

# उत्पत्ति

## संसार क उत्पत्ति पहिला दिन उजियारा

1 सुरु मँ परमेस्सर अकास अउ भुइँया क रचेस। 2 भुइँया सुनसान रही; अउ भुइँयाँ प कछू भी नाहीं रहा। समुद्दर प अँधियारा छावा रहा, अउ परमेस्सर क आतिमा पानी प मँडरात रहा। 3 तब परमेस्सर कहेस, “उजियारा होइ” अउ उजियारा होइ गवा। 4 परमेस्सर उजियारा क लखेस अउ उ जानि गवा कि इ नीक बाटइ। तबहिँ उ उजियारा का अँधियारा से अलग कई दिहेस। 5 परमेस्सर उजियारा क नाउँ “दिन” अउ अँधियारा क नाउँ “रात” दिहेस।

साँझ भइ अउ भिन्सार भवा। इ पहिला दिन रहा।

## दूसर दिन-अकास

6 तब परमेस्सर कहेस, “पानी क एक ढेर क दूसर ढेर स अलगावइ बरे वायुमण्डल\* होइ जाइ।” 7 एँह बरे परमेस्सर वायुमण्डल क बनएस अउ पानी क अलग किहेस। कछू पानी वायुमण्डल क ऊपर रहा अउ कछू वायुमण्डल क नीचे। 8 परमेस्सर वायुमण्डल क “अकास” कहेस। तब साँझ भइ अउ भिन्सार भवा। इ दूसर दिन रहा।

## तीसर दिन-झुरान भुइँया अउ पेड़-पौधा

9 अउर तब परमेस्सर कहेस, “भुइँया क पानी एक ठउरे प बटुर जाइ जेहसे झुरान भुइँया देखाइ देइ” अउ अइसा ही भवा। 10 परमेस्सर झुरान भुइँया क नाउँ “धरती” धरेस अउ जउन पानी बटुरा रहा, ओका “समुद्दर” क नाउँ दिहेस। परमेस्सर लखेस कि इ नीक अहइ।

11 तब परमेस्सर कहेस, “भुइँया, घास अउ पौधा जउन अन्न पइदा करत हीँ अउर फलन क बिरवा उगावइ। फलन क बिरवा जेकरे फलन क भीतर बिया होइ अइसा फल पइदा करइँ अउ हर एक तु पौधा आपन जाति क बिया बनावइ। इ पौधन क भुइँयाँ प निकरइ द्या।” अउ अइसा ही भवा। 12 भुइँयाँ घास अउ पौधा पइदा किहेस जउन अनाज पइदा करत हीँ अउ अइसा बिरवा अउ पौधा उगाएस जेनके फलन क भीतर बिया होत हीँ। हर एक तु पौधा आपन आपन जाति क मुताबिक बिया पइदा किहेस अउ परमेस्सर लखेस कि इ नीक अहइ। 13 तब साँझ भइ अउ भिन्सार भवा। इ तीसर दिन रहा।

## चउथा दिन-सूरज, चाँद अउ तारा

14 तब परमेस्सर कहेस, “अकास मँ जोतियन होइ द्या। इ

जोतियन दिन क रात स अलगाइ देइ। इ जोतियन खास त्यौहार क दिनन क अवइ अउर दिन अउ रात होइ एँकरे बरे मँ एक चीन्हा होब्या। 15 इ जोतियन भुइँयाँ प प्रकास देइ बरे अकासे मँ ठहारि जाइँ।” अउर अइसा ही भवा।

16 तब परमेस्सर दुइ बड़की जोतियन बनएस। परमेस्सर ओहमाँ स बड़की जोति क दिन प राज करइ बरे बनएस अउ छोटकी जोति क राति प राज करइ खातिर बनएस। परमेस्सर तारा भी बनएस। 17 परमेस्सर इ जोतियन क अकासे मँ एँह बरे धरेस कि पृथ्वी पइ चमकइ। 18 परमेस्सर इ जोतियन क अकासे मँ एँह बरे धरेस कि उ दिन अउ राति प राज करइ। इ सबइ जोतियन उजियारा क अँधियारा स अलगाइ दिहन अउ परमेस्सर इ लखेस कि इ नीक बा।

19 तब साँझ भइ अउ भिन्सार भवा। इ चउथा दिन रहा।

## पँचवा दिन-मछरियन अउ पंछिन

20 तबहीँ परमेस्सर कहेस, “पानी बहोत सारी जीव जन्तूअन स भरि जाइ अउ पंछी भुइँयाँ क ऊपर वायु मँ बिचरइँ।” 21 एँह बरे परमेस्सर समुद्दर मँ बड़वार बड़वार जलजन्तु बनएस। परमेस्सर ओन सबहिँ परानियन क बनएस जउन समुद्दर मँ बिचरत हीँ। सागर मँ किसिम किसिम क जलजन्तु बाटेन। परमेस्सर इ सबन क रचना किहेस। परमेस्सर हर तरह क पंछी भी बनएस जउन अकासे मँ उड़त हीँ। परमेस्सर लखेस कि इ नीक अहइ।

22 परमेस्सर इ जनावरन क आसीर्बाद दिहेस, अउ कहेस, “जा अउ बहोत स बच्चन क पइदा करा अउ सागरे क आपन सन्तानन स भरि द्या।” उ पंछी क भी कहेस कि आपन सन्तानन क कइ गुना बढ़ावा।

23 तब साँझ भइ अउ भोर भवा। इ पँचवा दिन रहा।

## छठाँ दिन-भुइँया क जीव जन्तु अउ मनई

24 तब परमेस्सर कहेस, “भुइँया हर जाति क जीव जन्तु पइदा करइ। बहोत स अलग अलग जाति क जनावर होइँ। हर जाति क बड़का जनावर अउ नान्ह नान्ह रेंगइवाला जनावर होइँ अउ इ जनावर आपन जाति क मुताबिक अउर जनावर बनावइँ” अउ इहइ सब भवा।

25 तउ, परमेस्सर हर जाति क जनावर बनएस। उ जंगली जनावर, पालतू जनावर, अउ सबहिँ नान्ह नान्ह रेंगइवाला जीव बनाएस अउर परमेस्सर लखेस कि इ नीक अहइ।

26 तब परमेस्सर कहेस, “अब मनई क आपन सरुप अउर आपन जइसा बनाएँ मनई हमरी तरह होइ। उ सागर क सब मछरियन प अकासे क पंछियन प राज करी। उ भुइँया क

वायुमण्डल हिब्रू भाखा मँ एकर अरथ अहइ “फइलाव” या “मण्डल।”

सब बड़वार जनावरन अउ सब नान्ह रेगंडवालन जीउ प राज करी।”

27<sup>एँह</sup> बरे परमेस्सर मनई क आपन सरुप में बनएस। परमेस्सर मनई क आपन ही सरुप में सिरजेस। परमेस्सर ओनकइ नर अउ नारी बनाएस। 28<sup>परमेस्सर</sup> ओनका असीसेस। परमेस्सर ओनसे कहेस, “बहोत सारे संतानन पइदा करा, नसलन क बढ़ावा अउर भुइँया क भरि दया। भुइँया पइ कब्जा कर ल्या। अउ ओह प राज करा। सागर क मछरियन प अउ अकासे क पंछिन प राज करा। भुइँया क हर जीउ-जन्तु प राज करा।”

29<sup>परमेस्सर</sup> कहेस, “लखा, मई तू पचन क सब किसिम क बिआदार बृच्छ पौधा अउ सारा फलदार बृच्छ दिहेउँ ह। इ सबइ अन्न अउ फल तोहार भोजन होइ। 30<sup>मई</sup> हर एक ठु हरिअर पेड़ पौधा गोरु बरे देत अहउँ। इ सबइ हरिअर बृच्छ पौधा ओनकइ चारा होइ। भुइँया क हर एक ठु जनावर, अकासे क हर एक पंछी अउ भुइँया प रेगंडवाला सब जीउ जन्तु इ चारा क खइहीं।” इ सबइ बातन भईन।

31<sup>परमेस्सर</sup> अपने जरिये हर एक ठु चीज लखेस जेका उ बनाएस रहा। अउ उ निहारेस कि हर चीज बहोतइ नीक बाटइ। साँझ भइ अउ भोर भवा। इ छठवाँ दिन रहा।

### सतवाँ दिन-आराम

2 इ तरह धरती, अकास अउ ओकर हर एक चीज क रचब पूर होइ गवा। 2<sup>परमेस्सर</sup> आपन कीन्ह जात काम क पूरा कइ लिहेस। एँह बरे सताएँ दिन परमेस्सर अपने काम में आराम किहेस। 3<sup>परमेस्सर</sup> सताएँ दिन क असीसेस अउ ओका पवित्र दिन बनइ दिहेस। परमेस्सर उ दिना क पवित्र दिन एँह बरे बनएस कि संसार क बनवत समइ जउन उ काम करत रहा उ सबहिँ कामे स उ दिन उ आराम किहेस।

### मनई जाति क सुरुआत

4<sup>इ</sup> धरती अउ अकास क इतिहास अहइ। इ कथा उ चिजियन क अहइ, जउन परमेस्सर क जरिये धरती अउ अकास बनवत टेम प भइन। 5<sup>तब</sup> धरती प कउनो बृच्छ पौधा नाहीं रहा। अउ खेतन में कछू भी नाहीं उगत रहा। काहेकि यहोवा तब तलक धरती प बरखा नाहीं पठए रहा अउ बृच्छ पौधन क देखइ भालइ वाला कउनो मनई भी नाहीं रहा। 6<sup>मुला</sup> कुहिरा भुइँया स उठत रहा अउ पानी समूचइ धरती क सींचत रहा।

7<sup>तब</sup> यहोवा परमेस्सर भुइँया स धूरि उठाएस अउ मनई क बनएस। यहोवा मनई क नाके में जिन्नगी क साँस फूँकैस अउ मनई एक ठु जिअत परानी बन गवा। 8<sup>फुन</sup> यहोवा परमेस्सर पूरब में अदन नाउँ क ठउरे में एक बाग लगाएस। यहोवा परमेस्सर आपन बनावा भवा मनई क इहइ बगिया में राखेस। 9<sup>यहोवा</sup> परमेस्सर हर एक सुन्नर बृच्छ अउ खइया बरे सबहिँ किसिम क नीक बृच्छ क उ बगिया में उगाएस। बगिया क बीचउ बीच यहोवा परमेस्सर जिन्नगी क बृच्छ क धरेस अउ उ बृच्छ क भी राखेस जउन अच्छाई अउ बुराई क जानकारी देत रहा।

10<sup>अदन</sup> स होइके एक ठु नदी बहत रही अउ उ बाग क सींचत रही। उ हुवाँ स अगवा जाइके चार ठु नान्ह नान्ह धारा में बदल गइ रही। 11<sup>पहिली</sup> नदी क नाउँ पीसोन रहा। इ नदी हवीला पहँटा क चारिहुँ कइँती बहत रही। 12<sup>उ</sup> पहँटा में सोना अहइ अउ उ सोना नीक बाटइ। मोती अउर गोमेदक रतन उ पहँटा में अहइँ। 13<sup>सूसरी</sup> नदी क नाउँ गीहोन अहइ जउन इथोपिया देस क चारो तरफ बहत ह। 14<sup>तीसरी</sup> नदी क नाउँ दजला बा। इ नदी अस्सूर क पूरब में बहत ह। चउथी नदी फरात अहइ।

15<sup>यहोवा</sup> परमेस्सर मनई क अदन क बाग में रखेस। मनई क काम पेड़-पौधा लगाउब अउ बगिया क रखवारी करब रहा। 16<sup>यहोवा</sup> परमेस्सर मनई क हुकुम दिहेस। यहोवा परमेस्सर कहेस, “तू बगिया क कउनो भी बृच्छ स फल खाइ सकत ह। 17<sup>मुला</sup> तू नीक अउ खोट क गियान देइवाला बृच्छ क फल नाहीं चख सकत ह। अगर तू उ बृच्छ क फल खाइ लेब्या तउ तू मरि जाब्या।”

### पहिली मेहरारु

18<sup>तब</sup> यहोवा परमेस्सर कहेस, “मनई क अकेले रहब नीक नाहीं। मई ओकरे तरह एक मनई ओका मदद बरे बनउब।”

19<sup>यहोवा</sup> परमेस्सर धरती क हर एक जनावर अउ अकासे क हर पंछी क भुइँया क माटी स बनएस। यहोवा परमेस्सर इ सबहिँ जीउन क मनई क समन्वा लइ आवा अउ मनई हर एक क नाउँ राखेस। 20<sup>मनई</sup> पालतू गोरु, अकासे क सब पंछिन अउ जंगल क सबहिँ जनावर क नाउँ रखेस। मनई ढेर क जनावर अउ पंछिन क लखेस। मुला मनई कउनो अइसा मदद करइया नाहीं पाइ सका जउन ओकरे जोगग होइ। 21<sup>एँह</sup> बरे यहोवा परमेस्सर मनई क गहरी नदि में सुवाइ दिहेस अउ जब उ सोवत रहा; यहोवा परमेस्सर मनई क तन स एक पसुली निकारि लिहस। तब यहोवा मनई क चाम क बन्द कइ दिहस जहाँ स उ पसुली निकारे रहा। 22<sup>यहोवा</sup> परमेस्सर मनई क पसुली स मेहरारु क बनएस। तब यहोवा परमेस्सर मेहरारु क मनई क लगे लिआवा। 23<sup>अउर</sup> मनई कहेस,

“आखिर मैं! हमरे तरह एक मनई। ऐंकर हाइ मोरे हाइ मैं स आवा ऐंकर तन मोरे तन स आवा। काहेकि इ मनई स निकारी गइ, एँह बरे मई ऐंका मेहरारु कहब।”

24<sup>इहइ</sup> कारण स मनई आपन महतारी-बाप क तजिके आपन मेहरारु क संग रही अउ उ दुइनउँ एक तन होइ जइहीं। 25<sup>मनई</sup> अउ ओकर मेहरारु बगिया में नंगा रहेन; मुला उ पचे लजात नाहीं रहेन।

### पाप क सुरु होब

3 यहोवा परमेस्सर जउन जंगली जनावरन क बनएस ओहमों स सरप सबन त जिआदा होसियार अउर धोखेबाज रहा। उ मेहरारु क धोखा देइ चाहत रहा। सरप मेहरारु स कहेस, “हे मेसरारु! का फुरइ परमेस्सर तोहसे कहेस ह कि तू बगिया क कउनो फल जिन चख्या?”

2मेहरारु सरप स कहेस, “नाहीं परमेस्सर इ नाहीं कहेस। हम बगिया क पेड़े स फल खाइ सकित ह। 3मुला एक तु बृच्छ बाटइ जेकर फल हम पचे नाहीं खाइ सकित। परमेस्सर हम पचन स कहेस ह, ‘तोहका उ बृच्छ क फल नाहीं खाइ चाही जउन बगिया क बीच में बाटइ। तोहका उ बृच्छ क छुअइ तलक नाहीं चाहीं नाहीं तउ मरि जाब्या।”

4मुला सरप मेहरारु स कहेस, “तू मरिब्या नाहीं। 5परमेस्सर जानत ह कि तू पचे उ बृच्छ स फल खाब्या तउ नीक अउ बुरा क बारे में जानि लेब्या। अउर तब तू उहइ होब्या जइसे परमेस्सर अहइ।”

6फुन मेहरारु निहारेस कि बृच्छ सुनर बाटइ। उ लखेस कि फल खाइ बरे नीक बाटइ अउ उ बृच्छ ओका बुद्धिमती बनाइ। तउ बृच्छ स कछू फल तोड़ेस अउ खाएस भी। तब उ अपने भतार क कछू फल खाइ बरे दिहस जउन ओकरे संग रहा।

7तब ओनकइ अखियाँ खुलि गएन। दुइनउँ जानेन कि उ पचे नंगा बाटेन। उ दुइनउँ क लज्जा अनुभव भवा। तउ उ पचे अंजीरे क पत्ता लिहेन अउ ओका सिएन अउ आपन नंगापन क ढाँपि लिहेन।

8तब मनसेधू अउ मेहरारु साँझ क ठंडी बयार में यहोवा परमेस्सर क आवइ क अवाज बगिया में अनकेन। उ पचे बगिया में बृच्छन क बीच लुकाइ गएन। 9यहोवा परमेस्सर गोहराइके मनई स पूछेस, “तू कहाँ बाट्या?”

10मनई जवाब दिहेस, “मई तोहरे टहरइ क अवाज बगिया में सुनेउँ अउ मई डेराइ गएँ काहेकि मइ नंगा रहेउँ। एँह बरे मई लुकाइ गएँ।”

11यहोवा परमेस्सर मनई स पूछेस, “तोहका कउन बताएस ह कि तू नंगा धड़ंग अहा? तू कउने वजह स सरमाइ गया ह? का तू उ बिसेख बृच्छ क फल चख्या ह जेका मई तोहका न खाइ बरे हुकुम दिहेउँ ह?”

12तब मनई कहेस, “तू जउन मेहरारु मोरे बरे बनया ह उ उहइ बृच्छ स मोका फला दिहस ह, अउर मई ओका खाएँ ह।”

13फुन यहोवा परमेस्सर मेहरारु स कहेस, “इ तू का किह्या ह?” मेहरारु कहेस, “सरप मोका बगदाइ दिहस। उ मोका मूरख बनाएस अउर मई फल चखि लिहेउँ।”

14तब यहोवा परमेस्सर कीरा स कहेस, “तू इ बहोतइ बुरा किहा। एँह बरे तोहार बुरा ही होइ। दूसर जनावर क बनिस्वत तोहार बहोतइ बुरा होइ। तू आपन पेट क सहारा रेगंड बरे बेबस होब्या। अउर तू धूरि फाँकइ क बेबस होब्या जिन्नगी क सब दिन में।

15मई तोहका अउ मेहरारु क एक दूसरे क दुस्मन बनाउब। तोहार गदेलन अउ एँकर बच्चा आपस में दुस्मन होइहीं। तू एँनकइ गदेलन क गोड़े में डसब्या अउ उ तोहार मूँड कुचल देइहीं।”

16तब यहोवा परमेस्सर मेहरारु स कहेस, “मई तोहका गाभिन होइ क हालत में बहोतइ दुखी करब। अउर जब तू लरिका पइदा करिबिउ, तोहका बहोत जियादा पीरा होइ। तू आपन भतार क बहोतइ चहिबिउ, मुला उ तोह प प्रभुताई करी।”

17तब यहोवा परमेस्सर मनई स कहेस,

“मई हुकुम दिहेउँ रहे कि तू बिसेख बृच्छ क फल जिन खाया। मुला तू आपन मेहरारु क बात सुन्या अउर उ बृच्छ क फल खाया ह। एँह बरे मई तोहरे कारण इ भुईया क सराप देत हउँ आपन जिन्नगी क पूरे टेमें तलक उ भोजन बरे जउन धरती देत ह तोहका कठिन मेहनत करइ क पड़ी।

18मुला धरती तोहरे बरे काँटन अउर खर-पतवार पइदा करी। अउर तू ओन पौधन क खाब्या जउन खेत में उगत ह।

19तू आपन खइया बरे कठोर मेहनत करब्या। तू तब तलक मेहनत करब्या जब तलक माथा प पसीना न आवइ। तू तब तलक कठोर मेहनत करब्या जब तलक तोहार मउत न आइ जाइ। उ टेमें तू दूसरी दाई माटी बन जाब्या। जब मई तोहका बनए रह्यो, तबहिं तोहका माटी स बनए रह्यो अउर जब तू मरिब्या तब तू उहइ माटी में फुन मिलि जाब्या।”

20आदम आपन मेहरारु क नाउँ हव्वा राखेस, काहेकि सब मनइयन क उ आदि महतारी रही।

21यहोवा परमेस्सर मनई अउ ओकरे मेहरारु बरे जनावर क चाम स पोसाक बनाएस। तब यहोवा इ सबइ पोसाक ओनका दिहस।

22यहोवा परमेस्सर कहेस, “लखा, मनई हमरे जइसा होइ गवा अहइ। मनई अच्छाई अउ बुराई जानत ह अउर अब मनई जिन्नगी क बृच्छ स भी फल लइ सकत ह। अगर मनई उ फले क खाई तउ सदा ही जिअत रही।”

23तब यहोवा परमेस्सर मनई क अदन क बगिया तजइ बरे बेबस किहस। जउने माटी स आदम बना रहा उ भुईया प आदम क कठोर मेहनत करइ क पड़ी। 24परमेस्सर आदम क बाग स बाहेर खदेर दिहस। तब परमेस्सर करूब सरगदूतन क बगिया क फाटक क रखवारी बरे राखेस। उ एक आगी क तरवार भी राखेस। इ तरवार जिन्नगी क बृच्छ क राह क रखवारी करत भइ चारिहुँ कइँती चमकत रही।

### पहिला परिवार

4 आदम अउ ओकर मेहरारु हव्वा क बीच में तने क रिस्ता भवा अउ हव्वा एक तु बच्चा जन्मेस। बच्चा क नाउँ काबील रखा गवा। हव्वा कहेस, “यहोवा क मदद स मई एक मनई पाएँ ह।”

2एँकरे पाछे हव्वा एक तु दूसर बच्चा क जन्मेस। इ लरिका काबील क भाई हाबिल रहा। हाबिल गडरिया बना। काबील किसान बना।

### पहिला कतल

3-4फसिल क टेमें काबील एक तु भेंट यहोवा क लगे लइ आवा। जउन अनाज काबील आपन जमीन में उपजावत रहा, ओहमों स तनिक अन्न उ लइ आवा। मुला हाबिल आपन जनावरन क झुण्ड में स कछू जनावर लावा। हाबिल आपन सबन त नीक भेड़ी क सबन त बढ़िया हींसा लइ आवा। यहोवा हाबिल अउ ओकरी भेंट क अंगीकार

किहस। 5मुला यहोवा काबील अउ ओकरे जरिये लाइ गइ भेंट क अंगीकार नाहीं किहस। ओकर चेहरा उदास होइ गवा। 6यहोवा काबील स पूछेस, “तू काहे कोहान अहा? तोहार चेहरा काहे बहोत उदास भवा देखत बाटइ? 7अगर तू नीक काम करिब्या तउ तू मोरी निगाह में ठीक रहब्या। तब मई तोहका अपनाउब। मुला अगर तू उ काम नाहीं करिब्या जउन कि नीक अहइ तउ पाप तोहार दरवाजे पइ घात में रहब्या। इ तोहका तबाह करइ चाहत ह। मुला तोहका एँका आपन बस में रखइ चाही।”

8काबील आपन भाई हाबिल स कहेस, “आवा हम मैदान में चली।” एँह बरे काबील अउ हाबिल मैदान में गएन। तब काबील आपन भाई प हमला कइ दिहस अउ ओका मारि डाएस।

9पाछे यहोवा काबील स पूछेस, “तोहार भाई हाबिल कहाँ बा?”

काबील जवाब दिहेस, “मोका नाहीं मालूम। का इ मोर काम अहइ कि मई आपन भाई क चउकसी अउ देखभाल करउँ?”

10तबइ यहोवा कहेस, “तू इ का किहा? तोहरे भाई क रकत जमीन स बोलत अहइ कि का होइ ग अहइ? 11तू आपन भाई क कतल किहा ह, भुईँया तोहरे हाथे स ओकर रकत लेइ बरे खुल गइ अहइ। एँह बरे तोहका अगिया नाही अहइ कि तू धरती स कउनो लाभ उठावा। 12बीता जमाना में तू फसल लगाया अउ उ अच्छी जामी। मुला अब तू बढ़िया फसल बोउब्या अउ जमीन तोहार अच्छी फसल होइ में मदद न करी। तोहका भुईँया प घर न मिली। तू जगह-जगह भटकत रहब्या।”

13तब काबील कहेस, “इ सजा ऐतनी जियादा अहइ कि मई सह नाहीं सकत हउँ। 14लखा, तू आज मोका धरती स तजि दिहस मई न तउ तोका देख पाउब अउर न ही तोर निकट रह पाउब। मोर घर नाहीं बा। मोका जगह-जगह भटकइ प बेबस कीन्ह जाई। अउर जदि कउनो मनई मोका पाइ तउ उ मोका मारि डाई।”

15तब यहोवा काबील स कहेस, “मई इ नाहीं होइ देब। जदि कउनो तोहका मारी तउ मई उ मनई क बहोत कठोर सजा देब।” तब यहोवा काबील प एक चीन्हा बनाएस। इ चीन्हा उ बतावत रहा कि काबील क कउनो न मारइ।

### काबील क परिवार

16तब काबील यहोवा क तजि क चला गवा। काबील नोद देस में रहइ लाग।

17काबील आपन मेहरारु क संग तने क रिस्ता किहस। उ गाभिन होइ गइ। उ हनोक नाउँ क बच्चा जन्म दिहस। काबील एक सहर बसाएस, अउर ओकर नाउँ आपन पूत क नाउं प हनोक ही राखेस। 18हनोक स ईराद पइदा भवा, ईराद स महूयाएल पइदा भवा, महूयाएल स मतूसाएल पइदा भवा अउर मतूसाएल स लेमेक पइदा भवा।

19लेमेक दुइ मेहरारु स बियाह किहस। एक मेहरारु क नाउँ आदा अउ दूसर क नाउँ सिल्ला रहा। 20आदा याबल क जन्मेस। याबल ओन मनइयन क बाप रहा जउन तम्बू में

रहत रहेन अउ गोरु क पाल पोस क आपन गुजर बसर करत रहेन। 21आदा क दूसर पूत यूबाल भी रहा। यूबाल, याबल क भाई रहा। यूबाल ओन मनइयन क बाप रहा जउन बीणा अउ बाँसुरी बजावत रहेन। 22सिल्ला तूबलकैन क जन्म दिहस। तूबलकैन ओन मनइयन क बाप रहा जउन काँसा अउ लोहा क पेसा करत रहेन। तूबलकैन क बहिन क नाउँ नामा रहा। 23लेमेक आपन मेहरारुअन स कहेस:

“ऐ आदा अउ सिल्ला मोरउ बात सुना। लेमेक क मेहरारुओ! जउन बतियन मई कहत हउँ, सुना। एक मनई मोका चोट पहुँचाएस, मई ओका मारि डालेउँ। एक जवान मोका चोट पहुँचाएस एँह बरे मई ओका मारि डाएउँ।”

24जदि काबील क कतल करइ क सजा सात गुना अहइ तउ लेमेक क कतल क सजा सतहत्तर गुना होब्या।”

### आदम अउ हव्वा क नवा पूत पइदा भवा

25आदम अउ हव्वा क संग पुन तने क रिस्ता भवा अउ हव्वा एक ठु अउर बच्चा क जन्म दिहेस। उ पचे इ लरिका क नाउँ सेत राखेन। हव्वा कहेस, “परमेस्सर मोका एक अउर पूत दिहेस ह। काबील हाबिल क मारि डाएस मुला सेत अब मोरे लगे अहइ।” 26सेत क भी एक पूत रहा। एकर नाउँ एनोस रहा। उ टेमें लोगन यहोवा क आराधना करई लागेन।\*

### आदम क परिवारे क इतिहास

5 इ अध्याय में आदम क परिवार क बंसज क बारे में अहइ। परमेस्सर मनई क आपन सरुप में बनाएस। 2परमेस्सर ओनका नर अउर मादा बनाएस। जउन दिन ओनका बनाएस उहइ दिन उ ओनका असीसेस अउर ओनका नाउँ “आदम” राखेस।

3जब आदम एक सौ तीस बरिस क होइ गवा तब उ एक अउर बच्चा क बाप भवा। इ पूत ठीक आदम क तरह देखाइ देत रहा। अदम आपन पूत क नाउँ सेत राखेस। 4सेत क जन्म क पाछे आदम आठ सौ बरिस जिअत रहा। इ दिनन में आदम क दूसर बेटवन अउ बिटियन भइन। 5इ तरह आदम पूरा नौ सौ तीस बरिस जिअत रहा, तब उ मरा।

6जब सेत एक सौ पाँच बरिस क होइ गवा तब ओका एनोस नाउँ क पूत पइदा भवा। 7एनोस क जन्म क पाछे सेत आठ सौ सात बरिस जिअत रहा। इहइ सेत क दूसर बेटवन अउ बिटियन पइदा भइन। 8इ तरह सेत पूरा नौ सौ बारह बरिस जिअत रहा, तब उ मरा।

9एनोस जब नब्बे बरिस क भवा, ओका केनान नाउँ क पूत पइदा भवा। 10केनान क जन्म क पाछे एनोस आठ सौ पन्द्रह बरिस जिअत रहा। इ दिनन एकर दूसर बेटवन अउ बिटियन पइदा भइन। 11इ तरह एनोस पूरा नौ सौ पाँच बरिस जिअत रहा, तब उ मरा।

12जब केनान सत्तर बरिस क भवा, ओका महललेल नाउँ क पूत पइदा भवा। 13महललेल क जन्म क पाछे केनान आठ सौ चालीस बरिस जिअत रहा। इ दिनन केनान

उ टेमें ... लागेन इ सब्ब क अरथ अहइ यहोवा क गोहरावइ लागेन।

क दूसर बेटवन अउ बिटियन पइदा भइन। 14इ तरह केनान पूरा नौ सौ दस बरिस जिअत रहा, तब उ मरा।

15जब महललेल पैसठ बरिस क भवा, ओका येरेद नाउँ क पूत पइदा भवा। 16येरेद क जन्म क पाछे महललेल आठ सौ तीस बरिस जिअत रहा। इ दिनन में ओका दूसर बेटवन अउ बिटियन पइदा भइन। 17इ तरह महललेल पूरा आठ सौ पंचान्बे बरिस जिअत रहा। तब उ मरा।

18जब येरेद एक सौ बासठ बरिस क भवा तउ ओका हनोक नाउँ क पूत पइदा भवा। 19हनोक क जन्म क पाछे येरेद आठ सौ बरिस जिअत रहा। इ दिनन में ओका दूसर बेटवन अउ बिटियन पइदा भइन। 20इ तरह येरेद पूरा नौ सौ बासठ बरिस जिअत रहा, तब उ मरा।

21जब हनोक पैसठ बरिस क भवा, ओका मतूसेलह नाउँ क पूत पइदा भवा। 22मतूसेलह क जन्म क पाछे हनोक परमेस्सर क संग तीन सौ बरिस रहा। इ दिनन ओकर दूसर बेटवन अउ बिटियन पइदा भइन। 23इ तरह हनोक पूरा तीन सौ पैसठ बरिस जिअत रहा। 24एक दिना हनोक परमेस्सर क संग चलत\* रहा अउ अछन्न होइ गवा काहेकि परमेस्सर उठाइ लिहस।

25जब मतूसेलह एक सौ सत्तासी बरिस क भवा, ओका लेमेक नाउँ क पूत पइदा भवा। 26लेमेक क जन्म क पाछे मतूसेलह सात सौ बयासी बरिस जिअत रहा। इ दिना ओकरे दूसर बेटवन अउ बिटियन पइदा भइन। 27इ तरह मतूसेलह पूरा नौ सौ ओनहत्तर बरिस जिअत रहा, तब उ मरा।

28जब लेमेक एक सौ ब्यासी बरिस क भवा, उ एक ठु पूत क बाप बना। 29लेमेक आपन पूत क नाउँ नूह धरेस। लेमेक कहेस, “हम किसान लोग कठोर मेहनत करित ह काहेकि परमेस्सर भुईया क सरापे अहइ। मुला नूह हम पचन क अराम देब।”

30नूह क जन्म क पाछे, लेमेक पाँच सौ पंचान्बे बरिस जिअत रहा। इ दिनन ओकरे दूसर बेटवन अउ बिटियन पइदा भइन। 31इ तरह लेमेक पूरा सात सौ सतहत्तर बरिस जिअत रहा, तब उ मरा।

32जब नूह पाँच सौ बरिस क भवा, ओकरे सेम, हाम अउर येपत नाउँ क पूत पइदा भएन।

### लोग पापी होइ गएन

6 भुईया प मनइयन क गनती बाढ़इ लाग। इ मनइयन क बिटियन पइदा भइन। 2अब परमेस्सर क पूतन लखेन कि मनई क बिटियन सुन्नर अहई। एँह बरे परमेस्सर क पूतन आपन आपन इच्छा क मुताबिक जैसे चाहेन ओसे बियाह किहेन।

अतब यहोवा कहेस, “लोग सिरिफ मानव अहइ। मई हमेसा आपन आतिमा क इ सबन स दुःखी न होइ देब। मई ओनका एक सौ बीस बरिस क जिन्नगी देब।”

4ओन दिनन अउर ओकर पाछे भी हुआँ नेफिलिम लोग\* उ धरती में रहत रहेन। जब परमेस्सर क पूतन मनइयन क बिटियन सादी किहेन तउ ओन स बच्चे पैदा

**हनोक** चलत सब्द क अरथ अहइ “हनोक परमेस्सर क संग संग चलत रहा।”

भएन। उ पचे मसहूर लोग रहेन। उ पचे पुराने जमाने स बहादुर रहेन।

5यहोवा लखेस कि भुईया प मनई बहोत जिआदा पापी अहई। यहोवा लखेस कि मनई लगातार बुरी बात ही सोचत ह।

6यहोवा क इ बात क दुःख भवा कि मई भुईया प मनई क काहे बनाएउँ? यहोवा इ बात स बहोत दुःखी भवा। 7एँह बरे यहोवा कहेस, “मई आपन बनई भइ भुईया क सब मनइयन क खतम कइ देब। मई हर एक मनई, जनावर अउ भुईया प रेगंडवाला हर एक जीउ जन्तु क नास करब। मई अकासे क चिरइयन क भी खतम कइ देब। काहे? काहेकि मई इ बात स दुःखी अहउँ कि मई इ सबहि चीजन क बनाएउँ।”

8मुला भुईया प यहोवा क खुस करइ वाला एक मनई रहा-नूह।

### नूह अउ जल क प्रलय

9इ नूह क जिन्नगी क कहानी बाटइ। उ आपन समइ में एक बहोत ही अच्छा मनइ रहा। अउर उ हमेसा परमेस्सर क अनुसरण किहेस। 10नूह क तीन पूत रहेन, सेम, हाम अउ येपत।

11-12परमेस्सर धरती प निगाह दउड़ाएस अउ उ निहारेस कि भुईया क मनइयन बर्बाद कइ दिहे अहई। हर एक ठउरे प मारकाट फइला रहा। मनई पपियाइ ग रहेन अउ क्रूर होइ ग रहेन, अउर उ पचे धरती प आपन जिन्नगी बर्बाद कइ दिहे रहेन।

13एँह बरे परमेस्सर नूह स कहेस, “सब मनइयन धरती क किरोध अउ हिंसा स पाट दिहे अहई। इ खातिर मई सबहि जिअत प्राणियन क नास कइ देब। मई ओनका भुईया स हटाइ देब। 14गोपेर क काठ बइपरा अउ आपन खातिर एक ठु जहाज बनावा। जहाज में कमरन बनावा अउ जहाज क राल स भीतरे अउ बाहरे लीपि द्या।

15“जउन जहाज मई बनावइ चाहत हउँ ओकर नाप जोख तीन सौ हाथ लम्बा, पचास हाथ चौड़ा, तीस हाथ ऊँच अहइ। 16जहाज बरे छत स करीब एक हाथ खाले खिरकी बनावा। जहाज क बगल में फाटक बनावा। जहाजे में तीन मंजिल बनावा। ऊपर क मंजिल, बिचकउ मंजिल अउ तरखाले क मंजिल।

17“तू पचन क जउन बतावइ चाहत हउँ ओका धियान स सुना। मई धरती प बइवार भारी पानी क बाढ़ लिआउब। अकासे क नीचे सबहि जीउन क नास करब। धरती क सब जीउ मरि जइहीं। 18मुला मई तू सबन क बचाउब। तब मई तोहसे एक खास करार करब। तू, तोहार पूतन, तोहार मेहरारु अउ तोहार पतोहुअन सबहि जहाज में सवार होइहीं। 19संग मैं तोहका जिअत प्राणी क जोड़ा भी लइ आवइ क

**नेफिलिम लोग** नेफिलिम लोग उ दिना उहइ देस में रहत रहेन। इ सबइ एकरे पाछे भी हुआँ रहत रहेन जब परमेस्सर क पूत लोग मनई क बिटियन स बियाह किहेन अउ इ मेहररुअन लरिकन क जन्म दिहना। इ लरिकन मसहूर भएन। इ सबइ पुराना जमाना स बहादुर रहेन।

होइ। हर एक प्राणी क नर अउ मादा जोड़ा जहाजे में लिआवा। आपन संग ओनका जिअत राखा। 20धरती क हर किसिम क चिरइयन क जोड़ा भी हेरा। धरती क हर किसिम क जनावरन क जोड़ा हेरा। धरती प रेंगइवाला हर एक जीउ क जोड़ा क भी हेरा। धरती प हर किसिम क जनावरन क नर अउ मादा तोहरे संग होइहीं। जहाजे प ओनका जिअत राखा। 21धरती प सब किसिम क भोजन भी लइ जहाजे प लइ आवा। इ भोजन तोहरे बरे अउ जनावरन बरे होइ।”

22नूह इ सब कछू किहस। नूह परमेस्सर क सब हुकुम क मान लिहस।

### जल प्रलय सुरु होत ह

7 तब यहोवा नूह स कहेस, “मई लखेउँ ह कि इ समइ क बुरे मनइयन में तू ही एक नीक मनई अहा। ऐह बरे तू आपन परिवार क बटोरा अउ तू पचे सबहिं जहाजे में चला जा। 2हर एक सुद्ध जनावर क सात जोड़ा, (सात तु नर अउ सात तु मादा) संग में लइ ल्या अउ धरती क ऊपर दूसर असुद्ध जनावरन में स एक एक जोड़ा नर अउ मादा लिआवा। इ सबहिं जनावरन क आपन संग जहाजे में लइ आवा। 3हवा में उड़इवाला सब पंछिन क सात तु जोड़ा (सात तु नर अउ सात तु मादा) लिआवा। एहसे इ सबइ जनावरन भुईया प जिअत रइहीं, जब कि दूसर जनावरन मिटि जइहीं। 4अब स सतएँ दिन मई भुईया प बहोतइ भारी बर्खा पठउब। इ बर्खा चालीस दिन अउ चालीस रात रही। पृथ्वी क सबहिं जिअइवाले प्राणी मर बिलाइ जइहीं। मोर बनई सब चिजियन नस्ट होइ जइहीं।” 5नूह ओन सबहिं बतियन क मानेस जउन यहोवा हुकुम दिहे रहा। 6बर्खा आवइ क टैम नूह छः सौ बरिस क रहा। 7नूह अउ ओकर परिवार बाढ़ क पानी स बचइ बरे जहाजे में चला गवा। नूह क मेहरारु, ओकर पूतन अउ ओनकइ मेहररुअन ओकरे संग रहिन। 8पृथ्वी क सब सुद्ध जनावरन अउ असुद्ध जनावरन, पंछियन अउ भुईया प रेंगइवाला सब जीउ। नूह क संग जहाजे में चढ़ेन। 9इ सबइ जनावरन क नर अउ मादा जोड़ा परमेस्सर क हुकुम स जहाजे में चढ़ेन। 10सात दिना पाछे बाढ़ सुरु भइ। धरती प बर्खा होइ लाग।

11-13दूसर महीना क सतरहें दिन, जब नूह छःसौ बरिस क रहा, धरती क नीचे क सब सोता फूट पड़ेन अउ धरती स पानी बहब सुरु होइ गवा। उहइ दिन धरती प भारी बर्खा होइ लाग। अइसा लाग माना कि अकासे क खिड़की खुल गइ होइ। चालीस दिन अउ चालीस रात तलक बर्खा धरती प होत रही।” ठीक उहइ दिन नूह, ओकर मेहरारु, ओकर पूत, सेम, हाम अउ येपेत अउर ओकर मेहररुअन जहाजे प चढ़ेन। 14उ पचे अउ धरती प हर किसिम किसिम क जनावर जहाजे में रहेन। हर तरह क गोरु, धरती प रेंगइवाले हर किसिम क जीउ अउ हर तरह क पंछी जहाजे में रहेन। 15इ सबइ जनावरन नूह क संग जहाजे में रहेन हर जाति क जिअत जनावरन क इ सबइ जोड़ा रहेन। 16परमेस्सर क हुकुम क मुताबिक सबहिं जनावरन जहाजे में चढ़ेन। ओकरे भीतर जाए क पाछे यहोवा दरवाजा बन्द कइ दिहस।

17चालीस दिना तलक भुईया प पानी क प्रलय होत रहा। पानी बाढ़ब सुरु भवा अउ उ जहाजे क धरती स ऊपर उठाइ दिहस। 18पानी बाढ़त रहा अउ जहाज धरती स बहोतई ऊपर तैरत रहा। 19पानी ऐतना ऊँच उठा कि ऊँचा त ऊँचा पहाड़ भी पानी में बूड़ गएन। 20पानी पहाड़े क ऊपर बहत रहा। पानी सब स ऊँच पहाड़े स पन्द्रह हाथ ऊँच रहा।

21-22धरती क सब जीउ मारा गएन। हर एक मेहरारु अउर मनई मरि गएन। सबहिं पंछी अउ सबहिं तरह क जनावर मर गएन। सबहिं तरह क जनावरन अउर रेंगइवालन जनावरन मरि गएन। धरती क हर एक जीउ, सांस लेइवालन परानी मरि गएन। 23इ तरह परमेस्सर धरती क सब जिअत हर एक मनई, हर एक जनावर, हर एक रेंगइवाला जीउ अउ हर एक पंछी क नास कइ दिहस। इ सबइ धरती स खतम होइ गएन। सिरिफ नूह, ओकरे संग जहाजे में चढ़े मनइयन अउ जनावरन क जिन्नगी बची रही। 24अउर पानी एक सौ पचास दिना तलक भुईया क बोरे रहा।

### पानी क प्रलय खतम होत ह

8 मुला परमेस्सर नूह क नाहीं बिसरा। परमेस्सर नूह अउ जहाजे में ओकरे संग रहइवालन सब पसुअन अउ जनावरन क सुमिरे रहा। परमेस्सर धरती प हावा चलाएस अउ सारा पानी घटइ होइ लाग। 2अकासे स बर्खा थमि गइ अउ धरती क नीचे स पानी बहब रुकि गवा। 3धरती क बोखइवाला पानी लगातार घटत चला गवा। एक सौ पचास दिन पाछे पानी ऐतना उतरि गवा कि जहाज फुनि स धरती प उतरा। 4जहाज अरारात क पहाड़न में स एक प आइके टिक गवा। इ सतएँ महीना क सत्रहवाँ दिन रहा। 5पानी उतरत गवा अउ दसवें महीना क पहिला दिन पहाड़न क चोटी पानी क ऊपर देखोए देइ लाग।

6जहाजे में बनी खिड़की क नूह चालीस दिन पाछे खोलेस। 7नूह एक कौआ क बाहेर उड़ाएस। कौआ उड़िके तब तलक फिरतइ रहा जब तलक धरती पूरी तरह झुराइ न गइ। 8नूह एक तु फ़ाक्ता भी बाहेर पठएस। उ इ जानइ चाहत रहा कि पानी धरती प घटि गवा या नाहीं।

9फ़ाक्ता क कहूँ बइठइ क ठउर नाहीं मिला काहेकि अबहुँ तलक पानी धरती प फइला रहा। ऐह बरे उ नूह क निअरे जहाजे प पुनि लौटि आवा। नूह आपन हाथ फइलाइके फ़ाक्ता क जहाजे प वापस भितरे लइ लिहसे।

10सात दिन पाछे नूह फुनि फ़ाक्ता क पठएस। 11उ दिन दुपहर क पाछे फ़ाक्ता नूह क लगे आवा। फ़ाक्ता क मुँह में एक तु ताजी जइतून क पाती रही। इ चीन्हा नूह क इ बतावइ बरे रहा कि अब धरती प झुरान भुईया अहइ। 12नूह सात दिन पाछे फुन फ़ाक्ता क पठएस। मुला इ टैम फ़ाक्ता लौटा ही नाहीं।

13ओकरे पाछे नूह जहाजे क दरवाजा खोलेस। नूह लखेस अउ पाएस कि भुईया झुरान बा। इ नूह क छः सौ एक बरिस क पहिले महीना क पहिला दिन रहा। 14दूसर महीना क सत्ताइसवाँ दिन तलक भुईया पूरी तरह झुराइ गइ।

15तब परमेस्सर नूह स कहेस, 16जहाज क तजा। तू तोहार पत्नी तोहार पूत लोग अउ ओनकइ मेहररुअन सब अब बाहेर आवा। 17हर एक जिअत प्राणी, सब पंछी, जनावरन अउ भुइँया प रेगंवालन सबहिं क जहाज स बाहेर लिआवा। इ सबइ जनावरन बहोत स जनावरन पइदा करिहीं अउ भुइँया क भरि देइहीं।”

18एँह बरे नूह आपन पूतन, आपन मेहरारु, आपन पूतन क मेहरारुअन क संग जहाज स बाहेर आवा। 19सबहिं जनावरन, सब रेगंइवाला जीउ अउ सब पंछी जहाज क तजि दिहेन। सब जनावर जहाज स नर अउ मादा क जोड़ा क संग बाहेर आएन।

20तब नूह यहोवा बरे एक वेदी बनाएस। उ कछू सुध्द पंछियन अउ कछू सुध्द जनावरन क लिहेस अउ ओनका वेदी प परमेस्सर क भेट क रुप में बारेस।

21यहोवा इ सब बलिदानन क सुगन्धि पाइके खुस भवा। यहोवा मन-ही-मन कहेस, “मई फिन कबहुँ मनई क कारण भुइँया क न सरापब। मनई छोटी उम्र स ही बुरी बात सोचइ लागत ह। एँह बरे जइसा मई अबहिं किहेउँ ह। इ तरह अब मई कबहुँ सब प्राणियन क सजा न देब। 22जब तलक इ भुइँया रही तब तलक यह पइ फसल पइदा करइ अउ फसल काटइ क समइ हमेसा रही। भुइँया प गरमी अउ जाड़ा अउ दिन अउ रात हमेसा होत रइहीं।”

### नई सुरुआत

9 परमेस्सर नूह अउ ओकर पूतन क असीसेस अउ ओनसे कहेस, “बहोत स बच्चा पइदा करा अउ आपन लोगन स भुइँया भरि द्या। 2भुइँया क सब जनावरन तोहरे डरे स थरथरइहीं अउ अकासे क हर एक पंछी तोहसे डरिहीं। भुइँया प रेगंइवाला हर एक जीउ अउ समुद्धर क हर एक मछरी तू मनइयन क अदब करी अउ तू पचन स डेराइ। तू इ सबहिं क ऊपर हुकुम चलउब्या। 3बीते भए समइ में तू पचन क मई हर एक ठु पेड़-पौधा खाइ बरे दिहेउँ रहेउँ। अब हर एक जनावर भी तोहार भोजन होइ। मई भुइँया क हर चीज तू पचन क देत हउँ-अब इ सबइ तोहार अहई। 4किन्तु मई तू पचन क एक हुकुम देत अहउँ कि तू कउनो जनावरन क तब तलक न खाया जब तलक ओहमा ओनका रक्त बाटइ। 5मई तोहरी जिन्नगी क बदले तोहार रक्त माँगब कहइ क अरथ अहइ मई उ जानवरे क जिन्नगी माँगब जउन कउनो मनई क मारी। अउर मई उ मनई क जिन्नगी माँगब जउन दूसरे मनई क मारी।

6परमेस्सर मनई क आपन सरुप में बनाएस ह। एँह बरे जउन कउनो मनई क खून बहाइ, ओकर खून मनई क जरिये बहावा जाइ।

7नूह तोहका अउ तोहरे पूतन क ढेर लरिका होई अउ धरती क मनइयन स भाँठि द्या।”

8तब परमेस्सर नूह अउ ओकरे पूतन स कहेस, 9अब मई तोहका अउ तोहरे सन्ताने क बचन देत हउँ। 10मई इ बचन तोहरे संग जहाजे स बाहेर आवइवालन सबहिं पंछिन, सब गोरुअन अउ सब जनावरन क देत हउँ। मई धरती पइ रहइवालन सबहिं वस्तुअन क बचन देत हउँ। 11मई तोहका

बचन देत हउँ, “पानी क बाढ़ स धरती क सब जिन्नगी बर्बाद होइ गइ मुला अब इ कबहुँ न होइ। अब बाढ़ फिन कबहुँ धरती क जिन्नगी क बर्बाद न करी।”

12अउर परमेस्सर कहेस, “इ सिद्ध करइ बरे मई तोहका इ बचन दिहेउँ ह कि मई तोहका कछू देब। इ सबूत बताइ कि मई तोहसे अउ भुइँया क सबहिं जिअत प्राणियन स एक ठु करार किहेउँ ह। इ करार भविस्स में सदा बनी रही जेकर सबूत इ अहइ। 13कि मई बदरन में इन्द्र धनुख बनाएउँ ह। इन्द्र धनुख मोरे अउ भुइँया क बीच करार क सबूत अहइ। 14जब मई भुइँया क ऊपर बदरे क लिआउब तउ तू बादरन में इन्द्र धनुख देखब्या। 15जब मई इ इन्द्र धनुख क निहारब तबहिं मई तोहरे, भुइँया क सबहिं जिअत प्राणियन अउ आपन बीच भई करार क सुमिरब। इ करार इ बात क बाटइ कि बाढ़ फुन कबहुँ भुइँया क प्राणियन क नास न करी। 16जब मई धियान स बादरन में इन्द्र धनुख क निहारब तब मई सदा बनी रहइवाली करार क सुमिरब। मई आपन अउ भुइँया क सब जिअत प्राणियन क बीच भइ करार क सुमिरब।”

17इ तरह यहोवा नूह स कहेस, “उ इन्द्र धनुख मोरे अउ भुइँया क सब जिअत प्राणियन क बीच भइ करार क सबूत बाटइ।”

### समस्या फुन सुरु होत हीं

18नूह क पूत लोग ओकरे संग जहाज स बाहेर आएन। ओनकइ नाउं सेम, हाम अउ येपेत रहेन। (हाम तउ कनान क बाप रहा।) 19इ तीनउ नूह क पूतन रहेन अउ संसारे क सबहिं मनई इ तीनउ स पइदा रहेन।

20नूह किसान बना। अंगूर क बगिया लगाएस। 21नूह अंगूर क दाखरस बनाएस अउ पिएस। उ दाखरस पीके मस्त होइ गवा अउ तम्बू में लोटि गवा। उ कउनो ओढ़ना नाहीं पहिरे रहा। 22कनान क बाप हाम अपने बाप क नंगा देखेस। उ तम्बू स बाहेर आपन भइयन क बताएस। 23तबहिं सेम अउ येपेत एक ठु ओढ़ना लिहस। उ दुइनउँ ओढ़ना क पीठ प डाइके उलटे मुहँ तम्बू में गएन। उ पचे आपना बाप उ नंगापन क ढाँक दिहस जबकि उ समइ ओकर मुहँ क रुख तम्बू क समन्वा रहा। इ तरह उ पचे आपन बाप क नंगापन नाहीं लखेन।

24पाछे नूह सोइके उठा। (उ दाखरस क नसा क कारण सोअत रहा।) तब ओका पता लाग कि ओकर सब त नान्ह पूत हाम ओकरे संग का किहे रहा।

25एँह बरे नूह सराप दिहेस,

“इ सराप कनान बरे होइ कि उ आपन भइयन क दास होइ।”

26नूह इ भी कहेस,

“सेम क परमेस्सर यहोवा धन्न होइ! कनान सेम क दास होइ।

27परमेस्सर येपेत क जिआदा भुइँया देइ। परमेस्सर सेम क तम्बू में रहइ अउर कनान ओकर दास बनइ।”

28बाढ़ क पाछे नूह साढ़े तीन सौ बरिस जिअत रहा। 29नूह पूरा साढ़े नौ सौ बरिस जिअत रहा, तब उ मरा।

**रास्ट्र बाढ़ अउ फइल जाइ**

**10** नूह क पूत सेम। हाम अउ येपेत रहेन। बाढ़ क पाछे इ तीनउँ बहोत स पूतन क बाप भएन। हिअँ सेम, हाम अउ येपेत स पइदा होइवालन पूतन क सूची दीन्ह जात अहइ:

**येपेत क संतान**

2येपेत क पूत रहेन: गोमेर, मागोग, मादै, यावान, तूबल, मेसेक अउ तीरास।

3गोमेर क पूत रहेन: असकनज, रीपत अउ तोगर्मा

4यावान क पूत रहेन: एलीसा, तर्सीस, किक्ती अउ दोदानी।

5भूमध्य सागर क चारिहुँ कइँती तटे प जउन मनई रहइ लागेन उ पचे येपेत क संतान ही रहेन। हर एक पूत क आपन अलग प्रदेस रहा। सब परिवार बाढ़ेन अउ अलग अलग रास्ट्र बन गएन। हर एक रास्ट्र क आपन आपन भाखा रही।

**हाम क संतान**

6हाम क पूत रहेन: कूस, मिस्त्र, फूत अउ कनान। 7कूस क पूत रहेन: सबा, हवीला, सबता, रमा, सबूतका। रमा क पूत रहेन: सबा अउ ददान। 8कूस क एक पूत निम्रोद नाउं क भी रहा। निम्रोद भुइँया प बहोत बरिआर मनई भवा रहा। 9यहोवा क समन्वा निम्रोद, एक बड़का सिकारी रहा। ऐँह बरे लोग दूसर मनइयन क बराबरी निम्रोद स करत हीं अउर कहत हीं, “इ मनई, यहोवा क समन्वा बड़का सिकारी निम्रोद क तरह अहइ।”

10निम्रोद क राज्ज सिनार देस में बाबुल, एरेख, कलना अउ अक्कद प्रदेस स सुरु भवा। 11निम्रोद अस्सूर में भी गवा। हुवाँ उ नीनवे, रहोबोतीर, कालह अउ 12रेसेन नाउँ क नगरन क बसाएस। (रेसेन, नीनवे अउ बड़का सहर कालह, क बीच क सहर बाटइ।)

13मिस्त्रप (मिस्त्र) - लूद, अनाम, लहाब, नप्तूह, 14पत्रूस, कसलूह अउ कप्तोर देसन क लोगन क बाप रहा। (पलिस्ती लोग कसलूह लोगन स आए रहेन।) 15कनान सीदोन क बाप रहा। सिदोन कनान क पहिला पूत रहा। कनान, हित क भी बाप रहा। हित, हिक्ती लोगन क बाप रहा। 16अउर कनान, यबूसी, एमोरी, गिगर्गीसी, 17हिक्वी, अर्की, सीनी, 18अर्वदी, समारी, हमाती लोगन क भी बाप रहा। कनान क परिवार संसार क अलग अलग हींसा में फइला रहेन,

19कनान लोगन क भुइँया उत्तर में सीदोन स दक्खिन में गगर तलक, पच्छिम में अज्जा स पूरब में सदोम अउ अमोरा तलक, अदमा अउ सबोयीम स लासा तलक रहा।

20इ सबइ लोग हाम क संतान रहेन। उ पचे परिवारन, भाखान, देसन अउर रास्ट्रन क अनुसार व्यवस्थित रहेन।

**सेम क संतान**

21सेम येपेत क बड़का भाई रहा। सेम क एक संतानन एबेर हिब्रू लोगन क बाप रहा।

22सेम क पूत एलाम, अस्सूर, अर्पखद, लूद अउ अराम रहेन।

23अराम क पूत ऊस, हूल, गेतेर अउ मस रहेन।

24अर्पखद सेलह क बाप रहा। सेलह एबेर क बाप रहा। 25एबेर क दुइ पूत रहेन। एक पूत क नाउँ पेलेग रहा। ओका इ नाउँ ऐँह बरे दीन्ह गवा काहेकि जिन्गी क टेम में धरती क बटवारा भवा। दूसर भाई क नाउँ योक्तान रहा।

26योक्तान अल्मोदाद, सेलेप, हसर्मावेत, येरह, 27यदोरवाम, ऊजाल, दिक्ला, 28ओबाल, अबीमाल, सबा, 29ओपीर हवीला अउ योबाब क बाप रहा। इ सबहिँ लोग योक्तान क संतान भएन। 30इ सबइ लोग मेसा अउ पुर्बिहा पहाड़ी प्रदेस क बीच क भुइँया में रहत रहेन। मेसा सपारा प्रदेस कइँती रहा।

31उ लोग सेम क परिवारे स रहेन। उ सबइ परिवार, परिवार क आधार पइ, भाखा क आधार पइ, देस क आधार पइ अउर रास्ट्र क आधार पइ बाँटा भवा रहा।

32नूह क पूतन स चलइ वाला परिवारन क इ सूची अहइ। उ पचे आपन आपन रास्ट्र में बाँटा भवा रहत रहेन। बाढ़ क पाछे सारी भुइँया प फइलइवाला लोग भी एनही परिवारे स निकरि आएन।

**संसार बाँटे गवा**

**11** बाढ़ क पाछे संसार एक ही भाखा बोलत रहा। सब लोग एक ही सब्द-भण्डार बइपरत रहेन। 2लोग पूरब कइँती स बढेन। ओनका सिनार देस में एक मइदान मिला। लोग हुवाँ बसइ गएन। 3लोग कहेन, “हम पचन क ईटा बनउब अउ ओका पजावा में तपावइ चाही, ताकि उ सबइ पक्की होइ जाई।” ऐँह बरे मनइयन आपन घर बनावइ बरे पाथरन क जगह ईटा क बइपरेन। अउ मनइयन चूना क गारा क जगह राल क प्रयोग किहेन।

4लोग कहेन, “हम पचे आपन खातिर एक ठु सहर बनाई अउ हम सबइ एक बहोत ऊँच इमारत बनाउब जउन अकासे क छुइ। हम पचे नामी होइ जाब। अगर हम पचे अइसा करब तउ पूरी धरती प बिखरेब नाहीं। हम पचे एक ही ठउर प एक संग रहब।”

5यहोवा सहर अउ बहोत ऊँच इमारत क लखइ बरे तरखाले आवा। यहोवा मनइयन क इ सब बनावत लखेस। 6यहोवा कहेस, “इ सबइ लोग एक भाखा बोलत हीं अउर मई निहारत हउँ कि उ पचे इ काम खतम करइ बरे एकउटा अहइ। इ तउ, इ सबइ जउन कछू कइ सकत हीं ओकर, सिरिफ सुरुआत अहइ। हाली ही उ पचे सब कछू करइ जोगग होइ जइहीं जउन इ पचे करइ चइहीं। 7ऐँह बरे आवा हम तरखाले चली अउ एनकइ भाखा क गड्डमड्ड कइ देइ। तब उ पचे एक दूसर क बात न बूझि पइहीं।”

8यहोवा मनइयन क समूचइ धरती प फइलाइ दिहस। ऐँहसे मनइयन सहर क बनाउब पूरा नाहीं किहन। 9इहइ उ ठउर रहा जहाँ यहोवा समूचइ संसार क भाखा क गड्डमड्ड कइ दिहस। ऐँह बरे इ ठउर क नाउँ बाबुल धरा गवा। इ तरह यहोवा उ जगहिया स मनइयन क पृथ्वी क सब देसन में फइलाएस।



### सेम क परिवार क कहानी

10इ सेम क परिवारे क कहानी बाटइ। बाढ़ क दुइ बरिस पाछे जब सेम सौ बरिस क रहा ओकर पूत अर्पखद क जनम भवा। 11ओकरे पाछे सेम पाँच सौ बरिस जिअत रहा। ओकरे दूसर पूत अउ बिटियन रहीं।

12जब अर्पखद पैतीस बरिस क रहा ओकर पूत सेलह क जनम भवा। 13सेलह क पइदा होइ क पाछे अर्पखद चार सौ तीन बरिस जिअत रहा। इ दिन ओकर दूसर पूतन अउ बिटियन पइदा भइन।

14सेलह क तीस बरिस होइ क पाछे ओकर पूत एबेर क जन्म भवा। 15एबेर क जन्म क पाछे सेलह चार सौ तीन बरिस जिअत रहा। इ दिनन में ओकरे पूतन अउ बिटियन पइदा भएन।

16एबेर क चौतीस बरिस क होइ क पाछे ओकरे पूत पेलेग क जन्म भवा। 17पेलेग क जन्मे क पाछे एबेर चार सौ तीस बरिस अउर जिअत रहा। इ दिनन में ओकरे दूसर पूतन अउ बिटियन पइदा भइन।

18जब पेलेग तीस बरिस क भवा, ओकर पूत 'रु' क जन्म भवा। 19'रु' क जन्म क पाछे पेलेग दुइ सौ नौ बरिस अउर जिअत रहा। उ दिनन में ओकरे दूसर बिटियन अउ बेटवन क जन्म भवा।

20जब रु बत्तीस बरिस क भवा, ओकरे पूत सरुग क जन्म भवा। 21सरुग क जन्मे क पाछे रु दुइ सौ सात बरिस अउर जिअत रहा। इ दिनन ओकरे दूसर बेटवन अउ बिटियन पइदा भएन।

22जब सरुग तीस बरिस क भवा, ओकरे पूत नाहोर क जन्म भवा। 23नाहोर क जन्म क पाछे सरुग दुइ सौ बरिस अउर जिअत रहा। इ दिनन में ओकरे दूसर पूतन अउ बिटियन क जन्म भवा।

24जब नाहोर उनतीस बरिस क भवा, ओकर पूत तेरह क जन्म भवा। 25तेरह क जन्म क पाछे नाहोर एक सौ उन्नीस बरिस अउर जिअत रहा। इ दिनन में ओकरे दूसर बिटियन अउ बेटवन क जन्म भवा।

26तेरह जब सत्तर बरिस क भवा, ओकरे पूत अब्राम, नाहोर अउ हारान क जन्म भवा।

### तेरह क परिवार क कहानी

27इ तेरह क परिवार क कहानी अहइ। तेरह अब्राम, नाहोर अउ हारान क बाप रहा। हारान लूत क बाप रहा। 28हारान आपन जन्मभूमि कसदियन क उर सहर में मरा। जब हारान मरा तब ओकर पिता तेरह जिअत रहा। 29अब्राम अउ नाहोर दुइनउँ आपन आपन बियाह किहन। अब्राम क मेहरारु सारै रहीं। नाहोर क मेहरारु मिल्का रहीं। मिल्का हारान क बिटिया रहीं। हारान मिल्का अउ यिस्का क बाप रहा। 30सारै क कउनो बच्चा नहीं रहा काहेकि उ कउनो बच्चा क जन्म देइ जोगग नहीं रहीं। 31तेरह आपन परिवार क संग लिहिस अउ कसदियन क उर सहर क तजि दिहिस। उ पचे कनान क जात्रा करइ क मन में ठान लिहन। तेरह आपन पूत अब्राम, आपन पोता लूत (हारान क पूत), आपन पतोहू (अब्राम क मेहरारु) सारै क संग लिहिस। उ पचे हारान

तलक जात्रा किहन अउ हुआँ ठहराउब तय किहन। 32तेरह दुइ सौ पाँच बरिस जिअत रहा। तब उ हारान में मरि गवा।

### परमेस्सर अब्राम क बोलवत ह

12 यहोवा अब्राम स कहेस, "आपन देस अउ आपन लोगन क तजि द्या। आपन बाप क परिवारे क तजि द्या अउर उस देस जा जेका मईँ तोहका देखाउब।

2मईँ तोहका आसीबाद देब। मईँ तू पचन स एक महान रास्ट्र बनाउब। मईँ तू सबन क नाउँ मसहूर करब। लोग तोहरे नाउँ क प्रयोग दूसर लोगन क आसीबाद देइ बरे करइहीं।

3मईँ उ पचन क असीसब, जउन तोहका असीसिहीं। मुला मईँ ओनका सराप देब जउन तोहका सराप दिहिस। मईँ धरती प सब मनइयन क असीसइ बरे तोहका बइपरब।"

### अब्राम कनान जात ह

4तउ अब्राम यहोवा क हुकुम मानेस। उ हारान क तजि दिहिस अउ लूत ओकरे संग गवा। इ समइ अब्राम पचहत्तर बरिस क रहा। 5अब्राम जब हारान तजेस तउ उ अकेल्ला नाहीं रहा। अब्राम आपन मेहरारु सारै, भतीजा लूत अउ हारान में ओनकइ संग जउन कछू रहा, सबक संग लइ आवा। अब्राम क जउन सब दास लोग मिला रहेन, उ सबइ भी ओकरे संग गएन। अब्राम अउ ओकर दल छारान क तजि दिहिस अउ कनान देस तलक जात्रा किहिस। 6अब्राम कनान देस में सकेम क सहर अउ मोरे क बड़का बृच्छ तलक जात्रा किहिस। उ समइ कनानी लोग हुआँ रहत रहेन।

7यहोवा अब्राम क समन्वा परगट भवा। यहोवा कहेस, "मईँ इ देस तोहरे संतानन क देब।"

यहोवा अब्राम क समन्वा जउने जगह प परगट भवा उ जगह प अब्राम एक वेदी यहोवा क आराधना बरे बनाएस। 8तब अब्राम उ जगह क तजि दिहिस अउ बेटेल क पूरब पहाड़े प जात्रा किहिस। अब्राम हुवाँ आपन तम्बू गाड़िस। बेटेल सहर पच्छिम में रहा। आइ सहर पूरब में रहा। उ जगह अब्राम यहोवा बरे दूसर वेदी बनाएस अउ अब्राम हुवाँ यहोवा क उपासना किहिस। 9एकरे पाछे अब्राम फुन जात्रा किहिस। उ नेगव कईँती जात्रा किहिस।

### मिस्त्र में अब्राम

10इ दिनन भुइँया बहोतइ झुरान रहीं अउ कउनो खाइ क चीज नाहीं जमत रहीं। एँह बरे अब्राम जिअत रहइ बरे मिस्त्र चला गवा। 11अब्राम लखेस कि ओकर मेहरारु सारै बहोत सुन्नर रहीं। एँह बरे मिस्त्र में आवइ क पहिले अब्राम सारै स कहेस, "मईँ जानत हउँ कि तू बहोतइ सुन्नर अहा। 12जब मिस्त्र क लोग तोहका निहरिहीं तउ उ पचे कहिहीं, 'इ मेहरारु एकर पत्नी अहइ।' तब उ सबइ मोका मारि डइहीं काहेकि तोहका बइठाइ लेइहीं। 13इ खातिर तू मनइयन स कह्या कि तू मोर बहिन अहा। तब उ पचे मोका नाहीं मरिहीं। उ पचे मोहे प दया करिहीं काहेकि उ पचे बूझि लेइहीं कि मईँ तोहार भाई अहउँ। इ तरह तू मोर जिन्नगी बचउबिउ।"

14इ तरह अब्राम मिस्र में पहुँचा। मिस्र क लोग लखेन, सारै बहोत सुन्नर मेहरारु अहइ। 15कछू मिस्र क अफसर लोग ओका लखेन। उ पचे फिरौन स कहें कि उ बहोतइ सुन्नर मेहरारु अहइ। उ सबइ अफसरन सारै क फिरौन क घर लइ गएन। 16फिरौन अब्राम क ऊपर दया किहेस काहेकि उ पचे बूझ गएन कि उ सारै क भइया बाटइ। फिरौन अब्राम क भेड़ी, गोरु अउ गदहन क दिहस। अब्राम ऊँटन क संग मनसेधु अउ मेहरारु नउकरन पाएस।

17फिरौन अब्राम क मेहरारु क रखि लिहस। एहसे यहोवा फिरौन अउ ओकरे घरे क मनइयन में खराब बेरामी सँचराइ दिहस। 18तउ फिरौन अब्राम क बोलाएस। फिरौन कहेस, “तू मोरे संग बड़ा खोट किहा ह। तू इ नाहीं बताया कि सारै तोहार पत्नी अहइ। काहे? 19तू कह्या, ‘इ मोर बहिन अहइ।’ तू अइसा काहे कह्या? मई एँका एँह बरे राखा कि इ मोर मेहरारु होइ। मुला अब मई तोहार मेहरारु क तोहका लउटावत अहउँ। एँका ल्या अउ जा।”

20तब फिरौन आपन मनइयन क हुकुम दिहस कि उ पचे अब्राम क मिस्र क बाहरे पहुँचाइ देइ। इ तरह अब्राम अउ ओकर मेहरारु उ जगह तजेन अउर उ पचे सब चिजियन क संग लइ गएन जउन ओनकइ रही।

#### अब्राम कनान लउटा

**13** अब्राम मिस्र तजि दिहस। अब्राम आपन मेहरारु अउ आपन सबहिँ सामान क संग नेगव स होइ के जात्रा किहस। लूत भी ओकरे संग रहा। 2इ टेम अब्राम बहोतइ धनी रहा। ओकरे संग ढेरिके जनावर, बहोत सी चाँदी अउ ढेर क सोना रहा।

3अब्राम चारिहुँ कइँती जात्रा करत रहा। उ नेगेव क तजेस अउ बेतेल वापस गवा। उ बेतेल अउर आइ क बीच क जगह में पहुँचेस। इ उहइ ठउर रहा जहाँ अब्राम अउ ओकर परिवार पहिले तम्बू लगाइके ठहरा रहा। 4इ उहइ ठउर रहा जहाँ अब्राम एक वेदी बनाए रहा। एँह बरे अब्राम इहाँ यहोवा क आराधना किहस।

#### अब्राम अउ लूत अलग भएन

5इ टेम लूत भी अब्राम क संग जात्रा करत रहा। लूत क लगे ढेरिके जनावर अउ तम्बू रहेन। 6अब्राम अउ लूत क लगे एँतना जिआद जनावर रहेन कि भुइँया एक लागे ओनका चारा नाहीं दइ सकत रही। 7अब्राम अउ लूत क गड़ेरिया या आपुस में तखड़ावइ-बखड़ावइ लागेन। (उ दिनन में कनानी लोग अउ परिज्जी लोग भी इहइ पहुँटा में रहत रहेन।)

8अब्राम लूत स कहेस, “हमरे अउ तोहरे बीच कउनो तखड़ा बखड़ा न होइ चाही। हमार अउर तोहार गड़ेरियन क बीच में झगाड़ा नाहीं होइ चाही। हम पचे सबहिँ भाई अही। 9हम पचन क अलग होइ जाइ चाही। तू जउन चाहा ठउर चुन ल्या। अगर तू बाई कइँती जाब्या तउ मई दाहिन कइँती जाब। अगर तू दाहिन कइँती जाब्या तउ मई बाई कइँती जाब।”

10लूत द्रिस्टी दउड़ाएस अउ यरदन क घाटी क निहारेस। लूत निहारेस कि हुवाँ बहोत पानी अहइ। (इ बात उ टेम क बाटइ जब यहोवा सदोम अउ अमोरा क नास नाहीं किहे रहा। उ टेम यरदन क घाटी सोअर तलक यहोवा क बगिया क नाई पूरे राह क संग संग फइली रही। इ भुइँया मिस्र देस क भुइँया क नाई नीक रही।) 11एँह बरे लूत यरदन क घाटी में रहब अंगीकार किहस। इ तरह दुइनउँ मनई अलग अलग होइ गएन अउ लूत पूरब कइँती जात्रा सुरु किहेस।

12अब्राम कनान प्रदेस में रहा अउ लूत घाटी क सहसन में रहा। लूत सदोम क दक्खिन में बढ़ा अउ रुकि गवा। 13सदोम क मनई बहोत पापी रहेन। उ पचे सदा यहोवा बरे खिलाफ पाप करत रहेन।

14जब लूत चला गवा तब यहोवा अब्राम स कहेस, “आपन चारिहुँ कइँती निहारा, उत्तर, दक्खिन, पूरब अउ पच्छिम कइँती लखा। 15इ सारी भुइँया, जेका तू लखत अहा, मई तोहका अउ तोहरे पाछे जउन तोहार लोग रइहीं ओनका देत अहउँ। इ प्रदेस सदा तोहार अहइ। 16मई तोहरे लोगन क धरती क धूल क कण क नाई अनगिनत बनउब। अगर कउनो धरती क कण क गन सकइ तउ उ तोहरे मनइयन क भी गन सकी। 17एँह बरे आवा। आपन धरती प चला। मई एँका अब तोहका देत अहउँ।”

18इ तरह अब्राम आपन तम्बू हटाएस। उ मग्ने क बड़का बृच्छ क लगे रहइ लाग। इ हेब्रोन सहर क निचके रहा। उ ठउरे प अब्राम एक वेदी यहोवा क आराधना बरे बनाएस।

#### लूत धरा गवा

**14** अम्रापेल सिनार क राजा रहा। अर्योक एल्लासार क राजा रहा। कदोर्लाओमेर एलाम क राजा रहा। तिदाल गोथीम क राजा रहा। 2इ सबहिँ राजा लोगन में सदोम क राजा बेरा, अमोरा क राजा बिसा, अदमा क राजा सिनाब, सबोथीम क राजा सेमेवेर अउ बेला। (बेला सोअर भी कहा जात रहा।) क राजा क संग एक जुद्ध भवा।

3सिद्दीम क घाटी में इ सबहिँ राजा आपन आपन फउज स मिलेन। (सिद्दीम क घाटी आजुकल नून क समुद्दर अहइ।) 4इ सबइ राजा लोग कदोर्लाओमेर क सेवा बारह बरिस तलक किहन। मुला तेरहवाँ बरिस उ सबइ ओकरे खिलाफ होइ गएन। 5एँह बरे चौदहवें बरिस में राजा कदोर्लाओमेर दूसर राजा लोगन क संग ओनसे लड़इ आवा। कदोर्लाओमेर अउ ओकरे संग क राजा लोग रपाई लोगन क असतरोत्कनम में हराएन। उ पचे हाम में जूजि लोगन क भी हराएन। उ पचे एमि लोगन क। उ सबइ एमि लोगन क साबेकियातैम में हराएन। 6अउर उ पचे होरीत लोगन क सेईर क पहाड़ी पहुँटा स हराइके एल्पारान कइँती खदेरेन। (एल्पारान मरुभूमि क निचके बाटइ।) 7तब राजा कदोर्लाओमेर पाछे कइँती घूमा अउ एमिसपात क गवा। इ कादेस कहा जात ह। अउर सबहिँ अमालेकी लोगन क हराएस। उ एमोरी लोगन क भी हराएस। इ पचे हससोन्तामार में रहत हीं।

8उ समइ सदोम क राजा, अमोरा क राजा, अदमा क राजा, सबोथीम क राजा, अउ बेला क राजा, (बेला सोअर ही अहइ।) सबहिँ एक संग मिलिके आपन दुस्मनन स लड़इ

बरे गएन। 9उ पचे एलाम क राजा कदोर्लाओमेर, गोयीम क राजा तिदाल, सिनार क राजा अम्रापेल, अउर एल्लासार क राजा अर्थेक स लड़ेन। इ तरह चार राजा पाँच राजा लोगन स लड़त रहेन।

10सिद्धीम क घाटी में राल स भरा भवा ढेरिके गड्डा रहेन। सदोम अउ अमोरा क राजा अउ ओकर फउजियन पराइ गएन। ओकरे बहुत सारे फउजियन ओन गड्डन में गिर गएन। मुला दूसर लोग पहाड़ी में पराइ गएन।

11सदोम अउ अमोरा क लगे जउन कछू रहा ओका ओनकइ दुस्मन लइ लिहिन। उ पचे ओनकइ सब भोजन-ओढ़ना क लइ लिहिन अउ उ पचे चला गएन। 12अब्राम क भाई क पूत लूत सदोम में रहत रहा, ओका दुस्मन कैद कइ लिहिन। उ पचे ओका अउर ओकरे लगे जउन कछू भी रहा लइ लिहिन। 13एक ठु मनई जउन धरा नहीं जाइ सका उ हिब्रू मनई अब्राम क इ सबइ सारी बातन क बताएस। एमोरी मग्ने क बृच्छन क लगे अब्राम आपन डेरा डाएस। मग्ने एस्कोल अउ आनेर एक समझौता एक दूसरे क मदद करइ बरे किहे रहेन अउर उ पचे अब्राम क मदद खातिर एक समझौता किहे रहेन।

### अब्राम लूत क छोड़वत ह

14तब अब्राम क पता लाग कि लूत धरा ग अहइ। तउ उ आपन पूरा परिवार क बटोरेस अउ ओनमें स तीन सौ अठारह प्रसिच्छित फउजियन क अब्राम दान नगर तलक दुस्मनन क पाछा किहस। 15उहइ रात उ अउर ओकर मनइयन ओनका खिलाफ धावा बोलि दिहिन। उ पचे दुस्मनन क हराएन अउ दमिस्क क उत्तर में होवा तलक ओनकइ पाछा किहिन। 16तब अब्राम दुस्मनन क जरिये चोरोंइ गइ सब चिजियन लइ आएन। अब्राम लूत, ओकर मेहरारुअन अउर ओकरे नउकरन अउर ओकरे सबहिं चिजियन क लइ आवा। 17कदोर्लाओमेर अउ ओकरे संग क सब राजा लोगन क हराए क पाछे अब्राम आपन घरे लौटि आवा। जब उ घर आवा तउ सदोम क राजा ओसे भेटंइ सावे क घाटी में पहुँचा। (एँका अब राजा क घाटी कहत हीं।)

### मेल्कीसेदेक

18सालेम क राजा मेल्कीसेदेक भी अब्राम स भेटंइ गवा। मेल्कीसेदेक, सर्वोच्च परमेस्सर क याजक रहा। मेल्कीसेदेक रोटी अउ अंगूरे क दाखरस लइ आवा। 19मेल्कीसेदेक अब्राम क आसीर्बाद दिहस अउ कहेस:

“अब्राम, सर्वोच्च परमेस्सर तोहका आसीर्बाद देइ। परमेस्सर भुइँथा अउ अकास बनाएस।

20अउर हम सर्वोच्च परमेस्सर क उपासना करित ह। परमेस्सर दुस्मनन क हरावइ में तोहार मदद किहेस।”

तबहिं अब्राम लड़ाई में मिली हर चीज क दसवाँ हीसां मेल्कीसेदेक क दिहस। 21तब सदोम क राजा कहेस, “तू इ सब चीजन क अपने लगे रखि सकत ह, मोका सिरिफ ओन मनइयन क दइ द्या जेनका दुस्मन धइ ल गए रहेन।”

22मुला अब्राम सदोम क राजा स कहेस, “मई सर्वोच्च परमेस्सर यहोवा जउन भुइँथा अउ आकास क बनएस ह:

ओकरे समन्वा इ किरिया खावा ह 23कि जउन आप क चीज बाटइ ओहमों स कछू भी न लेब। हियँ तलक कि एक ठु धागा व पनही क फीता भी न लेब। मई इ नहीं चाहित कि आप कहई, ‘मई अब्राम क धनी बनाएँ।’ 24मई सिरिफ उ भोजन क अपनाउब्या जेका हमार जवान लोग खाएस ह। मुला तू दूसर मनइयन क भी ओकर हीसा देई। हमरी लड़ाई में जीती भइ चीजनक आप लइ लेई अउ एहमों स कछू आनेर, एस्कोल अउ मग्ने क दइ देई। इ मनइयन लड़ाई में हमार मदद किहेन रहेन।”

### अब्राम क संग परमेस्सर क करार

15 इ बातन क होइ जाए क पाछे यहोवा क हुकुम अब्राम क एक ठु दरसन में आवा। परमेस्सर कहेस, “अब्राम, डेराअ, नहीं। मई तोहार रच्छा करब अउ मई तोहका बड़का पुरस्कार देब।”

2मुला अब्राम कहेस, “हे यहोवा अइसा कछू भी नहीं अहइ जेका तू मोका देब्या अउर उ मोका खुस करी। काहेकि मोरे पूत नहीं अहई। एँह बरे मोर दास दमिस्क क बसइया एलीएजेर मोरे मरइ क पाछे मोर सब कछू पाइ।”

3अब्राम कहेस, “तू ही लखा, तू मोका कउनो पूत नहीं दिहा ह। एँह बरे मोरे घरे में पइदा भवा एक ठु दास मोर सबहिं चिजियन क पाइ।”

4तब यहोवा अब्राम स बात किहस। परमेस्सर कहेस, “तोहरी चीजन क तोहार इ दास न पाइ। तोहरे एक ठु बेटवा होइ अउर तोहार पूत ही तोहार चिजियन क पाइ।”

5तब परमेस्सर अब्राम क बाहेर लइ गवा। परमेस्सर कहेस, “आकास क लखा। अनगिनत तारन क निहारा। इ सबइ एँतना अहई कि तू गन नहीं सकत्या। भविस्स में तोहार परिवार अइसा ही होइ।”

6अब्राम यहोवा पइ बिस्वास किहेस अउर उ ओका नीक समझेस।

7परमेस्सर अब्राम स कहेस, “मई ही उ यहोवा अहउँ जउन तोहका कसदियन क ऊर स बाहेर लइ आएँ। इ मई एँह बरे किहउँ कि इ पहुँटा मई तोहका दइ सकउँ, तू इ पहुँटा क आपन कब्जा में कइ सका।”

8मुला अब्राम कहेस, “हे यहोवा, मोर सुआमी, मई कइसे पतियाँ कि इ पहुँटा मोका मिली?”

9परमेस्सर अब्राम स कहेस, “हम पचे एक करार करब। तू मोका तीन बरिस क एक ठु गइया, तीन बरिस क एक बोकरी, अउ तीन बरिस क एक भेड़ा लिआवा। एक ठु फाक्ता अउ एक कबूतर क बच्चा भी लिआवा।”

10अब्राम इ सबहिं चिजियन क परमेस्सर क लगे लइ आवा। अब्राम इ जनावरन क मारि डाएस अउ हर एक क दुइ दुकड़ा कइ डाएस। अब्राम एक आधा टूक एक कइँती अउ दूसर आधा टूक दूसर कइँती ओकरे ठीक आमने-सामने धरेस। अब्राम पंछिन क दुइ टूका नहीं किहेस। 11तनिक देर पाछे मांसाहारी पंछी मरे भए जनावरन क खाइ क बरे खाले आइ गएन मुला अब्राम ओनका खदेरेस।

12पाछे सूरज बूड़इ लाग। अब्राम क गहरी नींद आइ गइ। खौफनाक अँधियारा ओका चारिहुँ कइँती स घेरि

लिहस। 13तब यहोवा अब्राम स कहेस, “तोहका इ सबइ बातन क जानइ चाही। तोहार संतानन बिदेसी बनिहीं अउर उ पचे देस में जइहीं जउन ओनका न होइ। उ पचे हुआँ दास होइहीं। चार सौ बरिस तलक ओनके संग बुरा बिउहार होइ। 14मई उ रास्ट्र क निआव करब अउ ओका सजा देब जउन ओन लोगन क गुलाम बनाएस अउर जब तोहरे सन्तानन उ देसे क तजि देइहीं तउ आपन संग ढेर नीक चीज लइ जइहीं।

15“तू बहोत लम्बी उमर तलक जिअत रहब्या। तू सान्ति स मरब्या अउ तू आपन पुरखन क लगे दफनावा जाब्या। 16चार पीढ़ीयन क पाछे तोहार लोग इहइ पहँटा में फुन अइहीं। इ टेम तोहार लोग एमेरियो क हरइहीं। हिआँ क बसइयन एमोरियन क, सजा देइ बरे मई तोहरे लोगन क बइपरब। इ बात भविस्स में होइ काहेकि एमोरियन सजा पावइ लायक बुरा अबहिं नार्हीं भवा अहईं।”

17जब सूरज बूड़ि गवा, तउ बहोत अँधियारा छाइ गवा। मरा भवा जनावर अबहिं तलक जमीन प ओलरा भए रहेन। हर एक जनावर दुइ हींसा में कटा भवा बहावा रहेन। उहइ समइ धुआँ अउ आगी क एक खम्भा जनावरन क टूक क बीच स गवा।

18इहइ तरह उ दिन यहोवा अब्राम क बचन दिहस अउ ओनके संग करार किहस। यहोवा कहेस, “मई इ पहँटा तोहरे संतानन क देब। मई मिस्त्र क नदी अउ बड़की नदी परात क बीच क पहँटा ओनका देब। 19इ देस केनी, कनिज्जी, कदमोनी, 20हित्ती, परीज्जी, रपाई, 21एमोरी, कनानी, गिर्गासी अउ यबूसी लोगन क अहइ।”

### दासी हाजिरा

**16** सारै अब्राम क मेहरारु रही। अब्राम अउ ओकरे कउनो लरिका नार्हीं रहा। सारै क लगे एक तु मिस्त्र क दासी रही। ओकर नाउँ हाजिरा रहा। 2सारै अब्राम स कहेस, “लखा, यहोवा मोका कउनो बच्चा नार्हीं दिहे अहइ। ऐह बरे मोरी दासी क संग सारीरिक संबन्ध करा होइ सकत ह कि ओकर बच्चा मोर अपना बच्चा होइ जाब।”

अब्राम आपन मेहरारु क कहब मान लिहस। 3कनान में अब्राम क दस बरिस रहइ क पाछे इ बात भइ अउ सारै आपन भतार अब्राम बरे हाजिरा क दइ दिहस। हाजिरा मिस्त्र क दासी रही।

4हाजिरा, अब्राम स गाभिन भइ। जब हाजिरा इ देखेस तउ ओका बहोत गरब भवा अउ इ महसूस करइ लाग कि मई आपन मालकिन सारै स बड़िया अहउँ।

5मुला सारै अब्राम स कहेस, “मोर दासी अब मोसे घिना करत ह अउ एकरे बर मई तोहका दोखी मानत हउँ। मई ओका तोहरे बरे दिहेउँ। उ गाभिन भइ अउर तब उ महसूस करइ लाग कि उ मोसे बड़िया बा। मई चाहत हउँ कि यहोवा सही निआव करी।”

6मुला अब्राम सारै स कहेस, “तू हाजिरा क मालकिन अहा। तू ओकरे संग जउन चाहा कइ सकत ह।” ऐह बरे सारै आपन दासी पइ अत्याचार किहस अउर ओकर दासी पराइ गइन।

### हाजिरा क पूत इस्माएल

7यहोवा क सरगदूत रेगिस्तान में पानी क सोता क लगे हाजिरा क पाएस। इ सोता सूर जाइवाला रहे प रहा। 8सरगदूत कहेस, “हाजिरा, तू सारै क दासी अहा। तू हिआँ काहे अहा? तू कहाँ जात अहा?”

हाजिरा कहेस, “मई आपन मालकिन सारै क हिआँ स पराइ जात अहउँ।”

9यहोवा क सरगदूत ओसे कहेस, “तू आपन मालकिन क घर जा अउर ओका सोंप द्या।” 10यहोवा क सरगदूत ओसे फुन कहेस, “तोहसे बहोत स लोग पइवा होइहीं। इ सबइ लोग ऐतना होइ जइहीं कि गना नार्हीं जाइ सकिहीं।”

11यहोवा क सरगदूत अउर भी कहेस,

“अबहिं तू गर्भ धरे अहा अउर तोहका एक पूत होइ। तू ओकर नाउँ इस्माएल राख्या। काहेकि यहोवा तोहका देइ भए कस्ट क सुनेस ह।

12इस्माएल एक तु जंगली गदहा क तरह जंगली अउ अजाद होइ उ सब क खिलाफ होइ अउर सबहीं ओकर खिलाफ होइ जाइ। उ आपन भाइयन क लगे आपन डेरा डाइ मुला उ ओनके खिलाफ होइ।”

13तब हाजिरा परमेस्सर क जउन ओसे बात करत रहा, एक नवा नाउँ स यहोवा क पुकारेस। उ कहेस, “तू परमेस्सर ह जउन मोका लखत ह।” उ ओसे उ नाउँ ऐह बरे दिहस काहेकि उ आपन आप स कहेस, “मई महसूस करत हउँ कि उ मोरे ऊपर निगाह राखत ह।” 14ऐह बरे उ कुआँ क नाउँ लहैरोइ पड़ा। उ कुआँ कादेस अउ बेरेद क बीच में बाटइ।

15हाजिरा अब्राम क पूत क जन्म दिहस। अब्राम पूत क नाउँ इस्माएल धरेस। 16अब्राम उ टेम छियासी बरिस क रहा जब हाजिरा इस्माएल क जन्म दिहस।

### खतना करार क सबूत

**17** जब अब्राम निन्यानबे बरिस क भवा, यहोवा ओह पइ परगट भवा। यहोवा कहेस, “मई सर्वोच्च परमेस्सर अहउँ। मोरे आगे चला अउर इमानदार रहा। 2जदि तू इ करा, तउ मई आपन अउ तोहरे बीच एक करार करब। मई तोहका बचन देत हउँ कि मई तोहका बहोत सारा संतान देबउ।”

3अब्राम परमेस्सर क समन्वा आपन मुँह जमीन कइँती निहुराएस। तब परमेस्सर ओहसे बात किहस अउ कहेस, 4“हमरे करार क इ हींसा मोर अहइ। मई तोहका कइउ रास्ट्र क बाप बनाउब। 5मई तोहरे नाउँ क बदल देब। तोहार नाउँ अब्राम नार्हीं होइ। तोहार नाउँ इब्राहीम होइ। मई तोहका इ नाउँ ऐह बरे देत अहउँ कि तू बहोत स रास्ट्रन क बाप बनब्या। 6“मई तोहका बहोत संतानन देब। तोहसे नवा रास्ट्र अउर राजा लोग पइवा होइहीं। 7अउर मई आपन अउ तोहरे बीच एक करार करब। इ करार तोहरे सबहिं संतानन बरे होइ। मई तोहार अउ तोहरे सबहिं संतानन क परमेस्सर रहब। इ करार सदा बनी रही। 8अउर मई इ प्रदेस तोहका अउ तोहरे सबहिं संतानन क देब। मई उ प्रदेस तोहका देब जेहसे होइके तू जात्रा करत रहब्या। मई तोहका कनान प्रदेस देब।

मई तोहका इ प्रदेस सदा बरे देब अउर मई तोहार परमेस्सर रहबा।”

9परमेस्सर इब्राहीम स कहेस, “अब करार क इ हींसा तोहार हींसा अहइ। मोर इ करार क मानब तू अउ तोहार संतानन करिहीं। 10इ उ करार अहइ कि जेका तू मनब्या। इ करार मोरे अउ तोहरे बीच अहइ। इ तोहरे सबहिं संतानन बरे अहइ। हर एक लरिका जउन पइदा होइ ओकर खतना जरूर होइ। 11तू बाहरी चाम क एक निसान बरे कटब्या कि तू आपन अउ मोरे बीच क करार क मानत रहब्या। 12जब लरिका आठ दिन क होइ जाइ तब तू ओकर खतना करया। हर एक लरिका जउन तोहरे मनइयन क बीच पइदा होइ या कउनो लरिका जउन विदेसी स खरीदइ भवा तोहार दास स पइदा होइ, ओकर खतना जरूर होइ। 13इ तरह तोहरे रास्ट्र क हर एक लरिका क खतना होइ। जउन लरिका तोहरे परिवारे में पइदा होइ या दास क रुप में बसेहा जाइ ओकर खतना होइ। 14इहइ मोर नेम अहइ अउर मोरे अउ तोहरे बीच करार अहइ। जउन कउनो मनई क खतना नाहीं होइ उ आपन मनइयन स अलगाइ दीन्ह जाइ। काहेकि उ मनई मोरे करार क तोड़ दिहस।”

### इसहाक प्रण क पूर

15परमेस्सर इब्राहीम स कहेस, “मई सारै क जउन तोहार मेहरारु अहइ, नवा नाम देब। ओकर नाउँ सारा होइ। 16मई ओका असीस देब। मई ओका पूत देब अउ तू बाप होइ। उ बहोत स नए रास्ट्रन क महतारी होब्या। ओहसे रास्ट्रन क राजा लोग पइदा होइहीं।”

17इब्राहीम आपन मूँड़ी परमेस्सर क भगति देखावइ बरे जमीन कईंती निहुराएस। मुला उ हँसा अउ आपन स बोला, “मई सौ बरिस क होइ ग अहउँ। मई पूत नाहीं पइदा कइ सकत हउँ अउ सारा नब्बे बरिस क बुढ़िया बाटइ। उ लरिकन क जन्म नाहीं दइ सकत।”

18तउ इब्राहीम परमेस्सर स कहेस, “मोका उमीद अहइ कि इस्माएल जिइहीं अउ तोहार सेवा करइहीं?”

19परमेस्सर कहेस, “नाहीं, मई कहेउँ कि तोहार मेहरारु सारा पूत क जन्म देइ। तू ओकर नाउँ इसहाक रखब्या। मई ओकरे संग करार करब। इ करार अइसा होइ जउन ओकरे सबहिं संतानन क संग सदा बनी रही।

20“तू इस्माएल क नाउँ लिहस अउर मई तोहार बात सुनेउँ। मई ओका असीसब। ओकरे बहोत स सन्तानन होइहीं। उ बारह बड़का राजा क बाप होइ। ओकर परिवार एक बहोत बड़ा रास्ट्र बनी। 21मुला मई आपन करार इसहाक क संग करब। इसहाक ही उ पूत होइ जेका सारा पइदा करी। इ पूत अगला बरिस में इहइ टेम में, पइदा होइ।”

22परमेस्सर जब इब्राहीम स बात करब बन्द किहस, इब्राहीम अकेल्ला रहि गवा। परमेस्सर इब्राहीम क लगे स आकास कईंती उठि गवा। 23परमेस्सर कहे रहा कि तू अपने परिवार क सबहिं लरिकन अउ मनइयन क खतना करया। ऐह बरे इब्राहीम इस्माएल अउ आपन घरे में पइदा भए सबइ नउकर लोगन क एक संग बोलाएस। इब्राहीम ओन नउकर लोगन क एक संग बोलाएस जउन धने स बेसहा ग रहेन।

इब्राहीम क घर क सबहिं मनसेधू अउ लरिकन बटुरेन अउ ओन सबहिं क खतना उहइ दिन ओनकइ बाहरी चाम काटिके कइ दीन्ह गवा। इब्राहीम ओन लोगन क खतना ठीक उहइ तरह स किहेस जे तरह परमेस्सर कहे रहेन। 24जब इब्राहीम क खतना भवा उ नन्यानबे बरिस क रहा। 25अउर ओकर पूत इस्माएल आपन खतना होइके टेम तेरह बरिस क रहा। 26इब्राहीम अउ ओकरे पूत क खतना उहइ दिन भवा। 27उहइ दिन इब्राहीम क सबहिं मनइयन क खतना भवा। इब्राहीम क घरे में पइदा भए सबहिं मनइयन क अउ बेसहा गए सबहिं दासन क खतना उहइ दिन भवा।

### तीन ठु मेहमान

18 पाछे यहोवा फुन इब्राहीम क समन्वा परगट भवा। इब्राहीम मग्रे क बलूत क बृच्छन क लगे रहत रहा। एक दिन, इब्राहीम दिन क सब स गर्म पहर में तम्बू क दुआरे बइठा रहा। 2इब्राहीम आँखि उठाइके लखेस अउ आपन समन्वा तीन मनइयन क खड़ा निहारेस। जबहिं इब्राहीम मनइयन क लखेस, उ ओनके लगे गवा अउ ओनका पैलगी किहेस। 3इब्राहीम कहेस, “साहेब लोगो! आप आपन इ सेवक क संग तनिक देर रुकि जाईं। 4मई आप लोगन बरे गोड़वा पखारइ खातिर पानी लइ आवत अहउँ। आप बृच्छन क खाले सुहताइ लेईं। 5मई आप पचन क कछू खइया के लिआवत अहउँ अउ आप लोग जेतना चाहईं खाइ लेईं। ऐंकरे पाछे आप सबइ आपन जात्रा प जाब सुरु कइ सकत हीं।”

तीनउँ कहेन, “इ बहोतइ बड़िया बा। तू जइसा कहत बाट्या, करा।”

6इब्राहीम हाली स तम्बू में घुसा। इब्राहीम सारा स कहेस, “हाली हाली तीन ठु रोटी बरे आटा साना।” 7तब इब्राहीम आपन गोरुअन कईंती भागा। इब्राहीम सबन त नीक एक ठु जवान बछवा लिहस। इब्राहीम बछवा नउकर क दिहस। इब्राहीम नउकर स कहेस कि तू हाली हाली करा, इ बछवा क मारा अउ खइया खातिर तइयार करा। 8इब्राहीम तीनहुँ क खाइ बरे गोस दिहस। उ दूध अउ माखन भी दिहस। जब तलक तीनहुँ मनई खात रहेन तब तलक इब्राहीम बृच्छ क खाले ठाड़ रहा।

9उ मनइयन इब्राहीम स कहेस, “तोहार मेहरारु सारा काहें बा?”

इब्राहीम कहेस, “उ तम्बू में बा।”

10तब यहोवा कहेस, “मई बसन्त में फुन आउब। उ टेम तोहार मेहरिया सारा एक ठु पूत क जन्मी।”

सारा तम्बू में अनकत रही अउर उ इ बातन क सुनेस। 11इब्राहीम अउ सारा बहोत बुढ़ाइ ग रहेन। सारा लड़कोर होइ क उमिर क पार कइ चुकी रही।

12सारा आपन आप प हँसी। उ आपन स कहेस, “मई अउ मोर भतार दुइनउँ बुढ़ान बाटेन। मई लरिका जन्मइ बरे ढेर बुढ़ाइ गइ अहउँ।”

13तब यहोवा इब्राहीम स कहेस, “इ सोचत भवा सारा काहे हँसेन कि, ‘मई ऐतना बूढ़ी हउँ कि लरिका नाहीं पइदा कइ सकत हउँ?’ 14का यहोवा बरे कछू भी असंभव बाटइ?”

नाहीं, मई फुन बसन्त में आपन बताए भए टेम प आउब अउ तोहार मेहरारु सारा पूत क जन्म देइ।”

15मुला सारा कहेस, “मई हसेउं नाहीं।” उ अइसा कहेस, काहेकि उ डेगन रही।

मुला यहोवा कहेस, “नाही, मई जानत हउं कि तोहार कहब सही नाहीं अहइ। तू जरुर हँसिउ हा।”

16तब उ मनइयन जाइ बरे उठेन। उ पचे सदोम कइँती लखेन अउ उहइ कइँती चल पड़ेन। इब्राहीम ओनका बिदा करइ बरे कछू दूर तलक ओनके संग गवा।

### परमेस्सर क संग इब्राहीम क सौव

17यहोवा मन में कहेस, “का मई इब्राहीम स कहि देउं जउन मई अबहुँ करब? 18इब्राहीम एक बड़का सक्तीवाला रास्ट्र बन जाइ। इ कारण स धरती क सारे मनइयन आसीबादि पइहीं। 19मई इब्राहीम क संग खास करार किहेउं ह। मई इ ऐह बरे किहेउं ह कि उ आपन लरिकन अउ आपन संतानन क तरह जिन्नगी बितावइ बरे हुकुम देइ जउने तरह जिन्नगी बिताउब यहोवा चाहत ह। मई इ ऐह बरे किहेउं ह कि उ पचे सच्चाई स रइहीं अउर इन्साफ पसन्द बनिहीं। तब मई यहोवा प्रण कीन्ह गइ चीजन क देब।”

20तब यहोवा कहेस, “सदोम अउर गमोरा का चीख-पुकार बहोत जबरदस्त अहइ। ओनका पाप बहोत गम्भीर अहइ। 21एह बरे मई हुँवा जाब अउर देखब कि जउन कूछ मई सुन्या ह, यदि उ सही बा तब मई जानब कि उ सही बाटइ या गलत।”

22तब उ मनइयन घूमेन अउ सदोम कइँती चल पड़ेन। मुला इब्राहीम यहोवा क समन्वा खड़ा रहा। 23तब इब्राहीम यहोवा स बोला, “हे यहोवा, का तू खोट मनइयन क नास करइ क संग भले मनइयन क नास करइ क बात सोचत अहा? 24जदि उ सहर में पचास भला मनई होई तउ का होइ? का तब भी तू सहर क नास कइ देब्या? फुरइ ही तू हुँआ क बसइया पचास भले मनइयन बरे उ सहर क बचाइ लेब्या। 25फुरइ ही तू उ सहर क नास न करब्या। खोट मनइयन क मारइ बरे तू पचास भले मनइयन क नास न करब्या। अगर अइसा भवा तउ भला अउ खोटा लोग एक ही होइ जइहीं। दुइनउं क ही सजा मिली। तू समूचइ भुइँया क निआव देइवाला अहा। मई जानत अहउं कि तू निआव करब्या।”

26फुन यहोवा कहेस, “जदि मोका सदोम सहर में पचास भला लोग मिलई तउ मई समूचइ सहर क बचाइ लेब।”

27तब इब्राहीम कहेस, “हे यहोवा, तोहरे अगवा, मई सिरिफ धूर अउ राख अहउं। मुला तू मोका फुन तनिक कस्ट देइ क मौका द्या अउ मोका इ प्रस्न पूछइ द्या कि: 28जदि पाँच नीक लोग कमती होई तउ का होइ? जदि सहर में पैतालीस ही नीक लोग होई तउ का होइ? का तू सिरिफ पाँच लोगन बरे समूचइ सहर क नास करिब्या?” तब यहोवा कहेस, “जदि मोका हुओँ पैतालीस नीक लोग मिलई तउ मई सहर क नास न करब।”

29इब्राहीम फुन यहोवा स कहेस, “जदि तोहका हुओँ सिरिफ चालीस नीक लोग मिलई तउ का तू सहर क नास

कइ देब्या?” यहोवा कहेस, “अगर मोका चालीस बड़िया लोग हुओँ मिलई तउ मई सहर क बर्बाद न करब।”

30तब इब्राहीम कहेस, “हे यहोवा कृपा कइके मोहे प किरोध जिन करा। मोका इ पूछइ द्या कि अगर सहर में सिरिफ तीस नीक लोग होई तउ का तू सहर क नास कइ देब्या?”

यहोवा कहेस, “जदि मोका तीस नीक लोग मिलई तउ मई सहर क बर्बाद न करब।”

31तब इब्राहीम कहेस, “हे यहोवा, का मई तोहका फुन कष्ट देउं अउ पूछ लेउं कि जदि बीस ही सहर में नीक लोग हुओँ होई तउ?”

यहोवा जवाब दिहस, “अगर मोका बीस बड़िया लोग मिलई तउ भी मई सहर क नास न करब।”

32तब इब्राहीम कहेस, “हे यहोवा तू मोहे प गुस्सा जिन करा। मोका आखिरी दाई कस्ट देइ क मौका द्या। जदि तोहका हुओँ दस बड़िया लोग मिलई तउ तू का करिब्या?”

यहोवा कहेस, “जदि मोका सहर में दस नीक लोग मिलई तउ भी मई सहर क नास न करब।”

33यहोवा इब्राहीम स बोलब बंद कइ दिहस, ऐह बरे यहोवा चला गवा अउ इब्राहीम आपन घर लउटि आवा।

### लूत क अतिथि

19 ओनमों स दुइ सरगदूत संझा क सदोम सहर में आएन। लूत सहर क दुआर प बइठा रहा अउ उ सरगदूतन क लखेस। लूत विचारेस कि उ पचे सहर क बीचउ बीच स जात्रा करत अहई। लूत उठा अउ सरगदूतन क लगे गवा अउ भुइँया तलक निहुरा। 2लूत कहेस, “महोदय, कृपा कइके मोरे घर चलई अउर मई आप लोगन क सेवा करब। हुओँ आप लोग आपन गोइ धोइ सकत हीं अउर रात में रुकि सकत हीं। तब भियान आप लोग आपन जात्रा सुरु कइ सकत हीं।”

सरगदूतन जवाब दिहन, “नाहीं, हम पचे सहर क चौराहे में रुकब।”

3मुला लूत आपन घर चलइ बरे बार बार कहत रहा। इ तरह सरगदूत लूत क घर जाइ बरे तइयार होइ गएन। जब उ पचे घरे पहोँचेन तउ लूत ओनका कछू पिअइ बरे लइ आवा। लूत ओनके बरे रोटी बनाएस। लूत क बनावा भवा भोजन सरगदूत खाएन।

4उ संझा क सोवइ क टेम स पहिले ही उ सबइ मँ स सदोम क जवान अउर बूढ़े दुइनउं मनइयन लूत क घरे आएन। सदोम क मनइयन लूत क घर घेरि लिहन अउ पूछेन। 5उ पचे कहेन, “आज राति क जउन लोग तोहरे लगे आएन, उ सब दुइनउं मनई कहीं बाटेन? उ मनइयन क बाहेर हमका दइ द्या। हम ओनके संग संभोग करइ चाहत हा।”

6लूत बाहेर निकरा अउ आपन पाछे स दरवाजा बंद कइ दिहस। 7लूत मनइयन स कहेस, “नाहीं मोर भाई लोगो, मई बिनती करत हउं कि आप इ बुरा कर्म न करई। 8लखा, मोरे दुइ बिटिया अहई, उ सबइ एँकरे पहिले कउनो मनई क संग नाहीं सोई अहई। मई आपन बिटियन क तू मनइयन क दइ देत अहउं। तू लोग ओनके संग जउन चाहा कइ सकत

ह। मुला इ मनइयन क संग कछू न करा। इ सब लोग हमरे घरे आवा अहइँ अउर मईँ ँनकइ रच्छा जरुर करबा।”

9घरे क चारिहुँ कइँती क मनइयन जवाब दिहिन, “राहे स हटि जा।” तब मनइयन आपन मने में बिचार किहिन, “इ मनई लूत हमरे सहर में मेहमान क रुप में आवा अहइ। अब इ सिखावइ चाहत ह कि हम पचे कैसे जिन्नगी गुजारइ चाही।” तब उ पचे लूत स कहेन, “हम पचे ओनसे भी जियादा बुरा तोरे संग करबा।” ँह बरे उ मनइयन लूत क घेरि क ओकरे निअरे आउब सुरु किहिन। उ सबइ दरवाजा क तोड़िके खोलइ चाहत रहेन।

10मुला लूत क संग क ठहरे भए मनइयन दरवाजा खोलेन अउ लूत क घरे क भीतर हींच लिहेन। तब उ पचे दरवाजा बंद कइ दिहिन। 11दुइनउँ मनइयन दरवाजे क बाहेर क मनइयन क आँधर कइ दिहिन। इ तरह घरे में घुसरइ क जतन करइ वालन जवान अउ बुढ़वा सबइ आँधर होइ गएन अउर दरवाजा न पाइ सकेन।

### सदोम स बच निकरब

12दुइनउँ मनइयन लूत स कहेन, “का इ सहर में अइसा कउनो मनई अहइ जउन तोहरे परिवारे क बाटइ? का तोहार दामाद, तोहार बिटिया या दूसर कउनो तोहरे परिवारे क मनई अहइ? जदि कउनो दूसर इ सहर में तोहरे परिवार क बाटइ तउ तू अबहिँ सहर तजि देइ बरे कहि द्या। 13हम पचे इ सहर क बर्बाद करब। यहोवा ओन सबहिँ बुराइयन क सुनि लिहे अहइ जउन इ सहर में अहइ। ँह बरे यहोवा हम मनइयन क ँँका नास करइ बरे पठए अहइ।”

14ँह बरे लूत बाहेर गवा अउ आपन दूसर बिटियन स बियाह करइ वालन दामादन स बात किहेस। लूत कहेस, “हाली करा अउ इ सहर क तजि द्या।” यहोवा ँँका फउरन बर्बाद कइ देइ। मुला उ मनइयन समझेन कि लूत मजाक करत बाटइ। 15दूसर दिन भिन्सारे भोर क टेम ही सरगदूत लूत स हाली करइ क कोसिस किहस। उ पचे कहेन, “लखा इ सहर क सजा मिली। ँह बरे तू आपन मेहरारु अउ तोहरे संग जउन दुइ बिटियन जउन अबहिँ तलक अहइँ, ओनका लइके इ जगह तजि द्या। तबहिँ तू सहर क संग बर्बाद न होब्या।”

16मुला लूत देर करइ लगा अउ सहर तजि देइ क उ हाली नाहीं किहेस। ँह बरे सरगदूतन लूत, ओकर मेहरारु अउ ओकर दुइनउँ बिटियन क हाथ धइ लिहन, काहेकि ओन पइ यहोवा क द्या रहा। उ दुइनउँ लूत अउ ओकरे परिवार क सहर क बाहेर पहुँचाएन। लूत अउ ओकरे परिवार प यहोवा क कृपा रही। 17ँह बरे दुइनउँ लूत अउ ओकरे परिवार क सहर क बाहेर पहुँचाइ दिहिन। जब उ पचे बाहेर होइ गएन तउ ओनमें स एक कहेस, “आपन जिन्नगी बचावइ बरे पराइ जा। सहर कइँती घूमिके जिन लखा। इ घाटी में कउनो जगह जिन रुका। तब तलक परत रहा जब तलक पहाड़े में न जाइके पहुँचा। अगर तू अइसा नाहीं करत्या, तउ तू सहर क संग नस्ट होइ जाब्या।”

18तब लूत दुइनउँ स कहेस, “श्रीमान लोगो, कृपा कइके ँँतना दूर दौड़इ बरे बेबस जिन करा। 19आप लोग मो सेवक

प ँँतनी कृपा किहा ह। आप लोग मोका बचावइ क कृपा किहा ह। मुला मईँ पहाड़ी ताईँ नाहीं दौड़ि सकत हउँ। अगर मईँ जरुरत स जियादा धीमे धीमे दौड़उँ तउ कछू बुरा होइ अउ मईँ मारा जाब। 20मुला लखइँ हिआँ निअरे एक बहोत छोटा सहर बाटइ। हम पचन क उ सहर तलक दौड़इ द्या। तब हमार जिन्नगी बचि जाइ।”

21सरगदूत लूत स कहेस, “ठीक बाटइ, मईँ तोहका अइसा ही करइ देब। मईँ उ सहर क नास नाहीं करब जेहमें तू जात अहा। 22मुला हुआँ तलक तेज दउड़ा। मईँ तब तलक सदोम क बर्बाद नाहीं करब जब तलक तू उ सहर में सुरच्छित नाहीं पहुँच जात्या।” (इ सहर क नाउँ सोअर अहइ काहेकी इ छोट अहइ।)

### सदोम अउ अमोरा बर्बाद कीन्ह गएन

23जब लूत सोअर में घुसत रहा, भिन्सारे क सूज चमकइ लाग 24अउर यहोवा सदोम अउ अमोरा क बर्बाद करब सुरु कइ दिहस। यहोवा आगी अउ बरत भवा गन्धक क अकासे स खाले बरसाएस। 25इ तरह यहोवा उ सहरन क अउर समूची घाटी क बर्बाद कइ दिहस अउ सबहिँ जिअत मनइयन अउ सबहिँ पेड़-पौधन क बर्बाद कइ दिहस। 26जब उ पचे परत रहेन, तउ लूत क मेहरारु घूमिके सहर क निहारेस। जब उ घूमिके लखेस तब उ एक नोन क भीटा होइ गइ।

27उहइ दिना बहोत तड़के इब्राहीम उठा अउ उ ठउरे प गवा जहाँ उ यहोवा क समन्वा ठाड़ होत रहा। 28इब्राहीम सदोम अउ अमोरा सहरन कइँती निगाह दौड़ाएस। इब्राहीम उ घाटी क समूची भुइँया कइँती लखेस। इब्राहीम उ पहुँटा स उठत भए घना धुआँ क लखेस। बड़ी खौफनाक आगी स उठत धुआँ क तरह उ देखाइ पड़ा।

29परमेस्सर घाटी क सहरन क नास कइ दिहस। परमेस्सर इब्राहीम क याद किहस अउर लूत क नास नाहीं किहेस। जब उ ओन सहरन क नास किहेस जेहमा लूत रहत रहेन।

### लूत अउ ओकर बिटियन

30लूत सोअर में लगातार रहइ स डेरान। ँह बरे उ अउ ओकर दुइनउँ बिटियन पहाड़न में गएन अउर उ हुवँइ रहइ लगेन। उ पचे हुवाँ एक गुफा में रहत रहेन। 31एक दिना बड़की बिटिया छोटकी बिटिया स कहेस, “भुइँया प चारिहुँ कइँती मनसेधू अउ मेहरारु बियाह करत हीं। मुला हिआँ आसपास कउनो मनसेधू नाहीं जेहसे हम बियाह करी। हम पचन क पिता बुढ़ाइ ग बाटेन। 32ँह बरे हम पचे आपन पिता का प्रयोग लरिकन क जन्म देइ बरे करी जेसे हम लोगन क बंस चलि सकइ। हम लोग आपन पिता क लगे चलब अउ अंगरे क दाखरस पिआउब अउ ओका नसा में बुत्त कइ देब। तब हम ओकरे संग सोइ सकित ह।”

33उहइ राति दुइनउँ बिटियन आपन पिता क लगे गइन अउ ओका उ पचे दाखरस पिआइके नसा में बुत्त कइ दिहिन। तब बड़की बिटिया पिता क बिछउना में गइ अउ ओकरे संग सोइ गइ। लूत जियादा नसा में बुत्त रहा। ँह बरे इ न जानि सका कि ओकरे संग कउन सोएस।

34दूसर दिन बड़की बिटिया छोटकी बिटिया स कहेस, “पिछली राति मई आपन पिता क संग सोएउँ। आवा इ रात फुन हम ओका दाखरस पिआइके नसा मँ बुत्त कइ देइ। तब तू ओकरे बिछउना मँ जाइ सकत ह अउर ओकरे संग सोइ सकत ह। इ तरह हम पचन क आपन पिता क प्रयोग लरिकन क जन्म दइके आपन बंस चलावइ बरे करइ चाही।” 35एँह बरे उ दुइनउँ बिटियन आपन पिता क दाखरस पिआइके नसा मँ बुत्त कइ दिहन। तब छोटकी बिटिया ओकरे बिछउना मँ ओलरी अउ ओकरे संग सोएस। लूत इ दाई भी न जानि सका कि ओकर बिटिया ओकरे संग सोएस।

36इ तरह लूत क दुइनउँ बिटिया गर्भ धारण किहेन। ओनका पिता ही ओनके लरिकन क पिता रहा। 37बड़की बिटिया एक पूत क जन्म दिहस। उ बेटवा क नाउँ मोआब धरेस। मोआब ओन सबहिँ मोआबी लोगन क पिता रहा, जउन अब तलक रहत अहइ। 38छोटकी बिटिया भी एक पूत जन्मेस। इ आपन पूत क नाउँ बेनम्मी धरेस। बेनम्मी ओन सबहिँ अम्मोनी लोगन क पिता अहइ जउन अब तलक रहत बाटेन।

### इब्राहीम गारर जात ह

**20** इब्राहीम उ ठउरे क तजि दिहस और नेगेव क जात्रा किहेस। इब्राहीम कादेस अउ सूर क बीच गारर मँ बस गवा। 2गारर मँ इब्राहीम मनइयन स कहेस कि सारा मोर बहिन अहइ। गारर क राजा अबीमेलक इ बात सुनेस। अबीमेलक क सारा चाहत रहा एँह बरे उ कछू नउकर ओका लावइ बरे पठाएस। 3मुला एक रात परमेस्सर अबीमेलक स सपन मँ बात किहस। परमेस्सर कहेस, “देखा, तू मरि जाब्या। जउने मेहरारु क तू लिहा ह उ सोहागिन अहइ।”

4मुला अबीमेलक अबहिँ सारा क संग नाहीं सोवा रहा। एँह बरे अबीमेलक कहेस, “हे यहोवा, मई दोखी नाहीं अहउँ। का तू बेदोखी मनई क मरब्या? 5इब्राहीम मोसे खुद कहेस, ‘इ मेहरारु मोर बहिन अहइ’ अउ मेहरारु भी कहेस, ‘इ मनई मोर भाई अहइ।’ मई बेदोखी अहउँ। मई नाहीं जानत रहेउँ कि मई का करत हउँ?”

6तब परमेस्सर अबीमेलक स सपन मँ कहेस, “हाँ, मई जानत हउँ कि तू निर्दोख अहा अउर मई इ भी जानत हउँ कि तू इ नाहीं जानत रह्या कि तू का करत रह्या? मई तोहका बचाएँउ। मई तोहका आपन खिलाफ पाप नाहीं करइ दिहेउँ। इ मई ही रहेउँ जउन तोहका ओकरे संग सोवइ नाहीं दिहेउँ। 7एँह बरे इब्राहीम क ओकर मेहरारु लौटाइ द्या। इब्राहीम एक ठु नबी बाटइ। उ तोहरे बरे पराथना करी अउर तू जिअत रहब्या मुला जदि तू सारा क नाहीं लौटउब्या तउ मई सरापत हउँ कि तू मरि जाब्या। तोहार सारा परिवार तोहरे संग मरि जाइ।”

8एँह बरे दूसर दिन बहोत भिंसारे अबीमेलक आपन सबइ नउकरन क बोलाएस। अबीसेलेक सपने मँ भइ सारी बातन क ओनका बताएस। नउकर बहोतइ डेराइ गवा। 9तब अबीमेलक इब्राहीम क बोलाएस अउ ओसे कहेस, “तू हम

पचन क संग अइसा काहे किहा? मई तोहार का बिगाड़ेउँ ह? तू इ झूठ काहे बोल्या कि उ तोहार बहिन अहइ। तू हमरे राज प बहोत बड़ी बिपत्ति लइ आवा ह। इ बात तोहका मोरे संग नाहीं करइ चाही। 10तू कउने बात स डेरात अहा? तू इ सबइ बातन मोरे संग काहे किहा ह?”

11तब इब्राहीम कहेस, “मई ससान रहेउँ। काहेकि मई सोचेउँ कि हिआँ कउनो भी परमेस्सर क आदर नाहीं करत। मई बिचारेउँ कि सारा क पावइ बरे कउनो मोका मारि डाइ। 12उ मोर मेहरारु अहइ, मुला उ मोर बहिन भी अहइ। उ मोरे पिता क बिटिया तउ अहइ मुला मोरी महतारी क बिटिया नाहीं अहइ। 13परमेस्सर मोका मोरे पिता क घरे स दूर पहुँचाए अहइ। परमेस्सर कइयऊ अलग अलग पहुँटा मँ मोका भटकाएस। जब अइसा भवा तउ मई सारा स कहेउँ, ‘मोरे बरे कछू करा। जहाँ कहुँ भी हम जाइ तू मनइयन स कहा कि तू मोर बहिन अहा।”

14अब अबीमेलक जान लिहेस कि का होइ चुका बाटइ। एँह बरे अबीमेलक इब्राहीम क सारा लौटाइ दिहस। अबीमेलक इब्राहीम क कछू भेड़िन, जनावर अउ दास भी दिहस। 15अबीमेलक कहेस, “तू चारिहुँ कइँती लखि ल्या। इ मोर देस अहइ। तू जउने ठउर चाहा, रहि सकत ह।”

16अबीमेलक सारा स कहेस, “लखा, मई तोहरे भाई क एक हजार चँदी क टूक दिहेउँ ह। मई इ एँह बरे किहेउँ ह कि जउन कछू भवा ओहसे मई दुःखी अहउँ। मई चाहत हउँ कि हर एक मनई इ लखइ कि मई नीक काम किहेउँ ह।”

17-18परमेस्सर अबीमेलक क ओकर पत्नी क अउर ओकर मेहरारु नउकरन क लरिका जन्मइ क अयोगग बनाएस। परमेस्सर उ एँह बरे किहस कि उ इब्राहीम क मेहरारु सारा क बइठाइ लिहे रहा। मुला इब्राहीम परमेस्सर स पराथना किहस अउ परमेस्सर अबीमेलक, ओकर मेहरारुअन अउ दास-कन्या क चंगा कइ दिहस।

### आखिर मँ सारा क एक लरिका

**21** अब यहोवा सारा लगे आपन काहेकि उ कहेस रहा, अउर उ सारा बरे उहइ किहेस जउन उ करइ क वादा किहे रहा। 2सारा गरभ धरेस अउर इब्राहीम बरे ओकर बुढ़ापे मँ एक लरिका क जन्मेस। सही टेम प जइसा परमेस्सर वचन दिहे रहा वइसा ही भवा। 3सारा पूत जन्मेस अउ इब्राहीम ओकर नाउँ इसहाक राखेस। 4परमेस्सर क हुकुम क मुताबिक इब्राहीम आठ दिन होए प इसहाक क खतना किहस।

5इब्राहीम सौ बरिस क रहा जब ओकर पूत इसहाक पइदा भवा 6अउ सारा कहेस, “परमेस्सर मोका सुखी बनाइ दिहस ह। हर एक मनई जउन इ बारे मँ सुनी उ मोहसे खुस होइ। 7कउनो भी इ नाहीं सोचत कि मई सारा इब्राहीम बरे पूत देबउँ। मुला मई इब्राहीम क ओकरे बुढ़ापे क उमर मँ एक ठु पूत दिहेउँ ह।”

### घरे मँ परेसानी

8अब बचवा ऐतना बाढ़ गवा कि महतारी क दूध तजिके ठोस भोजन सुरु करइ। जउने दिन ओकर दूध छोड़वावा गवा



उ दिन इब्राहीम एक बहोत बड़का भोज दिहस। 9बीते भए टेम में मिस्त्र क दासी एक ठु पूत क जन्मेस। इब्राहीम उ पूत क बाप रहा। सारा लखेस कि हाजिरा क पूत इसहाक क तंग करत ह। 10एँह बरे सारा इब्राहीम स कहेस, “उ दासी मेहरारु अउ ओकरे पूत क हिआँ पठइ द्या। जब हम पचे मरब हम पचन क सबहिं चिजियन इसहाक क मिलिहीं। मई नहीं चाहत कि ओकर पूत इसहाक क संग ओन चिजियन में हीसा लेइ।”

11इस्माएल क बरे इ कीन्ह जाना एका सोच इब्राहीम क बहोत ज्यादा दुःखी कइ दिहन। 12मुला परमेस्सर इब्राहीम स कहेस, “उ लइका क बारे में दुःखी जिन हवा। उ दासी क बारे में दुःखी जिन हवा। जउन सारा चाहत ह तू उहइ करा। तोहार बंस इसहाक क बंस स चली। 13मुला मई तोहरे दासन क पूतन क असीसब। उ तोहार पूत अहइ एँह बरे मई ओकरे परिवार क भी एक बड़ा रास्ट्र बनाउबा।”

14दूसर दिन बहोत भिन्सारे इब्राहीम कछू भोजन अउ पानी लिहस। इब्राहीम इ चीजन हाजिरा क दइ दिहस। हाजिरा उ सबहि चीजन क लिहस अउ बच्चा क संग दूर चली गइ। हाजिरा उ ठउर तजि दिहस अउर उ बेसीबा क रेगिस्तान में भटकइ लाग।

15कछू टेम पाछे हाजिरा क सारा पानी खतम होइ गवा। पिअइ बरे कछू पानी भी नहीं बचा। एँह बरे हाजिरा आपन लरिका क एक झाड़ी तरे राखेस। 16हाजिरा हुआँ स कछू दूर गइ। तब उ रुकी अउ बइठि गइ। हाजिरा सोचेस कि ओकर पूत मरि जाइ काहेकि हुआँ पानी नहीं रहा। उ ओका मरता भवा नहीं देखइ चाहत रही। उ हुआँ बइठि गइ अउ रोवइ लाग।

17यहोवा लरिका क रोउब सुनेस। सरग स एक दूत हाजिरा क लगे आवा। उ पूछेस, “हाजिरा, तोहका का तकलीफ अहइ। डेराउ नहीं काहेकि परमेस्सर हुवाँ लरिका क रोउब सुन लिहस। 18जा, अउर आपन पूत क सँभारा। ओकर हाथ धइ ल्या अउ ओका संग लइ चला। मई ओका बहोत बड़का रास्ट्र क पिता बनाउबा।”

19परमेस्सर हाजिरा क आँखी इ तरह खोलेस कि उ एक पानी क कुआँ निहारि सकी। एँह बरे हाजिरा कुआँ प गइ अउ उ थैला क पानी स भरि लिहस। तब उ बच्चा क पानी पिअइ बरे दिहस। 20बच्चा जब तक बाढ़ा नहीं तब तलक परमेस्सर ओकरे संग रहा। इस्माएल रेगिस्तान में रहा अउ एक सिकारी बन गवा। उ बहोत बढ़िया तीर चलाउब सीख लिहस। 21ओकर महतारी मिस्त्र स ओकरे बरे दुल्हन लइ आइ। उ पचे सबइ पारान रेगिस्तान में रहइ लागेन।

### इब्राहीम अबीमेलेक स सौदा करत ह

22तब अबीमेलेक अउ पीकोल इब्राहीम स बात किहन। पीकोल अबीमेलेक क फउज क सेनापति रहा। उ पचे इब्राहीम स कहेन, “तू जउन कछू करत अहा, परमेस्सर तोहार साथ देत ह। 23एँह बरे तू परमेस्सर क समन्वा इ बचन द्या कि तू मोरे अउ मोरे बच्चन बरे भला रहब्या। तू इ बचन द्या कि तू मोरे बरे अउ जहाँ तू रह्या ह उ देस बरे दयालु रहब्या। तू इ भी बचन द्या कि मई तोहरे बरे

जेतना दयालु रहा ओतना तू मोहे प दयालु रहब्या।” 24इब्राहीम कहेस, “मई बचन देत हउँ कि तोहसे मई वइसा ही बिउहार करब जइसा तू मोरे संग बिउहार किया ह।” 25तब इब्राहीम अबीमेलेक क ओराहना दिहस। इब्राहीम एँह बरे ओराहना दिहस कि अबीमेलेक क नउकरन पानी क कुआँ प कब्जा कइ लिहन।

26अबीमेलेक कहेस, “एँकरे बारे में मई इ पहिली बार सुनेउँ ह। मोका पता नहीं बाटइ, कि इ के किहसे ह अउर तू भी एँकर चर्चा मोहसे एँहसे पहिले कबहुँ नहीं किह्या।”

27एँह बरे इब्राहीम अउ अबीमेलेक एक समझौता किहन। इब्राहीम समझौता क सबूत क रुप में अबीमेलेक क कछू भेड़िन अउ गोरु दिहस। 28इब्राहीम सात ठु मादा भेड़ी क बच्चा भी अबीमेलेक क समन्वा लावा। 29अबीमेलेक इब्राहीम स पूछेस, “तू इ सबइ सात ठु भेड़ी क मादा बच्चन क काहे अलगाइ कइ दिह्या?”

30इब्राहीम कहेस, “जब तू इ सातहु\* भेड़ी क बच्चन स मोहसे लेब्या तउ इ सबूत रही कि इनारा मइ खनेउँ ह।”

31एँह बरे एँकरे पाछे उ इनारा बेसीबा कहवावा गवा। उ पचे इनारा क इ नाउँ दिहन काहेकि इ उ ठउर रहा जहाँ उ पचे एक दूसर क बचन दिहे रहेन।

32इ तरह इब्राहीम अउ अबीमेलेक बेसीबा में एक समझौता किहन। तब अबीमेलेक अउ सेनापति दुइनउँ पलिस्तियन क पहुँटा में लौटि गएन।

33इब्राहीम बेसीबा में झाऊ क एक बृच्छ लगाएस। उ ठउरे प इब्राहीम परमेस्सर, जउन हमेसा रहत ह स पराथना किहस। 34अउर इब्राहीम पलिस्तियन क देस में बहोत समइ तलक रहा।

### इसहाक क बलि क रूप में देन

22 इ बातन क पाछे परमेस्सर इब्राहीम क पतियाइ क परीच्छा लेब तय किहस। परमेस्सर ओसे कहेस, “इब्राहीम!” अउ इब्राहीम कहेस, “हाँ!”

2परमेस्सर कहेस, “आपन पूत ल्या, आप इकलौता पूत, इसहाक जेका तू पिरिम करत ह मोरिय्याह प जा। तू उ पहाड़े प जा जेका मई तोहका देखौउब। तू हुआँ आपन पूत क बलिदान देब्या अउ ओका होम बलि क सरुप में मोका अर्पण करिब्या।”

3भिन्सारे इब्राहीम उठा अउ उ गदहा क तइयार किहस। इब्राहीम इसहाक अउ दुइ नउकरन क संग लिहस। इब्राहीम बलि बरे काठ काटिके तइयार किहस। तब उ पचे उ ठउरे प गएन जहाँ जाइ बरे परमेस्सर कहेस। 4उ पचे तीन दिना तलक जात्रा किहेन। ओकरे पाछे इब्राहीम ऊपर लखेस अउ दूरी प उ ठउरे क निहारेस जहाँ उ पचे जात रहेन। 5तब इब्राहीम आपन नउकरन स कहेस, “हिआँ गदहा क संग ठहरि जा। मई आपन पूत क उ ठउरे लइ जाब अउ आरधना करब। तब हम पाछे लौटि आउबा।”

6इब्राहीम बलि बरे लकड़ी क आपन पूत क काँधे प धरेस। इब्राहीम एक खास छुरी अउ आगी लिहस। तब

सात बरे हिब्रू सब्द या बचन दे जइसा अहइ। यह बरे सात गोरु ओका बचन देइ क सबूत रहेन।

इब्राहीम अउ ओकर पूत दुइनउँ आराधना बरे उ ठउरे प एक संग गएन।

7इसहाक आपन बाप इब्राहीम स कहेस, “पिताजी!”

इब्राहीम जवाब दिहस, “हैं, बेटवा।” इसहाक कहेस, “मई ईधन अउ आगी तउ लखत हउँ, मुला उ भेड़ा कहीं बाटइ जेका हम बलि क रुप में बारब?” 8इब्राहीम जवाब दिहस, “बेटवा, परमेस्सर बलि बरे भेड़ा अपने आप जुटावत बाटइ।”

### इसहाक बचावा गवा

इ तरह इब्राहीम अउ ओकर पूत उ ठउर संग संग गएन। 9उ पचे उ ठउरे प पहोंचेन जहीं परमेस्सर पहोंचइ क कहे रहा। हुओं इब्राहीम बलि क एक वेदी बनाएस। इब्राहीम वेदी प काठ धरेस। तब इब्राहीम आपन पूत क बाँधेस। इब्राहीम इसहाक क वेदी क काठे प धरेस। 10तब इब्राहीम आपन छुरी निकारेस अउ आपन पूत क मारइ क तइयारी किहस।

11तब यहोवा क सरगदूत इब्राहीम क रोक दिहस। दूत सरग स गोहराएस अउ कहेस, “इब्राहीम, इब्राहीम।” इब्राहीम जवाब दिहेस, “हैं।”

12सरगदूत कहेस, “तू आपन पूत क जिन मारा या ओका कउनो तरह क चोट जिन पहोंचावा। मई अब लखि लिहउँ कि तू परमेस्सर क सम्मान करत ह अउ ओकर हुकुम मानत ह। मई लखत हउँ कि तू आपन इकलौता पूत क मोरे बरे मारइ क तइयार बाटया।”

13इब्राहीम ऊपर निगाह किहेस अउ एक भेड़ा क लखेस। भेड़ा क सींग झाड़ी में अरझ गइ रहिन। एँह बरे इब्राहीम हुओं गवा अउर भेड़ा क धइ लिहस अउ ओका मारि डाएस। इब्राहीम भेड़ा क आपन पूत क जगह प बलि दिहस। 14एँह बरे इब्राहीम उ जगह क नाउँ “यहोवा यिरे” राखेस। आज भी लोग कहत हैं, “इ पहाड़े क चोटी प यहोवा क लखा जाइ सकत ह।”

15यहोवा क सरगदूत सरग स इब्राहीम क दूसरी दाई गोहराएस। 16सरगदूत कहेस, “तू मोरे बरे आपन पूत क मारइ बरे तइयार रह्या। इ तोहार इकलौता पूत रहा। तू मोरे बरे अइसा किहा ह एँह बरे मई, यहोवा तोहका वचन देत अहउँ कि 17मई तोहका सचमुच ही असीसब। मई तोहका ओतना ही संतानन देब जेतना अकासे में तारा बाटइँ। इ सबइ एँतना जियादा लोग होइहीं जेतना समुदर क किनारे बालू क कण अउ तोहार लोग आपन सबहिं दुस्मनन क हरइहीं। 18संसार क सबहिं रास्ट्र तोहरे परिवार क जरिये आसीबादि पइहीं। मई इ एँह बरे करब काहेकि तू मोर हुकुम क मान्या ह।”

19तब इब्राहीम आपन नउकरन क लगे लउटा। उ पचे बेसीबा तलक वापसी जात्रा किहन अउ इब्राहीम हुओं रहइ लाग।

20एकरे पाछे, इब्राहीम क इ समाचार मिला। समाचार इ रहा, “तोहार भाई नाहोर अउ ओकर मेहरारु मिल्का क अब गदेलन अहइँ। 21पहिला पूत ऊस अहइ। दूसर पूत क नाउँ बूज अहइ। तीसर पूत अराम क बाप कमूल अहइ। 22एकरे अलावा केसेद, हजो, पिल्दास, यिदलाप अउ बतूल

बाटइ।” 23बतूल रिबका क बाप रहा। मिल्का इ सबइ आठहु पूतन क महतारी रही अउ नाहोर पिता रहा। नाहोर इब्राहीम क भाई रहा। 24नाहोर क दूसर चारि लरिकन ओकरी मेहरारु नउकर स रहेन। इ सबइ पूत तेबह, गहम, तहस अउर माका रहेन।

### सारा मरत ह

23 सारा एक सौ सत्ताईस बरिस जितत रही। 2कनान पहुँटा क किर्यतर्बा (हेब्रोन) सहर में मरी। इब्राहीम बहोत दुःखी भवा अउ ओकरे बरे हुओं रोएस। 3तब इब्राहीम मरी भइ मेहरारु क तजेस अउ हिल्ली लोगन स बात करइ गवा। उ कहेस, 4“मई इ पहुँटा में नाहीं रहत। मई हिओं सिरिफ एक रही अहउँ। एँह बरे मोरे लगे आपन मेहरारु क गाइइ क कउनो जगह नाहीं बाटइ। मई कछू भुइँया चाहत हउँ जेहमें आपन मेहरारु क दफनाइ सकूँ।”

5हिल्ली लोगन इब्राहीम क जवाब दिहेन, 6“साहेब, आप हम पचन क बीच परमेस्सर क सक्तीसाली राजकुमार अहइँ। आप आपन मरे भए क दफनावइ बरे सबन त नीक ठउरे प, जउन हम पचन क पास अहइ, लइ सकत हैं। आप हम पचन क कब्रिसतानन में स कउनो भी जगह, जउन आप चाहत हैं, लइ सकत हैं। हम लोगन में स कउनो भी आपक आपन मेहरारु दफनावइ स नाहीं रोकी।”

7इब्राहीम उठा अउ मनइयन कइँती मूँड़ि निहुराएस। 8इब्राहीम ओनसे कहेस, “जदि आप लोग सचमुच मोर मरी भइ मेहरारु क दफनावइ मैं मोर मदद करइ चाहत हैं तउ सोहर क पूत एप्रोन स मोरे बरे बात करइँ। 9मई मकपेला क गुफा क बसेहब पसन्द करब। एप्रोन एकर मालिक अहइ। इ ओकरे खेत क सिरहने प बाटइ। मई एकरे दाम क मुताबिक ओका पूरी कीमत देब। मई चाहत अहउँ कि आप लोग इ बात क साच्छी रहइँ कि मई इ भुइँया क कब्रिस्तान क रुप में खरीदत अहउँ।”

10एप्रोन हुओं मनइयन बीच बइठा रहा। एप्रोन इब्राहीम क जवाब दिहस, 11“नाहीं, साहेब। मई आपन सबइ लोगन क समन्वा इ भुइँया तोहका देब। मई आपक उ गुफा देब। मई इ आप क एँह बरे देब कि आप एहमें आपन मेहरारु क दफनाइ सकइँ।”

12तब इब्राहीम हिल्ली मनइयन क समन्वा आपन मूँड़ि निहुराएस। 13इब्राहीम सबहिं लोगन क समन्वा एप्रोन स कहेस, “मुला मई तो खेते क पूरा दाम देइ चाहत अहउँ। मोर धन अंगीकार करइँ। मई आपन मरे भए क एहमें गाइब।”

14एप्रोन इब्राहीम क जवाब दिहेस, 15“साहेब, मोरहु सुनइँ। चार सौ चाँदी क सेकेल। हमरे अउ आप क बीच में इ धन कछू भी नाहीं। भुइँया ल्या अउ आपन मरी भइ मेहरारु क गाइ द्या।”

16इब्राहीम समझेस कि एप्रोन ओका भुइँया क दाम बतावत अहइ। एँह बरे हिल्ली लोगन क गवाह मानिके, इब्राहीम चाँदी क चार सौ सेकेल एप्रोन बरे तौलेस। इब्राहीम पइसा उ बइपारी क दइ दिहेस जउन इ भुइँया क बेचइ क धन्धा करत रहा।

17-18इ तरह एप्रोन क खेत क मालिक बदल गएन। इ खेत मग्रे क पूरब मकपेला में रहा। इब्राहीम उ खेत क, गुफा क अउर उ खेत क बृच्छन क मालिक होइ गवा। सहर क सबहि लोग एप्रोन अउ इब्राहीम क बीच भए समझौता क लखेन। 19एकरे पाछे उ आपन मेहरारु सारा क कनान देस क मग्रे क निअरे जउन कि हेब्रोन में अहइ मकफेला क क निअरे उ खेते क गुफा में गाड़ेस। 20इब्राहीम खेत अउ ओकरे गुफा क हिल्ली लोगन स खरीदेस। इ ओकर संपत्ति होइ गइ, अउ उ एँकर बड़परब कब्रिस्तान क रुप में किहस।

### इसहाक बरे मेहरारु

**24** इब्राहीम बहोत बूढ़ा होइके भी जिअत रहा। यहोवा इब्राहीम क आसीबाद दिहेस अउ ओकरे हर एक काम क सफल होइ दिहेस। 2इब्राहीम क एक सवन त पुरान नउकर रहा जउन इब्राहीम क जउन कछू रहा ओकर प्रबंधक रहा। इब्राहीम उ नउकर क बोलाएस अउ कहेस, “आपन हाथ मोरे जाँघे क नीचे धरा। 3अब मई चाहत हउँ कि तू मोका एक बचन द्या। धरती अउ आकास क परमेस्सर यहोवा क समन्वा तू बचन द्या कि तू कनान क कउनो बिटिया स मोरे पूत क बियाह नाहीं होइ देब्या। हम पचे उ कनानियन क मध्य में रहित ह, मुला कनानी लड़की स ओकर बियाह न करइ द्या। 4तू मोरे देस अउ मोरे आपन मनइयन में लउटिके जा। हुआँ मोर पूत इसहाक बरे एक दुलहिन हेरा।”

5नउकर ओसे कहेस, “इ तउ होइ सकत ह कि उ दुलहिन मोरे संग इ देस में लौटब न चाहइ। तब, का मई तोहरे पूत क तोहरी जन्म भूमि में लइ जाऊँ?”

6इब्राहीम ओसे कहेस, “नाहीं! तू हमरे पूत क उ देस में न लइ जा। 7यहोवा, सरग क परमेस्सर मोका मोरी जन्म भूमि स हिआँ लिआवा। उ देस मोर बाप अउ परिवार क घर रहा। मुला यहोवा इ बचन दिहस कि इ नवा प्रदेश मोरे परिवार वालन क होइ। यहोवा आपन एक सरगदूत तोहरे समन्वा पठाएस जेहसे तू मोरे पूत बरे दुलहिन चुनि सका। 8मुला अगर बिटिया तोहरे संग आउब मना करइ तउ तू आपन बचन स छुटकारा पाइ जाब्या। मुला तू मोरे पूत क उ देस में वापिस जिन लइ जा।”

9इ तरह नउकर आपन मालिक क जाँघे तरे आपन हाथ धइके बचन दिहेस।

### खोज सुरु होत ह

10नउकर इब्राहीम क दस ठु ऊँट लिहेस अउ उ जगह स उ चला गवा। नउकर कइउ तरह क सुन्नर भेंट आपन संग लइ गवा। उ नाहोर क सहर मेसोपोटामिया गवा।

11उ सहर क बाहर क कुआँ प गवा। इ बात साँझ क भइ जब मेहररुअन पानी भरइ बाहेर आवति हीं। नउकर हुवँइ ऊँटन क गोड़े क घुटना क बल बइठाएस।

12नउकर कहेस, “हे यहोवा, तू मोर सुआमी इब्राहीम क परमेस्सर अहा। आज तू ओकरे पूत बरे मोका एक दुलहिन दिआवा। कृपा कइके मोर मालिक इब्राहीम प दया करा।

13मई हिआँ इ पानी क कुआँ क लगे ठाड़ अहउँ अउर पानी भरइ बरे सहर स बिटियन आवति अहइँ। 14मई एक ठु खास चीन्हा क बाट जोहत अहउँ जेहसे मई जान सकउँ कि इसहाक बरे कउन सी बिटिया नीक होइ। इ विसेख चीन्हा अहइ। मई बिटिया स कहेब कि ‘मेहरबानी कइके आपन गगरी क खाले धरइँ जेहसे मई पानी पी सकउँ।’ मई तब समझब कि इ नीक लड़की अहइ जब उ कही, ‘पिआ, अउर मई तोहरे ऊँटन बरे भी पानी देब।’ जदि अइसा होइ तउ तू साबित कइ देब्या कि इसहाक बरे इ बिटियन नीक बाटइ। मई बूझब कि तू मोरे सुआमी प कृपा किह्या ह।”

### एक दुलहिन मिली

15तब नउकर क पराथना पूरी होइ स पहिले ही रिबका नाउँ क एक लड़की इनारा प आइ। रिबका बतूएल क बिटिया रही। बतूएल इब्राहीम क भाई नाहोर अउ मिल्का क पूत रहा। रिबका आपन काँधे प पानी क गगरी लइके इनारा प आइ रही। 16लड़की बहोत सुन्नर रही। उ कुआँरी रही। उ कउनो मनई क संग कबहुँ नाहीं सोइ रही। उ आपन कूँड़ा भरइ बरे इनारा प आइ। 17तब नउकर ओकरे नगिचे तलक दौड़िके आवा अउ बोला, “मेहरबानी कइके आपन कूँड़ा स पिअइ बरे तनिक पानी द्या।”

18रिबका हाली हाली काँधे स कूँड़ा क खाले उतारेस अउ ओका पानी पिआएस। रिबका कहेस, “महासय, इ पिअइँ।” 19जइसेन ही उ पिअइ बरे कछू पानी देब खतम किहेस। रिबका कहेस, “मई आप क ऊँटयन क भी पानी पिअइ बरे दइ सकत हउँ।” 20एँह बरे रिबका फउसन कूँड़ा क सब पानी ऊँटयन बरे बना भवा हउदा में उडैरेस। तब उ अउर पानी लइ आवइ बरे इनारा क दौड़ गइ अउ उ सब ऊँटियन क पानी पिआएस।

21नउकर ओका चुपचाप धियान स लखेस। उ इ तय करइ चाहत रहा कि यहोवा साइद इ बात क मान लिहेस ह अउ ओकरी जात्रा क सुफल बनाइ दिहस ह। 22जब ऊँटियन पानी पी लिहन तब उ रिबका क आधा सेकेल जोखिके एक ठु सोना क मुनरी दिहेस। उ ओका दुइ बाजूबंद भी दिहेस जउन जोखे में हर एक दस सेकेल रहेन। 23नउकर पूछेस, “तोहार बाप कउन अहइ? का तोहरे बाप क घरे में एँतनी जगह बाटइ कि हम पचन क रहइ अउ सोवइ क संजाम होइ सकइ?”

24रिबका जवाब दिहेस, “मोर बाप बतूएल अहइँ जउन मिल्का अउ नाहोर क पूत अहइँ।” 25तब उ कहेस, “अउर हौँ हम पचन क लगे तोहरे ऊँट बरे चारा बाटइ अउ तोहरे सोवइ बरे जगह अहइ।”

26नउकर मूँड़ि निहुराएस अउ यहोवा क आराधना किहेस। 27नउकर कहेस, “मोरे सुआमी इब्राहीम क परमेस्सर यहोवा क धन्न हो। यहोवा हमरे सुआमी प दयालु अहइ। यहोवा मोका आपन सुआमी क पूत बरे सही लड़की दिहे अहइ।”

28तब रिबका दौड़ी अउ जउन कछू भवा रहा आपन परिवार क बताएस। 29-30रिबका क एक भाई रहा। ओकर नाउँ लाबान रहा। रिबका ओका उ बातन क बताएस जउन ओसे उ मनई किहे रहा। लाबान ओकर बातन अनकत रहा।

जब लाबान मुनरी अउ बहिनी क बाँह प बाजूबन्द निहारेस तउ उ धाड़के इनारा प पहाँचा अउर हुआँ उ मनई इनारा क लगे, ऊँटियन क बगल में ठाइ रहा।

31लाबान कहेस, “साहेब, आप पधारइँ आप क सुआगत अहइ। आप क हिआँ बाहेर खड़ा नाही रहब बाटइ। मई आपक ऊँटियन बरे एक जगह बनइ दीन्ह ह अउ आप सोवइ बरे एक तु कमरा ठीक कइ दीन्ह ह।”

32एँह बरे इब्राहीम क नउकर लाबान क घर गवा। लाबान ऊँटन पइ स बोझ उतारइ में ओकर मदद किहस अउ ऊँटन क खाइ बरे चारा दिहस। तब लाबान पानी दिहस जेहसे उ मनई अउ ओकरे संग आए भएन दूसर नउकरन आपन गोड़ पखारि सकइँ। 33तब लाबान ओका खाइ बरे दिहस। मुला नउकर खइया क खाइ स मना कइ दिहस। उ कहेस, “मई तब तलक भोजन न करब जब तलक मई इ नाही बताइ देउँ कि मई हिआँ काहे बरे आवा अहउँ।”

एँह बरे लाबान कहेस, “तब हम पचन क बतावा।”

### रिबका इसहाक क मेहरारु बनी

34नउकर कहेस, “मई इब्राहीम क नउकर अहउँ। 35यहोवा हमरे सुआमी प हर एक जगह कृपा किहस ह। मोर मालिक महान मनई होइ ग अहइँ। यहोवा इब्राहीम क कइउ भेड़िन क झुण्ड अउ गोरुअन क झुण्ड दिहे अहइ। इब्राहीम क लगे ढेरि क सोना, चाँदी अउ नउकर अहइँ। इब्राहीम क लगे बहोत स ऊँट अउ गदहा अहइँ। 36सारा, मोर सुआमी क पत्नी अहइ। जब उ बहोतइ बुढ़ाइ गइ उ एक पूत क जन्म दिहस अउ हमार सुआमी आपन सब कछू उ पूत क दइ दिहस ह। 37मोर सुआमी मोका एक बचन देइ बरे बेबस किहस। मोर सुआमी मोसे कहेस, ‘तू मोरे पूत क कनान क लरिकी स कउनो भी तरह बियाह नाही करइ देब्या। हम पचे ओनके बीच रहित ह, मुला मई नाही चाहित कि उ कउनो कनानी लरिकी स बियाह करइ। 38एँह बरे तोहका बचन देइ क होइ कि तू मोरे बाप क देस जाब्या। मोरे परिवार में जा अउ मोरे पूत बरे एक तु दुलहिन चुना।’ 39मई आपन सुआमी स कहेउँ, ‘इ होइ सकत ह कि उ दुलहिन मोरे संग इ देस में आवइ स इन्कार करेस।’ 40मुला मोर मालिक कहेस, ‘मई यहोवा क सेवा करत हउँ अउ यहोवा तोहरे संग आपन सरगदूत पठई अउ तोहार मदद करी। तोहका हुआँ मोरे आपन लोगन में स मोरे पूत बरे एक दुलहिन मिली। 41मुला जदि तू मोरे पिता क देस जात ह अउर उ पचे मोरे पूत बरे एक तु दुलहिन देब मना करत हीं तउ तोहका इ बचन स छुटकारा मिलि जाइ।’

42“आजु मई इ इनारा प आवा हउँ अउर मई कहेउँ ह, ‘हे यहोवा मोर सुआमी क परमेस्सर कृपा कइके मोर जात्रा सुफल बनावा। 43मई हिआँ इनारा क लगे रुकब अउ पानी भरइ बरे आवइ वाली नवखिल मेहरारु क जोहब। तब मई कहब, “कृपा कइके आप आपन कूँड़ा स पिअइ बरे पानी द्या।” 44नीक बिटिया ही खास तरह स जवाब देइ। उ कही, “इ पानी पिआ अउ मई तोहरे ऊँटियन बरे पानी लावत अहउँ।” इ तरह मई जानब कि इ उहइ मेहरारु अहइ जेका यहोवा मोर सुआमी क पूत बरे चुने अहइ।’

45“मोर पराथना पूरी होइ क पहिले ही रिबका इनारा प पानी भरइ आइ। पानी क कूँड़ा उ आपन काँधे प लइके धरे रही। उ इनारा तलक गइ अउ उ पानी भरेस। मई एहसे कहेउँ, “कृपा कइके मोका तनिक पानी द्या। 46उ फउरन काँधे स कूँड़ा क निहुराएस अउ मोरे बरे पानी उड़ेरेस अउ कहेस, ‘इ पिअइँ अउ मई आप क ऊँटियन बरे पानी लिआउब।’ एँह बरे मई पानी पिएउँ अउ आपन ऊँटन क भी पानी पियाएउँ। 47तब मई एहसे पूछेउँ, ‘तोहार पिता कउन अहइँ?’ इ जवाब दिहस, ‘मोर पिता बतूल अहइ। मोरे पिता क महतारी-बाप मिल्का अउ नाहोर अहइँ।’ तबइ मई एँका मुनरी अउ बाँहे बरे बाजूबन्द दिहेउँ ह। 48उ टेम मई आपन मूँड़ी निहुराएउँ अउ यहोवा क धन्न कहेउँ। मई आपन सुआमी इब्राहीम क परमेस्सर यहोवा क प्रसंसा किहा। मई ओका धन्न कहेउँ काहेकि उ सोझेइ मोरे सुआमी क भाई क नतिनी तलक मोका पहाँचाएस। 49अब बतावा कि तू का करब्या? का तू मोरे सुआमी प दयालु अउ स्वामिभक्त होब्या अउ आपन बिटिया ओका देब्या? या तू आपन बिटिया देब मना करब्या? मोका बतावा, जेहसे, मई इ समुझ सकउँ कि मोका का करइ क बाटइ।”

50तब लाबान अउ बतूल जवाब दिहन, “हम पचे इ लखत अही कि इ यहोवा कइँती स बाटइ। एँका हम सबइ टारि नाही सकित। 51रिबका तोहार अहइ। ओका ल्या अउ जा। आपन सुआमी क पूत स एका बियाह करइ द्या। इहइ अहइ जेका यहोवा चाहत ह।”

52इब्राहीम क नउकर सुनेस अउ उ यहोवा क समन्वा भुइँया प निहुरा। 53तब उ रिबका क उ सबइ भेंट दिहस जउन उ संग लिआवा रहा। उ रिबका क सोना अउ चाँदी क गहना अउ बहोत स सुन्नर ओढ़ना दिहस। उ, ओकरे भाई अउ महतारी क कीमती भेंट दिहस। 54नउकर अउ ओकरे संग क मनई हुआँ ठहरेन अउ खाएन अउर पिएन। उ पचे हुआँ राति भइ ठहरेन। उ पचे दूसर दिन भिन्सारे उठेन अउ बोलें “अब हम आपन मालिक क लगे जाब।”

55रिबका क महतारी अउ भाई कहेन, “रिबका क हम लोगन क लगे कछू दिन अउ ठहरइ द्या। ओका दस दिन तलक हमरे संग ठहरइ द्या। एँकरे पाछे उ जाइ सकत ह।”

56मुला नउकर ओनसे कहेस, “यहोवा मोर जात्रा सफल किहस ह। अब मोसे जिन जोहावा। मोका आपन मालिक क लगे लौटि जाइ द्या।”

57रिबका क भाई अउ महतारी कहेन, “हम पचे रिबका क बोलाउब अ ओसे पूछब कि उ का चाहत ह?” 58उ पचे रिबका क बोलाएन अउ ओसे कहेन, “का तू इ मनई क संग अबहिं जाइ चाहत अहा?” रिबका कहेस, “हाँ, मई जाब।”

59एँह बरे उ पचे रिबका क इब्राहीम क नउकर अउ ओकरे संगी लोगन क साथे जाइ दिहन। रिबका क धाई भी ओनके संग गइ। 60जब उ जाइ लाग अउ उ पचे रिबका स बोलें,

“हमार बहिनी, तू लाखन मनइयन क महतारी बना अउ तोहार संतान आपन दुम्पनन क हरावई अउ ओनके सहस्रन क हड़प लेई।”

61तब रिबका अउ धाई ऊँट प सवार भइन अउ नउकर अउ ओकरे संगी लोगन क पाछे चलइ लागिन। इ तरह नउकर रिबका क संग लिहस अउ घरे लउटइ बरे जात्रा सुरु किहस।

62इ टेम इसहाक बेर लहैरोई क तजि दिहे रहा अउ नेगेव में रहइ लाग। 63एक संझा क इसहाक मइदान में टहरत रहा। इसहाक नजर दउड़ाएस अउ बहोत दूर स ऊँटन क आवत लखेस।

64रिबका लखेस अउ इसहाक क निहारेस। तब उ ऊँट स कूदि पड़ी। 65उ नउकर स पूछेस, “हम मनइयन स मिलइ बरे खेतन में टहरत उ मनई कौन अहइ?”

नउकर कहेस, “इ मोरे सुआमी क पूत अहइ।” एँह बरे रिबका आपन मुँह क पर्दा में छिपाइ लिहस।

66नउकर इसहाक क उ सबइ बातन क बताएस जउन घटि गइ रहिन। 67तब इसहाक बिटिया क आपन महतारी क तम्बू में लिआवा। उहइ दिन रिबका इसहाक क मेहरारु होइ गइ। इसहाक ओसे बहोत पियार करत रहा। एँह बरे इसहाक क आपन महतारी क मउत क पाछे भी धीरज अउ दिलासा मिली।

### इब्राहीम क परिवार

**25** इब्राहीम फुन बियाह किहस। ओकर नई मेहरारु क नाउँ कतूरा रहा। 2कतूरा जिम्नान, योच्छान, मिधान, मिदान यिसबाक अउ सूह क जन्म दिहेस। 3योच्छान, सबा अउ ददान क बाप रहा। ददान क संतानन अस्सूर, लुम्मी अउ लतूसी लोग रहेन। 4मिद्यान क पूत एपा, एपेर, हनोक, अबीदा अउ एल्दा रहेन। इ सबहिँ पूत इब्राहीम अउ कतूरा स पइदा भएन। 5-6इब्राहीम मरइ स पहिले आपन मेहरारु नउकरन क पूतन क कछू भेंट दिहस। इब्राहीम पूतन क पूरब पठएस। उ एँनका इसहाक स दूर पठएस। एँकरे पाछे इब्राहीम आपन सबहिँ चीजन इसहाक क दइ दिहस।

7इब्राहीम एक सौ पचहत्तर बरिस क उमर तलक जिअत रहा। 8इब्राहीम धीमे धीमे दुबराइ गवा अउ संतुट्ट जीवन बिताइ क पाछे चल बसा। उ लम्बी भरपूर जिन्गी बिताएस अउर ओका दफना दीन्ह गवा रहा। 9ओकर पूत इसहाक अउ इस्माएल ओका मकपेला क गुफा में दफनाएन। इ गुफा सोहर क पूतन एप्रोन क खेते में अहइ। इ मग्रे क पूरब में रही। 10इ उहइ गुफा अहइ जेका इब्राहीम हिल्ली लोगन स बेसहे रहा। इब्राहीम क ओकर मेहरारु सारा क संग गाड़ा गवा। 11इब्राहीम क मरइ क पाछे परमेस्सर इसहाक प कृपा किहेस अउ इसहाक बेर लहैरोई में रहत रहा।

12इस्माएल क परिवार क इ सूची अहइ। इस्माएल इब्राहीम अउ हाजिरा क पूत रहा। (हाजिरा सारा क मिस्त्र देस क दासी रही।) 13इस्माएल क पूतन क इ सबइ नाउँ अहइँ पहिला पूत नबायोत रहा, तब केदार पइदा भवा, तब अदबेल, मिबसाम, 14मिस्मा, दूमा, मस्सा, 15हदद, तेमा, यतूर, नापीस अउ केदमा भएन। 16इ सबइ इस्माएल क पूतन क नाउँ रहेन। हर एक पूत क आपन गाँव या सिबिर रहेन। आपन कबील क उपचे बारह राजकुमार रहेन। 17इस्माएल एक सौ

सैंतीस बरिस जिअत रहा। तबहीं उ मर गवा अउ दफना दीन्ह गवा रहा। 18इस्माएल क संतानन हवीला स लइके सूर क लगे मिस्त्र क चौहद्दी अउ ओसे भी आगे अस्सूर क किनारे तलक, बसे रहेन अउ आपन रस्तेदारन पइ हमला करत रहेन।

### इसहाक क परिवार

19इ इसहाक क कहानी बाटइ। इब्राहीम क एक पूत इसहाक रहा। 20जब इसहाक चालीस बरिस क रहा तब उ रिबका स बियाह किहस। रिबका पद्दनराम क रहइवाली रही। उ अरामी बतूएल क बिटिया रही अउ लाबान क बहिन रही। 21इसहाक क बसही बच्चा नाहीं पइदा कइ सकी। एँह बरे इसहाक यहोवा स आपन मेहरारु बरे पराथना किहस। यहोवा इसहाक क बिनती सुनेस अउ यहोवा रिबका क गरभ धारण करइ दिहस।

22जब रिबका गरभ धारण किहे रही तब ओकरे गर्भ में बच्चे एक दूसर क संग धक्का धक्की करत रहेन। रिबका यहोवा स पराथना किहेस अउ बोली, “मोरे संग अइसा काहे होत अहइ।” 23यहोवा कहेस “तोहरे गर्भ में दुइ रास्ट्र अहइँ। दुइ परिवारन क राजा तोहसे पइदा होइहीं अउ उ पचे अलगाइ जइहीं। एक पूत दूसर स बलवान होइ। बड़का पूत छोटके पूत क सेवा करी” 24अउर जब टेम पूरा भवा तउ रिबका जुड़ैधा लरिकन क जन्मेस। 25पहिला लरिका लाल भवा। ओकर खाल रोवँदार ओढ़ना क नाई रही। एँह बरे ओकर नाउँ एसाव पड़ा। 26जब दूसर लरिका पइदा भवा, उ एसाव क एँडी क मजबूती स धरे रहा। एँह बरे उ लरिका क नाउँ याकूब पड़ा। इसहाक क उमिर उ टेम साठ बरिस क रही। जब याकूब अउ एसाव पइदा भएन।

27लरिकन बड़ा भएन। एसाव एक होसियार सिकारी भवा। उ मइवानन में रहब पसन्द करइ लाग। मुला याकूब सान्त रहा। उ आपन तम्बू में रहत रहा। 28इसहाक एसाव क पियार करत रहा। उ ओन जनावरन क खाब पसन्द करत रहा जेका एसाव मारि क लइ आवत रहा। मुला रिबका याकूब क पियार करत रही।

29एक दाई एसाव सिकार स लउटा। उ भूख स थका अउ कमजोर होइ गवा रहा। याकूब कछू दाल पकावत रहा। 30इ कारण एसाव याकूब स कहेस, “मई भूख स कमजोर होत अहउँ। तू उ लाल दाल में स कछू मोका द्या।” (इहइ कारण अहइ कि लोग ओका एदोम कहत हीं।)

31मुला याकूब कहेस, “तोहका पहिलौठी होइ क अधिकार मोका आज बेचइ करइ क होइ।”

32एसाव कहेस, “मई भूख स मरा जात अहउँ। अगर मई मरि जात अहउँ तउ मोरे बाप क सब धन मोर मदद नाहीं कर पाइ। एँह बरे तोहका मई आपन हींसा देब।”

33मुला याकूब कहेस, “पहिले बचन द्या कि तू इ मोका देव्या।” एँह बरे एसाव याकूब क बचन दिहस। एसाव आपन पिता क धन क आपन हींसा याकूब क बेच दिहस। 34तब याकूब एसाव क रोटी अउ भोजन दिहस। एसाव खाएस, पिएस अउ तब चला गवा। इ तरह एसाव इ देखोएस कि उ पहिलौटा होइ क आपन अधिकार क परवाह नाहीं किहेस।

### इसहाक अबीमेलिक स झूठ बोलत ह

**26** एक दौड़ अकाल पड़ा। इ अकाल वइसा ही रहा जइसा इब्राहीम क टेम में पड़ा। एह बरे इसहाक गगर सहर में पलिस्तियन क राजा अबीमेलिक क लगे गवा। 2यहोवा इसहाक स बात किहस। यहोवा इसहाक स इ कहेस, “मिस्र क जिन जा। उहइ देस में रहा जेहमाँ रहइ क हुकुम मई तोहका दिहेउँ ह। 3उहइ देस में रहा अउर मई तोहरे संग रहब। मई तोहका आसीबाद देब। मई तोहका अउ तोहरे परिवार क इ सब पहुँटा देब। मई उहइ करब जउन मई तोहरे बाप इब्राहीम क बचन दिहेउँ ह। 4मई तोहरे परिवार क आकास क तारा समूह क तरह बहोत स बनाउब अउर मई सारा पहुँटा तोहरे परिवारे क देब। धरती क सब रास्ट्र तोहरे सन्तानन क कारण मोर आसीबाद पाइ जइहीं। 5मई इ एह बरे करब कि तोहार बाप मोर हुकुम क मानेस अउ मई जउन कछू कहेउँ, उ किहस। इब्राहीम मोरे हुकुमन, मोर कानून अउ मोरे नेमन क पालन किहस।”

6इसहाक रुका अउ गगर में रहा। 7इसहाक क मेहरारु रिबका बहोत सुन्नर रही। उ जगह क मनइयन इसहाक स रिबका क बारे में पूछेन। इसहाक कहेस, “इ मोर बहिन अहइ।” इसहाक इ कहइ स डेरान कि रिबका मोर मेहरारु अहइ। इसहाक डेरत रहा कि मनई ओकर मेहरारु क पावइ क ओका मारि डइहीं।

8जब इसहाक हुआँ बहोत टेम तलक रहि चुका, तउ एक दिन अबीमेलिक आपन खिड़की स बाहेर झाँकिस अउ लखेस कि इसहाक, रिबका क संग हँसी अउर खेल करत अहइ। 9अबीमेलिक इसहाक क बोलाएस अउ कहेस, “इ मेहरारु तोहार पत्नी अहइ। तू हम पचन स इ काहे कह्या कि इ मोर बहिन अहइ।”

इसहाक ओसे कहेस, “मई डेरत रहेउँ कि तू ओका पावइ बरे मोका मारि डउब्बा।”

10अबीमेलिक कहेस, “तू हम पचन क बुरा किह्या ह। हम पचन क कउनो भी मनई तोहरे पत्नी क संग सोइ सकत रहा। तब उ बड़के पाप क देखी होत।”

11एह बरे अबीमेलिक सबहिँ मनइयन क चिताउनी दिहस। उ कहेस, “इ मनसेधू अउ इ मेहरारु क कउनो चोट नाहीं पहोंचाई। अगर कउनो ऐनका चोटपहोंचाइ तउ उ मनई जान स मारि दीन्ह जाइ।”

### इसहाक धनी बना

12इसहाक उ भुइँया प खेती किहस अउ उ बरिस ओकरे बहोतइ फसिल भइ। यहोवा ओह प बहोतइ कृपा किहस। 13इसहाक धनी होइ गवा। उ जियादा स जियादा धन तब तलक बटोरत रहा जब तलक बहोत धनी नाहीं होइ गवा। 14ओकरे लगे बहोत स झुण्ड अउ गोरुअन क झुण्ड रहेन। ओकरे लगे ढेर दास भी रहेन। सबहिँ पलिस्ती ओसे डह राखत रहेन। 15एह बरे पलिस्तियन ओन सबहिँ इनारन क बर्बाद कइ दिहन जेनका इसहाक क बाप इब्राहीम अउ ओकर साथी लोगन कइउ साल पहिले खने रहेन। पलिस्तियन ओनका माटी स पाट दिहन 16अउर अबीमेलिक इसहाक स

कहेस, “हमार देस तजि द्या। तू हम पचन स बहोत जियादा सकतीवाला होइ गवा अहा।”

17एह बरे इसहाक उ जगह तजि दिहस अउ गगर क छोटी नदी क लगे पड़ाव डालेस। इसहाक हुँवइ ठहरा अउ हुँवइ रहा। 18ओकरे बहोत पहिले इब्राहीम कइउ इनारा खने रहा। जब इब्राहीम मरा तउ पलिस्तियन माटी से इनारा पाटि दिहन। एह बरे हुँवइ इसहाक लौटा अउ ओन इनारन क फुन खनेस। उ इनार क उहइ नाउँ दिहस जउन नाउँ ओकर पिता दिहे रहा। 19इसहाक क नउकरन छोटी नदी क लगे एक इनारा खनेन। उ कुआँ स पानी क एक सोता फूट पड़ा। 20तब गगर क गड़रिया लोग उ इनारा क कारण इसहाक क नउकरन स झगड़इ लागेन। उ पचे कहेन, “इ पानी हमार अहइ।” एह बरे इसहाक ओकर नाउँ एसेक राखेस। उ इ नाउँ एह बरे दिहस कि उहइ जगह प उ मनइयन ओसे झगड़ा किहे रहेन।

21तब इसहाक क नउकरन दूसर इनारा खनेन। हुआँ क मनइयन उ इनारा बरे भी झगड़ेन। एह बरे इसहाक उ इनारा क नाउँ सिन्ना राखेस।

22इसहाक हुआँ स हटा अउ दूसर इनारा खनेस। उ इनारा बरे झगड़ा करइ कउनो नाहीं आवा। एह बरे इसहाक उ इनारा क नाउँ रहोबोत राखेस। इसहाक कहेस, “यहोवा हिआँ हमरे बरे जगह दियाएस ह। हम पचे प्रगति करब अउर बढ़ब अउ इहइ भुइँया पइ पूरी तरह सफल होइ जाब।”

23उ जगह स इसहाक बेसेबा क गवा। 24यहोवा उ रात इसहाक स बोला, “मई तोहरे पिता इब्राहीम क परमेस्सर अहउँ। जिन डेरअ। मई तोहरे संग अहउँ अउ मई तोहका आसीबाद देब। मई तोहरे परिवार क महान बनाउब। मई आपन सेवक इब्राहीम क कारण इ करब।” 25एह बरे इसहाक उ जगह यहोवा क आराधना बरे एक वेदी बनाएस। इसहाक हुआँ पड़ाव डालेस अउ ओकर नउकर लोग एक इनारा खनेन।

26अबीमेलिक गगर स इसहाक क लखइ आवा। अबीमेलिक आपन संग सलाहकार अहुज्जत अउ सेनापति पीकोल क लइ आवा। 27इसहाक पूछेस, “तू मोका लखइ काहे आया ह? तू एकरे पहिले मोरे संग दोस्ती नाहीं राखत रह्या। तू मोका आपन देस तजि देइ क बेबस किहा।”

28उ पचे जवाब दिहन, “अब हम पचे जानित ह कि यहोवा तोहार संग अहइ। इ बरे हम चाहित ह कि हम पचे तोहरे संग एक समझौता करी। हम चाहित ह कि तू हमका एक बचन द्या। 29हम पचे तोहका चोट नाहीं पहोंचावा, अब तू पचन क इ बचन देइ चाही कि तू हम लोगन क चोट नाहीं पहोंचउब्बा। हम पचे तोहका पठवा ह। मुला हम पचे तोहका सान्ति स पठवा ह। अब इ बात साफ अहइ कि यहोवा तोहका आसीबाद दिहस ह।”

30एह बरे इसहाक ओनका दावत दिहस। सबहिँ खाएन अउ पिएन। 31दूसर दिन भिन्सारे हर एक मनई बचन दिहस अउ किरिया खाएस। तब इसहाक ओनका सान्ति स बिदा किहस अउ उ पचे कुसल स ओकरे निचके स चला आएन।

32उ दिना इसहाक क नउकर आएन अउ उ पचे आपन खना इनारा क बारे में बताएन। नउकरन कहेन, “हम पचे उ

इनारा स पानी पिआ ह।” 33एँह बरे इसहाक ओकर नाउँ सिबा खबेस अउ उ सहर अबहिँ भी बेसेँबा कहवावत ह।

### एसाव क मेहररुअन

34जब एसाव चालीस बरिस क भवा उ हित्ती मेहररुअन स बियाह किहस। एक बेरी क बिटिया यहूदीत रही। दूसर एलोन क बिटिया बासमत रही। 35इ सबइ बियाहे स इसहाक अउ रिबका क मन दुःखी भवा।

### उत्तराधिकार क झगड़ा

27 जब इसहाक बुढ़ाइ वा तउ ओकर अँखियन नीक नाहीं रहिन। इसहाक साफ-साफ नाहीं लिखि सकत रहा। एक दिन उ आपन बड़का पूत एसाव क बोलाएस। इसहाक कहेस, “बेटवा!”

एसाव जवाब दिहस, “हाँ, पिताजी!”

2इसहाक कहेस, “लखा, मई बुढ़ाइ गवा अहउँ। होइ सकत ह कि मई हाली ही मरि जाउँ। 3अब तू आपन तीसन अउ धनुख लइके, मोरे खातिर सिकार प जा। मोरे खाइ बरे एक ठु जनावर मारि लिआवा। 4मोरे मनचाहा खइया क बनावा। ओका मोरे लगे लिआवा, अउर मई एका खाब। तब मई मरइ स पहिले असीसबा।” 5एँह बरे एसाव सिकार करइ गवा।

### याकूब इसहाक स छल-कपट किहस

रिबका उ सबइ बात सुनि लिहे रही, जउन इसहाक आपन पूत एसाव स कहेस। 6रिबका आपन पूत याकूब स कहेस, “सुना, मई तोहरे बाप क, तोहरे भाई स बतियात सुनेउँ ह। 7तोहार पिता कहेस, ‘मोरे खाइ बरे एक जनावर मारा। मोरे बरे भोजन बनावा, अउ मई ओका खाब। तब मई मरइ क पहिले तोहका आसीबादि देबा’ 8एँह बरे पूत सुना। मई जउन कहति अहउँ, करा। 9आपन बोकरियन क बीच जा अउ दुइ नई बोकरी लिआवा। मई ओनका वइसा बनाउब जइसा तोहरे पिता क सोहाइ। 10तबइ तू उ भोजन आपन पिता क लगे लइ जाब्या अउ उ मरइ क पहिले तोहका ही आसीबादि देइ।”

11मुला याकूब आपन महतारी रिबका स कहेस, “मुला मोर भाई रोंवादार अहइ अउ मई ओकरी जगह रोंवादार नाहीं अहउँ। 12जदि मोर बाप मोका छुअत हीँ, तउ जान लेइहीं कि मई एसाव नाहीं अहउँ। तब उ पचे मोका आसीबादि नाहीं देइहीं। उ पचे मोका सरापिहीं काहेकि मई ओनके संग छल-कपट करइ क जतन किहेउँ ह।”

13यह पइ रिबका ओसे कहेस, “जदि कउनो परेसानी होइ तउ मई आपन दोख मान लेब। जउन मई कहति हउँ करा। जा, मोरे बरे बोकरियन लिआवा।”

14याकूब एँह बरे बाहेर गवा अउ उ दुइ बोकरियन क धरेस अउ आपन महतारी क लगे लइ आवा। ओकर महतारी इसहाक क पसंद क अनुसार विसेख तरीका स पकाएस। 15तब रिबका उ पोसाक क उठाएस जउन ओकर बड़का पूत एसाव पहिरब पसंद करत रहा। रिबका आपन छोटका पूत याकूब क ओढ़ना पहिराइ दिहस। 16रिबका

बोकरियन क चाम क लिहस अउ याकूब क हाथे अउर गला प बाँध दिहस। 17तब रिबका आपन पकावा भोजन उठाएस अउ ओका याकूब क दिहस।

18याकूब पिता क लगे गवा अउ बोला, “पिता जी।”

अउर ओकर पिता पूछेस, “हाँ पूत, तू कउन अहा?”

19याकूब आपन पिता स कहेस, “मई आप क बड़का बेटवा एसाव अहउँ। आप जउन कहेन ह, मई कर दिहेउँ ह। अब आप बइठईँ अउ ओन जनावरन क खाईँ जेनकइ सिकार मई आप क बरे किहेउँ ह। तब आप मोका आसीबादि दइ सकत हीँ।”

20मुला इसहाक आपन पूत स कहेस, “तू एँतनी हाली सिकार कइके जनावरन क कइसे मार्या ह?”

याकूब जवाब दिहस, “काहेकि आप क परमेस्सर यहोवा मोका हाली ही जनावरन क दियाइ दिहस।”

21तब इसहाक याकूब स कहेस, “मोर पूत मोरे लगे आवा जेहसे मई तोहका छुइ सकउँ। जदि मई तोहका छुइ सकउँ तउ मई इ जान जाब कि तू असलियत में मोर पूत एसाव अहा।”

22याकूब आपन बाप इसहाक क लगे गवा। इसहाक ओका छुएस अउ कहेस, “तोहार आवाज याकूब जइसी अहइ। मुला तोहार बाँहन एसाव क रोंवादार बाहन क नाई अहइ।” 23इसहाक इ नाहीं जान पावा कि इ याकूब अहइ काहेकि ओकर बाँह एसाव क बाँह क नाई रोंवादार रहिन। एँह बरे इसहाक याकूब क असीसेस।

24इसहाक कहेस, “का सचमुच तू मोर पूत एसाव अहा?”

याकूब जवाब दिहस, “हाँ, मई अहउँ।”

### याकूब बरे आसीबादि

25तब इसहाक कहेस, “भोजन लिआवा। मई एका खाब अउ तोहका असीबादि देब।” एँह बरे याकूब ओका भोजन दिहस अउ उ खाएस। याकूब ओका दाखरस दिहस, अउर उ ओका पिएस।

26तब इसहाक ओसे कहेस, “पूत, मोरे निचके आवा अउ मोका चूमा।” 27एँह बरे याकूब आपन बाप क लगे गवा अउ ओका चूमेस। इसहाक एसाव क ओढ़ना क गन्ध पाएस अउ ओका असीसेस।

इसहाक कहेस, “अहा, मोर पूत क सुगन्ध यहोवा स बरदान पाइ गए खेतन क सुगन्धि क नाई बाटइ।

28यहोवा तोहका बहोत बर्खा देइ। जेसे तोहका बहोत फसिल अउ दाखरस मिलइ।

29सब लोग तोहार सेवा करईँ। राष्ट्र तोहरे समन्वा निहुरइ। तू आपन भाई लोगन क ऊपर रज्ज करब्या। तोहरी महतारी क पूत तोहरे समन्वा निहुरिहीं अउ तोहार हुकुम मनिहीं।

हर एक मनई जउन तोहका सरापी, सराप पाइ

अउ हर एक मनई जउन तोहका आसीबादि देइ, आसीबादि पाइ।”

### एसाव क “आसीबादि”

30इसहाक याकूब क आसीबादि देब पूरा किहेस। तब जइसेन ही याकूब आपन बाप इसहाक क निचके स गवा,

वइसेन ही एसाव सिकार कइके भीतर आवा। 31 एसाव आपन पिता क मनचाहा भोजन बनाएस। एसाव एका आपन पिता क निचके लिआवा। उ आपन पिता स कहेस, “पिता जी, उठई अउ उ भोजने क खाई जउन आपका पूत आप क बरे मोरेस ह। तब आप मोका आसीर्बाद दइ सकत हीं।”

32 मुला इसहाक ओसे कहेस, “तू कउन अहा?”

उ जवाब दिहस, “मई आप क पहिलौठी पूत एसाव अहई।”

33 तब इसहाक बहोतइ परेसान होइ गवा अउ बोला, “तब तोहरे आवइ स पहिले उ कउन रहा? जउन भोजन बनाएस अउ मोरे संग लावा। मई उ सब खाएउँ अउ ओका आसीर्बाद दिहेउँ। अब आपन आसीर्बाद क लउटावइ क टेम निकरि गवा अहइ।”

34 एसाव आपन पिता क बात सुनेस। उ बहोतइ गुस्साइ गवा अउ करुआइ गवा। उ चिचियान। उ आपन बाप स कहेस, “पिताजी, तब मोका भी आसीर्बाद देई।”

35 इसहाक कहेस, “तोहार भाई मोका धोखा दिहेस। उ आवा अउ तोहार आसीर्बाद लइके गवा।”

36 एसाव कहेस, “ओकर नाउँ ही याकूब अहइ। इ नाउँ ओकरे बरे ठीक ही अहइ। ओकर इ नाउँ बिल्कुल ठीक ही रखा गवा अहइ। उ फुरइ चालबाज अहइ। उ मोका दुइ दाई धोखा दिहेस। उ पहिलउठी होइ क मोरे अधिकार क लइ ही चुका बाटइ अउर अब उ मोरे हींसा क आसीर्बाद क भी लइ लिहस।” तब एसाव कहेस, “का आप मोरे बरे कउनो आसीर्बाद बचाइके रख्या ह?”

37 इसहाक जवाब दिहस, “नाहीं, अब बहोत देर होइ गइ। मई याकूब क तोहरे ऊपर राज्ज करइ क अधिकार दइ दिहेउँ ह। मई इ भी कहि दिहेउँ ह कि सब भाई ओकर सेवक होइहीं। मई ओका बहोत जियादा अन्न अउ दाखरस क आसीर्बाद दिहेउँ ह। पूत तोहका देइ क कछू नाहीं बचा अहइ।”

38 मुला एसाव आपन पिता स मँगत रहा। “पिता जी, का आप क लगे एक भी आसीर्बाद नाहीं बाटइ? पिताजी, मोका भी असीसा।” अइसेन एसाव रोवइ लाग।

39 तब इसहाक ओसे कहेस,

“तू अच्छी भुईया प नाहीं रहब्या। तोहरे लगे बहोत जियादा अन्न नाहीं होइ।

40 तोहका जिअइ बरे संघर्स करइ क होइ अउर तू आपन भाई क दास होब्या। मुला तू अजादी बरे लइब्या, अउ ओकरे राज्ज स अजाद होइ जाब्या।”

41 ओकरे पाछे इ आसीर्बाद क कारण जउन ओकर पिता दिए रहे एसाव याकूब स घिना करत रहा। एसाव मन ही मन सोचेस, “मोर बाप हाली ही मरि जाइ अउ मई ओकर दुःख मनाउब। मुला ओकरे पाछे मई याकूब क मारि डाउब।”

42 जब रिबका याकूब क मारइ बरे एसाव क योजना क सुनेस। तउ उ याकूब क बोलाएस अउर कहेस, “सुना, तोहार भाई एसाव तोहका मारि डावइ बरे योजना बनावत ह। 43 एह बरे पूत जउन मई कहति हउँ, करा। मोर भाई लाबान हारान में रहत ह। ओकरे पास जा अउ लुकान रहा। 44 ओकरे लगे तनिक टेम तलक रहा जब तलक तोहरे भाई

क किरोध नाहीं उतरत। 45 तनिक समइ पाछे तोहार भाई भूलि जाइ कि तू ओनके संग का किहा? तब मई तोहका लउटावइ बरे एक ठु नउकर क पठउब। एक ही दिन दुइनउँ पूतन क मई खोइ देइ नाहीं चाहित।”

46 तब रिबका इसहाक स कहेस, “तोहरा पूत एसाव हित्ती मेहरारुअन स बियाह कइ लिहस ह। मई इ मेहररुअन स तंग भए गवा अहउँ काहेकि इ सबइ हमरे परिवार क लोगन में स नाहीं अहई। अगर याकूब भी इ मेहररुअन में स कउनो क संग बियाह करत ह तउ मई मरि जाइ चाहबिउँ।”

### याकूब मेहरारु क खोज करत ह

28 इसहाक याकूब क बोलाएस अउ ओका आसीर्बाद दिहस। तब इसहाक ओका हुकुम दिहस। इसहाक कहेस, “तू कनानी मेहरारु स बियाह नाहीं कइ सकत्या। 2 एह बरे इ ठउर क तजा अउ पददन-अराम क जा। आपन नाना बतूल क घराना में जा। हुओं तोहार मामा लाबान रहत ह। ओकरी कउनो एक बिटिया स बियाह करा। 3 मई पराथना करत हउँ कि सब स सर्वसक्तीमान परमेस्सर तोहका आसीर्बाद देइ अउ तोहका बहोत स पूत देइ। मइ पराथना करत हउँ कि तू एक बड़का रास्ट्र क पिता बना। 4 मई पराथना करत हउँ कि जउने तरह परमेस्सर इब्राहीम क बरदान दिहे रहा उहइ तरह उ तोहका भी आसीर्बाद देइ। मई पराथना करत हउँ कि परमेस्सर तोहका इब्राहीम क आसीर्बाद देइ, मई पराथना करत हउँ कि तू जहाँ भी रहा उ धरती तोहार कब्जा में होइ। इ उहइ धरती अहइ जउन परमेस्सर इब्राहीम क दिहे रहा।”

5 इ तरह इसहाक याकूब क पददन-अराम क पहुँटा क पठएस। याकूब आपन मामा लाबान क लगे गवा। अरामी बतूल लाबान अउ रिबका क पिता रहा अउ रिबका याकूब अउ एसाव क महतारी रही।

6 एसाव क पता चला कि ओकर बाप इसहाक याकूब क आसीर्बाद दिहेस ह अउ याकूब क पददन-अराम में एक ठु मेहरारु क खोज बरे पठएस ह। एसाव क इ भी पता लाग कि इसहाक याकूब क आदेस दिहेस ह कि उ कनानी मेहरारु स बियाह न करइ। 7 एसाव इ समझेस कि याकूब आपन महतारी बाप क हुकुम मानेस अउ उ पददन-अराम क चला गवा। 8 एसाव एहसे इ समझेस कि ओकर बाप इ नाहीं चाहत कि ओकर पूत लोग कनानी मेहररुअन स बियाह करई। 9 एसाव क दुइ मेहररुअन पहिले स ही रहिन। मुला उ इस्माएल क बिटिया महलत स बियाह किहस। इस्माएल इब्राहीम क पूत रहा। महलत नबायोत क बहिन रही।

### बेतेल - परमेस्सर क घर

10 याकूब बेसेबा क तजि दिहस अउ उ हारान क चला गवा। 11 याकूब क जात्रा करत समइ में सूरज बूड़ गवा रहा। एह बरे याकूब रात बितावइ बरे एक जगह ठहर जाइ बरे गवा। याकूब उ जगह एक ठु चट्टान लखेस सोवइ बरे आपन मूँड धरेस। 12 याकूब सपन देखेस। उ लखेस कि एक सिद्धी भुईया स सरगे तलक पहोंची अहइ। 13 याकूब



सरगदूतन क सिड्डी प चढ़त उतरत लखेस अउ यहोवा क सिड्डी क लगे खड़ा निहारेस। यहोवा कहेस, “मई तोहरे पितामह इब्राहीम क परमेस्सर यहोवा अहउँ। मई इसहाक क परमेस्सर अहउँ। मई तोहका उ भुईया देब जेह प तू अब सोवत अहा। मई इ भुईया तोहका अउ तोहरे संतानन क देब। 14तोहार संतानन ओतना ही होइहीं जेतना भुईया प माटी क कण बाटेन। उ पचे पूरब, पच्छिम, उत्तर अउ दक्खिन चारिहूँ कइँती फइलिहीं। धरती क सबहिँ परिवार तोहरे संतानन क कारण बरदान पइहीं।

15“मई तोहरे संग अहउँ अउर मई तोहार रच्छा करब। जहाँ भी जाब्या अउ मई इ भुईया प तोहका लउटाइ लिआउब। मई तोहका तब तलक नाहीं तजि देब जब तलक मई उ नाहीं कइ लेब जउन मई करइ क बचन दिहेउँ ह।”

16तब याकूब आपन नीदं स उठा अउ बोला, “मई जानत हउँ कि यहोवा इ जगह प अहइ। मुला हिआँ जब तलक मई सोएउँ नाहीं रहे उ मई नाहीं जानत रहेउँ कि उ हिआँ अहइ।”

17याकूब डेरान। उ कहेस, “इ बहोत महिमा क जगह अहइ। इ तउ परमेस्सर क भवन अहइ। इ तउ सरग क दुआर अहइ।”

18याकूब दूसर दिन बहोत भिन्सारे उठा। याकूब उ सिला क उठाएस अउ ओका किनारे स ठाड़ कइ दिहस। तब उ यह पइ तेल चढ़ाएस। इ तरह उ एँका परमेस्सर बरे एक स्मृति पाथर बनाएस। 19उ जगह क नाउँ लूज रहा मुला याकूब ओका बेतेल नाम दिहस।

20तब याकूब एक बचन दिहस। उ कहेस, “जदि परमेस्सर मोरे संग रही अउ अगर परमेस्सर, जहाँ भी मई जात अहउँ, हुआँ मोर रच्छा करी। अगर परमेस्सर मोका खाइ क भोजन अउ पहिरइ क ओढ़ना देइ। 21अगर मई आपन पिता क लगे सान्ति स लउटब, जदि परमेस्सर इ सबहिँ चिजियन करी, तउ यहोवा मोर परमेस्सर होइ। 22इ जगह, जहाँ मई इ पाथर स्मृति पाथर क रुप में खड़ा किहेउँ ह, परमेस्सर क पवित्र ठउर होइ, अउ परमेस्सर जउन कछू मोका देइ ओकर दसवाँ हीसां मई तोहका देब।”

### याकूब राहेल स मिलत ह

**29** तब याकूब आपन जात्रा जारी रखेस। उ पूरब क देस में गवा। 2याकूब निगाह किहेस, उ मइदान में एक इनारा लखेस। हुआँ इनारा क नगिचे भेड़ी क तीन झुण्ड पड़ी रहिन। इहइ एक इनारा रहा जहाँ इ सबइ भेड़िन पानी पिअत रहिन। हुआँ एक बड़ी सिला स इनारा क मुँह मूँद रहा। 3जब सबहिँ भेड़िन हुआँ बटुर जात रहिन तउ गड़रिया चट्टान क इनारा क मुँह प स हटावत रहेन। तब सबहिँ भेड़िन ओकर जल पी सकत रहिन। जब भेड़िन पी चुकत रहिन तब गड़रिया सिला क फुन अपनी जगह प रख देत रहेन।

4याकूब हुआँ गड़रिया स कहेन, “भाईयन, आप लोग कहाँ क अहइँ?”

उ पचे जवाब दिहन, “हम पचे हारन क अही।”

5तब याकूब कहेस, “का आप लोग नाहोर क पूत लाबान

क जानत हीँ?” गड़रियन जवाब दिहेन, “हम पचे ओका जानित ह।”

6तब याकूब पूछेस, “उ कुसल स तउ अहइ?”

उ पचे कहेन, “उ सबइ ठीक अहइँ। सब कछू बहोत नीक अहइ। लखा, उ ओकर बिटिया राहेल आपन भेड़िन क संग आवति अहइ।”

7याकूब कहेस, “लखा, अबहिँ दिन अहइ अउ सूरज बूड़इ में अबहिँ, काफी देर बाटइ। रात बरे जनावरन क बटोरइ क अबहिँ टेम नाहीं बा। एँह बरे ओनका पानी द्या अउ ओनका मइदान में लौटि जाइ द्या।”

8मुला उ गड़रियन कहेन, “हम पचे इ सबइ तब तलक नाहीं कइ सकित जब तलक सबहिँ झुण्ड नाहीं बटुरि जातिन। तब हम पचे सिला क इनारा स हटाउब अउ सब भेड़िन पानी पीइहीं।”

9याकूब जब गड़रिया लोगन स बात करत रहा तब राहेल आपन बाप क भेड़िन क संग आइ। (राहेल क काम भेड़िन क देख रेख करब रहा।) 10राहेल लाबान क बिटिया रही। लाबान, रिबका क भाई रहा, जउन याकूब क महतारी रही। जब याकूब राहेल क लखेस तउ जाइके सिला क हटाएस अउ भेड़िन क पानी पियाएस। 11तब याकूब राहेल क चूमेस अउ भोंकारा मारिके रोएस। 12याकूब बताएस कि मई तोहरे बाप क खानदान स अहउँ। उ राहेल क बताएस कि मई रिबका क पूत अहउँ। एँह बरे राहेल घर क पराइ गइ अउ आपन बाप स कहेस।

13लाबान आपन बहिन क पूत याकूब क बारे में खबरिया सुनेस। एँह बरे लाबान ओसे भेटंइ परान। लाबान ओसे गले मिला, ओका चूमेस अउ ओका आपन घरे लइ आवा। याकूब जउन कछू भवा रहा, ओका लाबान क बताएस।

14तब लाबान कहेस, “बहोत अच्छी बात अहइ तू हमरे खानदाने स अहा।” एँह बरे याकूब लाबान क संग एक महीना तलक रहा।

### लाबान याकूब क धोखा देत ह

15एक दिन लाबान याकूब स कहेस, “इ ठीक नाहीं अहइ कि तू हमरे हिआँ बे पगारि क काम करतइ रहा। तू नातेदार अहा, नउकर नाहीं। मई तोहका का पगार देउँ?”

16लाबान क दुइ बिटिया रहिन। बड़की लिआ रही अउ लहुरी राहेल।

17राहेल सुन्नर रही अउ लिआ क आँखियन कमजोर अउ धुँधरी रहिन। 18याकूब राहेल स पिरेम करत रहा। याकूब लाबान स कहेस, “जदि तू मोका आपन बिटिया राहेल क संग बियाह करइ द्या तउ मई तोहरे हिआँ सात बरिस तलक काम कइ सकत हउँ।”

19लाबान कहेस, “इ ओकरे बरे नीक होइ कि कउनो दूसर क बजाय उ तोहसे बियाह करइ। एँह बरे मोरे संग ठहरा।”

20एँह बरे याकूब ठहरा अउ सात बरिस तलक लाबान बरे काम करत रहा। लेकिन इ समइ ओका बहोत कम लगा काहेकि उ राहेल स पिरेम करत रहा। 21सात बरिस क पाछे उ लाबान स कहेस, “मोका राखेल क द्या जेहसे मई

बियाह करउँ। तोहरे हिआँ मोरे काम करइ क टेम पूर होइ गवा।”

22एँह बरे लाबान उ जगह क सब लोगन क एक भोज दिहस। 23उहइ राति लाबान आपन बिटिया लिआ क याकूब क लगे लावा। याकूब अउ लिआ अपुस में तन क संबंध जोड़ें। 24(लाबान अपन बिटिया बरे, दासी क रुप में आपन नउकरानी जिल्पा क दिहस।) 25भिन्सारे याकूब जानेस कि उ लिआ क संग सोवा रहा। याकूब लाबान स कहेस, “तू मोका धोखा दिहा ह। मई तोहरे बरे कठिन मेहनत एँह बरे किहेउँ कि मई राहेल स बियाह कइ सकउँ। तू मोका धोखा काहे दिहा ह?”

26लाबान कहेस, “हम पचे आपन देस में लहुरी बिटिया क जेठ बिटिया स पहिले बियाह नाहीं करइ देइत। 27मुला बियाह क रस्म क पूरा हफता तलक मनावत रहा अउ मई राहेल क भी तोहका बियाह बरे देब। मुला तोहका सात बरिस तलक मोर सेवा करइ क पड़ी।”

28एँह बरे याकूब इहइ किहस अउ हफता क बिताएस। तब लाबान आपन बिटिया राहेल क भी ओका आपन मेहरारू क रुप में दिहस। 29(लाबान आपन बिटिया राहेल क दासिनी क रुप में आपन नउकरानी बिल्हा क दिहस।) 30एँह बरे याकूब राहेल क संग भी तने क सम्बंध किहस अउ याकूब राहेल क लिआ स जियादा पियार किहस। याकूब लाबान बरे अउर सात बरिस तलक काम किहस।

### याकूब क परिवार बाढ़त ह

31यहोवा लखेस कि याकूब लिआ स जियादा राहेल क पिआर करत ह। एँह बरे यहोवा लिआ क इ जोगग बनाएस कि उ बच्चन क जन्म दइ सकइ। मुला राहेल क कउनो लरिका नाहीं भवा।

32लिआ एक पूत क जन्म दिहस। उ ओकर नाउँ रूबेन रखेस। लिआ ओकर नाउँ एँह बरे रखेस काहेकि उ कहेस, “यहोवा मोरे कष्टन क लखत ह। मोर पति मोका पिआर नाहीं करत, एँह बरे होइ सकत ह कि मोर भतार अब मोसे पिआर करइ।”

33लिआ फिन गरभधारण किहस अउ उ दूसर पूत क जन्म दिहस। उ इ पूत क नाउँ सिमोन रखेस। लिआ कहेस, “यहोवा सुनेस कि मोका पिआर नाहीं मिलत, एँह बरे उ मोका इ पूत दिहस।”

34लिआ फुन गरभधारण किहस अउ एक तु अउर पूत क जन्मेस। उ पूत क नाउँ लेवी धरेस। लिआ कहेस, “अब फुरइ मोर भतार मोका पिआर करी। मई ओका तीन पूत दिएउँ ह।” 35तब लिआ एक अउर पूत क जन्मेस। उ इ लरिका क नाउँ यहूदा धरेस। लिआ ओका इ नाउँ दिहस काहेकि उ कहेस, “अब मई यहोवा क स्तुति करब।” तब लिआ क बच्चा होब बन्द होइ गवा।

**30** राहेल लखेस कि उ याकूब बरे कउनो बच्चा क जन्म नाहीं देति अहइ। राहेल आपन बहिनी लिआ स जलन करइ लाग। एँह बरे राहेल याकूब स कहेस, “मोका बच्चा द्या, वरना मई मरि जाब।”

2याकूब राहेल प किरोध किहस। उ कहेस, “मई परमेस्सर नाहीं अहउँ। उ परमेस्सर ही बाटइ जउन तोहका बच्चन क जन्मइ स रोक दिहस ह।” 3तब राहेल कहेस, “तू मोर दासी बिल्हा क लइ सकत ह। ओकरे संग सोआ अउ उ मोरे बरे बच्चा क जन्मी। तब मई ओकरे जरिये महतारी बनब।”

4इ तरह राहेल आपन भतार याकूब बरे बिल्हा क दिहस। याकूब बिल्हा क संग तने क संबंध किहस। 5बिल्हा गरभ धारण किहस अउ याकूब बरे एक पूत क जन्मेस।

6राहेल कहेस, “परमेस्सर मोर पराथना सुनि लिहेस ह। उ मोका एक पूत देइ क ठान लिहस ह।” एँह बरे राहेल इ पूत क नाउँ दान रखेस।

7बिल्हा दुसरी दाई गरभ धारण किहस अउ उ याकूब क दूसर पूत दिहस। 8राहेल कहेस, “मई आपन बहिनी क संग कठोर संघर्ष किहेउँ अउर मई जीत गएउँ ह।” एँह बरे उ इ पूत क नाउँ नप्ताली धरेउँ ह।

9लिआ सोचेस कि उ अउर जियादा बच्चन क जन्म नाहीं दइ सकित। एँह बरे उ आपन दासी जिल्पा क याकूब बरे दिहस। 10तब जिल्पा एक पूत क जन्म दिहस। 11लिआ कहेस, “मोर भाग्य बाटइ। अब मेहररूअन मोका भाग्यवती कइहीं।” एँह बरे उ पूत क नाउँ गाद रखेस। 12जिल्पा दूसर पूत क जन्मेस। 13लिआ कहेस, “मई बहोतइ खुस अहउँ। मेहरारू मोका “खुस” नाउँ स पुकारब्या।” एँह बरे उ लरिका क नाउँ आसेर धरेस।

14गोहूँ कटनी क समइ रूबेन खेतन में गवा अउ कछू दूदाफल\* न क लखेस। रूबेन इ दूदाफलन क आपन महतारी लिआ क लगे लिआवा। मुला राहेल लिआ स कहेस, “कृपा कइके आपन पूत क दूदाफलन में स कछू मोका दइ द्या।”

15लिआ जवाब दिहस, “तू तउ मोरे भतार क पहिले ही लइ लिहे ह। अब तू मोरे पूत क दूदाफलन क भी लइ लेइ चाहत अहा।”

मुला राहेल जवाब दिहस, “अगर तू आपन पूत क दूदाफलन मोका देब्या तू आज रात याकूब क संग सोइ सकित ह।”

16उ रात याकूब खेते स लउटा। लिआ ओका लखेस अउ उ ओसे मिलइ गइ। उ कहेस, “आज राति तू मोरे संग सोउब्या। मई आपन पूत क दूदाफलन क तोहरे दाम क रुप में दिहेउँ ह।” एँह बरे याकूब उ रात लिआ क संग सोवा।

17तब परमेस्सर लिआ क फुन गरभधारण करइ दिहस। उ पाँचवें पूत क जन्म दिहस। 18लिआ कहेस, “परमेस्सर मोका इ बात क ईनाम दिहस ह कि मई आपन दासी क आपन भतार क दिहेउँ ह।” एँह बरे लिआ आपन पूत क नाउँ इस्साकार धरेस। 19लिआ फुन गरभधारण किहस अउ उ छठवें पूत क जन्म दिहस। 20लिआ कहेस, “परमेस्सर मोका एक तु सुन्नर भेंट दिहस ह। अब सचमुच ही याकूब

**दूदाफल (मैनडरेक्स)** इ इब्रानी सब्ब क अरथ अहइ पिरैम क पोथा। उ समइ में लोगन क धारना रही कि मेहररूअन क गर्भ होवइ में इ सहायता करत ह।

मोका अपनाई, काहेकि मई ओका छः लरिका दिहेउँ ह।”  
 19एँह बरे लिआ पूत क नाउँ जबूलून धरेस।

21एकरे पाछे लिआ एक बिटिया क जन्म दिहस। उ बिटिया क नाउँ दीना रखेस।

22तब परमेस्सर राहेल क पराथना सुनेस। परमेस्सर राहेल बरे बच्चा पइदा करब संभव बनाएस। 23राहेल गरभ धारण किहेस अउ एक पूत क जन्म दिहस। 24राहेल कहेस, “परमेस्सर मोर लाज खतम कइ दिहस ह अउ मोका एक पूत दिहस ह।” एँह बरे राहेल आपन पूत क नाउ यूसुफ राखेस। अउर उ कहेस, “परमेस्सर मोका एक अउर पूत देइ।”

### याकूब क धन दोलत बढ़त ह

25यूसुफ क जन्म क पाछे याकूब लाबान स कहेस, “अब मोका आपन घर लौटइ द्या। 26मोका मोर मेहररुअन अउ बच्चा द्या। मई चौदह बरिस तलक तोहरे बरे काम कइके ओनका कमावा ह। तू जानत ह कि मई तोहार नीक सेवा किहेउँ ह।”

27लाबान ओसे कहेस, “मोका कछू कहइ द्या। मई महसूस करत हउँ कि यहोवा तोहरे कारण मोहे प कृपा किहेस ह। 28बतावा कि तोहका मई का देउँ अउर मई उहइ तोहका देब।”

29याकूब जवाब दिहस, “तू जानत अहा कि मई तोहरे बरे कठिन मेहनत किहेउँ ह। तोहर भेड़िन क झुण्ड बाँडिन ह अउर जब तलक मई ओनकइ देख भाल किहेउँ ह, ठीक रहिन ह। 30जब मई आवा रहेउँ, तोहरे लगे तनिक रहिन। अब तोहरे लगे बहोत जियादा अहइँ। हर दाई जब मई तोहरे बरे कछू किहेउँ ह यहोवा तोहे प कृपा किहस ह। अब मोरे बरे समइ आइ ग अहइ कि मई आपन बरे काम करउँ, इ मोरे बरे आपन घर बनावइ क टेम अहइ।”

31लाबान पूछेस, “तब मई तोहका का देउँ?”

याकूब जवाब दिहस, “मई नाहीं चाहत कि तू मोका कछू द्या। मई सिरिफ चाहत हउँ कि तू जउन मई काम किहेउँ ह ओकर दाम चुकाइ द्या। सिरिफ इहइ एक काम करा। मइ लउटाउब अउर तोहरी भेड़िन क देखरेख करब। 32मोका आपन सबहिं भेड़िन क झुण्ड क बीच स जाइ द्या अउ दागवाली या धारीदार हर एक भेड़ी क बच्चा अउ करिया बोकरी क बच्चा क मोका लइ लेइ द्या। मोका हर एक दागवाली या धारीवाली मादा बोकरी क लइ लेइ द्या। इहइ मोर पगार होइ। 33भविस्स मँ तू असानी स लिख लेब्या कि मई ईमानदार अहउँ। तू मोर भेड़ी क झुण्ड लखइ आइ सकत ह। जदि कउनो बोकरी दागदार नाहीं होइ या कउनो भेड़ी करिया नाहीं होइ तउ तू जान लेब्या कि मई ओका चोराएउँ ह।”

34लाबान जवाब दिहस, “मई एँका अंगीकार करत अहउँ। हम तोहका जउन कछू तू मँगब्या देब।”

35मुला उ दिन लाबान दागीदार बोकसन क छुपाइ दिहस अउ लाबान सबहिं दागीदार या धारीदार बोकरियन क छुपाइ दिहस। लाबान सब करिया भेड़िन क छुपाइ दिहस। लाबान

आपन बेटहनन क इ सबइ भेड़िन क देखरेख करइ कहेस। 36एँह बरे पूत लोग सबहिं दागीदार जनावरन क लिहन अउ उ पचे दुसरे ठउर प चला गएन। उ पचे तीन दिन तलक जात्रा किहन। याकूब रुक गवा अउ बचे भए जनावरन क देखरेख करइ लगेन। मुला ओहमँ कउनो जनावर दागदार या करिया नाहीं रहा।

37एँह बरे याकूब चिनार, बादाम अउ अर्मोन बिरवन क हरियर डारिन क काटेस। उ ओकर छाल इ तरह उतारेस कि सबइ डार उज्जर धारीदार बनि गइन। 38याकूब पानी पिआवइ क जगह प डारिन क भेड़िन क झुण्ड क समन्वा धइ दिहस। जब गोरु पानी पिअइ आएन तउ उ जगह प गाभिन होइ बरे मिलेन। 39तब बोकरियन जब डारिन क समन्वा गाभिन होइ बरे मिलिन तउ जउन बच्चन पइदा भएन उ सबइ दागीदार, धारीदार या करिया भएन।

40याकूब दागीदार अउ करिया गोरुअन क भेड़ी क झुण्ड क गोरुअन स अलगाइ दिहस। तउ इ तरह, याकूब आपन गोरुअन क लाबान क जनावरन स अलग किहस। उ आपन भेड़िन क लाबान क भेड़िन क लगे नाहीं भटकइ दिहस। 41जब कबहुँ गोरुअन क खरका मँ हिटठ पुटठ जनावर गाभिन होइ बरे मिलत रहेन तब याकूब ओकरी अँखिन क समन्वा डारिन क रख देत रहा, ओन डारिन क निचके ही इ सबइ जनावरन धनाइ बरे मिलत रहेन। 42मुला जब कमजोर जनावर धनाइ बरे मिलत रहेन, तउ याकूब हुआ डार नाहीं धरत रहा। इ तरह मरदुट जनावरन स पइदा भएन बच्चन लाबान क रहेन। हिटठ पुटठ गोरुअन स पइदा भए बच्चन याकूब क रहेन। 43इ तरह याकूब बहोत धनी होइ गवा। ओकरे लगे बहोत स रेवइ, बहोत स नउकर लोग, ऊँट अउ गदहन रहेन।

### बिब होइ के टेम याकूब परत ह

**31** एक दिन याकूब लाबान क पूतन क बतियात सुनेस। उ पचे कहेन, “हम पचन क बाप क सब कछू याकूब लइ लिहे अहइ। याकूब धनी होइ गवा अहइ, अउर इ सारा धन उ हमरे पिता स लिहेस ह।” 2याकूब इ देखेस कि लाबान पहिले क तरह पिरिम भाव नाहीं रखत ह। 3यहोवा याकूब स कहेस, “तू आपन पुरखन क देस क लउटि जा जहाँ तू पइदा भए रह्या। मई तोहरे संग रहब।”

4एँह बरे याकूब राहेल अउ लिआ स उ मइदान मँ मिलइ बरे कहेस जहाँ उ बोकरियन अउ भेड़िन क खरका रखत रहा। 5उ ओन स कहेस, “मई लखेउँ ह कि तोहार बाप मोसे गुस्सान अहइँ। ओन क मोरे बरे उ पहिले जइसा पिरिम-भाव अब नाहीं रहा। मुला मोर बाप क परमेस्सर मोर संग रहब। 6तू दुइनउँ जानत ह कि मई तू लोगन क पिता बरे ओतनी करी मेहनत किहेउँ, जेतना कइ सकत रहेउँ। 7मुला तू लोगन क बाप मोका धोखा दिहस। तोहार बाप मोर पगार दस दाई बदलि दिहस। मुला इ पूरे टेम मँ परमेस्सर लाबान क सब धोखा स मोका बचाएस ह।

8“एक दाई लाबान कहेस, ‘तू दागवाली सबहिं बोकरियन क रख सकत ह। इ तोहार पगार होइ।’ जब स उ इ कहे

रहा तब स सबहिनै जनावरन दागवाली बच्चन क जन्मेन। इ तरह उ सबइ मोर रहेन। मुला लाबान तब कहेस, 'मई दागवाली बोकरियन क रखब। तू सारी दागवाली बोकरियन क लइ सकत ह। इहइ तोहार पगार होइ।' ओकरे इ तरह कहइ क पाछे सबहिनै गोरुअन धारीदार जनावरन क जन्म दिहेन। 9इ तरह परमेस्सर जनावरन क तू पचन क पिता स लइ लिहस ह अउ मोका दइ दिहस ह।

10"जउन समइ जनावर गभिन् होइ क बरे मिलत रहेन मई एक सपन देखेउँ। मई देखेउँ कि सिरिफ नर जनावरन जउन गभिन् करइ बरे मिलत रहेन धारीदार अउ चितकबरा रहेन। 11सपन मँ परमेस्सर क सरगदूत मोसे बातन किहस। सरगदूत कहेस, 'याकूब।' "मई जवाब दिहेउँ 'हाँ!'

12"सरगदूत कहेस, 'लखा, सिरिफ दागदार अउ धरिदार बोकरियन भी गाभिन् होइ बरे मिलत रहिन। मई अइसा करत अहउँ। मई उ सब बुरा लखेउँ ह जउन लाबान तोहरे बरे करत ह। मई इ एँह बरे करत हउँ कि बोकरियन क सबहिनै नई बच्चन तोहार होइ जइहीं। 13मई उहइ परमेस्सर अहउँ जउन तोहार लगे बेतेल मँ आइ रहा। उ जगह तू एक वेदी बनाए रह्या अउर जइतून क तेल स ओका नहवाए रह्या अउ उ जगह तू मोसे एक प्रण किहे रहा। अब, उठा अउ उ जगहिया तजि द्या अउ वापिस आपन जन्म भूमि क लौटि जा।"

14-15राहेल अउ लिआ याकूब क जवाब दिहेन, "हम पचन क पिता क लगे मरइ प हम सबन क देइ क कछू नाहीं अहइ। उ हम पचन क संग अजनबी जइसा बेउहार किहस ह। उ हम पचन क तोहार लगे बेच दिहस अउ उ सारा धन खरच कइ दिहस जउन हम पचन क होतेन। 16परमेस्सर इ सब धन हमरे पिता स लइ लिहस ह अउ इ हमार अउ हमार सनतानन क अहइ। एँह बरे तू उहइ करा जउन परमेस्सर करइ बरे कहेस ह।"

17एँह बरे याकूब जात्रा क तइयारी किहस। उ आपन मेहररुअन अउ पूतन क ऊँट प बइठाएस। 18तब उ पचे कनान कइँती लउटइ लागेन जहाँ ओकर बाप रहत रहा। जनावरन क भी सब झुण्ड, जउन याकूब क रहेन, ओनके अगवा चलत रहेन। उ उ सबइ चिजियन क संग लइ जात रहा जउन उ पदुन अराम मँ रहत भए पाए रहा।

19इ टेम लाबान आपन भेड़िन क ऊन काटइ गवा रहा। जब उ बाहेर गवा तब राहेल ओकरे घरे मँ घुसी अउ आपन बाप क घरे क देवतन क चोरइ लइ गइ।

20याकूब अरामी लाबान क धोखा दिहस। उ लाबान क इ नाहीं बताएस कि उ हुआँ स जात अहइ। 21याकूब आपन परिवार अउ आपन सबहिनै चीजन क लिहस अउ हाली स चला गवा। उ पचे फरात नदी क पार किहन अउ गिलाद क पहाड़ी देस क ओर जात्रा किहन।

22तीन दिना पाछे लाबान क पता लाग कि याकूब पराइ गवा। 23एँह बरे लाबान आपन मनइयन क बटोरेस अउ याकूब क पाछा सुरु किहस। सात दिन पाछे याकूब क गिलाद पहाड़े क लगे पाएस। 24उ रात परमेस्सर लाबान क समन्वा सपन मँ परगट भवा। परमेस्सर कहेस, "होसियार रहा कि तू याकूब क कछू भी अच्छा या बुरा जिन कहा।"

### चोराए भए देवतन क खोज

25दूसर दिन भिन्सारे लाबान याकूब क जाइ धरेस। याकूब आपन तम्बू पहाड़े प लगाए रहा। एँह बरे लाबान अउ ओकर मनइयन आपन तम्बू गिलाद पहाड़े प लगाएन।

26लाबान याकूब स कहेस, "तू मोका धोखा काहे दिहा? तू मोर बिटियन क अइसे काहे लइ जात अहा माना कि उ सबइ जुद्ध मँ धरी गइ होइ? 27मोसे बगैर कहे तू काहे परान्या? जदि तू कहे होत्या तउ मई तोहका भोज देतेउँ। ओहमँ बाजा क संग नाचब अउ गाउब होत। 28तू मोका आपन नातियन क चूमइ तलक नाहीं दिहा अउ न ही बिटियन क बिदा कहइ दिहा। तू इ कइके भारी बेवकूफी किहा। 29तोहका फुरइ चोट पहोंचावइ क सकती मोहमँ बाटइ। मुला पाछे क राति मँ तोहरे बाप क परमेस्सर मोरे सपन मँ आवा। उ मोका चिताउनी दिहस कि मई कउनो तरह तोहका चोट न पहोंचावउँ। 30मइ जानत अहउँ कि तू आपन घरे लउटइ चाहत बाट्या। इहइ कारण अहइ कि तू हुआँ स चल पइया ह। मुला तू मोरे घरे स देवतन क काहे चोरोंया ह?"

31याकूब जवाब दिहस, "मई तोहसे बिना कहे भए चल पइया, काहेकि मई ससान रहेउँ। मई सोचेउँ कि तू आपन बिटियन क मोसे लइ लेब्या। 32मुला मई तोहरे देवतन क नाहीं चोरएउँ। जदि तू हिआँ मोरे लगे कउनो मनई क, जउन तोहरे देवतन क चोरोंए अहइ, पावा, तउ उ मारि दीन्ह जाइ। तोहरे लोग ही मोर गवाह होइहीं। तू आपन कउनो भी चीज क हेर सकत ह। जउन कछू भी तोहार होइ, लइ ल्या।" (याकूब क इ पता नाहीं रहा कि राहेल लाबान क घरे क देवतन क चोरएस ह।)

33एँह बरे लाबान याकूब क सिबिर मँ गवा अउ ओहमँ हेरेस। उ याकूब क तम्बू मँ हेरेस अउ लिआ क तम्बू मँ भी हेरेस। तब उ तम्बू मँ हेरेस जेहमँ दुइनउँ दासिन ठहरी रहिन। मुला उ ओकरे घरे मँ देवतन क नाहीं पाएस। तब लाबान राहेल क तम्बू मँ गवा। 34राहेल ऊँट क काठी मँ देवतन क छुपाइ राखे रही अउ उ ओनही प बइठी रही। लाबान पूरा तम्बू मँ हेरेस उ देवतन क न हेरि सका।

35अउ राहेल आपन पिता स कहेस, "पिता जी, मोह पइ जिन कोहाआ। मई आपक समन्वा ठाइ होइ मँ समर्थ नाहीं अहउँ। इ टेम मोर मासिक धरम चलत बाटइ।" एँह बरे लाबान पूरा सिबिर मँ हेरेस, मुला ओका हुआँ स देवतन क नाहीं पाइ सका।

36तब याकूब बहोतइ कोहान। याकूब कहेस, "मई का बुरा किहेउँ ह? मई कउन सा नेम तोड़ेउँ ह? मोर पाछा करइ अउ मोका रोक देइ क अधिकार तोहका कइसे अहइ? 37मोर जउन कछू अहइ ओहमँ तू हेरि लिहा ह। तू अइसी कउनो चीज पाया जउन तोहार अहइ। जदि तू कउनो चीज पाया ह तउ मोका देखोंवा। ओका हिअँइ धरा जेसे हमार संगी लखि सकई। हमरे संगियन क तय करइ द्या कि हम दुइनउँ मँ कउन ठीक अहइ। 38मई तोहरे बरे बीस बरिस तलक काम किहेउँ ह। इ पूरा समइ मँ बच्चा जनमत समइ कउनो भी नान्ह भेड़ी अउ बोकरी क नाहीं मरी अउर न ही मई कउनो मेमना तोहरे झुण्ड मँ स खाएउँ। 39जदि कबहुँ

जंगली जनावरन कउनो भेड़ी क मारेन मई फउरन ओकर दाम खुद दइ दिहेउँ। मई कबहुँ मुर्दा जनावर क तोहरे लगे लइके इ नाहीं कहेउँ कि एहमाँ मोर दोख नाहीं। मुला रात-दिन मोका लूटा गवा। 40दिन मँ सूरज मोर सक्ती छोरत रहा अउ रात क जाड़ा मोरी अँखियन क नीद चोराइ लेत रहा। 41मई बीस बरिस तलक तोहरे बरे एक दास क तरह काम किहेउँ। पहिले क चौदह बरिस मई तोहरी दुइ बिटियन क बियाहइ बरे काम किहेउँ। तउ पाछे क छः बरिस मई तोहरे जनावरन क पावइ बरे काम किहेउँ अउ इ बीच तू मोर पगार दस दाई बदल्या। 42मुला मोरे पुरखन क परमेस्सर इब्राहीम क परमेस्सर अउ इसहाक क भय मोरे संग रहा। जदि परमेस्सर मोरे संग नाहीं होत तउ तू मोका खाली हाथ पठइ देत्या। मुला परमेस्सर मोर दुःखे क लखेस। परमेस्सर मोरे किए काम क लखेस अउ पिछली रात परमेस्सर प्रमाण दइ दिहस कि मई नीक अहउँ।”

### याकूब अउ लाबान क मेल

43लाबान याकूब स कहेस, “इ सबइ लरिकियन मोर बिटिनियन अहई। ओनकइ बच्चन मोर बाटेन। इ सबइ जनावरन मोर अहई। जउन कछू भी तू हिआँ लखत अहा, मोर अहइ। मुला मई आपन बिटियन अउ ओनके बच्चन क रखइ बरे कछू नाहीं कइ सकत। 44एह बरे मई तोहसे एक करार करइ चाहत अहउँ। हम पचे पाथर क ढेर लगाउब जउन इ बताइ कि हम पचे सन्धि कइ चुका अहइ।”

45एह बरे याकूब एक बड़की चट्टान हेरेस अउ ओका इ पता देइ बरे हुआँ राखेस कि उ सन्धि किहेस ह। 46उ आपन मनइयन क अउर जियादा चट्टानन क हेरइ अउ चट्टानेँ क ढेर लगावइ क कहेस। तब उ पचे चट्टानन क लगे भोजन किहन। 47लाबान उ जगह क नाउँ यज्ञ सहादूथ राखेस। मुला याकूब उ जगह क नाउँ जिलियाद धरेस।

48लाबान याकूब स कहेस, “इ चट्टानन क ढेर हम दुइनउँ क हमार करार क सुमिरावइ मँ मदद करी।” इ कारण अहइ कि याकूब उ जगह क नाउँ गिलयाद कहेस।

49तब लाबान कहेस, “यहोवा हम पचन क एक दूसर स अलग होइ क गवाह रहइ।” एह बरे उ जगह क नाँउ मिजपा भी होगा।

50तब लाबान कहेस, “अगर तू मोर बिटियन क चोट पहोँचउब्या तउ याद राखा, परमेस्सर तोहका दण्ड देइ। अगर तू दूसर मेहरारु स बियाह करब्या तउ याद राखा, परमेस्सर तोहका लखत बाटइ। 51हिआँ इ सबइ चट्टानन अहई, जउन हमरे बीच मँ धरी अहई अउ इ खास चट्टान अहई जउन बतइहीं कि हम सन्धि कीन्ह ह। 52चट्टानन क ढेर अउ इ खास चट्टान हमका सन्धि क सुमिरन करावइ मँ मदद करी तू मोहसे लइइ बरे इ चट्टानन स आगे मोर कइँती कबहुँ न अउब्या। 53जदि हम पचे इ सन्धि क तोड़ देइ तउ इब्राहीम क परमेस्सर, नाहोर क परमेस्सर अउ ओनके पुरखन क परमेस्सर हम पचन क निआव करी।”

याकूब क पिता इसहाक परमेस्सर क “भय” नाउँ स गोहराएस। एह बरे याकूब वाचा बरे उ नाउँ क प्रयोग किहस। 54तब याकूब एक जनावर क मारेस अउ पहाड़े पइ

बलि क रूप मँ एँका भेंट चढ़ाएस अउ उ आपन मनइयन क भोज मँ सामिल होइ बरे बोलाएस। भोजन करे क पाछे उ पचे पहाड़े प राति काटेन। 55दूसर दिन भिन्सारे लाबान आपन नातियन क चूमेस अउ बिटियन क बिदा किहस। उ ओनका असीसेस अउ घर लउटि गवा।

### एसाव क संग पुन मेल

32 याकूब भी उ जगह तजेस। जब उ जात्रा करत रहा। उ परमेस्सर क सरगदूत क लखेस। 2जब याकूब ओनका लखेस तउ कहेस, “इ परमेस्सर क पड़ाव अहइ।” एह बरे याकूब उ जगह क नाउँ महनैम धरेस।

3याकूब क भाई एसाव सेईर नाउँ क पहँटा मँ रहत रहा। इ एदोम क पहाड़ी पहँटा रहा। याकूब एसाव क लगे दूत पठाएस। 4याकूब दूत स कहेस, “मोर सुआमी एसाव क इ खबर द्या, ‘तोहार नउकर याकूब कहत ह, मई इ सबइ बरिस मँ लाबान क संग रहेउँ ह। 5मोरे लगे गोरु, गदहन, झुण्ड अउ बहोत स नउकरन अउ मेहरारु नउकरन अहई। मई एनका तोहरे लगे पठवत अहउँ अउ चाहत अहउँ कि तू हमका अंगीकार करा।”

6दूत याकूब क लगे लउटा अउ बोला, “हम तोहरे भाई एसाव क लगे गए। उ तोहसे भेंटइ आवत अहइ। ओकरे संग चार सौ अउजार धारी वीर अहई।”

7उ संदेसा याकूब क डेराइ दिहस। उ आपन सबहिँ संगियन क दुइ दले मँ अलगाइ दिहस। उ आपन सबहिँ भेड़िन क खरका, गोरुअन क झुण्ड अउ ऊँटन क दुइ हींसा मँ बाँटेस। 8याकूब सोचेस, “अगर एसाव आइके एक हींसा क नास करत ह तउ दूसर हींसा पराइ सकत ह अउ बचि सकत ह।”

9याकूब कहेस, “हे मोरे पुरखा इब्राहीम क परमेस्सर। हे मोरे पिता इसहाक क परमेस्सर। यहोवा, तू मोका आपन देस मँ लउटइ अउ आपन परिवारे मँ आवइ बरे कह्या। तू कह्या कि तू मोर भलाई करिब्या। 10तू मोहे प बहोत दयालु रह्या ह। तू मोरे बरे बहोत नीक चीज किह्या ह। पहिली दाई मई जरिदन नदी क लगे जात्रा कीन्ह, मोरे लगे टहरइ क कुबरी क अलावा कछू भी नाहीं रहा। मुला मोरे लगे अब ऐतनी चीजन बाटिन कि मई ओनका पूरा दुइ दलन मँ बाँटि सकउँ। 11तोहसे पराथना करत अहउँ कि कृपा कइके मोका मोरे भाई एसाव स बचावा। मई ओसे ससान अहउँ। एह बरे कि उ आइ अउ सबहिँ क, हिआँ तलक कि बच्चन क संग महतरियन क भी जान स मारि डइ। 12हे यहोवा, तू मोसे कह्या, ‘मई तोहार भलाई करब। मई तोहरे परिवार क बढ़ाउब अउ तोहरे संताने क समुद्र क बालू क कणन क तरह बाढ़इ देब। उ सबइ ऐतना बेसी होइहीं कि गना नाहीं जाइ सकिहीं।”

13याकूब रात क उ जगह ठहरा। याकूब कछू चीजन एसाव क भेंट देइ बरे तइयार किहस। 14याकूब दुइ सौ बोकरियन, बीस तु बोकरन, दुइ सौ भेड़िन अउ बीस भेड़ा लिहस। 15याकूब तीस तु ऊँट अउ ओनकइ बच्चन, चालीस तु गइयन अउ दस तु बर्धन, बीस तु मादा गदहन अउ दस नर गदहन क लिहस। 16याकूब जनावरन क हर झुण्ड

नउकरन क दिहस। तब याकूब नउकरन स कहेस, “सब जनावरन क हर झुण्ड क अलग कइ ल्या। मोरे अगवा - अगवा चला अउ हर झुण्ड क बीच कछू दूरी राखा।” 17याकूब ओनका हुकुम दिहस। जनावरन क पहिले झुण्ड वाला नउकर स याकूब कहेस, “मोर भाई एसाव जब तोहरे लगे आवइ अउ तोहसे पूछइ, ‘इ केकर जनावर अहई? तू कहाँ जात अहा? तू केकर नउकर अहा?’ 18तब तू जवाब दिहा, ‘इ सबइ जनावरन आप क सेवक याकूब क अहई। याकूब एनका आपन सुआमी एसाव क भेंट क रुप में पठाएस ह, अउ याकूब भी हम लोगन क पाछे आवत अहइ।”

19याकूब क दूसर नउकर, तीसरा नउकर, अउर सबहिं दूसर नउकरन क इहइ बात करइ क हुकुम दिहस। उ कहेस, “जब तू पचे एसाव स भेट्या तउ इहइ एक बात कहब्या। 20तू पचे कहब्या, ‘इ आप क भेंट अहइ, अउर आप क सेवक याकूब भी लोगन क पाछे आवत अहइ।”

याकूब सोचेस, “जदि मई भेंट क संग इ मनइयन क आगे पठवत हउँ तउ इ होइ सकत ह कि एसाव मोका छिमा कइ देइ अउ मोका अंगीकार कइ लेइ।” 21एँह बरे याकूब एसाव क भेंट पठाएस। मुला याकूब उ रात आपन पड़ाव में ही ठहरा।

22पाछे उहइ रात याकूब उठा अउ उ जगह क तजि दिहस। याकूब आपन दुइनउँ मेहररुअन, आपन दुइनउँ दासिन अउ आपन ग्यारहु पूतन क साथ लिहस। घाटे प जाइके याकूब यब्बोक नदी क पार किहस। 23याकूब आपन परिवार क नदी क उ पार पठाएस। तब याकूब आपन सबहिं चिजियन क नदी क ओह पार पठइ दिहस।

### परमेस्सर स मल्ल जुद्ध

24याकूब नदी क पार करइवाला आखिर मनई रहा। मुला पार करइ स पहिले जब तक उ अकेला ही रहा, एक ठु मनई आवा अउ ओसे कुस्ती लड़इ लाग। उ मनई ओसे तब तलक कुस्ती लड़ेस जब तलक सूरज न निकरा। 25मनई लखेस कि उ याकूब क हराइ नहीं सकत। एँह बरे उ याकूब क गोड़ क ओकरे कूल्हा क जोड़ प छुएस। उ टेम याकूब क कूल्हा क जोड़ आपन जगह स हट गवा।

26तब उ मनई याकूब स कहेस, “मोका छोड़ द्या। सूरज ऊपर चढ़त बाटइ।”

मुला याकूब कहेस, “मई तोहका न छोड़ब। मोका तोहका असीबादि देइ क होइ।”

27अउर उ मनई ओसे कहेस, “तोहार का नाउँ अहइ?”

अउर याकूब कहेस, “मोर नाउँ याकूब बाटइ।”

28तब मनई कहेस, “तोहार नाउँ याकूब नहीं रही। अब तोहार नाउँ इस्त्राएल होइ। मई तोहका इ नाउँ एँह बरे देत हउँ कि तू परमेस्सर क संग अउ मनइयन क संग जुद्ध किहा ह अउ तू हरावा नहीं जाइ सक्या।”

29तब याकूब ओसे पूछेस, “कृपा कइके मोका आपन नाउँ बतावई।”

मुला उ मनई कहेस, “तू मोर नाउँ काहे पूछत अहा?” उ टेम उ मनई याकूब क असीसेस।

30एँह बरे याकूब उ जगह क नाउँ पनीएल राखेस। याकूब कहेस, “इ जगह मई परमेस्सर क साच्छात दरसन किहेउँ ह। किन्तु मोर जिन्नगी बच गइ।” 31जइसे ही उ पनीएल स गुजरा, सूरज निकरि आवा। याकूब आपन गोड़े क कारण लँगड़ाइ के चलत रहा। 32एँह बरे आजु भी इस्त्राएल क लोग पुट्टा क मांस पेसी क नहीं खातेन काहेकि इहइ मांस पेसी प याकूब क चोट लागि रही।

### याकूब आपन बहादुरी देखावत ह

33 याकूब निगाह उठाएस अउ एसाव क आवत लखेस। एसाव आवत रहा अउ ओकरे संग चार सौ मनई रहेन। याकूब आपन परिवार क चार टोली में बाटेस। लिआ अउ ओकर बच्चन एक दल में रहेन, राहेल अउ यूसुफ एक दले में रहेन, दासी अउ ओकर लरिकन दुइ दले में रहेन। 2याकूब दासियन अउ ओनके बच्चन क अगवा राखेस। ओकरे पाछे ओनके पाछे लिआ अउ ओकरे बच्चन क राखेस अउर याकूब राहेल अउ यूसुफ क सब क आखिर में राखेस।

3याकूब एसाव की ओर बढ़ा। एँह बरे उ पहिला मनई रहा जेकरे संग एसाव मिलेस। अपने भाई कइँती बढ़त टेम प याकूब सात दाई भुइँथा प निहुरिके पैलगी किहेस।

4जब एसाव याकूब क लखेस, उ ओसे भेटइ दौड़ गवा। एसाव याकूब क आपन बाँही में भरि लिहस अउ छाती स चिपकाएस तब एसाव ओकर गरदन स चिपकाएस अउ ओकर चुम्बन लिहस। अउ दुइनउँ आनन्द स रोइ पड़ेन। 5एसाव निगाह उठाएस अउ मेहररुअन अउ बच्चन क लखेस। उ कहेस, “तोहरे संग इ सबइ कउन लोग अहई?” याकूब जवाब दिहस, “इ सबइ उ बच्चन अहई जेका परमेस्सर मोका दिहे अहइ। परमेस्सर मोहे प दयालु रहा ह।”

6तब दुइनउँ दासियन आपन बच्चन क संग एसाव क लगे गएन। उ पचे ओका निहुरिके पैलगी किहन। 7तब लेआ आपन बच्चन क संग एसाव क समन्वा गइन अउ उ पैलगी किहस अउर तब राहेल अउ यूसुफ एसाव क समन्वा गएन अउ उ पचे भी पैलगी किहन।

8एसाव कहेस, “मई जउन सब मनइयन क हिआँ आवत समइ देखेउँ उ सबइ कउन रहेन? अउ उ सबइ गोरुअन काहे बरे रहेन?”

याकूब जवाब दिहस, “उ सबइ तोहका मोर भेंट अहई जेहसे तू मोका अंगीकार कइ सका।”

9मुला एसाव कहेस, “भाई, तोहका मोहे बरे कउनो भेंट नहीं देइ चाही काहेकि मोरे लगे सब कछू इफरात बाटइ।”

10याकूब कहेस, “नाहीं! मई तोहसे बिनती करत अहउँ। जदि तू फुरे मोका अपनावत ह तउ कृपा कइके जउन भेंट देत अहउँ तू अपनावा। मई तोहका दूसरी दाई लखि के बहोत खुस अहउँ। इ तउ परमेस्सर क लखइ जइसा बाटइ। मई इ लखिके बहोत खुस अहउँ कि तू मोका अपनावत ह। 11एँह बरे मई बिनती करत हउँ कि जउन भेंट मई देत अहउँ ओका भी अंगीकार करा। परमेस्सर मोरे ऊपर बहोतइ कृपालु रहा ह। मोरे लगे आपन जरुरत स बेसी अहइ।” इ

तरह याकूब एसाव स भेट अंगीकार करइ के बिनती किहेस।  
 12तब एसाव कहेस, “अब तू आपन जात्रा जारी किहे रहि  
 सकत ह। मई तोहरे संग चलब।”

13मुला याकूब ओसे कहेस, “तू इ जानत ह कि मोरे  
 बच्चन अबहि दुर्बल बाटेन अउर मोका आपन झुण्ड अउ  
 ओनके बच्चन क खास देख-रेख करइ चाही। अगर मई  
 ओनका बहोत दूर एक दिन मँ चलइ बरे मजबूर करत हउँ  
 तउ सबहि गोरु मरि जइहीं। 14एँह बरे तू आगे चला अउ  
 मई रसे रसे तोहरे पाछे आउब। मई गोरुअन अउ दूसर  
 जनावरन क रच्छा बरे धीमे बढ़ब अउ मई बहोतइ रसे-रसे  
 एँह बरे चलब कि मोर गदेलन बहोत जियादा थक न जाई।  
 मई सेइर मँ तोहसे मिलब।”

15एँह बरे एसाव कहेस, “तब मई आपन कछू संगियन क  
 तोहरी मदद बरे छोड़ देब।”

मुला याकूब कहेस, “इ तोहार बिसेस दाया बाटइ।” मुला  
 अइसा करइ क कउनो जरुरत नाहीं बा।”

16एँह बरे उ दिन एसाव सेइर क वापसी जात्रा प चल  
 पड़। 17मुला याकूब सुक्कोत क गवा। हुआँ उ आपन बरे  
 एक ठु घर बनाएस अउर आपन गोरुअन बरे एक नान्ह  
 नान्ह गोसालन क बनाएस। इहइ कारण इ जगह क नाउँ  
 सुक्कोत रखेस।

18याकूब सुरच्छा क साथ आपना जात्रा पढ़न-अराम स  
 सुरू कई क कनान पहुँटा मँ सकेम सहर तलक समाप्त  
 किहेस। याकूब सहर क निचके मइदान मँ डेरा डाएस।  
 19याकूब उ भुईया क सकेम क बाप हमोर क परिवारे स  
 बेसहेस। याकूब चाँदी क एक सौ सिक्का दिहस। 20याकूब  
 परिवार क आराधना बरे हुआँ एक ठु वेदी बनाएस। याकूब  
 जगह क नाउँ “एले, इस्त्राएल क परमेस्सर” रखेस।

### दीना क संग कुकर्म

**34** दीना लिआ अउ याकूब क बिटिया रही। एक दिन  
 दीना उ पहुँटा क मेहररुअन क लखइ बाहेर गइ।  
 2उ पहुँटा क राजा हमोर क पूत सकेम दीना क निहारेस। उ  
 ओका धइ लिहस अउ आपन संग तने क सम्बंध रखइ बरे  
 ओका बेबस किहस। 3उ सकेम याकूब क बेटी दीना स  
 पियेस करइ लाग। एँह बरे उ ओकर दिल जीतइ क कोसिस  
 किहेस। 4सकेम आपन बाप स कहेस, “कृपा कइके इ  
 लउँडिया क मोका दिआवा जेहसे मई एकरे संग बियाह कइ  
 सकउँ।”

5याकूब इ जान लिहेस कि सकेम ओकरी बिटिया दीना  
 क संग बहोत बुरा कर्म किहस ह। मुला याकूब क सबहि  
 पूत आपन गोरुअन क संग मइदान मँ गएन। एँह बरे उ  
 सबइ जब तलक नाहीं आएन, याकूब कछू नाहीं किहस। 6उ  
 टेम सकेम क बाप हमोर याकूब क संग बात करइ गवा।  
 7खेतन मँ याकूब क पूतन जउन कछू भवा रहा, ओकर  
 खबर सुनेन। जब उ पचे इ सुनेन तउ उ पचे बहोत कोहाइ  
 गएन। उ पचे पगलाइ स गएन काहेकि सकेम याकूब क  
 बिटिया क बलात्कार कइ के इस्त्राएल क बदनाम किहस।

सकेम बहोतइ धिनौनी बात किहे रहा। एँह बरे सबहिं भाई  
 लोग खेतन स घर लउटेन।

8मुला हमोर भाइयन स बात किहेस। उ कहेस, “मोर पूत  
 सकेम दीना स बहोत पियेस करत ह। मेहरबानी कइके ओका  
 एकरे संग बियाह करइ द्या। 9इ बियाह इ बात क प्रमाण  
 होइ कि हम पचे खास सन्धि कीन्ह ह। तब हमार लोग तू  
 पचन क मेहररुअन स अउ तोहार लोग हम पचन क  
 मेहररुअन क संग बियाह कइ सकत हीं। 10तू लोग हमारे  
 संग एक पहुँटा मँ रहि सकित ह। तू भुईया क सुआमी  
 बनब्या अउर हिआँ बइपार करइ बरे अजाद होब्या।”

11सकेम याकूब अउ दीना क भाइयन स भी बात किहस।  
 सकेम कहेस, “कृपा कइके मोका अंगीकार करा अउ मई  
 जउन किहेउँ ओकरे बरे छिमा करा। 12मई तोहका जउन  
 कछू उपहार तू चाहत ह देब, अगर तू मोका सिरिफ दीना  
 क संग बियाह करइ द्या।” मोका जउन कछू आप लोग  
 करइ क कइहीं करब, मुला दीना क बियाह मोर संग होइ  
 द्या।”

13याकूब क बेटहनन सकेम अउ ओकरे बाप स झूठ  
 बोलइ क ठान लिहना। भाइयन अबहुँ भी पागल होत रहेन  
 काहेकि सकेम ओनकइ बहिन दीना क संग अइसा धिनौना  
 बेउहार किहे रहेन। 14एँह बरे भाइयन ओसे कहेन, “हम  
 लोग तोहका आपन बहिन क संग बियाह नाहीं करइ देब  
 काहेकि तोहार खतना अबहिं नाहीं भवा अहइ। हमरी बहिनी  
 क तोहसे बियाह करब ठीक न होइ। 15मुला हम पचे  
 तोहका ओकरे संग बियाह करइ देब अगर तू इहइ एक  
 काम करा कि तोहरे सहर क हर मनई क खतना हम पचन  
 क तरह होइ जाइ। 16तब तोहरे मनई हमरी अउरतन स  
 बियाह कइ सकत हीं अउर हमार मनई तोहरी अउरतन स  
 बियाह कइ सकत हीं। तब हम पचे एक ही लोग बन जाब।  
 17जदि तू खतना कराउब नाहीं कबूल करब्या तउ हम लोग  
 दीना क लइ जाब।”

18इ सन्धि हमोर अउ सकेम क बहोत खुस किहस।  
 19दीना क भाइयन जउन कछू कहेन ओका करइ मँ सकेम  
 बहोत खुस भवा।

### बदला

सकेम परिवार क सबसे जियादा मर्जादी मनई रहा।  
 20हमोर अउ सकेम अपने सहर क सभाघर क गएन। उ  
 पचे सहर क लोगन स बातन किहन अउ कहेन 21“इस्त्राएल  
 क इ सबइ लोग हमार मीत होवा चाहत हीं। हम लोगन क  
 पास हम सबहिं लोगन बरे संतुट्ट भुईया अहइ। एह बरे उ  
 लोगन क हम लोगन क भुईया रहइ द्या अउर एहमाँ  
 बइपार करइ द्या। हम पचे एँकी मेहररुअन क संग बियाह  
 करइ क अजाद अही अउ हम लोग आपन मेहररुअन  
 ओनका बियाहे बरे देइ मँ खुस अही। 22मुला एक बात  
 अहइ जेका करइ बरे सबहिं क सन्धि करइ क होइ। ताकि  
 उ पचे हम लोगन क बीच रही सका अउर हम पचे एक  
 ही लोगन होइ सकब। हमार सबइ लोग भी उपचन्क क  
 नाई खतना करावइ बरे राजी हो जाब। 23जदि हम अइसा  
 करब तउ ओनके गोरुअन अउ जनावरन स हम धनी होइ

जाब। एह बरे हम लोग ओनके संग इ सन्धि करी अउर उ पचे हिआँ हम लोगन क संग रइहीं।” 24सभाघरे प जउन लोगन इ बात सुनेन उ पचे हमोर अउ सकेम क संग राजी होइ गएन अउ उ टेम हर एक मनई क खतना कइ दीन्ह गवा।

25तीन दिना पाछे, खतना कइ दीन्ह गए मनइयन क अबहिं जखम रहेन। याकूब क दुइ पूत सिमोन अउ लेवी जानत रहेन कि टेम लोग कमजोर होइहीं, एह बरे उ नगर क गएन अउर उ पचे सबहिं मनइयन क मारि डाएन। 26दीना क भाई सिमोन अउ लेवी हमोर अउ ओकरे पूत सकेम क मारि डाएस। उ पचे दीना क सकेम क घरे स बहियाइ दिहेन अउ उ पचे चला गएन। 27याकूब क दूसर पूतन सहर में गएन अउ उ पचे हुआँ जउन कछू रहा, लूटि लिहन। सकेम जउन कछू ओनकइ बहिनी क संग किहे रहा, ओसे उ सबइ तब तलक कोहान रहेन। 28एह बरे भाइयन ओनकइ सबहिं जनावरन लइ लिहेन। उ पचे ओनकइ गदहन अउ सहर अउ खेतन में दूसर जउन कछू रहा, सब स लइ लिहन। 29भाइयन ओन सबन क सब कछू लइ लिहन। भाइयन ओनकइ मेहररुअन अउ बच्चन तलक क लइ लिहन।

30मुला याकूब सिमोन अउ लेवी स कहेस, “तू पच मोर बरे मुसीबत खड़ी कइ दिहा ह। अउ इ प्रदेस क बसइयन क मन में घिना पइदा कराया ह। सबहिं कनानी अउ परिज्जी लोग हमरे खिलाफ होइ जइहीं। हिआँ हम बहोत तनिक अही। अगर इ पहुँटा क लोग हम पचन क खिलाफ लइइ खातिर बटुरि जइहीं तउ हम पचन बर्बाद होइ जाब। अउ हमरे संग हमार सबहिं लोग नस्त होइ जाइहीं। अउर मई अउ मोरे घरे क सबहिं लोगन बर्बाद होइ जाइहीं।”

31मुला भाइयन जवाब दिहन, “कम हम पचे ओन मनइयन क आपन बहिनी क संग पतुरिया जइसा बेउहार करइ देइ? नाहीं हमरी बहिनी क संग वइसा बेउहार करइ वाला लोग बुरा रहेन।”

### याकूब बेतेल में

**35** परमेस्सर याकूब स कहेस, “बेतेल सहर क जा, हुआँ बस जा अउ हुवई “एल,” परमेस्सर बरे जउन तोहरे समन्वा परगट भवा रहा जब तू आपन भाई एसाव स बचि के परात रह्या एक वेदी बनावा।”

2एह बरे याकूब आपन परिवार अउ आपन सबहिं नउकरन स कहेस, “काठ अउ धातु क बना जउन बिदेसी देवतन तू पचन क लगे अहई ओनका नस्त कइ द्या। अपने क पवित्र करा। ओढ़ना साफ पहिरा। 3हम पचे इ जगह क तजि देब अउ बेतेल क जाब। उ जगह में आपन परमेस्सर बरे एक वेदी बनाउब। इ उहइ परमेस्सर अहइ जउन मोरे कस्त क समइ मोर मदद किहस अउ जहाँ कहुँ मई गवा उ मोरे संग रहा।”

4एह बरे मनइयन क लगे जउन बिदेसी देवता रहेन, ओन सबहिं क उ पचे याकूब क दइ दिहन। उ पचे आपन काने में पहिरी भइ सब बालियन क भी याकूब क दइ दिहन।

याकूब सकेम नाउँ क सहर क नगिचे एक बलूत क बृच्छ क तरे इ सबहिं चिजियन क गाइ दिहस।

5तउ उ पचे तजि गएन अउर परमेस्सर ओनका चरीहू कइँती क सभी सहरन पइ भयंकर डर डाल दिएन। एह ठू बरे उ पचे याकूब क पूतन पाछा नाहीं किहस। 6एह बरे याकूब अउ ओकर लोग लूज पहोचैन। अब लूज क बेतेल कहत हीं। इ कनान प्रदेस में बाटइ। 7याकूब हुआँ एक तु वेदी बनाएस। याकूब उ जगह क नाउँ “एल बेतेल” राखेस। याकूब इ नाउँ क एह बरे चुनेस कि जब उ आपन भाई क हिआँ स परात रहत रहा, तब पहिली दाई परमेस्सर हिआँई परगट भवा।

8रिबका क धाई दबोरा हिआँई मरी रही, उ पचे बेतेल में सिन्दूर क बृच्छ क खाले ओका गाइ दिहन। उ पचे उ ठउर क नाउँ अल्लोनबक्कूत रखेन।

### याकूब क नवा नाँउ

9जब याकूब फद्दान आराम स लउटा तब परमेस्सर फुन ओकरे समन्वा परगट भवा। परमेस्सर याकूब क असीसेस। 10परमेस्सर याकूब स कहेस, “तोहार नाँउ याकूब अहइ। मुला मई उ नाउँ क बदलब। अब तू याकूब नाहीं कहवउब्या। तोहार नवा नाउँ इस्त्राएल होइ।” एह बरे एकरे पाछे याकूब क नाँउ इस्त्राएल भवा।

11परमेस्सर ओसे कहेस, “मई सर्वोच्च परमेस्सर अहउँ अउ तोहका मई इ आसीबादि देत हउँ तोहरे बहोत संतान होई अउर तू एक महान रास्ट्र बनी जाब्या। बहोत सारे रास्ट्र तोहसे अइहीं अउर राजा लोग तोहसे आइहीं। 12मई इब्राहीम अउ इसहाक क इ भुइँया दिहे रहेउँ। अब मई इ भुइँया तोहका अउर तोहार सन्तानन क देत अहउँ।” 13तब परमेस्सर उ जगह तजि दिहस। 14-15याकूब इ ठउरे प एक स्मृति चट्टान खड़ी किहस। याकूब ओह चट्टान पइ दाखरस अउर तेल क भेंट उडैरेस। इ एक खास ठउर रहा काहेकि परमेस्सर हुआँ याकूब स बात किहस अउर याकूब उ ठउर क नाउँ बेतेल राखेस।

### राहेल जन्म देत समइ मरी

16याकूब अउ ओकर दल बेतेल क तजि दिहन। एप्राता आवइ स ठीक पहिले राहेल आपन बच्चन क जन्म देइ लाग। 17मुला राहेल क इ जन्म स बहोत तकलीफ होइ लाग। ओका बहोत दर्द होत रहा। राहेल क धाई ओका लखेस अउ कहेस, “राहेल, डेराअ जिन। तू एक अउर पूत क जन्म देति अहा।”

18पूत क जन्म देत समइ राहेल मरि गइ। मरइ क पहिले राहेल बच्चा क नाउँ बेनोनी राखेस। मुला याकूब ओकर नाँउ बिन्यामीन राखेस।

19एप्राता क आवइवाली सड़क प राहेल क दफनावा गवा। (एप्राता बेतेलेहेम अहइ।) 20अउर याकूब राहेल क सम्मान में ओकरी कब्रे प एक तु चट्टान धरेस। उ खास चट्टान हुआँ आजु तलक बाटइ। 21तब इस्त्राएल आपन जात्रा जारी राखेस। उ एदेर बुर्ज खम्भा क ठीक दक्खिन में आपन सिबिर डाएस।



22इस्त्राएल हुआँ तनिक समइ ठहरा। जब उ हुआँ रहा तब रूबेन इस्त्राएल क मेहरारु नउकरन बिल्हा क संग सोएस। इस्त्राएल इ बारे में सुनेस अउ बहोत कोहाइ गवा।

### इस्त्राएल क परिवार

याकूब क बारह पूत रहेन।

23ओकरी मेहरारु लिआ स ओकरे छः पूत रहेनः रूबेन, सिमोन, लेवी, यहूदा, इस्साकार, जबूलून।

24ओकरी मेहरारु राहेल स ओकरे दुइ पूत रहेनः यूसुफ अउ बिन्यामीन।

25राहेल क दासी बिल्हा स ओकरे दुइ पूत रहेनः दान अउ नप्ताली।

26अउर लिआ क दासी जिल्पा स ओकरे दुइ पूत रहेनः गाद अउ आसेर। इ सबइ क पूत अहईँ जउन पददनराम में पइदा भए रहेन।

27मझे क किर्यत-अर्बा अर्थात् हेब्रोन में याकूब आपन पिता इसहाक क लगे गवा। इ उहइ जगह अहइ जहाँ इब्राहीम अउ इसहाक रहि चुका रहेन। 28इसहाक एक सौ अस्सी बरिस क रहा। 29इसहाक बहोत बरिस तलक जिअत रहा। जब उ मरा, उ बहोत बुढ़वा रहा। ओकरे पूत एसाव अउ याकूब ओका हुआँइ दफनाएन जहाँ ओकरे पिता क दफनावा गवा रहा।

### एसाव क परिवार

**36** एसाव अर्थात् एदोम क परिवार क इतिहास अहइ। 1एसाव कनान देस क मेहररुअन स बियाह किहस। एसाव क मेहररुअन रहिनः आदा, हिती एलोन क बिटिया। ओहोलीबामा हिच्वी सिबोन क नतिनी अउ अना क बिटिया। 3बासमत इस्त्राएल क बिटिया अउ नबायोत क बहिन। 4आदा एसाव क एक पूत एलीपज दिहस। बासमत क रूएल नाउँ क पूत भवा। 5ओहोलीबामा एसाव क तीन पूत दिएस यूस, यालाम अउ कोरह इ सबइ एसाव क पूत रहेन। इ सबइ कनान पहुँटा में पइदा भए रहेन।

6-8याकूब अउ एसाव क परिवार अब बहोत बाढ़ि गएन अउ अउ कनान में इ बड़ा परिवार क खाइ-पिअइ क जुटाइ पाउब कठिन होइ गवा। एँह बरे एसाव कनान तजि दिहस अउ आपन भाई याकूब स दूर दूसर पहुँटा में चला गवा। एसाव आपन सबहिँ चीजन क आपन संग लिआवा। कनान में रहत भवा उ सबहिँ इ चीजन क पाए रहा। एँह बरे एसाव आपन संग आपन मेहररुअन, पूतन, बिटियन सबहिँ नउकरन, गोरु अउ दूसर सबहिँ जनावरन क लिहस। एसाव अउ याकूब क परिवार एँतना बाढ़त रहेन कि ओनका एक जगह प रहब कठिन रहा। उ भुइँया दुइनउँ परिवारे क पेट पालइ बरे जियादा नाहीं रही। ओनके लगे बहोत जियादा गोरु रहेन। एसाव पहाड़ी पहुँटा सेईर कइँती बढ़ा। (एसाव क नाउँ एदोम भी अहइ।)

9एसाव एदोम क मनइयन क आदि बाप रहा। सेईर क पहाड़ी पहुँटा में बसइयन एसाव क घराने क इ नाउँ अहईँ।

10एसाव क पूत रहेनः एलीपज, आदा अउ एसाव क पूत। रूएल बासमत अउ एसाव क पूत।

11एलीपज क पाँच पूत रहेनः तेमान, ओमार, सपो, गाताम अउ कनज। 12एलीपज क एक तिम्ना नाँउ क उपपत्नी भी रही। तिम्ना अउ एलीपज अमालेक क जन्म दिहिन।

13रूएल क चार पूत रहेनः नहत, जेरह, सम्मा, मिज्जा।

इ सबइ एसाव क मेहरारु बासपत स ओकरे पोता रहेन।

14एसाव क तीसर मेहरारु अना क बिटिया ओहोलीबामा रही। (अना सिबोन क पूत रहा।) एसाव अउ ओहोलीबामा क पूत रहेनः यूस, यालाम, कोरह।

15एसाव स चलइ वाला बंस इ सबइ ही बाटेन।

एसाव क पहिला पूत एलीपज रहा। एलीपज स तेमान, ओमार, सपो, कनज, 16कोरह, गाताम, अमालेक भएन।

इ सबहिँ परिवार एसाव क मेहरारु आदा स भएन।

17एसाव क पूत रूएल इ परिवारन क आदि पिता रहाः नहत, जेरह, सम्मा, मिज्जा।

इ सबहिँ परिवार एसाव क मेहरारु बासमत स भएन।

18अना क बिटिया एसाव क मेहरारु ओहोलीबामा यूस, यालाम अउ कोरह क जन्म दिहिन। इ सबइ तीनउँ आपन-आपन घराने क बाप रहेन। 19इ सबहिँ परिवार एसाव स चलेन।

20एसाव क पहिले एदोम में सेईर नाँउ क एक ठु होरी मनई रहत रहा। सेईर क पूत इ सबइ अहईँः लोतान, सोबाल, सिबोन, अना 21दीसोन, एसेर, दिसान। इ सबइ पूतन आपन परिवार क मुखिया रहेन।

22लोतान, होरी, हेमाम क बाप रहा। (तिम्ना लोतान क बहिन रही।) 23सोबाल, अल्वान, मानहत एबल सपो, ओनाम क पिता रहा।

24सिबोन क दुइ पूत रहेनः अय्या अउर अना। (अना उ मनई अहइ जउन आपन पिता क गदहन क देखरेख करत समइ रेगिस्तान में गरम पानी क झरना हेरेस।)

25अना, दीसोन अउ ओहोलीबामा क पिता रहा।

26दीसोन क चार पूत रहेनः हेमदान, एस्वान, यित्रान, करान।

27एसेर क तीन पूत रहेनः बिल्हान, जावान, अकान।

28दीसान क दुइ पूत रहेनः ऊस अउ अरान।

29इ होरी परिवारन क मुखियन क नाउँ अहईँ। लोतान, सोबाल, सिबोन, अना। 30दीसोन, एसेर, दीसान। इ सबइ मनइयन ओन परिवारन क मुखिया रहेन जउन सेईर पहुँटा में रहत रहेन। 31उ टेम एदोम में कइउ राजा रहेन। इस्त्राएल में राजा होइ के बहोत पहिले एदोम में राजा रहेन।

32बोर क पूत बेला एदोम में राज्ज करइ वाला राजा रहा। उ दिन्हाबा सहर प राज्ज करत रहा। 33जब बेला मरा तउ योबाब राजा भवा। योबाब बोस्त्रा क जेरह क पूत रहा। 34जब योबाब मरा, हूसाम राज्ज किहस। हूसाम तेमानी लोगन क देस क रहा। 35जब हूसाम मरा, हदद उ पहुँटा प राज्ज किहस। हदद बदद क पूत रहा। (हदद उ मनई रहा जउन मिदयानी लोगन क मोआब देस में हराए रहा।) हदद अबीत सहर क रहा। 36जब हदद मरा, सम्ला उ प्रदेस प राज्ज किहस। सम्ला मस्त्रेक क रहा। 37जब सम्ला मरा, साऊल उ पहुँटा प राज्ज किहस। साऊल फरात नदी क किनारे रहोबोत क रहा। 38जब साऊल मरि गवा, बाल्हानान उ देस प हूकूमत किहस। बाल्हानान अकबोर क पूत रहा। 39जब

बाल्हानान मरा, हदर उ प्रदेस प राज्ज किहस। हदर पाऊ सहर क रहा। मत्रेद क बिटिया हदर क मेहरारु क नाउँ महेतबेल रहा। मत्रेद क बाप मेजाहब रहा।

40-43 एदोमी परिवारन, तिम्ना, अल्बा, यतेत, ओहोलीबामा, एला, पीपोन, कनज, तेमान, मिबसार, मगदीएल अउ ईराम आदि क बाप एसाव रहा। हर एक परिवार एक ठु अइसे प्रदेस में रहत रहा जेकर नाउँ उहइ रहा जउन ओनकइ परिवारे क नाउँ रहा।

### सपन क देखइवाला यूसुफ

37 याकूब ठहरि गवा अउ कनान पहुँटा मँ रहइ लाग। इ उहइ प्रदेस अहइ जहाँ ओकर बाप आइके बसा रहा। 2 याकूब क परिवार क इहइ कथा अहइ।

यूसुफ एक सत्रह बरिस क जवान रहा। ओकर पेसा भेड़ी बोकरियन क देखेख करब रहा। यूसुफ इ काम अरथ अहइ कि बिल्हा अउ जिल्पा क पूतन क संग करत रहा। (बिल्हा अउ जिल्पा ओकरे बाप क मेहररुअन रहिन।) यूसुफ आपन बाप क आपन भाइयन क बुरी बातन बतावत रहा। 3 यूसुफ उ टेम पइदा भवा जब ओकर पिता इस्त्राएल बहोत बुढ़वा रहा। ऐह बरे इस्त्राएल, यूसुफ क आपन दूसर पूतन स बेसी पिआर करत रहा। याकूब आपन पूत क एक खास कोट बनवाएस। इ कोट लम्बा अउ बहोत सुन्नर रहा। 4 यूसुफ क भाइयन लखेन कि ओनकइ बाप ओनसे बेसी यूसुफ क जियादा पिआर करत ह। उ पचे इहइ कारण आपन भाई स घिना करत रहेन। उ पचे यूसुफ स अच्छी तरह बात नाहीं करत रहेन।

5 एक दाई यूसुफ एक खास सपन लखेस। पाछे यूसुफ आपन इ सपना क बारे मँ आपन भाइयन क बताएस। एकरे पाछे ओकरे भाई पहिले स भी जियादा ओसे घिना करइ लागेन।

6 यूसुफ कहेस, “मई एक सपना देखेउँ ह। 7 हम पचे सबहिं खेते मँ काम करत रहे। हम पचे गोहूँ क एक साथ बोझ बाँधत रहेन। मोर बोझा खड़ा होइ गवा अउ तू पचन क बोझ मोरे बोझे क चारिहूँ कइँती घेरि लिहस। तब तोहार सबहिं बोझ मोरे बोझे क निहुरिके प्रणाम किहस।”

8 ओकर भाइयन कहेन, “का, तू सोचत ह कि ऐंकर अरथ अहइ कि तू राजा बनब्या अउर हम पचन प राज्ज करब्या?” ओकर भाइयन यूसुफ स अब अउर बेसी घिना करब सुरु किहसेस काहेकि उ ओकरे बारे मँ सपना देखत रहा।

9 तब यूसुफ दूसर सपना देखेस। यूसुफ आपन भाइयन स इ सपना क बारे मँ बताएस। यूसुफ कहेस, “मई दूसर सपना लखेउँ ह। मई सूरज, चन्द्रमा अउ गियारह नखत्रन क आपन क प्रणाम करत लखेउँ।”

10 यूसुफ आपन बाप क भी इ सपना क बारे मँ बताएस। मुला ओकर पिता ओका डॉटिस। ओकर पिता कहेस, “इ कउने तरह क सपना अहइ? का तोहका बिस्पास अहइ कि तोहार महतारी, तोहार भाई अउ हम पचे तोहका प्रणाम करिबइ?” 11 यूसुफ क भाई ओहसे बराबर जलन करत रहा। मुला यूसुफ क पिता इ सबहिं बातन क बारे मँ बहोत

गहराई स बिचार किहस अउ सोचेस कि ओनकइ अरथ का होई?

12 एक दिन यूसुफ क भाई आपन बाप क भेड़िन क देखेख बरे सकेम गएन। 13 याकूब यूसुफ स कहेस, “सकेम जा। तोहार भाई मोर भेड़िन क साथ हुआँ अहइ।”

यूसुफ जवाब दिहस, “मई जाब।”

14 यूसुफ क बाप कहेस, “जा अउ लखा कि तोहार भाई सुरच्छित बाटइ। लौटिके आवा अउ बतावा कि का मोर भेड़िन ठीक अहई?” इ तरह यूसुफ क पिता ओका हेब्रोन क घाटी स सकेम क पठाएस।

15 सकेम मँ यूसुफ हेराइ गवा। एक मनई ओका खेतन मँ भटकत भवा पाएस। उ मनई कहेस, “तू का हेरत अहा?”

16 यूसुफ उत्तर दिहस, “मई आपन भाइयन क हेरत अहउँ। का तू बताइ सकत ह कि उ सबइ आपन भेड़िन क संग कहाँ अहई?”

17 मनई जवाब दिहस, “उ पचे पहिले ही चला गवा अहई। मई ओनका कहत भवा सुनेउँ कि उ पचे दोतान क जात अहई।” ऐह बरे यूसुफ आपन भाइयन क पाछे गवा अउ उ ओनका दोतान मँ पाएस।

### यूसुफ गुलामी बरे बेच गवा

18 यूसुफ क भाइयन बहोत दूर स ओका आवत लखेन। उ पचे ओका मारि डावइ क कुचाल बनावइ क ठान लिहन। 19 भाइयन एक दूसर स कहेन, “इ सपना लखइवाला यूसुफ आवत अहइ। 20 मौका मिलत ही हम पचे ओका मारि डाइ। हम ओकरे तने क झुरान भए इरनन मँ स कउनो एक मँ लोकाइ सकित ह। हम आपन पिता स कहि सकित ह कि एक ठु जंगली जनावर ओका मारि डाएस। तब हम पचे ओका देखाउब कि ओकर सपना बेकार अहई।”

21 मुला रूबेन यूसुफ क बचावइ चाहत रहा। रूबेन कहेस, “हम पचे ओका मारी नाहीं। 22 हम लोग ओका बिना चोट किहे एक ठु इनारा मँ नाइ सकित ह।” रूबेन यूसुफ क बचावइ अउर ओकरे बाप क लगे पठवइ क जोजना बनाएस। 23 यूसुफ आपन भाइयन क लगे आवा। उ पचे ओह प धावा बोल दिहन अउ ओकरे लम्बे अउ सुन्नर कोट क फाड़ डिएन। 24 तब उ पचे ओका खाली झुरान इनारा मँ बहाइ दिहन।

25 यूसुफ इनारा मँ ओकर भाइयन क भोजन करइ बरे बइठइ तलक रहा। तब उ पचे नजर उठाएन अउ बइपारियन क एक दल क लखेन। जउन गिलाद स मिस्त्र क जात्रा प रहेन। ओनकइ ऊँटन कइउ तरह क मसाला अउ धन लइ जात रहेन। 26 ऐह बरे यहूदा आपन भाइयन स कहेस, “अगर हम लोग आपन भाई क मारि देब अउ ओकरी मउत क छुपाउब तउ ओहसे हमका का लाभ मिली? 27 हम सबन क बेसी फायदा तब होइ जब हम ओका बइपारियन क हाथ बेचि देइ।” दूसर भाई लोग मान गएन। 28 जब मिद्रयानी बइपारी लोग लगे आएन, भाई लोग यूसुफ क इनारा स बाहेर निकारेन। उ पचे बीस ठु चौँदी क टूका मँ ओका बेचि दिहन। बइपारियन ओका मिस्त्र लइ गएन।

29इ पूरा टेम रूबेन भाइयन क संग हुआँ नहीं रहा। उ नहीं जानत रहा कि उ पचे यूसुफ क बेचि दिहे रहेन। जब रूबेन इनारा प लौटिके आवा तउ उ लखेस कि यूसुफ हुआँ नहीं अहइ। रूबेन बहोत जियादा दुःखी भवा। उ आपन ओढ़ना क फाड़ेस। 30रूबेन भाइयन क लगे गवा अउ उ ओनसे कहेस, “लरिका कुआँ प नहीं अहइ। मई का करउँ?” 31भाइयन एक बोकरी क मारेन अउ ओकरे खून क यूसुफ क सुन्नर कोट प डाएस। 32तब भाइयन उ कोट क आपन पिता क देखाएन अउ कहेन, “हमका इ कोट मिला बाटइ, का इ यूसुफ क कोट अहइ?”

33बाप कोट क लखेस अउ पहिचानेस कि इ यूसुफ क अहइ। पिता कहेस, “हैं, इ उहइ क बाटइ। होइ सकत ह कि ओका कउनो जंगली जनावर मारि जाए होइ। मोरे पूत यूसुफ क कउनो जंगली जनावर खाइ गवा।” 34याकूब आपन ओढ़ना फाड़ि डाएस अउर सोक क ओढ़ना पहिर लिहस। याकूब लम्बे समइ तलक आपन बेटवा क दुःख अउ सोक में पड़ा रहा। 35याकूब क सबइ बेटवन, बिटियन ओका धीरे बँधावइ क जतन किहन। मुला याकूब कबहुँ धीरे न धरि सका। याकूब कहेस, “मई मरइ क दिन तलक आपन पूत यूसुफ क दुःख में डूबा रहब।” अउर याकूब आपन पूत क दुःख परगट करना जारी रखा।

36ओनेँ मिदयानी बड़पारियन जउन यूसुफ क बेसहे रहेन, पाछे ओका मिस्त्र में बेचि दिहन। उ पचे फिरौन क अंगरच्छकन क सेनापति पोतीपर क हाथ ओका बेचेन।

### यहूदा अउ तामार

**38** ओनही दिनन में यहूदा आपन भाइयन क तजि दिहस अउ हीरा नाउँ क मनई क संग रहइ चला गवा। हीरा अदुल्लाम सहर क रहा। 2यहूदा एक कनानी मेहरारु स हुआँ मिला अउ ओसे बियाह कइ लिहस। मेहरारु क बाप क नाउँ सूआ रहा। 3कनानी मेहरारु एक पूत क जन्म दिहस। उ पचे ओकर नाउँ एर धरेन। 4पाछे दूसर पूत क जन्म दिहस। उ पचे लरिका का नाउँ ओनान धरेन। 5पाछे ओका दूसर पूत सेला नाउँ क भवा। यहूदा तीसर बच्चा क जन्म क टेम कजीब में रहत रहा।

6यहूदा आपन पहिले पूत एर बरे बहू क रूप में एक तु मेहरारु क चुनेस। मेहरारु क नाउँ तामार रहा। 7मुला एर बहोत सी बुरी बातन क किहस। यहोवा ओसे खुस नहीं रहा। एँह बरे यहोवा ओका मारि डाएस। 8तब यहूदा एर क भाई ओनान स कहेस, “जा अउर मेरे भाई क मेहरारु क संग सोआ।\*। तू ओकरे भतार क नाई बना। अगर लरिका होइहीं तउ उ पचे तोहरे भाई एर क होइहीं।”

9ओनान जानत रहा कि जोड़ा स पइदा भए लरिकन ओकर नहीं होइहीं। ओनान तामार क संग तने क सम्बंध किहस। मुला उ ओका आपन गरभ धारण करइ नहीं

दिहस। 10एहसे यहोवा कोहाइ गवा। एँह बरे यहोवा ओनान क भी मारि डाएस।

11तब यहूदा आपन पतोहू तामार स कहेस, “आपन बाप क घरे लौटि जा। हुआँइ रहा अउर तब तलक बियाह जिन करा जब तलक मोर लहुरा पूत सेला बाढ़ न जाइ।” यहूदा क डर रहा कि सेला भी आपन भाइयन क तरह मारि डवा जाइ। तामार आपन बाप क घर लौटि गइ।

12पाछे सुआ क बिटिया यहूदा क मेहरारु मरि गइ। यहूदा आपन दुःख क टेम क पाछे अदुल्लाम क आपन मीत हीरा क संग तिम्ना गवा। यहूदा आपन भेड़ी क ऊन कतरइ तिम्ना गवा।

13तामार क इ मालूम भवा कि ओकर ससुर यहूदा आपन भेड़िन क ऊन कतरइ तिम्ना क जात अहइ।

14तामार हमेसा अइसे ओढ़ना पहिरत रही जेहसे मालूम होइ कि इ रौंइ अहइ। एँह बरे उ कछू दूसर ओढ़ना पहिरेस अउ मुँह क पर्दा में ढँकि लिहस। तब उ तिम्ना सहर क लगे एनैम क जाइवाली सड़क क किनारे बइठि गइ। तामार जानत रही कि यहूदा क लहुरा बेटवा अब बाढ़ि ग अहइ। मुला यहूदा ओसे ओकरे बियाहे क कउनो योजना नहीं बनावत अहइ।

15यहूदा उहइ सड़क स जात्रा किहस। उ ओका लखेस, मुला बिचारेस कि उ पतुरिया अहइ। (ओकरे मुँह पतुरिया क तरह ढका भवा रहा।) 16एँह बरे यहूदा ओकरे लगे गवा अउ बोला, “मोका आपन संग तने क सम्बंध करइ द्या।” (यहूदा नहीं जानत रहा कि उ ओकर पतोहू तामार अहइ।)

तामार बोली, “तू मोका केतना देब्या?”

17यहूदा जवाब दिहस, “मई आपन भेड़ी क झुण्ड स तोहका एक नई बोकरी पठउब।”

उ जवाब दिहस, “मई एका अंगीकार करत अहउँ मुला पहिले तू मोका कछू रखइ क द्या जब तलक तू बोकरी नहीं पठउत्या।”

18यहूदा पूछेस, “मई बोकरी पठउब एकरे सबूत बरे मोसे का लेइ चहुबिउ?”

तामार जवाब दिहस, “मोका तोहार मोहर अउर धागा द्या अउ मोका आपन टहरइ क कुबरी द्या।” यहूदा इ सबइ चीजन ओका दिहस। तब यहूदा अउ तामार तने क सम्बंध, किहन अउ तामार गोड़े स भारी होइ गइ। 19तामार घरे गइ अउ मुँह क ढँपइ वाला पर्दा क हटाएस। तब उ फुन आपन क रौंइ बतावइ वाला खास ओढ़ना क पहिरेस।

20पाछे यहूदा आपन मीत हीरा क पतुरिया क बोकरी देइ एनैम पठएस जेका उ जबान दिहे रहा। यहूदा हीरा स खास मोहर अउ टहरइ क कुबरी भी ओसे लेइ बरे कहेस। मुला हीरा ओका न पाइ सका।

21हीरा एनैम सहर क कछू लोगन स पूछेस, “सड़क क किनारे जउन पतुरिया रही, उ कहाँ बाटइ?” मनइयन जवाब दिहन, “हिआँ कबहुँ कउनो पतुरिया नहीं रही।”

22तउ यहूदा क मीत यहूदा क लगे लौटि गवा अउ ओसे कहेस, “मई उ मेहरारु क पता नहीं लगाइ सकेउँ। जउन मनइयन उ जगह बसत अहइँ उ पचे मोका बताएन कि हुआँ कबहुँ कउनो पतुरिया नहीं रही।” 23एँह बरे यहूदा कहेस,

**जा ... सोआ** इस्राएल में इ रिवाज रहा कि जदि कउनो मनई बे सन्ताने क मरि जात रहा तउ उ रौंइ क भाइयन में स कउनो एक ओका बइठाइ लेत रहा। अगर कउनो लरिका पइदा होत रहा तउ उ मेरे मनई क लरिका समझा जात रहा।

“ओका उ सबइ चीजन रखइ द्या। मई नार्हीं चाहत कि लोग हम पचन प हँसउआ करई। मई ओका बोकरी देइ चाहेउँ, मुला हम ओकर पता नार्हीं लगाइ सके। इहइ बहोत अहइ।”

### तामार लड़कोर होइवाली अहइ

24लगाभग तीन महीना पाछे कउनो यहूदा स कहेस, “तोहार पतोहू तामार एक पतुरिया क नार्ई पाप किहे अहइ अउ अब उ गरभ धारण किहे अहइ।”

तब यहूदा कहेस, “ओका बाहेर निकारा अउ ओका जराइ के मार डवा।”

25ओकर आदमी तामार क मारइ गएन। मुला तामार आपन ससुर क लगे सँदेसा पठएस। तामार कहेस, “जउन मनई मोका गरभधारण कराएस ह उहइ क इ सबइ चीजन अहई। इ सबइ चीजन क लखा। उ सबइ केकर अहई? केकर इ खास मोहर अउ इ धागा अउर इ टहरइ क कुबरी अहइ?”

26यहूदा ओन सबहि चीजन क पहिचानेस अउ कहेस, “इ ठीक कहत बाटइ। मई गलती किहेउँ। मई आप क बचन क अनुसार आपन बेटवा सेला क ँका नार्हीं दिहेउ” अउ यहूदा ओकरे संग फुन नार्हीं सोवा।

27तामार क लरिका जन्मइ क टेम आवा अउ उ पचे लखेन कि उ जुड़ैधा बच्चन क जन्मी। 28जउन टेम उ जन्मत रही एक लरिका बाहेर हाथ निकारेस। धाई हाथे प लाल धागा बाँधेस अउ कहेस, “इ बच्चा पहिले पइदा भवा।” 29मुला उ बच्चा आपन हाथ वापिस भितरे हींच लिहस। तब दूसर बच्चा पहिले पइदा भवा। तब दाई कहेस, “लखा तू कैसे निकरइ आएस।” ँह बरे उ पचे ओकर नाउँ पेरस रखेन। 30ँकरे पाछे दूसर बच्चा पइदा भवा। इ उहइ बच्चा रहा जेकरे हाथे प लाल धागा रहा। उ पचे ओकर नाउँ जेरह रखेन।

### यूसुफ क मिस्र क पोतीपर क बेच गवा

39 बइपारी लोग जउन यूसुफ क बेसहे रहेन उ ओका मिस्र लइ गएन। उ पचे फिरौन क अंगरच्छक क नायक पोतीपर क हाथ ओका बेच दिहन। 2मुला यहोवा यूसुफ क मदद किहस। यूसुफ एक सफल मनई बन गवा। यूसुफ आपन मिस्र क मालिक पोतीपर क घरे में रहा।

3पोतीपर लखेस कि यहोवा यूसुफ क संग अहइ। पोतीपर इ भी लखेस कि यहोवा जउन कछू करत ह, ओहमा ओका सफल बनवइ में सहायक बाटइ। 4ँह बरे पोतीपर यूसुफ क पाइके बहोत खुस रहा। पोतीपर ओका आपन बरे काम करइ अउ घर क सासन में मदद करइ बरे राखेस। पोतीपर क आपन हर एक चीज क यूसुफ अफसर रहा। 5जब यूसुफ घरे क अफसर बनइ दीन्ह गवा तब यहोवा उ घर अउ पोतीपर क हर एक चीज क असीसेस। यहोवा इ यूसुफ क कारण किहस अउ यहोवा पोतीपर क खेतन में उगइवाली हर चीज क असीसेस। 6ँह बरे पोतीपर घर क हर चीज क जिम्मेदारी यूसुफ क दिहस। पोतीपर कउनो चीज क चिन्ता

नार्हीं करत रहा। उ जउन खइया क खात रहा सिरिफ ओकर ओका फिकिर रही।

### यूसुफ पोतीपर क मेहरारु क अस्वीकार करत ह

यूसुफ बहोत सुन्नर अउ रुपवान रहा। 7कुछ टेम पाछे यूसुफ क मालिक क मेहरारु यूसुफ स पिरेम करइ लाग। एक दिन उ ओसे कहेस, “मोरे संग सोआ।”

8मुला यूसुफ मना कइ दिहस। उ कहेस, “मोर मालिक घर क हर चीज बरे मोहे प बिस्वास करत ह। उ हिओँ क हर चीज क जिम्मेदारी मोका दिहेस ह। 9मोर मालिक आपन घर में मोका लगाभग आपन क बराबर सम्मान दिहेस ह। मुला मोका ओकरी मेहरारु क संग नार्हीं सोवइ चाही। इ गलत अहइ। इ परमेस्सर क खिलाफ पाप अहइ।”

10उ मेहरारु हर दिन यूसुफ स बात करत रही मुला यूसुफ ओकरे संग सोवइ स मना कइ दिहस। 11एक दिन यूसुफ आपन काम करइ घरे में गवा। उ टेम उ घरे में अकेल्ला मनई रहा। 12ओकरे मालिक क मेहरारु ओकर कोट धइ लिहस अउ ओसे कहेस, “आवा अउ मोरे संग सोवा।” मुला यूसुफ घरे स पराइ गवा अउ उ आपन कोट ओकरे हाथे में छोड़ दिहस।

13मेहरारु लखेस कि यूसुफ आपन कोट ओकरे हाथे में छोड़ दिहे अहइ अउ उ जउन कछू भवा ओकरे बारे में झूठ बोलइ क ठान लिहस। उ बाहेर दौड़ी। 14अउर उ घरे क उ मनइयन क गोहराएस। उ कहेस, “लखा, इ हिब्रू दास हम पचन क मजाक करइ हिओँ आवा रहा। उ भितरे आवा अउ मोरे संग सोवइ क कोसिस किहस। मुला मई जोर स नरियाइ पड़ी। 15मोर नरियाब ओका ससाइ दिहस अउ उ पराइ गवा। मुला उ आपन कोट मोरे लगे छोड़ गवा।” 16ँह बरे उ यूसुफ क मालिक आपन भतारे क घर लौटइ क समइ तलक ओकरे कोट क आपन लगे राखेस। 17अउर उ आपन भतार क कहानी सुनाएस। उ कहेस, “जउन हिब्रू दास क तू हिओँ लिआया उ मोह प हमला करइ क कोसिस किहस। 18मुला जब उ मोरे लगे आवा तउ मई चिचियाई। उ पराइ गवा, मुला आपन कोट छोड़ गवा।”

### यूसुफ कारगार में

19यूसुफ क मालिक जउन ओकरी मेहरारु स कहेस, ओका सुनेस अउ उ बहोत रिसियाइ गवा। 20हुओँ एक जेल रही जेहमें राजा क दुस्मन रखा जात रहेन। ँह बरे पोतीपर यूसुफ क उहइ जेल में धँध दिहस अउ यूसुफ हुओँ पड़ रहा। 21मुला यहोवा यूसुफ क संग रहा। यहोवा ओह पइ कृपा करत रहा। 22कछू टेम पाछे जेल क रच्छक क मुखिया यूसुफ स सोनेह करइ लाग। रच्छकन क मुखिया सबहिँ कैदियन क अफसर यूसुफ क बनाएस। यूसुफ ओनकइ मुखिया रहा, मुला काम उहइ करत रहा जउन उ पचे करत रहेन। 23रच्छकन क मुखिया जेल क सबहिँ चीजन क बरे यूसुफ प पतियात रहा। इ ँह बरे भवा कि यहोवा यूसुफ क संग रहा। यहोवा यूसुफ क, उ जउन कछू करत रहा, सुफल होइ में मदद करत रहा।

### यूसुफ दुइ सपना क अरथ बतावत ह

**40** पाछे फिरौन क दुइ नउकरन ओकर संग कछू गलत किहेन। इ नउकरन में स एक ठु रोटी पोवइया अउ दूसर दाखरस देइ क सेवा करत रहा। 2 फिरौन आपन रोटी पोवइया अउ सरब देइवाला नउकर पर रिसियाइ गवा। 3 एह बरे फिरौन उहइ जेल में ओनका पठाएस जेहमें यूसुफ रहा। फिरौन क अंगरच्छक लोगन क नायक पोतीपर उ जेल क अफसर रहा। 4 नायक दुइनउँ कैदियन क यूसुफ क देखरेख में राखेस। दुइनउँ कछू टेम तलक जेल में रहेन। 5 एक रात दुइनउँ कैदियन सपना देखेन। दुइनउँ कैदी मिस्र क राजा क रोटी पोवइया अउ दाखरस देइवाला नउकर रहेन। हर एक कैदी क आपन-आपन सपना रहेन अउ हर एक सपना क अलग अलग अरथ रहा। 6 यूसुफ दूसर भिन्सारे ओनकइ लगे गवा। यूसुफ लखेस कि दुइनउँ मनई परेसान रहेन। 7 यूसुफ पूछेस, “आजु तू पचे ऐतना परेसान काहे देखाइ पड़त ह?”

8 दुइनउँ मनई जवाब दिहन, “पिछली रात हम पचे सपना देखा, मुला हम लोग नाहीं बूझत कि सपना क का अरथ अहइ? कउनो मनई अइसा नाहीं अहइ कि जउन सपना क अरथ बतावइ या हम पचन क साफ साफ बतावइ।”

यूसुफ ओनसे कहेस, “सिरिफ परमेस्सर ही अइसा अहइ जउन सपना क बूझत अउ अरथ बतावत ह। एह बरे मई निवेदन करत हउँ कि आपन सपना मोका बतावा।”

### दाखरस देइवाला नउकर क सपना

9 एह बरे दाखरस देइवाला नउकर यूसुफ क आपन सपना बताएस। नउकर कहेस, “मई सपना में अंगूरे क लता देखेउँ। 10 उ अंगूरे क लता क तीन ठु डारियन रहिन। मई डारियन में फूल आवत अउ ओनकइ अंगूर बनत लखेउँ। 11 मई फिरौन क पिआला लिए रहेउँ। एह बरे मई अंगूरन क लिहेउँ अउ पिआला में रस निचोड़ेउँ। तब मई पिआला फिरौन क दिहेउँ।”

12 तब यूसुफ कहेस, “मई तोहका सपन क अरथ बताउब। तीन ठु डारियन क अरथ तीन दिन अहइ। 13 तीन दिन बीतइ क पहिले फिरौन तोहका छिमा करी अउ तोहका तोहरे कामे प लौटे प देइ। तू फिरौन क बरे उहइ काम करब्या अउर जउन पहिले करत रह्या। 14 मुला जब तू अजाद होइ जाब्या तउ मोका सुमिर्या। मोर मदद किह्या। फिरौन स मोरे बारे में कह्या जेहसे मई इ जेल स बाहेर होइ सकउँ। 15 मोका हिब्रू लोगन क देस स लावा गवा रहा। मई हियाँ कउनो अपराध भी नाहीं किहेउँ ह। एह बरे मोका जेल में न होइ चाही।”

### रोटी पोवइया क सपना

16 रोटी बनावइ वाला लखेस कि दूसर नउकर क सपना अच्छा रहा। एह बरे रोटी पोवइया यूसुफ स कहेस, “मई भी सपना देखेउँ। मई देखेउँ कि मोरे मूँड़े प तीन ठु रोटी क टोकरी बाटइ। 17 सब त ऊपर क टोकरी में हर किसिम क पका भवा भोजन रहेन। इ भोजन राजा बरे रहा। मुला खइया क चिरइयन चुगत रहिन।”

18 यूसुफ जवाब दिहस, “मई तोहका बताउब कि सपना क का अरथ अहइ? तीन टोकरी क अरथ तीन दिन बाटइ। 19 तीन दिन बीतइ स पहिले राजा तोहका इ जेलि स बाहेर निकारी। तब राजा तोहार मूँड़े काटि डइ। उ तोहरे तने क एक ठु खम्भा स लटकाइ अउ चिरइयन तोहरे तने क खइहीं।”

### यूसुफ क भुलाइ दीन्ह गवा

20 तीन दिन पाछे फिरौन क जन्म दिन रहा। फिरौन आपन सबहिं नउकरन क दावत दिहस। दावत क टेम फिरौन दाखरस देइवाला अउ रोट पोवइया नउकरन क जेल स निकसइ दिहस। 21 फिरौन दाखरस देइवाला नउकर क अजाद कइ दिहस। फिरौन ओका नउकरी प लौटाइ दिहस अउ दाखरस देइवाला नउकर फिरौन क हाथे में एक ठु पिआला दिहस। 22 मुला फिरौन रोटी पोवइया क मार डाएस। सब बातन जइसे यूसुफ होइ बरे बताए रहा वइसेन ही भइन। 23 मुला दाखरस देइवाला नउकर क यूसुफ क मदद करब याद नाहीं रहा। उ यूसुफ क बारे में फिरौन स कछू नाहीं कहेस। दाखरस देइवाला नउकर यूसुफ क बारे में बिसरि गवा।

### फिरौन क सपना

**41** दुइ बरिस बाद फिरौन सपना लखेस। फिरौन सपने में लखेस कि उ नील नदी क किनारे खड़ा अहइ। 2 तब फिरौन सपने में नदी स सात गइयन क बाहेर आवत लखेस। गइयन मोटी अउ सुन्नर रहिन। गइयन हुआँ खड़ी रहिन अउ घासे प चरत रहिन। 3 तब सात दूसर गइयन नदी स बाहेर आइन, अउर नदी क किनारे मोटी गइयन क निचके ठाइ होइ गइन। मुला इ गइयन दूबर अउ देखन में बीमार लगत रहिन। 4 इ सातउ दूबर अउर बीमार गइयन, सुन्नर मोटी सात गइयन क खाइ गइन। तब फिरौन जाग उठा।

5 फिरौन फुन सोवा अउ दूसर दाई सपना लखेस। उ सपने में अनाज क सात बाल एक ही पउधा प लखेस। अनाजे क बालन मोटी अउ अच्छी रहिन। 6 तब उ उहइ अनाज क पाछे सात अनाजे क बालन क जमी लखेस। अनाजे क इ बालन पातर अउ गरम हवा स नस्त होइ गइ रहिन। 7 तबबइ सात पातर बालन सात ठु मोटवार अउ बढ़िया बालन क खाइ लिहन। फिरौन पुन जागि उठा अउ उ समझेस कि इ सिरिफ सपना ही बाटइ। 8 दूसर भिन्सारे फिरौन इ सपनन क बारे में परेसान रहा। एह बरे उ मिस्र क सबहिं जादूगर लोग अउ सबहिं गुनी लोगन क बोलाएस। फिरौन ओनका सपना बताएस। मुला ओन लोगन में स कउनो भी सपना क साफ या ओकर अरथ न बताइ सका।

### नउकर फिरौन क यूसुफ क बारे में बतावत ह

9 तब दाखरस देइवाला नउकर क यूसुफ याद आवा। नउकर फिरौन स कहेस, “मोरे संग जउन कछू भवा रहा उ मोका याद आवत अहइ। 10 आप मोह प अउ रोटी पोवइया प कोहान रहेन अउ आप हम दुइनउँ क जेलि में धँध दिहे

रहेन। 11जेल में एक ही रात हम दुइनउँ सपना देखेन। हर एक सपना अलग अरथ रखत रहा। 12एक ठु हिलू नउजवान हम पचन क संग जेल में रहा। उ अंगरच्छकन क नायक क नउकर रहा। हम पचन आपन आपन सपना ओका बतावा, अउ उ सपना क अरथ हम लोगन क बुझाएस। उ हर सपना क अरथ हम पचन क समझाएस। 13जउन अरथ उ बताएस उ सबइ ठीक निकरेन। उ बताएस कि मई अजाद होब अउ आपन काम में वापस लउट आउब। अउर इहइ भवा उ कहेस कि रोटी पोवइया क मार कइ टॉंग दीन्हा जाइहीं। अउ उहइ भवा।”

### यूसुफ सपन क अरथ बतावइ बरे बोलावा गवा

14एँह बरे फिरौन यूसुफ क जेल स बोलाएस। रच्छक हाली स यूसुफ क जेल स बाहेर लिआएन। यूसुफ हजामत बनावइके अउर कपड़े बदल के फिरौन क समन्वा खड़ा भवा। 15तब फिरौन यूसुफ स कहेस, “मई एक सपना लखेउँ ह। मुला कउनो अइसा नाहीं अहइ जउन सपना क अरथ मोका समझाइ सकइ। मई सुनेउँ ह कि जब कउनो सपना क बारे में तोहसे कहत ह कि तब तू सपन क अरथ अउ ओनका फरियाइ सकत ह।”

16यूसुफ जवाब दिहस, “मोर आपन बुद्धि नाहीं अहइ कि मई सपनन क बूझ सकउँ। सिरिफ परमेस्सर ही अहइ जउन अइसी सक्ती रखत ह अउर फिरौन बरे परमेस्सर ही इ करी।”

17तब फिरौन कहेस, “अपने आप क, मई नील नदी क किनारे ठाड़ लखेउँ। 18मई सात गइयन क नदी स बाहर आवत लखेउँ अउ घास चरत देखेउँ। इ गइयन मोटी अउ सुन्नर रहिन। 19तब मई दूसर सात गइयन क नदी स बाहेर आवत देखेउँ। इ सबइ गइयन पातर अउ भद्दी रहिन। मई मिस्त्र देस में जेतनी गइयन देखेउँ ह ओनमों स उ सबइ सब स जियादा बुरी रहिन। 20अउ एँ भद्दी अउर पातर गइयन पहिली सुन्नर सात गइयन क खाइ डिएन। 21मुला सातउ गइयन क खाए क पाछे भी उ पचे पातर अउ भद्दी रहिन। तू ओनका लखा तउ नाहीं जान सकृत्या कि उ पचे दूसर सात गइयन क खाया ह। उ पचे ओतनी ही भद्दी अउ पातर देखाइ पड़त रहिन जेतना सुरु में रहिन। तब मई जाग गवा।

22“तब मई आपन दूसर सपना में अनाज क सात बालन एक ही पउथा प उगी भइ देखेउँ। इ सबइ अनाज क बालन अच्छी अउ दानन स भरी भइ रहिन। 23तब ओनके पाछे सात दूसर बालन उगिन। मुला इ सबइ सात बालन पातर, भद्दी अउ गरम हवा स नस्ट भइ रहिन। 24तब सात पातर बालन सात अच्छी बालन क खाइ डिएन।

“मई इ सपना क आपन जादूगर लोगन क बताएउँ मुला कउनो सपने क अरथ मोका नाहीं समझाएस। एकर अरथ का अहइ?”

### यूसुफ सपना क अरथ बतावत ह

25तब यूसुफ फिरौन स कहेस, “इ दुइनउँ सपना एक ही अरथ रखत हीं। परमेस्सर तोहका बतावत ह कि उ हाली

का करइ क जात अहइ। 26सात अच्छी गइयन अउ सात अच्छी अनाजे क बालन सात बरिस अहइ-दुइनउँ सपना एक ही अहइ। 27सात दूबर अउ भद्दी गइयन अउ सात बुरी अनाजे क बालन देस में भुखमरी क सात बरिस अहइ। इ सबइ सात बरिस, बढ़िया सात बरिस क पाछे अइहीं। 28परमेस्सर आप क इ देखाइ दिहस ह कि हाली ही का होइवाला अहइ। इ वइसा ही होइ जइसा मई कहेउँ ह। 29आप क सात बरिस मिस्त्र में अच्छी पइदावार अउ भोजन इफरात होइहीं। 30मुला इ सात बरिस क पाछे पूरे देस में भुखमरी क सात बरिस अइहीं। जउन समूचइ मिस्त्र में पइदा भ अहइ ओका लोग बिसरि जइहीं। इ अकाल देस क बर्बाद कइ देइ। 31काहेकि अकाल एँतना भयानक होइ कि लोग प्रयाप्त खइया खाइ का होत ह इ बिसरि जाइहीं।

32“हे फिरौन, आपन एक ही बारे में दुइ सपना लखे रहेन। इ इ बात क देखावइ बरे भवा कि परमेस्सर फुरइ ही अइसा होइ देइ अउर इ बताएस ह कि परमेस्सर एँका हाली ही होइ देइ। 33एँह बरे हे फिरौन आप एक अइसा मनई चुनइ जउन बहोत चुस्त अउ बुद्धिमान होइ। आप ओका मिस्त्र देस क निगराँकार बनावइ। 34तब आपन दूसर मनई क जनता स भोजन बटोरइ बरे चुनइ। लोगन क सात अच्छे बरिस में जेतना अनाज पइदा करइ, ओकर पाँचवाँ हींसा ओनका देइ चाही। 35ओनका हुकुम देइ कि जउन अच्छे बरिस आवइ ओहमों भोजन बटोरइ। उ सहरन में भोजन क जमा करइ। तब उ पचे भोजन क रच्छा उ टेम तलक करिहीं जब ओनकइ जरुरत होइ। 36उ भोजन मिस्त्र देस में आवइवाली भुखमरी क सात बरिस में मदद करी। तब मिस्त्र में सात बरिस में लोग भोजन क कमी स मरिहीं नाहीं।”

37फिरौन क इ नीक बिचार मालूम भवा। एहसे सबहिं अफसर राजी रहेन। 38फिरौन आपन अफसरन स पूछेस, “का तू लोगन में स कउनो इ काम क करइ बरे यूसुफ स अच्छा मनई हेरि सकत ह? परमेस्सर क आतिमा इ मनई क फुरइ बुद्धिमान बनाइ दिहस ह।” 39फिरौन यूसुफ स कहेस, “परमेस्सर इ सबहिं चीजन क तोहका देखोएस ह। एँह बरे तू ही सबन त जियादा बुद्धिमान अहा। 40एँह बरे मई तोहका आपन महल क निगराँ अधिकारी बनउब। जनता तोहरे हुकुम क मानी। सिरिफ मई राजा ही तोहसे बड़वार रहब।”

41एक खास जलसा अउ नुमाइस रही जेहमों फिरौन यूसुफ क नवाब बनाएस। तब फिरौन यूसुफ स कहेस, “मई अब तोहका पूरे देस क राजा बनावत अहउँ।” 42तब फिरौन आपन सरकारी मोहरवाली अंगूठी यूसुफ क दिहस अउ यूसुफ क एक सुन्नर रेशमी ओढ़ना पहिरइ क दिहस। फिरौन यूसुफ क गले में एक ठु सोना क हार डिएस। 43फिरौन दूसर रथे प यूसुफ क सवार होइ क कहेस। ओकरे रथे क अगवा खास रच्छक चलत रहेन। उ पचे लोगन स कहत रहेन, “हे मनइयो, यूसुफ क निहुरिके पैलगी करा।”

इ तरह यूसुफ पूरे मिस्त्र क राजपाल बना। 44फिरौन ओसे कहेस, “मई सम्राट फिरौन अहउँ। एँह बरे मई जउन करइ चाहब, करब। मुला मिस्त्र में कउनो दूसर मनई हाथ गोड़ नाहीं हिलाइ सकत ह जब तलक तू ओसे न कहा।”

45 फिरौन ओका दूसर नाउँ सपन तपानेह दिहस। फिरौन आसनत नाउँ क मेहरारु जउन ओन क पुजारी पोती पर क बिटिया रही, यूसुफ क मेहरारु क रुप में दिहस। इ तरह यूसुफ समूचइ मिस्त्र देस क राजपाल होइ गवा।

46 यूसुफ उ टेम तीस बरिस क रहा जब उ मिस्त्र क सम्राट क सेवा करइ लाग। यूसुफ पूरा मिस्त्र देस में जात्रा किहस। 47 अच्छे सात बरिसन में देसे में पड़वावर बहोतइ डेर क भइ 48 अउर यूसुफ मिस्त्र में सात बरिस खइया क चीजन क बचाएस। यूसुफ खइया क सहरन में बटोरेस। यूसुफ सहर क चारिहूँ कइँती क खेतन में पड़वा भवा अनाजे क हर सहर में बटोरेस। 49 यूसुफ बहोत अनाज बटोरेस। इ समुदर क बालू क नाई रहा। उ एँतना अनाज बटोरेस कि ओकर वजन क भी न कूत कीन्ह जाइ सकइ।

50 यूसुफ क मेहरारु आसनत ओन क याजक पोतीपरा क बिटिया रही। भुखमरी क पहिले बरिस क आवइ स पहिले यूसुफ अउ आसनत क दुइ पूत भएन। 51 पहिले पूत क नाउँ मनस्से धरा गवा। यूसुफ ओकर इ नाउँ रखेस काहेकि उ बताएस, “मोका जेतना सारे कस्ट भएन अउ घरे क हर बात परमेस्सर मोसे बिसराइ दिहस।” 52 यूसुफ दूसर पूत क नाउँ एप्रैम रखेस। यूसुफ ओकर नाउँ इ रखेस काहेकि उ बताएस, “मोका बहोतइ दुःख मिला, मुला परमेस्सर मोका हर एक चीज में सफलता दिहेस।”

### भुखमरी क समइ सुरु होत ह

53 सात बरिस तलक लोगन क लगे खाइ बरे उ सब कछू भोजन रहा जेनकइ ओनका जरूरत रही अउर जउन चिजियन ओनका जरूरी रहिन उ सबइ सबहिं जमत रहिन। 54 मुला सात बरिस बाद भुखमरी क दिन सुरु भएन। इ ठीक वइसा ही भवा जइसा यूसुफ कहे रहा। उ पहाँटा क कउनो भी देस में अन्न पड़वा न भवा। मनइयन क लगे खाइ क कछू न रहा। मुला मिस्त्र में खाइ बरे इफरात रहा, काहेकि यूसुफ अनाज बटोरे रहा। 55 भुखमरी क टेम सुरु भवा अउ मनइयन भोजन बरे फिरौन क समन्वा रोवइ लागेन। फिरौन मिस्त्र क मनइयन स कहेस, “यूसुफ स पूछा। उहइ करा जउन उ कहइ क कहत ह।”

56 एँह बरे जब देस में सब ठउरे प भुखमरी रही, यूसुफ अनाजे क गोदाम स मनइयन क अन्न बाँटिस। यूसुफ बटोरा भवा अन्न क मिस्त्र क लोगन क बेचेस। मिस्त्र में बहोत भयंकर अकाल रहा। 57 मिस्त्र क चारिहूँ कइँती क देसन क लोग अनाज बेसहइ मिस्त्र आएन। उ पचे यूसुफ क लगे आएन काहेकि हुओं संसार क उ हींसा में सब ठउरे प भुखमरी रही।

### सपना फुरइ भवा

42 इ समइ याकूब क प्रदेस में भुखमरी रही। मुला याकूब क इ पता लाग कि मिस्त्र में अनाज अहइ। एँह बरे याकूब आपन बेटवन स कहेस, “हम लोग हिंओं हाथ प हाथ धरे काहे बइठा अहइ? 2 मइँ सुनेउँ ह कि मिस्त्र में खरीदइ क अनाज बाटइ। एँह बरे हम पचे हुओं

चली अउ हुओं स आपन खाइ क बरे अनाज बेसही, तब हम लोग जिअत रहव, मरब नाहीं।”

एँह बरे यूसुफ क भाइयन में स दस अन्न खरीदइ बरे मिस्त्र गएन। 4 याकूब बिन्यामीन क नाहीं पठएस। (बिन्यामीन यूसुफ क एक ही सगा भाई रहा।) याकूब एह बरे डरा भवा रहा कि बिन्यामीन पइ कउनो तरह क खतरा आवइ सकत ह।

5 कनान में भुखमरी क समइ बहोत खौफनाक रहा। एँह बरे कनान क बहोत स लोग अन्न बेसहइ मिस्त्र गएन। ओनहीं लोगन क संग में इस्त्राएल क पूतन भी रहेन।

6 इ टेम यूसुफ मिस्त्र क राजपाल रहा। सिरिफ यूसुफ ही रहा जउन मिस्त्र आवइ वालन लोगन क अन्न बेचइ क हुकुम देत रहा। यूसुफ क भाई ओकरे लगे आएन अउ उ पचे ओकर निहुरिके पैलगी किहेन। 7 यूसुफ आपन भाइयन क लखेस अउ उ ओनका पहिचान लिहेस कि उ पचे कौन अहइँ। मुला यूसुफ ओनसे इ तरह बात करत रहा जइसे उ ओनका पहिचानत नाहीं। उ ओनके संग कड़ाई स बात किहस। उ कहेस, “तू लोग कहीं स आया ह?”

भाइयन जवाब दिहन, “हम कनान देस स आए अहइँ। हम पचे अनाज बेसहइ आवा अहीं।”

8 यूसुफ ने पहिचान लिहेस कि उ पचे ओकर भाई अहइँ। मुला उ पचे नाहीं जानत रहेन कि उ कउन अहइ? 9 यूसुफ ओन सपनन क याद किहेस जेनका उ आपन भाइयन क बारे में लखे रहा।

### यूसुफ आपन भाइयन क जासूस कहत ह

यूसुफ आपन भाइयन स कहेस, “तू पचे अनाज बेसहइ नाहीं आया ह। तू लोग जासूस अहा। तू लोग इ पता लगावइ आया ह कि हम कहीं कमजोर अहीं?”

10 मुला भाइयन ओसे कहेन, “नाहीं। महोदय! हम तउ आपक सेवक क रुप में आइ अहीं। हम पचे सिरिफ अनाज बेसहइ आइ अहीं। 11 हम सबहिं लोग भाई अहीं, हम पचन क एक ही पिता अहइ। हम लोग ईमानदार अहीं। हम लोग सिरिफ अनाज बेसहइ आइ अहीं।”

12 तब यूसुफ ओनसे कहेस, “नाहीं! तू लोग इ पता लगावइ आया ह कि हम पचे कहीं कमजोर अहीं?”

13 भाइयन कहेन, “नाहीं! हम सबहिं भाई भाई अहीं। हमरे परिवारे में बारह भाई अहइँ। हम सब क एक ही पिता अहइ। हम लोगन क सब स लहुरा भाई अबहुँ भी हमरे पिता क संग घरे प बाटइ अउ दूसर भाई बहोत समइ पहिले मरि गवा। हम लोग आप क समन्वा सेवक क नाई अहीं। हम लोग कनान देस क अहीं।”

14 मुला यूसुफ कहेस, “नाहीं! मोका पता अहइ कि मइँ ठीक अहउँ। तू भेदिया अहा। 15 मुला मइँ तू लोगन क इ साबित करइ क मौका देब कि तू लोग फुरइ कहत बाट्या। तू लोग इ जगह तब तलक नाहीं तजि सकत्या जब तलक तू पचन क लहुरा भाई हिंओं नाहीं आवत। 16 एँह बरे तू लोगन में स एक ठु लउटइ अउ आपन लहुरे भाई क हिंओं लइ आवइ। उ समइ तलक दूसर हिंओं कैद में रइहीं। हम देखब कि का तू लोग फुरइ बोलत अहा। मुला मोका

बिस्सास अहइ कि तू पचे जासूस अहा। 17तब यूसुफ ओन सब क तीन दिना बरे जेल में नाई दिहस।

### सिमोन बन्धक क रुप में रखा गवा

18तीन दिन बाद यूसुफ ओनसे कहेस, “मई परमेस्सर क भय मानत हउँ। एह बरे मई तू लोगन क इ सिद्ध करइ क एक मौका देब कि तू लोग फुरइ बोलत अहा। तू लोग इ काम करा अउर मई तू लोगन क जिअइ देब। 19अगर तू लोग ईमानदार मनई अहा तउ आपन भाइयन में स एक क जेल में रहइ द्या। दूसर भाइयन जाइ सकत हीं अउ आपन लोगन बरे अनाज लइ जाइ सकत हीं। 20तब यदि तू आपन सब स लहुरा भाई क लइके हिआँ मोरे लगे आवा। इ तरह मई पतियाब कि तू लोग फुरइ बोलत अहा।”

भाइयन इ बात क मान लिहन। 21उ पचे आपुस में बतियानेन “हम पचन क सजा दीन्ह गइ ह। काहेकि हम पचे आपन सब स लहुरा भाई क संग बुरा किहे अही। हम पचे ओकरे मुसीबत क निहारा जेहमें उ रहा। उ आपन रच्छा बरे हम पचन स बिनती किहस। मुला हम सबइ ओकर एकहु न सुना। एह बरे हम पचे दुःखन में अही।”

22तब रूबेन ओनसे कहेस, “मई तोहसे कहेउँ रहा कि उ लरिका क कछू भी बुरा जिन करा। मुला तू पचे मोरउ एक न सुन्या। एह बरे अब हम ओकरी मउत बरे सजा पावत अही।”

23यूसुफ आपन भाइयन स बात करइ एक तु दु भासिया स काम लेत रहा। एह बरे भाइयन नहीं जान पाया कि यूसुफ ओनकइ भाखा जानत बाटइ। मुला उ पचे जउन कछू कहत रहेन ओका यूसुफ सुनत अउ समझत रहा। 24ओनकइ बातन स यूसुफ बहोत दुःखी भवा। एह बरे यूसुफ ओनसे अलग हटि गवा अउ रोइ पड़ा। तनिक देर में यूसुफ ओनके लगे लउटा। यूसुफ उ भाइयन में स सिमोन क धरेस अउ ओका बाँधिस जब कि दूसर भाई लखत रहेन। 25यूसुफ कछू सेवकन क ओनकइ बोरा में अनाज भरइ क कहेस। भाइयन इ अनाजे क दाम यूसुफ क दिहन। मुला यूसुफ उ धने क नाहीं लेइ क फइसला किहस। उ उ धने क ओनकई अनाज क बोरा में धरइ बरे सेवकन क हुकम दिहस। तब यूसुफ ओनका उ सबइ चीजन क दिहस, जेनकइ जरुरत ओनकइ घरे तलक लउटाइ वाली जात्रा में होइ सकत रही।

26एह बरे भाइयन अनाजे क आपन गदहन प लादेन अउ हुआँ स निकारि पड़ेन। 27उ सबइ सबहिं भाइयन राति क ठहरेन अउ भाइयन में स एक कछू अनाजे बरे आपन बोरा खोलेस अउ उ आपन धन बोरा में पाएस। 28उ दूसर भाइयन स कहेस, “लखा, जउन दाम मई अनाजे बरे चुकाएउँ ह, उ हिआँ अहइ। कउनो मोरे बोरा में इ धन लौटाइ दिहे अहइ।” उ सबइ सबहिं भाई बहोत जियादा डेराइ गएन। उ पचे आपुस में बतियानेन, “परमेस्सर हम पचन क संग का करत अहइ?”

### भाइयन याकूब क सूचना दिहेन

29उ सबइ भाई कनान देस में आपन पिता याकूब क लगे गएन। उ पचे जउन कछू भवा आपन पिता क बताएन। 30उ

पचे कहेन, “उ देस क राजपाल हम लोगन स बहोत रुखा होइके बोला। उ सोचेस कि हम पचे जासूस अही। 31मुला हम लोग कहेन कि हम पचे ईमानदार अही। अउर हम पचे जासूस नाहीं अही। 32हम पचे ओका बतावा कि हम लोग बारह भाई अही। अउर हम लोगन क सब स लहुरा भाई अब भी कनान देस में हमार बाप क संग बाटइ। अउर हमार दूसर भाई मरि गवा ह।”

33“तब देस क राजपाल हम लोगन स इ कहेस, ‘इहइ सिद्ध करइ बरे कि तू ईमानदार अहा इ रस्ता अहइ: आपन भाइयन में स एक क हमरे लगे हिआँ छोड़ि द्या। आपन अनाज लइके आपन आपन परिवारन क लगे लउटि जा। 34आपन सब स लहुरा भाइ क हमरे लगे लिआवा। तब मई समझब कि तू लोग ईमानदार अहा या तू लोग जासूस अहा। जदि तू पचे फुरइ बोलत अहा तउ मई तोहरे भाई क तोहका दइ देब। अउर तू लोग हमार देस स अनाज खरीदइ बरे आज्ञा होइ जाब्या।”

35तब सब भाई आपन बोरा स अनाज लेइ गएन अउ हर एक भाई आपन धने क थइली आपन अनाजे क बोरा में पाएस। भाइयन अउर ओनकइ पिता धन क लखेन, अउर उ सबइ बहोत डरि गएन।

36याकूब ओनसे कहेस, “का तू लोग चाहत ह कि मई आपन सबहिं पूतन स हथवा धोइ बइठउँ। यूसुफ मरि गवा, सिमोन भी चलि गवा अउ तू लोग बिन्यामीन क भी मोसे दूरि लइ जावा चाहत ह।”

37तब रूबेन आपन पिता स कहेस, “पिता जी आप मोरे दुइनउँ पूतन क मारि डया जदि मई बिन्यामीन क आप क लगे न लउटावउँ। मोहे प बिस्सास करा। मई आप क लगे बिन्यामीन क लउटाइ लिआउब।”

38मुला याकूब कहेस, “मई बिन्यामीन क तू लोगन क संग नाहीं जाइ देब। ओकर भाई अउर महतारी मरि गवा अहइ अउर मोर मेहरारु राहेल क उहइ अकेल्ला पूत बचा बाटइ। मिस्त्र तक क जात्रा में जदि ओकरे संग कछू भवा तउ उ होनी मोका मारि डाइ। तू लोग मोका एक दुःख स भवा अउ बूढा मनाई क कब्र में पठउब्या।”

### याकूब बिन्यामीन क मिस्त्र जाइ क आग्या दिहस

43 उ देस में अकाल बहोत भयंकर रहा। 2मनइयन उ सारा अन्न खाइ गएन जउन उ पचे उ सबइ मिस्त्र स लिआइ रहेन। जब अनाज खतम होइ गवा, याकूब आपन बेटवन स कहेस, “फुन मिस्त्र जा। हम लोगन क खाइ बरे कछू अउर अनाज बेसहा।”

3मुला यहूदा याकूब स कहेस, “उ देस क राजा हम लोगन क चिताउनी दिहस ह। उ कहेस ह, ‘जदि तू लोग आपन भाई क मोरे लगे वापिस नाहीं लउब्या तउ मई तू लोगन स बात करइ स मना भी कइ देब।’ 4जदि तू हम लोगन क संग बिन्यामीन क पठउब्या तउ हम पचे जाब अउ अनाज खरीदब। 5अन्यथा, हम लोग नाहीं जाब। उ मनई चिताउनी दिहस कि हम लोग बिन्यामीन के बिना वापिस न आइ।”



6इस्राएल कहेस, “तू लोग उ मनई स काहे कह्या, कि तोहार दूसर भाई भी अहइ। तू पचे मोरे संग अइसी बुरी बात काहे किह्या?”

7भाइयन जवाब दिहन, “उ राजपाल हुसियारी स हम पचन स प्रस्न पूछेस। उ हम लोगन अउ हम लोगन क परिवार क बारे में जानइ चाहत रहा। उ हम लोगन स पूछेस, ‘का तू पचन क पिता अबहिं जिअत अहइ? का तू लोगन क दूसर भाई घरे प बाटइ?’ हम लोग सिरिफ ओकरे प्रस्न क जवाब दीन्ह। हम लोग नहीं जानत रहे कि उ हमरे दूसर भाई क आपन लगे लइ आवइ क कही।”

8तब यहूदा आपन पिता इस्राएल स कहेस, “बिन्यामीन क मोरे संग पठवा। मई ओकर देखभाल करब। हम पचे मिस्त्र जरूर जाब अउ भोजन लिआउब। अगर हम पचे नहीं जाई तउ हम सबहीं लोग आपन गदेलन क संग मरि जाबइ। 9मई बिस्सास दियावत अहउँ कि उ सुरच्छित रही। मई एकर जिम्मेदार रहब। जदि मई ओका तोहरे लगे लउटाइके न लिआवउँ तउ तू सदा बरे मोका दोखी ठहराइ सकत ह। 10जदि तू हमका पहिले जाइ दिहे होत्या तउ भोजन बरे हम लोग दुइ जात्रा अबहिं तलक कर चुके होतेन।”

11तब ओनके पिता इस्राएल कहेस, “अगर इ फुरइ सही अहइ तउ बिन्यामीन क आपन संग लइ जा। मुला राजपाल बरे कछू भेंट लइ जा। ओन चीजन में स कछू लइ जा जउन हम पचे आपन देस में बटोरि सका अही। ओकरे बरे कछू सहद, पिस्ता, बादाम, गोदं अउ लोहबान लइ जा। 12इ टेम, पहिले स दुई गुना धन भी लइ ल्या उ धन क भी लइ ल्या जउन पिछली दाई दिहे क पाछे लउटाइ दीन्ह गवा रहा। होइ सकत ह कि राजपाल स गलती भइ ह। 13बिन्यामीन क संग ल्या अउ उ मनई क लगे लइ जा। 14मई पराथना करत हउँ कि सर्वसक्तिमान परमेस्सर तू पचन क उ टेम मदद करी जब तू उ राजपाल क समन्वा ठाड़ होब्या। मई इ पराथना भी करत हउँ कि उ बिन्यामीन अउ सिमोन क भी सुरच्छित आवइ देइ। अगर नहीं तउ मई आपन पूतन स वंचित होइ जाब।”

15एँह बरे भाइयन राजा क देइ बरे भेंट लिहन अउ उ पचे जेतना धन पहिले लिहे रहेन ओकर दुइ गुना आपन साथ लिहन। बिन्यामीन भाइयन क संग मिस्त्र गवा।

### भाइयन क यूसुफ क घर निमंत्रण मिलत ह

16मिस्त्र में यूसुफ ओनके संग बिन्यामीन क लखेस। यूसुफ आपन सेवक स कहेस: “ओन मनइयन क मोरे घरे लिआवा। एक ठु जनावर मारा अउ पकावा। उ सबइ मनई क आजु दुपहरिया मोरे संग भोजन करइ द्या।” 17नउकर क जइसा कहा गवा रहा वइसा किहस। उ ओन मनइयन क यूसुफ क घर लइ गवा।

18भाई लोग ससान रहेन जब उ सबइ यूसुफ क घर गएन। उ पचे कहेन, “हम पचे हिआँ उ धन बरे लिआवा ग अही जउन पिछली दाई हम लोगन क बोस में रखि दीन्ह ग रहा। उ पचे ऐंका हम लोगन क बिरुद्ध प्रयोग करिहीं। तब उ पचे हम पचन क गदहन क लइ लेइहीं अउ हम लोगन क गुलाम बनइहीं।”

19एँह बरे यूसुफ क घरे क देख रेख करइवाला नउकर क लगे सबहिं भाई गएन। 20उ पचे कहेन, “महोदय हम सपथ लइके कहत हउँ कि पिछली दाई हम लोग हिआँ भोजन खरीदइ बरे आए रहेन। 21-22घर लउटत समइ हम पचे आपन बोस क खाली कीन्ह अउ हर एक बोरा में आपन धन पावा। हम पचे नहीं जानत रहेन कि ओनमें धन कइसे पहोंचा। मुला हम उ धन आप क लउटावइ बरे साथ लाए अहइँ अउ इ समइ हम लोग जउन अनाज बेसहइ चाहित ह ओकरे बरे धन लाए अही।”

23नउकर जवाब दिहस, “डेराअ जिन, मोहे प पतिआ। तोहरे पिता क परमेस्सर तू लोगन क धन क तोहरे बोरवन में भेंट क रुप में धरे होइ। मोका सुमिरन अहइ कि तू लोगन पिछली दाई अनाज क दाम मोका दइ दिहे रह्या।”

तब नउकर सिमोन क जेल स बाहरे लिआवा। 24नउकर ओन लोगन क यूसुफ क घरे लइ गवा। उ ओनका पानी दिहस अउ उ पचे आपन गोइ पखारेन। उ ओनके गदहन क खाइ बरे चारा दिहस।

25भाइयन सुनेन कि यूसुफ क संग खइया क खइहीं। एँह बरे ओकर भाई आपन भेंट तइयार करइ में उ पचे दुपहर तलक लगा रहेन।

26यूसुफ आपन घर गवा अउ भाइयन ओका भेंट दिहन जउन उ पचे आपन संग लइ आए रहेन। तब उ पचे धरती प निहुरिके पैलगी किहन।

27यूसुफ ओनकइ कुसल पूछेस। यूसुफ कहेस, “तू पचन क बुढ़वा पिता जेकरे बारे में तू लोगन क बताया, ठीक तउ अहइ? का उ अब तलक जिअत अहइ?”

28भाइयन जवाब दिहेन, “हम पचन क बाप नीक अहइँ। उ सबइ अब तलक जिअत अहइँ” अउर उ पचे फुन यूसुफ क समन्वा निहुरेन।

### यूसुफ आपन भाई बिन्यामीन स मिलत ह

29तब यूसुफ आपन भाई बिन्यामीन क लखेस। (बिन्यामीन अउ यूसुफ क एक ही महतारी रहिन।) यूसुफ कहेस, “का इ तू लोगन क सब स लहुरा भाई अहइ जेकरे बारे में तू बताए रह्या?” तब यूसुफ बिन्यामीन स कहेस, “परमेस्सर तोह प कृपालु होइ।”

30तब यूसुफ कमरा स बाहरे दौड़ि गवा। आपन भाइ बिन्यामीन क सहानुभूति में बेकाबू होइ गवा रहेन। एँह बरे उ रोवइ वास्ते गुप्त ठउर खोजेस। उ आपन कमरा में गवा अउर हुवाँ रोवा। 31तब यूसुफ आपन मुँह धोएस अउ बाहरे आवा। उ आपन आप पइ काबू रखेस अउर कहेस, “अब खइया क खाइके टेम बाटइ।”

32यूसुफ अकेले एक ठु मेज प खइया खाएस। ओकर भाइयन दूसर मेज प एक साथ भोजन किहन। मिस्त्र क लोगन दूसर मेज प एक संग खाएन। ओनकइ बिस्सास रहा कि ओनके बरे इ ठीक नहीं कि उ पचे हिब्रू लोगन क संग खाईं। 33अब उ पचनक यूसुफ क समन्वा मेज पइ पहलोठा स लइ क सबन त छोटा क तरतीब में बइठा गवा रहेन। एँह बरे सबइ भाइयन अचरज करत भए रहेन। 34नउकर लोग यूसुफ क मेज प ओनका भोजन लइ जात

रहेन। मुला अउरन स अपेच्छा नउकर लोग बिन्यामीन क पाँच गुना बेसी दिहन। यूसुफ क संग उ सबहिं भाई तब तलक खात रहेन अउ दाखरस पिअत रहेन जब तलक उ पचे नसा में मस्त नाहीं होइ गएन।

### यूसुफ जाल बिखवत ह

**44** तब यूसुफ आपन नउकरन क जउन कि घर क निगारौंकार रहेन। हुकुम दिहेस। यूसुफ कहेस, “ओन मनइयन क बोरियन में ऐतना अनाज भरि द्या जेतना उ पचे लइ जाइ सकई। तउ हर एक मनइयन क पैसा ओकरे बोरामें उपर रख द्या। 2 मुला सब स लहुरा भाई क बोरामें उपर ओकरे आनाज क पैसा क संग मोर चाँदी क पियाला भी रख द्या।” नउकर यूसुफ क हुकुम पूरा किहस।

3 दूसरे दिन भिनसारे सब भाई लोग आपन गदहन क संग अपने देस क वापिस पठइ दीन्ह गएन। 4 जब उ पचे सहर बाहर कछू ही दूर गए रहेन तउ यूसुफ आपन नउकर क हुकुम दिहेस, “जा अउर ओन लोगन क पाछा करा। ओनका रोक अउ ओनसे कहा, ‘हम लोग आपन लोगन बरे नीक रह्या! मुला आप सबन हम लोगन बरे बुरा काहे रहे? 5 हमार मालिक यूसुफ इहइ पियाला स पिअत हीं। उ पचे राज क बात जानइ बरे इहइ पियाला क प्रयोग करत ह। इ पियाला क चोराइके आप लोगन काहे अपराध किहेन?’”

6 एह बरे नउकर हुकुम क मानेस। उ सवार होइ के भाइयन तलक गवा अउ ओनका रोकेस। नउकर ओनसे उ ही बातन किहेस जउन यूसुफ ओनसे कहइ बरे कहे रहा।

7 मुला भाइयन नउकर स कहेन, “राजपाल अइसी बातन काहे कहत हीं? हम पचे अइसा अपराध कबँहू नाहीं करब! 8 लखा हम पचे उ पैसा कनान देस लउटाइके लाए रहेन जउन पहिले हम लोगन क आपन बोरन में मिला रहा। एह बरे हम लोगन तोहार मालिक क घरे स चाँदी या सोना नाहीं चोरावइ चाही? 9 यदि आपन कउनो बोरामें चाँदी क उ पियाला पाइ जाई तउ उ मनई क मारि दीन्ह जाइ। तू ओका मार सकत ह अउर हम लोग तोहार नउकर होब।”

10 नउकर कहेस, “जइसा तू कहत ह हम वइसा ही करब, मुला मई उ मनई क मारब नाहीं। यदि मोका चाँदी क पियाला मिली तउ उ मनई मोर नउकर होइ। दूसर भाई लोग जाइ बरे अजाद होइहीं।”

### जाल बिखवा गवा, बिन्यामीन धरा गवा

11 तब सब भाई आपन आपन बोरामें हाली हाली भुइयों प खोलें। 12 नउकर बोरन में लखब सुरु किहेस। उ सब स जेठ भाई स सुरु किहस अउ सब स लहुरा भाई प खतम किहस। उ बिन्यामीन क बोरामें पियाला पाएस। 13 सबइ भाई लोग बहोत दुःखी भएन। एह बरे उ पचे आपन ओढ़ना फारि डएन। तउ आपन आपन गदहन पइ बोरन क लादेन अउर सहर क लउट पडेन।

14 यहूदा अउ ओकर भाई यूसुफ क घर लौटि गएन। यूसुफ तब तलक हुआँ रहा। भाइयन भुइँया तलक निहुरिके प्रणाम किहेन। 15 यूसुफ ओनसे कहेस, “तू पचे इ काहे किहा? का तू लोगन क पता नाहीं अहइ कि छिपी बातन क

फरियावइ क मोर खास ढंग बाटइ। मोहसे बढ़िके अच्छी तरह कउनो दूसर इ नाहीं कइ सकत।”

16 यहूदा कहेस, “महोदय, हम पचन क कहइ बरे कछू नाहीं अहइ। ऐंका फरियावइ क कउनो दूसर तरीका नाहीं बा। इ देखावइ क कउनो तरीका नाहीं बा कि हम पचे अपराधी नाहीं अही। हम पचे अउर कछू किहे होइ जेकरे बरे परमेस्सर हमका अपराधी ठहराएस ह। एह बरे, हम सबहिं बिन्यामीन क साथ, आपका दास होब।”

17 मुला यूसुफ कहेस, “मई तू पचनक सबहिं क आपन दास न बनाउब। सिरिफ उहइ मनई जेकर बोरामें पियाला पावा गवा रहा, मोर दास होइ। तू दूसर लोग आपन पिता क लगे जाइ बरे अजाद अहई।”

### यहूदा बिन्यामीन क बारे में सिफारिस करत ह

18 तब यहूदा यूसुफ क लगे गवा अउ उ कहेस, “महोदय, मेहरबानी कइके मोका खुद आपसे साफ कहि लेइ द्या। कृपा कइके मोसे नाखुस न हवा। मई जानत अहउँ कि आप खुद फिरौन जइसे अहईं। 19 जब हम लोग पहिले हिआँ आए रहे, आप पूछे रहेन कि ‘का तोहार पिता या भाई अहईं?’ 20 अउर हम आप क जवाब दीन्ह, ‘हमरे एक तु पिता अहईं, उ बुढ़ान अहईं अउ हम लोगन क एक लहुरा भाई अहइ। हमार पिता ओसे बहोत ज्यादा पियार करत हीं काहेकि ओकर जन्म ओकरे बुढ़ापे में भवा रहा, अउर लहुरा बेटवा क भाई मरि गवा एह बरे इ सिरिफ अकेला बचा अहइ जउन उ मेहरारु स जनमे रहा। हम पचन क पिता ओका बहोत पियार करत हीं।’ 21 तब आप हमसे कहे रहेन, ‘उ भाई क मोरे लगे लिआवा। मई ओका लखइ चाहत हउँ।’ 22 अउर हम लोग कहे रहे, ‘इ नान्ह लरिका नाहीं आइ सकत। उ आपन बाप क नाहीं तजि सकत। अगर ओकरे पिता क ओसे हाथ धोवइ पड़इ तउ ओकर पिता ऐतना दुःखी होइ कि उ मरि जाइ।’ 23 मुला आप हमसे कहेन, ‘तू लोग आपन छोटका भइया क जरुर लिआवा, नाहीं तउ मई फुन तू लोगन क हाथे अनाज न बेचब।’ 24 एह बरे हम लोग आपन पिता क लगे लउटे अउ आप जउन कछू कहेन, ओनका बतावा।

25 “पाछे हम पचन क पिता कहेन, ‘फुन जा अउ हम लोगन बरे कछू अउर अन्न खरीदा।’ 26 हम लोग ओसे कहा, ‘हम लोग आपन सब स लहुरा भाई क बिना नाहीं जाइ सकत। राजपाल कहेस ह कि उ तब तलक हम लोगन क अनाज नाहीं बेची जब तलक उ हमरे सबन त लहुरे भइया क नाहीं लखि लेत।’ 27 तब मोर पिता हम लोगन स कहेस, ‘तू लोग जानत ह कि मोर मेहरारु राहेल मोका दुइ पूत दिहस। 28 मई एक पूत क दूरी जाइ दिहेउँ अउ ओका जंगली जनावर मारि डएन अउ तब स मई ओका नाहीं लखेउँ ह। 29 अगर तू पचे मोर पूत क मोसे दूर लइ जाइ चाहत बाट्या अउ ओका कछू होइ जात ह तउ मोका ऐतना दुःख होइ कि मई मरि जाब।’ 30 एह बरे अब हम लोग आपन छोटका भाई क बिना घरे जाब तब हम पचन क पिता क इ निहारइ क पड़ी। उ छोटका बेटवा हमरे पिता क जिन्गी में सबसे बेसी मानता रखत ह। 31 जब उ

पचे लखिहीं कि छोटका बेटवा हम लोगन क संग नाही अहइ उ पचे मरि जइहीं अउर इ हम लोगन क दोख होइ। हम पचे आपन पिता क घोर दुःख अउ मउत क कारण होइ जाब।

32“मई छोटके बेटवा क जिम्मेदारी लीन्ह ह। मई आपन पिता स कहेउँ, ‘जदि मई ओका आप क लगे लउटाइके न लावउँ तउ आप सारी जिन्गगी भइ मोका दोखी ठहराइ सकत हीं।’ 33एँह बरे मई आप स माँगत अहउँ, अउर आप पराथना करत हउँ कि कृपा कइके छोटके लरिका क आपन भाइयन क संग लौटि जाइ देई अउ मई हिआँ रुकब अउ आप क दास होब। 34मई आपन पिता क लगे लौट नाही सकत जदि हमरे संग छोटका भाई नाही रही। मई इ बात स बहोत ससान अहउँ कि मोरे बाप क संग का घटी।”

### यूसुफ आपन क परगट करत ह कि उ कउन अहइ

45 यूसुफ आपन क अउर जियादा न संभारि सका। उ हुआँ हाजिर सबहि लोगन क समन्वा रोइ पड़ा। यूसुफ कहेस, “हर एक स कहा कि हिआँ स हट जाई।” एँह बरे सबहि लोग चला गएन। सिरिफ ओकर भाई ही यूसुफ क संग रहि गएन। तब यूसुफ ओनका बताएस कि उ कउन अहइ। 2यूसुफ रोवत रहा, अउर फिरौन क महल क सब मिस्त्र क मनइयन सुनेन। 3यूसुफ आपन भाइयन स कहेस, “मई आप लोगन क भाई यूसुफ अहउँ। का मोर पिता अब भी जीवित अहइ?” मुला भाइयन ओका जवाब नाही दिहेन। उ पचे डेरन अउ उलझन में रहेन।

4एँह बरे यूसुफ आपन भाइयन स फुन कहेस, “मोरे लगे आवा।” एँह बरे यूसुफ भाई क निअरे गएन अउ यूसुफ ओनसे कहेस, “मई आप लोगन क भाई यूसुफ अहउँ। मई उहइ अहउँ जेका मिस्त्री लोगन क हाथे आप लोग गुलाम क रुप में बेचे रहेन। 5अब परेसान न होई। आप लोग आपन किहे भए पड़ गुस्सा न करई। उ तउ मोरे बरे परमेस्सर क योजना रही कि मई हिआँ आवउँ। मई हिआँ तू लोगन क जिन्गगी बचावइ बरे आवा हउँ। 6इ खौफनाक भुखमरी क समइ दुइ बरिस ही अबहि बीता अहइ अउर अबहि पाँच बरिस बे पौध लगावइ या उपज क अइहीं। 7एँह बरे परमेस्सर तू लोगन स पहिले मोका हिआँ पठएस जेहसे मई इ देस में तू लोगन क बचाइ सकउँ। 8इ आप लोगन क दोख नाही रहा कि मई हिआँ पठवा गवा। इ परमेस्सर क योजना रही। परमेस्सर मोका फिरौन बरे पिता क समान बनाएस। ताकि मई ओकर सारा घर अउ समूचइ मिस्त्र क राजपाल बनि सकउँ।”

### इस्त्राएल क मिस्त्र बरे आमन्त्रण मिला

9यूसुफ कहेस, “एँह बरे हाली मोरे पिता क लगे जा। मोरे पिता स कहा कि ओकर पूत यूसुफ इ सँदेसा पठएस ह।”

परमेस्सर मोका समूचइ मिस्त्र क राजपाल बनाएस ह। मोरे लगे आवई। इन्तजार न करई। अबहि आवई। 10आप मोरे निचके गोसेन प्रदेस में रइहीं। आप क, आप क बेटवन

क, आप क सबहि जनावरन अउ झुण्ड क सुआगत अहइ। 11भुखमरी क अगले पाँच बरिस में मई आप क देखरेख करब। इ तरह आप क अउ आप क परिवारे क जउन चीजन अहई ओनसे आप क हाथ धोवइ क न होइ।

12यूसुफ आपन भाइयन स बात करत रहा। उ कहेस, “अब आप लोग निश्चित रूप स लख सकत अहई कि इ फुरइ मई ही यूसुफ अहई” अउर आप लोगन क भाई बिन्यामीन जानत ह कि इ मई ही आप लोगन क भाई अहउँ जउन आप लोगन स बात करत हउँ। 13एँह बरे मोरे पिता स मोका मिस्त्र क जउन सम्मान प्राप्त अहइ क बारे में कहेई। आप लोगन जउन हिआँ लखेन ह उ हर एक चीज क बारे में मोरे पिता क बतावई। अब हाली करा अउ मोरे पिता क लइके मोरे लगे लौटा।” 14तब यूसुफ आपन भाई बिन्यामीन क गले लगाएस अउ रोइ पड़ा अउ बिन्यामीन भी रोइ पड़ा। 15तब यूसुफ सबहि भाइयन क चूमेस अउ ओन कइ बरे रोइ पड़ा। एँकरे पाछे भाई ओकरे संग बतियाइ लागेन।

16फिरौन क पता लाग कि यूसुफ क भाई ओकरे पास आवा अहई। इ खबर फिरौन क पूरे महल में सँवर गइ। फिरौन अउ ओकर नउकर इ बारे में बहोत खुस भएन। 17एँह बरे फिरौन यूसुफ स कहेस, “आपन भाइयन स कहा कि ओनका जेतना खइया क चाही, लइ लेई अउ कनान देस क लौटि जाई। 18आपन भाइयन स कहा कि उ पचे आपन पिता अउ आपन परिवार क लइके हिआँ मोरे लगे आवई। मई तोहका रोजी बरे मिस्त्र में बढ़िया धरती देब अउ तोहार परिवार सब स अच्छा खइया क खाइ जउन हमरे लगे हिआँ अहइ।” 19तब फिरौन कहेस, “हमरी सबन त बढ़िया गाड़ियन में स कछू आपन भाइयन क द्या। ओनका कनान जाइ अउ गाड़ियन में स आपन पिता, मेहररुअन अउ गदेलन क हिआँ आवइ द्या। 20ओनकी सबइ चिजियन क हिआँ लावइ बारे में चिन्ता जिन करा। हम ओनका मिस्त्र में जउन सबन त बढ़िया अहइ, देब।”

21एँह बरे इस्त्राएल क पूतन इहइ किहेन। यूसुफ फिरौन क बचन क मुताबिक नीक गाड़िन क दिहस अउ यूसुफ जात्रा बरे ओनका भरपूर भोजन दिहस। 22यूसुफ हर एक भाई क एक एक जोड़ा सुन्नर ओढ़ना दिहस। मुला यूसुफ बिन्यामीन क पाँच जोड़ा सुन्नर ओढ़ना दिहस अउ यूसुफ बिन्यामीन क तीन सौ चाँदी क सिक्का भी दिहस। 23यूसुफ आपन पिता क भेंट पठएस। उ मिस्त्र स बहोत स बढ़िया चीजन स भरा बोरन स लदा दस तु गदहन क पठएस अउ उ आपन पिता बरे अनाज, रोटी अउ दूसर भोजन स लदी भइ दस तु गदहियन क ओनकी वापसी जात्रा बरे पठएस। 24तब यूसुफ आपन भाइयन क जाइ बरे कहेस। जब उ पचे जाइ क रहेन यूसुफ ओनसे कहेस, “सोइइ घरेजा अउ रस्ता में जिन लइया।”

25इ तरह भाइयन मिस्त्र क तजेन अउ कनान देस में आपन पिता क लगे गएन, 26भाइयन ओनसे कहेन, “पिता जी यूसुफ अबहि जिअत अहइ अउ उ पूरा मिस्त्र देस क राजा अहइ।”

ओनकइ पिता असमंजस में पड़ि गवा। उ ओन पड़ि नाहीं पतियान। 27मुला यूसुफ जउन बातन क कहे रहा, भाइयन हर एक बात आपन पिता स कहेन। तब याकूब ओन गाड़ियन क लखेस जेनका यूसुफ मिस्त्र क वापसी जात्रा बरे पठए रहा। तब याकूब भाव बिभोर होइ गवा अउ बहो बहोतइ खुस भवा। 28इस्त्राएल कहेस, “अब मोका बिस्सास अहइ कि मोर पूत यूसुफ अबहिं जिअत अहइ। मई मरइ स पहिले ओका देखइ जात अहउँ।”

### परमेस्सर इस्त्राएल क पतियावत ह

**46** एँह बरे इस्त्राएल मिस्त्र क आपन जात्रा सुरु किहस। पहिले इस्त्राएल बेसेबा पहोंचा। हुओं इस्त्राएल आपन पिता इसहाक क परमेस्सर क आराधना अउर बलि भेंट किहस। उ बलि दिहेस। 2राति में परमेस्सर इस्त्राएल स सपना में बोला। परमेस्सर कहेस, “याकूब, याकूब”

अउ इस्त्राएल जवाब दिहेस, “मईं हिओं अहउँ।”

3तब परमेस्सर कहेस, “मईं यहोवा तोहरे बाप क परमेस्सर अहउँ। मिस्त्र जाइ स डेरअ जिन। मिस्त्र में मईं तोहका महान रास्ट्र बनाउब। 4मईं तोहरे संग मिस्त्र चलब अउ मईं तोहका फुन मिस्त्र में स बाहेर निकारि लाउब। तू मिस्त्र में मरिब्या। मुला यूसुफ तोहरे संग रही। जब तू मरब्या तउ उ खुद आपन हाथन स तोहार आँखी बन्द करी।”

### इस्त्राएल मिस्त्र क जात ह

5तब याकूब बेसेबा तजेस अउ मिस्त्र तलक जात्रा किहस। ओकर बेटवन, अर्थात इस्त्राएल क बेटवन अउ बाप, आपन मेहररुअन अउ आपन सबहिं बच्चन क मिस्त्र लइ गएन। उ पचे फिरौन क जरिये पठई गइन गाड़ियन में जात्रा किहेन। 6ओनके लगे, ओनकइ गोरु अउ कनान देस में ओनका आपन जउन कछू रहा, उ भी संग रहा। इ तरह इस्त्राएल आपन सबहिं लरिकन अउ आपन परिवारे क संग मिस्त्र गवा। 7ओकरे संग ओकर बेटवन अउ बिटियन अउ पोतन अउर पोतिन रहिन। ओकर सारा परिवार ओकरे संग मिस्त्र गवा।

### याकूब क परिवार

8इ इस्त्राएल क ओन पूतन अउ परिवारन क नाउँ अहइँ जउन ओकरे संग मिस्त्र गएन।

रूबेन याकूब क पहिला पूत रहा। 9रूबेन क पूत रहेन: हनोक, पललू, हेस्त्रोन अउ कम्मी।

10सिमोन क पूत: यमूएल, यामीन, ओहद, याकीन अउ सोहर। हुओं साऊल भी रहा। (साऊल कनानी मेहररु अउ पइदा भवा रहा।)

11लेवी क बेटवन: गोर्सोन, कहात अउ मरारी

12यहूदा क पूतन: एर, ओनान, सेला, पेरेस अउ जेरह। (एर अउ ओनान कनान में रहत समइ मर ग रहेन।) पेरेस क पूतन: हेस्त्रोन अउ हामूल।

13इस्साकार क पूतन: तोला, पुब्बा, योब अउ सिमोन।

14जबूलून क पूतन: सेरेद, एलोन अउ यहलेल।

15रूबेन, सिमोन लेवी, यहूदा, इस्साकार अउ जबूलून जउन याकूब क मेहररु लिआ क पूतन रहेन। लिआ क उ पूतन पदन-अराम में रहेन अउर ओकर संग दीना नाउँ क एक ठू बिटिया भी रही। इ परिवारे में तैंतीस मनई रहेन।

16गाद क पूतन: सिथ्योन, हाग्गी, सूनी, एसबोन, एरी, अरोदी, अउर अरेली।

17आसेर क पूतन: यिम्ना, यिस्वा, यिस्वी, बरीआ अउ ओनकइ बहिन सेरह अउ बरीआ क पूतन: हेबेर अउ मल्कीएल रहेन।

18इ सबइ याकूब क मेहररु क दासी जिल्पा स ओकरे पूत रहेन। (जिल्पा लाबान क दुआरा ओकरे बिटिया लिआ क दीन्ह गवा रहेन।) इ परिवारे में सोलह मनई रहेन।

19याकूब क संग ओकर मेहररु राहेल स पइदा भवा पूत बिन्यामीन भी रहा। (यूसुफ भी राहेल स पइदा रहा, मुला उ पहिले स ही मिस्त्र में रहा।)

20मिस्त्र में यूसुफ क दुइ पूतन रहेन, मनस्से अउ एप्रैम। (यूसुफ क मेहररु ओन क याजक पोतीपेरा क बिटिया आसनत रही।)

21बिन्यामीन क पूत: बेला, बेकेर, अस्बेल, गेरा, नामान, एही, रोस, मुप्पीम, हुप्पीम अउ आर्द।

22उ पचे याकूब क मेहररु राहेल स पइदा भए ओकर दुइ पूत रहेन। इ परिवार में चौदह मनई रहेन। 23दान क पूत: हूसीम। 24नप्ताली क पूतन: यहसेल, गूनी, सेसेर, अउर सिल्लेम।

25उ पचे याकूब अउ बिल्हा क पूत रहेन। (बिल्हा राहेल क नउकरनी रही। जेका लाबन ओका दिहे रहेन) इ परिवारे में सात मनई रहेन।

26इ तरह याकूब क सन्तानन मिस्त्र में पहोंचिन। ओनमें छछठ ओकर सोइ संतान रहिन। (इ गनती में याकूब क बेटवन क मेहररुअन सामिल नाहीं रहिन।)

27यूसुफ क भी दुइ पूत रहेन। उ पचे मिस्त्र में पइदा भ रहेन। इ तरह मिस्त्र में याकूब क परिवार में सत्तर मनई रहेन।

### इस्त्राएल मिस्त्र पहोंचत ह

28इस्त्राएल पहिले यहूदा क यूसुफ क लगे पठएस। यहूदा गोसेन प्रदेश में यूसुफ क लगे गवा। जब इस्त्राएल अउ ओकर लोग उ प्रदेश में गएन। 29यूसुफ क पता लाग कि ओकर पिता नगिचे आवत अहइ। एँह बरे यूसुफ आपन रथ तइयार कराएस अउ आपन पिता इस्त्राएल स गोसेन में भेटंड चला। जब यूसुफ आपन पिता क लखेस तब उ ओकरे गटइया स लपटि गवा अउ देर तलक रोवत रहा।

30तब इस्त्राएल यूसुफ स कहेस, “अब मईं सान्ति स मरि सकत हउँ। मईं तोहार मुँह देखि लिहेउँ ह अउर मईं जानत हउँ कि तू अबहिं जिअत अहा।”

31यूसुफ आपन भाइयन अउ आपन पिता क परिवार स कहेस, “मईं जाब अउ फिरौन स कहब कि मोरे पिता हिओं आइ ग अहइँ। मईं फिरौन स कहब, ‘मोर भाइयन अउ मोर पिता क परिवार कनान देस तजि दिहे अहइ अउर हिओं मोरे लगे आइ ग अहइँ। 32इ गइरिया क परिवार अहइ। उ पचे

हमेशा गोरु अउ खरका राखे अहई। उ पचे आपन सबहि जनावर अउ ओनकइ जउन कछू आपन अहइ ओका आपन संग लइ आए अहई। 33जब फिरौन आप लोगन क बोलइहीं अउ आप लोगन स पूछिहीं, 'आप लोग का काम करत हीं?' 34आप लोग ओनसे कह्या, 'हम पचे गइरिया अही। हम सबइ पूरी जिन्नगी जनावरन क देखरेख में बितावा ह। हम लोगन स पहिले हमार पुरखन भी अइसे रहेन।' तब फिरौन तू लोगन क गोसेन प्रदेस में रहइ क आग्या दइ देइ। मिस्त्र क लोग गइरिया क पसन्द नहीं करतेन, एँह बरे बढ़िया उहइ होइ कि आप लोग गोसेन में ही ठहरई।"

### इस्त्राएल गोसेन में बसत ह

**47** यूसुफ फिरौन क लगे गवा अउ उ कहेस, "मोर पिता, मोर भाई अउ ओनके सबहि परिवार हिआँ आइ ग अहई। उ सबइ आपन सबइ जनावर तथा कनान में ओनकइ आपन जउन कछू रहा, ओकरे संग अहइ। इ टेम उ सबइ गोसेन प्रदेस में अहई।" 2यूसुफ आपन भाइयन में स पाँच क फिरौन क समन्वा हाजिर होइ बरे चुनेस। 3फिरौन भाइयन स पूछेस, "तू लोग का काम करत अहा?"

भाइयन फिरौन स कहेन, "महोदय, हम पचे गइरिया अही। हम लोगन स पहिले हमार पुरखन भी गइरिया रहेन।" 4उ पचे फिरौन स कहेन, "कनान में भुखमरी क इ टेम बहोत बुरा बाटइ। हम लोगन क गोरुअन क घास वाला कउनो खेत बचा नहीं रहि गवा बाटइ। एँह बरे हम लोग इस देस में बसइ आवा अही। आप से हम पचे बिनती करत अही कि आप कृपा कइके हम लोगन क गोसेन प्रदेस में रहइ देई।"

5तब फिरौन यूसुफ स कहेस, "तोहरे पिता अउ तोहार भाई तोहरे लगे आवा अहई। 6तू मिस्त्र में कउनो भी जगह ओनके रहइ बरे चुन सकत ह। आपन पिता अउ आपन भाइयन क सबसे अच्छी भुईया द्या। ओनका गोसेन पहुँटा में रहइ द्या अउ अगर उ सबइ कुसल गइरिया अहउँ, तउ उ पचे मोरे जनावरन क भी देख भाल कइ सकत हीं।"

7तब यूसुफ आपन पिता याकूब क भितरे फिरौन क समन्वा बोलाएस। याकूब फिरौन क आसीबाद दिहस। 8तब फिरौन याकूब स पूछेस, "आप क उमिर का अहइ?" 9याकूब फिरौन स कहेस, "बहोत स कस्टन क संग मोर छोटी जिन्नगी रही। मई सिरिफ एक सौ तीस बरिस जिन्नगी बिताएउँ ह। मोर पिता अउ ओनके पुरखन मोसे बेसी उमिर तक जिअत रहेन।"

10याकूब फिरौन क आसीबाद दिहस। तब फिरौन स बिदा लेइके चल दिहस। 11यूसुफ फिरौन क हुकुम मानेस। उ आपन पिता अउ भाइयन क मिस्त्र में भुईया दिहस। इ रामसेस सहर क निअरे मिस्त्र में सबसे बढ़िया भुईया रही। 12यूसुफ आपन पिता, भाइयन अउ ओनके आपन लोगन क, जउन भोजन ओनका जरूरी रहा, दिहस।

### यूसुफ फिरौन बरे भुईया खरीदत ह

13भुखमरी क समइ अउर भी जियादा बुरा होइ गवा। देस में कहीं भी भोजन न रहा। इ बुरा समइ क कारण मिस्त्र

अउ कनान बहोत गरीब होइ गएन। 14देस में लोग जियादा स जियादा अनाज बेसहइ लागेन। यूसुफ धन बचाएस अउ ओका फिरौन क महल में लिआएस। 15कछू समइ पाछे मिस्त्र अउ कनान में लोगन क लगे पइसा नहीं रहा। उ पचे आपन सारा धन अनाज बेसहइ में खर्च कइ दिहन। एँह बरे लोग यूसुफ क लगे गएन अउ बोलेन, "कृपा कइके हम पचन क खइया क द्या। हम पचन क धन खतम होइ ग अहइ। अगर हम लोग नहीं खाव तउ आप क लखत लखत मरि जाब।"

16मुला यूसुफ जवाब दिहस, "आपन गोरु मोका द्या अउर मई तू लोगन क भोजन देब।" 17एँह बरे लोग आपन गोरु, घोड़ा अउ दूसर सबहि जनावरन क भोजन बेसहइ बरे प्रयोग में लावइ लागेन अउ उ बरिस यूसुफ ओनके गोरुअन क लिहस अउ भोजन दिहस।

18मुला दूसर बरिस लोगन क लगे जनावर नहीं रहि गएन अउ भोजन बेसहइ बरे कछू न रहा। एँह बरे मनई यूसुफ क लगे गएन अउ बोलेन, "आप जानत हीं कि हम लोगन क लगे धन नहीं बचा बाटइ अउ हमार सबहि गोरु आप क होइ गए अहई। एँह बरे हम लोगन क लगे कछू नहीं बचा अहइ। उ बचा अहइ सिरिफ, जउन आप लखत हीं, हमार तन अउ हमार भुईया। 19आप क लखत भए ही हम फुरइ मरि जाब। मुला जदि आप मोका भोजन देत हीं तउ हम फिरौन क आपन भुईया देब अउ ओकर गुलाम होइ जाब। हमका बिआ द्या जेनका हम बोइ सकी। तब हम लोग जिअत रहव अउ मरब नहीं अउ भुईया हम लोगन बरे फुन अनाज उगाई।"

20एँह बरे यूसुफ मिस्त्र क सारी भुईया फिरौन बरे बेसहेस। मिस्त्र क सबहि लोगन आपन खेतन क यूसुफ क हाथ बेचि दिहन। उ पचे इ एँह बरे किहन काहे कि उ पचे बहोत भुखान रहेन। 21अउर सबइ लोग फिरौन क दास होइ गएन। मिस्त्र में सब जगह लोग फिरौन क दास रहेन। 22एक सिरिफ उहइ भुईया यूसुफ नहीं बेसहेस जउन याजकन क कब्जा में रही। याजकन क भुईया बेचइ क जरूरत नहीं रही। काहेकि फिरौन ओनके काम बरे ओनका पगार देत रहा। एँह बरे उ पचे इ धन क खाइ बरे भोजन बेसहइ में खरच किहन।

23यूसुफ लोगन स कहेस, "अब मई तू पचन क अउ तोहरी भुईया क फिरौन बरे बेसहेउँ ह। एँह बरे मई तू पचन क बिआ देब अउ तू लोग आपन खेतन में पौध लगाइ सकत ह। 24फसल काटइ क समइ तू लोग फसल क पाँचवाँ हींसा फिरौन क जरूर दिहा। तू पचे आपन खातिर पाँच में स चार हींसा रखि सकत ह। तू लोग उ बिआ क जेका भोजन अउ बोवइ बरे रखब्या ओका दुसरे बरिस प्रयोग कइ सकब्या। अब तू आपन परिवारन अउ गदेलन क खिआइ सकत ह।"

25मनइयन कहेन, "आप हम लोगन क जिन्नगी बचाइ लिहन ह।" हम लोग आप क अउ फिरौन क दास होइ में खुस अही।"

26एँह बरे यूसुफ उ समइ देस में एक नेम बनाएस अउ उ नेम अब तलक चला आवत अहइ। नेम क मुताबिक

भुईया स हर एक उपज क पाँचवौं हीसा फिरौन क बाटड़। फिरौन सारी भुईया क सुआमी अहइ। सिरिफ उहइ भुईया ओकर नाहीं जउन याजकन क बाटड़।

### “मोका मिस्त्र में जिन दफनाया”

27इस्त्राएल मिस्त्र में रहेउँ। उ गोसेन पहँटा में रहा। ओकर परिवार बाढ़ा अउ बहोत बड़वार होइ गवा। उ पचे मिस्त्र में उ भुईया क पाएन अउ अच्छी जिन्नगी बिताएन। 28याकूब मिस्त्र में सत्रह बरिस रहा। इ तरह याकूब एक सौ सैतालीस बरिस क होइ गवा। 29उ समइ आइ गवा जब इस्त्राएल समझ गवा कि उ हाली ही मरी, एँह बरे उ आपन पूत यूसुफ क आपन लगे बोलाएस। उ कहेस, “अगर तू मोसे पिरैम करत ह तउ तू आपन हाथ मोरी जाँघे क तरे धइके मोका बचन द्या कि तू, जउन मई कहब करब्या अउ तू मोरे बरे सच्चा रहब्या। जब मई मरब तउ मोका मिस्त्र में जिन दफनाया। 30उहइ जगह मोका दफनाया जउने जगह मोरे पुरखन दफनावा गए अहइँ। मोका मिस्त्र स बाहेर लइ जा अउ मोरे पुरखन जहाँ दफनाए गवा अहइँ उहइ जगह मोका दफनावा।”

यूसुफ जवाब दिहस, “मई बचन देत हउँ कि उहइ करब जउन आप कहत हीं।” 31तब याकूब कहेस, “मोसे एक प्रण करा” अउर यूसुफ ओसे प्रण किहेस कि उ एँका पूरा करी। तब इस्त्राएल आपन मूँडी खटिया प पाछे धरेस।\*

### मनस्से अउ एप्रैम क असीस

48 कछू टेम पाछे यूसुफ क पता लाग कि ओकर पिता बेराम अहइ। एँह बरे यूसुफ आपन दुइनउँ बेटहनन मनस्से अउ एप्रैम क संग लिहस अउ आपन पिता क लगे गवा। 2जब यूसुफ पहँचा तउ कउनो इस्त्राएल स कहेस, “तोहार पूत यूसुफ तोहका लखइ आवा ह।” इस्त्राएल बहोत दुर्बल रहा, मुला उ बहोत जतन किहेस अउ खटिया प बइठि गवा।

3तब इस्त्राएल यूसुफ स कहेस, “कनान देस में लूज क जगह प सर्वसत्तीमान परमेस्सर मोका खुद दर्सन दिहस। परमेस्सर हुआँ मोका आसीबाद दिहस। 4परमेस्सर मोसे कहेस, “मई तोहार एक बड़वार परिवार बनाउब। मई तोहका बहोत स बच्चन क देब अउर तू एक महान रास्ट्र बनब्या। तोहरे लोगन इ भुईया प सदा बना रहीं।” 5अउर अब तोहार दुइ पूत बाटेन। मोरे आवइ स पहिले मिस्त्र देस में हिआँ इ सबइ पइदा भए रहेन। तोहार दुइनउँ पूत एप्रैम अउ मनस्से मोरे आपन बेटवन क तरह होइहीं। उ पचे वइसेन होइहीं जइसे मोका रूबेन अउ सिमोन अहइँ। 6इ तरह इ दुइनउँ मोर पूत होइहीं। उ पचे मोर सबहिं चीजन में हिस्सेदार होइहीं। मुला अगर तोहार दूसर पूत होइहीं तउ उ सबइ तोहार बच्चन होइहीं। मुला उ पचे भी एप्रैम अउ मनस्से क

**तब ... धरेस** या तब इस्त्राएल लाठी क सहारा लइके पराथना में आपन मूँडे निहराएस। डंडा बरे हिब्रू सब्ब “बिखउना” सब्ब क तरह बाटड़ अउ पराथना बरे बइपरा सब्ब का अरथ “पैलगी करब” “ओलरब” होत ह।

बेटवन क नाई होइहीं। अरथ अहइ भविस्स में एप्रैम अउ मनस्से क जउन कछू होइ, ओहमाँ हिस्सेदार होइहीं। 7पद्वनअराम स जात्रा करत समइ में राहेल मरि गइ। इ बात मोका बहोतइ दुःखी किहस। उ कनान क भुईया में मरी। हम पचे अबहिं एप्राता कइँती जात्रा करत रहे। मई ओका एप्राता कइँती जाइवाली सड़क प दफनावा।” (एप्राता बेटलेहेम अहइ।)

8तब इस्त्राएल यूसुफ क पूतन क लखेस। इस्त्राएल पूछेस, “इ सबइ लरिक्न कउन अहइँ?”

9यूसुफ आपन पिता स कहेस, “इ सबइ मोर बेटवन अहइँ। इ सबइ उ पचे लरिक्न अहीं जेनका परमेस्सर मोका दिहस ह।”

इस्त्राएल कहेस, “आपन बेटवन क मोरे लगे लइ आवा। मई ओनका असीसब।”

10इस्त्राएल बुढ़वा रहा, अउर ओकर आँखिन ठीक नाहीं रहिन। एँह बरे यूसुफ आपन बेटहनन क अपने बाप क निचके लइ गवा। इस्त्राएल बच्चन क चूमेस अउ गले स चिपकाएस। 11तब इस्त्राएल यूसुफ स कहेस, “मई कबहुँ नाहीं सोचेउँ कि मई तोहार मुँह फुन लखब मुला देखा। परमेस्सर तोहका अउर तोहरे गदेलन क मोका निहारइ दिहस।”

12तब यूसुफ बच्चन क गोदी स लिहस अउ उ पचे ओकरे पिता क समन्वा पैलगी करइ क निहुरेन। 13यूसुफ एप्रैम क आपन दाहिन कइँती किहस अउ मनस्से क आपन बाई कइँती इ तरह एप्रैम इस्त्राएल क बाई कइँती रहा अउ मनस्से दाई कइँती रहा। 14मुला इस्त्राएल आपन हाथ क पहला बदलिके आपन दाहिन हाथ क लहुरा लरिका एप्रैम क मूँडे प धरेस अउ तब बाएँ हाथ क इस्त्राएल जेठ लरिका मनस्से क मूँडे प राखेस। उ आपन बाएँ हाथ क मनस्से प धरेस, तउ भी मनस्से क जन्म पहिले भवा रहा। 15अउर इस्त्राएल यूसुफ क आसीबाद दिहस अउ कहेस,

“मोरे पुरखा इब्राहीम अउ इसहाक हमरे परमेस्सर क आराधना किहस अउ उहइ परमेस्सर मोर पूरी जिन्नगी क रास्ता क देखेवइया रहा बाटड़।

16उहइ सरगदूत रहा जउन मोका सबहिं कस्टन स बचाएस अउर मोर पराथना अहइ कि इ सबइ लरिक्न क उ असीसइ। अब इ सबइ बच्चन मोर नाम पइहीं। उ पचे हमरे पुरखा इब्राहीम अउ इसहाक क नाउँ पइहीं। मई पराथना करत हउँ कि उ पचे धरती प महान परिवार अउ रास्ट्र बनिहीं।”

17यूसुफ लखेस कि ओकर पिता एप्रैम क मूँडे प दाहिना हाथ रखेस ह। इ यूसुफ क खुस न कइ सका। यूसुफ आपन पिता क हाथे क धरेस। उ ओका एप्रैम क मूँडे स हटाइके मनस्से क मूँडे प रखइ चाहत रहा। 18यूसुफ आपन पिता स कहेस, “आप आपन दाहिन हाथ गलत लरिका प धरे अहा। मनस्से क जन्म पहिले अहइ।”

19मुला ओकर पिता नकारेस, अउ कहेस, “पूत, मई जानत हउँ। मनस्से क जन्म पहिले अहइ अउर उ महान होइ। उ बहोत स लोगन क पिता भी होइ। मुला लहुरा भाई जेठ भाई स बड़ा होइ अउ लहुरे भाई क परिवार ओसे

बहोत बड़ा होइ।” 20इ तरह इस्राएल उ दिन ओनका आसीर्बादि दिहस। उ कहेस,

“इस्राएल क लोग तोहरे नाउँ क प्रयोग आसीर्बादि देइ बरे करिहीं, उ लोगन कहब्या: ‘परमेस्सर तोहका एप्रैम अउ मनस्से क तरह बनावइ।’”

इ तरह इस्राएल एप्रैम क मनस्से स बड़वार बनावस।

21तब इस्राएल यूसुफ स कहेस, “लखा मोरी मउत क टेम निचकाइ ग अहइ। मुला परमेस्सर तोहरे साथ अब भी रही। उ तोहका तोहरे पुरखन क देस तलक लउटाइ लइ जाइ। 22मई तोहका अइसा कछू दिहेउँ ह जउन तोहरे भाइयन क नाहीं दिहेउँ ह। मई तोहका उ पहाड़े क देत अहउँ जेका मई एमोरी लोगन स जीतेउँ ह। उ पहाड़ बरे मई आपन तरवार अउ आपन धनुख स जुद्ध किहेउँ रहे अउर मोर जीत भइ रही।”

### याकूब आपन पूतन क असीसत ह

49 तब याकूब आपन सबहिं बेटवन क आपन लगे बोलाएस। उ कहेस, “मोर सबइ बेटवनो, हिउँँ मोरे लगे आवा। मई तोहका बताउब कि भविस्स में का होइ।

2“याकूब क पूते, एक साथे आवा अउ सुना, आपन पिता इस्राएल क सुना।”

### रूबेन

3“रूबेन, तू मोर पहिलउटी क बेटवा अहा। तू मोर पहिलउटी क बेटवा अउ मोरी सक्ती क पहिला सबूत अहा। तू मोर सबहिं बेटवन स जियादा इज्जतदार अउ बरिआर अहा।

4मुला तोहार उमंग बाढ़े का लहर क नाई बेकाबू रहा। इस्राएल तू मोर सबहिं पूतन स जियादा सम्मानित पूत अउर नाहीं रहिसकब्या। तू आपन बाप क बिछाउना पइ चढ़्या अउ ओकर पत्नियन में स एक क संग सोया। तू आपन पिता क बिछाउना क लज्जित किहेस ह।”

### सिमोन अउ लेवी

5“सिमोन अउ लेवी भाई अहई। ओनका आपन तरवारे स लड़ब पियारा अहइ।

6उ पचे छुपे रूप बुरी योजना बनावन। मई ओनकइ योजना क कउनो हीसा नाहीं चाहत हउँ मई ओनकइ छुपी बइठकन क अनुमोदन नाहीं करब। उ पचे मनइयन क कतल किहन जब उ सबइ किरोध में रहेन। अउ उ पचे सिरिफ मजाक बरे जनावरन क चोट पहोंचाएन।

7ओनकइ किरोध एक सराप अहइ। इ सबइ बहोत जियादा कठोर अहइ जब उ सबइ पगलात हीं। याकूब क देस में ओनके परिवारन क आपन भुईया न होइ। उ पचे पूरा इस्राएल में फइलि जइहीं।”

### यहूदा

8“यहूदा, तोहार भाईयन तोहार प्रसंसा करिहीं। तू आपन दुस्मनन क हरउब्या। तोहरे भाई तोहरे समन्वा निहुरिहीं।

9यहूदा उ सेर क नाई अहइ जउन कउनो जनावर क मारे होइ। हे मोर पूत, तू उ सेर क तरह अहा जउन आपना सिकार क बाद अराम कई बरे सोइ जात ह। अउर कउनो ऐतना बहादुर नाहीं कि ओका छेड़ि देइ।

10यहूदा क परिवार क मनई राजा होइहीं। ओकरे परिवार क राज-चीन्हा सीलो\* क अवाई स पहिले खतम न होइ। तब अनेक लोग ओकर हुकुम मनिहीं।

11उ आपन गदहा क अंगूरे क लता स बाँधत ह। उ आपन गदहा क बच्चन क सबसे बढ़िया अंगूरे क लता में बाँधत ह। उ आपन ओढ़ना क धोवइ बरे सबसे बढ़िया दाखरस क बइपरत ह।

12ओकर आँखिन दाखरस पिए स ललछउँड रहत हीं। ओकर दँतवन दूध पिए स उज्जर अहई।”

### जबूलन

13“जबूलन समुदर क निअरे रही। ऐंकर समुदर क किनारा जहाजन बरे सुरच्छित रही। ऐंकर पहँटा सीदेन तलक फइला होइ।”

### इस्साकर

14“इस्साकर उ गदहा क तरह अहइ जउन बहोत जियादा कठोर काम किहे अहइ। उ भारी बोझ ढोवइ क कारण पस्त पड़ अहइ।

15उ लखी कि ओकरे आराम क जगह अच्छी अहइ। अउर इ कि ओकर भुईया आनन्दायक ह। तब उ भारी बोझा ढोवइ क तइयार होइ। उ गुलाम क रुप में काम करब अंगीकार करी।”

### दान

16“दान आपन लोगन क निआव वइसे ही करब्या जइसे इस्राएल क दूसर परिवार क संग करत हीं।

17दान सड़क क किनारे सरप क तरह अहइ। उ रास्ता क लगे ओलरा भवा खौफनाक सरप क तरह अहइ, जउन घोड़न क गोड़न क डसत ह, अउ सवार भुईया प भहराइ पड़त ह।

18“यहोवा, मई मुक्ति क जोहत अहउँ।”

### गाद

19“डकुअन क एक ठु गिरोह गाद प हमला करी। मुला गाद ओनका मार भगाई।”

### आसेर

20“आसेर क भुईया बहोत बढ़िया उपज देइ। ओका उहइ खइया क मिली जउन राजा लोगन बरे जोगग होइ।”

### नप्ताली

21“नप्ताली एक अजाद मादा हिरन क तरह अहइ जेका अजाद कीन्ह गवा ह। उ सुन्नर सब्द कहत ह।”

सीलो एक कठिन इब्रानी सब्द, सम्भवतः एक नाउँ, जेका अरथ होसकत ह, “उहइ एक जेका अधिकार मई अहइ।”

**यूसुफ**

22“यूसुफ बहोत सुफल अहइ। यूसुफ फलन स लदी भइ गवा क तरह अहइ। उ झरना क लगे जमी अंगूरे क गवा क तरह बाटइ, बाड़ा क सहारे जमी अंगूरे क गवा क तरह अहइ।

23ढेर मिला ओकरे खिलाफ भएन अउ ओसे लड़न। धनुर्धारी मनइयन ओकर दुस्मन होइ गवा।

24मुला उ आपन सक्तीवाला धनुख अउ फुर्तीला बाँहें स जुद्ध जीतेस। उ याकूब क सक्तीवाला परमेस्सर गइरियन, इस्त्राएल क चट्टान, स सक्ती पावत ह।

25अउर आपन पिता क परमेस्सर स सक्ती पावत ह। परमेस्सर तोहका आसीबादि देइ। सर्वसत्कीमान परमेस्सर तोहका आसीबादि देइ। उ तोहका ऊपर स आसीबादि देइ अउर खाले गहिर समुदर स आसीबादि देइ। होइ सकत ह उ तोहका छाती अउ गरभ स आसीबादि देइ।”

26मोरे महतारी-बाप क बहोत स बढ़िया चीजन होत रहिन। अउर मई तोहार पिता बहोत जियादा आसीबादि पावत रहा। अब मई आपन आसीबादि क यूसुफ पइ जमा करब जउन पहाड़ क समान ऊँचा होइ, हाँ ओकरे सिर पइ जेका ओकरे भाईयन स अलगाइ दीन्ह गवा रहेन।”

**बिन्यामीन**

27“बिन्यामीन एक अइसा भूखा बड़का कूकुर क समान अहइ। जउन भिन्सारे मारत ह ओका खात ह। संझा क उ बचा खुचा स काम चलावत ह।”

28इ सबइ इस्त्राएल क बारह परिवार अहइँ। अउर उहइ चीजन अहइँ जेनका ओनके पिता ओनसे कहे रहा। उ हर एक पूत क उ आसीबादि दिहस जउन ओकरे बरे ठीक रहा। 29तब इस्त्राएल ओनका एक हुकुम दिहस। उ कहेस, “जब मई मरउँ तउ मई आपन लोगन क बीच रहइ चाहत हउँ। मई आपन पुरखन क संग हिल्ली एप्रोन क खेतन क गुफा में दफनावा जाइ चाहत हउँ।

30उ गुफा मग्रे क नगिचे मकपेला क खेते में अहइ। इ कनान देस में अहइ। इब्राहीम उ खेत क एप्रोन स एँह बरे बेसहेस जेहसे ओकरे लगे एक ठु कब्रिस्तान होइ सकइ। 31इब्राहीम अउ ओकर मेहरारु सारा उहइ गुफा में दफनावा गए अहइँ। इसहाक अउ ओकर मेहरारु रिबका उहइ गुफा में दफनाए गएन। मई आपन मेहरारु लिआ क उहइ गुफा में दफनावा। 32उ गुफा उ खेत में अहइ जेका हिल्ली लोगन स बेसहा ग रहा।” 33आपन पूतन स बातन खतम करइ क पाछे याकूब ओलर गवा, गोड़वन क आपन बिछउना प धरेस अउ मरि गवा।

**याकूब क आखिरी किरिया करम**

**50** जब इस्त्राएल मरा, यूसुफ बहोत दुःखी भवा। उ पिता स लपटि गवा, ओह प रोवा अउ ओका चूमेस। 2यूसुफ आपन नउकरन क हुकुम दिहस कि उ पचे ओकरे बाप क लहासे क तइयार करइँ। (इ सबइ नउकर वैद्य रहेन।) वैद्य लोग याकूब क लहास गाड़इ बरे तइयार किहन। उ पचे मिस्त्र क लोगन क खास तरीका स लहासे

क तइयार किहन। 3जब मिस्त्र क लोग खास तरह स लहास तइयार किहन तब ओका गाड़इ क पहिले चालीस दिन तलक जोहेन। ओकरे पाछे मिस्त्री लोगन दुःख क खास समइ रखेन। इ समइ सत्तर दिन क रहा।

4सत्तर दिन पाछे दुःख क समइ खतम भवा। एँह बरे यूसुफ फिरौम क अफसरन स कहेस, “कृपा कइके फिरौन स इ कहा, 5जब मोर पिता मरत रहेन तब मई ओनसे एक प्रण किहेउँ रहेउँ। मई प्रण किहेउँ रहे कि मई ओनका कनान देस क गुफा में गाड़ब। इ उ गुफा बाटइ जेका उ अपने खातिर बनाएस ह। एँह बरे कृपा कइके मोका जाइ देई अउर हुआँ पिता क गाड़इ देई। तब मई आपक लगे वापिस लउटि आउब।”

6फिरौन कहेस, “आपन प्रतिग्या पूरी करा। जा अउर आपन बाप क गाड़ा।”

7एँह बरे यूसुफ आपन पिता क गाड़इ गवा। फिरौन क सबहिं अफसरन यूसुफ क संग गएन। फिरौन क बुजुर्गन अउ मिस्त्र क बड़कवा लोग यूसुफ क संग गएन। 8यूसुफ अउ ओकरे भाइयन क परिवार क सबहिं मनई ओकरे संग गएन अउ ओकर पिता क परिवार क सबहिं लोग भी यूसुफ क संग गएन। सिरिफ बच्चन अउ जनावरन गोसेन पहुँटा में रहि गएन। 9यूसुफ क संग जाइ बरे लोग रथन अउ घोड़न प सवार भएन। इ बहोतइ बड़ा मनइयन क झुण्ड रहा।

10उ पचे गोसन आताद क गएन। जउन यरदन नदी क पूरब में रहा। इ ठउर प इ पचे इस्त्राएल क अखिरी संस्कार किहन। इ सबइ आखिरी संस्कार सात दिन तलक होत रहा।

11कनान क बसइयन गोसन आताद में आखिरी संस्कार क लखेन। उ पचे कहेन, “उ पचे मिस्त्र क लोग फुरइ बहोतइ दुःख भरा संस्कार करत अहइँ।” एह बरे उ जगह क नाउँ यरदन नदी क पार तलक अब आबेलमिस्त्रैम अहइ।

12इ तरह इस्त्राएल क बेटवन उहइ किहन जउन ओनके पिता हुकुम दिहे रहेन। 13उ पचे ओकरे लहासे क कनान लइ गएन अउ मकपेला क गुफा में ओका गाड़न। इ गुफा मग्रे क निचके उ खेते में रही जेका इब्राहीम हिल्ली एप्रोन स खरीदा हा। इब्राहीम उ गुफा क कबरिस्तान बरे खरीदा रहा। 14यूसुफ क आपन पिता क दफनाइ क पाछे उ, ओकरे भाइयन अउर ओकरे संग झुण्ड क हर एक मनई मिस्त्र क लौट गवा।

**भाई यूसुफ स डेराएन**

15याकूब क मरइ क पाछे यूसुफ क भाई चिन्ता में पड़न। उ पचे आपन स कहेन, “होइ सकत ह जउन कछू हम कीन्ह ह ओकरे बरे यूसुफ अब भी हमसे घिना करत ह अउर जउन बुरा काम हम लोगन ओकर संग किहस ह ओकर बदला लेब।” 16एँह बरे भाइयन इ सँदेसा यूसुफ क पठएन:

तोहार पिता मरइ क पहिले हम लोगन क हुकुम दिहे रहा। 17उ कहेस, ‘यूसुफ स कह्या कि मई निवेदन करत हउँ कि कृपा कइके उ अपराधे क छिमा कइ देई जउन



उ पचे ओकरे संग किहेन।' ऐह बरे अब हम तोहसे पराथना करित अही कि उ अपराध क छिमा कइ द्या जउ, हम कीन्ह ह। हम लोग सिरिफ तोहरे पिता क परमेस्सर क सेवक अही।

यूसुफ क भाइयन जउन कछू कहेन ओसे ओका बड़ा दुःख भवा अउर उ रोइ पड़ा। 18यूसुफ क भाई ओकरे सामने गएन अउ ओकरे समन्वा निहुरि के पैलगी किहन। उ पचे कहेन, "हम लोग तोहार सेवक होब।"

19तब यूसुफ ओनसे कहेस, "डेराअ जिन मई परमेस्सर नाहीं अहउँ। 20इ फुरइ अहइ कि तू मोका नोस्कान पहुँचावइ बरे योजना बनाए रहा, मुला परमेस्सर फुरइ अच्छी योजना बनवत रहा। परमेस्सर क योजना बहोत स लोगन क जिन्नगी बचावइ बरे मोर प्रयोग करइ क रही अउर आजु भी ओकर इहइ योजना अहइ।

21ऐह बरे डेराअ जिन। मई तू लोगन अउ तोहरे बच्चन क देखरेख करब।" इ तरह, यूसुफ ओनका समझाइ बुझाइ क बात किहस अउ नम्र होइके बोला।

22यूसुफ आपन पिता क परिवार क संग मिस्त्र मँ रहत

रहा। यूसुफ एक सौ दस बरिस होइके मरा। 23यूसुफ क जिन्नगी मँ एप्रैम क पूतन अउ पोतन भएन अउ ओकर पूत मनस्से क एक पूत माकीर नाउँ क भवा। यूसुफ माकीर क बच्चा क लखइ बरे जितत रहा।

### यूसुफ क मउत

24जब यूसुफ मरइ क भवा, उ आपन भाइयन स कहेस, "मोरे मरइ क टेम आइ गवा। मुला मई जानत हउँ कि परमेस्सर तू लोगन क रच्छ करी। उ इ देस स तू लोगन क बाहेर लइ जाइ। परमेस्सर तू लोगन क उ देस मँ लइ जाइ जेका उ इब्राहीम, इसहाक अउ याकूब क देइ क बचन दिहे रहा।"

25तब यूसुफ आपन लोगन क एक प्रण करइ क कहेस। यूसुफ कहेस, "मोसे प्रतिग्या करा कि तब मोर हड्डी आपन संग लइ जाब्या जब परमेस्सर तू लोगन क नवे देस मँ लइ जाइ।"

26यूसुफ मिस्त्र मँ मरा, जब उ एक सौ दस बरिस क रहा। वैद्य लोग ओकरी अर्थी क गाइइ बरे तइयार भएन अउ मिस्त्र मँ ओकरी अर्थी क एक ठु ताबूत मँ धरेन।

# मलाकी

**1** परमेस्वर क सँदेसा। इ सँदेसा यहोवा क अहइ। इ सँदेसा क मलाकी इस्त्राएल क दिहस।

## परमेस्वर इस्त्राएल स पिरिम करत ह

2 यहोवा कहेस, “लोगो, मई तू पचन्स पिरिम करत हउँ।”

मुला तू कह्या, “कइसे पता लागइ कि तू हम स पिरिम करत अहा?”

यहोवा कहेस, “एसाव याकूब क भाई रहा। ठीक? मुला मई याकूब क चुनेउँ 3 अउर मई एसाव क अंगीकार नहीं किहेउँ। मई एसाव क पहाड़ी प्रदेश क नस्ट किहेउँ। एसाव क देस नस्ट कीन्ह गवा अउर अब हुआँ सिरिफ जंगली कूकुर रहत ही।”

4 संभव अहइ एदोम क लोग कहइँ, “हम पचे नस्ट कीन्ह गएन। मुला हम लोग वापस जाब अउर आपन सहरन क फुन बनाउबा।”

मुला सर्वसक्तीमान यहोवा कहत ह, “अगर उ पचे ओन सहरन क फुन बनावत ही तउ मई ओनका फुन नस्ट करबा।” लोग एदोम स कहब, दुट्ट प्रदेश अउर लोग जेहसे यहोवा सदा बरे घिना करत रहेन।

5 हे लोगो, तू पचे इ सबइ लखब्या अउर कहब्या, “यहोवा इस्त्राएल स बाहेर भी समानित भएस ह।”

## इ सबइ याजक परमेस्वर क सम्मान नहीं देतेन

6 सर्वसक्तीमान यहोवा कहेस, “गदेलन आपन बाप क सम्मान करत हीं। नउकरन आपन सुआमियन क सम्मान करत हीं। मई तोहरे बाप क जइसा हउँ, किन्तु उ सम्मान कहाँ बाटइ जेका तोहका मोका देइ चाही? मई तोहार सुआमी हउँ, किन्तु उ सम्मान कहाँ बाटइ जेका तोहका मोका देइ चाही? यहोवा इ सबइ प्रस्न ओन याजकन स पूछेस जउन ओकरे नाउँ क अपमान किहेस।”

मुला तू पचे कहत अहा, “हम पचे का कीन्ह ह, जउन परगट करत ह कि हम पचे तोहरे नाउँ क सम्मान नहीं करत्या?”

7 यहोवा कहेस, “तू पचे मोर वेदी पइ असुद्ध रोटी क भेंट चढ़ाइके मोर अपमान किहेस ह।” मुला तू पचे कहत अहा, “उ रोटी असुद्ध कइसे बाटइ?”

यहोवा कहेस, “तू पचे मोर वेदी क सम्मान नहीं करत्या। 8 तू पचे आँधर जनावर बलि बरे लिआवत ह अउर इ गलत अहइ। तू पचे बलि बरे रोगी अउ विकलांग जनावर लिआवत ह। इ गलत बाटइ। तू पचे आपन सासन करइवालन क ओग रोगी जनावरन क भेंट देइ क जलन करा। का उ एन जनावरन क भेंट क रूप मँ अंगीकार

करी? नहीं। उ ओन भेंटन क अंगीकार नहीं करी।” सर्वसक्तीमान यहोवा इ सब कहत ह।

9 “याजक लोगो! तू पचन्क यहोवा स हमरे बरे नीक बना रहइ क पराथना करइ चाही। मुला उ तोहार पचन्क नहीं सुनी अउर इ सारा दोख तोहार सबन्क अहइ।” सर्वसक्तीमान यहोवा इ सब कहेस।

10 “तोहका मोर मन्दिर क दुआसन क बन्द कइ देइ चाही रहा अउर मोरे वेदी पइ बेकार मँ, बलि क आगी क जराइ बन्द कइ देइ चाही रहा! काहेकि तउ मई तू लोगन स खुस नहीं हउँ अउर न ही तोहार भेंट अंगीकार करबा।” सर्वसक्तीमान यहोवा इ सब कहत ह।

11 “संसार मँ सब जगह लोग मोरे नाउँ क सम्मान करत हीं। संसार मँ सब जगह लोग मोरे बरे नीक भेंट लिआवत हीं। उ पचे अच्छी सुगन्धि मोरे बरे भेंट क रूप मँ बारत हीं। काहेकि मोर नाउँ ओन सबहि लोगन बरे महत्व स भरा अहइ।” सर्वसक्तीमान यहोवा इ सब कहेस।

12 “मुला लोगो! तू पचे इ सब परगट करत अहा कि तू पचे मोरे नाउँ क सम्मान नहीं करत्या। तू पचे कहत अहा कि यहोवा क वेदी पवित्त नहीं अहइ। 13 अउर तू पचे उ मेज स खइया क खाब पसंद नहीं करत्या। तू पचे भोजन क सूँघत अहा अउर ओका खाइ स इनकार करत अहा कि इ बुरा अहइ। मुला इ फुरइ नहीं। तू पचे रोगी, विकलांग अउ चोट खाए भए जनावर मोरे बरे लिआवत अहा। तू पचे रोगी जनावर क मोका बलि क रूप मँ भेंट करइ क जतन करत अहा। मुला मई तू पचन्स ओन रोगी जनावरन क अंगीकार नहीं करबा। 14 कछू लोग मोरे लगे नीक जनावर क बलि देइ क प्रतिग्या करत हीं। किन्तु उ पचे छिपे रूप स ओन नीक जनावरन क बदल देत हीं अउर मोका रोगी जनावर देत हीं। ओनकर संग बुरी बातन घटिहीं। मई महान राजा हउँ। संसार मँ सब जगह लोग मोर सम्मान करत हीं।” सर्वसक्तीमान यहोवा इ सब कहेस।

## याजक लोगन बरे नेम

**2** “याजक लोगो! इ नेम तोहरे पचन्क बरे बाटइ। मोर सुना। जउन मई कहत हउँ ओह पइ धियान द्या। मोर नाउँ क सम्मान करा। 2 अगर तू पचे मोरे नाउँ क सम्मान नहीं करत्या तउ तोहरे सबन्क संग बुरा घटित होइ। तू पचे आसीर्वाद देब्या, मुला उ पचे अभिसाप बनिहीं। मई बुरा घटइ क कराउब काहेकि तू पचे मोरे नाउँ क सम्मान नहीं करब्या।” सर्वसक्तीमान यहोवा इ सब कहेस।

3 “लखा, मई तू पचन्क बंस मँ जनम लेइवालन क सजा देब। याजक लोगो, तू पचे पवित्त दिनन क मोका बलि भेंट

करत अहा। तू पचे गोबर अउ मरे जनावरन क अंतड़ियन क लेत अहा अउर ओन हीसन क लोकाइ देत अहा। मुला मई ओन गोबर क तू पचन्क चेहरन पइ मलब अउर तू पचे एकरे संग लोकाइ दीन्ह जाब्या। 4तब तू पचे समुझब्या कि तू पचन्क इ आदेस काहे देत हउँ? मई तू पचन्क इ सबइ बातन एह बरे बतावत हउँ कि लेवी क संग मोर वाचा चलत रही।” सर्वसक्तीमान यहोवा इ सब कहेस।

5यहोवा कहेस, “मई इ वाचा लेवी क संग किहेउँ। मई ओका सान्ति स भरि जिन्नगी देइ क प्रतिग्या किहेउँ अउर मई ओका उ दिहेउँ। लेवी मोका सम्मान दिहेस। उ मोरे नाउँ क सम्मान दिहस। 6लेवी सच्ची सिच्छा दिहस। लेवी लबार उपदेस नाहीं दिहस। लेवी ईमानदार अउ सान्ति चाहइवाला मनई रहा। लेवी मोर अनुसरण किहस अउर अनेक मनइयन क पाप करमन स बचाएस। 7याजक क परमेस्सर क उपदेसन क जरूर जानइ चाही। लोगन क याजक क लगे परमेस्सर क उपदेसन सुनइ बरे जाइ क जोगग होइ चाही। याजक क लोगन बरे परमेस्सर क दूत होइ चाही।”

8यहोवा कहेस, “याजक लोगो, तू पचे मोर अनुसरण करब तजि दिहा। तू पचे सिच्छन क उपयोग लोगन स बुरा करम करावइ बरे किहा। तू पचे लेवी क संग कीन्ह गए वाचा क भ्रस्ट किहा।” सर्वसक्तीमान यहोवा इ सब कहेस। 9“काहेकि तू मोरे आदेसन क पालन नाहीं किहे अउर तू लोगन क बिस्सास स मोर नेम क सिच्छा नाहीं दिहेस एह बरे तू पचन्क बिना महत्व क बनाउब। लोग तोहार पचन्क सम्मान नाहीं करिहीं।”

### यहूदा परमेस्सर बरे सच्चा नाहीं रहा

10हम सबइ क एक ही परमेस्सर अहइ। उहइ परमेस्सर हम सबन्क बनाएस। एह बरे लोग आपन भाइयन क ठगत हीं? उ सबइ लोग परगट करत हीं कि उ पचे वाचा क सम्मान नाहीं करतेन। उ पचे उ वाचा क सम्मान नाहीं करतेन जेका हमार पुरखन परमेस्सर क संग किहन। 11यहूदा क लोग दूसर लोगन क ठगेन। यरूसलेम अउ इस्राएल क लोग खउफनाक काम किहन। यहूदा क निवासी लोग यहोवा क पवित्तर मंदिर क सम्मान नाहीं किहन। परमेस्सर उ जगह स पिरेम करत ह। यहूदा क लोग ओन बिदेसी मेहररून स बियाह किहन जउन लबार देवतन क पूजा करत रहिन। 12यहोवा ओन लोगन क यहूदा क परिवार स दूर कइ देइ। उ सबइ लोग यहोवा क लगे भेंट लिआइ सकत हीं, मुला ओहसे कउनो मदद नाहीं मिली। 13तू पचे रोइ सकत ह अउर यहोवा क वेदी क औंसुअन स ढँकि सकत ह, मुला यहोवा तोहार सबन क भेंट अंगीकार नाहीं करी। यहोवा ओन चिजियन स खुस नाहीं होइ, जेनका तू पचे ओकरे लगे लिअउब्या।

14तू पचे पूछत अहा, “हमार भेंटन यहोवा क जरिये अंगीकार काहे नाहीं कीन्ह जातिन?” काहेकि यहोवा तोहरे सबन्क बुरे करमन क लखेस, उ तोहरे सबन्क खिलाफ गवाह अहइ। उ लखेस कि तू पचे आपन पत्नियन बरे अविस्सासी रहा ह। तू पचे उ आपन पत्नी क संग तबहिं स ब्याहा अहा जब स तू पचे जवान भए रहया। उ तोहार

प्रेमिका रही। तब तू पचे आपुस मँ एक दूसर बरे किरिया खाए रहा। अउर उ तोहार पत्नी होइ गइ। मुला तू ओकरे बरे अविस्सासी रहा ह। 15परमेस्सर चाहत ह कि मनसेधू अउ मेहरारू एक बदन अउ एक आतिमा होइ जाईं। काहे? ताकि ओनकर गदेलन पवित्तर होईं। एह बरे उ आध्यात्मिक एकता क रच्छा करा। आपन पत्नी क बिस्सासाघाती जिन बना। उ तोहार पत्नी तब स अहइ जब स तू जवान भवा।

16इस्राएल क परमेस्सर यहोवा कहत ह, “मई बियाह-विच्छेद स घिना करत हउँ। मई मनसेधुअन क क्रूर करमन स घिना करत हउँ। एह बरे आतिमा क एका क सुरच्छा करा। आपन पत्नी का धोखा जिन द्या।”

### निआव क खास समइ

17तू पचे गलत सिच्छा दिहा ह। अउर ओन गलत सिच्छन यहोवा क बहोत दुःखी किहन ह। तू पचे इ सिच्छा दिहा कि परमेस्सर ओनका पसंद करत ह जउन बुरे करम करत हीं। तू पचे कहया कि परमेस्सर ओनका नीक लोग समुझत ह अउर तू पचे इ सिच्छा दिहा कि परमेस्सर लोगन क बुरा करम करइ बरे सजा नाहीं देत।

3 सर्वसक्तीमान यहोवा कहत ह, “लखा, मई आपन दूत पठवत हउँ। उ मोरे बरे मारग तइयार करी। यहोवा जेकरी खोज मँ तू पचे अहा, उ एकाएक आपन मंदिर मँ आइ। वाचा क सँदिसा लेवइया फुरइ आवत बा।

2“कउनो मनई उ समइ बरे तइयारी नाहीं कइ सकत। कउनो मनई ओकरे खिलाफ खड़ा नाहीं होइ सकत, जब उ आइ। उ बरत आगी क नाई होइ। उ बढ़िया रेह क तरह होइ जेका लोग चिजियन क स्वच्छ करइ उपयोग मँ बइपरत हीं। 3उ लेवीबंस क संतानन क पवित्तर करी। उ ओनका अइसे सुद्ध करी जइसे आगी चाँदी क सुद्ध करत ह। उ ओनका सुद्ध सोना अउ चाँदी क समान बनाइ। तब उ पचे यहोवा क भेंट लइहीं अउर उ पचे ओन करमन क ठीक तरिके स करिहीं। 4तब यहोवा यहूदा अउ यरूसलेम मँ भेंटन क अंगीकार करी। इ बीते काल क समान रही। इ पुरान लम्बा समइ क तरह होइ। 5तब मई तोहरे लगे निआव बरे आउब। मई उ गवाह क तरह होब जउन लोगन क जरिये कीन्ह गए बुरे करमन क बारे मँ निआव क जज स कहत ह। कछू लोग बुरा जादू करत हीं। कछू लोग बिभिचार क पाप करत हीं। कछू लोग झूठी प्रतिग्यन करत हीं। कछू लोग आप मजदूरन क उगत हीं। उ पचे आपन वाचा क कीन्ह गइ रकम नाहीं देतेन। कछू लोग विधवा अउरत अउर अनाथन क मदद नाहीं करतेन। कछू लोग बिदेसियन क मदद नाहीं करतेन। कछू लोग मोसे नाहीं डरतेन अउर मोर सम्मान नाहीं करतेन।” सर्वसक्तीमान यहोवा इ सब कहेस।

### परमेस्सर क हिआँ स चोरी

6“मई यहोवा हउँ, अउर मई बदलत नाहीं। तू पचे याकूब क सन्तान अहा। सिरिफ मोर बिस्सासहीनता क कारण तू पचे पूरी तरह स नस्ट नाहीं कीन्ह जात्या। 7मुला तू पचे मोरे नियमन क कबहुँ अनुपालन नाहीं किहया। हिआँ तक कि

तोहार सबन्क पुरखन मोर अनुसरण करब बंद कइ दिहन। मोरे लगे वापस लउटा अउर मई तोहरे पचन्क लगे वापस लउटब।” सर्वसक्तीमान यहोवा इ सब कहेस।

तू पचे कहत अहा, “हम पचे वापिस कइसे लउटि सकित ह?”

8परमेस्सर क लूटब बंद करा। लोगन्क परमेस्सर क चिजियन नाहीं चोरावइ चाही!

मुला तू पचे मोर चिजियन चोराया?

“तू पचन्क मोका आपन चिजियन क दसवाँ हीसा देइ चाही रहा। तू पचन्क मोका खास भेंट देइ चाही रही। मुला तू पचे उ सबइ चिजियन मोका नाहीं दिहा। 9इ तरह तोहार पचन्क समूचा रास्ट्र मोर चिजियन क चोराएस ह। एहसे तू पचन्क समूचा रास्ट्र मोर चिजियन क चोराएस ह। एहसे बुरी सबइ घटना तू पचन्क संग घटति अहई।” सर्वसक्तीमान यहोवा इ सबइ कहत ह।

10सर्वसक्तीमान यहोवा कहत ह, “इ परीच्छा क जाँचा। आपन चिजियन क दसवाँ हीसा मोका लिआवा। ओन चिजियन क खजाने में रखा। मोरे घरे खइया क लिआवा। एहका परखिके तउ लखा। तू पचे अगर ओन करमन क करब्या तउ मई, फुरइ ही, तू पचन्क आसीर्वाद देब। तू पचन्क लगे नीक चिजियन वइसे ही होइ जइहीं जइसे गगन स बर्खा होत ह। तू पचे हर चीज जरूरत स जियादा पउब्या। 11मई कीड़न क तू पचन्क फसलन क नस्ट नाहीं करइ देब। तोहरे पचन्क अंगूरे क सबहिं बेलन अंगूर पइदा करिहीं।” सर्वसक्तीमान यहोवा इ सबइ कहत ह।

12“दूसर रास्ट्रन क लोग तू पचन्क बरे भले रइहीं। तोहार सबन्क देस फुरइ अचरजे स भरा देस होइ।” सर्वसक्तीमान यहोवा इ सबइ कहत ह।

### निआव क खास समइ

13यहोवा कहत ह, “तू पचे मोहसे ओछी बातन कह्या।”

मुला तू पचे पूछत अहा, “हम पचे तोहरे बारे में का कहा?”

14तू पचे कह्या, “यहोवा क उपासना बेकार अहइ। हम पचे उ सबइ करम किहेन जउन यहोवा करइ क कहेस, मुला हम लोगन्क कछू नाहीं मिला। हम पचे आपन पापन बरे वइसे ही दुःखी रहेन जइसे मइयत में रोवत लोग। मुला एहसे कछू काम नाहीं निकरा। 15हम समुझत रहेन कि घमंडी

लोग सुखी रहत हीं। दुस्त लोग सफल होत हीं। उ पचे परमेस्सर क धीरज क परीच्छा करइ बरे बुरे करम करत हीं, अउर परमेस्सर ओनका सजा नाहीं देत।”

16उ लोगन क बीच में जउन ओकरे नाउँ क सम्मान किहेन आपुस में बतियानेन अउर यहोवा ओनका सुनेन। ओकरे समन्वा एक पुस्तक अहइ। उ किताबे म उ लोगन क नाउँ अहइ जउन यहोवा क नाउँ क सम्मान करत हीं।

17यहोवा कहेस, “उ सबइ लोग मोर अहई। मई ओन पइ कृपालु रहब। मनई आपन ओन लरिकन पइ जियादा कृपालु रहत ह जउन ओकर आग्याकारी होत हीं। उहइ तरह मई आपन मनवइयन पइ कृपालु रहब। 18हे लोगो, तू पचे मोरे निअरे वापिस लउटब्या अउर तू पचे नीक लोगन अउ बुरे लोगन क फरक जानब्या। तू पचे परमेस्सर क लोगन अउर दूसर लोगन क बीच क फरक समुझब्या।

4 “निआव क समइ आवत ह। इ गरम भट्ठी जइसा होइ। सबहिं घमण्डी मनई उ समइ सजा पइहीं। उ पचे सबहिं बुरा करम करइवाले लोग सुखी घास क तरह बरिहीं। उ पचे उ पेड़ क जइसा बरत होइहीं, जउन सिखर स ठुँठ तलक बिना कछू छोड़े बारत हीं” सर्वसक्तीमान यहोवा इ सब कहेस।

2“मुला, तू सबइ जउन मोर नाउँ क सम्मान किहेस ह, तू पचन पइ अच्छाई उदय होत भए सूरज क तरह चमकी। इ सूरज क किरणन क तरह तन्दुरुस्ती लिआब्या। तू पचे अइसे ही अजाद अउ खुस होब्या जइसे अपने थान स अजाद भए बछवन। 3तब तू पचे ओन बुरे लोगन्क कुचरि डउब्या, उ पचे तोहरे सबन क गोड़े क नीचे राखी जइसे होइहीं। मई निआव क समइ इ सबइ घटना क घटित कराउब।” सर्वसक्तीमान यहोवा इ सब कहेस।

4“मूसा क व्यवस्था क सुमिरा अउर अनुपालन करा। मूसा मोर सेवक रहा। मई होरेब पर्वते पइ ओन कानूनन अउ नेमन क ओका दिहेउँ। उ सबइ नेम इस्त्राएल क सबहिं लोगन बरे अहई।”

5यहोवा कहेस, “लखा, मई नबी एलिय्याह क तोहरे लगे पठउब। उ यहोवा क हिआँ स उ महान अउ खउफनाक निआव क समइ स पहिले आइ। 6एलिय्याह महतारी-बाप अउर गदेलन क बीच पुनः रिस्ता कायम करी। वरना, मई, परमेस्सर आउब अउर तोहरे सबन क देस क पूरी तरह नस्ट करब।”

# जकर्याह

## यहोवा आपन लोगन क वापसी चाहत ह

1 दारा क राजकाल क दूसर बरिस क अठएँ महीना में, यहोवा क सँदिसा बेरेक्याह क पूत जकर्याह नबी क लगे आवा। बेरेक्याह इद्दो क पूत रहा। सँदिसा इ अहइ:

2 यहोवा तोहरे पुरखन पइ बहोत कोहान रहा। 3 एह बरे लोगन स कहा: इ उहइ अहइ जउन सर्वसक्तीमान यहोवा कहत ह: “मोरे लगे वापस आवा अउर मई तोहार लगे वापस आउबा।” इ उहइ अहइ जउन सर्वसक्तीमान यहोवा कहेस।”

4 यहोवा कहेस, “आपन पुरखन क नाई न बना जेनका बीते भए समई मैं नबी उपदेस दिहेस। उ पचे कहेन, ‘सर्वसक्तीमान यहोवा चाहत ह कि तू पचे आपन बुरा रहन-सहन क तजि द्या। बुरा काम बंद कइ द्या।’ मुला तोहार पचन्क पुरखन मोर नाहीं सुनेन।” यहोवा इ सबइ बातन कहेस।

5 परमेस्सर कहेस, “अब तोहार पचन्क पुरखन कहाँ बाटइ? का नबी हमेसा जिअत रहतेन? 6 नबी मोर सेवक रहेन। मई ओनकर उपयोग तोहरे पचन्क पुरखन क आपन व्यवस्था अउर आपन सिच्छा देइ बरे किहेस। आखिरकार तोहार पुरखन सिच्छा ग्रहण किहेन। उ पचे पश्चाताप किहेन अउर कहेन, ‘सर्वसक्तीमान यहोवा हमार मारग अउ कामन क अनुसार ठीक वइसा ही जइसा उ निर्णय किहे रहा, किहेस ह।’ इ तरह उ पचे परमेस्सर क लगे वापस लउटेन।”

## घोड़न क दर्सन

7 दारा क दूसर बरिस क सबित क ग्यारहनें महीना क चउबीसवें दिन यहोवा क इ सँदिसा बेरेक्याह क पूत जकर्याह नबी क लगे आवा। बेरेक्याह इद्दो क पूत रहा।

8 त मँ मई लखेउँ कि एक मनई लाल घोड़े पइ सवार अहइ। उ एक घाटी मँ कछू मेंहदियन क बृच्छ क बीच खड़ा रहा। ओकरे पाछे लाल, भूरा अउ सफेद रंग क घोड़न रहेन। 9 मई पूछेउँ, “महोदय इ सबइ घोड़न क का मतलब अहई?”

सरगदूत जउन मोहसे बात करत रहा, मोका जवाब दिहेस, “मई तू पचन्क देखौउब कि ओकर का मतलब अहई।” 10 एह बरे मेंहदियन क बृच्छ क बीच रहत भवा मनई जवाब दिहेस, “इ सबइ यहोवा दुआरा पृथ्वी प गस्त लगाइ बरे पठएस ह।”

11 तब उ पचे यहोवा क सरगदूतन जउन मेंहदियन क बृच्छ क बीच खड़ा भवा रहा कहेन, “हम पचे पृथ्वी गस्त लगाइ चुका अहइ। फुरइ समूचा धरती सान्त अउ सुख-चैन मँ अहइ।”

12 तब यहोवा क सरगदूत कहेस, “हे सर्वसक्तीमान यहोवा, आप यरूसलेम अउ यहूदा क सहरन पइ केतेना दिना तलक दया नाहीं करब जेकर संग तू सतर बरिस तलक किरोधित रहा ह।”

13 तब यहोवा नीक अउ सान्तिदायक सब्दन स उ सरगदूत क जवाब दिहेस जउन मोसे बात करत रहा। 14 एह बरे सरगदूत जउन मोसे बाप करत रहा मोसे कहेस, “इ घोसणा करा:

“सर्वसक्तीमान यहोवा इ कहत ह: मई यरूसलेम अउ सिथ्योन स बहोत जलन अहइ।

15 अउर मई ओन रास्टन पइ बहोतइ कोहान हउँ जउन आपन क ऐतना सुरच्छित अनुभव करत हीं। हालाँकि मई कछू कोहाइ गवा हउँ, ओकर जगह उ सबइ रास्ट तोड़ा जियादा झेलस ह।”

16 इसलिए, यहोवा इ तरह कहत ह: “मई दया क संग यरूसलेम मँ लउटबा।” सर्वसक्तीमान यहोवा कहत ह, “यरूसलेम क निर्माण फुन होइ। अउर हुआँ मोर मन्दिर स्थापित होइ।”

17 सरगदूत कहेस, “लोगन स इ भी कहा: सर्वसक्तीमान यहोवा कहत ह, ‘मोर सहर फुन संपन्न होइहीं, मई सिथ्योन क आराम देब। मई यरूसलेम क आपन खास नगर चुनबा।”

## सींगन क दर्सन

18 तब मई ऊपर नजर उठाएँ अउर चार सींगन क दिखेउँ। 19 तब मई उ सरगदूत पूछेस कउनो मोसे बातन करत रहा, “इ सींगन क अरथ का अहइ?”

उ जवाब दिहेस, “इ सबइ उ सब सींगन अहई, जउन इम्राएल, यहूदा अउ यरूसलेम क लोगन क रास्टन क बीच छितराइ दीन्ह गवा ह।

20 तब यहोवा मोका चार सिल्पकारन क देखौएस। 21 मई ओनसे पूछेउँ, “इ सबइ का करइ बरे आवत अहई?”

उ जवाब दिहेस, “सींगन यहूदा क अइसा तितर-बितर कइ दिहे रहा कि कउनो आपन सिर न उठाइ सकी। परन्तु कारिगर ओका आतंकित करइ बरे अउ ओन जातियन क सींगन क काटन बरे आव ह जउन यहूदा लोगन देस क विरुद्ध आपन सींगन एह बरे उठाएस ह कि उ तितर-बितर हो जाइ।”

## यरूसलेम क मापइ क दर्सन

2 तब मई आपन निगाह उठाएँ अउर मई एक मनई क लखेउँ, अउ उ आपन हाथ मँ नापइ क डोरी लिए भए रहेन। 2 तउ मई पूछेउँ, “तू कहाँ जात अहा?”

उ मोकल कवल बरदहस, “मई यरूसलेम क नलड बरे कलत हउँ कल उ केरुँनल लम्बल अउ केरुँनल कउडल बलटइ।”

3तब उ सरगदूत कउन मोसे बलतन करत रहल, कल गवल अउर ओसे बलतन करइ बरे दूसर सरगदूत बलहेर आवत रहल। 4उ ओसे कहस, “दउडुके कल, नउकवलन स बलत करल। अउर ओसे कलल यरूसलेम ऐँतनल बलसलल बलटइ कल ओकल नलल नलहलँ कलइ सकत। ओसे इ कलल,

‘यरूसलेम बगैर कललरदलवलरी क सहर क नलई नलवलस करी कलहेकल हुओँ असंख्य ललग अउर कनलवर रइहलँ।’

5यहोवल कहत ह, ‘एकर कलल गलल पइ मईँ खुद ओकर कलरलहुँ कइँती आगी क देवल रहब, अउ मईँ ओकरे बलक मँ गौरव रहब।’”

### परमेस्सर आपन लोगन क घरे बोलवलत ह

6यहोवल कहत ह, “उठल! उठल! उतर भूँईयल स दउड कल। कलहेकल मईँ तू पकनक कलरलहुँ कइँती बलखेरेउँ।

7सलथुन क ललगो, तू पके बलबुल मँ बन्दी रहयल। मुलल अब परइ नलकरल। उ सहर स परइ कल।” कलहेकल सरुवसकुतीमलन यहोवल कहत ह (इ महलमल क मोकल पठइ क पलछे) उ रलसुन क बलरे मँ कउन तोहकल लूटेस ह।

8उ तू पकनक प्रतलसुठल देइ क मोकल पठस ह।” मुलल ओकरे पलछे, यहोवल मोकल ओनके खललफ पठइ। कलहेकल अगल उ पके तू पकनक कलओत पहलँकइहलँ तउ तउ यहोवल क ओँखी क पुतरी क कलओत पहलँकलवइ क होइ। ओन रलसुन आपन सलमनन पलएन।

9कलहेकल फुरइ मईँ ओन ललगनक खललफ आपन हलथ उठलउब अउर उ पके आपन दलस लूट लेइ कलइहलँ। तब तू पके कलन कलबुयल कल सरुवसकुतीमलन यहोवल मोकल पठस ह।”

10यहोवल कहत ह, “सलथुन, प्रसन्न हवल। कलहेकल मईँ आवतल हउँ अउर मईँ तोहेरे सहर मँ रहब।

11उ सलमइ अनेक रलसुन क ललग यहोवल क लगे अइहलँ। उ पके मोर ललग होइहलँ। कलनु सलथुन, मईँ तोहलर बलक रहब।” तउ तू पके कलन कलबुयल कल कउन मोकल तोहमँ पठस ह सरुवसकुतीमलन यहोवल अहइ।

12यहोवल यहूदल क पवलतर भूँईयल मँ आपन नलवलसी बनलउब। अउर उ फुन दोबलरल यरूसलेम क कुनब।

13हे सब प्रलणलन, यहोवल क सलनवल कलपु रहल। कलहेकल उ आपन पवलतर नलसवलस सुथलन स कललकर नलकललेस ह।

### महलकलक क बलरे मँ दरुन

3 तब उ मोकल महलकलक यहोसू क दरुखलल। उ यहोवल क सरगदूत क सलनवल खडु भवल रहल। सइतलन हुओँ यहोसू क कलरलये कीन्ह गल बुरे करमन बरे दोख देइ बरे ओकर दरुहलनल कइँती खडु रहल। 2तब यहोवल क सरगदूत कहस, “सइतलन, यहोवल तोहकल फटकरइ। यहोवल कउन यरूसलेम क कुने रहल, तोहकल फटकरइ। कल इ मनई आगी स नलकरल भवल बरत कलठे क नलई नलहलँ बलटइ?”\*

कल...बलटइ यहूसू हलओँ यहूदी कललवलतन क प्रसुत करत ह केकल (बलरत कलठे क नलई आगी स नलकरल गवल रहल) उदुदेस क पूरल करइ बरे कवलवल गवल रहल परमेस्सर क।

3यहोसू सरगदूत क सलनवल खडु रहल अउर ओकरे ओदुनन गनुदल रहेन। 4तब आपन नलरुे खडुे भल दूसर सरगदूतन स सरगदूत कहस, “यहोसू स गनुदल ओदुनन क उतलरल लुयल।” तब सरगदूत यहोसू स बलतन कलहेस। उ कहस, “मईँ तोहेरे अलपरधन क कुरलर ललहेउँ ह अउर मईँ तोहकल नवल ओदुनल देइउँ ह।”

5तब उ कहस, “ओकरे मुँडी पइ एक तु सलफ पगडी रखइ दुयल।” यह बरे कब यहोवल क सरगदूत हुवलँ खडु रहल, उ पके एक तु सलफ पगडी ओकरे मुँडी पइ रखस अउर उ पके ओकल नवल ओदुनल पहलरलएन। 6तब यहोवल क सरगदूत यहोसू स अधलकर क संग कहेन:

7इ उहइ अहइ कउन सरुवसकुतीमलन यहोवल कहत ह: “अगल तू मोर अदुसन क पललन करबुयल अउर ओन बलतन क करबुयल केकल मईँ अदुस दरुहेउँ ह, तउ तू मोर घरे पइ सलसन करबुयल अउर तू मोर मनुदर क ओँगन क अधलकलरी होबुयल। अउर मईँ तोहकल ओन ललगोन मँ आवइ-कलवइ देबुयल कउन हलओँ खडु अहइ।

8हे महलकलक यहोसू सुनल! तू अउर तोहकल मीतन कउन तोहलर सलनवल बइठल अहइ इ बलत क प्रतीक अहइ कल इ सबइ बलत होबुयल! सक ही, मईँ आपन सेवक क लइ आउब कउन “सलख” कलल कलत ह।

9उ पलथर हलओँ अहइ केकल मँ यहोसू क सलनवल रलखेउँ। इ पलथर मँ सलत ओँखन अहइ। मईँ एह पईँ एक लेख खलदब। एक दरुनल मईँ ओह भूँईयल प स पलपन क खतुम करब” सरुवसकुतीमलन यहोवल इ सब कहत ह।

10सरुवसकुतीमलन यहोवल कहत ह, “उ दरुनल तोहमँ स प्रलयेक आपन पडुसलन क आपन दलख-लतल अउर अंकीर क बृकुक क नीके आमंनरलत करबुयल।”

### दुीपलथर अउ दुइ कइतून क बृकुक

4 तब ओकर पलछे कउन सरगदूत मोहसे बलतन करत रहल, वलपलस आस अउर मोकल कलललस। मोकल अइसल ललग कइसल कउनो क नीड कललल कलत ह। 2उ मोसे पूछेस, “तू कल लखत अहल?”

मईँ कवलब दरुहेउँ, “मईँ एक तु ठुस सुनल क डलबट लखत हउँ। हुवलँ ओकरे सलरे पइ एक तु पलललल अहइ। पललले मँ स सलत तु दुीपक अहइ। इ सबइ दुीपक डलबट पइ अहइ अउर उ सबइ नलली क कुडल भवल अहइ।” 3अउर दुइ कइतून क पेइ पलललल क पीछे मँ अहइ एक तु पलललल दलहलने तरफ अउर दूसरल पललले क बलये तरफ अहइ।” 4तब मईँ, उ सरगदूत स कउन पूछेस कउन तोह स बलतन करत रहल, “महलदय, एन सबनक अरथ कल अहइ?”

5तब सरगदूत कउन मोहसे बलतन करत रहल कवलब दरुहेस, “कल तू नलहलँ कलनतुयल कल इ सबइ कलकलन कल अहइ?”

मईँ कहेउँ, “नलहलँ, महलदय।”

6तब उ मोहसे कहस, “इ यहोवल क सँदुसल कलरुबुबलबल बरे बलटइ: ‘तोहरी सकुती अउ प्रभुतल स मदद नलहलँ कलली। वरनल तोहकल मदद मोरी आतलमल स कलली।’ सरुवसकुतीमलन यहोवल इ सब कहत ह। 7उ ऊँकके महलन पर्वत, तू कल अहइ? कलरुबुबलबल सलनवल तू एक सलतल भुईँयल क नलई

अहइ। उ मंदिर क बनाई। जब आखिरी पाथर इ पइ रखा जाइ तब लोग नरियाइ उठिहीं, 'वाह केतौना सुन्नर, वाह बहोत सुन्नर!'"

8तउ यहोवा वचन मोर लगे आवा, 9"जरूबबाल क हाथन इ मंदिर क नीव पाथर राखब्या अउ ओकर हाथन इ मन्दिर क पूरा करब्या। हे लोगो तब तू पचे समुझब्या कि सर्वसक्तीमान यहोवा मोका तू लोगन क लगे पठएस ह। 10जउन कउनो भी जउन उ दिन क मजाक उड़ावत ह जब छोटे स्तर पइ निर्माणकारी कार्य सुरू कीन्ह गवा रहा तउ जब उ पचे जरूबबाल क हाथ मँ समारोह क पाथर जउन कि अन्तिम पाथर होइ तउ आन्दि होइ। इ सात दीपक यहोवा क आँख अहइ। सचमुच भुईया पइ खोजइ बरे उ पचे आगे पीछे फिरत।"

11तब मई ओहसे कहेउँ, "इ दुइ ठु जइतून क बृच्छ अहई। एक दीपाधार क दाई अउर एक बाई कईती अहइ। इ सबइ का अहई?" 12मई ओहसे इ भी कहेउँ, "मई जइतून क दुइनउँ साखा सोने क रंग क तेल लइ जात, सोना क नलन क सहारे लखेउँ। एन चिजियन क अरथ का अहइ?"

13तब सरगदूत मोसे कहेस, "का तू नाहीं जानत्या कि एन चिजियन क अरथ का अरथ का बा?"

मई कहेउँ, "नाहीं महोदय।"

14एह बरे उ जवाब दिहेस, "इ दुइ अभिसिक्त कीन्ह भवा मनई क प्रस्तुत करत ह जउन कि समूचइ धरती क सुआमी क बगल मँ खड़ा अहइ।"

### उड़त भवा गोल लपटा पत्रक

5 मई फुन निगाह ऊँच कियेउँ अउर मई एक ठु उड़त भवा लपटा पत्रक लखेउँ। 2सरगदूत मोहसे पूछेस, "तू का लखत अहा?" मई जवाब दिहेउँ, "मई एक ठु उड़त भवा लपटा पत्रक लखत हउँ जउन तीस फुट लम्बा अउ पन्द्रह फुट चउड़ा अहइ।"

3तबइ उ मोहसे कहेस, "उ लपटा पत्रक पइ एक सराप लिखा बा जउन पूरा धरती पइ फेंलिहीं। लपटा पत्रक क एक कोना मँ लिखा अहइ, 'हर कउनो जउन चोर अहइ भेज दीन्ह जाब्या।' दूसर कईती लिखा भवा अहइ, हर कउनो जउन लबार प्रतिग्या करिही भेज दीन्ह जाब्या। 4सर्वसक्तीमान यहोवा कहत ह, मई इ सराप भेजेउँ ह। इ मोर नाउँ लेइके हर चोरन क घरे अउर ओन लोगन क घरे जउन गलत प्रतिग्या करत ह, घुसबा। इ सराप ओकरे घरे मँ रहब अउर ओकरे घरे क पाथर अउ काठ दुइनउँ क बरबाद करब।"

### मेहरारू अउ टोकरी

5तब मोर संग बात करइवाला सरगदूत बाहेर आवा। उ मोहसे कहेस, "नज़र उठा अउ लखा। का तू जानत ह कि हमार कईती का अवात ह?"

6मई कहेउँ, "इ का अहइ?"

उ कहेस, "उ मापक टोकरी अहइ।" तउ उ कहेस, "उ टोकरी समुचइ धरती क दोख क प्रस्तुत करब।"

7तब टोकरी क ढकना जउन सीसा बना रहा उठावा

गवा, अउर हुवाँ टोकरी क भितरे एक मेहरारू बइठी रहा। 8अउर उ कहेस, "इ मेहरारू बुराई प्रस्तुत करत अहइ।" एह बरे उ ओका टोकरी मँ धकेल दिहस अउ सीसा क ढकना स ओकरे मुँहे बन्द कइ दिहस। 9तब मई नज़र उठाएस अउ लखेस कि दुइ मेहरारूअन हमार कईती अवात हीं। उ सास क नाई पखना रखत रहा। उ पचे आपन पखनन क हवा क पड़करइ बरे फइलाएस। उ पचे टोकरी क लिए भए हवा मँ उड़त रहिन। 10तब मई सरगदूत स पूछेउँ कि कउन मोसा बात किहे रहेन, "उ पचे टोकरी क कहीं लइ जात अहई?"

11उ मोहसे कहेस, "उ सबइ एका सिनार मँ लइ जात ह। हुवाँ उ पचे एक ठु घर बनाब। जब घर तइयार होइ जाइ, तउ उ पचे उ टोकरी क ओकरे जगह पइ धरिहीं।"

### चार ठु रथ

6 तब फुन मई घूमाएउँ अउ आपन निगाह क उठाएउँ अउर मई चार रथन क लखेउँ। उ सबइ काँसे क दुई ठु पर्वतन क बीच स निकरत रही। 2प्रथम रथ क लाल घोड़न हींचत रहेन। दूसर रथ क करिया घोड़न हींचत रहेन। 3तीसर रथे क उज्जर घोड़न हींचत रहेन। 4तब मई सरगदूत स पूछेउँ कि कउन मोस बात किहेस, "महोदय, एन चिजियन क तात्पर्य का अहइ?"

5सरगदूत कहेस, "इ सबइ चारिहुँ दिसा क हवा क प्रतीक अहई। उ सबइ सबहिँ सारे संसार क सुआमी क हिआँ स आएन हैं। 6करिया घोड़न उत्तर कईती जइहीं। लाल घोड़न पूरब कईती जइहीं। उज्जर घोड़न पच्छिम क जइहीं अउर भोरा धब्बादार घोड़न दक्खिन क जइहीं।"

7तब ताकतवर घोड़न बाहेर आएन। उ सबइ पृथ्वी क गस्त लगाइ बरे उत्सुक रहेन। एह बरे उ ओनसे कहेस, "जा, पृथ्वी क गस्त लगावा!" एह बरे, उ पचे पृथ्वी क गस्त किहेन।

8तब उ जोर स गोहरात भए कहेस, "लखा, उ सबइ जउन उत्तर कईती जात रहेन। उ सबइ उत्तर कईती मँ मोर आत्मा क सान्त कइ दिहन।"

### याजक यहोसू एक ठु मुकुट पावत ह

9अउर यहोवा क बचन मोर लगे आएस, उ कहेस: 10"ओन लोगन स चाँदी अउर सोना ल्या जेनका बन्दी बना गवा अहइ। हेल्दै, तोबियाह अउर यदायाह स ल्या जउन बालेल स आवा रहा। अउर उहइ दिन सपन्याह क पूत योसियाह क घर जा। 11सोना अउर चाँदी ल्या अउर एक ठु मुकुट बनावा। अउर उ मुकुट क यहोसादाक क पूत महा याजक यहोसू क मूँडे पइ राखा।

12अउर तू ओसा कहा, इ उहइ अहइ जउन सर्वसक्तीमान यहोवा कहत ह: हिआँ एक मनई अहइ जेकर नाउँ "साख" अहइ। ओका साख कहा गवा काहेकि उ हुवाँ स जहाँ उ अहइ साखा निकारब अउर यहोवा क एक मन्दिर बनाई।

13उ उहइ अहइ जउन यहोवा क मन्दिर क बनाई अउर उ उहइ अहइ जउन सम्मान पाई। उ आपन राजसिंहासन पइ बइठी, अउ सासन करिहीं। अउर हुवाँ ओकरे सिंहासन क

बगल में एक तु याजक होइ अउर इ दुइनउँ मनई एक संग सदभावना क साथ काम करिहीं।

14“उ मुकुट यहोवा क मन्दिर हेल्दै, तोबिय्याह, यदायाह अउ सपन्याह क पूत योसियाह बरे स्मृति चिन्ह होइ। 15लोग जउन दूर रहिहीं यहोवा क मन्दिर क निर्माण करइ बरे आइहीं। तउ तू पचे समुझब्या कि सर्वसक्तीमान यहोवा मोका तू लोगन क लगे पठएस ह। इ सब कछू घटित होइ जदि तू पचे यहोवा आपन परमेस्सर क ठीक तरह स पालन करब्या।”

### यहोवा दया अउ करुणा चाहत ह

7 फारस में दारा क राजकाल क चउथे बरिस, जकर्याह क यहोवा क एक सँदिसा मिला। इ नउवें महीना अर्थात् किस्लव क चउथा दिन रहा। 2बेतेल क लोग सेसेर, रेगेम्लेक अउ आपन साथियन क यहोवा स एक तु सवाल पूछइ क पठएस। 3उ पचे यहोवा क मंदिर में नबियन अउ याजकन क लगे गएन। ओन लोग ओनसे इ सवाल पूछेन: “हम लोग कई बरिस तलक मंदिर क नेस्त नाबूद होइ क सोक मनाए अही। हर बरिस क पाँचवें महीना में, रोवइ अउर उपवास रखइ क हम लोगन क खास समइ रहा। का हमका एका करत रहइ चाही?”

4तब सर्वसक्तीमान यहोवा क इ बचन मोह पइ आएस अउ कहेस: 5“याजकन अउ इ देस क अन्य लोगन स इ कहा: जउन उपवास अउर सोक पाछे क सत्तर बरिस स बरिस क पाँचवें अउ सातवें महीना में तू पचे करत आवत अहा का उ उपवास, सच ही, मोरे बरे रहा? नाहीं। 6अउर जब तू पचे खाया अउ पिया, आपन बरे जिन खाया अउ पिया रहा। 7का इ उहइ बचन नाहीं अहइ जेका यहोवा आपन पहिले क नबियन दुआरा उ समइ घोसना किहे रहेन जब यरूसलेम आबाद रहा, अउर अपन चरिहूँ कईती क नगरन सहित समृद्ध रहा, अउर जब नेगव सकेला अर्थात् नीचे क देस भी आबाद रहा?”

8जब यहवा बचन जकर्याह आवा अउ कहा:

9इ उहइ अहइ जउन सर्वसक्तीमान यहोवा कहत ह: ‘जब तू निआव करी सही फइसला देइ। एक दूसर बरे दयालु अउ करुणा दिखावा। 10रौंइ अउरतन, अनाथन, बिसेसियन या दीन लोगन पइ अत्याचार जिन करा। एक दूसर क बुरा करइ क विचार भी हिरदइ में न आवइ द्या।”

11मुला उ पचे अनसुनी किहेन। उ पचे बिद्रोह किहेन अउ आपन पीठ घुमाइ दिहेन। उ पचे सुनइ स आपन कान बंद कइ लिहेन।

12उ पचे बड़का हठी रहेन। उ पचे परमेस्सर क व्यवस्था क पालन करब नामंजूर कइ दिहन। आपन आत्मा क सक्ती स यहोवा नबियन क जरिये आपन लोगन क सँदिसा पठएस। मुला लोग ओका नाहीं सुनेन, एह बरे सर्वसक्तीमान यहोवा नबियन क जरिये आपन लोगन क सँदिसा पठएस। मुला लोग ओकर नाहीं सुनेन, एह बरे सर्वसक्तीमान यहोवा बहोत कोहाइ गवा। 13जब ओनका पुकारेउँ उ पचे नाहीं सुनेन। एह बरे ठीक इसी तरह मई भी ओनका नाहीं सुनब जब उ मोका पुकारब्या।” यहोवा सर्वसक्तीमान परमेस्सर इ कहत ह।

14तब मई ओनका जातियन क बीच तितर-बितर कइ दिहेस। उ पचे जेकर बारे में नाहीं जानतेन। ओकर अनुपस्थिति में भुईया क अइसा उजाड़ दीन्ह ग रहा, ताकि न कउनो आ सकतेन अउर न ही कउनो जा सकतेन। उ पचे इ सुहावना देस घटिया भुईया बनाइ दिहेन।”

### यहोवा यरूसलेम क आसीबाद देइ क प्रतिग्या करत

8 फुन सर्वसक्तीमान यहोवा क बचन मोर लगे आएन अउ कहेन: 2इ उहइ अहइ जउन सर्वसक्तीमान यहोवा कहत ह: “सिय्योन बरे मोका अत्यधिक जलन भवा। मई ओहसे बहोत जियादा जलन करत हउँ।” 3इ उहइ अहइ जउन यहोवा कहत ह: “मई सिय्योन क लगे वापस आवत हउँ अउर मई यरूसलेम में रहबउँ। यरूसलेम बिस्सास सहर कहा जाइ। मोर पर्वत, पवितर पर्वत कहा जाइ।”

4इ उहइ अहइ जउन सर्वसक्तीमान यहोवा कहत ह: “एक बार फुन एक बूढ़ मनसेधु अउर एक बूढ़ा मेहरारू यरूसलेम क चौराहे पइ बइठब। लोग एँतनी लम्बी उमर तलक जिअत रइहीं कि ओनके सहारे क छड़ी क जरूरत होइ। 5सहर क चौराहे लरिकन अउ लड़िकियन स भरा होइ। 6इ उहइ अहइ जउन यहोवा सर्वसक्तीमान कहत ह: ‘भले ही इ जिअत लोगन क नज़र में असम्भव लगे, का एका मोर नज़र में भी असम्भव लगइ चाही? यहोवा सर्वसक्तीमान कहत ह।

7इ उहइ अहइ जउन सर्वसक्तीमान यहोवा कहत ह, “लखा, मई पूरब अउ पच्छिम क देसन स आपन लोगन क बचाउब, 8अउर मई ओनका यरूसलेम में रहइ बरे लिआउब। उ पचे मोर लोग होइहीं अउर मई ओनकर बढ़िया अउ बिस्सास क जोगग परमेस्सर होबउँ।”

9सर्वसक्तीमान यहोवा कहत ह, “उ जउन इ सबदन क नबी क मुँहे स सुन्या ह, सक्तीसाली बना! तू पचे उ नबियन स सुने रहा जउन जब सर्वसक्तीमान यहोवा आपन मंदिर क फुन स बनावइ बरे नेवँ डाएस। इ मन्दिर सर्वसक्तीमान यहोवा क अहइ। 10अउर उ समइ क पहिले, हुवाँ लोगन क या जानवर क किराया पइ लेइ बरे धन नाहीं रहा। हुवाँ दुस्मनन क कारण आवागमन सुरिच्छित नाहीं रहा। कहेकि उ मई रहा जउन एक दूसरे क खिलाफ कइ दिहे रहेउँ। 11मुला अब मई वइसा नाहीं करब जइसा इ बचा भवा लोगन क संग बीते दिना में किहे रहेउँ ह,” सर्वसक्तीमान यहोवा इ सबइ कहेस ह।

12“कहेकि हुवाँ सान्तिपूर्वक खेती-बारी होइहीं। अंगूरे क लता फल देइहीं: भुईया अच्छी पइदावार देइ, अउ अकास आपन ओस देइहीं। मई इ सबहिं चिजियन लोगन क देब जउन जिअत रहब। 13हे यरूसलेम अउ यहूदा लोग, मई तोहका बचाउब। बीते समइ में तू लोग जातियन क बीच में सराप क उदाहरण बनि ग रहेन। मुला अब मई तू लोगन क जातियन क बीच में आसीबाद क उदाहरण बाउब। जिन डेरअ। सक्तीसाली बना।”

14फुरइ इ उहइ अहइ जउन सर्वसक्तीमान यहोवा कहत ह: “जब तू सबन क पुरखन मोका कोहाइ दिहन, मई ओन पइ विपत्तियन लावइ क जोजना बनाएउँ, अउर मई आपन



इराव क न बदलेउँ।” सर्वसक्तीमान यहोवा इ सब कहत ह, 15“ठीक उहइ तरह, अब मई यरूसलेम अउ यहूदा क लोगन बरे नीक करइ क योजना किहेउँ ह। जिन डेरा। 16मुला तू सबन क इ करइ चाही, “एक दूसर क संग तोहका सिरफ फुरइ बोलइ चाही: जब तू पचे आपन अदालतन में निर्णय ल्या, तउ लोगन क उचित निआव प्रदान करा। 17अपन हिरदइ में दूसर बरे बुरा योजना जिन बनावा अउर लबार प्रतिग्या जिन करा। काहेकि मई ओन बातन स घिना करत हउँ।” यहोवा इ सबइ कहेस।

18सर्वसक्तीमान यहोवा क इ सँदेसा मोर लगे फुन आपन अउर कहेन: 19इ उहइ अहइ जउन सर्वसक्तीमान यहोवा कहत ह: “चउथे महीना पचाँए महीना सतएँ महीना में तोहार सोक मनावइ अउर उपवास क दिन यहूदा क लोगन बरे गावइ, अनन्द मनाइ, अउ खुस होइ क होइ। एह बरे तू पचन्क सच्चाई क अउ सान्ति क पिरम करइ चाही।”

20इ उहइ अहइ जउन सर्वसक्तीमान यहोवा कहत ह: “भविस्स में, जातियन अउ अनेक सहरन स लोग यरूसलेम अइहीं 21अउर एक सहर क निवासी दूसर सहर क निवासियन लगे जाइहीं, अउर कइहीं, ‘हम लोगन क सर्वसक्तीमान यहोवा क लगे परार्थना करइ बरे अउर ओहसे मदद माँगइ बरे अउर ओकर उपासना करइ बरे चलइ चाही। दूसर मनई कहिहीं मई भी आउब।”

22अनेक लोग अउ अनेक सक्तीसाली रास्ट्र यरूसलेम आहहीं अउ सर्वसक्तीमान यहोवा क उपासना करिहीं अउ उ पचे ओसे मदद मागिहीं। 23इ उहइ अहइ जउन सर्वसक्तीमान यहोवा कहत ह: “उ दिना में, अलग अलग रास्ट्रन स अलग-अलग भाखन क बोलइया दस तु मनई एक तु यहूदी क कोट क पल्ला धरिहीं अउर कइहीं, ‘हम पचे तोहार संग आवइ चाहत हउँ, काहेकि हम पचे सुना ह कि परमेस्सर तू पचन्क संग अहइ।”

### दूसर रास्ट्रन क संग निआव

9 एक तु भविस्सबाणी: यहोवा क सँदेसा हद्राक क देस अउ ओकर राजधानी दमिस्क क खिलाफ अहइ। इ सँदेसा इ बिदेसी देस क बारे में दीन्ह ग रहा। “काहेकि न सिरफ इस्त्राएल क परिवार समूह बल्कि सबइ मानव जाति यहोवा क मदद बरे ओकरी कइँती लखत अहइँ। 2इ भविस्सबाणी भी हामात क खिलाफ अहइ जउन हद्राक क चउहद्दी में अहइ। इ भविस्सबाणी सोर तथा सीदेन क भी खिलाफ अहइँ भले ही उ बहोत बुद्धिमान अहइँ। 3सोर एक तु किला क नाई बना अहइ। हुआँ क लोग चाँदी ऐँतना बटोर लिहे अहइँ, कि उ धूलि क नाई सुलभ बाटइ अउर सोना ऐँतना साधारण अहइ जइसे माटी। 4मुला अब यहोवा ओकरे सबइ अधिकार क लेइ बरे जात ह। उ पचे ओकर सक्तीसाली नौसेना क नस्ट करी अउर उ सहर आगी स नस्ट होइ जाइ।

5“अस्कलोन में रहइवाले लोग इ सबइ घटना क लखिहीं अउ उ पचे डेरइहीं। अज्जा क लोग काँप उठिहीं अउ एक्रोन क लोग समूची आसा क तजि देइहीं, जब उ पचे

ओन घटनन क होब होत लखिहीं। अज्जा में कउनो राजा बचा नाहीं रही। कउनो भी मनई अब अस्कलोन में नाहीं रही। 6अस्वाद में बहोत सारा लोग इ भी नाहीं जानिहीं कि ओनकर पिता कउन अहइँ, अउ मई पलिस्ती लोगन घमण्ड क हटाइ देब। 7मई उ पचन्क मुँह स उ पचन्क गोस क लइ लेब जेहमाँ खून अहइ; मई उ पचन्क क उ घृणित भोजन क लइ लेब जउन ओकर दाँतन क बीच होइ। सबइ जिअत बचा भवा प्राणियन मोर परमेस्सर स सम्बन्धित होइ। तउ उ यहूदा क बंसज क नाई होइ जाब्या, अउर एक्रोन क लोग यबूसी लोग क जइसा होइ जाइ। 8मई आपन मन्दिर पइ सिबिर लगाउब। मई ओकर रच्छा सिपाही ह रूप में ओन लोगन स करब जउन आइ अउर हमला करइ बरे जाइ। कउनो अत्याचारी मोर लोगन क खिलाफ अउर नाहीं बढ़ सकब, काहेकि मई ओका निहारत हउँ।”

### भविस्स क राजा

9हे बिटिया सिथ्योन, खुश हवा! हे बिटिया यरूसलेम, आनन्द क चिल्लावा! लखा, तोहार राजा तोहरे लगे आवत बाटइ। उ विजय पावइवाला नीक अहइ। उ विनम्र स गदहा पइ, एक तु गदहा क बच्चा पइ सवार अहइ।

10राजा कहत ह, “मई एप्रैम में रथन क अउ यरूसलेम में घुड़सवारन क बर्बाद किहेउँ। मई जुद्ध में प्रयोग कीन्ह गए धनुसन क नस्ट किहेउँ।” दूसर रास्ट्र सान्ति - सन्धि क बातन सुनेन। उ राजा सागर स सागर तलक राज्ज करी। उ नदी स लइके पृथ्वी क दूरतम जगहियन पइ राज्ज करी।

### यहोवा आपन लोगन क रच्छा करी

11यरूसलेम हम आपन वाचा क खून स मूरबन्द किहेउँ। एह बरे मई तोहरे पचन्क बन्दियन क अजाद कइ दिहेउँ, तोहार लोग अब सूनी जेल में अब नाहीं रहि गएन।

12बन्दियो, अपने घरे जा। अब तोहरे लगे आसा करइ बरे कछू अहइ। अजु मई तू पचन्क दुई गुणा आसीर्बाद देब।

13यहूदा, मई तोहार पचन्क उपयोग एक धनुस-जइसा करब। एप्रैम मई पचन्क उपयोग बाणन जइसा करब। इस्त्राएल, मई तोहार पचन्क उपयोग यूनान स लइइ बरे मजबूत तरवार जइसा करब।

14यहोवा ओह पइ परगट होइ, अउर ओकर बाण बिजुली की तरह चलाई। यहोवा, मोर सुआमी तुरही बजाई। फउज मरुभूमि क तूफान क नाई आगे बढ़ी।

15सर्वसक्तीमान यहोवा ओनकर रच्छा करी। फउजी पाथर अउ गुल्ले क उपयोग दुस्मन क हरावइ में करिहीं। उ पचे आपन दुस्मनन क खून बहइहीं, उ दाखरस जइसा बही। इ वेदी क कोनन पइ फेंके गए खून जइसा होइ।

16उ समइ, ओनकर परमेस्सर यहोवा आपन लोगन क वइसेन ही बचाइ, जइसे गइरिया भेड़िन क बचावत ह। उ पचे ओकरे बरे बहोत मूल्यवान होइहीं। उ पचे ओनके हाथन में जगमगात रतन स होइहीं।

17हर एक चीज नीक अउ सुन्नर होइ। हुआँ अदभुत फसल होइ, मुला हुआँ केवल अन्न अउ दाखरस नाहीं होइ। हुआँ युवक अउ युवतियन होइहीं।

### यहोवा क प्रतिग्यन

**10** बसन्त ऋतु में यहोवा स बरखा बरे पराथना करा। यहोवा बिजुरी पठइ अउ बरखा होइ। उ हर एक मनई क खेते में अनाजन उगाइ।

२मूर्तियन स प्राप्त कीन्ह गवा सँदिस बेकार अहइ जादूगर लबार दर्सन रखत हीं; सपन दर्सी व्यर्थ बात करत हीं; उ पचे कउनो एक क भी आराम नाहीं पहेंचाइ सकत। एह बरे परमेस्सर क लोग भेड़िन क तरह एहर-ओहर भटकत अहइँ अउर ओनका राह देखावइवाला कउनो गइरिया नाहीं।

३यहोवा कहत ह, “मईँ गइरियन (प्रमुखन) पइ बहोत कोहान अहउँ। मईँ ओन प्रमुखन क आपन भेड़िन क (लोगन) देखरेख क जिम्मेदारी सौपे रहेउँ।” यहूदा क लोग परमेस्सर क खरका अहइँ अउर सर्वसक्तीमान यहोवा, फुरइ, आपन खरका क देखरेख करत ह। उ ओनकर अइसी देखरेख करत ह, जइसे कउनो फउजी आपन घोड़ा क रखत ह।

४“कोने क पाथर, डेरा क खूँटी, युद्ध क धनुस अउ अगवा बाढ़त फउजी सबहिं यहूदा स एक संग अइहीं। ५जुद्ध में उ पचे जोद्धन क समान होइ जउन दुस्मनन क गलियन क कीच में रौंद देत हीं। उ पचे युद्ध करिहीं, अउर यहोवा ओनके संग अहइ। एह बरे उ पचे घोड़सवान क भी हरइहीं। ६मईँ यहूदा क लोगन क सक्तीसाली बनाउब अउ मईँ यूसुफ क लोगन क रच्छा करब। मईँ ओनका वापिस लइ आउब काहेकि मईँ ओह पइ दया महसूस करत हउँ। मईँ ओकर संग अइसा बेउहार करब जइसा कि मईँ कभी ओका नाहीं तजेउँ ह। काहेकि मईँ यहोवा, ओनकर परमेस्सर हउँ अउर मईँ ओनकर पराथना क जवाब देब। ७एप्रैम क लोग जोद्धन क नाई होइ। उ पचे आपन हिरदइ में अइसा खुसी महसूस करब जइसा कि उ दाखरस स भरा गवा अहइ। ओनकर सन्तानन एका लखेहीं अउर उ पचे आनंद मनइहीं अउर ओनकर हिरदइ यहोवा में खुस होइ।

८“मईँ ओनका सीटी दइके सबन क एक संग बोलाउब। काहेकि मईँ ओनकर रिहारई बरे धन देइ चुका अहउँ, उ सबइ लोग अनगिनत होइ जइहीं जइसा उ पहिले रहन। ९मईँ सबहिं रास्ट्रन क बीच में स ओका छिरताइ देब, मुला मोका दूर क देसन में याद करिहीं। उ पचे अउर ओनकर सन्तानन बची रहिहीं। अउर उ पचे वापस अइहीं। १०मईँ ओनका मिस्त्र वापस लिआउब अउर मईँ ओनका अस्सूर में एकट्ठा करब। मईँ ओनका गिलाद अउ लबानोन क भूँइया में लिआउब अउर हुआँ ओन लोगन बरे काफी जगहिया नाहीं होइ।” 11उ गुरात भवा समुदर क पार करब अउ लहरन पइ चोट करब। तब नील नदी क सबइ घहरा भाग सूख जाई, अस्सूर क घमण्ड नीचा होइ जाई, अउ मिस्त्र सक्ती छीन लीन्ह जाई। 12यहोवा आपन लोगन क सक्तीसाली बनाइ अउर उ पचे ओनके अउ ओनके नाउँ बरे जिअत रहिहीं। यहोवा इ सब कहेस।

### परमेस्सर यहूदा क चारिहूँ कइँती क रास्ट्रन क सजा देइ

**11** लबानोन, आपन दुआर खोला, काहेकि आगी भितरे आइ अउर उ तू पचन क देवरारू क बृच्छन क बारि देइ।

२साइप्रस क बृच्छ रोइहीं काहेकि देवदारू क बृच्छ भहराइ गएन। बासान क ओक बृच्छ रोवा काहेन जगल जउन काटि डवा गवा।

३रोवत गइरियन क सुना! काहेकि ओनकर भव्य चरागाह तबाह कइ दीन्ह गएन। सुना! सेरन दहाइत हीं काहेकि यरदन नदी किनारे क जंगल-झाड़ी नस्त कीन्ह गवा अहइ।

४इ उहइ अहइ जउन यहोवा मोर परमेस्सर कहत ह: “ओन भेड़िन क झुण्ड क चढ़वाह होइ जा जेनका ज़बह करइ बरे नियुक्त कीन्ह गवा रहा। ५जउन लोग ओनका खरीद लेत हीं अउर ओनका ज़बह कइ देत हीं अउर उ सज़ा नाहीं पावत हीं। अउर जउन उ भेड़ियन क बेचत हीं कहत ह, ‘यहोवा क धन्य होइ काहेकि हम पचे धनी होइ गवा हउँ।’ ओनका आपन गइरियन ओह पइ दया नाहीं करतेन ६एह बरे मईँ इ देस में रहइवालन पइ कछू दया नाहीं करब।” यहोवा कहत ह। “लखा, मईँ हर एक क ओकर पड़ोसी अउ राजा क हाथ पकड़वाइ देब। उ पचे ओकर भूँइया रौंद देइहीं, लेकिन कउनो एक क भी ओकर सक्ती स मुक्त नाहीं करब।”

७एह बरे मईँ ओन भेड़िन क देखरेख किहेउँ, जेनका ज़बह करइ क वास्ते बेचइ बरे रहन। सचमुच में मईँ ओन बेचारा भेड़ियन क चड़वाही किहा तउ मईँ दुइ तु छड़ियन लिहेस: एक तु छड़ी क नाउँ “अनुग्रह” राखेउँ अउ दूसर छड़ी क नाउँ “एकता” राखेउँ अउर तब मईँ भेड़िन क देखरेख किहेउँ। ८एक महीने में मईँ ओकरे तीनउँ गइरियन क हटाइ दिहे रहा, काहेकि मईँ ओन स आपन धैर्य खो दिहे रहा, अउर उ मोसे घिना भी किहे रहा। ९एह बरे मईँ कहेउँ, “मईँ तू पचन्क अउर गइरिया नाहीं रहब। भेड़ जउन मरह ह, मरि दया; भेड़ जउन नस्त होइ बरे जात ह, नस्त होइ दया। भेड़ जउन बचिहीं, ओनका एक दूसर क गोस खाईके मरि जाई दया।” 10तब मईँ अनुग्रह नाउँ क छड़ी लिहेउँ अउर एक तोड़ दिहेउँ। मईँ इ बात क परगट करइ बरे किहेउँ कि सबहिं रास्ट्रन क संग परमेस्सर क वाचा टूट गइ। 11एह बरे इ उ दिना तोड़ दीन्ह ग रहा। ओन बेचारे भेड़िन जउन मोर कइँती लखत रहिन, जान लिहन कि इ सँदिसा यहोवा क अहइ।

12तब मईँ ओसे कहेउँ, “अगर इ तोहार नज़र में ठीक बाटइ, तउ मोका मोर भुगतान करा; अगर इ तोहार नज़र में ठीक नाहीं बाटइ, तउ मोका भुगतान जिन करा।” एह बरे उ पचे मोका चाँदी क तीस टूकन मजदूरी क रूप में दिहन। 13तब यहोवा मोहसे कहेस, “उ बड़का धन क जेका उ पचे मोरे बरे कीमत ठेहराएस ह खजाना में डाइ दया।” एह बरे मईँ चाँदी क तीस टूकन क लिहेउँ अउर ओनका यहोवा क मन्दिर क खजाना में डाइ दिहेउँ। 14तब मईँ “एकता” नाउँ क दूसर छड़ी क इ परगट करइ बरे कि इस्त्राएल अउ यहूदा क बीच क एकता टूटि जाई, तोड़ि दिहेन।

15तब यहोवा मोहसे कहेस, “एक बार फुन मूरख गड़ेरिया क समान लइ ल्या।” 16काहेकि मई इ भुईया मँ एक गड़ेरिया नियुक्त करइ बरे जात हउँ। उ एक अइसा गड़ेरिया होब जउन खोया भवा क चिन्ता न करब, जउन जवान क न खोजब, जउन घायल क चंगा न करब, जउन तन्दुरुस्त क खाइया न खिलाब। एकर जगह पइ, उ मोटे भेड़िन क गोस्त खाउब, अउर जउन ओकरे खुस क तोड़ देब।”

17हे मोर व्यर्थ गड़ेरिया, कउन झुण्ड क तजि दिहा! तरवार क ओकर भुजा अउ दाहिनी आँखी पइ चोट करइ द्या! ओकर दाहिनी भूजा क झूरान होइ जाइ द्या! ओकर दाहिनी आँखी क पूरी तरह स आँधर होइ द्या!”

### यहूदा क चारिहूँ कइँती क रस्ट्रन क बरे मँ दर्सन

**12** एक भविस्सवाणी: इ इस्त्राएल क बारे मँ यहोवा क सँदिसा अहइ: इ उहइ अहइ जउन यहोवा कहत ह, कउन आकसे क बनाएस, कउन पृथ्वी क स्थापना किहेस, कउन मनई क भीतर आतिमा क रचेस, 2“लखा, मई यरूसलेम क पिअइ क ज़हरीला पिआला बनाइ बरे जावत हउँ जउन कि ओकरे चारिहूँ कइँती क रस्ट्रन बरे मूसीबत झेलइ क कारण होइ। यहूदा क भी ओन रस्ट्रन क बीच जउन कि यरूसलेम क घेरत ह होवइ बरे मजबूर कीन्ह जाब्या। 3उ दिना मई यरूसलेम क सबइ जातियन बरे भारी चट्टान क नाई बनाउब। अउर जउन कउनो एका उठावइ क कोसिस करी जोर स चोट खाइ, अउर पृथ्वी क सारे रस्ट्रन यरूसलेम क खिलाफ होइहीं। 4यहोवा कहत ह, उ दिना मँ, मई हरेक घोड़न क डराउब अउर हरेक घोड़सवार क पागल बनाइ देब; किन्तु मई यहूदा क लोगन पइ धियान देब, अउर मई जातियन क सबइ घोड़न आँधर कइ देब। 5तब यहूदा क प्रमुखन आपन आप स कहिहीं, ‘यरूसलेम क निवासिन सर्वसक्तीमान यहोवा का करण मजबूत अहइ अउर उ ओकर परमेस्सर अहइ।’ 6उ दिना मँ, मई यहूदा क प्रमुखन क काठ मँ बरत भइ अंगठी, अउ बारत भवा अनाज क गुच्छा क नाई बनाइ देब। उ पचे आपन चारिहूँ कइँती क जातियन क नस्ट कइ देब साथ ही जउन ओकर दाहिनी तरफ अउ जउन ओकर बाइ तरह होइ। किन्तु यरूसलेम क निवासी फुन यरूसलेम क जगह पइ होइहीं।”

7पहिले यहोवा यहूदा क परिवार समूहन क विजय दिलाइ, एह बरे दाऊद क परिवार समूह क महिमा अउ यरूसलेम क निवासियन क महिमा यहूदा क बंसज स जियादा होइ। 8उ दिना मँ, यहोवा यरूसलेम क निवासियन बरे ढाल होइहीं। जउन कउनो आदमी ओनकर बीच मँ दृढ़ता स रही उ दाऊद क समान बड़वार जोधा बन जाइ। लोगन क समन्वा, दाऊद क परिवार देवता क समान या यहोवा क आपन सरगदूतन क नाई होइहीं।

9“उ दिना मँ, मई ओन रस्ट्रन क नस्ट करइ बरे रवाना होब जउन यरूसलेम क खिलाफ जुद्ध करइ बरे आवत अइहीं। 10मई दाऊद क परिवार पइ अउ यरूसलेम क निवासियन पइ महिमा क आतिमा अउ पराथना क उड़ेर देब। उ पचे मोर कइँती लिखिहीं, जेनका उ पचे छेद डाए रहेन। उ पचे ओकरे बरे अइसा रोवइ जइसा उ अपने

इकलौता पूत क मउत पइ रोवइवत ह। उ पचे अइसा गहिरा दुःख मँ होइ जइसा व्यक्ति आपन पहिलौटी पूत क मउत पइ रोवइवत होइ। 11उ दिना मँ, यरूसलेम मँ विलाप बहोत भयंकर होइहीं, इ उ समइ क नाई होइ, जब मगिद्दो घाटी मँ हददिमोन क मउते पइ विलाप होत रहेन। 12समपूर्ण भूईया खुद ही विलाप करिहीं, अउर हरेक परिवार खुद ही विलाप करिहीं; दाऊद क परिवार खुद ही रोइहीं, अउर ओनकर पत्नियन खुद ही रइहीं। अउर ओनकर पत्नियन आपन आप ही विलाप करिहीं। 13लेवी क परिवार खुद ही विलाप करिहीं, अउर ओनकर पत्नियन आपन आप ही विलाप करिहीं; सिमाइ क परिवार क खुद ही विलाप करिहीं, अउर ओनकर पत्नियन आपन आप ही विलाप करिहीं। 14सबहिं परिवार समूहन क हर कउनो जउन जितत ह खुद ही विलाप करिहीं, अउर पत्नियन आपन आप स विलाप करिहीं।”

**13** उ दिना, दाऊद क परिवार अउ यरूसलेम मँ रहइवाला लोगन बरे एक ठु सोता ओकरे पापन बरे क धोइ देइ अउर लोगन क सुद्ध करइ बरे फूटब।

### लबार नबी भविस्स मँ नाहीं

2सर्वसक्तीमान यहोवा कहत ह, “उ दिना, मई पृथ्वी प स सबहिं मूर्तियन क नाउँ हटाइ देब। अउर लोग ओनकर नाउँ भी याद नाहीं रखिहीं। अउर मई लबार नबियन अउर असुद्ध आतिमा क इ भुईया स हटाइ देब। 3जदि कउनो मनई भविस्सबानी करत ह तउ ओका सजा मिली। हिआँ तलक कि ओकरे माता-पिता, ओकर आपन महतारी अउर आपन बाप ओहसे कइहीं, ‘तू यहोवा क नाउँ झूठ बोल्या ह। एह बरे तोहका मरि जाइ चाही।’ ओकर आपन महतारी अउर ओकर आपन बाप भविस्सवाणी करइ क कारण ओका छूरी भोकें देइहीं।

4“उ समइ नबी आपन भविस्सवाणी अउर आपन दर्सन क खातिर लज्जित होइ जइहीं। उ पचे लोगन क धोखा देइ बरे रोंएदार चोगा नाहीं पहरिहीं। 5उ सबइ लोग कइहीं, ‘मई नबी नाहीं हउँ मई एक किसान हउँ। मई बचपना स किसान क रूप मँ काम किहेउँ ह।’ 6दूसर लोग कइहीं, ‘मुला तोहरे हाथन पइ घाव कइसे अहइ?’ उ कही, ‘इ चोट मोका अपने मित्र के घरे लगी।’”

7सर्वसक्तीमान यहोवा कहत ह, “तरवार, गड़रिया पइ चोट करा। मोरे मित्र क मारा। गड़रिया पइ वार करा अउर भेड़िन पशइ जइहीं अउर मई ओन छोटन क सजा देब। 8सर्वसक्तीमान यहोवा करत ह, “पूरी धरती क दुइ तिहाई लोग हटाइ जाइहीं अउर उ पचे मरिहीं, मुला एक तिहाई लोग बचा रइहीं। 9मई इ एक तिहाई लोगन क आगी मँ डाइ देब। मई ओका उहइ तरह स सुद्ध करब जइसा चाँदी क सुद्ध कीन्ह जात ह। मई ओका अइसा परखब जइसा सोना क जाँचा जात ह। तउ उ पचे मोका आपन नाउँ स पुकारिहीं अउर मई ओका जवाब देब। मई कहब, ‘उ पचे मोर लोग अहा,’ अउर उ पचे कइहीं, ‘यहोवा मोर परमेस्सर अहइ।’”

नरुणरु क दरन

**14** लखर, यहलवल क एक दरन आवत ह जब तललर करुतु कील तललर सडनुवल तलडर करडरररु। 2डरु सडररु सरुतुरन क डरुसुललड क खरलरड लडरु डरु एक सडुग लरलरडड। सहर डड अधरकर कलनु करडरु, डरन क लुड लरनु करडरु, डलररुडरन क डलरतुकर हलडरु; आधर ललग डनुदर क रुरु डु डलस नरसुकरसन डु करडररु, कलनु डलर डलवल ललग सहर स हडरवल नररु करडरु। 3तड यहलवल करड अड ओन सरुतुरन क वररुदुध वडसु हल करडुध करड करडसु अ डडललु कलरु हलरुन। 4उ दरनर, उ करडतुन क डडरड डड खडरु हलड, करडन डरुसुललड क डुरुड अहड। करडतुन क डरुवत एक गहररर डरुडर क दुआरर दुड तु हलसु डु डुरुड स डकुडुड तलक डरुत करडरु। एह डर आधर डरुवत उतुतर करडरुतु अडर आधर दकखन करडरुतु डरुदररु। 5करडसु-करडसु उ डडरडर डरुडर तुरु डरुडन क नरगडल आड, तु डललु डररड करड क करडन करडरु। तु डललु उहड सडड क नरुड डररडरु, करडसु तु डललु यहलुद क ररकर उकरडरुडरु क ससुन क सडड डु डुरुडुडुल स डररड ग रहुडर। करड यहलवल, डुलर डरडुसुसर आड, अडर ओकर सडरुड डरुवलुतर ओकरु सडुग हलडररु।

6उ दरनर न गरुडर डर न ठंडर डर न हल डरलर हलड। 7उ लगरतर दरन हलड। एक दरन करडन सरररड यहलवल हल करडनत ह। हुवलु न हल दरन हलड न ररत। हुवलु हडलसु उकरडररर हलड हलवलु तलक कल सुरुडुड डु डु डु। 8उ सडड, डरुसुललड स लगरतर डरनर डरु। उ धरर डरुडर करड अडर एक हलसु डुरुड करडरुतु डरु अडर एक हलसु डकुडुड क डुरुडुधुड सगर तलक करड अडर डुरु सलल गरुडर अड सरुदर डु डु डु। 9अडर यहलवल उ सडड संसर क ररकर हलड। यहलवल एक अहड। ओकर नरुडु "एक" अहड। 10सडुडुडु डुरुडुडर गलड स लडुके ररडुडुन तलक करडन डरुसुललड क दकखन करडरुतु डरुडर, रडुडर डडुदरन क नरुडु सडरड हलड करड। कलनु डरुसुललड आडन कुडरु करडरु करडरु डडर डुडर हल डुडरुडर डुडर स डरुडलु दुआर करडन कलनर क दुआर अहड, अडर हननलु क डुडरनर स ररकर क दखरस नरकरडुवलर तलक रहुडर। 11डरुडरडुध उठरड

लरनु करड अडर ललग हुओु आडन डर डनडररु। डरुसुललड सुरकुडुड हलड।

12डुलर यहलवल ओन सरुतुरन क सकर डलड करडन डरुसुललड क खरलरड लडुन। उ ओनकर डरुडुकर डुडररु लगरड डलड। खडर खडर ओनकर डरुदुन गलर करड। ओनकर ओुखन ओनकु कुडरु डु गलरु हल अडर ओनकर करड ओनकु डुडुनर डु गलु। 13-15उ खडडनरक डलरडु दुसुडनन क डलरन डु हलड अडर ओनकर डुडुन, खकुडरन, कुडुन अडर गदहन क ड खडडनरक डलरडु लगर करड।

उ सडड, उ सडड ललग, डुरड, यहलवल स डलरडरु। उ डललु एक दुसुर क गडुड दडरु। उ डललु एक दुसुर डड वरर करड डरु हथुवल उठडरु। यहलुद क ललग डरुसुललड डु करडुध कररु, डुलर उ डललु सहर क कुररुडुडु करडरुतु क सरुतुरन स धन डडरु। उ डललु डुडुत करडरुडरु सलनर, कुरुदुड अडर ओदुनर डडरु। 16अडर सडड सरुतुरन स डलर डलर ककु ललग करडन डरुसुललड क खरलरड करडुध करड अडरु, हर डररस उ डललु ररकर क अररधनर करड डरु, सरुवसुवतुडुडरुन यहलवल क उडरसनर क करड डरु करडरु, कुडुडर क तुडुडरुडर डनरवल करडरु। 17अडर अगर डुरुथुवल क कडनु डररवरर क ललग ररकर क, सरुवसुवतुडुडरुन यहलवल क उडरसनर करड डरुसुललड नररु करडरु, तड उ डललु डरुडरु स डकुडुड हलड करडरु। 18अडर करडु डरुडुड क कडनु डररवरर नररु उठरु हल अडर नररु आडरु, तड ओनकर उहड डडरडरु करडन यहलवल दुसुर सरुतुरन डरु डुडु डलर करडन कुडुडर क तुडुडरुडर डनरवल डरु नररु आवत रहर, कसुड डरुडुडरडड। 19डु सकर डरुडुडु डरु हलडरु हल अडर डु सकर उ सडुडुडु सरुतुर डरु करडन कडुडर क तुडुडरुडर डनरवल नररु आड।

20उ दरनर, "डलरुडुडर डरु डरुडुडर" डुडर क डुडुडुडर डड डु खुदर हलड। अडर यहलवल क डनुदर डकरवलड क डरुतुन वलुदु क सडनुडर रखर डलर डरुडरलर क सडरन हलड। 21डलरुडुड अड डरुसुललड क हर डरुतुन सरुवसुवतुडुडरुन यहलवल डरु डरुडुडरु हलड। करडन कडनु डरुडुडरु कडुडरुडु डरु आड ओनडुडु स ललडु ललड अडर ओह डु डु डु डुडुडु। उ दरनर, सरुवसुवतुडुडरुन यहलवल क डनुदर कडनु वडडरु नररु हलड।

# हागै

## मंदिर बनावइ क समइ

1 परमेस्सर यहोवा क सँदिसा नबी हागै क जरिये सालतीएल क पूत यहूदा क सासक जरुब्बाबेल अउर यहोसादाक क पूत महायाजक यहोसू क मिला। इ सँदिसा फारस क राजा दारा क दूसर बरिस क छठएँ महीना क पहिले दिन मिला रहा। इ सँदिसा मँ कहा गवा रहा: 2सर्वसक्तीमान यहोवा इ कहत ह, “इ सबइ लोग कहत हीं कि यहोवा क मंदिर क पुनःनिर्माण क समइ नाहीं आवा अहइ।”

3तबहिं एकरे बारे मँ यहोवा इ निम्न लिखित सँदिसा हागै नबी क जरिये स पठाएस ह, जेहमँ कहा गवा रहा, 4“का इ तू पचन क खुद खातिर काठे स मढ़ा मकानन मँ रहइ क समइ अहइ जबकि इ मंदिर अबहिं खाली पड़ा अहइ? 5इहइ कारण अहइ कि सर्वसक्तीमान यहोवा कहत ह:

‘जउन कछू तोहरे पचन क संग घटत बाटइ ओकरे बारे मँ सोचा। 6तू पचे बोवा बहोत ह, मुला तू पचे काटत्या नाहीं क बराबर। तू पचे खात अहा, मुला तोहार पचन क पेट भरत नाहीं। तू पचे पिअत अहा, पर तू पचनक नसा होत नाहीं। तू पचे ओढ़ना पहिरत अहा, किन्तु तू पचनक काफ़ी गरमाहट मिलत नाहीं। तू पचे जउन थोड़ा बहोत कमात अहा पता नाहीं कहाँ चला जात ह; लागत इ जइसे जेबन मँ छेद होइ ग होइ।”

7सर्वसक्तीमान यहोवा कहत ह, “जउन कछू तू पचन क संग घटत बाटइ ओकरे बारे मँ सोचा। 8पर्वते पड़ चढ़ा। लकड़ी लिआवा अउर मंदिर बनाव। तब मई मंदिर स प्रसन्न होबउँ, अउर सम्मानित होबउँ।” यहोवा इ सब कहत ह।

9सर्वसक्तीमान यहोवा कहत ह, “तू पचे बहोतइ जियादा पावइ क चाह मँ रहत ह, मुला तू पचनक नाहीं क बराबर मिलत ह। तू पचे जउन कछू भी घरे पड़ लिआवत अहा मई एका उड़ाइ लइ जात हउँ। काहेकि मोर मंदिर खंडहर पड़ा अहइ। मुला तू लोगन मँ हर एक क आपन आपन घरे क पड़ी बा। 10इहइ कारण बाटइ कि आसमान आपन ओस तक लइ लेत ह, अउर इहइ कारण भुइँया आपन फसल नाहीं देत। अइसा तू पचन क कारण होत ह।

11यहोवा कहत ह, “मई धरती अउ पर्वतन बरे सूखा पड़इ क हुकुम दिहेउँ ह। अनाज, दाखरस, जइतून क तेल अउर उ सबइ कछू जेका इ धरती पड़दा करत ह, बरबाद होइ जाइ। सबइ लोग अउर सबइ जनावरन क कारज कउनो चीज नाहीं पड़दा करइ सकी।”

## नवा मंदिर क कारज क सुरुआत

12तब सालतीएल क पूत जरुब्बाबेल अउ यहोसादाक क पूत महायाजक यहोसू अउर सबइ दूसर लोगन यहोवा आपन परमेस्सर क सँदिसा अउर ओकर पठए भए हागै नबी क बचनन क अंगीकार किहेस। अउर लोग यहोवा स डेराइ गाएन।

13परमेस्सर यहोवा क सँदिसा वाहक हागै लोगन क यहोवा क सँदिसा दिहस। उ इ कहेस, “मई तोहरे संग हउँ।”

14तब परमेस्सर यहोवा सालतीएल क पूत यहूदा क सासक जरुब्बाबेल क प्रेरणा दिहस अउ परमेस्सर यहोवा यहोसादाक क पूत महायाजक यहोसू क भी प्रेरणा दिहस अउ परमेस्सर यहोवा बाकी सबहिं लोगन क प्रेरणा दिहस। तब उ पचे आपन अउ आपन सर्वसक्तीमान परमेस्सर यहोवा क मंदिर क निर्माण मँ काम करइ लागेन। 15उ पचे इ परसिया क राजा दारा क दूसरे बरिस क छठएँ महीना क चौबीसवें दिन किहन।

## यहोवा क लोगन क प्रेरणा देब

2 यहोवा क सँदिसा सतएँ महीना क इक्कीसवें दिन हागै क मिला। सँदिसा मँ कहा गवा, 2अब यहूदा क सासक सालतीएल क पूत जरुब्बाबेल, यहोसादाक क पूत महायाजक यहोसू स बातन करा अउ जउन लोग बचा अहइ ओनसे कहा: 3“का तू पचन मँ कउनो अइसा बचा अहइ जउन उ मंदिर क आपन पहिले क बैभव मँ देखेस ह। अब तू पचनक कइसा लागत ह? का खण्डहर भवा इ मन्दिर ओ पहिले बैभववाला मंदिर क मुकाबले कहुँ ठहर पावत ह? 4मुला जरुब्बाबेल, ‘अब तू हिम्मती बना!’ अउर यहोसादाक क पूत महायाजक यहोसू, ‘तू भी हिम्मती बना।’ अउर तू सबइ लोग जउन हिआँ रहत ह, हिम्मती बना। यहोवा इ भी कहत ह, ‘काम करा, काहेकि मई तोहारे संग अहइ।’ सर्वसक्तीमान यहोवा इ कहत ह।”

5यहोवा कहत ह, “जहाँ तलक मोरी प्रतिग्या क बान अहइ, जउन मई तू पचन क मिस्त्र स बाहेर निकारइ क समइ तू पचन स किहेउँ, उ मोर आतिमा तू पचन मँ अहइ। डेराअ जिन। 6काहेकि सर्वसक्तीमान यहोवा इ कहत ह: एक दाई फुन मई हाली ही भुइँया अउ आसमान अउ समुदर अउ सूखी भुइँया क कँपकँपाइ देबउँ। 7मई सबहिं रास्ट्रन क कँपाइ देब, अउर उ सबहिं रास्ट्र आपन सम्पत्तियन क संग तू पचन क लगे अइहीं। तब मई इ मन्दिर क महिमा स भरि देबउँ। सर्वसक्तीमान यहोवा इ कहत ह। 8ओनकर चाँदी मोर अहइ अउर ओनकर सोना मोर अहइ।’ सर्वसक्तीमान यहोवा इहइ कहत ह। 9इ मंदिर क परवर्ती गौरव पहिले

मंदिर क गौरव स बढ़िके होइ। सर्वसक्तीमान यहोवा इ कहत ह अउर इ ठउर पइ मई सान्ति क ठहराउब। सर्वसक्तीमान यहोवा इ कहत ह।”

### कारज सुरू होइ चुका अहइ बरखन मिली

10 यहोवा क सँदसा दारा क दूसर बरिस क नौवें महीना क चउबीसवें दिना नबी हागै क मिला। सँदसा मँ कहा ग रहा, 11 सर्वसक्तीमान यहोवा इ कहत ह, अब याजक स पूछा कि इ बिसय क बारे मँ व्यवस्था का कहत ह। 12 होइ सकत ह कउनो मनई आपन ओढ़नन क तहन मँ पवितर मांस लइ चलइ। होइ सकत ह कि उ ओढ़ना जउन मँ उ पवितर मांस लइ जात रहा होइ, रोटी या पका भोजन, दाखरस, तेल या कउनो दूसर भोजन क छुइ लेइ। का उ चीज जेकर छुअब ओढ़ना स होत ह पवितर होइ जाइ?”

याजकन जवाब दिहस, “नाहीं।”

13 तब हागै पूछेस, “का होइ अगर कउनो मनई कउनो जउन कि लहासे क छुइ क कारण असुद्ध होइ गवा ह, इ चिजियन मँ स कउनो चीज क छुवत ह? का इ भी अपवितर होइ जाब?”

तब याजकन जवाब दिहस, “हाँ, उ अपवितर होइ जाइ।”

14 तब हागै जवाब दिहस, “परमेस्सर यहोवा कहत ह, ‘मोर नज़र मँ, इ एँन लोगन अउर इ रास्ट्र बरे नेम अहइ। जउन कछू उ करी अउर जउन कछू उ मोका भेंट करिहीं उ अपवितर होइ।”

15 अब सोचा आज क पहिले का भवा। यहोवा परमेस्सर क मन्दिर मँ तोहार जरिये एक पाथर पइ दूसर पाथर रखइ स पहिले चिजियन कइसा रहेन? 16 एक मनई बीस माप अनाज क ढेर क निअरे आवत ह, मुला हुआ ओका सिरिफ

दस ही मिलत ह अउर जब तलक एक मनई दाखरस क पीपा क निअरे पचास माप निकारइ आवत ह तउ हुआँ उ सिरिफ बीस ही पावत ह! 17 मई, तू पचन क अउर तू पचन क काम क सजा दिहन। मई तोहार पउधन क नास करइ बरे जेका तू उगाएस ह बेरामियन क भेजा हउँ। मई फफूँदी अउर ओलन क भेजेस जउन कि तोहार सारे पइदावान क तबाह कइ दिहेस। मुला तू पचे फुन भी मोरे लगे नाहीं आया। यहोवा इ कहत ह।”

18 यहोवा कहत ह, “इ दिना स अगवा सोचा अर्थात नौवाँ महीना क चौबीसवें दिन जउने दिन यहोवा, क मंदिर क नेंव तइयार कीन्ह गइ। सोचा। 19 का बिआ अबहुँ भी भण्डार-गृह मँ बाटइ? का अंगूरे क बेलन, अंजीर क बृच्छ, अनार अउ जइतून क बृच्छ अब तलक फल नाहीं दइ पावत अहई? नाहीं। मुला आजु क दिन स, अगवा क बरे मई तू पचन क आसीर्वाद देबउँ।”

20 तब महीन क चौबीसवें दिन हागै क दूसरी दाई यहोवा क सँदसा मिला। सँदसा मँ कहा गवा, 21 “यहूदा क प्रसासक जरुब्बाबेल स कहा, ‘मई आसमान अउ भुईया क कँपावइ जात हउँ

22 अउर मई रज्जन क सिंहासनन क लोकाइ देबउँ अउ रास्ट्रन क रज्जन क सक्ती क बरबाद कइ देबउँ अउर मई रथन अउर ओनके सवारियन क नीचे फेंक देबउँ। तब घोड़न अउर ओनके घुड़सवार बहरइहीं। भाई, भाई क दुस्मन होइ जाइ।

23 सर्वसक्तीमान यहोवा कहत ह, मई उ दिना सालतीएल क पूत, आपन सेवक, जरुब्बाबेल क लेबउँ। यहोवा इ कहत ह अउर मई तू पचन क मुंद्रा स छापी भइ अंगूठी बनाउब। काहेकि मई तू पचन क चुनेउँ ह।”

सर्वसक्तीमान यहोवा इ सब कहेस ह।

# सपन्याह

1 इ सैदसा अहइ जेका यहोवा सपन्याह क दिहस। सपन्याइ इ सैदसा तब पाएस जब आमोन क पूत योसियाह यहूदा क राजा रहा। सपन्याह कूसी क पूत रहा। कूसी गदल्याह क पूत रहा। गदल्याह अमर्याह क पूत रहा। अमर्याह हिजकियाह क पूत रहा।

## लोगन क निआव करइ क यहोवा क दिन

2 यहोवा कहत ह, “मई देस क हर चीज क पूरी तरह नस्ट कइ देबउँ। 3 मई सबहि लोगन क अउर सबहि जनावरन क नस्ट करबेउँ। मई अकास क चिरइन अउ सागरे क मछरियन क नस्ट करबेउँ। मई पापी लोगन क अउर ओन सबहि चीजन क जमीन पइ स नाउँ निसान मेट देबउँ।” यहोवा इ सब कहेस।

4 यहोवा कहेस, “मई यहूदा अउ यरूसलेम क वासिइन क खिलाफ आपन हाथ उठाउब। मई इ जगहन स उ सबइ क हटाइ देब जउन अबहुँ तलक लबार देवता बाल क पूजा करत ह। अउर उ याजकन क नाउँ क जउन बाल क सेवा करत ह। 5 मई ओन सबहि लोगन क हटाइ देब जउन आपन छते स तारन क पूजा करत ह, अउर उ लोगन क जउन यहोवा क नाउँ क किरिया खात हउँ, किन्तु फुन उ पचे लबार देवता मोलेक क किरिया खात ह। 6 कछू लोग यहोवा स विमुख होइ गएन। उ पचे मोरे पाछे रहब तजि दिहेन। उ पचे यहोवा स मदद माँगब भी बंद कइ दिहेन। एह बरे मई ओन लोगन क उ जगहिया स हटाउब।”

7 मोर सुआमी यहोवा क समन्वा चुप रहा! काहेकि लोगन क निआव करइ बरे यहोवा क दिन हाली ही आवत अहइ। यहोवा आपन भेंट बलि तइयार कइ लिहस ह अउर उ आपन बोलाए भए मेहमानन क तइयार कइ लिहस ह।

8 यहोवा कहेस, “यहोवा क बलि क दिन, मई राज पुत्रन अउर दूसर प्रमुखन क राजा देबउँ। मई दूसर देसन क ओढ़नन क पहिरइ वालन क सबहि लोगन क सजा देबउँ। 9 उ दिना मई ओन सबहि लोगन क सजा देबउँ जउन अन्धविस्वास क देहलीज पइ कूदत हीं। मई ओन लोगन क सजा देबउँ जउन सुआमी क घरे क कपट अउर हिंसा स बटोरे भए धने स भरत हीं।”

10 यहोवा इ भी कहेस, “उ दिना, लोग यरूसलेम में मछरी-दुआरे पइ मदद बरे गोहरावत रहा होइहीं। सहर क दूसर हीसन में लोग नरियात रहा होइहीं अउर लोग सहर क चारिहुँ कइँती क पहाड़ियन में चिजियन क नास होइ क जोरदार आवाज अनकत रहा होइहीं। 11 तू खाले नगर क निवासियो विलाप करा! काहेकि बइपारियन क रोक दीन्ह जाइहीं। अउ धनी बइपारी बरबाद कइ दीन्ह जइहीं।

12 “उ समइ, मई दिआ लइके समूचई यरूसलेम में ओनका खोजत रहब। मई ओन सबहि लोगन क हेरब जउन कि दाखरस क तलछट क नाई अहइ। उ पचे कहत ह, ‘यहोवा कछू नाहीं करत ह, न अच्छा अउर न ही बुरा।’ 13 तब दूसर लोग ओनकर सारी सम्पत्ति लइ लेइहीं अउर ओनकर घरन क बरबाद करिहीं। उ समइ जउन लोग घर बनाए होइहीं, उ पचे ओनमाँ नाहीं रइहीं अउर जउन लोग अंगूरे क बेलन क खेते में रोपे होइहीं, उ पचे ओन अंगूरेन क दाखरस नाहीं पीइहीं, ओन चीजन क दूसर लोग लइ लेइहीं।”

14 यहोवा क निआव क दिन हाली आवति अहइ। उ दिन निअरे अहइ, अउर तेजी स आवति अहइ। यहोवा क निआव क खास दिन लोग चिचिआन भवा सुर सुनिहीं। हिओँ तलक कि वीर जोधा भी चिचिअइहीं। 15 उ समइ परमेस्सर आपन किरोध परगट करी। उ खौफनाक विपत्तियन क समइ होइ। उ विध्वंस क समइ होइ। उ करिआ, भए बादर अउर तूफानी दिन क अँधियारा क समइ होइ। 16 इ दिन सैनिकन क किलाबंध नगरन अउर रच्छा-मीनारन पइ हमला क अलार्म स भरा भवा होब्या।

17 यहोवा कहेस, “मई लोगन क जिन्नगी बहोत दूभर कइ देबउँ। लोग ओन अँधरन क नाई चारिहुँ कइँती जइहीं जेनका इ भी मालूम नाहीं कि उ पचे कहाँ जात अहइ? काहेकि उ सबइ लोग यहोवा क खिलाफ पाप किहेन। अनेक लोग मारि डावा जइहीं। ओनकर खून जमीने पइ बही। ओनकर ल्हासियन गोबरे क नाई भुइँया पइ पड़ी भई सइत रही। 18 ओनकर सोना चाँदी ओनकर मदद नाहीं कइ पाई। उ समइ, यहोवा बहोतइ छुब्ध अउ कोहान होइ। यहोवा पूरे संसार क आपन किरोध क आगी में बारिके बरबाद कइ देइ। यहोवा पूरी तरह भुइँया पइ सब कछू बरबाद कइ देइ।”

## यहोवा लोगन क प्रेरित करत ह

2 निर्लज्ज लोगो, मुइझात अउ मरत फूलन क नाई होइ क पहिले, 2 आपन जिन्नगी क बदलि द्या। दिन क गर्मी में कउनो फूल मुइझाई अउर मरि जाइ। तू पचे वइसेन होब्या जब यहोवा आपन खउफनाक किरोध परगट करी। एह बरे आपन जिन्नगी क, यहोवा क जरिये तोहरे पचन क खिलाफ किरोध परगट करइ क पहिले, बदल डावा। 3 तू सबहि विनम्र लोगो, यहोवा क लगे आवा। ओकर नेमन क माना। नीक काम करब सीखा। विनम्र होइ सीखा। होइ सकत ह तब तू पचे सुरच्छित रहि सकब्या जब यहोवा आपन किरोध परगट करी।

### यहोवा इस्त्राएल क पड़ोसियन क सजा देइ

4अज्जा सहरे में कउनो भी नाहीं बची। अस्कलीन बरबाद कइ दीन्ह जाइ। दोपहरे तलक लोग असदोद तजइ क मजबूर कइ दीन्ह जइहीं। एक्रोन सूना होइ। 5हे समुदर-तट पइ बसइया लोगो अउर करेती लोगो, यहोवा क इ संदेसा सिरिफ तोहरे बरे अहइ। हे कनान देस, पलिस्ती देस, मई तू पचन्क बर्बाद कइ देब। हुआँ कउनो नाहीं रही। 6समुदर क किनारे क तोहार पचन क भुइँया बिना किसी नगरन या खेतन क बंजर रही। तोहार भुइँया सिरिफ गडेरियन अउ भेड़िन बरे खुला चरागाह रही। 7तब उ भुइँया यहूदा क बचे भए लोगन क बरे होइ। यहोवा यहूदा क ओन लोगन क याद रखी। 8सबइ लोग बिदेस में बंदी अहइँ। मुला यहोवा ओनका वापस लिआइ। तब यहूदा क लोग ओन खेतन में अपनी भेड़िन क घास चरइ देइहीं। साँझ क उ पचे अस्कलोन क खाली घरन में ओलरिहीं।

8यहोवा कहत ह, “मई जानत हउँ कि मोआब अउ अम्मोन क लोग का किहेन। उ सबइ लोग हमरे लोगन क लज्जित किहेन। उ सबइ लोग आपन देस क अउर जियादा बड़वार करइ बरे ओनकर भुइँया लिहेन। 9एह बरे जइसा कि मई सदोम अउर अमोरा क सजा दिहेस ह। मई मोआबी अउ अम्मोनी क भी सजा देब। मई सर्वसक्तीमान यहोवा, इस्त्राएल क परमेस्सर अहउँ। मई प्रतिग्या करत हउँ कि उ सबइ देस सदा क खातिर पूरी तरह बरबाद कइ दीन्ह जइहीं। ओनकर भुइँया में जंगली घास जमिहीं। ओनकर भुइँया मृत सागर क नोन स ढकी भइ भुइँया जइसी होइ। मोरे लोगन में स बची भइ उ भुइँया क अउ एहमाँ तजी गइ हर चीज क लेइहीं।”

10उ सबइ बातन, मोआब अउ अम्मोन बरे घटित होइहीं काहेकि उ पचे सर्वसक्तीमान यहोवा क लोगन क लज्जित किहेन। 11उ सबइ लोग यहोवा स डेरइहीं। काहेकि यहोवा ओनकर देवतन क बरबाद करी। तब सबहिँ दूर-दराज क देस यहोवा क उपासना करिहीं। 12कूस क लोगो, एकर अरथ तू पचे भी अहा। यहोवा क तरवार तोहरे लोगन क मारि डाइ। 13अउर यहोवा उत्तर कइँती आपन हाथ बढ़ाई अउ अस्सूर क सजा देइ। उ नीनवे क बरबाद करी, उ सहर खाली झुगन रेगिस्तान जइसा होइ।

14तब सिरिफ भेड़िन अउ जंगली जनावर उ बरबाद सहर में रइहीं। कुचकुचवा अउर कउआ ओन खंभन पइ बइठिहीं जाउन खड़ भाएन तजि दीन्ह ग अहइँ। ओनकर आवाज खिड़कियन स आवति भइ सुनाइ पड़ी। कउअन, दुआरे क सीढ़ियन पइ बइठिहीं। ओन सूने घरन में करिआ पंछी बइठिहीं।

15नीनवे एन दिनन एँतना जियादा घमण्डी अहइ। उ अइसा खुस सहर अहइ। लोग समुझत हीं कि उ पचे सुरच्छित अहइँ। उ पचे समुझत हीं कि नीनवे संसार में सब से बड़का ठउर बाटइ। मुला उ सहर बर्बाद कीन्ह जाइ। इ एक ठु सूनी जगहिया होइ, जहाँ सिरिफ जंगली जनावर आराम करइ जात हीं। जब लोग ओहर स गुजरिहीं अउर लखिहीं कि केतनी बुरी तरह सहर बरबाद कीन्ह ग अहइ, तब उ पचे सीटी बजइहीं अउर मूँड़ि हिलइहीं।

### यरूसलेम क भविस्स

3 यरूसलेम, तोहार पचन क लोग परमेस्सर क खिलाफ लड़ेन। तोहार पचन क लोग दूसर लोगन क चोट पहुँचाएन अउर तू पचे पापे स कलंकित अहा। 2तोहार लोग मोर एक ठु नाहीं सुनतेन। उ पचे मोर सिच्छा क अंगीकार नाहीं करतेन। यरूसलेम यहोवा में बिस्सास नाहीं राखत। यरूसलेम आपन परमेस्सर क लगे नाहीं आवत ह। 3यरूसलेम क प्रमुख गुराँत भवा सिंहेन जइसेन अहइँ। एकर निआव क जज अइसे भुखान भेड़ियन क तरह अहइँ जउन भेड़िन पइ हमला करइ साँझ क आवत ह, अउर भिसारे कछू बचा नाहीं रहत। 4ओकर नबियन जिम्मेदार अउर बिस्सासयोग्य नाहीं अहइ। ओकर याजकन पवित्तर चिजियन क अपवित्तर करत हीं। उ पचे परमेस्सर क नेम बरे हिंसा किहेन ह। 5मुला परमेस्सर अबहुँ भी उ सहर में बाटइ अउ उ ओनके बरे लगातर निआव स भरा रहा ह। परमेस्सर कछू भी बुरा नाहीं करत। उ अपने लोगन क भलाइ करता चला आवत ह। लगातार हर भिसारे उ आपन लोगन क संग निआव करत ह। मुला बुरे लोग आपन कीन्ह भए बुरे करमन बरे लज्जित नाहीं होतेन।

6परमेस्सर कहत ह, “मई समूचे रास्ट्रन क बरबाद कइ दिहेउँ ह। अई ओनकर रच्छा-मीनारन क नस्ट किहेउँ ह। मई ओनकर सबइ सड़क क नस्ट किहेउँ ह अउर अब हुआँ कउनो नाहीं जात। ओनकर नगरन सूना अहइँ, ओनमाँ अब कउनो नाहीं रहत। 7मई तू पचन्स इ एह बरे कहत हउँ ताकि तू पचे सिच्छा ल्या। अगर तू पचे अइसा करब्या तउ तोहार पचन क घर नस्ट नाहीं होइ। अगर तू पचे अइसा करब्या तउ मई आपन बनाई भइ योजना क अनुसार तू पचन क सजा नाहीं देबउँ।” मुला उ पचे बुरे लोग वइसेन ही बुरे करमन अउर जियादा करइ चाहत हीं जेनका उ पचे पहिले ही कइ रखे अहइँ।

8यहोवा कहेस, “एह बरे तनिक प्रतीच्छा करा। मोर खड़ा होइ अउ निआव कीन्ह जाइ स पहिले मोर प्रतीच्छा करा। अनेक रास्ट्रन स लोगन क लिआवइ अउ तू पचन क सजा देइ बरे ओनकर उपयोग आपन किरोध तू पचन क खिलाफ परगट करइ बरे करब। मई ओनकर उपयोग इ देखावइ बरे करबउँ कि मई केतना छुब्ध हउँ, अउर यहूदा क समूचा प्रदेश नस्ट होइ। 9तब मई दूसर रास्ट्रन क लोगन क बदल देब एह बरे उ साफ-साफ बोलइ सकब अउर यहोवा क नाउँ क तारीफ कर सकब। उ पचे सबइ एक संग मोर अराधना करब। 10लोग कूस में दूसर कइँती स पूरी राह तय कइके अइहीं। मोरे बिखरे भए लोग मोरे लगे अहइँ। मोर उपासक मोरे लगे अइहीं अउर आपन भेंट लइहीं।

11“यरूसलेम, तब तू अगवा चलिके ओन बुरे करमन बरे लजाब होइ बंद कइ देब्या। काहेकि मई यरूसलेम स ओन सबहिँ बुरे लोगन क निकारिके बाहेर करब। मई ओन सबहिँ घमण्डी लोगन क दूर कइ देबउँ। ओन घमण्डी लोगन में स कउनो भी मोरे पवित्तर पवते पइ नाहीं रही पाइ। 12मई सिरिफ सोझ अउ विनम्र लोगन क आपन सहर में रहइ देबउँ अउर उ पचे यहोवा क नाउँ में बिस्सास करिहीं। 13इस्त्राएल क बचे भए लोग बुरे करम नाहीं करिहीं। उ पचे



लबार नाही बोलिहीं। उ पचे लबार बोलिके लोगन क ठगइ नाही चइहीं। उ पचे ओन भेड़िन क नाई होइहीं जउन खात हीं अउर सान्त ओलरत हीं, अउर कउनो भी ओनका तंग नाही करी।”

### आनन्द सँदिसा

14हे यरूसलेम, गावा अउ खुस हवा! हे इस्त्राएल, खुसी स घोस करा! यरूसलेम, प्रसन्न हवा, तमासा करा।

15काहेकि यहोवा तोहार पचन क सजा रोकि दिहस। उ पचे तोहरे पचन क दुस्मनन क वापिस मोड़ द्या जउन तोहार तरफ आवत रहेन। हे इस्त्राएल क राजा, यहोवा तोहरे संग अहइ। अब तू पचन्क अउर कउनो बुरी घटना बरे चिन्ता क जरूरत नाही।

16उ समइ, यरूसलेम स कहा जाइ, “मजबूत बना, डेराअ जिन!

17तू पचन क परमेस्सर यहोवा तू पचन क संग अहइ। उ सक्तीसाली फउजी क नाई अहइ। उ तू पचन क रच्छा

करी। उ देखाई कि उ तू पचन स केतना पियार करत ह। उ देखाई कि उ तू पचन स केतना प्रसन्न अहइ। उ हँसी अउर तू पचन क बारे में अइसे खुस होइ।

18जइसे लोग दावत में होत हीं।” यहोवा कहेस, “मई तू पचन्क लज्जा क दूर करब। मई तू पचन्क दुर्भाग्य क तू पचन्स दूर करब।

19उ समइ, मई ओन लोगन्क सजा देबउँ जउन तू पचन्क चोट पहुँचाएन। मई आपन घायल लोगन्क रच्छा करब। मई ओन लोगन्क वापस लिआउब, जउन पराइ क बेबस कीन्ह ग रहेन अउर मई ओनका प्रसिद्ध करब। लोग सब जगह ओनकर तारीफ करिहीं।

20उ समइ, मई तू पचन्क वापस लिआउब। मई तू पचन्क एक साथ वापस लिआउब। मई तू पचन्क प्रसिद्ध बनाउब। सब जगह लोग तू पचन्क तारीफ करिहीं। इ तब होइ जब मई तू पचन्क अँखियन क समन्वा तू सबइ बन्दी लोगन्क लिआउब।”

यहोवा इ सबइ कहेस।

# हबक्कूक

## हबक्कूक क परमेस्सर स सिकाइत

1 इ उ संदेस अहइ जउन हबक्कूक नबी क दीन्ह ग रहा। 2हे यहोवा, मई लगातर तोहार दोहाइ देत रहत हउँ। तू मोर कब सुनव्या? मई इ हिंसा क बारे में तोहरे अगवा नरियात रहत हउँ मुला तू कछू नहीं किहा। 3लोग लूट लेत हीं अउर दूसर लोगन क नोस्कान पहोंचावत हीं। लोग तहतुक करत हीं अउर झगड़त हीं। हे यहोवा! तू अइसी भयानक बातन मोका काहे देखोंवत अहा? 4व्यवस्था बगैर सहारा क होइ चुकी अहइ अउर लोगन क संग निआव नहीं कइ पावति अहइ। दुट्ट लोग सज्जन लोगन क संग आपन लड़ाइयन जीतन बाटेन। तउ, व्यवस्था अब निस्पच्छ नहीं रहि गई बा।

## हबक्कूक क परमेस्सर क जवाब

5यहोवा जवाब दिहस, “दूसर जातियन क लखा। ओनका धियान स देखा। तू अचरज होइ जाब्या। मई तोहरी जिन्नगी क समइ में कछू अइसा करब जउन तोहका चकित कइ देइ। अगर तोहका ओकरे बारे में बतावा जाइ तउ तू ओह पइ भरोसा नहीं कइ पउब्या। 6मई बाबुल क लोगन क एक ठु बलवान जाति बनाइ देबउँ। उ सबइ लोग बड़कवा दुट्ट अउर सक्तीसाली जोधा अहइँ। उ पचे अगवा बाढ़त भए सारी धरती पइ छाइ जइहीं। उ पचे ओन घरन अउ ओन सहरन पइ कब्जा कइ लेइहीं जउन ओनकर नहीं अहइँ। 7बाबुल क लोग दूसर लोगन क ससाइ देइहीं। बाबुल क लोग जउन चइहीं, तउन करिहीं अउर जँहा चहिहीं, हुअँ जइहीं।

8ओनकर घोड़न चीतन स भी तेज दउड़इवाला होइहीं अउर सूरज क लुकाइ जाइ क पाछे बड़का कूकुर स भी जियादा खूँखार होइहीं। ओनकर घोड़सवार फउजी सुदूर ठउरन स अइहीं। उ पचे आपन दुस्मनन पइ वइसे टूटि पड़िहीं जइसे अकासे स कउनो भूखा गिद्ध झपट्टा मारत ह। 9उ पचे सबहिं हिंसा करइ बरे आइहीं। ओनकर फउज रेगिस्तान क हवा क तरह नाके क सोझ में अगवा बढ़िहीं। बाबुल क फउजी अनगिनत लोगन क बंदी बनाइके लइ जइहीं। ओनकर गिनती ऐतनी जियादा होई जेतनी रेत क कणन क होत ह।

10“बाबुल क फउजी दूसर देसन क राजा लोगन क हँसी उड़इहीं। दूसर देसन क राजा ओनके बरे चुटकुला बन जइहीं। बाबुल क फउजी उँचा सुदुढ़ मीनारवाले सहरन पइ हँसिहीं। उ पचे ओन किलन क बदले में बालु क रास्ता बनाइके ओन सहरन क आसानी स हराइ देइहीं। 11फुन उ पचे दूसर जगहन पइ जुद्ध बरे ओन जगहन क तजिके अइसेन ही

अगवा बढ़ि जइहीं जइसे आँधी आवति अहइ अउर अगवा बढ़ि जात ह। बाबुल क उ सबइ लोग बस आपन सक्ती क ही पूजिहीं।”

## परमेस्सर स हबक्कूक क सवाल

12फुन हबक्कूक कहेस, “हे यहोवा, तू अमर अहा। तू मोर पवितर परमेस्सर अहा। हम नहीं मरब। हे यहोवा, तू बाबुल क लोगन क दूसर लोगन क सजा देइ क रच्या ह। हे हमार चट्टान, तू ओनका यहूद क लोगन क सजा देइ क रच्या ह।

13तोहार भली आँखिन कउनो दोख नहीं लखति हीं। तू पाप करत भए लोगन क नहीं लखि सकत ह। तउ तू ओन पापियन क जीत कइसे लख सकत ह? तू कइसे लख सकत ह कि सज्जन क दुर्जन हराइ देइ।

14तू ही लोगन क अइसे बनाया ह जइसे सागरे क अनगिनत मछरियन जउन सागर छोटा जीव अहइँ बगइर कउनो मुखिया क।

15दुस्मन हुक अउ जालि डाइके ओनका पकड़ि लेत ह। आपन जालि में फँसाइके दुस्मन ओनका हींच लइ जात ह। दुस्मन बहोत खुस होत ह जउन उ पकड़त ह।

16इ फंद अउर जाल ओकरे बरे अइसी जिन्नगी में जउन धनवान क होत ह अउर उत्तिम भोजन खाइ में ओकर सहायक बनत हीं। एह बरे उ दुस्मन आपन ही जाल अउ फंदन क पूजत ह। उ ओनका मान देइ बरे सबइ बलि देत ह अउर उ ओनके बरे धूप बारत ह।

17का उ आपन जाल स इहइ तरह लगातार पकड़त रहब? का बाबुल क फउज इहइ तरह निर्दय होइके जातियन क नास करत रहब?

2 “मई पहरे क मीनारे पइ जाइके खड़ा होबउँ। मई हुअँ आपन जगह लेब अउर रखवारी करब। मई इ लखइ क इंतजार करब कि उ मोसे का कहत ह। मई इंतजार करब अउर इ जान लेब कि मोरे सिकाइत क बारे में मोका का जवाब देइ चाही।”

## परमेस्सर क जरिये हबक्कूक क सुनवाई

2यहोवा मोका जवाब दिहस, “मई तोहका कछू देखावत हउँ, तू ओका लिख ल्या। सूचना पट्टी पइ एका साफ़-साफ़ लिख द्या ताकि लोग आसानी स ओका बाँचि सकइँ। 3इ संदेस अगवा आवइवाला एक खास समइ क बारे में अहइ। इ संदेस आखिरी समइ क बारे में अहइ अउ इ सच्च सिद्ध होइ। अइसा लग सकत ह कि वइसा समइ तउ कबहुँ आइ हीं नहीं। मुला धीरा क संग ओकर इंतजार करा। उ समइ

आइ अउर ओका देर नहीं लागी। 4इ संदेस ओन लोगन क मदद नहीं कइ पाइ जउन एह पइ कान देइ स इनकार करत हीं। मुला सज्जन इ संदेस पइ बिस्सास करी अउर आपन बिस्सास क कारण सज्जन जिअत रही।”

5परमेस्सर कहेस, “दाखरस मनई क गुमराह कइ सकत ह। इहइ तरह कउनो सक्तीसाली मनई क ओकर घमण्ड मूरख बनाइ देत ह। उ मनई क सान्ति नहीं मिली। मउत क नाई कबहुँ ओकर पेट नहीं भरत उ हर समइ जियादा स जियादा इच्छा करत रहत ह अउर मउत क नाई ही ओका कबहुँ तृप्ति नहीं मिली। उ दूसर देसन क हरावत रही। उ दूसर देसन क ओन लोगन क आपन परजा बनावत रही। 6निहचय ही, इ सबइ लोग ओकर हँसी मसखरी उड़वत भए इ कहिहीं, ‘ओह पइ हाथ पड़इ जउन एतने दिनन तलक लूटत रहा ह। जउन अइसे ओन चिजियन क हथियावत रहा ह जउन ओकर नहीं रहिन। जउन केतने ही लोगन क आपन कर्जे क बोझे तरे दबावत रहा ह।’

7“का तू नहीं जानत कि उ सबइ जउन तोहका ऋण दिहेस ह तोहार खिलाफ उठिके खड़ा होइहीं? उ पचे उठिहीं अउर तोहका क कपाइहीं अउर उ तोहार चिजियन में स जउन कछू उ चाहत ह लेइ जाइहीं। 8तू बहोत स देसन क चिजियन लूट्या ह। तउ उ पचे तोहसे अउर जियादा लेइहीं। तू बहोत स लोगन क हत्तिया किहा ह। तू खेतन अउर सहरन क बर्बाद किहा ह। तू हुआँ सबहिँ लोगन क मार डया ह। 9सुना! जउन गलत तरीके स धन जमा किहेस ह! ओनका ओकर परिणाम भुगतइ क होइ। तू पचे सोचा करत ह कि तू आपन चिजियन चोरावइ स दूसर मनई क रोक सकत ह। मुला इ तोहार बरे बहोत बुरा होइ।

10“तू बहोत स लोगनक नास करइ क योजना बनाइ रख्या ह। ऐसे तोहार आपन लोगन ही लज्जित होइ अउर तोहका भी आपन जान स हाथ धोवइ क पड़ी। 11तोहरे घरे क देवारन क पाथर तोहरे खिलाफ गवाही देइहीं। हिआँ तलक कि तोहार घरे क छते क सहतीसन भी इ घोसणा करइहीं कि तू बुरा महई अहा। 12हाय लागइ उ बुरे अधिकारी पइ जउन खून बहाइके एक सहर क निर्माण करत ह अउर दुट्टता क जरिये चहारदीवारे स मिला एक ठु सहर क सुदृढ़ बनावत ह। 13सर्वसक्तीमान यहोवा इ ठान लिहस ह कि ओ लोग जउन कछू बनाए रहेन, उ सब कछू क एक ठु आगी भसम कइ देइ। ओनकर समूचा स्त्रम बेकार होइ जाइ। 14फुन सब कहुँ क लोग यहोवा क महिमा क जान जइहीं अउर एक खबर अइसे सँचर जाइ जइसे समुदरे में पानी फइला होइ। 15तू जउन आपन पड़ोसियन क दाखरस पिलावत ह, सुना! तू आपन ज़हर क मिलावत ह अउ ओका पिलावत ह ताकि तू ओकरे नग्नता क लखि सकी।

16“तू पचे सम्मान क जगह लज्जा स भरि जाब्या। तू पचे जरूर पीउब्या तउ तू पचे आपन नग्नता क प्रदर्शित करब्या। उ पियाले स पिआ जउन यहोवा क दाहिने हाथे में अहइ। तउ तू पचे सम्मान क जगह पई लज्जा पाउब्या।

17“लबानोन में तू बहोत स लोगन क हत्तिया किहा ह। तू हुआँ बहोत स गोरु लूट्या ह। तउ जउन लोग मारा गवा रहेन, तू ओनसे ससाइ जाब्या अउर तू उ देस बरे जउन बुरी

बातन किहेन, ओनके कारण तू डेराइ जाब्या। ओन सहरन क संग अउर ओन सहरन में बसइयन क संग जउन कछू तू किह्या ह, ओनसे तू डेराइ जाब्या।”

### मूर्तियन क निरर्थकता क सँदिस

18ओकर इ लबार देवता, ओकर रच्छा नहीं कइ पाइ काहेकि उ तउ बस एक अइसी मूर्ति अहइ जेका कउनो मनई धातु स मढ़ दिहेस ह। उ सिरिफ एक ठु मूर्ति अहइ। एह बरे जउन मनई खुद ओका बनावत ह, ओसे मदद क अपेच्छा नहीं कइ सकत। उ मूर्ति तउ बोल तलक नहीं सकत। 19धिव्कार अहइ उ मनई क जउन एक ठु काठपुतरी स कहत ह- “ओ देवता, जागि उठा।” उ मनई क धिव्कार अहइ जउन एक ठु अइसी पाथर क मूर्ति स बोल तलक नहीं पावत, कहत ह, “ओ देवता, उठि बइठा।” काहे उ कछू बोली अउर ओका राह देखाइ। उ मूर्ति चाहे सोना स मढ़ी होइ, चाहे चाँदी स, मुला ओहमाँ परान तउ बाटइ ही नहीं।

20मुला यहोवा एहसे अलग अहइ। यहोवा अपने पवित्रर मँदिर में रहत ह। एह बरे यहोवा क समन्वा संपूर्ण पृथ्वी क चुपचाप रहिके ओकरे बरे आदर परगट करइ चाही।

### हबक्कूक क पराथना

3 हबक्कूक नबी बरे सिग्योनीत पराथना:

2हे यहोवा, मई तोहरे बारे में सुनेउँ ह। हे यहोवा, बीत गए समइ में जउन सक्ती स भरा कारज तू किहे ह, ओन पइ मोका अचंभा अहइ। अब मोर तोसे बिनती बाटइ कि हमरे समइ में तू फुन ओनसे बड़का कारज करा। मुला तू गुस्सा में भी हम पचन पइ दया क देखाउब सुमिरा।

3परमेस्सर तेमान कइँती स आवत अहइ। उ पवित्रर परान क पहाड़े स आवत अहइ। ओकर महिमा आकासे क छाइ लेई। ओकर स्तुति धरती क भरि देइ।

4उ महिमा अइसी अहइ जइसे कउनो उज्जर जोति होइ। ओकरे हाथे स जोति क किरणन फूटति अहई अउर ओकरे हाथे में ओकर सक्ती लुकान अहइ।

5ओकरे समन्वा सबइ महामारी चलत हीं अउर ओकरे पाछे बिध्वंसक नास चला करत ह।

6यहोवा खड़ा भवा अउर धरती क निआव किहस। उ दूसर जातिन क लखेन अउर उ पचे काँपि उठेन। अतीत कालीन पहाड़न ढही गएन अउर चकनाचूर होइ गएन। पुरान बहोतइ पुरान पहाड़ ढहि गएन। परमेस्सर सदा अइसा ही करत ह।

7मई कुसान क तम्बुअन क दुःख में लखत ह। मिदयान क तम्बुअन क पर्दन काँपत रहेन।

8हे यहोवा, का तू नदियन पइ कोहान अहइ? का जलधारन पइ तोहका किरोध आवा ह? का समुदर तोहार किरोध क पात्र बन गवा? जब तू आपन बिजय क घोड़न पइ आवत रहा अउर विजय क रथन पइ चढ़ा रहा, का तू किरोध स भरा रहया?

9तू आपन धनुस तान लिहा अउर तीरन आपन लच्छ क बेध दिहन। जल क धारन क चीरइ बरे फूट पड़िन।

10पहाड़न तोहका निहारेन अउर उ सबइ काँपि उठेन। जल धरती क फोरिके बहइ लाग। धरती स ऊँचा फव्वारा जोर स गर्जत भए फूटइ लागेन।

11सूरज अउ चाँद आपन प्रकास तजि दिहन। उ पचे जब तोहार भालन बिजुरी क तरह चमकत लखेन, तउ चमकब तजि दिहन। बिजुरियन क उ सबइ चमकन बिजुरियन अइसी रहिन जइसे भालन अउ तीरन हवा में लटकत अहई।

12तू धरती पइ किरोध में चलेन अउर तू आपन किरोध में जातियन क रौंद दिहेन।

13तू ही एक अहइ जउन आपन लोगन क बचावइ रहया। तू ही आपन चुना भए राजा क मार्गदर्सक रहया। तू प्रदेस क हर बुरा परिवारे क मुखिया लोगन क, सबन्त कम महत्व वाले मनई स लइके बहोत महत्व स भरा मनई तलक मार डया।

14दुस्मन क सिपाहियन हम लोगन क खिलाफ लइइ बरे सक्तीसाली आँधी क तरह आएन। उ पचे खुसी में सोचत रहेन क उ पचे एक बेसहारा मनई पइ हमला करइ क जइसा जब न कउनो एका लखत ह अउर न ही कउनो ओकरे मदद बरे आवत ह, क नाई हम लोगन क आसानी

स हरा सकत ह। मुला तू ओनका मूँडे क आपन भाला स छेद कइ दिहेन।

15मुला तू सागरे प आपन घोड़न पइ सवार होइके चलत रहया, सक्तीसाली जल क उत्तेजित कइ दिहया।

16मई इ सबइ बातन सुनेउँ अउर मोर पेट डर स काँपि उठी। जब मई इ आवाज़ क सुनेउँ, मोर होंठ काँपइ लागेन। मोर हड्डियन दुर्बल होइ गइन। मोर टाँगियन काँपइ लागिन। एह बरे मई बिनासे क दिन क बाट जोहब जउन ओन लोगन पइ आई जउन हम पई हमला किहेस।

### यहोवा में सदा आनन्द स रहा

17अंजीर क बृच्छ चाहे अंजीर न उपजावई, अंगूरे क बेलन पइ चाहे अंगूर न उपजावई, जइतून क बृच्छ चाहे जइतून न पइदा करई, अउर चाहे इ सबइ खेत अनाज पइदा न करई, बाड़न में चाहे एक भी भेड़ न रहइ अउर चाहे पसुसाला में एक भी पसु न रहई।

18मुला फुन भी मई यहोवा में मगन रहबउँ। मई आपन रच्छक परमेस्सर में आनन्द लेबउँ।

19यहोवा, जउन मोर सुआमी अहइ। मोका सक्ती स भर दिहस ह। उ मोका हिरना क नाई पराइ में सहायता देत ह। उ मोका सुरच्छा क संग पहाड़न क ऊपर लइ जात ह।

संगीत निर्देसन बरे मोर तारदार उपकरण क संग।

# नहूम

1 इ नीनवे क बारे में एक ठु दुःखद समाचार अहइ। इ किताब नहूम क दर्सन क किताब अहइ। नहूम एल्कोस स रहा।

## यहोवा नीनवे स कोहान अहइ

2 यहोवा ईस्यलु अउर प्रतिसोधी परमेस्सर अहइ। यहोवा बदला लेत ह। यहोवा बहोतइ कोहान अहइ। यहोवा आपन दुस्मनन क खिलाफ बदला लेत ह। उ आपन दुस्मनन पइ कोहात रहत ह।

3 यहोवा धीरा राखत ह। मुला उ बहोतइ सक्तीसाली अहइ। यहोवा अपराधी लोगन क सजा देत ह। उ ओनका आजाद चला जाइ नाहीं देइ। लखा, यहोवा दुट्ठ लोगन क सजा देइ आवत ह। उ आपन सक्ती देखोवइ बरे चक्रवात अउर तूफानन क काम में लिआब। बादर ओकरे गोड़न क नीचे धूरि क समान अहइ।

4 जदि यहोवा सागर क घुड़कइ तउ सागर भी झुराइ जाइ। उ सारी नदियन क झुराइ सकत ह। बासान अउ कर्मल क हरी-भरी भुइँया झुराइके मरि जात हीं। लबानोन क फूल मुरझाइके गिरि पड़त हीं।

5 यहोवा क अवाई होइ अउर पहाइ डर स काँपिहीं अउर इ सबइ पहाड़ियन टेघराइके बहि जइहीं। यहोवा क अवाई होइ अउर इ धरती डर स काँपि उठी। इ जगत अउर जउन कछू एहमाँ अहइ जउन जिअत अहइ, डर स काँपी।

6 यहोवा क महाकोप क मुकाबला कउनो नाहीं कइ सकत, कउनो भी ओकर भयानक कोप नाहीं सहि सकत। ओकर किरोध आगी क नाई धधकी। जबहि उ पधारी तबहि चट्टानन चटकि जइहीं।

7 यहोवा संकट क काले में उत्तिम अहइ। उ सुरच्छित सरन अइसे ओन लोगन क अहइ जउन ओकरे भरोसे अहइँ। उ ओनकर देख-रेख करत ह।

8 मुला उ आपन दुस्मनन क पूरी तरह बर्बाद कइ देइ। उ ओनक बाढ़ क तरह बहाइ के लइ जाइ। अँधियारा क बीच उ आपन दुस्मनन क पाछा करी।

9 का तू पचे यहोवा क खिलाफ सड्यंत्र रचत अहा? उ तोहार पचन क अंत कइ देइ। फुन अउर कउनो दूसरी दाई कबहुँ यहोवा का खिलाफत नाहीं करी।

10 तोहरे पचनक दुस्मन अरझ गए काँटन स बर्बाद होइहीं। उ पचे झुरान घासे जइसे हाली ही जरि जइहीं।

11 हे अस्सूर, एक मनई तोहसे ही आवा अहइ। जउन यहोवा क खिलाफ सड्यंत्र रचेस अउर पापे स भरी सलाह दिहस।

12 यहोवा यहूदा स इ सबइ बातन कहे रहा: “अस्सूर क जनता पूरी सक्तीसाली अहइ। ओकरे लगे बहोत स फउजी अहइँ। मुला ओन सबनक काटिके लोकाइ दीन्ह जाइ। सबनक अन्त कीन्ह जाइ। हे मोर लोगो, मई तू पचनक बहोत स कस्ट दिहेउँ मुला अब आगे तू पचनक अउर कस्ट नाहीं देबउँ।

13 अब मई तोहरे पचन क काँधे स उ जुआ उतारि देब। तोहार सबनक जंजीरन जेनमाँ में तू पचे बँधा अहा मई अब तोरि देब।”

14 हे अस्सूर क राजा, तोहरे बारे में यहोवा इ आदेस दिहस ह: “तोहार नाउँ लेवइया कउनो भी संतान न रही। तोहार खुदी भइ मूर्तियन अउ धातु क मूर्तियन क मई बर्बाद कइ देब जउन तोहरे देवतन क मन्दिरन में रखा भवा अहइँ। मई तोहरे बरे कब्र बनावत हउँ काहेकि तोहार अंत आवति अहइ।

15 लखा यहूदा। लखा हुआँ, पहाड़े क ऊपर स कउनो आवत अहइ। कउनो हरकारा सुसंदेस लइकि आवत अहइ। लखा उ कहत अहइ कि हिआँ पइ सान्ति अहइ। यहूदा, तू आपन खास छुट्टी क दिन मनाइ ल्या। यहूदा, तू आपन मन्नतन मनाइ ल्या। अब फुन कबहुँ दुर्जन तोह पइ वार न करिहीं अउर उ पचे फुन तोहका हराइ न पइहीं। ओन सबहि दुर्जनन क अन्त कइ दीन्ह ग अहइ।

## नीनवे क विनास होइ

2 नीनवे, बिनासकारी तोहरे खिलाफ जुद्ध करइ बरे आवत अहइ। आपन सहर क मज़बूत ठउर सुरच्छित कइ ल्या! राहन पइ आँखी धरा, जुद्ध बरे तइयार रहा, लड़ाई क तइयारी करा।

2 काहेकि यहोवा याकूब क महिमा लउटावत अहइ जइसे इस्त्राएल क महिमा। अस्सूर क लोग इस्त्राएल क प्रजा क नास किहेन अउर ओनकर अंगूरे क बेलन क रौंदि डाएन ह।

3 ओन जोधन क ढार लाल बाटइ। ओकरे फउजियन क वर्दियन चमलीला लाल कपड़ा स बना अहइँ। जब उ जुद्ध बरे तइयार होत ही, ओकरे रथन पौलिस कीन्ह भवा लोहा क जइसा चमकत अहइँ। ओनकर भालन जुद्ध बरे तइयार रहत अहइँ।

4 ओनकर रथन गलियन में बहोत तेजी स भागत परत अहइँ। उ सबइ नगर क चउराहन में आगे पीछे भागत ही। उ सुलगत मसालन स देखीत ही अउर अइसे लगात हीं जइसे बिजुरी हिआँ-हुवाँ चमकत होइ।

5राजा आपन ओन फउजियन क बोलावत अहइ जउन सर्वश्रेष्ठ अहइ। मुला उ पचे आपन रास्ते में ठोकर खात अहइ। उ पचे किला क कईती दउड़त अहइ, अउर उ पचे सुरच्छा अवरण बनावत अहइ।

6मुला उ सबइ दुआर जउन नदियन क किनारे अहइ, खुला अहइ। दुस्मन ओनमें स जात अहइ अउर राजा क महल क गलाइके बैठाइ देत ह।

7लखा, इ दुस्मन रानी क उठाइ लइ जात ह अउर ओकर दासियन बिलखत हीं जइसेन दुःखे स भरी भइन कबूतरिन होइ। उ पचे आपन दुःख परगट करइ बरे आपन छाती पीटति अहइ।

8नीनवे अइसे तलाब जइसा होइ ग अहइ जेकर पानी बहिके बाहेर निकरत होइ। उ सबइ लोग पुकारिके कहत अहइ, “रुका! रुका! ठहरे रहा, कहुँ पराइ जिन जा।” मुला कउनो न ही रुकत बाटइ अउर न ही कउनो ओन पइ धियान देत ह।

9हे फउजियो, तू पचे जउन नीनवे क बिनास करत अहा। तू पचे चाँदी लइ ल्या अउर इ सोना लइ ल्या। हिआँ पइ लेइके बहुतेरी चिजियन अहइ। हिआँ पइ बहोत स खजाना भी अहइ।

10अब नीनवे खाली अहइ, सब कछू लुटि ग अहइ। सहर बर्बाद होइ ग अहइ। लोग आपन हिम्मत खोइ दिहे बाटेन। ओनकर मन डर स टेघरत बाटेन, ओनकर घुटना आपुस में टकरत अहइ। ओनकर तन काँपत अहइ, ओनकर मुँहना डरे स पिअर पड़ि गवा अहइ।

11नीनवे जउन कबहुँ सिंह क माँद रहा, अब उ कहुँ अहइ? जहाँ सिंह अउ सिंहिनी रहा करत रहेन। ओनकर बच्चन बेडर रहेन।

12जउन सिंह (नीनवे क राजा) आपन बच्चन अउ सबइ माबा क तृप्ति देइ बरे केतना ही सिकार मारे रहा। उ माँद अउर आपन गुफा क ओसे भरेस जेनका मारे रहा।

13सर्वसक्तीमान यहोवा कहत ह, “नीनवे, मई तोहरे खिलाफ हउँ। मई तोहरे रथन क जुद्ध में बारि देब। जुद्ध में मई तोहरे ‘जवान सिंहन’ क हत्या करब। तू फुन कबहुँ इ धरती पइ कउने भी आपन सिकार नाहीं मारि पाइ। लोग फुन कबहुँ तोहरे सँदेसवाकन क वाणियन क नाहीं सुनिहीं।”

### नीनवे बरे बुरा समाचार

3 उ हत्तियारन क सहर क धिक्कार अहइ। नीनवे अइसा सहर अहइ, जउन लबारन स भरा अहइ। इ दूसर देसन क लूट क माले स भरा अहइ। इ ओन बहोत सारे लोगन स भरा अहइ जेनकर उ पाछा किहस अउर जेनका इ मारि डाएस ह।

2लखा, कोइन क फटकार, पहियन क सोर, अउर घोड़न क टाप सुनाइ देति अहइ, अउर साथ-साथ उछरत रथन क सब्द सुनाइ देत अहइ।

3घोड़सवार हमला करत अहइ अउर ओनकर तरवारन चमचमाति अहइ। केतना ही लोग मरि गएन। ल्हासन क डेर लागि गवा अहइ। लोग अनगिनत ल्हासन पइ भहराइ भहराइके चलत बाटेन।

4इ सब कछू नीनवे क कारण घटा अहइ। नीनवे उ रण्डी जइसी अहइ जउन कबहुँ अघात नाहीं, ओका अउर जियादा, अउर जियादा चाहे रहा। उ आपन क ढेर सारे देसन क बोचे दिहे रहा अउर उ ओनका आपन दास बनावइ क जादू चलाए रहा।

5सर्वसक्तीमान यहोवा कहत ह, “हे नीनवे, मई तोहरे खिलाफ अहउँ। मई तोहरे ओढ़ना क तोहरे मुँहना तलक उठाइ देब। तोहरी नंगी देह क सारे देसन क देखाउब। मई तोहार लज्जा राजन क देखाउब।

6मई तोहरे ऊपर धिनौनी चीज लोकाउब। मई तोहसे धिना क संग बर्ताव करब। लोग तोहका लखिहीं अउर तोह पइ हँसिहीं।

7जउन कउनो भी तोहका लखी तोहसे दूर पराई। उ पचे कहब, ‘नीनवे नस्ट होइ गवा, मुला कउन ओकरे बरे रोब्या?’ मई कहुँ देखउँ जउन तोहका सुख चैन देइ?”

8नीनवे, का तू नील नदी क किनारे पइ बसी नौ अमोन\* स उत्तिम अहा? नाहीं अमोन क चारिहुँ कईती भी पानी हुआ करत रहा। नाहीं अमोन इ पानी क इस्तेमाल खुद क दुस्मन स बचावइ बरे खाई क रूप में करत रहत रहा। इ पानी क उपयोग उ एक ठु किला क रूप में भी करत रहा। 9कूस अउ मिस्त्र अमोन क बहोत सक्ती प्रदान करत रहा। ओका पूत अउ लोबी क भी समर्थन मिला रहा। 10मुला नाहीं अमोन हार गवा। ओकरे लोगन क बंदी बनाइके कउनो पराए देस में लइ जावा गवा। गली क हर कोना पइ फउजियन ओकरे नान्ह गदेलन क पीटि पीटिके मार डाएन। उ पचे पौसा लोकाइ इ लखेन कि कउन महत्वपूर्ण मनई क कउन अपने हिआँ दास बनाइके राखइ। उ पचे सबहिं महत्वपूर्ण मनइयन क जंजीरन डइ दिहे रहेन।

11तउ नीनवे, तोहार भी कउनो नसे में धुत मनई क तरह, पतन होइ। तू लुकात फिरब्या। दुस्मन स दूर, तू कउनो सुरच्छित जगह हेरत फिरब्या। 12मुला नीनवे, तोहार सबहिं मजबूत गढ़ अंजीरे क पेड़े जइसा होइ जइहीं। नई अंजीरन पाकत हीं। एक ठु मनई आवत ह अउर पेड़ क झकझोर देत ह तउ अंजीरन उ मनई क मुँहे में गिरत हीं।

13नीनवे, तोहार लोग तउ मेहररूनन जइसे अहइ अउर दुस्मन क फउजी ओनका लइ लेइके बरे तइयार बइठा अहइ। तोहरी धरती क दुआर खुला पड़ा अहइ कि तोहार दुस्मन भितरे आइ जाइ। तोहरे दुआरन में काठे स बनी आँगल क आगी बारिके बर्बाद कइ दिहस ह।

14आपन सहरे क भितरे पानी जमा कइ ल्या, काहेकि दुस्मन क फउजी तोहरे सहर क घेरि लेइहीं। आपन सुरच्छा क मजबूत बनाव। ईटा बनावइ बरे जियादा माटी लिआवा। गारा बनाव अउर ईटा बनावइ बरे साँचा लिआवा। 15तू पचे इ सबइ काम कइ सकत ह। मुला फुन भी आगी तोहका पूरी तरह बर्बाद कइ देइ अउर तरवार तोहका मारि डइ। तोहार धरती अइसे देखीं देइ जइसे कउनो टिड्डियन क दल ओका चट कइ गवा ह।

नौ अमोन ऊपरी मिस्त्र क प्राचीन राजधानी जउन कि येबेस भी कहलावत ह।

आपन आप क टिड्डियन क दल जइसा बढावा। फुन अइसा होइ जा जइसे टिड्डियन क झुण्ड। 16तोहरे हिआँ अनेक अनेक बइपारी होइ गएन जउन अनेक ठउरन पइ जाइके चिजियन खरीदा करत रहेन। उ पचे ऐँतना अनगिनत होइ गएन जेतना अकास में तारा अहई। उ पचे टिड्डी दल क जइसे होइ गएन, जउन खात ह, अउर सब कछू क उ समइ तलक खात रहत ह जब तलक उ खतम नाहीं होइ जातिन अउर फुन छोड़िके चला जात ह।

17तोहरे सरकारी अधिकारी भी टिड्डियन जइसा ही अहई। इ पचे ओन टिड्डियन क नाई अहई जउन ठण्डा क दिन एक ठु चट्टाने पइ बइठि जात हीं, मुला जब सूरज चढ़इ लागत ह अउर चट्टान गरम होइ लागत ह तउ उ कहूँ

दूरि उड़ जात ह। कउनो नाहीं जानत, उ पचे कहीं चली गइल। तोहार अधिकारी भी अइसा होइहीं।

18हे अस्सूर क राजा, तोहार चरवाहन (मुखिया लोग) सोइ गएन। उ सबइ सक्तीसाली मनई नीदं में पड़ा अहई। अउर तोहार भेड़िन (परजा) अब पहाड़न पइ भटकत अहई। ओनका वापस लिआवइवाला कउनो नाहीं अहइ।

19नीनवे, तू बुरी तरह घायल भवा ह अउर अइसा कछू नाहीं अहइ जउन तोहरे घाव क भरि सकइ। हर कउनो जउन तोहरे बिनास क खबर सुनत ह, ताली बजावत ह। उ पचे सबइ खुस अहई। काहेकि ओ सबइ उ पीरा क महसूस किहन ह, जेका तू सदा ओनका पहोंचावा करत रहया।

# मीका

## सोमरोन अउ इस्त्राएल क सजा दीन्ह जाइ

1 यहोवा क सँदेस मीका लगे राजा योताम, आहाज अउ हिजकिय्याह क समइ मँ आवा। इ सबइ पुरुस यहूदा क राजा रहेन। मीका मोरेसेती स रहा। मीका सोमरोन अउर यरूसलेम क बारे मँ इ सबइ दर्सन देखेन।

2हे लोगो, तू पचे सबहिं सुन ल्या! हे धरती अउर जउन कछू धरती पइ अहइ, सुना। मोर सुआमी यहोवा इ पवित्तर मन्दिर स आइ। मोर सुआमी तोहरे विरोध मँ एक साच्छी क रूप मँ आइ।

3लखा, यहोवा आपन जगह स बाहेर जात अहइ। उ धरती क ऊँच जगहियन पइ चलइ बरे उतरिके तरखाले आवत अहइ।

4परमेस्सर यहोवा क गोड़े क नीचे पहाड़ टेघर जइहीं, घाटियन चरमराइ जइहीं। जइसे आगी क समन्वा मोम टेघर जात ह, जइसे ढालू जगह स पानी उतरत भवा बहत ह।

5अइसा काहे होई? इ एह बरे होई कि याकूब अपराध किहेस ह। काहेकि इस्त्राएल क लोग पाप किहेस ह।

## सोमरोन, पापे क कारण

कउन याकूब स पाप कराए रहेन? इ सोमरोन अहइ! यहूदा मँ कउन ऊँच ठउरन अहइ? उ सबइ यरूसलेम मँ अहइ।

6एह बरे मई सोमरोन क खाली मइदान अउर खंडहरन क ढेर बनाउब। इ अइसी जगह क नाई होइ जब जेहमों अंगूर क बाग लगावा जात हीं। मई सोमरोन क पाथरन क घाटी मँ फेंकि देब। मई ओकरी सबहिं नेंव क प्रदीसित कइ देब।

7ओकर सबइ मूरतियन टूकन मँ तोरि दीन्ह जइहीं। सारा धन जेका इ रण्डीबाज़ी दुआर कमाएस ह, आगी स भसम होइ अउर मई एकर लबार देवतन क मूरतियन क नस्ट कइ देब। काहेकि उ सबइ लाभ रण्डीबाज़ी दुआरा हासिल किहेन ह, अउर ठीक वइसा ही रण्डी क मजूरी मँ खर्च कीन्ह जाब।

## मीका क महान दुःख

8मई इ हाली आवइवाला बिनास क कारण बियाकूल होबउँ अउर हाय-हाय करिहउँ। मई पनही न पहिरब अउर न ओढ़ना धारण करब। सियारन क जइसे मई जोर स चिल्लाब। मई विलाप करब जइसे सुतुर्मर्ग करत हीं।

9सोमरोन क घाव नाहीं भर सकत ह। ओकर बियाधि यहूदा तलक फइलि गवा अहइ। इ मोर लोगन्क नगर-दुआर तलक पहाँच गवा बल्कि इ तउ यरूसलेम तलक आइ गवा ह।

10एकर बात गात क नगरी मँ जिन करा। अको मँ जिन रोआ। विलाप करा अउर बेत-आप्रा क माटी मँ लोटा।

11हे सापीर क निवासिन, तू अपने राहे नंगी अउर लज्जा होइके चली जा। उ सबइ लोग, जउन सानान क बसइया अहई, बाहेर नाहीं निकरिहीं। बेतेसेल क लोग रोवत बिलखिहीं अउर तू पचन्स सहारा लेइहीं।

12अइसा उ मनई जउन मारोत क बसइया अहइ, सुसमाचार आवइ क बाट जोहत भवा दुर्बल होत जात अहइ। काहेकि यहोवा स तरखाले यरूसलेम क मगर-दुआर पइ विपद उतरि अहइ।

13हे लाकीस क बसइयो, तेज घोड़न क रथन मँ जोरा। सिय्योन क पाप लाकीस मँ सुरू भए रहेन। काहेकि तू इस्त्राएल क पापन्क पाछे चलति अहा।

14तउ तोहका गात मँ मोरेसेत क बिदाई क उपहार देइ क अहइ। अकजीब क घराना इस्त्राएल क राजा लोगन क निरास करिहीं।

15हे मारेसा क बसइयो, तू पचन्क विरोध मँ मई एक तु मनई क लिआउब जउन तू पचन्क सबइ चिजियन्क छोरि लेइ। इस्त्राएल क महिमा अदुल्लाम मँ आइ।

16एह बरे तू पचे आपन बार कटवाइ ल्या अउर तू गंजा बनि जा। काहेकि तू पचे आपन गदेलन बरे जेनसे तू पचे पियार करत रह्या रोउब्या चिल्लउब्या। आपन मुड़न क गिद्ध क नाई गंजा होइ द्या। काहेकि उ पचे तू पचन्क छोड़ि देइ अउर बाहेर निकरि जाइ बरे मजबूर होइ जइहीं।

## लोगन्क बुरी योजनन

2 ओन लोगन क बुरा होइ, जउन पाप स भरी योजना क बनावत हीं। अइसे लोग बिछउना मँ सोवत भए सइयंत्र रचत हीं अउर पौ फाटत ही आपन सइयंत्रन पइ चलइ लागत हीं। काहेकि ओनके लगे ओनका पूरा करइ क सक्ती अहइ।

2ओनका खेत चाही तउ उ पचे ओन सबन्क लइ लेत हीं। ओनका घर चाही तउ उ पचे ओन सबन्क लइ लेत हीं। उ पचे कउनो मनई क छलत हीं अउ ओकर घर छोरि लेत हीं। उ पचे कउनो मनई क छलत हीं अउ ओसे ओकर चिजियन छोरि लेत हीं।

## लोगन्क सजा देइ क यहोवा क योजनन

3इहइ कारण अहइ कि यहोवा इ बातन क कहत ह: “देखा, मई इ परिवारे पइ बिपदन ढावइ क योजना रचत हउँ। तू पचे आपन सुरच्छा नाहीं कइ पउब्या। तू पचे घमण्ड स चलि छोड़ देब्या। काहेकि उ एक बुरा समइ होइ।



4उहड़ समइ लोग तू पचन्क हँसी उड़इही। तू तोहार बारे में लोग करुणा क गीत गइहीं अउर उ पचे कइहीं: 'हम पचे बर्बाद होइ गए। यहोवा मोरे लोगन्क धरती छोरि लिहस ह अउर ओका दूसर लोगन्क दइ दिहस ह। हँ उ मोर धरती क मोसे छोरि लिहस ह। यहोवा हमार धरती हमरे दुस्मन क बीच बाँटि दिहस ह।'

5'यहोवा क परिसद मैं कउनो मनई अइसा नाही होइ जउन भुइँया क बाँटइ बरे पासा फेंकिहीं।

### मीका क उपदेस देइ क मना करब

6लोग कहा करत ही, "तू हम पचन्क उपदेस जिन द्या। ओनका अइसे नहीं कहइ चाही, हम पइ कउनो भी बात बुरी नहीं परी। 7याकूब क लोगो, का तू आपन-आप स कहत अहइ, 'का यहोवा हमार संग आपन सब्र खो रहा अहइ? अगर उ सही मैं अइसा करत ही?' किन्तु मोर सब्द उ लोगन बरे नीक होइ जउन उचित तरीका स जिनत ह। का उ नाही अहइ?"

### परमेस्सर क लोग परमेस्सर क दुस्मन होइ गएन

8मुला अबहीं अबहीं, मोर ही लोग मोर दुस्मन होइ गवा अहइँ। तू पचे राहगीरन क ओढ़ना उतारत अहा। जउन लोग सोचत हीं कि उ पचे सुरच्छित अहइँ, मुला तू पचे ओनसे ही चिजियन क छोरि लेत ह जइसे उ पचे जुद्ध बंदी होइँ।

9मोरे मनइयन क मेहररूअन क तू पचे ओनके घरन स निकरि जाइके मजबूर किहा जउन घर सुन्नर अउ आरामदेह रहेन। तू पचे मोरी महिमा क ओनके नान्ह नान्ह गदेलन स हमेसा-हमेसा बरे छोरि लिहा ह।

10उठा अउर हिआँ स भागा। इ आराम क जगह नाही अहइ। काहेकि इ ठउर असुद्ध होइ ग अहइ, इ बर्बाद होइ जाइ। इ खउफनाक विनास होइ।

11अगर कउनो लबार नबी आवइ अउर उ लबार बोलइ, "तउ मइँ तोहका दाखरस अउर मदिरा क बारे मैं उपदेस देब" तउ उ तरह उ ओकर नबी बन जाइ।"

### यहोवा अपने लोगन्क बटोरी

12हे याकूब क लोगो, मइँ तू सबन्क बटोरब। मइँ निहिचइ ही तू सबन क एक जगह बटोरब। मइँ इस्राएल क बचे भए लोगन क बटोरब। मइँ ओनका वइसा बटोरब जइसे बाइ मैं भेड़िन बटोरी जात हीं। तउ उ पचे एक बड़ा भीड़ स जियादा हल्ला-गुल्ला करिहीं।

13तब कउनो एक जउन रास्ता खोलत ह लोगन क समन्वा जाइ। उ दुआरन तोड़ब अउर इ सबइ लोगन क नेतृत्व करब। उ सबइ लोग अजाद होइके उ सहर क तजिके निकरिहीं। ओनके समन्वा ओनकर राजा चली। लोगन्क समन्वा ओनकर यहोवा होइ।

### इस्राएल क मुखिया बुगई क अपराधी अहइँ

3 फुन मइँ कहेउँ, "हे याकूब क मुखिया लोगो, अब सुन ल्या। हे इस्राएल क प्रजा क सासक लोगो, अब सुन ल्या। तू पचन्क जानइ चाही कि निआव का होत ह।

2किन्तु तू पचन्क नेकी स घिना अहइ अउर तू पचे लोगन्क खाल तलक उतारि लेत अहा। तू पचे लोगन्क हाइन स मौँस नोच लइ लेत अहा।

3तू पचे मोरे लोगन्क बर्बाद करत अहा। तू पचे ओनकर खाल तलक ओनसे उतारत अहा अउर ओनकर हाइ तलक तोड़त अहा। तू पचे ओनकर हाइन अइसे तोड़त अहा जइसे हँड़ी मैं मौँस चढ़ावइ बरे।

4तू पचे यहोवा स बिनती करव्या मुला उ तू पचन्क जवाब नाही देइ। नाही, यहोवा आपन मुँहना तू पचन्स छुपाइ। काहेकि तू पचे बुरा करम किहे अहा।"

### लबार नबी

5इ उ अहइ जेका यहोवा लबार नबियन क बारे मैं बतावत ह जउन ओकर लोगन क गलत तरीका स निर्देसित करत ह: "अगर लोग एँ नबियन क खाइ क देत हीं, उ पचे ओकरे बरे सान्ति क कामना करी। मुला अगर लोग ओनका खाइके नाही देतेन, तउ उ पचे ओकरे बरे जुद्ध क कामना करी।

6एह बरे इ तू पचन बरे राति सा होइ। तू पचे कउनो दर्सन नाही लख पउव्या। तउ तू पचे इ अचरज कारज नाही करइ पाउव्या। एह बरे इ तू पचन्क अँधियारा जइसा लागी। नबियन पइ सूरज छुप जाइ अउर ओनके ऊपर दिन करिया पड़ि जाइ। 7भविस्स क द्रस्टा लजाइ जइहीं। उ सबइ लोग, जउन भविस्स लखत हीं, ओनकर मुँहना करिया होइ जइहीं। हँ, उ सबइ सबहिं आपन मुँहना बंद कइ लेइहीं काहेकि हुआँ परमेस्सर कइँती स कउनो जवाब नाही होइ।"

### मीका परमेस्सर क सच्चा नबी अहइ

8मुला यहोवा क आतिमा मोका सकती, नेकी अउर सामरथ स भरि दिहस रहा। मइँ याकूब क ओकर अपराधन क बताउब। मइँ इस्राएल क ओकरे पापन क बारे मैं कहब।

### इस्राएल क मुखिया दोखी अहइँ

9हे याकूब क मुखिया लोगो, इस्राएल क सासक लोगो, तू पचे मोर बात सुना! तू पचे निआव स घिना करत अहा। जउन चीज सोइ होइ तू पचे ओका टेड़ी कइ देत अहा।

10तू पचे सिथ्योन क निर्माण लोगन क हत्तिया कइके किहा; तू पचे यरूसलेम क भयंकर अपराधन क जरिये बनाए रह्या।

11यरूसलेम क निआवधीस झूठे फैसले देइ बरे घूस लेत रहेन। यरूसलेम क याजकन क धन देइ पड़त ह, एँकरे पहिले कि उ पचे लोगन्क सीख देइँ। लोगन्क नबी लोगन्क धन देइ पड़त ह। एँकरे पहिले कि उ पचे भविस्स मैं झाँकइ अउर फुन भी उ सबइ मुखिया सोचत हीं कि ओन पइ कउनो दण्ड नाही पड़ सकत। उ सबइ सोचा करत हीं, यहोवा ओनका बचाइ लेइ अउर उ पचे कहत हीं, "यहोवा हमरे बीच मैं रहत ह। एह बरे हमरे संग कउनो बुरी बात नाही घटि सकत ह।"

12हे मुखिया लोगो, तू पचन्क कारण सिथ्योन क बिनास होइ। इ कउनो जोते भए खेत क तरह सपाट होइ जाइ।

यरूसलेम पाथरन क टीला बन जाइ अउर मन्दिर क पहाड़ झाड़ियन स ढका भवा एक ठु सूनी पहाड़ी होइ।

### विवस्था यरूसलेम स आइ

**4** अगवा आवइवाली समइ इ घटना घटी। यहोवा क मन्दिर क पहाड़ सबहि पहाड़न में बहोत ही महत्व स भरा भवा होइ जाइ। ओका पहाड़न क ऊपर उठाइ दीन्ह जाइ। दूसर देसन क लोग ऐंकी कइँती उमड़ि पड़िहीं।

2अनेक दूसर रास्ट्र आइहीं अउर कइहीं, “आवा! यहोवा क पहाड़े पड़ ऊपर चलइँ। याकूब क परमेस्सर क मन्दिर चलइँ। परमेस्सर हम पचन्क आपन राह सिखाइ। तउ हम पचे ओकरे पथ पड़ चलबा।” काहेकि परमेस्सर क नेमन सिथ्योन स आइ अउर यहोवा क बचन यरूसलेम स आइ।”

3परमेस्सर बहोत स जातियन क निआव करी। परमेस्सर ओन ससक्त देसन क फइसला करी, जउन बहोत-बहोत दूर अहइँ अउर फुन उ सबइ आपन तरवारन गलाइके अउर ओनका पीटिके हरे क फार में बदल देइहीं। उ सबइ देस आपन भालन क पीटि पीटिके अइसे औजारन में बदलि देइहीं, जेनसे बृच्छन क काट छोट होत रहत ह। देस तरवारन क उठाइके आपुस में नाहीं लड़िहीं। अब उ सबइ जुद्ध क सबइ विद्या अउर जियाद नाहीं सीखिहीं।

4मुला हर कउनो आपन अंगूरे क बेलन क तरखाले अउर अंजीर क पेड़ क नीचे बइठा करी। कउनो भी मनई ओनका डेराइ नाहीं पाइ। काहे? काहेकि सर्वसक्तीमान यहोवा इ कहेस ह।

5दूसर देसन क सबहि लोग आपन देवतन क अनुसरण करत हीं। मुला हम पचे आपन परमेस्सर यहोवा क सदा-सर्वदा अनुसरण करत हीं।

### उ राज जेका वापिस लिआउब अहइ

6यहोवा कहत ह, “उ समइ में मई जउन लँगड़ा होइ गवा ह एक संग बटोरब। मई ओन लोगन क बटोरब जउन भेजा ग अहइ अउर ओन लोगन क जेकरे संग मई बुरा काम किहे रहउँ ह।

7उ “ध्वस्त नगरी” क लोग बचा भवा लोग होइहीं। उ सहर क लोगन क तजिके भाग जाइके मजबूर कीन्ह गवा रहा। मुला मई ओनका एक ठु सुदृढ़ जाति क रूप में बनाउब।” यहोवा ओनकर राजा होइ अउर उ सिथ्योन क पहाड़े पड़ स सदा सासन करी।

8हे रेवड़ क पहरा क मीनार, हे ओपेल, सिथ्योन क पहाड़ी, तू फुन स सरकार क जगह पड़ बइठब्या। हे बिटिया यरूसलेम,\* उ राज्ज तोहमाँ ही रहब जइसा अतीत में रहा।”

### इस्त्राएलियन क बाबुल क लगे काहे जाइ चाही?

9अब तू पचे काहे ऐंती ऊँच आवाज में गोहरावत अहा? का तोहोर सबन क राजा जात रहा बाटइ? का तू पचे आपन

**बिटिया यरूसलेम** यरूसलेम नगर क सीर्सक। हिब्रु सब्द क अरथ अहइ ‘बिटिया’ अउर ‘उपनगरी’। यरूसलेम क पर्वत क बिटिया क रूप में दिखाया गवा ह जउन बना गवा अहइ।

मुखिया खोइ दिहा ह? तू पचे अइसे तड़पत अहा जइसे कउनो मेहरारू बच्चा पड़दा करइ क समइ में तड़पत ह।

10सिथ्योन क बिटिया, तू पीरा क झेला। तू उ मेहरारू जइसा होइ जा जउन बच्चा पड़दा करइ क समइ में फड़फड़त ह। काहेकि अब तोहका नगर (यरूसलेम) क तजइ क बाटइ। तोहका खुले मइदान में रहइ क बाटइ। तोहका बाबुल जाइ क होइ किन्तु उ जगह स तोहार रच्छा होइ जाइ। यहोवा हुँआ आइ अउर उ तोहका तोहरे दुस्मनन स वापिस लइ आइ।

### दूसर जातियन क यहोवा बर्बद करी

11तोहसे लड़इ बरे अनेक जाति अइहीं। उ पचे कहत हीं, “सिथ्योन क लखा। ओह पड़ हमला करा!”

12लोगन्क ओनकर आपन योजनन अहइँ, मुला ओनका अइसी ओन बातन क पता नाहीं जेनके बारे में यहोवा योजना बनावत अहइ। यहोवा ओन लोगन्क कउनो खास प्रयोजन बरे हिआँ लिआवा। उ सबइ लोग वइसे कुचुर दीन्ह जइहीं जइसे खरिहाने में अनाज क पूरी कुचरी जात हीं।

### इस्त्राएल आपन दुस्मनन क पराजित कइके विजयी होइ

13“हे सिथ्योन क बिटिया, खड़ी होइ जा अउर तू ओन क कुचरि द्या। मई तोहका सक्तीसाली बनाउब। तू अइसी होउबिउ जइसे तोहरे सींग लोहा क अउर तोहरे खुर कौंसा क होइँ। तू बहोत स जातियन क नस्ट करब्या। तू ओनके धने क यहोवा क अर्पित करा। तू ओनकर खजानन क समूची धरती क सुआमी क समर्पित करब्या।”

**5** हे सुदृढ़ सहर, अब तू आपन फउजियन क बटोरा। दुस्मन हमला करइ क हम पचन्क घेरत अहइँ। उ पचे इस्त्राएल क जज क मुँहना पड़ आपन सौटा स प्रहार करिहीं।

### बेतलेहेम में मसीह जन्म लेइ

2हे बेतलेहेम एप्राता, तू यहूदा क छोटा सहर अहा अउर तोहार परिवार गनती में बहोत कम अहइ। किन्तु “इस्त्राएल क सासक” मोर बरे तोहसे आइ। बहोत पहिले सुदूर पुराने जमाने में ओकरे घराने क जड़न बहोत पहिले स होइहीं।

3यहोवा आपन लोगन्क ओनकर दुस्मनन क हाथे में सौंपि देइ। उ पचे उ समइ तलक हुअँइ पड़ बना रइहीं जब तलक उ मेहरारू आपन लरिका क नाहीं जन्म देत। फुन ओकरे बचा भवा भाईयन इस्त्राएल क लोगन्क लगे लउटिके अइहीं।

4तब इस्त्राएल क सासक खड़ा होइ अउर भेड़िन क झुंड क चराइ। यहोवा क सक्ती स उ ओनका राह देखँइ। उ यहोवा आपन परमेस्सर क अजूबा नाउँ क सक्ती स ओनका राह देखँइ। हुआँ सान्ति होइ, काहेकि उ समइ में ओकर महानता धरती क छोरन तलक पहोंच जाइ।

5हुआँ सान्ति होइ, अउर अस्सूर क सेना हमार बिसाल भवन तोड़ी, तउ इस्त्राएल क सासक सात ठु गड़रियन चुनी। नाहीं, हम पचे आठ मुखिया लोगन्क पाउब।

6उ पचे अस्सूर क लोगन पड़ आपन तरवारन स हुकूमत करिहीं। ओनका राज्ज तरवारन क सक्ती स नम्रोद क धरती

पइ सासन करिहीं। फुन इस्त्राएल क सासक हम पचन्क अस्सूर क उ सबइ लोगन्स बचाइ जउन हमरी धरती पइ अइहीं अउर उ पचे हमरी चउहद्दी क आपन पैड़ तले रौदिहीं।

7फुन बहोत स रास्ट्रन क बीच में याकूब क बची भइ सन्तान ओस क बूँदन जइसी होइहीं जउन यहोवा कईती स आइ होई। उ पचे घासे क बरखा जइसी होइहीं। उ पचे लोगन पइ आसरा नहीं रखिहीं। उ पचे कउनो मनई क इंतजार नहीं करिहीं।

8बहोत स लोगन क बीच याकूब क बचे भए लोग उ सेर जइसे होइहीं जउन जंगल क पसुअन क बीच होत ह। जब सेर बीच स गुजरत ह तउ उ हुवई जात ह, जहाँ उ जाइ चाहत ह। उ पसू पइ टूटि पड़त ह अउर उ पसू क कउनो बचाइ नहीं सकत ह। ओकर बचे भए लोग अइसे ही होइहीं।

9मई तू पचन क हाथ तोहारे दुस्मनन क खिलाफ उठउब अउर तू पचे ओनकर बिनास कइ डउब्या।

### लोग परमेस्सर क भरोसे पइ रइहीं

10यहोवा कहत ह: “उ समइ मई तू पचन्स तोहार सबन्क घोड़ा छोरि लेबउँ। तोहार सबन्क रथन क बर्बाद कइ देबउँ।

11तोहार सबन्क नगरन उजारि देबउँ। मई तोहार सबन्क सबहिं गढ़न क ढहाइ देबउँ।

12मई तोहार जादूगसन क नस्ट कइ देब। अउर तोहार लगे अइसा एक भी मनई नहीं होब्या जउन भविस्सवक्ता होइ।

13मई तोहार पचन्क लबार देवतन क मूर्तियन क बर्बाद करब। ओन लबार देवन क पाथरन क स्मृति-स्तंभ मई उखारिके लोकाँउबउ जेनका तू पचे आपन हाथन स बनाया ह। तू पचे ओनकर पूजा नहीं कइ पउब्या।

14मई असेरा क पूजा क खम्भन क नस्ट कइ देबउँ। मई तू पचन्क नगरन क तहस-नहस कइ देबउँ।

15मई आपन बदला किरोध स लेबउँ अउर ओह पइ तीव्र होबउँ जउन मोर नहीं सुनिहीं।”

### यहोवा परमेस्सर क सिकाइत

6 जउन यहोवा कहत ह ओह पइ तू पचे कान द्या। तू पचे पहाड़न क समन्वा खड़ा होइ जा अउर आपन मुकद्दमा क पैस करा। पहाड़न क तोहार सिकायत सुनइ द्या।

2यहोवा क आपन लोगन स सिकाइत अहइ। पहाड़ो, तू सबइ यहोवा क सिकाइत क सुना। धरती क नेंव, यहोवा क सिकाइत क सुना। उ साबित करी कि इस्त्राएल दोखी अहइ।

3यहोवा कहत ह: “हे मेरे लोगो, का मई कबहुँ तोहार सबन्क कउनो बुरा कियेउँ ह? मई कइसे तोहार सबन्क जिन्गगी कठिन कियेउँ ह? मोका बतावा, मई तोहारे सबन्क संग का कियेउँ ह?

4मई तू पचन्क बतावत हउँ जउन मई तोहारे सबन्क संग कियेउँ ह, मई तू पचन्क मिस्त्र क धरती स निकारि लियाएउँ, मई तू सबन्क गुलामी स मुक्ति दियाएउँ रहे। मई तू पचन्क निअरे मूसा, हारून अउ मरियम क पठए रहेउँ।

5हे मोर लोगो, मोआब क राजा बालाक क बुरा जोजना क सुमिरा। उ सबइ बातन क सुमिरा जउन बोर क पूत बिलाम बालाक स कहे रहेन। उ सबइ बातन क सुमिरा जउन सित्तीम स गिल्गाल तलक घटी रहिन। तबहिं समुझ पउब्या कि यहोवा उचित अहइ।”

### परमेस्सर हम पचन्स का चाहत अहइ?

6जब मई यहोवा क समन्वा जाबउँ अउर परणाम करँउ, तउ परमेस्सर क समन्वा आपन संग का लइके जाबउँ? का यहोवा क समन्वा एक बरिस क बछवा क होमबलि लइके जाबउँ?

7का यहोवा एक हजार भेड़न स या दस हजार तेल क नदियन स खुस होइ? का आपन पापे क बदले मँ मोका आपन पहली संतान क अर्पित करइ चाही? का मोका पइदा होआ बच्चा आपन पापन क बदले मँ दे देइ चाही?

8हे मनई, यहोवा तू पचन्क उ बातन बताएन ह जउन उत्तिम अहइ। इ सबइ उ सबइ बातन अहइ, जेनकर यहोवा क तू सबन्स अपेच्छा अहइ: उ सब करा जउन दूसर लोगन बरे नीक रहा। दयालु रहा, अउर आपन जिन्गगी परमेस्सर क संग विनम्रता स आगे बढ़ावा।

### इस्त्राएल क लोग का करत रहेन?

9यहोवा क वाणी यरूसलेम क गोहरावत अहइ। बुद्धिमान मनई यहोवा क नाउँ क मान देत हीं। सजा क डण्डा पइ धियान द्या। ओह पइ धियान द्या जउन भाग्य अहइ!

10का अबहुँ भी दुट्ट आपन चोरोंए खाजाना क छुपावत अहइ? का उ पचे अबहुँ भी तउल मँ ओन खोटा टोकरियन\* क प्रयोग करत ही, जेसे यहोवा घिना करत ही?

11का मई ओन दुट्ट लोगन क दोस मुक्त कइ देबउँ जउन अबहुँ भी गलत बाँटन अउर खोट तराजू लोगन क ठग लेइ क कामे मँ लियावत हीं? का मई ओन दुट्ट लोगन क दोस मुक्त कइ देबउँ, जउन अबहुँ भी अइसी गलत तउल क इस्तेमाल करत हीं?

12उ सहर क धनी मनई अबहुँ भी क्रूर करम करत ही। उ सहर क बसइया अबहुँ भी झूठ बोला करत हीं। हीं, उ पचे लोग मनगढ़ंत झूठ क बोला करत हीं।

13तउ मई तू पचन्क सजा देब सुरू कइ दिहेउँ ह। मई तू पचन्क तोहार पचन्क पापन बरे बर्बाद कइ देबउँ।

14तू पचे खइया क खाब्या मुला तोहार पेट नहीं भरी। तू पचे फुन भी भूखा रहब्या। तू लोगन्क सुरच्छित जगह पइ लियावइ बरे जतन करब्या किन्तु मई ओनका तोहारे दुस्मनन क तरवारे क देब।

15तू पचे आपन बिया बोउब्या किन्तु तू पचे ओका नहीं काटब्या। तू पचे घानी मँ पेरिके आपन जइतून क तेल निचोरब्या, मुला तू पचन्क उ तेल क इस्तेमाल नहीं करिहीं। तू पचे आपन अंगूरन क खूँदिके निचोरब्या मुला तू दाखरस नहीं पिअइहीं।

**खोटा टोकरियन** बाट टोकरियन जउन कि असल मँ छोटा रहेन ताकि ओन लोगन क धोखा दीन्ह जाइ सकी जउन उ समान खरदत ह जउन कि वजन या मात्रा क अनुसार बेचा जात अहइ।

16अइसा काहे होइ? काहेकि तू पचे ओग्री क नेमन पर चलत अहा। तू पचे ओन बुरी बातन क करत अहा जेनका आहाब क परिवार करत रहा। तू पचे ओनकर सिच्छन पइ चलत रहत अहा एँह बरे मई तू पचन्क नस्ट भ्रस्ट कइ देबउँ। तू पचन्क सहरे क लोग क हँसी होइ। तू पचन्क दूसर रज्जन क घिना झेलइ क पड़ी।

### लोगन्क पाप आचरण पइ मीका क बियाकुल होब

7 मई बियाकुल अहई। काहेकि मई गरमी क उ फले जइसा अहउँ जेका अबहुँ तलक बिन लीन्ह ग अहइ। मई ओन अंगून जइसा अहउँ जेनका तोरि लीन्ह ग अहइ। अब हुआँ कउनो अंगूर खाइ क नाहीं बचा अहइ। सुरूआती क अंजीर जउन मोका भावत हीं, एक भी नाहीं बची अहई।

2एकर इ अरथ अहइ सबहिं सच्चे लोग जात रहत अहई। कउनो भी सज्जन मनई इ पहँटा मँ नाहीं बचा अहइ। हर मनई कउनो दूसर क मारइ क घात मँ रहत ह। हर मनई आपन ही भाई क फँदा मँ फँसावइ क जतन करत बाटइ।

3लोग दुइनउ हाथन स बुरा करइ मँ होसियार अहई। अधिकारी लोग रिसवत मँगत हीं। निआव क जज अदालतन मँ फइसला बदलइ बरे घूस लेत रहत हीं। “महत्वपूर्ण मुखिया” खरा अउ निस्पच्छ निर्णय नाहीं लेतेन। ओनका जइसा भावत ह उ पचे वइसा ही काम करत हीं।

4हिआँ तलक कि ओनकर सर्वोच्च काँटन क झाड़ी जइसा होत ह। हिआँ तलक कि ओनकर सबन त जियादा धर्मी मनई भी काँटन क झाड़ी स जियादा टेंढ होत ह।

### सजा क दिन आवत बा

उ दिना जेका तू अपेच्छा किहे रहा जउन तोहार सजा बरे होइ, आवत ही। अब तू पचन उलझ जाब्या।

5तू पचे आपन पड़ोसी क भरोसा जिन करा। तू पचे मित्र क भरोसा जिन करा आपन पत्नी तलक स खुलिके बात जिन करा।

6आपन ही घरे क लोग एक दूसरे क संग दुस्मन जइसा बेउहार करिहीं। पूत आपन बाप क आदर नाहीं करी। बिटिया आपन मताहरी क खिलाफ होइ जाइ। पतोहू आपन सास क खिलाफ होइ जाइ।

### यहोवा बचइया अहइ

7मई मदद बरे यहोवा क निहारब। मई परमेस्सर क इंतजार करब कि उ मोका बचाइ लेइ। मोर परमेस्सर मोर सुनी।

8मोर पतन भवा ह। मुला हे मोरे दुस्मन, मोर हँसी जिन उड़ावा। मई फुन स खड़ा होइ जाबउँ। यदपि आनु मई अँधियारा मँ बइठा हउँ यहोवा मोरे बरे प्रकास होइ।

### यहोवा छिमा करत ह

9यहोवा क खिलाफ मई पाप किहे रहेउँ। एँह बरे उ मोह पइ कोहान रहा। मुला अदालत मँ उ मोरे अभियोग क वकालत करी। उ, इ सबइ ही काम करी जउन मोरे बरे

उचित अहइ। फुन उ मोका बाहेर प्रकास मँ लइ आइ अउर मई ओकरे छुटकारा का लखब।

10फुन मोर बैरिन इ लखी अउर लजाइ जाइ। मोर बैरिन इ मोसे कहे रही, “तोहार परमेस्सर यहोवा कहाँ बा?” उ समइ, मई ओह पइ हँसब। लोग ओका अइसे कुचरि डइहीं जइसे गलियन मँ कीचं कुचरि डइ जात हीं।

### यहूदी लउटइ क अहई

11उ समइ आइ, जब तोहरे देवारन क फुन निर्माण होइ। एक दिना तोहार देवार बहोत दूर तलक बढ़िही।

12तोहार लोग तोहरी धरती पइ लउटि अइहीं। उ सबइ लोग अस्सूर स अइहीं अउर उ सबइ लोग मिस्त्र क सहसन स अइहीं। तोहार लोग मिस्त्र स अउर परात नदी क दूसरी छोर स अइहीं। उ सबइ पच्छिम क समुदर स अउर पूरब क पहाड़ी स अइहीं।

13धरती ओन लोगन क कारण जउन एकर बसइयन रहेन बर्बाद भइ रही, ओन करमन क कारण जेनका उ पचे करत रहेन।

14आपन लोगन ऊपर आपन साही राजदण्ड स हुकूमत करा। आपन लोगन क रेवइ पई हुकूमत करा। लोगन क उ रेवइ जंगलन मँ अउर कर्मेल क पहाड़े पइ अकेल्ले रहत ह। उ रेवइ बासान मँ रहत ह अउर गिलाद मँ बसत ह जइसे उ पहिले रहा करत रहा।

### इस्त्राएल आपन दुस्मनन क हयाइ

15जब मई तू पचन्क मिस्त्र स निकारिके लइ आए रहेउँ, तउ मई बहोत स चमत्कार किहे रहेउँ। वइसेन ही अउर चमत्कार मई तू पचन्क देखौँउब।

16उ सबइ चमत्कारन क सबइ जाति लखिहीं अउर लजाइ जइहीं उ सबइ जातियन लखिहीं कि ओनकर “सक्ती” मोरे समन्वा कछू नाहीं अहइ। उ सबइ चकित रहि जइहीं अउर उ सबइ आपन मुँह पइ हाथ रखिहीं। उ पचे कान क ढँपि लेइहीं अउर कछू नाहीं अनकिहीं।

17उ पचे धूरि चाटत सौँपन क नाई अउर रेंगत भए जीव क नाई धरती पइ रहई। उ पचे अइसे किरवन नाई रेंगत रहई आपन बिलन स निकरत ही। उ पचे डेरत-काँपत भए हमरे परमेस्सर यहोवा क लगे जइहीं। परमेस्सर, उ पचे तोहरे समन्वा डेरइहीं।

### यहोवा क स्तुति

18तोहरी नाई कउनो परमेस्सर नाहीं अहइ। तू पापी लोगन्क छिमा कइ देत अहा। तू आपन बचे भए लोगन क पापन क छिमा करत अहा। यहोवा सदा कोहान नाहीं रही, काहेकि ओका तउ दयालु ही रहब भावत ह।

19ओका हम पचन पई फुन दया करि द्या। ओका हमरे पापन स छुटकारा पावइ द्या। उ हमरे पापन क दूर गहिर सागरे मँ लोकाइ देब्या।

20याकूब बरे तू फुरइ रहब्या। इब्राहीम बरे तू दयालु रहब्या। तू अइसी ही प्रतिग्या बहोत पहिले हमरे पुरखन क संग किहे रहया।

# योना

## परमेस्सर क बोलाउब अउ योना क भागब

1 अमित्तै क पूत योना स यहोवा कहेस। यहोवा कहेस, 2“नीनवे\* एक ठु बड़का नगर अहइ। हुआँ क लोग जउन पाप करम करत अहई, ओनमों बहोत स पापन क बारे में मई सुनेउँ ह। एह बरे तू उ सहरे में जा अउर हुआँ क लोगन्क बतावा कि उ पचे ओन बुरे पापन करब तजि देई।”

3योना परमेस्सर क बात नाहीं मानइ चाहत रहा, तउ योना परमेस्सर स कहूँ दूरि पराइ बरे जतन किहेस। तउ योना यापो\* कइँती चला गवा। योना एक ठु नाव लिहेस जउन सुदूर सहर तर्सीस\* कइँती जात रही। योना आपन जात्रा बरे धन दिहस अउर उ नाव पइ जाइके चढ़ा। योना चाहत रहा कि इ नाव पइ उ लोगन्क संग तर्सीस चला जाइ अउर कहूँ दूरि पराइ जाइ।

## खउफनाक तूफान

4मुला यहोवा सागरे में एक ठु खउफनाक तूफान उठाइ दिहस। आँधी सागरे क बहोत असान्त कइ दिहेन इ अइसा लागत रहा कि जहाज क टूका-टूका होइ जाब्या। 5तूफान ऐँतना प्रबल रहा कि नाव क बूड़इ स बचावइ बरे ओका तनिक हलका कइ दीन्ह जाइके निर्णय कीन्ह गएस। तउ मल्लाह नाव क सामान क उठाइके सागरे में बहावइ लागेन। उ पचे बहोतइ ससाइ ग रहेन। हर मनई अपने अपने देवतन स पराथना करइ लागेन।

योना सोवइ बरे नाव में खाले तलघरा चला गवा रहा, अउर उ सोवत रहा। 6नाव क प्रमुख खेवइया योना क इ रूपे में लखिके कहेस, “उठा! तू काहे सोवत अहा? आपन परमेस्सर स पराथना करा। होइ सकत ह, तोहार परमेस्सर तोहार पराथना सुनि लेइ अउर हम पचन्क बचाइ लेइ।”

## इ तूफान काहे आवा?

7मनइयन फुन आपुस में कहइ लागेन, “हम पचन्क इ जानइ बरे कि हम पचन्पइ बिपदा कउने कारण पड़ति अहई, हम पचन्क पौसन लोकाँवइ चाही।”

**नीनवे** असीरिया क राजधानी। असीरिया क फउज उत्तरी इस्त्राएल क बर्बाद 723-721 ई पू में किहस।

**यापो** भूमध्य सागर स लगा इस्त्राएल क समुदी तट क एक ठु कसबा।

**तर्सीस** साइद इ स्पेन में एक सहर। इ पच्छिम में बहोतइ दूर रहा जहाँ योना पहुँच सका। नीनवे इस्त्राएल क पूरब में रहा।

तउ लोगन पासन्क लोकाँएन। पौसनस इ परगट भवा कि बिपदन योना क कारण आइ अहई। 8एह पइ मनइयन योना स कहेन, “इ केकर दोख अहइ, जेकरे कारण इ सबइ बिपदन हम पचन पइ पड़ी अहई? हम पचन्क बतावा तोहार काम धंधा का अहइ? तू कहाँ स आवत अहा? तोहार देस कउन स बाटइ? तोहार आपन लोग कउन अहई?”

9योना मनइयन स कहेस, “मई एक ठु हिब्रू अहउँ अउर सरगे क परमेस्सर यहोवा क उपासना करत हउँ, उ उहइ परमेस्सर अहइ, जउन सागरे अउ धरती क दुइनउँ क रचेस ह।”

10योना मनइयन स कहेस कि उ यहोवा स दूरि भागत अहइ। जब मनइयन क इ क पता लागि तउ उ पचे बहोतइ ससाइ गएन। मनइयन योना स कहेन, “तू इ पाप आपन परमेस्सर क खिलाफ काहे किहया ह?”\*

11ओहर आँधी अउ तूफान अउर समुदर क लहरियन तेज स तेज होत भइ जात रहिन। तउ मनइयन योना स कहेन, “समुदर क सान्त करइ बरे हम पचन्क तोहरे संग का करइ चाही?”

12योना मनइयन स कहेस, “मई जानत हउँ कि मोरे कारण ही समुदर में इ तूफान आवा ह। तउ तू पचे मोका समुदरे में लोकाइ द्या। एहसे तूफान सान्त होइ जाइ।”

13मुला उ पचे योना क समुदर में लोकावइ नाहीं चाहत रहेन। मल्लाह नइया क किनारे वापस लिआवइ बरे ओका खेवइ क जतन करइ लागेन। मुला उ पचे वइसा नाहीं कइ पाएन, काहेकि आँधी, तूफान अउ समुदर क लहरियन बहोत ताकतवर रहिन। अउर उ सबइ तेज स तेज होत जात रहिन।

## योना क सजा

14तउ मनइयन यहोवा क गोहँरावत भए कहेस, “हे यहोवा, इ मनई क हम पचे एकर ओन बुरे करमन बरे समुदर में लोकावत अही, जउन इ किहेस ह। किरपा कइके, तू हम पचन्क कउनो बेकसूर मनई क हत्तियारा जिन कइया। एकरे हत्तिया बरे तू हम पचन्क जिन मारि डया। हम पचे जानित ह कि तू यहोवा अहा अउर तू जइसा चहब्या, वइसा ही करब्या। मुला किरपा कइके तू हम पचन्प दयालु हवा।”

15तउ मनइयन योना क समुदरे में लोकाँइ दिहन। तूफान थम गवा, समुदर सान्त होइ गवा। 16जब मनइयन इ लखेन, तउ पचे यहोवा स डेराइ लागेन अउ ओकर सम्मान

तू इ ... किहया ह साब्दिक “तू का किहस ह।”

करइ लागेन। मनइयन एक ठु बलि दिहन, अउर यहोवा स बिसेस मन्तन क माँगेन।

17 योना जब समुदर में गिरा, तउ यहोवा योना क लील जाइ बरे एक ठु बहोत बड़की मछरी पठएस। योना तीन दिन अउ तीन राति तलक ओ मछरी क पेटे में रहा।

2 योना जब मछरी क पेटे में रहा, तउ उ आपन परमेस्सर यहोवा क पराथना किहेस। योना कहेस,  
2"मई गहिर विपदा में रहेउँ। मई यहोवा क दोहाइ दिहेउँ अउर उ मोका जवाब दिहस। मई गहिर कब्र क बीचउ बीच रहेउँ। हे यहोवा, मई तोहका गोहँराएँ अउर तू मोर पुकार सुन्या!

3"तू मोका समुदरे में लोकॉइ दिहे रह्या। तोहार ताकतवर लहरियन मोका थपेड़ा मारेन, मई समुदरे क बीच में मई गहिरा स गहिरा उतरन चला गएँ। मोरे चारिहूँ कइँती सिरिफ पानी ही पानी रहा।

4"फुन मई सोचेउँ, 'अब मई, जाइ क मजबूर हउँ, जहाँ तोहार दृस्टि मोका देख नहीं पाइ।' मुला मई सहायता पावइ क तोहरे पवित्तर मन्दिर कइँती निहारत रहब।

5 समुदर क जल मोका लील लिहेस ह। पानी मोर मुँह बंद कइ दिहस, अउर मोर साँस घुटि गइ। मई गहिर समुदरे क बीच उतरत चला गएँ मोरे मूँडे क चारिहूँ ओर खरपतवार लपट गएन ह।

6 मई समुदरे क तलहटी पइ पड़ा रहेउँ, जहाँ पर्वत जन्म लेत हीं। मोका अइसा लाग, जइसे इ बन्दीघरे क बीच सदा सर्वदा बरे मोह पइ ताला जड़ा अहई। मुला हे मोर परमेस्सर यहोवा, तू मोका मोर इ कब्र स निकारि लिहा। हे परमेस्सर, तू मोका जिन्नगी दिहा।

7 जब मई बेहोस होत रहेउँ। तब मई यहोवा क सुमरन किहेउँ हे यहोवा, मई तोहसे बिनती किहेउँ अउर तू मोर पराथनन आपन पवित्तर मन्दिर में सुन्या।

8 लोग जउन बेकार मूरतियन क पूजा करत हीं यहोवा क छोड़ दिहेस जउन कि ओन लोगन बरे दयालु रहेन।

9 मुक्ति तउ बस सिरिफ यहोवा स आवत ह! हे यहोवा, मई तोहका सबइ बलि देब, अउर तोहार गुन गाउब। मई तोहार धन्यवाद करब। मई तोहार मन्तन माँगब अउर आपन मन्तन क पूरा करब।"

10 फुन यहोवा उ मछरी स कहेस अउर उ योना क झुरान धरती पइ आपन पेटे स बाहेर उगलि दिहस।"

### परमेस्सर क बोलउब अउर योना क आग्या पालन

3 एकरे पाछे यहोवा योना स फुन कहेस। यहोवा कहेस,  
2"तू नीनवे क बड़के नगर में जा अउर हुआँ जाइके, जउन बातन मई तोहका बतावत हउँ, ओनकर सिच्छा द्या।"

3तउ यहोवा क आग्या मानिके योना नीनवे क चला गवा। निनवे एक ठु विसाल नगर रहा। उ एँतना विसाल रहा, कि उ नगरे में एक किनारे स दूसर किनारे तलक मनइयन क पैदल चलिके तीन दिन क समइ लागत रहा।

4तउ योना सहर क जात्रा सुरू किहस अउर सारे दिन उपदेस दिहस। योना कहेस, "चालीस दिन पाछे नीनवे तबाह होइ जाइ।"

5 परमेस्सर कइँती मिले भए इ सँदिस पइ, नीनवे क लोग बिस्सास किहन अउर उ सबइ लोग कछू समइ बरे खइया तजिके पापन पइ सोच-बिचार करइ क निर्णय लिहन। लोग आपन दुःख परगट करइ बरे खास तरह क ओढ़ना धारण किहेन। सहरे क सबहिं लोग चाहे उ पचे बड़कवा या बहोतइ छोट होइ, अइसा ही किहन।

6 नीनवे क राजा इ सबइ बातन सुनेन अउर उ भी आपन बुरे करमन क सोक मनाएन। एकरे बरे राजा आपन सिंहासन तजि दिहस। उ आपन राजसी वस्त्र हटाइ दिहस अउर आपन दुःख परगट करइ बरे सोक वस्त्र धारण कइ लिहस। एकरे पाछे उ राजा धूरि में बइठि गवा। 7 राजा एक खास सँदिस लिखवाएस अउर उ सँदिस क सारे सहर में ढिंढोरा पिटवाएस:

राजा अउर ओकर बड़कन सासक लोगन कइँती स आदेस रहा:

लोगन क कउनो समूह क अउ न ही कउनो जनवारन क झुण्ड क चरागाहे में जाइ दीन्ह जाइ। अउर न ही कछू खइहीं अउर न जल पिइहीं। 8 बल्कि हर मनई अउ हर गोरू टाट पहिरही जेहसे इ देखॉइ देइ कि उ सबइ दुःखी अहई। लोग ऊँची अवाज में परमेस्सर क गोहरइहीं। हर मनई क आपन जिन्नगी बदलइ क होइ अउर ओका चाही कि उ बुरे करमन क तजि देइ।

9 तब होइ सकत ह कि परमेस्सर क इच्छा बदलि जाइ अउर उ जउन योजना रचे बाटइ, वइसी बात न करइ। होइ सकत ह कि परमेस्सर क इच्छा बदलि जाइ अउर कुपित न होइ। तब होइ सकत ह कि हम पचन्क सजा न दीन्ह जाइ।

10 लोग जउन बातन किहे रहेन, ओनका परमेस्सर लखेस। परमेस्सर निहारेस ह कि लोग बुरा करम करब बंद कइ दिहेन। तउ परमेस्सर आपन मन बदल दिहस अउर जइसा करइ क उ योजना रचे रहा, वइसा नहीं किहस। परमेस्सर लोगन क सजा नहीं दिहस।

### परमेस्सर क करूणा स योना कोहाइ गवा

4 योना इ बात पइ खुस नहीं रहा कि परमेस्सर नगर क बचाइ लिहे रहा। योना कोहाइ गवा। 2उ यहोवा स सिकायत करत भवा कहेस, "मई जानत रहेउँ कि अइसा ही होइ। मई तउ अपने देस में रहेउँ, अउर तू ही मोहसे हिआँ आवइ क कहे रह्या। उहइ समइ मोका इ पता रहा कि तू इ पापी नगर क लोगन क छिमा कइ देब्या। मई एह बरे तर्सीस जाइ क सोचे रहेउँ। मई जानत रहेउँ कि तू एक दयालु परमेस्सर अहा! मई जानत रहेउँ कि तू करूणा देखॉवत ह अउ मनइयन क सजा देइ नहीं चहत्या। मोका पता रहा कि तू करूणा स पूर्ण अहा। मोका गियान रहा कि इ सबइ लोग पाप करब तजि दिहेन तउ तू एँनकर बिनास क योजनन क बदल देब्या। 3तउ हे यहोवा, अब मई तोहसे इहइ माँगत हउँ, कि तू मोका मारि डवा। मोरे बरे जिअत रहइ स मरि जाब उत्तिम अहइ।"

4एह पड़ यहोवा कहेस, “का तू सोचत अहा कि बस एह बरे कि मई ओन लोगन क कस्ट नाहीं दीन्ह, तोहार किरोध करब नीक बाटइ?” 5इ सबइ बातन स योना अबहुँ कोहान रहा। तउ उ सहर क बाहेर चला गवा। योना एक ठु अइसे जगह पड़ चला गवा जउन सहर क पूरब प्रदेस क निअरे रहा। योना हुआँ आपन बरे एक पड़ाव बनाइ लिहस। फुन ओकर छाया में हुवैइ बइठे-बइठे उ इ बाते क बाट जोहइ लाग कि देखी इ सहरे क साथ का घटति ह।

### रेंडी क पउथा अउ किरवा

6ओहर यहोवा रेंडी क एक ठु अइसा पउथा लगाएस जउन बहोत तेजी स बाढ़ि गवा अउ योना पड़ छाड़ गवा। एँहसे योना क बइठे बरे एक ठंडी जगह बनाइ दिहस। योना क एहसे अउर जियादा आराम मिला। इ पउथे क कारण योना बहोत खुस रहा।

7अगले दिन भिंसारे उ पउथे का एक ठु हीसा खाइ लेइ बरे परमेस्सर एक ठु किरवा पठएस। किरवा उ पउथे क खाब सुरू कइ दिहस अउर उ पउथा मुरझाइ गवा।

8सूरज जब अकासे में ऊपरि चढ़ि चुका रहा, परमेस्सर पुरवइया क गरम हवा चलाइ दिहस। योना क मूँडे पड़ सूरज

चमकत रहा, अउर योना एक दम्मइ निर्बल होइ गवा रहा। योना परमेस्सर स चाहेस कि उ ओका मउति दइ देइ। योना कहेस, “मोरे बरे जिअत रहइ स नीक बाटइ कि मई मरि जाउँ।”

9मुला परमेस्सर योना स कहेस, “बतावा, तोहरे विचार में का सिरिफ एह बरे इ पउथा झुराइ गवा अहइ, तोहार किरोध करब उचित अहइ?”

योना जवाब दिहस, “हाँ, मोर किरोध करब उचित ही बाटइ। मोका एँतना किरोध आवत ह कि जइसे बस मई आपन परान ही दइ देउँ।”

10एह पड़ यहोवा कहेस, “लखा, उ पउथे बरे तू तउ कछू भी नाहीं किहा! तू ओका उगाइ दिहा तलक नाहीं। उ राति में फूटि गवा रहा अउर अगले दिना उ नस्त होइ गवा अउर अब तू पउथे बरे एँतना दुःखी अहा।

11अगर तोहका उ पउथे बरे एँतना चिन्ता अहइ तउ का मोका नीनवे जइसा बड़ा सहर पड़ दाया नाहीं राखी चाही जेहमाँ बहोत स लोग अउर बहोत स जनावरन रहत हीं? जहाँ 1,20,000 स जियादा लोग रहत हीं, जउन इ भी नाहीं जानतेन कि का उ पचे गलत काम करत अहइ? का मोका ओन लोगन क बचाइ नाहीं चाही?”

# ओबद्याह

## एदोम दण्डित होइ

इ ओबद्याह क दर्शन अहइ। मोर सुआमी यहोवा एदोम क बारे में इ कहत ह: हम यहोवा परमेस्सर स इ संदेस पाइ गए ह। रास्ट्रन क एक ठु दूत पठवा गवा ह। उ कहेस, “हम पचन क एदोम क खिलाफ लड़इ बरे चलइ द्या।”

## यहोवा एदोम स कहत ह

2“एदोम, मई तोहार सबन त नाह रास्ट्र बनाइ देब। लोग तोहसे बहोत घिना करिहीं।

3तू आपन घमण्ड क जरिये छला गवा अहा। तू उँचकी पहाड़ियन क गुफन में रहत बाट्या। तोहार घर पहाड़ियन में उँचाई प बाटइ। तू आपन मने में कहत अहा, ‘मोका कउनो भी धूरी नहीं चटाइ सकत।’”

## एदोम नीच कीन्ह जाइ

4परमेस्सर यहोवा इ कहत ह: “जदपि तू उकाब क तरह ऊपर उड़ा, अउर आपन धोसला तारन क बीच बनाइ ल्या, तउ भी मई तोहका हुआँ स खाले उतारबउँ।

5तू फुरइ बरबाद होइ जाब्या। देखा। कउनो चोर तोहरे हिआँ आवत ही। जब, राति में डाकू आवत ही। तउ उ पचे भी ओतना ही चोराइके या लूटिके लइ जात ही जेतैना लइ जाइ सकत ही। तोहार बगियन में जब मजदूर अंगूर तोरइ आवत ही तउ अंगूर तोरइ क पाछे उ पचे कछू न कछू अंगूर छोड़िके जात ही।

6मुला हे एदोम। तोहसे तोहार सब कछू छोर लीन्ह जाइ। लोग तोहरे सबहिं खजानन क हेरि लेइही अउर हथियाइ लेइही।

7उ सबइ लोग जउन तोहार मीत अहई, तोहका देस स बाहेर जाइ का मजबूर करिहीं। तोहार संग सान्ति स रहइवालन तोहका धोखा देइही अउर तोहका हरइही। उ सबइ लोग जउन तोहार रोटिन्क तोहार संग खावात ह तोहार बरे फंद डावइ क योजना बनाव ह। ‘तू एँका नहीं समुझ सकब्या।’”

8यहोवा कहत ह: “ओह दिन, मई सदोम क बुद्धिमान लोगन्क बरबाद करब अउ मई एसाव पहाड़े स समुझवारी क नास करब।

9तबहिं, हे तेमान, तोहार सक्तीसली लोग भयभीत होइही अउर एसाव पहाड़े क हर मनई मारि जाब्या।

10तू सरम स धँसि जाब्या, अउर तू हमेसा बरे बरबाद होइ जाब्या। काहेकि आपन भाई याकूब बरे तू पचे एँतना क्रूर निकरया।

11ओह समइ, तू इस्त्राएल क दुस्मन होइ गवा। अजनबी याकूब क खजाना लइ गया। बिदेसी लोग इस्त्राएल क नगर-दुआर में घुसेन। उ बिदेसी लोग गोट डाइके इ निहचय

किहेन कि उ पचे यरूसलेम क कउन स हीसा लेइही। तउ उ समइ तू ओन लोगन क दुस्मनन क नाई रह्या।

12तू आपन भाई क बिपत काल में हँस्या, तू इ नाही करइ चाही रह्या तू पचे तबहिं खुस रह्या जबहिं लोग यहूदा क बरबाद किहेन। तू वइसा नाही करइ चाही रह्या। ओनकर बिपत क समइ तू ओनकर खिल्ली ओड़ैया।

13तू मोरे लोगन्क नगर-दुआर में घुस्या अउर ओनकर समस्यन पइ हँस्या। अउर तोहका अइसा नाही करइ क चाही रहा। तोहका ओकरे खजानन क दूसर दुस्मनन क नाई नाही लेइ चाही रहा।

14तोहका ओन लोगन्क चोराहे पइ नाही धइ चाही जउन बचिके निकरत चाहत रहा अउर तोहका ओका ओकरे दुस्मनन क वापिस नाही देइ चाही रहा।

## सब रास्ट्रन क निआव होब

15सबहिं रास्ट्रन पइ हाली ही यहोवा क दिन आवत अहइ। तू दूसर लोगन क संग बुरा किहा। उ सबइ ही बुरइयन तोहार संग घटिही। उ सबइ बुरइयन तू तोहार कपारे पइ उतरि अइही।

16काहेकि तू दाखरस पीके मोरे पवितर पहाड़े पइ खुसी मनाया। वइसेन ही सबहिं जातियन लगातार मोरे सजा क पीइही अउर ओका निगारि जइही अउ ओनकर लोप होइ जाइ।

17सिय्योन पहाड़ी पइ रहत रहा जिअत बचा भवा लोग मोर खास लोग होब्या। याकूब क रास्ट्र ओन चिजियन क वापस पाई जउन ओकर रहिन।

18याकूब क परिवार बरत आगी जइसा होई। यूसुफ क रास्ट्र बरत लपटन जइसा बनि जाइ। सिरिफ एसाव क रास्ट्र राखी क नाई होइ। यहूदा क लोग एदोमी लोगन क बरबाद करिहीं। एसाव क रास्ट्रन में कउनो जिअत नाही रही।” काहेकि परमेस्सर यहोवा अइसे कहेस।

19तब नेगव क लोग एसाव पर्वत पइ रइही अउर पर्वतन क तराइयन क लोग पलिस्ती प्रदेस क लइ लेइही। परमेस्सर क उ सबइ लोग एप्रैम अउ सोमरोन क भुँइया पइ रइही। गिलाद, बिन्यामीन क होइ।

20इस्त्राएल क लोग जउन आपन घर तजि देइ क मजबूर कीन्ह ग रहेन कनान क भूँइया पइ सारपत तलक कब्जा करिहीं। यरूसलेम क लोगन जउन कैद कीन्ह ग रहेन अउर सपाराद लई गए रहेन उ पचे नेगेव सहर पइ कब्जा करिहीं।

21बिजयी लोग सिय्योन पर्वत पइ होइही। उ सबइ लोग एसाव पहाड़े क बसइयन पइ सासन करिहीं अउर राज्ज यहोवा क होइ।



# आमोस

## प्रस्तावना

1 आमोस क सँदेसा। आमोस तकोइ नगर क गड़रिया रहा। यहूदा क राजा उज्जिय्याह क सासन काल अउ इस्त्राएल क राजा योआस क पूत यारोबाम क सासन काल में आमोस क इस्त्राएल क बारे में दर्सन भवा। इ भूकम्प क दुइ बरिस पहिले भवा।

## अराम क खिलाफ सजा

2 आमोस कहेस: “यहोवा सिन्धोन में सेर क तरह दहाड़ी। यहोवा क दहाड़ यरूसलेम में होइ। गड़रियन क हरिअर मइदान झुराइ जइहीं। हिआँ तलक कि कर्मेल पर्वत भी झुराई।”

3 इ सबइ यहोवा कहत ह: मई दमिस्क क लोगन क ओनके जरिये कीन्ह गए अपराधन क सजा जरूर देब। काहेकि उ पचे गिलाद क, अन्न भूसा स अलग करइवाले लोहा क औजारन स पीटेस। 4 एह बरे मई हजाएल क घर (सिरिया) में आगी लगाउब, अउर उ आगी बेन्हदद क ऊँच किलन क नस्ट करी। 5 मई दमिस्क क दुआर क मजबूत छड़न क भी तोड़ देब। आवेन क घाटी में सिंहासन पइ बइठइवाले मनई क भी मई नस्ट करबउँ। अराम क लोग हार जइहीं। लोग ओनका बंदी बनाइके कीर देस में लइ जइहीं। यहोवा उ सबइ कहेस।”

## पलिस्तियन क राजा

6 यहोवा इ कहत ह: “मई निहचइ ही अज्जा क लोगन क जरिये कीन्ह गए अनेक पापन बरे ओनका सजा देब। काहेकि उ पचे लोगन क एक समूचे रास्ट्र क पकड़न अउ दास क रूप में एदोम क पठए रहेन।

7 “एह बरे मई अज्जा सहर क देवारे पइ आगी लगाउब। इ आगी अज्जा क महत्व स भरे भए किलन क नस्ट करी। 8 मई असदोद में राजसिंहासन पइ बइठइवाले मनई क नस्ट करबउँ। मई अस्कलोन में राजदाण्ड धारण करइवाले राजा क नस्ट करब। मई एक्रोन क लोगने क सजा देबउँ। तब अबहिँ तलक जिअत बचे भए पलिस्ती मरिहीं।” परमेस्सर यहोवा इ सब कहेस।

## फनसिया क सजा

9 यहोवा इ सब कहत ह: “मई निहचइ ही सोर क लोगन क ओनके जरिये कीन्ह गए अनेक अपराधन बरे सजा देब। काहेकि उ पचे लोगनक एक समूचे रास्ट्र क पकड़न अउर एदोम क दास क रूप में पठए रहेन। उ पचे उ वाचा क याद नाही रखेन जेका उ पचे आपन भाइयन

(इस्त्राएल) क संग किहे रहेन। 10 एह बरे मई सोर क देवान पइ आगी लगाउब। उ आगी सोर क ऊँच मीनारन क नस्ट करी।”

## एदोमियों क सजा

11 यहोवा इ सब कहत ह: “मई निहचइ ही एदोम क लोगन क ओनके जरिये कीन्ह गए अनेक अपराधन बरे सजा देबउँ। काहेकि एदोम आपन भाई क पाछा तरवार लइके किहस। एदोम तनिक भी दाया नाही देखौँएस। एदोम क किरोध बराबर बना रहा। उ जंगली जनावर क तरह इस्त्राएल क चीर-फाइ करत रहा। 12 एह बरे मई तेमान में आगी लगाउब। उ आगी बोस्त्रा क ऊँच किलन क नस्ट करी।”

## अम्मोनियन क सजा

13 यहोवा इ सबइ कहत ह: “मई निहचइ ही अम्मोन क लोगन क ओनके जरिये कीन्ह गए अनेक अपराधन बरे सजा देब। काहेकि उ पचे गिलाद में गर्भवती मेहररूअन क मार डान। अम्मोनी लोगन एह बरे किहन कि उ पचे उ देस क लइ सकइँ अउर आपन देस क बड़का कइ सकइँ।

14 “एह बरे मई रब्बा क देवार पइ आगी लगाउब। इ आगी रब्बा क ऊँच किलन क नस्ट करी। जुद्ध क दिन इ आगी लागी। इ आगी एक अइसे दिन लागी जब तुफानी दिन में आँधियन चलत रही होइहीं।

15 “तब एनकर राजा अउर प्रमुख धइ लीन्ह जइहीं। उ सबइ एक संग बंदी बनाइके लइ जावा जइहीं।” यहोवा उ इ सब कहेस ह।

## मोआब क सजा

2 यहोवा इ सब कहत ह: “मई मोआब क लोगन क एनके जरिये कीन्ह गए अपराधन क जरूर सजा देबउँ। काहेकि मोआब एदोम क राजा क हड्डियन क बारिके चूना बनाएस। 2 एह बरे मई मोआब में आगी लगाउब अउर उ आगी करिय्योत क ऊँच किलन क नस्ट करी। हुआँ खउफनाक चिचियाहट अउ तुरही क अवाज होइ, अउर मोआब मरि जाइ। 3 एह बरे मई मोआब क राजा लोगन क समाप्त कइ देबउँ अउर मोआब क सबहिँ प्रमुखन क मारि डाउब।” यहोवा उ सबइ कहेस।

## यहूदा क सजा

4 यहूदा इ कहत ह: “मई यहूदा क ओकरे जरिये कीन्ह गए अनेक अपराधन बरे जरूर सजा देबउँ। काहेकि उ पचे

यहोवा क आदेसन क माइन स इन्कार किहन। उ पचे ओनके आदेसन क नाहीं मानेन। ओनकर पुरखन झूठ पइ बिसवास किहेन अउर ओन लवार बातन यहूदा क लोगन स परमेस्सर क अनुसरण करब छोड़ाएन। 5<sup>एह</sup> बरे मई यहूदा मँ आगी लगाउब अउर इ आगी यरूसलेम क ऊँच किलन क नस्त कइ देइ।

### इस्त्राएल क सजा

6<sup>यहोवा</sup> इ कहत ह: “मई इस्त्राएल क ओनके जरिये कीन्ह गए अपराधन बरे सजा जरूर देबउँ। काहेकि उ पचे चौंदा क टूकन बरे नीक अउ भोले-भाले लोगन क दास क रूप मँ बेचेस। उ पचे एक जोड़ी जूता खातिर गरीब लोगन क बेचेन। 7<sup>उ</sup> पचे गरीब लोगन क धक्का दइके मुँहे क बले गिराएन अउर उ पचे ओनका कुचरत भए गएन। उ पचे कस्त भोगन भए लोगन क एक ठु नाहीं सुनेन। पिता लोगन अउ पूतन एक ही जवान मेहरारु क संग तने स संबंध कायम किहेन, उ पचे मोरे पवित्तर नाउँ क अपवित्तर किहेन ह।

8<sup>उ</sup> पचे गरीब लोगन क ओढ़नन क लिहन अउ उ पचे ओन पइ गलीचन क तरह तब तलक बइठेन जब तलक उ पचे वेदी पइ पूजा करत रहेन। उ पचे गरिबन क ओनकर ओढ़नन क रेहन रखिके सिक्कन उधार दिहन। उ पचे लोगन क जुर्माना देइ क मजबूर किहन अउर उ जुर्माने क रकम स आपन परमेस्सर क मन्दिर मँ पिअइ बरे दाखरस खरीदेन।

9<sup>मुला</sup> मई ही ओनकर पहिले एमोरियन क नस्त किहे रहेउँ। एमोरी लोग ऊँच बरगदे क बृच्छ क नाई रहेन। उ पचे ओतने सक्तीवाले रहेन जेतने बांज क बृच्छ। मुला मई ओनके ऊपरे क फल अउ ओनके खाने क जड़न क नस्त किहेउँ।

10<sup>उ</sup> मई ही रहेउँ जउन तू पचन्क मिस्त्र देस स निकारिके जाएँ। चालीस बरिस तलक मई तू पचन्क रोगिस्ताने स होइके लाएँ। मई तू पचन्क एमोरियन क भुइँया पइ कब्जा कइ लेइ मँ मदद दिहेउँ। 11<sup>मई</sup> तू पचन्क कछू पूतन क नबी बनाएँ। मई तोहरे सबन्क नउजवानन मँ स कछू क नाज़ीर बनाएँ। इस्त्राएल क लोगो, इ फुरइ अहइ।” यहोवा इ सबइ कहेस।

12<sup>मुला</sup> तू लोग नाज़ीर लोगन क दाखरस पियाया। तू पचे नवियन क भक्त्सिवानी कइ स रोक्या। 13<sup>तू</sup> लोग मोरे बरे भारी बोझा क नाई अहा। मई उ गाड़ी क तरह हउँ जउन बहोतइ जियादा अनाजे से लदी होइके कारण निहुरी होइ। 14<sup>कउ</sup>नो भी मनई बचिके नाहीं निकरि पाइ, हिआँ तलक कि सब स जियादा दौड़इवाला भी। सक्तीवाले मनसेधू भी काफी सक्तीवाला नाहीं रहिहीं। फउजियन आपन क बचाइ नाहीं पइहीं। 15<sup>धनु</sup>स अउ बानवाले भी नाहीं बचि पइहीं। तेज दउड़इवाले भी नाहीं बचि पइहीं। घुडसवार भी जिअत पराइ नाहीं पइहीं, 16<sup>उ</sup> समइ, बहोतइ बीर जोधा भी नंगे हाथन भाग खड़ा होइहीं। ओनका आपन ओढ़ना तलक पहिरइ तलक क समइ भी नाहीं मिली।” यहोवा इ सबइ कहेस ह।

### इस्त्राएल क चितउनी

3 इस्त्राएल क लोगो, इ संदेसा क सुना। यहोवा तोहरे पचन्क बारे मँ इ सब कहेस ह। इ संदेसा ओन सबहिं इस्त्राएल परिवारन बरे अहइ जेनका मई मिस्त्र देस स बाहेर लियाएँ ह। 2<sup>पृथ्वी</sup> पइ अनेक परिवार अहइ। मुला तू पचे अकेल्ले अहा जेका मई बिसेस धियान देइ बरे चुनेउँ। मुला तू पचे मोरे खिलाफ होइ गया। एह बरे मई तू पचन्क सबहिं पापनबरे सजा देबउँ।”

### इस्त्राएल क सजा देइ क कारण

3<sup>दुइ</sup> मनइयन एक संग नाहीं चल सकतेन जब तलक उ पचे कउनो वाचा नाहीं करइँ। 4<sup>जंगल</sup> मँ सेर आपन सिकार क धरइ क पाछे ही गरजत ह। अगर कउनो जवान सेर आपन मौँद मँ ही गरज होइ तउ ओकर सकेत इहइ अहइ कि उ आपन सिकार क धइ लिहस ह। 5<sup>कउ</sup>नो चिरइया भुइँया पइ जालि मँ तब तलक नाहीं पड़ी जब तलक ओहमँ कउनो चुगग न होइ अउर अगर जालि बन्द होइ जाइ तउ उ चिरइया क फँसाइ लेइ। 6<sup>अगर</sup> कउनो तुरही खतरा क चितउनी देइ तउ लोग डर स जरूर काँपि उठिहीं। अगर कउनो मुसीबत कउनो सहर मँ आवइ तउ ओका यहोवा पठएस। 7<sup>मोर</sup> सुआमी यहोवा कछू भी करइ क निहचइ कइ सकत ह। मुला कछू भी करइ स पहिले उ आपन सेवक नवियन क आपन छुपी योजना बनाइ। 8<sup>अगर</sup> कउनो सेर दहाड़ी तउ लोग डेराइ जइहीं। अगर यहोवा कछू भविस्सवक्ता स कही तउ भविस्सवाणी करी।

9-10<sup>असदोद</sup> अउ मिस्त्र क ऊँच किलन पइ जा अउर इ संदेसा क घोसणा करा: “सोमरोन क पर्वतन पइ जा। हुआँ तू पचे बहोत गड़बड़ी पउब्या। काहेकि लोग नाहीं जानतेन कि धर्मी कइसे रहा जात ह। उ पचे दूसर लोगन क बरे क्रूर रहेन। उ पचे दूसर लोगन स चिजियन लेत रहेन अउर ओन चिजियन क आपन ऊँच किलन मँ छुपावत रहेन। ओनकर खजानन चोरी अउर जबर दस्ती लीन्ह गइ ओनकर चिजियन स भरा अहइ।”

11<sup>एह</sup> बरे यहोवा कहत ह, “उ देस मँ दुस्मन आइ। उ दुस्मन तोहार पचन्क सक्ती लइ लेइ। उ ओन चिजियन क लइ लेइ जेनका तू पचे आपन किलन मँ छुपाइ रख्या ह।”

12<sup>यहोवा</sup> इ कहत ह, “जइसे जब कउनो सेर कउनो मेमना पइ झपट्टा मारत ह तउ गइरिया उ मेमना क सिरिफ कउनो हीसा ही बचाइ सकत ह। उ सेर क मुँहे स ओकर दुइ गोइ, या ओकर काने क एक हीसा क ही खेंच सकत ह। ठीक इहइ तरह इस्त्राएल क जियादा लोग नाहीं बचाइ जाइ सकिहीं। सामरिया मँ रहइवाले लोग आपन बिछौना क कउनो कोना या आपन चौकी क पाया ही बचाइ पइहीं।”

13<sup>मोर</sup> सुआमी सर्वसक्तीमान परमेस्सर यहोवा इ कहत ह: “याकूब (इस्त्राएल) क परिवारे क लोगन क इ सबइ बातन क चिताउनी द्या। 14<sup>इस्त्राएल</sup> पाप किहेस अउर मई ओनकर पापन बरे ओनका सजा देब। मई बतेल क वेदी क भी नस्त करब। वेदी क सींगन काटि दीन्ह जइहीं अउर उ सबइ भुइँया पइ भहराइ जइहीं। 15<sup>मई</sup> गर्मी क घरे क संग सर्वी

क मौसम क घरे क भी नस्ट करब। हाथी दौत स सजा घर भी नस्ट होइहीं। अनेक घर नस्ट कीन्ह जइहीं।” यहोवा इ सबइ कहत ह।

### आनन्द प्रिय मेहरारू

**4** सोमरोन क पहाड़े पइ मोटी गइयन मोर बात सुना। तू पचे गरीब लोगन क दबावत अहा। तू पचे ओन गरीबन के ऊपर गुजर जात ह। तू पचे आपन भतारन स कहति अहा, “पिअइ बरे हमरे बरे कउनो दाखमघु लिआवा।”

2मोर सुआमी यहोवा आपन पवित्तर नाउँ स प्रतिग्या किहेस, कि तू पचन पइ मुसीबतन अइहीं। दुस्मन तोहमाँ स हर एक मछरी क नाई लेइ जाब्या जेका काँटन स पकरइ जाइ तलक कछू पता नाहीं रहत ह। 3उ तोहार पचन्क सहर नस्ट होइ। तू पचे देवारन क छेदन स सहर क बाहेर जाब्या। तू पचे आपन आपका लहासन क ढेरन पइ लोकउब्या।

यहोवा इ सबइ कहत ह: 4“बेतेल जा अउ पाप करा। गिलान जइ अउर जियादा पाप करा। आपन बलियन क भेंट भिंसारे करा। तीन दिन वाले पवित्तर दिनन में अपनी फसल क दसवाँ हींसा लिआवा। 5अउर खमीर क संग बनी धन्यवाद भेंट चढ़ावा। हर एक क स्वेच्छा भेंट क बारे में बताया। इस्राएल, तू पचे ओनका करब पसन्द करत अहा। एह बरे जा अउर उहइ करा।” यहोवा इ कहेस

6“मई तू पचन्क अपने लगे बोलावइ बरे कई काम किहेउँ। मई तू पचन्क खाइ क कछू नाहीं दिहेउँ। तू पचन्क कउनो भी सहर में खइया क नाहीं रहा। मुला तू पचे मोरे लगे वापस नाहीं लउट्या।” यहोवा इ सबइ कहेस।

7“मई बर्खा भी बन्द किहेउँ अउर इ फसल पाकइ क तीन महीना पहले भवा। एह बरे कउनो फसल नाहीं भइ। तब मई एक सहर पइ बर्खा होइ दिहेउँ मुला दूसर सहर पइ नाहीं। बर्खा देस क एक हींसा में भइ। मुला देस क दूसर हींसन में भुइँया बहोत सुखाइ गइ। 8एह बरे दो या तीन सहरन स लोग पानी लिआवइ बरे दूसर सहरन क लइखइत भए गएन। मुला हुआँ भी हर एक मनई बरे काफी जल नाहीं मिला। तउ भी तू पचे मोरे लगे मदद बरे नाहीं आया।” यहोवा इ सबइ कहेस।

9“मई तू पचन्क फसलन क गर्मी अउ बेरामी स मारि डाएँ। मई तू पचन्क बागन अउ अंगूरे क बगीचन क नस्ट किहेउँ। टिड्डयन तू पचन्क अंजीरे क बृच्छन अउ जइतून क बृच्छन क खाइ डाएन। मुला फुन भी तू पचे मोरे लगे मदद क नाहीं आया।” यहोवा इ सबइ कहेस।

10“मई तू पचन्क खिलाफ महामारियन वइसे ही पठएँ जइसे मई मिस्र में पठए रहेउँ। मई तू पचन्क नउजवानन क तरवार क घाट उतारि दिहेउँ। मई तू पचन्क घोड़न लइ लिहेउँ। मई तू पचन्क डेरन क लहासन क दुर्गन्ध स भरेउँ। मुला तबहुँ भी तू पचे मोरे लगे मदद क वापस नाहीं लउट्या।” यहोवा इ सबइ कहेस।

11“मई तू पचन्क वइसे ही नस्ट किहेउँ जइसे मई सदोम अउ अमोरा क नस्ट किहेउँ। इ दुइनँ सहरन पूरी तरह नस्ट किन्ह गए रहेन। तू लोगन में स बचा भवा आगी स हींची गइ बरत छड़ी तरह रहया। मुला तउ पइ भी तू पचे

फुन भी मदद बरे मोरे लगे नाहीं लउट्या।” यहोवा इ सबइ कहेस।

12“एह बरे इस्राएल मई तोहेर सबन्क संग इ सब करब। मई तोहेर साथ इ करब। इस्राएल आपन परमेस्सर स मिलइ बरे तइयार होइ जा। 13मई कउन हउँ? मई उहइ हउँ जउन पर्वतन क बनाएउँ। मई तोहार परान बनाएउँ। मई लोगन क आपन विचार बताएउँ। मई ही भिंसारे क साँझे में बदलत हउँ। मई पृथ्वी क ऊपर क पर्वतन पइ चलत हउँ। मई कउन हउँ? मोर नाउँ यहोवा, फउजन क परमेस्सर अहइ।”

### इस्राएल बरे सोक संदेसा

**5** इस्राएल क लोगो, इ सँदेसा क सुना, इ सोक सँदेसा तोहेर पचन्क बारे में अहइ।

2इस्राएल क कुँवारी गिर गइ अहइ। उ अब कबहुँ नाहीं उठी। उ धूरि में पड़ी अकेल्ली तजि दीन्ह ग अहइ। ओका उठावइवाला कउनो मनई नाहीं अहइ।

3मोर सुआमी यहोवा इ कहत ह: “हजार फउजियन क संग सहर स जाइवाले अफसर सिरिफ सउ फउजियन क संग लउटिहीं। सउ फउजियन क संग सहर तजइवाले अफसर सिरिफ दस फउजियन क संग लउटिहीं।”

### यहोवा इस्राएल क अपने लगे लउटइ बरे बढावा देत ह

4यहोवा इस्राएल क घराने स इ कहत ह: “मोर खोज करत आवा अउ जिअत रहा।

5मुला बेतेल में न खोजा। गिलगाल जिन जा। सीमा क पार न करा अउर बेसेबा न जा। गिलगाल क लोग बन्दी क रूप में लइ जावा जइहीं अउर बेतेल नस्ट कीन्ह जाइ।

6यहोवा क लगे जा अउर जिअत रहा। अगर तू पचे यहोवा हिआँ नाहीं जाब्या, तउ यूसुफ क घरे में आगी लगी। आगी यूसुफ क परिवारे क नस्ट करी अउर बेतेल में कउनो भी रोक नाहीं पाई।

7-9तू पचन्क मदद बरे यहोवा क लगे जाइ चाही। इ उहइ अहइ जउन कचपचिया अउ मृगसिरा क बनाएस। उ अँधियारा क भिंसोर प्रकास में बदल दत ह। उ दिन क अँधेरी रात में बदल देत ह। उ समुदर द जल क उठाइके ओका पृथ्वी पइ बरसावत ह। ओकर नाउँ यहोवा अहइ उ सक्तीवाले सहरन क मजबूत किलन क ढहाइ देत ह।”

### इस्राएलियन क जरिये कीन्ह गए बुरे करम

लोगो, तू पचन्क बरे इ बहोतइ बुरा होइ। तू पचे अच्छाई क कडुवाहट में बदल दिहा। तू पचे अच्छाई क मार डया अउर एका धूरि में मिलाइ दिहा।

10नबी समाज क ठउरन पइ जात हीं अउर ओन बुरे करमन क खिलाफ बोलत हीं जेनका लोग करत रहत हीं। मुला लोग ओन नबियन स घिना करत हीं। नबी फुरइ कहत हीं, मुला लोग ओन नबियन स घिना करत हीं।

11तू पचे गरीबन स गैर मुनासिब कर वसूलत अहा। तू पचे ओनसे ढेर क गोहूँ लेत ह अउ इ धने क उपयोग तू पचे तरासे भए पाथरन स सुन्नर महल बनावइ में करत अहा। मुला तू पचे ओन महलन में नाहीं रहब्या। तू पचे

अंगूस क बेलन क सुन्नर खेत बनावत अहा। मुला तू पचे ओनसे पाई दाखरस क नाही पीब्या।

12कहेकि मई तू पचन्क अनेक पापन्क जानत हउँ। तू पचे, फुरइ ही, कछू बुरे करम किहया ह। तू पचे मुनासिब काम करइवालन क चोट पहोंचाया। तू पचे घूस क रूप में धन लिहा। गरीब लोगन क संग अनेक मुकदमन में तू पचे निआव नाही किहया।

13उ समइ बुद्धिमान चुप रइहीं। काहे? काहेकि इ बुरा समइ अहइ।

14तू पचे कहत अहा कि परमेस्सर मोरे संग अहइ। एह बरे नीक करम करा, बुरा नाही। तब तू पचे जिअन रहब्या अउ सर्वसक्तीमान परमेस्सर यहोवा फुरइ ही तोहेर सबन्क संग होइ।

15बुराई स घिन करा। अच्छाई स पिरेम करा। कचहरी में निआव वापस लिआवा अउ तब संभव अहइ कि सर्वसक्तीमान परमेस्सर यहोवा यूसुफ परिवारे क बचे भए लोगन पइ दयालु होइ।

### बड़के सोक क समइ आवत अहइ

16इहइ कारण अहइ कि मोर सुआमी सर्वसक्तीमान परमेस्सर इ कहत अहइ, “लोग सबहिं समाज क ठहरन में रोइहीं, लोग सड़कियन पइ रोइहीं। लोग पेसेवर रोइवालन क भाड़ा पइ रखिहीं।

17लोग अंगूरे क सबहिं खेतन में रोइहीं। काहेकि मई हुओं स निकरब अउर तू पचन्क सजा देबउँ।” यहोवा इ सब कहेस ह।

18तू पचन में स कछू यहोवा क निआव क खास दिन क लखइ चाहत हीं। तू पचे उ दिन क काहे लखइ चाहत अहा? यहोवा क खास दिन तोहेरे पचन्क बरे अँधियारा लिआई उजियारा नाही।

19तू पचे कउनो सेरे क समन्वा स बचिके पराइ निकरइवाले अइसे मनई क नाई होब्या जेह पइ भागत समइ रीछ हमला कइ देत ह अउर फुन जब उ रीछ स भी बचिके निकरिके कउनो घरे में जाइ घुसत ह तउ हुओं देवारे पइ हथवा धरत ही, सँप डसि लेत ह।

20एह बरे यहोवा क खास दिन अँधियारा लिआई, उजियारा नाही, इ सोक क समइ होइ उल्लास क नाही।

### यहोवा इस्त्राएलियन क आराधना क अंगीकार नाहीं करत अहइ

21“मई तोहार पचन्क पवितर दिनन स घिना करत हउँ। मई ओनका कबूल नाही करब। मई तोहार पचन्क धर्म क सभन क आनन्द नाही लेतेउँ।

22अगर तू पचे होमबलि अउ अन्नबलि अउ भी देब्या तउ मई अँगीकार नाही करब। तू पचे जउन मोटवार जनावरन क सान्ति-भेंट क रूप में देब्या ओनका मई भी लखब भी नाही।

23तू पचे हिओं स सोरगुलवाले गीतन क दूर करा। मई तोहरी पचन्क वीणा क संगीत क नाही सुनब।

24तू पचन्क आपन सोर देस में निआव क नदी क तरह

बहइ देइ चाही। अच्छाई क सदा नदी क धारा क नाई बहइ द्या जउन कबहुँ झुरात नाही।

25इस्त्राएल, तू पचे चालीस बरिस तलक रोगिस्ताने में मोका बलि अउ भेंट नाही चढ़ाया।

26तू पचे आपन देवता सक्कुथ अउ नछत्र देवता कैवन क मूर्तियन क लइके चल्या। एन देवतन क मूर्तियन क तू पचे अपने बरे बनाये रहया।

27एह बरे मई तू पचन्क बन्दी बनाइके दमिस्क क पार पहोंचाउबा।” इ सब यहोवा कहत ह। ओकर नाउँ सर्वसक्तीमान परमेस्सर अहइ।

### इस्त्राएल स नीक समइ क लइ लीन्ह जाइ

6 सिय्योन क तू पचन्क में स कछू क जिन्नगी बहोत अराम क अहइ। सामरिया पर्वत क कछू लोग अपने क सुरच्छित महसूस करत हीं। मुला तू पचन पइ अनेक मुसीबतन अइहीं। रास्ट्रन क सब स उत्तिम नगर क तू पचे “सम्मनित” लोग अहा। “इस्त्राएल क लोग” निआव पावइ बरे तोहेरे पचन्क लगे आवत हीं।

2जा अउ कलने क लखा। हुओं स बिसाल नगर हमात क जा। पलिस्ती सहर गत क जा। का तू पचे इ सबइ राज्यन स बढ़िया अहा? नाही। ओनकर पहँटा तोहेरे पचन्क देसे स बड़का अहइँ।

3जब तू हिंसा क जरिये सासन करत ह तउ तू सज़ा क दिना बरे सोचइ स इन्कार करत जउन कि आवत ह।

4मुला तू पचे सबहिं बिलासन क भोगा करत अहा। तू पचे हाथी दँते क सेज पइ सोवत अहा अउर अपने बिछौना पइ आराम करत अहा। तू पचे गोरूअन क झुण्ड में स नरम मेमनन अउ बाड़न में स नवा बछवा खात अहा।

5तू पचे आपन वीणन क बजावत अहा अउर राजा दाऊद क नाई संगीत क धन बनावत ह।

6तू पचे सुन्नर पिआलन में दाखरस पिआ करत अहा। तू पचे सब स उत्तिम तेलन में स आपन मालिस करत अहा अउर तू पचन्क एकरे बरे घबराहट भी नाही कि यूसुफ क परिवार नस्ट कीन्ह जात अहइ।

7उ सबइ लोग अब बिछउना पइ अराम करत अहइँ। मुला ओनकर नीक समइ खतम होइ। उ पचे बन्दी क रूप में विदेसन में पहोंचावा जइहीं अउर उ पचे पहिले पकड़ा जाइवालन में स कछू होइहीं। 8मोर सुआमी यहोवा आपन नाउँ स इ प्रतिग्या किहे रहा। सर्वसक्तीमान परमेस्सर यहोवा प्रतिग्या किहस ह:

“मई ओन बातन स घिना करत हउँ जेन पइ याकूब क गर्व अहइ। मई ओकर मजबूत मीनारन स घिना करत हउँ। एह वरे मई दुस्मन क सहर अउर सहर क हर एक चीज लेइ देबउँ।”

### तनिक इस्त्राएली जिअत बचिहीं

9उ समइ, कउनो घरे में अगर दस मनई जिअत बचिहीं तउ भी उ पचे मरि जइहीं। 10जब कउनो मरि जाइ तब कउनो संबंधी लहास लेइ आइ, जेहसे उ ओका बाहेर लइ जाइ सकइ अउर बारि सकइ। संबंधी घरे में हाड़न क लेइ

आइ। लोग कउनो भी उ मनई स जउन घरे क भितरे छुपा होइ, पूछिहीं, “का तोहरे पचन्क लगे कउनो दूसर ल्हास अहइ?”

उ मनई जवाब देइ, “नाहीं...”

तब मनई क संबंधी कइहीं, “चुप। हम पचन्क यहोवा क नाउँ नाहीं लेइ चाहीं।”

11लखा, परमेस्सर यहोवा हुकुम देइ अउर बिसाल महल टूका-टूका कीन्ह जइहीं अउर नान्ह घर नान्ह नान्ह टूकन मँ तोरा जइहीं।

12का घोड़न सिलारखंडन पइ दउइत हीं? नाहीं। का लोग समुदर क बर्धन स जोत सकत हीं? नाहीं। तउ भी तू पचे हर चीज क उलट-पलट देत अहा। तू पचे अच्छाई अउ निआव क जहर मँ बदल देत अहा।

13तू पचे लौ-देवरे मँ खुस अहा, तू पचे कहत अहा, “हम पचे करनैम क आपन सक्ती स जीता ह।”

14“किन्तु इस्त्राएल, मई तू पचन्क खिलाफ एक रास्ट्र क पठउब। उ रास्ट्र तोहरे पचन्क समूचे देस क, लेबो-हमात स लइके अराबा नाले तलक मुसीबते मँ डइहीं।” सर्वसक्तीमान परमेस्सर यहोवा उ सबइ कहेस।

### दर्शन मँ टिड्डियन

7 यहोवा मोका इ देखाएस: उ दूसर फसिल उगर क समइ टिडडी दलन क बनउब सुरू किहेस। राजा क जरिये पहिली फसल काट लीन्ह जाइके पाछे इ दूसर फसल रही। 2टिड्डियन देस क सारी घास खाइ डापन। ओकरे पाछे मई कहेउँ, “मोर सुआमी यहोवा, मई पराथना करत हउँ, हम पचन क छिमा करा। याकूब जी नाहीं सकत, ओकर लगे बहोत सक्ती नाहीं अहइ।”

3तब यहोवा एकरे बारे मँ विचार बदलेस। यहोवा कहेस, “अइसा नाहीं होइ।”

### दर्शन मँ आगी

4मोर सुआमी यहोवा मोका इ चिजियन देखाएस: मई लखेउँ कि यहोवा परमेस्सर आगी क नाई बरसइ बरे बोलावत बाटइ। आगी बिसाल गहिर समुदर क नस्ट कइ दिहस। आगी भुइयाँ क चट करइ लाग। 5मुला मई कहेउँ, “हे परमेस्सर यहोवा, मई तोहसे पराथना करत हउँ, ठहरा। याकूब बच नाहीं सकत। उ बहोतइ नान्ह अहइ।”

6तब यहोवा एकरे बारे मँ आपन विचार बदलेस। परमेस्सर यहोवा कहेस, “अइसा नाहीं होइ।”

### दर्शन मँ साहुल

7यहोवा मोका इ देखाएस: यहोवा एक ठु देवारे क सहारे एक साहुल हाथे मँ लइके खड़ा भवा रहा। देवार साहुल स सोझ कीन्ह गइ रही। 8यहोवा मोसे कहेस, “आमोस, तू का लखत अहा?”

मई कहेउँ, “साहुल।”

तब मोर सुआमी कहेस, “लखा मई आपन इस्त्राएल क लोगन पइ साहुल क उपयोग करब। मई अब अउर अगवा ओनकर टेढ़ेपने क नजरन्दाज नाहीं करब। मई ओन बुरे

हीसन क काट लोकाउब। 9इसहाक क ऊँच ठउर नस्ट कीन्ह जइहीं। इस्त्राएल क पवित्तर ठउर चट्टाने क ढेर मँ बदल दीन्ह जइहीं। मई हमला करब अउर यारोबाम क परिवारे क तरवारे क घाट उतारब।”

### अमस्याह आमोस क भविस्सवाणी करइ

#### स रोकइ क जतन करत ह

10बेतल क याजक अमस्याह इस्त्राएल क राजा यारोबाम क इ सँदेसा पठएस: “आमोस तोहरे खिलाफ सडयंत्र रचत अहइ। उ इस्त्राएल क लोगन क तोहरे खिलाफ जुद्ध बरे भइकावत ह। उ एतना जियादा कहत अहइ कि ओकर सब्ब पूरा देस मँ भी समाइ नाहीं सकतेन। 11आमोस कहेस ह, “यारोबाम तरवारे क घाट उतरी अउ इस्त्राएल क लोगन क बन्दी बनाइके आपन देस स बाहरे लइ जावा जइहीं।”

12अमस्याह भी आमोस स कहेस, “हे दर्सी यहूदा जा अउर हुअँइ आपन भोजन करा। आपन उपदेस हुअँइ द्या। 13मुला हिअँ बेतेल मँ अउर जियादा उपदेस जिन द्या। इ यारोबाम क पवित्तर ठउर अहइ। इ इस्त्राएल क मंदिर अहइ।”

14तब आमोस अमस्याह क जवाब दिहस, “मई पेसेवर नबी नाहीं हउँ अउर मई नबी क परिवार क नाहीं हउँ। मई गोरू पालत हउँ अउर गूलर क बृच्छन क देखरेख करत हउँ।

15“मई गइरिया रहेउँ अउर यहोवा मोका भेड़िन क चरावइ स अजाद किहेस। यहोवा मोहसे कहेस, ‘जा मोर लोग इस्त्राएलियन मँ भविस्सवाणी करा।’ 16एह बरे यहोवा क सँदेस क सुना। तू मोहसे कहत अहा, ‘इस्त्राएल क खिलाफ भविस्सवाणी जिन करा। इसहाक क परिवारे क खिलाफ उपदेस जिन द्या।’ 17मुला यहोवा कहत ह, ‘तोहार पत्नी सहर मँ रण्डी होइ हीं। तोहार पूतन अउ बिटियन तरवारे स मारा जइहीं। दूसर लोग तोहार भुइँया क खिलाफ आइहीं अउर एका कब्जा कइ लेइहीं। अउर आपुस मँ बैटिहीं अउर तू बिदेस मँ मरब्या। इस्त्राएल क लोग निहचइ ही, इ देस स बन्दी क रूप मँ लइ लीन्ह जइहीं अउर देस स निस्कासित कीन्ह जाइ।”

### दर्शन मँ पके भए फल

8 यहोवा मोका इ देखाएस: मई गर्मी क फलन क एक टोपा लखेउँ: 2यहोवा पुछेस, “आमोस तू का लखत अहा?”

मई कहेउँ, “गर्मी क फलन स भरा भवा एक ठु टोकरी।”

तब यहोवा मोहसे कहेस, “मोर लोग इस्त्राएलियन क अंत आइ मँ अहइ। मई ओनके पापन क अउर बर्दास्त नाहीं कइ सकतेउँ। 3मन्दिर क गीत सोक गीत बन जइहीं। मोर सुआमी यहोवा इ सब कहेस। सब जगह ल्हासन ही होइहीं। सन्नाटे मँ लोग ल्हासन क लइ जइहीं अउर ओनकर ढेर लगाइ देइहीं।”

### इस्त्राएल क बड़पारी सिरिफ धन बनाबइ मैं लगे रहब चाहत हीं

4मोर सुना। लोगो तू पचे बेसहारा क कुचरत अहा। तू पचे इ देस क गरीबन क नस्ट करइ चाहत अहा।

5बड़पारियो तू पचे कहत अहा, “नवा चंदा कब बीती जेहसे हम पचे अन्न बेचि सकी? सबित कब बीती, जेहसे हम पचे आपन गोहूँ बेचइ क लिआइ सकी? हम कीमतन क बढ़ाइ सकी, बाटन क हल्का कइ सकी, अउर हम पचे तराजुअन क अइसा इंतजाम कइ लेइ कि लोगन क ठगि सकी।

6गरीब आपन कर्जा वापस नहीं कइ सकतेन। एह बरे हम ओनका दास क रूप में खरीदब। हम ओन गरीबन क एक जोड़ी पनही क कीमत में खरीदब। अहो! हम पचे ओन खराब गोहूँ क भी बेचि सकित ह, जउन फर्स पइ छितराइ गवा होइ।”

7यहोवा प्रतिग्या किहेस। उ “याकूब क गर्वी” क आपन नाउँ बरे उपयोग किहेस अउर इ प्रतिग्या किहेस कि: “मई ओन लोगन क कीन्ह करमन बरे ओनका छिमा नहीं कइ सकत।

8तोहार ओन करमन क कारण पूरा देस काँपि जाइ। इ देस क हर एक निवासी मरे भए के लिए रोइ। पूरा देस मिस्र में उड़त होइ नील नदी क तरह कपकपहारीं। पूरा देस उठिहीं अउर फुन गरीहीं।”

9यहोवा इ सबइ बातन भी कहेस: “उ समइ मई सूरज दुपहर में ही बूड़ि देब। मई उजियारा भरे दिन में पृथ्वी क अंधियारा स भरि देब।

10मई तोहार पचन्क पवितर दिनन क मरे भए लोगन बरे सोक दिवस में बदलब। तोहार पचन्क सबहिं मरे भए लोगन बरे सोक गीत बनिहीं। मई हर एक क सोक ओढ़ना पहिराउब। मई हर एक क मूँड़ मुडवाइ देब। मई अइसा गहिर सोक स भरा रोउब बनाउब माना उ एकलौती क पूत क होइ। इ एक कडुआ अन्त होइ।”

### परमेस्सर क संसार बरे भयंकर भुखमरी स भरा भविस्स

11यहोवा कहत ह: “लखा मई देस में भुखमरी लिआउब अउर उ सबइ दिन निचके आवत अहइँ। इ रोटी या पानी क भुखमरी नहीं होइहीं बल्कि यहोवा क वचन क भुखमरी होइहीं।

12लोग एक सागरे स दूसर सागर तलक भटकिहीं। उ पचे उत्तर स दक्खिन तलक भटकिहीं। उ सबइ लोग यहोवा क सँदेसा बरे अगवा बढिहीं पाछे हटिहीं, मुला उ पचे ओका पइहीं नहीं।

13उ समइ सुन्नर मेहररूअन अउ नउजवान पिआव क कारण बेहोस होइ जइहीं।

14ओन लोग सोमरोन क पाप क नाउँ पइ प्रतिग्यन किहेन। उ पचे कहेन, ‘दान तोहरे पचन्क देवता क सत्ता निहचइ फुरइ बाटइ, एहसे हम पचे प्रतिग्या करत अही, अउर बेशेवा क सत्ता क सत्ता निहचइ फुरइ बाटइ, एहसे हम पचे प्रतिग्या करत अही’ एह बरे ओन लोगन क पतन होइ अउर उ पचे फुन कबहुँ उठिहीं नहीं।”

### दर्सन में यहोवा क वेदी क सहारे खड़ा होब

9 मई आपन सुआमी क वेदी क सहारे खड़ा लखेउँ। उ कहेस,

“खम्भन क सिरे पइ प्रहार करा, अउर पूरी इमारत क डेहरी तलक काँप उठी। कम्भन क मनइयन क मूँड़े पइ गिरावा। अगर कउनो जितत बचइ, तउ ओका तरवारे स मारा। कउनो मनई पराइ सकत ह, मुला उ बचि नहीं सकी। मनइयन में स कउनो भी मनई बचिके नहीं निकरी।

2अगर उ पचे पाताल में खनिके जइहीं, मई ओनका हुआँ स हींच लेबउँ। अगर उ पचे ऊपर आकासे में जइहीं मई ओनका हुआँ स खाले लिआउब।

3अगर उ पचे कम्मेल क घाटी पइ जाइके छुपिहीं, मई ओनका हुआँ हेरब अउर मई ओनका उ जगहिया पइ लइ आउब। अगर उ पचे समुदर क तले में छुपइ चाहत हीं, मई सरप क हुकुम देब अउर उ ओनका डसि लेइ।

4अगर उ पचे धरा जइहीं अउर आपन दुस्मन क जरिये लइ जावा जइहीं, मई आपन तरवार क हुकुम देब अउर उ ओनका हुआँइ मारी। हाँ, मई ओन पइ सावधानी पूर्वक निगाह रखब उहइ दौरान मई ओन पइ मुसीबत लिआवइ बरे रास्ता खोजब। ओनके बरे नीक काम करइ क तरीकन पइ नहीं।”

### देस क लोगन क सजा नस्ट करी

5मोर सुआमी सर्वसक्तीमान यहोवा, उ पहँटा क छुइ अउर उ टेघर जाइ तब उ देस क सबहिं निवासी मरे भए लोगन बरे रोइहीं। इ पहँटा मिस्र क नील नदी क नाई ऊपर उठी अउर खाली गिरी।

6यहोवा आपन ऊपर क निवास अकासे क ऊपर बनाएस। उ आपन आकास क पृथ्वी पइ धरेस। उ सागरे क जल क बोलाइ लेत ह, अउर देस पइ ओकर बर्खा करत ह। ओकर नाउँ यहोवा अहइ।

### यहोवा इस्त्राएल क नस्ट करइ

#### क प्रतिग्या करत ह

7यहोवा इ कहत ह: “इस्त्राएल तू मोरे बरे कूसियन क नाई अहा। मई इस्त्राएल क मिस्र स निकारिके लाएउँ। मई पलिस्तियन क भी कप्तोर स लाएउँ अउर अरामियन क भी कीर स।”

8मोर सुआमी यहोवा पापे स भरा राज्ज पइ दृस्टि रखे अहइ। यहोवा इ कहत ह, “मई पृथ्वी पइ स इस्त्राएल क नस्ट करब। मुला मई याकूब क परिवार क पूरी तरह नस्ट नहीं करब।

9मई इस्त्राएल क घराना क तितर-बितर कइके दूसर रास्टून में छितरावइ क आदेस देत अहउँ। इ उहइ तरह होइ जइसे कउनो मनई अनाजे क छननी स छान देत ह। नीक आटा ओहसे निकरि जात ह, मुला बुरा अंस फँस जात ह। याकूब क परिवारे क संग अइसा ही होइ।

10मोरे लोगन क बीच पापी कहत हीं, ‘हम लोगन क संग कछू भी बुरा नहीं घटित होइ।’ मुला उ पचे सबहिं लोग तरवार स मारि दीन्ह जइहीं।”

**परमेस्वर राज क फुन स स्थापना  
क प्रतिग्या करत ह**

11“दाऊद क डेरा गिर गवा ह, मुला उ समइ इ डेरे क मई फुन खड़ा करब। मई देवारन क छेदन क भरि देब। मई नस्ट इमारतन क फुन स बनाउब। मई एका अइसा बनाउब जइसा इ पहिले रहा।

12फुन उ पचे एदोम मँ जउन लोग बचि गवा अहई, ओनका अउर ओन जातियन क जउन मोरे नाउँ स जानी जात हीं, लइ जाइ।” यहोवा इ सबइ बातन कहेस, अउर उ सबइ ओनका घटित कराई।

13यहोवा कहत ह, “उ समइ आवत अहइ, जब हर तरह क भोजन क बहोतयात होइ। अबहिं लोग पूरी तरह फसल काटि नाहीं पाए होइहीं कि जोताइ क समइ आइ जाइ।

लोग अबहिं अंगूसन क रस निकारि ही रहा होइहीं कि अंगूसन क रोपाइ क समइ फुन आइ पहेँची। पर्वतन स दाखरस क धार बही अउर उ पहाड़ियन स बरसी।

14मई आपन लोगन इस्त्राएलियन क देस निकारइ स वापस लिआउब। उ पचे नस्ट भए सहरन क फुन स बनइहीं अउर ओन सहरन मँ रइहीं। उ पचे अंगूरे क बेलन क बाग लगइहीं अउर उ पचे ओन बागन स मिला भवा दाखरस पीइहीं। उ पचे बाग लगइहीं अउर उ पचे ओन बागन क फलन क खइहीं।

15मई आपन लोगन क ओनकी भुइँया पइ जमाउब अउर उ पचे फुन उ देस स उखाड़ा नाहीं जइही जेका मई ओनका दिहेउँ ह।” यहोवा तोहार पचन्क परमेस्वर इ सबइ बातन कहेस।

# योएल

## टिड्डियन फसलन क खाइ लेइहीं

1 पतूएल क पूत योएल यहोवा स इ सँदिसा क पाएसः  
2 मुखिया लोगो, इ सँदिसा क सुना। हे इ देस क बसइया लोगो, तू पचे सबहिं मोर बात सुना। का तु पचन्क सारी जिन्नगी में पहिले कबहुँ कउनो अइसी बात घटी ह? का तू पचन्क पुरखन क जिन्नगी में कबहुँ कउनो अइसी बात घटी ह? 3 इ बातन क बारे में तू पचे आपन लरिकन क बतावा करब्या अउर तोहार पचन्क लरिकन इ सबइ बातन आपन लरिकन क बतइहीं अउर तोहार पचन्क नाती पोतन इ सबइ बातन अगवा क पीढ़िन क बतइहीं।

4 कुतरत भइ टिड्डियन स जउन कछू भी बच गवा, ओका भिन्नात भइ टिड्डियन खाइ लिहन अउर भिन्नात भइ टिड्डियन स जउन कछू बचा, ओका फुदकत भइ टिड्डियन खाइ लिहन ह अउर फुदकत भइ टिड्डियन स जउन कछू रहि गवा, ओका बिनास करइवाली टिड्डियन चट कइ डइन ह।

## टिड्डियन क आउब

5 ओ नसाबाज लोगो, जागग, उठा अउ विलाप करा। ओ सबहिं दाखमधु पिवइया लोगो, विलाप करा। काहेकि तू लोगन क लगे अब अउर कबहुँ पिवइ बरे मीठ दाखमधु नाहीं होब्या।

6 एक सक्ती साली राष्ट्र क नाई जउन आपन अंगिनत सिपाहियन क संग होइ भयंकर टिड्डियन क मोरे देस पइ हमला करइ बरे आएस। ओनकर दाँत सेर क दाँत क नाई रहेन, ओनकर जबरा सेरनी क जबरा क नाई रहेन।

7 उ सबइ “टिड्डिन” मोर अंगूरे क बगियन क बर्बाद कइ दिहस। उ पचे मोरे अंजीरे क बृच्छ क तोड़ दिहस। उ पचे मोरे बृच्छन टहनियन क छाल लक उधेड़ लिहेस अउर ओनका भुइँया पइ लोकाइ दिहेस।

## लोगन क विलाप

8 अब तू उ जवान दुलहन जइसा जउन आपन होइवाली मनसेधू (मंगेतर) जउन कि सादी स पहिले ही मारा गएस ह क कारण सोक क ओढ़ना पहिरे होइ अहइ, रोआ।

9 हे याजक लोगो! हे यहोवा क सेवक लोगो, विलाप करा। काहेकि यहोवा क मंदिर में स तू अब अउर न तउ अन्न क भेंट अउर न ही पेय भेंट पाउब्या।

10 खेत बर्बाद होइ गवा अहइँ। हिआँ तलक कि धरती भी रोअत ह काहेकि अन्न बर्बाद होइ गवा ह। नवा दाखमधु नाहीं होब्या काहेकि अंगूर क फसल बर्बाद होइ गवा ह अउर जइतून क बृच्छ तेल दइ क काबिल नाहीं होब्या।

11 हे किसान लोगो, तू पचे लाज करा। हे अंगूरे क बागबान लोगो, जोर स विलाप करा। तू पचे गोहूँ अउर जउ

बरे भी विलाप करा। काहेकि खेते क फसल बर्बाद होइ गवा ह।

12 अंगूरे क बेलन झुराइ गइ अहइँ अउर अंजीर क बृच्छ मुरझात अहइँ। अनारे क बृच्छ, खजूरे क बृच्छ अउ सेब क बृच्छ-बगियन क इ सबइ बृच्छ झुराइ ग अहइँ। लोगन क बीच खुसी मरि गइ अहइँ।

13 हे याजक लोगो, सोक क ओढ़ना पहिरा, जोर स बिलाप करा। हे वेदी क सेवक लोगो, जोर स बिलाप करा। हे मोरे परमेस्सर क दास लोगो, आपन सोक ओढ़ना में तू पचे सोइ जाब्या। काहेकि अब हुआँ अन्न अउ पेय भेंटन परमेस्सर क मंदिर में नाहीं होइहीं।

## टिड्डियन स खउफनाक बिनास

14 उपवास करइ बरे राष्ट्र क कहा, सभी लोगन क एक खास सभा बुलाइ ल्या। सभी बुर्जुग लोगन अउर देस क सभी निवासियन क एक साथ बटोर ल्या। ओनका आपन यहोवा परमेस्सर क मंदिर में बटोर ल्या।

15 यहोवा क भयंकर दिन हम लोगन क नजदीक आ गवा ह। उ दिन सर्वसक्तीमान परमेस्सर तवाही लाइ। यह बरे तोहका जरूर सोक मनाइ चाही। 16 हमार खइया क हमरे लखत-लखत चट होइ ग अहइँ। हमरे परमेस्सर क मंदिर स आनंद अउ खुसी जात अहइँ। 17 हम पचे खेत में बिया तउ बोए रहे, मुला उ झुराइके मरि गवा अहइँ यह बरे कोठियन खाली अहइँ। हमार खिलहान खाली पड़ अहइँ काहेकि फसल झुराइ गवा अहइँ।

18 हमार गोरू भूख स कराहत अहइँ। हमार गोरू खोवा-खोवा एँह कइँती ओह कइँती भटकत अहइँ। ओनके लगे खाइ क घास नाहीं अहइँ। भेड़िन मरति अहइँ। 19 हे यहोवा, मई तोहार दोहाइ देत अहउँ। काहेकि हमरी चरागाहन क आगी रेगिस्तान बनाइ दिहे अहइँ। बगियन क सबहिं बृच्छन लपटन स झउँसि गवा अहइँ। 20 जंगली पसु भी तोहार लगे हॉपत भवा आइहीं काहेकि नदियन झुराइ ग अहइँ। आगी हमार हरी-भरी चरागाहन क रेगिस्ताने में बदल दिहस ह।

## यहोवा क दिन आइ

2 सियोन पइ नरसिंह फूँका। मोरे पवितर पर्वते पइ चिताउनी सुनावा। ओन सबहिं लोगन क जउन इ धरती पइ रहत हीं, तू पचे डर स कँपाइ द्या। यहोवा क बिसेस दिन आवत अहइँ। इ बहोत ही लगे अहइँ।

2 उ दिन अँधियारा भर होइ, उ दिन उदासी अउर सोक क होइ, उ दिन करिया होइँ अउर उ दिन दुर्दिन होइ। भोरे क पहिली किरन क संग तू पचन्क पहाड़े पइ फउज फइलत भइ देखँइ देइ। उ फउज बिसाल अउर सक्ती होइ। तू अइसा



फउज पहिले तउ कबहुँ भी नाहीं लखा रहा अउ अगवा भी कबहुँ भविस्स काल में अइसा नाहीं लखी।

3उ फउज इ धरती क धधकत आगी जइसे तहस-नहस कइ देइ। जब फउज उ धरती स होइ क आगे बढ़इ तउ उ धरती जउन कि एदेन क बगीचा जइसा रहा उ एक उजड़ भवा रेगिस्तान में बदल जाइ। ओनसे कछू भी नाहीं बचि पाइ।

4टिडिय घोड़न क तरह देखइ जात अहइ अउर अइसे दउड़त हीं जइसे सिपाही दोड़त हीं।

5का तू इ आवाज क सुनत ह। इ पहाड़े पइ चढ़त भए रथन क खड़-खड़ क आवाज क नाई आवाज करत ह। इ आवाज अइसा अहइ जइसे जलत भइ भूसा क चटपट आवाज। उ सबइ लोग सक्तीवाले अहई। उ पचे जुद्ध बरे तइयार अहई।

6इ फउज क अगवा लोग डर स काँपत हीं। ओनकर मुँ डर स पिअर पड़ि जात हीं।

7उ सबइ फउजी बहोत तेज दउड़न हीं। उ सबइ फउजी देवारन पइ चढ़त हीं। हर एक फउजी सोझइ ही अगवा बढ़ि जात ह। उ पचे आपन रास्ता स तनिकउ भी नाहीं हटतेन।

8उ पचे एक दूसर क आपुस में नाहीं धकियउतेन। हर एक अपने राहे पइ चलत ह। अगर कउनो फउजी जखमी हो अउर गिरि जात ह तउ भी उ पचे आपन राहे स नाहीं मुरत ह।

9उ पचे आचानक ही सहरे पइ चढ़इ जाब। उपचे सहरे क देवार पाइ दोरब। उ पचे खिड़कियन स होइके भवनन भितरे घुस जात हीं जइसे कउनो चोर घुसि जाइ।

10धरती अउ अकासे तलक ओनके समन्वा थरत हीं। सूरज अउ चाँद भी करिया पड़ि जात हीं अउर तारा चमकब तजि देत हीं।

11यहोवा जोर सँ अपनी फउन क बुलावत ह। ओकर छावनी बिसाल अहइ उ फउज ओकरे हुकुमन क मानब्या। उ फउज बहोतइ सक्तीसाली अहइ। यह बरे यहोवा क बिसेस दिन महान अउ खउफनाक अहइ। कउनो भी मनई ओक आइ स रोक नाहीं सकत।

### यहोवा आपन लोगन स आपनी जिन्नगी बदलइ क कहत ह

12किन्तु अब भी यहोवा क सँदिसा इ अहइ: “पुरे मन स मोरे लगे वापस आवा। विलाप करा अउ चीख व पुकार करा अउर उपवास करा।

13अरे आपन ओढ़ना क बदले, तू पचे आपन सोक व दुःख क देखाइ बरे आपन दिल क ही फारि डवा। तू पचे आपन परमेस्सर यहोवा क लगे लउटि आवा। उ दयालु अउ करूणा स पूर्ण अहइ। ओका हाली किरोध नाहीं आवत ह। ओकर पिरेम महान अहइ। होइ सकत ह जउन किरोध उ तू पचन्क बरे सोचे होइ, ओकरे बरे उ आपन मन बदल लेइ।

14कउन जानत ह, होइ सकत ह यहोवा आपन मन बदल लेइ अउर इ भी होइ सकत ह कि उ तू पचन क बरे कउनो वरदान छोड़ जाइ। फुन तू पचे आपन परमेस्सर यहोवा क अन्नबलि अउ पेय भेंट अर्पण कइ पावा।”

### यहोवा स पराथना करा

15सियोन पइ नरसिंहा फूँका। उ बिसेस सभा बरे बोलावा द्या। उ उपवास क खास समइ क बोलावा द्या।”

16तू पचे, लोगन क बटोरा। बिसेस सभा बरे ओनका बोलावा। तू पचे बुढ़वा मनइयन क बटोरा अउर लरिकन क भी संग में बटोरा। उ सबइ नन्ह गदेलन भी लिआवा जउन अब भी महतारी क दूध पिअत अहई। नई दुलहिन क अउर दुलहा लोगन क ओनकर ओलरइ-कमरा स बोलावा।

17हे यहोवा क सेवक, याजक लोगो आँगन अउ वेदी क बीच विलाप करा। ओन सबहि लोगन क इ प्रार्थना करइ द्या: “हे यहोवा आपन लोगन पइ दया करा। तू पचे आपन लोगन क लजाइ जिन द्या। दूसर रास्ट्र क हम लोगन पइ हँसत भए इ कहइ क मौका जिन द्या कि “ओनकर परमेस्सर कहाँ अहइ?”

### यहोवा तू सबन्क तोहरे पचन्क धरती वापस दियाई

18तउ यहोवा क आपन देस क बारे जलन होइ गवा। अउर आपन लोगन क बरे में अफसोस परकट किया।

19ओनके प्रार्थना क उत्तर में यहोवा आपन लोगन स कहेस।, “मई तोहरे पचन्क बरे भरपूर अन्न, दाखमधु अउर तेल पठउब। मई अब दूसर रास्ट्रन क तू पचन्क पइ हँसइ नाहीं देब।

20मई उत्तर क हमलाआवर फउजन क तू पचन्क धरती स वापस भेज देब। मई ओनका झुरान अउ उजड़ी भइ धरती पइ पठाउब। ओनमाँ स कछू पूरब क समूदरे में अउ ओनमाँ स कछू पच्छिम समूदरे में जइहीं। उ पचे मरि भए होइ ओनके सड़त भइ दुर्गन्ध आकासे तलक जाइ काहेकि उ पचे बहोत ही खउफनाक करम किहस। परमेस्सर बहोत महान काम किहेउँ ह।”

### धरती क फुन नवा बनावा जाइ

21हे धरती, तू डर स जिन काँपा। खुस होइ जा अउर आनन्द स भरि जा। यहोवा बहोत महान काम किहेउँ ह।

22ओ मैदान क पसुओ, तू पचे जिन डरा। रेगिस्तान क चरागाहन में घास उगाइहीं। फल क बृच्छ फल देइ लागिही। अंजीर क बृच्छ सबन्त नीक फल अउर अंगूरे क बेलन भरपूर फसल देइहीं।

23तउ, हे सियोन क लोगो, खुस रहा। आपन परमेस्सर यहोवा में आनन्द स भरि जा। काहेकि उ तू पचन्क संग भला करी अउर तू पचन्क बर्खा देइ। उ तू पचन्क अगवा क बर्खा देइ। अउर उ तू पचन्क पाछे क भी बर्खा देइ जइसे पहिले देत रहा।

24तोहार पचन्क इ सबइ खरिहान गोहूँ स भरि जइहीं अउर तू पचन्क कुप्पे दाखमधु अउर जइतून क तेल स उफनाइ लागिहीं।

25उ सबइ भिनभिनात भइ टिडिडियन, फुदकत भइ टिडिडियन, बिनास करइवाली टिडिडियन अउ कुतरत भइ टिडिडियन जउन कि तोहार पचन्क चिजियन खाइ गाएन मई ही पठए रहेउँ। मुला मई यहोवा ओन मुसीबतन क बरिसन क बदला तू पचन्क चुका देब।

26तू पचे भरपूर खाइब्या अउर खाइ क सन्तुट्ट होइ जाब्या। आपन परमेस्सर यहोवा क नाउँ क तू पचे गुणगान करब्या काहेकि उ तू पचन्क बरे अदभुत बातन किहेस ह। अब मोर लोग फुन कबहुँ लज्जित न होइहीं।

27तू पचन्क पता लग जाइ कि मई इस्त्राएली लोगन्क साथ हउँ तू पचन्क पता लगि जाइ कि मई तोहार सबन्क परमेस्सर यहोवा हउँ। अउर कउनो दूसर परमेस्सर नाहीं अहइ। मोर लोग फुन कबहुँ लज्जिहीं नाहीं होइहीं।”

**सबहि लोगन पइ आपन आतिमा उडेरइ क यहोवा क प्रतिग्या**

28“एकरे पाछे मई तू सबन्पइ आपन आतिमा उडेरबउँ। तोहार पचन्क बेटवन-बिटियन भविस्सवाणी करिहीं। तोहार पचन्क बूढ़े सपनन लिखिहीं अउर तोहार पचन्क नउजवान दर्सन लिखिहीं।

29“उ समइ मई आपन आतिमा तोहार दास-दासियन तलक पइ भी उडेरब। 30धरती पइ अउ अकासे में जउन घटित होहीं ओकरे बरे में मई चेतवानी देब्या। हुआँ खून, आगी अउ गहिर धुआँ क स्तम्भ होइ।

31“सूरज आँधियारे में बदल जाइ अउर चाँद खून क रंग में बदली। तउ फुन यहोवा क दिन जउन कि सचमुच में महान अउ भयानक दिन अहइ आइ।

32“तब कउनो भी मनई जउन यहोवा स ओकरे नाउ लइ क प्रार्थना करइ ओका बचा लइ जाइ। काहेकि यहोवा वादा किहेस ह कि सिय्योन क पर्वत पइ अउर यरूसलेम में उ सबइ लोग होइहीं जेका बचावा गवा अहइँ। सिरिफ उहइ लोग बचिहीं जेका यहोवा बुलावत ह।

**यहूदा क दुस्मनन क यहोवा क जरिये**

**सजा दीन्ह जाइ क बचन**

3“हौं इ सच अहइ कि मई उ समइ, मई यहूदा अउ यरूसलेम क लोगन क बंधन स आजाद कराइके वापिस लइ आउबउँ।

2मई सबहिं रास्ट्रन यहोसापात क घाटी में बटोरब। अउर हुअँइ मई ओनका निआब करबउँ। काहेकि ओन रास्ट्रन मोरे इस्त्राएली लोगन क तितर-बितर कइ दिहे रहा अउर ओनका दूसर रास्ट्रन क बीच रहइ बरे मजबूर किहे रहेन। मई ओन रास्ट्रन क सजा देबउँ जउन मोर धरती क बाँटवारा कइ दिहे रहेन। उउ पचे मोर धरती क आपन लोगन क बीच बाँटवारा कइ बरे पाँसा लोकाए रहेन। उ पचे लरिकन क बँचिके ओकरे बदले रण्डी खरीदेन अउर दाखमधु खरीदइ बरे लइकियन बँचि डाएन अउर इ दाखमधु पी लिहेन।

4“हे सोर, सीदेन अउर पलिस्तीन क सबहिं प्रदेसो। तू पचे मोरे बरे कउनो महत्व नाहीं राखत्या। का तू पचे मोरे कउनो बुरे करम बरे सजा देत रहत अहा? होइ सकत ह तू पचे इ सोचत अहा कि तू पचे मोका सजा देत रहत अहा मुला हाली ही मई तू पचन्क सजा देइवाला अहउँ। 5तू पचे मोर चाँदी, सोना लूट लिहा। मोर बहोतइ कीमती खजानन क लइके तू पचे आपन मन्दिरे में धइ दिहा।

6“यहूदा अउ यरूसलेम क लोगन क तू पचे यूनानियन क हाथे बँच दिहा अउ इ तरह तू पचे ओनका धरती स बहोतइ

दूर लइ गया। 7तू पचे मोरे लोगन क सुदूर देस में बेच दिहा। मुला मई ओनका लउटाइके वापिस लिआउब अउर तू पचे जउन कछू किहा ह, ओकर बरे तू पचन्क सजा देब। 8मई यहूदा क लोगन्क लगे तू पचन्क बेटवन-बिटियन क बेच देबउँ। अउर फुन उ पचे ओनका सबइ लोगन्क बेच देइहीं जउन कि बहोत दूर रहत एहेन” इ सबइ बात होब्या काहेकि यहोवा इ सबइ बातन कहे रहा।

**जुद्ध क तइयारी करा**

9“लोगन क इ बताइ द्या-जुद्ध क तइयार रहा। सपहसालार लोगन क जगावा, सारे जोधन क नजदीक आइ द्या। ओनका हियाँ आइ द्या।

10आपन हरे क फारन क पीटिके तरवार बनावा अउ आपन हँसुआ क भाला में बदल द्या। दुर्बल लोग जरुर कहइ लागइँ कि “मई एक ठु सूरवीर हउँ।”

11हे सबहिं रास्ट्र क लोगो, हाली आवा। एक ठु जगह पइ बटुर जा। ये यहोवा, तू भी आपन बरिआर सिपाहियन क लइ आवा। 12हे रास्ट्र जागा! यहोसापात क घाटी में आ जा। मई सबहिं रास्ट्रन क जउन कि मोरे धरती क आसपास रहत अहइँ क निआउ करइ बरे बइठिहीं।

13तू पचे आपन संग हँसुआ लइ आवा, काहेकि फसल पक गवा ह। आवा, तू पचे अंगूर रौदा काहेकि अंगूर क कोल्हू भरा भवा अहइ। घड़न भरि भवा अइहीं अउर बाहेर उफनिहीं काहेकि रास्ट्रन क पाप बहोत बड़का अहइ।

14उ फँसला क घाटी में बहोत-बहोत सारे लोग अहइँ काहेकि उ फँसले क घाटी में यहोवा क दिन आवइवाला अहइ। 15सूरज चाँद करिया पड़ि जइहीं। तारे चमकब तजि देइहीं। 16परमेस्सर यहोवा सिय्योन स गरजी। उ यरूसलेम स गरजी, अकास अउ धरती काँप-काँप जइहीं मुला आपन लोगन बरे परमेस्सर यहोवा सरण क ठउर होइ। उ इस्त्राएल क लोगन क सुरच्छा ठउर होइ।

17तब तू पचे जान जाब्या कि मई तोहार पचन्क परमेस्सर यहोवा हउँ। मई सिय्योन पइ बसत हउँ जउन मोर पवितर पर्वत अहइ। यरूसलेम पवितर बनि जाइ। फुन पराये लोग कबहुँ भी ओहमों स होइके नाहीं जाइ पइहीं।”

**यहूदा बरे नई जिन्गी क वचन**

18उ दिन मधुर दाखमधु पहाड़न स टपकी। पहाड़न स दूधे क नदियन बहइहीं अउर यहूदा क सबहिं झुराइ नदियन बहत भाए जले स भरि जइहीं। यहोवा क मन्दिर स एक फौआरा फूटी जउन सितीम क घाटी क पानी स सीची।

19मिस्र उजाड़ होइ जाइ अउर एदोम एक उजाड़ भुइँया में बदल जाइ। काहेकि उ पचे यहूदा क लोगन क संग निर्दयी रहेन। उ पचे ओनके ही देस में निरपराध लोगन क जान स मारि रहेन। 20मुला यहूदा में लोग हमेसा ही बसा रइहीं अउर यरूसलेम में लोग पीढ़ी दर पीढ़ियन तलक रइहीं।

21ओ लोग मेरे लोगन क बध किहे रहेन एह बरे निहचय ही मई ओन लोगन स बदला लेब। मई कसूरवार लोगन क सजा दइ बिना नाहीं जाइ देब! काहेकि सिय्योन यहोवा क निवासे क ठउर अहइ।”

# होसे

## होसे क जरिये यहोवा परमेस्वर क सन्देश

1 इ यहोवा क उ सन्देश अहइ, जउन बेरी क पूत होसे क जरिये मिला रहा। इ सन्देश उ समइ आवा रहा जब यहूदा में उज्जियाह, योताम, आहाज अउ हिजकिय्याह क राज्ज रहा। इ ओन दिनन क बात अहइ जब इस्राएल क राजा योआस क पूत यारोबाम क समइ रहा।

2होसे बरे इ यहोवा क पहिला सन्देश रहा। यहोवा कहेस, “जा, अउर एक रण्डी स बियाह कइ ल्या जउन आपन रण्डीबाजी स संतान रखेस ह। काहेकि इ देस क लोग रण्डी क तरह बेउहार करत अहई। उ पचे यहोवा बरे अबिस्सासी रहेन ह।”

## यिज्जेल क जनम

3तउ होसे दिबलैम क बिटिया गोमेर स बियाह कइ लिहस। गोमेर गर्भवती भइ अउर उ होसे बरे एक तु पूत क जनम दिहस। 4यहोवा होसे स कहेस, “एकर नाउँ यिज्जेल राखा। काहे? काहेकि मई हाली ही यिज्जेल घाटी में कीन्ह गइन हत्या बरे येहू क परिवार क सजा देब फिन एकरे पाछे इस्राएल क बंस क राज्ज क खतम कइ देबउँ। 5उहइ समइ यिज्जेल घाटी में, मई इस्राएल क धनुस क तोड़ देब।”

## लोरुहामा क जनम

6एकरे पाछे गोमोर फुन गर्भवती भइ अउर एक तु कन्या क जन्म दिहस। यहोवा होसे स कहेस, “इ कन्या क नाउँ लोरुहामा राखा। काहेकि मई अब इस्राएल क लोगन पइ अउर जियादा दया नहीं देख्वाउब। मई ओनका छिमा नहीं करब। 7मुला मई तउ यहोवा क राज्ज पइ दया देख्वाउब। मई यहूदा क लोगन क रच्छा करब। मुला ओकरी रच्छा बरे मई न तउ धनुस अउर तरवार क प्रयोग करब अउर न ही जुद्ध क घोड़न अउर फउजियन क। मई, यहोवा, खुद आपन सक्ती स ओनका बचाउब।”

## लोअम्मी क जनम

8गोमेर अबहीं लोरुहामा क दूध पिआउब तजे ही रही कि उ फुन गर्भवती होइ गइ। तउ उ एक तु पूत क जनम दिहस। 9एकरे पाछे यहोवा कहेस, “एकर नाउँ लोअम्मी धरा। काहेकि तू पचे मोर प्रजा नहीं अहा अउर मई तोहार परमेस्वर नहीं अहउँ।”

## परमेस्वर यहोवा क बचन: इस्राएली बेगिनती क होइहीं

10“तउ पइ भी, भविस्स में, इस्राएल में अनगिनत लोग होइहीं जइसा सागरे क रेत क कन जउन न तउ नापी जाइ

सकत ह अउर न ही जेकर गनती कीन्ह जाइ सकत ह। अउर उहइ जगह पइ जहाँ ओनसे इ कहा ग रहा, ‘तू पचे मोर लोग नहीं अहा।’ उ पचन्क कहा जाईहीं, ‘तू पचे जिअत परमेस्वर क संतान अहा।’

11“तउ फुन यहूदा अउ इस्राएल क लोग एक संग ऐकटठा होइ जइहीं। उ पचे आपन खातिर एक सासक क चुनाव करिहीं अउर ओकरे लगे आपन पहुँटा होइहीं। यिज्जेल क दिन असल में एक महान दिन होइ।”

2“आपन भाइयन स कहा: ‘हम पचे एक ही लोग अहइ (अम्मी) अउर आपन बहिनियन क कहा, ‘यहोवा हम पचन पइ दयालु(रूहामा) अहइ।’”

## इस्राएल क जाति स यहोवा क कहब

2“आपन महतारी क खिलाफ एक सिकायत करा, काहेकि उ मोर पत्नी नहीं अहइ अउर न ही मई ओकर भतार अहउँ। ओका अदालत में लइ जा, तउ उ रण्डी जइसा बेउहार करइ छोड़ देइ अउर ओकरे प्रेमियन क ओकरे छातियन क बीच स दूर हटाइ देइ। 3अगर उ आपन इ रण्डीबाजी क छोड़इ स इन्कार करी, तउ मई ओका एकदम्मइ नंगा कइ देब। मई ओका वइसा ही प्रदर्शित करब जइसा उ पइदा भएका दिना रहेन। मई ओका सूखा रेगिस्तान क जइसा बनाब अउर मई ओका पिआसा मार देब। 4मई ओकरी संतानन पइ कउनो दया नहीं देख्वाउब काहेकि उ पचे रण्डीबाजी क संतान होइहीं। 5ओनकर महतारी रण्डी क नाई आचरण किहस ह। उ जउन ओनका गरभधारन किहेस ह मोर बरे लज्जा लिआएस, काहेकि उ कहेस, ‘मई आपन प्रेमियन क संग चलब जउन मोका उ सबइ चिजियन देब जेकर मोका जरूर अहई। उ पचे मोका रोटी, पानी, ऊन, अउर सन, तेल अउ दाखरस देत ही।’

6“एह बरे, मई तोहार रास्ता काँटन स बन्द करब! मई ओकरे रास्ता क रोकइ बरे एक तु देवार खड़ी करब, जेहसे उ आपन रास्ता ही नहीं पाइ सकिहीं। 7जदपि उ आपन प्रेमियन क पाछे भागिहीं, लेकिन उ ओन तक नहीं पहुँच सकिहीं। जदपि उ ओनका हेरिहीं, लेकिन उ ओनका नहीं पाइ सकिहीं। फुन उ कहिहीं, ‘मई आपन पहिले क भतार क लगे लौटि जाब काहेकि मोर पहिले क जिन्नगी मौजूदा जिन्नगी स बहोत अच्छा रहेन।’

8“किन्तु उ नहीं जानत रही कि उ मई ही रहा जउन ओका अन्न, दाखरस अउ तेल देत रहेउँ। मई ओका बहोत सारा चाँदी अउ सोना देत रहत रहेउँ, किन्तु ओकर प्रयोग बाल क मूर्तियन बनावइ में किहन। 9एह बरे मई वापस आउब अउर आपन अनाज क उ समइ लइ लेब जब उ

काटइ बरे तइयार होइ अउर मई आपन दाखरस क काटइ क मोसम में लेब। अउर मई आपन ऊन अउ सन क ओढ़ना क भी वापस लइ लेब जेका मई ओकरे नंगेपन क ढकि बरे दिहे रहेन। 10अब मई ओका बेवस्त्र कइके नंगा कइ देब ताकि ओकर सबहिं पिरेमी ओका देखि सकई। कउनो भी मनई ओका मोर सकती स बचाइ नाही पाई। 11मई ओहसे ओकर सारी हँसी खुसी छीन लेब। मई ओकर सालाना उत्सवन, नवा चाँद क दावतन अउ हफता क साबित क उत्सवन क खतम में लइ आउब। मई ओकर सबहिं खास दावतन क रोक देब। 12मई ओकर सबइ अंगूर क बेल अउर अंजीर क बृच्छन क भी नस्ट कइ देब। उ कहे रहेस, 'इ सबइ चिजियन मोर पिरेमी लोगन मोका दिहे रहेन।' मुला अब मई ओकरे बगियन क रेगिस्तान बदल देब। ओन बृच्छन स जंगली जानवर आइके आपन भूख मिटावा करिहीं।

13“उ बाल क सेवा किया करत रही, एह बरे मई ओका दण्ड देब। उ बाल देवतन क अगवा धूप बारत रही। उ गहनन स सजत अउर नथुनी पहिरा करत रही। फिन उ आपन पिरेमियन क लगे जात रही अउ मोका बिसर जात रही।” इ उ अहइ जउन यहोवा कहे रहा।

14“एह बरे, मई ओका लुभावइ बरे जात हउँ। मई ओका रेगिस्तान में लइ जाब अउर मई खुद ओह पइ जीतब। 15मई ओन रेगिस्तान में ओकरे बरे अंगूरु क बगियन बनाउब। मई आकोर क घाटी क आसा क दुआर बनाइ देब। फुन उ मोका उहइ तरह उत्तर देइ जइसे उ समइ दिया करत रही जब उ जवान रही अउर जब मई ओका मिस्र स बाहेर लिआए रहेस।” 16यहोवा कहत ह:

“उ अवसर पइ, तू मोका 'मोर भतार' कहिके पुकरब्या। तब तू जियादा समइ तलक मोका 'मोर सुआमी' नाही कहबू।\* 17मई बाल देवतन क नामन क ओकरे मुँह पइसे दूर हटाइ देब। फुन एक भी मनई बाल देवतन क नाउँ नाही लिया करिहीं।

18“फुन, मई इस्त्राएल क लोगन बरे जंगल क जनावरन, आकासे क पंछियन, अउर धरती पइ रेंगइवालन प्राणियन क संग एक वाचा करब। मई धनुस, तलवार अउर जुद्ध क अस्त्रन क तोड़ फेंकब। कउनो अस्त्र-सस्त्र उ भुईया पइ नाही बचि रहई। मई उ भुईया क सुरच्छित बनाइ देब जेहसे इस्त्राएल क लोग सान्ति क संग विस्त्राम कइ सकिहीं। 19मई तोहका सदा-सदा बरे आपन दुलहिन क रूप में लइ लेब। मई प्रतिग्या करत हउँ कि तोहका नेकी, खरेपन, पिरेम अउर दयालुता क संग आपन दुलहिन बनाइ लेब। 20मई तोहका आपन बिस्सासी दुलहिन बनाइ लेब अउर मई तोहार बिस्सासी होइ बरे प्रतिग्या करब। तब तू सचमुच यहोवा क जान जाबू।” 21यहोवा कहत ह, “उ दिना मई आकास क उत्तर देब अउर आकास धरती क उत्तर देब्या।”

**मोर भतार ... मोर सुआमी** इस्त्राएल क मेहररुअन इ दुइ सब्द क प्रयोग आमतौर स आपन भतार बरे किहे रहेन। हिब्रू भाखा में सब्द “सुआमी” बरे “बाल” सब्द रहा। बाल कनानियन क देवता भी रहा। होसे हिआँ बाल सब्द क प्रयोग इस्त्राएलियन क सरापइ बरे किहेस ह जउन बाल देवता क पूजा किहे रहेन।

22धरती अन्न, नवा दाखरस अउर उत्तम तेल स उत्तर देईहीं। उ पचे यिजेरल क उत्तर देईहीं।

23मई भुईया में इस्त्राएल क आपन बरे लगाउब। मई लोरुहामा पइ दया देखौउब: मई लोअम्मी स कहब, 'तू मोर प्रजा अहा।' अउर उ पचे मोहसे कहिहीं, 'तू हमार परमेस्सर अहा।”

### होसे क गोमेर क गुलामी स छोड़उब

3 तउ यहोवा मोसे कहेस: “फुन जा अउर उ बिभिचारी मेहरारू स पिरेम कर जउन कउनो दूसर क प्रेमी अहइ। ठीक इसी तरह यहोवा इस्त्राएलियन क परिम करत ह भले ही उ पचे दूसर देवतन क तरफ मुस्त हीं अउर किसमिस देइ पसंद करत हीं।”

2यह बरे मई ओका पन्द्रह चाँदी क सिक्कन अउर तीन सौ किलोग्राम जौ देइके खरीद लिहेस ह। 3तउ मई ओसे कहा: “तोहका मोरे संग बहोत अधिक समइ तलक रहइ चाही। तोहका कउनो रणडी जइसा हरकत नाही करइ चाही अउर कउनो दूसर मनइ क संग नाही रहइ चाही। मई अकेल्ला ही तोहार भतार होब।” 4इहइ तरह, इस्त्राएल क लोग बहोत दिनन तलक बिना कउनो राजा या मुखिया क रईहीं। उ पचे बिना कउनो बलिदान क रहिहीं अउर उ पचे कउनो पाथर क खम्भा खड़ा नाही करिहीं। उ पचे भविस्सवाणी करइ बरे कउनो एपोद क प्रयोग नाही करिहीं अउर ओनकर लगे कउनो गृह देवता भी नाही होईहीं। 5एँकरे बाद इस्त्राएल क लोग वापस लउटि अइहीं अउ यहोवा आपन परमेस्सर क खोजिहीं अउर आपन राजा जउन राजा दाऊद क परिवार समूह स आएस, खोज करिहीं। भविस्स्य में, उ पचे आपन आपका यहोवा समर्पित करिहीं अउर ओकरे आसीर्बादन क लेईहीं।

### इस्त्राएल पइ यहोवा क किरोध

4 हे इस्त्राएल क लोगो, यहोवा क सँदेस क सुना। यहोवा इ देस में रहइवालन क अदालत लइ जात हीं काहेकि उ पचे परमेस्सर संग कीन्ह भवा करार क प्रति विस्सासी अउ वफादार नाही रहेस ह। वास्तव में इ देस क लोगन परमेस्सर क जानतेन ही नाही। 2उ पचे सराप, झूठ, चोरी, बिभिचारी, अहिंसा अउर रक्तपात में मसगूल अहई। 3परिणाम, भुईया विलाप करब्या, अउर एकरे सबहिं निवासियन नस्ट कीन्ह जाब्या। जंगल क जनावरन, आकास क पंछियन अउर सागर क मछरियन तलक भी नस्ट कीन्ह जाब्या।

### पापी याजकता क खिलाफ यहोवा क बिरोध

4मई कउनो दूसर पइ आरोप जिन लगावत हउँ! हे याजकन, मई इ सबइ बातन बरे तोह पइ आरोप लगात हउँ। इहइ कारण मोर मुकद्दमा तोहार खिलाफ अहइ।\*

**इहइ ... अहइ** साब्दिक अरथ “कउनो क भी न इलज़ाम लगाइ द्या। अउर न ही फटकारइ द्या। तू ओन लोगन क नाई अहा जउन याजकन पइ इलज़ाम लगावत ह।” इ पद समुझइ बरे बहोत ही कठिन अहइ।

5हे याजकन, तू दिना में ठोकर खाउब्या, किन्तू तू अउर नबी दुइनउँ रात क समइ में ठोकर खाउब्या। तू आपन लोगन क ही बर्बाद कइ दिहेस ह।\*

6“मोर प्रजा क बिनास भवा काहेकि ओन लोग मोका यहोवा क रूप में स्वीकार नाहीं किहेस, कारण याजक मोका स्वीकार करइ स इन्कार किहेस। यह बरे मई तोहका आपन याजक क रूप में स्वीकार नाहीं करब। तू आपन परमेस्सर क बिसरि दिहा ह एह बरे मई तोहरी संतानन क बिसरि जाब। 7उ पचे मोर खिलाफ जेतैना पाप किहेस ओतैना ही घमण्डी होइ गएन। यह बरे मई ओनकर महिमा क लज्जा में बदल देब।

8“याजक क रूप में, उ पचक लोगन क पाप भेंटन क खाएस ह। उ पचे चाहेस कि लोग जियादा स जियादा पाप करी। 9याजकन अउर लोगन क संग एक ही तरह क बेउहार कीन्ह जाब्या। मई ओनका ओकरे पाप क कारण सजा देबउँ। मई ओनसे ओनकर बुरे करमन क बदला लेबउँ। 10उ पचे खइहीं मुला उ पचे संतुट्ट न होइ। उ पचे रण्डीबाजी करिहीं, मुला ओनकइ आबादी न बढ़िहीं। काहेकि उ पचे यहोवा क तजेन ह, अउर उ पचे अबिस्सासी होइके आपन क दूसर देवतन क समर्पित कइ दिहेस ह।

11“नई दाखरस अउर पूराना दाखरस ओन लोगन स ओनकर तर्क-सक्ती क लइ लेत ह। 12मोर लोग काठे क मूरती स राय मोंगत हीं। ओकर बिस्सास अहई कि जादूई छड़ी ओकरे भविस्य क बारे में बताई सकत ह। ओन देवतन क संग ओकरे बिभिचारी ओनका भटकइ दिहेस ह। उ पचे रण्डी क रहइ बरे उ पचे आपन परमेस्सर क तजि दिहेन। 13उ पचे पहाइन क चोटियन पइ बलि चढ़वत ह। उ पचे बलूत, चिनार अउ दूसर लम्बा बृच्छन क तरे धूप बारत ह। ओन बृच्छन क तरखाले क छाया नीक देखैत रही। एह बरे तोहार बिटियन ओन बृच्छन क तरे खूद रण्डीबाजी करइ बरे सोअत ह अउर तोहार बहुअन हुआँ पापे स भरा यौनाचार करत हीं।

14“मई तोहार बिटियन अउ बहुअन क एह बरे सजा नाहीं देब कि उ पचे रण्डी क जइसा रहइ के बिभिचारी क काम किहेन ह। काहेकि मनइयन खुद ही रण्डियन क संग यौन सम्बंध बनाएस ह अउर मंदिर क रण्डियन दुआरा बलि चढ़ावत हीं। यह बरे इ कहावत सच अहइ: उ रास्ट्र जउन समझ नाहीं राखत ह ओका बर्बाद कइ दीन्ह जाब्या।

### इस्त्राएल क लज्जा स भरा भवा पाप

15“हे इस्त्राएल, तउ प भी तू एक ठु रण्डी क नाई रहत अहा, मोका आसा अहइ कि यहूदा कसूरवार भि नाहीं होइ। यहूदा, तू गिलगाल में दाखिल जिन भवा अउर बेतावेन तलक जिन जा। यहोवा क नाउँ पइ किरिया जिन खा इ जिन कहा: ‘यहोवा क जिन्गी क किरिया, मई प्रतिग्या करत हउँ।’ 16इस्त्राएल एक ठु जवान हट्टी गाय क नाई बिद्रोह किहेन ह। हाली ही यहोवा ओनका चरागाह में गरोड़िया क नाई लेइ जाइहीं आपन मेमना क बिसाल घास क मइदान में

तू ... दिहेस ह मई तोहार महतारी क बर्बाद कइ दिहेस ह।

चरइ देत ह। 17एप्रैम भी ओकर मूरतियन में ओकर संगी बन गवा। तउ ओका अकेल्ले तजि द्या।

18“जब उ पचे दाखरस पिअइ खतम कइ देब, उ पचे आपन रण्डीपन क प्रथा जारी राखब; उ पचे आपन लज्जावाला कामन स बहोत खुस होब। 19एक बवण्डर इस्त्राएल क आपन पाखन में उड़ाइ लेइ जाब, अउर ओका लेइ जाब काहेकि उ मूरतियन क भेंट किहेस ह।”

### मुखिया लोग इस्त्राएल अउ यहूदा स पाप करवाएन

5 “याजकन, सुना! इस्त्राएल क परिवार, धियान दे! साही परिवार, सुना!

“जदपि तू पचे अइसा लुकान रहा जइसा कि मिसपा क फंदा में अहा अउर तू पचे ताबोर क धरती पइ फइलावा गवा फँदन क तरह अहा, मई तू सबइ क खिलाफ निआव करब। 2मई तू सबन क सजा देबउँ जदपि तू पचे सितम क गहरा खाई क नाई होइ। 3एप्रैम, मई जानत हउँ तू का करत ह। इस्त्राएल, तू मोसे छिपा भवा नाहीं बा। एप्रैम लखा, इस्त्राएल अपवित्त अहइ काहेकि उ रण्डी क नाई हरकत करत आवत ह। 4इस्त्राएल इ सबइ कुकरम कइके आपन क परमेस्सर क लगे लउटइ स रोकत अहई। उ पचे मूरती पूजा करइ क मजबूत इच्छा रखत ह\* उ पचे यहोवा क नाहीं जनतेन। 5जउन बातन इस्त्राएल क गोरव बनावत रही उ ही ओकरे बरे लज्जा लाइहीं। इस्त्राएल आपन अपराध क कारण ठोकर खावत ह। यहूदा भी ओकरे संग ठोकर खावत ह।

6“इस्त्राएल क लोग ‘भेड़िन’ अउर ‘गइयन’ क साथ लइके यहोवा क बलि चढ़ावइ बरे हेरइ बरे निकरि। मुला उ पचे ओका नाहीं पाइ सकिहीं। तउ जान जाइहीं कि उ ओनसे दूर चला गवा अहई। 7यहोवा ओन पइ बिस्सास किहेन, मुला उ पचे ओकर संग धोखा किहेस। लखा, उ पचे अवैध गदेलन क जन्म दिहेस ह। हाली ही यहोवा ओनकर समुचइ फसलन क एक ठु महीना में ही दुस्मन क जरिये खतम करइ देब्या।”

### इस्त्राएल क बिनास क भविस्सबाणी

8“गिबाह में नरसिंगाहा बजावा; रामा में तू तुरही बजावा। बेतावेन में जोरदार आवाज करा। हे बिन्यामीन, लखा!

9जब सजा क समइ आइ, एप्रैम पूरी तरह स बर्बाद कीन्ह जाब्या। तू निहचय होइ सकत ह कि मई इस्त्राएल क कबीला क बीच स जउन बोलत हउँ इ फुरइ अहइ।

10यहूदा क मुखिया उ मनई क तरह होइ जउन दूसर लोगन क भइया क लेइ बरे चउहददी क निसान क पाथरन खिसकावत ह। तउ मई ओह पइ आपन किरोध पानी क तरह उण्डेलब।

11एप्रैम क सजा दीन्ह जाइ, ओका कुचरि दीन्ह अउ मसरि दीन्ह जाइ जइसे अंगूरे क पीस दीन्ह जात ह। काहेकि उ निकम्मा क अनुसरण करइ क निहचइ किहेस ह।

उ पचे ... रखत ह साब्दिक अरथ ओनमा रण्डीबाजी क आत्मा अहइ।

12मई एप्रैम क अइसे नस्ट करब जइसे कउनो घुन कउनो काठे क नस्ट करत ह। अउर मई यहूदा क वइसे नस्ट करब जइसे जंग कउनो धातू क नस्ट करत ह।

13एप्रैम जान लिहेस कि उ रोगग्रस्त अहइ; यहूदा आपन घाव लखेस। एप्रैम अउर यहूदा अस्सूर क “महान रजा” क लगे मदद बरे गएन। किन्तु महान रजा तोहार रोग क नीक करइ मँ या तोहार घाव भरि मँ अस्सर्मथ रहेन।

14मई एप्रैम बरे एक सेर क नाई होब। मई यहूदा क संग एक जवान सेर क नाई हरकत करब। मई ओनका टुका मँ चीड़ देब अउर ओनका दूर लइ जाब। कउनो भी ओनका मोसा बचाइ नाहीं पाइ।

15फुन मई आपन जगह रहइ बरे लउट जाब जब तलक कि उ पचे आपन कसूर स्वीकार न करइ लेइ अउर मोका हेरत भए न आ जाइ। जब उ पचे विपदन मँ होइ, उ पचे मोका, मोह स मदद लेइ बरे हेइहीं।”

### यहोवा कइँती लउटि आवइ क प्रतिफल

6 “आवा, हम यहोवा कइँती लउटि आइ। जदपि उ हमका टुका मँ चीड़ दिहेस ह, किन्तु उ हमका चंगा करी। जिस तरह उ हमका चोट किहेस, उहइ तरह उ हमार घावन पइ मरहम भी लगाई।

2दुइ दिना मँ उ हमार जिन्नगी वापिस देइ सकत ह। तीसरे दिन उ हमका आपन गोड़ मँ खड़ा करी, तउ हम ओकर मोजूदगी मँ रहब।

3आवा, ओका परमेस्सर क रूप मँ स्वीकार करा; आवा, उ सबइ करी जेसे हम यहोवा स्वीकार कइ सकत हीं। ओकर आवइ ओतना ही निहचइ ह जेतँना कि भोर क आवइ। ओकर आवइ ओतना ही निहचय अहा जेतँना क जाड़ा क बोछार। अवस्य ही उ वइसे ही आई जइसे कि बसंत क बर्खा आवति अहइ जउन धरती क सींच देत ह।”

### लोग सच्चा नाहीं अहइँ

4“हे एप्रैम, तोहार संग मोका का करइ चाही? हे यहूदा, तोहरे संग मोका का करइ चाही? तोहार पिरेम ऐतना तेजी स गुजर गएन जइसा भिंसारे क कोहरा अउर भिंसारे क ओस तेजी स खत्म होइ जात ह।

5मई नबियन क प्रयोग किहेउँ अउर मनइयन बरे नेम बनाइ दिहेउँ। मोरे आदेस पइ मनइयन क कतल कीन्ह गवा मुला इ सबइ फइसलन स भली बातन पइव होइहीं।

6मोका विस्सासी पिरेम खुस करइ सकत ह, बलियन नाहीं जब लोग मोका परमेस्सर क रूप मँ जानत ह तउ इ मोका होमबलि स जियादा आनन्दित करत ह।

7उ जगह पइ जउन आदम कहलावत अहइ उ पचे करार तोड़ दिहस। उ भुइँया मँ उ पचे मोरे बरे अबिस्सासी रहेन।

8गिलाद ओन लोगन क नगरी अहइ जउन पाप किया करत हीं। हुआँ क लोग चालबाज अहइँ अउर उ पचे अउरन क हत्या करत हीं।

9याजक लोग भयानक अपराध किहेन। डाकून क दल जइसा कउने पइ हमला करइ बरे घात मँ छुपा रहत हीं।

लटेरन क जइसा उ पचे सकेम लोगन क राहे पइ हत्या किहेन।

10मई इस्राएल क मन्दिर मँ घृणित बात क लखेउँ ह। उहइ जगह पइ एप्रैम रणडीबाजी किहेन अउर इस्राएल आपन क अपवित्र किहेस।

11हे यहूदा, तोहार बरे भी फइसला क एक दिन तय कीन्ह ग अहइ।”

### परमेस्सर इस्राएल क सज़ा नाहीं देइ

#### अगर उ पश्चाताप करत ह

7 “जब मई आपन लोगन क सज़ा देइ बन्द करब अउर जब मई ओनका बन्दी स वापिस लिआउब अउर इस्राएल क चंगा करब। तब लोग एप्रैम क पाप जान लेइहीं। अउर हरकोइ सोमरोन मँ लोगन क कीन्ह भवा बुरा कामन क बारे मँ जानइ लेइहीं: उ पचे लबार देवतन बनाएन, चोरन घरे मँ घुसेन, लुटेरन क दल गलियन मँ लोगन क लुटेन।

2उ पचे इ नाहीं जान पावत ह कि मई ओनकर बुरा कामन क याद रखत हउँ। ओका बिस्सास नाहीं करत ह कि हर एक चीज जउन उ किहेस मई ओका साफ-साफ लखेत हउँ।

3उ पचे आपन कुकरमन स आपन राजा क खुस करत हीं। ओकर लबार ओकरे मुखियन क खुस करत हीं।

4रोटी पकावइवाला रोटी बरे आटा मढ़त ह। मुला उ आगी क तब तलक नाहीं दहकावत जब तक कि गोंधा भवा आटा फूल न जाइ। मुला इस्राएल क लोग उ रोटी पकावइवाला क नाई नाहीं अहइ, उ पचे आपन उमंग हर समइ दहकावत ह।

5ओकरे राजा क उत्सव क दिन मँ, राजकुमार दाखरस पिअइ सुरु कइ दिहेस। राजा ओन लोगन क संग समझौता करत ह जउन ओकरे संग हँसी-मजाक करत हीं।

6उ पचे ओकरे लगे आवत ह। उ पचे ओनकर खिलाफ खुफिया साज़ि रचत ह। अउर उ तंदूर क नाई दहकत रहत हीं। सारी रात ओकर गुस्सा धीरे-धीरे पाकत ह, अउर भिंसार होत होत उ भभकत भवा आगी क नाई तेज होइ जात ह।

7उ पचे मूँइ भभकत भए तन्दूर क जइसा अहइँ; उ पचे आपन ही मुखियन क नस्ट कइ दिहेन ह। ओनकर सबइ राजा लोगनक पतन एक ही तरह स भवा रहा, मुला ओनमौँ स कउनो भी परमेस्सर क मदद बरे कोहाइ क जतन नाहीं किहे रहेन।”

### इस्राएल आपन नास स बेखबर

8“एप्रैम दूसर जातियन क संग घुल-मिल गएन, मुला इ अइसा होइ जइसा कि रोटी सिरिफ एक ही तरफ स सेंका गवा ह।

9बिदेसयन एप्रैम क ताकत निगल गाएस ह, किन्तु उ ओका नाहीं जान पाए। ओकरे बार भी सफेद होइ लाग, किन्तु ओका एकर पता नाहीं चला।

10इस्राएल क आपन क घमंड ही ओह पइ इलज़ाम लगावत ह, लेकिन फिर भी उ यहोवा आपन परमेस्सर क

लगे नहीं लउट ह। जदपि इ सबइ बात घटिहीं, तउ प भी उ यहोवा क नहीं खोजिहीं।

11 एप्रैम उ भोला कबूतरे क नाई बन गवा अहइ जेकरे लगे कछू भी समुझ नहीं होत ह। लोग मिस्र स मदद माँगने अउर लोग अस्सूर क सरण में गएन।

12 जहाँ कहूँ भी उ जाई, मई ओका आपन जाले में फँसाउब अउर मई ओनका अइसे खाले हींच लेबउँ जइसे अकासे क पंछी हींच लीन्ह जात हीं।

13 ओह प हाय, काहेकि कि उ पचे मोका तजि दिहेस ह। उ पचे नस्त होइ काहेकि उ मोर खिलाफ बिद्रोह किहेन ह। मोका ओनका बचाइ बरे कछू धन दीन्ह जाइ चाही रही अउर ओकर धियान दीन्ह जाइ चाहत रही, मुला उ पचे मोर बरे झूठ बोलत हीं।

14 उ पचे पराथना में कबहुँ मोका पूरा हिरदइ स नहीं गोहरान। उ पचे आपन बिछउना में अनाज अउर दाखरस बरे गोहरावत हीं, अउर उ पचे दूसर देवतन बरे रीतियन क पूरा करत ह तउ आपन सरीर क घायल करत ह। उ पचे अपने पीठियन क मोर कइँती मोड़ दिहेस हीं।

15 मई ओनका अनुसासन दिहे रहेउँ ह अउर ओनकर भुजा बलवान बनाए रहेउँ ह, मुला उ पचे मोरे विरोध में बुरा सइयंत्र रचेन।

16 उ पचे पूजा बरे झूठे देवन कइँती मुड़ा भवा धनुस क नाई जउन फेंकइ क पस्चात वापस अवत हीं, क तरह मुड़ गएन ह। ओनकर मुखिया लोग आपन ही सक्ती क सेखी बघारत रहेन, मुला ओनका एक तरवार मउत क घाट उतारा जाइ। मिस्र में हर कोइ ओन पइ हँसिहीं।

### मूर्ति पूजा स इस्त्राएल क विनास

8 “तुरही क आपन होंठन लगावा। यहोवा क भवन क ऊपर गिद्ध जइसा बनि जा,\* काहेकि उ पचे मोर करार क तोड़ दिहन जउन ओकरे संग किहे रहेन। उ पचे मोर नेमन क खिलाफ अपराध किहेन ह। 2 उ पचे गोहरावत, ‘हे इस्त्राएल क परमेस्सर, मई तोहका जानत हउँ’ 3 मुला इस्त्राएल हाय! उ भली बातन क नकार दिहस। इहइ स दुस्मन ओकरे पाछे पड़ि गवा ह। 4 उ पचे बिना मोसा समपर्क किए भए आपन राजा चुनेन। मई उ मुखियन क अनुमोदन नहीं किहा जेका उ पचे चुने रहा। ओकर मुखियन ओकरे बरे सोना अउ चाँदी स मूर्तियन बनाए रहेन। एह बरे उ पचे नास कीन्ह जाब। 5 हे सोमरोन, तोहरे बछवा-मूर्ती मोर बरे घृणित अहइ। मई एकर कारण बहोतइ कोहाइ हउँ। तू पचन्क एकरे कारण केतँना देरी तलक इ पाप क दोखी रहब? 6 बछवा-मूर्ती इस्त्राएल क एक कारीगर दुआर बना ग रहेन अउर इ परमेस्सर नहीं, एह बरे सोमरोन क बछवा-मूर्ती क टूकन-टूकन में तोर दीन्ह जाइ। 7 उ पचे बोइहीं जब हवा बहत हीं, अउर उ पचे काहिहीं जब चक्रवात चलिहीं। खेतन अनाज उगाइ मैं असर्मथ होइ। एह बरे हुवाँ खाइ बरे रोटी नहीं होइ। अगर भुइँया थोड़ बहोत अनाज उग भी तउ ओका दुस्मन आइ अउर निगल जाइहीं।

तुरही क ... बनि यहोवा क भवन क उपर रच्छक जइसा बनि जा।

8 इस्त्राएल क रास्ट्रन क जरिये निगल लीन्ह गवा ह। एँकर लोग एक ठु अइसा बेकार क पात्र क नाई अहइ जउन बाहेर फेंक दीन्ह ग अहइ। रास्ट्रन क बीच स छितराइ दीन्ह गवा अहइ।

9 इस्त्राएल अस्सूर जाइ बरे अइसा बल देत ह जइसे कउनो जंगली गदहा स्वयं ही भटकत फिरत ह। एप्रैम जातियन क बीच रण्डी क धन दिहेन।

10 काहेकि इस्त्राएल जातियन क बीच रण्डी क धन दिहेन, अब मई सबन क आपुस में कछू समई बरे अस्सूर सम्राज क मातेहत ओकरे अत्याचार क झेलइ बरे बटोरब।”

### इस्त्राएल क परमेस्सर क बिसरब अउ मूर्तियन क पूजब

11 “जदपि पाप स छुकारा बरे एप्रैम जियादा स जियादा वेदियन क बनाए रहा, मुला उ पचे इ वेदियन क प्रयोग जियादा पाप करइ बरे करिहीं।

12 जदपि मई एप्रैम क बहोत साफ-साफ नेमन लिख दिहे रहेउँ, तउ भी इ ओकरे बरे बिचित्र लागत ह।

13 उ पचे ओसे बलि भेंट किहेन जउन मई ओनका दिहे रहा। उ पचे बलि भेंट किहेन अउर ओका खाएन जउन उ बलि दिहे रहेन। यहोवा इ लोगन स खुस नहीं अहइ। उ पचे ओकरे पापन क याद राखब, एह बरे उ ओका सज़ा देइहीं। ओनका बन्दी क रूप में मिस्र लइ जावा जाइ।

14 इस्त्राएल आपन निर्माता क बिसरि गवा। इस्त्राएल जियादा स जियादा महल क बनाइहीं जब यहूदा गढ़वाले अनेक नगर बनाएन। एह बरे मई यहूदा क नगरी में ओकर महलन क बबदि करइ बरे ओकर खिफाल आगी पठउब।”

### देस स निकारे भए क दुःख

9 हे इस्त्राएल, दूसर जातियन क तरह बहोत जियादा उत्सव पसन्द जिन करा। काहेकि तू मोर प्रति अविस्सासी होइ गवा ह अउर तू आपन परमेस्सर क दूर खड़ा होइ गवा ह। तू पचे लबार देवतन क वाचा क हर खरिहाने क धरती पइ पूरा करइ चाहत ह। 2 मुला ओन खरिहानन स मिला भवा अनाज इस्त्राएल क पर्याप्त भोजन नहीं दइ पाइ। इस्त्राएल बरे पर्याप्त दाखरस भी नहीं रही।

3 इस्त्राएल क लोग यहोवा क धरती पइ नहीं रहि पइहीं। एप्रैम मिस्र क लउटि जाइ। अस्सूर में ओनका वइसा खइया क खाइ पड़ी जइसा ओनका नहीं खाइ चाही। 4 उ पचे यहोवा बरे अउर दाखरस क चढ़ावा नहीं चढ़इहीं। ओनकर बलियन ओका खुस नहीं करब, उ पचे दाह-संस्कार क रोटी क नाई होइहीं जउन एका खइहीं अपवितर होइ जइहीं। ओनकर रोटी सिरिफ ओकर भूख मिटाहीं, मुला यहोवा क मन्दिर में बलि नहीं होइहीं। 5 नियत पर्व क दिन अउर यहोवा क उत्सव क दिन तू पचे का करिहीं?

6 इस्त्राएल क लोग पूरी तरह स नस्त होइ क डरे स अस्सूर क ग रहेन मुला मिस्र ओनका बटोरि क लइ लेइ। मोप क लोग ओनका गाड़ देइहीं। चाँदी स भरे ओनके खजानन पइ खरपतवार उगि आइ। ओनकर डेरन में, कौँदेर झाड़ी उगि अइहीं।

7निआव क दिन आइ गवा! सज़ा क दिन आइ गवा!  
इस्त्राएल क एका जरूर जानइ चाही!

### इस्त्राएल सच्चे नबियन क नकारेस

मुला उ पचे सोचत हीं कि नबी मूरख अहइ अउर आतिमा स प्रेरित जन पागल अहइ। तू आपन बहोत सारे पापन क कारण अउर काहेकि तू नबी क संदेस स घिना करत ह तू अइसा सोचत ह।

8नबी क कारज परमेस्सर बरे अइसा ही अहइ जइसा कउनो पहरेदार एप्रैम बरे पहरेदारी करत ह। मुला रस्ता अनेक फँदन स भरा भवा अहइ, काहेकि परमेस्सर क लोग तउ प भी हम स घिना करत हीं।

9उ पचे बहोत भरस्ट होइ गवा ह, ठीक वइसा ही जइसा गिबा क दिनन में होत रहेन। बहरहाल यहोवा ओनकर अपराध क याद रखत ह अउर ओनकर पाप क सज़ा देत ह।

### मूर्ति पूजा क कारण इस्त्राएल क विनास

10जब मई इस्त्राएल क पाएस, मई यहोवा बहोत खुस भाव जइसा कउनो मनई रेगिस्ताने में अंगूर पाएस ह। जब मई तोहार पुरुखन क लेखस, मई महसूस किह्या कि जइसा कि ऋतु क सुरुआत में अंजीर क बृच्छ पइ कउनो क अंजीर क पहिले फल मिलत हीं। मुला उ पचे तउ बाल-पेऑर\* क लगे चला गएन अउर बाल देवतन क भक्त होइ गएन। उ पचे घृणित देवतन क जइसा होइ गएन जेका उ पिरेम करत रहेन।

### इस्त्राएलियन क बंस नहीं बाढ़ी

11एप्रैम क महिमा एक चिड़िया क नाई उड़त हीं। उ पचे एकर पाछे न कउनो गरभ धारण करी, या न गरभवती होइ, या न कउनो गदेलन जन्म देइहीं।

12मुला भले ही इस्त्राएली आपन गदेलन पाल भी लेइहीं तउ भी सब बेकार होइ जाइ। मई ओनसे ओनकर गदेलन छोर लेब। ओकर लगे सिरिफ मुसीबतन ही रहइ काहेकि मई ओनसे मुडि जाब।

13मई लखत हउँ कि एप्रैम आपन सन्तानन क एक फँदा कइँती लइ जात अहइ। एप्रैम आपन गदेलन क इ हत्यारा क लगे बाहेर लइ जात अहइ।

14हे यहोवा, तू ओनका का देइ चाहत अहइ? ओनका अइसा गर्भ द्या, जेका गर्भपात होइ जात ह। ओनका अइसेन थन दइ द्या जउन दूध नहीं देइ सकी।

15उ पचे गिलगल में बहोत सारा बुरा काम किहेन रहेन! मई ओनसे ओकरे काम क कारण घिना करइ सुरू किहे रहेउँ। मई ओनका आपन घरे स निकरि फेंकब, मई ओनसे अब पिरेम नहीं करत रहब। ओनकर सबहिं मुखिया लोग मोर खिलाफ मुडि गवा अहइँ।

16एप्रैम पइ मसीबत आएस ह। उ पचे पूरी तरह उपजहीन होइ जाई। जदपि उ कउनो गदेलन क जन्म देई, मई ओकरे

बाल पेऑर इ भवा जब मूसा इस्त्राएलियन क रेगिस्ताने में अगुवाइ करत रहा। पढ़ा गनती 25:1-5

कीमती गदेलन क मार डाउब जइसे ही उ ओका जन्म देब्या।

17मोर परमेस्सर ओका अस्वीकार करिहीं, काहेकि उ पचे मोका नहीं सुनिही। इहइ कारण अहइ कि उ पचे जातियन क बीच में भटकत रहिहीं।

### इस्त्राएल क बैभव इस्त्राएल स मूर्ति पूजा करवाएस

10 इस्त्राएल एक ठु अइसी दाख-लता अहइ जेह पइ बहोत सारा फल लागत हीं। उ जेतना फल देत हीं ओतना ही वेदियन बनत ही। जब भूइँया नीक फसल पइदा करत ह, तउ इस्त्राएल जियादा स जियादा महँगा स्मृति पाथर लबार देवतन क मान देइ बरे लगावत ह। 2इस्त्राएल क लोग आपन हिरदयन में परमेस्सर क धोखा देइ क जतन किहेस, यह बरे ओका ओकरे पाप क बदले में जरूर सज़ा दीन्ह जाइ चाही। यहोवा खुद ही ओकार वेदियन क तोड़े देब अउर अउर उ ओनकर स्मृति-स्तूपन क तहस-नहस करब।

### यहोवा इस्त्राएलियन क राज लइ लेब

3अब इस्त्राएल क लोग कहा करत हीं, “न तउ हमार कउनो राजा अहइ अउर न ही हम यहोवा क मान करित ह। अउर ओकर राजा हमार कछू बिगारि नहीं सकत ह।”

4ओकर बचन सिरिफ एक सब्दन अहइँ। उ आपन प्रतिग्या क पूरा नहीं किहेस अउर करार क तोड़ दिहेस। हिऑ बहोत स अदालत क मुकद्दमा अहइँ जइसा खेत में उगा भवा खरपतवार।

5सोमरोन क लोग बेतावेन में बछवन क पूजा करत हीं अइसे लोग क असलियत में विलाप करिहीं। ओन याजक लोग असलियत में विलाप करिहीं काहेकि ओकर सुन्नर मूर्ति खो गइ अहइ। काहेकि ओकर महिमामय मूर्तियन क लइ लीन्ह जाब। 6उ पचे अस्सूर राजा क लगे उपहार क रूप लइ लेइ जाब्य जउन हमेसा ओकर संग जुद्ध करत हीं। एप्रैम लज्जित होइहीं, अउर इस्त्राएल आपन मूर्तियन पइ लजाइ। 7सोमरोन क लबार देवतन क बर्बाद कइ दीन्ह जाइ। उ पानी पइ उतरत भए कउनो काठे क टूका जइसा होइ जाइ।

8जउन ठउरन पइ इस्त्राएल पाप किहेस नस्ट कीन्ह जाब्या। ओनकर वेदियन पइ काँटन अउ घास-फूस उगिहीं। उ पचे पहाड़न स कइहीं, “हमका ढाँपि ल्या” अउर पहाड़िन स कइहीं, “हम पइ भहराइ पड़ा।”

### इस्त्राएल क आपन पापे क भुगतान करइ होइ

9हे इस्त्राएल, तू गिबा क समइ स ही पाप करत आया, अउर तू पचे वइसा ही हुआँ भी सुरू कइ दिहेस ह। का गिबा क जउन लोगन बुरा काम किहे रहेन फुरइ जुद्ध क चपेटे में नहीं आहइँ? 10मई आउब अउर ओनका सज़ा देब। मई जातियन क ओनके खिलाफ बटोरब अउर ओनका ओकरे दुई ठू पापन कारण जंजीर स बाँधिहीं।

11एप्रैम एक ठू जवान प्रसिच्छत गइया क नाई अहइ जउन खरिहाने में अनाज माँड़इ पसन्द करत अहइँ। मई ओकरे गटइ पइ जुआ राखब। किन्तु अब मई ओका खेत



जोताई मैं जियादा कठिन काम देब। मई ओह पड़ लसुरी लगाउब। यहूदा भुईया जोतब अउर याकूब कठोर धरती क फोड़ब। 12तोहका आपन प्रतिग्या क पूरा कइके नीक करम बोइ चाही, तउ तू सच्चा पिरेम क फसल काटब्या। इ तोहार बरे नई बात होब्या। इ अइसे धरती क जोतइ क जइसा होइ जेका तू फसल बरे कबहूँ उपयोग नहीं किहेस। यहोवा क आसीबाद लेइ क समइ अहइ जब तक कि उ तोह पड़ बर्खा क रूप में नीक चिजियन नहीं देइ।

13मुला तू तउ बदी क एक बिआ बोया ह; तू पचे आपन झूठ क फल भोग्या ह। अइसा एह बरे भवा कि तू आपन रथन पड़ निर्भर रह्या अउर आपन फउजियन पड़ बिस्सास किहा। 14जुद्ध क सोर तोहार लोगन क खिलाफ जियाद स जियाद बढ़िहीं। तोहार सारे गढ़ियन वइसी भहराइ जइसे बेतअरबेल सहर क जुद्ध क समइ सल्मन बर्बाद कइ दीन्ह ग रहा। दुइनउँ महतारी अउर गदेलन क टूका कीन्ह ग रहा। 15हे बेतेल, इ तोहार संग होइ काहेकि तू बहोत स कुकर्म किहा ह! भिसारे ही इस्राएल क राजा क पूरी तरह विनास कीन्ह जाब्या।”

### इस्राएल यहोवा क बिसरि गवा

11 “जब इस्राएल अबहीं गदेलन रहा, मई, (यहोवा) ओहसे पिरेम किहे रहेउँ। मई आपन गदेलन क मिस्त्र स बाहर बोलाइ लिहे रहेउँ।

2मुला मई ओका जेतना जियाद बोलाएउँ उ पचे मोहसे ओतना ही जियादा दूर होइ गए रहेन। उ पचे बाल देवतन क बलियन चढ़ाए रहेन अउर मूरतियन क अगवा धूप बारे रहेन।

3उ मई ही अहउँ जउन एप्रैम चलब सिखाएस। मई इस्राएल क आपन बाँहन में लिहे रहेउँ, मुला उ नहीं जानत ह कि कउन ओका तन्दुरुस्त किहेस ह।

4मई ओनका पिआर अउ स्नेह क “लसुरी” स अगुवाइ किहे रह्या। मई ओकरे गटइ स जुआ क हटाइ दिहेस अउर विनम्रता स खिलाएस ह।

5मुला उ पचे मोर कइँती नहीं मुड़ब्या! नहीं, उ पचे मिस्त्र चला गएन या आपन राजा अस्सूर क राजा क लगे गएन। उ पचे मोर कइँती वापिस आवइ स इन्कार करत ह। 6ओनकर सहरन क ऊपर लटकत भवा तरवार ओनकर सबइ ताकतवार मनइयन क ओनकर बुरे जोजना क कारण बर्बाद कइ देइहीं।

7“मोर लोग मोह स मुड़ि जाब अउर उ एका नहीं रोक सकब। उ पचे आपन मदद बरे बाल देवता क पुकारिस, का उ ओका बचा सकेस?”

### यहोवा इस्राएल क बिनास नहीं चाहत

8“हे एप्रैम, मई तोहका तजि देइ नहीं चाहत हउँ। हे इस्राएल, मई चाहत हउँ कि मई तोहार रच्छा करउँ। मई तोहका अदमा क तरह नहीं कइ देइ चाहत हउँ। मई नहीं चाहत हउँ कि तोहका सबोर्याम जइसा बनाइ देउँ। मई आपन मन बदलत हउँ तोहरे बरे पिरेम बहोत गहिर अहइ।

9मई आपन भयंकर किरोध क जीतइ नहीं देब। मई फुन एप्रैम क बर्बाद नहीं कइ देब। मई तउ परमेस्सर अहउँ, मई

कउनो मनई नहीं। मई तउ उ पवित्तर हउँ, मई तोहरे संग हउँ। मई आपन किरोध क नहीं देखाउब।

10मई सेर क दहाइ स गर्जन करब। मई गर्जन करब अउर मोरी संतानन निचके अइहीं अउर मोरे पाछे चलिहीं। मोर संतानन जउन डर स थर-थर काँपति अहइँ, पच्छिम स अइहीं।

11उ पचे काँपकाँपात चिड़ियन स मिस्त्र स अइहीं। उ पचे काँपत कबूतरे क नाई अस्सूर क धरती स अइहीं अउर मई ओनका ओनके घर वापस लइ जाब।” यहोवा इ कहे रहा।

12एप्रैम मोर बरे बहोत सारा लबार बोलेस; इस्राएल क घर मोर बरे बहोत सारा गलत बातन बोलेस। मुला अबहीं भी यहूदा परमेस्सर क सेवा\* करत रहेन अउर उ पवित्तर क बरे विस्सासी अहा।”

### यहोवा इस्राएल क खिलाफ रहा

12 एप्रैम हवा पकड़इ क जतन करत ह। उ पचे सारे दिन पूर्वी हवा क पाछा करत रहत ह। सारा रास्ट्र बेईमानी अउर हिसा में व्यस्थ अहइ, उ पचे अस्सूर क संग संधि किहेन। उहइ समइ नज़ाराना क रूप में मिस्त्र क तेल भेजत ह।

2यहोवा कहत ह, “इस्राएल क खिलाफत में मोर एक अभियोग अहइ। याकूब जउन करम किहेन ह, ओका ओनके बरे सजा दीन्ह जाइ चाही। आपन किए भए कुकरमन बरे ओका निहचइ ही सजा दीन्ह जाइ चाही। 3अबहीं याकूब आपन माता क गरभ में ही रहा कि उ आपन भाई क संग चालबाजी करब सुरू कइ दिहस। याकूब एक ठु सक्तीवाला युवक रहा अउर उ समइ उ परमेस्सर क संग कुस्ती लड़े रहा। 4याकूब परमेस्सर क सरगदूत स कुस्ती लड़ेस अउ ओका जीत लिहस। उ गोहराएस अउर कृपा करइ बरे बिनती किहस। इ बेतेल में भवा रहा। उ जगह पड़ उ ओहसे बातचीत किहे रहा। 5हाँ, यहोवा फउजन क परमेस्सर अहइ। ओकर नाउँ यहोवा अहइ। 6तउ आपन परमेस्सर कइँती लउटि आवा। ओकरे बरे वफ़ादार रहा। निआव अउर दयालुता कायम रखा। हमेसा आसावादी रहा कि परमेस्सर आपन वाचा क पूरा करब्या।

7“याकूब अइसा व्यापारी क तरह अहइ जउन लोगन स छल करइ बरे गलत तराजू क उपयोग करत ह। 8एप्रैम कहेस, ‘मई धनवान हउँ। मई सच्ची सम्पत्ति पाइ लिहे अहउँ। मोरे अपराधन क कउनो मनई क पता ही नहीं चली। मोरे पापन क कउनो मनई जान ही नहीं पाई।’

9“मुला मई तउ तबहिं स तोहार परमेस्सर यहोवा हउँ जब तू मिस्त्र क धरती स आवा रहा, जब मई तोहका रेगिस्तान में तम्बुअन में राखे रहा, ठीक वइसा ही जइसा कि पनाह क त्यौहार क समइ में रहा करत रहेन। 10मई नबियन स बात किहेउँ। मई ओनका अनेक दर्सन दिहेउँ। मई नबियन क तू पचन्क आपन पाठ पढ़ावइ क बहोत स तरिका दिहेउँ। 11मुला गिलाद में अबहुँ भी पाप अहइ। हुआँ बियर्थ देवतन अहइँ। गिलगाल में लोग बर्धन क बलियन क अर्पण करत हीं। हुवाँ बहुत स वेदियन में जोते भए खेते क कतारन क

परमेस्सर क सेवा साबित परमेस्सर क साथ चलत ह।

नाई अहई। 12याकूब आराम क भुईया कइँती भाग गवा। उ पचे दास क नाई काम किहेन जे आपन दुई ठू पत्नियन पावइ खातिर भेड़िन क निगरानी किहेस। 13तब यहोवा एक ठु नबी क जरिये इस्राएल क मिस्त्र स बाहेर लाएस, अउर पाछे दूसर नबी दुआरा इस्राएल क सुरच्छा किहेस। 14मुला एप्रैम यहोवा क बहोत जियादा गुस्साइ दिहस, एह बरे परमेस्सर यहोवा एका आपन अपराधन बरे भुगतवाएस। ओकर सुआमी (परमेस्सर) ओहसे ओकर लज्जा बरदास्त करइ देइ।”

### इस्राएल आपन नास खुद किहस

**13** “एप्रैम बंसज इस्राएल क तमाम जातियन क बीच में बहोत जियादा सक्तीसाली बनि गवा। एप्रैम जब बोला करत रहा, तउ लोग काँपात रहेन। मुला एप्रैम मरि गवा, कहेकि उ बाल देवता क पूजइ क कारण पाप किहे रहा। 2अउर अब उ पचे अपने बरे मूरतियन बनाइके लगातार पाप किहेन। ओकर कुसल कारीगर आपन सबसे अच्छा कुसला स ओकर चित्रन क तरासइ लागेन। तउ उ पचे ओन चित्रन स बातन करइ लागेन अउर उ सबइ लोग ओन बखवा क चित्रन चूमइ लागेन। 3इहइ कारण उ पचे भिसारे क उ कोहरा अउ भिसारे क ओस क नाई नज़र स ओझल होइ जाइहीं। जउन गायब होइ जात ह। उ पचन्क उ भूसा क तरह उड़ा लेजाइ चाही जेका खरिहाने स उड़ा जात ह। उ पचे उ धुआँ क समान होइहीं जउन कउनो चिमनी स उठत ह अउर लुप्त होइ जात ह।

4“तू लोग जब मिस्त्र में भवा करत रहया, मई तबहिं स तोहार परमेस्सर यहोवा अहउँ। मोका तजिके तू पचे कउनो परमेस्सर क नाहीं जानत रहया। मोर इलावा तोहका कउनो नाहीं बचाइ सकत ह। 5बयाबान में, हाँ, सूखा रेगिस्ताने में जहाँ पानी नाहीं होइ, मई तू सबन्क धियान दिहे रहया। 6मई इस्राएलियन क खाइ क दिहेउँ। उ पचे उ भोजन खाएन। आपन पेट भरिके उ पचे तृप्त होइ गएन। ओनका घमंड होइ गवा अउर उ पचे मोका बिसरि गएन।

7“मई इहइ बरे सरे क तरह होइ जाबउँ। मई राहे पइ घात लगाए भए चीता जइसा होइ जाब। 8मई ओन पइ उ रीछनी क तरह झपट पड़ब, जेहसे ओकर गदेलन छोर लीन्ह गवा होइ। मई ओन पइ हमला करब। मई ओनकर छातियन क चीर फाड़ देबउँ। मई उ सेर या कउनो दूसर अइसे हिसंक पसु क तरह होइ जाबैउ जउन आपन सिकार क फारिके खात रहत होत ह।”

### परमेस्सर क किरोध स इस्राएल क कउनो बचाइ नाहीं सकत

9“हे इस्राएल, मई तोहार रच्छा किहे रहेउँ, मुला तू मोसे मुँह मोड़ लिहा। तउ अब मई तोहार नास करब 10तोहार राजा कहाँ बाटइ जउन तोहरे सबहिं नगरन में तोहका बचाइ? कहाँ बाटइ तोहार सासक जेहसे तू आपन जरूरत क मागत ही कि “मोका एक राजा अउर राजकुमार दया।” 11मई कोहाइ गएउँ अउर मई तू पचन्क एक राजा दइ दिहेउँ। मई

अउर जियादा कोहाइ गएउँ अउर मई तू पचन्स ओका छोरि लिहेउँ।

12एप्रैम आपन अपराध छुपावइ क जतन किहस, उ सोचे रहा कि ओकर पाप गुप्त अहई। मुला ओन बातन बरे ओका सजा दीन्ह जाइ।

13ओकर सजा अइसी होइ जइसे कउनो मेहरारू एक बच्चा क जमन देइ क जतन करत अहइ, मुला उ बच्चा बुद्धिमान नाहीं होइ। हिआँ तलक कि जब समइ आइ, उ गरभ स बाहेर नाहीं निकरी।

14का मई ओनका गढ़ा स बचाइ लेब? नाहीं, मई नाहीं बचाब! का मई ओनका मउत क पकड़ स बचाइ लेब? नाहीं! मई नाहीं बचाब! हे मउत, आपन महामारियन ओन पइ लावा! हे कब्र, आपन तबाही ओन पइ लावा! मई ओह पइ कउनो दया नाहीं देखाउब।

15सायद उ कछू समइ क लिए सरकण्डा क पउथा क नाई बढ़इ जारी रखिहीं। मुला गरम पुर्वी हवा आउब्या, अउर यहोवा क कइँती स, रेगिस्तान स आउब्या। परिणाम ओकर झरना सूख जाई; अउर पानी क स्रोत सूख जाई। उ हवा ओकर सबइ खज़ाना उड़ा लेजाइहीं जेका उ आपन गोदाम में जमा किहे रहया ह।

16“सोमरोन क सजा दीन्ह जाइ काहेकि उ आपन परमेस्सर स मुँह फेरे रहा। इस्राएलियन तरवारे स मार दीन्ह जइहीं। ओनकर संतानन क चिथरा उड़ाइ दीन्ह जाइ। ओनकर गाभिन मेहररुअन चीरिके खोल दीन्ह जइहीं।”

### यहोवा कइँती मुड़ब

**14** हे इस्राएल, तोहार पतन भवा अउर तू परमेस्सर क खिलाफ पाप किहा। एह बरे अब तू पचे आपन परमेस्सर यहोवा कइँती लौटि आवा। 2यहोवा कइँती लौटि आवा अउर आपन जिन्नगी क बदल दे! यहोवा स कहा, “हमरे तमाम पापन माफ़ करा, मोर पराथना क सुना। बलिदान क जगह पइ हम पचे आपन मुँह स तोहार स्तुति कइके तोहका भेंट करत हउँ।

3अस्सूर हमका बचाइ नाहीं सकब, हम पचे जुद्ध क घोड़न पइ सवार नाहीं होब्या। हम पचे तोहसे प्रतिग्या करत हउँ कि तोहका उ मूरतियन क जइसा नाहीं समुझब जेका हम आपन ही हाथन स बनाएस ह। काहेकि तू उहइ परमेस्सर अहइ जउन अनाथ बच्चन पइ दया देखवइवाला ह तू हम पचन पइ भी दया देखाउब।”

### यहोवा इस्राएल क छिमा करी

4यहोवा कहत ह, “उ पचे मोका तजि दिहन। मई ओनका एकरे बरे छिमा कइ देब। मई ओनसे मुक्त भाव स पिरेम करबउँ। मई अब ओन पइ कोहान नाहीं अहउँ।

5मई इस्राएल बरे ओस क नाई होइ जाब। चमेली क नाई खिलब। उ लबानोन क देवदार बृच्छन नाइ बढ़ब्या।

6उ नवा डारन निकारइ सुरू करब्या। उ जइतून क बृच्छ क नाई सुन्नर होब्या। अउ ओकर सुगंध देवदार बृच्छन क नाई होब्या।

7“इस्राएल फुन स उ लोगन क सहारा देइ जेका मदद क जरूरत अहइ। उ पचे अन्न क नाई या अंगूरे क बेल क नाई जउन कि बृच्छ क छाया में बढत ह। इस्राएल लबानोन क दाखरस क तरह प्रसिद्ध होइहीं।”

### इस्राएल क मूरतियन क बारे में यहोवा क चितउनी

8“हे एप्रैम, मोका मूरतियन क बराबर जिन समुझा। उ मई ही अहउँ जउन सरग में स तोहका बचाएस। मई एक

सदाबहार सनोवार क बृच्छ क नाई हउँ। तोहार फल मोहसे ही आवत हीं।”

### अन्तिम सम्मति

9बुद्धिमान कउन अहइ? ओन व्यक्ति क एन बातन समुझइ द्या! कउनो समुझ रहत ह उ व्यक्ति क सच्चाइ क समुझइ द्या। काहेकि यहोवा क रहन नीक अहईं। अच्छे लोग ओन पइ चलिहीं, लेकिन बिद्रोही लोग ओह पइ ठोकर खाइहीं।

# दानिय्येल

## दानिय्येल क बाबुल लइ जावा जाब

**1** नबूकदनेस्सर बाबुल क राजा रहा। नबूकदनेस्सर यरूसलेम क चारिहुँ कइँती स घेर लिहस। इ तब भवा जब यहूदा क राजा यहोयाकीम क हुकूमत क तीसर बरिस चलत रहा। 2यहोवा यहूदा क राजा यहोयाकीम क नबूकदनेस्सर क जरिये पराजित कराइ दिहस। नबूकदनेस्सर परमेस्सर क मन्दिर क कछू बर्तनन क भी हथियाइ लिहस। नबूकदनेस्सर ओन वस्तुअन क बाबुल लइ गवा। नबूकदनेस्सर ओन वस्तुअन क उ मन्दिर में रखवाइ दिहस जेहमाँ ओकर देवतन क मूर्तियन रहिन।

3एकरे पाछे राजा नबूकदनेस्सर असपनज क एक हुकूम दिहस। (असपनज राजा क हिंजड़े-नौकरन क प्रधान रहा।) राजा असपनज क कछू इस्त्राएली लइकन क ओकरे महल में लिआवइ क कहे रहा। नबूकदनेस्सर चाहत रहा कि प्रमुख परिवारन अउ इस्त्राएल क राजा क परिवार क कछू इस्त्राएली लइकन क हुवाँ लिआवा जाइ।

4नबूकदनेस्सर क सिरिफ हट्टे कट्टे नउजवान इस्त्राएली लइकन ही चाही रहा। राजा क बस अइसे नउजवान लइकन क चाही रहा जेकरे तने पइ कउनो खरोंच या ओनकर तन कउनो भी तरह क दोख स रहित होइ। राजा सुन्नर, चुस्त अउ बुद्धिमान नउजवान लइकन ही चाहत रहा। जउन बातन क हाली स अउ आसानी स सीखइ में समरथ होइँ। राजा क अइसे नउजवान लइकन क जरूरत रही जउन ओकरे महल में सेवा क काम कइ सकइँ। राजा असपनज क हुकूम दिहस कि ओन इस्त्राएली नउजवान लइकन क कसदियन क भाखा अउ लिपि क सिच्छा दीन्ह जाइ।

5राजा नबूकदनेस्सर ओन नउजवानन क हररोज एक निहचित मात्रा में भोजन अउ दाखरस देत रहत रहा। इ भोजन उहइ तरह क होत रहा, जइसा खुद राजा खावा करत रहा। राजा क इच्छा रही कि इस्त्राएल क ओन नउजवानन क तीन बरिस तलक प्रसिच्छण दीन्ह जाइ अउ तीन बरिस क पाछे उ सबइ नउजवान राजा क सेवक बन सकइँ।

6ओन नउजवानन में दानिय्येल, हनन्याह, मीसाएल अउ अजर्याह सामिल रहेन। इ सबइ नउजवान यहूदा क परिवार समूह स रहेन। 7तउ एकरे पाछे यहूदा क ओन नउजवानन क असपनज नवा नाउँ रख दिहस। दानिय्येल क बेलतसस्सर क नवा नाउँ दीन्ह गवा। हनन्याह क नवा नाउँ रहा सद्रक। मीसाएल क नवा नाउँ दीन्ह गवा मेसक अउ अजर्याह क नवा नाउँ रखा गवा अबेदनगो।

8दानिय्येल राजा क उत्तम भोजन अउ दाखरस क ग्रहण करइ नाहीं चाहत रहा। दानिय्येल नाहीं चाहत रहा कि उ उ

भोजन अउ उ दाखरस स अपन आप क असुद्ध कइ लेइ। तउइ तरह अपन आप क असुद्ध होइ स बचावइ बरे असपनज स बिनती किहस।

9परमनउजवानोस्सर असपनज क अइसा बनाइ दिहस कि उ दानिय्येल क बरे कृपालु अउर नीक विचार करइ लाग। 10किन्तु असपनज दानिय्येल स कहेस, “मई आपन सुआमी, राजा स डरोत हउँ। राजा मोका हुकूम दिहस ह कि तोहका इ भोजन अउर इ दाखरस दीन्ह जाइ। जदि तू इ भोजन क नाहीं खात अहा तउ तू दुर्बल अउ रोगी देखाइ लगब्या। तू आपन उमिर क दूसर नउजवानन स भद्दा देखाइ देब्या। राजा एका लखी अउ मोह पइ किरोध करी। होइ सकत ह, तू मोर मुइँ कटवाइ देइ। जबकि इ दोख तोहार होइ।”

11एकरे पाछे दानिय्येल आपन देखभाल करइवालन से बातचीत किहस। असपनज उ रखवारे क दानिय्येल, हनन्याह, मीसाएल अउ अजर्याह क ऊपर धियान रखइ क कहा भवा रहा। 12दानिय्येल उ रखवारे स कहेस, “कृपा कइक तू दस दिन तलक हमार परीक्षा ल्या। हमका खाइ क साग-सब्जी अउर पिअइ क पानी क अलावा कछू जिन द्या। 13फुन दस दिन क पाछे ओन दूसर नउजवानन क संग तू हमार तुलना कइके लखा, जउन राजा क भोजन करत हीं अउर फुन अपने आप लखा कि अधिक तन्दुरुस्त कउन देखाइ देत ह। फिन तू अपने-आप यह निर्ग्या कर्या कि तू हमरे संग कइसा बेउहार करइ चाहत ह। हम तउ तोहार सेवक अही।”

14तउ उ रखवारा दानिय्येल, हनन्याह, मीसाएल अउ अजर्याह क परीच्छा लिहस। 15दस दिना क पाछे दानिय्येल अउ ओकर मीत ओन सबहिं नउजवानन स जियादा हट्टा-कट्टा देखौँ देइ लागेन जउन राजा क खइया क खात रहेन। 16तउ उ रखवारा ओनका राजा क उ खास भोजन अउ दाखरस देब बंद कइ दिहस अउर उ दानिय्येल, हनन्याह, मीसाएल अउ अजर्याह क उ खाइ क जगह पइ साग-सब्जियन देइ लाग।

17परमेस्सर दानिय्येल, हनन्याह, मीसाएल अउ अजर्याह क बुद्धि प्रदान किहस अउ ओनक अलग अलग तरह क लिपियन अउ विग्यानन क सीखइ क जोगगता प्रदान किहस। दानिय्येल तउ हर तरह क दर्सनन अउ सपनन क भी समुझ सकत रहा।

18राजा चाहत रहा कि ओन सबहिं जवानन क तीन बरिस तलक प्रसिच्छन दीन्ह जाइ। प्रसिच्छन क समइ पूरा होइ पइ असपनज ओन सबहिं जवानन क राजा नबूकदनेस्सर क लगे लइ गवा। 19राजा ओनसे बातन किहस। राजा पाएस कि ओनमाँ स कउनो भी जवान ओतना नीक नाहीं रहा जेतना

दानियेल, हनन्याह, मिसाएल अउ अजर्याह रहेन। तउ उ सबइ चारिउँ जवान राजा क सेवक बनाइ दीन्ह गएन।

20राजा हर दाई ओनसे कउनो महत्वपूर्ण बात क बारे में पूछत अउ उ पचे आपन प्रचुर गियान अउ समुझ-बूझ क परिचय देतेन। राजा लखेस कि उ पचे चारिउँ ओकर राज क सबहि जादुगसन अउ बुद्धिमान लोगन स दस गुणा जियादा उत्तिम अहई। 21तउ राजा कुसू क सासन काल क पहिले बरिस तलक दानियेल राजा क सेवकाई करत रहा।

### नबूकदनेस्सर क सपना

2 नबूकदनेस्सर आपन सासन क दूसर बरिस में एक सपना लखेस। उ सपना स बेचैन होइ गवा अउर सोइ नहीं सका। 2तउ राजा आपन जादूगसन, ओझन, भविस्स क बात बताइवालन अउर कसदियन\* क आपन सपना क अरथ बतावइ बरे बुलाएन। एह बरे उ सबइ आपन अउर राजा क समन्वा खड़ा होइ गएन।

3तब राजा ओन लोगन स कहेस, “मई एक सपना लखेउँ ह जेहसे मई बियाकुल हउँ। मई इ जानइ चाहत हउँ कि उ सपना क अरथ का बाटइ?”

4यह पइ ओन कसदियन राजा स उत्तर देत भए कहेन। उ सबइ अरामी भाखा में बोलत रहेन। “राजा चिरंजीव रहई। हम पचे तोहार दास अही। तू आपन सपन हमका बतावा। फिन हम तोहका ओकर अरथ बताउब।”

5एह पइ राजा नबूकदनेस्सर ओन लोगन स कहेस, “नहीं। उ सपना का रहा, इ भी तोहक ही बताउब अहइ अउर उ सपन क अरथ का अहइ, इ भी तोहका ही बताउब अहइ अउर जदि तू अइसा नहीं कइ पाया तउ मई तोहार टूकन टूकन कइ डावइ क आग्या देब। मई तोहरे घरन क तोरिके मलवा क देर अउ राखी में बदल डावइ क आग्या भी दइ देब। 6अउ जदि तू मोका मोर सपना बताइ देत अहा अउर ओकर व्याख्या कइ देत अहा तउ मई तोहका अनेक उपहार, बहोत स पुस्कार अउ महान आदर प्रदान करब। तउ तू मोका मोर सपना क बारे में बतावा अउर बतावा कि ओकर अरथ का अहइ?”

7ओन बुद्धिमान मनइयन राजा स फुन कहेन, “हे राजा, कृपा कइके हमका सपना क बारे में बतावा अउर हम तोहका इ बताउब कि उ सपना क फल का अहइ।”

8एक पइ राजा नबूकदनेस्सर कहेस, “मई जानत हउँ, तू लोग अउर जियाद समइ लेइ क जतन करत अहा। तू जानत अहा कि मई जउन कहेउँ, उहइ मोर अभिप्राय अहइ। 9तू इ जानत अहा कि जदि तू मोका मोर सपना क बारे में नहीं बताया तउ तोहका दण्ड दीन्ह जाइ। एह बरे तू पचे आपुस में जोजना बाएस क कि मोहसे झूठ बोलइ अउर गलत व्याखाय करब जब तलक कि स्थिति बदल न जाइ। अब बतावा कि मोका का सपना आवा रहा। इहइ एक रास्ता बाटइ पता करइ बरे कि का तू मोका मोरे सपना क सही अरथ बताइ सकत।”

**कसदियन** कसदी लोग ज्योतिस विद्या क उपयोग कइके व्याख्या बतावइ में माहिर होत रहेन।

10कसदियन राजा क उत्तर देत भए कहेन, “हे राजा धरती पइ कउनो अइसा मनई नहीं जउन अइसा कइ सकइ जइसा आप करइ क आग्रह करत ह। बुद्धिमान मनइयन स या जादूगसन स या कसदियन स कउनो भी महान अउर सवित्साली राजा कबहुँ भी अइसा करइ क नहीं कहेस। 11महाराज, आप उ काम करइ क कहत अहा, जउन संभव नहीं अहइ। बस राजा क ओकरे सपना क बारे में अउर ओकरे फल क बारे में देवता ही बताइ सकत हीं। किन्तु देवता तउ लोगन क बीच नहीं रहतेन।”

12जब राजा इ सुनेस तउ ओका बहोत किरोध आवा अउर उ बाबुल क सबहि बुद्धिमान मनइयन क मरवा डावइ क हुकूम दइ दिहस। 13राजा क आदेस लागू होइ चुका रहेन। सबहीं बुद्धिमान मनइयन क मारा जाब रहा, एह बरे दानियेल अउ ओकर मीतन क भी मरवाइ डावइ बरे ओनकर खोज में राज पुरुस पठइ दीन्ह गएन।

14अर्योक राजा क रच्छकन क नायक रहा। उ बाबुल क बुद्धिमान मनइयन क मार अवइ बरे जात रहा, किन्तु दानियेल ओहसे बातचीत किहस। दानियेल अर्योक स बुद्धिमानी क साथ नम्र होइके बात किहस। 15दानियेल अर्योक स पूछेस, “राजा एतना कठोर दण्ड देइके आग्या काहे दिहस ह?”

एह पइ अर्योक राजा क सपनावाली सारी कहानी कहि सुनाएस, दानियेल ओका समुझ गवा। 16दानियेल जब इ कहानी सुन लिहस तउ उ राजा नबूकदनेस्सर क लगे गवा। दानियेल राजा स बिनती किहस कि उ ओका तनिक समइ अउर देइ। उ राजा स ओकार सपना क अरथ समेत बतावइ क वादा किहस।

17एकरे पाछे दानियेल अपने घर क चल दिहस। उ आपन मीत हनन्याह, मीसाएल अउ अजर्याह क उ सारी बातन कहि सुनाएस। 18दानियेल आपन मीतन स सरग क परमेस्सर स पराथना करइ क कहेस। दानियेल ओनसे कहेस कि उ पचे परमेस्सर स पराथना करई कि उ ओन पइ दयालु होइ अउर इ रहस क समुझइ में ओनकर मदद करइ जेहसे बाबुल क दूसर विवेकी मनइयन क संग दानियेल अउ ओकर मीत भी घाट न उतारि दीन्ह जाई।

19राति क समइ परमेस्सर एक दर्सन में दानियेल क उ रहस समुझाइ दिहस। एह पइ सरग क परमेस्सर क स्तुति करत भए। 20दानियेल कहेस:

“परमेस्सर क नाउँ क सदा प्रसंसा करा। सवित अउ बुद्धिमान ओहमाँ ही होत ह।

21उ ही समइ बुद्धिमान क बदलत ह। उहइ राजा लोगन क हटावत ह अउर उहइ राजा लोगन क नियुक्त करत ह। उहइ बुद्धि देत ह अउर लोग बुद्धिमान बन जात हीं। उहइ लोगन क गियान देत ह अउर लोग गियानी बन जात हीं।

22उ गहिर अउ छुपे रहसस क जानत ह जेका समुझ पाउब कठिन अहइ। प्रकास ओकरे संग रहत ह। तउ उ जानत ह कि अँधियारा में अउ रहसस भरे स्थानन में का अहइ।

23हे मोरे पुरखन क परमेस्सर, मई तोहका धन्यवाद देत हउँ अउ तोहार गुण गावत हउँ। तू ही मोका गियान अउ

बुद्धिमत्ता दिहा। जउन बातन मई पूछे रहे ओकरे बारे में तू मोका बताया। तू हमका राजा क सपना क बारे में बताया।”

### दानियेल क जरिये राजा क सपन क व्याख्या

24एकरे पाछे दानियेल अर्योक क लगे गवा। राजा नबूकदनेस्सर अर्योक क बाबुल क बुद्धिमान मनइयन क हतिया बरे नियुक्त कीन्ह रहा। दानियेल अर्योक स कहेस, “बाबुल क बुद्धिमान मनइयन क हतिया जिन करा। मोका राजा क लगे लइ चला, मई ओका ओकर सपना अउ उ सपना क फल बताउब।”

25तउ अर्योक दानियेल क हाली ही राजा क लगे लइ गवा। अर्योक राजा स कहेस, “यहूदा क बन्दिन में मई एक अइसा मनई हेर लिहेउँ ह जउन राजा क ओकर सपना क मतलब बताइ सकत ह।”

26तउ राजा दानियेल (बेलतसस्सर) स एक सवाल पूछेस, “का तू मोका मोर सपना अउ ओकर अरथ क बारे में बताइ सकत ह?”

27दानियेल जवाब दिहस, “हे राजा नबूकदनेस्सर, तू जउन रहसस क बारे में पूछत अहा, ओका तोहका न तउ कउनो बुद्धिमान व्यक्ति न कउनो तान्त्रिक अउर न कउनो भविष्यवक्ता क बताइ सका ह। 28किन्तु सरग में एक परमेस्सर अइसा अहइ जउन भेद भरी बातन क रहसस बतावत ह। परमेस्सर राजा नबूकदनेस्सर क आगे क होइवाला अहइ, इ दर्सावइ बरे सपना दिहस ह। आपन बिछउना में सोते भए तू सपना में जउन बातन लखे रह्या, उ सबइ इ सब अहइ, 29हे राजा। तू अपने बिछउना में सोवत रह्या। तू भविस्स में घटइवाली बातन क बारे में सोचब सुरू किहेस। परमेस्सर लोगन क रहससपुर्ण बातन क बारे में बताइ सकत ह। तउ उ भविस्स में जउन घटइवाला अहइ, उ तोहका दर्साइ दिहस। 30परमेस्सर उ रहसस मोका भी बताइ दिहस ह। अइसा एह बरे नाहीं भवा कि मोरे लगे दूसर लोगन स कउनो जियादा बुद्धि अहइ। बल्कि मोका परमेस्सर इ भेद क एह बरे बताएस ह कि राजा क ओकर सपना क फल पता चल जाइ अउर इ तरह हे राजा, तोहरे मने में जउन बातन आवति अहइ, ओनका तू समझ जा।

31“हे राजा, सपना में तू अपने समन्वा खड़ा एक तु बिसाल मूर्ति लख्या ह, उ मूर्ति बहोत बड़ी रही, उ चमकदार रही अउर प्रभाव स पूरी रही। इ देखइ में डराउनी रही। 32उ मूर्ति क सिर सुद्ध सोना क बना रहा। ओकर छाती अउ सबइ भुजा चाँदी क बनी रहिन। ओकर पेट अउर जाँधन काँसा क बनी रहिन। 33उ मूर्ति क गोड़न लोहा क बनी रहिन। उ मूर्ति क पैर थोड़ा लोहा अउ थोड़ा माटी क बने रहन।

34“जब तू उ मूर्ति कइँती लखत रह्या, तउ तू एक तु चट्टान लख्या जउन कउनो मनई क मेहनत क कटी रहन अउर आइके मूर्ती क लोहे अउर मिट्टी क बनी गोड़न स टकरा गएन। उ चट्टान क कारण ओन मूर्तियन क गोड़ चकनाचूर होइ गएन। 35फुन फउरन ही लोहा, माटी, काँसा, चाँदी अउ सोना सब चूर-चूर होइ गवा अउ उ चूरा गर्मियन क दिनन में खरिहाने क भूसा जइसा होइ गवा। ओन टूकन

क हवा उड़ाइ लइ गइ। हुआँ कछू भी तउ नाहीं बचा। कउनो इ नाहीं कहि सकत रहा कि हुआँ कबहुँ मूर्ति रही भी। फुन उ चट्टान जउन मूर्ति स टकराइ रही, एक बिसाल पर्वत क रूप में बदल गइ अउ सारी धरती पड़ छाड़ गइ।

36“आपका सपना तउ इ रहा। अब हम राजा क इ बतावत अही कि इ सपना क फल का अहइ? 37हे राजा, आप बहोत जियादा महत्वपूर्ण राजा अहइँ। सरग क परमेस्सर तोहका राज दिहे सह। सक्ति दिहेस ह। सामरथ अउ महिमा दिहस ह। 38आप क परमेस्सर नियन्त्रण क सक्ति दिहेस ह अउर आप, लोगन पड़, बन क पसुअन पड़ अउ पंछियन पड़ सासन करत अहा। उ सबइ चाहे कहुँ भी रहत होइँ, ओन सबन पड़ परमेस्सर तोहका सासक ठहराएस ह। हे राजा नबूकदनेस्सर, उ मूर्ति क ऊपर जउन सोने क मूँड़ रहा, उ आप ही अहइँ।

39“आप क पाछे जउन दूसर राजा आई, उहइ उ चाँदी क हीसां अहइ। किन्तु उ राज तोहरे राज क समान बिसाल नाहीं होइ। एकरे पाछे धरती पड़ एक तीसर राज क सासन होइ। उहइ उ काँसे वाला भाग अहइ। 40एकरे पाछे एक चउथा राज आइ, उ राज लोहा क समान मजबूत होइ। जइसे लोहे स वस्तुअन टूटिके चकनाचूर होइ जात ही, वइसे ही चउथा राज दूसर राजन क भंग कइके चकनाचूर करी।

41“तू लखे रह्या कि उ मूर्ति क गोड़न अउर पंजे थोड़े माटी क अउर थोड़े लोहे क बना अहइँ, ओकर मतलब इ अहइ कि उ चउथा राज एक तु बटा भवा राज होइ। एहमें कछू लोहा क सक्ति होइ काहेकि तू माटी मिला लोहा लख्या ह। 42उ मूर्ति क गोड़न क पंजे क अगले हीसा जउन थोड़ा लोहा अउ थोड़ा माटी क बना रहन, एकर अरथ इ अहइ कि उ चउथा राज थोड़ा तउ लोहा क समान सक्तिसाली होइ अउर थोड़ा माटी क समान दुर्बल। 43आप लोहा क माटी स मिला भवा लखे रह्या किन्तु जइसे लोहा अउ माटी पूरी तरह कबहुँ आपुस में नाहीं मिलतेन, उ चउथे राज क लोग वइसे ही मिले जुले होइहीं। किन्तु एक जाति क रूप में उ सबइ लोग आपुस में एक जुट नाहीं होइहीं।

44“चउथे राज क ओन राजा लोगन क समय में ही सरग क परमेस्सर एक दूसर राज क स्थापना कइ देइ। इ राज क कबहुँ अन्त नाहीं होइ अउर इ सदा-सदा बना रही। इ एक अइसा राज होइ जउन कबहुँ कउनो दूसर समूह क लोगन क हाथ में नाहीं जाइ। इ राज ओन दूसर राज क कुचर देइ। इ ओन राजन क बिनास कइ देइ। किन्तु उ राज अपने आप सदा-सदा बना रही।

45“हे राजा नबूकदनेस्सर, आपन पहाड़ स उखड़ी भइ चट्टान तउ लखेउँ। कउनो मनई उ चट्टान क उखाड़ेस नाहीं। उ चट्टान लोहा क, काँसा क, माटी क, चाँदी क अउर सोने क टूका-टूका कइ दिहे रहा। इ प्रकार स महान परमेस्सर आप क उ देखाएस ह जउन भविस्स में होइवाला अहइ। इ सपना सच्चा अहइ अउर आप सपना क इ व्याख्या पड़ भरोसा कइ सकत हीं।” 46एकरे पाछे राजा

नबूकदनेस्सर दानियेल क निहुरिके नमस्कार किहेस। राजा दानियेल क बड़कई किहेस। राजा इ आग्या दिहेस कि दानियेल क सम्मानित करइ बरे एक भेंट अउ सुगन्ध प्रदान कीन्ह जाइ। 47फुन राजा दानियेल स कहेस, “मोका निहचय पूर्वक गियान होइ गवा ह कि तोहार परमेस्सर सब स जियादा महत्वपूर्ण अउ सक्तिसाली परमेस्सर अहइ। उ सबहिं राजा लोगन क परमेस्सर अहइ। उ लोगन क ओन बातन क बारे में बतावत ह, जेनका उ पचे नहीं जान सकतेन। मोका पता अहइ कि इ सच अहइ। काहेकि तू मोका भेद क इ सबइ गुप्त बातन क बताइ सका।”

48एकरे पाछे उ राजा दानियेल क आपन राज्ज में एक बहोत महत्वपूर्ण पद प्रदान किहेस तथा राजा बहोत स बहुमूल्य उपहार भी दानियेल क दिहेस। नबूकदनेस्सर दानियेल क बाबुल क समूचे प्रदेश क सासक नियुक्त कइ दिहेस। अउ उ दानियेल क बाबुल क सबहिं पण्डितन क प्रधान बनाइ दिहेस। 49दानियेल राजा स बिनति किहेस कि उ सद्रक, मेसक अउ अबेदनगो क बाबुल प्रदेश क महत्वपूर्ण हाकिम बनाइ देई। तउ राजा वइसा ही किहेस जइसा दानियेल चाहे रहा। दानियेल खुद ओन महत्वपूर्ण मनइयन में होइ गवा रहा जउन राजा क निअरे रहा करत रहेन।

### सोना क प्रतिमा अउ धधकत भट्टी

3 राजा नबूकदनेस्सर सोना क एक ठु प्रतिमा बनवाइ रखी रही। उ प्रतिमा साठ हाथ ऊँची अउ छः हाथ चउड़ी रही। नबूकदनेस्सर उ प्रतिमा क बाबुल प्रदेश क दूरा क मैदान में स्थापित कइ दिहेस। 2अउर फुन राजा राज्ज क राज्जपालन, मुखिया लोगन, अधिपतियन, सलाहकारन, खजांचियन, निआवधीसन, सासकन अउ दूसर सबहिं छेत्र क अधिकारियन क आपन राज्ज में आइके बटुरइ बरे बुलवाइ पठाएस। राजा चाहत रहा कि उ पचे सबहिं लोग प्रतिमा क प्रतिष्ठा महोत्सव में सामिल होई।

3एह बरे पूरा राज्ज स राज्जपाल, नेत, सलाहकार, खजानची, निआवधीस, प्रबंधक अउर बाकी सभी प्रान्तीय अधिकारी समर्पन समारोह में आएन अउ उ प्रतिमा क अगवा खड़े होइ गएन जेका राजा नबूकदनेस्सर स्थापित कराए रहा। 4फुन उ डैंडोरची, जउन राजा क सबइ सूचना क घोसणा प्रसारित करत रहा, ऊँचे अवाजे में कहस, “सुना, सबहिं लोगन, जातियन अउर भासा सुना। तू पचन क जउन करइ क आग्या दीन्ह गइ अहइ, उ इ अहइ, 5“तू पचे जब सबहिं नरसिंहन, बाँसुरियन, सितारन सात तारवाले बाजन वीणा अउ सहनाई तथा दूसर सबहिं प्रकार क बाजन क आवाज सुना, तउ तू पचन्क इ सोना क मूर्ती क जरूर पूजा करइ चाही जउन राजा नबूकदनेस्सर दुआरा स्थापित कीन्ह गवा ह। 6जदि कउनो मनई इ सोना क प्रतिमा क निहुरिके प्रणाम नहीं करी अउ एका नहीं पूजी तउ उ मनई क तुरंतइ धधकत भई भट्टी में झोंक दीन्ह जाइ।”

7तउ, जइसे ही उ पचे नरसिंहन, बाँसुरियन, सितारन, सात तारु वाले बाजन, सहनाइयन अउ दूसर तरह क संगीत बाजन क सुनेन, सभी लोगन, जातियन अउर हर भाखा क

लोग राजा नबूकदनेस्सर क जरिये रखा गवा सोना क उ मूर्ति क निहुरेन अउर पूजा किहेन।

8एकरे पाछे, कछू कसदी लोग राजा क लगे आएन। ओन लोग यहूदियन क विरोध में राजा क कान भरेन। 9राजा नबूकदनेस्सर स उ पचे कहेन, “हे राजा, आप चिरंजीवी हवा। 10हे राजा, आप एक ठु आदेस दिहे रहेन आप कहे रहेन कि हर उ मनई जउन नरसिंहन, बाँसुरियन, सितारन, सात तारुवाले बाजन, सबइ वीणा मसक सहनाइयन अउर दूसर सबहिं तरह क वाद्य-यन्त्रन क ध्वनि क सुनत ह, उ सोना क प्रतिमा क अगवा निहुरिके ओकर पूजा करइ चाही। 11आप इ भी कहे रहेन कि जदि कउनो मनई सोना क प्रतिमा क अगवा नेहुरिके ओकर पूजा नहीं करी तउ ओका कउनो धधकत भट्टी में झोंक दीन्ह जाइ। 12हे राजा, हिआँ कछू अइसे यहूदी अहई जउन आपक आदेस पइ धियान नहीं देतेन। आप ओन यहूदियन क बाबुल प्रदेश में महत्वपूर्ण हाकिम बनाए भवा अहा। अइसे लोगन क नाम अहई -सद्रक, मेसक अउ अबेदनगो। इ सबइ लोग आप क देवतन क पूजा नहीं करतेन अउ जउन सोना क प्रतिमा क आप स्थापित किहेन ह, उ सबइ न तउ ओकरे अगवा निहुरत हीं अउर ही ओकर पूजा करत हीं।”

13एह पइ नबूकदनेस्सर किरोध में आग-बबूला होइ उठा। उ सद्रक, मेसक अउ अबेदनगो क बोलवाइ पठाएस। तउ ओन लोगन क राजा क समन्वा लावा गवा। 14राजा नबूकदनेस्सर ओन लोगने स कहेस, “सद्रक, मेसक अउ अबेदनगो। का इ फूर अहइ कि तू मोर देवतन क पूजा नहीं करत्या? अउर का इ भी सच अहइ कि तू मोरे जरिये स्थापित कराइ गइ सोना क प्रतिमा क अगवा न तउ निहुरत अहा, अउर न ही ओकर पूजा करत अहा? 15अब लखा, तू जब नरसिंहन, बाँसुरियन, सितारन, सात तार क बाजन, वीणा, सहनाइयन तथा हर तरह क दूसर वाद्य-यन्त्रन क ध्वनि सुना तउ तोहका सोना क प्रतिमा क अगवा निहुरिके ओकर पूजा करइ चाही। जदि तू मोरे जरिये बनवाइ गइ उ मूर्ति क पूजा करइ क तइयार अहा, तब तउ नीक अहइ किन्तु जदि ओकर पूजा नहीं करत अहा तउ तोहका फउरन धधकत भइ भट्टी में झोंक दीन्ह जाइ। अउर कउनो भी देवता तोहका मोहस बचाइ नहीं सकत्या।”

16सद्रक, मेसक अउ अबेदनगो उत्तर देत भए राजा स कहेन, “हे नबूकदनेस्सर, हमका तोहका इ बिसय में जवाब देइ क जरूरत नहीं अहइ। 17जदि, हमार परमेस्सर जेकर हम उपासना करित ह ओकर अस्तित्व अहइ तउ उ इ बरत भइ भट्टी स हमका बचाइ लेइ में समर्थ अहइ। तउ राजा, उ हमका मोरी ताकत स बचाइ लेइ। 18किन्तु राजा, हम इ चाहित ह कि तू एतना जान ल्या कि जदि परमेस्सर हमार रच्छा न भी करइ तउ भी हम तोहरे देवतन क सेवा स इन्कार करित ह। सोना क जउन प्रतिमा तू स्थापित कराया ह हम ओकर पूजा नहीं करिब।”

19एह पइ तउ नबूकदनेस्सर किरोध स भइक उठा। उ सद्रक, मेसक अउ अबेदनगो कईंती घिना स लखा। उ आग्या दिहेस की जेतना उ तपा करत ह, ओका ओहसे सात गुणा जियादा दहकावा जाइ। 20एकरे पाछे नबूकदनेस्सर

आपन सेना क कछू बहोत मजबूत फउजियन क आग्या दिहेस कि उ पचे सद्रक, मेसक अउ अबेदनगो क बाँध लेई। राजा ओन फउजियन क आग्या दिहेस कि उ पचे सद्रक, मेसक अउ अबेदनगो क धधकत भट्ठी में झोकं देई। 21तउ सद्रक, मेसक अउ अबेदनगो क बाँध दीन्ह गवा अउ फुन धधकत भट्ठी में धकेल दीन्ह गवा। उ पचे ओकर कमीज़न, पतलूनन अउ टोप तथा दूसर ओढ़नन पहिर रखे रहेन। 22जउनो समइ राजा इ आग्या दिहे रह्या उ समइ उ बहोत कोहान रहा, एह बरे उ फउरन ही भट्ठी क बहोत तपाइ लिहस। आगी एतना जियादा भड़कत रही कि ओकर लपटन में स उ सबइ सकित्साली फउजी जर गएन, जब उ पचे सद्रक, मेसक अउ अबेदनगो क भट्ठी में ढकेले रहा। 23सद्रक, मेसक अउ अबेदनगो आगी में भहराइ गए रहेन। ओनका बहोत कसिके बाँधा भवा रहा।

24एह पइ राजा नबूकदनेस्सर उछरिके आपन गोड़न, पइ खड़ा होइ गवा। ओका बहोत अचरज होत रहा। उ आपन मंत्रियन स पूछेस, “इ ठीक अहइ न कि हम तउ बस तीन मनइयन क बाँधवाए रहे अउर आगी में ओनहीं तीन क डलवाए रहे।”

ओकर मंत्रियन जवाब दिहन, “हाँ, महाराज।”

25राजा बोला, “लखा, मोका तउ आगी क भीतरे इघर-उघर घुमत भए चार तु मनई देखाई देत अहई। उ सबइ बंधे भए नाहीं अहई अउर आगी ओनका कछू नाहीं बिगाड़ बिगाड़ेस ह। लखा, उ चउथा मनई देवता क पूत जइसा देखाई देत अहइ।”

26एकरे पाछे नबूकदनेस्सर उ बरत भइ भट्ठी क मुँह पइ गवा। उ जोर स गोहराइके कहेस, “सद्रक, मेसक अउ अबेदनगो, बाहेर आवा। सर्वोच्च परमेस्सर क सेवको बाहेर आवा।”

तउ सद्रक, मेसक अउ अबेदनगो आगी स बाहेर निकरि आएन। 27तब उ पचे बाहेर आएन तउ प्रान्त क राजपालन, हाकिमन, अधिपतियन अउ राजा क मंत्रियन ओनके चारिहूँ तरफ भीड़ लगाइ दिहन। उ पचे देख पावत रहेन कि उ आगी सद्रक, मेसक अउ अबेदनगो क छुआ तलक नाहीं अहइ। ओनकर तन तनिकउ भी नाहीं जरा रहेन। ओनकर बार झुलसा तलक नाहीं रहेन। ओनकर ओढ़नन क आँच तलक नाहीं आई रहिन। ओनकर तन स अइसी गंध तलक नाहीं निकरत रही जइसे उ पचे आगी क आस-पास भी गवा होई।

28फुन नबूकदनेस्सर कहेस, “सद्रक, मेसक अउ अबेदनगो क परमेस्सर क स्तुति करा। ओनकर परमेस्सर आपन सरगदूत क पठइके, आपन सेवकन क आगी स रच्छा किहेस ह। एन तीनहूँ पूरखन क आपन परमेस्सर में आस्था रही। इ सबइ मोरे आदेस क मानइ स मना कइ दिहेन अउर दूसर कउनो देवता क सेवा या पूजा करइ क बजाय उ पचे मरब कबूल किहेन। 29तउ आजु स मई इ नेम बनावत हउँ: कउनो भी लोगन जातियन अउर भासा बोलइवाला कउनो मनई जदि सद्रक, मेसक अउ अबेदनगो क परमेस्सर क विरोध में कछू कही तउ ओकर टूकन-टूकन कइ दीन्ह जइहीं अउ ओकर घर क उ समइ तलक तोड़ा-फोड़ा जाइ

जब तलक उ मलवा अउ राखी क ढेर मात्र न रहि जाइ। कउनो भी दूसर देवता आपन लोगन क इ तरह नाहीं बचाइ सकता।” 30एकरे पाछे राजा सद्रक, मेसक अउ अबेदनगो क बाबुल क प्रदेस में अउर जियादा महत्वपूर्ण पद प्रदान कइ दिहन।

### एक तु बृच्छ क बारे में नबूकदनेस्सर क सपना

**4** राजा नबूकदनेस्सर सबइ लोगन, जाति अउर भाखा क, जउन सारी दुनिया में बसे भए रहेन, इ पत्र पठएस तू सबइ क अधिक सात्ति मिली।

2सर्वोच्च परमेस्सर मोर संग जउन अचरज भरी अद्भूत बातन किहेस ह, ओकरे बारे में तोहका बतावत भए मोका बहोत खुसी अहइ।

3ओकरे कार्य केतैना अद्भुत अहइ। ओकरे चमत्कार केतैना सकित्साली अहइ। परमेस्सर क राज सदा टिका रहत ह; परमेस्सर क सासन पीढ़ी दर पीढ़ी बना रहत ह।

4मई, नबूकदनेस्सर, आपन महल में रहेउँ। मई प्रसन्न अउ सफल रहेउँ। 5मई एक सपना लखेउँ जउन मोका डेराइ दिहेस। मई आपन बिछउना में सोवत रहेउँ। मई तस्वीर अउर दर्सनन क लखेउँ। जउन कछू मई लखे रहेउँ उ मोका बहोत डेराइ दिहेस। 6तउ मई इ आग्या दिहेउँ कि बाबुल क सबहि बुद्धिमान लोगन क मोरे लगे, लिआवा जाइ ताकि उ पचे मोका सपन क फल बतावई। 7जब जादगर तान्त्रिक, कसदी अउर भविष्यवक्ता मोरे लगे आबई तउ मई ओनका आपन सपना क बारे में बताएउँ। किन्तु उ सबइ लोग मोका मोरे सपन क अर्थ नाहीं बताइ पाएन। 8अंत में दानियेल मोरे लगे आवा (मई आपन देवता क सम्मानित करइ बरे दानियेल क बेलेतसस्सर नाउँ दिहे रहेउँ। पवितर देवतन क आतिमा क ओहमाँ निवास अहइ।) दानियेल क मई आपन सपन कहि सुनाएउँ। 9मई ओहसे कहेउँ,

“हे बेलेतसस्सर, तू सबहि तान्त्रिकन में सब स बड़का अहा। मोका पता अहइ कि तोहमाँ पवितर देवतन क आतिमा बास करत अहइ। मई जानत हउँ कि कउनो भी रहस क समुझब तोहरे बरे कठिन नाहीं अहइ। मई जउन सपना लखे रहेउँ, उ इ अहइ। तू मोका एकर अरथ समुझावा। 10जब मई आपन बिछउना में ओलरा भवा रहेउँ तउ मई दिव्य दर्सन लखे रहेउँ। मई लखेउँ कि मोरे समन्वा धरती क बीचउ-बीच एक बृच्छ खड़ा अहइ। उ बृच्छ बहोत लम्बा अहइ। 11बृच्छ बड़ा होत भवा एक बिसाल मजबूत बृच्छ बन गवा। बृच्छ क चोटी अकास छुअइ लाग। उ बृच्छ क धरती पइ कहुँ स भी लखा जाइ सकत रहा। 12बृच्छ क पातियन सुन्नर रहिन। बृच्छ पइ बहोत नीक फल बहोतयात में लगे रहेन अउर उ बृच्छ पइ हर कउनो क लिए भरपूर खाइ क रहा। जंगली जनावर बृच्छ क नीचे आसरा पाए भए रहेन अउर बृच्छ क डारन पइ चिरइयन क बसेरा रहा। हर पसु पच्छी उ बृच्छ स ही भोजन पावत रहा।



13“अपने बिछउना पइ ओलरे-ओलरे दर्सन में मई ओन वस्तुअन क लखत रहेउँ अउर तबहिं एक पवितर सरगदूत क मई सरग स नीचे उतरत भए लखेउँ। 14उ बड़े ऊँचे सुर में बोला। उ कहेस, ‘बृच्छ क कांट लोकावा। एकर टहनियन क काट डाला। एकर पातियन क नोंच डावा। एकर फलन क चारिहुँ ओर बिखेर द्या। इ बृच्छ क नीचे आसरा पाए भए पसु कहूँ दूर पराइ जाई। एकर आसन पइ बसेरा किए भए पंछी कहूँ उड़ जाई।’

15“किन्तु एकर तना अउर एकर जड़न क धरती में रहइ द्या। एकरे चारिहुँ ओर लोहा अउ काँसे क एक बंधेज बाँध द्या। अपने आस-पास उगी घास क संग एकर तना अउर एकर जड़न धरती में रहिहीं। जंगली पसुअन अउ पेड़ पौधन क बीच इ खेतन में रही। ओस स उ नम होइ जाइ। 16उ जियादा समइ तलक मनई क तरह नाहीं सोची। ओकर मन पसु क मन जइसा होइ जाइ। ओकर अइसा ही रहत भए सात ऋतु चक्र (बरिस) बीत जाई।’

17“एक पवितर सरगदूत इ दण्ड क घोसणा किहे रहा ताकि धरती क सबहिं लोगन क इ पता चल जाइ कि मनइयन क राजन क ऊपर परम प्रधान परमेस्सर सासन करत ह। परमेस्सर जेका भी चाहत ह। एन राजन क दइ देत ह अउर परमेस्सर ओन राजन पइ सासन करइ बरे विनम्र मनइयन क चुनत ह।

18“बस मई (राजा नबूकदनेस्सर) सपना में इहइ लखेउँ ह। अब हे बेलतसस्सर। तू मोका इ बतावा कि इ सपना क अरथ का अहइ? मोरे राज क कउनो भी बुद्धिमान मनई मोका इ सपना क फल नाहीं बताइ पावत अहइ। किन्तु हे बेलतसस्सर, तू मोरे इ सपना क व्याख्या कइ सकत ह काहेकि तोहमों पवितर परमेस्सर क आतिमा निवास करत अहइ।”

19तब दानियेल (जेकर नाउँ बेलतसस्सर भी रहा) थोड़ी देर बरे एक दम चुप होइ गवा। जिन बातन क उ सोचत रहा, उ सबइ ओका बियाकुल किहे डावत रहिन। तउ राजा ओहसे कहेस, “हे बेलतसस्सर, तू उ सपना या उ सपना क फल स भय भीत जिन हवा।”

एह पइ बेलतसस्सर राजा क उत्तर दिहेस, “हे मोर सुआमी, कास इ सपना तोहरे दुस्मनन चइ पड़इ अउर एकर फल, जउन तोहरे विरोधी अहइँ, ओनका मिलइ।” 20तू आपन सपना में एक बृच्छ लखे रहेउँ। उ बृच्छ बड़ा भवा अउर मजबूत बन गवा। बृच्छ क चोटी आसमान छुअत रही। धरती में हर कहूँ स उ बृच्छ देखाई देत रहा। 21ओकर पातियन सुन्नर रहित अउर ओह पइ बहोतयात में फल लगे रहेन। ओन फलन स हर कउनो क पर्याप्त भोजन मिलत रहा। जंगली पसुअन क तउ उ घर ही रहा अउर ओकर डारन पइ चिरइयन बसेरा किया भए रहेन। तू सपना में अइसा बृच्छ लखे रह्या। 22हे राजा, उ बृच्छ आप ही अहइँ। आप महान अउर सक्तिसाली बन चुका अहइँ। आप उ ऊँच बृच्छ क समान अहइँ जउन अकास छुइ लिहेस ह

अउर आप क सक्ति धरती क सुदूर भागन तलक पहुँची भई अहइँ।

23“हे राजा, आप एक पवितर सरगदूत क अकासे स नीचे उतरत लखे रह्या। सरगदूत कहे रहा बृच्छ क काट डावा अउर ओका नस्त करा। बृच्छ क तना पइ लोहा अउ काँसे क बंधज डाइ द्या अउर एकर तना अउ जड़न क धरती में ही छोड़ द्या। खेत में घास क बीच एका रहइ द्या। ओस स ही इ नमी लेत रही। उ कउनो जंगली पसु क रूप में रहा करी। एकर रहइ हाल में सात ऋतु-चक्र बीत जइहीं।

24“हे राजा, आपक सपन क फल इहइ अहइ। सर्वोच्च परमेस्सर मोर सुआमी राजा क बरे एन बातन क घटइ क आदेस दिहस ह। 25हे राजा नबूकदनेस्सर, प्रजा स दूर चला जाइ क बरे आप क मजबूर कीन्ह जाइ। जंगली पसुअन क बीच आप क रहइ क होइ। मवेसियन क तरह आप घास स पेट भरिहीं अउर ओस स भिगिहीं। सात ऋतु चक्र बीत जइहीं अउर फुन ओकरे बाद तू इ स्वीकार करब्या कि सर्वोच्च परमेस्सर मनइयन क साम्राज्यन पइ सासन करत ह अउर उ जेका भी चाहत ह, ओका राज दइ देत ह।

26“बृच्छ क तना अउ ओकर जड़न क धरती में छोड़ देइ क आदेस क अरथ इ अहइ कि आप क साम्राज्य आप क वापस मिलि जाइ। किन्तु इ उहइ समइ होइ जब तू इ जान जाब्या कि तोहरे राज पइ सर्वोच्च परमेस्सर क ही सासन अहइ। 27एह बरे हे राज, आप कृपा कइके मोर सलाह माना। मई आप क इ सलाह देत हउँ कि आप पाप करब तजि देई अउर जउन उचित अहइ, उहइ करई। कुकरमन क त्याग कइ देई। गरीबन पइ दयालु होई। तबहिं आप सफल बना रहि सकिहीं।”

28इ सबहिं बातन राजा नबूकदनेस्सर क संग घटिन। 29इ सपना क बारह महीना बाद जब राजा नबूकदनेस्सर बाबुल में आपन महल क छत पइ घूमत समइ, 30तउ उ आपन आप स किहा, “उ मई हउँ जउन कि इ महान बाबुल क निर्माण किहेउँ ह। इ महल मोर अहइ। मई आपन सक्ति स इ बिसाल नगर क निर्माण किहेउँ ह। इ ठउर क निर्माण मई इ देखाइ बरे किहेउँ ह कि मई केतना खुस हउँ।”

31इ सबइ सब्द अबहिं ओकरे मुँह में ही रहेन कि एक अकासवाणी भई। अकासवाणी कहेस, “राजा नबूकदनेस्सर, तोहरे संग इ सबइ बातन घटिहीं। राजा क रूप में तोहसे तोहार सक्ति छोर लीन्ह गइ अहइ। 32तोहका आपन लोगन स दूर जाब होइ। जंगली पसुअन क संग तोहार निवास होइ। तू ढोरन क तरह घास खाब्या। एहसे पहिले कि तू सबक सीखा कि मनई क राजन पइ सर्वोच्च परमेस्सर सासन करत ह अउर सर्वोच्च उ जेका चाहत ह, ओका राज दइ देत ह सात ऋतु-चक्र बीत जइहीं।”

33फुन फउरन ही इ सबइ बातन घट गइन। नबूकदनेस्सर क लोगन स दूर जाइ बरे मजबूर कीन्ह गवा। उ गाइयन क तरह घास खाब सुरू कइ दिहस। उ ओस में भीगा। कउनो उकाब क पंखन क तरह ओकर बार बढ़ गएन अउर ओकर नाखून अइसे बढ़ गएन जइसे कउनो पंछी क पंजन क नाखून होत हीं।

34फुन उ समइ क अंत में मई, नबूकदनेस्सर ऊपर सरग क कईती लेखा अउर मोर सोचइ समुझइ क बुद्धि फिर स ठीक होइ गवा। तउ मई सर्वोच्च परमेस्सर क स्तुति किहेउँ, जउन सदा अमर अहइ, मई ओका आदर प्रदान किहेउँ अउर ओका गुनगान किहेउँ।

परमेस्सर सासन हमेसा करत ह। ओकर राज्ज पीढ़ी दर पीढ़ी बना रहत ह। 35इ धरती क सबइ लोग महत्वपूर्ण नाहीं अहई। परमेस्सर सरग क सक्तियन अउर धरती क लोगन क संग जउन चाहत ह उहइ करत ह। उ जउन करइ चाहत ह ओका उ करइ स कउनो भी नाहीं रोक सकत ह। ओकर ससक्त हाथ जउन कछू उ करत ह ओह पइ कउनो नाहीं सवाल करत ह।

36तउ, उ औसर पइ परमेस्सर मोका मोर बुद्धि फुन दइ दिहेस अउर उ एक राजा क रूप में मोर बड़ा मान, सम्मान अउ सक्ति भी वापस लउटाइ दिहेस। मोर मंत्री अउर मोर राजकीय लोग फुन मोरे लगे आवइ लागेन। मई फुन स राजा बन गएउँ। मई पहिले स भी जियादा महान अउ सक्तिसाली होइ गवा रहेउँ। 37लखा, अब मई, नबूकदनेस्सर सरग क राजा क स्तुति करत हउँ तथा ओकर उपासना करत हउँ, ओका आदर देत हउँ अउर ओकरे गुनगान करत हउँ। उ जउन कछू करत ह, ठीक करत ह। उ हमेसा निआव स पूर्ण अहइ। ओहमाँ अहंकारी लोगन क विनम्र बनाइ देइ क छमता अहइ।

### देवार पइ अभिलेख

5 राजा बेलसस्सर आपन एक हजार अधिकारियन क एक बड़की दावत दिहेस। राजा ओकरे संग दाखरस पिअत रहा। 2राजा बेलसस्सर दाखरस पिअत भए आपन सेवकन क सोना अउ चाँदी क पियाला लिआवइ क कहेस। इ सबइ उ सबइ पियालन रहेन जेनका ओकर पिता नबूकदनेस्सर यरूसलेम क मन्दिर स लिहे रहा। राजा बेलसस्सर चाहत रहा कि ओकर साही लोग, ओकर मेहररूअन अउ ओकर उप पत्नियन इन पियालन स दाखरस पिअई। 3तउ सोना क उ सबइ पियालन लिआवा गएन जेनका यरूसलेम में परमेस्सर क मन्दिर स उठावा गवा। फुन राजा अउ ओकर अधिकारियन, ओकर रानियन तथा ओकर उप पत्नियन, ओन पियालन स दाखरस पिया किहेन। 4दाखरस पिअत भए उ पचे आपन देवतन क मूरतियन क स्तुति करत रहेन। उ पचे ओन देवतन क स्तुति किहेन जउन देवता सोना, चाँदी, काँसा, लोहा, काठ अउ पाथर क मूरति पात्र रहेन।

5उहइ समइ एकाएक कउनो मनई क एक हाथ परगट भवा अउ देवार पइ लिखइ लाग। ओकर अँगुरियन देवार क लेप क कुरेदत भइ सब्ब लिखइ लागिन। देवार क लगे राजा क महल में उ हाथ देवार पइ लिखेस। हाथ जब लिखत रहा तउ राजा ओका लखत रहा।

6राजा बेलसस्सर बहोत भयभीत होइ उठा। डर स ओकर मुँह पिअर पइ गवा अउर ओकर घुटनन इ तरह काँपइ लागेन कि उ सबइ आपुस में टकरात रहेन। ओकर गोइ

एतना बलहीन होइ गएन कि उ खड़ा भी नाहीं रहि पावत रहा। 7राजा तान्त्रिकन अउ कसदियन क अपने लगे बोलवाएस अउर ओनसे कहेस, “मोका जउन कउनो भी इ लिखावट क पढ़कर बताइ अउर मोका ओकर अरथ समुझाइ देइ, मई ओका पुरस्कार देब। उ मनई क मई बैगनी पोसाक भेंट करब। मई ओकरे गले में सोना क हार पहिराउब अउर मई ओका आपन राज्ज क तीसर सबसे बड़ा सासक बनाइ देब।”

8तउ राजा क सबहि बुद्धिमान मनई हुवाँ आइ गएन किन्तु उ सबइ उ लिखावट क नाहीं पढ़ि सकेन। उ पचे समुझ ही नाहीं सकेन कि ओकर अरथ का अहई। 9राजा बेलसस्सर क हाकिम चक्कर में पड़े भए रहेन अउर राजा तउ अउर भी जियादा भयभीत अउर चिंतित रहा। ओकर मुँह डर स पीला पड़ा भवा रहा।

10तबहि जहाँ उ दावत चलत रही, हुवाँ राजा क महतारी आइ। उ राजा अउर ओकर राजकीय अधिकारियन क आवाजन सुन रिहे रहिन, उ कहेस, “हे राजा, चिरंजीव रहा। डेरा जिन। तू आपन मुँह क डर स एतना पीला जिन पड़इ द्या। 11लखा, तोहरे राज्ज में एक अइसा मनई अहइ जेहमाँ पवित्र देवतन क आत्मा बसत ह। तोहरे बाप क दिनन में इ मनई इ दसयि रहा कि ओकरे लगे देवतन क बुद्धि क नाई बुद्धि अउर समुझ अहइ। तोहार पिता नबूकदनेस्सर इ मनई क सबहि बुद्धिमान मनइयन पइ, तान्त्रिकन अउ कसदियन पइ मुखिया नियुक्त किहे रहा। 12मई जउन मनई क बारे में बातन करत हउँ ओकर नाउँ दानियेल अहइ। किन्तु राजा ओका बेलतसस्सर क नाउँ दइ दिहे रहा। बेलतसस्सर बहुत चुस्त अहइ अउर बहुत स बातन जानत ह। उ सपनन क व्याख्या कइ सकत ह। पहेलियन क समझाइ सकत ह। अउर कठिन स कठिन हलन क सुलझाइ सकत ह। तू दानियेल क बोलवा। देवारे पइ जउन लिखा बाटइ, ओकर अरथ तोहका उहइ बताई।”

13तउ उ सबइ दानियेल क राजा क लगे लइ आएन। राजा दानियेल स कहेस, “का तोहार नाउँ दानियेल अहइ? मोर पिता महाराज यहूदा स जिन लोगन क बंदी बनाइके लिआए रहेन, का तू ओनमाँ स एक अहा? 14मई सुनेउँ ह, कि देवता क आत्मा क तोहमाँ निवास अहइ अउर मई इ भी जानेउँ ह कि तोहमाँ महान अन्तदृष्टि अहइ। तू बहोत चुस्त अउ बुद्धिमान अहा।

15“बुद्धिमान मनई अउ तान्त्रिकन क इ देवार क लिखावट क समुझावइ बरे मोरे लगे लिआवा गवा। मई चाहत रहेउँ कि उ सबइ लोग उ लिखावट क अरथ बतावई। किन्तु देवार पइ लिखी इ लिखावट क व्याख्या उ पचे मोका नाहीं दइ पाएन। 16मई तोहरे बारे में सुनेउँ ह कि तू बातन क अर्थ क व्याख्या कइ सकत ह अउर तू अत्यन्त कठिन समस्यन क उत्तर भी ढूँढ सकत ह। जदि देवार क इ लिखावट क तू पढ़ द्या अउर एकर अरथ तू मोका समुझाइ द्या तउ मई तोहका उ सबइ चिजियन देब। मई तोहका बैगनी रंग क पोसाक प्रदान करब, तोहरे गले में सोना क हार पहिराउब। फुन तउ तू इ राज्ज क तीसर सब स बड़का सासक बन जाब्या।”

17एकरे पाछे दानियेल राजा क उत्तर देत भए कहैस, “हे राजा बेलसस्सर, तू आपन उपहार अपने लगे रखा, अथवा चाहा तउ ओनका कउनो अउर क दइ द्या। मई तोहका वइसे ही देवार क लिखावट पढ़ देब अउर ओकर अरथ का अहइ, इ तोहका समुझाइ देब।

18“हे राजा, सर्वोच्च परमेस्सर तोहार पिता नबूकदनेस्सर क एक महान सक्तिसाली राजा बनाए रहेउँ। परमेस्सर ओनका बहोत अधिक स अधिक महत्वपूर्ण बनाए रहा। 19सबइ रास्ट्र नबूकदनेस्सर स डरा करत रहेन काहेकि सर्वोच्च परमेस्सर ओक एक बहोत बड़का राजा बनाए रहा। जदि नबूकदनेस्सर कउनो क मार डावइ चाहत तउ ओका मार दीन्ह जात रहा अउर जदि उ चाहत कि कउनो मनई जिअत रहइ तउ ओका जिअत रहइ दीन्ह जात रहा। ओनका जेका उ उन्नती देइ चाहत रहा तउ ओका उन्नती देइ दीन्ह जात रहा। ओनका जेका उ विनम्र बनाइ चाहत रहा तउ ओका विनम्र बनाइ दीन्ह जात रहा।

20“किन्तु नबूकदनेस्सर क अभिमान होइ गवा अउर उ हठीला बन गवा। तउ परमेस्सर क जरिये ओहसे ओकर सक्ति छोर लीन्ह गइ। ओका ओकर राज सिंहासन स उतार फेंका गवा अउ ओका महिमा विहीन बनाइ दीन्ह गवा। 21एकर पाछे लोगन स दूर पराइ जाइ क बरे नबूकदनेस्सर क मजबूर कीन्ह गवा। ओकर सोचइ समुझइ क बुद्धि कउनो पसु क बुद्धि जइसी होइ गइ। उ जंगली गदहन क बीच रहइ लगा अउर डोरन क तरह घास खात रहा। उ ओस में भीगा। जब तलक ओका सबक नहीं मिल गवा, ओकरे संग अइसा ही होत गवा। फिन ओका इ गियान होइ गवा कि मनई क राज पइ सर्वोच्च परमेस्सर क ही सासन अहइ। अउर साम्राज्यन क ऊपर सासन करइ बरे उ जउन कउनो क भी चाहत ह, नियुक्त कइ देत ह।

22“किन्तु हे बेलसस्सर, तू तउ एन बातन क जानत ही अहा। तू नबूकदनेस्सर क पूत अहा किन्तु फुन भी तु अपने आप क विनम्र नहीं बनाया। 23नहीं तू विनम्र तउ नहीं भया अउ उल्टे सरग क सुआमी क खिलाफ होइ गया। तू ओकरे मन्दिर क पात्रन अउर पिआलन क अपने लगे लिआवइ क आग्या दिहा अउर फुन तू, तोहरे साही हाकिमन, तोहार मेहरून, तोहार उप पत्नियन ओन पिआलन में दाखरस पिएन। तू चाँदी, सोना, काँसा, लोहा, काठ अउर पाथर क देवतन क गुण गाया। उ पचे फुरइ क देवता नहीं अहइँ। उ पचे लख नहीं सकतेन, सुन नहीं सकतेन तथा उ पचे कछू समुझ भी नहीं सकतेन। उ पचे जानइ क सामर्थ नहीं अहइ कि तू ओनका स्तुति करत ह। तू उ परमेस्सर क आदर नहीं दिहा, जेकर जिन्गी या जउन कछू भी तू करत अहा, ओह पइ अधिकार अहइ। 24तउ एह बरे, परमेस्सर उ हाथे क पठएस जउन देवार पइ लिखेस। 25देवार पइ जउन सब्द लिखा गवा अहइँ, उ सबइ इ सबइ अहइँ:

मने, मने तकेल, ऊपसीन।

26“एन सब्दन क अरथ अहइ, मने: अर्थात् परमेस्सर तोहरे सासन क दिन गन लिहैस ह अउर उ ओकरे अन्त लिआएस ह।

27तकेल: अर्थात् तराजू पइ तोहका तौल लीन्ह गवा ह अउर तू पूरा नहीं उतरा ह।

28ऊपसीन: अर्थात् तोहसे तोहार राज छोरा जात अहइ अउर ओकर बँटवारा होत अहइ। इ राज मादियन अउ फारसिदन क लोगन क दइ दीन्ह जाइ।”

29एकरे पाछे बेलसस्सर आग्या दिहैस कि दानियेल क बैंगनी बेसभूसा पहिराइ जाइ। ओकरे गले में सोने क हार पहिराइ दीन्ह जाइ अउर इ घोसणा कइ दीन्ह गइ कि उ राज में तीसरा सबसे बड़कवा सासक होइ। 30उहइ रात, बेलसस्सर, बाबुल क प्रजा क राजा बध कइ दीन्ह गवा। 31मादे क रहइवाला एक मनई जेकर नाउँ दारा रहा अउर जेकर आयु कउनो बासठ बरिस क रही, हुवाँ क नवा राजा बना।

### दानियेल अउ सिंह

6 दारा राज पइ हुकुमत करइ बरे ओकर मदद बरे एक सौ बीस प्रांतीय अधिकारियन क नियुक्त करइ क निहचय किहा। 2अउर एकरे बरे उ एक सौ बीस प्रांत-अधिपतियन क ऊपर हुकुमत करइ बरे तीन ठु मनइयन क अधिकारी नियुक्त कइ दिहस। इ तीनहुँ देख-रेख करइवालन में एक रहा दानियेल। एन तीन मनइयन क नियुक्ति राजा एह बरे किहे रहा कि कउनो ओकरे संग छल न कइ पावइ अउर ओकर राज क कउनो भी हानि न होइ। 3दानियेल इ कइ देखाएस कि उ दूसर पर्यवेच्छकन स जियादा उत्तम अहइ। दानियेल इ काम आपन उत्तम मानिसक जागतन अउर महान अन्तर्दृष्टि क कारण सम्पन्न कइ सकेस। राजा दानियेल स एतना जियादा प्रभावित भवा कि उ दानियेल क सारी हुकुमत क हाकिम बनावइ क सोचेस। 4किन्तु जब दूसर पर्यवेच्छकन अउ प्रांत अधिपतियन एकरे बारे में सुनेन तउ ओनका दानियेल स जलन होइ लाग। उ पचे ओका कोसइ क बरे कारण ढूँढइ क जतन करइ लागेन। किन्तु फुन भी उ पचे ओकरे काम में कउनो दोख या कउनो भ्रष्ट नहीं ढूँढ पाएन। तउ उ पचे ओह पइ कउनो गलत काम करइ क दोख नहीं लगाइ सकेन। काहेकि दानियेल बहोत ईमानदार अउ भरोसेमन्द मनई रहा। उ पचे ओहमाँ कउनो दोख नहीं ढूँढ पाएन।

5आखिरकार ओन लोग कहैन, “दानियेल पइ कउनो बुरा काम करइ क दोख लगावइ क वजह हम कबहुँ नहीं ढूँढ पाउब। एह बरे हमका सिकाइत क बरे कउनो अइसी बात ढूँढइ चाही जउन ओकर परमेस्सर क नेमन स सम्बन्ध रखत होइ।”

6तउ उ पचे दुइनउँ पर्यवेच्छक अउर उ सबइ प्रांत-अधिपति टोली बनाइके राजा क लगे गएन। उ पचे कहैन, “हे राजा दारा, तू अमर रहा। 7हम सबहिँ पर्यवेच्छक, हाकिम, प्रांत - अधिपति, मंत्री अउर राजपाल एक बात पइ सहमत अहइ कि राजा क इ नेम बनाइ देइ चाही अउर हर मनई क इ नेम क पालन करइ चाही। उ नेम इ अहइँ, ‘जदि अगले तीस दिनन तलक कउनो भी मनई, आपक तजिके कउनो अउर देवता या मनई क पराथना करइ तउ उ

मनई क सेरन क माँद में डाइ दीन्ह जाइ। 8अब हे राजा! जउने कागज पइ नेम लिखा अहइ, तू ओह पइ हस्ताच्छर कइ दया। इ तरह स इ नेम कबहुँ बदला नहीं जाइ सकी। काहेकि मीडियन अउ फारसियन क नेम न तउ बदले जाइ सकत हीं।” 9तउ राजा दारा इ नेम बनाइके ओह पइ हस्ताच्छर कइ दिहेस।

10हर दिन तीन दाई दानियेल अपने घुटनन क बल निहुरिके आपन परमेस्सर क पराथना करत रहेन अउर आपन परमेस्सर क सुकरिया अदा किहेन। दानियेल जब इ नवे नेम क बारे में सुनेस तउ उ अपने घर चला गवा। दानियेल आपन मकान क छत क ऊपर, आपन कमरा में चला गवा। दानियेल ओन खिड़कियन क लगे गवा जउन यरूसलेम क तरफ खुलत रहिन। फिन उ आपन घुटनन क बल निहुरा अउर जइसे सदा किया करत रहा, उ वइसे ही पराथना किहेस।

11फिन उ सबइ लोग झुण्ड बनाइके दानियेल क हिऔ जाइ पहुँचेन। हुवाँ उ पचे दानियेल क पराथना करत अउ परमेस्सर स दया माँगत पाएन। 12बस फुन का रहा। उ सबइ लोग राजा क लगे पहुँचेन अउर उ पचे राजा स उ नेम क बारे में बात किहन जउन उ बनाए रहा। उ पचे कहेन, “हे राजा दारा, आप एक नेम बनाए रहेन। जेकरे अनुसार अगले तीस दिनन तलक जदि कउनो मनई कउनो देवता स या तोहरे अलावा कउनो मनई स पराथना करत ह तउ, हे राजा, ओका सेरन क माँद में फेंकवाइ दीन्ह जाइ। बतावई का आप इ नेम पइ हस्ताच्छर नहीं किहे रहेन?”

राजा जवाब दिहस, “हाँ, मई उ नेम पइ हस्ताच्छर किहे रहेउँ अउर मादियन अउ फारसियन क नेम अटल होत हीं। न तउ उ सबइ बदले जाइ सकत हीं, अउर न ही मिटावा, जाइ सकत हीं।”

13एह पइ ओन राजा स कहेन, “दानियेल नाउँ क उ मनई आप क बात पइ धियान नहीं देत अहइ। दानियेल यहूदा क बन्दियन में स एक अहइ। जउने नेम पइ आप हस्ताच्छर किहेन ह, उ ओह पइ धियान नहीं देत अहइ। दानियेल अबहुँ भी हर दिन तीन दाई अपने परमेस्सर क पराथना करत ह।”

14राजा जब इ सुनेस तउ उ बहोत दुःखी अउ बियाकुल होइ उठा। राजा दानियेल क बचावइ चाहत रहा। एह बरे ओका बचावइ क कउनो उपाय सोचत सोचत राजा सारा दिन बिताइ दिहेस अउर साम होइ गइ। 15एकरे बाद उ सबइ लोग एक झुण्ड बनाइके राजा क लगे पहुँचेन। उ पचे राजा स कहेन, “हे राजा, मादियन अउ फारसियन क ब्यवस्था क अनुसार या हुकूम पइ राजा हस्ताच्छर कइ देइ, उ न तउ कबहुँ बदला जाइ सकत ह अउर न ही कबहुँ मिटावा जाइ सकत ह।”

16तउ राजा दारा आदेस दइ दिहेस। उ सबइ लोग दानियेल क धइ लाएन अउर ओका सेरन क माँद में लोकाइ दिहेन। राजा दानियेल स कहेस, “मोका आसा अहइ कि तू जउन परमेस्सर क हमेसा उपासना करत ह, उ तोहार रच्छा करी।” 17एक बड़ा सा पाथर लिआवा गवा अउर ओका सेरन क माँद क दुआर पइ भेइ दीन्ह गवा।

फुन राजा आपन अँगूठी लिहेस अउर उ पाथर पइ आपन मुहर लगाइ दिहस। साथ ही उ आपन हाकिमन क अँगूठियन क मुहरन भी उ पाथर पइ लगाइ दिहस। एकर इ अभिप्राय रहा कि उ पाथर क कउनो भी हटाइ नहीं सकत अउर सेरन क उ माँद स दानियेल क बाहेर नहीं लाइ सकत रहा। 18एकरे पाछे राजा दारा आपन महल क वापस चला गवा। उ पूरी रात उपवास किहेस। उ नहीं चाहत रहा कि कउनो ओकरे लगे आवइ अउर ओकर मन बहलावइ। राजा सारी रात सोइ नहीं पाएस।

19दूसरे दिन भिन्सारे जइसे ही सूज रोसनी फइलइ लाग, राजा दारा जाग गवा अउ सेरन क माँद कइँती दउड़ा। 20राजा बहोत चिंतित रहा। राजा जब सेरन क माँद क लगे गवा तउ हुवाँ उ दानियेल क जोर स अवाज लगाएस। राजा कहेस, “हे दानियेल, हे जिअत परमेस्सर क सेवक, का तोहार परमेस्सर, जेकर तू हमेसा उपासना करत ह, तोहका सेरन स बचावइ में सामर्थ भवा ह?”

21दानियेल जवाब दिहेस, “राजा, अमर रहइँ। 22मोर परमेस्सर मोका बचावइ बरे सरगदूत पठए रहा। उ सरगदूत सेरन क मुँह बन्द कइ दिहेस। सेरन मोका कउनो हानि नहीं पहुँचाएन काहेकि मोर परमेस्सर जानत ह कि मई निरपराध हउँ। मई राजा क बरे कबहुँ कउनो बुरा नहीं किहेउँ ह।”

23राजा दारा बहोत खुस रहा। राजा आपन सेवकन क हुकूम दिहेस कि उ पचे दानियेल क सेरन क माँद स बाहेर हींच लेइँ। जब दानियेल क सेरन क माँद स बाहेर लिआवा गवा तउ ओका ओह पइ कउनो जखम नहीं देखाइ दिहस। सेरन दानियेल क कउनो भी तरह क हानि नहीं पहुँचाए रहा। काहेकि उ आपन परमेस्सर पइ बिस्वास किहेस।

24एकरे पाछे राजा ओन लोगन क जउन दानियेल पइ अभियोग लगाइके ओका सेरन क माँद में डलवाए रहेन, बोलवावइ क आदेस दिहस अउर ओन लोगन क, ओनकर मेहररूअन क अउर ओनके गदेलन क सेरन क माँद में फेंकवाइ दिहे रहा। एहसे पहिले कि उ पचे सेरन क माँद में धरती पइ गिरतेन, सेरन ओनका दबोच लिहन। सेर ओनके तनन क खाइ गएन अउर फुन ओनकर हाइन क चूर-चूर कइ दिहेन।

25एह पइ राजा दारा सारी धरती क लोगन, दूसर जाति क अलग - अलग भासा बोलइवालन क इ पत्र लिखेस:

“सुभकामनाएँ

26मई एक तु नेम बनावत हउँ। मोरे राज क हर भाग क लोगन क बरे इ नेम होइ। तू पचे सबहिँ लोगन क दानियेल क परमेस्सर क भय मानइ चाही अउर ओकर आदर कइ चाही।

दानियेल क परमेस्सर जिअत अहइ। परमेस्सर सदा-सदा अमर रहत ह। साम्राज कबहुँ ओकर खतम नहीं होइ ओकरे सासन क अंत कबहुँ नहीं होइ 27परमेस्सर लोगन क बचावत ह अउर रच्छा करत ह। सरग में अउ धरती क ऊपर परमेस्सर अद्भूत अचरजे स भरा करम करत ह। परमेस्सर दानियेल क सेरन स बचाइ लिहेस।”

28इ तरह जब दारा क राज रहा अउर जिन दिनन फारसी राजा कुसू क हुकूमत रही, दानियेल सफलता प्राप्त किहस।

### चार पसुअन क बारे में दानियेल क सपना

7 बेलससर क बाबुल पड़ सासन काल क पहिले बरिस दानियेल क एक ठु सपना आवा सपने में आपन पलंग पड़ ओलरे भए दानियेल, इ सबइ दर्सन लखेन। दानियेल जउन सपना लखे रहा, ओका लिख लिहस। 2दानियेल बताएस, “राति में मई सपना में एक दर्सन पाएँ। मई लखेउँ कि चारिहुँ दिसा स हवा बहत अहइ अउर ओन हवा स सागर उफनइ लाग। 3फुन मई तीन पसुअन क लखेउँ। हर पसु दूसर पसु स भिन्न रहा। उ पचे चारिहुँ पसु समुद्र में स उभरिके बाहर निकरे रहेन।

4“ओनमाँ स पहिला पसु सिंह क समान देखाइ देत रहा अउर उ सिंह क उकाब क जइसे पंख रहेन। मई उ पसु क लखेउँ। फुन मई लखेउँ कि ओकर पंख उखाड़ फेंका गवा अहइ। धरती पड़ स उ पसु क इ तरह उठावा गवा जेहसे उ कउनो मनई क समान आपन दुइ गोड़न पड़ खड़ा होइ गवा। एँका मनई क दिमाग दइ दीन्ह गवा रहा।

5“अउर फुन मई लखेउँ कि मोरे समन्वा एक अउर दूसर पसु मौजूद अहइ। इ पसु एक भालू क नाई रहा। उ आपन एक बगल पड़ उठा भवा रहा। उ पसु क मुहँ स दाँतन की बीच तीन पसलियन रहिन। उ भालू स कहा गवा रहा, ‘उठा अउर तोहका जेतना चाही ओतना माँस खाइ ल्या।’

6“एकरे पाछे, मई लखेउँ कि मोरे समन्वा एक अउर पसु खड़ा अहइ। इ पसु चीते जइसा लगत रहा अउर उ चीता क पिठिया पड़ चार पंख रहेन। पंख अइसे लगत रहेन, जइसे उ पचे कउनो चिरइया क पंख होई। इ पसु क चार ठु सिर रहेन, अउर ओका हुकूमत क अधिकार दीन्ह गवा रहा।

7“एकरे पाछे, सपना में रात क मई लखेउँ कि मोरे समन्वा एक अउर चौथा जनावर खड़ा अहइ। इ जनावर बहोतइ खूँखार अउर भयानक लगत रहा। उ बहोत मजबूत देखाई देत रहा। ओकरे लोहे क लम्बे-लम्बे दाँत रहेन। इ जनावर अपने सिकारन क कुचर कइके खाइ डावत रहा अउर सिकार क खाइ चुकइ क पाछे जड़न कछू बचि रहत, उ ओका आपन गोड़न क तरे कुचरि डावत रहा। इ पसु स पहिले मई सपना में जउन पसु लखे रहेउँ, उ चउथा पसु ओन स अलग रहा। इ पसु क दस ठु सींग रहेन।

8“अबहिं मई ओन सींगन क बारे में सोच ही रहेउ कि ओन सींगन क बीच एक ठु अउर सींग जमि आवा। इ सींग बहोत छोट रहा। इ छोटे सींग पड़ आँखिन रहिन, अउर उ सबइ आँखिन कउनो मनई क आँखिन जइसी रहिन। इ छोटके सींग में एक मुँह भी रहा अउर उ खुद क प्रसंसा करत रहा। इ छोटका सींग दूसर सींगन में स तीन ठु सींग उखाड़ फेकेस।

### चउथे पसु क निआव

9“मोर लखत ही लखत, ओनकी जगह पड़ सिंहासन रखे गएन अउर उ सनातन राजा\* सिंहासन पर बिराज गवा।

ओकर ओढ़ना बहोतइ उज्जर रहेन, उ सबइ ओढ़नन बर्फ जइसे सफेद रहेन। ओकर सिंहासन आगी क बना रहा अउर ओकर पहियन लपटन स बना रहेन। 10प्राचीन राजा क समन्वा एक आगी क नदी बहत रही। लाखों करोड़ों लोग ओकर सेवा में रहेन। ओकरे समन्वा करोड़न दास खड़ा रहेन। निआवधीस ओकर समन्वा बइठेस अउर पुस्तकन खोली गइ होई।

11“मई लखत क लखत रहि गएँ काहेकि उ छोटका सींग डींगन मारत रहा। मई उ समइ तलक लखत रहेउँ जब अन्तिम रूप स चउथे पसु क हलिया कइ दीन्ह गइ। ओकरी देह क नस्ट कइ दीन्ह गवा अउर ओका धधकत आगी में डाइ दीन्ह गवा। 12दूसर पसुअन क सक्ति अउर राजसता ओहसे छीन लीन्ह गएन। किन्तु एक निहचित समइ तक ओनक जिअत रहइ दीन्ह गवा।

13“राति क मई आपन दिव्व सपन में लखेउँ कि मोर समन्वा कउनो खड़ा अहइ, जउन मनई जइसा देखाई देत रहा। उ अकास में बादरन पड़ सवार होइके आवत रहा। उ उ सनातन राजा क लगे आवा रहा। तउ ओका ओकरे समन्वा लइ आवा गवा।

14“उ जउन मनई क समान देखाई देत रहा, ओका अधिकार, महिमा अउर सम्पूर्ण सासन सत्ता सौंप दीन्ह गइ। सबहिं लोग, सबहिं जातियन अउर प्रत्येक भासा-भासी लोग ओकर आराधना करिहीं। ओकर राज अमर रही। ओकर राज सदा बना रही। उ कबहुँ नस्ट नाहीं होइ।

### चउथे पसु क सपन क फल

15“मई, दानियेल बहुत विकल अउ चिंतित रहेउँ। उ सबइ दर्सन जउन मई लखे रहेउँ, उ सबइ मोका विकल बनाए भए रहेन। 16मई जउन हुवाँ खड़ा रहेउँ, ओनमाँ स एक क लगे पहाँचेउँ। मई ओहसे पूछेउँ, “इ सब कछू क अरथ का अहइ? “तउ उ बताएस, उ मोका समुझाएस कि एन बातन क मतलब का अहइ। 17उ कहेस, ‘उ पच इ चार बड़के पसु, चार राज अहइ। उ सबइ चारिहुँ राज धरती स उ मरिहीं। 18किन्तु परमेस्सर क पवितर लोग उ राज क प्राप्त करिहीं जउन एक अमर राज होइ।’

19“फुन मई इ जानइ चाहेउँ कि उ चउथा पसु का रहा अउर ओकर का अभिप्राय रहा? उ चउथा पसु सबहिं दूसर पसुअन स भिन्न रहा। उ बहोत भयानक रहा। ओकर दाँत लोहे क रहेन, अउर पंजे काँसे क रहेन। उ पसु रहा, जउन आपन सिकार क चकनाचूर कइके पूरी तरह खाइ लिहे रहा, अउर आपन सिकार क खाइ क पाछे जउन कछू बचा रहा, ओका आपन गोड़वन क तले रौंद डाए रहा। 20उ चउथे पसु क सिर पड़ जउन दस सींग रहेन, मई ओनके बारे में जानइ चाहेउँ अउर मई उ सींग क बारे में जानइ चाहेउँ जउन हुवाँ सींगन में स तीन ठु सींग उखाड़ि फेंके रहेन। उ सींग दूसर सींगन स जियादा बड़का देखाई देत रहा। ओकर आँखिन रहिन अउर उ आपन डींग हँकि चला जात रहा। 21मई

**सनातन राजा** साब्दिक “प्राचीन दिनन” में इ नाउँ परमेस्सर बरे इ दिखावत ह कि परमेस्सर बहोत पहिले स महान राजा रहत आवा ह।

लखत ही रहेउँ कि उ सींग परमेस्सर क पवितर लोग क विरुद्ध युद्ध अउर ओन पइ हमला करब सुरू कइ दिहस ह अउर उ सींग ओनका मारि डावत अहइ। 22परमेस्सर क पवितर लोग क उ सींग उ समइ तलक मारत रहा जब तलक सनातन राजा आइके उ सींग क निर्णय नाहीं किहस। उ निर्णय परमेस्सर क पवितर लोग क पच्छ में रहा। अउर ओनका ओनके आपन राज्ज क प्राप्ति होइ गइ।

23“अउर फुन उ सपना क मोका इ तरह समुझाएस कि उ चउथा पसु, ‘उ चउथा राज्ज अहइ जउन धरती पइ आई। उ राज्ज दूसर सबहिं राज्जन स अलग होइ। उ चउथा राज्ज संसार में सब कहुँ लोगन क बिनास करी। संसार क सबहिं देसन क उ आपन गोइन तले रौदी अउर ओनकर टूका-टूका कइ देइ। 24उ सबइ दस सींग उ सब दस राजा अहइ, जउन इ चउथे राज्ज में अइही। एन दसन राजा लोगन क चले जाइ क पाछे एक ठु अउर राजा आई। उ राजा अपने स पहिले क राजा लोगन स अलग होइ। उ ओनमाँ स तीन दूसर राजा लोगन क पराजित करी। 25इ बिसेस राजा सर्वोच्च परमेस्सर क विरुद्ध बातन करी तथा उ राजा परमेस्सर क पवितर लोगन क नोस्कान पहोंचाइ अउर ओनकर बध करी। जउन पवितर उत्सव अउर जउन नेम इ समइ प्रचलन में अहइ उ राजा ओनका बदलइ क जतन करी। परमेस्सर क पवितर लोग सोढ़े तीन बरिस तलक उ राजा क सक्ति क अधीन रहिहीं।

26“किन्तु जउन कछू होब अहइ, ओकर निर्णय निआवालय करी अउर उ राजा स ओकर सक्ति छोरि लीन्ह जाइ। ओकरे राज्ज क पूरी तरह अन्त होइ। 27फिन परमेस्सर क पवितर लोग उ राज्ज क हुकूमत चलइहीं। धरती क सबहिं राज्जन क सबहिं लोगन पइ सासन होइ। इ राज्ज सदा सदा अटल रही, अउर दूसर सबहिं राज्जन क लोग ओनका आदर देइहीं अउर ओनकर सेवा करिहीं।’

28“इ तरह उ सपना क अंत भवा। मइँ, दानियेल तो बहोत डेराइ गवा रहेउँ। डर स मोर मुँह पीला पइ गवा रहा। मइँ जउन बातन लखे रहेउँ अउर सुने रहेउँ, मइँ ओनके बारे में दूसर लोगन क नाहीं बताएउँ।”

### भेड़न अउ बोकसन क बारे में दानियेल क दर्सन

8 बेलसस्सर क सासन काल क तीसरे बरिस मइँ इ दर्सन लखेउँ। इ उ पहिले वाल दर्सन क बाद क दर्सन रहा। 2मइँ लखेउँ कि मइँ सूसन नगर में हउँ। सूसन, एलाम प्रान्त क राजधानी रही। मइँ ऊलै नदी क किनारे पइ खड़ा रहेउँ। 3मइँ आँखिन ऊपर उठाएउँ तउ लखेउँ कि ऊलै नदी क किनारे पइ एक भेड़ा खड़ा अहइ। उ भेड़ा क दुइ लम्बे सींग रहेन। जदपि ओकर दुइनउँ ही सींग लम्बे रहेन। पर एक सींग दूसर स लम्बा रहा। लम्बा वाला सींग छोटैवाले सींग क बाद में जमा रहा। 4मइँ लखेउँ कि उ भेड़ा कबहुँ पच्छिम कइँती दउड़त रहा तउ कबहुँ उत्तर कइँती, अउर कबहुँ दक्खिन कइँती अउर सींग मारत फिरत रहा। उ भेड़ा क कउनो भी पसु रोक नाहीं पावत अहइ अउर न ही कउनो दूसर पसुअन क बचाइ पावत अहइ। उ

भेड़ा सब कछू कइ सकत रहा, जउन कछू उ कइ चाहत रहा। इ तरह स उ भेड़ा बहोतइ सक्तिसाली होइ गवा।

5मइँ उ भेड़ा क बारे में सोचइ लगा। मइँ अबहिं सोचत ही रहत रहा कि पच्छिम कइँती स मइँ एक बोकरा क आवत लखेउँ। इ बोकरा धरती पइ दौड़ गवा। किन्तु उ बोकरा क गोड़ धरती पइ छुए तलक नाहीं। इ बोकरा क एक लम्बा सींग रहा। जउन साफ-साफ दिखत रहा, उ सींग बोकरा क दुइनउँ आँखिन क बीचउ-बीच रहा।

6फिन उ बोकरा उ दुइ सींगवाले भेड़न क लगे आवा। इ उहइ भेड़ा रहा जेका मइँ ऊलै नदी क किनारे खड़ा लखे रहेउँ। उ बोकरा किरोध स भरा भवा रहा। तउ उ भेड़ा क तरफ लपका। 7बोकरा क उ भेड़े क तरफ परात भए मइँ लखेउँ। उ बोकरा गुस्सा में आग बबूला होत रहा। तउ उ भेड़ा क दुइनउँ सींग तोड़ डाएस। भेड़ा बोकरा क रोक नाहीं पाएस। बोकरा भेड़ा क धरती पइ पछाड़ दिहस अउर फुन उ बोकरा उ भेड़ा क गोड़न तले कुचर दिहस। हुआँ उ भेड़ा क बोकरा स बचावइ वाला कउनो नाहीं रहा।

8तउ बोकरा बहोत सक्तिसाली बन बइठा। किन्तु जब उ सक्तिसाली बना, ओकर बड़का सींग टूट गवा अउर फुन उ बड़के सींग क तरह चार सींग अउर निकरि आएन। उ सबइ चारिहुँ सींग आसानी स देखाई पड़त रहेन! उ सबइ चार सींग अलग-अलग दिसा कइँती मुड़े भए रहेन।

9फुन ओन चारिहुँ सींगन में स एक छोटा सींग अउर निकरि आवा। उ छोटा सींग बड़इ लाग अउर बड़त-बड़त बहोत बड़ा होइ गवा। इ सींग दक्खिन-पूरब कइँती बढ़ा। इ सींग सुन्नर धरती कइँती बढ़ा।

10उ छोटा सींग बड़िके बहोत बड़ा होइ गवा। उ बड़त बड़त अकास छुड़ लिहस। उ नान्ह सींग, हिआँ तलक कि कछू तारन क भी धरती पइ पटक दिहस अउर ओन सबहिं तारन क गोड़न तले मसल दिहस। 11उ नान्ह सींग बहोत मजबूत होइ गवा अउर फुन उ तारन क सासक (परमेस्सर) क विरुद्ध हो गवा। उ नान्ह सींग उ सासक क अर्पित कीन्ह जाइवाली बलियन क रोक दिहस। उ ठउर जहाँ लोग उ सासक क उपासना किया करत रहेन, उ ओका उजाड़ दिहस 12अउर ओनकर फउज क भी हराइ दिहस अउर एक विद्रोही कार्य क रूप में उ नान्ह सींग दैनिक बलियन क ऊपर अपने आप क स्थापित कइ दिहस। उ सच क धरती पइ पटक दिहस। उ नान्ह सींग जउन कछू किहस उ सब कछू में सफल होइ गवा।

13फुन मइँ कउनो पवितर जन क बोलत सुनेउँ अउर ओकरे पाछे मइँ सुनेउँ कि कउनो दूसर पवितर मनई उ पहिले पवितर मनई क जवाब देत अहइ। पहिला पवितर मनई कहेस, “इ दर्सन दर्सावत ह कि दैनिक बलियन क का होइ? इ उ भयानक पाप क बारे में अहइ जउन बिनास डावत ह। इ दर्सावत ह कि जब लोग उ सासक क पूजा स्थल क तोड़ डइहीं तब का होइ? इ दर्सन दर्सावत ह कि जब लोग उ समूचे ठउर क गोड़न तले रौदिहीं तब का होइ? इ दर्सन दर्सावत ह कि जब लोग तास क ऊपर गोड़ धरहीं तब का होइ? किन्तु इ सबइ बातन कब तलक होत रइहीं?”

14दूसर पवित्तर मनई कहेस, “दुइ हजार तीन सौ दिन तलक अइसा ही होत रही अउर ओकरे पाछे पवित्तर ठउर क फुन स स्थापित कइ दीन्ह जाइ।”

### दर्शन क व्याख्या

15मई, दानियेल इ दर्सन लखे रहेउँ, अउर इ प्रयत्न किहेउँ कि ओकर अरथ समुझ लेउँ। अबहिँ मई इ दर्सन क विसय में सोच ही रहे रहेउँ कि मनई क जइसा देखाइवाला कउनो अचानक आइके मोरे समन्वा खड़ा होइ गवा। 16एकरे पाछे मई कउनो मनई क वाणी सुनेउँ। इ वाणी ऊलै नदी क ऊपर स आवति रही। उ अवाज कहेस, “जिब्राएल, इ मनई क एकर दर्सन क अरथ समुझाइ द्या।”

17तउ जिब्राएल जउन कउनो मनई क समान देखौत रहा, जहाँ मई खड़ा रहेउँ, हुआँ आइ गवा। उ जब मोरे लगे आवा तउ मई बहोत डेराइ गएउँ। मई धरती पइ भहराइ पड़ेउँ। किन्तु जिब्राएल मोहसे कहेस, “अरे मनई, समुझ ल्या कि इ दर्सन अंत समइ बरे अहइ।”

18अबहिँ जिब्राएल बोलत ही रहत रहा कि मोका नीदं आइ गइ। नीदं बहोतइ गहरी रही। मोर मुख धरती कइँती रहा। फुन जिब्राएल मोका छुएस अउर मोहसे मोर गोड़न पइ खड़ा कइ दिहस। 19जिब्राएल कहेस, “लखा, मई तोहका अब, उ दर्सन क समझावत हउँ। मई तोहका बताउब कि परमेस्सर क क्रोध क समइ क बाद में का कछू घटी।

20“तू दुइ सींगनवाला भेड़ा लखे रह्या। उ सबइ दुइ सींग अहई मादी अउ फारस क दुइ देस। 21इ बोकरा युनान क राजा अहइ। ओकर दुइ आखिन क बीच क बड़ा सींग उ पहिला राजा अहइ। 22उ सींग टूट गवा अउ ओकरे ठउर क चार सींग निकरि आएन। उ सबइ चार सींग चार राज अहई। उ सबइ चार राज, उ पहिले राजा क राष्ट्र स परगट होइहीं किन्तु उ सबइ चारिहुँ राज उ पहिले राजा क स मजबूत नाहीं होइहीं।

23“जब ओन राजन क अंत ओन लोगन क जरिये बुरा करम करइ क पाछे निकट होइ, तब हुवाँ एक हटी राजा जउन कि पहिलियन क समुझ सकत ह उठ खड़ा होइ। 24इ राजा बहोत सक्तिसाली होइ किन्तु ओकर सक्ति ओकर आपन नाहीं होइ। इ राजा भयानक तबाहीं मचाइ देइ। उ जउन कछू करी ओहमाँ ओका सफलता मिली। उ सक्तिसाली लोगन-हिआँ तलक कि परमेस्सर क लोग क भी नस्त कइ देइ।

25“इ राजा बहोत चुस्त अउ मक्कार होइ। उ आपन कपट अउ झूठन क बल पइ सफलता पाइ। उ अपने आप क सब स बड़कवा समुझी। लोगन क उ बिना कउनो चितउनी क नस्त करवाइ देइ। हिआँ तलक कि उ राजा लोगन क राजा (परमेस्सर) स भी जुद्ध क जतन करी किन्तु उ जफाकस राजा क सक्ति क खतम कइ दीन्ह जाइ अउर ओकर अंत कउनो मनई क हाथन नाहीं होइ।

26“अउर साम अउ सुबह क दर्सन फुरइ अहई। किन्तु इ दर्सन पइ तू मुहर लगाइके रख द्या। काहेकि उ सबइ बातन अबहिँ बहोत सारे समइ तलक घटइवाली नाहीं अहइ।”

27उ दिब्ब दर्सन क बाद में मई दानियेल, बहोत कमजोर होइ गवा अउर बहोत दिनन तलक बीमार पड़ा रहा। फुन बेरामी स उठिके मई लउटिके राजा क कामकाज करब सुरू कइ दिहस किन्तु उ दिब्ब दर्सन क कारण में बहोत बियाकुल रहा करत रहा। मई उ दर्सन क अरथ समुझ ही नाहीं पाए रहेउँ।

### दानियेल क बिनती

9 मादी दारा क हुकूमत क पहिले बरिस में, जउन छयर्स राजा क पूत रहा जउन कसदियन क राजा रहा। 2दारा क राजा क पहिले बरिस में मई, दानियेल कछू किताबन पड़त रहेउँ। ओन किताबन में मई लखेउँ कि यहोवा यिर्मयाह क इ बताएस ह कि यरूसलेम क पुनः निर्माण कितने बरिस बाद होइ। यहोवा कहे रहा कि एहसे पहिले कि यरूसलेम फुन स बसइ, सत्तर बरिस बीत जइहीं।

3फुन मई आपन सुआमी परमेस्सर कइँती मुड़ेउँ अउर ओहसे पराथना करत भए मदद क याचना किहेउँ। मई भोजन करब तजि दिहेउँ अउर अइसे ओढ़ना पहिर लिहेउँ जेहसे इ लागइ कि मई दुःखी हउँ। मई अपने मूँइ पइ धूरि डाल दिहेउँ। 4मई आपन परमेस्सर यहोवा स पराथना करत भए ओका आपन सबहिँ पाप बताइ दिहेउँ। मई कहेउँ, “हे यहोवा, तू महान अउ भयजोग्ग परमेस्सर अहा। जउन लोग तोहसे पिरिम करत हीं, जउन तोहरे आदेसन क पालन करत हीं, तू ओनके संग आपन पिरिम अउ दयालुता क करार क निभावत ह।

5“मुला हे यहोवा, हम पचे पापी अही। हम पचे बुरा किहे अही। हम पचे कुकरम किहे अही। हम पचे तोहार विरोध किहा ह। तोहार निस्पच्छ निआत अउर तोहरे आदेसन स हम पचे दूर भटक गए अही। हम पचे नबियन क बात नाहीं सुनित। नबी तउ तोहार सेवक अहई। उ पचे तोहरे बारे में हमारे राजा लोगन, सासकन अउ धरती क सारे लोगन क बारे में भी बात किहेस।

7“हे यहोवा, तू नीक अहा, अउर तोहमाँ नेकी अहइ। जबकि आजु हम आपन बुरे करम स लज्जित अही। यरूसलेम अउ यहूदा क लोग लज्जित अहई-इस्त्राएल क सबहिँ लोग लज्जित अहई। उ सबइ लोग जउन निआरे अहई अउर उ सबइ लोग जउन बहोत दूर अहई। हे यहोवा, तू ओन लोगन क बहोत स देसन में फइलाइ दिहा। ओन सबहिँ देसन में बसे इस्त्राएल क लोगन क लज्जा आवइ चाही। हे यहोवा, ओन सबहिँ बुरी बातन क बरे, जउन उ पचे तोहर विरुद्ध किहेन ह, ओनका लज्जित होइ चाही।

8“हे यहोवा, हम सब क लज्जित होइ चाही। हमारे सबहिँ राजा लोगन अउ मुखिया लोगन क लज्जित होइ चाही। अइसा काहे? अइसा एह बरे कि हे यहोवा, हम तोहरे विरुद्ध पाप किहे अही।

9“किन्तु हे यहोवा, तू दयालु अहा। लोग, जउन बुरे करम करतेन तउ तू ओनका, छमा कइ देत ह। हम असल में तोहसे मुँह फेर लिहा ह। 10हम आपन यहोवा परमेस्सर क आग्या क पालन नाहीं कीन्ह। यहोवा आपन सेवकन, आपन नबियन क जरिये हमका व्यवस्था क विधान प्रदान

किहस। किन्तु हम पचे ओकर व्यवस्थन क नाहीं माना। 11इस्राएल क कउनो भी मनई तोहरी सिच्छन पड़ नाहीं चला। उ पचे सबहिं राह स भटक ग रहेन। उ पचे तोहरे आदेसन क पालन नाहीं किहन। मूसा, जउन परमेस्सर क सेवक रहा क ब्यवस्था अउर विधान में सरापन अउ गम्भीर चिताउनी क उल्लेख भवा ह। उ सबइ सराप अउ चिताउनी ब्यवस्था अउर विधान पड़ नाहीं चलइ क दण्ड क बखान करत हीं अउर उ सबइ सबहिं बातन हमरे संग घट चुकी अहई काहेकि हम यहोवा क विरोध में पाप किहा ह।

12“परमेस्सर बताए रहा कि हमरे संग अउ हमरे मुखिया लोगन क संग उ सबइ बातन घटिहीं अउर उ ओनका घटाइ दिहस। उ हमरे संग भयानक बातन घटाइ दिहस। यरूसलेम क जेतना कस्ट उठावइ क पड़ा, कउनो दूसर नगर नाहीं उठाएस। 13उ सबइ सबहिं भयानक बातन जउन मूसा क व्यवस्था क विधान में लिखा अहई हमरे संग भी घटिन। किन्तु हम अबहुँ भी यहोवा हमरे परमेस्सर स मदद माँगइ नाहीं परत ह। हम अबहुँ भी आपन पाप करब नाहीं तजा ह। अबहुँ तलक भी हम तोहस सच्चाई क अनुसार रहना सीखइ में रूची नाहीं रखत हउँ। 14यहोवा उ सबइ खौफनाक बातन तइयार रख छोड़े रहिन अउर उ हमरे संग ओन बातन क घटाइ दिहस। हमार परमेस्सर यहोवा अइसा एह बरे किहे रहा कि उ तउ जउन कछू भी करत ह, निआव ही करत ह। किन्तु हम अबहुँ भी ओकर नाहीं सुनित।

15“हे सुआमी हमार परमेस्सर, तू आपन महान सक्ति क प्रयोग किहा अउर हमका मिस्र स बाहेर निकारि लिआया। हम तउ तोहार आपन लोग अही। आजु तलक उ घटना क कारण तू जाना जात अहा। हे सुआमी, हम पाप किहा ह। हम खौफनाक पाप किहा ह। 16हे सुआमी, यरूसलेम पड़ किरोध करब तजि द्या। यरूसलेम तोहार पवितर पर्वतन पड़ टिका अहइ। तू जउन करत अहा, ठीक ही करत अहा। एह बरे यरूसलेम पड़ किरोधित होब तजि द्या। हमरे आसपास क लोग हमार अपमान करत हीं अउर हमरे लोगन क हँसी उड़ावत हीं। हम लोगन क पाप अउर हम लोगन क पुरखन क पापन क कारण इ सबइ कछू भएस ह।

17“अब, हे यहोवा, तू मोर पराथना सुनि ल्या। मई तोहार दास हउँ। मदद बरे मोर बिनती सुन ल्या। आपन पवितर ठउर बरे तू अच्छी बातन करा। उ भवन नस्ट कइ दीन्ह गवा रहा। किन्तु हे यहोवा, तू खुद आपन भले बरे इ भली बातन क करा। 18हे मोर परमेस्सर, हम लोगन क सुना। जरा आपन आँखिन खोला अउर हमरे संग जउन खौफनाक बातन घटी अहई, ओनका लखा। उ नगर जउन तोहरे नाउँ स गोहरावा जात रहा, लखा ओकरे संग का होइ गवा ह। मई इ नाहीं कहत हउँ कि हम अच्छे लोग अही। मई पराथना करत हउँ काहेकि मई जानत हउँ कि तू बहोत दयालु अहा।

19“हे सुआमी मोर सुना, हे यहोवा, हमका छिमा करा। हे सुआमी, हम पड़ धियान द्या, अउर फुन कछू करा। अब अउर प्रतीच्छा जिन करा। इहइ समइ कछू करा। ओका तू खुद अपने भले बरे करा। हे सुआमी, अब तउ आपन नगर

अउर आपन ओन लोगन क बरे, जउन तोहरे नाउँ स गोहरावा जात हीं कछू करा।”

### सतर हफतन क बारे में दर्सन

20मई परमेस्सर स पराथना करत भए इ सबइ बातन कहत रहेउँ। मई इस्राएल क लोगन क अउर आपन पापन क बारे में बतावत रहेउँ। मई यहोवा हमार परमेस्सर क पवितर पर्वत पड़ पराथना करत रहेउँ। 21मई अबहिं पराथना करत ही रहेउँ कि जिब्राएल मोरे लगे आवा। जिब्राएल उहइ सरगदूत रहा जेका मई दर्सन में लखे रहेउँ। जिब्राएल हाली स मोरे लगे आवा। उ साँझ क बलि क समइ आवा रहा। 22मई जउन बातन क समुझइ चाहत रहा, ओन बातन क समुझइ में जिब्राएल मोर मदद किहेस। जिब्राएल कहेस, “हे दानियेल, मई तोहका बुद्धि प्रदान करइ अउ समुझइ में तोर सहायता क आवा हउँ। 23जब तू पहिले पराथना आरंभ किहे रही, आदेस देइ दीन्ह गवा रहा अउ लखा मई तोहका बतावइ आइ गवा हउँ। परमेस्सर तोहका बहोत पिरम करत ह। इ आदेस तहोरी समुझ में आइ जाइ अउर तू उ दर्सन क अरथ जान लेब्या।

24“हे दानियेल, परमेस्सर तोहार प्रजा अउ तोहार पवितर नगरी बरे सतर हफतन क समइ निहचित किहेस ह। सतर हफतन क समइ एह बरे निहचित कीन्ह गवा ह ताकि बुरे करम खत्म कइ दीन्ह जाइँ, अउर पाप करब बन्द कइ दीन्ह जाइ, पापन बरे प्रायश्चित कीन्ह जाइ, हमेसा बरे निआव स्थापित कीन्ह जाइ। सब लोगन क सुद्ध कीन्ह जाइ, सदा-सदा बनी रहइवाली नेकी क लिआवा जाइ, दर्सन अउ नबियन पड़ मोहर लगाइ दीन्ह जाइ, अउर पवितर ठउरे क समर्पित कीन्ह जाइ।

25“दानियेल, तू एन बातन क समुझ ल्या। एन बातन क गियान रखा। जब वापस आवइ अउ यरूसलेम क पुनःनिर्माण करइ क आदेस दीन्ह गवा रहा क समइ स लइके अभिसिक्त कीन्ह गवा क आवइ क समइ तलक सात हफता लगिहीं। सर्वजिनिक बाजार क निर्माण अउ नगर क रच्छा करइ बरे नगर क चारिहुँ कईती खाई खोदइ क संग नगर क बासठ हफतन में निर्माण कीन्ह जाइहीं। बासठ हफता तलक यरूसलेम क बसावा जाइ। 26बासठ हफता पाछे उ अभिसिक्त मनई क हतिया कइ दीन्ह जाइ। उ अउर नाहीं रहब्या। फुन होइवाले नेता क लोग नगर क अउर उ पवितर ठउरे क तहस-नहस कइ देइहीं। उ अंत अइसे आइ जइसे बाइ आवत ह। अंत तलक जुद्ध होत रही। उ ठउरे क पूरी तरह तहस-नहस कइ देइ क परमेस्सर आदेस दइ चुका ह।

27“एकरे पाछे उ भावी सासक बहोत स लोगन क संग एक करार करी। उ करार एक हफता तलक चली। भेंटन अउ बलियन आधे हफता क पाछे रुकी रहिहीं अउर फुन एक विनासकर्ता आई। उ बहोत सारा घृणित काम करिहीं। किन्तु ओनकर पूरा करइ स पहिले, जउन आदेस दीन्ह गवा ह उ विध्वंस करइवालन क खिलाफ कीन्ह जाइहीं।”



हिद्देकेल नदी क किनारे दानियेल क दर्सन

**10** कुसू फारस क राजा रहा। कुसू क सासनकाल क तीसरे बरिस दानियेल क एन बातन क दैवी संदेश मिला। (दानियेल क ही दूसर नाउँ बेलतसस्सर रहा) इ सबइ बातन फुरइ रहेन किन्तु समुझइ बरे बहोत कठिन रहेन। किन्तु दानियेल ओन क समुझ गवा। उ सबइ बातन एक दर्सन में ओका समुझाई गई रहिन।

2दानियेल क कहब अहइ, “उ समइ, मई दानियेल, तीन हफतन तलक बहोत दुःखी रहा। 3ओन तीन हफतन क दौरान, मई कउनो भी उत्तम खाना नहीं खाएउँ। मई दाखरस नहीं पिएउँ। कउनो भी तरह क तेल मई आपन मुँड़े पड़ नहीं डाएउँ। तीन हफता तलक मई अइसा कछू भी नहीं किहेउँ।

4“बरिस क पहिले महीने क चउबीसवें दिन मई हिद्देकेल महानदी क किनारे खड़ा रहेउँ। 5हुवाँ खड़े-खड़े जब मई ऊपर कइँती लखेउँ तउ हुँवा मई एक मनई क आपन समन्वा खड़ा पाएउँ। उ सन क कपड़ा भवा रहा। ओकर करिहाउँ में निखालिस सोना क बनी भइ कमर बंर रही। 6ओकर बदन चमचमात पाथर क जइसे रही। ओकर मुँह बिजुरी क समान उज्जर रहा। ओकर बाँहन अउर ओकर गोड़ चमकदार पीतर स झिलमिलात रहेन। ओकर अवाज एतनी ऊँच रही जइसे लोगन क भीड़ क अवाज होत ह।

7“इ दर्सन बस मोका, दानियेल क भवा। जउन लोग मोरे संग रहेन, उ सबइ जदपि उ दर्सन क नहीं लखि पाएन किन्तु उ सबइ फुन डर गए रहेन। उ पचे एतना डर गएन कि पराइके कहुँ जाइ छिपेन। 8तउ मई अकेल्ला छूटि गएउँ। मई उ दर्सन क लखत रहेउँ अउर उ दृश्य मोका भयभीत कइ डाए रहा। मोर सक्ति जात रही। मोर मुँह अइसे पिअर पड़ गवा जइसे माना उ कउनो मरे भए मनई क मुँह होइ। मई बेवस रहा। 9फुन दर्सन क उ मनई क मई बात करत सुनेउँ। मई ओकर अवाज क सुनत ही रहेउँ कि मोका गहिर नींद घेरि लिहस। मई धरती पइ औँधें मुँह पड़ा रहेउँ।

10“फिन एक हाथ मोका छुइ लिहस। अइसा होइ पड़ मई आपन हाथन अउ आपन घुटनन क बल खड़ा होइ गवा। मई डर क मोरे थर थर काँपत रहेउँ। 11दर्सन क उ मनई मोहसे कहेस, ‘दानियेल, तू परमेस्सर क बहोत पियारा अहा। जउन सब्द मई तोहसे कहउँ ओह पड़ तू सावधानी से पियार करा। खड़ा हवा। मोका तोहरे लगे पठवा गवा ह। जब उ अइसा कहेस तउ मई खड़ा होइ गवा। मई अबहुँ भी थर-थर काँपत रहेउँ काहेकि मई डेरान भवा रहा। 12एकरे बाद दर्सन क उ मनई फुन बोलन सुरू किहेस। उ कहेस, ‘दानियेल, जिन डेराअ। पहिले ही दिन स तू इ निहचइ कइ लिहे रह्या कि तू परमेस्सर क समन्वा विवेक पूर्ण अउर विनम्र रहब्या। परमेस्सर तोहार पराथनन क सुनत रहत ह। तू पराथना करत रहा ह, मई एह बरे तोहरे लगे आवा हउँ।

13“किन्तु फारस क जुवराज (सरगदूत) इक्कीस दिन तलक मोर संग लड़त रहा अउर मोका तंग करत रहा। एकरे बाद मिकाएल जउन एक बहोतइ महत्व पूर्ण जुवराज

रहा। मोर मदद बरे मोरे लगे आवा काहेकि मई हुवाँ फारस क राजा क संग अरइ भवा रहा।’

14“हे दानियेल, अब मई तोहरे लगे तोहका उ बतावइ क आवा हउँ जउन भविस्स में तोहरे लोगन क संग घटइवाला अहइ। कहा सपना आवइवाले भविस्स क बारे में अहइ।’

15“अबहिँ उ मनई मोहसे बात ही करत रहा कि मई धरती क तरफ खाले मुँह निहराइ लिहेउँ। मई बोल ही नहीं पावत रहा। 16फुन कउनो जउन मनई क जइसा देखाइ देत रहा, मोरे होठन क छुएस। मई आपन मुँह खोलेउँ, अउ बोलब सुरू किहेउँ। मोरे समन्वा जउन खड़ा रहा, ओहसे मई कहेउँ, महोदय, मई दर्सन में जउन लखे रहेउँ, मई ओहसे बियाकुल अउ भयभीत अहउँ। मई अपने क बेसहारा समुझत हउँ। 17मई तोहार दास हउँ। मई तोहसे कइसे बात कर सकत हउँ? मोर सक्ति जात रहत ह। मोहसे तउ साँस भी नहीं लीन्ह जात ह।’

18“मनई जइसे देखात भए उ मोका फुन छुएस। ओकरे छुअत स मई मज़बूत बनि गवा। 19फुन उ बोला, ‘दानियेल, डेराअ जिन। परमेस्सर तोहसे बहोत पियरेम करत ह। तोहका साक्ति प्राप्त होइ। अब तू सुदृढ होइ जा। सुदृढ होइ जा।’

“उ मोहसे जब बात किहेस तउ मई अउर जियादा सक्तिसाली होइ गवा। फुन मई ओहसे कहेउँ, ‘सुआमी! आप तउ मोका सक्ति दइ दिहा ह। अब आप बोल सकत हीं।’

20“तउ उ फुन कहेस, ‘दानियेल’ का तू जानत अहा, मई तोहरे पास काहे आवा हउँ? फारस क जुवराज स जुद्ध करइ क बरे मोका फुन वापस जाब अहइ। मोरे चले जाइ क बाद युनान क जुवराज हिआँ आइ। 21किन्तु दानियेल आपन जाइ स पहिले तोहका सब स पहिले मोका इ बताउब अहइ कि सच क पुस्तक में का लिखा अहइ। ओन बुरे राजकुमारन क विरोध में मीकाएल सरगदूत क अलावा मोरे संग कउनो नहीं खड़ा होत। मीकाएल उ राजकुमार अहइ जउन तोहरे लोगने पइ हुकूमत करत ह।’

**11** मादी राजा दारा क सासनकाल के पहिले बरिस मीकाएल क फारस क जुवराज क विरुद्ध जुद्ध में सहारा देइ अउर ओका ससक्त बनावइ क मई उठ खड़ा भवा।

2“अब लखा, दानियेल मई, तोहसे सच्ची बात बतावत हउँ। फारस में तीन राजा लोगन क सासन अउर होइ। इ एकरे पाछे एक चउथा राज्ज आइ। इ चउथा राज्ज अपने पहिले क फारस क दूसर राजा लोगन स कहुँ जियादा धनवान होइ। उ चउथा राजा सक्ति पावइ बरे आपन धन क प्रयोग करी। उ हर कउनो क युनान क विरोध में कइ देइ। 3एकर पाछे एक बहोत जियादा सक्तिसाली राजा आइ, उ बड़की सक्ति क संग सासन करी। उ जउन चाही उहइ करी। 4राजा क अवाई क पाछे ओकर राज्ज क टूका-टूका होइ जइहीं। ओकर राज्ज चारिहुँ कइँती तितर बितर होइ जाइ। ओकर राज्ज ओकर पूत पोतन क बीच नहीं बँटी। जउन सक्ति ओहमा रही, उहइ सक्ति ओकरे राज्ज में नहीं

होइ। अइसा काहे होइ? अइसा एह बरे होइ कि ओकर राज्ज उखाड़ दीन्ह जाइ अउर ओका दूसर लोगन क दइ दीन्ह जाइ।

5“दक्खिन क राजा सक्तिसाली होइ जाइ। किन्तु एकरे पाछे ओकर एक सेनापति ओह स भी जियादा सक्तिसाली होइ जाइ। उ सेना नायक हुकूमत करइ लागी अउर बहोत बलसाली जोइ जाइ।

6“फुन कछू बरिसन बाद एक समझोता होइ अउर दक्खिनी राजा क बिटिया उत्तरी राजा स बियाही जाइ। उ सान्ति कायम करइ बरे अइसा करी। किन्तु उ अउर दक्खिनी राजा पर्याप्त सक्तिसाली नाहीं होइहीं। फुन लोग ओकरे अउर उ मनई क जउन ओका उ देस में लाए रहा, खिलाफ होइ जइहीं अउर उ सबइ लोग ओकरे बच्चे क अउर उ मेहरारू क हिमाइती मनई क भी खिलाफ होइ जइहीं। 7कन्तु उ मेहरारू क परिवार क एक मनई दक्खिनी राजा क ठउर क लेइ बरे आई। उ उत्तर क राजा क फउज पइ हमला करी। उ राजा क सुदृढ़ किले में प्रवेश करी। उ जुद्ध करी अउर विजयी होइ। 8उ ओनके देवतन क मूर्तियन क लइ लेइ। उ ओनक धातु क बने मूर्तियन अउर ओनकर चाँदी-सोने क बहुमूल्य वस्तुअन क हुवाँ स मिस्र लइ जाइ। फुन कछू बरिसन तलक उ उत्तर क राजा क तंग नाहीं करी। 9उत्तर क राजा दक्खिन क राज्ज पइ हमला करी। किन्तु पराजित होइ अउर फुन अपने देस क लउटि जाइ।

10“उत्तर क राजा क पूतन जुद्ध क तइयारी करिहीं। उ पचे एक बिसाल फउज जुटइहीं। उ सेना एक सक्तिसाली बाइ क तरह बड़ी तेजी स धरती पइ अगवा बड़त चली जाइ। उ सेना दक्खिन क राजा क सुदृढ़ दुर्ग तलक सारे रास्ते जुद्ध करत जाइ। 11फिन दक्खिन क राजा क्रोध स तिलमिलाइ उठी। उत्तर क राजा स जुद्ध करइ बरे उ बाहेर निकरि आइ। उत्तर क राजा जदपि एक बहोत बड़ी सेना जुटाइ किन्तु जुद्ध में हार जाइ। 12“उत्तर क सेना पराजित होइ जाइ, अउर ओन फउजियन क कहुँ लइ जावा जाइ। दक्खिनी राजा क बहोत अभिमान होइ जाइ अउर उ उत्तरी सेना क हजारन-हजार फउजियन क मउत क घाट उतारि देइ। किन्तु उ जुद्ध करइ बरे लगातार नाहीं रहिहीं। 13उत्तर क राजा एक अउर सेना जुटाइ। इ सेना पहिली सेना स जियादा बड़ी होइ। कई बरिसन पाछे उ हमला करी। उ सेना बहोत बिसाल होइ अउर ओकरे लगे बहोत स हथियार होइहीं।

14“ओन दिनन बहोत स लोग दक्खिन क राजा क विरोध में होइ जाइहीं। कछू तोहार आपन लोग, जेनका जुद्ध प्रिय अहइ, दक्खिन क राजा क खिलाफ बगावत करिहीं। उ पचे जितिहीं तउ नाहीं किन्तु अइसा करत भए उ दर्सन क फुरइ सिध्द करिहीं। 15फुन ओकरे बाद उत्तर क राजा आई अउर उ नगर क परकोटे पइ ढलवाँ चउतरा बनाइके उ सुदृढ़ नगर पइ कब्जा करी। दक्खिन क राजा क सेना जुद्ध क उत्तर नाहीं दइ पाई। हिआँ तलक कि दक्खिनी सेना क सर्वोत्तम सैनिक भी एतने सक्तिसाली नाहीं होइहीं कि उ पचे उत्तर क सेना क रोक पावईं।

16“उत्तर क राजा जइसा चाही, वइसा करी। ओका कउनो भी रोक नाहीं पाई। उ इ सुन्नर धरती पइ नियन्त्रन कइके सक्ति पाइ लेइ। ओका इ प्रदेस नस्ट करइ क सक्ति पाइ लेइ। 17फुन उत्तर क राजा दक्खिन क राजा स जुद्ध करइ बरे आपन सारी सक्ति का उपयोग करइ क निहचइ करी। उ दक्खिन क राजा संग एक सन्धि करी। उत्तर क राजा दक्खिन राजा स आपन एक बिटिया क बियाह कइ देइ। उत्तर क राजा अइसा एह बरे करी कि उ दक्खिन क राजा क हराइ सकइ। किन्तु ओकर उ सबइ योजना फली भूत नाहीं होइहीं। एन सबइ योजना स ओका कउनो मदद नाहीं मिली।

18“एकरे आगे उत्तर क राजा भूमध्य-सागर क तट स लगत भए देसन पइ आपन धियान लगाई। उ ओन देसा में स बहोत स देसन क जीत लेइ। किन्तु फुन एक सेनापति उत्तर क राजा क उ अहंकार अउर उ बगावत क अंत कइ देइ। उ सेनापति उ उत्तर क राजा क लज्जित करी।

19“अइसा घटइ क पाछे उत्तर क उ राजा खुद आपन देस क सुदृढ़ किलन कइती लउटि जाइ। किन्तु उ दुर्बल होइ चुका होइ अउर ओकर पतन होइ जाइ। फुन ओकर पता भी नाहीं चली। 20उत्तर क उ राजा क पाछे एक नवा सासक आइ। उ सासक कउनो कर वसूलइ वालन क पठइ। उ सासक अइसा एह बरे करी कि उ सम्पन्नता क संग जिनगी बितावइ बरे पर्याप्त धन जुटाइ सकइ। किन्तु थोड़े ही बरिसा में उ सासक क अंत होइ जाइ। किन्तु उ जुद्ध में नाहीं मारा जाइ।

21“उ सासक क पाछे एक बहोत क्रूर एवं घृणा जोग्ग मनई आइ। उ मनई क राज परिवार क बंसज होइ क गौरव प्राप्त नाहीं होइ। उ चालाकी स राजा बनी। जब लोग अपने क सुरच्छित समुझे हुए होइहीं, उ तबहिं राज्ज पइ आक्रमण करी अउर ओह पइ कब्जा कइ लेइ। 22उ बिसाल सक्तिसाली फउजन क हराई देइ। उ समुझौते क मुखिया क संग सन्धि करइ पइ भी ओका पराजित करइ। 23बहोत स राष्ट्र उ क्रूर एवं घिना जोग्ग राजा क संग सन्धि करिहीं किन्तु उ ओनसे मिथ्या स भरी चालाकी बरती। उ मज़बूत होइ जाई किन्तु बहोत थोड़े स लोग ही ओकर पच्छ में होइहीं।

24“जब उ प्रदेस क सर्वाधिक धनी छेत्र आपन क सुरच्छित अनुभव करत रहे होइहीं; उ क्रूर एवं घिना स भरे सासक ओन पइ हमला कइ देइ। उ ठीक समइ पइ हमला करी अउर हुवाँ सफलता प्राप्त करी जहाँ ओकरे पुरखन क सफलता नाहीं मिली रही। उ जउन देसन क पराजित करी ओनकर सम्पति छोरिके आपन पिछलगुअन क देइ। उ सुदृढ़ नगरन क पराजित करइ क सबइ योजना रची। उ कामयाबी तउ पाई किन्तु बहोत थोड़े स समइ बरे।

25“उ क्रूर एवं घिना जोग्ग राजा क लगे एक बिसाल फउज होइ। उ उ फउज क उपयोग आपन सक्ति अउर आपन साहस क प्रदर्सन बरे करी अउर एहसे उ दक्खिन क राजा पइ हमला करी। तउ दक्खिन क राजा भी एक बहोत बड़की अउर सक्तिसाली फउज जुटाइ अउर जुद्ध बरे कूच करी। 26किन्तु उ सबइ लोग जउन दक्खिन क राजा क

मीत समुझा जात रहेन छुपे-छुपे सबइ योजना रचिहीं अउर ओका पराजित करइ क जतन करिहीं। ओकर फउज पराजित कइ दीन्ह जाइ। जुद्ध में ओकर बहोत स फउजी मारा जइहीं। 27ओन दुइनउँ राजा लोगन क मन इहइ बात में लगी कि एक दूसर क नोस्कान पहोंचावा जाइ। उ पचे एक ही मेज पइ बइठिके एक दूसर स झूठ बोलिहीं किन्तु ओहसे ओन दुइनउँ में स कउनो क भला नाहीं होइ, काहेकि परमेस्सर ओनकर अंत आवइ क समइ निर्धारित कइ दिहेस ह।

28“बहोत स धन दौलत क संग, उ उत्तर क राजा अपने देस लउटि जाइ। फिन उ पवितर वाचा क बरे उ बुरे करम करइ क निर्णय लेइ। उ आपन जोगगता क अनुसार काम करी अउ फुन आपन देस लउटि जाइ।

29“फुन उत्तर क राजा ठीक समइ पइ दक्खिन क राजा पर हमला कइ देइ। किन्तु इ बार उ पहिले क तरह कामयाब नाहीं होइ। 30पच्छिम क जहाज अइहीं अउर उत्तर क राजा क विरुद्ध जुद्ध करिहीं। उ ओन जहाजन क आवत लखिने डर जाइ। फुन वापस लउटिके पवितर वाचा पइ आपन किरोध उतारी। उ लउटिके, जउन लोग पवितर वाचा पइ चलब छोड़ दिहे रहा, ओनकर मदद करी। 31फुन उत्तर क राजा यरूसलेम क मन्दिर क असुद्ध करइ बरे आपन फउज पठइ। उ सबइ लोगन क दैनिक बलि समर्पित करइ स रोकिहीं। एकरे पाछे उ सबइ हुवाँ कछू अइसा भयानक घिनौनी वस्तु स्थापित करिहीं जउन फुरइ विनास करइवाला होइ। उ पचे अइसा खौफनाक काम करिहीं जउन विनास क जनम देत ह।

32“उ उत्तरी राजा लबार अउ चिकनी चपड़ी बातन स ओन यहूदियन क छली जउन पवितर वाचा क पालन करब तजि चुका अहई। उ पचे यहूदी अउर बुरे पाप करइ लगिहीं किन्तु उ सबइ यहूदी, जउन परमेस्सर क जानत हीं, अउर ओकर अनुसरण करत हीं, अउर जियादा सुदृढ़ होइ जइहीं। उ सबइ पलटिके जुद्ध करिहीं।

33“उ सबइ यहूदी जउन विवेकपूर्ण अहई जउन कछू घट रहा होइ, दूसर यहूदियन क ओका समुझइ में मदद देइहीं। किन्तु जउन विवेकपूर्ण होइहीं ओनका तउ मृत्यु दण्ड तलक झेलइ होइ। कछू समइ तलक ओनमाँ स कछू यहूदियन क तरवार क घाट उतारा जाइ अउर कछू आगी में झोकं दीन्ह जाइ। अथवा बन्दी गृहन में डाइ दीन्ह जाइ। ओनमाँ स कछू यहूदियन क घर बार अउर धन दौलत छोर लीन्ह जइहीं। 34जब उ पचे यहूदी दण्ड भोग रहे होइहीं तउ ओन विवेकपूर्ण यहूदियन साथ देइहीं, बहोत स केवल देखावा क होइहों। 35कछू विवेकपूर्ण यहूदी मार दीन्ह जइहीं। अइसा एह बरे होइ कि उ पचे अउर जियादा सुदृढ़ बनई, स्वच्छ बनई अउ अंत समइ क आवइ तलक निर्दोस रहई। फुन ठीक समइ पइ अंत होइ क समइ आइ जाइ।”

### आत्म प्रसंसक राजा

36“उत्तर क राजा जउन चाही, सो करी। उ आपन बारे में डींग हॉकी। उ आत्म प्रसंसा करी अउ सोची कि उ कउनो देवता स भी अच्छा अहइ। उ अइसी बातन करी

जउन कउनो कबहुँ सुनी तलक न होइहीं। उ देवतन क परमेस्सर क विरोध में अइसी बातन करी। उ उ समइ तलक कामयाब होत चला जाइ जब तलक उ पचे सबहिं बुरी बातन घट नाहीं जातिन। किन्तु परमेस्सर जउन योजना रची ह, उ तउ पूरी होइ ही।

37“उत्तर क उ राजा ओन देवतन क उपेक्षा करी जेनका ओकर पुरखन पूजा करत रहेन। ओन देवतन क मूर्तियन क उ परवाह नाहीं करी जेनकर पूजा मेहररून करत हीं। उ कउनो भी देवता क परवाह नाहीं करी बल्कि उ खुद आपन तारीफ करत रही अउर अपने आप क कउनो भी देवता स बड़का मानी। 38अपने पुरखन क देवता क अपेक्षा किले क देवता क पूजा करी उ सोना, चाँदी, बहुमूल्य हीरे जवाहरात अउर दूसर उपहारन स एक अइसे देवता क पूजा करी जेका ओकर पुरखन जानत तलक नाहीं रहेन।

39“इ विदिसी देवता क मदद स उ उत्तर क राजा सुदृढ़ गढ़ियन पइ हमला करी। उ ओन लोगन क सम्मान देइ जेनका उ बहोतइ पसन्द करी। उ बहोत स लोगन क ओनके अधीन कइ देइ। अउर उ ओनका भुइँया बाँट देइहीं जउन ओका एकर बरे पैसा भुगतान करिहीं बरे ओनसे भुगतान लिया करी।

40“अंत आवइ क समइ उत्तर क राजा, उ दक्खिन क राजा क संग जुद्ध करी। उत्तर क राजा ओह पइ हमला करी। उ रथन, घुड़सवारन अउर बहोत स बिसाल जलयानन क लइके ओह पइ चड़ाई करी। उत्तर क राजा बाइ क नाई वेग स उ धरती पइ चढ़ आई। 41उत्तर क राजा ‘सुन्नर धरती’ पइ हमला करी। उत्तरी राजा क जरिये बहोत स देस पराजित होइहीं किन्तु एदोम, मोआब अउ अम्मोनियन क मुखिया लोगन क ओहसे बचा लीन्ह जाइहीं। 42उत्तर क राजा बहोत स देसन में आपन सक्ति देखाइ। मिस्त्र क भी ओकर सक्ति क पता चल जाइ। 43उ मिस्त्र क सोने चाँदी क खजानन अउ ओकर समूची सम्पति क छोरि लेइ। लूबी अउर कूसी लोग भी ओकरे अधीन होइ जइहीं। 44किन्तु उत्तर क उ राजा क पूरब अउ उत्तर स एक समाचार मिली जेहसे उ भयभीत होइ उठी अउर ओका किरोध आइ। उ बहोत स देसन क तबाह कइ देइ क बरे उठी। 45उ आपन राजकीय तम्बू समुद्र अउ सुन्नर पवितर पर्वत क बीच लगवइ। किन्तु आखिरकार उ बुरा राजा मरि जाइ। जब ओकर अंत आइ तउ ओका सहारा देइवाला हुवाँ कउनो नाहीं होइ।”

**12** “दर्सनवाला मनई कहेस, ‘हे दानियेल, तउ उ समइ मीकाएल नाउँ क सरगदूत तोहार लोगन क रच्छा करइ बरे उठ खड़ा होइ। फुन एक बिपत्तिपूर्ण समइ आइ। उ समइ सबन त भयानक होइ, जेतना भयानक उ धरती पइ, जब स कउनो जाति अस्तित्व में आई बाटइ, कबहुँ नाहीं आइ होइ। किन्तु हे दानियेल, उ समइ तोहरे लोगन में स हर उ मनई जेकर नाउँ, पुस्तक में लिखा मिली, बच जाइ। 2धरती क उ सबइ अनगिनत लोग जउन मरि चुका अहई अउर जेनका दफनावा जाइ चुका अहइ,

उठ खड़ा होइहीं अउर ओनमाँ स कछू अनन्त जीवन जिअइ बरे उठि जइहीं। किन्तु कछू एह बरे जागिहीं कि ओनका कबहुँ नाहीं समाप्त होइवाली लज्जा अउर घिना प्राप्त होइ। 3अकासे क भव्यता क नाई बुद्धिमान पुरुस चमक उठिहीं। अइसे बुद्धिमान पुरुस जउन दूसरन क अच्छी जिन्नगी क राह देखाए रहेन, अनन्त काल बरे तारन क समान चमकइ लगिहीं।

4“किन्तु हे दानिय्येल! इ सन्देश क तू छिपाइके रख द्या। तोहका इ पुस्तक बन्द कइ देइ चाही। तोहका अंत समइ तलक इ रहस्य क छुपाइके रखब अहइ। सच्चा गियान पावइ बरे बहोत स लोग एहर-ओहर दउइ करिहीं अउर इ तरह सच्चे गियान क विकास होइ।’

5“फुन मई, दानिय्येल निगाह उठाएउँ अउर दुइ अलग-अलग मनइयन क लखेउँ। ओनमाँ स एक मनई नदी क हरेक किनारे खड़ा भवा रहा। 6उ मनई जउन सन क ओढ़ना पहिर रखे रहा, नदी में पानी क बहाव क विरुद्ध खड़ा रहा। ओन दुइनउँ में स कउनो एक ओहसे पूछेस, ‘एन अचरजे स पूर्ण बातन क खतम होइ में अबहुँ केतना समइ लागी?’

7“उ मनई जउन सन क ओढ़ना धारण किहे भवा रहा अउर जउन नदी क जल क बहाव क विरुद्ध खड़ा भवा रहा, उ आपन दाहिन अउ बायाँ-दुइनउँ हाथ अकासे कइँती उठाएस। मई उ मनई क अमर परमेस्सर क नाउँ क प्रयोग

कइके एक किरिया बोलत भए सुना। उ कहेस, इ साढ़े तीन बरिस तलक घटी। पवितर जन क सक्ति टूट जाइ अउर फुन इ सबइ बातन अंतिम रूप स खतम होइ जइहीं।’

8“मई इ उत्तर सुनेउँ तउ रहा किन्तु वास्तव में मई ओका समुझेउ नाहीं। तउ मई पूछेउँ, ‘हे महोदय, एन सबहिं बातन क फुरइ निकरइ क पाछे का होइ?’

9“उ उत्तर दिहस, ‘दानिय्येल, तू आपन जिन्नगी जिअइ जा। इ सँदेश गुप्त अहइ अउर जब तलक अंत समइ नाहीं आइ, इ गुप्त ही बना रही। 10बहोत स लोगन क सुद्ध कीन्ह जाइ। उ लोग खुद अपने आप क स्वच्छ करिहीं किन्तु दुस्त लोग, दुस्त ही बना रहिहीं उ सबइ दुस्मन लोग एका नाहीं समुझिहीं। किन्तु बुद्धिमान लोग एका समुझिहीं।

11“उ दिना स लइके बलि रोक दीन्ह जाब्या एक हजार दुइ सौ नब्बे दिन होइ जाब्या जब तलक खउफनाक चीज़ जउन तबाह करत अहइ स्थापित कीन्ह जाब्या। 12उ मनई जउन प्रतीच्छा करत भए एन एक हजार तीन सौ पैतीस दिनन क समइ क अंत तलक पहोंची, उ बहोत अधिक भाग्गसाली होइ।

13“हे दानिय्येल! जहाँ तलक तोहार बात अहइ, जा अउर अंत समइ तलक आपन जिन्नगी जिआ। तोहका तोहार बिस्त्राम प्राप्त होइ अउर अंत में तू आपन हींसा पावइ बरे मौत स फुन उठ खड़ा होब्या।”

# यहेजकेल

## प्रस्तावना

**1** 1-3मई बूजी क पूत याजक यहजेकेल हउँ। मई देस स निकारा गवा रहेउँ। मई उ समइ बाबुल मँ कबार नदी पइ रहेउँ जब मोरे बरे सरग खुला अउर मई परमेस्सर क दर्सन कियेउँ। इ तीसवे बरिस क चउथे महीने जुलाई क पाँचवा दिन रहा। राजा यहोयाकीम क देस स निकारे गए पँचाएँ बरिस अउर महीना क पँचाएँ दिन यहजेकेल क यहोवा क सँदेसा मिला। उ ठउरे पइ ओकरे ऊपर यहोवा क सकती आइ।

## यहोवा क रथ अउर ओकर सिंहासन

**4**मई (यहेजकेल) एक आँधी उत्तर स आवत लखेउँ। इ एक बिसाल बादर रहा अउर ओहमों स आगी चमकत रही। एकरे चारिहुँ कइँती प्रकास जगमगात रहा। इ आगी मँ चमकत तपत धातु क तरह देखात रहा। **5**बादरे क भीतर चार प्राणी रहेन। उ पचे मनइयन क तरह देखात रहेन। **6**किन्तु हर एक प्राणी क चार मुँह अउर चार पखना रहेन। **7**ओनकर गोड़ सोझ रहेन। ओनकर गोड़ बछवा क गोड़ जइसे देखात रहेन अउर उ पचे झलकत भए पीतर क तरह चमकत रहेन। **8**ओनकर पखना क खाले मनई क हाथ रहेन। हुआँ चार प्राणी रहेन अउर हर एक प्राणी क चार मुँह अउर चार पखना रहेन। **9**ओनकर पखना एक दूसर क छुअत रहेन। जब प्राणियन चलत रहेन तउ उ पचे मुड़त नाहीं रहेन। उ सबइ उ दिसा मँ चलत रहेन जेका लखत रहेन।

**10**हर एक प्राणी क चार मुँह रहेन। समन्वा कइँती ओनकर चेहरा मनई क रहा। दाई कइँती सेर क चेहरा रहा। बाई कइँती बर्धी क चेहरा रहा अउर पाछे कइँती उकाब क चेहरा रहा। **11**प्राणियन क पखना ओनके ऊपर फइले भए रहेन। उ सबइ दुइनुअँ पखनन स अपने लगे क प्राणी क दुइ पखनन क छुए भए रहेन अउ दुइ क आपन तन क ढाँपइ बरे उपयोग मँ लिहे रहेन। **12**उ सबइ प्राणी जब चलत रहेन तउ मुड़त नाहीं रहेन। उ सबइ उ दिसा मँ चलत रहेन जेका उ पचे लखत रहेन। उ पचे हुँवइ जात रहेन जहाँ आतिमा ओनका लइ जात रही। **13**हर एक प्राणी इ तरह देखात रहा। ओन प्राणियन क बीच क जगह मँ बरत भइ कोयला क आगी सा देखात रही। इ आगी नान्ह-नान्ह मसालन क तरह ओन प्राणियन क बीच चलत रही। आगी बइके प्रकास क संग चमकत रही अउर बिजुरी क तरह कौधत रही। **14**उ सबइ प्राणी बिजुरी क तरह तेजी स पाछे अउ अगवा कइँती दउड़त रहेन।

**15-16**जब मई प्राणियन क लखेउँ तउ चार चक्र लखेउँ। हर एक प्राणी बरे एक तु चक्र रहा। चक्र भुइयों क छुअत

रहेन अउर सबइ चक्र एक तरह क रहेन। चक्र अइसे देखात रहेन माना पिअर सुद्ध मणि क बना होइँ। उ सबइ अइसे देखात रहेन माना एक चक्र क भीतरे दूसर चक्र होइ। **17**उ सबइ चक्र कउनो भी दिसा मँ घूम सकत रहेन। किन्तु उ सबइ प्राणी जब चलत रहेन तउ मुड़त नाहीं रहेन।

**18**ओन चक्रन क घेरन ऊँच अउर डेरावइवाला रहेन। ओन चारिहुँ चक्रन क घेरन मँ आँखिन ही आँखिन रहिन।

**19**चक्र हमेसा प्राणियन क संग चलत रहेन। जदि प्राणी ऊपर हवा मँ जातेन तउ चक्र भी ओनके संग जातेन। **20**उ सबइ हुँवइ जातेन, जहाँ आतिमा ओनका लइ जात चाहत अउर चक्र ओनके संग जात रहेन। काहेकि प्राणियन क आतिमा चक्र मँ रही।

**21**एह बरे जदि प्राणी चलत रहेन तउ चक्र भी चलत रहेन। जदि प्राणी रूक जात रहेन तउ चक्र भी रूक जात रहेन। जदि चक्र हवा मँ ऊपर जातेन तउ प्राणी ओनके संग जात रहेन। काहेकि आतिमा चक्र मँ रही।

**22**प्राणियन क मूँड़ि क ऊपर एक अचरज करइवाली चीज रही। उ एक तु उल्टे खोरे क नाई रही। खोरा बिल्लोर की नाई स्वच्छ रहेन। **23**इ खोरा क खाले हर एक प्राणी क सोझ पखना रहेन जउन दूसर प्राणी तलक पहोंचत रहेन। हर एक क दूसर दुइ तु पखना रहेन जउन ओकर तने क ढाँपत रहेन।

**24**जब कबहुँ उ सबइ प्राणी चलत रहेन, ओनकर पखना बइकी तेज अवाज करत रहेन। मई उ अवाज क सुनेस। इ समुदर क गर्जना जइसी पइदा होत रही। उ सर्वसक्तीमान परमेस्सर क निचके स निकरइ क वाणी क नाई रही। उ कउनो फउजे क जन-समूह क सोर क तरह रही। जब उ प्राणी चलब बन्द करत रहेन तउ उ पचे आपन पखनन क आपन बगल मँ नीचे कइ लेत रहेन।

**25**ओन प्राणियन चलब बन्द कियेन अउर आपन पखनन क समेटेन अउर हुवाँ फुन भीसन अवाज भइ। उ अवाज उ खोरे स भइ जउन मूँड़ि क ऊपर रहा। **26**उ खोरे क ऊपर हुवाँ कछू रहा जउन एक सिंहासन क तरह देखात रहा। इ नीतमणि क तरह नीला रहा। हुवाँ कउनो रहा जउन उ सिंहासने पइ बइठा भवा एक तु मनई क तरह देखात रहा। **27**अउर मई ओका ओकर कमर क ऊपर लखेउँ। वह तप्त धातु की तरह दिखा, मानो ओकरे चारिहुँ कइँती आगी होइ। अउर नीचे स कमर तलक उ आगी क नाई दिखावइ देत रहा। अउर ओकरे चारिहुँ कइँती प्रकास जगमग करत रही। **28**ओकरे चारिहुँ कइँती चमकत प्रकास बादरन मँ इन्द्र धनुस जइसा रहा। इ यहोवा क महिमा जइसा देखात रहा। जइसेन ही मई उ लखेउँ, मई धरती पइ भहराइ गएउँ। मई धरती

पइ आपन माथा टेकेउँ। तब मई एक अवाज सम्बोधित करत भए सुनेउँ।

**2** उ वाणी कहेस, “मनई क पूत, खड़ा होइ जा अउर मई तोहसे बातन करब।” 2तब आतिमा मोका गोड़न पइ सोझ खड़ा कइ दिहस अउर मई ओका सुनेउँ जउन मोहसे बातन करत रहा। 3उ मोहसे कहेस, “मनई क पूत, मई तोहका इस्त्राएल क परिवार स कछू कहइ बरे पठवत हउँ।” उ सबइ लोग कइउ दाई मोरे खिलाफ भएन। ओनकर पुरखन भी मोरे खिलाफ भएन। उ पचे मोरे खिलाफ कइउ दाई पाप किहेन अउर उ पचे आजु तलक मोरे खिलाफ अब भी पाप करत अहइँ। 4मई तोहका ओन लोगन स कछू कहइ बरे पठवत हउँ। किन्तु उ पचे बहोत हठी अहइँ। उ पचे बड़के कठोर चित्तवाले अहइँ। किन्तु तोहका ओन लोगन स बातन करब अहइ। तोहका कहइ चाही, ‘हमार सुआमी यहोवा इ सबइ बातन बतावत ह।’ 5उ सबइ लोग तोहार सुनिहीं या न भी सुनिहीं। काहेकि उ पचे बहोत बिद्रोही लोग अहइँ, उ पचे सदा मोरे खिलाफ होइ जात हीं। मुला तोहका उ सबइ बातन कहइ चाही जेहसे उ पचे समुझ सकई कि ओनके बीच मँ कउनो नबी रहत बाटइ।

6“मनई क पूत ओन लोगन स डेराअ नाहीं। जउन उ पचे कहइँ ओहसे डेराअ नाहीं। इ फुरइ अहइ कि उ पचे तोहरे खिलाफ होइ जइहीं अउर तोहका चोट पहेंचाउब चइहीं। तू अइसा सोचब्या कि तू बीछियन क बीच रहत अहा। मुला उ पचे जउन कहइँ ओनसे डेराअ नाहीं। उ पचे बिद्रोही लोग अहइँ। किन्तु ओनसे डेराअ नाहीं। 7तोहका ओनसे उ बात कहइ चाही जउन मई कहत हउँ। चाहे उ पचे तोहार सुनि या ना सुनि। काहेकि उ पचे बिद्रोही लोग अहइँ।

8“मनई क पूत, तोहका ओन बातन क सुनइ चाही जेनका मई तोहसे कहत हउँ। ओन बिद्रोही लोगन क तरह मोरे खिलाफ जिन जा। आपन मुँह खोला जउन बात मई तोहसे कहत हउँ, अंगीकार करा अउर ओन बचनन क लोगन स कहा। एन बचनन क खाइ ल्या।”

9तब मई (यहेजकेल) एक भुजा क आपन कइँती बढत लखेउँ। उ एक ठु गोल कीन्ह भवा लम्बा पत्र जेह पइ बचन लिखे रहेन, धरे भए रहा। 10मई उ गोल कीन्ह भए पत्र क खोलेउँ अउर ओह पइ समन्वा अउ पाछे बचन लिखे रहेन। ओहमँ सबहिँ तरह क करूण गीत, सबइ कथा अउर चितउनियन रहिन।

**3** परमेस्सर मोहसे कहेस, “मनई क पूत, जउन तू लखत अहा ओका खाइ जा। इ गोल कीन्ह गए पत्र क खाइ जा अउर तब जाइके इस्त्राएल क लोगन स इ सबइ बातन कहा।” 2एह बरे मई आपन मुँह खोलेउँ अउर उ गोल कीन्ह गए पत्र क मुँह मँ रखेस। 3तब परमेस्सर कहेस, “मनई क पूत, मई तोहका इ गोल कीन्ह गए पत्र क देत अहउँ। एक लील जा। इ गोल कीन्ह गए पत्र क आपन तने मँ भर जाइ द्या।”

एह बरे मई गोल कीन्ह गए पत्र क खाइ गएउँ। इ मोरे मुँह मँ शहद क तरह मीठा रहा। 4तब परमेस्सर मोहसे

कहेस, “मनई क पूत, इस्त्राएल क परिवार मँ जा। मोर कहे भए बचन ओनसे कहा। 5मई तोहका कउनो बिदेसियन मँ नाहीं पठवत हउँ जेनकर बातन तू समुझ न सका। तोहका दूसर भाखा सीखइ नाहीं पड़ी। मई तोहका इस्त्राएल क परिवार मँ पठवत हउँ। 6मई तोहका बहोत स रास्ट्र मँ नाहीं पठवत हउँ जहाँ लोग अइसी भाखा बोलत हीं कि तू समुझ नाहीं सकत्या। यदि तू ओन लोगन क लगे जाब्या अउर ओनसे बातन करब्या तउ उ पचे तोहार सुनिहीं। किन्तु तोहका ओन कठिन सबइ भाखा क नाहीं समुझब अहइ। 7नाहीं। मई तउ तोहका इस्त्राएल क परिवार मँ पठवत हउँ। केवल वे ही लोग ही कठोर चित्त चाले अहइँ - उ पचे बहोत हठी अहइँ अउर इस्त्राएल क लोग तोहार सुनइ स इन्कार कइ देइहीं। उ पचे मोर सुनब नाहीं चाहतेन। 8मुला मई तोहका ओतना ही हठी बनाउब जेतना उ पचे अहइँ। तोहार चित्त ठीक ओतना ही कठोर होइ जेतना ओनकर। 9हीरा आगी क चट्टान से भी जियादा कठोर होत ह। उहइ तरह तोहार चित्त ओनकर चित्त स जियादा कठोर होइ। तू ओनसे जियादा हठी होब्या। एह बरे तू ओन लोगन स नाहीं डेराअ। तू ओन लोगन स नाहीं डेराब्या जउन हमेसा मोरे खिलाफ जात हीं।”

10तब परमेस्सर मोहसे कहेस, “मनई क पूत, तोहका मोर हर एक बात, जउन मई तोहसे कहत हउँ, सुनइ क होइ अउर तोहका ओन बातन क याद रखब होइ। 11तब तू आपन ओन सबहिँ लोगन क बीच जा जउन देस-निकारा अहइँ। ओनके लगे जा अउर कहा, ‘हमार सुआमी यहोवा इ सबइ बातन कहत ह,’ उ पचे मोर नाहीं सुनिहीं अउर उ पचे पाप करब बन्द नाहीं करिहीं। किन्तु तोहका इ सबइ बातन कहब अहइ।”

12तब आतिमा मोका ऊपर उठाएस। तब मई आपन पाछे एक आवाज सुनेउँ। इ बिजुरी क कइक क तरह बहोत तेज रही। उ कहेस, “ओकरे स्थान स यहोवा क महिमा क गुनगान करा।” 13तब प्राणियन क पखना हिलब सुरू भएन। पखनन, जब एक दूसर क छुएन, तउ उ पचे बड़की तेज अवाज क अउर ओनके समन्वा क चक्र बिजुरी क कइक क तरह प्रचण्ड घोस कइ लागेन। 14आतिमा मोका उठाएन अउर दूर लइ गइ। मई उ जगह तजेउँ। मई बहोत दुःखी रहेउँ अउर मोर आतिमा बहोत असान्त रही किन्तु यहोवा क सक्ती मोरे भीतर प्रबल रही। 15मई इस्त्राएल क ओन लोगन क लगे गएउँ जेका तेलबीब मँ कबार नदी क किनारे रहइ क मजबूर कीन्ह ग रहेन। मई ओन लोगन क बीच मँ सात दिना तलक सोक मँ बइठा रहा।

16सात दिना पाछे यहोवा क सँदेसा मोका मिला। उ कहेस, 17“मनई क पूत, मई तोहका इस्त्राएल क सन्तरी बनावत हउँ। मई ओन बुरी सबइ घटना क बताउब जउने ओनके संग घटित होइहीं अउर तोहका इस्त्राएल क ओन सबइ घटना क बारे मँ चितउनी देइ चाही। 18जदि मई कहत हउँ, ‘इ बुरा मनई मरी।’ तउ तोहका इ चितउनी ओका देइ चाही। तोहका ओहसे कहइ चाही कि उ आपन जिन्नगी बदलइ अउर बुरा करम करब बन्द करइ। जदि तू उ मनई क चितउनी नाहीं देब्या तउ उ मरि जाइ। उ मरी काहेकि उ

पाप किहस। किन्तु मई तोहका भी ओकर मउत क बरे उत्तरदायी बनाउब। काहेकि तू ओकरे लगे नाहीं गया अउर ओकरे जिन्गी क नाहीं बचाया।

19“इ होइ सकत ह कि तू कउनो मनई क चितउनी देब्या, ओका ओकरे जिन्गी क बदलइ बरे समुझउब्या अउर बुरा काम न करइ क कहब्या। जदि उ मनई तोहार अनसुनी करत ह तउ मरि जाइ। उ मरी काहेकि उ पाप किहे रहा। किन्तु तू ओका चितउनी दिहा, एह बरे तू आपन जिन्गी बचाइ लिहा।

20“या इ होइ सकत ह कि कउनो नीक मनई अच्छा बनब रहइ तज देइ। मई ओकरे समन्वा कछू अइसा लाइके रख देउँ कि उ ओकर पतन करइ। उ बुरे करम करब सुरू करी। एह बरे उ मरी। उ मरी, काहेकि उ पाप करत अहइ अउर तू ओका चितउनी नाहीं दिहा। मई तोहका ओकर मउत बरे जिम्मेदार बनाउब, अउर लोग ओकरे जरिये कीन्ह गए सबहिं नीक कार्यन क याद नाहीं करिहीं।

21“किन्तु जदि तू उ नीक मनई क चितउनी देत अहा अउर ओका पाप करब बन्द करइ क कहत अहा, अउर जदि उ पाप करब बन्द कइ देत ह, तब उ नाहीं मरी। काहेकि तू ओका चितउनी दिहा अउर उ तोहार सुनेस। इ तरह तू आपन जिन्गी बचाया।”

22तब यहोवा क सकती मोरे ऊपर आई। उ मोहसे कहेस, “उठा अउर घाटी में जा। मई तोहसे उ ठउरे पइ बात करब।”

23एह बरे मई खड़ा भएउँ अउर बाहेर घाटी में गएउँ। यहोवा क महिमा हुआ परगट भइ ठीक वइसेन ही, जइसा मई ओका कबार नदी क सहारे लखे रहेउँ। एह बरे मई धरती पइ आपन मूँड़ि निहुराएउँ। 24किन्तु “आतिमा” आइ अउर उ मोका उठाइके मोरे गोड़न पइ खड़ा कइ दिहेस। उ मोहसे कहेस, “घर जा अउर आपन क अपने घरे क ताले क भीतर बन्द कइ ल्या। 25मनई क पूत, लोग रस्सी क संग अइहीं अउर तोहका बाँध देइहीं। उ पचे तोहका लोगन क बीच बाहेर जाइ नाहीं देइहीं। 26मई तोहार जीभ क तोहरे तालु स चिपकाइ देब, तू बात करइ जोगग नाहीं रहब्या। एह बरे तू लोगन क ओनकर मार्ग क सुधारइ बरे कछू कहइ क जोग्य नाहीं रहब्या। काहेकि उ पचे लोग सदा मोरे खिलाफ जात अहइँ। 27किन्तु मई तोहसे बातचीत करब तब मई तोहका बोलइ देब। किन्तु तोहका ओनसे कहइ चाही, ‘हमार सुआमी यहोवा इ सबइ बातन कहत ह।’ जदि कउनो मनई सुनइ चाहत ह तउ इ बहोत अच्छा अहइ। जदि कउनो मनई एका नाहीं सुनइ चाहत, तउ न सुनइ। किन्तु उ सबइ लोग सदा मोरे खिलाफ जात रहेन।

4 “मनई क पूत, एक ठु ईटा ल्या। एह पइ एक चित्र खींचा। एक नगर क, अर्थात यरूसलेम क एक ठु चित्र बनावा 2अउर तब उ तरह कार्य करा माना तू उ नगर क घेरा डाए भए फउज अहा। नगर क चारिहुँ कइँती एक ठु माटी क देवार एह पइ हमला करइ में मदद बरे बनावा। नगर क देवार तलक पहोंचइ वाली एक ठु ढलान बनावा। तोड़ फोड़ करइवाले लट्ठन क लिआवा अउर नगर क

चारिहुँ कइँती फउजी डेसन क खड़ा करा 3अउर तब तू एक ठु लोहा क कड़ाही ल्या अउर एका आपन अउर नगर क बीच रखा। इ एक लोहा क देवार क तरह होइ, जउन तोहका अउर नगर क अलग करी। इ तरह तू इ प्रदर्सित करब्या कि तू उ नगर क खिलाफ अहा। तू उ नगर क घेरब्या अउर ओह पइ हमला करब्या। काहेकि इ इस्राएल क परिवार बरे एक ठु उदाहरण होइ। इ प्रदर्सित करी कि मैं (परमेस्सर) यरूसलेम क नस्ट करब।

4“तब तोहका आपन बाईं करवट ओलरइ चाही। तउ तू इस्राएल क लोगन क पापनक क घोसणा करा। तू ओनकइ पाप क सारे दिनन तलक ढोउब्या जेतने दिनन तलक तू आपन बाईं करवट ओलरब्या। 5तू इ तरह इस्राएल क पाप क तीन सौ नब्बे दिनन तलक घोसणा करब्या। इ तरह मई तोहका बतावत हउँ कि इस्राएल, एक दिन एक बरिस क बराबर क केतने लम्बे समय तलक दण्डित होइ।

6“उ समइ क पाछे तू आपन दाहिन करवट चालीस दिनन तलक ओलरब्या। इ समइ क दौरान तू यहूदा क पापनक बरे घोसणा करब्या। इ तरह स मई तोहका बतावत हउँ कि यहूदा क केतने लम्बे बरिस बरे दण्ड देइ चाही। एक दिन एक बरिस क होइ।”

7परमेस्सर फिन बोला। उ कहेस, “अब, आपन आस्तानन क मोड़ ल्या अउर आपन हाथन क ईटा क ऊपर उठावा। अइसा देखावा माना तू यरूसलेम नगर पइ हमला करत अहा। एका इ देखावइ बरे करा कि तू मोर नबी क रूप में लोगन स बातन करत अहा। 8एह पइ धियान राखा, मई तोहका लसुरियन स बाँधत अहउँ। तू तब तलक एक बगल स दूसरी बगल करवट नाहीं लइ सकत्या जब तलक तोहरे नगर पइ हमला खतम नाहीं हो।”

9परमेस्सर इ भी कहेस, “तोहका रोटी बनावइ बरे कछू अन्न लिआवइ चाही। कछू गोहूँ, जौ, सेम, मसूर, तिल, बजरी अउर कठिया गोहूँ लिआवा। इ सबहिं क एक ठु खोरा में मिलावा अउर ओनका पीसिके आटा बनावा। तोहका इ आटे क उपयोग रोटी बनावइ बरे करइ क होइ। तू सिरिफ इहइ रोटी क तीन सौ नब्बे दिनन तलक आपन बगल क सहारे ओलरे भए खाब्या। 10तोहका सिरिफ एक पियाला उ आटा रोटी बनावइ बरे प्रतिदिन उपयोग करइ क होइ। तू उ रोटी क पूरे दिन में समइ समइ पइ खाब्या। 11अउर तू सिरिफ तीन पियाला पानी प्रतिदिन पी सकत ह। 12तोहका प्रतिदिन आपनी रोटी बनावइ चाही। तोहका मनई क झुरान मैला लिआइके बारइ चाही। तब तोहका उ जरत मैला पइ आपन रोटी पकावइ चाही। तोहका इ रोटी क लोगन क समन्वा खाइ चाही।” 13तब यहोवा कहेस, “इ प्रदर्सित करी कि इस्राएल क परिवार विदेसन में अपवित्तर रोटियन क खाइ अउर मई ओनका इस्राएल क तजइ अउर ओन देसन में जाइ क बिवस किहे रहेउँ।”

14तब मई (यहेजकेल) अचरज स कहेउँ, “किन्तु मोरे सुआमी यहोवा, मई अपवित्तर खइया क कबहुँ नाहीं खाएउँ। मई कबहुँ उ जनावरे क माँस नाहीं खाएउँ, जउन कउनो रोग स मरा होइ या जंगली जनावर मारि डाए होइ। मई बचपन स लइके अब तलक कबहुँ अपवित्तर माँस नाहीं

खाएँ ह। मोरे मुँहे में कउनो भी वइसा बुरा माँस कबहुँ नहीं गवा ह।”

15तब परमेस्सर मोहसे कहेस, “ठीक बाटइ। मई तोहका रोटी पकावइ बरे गइया क झुरान गोबर उपयोग में लिआवइ देब। तोहके मनई क झुरान मैला क उपयोग नहीं करब होइ।”

16तब परमेस्सर मोहसे कहेस, “मनई क पूत, मई यरूसलेम क रोटी क आपूर्ति क नस्त करत हउँ। लोगन क लगे खाइ बरे रोटियन नहीं क बराबर होइहीं। उ पचे आपन भोजन आपूर्ति बरे बहोत परेसान होइहीं अउर ओनके बरे पानी नहीं क बराबर अहइ। उ पचे उ पानी क पिअत समइ बहोत भयभीत होइहीं। 17काहेकि लोगन बरे पर्याप्त भोजन अउर पानी नहीं होइ। लोग एक दूसर क लखिके भयभीत होइहीं काहेकि उ पचे आपन पापन क कारण एक दूसर क नस्त होत भवा लखिहीं।

5 1-2“मनई क पूत आपन उपवास क समइ क पाछे तोहका इ सबइ काम करइ चाही। तोहका एक तेज तरवार लेइ चाही। उ तरवार क उपयोग नाऊ क उस्तरे क तरह करा। तू आपन बार अउर दाढ़ी ओहसे काट ल्या। बारन क तराजू में धरा अउर तउला। आपन बारन क तीन हीसा में बाँटा। आपन बारन क एक तिहाई हीसा उ ईटा पइ धरा जेह पइ नगर क चित्र बना ह। उ नगर में ओन बारन क जरावा। इ प्रदर्शित करत ह कि कछू लोग नगर की भीतर मरिहीं। तब तरवार क उपयोग करा अउर आपन बारन क एक तिहाई क नान्ह-नान्ह टूकन में काट डवा। ओन बारन क उ नगर क चारिहुँ कइँती धरा। इ प्रदर्शित करी कि कछू लोग नगर क बाहेर मरिहीं। तब आपन बारन क एक तिहाई क हवा में उड़ाइ द्या। एनका हवा क दूर उड़ाइ लइ जाइ द्या। इ प्रदर्शित करी कि मई आपन तरवार निकारब अउर कछू लोगन क पाछा कइके ओनका दूर देसन में भगाइ देब। 3किन्तु तब तोहका जाइ चाही अउर ओन बारन में स कछू क लिआवइ चाही। ओन बारन क लिआवा, ओनका ढका अउर ओनकर रच्छा करा। इ प्रदर्शित करी कि मई आपन में स कछू क बचाउब 4अउर तब ओन उड़े भए बारन में स कछू अउर जियादा बारन क लिआवा। ओन बारन क आगी में झोंकि द्या। इ प्रदर्शित करत ह कि आगी हुवाँ सुरू होइ अउर इस्राएल क पूरे खानदान क बारिके नस्त कइ देइ।”

5तब मोर सुआमी यहोवा मोहसे कहेस, “उ ईटां यरूसलेम अहइ, मई इ यरूसलेम नगर क दूसर रास्टरन क बीच रखा ह, इ समइ इस्राएल क चारिहुँ ओर दूसर देस अहइँ। 6यरूसलेम क लोग मोरे आदेसन क बरे विद्रोह किहन। उ पचे दूसर कउनो रास्टर स जियादा बुरे रहेन। उ पचे मोरे नेमन क ओहसे भी जियादा तोड़ेन जेतना ओनके चारिहुँ कइँती क कउनो भी देस क लोग तोड़ेन। उ पचे मोरे आदेसन क सुनइ स इनकार कइ दिहन। उ पचे मोर व्यवस्था क पालन नहीं किहन।”

7एह बरे मोर सुआमी यहोवा कहेस, “मई तू लोगन पइ भयंकर विपत्तियन लिआउब। काहेकि तू मोर आदेसन क

पालन नहीं किहा। तू लोग मोरे नेमन क आपन चारिहुँ कइँती रहइवाले लोगन स भी जियादा तोड़या। तू लोग उ सबइ काम भी किहा जेनका उ सबइ लोग भी गलत कहत हीं।” 8एह बरे मोर सुआमी यहोवा कहत ह, “एह बरे मई भी तोहरे पचन्क विरूद्ध हउँ, मई तू पचन्क इ तरह दण्ड देब जेहसे दूसर लोग भी लखि सकइँ। 9मई तू लोगन क संग उ करब जेका मई पहिले कबहुँ नहीं किहेउँ। मई ओन भयानक कामन क फिन कबहुँ नहीं करब। काहेकि तू पचे एतना जियादा भयंकर काम किहा। 10यरूसलेम में लोग भूख स एतना तइपिही कि महतारी-बाप आपन गदेलन क खाइ जइहीं अउर गदेलन आपन महतारी-बाप क खाइ जइहीं। मई तू पचन्क कइउ तरह स दण्ड देब अउर जउन लोग जिअत बचा अहइँ, ओनका मई हवा में बिखेर देब।”

11मोर सुआमी यहोवा कहत ह, “यरूसलेम, मई आपन जिन्नगी क किरिया खाइके कहत हउँ कि मई तू पचन्क दण्ड देब। मई प्रतिग्या करत हउँ कि मई तू पचन्क दण्ड देब। काहेकि तू पचे मोर ‘पक्तर ठउर’ क खिलाफ भयंकर पाप किहा। तू पचे उ सबइ भयानक काम किहा जउन एका गन्दा बनाइ दिहन। मई तू पचन्क दण्ड देब। मई तू पचन्क पइ दया नहीं करब। मई तू पचन बरे दुःख क अनुभव नहीं करब। 12तोहार पचन्क एक तिहाई लोग नगर क भीतर रोग अउर भूख स मरिहीं। तोहार पचन्क एक तिहाई लोग नगर क भीतर रोग अउर भूख स मरिहीं। तोहार पचन्क एक तिहाई लोग जुद्ध में नगर क बाहेर मरिहीं अउर तोहार लोगन क एक तिहाई क मई आपन तरवार निकारिके ओनकर पाछा कइके ओनका दूर देसन में खदेड़ देब। 13सिरिफ तब मई तोहरे लोगन पइ क्रोधित होब बन्द करब। मई समुझ लेब कि उ पचे ओन बुरे कामन क बरे दण्डित भएन ह जउन उ पचे मोर संग किहे रहेन अउर उ पचे समुझिहीं कि मई यहोवा हउँ अउर मई ओन लोगन क बिरोध में आपन गैरत क कारण बात किहेउँ।”

14परमेस्सर कहेस, “यरूसलेम मई तोहका नस्त करब तू पाथरन क ढेर क अलावा दूसर कछू नहीं रहि जाब्या। तोहरे चारिहुँ कइँती लोग तोहार हँसी उड़ाइ ही। हर एक मनई जउन तोहरे लगे स गुजरी तोहार हँसी उड़इ। 15तोहरे चारिहुँ कइँती क लोग तोहार हँसी उड़इहीं, किन्तु ओनके बरे तू एक सबक भी बनब्या। उ पचे लखिहीं कि मई कोहान रहा अउर मई तोहका दण्ड दिहेउँ। मई बहोत कोहान रहा। मई तोहका चितउनी दिहे रहेउँ। मोका, यहोवा तोहसे कहे रहा कि मई का करउँ। 16मई कहे रहेउँ कि मई तोहरे लगे भयंकर भुखमरी क समइ पठउब। मई तोहसे कहे रहेउँ, मई ओन चीजन क पठउब जउन तोहका नस्त करिहीं अउर तोहसे कहे रहा कि मई तोहार भोजन क आपूर्ति छोर लेब, अउर उ भूखमरी क उ समइ बार-बार आवा। 17मई तोहसे कहे रहेउँ कि मई तोह पइ भूख अउर जंगली पसु पठउब, जउन तोहरे लरिकन क मारि डइहीं। मई तोहसे कहे रहेउँ कि पूरे नगर में रोग अउर मउत क राज होइ अउर मई ओन दुस्मन-फउजियन क तोहरे खिलाफ लइइ बरे लिआउब। मोका यहोवा इ कहे रहा, इ सबइ बातन घटित होइहीं अउर सबहिं घटित भइन।”



6 तब यहोवा क बचन मोरे लगे फुन आवा। 2उ कहेस, “मनई क पूत इस्राएल क पर्वतन कईती मुड़ा। उनके बिरूध नबूवत करा। 3ओन पर्वतन स इ कहा: ‘इस्राएल क पर्वतो, मोर सुआमी यहोवा कईती स इ सँदेसा सुना। मोर सुआमी यहोवा पहाड़ियन, पर्वतन, घाटियन अउर खार-खड्डन स इ कहत ह। धियान द्या। मई (परमेस्सर) दुस्मन क तू सबन्क खिलाफ लड़इ बरे लिआवत हउँ। मई तोहार सबन्क उच्च ठउरन क नस्ट कइ देब। 4तोहार सबन्क वेदियन क तोरिके टूका-टूका कइ दीन्ह जाइ तोहार सबन्क सुगन्धि चढ़ावइ क वेदियन ध्वस्त कइ दीन्ह जइहीं। अउर मई तोहार सबन्क ल्हासन क तोहार सबन्क गन्दी मूरतियन क समन्वा लोकाउब। 5मई इस्राएल क लोगन क ल्हासन क ओनकर देवतन क गन्दी मूरतियन क समन्वा लोकाउब। मई तोहार सबन्क हाइन क तोहरे पचन्क वेदियन क चारिहूँ ओर बिखेरब। 6जहाँ कहूँ तोहार लोग रहिहीं ओन पइ विपत्तियन अइहीं। ओनकर नगर पाथरन क ढेर बनिहीं। ओनकर उच्च ठउरन नस्ट कीन्ह जइहीं। काहे? एह बरे कि ओन पूजा ठउरन क उपयोग दुबारा न होइ सकइ। उ सबइ सबहिं वेदियन नस्ट कइ दीन्ह जइहीं। लोग फुन कबहूँ ओन गन्दी मूरतियन क नाहीं पूजिहीं। ओन सुगन्धि वेदियन क ध्वस्त कीन्ह जाइ। जउन चिजियन तू पचे बनावत ह उ सबइ पूरी तरह नस्ट कीन्ह जइहीं। 7तोहार लोग मारा जइहीं अउर तब तू जनब्या कि मई यहोवा हउँ।”

8परमेस्सर कहेस, “किन्तु मई तोहरे कछू लोगन क बच निकरइ देब। उ पचे थोड़े समइ तलक विदेसन में रहिहीं। मई ओनका बिखेरब अउर दूसर देसन में रहइ बरे मजबूर करब। 9तब उ पचे बचे भए लोग बन्दी बनावे जइहीं। उ पचे बिदेसन में रहइ क मजबूर कीन्ह जइहीं। किन्तु उ पचे बचे भए लोग मोका याद रखिहीं। मई ओनकर आतिमा क खण्डित किहेउँ। जउने पापन क उ पचे किहेन, ओकरे बरे उ पचे खुद ही घिना करिहीं। बीते समइ में उ पचे मोहसे विमुख भए रहेन। अउर दूर होइ ग रहेन। उ पचे आपन गन्दी मूरतियन क पाछे लगे भए रहेन। उ पचे उ समइ मेहरारू क नाई रहेन जउन आपन भतार क तजिके, कउनो दूसर मनई क पाछे धावइ लाग। उ पचे बड़े भयंकर पाप किहन। 10किन्तु उ पचे समुझ जइहीं कि मई यहोवा हउँ अउर उ पचे इ जनिहीं कि यदि मई कछू करइ बरे कहब तउ मई ओका करब। उ पचे समुझ जइहीं कि उ पचे सब विपत्तियन जउन ओन पइ आई अहई, मई डाएउँ ह।”

11तब मोर सुआमी यहोवा मोहसे कहेस, “हाथन स ताली बजावा अउर आपन गोड़ पीटा। ओन सबहिं भयंकर चिजियन क खिलाफ कहा जेनका इस्राएल क लोग किहन ह। ओनका चितउनी द्या कि उ सबइ रोग अउ भूख स मारा जइहीं। ओनका बतावा कि उ पचे जुद्ध में मारा जइहीं। 12दूर क लोग रोग स मरिहीं। समीप क लोग तरवार स मारा जइहीं। जउन लोग नगर में बचा रहिहीं, उ पचे भूख स मरिहीं। मई तबहिं किरोध करब तजब, 13अउर सिरिफ तबहिं तू जनब्या कि मई यहोवा अहउँ। तू इ तब समुझब्या जब तू आपन ल्हासन क गन्दी मूरतियन क समन्वा अउर वेदियन क चारिहूँ कईती लखब्या। तोहार पूजा

क ओन हर ठउरन क निचके, हर एक ऊँच पहाड़ी, पर्वत तथा हर एक हरिअर बृच्छ अउर पतेवाले हर एक बाँझ बृच्छ क नीचे, उ सबइ ल्हास होइहीं। ओन सबहिं ठउरन पइ तू आपन बलि-भेंट किहा ह। उ पचे तोहार गन्दी मूरतियन बरे मधुर गन्ध रहिन। 14किन्तु मई आपन हाथ तू लोगन पइ उठाउब अउर तोहका तोहरे लोगन क जहाँ कहूँ उ पचे रहेन, सजा देब। मै तोहरे देस क नस्ट करब। इ दिबला रेगिस्तान स भी जियादा सूनी होइ। तब उ पचे जनिहीं कि मई यहोवा हउँ।”

7 तब यहोवा क बचन मोका मिला। 2उ कहेस, “मनई क पूत, अब मोर सुआमी यहोवा क इ सँदेसा अहइ। इ सँदेसा इस्राएल देस बरे अहइ:

अन्त! अन्त आइ ग अहइ। पूरा देस नस्ट होइ जाइ।

3अब तोहार अन्त आइ ग अहइ। मई देखाउब कि मई तोह पइ केतना कोहान हउँ। मई तोहका ओन बुरे कामन बरे दण्ड देब जउन तू किहा। जउन भयंकर काम तू किहा ओनके बरे मई तोहसे भुगतान कराउब।

4मई तोहरे ऊपर तनिक भी दाया नाहीं करब। मई तोहरे बरे अफसोस नाहीं करब। मई तोहका तोहरे बुरे कामन बरे दण्ड देत हउँ। तू भयानक कामन क किहा ह। अब तू समुझ जाब्या कि मई यहोवा हउँ।”

5मोर सुआमी यहोवा इ सबइ बातन कहेस। “एक क बाद एक विपत्तियन अइहीं। 6अन्त आवत अहइ अउर इ बहोत हाली आइ। 7इस्राएल क लोगो, का तू सीटी सुन्या ह? दुस्मन आवत अहइ। उ दण्ड क समइ हाली आवत अहइ। दुस्मन क सोरगुल पर्वतन पइ जियादा स जियादा बढ़त जात अहइ। 8मई हाली ही देखाइ देब कि मई केतना कोहान हउँ। मई तोहरे खिलाफ आपन पूरे किरोध क परगट करब। मई ओन बुरे कामन बरे दण्ड देब जउन तू किहा। मई ओन सबहिं भयानक कामन बरे तोहसे भुगतान कराउब जउन तू किहा। 9मई तोह पइ तनिक भी दाया नाहीं करब मई तोहरे बरे अफसोस नाहीं करब। मई तोहका तोहरे बुरे कामन बरे दण्ड देत हउँ। तू जउन भयानक काम किहा ह, अब तू जानब्या कि मई यहोवा हउँ अउर मई दण्ड भी देत हउँ।

10“दण्ड क उ समइ आइ गवा। का तू सीटी सुनत अहा? परमेस्सर संकेत दिहस ह। दण्ड आरम्भ होत अहइ। डारी अकूरित होइ लाग अहइ। घमण्डी राजा (नवूकदनेस्सर) पहिले स ही जियादा सक्तीसाली होत जात रहा। 11उ हिंसक मनई ओन बुरे लोगन क दण्ड देइ बरे तैयार अहइ। इस्राएल में लोगन क गिनती बहोत अहइ, किन्तु उ ओनमाँ स नाहीं अहइ। उ उ भीड़ क मनई नाहीं अहइ। उ ओन लोगन में स कउनो महत्वपूर्ण प्रमुख नाहीं अहइ।

12“उ दण्ड क समइ आइ ग अहइ। उ दिन आइ पहोँचा। जउन लोग चिजियन खरीदन हीं, प्रसन्न नाहीं होइहीं अउर जउन लोग चिजियन बेचत हीं, उ पचे ओनका बेचइ में बुरा नाहीं मानिहीं। काहेकि उ भयंकर दण्ड हर एक मनई बरे होइ। 13जउन लोग आपन स्थायी सम्पत्ति बेचिहीं उ पचे ओका कबहूँ नाहीं पइहीं। यदि कउनो मनई जिअत नाहीं भी बचा रही तउ भी उ आपन स्थायी सम्पत्ति वापस नाहीं पाइ

सकत। काहेकि इ दर्सन लोगन क पूरे समूह क बरे अहइ। कउनो भी मनई अन्याय कइके आपन क बलवान नाहीं कइ पाइहीं।

14“उ सबइ लोगन क चितउनी देइ बरे तुरही बजइहीं। लोग जुद्ध बरे तइयार होइहीं। किन्तु उ पचे जुद्ध करइ क बरे नाहीं निकरिहीं। काहेकि मई पूरे जन-समूह क देखाउब कि मई केतना कोहान हउं। 15तरवार लिए भए दुस्मन नगर क बाहेर अहइं। रोग अउर भूख नगर क भीतर अहइं। जदि कउनो जुद्ध क मइदान में जाइ तउ सत्रु क फउजी ओका मारि डइहीं। जदि उ नगर में रहत ह तउ भूख अउर रोग ओका नस्त करिहीं।

16“किन्तु कछू लोग बचि निकरिहीं। उ पचे बचे लोग पराइके पहाड़न में चला जइहीं। किन्तु उ सबइ लोग सुखी नाहीं होइहीं। उ पचे आपन पापन क कारण दुखी होइहीं। उ पचे चिजियइहीं अउर कबूतरन क तरह दुःख भरी आवाज निकारिहीं। 17लोग एतने थके अउर खिन्न होइहीं कि आपन हाथन भी नाहीं उठाइ पइहीं। ओनकर गोड़ पानी क तरह ढीला होइहीं। 18उ पचे सोक वस्त्र पहिरिहीं अउर भयभीत रहिहीं। तू पचे हर मुँहे पइ लज्जा पउब्या। उ पचे सोक प्रदर्सन बरे आपन बार मुड़वाइ लेइहीं। 19उ पचे आपन चाँदी क देव मूरतियन क सड़कन पइ फेंक देइहीं। उ पचे आपन सोने क मूरतियन क गन्दा चिथरन क तरह समुझिहीं। काहेकि जब यहोवा आपन किरोध परगट किहस उ सबइ मूरतियन ओनका बचाइ नाहीं सकिन। उ सबइ मूरतियन लोगन बरे पतन क जालि के अलावा दूसर कछू नाहीं रहिन। उ सबइ मूरतियन लोगन क भोजन नाहीं देइहीं उ सबइ मूरतियन ओनके पेट में अन्न नाहीं पहुँचइहीं।

20“ओन लोग आपन सुन्नर आभूषण क उपयोग किहन अउर मूरति बनाएन। ओनका आपन मूरति पइ गर्व रहा। उ पचे आपन भयानक मूरतियन बनाएन। ओन लोग ओन गन्दी चिजियन क बनाएन। एह बरे मई (परमेस्सर) ओनका गन्दा चिथरन क तरह लोकाइ देब। 21मई ओनका अजनबियन क लेइ देब। उ सबइ अजनबी ओनका लूट लेइहीं। उ सबइ, अजनबी, आपन मने क मुताबिक सबइ कछू लइ लेइहीं अउ पवितर स्थान अपवितर कइ देइहीं। 22मई ओनसे आपन मुँह फेर लेब, मई ओनकर कइती नाहीं लखब। उ सबइ अजनबी मोरे मन्दिर क नस्त करिहीं, उ सबइ उ पवितर भवन क गोपनीय हीसन में जइहीं अउर ओका अपवितर करिहीं।

23“बन्दिन खातिर जंजीर बनावा। काहेकि बहोत स लोग दूसर लोगन क मारइ क कारण दण्डित होइहीं। नगर क हर ठउसन पइ हिंसा भडकी। 24मई दूसर रास्ट्रन स बुरे लोगन क लिआउब अउर उ सबइ लोग इस्राएल क लोगन क सबहिं घरन क लइ लेइहीं। मई तू बरिआर लोगन क गर्बीला होइ स रोक देब। दूसर रास्ट्रन क उ सबइ लोग तोहरे पूजा ठउसन क अपवितर कइ देइहीं।

25“तू लोग भय स थरिइ उठब्या। तू लोग सान्ति चहब्या, किन्तु सान्ति नाहीं मिली। 26तू पचे एक क पाछे दूसर दुःख कथा क सुनब्या। तू पचे बुरी खबरियन क अलावा कछू नाहीं सुनब्या। तू नबी क खोज करब्या अउर

ओहसे दर्सन पुछब्या। किन्तु कउनो मिली नाहीं। याजक क लगे तू पचन्क सिच्छा देइ क कछू भी नाहीं होइ अउर अग्रजन क लगे तू पचन्क कउनो नीक सलाह नाहीं होइ। 27तोहार पचन्क राजा ओन लोगन बरे रोइ अउर मरि गएन। प्रमुख सोक-वस्त्र पहिरिहीं। साधारण लोग बहोत डेराइ जइहीं। काहेकि मई ओकर बदल देब जउन उ पचे किहन। मई ओनकर दण्ड निहचित करब। अउर मई ओनका दण्ड देब। तब उ सबइ समुझिहीं कि मई यहोवा हउं।”

8 एक दिन मई (यहेजकेल) अपने घरे में बइठा रहेउं अउर यहूदा क अग्रज हुवाँ मोरे समन्वा बइठे रहेन। इ देस-निकारे क छठएँ बरिस क छठएँ महीने क पचौँ दिन भवा। अचानक मोर सुआमी यहोवा क सकती मोहमाँ उतरी। 2मई कछू लखेउं जउन आगी क नाई रहा। इ एक मनई क सरीर जइसा देखाइ पड़त रहा। करिहाउं स खाले उ आगी जइसा रहा। करिहाउं स ऊपर उ आगी में तपत धातु क तरह चमकत अउर कान्तिवाला रहा। 3तब मई कछू अइसा लखेउं जउन बाहु क तरह रहा। उ बाहु बाहेर बढ़ी अउर उ मोरे मुँडि क बारन स मोका धइ लिहस। तब आतिमा मोका हवा में उठाइ लिहस अउर परमेस्सर क दर्सन में उ मोका यरूसलेम क लइ गइ। उ मोका उत्तर कइँती भीतर फाटक पइ लइ गइ। उ देवमूर्ति, जेहसे परमेस्सर क ईस्यो होत ह, उ फाटक क सहारे अहइ। 4किन्तु इस्राएल क परमेस्सर क तेज हुवँइ रहा। उ तेज वइसा ही देखात रहा जइसा दर्सन मई घाटी क किनारे कबार नहर क लगे लखे रहेउं।

5परमेस्सर मोहसे कहेस। उ कहेस, “मनई क पूत, उत्तर कइँती लखा।” एह बरे मई उत्तर कइँती लखेउं। अउर हुवाँ प्रवेस मार्ग क सहारे वेदी-दुआर क उत्तर में उ देवमूर्ति रही जेकरे बरे परमेस्सर क ईस्यो होत रही।

6तब परमेस्सर मोहसे कहेस, “मनई क पूत का तू लखत अहा कि इस्राएल क लोग कइसा भयंकर काम करत अहइँ? हिआँ उ पचे उ चीज क मोरे मन्दिर क ठीक बगल में मोका इ स दूर हटाइ बरे बनाएन ह। जदि तू मोरे संग अउब्या तउ तू अउर भी जियादा भयंकर चिजियन लखब्या।”

7एह बरे मई आँगेने क प्रवेस दुआर पइ गएउं अउर मई देवार में एक ठु छेद लखेउं। 8परमेस्सर मोहसे कहेस, “हे मनई क पूत। उ देवारे क छेद क चारिहुँ कइँती खोदेन।” एह बरे मई देवार क उ छेद स होइके गएउं अउर हुवाँ एक दरवाजा लखेउं।

9तब परमेस्सर मोहसे कहेस, “अन्दर जा, अउर ओन भयानक दुट्ठ चिजियन क लखा जेनका लोग हुवाँ करत अहइँ।” 10एह बरे मई अन्दर गएउं अउर मई लखेउं। मई हर एक प्रकार क रेंगइवाले जन्तु अउर जनावरन क देवमूरतियन क लखेउं जेनके बारे में सोचइ स तोहका धिना होत ह। उ सबइ देवमूरतियन अउ गन्दी मूरतियन रहिन जेनका इस्राएल क लोग पूजत रहेन। हुवाँ ओन जनावरन क तस्बीर हर देवारे पइ चारिहुँ कइँदी खुदा भए रहेन।

11तब मई एह पइ धियान दिहेउं कि सापान क पूत याजन्याह अउर इस्राएल क सत्तर अग्रज उ ठउर पइ पूजा

करइवालन क साथ रहेन। हुवाँ पइ उ पचे, लोगन क ठीक समन्वा रहेन, अउर हर एक प्रमुख क हाथे में आपन सुगन्धि क थाल रहा। बरत सुगन्धि क धुवाँ हवा में उठत रहा। 12तब परमेस्सर मोहसे कहेस, “हे मनई क पूत का तू लखेस ह कि इस्राएल क नेता लोग अँधियारा में का करति आवत हीं? हरेक मनई क आपन लबार देवता बरे बिसेस कमरा अहई। उ पचे आपुस में इ बातन करत ह, ‘यहोवा हम लोगन क नाहीं लखइ सकब्या। यहोवा इ रास्ट्र क तजि दिहस ह।” 13तब परमेस्सर न मोह स कहेस, “यदि तुम मोरे संग आउब्या तउ तू ओन लोगन अउर भी जियादा भयानक काम करत भए लखब्या!”

14तब उ मोका यहोवा क मन्दिर क प्रवेश-दुआर पइ लइ गवा। इ दुआर उत्तर कईती रहा। हुवाँ मई मेहररून क बइठे अउर रोवत भए लखेउँ। उ पचे लबार देवता तम्मूज क बारे में सोक मनावत रहिन।

15परमेस्सर मोहसे कहेस, “मनई क पूत, का तू एन भयंकर चिजियन क लखत अहा? मोरे संग आवा अउर तू एनसे भी बुरे करम लखब्या।” 16तब उ मोका मन्दिरे क भीतरी अँगना में लइ गवा। उ ठउरे पइ मई पच्चीस मनइयन क खाले निहुरे भए अउर पूजा करत लखेउँ। उ पचे पवितर स्थान अउर वेदी क बीच रहेन, किन्तु उ पचे गलत दिसा में मुँह किए खड़े रहेन। ओनकर पीठ पवितर ठउरे कईती रहिन। उ पचे सूरज क पूजा करइ बरे खाले निहुरा रहेन।

17तब परमेस्सर कहेस, “मनई क पूत, का तू एका लखत अहा? यहूदा क लोग मोरे मन्दिर क एतना महत्वहीन समुझत हीं कि उ पचे मोरे मन्दिर में इ भयंकर करम करत हीं। इ देस हिंसा स भरा भवा अहइ। उ पचे लगातार मोका पागल करइवाला काम करत हीं। लखा, उ पचे आपन नाकन में लबार देवता क तरह चन्द्रमा क सम्मान करइ बरे बालियन पहिर रखिन ह। 18मई ओन पइ आपन किरोध परगट करब। मई ओन पइ कउनो दाया नाहीं करब। मई ओनके बरे दुःख क अनुभव नाहीं करब। उ पचे मोका जोर स गोहरइहीं, किन्तु मई ओनका सुवइ स इन्कार कइ देब।”

9 तब परमेस्सर जोर स पुकारेस, नगर क जल्लादन क आवइ द्या। हर एक क आपन हाथन में बिध्वंसकारी हथियार लेइ चाही। 2तब मई ऊपरी दुआरे स छः मनइयन क सड़के पइ आवत लखेउँ। इ दुआर उत्तर कईती अहइ। हर एक मनई आपन घातक सस्त्र क आपन हाथे में लिहे रहा। ओन मनइयन में स सूती ओढ़ना पहिर रखे रहा। ओकरे लगे करिहाउँ में लिपिक क एक टु कलम अउ सियाही रही। उ सबइ लोग मन्दिर स काँसि क बेदी क लगे गएन अउर हुवाँ खड़ा भएन। 3तब इस्राएल क परमेस्सर क तेज करूब सरगदूतन क ऊपर स, जहाँ उ रहा उठा। तब उ तेज मन्दिर क दुआर पइ गवा। जब उ ड्योढ़ी पइ पहुँचा तउ उ रूक गवा। तब उ तेज उ मनई क बोलाएस जउन सूती ओढ़ना कलम अउ स्याही धारन किए भए रहा।

4तब यहोवा ओहसे कहेस, “यरूसलेम नगर स होइ के निकरा। जउन लोग उ नगर में लोगन क जरिये कीन्ह गइ

धिनौना करम क बरे में गोहरावत अउर रोवत ह अहई, ओन हर एक क ललाट पइ एक चीन्हा अंकित करा।”

5-6तब मई परमेस्सर क दूसर लोगन स कहत सुनेउँ कि “तू लोग पहिले मनई क अनुसरण करा। तू पचे ओन सबहिं मनइयन क मार डावा। जेनके ललाट पइ चीन्हा नाहीं अहइ। तू पचे एह पइ धियान नाहीं द्या कि उ पचे अग्रज जुवक, जुवतियन, गदेलन या महतरियन अहई। तू पचन्क आपन सस्त्रन क उपयोग करब अहइ, ओन हर एक क मार डाउब अहइ जेनके ललाट पइ चीन्हा नाहीं अहइ। कउनो दाया जिन देखावा। कउनो मनई बरे अफसोस न करा। हिाँ मोरे मन्दिर में सुरू करा।” एह बरे उ पचे मन्दिर क समन्वा क अग्रजन स सुरू किहा।

7परमेस्सर ओनसे कहेस, “इ जगह क अपवितर बनाइ द्या। इ अँगने क ल्हासन स भरि द्या।” एह बरे उ पचे गएन अउर उ पचे नगर में लोगन क मारि डापन।

8जब उ सबइ लोग, लोगन क मारइ गएन, तउ मई हुवाँइ रूका रहेउँ। मई भुइँया पइ आपन माथा टेकत भए कहेउँ, “हे मोर सुआमी यहोवा, यरूसलेम क खिलाफ आपन किरोध परगट करइ बरे, का तू इस्राएल में बचे भए सबहिं लोगन क मारत अहइ?”

9परमेस्सर कहेस, “इस्राएल अउ यहूदा क परिवार बहोत जियादा बुरे पाप किहेन ह। इ देस में सर्वत्र लोगन क हतिया होत रहत अहई अउर इ नगर अपराध स भरा पड़ा अहइ। काहेकि लोग खुद कहत हीं, ‘यहोवा इ देस क तजि दिहस। उ ओन कामन क नाहीं लखि सकत जेनका हम करत अहई।’ 10अउर मई दाया नाहीं देखाउब। मई ओन लोगन बरे अफसोस अनुभव नाहीं करब। उ पचे खुद एका बोलाएन ह, मई एन लोगन क सिरिफ दण्ड दइ देत हउँ जेकर इ सबइ पात्र अहई।”

11तब सूती ओढ़ना, लिपिक क कलम अउर स्याही धारण करइवाला मनई बोला। उ कहेस, “मई उ कइ दिहेउँ जउन तोहार आदेस रहा।”

10 तब मई उ खोरे क लखेउँ जउन करूब सरगदूतन क मूँड़िन क ऊपर रहा। खोरे नीलमणि क तरह स्वच्छ नीला देखात रहा। हुवाँ खोरे क ऊपर कछू सिंहासन क तरह देखात रहा। 2तब उ मनई जउन सिंहासने पइ बइठा रहा, सन क ओढ़ना पहिरे भए मनई स कहेस, “तूफानी बादरे में आवा। करूब सरगदूतन क पहुँटा में आवा। करूब सरगदूतन क बीच स कछू अंगारन आपन हाथे में ल्या। आपन हाथे में ओन कोइलन क लइ ल्या अउर जाइके ओनका यरूसलेम नगर पइ लोकाइ द्या।”

उ मनई मोरे पाछे चला। 3करूब सरगदूत उ समइ मन्दिर क दक्खिन क पहुँटा में खड़ा रहेन, जब उ मनई बादरे में घुसा। बादर भीतरी अँगना में भरि गवा। 4तब यहोवा क तेज करूब सरगदूत स अलग होइके मन्दिर क दुआरे पइ चला गवा। तब बादर मन्दिर में भरि गवा अउर यहोवा क तेज क प्रखर जोति पूरे अँगना में भरि गइ। 5तब मई करूब सरगदूतन क पंखनन क फड़फड़ाहट पूरे बाहरी अँगना में सुनी जाइ सकत रही। बाहरी अँगना में फड़फड़ाहट

बड़की प्रचण्ड रही, वइसी ही जइसी सर्वसवतीमान परमेस्सर क गरजत वाणी होत ह, जब उ बातन करत ह।

6परमेस्सर सन क ओढ़ना पहिरे भए मनई क आदेस दिहे रहा। परमेस्सर ओका “तूफानी-बादर” में घुसुरइ क बरे कहेस अउर करूब सरगदूतन क बीच स कछू अंगारन लेइ क कहेस। एह बरे उ मनई तूफानी बादर में घुस गवा अउर गोल चक्रन में स एक क सहारे खड़ा होइ गवा। 7करूब सरगदूतन में स एक आपन हाथ बढ़ाएस अउर करूब सरगदूतन क पहुँटा क बीच स कछू अंगारन क लिहस। उ अंगारन क उ मनई क हाथन में धड़ दिहस अउर उ मनई हुवाँ स चला गवा। (8करूब सरगदूतन क पंखन क नीचे कछू ऐसा रहा जउन मनई क बाहन क तरह देखात रहा।)

9तब मई लखेउँ कि हुवाँ चार गोल चक्र रहेन। हर एक करूब सरगदूत क बगल में एक तु चक्र रहा, अउर चक्र स्वच्छ पिअर रतन क तरह देखात रहेन। 10उ सबइ चार चक्र रहेन अउर सब चक्र एक समान प्रतीत होत रहेन। उ सबइ अइसेन देखात रहेन माना एक चक्र दूसर चक्रन में होइ। 11जब उ सबइ चलत रहेन तउ कउनो भी दिसा में जाइ सकत रहेन। जब कबहुँ उ सबइ चलत रहेन उ सबइ चारिहुँ एक संग चलत रहेन। किन्तु ओनके चलइ क संग करूब सरगदूत साथ-साथ चक्कर नाहीं लगावत रहेन। उ सबइ उ दिसा में चलत रहेन, जेहर ओनकर मुँह होत रहा। जब उ सबइ चलत रहेन, तउ उ सबइ उ सबइ एहर-ओहर नाहीं मुड़त रहेन। 12ओनकर पूरे बदन पइ आँखिन रहिन। ओनकर पीठ, ओनकर बाँह, ओनकर पखना अउर ओनकर चक्र में आँखिन रहिन। हाँ, चारिहुँ चक्रन में आँखिन रहिन। 13मई ओन लोगन क पहिया क “चक्र कहत भवा सुना।”

14हर एक करूब सरगदूत चार मुँहवाला रहा। पहिला मुँह करूब सरगदूत क रहा। दूसर मुँह मनई क रहा। तीसर सिंह क मुँह रहा अउर चउथा उकाब क मुँह रहा। 15तब मई जानेउँ कि इ सबइ करूब सरगदूत उ जनावर रहेन जेनका मई कबार नदी क दर्सन में लखे रहेउँ।

तब करूब सरगदूत हवा में उठेन। 16ओनके संग चक्र उठेन। चक्रन आपन दिसा उ समइ नाहीं बदलेन जब करूब सरगदूत पखना खोलेन अउर उ सबइ हवा में उड़ेन। 17जब करूब सरगदूत हवा में उड़त रहेन तउ चक्र ओनके संग उड़ जात रहेन। जदि करूब सरगदूत सान्त खड़ा रहत रहेन तउ चक्र भी वइसा ही करत रहेन। काहेकि ओनमाँ जीवधारियन क आतिमा क सक्ती रही।

18तब यहोवा क तेज मंदिर क डेवड़ी स उठा, करूब सरगदूतन क ठउरे पइ ऊपर गवा अउ हुवाँ ठहर गवा। 19तब करूब सरगदूतन आपन पखना खोलेन अउर हवा में उड़ गएन। मई ओनका मन्दिर क तजत लखेउँ। चक्र ओनके संग चलेन। तब उ पचे यहोवा क मन्दिर क पूर्वी दुआर पइ ठहरेन। इस्राएल क परमेस्सर क तेज हवा में ओनके ऊपर रहा।

20तब मई इस्राएल क परमेस्सर क तेज क नीचे प्राणियन क कबार नदी क दर्सन में याद कियेउँ अउर मई अनुभव कियेउँ कि उ सबइ प्राणी करूब सरगदूत रहेन। 21हर एक प्राणी क चार मुँह रहेन, चार पखना रहेन अउर पखनन क

खाले कछू अइसा रहा जउन मनई क बाँहन क तरह देखात रहा। 22करूब सरगदूतन क उहइ चार मुँह रहेन जउन कबार नदी क दर्सन क प्राणियन क रहेन अउर उ सबइ सोझे अगवा उ दिसा में देखात रहेन, जेहर उ सबइ जात रहेन।

**1** तब आतिमा मोका यहोवा क मन्दिर क पूर्वी दुआर पइ लइ गवा जहाँ सूरज निकरत ह। मई इ फाटक क प्रवेस दुआर पइ पच्चीस मनई लखेउँ। अजूर क पूत याजन्याह ओन लोगनक संग रहा अउर बनायाह क पूत पलत्याह हुआँ रहा। उ पचे लोगन क प्रमुख रहेन।

2तब परमेस्सर मोहसे कहेस। उ बताएस, “मनई क पूत, इ सबइ उ सबइ मनई अहई जउन इ नगर में बुरी योजना बनावत हीं। इ सबइ हमेसा लोगन क बुरे काम करइ क कहत हीं। 3उ सबइ लोग कहत हीं, ‘हम लोग हाली ही फुन स आपन मकान नाहीं बनाउव। हम लोग बर्तन में धरे माँस क तरह इ नगर में सुरच्छित अही।’ 4उ पचे इ झूठ फइलावत अहई। एह बरे तोहका मोरे बरे लोगन स बात करइ चाही। मनई क पूत! जा अउर लोगन क बीच भविस्सवाणी करा।”

5तब यहोवा क आतिमा मोहमाँ आइ। उ मोहसे कहेस, “ओनसे कहा कि यहोवा इ सब कहेस ह: इस्राएल क परिवार, तू पचे बड़की योजना बनावत अहा। किन्तु मई जानत हउँ कि तू पचे का सोचत अहा। 6तू पचे इ नगर में बहोत स लोगन क मारि डया ह। तू पचे सड़कियन क ल्हासन स पाटि दिहा ह। 7अब हमार सुआमी यहोवा, इ कहत ह, ‘उ सबइ ल्हास माँस अहई अउर इ नगर पात्र अहइ। किन्तु नबूकदनेस्सर आइ अउर तू पचन्क इ सुरच्छित पात्र स निकारि लइ जाइ। 8तू पचे तरवारे स भयभीत अहा। किन्तु मई तू पचन्क खिलाफ तरवार लिआवत हउँ।” हमार सुआमी यहोवा इ सब कहेस ह। एह बरे इ सबइ घटित होइहीं।

9परमेस्सर इ भी कहेस, “मई तू लोगन क इ नगर स बाहरे लइ जाब अउर मई तू पचन्क अजनबियन क सौप देब। मई तू लोगन क सजा देब। 10तू पचे तरवारे क चाट उतरब्या। मई तू पचन्क हिआँ इस्राएल में सजा देब जेहसे तू पचे समुझब्या कि उ मई हउँ जउन तू पचन्क सजा देत हउँ। मई यहोवा हउँ। 11इ जगह बासन नाहीं होब्या, अउर नाहीं इ में तू मांस होब्या। मई तू पचन्क हिआँ इस्राएल में सजा देब। 12तब तू पचे जनब्या कि मई यहोवा हउँ। उ मोर नेम रहा जेका तू पचे तोइया ह। तू पचे मोरे आदेसन क पालन नाहीं किहा। तू पचे आपन चारिहुँ कइँती क रास्ट्रन क तरह रहइ क निर्णय किहा।”

13जइसेन ही मई परमेस्सर कइँती बोलब खतम कियेउँ, बनायाह क पूत पलत्याह मरि गवा। मई धरती पइ भहराइ पड़ेउँ। मई धरती पइ माथा टेकेउँ अउर कहेउँ, “हे मोर सुआमी यहोवा, तू का इस्राएल क सबहि बचे भएन क पूरी तरह नस्ट कहइ पइ तुला अहा।”

14मुला तब यहोवा क वचन मोका मिला। उ कहेस, 15“हे मनई क पूत, तोहार रिस्तेदार अर्थात इस्राएल क पूरा घर जउन कि तोहार संग जलावतन में ह। तोहार भाइयन

अहइ। यरूसलेम में रहइवाले लोग ओन लोगन स कहने, 'यहोवा क पास से दूर होइ जा। इ भुइयाँ वरासत क रूप में हमका दीन्ह गइ अहइ।'

16“एह बरे ओन लोगन स इ सब कहा: हमार सुआमी यहोवा, कहत ह, 'इ फुरइ अहइ कि मई आपन लोगन क बहोत दूर क देसन में जाइ बरे मजबूर किहेउँ। मई ही ओनका बहोत स देसन में बिखेरेउँ अउर उ भुइयाँ में जहाँ उ पचे गएन ह ओनकरे बरे थोड़े समइ बरे पवितर मन्दिर ठहरब। 17एह बरे तू पचन्क ओन लोगन स कहइ चाही कि ओनकर सुआमी यहोवा, ओनका वापस लिआइ। मई तू पचन्क, बहोत स देसन में बिखेर दिहेउँ ह। किन्तु मई तू लोगन क एक संग बटोरब अउर ओन रास्ट्रन स तू पचन्क वापस लिआउब। मई इस्राएल क पहुँटा तू पचन्क वापस देब। 18अउर जब हमार लोग लौटिहीं तउ उ पचे ओन सबहिं भयंकर गन्दी देवमूरतियन क, जउन अब हिआँ अहइ, नस्ट कइ देइहीं। 19मई ओनका एक संग लिआउब अउर ओनका एक ठु मनई सा बनाउब। मई ओनमा नई आतिमा भरब। मई ओनकर पाथर क हिरदय क दूर करब अउर आनके जगह पइ सच्चा हिरदय देब। 20तब उ पचे मोरे नेमन क पालन करिहीं। उ पचे मोरे आदेसन क पालन करिहीं, उ पचे उ कारज करिहीं जेनका मई करइ क कहब। उ पचे फुरइ मोर लोग होइहीं अउर मई ओनकर परमेस्सर होबउँ।”

21तब परमेस्सर कहेस, “किन्तु इ समइ ओनकर हिरदय भयंकर गन्दी देवमूरतियन क होइ चुका अहइ। मोका ओन लोगन क ओन बुरे करमन बरे सजा देइ चाही जउन उ पचे किहेन ह।” मोर सुआमी यहोवा इ कहेस ह। 22तब करूब सरगदूत आपन पखनन क खोलेस अउर हवा में उड़ गएन। चक्र ओनके संग गएन। इस्राएल क परमेस्सर क तेज ओनके ऊपर रहा। 23यहोवा क तेज ऊपर हवा में उठा अउर उ यरूसलेम क तजि दिहस। उ छिन भर क बरे यरूसलेम क पूरब पहाड़ी पइ ठहरा। 24तब आतिमा मोका हवा में उठाएस अउर वापस बाबुल में पहुँचाइ दिहस। उ मोका ओन लोगन क लगे लौटाएस, जउन इस्राएल तजइ बरे मजबूर कीन्ह ग रहेन। तब परमेस्सर क आतिमा मोका हवा में उठाएस अउर मोका तजि दिहस। मई ओन सबहिं चीजन क परमेस्सर क दर्शन में लखेउँ। 25तब मई निर्वासित लोगन स बातन किहेउँ। मई उ सबइ बातन बनाएँ जउन यहोवा मोका देखाए रहा।

**12** तब यहोवा क बचन मोका मिला। उ कहेस, 2“मनई क पूत, तू विद्रोही लोगन क संग रहत अहा। उ पचे सदा ही मोरे खिलाफ होइ ग अहइ। लखइ बरे ओनकर आँखिन अहइ जउन कछू मई ओनके बरे किहेउँ ह। किन्तु उ पचे ओन चिजियन क नाही लखतेन। सुनई बरे ओनकर कान अहइ, ओन चिजियन क जउन मई ओनका करइ क कहेउँ ह। किन्तु उ पचे मोरे आदेसन क नाही सुनतेन। काहेकि उ पचे विद्रोही लोग अहइ। 3उ एह बरे, मनई क पूत आपन सामान बाँध ल्या। अइसा बेउहार करा माना तू कउनो दूर देस क जात अहा। इ इ प्रकार करा

कि लोग तोहका देखत रहइ। होइ सकत ह, कि उ पचे लोग तोहे पइ धियान देई, किन्तु उ सबइ लोग बड़के बिद्रोही लोग अहइ।

4“दिन क समइ तू आपन सामान इ तरह बाहर लइ आवा कि लोग तोहका लखत रहइ। तब साँझ क अइसा देखावा करा, कि तू दूर देस में एक बन्दी क तरह जात अहा। 5लोगन क आँखिन क समन्वा देवार में एक छेद बनावा अउर उ देवार क छेदे स बाहेर आवा। 6राति क आपन सामान काँधे पइ धरा अउर उ ठउर क तजि द्या। आपन मुँह क ढाँपि ल्या जेहसे तू इ न लखि सका कि तू कहाँ जात अहा। एन कामन क तोहका इ तरह करइ चाही, कि लोग तोहका लखि सकउँ। काहेकि मई तोहका इस्राएल क परिवार क बरे एक ठु उदाहरण क रूप में बइपरत हउँ।”

7एह बरे मई (यहेजकेल) आदेस क अनुसार किहेउँ। दिन क समइ मई आपन सामान उठाएँ अउर अइसा देखावा किहेउँ माना मई कउनो दूर देस क जात हउँ। उ साँझ मई आपन हाथन क उपयोग किहेउँ अउर देवार में एक छेद बनाएँ। राति क मई आपन सामान काँधे पइ धरेउँ अउर चल पड़ेउँ। मई इ सब इ प्रकार किहेउँ कि सबहिं लोग मोका लखि सकइँ।

8अगले भिन्सारे मोका यहोवा बचन मिला। उ कहेस, 9“मनई क पूत, का इस्राएल क ओन विद्रोही लोगन तोहसे पूछेन कि तू का करत अहा? 10ओनसे कहा कि ओनकर सुआमी यहोवा इ सबइ बातन बताएस ह। इ दुःखद बचन यरूसलेम क प्रमुखन अउर हुवाँ रहइवाले इस्राएल क सबहिं लोगन क बारे में अहइ। 11ओनसे कहा, ‘मई (यहेजकेल) तू सबहिं लोगन बरे एक ठु उदाहरण हउँ। जउन कछू मई किहेउँ ह उ तू लोगन बरे फुरइ होइ।’ तू पचे फुरइ बन्दी क रूप में दूर देस में जाइ बरे मजबूर कीन्ह जाब्या। 12तोहार पचन्क प्रमुख देवारे में छेद करी अउर राति क गुप्त रूप में निकरि भागी। उ आपन मुँहना क ढाँपि लेइ जेहसे लोग ओका पहिचनिहीं नाहीं। ओकर आँखिन, इ लखइ लायक नाहीं होइहीं कि उ कहाँ जात अहइ। 13उ भाग निकरइ क जतन करी। किन्तु मई (परमेस्सर) ओका धइ लेब। उ मोर जालि में फँस जाइ अउर मई ओका बाबुल लिआउब जउन कसदियन क लोगन क देस अहइ। किन्तु उ उ भुइयाँ क लखि नाहीं पाई कि जहाँ उ जात अहइ। अउर उ हुँआ मर जाइ। 14मई राजा क लोगन क मजबूर करब कि इस्राएल क चारिहुँ कइँती बिदेसन में रहइ। मई ओकरी फउज क तितर-बितर कइ देब अउर दुस्मन क सैनिक ओनकर पाछा करिहीं। 15तब उ सबइ लोग समुझिहीं कि मई यहोवा हउँ। उ पचे समुझिहीं कि मई ओनका रास्ट्रन में बिखेरेउँ। उ पचे समुझ जइही कि मई ओनका दूसर देसन में जाइ बरे मजबूर किहेउँ।

16“किन्तु मई ओन लोगन में स थोड़ा स लोगन क जिअत रखब। उ सबइ रोग, भूख अउ जुद्ध स नाहीं मरिहीं। मई ओन लोगन क एह बरे जिअत रहइ देब, कि उ पचे रास्ट्रन में लोगन स जहाँ पइ उ पचन्क क बिखर दीन्ह ग रहेन ओन भयंकर कामन क बारे में कहि सकइँ, जउन

उ पचे मोरे बिरुद्ध किहेन। तब उ पचे जनिहीं कि मई यहोवा हउँ।”

17तब यहोवा क बचन मोरे लगे आवा। उ कहेस, 18“मनई क पूत! तोहका अइसा करइ चाही माना तू बहोत डेरान अहा। जब तू खइया खाब्या तब तोहका काँपइ चाही। तोहका पानी पिअइ क समइ चिन्तित अउर डेरान होइ क देखावा करइ चाही। 19तोहका इ धरती क लोगन स कहइ चाही। तोहका कहइ चाही, ‘हमार सुआमी यहोवा यरूसलेम क लोगन अउर इस्राएल क दूसर हीसन क लोगन स इ कहत ह। लोगो, तू भोजन करत समइ बहोत परेसान होब्या। तू पानी पिअत समइ डेरान होब्या। काहेकि तोहरे पचन्क देसन में सबहि कछू नस्ट होइ जाइ। हुवाँ रहइवाले सबहि लोगन बरे दुस्मन बहोत क्रूर होइ। 20तोहरे पचन्क नगरन में इ समइ बहोत लोग रहत हीं, किन्तु उ सबइ सहर नस्ट होइ जइहीं। तोहार पचन्क पूरा देस नस्ट होइ जाइ। तब तू पचे समुझब्या कि मई यहोवा हउँ।”

21तब यहोवा क बचन मोका मिला। उ कहेस, 22“हे मनई क पूत, इस्राएल क प्रदेस क बारे में लोग इ कहावत काहे सुनावत ही:

विपत्ति हाली न आई, हर एक दर्सन घटित होइ स विफल होइ गवा।

23“ओन लोगन स कहा कि तोहार पचन्क सुआमी यहोवा तोहार सबन्क इ कहावत क कहइ बन्द कइ देइ। उ पचे इस्राएल क बारे में इ कहावत क अउर नहीं कहिहीं। अब उ पचे इ कहावत सुनइहीं:

विपत्ति हाली आई  
दर्सन घटित होइहीं।

24“इ फुरइ अहइ कि इस्राएल में कबहुँ भी झूठे दर्सन नहीं घटित होइहीं। अब अइसे जादूगर भविस्स में नहीं होइहीं जउन अइसी भविस्सवाणी करिहीं जउन फुरइ नहीं होइ। 25काहेकि मई यहोवा अहउँ। मई उहइ कहब, जउन मई कहइ चाहब अउर उ चीज घटित होइ अउर मई घटना कल क लम्वा नहीं खींचइ देब। उ सबइ विपत्तियन हाली आवति अहइ। तोहरे पचन क आपनी ही जिन्नगी में। विद्रोही लोगो! जब मई कछू कहत हउँ तउ मई ओका घटित करत हउँ।” मोर सुआमी ओन बातन क कहेस।

26तब यहोवा क वचन मोका मिला। उ कहेस, 27“मनई क पूत, इस्राएल क लोग समुझत हीं कि जउन दर्सन मई तोहका देत हउँ, उ सबइ बहोत दूर क भविस्स में घटित होइहीं। उ पचे समुझत हीं, कि जउन विपत्तियन क बारे में तू बातन करत अहा, उ सबइ आजु स बहोत बरिसन क पाछे घटित होइहीं। 28एह बरे तोहका ओनसे इ कहइ चाही, ‘मोर सुआमी यहोवा कहत ह: मई अउर जियादा विलम्ब नहीं कइ सकत। जदि मई कहत हउँ, कि कछू घटित होइ तउ उ घटित होइ।” मोर सुआमी यहोवा ओन बातन क कहेस।

13 तब यहोवा क वचन मोका मिला। 2“मनई क पूत, तोहका इस्राएल क नबियन स मोरे बरे बातन करइ चाही। उ पचे नबी असल में मोरे बरे बातन नहीं करत

अहइ। उ पचे नबी उहइ कछू कहत अहइ जउन उ पचे कहइ चाहत हीं। एह बरे तोहका ओनसे बातन करइ चाही। ओनसे इ सबइ बातन कहा, ‘यहोवा क हिआँ स मिले इ वचन क सुना। 3मोर सुआमी इ वचन देत ह। मूरख नबियो! तू लोग गत पइ बिपत्तियन अहइ। तू लोग आपन आतिमा क अनुसरण करत अहा। तू लोगन स उ नहीं कहत अहा जउन तू पचे फुरइ दर्सन में लखत अहा।

4“इस्राएलियो, तोहार पचन्क नबी सून्य खण्डहरन में दउड लगावइवाली लोखरियन जइसे होइहीं। 5तू पचे नगर क टूटी देवारन क निअरे फउजी क नहीं रख्या ह। तू पचे इस्राएल क परिवार क रच्छा बरे देवारन नहीं बनाया ह। एह बरे यहोवा बरे, जब तोहका पचन्क सजा देइ क समइ आई तउ तू पचे जुद्ध में हार जाब्या।

6“लबार नबी लोग कहेन, कि उ पचे दर्सन लखेन ह। उ पचे आपन जादू किहन अउर कहेन कि सबइ घटना होइहीं, किन्तु उ पचे झूठ बोलेन। उ पचे कहेन कि यहोवा ओनका पठएस किन्तु उ पचे झूठ बोलेन। उ पचे आपन झूठ क फुरइ होइ क प्रतीच्छा अब तलक करत अहइ।

7“लबार नबियो, जउन दर्सन तू पचे लख्या, उ सबइ फुरइ नहीं रहेन। तू पचे आपन जादू किहा अउर कह्या कि कछू घटित होइ किन्तु तू लोग झूठ बोल्या। तू कहत अहा कि इ यहोवा क कथन अहइ, किन्तु मई तू लोगन स बातन नहीं किहेउँ।”

8एह बरे मोर सुआमी यहोवा अब फुरइ क छू कही, उ कहत ह “तू पचे झूठ बोल्या। तू पचे उ सबइ दर्सन लख्या जउन फुरइ नहीं रहेन। एह बरे मई (परमेस्सर) अब तोहरे पचन्क खिलाफ अहउँ।” मोर सुआमी यहोवा इ सबइ बातन कहेस। 9यहोवा कहेस, “मई ओन नबियन क सजा देब जउन लबार दर्सन लखेन अउर जउन झूठ बोलेन। मई ओनका आपन लोगन स अलग करब। ओनकर नाउँ इस्राएल क परिवार क सूची में नहीं रहिहीं। उ पचे फुन इस्राएल प्रदेस में कबहुँ नाही अइही तब तू पचे जनब्या कि मई यहोवा अउर सुआमी अहउँ।

10“ओन लबार नबियन बार-बार मोर लोगन स झूठ बोलेन। नबियन कहेन कि सात्ति रही किन्तु हुआँ कउनो सात्ति नहीं अहइ। जब कउनो कमजोर देवार बनावत ह, तउ उ पचे देवार क खामी छुपाइ बरे ओकरे ऊपर पतली लेप चढ़ावत ह। 11ओन लोगन स कहा कि मई ओलन अउ मूसलाधार बर्खा (सनु-सेना) पठउब। प्रचण्ड आँधी चली अउर बाँड़र आई। तब देवार भहराइ जाइ। 12देवार खाले भहराइ जाइ। लोग नबियन स पूछिहीं, ‘उ लेप क का भवा, जेका तू देवार पइ चढ़ाए रहया?’” 13मोर सुआमी यहोवा कहत ह, “मई कोहान अहउँ अउर मई तू लोगन क खिलाफ एक तूफान पठउब। मई कोहान हउँ अउर मई आकास स ओलन बरसाउब अउर तू पचन्क पूरी तरह बर्बाद करब। 14तू पचे लेप देवारे पइ चढ़ावत अहा। किन्तु मई पूरी देवार क नस्ट कइ देब। मई एका धरासायी कइ देब। देवार तोहे पइ भहराइ अउर तू पचे जनब्या कि मई यहोवा अहउँ। 15मई, देवार अउर ओह लेप चढ़ावइवालन क खिलाफ आपन किरोध पूरी तरह देखाउब। तब मई कहब,

‘अब कउनो देवार नाहीं रही अउर न ही अब कउनो मजदूर जो एह पड़ लेप चढ़ावइवाला अहइ।’

16“इ सबइ कछू इस्त्राएल क लबार नबियन बरे होइ। उ सबइ नबी यरूसलेम क लोगन स बातचीत करत हीं। उ पचे नबी कहत हीं कि सान्ति होइ, किन्तु कउनो सान्ति नाहीं अहइ।” मोर सुआमी यहोवा ओन बातन क कहेस।

17परमेस्सर कहेस, “मनई क पूत इस्त्राएल मैं मेहरारू नबियन क हेरा। उ सबइ मेहरारू नबी मोरे बरे नाहीं बोलतिन। उ सबइ उहइ कहत हीं जउन उ पचे कहइ चाहत हीं। एह बरे तू पचन्क मोरे बरे ओनके खिलाफ कहइ चाही। तू पचन्क ओनसे इ कहब चाही। 18मोर सुआमी यहोवा कहत हः मेहरारूओ, तू पचन्पइ बिपति आई। तू लोगन क भूजन पइ पहिरइ बरे कपड़न क बाजूबन्द सिअति अहा। तू लोगन क मूँड़ पइ बाँधइ बरे खास दुपट्टा बनावति अहा। तू पचे कहति अहा कि उ सबइ चिजियन लोगन क जिन्गी क नियन्त्रित करइ क जादुई सक्ती राखत हीं। तू पचे सिरिफ आपन क जितत रखइ बरे ओन लोगन क जाल मैं फँसावत अहा।

19“तू पचे लोगन क अइसा समुझावति अहा कि मई महत्वपूर्ण नाहीं अहउँ। तू पचे ओनका मूठी जौ अउर रोटी क कछू टुकड़न बरे मोरे खिलाफ करति अहा। तू पचे मोरे लोगन स लबार बोलति अहा। उ सबइ लोग लबार सुनब पसन्द करत हीं। तू पचे ओन मनइयन क मार डावति अहा जेनका जितत रहइ चाही अउर तू पचे अइसे लोगन क जितत रहइ देइ चाहति अहा जेनका मरि जाइ चाही। 20एह बरे यहोवा अउर सुआमी तू पचन स इ कहत हः तू पचे ओन कपड़न बाजूबन्दन क लोगन क जालि मैं फँसावइ बरे बनावति अहा-किन्तु मई ओन लोगन क अजाद करब। मई तोहार पचन्क भुजन क ओन बाजूबन्दन क फाड़ लोकाउब अउर लोग तू पचन्स अजाद होइ जइहीं। उ पचे जाल स मुक्त पंछियन क तरह होइहीं। 21मई ओन बाजूबन्दन क फारि डाउब अउर आपन लोगन क तोहार पचन्क सक्ती स बचाउब। उ सबइ लोग तोहार पचन्क जालि स पराइ निकारिहीं अउर तू पचे समुझबिउ कि मई यहोवा हउँ।

22“मेहरारू नबियो। तू पचे लबार बोलति अहा। तोहार पचन्क झूठ नीक लोगन क कस्त पहोंचावत ह, मई ओन लोगन क कस्त पहोंचाउब नाहीं चाहत हउँ। तू पचे बुरे लोगन क मदद करति अहा। तू पचे ओनका आपन जिन्गी बदलइ बरे नाहीं कहतिउ। तू पचे ओनके जिन्गी क रच्छा नाहीं करइ चाहतिउ। 23तू पचे अब भविस्स मैं लबार दर्सन नाहीं लखबिउ। तू पचे भविस्स मैं अउर कउनो जादू नाहीं करबिउ। मई आपन लोगन क तोहार पचन्क सक्ती स बचाउब अउर तू पचे जान जाबिउ कि मई यहोवा हउँ।”

**14** इस्त्राएल क कछू अग्रज मोरे लगे आएन। उ पचे मोहसे बात करइ बइठि गएन। 2यहोवा क वचन मोका मिला। उ कहेस, 3“मनई क पूत, इ सबइ मनई तोहसे बातन करइ आएन ह। उ पचे चाहत रहेन कि तू पचे मोहसे राय ल्या। किन्तु उ सबइ मनई अब तलक आपन

गन्दी देवमूरतियन क राखे अहइँ। उ पचे ओन चीजन क रखत हीं जउन ओनसे पाप करावत हीं। उ पचे अब तलक ओन मूरतियन क पूजा करावत हीं। एह बरे मोरे लगे राय लेइ काहे आवत ह? का मोका ओनकर सवालन क उत्तर देइ चाही? नाहीं। 4किन्तु मई ओनका उत्तर देब। तू पचन्क ओन लोगन्स इ कहि देइ चाही, ‘मोर सुआमी यहोवा कहत हः जदि कउनो इस्त्राएली मनई जउन गन्दी देवमूरतियन क रखत ह जउन ओहसे पाप करावत ह अउर आपन हिरदय मैं ओन मूरतियन क पूजा करत ह, नबी क लगे मोहसे राय पावइ बरे आवत ह तउ उ मनई क सवाल क जवाब मई खुद देब। मई ओका कहब, “तू मदद पावइ बरे आपन ढेर सारे गन्दी देवमूरतियन क लगे जा।” 5काहेकि मई ओनकर हिरदय क छुअइ चाहत हउँ। मई देखावइ चाहत हउँ कि ओनकर गन्दी देवमूरतियन ओन लोगन क मोसे दूर कइ दिहस ह।

6“एह बरे इस्त्राएल क परिवार स इ सबइ कहा। ओनसे कहा, ‘मोर सुआमी यहोवा कहत ह। मोरे लगे वापस आवा अउर आपन गन्दी देवमूरतियन क तजि द्या। ओन भयंकर लबार देवतन स मुँह मोड़ ल्या। 7जदि कउनो इस्त्राएली या इस्त्राएल मैं रहइवाला विदेसी मोरे लगे राय लेइ आवत ह, तउ मई ओका जवाब देब। मई ओका तब भी जवाब देब जदपि उ उ गन्दी देवमूरतियन क रखेस ह, जदि उ ओन चिजियन क रखत ह जउन ओहसे पाप करावत हीं अउर जदि उ तब तलक ओन मूरतियन क पूजा करत ह अउर इ जवाब अहइ जेका मई ओका देब। 8मई उ मनई क खिलाफ होबउँ। मई ओका नस्त करब। उ दूसर लोगन बरे एक तु उदाहरण बनी। लोग ओकर हँसी उड़इही। मई ओका आपन लोगन स निकार बाहेर करब। तब तू पचे जनब्या कि मई यहोवा अहउँ। 9जदि नबी एतना मूरख अहइ कि उ आपन जवाब देत ह तउ मई ओका देखौँ देब कि उ केतँना बड़का मूरख अहइ, मई ओकरे खिलाफ आपन सक्ती क उपयोग करब। मई ओका नस्त करब अउर आपन लोगो, इस्त्राएल स ओका निकार बाहेर करब। 10इ तरह उ मनई जउन राय बरे आवा अउर नबी जउन जवाब दिहस दुइनउँ एक ही दण्ड पइहीं। 11काहेकि इ तरह उ सबइ नबी मोरे इस्त्राएली लोगन क मोहसे दूर लइ जाब बन्द कइ देइहीं। इ प्रकार मोरे लोग आपन अपराधन स गन्दा होब बन्द कइ देइहीं। तब उ पचे मोर बिसेस लोग होइहीं अउर मई ओनकर परमेस्सर होब।” मोर सुआमी यहोवा उ सबइ बातन कहेस।

12तब यहोवा क वचन मोका मिला। उ कहेस, 13“मनई क पूत, मई आपन उ रास्ट्र क दण्ड देब जउन मोका तजत ह अउर मोरे विरुद्ध पाप करत ह। मई ओनकर भोजन आपूर्ति बन्द कइ देब। मई अकाल क समइ उत्पन्न कइ सकत हउँ अउर उ देस स मनइयन अउर पसुअन क बाहर कइ सकत हउँ। 14मई उ देस क दण्ड देब चाहे इ तीनहुँ मनई नूह, दानिय्येल अउर अथ्यूब हुओँ कहान रहत ह। उ सबइ लोग केवल आपन जिन्गी आपन अच्छाइयन स बचाइ सकत हीं, किन्तु उ पचे पूरे देस क नाहीं बचाइ सकतेन।” मोर सुआमी यहोवा इ सबइ कहेस।

15परमेस्सर कहेस, “या मइ उ पूरे प्रदेस में जंगली जनावरन क पठइ सकत हउँ अउर उ सबइ जनावर सबहि लोगन क मारि सकत हीं। जंगली जनावरन क कारण उ देस स होइके कउनो मनई जात्रा नहीं करी। 16जदि नूह, दानियेल अउर अय्यूब हुवाँ रहे होतेन, तउ उ तीनहुँ धर्मी मनई केवल स्वयं आपन जिन्नगी ही बचाइ सकतेन। किन्तु मई आपन जिन्नगी क किरिया खाइके कहत हउँ कि उ सबइ दूसर लोगन क जिन्नगी नहीं बचाइ सकतेन हिओँ तलक कि आपन पूत-बिटियन क जिन्नगी भी नहीं। उ बुरा देस नस्ट कइ दीन्ह जाइ।” मोर सुआमी यहोवा इ सबइ कहेस।

17परमेस्सर कहेस, “या, उ देस क खिलाफ लइइ बरे मई दुस्मन क फउज क पठइ सकत हउँ। उ सबइ फउजी उ देस क नस्ट कइ देइहीं। मई उ देस स सबहि लोगन अउर जनावरन क निकार बाहेर करब। 18जदि नूह, दानियेल अउर अय्यूब हुवाँ रहतेन, तउ उ तीनहुँ धर्मी मनई केवल आपन जिन्नगी ही बचाइ सकतेन। किन्तु मई आपन जिन्नगी क किरिया खाइके कहत हउँ कि दूसर लोगन क जिन्नगी उ पचे बचाइ सकतेन हिओँ तलक कि आपन पूत-बिटियन क जिन्नगी भी नहीं। उ बुरा देस नस्ट कइ दीन्ह जाइ।” मोर सुआमी यहोवा इ सबइ कहेस।

19परमेस्सर कहेस, “या, मई उ देस क खिलाफ महामारी पठइ सकत हउँ। मई ओन लोगन पइ आपन किरोध क बर्खा करब। मई सबहि मनइयन अउर जनावरन क उ देस स हटाइ देब। 20जदि नूह, दानियेल अउर अय्यूब हुवाँ रहतेन, तउ उ तीनहुँ धर्मी मनई केवल आपन जिन्नगी ही बचाइ सकतेन। किन्तु मई आपन जिन्नगी क किरिया खाइके कहत हउँ कि दूसर लोगन क जिन्नगी उ पचे नहीं बचाइ सकत रहेन हिओँ तलक कि आपन पूत-बिटियन क जिन्नगी भी नहीं।” मोर सुआमी यहोवा इ सबइ कहेस।

21तब मोर सुआमी यहोवा कहेस, “एह बरे सोचा कि यरूसलेम बरे इ केतना बुरा होइ, मई उ नगर क विरूद्ध ओन चारिहुँ दण्डन क पठउब। मई सन्तु-सेना, भूखमरी, महामारी अउर जंगली जनावरन क निकारि बाहेर करब। 22उ देस स कछू लोग बचि निकरिहीं। उ पचे आपन पूत-बिटियन क लइहीं अउर तोहरे पचक लगे सहायता क बरे अइहीं। तब तू पचे जनब्या कि उ सबइ लोग फुरइ केतना बुरा अहई। तू पचे ओन विपत्तियन क सम्बंध में उचित होइक धारणा बनउब्या जेनका मई यरूसलेम पइ लिआउब। 23तू पचे ओनके रहइ क ढंग अउर जउन बुरे काम उ पचे करत हीं, ओनका लखब्या। तब तू पचे समुझब्या कि ओन लोगन क सजा देइ क उचित कारण मोरे बरे रहा।” मोर सुआमी इ सबइ बातन कहेस।

**15** तब यहोवा क वचन मोका मिला। उ कहेस, 2“मनई क पूत, का अंगूरे क बेल क लकड़ी जंगले क कउनो बृच्छ क कटी नान्ह डार स जियादा नीक होत ह? नहीं। 3का तू अंगूरे क बेल क लकड़ी कउनो उपयोग में लाइ सकत ह? नहीं। का तू ओहसे तस्तरियन लटकावइ बरे खूँटयन बनाइ सकत है? नहीं। 4लोग उ लकड़ी क सिरिफ आगी में डावत हीं। कछू झुरान लकड़ियन

सिरन स जरब सुरू करत हीं, बीच क हींसा आगी स करिया पइ जात ह। किन्तु लकड़ी पूरी तरह बरत नहीं। का तू उ लकड़ी स कउनो चीज बनाइ सकत ह? 5जदि बरइ क पहिले तू उ लकड़ी स कउनो चीज नहीं बनाइ सकत ह, तउ निहचय ही, ओकर बरइ क पाछे ओहसे कउनो चीज नहीं बनाइ सकत्या। 6अंगूरे क बेल क लकड़ी क टूकन क जंगल क कउनो पेड़ क लकड़ी क टूकन स जियादा बारइ बरे उपयोग कीन्ह जात ह। लोग उ लकड़ी क टूकन क आगी में डावत हीं, अउर आगी ओनका बारत ह। उहइ तरह, मई यरूसलेम क निवासियन क आगी में लोकाउब।” मोर सुआमी यहोवा इ सबइ बातन कहेस। 7“मई ओन लोगन क दण्ड देब। जदपि ओन में स कछू लोगन बच निकर आएस ह तउ पइ भी आगी ओनका भस्म कइ देब। तू लखब्या कि मई एन लोगन क दण्ड देब अउर तू समुझब्या कि मई यहोवा हउँ। 8मई उ देस क नस्ट करब काहेकि लोग मोका लबार देवतन क पूजा बरे तजेन।” मोर सुआमी यहोवा इ सबइ बातन कहेस।

**16** तब यहोवा क वचन मोका मिला। उ कहेस, 2“मनई क पूत, यरूसलेम क लोगन क ओन भयंकर बुरे कामन क समुझावा जेनका उ पचे किहेन ह। 3तोहका कहइ चाही, ‘मोर सुआमी यहोवा यरूसलेम क लोगन क इ सँदिस देत ह: आपन इतिहास लखा। तू कनान में पइदा भवा रह्या। तोहार पिता एमोस रहा। तोहार महतारी हिती रही। 4यरूसलेम, जउने दिन तू पइदा भवा रह्या, तोहार बोड़री-नाल क काटइवाला कउनो नहीं रहा। कउनो तोह पइ नून नहीं डाएस अउर तोहका स्वच्छ करइ बरे नहवाएस नहीं। कउनो तोहका ओढ़ना में नाही लपेटेस। 5यरूसलेम, तू सब तरह स अकेल्ले रह्या। कउनो न तोहरे बरे खेद परगट करत रहा न ही धियान देत रहा। यरूसलेम, जउने दिन तू पइदा भया, तोहार महतारी बाप तोहका मैदाने में डाइ दिहन। तू तब तलक रक्त अउ झिल्ली में लपटा रह्या।

6“तब मई (परमेस्सर) ओहर स गुजरेउँ। मई तोहका हुओँ खून स लथपथ पड़ा पाएउँ। तू खूने में सनी रहिउ, किन्तु मई कहेउँ, “लम्बी जिन्नगी जिअत रहा।” हौं, तू खूने में सनी रहिउ, किन्तु मई कहेउँ, “जिअत रहा।” 7मई तोहार मदद खेते में पौधन क तरह बढ़इ मैं किहेउँ। तू बढ़त ही गइउ। तू एक जुवती विनउ, तोहार ऋतु-धरम सुरू भवा, तोहार वृच्छ-स्थल बढ़ेन, तोहार केस बढ़व सुरू भएन। किन्तु तू तब तलक वस्त्रहीन अउ नंगी रहिउ। 8मई तोह पइ निगाह डाएउँ। मई लखेउँ कि तू पिरेम बरे तइयार रहिउ। एह बरे मई तोहरे ऊपर आपन ओढ़ना डाएउँ अउर तोहार नंगा होइ क ढाकेउँ। मई तोहसे बियाह करइ क बचन दिहेउँ। मई तोहरे संग वाचा किहेउँ अउर तू मोर बनिउ।” मोर सुआमी यहोवा इ सबइ बातन कहेस।

9“मई तोहका पानी स नहवाएउँ। मई तोहरे रक्त क धोएउँ अउर मई तोहार चमड़ी पइ तेल मलेउँ। 10मई तोहका एक तु सुन्नर पहिरावा अउर नरम चामे क फनही दिहेउँ। मई तोहका एक महीन मलमल अउर एक रेसमी ओढ़ना दिहेउँ। 11तब मई तोहका कछू आभूसन दिहेउँ। मई तोहरी बाहन में



बाजूबन्द पहिराएउँ अउर तोहरे गले में हार पहिराएउँ। 12मई तोहका एक ठु नथ, कछू काने का बालियन अउर सुन्नर मुकुट तोहार मुँडे पड़ पहिरइ दिहेउँ। 13तू आपन सोना चाँदी क आभूषणन, आपन मलमल अउर रेसमी वस्त्रन अउर कड़ाई कीन्ह पहिरावे में सुन्नर देखात रहिन। तू उत्तिम आटा, मधु अउर तेल क भोजन किहा। तू बहोत जियादा सुन्नर रहिउ अउर तू रानी बनिउ। 14तू आपन सुन्नर होइ बरे बिख्यात भएउ। इ सब कछू एह बरे भवा काहेकि मई तोहका एतना जियादा सुन्नर बनाएउँ।” मोर सुआमी यहोवा इ सबइ बातन कहेस।

15परमेस्सर कहेस, “किन्तु तू आपन सुन्नर होइ पड़ बिस्सास करब सुरू किहेउ। तू आपन जस क दुरूपयोग किहेउ। तू एक रण्डी क तरह काम किहेउ। तू आपन क उ हर मनई क अर्पित किहेउ जउन हुआँ आवा। 16तउ उ आपन सुन्नर वस्त्रन क लिहस अउर आपन आराधना ठउरे क सजाएस। अउर ओन ठउरन पड़ तू रण्डी क नाई हरकत किहस। इहइ तरह क कार्य पहिले कबहुँ नाहीं कीन्ह ग रहेन अउ न ही आवइवाले समइ में कबहुँ होब। 17तब मोर दीन्ह गवा सुन्नर आभूषण तू लिहेउ अउर तू उ सोना-चाँदी क उपयोग मनइयन क मूरतियन बनावइ बरे किहेउ। तू ओनके संग भी यौन-सम्बन्ध किहेउ। 18तब तू सुन्नर वस्त्र लिहेउ अउर ओन मूरतियन बरे पहिरावा बनाएउ। तू इ तेल अउ धूप बत्ती क लिहेउ जउन मई तोहका दिहे रहेउँ अउ ओका ओन देवमूरतियन क समन्वा चढ़ाएउ। 19मई तोहका रोटा, मधु अउर तेल दिहेउँ। किन्तु तू भोजन आपन देवमूरतियन क दिहेउ। तू ओका आपन लबार देवतन क प्रसन्न करइ बरे सुगन्धि क रूप में भेंट किहेउ। तू ओन लबार देवतन क संग रण्डी जइसा बेउहार किहेउ।” मोर सुआमी यहोवा इ सबइ बातन कहेस।

20परमेस्सर कहेस, “तू आपन पूत-बिटियन लइके जेनका तू मोरे बरे जन्म दिहेउ, ओन मूरतियन क बलि चढ़ाएउ। का तू इ नाहीं सोच्या कि तोहार बिभिचारी काफी नाहीं रहा कि तोहका इ भयंकर पाप क भी करइ क रहा? 21तू मोर पूतन क हतिया किहेउ अउर ओनका आगी क जरिये ओन लबार देवतन पड़ चढ़ाएउ। 22तू मोका तजिउ अउर उ सबइ भयानक काम किहेउ अउर तू आपन उ समइ कबहुँ याद नाहीं किहेउ जब तू बच्ची रहिउ। तू याद नाहीं किहेउ कि जब मई तोहका पाएउँ तबइ तू नंगी रहिउ अउर रक्त में छटपटात रहिउ।

23“ओन सबहिं बुरी चीजन क पाछे, ओह यरूसलेम, इ तोहरे बरे बहोत बुरा होइ।” मोर सुआमी यहोवा इ सबइ बातन कहेस। 24“ओन सबइ बातन क पाछे तू उ लबार देवतन क पूजा बरे उ टीला बनाएउ। तू हर एक सड़क क मोड़ पड़ लबार देवतन क पूजा बरे उ ठउरन क बनाएउ। 25तू आपन टीलन हर एक सड़क क छोर पड़ बनाएउ। तब तू आपन सुन्नरता क मान घटाएउ। तू एकर हर लगे स गुजरइ वाले क फँसावइ बरे किहेउ। तू आपन अधोवस्त्र क ऊपर उठाएउ जेहसे उ सबइ तोहार टाँगन लखि सकइँ अउर तब तू ओन लोगन क संग एक ठु रण्डी क नाई होइ गइउ। 26तब तू उ पड़ोसी मिस्त्र क लगे गइउ जेकर यौन

अंग बिसाल रहा। तू मोका कोहाइ बरे ओकरे संग कइउ दाई यौन-सम्बन्ध कायम किहेउ। 27एह बरे मई तोहका सजा दिहेउँ। मई तोहका अनुमोदित कीन्ह गइ भुईया क एक हीसा लइ लिहेउँ। मई तोहार दुस्मन पलिस्तिनियन क बिटियन (नगसन) क उ करइ दिहेउँ जउन उ पचे तोहार करइ चाहत रहिन। जउन पाप तू किहा ओहसे उ पचे भी लज्जित भएन। 28किन्तु तू कबहुँ संतुष्ट नाहीं भए रहा। एह बरे बिभिचारी करइ बरे अस्सूर गएन, किन्तु तउ पड़ तू पचे संतुष्ट नाहीं भए रहेन। 29एह बरे तू बइपारियन क भुईया बाबुल कइँती मुड़ेस। किन्तु तबहुँ भी तोहका सन्तुष्टी नाहीं भएन। 30तू एँतनी कमजोर अहा। तू ओन सबहिं मनइयन क पाप करइ में लगइ दिहा। तू ठीक एक ठु रण्डी क तरह काम किहा।” उ सबइ बातन मोर सुआमी यहोवा कहेस।

31यहोवा कहेस, “तू आपन टीला हर एक सड़किया क छोर पड़ बनाया अउर तू आपन पूजा क ठउरे हर सड़क क मोड़ पड़ बनाया। तू ओन सारे मनइयन स सारीरिक सम्बन्ध किहे रहा। तू आपन बिभिचारी स कउनो लाभ नाहीं चाहा। तू पैसा लइ स इन्कार किहेस। 32तू बिभिचारिणी मेहरारू। तू आपन पति क तुलना में अजनबियन क संग सरीर क सम्बन्ध करब जियादा नीक मानिउ। 33अधिकांस रण्डियन सरीर क सम्बन्ध बरे मनई क भुगतान करइ बरे मजबूर करत हीं। किन्तु तू आपन प्रेमियन क लुभावइ बरे खुद भेंट देति अहा अउर ओनका सरीर क सम्बन्ध बरे आमन्त्रित करति अहा। तू आपन चारिहुँ ओर क सबहिं लोगन क अपने संग सरीर क सम्बन्ध बरे आमन्त्रित किहा। 34तू जियादातर रण्डियन क ठीक भिन्न अहा। अधिकांस रण्डियन मनइयन क आपन भुगतान बरे मजबूर करति अहा। किन्तु तू मनइयन क अपने संग सरीर क सम्बन्ध क भुगतान करति अहा।”

35हे रण्डी, यहोवा स आए वचन क सुना। 36मोर सुआमी यहोवा इ सबइ बातन कहत हः “तू आपन मुद्रा खर्च कइ दिहा ह अउर आपन पिरिमियन अउर गन्दा देवतन क आपन नंगा सरीर लखइ दिहा ह अउर आपन संग सरीर क सम्बन्ध करइ दिहा ह। तू आपन बच्चन क मारया ह अउर ओकर खून बहाया ह। उ ओन लबार देवतन क तोहार भेंट रहिन। 37एह बरे मई तोहरे सबहिं पिरिमियन क एक संग बटोरत हउँ। मई ओन सबहिं क लिआउब जेनसे तू पिरिम किहा अउर जउने मनइयन स घिना किहा। मई सबहिं क एक संग लइ आउब अउर ओनका तोहका नंगा लखइ देब। उ पचे तोहका पूरी तरह नगन लखिहीं। 38तब मई तोहका दण्ड देब। मई तोहका कउनो हत्यारिन अउर उ मेहरारू क तरह दण्ड देब जउन बिभिचार क पाप किहेस। तू वइसे ही दण्डित होउबिउ माना कउनो कोहान अउ इस्र्यालु भतार दण्ड देत होइ। 39मई ओन सबहिं पिरिमियन क तोहका प्राप्त कइ लेइ देब। उ पचे तोहार टीलन क नस्त कइ देइहीं। उ पचे तोहार पूजा ठउरन क जराइ उइहीं। उ पचे तोहार ओढ़ना फाड़ि डइहीं अउर तोहार सुन्नर आभूषण लइ लेइहीं। उ पचे तोहका वइसे वस्त्रहीन अउर नंगी छोड़ देइहीं जइसे तू तब रहिउ जब मई तोहका पाए रहेउँ। 40उ पचे आपन संग बिसाल जन-समूह लइहीं अउर तोहका मारि डवइ बरे तोहार

ऊपर पाथर फेंकिहीं। तब आपन तरवार स उ पचे तोहका टूका-टूका कइ डइहीं। 41उ पचे तोहार घर जराइ देइहीं। उ पचे तोहका इ तरह दण्ड देइहीं कि सबहिं दूसर मेहररूअन लखि सकईं। मई तोहार रण्डी क तरह रहब बन्द कइ देब। मई तोहका आपन पिरिमियन क धन देइ स रोक देब। 42तब मई कोहान अउर इस्यालु होब छोड़ देब। मई सान्त होइ जाब। मई फुन कबहुँ नाहीं कोहाब। 43इ सबइ सारी बातन काहे होइ? काहेकि तू उ याद नाहीं रख्या कि तोहरे संग तोहार युवावस्था में का घटित भवा रहा। तू उ सबइ सबहिं बुरे पाप किहा अउर मोका क्रोधित किहा। एह बरे ओन बुरे पापन बरे मोका तोहका सजा देइ क रहा। अउर का ओन सबइ भयंकर बुरा करमन स भी बुरा जेका तू किहा करम करइ जोजना नाहीं बनावत रहेन।” मोर सुआमी यहोवा इ सबइ बातन कहेस।

44“तोहरे बारे में बात करइवाले सब लोगन क लगे एक तु अउर बात भी कहइ बरे होइ। उ पचे कहिहीं, ‘महतारी क तरह बिटिया भी अहइ।’ 45तू आपन महतारी क बिटिया अहा। तू आपन पति या बच्चन क धियान नाहीं राखति अहा। तू ठीक आपन बहिन क समान अहा। तू दुइनउँ आपन भतारन अउर बच्चन स घिना किहा। तू ठीक आपन महतारी-बाप क तरह अहा। तोहार महतारी हिती रही अउर तोहार पिता एमोरी रहा। 46तोहार बड़की बहिन सोमरोन रही। जउन तोहरे उत्तर में आपन बिटियन क संग रहत रही अउर तोहार छोटकी बहिन सदोम रही। उ आपन बिटियन क संग तोहरे दक्खिन में रहत रही। 47तू पचे उ सबहिं भयंकर पाप किहा जउन उ पचे किहेन। किन्तु तू उ सबइ काम भी किहा जउन ओनसे भी बुरे रहेन। 48मई यहोवा अउर सुआमी अहउँ। मई सदा जिअत हउँ अउर आपन जिन्नगी क किरिया खाइके कहत हउँ कि तोहार बहन सदोम अउर ओकर बिटियन कबहुँ ओतने बुरे काम नाहीं किहेन जेतना तू अउर तोहार बिटियन किहेन।”

49परमेस्सर कहेस, “तोहार बहन सदोम अउर बिटियन घमण्डी रहिन। ओकरे लगे जरूरत स जियादा खाइ क रहा अउर ओकरे लगे बहोत जियादा समइ रहा। उ पचे दीन-असहाय लोगन क मदद नाहीं करत रहिन। 50सदोम अउर ओकर बिटियन बहोत जियादा घमण्डी होइ गइन अउर मोरे समन्वा भयंकर कार्य किहस। जब मई इ लखेस तउ मई ओनका नास कइ द्या।”

51परमेस्सर कहेस, “सोमरोन ओन पापन क आधा किहरा जउन तू किहा। तू सोमरोन क अपेच्छा बहोत जियादा पाप किहा। तू आपन बहन क अपेच्छा बहोत जियादा भयंकर पाप किहा ह। सदोम अउर सोमरोन क तुलना करइ पइ, उ पचे तोहसे नीक लागत हीं। 52एह बरे तोहका लज्जित होइ चाही। तू आपन बहिनन क, तुलना में आपन स नीक लगइवाली बनाया ह। तू भयंकर पाप किहा ह एह बरे तोहका लज्जित होइ चाही।”

53परमेस्सर कहेस, “मई सदोम अउर ओकरे चारिहुँ ओर क नगरन क नस्ट किहेउँ। मई सोमरोन अउर एकरे चारिहुँ कइँती क नगरन क नस्ट किहेउँ। यरूसलेम, मई तोहका नस्ट करब। किन्तु मई ओन नगरन क फुन स बनावब।

यरूसलेम, मई तोहका भी फुन स बनावब 54मई तोहका आराम देब। तब तू ओन भयंकर पापन क याद करब्या जउन तू किहा अउर तू लज्जित होब्या। 55इ तरह तू अउर तोहार बहिन समरिया फुन स बनाई जइहीं। सदोम अउर ओकरे चारिहुँ कइँती क नगर फुन स बनाववा जइहीं।”

56परमेस्सर कहेस, “अतीतकाल में तू घमण्डी रहिउ अउर बहिन सदोम क हँसी उड़ावत रहिउ। किन्तु तू वइसा फुन नाहीं कइ सकबिउ। 57तू अइसा दण्डित होइ स पहिले अउर आपन पड़ोसियन क जरिये हँसी उड़ावब सुरू कीन्ह जाइ स पहिले किहे रहया। आराम क बिटियन अउर पलिस्ती अब तोहार हँसी उड़ावत अहइँ। 58अब तोहका ओन भयंकर पापन बरे कस्ट उठावइ पड़ी जउन तू किहा।” यहोवा इ सबइ बातन कहेस।

59मोर सुआमी यहोवा, इ सबइ चिजियन कहेस, “तू आपन बियाह क प्रतिग्या भंग किहेउ। तू हमरी वाचा क आदर नाहीं किहा। अब मई तोहार बरे भी उहइ करब। 60किन्तु मोका उ वाचा याद अहइ जउन उ समइ कीन्ह गइ रही जब तू बच्ची रहिउ। मई तोहरे संग वाचा किहे रहेउँ जउन सदा चलइवाली रही। 61मई तोहरी बहिनियन क तोहरे लगे लिआउब अउर मई ओनका तोहार बिटियन बनावब। इ हमरी वाचा में नाहीं रहा, किन्तु मई इ तोहरे बरे करब। तब तू ओन भयंकर पापन क याद करबिउ, जेनका तू किहा अउर तू लजाइ जाबिउ। 62एह बरे मई तोहरे संग वाचा करब, अउर तू जानबिउ कि मई यहोवा अहउँ। 63मई तोहरे बरे नीक रहब जेहसे तू मोका याद करबिउ अउर ओन पापन बरे लज्जित होइ जउन तू किहा। मई तोहका सुद्ध करब अउर तोहका फुन कबहुँ लज्जित नाहीं होइ पड़ी।” मोर सुआमी यहोवा इ सबइ बातन कहेस।

**17** तब यहोवा क वचन मोका मिला। उ कहेस, 2“मनई क पूत, इस्त्राएल क परिवार क इ कहानी सुनावा। ओनसे पूछा कि एकर का मतलब अहइ? 3ओनसे कहा मोर सुआमी यहोवा इ कहत ह:

एक तु बिसाल उकाब (नबूकदनेस्सर) बिसाल पखना सहित लबानोन में आवा। उकाब क रंग बिरंगे पखना रहेन। उ देवदार क बृच्छ क चोटी क तोड़ दिहस।

4उ उकाब उ बिसाल देवदार बृच्छ क साखा, क माथे क तोड़ डाएस अउर ओका ब्यापारीयो देस को लइ गवा। उकाब बइपारियन क नगर में उ साखा क राखेस।

5तब उकाब तोहार भुइँया क कछू बीजन क लिहस। उ ओनका उपजाऊ भुइँया में बोएस। तब उ ओनका हुआ बोएस जहाँ पानी बहोत रहा, उहइ तरह स जइसे तू बैत क बृच्छ बगावत ह।

6बिआ उगेन अउर उ सबइ अंगूर क बेल बनेन। इ बेल अच्छी रही। बेल जँची नाहीं रही। किन्तु इ बड़के छेत्र क ढकइ बरे फइल गइ। बेल क तने बनेन अउर नान्ह बेलन बहोत लम्बी होइ गइ।

7तब दूसर पखनावाला उकाब अंगूरे क बेल क लखेस। उकाब क लम्बे पखना रहेन। अंगूरे क बेल चाहत रही कि इ नवा उकाब ओकर देख-भाल करइ। एह बरे इ आपन जड़न क उ उकाब कइँती फइलाएस। एकर साखन इ

उकाब कईती फइलिन। एकर साखन उ खेत स फइलिन जहाँ इ बोइ गइ रही। अंगूर क बेल चाहत रही कि नवा उकाब ओका पानी देइ।

8अंगूरे क बेल अच्छे खेते में बोइ गइ रही। इ प्रभूत जले क लगे बोइ गइ रही। इ साखन अउ फल पइदा कइ सकत रहिन। इ एक बहोत अच्छी अंगूरे क बेल होइ सकत रही।”

9मोर सुआमी यहोवा इ सबइ बातन कहेस, “का तू समुझत अहा कि बेल सफल होइ? नाहीं। नवा उकाब बेल क जमीन स उखाड़ि देइ। अउ पंछी बेल क जड़न क तोड़ देइ। उ सारे अंगूरन क खाइ जाइ। तबइ नई पत्तियन झुरइहीं अउर मरि जइहीं। उ बेल बहोत कमजोर होइ। इ बेल क जड़ स उखाड़ि बरे सक्तीसाली अस्त्र अउ सस्त्र या सक्तीसाली रास्ट्र क जरूरत नाहीं होइ।

10का इ बेल हुवाँ बढ़ी जहाँ बोइ गइ अहइ? नाहीं, गरम पुरवाई चली अउर बेल झुराई अउर मरि जाई। इ हुवाँ मरी जहाँ इ बोई गइ रही।”

11यहोवा क वचन मोका मिला। उ कहेस, 12“इ कहानी क बियाख्या इस्राएल क लोगन क बीच करा, उ पचे सदा मोरे खिलाफ जात हीं। ओनसे इ कहा: पहिला उकाब बाबुल क राजा अहइ। इ यरूसलेम आवा अउर राजा तथा दूसर प्रमुखन क लइ गवा। उ ओनका बाबुल लिआवा। 13तब नबूकदनेस्सर राजा क परिवार क एक मनई क संग सन्धि किहस। नबूकदनेस्सर उ मनई क प्रतिग्या करइ बरे मजबूर किहस। इ तरह इ मनई नबूकदनेस्सर बरे राजभक्त रहइ क प्रतिग्या किहस। नबूकदनेस्सर इ मनई क यहूदा क नवा राजा बनाएस। तब उ सबहिं सक्तीसाली मनइयन क यहूदा स बाहरे निकारेस। 14इ तरह यहूदा एक दुर्बल राज बन गवा, जउन राजा नबूकदनेस्सर क खिलाफ नाहीं उठ सकत रहा। यहूदा क नवा राजा क संग नबूकदनेस्सर जउन सन्धि किहे रहा ओकर पालन करइ बरे लोग मजबूर कीन्ह गएन। 15किन्तु इ नवा राजा कउनो भी तरह नबूकदनेस्सर क खिलाफ बिद्रोह करइ क जतन किहस। उ मदद माँगइ बरे मिस्र क दूत पठाएस। नवा राजा बहोत स घोड़न अउर फउजी माँगस। इ दसा में, का तू समुझत अहा कि यहूदा क राजा सफल होइ? का तू समुझत अहा कि नवा राजा क लगे पर्याप्त सक्ती होइ कि उ सन्धि क तोड़िके दण्ड स बचि सकी?”

16मोर सुआमी यहोवा कहत ह, “मई आपन जिन्गी क किरिया खाइके वचन देत हउँ कि इ नवा राजा बाबुल में मरी। नबूकदनेस्सर इ मनई क यहूदा क नवा राजा बनाएस। किन्तु इ मनई नबूकदनेस्सर क संग कीन्ह भइ आपन प्रतिग्या तोड़ेस। इ नवा राजा सन्धि क उपेच्छा किहस। 17मिस्र क राजा यहूदा क राजा क रच्छा करइ मैं समर्थ नाहीं होइ। उ बड़की गनती मैं फउज पठइ सकत ह किन्तु मिस्र क महान सक्ती यहूदा क रच्छा नाहीं कइ सकी। नबूकदनेस्सर क फउजन नगर पइ अधिकार बरे कच्ची सड़कियन अउर माटी क बनइहीं। 18किन्तु यहूदा क राजा बचिके निकर नाहीं सकी। काहेकि उ आपन सन्धि क उपेच्छा किहस। उ नबूकदनेस्सर क दीन्ह आपन बचन क

तोड़ेस।” 19मोर सुआमी यहोवा इ वचन देत ह, “मई आपन जिन्गी क किरिया खाइके प्रतिग्या करत हउँ कि मई यहूदा क राजा क दण्ड देब। काहेकि उ मोर चितउनियन क उपेच्छा किहस। उ हमार सन्धि क तोड़ेस। 20मई आपन जाल फइलाउब अउर उ एहमा फँसी। मई ओका बाबुल लिआउब तथा मई ओका उ जगह मैं दण्ड देब। मई ओका दण्ड देब काहेकि उ मोरे खिलाफ उठा। 21मई ओकर फउज क नस्त करब। मई ओकर सर्वोत्तम फउजियन क नस्त करब अउर बचे भए लोगन क हवाँ में उड़ाइ देब। तब तू जानब्या कि मई यहोवा हउँ अउर मई इ सबइ बातन तोहसे कहे रहिउँ।”

22मोर सुआमी यहोवा इ सबइ बातन कहे रहा:

“मई लम्बे देवदार क बृच्छ स एक डार लेब। मई बृच्छ क चोटी स एक नान्ह डार लेब। अउर मई खुद ओका बहोत ऊँच पहाड़े पइ बोउब।

23मई खुद एका इस्राएल मैं ऊँच पहाड़े पइ लगाउब। इ डार एक बृच्छ बन जाइ। एकर डारन निकरिहीं अउर एहमों फल लगीहीं। इ एक सुन्नर देवदार बृच्छ बन जाइ। अनेक पंछी एकर डारन पइ बइठा करिहीं। अनेक पंछी एकर डारन क खाले छाया मैं रहिहीं।

24तब दूसर बृच्छ ओका जनिहीं कि मई ऊँच बृच्छन क भुईया पइ गिरावत हउँ। अउर मई नान्ह बृच्छन क बढ़ावत अउर ओनका लम्बा बनावत हउँ। मई हरे बृच्छन क झुनाइ देत हउँ। अउर मई झुरान बृच्छन क हरा करत हउँ। मई यहोवा हउँ। यदि मई कहउँ कि मई कछू करब तउ मई ओका जरूर करब।”

**18** यहोवा क वचन मोका मिला। उ कहेस, 2“तू लोग इ कहावत क दोहरावत रहत ह। काहे? तू कहत ह:

पुरखन खट्टा अंगूर खाएन,  
किन्तु बच्चन क खट्टा स्वाद मिला।

3किन्तु मोर सुआमी यहोवा कहत ह, “मई आपन जिन्गी क किरिया खाइके प्रतिग्या करत हउँ कि इस्राएल क लोग अब भविस्स मैं इ कहावत क अब कबहुँ उपयोग नाहीं करब्या। 4मई सबहिं मनइयन क संग समान बेउहार करब। इ महत्वपूर्ण नाहीं होइ कि उ मनई महतारी बाप अहइ अथवा सन्तान। जउन मनई पाप करी उ मनई मरी।

5“जदि कउनो मनई भला अहइ, तउ उ जिअत रही। उ मनई लोगन क संग नीक बेउहार करत ह। 6उ भला मनई पर्वतन पइ नाहीं जात अउर लबार देवतन क चढ़ाए गए भोजन मैं कउनो हींसा नाहीं बाँटत। उ इस्राएल मैं ओन गन्दे देवतन क मूरतियन क स्तुति नाहीं करत। उ आपन पड़ोसी क मेहरारू क संग बिभिचार क पाप नाहीं करत। उ आपन मेहरारू क संग, ओकरे मासिक धरम क समय, सरीर क सम्बंध नाहीं करत। 7उ भला मनई लोगन स अनुचित लाभ नाहीं उठावत। जदि कउनो मनई ओहसे मुद्रा रिण लेत ह

तउ उ भला मनई गिरवी धइके दूसर मनई क मुद्रा देत ह अउर जब उ मनई ओका भूगतान कइ देत ह तउ भला मनई ओका गिरवी वस्तु वापस कइ देत ह। भला मनई भूखे लोगन क भोजन देत ह अउर उ ओन लोगन क वस्त्र देत ह जेनकर ओनका जरूरत अहइ। 8जदि कउनो मुद्रा रिण लेइ चाहत ह तउ भला मनई ओका उ रिण देत ह। उ रिण क ब्याज नहीं लेत। भला मनई कुटिल होइ स इन्कार करत ह। उ हर मनई क बरे सदा भला रहत ह। लोग ओह पइ बिस्वास कइ सकत हीं। 9उ मोरे नेमन क पालन करत ह। उ मोरे निर्णयन क समुझत ह अउर भला एव बिस्वास क जोग्य होब सीखत ह। काहेकि उ भला मनई अहइ, एह बरे उ जिअत रही। यहोवा परमेस्सर इ कहत ह।

10“किन्तु उ मनई क कउनो अइसा पूत होइ सकत ह, जउन ओन नीक कामन में स कछू भी न करत होइ। पूत चिजियन क चुराइ सकत ह अउर लोगन क हतिया कइ सकत ह। 11पूत एन बुरे कामन में स कउनो भी करम कइ सकत ह। उ पहाड़न पइ जाइ सकत ह अउर लबार देवतन क चढ़ाए गए भोजन में हीसा बटाइ सकत ह। उ पापी पूत आपने पड़ोसी क मेहरारू क संग बिभिचार करइ क पाप कइ सकत ह। 12उ गरीब अउर बेसहारा लोगन क संग बुरा बेउहार कइ सकत ह। उ लोगन स अनुचित लाभ उठाइ सकत ह। उ गिरवी चीज क तब्बई न लउटावइ जब कउनो मनई आपन रिण क भुगतान कइ चुका होइ। उ पापी पूत ओन गन्दी देवमूरतियन क पराथना कइ सकत ह अउर दूसर भयंकर पाप भी कइ सकत ह। 13जब उ लोगन क ऋण पइ धन देत ह तउ उ बियाज लेत ह। एह बरे उ पापी पूत जिअत नहीं रही। उ भयंकर पाप किहेस एह बरे मार दीन्ह जाइ अउर आपन मउत बरे उ खुद ही जिम्मेदार अहइ।

14“होइ सकत ह उ पापी पूत क भी एक पूत होइ। किन्तु इ पूत आपन बाप क जरिये कीन्ह गए पापन क लखि सकत ह अउर उ आपन पिता क तरह रहइ स इन्कार कइ सकत ह। उ मनई लोगन क संग भला बेउहार करत ह। 15उ मनई पहाड़न पइ नहीं जात, न ही लबार देवतन क चढ़ाए गए भोजन में हीसा बटावत ह। उ इस्राएल में ओन गन्दी देवमूरतियन क पराथना नहीं करत। उ आपन पड़ोसी क मेहरारू क संग बिभिचार क पाप नहीं करत। 16उ मनई लोगन स अनुचित लाभ नहीं उठावत। जदि कउनो मनई ओहसे रिण लेत ह तब भला पूत चीज गिरवी धरत ह अउर उ मनई क मुद्रा देत ह अउर जब उ मनई वापस भुगतान करत ह तउ भला मनई गिरवी चीज वापस कइ देत ह। भला मनई भूखन क भोजन देत ह अउर उ ओन लोगन क वस्त्र देत ह जेनका ओकर आवश्यकता अहइ। 17उ गरीबन क सहायता करत ह जदि कउनो मनई रिण लेइ चाहत ह तउ भला पूत ओका मुद्रा उधार दइ देत ह अउर उ उ रिण पइ बियाज नहीं लेत। भला पूत मोर नेमन क पालन करत ह और मोरे नेमन क मुताबिक चलत ह। उ भला पूत आपन पिता क पापन क कारण मारा नहीं जाइ। उ भला पूत जिअत रही। 18पिता लोगन क चोट पहोंचाइ सकत ह अउर चिजियन चुराइ सकत ह। उ आपन

लोगन क बीच कबहुँ कछू नीक कारज नहीं किहस। उ बाप आपन पापन क कारण मरी। किन्तु पूत आपन पिता क पापन बरे दण्डित नहीं होइ।

19“तू पूछ सकत ह, ‘बाप क पाप बरे पूत दण्डित काहे नहीं होइ?’ एकर कारण इ अहइ कि पूत भला करत ह अउर निआव क कार्य करत ह। उ बहोत सावधानी स मोरे नेमन क पालन करत ह। एह बरे उ जिअत रही। 20जउन मनई पाप करत ह उहइ मनई मारि डावा जात ह। एक पूत आपन पिता क पापन बरे दण्डित नहीं होइ अउर एक पिता आपन पूत क पापन बरे दण्डित नहीं होइ। एक भले मनई क भलाई क प्रतिफल दीन्ह जाब्या अउर बुरे मनई क बुराई क दण्ड दीन्ह जाब्या।

21“इ स्थिति में जदि कउनो बुरा मनई आपन जीवन क्रम बदल देत ह तउ उ जिअत रही, मरी नहीं उ मनई आपन किए करमन क फुन करब छोड़ सकत ह। उ बहोत होसियारी स मोर सबहिं नेमन क पालन करब सुरू कइ सकत ह। उ निआउ प्रिय अउर भला होइ सकत ह। 22परमेस्सर ओकर ओन सबहिं पापन क याद नहीं राखी जेनका उ किहेस। परमेस्सर सिरिफ ओकर भलाई क याद करी, एह बरे उ मनई जिअत रही।”

23मोर सुआमी यहोवा कहत ह, “मई बुरे लोगन क मरइ देब नहीं चाहत। मई चाहत हउँ कि उ पचे आपन जिन्नगी क बदलई, जेहसे उ पचे जिअत रहि सकई।

24“अइसा भी होइ सकत ह, कि भला मनई न रहि जाइ। उ आपन जिन्नगी क बदल सकत ह अउर ओन भयंकर पापन क करब सुरू कइ सकत ह जेनका बुरे लोग बीते जमाने में किहे रहेन। का इ मनई जिअत रहब? नहीं! एह बरे जदि उ भला मनई बदलन ह अउर बुरा बन जात ह तउ परमेस्सर उ मनई क कीन्ह नीक कामन क याद नहीं राखी। परमेस्सर इहइ याद राखी कि उ मनई ओकरे खिलाफ होइ गवा अउर उ पाप करब सुरू किहस। एह बरे उ मनई आपन पापन क कारण मरी।”

25परमेस्सर कहेस, “तू लोग कहि सकत ह, ‘परमेस्सर हमार सुआमी निआव स पूर्ण नहीं अहइ।’ किन्तु इस्राएल क परिवारो, सुना। का इ मोर रास्ता अहइ जउन कि सही नहीं अहइ? नहीं! तोहार रास्ता सही नहीं अहइ। 26जदि एक भला मनई बदलत ह अउर पापी बनत ह तउ ओका आपन कीन्ह गए बुरे कामन क कारण मरब ही चाही। 27जदि कउनो मनई बदलत ह अउर भला अउ निआउ क प्रिय होत ह तउ उ आपन जिन्नगी क बचाई। उ जिअत रही। 28उ मनई लखेस कि उ केतना बुरा रहा अउर मोरे लगे लउटा। उ ओन बुरे पापनक करब तजि दिहस जउन उ भूतकाल में किहे रहा। एह बरे उ जिअत रही। उ मरी नहीं।”

29इस्राएल क लोग कहेन, “इ निआउ स पूर्ण नहीं अहइ। मोर सुआमी यहोवा निआउ स पूर्ण नहीं अहइ।”

परमेस्सर कहेस, “का इ मोर रास्ता अहइ जउन कि सही नहीं अहइ? नहीं! तोहार रास्ता सही नहीं अहइ। 30एह बरे इस्राएल क परिवार, मई हर एक मनई क संग निआउ सिरिफ ओनके ओन क करमन क अनुसार करब जेनका उ

मनई करत ह।" एह बरे मोर लगे वापिस आ अउर अपने सब अपराध स पस्चाताप करा अउर ओनका करइ बन्द करा। ओन भयंकर चिजियन क आपन बिनास क कारण बनइ नाहीं द्या। 31ओन सबहिं भयंकर मूरतियन क लोकाइ द्या जेनका तू पचे बनाया, उ सबइ तोहसे सिरिफ पाप करवावत हीं। आपन हिरदय अउर आतिमा क बदला। इस्राएल क लोगो, तू पचे आपन क काहे मरि जाइ देइ चाहत अहा? 32मई तू पचन्क मारइ नाहीं चाहत हउँ। तू पचे हमारे लगे आवा अउर रहा।" उ सबइ बातन मोर सुआमी यहोवा कहेस।

**19** यहोवा मोहसे कहेस, "तू पचन्क इस्राएल क प्रमुखन क बारे में इ करूण गीत क गावइ चाही।

2"कइसी सिंहिनी अहइ तोहार पचन्क महतारी? उ सिंहन क बीच एक ठु सिंहिनी रही। उ जवान सिंहन में घिरी रहत रही अउर आपन बचवन क लालन-पालन करत रही।

3उ आपन बचवन में स एक ठु क लालन-पालन किहेस। उ एक ठु जवान सिंह होइ गवा ह। उ आपन भोजन पाउव सीख लिहस ह। उ एक मनई क मारेस अउर खाइ लिहेस।

4लोगन ओका गरजत सुनेन अउर उ पचे ओका आपन जालि में फँसाइ लिहस। उ पचे ओकरे मुँहे में नकेल डाएन अउर जवान सिंह क मिस्त्र लइ गएन।

5सिंह महतारी क आसा रही कि सिंह बच्चा प्रमुख बनी। किन्तु अब ओकर सारी आसा लुप्त होइ गइन्। एह बरे आपन बचवन में स उ एक दूसर क लिहस। ओका उ सिंह होइ क प्रसिच्छण दिहस।

6उ जवान सिंहन क संग सिकार क निकरा। उ एक ठु बलवान जवान सिंह बना। उ आपन भोजन क धरब सीखेस। उ एक ठु मनई क मारेस अउर ओका खाएस।

7उ महलन पइ हमला किहस। उ नगरन क बर्बाद किहस। उ देस क हर एक मनई तब भय स अवाक होत रहा। जब उ ओकर गरजत सुनत रहा

8तब ओकरे चारिहुँ कइँती रहइवाले लोग ओकरे बरे जालि बिछाएन अउर उ पचे ओका आपन जालि में फँसाइ लिहन।

9उ पचे ओह पइ नकेल लगाएन अउर ओका बंद कइ दिहन। उ पचे ओका अपने जालि में बंद रखेन। इ तरह ओका उ पचे बाबुल क राजा क लगे लइ गएन। अब, तू पचे इस्राएल क पर्वतन पइ ओकर गरजब सुन नाहीं सकत्या।

10तोहार पचन्क महतारी एक ठु अंगूरे क बेल जइसी रही, जेका पानी क लगे बोवा गवा रहा। ओकरे पास काफी पानी रहा, एह बरे उ अनेक सक्तीसाली बेलन पइदा किहस।

11तब उ एक बड़की डार पइदा किहस, उ डार टहरइ क छड़ी जइसी रही। उ डार राजा क राजदण्ड जइसी रही। बेल ऊँची, अउर ऊँच होत गइ। एकर ढेर डारन रहिन अउर उ बादरन क छुअइ लाग।

12किन्तु बेल क जड़ स उखाइ दीन्ह गवा, अउर ओकर भुईँया पइ बहाइ दीन्ह गवा। गरम पुरवइया हवा चली अउर

ओकरे फलन क झुराइ दिहस सक्तीसाली डारन टूट गइन्, अउर ओनका आगी में फेंक दीन्ह गवा।

13किन्तु उ अंगूरे क बेल अब रेगिस्ताने में बोइ गइ अहइ। इ बहोत डुरान अउर पियासी धरती अहइ।

14बिसाल डारे स आगी फइली। आगी ओकर सारी टहनियन अउर फलन क बारि दिहस। एह बरे कउनो सहारा क सक्तीसाली कुबरी नाहीं रही। कउनो राजा क राजदण्ड नाहीं रहा।' इ मउत क बारे में करूण-गीत रहा अउर इ मउत क बारे में करूणगीत क रूप में गावा गवा रहा।"

**20** एक दिन इस्राएल क अग्रजन में स कछू मोरे लगे यहोवा क राय पूछइ आएन। इ देस-निकारे क सतवाँ बरिस क पाँचवा महीना क दसवाँ दिन रहा। अग्रज मोरे समन्वा बइठेन।

2तब यहोवा क बचन मोरे लगे आवा। उ कहेस, 3"मनई क पूत, इस्राएल क अग्रजन स बात करा। ओनसे कहा, 'मोर सुआमी यहोवा, इ सबइ बातन बतावत ह: का तू लोग मोर सलाह माँगइ आए रहया? यदि तू लोग आवा हवा तउ मई तू पचन्क इ नाहीं देब। मोर सुआमी यहोवा इ बात कहेस।' 4हे मनई क पूत! का तू ओन लोगन क निगर्ण करब? का तू ओन लोगन क परखब? तोहका ओनका ओन भयंकर पापन क बारे में बतावइ चाही जउन ओनकर पुरखन किहे रहेन। 5तोहका ओनसे जरूर कहइ चाही, 'मोर सुआमी यहोवा इ कहत ह: जउने दिने मई इस्राएल क चुनेउँ, मई आपन हाथ याकूब क परिवार क ऊपर उठाएउँ। मई आपन आपन क ओन पइ परगट किहेउँ। अउर मई मिस्त्र में ओनसे एक ठु प्रतिग्या किहेउँ। मई आपन हाथ उठाएउँ अउर कहेउँ: मई तोहार परमेस्सर यहोवा अहउँ। 6उ दिन मई तू पचन्क मिस्त्र स बाहेर लिआवइ के उ देस में लाएउँ जेका क वचन दिहे रहेउँ मई तू पचन्क देइ चाहत रहेउँ। उ एक सुन्नर देस रहा जउन दुध अउर मधु स भरा रहा। इ सबहिं देसन स जियादा सुन्नर रहा।

7"मई, इस्राएल क परिवार स ओनकर भयंकर देवमूरतियन के लोकावइ बरे कहेउँ। मई, ओन मिस्त्र क गन्दी देवमूरतियन क संग ओनका गन्दा न होइ बरे कहेउँ। मई तोहार पचन्क परमेस्सर यहोवा अहउँ।" 8किन्तु उ सबइ मोरे विरूद्ध होइ गएन अउर उ पचे मोर एक न सुनेन। उ पचे आपन भयंकर देवमूरतियन क नाहीं लोकाएन। उ पचे मिस्त्र क आपन घिनौनी देवमूरतियन नाहीं छोड़ेस। एह बरे मई (परमेस्सर) ओनका मिस्त्र में नस्ट करइ क निर्णय किहेउँ अर्थात मई आपन किरोध क पूरी सक्ती क ओनका अनुभव करवाइ चाहत रहेउँ। 9किन्तु मई ओनका नस्ट नाहीं किहेउँ। मई लोगन स जहाँ उ पचे रहत रहेन पहिले ही कहि चुके रहेउँ कि मई आपन लोगन क मिस्त्र स बाहेर लइ जाबउँ। मई आपन अच्छे नाउँ क समाप्त नाहीं करइ चाहत, एह बरे मई ओन लोगन क समन्वा इस्राएलियन क नस्ट नाहीं किहेउँ। 10मई इस्राएल क परिवार क मिस्त्र स बाहेर लिआएउँ। मई ओनका रेगिस्ताने में लइ गएउँ। 11तब मई ओनका आपन नेम दिहेउँ। मई ओनका सारे नेम बताएउँ। यदि कउनो मनई ओन नेमन क पालन करी तउ उ जिअब।

12मई ओनका विस्त्राम क सबहि बिसेस दिनन क बारे में भी बताएउँ। उ सबइ पवितर दिन ओनके अउ मोरे बीच बिसेस प्रतीक रहेन। उ सबइ इ संकेत करत रहेन कि मई यहोवा हउँ अउर मई ओनका आपन बिसेस लोग बनावत हउँ।

13“किन्तु इस्राएल क परिवार रेगिस्ताने में मोरे खिलाफ उठ खड़ा भवा। उ पचे मोरे नेमन क अनुसरण नाहीं किहन। उ पचे मोरे नेमन क पालन करइ स इनकार किहन अउर उ सबइ नेम नीक अहई। जदि कउनो मनई ओनकर पालन करी तउ उ जिअब। उ पचे मोर विसेस विस्त्राम क खास दिनन क दूसित किहस माना ओनकर कउनो महत्व न होइ। उ पचे ओन दिनन क अनेकन दाई दूसित करत रहेन। मई रेगिस्ताने में ओनका नस्ट करइ क निहचइ किहेउँ अर्थात आपन किरोध क पूरी सक्ती क अनुभव ओनका करावइ चाहेउँ। 14किन्तु मई ओनका नस्ट नाहीं किहेउँ। दूसर रास्ट्रन मोका इस्राएल क मिस्त्र स बाहेर लिआवत लखेन। मई आपन अच्छे नाउँ क खतम नाहीं करइ चाहत रहेउँ, एह बरे मई ओन रास्ट्रन क समन्वा इस्राएल क नस्ट नाहीं किहेउँ। 15मई रेगिस्ताने में ओन लोगन क एक अउर वचन दिहेउँ कि मई ओनका उ प्रदेस में नाहीं लिआउब जेका मई ओनका देत रहत हउँ। उ एक सुन्नर भुईया रहा जहाँ दूध अउर सहद क नदी बहत रहा। इ सबहि देसन स जियादा सुन्नर रहा।

16“इस्राएल क लोग मोरे नेमन क पालन करइ स इनकार किहन। उ पचे मोरे नेमन क अनुसरण नाहीं किहन। उ पचे मोरे विस्त्राम क दिनन क अइसे लिहन माना उ पचे महत्व नाहीं रखतेन। उ पचे इ सबइ काम एह बरे किहन कि ओनका हिरदय ओन गन्दी देवमूरतियन क होइ चुका रहा। 17किन्तु मोका ओन पइ करूणा आइ, एह बरे मई ओनका नस्ट नाहीं किहेउँ। मई ओनका रेगिस्ताने में पूरी तरह नस्ट नाहीं किहेउँ। 18मई रेगिस्तान में ओनकर बच्चन स बातन किहेउँ। मई ओनसे कहेउँ, “आपन महतारी बाप जइसे न बना। ओनकर गन्दी देवमूरतियन स आपन आप क दूसित न करा। ओनकर नेमन क अनुसरण न करा। ओनकर आदेसन क पालन क करा।

19“मई यहोवा हउँ। मई तोहार पचन्क परमेस्सर हउँ। मोर नेमन क पालन करा। मोरे आदेसन क माना। उ काम करा जउन मई कहउँ। 20इ प्रदर्शित करा कि मोर विस्त्राम क दिन तोहरे बरे महत्वपूर्ण अहई। याद राखा कि उ सबइ तोहरे अउर हमरे बीच बिसेस प्रतीक अहई। मई यहोवा अहउँ अउर उ सबइ पवितर दिन इ संकेत करत हीं कि मई तोहार पचन्क परमेस्सर अहउँ।”

21“किन्तु उ सबइ बच्चन मोरे विरूद्ध होइ गएन। उ पचे मोर नेमन क पालन नाहीं किहन। उ पचे मोर आदेस नाहीं मानेन। उ पचे उ सबइ काम नाहीं किहेन जउन मई ओनसे कहेउँ उ सबइ नीक नेम रहेन। जदि कउनो ओनकर पालन करी तउ उ जिअब। उ पचे मोर बिस्त्राम क बिसेस दिनन क दूसित किहस माना ओनकर कउनो महत्व न होइ। एह बरे मई ओनका रेगिस्तान में पूरी तरह नस्ट करइ क निहचइ किहेउँ जेहसे उ पचे मोर किरोध क पूरी सक्ती क

महसूस कइ सकई। 22लेकिन मई आपन क रोक लिहेउँ। दूसर रास्ट्रन मोका इस्राएल क मिस्त्र स बाहेर लिआवत देखेन। इसलिए मई इस्राएल क बिनास नाहीं किहेउँ एह बरे दूसर रास्ट्रन क समन्वा मोर नाउँ अपवितर नाहीं होइ। 23एह बरे मई रेगिस्ताने में ओनका एक अउर बचन दिहेउँ। मई ओनका अलग-अलग रास्ट्रन में बिखेरइ अउ दूसर अनेक देसन में पठवइ क प्रतिग्या किहेउँ।

24“इस्राएल क लोग मोरे आदेसन क पालन नाहीं किहेन। उ पचे मोरे नेमन क मानइ स इनकार कइ दिहेन। उ पचे मोर विस्त्राम क दिनन क अइसे लिहन माना उ पचे महत्व न रखत होइ। उ पचे आपन पुरखन क गन्दी देवमूरतियन क पूजेन। 25एह बरे मई ओनका उ सबइ नेम दिहेउँ जउन नीक नाहीं रहेन। मई ओनका उ सबइ आदेस दिहेउँ जउन ओनका सजीव नाहीं कइ सकत रहेन। 26मई ओनका आपन भेंटन स अपने आप क गन्दा बनावइ दिहेउँ। उ पचे आपन पहिलउटी क पइदा गदेली तलक क बलि चढ़ाउब सुरू कइ दिहन। इ तरह मई ओन लोगन क नस्ट करइ चाहेउँ। तब उ पचे समुझेन कि मई यहोवा अहउँ। 27एह बरे मनई क पूत, अब इस्राएल क परिवार स कहा। ओनसे कहा ‘मोर सुआमी यहोवा इ सबइ बातन कहत ह: इस्राएल क लोग मोरे खिलाफ बुरी बातन किहन अउर मोरे खिलाफ बुरी जोजनन बनावेन। 28किन्तु मई एकरे होत भए भी, ओनका उ प्रदेस में लिआएउँ जेका देइ क बचन मई दिहे रहेउँ। उ पचे ओन पहाड़ियन अउर हरिअर बृच्छन क लखेन एह बरे उ पचे ओन सबहि ठउरन पइ पूजा करइ गएन। उ पचे आपन ओन बलियन क लिहेन जउन मोका किरोधित करत ह अउर ओन सबइ ठउरन पइ चढ़ाएन। उ पचे आपन उ सबइ बलियन चढ़ाएन जउन मथुर गन्धवाली रहिन अउर उ पचे आपन पेय भेंटन ओन ठउरन पइ चढ़ाएन। 29मई इस्राएल क लोगन स पूछेउँ कि उ पचे ओन ऊँच ठउरन पइ काहे जात अहई। एह बरे आजु तलक उ ऊँचे स्थान कहलावत हीं।”

30परमेस्सर कहेस, “इस्राएल क लोग ओन सबहि बुरे कामन क किहन। एह बरे इस्राएल क लोगन स बात करा। ओनसे कहा, ‘मोर सुआमी यहोवा इ कहत ह: तू लोग ओन कामन क कइके अपने क गन्दा बनाइ लिहा ह जेनका तोहार पुरखन किहन। तू पचे एक ठु रण्डी क नाई काम किहा ह। तू पचे ओन भयंकर देवतन क संग मोका तजि दिहा ह जेनकर पूजा तोहार पचन्क पुरखन करत रहेन। 31तू पचे उहइ तरइ क भेंट चढ़ावत अहा। तू पचे आपन बच्चन क आगी में लबार देवतन क भेंट क रूप में डावत अहा। तू पचे अपने क आजु भी गन्दी देवमूरतियन स गन्दा बनावत अहा। का तू पचे फुरइ सोचत अहा कि मई तू पचन्क अपने लगे आवइ देब अउर आपन सलाह माँगइ देब? मई यहोवा अउर सुआमी हउँ। मई आपन जिन्नगी क किरिया खाइके प्रतिग्या करत हउँ कि मई तोहरे पचन्क प्रसन क जवाब नाहीं देबउँ अउर तू पचन्क सलाह नाहीं देबउँ। 32तू पचे कहत ह कि तू पचे दूसर रास्ट्रन क तरह होवइ चाहत ह अउर काठ अउ पाथर क खण्डन क पूजा करत अहा। इ नाहीं होइ चाही।”

33मोर सुआमी यहोवा कहत ह, “आपन जिन्नगी क किरिया खाइके मई प्रतिग्या करत हउँ कि मई तोहरे पचन्क ऊपर राजा क तरह सासन करब। मई आपन सक्तीसाली भुजन क उठाउब अउर तू पचन्क दण्ड देब। मई तोहरे पचन्क बिरूद्ध आपन किरोध परगट करब। 34मई तू पचन्क एन दूसर रास्ट्रन स बाहेर लिआउब। मई तू लोगन क ओन रास्ट्रन में बिखेरेउँ। किन्तु मई तू लोगन क एक संग बटोरब अउर एन रास्ट्रन स वापस लउटाउब। किन्तु मई आपन सक्तीसाली भुजन उठाउब अउर तू पचन्क दण्ड। मई तोहरे पचन्क खिलाफ आपन किरोध परगट करब। 35मई पहिले क तरह तू पचन्क रेगिस्ताने में लइ चलब। किन्तु इ उ ठउर होइ जहाँ दूसर रास्ट्र रहत हीं। हम आमने-सामने खड़ा होब अउर मई तोहरे पचन्क संग निआउ करब। 36मई तोहरे पचन्क संग वइसा ही निआउ करब जइसा मई तोहरे पचन्क पुरखन क संग मिस्र क मरूभूमि में किहे रहेउँ।” मोर सुआमी यहोवा इ सबइ बातन कहेस।

37“मई तोहका आपन भेंड़ क नाई आपन सज़ा क छड़ी क तेल स गुजारउब। मई तोहका आपन करार क पालन करइ बरे मज़बूर करब। 38मई ओन सबहिं लोगन क दूर करब जउन मोरे खिलाफ खड़े भएन अउर जउन मोरे खिलाफ पाप किहेन। मई ओन लोगन क तोहरे पचन्क जन्मभूमि स दूर करब। उ सबइ इस्राएल देस में कबहुँ नाहीं लउटिहीं। तब तू पचे जनब्या कि मई यहोवा हउँ।”

39इस्राएल क परिवार, अब सुना मोर सुआमी यहोवा इ कहत ह, “जदि कउनो मनई मोरे सुनइ क बजाए आपन गन्दी देवमूरतियन क पूजा करइ चाहत ह तउ ओका उहइ करइ द्या। किन्तु तू पचे प्रतिस्था क भविस्स में आपन गन्दी देवमूरतियन क भेंट देब जारी रखइ क अउर जियादा नास नाहीं कइ सकब्या।”

40मोर सुआमी यहोवा कहत ह, “लोगन क मोर सेवा बरे मोर पवितर पर्वत इस्राएल क ऊँच पर्वत पइ आवइ चाही। इस्राएल क सारा परिवार आपन भुईया पइ होइ उ पचे हुवाँ अपने देस में होइहीं। इ उ जगह अहइ जहाँ तू पचे आइ सकत ह अउर तू पचन्क उ ठउरे पइ मोका आपन भेंट चढ़ावइ आउब चाही। तू पचन्क आपन फसल क पहिला भाग हुवाँ उ ठउरे पइ लिआवइ चाही। तू पचन्क आपन सबहिं पवितर भेंटन हुवई लिआवइ चाही। 41तब तोहार पचन्क मधुर गन्ध स मई खुस होबउँ। इ सबइ होइ जब मई तू पचन्क वापस लिआउब। मई तू पचन्क अलग अलग रास्ट्रन में बिखेरे रहेउँ। किन्तु मई तू पचन्क एक संग बटोरब अउर तू पचन्क फुन स आपन बिसेस लोग बनाउब। 42तब तू पचे समुझब्या कि मई यहोवा अहउँ। तू पचे इ तब जनब्या जब मई तू पचन्क इस्राएल देस में वापस लिआउब। इ उहइ देस अहइ जेका मई तोहरे पचन्क पुरखन क देइ क बचन दिहे रहेउँ। 43तउ तू ओन सबइ बुरे करमन क याद रखब्या जेनका तू किहस ह अउर जउन तोहका दूसित कइ दिह ह। अउर तू आपन आप स ही घिना करब ओन सबइ बुरे करम जेनका तू किहस ह। 44इस्राएल क परिवार! तू पचे बहोत बुरे काम किहा अउर तू पचे लोगनक बुरे कामन क कारण नस्ट कइ दीन्ह जाइ

चाही। किन्तु आपन नाउँ क रच्छा क बरे मई उ दण्ड तू लोगन क नाहीं देबउँ जेकर पात्र तू लोग अहा। तब तू पचे जनब्या कि मई यहोवा अहउँ। मोर सुआमी यहोवा इ सबइ बातन कहेस।

45तब यहोवा क बचन मोका मिला। उ कहेस, 46“मनई क पूत, दक्खिन कइँती लखा। नेगव-वन क बिरूद्ध कछू कहा। 47नेगव-वन स कहा, ‘यहोवा क संदेस क सुना। मोर सुआमी यहोवा इ सबइ बातन कहेस: धियान द्या, मई तू पचन्क वन में आगी लगावइ वाला अहउँ। आगी हर एक हरिर अ बृच्छ अउ हर एक झुरान बृच्छ क नस्ट करी। जउन लपटा जरिहीं ओनका बुझावा नाहीं जाइ सकी। दक्खिन स उत्तर तलक सारा देस आगी स जराइ दीन्ह जाइ। 48तब लोग जनिहीं कि मई अर्थात यहोवा आगी लगाएउँ ह। आगी बुझाई नाहीं जाइ सकी।”

49तब मई (यहेजकेल) कहेउँ, “हे मोर सुआमी यहोवा। जदि मई एन बातन क कहत हउँ तउ लोग कहिहीं कि मई ओनका सिरिफ कहानियन सुनावत हउँ। उ पचे नाहीं सोचिहीं कि इ फुरइ घटित होइ।”

**21** एह बरे यहोवा क बचन मोका फुन मिला। उ कहेस, 2“मनई क पूत, यरूसलेम कइँती लखा अउर ओकरे पवितर ठउरन क खिलाफ कछू कहा। मोरे बरे इस्राएल देस क बिरूद्ध कछू कहा। 3इस्राएल देस स कहा, ‘यहोवा इ सबइ बातन कहेस ह: मई तू पचन्क खिलाफ हउँ। मई आपन तरवार मियान स बाहेर निकारब। मई सबहिं लोगन क तोहसे दूर करब, नीक अउ बुरे दुइनउँ क। 4मई नीक अउ बुरे दुइनउँ प्रकार क मनइयन क तू पचन्स अलग करब। मई आपन तरवार मियान स निकारब अउर दक्खिन स उत्तर तलक क सबहिं लोगन क बिरूद्ध ओकर उपयोग करब। 5तब सबहिं लोग जनिहीं कि मई यहोवा हउँ अउर उ पचे जान जइहीं कि मई आपन तरवार मियान स निकारि लिहेउँ ह। मेर तरवार मियान में फुन स नाहीं लउटी।”

6परमेस्सर मोहसे कहेस, “मनई क पूत, टूट हिरदइवाले मनई क तरह सिसका। लोगन क समन्वा कराहा। 7तब उ पचे तोहसे पूछिहीं, ‘तू काहे कराहत अहा?’ तब तोहका कहइ चाही, ‘काहेकि कछू कस्टदायक खबर मिलइवाली अहइ, एह बरे हर एक हिरदय भय स पिघल जाइ। सबहिं हाथ कमजोर होइ जइहीं।’ हर एक अन्तात्मा कमजोर होइ जाइ। हर एक घुटना पानी जइसे होइ जइहीं। धियान द्या, उ बुरी खबर आवति बाटइ। इ सबइ घटनन घटित होइहीं।” मोर सुआमी यहोवा इ सबइ बातन कहेस।”

### तरवार तइयार अहइ

8परमेस्सर क बचन मोका मिला। उ कहेस, 9“मनई क पूत, मोरे बरे लोगन स बातन करा। इ सबइ बातन कहा, ‘मोर सुआमी यहोवा इ कहत ह:

“‘धियान द्या, एक तरवार, एक तेज तरवार अहइ, अउर तरवार चमकाई गइ अहइ।

10तरवार क जान लेइ क बरे तेज कीन्ह गवा रहा। बिजुरी क समान चकाचौंध करइ बरे एका चमकइ गवा रहा। या का हम लोग आपन पूत क राजदण्ड पइ खुसी बनाउब? उ तरवार काठे क बना भवा हरेक हथयार स जियादा मजबूत अहइ।

11एह बरे तरवार क झलकावा गवा अहइ। अब इ प्रयोग कीन्ह जाइ सकी। तरवार तेज कीन्ह गइ अउर झलकाइ गइ रही। अब इ मानइवाले क हाथन में दीन्ह जाइ सकी।

12“मनई क पूत, चिचिआइ अउर नरियाअ। काहेकि तरवार क उपयोग मोरे लोगन अउर इस्त्राएल क सबहिं सासकन क खिलाफ होइ। उ सबइ सासक जुद्ध चाहत रहेन, एह बरे उ पचे हमरे लोगन क संग तब होइहीं जब तरवार आइ। एह बरे आपन जाँघन क पीटा अउर आपन दुःख परगट करइ बरे सोर मचावा। 13काहेकि परीच्छा आवत अहइ। तू काठे क छड़ी स दण्डित होइ स इन्कार किहा का उ ओका आवइ स रोकव?” मोर सुआमी यहोवा इ सबइ बातन कहेस।

14परमेस्सर कहेस, “मनई क पूत, तालियन बजावा अउर मोरे बरे लोगन स इ सबइ बातन करा:

“दुइ दाई तरवार क वार करइ द्या, हौं तीन दाई। इ तरवार लोगन क मारइ बरे अहइ। इ तरवार अहइ, बड़के नर-संहार बरे। इ तरवार लोगन क धार पइ राखी।

15ओनकर हिरदय भय स टेघर जइहीं अउर बहोत स लोग गिरिहीं। बहोत स लोग आपन नगर-दुआर पइ मरिहीं। हौं, तरवार बिजुरी क तरह चमकी। इ लोगन क मारइ बरे झलकाइ गइ अहइ।

16तरवार, धारदार बना। तरवार दाहिन काटा, सोझे समन्वा काटा, बाएँ कईती काटा, जा हर एक ठउरे में जहाँ तोहार धार, जाइ बरे चुनी गइ।

17तब मई ताली बजाउब अउर आपन किरोध परगट करब बन्द कइ देब। मई यहोवा कहि चुका हउँ।”

### यरूसलेम तलक क राहे क चुनब

18यहोवा क वचन मोकामिला। उ कहेस, 19“मनई क पूत, दुइ सड़कन क नक्सा बनावा। जेनमों स बाबुल क राजा क तरवार इस्त्राएल आवइ बरे एक क चुन सकइ। दुइनउँ सड़किया उहइ बाबुल देस स निकरिहीं। तब नगर क पहोंचावइवाली सड़क क सिरे पइ एक चीन्हा बनावा। 20चीन्हा क उपयोग इ देखावइ बरे करा कि कउन स सड़क क उपयोग तरवार करी। एक सड़क अम्मोनी नगर रब्बा क पहोंचावत ह। दूसर सड़क यहूदा, सुरच्छित नगर, यरूसलेम क पहोंचावत ह। 21इ स्पष्ट करत ह कि बाबुल क राजा उ सड़क क योजना बनावत अहइ जेहसे उ छेत्र पइ हमला करइ। बाबुल क राजा उ बिन्दु पइ आइ चुका अहइ जहाँ दुइनउँ सड़कन अलग होत हीं। बाबुल क राजा जादू क संकेतन क उपयोग भविस्स क जानइ बरे किहेस ह। उ कछू बाण हिलाएस, उ परिवारे क देवमूरतियन स सवाल पूछेस, उ गुर्दे क लखेस जउन उ जनावरे क रहा जेका उ मारे रहा।

22“संकेत ओका बतावत हीं कि उ उ दाई सड़क क धरइ जउन यरूसलेम पहोंचावत ह। उ अपने संग बिध्वंसक लट्टन क लिआवइ क योजना बनाएस ह। उ आदेस देइ अउर ओकर फउजी जान स मारब सुरू करिहीं। उ पचे जुद्ध-घोस करिहीं। तब उ पचे एक माटी क देवार सहर क चारिहुँ ओर बनइहीं। उ पचे एक माटी क सड़क देवार तलक पहोंचावइ वाली बनइहीं। उ सबइ नगर पइ हमला बरे लकड़ी का मीनार बनइहीं। 23उ सबइ जादुई क चीन्हा इस्त्राएल क लोगन बरे कउनो अरथ नाहीं रखतेन। उ सबइ ओन बचनन क पालन करत हीं जउन उ पचे दिहेन ह। किन्तु यहोवा ओनकर पाप याद राखी। तब इस्त्राएली लोग बन्दी बनावे जइहीं।”

24मोर सुआमी यहोवा इ कहत ह, “तू पचे बहोत स बुरे काम किहा ह। तोहार पचन्क पाप पूरी तरह स्पष्ट अहइ। तू पचे मोकामे इ याद रखइ क मजबूर किहा कि तू पचे दोखी अहा। एह बरे दुस्मन तू पचन्क आपन हाथन में कइ लेइ 25हे इस्त्राएल क बुरे लोगो, तू पचे मारा जाब्या। तोहरे पचन्क दण्ड क समइ आइ पहोंचा अहइ।” अब अन्त निअरे अहइ।”

26मोर सुआमी यहोवा इ संदेस देत अहइ, “पगड़ी उतारा। मउर उतारा। परिवर्तन क समइ आइ पहोंचा अहइ। महत्वपूर्ण प्रमुख खाले लिआवा जइहीं अउर जउन लोग महत्वपूर्ण नाहीं अहइ, उ सबइ महत्वपूर्ण बनिहीं। 27मई उ नगर क पूरी तरह नस्त करब। किन्तु इ तब तलक नाहीं होइ जब तलक उपयुक्त मनई नवा राजा नाहीं होत। तब मई ओका नगर पइ अधिकार करइ देब।”

### अम्मोन क खिलाफ भविस्सवाणी

28परमेस्सर कहेस, “मनई क पूत, मोरे बरे लोगन स कहा। उ सबइ बातन कहा, ‘मोर सुआमी यहोवा इ सबइ बातन अम्मोन क लोगन अउर ओनकर लजाजनक देवता स कहत ह:

“‘धियान द्या एक तरवार एक ठु तरवार आपन मियान स बाहेर अहइ। तरवार झलकाइ गइ अहइ। तरवार मारइ बरे तइयार अहइ। बिजुली क तरह चमकइ बरे एका झलकावा गवा रहा।

29तोहार दर्शन बियर्थ अहइ। तोहार जादू तोहार मदद नाहीं करिहीं। इ सिरिफ झूठ क गुच्छा अहइ। अब तरवार पापियन क गर्दन पइ अहइ। उ पचे हाली ही मुदी होइ जइहीं। ओनकर अन्त समइ आइ पहोंचा अहइ। ओनकर पाप क समाप्ति क समइ आइ गवा अहइ।

### बाबुल क खिलाफ भविस्सवाणी

30“अब तू तरवार क मियान में वापस राखा। बाबेल, मई तोहरे संग निआउ, तू जहाँ बना हवा उहइ ठउरे पइ करब अर्थात उहइ देस में जहाँ तू पइदा भवा ह। 31मई तोहरे खिलाफ आपन किरोध क बर्खा करब। मोर किरोध तू पचन्क तपत हवा क तरह जराइ। मई तू पचन्क क्रूर मनइयन क हाथन में देब। उ सबइ मनई मनइयन क मार डावइ में कुसल अहइ। 32तू पचे आगी बरे ईधन बनब्या।



तोहार पचन्क खून भुईया में गहिर बहि जाइ अर्थात लोग तू पचन्क फुन याद नाहीं करिहीं। मई अर्थात यहोवा इ कहि दिहेउँ ह।”

**यहेजकेल यरूसलेम क खिलाफ बोलत ह**

**22** यहोवा क वचन मोका मिला। उ कहेस, **2**“मनई क पूत, का तू निआउ करब्या? का तू हलिसारन क नगर का संग निआउ करब्या? का तू ओहसे ओन सब भयंकर बातन क बारे में कहब्या जउन उ किहेस ह? **3**तू पचन्क कहइ चाही, ‘मोर सुआमी यहोवा इ कहत ह: नगर हतियारन स भरा अहइ। एह बरे ओकरे बरे दण्ड क समइ आइ। उ अपने बरे गन्दी देवमूरतियन क बनाएस अउर एन देवमूरतियन ओका असुद्ध बनाएन।

**4**“हे यरूसलेम क लोगो, तू पचे बहोत लोगन क मार डया। तू पचे गन्दी देवमूरतियन बनाया। तू पचे दोखी अहा अउर तू पचन्क दण्ड देइ क समइ आइ गवा अहइ। तोहार पचन्क अन्त आइ गवा अहइ। दूसर रास्ट्र तोहार मजाक उइइहीं। उ सबइ देस तोह पइ हैंसिहीं। **5**दूर अउर निअरे क लोग तोहार पचन्क मजाक उइइहीं। तू आपन नाउँ बदनाम किहा ह। तू हिंसा स भरा भवा अहइ।

**6**“धियान द्या। यरूसलेम में इस्त्राएल क हर एक सासक अपने क सवित्तसाली बनइ द्या जेहसे उ रक्तपात कइ सकइ। **7**यरूसलेम क लोग आपन महतारी-बाप क सम्मान नाहीं करतेन। उ पचे उ नगर में विदेसियन क सतावत हीं। उ पचे अनाथन अउर रांड मेहररूअन क उ ठउरे पइ ठगत हीं। **8**तू लोग मोर पवितर चिजियन स धिना करत ह। तू पचे मोरे विस्त्राम क दिनन क अइसे लेत ह माना उ पचे महत्वपूर्ण न होइँ। **9**यरूसलेम क लोग दूसर लोगन क बारे में झूठ बोलत हीं। उ पचे ओन भोले लोगन क मार डवइ बरे अइसा करत हीं। लोग पर्वतन पइ लबार देवतन क पूजा करइ जात हीं अउर उ पचे तोहार संग बूरी चिजन क करइ बरे एक संग योजना बनावत हा।

“यरूसलेम में लोग अनेक यौन-संबन्धी पाप करत हीं। **10**यरूसलेम में लोग आपन पिता क पत्नी क संग बिभिचार करत हीं। यरूसलेम में लोग मासिक धर्म क समइ में भी नारियन स बलात्कार करत हीं। **11**कउनो आपन पड़ोसी क पत्नी के विरुद्ध भी अइसा भयंकर पाप करत ह। कउनो आपन पतोहू क संग तने क सम्बन्ध करत ह अउर ओका अपवित्तर करत ह अउर कउनो आपन पिता क बिटिया अर्थात आपन बहिन क संग तने क सम्बन्ध करत ह।

**12**“यरूसलेम में, तू लोग, लोगन क मार डवइ क बरे धन लेत ह। तू लोग रिण देत ह अउर ओह रिण पइ बियाज लेत ह। तू लोग तनिक धन क पावइ बरे आपन पड़ोसी क ठगत ह अउर तू लोग मोका बिसर गया ह।” मोर सुआमी यहोवा इ सबइ बातन कहेस।

**13**परमेस्सर कहेस, ‘अब धियान द्या। मई आपन हाथ तोह पइ उठाउब। मई तू पचन्क लोगन क धोखा देइ अउर मार डवइ बरे दण्ड देब। **14**का तब भी तू पचे वीर बना रहब्या? का तू पचे पर्याप्त बलवान रहब्या जब मई तू पचन्क दण्ड देइ आउब? नाहीं। मई यहोवा हउँ। मई इ कहि दिहे

हउँ अउर मई उ करब जउन मई करइ क कहेउँ ह। **15**मई तू पचन्क रास्ट्रन में बिखेर देब। मई तू पचन्क बहोत स देसन में जाइ क मजबूर करब। मई नगर क गन्दी चिजियन क पूरी तरह नस्ट करब। **16**किन्तु यरूसलेम तू आपन क दूसित अउर दूसर रास्ट्रन एन घटनन क होत लखिहीं। तब तू जनब्या मई यहोवा अहउँ।”

**इस्त्राएल बेकार कचरे क तरह अहइ**

**17**यहोवा क बचन मोह तलक आवा। उ कहेस, **18**“मनई क पूत, काँसा, लोहा, सीसा अउ टीन, चाँदी क तुलना में बेकार अहइ। कारीगर चाँदी क सुद्ध करइ बरे आगी में डवत ह। चाँदी गल जात ह अउर कारीगर एका कचरा स अलग करत ह। इस्त्राएल रास्ट्र उ बेकार कचरे क तरह होइ गवा ह। **19**एह बरे यहोवा तथा सुआमी इ कहत ह, ‘तू सबहिं लोग बेकार कचरे क तरह होइ गवा अहा। एह बरे मई तू पचन्क इस्त्राएल में बटोरब। **20**कारीगर चाँदी, काँसा, लोहा, सीसा अउर टीन क आगी में डवत हीं। उ सबइ आगी क जियादा गरम करइ बरे फूँकत हीं। तब धातुअन क गलब सुरू होइ जात ह। इहइ तरह मई तू पचन्क आपन आगी में डउब अउर तू पचन्क टेघराउब। उ आगी मोर गरम किरोध अहइ। **21**मई तू पचन्क उ आगी में डउब अउर मई आपन किरोध क आगी क फूँकन मारब अउर तोहार पचन्क टेघरब सुरू होइ जाइ। **22**चाँदी आगी में टेघरत ह अउर कारीगर चाँदी क ढालत हीं तथा बचावत हीं। इहइ तरह तू पचे नगर में टेघरब्या। तब तू पचे जनब्या कि मई यहोवा हउँ अउर तू पचे समुझब्या कि मई तोहरे पचन्क खिलाफ किरोध क उइरेउँ ह।”

**यहेजकेल यरूसलेम क खिलाफ बोलत ह**

**23**यहोवा क बचन मोका मिला। उ कहेस, **24**“मनई क पूत, इस्त्राएल स बातन करा। ओहसे कहा कि उ पचन्क एक भुईया अहइ जेका सुद्ध नाहीं कीन्ह गवा अहइ। मई उ देस पइ कोहान हउँ एह बरे उ देस आपन बर्खा नाहीं पाएस ह। **25**यरूसलेम में नबी बुरे योजना बनावत अहइँ। उ पचे उ सिंह क तरह अहइँ जउन उ समइ गजरत ह जब उ आपन धरे भए जनावर क खात ह। ओन नबियन बहोत स जीवन नस्ट किहेन ह। उ पचे अनेक कीमती चिजियन लिहेन ह। उ पचे यरूसलेम में अनेक मेहररूअन क राँड बनाएन।

**26**“याजकन फुरइ मोरे उपदेसन क नोस्कान पहोंचाएन ह। उ पचे मोर पवितर चिजियन क दूसित किहेन। उ पचे पवितर चिजियन अउ पवितर चिजियन में भेद नाहीं करत हीं। उ पचे लोगन क सुद्ध अउर असुद्ध चिजियन क बीच क भेद क बारे में सिच्छा नाहीं देतेन। उ पचे मोर पवितर विस्त्राम क दिनन पइ धियान नाहीं देत ह। एह बरे मई ओन लोगन क जरिये दूसित कीन्ह गवा हउँ।

**27**“यरूसलेम में प्रमुख ओन भेड़ियन क समान अहइँ जउन आपन धरे जनावर क खात अहइ। उ पचे प्रमुख केवल आपन क धनवान बनावइ बरे आक्रमण करत हीं अउर लोगन क मारि डवत हीं।

28“नवी, लोगन क चितउनी नाहीं देतेन, उ पचे फुरइ क ढाँक देत हीं। उ पचे ओन कारीगरन क समान अहई जउन दीवार क ठीक-ठीक मजबूत नाहीं बतउतेन उ पचे केवल छेदन पइ लेप कइ देत हीं। ओनकर धियान सिरिफ झूठ पइ होत ह। उ पचे आपन जादू क उपयोग भविस्स जानइ बरे करत हीं, किन्तु उ पचे केवल झूठ बोलत हीं। उ पचे कहत हीं, ‘मोर सुआमी यहोवा इ सबइ बातन कहेस। किन्तु उ पचे सिरिफ झूठ बोलत अहई-यहोवा ओनसे बातन नाहीं कियेस।’

29“सामान्य जनता एक दूसर क लाभ उठावत हीं। उ पचे एक दूसर क धोखा देत अउर चोरी करत हीं। उ पचे गरीब अउर असहाय मनई क संग अइसा बेउहार करत हीं। उ पचे बिदेसियन क भी धोखा देत रहेन, माना ओनके खिलाफ कउनो नेम न होइ।

30“मई लोगन स कहेउँ कि तू लोग आपन जिन्नगी बदला अउर आपन देसन क रच्छा करा। मई लोगन क देवारन क मजबूत करइ बरे कहेउँ। मई चाहत रहेउँ कि उ पचे देवारन क छेदन पइ खड़ा रहई अउर आपन नगर क रच्छा करई। किन्तु कउनो मनई मदद बरे नाहीं आवा। 31एह बरे मई आपन किरोध परगट करब, मई ओनका पूरी तरह नस्त करब। मई ओनका ओन बुरे कामन बरे दण्डित करब जेनका उ पचे कियेन ह। इ सबइ ओनकर दोख अहइ।” मोर सुआमी यहोवा इ सबइ बातन कहेस।

**23** यहोवा क बचन मोका मिला। उ कहेस, 2“मनई क पूत, सोमरोन अउर यरूसलेम क बारे में इ कहानी क सुना। दुइ बहिन रहिन। उ पचे एक ही महतारी क बिटियन रहिन। 3उ पचे मिस्त्र में तब रण्डियन होइ गइन जब छोटी लड़कियन ही रहिन। मिस्त्र में उ पचे पहिले पिरिम किहन अउर लोगन क आपन चुचुक अउर आपन नवोदित स्तनन क धरइ दिहन। 4बड़की बिटिया ओहोला नाउँ क रही अउर ओकरी बहिन क नाउँ ओहोलीबा रहा। उ पचे मोर होइ र गइन अउर ओनके बेटवा बिटियन पइदा भइन (ओहोला असल में सोमरोन अहइ अउर ओहोलीबा असल में यरूसलेम अहइ।)

5“तब ओहोला मोर बरे पतिव्रता नाहीं रहि गइ। उ एक रण्डी क तरह रहइ लाग। उ आपन पिरिमियन क चाह राखइ लाग। उ अस्सूर क फउजियन क ओनकर 6नीली वर्दियन में लखेस। उ पचे सबहिं मन चाहे नव जवान घुड़सवार रहेन। उ पचे प्रमुख अउर अधिकारी रहेन 7अउर ओहोला आपन क ओन सबहिं लोगन क रण्डी क रूप में अर्पित कियेस। उ पचे सबहिं अस्सूर क सेना में चुना भवा विसिस्ट सिपाही रहेन अउर उ ओन सबहिं क मोहित कइ लिहेस। उ ओनकर गन्दी देवमूरतियन क संग असुद्ध होइ गइन। 8एकरे अलावा उ मिस्त्र स आपन पिरिम-ब्यापार क भी बन्द नाहीं कियेस। मिस्त्र ओहसे तब पिरिम कियेस जब उ किसोरी रही। मिस्त्र पहिला पिरिमी रहा जउन ओकर नवजात स्तनन क छुएस। मिस्त्र ओह पइ आपन झूठ पिरिम क बर्खा कियेस। 9एह बरे मई ओकर पिरिमियन क ओका भोगइ दिहेउँ। उ अस्सूर क चाहत रही, एह बरे मई ओका ओनका

दइ दिहेउँ। 10उ पचे ओकरे संग बलात्कार कियेस। उ पचे ओकरे बच्चन क लिहेस अउर उ पचे तरवार चलाएन अउर ओका मार डायन। उ पचे ओका दण्ड दिहेन अउर मेहररूअन अब तलक ओकर बातन करत हीं।

11“ओकर छोटकी बहिन ओहोलीबा एन सबहिं घटनन क घटित होत लखेन। किन्तु ओहोलीबा आपन बहिन स भी जियादा पाप कियेस। उ आपन बहिन ओहोला क तुलना में जियादा बिभिचारी किहा। 12इ अस्सूर क प्रमुखन अउर अधिकारियन क चाहत रही। उ नीली वर्दी में घोड़ा पइ सवार ओन फउजिन क चाहत रही। उ पचे सबहिं चाहइ जोग्य जुवक रहेन। 13मई लखेउँ कि उ पचे दुइनउँ मेहररूअन एक ही गलती स आपन जिन्नगी नस्त करइ जात रहिन।

14“ओहोलीबा अपने बिभिचारी क जारी राखेस। उ बाबुल क देवारन पइ खुदा भवा मनइयन क तस्बीरन क लखेस। उ सबइ तस्बीरन कसदी लोगन क तस्बीरन ओनकर लाल पोसाकन में रहिन। 15उ पचे करिहाउँ में पेटियन बाँध राखे रहिन अउर ओनके मूँड़ि पइ लम्बी पगड़ियन रहिन। उ पचे सबहिं रथ का अधिकारियन का तरह देखात रहेन। उ पचे सबहिं बाबुल क जन्मभूमि में उत्पन्न पुरूस मालूम होत रहेन। 16ओहोलीबा ओनका चाहेस। उ ओनका आमन्त्रित करइ बरे दूत पठएस। 17एह बरे उ पचे बाबुल क लोग ओकर पिरिम-सय्या पइ ओकरे संग तने क सम्बन्ध करइ आयन। उ पचे ओकर उपयोग कियेन अउर ओका एतना गन्दा कइ दिहन कि उ ओनसे घिना करइ लाग।

18“ओहोलीबा भी बार-बार आपन नंगा सरिर क एक बिभिचारियन क नाई अर्पित कियेस। उ बहोत सारे मनइयन क आपन नंगा सरिर स आनन्द लेइ दिहेस कि मोका ओहसे वइसा ही घिना होइ गवा जइसा ओकरे बहिन स होइ ग रही। 19उ बार-बार आपन बिभिचारी क बढ़ाएस। अउर तब उ आपन पिरिम-ब्यापार क याद कियेस जउन उ युवा अवस्था में मिस्त्र में किये रहा। 20उ आपन पिरिमियन पइ मोहित भएस जेनका लिंग गदन क लिंग क नाई रहेन, अउर जेनका वीर्य क प्रवाह घोड़न क वीर्य क प्रवाह क नाई रहेन।

21“ओहोलीबा, तू आपन ओन दिनन क याद किहा जब तू जुवती रहिउ, जब तोहार पिरिमी तोहार चुचुक क छुअत रहेन अउर तोहार नव जात स्तनन क धरत रहेन। 22एह बरे ओहोलीबा, मोर सुआमी यहोवा इ कहत ह: ‘तू आपन पिरिमियन स घिना करइ लागिउ। किन्तु मई तोहार पिरिमियन क हिआँ लिआउब। उ पचे तोहका घेर लेइहीं। 23मई ओन सबहिं लोगन क बाबुल स, खासकर कसदी लोगन क लिआउब। मई पकोद, सो अउर कोआ स लोगन क लिआउब अउर मई ओन सबहिं लोगन क अस्सूर स लिआउब। इ तरह मई सबहिं प्रमुखन अउर अधिकारियन क लिआउब। उ पचे सबहिं चाहइ जोग्ग, रथपति खास जोग्यता बरे चुने घुड़सवार रहेन। 24ओन लोगन क भीड़ तोहरे लगे आइ। उ पचे आपन घोड़न पइ सवार अउर आपन रथन पइ अइहीं। लोग बड़की तादाद में होइहीं। ओनके लगे ओनकर भालन, ओनकर ढालन अउर ओनके मूँड़े क सुरच्छा कबच

होइहीं। उ पचे तोहरे चारिहूँ कइँती बटुरिहीं। मईँ ओनका बताउब कि तू मोरे संग का किहा अउर उ पचे आपन तरह स तोहका पचन्क सजा देइहीं। 25मईँ तू पचन्क देखाउब कि मईँ केतना ईर्साळु अहउँ। उ पचे बहोत कोहान होइहीं अउर तू पचन्क चोट पहेंचइहीं। उ पचे तोहार पचन्क नाक अउर तोहार पचन्क कान लेइहीं। उ पचे तरवार चलइहीं अउर तू पचन्क मार डइहीं। तब उ पचे तोहरे पचन्क बच्चन क लइ जइहीं अउर तोहार पचन्क जउन कछू बचा होइ ओका बार देइहीं। 26उ पचे तोहार नीक ओढना गहना लइ लेइहीं 27अउर मिस्र क साथ भए तोहरे पिरम बइपार क सपना क मईँ रोक देब। तू फून कबहुँ मिस्र क याद नाहीं करिबिउ।”

28मोर सुआमी यहोवा कहत ह, “मईँ तोहका ओन लोगन क देत अहउँ, जेहसे तू धिन करति अहा। मईँ तोहका ओन लोगन क देत अहउँ जेनसे तू धिना करइ लागिउ रही 29अउर उ पचे देखइहीं कि उ पचे तोहसे केतनी धिना करत हीं। उ पचे तोहार हर एक चीज लइ लेइहीं जउन तू कमाया ह। उ पचे तोहका खाली अउ नंगा छोड़ देइहीं। लोग तोहरे पापन्क स्पस्ट लिखिहीं। उ पचे समुझिहीं कि तू एक रण्डी क तरह बेउहार किहन अउर बुरे सपनन लखेन। 30तू उ बुरे करम तब किहा जब तू मोका ओन दूसर रास्टन क पाछा करइ बरे तजे रह्या। तू ओन बुरे करम तब किहा जब तू ओनकर गन्दी देवमूरतियन क पूजा करब सुरू किहा। 31तू आपन बहिन क अनुसरण किहा अउर उहइ क तरह रहिउ। एह बरे मईँ ओकर पियाला तोहार हाथ में दिहस। एह बरे तू उहइ सजा झेलब जउन उ झेलत रहेन।” 32मोर सुआमी यहोवा इ कहेस,

“तू आपन बहिन क बिख क पियाला क पीबिउ। इ बिख क पियाला लम्बा-चौड़ा अहइ। उ पिआले में बहोत बिख आवत ह। लोग तोहे पइ हँसिहीं अउ व्यंगं करिहीं।

33तू मदमस्त होइहीं अउर सोक स भरि जाइहीं। इ पियाला बिनास अउ बिध्वंस क अहइ। इ उहइ पिआले क तरह अहइ जेका तोहार बहिन पिएस।

34तू उहइ पिआले में बिख पीबिउ। तू ओकर आखिरी बूँद तलक ओका पीबिउ। तू गिलासे क लोकउबिउ अउर ओकर टूकन कइ डउबिउ। अउर तू पीरा स आपन छाती विदीर्ण करबिउ। इ होइ काहेकि मईँ यहोवा अउ सुआमी हउँ अउर मईँ उ सबइ बातन कहेउँ।

35“इ तरह, मोर सुआमी यहोवा इ सबइ बातन कहेस, ‘यरूसलेम, तू मोका बिसरि गया। तू मोका दूर लोकाया अउर मोका पाछे छोड़ दिहा। एह बरे तोहका मोका तजइ अउर रण्डी क तरह सजा भोगइ चाही। तोहका आपन दुट्ट सपनन बरे कस्ट जरूर पावइ चाही।”

### ओहोला अउ ओहोलीबा क खिलाफ निर्णय

36मोर सुआमी यहोवा कहत ह, “मनई क पूत, का तू ओहोला अउर ओहोलीबा क निआउ करब्या? तब ओनका ओन भयंकर बातन क बतावा जउन उ पचे किहेन। 37उ पचे बिभिचार क पाप किहन ह। उ पचे हतिया क अपराधी अहइँ। उ पचे वेस्या क तरह काम किहन, उ पचे आपन

गन्दी देवमूरतियन क संग रहइ बरे मोका तजेन। उ पचे मोरे बरे बच्चे पइदा किहेन किन्तु तउ उ पचे ओनका आगी में होमबलि क रूप में चढ़ाएन। उ पचे आपन देवमूरतियन क भोजन देइ बरे इ किहस। 38उ पचे मोर बिस्त्राम क दिनन अउर पवित्र ठउरन क अइसे लिहन माना उ पचे महत्वपूर्ण न होइँ। 39उ पचे आपन भयंकर देवमूरतियन बरे आपन बच्चन क बलि चढ़ाएन। अउर तब उ पचे मोरे पवित्र ठउर पइ गएन अउर ओका भी गन्दा बनाएन। उ पचे इ मोरे मन्दिर क भीतर किहन।

40“उ पचे बहोत दूर क ठउरन स मनइयन क बोलाएन ह। एन मनइयन क तू एक दूत पठया अउर उ सबइ लोग तोहका लखइ आएन। तू ओनके बरे नहाइउ, आपन आँखिन क सजाइउ अउर आपन गहनन क पहिरिउ। 41तू सुन्नर बिछउना पइ बइठिउ जेकरे समन्वा मेज धरी रही। तू मोर सुगन्ध अउ मोरे तेल क इ मेजे पइ धरिउ।

42“यरूसलेम में सोर अइसा सुनाइ पड़त रहा माना दावत उड़ावइवाले लोगन क होइ। दावत में बहोत लोग आएन। उ पचे रेगिस्तान स बहोत सराबी लोगन क लइ आएन। उ पचे मेहररूअन क बाजूबन्द अउ सुन्नर मुकुट देत रहेन। 43तब मईँ एक ठु मेहररू स बातन कहेउँ, जउन बिभिचार स ढीली होइ ग रही। मईँ ओहसे कहेउँ, ‘का उ पचे ओकरे संग बिभिचार करत रहि सकत हीं, अउर उ ओनके संग करत रहि सकत ह?’ 44किन्तु उ पचे ओकरे लगे वइसे ही जात रहेन जइसे उ पचे कउनो रण्डी क लगे जात रहे होइँ। हौँ, उ पचे ओन दुट्ट मेहररूअन ओहोला अउर ओहोलीबा क लगे बार-बार गएन।

45“किन्तु अच्छे लोग ओनकर निआउ अपराधी क रूप में करिहीं। उ पचे ओन मेहररूअन क निआउ बिभिचार करइवालिन अउ हतियारिन क रूप में करिहीं। काहेकि ओहोला अउ ओहोलीबा बिभिचार क काम किहेस ह अउर उ रक्त स ओनकर हाथ अबहुँ भी रंगे अहइँ जेनका उ पचे मार डए रहेन।”

46मोर सुआमी यहोवा इ सबइ बातन कहेस, “लोगन क संग बटोरा। तब ओन लोगन क ओहोला अउर ओहोलीबा क दण्ड देइ द्या। लोगन क इ समूह ओन दुइनउँ मेहररूअन क दण्डित करी तथा एनकर मजाक उड़ाइ। 47तब उ समूह ओनका पाथर मारी अउर ओनका मारि डाइ। तब उ समूह आपन तरवारन स मेहररूअन क टूकन करी। उ सबइ मेहररूअन क बच्चन क मार डइहीं अउर ओनकर घर बारि डइहीं। 48इ तरह मईँ देस क लज्जा क धोउब अउर सबहिं मेहररूअन क चितउनी दीन्ह जाइ कि उ पचे उ लज्जाजनक करम न करइँ जउन तू किहा ह। 49उ पचे तोहका ओन दुट्ट कामन बरे दण्डित करिहीं जउन तू पचे किहा अउर तू पचन्क आपन गन्दी देवमूरतियन क पूजा बरे दण्ड मिली। तब तू पचे जनब्या कि मईँ यहोवा अउर सुआमी अहउँ।”

### पात्र अउर माँस

24 मोर सुआमी यहोवा क वचन मोका मिला। इ देस-निकारे क नवें क दसयें महीने क दसवौं दिन

रहा। उ कहेस, 2“मनई क पूत, आजु क तारीख अउ इ टिप्पणी क लिखा: ‘आजु बाबुल क राजा क फउज यरूसलेम क घेरेस।’ 3इ कहानी उ परिवार स कहा जउन आग्या मानइ स इन्कार करइ। ओनसे इ सबइ बातन कहा। ‘मोर सुआमी यहोवा इ कहत ह:

“पात्र क आगी पइ राखा, पात्र क रखा अउर ओहमा पानी डावा।

4ओहमाँ मौस क बोटिन डावा, हर नीक बोटिन क डावा, जाँघन अउ कंधन। पात्र क सर्वोत्तम हड्डियन स भरा।

5झुण्ड क सबसे बढ़िया जनावर क उपयोग करा, पात्र क खाले ईंधन क ढेर लगावा, अउर मौस क बोटिन क पकावा। शोरबा क तब तलक पकावा जब तलक हड्डियन भी न पक जाईं।’

6इ तरह मोर सुआमी यहोवा इ कहत ह: ‘इ यरूसलेम बरे बुरा होइ। इ हतियारन स भरे नगर बरे बुरा होइ। यरूसलेम उ पात्र क तरह अहइ जेह पइ जंग क दाग होई, अउर उ सबइ दाग दूर न कीन्ह जाइ सकई। उ पात्र सुद्ध नहीं अहइ, एह बरे मौस क हर एक बोटी, पात्र स बाहेर निकाला। उ मौस क खावइ बरे कउनो क जिन दया। याजकन क उ बेकार मौस में स कउनो बोटी जिन चुनइ दया।

7यरूसलेम एक जंग लगे पात्र क तरह अहइ, काहेकि हतियन क रक्त हुवाँ अब तलक अहइ। उ रक्त क खुली चट्टानन पइ डाएस ह। उ रक्त क भुईया पइ नहीं डाएस अउर एका माटी स नहीं ढँकेस।

8मई ओनकर रक्त क खुली चट्टान पइ डावा। एह बरे उ ढका नहीं जाइ। मई इ कहेउँ, जेहसे लोग क्रोधित होई, अउ ओका निरपराध लोगन क हतिया क दण्ड देईं।’

9यह बरे मोर सुआमी यहोवा इ कहत ह: ‘हत्यास स भरे इ नगर क बुरा होइ। मई आगी बरे बहोत स काहे क ढेर बनाउब

10पात्र क खाले बहोत सा ईंधन डावा। आगी बारा। अच्छी तरह मौस क पकावा। मसाला मिलावा अउर हड्डियन क जरि जाइ द्या।

11तब पात्र क अंगारन पइ खाली छोड़ द्या। एका एतना तय जाइ द्या कि एकर दाग चमकइ लागईं। सबइ दाग पिघल जाइ। अउर जंग जर जाइहीं।

12यरूसलेम आपन दागन क धोवइ क कठोर जतन कइ सकत ह। किन्तु उ जंग दूर नहीं होइ। सिरिफ आगी उ जंग क दूर करी।

13तू मोरे खिलाफ पाप किहा अउर पाप स कलंकित भइउ। मई तोहका नहवाउब चाहेउँ अउर तोहका स्वच्छ करइ चाहेउँ। किन्तु दाग छुटेन नहीं। मई तोहका फुन नहवावइ नहीं चाहेउँ। जब तलक मोर तपत किरोध तोहरे बरे खतम नहीं होत।

14“मई यहोवा हउँ। मई कहेउँ, तोहका सजा मिली, अउर मई एका दिआउब। मई सजा क रोकब नहीं। मई तोहरे बरे दुःख क अनुभव नहीं करब। मई तोहका ओन बुरे पापक क बरे सजा देब जउन तू किहा।” मोर सुआमी यहोवा इ कहेस।

### यहेजकेल क पत्नी क मउत

15तब यहोवा क बचन मोका मिला। उ कहेस, 16“हे मनई क पूत, तू आपन पत्नी स बहोत पिरेम करत अहा किन्तु मई ओका तोहसे दूर करत हउँ। तोहार पत्नी एकाएक मरी। किन्तु तोहका आपन सोक परगट नहीं करइ चाही। तोहका जोर स नहीं रोवइ चाही। तोहका रोवइ नहीं चाही अउर तोहार आँसू गिरि नहीं चाही। 17किन्तु तोहका आपन सोक रूदन बहोत धीमा रखइ चाही। आपन मरी मेहरारू बरे जोर स न रोआ। तोहका साधारण रोज क ओढ़ना पहिरइ चाही। आपन पगड़ी अउ आपन जूता पहिरा। आपन सोक क परगट करइ बरे आपन मोँछन जिन ढाँका अउर उ भोजन जिन करा जउन अक्सर कउनो क मरे पइ लोग करत हीं।”

18अगले भिन्सारे मई लोगन क बताएउँ कि परमेस्सर का कहेस ह। उहइ साँझ मोर मेहरारू मरी। अगले भिन्सार मई उहइ किहेउँ जउन परमेस्सर आदेस दिहे रहा। 19तबई लोग मोहसे कहेन, “तू इ काम काहे करत अहा? एकर मतलब का अहइ?”

20मई ओनसे कहेउँ, “यहोवा क बचन मोका मिला। उ मोहसे, 21इस्त्राएल क परिवार क कहेस। मोर सुआमी यहोवा कहेस, “धियान द्या, मई आपन पवितर ठउर क बर्बाद करब। तू लोगन क ओह पइ गर्व अहइ अउर तू लोग ओकर तारीफ क गीत गावत अहा। तोहका उ ठउरे क लखइ क पिरेम अहइ। तू फुरइ उ ठउरे स पिरेम करत अहा। किन्तु मई उ ठउर क नस्ट करब अउर तोहरे पाछे छुटे भए तोहार गदेलन जुद्ध में मारा जइहीं। 22किन्तु तू उहइ करब्या जउन मई आपन मरी मेहरारू क बारे में किहेउँ ह। तू आपन सोक परगट करइ बरे आपन मोँछन नहीं ढकब्या। तू उ भोजन नहीं करब्या जउन लोग अक्सर कउनो क मरइ पइ खात हीं। 23तू आपन पगड़ियन अउर आपन जूतन पहिरब्या। तू आपन सोक नहीं परगट करब्या। तू रोउब्या नहीं। किन्तु तू आपन पाप क कारण बर्बाद होत रहब्या। तू चुपचाप आपन आहन एक दूसर क समन्वा भरब्या। 24एह बरे यहजेकेल एक उदाहरण अहइ। तू उहइ सब करब्या जउन इ किहेस। सजा क इ समइ आइ अउर तब तू जनब्या कि मई यहोवा अहउँ।”

25“मनई क पूत, मई आपन सरणस्थल यरूसलेम क लोगन स लइ लेब। उ सुन्नर ठउर ओनका आनन्दित करत ह। ओनका उ ठउर लखइ क पिरेम अहइ। उ पचे फुरइ उ ठउर स पिरेम करत हीं। किन्तु उ समइ मई नगर अउर ओनकर गदेलन क ओन लोगन स लइ लेब। 26उहइ समइ बचइवाले लोगन में स एक यरूसलेम क बारे में बुरा सँदेसा लइके तोहरे लगे आइ। 27उ समइ तू उ मनई स बातन कइ सकब्या। तू अउर जियादा चुप नहीं रहि सकब्या। इ तरह तू ओनके बरे उदाहरण बनब्या। तब उ पचे जनिहीं कि मई यहोवा हउँ।”

### अम्मोन क विरूद्ध भविस्सवाणी

25 यहोवा क बचन मोका मिला। उ कहेस, 2“मनई क पूत, अम्मोन क लोगन क कइँती लखा अउर

मोरे बरे ओनके खिलाफ कछू बोला। 3अम्मोन क लोगन स कहा, 'मोर सुआमी यहोवा क कथन सुना। मोर सुआमी यहोवा कहत ह: तू तब खुस रह्या जब मोर पवितर ठउर नस्ट भवा रहा। तू लोग तब इस्राएल देस क खिलाफ रह्या जब इ दूसित भवा रहा। तू यहूदा क परिवार क खिलाफ रह्या जब उ सबइ लोग बन्दी बनाइके लइ जावा गएन। 4एह बरे, मई तू पचन्क पूरब क लोगन क देब। उ पचे तोहार सबन्क भुईया लेइहीं। ओनकर फउजन तोहरे देस में आपन डेरा डइहीं। उ पचे तोहरे पचन्क बीच रहिहीं। उ पचे तोहार पचन्क फल खइहीं अउर तोहार पचन्क दूध पीइहीं। 5मई रब्बा अम्मोन नगर क ऊँटन बरे चिरागाह में बदल देब अउर अम्मोन लोगन क देस भड़ियन क चिरागाह क बनाउब। तब तू पचे समुद्रब्या कि मई यहोवा हउँ। 6यहोवा इ कहत ह: तू पचे खुस रह्या कि यरूसलेम नस्ट भवा। तू पचे तालियन बजाया अउर गोड़न पइ थिरक्या। तू पचे इस्राएल प्रदेश क अपमानित करइवालन क मजाक किहा। 7एह बरे मई तू पचन्क दण्ड देब। तू पचे कइसी कीमती चिजियन क तरह होब्या जेनका फउजी जुद्ध में पावत हीं। तू पचे आपन उत्तराधिकार खोइ देब्या। तू पचे दूर देसन में मरब्या। मई तोहरे पचन्क देस क नस्ट करब। तबइ तू पचे जनब्या कि मई यहोवा अहउँ।”

### मोआब अउर सेइर क विरुद्ध भविस्सवाणी

8मोर सुआमी यहोवा इ कहत ह: “मोआब अउ सेइर कहत हीं, 'यहूदा क परिवार ठीक कउनो दूसर रास्ट्र क तरह अहइ।' 9मई मोआब क काँचे पइ प्रहार करब, मई एकरे ओन नगरन क लेब जउन एकर सीमा पइ प्रदेश क गौरव बेल्यसीमोत, बालमोन अउर कियतैम अहइँ। 10तब मई एन नगरन क पूरब क लोगन क देब। उ पचे तोहार प्रदेश लेइहीं अउर मई पूरब क लोगन क अम्मोन क नस्ट करइ देब। तब हर एक मनई बिसरि जाई कि अम्मोन क लोग एक रास्ट्र रहेन। 11इ तरह मई मोआब क दण्ड देब। तब उ पचे जनिहीं कि मई यहोवा हउँ।”

### एदोम क विरुद्ध भविस्सवाणी

12मोर सुआमी यहोवा इ कहत ह, “एदोम क लोग यहूदा क परिवार क खिलाफ उठ खड़े भएन अउर ओहसे बदला लेइ चाहेन। एदोम क लोग दोखी अहइँ।” 13एह बरे मोर सुआमी यहोवा कहत ह: “मई एदोम क दण्ड देब। मई एदोम क लोगन अउ जनावरन क नस्ट करब। मई एदोम क पूरे देस क तेमान स ददान तलक नस्ट करब। एदोमी जुद्ध में मारा जइहीं। 14मई आपन लोगन, इस्राएल क उपयोग करब अउर एदोम क खिलाफ भी होब। इ तरह इस्राएल क लोग मोरे किरोध क एदोम क लोगन क खिलाफ परगट करिहीं। तब एदोम क लोग समुझिहीं कि मई ओनका दण्ड दिहेउँ।” मोर सुआमी यहोवा इ कहेस।

### पलिस्तिनियन क खिलाफ भविस्सवाणी

15मोर सुआमी यहोवा इ कहेस, “पलिस्तिनियन भी बदला लेइ क जतन किहन। उ पचे बहोत क्रूर रहेन। उ पचे आपन

किरोध क अपने भीतर बहोत जियादा समइ तलक जरत रखेन।” 16एह बरे मोर सुआमी यहोवा कहेस, “मई पलिस्तिनियन क दण्ड देब। हौं, मई करेत स ओन लोगन क नस्ट करब। मई समुद्र तट पइ रहइवाले ओन लोगन क पूरी तरह नस्ट करब। 17मई ओन लोगन क दण्ड देब, मई ओनसे बदला लेब। मई आपन किरोध क जरिये ओनका एक पाठ सिखाउब तब उ पचे जनिहीं कि मई यहोवा हउँ।”

### सोर क बारे में दुखद खबर

26 देस-निकारे क गियारहवें बरिस में, महीना क पहिला दिन, यहोवा क बचन मोका मिला। उ कहेस, 2“मनई क पूत, सोर यरूसलेम क खिलाफ बुरी बातन कहेस: 'आहा! लोगन क रच्छा करइवाला नगर-दुआर नस्ट होइ गवा ह। नगर-दुआर मोरे बरे खुला ह। नगर नस्ट होइ गवा ह, एह बरे मई एहसे बहोत स बहुमूल्य चिजियन लइ सकत हउँ।”

3एह बरे मोर सुआमी यहोवा कहत ह: “सोर, मई तोहरे खिलाफ हउँ। मई तोहरे खिलाफ लइइ बरे कइउ रास्ट्रन क लिआउब। उ सबइ समुद्र तट क लहसन क तरह बार-बार अइहीं।”

4परमेस्सर कहेस, “दुस्मन क उ सबइ फउजी सोर क देवारन क नस्ट करिहीं अउर ओनके खम्भन क गिराइ देइहीं। मई भी ओकर भुईया स ऊपर क माटी क खुरच देब। मई सोर क चट्टान मात्र बनाइ डाउब। 5सोर समुद्र क किनारे मछरियन क जालन क फइलावइ क ठउर मात्र रहि जाइ। मई इ कहि दिहे हउँ।” मोर सुआमी यहोवा कहत ह, “सोर ओन बहुमूल्य वस्तुअन क तरह होइ जेनका फउजी जुद्ध में पावत हीं। 6मुख्य भुईया पइ सोर क चारिहुँ कइँती क गाँव जुद्ध में तबाह कीन्ह जाइहीं। तब उ पचे जनिहीं कि मई यहोवा हउँ।”

### नबूकदनेस्सर सोर पइ हमला करी

7मोर सुआमी यहोवा इ कहत ह, “मई सोर क खिलाफ उत्तर स एक दुस्मन लिआउब। बाबुल क महान राजा नबूकदनेस्सर दुस्मन अहइ। उ एक बिसाल फउज लिआइ। ओहमाँ घोड़न, रथ, घोड़सवार फउजी, अउर बहोत जियादा गिनती में दूसर फउजी होइहीं। उ सबइ फउजी विभिन्न रास्ट्रन स होइहीं। 8नबूकदनेस्सर मूल-प्रदेस में तोहार बितियन (छोटे नगरन) क मारि डाइ। उ तोहरे नगरन पइ हमला करइ बरे मीनारन बनाई। उ तोहरे नगर क चारिहुँ कइँती कच्ची सड़क बनाई। उ एक कच्ची सड़क देवार तलक पहोँचावइ वाली बनाइ। 9उ तोहार देवारन क तोइइ बरे लट्ठन लिआइ। उ कुदारियन क उपयोग करी अउर तोहार मीनारन क तोइ गिराइ। 10ओकर घोड़न एतनी बड़ी गिनती में होइहीं कि ओकर टापन स उठी धूरि तोहका ढक लेइ। तोहार देवारन घोड़सवार फउजियन, बन्द गाड़ियन अउ रथन क आवाज स काँप उठी। जब बाबुल क राजा नगर-दुआर स नगर में प्रवेस करी। हौं, उ पचे तोहरे नगर में अइहीं काहेकि एकर देवारन गिराई जइहीं। 11बाबुल क राजा तोहरे नगर स घोड़ा पइ सवार होइके निकरी। ओकर घोड़न क

टाप तोहार सड़कन क कुचरत भइ आइ। उ तोहरे लोगन क तरवार स मारि डाइ। तोहरे नगर क मजबूत खम्भे क कतारन धरासाई होइहीं। 12नबूकदनेस्सर क फउजी तोहार सम्पत्ति लइ जइहीं। उ पचे ओन चिजियन क लइ जइहीं जेनका तू बेचइ चाहत अहा। उ पचे तोहार देवारन क ध्वस्त करिहीं अउर तोहार सुन्नर भवनन क नस्त करिहीं। उ पचे तोहार पाथरन अउ लकड़ियन क घसन क कूड़े क तरह समुद्र में लोकाइ देइहीं। 13इ तरह मई तोहार आनन्द गीतन क स्वर क बन्द कइ देब। लोग तोहार वीणा क भक्विसस में नाहीं सुनिहीं। 14मई तोहका नंगी चट्टान मात्र कइ देब। तू समुद्र क किनारे मछरियन क जालिन क फइलावइ क ठउर रहि जाब्या। तोहार निर्माण फुन नाहीं होइ। काहेकि मई यहोवा इ कहेउँ ह।” मोर सुआमी यहोवा उ सबइ बातन कहेस।

### दूसर राष्ट्र सोर क बरे रोइहीं

15मोर सुआमी यहोवा सोर स इ कहत ह: “भूमध्य सागर क तट स लगे देस तोहरे पतन क आवाज स काँपि उठिहीं। इ तब होइ जब तोहार लोग चोट खइहीं अउर मारा जइहीं। 16तब समुद्र तट क देसन क सबहिं प्रमुख आपन सिहांसने स उतरिहीं अउर आपन दुख परगट करिहीं। उ पचे आपन खास पोसाक उतरिहीं। उ पचे आपन सुन्नर वस्त्रन क उतरिहीं। तब उ पचे आपन काँपइ क ओढ़ना पहिरिहीं। उ पचे भुईया पइ बइठिहीं अउर भय स काँपिहीं। उ पचे एह पइ सोकग्रस्त होइहीं कि तू एतना जल्दी कइसे नस्त होइ गया। 17उ पचे तोहरे बारे में इ करुण गीत गइहीं:

“हे सोर, तू मसहूर नगर रह्या समुद्र पार स लोग तोह पइ बसइ आएन। तू मसहूर रह्या, किन्तु अब तू कछू नाहीं अहा। तू सागर पइ सक्तीसाली रह्या, अउर वइसे ही तोहमें निवास करइवाले मनई रह्या। तू मुख्य भुईया पइ रहइवाले सबहिं लोगन क भयभीत किहा।

18अब जउने दिन तोहार पतन होत ह, समुद्र तट स लगे देस भय स काँपित होइहीं। तू समुद्र तट क सहारे कइउ उपनिवेश बनाया, अब उ सबइ लोग भयभीत होइहीं, जब तू नाहीं रहब्या।”

19मोर सुआमी यहोवा इ कहत ह, “सोर, मई तोहका नस्त करब अउर तू एक पुराना नगर होइ जाब्या। हुवाँ कउनो नाहीं रही। मई समुद्र क तोहरे ऊपर बहाउब। बिसाल समुद्र तोहका ढकि लेइ। 20मई तोहका खाले उ गहिर अधोगर्त में पठउब, जउने जगह पइ मरे भए लोग अहइँ। तू ओन लोगन स मिलब्या जउन बहोत पहिले मर चुकेन। मई तोहका ओन सबहिं प्राचीन अउर खाली नगरन क तरह पाताल लोक में पठउब। तू ओन सबहिं दूसर लोगन क संग होब्या जउन कब्र में जात हीं। तोहरे संग तब कउनो नाहीं रही। तू फुन कबहुँ जीवितन क पहुँटा में नाहीं रहब्या। 21दूसर लोग ओहसे डेरइहीं जउन तोहरे संग भवा। तू खतम होइ जाब्या। लोग तोहका हेरिहीं, किन्तु तोहका कबहुँ नाहीं पइहीं।” मोर सुआमी यहोवा इहइ कहत ह।

### सोर समुद्र पइ बियापार क महान केन्द्र

27 यहोवा क बचन मोका फुन मिला। उ कहेस, 2“मनई क पूत, सोर क बारे में इ करुण-गीत गावा। 3सोर क बारे में इ कहा:

“तू समुद्र क दुआर अहा। तू अनेक राष्ट्रन बरे बियापारी अहा, तू समुद्र तट क सहारे क अनेक देसन क जात्रा करत अहा। मोर सुआमी यहोवा इ कहत ह:

“हे सोर तू सोचत अहा कि तू एतना जियादा सुन्नर अहा। तू सोचत अहा कि तू पूरी तरह सुन्नर अहा!

4भूमध्य सागर तोहरे नगर क चारिहुँ ओर चउहददी बनावत ह। तोहार निर्माता लोग तोहका पूरी तरह सुन्नर बनाएन।

5तोहार निर्माता लोग, सनीर पर्वत स सनौवर क पेड़न क उपयोग, तोहरे सबहिं पल्लन क बनावइ बरे किहन। उ पचे लबानोन स देवदार क बृच्छन क उपयोग, तोहरे मस्तूल क बनावइ बरे किहन।

6उ पचे बासान स ओक बृच्छ क उपयोग तोहरे पतवारन क बनावइ बरे किहन। उ पचे सनौवर स चीड़ बृच्छ क उपयोग, तोहरे जहाज क फर्स क कमरे बरे किहन, अउर उ पचे इ निवास क हाथी-दाँत स सजाएन।

7तोहरे पाल बरे उ पचे मिस्र में बने रंगीन सूती ओढ़ना क उपयोग किहन। पाल तोहार झंडा रहा। कमरे बरे तोहार पर्दा नीले अउ बैंगनी रहेन। उ एलीसा क समुद्र तट स आवत रहेन।

8सीदोन अउ अर्वद क मनईयन तोहरे बरे तोहरी नावन क खेएन। सोर तोहार बुद्धिमान मनई तोहरे जहाजन क चालक रहेन।

9गबल क अग्रज प्रमुख अउर बुद्धिमान मनई जहाज क तखतन क बीच कल्किन लगावइ में मदद बरे जहाजे पइ रहेन। समुद्र क सारे जहाज अउर ओनकर चालक तोहरे संग बियापार अउर वाणिज्य करइ आवत रहेन।

10“फारस, लूद अउर पूत क मनईयन तोहरी फउज में रहेन। उ पचे तोहरे जुद्ध क फउजी रहेन। उ पचे आपन ढालन अउ मूँडे क कवच तोहरी देवारन पइ लटकाए रहेन। उ पचे तोहरे नगर बरे सम्मान अउ जस कमाएन। 11अर्वद क मनईयन तोहरे नगर क चारिहुँ ओर क देवार पइ रच्छक क रूप में खड़े रहेन। गम्मत क मनई तोहार मीनारन में रहेन। उ पचे तोहरे नगर क चारिहुँ ओर क देवारन पइ आपन ढालन टाँगेन। उ पचे तोहार सुन्नरता क पूर्ण किहन।

12“तर्सीस तोहरे सर्वोत्तम ग्राहकन में स एक रहा। उ पचे तोहार सबहिं वस्तुअन क बदले सोना, चाँदी, लोहा, टीन अउ सीसा देत रहेन। 13यावान, तूबल, मेसेक अउ काले सागर क चारिहुँ ओर क छेत्र क लोग तोहरे संग बियापार करत रहेन। उ पचे तोहार बिक्रम चिजियन क बदले गुलाम अउ काँसा देत रहेन। 14तोगर्मा राष्ट्र क मनईयन घोड़न, जुद्ध घोड़ा अउ खच्चर ओन चिजियन क बदले में देत रहेन जेनका तू बेचत रह्या। 15ददान क मनईयन तोहरे संग बियापार करत रहेन। उ पचन्क तोहार चिजियन क आपन जगहन प बेचत रह्या। लोग तोहका भुगतान करइ बरे हाथी दाँत अउर आबनूस क लकड़ी लिआवत रहेन। 16एदोम

तोहरे संग बियापार करत रहा काहेकि तोहरे लगे बहोत स अच्छी चिजियन रहिन। एदोम क लोग नीलमणि, बैंगनी कपड़ा, बारीक कढ़ाई क काम, बारीक सूती, मूँगा अउर लाल तोहार बिक्रय क चिजियन क बदले देत रहेन।

17“यहूदा अउर इस्राएल क मनईयन तोहारे संग बियापार किहस। उ पचे तोहार बिक्रय चिजियन क बरे भुगतान में गोहूँ, जैतून, अगाती, अंजीर सहद तेल अउर मरहम दिहेस। 18दमिस्क एक ठु नीक गाहक रहा। उ पचे तोहरे लगे क अद्भूत चिजियन बरे बियापार करत रहेन अउर ओन चिजियन बरे हेलबोन के दाखरस अउर सफेद ऊन देत रहेन। 19ऊजल स वादान अउर यूनानी लोग तोहार माल खरीदेस। ओन चिजियन क भुगतान में लोहा, तैजपात, सुगन्धी अउर गन्ना देत ह। 20ददान अच्छा बड़पार करत रहेन। उ पचे तोहार संग घोड़सवारी बरे जीन (काठी) क ओढ़ना क बड़पार करत रहेन। 21अरब अउर केदार क सबहिं प्रमुख मेमनन, भेड़ी अउर बोकरियन तोहार बिक्रय कीन्ह गइ वस्तुअन देत रहेन। 22सबा अउ रामा क बड़पारी तोहरे संग बड़पार करत रहेन। उ पचे सर्वोत्तम मसालन हर तरह क रतन अउर सोना तोहार विक्रय क चिजियन बरे देत रहेन। 23हारान, कन्ने, एदेन तथा सबा, अस्सूर, कलमद क बड़पारी तोहरे संग बियापार करत रहेन। 24उ पचे सर्वोत्तम कपड़न, बारीक कढ़े भए अउ नीले ओढ़ना, रंग बिरंग कालीन, अच्छी बटी रस्सियन अउर देवदार क लकड़ी स बने सामान भुगतान में दिहन। इ सबइ उ सबइ चिजियन रहिन जेनसे उ पचे तोहरे संग बड़पार किहन। 25तर्सीस क जहाज ओन चिजियन क लइ जात रहेन जेनका तू बेचत रहया।

“एह बरे सोर, तू ओन बड़पारी बेइन में स एक क तरह अहा, तू समुद्र पइ बहुमूल्य वस्तुअन स लदे भरा अहा।

26उ सबइ मनई जउन तोहार नावन क खेवत रहेन। तोहका बिसाल अउर सक्तीसाली समुद्रन क पार लइ गएन। किन्तु सक्तीसाली पुरवइया तोहरे जहाजन क समुद्र में नस्ट करी।

27अउर तोहार सारी सम्पत्ति समुद्र में बूड़ि जाइ। तोहार सम्पत्ति, तोहार बड़पार, अउर बिक्रय चिजियन, तोहार मल्लाह अउर तोहार चालक, तोहार मनई जउन, तोहरे जहाजे पइ तखान क बीच में कल्किन लगावत हीं, तोहार मल्लाह अउर तोहरे नगर क सबहिं फउजी अउर तोहार मल्लाह सारे समुद्र में बूड़ि जई। इ उहइ दिन होइ जउने दिन तू नस्ट होब्या।

28तोहार आपन बड़पारियन क बहोत दूर क ठउरन में पठाएस। उ सबइ ठउर भय स काँपि उठिहीं, जब उ पचे तोहरे चालकन क चिल्लाव सुनिहीं।

29तोहार सारे नाविक जहाजे स कूदिहीं। मल्लाह अउ चालक जहाज स कूदिहीं, अउर तट पइ तैर अइहीं।

30उ पचे तोहरे बारे में बहोत दुःखी होइहीं। उ पचे रोइ पड़िहीं। उ पचे आपन मूँडन पइ धूरि डइहीं। उ पचे राखी में लोटिहीं।

31उ पचे तोहरे बरे मूड़ पइ उस्तारा फिरइहीं। उ पचे सोक ओढ़ना पहिरिहीं। उ पचे तोहरे बरे रोएन-चिल्लिइहीं। उ पचे

कउनो अइसे रोवत भए क समान होइहीं, जउन कउनो क मरइ पइ रोवत ह।

32“उ पचे आपन फूट-फूट क रोवइ क समइ तोहरे बारे में इ सोक-गीत गइहीं अउर रोइहीं:

“कउनो सोर क तरह नाहीं अहइ। सोर नस्ट कइ दीन्ह गवा, समुद्र क बीच में। 33तोहार बड़पारी समुद्रन क पार गएन। तू बहोत सारे रास्ट्रन क आपन बियोल सम्पत्ति अउर आपन माल स सन्तुठ किहा। तू भुइँया क राजा लोगन क धनी बनाएस। 34मुला अब तू समुद्रन क जरिये टूटा अहा अउर गहिर जल क जरिये भी। सबहिं चिजियन जउन तू बेचत अहा, अउर तोहार सबहिं मनई नस्ट होइ चुका अहइँ। 35समुद्र तट क निवासी सबहिं मनई तोहरे बरे दुःखे में बूड़ा अहइँ। ओनकर राजा भयानक रूप स डेरान अहइँ। ओनकर चेहरा स सोक झाँकत अहइ। 36दूसर रास्ट्रन क बड़पारी तोह पइ सुसकारत हीं। जउन घटनन तोहरे साथ घटिन, लोगन क भयभीत करिहीं। काहेकि तू अब खतम होइ गवा अहा। तू भविस्स में नाहीं रहब्या।”

### सोर सोचत ह, उ परमेस्सर ह

**28** यहोवा क बचन मोका मिला। उ कहेस, 2“हे मनई क पूत, सोर क राजा स कहा। ‘मोर सुआमी यहोवा इ कहत ह:

“तू आपन बरे बहोत उच्च सोचत ह अउर तू कहत अहा, “मइँ परमेस्सर अहउँ! मइँ समुद्र क मध्य में देवतन क आसन पइ बइठन हउँ।”

किन्तु तू मनई अहा, परमेस्सर नाहीं। तू सिरिफ सोचत अहा कि तू परमेस्सर अहा।

3तू सोचत अहा तू दानिय्येल स बुद्धिमान अहा। तू समुझत अहा कि तू सारे रहस्यन क जानि लेब्या।

4आपन बुद्धि अउ आपन समुझ स। तू सम्पत्ति खुद कमाया ह अउर तू आपन कोसागार में सोना चाँदी राख्या ह।

5आपन तीब्र बुद्धि अउ बड़पार स तू आपन सम्पत्ति बढ़ाया ह, अउर अब तू उ सम्पत्ति क कारण गर्वीला अहा।

6एह बरे मोर सुआमी यहोवा इ कहत ह: सोर, तू सोच्या तू परमेस्सर क तरह अहा।

7मइँ अजनबियन क तोहरे खिलाफ लड़इ बरे लिआउब। उ पचे रास्ट्रन में बड़े भयंकर अहइँ। उ पचे आपन तरवास बाहेर खिंचिहीं अउर ओन सुन्नर चिजियन क खिलाफ चलइहीं जेनका तोहार बुद्धि कमाएस। उ पचे तोहरे गौरव क मटियामेट करिहीं।

8उ पचे तोहका गिराइके कब्र में पहेंचइही। तू उ मल्लाह क तरह होब्या जउन समुद्र में मरा।

9उ मनई तोहका मारि डाइ। का अब भी तू कहब्या, “मइँ परमेस्सर हउँ?” उ समइ उ तोहका अपने अधिकार में करी। तू समुझ जाब्या कि तू मनई अहा, परमेस्सर नाहीं।

10तू अजनबियन क हाथ बिदेसियन क जइसा मारि डावइ जाइहीं। इ घटनन होइहीं काहेकि मोरे लगे आदेस-सक्ती अहइ।” मोर सुआमी यहोवा इ सबइ बातन कहेस।

11यहोवा क बचन मोका मिला। उ कहेस, 12“मनई क पूत, सोर क राजा क बारे में करुण गीत गावा। ओहसे कहा, ‘मोर सुआमी यहोवा इ कहत हः

“तू सम्पूर्णता क आर्दस रहेन। तू बुद्धिमानी स परिपूर्ण रह्या, तू पूरी तरह सुन्नर रह्या,

13तू परमेस्सर क बगीचा एदेन में रह्या। तोहरे लगे हर एक बहुमूल्य रतन रहेन जइसे: लाल, पुखराज, हीरा, फिरोजा, गोमेद, जस्पर नीलम, हरितमणि अउ नीलमणि। अउर इ सबइ हर एक रतन सोने में जुड़ा रहेन। तोहका इ सुन्नरता प्रदान कीन्ह गइ रही जउने दिन तोहार जनम भवा रहा। परमेस्सर तोहका सक्तीसाली बनाएस।

14तू चुने भए करुब सरगदूत रह्या। तोहार पखना मोरे सिंहासने पइ फइला रहेन अउर मई तोहका परमेस्सर क पवित्तर पर्वत पइ धरेउँ। तू ओन रत्नन क बीच चल्या जउन आगी क तरह कौधत रहेन।

15तू नीक अउ ईमानदार रह्या जब मई तोहका बनाएउँ। किन्तु एकरे पाछे तू बुरे बन गया।

16तोहार बइपार तोहरे लगे बहोत सम्पत्ति लिआवत रहा। किन्तु उ भी तोहरे भीतर क्रूरपन पइदा किहेस अउर तू पाप किहा। एह बरे मई तोहरे संग अइसा बेउहार किहेउँ माना तू गन्दी चीज हवा। मई तोहका परमेस्सर क पर्वत स लोकाइ दिहेउँ। तू खास करुब सरगदूतन में स एक रह्या, तोहार पखना फइला रहेन मोरे सिंहासने पइ किन्तु मई तोहका आगी क तरह कौधइवाले रतनन क तजइ क मजबूर किहेउँ।

17तू आपन सुन्नरता क कारण घमण्डी होइ गया, तोहार गौरव तोहार बुद्धिमानी क नस्त किहेउ, एह बरे मई तोहका धरती पइ लिआइ लोकाएउँ, अउर अब दूसर राजा तोहका आँखिन फाड़िके लखत हीं।

18तू अनेक गलत काम किहा, तू बहोत कपटी बइपारी रह्या। इ तरह तू पवित्तर ठउरन क अपवित्तर किहा, एह बरे मई तोहरे ही भीतर आगी लिआएउँ, इ तोहका जराइ दिहस, तू भुइया पइ राखी होइ गया। अब हर कउनो तोहार लज्जा लखि सकत ह।

19अन्य रास्ट्रन में सबहि लोग, जउन तोह पइ घटित भवा, ओकरे बारे में दुःखी भए रहेन। जउन तोहका भवा, उ लोगन क भयभीत करी। तू खतम होइ गवा अहा।”

### सीदोन क खिलाफ सँसा

20यहोवा क बचन मोका मिला। उ कहेस, 21“मनई क पूत, सीदोन पइ धियान द्या अउर मोरे बरे उ ठउरे क बिरुद्ध कछू कहा। 22कहा, ‘मोर सुआमी यहोवा इ कहत हः सीदोन, मई तोहारे खिलाफ हई! तोहरे लोग मोरे सम्मान करब सिरिहीं, मई तोहार सीदोन क सजा देब, तब लोग समुझिहीं कि मई यहोवा हउँ। तब उ पचे समुझिहीं कि मई पवित्तर हउँ।

23मई सीदोन में रोग अउर मउत पठउब, ओकरे नगर में मउत उ समइ आइ जब मई ओकरे खिलाफ चारिहुँ कइँती स तरवार लिआउब। तब उ पचे समुझिहीं कि मई यहोवा अहउँ।”

### रास्ट्र इस्राएल क मजाक उड़ाब बन्द करिहीं

24“पुराने जमाने में इस्राएल क चारिहुँ ओर क देस ओहसे घिना करत रहेन। किन्तु उ दूसर देसन क बरे बुरी घटनन घटिहीं। कउनो भी तेज काँटन या काँटहरी झाड़ी इस्राएल क परिवार क घाएल करइवाली नाहीं रहि जाइ। तब उ पचे जानिहीं कि मई ओनकर सुआमी यहोवा हउँ।”

25मोर सुआमी यहोवा इ कहत ह, “मई इस्राएल क लोगन क अन्य रास्ट्रन में बिखेर दिहेउँ। किन्तु मई फुन इस्राएल क परिवार क एक संग बटोरब। तब उ सबइ रास्ट्र समुझिहीं कि मई पवित्तर हउँ। उ समइ इस्राएल क लोग आपन देस में रहिहीं अर्थात जउने देस क मई आपन सेवक याकूब क दिहेउँ। 26उ पचे उ देस में सुरच्छित रहिहीं। उ पचे घर कइहीं अउर अंगरे क बेलन लगइहीं। मई ओकरे चारिहुँ ओर क रास्ट्रन क दण्ड देब जउन ओहसे घिना किहन। तब इस्राएल क लोग सुरच्छित रहिहीं। तब उ पचे समुझिहीं कि मई ओनकर परमेस्सर यहोवा हउँ।”

### मिस्र क बिरुद्ध सँसा

29 देस निकारे क दसाँ बरिस क दसाँ महीने क बारहवें दिन मोर सुआमी यहोवा क बचन मोका मिला। उ कहेस, 2“मनई क पूत, मिस्र क राजा फिरौन कइँती धियान द्या, मोरे बरे ओकर तथा मिस्र क बिरुद्ध कछू कहा। 3कहा, ‘मोर सुआमी यहोवा इ कहत हः

“हे मिस्र क राजा फिरौन, मई तोहरे खिलाफ हउँ। तू नील-नदी क किनारे विस्त्राम करत भए बिसाल मगरमच्छ अहा। तू कहत रह्या, “इ मोर नदी अहइ। मई इ नदी बनाएउँ ह।”

4किन्तु मई तोहरे जबड़न में हुक डालउब। नील नदी क मछरियन तोहरी चमड़ी स चिपक जइहीं। मई तोहका तोहार मछरियन क तोहरी नदियन स बाहेर कइके झुरान भुइँया पइ लोकाइ देब,

5तू धरती पइ गिरब्या, अउर कउनो न तोहका उठाई, न ही दफनाई। मई तोहका जंगली जनावरन अउ पछियन क देब, तू ओनकर भोजन बनब्या।

6तब मिस्र में रहइवाले सबहि लोग जानिहीं कि मई यहोवा हउँ। मई एन कामन क काहे करब? काहेकि इस्राएल क लोग सहारे बरे मिस्र पइ भरोसा किहस। किन्तु मिस्र सिरिफ दुर्बल घास क तिनका निकरा।

7इस्राएल क लोग सहारे बरे मिस्र पइ आस्रित रहेन अउर मिस्र सिरिफ ओनके हाथन अउ काँधन क छेद किहेस। उ पचे सहारे बरे तोह पइ आस्रित रहेन। किन्तु तू ओनकर पीठ क तोइया अउर मरोइ दिहा।”

8एह बरे मोर सुआमी यहोवा इ कहत हः “मई तोहरे खिलाफ तरवार लिआउब। मई तोहरे सबहि लोगन अउर जनावरन क नस्त करब।

9मिस्र खाली अउ नस्त होइ जाई। तब उ पचे समुझिहीं कि मई यहोवा हउँ।”

परमेस्सर कहेस, “मई उ सबइ काम काहे करब? काहेकि तू कह्या, ‘इ मोर नदी अहइ। मई इ नदी क बनाएउँ।’ 10एह बरे मई तोहरे बिरुद्ध हउँ। मई तोहार नील नदी



कइउ साखन क विरूद्ध हउँ। मई मिस्त्र क पूरी तरह नस्ट करब। मिग्दोल स सवेन तलक तथा जहाँ तलक कूस क सीमा अहइ, हुवाँ तलक नगर खाली होइहीं। 11कउनो मनई या जनावर मिस्त्र स नाही गुजरी। कउनो मनई या जनावर मिस्त्र में चालीस बरिस तलक नाही रही। 12मई मिस्त्र देस क उजाड़ कइ देब अउर ओकर नगर चालीस बरिस तलक उजाड़ रहिहीं। मई मिस्त्रियन क रास्ट्रन में बिखेर देब। मई ओनका बिदेस में बसाइ देब।”

13मोर सुआमी यहोवा इ कहत ह, “मई मिस्त्र क लोगन क कइउ रास्ट्रन में बिखेरब। किन्तु चालीस बरिस क अन्त में फिर मई ओन लोगन क एक संग बटोरब। 14मई मिस्त्र क बंदियन क वापस लिआउब। मई मिस्त्रियन क पत्रास क प्रदेस में, जहाँ उ पचे पइदा भए रहेन, वापस लिआउब। किन्तु ओनकर राज महत्वपूर्ण नाही होइ। 15इ सबस कम महत्वपूर्ण राज होइ। मई एका फुन दूसर रास्ट्रन स ऊपर कबहुँ नाही उठाउब। मई ओनका एतना घोटका कइ देब कि उ पचे रास्ट्रन पइ सासन नाही कइ सकिहीं। 16अउर इस्राएल क परिवार फुन कबहुँ मिस्त्र पइ आस्रित नाही रही। इस्राएली आपन पापन क याद रखिहीं। उ पचे याद रखिहीं कि उ पचे मदद बरे मिस्त्र कइँती मुडेन, परमेस्सर कइँती नाही अउर उ पचे समुझिहीं कि मई यहोवा अउ सुआमी अहउँ।”

### बाबुल मिस्त्र क लेइ

17देस निकारे क सत्ताइसवें बरिस क पहिले महीने क पहिले दिन यहोवा क बचन मोका मिला। उ कहेस, 18“मनई क पूत, बाबुल क राजा नबूकदनेस्सर सोर क खिलाफ आपन फउज क भीषण जुद्ध में लगाएस। उ पचे हर एक फउजी क बार कटवाइ दिहेन। भारी वजन ढोवइ क कारण हर एक कंधा रगड़ स नंगा होइ गवा। नबूकदनेस्सर अउर ओकर फउज सोर क हरावइ बरे कठिन जतन किहस। किन्तु उ पचे ओन कठिन जतनन स कछू पाइ न सकेन।” 19एह बरे मोर सुआमी यहोवा कहत ह, “मई बाबुल क राजा नबूकदनेस्सर क मिस्त्र देस देब अउर नबूकदनेस्सर मिस्त्र क लोगन क लइ जाइ। नबूकदनेस्सर मिस्त्र क कीमती चिजियन क लइ जाइ। इ नबूकदनेस्सर क फउज क मजदूरी होइ। 20मई नबूकदनेस्सर क मिस्त्र देस ओकर कठिन जतन के पुरस्कार क रूप में दिहेउँ ह। काहेकि उ पचे मोरे बरे काम किहन।” मोर सुआमी यहोवा इ कहेस। 21“उ दिन मई इस्राएल क परिवार क सक्तीसाली बनाउब अउर मई तोहका ओन लोगन क बीच में बोलइ क अवसर देब। तब उ पचे जानिहीं कि मई यहोवा हउँ।”

### बाबुल क सेना मिस्त्र पइ हमला करी

**30** यहोवा क बचन मोका मिला। उ कहेस, 2“मनई क पूत, मोरे बरे कछू कहा। कहा, ‘मोर सुआमी यहोवा इ कहत ह:

“रोआ अउर कहा, “उ भयंकर दिन आवत अहइ।”

उउ दिन समीप अहइ। हौं, निआउ करइ क यहोवा क दिन समीप अहइ। इ एक दुर्दिन होइ। इ रास्ट्रन क संग निआउ करइ क समइ होइ।

4मिस्त्र क विरूद्ध तरवार आइ। कूस क लोग भय स काँपि उठिहीं, जउने समइ मिस्त्र क पतन होइ। बाबुल क सेना मिस्त्र क लोगन क बन्दी बनाइके लइ जाइ। मिस्त्र क नीब उखड़ि जाइ।

5अनेक लोग मिस्त्र स सान्ति-सन्धि किहेन। किन्तु कूस, पूत, लूद, समस्त अरब अउर लिबया नस्ट होइहीं।

6मोर सुआमी यहोवा इ कहत ह: “हौं, जउन लोग मिस्त्र क मदद करत हीं मिस्त्र क पतन होइ। ओकर सक्ती क घमण्ड खतम होइ। मिस्त्र क लोग मिग्दोल स लइके सवेन तलक जुद्ध में मारा जइहीं।” मोर सुआमी यहोवा उ सबइ बातन कहेस।

7मिस्त्र ओन देसन में मिलि जाइ जउन नस्ट कइ दीन्ह गएन। मिस्त्र ओन खाली देसन में स एक होइ।

8मई मिस्त्र में आगी लगाउब अउर ओकर सबहिं सहायक नस्ट होइ जइहीं। तब उ पचे जानिहीं कि मई यहोवा हउँ!

9उ समइ में दूतन क पठउब। उ पचे जहाजन में कूस क बुरी खबरन पहुँचावइ बरे जइहीं। कूस अब आपन क सुरच्छित समुझत ह। किन्तु कूस क लोग भय स तब काँपि उठिहीं जब मिस्त्र दण्डित होइ। उ समइ आवत अहइ।”

10मोर सुआमी यहोवा इ कहत ह: “मई बाबुल क राजा नबूकदनेस्सर क उपयोग करब अउर मई मिस्त्र क लोगन क नस्ट करब।

11नबूकदनेस्सर अउर ओकर लोग रास्ट्रन में सब स जियादा भयंकर अहइँ। मई ओनका मिस्त्र क नस्ट करइ बरे लिआउब। उ पचे मिस्त्र क विरूद्ध आपन तरवारन निकरिहीं। उ पचे पहुँटा क ल्हासन स पाट देइहीं।

12मई नील नदी क झुरान भुइँया बनाइ देब। तब मई झुरान भुइँया क बुरे लोगन क बेच देब। मई अजनबियन क उपयोग उ देस क खाली करइ बरे करब। मई यहोवा, इ कहेउँ ह।”

### मिस्त्र क देवमूरतियन नस्ट कीन्ह जइहीं

13मोर सुआमी यहोवा इ कहत ह: “मई मिस्त्र में देवमूरतियन क नस्ट करब। मई मूरतियन क नोप स बाहेर करब। मिस्त्र देस में कउनो भी प्रमुख भविस्स बरे नाही होइ, अउर मिस्त्र में भय भर देब।

14मई पत्रोस क खाली कराइ देब। मई सोअन में आगी लगाइ देब। मई “नो” क दण्ड देब।

15अउर मई सीन नाउँ क मिस्त्र क किले क विरूद्ध आपन किरोध क बर्खा करब! मई “नो” क लोगन क नस्ट करब।

16मई मिस्त्र में आगी लगाउब। सीन नाउँ क सहर डर स काँपिहीं, नो नगर में दुस्मन टूटि पड़िहीं अउर मेम्फिस पइ दिना क समइ हमला कीन्ह जाब्या।

17आवेत अउ पीवेसेत क युवक जुद्ध में मारा जइहीं अउर मेहररून धरी जइहीं अउर लइ जाई जइहीं।

18तहपन्हेस क इ काला दिन होइ, जब मई मिस्त्र क अधिकार क खतम करब मिस्त्र क गर्वाली सक्ती खतम

होइ। मिस्र क दुर्दिन ढक लेइ अउर ओकर बिटियन धरी अउ लेइ जाइ जइहीं।

19इ तरह मई मिस्र क दण्ड देब। तब उ पचे जनिहीं कि मई यहोवा हउँ।”

### मिस्र सदा बरे दुर्बल होइ

20देस निकारे क गियारहवें बरिस मँ पहिले महीने क सतएँ दिन यहोवा क बचन मोका मिला। उ कहेस, 21“मनई क पूत, मई मिस्र क राजा फिरौन क भुजा तोड़ डाएउँ ह। कउनो भी ओकर भुजा पड़ पट्टी नहीं लपेटी। ओकर घाव नहीं भरी। एह बरे ओकर भुजा तरवार धरइ जोग्य सक्तीसाली नहीं होइ।”

22मोर सुआमी यहोवा इ कहत ह, “मई मिस्र क राजा फिरौन क विरुद्ध हउँ। मई ओकर दुइनउँ भुजन, सक्तीसाली भुजा अउर पहिले स टूटी भुजा क तोड़ डाउब। मई ओकर हाथे स तरवार क गिराइ देब। 23मई मिस्रियन क रास्ट्र मँ बिसेर देब। 24मई बाबुल क राजा क भुजन क सक्तीसाली बनाउब। मई आपन तरवार ओकरे हाथे मँ देब। किन्तु मई फिरौन क भुजा क तोड़ देब। तब फिरौन पीरा स चीखी, राजा क चीख एक मरत भए मनई क चीख स होइ। 25एह बरे मई बाबुल क राजा क भुजन क सक्तीसाली बनाउब, किन्तु फिरौन क भुजन कटिके गिरिहीं। तब उ पचे जानिहीं कि मई यहोवा हउँ।

“मई बाबुल क राजा क हाथन मँ तरवार देब। तउ उ आपन तरवार क संग दाखिल होइहीं अउर मिस्र क ऊपर तरवार चलाईहीं। 26मई मिस्रियन क रास्ट्रन मँ बिखेरब। तब उ पचे समुझिहीं कि मई यहोवा हउँ।”

### अस्सूर एक देवदार वृच्छ क तरह अहइ

31 देस निकारे क गियारहवें बरिस मँ तीसरे महीने क पहिले दिन यहोवा क सँदिसा मोका मिला। उ कहेस, 2“मनई क पूत, मिस्र क राजा फिरौन अउ ओकरे लोगन स इ कहा:

“तोहरी बड़कई मँ कउन तोहरे समान अहइ?

3मई तोहार तुलना लबानोन क देवदार क वृच्छ क संग कइ सकत हउँ। एकर सुन्नर डारन अहइ जउन कि लगभग पूरे वन क छाया देत ह। इ बहोत लम्बा अहइ। एकर सिखर बादर भेदी अहइ।

4जल वृच्छ क उगावत रहा। गहिर नदियन वृच्छ क ऊँचा करत रहिन। नदियन ओन ठउर क चारिहुँ कइँती बहत रहिन, जहाँ वृच्छ लगा रहेन। केवल एकर धारन ही खेत क दूसर वृच्छन तलक बहत रहिन।

5एह बरे खेते क सबहिँ वृच्छन स ऊँच वृच्छ उहइ रहा अउर इ कइउ साखन उगाइ राखी रहिन। हुवाँ काफी जल रहा। एह बरे वृच्छ साखन बाहर फइली रहिन।

6वृच्छ क साखन मँ संसार क सबहिँ पंछियन घोंसलन बनाए रहेन। वृच्छ क साखन क नीचे खेत क सबहिँ जनावर बच्चन क जनम देत रहेन। सबहिँ बड़े रास्ट्र उ वृच्छ क छाया मँ रहत रहेन।

7एह बरे वृच्छ आपन बड़कइ अउर आपन लम्बी साखन मँ सुन्नर रहा। काहेकि एकर जड़न यथेस्त जले तलक पहोंची रहिन।

8परमेस्सर क बगीचा क देवदारू वृच्छ भी, ओतने बड़े नहीं रहेन जेतना इ वृच्छ। सनौवर क वृच्छ ऐतना जियादा साखन नहीं रखतेन, चिनार वृच्छ भी अइसी साखन नहीं रखतेन, परमेस्सर क बगीचे क कउनो भी वृच्छ, एतना सुन्नर नहीं रहा जेतना इ वृच्छ।

9मई अनेक साखन सहित इ वृच्छ क सुन्नर बनाएउँ अउर परमेस्सर क बगीचा अदन क सबहिँ वृच्छ एहसे जलन रखत रहेन।”

10एह बरे मोर सुआमी यहोवा इ कहत ह, “वृच्छ ऊँच होइ गवा ह। इ आपन सिखरन क बादरन मँ पहोंचाइ दिहस ह। वृच्छ गर्वीला अहइ काहेकि इ ऊँच अहइ। 11एह बरे मई एक सक्तीसाली राजा क इ वृच्छ क लेइ दिहेउँ। उ सासक वृच्छ क ओकरे बुरे कामन बरे दण्ड दिहस। मई उ वृच्छ क आपन उद्यान स बाहेर किहेउँ ह। 12अजनबी-बहोत जियादा भयंकर रास्ट्रन एका काट डाएन अउर छोड़ दिहन। वृच्छ क साखन पर्वतन अउ सारी घाटी मँ गिरिन। उ प्रदेश मँ बहइवाली नदियन मँ उ सबइ टूट अंग बहि गएन। वृच्छ क खाले कउनो छाया नहीं रहि गइ, एह बरे सबहिँ लोग ओका छोड़ दिहन। 13अब उ गिरे वृच्छ मँ पंछी रहत हीं अउर एकर गिरी साखन पड़ जंगली जनावर चलत हीं।

14“अब उ जल लगे कउनो भी, वृच्छ गर्वीला नहीं होइ। उ पचे बादरन तलक पहोंचइ नहीं चहिहीं। कउनो भी सक्तीसाली वृच्छ, जउन उ जल क पिअत ह, ऊँच होइ क आपन तारीफ नहीं करी। काहेकि ओन सबहिन क मउत क सामना करइ क होइ। उ सबइ कब्र मँ जाइहीं।”

15मोर सुआमी यहोवा इ कहत ह, “उ दिन जब तलक वृच्छ सेओल क गवा मई लोगन स सोक मनवाएउँ। मई गहिर जल क, ओकरे बरे, सोक स ढक दिहेउँ। मई वृच्छ क नदियन क रोक दिहेउँ अउर वृच्छ बरे जल क बहब रूक गवा। मई लबानोन स एकरे बरे सोक मनवाएउँ। खेते क सबहिँ वृच्छ क सोक स रोगी होइ गएन। 16मई वृच्छ क गिराएउँ अउर वृच्छ क गिरइ क ध्वनि क डर स रास्ट्र काँप उठेन। मई वृच्छ क मउत क ठउरे पड़ पहोंचाएउँ। इ खाले ओन लोगन क संग रहइ गवा जउन उ नरक मँ नीचे गिरे भए रहेन। अतीत मँ एदेन क सबहिँ वृच्छ अर्थात लबानोन क सर्वोत्तम वृच्छ उ पानी क पिअत रहेन। ओन सबहिँ वृच्छ पाताल लोक मँ सान्ति प्राप्त किहेन। 17हाँ, उ सबइ वृच्छ भी बड़के वृच्छ क संग मउत क जगह पड़ गएन। उ पचे ओन मनइयन क संग धरेन जउन जुद्ध मँ मर गए रहेन। उ बड़का वृच्छ दूसर वृच्छन क सक्तीसाली बनाएस। उ सबइ वृच्छ, रास्ट्रन मँ, उ बड़के वृच्छ क छाया मँ रहत रहेन।

18“एक बरे मिस्र, एदेन मँ बहोत स बिसाल अउ सक्तीसाली वृच्छ अहइ। ओनमों स एक वृच्छ क संग मई तोहार तुलना करब। तू एदेन क वृच्छन क संग पाताल लोक क जाब्या। मउत क जगह मँ तू ओन बिदेसियन अउ जुद्ध मँ मारे गए मनइयन क साथ मँ ओलरब्या।

“हाँ, इ फिरौन अउ ओकर सबहि लोगन क संग होइ।” मोर सुआमी यहोवा इ सबइ कहे रहा।

### फिरौन एक सेर या दैत्य?

**32** देस निकारे क बारहवें बरिस क बारहवें महीने क पहिले दिन यहोवा क बचन मोरे लगे आवा। उ कहेस, **2**“मनई क पूत, मिस्त्र क राजा फिरौन क बारे में इ करुण गीत गावा। ओहसे कहा:

“रास्ट्रन में गर्व क संग टहरत भए ‘तू सोचे रह्या तू सक्तीसाली युवा सेर अहा। किन्तु फुरइ समुद्र क दैत्य जइसे अहा। तू नदी प्रवाह क ढकेल के राह बनावत अहा, अउर आपन गोड़न स जल क मटमैला करत अहा। तू मिस्त्र क नदियन क उद्वेलित करत अहा।”

**3**मोर सुआमी यहोवा इ कहत ह: “मई बहोत स लोगन क एक संग बटोरेऊँ ह। अब मई तोहरे ऊपर जालि फेंकब। तब उ सबइ लोग तोहका हीच लेइहीं।

**4**तब मई तोहका झुरान भुईया पइ गिराइ देब। मई तोहका खेते में लोकाउब। मई सबहि पंछियन क तोहका खाइके बोलावाउब। मई हर जगह स जंगली जनावरन क तोहका खाइ अउर पेट भरइ बरे बोलवाउब।

**5**मई तोहरे बदन क पर्वतन पइ बिखेरब। मई तोहरे ल्हास स घाटियन क भरि देब।

**6**मई तोहार रक्त पर्वतन पइ डाउब अउर धरती एका सोखी। नदियन तोहसे भरि जइहीं।

**7**मई तोहका लुप्त कइ देब। मई नभ क ढक देब अउर नछत्रन क करिया कइ देब। मई सूरज क बादर स ढकि देब अउर चन्दा नहीं चमकी।

**8**मई सबहि चमकत जोतियन क नभ में तोहरे ऊपर काला बनाउब। मई तोहरे सारे देस में अँधेरा कइ देब।

**9**बहोत सारे रास्ट्र किरोधित होइहीं। जब उ पचे सुनिहीं कि तोहका नस्ट करइ बरे मई एक दुस्मन क लिआएऊँ। रास्ट्र जेनका तू जानत भी नहीं, तिलमिलाइ जइहीं। **10**मई बहोत स लोगन क तोहार कारण विस्मित कइ देब। जब मई आपन तरवार ओन लोगन क समन्वा चलाउब तउ ओनकर राजा लोग तोहार कारण डर स काँपिहीं। जउने दिन तोहार पतन होइ उहइ दिन, हर एक छिन, राजा लोग भयभीत होइहीं। हर एक राजा आपन जिन्नगी बरे भयभीत होइ।”

**11**काहेकि मोर सुआमी यहोवा इ कहत ह: “बाबुल क राजा क तरवार तोहरे विरुद्ध जुद्ध करइ आई। **12**मई ओन फउजियन क उपयोग तोहरे लोगन क जुद्ध में मार डावइ में करब। उ सबइ फउजी रास्ट्रन में सबस भयंकर रास्ट्र आवत हीं। उ सबइ ओन चीजन क नस्ट कइ देइहीं ओनकर गर्व मिस्त्र अहइ। मिस्त्र क लोग नस्ट कइ दीन्ह जइहीं। **13**मिस्त्र में नदियन क सहारे बहोत स जनावर अहइँ। मई एन जनावरन क भी नस्ट करब। लोग भविस्स में, आपन गोड़न स पानी क गंदा नहीं करिहीं। गइयन क खुर भविस्स में पानी क मइला नहीं करिहीं। **14**इ तरह मई मिस्त्र में पानी क सान्त बनाउब। मई ओनकर नदियन क मन्द बहाउब उ सबइ तेल क तरह बहिहीं।” मोर सुआमी यहोवा

इ सबइ कहेस, **15**“मई मिस्त्र देस क खाली कइ देब। उ हर चीज स रहित होइ। मई मिस्त्र में रहइवाले सबहि लोगन क दण्ड देब। तब उ पचे जनिहीं कि मई यहोवा अउर सुआमी हउँ।

**16**“इ एक करुणागीत अहइ जेका लोग मिस्त्र बरे गइहीं। दूसर रास्ट्रन में बिटियन मिस्त्र क बारे में इ करुण-गीत क गइही। उ पचे एका, मिस्त्र अउर ओकर सबहि लोगन क बारे में करुण-गीत क रूप में गइहीं।” मोर सुआमी यहोवा इ कहे रहा।

### मिस्त्र क नस्ट कीन्ह जाब

**17**देस निकारे क बारहवें बरिस में, उ महीने क पन्द्रहवें दिन, यहोवा क सँदेसा मोका मिला। उ कहेस, **18**“मनई क पूत, मिस्त्र क लोगन बरे रोआ। मिस्त्र क सक्तीसाली रास्ट्रन ओन बिटियन क, संग पाताल तलक पहुँचावा। ओनका उ पाताल लोक में पहुँचावा जहाँ उ पचे ओन मनइयन क संग होइहीं जउन उ गड़ा में गएन।

**19**“मिस्त्र, तू कउनो दूसर स अच्छा नहीं अहा। मउत क ठउरे पइ चले जा। जा अउर ओन बिदेसियन क संग लेटा।

**20**“मिस्त्र क ओन सबहि दूसर लोगन क संग रहइ क होइ जउन जुद्ध में मारे ग रहेन। दुस्मन ओका अउर ओकरे सबइ लोगन क घसीट लिहस ह।

**21**“मजबूत अउ सक्तीसाली मनई जुद्ध में मारे गएन। उ सबइ बिदेसी मउत क ठउर पइ गएन। उ ठउरे स उ सबइ लोग मिस्त्र अउ ओकरे सहायकन स बातन करिहीं। उ सबइ जउन जुद्ध में मारा ग रहेन।

**22**“अस्सूर अउ अउर ओकर सारी फउज हुवाँ मउत क ठउर पइ अहइ। ओनकर कब्रन खाले गहिर नरक में अहइँ। उ सबइ सबहि अस्सूर क फउजी जुद्ध में मारा गएन। **23**ओकर कब्रन ओकरी कब्र क चारिहुँ ओर अहइँ। जब उ पचे जिअत रहेन तब उ पचे लोगन का भय भीत करत रहेन। किन्तु अब उ पचे सबहि पूर्ण सान्त अहइँ उ पचे सबहि जुद्ध में मारा गएन।

**24**“एलाम हुआँ अहइ अउर एकर सारी फउज ओकर कब्र क चारिहुँ ओर अहइ। उ सबइ सबहि जुद्ध में मारा गएन। उ पचे बिदेसी गहिर खाले धरती में गएन। जब उ पचे जिअत रहेन, उ सबइ लोगन क भयभीत करत रहेन। किन्तु उ पचे आपन लज्जा क अपने संग उ गहिर नरक में लइ गएन। **25**उ पचे एलाम अउर ओकर फउजियन बरे, जउन जुद्ध में मारे गएन ह, बिछावन लगाइ दिहन ह। एलाम क सारी फउज ओकरी कब्र क चारिहुँ ओर अहइँ। इ सबइ सबहि बिदेसी जुद्ध में मारा ग रहेन। जब उ पचे जिअत रहेन, उ पचे लोगन क डेरावत रहेन। किन्तु उ पचे लज्जा क आपन संग उ गहिर नरक में लइ गएन। उ पचे ओन सबहि लोगन क संग रखे गएन, जउन मारे ग रहेन।

**26**“मेसेक, तूबल अउर ओनकर सारी फउजन हुवाँ अहइँ। ओनकर कब्रन एनके चारिहुँ ओर अहइँ। उ सबइ खतनाहीन मनइयन रहेन जउन जुद्ध में मारे गए रहेन। जब उ पचे जिअत रहेन तब उ पचे लोगन क भयभीत करत रहेन। **27**किन्तु अब उ पचे सक्तीसाली मनइयन क संग

ओलरा अहई जउन बहोत पहिले मर चुके रहेन। उ पचे आपन जुद्ध क अस्त्र-सस्त्रन क संग दफनावा गएन। ओनकर तरवारन ओनके मूँडे क खाले रखी जइहीं। किन्तु ओनकर पाप ओनकर हड्डियन पइ अहई। काहेकि जब उ पचे जित रहेन, उ पचे लोगन क डेराए रहेन।

28“मिस्र, तू भी नस्त होब्या। तू ओन बिदेसियन क संग ओलरब्या। तू ओन दूसर फउजियन क संग ओलरब्या जउन जुद्ध में मारे जाइ चुका अहई।

29“एदोम भी हुवई अहइ। ओकर राजा अउर दूसर प्रमुख ओनके संग हुवाँ रहेन। उ सबइ सक्तीसाली फउजी भी रहेन। किन्तु अब उ पचे ओन दूसर लोगन क संग ओलरा रहेन। जउन जुद्ध में मारे गए रहेन। उ पचे ओन बिदेसियन क संग आलग रहेन। उ पचे ओन मनइयन क संग खाले नरक में चले गएन।

30“उत्तर क सबहि सासक हुवाँ अहई। हुवाँ सीदोन क सबहि फउजी अहई। ओनकर सक्ती लोगन क डेरावत रही। किन्तु उ पचे अब लज्जित अहई। उ सबइ बिदेसी ओन दूसर मनइयन क संग ओलरा अहई जउन जुद्ध में मारे गए रहेन। उ पचे आपन लज्जा अपने संग उ गहिर नरक में लइ गएन।

31“फिरौन ओन लोगन क लखी जउन मउत पइ गएन ओकर सबइ सेना बरे ओका सान्तवना दीन्ह जाइ काहेकि फिरौन अउर ओनकर सारी सेना जंग में मारि जाइ।” मोर सुआमी यहोवा इ कहे रहा।

32“जब फिरौन जित रहा तब मई लोगन क ओहसे भयभीत कराएस। किन्तु अब उ ओन बिदेसियन क संग ओलरी। फिरौन अउ ओकर फउज ओन दूसर फउजियन क संग ओलरी जउन जुद्ध में मारे गए रहेन।” मोर सुआमी यहोवा इ कहे रहा।

### परमेस्सर यहेजकेल क इस्त्राएल क पहरेदार चुनत ह

**33** यहोवा क बचन मोका मिला। उ कहेस, 2“मनई क पूत, आपन लोगन स बातन करा। ओनसे कहा, ‘मई दुस्मन क फउजियन क उ देस क खिलाफ जुद्ध बरे लइ जाइ सकत हउँ। जब अइसा होइ तउ लोग एक मनई क पहरेदार क रूप में चुनिहीं। 3जदि पहरेदार दुस्मन क फउजियन क आवत देखत ह, तउ उ तुरही बजावत ह अउर लोगन क सावधान करत ह। 4जदि लोग उ चितउनी क सुनई किन्तु अनसुनी करई तउ दुस्मन ओनका धरी अउर ओनका बन्दी क रूप में लइ जाइ। उ मनई आपन मउत बरे खुद जिम्मेदार होइ। 5उ तुरही सुनेस, पर चितउनी अनसुनी किहेस। एह बरे आपन मउत बरे उ खुद दोखी अहइ। जदि उ चितउनी पइ धियान दिए होत तउ उ आपन जिन्नगी बचाइ लिए होत।

6“किन्तु इ होइ सकत ह कि पहरेदार दुस्मन क फउजियन क आवत लखत ह, किन्तु तुरही नहीं बजावत। उ पहरेदार लोगन क चितउनी नहीं दिहस। दुस्मन ओनका धरी अउर ओनका बन्दी बनाइके लइ जाइ। उ मनई लइ जावा जाइ काहेकि उ पाप किहेस। किन्तु पहरेदार भी उ आदमी क मउत क जिम्मेदार होइ।’

7“अब, मनई क पूत, मई तोहका इस्त्राएल क परिवार क पहरेदार चुनत हउँ। जदि तू मोरे मुँह स कउनो सँदेसा सुना तउ तोहका मोरे बरे लोगन क चितउनी देइ चाही। 8मई तोहसे कहि सकत हउँ, ‘इ पापी मनई मरी।’ तब तोहका उ मनई क लगे जाइके मोरे बरे ओका चितउनी देइ चाही। जदि तू उ पापी मनई क चितउनी नहीं देत्या अउर ओका आपन जिन्नगी बदलइ क नहीं कहत्या, तउ उ पापी मनई मरी, काहेकि उ पाप किहेस। किन्तु मई तोहका ओकर मउत क जिम्मेदार बनाउब। 9किन्तु जदि तू उ बुरे मनई क आपन जिन्नगी बदलइ बरे अउर पाप तजइ बरे चितउनी देत अहा अउर जदि उ पाप करब तजइ स इन्कार करत ह तउ उ मरी काहेकि उ पाप किहेस, किन्तु तू आपन जिन्नगी बचाइ लिहा।”

### परमेस्सर लोगन क नस्त करइ नहीं चाहत

10“एह बरे मनई क पूत, इस्त्राएल क परिवार स मोरे बरे कहा। उ सबइ लोग कह सकत हीं, ‘हम लोग पाप किहा ह अउर नेमन क तोड़ा ह। हमार पाप हमरी सहनसक्ती क बाहर अहई। हम ओन पापनक कारण मारा होत अही। हम जित रहइ बरे का कइ सकित ह।’

11“तोहका ओनसे कहइ चाही, ‘मोर सुआमी यहोवा कहत ह: मई आपन जिन्नगी क किरिया खाइके बिस्सास दिआवत हउँ कि मई लोगन क मरत लखिके आनन्दित नहीं होत हउँ, हिआँ तलक कि बुरे लोगन बरे भी नहीं। मई नहीं चाहत कि उ पचे मरई। मई चाहत हउँ कि उ बुरे लोग आपन जिन्नगी क बदलई जेहसे उ पचे जित रहि सकई। एह बरे बुरे काम करब तजा। इस्त्राएल क परिवार, तोहका मरब ही काहे चाही?’

12“मनई क पूत, आपन लोगन स कहा, ‘जदि कउनो मनई पुराने समइ में पूण्य कर्म किहेस ह तउ ओहसे ओकर जिन्नगी नहीं बचिहीं जदि उ अपराध पाप करब सुरू करइ। जदि कउनो मनई पुराने समइ में पाप किहेस, तउ उ नस्त नहीं कीन्ह जाइ, जदि उ पाप स दूर हटि जात ह। एह बरे याद राखा, एक मनई क जरिये पुराने समइ में कीन्ह गए पुण्य कर्म ओकर रच्छा नहीं करिहीं, जदि उ पाप करब सुरू करत ह।’

13“इ होइ सकत ह कि मई कउनो नीक मनई क बरे कहउँ कि उ जित रहि। किन्तु इ होइ सकत ह कि उ नीक मनई इ सोचब सुरू करइ कि पुराने समइ में उसके जरिये कीन्ह गए कर्म ओकर रच्छा करिहीं। एह बरे उ बुरे कर्म करब सुरू कइ सकत ह। किन्तु मई ओकर पुराने समइ क पुण्य क याद नहीं राखब। नहीं, उ ओन पापनक कारण मरी जेनका उ करब सुरू करत ह।

14“या इ होइ सकत ह कि मई कउनो दुस्त मनई क बरे कहउँ कि उ मरी। किन्तु उ आपन जिन्नगी क बदल सकत ह। उ पाप करब तजि सकत ह। उ नीक अउ उचित होइ सकत ह। 15उ उ गिरवी क चीज क लउटाइ सकत ह जेका उ रिण में मुद्रा देत समइ रखे रहा। उ ओन चिजियन क भुगतान कइ सकत ह जेनका उ चोराए रहा। उ ओन नेमन क पालन कइ सकत ह जउन जीवन देत हीं। उ बुरे

काम करब छोड़ देत ह। तब उ मनई निहचय इ ही जिअत रही। उ मरी नाहीं। 16मई ओकरे पुराने समइ क पापन्क याद नाहीं करब। काहेकि उ अब ठीक-ठाक रहत ह अउर उचित बेउहार रखत ह। एह बरे उ जिअत रही।

17“किन्तु तोहार लोग कहत हीं, ‘इ उचित नाहीं अहइ। यहोवा मोर सुआमी वइसा नाहीं होइ सकत।’

“परन्तु उ सबइ ही लोग अहई जउन उचित नाहीं अहई। उ सबइ ही लोग अहई, जेनका बदलइ चाही। 18जदि नीक मनई पुण्य करब बन्द कइ देत ह अउर पाप करब सुरू करत ह तउ उ अपने पापन्क कारण मरी। 19अउर जदि कउनो पापी पाप करब छोड़ देत ह अउर ठीक-ठाक तथा उचित रहब सुरू करत ह तउ उ जिअत रही। 20किन्तु तू लोग अब भी कहत अहा कि मई उचित नाहीं अहउँ। किन्तु मई फुरइ कहित हउँ। इस्त्राएल क परिवार, हर एक मनई क संग निआउ, उ जउन करत ह, ओकरे अनुसार होइ।”

### यरूसलेम पइ अधिकार कइ लीन्ह गवा

21देस निकारे क बारहवें बरिस मँ, दसएँ महीने क पँचएँ दिन एक मनई मोर लगे यरूसलेम स आवा। उ हुवाँ क जुद्ध स बच निकरा रहा। उ कहेस, “यरूसलेम पइ अधिकार होइ गवा।” 22अइसा भावा कि जउने दिन उ मनई मोरे लगे आवा ओकर पूर्व साँझ क, मोर सुआमी यहोवा क सक्ती मोह पइ उतरी। परमेस्सर मोका जउने समइ उ मनई मोरे लगे आवा स पहिले सुहब मँ बोलइ जोग्य बनाएस यहोवा मोर मुँह खोल दिहे रहा अउर फुन स मोका बोलइ दिहस। 23तब यहोवा क बचन मोका मिला। उ कहेस, 24“मनई क पूत, इस्त्राएल क ध्वस्त नगरन मँ इस्त्राएली लोग रहत अहई। उ सबइ लोग कहत अहई, ‘इब्राहीम केवल एक मनई क रहा अउर परमेस्सर ओका इ सारी भुइँया दइ दिहस। अब हम अनेक लोग अही। एह बरे निहचय ही इ भुँइया क हम लोग आपन विरासत क रूप मँ हासिल करब।’

25“तोहका ओनसे कहइ चाही कि मोर सुआमी यहोवा इ कहत ह, ‘तू लोग खून स सना माँस खात अहा। तू लोग आपन देवमूरतियन स मदद क आसा करत अहा। तू लोगन क मारि डावत अहा। एह बरे मई तू लोगन क इ भुँइया काहे देउँ। 26तू पचे आपन तरवार पइ भरोसा करत अहा। तू पचन्मँ स हर एक भयंकर पाप करत ह। तू पचन्मँ स हर एक आपन पड़ोसी क पत्नी क संग बिभिचार करत ह। एह बरे तू भुँइया पाइ नाहीं सकत्या।’

27“तू पचन्क कहइ चाही कि सुआमी यहोवा इइ कहत ह, “मई आपन जिन्नगी क किरिया खाइके प्रतिग्या करत हउँ, कि जउन लोग ओन ध्वस्त नगरन मँ रहत हीं, उ पचे तरवार क घाट उतारे जइहीं। जदि कउनो उ देस स बाहेर होइ तउ मई ओका जनावरन स मरवाउब अउर खिआउब। जदि लोग किले अउर गुफन मँ छिपे होइहीं तउ पचे रोग स मरिहीं। 28मई भुँइया क खाली अउर बर्बाद करब। उ देस ओन सबहिं चिजियन क खोइ देइ जेन पइ ओका गर्व रहा। इस्त्राएल क पर्वत खाली होइ जइहीं। उ ठउरे स

कउनो गुजरी नाहीं। 29ओन लोग अनेक भयंकर पाप किहेन ह। एह बरे मई उ देस क खाली अउ बर्बाद करब। तब उ सबइ लोग जनिहीं कि मई यहोवा हउँ।”

30“अब तोहरे बारे मँ, मनई क पूत, तोहार लोग देवारन क सहारे निहुरे भए अउर आपन दरवाजन मँ खड़े अहई अउर उ पचे तोहरे बारे मँ बात करत हीं। उ पचे एक दूसर स कहत हीं, “आवा, हम जाइके सुनी जउन यहोवा कहत ह।” 31एह बरे उ पचे तोहरे पचन्क लगे वइसे ही आवत हीं जइसे उ पचे मोर लोग होई। इ लोग तोहरे पचन्क समन्वा अइसे बइठत ह जइसे उ पचे मोर लोग अहइ। उ पचे तोहार सँदेसा सुनत ह। किन्तु उ पचे उ नाहीं करिहीं जउन तू कहव्या। उ पचे सिरिफ उ कइ चाहत हीं जउन अनुभव कइ मँ अच्छा होइ। उ पचे लोगन क धोखा देइ चाहत हीं अउर अधिक धन कमावइ चाहत हीं।

32“तू एन लोगन क दृष्टि मँ प्रेमगीत गावइवाले गायक स जियादा नाहीं अहा। तोहार स्वर अच्छा अहइ। तू आपन बाजा अच्छा बजावत अहा। उ पचे तोहार सँदेसा सुनिहीं किन्तु उ पचे उ नाहीं करिहीं जउन तू कहत अहा। 33किन्तु जिन चिजियन क बारे मँ ओन लोगन स कहत अहा, उ सबइ फुरइ घटित होइहीं अउर तब लोग समझिहीं कि ओनके बीच फुरइ एक ठु नबी रहत रहा।”

### इस्त्राएल भेड़िन क एक झुण्ड क तरह अहइ

34 यहोवा क वचन मोका मिला। उ कहेस, 2“मनई क पूत, मोरे बरे इस्त्राएल क गइरियन (प्रमुखन) क बिरूद्ध बातन करा। ओनसे मोरे बरे बातन करा। ओनसे कहा कि सुआमी यहोवा इ कहत ह: ‘इस्त्राएल क गइरियो तू पचे सिरिफ आपन पेट भरत अहा। इ तोहरे बरे बहोत बुरा होइ। का गइरियन क भेड़िन क पेट नाहीं भरइ चाही? 3तू मनई पनीर खावत अहा। अउर आपन ओढ़ना बनावइ बरे भेड़िन ऊन क प्रयोग करत अहा। तू पचे मोटी भेड़ी क मारत अहा, किन्तु भेड़िन क धियान नाहीं रखत ह। 4तू पचे दुर्बल क बलवान नाहीं बनाया। तू पचे रोगी भेड़ी क परवाह नाहीं किहा ह। तू पचे चोट खाइ भइ भेड़िन क पट्टी नाहीं बाँध्या। कछू भेड़िन भटकिके दूर चली गइन अउर तू पचे ओनका हेरइ अउर ओनका वापस लेइ नाहीं गया। नाहीं, तू पचे क्रूर अउर कठोर रह्या, इहइ राह रही जउने पइ तू भेड़िन क लइ जाइ चाह्या।

5“अउर अब, भेड़िन बिखरि गइ अहई काहेकि उ पचन्क कउनो गइरिया नाहीं रहा। उ पचे हर एक जंगली जनावर क भोजन बनी। एह बरे उ सबइ बिखरि गइन। 6मोर भेड़िन क झुण्ड सबहिं पर्वतन अउ ऊँच पहाड़ियन पइ भटकिन। मोर भेड़िन क झुण्ड धरती क सारी सतह पइ बिखरि ग अइन। कउनो भी ओनकर खोज अउ देखरेख कइवाला नाहीं रहा।”

7एह बरे तू गइरियो, यहोवा क बचन सुना। मोर सुआमी यहोवा कहत ह, 8“मई आपन जिन्नगी क किरिया खाइके तू पचन्क इ बिस्सास दियावत हउँ। जंगली जनावरन मोर भेड़िन क धरेन। हाँ, मोर भेड़िन क झुण्ड सबहिं जंगली जनावरन क भोजन बन गइन। काहेकि ओनकर कउनो ठीक

गड़रिया नहीं रहा। मोर गड़रियन मोर भेड़िन क झुण्ड क खोज नहीं किहन। ओन गड़रियन खुद ही भेड़िन क मारेन अउर खुद खाएन। उ पचे मोर भेड़िन क चारा नहीं दिहन।”

9एह बरे तू पचे गड़रियो, यहोवा क सँदिसा क सुना। 10यहोवा कहत ह, “मई ओन गड़रियन क विरूद्ध हउँ। मई ओनसे आपन भेड़िन माँगब। मई ओन पइ हमला करब। उ पचे भविस्स मैं मोर गड़रियन नहीं रहिहीं। मई ओनकर मुँहे स आपन भेड़िन क झुण्ड क बचाउब। तब मोर भेड़िन ओनकर भोजन नहीं होइहीं।”

11मोर सुआमी यहोवा कहत ह, “मई खुद ओनकर गड़रिया बनब। मई आपन भेड़िन क खोज करब। मई ओनका हेरब। 12जदि कउनो गड़रिया आपन भेड़िन क संग उ समइ अहइ जब ओकर भेड़िन दूर भटकइ लगी होइँ तउ उ ओनका हरेइ जाइ। उहइ तरह मई आपन भेड़िन क खोज करब। मई आपन भेड़िन क बचाउब। मई ओनका ओन ठउरन स लउटाउब जहाँ उ पचे उ बदरी अउर अँधेरा मैं भटक गइ रहिन। 13मई ओनका ओन रास्ट्रन स वापस लिआउब। मई ओन देसन स ओनका बटोरब। मई ओनका ओनके आपन देस मैं, लिआउब। मई ओनका इस्राएल क पर्वतन पइ, जल स्रोतन क सहारे, ओन सबहिं ठउरन मैं जहाँ लोग रहत हीं, खियाउब। 14मई ओनका घासवाले खेतन मैं लइ जाब। उ पचे इस्राएल क सबन्त ऊँचे पर्वतन पइ जइहीं। हुवाँ उ पचे अच्छी चिरागाह पइ सोइहीं अउ अच्छी घास खइहीं। उ पचे इस्राएल क पर्वत पइ भरी-पूरी घास-वाली भुइँया मैं चरिहीं। 15हाँ, मई आपन झुण्ड क खिआउब अउर ओनका विस्राम क ठउर पइ लइ जाब।” मोर सुआमी यहोवा इ कहे रहा।

16“मई खोइ भेड़ी क खोज करब। मई ओन भेड़िन क वापस लिआउब जउन बिखर गइ रहिन। मई ओन भेड़िन क पट्टी करब जेनका चोट लगी रही। मई कमजोर भेड़ी क मजबूत बनाउब। अउर मई मोटा अउ सक्तीसाली भेड़िन स ओनकइ रच्छा करब। मई ओनकर चरवाही निआवपूर्ण तरीका स करब।”

17मोर सुआमी यहोवा इ कहत ह, “अउर तू, मोर झुण्ड, मई हर एक भेड़ी क संग निआउ करब। मई भेड़िन अउर बोकसन क बीच निआउ करब। 18तू अच्छी भुइँया पइ उगी घास खाइ सकत ह। तू उ घासे क काहे कुचरत अहा जेका दूसर भेड़िन खाइ चाहत हीं? तू काफी मात्रा मैं स्वच्छ जल पी सकत ह। तउ तू उ जल क हिलाइके गन्दा काहे करत अहा, जेका दूसर भेड़िन पिअइ चाहत हीं? 19अब मोर भेड़िन क झुण्ड उ घास क खाइ चाही जेका तू आपन गोड़न स कुचरया अउर उ पानी पीअइ चाही जेका तू आपन गोड़न स हिलाइके गन्दा कइ दिहा।”

20एह बरे मोर सुआमी यहोवा ओनसे कहत ह: “मई खुद मोटी अउ पतरी भेड़िन क संग निआउ करब। 21तू आपन बगल स अउर आपन काँधन स धक्का दइके अउर आपन सींगन स सबहिं कमजोर भेड़िन क तब तलक मार गिरावत ह, जब तलक तू ओनका दूर चले जाइ बरे मजबूर नहीं करत्या। 22एह बरे मई आपन भेड़िन क झुण्ड का बचाउब। उ सबइ भविस्स मैं जंगली जनावरन स नहीं धरी जइहीं।

मई हर एक भेड़ी क संग निआउ करब। 23तब मई ओनके ऊपर एक गड़रिया आपन सेवक दाऊद क राखब। उ ओनका अपने आप खिआई अउर ओनकर गड़रिया होइ। 24तब मई यहोवा अउर सुआमी, ओनकर परमेस्सर होब अउर मोर सेवक दाऊद ओनकर सासक होब। मई यहोवा इ कहेउँ ह।

25“मई आपन भेड़िन क संग एक ठु सात्ति-सन्धि करब। मई नोस्कान पहोंचावइवाले जनावरन क देस स बाहेर कइ देब। तब भेड़िन रेगिस्ताने मैं सुरच्छित रहिहीं अउर जंगल मैं सोइहीं। 26मई आपन भेड़िन क आपन पहाड़ी क चारिहुँ ओर क ठउरन क आसीबाद देब। मई ठीक समइ पइ बर्खा करब। अउर बर्खा ओनकर बरे आसीबाद होइहीं। 27खेतन मैं उगइवाले बूच्छ आपन फल देइहीं। भुइँया आपन फसल देइ। एह बरे भेड़िन आपन प्रदेश मैं सुरच्छित रहिहीं। मई ओनके ऊपर रखे जुअन क तोड़ डाउब। मई ओनका ओन लोगन क सक्ती स बचाउब जउन दास बनाएन। तब उ पचे जनिहीं कि मई यहोवा हउँ।

28“उ पचे जनावरन क तरह भविस्स मैं दूसर रास्ट्रन क जरिये बन्दी नहीं बनावा जइहीं। उ सबइ जनावर ओनका भविस्स मैं नहीं खइहीं। अपितु अब उ सबइ सुरच्छित रहिहीं। कउनो ओनका आतंकित नहीं करी। 29मई ओनका कछू अइसी भुइँया देब जउन एक अच्छा बगीचा बनी। तब उ पचे उ देस मैं भूख स पीड़ित नहीं होइहीं। उ पचे भविस्स मैं रास्ट्रन स अपमानित होइ क कस्ट पइहीं। 30तब उ पचे समुझिहीं कि मई ओनकर परमेस्सर यहोवा हउँ। तब उ पचे समुझिहीं कि मई ओनके संग हउँ। इस्राएल क परिवार समुझी कि उ सबइ मोर लोग अहई।” मोर सुआमी यहोवा इ कहे रहा।

31“तू मोर भेड़िन, मोर चरागाह क भेड़िन, तू सिरिफ मनई अहा अउर मई तोहार परमेस्सर हउँ।” मोर सुआमी यहोवा इ कहेस।

### एदोम क खिलाफ सँदिस

**35** मोका यहोवा क बचन मिला। उ कहेस, 2“मनई क पूत, सेईर पर्वत कइँती धियान द्या अउर मोरे बरे एक खिलाफ कछू कहा। 3एहसे कहा, ‘मोर सुआमी यहोवा इ कहत ह:

“सेईर पर्वत, मई तोहरे खिलाफ हउँ। मई तोहका दण्ड देब। मई तोहका खाली बरबाद छेत्र कइ देब।

4मई तोहरे नगरन क नस्ट करब, अउर तू खाली होइ जाब्या। तब तू समुझब्या कि मई यहोवा हउँ।

5काहेकि तू सदा मोरे लोगन क विरूद्ध रह्या। तू इस्राएल क विरूद्ध आपन तरवारन क उपयोग ओकर बिपत्ति क समइ मैं किहा, ओनकर आखिर दण्ड क समइ मैं।”

6एह बरे मोर सुआमी यहोवा कहत ह, “मई आपन जिन्गी क किरिया खाइके प्रतिग्या करत हउँ कि मई तोहरे बरे रक्तपात लिआउब। रक्त तोहार पिछा करिहीं। तोहका लोगन क रक्त बहावइ मैं घिना नहीं भएस। एह बरे रक्त तोहार पाछा करी। 7मई सेईर पर्वत क खाली बरबाद कइ

देब। मई उ हर एक मनई क मार डाउब जउन उ नगर स आई अउर मई उ हर मनई क मार डाउब जउन उ नगर मँ जाइ क जतन करी। 8मई ओकर पर्वतन क ल्हासन स ढक देब। उ सबइ ल्हास तोहार सारी पहाड़िन, तोहार घाटी अउर तोहार सारे नालन मँ फइले होइहीं। 9मई तोहका सदा बरे नस्त कइ देब। तोहरे पचन्क नगरन मँ कउनो जिअत नाही रही। तब तू समुझब्या कि मई यहोवा हउँ।”

10तू कह्या, “इ दुइनउँ रास्ट्र अउर देस (इस्त्राएल अउ यहूदा) मोर होइहीं। हम ओनका आपन बनाइ लेब।”

किन्तु यहोवा हुवँ अहइ। 11मोर सुआमी यहोवा कहत ह, “तू मोरे लोगन बरे ईस्यालु रह्या। तू ओन पइ कोहान रह्या अउर तू मोहसे घिना करत रह्या। एह बरे आपन जिन्नगी क किरिया खाइके मई प्रतिग्या करत हउँ कि मई तोहका वइसे ही दण्डित करब जइसे तू ओनका चोट पहाँचाया। मई तोहका सजा देब अउर आपन लोगन क समुझइ देब कि मई ओनके संग हउँ। 12तब तू भी समुझब्या कि मई तोहरे सबहिं अपमानन क सुनेउँ ह। तू इस्त्राएल पर्वत क खिलाफ बहोत स बुरी बातन किहा ह। तू कह्या, ‘इस्त्राएल नस्त कइ दीन्ह गावा ह। हम लोग ओनका भोजन क तरह चबाइ जाब।’ 13तू पचे गर्वीला रह्या अउर मोरे खिलाफ बातन किहा। तू अनेक दाईउ कह्या अउर जउन तू कह्या, ओकर हर एक सब्द मई सुनेउँ। हँ, मई तू पचन्क सुनेउँ।”

14मोर सुआमी यहोवा इ कहत ह, “उ समइ सारी धरती खुस होइ जब मई तोहका नस्त करब। 15तू तब खुस रह्या जब इस्त्राएल देस नस्त भवा। मई तोहरे संग वइया ही बेउहार करब। सेइर पर्वत अउर एदोम क पूरा देस नस्त कइ दीन्ह जाइ। तब तू समुझब्या कि मई यहोवा हउँ।”

### इस्त्राएल देस क फुन निर्माण कीन्ह जाइ

**36** “मनई क पूत, मोरे बरे इस्त्राएल क पर्वतन स कहा। इस्त्राएल क पर्वतन क यहोवा क बचन सुनइ क कहा। 2ओनसे कहा कि सुआमी यहोवा इ कहत ह, ‘दुस्मन तोहार बिरुद्ध बोलेस ह। उ लोग कहेस, वाह! अब प्राचीन पर्वत हमार होइ।’

3“एह बरे मोरे बरे इस्त्राएल क पर्वतन स कहा। कहा कि सुआमी यहोवा इ कहत ह, ‘दुस्मन तोहका खाली किहस। उ पचे तोहका चारिहुँ ओर स कुचल डाएन ह। उ पचे अइसा किहेन। एह बरे तू दूसर रास्ट्रन क अधिकार मँ गया। तब तोहरे बारे मँ लोग बातन अउ कानाफूसी किहन।”

4एह बरे इस्त्राएल क पर्वतो, मोर सुआमी यहोवा क बचन सुना। मोर सुआमी यहोवा पर्वतन, पहाड़ियन, धारन, घाटियन, खाली खण्डहरन अउ छोड़े गए नगरन स, जउन चारिहुँ कइँती क दूसर रास्ट्रन क जरिये लूटेन अउ मजाक उडाए गएन कहत ह 5मोर सुआमी यहोवा कहत ह: “मई किरिया खात हउँ कि मई आपन जलजलाहट क अपने बरे बोलइ देब। मई एदोम अउर दूसर रास्ट्रन क आपन किरोध क अनुभवा कराउब। ओन रास्ट्रन मोर भुईया पइ कबजा कइ लिहेन। उ पचे उ देस क लइके बड़े खुस भएन। उ पचे उ भुईया क लूटिके बहोत खुस भएन।”

6“एह बरे इस्त्राएल देस क बारे मँ इ सबइ कहा। पर्वतन, पहाड़ियन, धारन अउ घाटियन स कहा। इ कहा कि मोर सुआमी यहोवा कहत ह, ‘मई आपन जलन अउ किरोध क आपन बरे बोलइ देब। काहेकि एन रास्ट्रन स तोहका अपमान क पीरा मिली ह।”

7एह बरे मोर सुआमी यहोवा इ कहत ह, “मई प्रतिग्या करत हउँ कि मई आपन हाथ उठाउब तोहरे चारिहुँ कइँती क रास्ट्र अपमान क कस्त भोगिहीं।”

8“किन्तु इस्त्राएल क पर्वतो, तू मोरे इस्त्राएल क लोगन बरे नए वृच्छ उगउब्या अउर फल पइदा करब्या। मोर लोग हाली लउटिहीं। मई तोहरे संग हउँ। 9मई तोहार मदद करब अउर तोहार देख-रेख करब। लोग तोहार भुईया जोतिहीं। लोग बिआ बोइहीं। 10तोहरे ऊपर अनगिनत लोग लहिहीं। इस्त्राएल क सारा परिवार अउर सबहिं लोग हुआँ रहिहीं। नगरन मँ, लोग रहइ लगिहीं। नस्त ठउर नवे जगहन क तरह बनिहीं। 11मई तोहका बहोत स लोग अउर जनावरन देब। उ पचे बढिहीं अउर ओनके बहोत गदेलन होइहीं। मई तोहारे ऊपर रहइवाले लोगन क वइसे ही प्राप्त कराउब, जइसे तू पहिले किहे रह्या। मई एका तोहरे बरे सुरूआत क बनिस्बत नीक बनाउब। तू फुन कबहुँ ओनका, ओनकर सन्तान स बंचित नाही करब्या। तब तू जनब्या कि मई यहोवा हउँ। 12हँ, मई आपन लोग, इस्त्राएल क तोहरी भुईया पइ चलाउब। उ पचे तोह पइ अधिकार करिहीं अउर तू ओनकर होब्या। तू ओनका बगैर बचन क फुन कबहुँ नाही बनउब्या।”

13मोर सुआमी यहोवा इ कहत ह, “हे इस्त्राएल देस लोग तोहसे बुरी बातन कहत हीं। उ पचे कहत हीं कि तू आपन लोगन क नस्त किहा ह। उ पचे कहत हीं कि तू बचन क दूर लइ गया। 14अब भविस्स मँ तू लोगन क नस्त नाही करब्या। तू भविस्स मँ बचन क दूर नाही लइ जाब्या।” मोर सुआमी यहोवा इ सबइ बातन कहे रहा। 15“मई ओन रास्ट्रन क तोहका, अउर जियादा अपमाणित नाही होइ देब। तू ओन लोगन स अउर जियादा चोट नाही खाब्या। तू ओनका गदेलन स रहित फुन कबहुँ नाही करब्या।” मोर सुआमी यहोवा इ सबइ बातन कहेस।

### यहोवा आपन अच्छे नाउँ क रच्छा करी

16तब यहोवा क बचन मोका मिला। उ कहेस, 17“मनई क पूत, इस्त्राएल क परिवार आपन देस मँ रहत रहा। किन्तु उ पचे उ देस क आपन कामन स दुसित बनाइ दिहन जउन उ पचे किहन। मोरे बरे उ पचे अइसी मेहरारू क समान रहेन जउन आपन मासिक धरम स असुद्ध होइ गइ होइ। 18उ पचे जब उ देस मँ लोगन क हत्या किहन तउ उ पचे धरती पइ खून फइलाएन। उ पचे आपन देवमूरतियन स देस क गन्दा किहन। एह बरे मई ओनका देखाएउँ कि मई केतना कोहान रहेउँ। 19मई ओनका रास्ट्रन मँ बिखेरेउँ अउर सबहिं देसन मँ फइलाएउँ। मई ओनका दण्ड उ बुरे काम बरे दिहेउँ जउन उ पचे किहन। 20उ पचे ओन दूसर रास्ट्रन क गएन अउर ओन देसन मँ भी उ पचे मोर अच्छे नाउँ क बदनाम किहेन। कइसे? हुवाँ रास्ट्रन ओनके बारे मँ बातन

किहना। उ पचे कहेन, 'इ सबइ यहोवा क लोग अहई किन्तु इ पचे ओकर देस तजि दिहन तउ जरूर यहोवा में कछू खराबी होइ।'

21"इस्त्राएल क लोग मोरे पवितर नाउँ क जहाँ कहीं उ पचे गएन, बदनाम किहना। मई आपन नाउँ बरे दुःख अनुभव किहेउँ। 22एह बरे इस्त्राएल क परिवार स कहा कि सुआमी यहोवा इ कहत ह, 'इस्त्राएल क परिवार, तू जहाँ गया हुआँ तू मोरे पवितर नाउँ क बदनाम किहा। एका रोकइ बरे मई कछू करइ जात हउँ। मई इ तोहरे बरे नाहीं करब। इस्त्राएल, मई एका आपन पवितर बरे करब। 23मई ओन रास्ट्रन क देखाउब कि मोर महान नाउँ सच मँ पवितर अहइ। तब उ सबइ रास्ट्र जनिहीं कि मई यहोवा हउँ।" मोर सुआमी यहोवा इ सबइ कहे रहा।

24परमेस्सर कहेस, "मई तोहका ओन रास्ट्रन स बाहेर निकारब, एक संग बटोरब अउर तोहका तोहरे देस मँ लिआउब। 25तब मई तोहरे उपर सुद्ध जल छिछकारब अउर तोहका सुद्ध करब। मई तोहार सारी गन्दगियन क धोइ डाउब अउर ओन घृणित देवमूरतियन स पइदा भइ गन्दगी क धोइ डाउब।" 26परमेस्सर कहेस, "मई तोहमें नई आतिमा भी भरब अउर तोहरे सोचइ क ढंग क बदलब। मई तोहरे तने स कठोर हिरदय क बाहेर करेब अउर तोहका एक कोमल मानवी हिरदइ देब। 27मई तोहरे भीतर आपन आतिमा प्रतिष्ठित करब। मई तोहका बदलब जेहसे तू मोरे नेमन क पालन करब्या। तू सावधानी स मोरे आदेसन क पालन करब्या। 28तब तू उ देस मँ रहब्या जेका मई तोहरे पुरखन क दिहे रहेउँ। तू पचे मोरे लोग रहब्या अउर मई तोहार परमेस्सर रहब।"

29परमेस्सर कहेस, "मई तोहका पचन्क बचाउब भी अउर तोहका पचन्क असुद्ध होइ स रोकब। मई अन्न क उगइ बरे आदेस देब। मई तोहरे पचन्क भुखमरी समइ नाहीं लिआउब। 30मई तोहरे बृच्छन स फलन क बड़की फसलन अउर खेतन स अन्न क फसलन देब। तब तू दूसर देसन मँ भूखे रहइ क लज्जा फुन कबहुँ महसूस नाहीं करब्या। 31तू पचे ओन बुरे कामन क याद करब्या जउन तू पचे स किहा। तू पचे याद करब्या कि उ सबइ काम नीक नाहीं रहेन। तब तू पचे आपन पापन अउर जउन भयंकर करम किहा ओनके बरे तू खुद अपने स धिन करब्या।" 32मोर सुआमी यहोवा इ कहत ह, "मई चाहत हउँ कि तू इ याद राखा: मई तोहरी भलाई बरे इ सबइ कामन नाहीं करत हउँ। मई ओनका आपन नीक नाउँ करत हउँ। इस्त्राएल क परिवार, तोहका आपन रहइ क ढंग पइ लज्जित अउ बियाकुल होइ चाही।" 33मोर सुआमी यहोवा इ कहत ह, "जउने दिन मई तोहरे पापन्क धोउब, मई लोगन्क वापस तोहरे नगरन मँ लिआउब। उ सबइ नगर फुन बनावा जइहीं। 34खाली पड़ी भुईया फुन जोती जाइ। हिआँ स गुजरइवाले हर एक क इ बरबादियन क ढेर क रूप मँ नाहीं देखाइ। 35उ पचे कहिहीं, 'पुराने समइ मँ इ देस नस्त होइ ग रहेन। लेकिन इ सबइ अदन क बगीचे जइसे अहई। नगर नस्त होइ गए रहेन। उ पचे बर्बाद अउर खाली रहेन। किन्तु अब उ सबइ सुरच्छित अहई ओनमाँ लोग रहत ही।" 36परमेस्सर कहेस, "तब तोहरे

चारिहुँ ओर क रास्ट्र समझिहीं कि मई यहोवा हउँ अउर मई ओन नस्त ठउरन क फुन बसाएउँ। मई इ पहेँटा मँ जउन खाली पड़ा रहा पेड़न क रोपेस। मई यहोवा हउँ। मई इ कहेउँ अउर मई एका घटित कराउब।"

37मोर सुआमी यहोवा इ कहत ह, "जब इस्त्राएल क मनई मोहसे इ चिजियन करइ बरे कहब तउ मई सकारात्मक उत्तर देउब। मई ओनका असंख्य लोग बनाउब। उ पचे भेड़िन क झुण्डन क तरह होइहीं। 38यरूसलेम मँ बिसेस त्यौहार क अवसर क समइ (बोकरियन, भेड़िन क खरकन क तरह, लोग होइहीं।) नगर अउर बरबाद ठउर, लोगन क झुण्ड स भरि जइहीं। तब उ पचे समुझिहीं कि मई यहोवा हउँ।"

### झुरान हाइन क दर्सन

37 यहोवा क सवित मोह पइ आयी। यहोवा क आतिमा मोका नगर क बाहेर लइ गई अउर खाले एक घाटी क बीच मँ राखेस। घाटी मेरे लोगन क हाइन क भरी रही। 2घाटी मँ अनगिनत हाइन भुईया पइ पेड़ रहेन। यहोवा मोका हाइन क चारिहुँ कइँती घुमाएस। मई लखेउँ कि हाइत बहोत झुरान अहई। 3तब मोर सुआमी यहोवा मोहसे कहेस, "मनई क पूत, का इ हाइन जीवित होइ सकत ही?" मई जवाब दिहेउँ, "मोर सुआमी यहोवा, उ सवाल क जवाब सिरिफ तू जानत अहा।" 4मोर सुआमी यहोवा मोहसे कहेस, "ओन हाइन स मोरे बरे बातन करा। ओन हाइन स कहा, 'झुरान हाइो यहोवा क वचन सुना! 5मोर सुआमी यहोवा तू झुरान हाइन स कहत ह: मई तू सबइ क अन्दर साँस दाखिल करब। अउर तू पचे जीवित होइ जाब्या। 6मई तोहरे पचन्क ऊपर नसन अउर माँस पेसियन चढ़ाउब अउर मई तोहका पचन्क चमड़ी स ढक देब। तब मई तोहार अन्दर साँस फूँकब। अउर तू पचे फुन जीवित होइ उठब्या। तब तू पचे समुझब्या कि मई यहोवा हउँ।" 7अतः मई यहोवा बरे ओन हाइन स वइसे ही बातन किहेउँ कि जइसा उ कहेस। जब मई अभी बात करत ही रहेउँ तबहिँ मई प्रचण्ड ध्वनि सुनेउँ। हाइन खड़खड़ाइ लागिन अउर हाइन हाइन स एक संग जुड़िन। 8हुवाँ मोर आँखिन क समन्वा नसन, माँस पेसियन अउर चमड़ी हाइन क ढकब सुरू किहस। किन्तु ओनमाँ साँस नाही रहा।

9तब मोर सुआमी यहोवा मोहसे कहेस, "साँस स मोरे बरे कहा। मनई क पूत, मोरे बरे साँस स बातन करा। साँस स कहा कि सुआमी यहोवा इ कहत अहइ: 'हे साँस, हर दिसा स आवा अउर एन लहासन मँ साँस भरा। ओनमा साँस भरा अउर उ पचे फुन जीवित होइ जाइहीं।" 10इ तरह मई यहोवा बरे साँस स बातन किहेउँ जइसा उ कहेस अउर लहासन मँ साँस आइन। उ पचे जी उठेन अउर खड़े होइ गएन। हुआँ बहोत स मनसेधू रहेन, उ पचे एक तु बड़की फउज रहेन। 11तब मोर सुआमी यहोवा मोहसे कहेस, "मनई क पूत, इ सबइ हाइन इस्त्राएल क पूरे परिवार क दर्सावत अहई। इस्त्राएल क लोग कहत हीं, हमार हाइन झुराइ गइ अहई, हमार आसा समाप्त अहइ। हम पूरी तरह नस्त कीन्ह जाइ चुकी अहई। 12एह बरे ओनसे मोरे बरे बातन करा। ओनसे कहा सुआमी यहोवा इ कहत ह, 'मोर लोगो, मई



तोहार पचन्क कब्रन खोलब अउर तू सबइ पचन्क कब्रन क स बाहेर लिआउब। तब मई तू पचन्क इस्राएल क भुइँया पइ लिआउब। 13मोरे लोगो, मई तोहार पचन्क कब्रन खोलब अउर तोहार पचन्क कब्रन स तू पचन्क बाहेर लिआउब। तब तू पचे समुझब्या कि मई यहोवा हउँ। 14मई आपन साँस तू पचन्मँ डाउब अउर तू पचे फुन स जीवित होइ जाब्या। तब तू पचन्क मई तोहरे पचन्क देस मँ वापस लिआउब। तब तू पचे जनब्या कि मई यहोवा हउँ। तू पचे जनब्या कि मई इ सबइ बातन कहेउँ अउर ओनका घटित कराया।” यहोवा इ कहे रहा।

### यहूदा अउ इस्राएल क फिर एक होब

15मोका यहोवा क बचन फुन मिला। उ कहेस, 16“हे मनई क पूत, एक कुबरी ल्या अउर ओह पइ इ सँदेसा लिखा: ‘इ कुबरी यहूदा अउर ओकर मीतन, इस्राएल क लोगन क अहइ।’ तब दूसर कुबरी ल्या अउर एह पइ लिखा, ‘एप्रैम क इ कुबरी यूसुप अउर ओकर मीत, इस्राएल क लोगन क अहइ।’ 17तब दुइनउँ कुबरियन क एक संग जोर द्या। तोहरे हाथे मँ उ सबइ एक कुबरी होइ। 18तोहार लोग इ स्पस्ट करइ क कहिहीं, कि एकर अरथ का अहइ। 19ओनसे कहा कि सुआमी यहोवा कहत ह, ‘मई यूसुफ क कुबरी लेब जउन कि एप्रैम अउर ओकर मीत इस्राएल क काबिल क हाथन मँ अहइ। तब मई उ कुबरी क यहूदा क कुबरी क संग रखब अउर एनकर एक तु कुबरी बनाउब। उ पचे मोरे हाथे मँ एक तु कुबरी होइ।’ 20ओनकर आँखिन क समन्वा ओन कुबरियन क आपन हाथन मँ धरा। तू उ सबइ नाउँ पइ ओन कुबरियन पइ लिखे रह्या। 21लोग स कहा कि सुआमी यहोवा इ कहत ह: मई इस्राएल क लोगन क ओन रास्ट्रन स लिआउब, जहाँ उ पचे गवा अहई। ‘मई ओनका चारिहुँ कइँती स बटोरब अउर ओनके अपने देस मँ लिआउब। 22मई ओनका इस्राएल क पर्वतन क प्रदेस मँ एक रास्ट्र बनाउब। ओन सबहिँ क सिरिफ एक राजा होइ। उ पचे दुइ रास्ट्र नाहीं बना रहिहीं। उ पचे भविस्स मँ राज्न मँ नाहीं बाँटा जाइ सकतेन। 23उ पचे आपन देवमूरतियन अउ भयंकर मूरतियन या आपन दूसर कउनो पापन स आपन आपका अउर दूसित नाहीं करिहीं। किन्तु मई ओन लोगन क ओनकर सबहिँ पापन स जउन उ पचे किहे रहा बचाउब, अउर मई ओनका सबहिँ ठउरन जहाँ उ पाप किहे रहेन एक संग बटोरब। मई ओनका पवितर बनाउब। उ सबइ मोर लोग होइहीं। अउर मई ओनकर परमेस्सर रहब।

24“मोर सेवक दाऊद ओनके ऊपर राजा होइ। ओन सबहिँ क सिरिफ एक गइरिया होइ। उ पचे मोर नेमन क सहारे होइहीं अउर मोरे विधियन क पालन करिहीं। उ पचे उ काम करिहीं जउन मई कहब। 25उ पचे उ भुइँया पइ रहिहीं जउन मई आपन सेवक याकूब क दिहेउँ। तोहार पुरखन उ ठउर पइ रहत रहेन अउर मोर लोग हुवाँ रहिहीं। उ पचे, ओनकर गदेलन अउर ओनकर पोतन-पोतियन हुवाँ हमेसा रहिहीं अउर मोर सेवक दाऊद ओनकर प्रमुख सदा रही। 26मई ओनके संग एक सान्ति सन्धि करब। इ सन्धि

सदा बनी रही। मई ओनका ओनकर देस देब मंजूर करब। मई ओनका बहुसंख्यक लोग बनाउब मंजूर करब। मई आपन पवितर ठउर हुवाँ ओनक संग सदा बरे रखब मंजूर करत हउँ। 27मोर पवितर तम्बू हुवाँ ओनके बीच रही। हौँ, ओनकर परमेस्सर अउर उ पचे मोर लोग होइहीं। 28तब दूसर रास्ट्र समुझिहीं कि मई यहोवा हउँ अउर उ पचे जानिहीं कि मई इस्राएल क, ओनके बीच सदा बरे आपन पवितर ठउर रखिके, आपन खास लोग बनावत हउँ।”

### गोग क खिलाफ सँदेसा

38 यहोवा क सँदेसा मोका मिला। उ कहेस, 2“मनई क पूत, मागोग प्रदेस मँ गोग पइ धियान द्या। उ मेसेक अउर तूबल रास्ट्रन क सर्वाधिक महत्वपूर्ण प्रमुख अहइ। गोग क विरूद्ध मोरे बरे कछू कहा। 3उ ओहसे कहा कि सुआमी यहोवा इ कहत ह ‘गोग तू मेसेक अउ तूबल रास्ट्रन क सर्वाधिक महत्वपूर्ण प्रमुख अहा। किन्तु मई तोहरे खिलाफ हउँ। 4मई तोहका धरब अउर तोहार पूरी फउज क संग वापस लिआउब। मई तोहार फउज क सबहिँ मनसेधुअन क वापस लिआउब। मई सबहिँ घोडन अउर घुइसवारन क वापस लिआउब। मई तोहरे जबड़न मँ हुक डालब अउर तू सबहिँ क वापस लिआउब। सबहिँ फउजी आपन सबहिँ तरवारन अउर ढालन क संग आपन फउजी पोसाक मँ होइहीं। 5फारस, कूस अउ पूत क फउजी ओनके संग होइहीं। उ पचे सबहिँ आपन ढालन अउर मूँडे क कवच धारन किहे होइहीं। 6हुआँ आपन फउजियन क सबहिँ समूहन क संग गोमेर भी होइ। हुवाँ दूर उत्तर स आपन फउजियन क सबहिँ समूहन क संग तोगर्मा क रास्ट्र भी होइ। तोहार संग अनेक लोग होइहीं।

7“तइयार होइ जा। हौँ, आपन क तइयार करा अउर आपन संग मिलइवाली सेना क भी। तोहका निगरानी रखइ चाही अउर तइयार रहइ चाही। 8बहोत लम्बे समइ क पाछे तू काम पइ बोलावा जाब्या। आगे आवइवाले बरिसन मँ तू उ प्रदेस मँ अउब्या जउन जुद्ध क बाद फुन निर्मित होइ। उ देस मँ लोग इस्राएल क पर्वत पइ आवइ बरे बहोत स रास्ट्रन स एकट्ठा कीन्ह जइहीं। अतीत मँ इस्राएल क पर्वत बार-बार नस्ट कीन्ह गवा रहा। किन्तु इ सबइ लोग ओन दूसर रास्ट्रन स वापस लउटे होइहीं। उ पचे सबहिँ सुरच्छित होइहीं। 9किन्तु तू ओन पइ आक्रमण करइ अउब्या। तू तूफान क तरह अउब्या। तू देस क ढकत भए गरजत मेघ क तरह अउब्या। तू अउर बहोत स रास्ट्रन क तोहरे फउजियन क समूह, एन लोगन पइ आक्रमण करइ अइहीं।” 10मोर सुआमी यहोवा इ कहत ह: “उ समइ तोहरे दिमागे मँ एक विचार उठी। तू एक बुरी योजना बनाउब सुरू करब्या। 11तू कहब्या, ‘मई उ देस पइ हमला करइ जाब जेकर नगर बगैर देवार क अहई (इस्राएल)। उ सबइ लोग सान्तिपूर्वक रहत हीं। उ पचे समुझत हीं कि उ पचे सुरच्छित अहई। ओनकर रच्छा बरे ओनकर नगरन क चारिहुँ कइँती कउनो देवार नाहीं अहइ। ओनके दरवाजन मँ तालन नाहीं अहई, ओनके दरवाजे भी नाहीं अहई। 12मई एन लोगन क हराउब अउर ओनकर सबहिँ कीमती चिजियन

ओनसे छोर लेब। मई ओन ठउरन क खिलाफ लड़ब जउन नस्ट होइ चुका रहेन, किन्तु अब लोग ओनमौ रहइ लागेन ह। मई ओन लोगन (इस्त्राएल) क खिलाफ लड़ब जउन दूसर रास्ट्रन स एकट्ठा भए रहेन। अब उ सबइ लोग मवेशी अउ सम्पत्ति वाले अहई। उ सबइ संसार क चउराहे पइ रहत हीं जउने ठउर मँ सक्तीसाली देसन क दूसर सक्तीसाली सबहिं देसन तलक जाइ बरे जात्रा करइ पड़त ह।

13“सबा, ददान अउ तर्सीस क बइपारी अउर सबहिं नगर जेनके संग उ पचे बइपार करत हीं, तोहसे पूछिहीं, ‘का तू कीमती चिजियन पइ अधिकार करइ आया ह? का तू आपन फउजियन क समूहन क संग, ओन नीक चिजियन क हइपइ अउर चाँदी, सोना मवेशी तथा सम्पत्ति लइ जाइ आवा रह्या?’” 14परमेस्सर कहेस, “मनई क पूत, मोरे बरे गोग स कहा। ओहसे कहा कि सुआमी यहोवा इ कहत ह, ‘तू हमरे लोगन पइ तब हमला करइ अउब्या जब उ पचे सात्तिपूर्वक अउर सुरच्छित रहत अहई। 15तू दूर उत्तर क आपन ठउर स अउब्या अउर तू बहुसंख्यक लोगन क साथ लउब्या। उ पचे सबहिं घुइसवार होइहीं। तू एक बिसाल अउर ताकतवर फउज होब्या। 16तू मोरे लोग इस्त्राएल क विरूद्ध लइइ अउब्या। तू देस क गरजत मेघ क तरह ढकइवाले होब्या। मई बाद मँ, आपन देस क विरूद्ध लइइ बरे तोहका लिआउब। तब हे गोग, रास्ट्र जनिहीं कि मई केतना ताकतवर हई। उ पचे मोर सम्मान करिहीं अउर समुझिहीं कि मई पवितर हई। उ पचे लिखिहीं कि मई तोहरे संग का करब।”

17यहोवा इ कहत ह, “उ समइ लोग याद करिहीं कि मई पुराने जमाने मँ तोहरे बारे मँ जउन कहेउँ। उ पचे याद करिहीं कि मई आपन सेवकन इस्त्राएल क नबियन क उपयोग किहेउँ। उ पचे याद करिहीं कि इस्त्राएल क नबी लोग मोरे बरे पुराने जमाने मँ बातन किहन अउर कहेन कि मई तोहका ओनके खिलाफ लइइ बरे लिआउब।” 18मोर सुआमी यहोवा कहेस, “उ समइ, गोग इस्त्राएल देस क विरूद्ध लइइ आइ। मई आपन किरोध परगट करब। 19किरोध अउ जलजलाहट मँ मई इ प्रतिग्या करत हई, अउर इ कहत हई कि इस्त्राएल मँ एक प्रबल भूकम्प आई। 20उ समइ सबहिं सजीव प्राणी भय स काँप उठिहीं। समुद्र मँ मछरियन, अकासे मँ पंछी, खेतन मँ जंगली जनावरन अउर उ सबइ सबहिं परानी जउन धरती पइ रेगंत हीं, भय स काँप उठिहीं। पर्वत भहराइ पड़िहीं अउर सिखर ध्वस्त होइहीं। हर एक देवार धरती पइ आइ गिरिहीं।” 21मोर सुआमी यहोवा कहत, “इस्त्राएल क पर्वतन पइ, मई गोग क विरूद्ध हर प्रकार क भय उत्पन्न करब। ओकर फउजी एतना भयभीत होइहीं कि उ पचे एक दूसर पइ हमला करिहीं अउर आपन तरवार स एक दूसर क मार डइहीं। 22मई गोग क रोग अउर मउत स दण्ड देब। मई ओह पइ, ओकर सेना पइ अउर अनेक रास्ट्रन क लोगन पइ जउन कि ओकर संग अहई। ओलन, आगी अउर गंधक क बर्खा करब। 23तब मई देखाउब कि मई केतना महान हई, मई प्रमाणित करब कि मई पवितर हई। बहोत स रास्ट्र

मोका इ सबइ काम करत लिखिहीं अउर उ पचे जनिहीं कि मई कउन हई। तब उ पचे जनिहीं कि मई यहोवा हई।”

### गोग अउर ओकर सेना क मउत

39 “मनई क पूत, गोग क विरूद्ध मोरे बरे कहा। ओहसे कहा कि सुआमी यहोवा इ कहत ह, ‘गोग, तू मेसेक अउर तूबल देसन क सर्वाधिक महत्वपूर्ण प्रमुख अहा। किन्तु मई तोहरे विरूद्ध हई। 2मई तोहका घुमा देब अउर तोहार गवाइ करब अउर तोहका सुदूर उत्तर स लिआउब। मई तोहका इस्त्राएल क पर्वतन क खिलाफ जुद्ध करइ बरे लिआउब। 3किन्तु मई तोहार धनुस तोहरे बाएँ हाथ स झटक के गिराइ देब। मई तोहरे दाएँ हाथ स तोहार बाण झटकके गिराइ देब। 4तू इस्त्राएल क पर्वतन पइ मारा जाब्या। तू, तोहार फउजी अउर तोहरे संग क दूसर सबहिं रास्ट्र जुद्ध मँ मारा जइहीं। मई तोहका भोजन क रूप मँ सबइ सिकारी पच्छियन वन जनावरन क देब। 5तू खुले मइदानन मँ मारा जाब्या। मई इ कहि दिहे हई।” मोर सुआमी यहोवा इ कहेस। 6परमेस्सर कहेस, “मई मागोग अउ ओन मनइयन क, जउन समुद्र-तट पइ सुरच्छित रहत हीं, विरूद्ध आगी पठउब। तब उ पचे जानिहीं कि मई यहोवा हई। 7मई आपन पवितर नाउँ इस्त्राएल क लोगन मँ परगट करब। भविस्स मँ, मई आपन पवितर नाउँ क, लोगन क जरिये अउर जियादा दूसित नाहीं करइ देब। रास्ट्र जनिहीं कि मई यहोवा इस्त्राएल क परम पवितर हई। 8उ समइ आवत अहइ। इ घटित होइ।” यहोवा इ सबइ बातन कहेस। “इ उहइ दिन अहइ जेकरे बारे मँ मई कहत हई। 9उ समइ, इस्त्राएल क नगरन मँ रहइवाले लोग ओन खेतन मँ जइहीं। उ पचे दुस्मन क अस्त्र-सस्त्रन क एकट्ठा करिहीं अउर ओनका जराइ देइहीं। उ पचे सबहिं ढालन, धनुसन अउर बाणन सबइ गदा अउ भालन क जलइहीं। उ पचे ओन अस्त्र-सस्त्रन क उपयोग सात बरिस तलक ईंधन क रूप मँ करिहीं। 10ओनका मइदानन स काठ एकट्ठी नाहीं करइ पड़ी या जंगलन स बूच्छ नाहीं काटइ पड़ी, काहेकि उ पचे अस्त्र-सस्त्रन क उपयोग ईंधन क रूप मँ करिहीं। उ पचे ओन फउजियन क ल्हास क लूट लेइहीं जउन कि ओनसे चोरावइ बरे आए रहेन। उ पचे ओन फउजियन स अच्छी चिजियन लेइहीं जउन ओनसे नीक चिजियन लइ लिहेन।” मोर सुआमी यहोवा इ कहेस।”

11परमेस्सर कहेस, “उ समइ मँ गोग क दफनावइ बरे इस्त्राएल मँ एक ठउर चुनब। उ मृत सागर क पूरब मँ जात्रियन क घाटी मँ दफनावा जाइ। इ जात्रियन क मारग क रोकी। काहेकि गोग अउ ओकर सारी फउज उ ठउर मँ दफनाई जाइ। लोग एका ‘गोग क सेना क घाटी’ कहिहीं। 12इस्त्राएल क परिवार देस क सुद्ध करइ बरे सात महीने तलक ओनका दफनाई। 13देस क साधारण लोग दुस्मन क फउजियन क दफनइहीं। इस्त्राएल क लोग उ दिन प्रसिद्ध होइहीं जउने दिन मई अपने बरे सम्मान पाउब।” मोर सुआमी यहोवा इ कहेस। 14परमेस्सर कहेस, “लोग मजदूरन क, ओन मरे फउजियन क दफनावइ बरे पूरे समइ क नौकरी देइहीं। इ तरह उ पचे देस क पवितर करिहीं। उ सबइ

मजदूर सात महीने तलक कार्य करिहीं। उ पचे ल्हासन क हेरत भए चरिहुँ ओर जइहीं। 15उ सबइ मजदूर चारिहुँ कइँती हेरत फिरिहीं। जदि ओनमाँ स कउनो एक हाइ लखी तउ उ ओकरे पास एक तु चीन्हा बनाइ देइ। चीन्हा हुवाँ तब तलक रही जब तलक कब्र खोदइवाला आवत नाहीं अउर गोग क सेना क घाटी मँ उ हाइ क दफनावत नाहीं। 16उ मृतक लोगन क नगर (कब्रिस्तान) हमोना कहवाई। इ तरह उ सबइ देस क सुद्ध करिहीं।”

17मोर सुआमी यहोवा इ कहेस, “हे मनई क पूत, मोरे बरे सबइ पंछियन अउ सबइ जंगली जानवरन स बात करा। ओनसे कहा, ‘हिआँ आवा। हिआँ आवा। इ बलि क चारिहुँ कइँती एकट्ठा भवा जउन मई तोहरे बरे इस्त्राएल क पर्वतन पइ तइयार किहेउँ। आवा, माँस खा अउर खून पिआ। 18तू ताकतवर फउजियन क सरिर क माँस खाउब्या। तू संसार क प्रमुखन क खून पीब्या। उ पचे बासान क भेड़न, मेमनन, बोकनन अउर मोटे बइलन क समान होइहीं। 19तू जेतना चाहा, ओतनी चर्बी खाइ सकत ह अउर तू उ समइ तलक खून पी सकत ह जब तलक कि तू नसा मँ नाहीं आवत ह। तू मोर बलि स खाब्या अउर पीब्या जेका मई तोहारे बरे गारेउँ। 20तू मोरे मेज पइ तब तलक खाउब्या जब तलक तू सन्तुट्ट नाहीं होइ जाब्या। हुवाँ घोड़न अउर रथ सारथी, सक्तीसाली फउजी अउर दूसर सबहि लइइवाले मनई होइहीं।” मोर सुआमी यहोवा इ कहेस।

21परमेस्सर कहेस, “मई दूसर रास्ट्रन क देखाउब कि मई का किहेउँ ह। उ सबइ रास्ट्र मोर सम्मान करब आरम्भ करिहीं। उ सबइ मोर उ सक्ती लखिहीं जउन मई दुस्मन क विरूद्ध उपयोग किहेउँ। 22तब उ दिन क पाछे, इस्त्राएल क परिवार जानी कि मई ओकर परमेस्सर यहोवा हउँ। 23रास्ट्र इ जान जइहीं कि इस्त्राएल क परिवार काहे दूसर देसन मँ बन्दी बनाइके लइ जावा गवा रहा। उ पचे जनिहीं कि मोर लोग मोरे विरूद्ध होइ उठा रहेन। एह बरे मई ओनसे दूर हट गवा रहेउँ। मई ओनके दुस्मनन क ओनका हरावइ दिहेउँ। एह बरे मोर लोग जुद्ध मँ मारा गएन। 24उ पचे पाप किहेन अउर आपन क गन्दा बनाएन। एह बरे मई ओनका ओन कामन बरे दण्ड दिहेउँ जउन उ पचे किहेन। एह बरे मई ओनसे आपन मुँह फेर लिहेउँ ह।”

25एह बरे मोर सुआमी यहोवा इ कहत ह, “अब मई याकूब क परिवार क बन्धुवाई स निकारब। मई पूरे इस्त्राएल क परिवार पइ दया किहेउँ ह। मई आपन पवित्त नाउँ क बरे बिसेस भावना परगट करब। 26लोग आपन लज्जा अउर मोरे विरूद्ध विद्रोह क सारे समइ क बिसरि जइहीं। उ पचे आपन देस मँ सुरच्छा क संग रहिहीं। कउनो भी ओनका भयभीत नाहीं करी। 27मई आपन लोगन क दूसर देसन स वापस लिआउब। मई ओनका ओनके दुस्मनन क देसन स एकट्ठा करब। तब बहोत स रास्ट्र समुझिहीं कि मई केतना पवित्त हउँ। 28उ पचे समुझिहीं कि मई यहोवा ओनकर परमेस्सर हउँ। काहेकि मई ओनसे ओनकर घर छोड़वाएउँ अउर दूसर देसन मँ बन्दी क रूप मँ पठएउँ अउर तब मई ओनका एक संग एकट्ठा किहेउँ अउर ओनका आपन देस मँ वापस लिआएउँ। मई ओनमाँ स कउनो हवाँ अउर नाहीं

छोड़ब। 29मई इस्त्राएल क परिवार पइ आपन आतिमा उड़ेरब अउर ओकरे पाछे, मई फुन आपन मुँह आपन लोगन स नाहीं छुपाउब।” मोर सुआमी यहोवा इ कहे रहा।


### नवा मन्दिर

**40** हम लोगन क बन्दी क रूप मँ लइ जावा जाइके पच्चीसवें बरिस मँ, बरिस क सुरुआत मँ प्रथम महीने क दसएँ दिन, यहोवा क आतिमा मोह पइ आई। यरूसलेम क जीतइ क पाछे इ चउदहवाँ बरिस रहा। उहइ दिना यहोवा क सक्ती मोका हुवाँ लइ गवा। 2दर्सन मँ परमेस्सर मोका इस्त्राएल देस लइ गवा। उ मोका एक बहोत ऊँचे पर्वत क समीप उतारेस। पर्वत पइ एक भवन रहा जउन नगर क समान देखात रहा। यहोवा मोका हुवाँ लइ गवा। हुवाँ एक मनई रहा जउन चमचमात गए काँसे क तरह चमकत भवा देखात रहा। उ मनई एक कपड़ा नापइ क फीता अउर नापइ क एक छड़ आपन हाथे मँ लिहे रहा। उ फाटक स लगा खड़ा रहा। 4उ मनई मोहसे कहेस, “मनई क पूत, आपन आँखिन अउ आपन कान क उपयोग करा। एन चिजियन पइ धियान द्या अउर मोर सुना। जउन मई तोहका देखावत हउँ ओह पइ धियान द्या। काहेकि तू हिआँ लाए गवा अहा, एह बरे मई तोहका एन चिजियन क देखाइ सकत हउँ। तू इस्त्राएल क परिवार स उ सबइ बतावा जउन तू हिआँ लखा।” 5मई एक देवार लखेउँ जउन मन्दिर क बाहर चारिहुँ कइँती स घेरत रहिन। उ मनई क हाथे मँ चिजियन क नापइ क एक छड़ रही। इ एक छे हाथ लम्ब रहा। (प्रत्यक हाथ साधारण हाथ स चार अगुँल लम्बा रहा।) एह बरे उ मनई देवार क मोटाइ नापेस उ एक छड़ मोटी रही। उ मनई देवार की ऊँचाई नापेस। इ एक छड़ ऊँची रही। 6तब मनई पूरबी दुआर क गवा। उ मनई ओकर सीढ़ियन पइ चढ़ेस अउर फाटक क डेवढ़ी क नापेस। इ एक छड़ चौड़ी रही। 7रच्छकन क कमरन एक छड़ लम्बे अउर एक छड़ चौड़े रहेन। कमरन क बीच क देवारन क मोटाई पाँच हाथ रही। भीतर क ओर फाटक क डेवढ़ी जउन कच्छ क बगल मँ रहा एक छड़ चौड़ी रही। 8तब उ मनई मन्दिर स लगे फाटक क प्रवेस कच्छ क नापेस। इ एक छड़ चौड़ा रहा।

9तब उ मनई फाटक क प्रवेस कच्छ क नापेस। इ आठ हाथ लम्बा रहा। उ मनई फाटक क दुइनउँ बगल क देवारन क नापेस। हर एक बगल देवार दुइ हाथ चौड़ा रहा। फाटक क ओसारा दरवाजा क भीतर क कइँती रहा।


10फाटक क हर कइँती तीन नान्ह कमरन रहेन। इ सबइ तीनहुँ नान्ह कमरन हर कइँती स एक नाप क रहेन। दुइनउँ कइँती क दुआर खम्मभन एक नाप क रहेन। 11उ मनई फाटक क प्रवेसद्वार क चौड़ाई नापेस। इ दस हाथ चौड़ी अउर फाटक क लम्बाइ तेरह हाथ रही। 12हर एक कमरा क सामने एक नीची देवार रही। इ देवार एक हाथ ऊँची अउर एक हाथ मोटी रही। कमरन वर्गाकार रहेन अउर हर कइँती स छः हाथ लम्बे रहेन। 13उ मनई फाटक क हर कमरे क छत स दूसर कमरे क छत तलक नापेस। इ पच्चीस हाथ लम्बा रहा। एक दुआर दूसर दुआर क ठीक विपरीत रहा। 14उ मनई प्रवेस कच्छ क नापेस। इ साठ

# यहेजकेल क वर्णित कीन्ह गवा मन्दिर क पुनःनिर्माण



0 500

0 50



बाहेरी आँगन क पूर्वी फाटक

हाथ चउड़ा रहा। प्रवेस कच्छ क चारिहुँ ओर आँगन रहा। 15प्रवेस कच्छ क फाटक पूरे बाहर स, फाटक क भीतर तलक नाप में पचास हाथ रहा। 16रच्छकन क कमरन में चारिहुँ कइँती खिड़कियन रहिन। प्रवेस क कइँती खिड़कियन बहोत जयादा पातर हो ग रहिन। अउर अन्दर क कइँती चउड़ा रहेन। प्रवेस कच्छ में भी चारिहुँ कइँती उहइ प्रकार क खिड़कियन रहिन। हर एक दुआर खम्भन पइ खजूर क बृच्छ खुदा रहेन।

### बाहर क आँगन

17तब उ मनई मोका बाहरी आँगन में लिआवा। मई कमरन अउर पक्के फर्स क लखेस। उ पचे आँगन क चारिहुँ कइँती रहेन। पक्के फर्स पइ सामने तीस कमरन रहेन। 18पक्का रास्ता फाटक क बगल स गवा। पक्का फर्स ओतना ही लम्बा रहा जेतने फाटक रहेन। इ खाले क रास्ता रहा। 19तब उ मनई खाले फाटक क सामने भीतर कइँती स लइके आँगन क देवार क समन्वा भीतर कइँती तलक नापेस। इ पूरब अउर उत्तर क अउर सौ-सौ हाथ रहेन। 20उ मनई बाहरी आँगन, जेकर सामना उत्तर कइँती अहइ, क फाटक क लम्बाई अउ चौड़ाइ क नापेस। 21एकरे हर एक कइँती तीन कमरा अहइँ। एकर दुआर खम्भन अउर प्रवेस-दुआर क नाप उहइ रही जउन पहिले फाटक क रही। फाटक पचास हाथ लम्बा अउर पच्चीस हाथ चौड़ा रहा। 22एकर खिड़कियन एकर ओसारा अउर एकर खजूर क बृच्छन क नक्कासी क नाप उहइ रही जउन पूरब कइँती मुखवाले फाटक क रही। फाटक तलक सात सीढ़ियन रहिन। फाटक क प्रवेस कच्छ भीतर रहा। 23भीतरी आँगन में उत्तर क फाटक तलक पहोंचइवाला एक फाटक रहा। इ पूरब क फाटक क नाई रहा। उ मनई एक फाटक स दूसर तक नापेस। इ एक फाटक स दूसर फाटक तलक सौ हाथ रहा।

24तब उ मनई मोका दक्खिन कइँती लइ गवा। मई दक्खिन में एक दुआर लखेउँ। उ मनई दुआर खम्भन अउर प्रवेस कच्छ क नापेस। उ पचे नाप में ओतने ही रहेन जेतने दूसर फाटक। 25दुआरा रास्ता अउर एकर ओसारा पचास हाथ लम्बा अउर पच्चीस हाथ चउड़ा रहा। एकर चारिहुँ कइँती दूसर फाटकन क नाई खिड़कियन रहेन। 26सात पैड़ियन इ फाटक तलक पहोंचावत रहिन। एकर प्रवेस कच्छ भीतर क रहा। हर एक कइँती एक-एक दुआर-खम्भा पइ खजूर क नक्कासी रही। 27भीतरी आँगन क दक्खिन कइँती एक फाटक रहा। उ मनई दक्खिन कइँती एक फाटक स दूसर फाटक तलक नापेस। इ सौ हाथ चउड़ा रहा।

### भीतरी आँगन

28तब उ मनई मोका दक्खिन फाटक स होइके भीतर आँगन में लइ गवा। दक्खिन क फाटक क नाप ओतनी ही रही जेतनी दूसर फाटकन क। 29दक्खिन फाटक क कमरन, दुआर-खम्भा अउर प्रवेस दुआर क नाप ओतनी ही रही जेतनी दूसर फाटकन क रही। खिड़कियन, फाटक अउर प्रवेस कच्छ क चारिहुँ ओर रहिन। फाटक पचास हाथ

लम्बा अउर पच्चीस हाथ चउड़ा रहा। 30ओकरे चारिहुँ कइँती प्रवेस कच्छ रहेन। प्रवेस कच्छ पच्चीस हाथ लम्बा अउ पाँच हाथ चउड़ा रहा। 31दक्खिन फाटक क प्रवेस कच्छ क समन्ना बाहरी आँगन कइँती रहा। एकरे दुआर खम्भन पइ खजूरे क बृच्छन क नक्कासी रही। एकर सीढ़ी क आठु पैड़ियन रहिन। 32उ मनई मोका पूरब कइँती क भीतरी आँगन में लिआवा। उ फाटक क नापेस। ओकर नाप उहइ रही जउन दूसर फाटकन क। 33पूरबी दुआर क कमरन, दुआर खम्भा अउ प्रवेस कच्छ क नाप उहइ रहेन जउन अन्य फाटकन क। फाटक अउ प्रवेस कच्छ क चारिहुँ कइँती खिड़कियन रहिन। पूरबी फाटक पचास हाथ लम्बा अउ पच्चीस हाथ चउड़ा रहा। 34एकर प्रवेस कच्छ क सामना बाहरी आँगन कइँती रहा। हर कइँती क दुआर-खम्भन पइ खजूरे क बृच्छन क नक्कासी रही। एकरी सीढ़ी में आठ पैड़ियन रहिन। 35तब उ मनई मोका उत्तरी दुआरे पइ लिआवा। उ एका नापेस। एकर नाप उ रही जउन दूसर फाटकन क नाप क समान रहि 36एकर दुआरपाल क कमरन, खम्भन, प्रवेस कच्छ अउर ओसारा भी रहेन। फाटक क चारिहुँ ओर खिड़कियन रहिन। इ पचास हाथ लम्बा अउर पच्चीस हाथ चउड़ा रहा। 37दुआर खम्भन क सामना बाहरी आँगन कइँती रहा। हर एक कइँती क दुआर खम्भन पइ खजूरे क बृच्छन क नक्कासी रहिन अउर एकर सीढ़ी क आठ पैड़ियन रहिन।

### बलियन तइयार करइ क कमरें

38एक कमरा रहा जेकर दरवाजा फाटक क प्रवेस कच्छ क लगे रहा। इ हुवाँ रहा जहाँ याजक होमबलि बरे जनावरन क नहवावत हीं। 39फाटक क प्रवेस कच्छ क दुइनउँ कइँती दुइ मेजन रहिन। होमबलि पाप बरे भेंट अउर अपराध बरे भेंट क जनावरन ओनहीं मेजन पइ मारा जात रहेन। 40प्रवेस कच्छ क बाहर, जहाँ उत्तरी फाटक खुलत ह, दुइ मेजन रहिन अउर फाटक क प्रवेस कच्छ क दूसर कइँती दुइ मेजन रहिन। 41फाटक क भीतर चार मेजन रहिन। चार मेजन फाटक क बाहेर रहिन। सब मिलाइके आठ मेजन रहिन। याजक एन मेजन पइ बलि बरे जनावरन क मारत रहेन। 42होमबलि बरे कटी सिला क चार मेजन रहिन। इ सबइ मेजन डेढ़ हाथ लम्बी, डेढ़ हाथ चउड़ी अउर एक हाथ ऊँची रहिन। योजक होमबलि अउर बलिदानन बरे जउन जनावरन क मारा करत रहेन, ओनका मारइ क अउजारन क एन मेजन पइ धरत रहेन। 43तीन इंच लम्बा हुक पूरे मन्दिर में लगाए गए रहेन। भेंट बरे माँस मेजन पइ रखइ रहत रहा।

### याजकन क कमरन

44प्रमुखन के लिए भीतरी आँगन क फाटक क दुइ कमरन रहेन। एक उत्तरी फाटक क साथ रहा। एकर सामना दक्खिन क रहा। दूसर कमरा दक्खिन क फाटक क साथ रहा। एकर सामना उत्तर क रहा। 45उ मनई मोहसे कहेस, “इ कमरा, जेकर सामना दक्खिन क अहइ, ओन याजक क बरे अहइ जउन काम पइ अहइँ अउर मन्दिर में

सेवा करत अहईं। 46किन्तु उ कमरा जेकर सामना उत्तर क अहइ, ओन याजकन बरे अहइ जउन आपन काम पइ अहईं अउर वेदी पइ सेवा करत अहईं। इ सबहिं याजक सादोक क बंसज अहईं। सादोक क बंसज ही लेवी बंस क एकमात्र मनई अहईं जउन यहोवा क सेवा ओनके लगे बलि लाइके कइ सकत हीं।” 47उ मनई आँगन क नापेस। आँगन पूर्ण वर्गीकार रहा। इ सौ हाथ लम्बा अउर सौ हाथ चउड़ा रहा। वेदी मन्दिर क समन्वा रही।

### मन्दिर क प्रवेस कच्छ

48उ मनई मोका मन्दिर क ओसारा में लिआवा अउर दुइनउँ कइँती क हरे क नापेस। ओन में हर एक पाँच-पाँच हाथ मोटा अउर तीन-तीन हाथ चउड़ा रहा। प्रवेस क चउड़ाइ चौदह हाथ रहा। 49प्रवेस कच्छ बीस हाथ लम्बा अउर बारह हाथ चउड़ा रहा। प्रवेस कच्छ तलक दस सीढियन पहोंचावत रहिन। दुआर खम्भा क सहारे दुइनउँ ओर खम्भा रहेन।

### मन्दिर क पवितर ठउर

41 उ मनई मोका मन्दिर क बीच क कमरा में लिआवा। उ कमरा क दुइनउँ कइँती क देवारन क नापेस। उ सबइ में स हर एक, हर कइँती छः हाथ मोटा रहेन। 2दरवाजा दस हाथ चउड़ा रहा। दुआर क बगलन पाँच हाथ हर कइँती रहिन। उ मनई बाहरी पवितर ठउरे क नापेस। इ चालीस हाथ लम्बा अउर बीस हाथ चउड़ा रहा।

### मन्दिर क परम पवितर ठउर

3तब उ मनई अन्दर गवा अउर हर एक दुआर खम्भा क नापेस। हर एक दु आर खम्भा दुइ हाथ मोटा रहा। इ छः हाथ ऊँचा रहा। दुआर सात हाथ चउड़ा रहा। 4तब उ मनई कमरा क लम्बाई नापेस। इ बीस हाथ लम्बा अउर बीस हाथ चउड़ा रहा। इ (प्रथम) परिसुद्ध कमरे क बाद रहा। उ मनई कहेस, “इ परम पवितर ठउर अहइ।”

### मन्दिर क चारिहुँ कइँती क बाकी कमरें

5तब उ मनई मन्दिर क देवार नापेस। इ छः हाथ चउड़ी रही। बगल क कमरन चार हाथ चउड़न मन्दिर क चारिहुँ कइँती रहेन। 6बगल क कमरन तीन अलग अलग मंजिलन पइ रहेन। उ सबइ एक दूसर क ऊपर रहेन। हर एक मंजिल पइ तीस कमरन रहेन। बगल क कमरन चारिहुँ कइँती क देवार पइ टिके भए रहेन। एह बरे मन्दिर क देवार खुद कमरन क टेकाए भए नाहीं रहिन। 7मन्दिर क चारिहुँ ओर क कमरन क मंजिल क खाले क मंजिल स अधिक चउड़ी रहिन। मन्दिर क चारिहुँ ओर ऊँच चबूतरा हर मंजिल पइ मन्दिर क हर एक कइँती फइला भवा रहा। एह बरे सब स ऊपर क मंजिल पइ कमरन अधिक चउड़ा रहेन। दूसर मंजिल स होइके एक सीढ़ी सब स नीचे क मंजिल स सब स ऊँच मंजिल तलक गइ रही।

8मई इ भी लखेउँ कि मन्दिर क चारिहुँ कइँती उठा भवा चबूतरा रहा। बगल क कमरन क नेंव एक समन्वा छइ

अरथात छः हाथ क पूरे छइ क रहा। 9बगल क कमरन क बाहरी देवार पाँच हाथ मोटी रही। मन्दिर क बगल क कमरन’ 10अउर याजक क कमरन क बीच खुला छेत्र मन्दिर क चारिहुँ ओर रहा। इ खुला छेत्र मन्दिर क चारिहुँ कइँती बीस हाथ रहा। 11बगल क कमरन क दरवाजन खुला छेत्र क नेंव पइ खुलत रहेन जउन देवार क हींसा नाहीं रहिन। एक दरवाजा क मुँह उत्तर कइँती रहा अउर दूसर क दक्खिन कइँती। खुला छेत्र चारिहुँ कइँती स पाँच हाथ चउड़ी रहिन। 12पच्छिमी कइँती मन्दिर क आँगन क सामने क भवन सत्तर हाथ रहा। भवन क देवार चारिहुँ ओर पाँच हाथ मोटी रही। इ नब्बे हाथ लम्बी रही। 13तब उ मनई मन्दिर क नापेस। इ सौ हाथ लम्बा रहा। भवन अउ एकर देवार क संग आँगन भी सौ हाथ लम्बे रहेन। 14मन्दिर क पूर्वी मुँह अउर आँगन सौ हाथ चउड़ा रहा। 15-16उ मनई उ भवन क लम्बाई क नापेस जेकर सामना मन्दिर क पाछे क आँगन कइँती रहा तथा जेकर देवारन दुइनउँ कइँती रहिन। इ सौ हाथ लम्बा रहा। बीच क कमरे क भीतरी कमरे (सबन त पवितर ठउर) अउ आँगन क प्रवेस कच्छ पइ तखता लगी रहिन। तीनहुँ पइ ही चारिहुँ कइँती जालीदार खिड़कियन रहिन। मन्दिर क चारिहुँ कइँती डेवढी स लगे, फर्स स खिड़कियन तलक काठे क तखता जड़ी भइ रहिन। खिड़कियन ढकी भइ रहिन।

17दुआरे क ऊपर क देवार, भीतरी कमरन अउर बाहेर तलक, सारी लकड़ी क चौखटन स मढ़ी गइ रहिन। मन्दिर क भीतरी कमरन तथा बाहरी कमरन क सबहिं देवारन पइ 18करूब सरगदूतन अउर खजूर बृच्छन क नक्कासी कीन्ह गइ रही। करूब सरगदूतन क बीच एक खजूर क बृच्छ रहा। अउर हर एक करूब क दुइ मुख रहेन। 19एक मुँह मनई क रहा जउन एक कइँती खजुरे क बृच्छ क लखत रहा। दूसर मुँह सेर क रहा जउन दूसर कइँती खजूर क बृच्छक लखत रहा। उ पचे मन्दिर क चारिहुँ कइँती उकेरा ग रहेन। 20बीच क कमरन पवितर ठउर क सबहिं देवारन पइ करूब सरगदूत अउर खजुरे क बृच्छ उकेरे ग रहेन।

21पत्तिर स्थान क दुआर ज ढाँचा वर्गीकार रहेन। सब स जियादा पवितर ठउरे क समन्वा अइसा कछू रहा जउन 22वेदी क नाई काठे क बना देखात रहा। इ तीन हाथ ऊँच अउर दुइ हाथ लम्बा रहा। एकर कोनन, नेंव अउ पच्छ काठे क रहेन। उ मनई मोहसे कहेस, “इ मेज अहइ जउन यहोवा क समन्वा अहइ।”

23बीच क कमरा (पवितर ठउर) अउर परम पवितर ठउर दुइ दरवाजनवाला रहेन। 24एक दरवाजा दुइ नान्ह दरवाजन स बना रहा। हर एक दरवाजा फुरइ दुइ हिलत भए दरवाजन स रहा। 25बीच क कमरन (पवितर ठउर) क दरवाजन पइ करूब सरगदूत अउ खजूर क बृच्छ उकेरे ग रहेन। उ सबइ वइसे ही रहेन जइसे देवारन पइ उकेरे गवा रहेन। बाहेर कइँती प्रवेस कच्छ क बाहरी हीसें पइ काठे क नक्कासी रही। 26बाहेर तंग खिड़कियन अउर अन्दर चउड़ी खिड़कियन रहेन। अउर प्रवेस कच्छ क दुइनउँ कइँती, मन्दिर क बगल कमरन अउर देहली पइ खजूर क बृच्छ क तस्बीरन रहेन।

याजकन क कमरन

**42** तब उ मनई मोका बाहरी आँगन में लइ गवा जेकर सामना उत्तर क रहा। उ ओन कमरन में लइ गवा जउन मन्दिर स आँगन क आर-पार अउर उत्तर क भवनन क आर-पार रहेन। 2उत्तर कइँती क भवन सौ हाथ लम्बा अउ पचास हाथ चउड़ा रहा। 3हुआँ भीतरी आँगन क आगे बीस हाथ लम्बा खुला छेत्र अउर बाहरी आँगन क आगे पक्का गल्यारा रहेन। ओन भवनन पइ तीन तीन छज्जन रहेन। उ सबइ एक दूसर क आमने-समने रहेन। 4कमरन क समन्वा एक बिसाल कच्छ रहा। उ भीतर पहोंचत रहा। इ दस हाथ चउड़ा, सउ हाथ लम्बा रहा। ओकर दरवाजन उत्तर कइँती रहेन। 5ऊपर क कमरन जियादा पातर रहेन काहेकि छज्जत बीच अउ निजली मंजिल स जियादा जगह घेरे रही। 6कमरन तीन मंजिलन पइ रहेन। बाहरी आँगन खम्भन क तरह ओनकर खम्भन नाहीं रहेन। एह बरे ऊपर क कमरन बीच अउ खाले क मंजिल क कमरन स जियादा पाछे रहेन। 7बाहेर एक देवार रही। इ कमरन क समानान्तर रही। इ कमरन क समन्वा बाहरी आँगन तलक रहेन। इ पचास हाथ लम्बा रहा। 8कमरन क कतार जउन कि बाहेरी आँगन कइँती गएन रहा पचास हाथ लम्बी रही। मन्दिर क समन्वा क कमरन क कुल लम्बाई सौ हाथ रहेन। 9एन कमरन क निचे एक प्रवेसपथ रहा जउन बाहरी आँगन स होत भवा पूरब क लइ जात रहा। 10पूरब क कइँती क आँगन क देवारन में, सटा भवा आँगन अउर भवन क आपने-सामेन कमरन रहेन। 11हुआँ एक बिसाल कच्छ रहा। उ सबइ उत्तर क कमरन क नाई रहेन। ओन सबइ क लम्बाइ अउ चउड़ाइ समान रहेन अउर उहइ तरह दरवाजन रहेन। 12दक्खिन क कमरन क खाले एक दुआर रहा जउन पूरब कइँती जात रहा। इ बिसाल कच्छ में पहोंचावत रहा। दक्खिन क कमरन क आर-पार एक विभाजक देवार रही।

13उ मनई मोहसे कहेस, “आँगन क आर-पार वाले दक्खिन क कमरन अउ उत्तर क कमरन पवित्तर कमरन अहइँ। इ सबइ ओन याजकन क कमरन अहइँ जउन यहोवा क बलि-भेंट चढ़ावत हीं। उ सबइ याजक एन कमरन में सबनत पवित्तर भेंट क खइहीं। उ पचे सब स जियादा पवित्तर भेंट क हुवाँ रखिहीं। काहेकि इ जगह पवित्तर अहइ। सब स जियादा पवित्तर भेंटन इ सबइ अहइँ: अन्न भेंट, पाप बरे भेंट अउर अपराध भेंट। 14याजक पवित्तर छेत्र में प्रवेस करिहीं। किन्तु बाहरी आँगन में जाइ क पहिले उ पचे आपन सेवा-वस्त्र पवित्तर ठउर में रख देइहीं। काहेकि इ समइ वस्त्र पवित्तर अहइँ। जदि याजक चाहत ह कि उ मन्दिर क उ भाग में जाइ जहाँ दूसर लोग अहइँ तउ ओका ओन कमरन में जाइ चाही अउर दूसर वस्त्र पहिर लेइ चाही।”

मन्दिर क बाहरी हीसा

15उ मनई जब मन्दिर क बाहरी आँगन क नाप लेइ खतम कइ चुका, तउ उ मोका उ फाटक स बाहेर लिआवा जउन पूरब क रहा। उ मन्दिर क बाहेर चारिहुँ

कइँती नापेस। 16उ मनई नापदण्ड स, पूरब क सिरा क नापेस। इ पाँच सौ छइ लम्बा रहा। 17उ उत्तर क सिरे क नापेस। इ पाँच सौ छइ लम्बा रहा। 18उ दक्खिन क सिरे क नापेस। इ पाँच सौ छइ लम्बा रहा। 19उ पच्छिम क तरफ चारिहुँ कइँती गवा अउर एका नापेस। इ पाँच सौ छइ लम्बा रहा। 20उ मन्दिर क चारिहुँ ओस स नापेस। देवार मन्दिर क चारिहुँ ओर गइ रही। देवार पाँच सौ छइ लम्बी अउर पाँच सौ छइ चउड़ी रही। इ पवित्तर स्थान क साधारण स्थान अलागावइ बरे हुवाँ रही।

यहोवा आपन लोगन क बीच रही

**43** उ मनई मोका फाटक तलक लइ गवा, उ फाटक जउन पूरब क खुलत रहा। 2हुवाँ पूरब स इस्राएल क परमेस्सर क महिमा उतरी। परमेस्सर क अवाज क सोरमचावत भवा अधिक पानी आवाज़ क समान तेज रही। परमेस्सर क महिमा स भुइँया प्रकास स चमक उठी। 3उ दर्सन वइसा ही रहा जउन मई उ समइ लखेउँ जब उ नगर विनास करइ बरे आवा रहा वइसा ही रहा। जइसा दर्सन मई कबार नदी क किनारे लखे रहेउँ। अउर मई मुहँ क बल धरती पइ गिर पड़इ गवा। 4यहोवा क महिमा, मन्दिर में उ फाटक स आइ जउन पूरब क खुलत ह।

5तब आतिमा मोका ऊपर उठाएस अउर भीतरी आँगन में लइ गइ। यहोवा क महिमा मन्दिर क भर दिहस। 6मई मन्दिर क भीतर स कउनो क मोरे संग बातन करत सुनेउँ। मनई मोर बगल में खड़ा रहा। 7मन्दिर में एक अवाज मोका कहेस, “मनई क पूत, इहइ ठउर मोरे सिंहासन अउ पदपीठ अहइ। मई इ ठउर पइ इस्राएल क लोगन में सदा रहब। इस्राएल क परिवार मोरे पवित्तर नाउँ क फिन अपमान नाहीं करी। राजा अउर ओनकर लोग मोरे पवित्तर नाउँ क बिभिचारी स अउर आपन आपन उच्च ठउरे पइ राजा लोगन क ल्हासन दफनाइके लज्जित नाहीं करिही। 8उ पचे मोरे नाउँ क, आपन डवेढी क मोर डवेढी क संग बनाइके अउर दुआर खम्भा क मोरे दुआर खम्भा क संग बनाइके लज्जित नाहीं करिहीं। पुराने जमाने में सिरिफ एक देवार मोरे घेरे क ओर्नेस अलग करत रही। एह बरे उ पचे हर समइ जब कबहुँ भी पाप अउर भयंकर कामन क किहेन तब मोरे पवित्तर नाउँ क लज्जित किहेन। इहइ कारण रहा कि मई कोहाइ गएउँ अउर ओनका नस्ट किहेउँ। 9अब ओनका बिभिचार क दूर करइ द्या अउर अपने राजा लोगन क ल्हासन क मोका बहोत दूर लइ जाइ द्या। तब मई ओनके बीच सदा रहब।

10“अब मनई क पूत, इस्राएल क परिवार स मन्दिर क बारे में कहा। तब उ पचे आपन पापन पइ लज्जित होइहीं। उ पचे मन्दिर क योजना क बारे में सिखिहीं। 11उ पचे ओन बुरे कामन बरे लज्जित होइहीं जउन उ पचे किहेन ह। ओनका मन्दिर क आकृति समुझइ द्या। ओनका इ सीखइ द्या कि उ कइसे बनी, ओकर प्रवेस दुआर, निकास दुआर अउर एह पइ क सारी रूपकृतियन कहाँ होइहीं। ओनका एकर सबहिँ नेमन अउर विधियन क बारे में सिखावा अउर

एनका लिखा जेहसे उ पचे सबहिं एनका लिख सकई। तब उ पचे मन्दिर क सबहिं नेमन अउर विधियन क पालन करिहीं। तब उ पचे इ सब कछू कइ सकत हीं। 12मन्दिर क नेम इ अहइ: पर्वत क चोटी पइ सारा छेत्र सब स जियादा पवितर अहइ। इ मन्दिर क नेम अहइ।

### वेदी

13“वेदी क नाप, लम्बा हाथ क नाप क अनुसार इ अहइ: हाथ का नाप साधारण हाथ स चार अंगुल बड़ा रह। वेदी क नेंव क चारिहुँ कइँती एक गन्दा नाला रहा। इ एक हाथ गहिर अउर एक हाथ चउड़ा रहा। किनारा क चारिहुँ कइँती एक बीता ऊँचा पट्टी रहा। वेदी केतनी ऊँची रही, उ इ रही। 14भुइँया स निचली किनारी तलक, नेंव क नाप दुइ हाथ अहइ। इ एक हाथ चउड़ी रही। छोटी किनारी स बड़ी किनारी तलक एकर नाप चार हाथ रही। इ दुइ हाथ चउड़ी रही। 15वेदी पइ आगी क जगह चार हाथ ऊँच रही। वेदी क चारिहुँ कोने सीगन क आकार क रहेन। 16वेदी पइ आगी क जगह बारह हाथ लम्बी अउर बारह हाथ चउड़ी रही। इ पूरी तरह वर्गीकार रहा। 17किनारा भी वर्गीकार रही अउर चौदह हाथ लम्बी अउर चउदह हाथ चउड़ी रही। एकरे चारिहुँ ओर आधा हाथ चउड़ी एक पट्टी रही। (नेंव क चारिहुँ कइँती गन्दी नाली एक हाथ चउड़ी रही।) वेदी तलक जाइवाली सीढियन पूरब दिसा में रहिन।”

18तब उ मनई मोहसे कहेस, “मनई क पूत, सुआमी यहोवा इ कहत ह: ‘वेदी बरे इ सबइ नेम अहई। जउने दिन इ होमबलि चढ़ावइ बरे अउर एह पइ खून बहावइ बरे तइयार होइ जाइ तउ, 19तोहका लेवी कबीला क याजकन क जउन कि सदोक क सत्तानन अहइ एक तु जवान सौँइ देइ चाही। उ पचे ओन लोग अहइ जउन कि मोर बरे भेंट क जराइके मोर सेवा किहेस।” मोर सुआमी यहोवा इ कहेस। 20“तू बैल क कछू खून लेब्या अउर वेदी क चारिहुँ सीगन पइ, किनारे क चारिहुँ कोनन पइ अउर पट्टी क चारिहुँ ओर डउब्या। इ तरह तू वेदी क पवितर करब्या अउर एकरे बरे प्रायश्चित अदा करब्या। 21तू बैल क पाप बलि क रूप में लेब्या। बैल, पवितर छेत्र क बाहेर, मन्दिर क खास जगह पइ जरावा जाइ।

22“दूसर दिन तू बोकरा भेंट करब्या जेहमों कउनो दोख नाहीं होइ। इ पाप बलि होइ। याजक वेदी क उहइ तरह पवितर करी जउने तरह उ बैल स ओका पवितर किहस। 23जब तू वेदी क पवितर करब समाप्त कइ चुका तब तोहका चाही कि तू एक दोख रहित जवान बैल अउर एक दोख रहित भेड़ा बलि चढ़ावा। 24तब याजक ओन पइ नून छिछकारिहीं। तब याजक बैल अउर भेड़ा क यहोवा क होमबलि क रूप में बलि चढ़इहीं। 25तू एक बोकरा हर रोज सात दिन तलक, पाप बलि क बरे तइयार करब्या। तू एक नवा बैल अउर झुण्ड स एक भेड़ा भी तइयार करब्या। बैल अउर भेड़न में कउनो दोख नाहीं होइ चाही। 26सात दिन तलक याजक वेदी क पवितर करत रहिहीं। तब याजक वेदी क समर्पित करिहीं। 27उ सबइ सात दिन पूरा होइ जइहीं। अठौँ दिन अउर ओकरे आगे याजक क तोहार होमबलि

अउ मेलबलि वेदी पइ चढ़ाइ चाही। तब मई तोहका अंगीकार करब।” मोर सुआमी यहोवा इ कहेस।

### बाहरी दुआर

44 तब उ मनई मोका मन्दिर क बाहरी फाटक, जेकर सामना पूरब क अहइ, वापस लिआवा। अउर बाहरी दुआर बन्द रहा। 2यहोवा मोहसे कहेस, “इ फाटक बन्द रही। इ खोला नाहीं जाई। कउनो भी एहसे होइके प्रवेस नाहीं करी। काहेकि इस्राएल क परमेस्सर यहोवा एहसे प्रवेस कइ चुका अहइ। एह बरे इ बंद रहइ चाही। 3उ लोगन क सासक इ जगह पइ तब बइठी जब उ यहोवा क संग रोटी खाइ। उ फाटक क संग क प्रवेस कच्छ क दुआर स प्रवेस करी तथा उहइ रास्ते स बाहेर जाइ।”

### मन्दिर क पवितरता

4तब उ मनई मोका उत्तरी दुआर स मन्दिर क समन्वा लिआवा। मई निगाह डाएँ। अउर यहोवा क महिमा क यहोवा क मन्दिर में भरत लखेँ। मई मुँहे क बल धरती पइ गिरि गवा। 5यहोवा मोहसे कहेस, “मनई क पूत, बहोत सावधानी स लखा। आपन आँखिन अउर कानन क उपयोग करा। एन चिजियन क लखा। मई तोहका मन्दिर क बारे में सबहिं नेम-विधि बतावत हउँ। सावधानी क साथ मन्दिर क प्रवेस-दुआर अउर पवितर ठउर स सबहिं निकासन क लखा। 6तब इस्राएल क ओन लोगन क इ सँदेसा द्या जउन मोर आग्या क पालन करइ स इन्कार कइ दिहे रहेन। ओनसे कहा, मोर सुआमी यहोवा इ कहत ह, ‘इस्राएल क परिवार, मई तोहरे जरिये कीन्ह गइ भयंकर करमन क जरूरत स जियादा सहन किहेउँ ह। 7तू बिदेसियन क मोरे मन्दिर में लिआया अउर ओन लोगन क फुरइ खतना नाहीं भवा रहा। उ पचे पूरी हिरदय स मोरे बरे समर्पित नाहीं रहेन। इ तरह तू मोरे मन्दिर क अपवितर किहे रह्या। तू हमार करार क तोड़या, भयंकर काम किहा अउ तब तू आपन देवमूरतियन क मोर रोटी, चर्बी अउ खून चढ़ाएस। किन्तु इ मोरे मन्दिर क गन्दा बनाएस। 8तू मोर पवितर चिजियन क देखभाल नाहीं किहा। नाहीं, तू बिदेसियन क मोरे मन्दिर बरे उत्तरदायी बनाया।” 9मोर सुआमी यहोवा इ कहत ह, “एक बिदेसी क जेकर खतना न भवा होइ, मोरे मन्दिर में नाहीं आवइ चाही, ओन बिदेसियन क भी नाहीं, जउन इस्राएल क लोगन क बीच स्थायी रूप स रहत हीं। ओकर खतना जरूर होइ चाही अउर ओका मोरे बरे पूरी तरह समर्पित होइ चाही, एकरे पूरब कि उ मोरे मन्दिर में आवइ। 10पुराने जमाने में, लेवीबंसियन मोका तब छोड़ दिहन, जब इस्राएल मोरे खिलाफ होइ गवा रहा। इस्राएल मोका आपन देवमूरतियन क अनुसरण करइ बरे छोड़ेस। लेवी बंसी आपन पाप बरे दण्डित होइहीं। 11लेवी बंसी मोरे पवितर ठउर में सेवा करइ बरे चुने ग रहेन। उ पचे मन्दिर क फाटक क चौकीदारी किहन। उ पचे मन्दिर में सेवा किहन। उ पचे बलियन तथा होमबलियन क जनावरन क लोगन बरे मारेन। उ पचे लोगन क मदद करइ अउर



ओनकर सेवा बरे चुने गए रहेन। 12किन्तु ओन लेवी बंसियन मोरे विरूद्ध पाप करइ मैं लोगन क सहायता किहन। उ पचे लोगन क देवमूरतियन क पूजा करइ मैं सहायता किहन। एह बरे मई ओनके विरूद्ध प्रतिग्या करत हउँ, "उ पचे आपन पाप बरे दण्डित होइहीं।" मोर सुआमी यहोवा इ बात कहेस ह। 13"एह बरे लेवीबंसी याजकन क रूप मैं मोर लगे भेंट नाहीं लइहीं मोर सेवा करइहीं। उ पचे मोर कउनो भी पवितर चीज या सब स जियादा पवितर वस्तु क नाहीं चढ़ाइहीं। उ पचे आपन लज्जा क, जउन बुरे काम उ पचे किहन, ओकरे कारण दोइहीं। 14किन्तु मई ओनका मन्दिर क देखभाल करइ देब। उ पचे मन्दिर मैं काम करिहीं अउर उ सबइ काम करिहीं जउन एहमों कीन्ह जात हीं।

15"सबहिं याजक लेवी क परिवार समूह स अहईं। किन्तु जब इस्राएल क लोग मोरे विरूद्ध मोहसे दूर गएन तब केवल सादोक परिवार क याजकन मोरे पवितर ठउर क देखभाल किहन। एह बरे केवल सादोक क बंसज ही मोका भेंट लइहीं। उ पचे मोरे समन्वा खड़े होइहीं अउर आपन बलि चढ़ाए गए जनावरन क चर्बी अउर खून मोका भेंट करिहीं।" मोर सुआमी यहोवा इ कहेस। 16"उ पचे मोर पवितर ठउर मैं प्रवेस करिहीं। उ पचे मोर मेज क लगे मोर सेवा करइ अइहीं। उ पचे ओन चिजियन क देखभाल करिहीं जेनका मई ओनका दिहेउँ। 17जब उ पचे भीतरी आँगन क फाटकन मैं प्रवेस करिहीं तब उ पचे सन क वस्त्र पहिरिहीं। जब उ पचे भीतरी आँगन क फाटक अउर मन्दिर मैं सेवा करिहीं, तब उ पचे ऊनी वस्त्र निहचित ही नाहीं पहिरिहीं। 18उ पचे सन क पगड़ी अपने मूँडे पड़ धारण करिहीं, अउर उ पचे सन क जौंधिया पहिरिहीं। उ पचे अइसा कछू नाहीं पहिरिहीं जेहसे पसीना आवइ। 19उ पचे मोर सेवा करत समइ क वस्त्र क, बाहरी आँगन मैं लोगन क लगे जाइ क पहिले, उतारिहीं। तब उ पचे दूसर वस्त्र पहिरिहीं। इ तरह उ पचे लोगन क ओन पवितर वस्त्रन क छुअइ नाहीं देइहीं।

20"उ पचे याजकन क आपन मूँडे क बाल मुड़वाइ नाहीं चाही अउर न ही आपन बालन क बहोत बढ़इ देइ चाही। याजक आपन मूँडे क बालन क सिरिफ छँटाई कइ सकत हीं। 21कउनो भी याजक उ समइ दाखरस नाहीं पी सकत जब उ पचे भीतरी आँगन मैं जात ह। 22याजक क बिधवा स या तलाक मिली मेहरारू स बियाह नाहीं करइ चाही। नाहीं, उ पचे क सिरिफ इस्राएल क परिवार क कुँवारी कन्या स बियाह करइ चाही। या उ पचे कउनो याजकन क बिधवा स बियाह कइ सकत ह।

23"याजक मोरे लोगन क पवितर चिजियन अउर जउन चिजियन पवितर नाहीं अहईं, क बीच अन्तर क बारे मैं भी सिच्छा देइहीं। उ पचे मोरे लोगन क, जउन सुद्ध अउर जउन सुद्ध नाहीं अहइ, क जानकारी करइ मैं मदद देइहीं। 24याजक कचहरी मैं निआउ क जज होइ। उ पचे लोगन क संग निआउ करत समइ मोरे नेम क अनुसरण करिहीं। उ पचे मोर बिसेस दावतन क समइ मोरे नेम-विधियन क पालन करिहीं। उ पचे मोर बिसेस विस्राम क दिनन क सम्मान करिहीं अउर ओनका पवितर रखिहीं। 25उ पचे मनई क लहास क लगे जाइके आपन क अपवितर करइ नाहीं

जइहीं। किन्तु उ पचे तब अपने क अपवितर कइ सकत हीं जदि मरइवाला मनई पिता, माता, पूत, बितिया, भाई या बिन ब्याही बहिन होइ। इ सबइ याजक क अपवितर बनाई। 26सुद्ध कीन्ह जाइ क पाछे याजक क सात दिन तलक प्रतीच्छा करइ चाही। 27तब इ पवितर ठउर क लउट सकत ह। किन्तु जउने दिन उ भीतरी आँगन क पवितर ठउर मैं सेवा करइ जाइ, ओका पाप बलि अपने बरे चढ़ावइ चाही" मोर सुआमी यहोवा इ कहेस।

28"लेवीबंसियन क आपन भुईया क बारे मैं: मई ओनकर सम्पति हउँ। तू लेवीबंसियन क कउनो सम्पति इस्राएल मैं नाहीं देब्या। मई इस्राएल मैं ओनकर हीसन मैं हउँ। 29उ पचे अन्नबलि, पापबलि, दोखबलि खाइ क बरे पइहीं। जउन कछू इस्राएल क लोग यहोवा क देइहीं, उ ओनकर होइ। 30हर तरह क तइयार फसल क पहिला भाग याजकन बरे होइ। तू आपन साने आटे क पहिला हीसा भी याजक क देब्या। इ तोहरे परिवार पड़ आसीवाद क बर्खा करी। 31याजक क उ पंछी या जनावर नाहीं खाइ चाही जेकर अपने आप मउत होइ या जउन जंगली जनावर क जरिये टूका टूका कइ दीन्ह ग होइ।

#### पवितर काम क उपयोग बरे भुईया क बटवारा

**45** "तू इस्राएल क परिवार समूह बरे भुईया क विभाजन पाँसा लोकाइके करब्या। उ समइ तू भुईया क एक हीसा अलग करब्या। इ यहोवा बरे पवितर हीसा होइ। भुईया पच्चीस हजार हाथ लम्बी अउर दस हजार हाथ चउड़ी होइ। इ पूरी भुईया पवितर होइ। 2पाँच सौ हाथ लम्बा अउर पाँस सौ हाथ चउड़ा वर्गाकार भुईया मन्दिर बरे होइ। मन्दिर क चारिहुँ कइँती पचास हाथ चउड़ा क एक ठु खुला छेत्र होइ। 3बहोत पवितर ठउर मैं तू पच्चीस हजार हाथ लम्बा अउर दस हजार हाथ चउड़ा नपब्या। मन्दिर इ छेत्र मैं होइ। मन्दिर क छेत्र सब स जियादा पवितर ठउर होइ। 4इ भुईया क पवितर भाग मन्दिर क सेवक याजकन बरे होइ जहाँ उ पचे परमेस्सर क समीप सेवा करइ आवत हीं। इ याजकन क घरन अउर मन्दिर बरे होइ। 5दूसर छेत्र पच्चीस हजार हाथ लम्बा अउर दस हजार हाथ चउड़ा ओन लेवीबंसियन क बरे होइ जउन मन्दिर मैं सेवा करत हीं। इ भुईया भी लेवीबंसियन क, ओनके रहइ क नगरन बरे, होइ। 6तू नगर क पाँच हजार हाथ चउड़ा अउर पच्चीस हजार हाथ लम्बा छेत्र देब्या। इ पवितर छेत्र क सहारे होइ। इ इस्राएल क पूरे परिवार बरे होइ। 7सासक पवितर ठउर अउ नगर क आपन भुईया क दुइनउँ कइँती क भुईया अपने लगे रखी। इ पत्रि छेत्र अउ नगर क छेत्र क बीच मैं होइ। इ उहइ चउड़ाई क होइ जउन चउड़ाई परिवार समूह क भुईया क अहइ। इ लगातार पच्छिमी सीमा स पूर्वी सीमा तलक जाइ। 8इ भुईया इस्राएल मैं सासक क सम्पति होइ। इ तरह सासक क मोर लोगन क जीवन क भविस्स मैं कस्ट देइवाला बनावइ क जरूरत नाहीं होइ। किन्तु उ पचे 'भुईया क इस्राएलियन क बरे ओनके परिवार समूहन क देइहीं।"

१मोर सुआमी यहोवा इ कहेस, “इस्त्राएल क सासको, बहोत होइ चुका। क्रूर होब अउर लोगन स चिजियन चुराउब, छोड़ा। निआउवाला बना अउर अच्छे काम करा। हमरे लोगन क आपन घसन स बाहेर जाइ बरे बलपूर्वक मजबूर न करा।” मोर सुआमी यहोवा इ कहेस।

10“लोगन क ठगब बन्द करा। सही बाटन अउ आपन क उपयोग करा। 11एपा (सूखी चिजियन क बाट) अउ बथ (दूत क मापक) एक ही तरह होइ चाही। एक बथ अउ एपा दुइनउँ एक क दसवाँ भाग होमर क बराबर होइ चाही। उ सबइ मापक होमर पड़ आधारित होइहीं। 12एक सेकेल बीस गेरा क बराबर होइ चाही। एक मिना साठ सेकेल क बराबर होइ चाही। इ बीस सेकेल जमा पचीस सेकेल जमा पन्द्रह सेकेल क बराबर होइ चाही।

13“इ खास भेंट अहइ जेका तोहका देइचाही। एक क छठा भाग एपा गोहूँ क हर एक होमर गोहूँ बरे अउर एक क छठा भाग एपा जउन क हर एक होमर जौ क बरे देइ चाही। 14एक बथ क दसवाँ हींसा जइतून क तेल, हर एक कोर जइतून क तेल क बरे द्या। याद राखा दस बथ क एक होमर अउर एक होमर क एक कोर होत ह। 15एक तु भेड़, हर एक दुइ सौ भेड़िन स इस्त्राएल क सबन्त अच्छा घास क मनइयन स। “इ सबइ बिसेस भेंटन अन्नबलि, होमबलि अउर मेलबलि क बरे अहइँ। इ सबइ भेंटन लोगन क प्रायश्चित्त बरे अहइँ।” मोर सुआमी यहोवा इ कहेस। 16“देस क हर एक मनई इस्त्राएल क सासक क बरे इ भेंट देइ। 17किन्तु सासक क बिसेस पवित्तर दिनन बरे जरूरी चिजियन देइ चाही। सासक क होमबलि, अन्नबलि अउर पेय भेंट क बियवस्था दावत क रिन, नवचन्द्र सबित अउ इस्त्राएल क परिवार क सबहिं बिसेस दावतन बरे करइ चाही। सासकन क सबहिं पापबलि, अन्नबलि, होमबलि, मेलबलि जउन इस्त्राएल क परिवार क पवित्तर करइ बरे उपयोग कीन्ह जात ह क समेत सबहिं बलियन देइ चाही।” 18मोर सुआमी यहोवा इ सबइ बातन बताएस, “पहिले महीने में, महीने क पहिले दिन तू एक दोख रहित भवा जवान बैल लेब्या। तोहका उ बैल क उपयोग मन्दिर क पवित्तीकरण करइ बरे करइ चाही। 19याजक कछू खून पाप बरे भेंट स लेइ अउर एका मन्दिर क दुआर खम्भन अउर वेदी क किनारी क चारिहुँ कोनन अउ भीतरी आँगन क फाटक क खम्भन पड़ डाइ। 20तू इहइ काम महीने क सतएँ दिन उ मनई बरे करब्या जउन गलती स या अनजाने में पाप कइ दिहे होइ। इ तरह तू मन्दिर बरे प्रायश्चित्त करब्या।”

### फसह पर्व क दावत क समय भेंट

21“पहिले महीने क चौदहवें दिन तोहका सात दिन तलक फसह पर्व मनावई चाही। उ समइ में बेखमीरी रोटी खाइ चाही। 22उ समइ सासक एक बैल अपने बरे तथा इस्त्राएल क लोगन क बरे भेंट करी। बैल पापबलि बरे होइ। 23दावत क सात दिन तक सासक दोख रहित सात बैल अउ सात भेड़न भेंट करी। उ पचे यहोवा क होमबलि होइहीं। सासक उत्सव क सात दिन हर रोज एक बैल भेंट करी अउर उ पाप बलि बरे हर एक दिन एक बोकरा भेंट करी।

24सासक एक एपा जौ हर एक बैल क संग अन्नबलि क रूप में, अउर एक एपा जौ हर एक भेड़ा क साथ भेंट करी। सासक क एक हीन तेल हर एक एपा अन्न क बरे देइ चाही। 25सातवें महीने के पन्द्रहवें दिन स सरण क उत्सव अहइ। किन्तु सासक क इहइ काम उत्सव क सात दिन तलक करइ चाही। इ सबइ भेंटन पापबलि, होमबलि, अन्नबलियन अउ तेल-भेंटन जरूर चढ़ावइ चाही।”

### सासक अउ त्यौहार

**46** मोर सुआमी यहोवा इ कहत ह, “भीतरी आँगन क पूर्वी फाटक काम क छः दिनन में बन्द रही। किन्तु इहइ सबित क दिन अउर नवचन्द्र क दिन खुली। 2सासक फाटक क प्रवेस कच्छ स अन्दर आइ अउर उ फाटक क खम्भा क सहारे खड़ा होइ। तब याजक क होमबलि अउ मेलबलि चढ़ाई। सासक फाटक क डेवड़ी पड़ उपासना करी। तब उ बाहेर जाई। किन्तु फाटक साँझ होइ तलक बन्द नाहीं होइ। 3उ देस क लोग भी यहोवा क सम्मुख जहाँ फाटक सबित क दिन अउर नवचन्द्र क दिन खुलत ह, उहइँ उपासना करी। 4सासक सबित क दिन यहोवा क होमबलि चढ़ाई। ओका दोख रहित छः मेमनन अउर दोख रहित एक भेड़ा देइ चाही। 5ओका एक एपा अन्नबलि भेड़ा क साथ देइ चाही। सासक ओतनी अन्नबलि मेमनन क साथ देइ, जेतनी उ दइ सकत ह। ओका एक हिन जैतून क तेल हर एक एपा अन्न क साथ देइ चाही। 6“नवचन्द्र क दिन ओका एक बैल भेंट करइ चाही, जेहमाँ कउनो दोख न होइ। उ छः मेमनन अउ एक भेड़ा, जेहमाँ कउनो दोख न होइ, भी भेंट करी। 7सासक क, बैल क संग एक एपा अन्नबलि अउर एक एपा अन्नबलि भेड़ा क साथ देइ चाही। सासक क हरेक मेमना क संग जेतना होइ सकइ देइ चाही तथा हर एक एपा अन्न बरे एक हिन तेल ओका जरूर चढ़ावइ चाही।

8“सासक पूर्वी फाटक ओसारा स होइके अन्दर जाइ चाही अउर उहइ रास्ता स होइके वापिस बाहर जाइ चाही। 9जब देस क लोग बिसेस त्यौहार पड़ यहोवा मिलइ बरे आइहीं तउ जउन कउनो भी उत्तर फाटक स उपासना करइ बरे अन्दर आवत हीं तउ ओका दक्खिन फाटक स होइके बाहेर जाइ चाही। अउर जउन कउनो दक्खिन फाटक स उपासना करइ बरे आवत हीं तउ ओका उत्तर फाटक स होइके बाहेर जाइ चाही। कउनो भी उहइ मार्ग स नाहीं लउटि जेहसे उ प्रवेस किहे रहेन। हरेक मनई क सोझे आगे बढ़इ चाही। 10जब लोग अन्दर जइहीं तउ सासक अन्दर जाइ। जब उ पचे बाहेर अइहीं तब सासक बाहेर जाइ। 11दावतन अउ बिसेस बइठकन क अवसर पड़ एका एपा अन्नबलि हर बैल क संग चढ़ाई जाइ चाही। एक एपा अन्नबलि हर भेड़ा क संग चढ़ाई जाइ चाही अउ हर एक मेमना क संग ओका जेतना जियादा उ दइ सकइ देइ चाही। ओका एक हिन तेल हर अन्न क एक एपा क बरे देइ चाही। 12जब सासक यहोवा क स्वेच्छा भेंट करत ह, इ होमबलि, मेलबलि या स्वेच्छा भेंट होइ सकत ह, चढ़ाई तउ उसके बरे पूर्व क फाटक खुली। तब उ आपन होमबलि

अउर आपन मेलबलि क सबित क दिन क तरह चढ़ाई। जब उ जाई ओकरे पाछे फाटक बन्द होई।

### नित्य भेंट

13“तू दोख रहित एक बरिस का एक मेमना देब्या। इ प्रतिदिन यहोवा क होम बलि बरे होइ। प्रत्येक भिन्सारे तू एका देब्या। 14तू हर एक भिन्सारे मेमना क संग अन्नबलि भी चढ़उब्या। तू एक क छठा भाग एपा आटा अउ एक क तीसरा भाग हिन तेल नीक आटा क चिकना करइ बरे, देब्या। इ यहोवा क हमेसा अन्नबलि होइ। 15इ तरह उ पचे सदा ही मेमना, अन्नबलि अउ तेल, होमबलि बरे हर भिन्सारे देत रहिहीं।”

### आपन सन्तान क सासक क जरिये भुईया देइ क नेम

16मोर सुआमी यहोवा इ कहत ह, “जदि सासक आपन भुईया क कउनो हीसा क आपन पूतन क मीरास क रूप में देत ह तउ उ ओकर पूतन क होइ। इ ओनकर सम्पति अहइ। 17किन्तु जदि कउनो सासक आपन भुईया क कउनो भाग क आपन गुलाम क मीरास क रूप में देत ह तउ उ मीरास ओकरे पास जुबली क बरिस तलक होइ। तब ओकरे पाछे मीरास सासक क वापस होइ जाइ। सिरिफ राजा क पूत ही ओकरी भुईया क मीरास क अपने लगे रख सकत ही। 18अउर सासक लोगन क भुईया क कउनो भी हीसा नाहीं लेइ अउर न ही ओनका आपन भुईया छोड़इ क मजबूर करी। ओका आपन भुईया क कछू हीसा आपन पूतन क देइ चाही। इ तरह स हमार लोग आपन भुईया स बंचित होइ बरे मजबूर नाहीं कीन्ह जइहीं।”

### विसेस रसोई घर

19उ मनई मोका दुआर स फाटक क बगल में लइ गवा। उ मोका याजकन क उत्तर में पवितर कमरन कइँती लइ गवा। मई हुवाँ बहोत दूर पच्छिम में एक ठउर लखेस। 20उ मनई मोहसे कहेस, “इहइ उ ठउर अहइ जहाँ याजक दोखबलि अउ पाप बलि क पकइहीं। हिअँइ पइ याजक अन्नबलि क पकइहीं। काहे? जेहसे ओनका ओन भेंटन क बाहरी आँगन मइ लइ जाइ क जरूरत न रहइ। इ तरह उ पचे ओन पवितर चिजियन क बाहेर नाहीं लइहीं जहाँ साधारण लोग होइहीं।” 21तब उ मनई मोका बाहरी आँगन में लिआवा। उ मोका आँगन क चारिहुँ कोनन में लइ गवा। आँगन क हर एक कोने में एक नान्ह आँगन रहा। 22आँगन क कोनन में नान्ह आँगन रहेन। हर एक नान्ह आँगन चालीस हाथ लम्बा अउर तीस हाथ चउड़ा रहा। चारिहुँ कोनन क नाप समान रही। 23भीतर एन नान्ह आँगनन क चारिहुँ कइँती ईटन क एक देवार रही। हर एक देवार में भोजन पकावइ क ठउर बरे रहेन। 24उ मनई मोहसे कहेस, “इ सबइ रसोइयाँ अहँइ जहाँ उ पचे लोग जउन मन्दिर क सेवा करत ही, लोगन बरे बलि पकइहीं।”

### मन्दिर स बहत जल

47 उ मनई मन्दिर क दुआर पइ मोका वापस लइ गवा। मई मन्दिर क पूर्वी डेवढी क खाले स पानी

आवत लखेउँ। (मन्दिर क सामना मन्दिर क पूर्वी कइँती अहइ।) पानी मन्दिर क दक्खिनी छोर क खाले स वेदी क दक्खिन में बहत रहा। 2उ मनई मोका उत्तर फाटक स बाहेर लिआवा अउर बाहरी फाटक क पूरब तरफ चारिहुँ कइँती लइ गवा। दक्खिन कइँती स पानी बहत रहा। 3उ मनई पूरब कइँती हाथ में नापइ क फीता लइके बढ़ा। उ एक हजार हाथ नापेस। तब उ मोका उ जगह स पानी स होइके चलइ क कहेस। हुवाँ पानी सिरिफ मोरे टकने तलक गहिर रहा। उ मनई दूसर एक हजार हाथ नापेस। तब उ उ जगह पइ पानी स होइके चलइ क कहेस। हुवाँ पानी मोरे घुटना तलक आवा। 4तब उ मनई दूसर एक हजार हाथ नापेस तउ उ मोका उ जगह पइ पानी स होइके चलइ क कहेस। हुवाँ पानी मोरे घुटनन तलक रहा। तउ मनई दूसर एक हजार हाथ नापेस अउर मोका उ जगह पइ पानी स होइके चलइ क कहेस। हुआँ पानी मोरे कमर तलक रहा। 5उ मनई दूसर एक हजार हाथ नापेस। किन्तु हुवाँ पानी एतना गहिर रहा कि पार न कीन्ह जाइ सकइ। इ एक नदी बन गवा। पानी तैरइ बरे पर्याप्त गहिर रहा। इ नदी एतनी गहिर रही कि पार नाहीं कइ सकत रहेन। 6तब उ मनई मोहसे कहेस, “मनई क पूत, का तू जउन चिजियन क लखेस, ओन पइ गहराई स धियान दिहेस?”

तब उ मनई नदी क किनारे क साथ मोका वापस लइ गवा। 7जइसे मई नदी क किनारे स वापस चला, मई पानी क दुइनउँ कइँती बहुत जियादा बृच्छ लखेउँ। 8उ मनई मोहसे कहेस, “इ पानी पूरब क अरबा घाटी क तरफ खाले बहत ह। पानी मृत सागर में पहेचत ह। उ सागर में पानी स्वच्छ अउ ताज होइ जात ह। 9इ नदी जहाँ भी बहत ह, जिन्नगी लावत ह। इ पानी में बहोत मछरियन अहँइ अउर जहाँ इ नदी जात ह हुवाँ बहोत प्रकार क जानवर रहत हीं। 10तू मछूआसन क लगातार एनगदी स एनेग्लेम तलक खइ देख सकत ह। तू ओनका आपन मछरी क जाल फेंकत अउर कइँउ तरह क मछरियन धरत लख सकत ह। मृत सागर में ओतनी ही प्रकार क मछरियन अहँइ जेतने प्रकार क भूमध्य सागर में। 11किन्तु दलदल अउ गड़हन क पहँटा क प्रदेस क नान्ह छेत्र अनुकूल नाहीं बनाइ जाइ सकतेन। उ पचे नमक बरे छोड़े जइहीं। 12हर तरह क फलदार बृच्छ नदी क दुइनउँ ओर उगत हीं। एनकर पतन कबहुँ झुरातेन अउ मरतेन नाहीं। एन बृच्छन पइ फल लगब कबहुँ रूकत नाहीं। बृच्छ हर महीने फल पैदा करत हीं। काहेकि बृच्छन बरे पानी मन्दिर स आवत ह। बृच्छन क फल भोजन बनी, अउर ओनकर पातियन औसधियन होइहीं।”

### परिवार समूहन बरे भुईया क बटवारा

13मोर सुआमी यहोवा इ कहत ह, “इ सबइ सीमन इस्त्राएल क बारह परिवार समूहन में भुईया क बरे अहँइ। यूसुफ क दुइ भाग मिलिहीं। 14तू भुईया क बराबर बँटब्या। मई इ भुईया क तोहरे पुरखन क देइ क बचन दिहे रहेउँ। एह बरे मई इ भुईया क तोहका देत रहत हउँ। 15हिआँ भुईया क दुइ सीमा अहँइ। उत्तर कइँती इ सीमा भूमध्य सागर स हेतलोन होइके जात ह जहाँ सड़क हमात अउ

सदाद तलक 16बेरोता, सिब्रैम (जउन दमिस्क अउ हमात क सीमा क बीच अहइ) अउर हसर्हतीकोन जउन हौसन क सीमा पइ अहइ, कईती मुड़त ह। 17एह बरे सीमा समुद्र स हसरेनोन तलक जाइ जउन दमिस्क अउर हमात क उत्तरी सीमा पइ अहइ। इ उत्तर कईती होइ।

18“पूरब कईती, सीमा हसरेनोन स हौरान अउ दमिस्क जाइ अउ यरदन नदी क सहारे गिलाद अउर इस्त्राएल क भुइँया क बीच पूरबी समुद्र तलक लगातार, तामार तलक जाइ। इ पूरबी सीमा होइ।

19“दक्खिन कईती, सीमा तामार स लगातार मरीबोट कादेस क नखलिस्तान तलक जाइ। तब इ मिस्र क नाले क सहारे भूमध्य सागर तलक जाइ। इ दक्खिनी सीमा होइ।

20“पच्छिमी कईती, भूमध्य सागर लगातार हमात क समन्वा क छेत्र तलक सीमा होइ। इ तोहार पच्छिमी सीमा होइ।

21“इ तरह तू इ भुइँया क इस्त्राएल क परिवार क समूहन में बँटब्या। 22तू एका आपन सम्पत्ति अउर आपन बीच रहइवाले विदेसियन क सम्पत्ति क रूप में जेनकर गदेलन तोहरे बीच रहत हीं, बँटब्या। इ सबइ बिदेसी निवासी होइहीं, इ सबइ स्वाभाविक जनम स इस्त्राएली होइहीं। तू कछू भुइँया इस्त्राएल क परिवार समूहन में स ओनका बँटब्या। 23कउनो भी कबीला जेहमों बिदेसी नागरिकन निवास करिहीं, ओनका ओनकर मीरास मिलइ चाही। मोर सुआमी यहोवा इ कहेस ह।

### इस्त्राएल क परिवारसमूह बरे भुइँया

**48** 1-7उत्तरी सीमा भूमध्य सागर स पूरब हेतलोन स हमात दर्सा अउ तब लगातार हसेसोन तलक जात ह। इ दमिस्क अउर हमात क सीमन क बीच अहइ। परिवार समूहन में स इ समूह क भुइँया एन सीमन क पूरब स पच्छिम क जाइ। उत्तर स दक्खिन, इ छेत्र क परिवार-समूह अहइँ, दान, आसेर, नप्ताली, मनस्से, एप्रैम, रूबेन यहूदा।

### भुइँया क खास भाग

8भुइँया क अगला छेत्र खास उपयोग बरे होइ। इ भुइँया यहूदा क भुइँया क दक्खिन में अहइ। इ छेत्र उत्तर स दक्खिन तलक पच्चीस हजार हाथ लम्बा अहइ अउर पूरब स पच्छिम तलक, इ ओतना चउड़ा होइ जेतना दूसर परिवार समूहन क होइ मन्दिर भुइँया क इ विभाग क बीच होइ। 9तू इ भुइँया क यहोवा क समर्पित करब्या। इ पच्चीस हजार हाथ लम्बा अउर दस हजार हाथ चउड़ा होइ। 10भुइँया क इ खास छेत्र याजकन अउ लेवीबंसियन में बँटी। याजक इ छेत्र क एक हीसा पइहीं। इ भुइँया उत्तर कईती पचीस हजार हाथ लम्बी, पच्छिम कईती दस हजार हाथ चउड़ी, पूरब कईती दस हजार हाथ चउड़ी अउर दक्खिन कईती पचीस हजार हाथ लम्बी होइ। भुइँया क इ छेत्र क बीच यहोवा क मन्दिर होइ। 11इ भुइँया सादोक क बंसजन क बरे अहइ। इ सबइ मनई मोर पवितर याजक होइ बरे चुने ग रहन। काहेकि इ पचे तब भी मोर सेवा करब जारी राखेस जब इस्त्राएल क दूसर लोग मोका छोड़ दिहन। सादोक क

परिवार मोका लेवी परिवार-समूह क दूसर लोगन क तरह नाहीं छोड़ेस। 12इ पवितर भू-भाग क खास हीसा बिसेस रूप स एन याजकन क होइ। इ लेवीबंसियन क भुइँया स लगा भवा होइ।

13“याजकन क भुइँया स लगी भूमि क लेवीबंसी आपन हीसा क रूप में पइहीं। इ पच्चीस हजार हाथ लम्बी, दस हजार हाथ चउड़ी होइ। उ पचे उ पूरी भुइँया क जउन पच्चीस हजार हाथ लम्बी अउ दस हजार हाथ चउड़ी होइ पइहीं। 14लेवीबंसी इ भुइँया क कउनो हीसा न तउ बेचिहीं, न ही बड़पार करिहीं। उ पचे इ भुइँया क कउनो भी हीसा क बेचइ क अधिकार नाहीं रखतेन। उ पचे इ भुइँया क कउनो भी हीसा क अदल बदल नाहीं कइ सकत ह। एका दूसर क हाथन क हस्तान्तरित नाहीं होवइ चाही। काहेकि इ भुइँया यहोवा क अहइ। इ सब स परम पवितर अहइ।

### नगर सम्पत्ति बरे हीसन

15“भुइँया क एक छेत्र पाँच हजार हाथ चउड़ा अउर पचीस हजार हाथ लम्बा होइ जउन याजकन अउ लेवीबंसियन क दीन्ह गइ भुइँया स अतिरिक्त होइ। इ भुइँया नगर, पसुअन क चरागाह अउ घर बनावइ बरे होइ सकत ह। साधारण लोग एकर उपयोग कइ सकत हीं। नगर एकरे बीच में होइ। 16नगर क नाप इ अहइ: उत्तर कईती इ साढ़े चार हजार हाथ होइ। पूरब कईती इ साढ़े चार हजार हाथ होइ। दक्खिन कईती इ साढ़े चार हजार हाथ होइ। पच्छिम कईती इ साढ़े चार हजार हाथ होइ। 17नगर क चरागाह होइ। इ सबइ चरागाहन ढाई सौ हाथ उत्तर कईती, ढाई सौ हाथ दक्खिन कईती होइ। उ सबइ ढाई सौ हाथ पूरब कईती तथा ढाई सौ हाथ पच्छिम कईती होइ। 18पवितर छेत्र क संग जउन हीसा बची, उ दस हजार हाथ पूरब में अउर दस हजार हाथ पच्छिम में होइ। इ भुइँया पवितर छेत्र क बगल में होइ। इ भुइँया नगर क मजदूरन बरे अन्न पइदा करी। 19नगर क मजदूर एहमों खेती करिहीं। मजदूर इस्त्राएल क सबहि परिवार समूहन में स होइहीं।

20“इ भुइँया क बिसेस छेत्र वर्गीकार होइ। इ पचीस हजार हाथ लम्बा अउर पचीस हजार हाथ चउड़ा होइ। इ पवितर छेत्र अहइ, जेहमों नगर बरे दीन्ह गवा हीसा सामिल अहइ।

21-22“इ खास भुइँया क एक हीसा देस क सासक क बरे होइ। इ बिसेस भुइँया क छेत्र वर्गीकार अहइ। इ पचीस हजार हाथ लम्बा अउर पचीस हजार हाथ चउड़ा अहइ। एकर एक हीसा याजकन बरे, एक हीसा लेवीबंसियन बरे अउर एक हीसा मन्दिर बरे अहइ। मन्दिर इ भुइँया छेत्र क बीच में अहइ। सेस भुइँया देस क सासक क अहइ। सासक बिन्यामीन अउर यहूदा क भुइँया क बीच क भुइँया पाइ।

23-27“बिसेस छेत्र क दक्खिन में उ परिवार-समूह क भुइँया होइ जउन यरदन नदी क पूरब में रहत रहा। हर परिवार-समूह उ भुइँया क एक हीसा पाइ जउन पूर्वी सीमा स भूमध्य सागर तलक गइ अहइ। उत्तर स दक्खिन क इ सबइ परिवार-समूह अहइँ: बिन्यामीन, सिमोन, इस्साकर, जबूलून अउ गाद।

28“गाद क भुइँया क दक्खिनी सीमा तामार स मरीबोत-कादेस क नखलिस्तान तलक जाइ। तब मिस्त्र क नाले स भूमध्य सागर तलक पहुँची। 29अउर इहइ उ भुइँया अहइ जेका तू इस्राएल क परिवार में बटँब्या। उहइ हर एक परिवार-समूह पाई।” मोर सुआमी यहोवा इ कहेस।

#### नगर क फाटक

30“नगर क इ सबइ फाटक अहइँ। फाटकन क नाउँ इस्राएल क परिवार समूहन क नाउँ पइ होइहीं। “उत्तर कइँती नगर साढ़े चार हजार हाथ लम्बा होइ। 31ओहमाँ तीन फाटक होइहीं। रूबेन क फाटक, यहूदा क फाटक

अउर लेवी क फाटक। 32पूरब कइँती नगर साढ़े चार हजार हाथ लम्बा होइ। ओहमाँ तीन फाटक होइहीं: यूसुफ क फाटक, बिन्यामीन क फाटक अउर दान क फाटक।

33“दक्खिन कइँती नगर साढ़े चार हजार हाथ लम्बा होइ। ओहमाँ तीन फाटक होइहीं। सिमोन क फाटक, इसाकर क फाटक अउर जबूलून क फाटक।

34“पच्छिम कइँती नगर साढ़े चार हजार हाथ लम्बा होइ। एहमाँ तीन फाटक होइहीं: गाद क फाटक, आसेर क फाटक अउर नप्ताली क फाटक।

35“नगर क चारिहुँ ओर क दूरी अट्ठारह हजार हाथ होइ। अब स आगे नगर क नाउँ होइ: यहोवा हिआँ अहइ।

# विलापगीत

## आपन बिनास पइ यरूसलेम क विलाप

1 यरूसलेम क अकेल्ला काहे छोड़ दीन्ह ग ह, इ नगर जउन कि एक समइ लोगन क भीड़ स भरी पड़ा रहेन? एक समइ उ रहा जब देसन क बीच यरूसलेम महान नगरी रही। किन्तु आजु उहइ अइसी होइ गइ अहइ जइसी कउनो रौंड़ होत ह। उ समइ रहा जब देसन क बीच उ एक तु राजकुमारी स देखात रहे। किन्तु आजु उहइ नगरी दास बनाइ दिन्ह ग अहइ।

2 श्रुति में उ बुरी तरह रोवत ह अउर ओकर आँसू गालन पइ टिके भए अहाइँ। किन्तु ओकर कउनो भी प्रेमी ओका दिलासा नाहीं देत ह। ओकर सबहि मीतन ओका दागा दिहस ह। ओकर मीत ओकर दुस्मन बन गएन।

3 बहोत कस्ट सहइ क पाछे यहूदा बैँधुआ बन गइ। यहूदा दूसर देसन क बीच रहत ह, किन्तु उ आराम नहीं पाएस ह। जउन लोग ओकरे पाछे पड़ा रहेन, उ पचे ओका धइ लिहल। उ पचे ओका सँकरी घाटियन क बीच में पकड़ लिहल।

4 सिथ्योन क राहन बहोत दुःख स भरी अहइँ। उ पचे बहोत दुःखी अहउँ काहेकि अब उत्सव क दिनन क बरे कउनो भी मनई सिथ्योन पइ नाहीं जात ह। सिथ्योन क सारे दुआर नस्ट कइ दीन्ह गएन ह। सिथ्योन क सबइ याजक कराहत हीं। सिथ्योन क चारिहूँ कइँती क गाँव खाली अहइँ। सबहि लोगन क बंदी बना लीन्ह गएन ह। सिथ्योन गहिर दुःख में अहइ।

5 यरूसलेम क दुस्मन विजयी अहइँ। ओकर दुस्मन सफल होइ गवा अहइँ, काहेकि यहोवा, ओका ओकर बहोत सारी पापन बरे दण्ड दिहस। दुस्मन ओकर सन्तान क बंदी बना लीन्ह ह।

6 सिथ्योन क बिटिया क खुबसूरती जात अहइ। ओकर सबइ राजकन्या हरिनी सी भइन जेनके लगे चरह क चरागाह नाहीं होत। उ पचे बेसहारा होइके ओहेसा पराइ गएन जउन ओनकर पाछा किहे रहेन।

7 यरूसलेम बीती बात सोचा करत ह, ओन दिनन क बातन जब ओह पइ प्रहार भावा रहा अउर उ बेघर-बार भइ रहो। ओका बीते दिनन क सुख याद आवत रही। उ पचे पुराने दिनन में जउन नीक चिजियन ओकरे लगे रहिन, ओका याद आवत रहिन। उ अइसे उ समइ क सुमिरत ह जब ओकर लोग दुस्मनन क जरिये बंदी कीन्ह गएन। उ अइसे उ समइ क याद करत ह जब ओका सहारा देइ क कउनो भी मनई नाहीं रहा। जब दुस्मन ओका लखत रहेन, उ पचे ओकर हँसी उड़ावत रहेन। उ पचे ओकर हँसी उड़ावत रहेन काहेकि उ उजर चुकी रही।

8 यरूसलेम भयंकर पाप किहे रहा। आपन पाप क कारण ओका तबाह कीन्ह गएन ह। ओन पइ लोग आपन मुँड़ हिलाइके मजाक उड़ावत रहेन काहेकि उ पचे ओकर नंगापन क लख लिहस रहेन। यरूसलेम कराहत ह अउर आपन मुँहना लाज स फेरि लेत ह।

9 यरूसलेम क वस्त्र गन्दा रहेन। उ नाहीं सोचे रहा कि ओकरे संग का कछू घटी। ओकर पतन अजूबा रहा, ओकरे लगे कउनो नाहीं रहा जउन ओका सान्ति देत। उ कहा करत ह “हे यहोवा, लखा मई केतना दुःखी अहउँ। लखा मोर दुस्मन कइसा सोचत अहइ कि उ केतना महान अहइ।”

10 दुस्मन हाथ बढ़ाएस अउर ओकर सब उत्तम वस्तु लूट लिहस। वास्तव में, उ पराये देस क अपने पवित्र ठउरे में घुसत भए लखेस। हे यहोवा, इ हुकुम तू ही दिहे रहया कि उ सबइ लोग तोहरी सभा में प्रवेश नाहीं करिहीं।

11 यरूसलेम क सबहि लोग कराहत अहइँ, ओकर सबहि लोग खइया क खोज में अहइँ। उ सबइ खइया जुटावइ क आपन कीमती चिजियन बेचत अहइँ। उ पचे अइसा करत हीं ताकि ओनकर जिन्नगी बनी रहइ। यरूसलेम कहत ह, “लखा यहोवा, तू मोका लखा। लखा, लोग मोका कइसे धिना करत हीं।

12 मारग स होत भए जब तू सबहि लोग मोरे लगे स गुजरत अहा तउ अइसा लगत ह जइसे धियान नाहीं देत अहा। किन्तु मोह पइ निगाह डावा अउर जरा लखा, का कउनो अइसी पीरा अहइ जइसी पीरा मोका अहइ? का अइसा कउनो दुःख अहइ जइसा दुःख मोह पइ परा अहइ? का अइसा कउनो कस्ट अहइ जइसा कस्ट क दण्ड यहोवा आपन भयंकर क्रोध क दिन पइ मोका दिहस ह।

13 यहोवा ऊपर स आगी क पठएस ह अउर उ आगी मोरी हाइन क छेद दिहस। उ मोरे गोइन क बरे एक फंदा फेंकेस अउर उ मोका पाछे ढकेल इदहस ह। उ मोका वीरान कइ डाएस ह अउर मई बीमार रहत हउँ।

14 मोर पाप मोह पइ जुए क नाई कसा गएन। यहोवा क हाथन क जरिये मोर पाप मोह पइ कसे गएन। यहोवा क जुआ मोरे कँधन पइ अहइ। यहोवा मोका दुर्बल बनाइ दिहस ह। यहोवा मोका ओन लोगन क सौंपेस जउन ओतना जियादा सक्तीसाली अहइ कि मई ओकरे संग लराइ नाहीं कइ सकत।

15 मोर सबहि वीर जोधा क नगर क भीतर ठहिरइ क रहेन काहेकि यहोवा ओनका मदद नाहीं किहस किन्तु नकार दिहस। यहोवा मोरे विरोध में फुन एक भीड़ पठएस, उ मोर युवा फउजी क मरवावइ ओन लोगन क लिआए रहा।

यहोवा यरूसलेम क नोकरानियन क वइसे ही कुचर दिहस जइसे लोग अंगूर कोल्हू में कुचरत ह।

16एन सबहिं बातन क लइके मई चिल्लाएउँ। मोर नैन जल में बूड़ि गएन। मोरे लगे कउनो नाहीं मोका चैन देइ। मोरे लगे कउनो नाहीं जउन मोका तनिक सान्ति देइ। मोर संतानन अइसी बनिहीं जइसे उजाड़ होत ह। उ पचे अइसे भवा कि दुस्मन जीत गवा रहा।”

17सिस्थोन मदद बरे आपन हाथ पसारे अहइ। कउनो अइसा मनई नाहीं रहा जउन ओका ढाढ़स देत। यहोवा याकूब क दुस्मनन क ओका घेर लेइ क आग्या दिहे रहा। यहोवा यरूसलेम असुद्ध मेहरारु क नाई होइ गइ रहीं।

18यरूसलेम कहा करत ह, “मई यहोवा क खिलाफ बिद्रोह किहस हउँ यह बरे उ जउन बात मोहे बरे करत ह उ उत्तिम बाटइ। तउ, हे सबहिं लोगो, सुना। तू मोर कस्ट लखा। मोर जवान मेहरारू अउर मनसेधू बन्दी बनाइ लइ गवा अहइँ।

19मई आपन पिरेमियन क गोहराएउँ। किन्तु उ पचे मोका धोका दिहस। नगर क याजक अउर बुजुर्ग मर गएन काहेकि उ पचे खइया खोजेस किन्तु कछु नाहीं पाएन।

20हे यहोवा, मोका लखा। मई दुःखे में पड़ी अहउँ। मोर अन्तरंग बचैने अहइ। मोर हिरदइ दुःखे में अहइ काहेकि मई बिद्रोह किहा रहिउँ। गलियन में मोरे गदेलन क तरवार काट डाए अहइ। घरन क भितरे मउत क बास रहा।

21मोर सुना, काहेकि मई कराहत हउँ। मोरे लगे कउनो नाहीं अहइ जउन मोक ढाढ़स देइ, मोर सब दुस्मनन मोरे दुःखन क बात सुनि लिहेन ह। उ पचे बहोत खुस अहइँ काहेकि तू मोरे संग अइसा सलूक किहस। अब उ दिन क लइ आवा जेकर तू घोसणा किहे रहया। उ दिन तू मोरे दुस्मनन क वइसा ही बनाइ दया जइसी मई अब ही अहउँ।

22मोरे दुस्मनन क बुरा करम क आपन समन्वा आवइ दया। फिन ओनके संग तू वइसा ही करब्या जइसा मोरे अपराध क बदले में तू मोरे संग किहा। अइसा करा काहेकि बार बार कराहत रहेउँ। अइसा करा काहेकि मोर हिरदइ निरास अहइ।”

### यहोवा क जरिये यरूसलेम क बिनास

2 लखा यहोव सिस्थोन क बिटिया क कइसे बादर में ढाँपि दिहस ह। उ इस्राएल क महिमा स्वर्ग स धरती पइ लोकाइ दिहेस ह। यहोवा आपन किरोध क दिन में आपन धरती पइ निवास स्थान बरे कउनो परवाह नाहीं किहसे।

2यहोवा याकूब क चिरागाह क बिना दया क लील लिहस। उ आपन प्रिय यहूदा क सबहिं गढ़ियन क भरिके किरोध में मेटेस। यहोवा यहूदा क राज क धरती पइ पटक दिहस अउर ओकरे नेता लोगन क बर्बाद कइ दिहस।

3यहोवा किरोध में भरिके इस्राएल क सारी सक्ती उखाड़ फेंकेस। उ ओका ओकर दुस्मन स अउर सुरच्छा नाहीं किहसे। उ याकूब में धधकत भइ आगी स भइकी। उ एक अइसी आगी रहौ जउन आस-पास क सब कछू चट कइ जात ह।

4यहोवा सत्रु क नाई आपन धनुस खींचे रहा। ओकरे दाहिन हाथे में ओकरे तरवारे क मूठा रहा। उ आपन दुस्मन पइ वार करइ बरे तैयार रहा। उ यहूदा क सबहिं आकर्सक लोगन क मारि डाएस। यहोवा आपन किरोध क जंगल क आगी क नाई सिस्थोन क खेमन पइ बरसाएस।

5यहोवा दुस्मन होइ गवा रहा अउर उ इस्राएल क लील लिहस। ओकर सबहिं महलन क उ लील लिहस ओकर सबहिं गढ़ियन क लील लिहे रहा। उ आपन प्रिय यहूदा बरे बहोत जियादा रुलाएस अउर बहोत विलाप कराएस।

6यहोवा आपन ही मन्दिर नस्ट किहे रहा जइसे उ कउनो उपवन होइ, उ उ ठाँव क नस्ट किहसे जहाँ लोग ओकर उपासना करइ बरे जमा होत रहेन। यहोवा लोगन क अइसा बनाइ दिहस कि उ पचे सिस्थोन में खास मिलन अउर आराम क खास दिनन क बिसरि जाइँ। यहोवा याजक अउ राजा क नकार दिहस। उ बड़े किरोध में भरिके ओनका नकारेस।

7यहोवा आपन ही वेदी क नकार दिहस अउर उ आपन उपासना क पवितर ठउरे क नकार दिहे रहा। यरूसलेम क महलन क देवारन क उ दुस्मन क सौपि दिहस। यहोवा क मन्दिर में दुस्मन सोर करत रहा। उ पचे अइसे सोर करत रहेन जइसे कउनो छूट्टी क दिन होइ।

8उ सिस्थोन क बिटिया क देवार नस्ट करब सोचेस ह। उ कउनो नापइ क डोरी स ओह पइ निसान डाएस ह। उ खुद क इका बिनास करइ स नाहीं रोकस। उ दुःख में भरिके फसीलन अउर देवार क रोवाइ दिहस।

9यरूसलेम क दरवाजन टुटिके धरती पइ बइठ गएन। फाटक क सलाखन क तोड़िके ओका तहस-नहस कइ दिहस। सिस्थोन क राजा अउर नेता लोगन दुसर देसन में बिखेर दीन्ह गएन। ओनके बरे आजु कउनो धार्मिक सिच्छा ही नाहीं रही। नबी भी यहोवा स कउनो दिव्य दर्सन नहीं पउतेन।

10सिस्थोन क बुजुर्ग अब धरती पइ बइठत हीं। उ पचे धरती पइ बइठत हीं अउर चुप रहत हीं। आपन माथन पइ फूल मलत हीं अउर सोक वस्त्र पहिरत हीं। यरूसलेम क जुवतियन दुःख में आपन माथा धरती पइ नवावत हीं।

11जब मई रोवत हउँ तउ मोर नैन में र्द होत ह। मोर अंतरंग वियाकुल अहइ। मोरे लोगन क बिनास क कारण मोर मन क अइसा लागत ह जइसे उ बाहर निकरिके धरती पइ गिरा होइ। गदेलन अउर दूध पइ वाले बच्चे गलियन में बेहोस पड़ा अहइँ।

12उ पचे बिलाखत भए आपन महतरियन स पुछत हीं, “कहाँ बाटइ महतारी, कछू क खइया अउर पिअइ क?” उ पचे इ सवाल अइसे पूछत हीं जइसे जख्मी सिपाही सहर क गलियन में गिरत प्राणन क तजत, उ पचे इ सवाल पूछत हीं। उ पचे आपन महतरियन क गोदी में लोटत भए प्राणन क तजत हीं।

13हे यरूसलेम क बिटिया, मई केहसे तोहार तुलना करउँ? तोहका केकरे समान कहउँ? हे सिस्थोन क कुवाँरी कन्या, तोहका केहसे तुलना करउँ? तोहका कइसे ढाढ़स

बँधावउँ? तोहार जखम सगरे जइसा विसाल अहइ। अइसा कउनो भी नाहीं जउन तोहार उपचार करइ।

14तोहार नबियन तोहरे बरे दिव्ब दर्सन लिहे रहन। किन्तु उ पचे सबहिं बियर्थ अउर लबार सिद्ध भएन। उ पचन्क तोहका बिनास स दूर रखइ बरे, तोहरे पापन क खिलाफ उपदेस दिन्ह चाही रहन। किन्तु उ पचे अइसा नाहीं किहन। उ पचे तोहका झूटे चिजियन क सिच्छा दिहन जउन कि तोहका भटकइ दिहस।

15बटोही राह स गुजरत भए स्तब्ध होइके तोह पइ ताली बजावत हीं। यरूसलेम क बिदिया पइ उ पचे सीटियन बजावत अउर माथा नयावत हीं। उ सबइ लोग पुछत हीं, “का इहइ उ नगरी अहइ जेका लोग कहा करत रहन, ‘एक संपूर्ण सुन्नर नगर’ तथा ‘समुचइ संसार क आनन्द?’”

16तोहार सबहिं दुस्मन तोह पइ आपन मुँह खोलत हीं। तोह पइ सीटियन बजावत हीं अउर तोह पइ दाँत पसित हीं। उ पचे कहा करत हीं, “हम ओनका लील लीन्ह। फुरइ इहइ उ दिन अहइ जेकर हमका प्रतीच्छा रही। अउर अब हम पचे ऐँका घटत भए लाखि लीन्ह।”

17यहोवा वइसा ही किहस जइसी ओकर योजना रही। उ वइसा ही किहस जइसा उ करइ बरे कहे रहा। बहोत दिनन पहिले जइसा उ आदेस दिहे रहा, वइसा ही कइ दिहस। उ बर्बाद किहस, ओहका दाया तलक नाहीं आइ। उ तोहरे दुस्मनन क खुस किहस कि तोहारे संग अइसा घटा। उ तोहारे दुस्मनन क ताकत बढ़ाइ दिहस।

18ओनका दिल यहोवा क पुकारेस। सिन्थोन क देवार आँसुअन क नदी क नाई बहइ दया। दिन अउर रात आपन आँसुअन क गिरइ दया। तू ओनका जिन रोका।

19जाग उठा। राति में विलाप करा। राति क हर पहर क सुर में विलाप करा। आँसुअन में आपन मन बाहेर निकार दया जइसा उ पानी होइ। आपन मन यहोवा क समन्वा निकार राख। यहोवा क पराथना में आपन हाथ ऊपर उठावा। ओहसे आपन संतानन क जीवन माँगा। ओहसे तू ओन संतानन क जीवन माँग ल्या जउन भूख स हर कुचे गली में बेहोस होइके गिर जात ह।

20हे यहोवा, मोह पइ निगाह करा। लखा कउन अहइ उ जेकर संग तू अइसा किहा। तू मोहका इ सवाल पूछइ दया: का महतारी क ओन गदेलन क खाइ जा नीक अहइ जेनका उ जनत ह? का महतारी क ओन गदेलन क खाइ जा नीक अहइ जेनका उ पोसत रही ह? का यहोवा क मन्दिर में याजक अउ नबियन क प्राणन क लीन्ह जा नीक अहइ?

21लरिकन अउ बुजुर्गिन नगर क गलियन में धरती पइ पड़ा रहईं। मोर जवान मेहररुअन अउर जवान मनसेधू तरवारे क धार उतारे गए रहन।

हे यहोवा, तू आपन किरोध क दिन पइ ओनकर बध किहा ह। तू ओनका बगैर कउनो करुणा क मारा ह।

22तू मोह पइ हर एक जगह स दुःख व मसीबत अइसे बोलाया जइसे इ पर्व क दिन होइ। ओह दिन जब यहोवा किरोध किहस अइसा कउनो मनई नाहीं रहा जउन बचिके भाग पाया होइ। जेनका मई बढ़ाए रहेउँ अउर मई पालेउँ, पोसेउँ ओनका मोर दुस्मनन मारि डारन ह।

### एक मनई क जरिये आपन सबइ यातना पइ विचार

3 मई एक अइसा मनई हउँ जउन बहोतेरी यातना भोगी हउँ, यहोवा क किरोध क तले मई बहोतेरी दण्ड यातना भोगी हउँ।

2यहोवा मोका लइके चला अउर उ मोका अँधियारा क भीतर लावा न कि प्रकासे में।

3यहोवा आपन हाथ मोरे विरोध में कइ दिहस। अइसा उ बारम्बार सारे दिन किहस।

4उ मोर आस, मोर चाम नस्त कइ दिहस। उ मोर हाइन क तोड़ दिहस।

5यहोवा मोरे विरोध में, कडुआहट अउ आपदा फइलाएस ह। उ मोरे चारिहुँ कइँती कडुआहट अउ बिपत्ति फइलाइ दिहस।

6उ मोका अधियारा में बइठाइ दिहे रहा। उ मोका उ उ मनई सा बनाइ दिहे रहा जउन कउनो बहोत दिनन पहिले मरि चुका होइ।

7यहोवा मोका भितरे बंद किहेस, एहसे मई बाहेर आइ न सकेउँ। उ मोह पइ भारी जंजीरन घेर रहा।

8हिआँ तलक कि जब मई चिल्लाइके दोहाइ देत हउँ, यहोवा मोर विनती क नाहीं अनकत ह।

9उ पथरे स मोरी राह क मुँद दिहस ह। उ मोर राह क टेढ़ा कइ दिहेस ह।

10यहोवा उ भालू सा भवा जउन मोह पइ आक्रमण करइ क तत्पर अहइ। उ उ सिँहसा भवा ह जउन कउनो ओटे में छिपा भवा अहइ।

11जहोवा मोका मोरी राहे स हटाइ दिहस। उ मोर धजियन उड़ाइ दिहस। उ मोका बर्बाद कइ दिहस ह।

12उ आपन धनुस तैयार किहस। उ मोका आपन बाणन क निसाना बनाइ दिहे रहा।

13मोरे पेट में बाण मार दिहस। मोह पइ आपन बाणन स प्रहार किहे रहा।

14मई आपन लोगन क बीच हँसी क यात्र बन गएँ। उ पचे दिन भइ मोर गीत गाइ-गाइके मोर मजाक बनावत हीं।

15यहोवा मोका करवाहट स भर दिहेस ह। उ मोका जहर पिलवाएस ह।

16उ मोर दाँत पाथरे क भुईया में गडाइ दिहेस। उ मोका माटी में मिलाइ दिहस।

17मई अब अउर सान्ति योग्य नाहीं अहउँ। अच्छी भली बातन क मई बिसरि गवा रहेउँ।

18खुद अपने आप स मई कहइ लागे रहेउँ, “मोका तउ बस अब अउर आस नाहीं अहइ कि यहोवा कबहुँ मोका सहारा देइ।”

19मई आपन दुखिया पन क, मोर घर नहीं अहइ एका कड़वे जहर क,

20अउर मोर सारी यातना क याद कइ क मई बहोत ही दुःखी हउँ।

21किन्तु उहइ समइ जब मई सोचत हउँ, तउ मोका आसा होइ लागत ह। मई अइसा सोचा करत हउँ।

22यहोवा क पिरेम अउ करुणा क अंत कबहुँ नाहीं होत। यहोवा क सबइ कृपा कबहुँ खतम नाहीं होत।



23हर भिन्सोर उ सबइ नवा होइ जात हीं। हे यहोवा, तोर सच्चाई महान अहइ।

24मई आपन स कहा करत हउँ, “यहोवा मोरे हीसां मँ अहइ। इहइ कारण स मई आसा रखबा।”

25यहोवा ओनके बरे उत्तिम अहइ जउन ओकर बाट जोहत हीं। यहोवा ओनके बरे उत्तिम अहइ जउन ओकर खोज मँ रहा करत हीं।

26इ उत्तिम अहइ कि कउनो मनई चुपचाप यहोवा क प्रतीच्छा करइ कि उ ओकर रच्छा करी।

27इ उत्तिम अहइ कि कउनो मनई यहोवा क जुए क धारण करइ, उ समइ स ही जब उ युवक होइ।

28मनई क चाही कि उ अकेला चुप बइठे ही रहइ जब यहोवा आपन जुए क ओह पइ धरत ह।

29उ मनई क चाही कि यहोवा क समन्वा उ दण्डवत प्रणाम करइ। होइ सकत ह कि कउनो आस बची होइ।

30उ मनई क चाही कि उ आपन गाल कइ देइ, उ मनई क समन्वा जउन ओह पइ प्रहार करत होइ। उ मनई क चाही कि उ अपमान झेलइ क तत्पर रहइ।

31उ मनई क चाही उ याद राखइ कि यहोवा कउनो क भी सदा-सदा बरे नाही बिसरावत।

32यहोवा दण्ड दण्ड देत भए भी आपन कृपा बनाए राखत ह। उ आपन परिम अउ दया क कारण आपन कृपा राखत ह।

33यहोवा कबहुँ भी नाही चाहत कि लोगन क दण्ड देइ। ओका नाही भावत कि लोगन क दुःखी करइ।

34यहोवा क इ सबइ बातन नाही भावत हीं: ओका नाही भावत कि कउनो मनई आपन गोइन क तले धरती क सबहि बंदियन क कुचरी डावइ।

35ओका नाही भावत ह कि कउनो मनई कउनो मनई क छलइ। कछु लोग ओकरे मुकदमे मँ परम प्रधान परमेस्सर क समन्वा ही अइसा किया करत हीं।

36ओका नाही भावत कि कउनो मनई अदालत मँ कउनो स छल भरइ। यहोवा क एनमाँ स कउनो भी बात नाही भावत ह।

37जब तलक खुद यहोवा ही कउनो बात क होइ क आग्या नाही देत, तब तलक अइसा कउनो भी मनई नाही अहइ कि कउनो बात कहइ अउर ओका पूरा करवाइ लेइ।

38बुरी-भली बातन सबहि सर्वोच्च परमेस्सर क मुँहे स ही आवत हीं।

39कउनो जिअत मनई सिकाइत कइ नाही सकत जब यहोवा उहइ क पापन क दण्ड ओका देत ह।

40आवा, हम आपन करमन क परखई अउर लखई, फुन यहोवा क सरन मँ लौट आवई।

41आवा, अपना परारथाना करइ बरे सरग क परमेस्सर क समन्वा हम आपना हाथ उठाइ।

42आवा, हम ओहसे कही, “हम पाप कीन्ह ह अउर हम जिद्दी बना रही अउर एह बरे तू छमा नाही किहा।

43तू किरोध स अपने क ढॉप लिहा, हमार पीछा तू करत रहा ह, तू हम पचन्क बेरहमी स मार दिहा।

44तू आपन क बदरे स ढॉप लिहा। तू अइसा एह बरे किहे रहया कि कउनो भी विनती तोह तलक पहुँचे ही नाही।

45तू हम पचन्क दूसर देसन क तुलना मँ कुड़ा करकट क नाई बना दिहेस।

46हम पचन्क सबहि दुस्मन हम पचन स घमण्ड मँ बोलत ही।

47हम डेरान भए अही, हम गर्त मँ गिर गवा ही। हम बुरी तरह नोस्कान पावा ह। हम पचे टूटि चुका ही।”

48मोर नैन स आसूँअन क नदी बही ही। मई विलाप करत हउँ काहेकि मोर लोग तबाह होइ गवा ह।

49मोर नैन बिना रुके बहत रहिहीं। मई हमेसा विलाप करत रहब।

50हे यहोवा, मई तब तलक विलाप करत रहब जब तलक तू दिस्टि न करा अउ हमका लखा। मई तब तलक विलाप हो करत रहब जब तलक तू सरग स हम पइ दिस्टि न करा।

51जब मई लखा करत हउँ जउन कछू मोर नगरी क जुवतियन क संग घटा तब मोर नैन मोका दुखी करत हीं।

52जउन लोग बियर्थ मँ ही मोर दुस्मन बना हीं, उ पचे घूमत हीं मोरे सिकारे क फिराक मँ, माना मई कउनो चिडिया हउँ।

53जिअत जी उ पचे मोका गढ़ा मँ लोकाएन जउर मोह पइ पाथर लुढ़काए रहेन।

54मोरे मूँडे पइ पानी गुजर गवा। मई आपन आप मँ कहाँ, “मोर नास भवा।”

55हे यहोवा, मई तोहार नाउँ गोहराएउँ। उ गइहा क तल स मई तोहार नाउँ गोहराएउँ।

56तू मोर अवाज क सुन्या। तू कान नाही मूँद लिहा। तू बचावइ स अउर मोर रच्छा करइ स नकार्या नाही।

57जब मई तोहार दोहाइ दिहेउँ, उहइ दिन तू मोरे लगे आइ गवा रहया। तू मोहसे कहे रहया, “भयभीत जिन हवा।”

58हे यहोवा, मोरे अभियोग मँ तू मोर पच्छ लिहा। मोरे बरे तू मोर प्राण वापस लइ आया।

59हे यहोवा, तु मोर विपत्तियन लख्या ह, अब मोरे बरे तू मोर नियाव करा

60तू खुद लख्या ह कि दुस्मनन मोरे संग केतन अनियाव किहन। तू खुद लख्या ह ओन समूचइ सड्यंत्रन क जउन उ पचे मोहसे बदला लेइ क मोरे खिलाफ रचे रहेन।

61हे यहोवा, तु सुन्या ह कि मोर अपमान कइसे करत हीं तू सुन्या ह ओन सड्यंत्रन क जउन उ पचे मोरे खिलाफ रचाएन।

62मोरे दुस्मनन क बचन अउ बिचार सारे दिन ही मोरे खिलाफ रहेन।

63लखा यहोवा, चाहे उ पचे बइठे होई, चाहे उ पचे खड़ा होई, कइसे उ पचे हँसी उड़ावत हीं।

64हे यहोवा, ओनके संग वइसा ही करा जइसा ओनके संग करइ चाही। ओनके करमन क फल ओनका दइ द्या।

65ओनकर मन हठीला कइ द्या। फिन आपन अभिसाप ओन पइ डाइ द्या।

66क्रोध में भरिके तू ओनकर पाछा करा। ओनका बर्बाद कइ द्या। हे यहोवा, तू ओनका इ धरती स खतम कइ द्या।

**यरूसलेम पइ हमले क आतंक**

4 लखा, कउने तरह सोना चमक रहित होइ गवा। लखा, सारा सोना कइसे खोट होइ गवा। चारिहुँ कइँती हीरा-जवाहरात बिखड़ा पड़ा अहई। हर गली क सिर पइ इ सबइ रतन पसरा अहई।

2सिय्योन क लोग अइसे ही मुल्यवान रहेन, जइसे ओनका वजन सोना क बराबर रहा। किन्तु अब ओनके संग दुस्मन अइसे बर्ताव करत हीं जइसे उ पचे कोमहार क बनाए माटी क पात्र होई।

3हिआँ तलक कि सियार भी आपन बच्चन क थन देत ह, उ आपन बच्चन क दूध पिअइ देत ह। किन्तु मोर लोग निर्दय होइ ग अहई। उ पचे अइसे होइ गएन जइसे मरुभूमि में निवासी-सुतुर्मुग।

4पिआस क मारे आबोध गदेलन क जीभ तालु स चिपकति अहइ। इ सबइ नान्ह लरिकन रोटी क तरिसत हीं। किन्तु कउनो भी ओनका कछू भी खाई क बरे देत नाहीं।

5अइसे लोग जउन सुआदिस्ट भोजन खावा करत रहेन, आजु भूख स गलियन में मरत अहई। अइसे लोग जउन उत्तिम ओढ़ना पहिरत भए पले बढ़े रहेन, अब कुड़न क देस पइ बिनत फिरत अहई।

6मोरे लोगन क पाप सदोम अउ अमोरा क पापन स बड़ा रहा। सदोम अउ अमोरा क एकाएक नस्ट कीन्ह गवा। ओनके बिनासे में कउनो भी मानव क हाथ नाहीं रहा।

7यहूदा क लोग परमेस्सर क समर्पित रहेन, उ पचे बरफ स उज्जर रहेन, दूधे स धोवा रहेन। ओनकर तन मूँगा स जियादा लात रहिन। ओनकर डाढ़ी नीलम स करिया रहिन।

8किन्तु ओनकर मुहँ अब धुआँ स करिआ होइ गवा अहई। हिआँ तलक कि गलियन में ओनका कउनो भी नाहीं पहिचान सकत ह। ओनकर ठठरी पइ अब झुरियन पड़ि गइ अहई। ओनकर चाम अब लकड़ी जइसा होइ गवा अहइ।

9अइसे लोग जेनका तरवारे क घाट उतावा गवा ओनसे जियादा भागगवान रहेन जउन लोग भूख-मरी क मउत मरेन। खइया क कमी स मरिइ स खून क कमी स मरि जान बहतर अहइ

10ओन दिन अइसी मेहररुअन भी जउन बहोत अच्छी हुवा करत रहिन, आपन ही बच्चन क माँस पकाए रहिन। उ सबइ गदेलन आपन महतारी क आहार बनेन। अइसा तब भवत रहा जब मोरे प्रिय लोगन क बिनास भवा रहा।

11यहोवा आपन सब क्रोध क प्रयोग किहेस; आपन समूचा क्रोध उ उड़े दिहस। सिय्योन में जउन आग भड़काएस, सिय्योन क नेवन क खाले तलक बार दिहे रहेन।

12जउन कछू घटा रहा, धरती क कउनो भी राजा क ओकर बिस्सास नाहीं रहा। जउन कछू घटा रहा, धरती क कउनो भी लोगन क ओकर बिस्सास नाहीं रहा। यरूसलेम क दुआसन स होइके कउनो भी दुस्मन भीतर आइ सकत ह, एकर कउनो क भी बिस्सास नाहीं रहा।

13किन्तु अइसा ही भवा, काहेकि यरूसलेम क नबी लोग पाप किहे रहेन। अइसा भवा काहेकि यरूसलेम क याजक बुरे काम किया करत रहेन। यरूसलेम क नगर में उ पचे नीक लोगन क खून बहावा करत रहेन।

14याजक अउ नबी गलियन में आँधि लोगन जइसे घुमत रहेन। उ पचे रकत स रिती क अनुसार गंदे होइ ग रहेन। यह बरे कउनो भी ओनकर ओढ़ना तलक नाहीं छुअत रहा।

15लोग ओन लोगन पइ चिचिआइके कहत रहेन, “दूर हटा! तू पचे अपवित्तर अहा, दूर हटा, दूर हटा! हमका जिन छुआ!” उ सबइ लोग बिना घर-बार क भटकत रहेन। दूसर देसन क लोग कहा करत रहेन, “हम नाहीं चाहि कि उ पचे हमरे लगे रहेन।”

16उ सबइ लोग खुद यहोवा क जरिये ही बिखेर दीन्ह गए रहेन। उ ओनकी कइँती फुन कबहुँ नाहीं लखेन। उ याजकन क आदर नाहीं दिहन। यहूदा क मुखिया लोगन क संग उ दोस्ती स नाहीं रहा।

17मदद पावइ क बाट जोहत-जोहत आपन आँखिन काम करब बंद किहन, अउर अब हमार आँखिन थक गइन ह। किन्तु कउनो भी सहायता नाहीं आई। हम प्रतीच्छा करत रहे कि कउनो अइसी जाति आवइ तउ हमका बचाइ लेइ। हम आपन निगरानी बुर्जा स लखत रहि गए। किन्तु कउनो भी हमका बचाएस नाहीं।

18हर समइ दुस्मन हमरे पाछे पड़े रहेन हिआँ तलक कि हम बाहेर गली में भी निकर नाहीं पाए। हमार अंत निअरे आवा। हमार समय पुरा होइ चुका रहा। हमार अंत आइ गवा।

19हम लोगन क पाछा करइवालन क गति उकाब क गति स तेज रही। ओ लोग पहाड़न क भीतर हम पक्क पाछा किहना। उ पचे हमका धरइ क रेगिस्तान में लुका-छिपा रहेन।

20उ राजा जउन हमरी नाकन क भीतर हमार प्राण रहा, गडढा में फँसाइ लीन्ह गवा रहा, उ राजा अइसा मनई रहा जेका यहोवा खुद चुने रहा। राजा क बारे में हम कहे रहे, “ओकरी छत्र-छाया मैं हम जिअत रहब, ओकरी छाया मैं हम जातियन क बीच जिअत रहब।”

21एदोम क लोगो, खुस रहा अउर आनन्द में रहा। हे ऊज क निवासी लोगो, खुस रहा। किन्तु सदा याद रखा, तोहरे पास भी यहोवा क क्रोध क पियाला आइ। जब तू ओका पीब्या, धुत होइ जाब्या अउर खुद क नंगा कइ डउब्या।

22सिय्योन, तोहार दण्ड पुरा भावा। अब फुन स तू कबहुँ बंधन में नाहीं पड़बिउ। किन्तु हे एदोम क लोगो, यहोवा तोहरे पापन क दण्ड देइ। तोहरे पापन क उ उघाइ देइ।

**यहोवा स विनती**

5 हे यहोवा, हमरे संग जउन घटा ह ओका याद राखा। हे यहोवा, हमरे तिरस्कार क लखा।

2हमार धरती परायन क हाथन में दइ दीन्ह गइ। हमार घर परदेसियन क हाथन में दीन्ह गएन।

3हम अनाथ होइ गएन। हमार कउनो पिता नाहीं। हमार महतरियन विधवा स होइ गइन ह।

4पानी पिअइ तलक हमका मोल देब पड़त ह, ईधन क लकड़ी तलक बेसहब पड़त ह।

5आपन काँधन पइ हमका जुए क बोझा उठाउब पड़त ह। हम थकिके चूर होत ह किन्तु अराम तनिकउ हमका नाहीं मिलत।

6हम पचन्क मिस्त्र अउर अस्सुर स खइया लेइ होब्या काहेकि हम पचन्क लगे खइया नाहीं अहइ।

7हमार पुरखन तोहरे खिलाफ में पाप किहे रहेन। आजु उ पचे मर चुका अहइँ। किन्तु ओनका बदले में हम पचन विपत्तयन भोगत अहइँ।

8हमार दास हो सुआमी बना अहइँ। हिआँ कउनो अइसा मनई नाहीं जउन हमका ओनसे बचाइ लेइ। 9बस भोजन पावइ क हमका आपन जिन्गी दाँव पइ लगावइ पड़त ह। रेगिस्तान में अइसे लोगन क कारण, जेनके लगे तरवार अहइ हमका आपन जिन्गी दाँव पइ लगाउब पड़त ह।

10हमार खाल तन्दूर सी तपत अहइ, हमार खाल तपत रही उ भूख क कारण जउन हमका लगी ह।

11सिय्योन क मेहररुअन क संग कुकर्म कीन्ह गवा ह। यहुदा क नगरियन क कुँवरियन क संग कुकर्म कीन्ह गवा अहइँ। 12हमार राज कुमार फाँसी पइ चढ़ावा गएन, उ पचे हमरे अग्रजन क आदर नाहीं किहन।

13हमार दुस्मनन हमरे नउजवान मनसेधुअन स चक्की में आटा पिसवाएन। हमार नउजवान मनसेधुअन काठे क बोझ तरे ठोकर खाएन।

14हमार बुजुर्गन अब नगर क दुआरन पइ बइठा नाहीं करतेन। हमार युवक अब संगीत में हीसां नाहीं लेतेन।

15हमरे मने में अब कउनो खुसी नाहीं अहइ। हमार खुसी मरे भए लोगन क विलाप में बदल गवा अहइ।

16हमार महिमा अउर हमरार मान संमान खतम होइ गवा अहइ। हम पचन्क सज़ा दीन्ह गएन ह।

17एह बरे हमार मन रोगी भए हँ, एन ही बातन स हमार आँखिन मधिम भई हँ।

18सिय्योन क पहाड़ वीरान होइ गवा ह। सिय्योन क पहाड़े पइ अब सियार घूमत हीं।

19किन्तु हे यहोवा, तोहार राज तउ अमर अहइ। तोहार महिमा स पूर सिंहासन सदा-सदा बना रहत ह।

20हे यहोवा, तू हम पचन्क क सदा बरे काहे भूला देब्या? तू हम पचन्क क अकेल्ला लम्बे समइ बरे काहे तजि देब्या?

21हे यहोवा, हम लोगन क तू अपनी कइँती वापिस ल्या, अउर हम लोग लउटि आउब। हमार दिन फेर द्या जइसे उ पहिले रहेन।

22का तू हम लोगन क पूरी तरह नकार दिहा ह? तू हम लोगन स बहोत कोहान रहा ह।

# यिर्मयाह

1 यिर्मयाह क इ सबइ सँदेस अहइ। यिर्मयाह हिल्कय्याह नाउँ क मनई क पूत रहा। यिर्मयाह ओन याजकन क परिवार स रहा जउन अनातोत नगर मँ रहत रहेन। उ नगर उ पहुँटा मँ अहइ जउन बिन्यामीन परिवारे क रहा। 2यिर्मयाह यहोवा क वचन ओन दिनन प्राप्त कइ सुरू किहस जब आमोन नाउँ क राजा क पूत योसियाह यहूदा रास्ट्र क राजा रहा। यिर्मयाह योसियाह क राजकाल क तेरहवें बरिस मँ यहोवा क वचन प्राप्त करइ सुरू किहस। 3योसियाह क पूत अउर यहोयाकीम क राजकाल मँ यिर्मयाह यहोवा क वचन प्राप्त करत रहा। यहोवा क वचन, यहूदा क अगला राजा योसियाह क पूत क सिदकियाह क राजकाल क ग्यारह बरिस तलक, अउर सिदकियाह क राजकाल क ग्यारहवें बरिस क पाँचवें महीना मँ यरूसलेम मँ रहत रहे लोगन क देस-निकारा जाइ तलत प्राप्त होत रहा।

## परमेस्सर यिर्मयाह क अपने लगे बोलावत ह

4मई यिर्मयाह इ सँदेस यहोवा स प्राप्त कइ रहा:

5“तोहरी महतारी क गरभ मँ रखइ क पहिले मई तोहका जान लिहेउँ। तोहरे जनम लेइ क पहिले, मई तोहका बिसेस कारज बरे चुने रहेउँ। मई तोहका रास्ट्रन क नबी होइ क चुने रहेउँ।”

6तब मई अर्थात यिर्मयाह कहेउँ, “मुला सर्वसक्तीमान यहोवा, मई तउ बोलब भी नाहीं जानत। मई तउ अबहि बालक ही रहेउँ।”

7मुला यहोवा मोहसे कहेस, “जिन कहा, ‘मई बालक ही हउँ।’ तोहका हर ओन ठउरन पइ जाब अहइ जहाँ मई पठवउँ। तोहका उ सब कहब अहइ जेका मई कहइ क कहउँ।

8कउनो स जिन डेराअ। मई तोहरे संग अहउँ, अउर मई तोहार रच्छा करबा।” इ सँदेस यहोवा क अहइ।

9तब यहोवा आपन हाथ बढ़ाएस अउर मोरे मुँह क छुइ लिहस। यहोवा मोहसे कहेस, “यिर्मयाह, मई आपन सब्द तोहरे मुँह मँ देत अहइ।”

10आजु मई तोहका राजन अउ रास्ट्रन क अधिकारी, एनका उखाड़ा अउ उजाड़ फेंकइ बरे, एका नस्ट अउ उठाइ फेंकइ बरे, एका निर्माण करइ अउ रोपन बरे नियुक्त किहउँ।”

## दुइ अन्तर्दृश्य

11यहोवा क सँदेस मोका मिला। इ सँदेस यहोवा क रहा: “यिर्मयाह, तू का लखत अहा?” मई जवाब दिहेउँ, “मई बादाम क काठे क एक छड़ी लखत हउँ।”

12यहोवा मोहसे कहेस, “तू बहोत ठीक लख्या। काहेकि मई आपन बचन क होइ बरे ओहे पइ नज़र रखत अहउँ।” \*

13यहोवा क सँदेस मोका फुन मिला। इ सँदेस इ तरह रहा: “यिर्मयाह, तू का लखत अहा?”

मई जवाब दिहेउँ, “मई खउलत पानी क एक बर्तन लखत हउँ। इ बर्तन उत्तर कईती स टपकत अहइ।”

14यहोवा मोहसे कहेस, “उत्तर कईती स कछू भयानक चिजियन ओन लोगन बरे जउन इ देस मँ रहत ही आइ।

15बहोत ही जल्दी मई उत्तर क राजन क सबहि लोगन क बोलाउबा,” यहोवा कहत ह। “ओन राजन क राजा लोगन अइहीं। उ पचे यरूसलेम क दुआर क समन्वा आपन सिंहासन जमइहीं। उ पचे यरूसलेम क सबहि नगर देवारन पइ आक्रमन करिहीं। उ पचे यहूदा क एलाके क सबहि नगरन पइ आक्रमन करिहीं।

16अउर मई यहूदा क लोगन क जरिये कीन्ह गवा बुरे करम क बिरुद्ध आपन निर्णय क घोसना करबा। मोर लोग मोका छोड़एन। उ पचे दूसर देवतन क बलि चढ़ाएन जेका उ पचे आपन हाथन स बनाएस।

17यिर्मयाह, जहाँ तलक तोहार बात अहइ, उठा, तइयार होइ जा अउर लोगन स उ सब कछू कहा, जेका मई तोहका हुकुम देत हउँ। लोगन स जिन डेराअ। वरना तउ मई ओन लोगन क समन्व तोहका तबाह कइ देब। 18जहाँ तलक मोर बात अहइ, मई आजु ही तोहका एक दृढ़ नगर, एक लौह खम्भा, एक तु काँसा क देवार बनावइ जात हउँ। तू देस मँ हर एक क खिलाफ खड़ा होइ क योगग होब्या, यहूदा देस क राजा लोगन क खिलाफ, यहूदा क याजकन क खिलाफ अउर यहूदा देस क लोगन क खिलाफ भी।

19उ सबइ लोग तोहरे खिलाफ लड़िहीं, मुला उ पचे तोहका हरावइ क नाहीं करिहीं। काहेकि मई तोहरे संग हउँ, अउर मई तोहार रच्छा करबा।” इ सँदेस यहोवा क अहइ।

## यहूदा बिस्सास क जोगग नाहीं रहा

2 यहोवा क सँदेस यिर्मयाह क मिला। यहोवा क सँदेस इ रहा: 2“यिर्मयाह, जा अउर यरूसलेम क लोगन क सँदेस द्या। ओनसे कहा:

“जउने समय तू नवा रास्ट्र रह्या, तू मोर बिस्सास क योगग रह्या। तू मोर अनुसरण नई दुलहिन जइसा किहा। तू मोर अनुसरण रेगिस्तान मँ स होइके किहा, उ प्रदेश मँ

नज़र रखत अहउँ इ सब्दन क खेल अहइ। “साकेद” एक इब्रानी सब्द अहइ जउन कि बादाम क काठे बरे अहा। अउर “सकूद” क अरथ अहइ लखत अहउँ।

अनुसरण किहा जेका कबहुँ खेती क भूमि न बनावा गवा रहा।

3इस्त्राएल क लोग यहोवा बरे एक पवितर भेंट रहेन। उ पचे ओकर फसल क पहिला फल रहेन। कउनो भी व्यक्ति जउन ओनका खाइ क जतन किहे रहेन ओका कसूरवार घोसित कीन्ह ग रहेन। ओन पइ बुरी आपतियन अइहीं,” यहोवा कहत ह।

4याकूब क परिवार, यहोवा क सँदिसा सुना। इस्त्राएल क तू सबहि परिवार समूहों, सँदिसा सुना।

5जउन यहोवा कहत ह, उ इ अहइ: “तोहार पुरखन बरे मई का गलत किहेउँ कि तोहार पुरखन मोहसे दूर होइ गएन? तोहार पुरखन निरर्थक देव मूरतियन पूजेन। अउर उ पचे खुद निरर्थक होइ गएन।

6तोहार पुरखन इ नहीं कहेन, ‘यहोवा हमका मिस्त्र स निकारेस। यहोवा मरूभूमि में हमार अगुअईं किहेस। यहोवा हमका झुरान चट्टानी प्रदेश स लइके आवा, यहोवा हमका अँधियारा स पूर अउर भय से भरे देसन में राह देखाएस। कउनो भी लोग हुआँ नहीं रहतेन। कउनो भी लोग उ देस स जात्रा नहीं करतेन। मुला यहोवा उ प्रदेश में हमार अगुवाई किहेस। एह बरे उ यहोवा अब कहाँ अहइ?”

7यहोवा कहत ह, “मई तू पचन्क अनेक चिजियन स भरे उत्तिम देस में लाएउँ। मई इ किहेउँ जेहसे तू हुआँ उगे भए फल अउर पइदावार क खाइ सका। मुला तू पचे आया अउर मोरे देस क ‘गन्दा’ किहा। मई उ देस तू पचन्क दिहे रहेउँ, किन्तु तू पचे ओका बुरा ठउर बनाया।

8याजक लोग नहीं पूछेन, ‘यहोवा कहाँ अहइ?’ उ लोग जउन व्यवस्था क सिच्छा देत ह उहइ मोका नहीं जानत ह। इस्त्राएल क लोगन क प्रमुख मोरे खिलाफ चला गएन। नबी लोग लबार बाल देवता क नाउँ भविस्सवाणी किहन। उ पचे निरर्थक देव मूरतियन क पूजा किहन।”

9यहोवा कहत ह, “एह बरे मई तू पचन्क फुन दोखी करार देब, अउर तोहरे पचन्क पोतन क दोखी ठहराउब।

10समुदर पार किलियन क द्वीपन क जा अउर लखा कउनो क केदार प्रदेशन क पठवा अउर ओका धियान स लखइ द्या। धियान स लखा का कउनो अइसा काम किहेस:

11“का कउनो रास्ट्र क लोग कबहुँ आपन पुरान देवतन क नवा देवतन स बदलेन ह? नहीं। निःसंदेह ओनकर देवतन असल में देवतन अहइ ही नहीं। मुला मोर लोग आपन यसस्वी परमेस्सर क निरर्थक देव मूरतियन स बदलेन ह।

12आकास, जउन भवा ह ओहसे अपने हिरदइ क आघात पहोंचइ द्या। भय स काँप उठा।” इ सँदिसा यहोवा क रहा।

13मोर लोग दुइ पाप किहेन ह। उ पचे मोका तजि दिहन (मई ताजा पानी क सोता अहउँ।) अउर उ पचे आपन पानी क निजी हौद खनेन ह। (उ पचे दूसर देवतन क भक्त बनेन ह।) किन्तु ओनकर हउज टूटेन ह। ओन हउजन में पानी नहीं रुकी।

14का इस्त्राएल क लोग दास होइ गएन ह? का उ पचे

एक जन्मजात दास स होइ गएन ह? इस्त्राएल क लोग क सम्पत्ति दूसर लोग काहे लइ लिहेन?

15जवान सिंह (दुस्मन) इस्त्राएल रास्ट्र पइ दहाइत हीं, गुराँत हीं। सिंहन इस्त्राएल क लोगन क देस उजाइ दिहेन ह। इस्त्राएल क नगर बार दीन्ह गएन ह। ओनमों कउनो भी नहीं रहि गवा ह।

16नोप अउर तहपन्हेस नगर क लोग तू पचन्क मूँडे क सीर्स क कुचरि दिहेन ह।

17इ परेसानी तोहार पचन्क आपन दोख क कारण अहइ। तू पचे आपन यहोवा परमेस्सर स विमुख होइ गया, जबकि उ सही दिसा में तू पचन्क लइ जात रहा।

18एकरे बारे में सोचा: का तू मिस्त्र जाइ समइ में सहायता पाएहस? का तू पानी पिअइ बरे नील नदी पाएहस? नाही। क तू अस्सूर जाइ समइ में सहायता पाएस? का तू परात नदी क जल पिअइ बरे गएस? नाही।

19तू पचे बुरे करम किहा, अउर उ सबइ बुरी चिजियन तू पचन्क सिरिफ सजा देवइहीं। बिपदन तू पचन्क टूटि पड़िहीं अउर इ सबइ बिपदन तू पचन्क पाठ पढ़इहीं। इ किसय में सोचा; तब तू पचे इ समुझब्या कि आपन परमेस्सर स बिमुख होइ जाब केतना बुरा अहइ। मोहसे न डेराब बुरा अहइ।” इ सँदिसा मोर सुआमी सर्वसक्तीमान यहोवा क रहा।

20“तू बहोत पहिले आपन जुआ लोकाइ दिहे रह्या। तू उ रस्सियन तोड़ फेंक्या जेका मई तू पचन्क अपने लगे धरइ में काम में लिआवत रह्या। तू मोहसे कह्या, ‘मई आप क सेवा नहीं करब।’ तू रंडी क नाई हर एक ऊँची पहाड़ी पइ अउर हर एक हरियर बृच्छ क नीचे झुटे देवत क उपासना कइ के तू बेवफाइ किहा।

21मई तू पचन्क बिसेस अंगूरे क बेल क तरह रोपेउँ। तू सबहि नीक बिया क समान रह्या। तू उ अलग बेल में कइसे बदल्या जउन बुरा फल देत हीं।

22अगर तू आपन क सज्जी\* स भी धोवा, बहोत साबुन भी लगावा, तउ भी मई तोहरे दोख क दागे क लख सकत हउँ।” इ सदेस परमेस्सर यहोवा क रहा।

23“तू मोका कइसे कहि सकत ह, ‘मई अपराधी नहीं अहउँ। मई बाल क मूरतियन क पूजा नहीं किहेउँ?’ ओन कामन क बारे में सोचा जेनका तू घाटी में किहा। उ बारे में सोचा, तू का कइ डया ह। तू उ तेज ऊँटिन क नाई अहा जउन कि टेढ़ा-मेढ़ा रास्ता पइ तेज दउड़त ह।

24तू उ जंगली गदही क तरह अहा जउन रेगिस्तान में रहत ह अउर सहभोग क मौसम में जउन हवा क सूँधत ह (गन्ध लेत ह।) कउनो मनई ओका काम क उत्तेजना क समइ लउटाइके लिआइ नहीं सकत। सहभोग क समइ हर एक गद्धा जउन ओका चाहत ह, पाइ सकत ह। ओका खोज निकारब सहल अहइ।

25देवमूरतियन क पाछे दउड़ब बन्द करा। ओन दूसर देवतन बरे पियास रखाइ बंद करा। मुला तू कहत अहा, ‘इ बियर्थ अहइ। मई तजि नहीं सकत। मई ओन दूसर देवतन स पिरेम करत हउँ। मई ओनकर पूजा कइ चाहत हउँ।’

26“चोर लजात ह जब ओका लोग धड़ लेत हीं। उहड़ तरह इस्त्राएल क परिवार लजात ह। राजा अउर प्रमुख याजक अउ नबी लजान अहड़ै।

27उ पचे लोग काठे क टूकन स बात करत हीं, उ पचे कहत हीं, ‘तू मोर पिता अहा।’ उ सबड़ लोग चट्टान स बात करत हीं, उ पचे कहत हीं, ‘तू मोका जन्म दिहा ह।’ उ पचे सबहिं लोग लजाइ जइहीं। उ पचे लोग मोरी कइँती धियान नाहीं देतेन। उ पचे मोहसे पीठ फेरि लिहन ह। किन्तु जब ओन लोगन पड़ बिपद आवत ह तब उ पचे मोहसे कहत हीं, ‘आवा अउर हमका बचावा।’

28ओन देवमूरतियन क आवड़ अउर तोहका बचावड़ द्या। उ सबड़ देवमूरतियन कहाँ अहड़ै जेनका तू अपने बरे बनाया ह? हमका लखइ द्या, का उ सबड़ मूरतियन आवत हीं अउर तोहार रच्छा बिपति स करत हीं? यहूदा क लोगो, तू लोगो क लगे ओतनी मूरतियन अहड़ै जेतना नगर।

29तू पचे मोहसे बिबाद काहे करत अहा? तू सबहिं मोरे खिलाफ होइ गवा अहा।” इ सँदेसा यहोवा क रहा।

30“मइँ तोहरे गदेलन क दण्ड दिहेउँ, मुला एकर कउनो नतीजा नाहीं निकरा। तू पचे तब लउटिके नाहीं आया जब दण्डित कीन्ह गया। तू पचे ओन नबियन क तरवार क घाट उतारया जउन तोहरे पचन्क लगे आए रहेन। तू पचे खूखार सिंह क नाई रहया अउर तू पचे नबियन क मार डया।”

31इ पीढ़ी क लोगो, यहोवा क सँदेसा पड़ धियान द्या: “का मइँ इस्त्राएल क लोगन बरे रेगिस्तान जइसा बन गएउँ? का मइँ ओनका बरे अँधियर अउर खउफनाक देस जइसा बन गएउँ? मोर लोग कहत हीं, ‘हम आपन राह जाइ क अजाद अही, यहोवा, हम फुन तोहरे लगे नाहीं लउटबा।’ उ पचे ओन बातन क काहे कहत हीं?

32का कउनो नउजवान अउरत आपन गहना बिसरत ह? नाहीं। का कउनो दुलहिन आपन रूप-संगार क लिबास बरे आपन दुपटा बिसरि जात ह? नाहीं। मुला मोर लोग मोका अनगिनत दिनन बरे बिसरि गएन ह।

33तू फुरइ पिरेमियन (लबार देवतन) क पाछे पड़ब जानत अहा। तू ओन दूसर लोगन बरे जउन बुरा करम करत ह नमुना बन गवा ह।

34तोहार पचन्क हाथ खून स रंगा अहड़ै। इ गरीब अउ भोले लोगन क खून अहड़। तू पचे लोगनक मारया ह अउर उ पचे अइसे चोर भी नाहीं रहेन जेनका तू पचे धरया ह। तू पचे उ सबड़ बुरे काम करत अहा।

35किन्तु तू पचे फुन भी कहत रहत अहा, ‘हम निरपराध अही। परमेस्सर मोहे पड़ कोहान नाहीं अहड़।’ एह बरे मइँ तू पचन्क झूठ बोलइवाला अपराधी होइ क भी निर्णय देब। काहेकि तू कहत बाट्या, ‘मइँ कछू भी बुरा नाहीं किहेउँ ह।’

36तोहरे पचन्क बरे इरादा क बदलब बहोत आसान अहड़। अस्सूर तू पचन्क निरास किहस। एह बरे तू पचे अस्सूर क तज्या अउर मदद बरे मिस्त्र पहोंच्या। मिस्त्र तू पचन्क निरास करी।

37अइसा होइ कि तू पचे मिस्त्र भी तजब्या अउ तू पचन्क हाथ लजा स तोहार पचन्क आँखिन होइहीं। मुला तू

पचन्क ओन देसन स कउनो कामयाबी नाहीं मिली। काहेकि यहोवा ओन देसन्क अस्वीकार कइ दिहस ह।

3“अगर कउनो मनई आपन पत्नी क तलाक देत ह, अउर उ पत्नी ओका तजि देत ह अउर दूसर मनई बियाह कइ लेत ह तउ का उ मनई आपन पत्नी क लगे फुन आइ सकत ह? नाहीं। जदि उ मनई उ मेहरारू क लगे लउटी तउ देस पूरी तरह गन्दा होइ जाइ। यहूदा, तू रण्डी क तरह अनेक पिरेमियन (लबार देवतन) क संग काम किहा अउर अब तू मोरे लगे लउटइ चाहत अहा।” इ सँदेसा यहोवा क रहा।

2“खाली पहाड़ी क चोटी क लखा। क कउनो अइसी जगह अहड़ जहाँ तोहार आपन पिरेमियन क संग सारीरिक सम्बन्ध नाहीं चला? तू सइकिया क किनारे पिरेमियन क प्रतीच्छा करती बइठी अहा। तू हुआँ रेगिस्तान मँ प्रतीच्छा करत अरब क तरह बइठा। एँह बरे तू मोहसे बेवफाइ कइ क अउर बहोत सारी बुरा करम कइ क धरती क अपवित्तर बना दिहस ह।

3तू पाप किहा एह बरे बर्खा नाहीं आई। बसन्त समइ क कउनो बर्खा नाहीं भइ। मुला अबहिं भी तू लज्जित होइ स इनकार करति अहा। तोहरे मुँहना पड़ रण्डी क भाव अहड़ जब उ लज्जित होइ स इनकार करति अहा। तू आपन कीन्ह करमन पड़ लज्जित होइ स इनकार करति अहा।

4मुला अब तू मोका बोलावत अहा। ‘मोर पिता, तू मोर बचपन स मोर प्रिय मीत रहा ह।’

5तू इ भी कहया, ‘परमेस्सर सदैव मोह पड़ कोहान नाहीं रही। परमेस्सर क किरोध सदैव बना नाहीं रही।’ तू इ सब कछू कहत अहा, मुला तू ओतने ही बुराई करति अहा जेतना तू कइ सकत अहा।”

### डुइ बुरी बहिनी: इस्त्राएल अउ यहूदा

6ओन दिनन जब योसियाह यहूदा रास्ट्र पड़ हुकूमत करत रहा। यहोवा मोहसे बातन किहस। यहोवा कहेस, “यिर्मयाह, तू ओन बुरे करमन क लखा जउन इस्त्राएल किहस? तू लख्या कि कइसे मोरे संग बिस्ससघात किहस। उ हर एक पहाड़ी क ऊपर अउर हर एक हरियर वृच्छ क खाले झूठी मूरतियन क पूजिके बिभिचार कइ क पाप किहस। 7मइँ अपने स कहेउँ, ‘इस्त्राएल मोरे लगे तब लउटी जब उ आपन बुरे करमन क कइ चुकी।’ किन्तु उ मोरे लगे नाहीं लउटेस अउर ओका अबिस्सासी बहिन यहूदा लखेस कि इस्त्राएल का किहेस ह? 8यहूदा लखेस कि मइँ अबिस्सासी इस्त्राएल क दूर पठाइ दिहेस ह काहेकि उ बिभिचार किहे रही। मइँ ओका तलाक पत्र लिखिके तलाक देइ दिहा। किन्तु ओकरे अबिस्सासी बहिन यहूदा ओन बातन स नाहीं डेराएस। यहूदा भी निकर गइ अउर उ रण्डी क तरह रहइ लगेस। 9यहूदा इ धियान भी नाहीं दिहस कि उ रण्डी क तरह काम करति बाटइ। एह बरे उ आपन देस क गन्दा किहस। उ काठे अउर पाथर क बनी मूरतियन क पूजा कइके बिभिचार क पाप किहस। 10इस्त्राएल क अबिस्सासी बहिन (यहूदा) आपन पूरे हिरदइ स मोरे लगे लउटी नाहीं।

उ सिरिफ बहाना बनाएस कि उ मोरे लगे लउटी अहइ।" इ सँदेसा यहोवा क रहा।

11 यहोवा मोसे कहेस, "इस्त्राएल मोर मनवइया नाहीं रही। मुला ओकरे लगे कपटी यहूदा क अपेच्छा नीक बहाना रहा। 12 उत्तर कइँती लखा अउर इ सँदेसा बोला:

"अबिस्सासी इस्त्राएल क लोगो तू पचे लउटा।" यहोवा कहत ह। मई तू पचन स आपन मुँह नाहीं फेड़ब। मई दयासागर हउँ, 'मई सदैव तू पचन पइ कोहान नाहीं रहब।' यहोवा कहत ह।

13 तोहका सिरिफ एतना करब होइ कि तू आपन पापन क स्वीकारा। तू यहोवा अपने परमेस्सर क खिलाफ अपराध किहस, इ तोहार पाप अहइ कि तू दूसर रास्ट्रन क लोगन क देव मूरतियन क आपन पिरेम दिहा। तू आपन देव मूरतियन क पूजा हर एक हरियर बृच्छ क खाले किहा। तू मोर आग्या क पालन नाहीं किहा।" यहोवा कहत ह।

14 "अभक्त लोगो, मोरे लगे लउटि आवा।" इ सँदेसा यहोवा क रहा।

"मई तोहार सुआमी अहउँ। मई हर एक नगर स एक मनई लेब अउर हर एक परिवार स दुइ मनई अउर तू पचन्क सिन्धोन पइ लिआउब। 15 तब मई तू पचन्क नवा सासक देब। उ पचे सासक मोर मनवइयन होइहीं। उ पचे तोहार पचन्क मार्ग दर्सन गियान अउर समुझ स करिहीं। 16 ओन दिना तू लोग बड़ी गनती मँ देस मँ होब्या।" इ सँदेसा यहोवा क अहइ।

"उ समइ लोग फुन इ कबहुँ नाहीं कइँहीं, 'मई ओन दिनन क सुमिरत हउँ जब हम लोगन क लगे यहोवा क करार क सन्दूख रहा।' उ पचे पवितर सन्दूख क बारे मँ फुन कबहुँ सोचिहीं भी नाहीं। उ पचे न तउ एका याद करिहीं अउर न ही ओकरे बरे अफसोस करिहीं। उ पचे दूसर पवितर सन्दूख कबहुँ नाहीं बनइहीं। 17 उ समइ, यरूसलेम नगर 'यहोवा क सिंहासन' कहा जाइ। सबहिं रास्ट्र एक संग यरूसलेम नगर मँ यहोवा क नाउँ क सम्मान देइ अइहीं। उ पचे आपन हठी अउर बुरे हिरदय क अनुसार अब कबहुँ नाहीं चलिहीं। 18 ओन दिनन यहूदा क परिवार इस्त्राएल क परिवार क संग मिलि जाइ। उ पचे उत्तर मँ एक देस स एक साथे अइहीं। उ पचे उ देस मँ अइहीं जेका मई ओनकर पुरखन क दिहे रहे रहेउँ।

19 "मई यानी यहोवा अपने स कहेउँ, 'मई तू पचन स आपन बचवन क नाई बेउहार करइ चाहत हउँ, मई तू पचन्क एक सुहावना देस देइ चाहत हउँ। उ देस जउन कउनो भी रास्ट्र स जियादा सुन्नर होइ।' मई सोचे रहेउँ कि तू पचे मोका 'बाप' कहब्या। मई सोचे रहेउँ कि तू पचे मोर सदैव अनुसरण करब्या।

20 मुला तू पचे उ मेहरारू क नाई भया जउन पतिव्रता नाहीं रही। इस्त्राएल क परिवार, तू पचे मोरे बरे बिस्सासघाती रह्या।" इ सँदेसा यहोवा क रहा।

21 तू पचे नंगी पहाड़ियन पइ रोउब सुन सकत ह। इस्त्राएल क लोग कृपा बरे रोवत रहेन अउर पराथना करत अहइँ। उ पचे बहोत बुरा होइ ग रहेन। उ पचे आपन परमेस्सर यहोवा क बिसरी ग रहेन।

22 यहोवा इ भी कहेस, "इस्त्राएल क अबिस्सासी लोगो, तू पचे मोरे लगे लउटि आवा, अउर मई तोहरे पचन्क अबिस्सासी होइ क अपराध क छिमा करब।" लोगन क कहइ चाहीं, "हाँ, हम लोग तोहरे लगे आउब तू हमार परमेस्सर यहोवा अहा।

23 निहचय ही पहाड़ियन पइ देवमूरतियन क पूजा अउर पहाड़न पइ जमा होइ सिरिफ झूठी आसा देत ह। निहचय ही, इस्त्राएल क मुक्ति, यहोवा आपन परमेस्सर स आवत ह।

24 उ मूरतियन हमरे पुरखन क हर एक चीज बलि क रूप मँ हम लोगन क बचपन क अमइ स ही खाएस। उ मूरतियन हमरे पुरखन क पसु, भेड़ी, पूत, बिटिया लिहस।

25 हम पचन्क आपन लाज मँ, माथा टेकइ चाही, लज्जा हम लोगन क कम्बल क नाई ढौप लाइ। हम अउर हमार पुरखन आपन परमेस्सर यहोवा क खिलाफ पाप किहे अही। हम आपन परमेस्सर यहोवा क आग्या आपन बचपन स ही नाहीं माने अही।"

4 यहोवा कहत ह, "इस्त्राएल, जदि तू लउटि आवा चाहत ह तउ तू मोरे लगे जरूर लउटि आवा। जदि तू आपन देवमूरतियन क लोकावा अउर भटकना बन्द करा,

2 जदि तू मोरे नाउ पइ सच्चाइ स, निआब स अउर ईमानदारी स इ कहत भए प्रतिग्या करब्या, 'यहोवा क जिन्नगी क किरया,' तउ रास्ट्र यहोवा क जरिये बरदान पाइहीं अउर उ पचे यहोवा क गर्व स बखान करिहीं।"

यहोवा यहूदा अउर यरूसलेम क निवसियन स कहत ह, "उहइ खेत मँ हर चलावा जेका जोतइ स तू नकार दिहे रहा काँटा क बीच मँ बिया छिरकान बन्द करा! 4 इ दिखावइ बरे कि तू यहोवा क अहइ खतना करइ लिहा। मोर अर्थ इ अहइ कि आपन आप क पूरी तरह स मोर बरे अर्पित कइ द्या! अउर आपन दिल स खिलरी हटा द्या। जदि तू इ नाहीं करा तउ मई बहोतइ कोहान होबउँ। मोर किरोध आगी क नाई फइली अउर मोर किरोध तू पचन्क बारि देइ अउर कउनो मनई उ आगी क बुझाइ नाहीं पाइ। इ काहे होइ? काहेकि तू पचे बुरे करम किहे अहा।"

### उत्तर दिसा स बिध्वंस

5 "यहूदा क लोगन मँ इ सँदेसा क घोसणा करा: यरूसलेम सहर क हर मनई स कहा, 'सारे देस मँ तुरही बजावा।' जोर स नरियाअ अउर कहा, 'एक संग आवा, हम सबहिं रच्छा बरे मजबूत सहरन क भाग निकरी।'

6 सिन्धोन का सूचक झंडा क उठावा, कउनो जगह एक ठू सुरच्छा क जगह खोजा, प्रतीच्छा जिन करा। इ एह बरे करा कि मई उत्तर स बिध्वंस लिआवत हउँ। मई भयंकर बिनास लिआवत हुँ।"

7 एक ठु सेर अपनी गुफा स निकरा ह, रास्ट्रन क बिध्वंसक तेज कदम बढ़ाउब सुरू कइ चुका अहइ। उ तोहरे पचन्क देसन क बरबाद करइ आपन घर तजि चुका अहइ। तोहरे पचन्क सहर तहस नहस होइहीं। ओनमँ रहइवाला कउनो मनई नाहीं बची।

8 एह बरे टाट क ओढ़ना पहिरा, रोवा, काहेकि यहोवा हम पइ बहोत कोहान अहइ।"

9इ सँदिसा यहोवा क अहइ, “अइसे समइ इ होत ह। राजा अउर प्रमुख हिम्मत हार जइहीं, याजक डेरइहीं, नबियन क दिल दहली।”

10तब मई यानी यिर्मयाह कहेउँ, “मोर सुआमी यहोवा, तू फुरइ यहूदा अउ यरूसलेम क लोगन क धोखा मँ राख्या ह। तू ओनसे कह्या, ‘तू पचे सान्तिपूर्वक रहब्या।’ किन्तु अब ओनके गटइयन पइ तरवार हईंची भइ अहइ।”

11उ समइ एक सँदिसा यहूदा अउ यरूसलेम क लोगन क दीन्ह जाइ: “नंगी पहाड़ियन क चोटी स गरम आँधी चलाति अहइ। इ रेगिस्ताने स मोर लोगन कइँती आवति अहइ। इ उ मन्द हवा नाहीं जेकर उपयोग किसान भूसा स अनाज निकारइ बरे करत हीं।

12इ ओहसे जियादा तेज हवा अहइ अउर मोहसे आवति अहइ। अब मई यहूदा क लोगन क खिलाफ आपन निआउ क घोसणा करब।”

13लखा। दुस्मन बादर क नाई उठत अहइ, ओकर रथ चक्रवात क तरह अहइ। ओकर घोड़ा उकाब स तेज अहई। इ हम सब बरे बुरा होइ, हम बरबाद होइ जाब।

14यरूसलेम क लोगो, आपन हिरदय स बराइयन क धोइ डाबा। आपन हिरदय क पवित्र करा, जेहसे तू बच निकरा। बुरी योजनन जिन बनावत चला।

15दान देस क दूत क वाणी क धियान स सुना। कउनो एप्रैम क पहाड़ी प्रदेश स बुरा खबर क घोसणा करत ह।

16“इ रास्ट्र क एकर विवरण द्या। यरूसलेम क लोगन मँ इ खबर क फइलावा। दुस्मन दूर देस स आवत अहई। उ सबइ दुस्मन यहूदा क नगरन क विरूद्ध जुद्ध उद्घोस करत अहई।

17दुस्मन यरूसलेम क अइसे घेरेन ह जइसे खेत क रच्छा करइवाले लोग होई। यहूदा, तू मोरे खिलाफ गया, एह बरे तोहरे खिलाफ दुस्मन आवत अहई।” इ सँदिसा यहोवा क अहइ।

18“जउने तरह तू रह्या अउर तू पाप किहा उहइ स तोह पइ इ बिपति आइ। इ तोहार पाप ही अहई जउन जिन्नगी क एतना कठिन बनाएन ह। इ तोहार पाप ही अहइ जउन उ पीरा क लिआएस जउन तोहरे हिरदय क बेधत ह।”

### यिर्मयाह क रुदन

19आह, मोर दुःख अउ मोर परेसानी मोरे पेट मँ दर्द करत अहई। मोर हिरदय धइकत अहइ। हाय, मई एतना डेरान अहई। मोर हिरदय मोरे भीतर तइपत अहइ। मई चुप नाहीं बइठ सकत। काहेकि मई तुरही क बजाउब सुनेउँ ह। तुरही सेना क जुद्ध करइ बोलावति अहइ।

20ध्वंस क पाछे बिध्वंस आवत ह। पूरा देस नस्त होइ ग अहइ। अचानक मोर डेरन बरबाद कइ दीन्ह ग अहई, मोर परदन फाइ दीन्ह ग अहई।

21हे यहोवा मई कब तलक जुद्ध पताकन क लखब? जुद्ध क तुरही क केतने समइ सुनब?

22परमेस्सर कहेस, “मोर लोग मूरख अहई। उ पचे मोका नाहीं जानतेन। बेवकूफ बच्चन अहई। उ पचे समुझतेन नाहीं।

उ पचे पाप करइ मँ दच्छ अहई, किन्तु उ पचे नीक करइ नाहीं जानतेन।”

### बिनास आवत अहइ

23मई धरती क लखेउँ। धरती खाली रही, एह पइ कछू नाहीं रहा। मई गगन क लखेउँ, अउर एकर प्रकास चला गवा रहा।

24मई पर्वतन पइ नजर डाएउँ, अउर उ पचे काँपत रहेन। सबहि पहाड़ियन लइखड़ा रहिन।

25मई धियान स लखेउँ किन्तु कउनो मनई नाहीं रहा, अकासे क सबहि पंछी उड़ गवा रहेन।

26मई लखेउँ कि सुहावना प्रदेश रेगिस्तान बन गवा रहा। उ देस क सबहि नगर नस्त कइ दीन्ह ग रहेन। यहोवा इ कराएस। यहोवा अउर ओकर प्रचण्ड क्रोध इ कराएस।

27यहोवा इ सबइ बातन कहत ह। “पूरा देस बरबाद होइ जाइ। (मुला मई देस क पूरी तरह नस्त नाहीं करब।)

28एह बरे इ देस क लोग मरे लोगन बरे रोइहीं। अकास अँधियारा स भरा होइ। मई कहि दिहेउँ ह, अउर बदलब नाहीं। मई एक निर्णय किहेउँ ह, अउर मई आपन बिचार नाहीं बदलब।”

29यहूदा क लोग घुड़सवारन अउर धनुर्धारियन क उद्घोष सुनिहीं, अउर लोग पराइ जइहीं। कछू लोग गुफन मँ छिपिहीं; कछू झाड़ियन मँ अउ कछू चट्टानन पइ चढ़ि जइहीं। यहूदा क सबहि नगर खाली अहई। ओनमाँ कउनो नाहीं रहत।

30हे यहूदा, तू बरबाद कइ दीन्ह गवा अहा, तू का करत अहा? तू आपन सुन्नरतम लाल ओढ़ना काहे पहिरत अहा? तू आपन सोने का गहना काहे पहिरे अहा? तू आपन आँखिन मँ आँजन काहे लगावत अहा। तू आपन क सुन्नर बनावत अहा, किन्तु इ सब बियर्थ अहइ। तोहार पिरेमी तोहसे घिना करत हीं, उ पचे मार डावइ क जतन करत अहई।

31मई एक चीख सुनत हउँ जउन उ मेहरारू क चीख क तरह अहइ जउन लरिका पइदा करत होइ। इ चीख उ मेहरारू क तरह अहइ जउन पहिलउटी क लरिका क पइदा करत होइ। इ सिथ्योन क बिटिया क चीख अहइ। उ आपन हाथ पराथना मँ इ कहत भए उठावति बाटइ, “आह! मई मूर्छित होइवाली अहउँ, हतियारे मोरे चारिहुँ कइँती अहई।”

### यहूदा क लोगन क पाप

5 यहूदा कहत ह: “यरूसलेम क सड़कियन पइ ऊपर नीचे जा। चारिहुँ कइँती लखा अउर एन चीजन क बारे मँ सोचा। सहर क सार्वजनिक चौराहन क खोजा, पता करा कि का तू कउनो एक नीक मनई क पाइ सकत ह, अइसे मनई क जउन ईमानदारी स काम करत होइ, अइसा जउन सच क खोज करत होइ। यदि तू एक नीक मनई क हेरिके निकरब्या तउ मई यरूसलेम क छिमा कइ देब। जब लोग प्रतिग्या करत हीं अउर कहत हीं, ‘जइसा कि यहोवा सास्वत अहइ।’ तउ तू निहचय कइ सकत ह कि उ पचे झूठ बोलत रहइ।”



3हे यहोवा, मई जानत हउँ कि तू लोगन में सच्चाई लखइ चाहत अहा। तू यहूदा क लोगन क चोट पहोंचाया, मुला उ पचे कउनो पीरा क अनुभव नहीं किहन। तू ओनका बर्बाद किहा, मुला उ पचे आपन पाठ सीखइ स इन्कार कइ दिहन। उ पचे बहोत हठी होइ गएन। उ पचे आपन पापन बरे पछताइ स इन्कार कइ दिहन।

4मुला मई (यिर्मयाह) आपन स कहेउँ, “उ पचे सिरिफ गरीब लोग ही अहई जउन मूरख अहई। इ सबइ उहइ लोग अहई जउन यहोवा क मारग क नहीं सीख सकेन। गरीब लोग आपन परमेस्सर क सिच्छा क नहीं जानतेन।

5एह बरे मई अमीर लोगन क लगे जाब। मई ओनसे बातन करब। निहचय ही प्रमुख यहोवा क मारग क समुझत हीं। मोका बिस्सास अहइ कि उ पचे आपन परमेस्सर क सिच्छा क जानत हीं।” किन्तु सबहिं अमीर लोगन यहोवा क सेवा करइ स इन्कार करइ देइन।

6उ पचे परमेस्सर क खिलाफ भएन, एह बरे जंगल स एक सेर ओन पइ हमला करी। रेगिस्तान में एक ठु बिगवा ओनका मारि डाई। एक ठु तेदुआ ओनका सहरन क लगे घात लगाए अहइ। सहरन क बाहर जाइवाले कउनो क भी तेदुआ टूकन में चीर डाइ। काहेकि यहूदा क लोग बहोत अपराध किहेन ह। उ पचे यहोवा स दूर भटक गवा अहई।

7परमेस्सर कहेस, “यहूदा, मोका कारण बतावा कि मोका तोहका काहे छिमा देइ चाही? तोहार सन्तानन मोका तजि दिहेन ह। उ पचे ओन मूरतियन स प्रतिग्या किहन ह जउन परमेस्सर अहई ही नहीं। मई तोहरी सन्तानन क हर एक चीज दिहेउँ जेकर जरूरत ओनका रही। किन्तु फुन भी उ पचे बिस्सासघाती रहेन। उ पचे रण्डी क कोठन में बहोत समइ बिताएन।

8उ पचे ओन घोड़न जइसे रहेन जेनका बहोत खाइ क अहइ, अउर जउन जोड़ा बनावइ क होइ। उ पचे ओन घोड़न जइसे रहेन जउन पड़ोसी क मेहररूअन पइ हिनहिनात रहेन ह।

9का मोका यहूदा क लोगन क इ सबइ काम करइ क कारण, सजा देइ चाही?” यहोवा कहत ह, “का मोका ओनका उ दण्ड देइ नहीं चाही जउन ओका मिलइ चाही?

10आवा, अउर यहूदा क अंगूर क बेलन क कतारन नस्ट करी दिहा बेलन क काट डावा। किन्तु ओनका पूरी तरह नस्ट जिन करा। ओनकी सारी डारन क छॉट द्या काहेकि इ सबइ डारन यहोवा क नहीं अहई।

11इस्त्राएल अउर यहूदा क रास्ट्र हर तरह स मोरे बिस्सासघाती रहेन।” यहोवा कहत ह।

12“ओ लोग यहोवा क बारे में झूठ कहेन ह। उ पचे कहेन ह, ‘यहोवा हमार कछू नहीं करी। हम लोगन क कछू भी बुरा न होइ। हम कउनो फउज क हमला अपने ऊपर नहीं लखब। हम कबहुँ भूखा नहीं मरब।’

13झूठे नबी मरे प्राण अहई। परमेस्सर क सँदिसा ओनमाँ नहीं उतरा अहइ। विपत्तियन ओन पइ अइहीं।”

14सर्वसक्तिमान परमेस्सर यहोवा इ सब कहेस, “ओ लोग कहेन कि मई ओनका दण्ड नहीं देब। एह बरे यिर्मयाह, जउन सँदिसा मई तोहका देत रहत हउँ, उ आगी जइसा होइ

अउर उ सबइ लोग काठे जइसे होइहीं अउ आगी सारी काठी क बार देइ।”

15इस्त्राएल क रास्ट्र, यहोवा कहत ह, तोह पइ आक्रमण बरे मई एक रास्ट्र क बहोत दूर स हाली ही लिआउब। इ एक ताकतवर रास्ट्र अहइ। इ एक पुरानी रास्ट्र अहइ। उ रास्ट्र क लोगन उ भासा बोलत हीं जेका तू नहीं जानत्या। तू नहीं समुझ सकत्या कि उ पचे का कहत हीं? 16ओनकर तरकस खुली कब्र अहई, ओनकर सबहिं लोग वीर सैनिक अहई।

17उ सबइ सैनिक तोहरे घरे लिआई फसल क खाइ जइहीं। उ पचे तोहार सारा भोजन खाइ जइहीं। उ पचे तोहार पूत-बिटियन क खाइ जइहीं (नस्ट कइ देइहीं) उ पचे तोहार रेवइ अउर गोरू क खरका क चट कइ जइहीं। उ पचे तोहार अंगूर अउर अंजीर क चार जइहीं। उ पचे तोहार मजबूत सहरन क आपन तरवासन स नस्ट कइ डइही। जउने सहरन पइ तोहार बिस्सास अहइ ओनका उ पचे नस्ट कइ देइही।” 18इ सँदिसा यहोवा क अहइ। “किन्तु कब उ सबइ भयानक दिन आवत हीं, यहूदा मई तोहका पूरी तरह नस्ट नहीं करब।

19यहूदा क लोग तोहसे पूछिहीं, ‘यिर्मयाह, हमार परमेस्सर यहोवा हमार अइसा बुरा काहे किहस?’ ओनका इ जवाब द्या, ‘यहूदा क लोगो तू पचे यहोवा क, अउर तू पचे ही आपन देस में बिदेसी देव मूरतियन क पूजा किहा ह। तू पचे उ सबइ काम किहा, एह बरे तू पचे अब उ देस में जउन तोहार नहीं अहइ, बिदेसियन क सेवा करब्या।”

20यहोवा कहेस, “याकूब क परिवार में, इ सँदिसा क घोसणा करा। इ सँदिसा क यहूदा रास्ट्र में सुनावा।

21इ सँदिसा क सुना, ‘तू सबइ मूरख लोगो, तू पचन्क समुझ नहीं अहइ: तू पचे लोगन का आँखिन अहा, किन्तु तू पचे लखल्या नहीं। तू पचे लोगन क कान अहा, किन्तु तू पचे सुनत्या नहीं।

22का तू मोसे नाही डरत ह?” यहोवा कहत ह, “मोरे समन्वा तू पचन्क डर स काँपइ चाही। मई ही उ हउँ, जउन समुद्दर क तदन क मर्यादा बनाएउँ। मई बाछू क अइसी सीमा बनाएउँ जेका पानी तोड़ सकत ह। लहरन तटे क कुचरि सकत ह, मुला उ एका बर्बाद नहीं करी। चढ़त भइ लहरन गरज सकत हीं, मुला उ सबइ तटे क मर्यादा तोड़ नहीं सकत।

23मुला यहूदा क लोग हठी अहई। उ सबइ हमेसा मोरे खिलाफ जाइ क जोजना बनावत हीं। उ पचे मोहसे मुड़ा अहई अउर मोहसे दूर चला गवा अहई।

24यहूदा क लोग कबहुँ आपन स नहीं कहतेन, ‘हमका आपन परमेस्सर यहोवा स डेराइ अउ ओकर सम्मान करइ चाही। उ हमका ठीक समइ पइ पतझड़ अउ बसन्त क बर्खा देत ह। उ इ निहचित करत ह कि हम ठीक समइ पइ फसिल काटि सकी।’

25यहूदा क लोगो, तू पचे अपराध किहा ह। एह बरे इहाँ बर्खा अउर पकी भइ फसिल नहीं अही। तोहार पचन्क पापन तू पचन्क यहोवा क ओन नीक चीजन क भोग नहीं करइ दिहस ह।

26मोरे लोगन क बीच पापी लोग अहई। उ सबइ पापी लोग पंछिन क फँसावइ बरे जाल बनावइवालन क तरह अहई। उ पचे लोग आपन जाल बिछावत हीं, मुला उ पचे पंछी क बदले मनइयन क फँसावत हीं।

27एन मनइयन क घर झूठ स वइसेन भरा होत हीं, जइसे चिरइयन स भरे पिंजरा होई। ओनकर झूठ ओनका धनी अउ सक्तीसाली बनाएस ह।

28जउने पापन क उ पचे किहन ह ओनही स उ पचे बड़के अउर मोट भएन ह। जउने बुरे करमन क उ पचे करत हीं ओनकर कउनो अन्त नाहीं। उ पचे अनाथ बच्चन क मामले क पच्छ मँ बहस नाहीं करिहीं, उ पचे अनाथ क सहायता नाहीं करिहीं। उ पचे गरीब लोगन क उचित निआव नाहीं पावइ देईहीं।

29का मोका एन करमन क कारण यहूदा क दण्ड देइ चाहीं?" यहोवा कहत ह, "का मोका ओनका उ दण्ड देइ नाहीं चाही जउन ओनका मिलइ चाही?"

30यहोवा कहत ह, "यहूदा देस मँ एक खउफनाक अउर हिरदय दहलावइ वाला घटना घटति अहइ। जउन भवा ह उ इ अहइ कि:

31नबी झूठ बोलत हीं, याजक अपने हाथे मँ सक्ती लेत हीं। मोर लोग इहइ तरह खुस अहई। किन्तु लोगो, तू पचे का करब्या जब सजा दीन्ह जाइ?"

### दुस्मन क जरिये यरूसलेम क घेराव

6 बिन्यामीन क लोगो, आपन जान बचाई बरे पराअ, यरूसलेम सहर स भाग चला। जुद्ध क तुरही तकोआ सहर मँ बजावा। बेथेक्केरेम मँ संकेत चिन्ह लगावा। करा काहेकि, उत्तर कइँती स बिपत्ति अउर भयानक विनास आवति अहइ।

2सिय्योन क बिटिया, तू एक ठु सुन्नर हरा चरागाह क समान अहा।

3मुला गड़रियन आपन खरका क साथ आवत हीं। उ पचे तोहार चारिहुँ कइँती आपन डेरा डावत हीं। हर एक गड़रिया आपन खरका क अगुवाइ आपन हीसा तोहार चरागाह स खाइ बरे करत ह।

4"यरूसलेम नगर क खिलाफ लड़इ बरे तइयार होइ जा। उठा, हम लोग दुपहर क सहर पइ हमला करब, किन्तु पहिले ही देर होइ चुकी अहइ। साँझ क छाया लम्बी होत अहइ,

5एह बरे उठा। हम सहर पइ राति मँ हमला करब। हम यरूसलेम क मजबूत रच्छा-साधनन क बर्बाद करब।"

6सर्वसक्तीमान यहोवा जउन कहत ह, उ अहइ: "यरूसलेम क चारिहुँ कइँती क बृच्छ काट डावा अउर यरूसलेम क खिलाफ घेरा डावइ क टीला बनावा। इ सहर क सजा मिलइ चाही।" इ सहर क भीतर दमन करइ क अलावा कछू नाहीं अहइ।

7जइसे कुआँ आपन पानी स्वच्छ राखत ह उहइ तरह यरूसलेम आपन दुट्टता क नवा बनावइ राखत ह। इ सहर मँ हिंसा अउर बिध्वंस सुना जात ह। मई सिरफ यरूसलेम क बीमारी अउर दर्द क लख सकत हई।

8यरूसलेम, इ चितउनी क अनका। जदि तू नाहीं सुनबिउ तउ मई आपन पिठिया तोहरी कइँती कइ लेबउँ। मई तोहरे प्रदेस क सूना रेगिस्तान कइ देब। कउनो भी मनई हुआँ नाहीं रहि पाई।"

9सर्वसक्तीमान यहोवा जउन कहत ह, "उ इ अहइ, ओन इस्त्राएल क लोगन क बटोरा जउन आपन देस मँ बच गवा रहेन। ओनका इ तरह एकट्ठा करा, जइसे तू अंगूरे क बेल स आखिरी अंगूर बटोरत अहा। अंगूर एकट्ठा करइवाले क तरह हर एक बेल क जाँच करा।"

10मई केहसे बात करउँ? मई केका चितउनी दइ सकत हउँ? मोर कउनो सुनी? इस्त्राएल क लोग आपन कान क बंद किहेन ह। एह बरे उ पचे मोर चितउनी सुन नाहीं सकतेन। लोग यहोवा क सिच्छा पसन्द नाहीं करतेन। उ पचे यहोवा क सँदेस सुनइ नाहीं चाहतेन।

11किन्तु मई (यिर्मयाह) यहोवा किरोध स भरा हउँ। मई एका रोकत-रोकत थक गवा हउँ। "सड़किया पइ खेलत बच्चन पइ यहोवा क किरोध उड़ेरा। एक संग बटुरे नउजवानन पइ एका उड़ेरा। मनसेधू अउ ओकर मेहरारू दुइनउँ धरा जइहीं। बुढ़वा अउ बहोत बुढ़वा लोग धरा जइहीं।

12ओनकर घर दूसर लोगन क दइ दीन्ह जइहीं। ओनकर खेत अउर ओनकर मेहरारूअन दूसर क दइ दीन्ह जइहीं। मई आपन हाथ उठाउब अउर यहूदा देस क लोगन क सजा देब।" इ सँदेसा यहोवा क रहा।

13इस्त्राएल क सबहिं लोग धन अउर जियादा धन चाहत हीं। कम महत्वपूर्ण स लइके ज्यादा महत्वपूर्ण तलक सबहिं निआवहीन धन बरे लालची अहई। हिआँ तलक कि याजक अउ नबी झूठ पइ जितत हीं।

14मोर लोग बहोत बुरी तरह चोट खाए भए अहई। नबी अउर याजक मोरे लोगन क घाव भरइ क अइसा जतन करत हीं, माना उ पचे नान्ह स घाव होई। उ पचे कहत हीं, 'सान्ति! सान्ति! किन्तु हुआँ सान्ति नाहीं बाटइ।'

15नबियन अउ याजकन पइ ओह पइ लजाइ चाही, जउन बुरा उ पचे करत हीं। मुला उ पचे तनिक भी लजानेन नाहीं। एह बरे उ पचे दूसर क संग गिर जाइहीं। जब मई ओन लोगन क सजा देब, उ पचे ठोकर खाइहीं।" यहोवा कहत ह।

16यहोवा इ सब कहत ह: "चउराहन पइ खड़ा हवा अउर लखा। पता करा कि पुरान सड़किया कहाँ रही। पता करा कि अच्छी सड़किया कहाँ बा, अउ उ सड़क पइ चला। जदि तू पचे अइसा करब्या, तू पचनक आराम मिली। मुला तू लोग कह्या ह, 'हम, पचे सड़किया पइ नाहीं चलब।'

17मई तोहार पचनक चौकसी बरे चौकीदारी चुनेउँ। मई ओनसे कहेउँ, 'जुद्ध-तुरही क अवाजे पइ कान राखा।' मुला उ पचे कहेन, 'हम नाहीं सुनब।'

18एह बरे तू पचे सबहिं रास्ट्रन, ओन देसन क तू सब लोगो, अनका धियान द्या। उ सबइ सुना जउन मई यहूदा क लोगन क संग करब।

19पृथ्वी क लोगो इ सुना: मई यहूदा क लोगन पइ उ विपत्ति ढावइ जात अहउँ। जउन ओनका दुष्ट जोजनन स पइदा भाएस ह। इ होइ काहेकि उ पचे मोरे सँदेसन कईंती धियान नाहीं दिहन। ओ लोग मोरे नेमन क पालन करइ स इन्कार किहेन ह।”

20यहोवा कहत ह, “तू पचे सबा देस स मोका सुगन्धि क भेंट काहे लिआवत अहा? तू पचे भेंट क रूप मँ दूर देसन स सुगन्धि काहे लिआवत अहा? तोहार पचन्क होमबलि मोका खुस नाहीं करत। तोहार पचन्क बलि मोका खुस नाहीं करत।

21एह बरे यहोवा जउन कहत ह, उ इ अहइ: “मई यहूदा क लोगन क समन्वा सबइ समस्या रखब। उ पचे लोगन क गिरावइवाले पाथर स होइहीं। बाप अउर पूत ओन पइ ठेह खाइके भहरइहीं। मीत अउ पड़ोसी मरिहीं।”

22यहोवा जउन कहत ह, “उ इ अहइ: उत्तर क देस स एक ठु फउज आवति अहइ, पृथ्वी क दूर ठउरन स एक ठु सक्तीसाली राष्ट्र आवत अहइ।

23फउजियन क हाथे मँ धनुस अउ भालन अहइँ, उ पचे क्रूर अहइ। उ पचे कृपा करइ नाहीं जानतेन। उ पचे बहोत सक्तीसाली अहइँ। उ पचे सागर क तरह गरजत हीं, जब उ पचे अपने घोड़न पइ सवार होत हीं। उ फउज जुद्ध बरे तइयार होइके आवति अहइ। हे सिस्थोन क बिटिया, फउज तोह पइ हमला करइ आवति अहइ।”

24हम पचे उ फउज क बारे मँ खबर पाएँ ह। हम पचे डर स असहाय अही। हम खुद क बिपत्तियन क जाली मँ पड़ा अनुभव करित ह। हम पचे वइसे ही कस्ट अही, जइसे एक मेहरारू क प्रसव-बेदना होत ह।

25खेतन मँ जिन जा, सड़कन पइ जिन निकरा। काहेकि दुस्मन क हाथन मँ तरवार अहइ, काहेकि खतरा चारिहँ कईंती अहइ।

26हे मोर लोगो, टाटे क ओढ़ना पहिर ल्या। राखी मँ लोट-पोटा। फूटि-फूटि रोआ जइसे कि तू एकलउता पूत क खोवइ देइ रह्या। इ सबइ करा काहेकि बिनासक बहोतइ हाली स हमरे खिलाफ अइहीं।

27यिर्मयाह, मई (यहोवा) तोहका प्रजा क कच्ची धातु क पारखी बनाएँ ह। तू हमरे लोगन क जाँच करब्या अउर ओनके बेउहार क चौकसी रखब्या।

28मोर लोग मोरे खिलाफ होइ ग अहइँ, अउर उ पचे बहोत हठी अहइँ। उ पचे लोगन क बारे मँ बुरी बातन कहत घूमत हीं। उ पचे काँसा क तरह हठी अउर बेचमक लोहा क तरह अहइँ।

29उ पचे उ चाँदी बनावइया क तरह अहइँ जउन धातू क सुद्ध करइ क कोसिस किहेस। ओकर धौकनी तेज चली, आगी भी तेज जरी, मुला आगी स निकरा अउर राँगा रहा। जउन कछू चाँदी बनावइया किहेस उ सिरिफ समइ क बरबादी रही। ठीक इहइ तरह मोरे लोगन स बुराई दूर करइ क जतन सिरिफ समई क बबादी रही।

30मोर लोग ‘खोटी चाँदी’ कहा जइहीं। ओनका इ नाउँ मिली काहेकि यहोवा ओनका अंगीकार नाहीं किहस।”

### यिर्मयाह क मन्दिर उपदेस

7 इ यहोवा क सँदेसा यिर्मयाह बरे अहइ। 2यिर्मयाह यहोवा क मन्दिर दुआरे क समन्वा खड़ा हवा। दुआरे पइ इ सँदेसा घोसित करा:

“यहूदा राष्ट्र क सबहिं लोगो, यहोवा क उपासना करइ बरे जउन लोग एन दुआरन स होइके आवा, हिआँ यहोवा क सँदेसा रहा। 3इस्त्राएल क लोगन क परमेस्सर यहोवा अहइ। सर्वसक्तीमान यहोवा जउन कहत ह, ‘उ इ अहइ, आपन जिन्नगी बदला अउर नीक काम करा। जदि तू अइसा करब्या तउ मई तू पचन्क इ ठउरे पइ रहइ देब। 4इ झूठ पइ जिन पतियाअ जउन कछू लोग बोलत हीं। उ पचे कहत हीं, “इ यहोवा क मन्दिर अहइ। यहोवा क मन्दिर अहइ! यहोवा क मन्दिर अहइ!” 5जदि तू पचे आपन जीवन बदलब्या अउर नीक करम करब्या, तउ मई तू पचन्क इ ठउरे पइ रहइ देब। तू पचन्क एक दूसर पइ निस्थावान होइ चाही। 6तू पचन्क अजनबियन क संग भी निस्थावान होइ चाही। तू पचन्क राँइ अउर अनाथ लरिकन बरे उचित काम करइ चाही। निरपराध लोगन क जिन मारा। दूसर देवतन क अनुसरण न करा। काहेकि उ पचे तोहरे पचन्क जिन्नगी क नस्ट कइ देइहीं। 7जदि तू पचे मोरी आग्या क पालन करब्या तउ मई तू पचन्क इ ठउरे पइ रहइ देब। मई इ प्रदेस तोहरे पचन्क पुरखन क अपने लगे सदा ही रखइ बरे दिहेउँ।

8“किन्तु तू पचे झूठ मँ बिस्सास करत अहा अउर उ झूठ बियर्थ अहइ। 9का तू पचे चोरी अउर हत्या करब्या? का तू पचे बिभिचार क पाप करब्या? का तू फाइदा बरे झूठी गवाही देब्या? का तू पचे लबार देवता बाल क पूजा करब्या अउर दूसर देवतन क अनुसरण करब्या जेनका तू पचे नाहीं जानत्या? 10जदि तू पचे इ सबइ पाप करत अहा तउ का तू पचे समुझन अहा कि तू पचे उ मन्दिर मँ मोरे समन्वा खड़ा होइ सकत ह जेहसे मोरे नाउँ स गोहरावा जात होइ? का तू पचे सोचत अहा कि तू पचे मोरे समन्वा खड़ा होइ सकत अहा अउर कहि सकत अहा, “हम सुरच्छित अही?” सुरच्छित एह बरे कि जेहसे तू पचे घृणित कार्य कइ सका। 11इ मन्दिर मोरे नाउँ स गोहरावा जात ह। का इ मन्दिर तोहरे पचन बरे डकैतन क छिपइ क ठउरे क अलावा दूसर कछू नाहीं अहइ? मई तोहार पचन्क चौकसी रखत हउँ।” इ सँदेसा यहोवा क अहइ।

12“यहूदा क लोगो, तू पचे अब सीलो नगर क जा। उ ठउरे पइ जा जहाँ मई पहिली बार अपने नाउँ क बरे मन्दिर बनाएँ। जा अउर लखा कि उ ठउरे क मई ओन पाप क बरे का किहेउँ जउन एह बरे कि लोग किहन। 13तू लोग इ सबइ सब पाप करम करत रह्या।” इ सँदेसा यहोवा क रहा। “मई तू पचन्स बार-बार बातन किहेउँ, मुला तू पचे मोर अनसुनी कइ दिहा। मई तू लोगन क पुकारेउँ पर तू पचे जवाब नाहीं दिहा। 14एह बरे मई आपन नाउँ स गोहरावा जाइवाले यरूसलेम क इ मन्दिर क नस्ट करब। मई उ मन्दिर क जेहमौँ तू पचे बिस्सास करत अहा वइसे ही नस्ट करब जइसे मई सीलो क नस्ट किहेउँ। अउ मई उ ठउरे क नस्ट करब्या जेका मई तू पचन्क अउर तोहरे पचन्क

पुरखन क दिहेउँ। 15मई तू पचन्क अपने पास ह वइसे ही दूर लोकाइ देब जइसे मई तोहरे सबहिं भाइयन क एप्रैम स लोकाएउँ।

16“यिर्मयाह, जहाँ तलक तोहार बात अहइ, तू यहूदा क एन लोगन बरे पराथना जिन करा। न ओनके बरे याचना करा अउर न ही ओनके बरे पराथना। ओनकर सहायता बरे मोहसे पराथन जिन करा। ओनके बरे तोहरी पराथना क मई नहीं सुनब। 17मई जानत हउँ कि तू लखत अहा कि उ पचे यहूदा नगर मँ का करत अहइँ। तू लखि सकत अहा कि उ पचे यरूसलेम क सड़कन पड़ का करत अहइँ? 18यहूदा क लोग जउन करत अहइँ उ इ अहइ: “बच्चन लकड़ी बटोरत हीं। पिता लोग उ लकड़ी क उपयोग आगी बारइ मँ करत हीं। मेहररूअन आटा गूँधत हीं अउर सरग क रानी क भेंट बरे रोटियन बनावत हीं। यहूदा क उ सब लोग दूसर देवतन क पूजा बरे पेय भेंट चढ़ावत हीं। उ पचे मोका क्रोधित करइ बरे इ करत हीं। 19मुला मई उ नहीं हउँ जेका यहूदा क लोग फुरइ चोट पहोंचावत अहइँ।” इ सँदेसा यहोवा क अहइ। “उ पचे सिरिफ आपन क ही चोट पहोंचावत अहइँ। उ पचे आपन क लज्जा क पात्र बनावत अहइँ।”

20एह बरे यहोवा इ कहत ह: “मई आपन किरोध इ ठउरे क खिलाफ परगट करब। मई लोगन तथा जानवरन क सजा देब। मई खेते मँ बृच्छन अउ उ भुइँया मँ जमइवाली फसलन क सजा देब। मोर किरोध प्रचण्ड आगी क नाई होइ अउर कउनो मनई ओका रोक नहीं सकी।”

### यहोवा बलि क अपेक्षा, आपन आग्या क पालन जियादा चाहत ह

21इस्त्राएल क परमेस्सर सर्वसक्तिमान यहोवा इ कहत ह, “जा अउर जेतनी भी होमबलि अउर बलि चाहा, भेंट करा। ओन बलियन क गोस खुद खा। 22मई तोहरे पचन्क पुरखन क मिस्त्र स बाहेर लिआएउँ। मई ओनसे बातन किहेउँ, किन्तु ओनका कउनो आदेस होमबलि अउर बलि क बारे मँ नहीं दिहस। 23मई ओनका सिरिफ इ आदेस दिहेउँ, ‘मोरी आग्या क पालन करा अउर मई तोहार पचन्क परमेस्सर रहब तथा तू पचे मोर लोग होब्या। जउन मई आदेस देत हउँ उकरा, अउर तोहरे पचन्क बरे सब नीक होइ।’

24“किन्तु तोहार सबन्क पुरखन मोर एक नहीं सुनेन। उ पचे मोह पड़ धियान नहीं दिहन। उ पचे हठी रहेन अउर उ पचे ओन कामन क किहन जउन उ पचे करइ चाहत रहेन। उ पचे नीक नहीं बनेन। उ पचे पहिले स भी जियादा बुरे बनेन, उ पचे पाछे क गएन, अगवा नहीं बढेन। 25ओ दिन स जउने दिन तोहरे सबन्क पुरखन मिस्त्र तजेन आजु तलक मई आपन सेवकन क तोहरे पचन्क लगे पठएउँ ह। मोरे सेवक नबी अहइँ। मई ओनका तोहरे सबन्क लगे बराबर पठएउँ। 26मुला तोहार पचन्क पुरखन मोर अनसुनी किहन। उ पचे मोह पड़ धियान नहीं दिहन। उ पचे बहोत हठी रहेन, अउर उ पचे बहोत जिद्दी रहेन, अउर उ पचे आपन पुरखन स भी बढिके बुराइयन किहन।

27“यिर्मयाह, तू यहूदा क लोगन स इ सबइ बातन कहब्या। किन्तु उ पचे तोहार पचन्क एक न सुनिहीं। तू पचे

ओनसे बातन करब्या मुला उ पचे तू पचन्क जवाब नहीं देइहीं। 28एह बरे तोहका ओनसे इ सबइ बातन कहइ चाही: इ उ रास्ट्र अहइ जउन यहोवा आपन परमेस्सर क आग्या क पालन नहीं किहस। इ सबइ लोग परमेस्सर क सिच्छन क अनसुनी किहन। इ सबइ लोग सच्ची सिच्छन क नहीं जानतेन।

### हत्या घाटी

29“यिर्मयाह, अपने बारन क काट डावा अउर एका लोकाइ द्या। पहाड़ी क नंगी चोटी पड़ चढ़ा अउर रोवा चिचियाअ। काहेकि यहोवा इ पीढ़ी क लोगन क दुत्कार दिहस ह। यहोवा एन लोगन स आपन पीठ मोड़ लिहस ह अउर उ किरोध मँ एनका सजा देइ। 30इ सबइ करा काहेकि मई यहूदा क लोगन क पाप करत लखेउँ ह।” इ सँदेसा यहोवा क अहइ। “उ पचे आपन देवमूर्तियन क स्थापना किहेन ह अउर मई ओन देवमूर्तियन स घिना करत हउँ। उ पचे देवमूर्तियन क उ मन्दिर मँ स्थापित किहेन ह जउन मोरे नाउँ स अहइ। उ पचे मोरे मन्दिर क ‘गन्दा’ कइ दिहन ह। 31यहूदा क उ सबइ लोग बेन हिन्नोम घाटी मँ तोपेत क उच्च स्थान बनाए अहइँ। ओन ठउरन पड़ लोग आपन पूत-बिटियन क मार डावत रहेन, उ पचे ओनका बलि क रूप मँ बार देत रहेन। इ अइसा अहइ जेकरे बरे मई कबहुँ आदेस नहीं दिहेउँ। इ तरह क बात कबहुँ मोरे मन मँ आई ही नहीं। 32एह बरे मई तू पचन्क चितउनी देत हउँ। उ सबइ दिन आवत अहइँ।” इ सँदेसा यहोवा क अहइ, “जब लोग इ ठउरे क तोपेत या बेन हिन्नोम क घाटी फुन नहीं कहिहीं। नहीं, उ पचे एका हत्याघाटी कहिहीं। उ पचे एका इ नाउँ एह बरे देइहीं कि उ पचे तोपेत मँ एतने मनइयन क दफनइहीं कि ओनके बरे कउनो दूसर क दफनावइ क जगह नहीं बची। 33तब लोगन क लहास जमीन क ऊपर पड़ा रइहीं अउर अकासे क पंछियन क चारा होइहीं। ओन लोगन क तने क जंगली जनावर खइहीं। हुआँ ओन पंछियन अउर जनावरन क भगावइ बरे कउनो मनई जिअत नहीं बची। 34मई आनन्द अउर खुसी क कहकहन क यहूदा क नगरन अउर यरूसलेम क सड़कियन पड़ खतम कइ देब। यहूदा अउ यरूसलेम मँ दुलहिन अउ दुल्हा क हँसी-ठिठोली अब स अगवा नहीं सुनाई पड़ी। पूरा पहेँटा सूना रेगिस्तान बन जाइ।”

8 यहोवा कहत ह: “उ समइ लोग यहूदा क राजा लोग अउर प्रमुख सासक लोग क हडिडियन क कब्रन स निकारि लेइहीं। उ पचे याजकन अउर नबियन क हडिडियन क ओनकर कब्रन स लइ लेइहीं। उ पचे यरूसलेम क सबहिं लोगन क कब्रन स हडिडियन निकारि लेइहीं। 2उ सबइ लोग ओन हडिडियन क सूरज, चाँद अउर तारन क पूजा बरे खाले जमीन पड़ फइलइहीं। यरूसलेम क लोग सूरज, चाँद अउ तारन क पूजा स पिरेम करत हीं। कउनो भी मनई ओन हडिडियन क बटोरी नहीं अउर न ही ओनका फुन दफनाई। एह बरे ओन लोगन क हडिडियन गोबर क तरह भुइँया पड़ पड़ी रहिहीं।

3“मई यहूदा क लोगन क आपन घर अउ प्रदेस तजइ पर विक्स करब। लोग विदेसन में लइ जावा जइहीं। यहूदा क उ सबइ कछू लोग जउन जुद्ध में नाहीं मारा जाइ सकेन, चहिहीं कि उ पचे मार डावा गए होतेन।” इ सँदेसा यहोवा क अहइ।

#### पाप अउर सजा

4ओन लोगन स कहा, जउन यहोवा कहत ह उ इ अहइ: “तू इ सब जानत अहा कि जउन मनई गिरत ह उ फुन उठत ह। अउर जदि कउनो मनई गलत राहे पइ चलत ह तउ का उ वापस नाहीं आवत ह?”

5यहूदा क लोग गलत राह चला गवा अहई। मुला यरूसलेम क लोग गलत राह चलत ही काहे जात अहई? उ पचे आपन झूठ में बिस्सास रखत हीं। उ पचे मुइइ अउर लउटइ स इन्कार करत हीं।

6मई ओनका धियान स सुनेउँ ह, मुला उ पचे उ नाहीं कहतेन जउन फुरइ अहइ। लोग आपन पापे खातिर पछतातेन नाहीं। लोग ओन बुरे करमन पइ विचार नाहीं करतेन जेनका उ पचे किहेन ह। हर एक अपने राहे पइ वइसे ही चला जात अहइ। उ पचे जुद्ध में दउड़त भए घोड़वन क समान अहई।

7अकासे क पंछी भी काम करइ क ठीक समइ जानत हीं। सारस, कबूतर, खज्जन अउ मइना भी जानत हीं कब ओनका आपन नवे घरे में उड़िके जाब अहइ। किन्तु मोर लोग नाहीं जानतेन कि यहोवा ओनसे का कराउब चाहत ह।

8तू पचे कइसे कह सकत ह, ‘हमका यहोवा क नेम मिली अहइ। एह बरे हम बुद्धिमान अही?’ किन्तु जउन नेम क सिच्छा देत ह अहइ उहइ एका झुठलाइ दिहेस ह।

9ओन ‘चतुर लोग’ यहोवा क सिच्छा अनसुनी किहेन ह एह बरे फुरइ उ पचे असल में बुद्धिमान लोग नाहीं अहई। उ पचे ‘चतुर लोग’ जाल में फँसावा गएन। उ पचे काँप उठेन अउर लज्जित भएन।

10एह बरे मई ओनकर मेहररूअन क दूसर मनइयन क देब। मई ओनके खेते क दूसर मालिकन क दइ देब। इस्राएल क सबहि लोग जियादा स जियादा धन चाहत हीं। कम महत्त्वपूर्ण स लइके ज्यादा महत्त्वपूर्ण सबहि लोग निआवहीन धन बरे लालची अहइ। हिआँ तलक कि नबी स लइके याजक भी लबार बोलत हीं।

11नबी अउर याजक हमरे लोगन क घावन क भरइ क जतन अइसे करत हीं माना उ पचे नान्ह स घाव होई। उ पचे कहत हीं, ‘सान्ति! सान्ति! किन्तु हुआँ सान्ति नाहीं अहई।’

12ओन लोगन क आपन किए बुरे करमन बरे लज्जित होइ चाही। किन्तु उ पचे बिल्कुल लज्जित नाहीं। एह बरे उ पचे दूसर सबहि क संग गिर जाइहीं। जब मई ओनका सजा देब तउ उ पचे ठोकर खाइहीं।” यहोवा कहत ह।

13“मई आपन लोगन क इकट्ठा करइ बरे आउब्या” यहोवा कहत ह: “कउनो भी अंगूरे क बेलन में कउनो अंगूर नाहीं होइ। कउनो भी अंजीरे क पेड़न पइ कउनो अंजीर नही होइ। हिआँ तलक कि पातियन भी सूखिके झड़ि

जाइहीं। अउर मई इ सारी बातन क ओन लोगन पइ होइ देब।

14हम हिआँ खाली काहे बइठा अही? आवा, मजबूत सहरन क भाग निकरी। जदि हमार परमेस्सर यहोवा हमका मारइ ही जात अहइ, तउ हम हुअँई मरी। हम यहोवा क खिलाफ पाप किहा ह एह बरे परमेस्सर हमका पिअइ क पानी जहरीला पानी दिहेस ह।

15हम सान्ति क आसा करत रहे, किन्तु कछू भी नीक नाहीं होइ सका। हम अइसे समइ क आसा करित ह, जब उ छिमा कइ देइ। किन्तु बिपत्ति ही आइ पड़ी अहइ।

16दान क परिवार समूह क प्रदेस स हम दुस्मन क घोड़न क नथुनन क फड़फड़ावइ क आवाज सुनित ह, ओनकर टापन स पृथ्वी काँप उठी अहइ, उ पचे प्रदेस अउर एहमाँ क सारी चीजन क नस्त करइ आवा अहई। उ पचे सहर अउर एकर निवासी सबहि लोगन क जउन हुआँ रहत हीं नस्त करइ आवा अहई।

17यहूदा क लोगो, मई तू पचन्क डसइ क जहरीला साँप पठवत अहई। ओन साँपन क सम्मोहित नाहीं कीन्ह जाइ सकत। उ सबइ ही साँप तू पचन्क डसिहीं।” इ सँदेसा यहोवा क अहइ।

18परमेस्सर, मई बहोत दुःखी अउर भयभीत अहई।

19मोर लोगन क सुना। इ देस में उ पचे चारिहुँ कइँती मदद बरे गोहरावत अहई। उ पचे कहत अहई, “का यहोवा अब भी सिथ्योन में अहइ? का सिथ्योन क राजा अब भी हुआँ अहई?” किन्तु परमेस्सर कहत ह, “यहूदा क लोग, आपन देव मूरतियन क पूजा कइके मोका क्रोधित काहे करत अहा? उ पचे आपन बियर्थ बिदेसी देव मूरतियन क पूजा किहन ह।”

20लोग कहत ही, “फसल काटइ क समइ अउर गरमी क मौसम चला गवा ह किन्तु हम बचावा नाहीं जाइ सके।”

21मोर लोग बीमार अहई, एह बरे मई बीमार हई। मई एन बीमार लोगन क चिन्ता में दुःखी अउ निरास हई।

22निहचय ही, गिलाद प्रदेस में कछू दवा अहइ। निहचय ही, गिलाद प्रदेस म बैद्य अहइ। तउ भी मोरे लोगन क घाव काहे नीक नाहीं होतेन?

9 कास मोर सिर पानी में डूबा होत, अउर मोर आँखिन आँसू क झरना होतिन तउ मई आपन नस्त कीन्ह गए लोगन बरे दिन रात रोवत रहत।

2कास मोका रेगिस्तान में जगहिया मिल गइ होत जहाँ कउनो घरे में यात्री रात बितउतेन, तउ मई आपन लोगन क छोड़ सकत रहेई। मई ओन लोगन स दूर चला जाइ सकत रहेई। काहेकि उ पचे सबहि परमेस्सर क बिस्सासघाती व बिभिचारी होइ गवा अहई।

3“उ सबइ लोग आपन जीभ क उपयोग धनुस जइसा करत हीं, ओनकर मूँह स झूठ बाण क समान छूटत हीं। उ पचे पूरा देस में प्रबल होत ह, उ सबइ लोग एक क बाद दूसर करम करत हीं। उ पचे मोका नाहीं जानतेन।” यहोवा कहत ह।

4“आपन पड़ोसियन स सतर्क रहा, आपन निज भाइयन पड़ भी बिस्सास जिन करा। काहेकि हर एक भाई ठग होइ गवा अहइ। हर पड़ोसी तोहरे पीठ पाछे बात करत ह। 5हर एक मनई आपन पड़ोसी स झूठ बोलत ह। कउनो मनई फुरइ नहीं बोलत। यहूदा क लोग जीभ क झूठ बोलइ क सिच्छा दिहन ह। उ पचे तब तलक पाप किहन जब तलक कि उ पचे एतने थकेन कि लउट नहीं सकेन।

6तू धोखा क बीच मैं निवास करत ह। लोग मोका अपनावइ स इन्कार कइ दिहन।” यहोवा कहत ह।

7एह बरे सर्वसक्तीमान यहोवा कहत ह, “मई यहूदा क लोगन क परीच्छा वइसे ही करब जइसे कउनो मनई आगी मैं तपाइके कउनो धातु क परीच्छा करत ह। मोरे लगे दूसर विकल्प नहीं अहइ। मोर लोग पाप किहन ह।

8यहूदा क लोगन क जीभ तेज बाणन क तरह अहई। ओनकर मुँह स झूठ बरसत ह। हर एक मनई आपन पड़ोसी स अच्छा बोलत ह। किन्तु उ छुपे आपन पड़ोसी पइ हमला करइ क योजना बनावत ह।

9का मोका यहूदा क लोगन क एन कामन क करइ बरे सजा नहीं देइ चाही?” इ सँदेसा यहोवा क अहइ। “तू जानत ह कि मोका इ प्रकार क लोगन क सजा देइ चाही। मई ओनका उ दण्ड देब जेकर उ पचे पात्र अहई।”

10मई पर्वतन बरे फूटि फूटिके रोउब। मई खाली खेतन बरे सोक गीत गाउब। काहेकि जिअत बस्तुअन छोर लीन्ह गइन। कउनो मनई हुआँ जात्रा नहीं करत। उ जगह पइ कउनो जनावर क ध्वनि नहीं सुनाई पइ सकत। पंछी उड़ गवा अहई अउर जनावर चला गवा अहई।

11मई (यहोवा) यरूसलेम नगर क कूड़े क ढेर बनाइ देब। इ सियारन क मॉदन बनी। मई यहूदा देस क सहरन क बरबाद करब एह बरे हुआँ कउनो भी नहीं रही।”

12का कउनो मनई अइसा बुद्धिमान अहइ जउन एन बातन क समुझ सकइ? का कउनो मनई अहइ जेका यहोवा स सिच्छा मिली अहइ? का कउनो यहोवा क सँदेसा क व्याख्या कइ सकत ह? देस काहे नस्त भवा? इ एक ठू सूने रेगिस्ताने क तरह काहे कइ दीन्ह गवा जहाँ कउनो भी नहीं जात?

13यहोवा एन सवालन क जवाब दिहस। उ कहेस, “इ एह बरे भवा कि यहूदा क लोग मोर सिच्छा पइ चलब तजि दिहन। मई ओनका आपन सिच्छा दिहेउँ, किन्तु उ पचे मोर सुनइ स इन्कार किहन। उ पचे मोर उपदेसन क अनुसरण नहीं किहन।

14यहूदा क लोग आपन राह चलेन, उ पचे हठी रहेन। उ पचे लबार देवता बाल क अनुसरण किहन। ओनकर पुरखन ओनका लबार देवतन क अनुसरण करइ क सिच्छा दिहन।”

15एह बरे इस्राएल क परमेस्सर सर्वसक्तीमान यहोवा कहत ह, “मई हाली ही यहूदा क लोगन क कडुवा फल चखाउब। मई ओनका जहरीला पानी पिआउब।

16मई यहूदा क लोगन क दूसर रास्ट्रन मैं छितराइ देब। उ पचे अजनबी रास्ट्रन मैं रहिहीं। उ पचे अउर ओनकर पुरखन ओन देसन क कबहुँ नहीं जानेन। हवाँ भी मई

तरवार लिए मनइयन क ओन लोगन क मारि डावइ बरे पठाब। जब तलक उ पचे नस्त नहीं होइ जइहीं।”

17सर्वसक्तीमान यहोवा जउन कहत ह, “उ इ अहइ: “अब एन सबन्क बारे मैं सोचा। अन्वेस्टि क समइ भाड़ा पइ रोवइवाली मेहररूअन क बोलावा। ओन मेहररूअन क बोलावा जउन बिलाप करइ मैं चतुर होई।”

18लोग कहत हीं, ‘ओन मेहररूअन क हाली स आवइ अउर हमरे बरे रोवइ द्या, तब हमार आँखिन आँसू स भरिहीं अउर पानी क धारा हमरी आँखिन स फूट पड़ी।’

19जोर स रोवइ क अवाजन सिथ्योन स सुनी जाति अहई। ‘हम फुरइ बर्बाद होइ गए। हम फुरइ लज्जित अही। काहेकि हम अपने देस क तजइ दिहे ह, काहेकि हमार घर नस्त अउर बर्बाद होइ ग अहई।”

20यहूदा क मेहररूओ, अब यहोवा क सँदेसा सुना। यहोवा क मुँह स निकरे सब्दन क सुनइ बरे आपन कान खोल ल्या। यहोवा कहत ह, “आपन बिटियन क जोर स रोउब सिखाया। हर एक मेहररू क इ सोक गीत क सीख लेब चाही।”

21‘मउत हमरी खिड़कियन स चढ़िके आई अहइ। मउत हमरे महलत मैं घुसि गइ अहइ। सड़क पइ खेलइवाले हमरे बच्चन क मउत आइ गइ अहइ। सामाजिक ठउरन मैं मिलइवाले युवकन क मउत होइ गइ अहइ।’

22“ओन लोगन स कहा, ‘जउन यहोवा कहत ह, उ इ अहइ: मनइयन क ल्हास खेतन मैं गोबर स पड़ा रहिहीं। ओनकर ल्हास जमीन पइ उ फसल स पड़ा रहिहीं जेनका किसान काट डाएन ह। किन्तु ओनका बटोरइवाला कउनो नहीं होइ।”

23यहोवा कहत ह, “बुद्धिमान क आपन बुद्धिमान क डींग नहीं मारइ चाही। ताकतवर क आपन ताकत क बखान नहीं करइ चाही। धनवान क आपन धने क हवा नहीं बाँधइ चाही।

24किन्तु जदि कउनो डींग मारइ ही चाहत ह तउ ओका एन चीजन क डींग मारइ द्या: ओका इ बात क डींग मारइ द्या कि उ मोका समुझत अउर जानत ह। ओका इ बात क डींग हाँकइ द्या कि उ इ समुझत ह कि मई यहोवा हउँ। एका इ बात क हवा बाँधइ द्या कि मई कृपालु अउर न्यायी हउँ। ओका इ बात क ढिँढोरा पीटइ द्या कि मई पृथ्वी पइ अच्छे काम करत हउँ। मोका एन कामन क करइ स पिरेम अहइ।” इ सँदेसा यहोवा क अहइ।

25यहोवा कहत ह, “समइ आवत अहइ, जब मई ओन लोगन क सजा देब जउन सिरिफ तने स खतना कराए अहई।

26“मई मिस्त्र, यहूदा, एदोम, अम्मोन अउ मोआब क रास्ट्रन क अउर ओन सबहिँ लोगन क बारे मैं बातन करत अहई जउन रेगिस्ताने मैं रहत हीं जउन दाढ़ी क किनारन क बालन क काटत हीं। ओन सबहिँ देसन क लोग आपन सरीर क खतना नहीं करवाएन ह। किन्तु इस्राएल क परिवार क लोग हिरदइ स खतना क नहीं ग्रहण किहन ह, जइसे कि परमेस्सर क लोगन क करइ चाही।”

**यहोवा अउर देव मूरतियन**

**10** इस्राएल क परिवार, यहोवा क सुना। 2जउन यहोवा कहत ह, उ इ अहइ:

“अन्य रास्ट्रन क लोगन क तरह रहा। अकासे क खास संकेतन स जिन डेराअ। दूसर रास्ट्र ओन संकेतन स डेरात हीं जेनका उ पचे अकासे में लखत हीं। किन्तु तू पचन्क ओन चीजन स नाहीं डेराइ चाही।

3दूसर लोगन क रीति रिवाज ब्यर्थ अहइँ। ओनकर देव मूरतियन जंगल क लकड़ी क अलावा कछू नाहीं। ओनकर देव मूरतियन कारीगर क छैनी स बनी अहइँ।

4उ पचे आपन देव मूरतियन क सोना चाँदी स सुन्नर बनावत हीं। उ पचे आपन देव मूरतियन क हथौड़न अउर कीलन स लटकावत हीं जेहसे उ सबइ लटके रहइँ, गिर न पड़इँ।

5दूसर देसन क देव मूरतियो, ककड़ी क खेते में खड़े फूस क पुतले क समान अहइँ। उ सबइ न बोल सकत हीं, अउर न चल सकत हीं। ओनका उठाइके लइ जाब पड़त ह काहेकि उ सबइ चल नाहीं सकतिन। ओनसे जिन डेराअ। उ सबइ न तउ तू पचन्क चोट पहुँचाइ सकत हीं अउर न ही कउनो लाभ।”

6यहोवा तू जइसा कउनो दूसर नाहीं अहइ। तू महान अहा। तोहार नाउँ महान अउर सक्तिपूर्ण अहइ।

7परमेस्सर, हर एक मनई क तोहार सम्मान करना चाही। तू सबहिं रास्ट्रन क राजा अहा। तू ओनके सम्मान क पात्र अहा। रास्ट्रन में अनेक बुद्धिमान मनई अहइँ। किन्तु कउनो मनई तोहरे समान बुद्धिमान नाहीं अहइ।

8दूसर रास्ट्रन क सबहिं लोग बेहुदा अउर मूरख अहइँ। ओनकर देवतन क सिच्छा केवल लकड़ी क टुकड़ा अहइँ।

9उ पचे आपन मूरतियन क तर्सीस नगर क चाँदी अउर उफाज नगर क सोने क उपयोग कइके बनावत हीं। उ सबइ देव मूरतियन बढइयन अउ सुनारन क जरिये बनाई जात हीं। उ पचे ओन देव मूरतियन क अच्छा किसिम क कीमती नीले अउर बैंगनी वस्त्र पहिरावत हीं। इ सबइ “कुसल कारीगरस” दुआरा बनाए गए रहेन।

10किन्तु केवल यहोवा ही सच्चा परमेस्सर अहइ। उ एकमात्र परमेस्सर अहइ जउन चेतन अहइ। उ सास्वत सासक अहइ। जब परमेस्सर किरोध करत ह तउ धरती काँप जात ह। रास्ट्रन क लोग ओकरे किरोध क रोक नाहीं सकतेन।

11यहोवा कहत ह, “ओन लोगन क इ सँदेसा द्या: ‘ओन लबार देवतन पृथ्वी अउ सरग नाहीं बनाएन अउर उ पचे देवता नस्त कइ दीन्ह जइहीं, अउर पृथ्वी अउर सरग स लुप्त होइ जइहीं।’”

12उ परमेस्सर एक ही अहइ जउन आपन सक्ती स पृथ्वी बनाएस। परमेस्सर आपन बुद्धि क उपयोग किहस अउर संसार क रचना कइ डाएस। आपन समुझ क अनुसार परमेस्सर पृथ्वी क ऊपर अकास क फइलाएस।

13परमेस्सर कइकत बिजली बनावत ह अउर उ अकास स बड़े जल क बाढ़ क सिरावत ह। उ पृथ्वी क हर एक स्थान पड़, अकासे में मेघ क उठावत ह। उ बिजली क

बर्खा क साथ पठवत ह। उ आपन गोदामन स पवन क निकारत ह।

14लोग एतना बेवकूफ अहइँ। सुनार ओन देव मूरतियन स मूरख बनावे गएन ह जेनका उ पचे खुद बनावेन ह। इ सबइ मूरतियन झूठ क अलावा कछू नाहीं अहइँ, उ सबइ निस्क्रिय अहइँ।

15उ सबइ देव मूरतियन कउनो काम क नाहीं। उ सबइ कछू अइसी अहइँ जेनकर मजाक उड़ावा जाइ सकइ। निआउ क समइ आवइ पड़ उ सबइ देव मूरतियन नस्त कइ दीन्ह जइहीं।

16किन्तु याकूब क परमेस्सर ओन देव मूरतियन क समान नाहीं अहइ। परमेस्सर सबहिं वस्तुअन क सृस्टि किहस, अउर इस्राएल उ परिवार अहइ जेका परमेस्सर आपन लोग क रूप में चुनेस। परमेस्सर क नाउँ, “सर्वसक्तीमान यहोवा” अहइ।

**बिनास आवत अहइ**

17तू पचे जउन कि सहर रहत ह आपन सबहिं चिजियन जमा कइ ल्या अउर जाइ क तइयार हो जा।

18यहोवा कहत ह, “इ समय मई यहूदा क लोगन क इ देस स बाहरे लोकाइ देब। मई ओनका पीड़ा अउ परेसानी देब। मई अइसा करब जेहसे उ सबइ पाठ सीख सकइँ।”

19ओह, मई बुरी तरह घायल अहउँ। मई ठीक नाहीं होइ सकत। तउ भी मई खुद स कहेउँ, “इ मोर बेरामी अहइ, मोका एहसे पीड़ित होइ चाही।”

20मोर डेरा बर्बद होइ गवा। डेरे क सारी रस्सियन टूट गइन ह। मोर बच्चन मोका तजि गएन। उ पचे चला गएन। कउनो मनई मोर डेरा लगावइ क नाहीं बचा ह। कउनो मनई मोरे बरे सरण ठउर बनावइ क नाहीं बचा ह।

21गइरियन (प्रमुख) मूर्ख अहइँ। उ पचे यहोवा क पावइ क जतन नाहीं करतेन। उ पचे बुद्धिमान नाहीं अहइँ, एह बरे ओनकर रेवइन (लोग) बिखर गइन अउर नस्त होइ गइन ह।

22धियान स सुना। एक कोलाहल, कोलाहल उत्तर स आवत अहइ। इ यहूदा क नगरन क नस्त कइ देइ। यहूदा एक सुनसान रेगिस्तान बन जाइ। इ गीदइन क माँद बन जाइ।

23हे यहोवा, मई जानत हउँ कि मनई फुरइ आपन जिन्नगी क मालिक नाहीं अहइ। लोग फुरइ आपन भविस्स क योजना नाहीं बनाइ सकत हीं। लोग फुरइ नाहीं जानतेन कि कइसे ठीक जिअत रहा जाइ।

24हे यहोवा, हमार अनुसान करा, किन्तु निआव स। किरोध में हमका सजा जिन द्या। नाहीं तउ तू मोका नस्त कइ देब्या।

25जदि तू कोहान अहा तउ दूसर रास्ट्रन क सजा द्या। उ पचे, न तोहका जानत हीं न ही तोहार सम्मान करत हीं। उ सबइ लोग तोहार आराधना नाहीं करतेन। ओन रास्ट्रन याकूब क परिवारे क नस्त किहन। उ पचे इस्राएल क पूरी तरह बर्बद कइ दिहन। उ पचे इस्राएल क जन्मभूमि क नस्त किहन।

## करार टूटी

**11** इ उ सँदिसा अहइ जउन यिर्मयाह क मिला। यहोवा क इ सँदिसा आवा। 2“यिर्मयाह इ करार क सब्दन क सुना। एन बातन क बारे में यहूदा क लोगन स कहा। इ सबइ बातन यरूसलेम में रहइवाले लोगन स कहा। 3ओन लोगन स कहा: इ उ अहइ, जउन इस्राएल क परमेस्सर यहोवा कहत ह, ‘जउन मनई इ करार क पालन नहीं करी ओह सरापि जाई।’ 4इ उ करार रही जेका मई तोहरे पुरखन क संग किहेउँ, जब मई ओनका मिस्त्र स बाहेर लिआएउँ। मिस्त्र अनेक मुसीबतन क जगह रही इ लोहा क टेघराइ देइवाली गर्भ भट्टी क तरह रही। मई ओन लोगन स कहेउँ, “मोर आग्या माना अउर उ सब करा जेकर मई तू पचन्क आदेस देउँ। यदि तू पचे इ करब्या तू मोर लोग होब्या अउर मई तोहार पचन्क परमेस्सर होब।”

5“मई इ तोहार पचन्क पुरखन क दीन्ह गए वचन क पूरा करइ बरे करत रहेउँ ह। मई ओनका बहोत उपजाउ भुइँया देइ क प्रतिग्या किहेउँ, अइसी भुइँया जेहमाँ दूध अउर सहद की नदी बहत अहइ अउर आजु तू पचे उ देस में रहत अहा।” मई जवाब दिहेउँ, “हे यहोवा, आमीन।”

6यहोवा मोहसे कहेस, “यिर्मयाह, इ सँदिसा क सिच्छा यहूदा क नगरन अउर यरूसलेम क सड़कन पइ द्या। सँदिसा इ अहइ, “इ करार क बातन क सुना अउर तब ओन नेमन क पालन करा। 7मई तोहरे पचन्क पुरखन क मिस्त्र देस स बाहेर लिआवइ क समइ एक चिताउनी दिहे रहेउँ। मई ओनसे आपन आग्या क पालन करइ बरे कहेउँ। 8किन्तु तोहरे पचन्क पुरखन मोर एकउ न सुनेन। उ पचे हठी रहने अउर उहइ किहन जउन ओनकर आपन बुरे हिरदय चाहेन। तउ मई उ सबइ बिपतियन जउन मोर करार में लिखा भवा ह ओह पइ लाएस, जउन कि मोर अवग्या करइ स मिलइ चाही जे उ पचे किहेस ह।”

9यहोवा मोहसे कहेस, “यिर्मयाह, मई जानत हउँ कि यहूदा क लोग अउर यरूसलेम क निवासी लोग गुप्त जोजनन बनाइ राखेन ह। 10उ सबइ लोग वइसे ही पाप करत अहइ जेनका ओनकर पुरखन किहन ह। ओनकर पुरखन मोर सँदिस क सुनइ स इन्कार किहेन। उ पचे दूसर देवतन क अनुसरण किहन अउर ओनका पूजेन। इस्राएल क परिवार अउर यहूदा क परिवार उ करार क तोड़ेन ह जेका मई ओनके पुरखन क संग किहे रहेउँ।”

11एह बरे यहोवा कहत ह: “मई यहूदा क लोगन पइ हाली ही भयंकर विपतियन ढाउब। उ पचे बच नहीं पइहीं अउर जब उ पचे मदद बरे मोका गोहरइहीं। मई ओनकर एक न सुनब। 12यहूदा क नगरन क लोग अउर यरूसलेम नगर क लोग जइहीं अउर आपन देव मूरतियन स पराथना करिहीं। उ सबइ लोग ओन देव मूरतियन क सुगन्धि यहूदा धूप वास्त ही। किन्तु उ सबइ देव मूरतियन क लोगन क मदद नहीं कइ पइहीं जब उ भयंकर विपति क समइ आइ।

13“यहूदा क लोगो, तोहरे पचन्क लगे बहोत स देवमूरतियन अहइ, हुआँ ओतनी देवमूरतियन अहइ जेतना यहूदा नगर में अहइ। तू पचे उ धिनौनी बाल क पूजा बरे बहोत स बेदियन बनाइ राख्या ह यरूसलेम में जेतनी सड़कन

अहइ ओतनी ही वेदियन अहइ। 14यिर्मयाह, जहाँ तलक तोहार बात अहइ, यहूदा क एन लोगन बरे पराथना न करा। ओनके बरे याचना न करा। मई ओनका नहीं सुनब जब उ कस्ट में रहिहीं अउ मोहसे मदद बरे गोहारही।

15“मोर प्रिया (यहूदा) मोरे घरे में काहे अहा? ओका हुवाँ रहइ क अधिकार नहीं अहइ। उ बहोत स बुरे काम किहेन ह, यहूदा का तू सोचति अहा कि खास प्रतिग्यन अउर पसु बलि तोहका बर्बाद होइ स बचाइ लेइहीं? का तू आसा करति अहा कि तू ओका बलि भेंट कइके सजा पावइ स बच जाबिउ?”

16यहोवा तोहका एक ठु नाउँ दिहे रहा। उ तोहका हरा भरा जैतून क बृच्छ कहे रहा जेकर सुन्दरता निहारइ क जोग्य अहइ किन्तु एक प्रबल आँधी क गरज क संग, यहोवा उ बृच्छ क आगी में झुलसाई देइ अउर एकर डानस जरि जइहीं।

17सर्वसक्तीमान यहोवा तोहका रोपेस, अउर उ इ घोसना किहेस ह कि तोहे पइ बर्बादी डाउब्या। काहेकि इस्राएल क रास्ट्र अउर यहूदा क परिवार बुरे करम किहेन ह। उ पचे बाल क बलि भेंट कइके मोका क्रोधित किहेन ह।”

## यिर्मयाह क खिलाफ बुरी जोजनन

18यहोवा मोका देखाएस कि अनातेन क मनई मोरे खिलाफ सड्यंत्र करत अहइ। यहोवा मोका उ सब देखाएस जउन उ पचे करत अहइ। एह बरे मई जानेउँ कि उ पचे मोरे खिलाफ रहेन। 19जब यहोवा मोका देखाएस कि लोग मोरे विरुद्ध अहइ एकरे पहिले मई उ भोले मेमने क समान रहेउँ जउन काट दीन्ह जाइ क प्रतीच्छा में होइ। मई नहीं समझत रहेउँ कि उ पचे मोरे खिलाफ अहइ। उ पचे मोरे बारे में इ कहत रहेन: “आवा, हम लोग पेड़ अउर ओकर फल क नस्त कइ देइ। आवा हम ओका मारि डाइ। तब लोग ओक बिसरि जइहीं।” 20किन्तु यहोवा तू एक निआइ निआवाधीस अहा। तू लोगन क हिरदय अउर मन क परीच्छा करइ जानत अहा। मई आपन तर्कन क तोहरे समन्वा प्रस्तुत करब अउर मई तोहका ओनका सजा देइ क कहब जेकर उ पचे पात्र अहइ।

21अनातेन क लोग यिर्मयाह क मार डावइ क जोजना बनावत रहेन। ओन लोग यिर्मयाह स कहेन, “यहोवा क नाउँ भविस्सवाणी न करा वरना हम तोहका मार डाउब।” यहोवा अनातोत क ओन लोगन क बारे में निर्णय लिहस। 22सर्वसक्तीमान यहोवा कहेस, “मई हाली ही अनातोत क ओन लोगन क सजा देब। ओनकर नउजवान जुद्ध में मारा जइहीं। ओनकर पूत अउर बितियन भूखन मरिहीं। 23अनातोत नगर में कउनो भी मनई नहीं बची। कउनो मनई जिअत नहीं रही। मई ओनका सजा देब। मई ओनके संग कछू बुरा घटित होइ देब।”

## यिर्मयाह परमेस्सर स सिकाइत करत ह

**12** यहोवा। मई तोहसे तर्क करत हउँ, तू सदा सही निकरत ह। किन्तु मई तोहसे ओन सब क बारे में पूछइ चाहत हउँ जउन सही नहीं लगतिन। दुट्ट लोग



सफल काहे अहइ? जउन तोह पइ बिस्सास नाही करतेन, ओनकर जीवन ऐतना सुखी काहे अहइ?

2तू ओन दुट्ट लोगन क हिआँ बसाया ह। जउन मजबूत जरवाले पौधे अहईँ जउन बढ़त अउ फल देत हीं। आपन मूँह स उ पचे तोहका आपन नजदीकी अउर प्रिय कहत हीं। किन्तु आपन हिरदइ स उ पचे असल मँ तोहसे बहोत दूर अहईँ।

3मुला मोर यहोवा, तू मोरे हिरदइ क जानत ह। तू मोका अउर मोरे मन क लखत अउर परखत अह, मोर हिरदइ तोहरे संग अहइ। ओन दुट्ट लोगन क मारी जाइवाली भेड़ी क नाईँ घसीटा। बलि दिवस बरे ओनका चुना।

4कब तलक भुईया पियासी पड़ी रहब? घास कब तलक झुरान अउ मरी रही? इ भुईया क जनावर अउर पंछी मर चुका अहईँ अउर उ दुट्ट लोगन क अपराध अहइ। काहेकि उ सबइ दुट्ट लोग किहा, “उ हम लोगन क अन्त नाही लखिहीं।”

### परमेस्सर क यिर्मयाह क जवाब

5“यिर्मयाह, जदि तू मनइयन क गोड़ दौड़ मँ थक जात ह तउ तू घोड़न क मुकाबले मँ कइसे दउड़ब्या? जदि तू सुरच्छित देस मँ थक जात ह तउ तू यरदन नदी क किनारन पइ उहइ भयंकर कँटीली झाड़ियन मँ पहाँचिके का करब्य?

6इ सबइ लोग तोहार आपन भाईँ अहईँ। तोहरे आपन परिवार क सदस्य तोहरे खिलाफ योजना बनावत अहईँ। तोहरे आपन परिवार क लोग तोह पइ चिचियात अहईँ। जदि उ सबइ मीत जइसा बोलईँ, ओन पइ बिस्सास जिन करा।”

### यहूदा आपन लोगन अर्थात यहूदा क तजत ह

7“मईँ (यहोवा) आपन घर तजि दिहे हउँ। मईँ आपन बिरासत अस्वीकार कइ दिहे हउँ। मईँ जेहसे (यहूदा) पियार किहे हउँ, ओका ओकरे दुस्मनन क दइ दिहे हउँ।

8मोर आपन लोग मोरे बरे जंगली सेर बन गवा अहईँ। उ पचे मोह पइ गरजत हीं, एह बरे मईँ ओनसे घिना करत हउँ।

9मोर आपन लोग गीधन स घेरा भवा, मरत भवा जनावर बन गवा अहईँ। उ सबइ पंछी ओह पइ मँडरात अहईँ। जंगली जनावरो आवा। अगवा बढ़ा, खाइ क कछू पावा।

10अनेक गड़रियन मोरे अंगूरे क खेतन क नस्त किहेन ह। अउ मोरे खेत क पौधन क रौँदेन ह। ओन गड़रियन मोर सुन्नर खेत क सुनसान रेगिस्तान मँ बदलेन ह।

11उ पचे मोरे खेत क रेगिस्तान मँ बदल दिहन ह। इ झुराइ गवा अउर मरि गवा। कउनो भी मनईँ हुवाँ नाही रहत। पूरा देस ही सुनसान रेगिस्तान अहइ। उ खेते क देखभाल करइवाला कउनो मनईँ नाही बचा ह।

12अनेक फउजी ओन सूनी पहाड़ियन क रौँदत गाएन ह। यहोवा ओन फउजन क उपयोग उ देस क सजा देइ बरे किहस। समस्त देस बाबाँद रेगिस्तान अहइ, किन्तु एकर देख-रेख करइवाला कउनो नाही अहइ।

13लोग गोहूँ बोइहीं, किन्तु उ पचे सिरिफ काँटा ही कटिहीं। उ सबइ बहोत जियादा थकइ तलक काम करिहीं,

किन्तु उ पचे आपन सारे कामन क बदले कछू भी नाही पइहीं। उ पचे आपन फसल पइ लजाइ जइहीं। यहोवा क किरोध इ सब कछू किहस।”

### इस्त्राएल क पड़ोसियन क यहोवा क बचन

14यहोवा जउन कहत ह, उ इ अहइ: “मईँ तू पचन्क बताउब कि मईँ इस्त्राएल देस क चारिहुँ कइँती रहइवाले सबहिँ लोगन बरे का करब। उ सबइ लोग बहोत दुट्ट अहईँ। उ पचे उ देस क नस्त किहेन जेका मईँ इस्त्राएल क लोगन क दिहे रहेउँ। मईँ ओन दुट्ट लोगन क उखाड़ब अउर ओनके देस स ओनका बाहेर लोकाइ देब। अउ मईँ यहूदा क ओकर बीच स उखाड़ देब। 15किन्तु ओन लोगन क ओनके देस स उखाड़ फेकइ क पाछे मईँ ओनके बरे अफसोस करब। मईँ हर एक परिवार क ओनकर आपन सम्पति अउर आपन भुईया पइ वापस लिआउब। 16मईँ चाहत हउँ कि उ सबइ लोग अब मोरे लोगन क तरह रहब सीख लेइँ। बीते समइ मँ ओन लोग हमरे लोगन क सपथ खाइ बरे बाल क नाउँ क उपयोग करब सिखाएन। अब, मईँ चाहत हउँ कि उ सबइ लोग सीखइ ल्या कि मोर नाउँ कइसे उपयोग करइ होइ। मईँ चाहत हउँ कि उ सबइ लोग कहइँ, ‘काहेकि यहोवा सास्वत अहइ।’ जदि उ सबइ लोग वइसा करत हीं तउ मईँ ओनका सफल होइ देब अउर ओनका आपन लोगन क बीच रहइ देब। 17किन्तु जदि कउनो रास्टर मोरे सँदिसा क अनसुना नाही करत ह तउ मईँ ओका पूरी तरह नस्त कइ देब।” यहोवा कहत ह।

### अधो वस्त्र

13 जउन यहोवा मोहसे कहेस उ इ अहइ: “यिर्मयाह, आवा अउर एक ठु सन (कीमती सूती कपड़ा) क अधोवस्त्र बेसहा। तब एक आपन कमर मँ लपेटा। अधोवस्त्र क गीला न होइ द्या।”

2एह बरे मईँ एक ठु सन क अधोवस्त्र बेसहेउँ, जइसा कि यहोवा करइ क कहे रहा अउर मईँ एका आपन कमर मँ लपेटेउँ। 3तब यहोवा क सँदिसा मोरे लगे दुबारा आवा।

4सँदिसा इ रहा: “यिर्मयाह आपन बेसहा गए अधोवस्त्र क ल्या अउर परात क जा। अधोवस्त्र क चट्टानन क दराइ मँ छिपाइ द्या।”

5एह बरे मईँ परात गएउँ अउर जइसा यहोवा कहे रहा, मईँ अधोवस्त्र क हुवाँ छुपाइ दिहेउँ। 6कइउ दिनन बाद यहोवा मोहसे कहेस, “यिर्मयाह, अब तू परात जा। उ अधोवस्त्र क ल्या जेका मईँ छुपावइ क कहे रहेउँ।”

7एह बरे मईँ परात क गएउँ अउर मईँ खोदके अधोवस्त्र क निकारेउँ, मईँ ओका चट्टानन क दरार स निकारेउँ जहाँ मईँ ओका छुपाइ राखे रहेउँ। किन्तु अब मईँ अधोवस्त्र क पहिर नाही सकत रहेउँ काहेकि उ गलि चुका रहा, उ कउनो भी काम क नाही रह गवा रहा।

8तब यहोवा क सँदिसा मोका मिला। 9यहोवा जउन कहेस, उ इ अहइ: “अधोवस्त्र गल चुका बा अउर कउनो भी काम क नाही रह गवा ह। इहइ प्रकार मईँ यहूदा अउर यरूसलेम क घमण्डी लोगन क बबाँद करब। 10उ पचे मोरे

सँदिसन क सुनइ स इन्कार किहेन ह। उ पचे हठी अहई अउर उ पचे सिरिफ उ करत हीं जउन उ पचे करइ चाहत हीं। उ पचे दूसर देवतन क अनुसरण अउर ओनकर पूजा करत हीं। उ पचे यहूदा क लोग इ सने क अधोवस्त्र क तरह होइ जइहीं। उ पचे बर्बाद होइहीं अउर कउनो काम क नहीं रइहीं।”

11 अधोवस्त्र मनई क कमर स कसिके लपेटा जात ह। उहइ तरह मई पूरे इस्त्राएल अउर यहूदा क परिवारन क आपने चारिहूँ कइँती लपेटेउँ।” इ सँदिसा यहोवा क हिआँ स अहइ। मई वइसा एह बरे किहेउँ कि उ सबइ लोग मोर लोग होइहीं। तब मोर लोग मोका जस, तारीफ अउर प्रतिष्ठा प्रदान करिहीं। किन्तु मोर लोग मोर एक नहीं सुनेन।”

### यहूदा क चेताउनियन

12 “यिर्मयाह, यहूदा क लोगन स कहा: ‘इस्त्राएल क परमेस्सर यहोवा जउन कहत ह, उ इ अहइ: ‘हर एक दाखरस क मसक दाखरस स भरी जाइ चाही। उ सबइ लोग हँसिहीं अउर तोहसे कहिहीं, ‘निहचय ही हम जानित ह कि हर एक दाखरस क मसक दाखरस स भरी जाइ चाही।’ 13 तब तू ओनसे कहब्या, ‘यहोवा जउन कहत ह उ इ बाटइ: मई इ देस क हर एक निवासी क ओन राजा क जउन दाऊद क सिंहासने पइ बइठत हीं, याजकन, नबियन अउर सबहिं लोगन क मदमत क नाई बेसहारा करब। 14 मई यहूदा क लोगन क ठोकर खाइ अउर एक दूसरे पइ महाराइ देब। पिता अउ पूत एक दूसर पइ भहरइहीं।’ इ सँदिसा यहोवा क अहइ। “मई ओनके बरे अफसोस नहीं करब अउर न ओन पइ द्या। मई करुणा क, यहूदा क लोगन क नस्ट करइ स रोकइ नहीं देब।”

15 सुना अउ धियान द्या। यहोवा तू पचन्क सँदिस दिहे अहइ। घमण्डी जिन बना।

16 आपन परमेस्सर यहोवा क सम्मान करा, ओकर स्तुति करा नहीं तउ उ अँधियारा लाई। अँधिरी पहाड़ियन पइ लइखड़ाइ अउर गिरइ स पहिले ओकर स्तुति करा। यहूदा क लोगो, तू पचे प्रकास क आसा करत अहा। किन्तु यहोवा प्रकास क घोर अँधियारा मँ बदली। यहोवा प्रकास क बहोत गहिर अँधियारा स बदल देई।

17 यहूदा क लोगो, जदि तू पचे यहोवा क अनसुनी करत अहा तउ मई छुपि जाब अउर रोउब। तोहार पचन्क घमण्ड मोका रोवाई। मई फूटि-फूटिके रोउब। मोर अँखिन आँसुअन स भरि जइहीं। काहेकि यहोवा क रेवड़ धरी जाइ।

18 इ सबइ बातन राजा अउर ओकर रानी स कहा, “आपन सिंहासनन स उतरा। तोहार पचन्क सुन्नर मुकुट तोहरे पचन्क मँडन स गिर चुका अहई।”

19 नेगव रेगिस्ताने क नगरन मँ ताला पइ चुका अहइ, ओनका कउनो खोल नहीं सकत। यहूदा क लोगन क देस निकारा दिया जाइ चुका बाटइ। ओन सबहिं क बंदी क रूप मँ लइ जावा गवा अहइ।

20 यरूसलेम, धियान स लखा। दुस्मनन क उत्तर स आवत लखा। तोहार पचन्क रेवड़ कहाँ अहई? परमेस्सर तू पचन्क

सुन्नर रेवड़ दिहे रहा। तू पचन्स उ रेवड़ क देखरेख क आसा रही।

21 जब यहोवा उ रेवड़ क हिसाब तू पचन्स माँगी तउ तू पचे ओका का जवाब देब्या? तू पचन्स आसा रही कि तू पचे परमेस्सर क बारे मँ लोगन क सिच्छा देब्या। तोहरे पचन्क नेता लोगन स लोगन क अगुवाई करइ क आसा रही। लेकिन उ पचे इ कारज नहीं किहन। एह बरे तू पचन्क बहोत दुःख व पीरा भुगतइ होइ।

22 तू पचे आपन स पूछ सकत अहा, “इ बुरी बिपति मोह पइ काहे आइ?” इ सबइ बिपतियन तोहरे पचन्क अनेक अपराधन क कारण आई। तू पचन्क निर्वस्त्र कीन्ह गवा अउर तोहार संग हिसंक अउर सरमनाक बेउहार कीन्ह गवा।

23 एक ठु करिया मनई आपन चमड़ी क रंग बदल दिहस। अउर कउनो चीता आपन धब्बन नहीं बदल सकत। ओ यरूसलेम, उहइ तरह तू भी बदल नहीं सकत्या, नीक काम नहीं कइ सकत्या। तू सदा ही बुरे करम करत अहा।

24 मई तू पचन्क आपन घर तजइ क मजबूर करब, जब तू पचे पराब्या तब हर दिसा मँ दउड़ब्या। तू पचे उ भूसे क तरह होब्या जेका रेगिस्ताने क हवा उड़ाइ लइ जात ह।

25 इ सबइ उ सबइ चीजन अहई जउन तोहरे पचन्क संग होइहीं, इ मोर जोजना क तोहार पचन्क हींसा अहइ।” इ सँदिसा यहोवा क अहइ। “इ काहे होइ? काहेकि तू पचे मोका बिसरि गया, तू पचे लबार देवतन पइ बिस्सास किहा।

26 यरूसलेम मँ, मई तोहरे पचन्क वस्त्र उतारब लोग तोहार नंगा होइ के देखिहीं अउर तू पचे लज्जा स गड़ जाब्या।

27 मई ओन खउफनाक कामन क लखेउँ जउन तू किहा। मई तोहका हँसत अउर आपन पिरिमियन क संग तने क सम्बन्ध करत लखेउँ। मई जानत हउँ कि तू रण्डी क तरह दुस्कर्म किहे ह। मई तोहका पहाड़ियन अउर खेतन मँ लखेउँ ह। यरूसलेम, इ तोहरे बरे बहोत बुरा होइ। तू कब तलक आपन गंदे पापन क करत रहब्या?”

### सूखा पड़ब अउर लबार नबी

14 इ यिर्मयाह क सूखा क बारे मँ यहोवा क सँदिस अहइ:

2 “यहूदा रास्ट्र ओन लोगन बरे रोवत अहइ जउन मरि गवा अहई। यहूदा नगर क लोग दुर्बल, अउर दुर्बल होत जात अहई। उ सबइ लोग भुइँया पइ लोटिके सोक मनावत हीं। यरूसलेम नगर स एक चौख परमेस्सर क लगे पहोंचत अहइ।

3 लोगन क प्रमुख आपन सेवकन क पानी लिआवइ बरे पठवत हीं। सेवक कुंडन पइ जात हीं। किन्तु उ पचे कछू भी पानी नहीं पउतेन। सेवक खाली बर्तन लइके लउटत हीं। एह बरे उ पचे लज्जित अउर परेसान अहई। उ पचे अपने मँडू क लज्जा स ढोंकि लेत हीं।

4 कउनो भी फसल बरे भूइँया तइयार नहीं करत। भूइँया पइ बर्खा नहीं होत, किसान हतास अहई। एह बरे उ पचे आपन सिर लज्जा स ढोंपि लेत हीं।

5हिआँ तलक कि हिरनी भी आपन नवा जन्मत बच्चा क खेत में अकेल्ला छोड़ देत ह। उ वइसा करत ह काहेकि हुआँ घास नहीं अहइ।

6जंगली गदहन नंगी पहाड़ी पइ खड़ा होत हीं। उ पचे सियार क तरह हवा सूँघत हीं। किन्तु ओनकर आँखिन क कउनो चरइ की चीज नहीं देखाइ पड़त। काहेकि चरइ जोगग हुवाँ कउनो पौधन नहीं अहइँ।

7“हम जानित ह कि इ सब कछू हमरे अपराध क कारण अहइ। अउर हम पचे एकर अधिकारी अहइ किन्तु हे यहोवा, आपन अच्छे नाउँ बरे हमार मदद करा। हम अंगीकार करित ह कि हम लोग तोहका कइउ दाई तजा ह। हम लोग तोहरे खिलाफ पाप किहा ह।

8परमेस्सर, तू इस्त्राएल क आसा अहा। विपत्ति क दिनन में तू इस्त्राएल क बचाया। किन्तु अब अइसा लागत ह कि तू इ देस में अजनबी अहा। अइसा प्रतीत होत ह कि तू उ यात्री अहा जउन एक रात हिआँ ठहरा होइ।

9तू उ मनई क समान लगत अहा जेह पइ अचानक हमला कीन्ह गवा होइ। तू उ फउजी सा लगत अहा जेकरे लगे कउनो क बचावइ क ताकत न होइ। किन्तु हे यहोवा, तू हमरे संग अहा। हम तोहरे नाउँ स गोहरावा जात अही, एह बरे हमका बेसहारा जिन तजा।”

10यहूदा क लोगन क बारे में यहूदा जउन कहत ह, उ इ अहइ: “यहूदा क लोग फुरइ मोका तजइ में खुस अहइँ। उ सबइ लोग मोका तजब अब भी बन्द नहीं करतेन। एह बरे अब यहोवा ओनका नहीं अपनाई। अब यहोवा ओनके बुरे करमन क याद राखी जेनका उ पचे करत हीं। यहोवा ओनका ओनके पापन बरे सजा देइ।”

11तब यहोवा मोहसे कही, “यिर्मयाह, यहूदा क लोगन बरे कछू अच्छा होइ, एकर पराथना जिन करा।” 12यहूदा क लोग उपवास कइ सकत हीं अउर मोहसे पराथना कइ सकत हीं। मुला मईँ ओनकर पराथनन नहीं सुनब। हिआँ तलक कि इ सबइ लोग होमबलि अउर अन्न भेंट चढ़इहीं तउ भी मईँ ओन लोगन क नहीं अपनाउब। मईँ यहूदा क लोगन क जुद्ध में नस्त करब। मईँ ओनकर खइया क छोरे लेब अउर यहूदा क लोग भूखन मरिहीं अउर मईँ ओनका भयंकर बीमारियन स बर्बाद करब।

13किन्तु मईँ यहोवा स कहेउँ, “हमार सुआमी यहोवा। नबी लोगन स कछू अउर कहत रह्या। उ पचे यहूदा क लोगन स कहत रहेन, “तू लोग दुस्मन क तरवार स दुःख नहीं उठउब्या। तू लोगन क कबहुँ भूख स कस्त नहीं होई। यहोवा तू पचक इ देस में सात्ति देइ।”

14तब यहोवा मोहसे कहेस, “यिर्मयाह, उ सबइ नबी मोरे नाउँ पइ झूठा उपदेस देत अहइँ। मईँ ओन नबियन क नहीं पठएँ मईँ ओनका कउनो आदेस या कउनो बात नहीं किहेउँ उ सबइ नबी लबार कल्पनन, ब्यर्थ जादू अउर आपन झूठे दर्सन क उपदेस करत अहइँ। 15एह बरे ओन नबियन क बारे में जउन मोरे नाउँ पइ उपदेस देत अहइँ, मोर कहब इ अहइ। मईँ ओन नबियन क नहीं पठएँ। ओन नबियन कहेन, ‘कउनो भी दुस्मन तरवार स इ देस पइ हमला नहीं करी। इ देस में भुखमरी कबहुँ नहीं होइ।’ उ

सबइ नबी भूखन मरिहीं अउर दुस्मन क तरवारे घाट उतारा जइहीं। 16अउर जउन लोगन स उ सबइ नबी बात करत हीं यरूसलेम क गलियन पइ लोकाइ दीन्ह जइहीं। उ सबइ लोग भूखन मरिहीं अउर दुस्मन क तरवारे क घाट उतारा जइहीं। कउनो मनई ओनका या ओनकर मेहररूअन या ओनकर पूतन या ओनकर बिटियन क दफनावइ बरे जिन्दा नहीं रही। मईँ ओनका ओनकइ बुरा करम बरे सजा देब।

17“यिर्मयाह, इ सँदेसा यहूदा क लोगन क द्या: ‘मोर आँखिन आँसुअन स भरी अहइँ। मईँ बिना रूके दिन-रात रोउब। मईँ आपन कुँमारी बिटिया बरे रोउब। मईँ आपन लोगन बरे रोउब। काहेकि कउनो ओन पइ प्रहार किहस अउर ओनका कुचर डाएस। उ पचे बुरी तरह घायल कीन्ह गवा अहइँ।

18जदि मईँ खेत में जात हउँ तउ मईँ ओन लोगन क लखत हउँ जउन तरवार क घाट उतारि गवा अहइँ। जदि मईँ नगर में जात हउँ मईँ बहोत स बीमारियन लखत हउँ, काहेकि लोगन क लगे भोजन नहीं अहइ।’ याजक अउ नबी दुइनउँ ही आपन सेवन क बेचत हीं, किन्तु उ ना समझ अहइ।”

19“हे यहोवा, का तू पूरी तरह यहूदा रास्ट्र क तजि दिहा ह? यहोवा, का तू सिथ्योन स घिना करत ह? तू एका बुरी तरह स चोट किहा ह कि हम फुन स नीक नहीं बनाइ जाइ सकित। तू वइसा काहे किहा? हम सात्ति क आसा रखत रहे, किन्तु कछू भी नीक नहीं भवा। हम लोग घाव भरइ क समइ क प्रतीच्छा करत रहे, किन्तु सिरिफ त्रास आवा।

20हे यहोवा, हम जानित ह कि हम बहोत बुरा लोग अही, हम जानित ह कि हमरे पुरखन बुरे करम किहेन। हाँ, तोहरे खिलाफ पाप किहा।

21हे यहोवा, आपन नाउँ क अच्छाई बरे तू हमका धक्का दइके दूर न करा। आपन सम्माननीय सिंहासने क गौरव क न हटावा। हमरे संग कीन्ह गइ करार क याद राखा अउर एका जिन तोड़ा।

22विदेसी देवमूरतियन में बर्खा लिआवइ क सक्ती नहीं अहइ, अकासे में पानी बरसावइ क सक्ती नहीं अहइ। सिरिफ तू ही हमार आसा अहा, एक मात्र तू ही अहा जउन इ सब कछू बनाया ह।”

**15** यहोवा मोहसे कहेस, “यिर्मयाह, जदि मूसा अउ समूएल भी यहूदा क लोगन बरे पराथना करइवाले होतेन, तउ भी मईँ एन लोगन बरे अफसोस नहीं करत। यहूदा क लोगन क मोहसे दूर पठवा। ओनसे जाइ क कहा। 2उ सबइ लोग तोहसे पूछ सकत हीं, ‘हम लोग कहाँ जाब?’ तू ओनसे कहा, यहोवा जउन कहत ह, उ इ अहइ:

“मईँ कछू लोगन क मरइ बरे निहचित किहेउँ ह। उ सबइ लोग मरिहीं। मईँ कछू लोगन क तरवार क घाट उतारब निहचित किहेउँ ह, उ सबइ लोग तरवार क घाट उतारा जइहीं। मईँ कछू क भूख स मरइ क निहचित किहेउँ ह उ सबइ भूख स मरिहीं। मईँ कछू लोगन क बन्दी होब अउर बिदेस लइ जाब निहचित किहेउँ ह। उ सबइ लोग ओन बिदेसन में बन्दी रइहीं।

3यहोवा कहत ह कि मई चार तरह क बिनासकारी सक्तियन ओनके खिलाफ पठउब। इ सँदेसा यहोवा क अहइ। 'मई दुस्मन क तरवार क संग मारइ बरे पठउब। मई कूकुरन क ओनकर ल्हास घसीट लइ जाइ क पठउब। मई हवा में उड़त पंछियन अउर जंगली जनावरन क ओनकर ल्हास खाइ अउर बर्बाद करइ क पठउब।

4मई यहूदा क लोगन क अइसा दण्ड देब कि धरती क लोग एका देखिके काँप जइहीं। मई यहूदा क लोगन क संग इ, मनस्से यरूसलेम में जउन कछू किहेस, ओकरे कारण करब। मनस्से, राजा हिलकिय्याह क पूत रहा। मनस्से यहूदा रास्ट्र क एक राजा रहा।'

5यरूसलेम, तोहरे ऊपर कउनो दाया नहीं करी। न कउनो विलाप करिहीं या नहीं रोइहीं। कउन तोहार कुसल छेम अउर काम क बरे पूछइ तोहरे लगे नहीं आइ।

6यरूसलेम, तू मोका तज्या।" यहोवा कहत अहइ। "तू मोका बार-बार तज्या। एह बरे मई तोहका सजा दिहेस अउर तोहका बर्बाद किहेस। मई तोह पइ दाया करत थक गवा हई। करार

7मई आपन सूप स यहूदा का लोगन क फटक देब। मई देस क नगर दुआर पइ ओनका बिखेर दिहेस। मई आपन लोगन क बर्बाद कइ किहेस अउर बच्चन क लइ लिहेन फिर भी मोर लोगन बदलेस नाही।

8अनेक मेहररूअन आपन भतारन क खोइ देइहीं। सगरे क बालू स जियादा हुवाँ रौंइ होइहीं। मई एक बिनासक क दुपहरी में लिआउब। बिनासक यहूदा क नउ जवानन क महतरियन पइ हमला करी। मई यहूदा क लोगन क पीरा अउ डर देब। मई एका घटित किहेस।

9दुस्मन तरवारे स हमला किहेस अउर लोगन क मार डाइएस। उ पचे यहूदा बचे लोगन क मारि डइहीं। एक मेहरारू क सात ठु पूत होइ सकत हीं, किन्तु उ पचे सबहिं मारा गवा। उ रोवत, अउर रोवत रही, जब तलक उ साँस लेइ बरे भी बहोत दुर्बल होइ गएन उ लज्जा अउर बिना निहचित में होइ, ओकर उजले दिन दुःखे स करिया होइ गएन।"

### यिर्मयाह फुन परमेस्सर स सिकाइत करत ह

10हाय महतारी, तू मोका जन्म काहे दिहा? मई उ मनई हई जउन पूरे देस क दोखी कहइ अउर आलोचना करइ। मई न कछू उधार दिहे हई अउर न ही लिहे हई। किन्तु हर एक मनई मोका अभिसाप देत ह।

11यहोवा कहेस मई तोहका अच्छी तरह तइयार किहेस ह। तोहर सुत्रन दुआरा लावइ गइ विपत्तियन क समइ मई तोहार बरे बीच में दखल दिहेस ह।

### परमेस्सर यिर्मयाह क जवाब देत ह

12"तू जानत अहा कि कउनो मनई लोहा काँसा उत्तर वाले लोहे क सुत्रन क चकनाचूर नहीं कइ सकत्या।

13यहूदा क लोगन क लगे सम्पत्ति अउर खजानन अहई। मई उ सम्पत्ति क दूसर लोगन क देब। ओन दूसर लोगन क उ सम्पत्ति बेसहइ नहीं पड़ी। मई ओनका उ सम्पत्ति देब।

काहेकि यहूदा बहोत पाप किहेस ह।" यहूदा देस क हर एक भाग में पाप किहेस ह।

14यहूदा क लोगो, मई तोहका तोहरे दुस्मनन क दास बनाउब। तू उ देस में दास होब्या जेका तू कबहुँ नहीं जान्या। मई बहोत कोहान हई। मोर किरोध तपत आगी जइसा अहइ अउर तू बारि दीन्ह जाब्या।"

15हे यहोवा, तू मोका समुझत ह। मोका याद राखा अउर मोर देखरेख करा। लोग मोका चोट पहाँचावत हीं। ओन लोगन क उ सजा द्या जेकर उ पात्र अहई। तू ओन लोगन बरे सहनसील अहा। किन्तु ओनके बरे सहनसील रहत समइ मोका बर्बाद न कइ द्या। मोरे बारे में सोचा। यहोवा उ पीरा क सोच जउन मई तोहरे बरे सहन हई।

16तोहार सँदेसा मोका मिला अउर मई मोका निगल गवा। तोहार सँदेसा मोका बहोत खुस कइ दिहस। मई खुस रहेई कि मोका तोहरे नाई स गोहरावा जात ह। तोहार नाई यहोवा सर्वसक्तीमान अहइ।

17मई कबहुँ ओकरे साथ नहीं बइठा जउन उत्सव मनावत अउ मज़ा करत ह। अपने उपर तोहरे प्रभाव क कारण मई अकेला बइठा। तू मोरे चारिहुँ कइँती बुराइयन पइ मोका किरोध स भर दिहा।

18मई नहीं समुझ पावत कि मई काहे अब तलक घायल हुई? मई नहीं समुझ पावत कि मोर घाव नीक काहे नहीं होत अउर भरत काहे नहीं? हे यहोवा, मई समुझत हई कि तू बदल गवा अहा। तू सोता क उ पानी क तरह अहा जउन झुराइ गवा होइ। तू उ सोता क तरह अहा जेकर पानी झुराइ गवा होइ।

19तबइ यहोवा कहेस, "जदि तू लउट आइ तउ मई तोहका आपन लगे वापिस लउटाउब। अउर तू मोरे लगे खड़ा होब्या। जदि तू महत्वपूर्ण बात कहत ह अउर उ बेकार बातन क नहीं कहब्या, तउ तू मोरे बरे कहि सकत ह। यहूदा क लोगन क बदलइ चाही अउर तोहरे लगे ओनका आवइ चाही। किन्तु तू जिन बदला अउर ओनकी तरह न बना।

20मई तोहका सक्तीसाली बनाउब। उ सबइ लोग सोचिहीं कि तू काँसे क बनी देवार जइसी सक्तीसाली अहा यहूदा क लोग तोहरे खिलाफ लड़िहीं, किन्तु उ पचे तोहका हरइहीं नहीं। काहेकि मई तोहरे साथ हई। मई तोहार सहायता करब, तोहार उद्धार करब।"

इ सँदेसा यहोवा क अहइ।

21"मई तोहार उद्धार ओन बुरे लोगन स करब। उ सबइ लोग तोहका डेरावत हीं। किन्तु मई तोहका ओन लोगन स बचाउब।"

### बिनास क दिन

16 यहोवा क सँदेसा मोका मिला। 2"यिर्मयाह, तोहका बियाह नहीं कइ चाही। तोहका इ ठउरे पइ बेटा या बिटिया नहीं पइदा कइ चाही।"

अयहूदा देस में जन्म लेइवाले बेटा-बिटियन क बारे में यहोवा इ कहत ह, अउर ओन बच्चन क बाप-महतारी क बारे में जउन यहोवा कहत ह, उ इ अहइ: 4"उ सबइ लोग

भयंकर मउत क सिकार होइहीं। ओन लोगन बरे कउनो रोई नहीं। कउनो भी मनई ओनका दफनाइ नहीं। ओनकर लहासन जमीन पइ गोबरे क नाई पड़ी रहिहीं। उ सबइ लोग दुस्मन क तरवार क घाट उतरिहीं या भूखन मरिहीं। ओनकर लहास अकासे क पंछियन अउर भुइँया क जंगली जनावरन क भोजन बनिहीं।”

5“एह बरे यहोवा कहत ह, “ओन घरन में न जा जहाँ लोग आखिरी क्रिया क्रम क दावत खात रहत हीं। हुवाँ रोवइ या आपन सोक परगट करइ जिन जा। इ सबइ सब काम जिन करा। काहेकि मई आपन सात्ति वापस लइ लिहेउँ ह। मई यहूदा क एन लोगन पइ दया नहीं करब,” यहोवा कहत ह।

6“यहूदा देस में महत्वपूर्ण लोग अउर साधारन लोग मरिहीं। कउनो मनई ओन लोगन क न दफनइहीं न ही ओनके बरे रोइ। एन लोगन बरे सोक परगट करइ क न तउ कउनो आपन क काटी अउर न ही आपन मूँडे क बार साफ कराई। 7कउनो मनई ओन लोगन बरे भोजन नहीं लिआई जउन मरे बरे रोवत रहा होइहीं। जेनकर महतारी-बाप मर गए होइहीं लोगन क कउनो मनई समझाई बुझाई नहीं। जउन मरे बरे रोवत रहा होइहीं ओनका सात्त करइ बरे कउनो मनई दाखरस नहीं पिआई।”

8“यिर्मयाह, उ घरे में न जा जहाँ लोग दावत खात रहत होइँ। उ घरे में न जा अउर ओनके संग बइठिके न खा न दाखरस पिआ। 9इस्त्राएल क परमेस्सर सर्वसक्तीसाली यहोवा कहत ह: ‘मजा उड़ावइ वाले लोगन क सोर क हाली ही मई बंद कइ देब। बियाहे क दावत में लोगन क हँसी मजाक क किलकारियन क मई बन्द कइ देब। इ तोहरे जीवनकाल में ही होइ। मई इ सबइ काम हाली स करब।’

10“यिर्मयाह, तू यहूदा क लोगन क इ सबइ बातन बतउब्या अउर लोग तोहसे पूछिहीं, ‘यहोवा हम लोगन बरे एतनी भयंकर बातन काहे कहेस ह? हम का गलत काम कीन्ह ह? हम लोग यहोवा आपन परमेस्सर क खिलाफ कउन-सा पाप किहा ह?’ 11तू पचन्क ओन लोगन स इ कहइ चाही, ‘तू पचन्क संग भयंकर घटनन घटिहीं काहेकि तोहार पचन्क पुरखन मोर अनुसरण करब तजेन अउर दूसर देवतन क अनुसरण करब तथा सेवा करब सुरू किहन। उ पचे ओन दूसर देवतन क पूजा किहन। तोहार पुरखन मोका तजेन अउर मोर नेमन क पालन करब तजेन। 12किन्तु तू लोग आपन पुरखन स भी जियादा बुरे करम किहा ह। तू लोग बहोत हठी अहा अउर तू सिरिफ उहइ करत अहा जेका तू करइ चाहत अहा। तू मोर आग्या क पालन नहीं करत अहा। 13एह बरे मई तोहका पचन्क इ देस स बाहेर निकारि फेंकब। मई तोहका पचन्क बिदेस में जाइके मजबूर करब। तू पचे अइसे देस में जाब्या जेका तू अउर तोहार पुरखन कबहुँ नहीं जानेन। उ देस में तू पचे ओन सबहि लबार देवतन क दिन अउ रात पूजा कइ सकत ह। अउर न ही मई तोहरे बरे कउनो सहायुभूति देखाउब।’

14“लोग प्रतिग्या करत हीं अउर कहत हीं, ‘यहोवा निहचय ही सास्वत अहइ। केवल उहइ अहइ जउन इस्त्राएल क लोगन क मिस्त्र देस स बाहेर लिआवा।’ किन्तु समइ

आवत अहइ, जब लोग अइसा नहीं कहिहीं।” इ सँदेसा यहोवा क अहइ। 15लोग कछू नवा कहिहीं। उ पचे कहिहीं, ‘निहचय ही यहोवा सास्वत अहइ। उ ही केवल अइसा अहइ जउन इस्त्राएल क लोगन क उत्तरी देस स लइ आवा। उ ओनका ओन सबहिँ देसन स लइ आवा जेहमों उ ओनका पठए रहा।’ लोग इ सबइ बातन काहे कहिहीं? काहेकि मई इस्त्राएल क लोगन क उ देस में वापिस लिआउब जेका मई ओनके पुरखन क दिहे रहेउँ।

16“मई हाली ही अनेकन मछुआरन क इ देस में आवइ बरे बोलाउब।” इ सँदेसा यहोवा क अहइ। “उ सबइ मछुआरन यहूदा क लोगन क धइ लेइहीं। इ होइ क पाछे मई बहोत स सिकारियन क इ देस में आवइ बरे बुलाउब। उ सबइ सिकारी यहूदा क लोगन क सिकार हर एक पहाइ, पहाड़ी अउर चट्टानन क दरारन में करिहीं। 17मई उ सब कछू जउन उ पचे करत हीं, लखत हउँ। यहूदा क लोग ओन कामन क मोहसे छुपाइ नहीं सकतेन जेनका उ पचे करत हीं। ओनकर पाप मोहसे छुपा नहीं अहई।” 18मई यहूदा क लोग जउन बुरे करम किहेन ह, ओकर बदला चुकाउब। मई हर एक पाप क बरे दुइ दाई ओनका सजा देब। मई इ करब काहेकि उ पचे मोरे देस क ‘गन्दा’ बनाएन ह। उ पचे मोरे देस क भयंकर मूरतियन स गन्दा किहेन ह। मई ओन देवमूरतियन स घिना करत हउँ। किन्तु उ पचे मोरे देस क आपन देवमूरतियन स भरि दिहेन ह।”

19हे यहोवा, तू मोर सक्ती अउर गढ़ अहा। बिपत्ति क समइ पराइके बचइ क तू सुरच्छित सरण अहा। सोरे संसार स रास्टू तोहरे लगे अइहीं। उ पचे कहिहीं, “हमार पिता लबार देवता राखत रहेन। उ पचे ओन बियर्थ देवमूरतियन क पूजा किहन, किन्तु ओन देवमूरतियन ओनकर कउनो मदद नहीं किहन।”

20का लोग अपने बरे सच्चे देवता बनाइ सकत हीं? नहीं, उ पचे देवमूरतियन बनाइ सकत हीं, किन्तु उ सबइ देवमूरतियन फुरइ देवता नहीं अहई।

21“एह बरे मई ओन लोगन क सबक सिखाउब, जउन देवमूरतियन क देवता बनावत हीं। अब मई सोझ आपन सक्ती अउर प्रभुता क बारे में सिच्छा देब। तब उ पचे समुझिहीं कि मई परमेस्सर हउँ। उ पचे जनिहीं कि मोर नाउँ यहोवा अहइ।”

### हिरदय पइ लिखा अपराध

17 “यहूदा क लोगन क पाप हुआँ लिखा अहइ जहाँ स ओका मिटावा नहीं जाइ सकत। उ सबइ पाप लोहे क कलम स पाथरन पइ लिखे ग रहेन। ओनकर पाप हीरे क नोकवाली कलम स लिखा ग रहेन, अउर उ पाथर ओनकर हिरदय अहइ। उ सबइ पाप ओनकर वेदी क सीगन क बीच काटे ग रहेन।

2ओनकर बच्चन लबार देवतन क अर्पित कीन्ह गइ वेदिन क याद राखत हीं।

3उ पचे ओन चीजन क खुले ठउरे क पहाइन पइ याद करत हीं। यहूदा क लोगन क लगे सम्पति अउर खजानन अहई। मई ओन चीजन क दूसर लोगन क देब। मई तोहरे

देस क सबहि उच्च ठउरन क नस्ट करब। तू ओन ठउरन पइ पूजा कइके पाप किहा ह।

4तू उ भूइया क खोउब्या जेका मई तोहका दिहेउँ ह। मई तोहरे दुस्मनन क तोहका ओनके दास क तरह उ भूइया में लइ जाइ देब जेकरे बारे में तू नाही जानत्या। काहेकि मई बहोत कोहान हउँ। मोर किरोध तपत आगी जइसा अहइ, अउर जउन कि सदैव जरिहीं।”

### जनता में बिस्सास एवं परमेस्सर में बिस्सास

5यहोवा इ सब कहत ह, “जउन लोग केवल दूसर लोगन में बिस्सास करत हीं ओनकर बुरा होइ। जउन सक्ती बरे सिरिफ दूसर क सहारे रहत हीं ओनकर बुरा होइ। काहेकि ओन लोग यहोवा पइ बिस्सास करब तजि दिहन ह।

6उ सबइ लोग रेगिस्ताने क झाड़ी क तरह अहइ। उ झाड़ी उ भूइया पइ अहइ जहाँ कउनो नाही रहत। उ झाड़ी गरम अउ झुरान भुइया में अहइ। उ झाड़ी खराब माटी में अहइ। उ झाड़ी ओन अच्छी चीजन क नाही जानत जेनका परमेस्सर दइ सकत ह।

7किन्तु जउन मनई यहोवा में बिस्सास करत ह, उ धन्य अहइ। सिरिफ यहोवा ही ओका बिस्सास होइहीं।

8उ मनई उ बृच्छ क तरह होइ जउन पानी क पास लगावा गवा होइ। उ बृच्छ क लम्बी जउन होत हीं जउन पानी पावत हीं। उ बृच्छ गर्मी क दिनन स नाही डरत। ऐंकर पातियन सदा हरी रहत हीं। इ बरिस क ओन दिनन में परेसान नाही होत जब बरखा नाही होत। उ बृच्छ में सदा फल आवत हीं।

9मनई क दिमाग बड़ा कपटी होत ह। दिमाग बहोत बीमार भी होइ सकत ह अउर कउनो भी मनई दिमाग क ठीक-ठाक नाही समुझत।

10किन्तु मई यहोवा हउँ अउर मई मनई क हिरदय क जान सकत हउँ। मई मनई क दिमाग क जाँच कइ सकत हउँ। एह बरे मई निर्णय कइ सकत हउँ कि हर एक मनई क का मिलइ चाही। मई हर एक मनइ क ओकर बरे ठीक भुगतान कइ सकत हउँ जउन उ करत ह।

11कबहुँ कबहुँ उ एक ठु चिरइया उ अण्डे स बच्चा निकारत ह जेका उ नाही दिहस। उ मनई क आधी उमर खतम होइ तउ उ उ धने क खोइ देइ। आपन जिन्गी क आखीर में इ स्पस्ट होइ जाई कि उ एक मूर्ख मनई रहा।”

12सुरू ही स हमार मन्दिर परमेस्सर बरे एक ठु गौरवसाली सिंहासन रहा। इ एक बड़ा महत्व क स्थान अहइ।

13हे यहोवा, तू इस्त्राएल क आसा अहा। हे यहोवा, तू अमृत जल क सोते क तरह अहा। जदि कउनो तोहार अनुसरण करब तजी तउ ओकर जिन्गी बहोत घटि जाइ।

### यिर्मयाह क तीसरी सिकाइत

14हे यहोवा, जदि तू मोका तन्दुरुस्त करत ह, मई फुरइ तन्दुरुस्त होइ जाब। मोर रच्छा करा, अउर मोर फुरइ रच्छा होइ जाइ। हे यहोवा, मई तोहार स्तुति करत हउँ।

15यहूदा क लोग मोहसे सवाल करत रहत हीं, “यिर्मयाह, यहोवा क हिआँ क सँदेसा कहाँ अहइ? हम लोग देखाई कि सँदेसा फुरइ साबित होत ह?”

16हे यहोवा, मई तोहसे दूर नाही भागा, मई तोहार अनुसरण किहेउँ ह। तू जइसा चाहया वइसा गइरिया मई बना। मइ नाही चाहत कि भयंकर दिन आवइ। यहोवा तू जानत अहा जउन कछू मई कहेउँ। जउन होत अहइ, तू सब लखत ह।

17हे यहोवा, तू मोका बर्बाद जिन करा। मई बिपति क दिनन में तोहरे सहारे हउँ।

18लोग मोका चोट पहोंचावत अहइ। ओन लोगन क लज्जित करा। किन्तु मोका निरास जिन करा। ओन लोगन क भयभीत होइ द्या। मोर दुस्मनन पइ भयंकर बिनास क दिन लिआवा ओनका तोड़ा अउर ओनका फुन तोड़ा।

### सबित दिवस क पवित्तर रखब

19यहोवा मोहसे इ सबइ बातन कहेस, “यिर्मयाह, जा अउर यरूसलेम क जन-दुआरे पइ खड़ा होइ जा, जहाँ स यहूदा क राजा भीतर आवत अउर बाहेर जात हीं। मोर लोगन क मोर सँदेसा द्या अउर तब यरूसलेम सबहिं दुआरन पइ जा अउर इहइ काम करा।

20“ओन लोगन स कहा: ‘यहोवा क सँदेसा सुना। यहूदा क राजा लोगो, सुना। यहूदा क तू सबहिं लोगो सुना। इ दुआर स यरूसलेम में आवइवाले सबहिं लोगो, मोर बात सुना। 21यहोवा इ बात कहत ह: इ बात में सावधान रहा कि सबित क दिन बोझा लइके जिन चला अउर यरूसलेम क दुआरन स सबित क दिन बोझा न लिआवा। 22सबित क दिन आपन घरन स बोझा बाहेर न लइ जा। उ दिन कउनो काम न करा। मई इहइ आदेस तोहार पुरखन क दिहे रहेउँ। 23मुला तोहार पुरखन मोरे इ आदेस क पालन नाही किहन। उ पचे मोरी कइँती धियान नाही दिहन। तोहार पुरखन बहोत हठी रहन। मई ओनका सजा दिहेउँ मुला एकर कउनो अच्छा फल नाही निकरा। उ पचे मोर एक नाही सुनेन। 24मुला तोहका मोर आग्या क पालन करइ में सावधान रहइ चाही।” इ सँदेसा यहोवा क अहइ। “तोहका सबित क दिन यरूसलेम क दुआरन स बोझा नाही लिआवइ चाही। तोहका सबित क दिन क पवित्तर बनावइ चाही। तू इ, उ दिन कउनो भी काम न कइके, करब्या।

25“जदि तू इ आदेस क पालन करब्या तउ राजा जउन दाऊद क सिंहांसने पइ बइठिहीं, यरूसलेम क दुआरन स अइहीं। उ सबइ राजा आपन रथन अउर घोड़न पइ सवार होइके अइहीं। यहूदा अउर इस्त्राएल क लोगन क प्रमुख ओन राजा लोगन क साथ होइहीं। यरूसलेम नगर में सदैव रहइवाले लोग हिआँ होइहीं। अउर यरूसलेम क नगर हमेसा बरे रहब्या। 26यहूदा क नगरन स लोग यरूसलेम अइहीं। लोग यरूसलेम क ओन नान्ह-नान्ह गाँवन स अइहीं जउन एकरे चारिहुँ कइँती अहइ। लोग उ पहँटा स अइहीं जहाँ बिन्यामीन क परिवार समूह रहत ह। लोग पच्छिमी पहाड़े क तराइयन अउर पहाड़ी प्रदेशन स अइहीं अउर लोग नेगव स अइहीं। उ पचे सबहिं लोग होमबलि, बलि

अन्नबलि, सुगन्धि अउ धन्यवाद भेंट लइके अहहीं। उ पचे ओन भेंटन अउर बलियन क यहोवा क मन्दिर में लिअइहीं।

27“किन्तु यदि तू मोर बात नाहीं सुनल्या अउर मोर आदेस क नाहीं मानल्या तउ बुरी घटनन होइहीं। यदि तू सबित क दिन यरूसलेम क दुआरे स बोझा लइ जात ह तब तू ओका पवित्तर दिन नाहीं रखल्या। इ दसा में मई अइसे आगी लगाउब जउन बुझाई नाहीं जाइ सकत। उ आगी यरूसलेम क दुआरन स सुरु होइ अउर महलन क भी जराइ देइ।”

### कोमहार अउर माटी

18 इ यहोवा क उ सँदेसा अहइ जउन यिर्मयाह क मिला: 2“यिर्मयाह, कोमहारे क घरे जा। मई आपन सँदेसा तोहका कोमहारे क घर देब।”

3एह बरे मई कोमहारे क घर गएँ। मई कोमहार क चाके पइ माटी स बर्तन बनावत लखेँ। 4उ एक तु बर्तन माटी स बनावत रहा। मुला बर्तन में कछू दोख रहा। एह बरे कोमहार उ माटी क उपयोग फुन किहस अउर उ दूसर बर्तन बनाएस। उ आपन हाथन क उपयोग बर्तन क उ रूप देइ बरे किहस जउन रूप उ देइ चाहत रहा।

5तब यहोवा स सँदेसा मोरे लगे आवा, 6“इस्त्राएल क परिवार, तू जानत अहा कि मई (परमेस्सर) वइसा ही तोहरे साथ कइ सकत हउँ। तू कोमहार क हाथ क माटी क समान अहा अउर मई कोमहार क तरह हउँ। 7अइसा समइ आइ सकत ह, जब मई एक रास्ट्र या राज्ज क बारे में बातन करउँ। मई इ कहि सकत हउँ कि मई उ रास्ट्र क उखाड़ फेकब या इ भी होइ सकत ह कि मई कहउँ कि मई उ रास्ट्र क उखाड़ गिराउब अउर उ रास्ट्र या राज्ज क नस्ट कइ देब। 8किन्तु उ रास्ट्र क लोग आपन हिरदय अउर जीवन क बदल सकत हीं। उ रास्ट्र क लोग बुरे करम करब तजि सकत हीं। तब मई आपन इरादे क बदल देब। मई उ रास्ट्र पइ बिपति ढावइ क आपन योजना क अनुसरण करब तजि सकत हउँ। 9कबहुँ अइसा दूसर आइ सकत ह जब मई कउनो रास्ट्र क बारे में बातन करउँ मई इ कहि सकत हउँ कि मई उ रास्ट्र क निर्माण करब अउर ओका स्थिर करब।

10“किन्तु मई इ लख सकत हउँ कि मोर आग्या क पालन न कइके उ रास्ट्र बुरा करम करत अहइ। तब मई उ अच्छाई क बारे में फुन सोचब जेका देइ क योजना मई उ रास्ट्र बरे बनाइ राखेँ ह।

11“एह बरे यहूदा अउ यरूसलेम में जउन लोग रहत हीं ओनसे कहा, ‘यहोवा जउन कहत ह उ इ अहइ: अब मई सोझ तू लोगन बरे बिपति क निर्माण करत हउँ। मई तू लोगन क खिलाफ योजना बनावत हउँ। एह बरे ओन बुरे करमन क करब बन्द करा जउन तू करत अहा। हर एक मनई क बदलइ चाही अउर अच्छा काम करब सुरु करइ चाही।’ 12किन्तु क लोग जवाब देइहीं, ‘अइसी कोसिस करइ स कछू नाहीं होइ। हम उहइ करत रहब जउन हम करइ चाहित ह। हम लोगन में हर एक उहइ करी जउन हठी अउर बुरा हिरदय करइ चाहत ह।”

13ओन बातन क सुना जउन यहोवा कहत ह, “दूसर रास्ट्र लोगन स इ सवाल करा: ‘का तू कबहुँ कउनो क उ अइसा बुराई करत सुन्या ह जउन इस्त्राएल किहेस ह।’

14तू जानत अहा कि चट्टानन कबहुँ खुद ही मैदान नाहीं तजितेन। तू जानत अहा कि लबानोन क पहाड़न ऊपर बर्फ कबहुँ नाहीं टेघरत। तू जानत अहा कि सीतल बहइवाले झरना कबहुँ नाहीं झुरातेन।

15मुला मोर लोग मोका बिसरि चुका अहइ, उ पचे बियर्थ देवमूरतियन क बलि चढ़ावत हीं। मोरे लोगन क ऊबड़ खाबड़ सड़कियन अउर तुच्छ राजमार्गन पइ चलब जियादा पसन्द अहइ, एकरे अपेच्छा कि उ पचे मोर अनुसरण अच्छी सड़किया पइ करइँ।

16एह बरे यहूदा देस एक सूना रेगिस्तान बनी। एकरे पास स गुजरात लोग हर दाई सीटी बजइहीं अउर मूँड़ि हिलइहीं। इ बात स चकित होइहीं कि देस कइसे बरबाद कीन्ह गवा।

17मई यहूदा क लोगन क ओनके दुस्मनन क समन्वा बिखराउब जइसा कि प्रबल पूर्वी आँधी बिखेरब। उ समइ उ पचे आपन मदद बरे कउनो क भी आवत नाहीं लखिहीं। नाहीं, उ पचे मोका आपन क तजत लखिहीं।”

### यिर्मयाह क चउथी सिकाइत

18तब यिर्मयाह क दुस्मनन कहेन, “आवा, हम यिर्मयाह क खिलाफ सड्यन्त्र रची। निहचय ही, याजक क जरिये दीन्ह गइ विवस्था क सिच्छा मिटी नाहीं अउर बुद्धिमान लोगन क सलाह अब भी हम लोगन क मिली। हम लोगन क नबियन क सँदेस भी मिलिहीं। एह बरे हम लोग ओकरे बारे में झूठ बोली। ओहसे उ बर्बाद होइ। उ जउन कहत हम कउनो पर भी धियान नाहीं देब।”

19हे यहोवा, मोर सुना अउर मोरे बिरोधियन क सुना, तब तय करा कि कउन ठीक अहइ।

20याद करा मई कइसन तोहार समन्वा खड़ा होइके यहूदा क निवासियन क भलाई बरे अउर ओहइ पइ स तोहार गुस्सा उतारइ बरे बोले रहा। किन्तु अब उ पचे उल्टे बदले में बुराई देत अहइ। उ पचे मोका फँसावत अहइ। उ पचे मोका धोखा दइके फँसावइ अउर मार डारइ क जतन करत अहइ।

21एह बरे अब ओनके बच्चन क अकाले में भूखन मरइ द्या। ओनके दुस्मनन क ओनका तरवार स हराइ डारइ द्या। ओनकर मेहररूअन क बगैर गदेला क होइ द्या। यहूदा क लोगन क मउत क घाट उतर जाइ द्या। ओनकर मेहररूअन क रौंड़ होइ द्या। यहूदा क लोगन क मउत क घाट उतर जाइ द्या। नउ जवानन क जुद्ध में तरवार क घाट उतार दीन्ह जाइ द्या।

22ओनकर घरन में रोउब-पिटब मचइ द्या। ओनका तब रोवइ द्या जब तू अचानक ओनके खिलाफ दुस्मनन क लिआया। एका होइ द्या काहेकि हमरे दुस्मनन मोका धोका दइके फँसावइ क कोसिस किहेन ह। उ पचे मोरे फँसइ बरे गुप्त जाल डाएन ह।

23हे यहोवा, मोका मार डारइ क ओनकर योजना क तू जानत अहा। ओनकर अपराधन क तू छिमा जिन करा।

ओनकर पापन क जिन धोवा। मोरे दुस्मनन क बर्बाद करा। क्रोधित रहत समइ ही ओन लोगन क सजा द्या।

### दूरी सुराही

**19** यहोवा मोहसे कहेस: “यिर्मयाह, जा अउर कउनो कोमहार स एक ठु माटी क सुराही बेसहा। 2ठीकरा-दुआरे समन्वा क लगे बेन हिन्नोम घाटी क जा। अपने संग लोगन क अग्रजन अउर कछू याजकन क ल्या। उ ठउरे पइ ओनसे इ कहा जउन मई तोहसे कहत हईं। 3अपने संग क लोगन स कहा, ‘यहूदा क राजा लोग अउर इस्राएल क लोगो, यहोवा क हिआँ स इ सँदेसा सुना। इस्राएल क लोगन क परमेस्सर सर्वसक्तीमान यहोवा जउन कहत ह, उ इ अहइ: ‘मई इ ठउरे पइ हाली ही एक खउफनाक घटना घटित कराउब। हर एक मनई जउन एका सुनी, चकित अउर भयभीत होइ। 4मई इ सबइ काम करब काहेकि यहूदा क लोग मोर अनुसरण करब तजि दिहेन ह। उ पचे एका बिदेसी देवतन क ठउर बनाइ दिहेन ह। यहूदा क लोग इ ठउरे पइ दूसर देवतन बरे बलियन बारेन ह। उ हियाँ बेकुसूर लोगन क खून बहावत रहा। ओनकर पुरखन या ओनकर राजा ओन देवतन क नाहीं पूजत रहेन। 5उ पचे बाल देवता का पूजा करइ बरे जगहन क चुनेस ह। उ पचे ओन ठउरन क उपयोग आपन पूतन क आगी में बारइ बरे किहेन। उ पचे आपन पूतन क बाल बरे होमबलि क रूप में बारेन। मई ओनका इ करइ क नाहीं कहेईं। मई तोहसे इ नाहीं माँगा कि तू आपन पूतन क बलि क रूप में भेंट करा। मई कबहुँ इ सम्बंध में सोचेईं भी नाहीं। 6अब लोग उ ठउरे क हिन्नोम क घाटी तोपेत कहत हीं। किन्तु मई तोहका इ चितउनी देतहईं, उ सबइ दिन आवत अहईं।” इ सँदेसा यहोवा क अहइ, “जब लोग इ ठउरे क बध क घाटी कहिहीं। 7इ ठउरे पइ मई यहूदा अउर यरूसलेम क लोगन क जोजनन क बर्बाद करब। दुस्मन एन लोगन क पाछा करिहीं अउर मई इ ठउरे पइ यहूदा क लोगन क तरवार क घाट उतरि जाइ देब अउर मई ओनकर ल्हासन क पछियन अउर जंगली जनावरन क भोजन बनाउब। 8मई इ नगर क पूरी तरह बर्बाद करब। जब लोग यरूसलेम स गुजरिहीं तउ सीटी बजइहीं अउर मूँड़ि हिलइहीं। ओनका विस्मय होइ जब उ पचे लिखिहीं कि नगर कउने तरह ध्वस्त कीन्ह गवा अहइ। 9दुस्मन आपन फउज क सहर क चारिहूँ कइँती लिआइ। उ फउज लोगन क भोजन लेइ बाहेर नाहीं आवइ देइ। एह बरे सहर में लोग भूखन मरिहीं। उ पचे एतना भूखा होइ जइहीं कि आपन पूत अउर ब्रिटियन क तने क खाइ लगिहीं अउर तब उ पचे एक दूसर क खाइ लगिहीं।’

10“यिर्मयाह, तू इ सबइ बातन लोगन क कहब्या अउर जब उ पचे लखत रहत होई तबहिं तू उ सुराही क तोइया। 11उ समइ, तू इ कह्या, सर्वसक्तीमान यहोवा कहत ह, ‘मई यहूदा रास्ट्र अउ यरूसलेम नगर क वइसे ही तोइब जइसे कउनो माटी क सुराही तोइत ह। इ सुराही फुन जोइके नाहीं बनाई जाइ सकत। यहूदा रास्ट्र बरे भी इहइ सब होइ। मरे लोग इ तोपेत में तब तलक दफनावा जइहीं जब तलक

हिआँ जगह नाहीं रहि जाइ। 12मई इ एन लोगन अउर इ ठउरे क संग अइसा करब। मई इ नगर क तोपेत क तरह कइ देब।’ इ सँदेसा यहोवा क अहइ। 13यरूसलेम क घर तथा राजा क महल तोपेत क इ जगह क नाई असुद्धता स भरि जाब। काहेकि लोग ओन घरन क छत पइ लबार देवतन क पूजा किहन। उ पचे ग्रह-नछत्रन क पूजा किहन अउर ओनके सम्मान में बलि बारेन। उ पचे लबार देवतन क पेय भेंट दिहन।”

14तब यिर्मयाह तोपेत क तजेस जहाँ यहोवा उपदेस देइ क कहे रहा। यिर्मयाह यहोवा क मन्दिर क गवा अउर ओकरे आँगन में खड़ा भवा। यिर्मयाह सबहिं लोगन स कहेस, 15“इस्राएल क परमेस्सर सर्वसक्तीमान यहोवा इ कहत ह: ‘मई कहेईं ह कि मई कि मई यरूसलेम अउर ओकरे चारिहूँ कइँती क गाँवन पइ अनेक विपत्तियन डाउब। मई एनका हाली घटित कराउब। काहेकि लोग बहोत हठी अहईं उ पचे मोर सुनइ अउर मोर आग्या क पालन करइ स इन्कार करत हीं।”

### यिर्मयाह अउर पसहूर

**20** पसहूर नाउँ क एक मनई याजक रहा। उ यहोवा क मन्दिर में उच्चतम अधिकारी रहा। पसहूर इमेरे नाउँ क मनई क पूत रहा। पसहूर यिर्मयाह क मन्दिर क आँगन में ओन बातन क उपदेस करत सुनेस। 2एह बरे उ यिर्मयाह नबी क पिटवाएस अउर उ बिन्यामीन क ऊपरी दुआरी पई ओका काठेक लट्ठन क बीच में जकड़ दिहेस। 3अगले दिन पसहूर यिर्मयाह क काठे क लट्ठन क बीच स निकारेस। तब यिर्मयाह पसहूर स कहेस, “यहोवा क दीन्ह तोहार नाउँ पसहूर नाहीं अहइ। अब यहोवा कइँती स तोहार नाउँ सर्वत्र आतंक अहइ। 4इहइ तोहार नाउँ अहइ, काहेकि यहोवा कहत ह, ‘मई हाली ही तोहका अपने आप बरे आतंक बनाउब। मई हाली ही तोहका तोहरे मीतन बरे आतंक बनाउब। तू दुस्मनन क जरिये आपन मीतन क तरवारे क घाट उतारत लखब्या। मई यहूदा क सबहिं लोगन क बाबुल क राजा क दइ देब। उ यहूदा क लोगन क बाबुल देस क लइ जाइ। अउर ओकर फउज यहूदा क लोगन क आपन तरवार क घाट उतारी। 5यहूदा क लोग चीजन क बनावइ में कठिन परिश्रम किहन अउर धनी होइ गएन। किन्तु मई उ सबइ सारी चीजन ओनके दुस्मनन क दइ देब। यरूसलेम क राजा क लगे बहोत स धन भण्डार अहइ। किन्तु मई ओन सबइ धन-भण्डारन क दुस्मनन क दइ देब। दुस्मन ओन चीजन क लेइ अउर ओनका बाबुल देस क लइ जाइ।

6“अउर पसहूर तू अउर तोहरे घरे में रहइवाले सबहिं लोग हिआँ स लइ जावा जाब्या। तोहका जाइ क अउर बाबुल देस में रहइ क मजबूर कीन्ह जाइ। तू बाबुल में मरब्या अउर तू उ बिदेस में दफनावा जाब्या। तू आपन मीतन क झूठा उपदेस दिहा। तू कह्या कि इ सबइ घटनन नाहीं घटिहीं। किन्तु तोहार सबहिं मीत भी मरिहीं अउर बाबुल में दफनाया जइहीं।”



**यिर्मयाह क पाँचवी सिकाइत**

7हे यहोवा, तू मोका बहका दिहा अउर मई निहचय ही बहक गएउँ। तू मोहसे जियादा सक्तीसाली रहा एह बरे तू मोका हराइ दिहा। मई मजाक बनिके रहि गवा हउँ। लोग मोह पइ हँसत हीं अउर सारा दिन मोर मजाक उड़ावत हीं।

8जब मई भी बोलत हउँ, चीख पड़त हउँ। मई लगातार हिंसा अउर तबाही क बारे में चिल्लात रहत हउँ। मई लोगन क उ सँदेसा क बारे में बतावत हउँ जेका मई यहोवा स प्राप्त किहेउँ। किन्तु लोग सिरिफ मोर अपमान करत हीं अउर मोर मजाक उड़ावत हीं।

9कबहुँ-कबहुँ मई आपन स कहत हउँ: “मई यहोवा क बारे में बिसरि जाब। मई अब आगे यहोवा क नाउँ पइ नाहीं बोलाब।” किन्तु जदि मई अइसा कहत हउँ तउ यहोवा क सँदेसा मोरे भीतर भड़कत ज्वाला स होइ जात ह। मोका अइसा लागत ह कि इ अन्दर मोरे हाइन क बारत अहइ। मई अपने भीतर यहोवा क सँदेसा क रोकइ क जतन में थक जात हउँ अउर आखीर मँ मई एका अपने भीतर रोकइ मँ समर्थ नाहीं पावत हउँ।

10मई अनेक लोगन क दबी जबान अपने खिलाफ बातन करत सुनत हउँ। सर्वत्र मई उ सब सुनत हउँ जउन मोका भयभीत करत हीं। हिआँ तलक कि मोरे मीत भी मोरे खिलाफ बातन करत हीं। चला हम अधिकारियन क एकरे बारे में सूचित करी। लोग सिरिफ इ प्रतीच्छा मँ अहई कि मई कउनो गलती करउँ। उ पचे कहत अहई, “आवा हम झूठ बोली अउ कही कि उ कछू बुरे करम किहे अहइ। संभव अहइ हम यिर्मयाह क धोखा दइ सकी। तब उ हमरे संग होइ। आखीर मँ हम ओहसे छुटकारा पाउब। तब हम ओका दबोच लेब अउर ओहसे आपन बदला लेब।”

11किन्तु यहोवा मोरे संग अहइ। यहोवा एक ठु मजबूत फउजी जइसा अहइ। एह बरे जउन लोग मोर पाछा करत ही मुँह क खड़हीं। उ सबइ लोग मोका पराजित नाहीं कइ सकिहीं। उ सबइ लोग असफल होइहीं। उ सबइ निरास होइहीं। उ सबइ लोग लज्जित होइहीं अउर लोग उ लज्जा क कबहुँ नाहीं बिसरिहीं।

12सर्वसक्तीमान यहोवा तू अच्छे लोगन क परीच्छा लेत ह। तू मनई क दिल अउर दिमाग क गहराई स लखत ह। मोका भरोसा अहइ कि इ मोका निआव देब्या। कृप्या कइके मोका उ तोहार सज़ा लखत देई जेनकर उ पचे पात्र अहई।

13यहोवा बरे गावा। यहोवा क स्तुति करा। यहोवा गरीब क जिन्नगी क रच्छा करत ह। उ ओनका दुट्ट लोगन क सक्ती स बचावत ह।

**यिर्मयाह क छठी सिकाइत**

14उ दिना क धिक्कार अहइ जउने दिन मोर जनम भवा। उ दिना क बधाई जिन द्या जउने दिन मई महतारी क कोख मँ आएउँ।

15उ मनई क अभिसाप द्या जउन मोरे बाप क इ सूचना दिहस कि मोर जनम भवा ह। उ कहे रहा, “तोहार लड़का

भवा ह, उ एक लड़का अहइ।” उ मोरे बाप क बहोत खुस किहे रहा उ ओनसे इ कहे रहा।

16उ मनई क वइसा ह होइ द्या जइसे उ पचे सहर जेनका यहोवा बर्बाद किहे रहा। यहोवा ओन नगरन पइ कछू भी दया नाहीं किहेस। उ मनई क सबेरे जुद्ध क उद्घोस सुनइ द्या, अउर दुपहरे क जुद्ध की चीख सुनइ द्या।

17तू मोका महतारी क पेट मँ ही, काहे नाहीं मार डया? तब मोर महतारी क कोख कब्र बन जात, अउर मई कबहुँ जनम नाहीं लइ सका होत।

18मोका महतारी क पेट स बाहेर काहे आवइ क पड़ा? जउन कछू मई पाएउँ ह उ परेसानी अउर दुःख अहइ अउर मोर जिन्नगी क आखीर लज्जा जनक होइ।

**राजा सिदकिय्याह क निवेदन क परमेस्सर अस्वीकार करत ह**

21 इ यहोवा क उ सँदेसा अहइ जउन यिर्मयाह क मिला। इ सँदेसा तब आवा जब यहूदा क राजा सिदकिय्याह मल्किय्याह क पूत पसहूर नाउँ क एक मनई अउ याजक मासयाह क पूत सपन्याह नाउँ क एक मनई क यिर्मयाह क लगे पठएस। उ पचे कहेस: 2पसहूर अउ सपन्याह यिर्मयाह स कहेन, “यहोवा स हम लोगन बरे पराथना करा। यहोवा स पूछा कि का होइ? हम जानइ चाहित ह काहेकि बाबुल क राजा नबूकदनेस्सर हम लोगन पइ हमला करत अहइ। होइ सकत ह यहोवा हम लोगन बरे वइसे ही महान कारज करइ जइसा उ बीते समइ मँ किहेस। होइ सकत ह कि यहोवा नबूकदनेस्सर क हमला करइ स रोक देइ या ओका चला जाइ दे।”

अतब यिर्मयाह पसहूर अउर सपन्याह क जवाब दिहेस। उ कहेस, “राजा सिदकिय्याह स कहा, 4इझ्राएल क परमेस्सर यहोवा जउन कहत ह, इ उ अहइ: ‘तोहरे पचन्क हाथन मँ जुद्ध क अस्त्र-सस्त्र अहई। तू पचे ओन अस्त्र सस्त्रन क उपयोग अपनी सुरच्छा बरे बाबुल क राजा अउर कसदियन क खिलाफ करत रह्या। किन्तु मई ओन अस्त्रन क बियर्थ कइ देब।

“बाबुल क फउज सहर क चारिहुँ कइँती घेर लिहे अहइ। उ फउज सहर क चारिहुँ ओर अहइ। हाली ही मई उ फउज क यरूसलेम मँ लइ आउब। 5मई खुद यहूदा तू लोगन क खिलाफ लड़ब। मई आपन सक्तीसाली हाथन स तोहरे पचन्क खिलाफ लड़ब। मई तू पचन्कइ बहोत जियादा कोहान अहउँ, एह बरे मई आपन सक्तीसाली बाहन स तोहरे पचन्क खिलाफ लड़ब। मई तोहरे पचन्क खिलाफ घोर जुद्ध करब अउर देखाउब कि मई केतना कोहान हउँ। 6मई यरूसलेम मँ रहइवाले लोगन क मार डाउब। मई लोगन अउर जनावरन क मारि डाउब। उ पचे उ भयंकर बीमारी स मरिहीं जउन पूरे नगर मँ फइल जाइ। 7जब इ होइ जाइ तब ओकरे पाछे,” इ सँदेसा यहोवा क अहइ। “मई यहूदा क राजा सिदकिय्याह क बाबुल क राजा नबूकदनेस्सर क देब। मई सिदकिय्याह क अधिकारियन क भी नबूकदनेस्सर क देब। यरूसलेम क कछू लोग भयंकर बीमारी स नाहीं मरिहीं। कछू लोग तरवार क घाट नाहीं उतारा जइहीं।

ओनमाँ स कछू भूखन नाहीं मरिहीं किन्तु मई ओन लोगन क नबूकदनेस्सर क देब। मई यहूदा क दुस्मनन क बिजयी बनाउब। नबूकदनेस्सर क फउज यहूदा क लोगन क मार डावा चाहत ह। एह बरे यहूदा अउर यरूसलेम क लोग तरवार क घाट उतार दीन्ह जइहीं। नबूकदनेस्सर कउनो दाया नाहीं देखाइ। उ ओन लोगन बरे अफसोस नाहीं करी।

8“यरूसलेम क लोगन स इ सबइ बातन भी कहा। यहोवा इ सबइ बातन करत ह, ‘मई तोहका एक चुनाव देत हउँ: जिअई या मरइ एक क चुन्या। 9कउनो भी मनई जउन यरूसलेम में ठहरी, मरी। उ मनई तरवार, भूख या भयंकर बीमारी स मरी किन्तु जउन मनई यरूसलेम क बाहेर जाइ अउर बाबुल क फउज क समन्वा आत्म समर्पण करी, जिअत रही। उ आपन जिन्गी क जुद्ध क लूट क माल क नाई जीत लेब। 10मई यरूसलेम नगर पइ विपति ढावइ क निहचइ कइ लिहेउँ ह। मई सहर क मदद नाहीं करब।” इ सँदेसा यहोवा क अहइ। “मई यरूसलेम क नगर क बाबुल क राजा क देब। उ एका आगी स बारी।

11“यहूदा क राज परिवार स इ कहा, यहोवा सँदेसा क सुना।

12दाऊद क परिवार यहोवा इ कहत ह, ‘तू पचन्क रोज लोगन क निस्पच्छ निआव करइ चाही। अपराधियन स ओनके सिकारन क रच्छा करा। जदि तू पचे अइसा नाहीं करल्या तउ मई बहोत क्रोधित होबउँ। मोर किरोध अइसे आगी क तरह होइ जेका कउनो मनई बुझाइ नाहीं सकत। इ घटित होइ काहेकि तू बुरे करम किहा ह।’

13यरूसलेम, मई तोहरे बिरुद्ध हउँ। तू पर्वते क चोटी पइ बइठी अहा। तू इ घाटी क ऊपर एक रानी क तरह बइठी अहा। यरूसलेम क लोगो, तू पचे कहत अहा, ‘कउनो भी हम पइ आक्रमण नाहीं कइ सकत। कउनो भी हमरे मजबूत नगर में घुस नाहीं सकत।’ किन्तु यहोवा क हिआँ स उ सँदेस क सुना:

14“तू पचे उ सजा पउब्या जेकर पात्र तू पचे अहा। मई तोहरे पचन्क बनन में आगी लगाउब। उ आगी तोहरे चारिहूँ ओर क हर एक चीज बारि देइ।”

### बुरे राजा लोगन क खिलाफ निआव

22 यहोवा कहेस, “यिर्मयाह राजा क महल क जा। यहूदा क राजा क लगे जा अउर हुआँ ओका उ सँदेसा क उपदेस द्या। 2‘यहूदा क राजा, यहोवा क हिआँ स सँदेसा सुना। तू दाऊद क सिंहासन स सासन करत अहा, एह बरे सुना। राजा, तू पचन्क अउर तोहरे अधिकारियन क इ अच्छी तरह सुनइ चाही। यरूसलेम क दुआसन स आवइवाले सबहिं लोगन क यहोवा क सँदेसा सुनइ चाही। 3यहोवा कहत ह: उ सबइ काम करा जउन नीक अउ निआव स पूर्ण होई। उ मनई क रच्छा करा जेका डाकूअन क जरिय लूट लीन्ह ग होइ। प्रवासी, अनाथ बच्चन अउ रौँइन क जिन दुःख द्या। बेगुनाह लोगन क जिन मारा। 4“जदि तू एन आदेसन क पालन करत अहा तउ जउन घटित होइ उ इ अहइ: जउन राजा दाऊद क सिंहासने पइ बइठिहीं, उ पचे यरूसलेम नगर में इ महल क दुआसन स आवत रहिहीं। उ

पचे राजा, ओनकर उत्तराधिकारी अउर ओनकर लोग रथन अउर घोड़न पइ चढ़िके अइहीं। 5किन्तु जदि तू एन आदेसन क पालन नाहीं करब्या तउ यहोवा कहत ह: मई प्रतिग्या करत हउँ कि राजा क महल ध्वस्त कइ दीन्ह जाइ इ ध्वस्त जगह क तरह रहि जाइ।”

6यहोवा ओन महलन क बारे में इ कहत ह जेनमाँ यहूदा क राजा रहत हीं:

“गिलाद वन क तरह इ महल ऊँचा अहइ। इ लबानोन पर्वत क समान ऊँचा अहइ। किन्तु मई ऐंका फुरइ रेगिस्ताने सा बनाउब। इ महल उ नगर क तरह सूना होइ जेहमाँ कउनो मनई न रहत होइ।

7मई लोगन क महल क नस्ट करइ पठउब। हर एक मनई क लगे आपन औजार होइहीं। उ सबइ लोग तोहार सबन्त उत्तम देवदार सहतीर क काट डइहीं। अउर ओका आगी में लोकाइ देइहीं।

8“अनेक रास्ट्रन स लोग इ नगर स गुजरिहीं। उ पचे एक दूसर स पूछिहीं, ‘यहोवा इ महान नगर यरूसलेम क संग अइसा भयंकर काम काहे किहस?’ 9उ सवाल क जवाब इ होइ, ‘परमेस्सर यरूसलेम क नस्ट किहस, काहेकि यहूदा क लोग यहोवा आपन परमेस्सर स संग कीन्ह गइ करार क मानब तजि दिहस। ओन लोग दूसर देवतन क पूजा अउर सेवा किहन।’

### राजा यहोसाहाज क खिलाफ निआव

10उ राजा बरे जिन रोआ जउन मरि गवा। ओकरे बरे जिन रोवा। किन्तु उ राजा बरे फूट-फूट के रोआ जउन हिआँ स जात अहइ। ओकरे बरे रोआ, काहेकि उ फुन कबहुँ वापस नाहीं आइ। सल्लूम (यहोसाहाज) आपन जन्मभूमि क फुन कबहुँ नाहीं लखी।

11यहोवा योसिय्याह क पूत सल्लूम क बारे में जउन कहत ह, उ इ अहइ (सल्लूम आपन बाप योसिय्याह क मउत क पाछे यहूदा क राजा भवा।) “सल्लूम यरूसलेम स दूर चला गवा। उ फुन यरूसलेम क वापस नाहीं लौटी। 12सल्लूम हुवँइ मरी जहाँ ओका मिस्री लइ जइहीं। उ इ भुईया क फुन नाहीं लखी।”

### राजा यहोयाकीम क बिरुद्ध निआव

13राजा यहोयाकीम बरे इ बहोत बुरा होइ। उ बुरे करम करत अहइ एह बरे उ आपन महल बनाइ लेइ। उ लोगन क ठगत अहइ, एह बरे उ ऊपर कमरन बनाइ सकत ह। उ आपन लोगन स बेगार लेत अहइ। उ ओनके काम क मजदूरी नाहीं देत अहइ।

14यहोयाकीम कहत अहइ, ‘मई अपने बरे एक तु बिसाल महल बनाउब। मई दूसर मंजिल पइ बिसाल कमरन बनाउब।’ एह बरे उ बिसाल खिड़कियन वाला महल बनावत अहइ। उ देवदार क कड़ियन क दीवारन पइ मढ़ावत बाटइ अउर एन पाइ लाल रंग चढ़ावत अहइ।

15यहोयाकीम, आपन घरे में देवदार क जियादा लकड़ी क उपयोग तोहका महान सम्राट नाहीं बनावत। तोहार बाप योसिय्याह भोजन पान पाइके सतुंठ रहा। उ उ किहस

जउन ठीक अउर निआवपूर्ण रहा। योसियाह उ किहस, एह बरे परमेस्सर ओका आसीस दिहा।

16योसियाह दीन-दीन लोगन क मदद दिहस। योसियाह उ किहस, एह बरे ओकरे बरे सब कछू अच्छा भवा। यहोयाकीम 'परमेस्सर क जानइ' क का अरथ होत ह? मोका जानइ क अरथ, ठीक रहब अउर निआवपूर्ण होब अहइ।" इ सँदिसा यहोवा क अहइ।

17"यहोयाकीम, तोहार आँखिन सिरिफ तोहार आपन लाभ क लखत हीं, तू सदा ही आपन बरे जियादा स जियादा पावइ क सोचत अहा। तू निरपराध लोगन क मारइ बरे इच्छुक रहत अहा। तू दूसर लोगन क चीजन क चोरी करइ क इच्छुक रहत अहा।"

18एह बरे योसियाह क पूत यहोयाकीम स यहोवा जउन कहत ह, उ इ अहइ: "यहूदा क लोग यहोयाकीम बरे रोइहीं नाहीं। उ पचे आपुस में इ नाहीं कहिहीं, 'हे मोर भाई यहोयाकीम क बारे में एतना दुःखी हउँ। हे मोर बहिन, मई यहोयाकीम क बारे में एतना दुःखी हउँ। उ पचे ओकरे बरे रोइहीं नाहीं। मई उ पचे ओकरे बारे में नाहीं कहिहीं, 'हे स्वामी, हम एतने दुःखी अही। हे राजा, हम एतने दुःखी अही।'

19यरूसलेम क लोग यहोयाकीम क एक ठु मरे गवहे क तरह दफनइहीं। इ पचे ओकरे ल्हास क दूर घसीट लइ जइहीं अउर उ पचे ओकरे ल्हास क यरूसलेम स दुआरे क बाहेर एक खेत में लोकाइ देइहीं।

20यहूदा, लबानोन क पहाड़न पइ जा अउर चिल्लाअ। बासान क पहाड़न में आपन रोउब सुनाई पइइ द्या। अबारीम क पहाड़न में जाइके चिल्लाअ। काहेकि तोहार सबहिं 'प्रेमी' नस्त कइ दीन्ह जइहीं।

21हे यहूदा जब तू आपन क सुरच्छित समुझा, किन्तु मई तोहका चिताउनी दिहेउँ, परन्तु तु सुनइ स इन्कार किहा अउर यहूदा जब स तू युवती रहिउ, तू मोर आग्या क पालन नाहीं किहा।

22हे यहूदा, मोर सजा आँधी क तरह आइ अउर इ तोहार सबहिं गइरियन (प्रमुखन) क उड़ाइ लइ जाइ। तोहार प्रेमियन क बन्दी बना लीन्ह जाइ। तब तू लज्जित होउबिउ। तू जउन कछू बुरे करम किहा, ओनके कारण अपमानित होउबिउ।

23हे राजा, तू लबानोन स लीन्ह भवा ऐस व आराम क सामन स घेरा भवा सुरच्छित रहत ह। किन्तु तू फुरइ तब कराह उठब्या जब तोहका सजा मिली। तू बच्चा पइदा करत मेहरारू क तरह पीड़ित होब्या।"

### राजा कोन्याह क खिलाफ निआव

24इ सँदिसा यहोवा क अहइ: "मई आपन जिन्नगी क किरिया खात हउँ यहोयाकीम क पूत अउर यहूदा क राजा कोनयाह (यहोयाकीन) बरे कि जदि तू मोरे दाहिने हाथ क मुहर क आँगूठी (राजमुद्रा) होतेन तउ भी मई तोहका बाहेर निकार फेंकतेन। 25कोन्याह मई तोहका बाबुल अउ कसदियन क राजा नबूकदनेस्सर क देब। उ पचे ही लोग अइसे अहइँ जेनसे तू डेरात ह। उ सबइ लोग तोहका मार डावइ चाहत

हीं। 26मई तोहका अउर महतारी क अइसे देस में लोकाउब कि जहाँ तू दुइनउँ मैं स कउनो भी पइदा नाहीं भवा रहा। तू अउर तोहार महतारी उहइ देस में मरिहीं। 27उ पचे आपन भुइँया में जाइ क इच्छा करब्या, किन्तु उ पचन्क कबहुँ लउटइ नाहीं दीन्ह जाइ।"

28कोन्याह उ टूट बर्तन क तरह अहइ जेका कउनो लोकाइ दिहेस ह। उ अइसे बर्तन क तरह अहइ जेका कउनो मनई नाहीं चाहत। कोन्याह अउर ओकर सन्तानन काहे बाहेर लोकाइ दीन्ह जइहीं? उ पचे कउनो भी बिदेस में काहे लोकावा जइहीं?

29भुइँया, भुइँया, यहूदा क भुइँया। यहोवा क सँदिसा सुना।

30यहोवा कहत ह, "कोन्याह क बारे में इ लिख ल्या: 'उ अइसा मनई अहइ जेका भविस्स में अब बच्चन नाहीं होइहीं। कोन्याह आपन जिन्नगी में सफल नाहीं होइ। ओकर सन्तान में स कउनो भी यहूदा पइ सासन नाहीं करी।'"

**23** "यहूदा क गइरियो क बरे इ बहोत बुरा होइ। उ सबइ गइरियन भेड़िन क नस्त करत अहइँ। उ पचे भेड़िन क मोर चरागाह स चारिहुँ कइँती भगावत अहइँ।" इ यहोवा क सँदिसा अहइ।

2उ सबइ गइरियन मोरे लोगन बरे उत्तरदायी अहइँ अउर इस्राएल क परमेस्सर यहोवा ओन गइरियन स इ कहत ह, "गइरियो, तू मोर भेड़िन क चारिहुँ कइँती भगाया ह। तू ओनका चला जाइ क मजबूर किहा ह। तू ओनकर देखरेख नाहीं रख्या ह। किन्तु मई तू लोगन क लखब, मई तू पचन्क बुरे करमन बरे सजा देब जउन तू किहा ह।" इ सँदिसा यहोवा क हिआँ स अहइ। 3"मई आपन भेड़िन (लोगन) क अलग-अलग देसन में पठउब। किन्तु मई आपन ओन भेड़िन क एक संग बटोरब जउन बची रहि ग अहइँ अउर मई ओनका ओनकर चरागाह (देस) में लिआउब। जब मोर भेड़िन अपनी चरागाह में वापस अइहीं तउन ओनकर बहोत बच्चन होइहीं अउर ओनकर संख्या बढ़ि जाइ। 4मई आपन भेड़िन बरे नवे गइरियन राखब उ सबइ गइरियन मोरे भेड़िन क देखरेख करिहीं अउर मोर भेड़िन भयभीत या डेरइहीं नाहीं। मोर भेड़िन में स कउनो हेरइहीं नाहीं।" इ सँदिसा यहोवा क अहइ।

### सच्चा अंकुर

5यहोवा कहत ह: "समइ आवत अहइ जब मई दाऊद क कुल में एक ठु सच्चा "अंकुर" उगाउब। उ अइसा राजा होइ जउन बुद्धिमानी स सासन करी अउर उ उहइ करी जउन देस में उचित अउर निआउपूर्ण होइ।

6उ सच्चे अंकुर क समइ में यहूदा क लोग सुरच्छित रहिहीं अउर इस्राएल सुरच्छित रही। ओकर नाउँ इ होइ यहोवा हमार सच्चाई अहइ।"

7यहोवा कहत ह: "एह बरे समइ आवत अहइ जब लोग पुरान प्रतिग्या नाहीं करिहीं। जउन उ पहिले किया करत रहेन उ कहत रहे: 'यहोवा क किरिया, जउन इस्राएल क लोगन क मिस्त्र देस स बाहेर लिआए रहा।' किन्तु अब लोग कछू नवा कहिहीं, 'यहोवा जिअत अहइ, यहोवा ही उ अहइ

जउन इस्त्राएल क लोगन क उत्तर क देस स बाहेर लिआवा। उ ओनका ओन सबहि देसन स बाहेर लिआवा जेनमाँ उ ओनका पठए रहा। तब इस्त्राएल क लोग आपन देस में ही रहिहीं।”

### झूठे नबियन क विरुद्ध निआव

9नबियन बरे सँदेस अहइ: “मई बहोत दुःखी हउँ, मोर हिरदय विदीर्ण होइ ग अहइ। मोर सारी हड्डियन काँपत अहई। मई (यिर्मयाह) मतवाला क तरह अहउँ। काहे? यहोवा अउर ओकर पवितर सँदेस क कारण।

10यहूदा अइसे लोगन स भरा अहइ जउन परमेस्सर बरे बिस्सासघाती अहई। यहोवा भुईया क अभिसाप दिहस अउर इ बहोत झुराइ गइ। पौधन चरागाहन में झुरात अहई अउर मरत अहई। खेत रेगिस्ताने जइसा होइ ग अहई। नबियन बुरा कर्म करत ह अउर ओनकर सक्ती नकली अहइ।

11नबी अउर याजक तलक भी पापी अहई। मई ओनका आपन मँदिर में पाप करत लखेउँ ह।” इ सँदेस यहोवा क अहइ।

12एह बरे मई ओनका आपन सँदेस देब बन्द करब। इ अइसा होइ माना उ पचे अंधकार में चलइ क मजबूर कीन्ह ग होई। इ अइसा होइ माना नबियन अउर याजकन बरे फिसलइवाली सड़किया होइ। उ अँधियारी जगह में उ सबइ नबी अउ याजक गिरिहीं। मई ओन पइ बिपत्तियन ढाउब। उ समइ मई ओन नबियन अउर याजकन क सजा देब।” इ सँदेस यहोवा क अहइ।

13“मई सोमरोन क नबियन क कछू बुरा करत लखेउँ। मई ओन नबियन क लबार बाल देवता क नाउँ भविस्सवाणी करत लखेउँ। ओन नबियन इस्त्राएल क लोगन स दूर भटकाएन।

14“मई यहूदा क नबियन क यरूसलेम में बहोत भयानक कर्म करत लखेउँ। एन नबियन बिभिचार करइ क पाप किहन। उ पचे झूठी सिच्छन पइ बिस्सास किहन, अउर ओन लबार उपदेसन क कबूल किहन। उ पचे दुट्ट लोगन क पाप करत रहइ क बरे उत्साहित किहन। एह बरे लोग पाप करब नाहीं तजेन। उ पचे सबहि लोग एदोप नगर क तरह अहई। यरूसलेम क लोग मोरे बरे अमोरा नगर क तरह अहइ।”

15एह बरे सर्वसक्तीमान यहोवा नबियन क बारे में इ बातन कहत ह, “मई आव नबियन क दण्ड देब। उ सजा बिख स भरा भोजन पानी खाइ पिअइ जइसा होइ। नबियन आध्यात्मिक बीमारी पइदा किहन अउर उ बीमारी पूरे देस में फइल गइ। एह बरे मई ओन नबियन क सजा देब। उ बीमारी यरूसलेम में नबियन स आइ।”

16सर्वसक्तीमान इ सब कहत ह: “उ पचे नबी तू पचन स जउन कहई ओकर अनसुनी करा। उ पचे तू पचनक मूरख बनावइ क जतन करत अहई। उ पचे नबी अन्तर्दर्सन करइ क बात करत हीं। किन्तु उ पचे आपन अन्तर्दर्सन मोहसे नाहीं पाउतेन। ओनकर अन्तर्दर्सन ओनकर मन क उपज अहइ।

17कछू लोग यहोवा क सच्चे सँदेस स घिना करत हीं। एह बरे उ सबइ नबी ओन लोगन स अलग-अलग कहत हीं। उ पचे कहत हीं, ‘तू सात्ति स रहब्या।’ कछू लोग बहोत हठी अहई। उ पचे उहइ करत हीं जउन उ पचे करइ चाहत हीं। एह बरे उ सबइ नबी कहत हीं, ‘तोहार पचनक कछू भी बुरा नाहीं होइ।’

18किन्तु एन नबियन में स कउनो भी स्वगीय परिषद में सामिल नाहीं भवा ह। ओनमाँ स कउनो भी यहोवा क सँदेस क न लखेस ह न ही सुनेस ह। ओनका स कउनो भी यहोवा क सँदेस पइ गंभीरता स धियान नाहीं दिहस ह।

19अब यहोवा क हिआँ स सजा आँधी क तरह आइ। यहोवा क किरोध बाँड़र क तरह होइ। इ ओन दुट्ट लोगन क मूँड़न क कुचरत भवा आइ।

20यहोवा क किरोध तब तलक नाहीं रूकी जब तलक उ पचे जउन करइ चाहत हीं, पूरा न कइ लेई। जब उ दिन चला जाइ तब तू पचे एका ठीक ठीक समुझब्या।

21मई ओन नबियन क नाहीं पठएउँ। किन्तु उ पचे आपन सँदेस देइ दउड़ पड़ेन। मई ओनसे बातन नाहीं किहेउँ। किन्तु उ पचे मोर नाउँ क उपदेस दिहन।

22जदि उ पचे मोर स्वगीय परिषद में सामिल भए होतेन तउ उ पचे यहूदा क लोगन क मोर सँदेस दिए होतेन। उ पचे लोगन क बुरे कर्म करइ स रोक दिए होतेन। उ पचे लोगन क पाप कर्म करइ स रोक दिए होतेन।”

23इ सँदेस यहोवा क अहइ। “मई परमेस्सर हउँ, हिआँ हुआ अउर सर्वत्र। मई बहोत दूर नाहीं हउँ।

24कउनो मनई कउनो छिपइ क ठउरे में आपन क मोहसे छिपावइ जतन कइ सकत ह। किन्तु ओका लखि लेब मोरे लिए सहल अहइ। काहेकि मई सरग अउ धरती दुइनउँ पइ सर्वत्र हउँ।” यहोवा इ सबइ बातन कहेस।

25“अइसे नबी अहई जउन मोरे नाउँ पइ लबार उपदेस देत हीं। उ पचे कहत हीं, ‘मई एक सपन लखेउँ ह! मई एक सपन लखेउँ ह।’ मई ओनका उ सबइ बातन करत सुनेउँ ह। 26इ कब तलक चलत रही? उ सबइ नबी झूठ ही क चिन्तन करत हीं अउर तब उ पचे उ झूठ क उपदेस लोगन क देत हीं। 27इ सबइ नबी जतन करत हीं कि यहूदा क लोग मोर नाउँ बिसरि जाईं। उ पचे इ काम क, आपुस में एक दूसर स कल्पित सपन कहिके करत अहई। इ सबइ लोग मोरे लोगन स मोर नाउँ वइसे ही बिसराइ देइ क जतन करत अहई जइसे ओनकर पुरखन मोका बिसरि गए रहेन। ओनकर पुरखन मोका बिसरि गएन अउर उ पचे लबार देवता बाल क पूजा किहन। 28भूसा उ नाहीं अहइ जउन गोहूँ अहइ। ठीक उहइ तरह ओन नबियन क सपन मोर सँदेस नाहीं अहई। जदि कउनो मनई आपन सपनन क कहइ चाहत ह तउ ओका कहइ द्या। किन्तु उ मनई क मोरे सँदेस क सच्चाई क कहइ द्या जउन मोरे सँदेस क सुनत ह। 29मोर सँदेस ज्वाला क तरह अहइ। इ उ हथौड़े क तरह अहइ जउन चट्टान क चूर्ण करत ह।” इ सँदेस यहोवा क अहइ।

30“एह बरे मई लबार नबियन क खिलाफ हउँ। काहेकि उ पचे मोरे सँदेस क एक दूसर स चोरावइ में लगा रहत

हीं।" इ सँदिसा यहोवा क अहइ। 31"उ पचे आपन बात कहत हीं अउर देखावा इ करत हीं कि उ यहोवा सँदिसा अहइ। 32मई ओन लबार नबियन क खिलाफ हउँ जउन सपन क उपदेस देत हीं।" इ सँदिसा यहोवा क अहइ। "उ पचे आपन झूठ अउ झूठे उपदेसन स मोरे लोगन क भटकावत हीं। मई ओन नबियन क लोगन क उपदेस देइ बरे नाहीं पठाएँ। मई ओनका आपन बरे कछू करइ क आदेस कबहुँ नाहीं दिहेउँ। उ पचे यहूदा क लोगन क सहायता बिल्कुल नाहीं कइ सकतेन।" इ सँदिसा यहोवा क अहइ।

### यहोवा स दुःखपूर्ण सँदिसा

33"यहूदा क लोग, नबी अथवा याजक तू पचन्स पूछ सकत हीं, यहोवा क 'बोझ' का अहइ?' तू पचे ओनका जवाब द्या, 'तू पचे 'बोझ' अहइ अउर मई तोहसे छुटकारा पाउब।" यहोवा कहत ह।

34"कउनो नबी या याजक अथवा सायद लोगन मँ स कउनो कह सकत ह, 'इ यहोवा स बोझ अहइ।' उ मनई इ झूठ कहेस, एह बरे मई उ मनई अउर ओकरे पूरे परिवार क सजा देब। 35जउन तू आपुस मँ एक दूसर स कहब्या उ इ अहइ: 'यहोवा का जबाव दिहस?' या 'यहोवा का कहेस?' 36किन्तु तू पचे फुन इ भाव क कबहुँ नाहीं दुहरउब्या। यहोवा क 'बोझ' काहेकि 'बोझ' लोगन क खुद क सब्द अहइ। एँह बरे तू पचे मोरे परमेस्सर, सजीव परमेस्सर, सर्वसक्तीमान यहोवा क सब्द क 'बोझ' बदल ह।

37"जदि तू परमेस्सर क सँदिसा क बारे मँ जानइ चाहत अहा तब कउनो नबी स पूछा, 'यहोवा तोहका का जवाब दिहस?' या 'यहोवा का कहेस?' 38किन्तु इ न कहा, 'यहोवा क हिआँ स 'बोझ' का अहइ?' जदि तू एन सब्दन क उपयोग करब्या तउ यहोवा तोहसे इ सब कही, 'तोहका मोरे सँदिसा क यहोवा क हिआँ स 'बोझ' नाहीं कहइ चाही रहा।' मई तोहसे ओन सब्दन क उपयोग न करइ क कहे रहेउँ। 39किन्तु तू मोरे सँदिसा क बोझइ कहा, 'एह बरे मई तोहका एक 'बोझ' क तरह उठाउब अउर आपन स दूर पटक देब। मई तोहरे पुरखन क यरूसलेम नगर दिहे रहेउँ। किन्तु अब मई तोहका अउर उ नगर क आपन स दूर लोकाइ देब। 40मई सदा ही तोहका कलंकित बनाइ देब। तू कबहुँ आपन लजा क नाहीं बिसरब्या।"

### नीक अंजीर अउर बुरे अंजीर

**24** यहोवा मोका इ सबइ चिजियन देखाइस: यहोवा क मन्दिर क समन्वा मई सजी भइ दुइ तु अंजीर क टोकुरियन लखेउँ। (मई इ अन्तदर्सन क बाबुल क राजा नबूकदनेस्सर क जरिये यकोन्याह क बन्दी बनाइ लीन्ह जाइ क पाछे लखेउँ। यकोन्याह राजा यहोयाकीम क पूत रहा। यकोन्याह अउ ओकर बड़के अधिकारी यरूसलेम स दूर पहुँचाइ दीन्ह ग रहेन। उ पचे बाबुल पहुँचावा ग रहेन। नबूकदनेस्सर यहूदा क सबहिं बड़इयन अउ धातुकारन क लइ गवा रहा।) 2एक ठु टोकरी मँ बहोत नीक अंजीर रहेन। उ सबइ ओन अंजीरन क तरह रहेन जउन मौसम क सुरूआत

मँ पकत हीं। किन्तु दूसर टोकरी मँ सड़े गले अंजीर रहेन। उ सबइ एतने सड़े गले रहेन कि ओनका खावा नाहीं जाइ सकत रहा।

यहोवा मोहसे कहेस, "यिर्मयाह, तू का लखत अहा?" मई जवाब दिहेउँ, "मई अंजीर लखत हउँ। नीक अंजीर बहोत नीक अहइ। अउर सड़े गले अंजीर बहोत ही सड़े गले अहइ। उ सबइ एतने सड़े गले अहइ कि खावा नाहीं जाइ सकतेन।"

4तब यहोवा क सँदिसा मोका मिला। 5इस्त्राएल क परमेस्सर यहोवा कहेस, "यहूदा क लोग आपन देस स लइ जावा गएन। ओनकर दुस्सन ओनका बाबुल लइ गवा। उ सबइ लोग एन नीक अंजीरन क तरह होइहीं। मई ओन लोगन पइ दया करब। 6मई ओनकर रच्छा करब। मई ओनका यहूदा देस मँ वापस लिआउब। मई ओनका चरिके लोकाउब नाहीं, मई फुन ओनकर निर्णय करब। मई ओनका उखाड़ब नाहीं अपितु रोपब जेहसे उ सबइ बाढ़इ। 7मई ओनका आपन क समुझइ क इच्छा रखइवाला बनाउब। उ पचे समझिहीं कि मई यहोवा हउँ। उ सबइ मोर लोग होइहीं अउर मई ओनकर परमेस्सर। मई इ करब काहेकि उ पचे बाबुल क बन्दी पूरे हिरदय स मोर सरण मँ अइहीं।

8"किन्तु यहूदा क राजा सिदकिय्याह ओन अंजीरन क तरह अहइ जउने एँतने सड़े गले अहइ कि खावा नाहीं जाइ सकतेन। अउर ओकर बड़के अधिकारी, जउन यरूसलेम अउ मिस्र मँ रहत अहइ ओन सड़े गले अंजीरन क तरह होइहीं।

9"मई ओन लोगन क सजा देब। उ सजा पृथ्वी क सबहिं लोगन क हिरदय दहताइ देइ। लोग यहूदा क लोगन क मजाक उड़इहीं। लोग ओनके बारे मँ हसी उड़इहीं। लोग ओनका ओन सबहिं ठउरन पइ सराप देइहीं जहाँ ओनका मई बिखेरब। 10मई ओनके विरूद्ध तरवारन, भुखमरी अउर बीमारियन पठाउब। मई ओन पइ तब तलक हमला करब जब तलक कि उ पचे सबहिं मर नाहीं जातिन। तब उ पचे भविस्स मँ उ भुइँया पइ नाहीं रहिहीं जेका मई एनका तथा एनकर पुरखन क दिहे रहेउँ।"

### यिर्मयाह क उपदेस क सार

**25** इ उ सँदिसा अहइ, जउन यहूदा क सबहिं लोगन स सम्बन्धित, यिर्मयाह क मिला। इ सँदिसा यहोयाकीम क यहूदा मँ राजकाल क चउथे बरिस मँ आवा। यहोयाकीम योसियाह क पूत रहा। राजा क रूप मँ ओकरे राजकाल क चउथा बरिस उहइ रहा जउन बाबुल मँ नबूकदनेस्सर क पहिला बरिस रहा। 2इ उहइ सँदिसा अहइ जेका यिर्मयाह नबी यहूदा क लोगन अउर यरूसलेम क लोगन क दिहस।

3मई एन बीते तेईस बरिसन मँ यहोवा क सँदिसन क तोहका बार-बार दिहेउँ ह। मई यहूदा क राजा आमोन क पूत योसियाह क राजकाल मँ तेरहवाँ बरिस स नबी अहउँ। मई सुबह होत ही यहोवा क सँदिसन क तोहका दिहेउँ ह। किन्तु तू पचे ओका अनसुना किहा ह। 4यहोवा आपन सेवक नबियन क तोहरे पास बार-बार पठाएस ह। किन्तु तू ओनका

अनसुना किहा ह। तू ओनकी कइँती तनिक भी धियान नाहीं दिहा ह।

5ओन नबियन कहेन, “आपन जिन्गी क बदला। ओन बुरे कामन क करब तजा। जदि तू बदल जाब्या, तउ तू उ भुईया पइ वापस लउट अउर रह सकब्या जेका यहोवा तोहका अउर तोहरे पुरखन क बहोत पहिले दिहे रहा। उ इ भुईया तोहका सदैव रहइ क दिहस। 6दूसर देवतन क अनुसरण न करा। ओनकर सेवा या ओनकर पूजा न करा। इ सबइ कइके मोका किरोधित न करा, मोका तोहका सजा मत देइ द्या।”

7“किन्तु तू मोर अनसुनी किहा।” यहोवा कहत ह। “आपन करम स तू मोका आपन ही चोट बरे किरोधित किहा ह।”

8एह बरे सर्वसक्तीमान यहोवा इ कहत ह, “तू मोरे सँदिसा क अनसुना किहा ह। 9एह बरे मई उत्तर क सबहि परिवार समूहन क हाली बोलाउब।” इ सँदिसा यहोवा क अहइ। “मई हाली ही बाबुल क राजा नबूकदनेस्सर क पठउब। उ मोर सेवक अहइ। मई ओन लोगन क यहूदा देस अउर यहूदा क लोगन क खिलाफ बोलाउब। मई ओनका तोहरे चारिहुँ कइँती क पड़ोसी रास्ट्रन क खिलाफ भी लिआउब। मई ओन सबहि देसन क नस्ट करब। मई ओन देसन क सदैव बरे सूना रेगिस्तान बनाइ देब। लोग ओन देसन क लिखिही अउर जउन बुरी तरह उ सबइ बर्बाद भएन ह ओह पइ सीटी बजइही। 10मई ओन ठउरन पइ सुख अउर आनन्द क किलोलन क बन्द कइ देब। हुआँ भविस्स मँ दुलहा-दुलहिन्स क उमंग भरी हँसी ठिठोली न होइ। मई चक्की चलावइ लोगन क गीतन क दूर कइ देब। मई दीयकन क उजाला खतम करब। 11उ समूचा पहँटा ही सूना रेगिस्तान बन जाइ। उ पचे सारे लोग बाबुल क राजा क सत्तर बरिस तलक दास होइहीं।

12“किन्तु जब सत्तर बरिस बीत जइहीं तउ मई बाबुल क राजा क सजा देब। मई बाबुल रास्ट्र क सजा देब।” इ सँदिसा यहोवा क अहइ। “मई कसदियन क देस क ओनके पाप बरे दण्ड देब। मई उ देस क सदेव बरे रेगिस्तान बनाउब। 13मई कहेउँ ह कि बाबुल पइ अनेक विपत्तियन अइहीं। उ सबइ बातन घटित होइहीं। यिर्मयाह ओन बिदेसी रास्ट्रन क बारे मँ उपदेस दिहे रहा अउर उ सबइ चितउनियन इ पुस्तक मँ लिखी अहइ। 14हौँ बाबुल क लोगन क कइउ रास्ट्रन अउर कइउ बड़के राजा लोगन क सेवा करइ पड़ी। मई ओनका ओकरे बरे ओनके उचित दण्ड देब जउन सब उ पचे करिहीं।”

### बिस्व क रास्ट्रन क संग निआव

15इस्त्राएल क परमेस्सर यहोवा इ सब कहेस, “यिर्मयाह, इ दाखरस क पियाला मोरे हाथन स ल्या। इ मोर किरोध क दाखरस अहइ। मई तोहका अलग-अलग रास्ट्रन मँ पठवत अहउँ। ओन सबहि रास्ट्रन क इ पियाला स पिआवा। 16उ पचे इ दाखरस क पीइहीं। तब उ पचे उलटी करिहीं अउर पागलन सा बेउहार करिहीं। उ पचे इ ओन तरवारन क कारण अइसा करिहीं जेनका मई ओनके खिलाफ हाली पठउब।”

17एह बरे मई यहोवा क हाथ स पियाला लिहेउँ। मई ओन रास्ट्रन मँ गएँ अउर ओन लोगन क उ पियाले स पियाएँ। 18मई दाखरस क यरूसलेम अउ यहूदा क लोगन क बरे ढालेउँ। मई यहूदा क राजा लोगन अउर प्रमुखन क इ पियाले स पियाएँ। मई इ एह बरे किहेउँ कि इ ठउर ऐतनी बुरी तरह स बर्बाद होइ जाइ कि लोग एकरे बारे मँ सीटी बजावइँ अउर इ ठउर क सराप देइँ अउर इ भवा, यहूदा अब उहइ तरह क अहइ।

19मई मिस्त्र क राजा फिरौन क भी पियाले स पियाएँ। मई ओनकर अधिकारियन, ओकर बड़के प्रमुखन अउर ओकर सबहि लोगन क यहोवा क किरोध क पियाले स पियाएँ।

20मई सबहि मिस्त्रित रास्ट्रन अउर अज देस क सबहि राजा लोगन क उ पियाले स पियाएँ।

मई पलिस्ती देस क सबहि राजा लोगन क उ पियाले स पियाएँ। इ सबइ अस्कलोन, अजा, एक्रोन अउर असदोद नगर क बचे भाग क राजा रहेन।

21तब मई एदोम, मोआब अउर अम्मोन क लोगन क उ पियाले स पियाएँ।

22मई सोर अउर सीदोन क राजा लोगन क उ पियाले स पियाएँ। मई बहोत दूर क देसन क राजा लोगन क भी उ पियाले स पियाएँ। 23मई ददान, तेमा अउर बूज क लोगन क उ पियाले स पियाएँ। मई ओन सब क उ पियाले स पियाएँ जउन आपन गाल क बारन क काटत हीं। 24मई अरब क सबहि राजा लोगन क उ पियाले स पियाएँ। इ सबइ राजा रेगिस्ताने मँ रहत हीं। 25मई जिम्नी, एलाम अउर मादै क सबहि राजा लोगन क उ पियाले स पियाएँ। 26मई उत्तर क सबहि निचके अउ दूर क राजा लोगन क उ पियाले स पियाएँ। मई एक क पाछे एक दूसर क पियाएँ। मई पृथ्वी पइ क सबहि राजन क यहोवा क किरोध उ पियाले स पियाएँ। किन्तु बाबुल क राजा एन सबहि दूसर रास्ट्रन क पाछे इ पियाले स पीइ।

27“यिर्मयाह, ओन रास्ट्रन स कहा कि इस्त्राएल क लोगन क परमेस्सर सर्वसक्तीमान यहोवा जउन कहत ह, उ इ अहइ: ‘मोर किरोध क इ पियाला क पिआ। ओकी पीइके मत होइ जा अउर उलटियन करा। भहराइ पड़ा अउ उठा नाहीं, काहेकि तोहका मार डावइ क मई तरवार पठवत हउँ।’

28“उ सबइ लोग तोहरे हाथे स पियाला लेइ स इन्कार करिहीं। उ पचे एँका पिअइ स इन्कार करिहीं। किन्तु तू ओनसे इ कहब्या, ‘सर्वसक्तीमान यहोवा इ बातन बतावत ह: ‘तू निहचय हीं इ पियाला स पीब्या। 29मई आपन नाउँ पइ गोहरावा जाइवाले यरूसलेम नगर पइ पहिले ही बुरी विपत्तियन ढावइ जात हउँ। होइ सकत ह कि तू लोग सोचा कि तू पचन्क सजा नाहीं मिली। किन्तु तू पचे गलत सोचत अहा। तू पचन्क सजा मिली। मई पृथ्वी पइ सबहि लोगन पइ हमला करइ बरे तरवार मँगावइ जात हउँ।” इ सँदिसा यहोवा क अहइ।

30“यिर्मयाह, तू ओनका इ सँदिसा देब्या: ‘यहोवा ऊँच अउ पवित्तर मन्दिर स गरजत बाटइ। यहोवा आपन चरागाह

क खिलाफ चिचियाइके कहत अहइ। ओकर चिल्लाहट वइसी ही ऊँच अहइ, जइसे ओन लोगन क, जउन अगूँन क दाखरस बनावइ बरे गोड़न स कुचरत हीं।

31उ चिल्लाहट पृथ्वी क सबहिं लोगन तलक जात ह। यहोवा क रास्ट्र क खिलाफ सिकायत अहइ। उ सबहिं लोगन क खिलाफ कानूनी दोख दर्ज करत ह। उ कसूरवार क तरवार स मउत क सज़ा देब।” यहोवा कहत ह।

32सर्वसक्तीमान यहोवा इ कहत ह: “एक देस स दूसर देस तलक हाली ह बरबादी आइ। उ सक्तीसाली आँधी क तरह पृथ्वी क सबहिं बहोत दूर क देसन में आइ।”

33ओन लोगन क लहासन एक देस क सिरे स दूसर सिरे क पहुँचहीं। कउनो भी ओन मरन बरे नहीं रोइ। कउनो भी यहोवा क जरिये मारे गए ओनकर लहासन क बटोरी नहीं अउर बटोरी नहीं। उ पचे गोबरे क नाई भुइँया पड़ पड़े तजि दीन्ह जइहीं।

34गड़रियो, जोर स चिल्लाब सुरू करा। भेड़िन क प्रमुखो, पीरा स तड़पत भए जमीन पड़ लोटा। काहेकि अब तोहरे सबन्क मउत क घाट उतारा जाइ क समइ आवत अहइ। मई तू सबइ क टूट घड़न क ठीकरन क तरह चारिहुँ कइँती बिखरिहीं।

35गड़रियो क छुपइ बरे कउनो ठउर नहीं होइ। उ सबइ प्रमुख बचिके नहीं निकरि पड़हीं।

36मई गड़रियन क सोर मचाउब सुनत हउँ। मई भेड़िन क प्रमुखन क रोउब सुनत हउँ। यहोवा ओनकर चरागाह (देस) क नस्ट करत अहइ।

37उ सबइ सान्त चरागाहन सूना रेगिस्तान जइसा अहइँ। इ भवा, काहेकि यहोवा बहोत कोहान अहइ।

38यहोवा आपन माँद तजत भए सेर क तरह खतरनाक अहइ। यहोवा कोहान अहइ। यहोवा क किरोध ओन लोगन क चोट पहुँचाइ। ओनकर देस सूना रेगिस्तान बन जाइ।

### मन्दिर पड़ यिर्मयाह क सिच्छा

**26** योसिय्या राजा क पूत यहोयाकीम क यहूदा पड़ राज करइ क पहिले बरिस यहोवा क इ सँदेसा मिला। यहोवा कहेस, “यिर्मयाह, यहोवा क मन्दिर क आँगन में खड़ा हवा। यहूदा क ओन सबहिं लोगन क इ सँदेसा द्या जउन यहोवा क मन्दिर में पूजा करइ आवत अहइँ। तू ओनसे उ सब कछू कहा जउन मई तोहसे कहइ क कहत हउँ। मोरे सँदेसा क कउनो हींसा क जिन तजा। अहोइ सकत ह उ पचे मोरे सँदेसा क सुनइँ अउर ओकरे अनुसार चलइँ। होइ सकत ह उ पचे अइसी बुरी जिन्नगी बिताउब तजि देइँ। जदि तू पचे बदल जाइँ तउ मई ओनका सजा देइ क योजना क बारे में, आपन निर्णय क बदल सकत हउँ। मई ओनका उ सजा देइ क योजना बनावत हउँ काहेकि उ पचे अनेक बुरे करम किहेन ह। 4तू ओनसे कहब्या, ‘यहोवा जउन कहत ह, उ इ अहइ: मई आपन उपदेस तू पचन्क दिहेउँ। तू पचन्क मोर आग्या क पालन करइ चाही अउर मोर उपदेसन पड़ चलइ चाही। 5तू पचन्क मोरे सेवकन क उ सबइ बातन सुनई चाही जउन उ पचे तोहसे कहइँ। (नबी मोर सेवक अहइँ) मई नबियन क

बार-बार तोहरे पचन्क लगे पठ एउँ ह किन्तु तू पचे ओनकर अनसुनी कइ दिहा ह। 6जदि तू पचे मोर आग्या क पालन नहीं करत्या तउ मई आपन यरूसलेम क मन्दिर क सीलो क पवितर तम्बू क तरह कइ देब। समूची दूनिया क लोग दूसर नगरन बरे बिपति माँगइ क समइ यरूसलेम क बारे में सोचिहीं।”

7याजकन, नबियन अउर सबहिं लोग यहोवा क मन्दिर में यिर्मयाह क इ सबइ कहत सुनेन। 8यिर्मयाह उ सब कछू कहब पूरा किहेस जेका यहोवा लोगन स कहइ क आदेस दिहे रहा। तब याजकन, नबियन अउर लोग यिर्मयाह क धइ लिहेन। उ पचे कहेन, “अइसी भयंकर बातन करइ क कारण तू मरब्या। 9यहोवा क नाँउ पड़ अइसी बातन करइ क हिम्मत तू कइसे करत अहा? तू इ कइसे कहइ क साहस करत अहा कि इ मन्दिर सीलो क मन्दिर क तरह नस्ट होइ? तू इ कहइ क हिम्मत कइसे करत अहा कि यरूसलेम बिना कउनो निवासी क रेगिस्तान बन जाइ।” सबहिं लोग यिर्मयाह क चारिहुँ कइँती यहोवा क मन्दिर में बटुर गएन।

10इ तरह यहूदा क सासक लोग ओन सारी घटनन क सुनेन जउन घटित होत रहीं। एह बरे उ पचे राजा क महल स बाहेर आएन। उ पचे यहोवा क मन्दिर क गएन। हुआँ उ पचे यहोवा क मन्दिर क नवे फाटक क प्रवेस क ठउरे पड़ बइठ गएन। नवा फाटक उ फाटक अहइँ जहाँ स यहोवा क मन्दिर क जात हीं। 11तब याजकन अउर नबियन सासक लोगन अउर सबहिं लोगन स बातन किहेन। उ पचे कहेन, “यिर्मयाह मार डावा जाइ चाही। इ यरूसलेम क बारे में बुरा कहेस ह। तू ओसे बातन कहत सुन्या।”

12तब यिर्मयाह यहूदा क सबहिं सासकन अउर दूसर सबहिं लोगन स बात किहेस। उ कहेस, “यहोवा मोका इ मन्दिर अउर इ नगर क बारे में बातन कहइ बरे पठएस। जउन सब तू पचे सुन्या ह उ यहोवा क हिआँ स अहइ। 13तू लोगन क आपन जिन्नगी बदलइ चाही। तोहका पचन्क नीक काम करब सुरू करइ चाही। तू पचन्क आपन यहोवा परमेस्सर क आग्या मानइ चाही। जदि तू पचे अइसा करब्या तउ यहोवा आपन इरादा बदल देइ। यहोवा उ सबइ बुरी विपत्तियन नहीं लिआइ। जेनके घटित होइ क बारे में उ कहेस। 14जहाँ तलक मोर बात अहइ, मई तू पचन्क बस में हउँ। मोरे संग उ करा जउन तू नीक अउर ठीक समुझत अहा। 15किन्तु जदि तू मोका मार डउब्या तउ एक बात निहचित समझा। तू एक निरपराध मनई क मारइ क अपराधी होब्या। तू इ नगर अउर एहमों जउन रहत हीं ओनका भी अपराधी बनउब्या। फुरइ, यहोवा मोका तोहरे पचन्क लगे पठएस ह। जउन सँदेसा तू सुन्या ह, फुरइ, यहोवा क अहइ।” 16तब सासक अउर सबहिं लोग बोल पड़ें। ओन लोग याजकन अउर नबियन स कहेन, “यिर्मयाह, नहीं मारा जाइ चाही। यिर्मयाह जउन कछू कहेस ह उ हमरे यहोवा परमेस्सर क ही वाणी अहइ।”

17तब अग्रजन में स कछू खड़े भएन अउर उ पचे सब लोगन स बातन किहेन। 18उ पचे कहेन, “मीकायाह नबी मोरसोती नगर क रहा। मीकायाह ओन दिनन नबी रहा जउने

दिनन हिजकिय्याह यहूदा क राजा रहा। मीकायाह यहूदा क सबहि लोगन स इ कहेस: सर्वसक्तीमान यहोवा इ कहत ह:

“सिय्योन एक ठु जुता भवा खेत बनी। यरूसलेम चट्टानन क ढेर होइ। जउने पहाड़ी पइ मन्दिर बना अहइ ओह पइ बृच्छ उगिहीं।”  
मीका 3:12

19“हिजकिय्याह यहूदा क राजा रहा अउर हिजकियाह मीकायाह क नाहीं मारिस। यहूदा क कउनो मनई मीकायाह क नाहीं मारेन। तू पचे जानत अहा हिजकिय्याह यहोवा क सम्मान करत रहा। उ यहोवा क खुस करइ चाहत रहा। यहोवा कह चुका रहा कि उ यहूदा क बुरा करी। किन्तु हिजकिय्याह यहोवा स पराथना किहस अउर यहोवा आपन इरादा बदल दिहस। यहोवा उ सबइ बुरी विपतियन नाहीं आवइ दिहस। जदि हम लोग यिर्मयाह क चोट पहाँचाउब तउ हम लोग अपने उपर विपतियन बोलाउब अउर उ सबइ विपतियन हम लोगन क अपने दोख क कारण होइहीं।”

20अतीत काल में एक दूसर मनई रहा जउन यहोवा क सँदेसा क उपदेस देत रहा। ओकर नाउँ ऊरिय्याह रहा। उ समाय्याह नाउँ क मनई क पूत रहा। ऊरिय्याह, किर्यत्यारीम नगर क रहा। ऊरिय्याह इ नगर अउर देस क बिरुद्ध उहइ उपदेस दिहस जउन यिर्मयाह दिहस ह। 21राजा यहोयाकीम ओकर सेना अधिकारी अउर यहूदा क प्रमुख लोग ऊरिय्याह क उपदेस सुनेन। उ पचे कोहाइ गएन। राजा यहोयाकीम ऊरिय्याह क मार डावइ चाहत रहा। किन्तु ऊरिय्याह क पता चला कि यहोयाकीम ओका मार डावइ चाहत ह। ऊरिय्याह डेराइ गवा अउर उ मिस्र देस क पराइ निकरा। 22किन्तु यहोयाकीम एलनातान नाउँ क एक मनई तथा कुछ लोगन क मिस्र पठएस। एलनातान अकबोर नाउँ क मनई क पूत रहा। 23उ सबइ लोग ऊरिय्याह क मिस्र स वापस लइ आएन। तब उ सबइ लोग ऊरिय्याह क राजा यहोयाकीम क लगे लइ गएन। यहोयाकीम ऊरिय्याह क तरवारे क घाट उतार देइ क आदेस दिहस। ऊरिय्याह क लहास उ कब्रिस्तान में लोकाइ दीन्ह गवा जहाँ गरीब लोग दफनाया जात रहेन।

24किन्तु साफान क पूत अहीकाम यिर्मयाह क साथ दिहस अउ ओका लोगन क हाथ स मरइ स बचाएस।

### यहोवा नबूकदनेस्सर क सासक बनाएस ह

27 यहोवा क सँदेसा यिर्मयाह क मिला। यहूदा क राजा सिदकिय्याह क राजकाल क चउथे बरिस उ आवा। सिदकिय्याह राजा योसिय्याह क पूत रहा। 2यहोवा मोहसे जउन कहेस, उ इ अहइ: “यिर्मयाह छइ अउर चमड़े क पट्टियन स जुआ बनावा। उ जुआ क आपन गटइया पई रखा। अतब एदोम, मोआब, अम्मोन सोर अउर सीदोन क राजा लोगन क कइँती ओनका पठवा। इ सबइ सँदेसन एन राजा लोगन क राजदूतन क जरिये पठवा जउन यहूदा क राजा सिदकिय्याह स मिलइ यरूसलेम आवा अहइँ। 4ओन राजदूतन स कहा कि उ पचे सँदेसा आपन सुआमियन क द्या। ओनसे इ कहा कि इस्राएल क परमेस्सर सर्वसक्तीमान यहोवा इ कहत ह: ‘आपन सुआमियन स कहा

कि 5मई पृथ्वी अउर एँह पइ रहइवाले सबहि लोगन क बनाएउँ। मई पृथ्वी क सबहि जनावरन क बनाएउँ। मई इ आपन बड़की सक्ती अउर सक्तीसाली भुजा स किहेउँ। मई इ पृथ्वी कउनो क भी चाहउँ दइ सकत हउँ। 6इ समइ मई बाबुल क राजा नबूकदनेस्सर क इ सबइ भुइँया दइ दिहेउँ। उ मोर सेवक अहइ। मई जंगली जनावरन क भी ओकरे आग्याकारी बनाउब। 7सबहिं रास्त्र नबूकदनेस्सर ओकर पूत अउर ओकर पौत्र क सेवा करिहीं। तब बाबुल क पराजय क समइ आइ। कइउ रास्त्र अउर बड़के सम्राट बाबुल क आपन सेवक बनइहीं।

8“किन्तु इ समइ कछू रास्त्र या राज्ज बाबुल क राजा नबूकदनेस्सर क सेवा करइ स इन्कार कइ सकत हीं। उ पचे ओकरे जुआ क आपन गटइया पइ धरइ स इन्कार कइ सकत हीं। जदि अइसा होत ह तउ जउन मई करब उ इ अहइ: मई उ रास्त्र क तरवार, भूख अउर भयंकर बीमारी क सजा देब,” यहोवा कहत ह। “मई उ तब तलक करब जब तलक मई उ रास्त्र क नस्ट न कइ देउँ। मई नबूकदनेस्सर क उपयोग उ रास्त्र क नस्ट करइ क बरे करब जउन ओकरे बिरुद्ध करत ह। 9एह बरे आपन नबियन क एक स सुना। ओन मनइयन क एक न सुना जउन भविस्स क घटनन क जानइ बरे जादू क उपयोग करत हीं। ओन लोगन क एक न सुना जउन इ कहत हीं कि हम सपन क फल बताइ सकित ह। ओन मनइयन क एक न सुना जउन मरन स बात करत हीं या उ सबइ लोग जउन जादूगर अहइँ। उ पचे सबहिं तू पचन्स बातन करत हीं, “तू पचे बाबुल क राजा क दास नाहीं बनब्या।” 10किन्तु उ सबइ लोग तू पचन्स झूठ बोलत हीं। मई तू पचन्क तोहरे पचन्क जन्मभूमि म दूर जाइ पइ बिबस करब अउर तू पचे दूसर देस में मरब्या।

11“किन्तु उ सबइ रास्त्र जउन बाबुल क राजा क जुआ क आपन कंधन पइ धरिहीं अउर ओकर आग्या मानिहीं, जिअत रहिहीं। मई ओन रास्त्रन क ओनके आपन देस में रहइ देब।” इ सँदेसा यहोवा क अहइ। “ओन रास्त्रन क लोग आपन भुइँया पइ रहिहीं अउर ओह पइ खेती करिहीं।

12“मई यहूदा क राजा सिदकिय्याह क भी इहइ सँदेसा दिहउँ। मई कहेउँ, “सिदकिय्याह, तोहका बाबुल क राजा क जुआ क खाले आपन गटइ देइ चाही अउर ओकर आग्या मानइ चाही। जदि तू बाबुल क राजा अउर ओकर लोगन क सेवा करब्या तउ तू रहि सकब्या। 13जदि तू बाबुल क राजा क सेवा करब कबूल नाहीं करत्या तउ तू अउर तोहार लोग दुस्मन क तरवार क घाट उतारा जइहीं, तथा भूख अउर भयंकर बीमारी स मरिहीं। यहोवा कहेस कि इ सबइ घटनन होइहीं। 14किन्तु लबार नबी कहत अहइँ: तू बाबुल क राजा क दास कबहुँ नाहीं होब्या।

“ओन नबियन क एक न सुना। काहेकि उ पचे तोहका झूठा उपदेस देत अहइँ। 15मई ओन नबियन क नाहीं पठएउँ ह।” इ सँदेसा यहोवा क अहइ। “उ पचे झूठ उपदेस देत अहइँ अउर कहत अहइँ कि उ सँदेसा मोरे हिआँ स अहइ। एह बरे यहूदा क लोगो, मई तोहका पचन्क दूर पठउब। तू पचे मरब्या अउर उ सबइ नबी भी जउन झूठ उपदेस देत



अहईं मरिहीं।” 16तब मई (यिर्मयाह) याजक अउर ओन सबहिं लोगन स कहेस, “यहोवा कहत ह: ‘उ पचे लबार नबी कहत अहईं, कसदियन बहोत स चिजियन यहोवा क मन्दिर स लिहना। उ सबइ चिजियन हाली ही वापस लिआइ जइहीं।’ ओन नबियन क एक न सुना काहेकि उ पचे तू पचन्क झूठ उपदेस देत अहईं। 17ओन नबियन क एक न सुना। बाबुल क राजा क सेवा करा अउर तू पचे जिअत रहब्या। तोहरे पचन्क बरे कउनो कारण नाहीं कि तू पचे यरूसलेम सहर क बर्बाद करवाआ। 18जदि उ सबइ लोग नबी अहईं अउर ओनके लगे यहोवा क सँदेसा अहइ तउ ओनका पराथना करइ द्या। ओन चीजन क बारे में ओनका पराथना करइ द्या जउन अबहिं तलक राजा क महल में अहईं अउर ओनका ओन चिजियन क बारे में ओनका पराथना करइ द्या जउन अबहिं तलक राजा क महल में अहईं ओनका ओन चिजियन क बारे में पराथना करइ द्या जउन अब तलक यरूसलेम में अहईं। ओन नबियन क पराथना करइ द्या ताकि उ पचे सबहिं चिजियन बाबुल नाहीं लइ जाइ जाईं।”

19सर्वसक्तीमान यहोवा ओन सबइ चिजियन क बारे में इ कहत ह जउन अबहिं तलक यरूसलेम में बची रहि गइ अहईं। मन्दिर में खम्भा, काँसा क बना सागर, हटावइ जोगग आधार अउर दूसर चिजियन अहईं। बाबुल क राजा नबूकदनेस्सर ओन चिजियन क यरूसलेम में तजि दिहना। 20नबूकदनेस्सर जब यहूदा क राजा यकोन्याह क बन्दी बनाइके लइ गवा तब ओन चिजियन क नाहीं लइ गवा। यकोन्याह राजा यहोयाकीम क पूत रहा। नबूकदनेस्सर यहूदा अउर यरूसलेम क दूसर बड़ेके लोगन क भी लइ गवा। 21इस्त्राएल क लोगन क परमेस्सर सर्वसक्तीमान यहोवा मन्दिर में बची, राजमहल में बची अउर यरूसलेम में बची चिजियन क बारे में इ कहत ह, “उ सबइ चिजियन भी बाबुल लइ जाइ जइहीं। 22उ सबइ चिजियन बाबुल में तब तलक रहिहीं जब तलक उ समइ आइ कि मई ओनका लेइ जाब।” इ सँदेसा यहोवा क अहइ। “तब मई ओन चिजियन क वापस लिआउब। मई ओन चिजियन क इ ठउरे पइ वापस रखब।”

### झूठा नबी हनन्याह

**28** यहूदा में सिदकिय्याह क राजकाल क चउथे बरिस क पाँचवे महीना में अजू क पूत, गिबोन क हनन्याह नबी मोहसे बात किहस। हनन्याह यहोवा क मन्दिर में याजक अउर दूसर लोगन क समन्वा मोहसे बात किहसे। हनन्याह जउन कहेस उ इ अहइ: 2“इस्त्राएल क लोगन क परमेस्सर सर्वसक्तीमान यहोवा इ कहत ह, ‘मई उ जुए क तोड़ डाउब जेका बाबुल क राजा यहूदा क लोगन पइ रखा ह। 3दुइ बरिस पूरा होइ क पहिले मई ओन चिजियन क वापस लइ आउब जेनका बाबुल क राजा नबूकदनेस्सर यहोवा क मन्दिर स बाबुल लइ गवा ह। 4मई यहूदा क राजा यकोन्याह क भी वापस हिआँ स लइ आउब। यकोन्याह, यहोयाकीम पूत अहइ मई ओन सबहिं यहूदा क लोगन क वापस लि आउब जेनका नबूकदनेस्सर

आपन घर तजइ अउर बाबुल जाइ क मजबूर किहस।’ इ सँदेसा यहोवा क अहइ। ‘एह बरे मई उ जुए क तोड़ देब जेका बाबुल क राजा यहूदा क लोगन पइ रखेस ह।”

5तब यिर्मयाह नबी हनन्याह नबी स यहोवा मन्दिर में याजकन अउर ओन सबहिं लोगन क समन्वा जउन यहोवा क मन्दिर में उपस्थित रहब, कहब्या। 6यिर्मयाह हनन्याह स कहेस, “आमीन! मोका आसा अहइ कि यहोवा निहचय ही अइसा करी। मोका आसा अहइ कि यहोवा उ सँदेसा क फुरइ घटित करी जउन तू देत अहा। मोका आसा अहइ कि यहोवा आपन मन्दिर क चिजियन क बाबुल स उ ठउरे पइ वापस लिआइ अउर मोका आसा अहइ कि यहोवा ओन सबहिं लोगन क इ ठउरे पइ वापस लिआइ जउन आपन घरन क तजइ क बिक्स कीन्ह ग रहेन।

7“किन्तु हनन्याह उ सुना जउन मोका कहइ चाही। उ सुना जउन मई सबहिं लोगन स कहत हउँ। 8हनन्याह हमरे अउर तोहरे नबी होइ के बहोत पहिले भी नबी रहेन। उ पचे भविस्सवाणी किहे रहेन कि जुद्ध, भुखमरी अउर भयंकर बीमारियन अनेक देसन अउर राजन में अइहीं। 9मुला उ नबी क जाँचा इ जानइ बरे होइ चाही कि ओका यहोवा फुरइ पठएस ह जउन इ कहत ह कि हम लोग सात्ति क साथ रहब। जदि उ नबी क सँदेसा फुरइ घटित होत ह तउ लोग समुझ सकत हीं कि फुरइ ही उ यहोवा क जरिये पठवा गवा ह।”

10यिर्मयाह आपन गटइ पइ एक जुआ धरे रहा। तब हनन्याह नबी उ जुआ क यिर्मयाह क काँधन स उतार लिहस। हनन्याह उ जुआ क तोड़ डाएस। 11तब हनन्याह सबहिं लोगन क समन्वा बोला। उ कहेस, “यहोवा कहत ह, ‘इहइ तरह मई बाबुल क राजा नबूकदनेस्सर क जुआ क तोड़ देब। उ उ जुआ क दुनिया क सबहिं रास्ट्रन पइ धरेस ह। किन्तु मई उ जुआ क दुइ बरिस बीतइ स पहिले ही तोड़ देब।”

हनन्याह क उ कहइ क बाद यिर्मयाह मन्दिर क तजिके चला गवा।

12तब यहोवा क सँदेसा यिर्मयाह क मिला। इ तब भवा जब हनन्याह यिर्मयाह क गटइ स जुआ क उतार लिहे रहा अउर ओका तोड़ डाए रहा। 13यहोवा यिर्मयाह स कहेस, “जा अउर हनन्याह स कहा, ‘यहोवा जउन कहत ह, उ इ अहइ: तू एक ठु काठे क जुआ तोड़्या ह। किन्तु मई काठ क जगह एक ठु लोहा क जुआ बनाउब।’ 14इस्त्राएल क परमेस्सर सर्वसक्तीमान यहोवा कहत ह, ‘मई एन सबहिं रास्ट्रन क गटइ पइ लोहा क जुआ धरब। मई इ बाबुल क राजा नबूकदनेस्सर क ओनसे सेवा कराबइ बरे करब अउर उ पचे ओकर दास होइहीं। मई नबूकदनेस्सर क जंगली जनावरन पइ भी सासन क अधिकार देब।”

15तब यिर्मयाह नबी हनन्याह नबी स कहेस, “हनन्याह, सुना! यहोवा तोहका नाहीं पठएस। यहोवा तोहका नाहीं पठएस किन्तु तू यहूदा क लोगन क झूठ में बिस्सास कराया। 16एह बरे यहोवा जउन कहत ह, उ इ अहइ, ‘हनन्याह मई तोहका हाली ही इ संसार स उठाइ लेब। तू इस बरिस मरब्या। काहेकि तू लोगन क यहोवा क खिलाफ

जाइ क सिच्छा दिहा ह।” 17हनन्याह उहइ बरिस क सतएँ महीने मरि गवा।

### बाबुल में यहूदी बन्दीयन बरे एक पत्र

**29** यिर्मयाह बाबुल में बन्दी यहूदियन क एक पत्र पठएस। उ एका अग्रजन, याजकन, नबियन अउर बाबुल में रहइवाले सबहिं बन्दी यहूदियन क पठएस। इ सबइ उ पचे लोग रहेन जेनका नबूकदनेस्सर यरूसलेम में पकड़े रहा अउर बाबुल लइ गवा। 2इ पत्र राजा यकोन्याह, राजमाता, अधिकारी, यहूदा अउर यरूसलेम क प्रमुख, बर्दई अउर ठठेरन क यरूसलेम स लइ जावा जाइ क पाछे पठवा गवा रहा। 3सिदकिय्याह एलासा अउर गमर्याह क राजा नबूकदनेस्सर क लगे पठएस। सिदकिय्याह यहूदा क राजा रहा। एलासा सापान क पूत रहा अउर गमर्याह हिल्किय्याह क पूत रहा। यिर्मयाह उ पत्र क ओन लोगन क बाबुल लइ जाइ बरे दिहस। पत्र में जउन लिखा रहा उ इ अहइ:

4इस्त्राएल क लोगन क परमेस्सर सर्वसक्तीमान यहोवा इ सबइ बातन ओन सबहिं लोगन स कहत ह जेनका बन्दी क रूप में उ यरूसलेम स बाबुल पठए रहा: 5“घर बनावा अउर ओहमाँ रहा। उस देस में बस जा। पौधन लगावा अउर आपन आइ भइ फसल स भोजन पावा। 6बियाह करा अउ बेटा-बिटिया पढ़ा करा। आपन पूतन बरे मेहररूअन हेरा अउर आपन बितियन क बियाह करा। इ एह बरे करा जेहसे ओनके भी लरकन अउ लड़कियन होई बहोत स बच्चन पढ़ा करा अउर बाबुल में आपन गिनती बढ़ावा। आपन गिनती जिन घटावा। 7मई जउने नगर में तू पचन्क पठउँ ओकरे बरे नीक काम करा। जउने नगर में तू पचे रहा ओकरे बरे यहोवा स पराथना करा। काहेकि जदि उ नगर में सात्ति रही तउ तू पचन्क भी सात्ति मिली।” 8इस्त्राएल क लोगन क परमेस्सर सर्वसक्तीमान यहोवा कहत ह, “आपन नबियन अउर जादूगरन क आपन क मूरख मत बनावइ द्या। ओनकर ओन सपनन क बारे में न सुना जेनका उ पचे लखत हीं। 9उ पचे झूठा उपदेस देत हीं अउर उ पचे इ इ कहत हीं कि ओनकर सँदिसा मोरे हिआँ स अहइ। किन्तु मई ओका नाहीं पठएउँ।” इ सँदिसा यहोवा क अहइ।

10यहोवा जउन कहत ह, उ इ अहइ: “बाबुल सत्तर बरिस तलक सक्तीसाली रही। ओकरे पाछे बाबुल में रहइवाले लोगो, मई तोहरे पचन्क लगे आउब। मई तोहका पचन्क वापस यरूसलेम लिआवइ क सच्ची प्रतिग्या पूरी करब। 11मई इ एह बरे कहत हउँ काहेकि मई ओन आपन जोजनन क जानत हउँ जउन तोहरे पचन बरे अहई।” मई तू पचन्क चोट पहाँचावइ क जोजना नाहीं बनावत हउँ। मई तू पचन्क आसा अउर उज्वल भविस्स देइ क जोजना बनावत हउँ। 12तब तू लोग मोर नाउँ लेब्या। तू लोग मोरे लगे अउब्या अउर मोर पराथना करब्या अउर मई तोहार पचन्क बातन पढ़ धियान देब। 13तू लोग मोर खोज करब्या अउर तू पचे मोका पउब्या काहेकि तू इमानदरी स मोर खोज करब्या।

14मई आपन क तू पचन्क प्राप्त होइ देब।” इ सँदिसा यहोवा क अहइ। “मई तू पचन्क तोहरे सबन्क बन्दीखाने स वापस लिआउब। मई तू पचन्क इ ठउर तजइ क विवस किहस। किन्तु मई तू पचन्क ओन सबहिं रास्ट्रन अउ ठउरन स एकट्ठा करब जहाँ मई तू पचन्क पठएउँ ह।” इ सँदिसा यहोवा क अहइ। मई तू पचन्क इ ठउरे पड़ वापस लिआउब।”

15तू लोग इ कहि सकत ह, “किन्तु यहोवा हमका हिआँ बाबुल में नबी दिहस ह।” 16किन्तु यहोवा तोहरे पचन्क ओन सबंधियन क बारे में जउन बाबुल नाहीं लइ जावा गए इ कहत ह: मई उ राजा क बारे में बात कहत हउँ जउन इ समइ दाऊद स राजसिंहासन पड़ बइठा अहइ अउर ओन सबहिं दूसर लोगन क बारे में जउन अब भी यरूसलेम नगर में रहत हीं। 17सर्वसक्तीमान यहोवा कहत ह, “मई हाली ही तरवार, भूख अउर भयंकर बीमारी ओन लोगन क खिलाफ पठउब जउन अब भी यरूसलेम में अहई अउर मई ओनका उ सबइ ही सड़े गले अंजीर बनाउब जउन खाइ जोगग नाहीं। 18मई ओन लोगन क पाछा जउन अभी भी यरूसलेम में अहई, तरवार, भूख अउर भयंकर बीमारी स करब अउर मई एका अइसा कइ देब कि पृथ्वी क सबहिं राज इ लखिके डेराब कि एन लोगन क संग का घटित होइ ग अहइ। उ सबइ लोग बर्बाद कइ दीन्ह गएन। लोग जब ओन घटित घटनन क सुनिहीं तउ अचरज स सिसकारी भरिहीं अउर जब लोग कउनो लोगन बरे अभिसाप करिहीं तउ उ पचे एका उदारहण रूप में उपयोग करिहीं। मई ओन लोगन क जहाँ कहुँ जाइ क बिबस करब, लोग हुआँ ओनकर अपमान करिहीं। 19मई ओन सबहिं घटनन क घटित कराउब काहेकि यरूसलेम क ओन लोग मोरे सँदिसा क अनसुना किहन ह।” इ सँदिसा यहोवा क अहइ। “मई आपन सँदिसा ओनके लगे बार-बार पठएउँ। मई आपन सेवक नबियन क ओन लोगन क आपन सँदिसा देइ क पठएउँ। किन्तु लोग ओनका अनसुना किहन।” इ सँदिसा यहोवा क अहइ। 20“तू लोग बन्दी हवा। मई तू पचन्क यरूसलेम तजइ अउर बाबुल जाइ क मजबूर किहेउँ। एह बरे यहोवा सँदिसा सुना।”

21सर्वसक्तीमान यहोवा कोलायाह क पूत अहाब अउर मासेयाह क पूत सिदकिय्याह क बारे में इ कहत ह: “इ दुइनउँ मनई तू पचन्क लबार उपदेस देत अहई। उ पचे कहेन ह कि ओनकर सँदिसा मोरे हिआँ स अहइ। किन्तु उ पचे झूठ बोलत रहेन। ओन दुइनउँ नबियन क बाबुल क राजा नबूकदनेस्सर क दइ देब अउर नबूकदनेस्सर बाबुल में बन्दी तू सबहिं लोगन क समन्वा ओन नबियन क मार डाइ। 22सबहिं यहूदी बन्दी ओन लोगन क उपयोग उदारहण बरे तब करिहीं जब उ पचे दूसर लोगन क बुरा होइ क माँग करिहीं। उ सबइ बन्दी कहिहीं, ‘यहोवा तोहरे पचन्क संग सिदकिय्याह अउर अहाव क नाई बेउहार करइ। बाबुल क राजा ओन दुइनउँ क आगी में बार दिहस।’ 23ओन दुइनउँ नबियन

इस्त्राएल क लोगन क संग घृणित कर्म किहे रहेन। उ पचे आपन पड़ोसी क मेहरारू क घिनौना करम किहे रहेन। उ पचे झूठ भी बोलें ह अउर कहेन ह कि उ सबइ झूठ यहोवा क हिआँ स अहइ। मई ओनसे उ सब करइ क नाहीं कहेउँ। मई जानत हउँ कि उ पचे का किहेन ह? मई साच्छी हउँ।” इ सँदिसा यहोवा क अहइ।

### समायाह क परमेस्सर क सँदिसा

24समायाह क भी एक सँदिसा द्या। समायाह नेहलामी परिवार स अहइ। 25इस्त्राएल क परमेस्सर सर्वसक्तीमान यहोवा कहत ह, “समायाह, तू यरूसलेम क सबहि लोगन क पत्र पठएस अउर तू यासेयाह क पूत याजक सपन्याह क पत्र पठया। तू सबहि याजकन क पत्र पठया। तू ओन पत्रन क आपन नाउँ स पठया अउर यहोवा क सत्ता क नाउँ पइ नाहीं। 26समायाह, तू आपन सपन्याह क आपन पत्र मँ जउन लिखे रह्या उ इ अहइ: ‘सपन्याह यहोवा यहोयादा क ठउरे पइ तोहका याजक बनाएस ह। तू यहोवा क मन्दिर क अधिकारी अहा। तोहका उ कउनो क कैद कइ लेइ चाही जउन पागल क तरह काम करत ह अउर नबी क तरह बेउहार करत ह। तोहका उ मनई क गोड़न क लकड़ी क बड़े टूकन क बीच रखइ चाही अउर ओकरे गले मँ लौह-कटक पहिरइ चाही। 27अब यिर्मयाह नबी क तरह काम करत ह। एह बरे तू ओका बन्दी काहे नाहीं बनाया? 28यिर्मयाह हम लोगन क इ सँदिसा बाबुल मँ दिहे रहा: “बाबुल मँ रहइवाले लोगो, तू हुआँ लम्बे समइ तलक रहब्या। एह बरे आपन मकान बनावा अउर हुवँइ जाइ बसा। बाग लगावा अउर उ खा, जउन उपजावा।”

29याजक सपन्याह यिर्मयाह नबी क पत्र सुनाएस। 30तब यिर्मयाह क लगे यहोवा क सँदिसा आवा। 31“यिर्मयाह, बाबुल क सबहि बन्दियन क इ सँदिसा पठवा: ‘नेहलामी परिवार क समायाह क बारे मँ जउन यहोवा कहत ह, उ इ अहइ: समायाह तोहरे समन्वा भविस्सवाणी किहस, किन्तु मई ओका नाहीं पठएउँ। समायाह तोहका झूठ मँ बिस्सास कराएस ह। समायाह इ किहेस ह। 32एह बरे यहोवा जउन कहत ह उ इ अहइ: नेहलामी परिवार क समायाह क मई हाली सजा देब। मई ओकरे परिवार क पूरी तरह नस्त करब अउर मई आपन लोगन बरे जउन नीक करब ओहमौ ओकर कउनो हीसा नाहीं होइ।” इ सँदिसा यहोवा क अहइ। “मई समायाह क सजा देब काहेकि उ लोगन क यहोवा क बिरुद्ध जाइ क सिच्छा दिहेस ह।”

### आसा क प्रतिग्यन

30 इ सँदिसा यहोवा क अहइ जउन यिर्मयाह क मिलइ। 2इस्त्राएल क लोगन क परमेस्सर यहोवा इ कहेस, “यिर्मयाह, मई जउन सँदिसा दिहेउँ ह, ओनका एक तु किताबे मँ लिख ड़ावा। इ किताबे क अपने बरे लिखा।” 3इ सँदिसा यहोवा क अहइ। “इ करा, काहेकि उ सबइ दिन अइहीं जब मई आपन लोगन इस्त्राएल अउर यहूदा क देस निकारइ स वापस लिआउब।” इ सँदिसा यहोवा क अहइ।

“मई ओन लोगन क उ देस मँ वापस लि आउब जेका मई ओनके पुरखन क दिहे रहेउँ। तब मोर लोग उ देस क फुन अपना बनइहीं।”

4यहोवा इ सँदिसा इस्त्राएल अउर यहूदा क लोगन क बारे मँ दिहस

5यहोवा जउन कहेस, उ इ अहइ: “हम भय स रोवत लोगन क रोउब सुनित ह। लोग डेरान अहइँ। कहुँ सान्ति नाहीं।

6इ सवाल पूछा एह पइ विचार करा: का कउनो पुरूख बच्चा क जन्म दइ सकत ह? निहचय ही नाहीं। तब मई हर एक सक्तीसाली मनई क पेट धरे काहे लखत हउँ माना उ पचे पइदा करइवाली मेहरारू क पीरा सहत होई? काहे हर एक मनई क मुँह ल्हास सा सफेद होत अहइ? काहेकि लोग बहोत भयभीत अहइँ?

7इ याकूब बरे बहोत महत्वपूर्ण समइ अहइ। इ बड़की बिपत्ति क समइ अहइ। इ तरह क समइ फुन कबहुँ नाहीं आइ। किन्तु याकूब बच पाइ।”

8इ सँदिसा यहोवा क अहइ: “उ समइ, मई इस्त्राएल अउर यहूदा क लोगन क गटइ स जुआ क तोड़ डाउब अउर तोहका जकड़इवाली रस्सियन क मई तोड़ देब। विदेसन क लोग मोरे लोगन क फुन कबहुँ दास होइ बरे बिक्स नाहीं करिहीं। 9इस्त्राएल अउर यहूदा क लोग दूसर देसन क भी सेवा नाहीं करिहीं। नाहीं, उ पचे तउ आपन परमेस्सर यहोवा क सेवा करिहीं अउर उ पचे आपन राजा दाऊद क सेवा करिहीं। मई उ राजा क ओनके लगे पठउब।

10“एह बरे मोर सेवक याकूब डेराअ नाहीं।” इ सँदिसा यहोवा क अहइ। “इस्त्राएल, डेराअ नाहीं। मई उ बहोत दूर क ठउरे स तोहका बचाउब। तू उ बहोत दूर क देस मँ बन्दी अहा, किन्तु मई तोहरी सन्तानन क उ देस स बचाउब। याकूब फुन सान्ति पाइ। याकूब क लोग तंग नाहीं करिहीं। मोरे लोगन क भयभीत करइवाला कउनो दुस्मन नाहीं होइ।

11इस्त्राएल अउर यहूदा क लोगो, मई तोहरे संग हउँ।” यहोवा कहत ह, “अउर मई तोहका बचाउब। मई तोहका ओन रास्ट्रन मँ पठएउँ। किन्तु मई ओन सबहि रास्ट्रन क पूरी तरह नस्त करब। किन्तु मई तोहका नस्त नाहीं करब। किन्तु मई तोहका निआवपूर्ण अनुसासित करब ओन बुरे कामन क सजा जरूर मिली जेनका तू किहा।”

12यहोवा कहत ह, “इस्त्राएल अउर यहूदा क तू लोगन क एक घाव अहइ जउन नीक नाहीं कीन्ह जाइ सकत। तोहका एक चोट अहइ जउन नीक नाहीं होइ सकत। 13तोहरे घावत क ठीक करइवाला कउनो मनई नाहीं अहइ। एह बरे तू तन्दुरूस्त नाहीं होइ सकत्या।

14तू अनेक रास्ट्रन क मीत बना अहा, किन्तु उ पचे रास्ट्र तोहार परवाह नाहीं करतेन। तोहार मीत तोहका बिसरि गवा अहइँ। मई तोहका दुस्मन जइसी चोट पहोंचाएउँ। मई तोहका कठोर सजा दिहेउँ। मई इ तोहरे बड़के अपराध बरे किहेउँ।

15इस्त्राएल अउर यहूदा तू आपन घाव क बरे मँ काहे चिल्लात अहा? तोहार घाव कस्त देइवाला अहइ अउर एकर कउनो उपचार नाहीं अहइ। मई, यहोवा तोहार बड़के

अपराधन क कारण तोहका इ सबइ किहेउँ। मई इ सबइ कछू तोहार अनेक पापन क कारण किहेउँ।

16ओन रास्ट्र तोहका नस्ट किहन। किन्तु अब उ सबइ नस्ट कीन्ह जइहीं। इस्राएल अउर यहूदा तोहार सत्रु बन्दी होइहीं। ओन लोग तोहार चिजियन चोराएन। किन्तु दूसर लोग ओनकर चिजियन चुराइहीं। ओन लोग तोहार चिजियन जुद्ध में लिहेन। किन्तु दूसर लोग ओनसे चिजियन जुद्ध में लेइहीं।

17मई तोहरी तन्दुरुस्ती क लउटाउब अउर मई तोहरे घावन क भरबा" इ सँदेसा यहोवा क अहइ। "काहेकि दूसर लोग कहेन कि तू जाति-बहिस्क्रत अहा। ओन लोग कहेन, 'कउनो भी सिथ्योन क परवाह नहीं करता।"

18यहोवा कहत ह: "याकूब क लोग अब बन्दी अहई। किन्तु उ पचे वापस अइहीं। अउर मई याकूब क परिवारन पइ दाया करब। सहर अब बर्बाद इमारतन स ढका एक पहाड़ी सिरिफ अहइ। किन्तु इ नगर फुन बनी अउर राजा क महल भी हुआँ फुन बनी जहाँ एका होइ चाही।

19ओन ठउरन पइ लोग स्तुतिगान करिहीं। हुआँ हँसी ठठा भी सुनाइ पड़ी। मई ओनका बहोत सी सन्तानन देब। इस्राएल अउ यहूदा नाह नहीं रहिहीं। मई ओनका सम्मान देब। कउनो मनई ओनकर अनादर नहीं करी।

20याकूब क परिवार प्राचीनकाल क परिवारन सा होइ। मई इस्राएल अउर यहूदा क लोगन क सक्तीसाली बनाउब अउर मई ओन लोगन क सजा देब जउन ओन पइ चोट करिहीं।

21ओनहीं मैं स एक ओनकर अगुवा होइ। उ सासक मोरे लोगन में स होइ। उ मोरे निचके तबइ आइ जब मई ओनसे अइसा करइ क कहब। एह बरे मई अगुवा क आपन लगे बोलाउब अउर उ मोरे निअरे होइ।

22तू पचे मोर लोग होब्या अउर मई तोहार पचन्क परमेस्सर होब।"

23"यहोवा बहोत कोहान रहा। उ लोगन क सजा दिहस अउर सजा प्रचण्ड आँधी क तरह आइ। सजा एक चक्रवात सा, दुट्ट लोगन क खिलाफ आइ।

24यहोवा तब तलक कोहान रही जब तलक उ पचे लोगन क सजा देब पूरा नहीं करत उ तब तलक कोहान रही जब तलक उ आपन योजना क अनुसार सजा नहीं दइ लेत। जब उ दिन आइ तउ यहूदा क लोगो, तू पचे समुझ जाब्या।

### नवा इस्राएल

**31** यहोवा इ सबइ कहेस: "उ समइ मई इस्राएल क पूरे परिवार समूहन क परमेस्सर होब अउर उ पचे मोर लोग होइहीं।"

2यहोवा कहत ह, "जउन लोग दुस्मन क तरवार स बच गएन, उ सबइ लोगन क रेगिस्ताने में आराम मिला। इस्राएल आराम क खोज में रहा।"

3बहोत दूर स यहोवा आपन लोगन क समन्वा परगट भवा। यहोवा कहत ह, लोगो, "मई तोहसे पिरेम करत हउँ अउर मोर पिरेम सदैव रही। मई सदैव तोहरे बरे सच्चा रहब।

4मोर दुलहिन, इस्राएल मई तोहका फुन बनाउब्या। तू

फुन लोगन स भरा सुन्नर देस बनबिउ। तू आपन तम्बूरा फुन सँभलबिउ। तू बिनोद करइवाले दूसर सबहि लोगन क संग नचबिउ।

5इस्राएल क किसानो, तू अंगूरे क बगिया फुन लगउब्या। तू सोमरोन सहर क चारिहुँ कइँती ओन पहाड़ी पइ ओन अंगूसन क बाग लगउब्या अउर किसान लोग ओन अंगूसन क बागन क फलन क आनन्द लेइहीं।

6उ समइ आइ जब एप्रैम क पहाड़ी प्रदेस क चौकीदार इ सँदेसा घोसित करी: "आवा, हम आपन परमेस्सर यहोवा क उपासना करइ सिथ्योन चली।" एप्रैम क पहाड़ी प्रदेस क चौकीदार भी अहइ सँदेसा क घोसणा करिहीं।"

7यहोवा कहत ह, "खुस हवा अउर याकूब बरे गावा। सर्वश्रेष्ठ रास्ट्र इस्राएल क बरे उदघोस करा। आपन स्तुतियाँ करा। इ उदघोस करा, 'यहोवा आपन लोगन क रच्छा किहस ह। उ इस्राएल रास्ट्र क जिअत बचे भए लोगन क रच्छा किहस ह।'

8मई उत्तर क प्रदेस स इस्राएल क लिआउब। मई पृथ्वी क बहोत दूर ठउरन स इस्राएल क लोगन क बटोरब। ओन मनइयन में स कछू आँधर अउर लँगड़ा अहई। कछू मेहररूअन गर्भवती अहई अउ बच्चन क जन्म देइहीं। असंख्य लोग वापस अइहीं।

9लउटत समइ उ सबइ लोग रोवत रहा होइहीं। किन्तु मई ओनकर अगुवाई करब अउर ओनका आराम देब। मई ओन लोगन क पानी क नालन क संग लिआउब। मई ओनका बढ़िया रास्तन स लिआउब जेहसे उ पचे ठोकर खाइके न गिरई। मई ओनका इ तरह लिआउब काहेकि मई इस्राएल क बाप हउँ अउर एप्रैम मोर पहिलौटी क बेटा अहइ।

10"रास्ट्रन, यहोवा क इ सँदेसा सुना। सागर क किनारे क दूर देसन क इ सँदेसा द्या कहा: 'जउन इस्राएल क लोगन क बिखेरेस, उहइ ओनका एक संग वापस लिआइ अउर उ गइरिया क तरह आपन झुंड (लोग) क देखेरेख करी।"

11यहोवा याकूब क वापस लिआइ यहोवा आपन लोगन क रच्छा ओन लोगन स करी जउन ओनसे जियादा बलवान अहई।

12इस्राएल क लोग सिथ्योन क ऊँचाइयन अइहीं, अउर उ पचे आनन्द घोस करिहीं। ओनकर मुँह यहोवा क जरिये दीन्ह गइ नीक चिजियन क कारण खुसी स झूमि उठी। यहोवा ओनका अन्न, नई दाखरस, तेल, नई भेड़िन अउ गइयन देइ। उ पचे उ बगीचे क तरह होइहीं जेहमाँ प्रचुर जल होइ अउर इस्राएल क लोग भविस्स में तंग नहीं कीन्ह जाई।

13तब इस्राएल क जुवतियन खुस होइहीं अउर नचिहीं। जुवा, बुढ़वा मनई भी उ नाच में भाग लेइहीं। मई ओनके दुःख क सुख में बदल देब। मई इस्राएल क लोगन क आराम देब। मई ओनकर उदासी क खुसी में बदल देब।

14याजकन बरे जरूरत स जियादा बलि भेंट दीन्ह जाइ अउर मोर लोग एहसे भरे पूरे अउर संतुट्ट होइहीं जउन अच्छी चिजियन मई ओनका देब।" इ सँदेसा यहोवा क अहइ।

15यहोवा कहत ह, “रामा में एक चिल्लाहट सुनाई पड़ी। इ कटु चिल्लाहट अउर जियादा उदासी भरी भवी अही। राहेल आपन बच्चन बरे जोर-जोर स रोवत भवा ह। सान्त्वना पावइ स इन्कार करी, काहेकि ओकर बच्चन मर गएन ह।”

16किन्तु यहोवा कहत ह: “रोउब बन्द करा, आपन आँखिन आँसू स न भरा। तोहका आपन कामे क पुरस्कार मिली।” इ सँदेसा यहोवा क अहइ। “इस्त्राएल क लोग आपन सत्रु क देस स वापस अइहीं।

17एह बरे इस्त्राएल, तोहरे बरे आसा अहइ।” इ सँदेसा यहोवा क अहइ। “तोहर बच्चन आपन देस में वापस लौटिहीं।

18मई एप्रैम क रोवत सुनेउँ ह। मई एप्रैम क इ कहत सुनेउँ ह: “हे यहोवा, तू फुरइ ही, मोका सजा दिहा ह अउर मई आपन पाठ सीख लिहेउँ ह। मई उ बछवा क तरह रहेउँ जेका कबहुँ प्रसिच्छन नहीं मिला मेहरबानी कइके मोका सजा देब बन्द करा, मई तोहरे लगे वापस आउब। तू फुरइ ही मोर परमेस्सर यहोवा अहा।

19हे यहोवा, मई तोहका भटक गवा रहा। किन्तु मई जउन बुरा किहेउँ ओहसे सिच्छा ल्या। एह बरे मई आपन हिरदय अउर जीवन क बदल डाएँ। जउन मई जवानी क उमिर में मूरखता स भरे काम किहेउँ ओकरे बरे मई परेसान अउर लज्जित हउँ।”

20परमेस्सर कहत ह: “तू जानत अहा कि एप्रैम मोर पियारा पूत अहइ। मई उ बचवा स पियार करत हउँ। हौं, मई अक्सर एप्रैम क खिलाफ बोलत हउँ, किन्तु फुन भी मई ओका याद राखत हउँ। मई ओहसे बहोत पियार करत हउँ। मई फुरइ ही, ओका आराम पहोंचावइ चाहत हउँ।” इ सँदेसा यहोवा क अहइ।

21“इस्त्राएल क लोगो, सड़कन क संकेतन क लगावा। ओन संकेतन क लगावा जउन तोहका घरे क मारग बतावई। सड़किया क धियान स लखा। उ सड़किया पइ धियान राखा जेहसे तू जात्रा करत अहा। मोर दुलहिन इस्त्राएल घर लउटा, आपन नगरन क लउटि आवा।

22अबिस्सासी बिटिया कब तलक तू चारिहुँ कइँती मँडरात रहबिउ? तू कब घरे अउबिउ?” यहोवा एक नबी चीज धरती पइ बनावत ह, एक ठु मेहरारू, मनई क चारिहुँ कइँती।

23इस्त्राएल क परमेस्सर सर्वसक्तीमान यहोवा कहत ह: “मई यहूदा क लोगन बरे जउन बन्दी बनाए गए रहेन, फुन अच्छा काम करब। उ समइ यहूदा देस अउर ओकरे नगरन क लोग एन सब्दन क उपयोग फुन करिहीं। ‘ऐ जहाँ पइ सच्चा निवास अहइ, ए पवित्र पर्वत यहोवा तोहका आसीर्वाद देइ।’

24“यहूदा क सबहिं नगरन में लोग एक साथ सान्तिपूर्वक रहिहीं। किसान अउर उ मनई जउन आपन भेड़िन क खरकन क संग चारिहुँ कइँती घूमत हीं, यहूदा में सान्ति स एक संग रहिहीं। 25मई ओन लोगन क आराम अउर सक्ती देब जउन थके अउर कमजोर अहइँ।”

26इ सुनइ क पाछे मई जगेउँ अउर आपन चारिहुँ ओर लखेउँ। उ बड़की आनन्द दायी नींद रही।

27“उ सबइ दिन आवत अहई जब मई यहूदा अउर इस्त्राएल क परिवारन क बढ़ाउब।” इ सँदेसा यहोवा क अहइ। “मई ओनकर बच्चन अउर जानवरन क बढ़इ में भी मदद करब। इ पौधा क रोवइ अउर देखरेख करइ जइसा होइ। 28पुराने जमाने में मई इस्त्राएल अउर यहूदा पइ धियान दिहेउँ, किन्तु मई उ समइ ओनका फटकारइ क निगाह स धियान दिहेउँ। मई ओनका उखाड़ फेंकेउँ। मई ओनका नस्ट किहेउँ। मई ओन पइ अनेक विपत्तियन डाएँ। किन्तु अब मई ओन पइ ओनका बनावइ अउ ओनका सक्तीसाली करइ क दृष्टि स धियान देब।” इ सँदेसा यहोवा क अहइ।”

29“उ समइ लोग इ कहावत क कहब बन्द कइ देइहीं:

पुरखन खट्टे अंगूर खाएन अउर बच्चन एकर कारण विपत्तियन झेलेन।”

30मुला हर मनई आपन पाप बरे मरी। जउन मनई खट्टे अंगूर खाई उहइ एकर कारण विपत्तियन झेलिही।”

### नवी करार

31यहोवा इ सब कहेस, “उ समइ आवत अहइ जब मई इस्त्राएल क परिवार अउ यहूदा क परिवार क संग नवी करार करब। 32इ उ करार क तरह नाहीं होइ जेका मई ओनके पुरखन क संग किहे रहेउँ। मई उ करार तब किहेउँ जब मई ओनकर हथवा धरेउँ अउर ओनका मित्र स बाहेर लिआएँ। मई ओनकर सुआमी रहेउँ अउर उ पचे करार तोडेन।” इ सँदेसा यहोवा क अहइ।

33“भविस्स मई इ करार मई इस्त्राएल क लोगन क संग करब।” इ सँदेसा यहोवा क अहइ। “मई आपन सिच्छन क ओनके दिमाग में रखब अउर ओनकर हिरदइ पइ लिखब। मई ओनकर परमेस्सर होब अउर उ पचे मोर लोग होइहीं। 34लोगन क यहोवा क जानइ क बरे आपन पड़ोसियन अउर रिस्तेदारन क, सिच्छा देइ नाहीं पड़ी। काहेकि सबस बड़के स लइके सबस छोटे तलक सबहिं मोका जनिहीं।” इ सँदेसा यहोवा क अहइ। “जउन बुरा काम उ पचे कइ दिहन ओका मई छिमा करब। मई ओनकर पापन क याद नाहीं राखब।”

### यहोवा इस्त्राएल क कबहुँ नाहीं तजी

35यहोवा इ कहत ह: “यहोवा सूरज क दिन में चमकावत ह अउर यहोवा चाँद अउ तारन क राति में चमकावत ह। यहोवा सगरे क चंचल करत ह जेहसे ओकर लहरन किनारे स टकरात हीं। ओकर नाउँ सर्वसक्तीमान यहोवा अहइ।”

36यहोवा इ करार करत ह, “जइसा मई सूरज, चाँद, तारन अउर समुद्र पइ नियन्त्रन रखत हउँ, वइसा ही मई इस्त्राएल क सन्तानन क ख्याल रखब।”

37यहोवा कहत ह: “मई इस्त्राएल क सन्तानन क कबहुँ तियाग नाहीं करब। इ तबहिं संभव अहइ जदि लोग ऊपर आसमान क नापइ लागई अउर खाले धरती क समूचइ रहस्यन क जान जाईं। जदि लोग उ सबइ कइ सकिहीं तबहिं मई इस्त्राएल क संतानन क तजि देब। तब मई ओनका, जउन कछू उ पचे किहन, ओकरे बरे तजब।” इ सँदेसा यहोवा क अहइ।

### नवा यरूसलेम

38इ सँदेसा यहोवा क अहइ: “उ सबइ दिन आवत अहइ जब यरूसलेम नगर यहोवा बरे फुन बनी। पूरा नगर हननेल क खमम्भा स कोनेवाले फाटक तलक फुन बनी। 39नाप क जंजीर कोनेवाले फाटक स सोझइ गारेब क पहाड़ी तलक बिछी अउर तब गोआ नाउँ क ठउरे तलक फइली। 40पूरी घाटी जहाँ ल्हास अउर राखी बहाइ जात ह। यहोवा बरे पवितर होइ अउर ओनमाँ किद्रोन घाटी तलक क सबहिं टीलन पूरब में घोड़ा-दुआर क कोने तलक सामिल होइहीं। सारा छेत्र यहोवा बरे पवितर होइ। यरूसलेम क नगर भविस्स में न ध्वस्त होइ, न ही बर्बाद कीन्ह जाइ।”

### यिर्मयाह एक तु खेत खरीदत ह

32 सिदकिय्याह क यहूदा राज्ज में राज्जकाल क दसएँ बरिस, यिर्मयाह क यहोवा क इ सँदेसा मिला। सिदकिय्याह क दसवाँ बरिस नबूकदनेस्सर क अठारहवाँ बरिस रहा। 2उ समइ बाबुल क राजा स सेना यरूसलेम नगर क घेरे भए रही अउर यिर्मयाह रच्छक आँगन में बन्दी रहा। इ आँगन यहूदा राजा क महल में रहा। 3यहूदा क राजा सिदकिय्याह उ ठउरे पइ यिर्मयाह क बन्दी बनाइ राखे रहा। सिदकिय्याह यिर्मयाह क भविस्सबाणियन क पसन्द नाहीं करत रहा। यिर्मयाह कहेस, “यहोवा इ कहत ह: ‘मई यरूसलेम क हाली ही बाबुल क राजा क दइ देब। नबूकदनेस्सर इ सहर पइ अधिकार कइ लेइ। 4यहूदा क राजा सिदकिय्याह कसदियन क फउज स बचिके निकर नाहीं पाइ। किन्तु उ निहचइ ही बाबुल क राजा क दीन्ह जाइ अउर सिदकिय्याह बाबुल क राजा स आमने-सामने बातन करी। सिदकिय्याह ओका आपन आँखिन स लखी। 5बाबुल क राजा सिदकिय्याह क बाबुल लइ जाइ। सिदकिय्याह तब तलक हुआँ ठहरी जब तलक मई ओका सजा नाहीं दइ देत।’ इ सँदेसा यहोवा क अहइ। ‘जदि तू पचे कसदियन क फउज स लइब्या, तू पचन्क कामयाबी नाहीं मिली।’”

6जउने समइ यिर्मयाह बन्दी रहा, उ कहेस, “यहोवा क सँदेसा मोका मिला। उ सँदेसा इ रहा: 7यिर्मयाह, तोहार चचेरा भाइ हननेल हाली ही तोहरे लगे आइ। उ तोहार चाचा सल्लूम क पूत अहइ। हननेल तोहसे इ कही, ‘यिर्मयाह, अनातोत नगर क लगे मोर खेत बेसहिं ल्या। एका बेसहिं ल्या काहेकि तू मोर सबसे निचके क रिस्तेदार अहा। उ खेते क खरीदब तोहार अधिकार अउर तोहार जिम्मेदारी अहइ।’

8“तब इ वइसा भवा जइसा यहोवा कहे रहा। मोर चचेरा भाई रच्छक आँगन में मोरे लगे आवा। हननेल मोहसे कहेस, ‘बिन्यामीन परिवार समूह क पहुँटा में अनातोत नगर क लगे मोर खेत बेसहिं ल्या। उ भुइँया क तू अपने बरे बेसहा काहेकि इ तोहार अधिकार अहइ अउर जिम्मेदारी अहइ कि तू एका आपन बरे बेसहा।’

“एह बरे मोका मालूम भवा कि इ यहोवा क सँदेसा अहइ। 9मई आपन चचेरा भाई हननेल स अनातोत में भुइँया बेसहिं लीन्ह। मई ओकरे बरे सत्रह सेकेल चाँदी तउली। 10मई पट्टे पइ हस्ताक्षर किहेउँ अउर मोका पट्टा क एक

प्रति मुहरबन्द मिली अउर जउन मई किहे रहेउँ ओकर साच्छी क रूप में स कछू लोगन क बोलाइ लिहेउँ अउर मई तराजू पइ चाँदी तउली। 11तब मई पट्टे क मुहरबन्द प्रति अउ मुहर रहित प्रति पाएउँ। 12अउर मई ओका बारूक क दिहेउँ। बारूक नोरिय्याह क पूत रहा। नोरिय्याह महसेयाह क पूत रहा। मुहरबन्द पट्टा में मोर बेसहइ क सबहिं सर्तन अउर सीमा रहीं। मई आपन चचेरा भाई हननेल अउर दूसर गवाहन क समन्वा उ पट्टा बारूक क दिहेउँ। ओन गवाहन भी उ पट्टे पइ हस्ताक्षर किहेन। उ समइ यहूदा क बहोत स मनई आँगन में बइठा रहेन जउन मोका बारूक क पट्टा देत लखेन।

13“सबहिं लोगन क साच्छी कइके मई बारूक स कहेउँ, 14इस्त्राएल क परमेस्सर सर्वसक्तीमान यहोवा इ कहत ह, ‘मुहरबन्द अउर मुहर रहित दुइनउँ पट्टन क प्रतियन क ल्या अउर एका माटी क घड़े में धइ द्या। इ करा एह बरे काम बहोत अधिक समइ तलक रहइ।’ 15इस्त्राएल क परमेस्सर सर्वसक्तीमान यहोवा कहत ह, “भविस्स में मोर लोग एक दाई फुन घर, खेत अउ अंगूरे क बगिया इस्त्राएल देस में बेसहीं।”

16“नेरिय्याह क पूत बारूक क पट्टा देइ क पाछे मई यहोवा स पराथना किहेउँ। मई कहेउँ:

17“परमेस्सर यहोवा, तू पृथ्वी अउ आकास बनाया। तू ओनका आपन महान सक्ती स बनाया। तोहरे बरे कछू भी करब बहोत कठिन नाहीं अहइ। 18यहोवा, तू हजारन मनइयन क बिस्सास पात्र अउर ओन पइ दयालु अहा। किन्तु तू मनइयन क ओनके पुरखन क पापन बरे सजा देत अहा। महान अउर सक्तीसाली परमेस्सर, तोहार नाउँ सर्वसक्तीमान यहोवा अहइ। 19हे यहोवा, तू महान कारजन क जोजना बनावत अउर ओनका करत ह। तू उ सब लखत ह जेनका लोग करत हीं अउर ओनका पुरस्कार देत ह जउन अच्छे काम करत हीं तथा ओनका सजा देत ह जउन बुरे काम करत हीं, तू ओनका उ देत ह जेनकर उ पचे पात्र अहइ। 20हे यहोवा, तू मिस्त्र देस में अत्यन्त प्रभावसाली चमत्कार किहा। तू आजु तलक भी प्रभावसाली चमत्कार किहा ह। तू इ सबइ चमत्कार इस्त्राएल में देखाया अउर तू एनका हुवाँ भी देखाया जहाँ कहुँ मनई रहत हीं। तू एन चमत्कारन बरे प्रसिद्ध अहा। 21हे यहोवा, तू प्रभावसाली चमत्कारन स आपन लोग क मिस्त्र स बाहेर लइ आएन। तू आपन चमत्कारन स आपन ताकत अउर अद्भुत सक्ती दिखाइ।

22“हे यहोवा, तू इ धरती इस्त्राएल क लोगन क दिहा। इ उहइ धरती अहइ जेका तू ओनके पुरखन क देइ क बचन बहोत पहिले दिहे रहया। इ अइसा धरती अहइ जहाँ दूध अउर सहद क नदी बहत हीं। 23इस्त्राएल क लोग इ धरती में आएन अउर उ पचे एका आपन बनाइ लिहन। मुला ओन लोग तोहार आग्या नाहीं मानेन। उ पचे तोहरे उपदेसन क अनुसार चलेन। उ पचे उ नाहीं किहेन जेकरे बरे तू आदेस दिहा। एह बरे तू इस्त्राएल क लोगन पइ उ सबइ भयंकर विपत्तियन ढाया।

24“अब दुस्मन नगर पड़ घेरा डाएस ह। उ सबइ ढाल बनावत अहई ताकि उ पचे यरूसलेम क चहारदीवारी पड़ चढ़ सकई। आपन तरवारन क उपयोग कइके तथा भूख अउ भयंकर बीमारी क कारण बाबुल क सेना यरूसलेम नगर क हराइ। बाबुल क फउज अब नगर पड़ हमला करति अहइ। यहोवा तू कहे रहया कि इ होइ, अउर अब तू लखत अहा कि इ घटित होत अहइ।

25“मोर सुआमी यहोवा, उ सब सबहिं बुरी घटनन घटित होत अहई। किन्तु अब तू मोहसे कहत अहा, ‘यिर्मयाह, चाँदी स खेत बेसहा अउ बेसहइ क साच्छी बरे कछू लोगन क चुना।’ तू इ उ समइ कहत अहा जब बाबुल क सेना नगर पड़ अधिकार करइ क तइयार अहइ। मई आपन धन क उ तरह बर्बाद काहे करउँ?”

26तब यहोवा क सँदसा यिर्मयाह क मिला: 27“यिर्मयाह, मई यहोवा हउँ। मई पृथ्वी क हर एक मनई क परमेस्सर हउँ। यिर्मयाह, तू जानत अहा कि मोरे बरे कछू असंभव नाहीं अहइ।” 28यहोवा इ भी कहेस, “मई हाली ही यरूसलेम नगर क बाबुल क सेना अउ बाबुल क राजा नबूकदनेस्सर क दइ देब। उ सेना नगर पड़ अधिकार कइ लेइ। 29बाबुल क सेना पहिले स ही यरूसलेम नगर पड़ हमला करत अहइ। उ पचे हाली ही नगर में प्रवेस करिहीं अउर आगी लगाइ देइहीं। उ पचे इ नगर क बारिके राखी कइ देइहीं। इ नगर में अइसे मकान अहई जेनमों यरूसलेम क लोग लबार देवता बाल क छतन पड़ बलि भेंट दइके मोका क्रोधित किहन ह अउ लोग दूसर देवमूरतियन क दाखस भेंट चढ़ाएन। बाबुल क सेना ओन मकानन क बारि देइ। 30मई इस्त्राएल अउ यहूदा क लोगन पड़ नगर रखेउँ ह। उ पचे जउन कछू करत हीं; बुरा अहइ। उ पचे तब स बुरा करत अहई जब स उ पचे नउ जवान रहेन। इस्त्राएल क लोग मोका क्रोधित किहेन। उ पचे मोका क्रोधित किहेन काहेकि ओन मूरतियन क पूजा किहन जेनका उ पचे आपन हाथन स बनाएन।” इ सँदसा यहोवा क अहइ। 31“जब स यरूसलेम सहर बसा तब स अब तक इ नगर क लोग मोका क्रोधित किहेन ह कि मोका एका आपन नजर क समन्वा स दूर कइ देइ चाही। 32यहूदा अउर इस्त्राएल क लोग जउन बुरा काम किहन ह, ओकरे बरे, मई यरूसलेम क नस्त करब। जन साधारण ओनकर राजा, प्रमुख, ओनकर याजक अउ नबी यहूदा क मनई अउ यरूसलेम क लोग, सबहिं मोका क्रोधित किहेन ह।

33“ओन लोगन क मदद बरे मोरे लगे आवइ चाही रहा। लेकिन उ पचे मोहसे आपन पीठ मोर कइँती मोडेन। मई ओन लोगन क बार-बार सिच्छा देइ चाही किन्तु उ पचे मोर सुनइ स इन्कार कई दिहन। 34ओन लोग आपन देवमूरतियन बनाएन ह अउर मई ओन देवमूरतियन स घिना करत हउँ। उ पचे ओन देवमूरतियन क उ मन्दिरे में रखत हीं जउन मोरे नाउँ पड़ अहइ। इ तरह उ पचे मोरे मन्दिर क अपवितर किहन ह।

35“बेनहिन्मोम क घाटी में ओन लोग लबार देवता बाल बरे ऊँची जगह बनाएन। उ पचे लबार देवता मोलेक क

पूजा बरे ठउर क आपन बेटवा-बिटियन क सिसु बलि भेंट क रूप में जराइ सकइ बरे बनाएन। मई ओनका कबहुँ अइसे भयानक काम करइ बरे आदेस नाहीं दिहेउँ। मई इ कबहुँ सोचेउँ तलक नाहीं कि यहूदा क लोग अइसा भयंकर पाप करिहीं।

36“तू सबहिं लोग कहत अहा, ‘बाबुल क राजा यरूसलेम पर अधिकार कइ लेइ। उ तरवार, भुखमरी अउर भयंकर बीमारी क उपयोग इ सहर क पराजित करइ बरे करी।’ किन्तु यहोवा इस्त्राएल क लोगन क परमेस्सर कहत ह, 37‘मई इस्त्राएल अउर यहूदा क लोगन क आपन देस तजइ क मजबूर किहेउँ ह। मई ओन लोगन पड़ बहोत कोहान रहा। किन्तु मई ओनका इ ठउरे पड़ वापस लिआउब। मई ओनका ओन देसन स बटोरब जेनमों जाइ क बरे मइ ओनका मजबूर किहेउँ। मई ओनका इ देस में वापिस लिआउब। मई ओनका सान्तिपूर्वक अउर सुरच्छित रहइ देब। 38इस्त्राएल अउर यहूदा क लोग मोर आपन लोग होइहीं अउर मई ओनकर परमेस्सर होब। 39उ पचे एक उद्वेसस रखिहीं फुरइ ही, जिन्गगी भइ मोर उपासना करइ चहिहीं। ओनके बरे सुभ होइ अउर ओनके पाछे ओनकर परिवारन बरे भी सुभ होइ।

40“मई इस्त्राएल अउर यहूदा क लोगन क संग एक करार करब। इ करार सदैव बरे होइ। इ करार क अनुसार मई लोगन स कबहुँ दूर नाहीं जाब। मई ओनके बरे सदैव अच्छा रहब। मई ओनका, आपन आदर करइ बरे इच्छूक बनाउब। तब उ पचे मोहसे कबहुँ दूर नाहीं हटिहीं। 41उ पचे मोका खुस करिहीं। मई ओनकर भला करइ में आनन्दित होब अउर मई, निहचय ही, ओनका इ धरती में बसाउब अउर ओनका बढ़ाउब। इ मई आपन पूरे हिरदय अउर आतिमा स करब।”

42यहोवा जउन कहत ह, उ इ अहइ, “मई इस्त्राएल अउर यहूदा क लोगन पड़ इ बड़की बिपति ढाएँ ह। इहइ तरह मई ओनका अच्छी चिजियन देब। मई ओनका अच्छी चिजियन करइ क बचन देत हउँ। 43तू लोग इ कहत अहा, ‘इ देस सूना रेगिस्तान अहइ। हिआँ कउनो मनई अउर कउनो जनावर नाहीं अहइ। बाबुल क फउज इ देस क पराजित किहस।’ किन्तु भविस्स में लोग फुन इ देस में भुईया खरीदहीं। 44लोग आपन धने क उपयोग करिहीं अउर खेत बेसहिहीं। उ पचे आपन सबइ करार पड़ हस्ताच्छर क साच्छी होइहीं। लोग उ प्रदेस में फुन खेत बेसहिहीं जेहमों बिन्यामीन परिवार समूह क लोग रहत हीं। उ पचे यरूसलेम छेत्र क चारिहुँ ओर खेत बेसहिहीं। उ पचे यहूदा प्रदेस क नगरन, पहाड़ी प्रदेस, पच्छिमी पर्वत चरण, अउर दक्खिनी रेगिस्तान क पहाँटा में खेत बेसहिहीं। इ होइ, काहेकि मई तोहरे लोगन क वापस लिआउब।” इ सँदसा यहोवा क अहइ।

#### परमेस्सर क प्रतिग्या

**33** यिर्मयाह क दूसरी दाई यहोवा क सँदसा मिला। यिर्मयाह अबहिं भी रच्छक आँगन में ताला क भीतर बन्दी रहा। यहोवा पृथ्वी क बनाएस अउर ओकर उ

रच्छा करत ह। ओकर नाउँ यहोवा अहइ। यहोवा कहत ह, 3“मोहसे पराथना करा अउर मई तोहका देई। मई तोहका महत्वपूर्ण रहस्य बताउब। तू ओनका कबहुँ नाहीं सुन्या ह। 4इस्त्राएल क परमेस्सर यहोवा यरूसलेम क मकानन अउर यहूदा क राजा लोग क महलन क बारे में जउन सत्रुन दुआरा ढाल बनाइके हमला कइके तबाह कइ दीन्ह गवा ह, इ कहत ह।

5“यरूसलेम क लोग बहोत बुरे काम किहन ह। मई ओन लोगन पइ कोहान हउँ। मई ओनके बिरुद्ध होइ गवा हउँ। एह बरे हुवाँ मई असंख्य लोगन क मार डाउब। बाबुल क सेना यरूसलेम क बिरुद्ध लड़इ बरे आइ। यरूसलेम क इ घरन में असंख्य ल्हास होइहीं।

6“मुला ओकरे पाछे मई उ नगर में लोगन क तन्दुरूस्त बनाउब। मई ओन लोगन क सान्ति अउर सुरच्छा क आनन्द लेइ देब। 7मई इस्त्राएल अउर यहूदा में फुन स सब कछू अच्छा घटित होइ देब। मई ओन लोगन क पुराने जमाने क तरह बरिआर बनाउब। 8उ पचे मोर बिरुद्ध पाप किहेन, किन्तु उ पाप क मई धोइ देब। उ पचे मोरे बिरुद्ध लड़ें, किन्तु मई ओनका छमा कइ देब। 9तब यरूसलेम आस्चर्यचकित करइवाला ठउर होइ जाइ। लोग सुखी होइहीं अउर दूसर रास्ट्रन क लोग एकर तारीफ करिहीं। उ लोग ओन अच्छे कामन क बारे में सुनब्या जे मई यरूसलेम बरे कइ रहत हउँ अउर उ लोग मोर महानता क कारण डर स काँपिही।

10“तू लोग इ करत रह्या ह, ‘हमार देस सूनी रेगिस्तान, अहइ। हुआँ कउनो मनई या कउनो जनावर जितत नाहीं रहेन।’ अब यरूसलेम क सड़कियन अउर यहूदा क नगरन में निर्जन सान्ति अहइ। किन्तु हुआँ हाली ही चहल-पहल होइ। 11हुआँ सुख अउर आनन्द क किलोलन होइहीं। हुआँ दुल्हा-दुल्हिन क उमँग भरी चहल होइ। हुआँ यहोवा क मन्दिर में आपन भेट लिआवइवालन क मधुर वाणी होइ। उ पचे कहिहीं, ‘सर्वसक्तीमान यहोवा क स्तुति करा। यहोवा दयालु अहइ। यहोवा क दाया सदा बनी रहत ह।’ लोग इ सबइ बातन कहिहीं काहेकि मई फुन यहूदा बरे नीक काक करब। इ वइसा ही होइ जइसा सुरू में रहा।” यहोवा कहत ह।

12सर्वसक्तीमान यहोवा कहत ह, “इ ठउर अब सुना अहइ। हिआँ कउनो लोग या जनावर नाहीं रहि रहेन। किन्तु अब यहूदा क सबहिं नगरन में लोग रहिहीं। हुआँ गड़रियन होइहीं अउर चरागाहन होइहीं जहाँ उ पचे आपन खरकन क आराम करइ देइहीं। 13गड़रियन आपन भेड़िन क तब गनत हीं जब भेड़िन ओनके अगवा चलत हीं। लोग आपन भेड़िन क पूरे देस में चारिहुँ कइँती पहाड़ी प्रदेस, पच्छिमी पर्वत चरण, नेगव अउर यहूदा क सबहिं नगरन में गिनिहीं।”

### अच्छी साखा

14इ सँदेसा यहोवा क अहइ: “मई इस्त्राएल अउर यहूदा क लोगन क बिसेस बचन दिहेउँ ह। उ समइ आवति बाटइ जब मई उ करब जेका करइ क बचन मई दिहेउँ ह। 15उ समइ मई दाऊद क परिवारे स एक तु नीक साखा पइदा

करब। उ नीक साखा उ सब करी जउन देस बरे अच्छा अउर उचित होइ। 16इ साखा क समइ यहूदा क लोगन क रच्छा होइ जाई। लोग यरूसलेम में सुरच्छित रहिहीं। उ साखा क नाउँ यहोवा हमार धार्मिकता अहइ।”

17यहोवा कहत ह, “दाऊद क परिवार क कउनो न कउनो मनई सदा ही सिहांसने पइ बइठी अउर इस्त्राएल क परिवार पइ सासन करी 18अउर लेवी क परिवार स याजक सदा ही होइहीं। उ सबइ याजक मोरे समन्वा सदा रहिहीं अउर मोका होमबलि, अन्नबलि अउर बलि भेंट करिहीं।”

19यहोवा क इ सँदेसा यिर्मयाह क मिला। 20यहोवा कहत ह, “मई राति अउर दिन स करार कीन्ह ह। मई करार कीन्ह कि उ सदा ही रही। तू उ करार क बदल नाहीं सकत्या। दिन अउर राति सदा ठीक समइ पइ अइहीं। जदि तू उ करार क बदल सकत ह 21तउ तू दाऊद अउर लेवी क साथ कीन्ह गइ मोर करार क भी बदल सकत अहा। तब दाऊद अउर लेवी क परिवारे क संतान राजा अउर याजक नाहीं होइ सकिहीं। 22किन्तु मई आपन सेवक दाऊद क अउर लेवी क परिवार समूह क अनेक संतान देब। उ पचे ओतने ही होइहीं जेतना अकासे में तारे अहइँ, अउर अकासे क तारन क कउनो गन नाहीं सकत अउर उ पचे एतना होइहीं जेतना सागर किनारे पइ बालू कण होत हीं अउर ओन बालू क कणन क कउनो गन नाहीं सकत।”

23यहोवा क इ सँदेसा यिर्मयाह प्राप्त किहस: 24यिर्मयाह, का तू सुन्या ह कि लोग का कहत अहइँ? उ सबइ लोग कहत अहइँ: यहोवा इस्त्राएल अउर यहूदा क दुइ परिवारन क अस्वीकार कइ दिहस ह। यहोवा ओन लोगन क चुने रहा, किन्तु अब उ ओनका रास्ट्र क रूप में भी अंगीकार नाहीं करत।”

25यहोवा कहत ह, “जदि मोर करार दिन अउर राति क संग बनी नाहीं रहत, अउर जदि मई अकास अउ पृथ्वी क बरे नेम नाहीं बनावत, तबहिं संभव अहइ कि मई ओन लोगन क तजउँ। 26तबहिं इ संभव होइ कि मई याकूब क संतानन स दूर हटि जाउँ अउर तबहिं होइ सकत ह कि मई दाऊद क संतानन क इब्राहीम, इसहाक अउ याकूब क संतानन पइ सासन करइ न देउँ। किन्तु दाऊद मोर सेवक अहइ अउर मई ओन लोगन पइ दाया करब अउर मई फुन ओन लोगन क ओनकर धरती पइ वापस लउटाइ लाउब।”

### यहूदा क राजा सिदकिय्याह क चिताउनी

34 यहोवा क इ सँदेसा यिर्मयाह क मिला। इ सँदेसा उ समइ मिला जब बाबुल क राजा नबूकदनेस्सर यरूसलेम अउर ओकरे चारिहुँ ओर क सबहिं नगरन स जुद्ध करत रहा। नबूकदनेस्सर अपने सारी फउज अउर सासित राजन अउ साम्राज्य क लोगन क मिलाए भए रहा।

2सँदेसा इ रहा: “यहोवा इस्त्राएल क लोगन क परमेस्सर जउन कहत ह, उ इ अहइ: “यिर्मयाह, यहूदा क राजा सिदकिय्याह क लगे जा अउर ओका इ सँदेसा द्या: ‘सिदकिय्याह, यहोवा जउन कहत ह, उ इ अहइ: मई यरूसलेम नगर क बाबुल क राजा क हाली ही दइ देब अउर उ ओका जराइ डाइ। 3सिदकिय्याह, तू बाबुल क राजा



स बचिके निकरि नाही पउब्या। तू निहचय ही पकड़ा जाब्या अउर ओका दइ दीन्ह जाब्या। तू बाबुल क राजा क आपन आँखिन स लखब्या। उ तोहसे आमने सामने बातन करी अउर तू बाबुल जाब्या। किन्तु यहूदा क राजा सिदकिय्याह यहोवा क दीन्ह ग वचन क सुना। यहोवा तोहरे बारे में जउन कहत ह, उ इ अहइ: तू तरवारे स नाही मारा जाब्या। 5तू सान्ति पूर्वक मरब्या। तोहार स पहिले जउन राजा राज करत रहेन ओन पुरखन क सम्मान क बरे लोग आगी तैयार किहन। उहइ तरह तोहरे सम्मान बरे लोग आगी बनइहीं। उ पचे तोहरे बरे रोइहीं। उ पचे सोक मैं बूड़ा भवा कहिहीं, 'हे स्वामी, मई खुद तोहका इ बचन देत हउँ,' यहोवा कहत ह।

6एह बरे यिर्मयाह यहोवा क सँदिसा यरूसलेम में सिदकिय्याह क दिहेस। 7इ उ समइ भवा जब बाबुल क राजा क सेना यरूसलेम क खिलाफ लड़त रही। बाबुल क फउज यहूदा क ओन नगरन क खिलाफ भी लड़त रही जेन पइ अधिकार नाही होइ सका रहा। उ सबइ लाकीस अउ अजेका नगर रहेन। उ सबइ ही सिरिफ किलाबंद नगर रहेन जउन यहूदा प्रदेस मैं बचा रहेन।

### लोग करार मैं स एक क तोड़े

8सिदकिय्याह यरूसलेम क सबहिं निवासियन स इ करार किहे रहा कि मई सबहिं यहूदी दासन क मुक्त कइ देब। जब सिदकिय्याह उ करार कइ लिहेस, ओकरे पाछे यिर्मयाह क यहोवा क इ सँदिसा मिला। 9हर मनई स आसा कीन्ह जात ह कि उ आपन यहूदी दासन क अजाद करइ। सबहिं यहूदी दास-दासी अजाद कीन्ह जाब रहेन। यहूदा क परिवार समूह क कउनो भी मनई क दास रखइ क संभावना कउनो भी मनई स नाही कीन्ह जाइ सकत रही। 10एह बरे सबहिं प्रमुखन अउर यहूदा क सबहिं लोग इ करार क अंगीकार किहे रहेन। हर एक मनई आपन दास-दासियन क अजाद कइ देइ अउर ओनका अउर जियादा समइ तलक दास क रूप मैं नाही राखी। हर एक मनई सहमत रहा अउर इ तरह सबहिं दास अजाद कइ दीन्ह गएन। 11किन्तु ओकरे पाछे ओन लोग जेनके लगे दास रहेन, आपन निर्णय क बदलाइ दिहन। एह बरे उ पच अजाद कीन्ह गए लोगन क फुन धइ लिहन अउर ओनका दास बनाएन।

12तब यहोवा क सँदिसा क यिर्मयाह क मिला: 13यिर्मयाह, यहोवा इस्त्राएल क लोगन क परमेस्सर जउन कहत ह उ इ अहइ: "मई तोहरे पचन्क पुरखन क मिस्र स बाहेर लाएउँ जहाँ उ पचे दास रहेन। जब मई अइसा किहेउँ तब मई ओनसे एक करार किहेउँ। 14मई तोहरे पचन्क पुरखन स कहेउँ, 'हर एक सात बरिस क आखीर मैं प्रत्येक मनई क आपन यहूदी दासन क अजाद कइ देइ चाही। जदि तोहरे पचन्क हिआँ तोहार पचन्क अइसा यहूदी साथी अहइ जउन आपन क तोहरे पचन्क हाथ बेच चुका अहइ तउ तोहका ओका छ: महीना सेवा क पाछे अजाद कइ देइ चाही।' मुला तोहार पचन्क पुरखन न तउ मोर सुनेन, न ही ओह पइ धियान दिहेन। 15कछू समइ पहिले तू पचे आपन हिरदय क, जउन उचित अहइ, ओका करइ बरे बदला। तू पचन्क मैं स

हर एक ओन यहूदी साथियन क अजाद किहेस जउन दास रहेन अउर तू पचे मोर समन्वा उ मन्दिर मैं जउन मोरे नाउँ पइ अहइ एक करार भी किहा। 16मुला अब तू पचे आपन इरादा बदल दिहे अहा। तू पचे इ परगट किहे अहा कि तू पचे मोरे नाउँ क सम्मान नाही करत्या। तू पचे इ कहेस किहा? तू पचन्क स हर एक आपन दास दासियन क वापस लइ लिहस ह जेनका तू पचे अजाद किहे रह्या। तू लोग ओनका फुन दास होइ बरे मजबूर किहा ह।

17"एह बरे जउन यहोवा कहत ह, उ इ अहइ: 'तू लोग मोर आग्या क पालन नाही किहा ह। तू पचे आपन साथी यहूदियन क अजादी नाही दिहा ह। काहेकि तू पचे इ करार पूरी नाही किहा ह, एह बरे मई तोहका "अजादी" देब। इ यहोवा क सँदिसा अहइ। "तरवार स, भयंकर बीमारी स अउर भूख स मारे जाइ क अजादी मई देब। मई तोहका पचन्क अइसा कर देब कि जब उ पचे तोहरे पचन्क बारे मैं सुनिहीं तउ पृथ्वी क समूचइ राज्ज भयभीत होइ उठिहीं। 18मई ओन लोगन क दूसर लोगन क हाथ देब जउन मोर करार क तोड़ेन ह अउर उ प्रतिग्या क पालन नाही किहन जेका उ पचे मोरे समन्वा किहन ह। एन लोग मोरे समन्वा एक तु बछवा क दुइ टुकन मैं काटेन अउर उ पचे दुइ टुकन क बीच स गुजरेन। 19जउन उ समइ बछवा क टूकन बीच स गुजरेन जब उ पचे मोरे संग करार किहे रहेन: उ यहूदा अउ यरूसलेम क प्रमुख, कचहरी क बड़ेके अधिकारी, याजकन अउ उ देस क लोग। 20एह बरे मई ओन लोगन क ओनकर दुस्मन क देब जउन ओनका मारि डावइ चाहत हीं। ओन मनइयन क ल्हास हवा मैं उड़इवाले पंछियन अउर पृथ्वी पइ क जँगली जनावरन क भोजन बनिहीं। 21मई यहूदा क राजा सिदकिय्याह अउर ओकर प्रमुखन क ओनकर दुस्मनन अउर जउन ओनका मारि डावइ चाहत हीं, क देब। मई सिदकिय्याह अउर ओनके लोगन क बाबुल क राजा क फउज क तब भी देब जब उ फउज यरूसलेम क तजि चुकी होइ। 22मुला मई कसदी फउज क यरूसलेम मैं फुन लउटइ क आदेस देब। इ सँदिसा यहोवा क अहइ। उ फउज यरूसलेम क खिलाफ लड़ी। उ पचे एह पइ अधिकार करिहीं, एहमाँ आगी लगइहीं अउ एका बारि डइहीं अउर मई यहूदा क नगरन क बर्बाद कइ देब। उ सबइ नगर सूना रेगिस्तान होइ जइहीं। हुआँ कउनो मनई नाही रही।"

### रेकाबी परिवार क उत्तिम उदाहरण

**35** जब यहोयाकीम यहूदा क राजा रहा तब यहोवा क सँदिसा यिर्मयाह क मिला। यहोयाकीम राजा योसिय्याह क पूत रहा। यहोवा क सँदिसा इ रहा: 2"यिर्मयाह, रेकाबी परिवार क लगे जा। ओनका यहोवा क मन्दिर क बगल क कमरन मैं स एक मैं आवइ बरे निमन्त्रित करा। ओनका पिअइ बरे दाखरस द्या।"

3एह बरे मई (यिर्मयाह) याजन्याह स मिलइ गएँ। याजन्याह उ यिर्मयाह नाउँ क एक मनई क पूत रहा जउन हबस्सिन्याह नाउँ क मनई क पूत रहा अउर मई याजन्याह क सबहिं भाइयन अउ पूतन स मिलेँ। मई पूरे रेकाबी

परिवार क एक संग बटोरेउँ। 4तब मई रेकाबी परिवार क यहोवा क मन्दिर में लइ आएउँ। हम लोग उ कमरे में गए जउन परमेस्सर क मनई यिग्दल्याह क पूत हानान क पूतन क नाउँ स जाना जात ह। इ उ कमरा स अगला कमरा रहा जेहमों राजा क अधिकारी ठहरत रहेन। इ सल्लूम क पूत मासेयाह क कमरा क ऊपर रहा। मासेयाह मन्दिर में दुआरपाल रहा। 5तब मई (यिर्मयाह) रेकाबी परिवार क समन्वा कछू पियालन क संग दाखरस स भरे कछू कटोरन धरेउँ अउ मई ओन्से कहेउँ, “थोड़ी दाखरस पिया।”

6किन्तु रेकाबी लोगन जवाब दिहन, “हम दाखरस कबहुँ नहीं पीइत। हम एह बरे नहीं पीइत काहेकि हमार पुरखा रेकाबी क पूत योनादाब इ आदेस दिहे रहा: ‘तू पचन्क अउर तोहरे सन्तानन क दाखरस कबहुँ नहीं पिअइ चाही। 7तू पचन्क कबहुँ घर बनावइ, पौधन रोपब अउर अंगूरे क लता कबहुँ नहीं लगावइ चाही। तू पचन्क ओनमों स कछू भी नहीं करइ चाही। तू पचन्क सिरिफ तम्बूअन में रहइ चाही। जदि तू पचे अइसा करब्या तउ उ पहुँटा में जियादा समइ रहब्या जहाँ तू पचे एक ठउर स दूसर ठउरे पइ घूमत रहत ह।’ 8एह बरे हम रेकाबी लोग ओन सब चीजन क पालन करित ह जेनका हमरे पुरखा योनादाब हमका आदेस दिहस ह। हम अउर हमार मेहररूअन अउर गदेलन दाखरस कबहुँ नहीं पीतेन। 9हम रहइ बरे घर कबहुँ नहीं बनाइत अउर हम लोगन क अंगूरे क बगिचा या खेत कबहुँ नहीं होतेन अउर हम फसलन कबहुँ नहीं उगाइत। 10हम तम्बूअन में रहत अही अउर उ सब माना ह जउन हमरे पुरखा योनादाब आदेस दिहेन ह। 11किन्तु जब बाबुल क राजा नबूकदनेस्सर यहूदा देस पइ हमला किहस तब हम लोग यरूसलेम क गए। हम लोग आपुस में कहा, “आवा हम यरूसलेम नगर में सरण लेइ जेहसे हम कसदी अउर अरामी फउज स बचि सकी।’ एह बरे हम लोग यरूसलेम में ठहर गए।

12तब यिर्मयाह क यहोवा क सँदेसा मिला: 13इस्त्राएल क लोगन क परमेस्सर सर्वसक्तीमान यहोवा कहत ह: “यिर्मयाह, जा यहूदा अउ यरूसलेम क लोगन क इ सँदेसा द्या: लोगो, तू पचन्क सबक सीखइ चाही अउर मोरे सँदेसा क पालन करइ चाही।” इ सँदेसा यहोवा क अहइ। 14रेकाब क पूत योनादाब आपन पूतन क आदेस दिहस कि उ पचे दाखरस न पिअई, अउर उ आदेस क पालन भवा ह। आजु तलक योनादाब क संतान आपन पुरखन क आदेस क पालन किहस ह। उ पचे दाखरस नहीं पीतेन। किन्तु मई तउ यहोवा हउँ अउर यहूदा क लोगो, मई तू पचन्क बार बार सँदेसा दिहेउँ ह, मुला तू पचे ओकर पालन नहीं किहा। 15इस्त्राएल अउर यहूदा क लोगो, मई आपन सेवक नबियन क तू पचन्क लगे पठएँ। मई ओनका तोहरे पचन्क लगे बार-बार पठएँ। ओन नबियन तू पचन्स कहेन, ‘इस्त्राएल अउर यहूदा क लोगो, तू सबन्क बुरा करब तजि देइ चाही। तू पचन्क अच्छा होइ चाही। दूसर देवतन क अनुसरण न करा। ओनका न पूजा, न ही ओनकर सेवा करा। जदि तू पचे मोर आग्या क पालन करब्या तउ तू पचे उ देस में होब्या जेका मई तू पचन्क अउर तोहरे पचन्क पुरखन क

दिहेउँ ह।’ किन्तु तू लोग मोरे सँदेसे पइ धियान नहीं दिहा। 16किन्तु योनादाब क सन्तानन आपन पुरखन क आदेस क, जउन उ दिहस मान ल्या। मुला यहूदा क लोग मोर आग्या क पालन नहीं किहना।”

17एह बरे इस्त्राएल क परमेस्सर सर्वसक्तीमान यहोवा करत ह: “मई कहेउँ कि यहूदा अउ यरूसलेम बरे बहोत स बुरी घटनन घटिहीं। मई ओन बुरी घटनन क हाली ही घटित कराउब। मई इ करब काहेकि मई ओन लोगन क बात किहस, किन्तु उ पचे मोर एक न सुनेन। मई ओनका पुकारेउँ, किन्तु उ पचे जवाब नहीं दिहना।”

18तब यिर्मयाह रेकाबी परिवार क लोगन स कहेस, “इस्त्राएल क परमेस्सर सर्वसक्तीमान यहोवा कहत ह, ‘तू लोग आपन पुरखा योनादाब क आदेस क पालन किहा ह। तू पचे योनादाब क सारी सिच्छन क अनुसरण किहा ह। तू पचे उ सब किहा ह जेकरे बरे उ आदेस दिहे रहा। 19एह बरे इस्त्राएल क परमेस्सर सर्वसक्तीमान यहोवा कहत ह: रेकाब क पूत योनादाब क सन्तानन में स एक अइसा सदैव होइ जउन मोर सेवा करी।”

#### राजा यहोयाकीम यिर्मयाह क पत्रकन क बार देत ह

36 यहोवा क सँदेसा यिर्मयाह क मिला। इ योसिय्याह क पूत यहोयाकीम क यहूदा में राजकाल क चउथे बरिस भवा। यहोवा क सँदेसा इ रहा: 2“यिर्मयाह, पत्रक ल्या अउर ओन सँदेसन क ओह पइ लिख डावा जेनका मई तोहसे कहेउँ ह। मई तोहसे इस्त्राएल अउर यहूदा क अउर बाकी राष्ट्रन क बारे में बातन किहेउँ ह। जब स योसिय्याह राजा रहा तब स अब तलक मई जउन सँदेसा तोहका दिहेउँ ह, ओनका लिख डावा। 3सायद, यहूदा क परिवार इ सुनइ कि मई ओनके बरे का करइ क जोजना बनावत हउँ अउर सायद उ पचे बुरा काम करब तजि देई। जदि उ पचे अइसा करिहीं तउ मई ओनका, जउन बुरे करम उ पचे किहन ह, ओकरे बरे छिमा कइ देब।”

4एह बरे यिर्मयाह नेरिय्याह क पूत बारूक नाउँ क एक मनई क बोलाएस। यिर्मयाह ओन सँदेसन क कहेस जेनका यहोवा ओका दिहे रहा। जउने समइ यिर्मयाह ऊँची आवाज़ में सँदेसा देत रहा उहइ समय बारूक ओनका पत्रक पर लिखत रहा। 5तब यिर्मयाह बारूक स कहेस, “मई यहोवा क मन्दिर में नहीं जाइ सकत। मोका हुआँ जाइ क आग्या नहीं अहइ। 6एह बरे मई चाहत हउँ कि तू यहोवा क मन्दिर में आवा। हुआँ उपवास क दिन जा अउर पत्रक स लोगन क सुनावा। ओन सँदेसन क जेनका यहोवा तोहका दिहस अउर जेनका तू पत्रक में लिख्या, ओनका लोगन क समन्वा बाँचा। ओन सँदेसन क यहूदा क सबहि लोगन क समन्वा बाँचा जउन आपन रहइ क सहरन स यरूसलेम में आपन। 7सायद, उ सबइ लोग यहोवा स मदद क याचना करई। होइ सकत ह हर एक मनई बुरा काम करब तजि देइ। यहोवा इ घोसित कइ दिहस ह कि उ ओन लोगन पइ क्रोधित अहइ।” 8एह बरे नेरिय्याह क पूत बारूक क सबइ किहस जेका यिर्मयाह नबी करइ क कहेस। बारूक उ पत्रक

जोर स बाँचेस जेहमोँ यहोवा क सँदेसन लिखा रहेन। उ एका यहोवा क मन्दिर में बाँचेस।

9 यहोयाकीम क राजकाल क पँचए बरिस क नवे महीना में यहोवा क पराथना बरे एक उपवास घोसित भवा। इ आग्या रही कि यरूसलेम में रहइवाले सबहिं लोग अउर यहूदा क नगरन स यरूसलेम में आवइवाले लोग यहोवा क समन्वा उपवास रखिहीं। 10 उ समइ बारूक उ पत्रक क जेहमोँ यिर्मयाह क कथन रहेन उ सबहिं लोगन क समन्वा जउन यहोवा क मन्दिर में बाँचेस रहेन। बारूक ऊपरी आँगन में यमरिया क कमरा में खड़ा भवा रहा जब उ पत्रक स पढ़त रहा। (इ कमरा सापान क पूत यमरिया क रहा। उ मन्दिर में सास्त्री रहा अउर उसका कमरा मन्दिर क नया प्रवेस दुआर क लगे रहा।)

11 मीकायाह नाउँ क एक मनई यहोवा क ओन सारे सँदेसन क सुनेस जेनका बारूक पत्रक स बाँचेस। मीकायाह उ गमर्याह क पूत रहा जउन सापान क पूत रहा। 12 जब मीकायाह पत्रक स सँदेसा क सुनेस तउ उ राजा क महल में सचिव क कमरा में गवा। राजकीय सबहिं अधिकारी राजमहल में बइठा रहेन। ओन अधिकारियन क नाउँ इ सबइ अहइँ: सचिव एलीसामा, समायाह क पूत दलायाह, अबबोर क पूत एलनातान, सापान क पूत गमर्याह, हनन्याह क पूत सिदकियाह अउर दूसर सबहिं अधिकारी भी हुआँ रहेन। 13 मीकायाह ओन अधिकारियन स उ सबइ कहेस जउन उ बारूक क पत्रक स बाँचन सुने रहा।

14 तबइ ओन अधिकारियन बारूक क लगे यहूदी नाउँ क मनई क पठएन। यहूदी सेलेम्याह क पूत नतन्याह क पूत रहा। सेलेम्याह कूसी क पूत रहा। यहूदी बारूक स कहेस, “उ पत्रक तू लिआवा जेका तू बाँच्या अउर मोरे संग चला।” नेरियाह क पूत बारूक पत्रक क लिहस अउर यहूदी क संग अधिकारियन क लगे गवा।

15 तब ओन अधिकारियन बारूक स कहेन, “बइठा अउर पत्रक क हम लोगन क समन्वा बाँचा।”

एह बरे बारूक उ पत्रक क ओनका सुनाएस।

16 ओन राजकीय अधिकारियन उ पत्रक स सबहिं सँदेसा सुनेन। अउर डेराइ गएन। उ पचे बारूक स कहेन, “हमका पत्रक क सँदेसा क बारे में राजा यहोयाकीम स कहब होइ।” 17 तब अधिकारियन बारूक स एक सवाल किहन। उ पचे पूछेन, “बारूक इ बतावा कि तू इ सबइ सँदेसन कहाँ स पाया जेनका तू इ पत्रक पइ लिख्या? का तू ओन सँदेसन क लिख्या जेनका यिर्मयाह तोहका बताएस?”

18 बारूक जवाब दिहस, “हाँ, यिर्मयाह कहेस अउर मईँ सारे सँदेसन क सियाही स इ पत्रक पइ लिखेउँ।”

19 तब राजकीय अधिकारियन बारूक स कहेन, “तोहका अउर यिर्मयाह क कहुँ जाइके छुप जाइ चाही। कउनो न जिन बतावा कि तू कहाँ छुकान अहा।”

20 तब राजकीय अधिकारियन सास्त्री एलीसामा कमरा में पत्रक क रखेन। उ पचे राजा यहोयाकीम क लगे गएन अउर पत्रक क बारे में ओका सब कछू बताएन।

21 एह बरे राजा यहोयाकीम यहूदी क पत्रक लेइ पठएस। यहूदी सास्त्री एलीसामा क कमरा स पत्रक क लिआवा। तब

यहूदी राजा अउर ओकरे चारिहुँ कइँती खड़े सेवकन क पत्रक बाँचिके सुनाएस। 22 इ जउने समय भवा, नवाँ महीना रहा, एह बरे राजा यहोयाकीम सीतकालीन महल खण्ड में बइठा रहा। राजा क समन्वा अंगीठी में आगी जरत रही। 23 यहूदी पत्रक स पढ़ब सुरू किहस। मुला जब उ दुइ या तीन पक्तियन बाँचत, राजा यहोयाकीम पत्रक क उससे धइ लेता अउर उ भाग क जउन अभी पढ़ा गवा रहा एक नान्ह चाकू स काट डारत रहा अउर ओनका आग में डाइ देत रहा। आखिर में पूरा पत्रक आगी में जराइ दीन्ह गवा 24 जब राजा यहोयाकीम अउर ओकर सेवकन पत्रक स सँदेसा सुनेन तउ उ पचे डेरानेन नाहीं। उ पचे आपन ओढ़ना इ परगट करइ बरे नाहीं फाड़ेन कि ओनका आपन बुरे कर्मन बरे दुःख अहइ।

25 एलनातान, दलइया अउर यिर्मयाह राजा यहोयाकीम स पत्रक क न जरावइ बरे बात करइ क जतन किहस। किन्तु राजा ओनकर एक न सुनेस 26 अउर राजा यहोयाकीम कछू मनइयन क आदेस दिहस कि उ पचे सास्त्री बारूक अउर यिर्मयाह नबी क बन्दी बनावइँ। इ सबइ मनई राजा क एक तु पूत अज्राएल क पूत सरायाह अउर अब्देल क पूत सेलेम्याह रहेन। किन्तु उ सबइ मनई बारूक अउर यिर्मयाह क न दूँदि सकेन काहेकि यहोवा ओनका छुपाइ दिहे रहा।

27 यहोवा क सँदेसा यिर्मयाह क मिला। इ तब भवा जब यहोयाकीम यहोवा क ओन सबहिं सँदेसनवाले पत्रक क जराइ दिहे रहा, जेनका यिर्मयाह बारूक स कहे रहा अउर बारूक सँदेसन क पत्रक पइ लिखे रहा। यहोवा क जउन सँदेसा यिर्मयाह क मिला, उ इ रहा:

28 “यिर्मयाह, दूसर पत्रक तइयार करा। एह पइ ओन सबहिं सँदेसन क लिखा जउन पहिले पत्रक पइ रहेन। यानि उहइ पत्रक जेका यहूदा क राजा यहोयाकीम जराइ दिहे रहा।

29 यिर्मयाह, यहूदा क राजा यहोयाकीम स इ भी कहा, यहोवा जउन कहत ह, उ इ अहइ: ‘यहोयाकीम तू उ पत्रक क जराइ दिहा। तू कहुया, “यिर्मयाह काहे लिख्या कि बाबुल क राजा निहचइ ही आइ अउर इ देस क बर्बाद करी? उ काहे कहत ह कि बाबुल क राजा इ देस क लोगन अउर जनावरन दुइनउँ क बर्बाद करी?” 30 एह बरे यहूदा क राजा यहोयाकीम क बारे में जउन यहोवा कहत ह, उ इ अहइ: यहोयाकीम क संतान दाऊद क राज सिंहासन पइ नाहीं बइठहीं। जब यहोयाकीम मरी ओका राजा जइसे अन्त्येस्टि नाहीं दीन्ह जाइ, बल्कि ओकर अर्थी भुइँया पइ फेक दीन्ह जाइ। ओकर अर्थी दिन क गर्मी में अउर रात क ठंडे पाले में छोड़ दीन्ह जाइ। 31 मईँ, यहोयाकीम, ओकर सन्तान अउ ओकरे अधिकारियन क ओनकइ दुट्ठ करम बरे सजा देब। मईँ यरूसलेम क लोगन पइ अउर यहूदा क लोगन पइ भयंकर विपत्ति ढावइ क प्रतिग्या किहेउँ ह। मईँ आपन प्रतिग्या क अनुसार ओन पइ सबहिं बुरी विपत्तियन ढाउब काहेकि उ पचे मोर चिताउनी नाहीं सुनेन।”

32 तब यिर्मयाह दूसर पत्रक लिहस अउर ओका नेरियाह क पूत सास्त्री बारूक क दिहस। जइसे यिर्मयाह बोलत जात रहा वइसे ही बारूक ओनही सँदेसन क पत्रक पइ लिखत

32 तब यिर्मयाह दूसर पत्रक लिहस अउर ओका नेरियाह क पूत सास्त्री बारूक क दिहस। जइसे यिर्मयाह बोलत जात रहा वइसे ही बारूक ओनही सँदेसन क पत्रक पइ लिखत

जात रहा जउन उ पत्रक पड़ रहेन जेका राजा यहोयाकीम आगी में जराइ दिहे रहा अउर ओनहीं सँदेसन क तरह बहोत सी दूसर बातन दूसर पत्रक में जोरी गइन।

### यिर्मयाह जेल में डावा गवा

**37** नबूकदनेस्सर बाबुल क राजा रहा। नबूकदनेस्सर यहोयाकीम क पूत यकोन्याह क ठउरे पड़ सिदकिय्याह क यहूदा क राजा तैनात किहस। सिदकिय्याह राजा योसिय्याह क पूत रहा। शिक्तु सिदकिय्याह यहोवा क ओन सँदेसन पड़ धियान नाहीं दिहस जेनका यहोवा यिर्मयाह नबी क उपदेस देइ बरे दिहे रहा अउर सिदकिय्याह क सेवकन तथा यहूदा क लोग यहोवा क सँदेसा पड़ धियान नाहीं दिहस।

3राजा सिदकिय्याह यहूकल नाउँ क एक मनई अउर याजक सपन्याह क यिर्मयाह नबी क लगे एक टु सँदेसा लइके पठएस। यहूकल सेलेम्याह क पूत रहा। याजक सपन्याह मासेयाह क पूत रहा। जउन सँदेसा उ पचे यिर्मयाह क बरे लिआए रहेन उ इ अहइ: “यिर्मयाह, हमार परमेस्सर यहोवा स हम लोगन बरे पराथना करा।”

4(उ समइ तलक, यिर्मयाह जेल में नाहीं डावा गवा रहा, एह बरे जहाँ कहूँ उ जाइ चाहत रहा, जाइ सकत रहा। 5उ समइ ही फिरौन क फउज मिस्त्र स यहूदा क प्रस्थान कइ चुकी रही। बाबुल फउज पराजित करइ बरे, यरूसलेम सहर क चारिहूँ कइँती घेरा डाइ रखे रहा। तब उ पचे मिस्त्र स ओनकी कइँती कूच कइ चुकी भई फउज क बारे में उ सुन चुका रहा। एह बरे बाबुल क फउज मिस्त्र स आवइवाली फउज स लइइ बरे, यरूसलेम स हट गइ रही।)

6यहोवा क सँदेसा यिर्मयाह नबी क मिला: 7“इस्त्राएल क लोगन क परमेस्सर यहोवा जउन कहत ह, उ इ अहइ: ‘मई जानत हउँ कि यहूदा क राजा सिदकिय्याह तोहका मोरे लगे यहोवा स सलाह पूछइ बरे पठएस ह। राजा सिदकिय्याह क इ जवाब द्या, फिरौन क फउज हिआँ तोहार मदद बरे आवत ह, किन्तु उ फउज मिस्त्र क वापिस लौट जाइ। 8ओकरे पाछे बाबुल क फउज हिआँ लउटी। इ यरूसलेम पड़ हमला करी। तब बाबुल क उ फउज यरूसलेम पड़ अधिकार करी अउर ओका बारि डाइ। 9यहोवा जउन कहत ह, उ इ अहइ: ‘यरूसलेम क लोगो, आपन क मूर्ख जिन बनावा। तू पचे आपुस में जिन कहा, “बाबुल क फउज निहचइ ही, हम लोगन क सान्त छोड़ देइ।” उ नाहीं छोड़ी। 10यरूसलेम क लोगो, जदि तू पचे बाबुल क उ सारी फउज क ह काहे न हराइ द्या जउन तू पचन पड़ हमला करत अहइ, तउ भी ओनके डेरन में कछू घायल मनई बच जइहीं। उ पचे थोड़े घायल मनई भी आपन डेरन स बाहेर निकरिहीं अउर यरूसलेम क जराइके राख कइ देइहीं।”

11जब बाबुल फउज मिस्त्र क फिरौन क सेना क संग जुद्ध करइ बरे यरूसलेम क छोड़ेस, 12तब यिर्मयाह यरूसलेम स बिन्यामीन प्रदेस क जात्रा करइ चाहत रहा। हुआँ उ आपन परिवार क कछू सम्पत्ति क बटवारे में भाग लइ जात रहा। 13मुला जब यिर्मयाह यरूसलेम क बिन्यामीन क दुआर पड़ पहुँचा तब रच्छन क अधिकारी कप्तान ओका

बन्दी बनाइ लिहस। कप्तान क नाउँ यिरियाह रहा। यिरियाह सेलेम्याह क पूत रहा। सेलेम्याह हनन्याह क पूत रहा। इ तरह कप्तान यिरियाह यिर्मयाह क बन्दी बनाएस अउर कहेस, “यिर्मयाह, तू हम लोगन क बाबुल पच्छ में मिलइ बरे, छोड़त अहा।”

14यिर्मयाह यिरियाह स कहेस, “इ फुरइ नाहीं अहइ। मई कसदियन क संग मिलइ बरे नाहीं जात हउँ।” मुला यिरियाह यिर्मयाह क एक न सुनेस। यिरियाह यिर्मयाह क बन्दी बनाएस अउर ओका यरूसलेम क राजकीय अधिकारियन क लगे लइ गवा। 15उ सबइ अधिकारी यिर्मयाह पड़ बहोत कोहान रहेन। उ पचे यिर्मयाह क पीटइ क आदेस दिहस। तब उ पचे यिर्मयाह क जेल में डाइ दिहस। जेल योनातान नाउँ क मनई क घर में रहा। योनातान यहूदा क राजा क सास्त्री रहा। योनातान क घर जेल बनाइ दीन्ह गवा रहा। 16ओन लोग यिर्मयाह क योनातान क घर क एक कोठरी में रखेन। उ कोठरी जमीन क खाले कूप-गृह रही। यिर्मयाह ओहमाँ लम्बे समइ तलक रहा।

17तब राजा सिदकिय्याह यिर्मयाह क बोलवाएस अउर ओका राजमहल में लावा गवा। सिदकिय्याह यिर्मयाह स एकान्त में बातन किहस। उ यिर्मयाह स पूछेस, “का यहोवा क कउनो सँदेसा अहइ?”

यिर्मयाह जवाब दिहस, “हाँ, यहोवा क सँदेसा अहइ। सिदकिय्याह, तू बाबुल क राजा क हाथ में दइ दीन्ह जाब्या।” 18तब यिर्मयाह राजा सिदकिय्याह स कहेस, “मई कउन सा अपराध किहे हउँ? मई कउन सा अपराध तोहरे, तोहरे अधिकारियन या यरूसलेम क खिलाफ किहे हउँ? तू मोका जेल में काहे धँध्या? 19राजा सिदकिय्याह, तोहार नबी अब कहाँ अहइ? ओन नबियन तोहका झूठा सँदेसा दिहस। उ पचे कहेन, ‘बाबुल क राजा तोह पड़ या यहूदा देस पड़ हमला नाहीं करी।’ 20मुला अब मोर यहोवा, यहूदा क राजा, कृपा कइके मोर सुना। कृपा कइके मोर निवेदन अपने तलक पहुँचइ द्या। मई आप स एतना माँगत हउँ। सास्त्री योनातान क घर मोका वापस जिन पठवा। जदि आप मोका हुआँ पठउब्या मई हुअँइ मरि जाब।”

21एह बरे राजा सिदकिय्याह यिर्मयाह बरे आँगन में रच्छकन क संरच्छन में रहइ क आदेस दिहस कि यिर्मयाह क सड़क पड़ रोटी बनावइवालन स रोटियन दीन्ह जाइ चाही। यिर्मयाह क तब तक रोटी दीन्ह जात रही जब तलक नगर में अउर रोटी नाहीं रहे। इ तरह यिर्मयाह आँगन में रच्छक क संरच्छन में रहा।

### यिर्मयाह हउज में फेंक दीन्ह जात ह

**38** कछू राजकीय अधिकारियन यिर्मयाह क जरिये दीन्ह जात उपदेस क सुनेन। उ पचे मत्तान क पूत सपन्याह, पसहूर क पूत गदल्ल्याह, सेलेम्याह क पूत यहूकल अउर मल्किय्याह क पूत पसहूर रहेन। यिर्मयाह सबहिँ लोगन क इ सँदेसा देत रहा। 2“जउन यहोवा कहत ह, उ इ अहइ: ‘जउन कउनो भी यरूसलेम में रहिहीं उ पचे सबहिँ तरवार, भूख, भयंकर बीमारी स मरिहीं। किन्तु जउन भी बाबुल क सेना क आत्मसमर्पण करी, जितत रही। उ सबइ

लोग जिअत बचा जाई।' 3अउर यहोवा इहइ कहत ह, 'इ यरूसलेम नगर बाबुल क राजा क फउज क निहचइ ही, दीन्ह जाइ। उ इ नगर पइ अधिकार करी।'"

4तब जउन राजकीय अधिकारियन यिर्मयाह क उ कथन क सुनेन जेका उ लोगन स कहत रहा, उ सबइ राजा सिदकिय्याह क लगे गएन। उ पचे राजा स कहेन, "यिर्मयाह क जरूर मार डावइ चाही। उ ओन सैनिकन क भी हतोत्साहित करत अहइ जउन अब तलक नगर में अहई। यिर्मयाह जउन कछू कहत अहइ ओहसे उ हर एक क साहस तोड़त अहइ। यिर्मयाह यरूसलेम क लोगन क मदद करइ में नाही बल्कि दुःखी करइ में रूची क दिखावत ह।"

5एह बरे राजा सिदकिय्याह ओन अधिकारियन स कहेस, "यिर्मयाह तू लोगन ह हाथ में अहा। मई तू पचन्क रोकइ बरे कछू नहीं कइ सकत।"

6एह बरे ओन अधिकारियन यिर्मयाह क लिहन अउर ओका राजकुमार मल्किय्याह क हउज में डाइ दिहन। उ हउज आँगन में रहा जहाँ राजा क रच्छक ठहरत रहेन। ओन अधिकारियन यिर्मयाह क हउज में उतारइ बरे लसुरी क उपयोग किहन। हउज में पानी बिल्कुल नाही रहा, ओहमा सिरिफ कीचड़ रही अउर यिर्मयाह कीचड़ में धँसना सुरू होइ गवा।

7किन्तु कूस क निवासी, खोजा एबेदमेलेक नाउँ क एक मनई सुनेस कि अधिकारियन यिर्मयाह क हउज में डाइ दिहेन ह। राजा सिदकिय्याह बिन्यामीन दुआरे पइ बइठा रहा। 8एह बरे एबेदमेलेक राजमहल स निकरा अउर राजा स बातन करइ उ दुआरे पइ पहाँचा। 9एबेदमेलेक कहेस, "मोर सुआमी अउ राजा उ अधिकारियन नबी क हउज में डाइके एक ठू भयंकर काम किहेन ह। उ पचे ओका हुवाँ छोड़ दिहेन ह कि उ मरइ जाई अउर सहर में रोटी बाकी नाही बची।"

10तब राजा सिदकिय्याह कूसी एबेदमेलेक क आदेस दिहस। आदेस इ रहा: "एबेदमेलेक राजमहल स तू तीन मनई अपने संग ल्या। जा अउर मरइ स पहिले यिर्मयाह क हउज स निकारा।" 11एह बरे एबेदमेलेक अपने संग मनइयन क लिहस। किन्तु पहिले उ राजमहल क भंडारगृह क एक कमरा में गवा। उ कछू पुरान कम्बल अउ फटा पुरान कपड़ा उ कमरा स लिहस। तब उ ओन कम्बल क लसुरी क सहारे हउज में यिर्मयाह क लगे पहाँचाएस। 12कूसी एबेदमेलेक यिर्मयाह स कहेस, "एन पुरान कम्बलन अउर चिथड़न क अपनी कखरी क खाले लगावा। जब हम लोग तोहका हींचब तउ इ सबइ तोहरी बाँहन क खाले गद्दी बनिहीं। तब लसुरियन तोहका चुभिहीं नाही।" एह बरे यिर्मयाह उहइ किहस जउन एबेदमेलेक कहेस। 13ओन लोग यिर्मयाह क लसुरियन क मदद स ऊपर क बाहेर निकार लिहन यिर्मयाह रच्छकन क आँगन में रच्छकन क संरच्छन में रहा।

### सिदकिय्याह यिर्मयाह स फुन सवाल पूछत ह

14तब राजा सिदकिय्याह कउनो क यिर्मयाह नबी क लिआवइ पठएस। उ यहोवा मन्दिर क तीसरे दुआर पइ

यिर्मयाह क मँगवाएस। तब राजा कहेस, "यिर्मयाह, मई तोहसे कछू पूछत हउँ। मोहसे कछू भी जिन छुपावा, मोका सब ईमानदारी स बतावा।"

15यिर्मयाह सिदकिय्याह स कहेस, "जदि मई आप क जवाब देब तउ संभव अहइ आप मोका मारी डावई अउर जदि मई आप क सलाह भी देब तउ आप ओका नाही मानिहीं।"

16मुला राजा सिदकिय्याह यिर्मयाह स किरिया खाएस। सिदकिय्याह इ गुप्त रूप स किहस। इ उ अहइ जउन सिदकिय्याह किरिया खाएस, "यिर्मयाह जइसा कि यहोवा सास्वत अहइ, जउन हम क परान अउर जिन्नगी दिहस ह यिर्मयाह। मई तोहका मारब नाही अउर मई प्रतिग्या करत हउँ कि मई तोहका ओन अधिकारियन क नाही देब जउन तोहका मार डावइ चाहत हीं।"

17तब यिर्मयाह राजा सिदकिय्याह स कहेस, "इ उ अहइ जेका सर्वसक्तीमान परमेस्सर यहोवा इस्त्राएल क लोगन क परमेस्सर कहत ह, 'जदि तू बाबुल क राजा क अधिकारियन क आत्मसमर्पण करब्या तोहार जिन्नगी बचि जाइ अउर यरूसलेम जराइके राख नाही कीन्ह जाइ, तू अउर तोहार परिवार जिअत रही। 18किन्तु जदि तू बाबुल क राजा क अधिकारियन क आत्मसमर्पण करइ स इन्कार करब्या तउ यरूसलेम बाबुल फउज क दइ दीन्ह जाइ। उ पचे यरूसलेम क जराइके राख कइ देइहीं अउर तू खुद ओनसे बचिके नाही निकर पउब्या।"

19तब राजा सिदकिय्याह यिर्मयाह स कहेस, "किन्तु मई यहूदा क ओन लोगन स डेरात हउँ जउन पहिले ही बाबुल फउज स जाइ मिला अहई। मोका डर अहइ कि फउजी मोका यहूदा क ओन लोगन क दइ देइहीं अउर उ पचे मोरे संग बुरा बेउहार करिहीं अउर चोट पहाँचइहीं।"

20किन्तु यिर्मयाह जवाब दिहस, "फउजी तोहका यहूदा क ओन लोगन क नाही देइहीं। सादा सिदकिय्याह, जउन मई कहत हउँ ओका कइके, यहोवा क आग्या क पालन करा। तब सबहिं कछू तोहरे भले बरे होइ अउर तोहार जिन्नगी बच जाइ। 21किन्तु यदि तू बाबुल क फउज क समन्वा आत्मसमर्पण करइ स इन्कार करत अहा तउ यहोवा मोका देखाइ दिहेस ह कि का होइ। इ उ अहइ जउन यहोवा मोहसे कहेस ह: 22उ पचे सबहिं मेहररूअन जउन यहूदा क राजमहल में रहि गई अहई बाहेर लिआई जइहीं। उ पचे बाबुल क राजा क बड़के अधिकारियन क समन्वा लिआइ जाइहीं। तोहार मेहररूअन एक ठु गीत क जरिये तोहार खिल्ली उड़इहीं। जउन कछू मेहररूअन कहिहीं उ इ अहइ:

'तोहार अच्छे मीत तोहका गलत राह लइ गएन अउर उ पचे तोहसे जियादा बरिआर रहेन। उ पचे अइसे मीत रहेन जेन पइ तोहार बिस्सास रहा। तोहार पाँव कीचड़ में फँसा रहेन। तोहार मीतन तोहका छोड़ दिहेन ह।'

23"तोहार सबहिं मेहररूअन अउर तोहार बच्चन बाहेर लिआवा जइहीं। उ पचे बाबुल फउज क दइ दीन्ह जइहीं। तू खुद बाबुल क फउज स बचिके नाही निकर पउब्या। तू बाबुल क राजा क जरिये धरा जाब्या अउर यरूसलेम जराइके राख कइ दीन्ह जाइ।"

24तब सिदकिय्याह यिर्मयाह स कहेस, “कउनो मनई स इ जिन कह्या कि मई तोहसे बातन करत रहा। जदि तू कहब्या तउ तू मारा जाब्या। 25अगर उ सबइ अधिकारियन क पता चला कि मई तोहसे बातन किहेउँ। तब उ पचे तोहरे लगे अइहीं अउर तोहसे कहिहीं, ‘यिर्मयाह, इ बतावा कि तू राजा सिदकिय्याह स का कह्या अउर उ तोहसे का कह्या? हम लोगन बरे ईमानदार रहा अउर हमका सब कछू बताइ द्या, नाहीं तउ हम तोहका मार डाउबा।’ 26जदि उ पचे तोहसे अइसा कहई तउ ओनसे कह्या, ‘मई राजा स पराथना करत रहेउँ कि उ पचे मोका योनातन क घर क खाले कूप-गृह में वापस न पठवई। जदि मोका हुआँ वापस जाइ पड़ा तउ मई मरि जाब।”

27अइसा भवा कि राजा क उ सबइ अधिकारी यिर्मयाह स पूछइ ओकरे लगे आइ गएन। एह बरे यिर्मयाह उ सब कहेस जेका कटइ क आदेस राजा दिहे रहा। तब ओन अधिकारियन यिर्मयाह क अकेले छोड़ दिहन। कउनो मनई क पता नाहीं चला कि यिर्मयाह अउर राजा का बातन किहन।

28इ तरह यिर्मयाह रच्छकन क संरच्छन में आँगन में उ दिन तलक रहा जउने दिन यरूसलेम पइ अधिकार कइ लीन्ह गवा।

### यरूसलेम क पतन

**39** यरूसलेम पइ जउने तरह अधिकार भवा उ इ अहइ: यहूदा क राजा सिदकिय्याह क राजकाल क नवें बरिस क दसएँ महीने में बाबुल क राजा नबूकदनेस्सर आपन पूरी फउज क साथ यरूसलेम क खिलाफ कूच किहस। 2३ हरावइ बरे नगर क डेरा डाएस अउ सिदकिय्याह क ग्यारहवें बरिस क चउथे महीने क नौवें दिन यरूसलेम क चहरदीवारी टूटी। 2४ तब बाबुल क राजा क सबहिं राजकीय अधिकारी यरूसलेम नगर में घुस आएन। उ पचे अन्दर आएन अउर बीच वाले दुआर पइ बइठ गएन। ओन अधिकारियन क इ सबइ नाम अहई: समगर जिले प्रसासक नेर्गलसरेसेर एक बहोत उच्च अधिकारी नेबो-सर्सकीम दूसर उच्च अधिकारी अउर बहोत स दूसर बड़के अधिकारी भी हुवाँ रहेन।

4यहूदा क राजा सिदकिय्याह बाबुल क ओन पदाधिकारियन क लखेस, एह बरे उ अउर ओकर फउजी हुवाँ स पराइ गएन। उ पचे रात में यरूसलेम क तजेन अउर राजा क बाग स होइके बाहेर निकरेन। उ पचे उ दुआर स गएन जउन दुइ दीवारन क बीच रहा। तब उ पचे रेगिस्तान कइँती बढेन। 5मुला बाबुल क फउज सिदकिय्याह अउर ओकरे साथ क फउज क पाछा किहस। कसदियन क फउज यरीहे क मइदान में सिदकिय्याह क जाइ धरेस उ पचे सिदकिय्याह क धरेन अउर मोका बाबुल क राजा नबूकदनेस्सर क लगे लइ गएन। नबूकदनेस्सर हमात प्रदेश क रिबला नगर में रहा। उ ठउरे पइ नबूकदनेस्सर सिदकिय्याह क बरे निर्णय सुनाएस। 6हुवाँ रिबला नगर में बाबुल क राजा सिदकिय्याह क पूतन क ओकरे सामने मार डाएस अउर सिदकिय्याह क समन्वा ही नबूकदनेस्सर यहूदा क सबहिं राजकीय अधिकारियन

क मार डाएस। 7तब नबूकदनेस्सर सिदकिय्याह क आँखिन निकार लिहस। उ सिदकिय्याह क काँसा क जंजीर स बाँधिस अउर ओका बाबुल लइ गवा।

8बाबुल क सेना राजमहल अउर यरूसलेम क लोगन क घरन में आगी लगाइ दिहस अउर उ पचे यरूसलेम क दीवारन गिराइ दिहन। 9नबूजरदन नाउँ क एक मनई बाबुल क राजा क बिसेस रच्छकन क अधिनायक रहा। उ ओन लोगन क लिहस जउन यरूसलेम में बचि ग रहेन अउर ओनका कैदी बनाइ लिहस। नबूजरदन ओन लोगन क लिहेस जउन यरूसलेम में रहत रहेन ओन लोगन क भी लिहस जउन पहिले ही ओका आत्मसमर्पण कइ चुके रहेन। अउर ओकर पाछे उ ओन सबइ क बन्दी बनाइके बाबुल भेज दिहस। 10मुला बिसेस रच्छकन क अधिनायक नबूजरदान यहूदा क कछू गरीब लोगन क आपन पाछे छोड़ दिहस। उ पचे अइसे लोग रहेन जेनके लगे कछू नाहीं रहा। इ तरह उ दिन नबूजरदान ओन यहूदा क गरीब लोगन क अंगूर क बाग अउर खेत दिहस।

11किन्तु नबूकदनेस्सर नबूजरदान क यिर्मयाह क बारे में कछू आदेस दिहस। नबूजरदान, नबूकदनेस्सर क बिसेस रच्छकन क अधिनायक रहा। आदेस इ सबइ रहेन: 12“यिर्मयाह क हेरा अउर ओकर देख-रेख करा। ओका चोट न पहोंचावा। ओका उ सब द्या, जउन उ माँगइ।”

13एह बरे राजा क बिसेस रच्छकन क अधिनायक नबूजरदान बाबुल क फउज क एक मुख्य पदाधिकारी नबूसजवान एक ऊँचा अधिकारी नेर्गलसरेसेर अउर बाबुल क फउज क दूसर सबहिं अधिकारी यिर्मयाह क खोज में पठए गएन। 14ओन लोग यिर्मयाह क आँगन स निकारेन जहाँ उ यहूदा क राजा क रच्छकन क संरच्छन में पड़ा रहा। कसदी सेना क ओन अधिकारी लोग यिर्मयाह क सपान क पूत अहीकाम, अहीकाम क पूत गदल्याह क सुपुर्द किहन। गदल्याह क आदेस रहा कि उ यिर्मयाह क ओकरे घर वापस लइ जाइ। एह बरे यिर्मयाह आपन घरे पहोंचाइ दीन्ह गवा अउर उ आपन लोगन में रहइ लाग।

### एबेदमेलेक क यहोवा स सँदिसा

15जउने समइ यिर्मयाह रच्छकन क संरच्छन मन्दिर क आँगन में रहा, ओका यहोवा क एक सँदिसा मिला। सँदिसा इ रहा: 16“यिर्मयाह, जा अउर कूस क एबेदमेलेक क इ सँदिसा द्या: इ उ सँदिसा अहइ, जेका सर्वसक्तीमान यहोवा इस्त्राएल क लोगन क परमेस्सर देत ह: ‘बहोत हाली ही मई इ यरूसलेम नगर सम्बन्धी आपन सँदिसन क फुरइ घटित करब। मोर सँदिसा बिनास लाइके फुर होइ। नीक बातन क लाइके नाहीं। तू सबहिं इ फुरइ क घटित होत भवा आपन आँखिन स देखब्या। 17किन्तु एबेदमेलेक उ दिन मई तोहका बचाउबा।’ इ यहोवा क सँदिसा अहइ। ‘तू ओन लोगन क नाहीं दीन्ह जाब्या जेनसे तोहका डर अहइ। 18एबेदमेलेक मई तोहका बचाउबा। तू तरवारे क घाट नाहीं उतारा जाब्या, अपितु बच निकरब्या अउर जिअत रहब्या। अइसा होइ, काहेकि तू मोह पइ बिस्सास किहा ह।” इ सँदिसा यहोवा क अहइ।

**यिर्मयाह अजाद कीन्ह जात ह**

**40** रामा सहर में अजाद कीन्ह जाइ क पाछे यिर्मयाह क यहोवा क सँदेसा मिला। बाबुल क राजा क बिसेस रच्छकन क अधिनायक नबुनरदान क यिर्मयाह रामा में मिला। यिर्मयाह जंजीरन में बँधा रहा। उ यरूसलेम अउर यहूदा क सबहिं कैदियन क संग रहा। उ पचे कैदी बाबुल क बन्धुआइ में लइ जात रहेन। 2जब अधिनायक नबूजरदान क यिर्मयाह मिला तउ उ ओहसे बातन किहस। उ कहेस, “यिर्मयाह तोहार परमेस्सर यहोवा इ घोसित किहे रहा कि इ बिपति इ जगहिया पइ आइ उ 3अउर अब यहोवा सब कछू उ कइ दिहेस ह जेका उ कइ क कहे रहा। इ बिपति एह बरे आइ कि यहूदा क तू सब लोगन यहोवा क खिलाफ पाप किहा। तू लोग यहोवा क आग्या नाहीं मान्या। 4किन्तु यिर्मयाह, अब मई तोहका अजाद करत हउँ। मई तोहरी कलाइयन स जंजीर उतारत हउँ। जदि तू चाहा तउ मोरे संग बाबुल चला अउर मई तोहार अच्छी देख-रेख करब। किन्तु जदि तू मोरे संग चलब नाहीं चहत्या तउ न चला। लखा पूरा देस तोहरे बरे खुला अहइ। तू जहाँ चाहा चला जा। 5या सापान क पूत अहीकाम क पूत गदल्याह क लगे लउटि जा। बाबुल क राजा यहूदा क नगरन क प्रसासक गदल्याह क चुनेस ह। जा अउर गदल्याह क संग लोगन क बीच रहा या तू जहाँ चाहा जाइ सकत ह।”

तब नबूजरदान यिर्मयाह क कछू भोजन अउर भेंट दिहस तथा ओका बिदा किहस। 6इ तरह यिर्मयाह अहीकाम क पूत गदल्याह क लगे मिस्या गवा। यिर्मयाह गदल्याह क संग ओन लोगन क बीच रहा जउन यहूदा देस में छोड़ दीन्ह ग रहेन।

**गदल्याह क अल्प काल क सासन**

7यहूदा क फउज क कछू फउजी, अधिकारी अउर ओनकर लोग, जब यरूसलेम नस्ट होत रहा, खुला मैदान में रहेन। ओन फउजियन सुनेन कि अहीकाम क पूत गदल्याह क बाबुल क राजा प्रदेस में बचे लोगन क प्रसासक तैनात किहस ह। बचे भए लोगन में उ पचे सबहिं मेहररूअन, मनसेधुअन अउर बच्चन रहेन जउन बहोत जियादा गरीब रहेन अउर कैदी बनाइके बाबुल नाहीं पहोंचावा गए रहेन। 8एह बरे उ सबइ फउजी गदल्याह क लगे मिस्या में आएन। उ सबइ फउजी नतन्याह क पूत इस्माएल, योहानन अउ ओकर भाई योनातान, कारेह क पूत तन्हूसेत क पूत सरायाह, नतोयवासी एथै क पूत माकावासी क पूत याजन्याह अउर ओकरे साथ स मनसेधुअन रहेन।

9सापान क पूत अहीकाम क पूत गदल्याह ओन फउजियन अउर ओनके लोगन क जियादा सुरच्छित अनुभव करावइ क किरिया खाएस। गदल्याह जउन कहेस, उ इ अहइ: “फउजियो तू लोग कसदी लोगन क सेवा करइ स भयभीत जिन हवा। इ प्रदेस में बस जा अउर बाबुल क राजा क सेवा करा। जदि तू पचे अइसा करब्या तउ तोहार पचन्क सब कछू भला होइ। 10मई खुद मिस्या में रहब। मई ओन कसदी लोगन स तोहरे पचन्क बरे में बातन करब जउन हिओँ अइहीं। तू लोग इ काम मोह पइ छोड़ा। तू

पचन्क दाखरस गर्मी क फल अउर तेल पइदा करइ चाही। जउन तू पचे पइदा करा ओका आपन बटोरइ बरे घड़न में भरा। ओन नगरन में रहा जेह पइ तू पचे अधिकार किहे अहा।”

11यहूदा क सबहिं लोग, जउन मोआब, अम्मोन, एदोम अउर दूसर सबहिं प्रदेसन में रहेन, सुनेन कि बाबुल क राजा यहूदा क कछू लोगन क उ देस में छोड़ दिहेस ह अउर उ पचे इ सुनेन कि बाबुल क राजा सापान क पोता अउ अहीकाम क पूत गदल्याह क ओनकर प्रसासक तइनात किहेस ह। 12जब यहूदा क लोग इ खबर पाएन, तउ उ पचे यहूदा प्रदेस में लउटि आएन। उ पचे गदल्याह क लगे ओन सबहिं देसन स मिस्या लउटेन, जेनमों उ पचे बिखेर ग रहेन। एह बरे उ पचे लउटेन अउर उ पचे दाखरस अउर गर्मी क बड़ी फसल काटेन।

13कारेह क पूत योहानन अउ यहूदा क फउज क सबहिं अधिकारी, जउन अबहिं तलक खुले प्रदेसन में रहेन, गदल्याह क लगे आएन। गदल्याह मिस्या नगर में रहा। 14योहानन अउर ओकरे साथ क अधिकारियन गदल्याह स कहेन, “का तोहका मालूम अहइ कि अम्मोनी लोगन क राजा बालीस तोहका मार डावइ चाहत ह? उ नतन्याह क पूत इस्माएल क तोहका मार डावइ पठएस ह।” मुला अहीकाम क पूत गदल्याह ओन पइ बिस्सास नाहीं किहस।

15तब कारेह क पूत योहानन मिस्या में गदल्यह स गुप्त बाचचीत किहस। योहानन गदल्याह स कहेस, “मोका जाइ द्या अउर नतन्याह क पूत इस्माएल क मार डावइ द्या। कउनो भी मनई इ बारे में नाहीं जानी। हम लोग इस्माएल क तोहका मारइ नाहीं देब। उ यहूदा क ओन सबहिं लोगन क जउन तोहरे लगे बटुरा भए अहइँ, विभिन्न देसन में फुन स बिखेर देइ अउर एकर इ अरथ होइ कि यहूदा क थोड़ा स बचे-खुचे लोग भी नस्ट होइ जइँहीं।”

16किन्तु अहीकाम क पूत गदल्याह कारेह क पूत योहानन स कहेस, “इस्माएल क न मारा। इस्माएल क बारे में जउन तू कहत अहा, उ फुरइ नाहीं अहइ।”

**41** सतएँ महीना में नतन्याह (एलीसामा क पूत) क पूत इस्माएल, अहीकाम क पूत गदल्याह क लगे आवा। इस्माएल आपन दस मनइयन क संग आवा। उ सबइ लोग मिस्या नगर में आए रहेन। इस्माएल राजा परिवार क सदस्य रहा। उ यहूदा राजा क अधिकारियन में स एक रहा। इस्माएल अउर ओकर लोग गदल्याह क संग खइया क खाएन। 2जब उ पचे साथ भोजन करत रहेन तबहिं इस्माएल अउर ओकर दस मनई उठेन अउर अहीकाम क पूत गदल्याह क तरवारे स मार दिहन। उ इ एह बरे किहेन काहेकि बाबुल क राजा ओका यहूदा क राजपाल नियुक्त किहे रहा। 3इस्माएल यहूदा क ओन सबहिं लोगन क भी मार डाएस जउन मिस्या में गदल्याह क संग रहेन। इस्माएल ओन कसदी फउजियन क भी मार डाएस जउन उ समइ मिस्या में रहेन।

4-5गदल्याह क हत्या क एक दिन बाद अस्सी मनई मिस्या आएन। उ पचे अन्नबलि अउर सुगन्धि यहोवा क

मन्दिर बरे लिआवत रहेन। ओन अस्सी मनइयन आपन दाढ़ी मुडुवाइ राखी रही, आपन ओढ़वा फाड़ डावे रहेन अउर आपन क काट राखे रहेन। उ पचे सकेम, सीलो अउर सोमरोन स आए रहेन। एनमों स कउनो भी इ नार्ही जानत रहा कि गदल्याह क हत्या कइ दीन्ह गई अहइ। 6इस्माएल मिस्या नगर स ओन अस्सी मनइयन स मिलइ गवा। ओनसे मिलत जात समइ उ रोवत रहा। इस्माएल ओन अस्सी मनइयन स मिला अउर उ कहेस, “अहीकाम क पूत गदल्याह स मिलइ मोरे संग चला।” 7उ पचे अस्सी मनई मिस्या नगर में गएन। तब इस्माएल अउर ओकर मनइयन ओनमों स सत्तर लोगन क मार डाएन। इस्माएल अउर ओकर मनइयन ओन सत्तर मनइयन क अर्थियन क एक ठु गहिर हउज में डाइ दिहस। 8मुला बचे भए दस मनइयन इस्माएल स कहेन, “हमका जिन मारा। हमरे लगे गोहूँ अउर जौ अहइ अउर हमरे लगे तेल अउर सहद अहइ। हम लोग ओन चिजियन क एक खेते में छिपाइ राखी हा।” एह बरे ओन मनइयन क छोड़ दिहा। उ दूसर लोगन क संग ओनका नार्ही मारेस। 9(उ हउज जेहमों इस्माएल ल्हासन क फेंकेस बहोत बड़ा रहा इ यहूदा क आसा नाउँ क राजा क जरिये बनवावा गवा रहा। ओका एह बरे बनाए रहा कि जुद्ध कि दिनन में जब इ इस्त्राएल क राजा बासा स लड़त रहा तउ नगर क ओहसे पानी मिलत रहइ। इस्माएल उ हउज में एतनी ल्हासन डाएस कि उ भर गवा।)

10इस्माएल मिस्या नगर क दूसर सबहिं लोगन क भी धरेस। (ओन लोगन में राजा क बिटियन अउर उ सबइ दूसर लोग रहेन जउन हुवाँ बच गए रहेन। उ पचे अइसे लोग रहेन जेनका नबूजरदान गदल्याह पइ नजर रखइ बरे चुने रहा। नबूजरदान बाबुल क राजा क खास रच्छकन क अधिनायक रहा। एह बरे इस्माएल ओन लोगन क धरेस अउर अम्मोनी लोगन क देस में जाइ बरे बढब सुरू किहस।)

11कारेह क पूत योहानन अउर ओकर साथी क सबहिं फउजी अधिकारियन ओन सबहिं दुराचारन क सुनेन जउन इस्माएल किहसे। 12एह बरे योहानन अउर ओकरे संग क फउजी अधिकारियन आपन मनइयन क लिहन अउ नतन्याह क पूत इस्माएल स लड़इ गएन। उ पचे इस्माएल क उ बड़के पानी क हउज क लगे धरेन जउन गिबोन नगर में अहइ। 13ओन मनइयन जेनका इस्माएल बन्दी बनाए रहा, योहानन अउ फउजी अधिकारियन क लखेन। उ सबइ लोग बहोत खुस भएन। 14तब उ पचे सबहिं लोग जेनका इस्माएल मिस्या में बन्दी बनाए रहा, कारेह क पूत योहानन क लगे दउड़ पड़ेन। 15किन्तु इस्माएल अउ ओकर आठ मनई योहानन स बच निकरेन। उ पचे अम्मोनी लोगन क लगे पराइ गएन।

16एह बरे कारेह क पूत योहानन अउ ओकर सबहिं फउजी अधिकारियन बन्दीयन क बचाइ लिहन। इस्माएल गदल्याह क हत्या किहे रहा अउ ओन लोगन क मिस्या स धइ लिहे रहा। बचे भए लोगन में फउजी, मेहररून, बच्चन अउर अदालत क अधिकारी रहेन। योहानन ओनका गिबोन नगर स वापस लिहस।

### मिस्र क बच निकरब

17-18योहानन अउ दूसर फउजी अधिकारी कसदियन स भयभीत रहेन। बाबुल क राजा गदल्याह क यहूदा क प्रसासक चुने रहा। किन्तु इस्माएल गदल्याह क हत्या कइ दिहे रहा अउ योहानन क डर रहा कि कसदी कोहान होइहीं। एह बरे उ पचे मिस्र क पराइ निकरइ क निहचइ किहस। मिस्र क रास्ते में उ पचे गेरथ किम्हाम में रूकेन। गेरथ किम्हान बेतलेहेम नगर क लगे अहइ।

**42** जब उ पचे गेरथ किम्हाम में रहेन योहानन अउ होसायाह क पूत याजन्याह यिर्मयाह नबी क लगे गएन। योहानन अउ याजन्याह क संग सबहिं फउजी अधिकारी गएन। जियादा महत्वपर्ण स लइके कम महत्वपर्ण तलक सबहिं मनई यिर्मयाह क लगे गएन। 2ओन सबहिं लोग ओहसे कहेस, “यिर्मयाह, कृपा कइके सुना जउन हम कहत अही। आपन परमेस्सर यहोवा स, यहूदा क परिवार क एन सबहिं बचे मनइयन बरे पराथना करा। यिर्मयाह, तू लख सकत अहा कि हम लोगन में बहोत जियादा नार्ही बचा अहई। कउने समइ हम बहोत जियादा रहे। 3यिर्मयाह, आपन परमेस्सर यहोवा स इ पराथना करा कि उ बतावइ कि हमका कहाँ जाइ चाही अउ हमका का करइ चाही।”

4तब यिर्मयाह नबी जवाब दिहसे, “मई समुझत हउँ कि तू मोहसे का करावइ चाहत अहा। मई तोहार परमेस्सर यहोवा स उहइ पराथना करब जउन तू मोहसे करइ क कहत अहा। मई हर एक बात, जउन यहोवा कही बताउब। मई तोहसे कछू भी नार्ही छिपाउब।”

5तब ओन लोग यिर्मयाह स कहेन, “जदि तोहार परमेस्सर यहोवा जउन तोहार जरिये हम पचन्क कहत ह ओका हम नार्ही करित तउ हमका आसा अहइ कि यहोवा ही सच्चा अउ बिस्सास क जोगग गवाह हमरे खिलाफ होइ। 6एकर कउनो महत्व नार्ही कि हम सँदेसा क पसन्द करित ह या नार्ही। हम लोग आपन परमेस्सर, यहोवा क आग्या क पालन करब। हम लोग तोहका यहोवा क हिआँ ओहसे सँदेस लेइ बरे पठवत अही। हम ओकर पालन करब जउन उ कही। तब हम लोगन बरे उ नीक होइ। हाँ, हम आपन परमेस्सर यहोवा क आग्या क पालन करब।”

7दस दिन बीतइ क पाछे यहोवा क हिआँ स यिर्मयाह क सँदेसा मिला। 8तब यिर्मयाह कारेह क पूत योहानन अउर ओकरे संग क फउजी अधिकारियन क एक संग बोलाएस। यिर्मयाह बहोत नान्ह मनई स लइके बहोत बड़के मनई तलक क भी एक संग बोलाएस। 9तब यिर्मयाह ओनसे कहेस, “जउन इस्त्राएल क लोगन क परमेस्सर यहोवा कहत ह, उ इ अहइ: तू मोका ओकरे लगे पठया। मई यहोवा स उ पूछेउँ, जउन तू लोग मोहसे पूछइ चाहत रहया। यहोवा इ कहत ह: 10जदि तू लोग यहूदा में रहब्या तउ मई तोहार निर्माण करब मई तोहका नस्ट नार्ही करब। मई तोहका रोपब अउर मई तोहका उखाड़ब नार्ही। मई इ एह बरे करब कि मई ओन भयंकर बिपत्तियन बरे दुःखी हउँ जेनका मई तू लोगन पइ घटित होइ दीन्ह। 11इ समइ तू पचे बाबुल क राजा स भयभीत अहा। बाबुल क राजा स भयभीत न हवा: यहोवा कहत ह। काहेकि मई तोहरे पचन्क संग हउँ। मई



तोहका पचन्क बचाउब। मई तू पचन्क खतरे स बाहेर निकारब। 12मई तू पचन्पइ दयालु रहब अउर बाबुल क राजा भी तू पचन्क संग दया क बेउहार करी अउर उ तू पचन्क तोहरे पचन्क देस वापस लिआइ। 13किन्तु तू पचे इ कहि सकत ह, हम यहूदा में नाहीं ठहरब। जदि तू पचे अइसा कहब्या तउ तू पचे आपन परमेस्सर यहोवा क आग्या क उल्लंघन करब्या। 14तू पचे इ भी कहि सकत ह, 'नाहीं हम लोग जाब अउर मिस्त्र में रहब। हमका उ ठउरे पइ जुद्ध क परेसानी नाहीं होइ। हम हुआँ जुद्ध क तुरही नाहीं सुनब अउर मिस्त्र में हम भूखा नाहीं रहब।' 15अगर तू पचे इ सब कहत अहा, तउ यहूदा क बचे लोगो यहोवा क इ सँदेसा क सुना। इस्राएल क लोगन क परमेस्सर सर्वसक्तीमान यहोवा इ कहत ह: 'अगर तू पचे मिस्त्र में रहइ बरे जाइ क निर्णय करत अहा तउ इ सब घटित होइ: 16तू पचे जुद्ध क तरवार स डेरात अहा, किन्तु इहइ तोहका पचन्क पराजित करी अउर तू पचे भूख स परेसान अहा किन्तु तू पचे मिस्त्र में भूखा रहब्या। तू पचे हुआँ मरब्या। 17हर एक उ मनई तरवार, भूख अउर भयंकर बीमारी स मरी जउन मिस्त्र में रहइ बरे जाइ क निर्णय करी। जउन लोग मिस्त्र जइहीं ओनमाँ स कउनो भी जिअत नाहीं बची। ओनमाँ स कउनो भी ओन भयंकर बिपत्तियन स नाहीं बची जेनका मई ओन पइ ढाउब।

18"इस्राएल क सर्वसक्तीमान यहोवा, इ कहत ह: 'मई आपन किरोध यरूसलेम क खिलाफ परगट किहेउँ ह। मई ओन लोगन क सजा दिहेउँ जउन यरूसलेम में रहत रहेन। उहइ प्रकार मई आपन किरोध हर एक उ मनई पइ उडेरब जउन मिस्त्र जाइ। लोग तू पचन्क स लज्जित होइहीं। तू पचे अभिसाप वाणी क समान होब्या। तू पचन्पइ जउन कछू भवा ओका लखिके लोग भयभीत होइहीं। लोग तोहार पचन्क अपमान करिहीं अउर तू पचे फुन कबहुँ इ देस क नाहीं लिखि पउब्या।'

19"यहूदा क बचे भए लोगो, यहोवा तू पचन्स कहेस, 'मिस्त्र जिन जा।' मई तू पचन्क साफ चिताउनी देत अहइँ। 20तू लोग एक बड़ी भूल करत अहा, जेकरे कारण तू मरब्या। तू लोग यहोवा आपन परमेस्सर क लगे मोका पठया। तू मोहसे कहया, 'परमेस्सर यहोवा स हमरे बरे पराथना करा। हर बात हमका बतावा जउन यहोवा करइ क कहत ह। हम यहोवा क आग्या क पालन करब।' 21एह बरे आजु मई यहोवा क सँदेसा तोहका दिहेउँ ह। किन्तु तू पचे आपन परमेस्सर यहोवा क आग्या क पालन नाहीं किहा। तू पचे उ सब नाहीं किहा ह जेका करइ बरे कहइ क उ मोका पठएस ह। 22तू लोग रहइ बरे मिस्त्र जाइ चाहत अहा अब निहचइ ही तू पचे इ समुझ गवा होब्या कि मिस्त्र में तू पचन्पइ इ घटी: तू पचे तरवार स या भूख स, या भयंकर बीमारी स मरब्या।"

**43** इ तरह यिर्मयाह लोगन क यहोवा ओकरे परमेस्सर क सँदेसा देब पूरा किहस। यिर्मयाह लोगन क उ सब कछू बताइ दिहस जेका लोगन स कहइ बरे यहोवा ओका पठए रहा।

2होसाया क पूत अजयाह, कारेह क पूत योहानन अउर कछू दूसर लोग घमण्डी अउर हठी रहेन। उ सबइ लोग यिर्मयाह पइ क्रोधित होइ गएन। ओन लोगन यिर्मयाह स कहेन, "यिर्मयाह, तू झूठ बोलत अहा। हमार परमेस्सर यहोवा तोहसे हमका इ कहइ क नाहीं पठएस, 'तू लोगन क मिस्त्र में रहइ बरे नाहीं जाइ चाही।' 3यिर्मयाह, हम समझित अही कि नेरिय्याह क पूत बारूक तोहका हम लोगन क बिरुद्ध होइ बरे हुस्कावत अहइ। उ चाहत ह कि तू हमका कसदी लोगन क हाथ में दइ द्या। उ इ एह बरे चाहत ह जेहसे उ पचे हमका मारि डावई या उ तोहसे इ एह बरे चाहत ह कि उ पचे हमका कैदी बनाइ लेई अउर बाबुल लइ जाइ।"

4एह बरे योहानन फउजी अधिकारी अउर सबहि लोग यहोवा क आग्या क उल्लंघन किहन। यहोवा ओनका यहूदा में रहइ क आदेस दिहे रहा। 5किन्तु यहोवा क आग्या मानइ क जगह पइ योहानन अउर फउजी अधिकारी ओन लोगन क भी आपन संग लइ गएन जउन यहूदा में रहइ बरे आए रहेन। पहिले उ पचे सत्रुअन दुआरा दूसर रास्ट्रन में लेइ जवा गएन रहेन, किन्तु अब उ पचे वापिस यहूदा आइ गए रहेन। 6अब योहानन अउ सबहि फउजी अधिकारी, सबहि मनसेधू, मेहररूअन अउर बच्चन क मिस्त्र लइ गएन। ओन लोगन में राजा क बिटियन रहिन। (नबूजरदान गदल्याह क ओन लोगन क प्रसासक तैनात किहे रहा नबूजरदान बाबुल क राजा क खास रच्छकन क अधिनायक रहा।) योहानन यिर्मयाह नबी अउर नेरिय्याह क पूत बारूक क भी साथ लइ गवा। 7ओन लोग यहोवा क एक न सुनेन। एह बरे उ पचे सबहि लोग मिस्त्र गएन। उ पचे तहपन्हेस नगर क गएन।

8तहपन्हेस नगर में यिर्मयाह यहोवा स इ सँदेसा पावा, 9"यिर्मयाह, कछू बड़के पाथर ल्या। ओनका ल्या अउर ओनका तहपन्हेस में फिरौन क राजमहल क प्रवेस दुआर क ईटन क चबूतरन क लगे माटी में गाड़ा। 10इ तब करा जब यहूदा क लोग तोहका अइसा करत लखत रहा अहा, 'इस्राएल क परमेस्सर सर्वसक्तीमान यहोवा जउन कहत ह, उ इ अहइ: मई बाबुल क राजा नबूकदनेस्सर क हिआँ आवइ बरे बोलावा पठउब। उ मोर सेवक अहइ अउर मई ओकर राज सिंहासन क एन पाथरन पइ रखब जेनका मई हिआँ गाड़ा ह। नबूकदनेस्सर आपन चँदोवा एन पाथरन क ऊपर फैलाई। 11नबूकदनेस्सर हिआँ आइ अउर मिस्त्र पाइ हमला करी। उ कछू लोगन मारिहीं अउर कछू क लोगन क कैदी बनावइ जाइ अउर उ कछू लोगन क तरवारे क घाट उतारी। 12नबूकदनेस्सर मिस्त्र क लबार देवतन क मन्दिरन में ओन देवतन क संग आगी लगाइ देइ। उ ओनका बार देइहीं अउ ओनका बन्दी बनाइ लेइहीं। नबूकदनेस्सर मिस्त्र क भुइँया क सबहि चिजियन क वइसेन ही लइ लेत ह जइसे गडेरिया आपन ओढ़ना स चिल्लर क चुन-चुन कइ बाहेर फेंकत ह। अउर तउ उ सुरच्छा स मिस्त्र क तजि देइहीं। 13नबूकदनेस्सर ओन सुमिरन-पाथरन क नस्ट करी जउन मिस्त्र में सूर्य देवता क मन्दिर में अहइ उ मिस्त्र क लबार देवन क मन्दिरन क जराइ देइ।"

### यहूदा अउर मिस्त्र क लोगन क यहोवा क सँदिसा

**44** यिर्मयाह क यहोवा क एक ठु सँदिसा मिला। इ सँदिसा मिस्त्र में रहइवाले यहूदा क सबहिं लोगन बरे रहा। इ सँदिसा यहूदा क ओन लोगन बरे रहा जउन मिग्दोल, तहपन्हेस, नोप अउर दक्खिनी मिस्त्र में रहत रहेन। सँदिसा इ रहा: 2इस्त्राएल क परमेस्सर सर्वसक्तीमान यहोवा कहत ह, “तू लोग ओन भयंकर घटनन क लख्या जेनका मई यरूसलेम नगर अउर यहूदा क दूसर सबहिं नगरन क बिरुद्ध लाएँ। उ सबइ नगर आजु पाथरन क ढेर अहई। हुवाँ कउनो नाही रहत ह। 3उ सबहिं जगह नस्ट कीन्ह गएन काहेकि तू अउर ओनमाँ रहइवाले दूसर लोग बुरे करम किहन। ओन लोग दूसर देवतन क बलि भेंट किहन, जेका तोहार लोग अउर तोहार पुरखन पहिले नाही जानत रहेन। अउर मोका क्रोधित किहस। 4मई आपन नबी ओन लोगन क बार-बार पठएँ। उ सबइ नबी मोर सेवक रहेन। ओन नबियन मोर सँदिसा दिहन अउर लोगन स कहने, “इ भयंकर काम जिन करा जेहसे मई घिना करत हउँ। काहेकि तू पचे देवमूरतियन क पूजा करत अहा। 5किन्तु ओन लोग नबियन क एक न सुनेन। उ पचे ओन नबियन पइ धियान नाही दिहन। ओन लोग दुट्टता भरे करम करब नाही तजेन। उ पचे दूसर देवतन क बलि भेंट करब बन्द नाही किहेन। 6एह बरे मई आपन किरोध ओन लोगन क बिरुद्ध परगट किहेउँ। मई यहूदा क नगरन अउर यरूसलेम क सड़कियन क सजा दिहेउँ। मोर किरोध यरूसलेम अउर यहूदा क नगरन क सूना पाथरन क देर बनाएस, जइसे उ सबइ आजु अहई।”

7एह बरे इस्त्राएल क परमेस्सर सर्वसक्तीमान यहोवा इ कहत ह: “तू पचे मनइयन, मेहररूअन, गदेलन अउर नान्ह गदेलन क यहूदा क धरती स दूर ले जाइके अउर हिआँ पइ कउनो क धोड़िके आपन क चोट काहे पहुँचावत अहा। 8लोगो देवमूरतियन बनाइके तू पचे मोका काहे क्रोधित करब चाहत अहा? अब तू पचे मिस्त्र में रहत अहा अउर अब मिस्त्र क लबार देवतन क भेंट चढ़ाइके तू पचे मोका क्रोधित करत अहा। लोगो तू पचे आपन क नस्ट कइ डउब्या। इ तोहार पचन्क आपन दोख क कारण होइ। तू पचे आपन क कछू अइसा बनाइ लेब्या कि दूसर रास्ट्रन क लोग, तोहार पचन्क बुराई करिहीं अउर पृथ्वी क दूसर रास्ट्रन क लोग तोहार पचन्क मजाक उड़इहीं। 9का तू पचे ओन दुट्टता भरे करमन क बिसरि चुका अहा जेनका तोहार पुरखन किहन? का तू पचे ओन दुट्टता स भरे कामन क बिसरि चुका अहा जेनका यहूदा क राजा अउर रानिनियन किहन? का तू पचे ओन दुट्टता स भरे करमन क बिसरि चुका अहा जेनका तू पचे अउर तोहार मेहररूअन यहूदा क धरती पइ अउर यरूसलेम क गलियन पइ किहन? 10आज भी यहूदा क लोगन आपन क विनम्र नाही बनाएन। उ पचे मोका कउनो सम्मान नाही दिहन अउर ओन लोग मोर सिच्छन क अनुसरण नाही किहन। उ पचे ओन नेमन क पालन नाही किहन जेनका मई तू पचन्क अउर तोहरे पचन्क पुरखन क दिहेउँ।”

11एह बरे इस्त्राएल क परमेस्सर सर्वसक्तीमान यहोवा जउन कहत ह, उ इ अहइ: “मई तू पचन्पइ भयंकर बिपति ढावइ क निहचइ किहे हउँ। मई यहूदा क पूरे परिवार क नस्ट कइ देब। 12यहूदा क थोड़ा स लोग ही बचा रहेन। उ सबइ लोग हिआँ मिस्त्र में आएन ह। किन्तु मई यहूदा परिवार क ओन कछू बचे लोगन क नस्ट कइ देब। उ सबइ तरवारे क घाट उतरिहीं या भूख स मरिहीं। उ सबइ कछू अइसा होइहीं कि दूसर रास्ट्रन क लोग ओनके बारे में बुरा कहिहीं। दूसर रास्ट्र ओहसे भयभीत होइहीं जउन लोगन क संग घटित होइ। उ सबइ लोग अभिसाप बाणी बन जइहीं। दूसर रास्ट्र यहूदा क ओन लोगन क अपमान करिहीं। 13मई ओन लोगन क सजा देब जउन मिस्त्र में रहइ चला गवा अहई। मई ओनका सजा देइ बरे तरवार, भूख अउर भयंकर बीमारी क उपयोग करब। मई ओन लोगन क वइसे ही सजा देब जइसे मई यरूसलेम नगर क सजा दिहेउँ। 14एन थोड़े बचे भएन में स, जउन मिस्त्र में चला गवा अहई, कउनो भी मोरी सजा स नाही बची। ओनमाँ स कउनो भी यहूदा वापस आवइ बरे नाही बच पाई। उ सबइ लोग यहूदा वापस लउटब अउर हुआँ रहब चाहत हीं किन्तु ओनमाँ स एक भी मनई सायद कछू बचि निकरइ वालन क अलावा वापस नाही लउटी।”

15मिस्त्र में रहइवाली यहूदा क मेहररूअन में स अनेक दूसर देवतन क बलि भेंट करत रहीं। ओनकर भतारन एका जानत रहेन किन्तु ओनका रोकत नाही रहेन। हुआँ यहूदा क लोगन क मिस्त्र में एक बिसाल समूह बटुरा होत रहा। ओन सबहिं मनइयन यिर्मयाह स कहने, 16“हम यहोवा क सँदिसा क नाही सुनब जउन तू पचे देब्या। 17हम सरगे क रानी क बलि भेंट करइ प्रतिग्या कीन्ह ह अउर हम उ सब करब जेकर हम प्रतिग्या कीन्ह ह। हम ओकर पूजा में बलि चढ़ाउब अउर पेय भेंट देब। इ हम अतीत में कीन्ह अउर हमार पुरखन, राजा लोग अउर हमार पदाधिकारियन पुराने जमाने में इ किहस। हम सब यहूदा क नगरन अउर यरूसलेम क सड़कियन पइ इ किहस। जउने दिन हम सरगे क रानी क पूजा करत रहे हमरे लगे बहोत अन्न होत रहा। हम सफल होत रहे। हम लोगन क कछू भी बुरा नाही भवा। 18किन्तु तबहिं हम लोग सरग क रानी पूजा तजि दीन्ह हम ओका पेय भेंट देब बन्द कइ दीन्ह। जब स हम ओकर पूजा में उ पचे काम बन्द किहन तब स ही सबइ समस्या पइदा भइन ह। हमार लोग तरवार अउर भूख स मरे अहई।”

19तब मेहररूअन बोल पड़ी। उ पचे यिर्मयाह स कहने, “हमरे भतारन जानत रहेन कि हम का करत रहे। हम सरग क रानी क बलि देइ बरे ओनसे मंजूरी लीन्ह रहे। दाखरस भेंट चढ़ावइ बरे हम ओनकर मंजूरी पाए रहे। हमरे भतारन इ भी जानत रहेन कि हम एक अइसी खास रोटी बनावत रहे जउन ओनके तरह देखाई पड़त रही।”

20तब यिर्मयाह ओन सबहिं मेहररूअन अउर मनसेधुअन स बातन किहस। उ ओन लोगन स बातन किहस जउन उ सबइ बातन अबहिं कहे रहेन। 21यिर्मयाह ओन लोगन स कहेस, “यहोवा क याद रहा कि तू पचे यहूदा नगर अउर

यरूसलेम क सड़कियन पइ बलि भेंट किहे रह्या। तू पचे अउर तोहार पुरखन, तोहार राजा लोग, तोहार अधिकारियन अउर देस क लोग ओका किहन। यहेवा क याद रहा अउर उ तोहरे पचन्क कीन्ह गए करमन क बारे में सोचेस। 22एह बरे यहेवा तोहरे पचन्क अउर जियादा चुप नाहीं रहि सका। यहेवा ओन भयंकर करमन स घिना किहेस जउन तू पचे किहा। इहइ बरे यहेवा तू पचन्क देस क सूना रेगिस्तान बनाइ दिहस। अब हुआँ कउनो मनई नाहीं रहत। दूसर लोग उ देस क बारे में बुरी बातन कहत हीं। 23उ सबइ सबहिं बुरी घटनन तोहरे पचन्क संग घटित काहेकि तू पचे दूसर देवतन क बलि भेंट किहा। तू पचे यहेवा क खिलाफ पाप किहा। तू पचे यहेवा क आग्या क पालन नाहीं किहा। तू पचे ओकरे उपदेसन या ओकर दीन्ह नेमन क अनुसरण नाहीं किहा। तू पचे ओकरे संग कीन्ह गइ करार क पालन नाहीं किहा।”

24तब यिर्मयाह ओन सबहिं मनसेधुअन अउ मेहररूअन स बातन किहस। यिर्मयाह कहेस, “मिस्त्र में रहइवाले यहूदा क तू सबहिं लोगो यहेवा क हिआँ स सँदेसा सुना: 25इस्त्राएल क लोगन क परमेस्सर सर्वसक्तीमान यहेवा कहत ह: ‘मेहररूओ, तू पचे उ किहा जउन तू पचे करइ क कह्या। तू पचे कहिउ, “हम पचे जउन प्रतिग्या कीन्ह ह ओकर पालन हम करब। हम प्रतिग्या कीन्ह ह कि हम सरग क देवी क बलि भेंट करब अउर पेय भेंट डाउब।” एह बरे अइसा करति रहा। उ करा जउन तू पचे करइ क प्रतिग्या किहा ह। आपन प्रतिग्या क पूरा करा। 26किन्तु मिस्त्र में रहइवाले सबहिं लोगो यहेवा क सँदेसा सुना: मई आपन बड़े नाउँ क उपयोग करत भए इ प्रतिग्या कीन्ह ह: मई प्रतिग्या करत हउँ कि अब मिस्त्र में रहइवाला यहूदा क कउनो भी मनई प्रतिग्या करइ बरे मोरे नाउँ क उपयोग कबहुँ नाहीं कइ पाइ। उ पचे फुन कबहुँ नाहीं कहिहीं, “जइसा कि यहेवा सास्वत अहइ।” 27मई यहूदा क ओन लोगन पइ नजर रखत हउँ। किन्तु मई ओन पइ नजर ओनकर देखरेख बरे नाहीं रखत हउँ। मई ओन पइ चोट पहोंचावइ बरे नजर रखत हउँ। मिस्त्र में रहइवाले यहूदा क लोग भूख स मरिहीं अउर तरवार स मारा जइहीं। उ पचे तब तलक मरत चला जइहीं जब तलक उ पचे खतम नाहीं होतेन। 28यहूदा क कछू लोग तरवार स मरइ स बचि निकरिहीं। उ पचे मिस्त्र स यहूदा वापस लउटिहीं। किन्तु बहोत थोड़ा स यहूदा क लोग बचि निकरिहीं। तब यहूदा क बचे भए उ पचे लोग जउन मिस्त्र में आइके रहिहीं इ समझिहीं कि केकर सँदेसा घटित होत ह। उ पचे जानिहीं कि मोर सँदेसा अथवा ओनकर सँदेसा सच निकरत ह। 29लोगो मई तू पचन्क एकर प्रमाण देब इ यहेवा क हिआँ स सँदेसा अहइ कि मई तू पचन्क मिस्त्र में सजा देब। तब तू पचे निहचइ ही समुझ जाब्या कि तू पचन्क चोट पहोंचावइ क मोर प्रतिग्या, फुरइ ही घटित होइ। 30जउन मई कहत हउँ, इ उ अहइ, होप्रा फिरौन मिस्त्र क राजा अहइ। ओकर दुस्मन ओका मार डावइ चाहत हीं। मई होप्रा फिरौन क ओकरे दुस्मन क देब। सिदकिय्याह यहूदा क राजा रहा। नबूकदनेस्सर सिदकिय्याह क दुस्मन रहा अउर मई सिदकिय्याह

क ओकरे दुस्मन क दिहेउँ। उहइ तरह मई होप्रा फिरौन क ओकरे दुस्मन क देब।”

### बारूक क सँदेसा

**45** यहेवाकीम योसिय्याह क पूत रहा। यहेवाकीम क यहूदा में राजकाल क चउथे बरिस यिर्मयाह नबी नेरिय्याह क पूत बारूक स इ कहेस। बारूक एन तथ्यन क पत्रक पइ लिखेस। यिर्मयाह बारूक स जउन कहेस, उ इ अहइ: 2“इस्त्राएल क परमेस्सर यहेवा जउन तोहसे कहत ह, उ इ अहइ: 3‘बारूक, तू कह्या ह: इ मोरे बरे बहोत बुरा अहइ। यहेवा मोर पीरा क संग मोका सोक दिहस ह। मई बहोत थक गवा हउँ। आपन कस्टन क कारण मई छीन होइ गवा हउँ। मई आराम नाहीं पाइ सकत।” 4यहेवा कहेन, “यिर्मयाह, बारूक स इ कहा: ‘यहेवा जउन कहत ह, उ इ अहइ: मई ओका ध्वस्त कइ देब जेका मई बनाएउँ ह। मई जेका रोपेउँ ह ओका मई उखाड़ फेंकब। मई पूरे यहूदा क ध्वस्त करब। 5बारूक, तू अपने बरे कछू बड़की बात होइ क आसा करत अहा। किन्तु ओन चिजियन क आसा न करा। ओनकी कइँती नजर न राखा काहेकि मई सबहिं लोगन क बरे कछू भयंकर बिपत्ति पइदा करब।’ इ सबइ बातन यहेवा कहेस, ‘तोहका अनेक जगहन पइ जाब पड़ी। किन्तु तू चाहे जहाँ जा मई तोहका जिअत बचिके निकर जाइ देब।”

### रास्ट्रन क बारे में यहेवा क सँदेसा

**46** यिर्मयाह नबी क इ सँदेसन मिलेन। इ सँदेसन अलग अलग रास्ट्रन बरे अहइँ।

### मिस्त्र क बारे में सँदेसा

2इ सँदेसा मिस्त्र क बारे में अहइ। इ सँदेसा निको फिरौन क फउज क बारे में अहइ। निको मिस्त्र क राजा रहा। ओकर फउज कर्कमीस नगर में पराजित भइ रही। कर्कमीस परात नदी पइ अहइ। यहेवाकीम क यहूदा पइ राजकाल क चउथे बरिस बाबुल क राजा नबूकदनेस्सर निको फिरौन क फउज क कर्कमीस में पराजित किहस। यहेवाकीम राजा योसिय्याह क पूत रहा। मिस्त्र बरे यहेवा क सँदेसा इ अहइ: 3“आपन बिसाल अउर छोटकी ढालन क तइयार करा। जुद्ध बरे कुच कइ द्या।

4घोड़न क तइयार करा। फउजियन, आपन घोड़न पइ बइठ। जुद्ध बरे आपन जगहिया जा अउर आपन टोप पहन ल्या। आपन भालन क तेज करा। आपन कवच पहिर ल्या।

5मई इ का लखत हउँ? फउज डर गइ बाटइ। फउजी परात अहइँ। ओनकर वीर फउजी पराजित होइ ग अहइँ। उ पचे हाली परात अहइँ। उ पचे पाछे मुड़िके नाहीं लखतेन। सर्वत्र डर छावा अहइ।” यहेवा इ सबइ बातन कहेस।

6“तेज धावक पराइके निकरि नाहीं सकतेन। ताकतवर फउजी बचिके पराइ नाहीं सकत। उ पचे सबहिं ठोकर खइहीं अउर उत्तर में परात नदी क किनारे पइ गिरब्या।

7नील नदी क नाई कउन उमड़त आवत अहइ? उ बलवती अउ तेज नदी क नाई कउन बढ़त बाटइ?

8इ मिस्र अहइ जउन उमड़त नील नदी जइसा आवति अहइ। इ मिस्र अहइ जउन बलवती तेज नदी जइसा आवत अहइ। मिस्र कहत ह: 'मई आउब अउर पृथ्वी क पाट देब, मई नगस अउर ओनकर लोगन क बर्बाद कइ देब।'

9घुड़सवारो, जुद्ध में टूट पड़ा। सारथियो, तेज हाँका। वीर फउजियो, अगवा बढ़। कूस अउर पूत क फउजियो, आपन ढालन ल्या। लूदीया क फउजियो, आपन धनुस सँभारा।

10किन्तु उ दिन, हमार सुआमी सर्वसक्तीमान यहोवा बिजयी होइ। उ समइ उ ओन लोगन क सजा देइ जेनका सजा मिलत ह। यहोवा क दुस्मन उ सजा पइहीं जउन ओनका मिलइ क अहइ। तरवार तब काटी जब तलक उ गोठिल नहीं होइ जात। तरवार तब तलक मारी जब तलक एकर खून क पियास बुझ नहीं जात। इ होइ, काहेकि इ सबइ हमार सुआमी सर्वसक्तीमान यहोवा बरे बलि भेंट होत ह। उ बलि मिस्र क फउज अहइ जउन परात नदी क किनारे उत्तरी पहँटा में अहइ।

11मिस्र, गिलाद क जा अउर कछू दवाइयन लिआवा। तू अनेक दवाइयन बनउब्या, किन्तु उ सबइ सहायक नहीं होइहीं। तू तन्दुरूस्त नहीं होब्या।

12रास्टर तोहार सर्मानाक हार लखब्या। तोहार रोउब समूचइ पृथ्वी पइ सुना जाइ। एक वीर सिपाही दूसर सिपाही पइ टूट पड़ी अउर दुइनउँ वीर फउजी साथ भहरइहीं।"

13इ उ सँदिसा अहइ जेका यहोवा यिर्मयाह नबी क दिहस। इ सँदिसा नबूकदनेस्सर क बारे में अहइ जउन मिस्र पइ हमला करइ आवत अहइ।

14"मिस्र में इ सँदिसा क घोसणा करा, एकर उपदेस मिगदोल नगर में द्या। एकर उपदेस नोप अउर तहपन्हेस नगर में भी द्या। 'जुद्ध बरे तइयार हवा। काहेकि तोहरे चारिहुँ ओर तरवारन स मारा जात अहइ।'

15मिस्र, तोहार ताकतवर फउजी काहे मारा जइहीं? उ पचे मुकाबले में नहीं टिकिहीं काहेकि यहोवा ओनका खाले धक्का देइ।

16उ सबइ फउजी बार-बार ठोकर खइहीं, उ पचे एक दूसर पइ भहरइहीं। उ पचे कहिहीं, 'उठा, हम फुन आपन लोगन में चली, हम आपन देस चली। हमार दुस्मन हमका पराजित करत अहइ।' हमका जरूर पराइ निकरइ चाही।'

17उ सबइ फउजी आपन देस में कहिहीं, 'मिस्र क राजा फिरौन सिरिफ एक नाउँ क गूँज अहइ। ओकरे गौरव क समइ गवा।"

18राजा क इ सँदिसा अहइ। राजा सर्वसक्तीमान यहोवा अहइ। "जदि मोर जिअब फुर अहइ तउ एक ताकतवर पत्र दर्सक आइ। उ सगरे क निअरे ताबोर अउर कर्मेल पहाड़न क नाई महान होइ।

19मिस्र क लोगो, आपन चिजियन क बाँधा, बन्दी होइ का तइयार होइ जा। काहेकि नोप एक बर्बाद सूना पहँटा बन जाइ नगर नस्ट होइहीं अउर कउनो भी मनई ओनमाँ नहीं रही।

20मिस्र एक सुन्नर गइया जइसा अहइ। किन्तु ओका पीड़ित करइ क उत्तर स एक गोमवखी आवति अहइ।

21मिस्र क फउज में भाड़े क फउजी मोटके बछवन जइसा अहइ। उ सबइ सबहिँ मुड़िके पराइ खड़ा होइहीं। उ पचे हमला क खिलाफ मजबूती स खड़ा नहीं रहिहीं। ओनकर बर्बादी क समइ आवत अहइ। उ पचे हाली ही सजा पइहीं।

22मिस्र साँप क जइसा फुँफकार क आवाज करत ह अउ आगे बढ़त ह। दुस्मन निचके स निचके आवत जात अहइ अउर मिस्री फउज पराइ क जतन करति अहइ। दुस्मन मिस्र क खिलाफ कुल्हाड़ियन क संग आइ, उ सबइ लकड़हारन क तरह अहइ।"

23यहोवा इ सबइ कहत ह, "दुस्मन मिस्र क बन क काट गिराइ। बन में असंख्य बृच्छ अहइ, किन्तु उ सबइ काट डावा जइहीं। दुस्मन क सिपाही टिड्डी दल स भी जियादा अहइ। उ पचे एतेन जियादा फउजी अहइ कि ओनका कउनो गन नहीं सकत।

24मिस्र लज्जित होइ उत्तर क दुस्मन ओका पराजित करी।"

25इस्त्राएल क परमेस्सर सर्वसक्तीमान यहोवा कहत ह: "मई बहोत हाली, थीबिस क देवता आमोन क सजा देब अउर मई फिरौन, मिस्र अउर ओकर देवतन क सजा देब। मई मिस्र क राजा लोगन क सजा देब। मई फिरौन पइ आखित लोगन क सजा देब। 26मई ओन सबहिँ लोगन क ओनकर दुस्मनन स पराजित होइ देब अउर उ पचे दुस्मन ओनका मार डावइ चाहत हीं। मई बाबुल क राजा नबूकदनेस्सर अउर ओकर सेवकन क हाथ में ओन लोगन क देब।

"बहोत पहिले मिस्र सान्ति स रहा अउर एन सब बिपत्तियन क समइ मिस्र फुन सान्तिपूर्वक रही।" यहोवा इ सबइ बातन कहेस।

### उत्तरी इस्त्राएल बरे सँदिसा

27"मोरे सेवक याकूब, भयभीत न हवा। इस्त्राएल, आतंकित न हवा। मई निहचइ ही तोहका ओन दूर-दराज क देसन स बचाउब। मई तोहरे बच्चन क हुआँ स बचाउब जहाँ उ पचे बन्दी अहइ। याकूब क पुनःसुरच्छा अउर सान्ति मिली अउर कउनो मनई ओका भयभीत नहीं करी।"

28यहोवा इ सब कहत ह: "याकूब मोर सेवक, डेराअ जिन। मई तोहरे संग हउँ। मई तोहका अलग-अलग जगहन में दूर पठएउँ अउर मई ओन सबहिँ रास्टरन क पूरी तरह बर्बाद करब। किन्तु मई तोहका पूरी तरह बर्बाद नहीं करब। तोहका ओकर सजा मिलइ चाही जउन तू बुरे काम किहा ह। एह बरे मई तोहका सजा स बच निकारइ नहीं देब। मई तोहका अनुसासन में लिआउब, किन्तु मई उचित ही करब।"

### पलिस्ती लोगन क बारे में सँदिसा

47 इ सँदिसा यहोवा क अहइ जउन यिर्मयाह नबी क मिला। इ सँदिसा पलिस्ती लोगन क बारे में अहइ। इ सँदिसा, जब फिरौन गज्जा नगर पइ हमला किहस, ओहसे पहिले आवा।

2यहोवा कहत ह: "धियान द्या, दुस्मन क फउजी उत्तर में एक संग मोर्चा लगावत अहइ। उ पचे तटन क बारेत तेज

नदी क तरह अइहीं उ पचे देस क बाढ़ सा ढकि लेइहीं। उ पचे नगरन अउर ओनमाँ रह रहे निवासियन क ढकि लेइहीं। उ देस क हर एक रहइवाला मदद बरे चिल्लाई।

3उ सबइ धावत घोड़न क अवाज सुनिहीं, उ पचे रथन क घरघराहट सुनिहीं। उ पचे पहियन क घरघराहट सुनिहीं। पिता आपन बच्चन क सुरच्छा करइ मँ मदद नाहीं कइ सकिहीं। उ पचे पिता मदद करइ मँ एकदम असमर्थ होइहीं।

4सबहिं पलिस्ती लोगन क नस्त करइ क समइ आइ ग अहइ। सोर अउर सिदोन क बचे सहायकन क नस्त करइ क समइ आइ ग अहइ। यहोवा पलिस्ती लोगन क हाली नस्त करी। कप्तोर द्वीप मँ बचे लोगन क उ नस्त करी।

5गज्जा क लोग सोक मँ बूड़िहीं अउर आपन सिर मुड़ैहीं। अस्कलोन क लोग चुप कइ दीन्ह जइहीं। घाटी क बचे लोगो, कब तलक तू पचे आपन क काटत रहब्या?

6ओ! यहोवा क तरवार, तू रूकिउ नाहीं तू कब तलक मार करति रहबिउ? आपन म्यान मँ लउटि जा, 'रूका, सान्त हवा।

7किन्तु यहोवा क तरवार कइसे बिस्त्राम लेइ? यहोवा एका आदेस दिहस ह। यहोवा एका इ आदेस दिहस ह कि इ अस्कलोन नगर अउर समुद्र तट पइ हमला करई।"

### मोआब क बारे मँ सँदसा

**48** इ सँदसा मोआब देस क बारे मँ अहइ। इस्राएल क लोगन क परमेस्सर सर्वसक्तीमान यहोवा जउन कहेस, उ इ अहइ:

"नबो पहाड़ क बुरा होइ, नबो पहाड़ नस्त होइ। क्रियतैम नगर लज्जित होइ। एह पइ अधिकार होइ। सक्तीसाली जगह लज्जित होइ। इ बिखरि जाइ।

2मोआब क पुनः तारीफ नाहीं होइ। हेसबोन नगर क लोग मोआब क पराजय क योजना बनइहीं। उ पचे कहिहीं, 'आवा हम उ रास्ट्र क अन्त कइ देइ।' मदमेन तू भी चुप कीन्ह जाब्या, तरवार तोहार पाछा करी।

3हेरोनौम नगर स रूदन अनका, उ पचे बहोत घबराहट अउर बिनास क चीखेन ह।

4मोआब नस्त कीन्ह जाइ। ओकर नान्ह बच्चन मदद क पुकार करिहीं।

5मोआब क लोगो लूहीत क मारग तलक जा। उ पचे जात भए फूटि फूटिके रोवत अहइँ। हेरोनौम नगर तलक जाइवाली सड़किया स पीरा अउर कस्ट क रूदन सुना जाइ सकत ह।

6पराइ चला, जिन्नगी बरे पराअ। जइसा झाड़ी रेगिस्ताने मँ उड़त ह वइसा उड़ा।

7तू आपन बनाई चिजियन अउर आपन धन पइ बिस्सास करत अहा। एह बरे तू बन्दी बनाई लीन्ह जाब्या। कमोस देवता कैदी बनावा जाइ अउर ओकर याजक अउर पदाधिकारी ओकरे संग जइहीं।

8बिध्वंसक हर एक नगर क खिलाफ आइ, कउनो नगर नाहीं बची। घाटी बर्बाद होइ। उच्च मैदान नस्त होइ। यहोवा इ कहेस ह, एह बरे इ होइ।

9मोआब क खेतन मँ नमक फइलावा। देस सूना रेगिस्तान बनी। मोआब क नगर खाली होइहीं। ओनमाँ कउनो भी मनई न रही।

10जदि मनई उ नाहीं करत जेका यहोवा कहत ह जदि उ आपन तरवार क उपयोग ओन लोगन क मारइ बरे नाहीं करत, तउ उ मनई क बुरा होइ।

11मोआब क कबहुँ बिपत्ति स पाला नाहीं पड़ी। मोआब सान्त होइ बरे छोड़ी गइ दाखरस सा बाटइ। मोआब एक गगरी स दूसर गगरी मँ दाला नाहीं गवा। उ कबहुँ कैदी नाहीं बनावा गवा। एह बरे ओकर सुआद पहिले क नाई अहइ अउर ओकर गन्ध बदली नाहीं अहइ।"

12यहोवा इ सब कहत ह, "किन्तु मई लोगन क हाली ही तोहका तोहरी गगरी स ढालइ पठउब। उ सबइ लोग मोआब क गगरी क छूँछ कइ देइहीं अउर तब उ पचे ओन गगरियन क चकनाचूर कइ देइहीं।"

13तब मोआब क लोग आपन असत्य देवता कमोस क बरे लज्जित होइहीं। इस्राएल क लोगन बेतेल मँ लबार देवतन पइ बिस्सास किहे रहेन अउर इस्राएल क लोगन क उ समइ ग्लानि भइ रही जब उ लबार देवता ओनकर मदद नाहीं किहे रहा। मोआब वइसा ही होइ।

14"तू कइसे कह सकत ह, 'हम बढ़िया फउजी अही। हम जुद्ध मँ बहादूर मनसेधू अहइ?'

15दुस्मन मोआब पइ हमला करी। दुस्मन ओन नगरन मँ आइ अउर ओनका नस्त करी। नरसंहार मँ ओकर स्त्रेष्ठ जुवक मारा जइहीं।" इ सँदसा राजा क अहइ। उ राजा क नाउँ सर्वसक्तीमान यहोवा अहइ।

16"मोआब क अन्त निचके अहइ। मोआब हाली ही नस्त कइ दीन्ह जाइ।

17मोआब क चारिहुँ कइँती बसइया लोगो, तू सबहिं उ देस बरे रोउब्या। तू लोग जानत ह कि मोआब केतना प्रसिद्ध अहइ। एह बरे एकरे बरे रोआ। कहा, 'सासक क ताकत भंग होइ गइ। मोआब क ताकत अउ प्रतिष्ठा चली गइ।'

18दीबोन मँ रहइवाले लोगो आपन प्रतिष्ठा क जगह स बाहेर निकरा। धूरि मँ जमीन पइ बइठा। काहेकि मोआब क बिध्वंसक आवत अहइ अउर उ तोहरे मजबूत नगरन क नस्त कइ देइ।

19अरोएर क बसइया लोगो, सड़क क सहारे खड़ा हवा अउर सावधानी स रहा। मनई क परात लखा, मेहरारू क परात लखा, ओनसे पूछा क भवा ह?

20मोआब बर्बाद होइ अउर लज्जा स गड़ि जाइ। मोआब रोइ अउर रोइ। अर्नोन नदी पइ घोसित करा कि मोआब नस्त होइ गवा।

21ऊँच मैदान क लोग सजा पाइ चुके होलोन, यहसा अउर मेपात नगरन क निआव होइ चुका।

22दीबोन, नबो अउर बेतदिबलतैम,

23किय्यतैम, बेतगामूल अउर बेतमोन।

24करिय्योत बोस्त्रा अउ मोआब क निचके अउ दूर क सबहिं नगरन क संग निआउ होइ चुका।

25मोआब क ताकत काट दीन्ह गइ, मोआब क बाँहन टूट गइ।” यहोवा इ सब कहेस।

26“मोआब समझे रहा उ यहोवा स भी जियादा महान अहइ। एह बरे मोआब क सख्त पागल जइसा सजा द्या। मोआब गिरी अउ आपन उलटी में चारिहुँ कइँती लउटी। लोग मोआब क मजाक उइइहीं।

27मोआब तू आपन इस्त्राएल क मजाक उड़ाए रह्या। इस्त्राएल चोरन क गिरोह क जरिये धरा गवा। हर दाई तू इस्त्राएल क बारे में कहत रह्या। तू आपन मूँड़ हिलावत रह्या अइसा अभिनय करत रह्या माना तू इस्त्राएल स स्नेह अहा।

28मोआब क लोगो, आपन नगरन क तजा। जा अउर पहाड़ियन पइ रहा, उ कबूतर क तरह रहा जउन आपन झोंझ गुफा क मुँहे पइ बनवत ह।”

29“हम मोआब क गर्व क सुनि चुका अही, उ बहोत घमण्डी रहा। उ समुझे रहा कि उ बहोत बड़ा अहइ। उ हमेसा आपन मुँह मियाँ मिटठू बनत रहा। उ बहोत जियादा घमण्डी रहा।”

30यहोवा कहत ह, “मई जानत हउँ कि मोआब हाली ही कोहाइ जात ह अउर आपन तारीफ क गीत गावत ह। मुला ओकर सेखी झूठ अहइँ। उ जउन करइ क कहत ह, कइ नहीं सकत।

31एह बरे मई मोआब बरे रोवत हउँ। मई मोआब में हर एक बरे रोवत हउँ। मई कीहैरिस क लोगन बरे रोवत हउँ।

32मई सिबमा क लोगन बरे याजेर स लोगन स जियादा रोवत हउँ। सिबमा पुराने जमाना में तोहार अंगूर क बेलन सागर तलक याजेर जेतनी दूर तलक फइली रहिन। मुला बिध्वंसक तोहार फल अउर अंगूर लइ लिहन।

33मोआब क बिसाल अंगूर क बगियन स सुख अउर आनन्द बिदा होइ गएन। मई दाखरस निकारइ वाली जगहन स दाखरस क बहब रोक दिहे हउँ। अब दाखरस बनावइ बरे अंगूरन पइ चलइवालन क नाच-गाना नहीं रहि गवा अहइँ। खुसी क सोर गुल सबहिं खतम होइ गवा अहइ।

34हेसबोन अउ एलाले नगरन क लोग रोवत अहइँ। ओनकर रूदन दूर यहस क नगर में भी सुनाई पड़त अहइ। ओनकर रूदन सोआर नगर स सुनाई पड़त अहइ अउर हेरोनैम अउ सेलिसिया क दूर नगरन तलक पहुँचत अहइ। हिआँ तलक कि निम्रीम क भी पानी झुराइ गवा ह। 35मई मोआब क उच्च ठउरन पइ होमबलि चढ़ावइ स रोक देब। मई ओनका आपन देवतन क बलि चढ़ावइ स रोकब।” यहोवा इ सब कहेस।

36“मोका मोआब बरे बहोत दुःख अहइ। सोक गीत छेड़इवाली बाँसूरी क धुन क तरह मोर हिरदय रूदन कइ रहा अहइ। मई कीहैरिस क लोगन बरे दुःखी हउँ। ओनकर धन अउ सम्पत्ति सबहिं लइ लीन्ह ग अहइँ। 37हर एक आपन मूँड़ मुड़ाए अहइ। हर एक स दाढ़ी साफ होइ ग अहइ। हर एक क हाथ कटा अहइँ अउ ओनसे रक्त निकरत अहइ। हर एक आपन कमर में सोक स ओढ़ना लपेटे अहइ। 38मोआब में लोग घसन क छतन अउर हर एक सार्वजनिक चउराहन में सर्वत्र मरे भएन बरे रोवत

अहइँ। हुआँ सोक अहइ काहेकि मई मोआब क छूँछ गगरी क तरह फोड़ डाएँ ह।” यहोवा इ सब कहेस।

39“मोआब बिखरि गवा अहइ। लोग रोवत अहइँ। मोआब आत्मसमर्पण किहेस ह। अब मोआब लजान अहइ। लोग मोआब क मजाक उड़ावत हीं, किन्तु जउन कछू भवा ह उ ओनका भयभीत कइ देत ह।”

40यहोवा कहत ह, “लखा, एक उकाब अकासे में खाले टूट पड़त अहइ। इ आपन परन क मोआब पइ फइलावत अहइ।

41मोआब क नगरन पइ अधिकार होइ। छुपइ क सुरच्छित ठउर पराजित होइहीं। उ समइ मोआब क फउजी वइसे ही आतंकित होइहीं जइसे प्रसव करत मेहरारू।

42मोआब क रास्ट्र नस्ट कइ दीन्ह जाइ। काहेकि उ पचे समुझत रहेन कि उ पचे यहोवा स भी जियादा महत्वपूर्ण अहइँ।”

43यहोवा इ सब कहत ह: “मोआब क लोगो, भय गहिर गइहन अउर जाल तोहरी प्रतीच्छा में अहइँ।

44लोग डेरइहीं अउर भाग खड़ा होइहीं, अउर उ पचे गइहन में गिरिहीं। जदि कउनो गहिर गइहा स निकरी तउ उ जाल में फँसी। मई मोआब पइ सजा क बरिस लिआउब।” यहोवा इ सब कहेस।

45“ताकतवर दुस्मन स लोग भाग चला अहइँ। उ पचे सुरच्छा बरे हेसबोन नगर में परातेन। किन्तु हुआँ सुरच्छा नहीं रही। सिहोन (हेसबोन) क नगर मोआबियन क बिरुद्ध होइ गवा अउर उ मोआब क प्रमुखन क नस्ट करइ लाग। इ ओन घमण्डी लोगन क नस्ट करइ लाग।

46मोआब इ तोहरे बरे, बहोत बुरा होइ। कमोस क लोग नस्ट कीन्ह जात अहइँ। तोहार पूत अउ बिटियन बन्दी अउ कैदी क रूप में लइ जावा जात अहइँ।

47“मोआब क लोग कैदी क रूप में दूर पहुँचावा जइहीं। किन्तु आवइवाले दिनन में मई मोआब क लोगन क वापस लिआउब।” इ सँदेसा यहोवा क अहइ।

हिआँ मोआब क संग निआव खतम होत ह।

### अम्मोन क बारे में सँदेसा

**49** इ सँदेसा अम्मोनी लोगन क बारे में अहइ। यहोवा कहत ह, “अम्मोनी लोगो, का तू पचे सोचत अहा कि इस्त्राएली लोगन क बच्चन नहीं अहइँ? का तू पचे समुझत अहा कि हुवाँ महतारी-बाप क मरइ क पाछे ओनकर भूँइया लेइवाला कउनो नहीं? फिर भी तू पचे मल्कोम देवता क नाउँ पइ इस्त्राएल स गाद क भूँइया लेइ क निहचय किहेन।”

2यहोवा कहत ह, “उ समइ आइ जब रब्बा अम्मोन क लोग हमला स बचइ बरे तुरही बजाइहीं। रब्बा अम्मोन नस्ट कीन्ह जाइ। इ नस्ट इमारतन स ढकी पहाड़ी बनी अउर एका चारिहुँ कइँती क नगर बारि दीन्ह जइहीं। ओन लोग इस्त्राएल क लोगन क उ भूमि तजइ क बिक्स करी। अब इस्त्राएल क लोग ओनका अम्मोन देस तजइ बरे बिक्स करिहीं,” यहोवा कहत ह।

3“हेसबोन क लोगो, रोवा। काहेकि इ सबइ नगर नस्त कइ दीन्ह ग अहइ। रब्बा अम्मोन क मेहररूओ, रोवा। आपन सोक ओढना क पहिरा अउर रोवा। सुरच्छा बरे नगर क पराअ। काहेकि दुस्मन आवत अहइ। उ पचे मल्कान देवता क लइ जइहीं अउर उ पचे मल्कान क याजकन अउ अधिकारियन क लइ जइहीं।

4तू आपन सक्ति क डींग मारत अहा। किन्तु आपन ताकत क खोवत अहा? तोहका बिस्सास अहइ कि तोहार धन तोहका बचाइ। तू समुझत अहा कि तोह पइ कउनो हमला करइ क सोच भी नाहीं सकत।”

5किन्तु सर्वसक्तीमान यहोवा इ कहत ह, “मई हर कइँती स तोह पइ बिपत्ति ढाउब। तू सब पराइ खड़ा होब्या, फुन कउनो भी तू पचन्क एक संग लिआवइ मँ समर्थ नाहीं होइ।”

6“अम्मोनी लोग कैदी बनाइके दूर पहाँचावा जइहीं। किन्तु समइ आइ जब मई अम्मोनी लोगन क वापस लिआउब।” इ सँदिसा यहोवा क अहइ।

### एबोम क बारे में सँदिसा

7इ सँदिसा एदोम क बारे में अहइ: सर्वसक्तीमान यहोवा कहत ह, “का तोमान नगर मँ बुद्धि बची नाहीं रह गई अहइ? का एदोम क बुद्धिमान लोग अच्छी सलाह देइ क जोग्य नाहीं रहेन? का उ पचे आपन बुद्धिमानी खोइ चुका अहइ?”

8ददान क निवासियो, भागा छुपा। काहेकि मई एसाव क ओकर कामन बरे सजा देब।

9“जदि अंगूर तोइइवाले आवत हीं अउर आपन अंगूर क बगियन स अंगूर तोइत हीं अउर बेलन पइ कछू अंगूर छोड़ ही देत हीं। जदि चोर रात क आवत हीं तउ उ पचे ओतना ही लइ जात हीं जेतना ओनका चाही सब नाहीं।

10किन्तु मई एसाव स हर चीज लइ लेब। मई ओकर सबहिं छुपइ क जगह ढूँढ़ि डाउब। उ मोहसे छुपा नाहीं रह सकत। ओकर, बच्चन, रिस्तेदार अउर पड़ोसी मरिहीं।

11कउनो भी मनई मनई ओनकर बच्चन क देख-रेख बरे नाहीं बची। ओनकर मेहररूअन कउनो भी बिस्सासपात्र क नाहीं पइहीं।”

12इ उ अहइ जउन यहोवा कहत ह, “कछू मनई सजा क पात्र नाहीं होतेन, किन्तु ओनका कस्त होत ह। किन्तु एदोम तू सजा पावइ क जोगग अहा, एह बरे फुरइ तोहका सजा मिली। जउन सजा तोहका मिलइ चाही, ओहसे तू बचिके नाहीं निकर सकल्या। तोहका सजा मिली।” 13यहोवा कहत ह, “मई आपन सक्ती स इ प्रतिग्या करत हउँ, मई प्रतिग्या करत हउँ कि बोस्त्रा नगर नस्त कीन्ह जाइ। उ नगर बर्बाद चट्टानन क ढेर बन जाइ। जब लोग दूसर नगरन क बुरा होइ चहिहीं तउ उ पचे इ नगर क उदारहण क रूप मँ याद करिहीं। लोग उ नगर क अपमान करिहीं अउर बोस्त्रा क चारिहुँ ओर क नगर सदा ही बर्बाद होइ जइहीं।”

14मई एक सँदिसा यहोवा स सुनेउँ। यहोवा रास्ट्रन क सँदिसा पठएस। सँदिसा इ अहइ: “आपन फउजन क एक

संग बटोरा। जुद्ध बरे तइयार होइ जा। एदोम रास्ट्र क खिलाफ कूच करा।

15एदोम, मई तोहका महत्वहीन बनाउब। हर एक मनई तोहसे घिना करी।

16एदोम, तू दूसर रास्ट्रन क आतंकित किहा ह। एह बरे तू समझा कि तू महत्वपूर्ण अहा। किन्तु तू मूरख बनावा गवा रह्या। तोहार घमण्ड तोहका धोखा दिहस ह। एदोम, तू ऊँच पहाड़ियन पइ बसा अहा, तू बड़की चट्टानन अउर पहाड़ियन क जगहन पइ सुरच्छित अहा। किन्तु जदि तू आपन निवास उकाब क झोंझ क ऊँचाई पइ ही काहे न बनावा, तउ भी मई तोहका पाइ लेब अउर मई हुआँ स खाले लइ आउब।” यहोवा इ सबइ कहेस।

17“एदोम नस्त कीन्ह जाइ। लोगन क नस्त नगरन क लखिके दुःख होइ। लोग नस्त नगरन पइ अचरज स सीटी बजइहीं।

18सदोम अउर अमोरा मँ तब स कउनो नाही रहत ह बहोत पहिले जब स उ नस्त कीन्ह गए रहेन, उहइ तरह एदोम क सहर मँ कउनो नाही रहब्या जब मई ओका तबाह करब,” यहोवा कहत ह।

19“कबहुँ यरदन नदी क निचके क घनी झाड़ियन स एक ठु सेर निकरी अउ उ सेर ओन खेतन मँ जाइ जहाँ लोग आपन भेड़िन अउर आपन पसु रखत हीं। मई उ सेर क समान हउँ। मई एदोम जाब अउर मई ओन लोगन क आतंकित करब। मई ओनका भगाउब। कउनो भी मोरे समान नाहीं अहइ। कउनो भी मोका चुनौती नाहीं देइ। ओनकर गड़रियन (प्रमुखन) मँ स कउनो भी हमरे बिरुद्ध खड़ा नाहीं होइ।”

20एह बरे यहोवा एदोम क खिलाफ जउन जोजना बनाएस ह ओका सुना। तेमान मँ लोगन क संग जउन करइ क निहचइ यहोवा किहस ह ओका सुना। उ पचे जउन कछू किहन ओहसे एदोम क चरागाह खाली होइ जइहीं।

21एदोम क पतन क धमाका स पृथ्वी काँप उठी। ओनकर रूदन लगातार लाल सागर तलक सुनाई पड़ी।

22यहोवा उ उकाब क तरह मँडराइ जउन आपन सिकार पइ टूटत ह। यहोवा बोस्त्रा नगर पइ आपन पखना फइलाइके उकाब क नाई अहइ। उ समइ एदोम क फउजी बहोत आतंकित होइहीं। उ पचे बच्चा पइदा करत मेहरारू क तरह डर स रोइहीं।

### दमिस्क क बारे में सँदिसा

23इ सँदिसा दमिस्क नगर क बरे अहइ: “हमात अउ अर्पद नगर भयभीत अहइँ। उ पचे डेरान अहइँ काहेकि उ पचे बुरी खबर सुनेन ह। उ पचे साहसहीन होइ गएन ह। उ पचे परेसान अउ आतंकित अहइँ।

24दमिस्क नगर दुर्बल होइ ग अहइ। लोग पराइ जाइ चाहत अहइँ। लोग भय स तैयार बइठा अहइँ। बच्चा पइदा करत मेहरारू क तरह पीरा अउ कस्त महसूस करत अहइँ।

25“दमिस्क नगर प्रसिद्ध अउ बहोत खुस अहइ। अब इ केतना अलग अहइ।

26एह बरे दमिस्क क जवान लोगन इ नगर क सार्वजनिक चउराहे में मरिहीं। उ समइ ओकर सबहिं फउजी मार डावा जइहीं,” सर्वसक्तिमान यहोवा कहत ह।

27“मई दमिस्क क देवारन में आगी लगाइ देब। उ आगी बेन्नहदद क मजबूत दुर्गन पूरी तरह बारिके खाक कइ देइ।”

### केदार अउर हासोर क बारे में सँदसा

28इ सँदसा केदार क परिवार समूह अउ हासोर क सासकन क बारे में अहइ। बाबुल क राजा नबूकदनेस्सर ओनका पराजित किहे रहा।

यहोवा कहत ह, “जा अउर केदार क परिवार समूह पइ हमला करा। पहिले क लोगन क नस्ट कइ द्या।

29ओनकर डेरन अउ भेड़िन क खरकन लइ लिहा। ओनकर डेरन अउर सबहिं चिजियन क आपन समझकर लेइ जा। ओनकर ऊँटन क आपन जगह पइ लेइ जा। लोग ओनके समन्वा चिल्लइहीं: ‘हमार चारिहूँ ओर भयंकर घटनन घटति अहइ।’

30हाली ही पराइ निकरा। हासोर क लोगो, छुपइ क ठउर हेरा।” इ सँदसा यहोवा क अहइ। “नबूकदनेस्सर तोहरे खिलाफ योजना बनाएस ह। उ तू पचन्क पराजित करइ क चुस्त योजना बनाएस ह।

31एक रास्ट्र अहइ, जउन खुसहाल अहइ। उ रास्ट्र क बिस्सास अहइ कि उ कउनो क नाहीं हराइ। उ रास्ट्र क लगे सुरच्छा बरे दुआर अउ रच्छा प्राचीर नाहीं अहइ। उ सबइ लोग अकेल्ले रहत हीं। यहोवा कहत ह, ‘उ रास्ट्र पइ हमला करा।’

32दुस्मन ओनकर ऊँटन अउर पसुअन क बड़के झुण्डन क चोराइ लेइ। मई ओन लोगन क पृथ्वी क हर हीसा में पराइ जाइ पइ मजबूर करब जउन आपन बालन क कोनन क कटाइ राखे अहइ। अउर मई ओनके बरे चारिहूँ ओर भयंकर बिपत्तियन लिआउब,” यहोवा कहत ह।

33“हासोर क प्रदेस जंगली कुकुरन क रहइ क ठउर बनी। इ सदा ही क बरे सूना रेगिस्तान बनी। कउनो मनई हुआँ नाहीं रही कउनो मनई उ ठउरे पइ नाहीं रही।”

### एलाम क बारे में सँदसा

34जब सिदकिय्याह यहूदा क राजा रहा तब ओकरे राजकाल क सुरुआत में यिर्मयाह नबी यहोवा क एक सँदसा प्राप्त किहस। इ सँदसा एलाम रास्ट्र क बारे में अहइ।

35सर्वसक्तिमान यहोवा कहत ह, “मई एलाम क धनुस बहोत हाली तोड़ देब। धनुस एलाम क सब स सक्तीसाली अस्त्र अहइ।

36मई एलाम पइ चतुर्दिक तूफान लिआउब। मई ओनका अकासे क चारिहूँ दिसा स लिआउब। मई एलाम क लोगन क पृथ्वी पइ सर्वत्र पठउब जहाँ चतुर्दिक आँधियन चलत हीं अउर एलाम क कैदी हर रास्ट्र में जइही।

37मई एलाम क ओनके समन्वा तोड़ब गाजो ओनका मारि डावइ चाहत हीं। मई ओनपइ भयंकर बिपत्तियन लिआउब। मई ओनका देखाउब कि मई ओन पइ केतना

कोहान हउँ,” यहोवा कहत ह। “मई एलाम क पाछा करइ बरे तरवार पठउब। तरवार ओनकर पाछा तब तलक करी जब तलक मई ओन सब क मारि नाहीं डाउब।

38मई एलाम क देखाउब कि मई व्यवस्थापक हउँ अउर मई ओकर राजा लोग तथा पदाधिकारियन क नस्ट कइ देब।” उ सँदसा यहोवा क अहइ।

39“किन्तु भविस्स में मई एलाम बरे सब नीक घटित होइ देवउँ।” इ सँदसा यहोवा क अहइ।

### बाबुल क बारे में सँदसा

**50** इ सँदसा यहोवा क अहइ जेका उ बाबुल रास्ट्र अउ बाबुल क लोगन बरे दिहस। यहोवा इ सँदसा यिर्मयाह क जरिये दिहस।

2“हर एक रास्ट्र क इ घोसित कइ द्या। झण्डा उठावा अउर सँदसा सुनावा। पूरा सँदसा सुनावा अउर कहा, ‘बाबुल रास्ट्र पइ अधिकार कीन्ह जाइ। बेल देवता लज्जा क पात्र बनी। मरोदेक देवता बहोत डेराइ जाइ। बाबुल क देवमूरतियन लज्जा क पात्र बनीं ओकर मूर्ति देवता भयभीत होइ जइहीं।’

3उत्तर स एक रास्ट्र बाबुल पइ हमला करी। उ रास्ट्र बाबुल क सूना रेगिस्तान स बनाइ देइ। कउनो मनई हुआँ नाहीं रही। मनई अउ पसु दुइनउँ हुआँ स पराइ जइहीं।”

4यहोवा कहत ह, “उ समइ, इस्त्राएल क अउर यहूदा क लोग एक संग होइहीं। उ पचे एक संग बराबर रोवत रहिहीं अउर एक संग ही उ पचे आपन यहोवा परमेस्सर क खोजइ जइहीं।

5उ सबइ लोग पूछिहीं सिथ्योन कइसे जाइँ उ पचे उ दिसा में चलब सुरू करिहीं। लोग कहिहीं, ‘आवा, हम यहोवा स जाइ मिलइँ, हम एक अइसी करार करी जउन सदा ही रहइ। हम लोग एक ठु अइसी करार करी जेका हम कबहुँ न बिसरी।’

6मोर लोग हेरान भेड़िन क तरह होइ ग अहइँ। ओनकर गड़रियन ओनका गलत राहे पइ लइ गवा अहइँ। ओनकर मार्गदर्सकन ओनका पहाड़न अउर पहाड़ियन में चारिहूँ कइँती भटकाएन ह। उ पचे बिसरि गएन कि ओनकर बिस्त्राम क ठउर कहाँ अहइ।

7जउन भी मोरे लोगन क पाएस, चोट पहाँचाएस अउर ओन कहेन, ‘हम कछू गलत नाहीं कीन्ह।’ वे लोग ही यहोवा क खिलाफ पाप किहेन। यहोवा ओनकर बिस्त्राम क ठउर अहइ। अउर परमेस्सर जेह पइ ओकर पुरखन पतियानेन।

8“बाबुल स पराइ निकरा। कसदी लोगन क देस क तजि द्या। ओन बोकरन क तरह बना जउन झूण्ड क राह देखावत हीं।

9मई बहोत स रास्ट्रन क उत्तर स एक संग लिआउब। रास्ट्रन क इ समूह बाबुल क बिरुद्ध जुद्ध बरे तइयार होइ। बाबुल उत्तर क लोगन क जरिये अधिकार में लिआवा जाइ। उ सबइ रास्ट्र बाबुल पइ अनेक बाण चलइहीं अउर उ सबइ बाण ओन फउजियन क समान होइहीं जउन जुद्ध भूँइया स खाली हाथ नाहीं लउटेन।



10 दुस्मन कसदी लोगन स सारा धन लेइ। उ सबइ दुस्मन फउजी जउन चहिहीं, लेइहीं।" इ सबइ यहोवा कहत ह।

11 "बाबुल, तू उत्तेजित अउ खुस हवा। तू मोर देस लिहा। तू अनाज क चारिहुँ कइँती गइया क तरह नाचत अहा। तोहार हँसी घोड़न क हिनहिनाहट जइसी अहइ।

12 अब तोहार महतारी बहित लजाइ तोहका जन्म देइवाली महतारी क ग्लानि होइ बाबुल सबहिँ रास्ट्रन क तुलना में सब स कम महत्व क होइ। उ एक सूना रेगिस्तान होइ।

13 यहोवा आपन किरोध परगट करी। एह बरे कउनो मनई हुआँ नाहीं रही। बाबुल नगर पूरी तरह खाली रही। बाबुल स गुजरइवाला हर एक मनई डेराइ। उ पचे आपन मूँड हिलइहीं जब उ पचे लखिहीं कि इ कउने बुरी तरह नस्ट भवा ह।

14 बाबुल क खिलाफ जुद्ध क तइयारी करा। सबहिँ फउजियन आपन धनुस स बाबुल पइ बाण चलावा। आपन बाणन क न बचावा। बाबुल यहोवा क खिलाफ पाप किहस ह।

15 बाबुल क चारिहुँ ओर क फउजियो, जुद्ध क उद्घोस करा। अब बाबुल आत्म समर्पण किहस ह। ओकर दीवारन अउर गुम्बदन क गिराइ दीन्ह ग अहइ। यहोवा ओन लोगन क उ सजा देत अहइ जउन ओनका मिलइ चाही। रास्ट्रो तू बाबुल क उ सजा द्या जउन मिलइ चाही। ओकर संग उ करा जउन उ दूसर रास्ट्रन क संग किहस ह।

16 बाबुल क लोगन क ओनकर फसलन न उगावइ द्या। ओनका फसलन न काटइ द्या। बाबुल क फउजी आपन नगर में अनेकन कैदी लियाएन ह। अब दुस्मन क फउजी आइ गवा अहइँ, एह बरे उ पचे कैदी आपन घर लउटत अहइँ। उ सबइ कैदी आपन देसन क वापस परात अहइँ।

17 "इस्त्राएल भेड़ी क तरह अहइ जेका सेरन पाछा कइके भगाइ दिहन ह। ओका खाइवाला पहिला सेर अस्सूर क राजा रहा। ओकर हाइन क चूर करइवाला आखिरी सेर बाबुल क राजा नबूकदनेस्सर रहा।

18 एह बरे सर्वसक्तीमान यहोवा, इस्त्राएल क परमेस्सर कहत ह: "मई हाली ही बाबुल क राजा अउर ओकर देस क सजा देब। मई ओका वइसे ही सजा देब जइसे मई अस्सूर क राजा क सजा दिहेउँ।"

19 मुला इस्त्राएल क मई ओकरे खेतन में वापस लिआउब। उ उहइ भोजन करी जउन कर्मेल पर्वत अउर बासान क भुइँया क उपज अहइ। उ भोजन करी अउर भरा पूरा होइ। उ एप्रैम अउर गिलाद भुइँया में पहाड़ियन पइ खाइ।"

20 यहोवा कहत ह, "उ समइ लोग इस्त्राएल क अपराध क जानइ चहिहीं। किन्तु कउनो अपराध नाहीं होइ। लोग यहूदा क पापन क जानइ चहिहीं किन्तु कउनो पाप नाहीं मिली। काहेकि मई इस्त्राएल अउ यहूदा क कछू बचे भएन क बचावत अहउँ अउर मई ओनकर सबहिँ पापन बरे ओनका छिमा करत हउँ।"

21 यहोवा कहत ह, "मरातैम देस पइ हमला करा। पकोद क पहँटा क निवासियन पइ हमला करा। ओन पइ हमला करा, ओनका मार डावा अउर ओनका पूरी तरह नस्ट कइ द्या। उ सब करा जेकरे बरे मई आदेस देत हउँ।"

22 "जुद्ध क घोस समूचइ देस में सुना जाइ सकत ह। इ बहोत जियादा बिध्वंस क सोर अहइ।

23 बाबुल पूरी भुइँया क हथौड़ा रहा। किन्तु अब हथौड़ा टूट गवा बिखराइ गवा अहइ। बाबुल सबन में सब स जियादा बर्बाद रास्ट्रन में स एक अहइ।

24 बाबुल, तू एक जाल बिछापूँ, किन्तु खुद ही तू एहमों आइ फँसा अउर तू लख भी नाहीं पाएस कि उ आवत रहा। तू यहोवा क खिलाफ लड्या, एह बरे तू मिल गया अउर धरा गया।

25 यहोवा आपन भण्डार खोल दिहस ह। अउर आपन किरोध क अस्त्र-सस्त्र निकारेस ह। सर्वसक्तीमान परमेस्सर यहोवा ओन अस्त्र-सस्त्र क निकारेस ह काहेकि ओका कसदी लोगन क देस में काम करब अहइ।

26 बहोत दूर स बाबुल क खिलाफ आवा, ओकर अन्न भण्डार घरन क तोड़िके खोला। बाबुल क पूरी तरह नस्ट करा अउर कउनो क जितत न छोड़ा। ओनकर लहासन क अनाजे क बड़के ढेर क तरह एक ढेर में लगावा।

27 बाबुल क सबहिँ नउ जवानन क मार डावा। ओनकर नरसंहार होइ द्या। ओनकर पराजय क समय आइ गवा अहइ। एह बरे ओनके बरे बहोत बुरा होइ। इ ओनके बरे दण्डित होइ क समइ अहइ।

28 लोग बाबुल देस स परात अहइँ, उ पचे उ देस स बच निकरत अहइँ। उ सबइ लोग सिन्थोन क आवत अहइँ अउर उ पचे सबहिँ स उ सब कहत अहइँ जउन यहोवा करत अहइ। उ सबइ कहत अहइँ कि बाबुल क, जउन सजा मिलइ चाही यहोवा ओका देत अहइ। बाबुल यहोवा क मन्दिर क नस्ट किहस, एह बरे अब यहोवा बाबुल क नस्ट करत अहइ।

29 धनुर्धारियन क बाबुल क खिलाफ बोलावा। ओन लोगन स नगर पइ हमला करइ क कहा। कउनो क बच निकरइ जिन द्या। जउन उ किहस ह ओकर उल्टा भुगतान करा। ओकरे संग उहइ करा जउन उ दूसर रास्ट्रन क संग किहस ह। बाबुल यहोवा क सम्मान नाहीं किहस। बाबुल इस्त्राएल क पवित्तरतम क बरे बड़ा घमण्डी रहा। एह बरे बाबुल क सजा द्या।

30 बाबुल क नउ जवान सड़कन पइ मारा जइहीं, ओह दिन सबहिँ फउजी मर जइहीं।" इ सबइ यहोवा कहत ह।

31 "बाबुल, तू बहोत गर्वीला अहा, अउर मई तोहरे खिलाफ हउँ।" हमार सुआमी सर्वसक्तीमान यहोवा इ सब कहत ह। "मई तोहरे खिलाफ हउँ अउर तोहरे दण्डित होइ क समइ आइ गवा ह।

32 गर्वीला बाबुल ठोकर खाइ अउ गिरी अउर कउनो मनई ओका उठावइ में मदद नाहीं करी। मई ओकरे नगरन में आगी लगाउब, उ आगी ओकरे चारिहुँ कइँती क सबहिँ क पुरी तरह बारि देइ।"

33 सर्वसक्तीमान यहोवा कहत ह, "इस्त्राएल अउ यहूदा क लोग दास अहइँ। दुस्मन ओनका लइ गवा अउर दुस्मन इस्त्राएल क निकरि जाइ नाहीं देइ।

34 मुला परमेस्सर ओन लोगन क वापस लिआइ। ओकर नाउँ सर्वसक्तीमान परमेस्सर यहोवा अहइ। उ दृढ़ सक्ती स

ओन लोगन क रच्छा करी। उ ओनकर रच्छा करी जेहसे उ पृथ्वी क बिस्त्राम दइ सकइ। किन्तु उ बाबुल क लोगन क बिस्त्राम नाहीं देइ।”

35यहोवा कहत ह, “बाबुल क लोगन क तरवार स मार द्या। बाबुल क राजकीय अधिकारियन अउ ग्यानियन क भी तरवार स मर जाइ द्या।

36बाबुल क याजकन क तरवार स मार द्या। उ सबइ याजक मूरख लोगन क तरह होइहीं। बाबुल क फउजियन क तरवार स मर जाइ द्या, उ सबइ फउजी त्रास स भरि जइहीं।

37बाबुल क घोड़न अउर रथन क तरवार क घाट उतरइ द्या। दूसर देसन क भाड़े क फउजियन क तरवार स कट जाइ द्या। उ सबइ फउजी भयभीत अबला होइहीं। बाबुल क खजाने क खिलाफ तरवार उठइ द्या, उ सबइ खजानन लइ लीन्ह जइहीं।

38बाबुल क नदियन सूख जाइँ। उ सबइ नदियन सूख जइहीं। बाबुल देस में असंख्य देवमूरतियन अहइँ। उ सबइ मूरतियन परगट करत हीं कि बाबुल क लोग मूरख अहइँ। एह बरे ओन लोगन क संग बुरी घटनन घटिहीं।

39बाबुल फुन लोगन स नाहीं भरी जंगली कूकुरन, सुतुरमुर्ग अउर दूसर रेगिस्तान क जनावर हुआँ रहिहीं। किन्तु हुआँ कबहुँ कउनो मनई नाहीं रही।

40परमेस्सर सदोम, अमोरा अउ ओनके चारिहुँ कइँती क नगरन क पूरी तरह स नस्त किहे रहा अउर जब ओन नगरन में कउनो नाहीं रहत। इहइ तरह बाबुल में कउनो नाहीं रही अउर कउनो मनई हुआँ रहइ कबहुँ नाहीं जाइ।

41लखा, उत्तर स लोग आवत अहइँ, उ पचे एक सक्तीसाली रास्ट्र स आवत अहइँ। पूरे संसार क चारिहुँ ओर स एक संग बहोत स राजा आवत अहइँ।

42ओनकी फउज क लगे धनुस अउर भालन अहइँ, फउजी क्रूर अहइँ, ओनमाँ दया नाहीं अहइ। फउजी आपन घोड़न पइ सवार आवत अहइँ, ओकर दोड़इ क आवाज समुद्धर क गरजन क तरह अहइ। उ पचे आपन जगहियन पइ जुद्ध बरे तइयार अहइँ। बाबुल नगर उ पचे तोह पइ हमला करइ क तत्पर अहइँ।

43बाबुल क राजा ओन फउजन क बारे में सुनेस, अउर उ आतंकित होइ गवा। उ एतना डर गवा ह कि ओकर हाथ हल नाहीं सकतेन। ओकरे डर स ओकरे पेट में अइसी पीरा होत अहइ, जइसे उ बच्चा पइदा करइवाली मेहरारू होइ।”

44यहोवा कहत ह, “कबहुँ यरदन नदी क निचके क घनी झाड़ियन स एक ठु सेर निकरी। उ सेर ओन खेतन में आइ जहाँ लोग आपन जनावरन रखत हीं अउर सब जनावर पराइ जइहीं। मइँ उ सेर क तरह होब। मइँ बाबुल, स ओकर देस छोड़ाउब। इ करइ बरे मइँ केका चुनब? मइँ जेका चाहब चुनब। काहेकि अइसा कउनो मनई नाहीं जउन मोका चुनौती दइ सकइ। कउनो गइरिया मोर समन्वा खड़ा नाहीं होइ सकत।”

45बाबुल क संग यहोवा जउन कछू करइ क योजना बनाएस ह, ओका सुना। बाबुल लोगन बरे यहोवा जउन

करइ क निर्णय लिहस ह ओका सुना। दुस्मन बाबुल क लोगन क खींच लेइ जाब्या जइसा एक बछड़ा क झुण्ड स खींच लइ जाइ जात ह। उ बाबुल क एक खाली खेत में बदल देब।

46बाबुल क पतन होइ, अउर उ पतन पृथ्वी क कँपकँपाइ देइ। सबहिं रास्ट्रन क लोग बाबुल क बिध्वंस होइ क बारे में सुनिहीं।

**51** यहोवा कहत ह, “मइँ एक प्रचण्ड आँधी उठाउब। मइँ एका बाबुल अउ बाबुल क लोगन के खिलाफ बहाउब।

2मइँ बाबुल क ओसावइ बरे लोगन क पठउब। उ पचे बाबुल क ओसाइ देइहीं। उ सबइ लोग बाबुल क सूना बनाइ देइहीं। फउजन नगर क घेर डइहीं अउ भयंकर बिध्वंस होइ।

3बाबुल क फउजी आपन धनुस-बाण क उपयोग नाहीं कइ पइहीं। उ सबइ फउजी आपन कवच भी नाहीं पहिर सकिहीं। बाबुल क नउ जवानन बरे दुःख महसूस जिन करा। ओनकर फउजे क पूरी तरह नस्त करा।

4बाबुल क फउजी कसदियन क भुइँया में मारा जइहीं। उ सबइ बाबुल क सड़कियन पइ बुरी तरह घायल होइहीं।”

5सर्वसक्तीमान यहोवा इस्त्राएल व यहूदा क लोगन क राँड़ सा अनाथ नाहीं छोड़ेस ह। परमेस्सर ओन लोगन क नाहीं छोड़ेस। नाहीं उ सबइ लोग इस्त्राएल क पवितरतम क छोड़े क अपराधी अहइँ। उ पचे ओका छोड़ें किन्तु उ एनका नाहीं छोड़ेस।

6बाबुल स पराइ चला। आपन जिन्नगी बचावइ बरे पराअ। बाबुल क पापन क कारण हुआँ जिन ठहरा अउर मारा न जा। इ समइ अहइ जब यहोवा बाबुल क लोगन क ओन बुरे करमन क सजा देइ जउन उ पचे किहन। बाबुल क सजा मिली जउन ओका मिलइ चाही।

7बाबुल यहोवा क हाथ क सुनहरा पियाला जइसा रहा। बाबुल पूरी पृथ्वी क मतवाला बनाइ डाएस। रास्ट्रन बाबुल क दाखरस पिएन। एह बरे उ सबइ पागल होइ उठेन।

8बाबुल क पतन होइ अउर उ अचानक टूट जाइ। ओकरे बरे रोआ। ओकर पीरा क दवाई लिआवा। सायद उ तन्दुरुस्त होइ जाइ।

9हम बाबुल क तन्दुरुस्त करइ क जतन किहेउँ, किन्तु हम कामयाब न भवा। एह बरे हम ओका तजि देइ अउर आपन देसन क लउटि चली। बाबुल क सजा अकासे क परमेस्सर निहचित करी, उ निर्णय करी कि बाबुल क का होइ।

10यहोवा हम लोगन बरे बदला लिहस। आवा इ बारे में सिथ्योन में बताइ। हम यहोवा हमार परमेस्सर जउन कछू हमार बरे किहस ह, ओकरे बारे में बताइ।

11बाणन क तेज करा। ढाल ओढ़ा। यहोवा मादी क राजा लोगन क जगाइ दिहस ह। उ ओनका जगाएस ह काहेकि उ बाबुल क नस्त करइ चाहत ह। यहोवा बाबुल क लोगन क उ सजा देइ जेकर पचे पात्र अहइँ। बाबुल क फउज यरूसलेम में यहोवा क मन्दिर क ध्वस्त किहे रही। एह बरे यहोवा ओनका उ सजा देइ जउन ओनका मिलइ चाही।

12बाबुल क देवारन क खिलाफ झण्डन उठाइ ल्या। अधिक रच्छक लिआवा। चौकीदारन क ओनके जगह पइ रखा। एक ठु गुप्त हमला बरे तइयार होइ जा। यहोवा उ करी जउन उ योजना बनाएस ह। यहोवा उ करी जउन उ बाबुल क लोगन क खिलाफ करइ क कहेस।

13बाबुल तू प्रभूत जल क निअरे अहा। तू खजाना स पूर्ण अहा। किन्तु रास्ट्र क रूप में तोहार अन्त आइ ग अहइ। इ तोहका बर्बाद करइ क समइ अहइ।

14सर्वसक्तीमान यहोवा इ प्रतिग्या आपन नाउँ लइके किहेस ह: “बाबुल मई तोहका निहचइ ही असंख्य सन्नु सेना स भरि देब। उ पचे टिड्डी दल क नाई होइहीं। उ सबइ फउजी तोहरे खिलाफ जितिहीं अउर उ पचे तोहरे ऊपर खड़ा होइहीं अउर बिजय घोस करिहीं।”

15यहोवा आपन महान सक्ती क उपयोग किहस अउर पृथ्वी क बनाएस। उ दुनिया क बनावइ बरे आपन बुद्धि क उपयोग किहस। उ आपन समुद्र क उपयोग अकास क फइलावइ मैं किहस।

16जब उ गरजन ह तब अकासे क जल गरज उठत ह। उ समूची पृथ्वी स बादसन क ऊपर पठवत ह। उ बर्खा क संग बिजली क पठवत ह। उ आपन भण्डार घर स हवा क लिआवत ह।

17मुला लोग बेवकूफ अहईं। उ पचे नाहीं समुझतेन कि परमेस्सर का किहेस ह। मूर्तिकार मूरतियन बनावत हीं। उ पचे सिरिफ लबार देवता अहईं। एह बरे उ सबइ परगट करत हीं कि उ मूर्तिकार केतना मूर्ख अहईं। उ सबइ देवमूरतियन सजीब नाहीं अहईं।

18उ सबइ देवमूरतियन बियर्थ अहईं। लोग ओन देवमूरतियन क बनाएन ह अउर उ पचे मजाक क अलावा कछू नाहीं अहईं। ओनकर निआव क समइ आइ अउर उ सबइ देवमूरतियन नस्ट कइ दीन्ह जइहीं।

19किन्तु परमेस्सर याकूब क हींसा ओन बियर्थ देवमूरतियन जइसा नाहीं अहइ। लोग परमेस्सर क नाहीं बनाएन, परमेस्सर लोगन क बनाएस। इस्त्राएल ओकर खास सम्पत्ति अहईं। परमेस्सर ही सब कछू बनाएस। ओकर नाउँ सर्वसक्तीमान यहोवा अहइ।

20यहोवा कहत ह, “बाबुल तू मोर जुद्ध क हथियार हवा, मई तोहार उपयोग रास्ट्रन क कुचरइ बरे करत हउँ। मई तोहार उपयोग राजन क बर्बाद करइ बरे करत हउँ।

21मई तोहार उपयोग घोड़ अउ घुड़सवार क कुचरइ बरे करत हउँ।

22मई तोहार उपयोग मेहररूनन क कुचरइ बरे करत हउँ। मई तोहार उपयोग बूढ़ा अउ नउजवान क कुचरइ बरे करत हउँ। मई तोहार उपयोग नउजवानन अउर नउ जुवतियन क कुचरइ बरे करत हउँ।

23मई तोहार उपयोग गड़रियन अउ ओनकर भेड़िन क खरकन बरे करत हउँ। मई तोहार उपयोग किसानन अउ बर्धन क कुचरइ बरे करत हउँ। मई तोहार उपयोग प्रसासकन अउर बड़के अधिकारियन क कुचरइ बरे करत हउँ।

24मुला मई बाबुल क अउर बाबुल क सबहिं लोगन क उल्टा भुगतान करब। मई ओनका सिथ्योन बरे उ पचे जउन बुरा किहन, ओन सब क भुगतान करब। मई ओनका उल्टा भुगतान करब जेहसे सबहिं ओका लिख सका,” यहोवा कहत ह।

25यहोवा कहत ह, “बाबुल, तू पहाड़ क गिरावत अहा अउर मई तोहरे खिलाफ हउँ। बाबुल, तू पूरा देस नस्ट किहा ह अउर मई तोहरे बिरुद्ध हउँ। मई तोहरे बिरुद्ध आपन हाथ बढ़ाउब। मई तोहका चट्टानन स लुढ़काउब। मई तोहका जरा भवा पर्वत कइ देब।

26लोगन क कोने क पाथर बनावइ जोगग बड़का पाथर नाहीं मिली। उ पचे इमारतन क नेंव बरे कउनो भी चट्टान नाहीं लाइ सकिहीं। काहेकि तोहार नगर सदा ही क बरे बेकार पाथरन क ढेर बन जाइ,” यहोवा कहत ह।

27“देस मैं जुद्ध क झण्डा उठावा। सबहिं रास्ट्रन मैं तुरही बजाइ द्या। रास्ट्रन क बाबुल क खिलाफ जुद्ध बरे तइयार करा। अरारात मिन्नी अस्कनज राजन क बाबुल क खिलाफ जुद्ध बरे बोलावा। ओकरे खिलाफ सेना संचालन बरे सेनापति चुना। सेना क ओकरे खिलाफ पठवा। एतने जियादा घोड़न क पठवा कि उ पचे टिड्डी दल जइसा हो जाईं।

28ओकरे खिलाफ रास्ट्रन क जुद्ध बरे तइयार करा। मादी क राजा लोगन क तइयार करा। ओनकर प्रसासकन अउर बड़के अधिकारियन क तइयार करा। ओनसे सासित सबहिं देसन क बाबुल क खिलाफ जुद्ध बरे लिआवा।

29देस क तरह काँपत ह माना पीरा भोगत होइ। इ काँपी जब यहोवा बाबुल बनाई योजना क पूरा करी। यहोवा योजना बाबुल क सूना रेगिस्तान बनावइ क अहइ। कउनो मनई हुआँ नाहीं रही।

30कसदी फउजियन लइब बन्द कइ दिहन ह। उ पचे आपन दुर्गन मैं ठहरा अहईं। ओनकर ताकत छीन होइ ग अहइ। उ पचे भयभीत अबला क नाई होइ गएन ह। बाबुल क घर बरत अहईं। ओकर फाटकन क अवरोध टूट गवा अहईं।

31एक क पाछे दूसर राजदूत आवत अहइ। राजदूत क पाछे राजदूत आवत अहईं। उ पचे बाबुल क राजा क खबर सुनावत अहईं कि ओकरे पूरे नगर पइ अधिकार होइ गवा।

32उ पचे जहाँ स नदियन क पार कीन्ह जात ह अधिकार मैं कइ लीन्ह गवा अहईं। दलदली भुईया बरत अहइ बाबुल क सबहिं फउजी भयभीत अहईं।”

33इस्त्राएल क परमेस्सर सर्वसक्तीमान यहोवा इ कहत ह: “बाबुल नगर एक ठु खरिहान जइसा अहइ। बाबुल क पीटइ क समइ हाली आवत अहइ।”

34“बाबुल क राजा नबूकदनेस्सर पुराने जमाने मैं हमका नस्ट किहेस। पुराने जमाने मैं नबूकदनेस्सर हमका चोट पहाँचाएस। पुराने जमाने मैं उ हमरे लोगन क लइ गवा अउर हम खाली गगरी स होइ गए। उ हमार सर्वोत्तम चिजियन लिहस। उ बिसाल दानव क तरह रहा जउन तब तलक सब कछू खात रहा जब तलक ओकर पेट न भरा। उ सर्वोत्तम चिजियन लइ गवा, अउर हम लोगन क दूर लोकाइ दिहस।

35बाबुल हमका चोट पहोंचावइ बरे भयंकर करम किहस अउर अब मई चाहत हउं बाबुल क संग वइसा ही घटित होइ।" सिय्योन में रहइवाले लोगन इ कहेन, "बाबुल हमरे लोगन क मारइ क अपराधी अहइ अउर अब उ पचे बुरे करमन बरे सजा पावत अहइ जउन उ पचे किहे रहेन।" यरूसलेम नगर इ सब कहेस।

36एह बरे यहोवा कहत ह, "यहूदा मई तोहार रच्छा करब। मई इ निहचइ लखब कि बाबुल क सजा मिलइ। मई बाबुल क समुद्र क झुराइ देब अउर मई ओकरे पानी क सोतन क सुखाइ देब।

37बाबुल बर्बाद इमारतन क ढेर बन जाइ। बाबुल जंगली कूकुरन क तरह क ठउर बनी। लोग चट्टानन क ढेर क लिखिहीं अउर चकित होइहीं। लोग बाबुल क बारे में आपन मूँड़ि हिलइहीं। बाबुल अइसी जगह होइ जाइ जहाँ कउनो भी नाहीं रही।

38बाबुल क लोग गरजत भए जवान सेर क तरह अहइँ। उ पचे सेर क बच्चन क तरह गुर्गत हीं।

39उ सबइ लोग उत्तेजित सेरन क सा काम करत अहइँ। मई ओनका दावत देब। मई ओनका मत्त बनाउब। उ पचे हँसिहीं अउर आनन्द क समइ बितइहीं अउर तब उ पचे सदा ही क बरे सोइ जइहीं। उ पचे कबहुँ नाहीं जागिहीं।" यहोवा इ सबइ कहेस।

40मई बाबुल क लोगन क मार डावा जाइ बरे लइ जाब। बाबुल मारा जाइ क प्रतीच्छा करइवाली भेड़िन, मेमनन अउर बोकरियन जइसा होइ।

41"सेसक पराजित होइ। सारी पृथ्वी क उत्तिम अउ सब स जियादा गर्वीला देस कैदी होइ। दूसर रास्ट्रन क लोग बाबुल पइ निगाह डइहीं अउर जउन कछू उ पचे लिखिहीं ओहसे उ पचे भयभीत होइ उठिहीं।

42बाबुल पइ सागर उमड़ि पड़ी। ओकर गरजत तरंगन ओका ढकि लेइहीं।

43तब बाबुल क नगर बर्बाद अउर सूना होइ जइहीं। बाबुल एक झुरान रेगिस्तान बन जाइ। इ अइसा देस बनी जहाँ कउनो मनई नाहीं रही, लोग बाबुल स जात्रा भी नाहीं करिहीं।

44मई बेल देवता क बाबुल में सजा देब। मई ओकरे जरिये लील लीन्ह मनइयन क उगलावाउब। दूसर रास्ट्र बाबुल में नाहीं अइहीं बाबुल नगर क चहारदीवारी गिर जाइ।

45मोर लोगो, बाबुल नगर स बाहेर निकरा। आपन जिन्नगी बचावइ भाग चला। यहोवा क तेज किरोध स बचिके पराअ।

46मोरे लोगो, दुःखी जिन हवा। अफवाहन उड़िहीं किन्तु डेराअ जिन। इ बरिस एक अफवाह उड़ि त ह। अगले बरिस दूसर अफवाह उड़ी। देस में भयंकर जुद्ध क बारे में अफवाहन उड़िहीं। सासकन क दूसर सासकन क खिलाफ जुद्ध क बरे में अफवाहन उड़िहीं।

47निहचइ ही उ समइ आइ जब मई बाबुल क लबार देवतन क सजा देब अउर पूरा बाबुल देस लज्जा क पात्र बनी। उ नगर क सड़कियन पइ अनगिनत मरे मनई पड़ा होइहीं।

48तब पृथ्वी अउर अकास अउ ओकरे भीतर क सबहिं चिजियन बाबुल पइ खुस होइके गावइ लगिहीं, उ पचे जय जयकार करिहीं, काहेकि सेना उत्तर स आई, अउर बाबुल क खिलाफ लड़ी।" इ सब यहोवा कहेस ह।

49"बाबुल इस्राएल क लोगन क मारेस। बाबुल सारी पृथ्वी पइ भी लोगन क मारेस।

50लोगो, तू तरवार क घाट उतरइ स बच निकर्या, तू पचन्क हाली करइ चाही अउर बाबुल क छोड़इ चाही। प्रतीच्छा न करो। तू पचे दूर देस में अहा। किन्तु जहाँ कहुँ रहा यहोवा क सुमिरा अउर यरूसलेम क सुमिरा।

51यहूदा क हम लोग लज्जित अही। हम लज्जित अही काहेकि हमार अपमान भवा। काहेकि बिदेसी यहोवा क मन्दिर क पवितर ठउरन में प्रवेस कइ चुका अहइँ।"

52यहोवा कहत ह, "समइ आवत अहइ जब मई बाबुल क देवमूरतियन क सजा देब। उ समइ उ देस में सर्वत्र घायल लोग पीरा स रोइहीं।

53बाबुल उठत चला जाइ जब तलक उ अकास स छुड़ लेइ। बाबुल आपन किलन क मजबूत बनाई। किन्तु मई उ नगर क खिलाफ लइइ बरे लोगन क पठउब अउर उ सबइ लोग ओका नस्ट कइ देइहीं।" इ सबइ यहोवा कहेस।

54"हम बाबुल में लोगन क रोउब सुन सकित ह। हम कसदी लोगन क देस में चिजियन क नस्ट करइवाले लोगन क सोर सुनि सकित ह।

55यहोवा बहोत हाली बाबुल क नस्ट करी। उ नगर क गरजना क चुप कइ देइ। दुस्मन सागरे क गरजत तरंगन क तरह टूट पड़िहीं। चारिहुँ कइँती क लोग उ गरज क सुनिहीं।

56फउज आइ अउर बाबुल क नस्ट करी। बाबुल क फउजी धरा जइहीं। ओनकर धनुस टूटिहीं। काहेकि यहोवा ओन लोगन क सजा देत ह जउन बुरा करत हीं। यहोवा ओनका पूरी सजा देत ह जेकर उ पचे पात्र अहइँ।

57मई बाबुल क बड़के पदाधिकारियन अउर बुद्धिमान लोगन क मत्त कइ देब। ओकर प्रसंसकन, अधिकारियन अउर फउजियन क भी मत्त करब। तब उ पचे सदा ही क बरे सोइ जइहीं, उ पचे कबहुँ नाहीं जागिहीं।" राजा इ कहेस ओकर नाउँ सर्वसक्तीमान यहोवा अहइ।

58सर्वसक्तीमान यहोवा कहत ह, "बाबुल क मोटकी अउ मजबूत देवार गिराइ दीन्ह जाइ। एकर ऊँच दुआर जराइ दीन्ह जइहीं। बाबुल क लोग कठिन मेहनत करिहीं पइ ओकर कउनो लाभ नाहीं होइ। उ पचे नगर क बचावइ क जतन में बहोत थक जइहीं, किन्तु उ पचे लपटन क सिरिफ ईंधन होइहीं।"

### यिर्मयाह बाबुल क एक ठु सँदिसा पठवत ह

59इ उ सँदिसा अहइ जेका यिर्मयाह नबी महसेयाह क पूत नेरिय्याह, नरेय्याह क पूत सरयाह नाउँ क अधिकारी क दिहस। सरयाह यहूदा क राजा सिदकिय्याह क संग बाबुल गवा रहा। यहूदा क राजा सिदकिय्याह क राजकाल क चउथे बरिस में इ भवा। सरयाह कर क अधिकारी रहा। 60यिर्मयाह पत्रक पइ ओन सब भयंकर घटनन क लिखत

रहा जउन बाबुल में घटइवाली रहिन। उ इ सब बाबुल क बारे में लिखत रहा।

61यिर्मयाह सरायाह स कहेस, “सरायाह, बाबुल जा। निहचइ करा कि इ सँदेसा तू इ तरह बाँचा कि सबहिँ लोग सुनि लेई। 62एकरे पाछे कहा, ‘हे यहोवा तू कह्या ह कि तू इ बाबुल नाउँ क जगह क नस्त करब्या। तू एक अइसे नस्त करब्या कि कउनो मनई या जानवर हिअँ नाहीं रही। इ सदा ही क बरे सूना अउर बर्बाद उठर होइ जाइ।’ 63जब तू पत्रक बाँच चुका तउ एहसे एक ठु पाथर बाँधा। तब इ पत्रक क परात नदी में डाइ द्या। 64तब कहा, ‘बाबुल इहइ तरह बूड़ी। बाबुल फुन कबहुँ नाहीं उठी। बाबुल बूड़ी काहेकि मई हुअँ भयंकर बिपतियन ढाउब।” यिर्मयाह क सब हिअँ खतम भएन।

### यरूसलेम क पतन

**52** सिदकिय्याह जब यहूदा क राजा भवा, उ इक्कीस बरिस क रहा। सिदकिय्याह यरूसलेम में गियारह बरिस तलक राज्ज किहस। ओकर महतारी क नाउँ हमूतल रहा जउन यिर्मयाह क बिटिया रही। हमूतल क परिवार लिब्ना नगर क रहा। 2सिदकिय्याह बुरे करम किहस, ठीक वइसने ही जइसे यहोयाकीम किहे रहा। यहोवा सिदकिय्याह क जरिये ओन बुरे करमन क करब पसन्द नाहीं करत रहा। 3यरूसलेम अउ यहूदा क संग भयंकर घटनन घटिन, काहेकि यहोवा ओन पइ कोहान रहा। आखीर में यहोवा आपन समन्वा स यहूदा अउ यरूसलेम क लोगन क दूर लोकाइ दिहस।

सिदकिय्याह बाबुल क राजा क खिलाफ होइ गवा। 4एह बरे सिदकिय्याह क हुकूमत क समइ में नवें बरिस क दसएँ महीने क दसएँ दिन बाबुल क राजा नबूकदनेस्सर फउज क संग यरूसलेम क कूच किहस। नबूकदनेस्सर आपन संग आपन पूरी फउज लिहे रहा। बाबुल क फउज यरूसलेम क बाहेर डेरा डाएस। एकरे पाछे उ पचे नगर-प्रार्चार क चारिहुँ ओर माटी क टीला बनाएस जेहसे उ पचे ओन देवारन पइ चढ़ि सकई। 5सिदकिय्याह क राज्जकाल क गियारहवें बरिस तलक यरूसलेम नगर पइ घेरा पड़ा रहा। 6उ बरिस क चउथे महीने क नौवें दिन तलक भुखमरी क हालत बहोत खराब रही। नगर में खाइ बरे कछू भी खइया क नाहीं रहि गवा रहा। 7उ दिन बाबुल क फउज यरूसलेम में प्रवेस कइ गइ। यरूसलेम क फउजी पराइ गएन। उ पचे राति क नगर तजिके परानेन। उ पचे दुइ देवारन क बीच क दुआरे स गएन। दुआर राजा क बगीचा क निचके रहा। यद्यपि बाबुल क फउज यरूसलेम नगर क घेर रखे रही तउ भी यरूसलेम क फउजी पराइ निकरेन। उ पचे रेगिस्तान कइँती परानेन।

8किन्तु बाबुल क फउज सिदकिय्याह क पाछा किहस। उ पचे ओका यरीहो क मइदान में धरेन। सिदकिय्याह क सबहिँ फउजी पराइ गएन। 9बाबुल क फउज राजा सिदकिय्याह क धइ लिहस। उ पचे रिबला नगर में ओका बाबुल क राजा लगे लइ गएन। रिबला हमात देस में अहइ। रिबला में बाबुल क राजा सिदकिय्याह क बारे में आपन निर्णय

सुनाएस। 10हुअँ रिबला नगर में बाबुल क राजा सिदकिय्याह क पूतन क मारि डाएस। सिदकिय्याह क आपन पूतन क मारा जाब लखइ क मजबूर कीन्ह गवा। बाबुल क राजा यहूदा क राजकीय पदाधिकारियन क भी मार डाएस। 11तब बाबुल क राजा सिदकिय्याह क आँखिन निकारि लिहस। उ ओका काँसा क जंजीर पहिराएस। तब उ सिदकिय्याह क बाबुल लइ गवा। बाबुल में उ सिदकिय्याह क जेलि में डाइ दिहस। सिदकिय्याह आपन मरइ क दिन तलक बन्दी घर में रहा।

12बाबुल क राजा क खास रच्छकन क अधिनायक नबूजरदान यरूसलेम आवा। नबूकदनेस्सर क राज्जकाल क उन्नीसवें बरिस क पाँचए महीने क दसएँ दिन इ भवा। नबूजरदान बाबुल क महत्वपूर्ण अधिनायक रहा। 13नबूजरदान यहोवा क मन्दिर क जराइ डाएस। उ राजमहल तथा यरूसलेम क दूसर घरन क भी बारि दिहस। उ यरूसलेम क हर एक महत्वपूर्ण इमारत क बारि दिहस। 14पूरी कसदी फउज यरूसलेम क चहारदीवारी क तोड़ गिराएस। इ फउज उ समइ राजा क बिसेस रच्छकन क अधिनायक क अधीन रही। 15अधिनायक नबूजरदान अब तलक यरूसलेम में बचे लोगन क भी कैदी बनाइ लिहस। उ ओनका भी लइ गवा जउन पहिले ही बाबुल क राजा क आत्मसमर्पण कइ दिहे रहा। उ ओन कुसल कारिगरन क भी लइ गवा जउन यरूसलेम में बचा रहि गए रहेन। 16मुला नबूजरदान कछू बहोत गरीब लोगन क देस में पाछे छोड़ दिहे रहा। उ ओन लोगन क अंगूर क बागन अउर खेतन में काम करइ बरे छोड़े रहा।

17कसदी फउज मन्दिर क काँसा क खम्भन क तोड़ दिहस। उ पचे यहोवा क मन्दिर क काँसा क तालाब अउर ओकरे आधार क भी तोड़ेस। उ पचे उ सारे काँसे क बाबुल लइ गएन। 18बाबुल क फउज एन चिजियन क भी मन्दिर स लइ गइ: बर्तन, बेलचन, दिया बारइ क जन्त्र, बड़के खोरन, कड़ाहियन अउर काँसा क उ सबइ चिजियन जेनकर उपयोग मन्दिर क सेवा में होत रहा। 19राजा क खास रच्छकन क अधिनायक एन चिजियन क लइ गवा: चिलमची, अँगीठियन, बड़कन खोरन, बर्तन, डीबट, कड़ाहियन अउर दाखरस क बरे काम में आवइवाले बड़के पियालन। उ ओन सबहिँ चिजियन क जउन सोने अउर चाँदी क बनी रहिन, लइ गवा। 20दुइ स्तम्भ सागर अउ ओकर खाले क बारह काँसा क बैल अउ सरकइवाले आधार बहोत भारी रहेन। राजा सुलैमान यहोवा क मन्दिर बरे इ सबइ चिजियन बनाए रहा। उ काँसा जेहसे उ सबइ चिजियन बनी रहिन, एतना भारी रहा कि तौला नाहीं जाइ सकत रहा।

21काँसा क हर एक खम्भा अट्टारह हाथ क ऊँचा रहा। हर एक खम्भा बारह हाथ परिधि वाला रहा। हर एक खम्भा खोखला रहा। हर एक खम्भा क देवार चार ईँच मोटी रही। 22पहिले खम्भा साढ़े सात हाथ ऊँच रहा। इ चारिहुँ कइँती जाल क सजावट अउर काँसे क अनार स सजा रहा। दूसर खम्भन पइ भी अनार रहेन। इ पहिले खम्भा क तरह रहा। 23खम्भन क बगल में छियान्नेवें

अनार रहेन। खम्भन क चारिहुँ कइँती बने जाल क सजावट पइ सब मिलाइके सौ अनार रहेन।

24राजा क खास रच्छकन क अधिनायक सरायाह अउर सपन्याह क कैदी क रूप में लइ गवा। सरायाह महायाजक रहा अउर सपन्याह ओहसे दूसर। तीन चौकीदार भी कैदी बनाए गएन। 25राजा क खास रचच्छन क अधिनायक लइइवाले मनइयन क अधीसक क भी लइ गवा। उ राजा क सात सलाहकारन क भी कैदी बनाएस। उ सबइ लोग उ समइ तलक यरूसलेम में रहेन। उ सास्त्री क भी लिहस जउन मनइयन क फउज में रखइ क अधिकारी रहा अउर उ साठ साधारण मनइयन क भी लिहस जउन तब तलक नगर में रहेन।

26-27अधिनायक नबूजरदान ओन सबहिं अधिकारियन क लिहस। उ ओनका बाबुल क राजा क समन्वा लिआएस। बाबुल क राजा रिबला नगर में रहा। रिबला हमात देस में अहइ। हुओं उ रिबला नगर में राजा ओन अधिकारियन क मारि डवइ क आदेस दिहस।

इ तरह यहूदा क लोग आपन देस स लइ जावा गएन। 28इ तरह नबूकदनेस्सर बहोत स लोगन क कैदी बनाइके लइ गवा।

राजा नबूकदनेस्सर क सासन क सताएँ बरिस में: यहूदा क तीन हजार तेइस पुरूस।

29नबूकदनेस्सर क सासन क अट्टारहवें बरिस में: यरूसलेम क आठ सौ बत्तीस लोग।

30नबूकदनेस्सर क सासन क तेईसवें बरिस में नबूजरदान यहूदा क सात सौ पैतालीस मनई कैदी बनाएस। नबूजरदान राजा क खास रच्छकन क अधिनायक रहा।

सब मिलाइके चार हजार छ: सौ लोग कैदी बनावा ग रहेन।

### यहोयाकीम अजाद कीन्ह जात ह

31यहूदा क राजा यहोयाकीम सैंतीस बरिस तलक बाबुल क जेलि में रहा। ओकर कैदी रहइ क सैंतीसवें बरिस बाबुल क राजा एबीलमरोद क यहोयाकीम पइ बहोत दयालु रहा। उ यहोयाकीम क उ बरिस जेलि स बाहेर निकारेस। इ उहइ बरिस रहा जब एबीलमरोदक बाबुल क राजा भवा। एबीलमरोदक यहोयाकीम क बारहवें महीने क पन्तीसवें दिन जेलि स छोड़ दिहस। 32एबीलमरोदक यहोयाकीम स रहम स बातन किहस। उ यहोयाकीम क ओन दूसर राजा लोगन क ऊँच सम्मान क ओहदा दिहस जउन बाबुल में ओकरे संग रहेन। 33एह बरे यहोयाकीम आपन कैदी क ओढ़ना उतारेस। बाकी जिन्नगी में उ नेम स राजा क मेज पइ भोजन करत रहा। 34बाबुल क राजा प्रतिदिन ओका स्वीकृत धन देत रहा। इ तब तलक चला जब तलक यहोयाकीम मरा नाहीं।

# यसायाह

**1** इ सबइ परमेस्सर क दर्सन अहइ जउन आमोस क पूत यसायाह यहूदा अउर यरूसलेम क बारे लखेस ह। यसायाह एँन दर्सन क यहूदा क राजा लोगन उज्जियाह, योताम, आहाज अउ हिजकिय्याह क समय में लखे रहा।

## आपन लोगन क खिलाफ परमेस्सर क सिकाइत

**2**हे सरग अउ धरती, यहोवा क वाणी सुना! यहोवा कहत ह, “मई आपन बच्चन क परवान चढ़ाएँ अउर ओका मजबूत स बढ़इ मँ मदद किहेउँ, किन्तु उ पचे मोहसे विद्रोह किहन।

**3**बैल आपन सुआमी क जानत ह अउर गद्दा उ जगह क जानत ह जहाँ ओकर सुआमी ओका चारा देत ह। किन्तु इस्राएल क लोग मोका नाही पहिचानतेन। उ पचे मोर आपन अहई किन्तु मोका नाही समुझतेन ह।”

**4**इस्राएल रास्ट्र पापे अउ दोख स भरि गवा अहइ। जउन कि भारी बोझे क समान ह जेका लोगन क उठाइ क होइ। उ पचे बुरे परिवारन स बुरे अउ दुट्ट बच्चन क समान अहई। उ पचे यहोवा क तजि दिहन। उ पचे इस्राएल परमेस्सर क पवित्तरता क अपमान किहन। उ पचे ओका तजि दिहेन अउर ओकरे संग अजनबी जइसा बेउहार किहन।

**5**परमेस्सर कहत ह, “मई तू सबइ लोगन क अउर दण्ड काहे देत रहउँ? मई तू पचन्क दण्ड दिहेउँ, मुला तू पचे नाही बदल्या। तू पचे मोरे बिरूद्ध विद्रोह करत ही रह्या। अब हर मूँड घायल अहइ अउ हर हिरदय दुखी अहइ। **6**तोहरे सबन गोड़े क तलुअन स लइके मूँडे क ऊपरी हींसा तलक तोहरे बदन क हर अंग घावत स भरा अहइ। ओनमाँ चोट लगी अहई अउर फूटे भए फोड़न अहई। तू पचे आपन फोड़न क कउनो परवाह नाही किह्या। तोहार पचन्क घाव न तउ साफ कीन्ह ग अहई नही ओनका ढका गवा अहइ।

**7**“तोहार सबन्क धरती बर्बाद होइ ग अहइ। तोहार पचन्क नगर आगी में बरि गवा अहई। तोहार पचन्क धरती तोहार पचन्क दुस्मनन हथियाइ लिहेन। तोहार पचन्क भुईया अइसे उजारि दीन्ह ग अहइ कि जइसे दुस्मनन क जरिये उजाड़ा गवा कउनो प्रदेस होइ। **8**सिय्योन क बिटिया (यरूसलेम) अब तजि भए सिबिर जइसा होइ गवा। उ ककड़ी क खेत में एक अइसा झोपड़ी क नाई अहइ जेका फसल काटइ क पाछे छोड़ दीन्ह गवा होइ। इ उ नगरी क समान अहइ जेका घेर लीन्ह गवा होइ।” **9**इ फुरइ अहइ किन्तु फुन भी सवतीसाली यहोवा कछू लोगन क हुआँ जित रहइ बरे छोड़ दीन्ह ग रहा। सदोम अउर अमोरा सहरन क समान हमार पूरी तरह बिनस नाही कीन्ह गवा रहा।

## परमेस्सर सच्ची सेवा चाहत ह

**10**हे सदोम क मुखिया लोगो, यहोवा स सँदसा सुना। हे अमोरा क लोगो, परमेस्सर क उपदेसन पइ धियान द्या। **11**परमेस्सर कहत ह, “मोका इ सबइ सबहि बलियन नाही चाही। मई तोहार पचन्क भेड़िन अउर पसुअन क चर्बी क काफी होमबलियन लइ चुका हउँ। बर्धन, मेमनन, बोकन क खून स मई प्रसन्न नाही हउँ।

**12**“तू लोग जब मोहसे मिलइ आवत अहा तउ मोरे आँगन क हर वस्तु रौंद डावत अहा। अइसा करइ बरे तू पचन्स कउन कहेस ह?

**13**“बेकार क बलियन तू पचे मोका जिन चढ़ावत रहा। जउन सुगंधित सामग्री तू पचे मोका अर्पित करत अहा, मोका ओहसे घिना अहइ। नवा चाँद क दावतन, बिस्त्राम अउर सबित मोहसे सहन नाही होइ पउतेन। आपन पवित्तर सभन क बीच जउन बुरे करमन तू पचे करत अहा, मोका ओनसे घिना अहइ। **14**तोहार पचन्क माहवारी बैठकन अउर सबइ सभा स मोका आपन सम्पूर्ण मन स घिना अहइ। इ सबइ सभन मोरे बरे एक भारी भरकम बोझ स बन गइ अहइ। अउर ओन बोझन क उठावत अब मई थक चुका हउँ।

**15**“तू लोग हाथ उठाइके मोर प्रार्थना करब्या, किन्तु मई तोहार सबन कइँती लखइ तलक नाही। तू लोग जियादा स जियादा परार्थना करब्या, किन्तु मई तोहार सबन्क सुनइ तलक क मना कइ देब काहेकि तोहार सबन्क हाथ खून स सना अहई।

**16**“आपन क धोइ अउ आपन क पवित्तर करी। तू पचे जउन बुरे करम करत अहा ओनका मोर आँखि क नज़र स दूर करा। ओन बुरे कामन क तजा!

**17**“अच्छे करम करब सीखा। दूसर लोगन क संग निआव करा। जउन लोग दूसर लोगन क सतावत हीं, ओनका दण्ड द्या। अनाथ बच्चन क अधिकारन बरे संघर्ष करा। जउन मेहररूअन क मनसेधू मरि गवा अहई, ओनका निआव दियावइ बरे पैरवी करा।”

**18**यहोवा कहत ह, “आवा, हम एँन बातन पइ विचार करी। तोहार सबन्क पाप गहरा लाल रंग क नाई अहई मुला ओनका धोवा जाइ सकत ह अउर बरफ क नाई उज्वर होइ सकत ह। तोहार पचन्क पाप लाल कपड़ा क नाई सुख अहई, किन्तु उ सबइ उन क नाई सफेद होइ सकत अहा।

**19**“अगर तू पचे मोर कही बातन पइ धियान देत अहा, तउ तू पचे इ धरती क नीक वस्तुअन पउब्या। **20**किन्तु अगर तू पचे सुनइ स मना करत अहा तू पचे मोरे खिलाफ

होत अहा, अउर तोहार दुस्मनन तू पचन्क नस्ट कइ डाइहीं।” यहोवा इ सबइ बातन खुद ही कहे रहा।

### यरूसलेम परमेस्सर बरे बिस्सास क जोगग नाहीं अहइ

21परमेस्सर कहत ह, “यरूसलेम कइँती लखा। यरूसलेम एक ठु अइसी नगरी रही जउन मोहमाँ बिस्सास राखत रही अउर मोर अनुसरण करत रही। उ रण्डी क नाई कउनो कारण बन गई? अब उ मोर अनुसरण नाहीं करत। यरूसलेम क निआव स परिपूर्ण होइ चाही। यरूसलेम क बसइयन क, जइसे परमेस्सर चाहत ह, वइसे ही जिअइ चाही। किन्तु अब तउ हुवाँ हतियारन रहत हीं।

22“तू पचन क नेकी चाँदी क समान अहई जउन अब बेकार अउर असुद्ध समुझा जात ह। इ उ दाखरस का नाई अहइ जउन कि बहोत जियादा पानी क कारण पतरा होइ गवा अहइ। 23तोहार पचन्क सासक विद्रोही अहई अउर चोरन क साथी अहई। तोहार पचन्क सबहिं सासक घूस लेइ चाहत हीं। गलत काम करइ बरे उ पचे घूस क धन लइ लेत हीं। तोहार पचन्क सबहिं सासक लोगन्क ठगइ बरे मेहनताना लेत हीं। तोहार पचन्क सासक अनाथ बच्चन क सहारा देइ क जतन नाहीं करतेन। तोहार पचन्क सासक ओन मेहररूअन क जरूरतन पइ कान नाहीं देतेन जेनकर मनसेधू मर चुके अहई।”

24एन सबइ बातन क कारण, सुआमी सर्वसक्तीमान यहोवा अरथात इस्त्राएल क सर्वसक्तीमान कहत ह, “हे मोर बैरियो मई तू पचन्क दण्ड देबउँ। तू पचे मोका अब अउर जियादा नाहीं सताइ पउब्या। 25जइसे लोग चाँदी क साफ करइ बरे खार मिले भए पानी क प्रयोग करत हीं, वइसे ही मई तोहार पचन्क सबहिं खोट दूर करबउँ। सबहिं निरर्थक वस्तुअन तू पचन लइ लेबउँ। 26जइसे निआव क करवाइयन तोहरे सबन्क लगे सुरु मँ रहेन अब वइसे ही निआव क करवइया मई फुन स वापिस लिआउब। जइसे सलाहकार बहोत पहिले तोहरे सबन क लगे हुवा करत रहेन, वइसे ही सलाहकार तोहरे पचन्क लगे फुन होइहीं। तू पचे तब फुन ‘नेक अउर बिस्सासी नगरी’ कहवउब्या।”

27नीक फइसला अब सिथ्योन क दीन्ह जाई अउ उ आजाद होइ जाइ। परमेस्सर उ लोगन क निआव देइ जउन अब हुवाँ रहत हीं। 28मुला सबहिं अपराधियन अउर पापियन जउन यहोवा क अस्वीकार किहेस ह, क पूरी तरह स तोड़ दीन्ह जाइ अउ बरबाद कइ दीन्ह जाइ।

29भविस्स मँ, तू लोग ओन बाँझबृच्छन बरे ओन बिसेस बगीचन बरे, जेनका पूजइ बरे तू पचे चुने रह्या, लज्जित होइहीं। 30इ एह बरे घटित होइ काहेकि तू लोग अइसे बाँझ बृच्छन जइसे होइ जाब्या जेनकर पातियन मुरझात होई। तू पचे एक अइसे बगियन क नाई होइ जाब्या जउन पानी क बिना मर रहा होइ। 31बरिआर लोग झुरान काठे क नान्ह नान्ह टूकन जइसा होइ जइहीं अउर उ सबइ लोग जउन काम करिहीं, उ पचे अइसी चिनगारियन क समान होइहीं जोनसे आगी लगी जात ह। उ सबइ बरिआर लोग अउर ओनकर काम बरइ लगीहीं अउर कउनो भी मनई अइसा नाहीं होइ जउन उ आगी क रोकि पाई।

2 आमोस क पूत यसायाह यहूदा अउर यरूसलेम क बारे मँ इ संदेस लखेस।

2आखिरी दिन मँ यहोवा क मन्दिर उ पर्वत पई बनावइ जाइ जउन आपन अगल-बगल क सबहिं पर्वतन मँ सबसे ऊँचा होइ। सबइ रास्ट्रन क लोगन हुवाँ बाढ़ क नाई आइ। 3अनेक लोग इ कही सरू करि, “आवा, हमका यहोवा क पर्वत पइ, याकूब क परमेस्सर क मंदिर मँ जाइ चाही। उ हमका आपन जिन्नगी विधि क सिच्छा देइ अउर हम ओकर अनुसरण करब।”

सिथ्योन पर्वत पइ यरूसलेम मँ स परमेस्सर क उपदेसन क संदेस सुरु करी अउर हुवाँ स उ समूचइ संसार मँ चलि जाइ। 4तब परमेस्सर सबहिं देसन क निआवी होइ। परमेस्सर बहोत स लोगन क विवादन निपटारा करी अउर उ सबइ लोग लड़ाई बरे अपने हथियारन क प्रयोग करब बंद कइ देइहीं। आपन तरवारन स उ पचे हरे क फार बनइहीं अउर उ पचे आपन भालन क पौधन क काटइ क दँराती क रूपे मँ काम मँ लइहीं। लोग दूसर लोगन क खिलाफ लड़ब बंद कइ देइहीं। लोग जुद्ध बरे कबहुँ प्रसिच्छित नाहीं होइहीं।

5हे याकूब क परिवार, तू पचे यहोवा क अनुसरण करा। 6हे यहोवा, तू याकूब (इस्त्राएल) क घरे स पीछे मुड़ि गवा ह, जबकि उ तोहार लोग अहइ। तोहार लोग पूरी तरह स पूरब (असीरिया) क कबूल कइ लिहेन ह, अउ तोहार लोग पलिस्तियन (पस्चिम) क नाई भविस्स बतावइ क सुरु करइ दिहेन ह। तू लोग ओन विचित्र विचारन क पूरी तरह स स्वीकार कइ लिहेस ह। 7हाँ, तोहार धरती सोना अउ चाँदी स भरि गइ अहइ, अउ हुवाँ क धन-सम्पत्ति क गना न जाइ। हुवाँ अनगिनत जुद्ध क घोड़न रथन भी अहई। 8मुला ओनकर धरती मूरतियन स भी भरी पड़ी अहई; तोहार लोग एँका खुद की आकार दिहेस ह, अपने हाथन स ओका बनाएन ह अउर उ पचे ही ओनकर पूजा करत हीं। 9लोग बुरा स बुरा होइ ग अहई। लोग बहोत नीच होइ ग अहई। हे परमेस्सर, निहचय ही तू ओनका छिमा करब्या, का तू अइसा करब्या?

### परमेस्सर क दुस्मन भयभीत होइहीं

10जा, कतहुँ कउनो गइहा मँ या कउनो चट्टाने क पाछे लुकाइ जा। तू परमेस्सर स डेराअ अउर ओकर महान सक्ती क समन्बा स ओझर हीइ जा। 11अहंकारी लोग अहंकार करब तजि देइहीं। अहंकारी लोग धरती पइ लाज स मूँड़ नीचे निहुराइ लेइहीं। उ समय सिरिफ यहोवा ही ऊँच ठउरे पइ बिराजमान होइ।

12यहोवा एक खास दिन क योजना बनाएस ह। उ दिन, यहोवा अहंकारियन अउर बड़बोलन लोगन क सजा देइ। तब ओन अहंकारी लोगन क साधारण बनाइ दीन्ह जाइ। 13उ सबइ अहंकारी लोग लबानोन क लम्बे देवदार बृच्छन क समान अहई। उ पचे बासान क बाँझ बृच्छन जइसे अहई किन्तु परमेस्सर ओन लोगन क दण्ड देइ। 14उ सबइ अहंकारी लोग ऊँच पहाड़ियन जइसे लम्बे अउर पहाड़न जइसे ऊँच अहई। 15उ पचे अहंकारी लोग अइसे अहई



जइसे लम्बी अउ ऊँच मीनारन तथा मजबूत परकोटा होइ। किन्तु परमेस्सर ओन लोगन क दण्ड देइ। 16उ सबइ अहंकारी लोग तर्सीस क बिसाल जहाउन के समान अहई। एन जहाजन में महत्वपूर्ण चिजियन भरी अहई। किन्तु परमेस्सर ओन अहंकारी लोगन क सजा देइ।

17उ समय, लोग अहंकार करब तजि देइहीं। उ सबइ लोग जउन अब अहंकारी अहई, धरती पइ खाले निहुराइ दीन्ह जइहीं। फिन उ समय केवल यहोवा ही ऊँचा बिराजमान होइ। 18सबहिं मूरतियन लबार देवता खतम होइ जइहीं। 19लोग चट्टानन सबइ गुफा अउर धरती क भीतर जाइ लुकइहीं। उ पचे यहोवा अउर ओकर महान सक्ति स डर जइहीं। अइसा उ समय होई जब यहोवा धरती क हिलावइ बरे खड़ा होइ।

20उ समय, लोग आपन सोने, चाँदी क मूरतियन क दूर लोकाइ देइहीं (एन मूरतियन क लोग एह बरे बनाए रहने कि लोग ओनका पूजि सकईं।) लोग ओन मूरतियन क धरती क ओन बिलन में लोकाइ देइहीं जहाँ चमगादड़ अउर छछूँदर रहत हीं। 21फुन लोग चट्टानन क गुफन में छुप जइहीं। उ पचे यहोवा अउर ओकर महान सक्ती स डेराइके अइसा करिहीं। अइसा उ समय घटित होइ जब यहोवा धरती क हिलावइ बरे खड़ा होइ।

### इस्त्राएल क परमेस्सर क बिस्वास करइ चाही

22ओ इस्त्राएल क लोगो। तू पचन्क आपन रच्छा बरे दूसर लोगन पइ निर्भर रहब तजि देइ चाही। उ सबइ तउ मनई मात्र अहई अउर मनई मरि जात ह। एह बरे, तू पचन्क इ नाहीं सोचइ चाही कि उ पचे परमेस्सर क समान सक्तीसाली अहई।

**3** इ सबइ बातन मई तू पचन्क बतावत हउं, तू पचे समुझ ल्य। सर्वसक्तीसाली यहोवा सुआमी, ओन सबहिं वस्तुअन क छोरि लेइ जेन पइ यहूदा अउ यरूसलेम निर्भर रहत हीं। परमेस्सर समूचइ भोजन अउ जल भी छोरि लेइ। 2परमेस्सर सबहिं नायकन अउ महाजोधन क छोरि लेइ। सबहिं निआवा धीसन, भविस्सवक्तन, जूतिसियन अउ बुजुर्गन क परमेस्सर छोरि लेइ। 3परमेस्सर सेनानायकन अउर प्रसासनिक नेतन क छोरि लेइ। परमेस्सर सलाहकारन अउर ओन बुद्धिमान क छोरि लेइ जउन जादू करत हीं अउर भविस्स बतावइ क जतन करत हीं।

4परमेस्सर कहत ह, “मई जवान बच्चन क ओनका नेता बनाइ देवउं। बच्चन ओन पइ राज करिहीं। 5हर मनई आपुस में एक दूसर क बिरुद्ध होइ जाइ। नवयुवक बड़के बूढ़न क आदर नाहीं करिहीं। साधारण लोग महत्वपूर्ण लोगन क आदर नाहीं देइहीं।”

6उ समय, आपन ही परिवारे स कउनो मनई आपन ही कउनो भाई क धरि लेइ। उ मनई आपन भाई स कही, “काहेकि तोहरे लगे एक ठु ओढ़नाबा, तउ तू हमार नेता होब्या। एन सबहिं खण्डरहन क तू नेता बनजा।”

7किन्तु उ भाई ठाइ होइके कही, “मई तू पचन्क सहारा नाहीं दइ सकत। मोरे घरे काफी भोजन अउ ओढ़ना नाहीं बाटइ। तू मोका आपन मुखिया नाहीं बनउब्या।”

8अइसा एह बरे होइ काहेकि यरूसलेम ठोकर खाएस अउर उ बुरा किहस। यहूदा क पतन होइ गवा अउर उ परमेस्सर क अनुसरण करब तजि दिहस। उ पचे जउन कहत हीं अउर जउन करत हीं उ यहोवा क खिलाफ अहइ। उ पचे यहोवा क महिमा बरे विद्रोह किहन।

9लोगन क चेहरन पइ जउन भाव अहई ओनसे साफ देखाई देत ह कि उ सबइ बुरा करम करइ क अपराधी अहई। किन्तु उ पचे एन अपराधन क छुपावत नाहीं अहइ, बल्कि ओन पइ गर्व करत भए आपन पापन क डोंडी पीटत हीं। उ पचे ढीठ अहई। उ पचे सदोम नगरी क लोगन जइसे अहई। ओनका इ बात क परवाह नाहीं अहइ कि ओनके पापे क कउन लखत अहइ। इ ओनके बरे बहोत बुरा होइ। आपन ऊपर ऐतनी बड़की विपद उ पचे खुद बोलाएन ह।

10अच्छे लोगन क बताइ द्या कि ओनके संग अच्छी बातन घटिहीं। जउन नीक करम उ पचे करत हीं, ओनकर सुफल उ पचे पइहीं। 11किन्तु बुरे लोगन बरे इ बहोत बुरा होइ। ओन पइ बड़ी विपद टूट पड़ी। जउन बुरे करम उ पचे किहेन ह, ओन सबन बरे ओनका सजा दीन्ह जाइ। 12मोर लोगन क बच्चन बेरहमी स सतइहीं। ओन पइ मेहररूअन राज करिहीं। हे मोर लोगो, तोहार पचन्क अगुआ तू पचन्क बुरे राहन पइ लइ जइहीं। सही मारग स उ पचे तू पचन्क भटकाइ देइहीं।

### आपन लोगन क बारे में परमेस्सर क निर्णय

13यहोवा आपन लोगन क विरोध में मुकदमा लइइ बरे खड़ा होइ। उ आपन लोगन क निआव करइ बरे खड़ा होइ। 14बुजुर्गन अउ अगुवा लोग जउन काम किहेन ह यहोवा ओनके बिरुद्ध मुकदमा चलाइ।

यहोवा कहत ह, “तू लोग अंगूरे क बागन क (यहूदा क) बारि डाय ह। तू पचे गरीब लोगन क चिजियन क लइ लिहा अउर उ सबइ वस्तुअन अबहिं भी तोहरे पचन्क घरन में अहई। 15मोरे लोगन क सतावइ क अधिकार तू पचन्क कउन दिहस? गरीब लोगन क मुँहे क बल धूरि में ढकेलइ क अधिकार तू पचन्क कउन दिहस?” मोर सुआमी, सर्वसक्तीमान यहोवा इ सबइ बातन कहे रहा।

16यहोवा कहत ह, “सिथ्योन क मेहररूअन बहोत घमण्डी होइ गइ अहई। उ पचे मूँडी उठाए भए अउर अइसा आचरण करत भए, जइसे उ पचे दूसर लोगन स उत्तिम होई, एहर-ओहर घूमति रहत हीं। उ सबइ मेहररूअन आपन आँखिन मटकावत रहत हीं तथा आपन गोड़े क पाजेब झंकारत भइ एहर-ओहर ठुमकत फिरत हीं।”

17सिथ्योन क अइसी मेहररूअन क मूँडे पइ मोर सुआमी फोड़न निकारी। यहोवा ओन मेहररूअन क गंजा कइ देइ। 18उ समय, यहोवा ओनसे उ सब चिजियन छोरी लेइ जउने पइ ओनका नाज रहा: गोड़न क सुन्नर पाजेब, सूरज अउर चाँद जइसे देखाइवाले कंठहार, 19बुन्दे, कंगना अउर ओढ़नी, 20माथापट्टी, गोड़े क झाँझर, कमरबंद, इत्र क सीसियन अउ ताबीज जेनका उ पचे आपन कंठहारन में धारण करत रहिन। 21मुहरदार अंगूठियन, नाके क बालियन, 22उत्तिम

ओढ़ना, टोपियन, चद्दरन, बटुअन, 23दर्पण, मलमले क कपड़न, पगड़ीदार टोपियन अउर लम्बा दुसालन।

24उ समय मँ सुगंधित इत्र जउन अबहुँ अच्छा सुगंध देत अहइ, ओकर उ सुगंध सड़ा भवा फफूँद क संग दुर्गन्ध मँ बदल जाइ। अब उ पचे कमर-बंध पहिरत हीं, किन्तु उ समय पहिरइ क बस ओनके लगे रस्सन होइहीं। इ समय उ पचे आपन बार मँ सुसोभित जूड़न बाँधत हीं, किन्तु उ समय ओनकर मूँड़ मुड़वाइ दीन्ह जइहीं। ओनके एक ठु बार तलक नाहीं होइ।\* अब ओनके लगे सुन्नर पोसाकन अहईं। किन्तु उ समय ओनके लगे सिरिफ सोक वस्त्र होइहीं। ओकर सुन्नरता क चीन्ह दासिता क चीन्ह मँ बदलि जाइ।

25तू पचन्क मनइयन तरवासन स काटि जाइ अउर तोहार मेहरारूअन जुद्ध मँ मारि जाइ। 26नगर दुआर क निअरे सभा ठउरन मँ रोउब बिलखब अउर दुःख ही फइला होइ। यरूसलेम उ मेहरारू क नाई हर चीज स वंचित होइ जाइ जेकर सब कछू चोर अउ लुटेरन लूट गवा होइ। उ धरती पइ बइठी अउर बिलखी।

**4** उ समय, सात सात मेहररूअन एक ठु मनसेधू क दबोच लेइहीं अउर ओहसे कहिहीं, “आपन खाइ क बरे हम आपन रोटियन क जुगाड़ खुद कइ लेब, आपन पहिरइ बरे ओढ़ना हम खुद बनाउब। बस तू हमसे बियाह कइ ल्या। इ सबइ काम अपने बरे हम खुद कइ लेब। बस तू हमका आपन नाउँ द्या। कृपा कइके हमरी सरम पइ पर्दा डाइ द्या।”

2मुला इ मुसीबत क समइ मँ भी यहोवा क पौधा इस्त्राएल क सेवकन क खुस करिहीं। इ एक सुन्नर अउ सम्मानित क रास्ट्र होइ। 3सिय्योन अउर यरूसलेम मँ जिअत बचा भवा सबइ लोग परिवतर कहलाउब्या। यरूसलेम मँ उ पचे ही अहईं जेकर नाउँ क जिअत रहइ बरे जिन्नगी क पुस्तक मँ सूचीबंध कीन्ह गवा रहेन।

4यहोवा सिय्योन क मेहररूअन क असुद्धता क धोइ देइ। यहोवा यरूसलेम स खून क धोइ क बहाइ देइ। यहोवा निआव क चेतना क प्रयोग करी अउर बिना कउनो पच्छपात क निर्णय लेइ। वह दाहक चेतना क प्रयोग करी अउर हर वस्तु क सुद्ध कइ देइ।

5तब परमेस्सर इ साबित करी कि उ आपन मनइयन क संग अहइ। उ दिन क समय, धुँए क एक बादर क रचना करी अउर रात क समय एक चमचमात लपट स मिली भइ आगी। इ सबइ चीन्ह सिय्योन पर्वत पइ, लोगन क हर सभा क ऊपर अउर उ सहर मँ ओकरे हर भवन क ऊपर परगट होइहीं। सुरच्छा बरे हर मनई क ऊपर एक आवरण छाइ जाइ। 6मण्डप क इ आवरण एक ठु सुरच्छा ठउर होइ। इ आवरण लोगन क सूरज क गर्मी स बचाइ। मण्डप क इ आवरण सब प्रकार क बाढ़न अउ बर्खा स बचइ क एक सुरच्छित ठउर होइ।

### इस्त्राएल परमेस्सर क खास उपवन

**5** अब मई आपन मीत बरे एक ठु गीत गाउब। इ गीत मोरे मीत क अंगूर क बागीचा क बारे मँ अहइ।

अनके ... होइ “इ दिखावत ह कि उ पचे दास होइ जाइ।”

ओकरे लगे अंगूर क इ बागीचा बहोत उपजाऊ पहाड़ी पइ अहइ।

2मोर मीत धरती खोदेस अउ काँकड़ पाथर हटाइके ओका साफ किहेस अउर हुवाँ पइ अंगूरे क उत्तिम बेलन रोपि दिहस। फुन खेत क बीच मँ उ अंगूर क रस निकारइ क कुण्ड बनाएस। मीत क आसा रही कि हुवाँ उत्तिम अंगूर होइहीं। किन्तु हुवाँ जउन अंगूर लाग रहेन उ सबइ बुरा रहेन।

3तउ परमेस्सर कहेस: “हे यरूसलेम क लोगो, अउर यहूदा क बसइयो, मोर अउ मोरे अंगूर क बाग क बारे मँ निर्णय करा।

4मई अउर क आपन अंगूर क बाग क बरे कइ सकत रहेउँ? मई उ सब किहेउँ जउन कछू भी मई कइ सकत रहेउँ। मोका उत्तिम अंगूरन क लगइ क आसा रही, किन्तु हुवाँ अंगूर बुरे ही लागेन। इ अइसा काहे भवा?

5अब मई तोहका बताउब कि आपन अंगूर क बगीचा बरे मई का कछू करउँ:

उ काँटेहरी झाड़ी जउन खेते क रच्छा करत ह मई उखाड़ि देब, अउर ओन झाड़ियन क आगी मँ बारि देबउँ। पाथर क परकोटा तोड़िके भहराइ देब। बगिया क रौंदि दीन्ह जाइ।

6मई अंगूरे क बगीचे क खाली खेते मँ बदली देबउँ। कउनो पउधन क काटा-छाँटा नाहीं जाइ अउर नाहीं कुदाल स मिट्टी क खोदी जाइ। एँह बरे हुवाँ सिरिफ काँटा अउर खरपतवार उगीहीं। मई बादरन क आदेस देब कि उ सबइ हुवाँ न बरिसईं।”

7सर्वसक्तीसाली यहोवा क अंगूरे क बगीचा इस्त्राएल क रास्ट्र अहइ, अउर अंगूरन क बेलन यहूदा क राजा अहईं। यहोवा निआव क आसा किहे रहा, किन्तु हुवाँ हत्तिरा दबदबा रही। यहोवा निस्पच्छता क आसा किहस, किन्तु हुवाँ बस मदद माँगइवालन क रोना रहा जेनके संग जुल्म कीन्ह गवा रहा।

8सराप ओनका जउन मकान दर मकान लेत ही चला जात हीं अउर एक खेत क पाछे दूसर खेत अउर दूसर क पाछे तीसर खेत तब तलक घेरत ही चला जात हीं जब तलक कउनो अउर बरे कछू भी जगह नाहीं बची रहत। अइसे लोगन क इ भूईया मँ अकेले ही रहइ पड़ी। 9सर्वसक्तीसाली यहोवा क मई मोहसे इ कहत भए सुना ह, “अब लखा हुवाँ बहोत सारे भवन अहईं किन्तु मई तोहसे कसम लइके कहत हउँ कि उ सब सबहिं भवन नस्त कइ दीन्ह जइहीं। अबहिं हुवाँ बड़के बड़के भव्य भवन अहईं किन्तु उ सबइ भवन उजड़ जइहीं। 10उ समय दस एकड़ भुईया क अंगूरन स एक ही बेरल दाखरस तइयार होइ, अउर दस बोरी बिअन स एक बोरी अनाज पइदा होइ।”

11तू पचन्क धिक्कार अहइ, तू लोग अलख भिन्सारे उठत ह अउर अब सराब पिअइ क ताक मँ रहत ह। राति क देर तलक जागत भए दाखरस पिअके धुत होत अहा। 12तू आपन प्रतिभोज मँ दाखरस पीअत ह अउर वीणा, ढोल, बाँसुरी अउर अइसे ही दूसर बाजन यत्रं स संगीत

सुनत ह तू पचे ओन बातन पड़ दृष्टि नाहीं डउत्या जेनका यहोवा किहस ह! तू उ चिजियन क भी नाहीं लखेस ह जेका यहोवा आपन हाथन स बनाएस ह। एँह बरे तू लोगन बरे इ बहोत बुरा होइ।

13 यहोवा कहत ह, “मोरे लोगन क बंदी बनाइके कैदी क रूप में लइ जावा जाइ, काहेकि उ पचे मोका नाहीं जानतेन। अउ महत्वपूर्ण लोग भूख स झूझत रही। अउर आम लोग बहोत पियासा होइ जइहीं।” 14 फुन ओनकर मउत होइ जाइ अउर सियोल, जियादा स जियादा लोगन क निगलि जाइ। मउत क उ प्रदेस आपन असीम मुँह पसारी अउर उ पचे सबहि महत्वपूर्ण अउर साधारण लोग अउर हुल्लड़ मचावत उ पचे सबहि खुसियन मनावत अउर सियोल में धँसि जइहीं।”

15 ओन लोगन क नीच देखेवा जाइ। उ सबइ बड़के लोग आपन मुँह नीचे लटकाए धरती कइँती लिखिहीं। 16 सर्वसक्तीसाली यहोवा निआव क संग निर्णय देइ, अउर लोग जान लेइहीं कि उ महान अहइ। पवित्तर परमेस्सर ओन बातन क करी जउन उचित अहइँ, अउर लोग ओका आदर देइहीं। 17 इस्राएल क लोगन स परमेस्सर ओनका आपन देस छोड़वाइ देइ। धरती वीरान होइ जाइ। भेड़िन जहाँ चइहीं, चली जइहीं। उ धरती जउन कबहुँ धनवान लोगन क रही, ओह पड़ भेड़िन घूमा करिहीं।

18 ओन लोगन क बुरा होइ, उ पचे आपन अपराध अउर आपन पापन क आपन पाछे अइसे ढोवत अहइँ जइसे लोग रस्सन स छकड़न हींचत हीं। 19 ओह, तू कहत हीं, “ओका उ हाली करी द्या जे उ करइ बरे जात अहा, ताकि हम एको लख सकत हीं! यहोवा जउन चाहत ह ओका होइ द्या ताकि हम जान सकि कि असल में इ का अहइ!”

20 ओन लोगन क बुरा होइ जउन कहा करतेन कि अच्छी बातन बुरी अहइँ, अउर बुरी बातन अच्छी अहइँ। उ सबइ लोग सोचा करत हीं कि प्रकास अँधेरा बाटइ, अउर अँधेरा प्रकास अहइ। ओन लोगन क विचार अहइ कि कड़वा, मीठ अहइ अउर मीठ कड़वा अहइ। 21 बुरा होइ ओन अभिमानियन क जउन खुद क बहोत चतुर मानत हीं। वे पचे सोचा करत हीं कि उ पचे बहोत बुद्धिमान अहइ। 22 बुरा होइ ओनकर जउन दाखरस पिअइ बरे जाना माना जात हीं। दाखरस क मिस्त्रन में जेनका कुसलता हासिल अहइ। 23 अउर यदि तू पचे ओन लोगन क रिस्वत दइ द्या तउ उ पचे एक अपराधी क भी छोड़ देइहीं। किन्तु उ पचे अच्छे मनई क भी निस्पच्छता स निआव नाहीं होइ देतेन। 24 अइसे लोगन क साथ बुरी बातन घटिहीं। ओनकर सन्तान पूरी तरह वइसे ही बर्बाद होइ जइहीं जइसे घास फूस आगी में बारि दीन्ह जात हीं। ओनकर सन्तान उ कंद मूल क तरह नस्त होइ जइहीं जउन मरिके धूरि बन जात ह। ओनकर सन्तान अइसे बर्बाद कइ दीन्ह जइहीं जइसे आगी फूलन क बारि डावत ह अउर ओकर राखी हवा में उड़ि जात ह।

अइसे लोग सर्वसक्तीसाली यहोवा क उपदेसन क पालन करइ स इन्कार कइ दिहन ह। ओ लोग इस्राएल क पवित्तर परमेस्सर क कथन स बइर किहन ह। 25 एह बरे यहोवा आपन लोगन स बहोत जियादा कोहाइ गवा ह।

यहोवा आपन हाथ उठाएस अउर ओनका दण्ड दिहस। हिओँ तक कि पर्वत भी डेराइ ग रहेन। गलियन में कूड़न क तरह ल्हासन बिछी पड़ी रहिन। किन्तु यहोवा अबहिं भी कोहान अहइ। ओकर हाथ लोगन क दण्ड देइ बरे अबहिं भी उठा भवा बाटइ।

### इस्राएल क सजा देइ बरे परमेस्सर फउजन लिआइ

26 लखा! परमेस्सर दूर देसन क लोगन क संकेत देत अहइ। परमेस्सर एक ठु झण्डा उठावत अहइ, अउर ओन लोगन क बोलावइ बरे सीटी बजावत अहइ। कउनो दूर देस स दुस्मन आवत अहइ। उ दुस्मन हाली ही देस में घुसि आइ। उ पचे बड़ी तेजी स अगवा बढ़त अहइँ। 27 दुस्मन कबहुँ थका नाहीं करत या कबहुँ नीचे नाहीं गिरत। दुस्मन कबहुँ न तउ ओघात ह अउर न ही सोवत ह। ओनकर हथियारन क कमर बंद सदा कसा रहत हीं। ओनकर जूतन क तस्मन कबहुँ टूटतेन नाहीं ह। 28 दुस्मन क बाण पैना अहइँ। ओनकर सबहिं धनुस बाण छोड़इ बरे तइयार अहइँ। ओनकर घोड़न क खुर चट्टानन जइसे कठोर अहइँ। ओनकर रथन क पाछे धूरि क बादर उठा करत हीं।

29 दुस्मन गरजत ह, अउर ओनकर गरजब सेर क दहाइ क जइसा अहइ। उ एँतना तीव्र अहइ जेतना जवान सेर क गरजब। दुस्मन जेनके खिलाफ जुद्ध करत अहइ ओनके ऊपर गुर्गत ह अउर ओन पड़ झपट पड़त ह। उ ओनका हुवाँ स घसीट लइ आवत ह अउर हुवाँ बचावइवाला कउनो नाहीं होत। किन्तु ओनके बच पावइ क कउनो वजह नाहीं। 30 तउ, उ दिन उ ‘सिंह’ समुद्र क तरगन क नाई दहाइन मारी अउर बंदी बनाए गए लोग धरती ताकत रहि जइहीं, अउर फुन हुवाँ अँधेरा अउर दुःख ही रहि जाइ। इ घने बादर में समूचइ प्रकास अँधेरा में बदलि जाइ।

### यसायाह क नबी बनइ बरे परमेस्सर क बुलावा

6 जउने बरिस उजिय्याह क मउत भइ, मई आपन अद्भुत सुआमी क दर्सन किहेउँ। उ एक बहोत ऊँच सिंहासन पड़ विराजमान रहा। ओकर लम्बे चोगे स मंदिर भर गवा रहा। 2 यहोवा क चारिहुँ कइँती साराप सरगदूतन खड़ा रहेन। हर साराप सरगदूतन क छः छः पंख रहेन। एनमाँ स दुइ पंखन क प्रयोग उ पचे आपन मुँह क ढकइ क बरे किया करत रहेन अउर दुइ पंखन क प्रयोग आपन गोड़न क ढकइ बरे करत रहेन अउर दुइ पंखन क उ पचे उड़इ क कामे में लिआवत रहेन। 3 हर सरगदूत दूसर सरगदूत स गोहराइ गोहराइ के कहत रहेन, “पवित्तर, पवित्तर, पवित्तर सर्वसक्तीसाली यहोवा परम पवित्तर अहइ। यहोवा क महिमा सारी धरती पड़ फइली अहइ।” सरगदूतन क वाणी क स्वर बहोत ऊँच रहेन। 4 सरगदूतन क आवाज स दुआरे क चौखटन हिल उठिन अउर फुन मंदिर धुआँ स भरइ लाग।

5 मई बहोत डेरा गएँ। मई कहेउँ, “अरे, नाहीं। मई तउ बर्बाद होइ जाब। मई ओतेना सुद्ध नाहीं हउँ कि परमेस्सर स बातन करउँ अउर मई अइसे लोगन क बीच रहत हउँ जउन ओतने सुद्ध नाहीं अहइँ कि परमेस्सर स बातन कइ सकइँ।

किन्तु फुन भी मई उ राजा, सर्वसक्तीमान यहोवा क दर्सन कइ लिहेउँ ह।”

6हुवाँ वेदी पइ आगी बरत रही। ओन साराप सरगदूतन मँ स एक उ आगी मँ स चिमटा स एक दहकत भवा कोइला उठाइ लिहेउँ। 7तब उ दहकत भए कोइला स मोरे मुँहे क धुआइ दिहस अउर कहेस, “जब इ दहकत कोइला तोहरे ओठन क छुइ, तउ तू जउन बुरे करम किहया ह, उ सबइ तोहमों स खतम होइ जाइ अउर तोहार पाप धोइ जाइ।”

8एकरे पाछे मई आपन यहोवा आवाज सुनेउँ। यहोवा कहेस, “मई केका पठइ सकत हउँ? हमरे बरे कउन जाइ?” तउ मई कहेउ, “मई हिआँ हउँ। मोका पठवा।”

9फिन यहोवा बोला, “जा अउर लोगन स कहा, ‘धियान स सुना, किन्तु समुझा जिन। निआरे स लखा, किन्तु बूझा जिन।’ 10लोगन क लोगन क समझइ क छमता क कठिन कइ द्या। ओनका सुनन मँ मुसकिल कइ देइ अउर लखइ नाहीं सकी। यदि तू अइसा नाहीं करब्या, तउ होइ सकत ह उ आपन आँखन स लखि सकत ही, आपन कानन स सुनि सकत ही, अउर आपन हिरदइ स समुझ सकत ही अउर तउ उ पचे पछतावा करी अउर चिकित्सा पाइ।”

11मई फुन पूछेउँ, “सुआमी, मई अइसा कब तक करत रहउँ?”

यहोवा जवाब दिहस, “तू तब तलक अइसा करत रहा, जब तलक देस उजरिके बर्बाद न होइ जाइ।”

12यहोवा लोगन क दूर चले जाइ पइ मजबूर करी। इ देस मँ बड़के-बड़के छेत्र उजड़ जइहीं। 13 उ देस मँ सिरिफ दस प्रतिशत लोग ही बचा रहि जइहीं, अउर दुस्मन ओका बर्बाद करइ बरे फुन स आइ।\* इ सबइ लोग बैँझ बूच्छ क नाई होइहीं। जब उ काट दिहे जाइ अउ ओकर सिरिफ टूँठ बचा रहि जात ह, उ टूँठ फुन स नवा टहरी उगात ह अउर एकोँ डार बनाइ डावत ह। इ टूँठ पवित्तर बिया स बढेस ह।

### आराम पइ बिपत्ति

7 आहाज, योताम क पूत रहा। योताम उज्जिय्याह क पूत रहा। ओनहीं दिनन मँ रसीन आराम क राजा भवा रहा अउर इस्त्राएल पइ रमल्याह क पूत पेकह राजा रहा। जउने दिनन यहूदा पइ आहाज सासन करता रहा, रसीन अउ पेकह जुद्ध बरे यरूसलेम पइ चढ़ बइठेन। किन्तु उ पचे इ सहर क हराइ नाहीं सकेन।

2दाऊद क साही घराना क इ सँदेसा मिला, “आराम अउ इस्त्राएल क फउजन आपुस मँ मिली गए रहेन अउर एक संग सिबिर लगाएस ह।”

राजा आहाज जब इ खबर सुनेस तउ उ अउर ओकर प्रजा बहोत डेराइ गएन। उ पचे आँधी मँ हिलत भए जंगल क बृच्छन क नाई डर स काँपइ लागेन।

3तबहिँ यसायाह स यहोवा कहेस, “तोहका अउर तोहार पूत सार्यासूब क आहाज क लगे जाइके बतियाइ चाही। तू उ ठउरे पइ आवा, जहाँ ऊपर क तलाव मँ पानी गिरा

करत ह। इ उ गली मँ अहइ जउन धोबी-घाट कइँती जात ह।

4“आहाज स जाइके कह्या, ‘होसियार रहा, किन्तु साथ ही सान्त भी रहा। डेराअ जिन। ओन दुइनउँ मनइयन रसीन अउ रमल्याह क पूतन स जिन डेराअ। उ पचे दुइ मनई तउ बरी भइ काठन क नाई अहई। पहिले उ पचे दहका करत रहेन किन्तु अब उ पचे, बस धुआँ मात्र रहि ग अहई। रसीन, आराम अउ रमल्याह क पूत कोहान अहई। 5आराम, एप्रैम क प्रदेसन अउ रमल्याह क पूत तोहरे खिलाफ सबइ योजना बनाइ रखे अहई। उ पचे कहेन, 6हमका यहूदा पइ चढ़ाई करइ चाही। हम अपने बरे ओका बाँटि लेब। हम ताबेल क पूत क यहूदा क नवा राजा बनाउब।”

7मोर सुआमी यहोवा क कहब बाटइ, “ओकर योजना सफल नाहीं होइ। उ कबहुँ पूरी नाहीं होइ। 8जब तलक दमिस्क क राजा रसीन अहइ, तब तलक इ नाहीं घटी। इस्त्राएल अब एक तु रास्ट्र अहइ किन्तु पैसंठ बरिस क भीतर इ एक रास्ट्र नाहीं रही। 9जब तलक इस्त्राएल क राजधानी सोमरीन अहइ अउर जब तलक सोमरोन क राजा रमल्याह क पूत बाटइ तब तलक ओनकर सबइ योजना सफल नाहीं होइहीं। यदि इ संदेस पइ तू बिस्सास नाहीं करब्या तउ लोग तोह पइ बिस्सास नाहीं करिहीं।”

### इम्मानुएल - परमेस्सर हमरे संग अहइ

10यहोवा आहाज स आपन बात जारी राखत भए कहेस, 11यहोवा बोला, “इ सबइ बातन फुरइ अहई, एका खुद साबित करइ बरे कउनो संकेत माँग ल्या। तू जइसा भी चाहा वइसा संकेत माँग सकत ह। उ संकेत चाहे गहिरे मउत क पहेँटा स होइ अउर चाहे आकासन स भी ऊँच कउनो ठउरे स।”

12किन्तु आहाज कहेस, “सबूत क रूप मँ मई कउनो संकेत नाहीं माँगब। मई यहोवा क परीच्छा नाहीं लेब।”

13तब यसायाह कहेस, “हे दाऊद क साही परिवार, होसियार होइके सुना। तू लोगन क धीरज क परीच्छा लेत अहा। का इ तोहरे बरे काफी नाहीं अहइ, अब तू मोर परमेस्सर क परीच्छा लेत अहा? 14एँह बरे, मोर सुआमी परमेस्सर तू पचन्क इ संदेसा देब:

लखा जवान लड़की क! उ गर्भवती अहइ। उ एक तु पूत क जनम देइ। उ इ पूत क नाउँ इम्मानुएल\* राखी।

15इम्मानुएल दहिउ अउ सहद खाइ। उ इहइ तरह रही जब तलक उ इ नाहीं सीख जात उत्तिम क चुनब अउर बुरे क नकारब।

16किन्तु जब तलक उ भला क चुनब अउर बुरे क तजब जानी एप्रैम अउ आराम क धरती उजाइ होइ जाइ।

“आजु तू ओन दुइ राजा लोगन स डेरात अहा। 17किन्तु तोहका यहोवा स डेराइ चाही। काहेकि यहोवा तोह पइ बिपत्ति क समय लिआवइवाला अहइ। उ सबइ विपत्तियन तोहरे लोगन पइ अउर तोहरे पचन्क पिता क परिवारे क लोगन पइ अइहीं। विपत्ति क इ समय ओन सबहिँ विपत्तियन

दुस्मन ... आइ या, “होइ सकत ह उ वापिस आइ क कोसिस करी, मुला देस बर्बाद करी दीन्ह जाइ।”

इम्मानुएल परमेस्सर हमार साथ अहइ।

में जियादा बुरा होइ जउन समइ एप्रैम यहूदा स अलग भवा ह, तब स अबइ तलक घटी बाटइ। एकरे बरे परमेस्सर का करी? परमेस्सर अस्सूर क राजा क तोहसे लड़ावइ बरे लिआइ।

18“उ समय, यहोवा ‘माखियन क बुलाइ। (फिलहाल उ सबइ माखियन मिस्त्र क जलधारन क निअरे अहई।) अउर यहोवा ‘मधुमाखियन’ क बुलाइ। (फिलहाल उ सबइ मधुमाखियन अस्सूर देस में रहत हीं।) इ सबइ दुस्मन तोहरे देस में अहई। 19इ सबइ दुस्मन चट्टानी छेत्रन में, रेगिस्ताने में जल धारन क निअरे झाड़ियन क आस-पास अउर पानी पिअइ क जगहन क इर्द-गिर्द आपन डेरन डइहीं। 20यहोवा यहूदा क दण्ड देइ बरे अस्सूर क प्रयोग करी। अस्सूर बलेड क नाई प्रयोग करी बरे भाड़े पइ लेइ जाइ। इ अइसा होइ जइसे यहोवा यहूदा क मूँइ अउ गोड़े क बाल क मूँइ करत होइ। इ अइसा होइ जइसे यहोवा यहूदा क दाढ़ी मूँइत होइ।

21“उ समय, एक मनई बस एक जवान गाय अउ दुइ भेड़न ही बस जिअत रखि पाइ। 22उ सबइ सब एँतना दूध देइहीं जउन उ मनई क दहिउ खाइ बरे काफी होइ। उ देस में बाकी बचा भवा हर मनई दहिउ अउर सहद ही खावा करी। 23आजु इ धरती पइ हर खेते में एक हजार अंगूरे क बेलन अहई। अंगूरे क हर बगिया क कीमत एक हजार चाँदी क सिक्का क बराबर अहई। किन्तु एन खेतन में खरपतवार अउर काँटन भरि जइहीं। 24इ धरती जंगली होइ जाइ अउर ओकर प्रयोग एक सिकारघर क रूप में ही होइ सकी। 25एक समय रहा जब एन पहाड़ियन पइ लोग काम किया करत रहेन अनाज पइदा करत रहेन। किन्तु उ समय लोग हुआँ नाहीं जावा करिहीं। उ धरती खरपतवारन अउर काँटन स भरि जाइ। ओन ठउरन पइ बस भेड़िन अउर मवेशी ही घूमा करिहीं।”

### अस्सूर हाली ही आइ

8 यहोवा मोसे कहेस, “लिखइ बरे माटी क बड़की स तख्ती ल्या अउर ओह पइ सुआ स इ लिखा, महेशालालहशबज (अर्थात् ‘हिआँ हाली ही लूटमार अउ चोरियन होइहीं।’)”

2मई कछू अइसे लोग बटोरेउँ जिन पइ साच्छी होइ बरे बिस्सास कीन्ह जाइ सकत रहा। इ सबइ लोग रहेन याजक ऊरिय्याह जकर्याह जउन जेबरेक्याह क पूत रहा। उ लोग मोका निहारत रहेन जउन टैम में मई एँन बातन क लखे रहेन। 3फुन मई ओन नबिया क लगे गएउँ। मोर ओकरे संग संग रहइ क पाछे, उ गर्भवती भइ अउर ओकरे एक पूत भवा। तब यहोवा मोसे कहेस, “तू बेटवा क नाउँ महेशालालहशबज राखा। 4काहेकि एहसे पहिले कि बचवा, ‘महतारी’ अउर ‘बाप’ कहब सीखइ, ओहसे पहिले ही दमिस्क अउ सोमरोन क समूचइ धनदौलत क छोरि लेइ अउर ओन वस्तुअन क अस्सूर क राजा क दइ देइ।”

5यहोवा मोसे फुन कहेस, 6मोर सुआमी कहेस, “इ सबइ लोग सीलोह क तालाब स सान्त पानी क लेइ स इन्कार

करत हीं। इ सबइ लोग रसीन\* अउ रमल्याह पूत क असांत पानी क लेइ क प्राथमिकता दिहिस। 7किन्तु एह बरे मई, यहोवा, अस्सूर क राजा अउर ओकर समूची सक्ती क तोहरे विरोध में लइके आउब। उ पचे परात नदी क खउफनाक बाढ़ क तरह अइहीं। इ अइसा होइ जइसे किनारन क तोड़त बोरत नदी उफना पड़त ह। 8जउन पानी उ नदी स उफनिके निकरी उ यहूदा में भरि जाइ अउर यहूदा क प्रायः बोर देइ।

“इम्मानूएल, इ बाढ़ क पानी तब तलक फइलत चली जाइ जब तलक तोहरे पचन्क समूचइ देस में बाढ़ न आ जाइ।”

### यहोवा अपने सेवकन क रच्छा करत ह

9हे जातियो, तू सबहिं जुद्ध बरे तइयार रहा। तू पचन्क हराइ दीन्ह जाइ। अरे, सुदूर क देसो, सुना, तू सबहिं जुद्ध बरे तइयार रहा। तू पचन्क हराइ दीन्ह जाइ।

10आपन जुद्ध क जोजनन क रचा। तोहार जोजनन हराइ दीन्ह जइहीं। तू अपनी फउजन क हुकुम द्या। तोहार उ सबइ हुकुम बेकार होइ जइहीं। काहेकि परमेस्सर हमार संग अहइ।

### यसायाह क चितउनी

11यहोवा आपन महान सक्ती क संग मोसे कहेस। यहोवा मोका चितउनी दिहिस कि मई एन दूसर लोगन क नाई न बनउँ। यहोवा कहेस, 12“तू पचन क इ नाहीं सोचइ चाही कि इ सडयंत्र सिरिफ इ कारण स रचा गवा अहई कि लोग अइसा कहत ह! नाहीं, तू पचन क उ बातन स डेरत नाहीं चाही जे बातन स उ पचे डेरत अहई।”

13तू पचन्क बस सर्वसक्तीमान यहोवा स डेराइ चाही। तू पचन्क बस उहइ क आदर करइ चाही। तू पचन्क उहइ स डेराइ चाही। 14जदि तू पचे यहोवा क आदर रखब्या अउर ओका पवित्तर मनब्या तउ उ तोहरे पचन बरे एक ठु सुरच्छित ठउर होइ। किन्तु तू पचे ओकर आदर नाहीं करत्या। एह बरे परमेस्सर एक ठु अइसी चट्टान होइ ग अहइ जेकरे ऊपर तू लोग भहराब्या। उ एक अइसी चट्टान होइ ग अहइ जेह पइ इस्त्राएल क दुइ परिवार ठोकर खइहीं। यरूसलेम क सबहिं लोगन क फँसावइ बरे उ एक फन्दा बन गवा ह। 15(इ चट्टान पइ बहोत स लोग भहरइहीं। उ पचे गिरहीं अउर चकनाचूर होइ जइहीं। उ पचे जाल में पड़ितीं अउर धइ लीन्ह जइहीं।)

16यसायाह कहेस, “एक ठु समझौता करा अउर ओह पइ मोहर लगाइ द्या। भविस्स बरे, मोरे उपदेसन क रच्छा करा। मोर चलन क लखत भए क टैम ही अइसा करा। 17उ वाचा इ अहइ:

मई सहायता पावइ बरे यहोवा क प्रतीच्छा करब। यहोवा याकूब क घराने स लज्जित अहइ। उ ओनका लखइ तलक नाहीं चाहत ह। किन्तु मई यहोवा क प्रतीच्छा करब। उ हमार रच्छा करी।

रसीन आराम क एक राजा। इ लगभग 740-731 इ. पू. सासन किहिस।

18“मई अउर मोर बच्चा इस्त्राएल क लोगन बरे संकेत अउर प्रमाण अहई। हम उ सर्वसक्तीमान यहोवा क जरिये पठवा ग अहइ, जउन सिंयोन पर्वते पइ रहत ह।”

19कछू लोग कहा करत हीं, “भविस्स बतावइवालन अउर जादूगरन स पूछा, ‘का करब अहइ?’ (इ सबइ भविस्स बतावइवालन अउर जादूगर फुस-फुसाइके बोलत हीं। इ सबइ लोगन पइ इ प्रभाव डावइ बरे कि ओनके लगे अर्न्तदृष्टि अहई, उ पचे चुपचाप बातन करत हीं।) किन्तु मई तू पचन्क बतावत हई कि लोगन क आपन परमेस्सर स सहायता माँगइ चाही। उ पचे भविस्स बतावइवालन अउर जादूगर मरे भए लोगन स पूछिके बतावत हीं कि का करइ चाही? किन्तु भला जिअत लोग मरे भएन स कउनो बात काहे पूँछइ।

20तू पचन्क सिच्छन अउर वाचा क अनुसार चलइ चाही। जदि तू पचे एन हुकुमन क पालन नाहीं करब्या तउ होइ सकत ह तू गलत हुकुमन क पालन करइ लाग्गा। (इ सबइ हुकुमन उ सबइ अहई जउन जादूगरन अउ भविस्स बतावइवालन क जरिये मिलत हीं। इ सबइ हुकुमन बेकार अहई। ओन हुकुमन पइ चलिक्के तू पचन्क कछू नाहीं मिली।)

21जदि तू पचे ओन गलत हुकुमन पइ चलब्या, तउ तोहरे पचन्क देस पइ विपत्ति आइ अउर भूखमरी फइली। लोग भूखा मरिहीं। फुन उ पचे कोहाइ जइहीं अउर आपन राजा अउर आपन देवतन क खिलाफ बातन कहिहीं। एकरे पाछे उ पचे मदद बरे परमेस्सर कइँती निहरिहीं। 22अगर आपन देस मँ उ पचे चारिहुँ तरफ लखिहीं तउ ओनका चारिहुँ कइँती विपत्ति अउर चिन्ताजनक अँधियारा ही देखाइ देइ। लोगन्क उ अंधकार स भरा दुःख ओनका देस तजइ पइ मजबूर करी अउर उ सबइ लोग जउन उ अँधेरे मँ फँसा होइहीं, आपन आपका ओहसे अजाद नाहीं कराइ पइहीं।

### एक नवा दिन आवइ क अहइ

9 पहिले लोग सोचा करत रहेन कि जबूलून अउर नप्ताली क धरती महत्वपूर्ण नाहीं अहइ। किन्तु पाछे परमेस्सर उ धरती क महान बनाइ। समुदर क लगे क धरती पइ, यरदन नदी क पार अउ गलील मँ गैर यहूदी लोग रहत हीं।

2जदपि आनु इ सबइ लोग अंधकार मँ निवास करत हीं, किन्तु एनका महान प्रकास रूप मँ दर्शन होइ। इ सबइ लोग एक अइसे अँधियारा मँ रहत हीं जउन मउत क देस क नाई अहइ। किन्तु उ “अद्भुत जोति” ओन पइ प्रकासित होइ।

3तू इ जाति क बढ़ोतरी करब्या, का तू नाहीं करब्या? तू ओकर खुसहाली क बढ़ाउब्या, का इ सही नाहीं अहइ? इ सबइ लोग तोहार मोजूदगी मँ अइसे ही खुस होइ जइसे लोग कटनी क समय पइ खुस होत ह, या इ सबइ वइसी ही खुस होइ जइसी जुद्ध मँ लूटा भवा चिजियन क आपुस मँ बाँटइ क समइ मँ खुसी मनावत हीं। 4अइसा काहे होइ? काहेकि तू पचन्क इ भारी जूए क तोड़ी देब्या जउन

अत्याचारी लोग तोहार कंधा पइ धरेस ह। तू पचे एको वइसा ही हराउब्या जइसा तू पचे मिद्यानियन क हराए रह्या!

5हर उ कदम जउन जुद्ध मँ आगे बढ़ा, बर्बाद कइ दीन्ह जाइ। हर उ वर्दी जेइ पउ लहू क धब्बन बाटेन, बर्बाद कइ दीन्ह जाइ। इ सबइ वस्तुअन आगी मँ झोंकि दीन्ह जइहीं। 6इ सब कछू तब घटी जब उ बिसेस बच्चा क जनम होइ। परमेस्सर हमका एक तु पूत प्रदान करी। इ पूत लोगन क अगुवाइ बरे उत्तरदायी होइ। ओकर नाउँ होइ: “अद्भुत, उपदेसक, सामर्थी परमेस्सर, पिता चिर अमर अउ सान्ति क राजकुमार।” 7ओकरे राज मँ सक्ती अउर सान्ति क निवास होइ। दाउद क बंसज, उ राजा क राज क लगातार विकास होत रही। उ राजा नेकी अउ निस्पच्छ निआव क आपन राज क सासन मँ हमेसा हमेसा उपयोग करत रही।

उ सर्वसक्तीमान यहोवा आपन प्रजा स गहिर पिरेम राखत ह अउर ओकर इ गहिर पिरेम ही ओहसे अइसे काम करवावत ह।

### परमेस्सर इस्त्राएल क सजा देइ

8याकूब क लोगन क खिलाफ मोर यहोवा एक आग्या दिहस। इस्त्राएल क खिलाफ दीन्ह गइ उ आग्या क पालन होइ। 9तब एप्रैम क हर मनई क अउर हिआँ तलक कि सोमरोनक मुखिया लोगन क इ पता चलि जाइ कि परमेस्सर ओनका सजा दिहे रहा। आजु उ सबइ लोग अभिमानी अउ बड़बोला अहई। उ सबइ लोग कहा करत हीं, 10“होइ सकत ह इ सबइ ईटन भहराइ जाई किन्तु हम एकर अउर जियादा मजबूत पाथरन स निर्माण करब। सम्भव अहइ इ सबइ नान्ह नान्ह बृच्छ काट गिराव जाई। किन्तु हम नवा नवा बृच्छ खड़ा कइ देब अउर इ सबइ बृच्छ बिसाल तथा मजबूत बृच्छ होइहीं।”

11तउ यहोवा इस्त्राएल क लोगन क खिलाफ जुद्ध करइ बरे हुसकाइ। यहोवा रसीन क सत्रुअन क ओनकर विरुद्ध लइ आई। 12यहोवा पूरब स आराम क लोगन क अउ पच्छिम स पलिस्तियन क लिआइ। उ सबइ सत्रु आपन फउज स इस्त्राएल क हराइ देइहीं। किन्तु परमेस्सर इस्त्राएल स तब भी कुपित रही। यहोवा तब भी लोगन क सजा देइ क तत्पर रही।

13परमेस्सर लोगन क सजा देइ, किन्तु उ पचे फुन भी पाप करब नाहीं छोड़िहीं। उ पचे परमेस्सर कइँती नाहीं मुड़िहीं। उ पचे सर्वसक्तीमान यहोवा क अनुसरण नाहीं करिहीं। 14तउ यहोवा इस्त्राएल क मूँड अउ पूँछ काट देइ। एक ही दिन मँ यहोवा ओकर साखा अउर ओकरे तने क लइ लेइ। 15(हिआँ मूँड क अरथ अहइ अग्रज तथा महत्वपूर्ण अगुवा लोग अउर पूँछ स अरथ अहइ अइसे नबी जउन झूठ बोला करत हीं।)

16उ सबइ लोग जउन अगुवाइ करत हीं ओनका बुरे मारग पइ लइ जात हीं। जउन लोग ओनके पाछे चलत हीं, बर्बाद कइ दीन्ह जइहीं। 17इ सबइ सबहिं लोग दुस्ट अहई। एह बरे यहोवा एन युवकन स खुस नाहीं अहइ। यहोवा ओनकर रौँड अउरत अउ ओनकर अनाथ लरिकन पइ दया नाहीं करी। काहेकि इ सबइ लोग दुस्ट अहई। इ सबइ

लोग अइसे काम करत हीं जउन परमेस्सर क खिलाफ अहई। इ सबइ लोग झूठ बोलत हीं। तउ परमेस्सर एन लोगन क बरे कुपित बना रही अउ सजा देत रही।

18बुराई एक ठु छोटकी सी आगी अहइ, आगी पहिले घास फूस अउर काँटन क बारत ह, फुन उ बड़की बड़की झाड़ियन अउ जंगल क बारइ लागत ह अउर अंत में जाइके उ बियापक आगी का रूप लइ लेत ह अउर हर वस्तु छुआँ बनिके ऊपर उड़ि जात ह।

19सर्वसक्तीमान यहोवा कुपित अहइ। एह बरे इ प्रदेस भसम होइ जाइ। उ आगी में सबहि लोग भसम होइ जइहीं। कउनो मनई आपन भाई तलक क बचावइ क जतन नाहीं करी। 20तब ओनके आस-पास, जउन भी कछू होइ, उ पचे ओका जब दाहिन कईती लेइहीं, या बाई कईती स लेइहीं, भूखा ही रइहीं। फुन उ सबइ लोग आपुस में आपन ही परिवार क लोगन क खाइ लगिहीं। 21(अर्थात् मनस्से, एप्रैम क खिलाफ लड़ी अउर एप्रैम मनस्से क खिलाफ लड़ाइ करी अउर फुन दुइनउँ ही यहूदा क खिलाफ होइ जइहीं।)

यहोवा इस्त्राएल स अबहि भी कोहान अहइ। यहोवा ओकर लोगन क सजा देइ बरे अबहि भी तत्पर अहइ।

**10** ओन नेम बनावइवालन क लखा अउर जउन अनिआव स भरा नेम बनाइके लिखत हीं। अइसे नेम बनावइवाले अइसे नेम बनाइके लिखत हीं जेहसे लोगन क जिन्गी दूभर होत ह। 2उ पचे गरीब लोगन क खिलाफ नेम बतावइ बरे उचित मार्ग स हटत ही। उ पचे राँइ क जप्त करत हीं अउर अनाथन क हिआँ चोरी करत हीं।

3अरे ओ, नेम क बनावइवालो, जब तू पचन्क, जउन काम तू पचे किहा ह, ओनकर हिसाब देइ क होइ तब तू पचे का करब्या? सुदूर देस स तोहार पचन्क बिनास आवत अहइ। मदद बरे तू पचे केकरे लगे दउड़ब्या? तोहार पचन्क धन अउर तोहार पचन्क सम्पत्ति तोहार सबन्क रच्छा नाहीं करि पइहीं। 4तू पचन्क एक ठु बंदी क नाई खाले निहुरइ ही होइ। तू पचे मुर्दा क नाई धरती में भहराइके प्रणाम करब्या किन्तु ओहसे तू पचन्क कउनो मदद नाहीं मिली। परमेस्सर तब भी कुपित रही। परमेस्सर तू पचन्क दण्ड देइ बरे तब भी तत्पर रही।

5परमेस्सर कही, “मई एक छड़ी क रूप में अस्सूर क प्रयोग करब। मई किरोध में भरिके इस्त्राएल क सजा देइ बरे अस्सूर क प्रयोग करब। 6अइसे लोगन क खिलाफ, जउन पाप करम करत ही जुद्ध करइ बरे मई अस्सूर क पठउब। मई ओन लोगन स कोहान हउँ अउर ओन लोगन स जुद्ध करइ बरे मई अस्सूर क आदेस देब। अस्सूर ओन लोगन क हराइ देइ अउर फुन ओनसे कीमती वस्तुअन छोरी लेइ। अस्सूर बरे इस्त्राएल गलियन में पड़ी उ धूरि जइसा होइ जेहसे उ आपन ओइन तले रउँदी।

7“किन्तु अस्सूर इ नाहीं समुझत ह कि मई ओकर प्रयोग करब। उ इ नाहीं सोचत कि उ मोर एक साधन अहइ। अस्सूर तउ बस दूसर लोगन क नस्ट करइ चाहत ह। अस्सूर की तउ मात्र इ योजना अहइ कि उ बहोत स जातियन क नस्ट कइ देइ। 8अस्सूर आपन मने में कहत ह, ‘मोर सबहि

राजकुमार राजा लोगन क समान अहई। 9कलनो नगरी कर्कमास क जइसी अहइ अउर हमात नगर अर्पद नगर क जइसा अहइ। सीमरोन क नगरी दमिस्क नगर क जइसी अहइ। 10मई एन सबहि बुरे राजन क हराइ दिहेउँ ह अउर अब एन पइ मोर अधिकार अहइ। जउने मूरतियन क उ पचे लोग पूजा करत हीं, उ पचे यरूसलेम अउ सोमरोन क मूरतियन स जियादा अहई। 11मई सोमरोन अउ ओकर मूरतियन क पराजित कइ दिहेउँ। मई यरूसलेम अउ ओकर मूरतियन का भी जेनका ओकर लोग बनाएन ह पराजित कइ देबउँ।”

12मोर सुआमी जब यरूसलेम अउ सिथ्योन पर्वत क बरे, जउन ओकर योजना अहइ, ओकर बातन क करब खतम कइ देइ, तउ यहोवा अस्सूर क सजा देइ। अस्सूर क राजा बहोत अभिमानी अहइ। ओकर घमंड ओहसे बुरे करम करवाएस ह। तउ परमेस्सर ओका सजा देइ।

13अस्सूर क राजा कहा करत ह, “मई बहोत बुद्धिमान अहउँ। मई खुद आपन बुद्धि अउ सक्ती स अनेक महान कारज किहेउँ ह। मई बहोत स जातियन क हराएउँ ह। मई ओनकर धन छोर लिहेउँ ह अउर ओनके लोगन क दास बनइ लिहेउँ ह। मई एक बहोत सक्तीसाली मनई हउँ। 14मई खुद आपन हाथन स ओन सब लोगन क धन दौलत अइसे लइ लिहेउँ ह जइसे कउनो मनई चिरइयन क घोंसलन स अण्डन उठाइ लेत ह। चिरइयन जउन अक्सर आपन घोंसलन अउ अण्डन क तजि जात हीं अउर उ घोंसला क रखवारी करइ बरे कउनो भी नाहीं रहि जात। हुवाँ आपन पखनन अउ आपन चोंच स सोर मचावइ अउर लड़ाई करइ बरे कउनो पंछी नाहीं होत। एह बरे लोग अण्डन क उठाइ लेत हीं। इहइ तरह धरती क सबहि लोगन क उठाइ लइ जाइ स रोकइ बरे कउनो भी मनई हुवाँ नाहीं रहा।”

### सोमरोन क सक्ती पइ परमेस्सर क नियंत्रण

15कुल्हाड़ा उ मनई स नीक नाहीं होत, जउन कुल्हाड़ा क चलावत ह। कउनो आरा उ मनई स नीक नाहीं होत, जउन उ आरे स काटत ह। किन्तु अस्सूर क विचार अहइ कि उ परमेस्सर स भी जियादा महत्वपूर्ण अउर बलवान अहइ। जउन ओका उठावत ह अउर कउनो क सजा देइ बरे ओकर प्रयोग करत ह।

16अस्सूर क विचार अहइ कि उ महान अहइ किन्तु सर्वसक्तीमान यहोवा अस्सूर क दुर्बल कइ डावइवाली महामारी पठइ अउर अस्सूर आपन धन अउ आपन सक्ती क वइसे ही खोइ बइठी जइसे कउनो बेराम मनई आपन सक्ती गँवाइ बइठन ह। फुन अस्सूर क बैभव बर्बाद होइ जाइ। इ उ आगी क समान होइ जउन उ समय तलक बरत रहत ह जब तलक सब कछू खतम नाहीं होइ जात। 17इस्त्राएल क प्रकास (परमेस्सर) एक आगी क समान होइ। उ पवित्तरतम लपट क नाई होइ। उ उ आगी क दाई होइ जउन खरपतवार अउर काँटन क तत्काल बार डावत ह। 18अउर फुन बड़िके बड़िके बड़िके बृच्छन अउर अंगूरे क बगीचन क बार देत ह अउर आखिर में सब कछू बर्बाद होइ जात ह हिआँ तलक कि लोग भी। अइसा उ समइ

होइ जब परमेस्सर अस्सूर क बर्बाद कइ देइ। अस्सूर सड़त-गलत लट्ठा क जइसा होइ जाइ। 19जंगल में होइ सकत ह थोड़ा स बृच्छ खड़ा रहि जाएँ। पर उ सबइ एतना थोड़ा स होइहीं कि कउनो बच्चा तलक गन सकी।

20उ समइ, उ सबइ लोग जउन इस्त्राएल में जित रहहीं, यानी याकूब क बंस क इ सबइ लोग उ मनई पइ निर्भर नाहीं करत रहहीं जउन ओनका मारत पीटत ह। उ सबइ सचमुच उ यहोवा पइ निर्भर करब सीख जइहीं जउन इस्त्राएल क पवित्तर परमेस्सर अहइ। 21याकूब क बंस क उ सबइ बाकी बचे लोग सक्तीसाली परमेस्सर क फुन अनुसरण करइ लगिहीं।

22जइपि तोहार इस्त्राएली लोग सागर क रेत कणन क समान अहई तब पर ओनमाँ स कछू ही वापस मुड़ आवइ काहेकि परमेस्सर क निआव बाढ़ क नाई आवत हीं जउन हरेक चिजियन क पूरी तरह नास कइ देब। 23मोर सुआमी सर्वसक्तीमान यहोवा, इ प्रदेस क निहचय ही बर्बाद करी।

24मोर सुआमी सर्वसक्तीमान यहोवा कहत ह, “हे! सिथ्योन में बसइया लोगो, अस्सूर स जिन डेराअ। उ भविस्स में तू पचन्क आपनी छड़ी स इ तरह पीटी जइसे पहिले मिस्त्र में तू पचन्क पीटे रहा। इ अइसा होइ जइसे माना तू पचन्क नोस्कान पहोंचावइ बरे अस्सूर कउनो लाठी क प्रयोग करत रहत होइ। 25किन्तु थोड़े समइ क पाछे मोर किरोध सांत होइ जाइ, मोका संतोख होइ जाइ कि अस्सूर तू पचन्क काफी सजा दइ दिहस ह।”

26ओकरे पाछे सर्वसक्तीमान यहोवा अस्सूर क कोड़न स मारी। जइसा पहिले यहोवा जब ओरेब क चट्टान पइ मिय्यानियन क हराए रहा, तब भवा रहा। वइसा ही उ समइ होइ जब यहोवा अस्सूर पइ हमला करी। पहिले यहोवा मिस्त्र क सजा दिहे रहा। उ समुदर क ऊपर छड़ी उठाए रहा अउर मिस्त्र आपन लोगन क लइ गवा रहा। यहोवा जब अस्सूर स आपन लोगन क रच्छा करी, तब भी अइसा ही होइ।

27अस्सूर तू पचन्पइ बिपल्लियन लियाइ। उ सबइ बिपल्लियन अइसे बोझन क नाई होइहीं, जेनका तू पचन आपन ऊपर एक जुए क रूप में उठावइ ही होइ। किन्तु फुन तोहार पचन्क गर्दन पइ उ जुए क उतारके लोकावा जाइ। उ जुआ तोहार पचन्क सक्ती (परमेस्सर) क जरिये तोरि दीन्ह जाइ।

### इस्त्राएल पइ अस्सूर क फउज क हमला

28अव्यात क निअरे फउजन प्रवेस होइ। मिस्त्रोन, मिग्रोन यानी ‘खलिहानन’ क फउजन रउँदि डइहीं। फउजन एकरे खाइ क चीज क ‘कोठिलन’ (मिकमास) में रखि देइहीं। 29‘पार करइ क ठउर’ (माबरा) स फउजन नदी पार करिहीं। उ सबइ फउजन जेबा में राति बितइहीं। रामा डेराइ जाइ। साउल क गिबा क लोग निकरिके परइहीं।

30हे गल्लीम क पुत्री चिल्ला! हे लैसा सुना! हे, अनातोत मोका जवाब द्या। 31मदसेना क लोग भागत परात अहई। गोबीम क लोग लुकान अहई। 32आजु फउज नोब में टिकी अउर यरूसलेम क पर्वते पइ सिथ्योन पइ चढ़ाई करइ क तैयारी करी।

33लखा! हमार सुआमी सर्वसक्तीमान यहोवा बिसाल बृच्छ (अस्सूर) क काटि गिराई। यहोवा आपन महान सक्ती स अइसा करी। बड़के अउर महत्वपूर्ण लोग काट गिरावा जइहीं। उ पचे महत्वहीन होइ जइहीं। 34यहोवा आपन कुलहाड़ा स जँगल क काटि डाइ। अउर लबानोन क बिसाल बृच्छ (मुखिया लोग) गिर पडिहीं।

### सान्ति क राजा आवत अहइ

11 एक ठू अंकुर क नाई जे उ पेड़ स उगत ह जउन कटा जात रहा, एक ठू अंकुर (पूत) यिसै क ठुँठ (परिवार) स उगब सुरू होइ। हौं, इ अब डार यिसै क जड़ स उगी। 2उ पूत में यहोवा क आतिमा होइ। उ आतिमा विवेक, समझबूझ, मार्ग दर्शन अउ सक्ती क आतिमा होइ। उ आतिमा 3इ पूत क यहोवा क समुझइ अउर ओकर आदर करइ में मदद देइ। उ इ पूत यहोवा क आदर करी अउर एहसे उ खुस होइ।

इ पूत वस्तुअन जइसी देखोइ देत रही होइ, ओकरे अनुसार लोगन क निआव नाहीं करी। उ सुनी, सुनाई क आधार पइ ही निआव नाहीं करी। 4-5उ गरीब लोगन क निआव ईमानदारी अउर सच्चाई क साथ करी। धरती क दीन जनन बरे जउन कछू करइ क उ निर्णय लेइ, ओहमाँ उ पच्छपात रहित होइ। जदि उ निर्णय करत ह कि लोगन पइ मार पड़इ तउ उ आदेस देइ अउर ओन लोगन पइ मार पड़ी। जदि उ निर्णय करत ह कि ओन लोगन क मउत होइ चाही तउ उ आदेस देइ अउर ओन दुस्त्न क मउत क घाट उतार दीन्ह जाइ। नेकी अउर सच्चाई इ पूत क सक्ती प्रदान करी। ओकरे बरे नेकी अउर सच्चाई एक अइसे कमर बंद क नाई होइहीं जेका उ आपन कमर क चारिहुँ कइँती लपेटत ह।

6ओकरे सासन काल में मेमना अउर जंगली भेड़िया सान्ति स एक साथ रहिहीं। चीता अउर बोकरी क बच्चा एक संग सान्ति स पड़ा रहिहीं। बछवन, सेर अउर साँड़ आपुस में सान्ति क साथ रहिहीं। एक ठु नान्ह सा गदेली ओकर अगुवाई करी।

7गइयन अउर रीछिन सान्ति क संग संग आपन खइया क खइहीं। ओनकर बच्चन साथे-साथे बइठा करिहीं अउर आपुस में एक दूसर क नोस्कान नाहीं पहोंचइहीं। सेर गइयन क नाई घास चरिहीं 8अउर हिआँ तलक कि साँप भी लोगन क नोस्कान नाहीं पहोंचइहीं। काले नाग क बिल क लगे एक गदेली तलक खेल सकी। कउनो भी गदेली बिसैला नाग क बिले में हाथ डाइ सकी।

9इ सबइ बातन देखोवत हीं कि हुवाँ सब कहूँ सान्ति होइ। कउनो मनई कउनो दूसर क नोस्कान नाहीं पहोंचाइ। मोर पवित्तर पर्वत क लोग वस्तुअन क नस्ट नाहीं करइ चइहीं। काहेकि लोग यहोवा क फुरइ जान लेइहीं। उ सबइ ओकरे गियान स अइसे परिपूर्ण होइहीं जइसे सागर जल स परिपूर्ण होत ह।

10उ समय यिसै क परिवार में एक खास मनई होइ। एक मनई एक झंडा क समान होइहीं। इ ‘झंडा’ देखोई कि समुचय रास्टन क ओकरे आसपास बटोर जाइ चाही। इ



सबइ रास्ट्र ओहसे पूछा करिहीं कि ओनका का करइ चाही? अउर उ ठउर, जहाँ उ होइ, भव्यता स भरि जाइ।

11अइसे समइ मैं, मोर सुआमी फुन आपन लोगन क एक संग जमा करी। उ आपन लोगन मैं स ज़िअत भवा क अस्सूर, उत्तरी मिस्त्र, दक्खिनी मिस्त्र, कूस, एलाम, बाबुल, हमात तथा समूचइ संसार मैं फइला भवा अइसे ही सुदूर देसन मैं “वापिस खरीदी।”

12परमेस्सर सब लोगन बरे संकेत क रूप मैं झंडा उठाइ। इस्त्राएल अउ यहूदा क लोग आपन-आपन देसन क तजइ बरे मजबूर कीन्ह ग रहेन। उ सबइ लोग धरती पइ दूर-दूर फइल ग रहेन किन्तु परमेस्सर ओनका परस्पर बटोरी।

13उ समय एप्रैम यहूदा स जलन नाहीं रखी। यहूदा क कउनो दुस्मन नाहीं बची। यहूदा एप्रैम क बरे कउनो कस्ट पइदा नाहीं करी। 14बल्कि एप्रैम अउ यहूदा पलिस्तियन पइ हमला करिहीं। इ सबइ दुइनउँ देस उड़त भए ओन पंछियन क नाई होइहीं जउन कउनो नान्ह स जनावर क धरइ बरे झपट्टा मारत हीं। एक संग मिलिके उ सबइ दुइनउँ पहिले क धन दौलत लूट लेइहीं। एप्रैम अउ यहूदा एदोम, मोआब अउ अम्मोनी क लोगन पइ कब्जा कइ लेइहीं।

15यहोवा कोहाइ जाइ अउर जइसे उ मिस्त्र क सागर क दुइ हींसा मैं बाँट दिहे रहा, उहइ तरह परात नदी पइ तु आपन हाथ उठाइ अउर ओह पइ वार करी। जेहसे उ नदी सात नान्ह धारन मैं बाँट जाइ। इ सबइ नान्ह जलधारन गहिर नाहीं होइहीं। लोग आपन जूतन पहिरे भए पैदल चलिके ओनका पार कइ लेइहीं। 16परमेस्सर क लोग जउन हुवाँ छूट ग रहेन अस्सूर क तजि देइ बरे राह पाइ जइहीं। इ वइसा ही होइ, जइसा उ समय भवा रहा, जब परमेस्सर लोगन क मिस्त्र स बाहेर निकारिके लिआवा रहा।

### परमेस्सर क स्तुति गीत

12 उ समइ तू कहब्या: “हे यहोवा, मई तोहार गुण गावत हउँ! तू मोहसे कोहान अहा किन्तु अब मोहे पइ किरोध जिन करा। तू मोहे पइ आपन पिरैम देखॉवा।”

2परमेस्सर मोका बचावत ह। मोका ओह पइ भरोसा अहइ। मोका कउनो अउर डर नाहीं अहइ। उ मोका बचावत ह। यहोवा ही मोर सक्ती अहइ। उ मोका बचावत ह, अउर मई ओकरे बरे स्तुति गीत गावत हउँ!\*

3तू आपन जल मुक्ती क झरना स ग्रहण करा। तबहिं तू खुस होब्या।

4फुन तू कहब्या, “यहोवा क स्तुति करा! ओकरे नाउँ क तू उपासना किया करा। उ जउन कार्य किहेन ह ओकर लोगन स बखान करा। तू ओनका बतावा कि उ केतना महान अहइ।”

5तू यहोवा क स्तुति गावा। काहेकि उ महान कार्य किहेस ह। इ सुभ समाचार क जउन परमेस्सर क अहइ, सारी

**यहोवा ... गावत हउँ** साब्दिक “यहोवा मोर सक्ती अहइ अउर परमेस्सर अहइ। अउर उ मोर उद्धार बन गवा अहइ।” इ मूसा क जीत क गीत अहइ। लखा निर्गमन 15:2

दुनियाँ फइलावा ताकि सबहिं लोग इ सबइ बातन जान जाएँ।

6हे सिस्त्रियन क लोगो, आनन्द क साथ खुस रहा, काहेकि इस्त्राएल क पवित्र चीज तोहरे बीच एक सक्तीसाली मारग क रूप मैं अहइ।

### बाबुल क परमेस्सर क दर्शन

13 परमेस्सर क बाबुल क बारे मैं इ सोक संदेस अहइ। इ दर्शन आमोस क पूत यसायाह दुआरा लखा ग रहा। 2परमेस्सर कहेस:

“इ बंजर पर्वत पइ ध्वज उठावा। ओन लोगन क गोहरइ अउर आपन हाथ संकेत क रूप मैं हलाइ के ओन लोगन क बतावा कि उ पचे सज्जन मनइयन क प्रवेस दुआर पइ अहइ।”

3परमेस्सर कहेस, “मई इ सबइ फउजन क आदेस दिहउँ जउन जुद्ध बरे आपन आपका समर्पित कइ दिहेस ह। उ मइ हउँ जउन इ सबइ जोद्धन क बोलाएस ह। मई आपन गुस्सा देखाउब्या। मई उ जोद्धन पइ गर्व करत हउँ जउन मोर सेवा करइ बरे बहोत खुस अहइ।

4पहाड़ मैं एक जोरदार सोर भवा ह। तू उ सोर क सुना। इ सोर अइसा लागत ह जइसे बहोत ढेर सारे लोगन क। बहोत सारे देसन क लोग आइके बटुरा अहइ। सर्वसक्तीमान यहोवा आपन फउज क एक संग बोलावत अहइ।

5यहोवा अउर इ सेना कउनो दूर क देस स आवत अहइ। इ सबइ लोग छितिज क पार स किरोध परगट करइ आवति अहइ। यहोवा इ सेना क उपयोग अइसे करी जइसे कउनो किसी सस्त्र क उपयोग करत ह। इ फउज सारे देस क बर्बाद कइ देइ।”

6यहोवा क निआव क खास दिन आवइ क अहइ। एह बरे रोआ। अउ खुद आपन बरे दुःखी हवा। समय आवत अहइ जब सत्रु तोहार सम्पति चुराइ लेइ। सर्वसक्तीमान परमेस्सर वइसा करवाइ। 7लोग आपन हिम्मत छोड़ि देइहीं अउर डर लोगन क दुर्वल बनाइ देइ। 8हर कउनो भयभीत होइ। डर स लोगन क अइसे दुःखइ लगिहीं जइसे कउनो बच्चा क जन्मइवाली महतारी क पेट दुःखइ लागत ह। ओनकर मुँह लाल होइ जइहीं, जइसे कउनो आगी होइ। लोग अचरजे मैं पड़ि जइहीं काहेकि ओनकर सबहिं पड़ोसियन क मुँहे पइ भी भय देखाई देइ।

### बाबुल क खिलाफ परमेस्सर क निआव

9लखा, यहोवा क खास दिन आवइ क अहइ। उ एक खउफनाक दिन होइ। परमेस्सर महान किरोध मैं देस क बिनास कइ देब। उ पाप क उ भुइँया स निकार देब। 10आकास करिया पड़ि जइहीं, सूरज अउ चाँद नाहीं चमकिहीं। तारन आपन तारा-मण्डल मैं नाहीं टिमटिमाइ।

11परमेस्सर कहेस, “मई इ दुनियाँ लोगन क उ बुरा चिजियन जउन उ किहेस ह क बरे जिम्मवार ठहरउब। मई लोगन क उ सेखी क नस्ट करब जउन दूसर लोगन बरे अरथ होइ। 12हुवाँ बस थोड़े स लोग ही बचिहीं। जइसे सोना क मिलब दुरलभ अहइ, वइसे ही हुवाँ लोगन का

मिलव दुर्लभ होइ जाइ। किन्तु जउन लोग मिलिहीं, उ पचे निखालिस सोना स भी जियादा मूल्यवान होइहीं। 13 आपन किरोध स मई आकास क हलाइ देबउँ। धरती आपन धुरी स डिगाइ दीन्ह जाइ।”

इ सब उ समय घटी जब सर्वसक्तीमान यहोवा आपन किरोध दर्साइ। 14 तब बाबुल क निवासी अइसे परइहीं जइसे घायल हिरन परात ह। उ पचे अइसे परइहीं जइसे बगैर गड़रिये क भेड़ी परात ह। हर कउनो मनई पराइके आपन देस अउर आपन लोगन कइँती मुड़ आई। 15 किन्तु बाबुल क लोगन क पाछा ओनकर दुम्पन नाहीं छोड़िहीं अउर जब सत्रु कउनो मनई क धर पकड़ी तउ उ ओका तलवार क घाट उतारि देइ। 16 ओनकर घरे क हर वस्तु चुराइ लीन्ह जाइ। ओनकर पत्नियन क संग कुकरम कीन्ह जाइ अउर ओनकर नान्ह नान्ह गदेलन क लखत पीटि पीटिके मार डावा जाइ।

17 परमेस्सर कहत ह, “लखा, मई मादी क फउजन स बाबुल पइ हमला कराउब। मादी क फउजन यदि सोना अउ चाँदी क भुगतान लइ भी लेइहीं तउ भी उ पचे ओन पइ हमला करब बंद नाहीं करिहीं। 18 फउजन बाबुल क नउजवान मनइयन क धनुस क छिन-भिन कइ देब्या। उ पचे नान्ह लरिकन पइ दाया नाहीं देखौइ या गदेलन तलक भी करुणा नाहीं करिहीं।

19 “तब बाबुल, सबइ समराज्य मँ सबन त सुन्नर, कसदी क चमत्कारी गर्व क पूरी तरह स बर्बाद कइ दीन्ह जाब। इ उहइ तरह होइ जइसा परमेस्सर सदोम अउर अमोरा क नास किहे रहा! 20 किन्तु बाबुल क सुन्नरपन बना नाहीं रही। भविस्स मँ हुवाँ लोग नाहीं रइहीं। अराबी क लोग हुवाँ आपन तम्बू नाहीं गड़िहीं। गड़रियन चरावइ बरे हुवाँ आपन भेड़िन क नाहीं लिअइहीं। 21 जउन पसु हुवाँ रइहीं उ सबइ बस रेगिस्तान क पसु ही होइहीं। बाबुल मँ आपन घरन मँ लोग नाहीं रहि पइहीं। घरन मँ जंगली कुत्तन अउ बड़के कूकुरन चिल्लइहीं। घरन क भितरे जंगली बोकुरन बिहार करिहीं। 22 बाबुल क बिसाल भवनन मँ जंगली कूकुरन अउर सियारन गुराइ। बाबुल बर्बाद होइ जाइ। बाबुल क अंत निअरे अहइ अब बाबुल क बिनास मँ अउर जियादा देरी नाहीं होइ।”

### इस्त्राएल घरे लउटी

**14** जब यहोवा याकूब क सुख देइ अउर इस्त्राएल क फुन आपन लोगन क रूप मँ चुनी उ ओनका क ओकर आपन धरती मँ बसाइ। उ समइ मँ कछू बिदेसियन ओकर संग सामिल होइ जाइ अउर याकूब क परिवार क निअँबर बन जाइ। 2 उ सबइ जातियन इस्त्राएल क धरती बरे इस्त्राएल क लोगन क फुन वापस लइ लेइहीं। दूसर जातियन क उ सबइ मेहरारू मनसेधू इस्त्राएल क दास होइ जइहीं। बीते भए समय मँ ओन लोग इस्त्राएल क लोगन क बलपूर्वक आपन दास बनाए रहेन। इस्त्राएल क लोग ओन जातियन क हरइहीं अउर फुन इस्त्राएल ओन पइ हुकूमत करी। 3 यहोवा तोहरे मेहनत क खतम करी अउर तोहका आराम देइ। पहिले तू दास हुवा करत रहया, लोग तोहका

कड़ी मेहनत करइके मजबूर करत रहेन किन्तु यहोवा तोहार इ कड़ी मेहनत क अब खतम कइ देइ।

### बाबुल क राजा क बारे मँ एक गीत

4 उ समय बाबुल क राजा क बारे मँ तू इ गीत गावइ लगब्या: उ राजा दुट्ठ रहा जब उ हमार सासक रहा। किन्तु अब ओकरे राज्य क अन्त भवा।

5 यहोवा दुट्ठ सासकन क राज दण्ड तोड़ देत ह। यहोवा ओनसे ओनकर सक्ती छोरि लेत ह।

6 बाबुल क राजा किरोध मँ भरिके लोगन क पीटा करत ह। उ दुट्ठ सासक लोगन क पीटब कबहुँ बंद नाहीं किहस। उ दुट्ठ राजा किरोध मँ भरिके लोगन पइ राज किहस। उ लोगन क साथ बुरे कामन क करब नाहीं तजेस।

7 किन्तु अब सारा देस आराम मँ अहइ। देस मँ सान्ति अहइ। लोग अब उत्सव मनाउब सुरू किहेन ह।

8 तू एक बुरा सासक रहया, अउर अब तोहार अन्त भवा ह। हिआँ तलक की चीड़ क बृच्छ भी सुस्त अहँइ। लबानोन मँ देवदार का बृच्छ भगन अहँइ। बृच्छ इ कहत ही, “जउन राजा हमका गिराए रहा। आजु उ राजा क ही पतन होइ ग अहइ, अउर अब उ राजा कबहुँ खड़ा नाहीं होइ।”

9 अधोलोक, यानी मउत क प्रदेश उत्तेजित अहइ काहेकि तू आवत अहा। अधोलोक तोहार बरे संसार क प्रमुखन क आतिमा क उठावत रहा ही। अधोलोक तोहार स्वागत करइ बरे सिंहासन स ओन प्राचीन राजा लोगन क खड़ा करत ही।

10 इ सबइ प्रमुख तोह पइ हँसी उड़इ अउर कहिहीं, “तू भी अब हमरी तरह मरा भवा सरिर अहा। अब लोग तोहार बरे भी उहइ गीतन लेखब जउन उ पचे मोरे बरे लेखेस ह।”

11 तोहरे अभिमान क मउत क लोक मँ खाले उतारा गवा। तोहार अभिमानी आतिमा क अवाइ क घोसणा तोहरी वीजन क संगीत करत ह। तोहरे बदन क माखियन खाइ जइहीं। तू ओन पइ अइसे ओलरब्या माना उ पचे तोहार बिछउना होइ। कीसन अइसे तोहरी देह क ढक लेइहीं माना कउनो कमरी होइ।

12 हे भोर क तारा, तू धरती पइ भहराइ पइया। हे पेड़ तू सबहिं राष्ट्र क कमज़ोर बनाइ दिहेस, किन्तु तोहका अब काटिके गिराइ दीन्ह गवा।

13 तू हमेसा आपन स कहत रहया, “मई अकासन पइ आरोहण करब अउर परमेस्सर क तारन क ऊपर अपना सिंहासन कायम करब अउर देवी पर्व जप्पा क चोटी पइ बैठब, जहाँ पइ जप्पा क सबन त ऊँची चोटीयन पइ देवतन अकत्र होत ह।

14 मई बादरन क वेदी तलक जाब। मई सर्वोच्च परमेस्सर जइसा बनब।”

15 किन्तु वइसा नाहीं भवा। तू परमेस्सर क संग ऊपर अकासे मँ नाहीं जाइ पाया। तोहका अधोलोक क खाले गहिर पताल मँ लइ आवा गवा।

16 लोग जउन तोहका टकटकी लगाइके लखा करत हीं, उ सबइ तोहरे बरे सोचा करत हीं। लोगन क आजु इ देखौत ह कि तू बस मरा भवा अहा, अउर लोग कहा

करत हीं, “का इहइ उ मनई अहइ जउन धरती क सारे राजन में भय फइलावा भवा अहइ?

17का इ उहइ मनई अहइ जउन नगर बर्बाद कियेस अउर जउन धरती क उजाड़ में बदल दिहस? का इ उहइ मनई अहइ जउन लोगन क जुद्ध में बन्दी बनाएस अउर ओनका आपन घसन में नहीं जाइ दिहस?”

18धरती क हर राजा सान स मउत क पाएस। हर कउनो राजा क मकबरा बना अहइ।

19किन्तु हे बुरे राजा, तोहका तोहरी कब्र स निकारि बहावा दीन्ह ग अहइ। तू एक ठु गिरी भई ल्हास अहा जेका जुद्ध में मारा गवा, अउर दूसर फउजी ओका रौदन चला गएन। अब तू अइसा देखौवत अहा जइसे दूसर मरे मनई देखौत हीं। तोहका कफन में लपेटा गवा ह।

20बहोत स अउर भी राजा लोग मरेन। ओनके लगे आपन आपन कब्र अहईं। किन्तु तू ओनमाँ नहीं मिलव्या। काहेकि तू आपन ही देस क बिनास किहया। आपन ही लोगन क तू बध किहा ह। जइसा बिनास तू मचाए रह्या।

21ओकरी सन्तानन क बध तइयारी करा। तू ओनका मउत क घाट उतारा काहेकि ओनकर पिता अपराधी अहइ। अब कबहुँ ओकरे पूत नहीं होइहीं। ओकर सन्तानन अब कबहुँ भी संसार क आपन नगरन स नहीं भरिहीं। तोहार सन्तानन वइसा करत नहीं रहिहीं। तोहरी सन्तानन क वइसा करइ स रोक दीन्ह जाइ।

22सर्वसक्तीमान यहोवा कहेस, “मई खड़ा होब अउर ओन लोगन क खिलाफ लड़ब। मई मसहूर नगर बाबुल क उजारि देबउँ। बाबुल क सबहि लोगन क मई नस्ट कइ देब। मई ओनकर सन्तानन, पोते-पोतियन अउर सन्तानन क मेट देबउँ।” इ सबइ सब बातन यहोवा खुद कहे रहा।

23यहोवा कहे रहा, “मई बाबुल क बदल डाब। उ ठउरे में पसुअन क बास होइ, न कि मनइयन क। उ ठउर दलदल क प्रदेश बनि जाइ। मई ‘विनास क झाड़ू’ स बाबुल क बाहेर कइ देब।” सर्वसक्तीमान यहोवा इ सबइ बातन कहे रहा।

### परमेस्सर अस्सूर क भी दण्ड देइ

24सर्वसक्तीमान यहोवा एक बचन दिहे रहा। यहोवा कहे रहा, “मई बचन देत हउँ, कि इ सबइ बातन ठीक वइसे ही घटिहीं, जइसे मई एनका सोचेउँ ह। इ सबइ बातन ठीक वइसे ही घटिहीं जइसे कि मोर योजना अहइ। 25मई आपन देस में अस्सूर क राजा क नास करब आपन पहाड़न पइ मई अस्सूर क राजा क आपन गोड़न तले कुचरि डाउब। उ राजा मोरे लोगन क आपन दास बनाइके ओनकर कन्धन पइ एक जूआ रख दिहस ह। यहूदा क गर्दन स उ जूआ उठाइ लीन्ह जाइ। उ बिपत्ति क उठावा जाइ। 26मई आपन लोगन बरे अइसी ही योजना बनावत हउँ। सबहि जातियन क सजा देइ बरे, मई आपन सक्ती क प्रयोग करब।”

27यहोवा जब कउनो योजना बनावत ह तउ कउनो भी मनई उ योजना क रोक नहीं सकत। यहोवा लोगन क सजा देइ बरे जब आपन हाथ उठावत ह तउ कउनो भी मनई ओका रोक नहीं सकत।

### पलिस्तियन क परमेस्सर क सँदेश

28इ दुःखद सँदेश उ बरिस दीन्ह गवा रहा जब राजा आहाज क मउत भइ रही।

29हे, पलिस्तियो क प्रदेशो! तू बहोत खुस अहा काहेकि जउन राजा तोहका मार लगावा करत रहा, आजु मर चुका अहइ। किन्तु तोहका असलियत में खुस नहीं होइ चाही। इ फुरइ अहइ कि ओकरे सासन क अंत होइ चुका अहइ। किन्तु उ राजा क पूत अबहिं आइके राज करी अउ उ एक अइसे साँप क समान होइ जउन खउफनाक नागन क जन्म दिया करत ह। इ नवा राजा तू लोगन बरे एक ठु बड़के फुर्तीले खउफनाक नाग क जइसा होइ। 30किन्तु मोरे दीन जन सुरूच्छा पूर्वक खात पिअत रहि पइहीं। ओनकर सन्तानन भी सुरच्छित रइहीं। मोरे दीनजन, सोइ सकिहीं अउर सुरच्छित अनुभव करिहीं। किन्तु तोहरे परिवार क भूख स मार डाउब अउर तोहार सबहि बचे भए लोग मरि जइहीं।

31हे नगर दुआर क बासियो, रोवा! नगर में बसइयो तू लोग, चीखा-चिल्ला! पलिस्ती क तू सब लोगो डेराइ जाब्या। तोहार हिम्मत गरम मोम क नाई टेघरिके ढल जाइ। उत्तर दिसा कइँती लखा! हुवाँ धूरि क एक बादर अहइ। लखा, अस्सूर स एक फउज आवति अहइ। उ फउज क सबहि लोग बलवान अहईं।

32उ फउजी आपने नगर में दूत पठइहीं। दूत आपन लोगन स का कहिहीं? उ पचे एलान करिहीं: पलिस्ती हार गवा, किन्तु यहोवा सिथ्योन क सुदृढ़ बनाएस ह, अउर ओकर दीन्ह जन हुवाँ रच्छा पावइ क गएन।

### मोआब क परमेस्सर क सँदेश

15 इ दुःखद सँदेश मोआब क बारे में अहइ: एक राति मोआब में स्थित आर नगर लूटा गवा, उ तहस नहस कइ दीन्ह गवा। एक राति मोआब में स्थित आर नगर लूटा गवा, उ नगर तहस नहस कइ दीन्ह गवा।

2राजा क घराना अउ दिबोन क निवासी आपन दुःख रोवइ क ऊँचके पइ पूजा ठउरन पइ चला गएन। मोआब क निवासी नबो अउर मेदबा बरे रोवत हीं। ओन सबहि लोग आपन दाढ़ी अउ मूँड़ आपन सोक दर्सावइ बरे मुड़वाए रहेन।

3मोआब में सब कहुँ घसन अउ गलियन में, लोग सोक वस्त्र पहिरिके हाय हाय करत हीं।

4हेसबोन अउ एलाले नगरन क निवासी बहोत ऊँच सुर में विलपत अहईं। बहोत दूर यहस क नगरी तलक उ विलाप उनका जाइ सकत ह। हिआँ तलक कि फउजी भी डेराइ ग अहईं। उ सबइ फउजी भय स काँपत अहईं।

5मोर मन दुःख स मोआब बरे रोवत अहइ। लोग कहुँ सरण पावइ बरे दउड़त अहईं। उ पचे सुदूर जोआर में जाइ क भागत अहईं। लोग दूर क देस एलतसलीसिय्या क परात अहईं। लोग लूहीत क पहाड़ी चढ़ाइ पइ रोवत बिलखत भए परात अहईं। लोग होरोनैम क मार्ग पइ अउर उ पचे बहोत ऊँच ऊँच सुर में बिलखत भए जात अहईं।

6निघ्रीम क नाला अइसे झुराइ गवा जइसे रेगिस्तान झुरान होत ह। सबहिं गेहुँअन क पउथा काटइ क पहिले मुरझा

गएन। सबइ घास खतम होइ गएन। हुवाँ कछू भी हरा नाहीं बचा बाटइ।

7तउ लोग जउन कछू ओनके लगे अहइ ओका बटोरा करत हीं, अउर मोआब क तजत हीं। ओन वस्तुअन क लइके उ पचे नाले (पाप्लर या अराबा) स सीमा पार करत अहई।

8मोआब मँ हर कहुँ विलाप ही सुनाई देत ह। दूर क नगर एगलैम मँ लोग बिलखत बाटेन। बेरेलीम नगर क लोग विलाप करत अहई।

9दीमोन\* नगर क जल खून मँ बदलि गवा अहइ। अउर मई दीमोन पइ अबहिं अउर बिपतियन डाउब। मोआब क कछू निवासी सत्रु स बचि गवा अहई। मई ओन लोगन क खाइ बरे सेरन क पठउब।

**16** सेला क नगर स मेमनन यहूदा क नवा राजा बरे नज़राना पठावा; तू पचन्क रेगिस्तान स होत भए सिथ्योन क बिटिया क पठवा।

2मोआब क मेहररूअन उ बे सहारे नान्ह चिरइयन क जइसा अहई जउन आपन घोंसला स धरती पइ गिर गवा ह। उ पचे अर्नीन नदी क पार करइ बरे इधर-उधर दउड़त अहइ।

3उ सबइ विन्ती करत अहई, “हमार मदद करा! बतावा हम का करी! तू हमका मुसीबत स अइसा बचावा जइसा दोपहर क धूप स एक आंधर छाया हमका बचावत ह। हम सत्रुअन स भागत अही। तू हमका छुपाइ ल्या। हम का तू सत्रुअन क हाथन मँ पड़इ न द्या।”

4ओन मोआब बासियन क आपन घर तजइ क मजबूर कीन्ह गवा रहा। एह बरे तू ओनका आपन धरती पइ रहइ द्या। तू ओनके सत्रुअन क छुवाइ ल्या। इ लूट रुक जाइ। सत्रु हार जइहीं अउर अइसे मनसेधू दूसर क नोस्कान करत हीं, इ धरती स उखड़िहीं।

5फुन एक तु नवा राजा आइ। इ राजा दाउद क घराने स होइ। उ सच्चाई स पूर्ण, करूणावाला अउ दयालु होइ। इ राजा निआव कर्ता अउ निस्पच्छ होइ। उ खरे अउ नीक काम करी।

6हम सुना ह कि मोआब क लोग बहोत अभिमानी अउ घमण्डी अहई। इ सबइ लोग हिंसक अहई अउ बड़ा बोले भी। एनकर बड़ा बोल फुरइ नाहीं अहइ।

7समूचा मोआब देस आपन अभिमान क कारण कस्ट उठाई। मोआब क सारे लोग विलाप करिहीं। उ सबइ लोग बहोत दुःखी रहिहीं। उ पचे अइसी वस्तुअन क इच्छा करिहीं जइसी ओनके लगे पहिले हुवा करत रहीं। उ पचे कीरहरासत मँ बने भए अंजीर क पूड़न क इच्छा करिहीं। 8उ सबइ लोग बहोत दुःखी रहा करिहीं काहेकि हेसबोन क खेत अउर सिबमा क अंगूर क बेलन मँ अंगूर नाहीं लगाइ पावत अहई। बाहेर क सासकन अंगूर क बेलन क काट फेकेन ह। याजेर क नगरी स लइके रेगिस्ताने मँ दूर दूर तलक सत्रु क फउजन फइल गइ अहई। उ पचे सागर क किनारे तलक जाइ पहुँची अहई।

दीमोन साइद इ दिबोन नगर अहइ। इ नाउँ क आवाज हिब्रू सब्द क जइसा अहइ जेकर अरथ अहइ “खून”।

### मोआब क बारे मँ एक सोक गीत

9“मई ओन लोगन क साथ बिलाप करब जउन याजेर अउ सिबमा क निवासी अहई काहेकि अंगूर नस्ट कीन्ह गएन। मई हेसबोन अउ एगलै क लोगन क साथ सोक करब काहेकि हुवाँ फसल नाहीं होइ। हुवाँ गर्मी क कउनो फल नाहीं होइ। हुवाँ पइ आनन्द क ठहाके भी नाहीं होइहीं।

10अंगूरे क बगिया मँ आनन्द नाहीं होइ अउर न ही हुवाँ गीत गावा जइहीं। मई कटनी क समय क सारी खुसी खतम कइ देब। दाखरस बनवइ बरे अंगूर तउ तइयार अहई, किन्तु उ सबइ बर्बाद होइ जइहीं।

11एह बरे मई मोआब बरे बहोत दुःखी हउँ। मई कीरहरैम बरे बहोत दुःखी हउँ। मई ओन नगरन बरे बहोत जियादा दुःखी हउँ।

12मोआब क निवासी आपन ऊँचे पूजा क ठउरन पइ जइहीं। उ सबइ लोग पराथना करइ क जतन करिहीं। किन्तु उ सबइ ओन सबहिं बातन क लखिहीं। जउन कछू घटि चुकी अहइ, अउर उ पचे पराथना करइ क दुर्बल होइ जइहीं।”

13यहोवा मोआब क बारे मँ पहिले अनेक दाई इ सबइ बातन कहे रहा। 14अउर अब यहोवा कहत ह, “तीन बरिस मँ (उ रीति स जइसे किराये क मजदूर समय गनत ह) उ पचे सबहिं मनई अउर ओनकर उ सबइ वस्तुअन जेन पइ ओनका गर्व रहा, नस्ट होइ जइहीं। हुवाँ बहोत थोड़े स लोग बचिहीं, बहोत स नाहीं।”

### आराम बरे परमेस्सर क सँदिसा

**17** इ दमिस्क बरे दुःखद सँदिसा अहइ। यहोवा कहत ह कि दमिस्क क साथ मँ बातन घटिहीं:

“दमिस्क जउन आज नगर अहइ किन्तु कल उ उजड़ि जाइ। दमिस्क मँ बस टूटे फूटे भवन ही बचिहीं।

2अरोएर क नगरन क लोग तजि जइहीं। ओन उजड़े भए नगरन मँ भेड़िन क खरका खुली घुमिहीं। हुवाँ कउनो ओनका डरावइवाला नाहीं होइ।

3समारिया, एप्रैम क गढ़ नगर ध्वस्त होइ जइहीं। दमिस्क क सासन क अन्त होइ जाइ। इस्त्राएल अउर आराम दुइनउँ देसन मँ इ सबहिं घटना एक समान घटिहीं। दुइनउँ देस आपन सक्ती अउर महिमा खोइ देब।” सर्वसक्तीमान यहोवा बताएस कि इ सबइ बातन होइहीं।

4ओन दिनन याकूब अपनी सारी सम्पत्ति खोइ देइ। याकूब वइसा होइ जाइ जइसा मनई रोग स दुबला होइ।

5उ समय क सज़ा अइसा होइ जइसे रपाईम घाटी मँ फसल काटइ क समय होत ह। मजदूर ओन पउधन क बटोरत हीं जउन खेते मँ उपजत हीं। फुन उ पचे ओन पउधन क बालन क काटत हीं अउर ओनसे अनाजे क दाना निकारत हीं।

6उ समय ओह समय क समान होइ जब लोग जैतून क फसल उतारत हीं। लोग जैतून क बृच्छन स जैतून झाड़त हीं। किन्तु बृच्छ क चोटी पइ प्रायः कछू फल तब भी बचा रहत हीं। चोटी क कछू डारन पइ चार पाँच जइतून क फल

छूट जात हौं। ओन नगरन में भी अइसा ही होइ। सर्वसक्तीमान यहोवा इ सबइ बातन कहे रहा।

7उ समय लोग परमेस्सर कइँती निहरिहीं। परमेस्सर, जउन ओनकर रचना किहेस ह। उ सबइ इस्त्राएल क पवित्रर कइँती मदद खातिर लिखिहीं।

8लोग ओन वेदियन पइ बिस्सास करब खतम कइ देइहीं जेनका उ पचे खुद आपन हाथन स बनाए रहा। असेरा देवी क जेन खम्मन अउ धूप बारइ क बेदियन क उ पचे आपन अँगुरियन स बनाए रहा, उ पचे ओन पइ भरोसा करब बंद कइ देइहीं।

9उ समय, सबहिं गढ़-नगर उजड़ जइहीं। उ सबइ नगर अइसे पर्वत अउर जंगलन क समान होइ जइहीं, जइसे उ पचे इस्त्राएलियन क आवइ स पहिले हुवा करत रहेन। बीते भए दिनन में हुवाँ स सबहिं लोग दूर भाग गए रहेन काहेकि इस्त्राएल क लोग हुवाँ आवत रहेन। भविस्स में इ देस फुन उजड़ जाइ।

10अइसा एह बरे होइ काहेकि तू आपन उद्धारकर्ता परमेस्सर क बिसराइ दिहा ह। तू इ याद नाहीं राख्या कि परमेस्सर ही तोहार सरणस्थल अहइ।

तू सुदूर जगहन स बहोत नीक अंगूर क बेलन लिआए रह्या। तू अंगूरे क बेलन क रोप सकत ह किन्तु ओन पउधन में बढ़वार नाहीं होइ।

11एक दिन तू आपन अंगूर क ओन बेलन क रोपब्या अउर ओनकर बढ़वार क जतन करब्या। अगवा दिन, उ सबइ पउधन बड़इ भी लगिहीं किन्तु फसल उतारइ क समय जब तू ओन बेलन क फल बटोरइ जाब्या तब लखब्या कि सब कछू झुराइ चुका अहइ। एक बेरामी सबहिं पउधन क अंत कइ देइ।

12हे लोगन क भीड़ क सुना, उ गर्जत भवा समुद्दर क नाई आवाज करत हौं! हे भीड़ क सोर सुना, उ सागर क ज्वार-भाट क टकराइ क नाई आवाज करत ह।

13हौं उ भीड़ ओनहीं लहरन जइसे अहइ। मुला उ पचे सबहिं लहरन क नाई पराइ जाइ जब परमेस्सर ओनका झिड़की! लोग उ भूसे क नाई होइहीं जेकरी पहाड़ी पइ हवा उड़ावत फिरत ह। लोग वइसे ही होइ जइही जइसे आँधी क जरिया वस्तुअन क उखाड़े जात अहइ। आँधी ओनका उड़ावत ह अउर दूर लइ जात ह।

14उ रात लोग बहोत ही डेराइ जइहीं। सुबह होइस पहिले, कछू भी नाहीं बच पाई। तउ सत्रुअन क हुवाँ कछू भी हाथ नाहीं आई। उ पचे हमार धरती कइँती अइहीं, किन्तु हुवाँ भी कछू नाहीं होइ।

### इथोपिया बरे परमेस्सर क सँदसा

18 उ धरती क लखा जउन इथोपिया क नदियन क साथ-साथ फइली अहइ। इ धरती में कीड़े-मकोड़े भरे पड़ा अहइँ। तू ओनके पखनन क भिन्नाहट सुन सकत ह। 2इ धरती लोगन क सरकण्डन क नइयन स सागर क पार पर पठवत ह। हे तेज चलइवाले हरकारो, एक अइसी जाति क लोगन क लगे जा जउन लम्बे अउर सक्तीसाली अहइँ! (एन लम्बे सक्तीसाली लोगन स सब कहुँ क लोग

डेरात हौं। उ पचे एक बलवान जाति क लोग अहइँ। ओनकर जाति दूसर जातियन क हराइ देत ह। उ पचे एक अइसे देस क अहइँ जेका नदियन बाँट देत हौं।) 3उ अइसे ओन लोगन क सावधान कइ द्या कि ओनके संग कउनो बुरी घटना घटइ क अहइ। उ जाति क साथ घटत भइ इ घटना क दुनिया क सब लोग लिखिहीं। लोग एका इ तरह साफ साफ लिखिहीं, जइसे पहाड़ पइ लगे भए झण्डे क लोग निहारत हौं। एन लम्बे अउर सक्तीसाली मनइयन क साथ जउन बातन घटिहीं, ओनके बारे में इ धरती क सबहिं निवासी सुनिहीं। एका उ पचे ऐतनी स्पस्टता स सुनिहीं जेतनी स्पस्टता स जुद्ध स पहिले बजइवाले नरसिंहे क अवाज सुनाई देत ह।

4यहोवा कहेस, “जउन ठउर मोरे बरे तइयार कीन्ह ग अहइ, मई उ ठउर पइ होब। मई चुपचाप एन बातन क घटत भए लखब। गर्मी क एक सुहावने दिन दोपहर क समय जब लोग अराम करत रहे होइहीं (यह तब होइ जब कटनी क गर्म समय होइ, बर्खा नाहीं होइ, बस अलख सुबह क ओस ही पड़ी।) 5तबहिं कउनो बहोत भयानक बात घटी। इ उ समय होइ जब फूल खिल चुका होइहीं अउर ओनकर बढ़त होत रही होइ। किन्तु फसल उतारइ क समय स पहिले ही दुस्मन आइ अउर एन पउधन क काटि डाइ। सत्रु आइके अंगूरे क सबइ लता क तोरि डाइ अउर ओनका कहुँ दूर लोकाइ देइ। 6अंगूरे क इ सबइ बेलन सिकारी पहाड़ी पंछियन अउर जंगली जानवरन क खाइ बरे छोड़ि दीन्ह जाइ। गर्मियन में पंछी एन दाख क सबइ लता में बसेरा करिहीं अउर उ सर्दी में जंगली पसु एन दाख क सबइ लता क चरिहीं।”

7उ समय, लम्बे अउर सक्तीमान लोगन क सर्वसक्तीमान यहोवा क एक खास भेंट क रूप में चढ़ाई जाइँ। सब कहुँ क लोग एन लोगन स डेरात हौं। इ सबइ एक सक्तीसाली रास्ट्र क लोग अहइँ। उ पचे बिदेसी भासा बोलइ। इ रास्ट्र दूसर रास्ट्र क लोगन क जीतइ लेइ। इ सबइ एक अइसे देस क अहइँ, जउन नदियन स बँटा अहइँ। इ भेंट यहोवा क ठउर, सिन्थोन पर्वत पइ स्वीकार करी जाइँ।

### मिस्र बरे परमेस्सर क सँदसा

19 मिस्र क बारे में दुःखद सँदसा: लखा! एक उड़त भए बादर पइ यहोवा आवत अहइ। यहोवा मिस्र में प्रवेस करी अउर मिस्र क सारे लबार देवता डर स थर थर काँपइ लगिहीं। मिस्र वरि रहा किन्तु ओकर बहादुरी मोम क तरह टेघरिके बहि जाइ।

2परमेस्सर कहत ह, “मई मिस्र क लोगन क आपुस में ही एक दूसर क खिलाफ जुद्ध करइ बरे हुस्काउब। लोग आपन ही भाइयन स लड़िहीं। पड़ोसी, पड़ोस क विरोध में होइ जाइ। नगर, नगर क विरोध में अउर राज, राज क खिलाफ होइ जाइ। 3मिस्र क लोग चक्कर में पड़ि जइहीं। उ सबइ लोग आपन लबार देवतन क अउर बुद्धिमान लोगन स पूछिहीं कि ओनका का करइ चाही। उ पचे लोग आपन ओझन अउ जादूगरन स पूछताछ करिहीं किन्तु ओनकर सलाह बेकार होइ।”

4सुआमी, सर्वसक्तीमान यहोवा कहेस: "मई (परमेस्सर) मिस्त्र क कठोर सुआमियन क सौपब। एक सक्तीसाली राजा लोगन पइ राज करी। 5नील नदी क पानी झुराइ जाइ। नदी क तल में पानी नाहीं रही। 6सबहिं नदियन स दुर्गन्ध आवइ लागी। मिस्त्र क नहरन झुराइ जइहीं। हवाँ पानी नाहीं रहइँ। पानी क सबहिं पउधन सइ जइहीं। 7उ पचे सबहिं पउधन जउन नदी क किनारे उगे होइहीं, झुराइके उड़ि जइहीं। हिआँ तलक कि उ सबइ पउधन भी, जउन नदी क सबन ते चौड़े हीसाँ में होइहीं, बेकार होइ जइहीं।

8"मछुआरे, अउर उ सबइ लोग जउन नील नदी स मछरियन पकड़ा करत हीं, दुःखी होइके त्राहि-त्राहि कइ उठिहीं। उ पचे आपन भोजन बरे नील नदी क सहारे पइ अहइँ किन्तु उ झुराइ जाइ।

9उ सबइ लोग जउन कपड़ा बनावा करत हीं, बहोत जियादा दुःखी होइहीं। एन लोगन क सन क कपड़ा बनावइ बरे पटसन क जरूरत होइ किन्तु नदी क झुराइ जाइ स सने क पौधन क बढ़ोतरी नाहीं होइ पाई। 10पानी ँकट्टा करइ बरे बाँध बनावइवाले लोगन क पास काम नाहीं रहि जाइ। तउ उ पचे बहोत दुःखी होइहीं।

11"सोअन नगर क मुखिया मूरख अहइँ। फिरौन क बुद्धिमान मन्त्री गलत सलाह देत हीं। उ सबइ मुखिया लोग कहत हीं कि उ पचे बुद्धिमान अहइँ। ओनकर कहब अहइ कि उ पचे पुराना राजा लोगन क सन्तान अहइँ। किन्तु जइसा उ पचे सोचत हीं, वइसे बुद्धिमान नाहीं अहइँ।"

12हे मिस्त्र, तोहार बुद्धिमान मनसेधू कहाँ अहइँ? ओन बुद्धिमान लोगन क सर्वसक्तीमान यहोवा मिस्त्र बरे जउन योजना बनाएस ह, ओनकर पता होइ चाही। ओन लोगन क, जउन होइवाला अहइ, तू पचन्क बतावइ चाही।

13सोअन क मुखिया मूर्ख बनाइ दीन्ह ग अहइँ। नोप क मुखिया लोग झूठी बातन पइ बिस्सास किहेन ह। तउ मुखिया लोग मिस्त्र क गलत राहे पइ लइ जात हीं। 14यहोवा मुखिया लोगन क उलझन में डाइ दिहस ह। उ सबइ भटक ग अहइँ अउर मिस्त्र क गलत राहे पइ लइ जात अहइँ। उ पचे नसे में धुत अइसे लोगन क नाई अहइ जउन बेरामी क कारण धरती में लउटत अहइँ। 15मिस्त्र क बरे कउनो कुछ नाहीं कइ पाइ। (फिन चाहे उ सबइ मँड़ होई या पूँछ, "खजूरे क डारि होइ या सरकंडा।" (अर्थात् 'महत्व स पूर्ण होइ या बगैर महत्व क लोग।")

16उ समय, मिस्त्र क निवासी डेरान मेहररूअन क नाई होइ जइहीं। उ सबइ सर्वसक्तीमान यहोवा स डेरइहीं। यहोवा लोगन क सजा देइ बरे हाथ उठाइ अउर लोग डेराइ जइहीं। 17मिस्त्र में सब लोगन बरे यहूदा क प्रदेस भय क कारण होइ। मिस्त्र में कउनो भी यहूदा क नाउँ सुनिके डेराइ जाइ। अइसा एह बरे होइ काहेकि सर्वसक्तीमान यहोवा सबइ खउफनाक घटना क घटावइ बरे योजना बनाएस ह। 18उ समइ में, मिस्त्र में अइसे पाँच सहर होइहीं जहाँ लोग कनान क भाखा (यहूदी भाखा) बोलिहीं। एन नगरन में एक नगर क नाउँ "नास क नगरी" \* होइ।

**नास क नगरी** इ एक सब्द क खेल अहइ। मिस्त्री नाउँ क अरथ "सूरज क देस" अहइ।

लोग सर्वसक्तीमान यहोवा क अनुसरण क प्रतिग्या करिहीं। 19उ समय मिस्त्र क बीच में यहोवा बरे एक वेदी होइ। मिस्त्र क सीमा पइ यहोवा क आदर देइ बरे एक तु स्मारक होइ। 20इ इ बात क प्रतीक होइ कि सर्वसक्तीमान यहोवा सक्तीमान कार्य करत ह। जब कबहुँ लोग मदद बरे यहोवा क गोहरइहीं, यहोवा मदद पठई। यहोवा लोगन क बचावइ अउर ओनकर रच्छा करइ बरे एक मनई पठई। उ मनई ओन मनइयन क ओन दूसर लोगन स बचाई जउन ओने साथ बुरी बातन करत हीं।

21फुरइ उ समय, मिस्त्र क लोग यहोवा क जानिहीं। उ सबइ लोग परमेस्सर स पिरेम करिहीं। उ सबइ लोग परमेस्सर क सेवा करिहीं अउर बहोत स बलियन चढ़इहीं। उ सबइ लोग यहोवा क मनौतियन मनिहीं अउर ओन मनौतियन क पालन करिहीं।

22यहोवा मिस्त्र क लोगन क सजा देइ। फुन यहोवा ओनका (चंगा) छिमा कइ देइ अउर उ पचे यहोवा कइँती लउटि अइहीं। यहोवा ओनकर पराथनन सुनी अउर ओनका छिमा कइ देइ।

23उ समय, हुवाँ एक अइसा राजमार्ग होइ जउन मिस्त्र स अस्सूर जाइ। फुन अस्सूर स लोग मिस्त्र में जइहीं अउर मिस्त्र स अस्सूर में। मिस्त्र अस्सूर क लोगन क संग परमेस्सर क उपासना करी।

24उ समय, इस्राएल अस्सूर अउ मिस्त्र आपुस में एक होइ जइहीं अउर पृथ्वी पइ सासन करिहीं। इ सासन धरती बरे वरदान होइ। 25सर्वसक्तीमान यहोवा एन देसन क आसीबाद देइ। उ कही, "हे मिस्त्रियो! तू पचे मोर लोग अहा। हे अस्सूर क लोगो, उ मई हउँ जउन तोहका बनाएस। हे इस्राएलियो, तू अहा। मई तू सबन क आसीबाद देउँ ह!"

### अस्सूर मिस्त्र अउ इथोपिया क हराइ

**20** सर्गोन अस्सूर क राजा रहा। सर्गोन तर्तान क नगर क खिलाफ जुद्ध करइ बरे असदोद पठएस। तर्तान हुवाँ जाइके सहर पइ कब्जा कइ लिहस। 2उ समय आमोस क पूत यसायाह क जरिये यहोवा कहेस, "जा, अउर अपने कमर स सोक वस्त्र उतारिके लोकावा। अपने गोड़न क जूतियन उतारि द्या।" यसायाह यहोवा क हुकुम क पालन किहस अउर उ बगैर कपड़न अउ बगैर जूतन क एहर-ओहर घूमा।

3फुन यहोवा कहेस, "यसायाह तीन बरिस तलक बगैर कपड़न अउर बगैर जूतियन पहिरे एहर-ओहर घूमत रहा ह। मिस्त्र अउ इथोपिया बरे इ एक संकेत अहइ कि 4अस्सूर क राजा मिस्त्र अउ इथोपिया क हराइ। अस्सूर हुवाँ क बंदियन क लइके, ओनकर देसन स दूर लइ जाइ। बूढ़े मनई अउ जवान लोग बगैर कपड़न अउ नंगे गोड़न लइ जावा जइहीं। उ पचे पूरी तरह स नंगा होइहीं। मिस्त्र क लोग लजाइ जइहीं। 5जउन लोग मदद बरे इथोपिया कइँती लखा करत रहेन, उ सबइ टूट जइहीं। जउन लोग मिस्त्र क महिमा स चकित रहेन उ पचे लज्जित होइहीं।"

6समुद्र क लगे बसइया लोग, उ पचे कहिहीं, “हम मदद बरे ओन देसन पइ बिस्वास कीन्ह। हम पचे ओनके लगे धावत गए ताकि उ पचे हमका अस्सूर क राजा स बचाइ लें किन्तु ओन देसन क लखा कि ओन देसन पइ ही जब कब्जा कइ लीन्ह गवा तब हम कइसे बच सक्ति रहे?”

### परमेस्सर क बाबुल क सँदिसा

**21** सागर क रेगिस्तान क बारे में दुःखद सँदिसा: रेगिस्ताने स कछू आवइवाला अहइ। इ नेगव स आवत हवा जइसा आवति बाटइ। इ कउनो खउफनाक देस स आवति अहइ।

2मई कछू लखेउँ ह जउन बहोत ही भयानक अहइ अउर घटइ ही वाला अहइ। मोका गद्दार तोहका धोखा देत भए देखौत हीं। मई लोगन क तोहार पचन्क धन छोरेत भए लखत हउँ। एलाम, तू जा अउर जुद्ध करा! मादै, तू आपन फउजन लइके नगर क घेरि ल्या अउर ओका हरावा। मई उ बुराई क अन्त करब जउन उ नगर में बाटइ।

3मई इ सबइ भयानक बातन लखेउँ अउर अब मई बहोत डेराइ गएउँ ह। डर क मारे पेट में दर्द होत अहइ। इ दर्द जच्चा क पीरा जइसा अहइ। जउन बातन मई सुनत हउँ, उ सबइ मोका बहोत डेरावत अहइ। जउन बातन मई लखत हउँ, ओनके कारण मई डर क मारे काँपइ लागत हउँ। 4मई चिन्तित हउँ अउर भय स थर-थर काँपत हउँ। मोर सुहावनी साँझ डर क रात बन गई ह।

5लोगन सोचत हीं, सब कछू ठीक अहइ। लोग कहत हीं, “चौकी तइयार करा अउर ओह पइ आसन बिछावा, खा, पिआ।” किन्तु मोर कहब अहइ, “मुखिया लोगो! खड़ा हवा अउर जुद्ध क तइयारी करा।” उहइ समय फउजी कहत अहइ, “पहरूअन क तैनात करा। अधिकारी लोगो, खड़ा होइ जा अउर आपन ढालन क झलकावा।”

6मोर सुआमी मोका इ सबइ बातन ह, “जा अउर नगर क रच्छा बरे कउनो मनई क हेरा। 7जदि उ रखवारा घुड़सवारन क, गदहन क या ऊँटन क कतारन क लखेउँ तउ ओका होसियारी क साथ सुनइ चाही।”

8तउ फुन उ पहरूआ जोर स बोला पहरूआ कहेस, “मोर सुआमी, मई हर दिन चौकीदार क बुर्ज पइ चौकादारी करत आएँ ह। हर राति मई खड़ा भवा पहरा देत रहत हउँ। 9मुला लखा! उ पचे आवत अहइ। मोका घुड़सवारन क कतारन देखौइ देत अहइ।” फुन सँदिसवाहक कहेस, “बाबुल हार गवा, बाबुल धरती पइ ध्वस्त कीन्ह गवा। ओकरे मिथ्या देवन क सबहिं मूरतियन धरती पइ लुढ़काइ दीन्ह गइन अउर उ सबइ चकनाचूर हो गइन ह।” 10यसायाह कहेस, “हे खरिहाने मैं अनाज क तरह रौंदे भए मोर लोगो, मई सर्वसक्तीमान यहोवा, इस्राएल क परमेस्सर स जउन कछू सुना ह, सबइ तू पचन्क बताइ दीन्ह ह।”

### एदोम क परमेस्सर क सँदिसा

11दूमा बरे दुःखद सँदिसा। सेईर स मोका कउनो गोहराएस। उ मोहसे कहेस, “हे पहरू, रात अबहिं केतनी बाकी बची बाटइ? अबहिं अउर केतनी देर इ रात रही।” 12पहरूआ

कहेस, “भोर होइ क अहइ मुला राति फुन स आई। अगर तोहका कउनो बात पूछब अहइ तउ लउट आवा अउर मोहसे पूछ ल्या।”

### अरब बरे परमेस्सर क सँदिसा

13अरब बरे दुःखद सँदिसा हे ददानी क काफिले, तू रात क रेगिस्तान में कछू बृच्छन क लगे गुजार ल्या।

14कछू पियासे यात्रियन क पिअइ क पानी द्या। तेमा क लोगो, ओन लोगन क खइया क द्या जउन जात्रा करत अहइ।

15उ सबइ लोग अइसी तरवारन स परात अहइ जउन ओनका मारइ क तत्पर रहेन। उ सबइ लोग ओन धनुसन स बचिके परात रहेन जउन ओन पइ छूटइ बरे तने भए रहेन। उ सबइ भीसण लड़ाइ स परात रहेन।

16मोर सुआमी यहोवा मोका बताए रहा कि अइसी बातन घटिहीं। यहोवा कहे रहा, “एक बरिस में (एक अइसा ढंग जेहसे मजदूर किराये क समय क गनत ह।) केदार क वैभव बर्बाद होइ जाइ। 17उ समय केदार क थोड़े स धनुसधारी, प्रतापी फउजी ही जिअत बच पइहीं।” इस्राएल क परमेस्सर यहोवा मोका इ सबइ बातन बताए रहा।

### यरूसलेम बरे परमेस्सर क सँदिसा

**22** दिव्य दर्सन क घाटी क बारे में दुःखद सँदिसा: तू लोगन क साथ का भवा ह? काहे तू पचे आपन घरन क छतन पइ छिपत अहा?

2बीत गए समय में इ सहर बहोत व्यस्त सहर रहा। इ सहर बहोत सोरगुल स भरा अउर बहोत खुस रहा। किन्तु अब बातन बदलि गइन। तोहार लोग मारा गएन किन्तु तरवारन स नाहीं, अउर उ पचे मारा गएन किन्तु जुद्ध में लड़ते समय नाहीं।

3तोहार सबहिं सैनिक अधिकारी पराइ गएन, किन्तु उ सबहिं बिना हथियारन क पकड़ि गवा। उ सबहिं खोजा गएन अउर एक साथ पकड़ा गएन, जबकि उ फ़राइके कहुँ दूर भाग गए रहेन।

4एह बरे मई कहत हउँ, “मोरी कइँती जिन लखा, बस मोका रोवइ द्या! यरूसलेम क बिनास पइ मोका सान्त्वना देइ बरे मोरी कइँती जिन लपका।”

5यहोवा एक खास दिन चुनेस ह। उ दिन हुवाँ बगावत अउर भगदड़ मचि जाइ। दिव्य दर्सन क घाटी\* में लोग एक दूसर क रौंद डइहीं। नगर क चार दीवारी ओकर नीव स उखाड़ फेंकी जाइ। घाटी क लोग पहाड़े पइ के लोगन क ऊपर चिल्लाइहीं। 6एलाम क घुड़सवार फउजी आपन आपन तरकसन लइके घोड़न पइ चढ़े भए जुद्ध क प्रस्थान करिहीं। किर क लोग आपन ढालन स आवाज करिहीं। 7तोहार इ खास घाटी में फउजन आइ जुटिहीं। घाटी रथन स भरि जाइ। घुड़सवार फउजी क नगर दुआसन क समन्वा तैनात कीन्ह जइहीं।

**दिव्य दर्सन क घाटी** संभवता किदरोन क घाटी यरूसलेम अउर जैतून पहाड़े क बीच में स्थित अहइ। अनेक प्रमुख अधिकारियन क कबर इ घाटी क पूरब कइँती में रहेन।

8तब यहूदा क रच्छा-अवरण\* हटाइ लेइ जाइ। लोग जंगल-महल में जमा कइ भए हथियरन क लइ बरे जाब्या।

9-11तू पचन्क दाऊद क नगर क चहारदीवारी क दरारन क लख सकत हीं। तउ तू पचे मकानन क गनइ सुरू करब्या यह तय करइ बरे कि ओहमों स कैतना मकान क धवस्त करइ क जरूरत, दीवार क मरम्मत करइ बरे होइ। तू पचे निचली तालाब\* स पानी भी जमा करइ सुरू करब्या। तू पचे दूसर तालाब\* दीवारन क बीच में सहर क निचला भाग में पुराने तालाब\* स पानी जमा करइ बरे बनाउब्या।

फुन भी उ परमेस्सर पइ तोहार पचन्क भरोसा नाहीं होइ जउन एँन सबइ वस्तुअन क बनाएस ह। तू पचे ओकरी (परमेस्सर) कइँती नाहीं लखब्या जउन बहोत पहिले एँन सबइ वस्तुअन क रचना किहे रहा।

12तउ, मोर सुआमी सर्वसक्तीमान यहोवा लोगन स ओनके मरे भए मीतन बरे बिलाप करइ अउर दुःखी होइ बरे कही। लोग आपन मुँडि मुँडवाइ लेइहीं अउर सोक-वस्त्र धारण करिहीं।

13किन्तु लखा! अब लोग खुस अहइँ। लोग खुसियन मनावत अहइँ। उ सबइ लोग कहत अहइँ: मवेसियन क मारा, भेड़िन क बध करा। हम उत्सव मनाउब। तू पचे आपन खइया क खा अउर आपन दाखरस पिआ। खा अउर पिआ काहेकि भियान तउ हमका मरि जाब अहइ।

14सर्वसक्तीमान यहोवा इ सबइ बातन मोहसे कहे रहा अउर मई ओनका अपने काने स सुने रहेउँ: “तू पचे बुरे करम करइ क अपराधी अहा अउर मई निहचय क साथ कहत हउँ कि इ अपराध क छिमा कीन्ह जाइ स पहिले ही तू पचे मरि जाब्या।” मोर सुआमी सर्वसक्तीमान यहोवा इ सबइ बातन कहे रहा।

### सेबना बरे परमेस्सर क सँसा

15मोर सुआमी सर्वसक्तीमान यहोवा मोहसे इ सबइ बातन कहेस: “उ सेबना नाउँ क सेवक क लगे जा। उ महल क प्रबन्ध-अधिकारी अहइ। 16ओहसे पूछ्या, ‘उ का करत अहा? का हिआँ ओकरे परिवार क कउनो मनइ गड़ा भवा अहइ? उ हिआँ एक कब्र काहे बनावत अहा?’”

यसायाह कहेस, “लखा इ मनई क! इ एक ऊँच जगहिया पइ आपन कब्र बनावत अहइ। आपन कब्र बनावइ बरे इ चट्टान क काटत अहइ।

17-18“हे मनसेधू, यहोवा तोहका कुचरि डाइ। यहोवा तोहका बाँधिके एक तु नान्ह स गेँदे क तरह गोल बनाइके कउनो बिसाल देसे में लोकाइ देइ अउर हुवाँ तोहार मउत होइ जाइ।”

**रच्छा-अवरण** एकर अरथ होइ सकत ह 1 यहोवा रच्छक क रूप में। 2 यरूसलेम क दीवार। या 3 पवित्तर जगह क बचाना इ देखावत ह कि परमेस्सर लोगन क रच्छा करत ह।

**निचली तालाब** दाऊद क नगर क दक्खिन छोर पइ ऊपरी तालाब क ठीक नीचे क तालाब।

**दूसर तालाब** सम्भवत: इ ऊपरी तालाब अहइ।

**पुराने तालाब** सम्भवत: नगर क पूरबी ढलानन पइ जिअव क झरना पइ क तालाब।

यहोवा कहेस, “तोहका आपन रथन पइ बड़ा अभिमान रहा। किन्तु उ दूर देस में तोहरे नवे सासक क लगे अउर भी नीक रथ अहइँ। ओकरे महल में तोहार रथ महत्वपूर्ण नाहीं देखाइ देइहीं। 19हिआ मई तोहका तोहार महत्व स पूर्ण काम स ढकेल के बाहेर करब। तोहरे महत्व क पूर्ण काम स तोहार नवा मुखिया तोहका दूर कइ देइ। 20उ समय मई आपन सेवक एल्याकीम क जउन हिज्जियाह क पूत अहइ, बोलाउब 21अउर तोहार चोगा लइके उ सेवक क पहिराइ देब। तोहार राजदण्ड भी मई ओका दइ देब। जउन महत्वक पूर्ण काम तोहरे पास अहइ, मई ओका भी उहइ क दइ देब। उ सेवक यरूसलेम क लोगन अउर यहूदा क परिवार बरे पिता क समान होइ।

22यहूदा क भवन क चाभी मई उ मनसेधू क गले में डाइ देब। अगर उ कउनो दुआर क खोली तउ उ दुआर खुला ही रही। कउनो भी मनई ओका बंद नाही कइ पाई। जदि उ कउनो दुआर क बंद करी तउ उ दुआर बंद होइ जाइ। कउनो भी मनई ओका खोल नाहीं पाई। उ सेवक पिता क घरे में एक सिंहासन क समान होइ। 23मई ओका एक अइसी खूँटी क समान सुदुढ़ बनाउब जेका बहोत सख्त तखत में ठोका गवा ह। 24ओकरे पिता क घर क सबहिं माननीय अउर महत्व स पूर्ण वस्तुअन ओकरे ऊपर लटकिहीं। सबहिं वयस्क अउर नान्ह बच्चन ओह पइ निर्भर रहिहीं। उ सबइ लोग अइसे होइहीं जइसे नान्ह नान्ह पात्र अउर बड़ी बड़ी सुराहियन ओकरे ऊपर लटकत होइँ।

25“उ समय, उ खूँटी (सेबना) जउन अब एक बड़े कठोर तखते में गाड़ी भइ खूँटी अहइ, दुर्बल होइके टूट जाइ। उ खूँटी धरती पइ गिर पड़ी अउर उ खूँटी पइ लटकी भइ सबहिं वस्तुअन बर्बाद होइ जइहीं। तब उ प्रत्येक बात जउन मई उ सँदिसा में बताए रहेउँ, घटित होइ।” (इ सबइ बातन घटिहीं काहेकि एनका यहोवा कहे अहइ।)

### लबानोन क परमेस्सर क सँसा

23 सोर क बारे में दुःखद सँदिसा: हे तर्सीस क जहाजो, दुःख मनाव। तोहार बंदरगाह उजाड़ दीन्ह गवा ह। (एन जहाजन पइ जउन लोग रहने, ओनका इ समाचार उ समय बतावा ग रहा जब उ पचे कित्तियन क देस में आपन राहे जात रहने।)

2हे सागरे क निचके बसइया लोगो, रूका अउर सोक मनाव! हे, सीदोन क सौदागरो सोक मनाव। सीदोन तोहरे सँदिसावाहक समुदर पर जावा करत रहने। ओ लोग तोहका धन दौलत स भरि दिहने।

3उ सबइ लोग अनाजे क तलास में समुदर में जात्रा करत रहने। सोर क उ सबइ लोग नील नदी क आस पास जउन अनाज पैदा होत रहा, ओका मोल लइ लेत रहा करत रहने अउर फुन उ अनाज क दूसर देसन में बेचा करत रहने।

4हे सीदोन, तोहका सर्म आवइ चाही। काहेकि अब सागर अउर सागर क किला कहत ह: मई सन्तान रहित हउँ। मोका जच्चा क बेदना क गियान नाहीं अहइ। मई कउनो बच्चे क जनम नाहीं दिहेउँ। मई युवती व युवक क पालिके बड़ा नाहीं किहेउँ।



5मिस्र सोर क खबर सुनी अउर इ खबर मिस्र क दुःख देइ।

6तोहार जलयान तर्सीस क लउटि जाइ चाही। हे सागरतट वासियो! दुःखे में बूड़ जा।

7बीते दिनन में, तू पचे सोर क महिमा स आनन्द लिहा। इ नगरी सुरु स ही विकसित होत रही। उ नगर क लोग नगरन स कहुँ दूर बसइ बरे जात्र किहेन।

8सोर क नगर बहोत सारे नेता पैदा किहेस। हुवाँ क बइपारी राजपूतन क समान होत हीँ अउर उ सबइ लोग वस्तुअन खरीदत अउ बेचत हीँ। उ पचे हर कहुँ आदर पावत हीँ। तउ कउन सोर क खिलाफ जोजनन रचेस ह।

9हीँ, सर्वसक्तीमान यहोवा उ सबइ योजना बनाए रहा। उहइ ही ओनका महत्व स पूर्ण न बनावइ क निहचय किहे रहा।

10हे तर्सीस क जहाजो तू पचे अपने देस क लउटि जा। तू पचे सागरे क अइसे पार करा जइसे उ नान्ह स नदी होइ। कउनो भी मनई अब तू सबन्क नाहीं रोकी।

11यहोवा आपन हाथ सागर क ऊपर फइलाएस ह अउर राजन क कँपाइ दिहस। यहोवा कनान देस क बारे में आदेस दइ दिहस कि ओकरे गढ़ियन क नस्ट कइ दीन्ह जाइ।

12यहोवा कहत ह, हे! सीदोन क कुँवारी बिटिया, तोहका बर्बाद कीन्ह जाइ। अब तू अउर जियादा आनन्द न मनाइ पाई।” किन्तु सोर क निवासी कहत हीँ, “हमका कितीम बचाई।” किन्तु अगर तू सागरे क पार कइके कितीम जा हुवाँ भी तू चैन क ठउर न पउब्या।

13एह बरे सोर क निवासी कहा करत हीँ, “बाबुल क लोग हम क बचइहीं।” किन्तु तू बाबुल क लोगन क धरती पइ लखा। एक देस क रूप में आजु बाबुल क कउनो अस्तित्व नाहीं अहइ। बाबुल क ऊपर अस्पूर चढ़ाई किहस अउर ओकरे चारिहुँ ओर बुर्जियन बनाएस। फउजियन सुन्नर घसन क सब धन लूट लिहन। अस्पूर बाबुल क जँगली पसुअन क घर बनाइ लिहस। उ पचे बाबुल क खण्डहरन में बदल दिहन।

14तउ तर्सीस क जलयानो तू पचे बिलाप करा। तोहार सबन्क सुरच्छा ठउर (सोर) बर्बाद होइ जाइ।

15सत्तर बरिस तलक लोग सोर क बिसरि जइहीं। (इ समय, कउनो राजा क सासनकाल क बराबर समय माना जात रहा।) सत्तर बरिस क पाछे, सोर एक रण्डी क नाई होइ जाइ। इ गीत में:

16हे रण्डी! जेका मनसेधूअन बिसराइ दिहन। तू आपन वीणा उठावा अउर इ नगर में घूमा। तू आपन गीत क अच्छी तरह बजावा। तू अक्सत आपन गीत गावा करा। तबहिँ तोहका लोग फुन स याद करिहीं।

17सत्तर बरिस क पाछे, परमेस्सर सोर क समस्या पइ विचार करब। सोर फुन आपन मजदूरी एक रण्डी क नाई धरती क सबहिँ रास्ट्रन क संग बइपार कइके प्राप्त करइ लागी।

18किन्तु सोर जउने धन क कमाई ओका रख नाहीं पाई। सोर उ लाभ क जउन उ बइपार में कमाएस ह, यहोवा बरे सुरच्छित रही। सोर ओका ओन लोगन क देइ जउन यहोवा

क सेवा करत अहा। एह बरे यहोवा क सेवक भर पेट खइया क खइहीं अउर नीक ओढ़ना पहिरहीं।

### परमेस्सर इस्राएल क सजा देइ

24 लखा! यहोवा इ धरती क बर्बाद करी। यहोवा भूचालन क जरिये इ धरती क मरोड़ देइ। यहोवा लोगन क कहुँ दूर जाइ क मजबूर करी।

2उ समय, हर कउनो क संग एक जइसी घटनन घटिहीं, साधारण मनई अउ याजक एक जइसे होइ जइहीं। सुआमी अउर सेवक एक जइसे होइ जइहीं। दासियन अउर ओनकर सुआमियन एक समान होइ जइहीं। मोल लेइवाले अउर बेसइवाले एक जइसे होइ जइहीं। कर्जा लेइवालन अउर कर्जा देइवालन लोग एक जइसे होइ जइहीं। धनवान अउर दीन लोग एक जइसे होइ जइहीं।

3सबहिँ लोगन क हुवाँ स ढकेल बाहेर कीन्ह जाइ। सारी धन दौलत छोरी लीन्ह जइहीं। अइसा एह बरे घटी काहेकि यहोवा अइसा ही आदेस दिहस ह।

4देस उजड़ जाइ अउर दुःखी होइ। दुनिया खाली होइ जाइ अउर उ दुर्बल होइ जाइ। इ धरती क महान नेता सक्तिहीन होइ जइहीं।

5इ धरती उ लोगन दुआरा दूसित कइ दीन्ह ग अहइ जउन एह पइ रहत हीँ। अइसा कइसा होइ गवा? लोग परमेस्सर क सिच्छा क विरोध में गलत काम किहेन। लोग परमेस्सर क नेमन क पालन नाहीं किहन। बहोत पहिले उहइ लोग परमेस्सर क संग एक करार किहे रहेन। किन्तु परमेस्सर क समन्वा कीन्ह गवा उ करार क उ पचे उल्लंघन किहेस। 6इ धरती क रहइवाले लोग अपराधी अहइँ। एह बरे परमेस्सर इ धरती क नस्ट करइ क निहचय किहस। ओन लोगन क सजा दीन्ह जाइ अउर हुवाँ थोड़े स लोग ही बचि पइहीं।

7अंगूर क बेलन मुरझात अहइँ। नई दाखरस क कमी पड़ति अहइ। पहिले लोग खुस रहेन। किन्तु अब उ पचे ही लोग दुःखी अहइँ। 8लोगन आपन खुसी वियक्त करइ तजि दिहे अहइँ। खुसी क सबहिँ ध्वनियन रूकि गइ बाटिन। खँजरियन अउ वीणन क आनन्द स भरा संगीत खतम होइ चुका अहइ। 9अब लोग दाखरस पिअत अहइँ, तउ खुसी क गीत नाहीं गाउतेन। अब जब मनई दाखरस पिअत हीँ, तब उ ओका कडुई लागत ह।

10इ सहर क एक नीक स नाउँ अहइ, “गड़बड़ स भरा, इ नगर क बिनास कीन्ह गवा। लोग घसन में नाहीं घुस सकतेन। दुआर बंद होइ चुका अहइँ। 11गलियन में दुकानन पइ लोग अबहुँ भी दाखरस क पूँछत हीँ, किन्तु समूची खुसी जाइ चुकी अहइ। आनन्द तउ दूर कइ दीन्ह ग अहइ। 12नगर बरे बस बिनास ही बचत अहइ। दुआर तलक चकनाचूर होइ चुका अहइँ।

13“फसल क समय लोग जइतून क बृच्छ स जइतून क गिरावा करिहीं। किन्तु केवल कछू ही जइतून बृच्छन पइ बचिहीं! जइसे अंगूरे क फसल उतारइ क पाछे थोड़ा स अंगूर बचे रहि जात हीँ। अइसा ही इ धरती क रास्ट्रन क संग होइ।

14बचे भए लोग ऊँची आवाज़ में स्तुति करीं। दूरगामी देस क लोग यहोवा क महानता क स्तुति करिहीं अउर उ पचे, खुस होइहीं।

15उ सबइ लोग कहा करिहीं, “पूर्व क लोगो, यहोवा क तारीफ करा।” दूर देस क लोगो, इस्त्राएल क परमेस्सर यहोवा क नाउँ क गुण गान करा।”

16इ धरती पइ हर कहूँ हम परमेस्सर क स्तुति क गीत सुनबा। एँन गीतन में परमेस्सर क स्तुति होइ। किन्तु मई कहत हउँ, “मई बरबाद होत रहत हउँ। मई जउन कछू भी लखत हउँ सब कछू खउफनाक अहइ। गद्दार लोग, लोगन क विरोधी होत रहत हीं, अउर ओनका चोट पहुँचावत हीं।

17मई धरती क बसइयन पइ खतरा आवत लखत हउँ। मई ओनके बरे भय, गड़हन अउर फँदन लखत हउँ।

18लोग खतरे क सुनिके डर स काँपि जइहीं। कछू लोग, पराइ जइहीं किन्तु उ सबइ गड़हन अउर फँदन में जाइ गिरिहीं अउर ओन गड़हन स कछू चढ़िके बचि निकरि अइहीं। किन्तु उ पचे फुन दूसर फँदन में फँसिहीं। ऊपर अकासे क छाती फटि जाइ जाइसे बाढ़ क दुआर खुलि गवा होई।” बाढ़न आवइ लगिहीं अउर धरती क नैव डगमग हिलइ लागी।

19भूवाल आइ अउर धरती फट जाइहीं।

20संसार क पाप बहोत भारी अहइँ। उ भारे स दबिके इ धरती गहराइ जाइ। इ धरती कउनो झोपड़ी स काँपी अउर नसे में धुन्त कउनो मनई क तरह धरती गिर जाइ। इ धरती बनी न रही। 21उ समय यहोवा सब क निआव करी। उ समय यहोवा अकासे में सरग क फउजन अउर धरती क राजा उ निआव क विषय होइहीं।

22एन सबन क एक संग एकट्ठा कइ दीन्ह जाइ। ओनमाँ स कछू काल कोठरी में बन्द होइहीं अउर कछू कारागार में रइहीं। किन्तु अंत में बहोत समय क पाछे एन सबनक निआव होइ।

23यरूसलेम में सियोन क पहाड़े पइ यहोवा राजा क रूप में राज करी। अग्रजन क समन्वा ओकर महिमा होइ। ओकर महिमा एँतनी भव्व होइ कि चँदा व्याकुल होइ जाइ, सूरज लजाइ जाइ।

### परमेस्सर क एक स्तुति-गीत

**25** हे यहोवा, तू मोर परमेस्सर अहा। मई तोहरे नाउँ क स्तुति करत हउँ अउर मई तोहका सम्मान देत हउँ। तू अनेक अद्भुत कार्य किहा ह। जउन भी सब्द तू बहोत पहिले कहे रह्या उ सबइ पूरी तरह स फुरइ अहइँ। हर बात वइसी ही घटी जइसी तू बताए रह्या।

2तू नगर क नस्त किहा। उ नगर सुदृढ़ चहरदीवारी स संरच्छित रहा। किन्तु अब उ मात्र पाथरन क ढेर रहि गवा। परदेसियन क महल नस्त कइ दीन्ह गवा। अब ओकर फुन स निर्माण नाहीं होइ।

3सामर्थी लोग तोहार महिमा करिहीं। त्रूर जातियन क नगर तोहसे डेरइहीं।

4यहोवा तू निर्धन लोगन बरे जउन जरूरतमंद अहइँ, सुरच्छा क ठउर अहा। अनेक बिपत्तियन ओनका पराजित

करइ क आवत हीं किन्तु तू ओनका बचावत ह। तू एक अइसा भवन अहा जउन ओनका तूफानी बर्खा स बचावत ह अउर तू एक अइसी हवा अहा जउन ओनका गर्मी स बचावत ह। बिपत्तियन खउफनाक आँधी अउर घनघोर बर्खा जइसी आवत ह। बर्खा देवारन स टकरात ह अउर खाले बहि जात ह किन्तु मकाने में जउन लोग अहइँ, ओनका नोस्कान पहुँचावत ह।

5नारा लगावत भए दुस्मन ललकारेस। घोर दुस्मन चुनौती देइ क ललकारेस। किन्तु तू हे परमेस्सर, ओनका रोक लिहा। उ सबइ अइसे रहेन जइसे गर्मी कउनो खुस्क जगह पइ। तू ओन त्रूर लोगन क विजय गीत अइसे रोक दिहे रह्या जइसे सघन मेघन क छाया गर्मी क दूर करत ह।

### आपन सेवकन बरे परमेस्सर क भोज

6उ समय, सर्वसक्तीमान यहोवा इ पर्वते प सबहिं रास्ट्रन बरे एकठु भोज क प्रबंध करी। भोजे में स्वादिस्ट खइया क अउ दाखरस परोसा जाइ। भोज में नर्म अउ मजेदार गोस्त परोसा जाइ।

7किन्तु अब लखा, एक अइसा पर्दा अहइ जउन सबहिं जातियन अउर सबहिं मनइयन क ढके अहइ। इ पर्दे क नाउँ अहइ, “मउत।” 8किन्तु मउत क हमेसा बरे अंत कइ दीन्ह जाइ अउर मोर सुआमी यहोवा हर आँखी क आँसू पोंछ देइ। बीते समय में ओकर सबहिं लोग सर्मिन्दा रहेन। यहोवा ओनकर लजा क इ धरती पइ स हरण कइ लेइ। इ सब कछू घटी काहेकि यहोवा कहे रहा, अइसा होइ।

9उ समय लोग अइसा कहिहीं, “लखा इ हमार परमेस्सर अहइ। इ उहइ अहइ जेकर हम बाट जोहत रहे। इ हमका बचावइ क आवा अहइ। हम आपन यहोवा क प्रतीच्छा करत रहे। एह बरे हम खुसियन मनाउब अउर खुस होब कि यहोवा हमका बचाएस ह।”

10इ पहाड़े पइ यहोवा क सक्ती अहइ अउर मोआब पराजित होइ। यहोवा सत्रु क अइसा कुचिर डाइ जइसे भूसा कुचरा जात ह जउन खाद क ढेर में होत ह।

11यहोवा आपन हाथ अइसे पसारी जइसे कउनो तैरत भवा मनई फइलावत ह। तब यहोवा ओन सबहिं वस्तुअन क एकट्ठा करी जेन पइ लोगन क गर्व अहइ। यहोवा ओन सबहिं सुन्नर वस्तुअन क बटोर लेइ जेनका उ पचे बनाए रहेन अउर उ एन वस्तुअन क लोकाइ देइ।

12यहोवा लोगन क ऊँच देवारन क नस्त कइ देइ। यहोवा ओनके सुरच्छा ठउरन क नस्त कइ देइ। यहोवा ओनका धरती क धूरि में पटक देइ।

### परमेस्सर क एक स्तुति-गीत

**26** उ समय, यहूदा क लोग इ गीत गइहीं: यहोवा हमका मुक्ति देत ह। हमार एक सुदृढ़ नगरी अहइ। हमरे नगर क सुदृढ़ परकोटा अउ सुरच्छा अहइ।

2ओकरे दुआरन क खोला ताकि भले लोग ओहमाँ प्रवेस करईं। उ सबइ लोग परमेस्सर क जिन्नगी क खरी रहे का पालन करत हीं।

3हे यहोवा, तू हमका सच्चा सान्ति प्रदान करत ह। तू

ओनका सान्ति दिया करत ह, जउन तोहरे भरोसे अहई अउर तोह पड़ बिस्सास रखत हीं।

4एह बरे सदा ही यहोवा पड़ बिस्सास करा। काहेकि “यहोवा याह” ही तोहार हमेसा सर्वदा बरे सरण क ठउर होइ।

5किन्तु अभिमानी नगर क यहोवा निहुराएस ह अउर हुवाँ क निवासियन क उ सजा दिहेस ह। यहोवा उ ऊँच बसी नगरी क धरती पड़ गिराएस। उ एका धूरि में मिलावड़ गिराएस ह।

6तब दीन अउ नम्र लोग नगरी क खण्डहरन क आपन गोड़े तले रौंदि देइहीं।

7खरापन खरे लोगन क जिअइ क ढंग अहइ। खरे लोग उ राहे पड़ चलत हीं जउन सोझ अउ सच्ची होत ह। परमेस्सर, तू उ राहे क चलइ बरे सुखद व सहल बनावत ह।

8किन्तु हे परमेस्सर! हम तोहरे निआव क मारग क बाट जोहत अही। हमार मन तोहका अउर तोहरे नाउँ क सुमिरान करइ चाहत ह।

9मोर मत राति भर तोहरे साथ रहइ चाहत ह अउर मोरे अन्दर क आत्मा हर नए दिन क सबेरे तोहरे साथ रहइ चाहत ह। जब धरती पड़ तोहार निआउ आइ, लोग खरी जिन्गी जिअइ सीख जइहीं।

10जदि तू सिरिफ दुट्ट पड़ दाया देखावत रहया तउ उ कबहुँ भी अच्छे करम करब नाहीं सीखी। दुट्ट जन चाहे भले लोगन क बीच में रहइ मुला तब उ भी बुरे करम करत रही। उ दुट्ट कबहुँ भी यहोवा क बड़प्पन नाहीं देख पाइ।

11हे यहोवा तू ओनका सजा देइ क तत्पर अहा किन्तु उ पचे एका नाहीं लखतेन। हे यहोवा तू आपन लोगन पड़ आपन असीम पिरेम देखौवत अहा जेका लखिके दुट्ट जन लज्जित होइ जात हीं। तोहार दुस्मन आपन ही पापे क आगी में जरिके भसम होइ जइहीं।

12हे यहोवा, हमका कामयाबी तोहरे ही कारण मिली ह। तउ कृपा कइके हमका सान्ति द्या।

### यहोवा आपन लोगन क नवा जीवन देइ

13हे यहोवा, तू हमार परमेस्सर अहा किन्तु पहिले हम पड़ दूसर देवता राज करत रहेन। हम दूसर सुआमियन स जुड़े भए रहेन किन्तु अब हम इ चाहित ह कि लोग बस एक ही नाउँ याद करई उ अहइ तोहार नाउँ।

14अब उ पचे सुआमी जिअत नाहीं अहई। उ सबइ भूत आपन कब्रन स कबहुँ भी जिअत नाहीं उठिहीं। तू ओनका बर्बाद करइ क निहचय किहे रहया अउर तू ओनकर याद तलक क मेट दिया।

15हे यहोवा, तू जाति क बढ़ाया। जाति क बढ़ाइके तू महिमा पाया। तू प्रदेस क चउहद्दी क बढ़ाया।

16हे यहोवा, तोहका लोग दुःखे में याद करत हीं, अउर जब तू ओनका सजा दिया करत ह तब लोग तोहार गूँगी पराथनन करत हीं।

17हे यहोवा, हम तोहरे कारण अइसे होत हैं जइसे जच्चा पीरा क झेलत मेहरारू होइ जउन बच्चा क जनम देत समय रोवत बिलखत अउर पीरा भोगत ह।

18इहइ तरह हम भी गर्भधारण कइके पीरा भोगित ह। हम जनम देइत ह किन्तु सिरिफ वायु क। हम संसार क नवा लोग नाहीं दइ पाए। हम धरती क उद्धार पड़ नाहीं लिआए पाए।

19यहोवा कहत ह, “मरे भए तोहार लोग फुन स जी जइहीं। मरे लोगन क देह मउत स जी उठी। हे मरे भए लोगो, हे धूरि में मिल भवो, उठा अउ तू पचे खुस होइ जा। उ ओस जउन तोहका घेरे भए अहइ, अइसी अहइ जइसे रोसनी में चमकत भइ ओस। धरती ओनका फुन जनम देइ जउन अबहि मरे भए अहई।”

### निआव पुस्कार या सजा

20हे मेरे लोगो, तू पचे आपने कोठरियन में जा। आपन क थोड़े समय बरे आपन कमरन में छिपा ल्या। परमेस्सर क किरोध बहोत जल्द सान्त होइ जाइ।

21यहोवा धरती क लोगन क पापन क निआव करी बरे सरण क आपन ठउरे क तजि देइ। धरती अब मरा भवा लोगन क अउर न ढौंपिहीं। धरती खुद पड़ बहाइ गवा खून क राज क फास करिहीं।

27 उ समय, यहोवा लिब्यातान क निआव करी जउन एक फ़रार सरप अहइ। यहोवा आपन बड़की अउ सकतीसाली तरवार क उपयोग कुंडली मारे सरप लिब्यातान क मारइ में करी। यहोवा सागरे क भीमकाय प्राणी क मारि डाइ।

2उ समय, हुवाँ खुसियन स भरा अंगूरे क एक बाग होइ। तू पचे ओकर गीत गावा।

3“मई यहोवा, उ बाग का धियान रखब। मई बागे क उचित समये पड़ सीचब। मई बगीचे क रात दिन रखवारी करब ताकि कउनो भी ओका नोस्कान न पहाँचाइ पावइ।

4मई कुपित नाहीं होब। जदि काँटा कँटरी मोका हुवाँ मिलइ तउ मई वइसे रौंदब जइसे फउजी रौंदत चला जात ह अउर ओनका फूँक डाउब।

5लेकिन अगर कउनो मनई मोरी सरण में आवइ अउर मोहसे मेल करइ चाहइ तउ उ चला आवइ अउर मोहसे मेल करि लेइ।

6आवइ वाले दिनन में याकूब क लोग उ पउधे क समान होइहीं जेकर उड़न उत्तिम होत हैं। याकूब क बिकास उ पनपते पउधे सा होइ जेह पड़ बहार आई होइ। फुन धरती याकूब क बंसजन स भरि जाई जइसे बृच्छन क फलन स उ भर जात ह।”

### परमेस्सर इस्त्राएल क खोज निकारत ह

7यहोवा आपन लोगन क ओतना दण्ड नाहीं दिहस ह जेतना उ ओनके दुस्मनन क दिहस ह। ओकर लोग ओतने नाहीं मरेन ह जेतने उ सबइ लोग मरेन ह जउन एन लोगन क मारइ बरे प्रयत्नसील रहेन।

8यहोवा इस्त्राएल क दूर पठइके ओकरे संग आपन विवाद सुलझाइ लेइ। यहोवा इस्त्राएल क उ तेज हवा क झोंके स उड़ाइ दिहस जउन रेगिस्ताने क गरम लू क समान होत ह।

9याकूब क अपराध कइसे छिमा कीन्ह जाइ? ओकरे पापन्क कइसे दूर कीन्ह जाइ? इ सबइ बातन घटिहीं, वेदी क सबइ सिला चकनाचूर होइके धूरि में मिल जइहीं, लबार देवतन क स्तम्भ अउर ओनकर पूजा क वेदियन तहस-नहस कइ दीन्ह जाइ।

10इ नगरी नस्ट होइ जाब्या। सब लोग कहूँ दूर भाग जाब्या। उ नगर एक खुली चरागाह जइसा होइ जाब। मवेसियन क बच्चन हुआँ घाँस खाइहीं मवेसी अंगूरे क बेलन स पातियन खाइहीं होइ।

11इ सहर उ अंगूर क बेलन क नाई अहइ जउन फसल काटि स पहिले ही सूख ग अहइ, काहेकि एकर डारन मरि गवा अहइ। एह बरे डारन टूटके गिर ग अहइ। मेहररूअन ओन डारन जराइ बरे आइँ। इ सबइ लोग मूरख अहइँ। एह बरे ओकर बनाइवाला ओकर प्रति दया नाहीं देखॉइ। ओनकर रचयिता ओनके बरे दयालु नाहीं होइ।

12उ समय, यहोवा दूसर लोगन स आपन लोगन क अलग करइ लागी। परात नदी स उ इ कारज क आरम्भ करी। परात नदी स लइके मिस्र क नदी तलक यहोवा तू इस्त्राएलियन क एक एक क कइके एकटठा करी।

13अस्सूर में अबहि मोर बहुत स लोग खोए भए अहइँ। मोर कछू लोग मिस्र क पराइ ग अहइँ। किन्तु उ समय तलक एक बिसाल भेरी बजाई जाइ अउर उ सबइ सबहि लोग वापिस यरूसलेम आइ जइहीं अउ उ पवित्तर पर्वत पइ यहोवा क समन्वा उ सबइ सबहि लोग निहुरि जइहीं।

### उत्तर इस्त्राएल क चितउनी

**28** सोमरोन क लखा। एप्रैम क मदमस्त लोग उ नगर पइ गर्व करत हीं। उ नगर पहाड़ी पइ बसा ह जेकरे चारिहूँ कइँती एक संपन्न घाटी अहइ। सोमरोन क वासी इ सोचा करत हीं कि ओनकर सहर फूलन मुकुट जइसा अहइ। किन्तु उ पचे दाखरस स धुत अहइँ अउर इ “सुन्नर मुकुट” मुरझाए पौधा स अहइ।

2लखा, मोर सुआमी एक मनई क चुनेस ह जउन मज़बूत अउर वीर अहइ। उ व्यक्ति इ देस में इ तरह आइ जइसे ओलन अउ बर्खा क तूफान आवत ह। उ देस में इ तरह आइ जइसे बाढ़ आवा करत ह। उ समारिया क धरती पइ फेंकी।

3नसे में धुत एप्रैम क लोग आपन “सुन्नर मुकुट” पइ गर्व करत हीं किन्तु उ नगरी गोड़े तले रौंदी जाइ।

4उ नगर पहाड़ी पइ बसा अहइ जेकरे चारिहूँ कइँती एक सम्पन्न घाटी अहइ। किन्तु उ “फूलन क सुन्नर मुकुट” बस एक मुरझात भवा पौधा अहइ। उ नगर गर्मी में अंजीर क पहिले फले क समान होई। जब कउनो उ पहली अंजीर क लखत ह तउ हाली स तोड़के ओका चट कइ जात ह।

5उ समय, सर्वसक्तीमान यहोवा, “सुन्नर मुकुट” बनी। उ ओन बचे भए आपन लोगन बरे “फूलन क सानदार मुकुट” होइ। 6फुन यहोवा ओन निआव क अर्धासन क बुद्धि प्रदान करी जउन ओकर आपन लोगन क सासन करत हीं। नगर दुआरन पइ जुद्धन में लोगन यहोवा सक्ती देइ। 7किन्तु अबहि उ सबइ मुखिया लोग मदमस्त अहइँ। याजक अउ

नबी सबहिं दाखरस अउर सुरा स धुत अहइँ। उ सबइ लइखइत अहइँ अउर खाले भहराइ पड़त अहइँ। नबी जब आपन सपनन लखत हीं। निआव क अधीस जब निआव करत हीं तउ उ पचे नसे में बूड़े भए होत हीं। 8हर खाइ क मेज उल्टी स भरी भइ अहइ। कहूँ भी कउनो स्वच्छ ठउर नाहीं रहा अहइ।

### परमेस्सर आपन लोगन क सहायता करइ चाहत ह

9उ पचे कहा करत हीं, इ मनई कउन अहइ? इ केका सिच्छा देइ क कोसिस करत अहइ? उ आपन सँदिसा केका समुझावत अहा? का ओन बच्चन क जेनकर अबहि-अबहि दूध छोड़वा गवा अहइ? का ओन बच्चन क जेनका अबहि अबहि आपन महतारियन क छाती स दूर कीन्ह गवा ह? 10एह बरे यहोवा ओनसे इ तरह बोलत ह जइसे उ पचे दुधमुहौँ बच्चन होई।

“सौ लासौ सौ लासौ काव लाकाव काव लाकाव जेइर साम जेइर साम।” \*

11फिन यहोवा ओन लोगन स बात करी ओकर होंठ कोंपत भए होइहीं अउर उ ओन लोगन स बातन करइ मैं दूसर विचित्र भाखा प्रयोग करी।

12यहोवा पहिले ओन लोगन स कहे रहा, “हिआँ विस्त्राम क एक ठउर अहइ। थके माँदे लोगन क हिआँ आवइ द्या अउर विस्त्राम पावइ द्या। इ सान्ति क ठउर अहइ।”

किन्तु लोग परमेस्सर क सुनइ नाहीं चाहें। 13तउ परमेस्सर क बचन कउनो विचित्र भासा क जइसे होइ जइहीं।

“सौ लासौ सौ लासौ काव लाकाव काव लाकाव जेइर साम जेइर साम।”

तउ लोग जब चलिहीं तउ पाछे कइँती लुढ़क जइहीं अउर जख्मी होइहीं। लोगन क फँसाइ लीन्ह जाइ अउर उ पचे धरा जइहीं।

### परमेस्सर क निआव स कउनो नाहीं बच सकत

14हे, यरूसलेम क आग्या क नाहीं मानइवाले अभिमानी मुखिया लोगो, तू यहोवा क सँदिसा सुना। 15तू लोग कहत अहा, “हम मउत क संग एक वाचा कीन्ह ह। सेओल (मौत क पहँटा) क संग हमार एक अनुबंध अहइ। एह बरे हम दण्डित नाहीं होब। दण्ड हम पचन्क नोस्कान पहाँचाए बगैर हमरे पास स निकरि जाइ। आपन चालाकियन अउर आपन झूठन क पाछे हम पचे लुकाइ जावइ।”

16एन बातन क कारण मोर सुआमी यहोवा कहत ह: “मई एक पाथर एक ठु कोने क पाथर सिय्योन मैं धरती पइ गइब। इ एक अत्यन्त मूल्यवान पत्थर होइ। इ बहोत महत्वपूर्ण पाथर पई ही हर कउनो वस्तु क निर्माण होइ। जेहमाँ बिस्सास होइ, उ कबहुँ घबराई नाहीं।

**सो लासौ ... जेइर साम** सॉझ इ साइद कउनो हिब्रू गीत अहइ। इ गीत क जरिये बच्चन क लिखब सिखावा जात रहा। गीत क अनुवाद इ सब्दन में कीन्ह जाइ सकत ह: “एक आग्या हिआँ एक आग्या हुँवा, एक नेम हिआँ एक नेम हुवाँ, एक पाठ हिआँ एक पाठ हुवाँ।”

17“लोग देवारे क सोझ लखइ बरे जइसे सूत डाइके लखत हीं, वइसे ही मई जउन उचित अहइ ओकरे बरे निआव अउर खरेपन क प्रयोग करब।

“तू दुट्ट लोग आपन झूठ अउर चालाकियन बरे आपन क छुपावइ क जतन करत अहा, किन्तु तोहका दण्ड दीन्ह जाइ। उ दण्ड अइसा ही होइ जइसे तोहरे सबन्क छुपावइ क ठउरन क नस्ट करइ बरे कउनो तूफान या कउनो बाढ़ आवत होइ। 18मउत क साथे तोहरे वाचा क मेट दीन्ह जाइ। अधोलोक क संग भई तोहार संधि भी तोहार मदद नहीं करी।

“जब खउफनाक सजा तोहे सबन पइ पड़ी तू पचे कुचरा जाब्या। 19उ हर दाई जब आई तू पचन्क हुवाँ लइ जाइ। तोहार पचन्क सजा भयानक होइ। तू पचन्क भिन्सारे दर भिन्सारे अउर दिन रात सजा मिली।

20जब तू पचे इ कहानी क समुझब्या: कउनो मनसेधू एक अइसे बिछउना पइ सोवइ क जतन करत रहा जउन ओकरे बरे नान्ह रहा। ओकरे लगे एक कंबल रहा जउन एतना चौड़ा नहीं रहा कि ओका ढाक लेइ। त उ बिछउना अउर उ कम्बल ओकरे बरे बियर्थ रहेन अउर लखा तोहार वाचा भी तोहरे सबन्क बरे अइसा रही।”

21“यहोवा वइसे ही जुद्ध करी जइसे उ पराजीम नाउँ क पहाड़ पइ किहे रहा। यहोवा वइसे ही कोहाइ जाइ जइसे उ गिबोन क घाटी में भवा रहा। तब यहोवा ओन कामन क करी जउन ओका निहचय ही करइ क अहई। यहोवा कछू बिचित्र काम करी। किन्तु उ आपन काम क कर देइ। ओकर काम कउनो एक अजनबी क काम अहइ। 22अब तू पचन्क इ सबइ बातन क मजाक नहीं उड़ाबइ चाही। जदि तू पचे अइसा करब्या तउ तोहार पचन्क बन्धन क रस्सियन अउर जियादा कस जइहीं। सर्वसक्तीमान यहोवा इ समूचे प्रदेस क नस्ट करइ क ठान लिहस ह। जउन सब्द मई सुने रहेउँ, अटल अहई। तउ उ सबइ बातन जरूर घटिहीं।

### यहोवा खरा दण्ड देत ह

23जउन सँदेसा मई तू पचन्क सुनावत हउँ, ओका धियान स सुना। 24का कउनो किसान आपने खेते क हर समय जोनत रहत ह? नहीं। का उ माटी क हर समय सँवारत रहत ह? नहीं। 25किसान आपन धरती क तइयार करत ह, अउर फुन ओहमाँ बिआ अलग अलग डावत ह। किसान अलग-अलग बीजन क रोपाई, ढंग स करत ह। किसान सौँफ क बिआ बिखेरत ह अउर एक किसान कठिए गोहूँ क बोवत ह। एक किसान खास जगह पइ अउ लगावत ह। एक किसान कठिए गोहूँ क बिअन क खेत क मेंड पइ लगावत ह।

26ओकर परमेस्वर ओका सिच्छा देत ह अउर अच्छे तरह स ओका निर्देस देत ह। 27का कउनो किसान तेज दौँतदार तखन क प्रयोग सौँफ क दानन क गहावइ बरे करत ह? नहीं। का कउनो किसान जीरा क गहावइ बरे कउनो छकड़े क प्रयोग करत ह? नहीं। एक किसान इ मसालन क बीअन क छिलका उतारइ बरे एक नान्ह स कुबरी क प्रयोग ही करत ह।

28लोगन क रोटी बनावइ बरे अनाज क पीसइ परी, किन्तु उ पचे लगातार अनाज जिन पीसत रहतेन। एक किसान अनाज क दलइ क बरे अनाज दलइ क पहिया अनाजे पइ फिराइ क परी, किन्तु ओका अनाजे क रौँदइ बरे घोड़न क समूह क जरूरत नहीं परी! ठीक इहइ तरह, परमेस्वर आपन लोगन क लगातार सजा नहीं देत ह! 29सर्वसक्तीमान यहोवा स इ पाठ मिलत ह। यहोवा अद्भुत सलाह देत ह। यहोवा फुरइ बहोत बुद्धिमान अहइ।

### परमेस्वर क यरूसलेम स पिरेम

29 परमेस्वर कहत ह, “हे अरीएल, अरीएल! तू उ सहर अहइ जहाँ दाऊद छावनी डाए रहा। लोग इ सहर क बरिस दर बरिस पवित्तर भोज बरे जात्र किहेस। 2किन्तु जब मई अरीएल क अन्त करब्या, तउ हुवाँ सोक अउ विलाप होइ। किन्तु उ तब भी मोर अरीएल होइ! 3तब मई तोहका फउजन क सिबिर स घेरउब। मई तोहार विरोध में जुद्ध क बुर्ज अउर ढलवान बनाउब। 4तू पचे धरती पइ गिरि जाब। धूल स तोहार कमज़ोर धीमा फुसफुसाहत क आवाज़ अइसा होइ जइसे धरती प कउनो भूत होइ।”

5तोहार दुस्मन धूर क कण क भाँति अनगिनत होइहीं। तोहार क्रूर अत्याचार अनगिनत होइहीं जइसे भूसे आँधी में उड़त भए अहा। 6सर्वसक्तीमान यहोवा बादरन क गर्जन स, धरती क काँपे स, अउर जहा ध्वनियन स तोहरे लगे आइ। यहोवा दण्डित करी। यहोवा तूफान, तेज आँधी अउर आगी क प्रयोग करी जउन बारिके सबहिँ क नस्ट कइ देइ। 7तउ रात क सपना क नाई जउन कि जागते ही गाइब होइ जात ह अइसा ही अरीएल क चारिहुँ कइँती स घेरा भवा फउज अउर ओनके जुद्ध यंत्र जउन कि ओकर खिलाफ घूमत रहत ह, गाइब होइ जात हीं। 8मुला ओन फउजन क एक सपना जइसा होइ। उ सबइ फउजन उ सब चिजियन न पइहीं जेनका उ पचे चाहत हीं। इ वइसा ही होइ जइसा भूखा मनई भोजन क सपन लखइ अउर जागइ पइ उ आपन क वइसा ही भूखा पावइ। इ वइसा ही होइ जइसे कउनो पिआसा पानी क सपन लखइ अउर जब जागइ तब आपन क पियासा पावइ।

सिय्योन क विरोध में लड़त भए सबहिँ देस फुरइ अइसे ही होइहीं। इ बात ओन पइ खरी उतरी। देसन क उ सबइ चिजियन नहीं मिलिहीं जेनका ओनका चाह अहइ।

9आस्चर्य चकित होइ जा अउर अचरज स भरि जा। तू पचे सबहिँ धुत होब्या किन्तु दाखरसु स नहीं। लखा अउर अचरज करा। तू लइखइबाब्या अउर भहराइ जाब्या किन्तु सराबे स नहीं।

10यहोवा तोहका सबन्क सोवाएस ह। यहोवा तोहार आँखिन मूँदि दिहस ह। (तोहार आँखिन नहीं अहई)

11मई तू पचन्क बतावत हउँ कि इ सबइ बातन घटिहीं। किन्तु तू पचे मोका नहीं समुझ रह्या। मोर सब्द उ किताबे क समान अहई, जउन बन्द अहई अउर जेह पइ एक मोहर लगी बाटइ।

12तू पचे उ किताबे क एक अइसे मनई क दइ सकत ह जउन पढ़ सकत ह अउर उ मनई स कहि सकत ह कि उ

उ किताबे क पढ़इ। मुला उ मनई कही, “मई किताबे क बाँच नाही सकत काहेकि इ बन्द अहइ अउर मई एका खोल नाही सकत।” या तू उ किताबे क कउनो भी अइसे मनई क दइ सकत ह जउन बाँच नाही सकत, अउर उ मनई स कहि सकत ह कि उ उ किताबे क पढ़इ। तब उ मनई कही, “मई इ किताबे क नाही बाँचि सकत काहेकि मई पढ़ब नाही जानत।”

13मोर सुआमी कहत ह, “इ सबइ लोग कहत हीं कि उ पचे मोहसे पिरेम करत हीं। आपन मुँह क सब्दन स उ पचे मोरे बरे आदर परगट करत हीं। मुला ओनकर मन मोहसे दूर अहई। उ आदर जेका उ पचे मोरे बरे देखौवत हीं, बस कोरे मानव नेम अहई जउन उ पचे रट डाए अहई। 14तउ मई एन लोगन क सकती स पूर अउर अचरज भरी बातन करत भए आश्चर्य चकित करत रहब। ओनकर बुद्धिमान मनई समझइ मँ असमर्थ होइ जइहीं।”

15धिवकार अहइ ओन लोगन क जउन यहोवा स बातन छिपावइ क जतन करिहीं। उ पचे सोचत हीं कि यहोवा तउ समझी ही नाही। उ सबइ लोग आँधियारा मँ काम करत हीं। उ सबइ लोग आपन मन मँ कहा करत हीं, “हम पचन्क कउनो लख सकत नाहीं। हम पचे कौन अही, एका कउनो मनई नाही जानी।”

16तू पचे भ्रम मँ पड़ा अहा। तू पचे सोचा करत अहा, कि माटी कोहार क बराबर अहइ। तू पचे सोचा करत अहा कि कृति आपन कर्ता स कह सकत ह, “तू मोर रचना नाही किहा ह।” इ वइसा ही अहइ, जइसे गगरी क आपन बनावइवाले कोहार स इ कहब, “तू समझत्या नाही तू का करत अहा।”

### एक उत्तिम समय आवत अहइ

17इ फुरइ अहइ: कि लबानोन थोड़े समय पाछे, आपन बिसाल ऊँच बृच्छन बरे सपाट जोते खेतन मँ बदल जाइ अउर सपाट खेत ऊँच-ऊँच बृच्छन वाले सघन जंगलन क रूप लइ लेई। 18किताबे क सब्दन क बहिरे सुनिहीं, आँधर आँधियारे अउ कोहरे मँ स लखि सकिहीं। 19यहोवा दीन जनन क खुस करी। दीन जल इस्त्राएल क उ पवित्तरतम मँ आनन्द मनइहीं।

20अइसा तब होइ जब नीच अउ क्रूर मनई खत्म होइ जइहीं। अइसा तब होइ जब बुरा काम करइ मँ आनन्द लेइवाले लोग चले जइहीं। 21(उ सबइ लोग दूसर लोगन क बारे मँ झूठ बोला करत हीं। उ पचे कचहरी मँ लोगन क फँसावइ क जतन करत हीं। उ पचे भोले भाले लोगन क नस्त करइ मँ जुटे रहत हीं।)

22तउ यहोवा याकूब क परिवार स कहेस। (इ उहइ यहोवा अहइ जउन इब्राहीम क अजाद किहे रहा।) यहोवा कहत ह, “अब याकूब (इस्त्राएल क लोग) क लज्जित नाही होब होइ। अब ओकर मुँह कबहुँ पिअर नाही होइ चाही। 23उ आपन सबहिं संतानन क लखी अउर कही कि मोर नाउँ पवित्तर अहइ। एन संतानन क मई आपन हाथन स बनाएउँ ह अउर इ सबइ संतानन मनिहीं कि याकूब क पवित्तर परमेस्सर वास्तव मँ पवित्तर अहइ अउर इ सबइ

संतानन इस्त्राएल क परमेस्सर क आदर देइहीं। 24उ सबइ लोग जउन गलतियन करत हीं, अब समुझ जइहीं। उ सबइ लोग जउन सिकाइत करत रहत हीं अब निर्देसन क अंगीकार करिहीं।”

### इस्त्राएल क परमेस्सर पइ बिस्सास रखइ चाही

30 यहोवा कहेस, “मोरे एन बच्चन क लखा, इ सबइ मोर बात नाही मानतेन। इ सबइ योजनन बनावत हीं मुला मोर मदद नाही लेइ चाहतेन। इ सबइ दूसर जातियन क साथ समझौता करत हीं जबकि मोर आतिमा ओन समझौतन क नाही चाहत। इ सबइ लोग आपन मुँह पइ पाप क बोझ बढ़ावत चला जात बाटेन। 2इ सबइ बच्चन मोहसे कछू नाही पूछतेन कि का अइसा करब उचित अहइ। ओनका उम्मीद अहइ कि फिरौन ओनका बचाइ लेइ। उ पचे चाहत हीं कि मिस्त्र ओनका बचाइ लेइ।

3“मुला मई तू पचन्क बतावत हउँ कि मिस्त्र मँ सरण लेइ स तोहार पचन्क बचाव नाही होइ। मिस्त्र तोहार सबन्क रच्छा करइ मँ सफल नाही होइ। 4तोहार पचन्क अगुअन सोअन मँ गवा अहई अउर तोहार पचन्क राजदूत हानेस क चला गवा अहई। 5किन्तु ओनका निरासा ही हाथे लागी। उ पचे एक अइसे रास्ट्र पइ बिस्सास करत अहई जउन ओनका नाही बचाइ पाइ। मिस्त्र बेकार अहइ, मिस्त्र कउनो मदद नाही देइ। मिस्त्र क कारण ओनका अपमानित अउ लज्जित होइ पड़ी।”

### यहूदा क परमेस्सर क सँदसा

6दक्खिन क गोरूअन बरे दुःखद सँदसा:

नेगव बिपतियन अउर खतरन स भरा एक तु देस अहइ। इ पहँटा सेरन, नागन अउर उड़इवाले साँपन स भरा पड़ा अहइ। किन्तु कछू लोग नेगव स होत भए जात्रा करत अहई उ पचे मिस्त्र कइँती जात अहई। ओन लोग गदहन क पीठन पइ आपन धन-दौलत लादे भए अहई। ओन लोग आपन खजाना ऊँटन क पीठन पइ लाद रखे अहई अर्थात् इ सबइ लोग एक अइसे देस पइ भरोसा रखे अहई जउन ओनका नाही बचाइ सकत। 7मिस्त्र ही उ बेकार क देस अहइ। मिस्त्र क मदद बेकार अहइ। एह बरे मई मिस्त्र क एक तु अइसा रहाब कहत हउँ जउन निठल्ला पड़ा रहत ह।

8अब एका एक चिह्न पइ लिख द्या ताकि सबहिं लोग एका लखि सकईं। एका एक तु किताबे मँ लिख द्या। एनका अन्तिम दिनन बरे लिख द्या। इ सबइ बातन सुदूर भविस्स क साच्छी होइहीं।

9इ सबइ लोग ओन बच्चन क जइसे अहई जउन आपन महतारी-बाप क बात नाही मानतेन। उ सबइ लबार अहई अउर यहोवा क सिच्छन क सुनइ तलक नाही चाहतेन। 10उ पचे नबियन स कहा करत हीं, “हम क जउन कछू ठीक बातन करइ चाही ओनके बारे मँ दर्सन जिन किया करा। हम क सच्चाई जिन वतावा। हम स अइसी अच्छी बातन कहा, जउन हम क नीक लाग सकत। हमरे बरे केवल अच्छी बातन ही लखा। 11जउन बातन फुरइ घटइ क अहई, ओनका लखब

बन्द करा। हमारे राहे स हटि जा। इस्राएल क उ पवित्तर परमेस्सर क बारे में हम का बताउब बन्द करा।”

### यहूदा क मदद केवल परमेस्सर स आवत ह

12इस्राएल क पवित्तर परमेस्सर कहत ह, “तू लोग यहोवा स इ सँदिसा क मानइ स मना कइ दिहा ह। तू लोग सहायता बरे लड़ाई-झगड़न अउर झूठ पड़ निर्भर रहइ चाहत अहा। 13तू पचे काहेकि एन बातन बरे अपराधी अहा, एह बरे तू पचे एक ठु अइसी ऊँच देवार क समान अहा जेहमों दरारन आइ चुकी अहई। उ देवार ढह जाइ अउर नान्ह नान्ह टूकन में टूटिके ढेर होइ जाइ। 14तू पचे माटी क उ बड़के बर्तन क समान होइ जाब्या जउन टूटि टूटिके नान्ह नान्ह टूकन में बिखरि जात ह। इ सबइ टूकन बेकार होत हैं। एन टूकन में स तू पचे न तउ आगी स बरत कोयला ही उठाइ सकत ह अउर न ही क उनो जोहड़ स पानी।”

15इस्राएल क उ पवित्तर, मोर सुआमी यहोवा कहत ह, “जदि तू पचे मोरी कइँती लउट आवा तउ तू पचे बचि जाब्या। जदि तू पचे मोहे पड़ भरोसा रखब्या तबहिँ तू पचन्क तोहार सबन्क बल मिली मुला तू पचन्क सान्त रहब होइ।”

मुला तू पचे तउ वइसा करइ ही नाहीं चाहल्या। 16तू पचे कहत अहा, “नाहीं, हम पचन्क घोड़न क जरूरत अहइ जेन पड़ चढिके हम पचे दूर पलाइ जाइ।” इ फुरइ अहइ तू पचे घोड़न पड़ चढिके दूर पलाइ जाब्या मुला दुस्मन तोहार सबन्क पाछा करी अउर उ तोहारे सबन्क घोड़न स जियादा तेज होइ।

17एक दुस्मन ललकारी अउर तोहार पचन्क सबहिँ लोग ओकरे समन्ना स भाग खड़ा होइ जइहीं। हुवों तू पचे अइसे अकेल्ले बचा रहि जाब्या, जइसे पहाड़ी पड़ लगा तोहार पचन्क झण्डे क डण्डा।

18यहोवा तू पचन्पइ आपन करूणा दर्सावत ह। यहोवा बाट जोहत ह। यहोवा तू पचन्क सुख चैन देइ बरे तइयार खड़ा अहइ। यहोवा खरा परमेस्सर अहइ अउर हर उ मनई जउन यहोवा क मदद क इंतजार में अहइ, धन्न (आनन्दित) होइ।

19हाँ, हे सियोन पर्वत पड़ रहइ वालो, हे यरूसलेम क बसइयो, तू लोग रोवत बिलखत नाहीं रहब्या। यहोवा तोहारे पचन्क रोवइ क सुनी अउर उ तू पचन्पइ दया करी। यहोवा तोहार पचन्क सुनी अउर उ तोहार पचन्क मदद करी।

### परमेस्सर आपन लोगन क मदद करी

20जदपि मोर यहोवा परमेस्सर तू पचन्क दुःख अउ कस्ट दइ सकत ह अइसे ही जइसे माना उ अइसा रोटी-पानी होइ, जेका तू पचे हर दिन खात-पिअत ह्वा। किन्तु असल में परमेस्सर तउ तोहार पचन्क सिच्छक अहइ, अउर उ तू पचन्स छिपा नाहीं रही। तू पचे खुद आपन आँखिन स आपन उ सिच्छक क लखब्या। 21तब अगर तू पचे बुरे काम करब्या अउर बुरी जिन्नगी जीब्या (दाहिन कइँती या बाई कइँती) तउ तू पचे आपन पाछे एक आवाज क कहत सुनब्या, “खरी राह इ अहइ। तू पचन्क इहइ राहे में चलब अहइ।”

22तोहारे पचन्क लगे चाँदी सोने स मढ़ी मूरतियन अहई। ओन झूठे देवतन तू पचन्क (पाप पूर्ण) बनाइ दिहेन ह। लेकिन तू पचे ओन झूठे देवतन क सेवा करब तजि देब्या। तू पचे ओन देवतन क कूड़े कचरे अउर मइले चिथड़न क समान दूर लोकउब्या।

23उ समय, यहोवा तोहारे पचन्बरे बर्खा पठइ। तू पचे खेतन में बिआ बोउब्या, अउर धरती तोहारे पचन्बरे भोजन उपजाइ। तू सबन्क भरपूर उपज मिली। तोहार पचन्क पसुअन बरे खेतन में भरपूर चारा होइ। तोहारे पचन्क पसुअन बरे हुवों बड़ी-बड़ी चरागाहन होइहीं। 24तोहारे पचन्क मवेसियन अउ तोहारे सबन्क गदहन क जइसे चारा क जरूरत होइ, उ सब ओनका मिली। खइया क ऐँतना इफरात होइ कि तू पचन्क आपन पसुअन क खाइ बरे भी फावड़न अउर पंजन स चारा क फइलाउव होइ। 25हर पर्वत अउर पहाड़ियन पड़ पानी स भरी जल धान होइहीं। इ सबइ बातन तब घटिहीं जब बहोत स लोग मरि चुकिहीं अउर मीनारन ढहि चुकिहीं।

26उ समय चाँद क चाँदनी सूरज क धूप जइसी उज्जर होइ जाइ। सूरज क रोसनी आज स सात गुना जियादा उज्जर होइ जाइ। सूरज एक दिन में ऐँतनी रोसनी देइ लागी जितनी उ पूरे सप्ताह में देत ह। इ सबइ बातन उ समय घटिहीं जब यहोवा आपन टूटे लोगन क मरहम पट्टी करी अउर सजा क कारण जउन चोटन ओनका आई अहई, ओनका चंगा करी। 27लखा! बहोत दूर स यहोवा क नाउँ आवत अहइ। उ बहोत किरोधित अहइ। उ सँदिसा जउन उ लावत ह भाड़ी वजन क नाई अहइ। ओकर होंठ क सब्द रूखा अहइ, ओकर जीभ एक बरत भए आग जइसी अहइ। 28यहोवा क साँस (आतिमा) एक अइसी बिसाल नदी क तरह अहइ जउन तब तलक चढ़त रहत ह, जब तलक उ गटइ तलक नाहीं पहुँच जात। यहोवा सबहिँ रास्ट्रन क निआव करी। इ वइसा ही होइ जइसे उ ओनका बिनासे क छलनी स छान डावइ। इ नियंत्रन वइसा होइ जइसे घोड़सवार लगाम क जरिया स घोड़ा क नियंत्रन करत ह, यहोवा रास्ट्रन क नियंत्रन करब अउर ओनकर अगुवाइ उ जगह तलक करब जहाँ उ ओनका लेइ जाइ चाहत ह।

29उ समय, तू पचे खुसी क गीत गउब्या। उ समय ओन रातिन क जइसा होइ जब तू पचे आपन उत्सव मनाउब सुरू करत अहा। तू पचे ओन मनइयन क समान खुस होब्या जउन इस्राएल क चट्टान यहोवा क पर्वत पड़ जात समय बाँसुरी क सुनत भए प्रसन्न होत हैं।

30यहोवा सबहिँ लोगन क आपन महान वाणी सुनइ क मजबूर करी। यहोवा लोगन क किरोध क संग खाले आवत भइ आपन सक्तीसाली भुजा लखइ क मजबूर करी। इ भुजा उ महा आगी क नाई होइ जउन सब कछू भसम कइ डावत ह। यहोवा क सक्ती उ आँधी क जइसी होइ जउन तेज बर्खा अउ ओलन क संग आवत ह। 31अस्सूर जब यहोवा क अवाज सुनी तउ उ डेराइ जाइ। यहोवा लाठी स अस्सूर पड़ वार करी। 32यहोवा अस्सूर क पीटी अउर इ पिटाई अइसी होइ जइसे कउनो नगाड़न अउ वीणन पड़ संगीत बजावत हई। यहोवा आपन सक्तीसाली भुजा (सक्ती) स अस्सूर क हराई।

33तोपेत क बहोत पहिले स ही तइयार कइ लीन्ह गवा अहइ। राजा बरे इ तइयार अहइ। इ भट्टी बहोत गहिर अउर बहोत चौड़ी बनाई गइ अहइ। हुवाँ काठे क एक बहोत बड़का ढेर अउ आगी मौजूद अहइ। यहोवा क आतिमा बरत भइ गंधक क नदी क रूप में आइ अउर एका भसम कइके नस्ट कइ देइ।

### इस्राएल क परमेस्सर क सक्ती पइ भरोसा रखइ चाही

**31** ओन लोगन क धिक्कार अहइ जउन मदद पावइ बरे मिस्र कइँती उतरत अहइँ। इ सबइ लोग घोड़न चाहत हीं, घोड़न ओनका बचाइ लेइहीं। लोगन क आसा बाटइ कि मिस्र क रथ अउर घुड़सवार सैनिक ओनका बचाइ लेइहीं। लोग सोचत हीं कि उ पचे सुरच्छित एह बरे अहइँ कि इ एक बिसाल सेना अहइ। लोग इस्राएल क पवित्तर (परमेस्सर) पइ भरोसा नाहीं रखतेन। लोग यहोवा स मदद नाहीं माँगतेन।

2किन्तु, यहोवा ही बुद्धिमान अहइ अउर उ यहोवा ही अहइ जउन ओन पइ विपत्तियन ढाइ। लोग यहोवा क आदेस क नाहीं बदल पइहीं। यहोवा बुरे लोगन (यहूदा) क खिलाफ खड़ा होइ अउर जुद्ध करी। यहोवा ओन लोगन (मिस्र) क खिलाफ जुद्ध करी, जउन ओनका मदद पहोंचावइ क जतन करत हीं।

3मिस्र क लोग मात्र मनई अहइँ परमेस्सर नाहीं। मिस्र क घोड़न मात्र पसु अहइँ, आतिमा नाहीं। यहोवा आपन हाथ अगवा बढ़ाई अउर सहायक (मिस्र) हार जाइ अउर मदद चाहइवाले लोगन (यहूदा) क पतन होइ। उ पचे सबहिं लोग साथ साथ मिट जइहीं।

4यहोवा मोहसे इ कहेस, “जब कउनो सेर या सेर क कउनो बच्चा कउनो पसु क भच्छइ बरे धरत ह तउ उ मरे भए पसु पइ खड़ा होइ जात ह अउर दहाइत ह। उ समय उ सक्तीसाली सेर क कउनो भी डेराइ नाहीं पावत। अगर चरवाहन आवई अउर उ सेर क हँका करइ लागई तउ भी उ सेर डेराइ नाहीं। लोग केर्तेना ही सोर करत रहइँ, मुला उ सेर नाहीं पराई।”

इहइ तरह सर्वसक्तीमान यहोवा सिन्धोन पर्वत पइ उतरी। उ पर्वत पइ यहोवा जुद्ध करी। 5सर्वसक्तीमान यहोवा वइसे ही यरूसलेम क रच्छा करी जइसे आपन घोंसलन क ऊपर उड़त भइ चिरइयन। यहोवा ओका बचाइ अउर ओकर रच्छा करी। यहोवा ऊपर स होइके निकरि जाइ अउर यरूसलेम क रच्छा करी।

6हे, इस्राएल क सन्तान! तू पचे परमेस्सर स विद्रोह किहा। तू पचन्क परमेस्सर कइँती मुड़ आवइ चाही। 7तब लोग ओन सोना चाँदी क मूरतियन क पूजब तजिहीं अउर जेनका तू पचे बनाया ह।

8अस्सूर क लोग तरवार क जरिये मारि दीन्ह जाइ, मुला उ तरवार कउनो मनई क नाहीं होइ। हौं अस्सूर क लोग तरवार स भाग जाइ क कोसिस करी, किन्तु ओनका जवान मनइयन क धइ लेहीं अउ दास बनाइ लेहीं। 9ओन लोगन क पनाह क स्थान क तबाह कीन्ह जाइहीं। ओनकर नेता पराजित कइ दीन्ह जइहीं अउर उ पचे आपन झण्डन क

तजि देइहीं। इ सबइ संदेसा उ यहोवा क अहइ जेकर आगी थल (वेदी) सिन्धोन पर्वत पइ अहइ। हौं ओकर भट्टी (वेदी) यरूसलेम में अहइ।

### मुखिया लोगन क खरा अउर सच्चा होइ चाही

**32** लखा, राजा लोग आपन राज क निआव बरे सासन करब्या। अधिकारियन भुईँया क निआव करइ बरे सक्ती राखब्या। 2जदि अइसा होइ तउ राजा उ जगहिया क नाई होइ जाइ जहाँ लोग आँधी अउ बर्खा स बचइ बरे आस्रय लेत हीं। इ झुरान धरती में जल धारन क नाई होइ। इ अइसा ही होइ जइसे गरम प्रदेस में कउनो बड़की चट्टान क ठण्डी छाया। 3तब लोग ओका ठीक स देखत ही जउन ओकर आँख लखत ह। लोग ओका धियान स सुनिही जउन ओकर कान सुनत ह। 4उ पचे लोग जउन उतावला अहइँ, उ सबइ सही फैसला लेइहीं। उ सबइ लोग जउन अबहिं साफ साफ नाहीं बोल पावत हीं, उ पचे साफ साफ अउर जल्दी बोलइ लगिहीं। 5मूरख लोग महान मनई नाहीं कहवइहीं। लोग सइयंत्र करइवालन क सम्मान जोगग नाहीं कहिहीं।

6एक मूरख मनई तउ बेवकूफी स भरी बातन कहत ह अउर उ आपन मने में बुरी बातन क ही जोजनन बनावत ह। मूरख मनई अनुचित कारज करइ क ही सोचत ह। मूरख मनई यहोवा क बारे में गलत बातन कहत ह। मूरख मनई भुखान क खइया क खाइ नाहीं देत। मूरख मनई पियासे लोगन क पानी नाहीं पिअइ देत। 7उ मूरख मनई बुराई क एक हथियार क रूप में इस्तेमाल करत ह। उ निर्धन लोगन स झूठ क जरिये बरबाद करइ बरे बुरे बुरे राहन बनावत ह। ओकर इ सबइ झूठी बातन गरीब लोगन क निस्पच्छ निआव मिहाइ स दूर रखत ह।

8मुला एक तु नीक मुखिया नीक काम करइ क योजना बनावत ह अउर ओकर उ सबइ नीक बातन ही ओका एक बढ़िया नेता बनावत ह।

### बुरा समय आवत अहइ

9तोहमाँ स कछू मेहररूअन अबहिं खुस अहइँ। तू पचे सुरच्छित अनुभव करति अहा। मुला तू पचन खड़े होइके जउन बचन मई बोलत हउँ ओनका सुनइ चाही। 10मेहररूओ तू पचे अबहिं सुरच्छित अनुभव करति अहा किन्तु एक बरिस पाछे तू पचन बिपत्ति आवइवाली अहइ। काहेकि तू पचे अगले बरिस अंगूर एकट्ठा नाहीं करिब्यू एकट्ठा करइ बरे अँगूर होइहीं ही नाहीं।

11मेहररूओ, अबहिं तू पचे चइन स अहा, किन्तु तू पचन्क डेराइ चाही। मेहररूओ, अबहिं तू पचे सुरच्छित अनुभव करति अहा, किन्तु तू पचन्क चिन्ता नाहीं करइ चाही। आपन सुन्नर ओढ़नन क उतारि बहावा अउर सोक वस्त्रन क धारण कइ ल्या। ओन वस्त्रन क आपन कमर पइ लपेट ल्या। 12आपन सोक स भरी छातियन पइ ओन सोक वस्त्रन क पहिर ल्या।

विलाप करा काहेकि तोहार खेत उजरि गवा अहइँ। तोहार पचन्क अँगूरे क बगीयन जउन कबहुँ अँगूर दिया



करत रहेन, अब खाली पड़ा अहई। 13मोरे लोगन क धरती बरे बिलाप करा। बिलाप करा, काहेकि हुवाँ बस काँटन अउ खरपतवार ही उगा करिहीं। विलाप करा इ नगर बरे अउर ओन सब भवनन बरे जउन कबहुँ आनन्द स भरे भए रहेन।

14लोग इ प्रमुख नगर क छोड़ जइहीं। इ महल अउर इ मीनारन वीरान छोड़ दीन्ह जइहीं। उ पचे जनावरन क मौँद जइसे होइ जइहीं। नगर में जंगली गदहन बिहार करिहीं। हुवाँ भेड़िन घास चरत फिरिहीं।

15-16तब तलक अइसा ही होत रही, जब तलक परमेस्सर ऊपर स हमका आपन आतिमा नाहीं देइ। अब धरती पड़ कउनो अच्छाई नाहीं अहइ। इ रेगिस्तान स बनी भई अहइ मुला आवइवाले समय में इ रेगिस्तान उपजाऊ मैदान होइ जाइ अउर इ उपजाऊ मैदान एक हरे भरे वन जइसा वन जाइ। चाहे जंगल होइ चाहे उपजाऊ धरती हर कहुँ निआव अउ निस्पच्छता मिली। 17उ नेकी सदा-सदा क बरे सान्ति अउ सुरच्छा क लियाइ। 18मोर लोग सान्ति क इ सुन्नर छेत्र में बसा करिहीं। मोर लोग सुरच्छा क तम्बुअन में रहा करिहीं। उ पचे निहचिंतता क संग सान्ति स पूर्ण जगहन में निवास करिहीं।

19किन्तु इ सबइ बातन घटई एहसे पहिले उ वन क गिरब होइ। उ नगर क पराजित होइ क होइ। 20तू पचनमें स कछू लोग हर जलधारा क निअरे बिआ बोवत अहा। तू पचे आपन मवेसियन अउ आपन गदहन क एहर-ओहर चरइ बरे खुला छोड़ देत अहा। तू लोग बहोत खुस रहब्या।

### बुराई स जियादा बुराई पइदा होत ह

**33** लखा, तू लोग लड़ाई करत अहा अउर ओन लोगन क वस्तुअन लूटत अहा अउर उ भी अइसे लोगन क जउन कबहुँ कउनो तोहार पचन्क वस्तु नाहीं चोरएण। तू पचे अइसे लोगन क धोखा देत रह्या जउन कबहुँ तू पचन्क धोखा नाहीं दिहन। एह बरे जब तू पचे चोरी करब बंद कइ देब्या तउ दूसर लोग तोहार वस्तुअन चोरी करब सुरू कइ देइहीं। जब तू लोगन क धोखा देब बंद कइ देब्या तउ लोग तू पचन्क धोखा देब आरम्भ कइ देइहीं।

तब तू पचे कहब्या, 2“हे यहोवा, हम पड़ दया करा। हम पचे तोहरे सहारे बाट जोहा ह। हे यहोवा, हर सुबह तू हमका सक्ती द्या जब हम बिपत्ति में होइ, तू हमका बचाइ ल्या।

3तोहरी सक्तीसाली ध्वनि स लोग डरा करत हीं अउर उ पचे तोहसे दूर भाग जात हीं। तोहरी महानता क कारण रास्ट्र दूर भाग जाती हीं।”

4तू पचे जुद्ध में लूटेस, किन्तु तू पचन्क छीना जाइ अउर तोहस लइ लेइ जाइ! इ अइसा ही होइ जइसा टिड्डियन आवा रहा अउर तोहार सारा फसल खाइ लेत रहा!

5यहोवा बहोत महान अहइ, काहेकि उ बहोत ऊँचाइ (सरग) पड़ रहत ह। यहोवा सिव्योन क सच्चाई अउर निआव स भरि दिहिस ह।

6हे यरूसलेम, तोहार धार्मिक सभा लगातार होत रही। परमेस्सर क बुद्धि अउ गियान कवच क नाई होइ जउन तोहार छाती क रच्छा करी। यहोव स तोहार डर अइसा होइ जइसा तू पचन क धन क खजाना।

7मुला सुना! सरगदूत बाहरे गोहरावत अहई अउर सान्ति-संदेसवाहक बहोत रोवत अहई। 8उच्च मार्गन रौंदा ग अहई। गलियन में कउनो नाहीं चलत फिरत अहइ। लोगन उ करार क उल्लंघन करिहीं जउन उ बनाए रहा। लोग साच्छी क जउन गवाही क रूप में पेस करि स जाइ इन्कार करी। कउनो भी कउनो दूसर लोगन क आदर नाहीं करत। 9भुईया बेरामी अहइ अउर अइसा लागत अहइ कि उ आपन आखरी सांस लेत अहइ। लबानोन आपन आखरी साँस लेत अहइ अउर सारोन क घाटी झुरान अउ उजाड़ अहइ। बासान अउ कर्मेल जउन कबहुँ पौधन अउर बृच्छन स हरा भरा रहा किन्तु अब हुआँ कछू नाहीं उगत ह।

10यहोवा कहत ह, “मई अब खड़ा होब अउर आपन बड़कइ देखाउब। अब मई लोगन बरे एक महत्वपूर्ण बनब। 11तू लोग बेकार क काम किहा ह। उ सबइ चिजियन भूसा अउर झुरान घासे क जइसे अहई। उ पचे बेकार अहई। तोहार पचन्क आतिमा आगी क नाई होइ जाइ अउर तू पचन्क बारि देइ। 12लोग तब तलक बरत रइहीं जब तलक ओनकर हाइन बरिके चूना जइसी नाहीं होइ जातीं। लोग काँटन अउर झुरान झाड़ियन क समान हाली स बरि जइहीं।

13“दूर देसन क लोगो, जउन काम मई किहेउँ ह, तू पचे ओनके बारे में सुनत अहा। हे मोरे लगे क लोगो, तू पचे मोर सक्ती क समुझत अहा।”

14सिव्योन में पापी डेरान अहई। उ पचे जउन बुरे करम किया करत हीं, डर स थर थर काँपत अहई। उ पचे कहत हीं, “का इ बिनासकारी आगी स हम पचन क कउनो बचि सकत ह? कउन रह सकत ह इ आगी क निअरे जउन हमेसा हमेसा बरे बरत रहत ह?”

15उ सबइ लोग इ आगी में स बचि पइहीं जउन अच्छा अहई, सच्चा अहई। उ सबइ लोग पइसा बरे दुसरन क नोस्कान नाहीं पहुँचाव चाहतेन। उ सबइ लोग घूस नाहीं लेतेन। दूसर लोगन क कतल क जोजनन क उ पचे सुनइ तलक स मना कइ देत हीं। बुरे करम करइ क जोजनन क उ पचे लखब भी नाहीं चाहतेन।

16अइसे लोग ऊँच ठउरन पड़ सुरच्छा क साथ निवास करिहीं। ऊँच चट्टानन क गढियन में उ पचे सुरच्छित रइहीं। अइसे लोगन क लगे सदा ही खाइ क भोजन अउर पिअइ क पानी रही।

17तोहार पचन्क आँखिन उ राजा (परमेस्सर) क सुन्नरता क दर्सन करिहीं। तू पचे उ महान भईया क लखब्या। 18-19बीते भए दिनन में तू पचे जउन कस्ट उठाया ह, तू पचे ओकरे बारे में सोचब्या, “दूसर देसन क उ सबइ लोग कहाँ अहई? उ सबइ लोग अइसी बोली बोला करत रहेन, जेका हम समुझ नाहीं सकत रहेन। दूसर देसन क उ सबइ सेवक अउर कर एकट्ठा करइवाले कहाँ अहई? उ पचे गुप्तचर जउन हमार सुरच्छा मीनारन क लेखा जोखा लिए रहेन, कहाँ अहई? उ सबइ सब खतम होइ गएण।”

**परमेस्सर यरूसलेम क बचाई**

20हमारे धार्मिक उत्सव क नगरी, सिय्योन क लखा। विस्त्राम निवास क उ सुन्नर ठउर यरूसलेम क लखा। यरूसलेम उ तम्बू क समान अहइ जेका कबहुँ उखाड़ा नाहीं जाई। उ सबइ खूँटन जउन ओका आपन ठउरे पइ थामे रखत हीं, कबहुँ उखाड़ा नाहीं जइहीं। ओकर रस्सन कबहुँ टुटिहीं नाहीं। 21-23हुवाँ हमरे बरे सक्तीसाली यहोवा विस्तृत झरनन अउर नदियन वाले एक ठउरे क समान होइ। किन्तु ओन नदियन पइ कबहुँ सत्रु क नउकन या सक्तीसाली जहाज वाहीं होइहीं। ओन नउकन पइ काम करइवाले तू लोग रस्सियन क नाहीं थामे रख सक्या। तू पचे मस्तूल क मजबूत नाहीं बनाए नाहीं रख सक्या। तउ तू पचे आपन पालन क भी नाहीं खोल पउब्या। काहेकि यहोवा हमार निआवकर्ता अहइ। यहोवा हमारे बरे नेम बनावत ह। यहोवा हमार राजा अहइ। उ हमार रच्छा करत ह। इहइ स यहोवा हमका बहोत सा धन देइ। हिओँ तलक कि अपाहिज लोग भी जुद्ध मँ बहुत सा धन जीत लेइहीं। 24हुवाँ रहइवाला कउनो भी मनई अइसा नाहीं कही, “मई रोगी हउँ।” हुवाँ रहइवाले लोग अइसे लोग अहईँ जेनकर पाप छिमा कइ दीन्ह गवा अहईँ।

**परमेस्सर आपन दुस्मन क सजा देइ**

**34** हे सबहिं रास्ट्र क लोगो, पास आवा अउर सुना। तू सब लोगन क धियान स सुनइ चाही। हे धरती अउ धरती पइ क सबहिं वासियो, हे जगत अउ ऐह मँ स आइ सबहिं वस्तुओ, तू सबन्क एन बातन क सुनइ चाही। 2यहोवा सबहिं देसन अउर ओनकर फउजन पइ कोहान अहइ। यहोवा ओन सब क बर्बाद कइ देइ। उ ओन सबहिं क मरवाइ डाइ। 3ओनकर ल्हासन बाहेर बहाइ दीन्ह जइहीं। ल्हासन स दुर्गन्ध उठी अउर पहाइ क ऊपर स खून खाले क बही। 4अकास चर्मपत्र क नाई लपेटिके मूँदि दीन्ह जइहीं। ग्रह तारन मरिके अंगूरे क बेल या अंजीरे क पत्तन क नाई गिरइ लगीहीं। अकासे क सबहिं तारन टेघर जइहीं। 5यहोवा कहत ह, “अइसा उ समय होइ जब अकासे मँ मोर तरवार खूने मँ सन जाइ।”

लखा! यहोवा क तरवार एदोम क काटि डाइ। यहोवा ओन लोगन क अपराधी ठहराएस ह तउ ओन लोगन क मरब ही होइ। 6यहोवा क तरवार मेमना अउर बोकरियन क खून स लतपत होइ गवा अहइ। अउर भेड़ा क गुर्दन क चर्बी स चिकनाई गवा अहइ। काहेकि यहोवा निहचइ किहस ह बोसरा मँ कत्लेआम होइ उ समइ बहोत सारे लोग एदोम मँ मारइ जाइहीं। 7तउ भेड़न, मवेसी अउ हट्टे कट्टे जंगली बर्धन मारा जइहीं। धरती ओनकर खून स भरि जाइ। माटी ओनकी चर्बी स पट जाइ।

8अइसी बातन घटिहीं काहेकि यहोवा सजा देइ क एक समय तय किहस ह। यहोवा एक साल अइसा चुन लिहस ह जेहमँ लोग आपन ओन बुरे कामन बरे जउन सिय्योन क खिलाफ किहेन ह, जरूर ही भुगतान कइ देइहीं। 9एदोम क नदियन अइसी होइ जइहीं जइसे माना उ सबइ गरम तारकोल क होई। एदोम क धरती बरत भइ गंधक अउ

तारकोल क समान होइ जाइ। 10उ पचे आगे रात दिन बरा करिहीं। कउनो भी मनई उ आगी क रोकि नाहीं पाई। एदोम स सदा धुआँ उठा करी। उ धरती सदा सदा बरे बर्बाद होइ जाइ। उ धरती स होइके फुन कबहुँ कउनो नाहीं गुजरा करी। 11उ धरती परिदन अउर नान्ह-नान्ह जनावरन क होइ जाइ। हुवाँ कुचक्रचवन अउर कउअन क बास होइ। परमेस्सर उ धरती क “सूनी उजाड़” भुइँया मँ बदल देइ। इ वइसी ही होइ जइसी इ सृस्टि स पहिले रही। 12स्वतंत्र मनई अउर मुखिया लोग खतम होइ जइहीं। ओन लोगन क हुकूमत कइ बरे हुवाँ कछू भी नाहीं बची।

13हुवाँ क सबहिं सुन्नर भवनन मँ काँटन अउर जंगली झाड़ियन जमि अहइ। जंगली कूकुरन अउर कुचकुचवन ओन मकानन मँ बास करिहीं। परकोटन स जुक्त नगरन क जंगली जानवर आपन निवास बनाइ लेइहीं। हुवाँ जउन घास जमी ओहमँ बड़के बड़के पंछी रइहीं। 14हुवाँ जंगली बिल्लियन अउर लकड़ बग्धन साथ रहा करिहीं अउर जंगली बोकरियन हुवाँ आपन मीतन क बोलइहीं। राति क जीवजन्तु हुवाँ आपन बरे आस्रय खोजत फिरिहीं अउर हुवँइ विस्त्राम कइ बरे आपन जगह बनाइ लेइहीं। 15साँप हुवाँ आपन घर बनाइ लेइहीं। हुवाँ साँप आपन अण्डन दिया करिहीं। अण्डन फूटिहीं अउर ओन अँधियारा स भरे जगहन स रेंगत भए साँप क बच्चन बाहेर निकरिहीं। हुवाँ मरी चिजियन क खाइवाले पंछी एक क पाछे एक एकट्ठा होत चला जइहीं।

16यहोवा क चर्म-पत्र क लखा। पढ़ा ओहमँ का लिखा अहइ। कछू भी नाहीं छूटा अहइ। उ चर्म-पत्र मँ लिखा अहइ कि उ पचे सबहिं पसु पंछी एकट्ठा होइ जइहीं। एह बरे परमेस्सर क मुँह इ आदेस दिहन अउर ओकर आतिमा ओनका एक संग एकट्ठा कइ दिहस। परमेस्सर क आतिमा ओनका परस्पर एकट्ठा करी। 17परमेस्सर ओनके साथ का करी, इ उ निहचय कइ लिहस ह। एकरे पाछे परमेस्सर ओनके बरे एक जगह चुनेस। परमेस्सर एक रेखा हींचेस अउर ओनका ओनकर धरती देखाइ दिहस। एह बरे उ धरती सदा सदा पसुअन क ही होइ जाइ। उ पचे हुवाँ साल दर रहत साल चला जइहीं।

**परमेस्सर आपन लोगन क सुख देइ**

**35** झुरान रेगिस्तान बहोत खुसहाल होइ जाइ। रेगिस्तान खुस रही अउर एक फूल क नाई विकसित होइ। 2उ रेगिस्तान खिलत भए फूलन स भरि उठी अउर आपन खुसी देखावइ लागी। अइसा लागी जइसे रेगिस्तान आनन्द मँ भरा नाचत होइ। इ रेगिस्तान अइसा सुन्नर होइ जाइ जइसा लबानोन क बन बाटइ, कर्मेल क पहाइ अहइ अउर सारोन क घाटी अहइ। अइसा एह बरे होइ, काहेकि सबहिं लोग यहोवा क महिमा क दर्सन करिहीं। लोग हमरे परमेस्सर क महानता क लिखिहीं।

3दुर्बल बाँहन क फुन स सक्ती स भरा बनाव। दुर्बल घुटनन क मजबूत करा। 4लोग डेरान अहईँ अउर असमंजस मँ पड़ा अहईँ। ओन लोगन स कहा, “सक्तीसाली बना। डेराअ जिन।” लखा तोहार पचन्क परमेस्सर आइ अउर

तोहार पचन्क दुस्मनन क जउन उ पचे किहन ह, ओकर सजा देइ। उ आइ अउर तू पचन्क तोहार सबन्क प्रतिफल देइ अउर तोहार पचन्क रच्छा करी। 5फुन तउ आँधर लखइ लगिहीं। ओनकर आँखिन खुल जइहीं। 6लूले लंगड़े लोग हिस्न क तरह नाचइ लगिहीं अउर अइसे लोग जउन अबहि गूँगन अहइ, खुसी क गीत गावइ मँ आपन वाणी क उपयोग करइ लगिहीं। अइसा उ समय होइ जब मरूभूमि मँ पानी क झरनन बहइ लगिहीं। झुरान धरती पइ झरनन बहि चलिहीं। 7लोग अबहि जत क रूप मँ मृग मरीचिका क लखत हीं किन्तु उ समय जल क फुरइ सरोवर होइहीं। झुरान धरती पइ कुअँन होइ जइहीं। झुरान धरती स जल फूट बही। जहाँ एक समय जंगली जनावरन क राज रहा, हुवाँ लम्बे लम्बे पानी क पउधन जमि पइहीं।

8उ समय, हुवाँ एक राह बन जाइ अउर इ राजमार्ग क नाम होइ “पवित्तर मार्ग।” उ राह पइ असुद्ध लोगन क चलइ क अनुमति नाहीं होइ। कउनो भी मूरख उ राहे पइ नाहीं चली। बस परमेस्सर क पवित्तर लोग ही ओह पइ चला करिहीं। 9उ सड़क पइ कउनो खतरा नाहीं होइ। लोगन क नोस्कान पहोंचावइ बरे उ सड़क पइ सेर नाहीं होइहीं। कउनो भी भयानक जन्तु हुवाँ नाहीं होइ। उ सड़क ओन लोगन बरे होइ जेनका परमेस्सर अजाद किहेस ह।

10परमेस्सर आपन लोगन क अजाद करी अउर उ सबइ लोग फुन लउटिके हुवाँ अइहीं। लोग जब सिन्धोन पइ अइहीं तउ उ पचे खुस होइहीं। उ पचे सदा-सदा बरे खुस होइ जइहीं। ओनकर खुसी ओनकर माथन पइ एक मुकुट क नाई होइ। उ पचे आपन खुसी अउ आनन्द स पूरी तरह भरि जइहीं। सोक अउ दुःख ओनसे दूर बहुत दूर चले जइहीं।

### अस्सूर क यहूदा पइ हमला

**36** हिजकिय्याह यहूदा क राजा रहा अउर सन्हेरीब अस्सूर क राजा रहा। हिजकिय्याह क सासन क चउदहवें बरिस मँ सन्हेरीब यहूदा क किलाबन्द नगरन स जुद्ध किहन अउर उ ओन नगरन क हराइ दिहन। 2लाकीस स सन्हेरीब आपन सेनापति अउर बहोत सारे सेना क यरूसलेम मँ यहूदा क राजा हिजकिय्याह क लगे आपन माँगन क बतावइ बरे पठएस। उ ऊपरवाले तालाब क कईती जात भवा नाला\* पइ रुक गएस जउन धोबी लोगन क खेत क सड़क पइ रहा।

3यहूदा क तीन अधिकारी ओसे मिलइ बरे गएन। इ सबइ लोग रहन: महल क देखरेख करइवाला हिल्किय्याह क पूत एल्याकीम, लिपिकार सेब्ना, अउर कागाजात क संधारिके रखइ क काम करइवाला आसाप क पूत योआह।

4सेनापति ओनसे कहेस, “तू लोग, राजा हिजकिय्याह स जाइके इ सबइ बातन कहा: महान राजा अस्सूर क राजा कहत ह:

“तू आपन सहायता बरे कउने पइ भरोसा रखत ह?

5मई तू पचन्क बतावत हउँ कि जदि जुद्ध मँ तोहार

**नाला** एक गड्डा या एक पाइप जेसे पानी क एक जगह स दूसर जगह लइ जावा जात अहइ।

बिस्सास सक्ती अउर कुसल जोजनन पइ अहइ तउ उ बेकार अहइ। उ सबइ कोरे सब्दन क अलावा कछू नाहीं अहई। एह बरे तू मोहसे काहे जुद्ध करत अहा? 6अब मई तोहसे पूछत हउँ, तू मदद पावइ बरे कउने पइ भरोसा करत अहा? का तू मदद बरे मिस्त्र क सहारे अहा? मिस्त्र तउ एक टूटी भइ लाठी क नाई अहइ। जदि तू सहारा पावइ क ओह पइ टिकब्या तउ उ तू पचन्क बस नोस्कान ही पहोंचाइ अउर तोहरे हाथे मँ एक ठु छेद बनाइ देइ। मिस्त्र क राजा फिरौन पइ कउनो भी मनई क जरिये मदद पावइ क भरोसा नाहीं कीन्ह जाइ सकत।

7मुला होइ सकत ह तू कहा, “हम मदद पावइ बरे आपन यहोवा परमेस्सर पइ भरोसा रखित ह।” किन्तु मई सुना अहइ कि हिजकिय्याह यहोवा क वेदियन क अउर आराधना क ऊँच ठउरन\* क बर्बाद कइ दिहस ह अउर यहूदा अउ यरूसलेम क लोगन स कहेस, “तू हिआँ यरूसलेम मँ बस एक इहइ वेदी पइ उपासना किया करब्या।”

8अगर तू अब भी मोर सुआमी स जुद्ध करइ चाहत अहा तउ अस्सूर क राजा तोहसे इ सौदा करइ चाही: राजा क कहब अहइ, ‘जदि जुद्ध मँ तोहरे लगे घुड़सवार पूरा अहई तउ मई तू पचन्क दुइ हजार घोड़न दइ देब।’ 9किन्तु एतना होइ पइ तू मोर सुआमी क एक सेवक तलक क नाहीं हराइ पउब्या। ओकर कउनो नान्ह स नान्ह अधिकारी तलक क तू नाहीं हराइ पउब्या। एह बरे तू मिस्त्र क घुड़सवार अउर रथन पइ आपन भरोसा काहे बनाए रखत अहा।

10अउर अब लखा जब मई इ देस मँ आवा रहेउँ अउर मई जुद्ध किहे रहेउँ, यहोवा मोरे संग रहा। जब मई नगरन क उजाड़ेउँ, यहोवा मोरे संग रहा। यहोवा मोहसे कहा कहत रहा, “खड़ा हवा। इ नगरी मँ जा अउर एक ध्वस्त कइ द्या।”

11यहूदा क तीनहुँ अधिकारियन, एल्याकीम, सेब्ना अउर योआह सेनापति स कहेस, “कृपा कइके हमरे संग अरामी भासा मँ ही बात करा ताकि एका हम समुझ सकित। तू यहूदी भासा मँ हम से जिन बोला। जदि तू यहूदी भासा क प्रयोग करब्या, तउ नगर दीवारे क पार क सबहि लोग एका समुझ जइहीं।”

12एह पइ सेनापति कहेस, “मोर सुआमी मोहसे इ सबइ बातन बस तू पचन्क अउर तोहरे पचन्क सुआमी हिजकिय्याह क ही सुनावइ बरे नाहीं पठएस ह। मोर सुआमी मोका एन बातन क ओनका बतावइ बरे पठएस ह जउन लोग नगर परकोटन पइ बइठा अहई। ओन लोगन क न तउ पूरा खइया क मिलत ह अउर न पानी। तउ ओनका आपन मलमूत्र क तोहरे पचन्क तरह खाब-पिअब होइ।”

**वेदी ... ठउरन** इ “गैर सरकारी” अउर “मुकामी” समाधि क ओर इसारा करत ह जउन कि ओकर भुइँया पइ इहर-उहर पहाड़ियन पइ होत रहा जहाँ लोग परमेस्सर या झूटे देवता क पूजा करत रहेन।

13फुन सेनापति खड़ा होइके ऊँच सुर में कहेस। उ यहूदी भासा में बोला। 14सेनापति कहेस, “महासम्राट अस्सूर क राजा क सब्दन क सुना:

तू आपन खुद क हिजकिय्याह क जरिये मूरख जिन बनइ द्या, उ तू पचन्क बचाइ नहीं पाइ। 15हिजकिय्याह जब इ कहत ह, ‘यहोवा में बिस्सास राखा। यहोवा अस्सूर क राजा हमार रच्छा करी। यहोवा अस्सूर क राजा क हमरे नगर क हरावइ नहीं देइ तउ ओह पइ बिस्सास जिन करा।’

16हिजकिय्याह क एन सब्दन क अनसुनी करा। अस्सूर क राजा क सुना। अस्सूर क राजा क कहब अहइ, “हमका एक तु सन्धि करइ चाही। तू लोग नगर स बाहेर निकरि के मोरे लगे आवा। फुन हर मनई आपन घरे जाइ क अजाद होइ। हर मनई आपन अंगूर क बेलन स अंगूर खाइ क अजाद होइ अउर हर मनई आपन अंजीर क बृच्छन क फल खाइ क अजाद होइ। खुद आपन कुआँ क पानी पिअइ क हर मनई अजाद होइ। 17जब तलक मई आइके तू पचन्क तोहरे पचन्क जइसे एक देस में न लइ जाउँ, तब तलक तू पचे अइसा करत रहि सकत ह। उ नवा देस में तू पचे बढ़िया अनाज अउर नवा दाखरस पउब्या। उ धरती पइ तू पचन्क रोटी अउ अंगूर क खेत मिलिहीं।”

18हिजकिय्याह क तू आपन क मूरख जिन बनावइ द्या। उ कहत ह, “यहोवा हमार रच्छा करी।” किन्तु मई तोहसे पूछत हउँ का कउनो दूसर देस क कउनो भी देवता हुवाँ क लोगन क अस्सूर क राजा क सक्ती स बचाइ पाइ नहीं। हम हुवाँ क हर मनई क हराइ दीन्ह। 19हमात अउ अर्पाद क देवता आजु कहाँ अहइँ? ओनका हराइ दीन्ह गवा अहइ। सपर्वे म क देवता कहाँ अहइँ? उ सबइ हराइ दीन्ह ग अहइँ अउर का सोमरोन क देवता हुवाँ क लोगन क मोर सक्ती स बचाइ पाएन? नहीं। 20कउनो भी देस अथवा जाति क अइसे कउनो भी एक देवता क नाउँ मोका बतावा जउन हुवाँ क लोगन क मोर सक्ती स बचाएस ह। मई सबन्क हराइ दिहेउँ। एह बरे लखा मोर सक्ती स यरूसलेम क यहोवा नहीं बचाइ पाइ।”

21यरूसलेम क लोग एक दम चुप रहेन। उ पचे सेनापति क कउनो जवाब नहीं दिहन। हिजकिय्याह लोगन क हुकुम दिहे रहा कि उ पचे सेनापति क कउनो जवाब न देई।

22एकरे पाछे महल क देखरेख करइवाला हिल्किय्याह क पूत एल्याकीम लिपिकार सेब्ना अउर कागजात क संधारिके रखइ क काम करइवाला आसाप क पूत योआह इ देखावइ बरे कि उ दुःखी रहेन आपन ओढ़ना फाड़ि डारन। उ पचे तीनउँ मनइयन हिजकिय्याह क लगे गएन अउर सेनापति जउन कछू ओनसे कहे रहा, उ सब ओका कहि सुनाएन।

### हिजकिय्याह क परमेस्सर स पराथना

37 हिजकिय्याह जब सेनापति क सँदिसा सुनेस तउ उ आपन ओढ़ना फाड़ि डारन। फुन बिसेस सोक

वस्त्र धारण कइके उ यहोवा क मंदिर में गवा। 2हिजकिय्याह महल क सेवक एल्याकीम क राजा क सचिव सेब्ना क अउर याजकन क अग्रजन क आमोस क पूत यसायाह नवी क लगे पठएस। एन तीनउँ ही लोग बिसेस सोक-वस्त्र पहिरे भरे रहेन।

3एन लोगन यसायाह स कहेन, “राजा हिजकिय्याह कहेस ह कि आजु क दिन सोक अउर दुःख क एक बिसेस दिन होइ। इ दिन एक अइसा दिन होइ जइसे जब एक बच्चा जन्म लेत ह। किन्तु बच्चा क जन्म देइवाली महतारी में जेतनी सक्ती होइ चाही ओहमों ओतनी ताकत नहीं होत। 4सम्भव अहइ तोहार परमेस्सर यहोवा, सेनापति क जरिये कही बातन क सुन लेइ। अस्सूर क राजा सेनापति क साक्षात परमेस्सर क बेज्जत करइ पठएस ह। होइ सकत ह तोहार परमेस्सर यहोवा ओन बुरी अपमान स भरी बातन क सुन लिहस ह अउर उ ओनका एकर सजा देइ। कृपा कइके इन्नाएल क ओन थोड़े स लोगन बरे पराथना करा जउन बचे भए अहइ।”

5-6हिजकिय्याह क सेवक यसायाह क लगे गएन। यसायाह ओनसे कहेस, “अपने मालिक क इ बताइ द्या: ‘यहोवा कहत ह तू पचे सेनापति स जउन सुन्या ह, ओन बातन स जिन डेराअ। अस्सूर क राजा क लरिकन मोर अपमान करइ बरे जउन बातन कहेन ह, ओन बातन स जिन डेराअ। 7लखा अस्सूर क राजा क मई एक अफवाह सुनवाउब। अस्सूर क राजा क एक अइसी रपट मिली जउन ओकरे देस पइ आवइ वाले खतरा क बारे में होइ। एहसे उ अपने देस वापस लउटि जाइ। उ समय मई ओका, ओकरे आपन ही देस में तरवार स मउत क घाट उतार देब।”

### अस्सूर क सेना क यरूसलेम क तजब

8-9अस्सूर क राजा क एक खबर मिली, सूचना में कहा ग रहा, “इथोपिया क राजा तिहीका जुद्ध करइ आवति अहइ।” तउ अस्सूर क राजा लाकीस क तजिके लिबना चला गवा। सेनापति इ सुनेस अउर लिबना नगर क चला गवा जहाँ अस्सूर क राजा जुद्ध करत रहा। फुन अस्सूर क राजा हिजकिय्याह क लगे दूत पठएस। राजा ओन दूतन स कहेस, 10“यहूदा क राजा हिजकिय्याह स तू पचे इ बातन कइया:

जउने देवता पइ तोहार बिस्सास अहइ, ओहसे तू पचे मूरख जिन बना। अइसा जिन कहा कि अस्सूर क राजा परमेस्सर यरूसलेम क पराजित नहीं होइ देइ।

11लखा, तू पचे अस्सूर क राजा लोगन क बारे में सुन ही चुका अहा। उ पचे हर कउनो देस में लोगन क संग का कछू किहेन ह। ओनका उ पचे बुरी तरह हराएन ह। का तू पचे ओनसे बचि पउब्या? नहीं, कदापि नहीं। 12का ओन लोगन क देवतन ओनकर रच्छा किहे रहेन? नहीं। मोर पुरखन ओनका नस्त कइ दिहन। मोर लोग गोजान, हारान अउ रसेप क नगरन क बुरी तरह हराइ दिहे रहेन अउर उ पचे एदेन क लोग जउन तलस्सार में रहा करत रहेन, ओनका भी हराइ दिहे रहेन। 13हमात अउर अर्पाद क राजा कहाँ गएन। सपरवैम क राजा आज कहाँ अहइ? हेना अउर

इव्वा क राजा अब कहाँ अहई? ओनकर अन्त कइ दीन्ह गवा। उ पचे सबहि बर्बाद कइ दीन्ह गएन।”

### हिजकिय्याह क परमेस्सर स पराथना

14 हिजकिय्याह ओन लोगन स उ सँदेसा लइ लिहस अउर ओका बाँचेस। फुन हिजकिय्याह यहोवा क मंदिर में चला गवा। हिजकिय्याह उ सँदेसा क खोलेस अउर यहोवा क समन्वा रख दिहस। 15 फुन हिजकिय्याह यहोवा स पराथना करइ लाग। हिजकिय्याह बोला:

16 “इस्त्राएल क परमेस्सर सर्वसक्तीमान यहोवा, तू राजा क समान करूब सरगदूतन पइ बिराजत अहा। तू अउर बस तू ही परमेस्सर अहा, जेकर धरती क सबहि राजन पर सासन अहइ। तू सरगन अउर धरती क रचना किहा ह। 17 मोर सुना। आपन आँखिन खोला अउर लखा, कान लगाइके सुना इ सँदेसा क सब्दन क, जेका सन्हेरीब मोका पठएस ह। एहमाँ तू साक्षात परमेस्सर क बारे में अपमान स भरी बुरी बुरी बातन कह्या ह।

18 हे यहोवा, अस्सूर क राजा लोग असल में सबहि देसन अउर हुवाँ क धरती क तबाह कइ दिहस ह। 19 अस्सूर क राजा लोग ओन देसन क देवतन क बारि डाएन ह किन्तु उ पचे सच्चे देवतन नाहीं रहेन। उ पचे तउ सिरिफ अइसे मूरतियन रहेन जेनका लोग बनाए रहेन। उ सबइ तउ कोरी काठ रहेन, कोरे पाथर रहेन। एह बरे उ पचे खतम होइ गएन। उ सबइ बर्बाद होइ गएन। 20 तउ अब हे हमार परमेस्सर यहोवा। अब कृपा कइके अस्सूर क राजा क सक्ती स हमार रच्छा करा। ताकि धरती क सबहि राजन क पता चलि जाइ कि तू यहोवा अहा अउर तू ही हमार एकमात्र परमेस्सर अहा।”

### हिजकिय्याह क परमेस्सर क उत्तर

21 फुन आमोस क पूत यसायाह हिजकिय्याह क लगे इ सँदेसा पठएस, “इ उ अहइ जेका इस्त्राएल क परमेस्सर यहोवा कहेस ह, ‘अस्सूर क राजा सन्हेरीब क बारे में तू मोका पराथना किहस ह।’

22 “तउ मोका जउन सन्हेरीब विरोध में कहेस,

‘उ इ अहइ: सिय्योन क कुवारी पुत्री तोहका तुच्छ जानत ह। उ तोहार हँसी उड़ावत ह। यरूसलेम क पुत्री तोहार हँसी उड़ावत ह।

23 तू मोरे बरे विरोध में बुरी बातन कह्या। तू बोलत रह्या। तू आपन आवाज मोरे विरोध में उठाए रह्या। तू मोका इस्त्राएल क पवित्तर परमेस्सर क अभिमान भी आँखिन स घूरे रह्या।

24 मोर सुआमी यहोवा क बारे में तू बुरी बातन कहलवावइ बरे तू आपन सेवकन क प्रयोग किहा। तू कह्या “मई बहोत सक्तीसाली हई! मोरे लगे बहोत स रथ अहई। मई आपन सक्ती स लबानोन क हराया जब मई आपन रथन क लबानोन क महान पर्वत क ऊँच सिखरन क ऊपर लइ आएँ। मई लबानोन क सबहि महान बृच्छ काट डायँ। मई

उच्चतम सिखर स लइके गहिर जंगलन तलक प्रवेस कइ चुका हई।

25 मई बिदेसी धरती पइ कुअँन खनेउँ अउर पानी पिपुँ। मई मित्र क नदियन सुखाइ दिहेउँ अउर उ देस पइ चलिके गएँ ह।”

26 इ सबइ उ जउन तू कह्या। का तू इ नाहीं सुन्या कि परमेस्सर का कहेस? “मई (परमेस्सर) बहोत बहोत पहिले ही इ योजना बनाइ लिहेउँ रहे। बहोत बहोत पहिले ही मई एका तइयार कइ लिहे रहेउँ अब एका मई घटित किहेउँ ह। मई ही तू पचन्क ओन नगरन क नस्ट करइ दिहेउँ अउर मई ही तू पचन्क ओन नगरन क पाथरन क देर में बदलइ दिहेउँ।

27 ओन नगरन क निवासी कमजोर रहेन। उ सबइ लोग भयभीत अउर लजित रहेन। उ पचे खेते क पउधन जइसे रहेन, उ पचे नई घास क जइसे रहेन। उ पचे उ घासे क नाई रहेन जउन मकानन क छतन पइ जमा करत हीं। उ घास लम्बी होइ स पहिले ही रेगिस्तान क गरम हवा झुलसाइ दीन्ह जात ह।

28 तोहार सेना अउ तोहरे जुद्ध क बारे में मई सब कछू जानत हई। मोका पता अहइ जब तू विस्त्राम किहे रह्या। जब तू जुद्ध बरे गवा रह्या, मोका तब क भी पता अहइ। तू जुद्ध स घरे कब लउट्या, मई इ भी जानत हई। मोका एकर भी गियान अहइ कि तू मोह पइ कोहान अहा।

29 तू मोहसे खुस नाहीं अहा अउर मई तोहार अहंकार स भरा अपमान क सुना ह। तउ मई तोहका सजा देब। मई तोहरे नाके में नकेल डाउब। मई तोहरे मुँह पइ लगाम लगाउब अउर तब मई तोहका मजबूर करब कि तू जउने राहे स आया रह्या, उहइ राहे स मोरे देस क तजिके वापिस चला जा।”

### हिजकिय्याह बरे यहोवा क संदेस

30 एह पइ यहोवा हिजकिय्याह स कहेस, “हिजकिय्याह, तू इ देखावइ बरे कि इ सबइ सब्द सच्चा अहई, मई तोहका एक संकेत देब। इ बरिस तू खाइ बरे कउनो अनाज नाहीं बोया। तउ इ बरिस तू पिछले बरिस क फसल स यूँ ही जम आए अनाजे क खाब्या। अगले बरिस भी अइसा ही होगा किन्तु तीसरे बरिस तू उ अनाजे क खाब्या जेका तू जमाए होब्या। तू आपन फसलन क कटब्या। तोहरे लगे खाइ क भरपूर होइ। तू अंगूरे क बेलन रोपब्या अउर ओनकर फल खाब्या।

31 “यहूदा क परिवार क कछू लोग बच जइहीं। उ पचे ही लोग बढ़त भए एक बड़की जाति क रूप लइ लेइहीं। उ पचे लोग ओन बृच्छन क नाई होइहीं जेनकर जउन धरती में बहोत गहिर जात हीं अउर जउन बहोत तगड़े होइ जात हीं अउर बहोत स फल देत हीं। 32 यरूसलेम म कछू ही लोग जिअत बचिके बाहेर जाइ पइहीं। सिय्योन पर्वत स बचे भए लोगन क एक समूह ही बाहेर जाइ पाइ। सर्वसक्तीमान यहोवा क सुदृढ़ पिरेम ही अइसा करी।

33 तउ यहोवा अस्सूर क राजा क बारे में इ कहेस:

“उ इ नगर में नाहीं आइ। उ इ नगर पइ एक भी बाण नाहीं छोड़ी! उ आपन दालन क मुँह इ नगर कइँती नाहीं

करी। उ इ नगर पड़ हमला करइ क बरे माटी क टीला खड़ा नाहीं करी।

34उहइ राहे स जेहसे उ आवा रहा, उ वापस आपन नगर क लउटि जाइ। इ नगर में उ प्रवेस नाहीं करी।” इ सँदेसा यहोवा कइँती स अहइ।

35यहोवा कहत ह, मई बचाउब अउर इ नगर क रच्छा करब। मई अइसा खुद आपन बरे अउर आपन सेवक दाऊद बरे करब।”

36तउ यहोवा क सरगदूत अस्सूर क सिबिर में जाइके एक लाख पचासी हजार फउजी मनइयन क मार डाएस। अगली सुबह जब लोग उठेन, तउ उ पचे लखेन कि ओनके चारिहुँ कइँती मरे भए फउजियन क ल्हासन बिखरी अहइँ। 37एह पड़ अस्सूर क राजा सन्हेरीब वापस लउटिके आपन घरे नीनवे चला गवा अउर हुँवइ रहइ लाग।

38एक दिन, जब सन्हेरीब आपन देवता निस्त्रोक क मंदिर में ओकर पूजा करत रहा, उहइ समय ओकर पूत अद्रम्मेलेक अउर सेरेसेर तरवार स ओकर कतल कइ दिहस अउर फुन उ पचे असरात क भुईँया में पराइ गएन। एह बरे सन्हेरीब क पूत एसहर्ददेन (अस्सूर क) नवा राजा बन गवा।

### हिजकिय्याह क बीमारी

**38** उ समय क आसपास हिजकिय्याह बहोत बीमार पड़ा। एँतना बीमार कि जइसे उ मरि ही गवा होइ। तउ आमोस क पूत यसायाह ओहसे मिलइ गवा।

यसायाह राजा स कहेस, “यहोवा तू पचन्क इ सबइ बातन बतावइ बरे कहेस ह: ‘हाली ही तू मरि जाब्या। तउ जब तू मरा, तोहार परिवार का करइँ, इ तोहका ओनका बताइ देइ चाही। अब तू फुन कबहुँ नीक नाहीं होब्या।”

2हिजकिय्याह उ देवार क नाई करवट लिहस जेकर मुँह मन्दिर कइँती रहा। उ यहोवा क पराथना किहस, उ कहेस, 3“हे यहोवा, कृपा करा, याद करा कि मई सदा तोहरे समन्वा बिस्सास स भरी अउर सच्चे हिरदय क संग जिनगी जिउँ ह। मई उ सबइ बातन किहेउँ ह जेनक तू उत्तिम कहत ह।” एकरे पाछे हिजकिय्याह ऊँच सुर में रोउब सुरू कइ दिहस।

4यसायाह क यहोवा स इ संदेस मिला: 5“हिजकिय्याह क लगे जा अउर ओहसे कहि द्या: इ सबइ बातन उ सबइ अहइँ जेनका तोहार बाप दाऊद क परमेस्सर यहोवा कहत ह, ‘मई तोहार पराथना सुनेउँ ह अउर तोहार दुःख भरे आँसू लखेउँ ह। तोहरी जिनगी में मई पन्द्रह बरिस अउर जोड़त हउँ। 6अस्सूर क राजा क हाथन स मई तोहका छोड़ाइ डाउब अउर इ नगर क रच्छा करब।”

22किन्तु हिजकिय्याह यसायाह स पूछेस, “यहोवा कइँती स अइसा कउन सा संकेत अहइ जउन साबित करत ह कि मई नीक होइ जाब? कउन सा संकेत अहइ जउन प्रमाणित करत ह कि मई यहोवा क मंदिर में जाइ क जोग्य होइ जाब?”

7तोहका इ बात बतावइ बरे जउन बातन क उ कहत ह, ओनका उ पूरा करी। यहोवा कइँती इ संकेत अहइ:

8“लखा, आहाज क धूप घड़ी क उ छाया जउन अंसन पड़ पड़त ह, मई ओका दस अंस पाछे हटाइ देब। सूरज क उ छाया दस अंस तलक पाछे चली जाइ।”

21फुन एह पड़ यसायाह कहेस, “अंजीरन क आपुस में मसलवाइके ओकरे फोड़न पड़ बाँधा। एहसे उ नीक होइ जाइ।”

9इ हिजकिय्याह क उ पत्र अहइ जउन उ बेरामी स नीक होइ क पाछे लिखे रहा:

10मई आपन मन में कहेउँ कि मई तब तलक जिअब जब तलक बूढ़ा होबउँ। किन्तु मोर काल आइ गवा रहा कि मई मउत क दुआरे स गुजरउँ। अब मई आपन समय हिऊँइ पड़ बिताउबउँ।

11एह बरे मई कहेउँ, “मई यहोवा याह क फुन कबहुँ जिअतन क धरती पड़ नाहीं लखब। धरती पड़ जिअत भए लोगन क मई नाहीं लखब।

12मोर घर, चरवाहे क अस्थिर तम्बू सा उखाड़िके गिरावा जात अहइ अउर मोहसे छीना जात अहइ। अब मोर वइसा ही अन्त होइ गवा ह जइसे करघे स कपड़ा लपेटि के काट लीन्ह जात ह। क्षिनभर में तू मोहका इ अंत तलक पहोंचाइ दिहा।

13मई भोर तलक आपन क सान्त करत रहेउँ। उ सेर क नाई मोर हाड़न क तोरत अहइ। एक ही दिन में तू मोर अन्त कइ डावत ह।

14मई कबूतर स रोवत रहेउँ। मई एक पंछी जइसा रोवत रहेउँ। मोर आँखिन थक गइन तउ भी मई लगातार अकासे कइँती निहारत रहेउँ। मोर सुआमी, मई विपति में हउँ मोका उबारइ क बचन द्या।”

15मई अउर का कहि सकत हउँ? मोर सुआमी मोका बताएस ह जउन कछू भी होइ, अउर मोर सुआमी ही उ घटना क घटित करी। मई एन बिपत्तियन क आपन आतिमाँ में झेलेउँ ह एह बरे मई जिनगी भइ विनम्र रहब।

16हे मोर सुआमी, इ कस्ट क समय क उपयोग फुन स मोर चेतना क ससक्त बनावइ में करा। मोरे मने क ससक्त अउर स्वस्थ होइ में मोर मदद करा। मोका सहारा द्या कि मई नीक होइ जाउँ। मोर मदद करा कि मई फुन स जी उठउँ।

17लखा! मोर बिपत्तियन खतम भईन! अब मोरे लगे सान्ति अहइ। तू मोहसे बहोत जियादा पिरेम करत ह। तू मोका कब्र में सड़इ नाहीं दिहा। तू मोर सब पाप छिमा किहा। तू मोर सब पाप दूर लोकाइ दिहा।

18तोहार स्तुति मरे मनई नाहीं गावतेन। मउत क देस में पड़े लोग तोहार यसगीत नाहीं गावतेन। उ पचे मरे भए मनई जउन कब्र में समावा अहइँ, मदद पावइ क तोह पड़ भरोसा नाहीं रखतेन।

19उ सबइ लोग जउन जिअत अहइँ जइसा आजु मई हउँ तोहार जस गावत हीं। एक बाप क आपन सन्तानन क बतावइ चाही कि तोह पड़ भरोसा कीन्ह जाइ सकत ह।

20एह बरे मई कहत हउँ: “यहोवा मोका बचाएस ह तउ हम आपन जिनगी भइ यहोवा क मन्दिर में गीत गाउब अउर बाजा बजाउब।”

## बाबुल क सँसावाहक

**39** उ समय, बलदान क पूत मरोदक बलदान बाबुल क राजा भवा करत रहा। मरोदक हिजकिय्याह क लगे पत्र अउर उपहार पठाए। मरोदक ओकरे लगे उपहार एह बरे पठाए रहा कि उ अन्के रहा कि हिजकिय्याह बेराम रहा अउर फुन नंगा होइ गवा। 2एन उपहारन क पाइके हिजकिय्याह बहोत खुस भवा। एह बरे हिजकिय्याह मरोदक क लोगन क आपन खजाने क कीमती चिजियन देखाए। हिजकिय्याह ओन लोगन क आपन सारी सम्पत्ति देखाए। चाँदी, सोना, कीमती तेल अउर इत्र ओनका देखाए। हिजकिय्याह ओनका जुद्ध में काम आवइवाली तरवारन अउर ढालन भी देखाए। हिजकिय्याह ओनका सबहि चिजियन देखाए जउन उ जमा कइ रखे रहा। हिजकिय्याह आपन घरे क अउर आपन राज क हर वस्तु ओनका देखाए।

3यसायाह नबी राजा हिजकिय्याह क लगे गवा अउर ओहसे बोला, “इ सबइ लोग का कहत अहई? इ सबइ लोग कहाँ स आएन ह?”

हिजकिय्याह कहेस, “इ सबइ लोग दूर देस स मोरे लगे आएन ह। इ सबइ लोग बाबुल स आएन ह।”

4एह पइ यसायाह ओहसे पूछेस, “उ पचे तोहरे गहल में का लखेन?”

हिजकिय्याह कहेस, “मोर महल क हर वस्तु उ पचे लखेन। मई आपन सारी सम्पत्ति ओनका देखाए रहेई।”

5यसायाह हिजकिय्याह स इ कहेस, “सर्वसक्तीमान यहोवा क सब्दन क सुना। 6भविस्स में जउन कछू तोहरे घर में अहइ, उ सब कछू बाबुल लइ जावा जाइ। अउर तोहरे बुजुर्गन क उ सारी धन दौलत जउन अचानक उ पचे बटोरेन ह, लइ लीन्ह जाइ। तोहरे लगे कछू नहीं छोड़ा जाइ। सर्वसक्तीमान यहोवा इ कहेस ह। 7बाबुल क राजा तोहरे पूतन क लइ जाइ। उ सबइ पूत जउन तोहसे पढ़दा होइहीं। तोहार पूत बाबुल क राजा क महल में हाकिम बनिहीं। 8हिजकिय्याह यसायाह स कहेस, “यहोवा क एन बचनन क सुन मोरे बरे बहोत उत्तिम होइ।” (हिजकिय्याह अइसा एह बरे कहेस काहेकि ओकर विचार रहा, “जब मई राजा होब, तब सान्ति रही अउर कउनो उत्पात नहीं होइ।”)

## इस्राएल क सजा क अन्त

**40** “चैन द्या, मोरे लोगन कचैन द्या! तोहार पचन्क परमेस्सर कहत ह।

2तू यरूसलेम स दया स बातन करा। यरूसलेम क बताइ द्या, ‘तोहरी सेवा क समय पूरा होइ चुका। तू आपन पापन क कीमत दइ दिहे अहा।’ यहोवा यरूसलेम क कीन्ह भए पापन क दुइ गुणा दण्ड ओका दिहेस ह।

3सुना! एक मनई क जोर स गोहरावत भए सुर: “यहोवा बरे बियाबान में एक राह बनावा। हमार परमेस्सर बरे बियाबान में एक रास्ता चौरस करा।

4हर घाटी क भरि द्या हर एक पर्वत अउ पहाड़ी क समथर करा। टेढ़-मेढ़ राहन क सोझ करा। उबड़-खाबड़ क चौरस बनाइ द्या।

5तब यहोवा क महिमा परगट होइ। सब लोग एकट्ठा यहोवा क तेज क लखिहीं। हॉ, यहोवा खुद इ सबइ कहेस ह।”

6एक वाणी मुखरित भइ, उ कहेस, “बोला।” तउ मनई पूछेस, “मई का कहई?” वाणी कहेस, “लोग सदा जिअत नाहीं रहिहीं। उ सबइ रेगिस्ताने क घास क नाई अहई। ओनकर धार्मिकता जंगली फूल क समान अहइ।

7एक सक्तीसाली आँधी यहोवा कइँती स उ घासे पइ चलत ह, अउर घास झुराइ जात ह, जंगली फूल नस्त होइ जात ह।” हॉ सबहि लोग घास क समान अहई।

8घास मरि जात ह अउर जंगली फूल नस्त होइ जात ह। किन्तु हमरे परमेस्सर क बचन सदा बने रहत ही।”

## मुक्ति: परमेस्सर क सुसंदेश

9हे, सिन्योन, तोहरे लगे सुसंदेश कहइ क अहइ। तु पहाड़े पइ चढ़ि जा अउर ऊँचे सुर स ओका गोह रावा। यरूसलेम, तोहरे लगे एक सुसंदेश कहइ क अहइ। भयभीत जिन हवा, तू ऊँच सुर में बोला। यहूदा क सारे नगरन क तू इ सबइ बातन बताइ द्या: “लखा, इ रहा तोहार परमेस्सर!”

10मोर सुआमी यहोवा सक्ती क संग आवत अहइ। उ आपन सक्ती क उपयोग लोगन पइ सासन करइ में लगाइ। यहोवा आपन लोगन क प्रतिफल देइ। ओकरे लगे देइ क ओनकर मजदूरी होइ।

11यहोवा आपन लोगन क वइसे ही अगुवाई करी जइसे कउनो गड़रिया आपन भेड़िन क अगुवाई करत ह। यहोवा आपन बाहु क काम में लिआई अउर आपन भेड़िन क बटोरी। यहोवा नान्ह भेड़िन क उठाइके गोद में थामी, अउर ओनकर महतारिन ओकरे संग संग चालिहीं।

## संसार क परमेस्सर रचेस: उ एकर सासक अहइ

12कउनो अँजुरी में भरिके समुद्र क नाप दिहेस? कउन हाथे स अकास क नाप दिहेस? कउन कटोरा में भरिके धरती क सारी धूरि क नाप दिहेस? कउन नापइ क धागा स पर्वतन अउर चोटियन क नाप दिहेस? इ यहोवा किहे रहा।

13यहोवा क आतिमा क कउनो मनई इ नाहीं बताएस कि ओका का करब रहा। यहोवा क कउनो इ नाहीं बताएस कि ओका जउन उ किहेस ह, कइसे करब रहा।

14का यहोवा कउनो स मदद माँगेस? का यहोवा क कउनो निस्पच्छता क पाठ पढ़ाएस ह? का कउनो मनई यहोवा क गियान सिखाएस ह? का कउनो मनई यहोवा क बुद्धि स काम लेब सिखाएस ह? नाहीं। एन सबहि बातन क यहोवा क पहिले ही स गियान अहइ।

15लखा, जगत क सारे देस गगरी में एक नान्ह बूँद जइसे अहई। जदि यहोवा सुदूरवर्ती देसन तलक क लइके आपन तराजू पइ धइ देइ, तउ उ पचे नान्ह स रजकन जइसे लहिहीं।

16लबानोन क सारे बृच्छन भी काफी नाहीं अहइ कि ओनका यहोवा बरे बारा जाइ। लबानोन क सारे पसु काफी नाहीं अहई कि ओनका ओकर एक बलि बरे मारा जाइ।

17परमेस्सर क तुलना में विस्व क सबहिं रास्ट्र क्ख भी नाहीं अहई। परमेस्सर क तुलना में विस्व क सबहिं रास्ट्र बिल्कुल बगैर कीमत क अहई।

### परमेस्सर का अहइ, लोग कल्पना नाहीं कइ सकतेन

18का तू परमेस्सर क तुलना कउनो भी चीज स कइ सकत ह? नाहीं। का तू परमेस्सर क चित्र बनाइ सकत ह? नाहीं।

19किन्तु कछू लोग अइसे अहई जउन पाथर अउर काठे क मूर्तियन बनावत हीं अउर ओनका देवता कहत हीं। एक कारीगर मूर्ति क बनावत ह। फुन दूसर कारीगर ओह पइ सोना मढ़ देत ह अउर ओकरे बरे चाँदी क जंजीरन बनावत ह।

20तउ उ मनई आधार बरे एक खास तरह क काठ चुनत ह जउन सड़त नाहीं ह। तब उ एक अच्छे काठे क कारीगर क हेरत ह। उ कारीगर एक अइसा देवता बनावत ह जउन लुढ़कत नाहीं ह।

21निहचय ही, तू पचे फुरइ जानत अहा, बोला? निहचय ही तू पचे सुन्या ह। निहचइ ही बहोत पहिले कउनो तू पचन्क बताएस ह। निहचइ ही तू पचे जानत अहा कि धरती क कउन बताएस ह।

22यहोवा ही सच्चा परमेस्सर अहइ। उहइ धरती क चक्र क ऊपर बइठत ह। ओकर तुलना में लोग टिड्डी स लगत हीं। उ अकासन क कउने कपड़े क टूकन क नाई खोल दिहस। उ अकासे क ओकरे खाले बइठइ क एक तम्बू क नाई तान दिहस।

23सच्चा परमेस्सर सासकन क महत्वहीन बनावत ह। उ इ जगत क निआवकर्तन क पूरी तरह बियर्थ बनाइ देत ह।

24उ सबइ सासक अइसे अहई जइसे उ पचे पउधन जेनका धरती में रोपा गवा होइ, किन्तु एहसे पहिले कि उ पचे आपन जड़न धरती में जमाइ पावई, परमेस्सर ओनका बहाइ देत ह अउर उ सबइ झुराइके मरि जात हीं। आँधी ओनका तिनका सा उड़ाइके लइ जात ह।

25“का तू कउनो स भी मोर तुलना कइ सकत ह? नाहीं। कउनो भी मोरे बराबर क नाहीं अहइ।

26ऊपर अकासन क लखा। कउन ऐन सबहिं तारन क बनाएस? कउन उ सबइ अकास क सेना बनाएस? केका सबहिं तारन नाम-बनाम मालूम अहई? सच्चा परमेस्सर बहोत ही सुदृढ़ अउर सक्तीसाली अहइ एह बरे कउनो तारा कबहुँ निज मार्ग नाहीं बिसरा।”

27हे याकूब, इ सच अहइ। हे इस्राएल, तोहका एका बिस्वास करइ चाही। तउ तू काहे अइसा कहत ह कि “जइसी जिन्नगी मई जिअत हउँ ओका यहोवा नाहीं लखि सकत। परमेस्सर मोका धइ नाहीं पाइ अउर न सजा दइ पाई।”

28सचमुच तू सुन्या ह अउर जानत ह कि यहोवा परमेस्सर बुद्धिमान अहइ। जउन कछू उ जानत ह ओन सबहिं बातन क मनई नाहीं सीख सकत। यहोवा कबहुँ थकत नाहीं,

ओका कबहुँ विस्त्राम क जरूरत नाहीं होत। यहोवा ही सबहिं दूरदराज क ठउर धरती पइ बनाएस। यहोवा सदा जिअत ह।

29यहोवा सक्तीहीनन क सक्तीसाली बनइ में सहायता देत ह। उ अइसे ओन लोगन क जेनके लगे सक्ती नाहीं अहइ, प्रेरित करत ह कि उ सक्तीसाली बनइ।

30नउजवान थक जात हीं अउर ओनका विस्त्राम क जरूरत पड़जात ह। हिअँ तलक कि किसोर भी ठोकर खात हीं अउर गिरत हीं।

31किन्तु उ सबइ जउन यहोवा क भरोसा करत अहई आपन सक्ती क प्राप्त कइ लेइ। उ पचे उँचाई पइ उड़ि ओकर पखना बाज़ क नाई होइ। उ पचे दौड़ी किन्तु कमज़ोर नाहीं होइ। उ पचे चली किन्तु थकी नाहीं

### यहोवा सृजनहार अहइ: उ अमर अहइ

41 यहोवा कहा करत ह, “सुदूरवर्ती देसो, चुप रहा अउर मोरे लगे आवा। जातियो, फुन स सुदृढ़ बना। मोरे लगे आवा अउर मोहसे बातन करा। आपुस में मिलिके हम निहचय करी कि उचित का अहइ।

2कउन उ बिजेता क जगाएस ह, जउन पूरब स आइ? कउन ओहसे दूसर देसन क हरवावत अउर राजा लोगन क अधीन कइ देत? कउन ओकर तरवारन क एतना बढ़ाइ देत ह कि उ पचे अनगिनत होइ जात जेतना रेत-कण होत हीं? कउन ओकरे धनुसन क एतना अनगिनत कइ देत जेतना भूसे क छिलकन होत हीं?

3उ मनई पाछा करी अउर ओन रास्ट्रन क पाछा बगैर नोस्कान उठाए करत रही अउर अइसे ओन ठहरन तलक जाइ जहाँ उ पहिले कबहुँ गवा ही नाहीं।

4कउन इ सबइ सब घटित करत ह? कउन इ किहेस? कउन आदि स सबलोगन क बोलाएस? मई यहोवा एन सबइ बातन क किहेउँ। मई यहोवा ही सबसे पहिला हउँ। आदि क पहिले स मोर अस्तित्व रहा ह, अउर जब सब कछू चला जाइ तउ भी मई हिअँ रहब।

5सुदूरवर्ती देस एका लखिहीं अउर भयभीत होई। दूर धरती क छोर क लोग फुन आपुस में एक जुट होइके भय स काँपि उठई।”

6“काम करइवालन एक दूसर क मदद करत ह अउर मज़बूत होइवइ बरे हिम्मत बढ़ावत ह। 7मूर्ति बनावइ बरे एक कारीगर लड़की काटत अहइ। फुन उ मनई सुनारे क उत्साहित करत ह। एक कारीगर हथौड़े स धातु क पत्तर बनावत अहइ। फुन उ कारीगर निहायी पइ काम करइवाले मनई क प्रेरित करत अहइ। इ आखिरी कारीगर कहत अहइ, काम अच्छा अहइ, ‘किन्तु इ धातु बाहरे नाहीं निकरी।’ किन्तु उ तउ प भी मूर्ति क आधार पइ कीले स जड़ि द्या, ताकि इ कबहुँ हिल-डुल तलक नाहीं पाई।”

### यहोवा ही हमार रच्छा कइ सकत ह

8यहोवा कहत ह: “हे मोर सेवक इस्राएल, हे याकूब मोर मीत इब्राहीम क सन्तान तोहका मई चुनेउँ ह,

9मई तोहका भूईया क दूर जगह स उठाएउँ। मई तू पचन्क उ दूर देस स बोलाएउँ। मई कहेउँ, तू मोर सेवक



अहा।" मई तोहका चुनेउँ ह अउर मई तोहका रद्द किहेउँ ह।

10तू चिन्ता जिन करा, मई तोहरे संग हउँ। तू भयभीत जिन हवा, मई तोहार परमेस्सर हउँ। मई तोहका सुदृढ़ करब। मई तोहका आपन नेकी क दाहिने हाथे स सहारा देब।

11लखा, कछू लोग तोहसे नाराज अहई किन्तु उ पचे लजइहीं। जउन तोहार दुस्मन अहई उ पचे नाहीं रहिहीं, उ पचे सब हेराइ जइहीं।

12तू अइसे ओन लोगन क खोज करब्या जउन तोहरे बिरुद्ध रहेन। किन्तु तू ओनका नाहीं पउब्या। उ पचे सबइ लोग जउन तोहसे लड़ा रहेन, पूरी तरह लुप्त होइ जइहीं।

13मई तोहार परमेस्सर यहोवा हउँ। मई तोहार सीधा हाथ थाम रखे हउँ। मई तोहसे कहत हउँ कि जिन डेराउन। मई तोहका सहारा देब।

14कीमती यहूदा, तू निर्भय रहा। हे मोर प्रिय इस्राएल क लोगो! भयभीत जिन रहा। फुरइ मई तोहका मदद देबउँ। खुद यहोवा ही इ सबइ बातन कहे रहा। इस्राएल क पवित्तर परमेस्सर जउन तोहार रच्छा करत ह, कहे रहा:

15"लखा, मई तोहका एक नवे दौवइ क औजार जइसा बनाएउँ ह। इ औजारे मँ बहोत स दौतन अहई जउन बहोत तीखे अहई। किसान एका अनाज क छिलका उतारइ क काम मँ लिआवत हीं। तू पर्वतन क गोड़न तले मसलब्या अउर ओनका धूरि मँ मिलाइ देब्या। तू पर्वतन क अइसा कइ देब्या जइसे भूसा होत ह।

16तू ओनका हवा मँ उछरब्या अउर हवा ओनका उड़ाइके दूर लइ जाइ अउर ओनका कहुँ छितराई देइ। तब तू यहोवा मँ टिकिके आनन्दित होब्या। तोहका इस्राएल क पवित्तर परमेस्सर प बहोत गर्व होइ।

17गरीब जन, अउर जरूरतमंद जल हेरत हीं किन्तु ओनका जल नाहीं मिलत ह। उ पचे पियासा अहई अउर ओनकर जीभ झुरान अहइ। मई ओनकर बिनतियन क जवाब देब। मई ओनका न ही तजब अउर न ही मरइ देब।

18मई झुरान पहाइ पइ नदियन बहाइ देब। घाटियन मँ स जलस्रोत बहाइ देब। मई रेगिस्तान क जल स भरी झील मँ बदल देब। उ झुरान धरती पइ पानी क सोतन मिलिहीं।

19रेगिस्तान मँ देवदार क, कीकर क, जैतून क, सनावर क, तिघारे क, चीड़ क बृच्छ जमिहीं।

20लोग अइसा होत भए लखिहीं अउर उ पचे जानिहीं कि यहोवा क सक्ती इ सब किहेस ह। लोग एनका लखिहीं अउर समुझब सुरू करिहीं कि इस्राएल क पवित्तर परमेस्सर इ बातन किहेस ह।"

### यहोवा क लबार देवतन क चितउनी

21यहोवा, याकूब क राजा कहत ह, "आ, अउर मोका आपन मुकदमा द्या। आपन सबूत मोका देखावा। तब हम इ निहचय करब कि का उचित अहई?" 22तोहरे पचन्क मूरतियन क हमरे लगे आइके, जउन घटत अहइ, उ बतावइ चाही।

"सुरू मँ का कछू घटा रहा अउर भविस्स मँ का घटइवाला अहइ। हमका बतावा हम बड़े धियान स सुनब।

जेहसे हम इ जान जाइ कि अगवा का होइवाला अहइ। 23हमका ओन बातन क बतावा जउन घटइवाली अहई। जेनका जानइ क हमका इन्तजार अहइ ताकि हम पतियायी कि फुरइ तू देवता अहा। कछू करा। चाहे भला चाहे बुरा ताकि हम लखि सकी अउर जान सकी कि तू जिअत अहा अउर तोहार अनुसरण करी।

24"लखा, हे लबार देवता, तू पचे बेकार स भी जियादा बेकार अहा! तू पचे कछू भी नाहीं कइ सकत्या। केवल बेकार क भ्रस्ट लोग ही तू पचन्क पूजइ चाहत हीं।"

### बस यहोवा ही परमेस्सर अहइ

25"जवाब मँ मई एक मनई क उठाएउँ ह। उ पूरब स जहाँ सूरज उगा करत ह, आवत अहइ। उ मोरे नाउँ क उपासना किया करत ह। जइसे कोहार माटी रौंदा करत ह वइसे ही उ बिसेस मनई राजा लोगन क रौंदा।"

26इ सबइ घटइ स पहिले ही हमका जउन बताएस ह, हमका ओका परमेस्सर कहइ चाही। का हमका इ सबइ बातन तू पचन्क कउनो मूरति बताएस? नाहीं। कउनो भी मूरति कछू भी हमका नाहीं बताए रही। उ सबइ मूरतियन तउ एक भी सब्द नाहीं बोल पावत हीं। उ सबइ लबार देवतन एक भी सब्द जउन तू पचे बोला करत ह नाहीं सुन पावत हीं।

27मई, यहोवा पहिले रहेउँ जउन इ बातन क बिसय मँ सिथ्योन क बताएउँ ह! उ मई ही रहेउँ जउन दूत क इ बड़िया संदेस क साथ यरूसलेम पठएउँ। "लखा, तोहार लोग वापस आवत अहई।"

28जइसा मई लखेस, हुवाँ कउनो एक भी मोजूद नाहीं रहा जउन आपन तर्क पेस करी! का एकर मतलब अहइ कि ओन देवतन मँ स एक भी वकील न रही! मई ओका प्रस्न पूछेस, किन्तु ओनमाँ स कउनो भी कछू नाहीं बोलेस!

29लखा, इ सबइ देवतन बिल्कुल ही बियर्थ अहई! उ पचे कछू नाहीं कइ पावतेन! उ कछू नाहीं सिरिफ हवा अहइ।

### यहोवा क बिसेस सेवक

42 "मोरे दास क लखा। मई ओकर हाथ सँभारेउँ ह। उहइ एक अहइ जेका मई चुनेउँ ह, मई ओहसे बहोत खुस हउँ। मई आपन आतिमा ओह पइ रखत हउँ। उ ही सब रास्ट्रन मँ निआव कइ सकत ह।

उ गलियन मँ जोर स नाहीं बोली। उ नाहीं गोहराई अउर न चीखी। उ विनम्र होब्या। उ कुचाल भवा सरकण्डा तलक क नाहीं तोड़ी। उ टिमटिमात भइ लौ तलक क भी नाहीं बुझाई। उ सच्चाई स निआव क कायम करी।

उ कमजोर या कुचरा भवा तब तलक नाहीं होइ जब तलक उ निआव क दुनियाँ मँ न लइ आवइ। दूर देसन क लोग ओकर सिच्छन पइ बिस्सास करिहीं।"

### यहोवा जगत क सृजनहार अउर सासक अहइ

5सच्चा परमेस्सर यहोवा इ सबइ बातन कहेस ह: (यहोवा अकासन क बनाएस ह। यहोवा अकास क धरती पइ तानेस

ह। धरती पड़ जउन कछू अहइ उ भी उहइ बनाएस ह। धरती पड़ सबहि लोगन पड़ उहइ प्राण फूँकत ह। धरती पड़ जउन भी लोग चलत फिरत अहई, ओन सबन क उहइ जिन्नगी प्रदान करत ह।)

6“मई, यहोवा, तोहका नीक मकसद स बुलाएस रहा! मई तोहार हाथ थामब अउर तोहार रच्छा करब। तू एक चिहन इ प्रगट करइ क होब्या कि लोगन क संग मोर एक वाचा अहइ। तू सब लोगन पड़ चमकइ क एक प्रकास होब्या।

7तू आँधरन क आँखी क प्रकास देब्य अउर उ सबइ लखइ लगिहीं। अइसे बहोत स लोग जउन जेल में पड़ा अहई, तू ओन लोगन क अजाद करब्य। तू बहोत स लोगन क जउन अँधियारा में रहत हीं। ओनका उ कारागार स तू बाहेर छुड़ाइ लउब्या।”

8मई यहोवा हउँ। मोर नाउँ यहोवा अहइ। मई आपन महिमा दूसर क नाहीं देब। मई आपन ओन मूरतियन क उ तारीफ जउन मोर अहई, नाहीं लेइ देब।

9सुरू में मई कछू बातन जेनका घटब रहा, बताए रहेउँ अउर उ सबइ घटि गइन। अब तोहका उ सबइ बातन घटइ स पहिले ही बताउब जउन अगावा चलिके घटिहीं।”

### परमेस्सर क स्तुति

10यहोवा बरे एक नवा गीत गावा, तू पचे जउन दूर दराज क देसन में बसा अहा, तू पचे जउन सागरे पड़ जलयान चलावत अहा, तू पचे समुद्र क सबहि जीवन, दूरवर्ती देसन क सबहि लोगन, यहोवा क यसगान करा।

11हे रेगिस्तान एवं नगरन अउर केदार क गाँवन, यहोवा क तारीफ करा। सेना क लोगो, आनन्द बरे गावा। आपन पर्वतन क चोटी स गावा।

12यहोवा क महिमा द्या। दूर देसन क लोगो ओकर यसगान करा।

13यहोवा वीर योद्धा स बाहेर निकरी उ मनई स जउन जुद्ध बरे तत्पर अहइ। उ बहोत उत्तेजित होइ। उ पुकारी अउर जोर स ललकारी उ गोहराई अउर जोर स ललकारी अउर आपन दुस्मनन क पराजित करी।

### परमेस्सर धीरज रखत ह

14“बहोत समय स मई कछू भी नाहीं कहेउँ ह। मई अपने ऊपर नियन्त्रण बनाए रखेउँ ह अउर मई चुप रहेउँ ह। किन्तु अब मई ओतने जोर से चिल्लाब जेतने जोर स बच्चे क जनत भए मेहरारू चिल्लात ह। मई बहोत तेज अउर जोर स साँस लेब।

15मई पर्वतन-पहाड़ियन क नस्ट कइ देब। मई जउन पौधे हुवाँ उगत हीं। ओनका झुराइ देबउँ। मई नदियन क झुरान धरती में बदल देबउँ। मई जल क सरोवरन क सुखाइ देब।

16फुन मई आँधरन क अइसी राह देखौउब जेन पड़ ओका कबहुँ नाहीं लइ जाइ गवा। मई आँधर लोगन क अइसी जगह पड़ लेइ जाब जहाँ उ पचे कबहुँ नाहीं भवा। ओनके बरे मई अँधियारा क प्रकास में बदल देबउँ। ऊँच नीच धरती क मई समथर बनाउब। मई ओन कामन क

करब जेनकर मई बचन दिहेउँ ह। मई आपन लोगन क कबहुँ नाहीं तजब।

17किन्तु कछू लोग मोर अनुसरण करी तजि दिहेन। उ पचे सोना स मढ़ी मूरतियन पड़ विस्वास कइके आपन-आप क लज्जित किहेन। ओनसे उ पचे कहा करत हीं कि ‘तू पचे हमार देवतन अहा।’ उ पचे आपन लबार देवतन क बिस्वासी अहई। किन्तु अइसे लोग बस निरास ही होइहीं।”

### इस्त्राएल परमेस्सर क नाहीं सुनेस

18“तू सबइ बहिर लोगन क मोर सुनइ चाही। तू सबइ आँधर लोगन क एहर दृष्टि डावइ चाही अउर मोका लखइ चाही।

19कउन अहइ ओतना आँधर जेतना मोर दास अहई? कउनो नाहीं। कउन अहइ ओतना बहिर जेतना मोर दूत अहइ जेका मई इ संसार में पठएउँ ह? कउनो नाहीं। इ आँधर कउन अहइ जेकरे संग मई वाचा किहेउँ? इ पचे ऐतना आँधर अहई जेतना आँधर यहोवा क दास अहइ।

20उ लखत बहोत ह, किन्तु मोर हुकुम नाहीं मानत। उ आपन कानन स साफ साफ सुनि सकत ह किन्तु उ मोर सुनइ स इन्कार करत ह।”

21यहोवा उहइ चाहत ह जउन ओकरे सेवक इस्त्राएल बरे बड़ियार होइ, एँह बरे उ (यहोवा) ओनका महान अउर अद्भुत उपदेस देत ह।

22किन्तु ओनका कइँती लखा। उ पचे हराइ दिहे गएन अउर ओनकर धन जुद्ध में लूटि लिहे गएन। उ पचे सबहि जैल में बन्द कीन्ह गएन। लोग ओनसे ओनकर धन छीनी लिहेन ह। कउनो मनई ओकार रच्छा करइ क लाइक नाहीं अहा। दूसर मनई ओकर धन क लूटि लिहेन। कउनो मनई अइसा नाहीं जउन कहइ “एका वापिस करा।”

23तू पचनमें स का कउनो मनई एका सुनत ह? का तू पचनमें स कउनो क भी इ बात क परवाइ अहइ अउर का कउनो सुनत ह कि भविस्स में तू पचनक साथ का होइवाला अहइ? 24याकूब अउर इस्त्राएल क सम्पत्ति लोगन क कउन लेइ दिहस? यहोवा ही ओनका अइसा करइ दिहस। हम यहोवा क विरुद्ध पाप किहे रहे? तउ यहोवा लोगन क हमार सम्पत्ति छोड़ दिहस? इस्त्राएल क लोग उस ढंग स जिअब नाहीं चाहत रहेन जउने ढंग स यहोवा चाहत रहा। इस्त्राएल क लोग ओकरी सिच्छा पड़ कान नाहीं दिहन। 25तउ यहोवा ओन पड़ कोहाइ गवा। यहोवा ओनके खिलाफ भयानक लड़ाइयन लड़ाइ दिहस। इ अइसे भवा जइसे इस्त्राएल क लोग आगी में बरत होई अउर उ पचे जान ही न पाए होई कि का होत अहइ। इ अइसा रहा जइसे उ पचे बरत होई। किन्तु उ पचे जउन वस्तुअव घटत रहिन, ओनका समुझावइ क जतन ही नाहीं किहेन।

### परमेस्सर सदा आपन लोगन क साथ रहत ह

43 याकूब, तोहका यहोवा बनाए रहा। इस्त्राएल, तोहार रचना यहोवा किहे रहा। अब यहोवा कहत ह: “भयभीत जिन ह्वा! मई तोहका बचाइ लिहेउँ। मई तोहका नाउँ स पुकारेउँ ह। तू मोर अहा। 2जब तोहे पड़ बिपत्तियन

पड़त हीं, मई तोहरे संग रहत हउँ। जब तू नदी पार करब्या, तू बहब्या नाहीं। तू जब आगी स होइके गुजरब्या, तउ तू बरब्या नाहीं। लपटन तोहका नोस्कान नाहीं पहोंचइही। 3काहेकि मई तोहार परमेस्सर यहोवा हउँ। मई इस्त्राएल क पवित्तर तोहार उद्धारकर्ता हउँ। तोहरे बदले में मई मिस्त्र क दइके तोहका आजाद कराएउँ ह। मई इथोपिया अउ सबा क तोहका आपन बनावइ क दइ डाएउँ ह। 4तू मोरे बरे बहोत महत्वपूर्ण अहा। एह बरे मई तोहार आदर करब। मई तोहसे प्रेम करत हउँ, ताकि तू जी सका, अउर मोर होइ सका। एकरे बरे मई सबहिं मनइयन अउर जातियन क बदले में देबउँ।”

### परमेस्सर आपन सन्तानन क घर लिआई

5“एह बरे जिन डेराअ। मई तोहरे संग हउँ। तोहार बच्चन क एकट्ठा कइके मई ओनका तोहरे लगे लिआउब। मई तोहरे लोगन क पूरब अउ पच्छिम स एकट्ठा करब। 6मई उत्तर स कहब: मोर बच्चे मोका लौटाइ द्या।” मई दक्खिन स कहब: “मोरे लोगन क बंदी बनाइके जिन रखा। दूर-दूर स मोरे पूत अउर बितियन क मोरे लगे लिआवा। 7ओन सबहिं लोगन क, जउन मोर अहई, मोरे लगे लइ आवा अर्थात् ओन लोगन क जउन मोर नाउँ लेत हीं। मई ओन लोगन क खुद अपने बरे बनाएउँ ह। ओनकर रचना मई कियेउँ ह अउर उ पचे मोर अहई।”

### जगत बरे इस्त्राएल परमेस्सर क साच्छी अहइ

8“अइसे लोगन क जेनकर आँखिन तउ अहई किन्तु फुन भी उ पचे आँधर अहई, ओनका निकार लिआवा। अइसे लोगन क जउन कानन क होत भए भी बहिर अहई, ओनका निकार लिआवा। 9सबहिं लोगन अउ सबहिं रास्त्रन क एक संग बटोरा। अगर कउनो भी लबार देवता कबहुँ इ कहेस कि प्रारम्भ में का भवा रहा अउर भूतकाल में इ बताए रहा कि आगे का कछू होइ तउ ओनका आपन गवाह लिआवइ द्या अउर ओनका सच साबित करइ द्या। अगर उ सुन सकत ह तउ ओका आवइ द्या अउर सच्चाइ क कहइ द्या।”

10यहोवा कहत ह, “तू ही लोग मोर साच्छी अहा। तू मोर उ सेवक अहा जेका मई चुनेउँ ह। मई तोहका एह बरे चुनेउँ ह ताकि तू समुझ ल्या कि ‘उ मई ही हउँ’ अउर मोह माँ बिस्सास करइ। मई फुरइ परमेस्सर हउँ। मोसे पहिले कउनो परमेस्सर नाहीं होइ। 11मई खुद ही यहोवा हउँ। मोरे अलावा अउर कउनो दूसर उद्धारकर्ता नाहीं अहइ, बस केवल मई ही हउँ।

12उ मई ही हउँ जउन तोहसे बात किये रहा। तोहका मई बचाएउँ ह। उ सबइ बातन मई तोहका बताए रहेउँ। जउन तोहरे संग रहा, उ कउनो अनजाना देवता नाहीं रहा। तू मोर साच्छी अहा अउर मई परमेस्सर हउँ।” (इ सबइ बातन यहोवा कहे रहा।) 13“मई तउ सदा स ही परमेस्सर रहा हउँ। जब मई कछू करत हउँ तउ मोर कीन्ह क कउनो भी मनई नाहीं बदल सकत अउर मोर सक्ती स कउनो भी मनई कउनो क बचाइ नाहीं सकत।”

14इस्त्राएल क पवित्तर यहोवा तोहका छोड़ावत ह। यहोवा कहत ह, “मई तोहरे बरे बाबुल में फउजन पठउब। सबहिं ताले लगे दरवाजन क मई तोड़ देब। कसदियन क जीत क नारे दुःख भरी चीखन में बदल जइहीं। 15मई तोहार पवित्तर यहोवा हउँ। इस्त्राएल क मई रचेउँ ह। मई तोहार राजा हउँ।”

### यहोवा फुन आपन लोगन क रच्छा करी

16यहोवा सागर में राहन बनाई। हिआँ तलक कि पछाइन खात भए पानी क बीच भी उ आपन लोगन बरे राह बनाई। यहोवा कहत ह, 17“उ पचे लोग जउन आपन रथन, घोड़न अउर फउजन क लइके मोहसे जुद्ध करिहीं, पराजित होइ जइहीं। उ पचे फुन कबहुँ नाहीं उठि पइहीं। उ पचे नस्त होइ जइहीं। उ पचे दीये क लौ क तरह बुझ जइहीं। 18तउ ओन बातन क याद जिन करा जउन प्रारंभ में घटी रहिन। ओन बातन क जिन सोचा जउन कबहुँ बहोत पहिले घटी रहिन। 19काहेकि मई चिजियन क नवा जइसा बनावत हउँ! अब एक नवे बृच्छ क नाई तोहार अंकुरन होइ। तू जानत अहा कि इ सच नाहीं अहइ! मई तोहार बरे रेगिस्ताने में फुरइ एक मारग बताउब। मई फुरइ झुरान धरती पइ नदियन बहाइ देब। 20हिआँ तलक कि बनेर पसु अउर कुचकुचवा भी मोर आदर करिहीं। विसालकाय पसु अउर पच्छी मोर आदर करिहीं। जब मरुभूमि में मई पानीरह देब तउ उ पचे मोर आदर करिहीं। झुरान धरती में जब मई नदियन रचना कइ देब तउ उ पचे मोर आदर करिहीं। मई अइसा आपन लोगन क पानी देइ बरे करब। ओन लोगन क जेनका मई चुनेउँ ह। 21इ सबइ उ पचे लोग अहई अउर इ सबइ लोग मोर तारीफ क गीत गावा करिहीं।

22“याकूब, तू मोका नाहीं गोहराया। काहेकि हे इस्त्राएल, तोहार मन मोहसे भरि गवा रहा। 23तू लोग भेड़ी क आपन बलियन मोरे लगे नाहीं लिआया। तू पचे मोर मान नाहीं रख्या। तू पचे मोका बलियन नाहीं अर्पित किहा। मोका अन्न बलियन अर्पित करइ बरे मई तू पचन पइ जोर नाहीं डावत हउँ। तू पचे मोरे बरे धूप बारत-बारत हार जाब्या, एकरे बरे मई तोह पइ दबाव नाहीं डावत।

24“तू पचे आपन बलियन क चर्बी स मोका तुम नाहीं करत्या मोका आदर देइ बरे चिजियन मोल लेइ बरे आपन धने क उपयोग नाहीं करत्या। आपन बलियन क चर्बी स मोका तुम नाहीं करत्या। किन्तु तू मोहे पइ दबाव डावत अहा कि मई तोहरे दास क नाई आचरण करउँ। तू तब तलक पाप करत चला गया जब तलक मई तोहरे पापन स पूरी तरह तंग नाहीं आइ गएउँ।

25“मई उहइ हउँ जउन तोहरे पापनक धोइ डावत हउँ। खुद आपन खुसी बरे मई अइसा ही करत हउँ। मई तोहरे पापनक याद नाहीं रखब। 26अब, मोका उ याद दिलावा कि का भवा! बहस व मुबाहिसा करइ बरे अउर इ फइसला लेइ बरे कि कउन सत्य अहइ हमका एक संग मिलइ द्या। तू आपन पच्छ में तर्क पेस किया ह एह बरे तू इ कोसिस किहा कि तू निर्दोस अहइ! 27तोहार पचनक आदि बाप पाप किये रहा अउर तोहार हिमायतियन मोरे खिलाफ काम किये रहेन। 28मई तोहरे पचनक पवित्तर सासकन क अपवित्तर

बनाइ दिहेउँ। मई याकूब क लोगन क अभिसप्त बनाएउँ। मई इस्त्राएल क अपमान कराएउँ।”

### सिरिफ यहोवा ही परमेस्सर अहइ

**44** “याकूब, तू मोर सेवक अहा। इस्त्राएल, मोर बात सुना। मई तोहका चुनेउँ ह। जउन कछू मई कहत हउँ ओह पइ धियान द्या। 2मई यहोवा हउँ अउर मई तोहका बनाएउँ ह। तू जउन कछू अहा ओहका बनावइवाला मई ही हउँ। जब तू महतारी क देह में ही रह्या, मई तबहिं स तोहार सहायता किहे रहेउँ। मोर सेवक याकूब डेराअ जिन। यसरून (इस्त्राएल) तोहका मई चुनेउँ ह।

3“जइसे मई पियासे लोगन बरे पानी बरसाउब अउर जइसे झुरान धरती पइ मई जलधारन बहाउब, उसी तरह तोहरी संतानन पइ मई आपन आतिमा डाउब। मोर आसीबादि तोहार गदेलन पइ अइसा ही बहब जइसा पानी क टंकी स पानी बहत ह। 4उ पचे हर मोसम में चिनार क बृच्छन क नाई बढ़त भए होइहीं।

5“लोगन में कउनो कही, ‘मई यहोवा क अहउँ।’ तउ दूसर मनई याकूब क नाउँ लेइ। कउनो मनई आपन हाथे पइ लिखी, ‘मई यहोवा क हउँ अउर दूसर मनई ‘इस्त्राएल’ नाउँ क उपयोग करी।” 6यहोवा इस्त्राएल क राजा अहइ। सर्वसक्तीमान यहोवा इस्त्राएल क रच्छा करत ह। यहोवा कहत ह, “परमेस्सर केवल मई ही हउँ। अन्य कउनो परमेस्सर नाहीं अहइ। मई ही आदि हउँ। मई ही अंत अहउँ। 7मोरे जइसा परमेस्सर कउनो दूसर नाहीं अहइ अउर जदि कउनो अहइ तउ ओका अब बोलइ चाही। ओका आगे आइके कउनो प्रमाण देइ चाही कि उ मोरे जइसा अहइ। भविस्स में का कछू होइवाला अहइ ओका बहुत पहले ही कउन बनाइ दिहे रहा? तउ उ पचे हम का अब बताइ देई कि अगवा का होइ? 8डेराअ जिन, चिंता जिन करा। जउन कछू घटइवाला अहइ, उ मई तू पचन्क सदा बताएउँ ह। तू लोग मोर साच्छी अहा। कउनो दूसर परमेस्सर नाहीं अहइ। केवल मई ही हउँ। कउनो दूसर ‘सरण स्थान’ नाहीं अहइ। मई जानत हउँ केवल मई ही हउँ।”

### लबार देवता बेकार अहई

9कछू लोग मूरति (लबार देवता) बनाबा करत हीं। किन्तु उ पचे बेकार अहई। लोग ओन बुतन स पिरेम करत हीं किन्तु उ सबइ बुत बेकार अहई। उ सबइ लोग ओन बुतन क साच्छी अहई किन्तु उ सबइ लख नाहीं पउतेन। उ पचे लज्जित होइहीं।

10एन लबार देवतन क कउनो काहे गढ़ी? एन बेकार क बुतन क कउनो काहे ढाली? 11ओन देवतन क कारीगरन गढ़ेन ह अउर उ सबइ कारीगर तउ मात्र मनई अहई, न कि देवता। जदि उ पचे सबहिं एकजुट होइके पक्ति में आवई अउर एन बातन पइ विचार क लेन-देन करई तउ उ सबइ लजाइ जइहीं अउर डर जइहीं।

12कउनो एक कारीगर कोयलन पइ लोहा क तपावइ बरे आपन अउजारन क उपयोग करत ह। उ मनई धातु क पीटइ बरे आपन हथौड़ा कामे में लिआवत ह। एकरे बरे उ

आपन बाँहन क सक्ती क प्रयोग करत ह। किन्तु उहइ मनई क जब भूख लागत ह, ओकर सक्ती जात रहत ह। उहइ मनई अगर पानी न पियइ तउ कमजोर होइ जात ह।

13दूसर मनई आपन रेखा पटकइ क सूत क उपयोग करत ह। उ तखे पइ रेखा हींचइ बरे परकार क काम में लिआवत ह। इ रेखा ओका बतावत ह कि उ कहाँ स काटइ। फिन उ मनई निहानियन क उपयोग करत ह अउर काठे में मूरतियन क उभारत ह। उ मूरतियन क नापइ बरे परकार क प्रयोग करत ह अउर इ तरह उ कारीगर लकड़ी क ठीक मनई क रूप दइ देत ह। फुन मनई क सा इ मूरति घरे में बइठाइ दीन्ह जात ह।

14कउनो मनई देवदार, सनोवर अथवा बाँज क बृच्छ क काट गिरावत ह। (किन्तु उ मनई ओन बृच्छन क उगावत नाहीं। इ सबइ बृच्छ बन में खुद अपने आप उगत हीं। जदि कउनो मनई बृच्छ उगावइ तउ ओकर बढ़वार बर्खा करत ह न कि उ मनई।) 15फुन उ मनई उ बृच्छ क आपन बारइ क काम में लिआवत ह। उ मनई उ बृच्छ क काटिके काठे क मुद्दिब्यन बनावत ह अउर ओनका भोजन बनावइ अउर खुद क गरमावइ क काम में लिआवत ह। मनई थोड़ी सी लकड़ी क आगी सुलगाइ के आपन रोटियन सेंकत ह। किन्तु तउ भी मनई उहइ लकड़ी स देवता क मूरति बनावत ह अउर फुन उ देवता क पूजा करइ लागत ह। इ देवता तउ एक मूरति अहइ जेका उ मनई बनाएस ह। किन्तु उहइ मनई उ मूरति क आगे आपन माथा नवावत ह। 16उहइ मनई आधी लकड़ी क आगी में बारि देत ह अउर उ आगी पइ माँस पकाइके भर पेट खात ह अउर फुन अपने आप क गरमावइ बरे मनई उहइ लकड़ी क बारत ह अउर फुन उहइ कहत ह, बहोत अच्छे! अब मई गरम हउँ अउर आगी क लपटन क लखि सकत हूँ।” 17किन्तु थोड़ी बहोत लकड़ी बच जात ह। तउ लकड़ी स मनई एक मूरति बनाइ लेत ह अउर ओका आपन देवता कहइ लागत ह। उ उ देवता क आगे माथा नवावत ह अउर ओकर पूजा करत ह। उ उ देवता स पराथना करत भए कहत ह, “तू मोर देवता अहा, मोर रच्छा करा।”

18इ सबइ लोग इ नाहीं जानतेन कि इ सबइ का करत अहई? इ सबइ का करत अहइ? इ सबइ लोग समझतेन नाहीं। अइसा अहइ जइसे एनकर आँखिन बंद होई अउर इ सबइ कछू लख ही नाहीं पावत होई। एनकर मन समुझइ क जतन ही नाहीं करत। 19एन वस्तुअन क बारे में इ सबइ लोग कछू सोचत ही नाहीं ह। इ सबइ लोग ना समुझ अहई। एह बरे एन लोग आपन मने में कबहुँ नाहीं सोचेन। “आधी लकड़ियन मई आगी में बारि डाएउँ। दहकत कोयलन क प्रयोग मई रोटी सेंकइ अउर माँस पकावइ में किहेउँ। फुन मई माँस खाएउँ अउर बची भइ लकड़ी क प्रयोग मई भ्रष्ट वस्तु (मूर्ति) बनावइ में किहेउँ। अरे, मई तउ एक लकड़ी क टूका क पूजा करत हउँ।”

20इ तउ बस उ राख क खाइ जइसा अहइ। उ मनई इ नाहीं जानत कि उ का करत अहइ? उ भ्रम में पड़ा भवा अहइ। एह बरे ओकर मन ओका गलत राह पइ लइ जात ह। उ मनई आपन बचाव नाहीं कइ पावत ह अउर उ इ

देख नहीं पावत ह कि उ गलत काम करत अहइ। उ मनई नहीं कही, “इ मूर्ति जेका मई थामे हउँ एक लबार देवता अहइ।”

### सच्चा परमेस्वर यहोवा इस्राएल क सहायक अहइ

21“हे याकूब, इ सबइ बातन याद रखा। इस्राएल, याद रखा कि तू मोर सेवक अहा। मई तोहका बनाएँउ। तू मोर सेवक अहा, एह बरे इस्राएल, मई तोहका नहीं बिसराउब।

22तोहार पाप एक बड़के बादर जइसे रहेन। किन्तु मई तोहरे पापन्क उड़ाइ दिहेउँ। तोहार पाप बादर क नाई हवा में बिलाइ गएन। मई तोहका बचाएँउँ अउर तोहार रच्छा किहेउँ। एह बरे मोरे लगे लउटि आवा।”

23अकास खुस अहइ, काहेकि यहोवा महान काम किहेस। धरती अउ हिआँ तलक कि धरती क तले बहोत गहिर ठउर भी खुस अहइँ। पर्वत परमेस्वर क धन्यवाद देत भए गावा। बने क सबहि बृच्छ तू पचे भी खुसी गवा। काहेकि यहोवा याकूब क बचाइ लिहस ह। यहोवा इस्राएल बरे महान कार्य किहे अहइ। 24जउन कछू भी तू अहा यहोवा तोहका बनाएस। यहोवा इ किहेस जब तू अबहि महतारी क गरम में ही रह्या। यहोवा तोहार रखवारा कहत ह। “मई यहोवा सब कछू बनाएँउँ। मई ही हुआँ अकास तानेउँ ह, अउर आपन समन्वा धरती क बिछाएँउँ।”

25लबार नबी सगुन देखाया करत हीं किन्तु यहोवा दसावत ह कि ओकर सगुन झूठ अहइँ। जउन लोग जादू टोना कइके भविस्स बतावत हीं, यहोवा ओनका मूरख सिद्ध करी। यहोवा तथाकथित बुद्धिमान मनइयन तलक क भ्रम में डाइ देत ह। उ पचे सोचत हीं कि उ पचे बहोत कछू जानत हीं किन्तु यहोवा ओनका अइसा बनाइ देत ह कि उ पचे मूरख देखाइ देई। 26यहोवा आपन सेवकन क लोगन क सन्देश सुनावइ बरे पठवत ह अउर फुन यहोवा ओन सन्देशन क फुरइ कइ देत ह। यहोवा लोगन क का करइ चाही ओनका इ बतावइ बरे दूत पठवत ह अउर फुन यहोवा देखाइ देत ह कि ओनकर सम्मति अच्छी अहइ।

### परमेस्वर कुसू क यहूदा क पुनःनिर्माण बरे चुनत ह

यहोवा यरूसलेम स कहत ह, “लोग तोहमाँ आइके फुन बसिहीं।” यहोवा यहूदा क नगरन स कहत ह, “तोहार फुन स निर्माण होइ। यहोवा ध्वस्त भए नगरन स कहत ह, “मई तू सबइ नगरन क फुन स उठाउब।”

27यहोवा गहिर सागर स कहत ह, ‘झुराइजा’ मई तोहार जल धारन क सूखा बनाइ देब।”

28यहोवा कुसू स कहत ह, “तू मोर चरवाहा अहा। जउन मई चाहत हउँ तू उहइ काम करब्या। तू यरूसलेम स कहब्या, “तोहका फुन स बनावा जाइ।” तू मन्दिर स कहब्या, ‘तोहार नीवन क फुन स निर्माण होइ।’”

### परमेस्वर कुसू क इस्राएल क मुक्ति बरे चुनत ह

45 इ सबइ उ बातन अहइँ जेनका यहोवा आपन चुने भए राजा कुसू कहत ह, “मई कुसू क दाहिन हाथ थामव। मई राजा लोगन क सक्ती छोरइ में ओकर

मदद करब। नगर दुआर कुसू क रोक नहीं पइहीं। मई नगर क दुआर खोल देब, अउर कुसू भीतर चला जाइ।

2“कुसू, तोहार फउजन अगवा बढ़िहीं अउर मई तोहरे अगवा चलब। मई पर्वतन क समथर कइ देब। मई काँसे क नगर-दुआर क तोड़ डाउब। मई दुआरे पइ लगी लोहा क आँगल क काट डाउब।

3मई अँधियारा कमरा में रखी भइ दौलत तोहका देब। मई तोहका उ छिपा भवा धन देब। मई अइसा करब ताकि तोहका पता चलि जाइ कि मई यहोवा इस्राएल क परमेस्वर हउँ, अउर मई तोहका तोहार नाउँ स पुकारेस हउँ।

4मई इ सबइ बातन आपन सेवक याकूब बरे करत हउँ। मई इ सबइ बातन इस्राएल क आपन चुने भए लोगन बरे करत हउँ। कुसू, यद्यपि तू मोका नहीं जानत अहा, किन्तु मई तोहका तोहार नाउँ स पुकारे हउँ, यहाँ तलक कि तोहार आपन नाउँ स पुकारे हउँ।

5मई यहोवा हउँ। मई सिरिफ परमेस्वर हउँ। मोरे सिवा दूसर कउनो परमेस्वर नहीं अहइ। मई तोहका मज़बूत बनाए हउँ,\* यद्यपि तू मोका नहीं पहिचानत ह।

6मई इ काम करत हउँ ताकि सब लोग जान जाई कि मई ही परमेस्वर हउँ। पूरब स पच्छिम तलक सबहि लोग इ सबइ जानिहीं कि मई यहोवा हउँ अउर मोरे सिवा दूसर कउनो परमेस्वर नहीं।

7मई प्रकास क बनाएँउँ अउर मई ही अँधियारा क रचेउँ। मई सात्ति क सृजेउँ अउर विपत्तियन भी मई ही बनाएँउँ ह। मई यहोवा हउँ। मई ही इ सबइ बातन करत हउँ।

8ऊपर अकासे में निआव अइसे बरसब जइसे मेघ स बर्खा बरसत ह। धरती खुल जात ह। मुक्ति अइसा फलब फूलब जइसा कउनो पउथा धरती स उगत ह। पुण्य कर्म आपन चारिहुँ कइँती बढब! मई यहोवा ही इ सबइ कइ क कारण हउँ।

### परमेस्वर आपन सृष्टि क नियन्त्रण करत ह

9“धिवकार अहइ एँन लोगन क, इ सबइ उहइ स बहस करत अहइँ जउन ऐतका बनाएस ह। इ सबइ कउनो टूटे भए घड़े क ठीकरन जइसे अहइँ। कोहार नरम गीली माटी स घड़ा बनावत ह पर माटी ओहसे नहीं पूछत, ‘अरे, तू का करत अहा?’ वस्तुअन जउन बनाई गइ अहइँ, उ सबइ इ सक्ती नहीं रखतिन कि आपन बनावइवाले स सवाल पूछइ। इ सबइ लोग भी माटी क टूटे घड़न क ठीकरन क जइसे अहइँ। 10या, बच्चा आपन बाप स इ नहीं पूछ सकतेन कि ‘तू हमका जिन्नगी काहे देत अहा?’ बच्चा आपन महतारी स इ सवाल नहीं कइ सकत हीं कि “तू हमका काहे पइदा करति अहा?”

मई तोहका मज़बूत बनाए हउँ मूलार्थ, “मई एक कमरबंध (तोहार कमर क चारिहुँ कइँती) डालब।” आमतोर पर लोग कमरबंध क अपने कमर में आपन मांसपेसी क अतिरिक्त बल प्रदान करइ बरे बांधा करत ह। एँह बरे इ अरथ क साथ एक महावरा बन गवा। “कउनो मनई क आपन काम करइ बरे मज़बूत अउर तइयार होना।”

11यहोवा इस्राएल क परमेस्सर पवित्तर अहइ। उ इस्राएल क बनाएस। यहोवा कहत ह,

“का तू मोहसे मोरे बच्चन क बारे में पूछब्या अथवा तू मोका आदेस देब्या ओनके ही बारे में जेका मई आपन हाथन स रचेउँ।

12तउ लखा, मई धरती बनाएउँ अउर उ पचे सबहि लोग जउन एह पड़ रहत हीं, मोर बनाए भए अहईं। मई खुद आपन हाथन स अकासन क रचता किहेउँ, अउर मई अकास क सितारन क आदेस देत हउँ।

13मई हउँ जउन वास्तव में ओका इ काम करइ बरे उकसाएस ह। मई ओकर रास्ता क सहल बनाउबउँ। मई आपन नगर क फुन स बनाब। उ मोरे क लोगन बिना किसी रिस्वत दिए या बिना कउनो मोल चुकाए अजाद कइ देइ!” सर्वसक्तीमान यहोवा इ सबइ बातन कहेस।

14यहोवा कहत ह, “मिस्र अउ कूस बहोत वस्तुअन रचेस रहेन, किन्तु हे इस्राएल, तू उ सबइ वस्तुअन पउब्या। सेबा क लम्बे लोग तोहार होइहीं। उ पचे आपन गर्दन क चारिहूँ कइँती जंजीर लिए भए तोहरे पाछे-पाछे चलिहीं। उ सबइ लोग तोहरे समन्ना निहुरिहीं, अउर उ पचे तोहसे बिनती करिहीं।” इस्राएल, परमेस्सर तोहरे संग अहइ, अउर ओका तजिके कउनो दूसर परमेस्सर नाहीं अहइ।

15हे परमेस्सर, तू उ परमेस्सर अहा जेका लोग लख नाहीं सकतेन। तू ही इस्राएल क उद्धार कर्ता अहा।

16बहोत स लोग मिथ्या देवता बनावा करत हीं। किन्तु उ सबइ लोग तउ निरास ही होइहीं। उ सबइ सबहि लोग तउ लजाइ जइहीं।

17किन्तु इस्राएल यहोवा क जरिये बचाइ लीन्ह जाइ। उ मुक्ति जुगन तलक बनी रही। फुन इस्राएल कबहुँ भी लज्जित नाहीं होइ।

18यहोवा ही परमेस्सर अहइ। उ अकास रचेस ह, अउर अहइ धरती बनाएस ह। यहोवा ही धरती क अपने जगहिया पड़ टेकाएस ह। जब यहोवा धरती बनएस उ इ सबइ नाहीं चाहेस कि धरती खाली रहइ। उ एका रचेस ताकि एहमें जिनगी रहइ। मई यहोवा हउँ। मोरे अलावा कउनो दूसर परमेस्सर नाहीं अहइ।

19मई अकेल्ले इ सबइ बातन नाहीं किहेउँ। मई अजाद भाव स कहेउँ ह। संसार क कउनो भी अँधियारा में मई आपन बचन नाहीं छुपावत। मई याकूब क लोगन स नाहीं कहेउँ कि उ पचे मोका बीरान जगहन पड़ हेरइं। मई परमेस्सर हउँ अउर मई फुरइ बोहात हउँ। मई उहइ बातन कहत हउँ जउन फुरइ अहईं।”

### यहोवा सिद्ध करत ह कि उ ही परमेस्सर अहइ

20“तू लोग दूसरी जातियन स बच पराया। तउ आपुस में बटुर जा अउर मोरे समन्वा आवा। (इ सबइ लोग अपने संग मिथ्या देवन क मूर्तियन रखत हीं अउर एन बेकार क देवतन स पराथना करत हीं। किन्तु इ सबइ लोग इ नाहीं जानतेन कि उ पचे का करत अहईं? 21 एन लोगन क मोरे लगे आवइ क कहा। एन लोगन क आपन तर्क पेस करइ दया।)

“उ पचे बातन बहुत दिनन पहिले घटी रहिन, ओनके बारे में तू पचन्क कउन बोलाएस? बहोत-बहोत दिनन पहिले ही एन बातन क लगातार कउन बतावत रहा? उ मई यहोवा ही हउँ जउन इ सबइ बातन बताए रहा। मई ही एकमात्र यहोवा हउँ। मोरे अलावा कउनो अउर परमेस्सर नाहीं अहइ? का अइसा कउनो अउर अहइ जउन आपन लोगन क रच्छा करत ह? नाहीं, अइसा कउनो दूसर परमेस्सर नाहीं अहइ। 22हे हर कतहुँ क लोगो, तू पचन्क एन लबार देवतन क पाछे चलब छोड़ देइ चाही। तू पचन्क मोर अनुसरन करइ चाही अउर होइ जाइ चाही। मई परमेस्सर हउँ। मोहसे दूसर कउनो दूसर परमेस्सर नाहीं अहइ। परमेस्सर केवल मई ही हउँ।

23“मई खुद आपन सक्ती क साच्छी कइके प्रतिग्या किहेउँ ह। इ एक उत्तम बचन अहइ। इ एक आदेस अहइ जउन पूरा होइ ही। हर मनई मोर (परमेस्सर क) आगे निहुरी अउर हर मनई मोर अनुसरण करइ क बचन देइ। 24यहोवा आपन आप स सपथ लेइ के मोसे वाचा किहेस, ‘अच्छाई अउर मज़बूती तोहमें आउब्या।”

उ सबइ जउन ओहे (कुस्रू) पड़ कोहाइ उ अपमानित होइ। 25यहोवा अच्छे करम करइ बरे इस्राएल क लोगन क बिजयी बनाई अउर लोग ओकर तारीफ करिहीं।

### लबार देव बियर्थ अहईं

46 बेल अउर नेबो तोहरे अगवा निहुराइ दीन्ह ह अहईं। लबार देवता तउ बस केवल मूर्ति अहईं। लोग एन बुतन क जानवरन क पीठ पड़ लाद दिहेन ह। इ सबइ बुत बस एक बोझ अहईं, जेनका ढोउब ही अहइ। इ सबइ लबार देवता कछू नाहीं कइ सकतेन। बस लोगन क थकाइ सकत हीं। 2एन सबहि लबार देवतन क निहुराइ दीन्ह जाइ। इ सबइ बचिके कहुँ नाहीं पराइ सकिहीं। ओन सबहि क बन्दियन क तरह लइ जावा जाइ।

3“याकूब क परिवार, मोर सुना। हे इस्राएल क लोगो जउन अबहिं जिअत अहा, सुना। मई तू पचन्क तब स धारण किहे अहउँ जब अबहिं तू पचे महतारी क गर्भ में ही रह्या। 4मई तू पचन्क तबइ स धारण किहे हउँ जब स तू पचन्क जन्म भवा ह अउर मई तू पचन्क तबइ भी धारण करब, जब तू पचे बुढ़वा होइ जाब्या। तोहार पचन्क बार सफेद होइ जइहीं, मई तब भी तू पचन्क धारण किहे रहब काहेकि मई तोहार पचन्क रचना किहेउँ ह। मई तू पचन्क धारण किहे रहब अउर तोहार पचन्क रच्छा करब।

5“केकर संग तू मोर तुलना कइ सकत ह? कउनो भी मनई नाहीं अहइ जेकर तुलना मोहसे कीन्ह जाइ सकी! तोहार तुलना में स कउनो भी मोर सही तरीका स वर्णन नाहीं कइ सकत हीं। 6कछू लोग सोना अउ चाँदी आपन थैलियन स निकालेस, उ पचे ओनका तराजुअन स तौलेस अउर ओनका लबार देवता बनावइ बरे सोनार जेका उ मजदूरी पड़ आपन बरे मूर्तियन बनावइ बरे लाएस ह क देत हीं। तब फुन उ सबइ लोग उहइ लबार देवतन निहुरत हीं अउर ओकर सम्मान करत हीं। 7हैं उ सबइ लोग लबार देवतन लेब्या अउर ओका आपन काँधन पड़ रखिके लइ

चलव्या। किन्तु जब उ पचे एका धरती पइ थापिब, इ न ही उठ सकत या हिल-डुल कइ पावत। इ नार्ही कइ सकत काहेकि इ मूर्ति अहइ! लोग आपन लबार देवतन क समन्वा मदद बरे चिचियात हीं, किन्तु इ कबहुँ जबाव नार्ही देइ। इ लोगन क ओनकर विपत्तियन अउर कस्टन स नार्ही उबार सकत।

8“तू लोग पाप किहा ह। तू पचन्क एन बातन क फुन स याद करइ चाही। एन बातन क याद करा अउर सुदृढ़ होइ जा। 9ओन बातन क सुमिरा जउन बहोत पहिले घटी रहिन। याद राखा कि मई परमेस्सर हउँ। कउनो दूसर अन्य परमेस्सर नार्ही अहइ। उ सबइ लबार देवता मोरे जइसे नार्ही अहइ।

10“सुरू मँ मई तू पचन्क ओन बातन क बारे मँ बताइ दिहे रहेउँ जउन अंत मँ घटी। बहोत पहिले स ही मई तू पचन्क उ सबइ बातन बताइ दिहे हउँ, जउन अबहिं घटी नार्ही अहइ। जब मई कउनो बात क कउनो योजना बनावत हउँ तउ उ घटत ह। मई उहइ करत हउँ जउन करइ चाहत हउँ। 11लखा, पूरब दिसा स मँ एक मनई क बोलावतहउँ उ मनई एक उकाब क समान होइ। उ एक दूर देस स आई अउर उ ओन कामन क करी जेनका करइ क योजना मई बनाएउँ ह। मई तू पचन्क बतावत हउँ कि मई एका करब अउर मई ओका करब ही। काहेकि ओका मई ही बनाएउँ ह। मई ओका लिआउब ही।

12“तू पचन मँ स कछू सोचा करत हीं कि तू पचन सक्ती अहइ किन्तु तू पचे भले काम नार्ही करत अहा। मोर सुना। 13मई भले काम करब। मई हाली ही आपन लोगन क रच्छा करब। मई आपन सिथ्योन अउर आपन अद्भुत इस्त्राएल क बरे उद्वद्धार लिआउब।”

### बाबुल क परमेस्सर क संदेस

47 “हे बाबुल क कुँवारी पुत्री, खाले धूरि मँ गिरि जा अउर हुँवा पइ बइठ जा। अब तू रानी नार्ही अहा। लोग अब तोहका कोमल अउर सुन्नर नार्ही कहा करिहीं।

2अब तोहका आपन कोमल ओढ़ना उतारिके कठिन परिस्त्रम करइ चाही। अब तू चक्की ल्या अउर ओह पइ आटा पीसा। तू आपन घाघरा इतना ऊपर उठावा कि लोगन क तोहार टाँगन देखाइ लग जाई अउर नंगी टाँगन स तू नदी पार करा। तू आपन देस तजि द्या।

3लोग तोहरे बदन क लखिहीं अउर उ पचे तोहार भोग करिहीं। तू अपमानित होबू। मई तोहसे बुरे कर्मन क मोल देवाउब जउन तू किहा ह। तोहरी मदद क कउनो भी मनई अगवा नार्ही आइ।”

4“मोर लोग कहत हीं, ‘परमेस्सर हम लोगन क बचावत ह। ओकर नाउँ, इस्त्राएल क पवित्तर सर्वसक्तीमान अहइ।”

5यहोवा कहत ह, “हे बाबुल, तू बइठ जा अउर कुछ भी जिन कहा। बाबुल क बिटिया, चली जा अँधियारा मँ। काहेकि अब तू अउर जियादा ‘राज्जन क रानी’ नार्ही कहवाई।

6“मई आपन लोगन पइ किरोध किहे रहेउँ। इ सबइ लोग मोर आपन रहेन, किन्तु मई कोहान रहेउँ, एह बरे मई

ओका अपमानित किहेउँ। मई ओनका तोहका दइ दिहेउँ, अउर तू ओनका दण्ड दिहा। तू ओन पइ कउनो करुणा नार्ही दर्साया अउर तू ओन बूढ़न पइ भी बहुत कठिन काम क जुआ लद दिहा।

7तू कहा करत रहिउ, ‘मई अमर हउँ मई सदा रानी रहब।’ किन्तु तू ओन बुरी बातन पइ धियान नार्ही दिहा जेनका तू ओन लोगन क संग किहे रहया। तू कबहुँ नार्ही सोच्या कि पाछे का होइ।

8एह बरे अब, ओ ‘मनोहर मेहरारू,’ मोर बात तू सुन ल्या। तू आपन क सुरच्छित जाना अउर अपने आप स कहा। ‘केवल मई ही महत्वपूर्ण मनई हउँ। मोरे समान कउनो दूसर बड़का नार्ही अहइ। मोका कबहुँ भी विधवा नार्ही होब अहइ। मोरे सदैव बच्चन होत रहिहीं।’

9इ सबइ दुइ बातन तोहरे संग मँ घटित होइहीं: पहिले, तोहार बच्चन तोहसे छूट जइहीं अउर फुन तोहार पति भी तोहसे छूट जाइ। हाँ, इ सबइ बातन तोहरे संग जरूर घटिहीं। तोहार सबहिं जादू अउर सक्तीसाली टोन्न तोहका नार्ही बचाइ पइहीं।

10तू बुरे काम करति अहा, फुन भी तू आपन क सुरच्छित समुझति अहा। तू कहा करति अहा कि तोहार बुरे काम क कउनो नार्ही लखत। तू बुरे काम करति अहा किन्तु तू सोचति अहा कि तोहार बुद्धि अउर तोहार गियान तोहका बचाइ लेइहीं। तू खूद क सोचति अहा कि बस एक तू ही महत्वपूर्ण अहा। तोहरे जइसा अउर कउनो भी दूसर नार्ही अहइ।

11किन्तु तोह पइ बिपत्तियन अइहीं। तू नार्ही जानतिउ कि उ कब होइ जाइ, किन्तु बिनास आवत अहइ। तू ओन बिपत्तियन क रोकइ बरे कछू भी नार्ही कइ पउबिउ। तोहार बिनास ऐतना हाली होइ कि तोहका तक भी न चली कि का कछू तोहरे संग घट गवा।

12जादू अउर टोना क सीखइ मँ तू कठिन मेहनत करत भए जिन्नगी बिताइ दिहा। तउ अब आपन जादू अउर टोना क चला। संभव अहइ टोने टोटके तोहका बचाइ लेई। समंव अहइ-ओनसे तू कउनो क डेराइ द्या।

13तोहरे लगे बहोत स सलाहकार अहई। का तू ओनकर सलाहन स तंग आइ चुकी अहइ? तउ फुन ओन लोगन क जउन सितारन बाँचत ही, बाहेर पठवा। जउन बताइ सकत हीं महीना कब सुरू होत ह। तउ संभव अहइ उ पचे तोहका बताइ पाँवइ कि तोह पइ कब विपत्तियन पइहीं।

14किन्तु उ सबइ लोग तउ खुद आपन क बचाइ नार्ही पइहीं। उ पचे घासे क तिनकन जइसे भक स बरि जइहीं। उ पचे ऐतना हाली बरिहीं कि अंगार तलक कउनो नार्ही बची जेहमाँ रोटी सेंकी जाइ सकइ। कउनो आगी तलक नार्ही बची जेकरे लगे बइठिके उ पचे खुद क गर्माइ लेई।

15अइसा ही हर वस्तु क साथ मँ घटी जेनके बरे तू कड़ी मेहनत किहा। तोहरे जिन्नगी भइ जेनसे तोहार वइपार रहा, उ पचे ही मनइयन तोहका तजि देइहीं। हर कउनो आपन-आपन राह चला जाइ। कउनो भी मनई तोहका बचावइ क नार्ही बची।”

**परमेस्सर आपन जगत पड़ राज करत ह**

**48** यहोवा कहत ह, “याकूब क परिवार, तू उहड़ जाति अहड़ जेका ‘इस्त्राएल’ कहा जात ही, मोर बात सुना! तू पचे यहूदा क घराने स जउन बचन देइ बरे यहोवा क नाउँ लेत अहा, तू पचे इस्त्राएल क परमेस्सर क बारे में बोलत अहा, किन्तु सच्चाई अउर निष्ठावानी स नाहीं।

2तू लोग आपन क पवित्तर नगरी क नागरिक कहत अहा। तू पचे इस्त्राएल क परमेस्सर क भरोसे रहत अहा। ओकर नाउँ सर्वसक्तीमान यहोवा अहड़।

3मई तू पचन्क बहोत पहिले ही पहिले क ओन घटना क बारे में ओका घटइ स पहिले ही बताइ दिहे रहा, तू पचन्क ओन घटना क बारे में बताइ दिहे रहा कि इ होइ सकत ह। मई अचानक ओन बातन घटाइ दिहेउँ! इ सबइ बातन वइसा ही भवा जइसा मई बताए रहा।

4मई तोहका इ सबइ बातन क पहिले ही बताए दिहे रहेउँ काहेकि मोका मालूम रहा कि तू पचे बहोत जिद्दी अहा। मई जउन कछू भी बताए रहेउँ ओहे पड़ बिस्वास करइ स तू पचे इन्कार किहा। तू पचे बहोत जिद्दी रहया, जइसे लोहा क छड़ नाहीं निहुरत ह। इ बात अइसी रही जइसे तोहार मूँड काँसा क बना भवा होइ।

5एह बरे मई तू पचन्क पहिले ही ओन घटना क बारे में बताइ दिहे रहेउँ जउन घटी सकत ह। अइसा एह बरे किहे रहेउँ ताकि तू नाहीं कहि सकइ कि ‘इ सबइ काम हमार देवतन किहेन।’ तू इ नाहीं कहि सकत्या कि ‘हमार मूर्तियन, हमार देवतन,’ इ सबइ बातन घटाइ क आदेस दिहे रहेन।”

**इस्त्राएल क पवित्तर करइ बरे परमेस्सर क ताइब**

6“तू ओन सबहिं बातन क जउन होइ चुकी अहड़ें, लख्या अउर सुन्या ह। एह बरे तोहका इ सबइ खबरियन दूसरन क बतावइ चाही। अब मई तोहका नई बातन बतावइ सुरू करत हउँ। जेनका तू अबहिं नाहीं जानत अहा।

7इ सबइ उ सबइ बातन नाहीं अहड़ें जउन पहिले घटि चुकी अहड़ें। इ सबइ बातन अइसी अहड़ें जउन अब सुरू होत अहड़ें। आजु स पहिले तू इ सबइ बातन नाहीं सुन्या। तउ तू नाहीं कहि सकत्या, ‘हम तउ एहसे पहिले ही जानित ह।’

8किन्तु तब पर भी, तू कबहुँ ओह पड़ कान नाहीं दिहा जउन मई कहेस। तू मोह स कछू नाहीं सीख्या! तू कछू नाहीं सुन्या जउन मई कहया। किन्तु मई तोहका ओन बातन क बारे में बताएउँ काहेकि मई जानत नाहीं रहेउँ कि तू मोरे विरोध में होब्या। तू तउ विद्रोही रहया जब स तू पड़दा भवा।

9किन्तु मई धीरज धरब। अइसा मई अपने बरे करब। मोका किरोध नाहीं आवा एकरे बरे लोग मोर जस गइहीं। मई आपन किरोध पड़ काबू करब कि तोहार नास न करउँ। तू मोर बाट जोहत भए मोर गुण गउब्या।

10लखा, मई तोहका सुद्ध करब। चाँदी क सुद्ध करइ बरे लोग ओका आग में डावत हीं। किन्तु मई तोहका विपत्ति क भट्ठी में डाइके सुद्ध करब।

11इ मई खुद अपने बरे करब। तू मोरे संग अइसे नाहीं बरतब्या, जइसे मोर महत्व न होइ। कउनो मिथ्या देवता क मई आपन तारीफ नाहीं लेइ देब।

12याकूब, तू मोर सुना। हे इस्त्राएल क लोगो, मई तू पचन्क आपन लोग बनवइ क बुलाएउ ह। तू एह बरे मोर सुना। मई परमेस्सर हउँ, मई ही सुरूआत हउँ अउर मई ही अन्त हउँ।

13मई खुद आपन हाथन स धरती क रचना किहेउँ। मोरे दाहिन हाथे अकास क बनाएस। जदि मई ओनका गोहराउबउँ तउ दुइनउँ साथ-साथ मोरे समन्वा अइहीं।

14एह बरे तू सबहिं जउन आपुस में एकट्ठा भए अहा मोर बात सुना। का कउनो लबार देवता तोहसे अइसा कहेस ह कि आगे चलिके अइसी बातन घटिहीं? नाहीं।” यहोवा इस्त्राएल स जेका, उ चुनेस ह, पिरेम करत ह उ जइसा चाही वइसा ही बाबुल अउर कसदियन क साथ करी।

15यहोवा कहत ह कि “मई तोहसे कहे रहेउँ। मई ओका बोलाउब। मई ओका लिआउब अउर ओका सफल बनाउब।

16आवा अउर मोर सुना, मई सुरू से ही एकर बारे में साफ-साफ बोलेस ह। मई उ समय हुवाँ पड़ मौजूद रहा जब बाबुल क नीव पड़ी रहेन।” तउ नबी कहेस, “अब मोर सुआमी यहोवा मोका आपन आत्मा क संग एन बातन क तू पचन्क बतावइ बरे पठएस ह।

17यहोवा जउन मुक्तिदाता अहड़ अउर इस्त्राएल क पवित्तर अहड़, कहत ह, “मई तोहार यहोवा परमेस्सर अहड़ें। मई तोहका सिखावत हउँ कि का हितकर अहड़। मई तोहका राहे पड़ लिये चलत हउँ जइसे तोहका चलइ चाही।

18अगर तू मानत अहा तउ तोहका ओतनी सान्ति मिल जात जेतनी नदी भरिके बहत ह। तोह पड़ उत्तम चिजियन अइसी छाइ जात जइसे समुद्र क तरंग होईं।

19जदि तू मानत्या तउ तोर सन्तानन बहोत बहोत होतिन। तोहार सन्तानन वइसे अनगिनत होइ जातिन जइसे रेत क असंख्य कण होत हीं। जदि तू मोर मानत्या तउ तउ तू नस्त नाहीं होत्य। तू भी मोर संग बना होत्य।”

20हे मोरे लोगो, तू पचे बाबुल क तजि द्या। हे मोर लोगो, तू पचे कसदियन स पराइ जा। खुसी में भरिके तू पचे लोगन स इ खबरिया क कहा। धरती पड़ दूर-दूर इ खबर क फइलावा। तू पचे लोगन क बताइ द्या, “यहोवा आपन दास याकूब क उवारि लिहेस ह।

21यहोवा आपन लोगन क रेगिस्ताने में राह देखाएस, अउर उ सबइ लोग कबहुँ पियासे नाहीं रहेन। काहेकि उ आपन लोगन बरे चट्टान फोड़िके पानी बहाइ दिहस।”

22किन्तु परमेस्सर कहत ह, “दुस्टन क सान्ति नाहीं अहड़।”

**आपन बिसेस सेवक क परमेस्सर क बोलावा**

**49** हे दूर देसन क लोगो, मोर बात सुना। हे धरती क निवासियो, तू सबहिं मोर बात सुना। मोरे जनम स पहिले ही यहोवा मोका आपन सेवा बरे बोलाएस। जब मई आपन महतारी क गरभ में ही रहेउँ, यहोवा मोर नाउँ रख दिहे रहा।



2यहोवा मोर जरिया स लोगन स बात किहेस। उ मोर जीव क तेज तरवार क नाई बनाएस ह, किन्तु उ मोका आपन हाथ क छाया में छुपाएस ह। उ मोका तेज तीर क समान बनाएस ह, किन्तु उ आपन तीरन क तरकास में राखिके मोर रच्छा किहेस ह।

3यहोवा मोका बताएस ह, “इस्त्राएल, तू मोर सेवक अहा। मई तोहरे संग में अजूबा काम करब।”

4मई कहेस, “महँ कड़ी मेहनत किहे रहे हउँ, किन्तु मई कछू भी पूरा नहीं किहस। मई आपन सब सक्ती लगाइ दिहेस, किन्तु मई कउनो काम पूरा नहीं कइ सकेउँ! एह बरे यहोवा क मोर बरे जरूर निआव करइ चाही। मोर परमेस्सर क मोरे प्रतिफल क निर्णय जरूर करइ चाही।

5यहोवा ही एक अहइ जउन मोका अपना सेवक उ टैम में बनाएस ह जे टैम मई आपन महतारी क गर्भ में रहा। उ मोका बनाएस ताकि मई याकूब क लोगन क ओकरे लगे लउटाइके लइ आउँ बरे, अउर इस्त्राएलियन क धर्म-संध में जमा कइ बरे लउटाइके लइ आउँ। यहोवा मोका मान देइ। मई परमेस्सर क स्तुति गीत गाएस।”\* अब, यहोवा कहत ह:

6“याकूब क पुनःस्थापित करइ अउर इस्त्राएल क बचा भवा क जेका परमेस्सर बचाएस रहा वापिस लइ आवइ महत्वपूर्ण अहा। किन्तु मोर सेवक मोरे लगे तोहरे बरे एह स जियादा महत्वपूर्ण कार्य अहइ। मई तोहका पूरे धरती क उद्धार करइ बरे “रास्ट्र बरे एक प्रकास” बनाएउँ ह।”

7इहइ इस्त्राएल यहोवा ह, इस्त्राएल क पवित्तर ह, इस्त्राएल क रच्छा करत ह अउर यहोवा कहत ह, “मोर दास विनम्र अहइ जउन सासकन क सेवा करत ह, अउर लोग ओहसे घिना करत हीं। राजा ओकर दर्शन करिहीं अउर ओकरे सम्मान में खड़ा होइहीं। महान नेता भी ओकरे समन्ना निहुरिहीं,” काहेकि यहोवा विस्सवासी अहइ। इस्त्राएल ही एक पवित्तर अहइ जेका यहोवा चुनेस ह।

### मुक्ती क समय

8यहोवा कहत ह, “उचित समय आवइ पइ मई तोहार पराथनन क जबाव देब। मई तोहका सहारा देब। मुक्ति क दिनन में मई तोहार रच्छा करब अउर तू एकर प्रमाण होब्या कि लोगन क संग में मोर वाचा अहइ। अब देस उजड़ चुका अहइ, किन्तु तू इ धरती एकरे सुआमियन क लउटवउब्या।

9तू बन्दियन स कहब्य, “तू पचे आपन जेलि स बाहेर निकरि आवा।’ तू ओन लोगन स जउन अँधियारा में अहइँ, कहब्या, “अँधियारा स बाहेर आइ जा।’ उ पचे चलत भए राहे में भोजन कइ पइहीं। उ पचे वीरन पहाड़न में भी भोजन पइहीं।

10लोग भूखा नहीं रहिहीं, लोग पियासा नहीं रहिहीं। गर्म सूरज, गर्म हवा ओनका दुःख नहीं देइहीं। काहेकि उहइ जउन ओनका चैन देत ह, (परमेस्सर) ओनका राह

**मई परमेस्सर ... गाएस** या “मोर परमेस्सर मोर सक्ती अहइ।” हिब्रू सब्द क अरथ अहइ “सक्ती” या “गीत जउन दूसर क सक्ती क स्तुति बरे गावा जात ह।”

देखौं। उहइ लोगन क पानी क झरनन क पास-पास लइ जाइ।

11मई आपन लोगन बरे एक राह बनाउब। पर्वत समथर होइ जइहीं अउर दबी राहन ऊपर उठि अइहीं।

12लखा, दूर दूर देसन स लोग हिआँ आवत अहइँ। उत्तर स लोग आवत अहइँ अउर लोग पच्छिम स आवत अहइँ। लोग मिस्त्र में स्थित असवान स आवत अहइँ।”

13हे आकासो, हे धरती, तू खुस होइ जा। हे पर्वतो, आनन्द स जयकारा बोला! काहेकि यहोवा आपन लोगन क सुख देत ह। यहोवा आपन दीन हीन लोगन बरे बहुत दयालु अहइ।

### सिथ्योन: तजी गइ मेहरारू

14किन्तु अब सिथ्योन कहेस, “यहोवा मोका तजि दिहस। मोर सुआमी मोका बिसरि गवा।”

15किन्तु यहोवा कहत ह, “का कउनो मेहरारू आपन ही बच्चन क भूल सकत ह? नहीं। का कउनो मेहरारू उ बच्चा क जउन ओकर ही कोख स जन्मा ह, भूल सकत ह? नहीं। सम्भव अहइ कउनो मेहरारू आपन सन्तान क बिसरि जाइ। परन्तु मई (यहोवा) तोहका नहीं बिसरि सकत हउँ।

16लखा जरा, मई आपन हथेली पइ तोहार नाउँ खोद लिहे हउँ। मई सदा तोहरे विसय में ही सोचा करत हउँ।

17तोहार सन्तानन तोहरे लगे लउटि अइहीं। जउन लोग तोहका पराजित किहे रहेन, उ पचे ही मनइयन तोहका अकेल्ले तजि जइहीं।”

### इस्त्राएलियन क वापसी

18आपन आखँनि क ऊपर उठावा अउ चारिहुँ कइँती लखा। तोहार सबहिँ गदेलन आपुस में एकट्ठी होइके तोहरे लगे आवति अहइँ। यहोवा क इ कहब अहइ, “आपन जिन्गी क कसम खाइके मई तू पचन्क इ सबइ बचन देत हउँ, तोहार गदेलन ओन रत्नन जइसी होइहीं जेनका तू अपने गले में पहिरत अहा। तोहार गदेलन वइसी ही होइहीं जइसा उ कंठहार होत ह जेका दुलहिन पहिरत ह।

19आजु तू नस्ट अहा अउर आजु तू पराजित अहा। तोहार भुइँया तबाही में अहइ। किन्तु कछू ही दिनन पाछे तोहरी धरती पइ बहोत सारे लोग होइहीं अउर उ सबइ लोग जउन तोहका उजारे रहेन, दूर बहोत दूर चला जइहीं।

20जउन गदेलन तू खोइ दिहा, ओनके बरे तोहका बहोत दुःख भवा किन्तु उहइ पचे गदेलन तोहसे कहिहीं। ‘इ जगहिया रहइ क बहोत छोटी अहइ। हमका तउ कउनो फइली जगहिया द्या।”

21फुन तू खुद अपने आप स कहब्या, ‘एन सबहिँ गदेलन क मोरे बरे कउन जन्माएस? इ तउ बहोत अच्छा अहइ। मई दुःखी रहा अउर अकेल्ला रहा। मई हारा भवा रहा। मई आपन लोगन स दूर रहा। तउ इ सबइ गदेलन मोरे बरे कउन पालेस ह? लखा तनिक, मई अकेल्ला छोड़ा गवा हउँ। इ सबइ एँतेने सबइ गदेलन कहाँ स आइ गएन?”

22मोर सुआमी यहोवा कहत ह, “लखा, आपन हाथ उठाइके इसारे स मई सारे ही देसन क बुलावे क संकेत देत

हउँ। मई आपन झण्डा उठाउब कि सब लोग ओका लखइँ। फुन उ पचे तोहार गदेलन क तोहरे लगे लिअइहीं। उ सबइ लोग तोहरे गदेलन क आपन काँधे पइ उठइहीं अउर उ पचे ओनका आपन बाँहें मँ उठाइ लेइहीं।

23 राजा तोहरे गदेलन क सिच्छक होइहीं अउर सबइ राजकन्या ओनकर धियान रखिहीं। उ सबइ राजा अउर ओनकर सबइ राजकन्या दुइनउँ तोहरे समन्वा माथा नवइहीं। उ पचे तोहरे पाँवन भी धूरि क चुम्बन करिहीं। तबहिँ तू जनब्या कि मई यहोवा हउँ। तबहिँ तोहका समुझ मँ आई कि हर अइसा मनई जउन मोहमौँ भरोसा राखत ह, निरास नाहीं होइ।”

24 जब कउनो सक्तीसाली योधा जुद्ध मँ जीतत ह तउ का कउनो ओकर जीती भइ वस्तुअन क ओहसे लइ सकत ह? जब कउनो विजेता फउजी कउनो बन्दी पइ पहरा देत ह, तउ का कउनो पराजित बन्दी बचिके भरा सकत ह?

25 किन्तु यहोवा कहत ह, “उ बलवान सैनिक स बन्दीयन क छोड़ाइ लीन्ह जाइ अउर जीत क चिजियन ओहसे छोरि लीन्ह जाइ। इ भला काहे क होइ? मई तोहरे जुद्धन क लइब अउर तोहरी सन्तानन बचाउब।

26 अइसे ओन लोगन क जउन तू पचन्क कस्ट देत हीँ मई अइसा ही कइ देब कि उ पचे आपुस मँ एक दूसर क बदन क खाईँ। ओनकर खून दाखरस बन जाइ जेहसे उ पचे धुतत होइहीं। तब हर कउनो जानी कि मई उहइ यहोवा हउँ जउन तोहका बचावत ह। सारे लोग जान जइहीं कि तोहका बचावइवाला याकूब क समर्थ अहइ।”

### इस्त्राएल क ओकरे पापन्क दण्ड

**50** यहोवा कहत ह, “हे इस्त्राएल क लोगो, तू पचे कहा करत रह्या कि मई तोहार महतारी यरूसलेम क तलाक दिहेउँ। किन्तु उ तलाकपत्र कहाँ अहइ जउन साबित कइ देइ कि मई ओका तलाक दिहेउँ ह। हे मोरे गदेलो, का मई कउनो क कर्जदार अहउँ? का आपन कउनो कर्ज चुकावइ बरे मई तोहका बेचेउँ ह? नाहीं। तू बिका रह्या एह बरे कि तू बुरे करम किहे रह्या। एह बरे तोहार महतारी दूर पठइ गइ रही काहेकि तू बुरा करम किहे रह्या।

2 जब मई घरे आवा रहेउँ, मई हुआँ कउनो क नाहीं पाएउँ। मई बार-बार गोहराएउँ किन्तु कउनो जबाव नाहीं दिहस। का तू पचे सोचत अहा कि तोहका मई नाहीं बचाइ सकत हउँ? मई तोहार बिपत्तियन स तोहका पचन्क बचावइ क सक्ती धरत हउँ। लखा, यदि मई समुद्दर क झुराइ क आदेस देउँ तउ उ झुराइ जाइ। मछरियन परान तजि देइहीं काहेकि हुवाँ जल न होइ अउर ओनकर देह सड़ि जाइ।

3 मई अकासन क करिआ कइ सकत हउँ। अकास वइसे ही करिआ होइ जइहीं जइसे सोक वस्त्र होत हीँ।”

### परमेस्सर क सेवक परमेस्सर क भरोसे

4 मोर सुआमी यहोवा मोका सीख देइ क जोग्यता दिहस ह। एँह बरे मई थका भवा लोगन क प्रोत्साहित करत हउँ अउर ससकत बनावत हउँ। हर भिंसारे उ मोका जगावत ह

अउर एक छात्र क नाई सिच्छा देत ह। 5 मोर सुआमी यहोवा सीखइ मँ मोर सहायक अहइ अउर मई ओकर विरोधी नाहीं बना अहउँ। मई ओकरे पाछे चलब नाहीं तजब। 6 ओन लोगन क मई आपन पिटाइ करइ देब। मई ओनका आपन दाढ़ी क बार नोचइ देबउँ। उ सबइ लोग जब मोरे बरे अपसब्द कइहीं अउर मोह पइ थूकिहीं तउ मई आपन मुँह नाहीं मोड़ब। 7 मोर सुआमी, यहोवा मोर मदद करी। एह बरे ओनकर अपसब्द मोका दुःख नाहीं पहोंचइहीं। मई सुदृढ़ रहब। मई जानत हउँ कि मोका निरास नाहीं होइ पड़ी।

8 एक उ जउन कउनो मोका दोख रहित बनाएस ह उ मोर संग अहइ, एह बरे कउन मनई मोका अपराधी साबित कइ सकत ह। यदि कउनो मनई सोचत ह कि उ मोर खिलाफ कउनो सिकायत रखत ह, तउ उ मनई क मोरे लगे आवइ द्या अउर अपना तर्क रखइ द्या। 9 किन्तु लखा, मोर सुआमी यहोवा मोर मदद करत ह। एँह बरे कउन मनई अहइ जउन इ सिद्ध कइ सकी कि मई दोखी हउँ? उ सबइ सबहिँ लोग वइसे ही बाहर फँकइ जाइ जइसे पुरान कपड़न क जेका किरवन चट कइ जातहीं।

10 अगर कउनो मनई जउन यहोवा क आराधना करत ह अउर ओकर सेवक क संदेस भी सुनत ह, मगर अबहुँ तलक अंधेरे मँ बिना प्रकास क चलत ह, एका अपने यहोवा क नाउँ मँ बिस्वास रखइ चाही अउर ओका आपन परमेस्सर पइ जरूर भरोसा रखइ चाही।

11 “लखा, तू लोग आपन ही ढंग स जिअइ चाहत अहा। आपन आगी अउर आपन मसालन क तू पचे खुद बारत अहा। तू पचे आपन ही ढंग स रहइ चाहत अहा। किन्तु तू पचन्क सजा दीन्ह जाइ। तू पचे आपन ही आगी मँ भहराब्या अउर तोहार पचन्क आपन ही मसालन तू पचन्क बारि डइहीं। अइसी घटना मई घटवाउब।”

### इस्त्राएल क इब्राहीम क जइसा होइ चाही

**51** “मोर सुन्या, तोहमौँ स जउन लोग उत्तिम जिन्नगी जिअइ क कठिन प्रयत्न करत अहा अउर यहोवा क मदद खोजत अहा। अगर तू सही तरीके से जिअइ क उदाहरण चहात ह, लखा चट्टा (इब्राहीम) क जेहसे तू पचन्क काटि गवा अहइ, लखा खोखला चट्टान (सारा) क जेहसे तू पचन्क तरासत भवा अहइ। 2 हौँ, लखा आपन पिता इब्राहीम अउर आपन माँ सारा क जउन तू पचन्क जन्म दिहस ह। उ इब्राहीम ही अकेला रहा जेका मई बोलाए रहा। किन्तु मई ओका वरदान दिहा अउर ओका एक बड़के रास्ट्र बनाइ दिहस।”

असिन्धोन पर्वत क यहोवा वइसे ही आसीर्वाद देइ। यहोवा क यरूसलेम अउर ओकरे खंडहरन क बरे खेद होइ अउर उ नगर बरे कउनो बहोत बड़ा काम करी। यहोवा रेगिस्तान क बदल देइ। उ रेगिस्तान अदन क उपवन क जइसे एक उपवन मँ बदल जाइ। उ उजाड़ स्थान यहोवा क बगीचे जइसा होइ जाइ। लोग बहोत जियादा खुस होइहीं। लोग हुवाँ आनन्द परगट करिहीं। उ सबइ लोग धन्नबाद अउर विजय क गीत गइहीं।

4“हे मेरे लोगो, मोर सुना! मई तू पचन क आपन उपदेसन क देब। मई आपन नेमन क प्रकास क तरह बनाउब जउन लोगन क देखइहीं कि कइसे ठीक तरह स जिया जात ह।

5मई हाली ही परगट करब कि मई निआव स पूर्ण हउँ। मई हाली ही तोहार पचन्क रच्छा करब। मई आपन सक्ती क काम में लिआउब अउर मई सबहिं रास्ट्रन क निआव करब। सबहिं दूर-दूर क देस मोर बाट जोहत अहईं। ओनकर मोर सक्ती क प्रतीच्छा अहइ जउन ओनका बचाई।

6ऊपर अकासन क लखा, अकास अइसे लोप होइ जाइ जइसे धुआँ क एक बादर खोइ जात ह। अउर धरती अइसे ही बेकार होइ जाइ जइसे पुरान ओढ़ना बगैर कीमत क होत हीं। धरती क वासी आपन प्राण तजिहीं किन्तु मोर मुक्ति सदा ही बनी रही। मोर उत्तिमता कबहुँ नाहीं मिटी।

7अरे ओ उत्तिमता क समुझइवाले लोगो, तू पचे मोर बात सुना। अरे ओ मोर सिच्छन पइ चलइवालो, तू पचे उ सबइ बातन सुना जेनका मई बतावत हउँ। दुट्ट लोगन स तू पचे जिन डेराअ। ओन बुरी बातन स जेनका उ पचे तू पचन्स कहत हीं, तू पचे भयभीत जिन हवा।

8काहेकि उ पचे पुराना कपड़न क नाई होइहीं। ओनका किरवन खाइ जइहीं। उ पचे ऊन क जइसे होइहीं जेका किरवन चाट जइहीं। संसार क लोग मरिहीं, किन्तु मोर मुक्ती सदै ही बना रही। मोर अच्छाइ निरन्तर बनी रही।”

#### परमेस्सर क सामर्थ्य ओकरे लोगन क रच्छा करत ह

9यहोवा क भुजा जाग-जाग। आपन सक्ती क सज्जित करा। तू आपन सक्ती क प्रयोग करा। तू वइसे जाग जा जइसे तू बहोत बहोत पहिले जागा रह्या। तू उहइ सक्ती अहा जउन रहाब क छक्कन छुड़ाए रहा। तू भयानक मगरमच्छ क ध्वाये रह्या।

10तू सागरे क सुखाया। तू गहिर समुद्र क जलहीन बनाइ दिहा। तू सागर क गहिर सतह क एक राहे में बदल दिहा अउर तोहार लोग उ राह स पार भएन अउर बच गए रहेन।

11यहोवा आपन लोगन क रच्छा करी। उ पचे सिय्योन पर्वत कइँती आनन्द मनावत भए लउटि अइहीं। इ सबइ सबहिं आनन्द में मगन होइहीं। सारे ही दुःख ओनसे दूर कहुँ भाग जइहीं। 12यहोवा कहत ह, “मई उहइ हउँ जउन तू पचन्क चइन दिया करत ह। एह बरे तू पचन्क दूसर लोगन्स काहे डेराइ चाही? उ पचे तउ बस मनइयन अहईं जउन जिया करत हीं अउर मरि जात हीं। उ पचे वइसे मरि जात हीं जइसे घास मरि जात ह।”

13यहोवा तू पचन्क रचेस ह। उ निज सक्ती स इ धरती क बनाएस ह। उ निज सक्ती स धरती पइ अकास तान दिहस। किन्तु तू पचे ओका अउर ओकर सक्ती क बिसरि गवा। एह बरे तू पचे सदा ही उ मनइयन स भयभीत रहत ह जउन तू पचन्क हानि पहुँचावत हीं। तोहार नास करइ क ओन लोग जोजना बनाएन, किन्तु आजु उ पचे कहाँ अहईं? उ पचे सबहिं चलि गए रहेन!

14लोग जउन बन्दी अहईं, हाली ही मुक्त होइ जइहीं। ओन लोगन क मउत काल कोठरी में नाहीं होइ अउर न

ही उ पचे कारागार में सइत रइहीं। ओन लोगन्क लगे खाइके पर्याप्त होइ।

15“मई ही यहोवा तोहार पचन्क परमेस्सर हउँ। मई ही सागर क झकोरत हउँ अउर मई ही लहरन उठावन हउ।” (ओकर नाउँ सर्वसक्तीमान यहोवा अहइ।)

16“मोर सेवक, मई तोहका उ सबइ सब देब जेनका मई तोहसे कहलवावइ चाहत हउँ। मई तोहका आपन हाथन स ढकिके तोर रच्छा करब। मई तोहसे नवा अकास अउ नई धरती बनवाउब। मई तू पचन क जरिये सिय्योन क इ कहलवा वइ बरे कि ‘तू पचे मोर लोग अहा, ‘तोहार उपयोग करब।’”

#### परमेस्सर इस्त्राएल क दण्ड दिहस

17जागा। जागा। यरूसलेम जाग उठा। यहोवा तोहसे बहोत ही कोहान रहा। एह बरे तोहका दण्ड दीन्ह गवा। उ दण्ड अइसा रहा जइसा जहर क कउनो पियाला होइ अउर उ तोहका पिअइ पइइ अउर ओका तू पी लिहा।

18यरूसलेम में बहोत स लोग हुआ करत रहेन किन्तु ओनमाँ स कउनो भी मनई ओकर अगुवाई नाहीं कइ सका। उ पाल-पोसके जउन गदेलन क बड़ा किहे रहा, ओनमाँ स कउनो भी ओका राह नाहीं देखाइ सका। 19दुइ जोड़ा बिपत्ति यरूसलेम पइ टूट पड़ी अहईं, लूटपाट अउर अनाज क परेसानी अउर भयानक भूख अउ सबइ हत्तिया।

जब तू विपत्ति में पड़ी रही, कउनो भी तोहका सहास नाहीं दिहस, कउनो भी तोह पइ तरस नाहीं खाएस। 20तोहार लोग दुर्बल होइ गएन। उ पचे हुवाँ धरती पइ भहराइ पड़ा अहईं अउर हुँवइ पड़ा रइहीं। उ सबइ लोग हर गली का नुक्कड़ पर पड़ा अहईं। उ सबइ लोग अइसे अहईं जइसे कउनो जाल में फँसा हरिन होइ। ओन लोगन पइ यहोवा क कोप क मार तब तलक पड़त रही, जब तलक उ पचे अइस न होइ गएन कि दण्ड झेल ही न सकइ। परमेस्सर जब कहेस कि ओनका अउर दण्ड दीन्ह जाइ तउ उ पचे बहोत कमजोर होइ गएन। 21बेचारे यरूसलेम, तू मोर सुन। तू कउनो धूत मनई क समान दुर्बल अहा किन्तु तू दाखरस पीके धुत नाहीं भवा अहा, बल्कि तू तउ “जहर क उ पियाला का पीके” अइसा दुर्बल होइ गवा अहा।

22तोहार पचन्क परमेस्सर अउर सुआमी उ यहोवा आपन लोगन बरे जुद्ध करी। उ तू पचन्क कहत ह, “लखा! मई ‘जहर क इ पियाला’ (दण्ड) क तू पचन्स दूर हटावत हउँ। मई आपन किरोध क तू पचन्पइ स हटावत अहउँ। अब मोरे किरोध स तू पचन्क अउर दण्ड नाहीं भोगइ क होइ। 23अब मई आपन किरोध क मार ओन लोगन पइ डाउब जउन तू पचन्क दुःख पहुँचावत हीं। उ सबइ लोग तू पचन्क मार डावइ चाहत रहेन। ओ लोग तू पचन्स कहे रहेन, ‘हमरे अगवा निहुरि जा। हम तू पचन्क कुचरि डाउब।’ आपन समन्वा निहुरावइ बरे उ पचे तू पचन्क मजबूर किहन। फुन ओ लोग तू पचन्क पीठ क अइसा बनाइ डाएन जइसे धूर-माटी होइ ताकि उ पचे तू पचन्क रौंद सकई। ओनके बरे चलइ क वास्ते तू पचे कउनो राहे क जइसा होइ गए रह्या।”

**इस्त्राएल क उद्धार होइ**

**52** जाग उठा। जाग उठा हे सिष्योन। आपन वस्त्र क धारण करा। तू आपन सक्ती स भारा। हे पवित्तर यरूसलेम, तू खड़ा होइ जा। अइसे उ सबइ लोग जेनका परमेस्सर क अनुसरण करब कबूल नाहीं अहइ अउर जउन स्वच्छ नाहीं अहइ, तोहमाँ फुन प्रवेस नाहीं कइ पइहीं।

2तू धूरि झाड़ द्या। तू आपन सुन्नर ओढ़ना धारण करा। हे यरूसलेम, हे सिष्योन क बिटिया, तू एक बन्दिनी रहिउ किन्तु अब तू खुद क आपन गटई में बँधी जंजीसन स मुक्त करा।

3यहोवा क कहत ह, “तोहका धन क बदले में नाहीं बेचा गवा रहा, एह बरे जब मई तोहका आजाद करब तउ कउनो धन नाहीं देइ पड़ी।”

4मोर सुआमी यहोवा कहत ह, “मोर लोग बस जाइ बरे पहिले मित्र में गवा रहेन, अउर फुन उ पचे दास बन गएन। पाछे अस्सूर ओनका बेकार में ही दास बनाइ लिहे रहा। 5अब लखा, इ का होइ गवा अहइ। अब कउनो दूसर रास्ट्र मोरे लोगन क लइ लिहे अहइ। मोरे लोगन क लइ जाइ बरे इ देस कउनो भुगतान नाहीं किहे रहा। इ देस मोरे लोगन पइ हुकुमत करत ह अउर ओनकर हँसी उड़ावत ह। हुवाँ क लोग सदा ही मोरे बरे बुरी बातन कहा करत हीं।”

6यहोवा कहत ह, “अइसा एह बरे भवा कि मोरे लोग मोरे बारे में जानइँ। मोरे लोगन क पता चलि जाइ कि मई कउन हउँ? मोरे लोग मोर नाउँ जान जइहीं अउर ओनका इ भी पता चल जाइ कि उ मई ही हउँ जउन ओनसे बोलन हउँ।”

7सुसमाचार क संग पहाड़न क उपर स आवत भए संदेसवाहक क लखब निहचय ही एक अद्भुत बात अहइ। कउनो संदेसवाहक क इ घोसणा करत भए सुनब केतना अद्भुत अहइ: “हुवाँ सान्ति क निवास अहइ, हम बचाइ लीन्ह गए अही। तोहार परमेस्सर राजा अहइ।”

8नगर क रखवारे जयजयकार करइ लोगन ह। उ पचे आपुस में मिलिके आनन्द मनावत अहइँ। काहेकि ओनमाँ स हर एक यहोवा क सिष्योन क लउटिके आवत भए लखत अहइ।

9यरूसलेम तोहार उ सबइ भवन जउन बबदि होइ चुके अहइँ फुन स खुस होइ जइहीं। तू पचे सबहिँ आपुस में मिलिके आनन्द मनउब्या। काहेकि यहोवा यरूसलेम पइ दयालु होइ जाइ। यहोवा आपन लोगन क उद्धार करी।

10यहोवा सबहिँ रास्ट्रन क ऊपर आपन पवित्तर सक्ती दसाइ अउर सबहिँ उ सबइ देस जउन दूर-दूर बसा अहइँ, लिखिहीं कि परमेस्सर आपन लोगन क रच्छा कइसे करत ह।

11तू लोगन क चाही कि बाबुल छोड़ जा। उ जगह छोड़ द्या। हे लोगो, ओन वस्तुअन क लइ चलइवाले जउन उपासना क काम आवति हीं, अपने आप क पवित्तर करा। अइसी कउनो भी वस्तु जउन पवित्तर ओका जिन छुआ।

12तू पचे बाबुल तजब्या किन्तु हाली में तजइ क तू पचन्पइ कउनो दबाव नाहीं होइ। तू पचे चलिके बाहेर जाब्या अउर यहोवा तू पचन्क संग संग चली। तू पचन्क अगुवाई

यहोवा ही करी अउर तोहार पचन्क रच्छा बरे इस्त्राएल क परमेस्सर पाछे-पाछे भी होइ।

**परमेस्सर क कस्ट सहत सेवक**

13“मोरे सेवक कइँती लखा। इ बहोत सफल होइ। इ बहोत महत्वपूर्ण होइ। अगवा चलिके लोग ओका आदर देइहीं अउर ओकर सम्मान करिहीं।”

14“किन्तु बहोत स लोग जब मोरे सेवक क लखेन तउ उ पचे भौचक्के रहि गएन। मोर सेवक एतना बुरी तरह स सतावा ग रहा कि उ पचे ओका एक मनई क रूप में बड़ी दिक्कत स पहचान जाएन। 15किन्तु बहोत सारे रास्ट्रन भी चकित होइहीं। राजा ओका लिखिके अचरजे में पड़ि जइहीं अउर एक सब्द भी नाहीं बोल पइहीं। उ मोर सेवक क बारे में नाहीं सुनी ही किन्तु जउन कछू भवा रहा उ पचे ओका लखे रहेन। उ लोग ओकर बारे में सुने भर नाहीं रहेन किन्तु ओका समझे रहेन।”

**53** हम जउन बातन बताए रहे, ओनकर फुरइ कउन बिस्सास किहस? यहोवा क दण्ड क फुरइ कउन कबूलेस?

2यहोवा क समन्वा एक नान्ह पउधन क तरह ओकर बढ़वार भइ। उ एक अइसी जड़ क समान रहा जउन झुरान धरती में फूटति रही। उ कउनो खास, नाहीं देखाइ देत रहा। न ही कउनो ओकर कउनो विसेस महिमा रही। जदि हम ओका देखिन तउ हमका ओहमा कउनो अइसी विसेस बात नाहीं देखाइ देत, जेहसे हम ओका चाह सकित। 3ओहसे घिना कीन्ह गइ रही अउर ओकर मीतन ओका तजि दिहे रहेन। उ एक अइसा मनई रहा जउन पीरा क जानत रहा। उ बीमारी क बहोत अच्छी तरह पहिचानत रहा। लोग ओका एतना भी आदर नाहीं देत रहेन कि ओका देख तउ लेइँ। हम तउ ओह पइ धियान तलक नाहीं देत रहे।

4किन्तु उ हमार पाप अपने उपर लइ लिहस। उ हमार पीरा क हमसे लइ लिहस अउर हम इहइ सोचत रहे कि परमेस्सर ओका दण्ड देत अहइ। हम सोचा परमेस्सर ओह पइ ओकरे करमन बरे मार लगावत अहइ। 5किन्तु उ तउ ओन बुरे कामन बरे बेधा जात अहइ, जउन हम किहे रहे। उ हमार अपराधन बरे कुचरा जात रहा। जउन कर्जा हमका चुकावइ क रहा, यानी हमार दण्ड रहा, ओका उ चुकावत रहा। ओकरी सबइ यातना क बदले में हम चंगे (छिमा) कीन्ह ग रहे। 6किन्तु ओकरे एतना करइ क पाछे भी हम सब भेड़िन क तरह एहर-ओहर भटक गए। हम में स हर एक आपन-आपन राह चला गवा। यहोवा क जरिये हमक हमार अपराधन स मुक्त कइ दीन्ह जाइ क पाछे अउर हमरे अपराध क आपन सेवक स जोड़ देइ पर भी हम अइसा कीन्ह।

7ओका सतावा गवा अउर दण्डित कीन्ह गवा। किन्तु उ ओकरे विरोध में आपन मुँह नाहीं खोलेस। उ बध बरे लइ जाइ जात भइ मेमना क समान चुप रहा। उ उ मेमना क समान चुप रहा जेकर ऊन उतारा जात रहा होइ। उ कबहुँ आपन मुँह नाहीं खोलेस। 8लोग ओह पइ बल प्रयोग किहन

अउर ओका लइ गएन। ओकरे साथ खरेपन स निआव नाही कीन्ह गवा। ओकर भावी परिवार बरे कउनो कुछ नाही कहि सकत काहेकि सजीव लोगन क धरती स ओका उठाइ लीन्ह गवा। मोर लोगन क पापन्क भुगतान करइ बरे ओका दण्ड दीन्ह गवा रहा।

9ओकर मउत होइ गइ अउर दुट्ठ लोगन क संग ओका गाड़ा गवा। धनवान लोगन क बीच ओका दफनावा गवा। उ कबहुँ कउनो हिंसा नाही किहेस। उ कबहुँ झूठ नाही बोलेस किन्तु फुन भी ओकरे साथ अइसी बातन घटिन।

10यहोवा ओका कुचर डावइ क निहचय किहेस। यहोवा निहचय किहस कि उ सबइ यातना झेलइ। तउ सेवक आपन प्रान तजइ क खुद क सौंपेस। किन्तु उ एक नवा जीवन अनन्त-अनन्त काल तलक बरे पाई। उ आपन लोगन क लखी। यहोवा ओका जउन करइ चाहत ह, उ ओन बातन क पूरा करी।

11उ आपन आत्मा में बहोत सी पीरन झेली किन्तु उ घटइवाली अच्छी बातन क लखी। उ जउने बातन क गियान प्राप्त करत ह, ओनसे संतुटठ होइ। मोर उ उत्तिम सेवक बहोत स लोगन क ओनके अपराधन स छुटकारा दिलवाई। उ ओनके पापन्क अपने सिरन पइ लइ लेइ। 12एह बरे मई ओका बहोतन क संग पुरस्कार क सहभागी बनाउब। उ सबइ चिजियन क उ लोगन क बीच में बाँटब जउन मज़बूत अहइ। काहेकि उ आपन जिन्नगी दूसरन बरे दइ दिहस।

उ अपने आप क अपराधियन क बीच गना जाइ दिहस। जबकि उ वास्तव में बहुतेरन क पापन्क दूर किहस अउर अब उ पाप बरे ओनकर रच्छक क रूप में बोलत ह।

### परमेस्सर आपन लोगन क वापस लिआवत ह

**54** हे बाँझ मेहरारू, तू खुस होइ जा। तू गदेलन क जन्म नाही दिहा, किन्तु फुन भी तोहका बहोत खुस होइ चाही। यहोवा कहेस, “जउन मेहरारू अकेल्ली अहइ, ओकर जियादा सन्तानन होइहीं बनिसबत उ मेहरारू क जेकरे लगे ओकर पति अहइ।”

2आपन तम्बू फइलावा, आपन दुआर पूरा खोला। आपन तम्बू क बढइ स जिन रोका। आपन रस्सियन बढावा अउर खूँटन मजबूत करा।

3काहेकि तू आपन बंस-बेल दाहिन अउ बाएँ फइलाई। तोहार सन्तानन अनेकानेक रास्ट्रन क धरती क लइ लेइहीं अउर उ सबइ सन्तानन ओन नगरन में फुन बसिहीं जउन बर्बाद भ रहेन।

4तू ससाउ जिन, तू लज्जित नाही होबिउ। आपन मन जिन हारा काहेकि तोहका अपमानित नाही होइ क होइ। जब तू जवान रहिउ, तू लज्जित भइ रहिउ किन्तु उ लज्जा क अब तू बिसरब्या। अब तोहका उ लाज नाही याद राखब अहइ तू जेका उ काल में भोग्या रहा जब तू आपन भतार खोया रह्या।

5काहेकि तोहार भतार उहइ रहा! जउन तोहका रचे रहा। ओकर नाउँ सर्वसक्तीमान यहोवा अहइ। उहइ इस्त्राएल क

रच्छा करत ह, उहइ इस्त्राएल क पवित्र अहइ अउर उहइ समूची धरती क परमेस्सर कहवावत ह।

6तू एक ठु अइसी मेहरारू क जइसी रहिउ जेका ओकर ही भतार तलाक दिहे रहा। तोहार मन बहोत भारी रहा किन्तु तोहका यहोवा आपन बनावइ बरे बोलाए रहा। तू उहइ मेहरारू क समान अहा जेकर बचपने में ही बियाह भवा अउर जेका ओकर भतार तलाक दिहेस ह। किन्तु परमेस्सर तू पचन्क आपन बनावइ बरे बोलाएस ह।

7तोहार परमेस्सर कहत ह, “मई तोहका थोड़े समय बरे तजे रहेउँ। किन्तु अब मई तोहका फुन स अपने पास आउब अउर आपन महा करुणा तोह पइ दर्साउब।

8मई बहोत कोहाइ गवा अउर थोड़े स समय क बरे तोहसे छुप गवा किन्तु आपन महाकरुणा स मई तोहका सदा चैन देब।” तोहार उद्धारकर्ता यहोवा इ कहेस ह।

### परमेस्सर आपन लोगन स सदा पियेम करत ह

9परमेस्सर कहत ह, “इ ठीक वइसा ही अहइ जइसे नूह क काल में मई बाढ़ क जरिये दुनिया क दण्ड दिहे रहेउँ। मई नूह क वरदान दिहेउँ कि फुन स मई दुनिया पइ बाढ़ नाही लाउब। उहइ तरह तोहका, मई उ वचन देत हउँ, मई तोहसे कुपित नाही होब अउर तोहसे फुन कठोर वचन नाही बोलब।”

10यहोवा कहत ह, “चाहे पर्वत लुप्त होइ जाई अउर इ पहाड़ियन रेत में बदल जाई किन्तु मोर करुणा तोहका कबहुँ भी नाही तजी। मई तोहसे मेल करब अउर उ मेल क कबहुँ अंत न होइ।” यहोवा तोह पइ करुणा देखावत ह अउर उ यहोवा ही उ सबइ बातन बताएस ह।

11“हे नगरी, हे दुखियारी! तोहका तूफानन सतायन ह अउर कउनो तोहका चैन नाही दिहेस ह। मई तोहार कीमती पाथरन स फुन स निर्माण करब। मई तोहार नीव फिरोजन अउ नीलम स धरब।

12मई तोहार देवान स चुनइ में माणिक क लगाउब। तोहरे दुआरन पइ दमकत भए रत्नन क जड़ब। तोहरी सबहिं देवान मई कीमती पाथरन स उठाउब।

13तोहार सन्तानन यहोवा द्वारा सिच्छित होइहीं। तोहार सन्तानन क सम्पन्नता महान होइ।

14मई तोहार निर्माण खरेपन स करब ताकि तू दमन अउर अन्याय स दूर रहा। फुन कछू नाही होइ जेहसे तू डरब्या। तोहका नोस्कान पहाँचावइ कउनो भी नाही आई।

15मोर कउनो भी सेना तोहसे कबहुँ जुद्ध नाही करी। अउर यदि कउनो सेना तोह पइ चढ़ बइठइ क प्रयत्न करइ तउ तू उ सेना क पराजित कइ देब्या।

16“लखा, मई लोहार क बनाएँ ह। उ लोहे क तपावइ बरे धौकनी धौकत ह। फुन उ तपे लोहे स जइसे चाहत ह, वइसे औजार बनावत ह। उहइ प्रकार मई ‘विनासकर्ता’ क बनाएँ ह जउन वस्तुअन क नस्त करत ह।

17“तोहका हरावइ बरे लोग हथियार बनइहीं किन्तु उ सबइ हथियार तोहका कबहुँ हराइ नाही पइहीं। कछू लोग तोहरे विरोध में बोलिहीं। किन्तु हर अइसे मनई क बुरा साबित कीन्ह जाइ जउन तोहरे विरोध में बोली।”

यहोवा कहत ह, “यहोवा क सेवकन क का मिलत ह? ओनका निआव क विजय मिलत ह? इ ओनका मोहसे मिलत ह।”

**परमेस्सर अइसा भोजन देत ह जेहसे सच्ची तृप्ति मिलत ह**

**55** “हे पियासे लोगों, आवा पानी पिआ। अगर तोहरे पचन्क लगे नहीं धन ही अहइ, तउ एकर चिन्ता जिन करा। आवा, खाना ल्या अउर खा। तू पचन्क एकर कीमत देइ क जरूरत नहीं अहइ। बिना कउनो कीमत क दूध अउ दाखरस ल्या।

2बियर्थ ही आपन धन अइसी कउनो वस्तु पइ काहे बर्बाद करत अहा जउन सच्चा भोजन नहीं अहइ? अइसी कउनो वस्तु बरे काहे स्रम करत अहा जउन फुरइ में तू पचन्क तृप्त नहीं करती? मोर बात धियान स सुना। तू पचे सच्चा भोजन पउब्या। तू पचे उ भोजन क आनन्द लेब्या जेहसे तोहार पचन्क मन तृप्त हो जाइ।

3जउन कछू मई कहत हउँ, धियान स सुना। मोर सुना ताकि तोहार आतिमा जिअब। तू पचे मोरे पास आवा अउर मई तोहरे सबन्क साथ एक करार करब जउन सदा-सदा क बरे बना रही। इ करार वइसी ही होइ जइसी करार दाऊद क संग मई किहे रहेउँ। मई दाऊद क वचन दिहे रहेउँ कि मई ओह पइ सदा करुणा करब। अउर तू पचे उ वचन पइ बिस्वास कइ सकत ह।

4मई आपन उ सक्ती क दाऊद क साच्छी बनाए रहेउँ जउन सबहिं रास्ट्रन बरे रही। मई दाऊद क बहोत देसन क प्रसासक अउर ओनकर सेनापति बनाए रहेउँ।”

5अनेक अग्यात देसन में अनेक अनजानी जातियन अहइँ। तू ओन सबहिं जातियन क बोलउब्या, जउन जातियन तोहसे अपरिचित अहइँ किन्तु उ पचे पराइके तोहरे पास अहइी। अइसा घटी काहेकि तोहार परमेस्सर यहोवा अइसा ही चाहत ह। अइसा घटी काहेकि उ इस्त्राएल क पवित्तर तोहका मान देत ह।

6तउ तू पचे यहोवा क हेरा। कहुँ बहोत देर न होइ जाइ। अब तू पचे ओका गोहराइ ल्या जब तलक उ तोहरे पचन्क लगे अहइ।

7हे पापियो! आपन पापपूर्ण जिन्गी क तजा। तू पचन्क चाही कि तू पचे बुरी बातन सोचब तजि द्या। तू पचन्क चाही कि तू पचे यहोवा क लगे लउटि आवा। जब तू पचे अइसा करब्या तउ यहोवा तू पचन्क सुख देइ। ओन सबहिं क चाही कि उ पचे यहोवा क सरन में आवइँ काहेकि परमेस्सर हमका छिमा करत ह।

**लोग परमेस्सर क नहीं समुझ पइहीं**

8यहोवा कहत ह, “तोहार पचन्क विचार वइसे नहीं, जइसे मोर अहइँ। तोहार पचन्क राहन वइसे नहीं जइसी मोर राहन अहइँ।

9जइसे धरती स ऊँच सरग अहइँ वइसे ही तोहार राहन स मोर राहन ऊँच अहइ। अउर मोर विचार तोहरे पचन्क विचारन स ऊँच अहइँ।” इ सबइ बातन यहोवा ही कहेस ह।

10अकासे स बर्खा अउर हिम गिरा करत हीं अउर उ पचे फुन नहीं लउट जातेन जब तलक उ पचे धरती क नहीं छुइ लेत हीं, अउर धरती क गीला नहीं कइ देत हीं। फुन धरती पउधन क अंकुरित करत ह अउर ओनका बढ़ावत ह अउर उ सबइ पउधन किसानन क बरे बीज उपजावत हीं अउर लोग ओन बीजन स खाइ बरे रोटियन बनावत हीं।

11अइसे ही मोर मुख में स मोर सब्द निकसत हीं अउर जब तलक घटनन क घटाइ नहीं लेतेन, उ पचे वापस नहीं आवत हीं। मोर सब्द अइसी घटनन क घटावत हीं जेनका मई घटवावइ चाहत हउँ। मोर सब्द उ सबइ सबहिं बातन पूरी कराइ लेत हीं जेनका करवावइ क मई ओनका पठवत हउँ।

12जब तू पचन्क आनन्द स भरिके सान्ति अउर एकता क साथ में उ धरती स छुड़ाइके लइ जावा जाइ रहा होइ जेहमाँ तू पचे बन्दी रह्या, तउ तोहरे पचन क समन्वा खुसी में पहाइ फट पड़िहीं अउर थिरकइ लगिहीं। पहाड़ियन नाच में फूटि पड़िहीं। तोहार पचन्क समन्वा जंगल क सबहिं बृच्छ अइसे हलइ लगिहीं जइसे तालियन पीट रहा होइँ।

13जहाँ कँटरी झाड़ियन जमा करत हीं हुवाँ देवदार क बिसाल बृच्छ जमिहीं। जहाँ खरपतवार जमा करत रहेन, हुवाँ हिना क बृच्छ जमिहीं। इ सबइ बातन यहोवा क प्रसिद्ध करिहीं। इ सबइ बातन प्रमाणित करिहीं कि यहोवा सक्तीपूर्ण अहइ। इ प्रमाण कबहुँ नस्त नहीं होइ।”

**सबहिं जातियन यहोवा क अनुसरण करिहीं**

**56** यहोवा इ सबइ बातन कहे रहा, “सब लोग क साथ उहइ काम करा जउन निआव स पूर होइ। काहेकि मोर उद्धार हाली ही तोहरे पचन्क लगे आवइ क अहइ। सारे संसार में मोर छुटकारा हाली ही परगट होइ।”

2अइसा मनई जउन सबित क दिन क पालन एका बिना दूसित कइ भए करत ह अउर उ मनई जउन बुरा नहीं करी आसीबदि पाइहीं। 3उ गैर यहूदी लोग जउन यहोवा क लोगन में सामिल होइ पसन्द करत ह। अइसे मनइयन क इ नहीं कहइ चाही: “यहोवा मोर संग आपन “वास्वित” लोगन अलग थलग जइसा बेउहार करब्या। उ असल में मोका आपन अपना लोगन में स एक क रूप में स्वीकार नहीं करब्या!” कउनो हिंजड़े क इ नहीं कहइ चाही: “मई काटे क एक झुरान टुका हउँ अउर मई कउनो गदेल क बाप नहीं बन सकब।”

4-5एन हिंजड़न क अइसी बातन नहीं कहइ चाही काहेकि यहोवा कहे रहा: “एनमाँ स कछू हिंजड़े सबित क नेमन क पालन करत हीं अउर जउन मई चाहत हउँ, उ पचे वइसा ही करइ चाहत हीं। उ पचे सच्चे मन स मोरी वाचा क पालन करत हीं। एह बरे मई आपन मंदिर में ओनके बरे यादगार क एक ठु पाथर लगाउब। मोरे नगर में ओनके नाउँ क याद कीन्ह जाइ। हौं! मई ओनका पुत्र-पुत्रियन स भी कछू अच्छा देबउँ। ओन हिंजड़न क मई एक नाउँ देबउँ जउन सदा-सदा बना रही। मोर लोगन स उ पचे काटिके अलग नहीं कीन्ह जइहीं।”

6कछू अइसे लोग जउन यहूदी नाहीं अहई, अपने आप क यहोवा स जोरिहीं। उ पचे अइसा एह बरे करिहीं कि यहोवा क सेवा अउर यहोवा क नाउँ क पिरम कइ पावई। यहोवा क सेवक बनइ बरे उ पचे खुद क ओहसे जोड़ लेइही। उ पचे सबित क दिन क उपासना क एक बिसेस दिन क रूप में माना करिहीं अउर उ पचे मोर करार क गंभीरता स पालन करिहीं।

7यहोवा कहत ह, “मई ओन लोगन क आपन पवित्तर पर्वत पइ लिआउब। आपन पराथना भवन में मई ओनका आनन्द स भरि देब। उ पचे जउन भेंट अउर बलियन मोका अर्पित करिहीं, मई ओनसे खुस होब। काहेकि मोर मंदिर सबहिं रास्ट्रन क लोगन क पराथना क घर कहावा जाइ।”

8इ उह अहइ जउन मोर सुआमी करत ह,

“मई उहइ हउँ जउन देस निस्कासित कीन्ह भवा इस्त्राएलियन क जेका सताया गवा अहइ एकट्ठा किहेउँ ओनकर संग ओन सबहिं बिदेसियन क जोड़इ जउन बिदेसियन ओकर संग एकट्ठा भए अहा।”

### परमेस्सर क आपन सेवा बरे सबन्क बोलावा

9हे वन क पसुओ। तू पचे सबहिं खइया पइ आवा।

10इ सबइ धरम क रखवारे (नबी) सबहिं नेत्रहीन अहई। ओनका पता नाहीं कि उ पचे का करत अहई। उ पचे उ गूंगे कूकुर क नाई अहई जउन नाहीं जानत कि कइसे भौंका जात ह? उ पचे धरती पइ लउटत हीं अउर सोइ जात हीं। हाय! ओनका नींद पियारी अहइ।

11उ सबइ लोग अइसे अहई जइसे भुखान कूकुर होई। जेनका कबहुँ भी तृप्ति नाहीं होत। उ पचे अइसे चरवाहन अहई जेनका पता तलक नाहीं कि उ पचे का करत अहई? उ पचे ओकर आपन ओन भेड़िन जइसे अहई जउन आपन रास्ता स भटकके कहुँ खोइ गइन। उ पचे लालची अहई ओनका तउ बस आपन पेट भरब भावत ह।

12उ पचे कहा करत हीं, “आवा तनिक दाखरस ल्या अउर ओका पिआ यव सुरा भरपेट पिआ। हम भियान भी इहइ करब, भियान तनिक अउर जियादा पिअब।”

### इस्त्राएल परमेस्सर क नाहीं मानत ह

57 अच्चे लोग चला गएन किन्तु एक भी अइसा नाहीं अहइ जउन एह पइ धियान दिहस। लोग समुझत नाहीं अहई कि का कछू घटत अहइ। भले लोग बटोरा गएन। लोग समुझतेन नाहीं कि बिपत्तियन आवत अहई। ओनका पता तलक नाहीं अहइ कि भले लोग रच्छा बरे बटोरा गएन।

2किन्तु सान्ति आइ अउर लोग अराम स आपन बिछउनन में सोइहीं अउर लोग उहइ तरह जिइहीं जइसे परमेस्सर ओनसे चाहत ह।

3“हे चुडैलियन क गदेलनों, एँह कइँती आवा। तोहार पचन्क पिता बिभिवार क पापी अहइ। तोहार पचन्क महतारी आपन देह यौन बइपार में बेचा करत ह। एहर आवा।

4हे विद्रोहियो अउर झूठी सन्तानों, तू पचे मोर हँसी उड़ावत अहा। मोह पइ आपन मुँह चिढ़ावत अहा। तू पचे मोह पइ जिभिया निकारत अहा।

5तू पचे सबहिं हरिअर बृच्छन क खाते लबार देवतन क कारण कामातुर होत अहा। हर नदी क तीर पइ तू पचे बाल बध करत अहा अउर चट्टानी जगहियन पइ ओनकर बलि देत अहा।

6नदी क गोल बट्टियन क तू पूजइ चाहत अहा। तू ओन पइ दाखरस ओनकर पूजा बरे चढ़ावत अहा। तू ओन पइ बलियन क चढ़ावा करत अहा किन्तु तू ओनके बदले बस पाथर ही पावत अहा। का तू इ सोचत अहा कि मई एहसे खुस होत हउँ? नाहीं। इ मोका खुस नाहीं करत अहइ। तू हर कउनो पहाड़ी अउर हर ऊँच पर्वत पइ आपन बिछउना बनावत अहा।

7तू ओन ऊँची जगहन पइ जावा करत अहा अउर तू हुवाँ बलियन चढ़ावत अहा।

8अउर फुन तू ओन बिछउनन क बीच जात अहा अउर मोरे विरुद्ध तू पाप करत अहा। ओन देवन स तू पिरम करत अहा। उ पचे देवता तोहका भावत हीं। तू मोरे संग रहया किन्तु ओनके संग होइ क बरे तू मोका तजि दिहा। ओन सबहिं बातन पइ तू परदा डाइ दिहा जउन तोहका मोर याद दिआवत ह। तू ओनके दुआसन क पाछे अउर दुआर क चउखटन क पाछे छुपाया अउर तू ओन लबार देवतन क लगे ओनके संग वाचा करइ जात अहा।

9तू आपन तेल अउ फुलेल लगावत अहा ताकि तू आपन लबार देवता मोलक क समन्वा नीक देखाअ। तू आपन दूत दूर-दूर देसन क पठया ह अउर एहसे तू ही नरक में, मउत क देस में गिरब्या।

### इस्त्राएल क परमेस्सर पइ बिस्सास करइ चाही मूर्तियन पइ नाहीं

10“एन बातन क करइ मैं तू परिस्त्रम किहा ह। फुन भी तू कबहुँ नाहीं थक्या। तोहका नई सक्ती मिलत रही काहेकि एन बातन मैं तू रस लिहा।

11तू मोका कबहुँ नाहीं याद किहा हिआँ तलक कि तू मोह पइ धियान तलक नाहीं दिहा। तउ तू केकरे बारे में चिन्तित रहा करत रहया? तू केहसे भयभीत रहत रहया? तू झूठ काहे कहत रहया? लखा मई बहोत दिनन स चुप रहत आवा हउँ अउर फुन तू मोर आदर नाहीं किहा।

12मोका तोहार अच्चे कर्मन अउर तोहरे ओन उपलब्धियन क तारीफ करत रहइ क लाइके होइ चाही। किन्तु उ सबइ बातन जउन तू किहेस ह बेकार अहइ अउर तोहका कउनो लाभ नाहीं देत ह।

13जब तोहका सहारा चाटी तउ तू ओन लबार देवन क जेनका तू आपन चारिहुँ कइँती जुटाया ह, काहे नाहीं गोहरावत अहा। किन्तु मई तोहका बतावत हउँ कि ओन सब क आँधी उड़ाइ देइ। हवा क एक झोका ओनका तोहसे छोर लइ जाइ। किन्तु उ मनई जउन मोरे सहारे अहइ, धरती क पाई। अइसा ही मनई मोर पवित्तर पक्ती क पाई।

**यहोवा आपन भक्तन क रच्छा करी**

14 रास्ता साफ करा। रास्ता साफ करा। मोरे लोगन बरे राह साफ करा।

15 उ जउन ऊँच अहइ अउर जेहका ऊपर उठावा गवा ह, उ जउन अमर अहइ, उ जेकर नाउँ पवित्तर अहइ, उ इ कहत ह: मई एक ऊँच अउर पवित्तर जगह पइ रहा करत हउँ किन्तु मई ओन लोगन क बीच रहा करत हउँ जउन दुःखी अउर विनम्र अहई। अइसे ओन लोगन क मई नई जिन्गी देब जउन मने स विनम्र अहई। अइसे ओन लोगन का मई नई जिन्गी देब जउन हिरदय स दुःखी अहई।

16 मई सदा-सदा ही मुकद्दमा लड़त रहब। सदा-सदा ही मई तउ क्रोधित नाहीं रहब। यदि मई कोहान ही रहउँ तउ मनई क आतिमा यानी उ जिन्गी जेका मई ओनका दिहेउँ ह, मोरे समन्वा ही मरि जाई।

17 उ पचे लालच स हिंसा स भरा स्वारथ साधे रहेन अउर मोका क्रोधित कइ दिहे रहेन। मई इस्त्राएल क दण्ड दिहेउँ। मई ओका निकार दिहेउँ काहेकि मई ओह पइ कोहान रहेउँ अउर इस्त्राएल मोका तजि दिहस। जहाँ कहुँ इस्त्राएल चाहत रहा, चला गवा।

18 मई इस्त्राएल क राहन लखि लिहे रहेउँ। किन्तु मई ओका छिमा करब। मई ओका चैन देब अउर अइसे बचन बोलब जेहसे ओका आराम मिलइ अउर मई ओका राह देखाउब। फुन ओका अउर ओकरे लोगन क दुःख नाहीं छुइ पाई।

19 ओन लोगनक मई एक नवा सब्द सान्ति सिखाउब। अउर मई ओन सबहि लोगन क आसीबादि देब जउन सान्ति क साथ मोरे पास या दूर अहई। यहोवा इ सब कहेस, मई ओन सबहि लोगन क छिमा करब।”

20 किन्तु दुट्ट लोग क्रोधित सागरे क जइसे होत हीं। उ पचे चुप या सान्त नाहीं रहि सकतेन। उ पचे क्रोधित रहत हीं अउर समुद्र क तरह कींचा उछारत रहत हीं। मोर परमेस्सर क कहब अहइ: 21 “दुट्ट लोगन बरे कहुँ कउनो सान्ति नाहीं अहइ।”

**लोगन स कहा कि उ पचे परमेस्सर क अनुसरण करई**

**58** जोर स नरिआअ, जेतना तू गोहराइ सका। आपन क जिन रोका। जोर स गोहरावा जइसे नरसिंहा बजावत ह। लोगन क ओनके बुरे कामन क बारे मँ जउन उ पचे किहेन ह, बतावा। याकूब क घराने क ओनके पापन क बारे मँ बतावा।

2हरेक अइसा देखाइ देत ह जइसा उ बहोत धर्मी अहइ: हर दिना लोग मोर मदद तलास करत हीं। उ पचे मोर राहन क समुझइ चाहत हीं। उ पचे ठीक वइसा ही देखाइ देत ह जइसे उ सबइ लोग कउनो अइसी जाति क होई जउन उहइ करत ह जउन उचित होत ह अउर जउन अपने परमेस्सर क कानूनन क उल्लंघन नाहीं किहेस ह। उ पचे मोहसे चाहत हीं कि ओनकर निआव निस्पच्छ होइ अउर परमेस्सर ओनके संग रहइ।

3 अब उ सबइ लोग कहत हीं, “तोहरे बरे आदर देखावइ क बरे हम पचे भोजन करब बंद कइ देइत ह। तू हमार कइँती लखत्या काहे नाहीं? तोहरे बरे आदर परगट करइ क बरे हम आपन देह क छति पहाँचावत अही। तू हमरी कइँती धियान काहे नाहीं देत्या?”

किन्तु यहोवा कहत ह, “उपवास क ओन दिनन मँ उपवास रखत भए तू पचन्क आनन्द आवत ह किन्तु ओनहीं दिनन तू पचे आपन दासन क खून चूसत अहा। 4 तू पचे भोजन बरे भूखा नाहीं अहा। तू पचन्क आपुस मँ झगड़इ बरे अउर आपुस मँ लड़इ बरे उपवास रखत अहई। तू पचे आपन अत्याचार क हाथन स लोगन क पीटइ बरे भूखा रहत ह। यदि तू पचे चाहत अहा कि सरग मँ तोहार पचन्क परार्थना क सुनइ जाइ तउ उपवास रखइ क इ तरीका नाहीं अहइ। जइसे तू पचे आजु कल रखत अहा। 5 तू पचे का इ सोचत अहा कि भोजन नाहीं करइ क ओन बिसेस दिनन मँ बस मई लोगन क अपने तने क दुःख देत भए लखइ चाहत हउँ? का तू पचे अइसा सोचत अहा कि मई लोगन क दुःखी लखइ चाहत हउँ? का तू पचे इ सीचत अहा कि मई लोगन क मुरझाए भए पउधन क तरह सिर अउर सोक ओढ़ना पहिरे लखइ चाहत हउँ? का तू इ सोचत अहा कि मई लोगन क आपन दुःख परगट करइ क बरे राखी मँ बइठे लखइ चाहत हउँ? इहइ तउ उ सब कछू अहइ जउन तू खइया क न खाइ क दिनन मँ करत अहा। का तू अइसा सोचत अहा कि यहोवा तोहसे बस इहइ चाहत ह?

6 “मई तोहका बताउब कि मोका कइसा बिसेस दिन चाही - एक अइसा दिन जब लोगन क अजाद कीन्ह जाइ। मोका एक अइसा दिन चाही जब तू लोगन क बोझ क ओनसे दूर कइ द्या। मई एक अइसा दिन चाहत हउँ जब तू दुःखी लोगन क अजाद कइ द्या। मोका एक दिन अइसा चाही जब तू ओनके काँधन स भार उतारि द्या। 7 मई चाहत हउँ कि तू भुखान लोगन क संग आपन खाइके चिजियन बाँटा। मई चाहत हउँ कि अइसे गरीब लोगन क हेरा जेनके लगे घर नाहीं अहई अउर मोर इच्छा अहइ कि तू ओनका आपन घरन मँ लइ आवा। तू जब कउनो अइसे मनई क लखा, जेनके लगे ओढ़ना न होइ तउ ओका आपन ओढ़ना दइ डावा। ओन लोगन क मदद स मुँह जिन मोड़ा, जउन तोहार आपन होई।”

8 यदि तू एन बातन क करब्या तउ तोहार प्रकास प्रभात क प्रकास क समान चमकइ लागी। तोहार जखम भर जइहीं। तोहार “नेकी” (परमेस्सर) तोहरे आगे-आगे चलइ लागी अउर यहोवा क महिमा तोहरे पाछे-पाछे चली आइ। 9 तू तबइ यहोवा क जब पुकरब्या, तउ यहोवा तोहका जवाब देइ। जब तू यहोवा क गोहरउब्या तउ उ कही, “मई हिआँ हउँ।”

**परमेस्सर क लोगन क नेकी कइ चाही**

तोहका लोगनक दमन करब अउर लोगन क दुःख देब तजि देइ चाही। तोहका लोगन स कउनो बातन बरे कडुआ सब्द बोलब अउर ओन पइ लांछन लगाउब तजि देइ चाही। 10 तोहका भूखन क भूख बरे दुःख क अनुभव करत भए



ओनका भोजन देइ चाही। दुःखी लोगन क सहायता करत भए तोहका ओनकर जरूरत क पूरा करइ चाही। जब तू अइसा करब्या तउ अँधियारा में तोहार रोसनी चमक उठी अउर तोहका कउनो दुःख नहीं रहि जाइ। तू अइसे चमक उठब्या जइसे दुपहर क समय धूप चमकत ह।

11यहोवा सदा तोहार अगुवाई करी। रेगिस्तान में भी उ तोहरे मने क पियास बुझाई। यहोवा तोहार हाइन क मजबूत बनाई। तू एक अइसे बाग क समान होब्या जेहमों पानी क बहुतायत अहइ। तू एक अइसे झरना क नाई होब्या जेहमों सदा पानी रहत ह।

12बहोत बरिसन पहिले तोहार नगर उजाड़ दीन्ह ग रहेन। एन नगरन क तू नवा सिरे स बसउब्या। एन नगरन क निर्माण तू एकर पुरान नेबन पड़ तू करब्या। “तू टूटे भए परकोटे क बनावइवाले कहवउब्या अउर तू मकानन अउर रास्ट्रन क बहाल करइवाले कहवउब्या।”

13अइसा उ समय होइ जब तू सबित क बारे में परमेस्सर क नेमन क तोड़इ छोड़ देब्या, जब तू जात्रा करइ अउर अइसा करइ क जइसा तू चाहत ह आराम क दिन में छोड़ देब्या। सबित क दिन क तोहका खुसी क साथ यहोवा क आदर करइ चाही, तोहका जात्रा नहीं करइ चाही, तोहका उ काम नहीं करइ चाही जेका तू आपन खुसी बरे करत ह, या तोहका दूसर लोगन क आपन बरे काम करइ क आदेस नहीं देइ चाही।

14तब तू यहोवा में खुसी पउब्या, अउर मइँ यहोवा धरती क ऊँच-ऊँच ठउरन पड़, तोहका लइ जाब। मइँ तोहार पेट भरब। मइँ तोहका अइसी ओन वस्तुअन क देब जउन तोहार बाप याकूब क लगे हुआ करत रहिन।

इ सबइ बातन यहोवा बताए रहा।

### दुःख लोगन क आपन जिन्नगी बदलइ चाही

59 लखा, तोहार रच्छा बरे यहोवा क सक्ती काफ़ी अहइ। जब तू मदद बरे ओका गोहरावत ह तउ उ तोहार सुन सकत ह। 2किन्तु तोहार पचन्क पाप तू पचन्क परमेस्सर स अलग करत हीं अउर इहइ बरे उ तोहरे पचन्क तरफ स कान बन्द कइ लेत ह।

3तोहार पचन्क हाथ गन्दा अहइँ, उ सबइ खून स सने भए अहइँ। तोहार पचन्क अँगुरियन अपराधन स भरी अहइँ। आपन मुँह स तू पचे झूठ बोलत अहा। तोहार पचन्क जिभियन बुरी बातन करत हीं।

4दूसर मनइ क बारे में कउनो मनई फुरइ नहीं बोलत। लोग अदालत में एक दूसर क खिलाफ मुकद्दमा करत हीं। आपन मुकद्दमा जीतइ बरे उ पचे झूठे तर्कन पड़ आसरा करत हीं। उ पचे एक दूसर क बारे में परस्पर झूठ बोलत हीं। उ पचे कस्ट क गर्भ में धारण करत हीं अउर बुराइयन क जनम देत हीं। 5उ पचे सरप क बिख भरे अण्डन क समान बुराई क सेवत हीं। अगर ओनमों स तू एक अण्डा भी खाइ ल्या तउ तोहार मउत होइ जाइ अउर अगर तू ओनमों स एक अण्डा फोड़ द्या तउ एक जहरीला नाग बाहेर निकरि पड़इ।

लोग झूठ बोलत हीं। इ झूठ मकड़ी क जालन जइसी कपड़े नहीं बन सकतेन। 6ओन जालन स तू आपन क ढाँपि नहीं सकतेन।

कछू लोग बदी करत हीं अउर आपन हाथन स दूसरन क नोस्कान पहोंचावत हीं। 7अइसी लोग आपन गोड़न क प्रयोग बदी क लगे पहोंचइ बरे करत हीं। इ सबइ लोग निर्दोख मनइयन क मारि डावइ क जल्दी में रहत हीं। उ पचे बुरे विचारन में पड़े रहत हीं। उ पचे जहाँ जात हीं बिनास अउ बिध्वंस फइलावत हीं।

8अइसे लोग सान्ति क मारग नहीं जानतेन। ओनकर जिन्नगी में नेकी तउ होत ही नहीं। ओनकर रास्तन ईमानदारी क नहीं होतेन। कउनो भी मनई जउन ओनके जइसा जिन्नगी जिअत ह, आपन जिन्नगी में कबहुँ सान्ति नहीं पाई।

### इस्त्राएल क पापन स बिपत्ति क आउब

9एह बरे परमेस्सर क निआव अउर मुक्ति हम स दूर अहइ। हम प्रकास क बाट जोहत अही। पर बस केवल अन्धकार फइला अहइ। हमका चमकत प्रकास क आसा अहइ। किन्तु हम अँधियारा में चलत अही।

10हम अइसे लोग अही जेनके लगे आँखिन नहीं अहइँ। नेत्रहीन लोगन क तरह हम देवारन क टटोरित चलत अही। हम ठोकर खात अही अउर गिर जात अही जइसे इ रात होइ। दिन क प्रकास में भी हम मुर्दन क भाँति गिर पड़ित ह।

11हम सब बहोत दुःखी अही। हम सब अइसे कराहत अही जइसे कउनो रीछ अउर कउनो कबूतर कराहत ह। हम अइसे उ समय क बाट जोहत अही जब लोग निस्पच्छ होइहीं किन्तु अबहिं तलक तउ कतहुँ भी नेकी नहीं अहइ। हम उद्धार क बाट जोहत अही किन्तु उद्धार बहोत-बहोत दूर अहइ।

12काहेकि हम आपन परमेस्सर क विरोध में बहोत पाप किहे अही। हमार पाप बतावत हीं कि हम बहोत बुरे अही। हमका एकर पता अहइ कि हम एन बुरे करमन क करइ क अपराधी अही।

13हम पाप किहे रहे अउर हम आपन यहोवा स मुँह मोड़ लिहे रहे। यहोवा स हम विमुख भए अउर ओका तजि दीन्ह। हम बुरे करमन क योजना बनाए रहे। हम अइसी ओन बातन क योजना बनाए रहे जउन हमरे परमेस्सर क विरोध में रही। हम पचे उ सबइ बातन सोचे रहे अउर दूसरन क सतावइ क योजना बनाए रहे।

14हमसे नेकी क पाछे ढकेला गवा। निस्पच्छता दूर ही खड़ी रही। गलियन में सच्चाई गिर पड़ी रही माना नगर में अच्छाई क प्रवेस नहीं भवा।

15सच्चाई चली गइ अउर उ सबइ लोग लूटे गएन जउन भला करइ चाहत रहेन। यहोवा हेरे रहा किन्तु कउनो भी, कहीं भी अच्छाई न मिल पाई।

16यहोवा हेर लखेस किन्तु ओका कउनो मनई नहीं मिला जउन लोगन क संग खड़ा होइ अउर ओनका सहारा

देइ। एह बरे खुद आपन सक्ती क अउर खुद आपन नेकी क प्रयोग किहस अउर यहोवा लोगन क बचाइ लिहस।

17यहोवा नेकी क कवच, उद्धार क सिरस्त्रण (हेलमेट), दण्ड क वस्त्र, अउर आपन मज़बूत पिरेम क चोगा पहिरेस।

18यहोवा आपन दुस्मन पइ कोहान अहइ तउ यहोवा ओनका अइसा दण्ड देइ जइसा ओनका मिलइ चाही। यहोवा आपन दुस्मनन स कोहान अहइ तउ यहोवा सबहिं दूर-दूर क देसन क लोगन क सजा देइ। यहोवा ओनका वइसा दण्ड देइ जइसा ओनका मिलइ चाही।

19फुन पच्छिम क लोग यहोवा क नाम क आदर देइहीं अउर पूरब क लोग यहोवा क महिमा स भय विम्हित होइ जइहीं। यहोवा अइसे ही हाली आइ जाइ जइसे तेज नदी बहत भइ आइ जात ह। इ उ तेज हवा क रफ़ार सा होइ जेका यहोवा उ नदी क तूफान बहावइ बरे पठवत ह।

20तब सिय्योन पर्वत पइ एक छुड़ावइवाला आइ। उ याकूब क ओन लोगन क लगे आइ जउन पाप तउ किहे रहेन, किन्तु जउन परमेस्सर कईंती लउटि आए रहेन।” यहोवा इ सबइ बातन क कहेस,

21यहोवा कहत ह, “मई ओन लोगन क संग एक वाचा करब। मई बचन देत हउँ मोर आतिमा अउर मोरे सब्द जेनका मई तोहरे मुखे मँ रखत हउँ तोहका कबहुँ नाहीं छोड़िहीं। उ पचे तोर संतानन अउर तोहार बच्चन क बच्चन क संग रहिहीं। उ पचे आजु तोहरे साथ रहिहीं अउर सदा-सदा तोहरे साथ रहिहीं।”

### परमेस्सर आवति अहइ

60 “हे यरूसेलेम, हे मोर प्रकास, तू उठि जागा। तोहार प्रकास (परमेस्सर) आवत रहा बाटइ। यहोवा क मिहिमा तोहरे ऊपर चमकी।

2आजु अँधियारा सारा जहान अउर ओकरे लोगन क ढक रखे अहइ। मुला यहोवा क तेज परगट होइ अउर तोहरे ऊपर चमकी। ओकर तेज तोहरे ऊपर देखाई देइ।

3उ समय सबहिं देस तोहरे प्रकास क लगे अइहीं। राजा तोहरे भव्य तेज क लगे अइहीं।

4आपन चारिहुँ कईंती लखा। लखा, तोहरे चारिहुँ कईंती लोग एकटठा होत अहइँ अउर तोहरी सरण मँ आवत अहइँ। इ सबइ सबहिं लोग तोहार पूत अहइँ जउन दूर बहोत दूर स आवत अहइँ अउर ओनके संग तोहार बिटियन आवत अहइँ।

5अइसा भविस्स मँ होइ अउर अइसे समय मँ जब तू आपन लोगन क लखब्या तब तोहार मुँह खुसी स चमक उठिहीं। पहिले तू उत्तेजित होब्या किन्तु फुन आनन्दित होब्या। समुद्र पार देसन क सारी धन दौलत तोहरे समन्वा घरी होई। तोहरे लगे देसन क सम्पत्तियन अइहीं।

6मिद्यान अउर एपा देसन क ऊँटन क झुण्ड तोहार धरती क ढाँपि लेइहीं। सिबा क देस स ऊँटन क लम्बी कतारन तोहरे हिअँ अइहीं। उ पचे सोना अउर सुगन्ध लइहीं। लोग यहोवा क खुसी क गीत गइहीं।

7केदार क भेड़िन एकट्ठी कीन्ह जइहीं अउर तोहका दइ दीन्ह जइहीं। नबायोत क मेढन तोहरे बरे लिआवा जइही। उ

पचे मोर वेदी पइ स्वीकार करइ क लायक बलियन बनिहीं अउर मई आपन अद्भुत मन्दिर अउर जियादा सुन्नर बनाउबउँ।

8एन लोगन क लखा! इ सबइ तोहरे लगे जल्दी मँ आवत अहइँ जइसे मेघ अकास क जल्दी पार करत हीं। इ सबइ अइसे देखात अहइँ जइसे आपन घोंसलन कईंती उड़त भए कपोत होईं।

9सुदूर देस मोरी प्रतीच्छा मँ अहउँ। तर्सिस क बड़के बड़के जलयान जाइ क तत्पर अहइँ। इ सबइ जलयान तोहरे संतानन क दूर-दूर देसन स लिआवइ क तत्पर अहइँ। अउर एन जहाजन पइ ओनकर सुवर्ण ओनके संग आई अउर ओनकर चाँदी भी इ सबइ जहाज लिअइहीं। अइसा एह बरे होइ कि तोहार परमेस्सर यहोवा क आदर होइ। अइसा एह बरे होइ कि इस्त्राएल क पवित्तर अद्भुत काम करत ह।

10दूसर देसन क संतानन तोहार ढेवारन फुन उठइहीं अउर ओनकर सासक तोहार सेवा करिहीं। जब मई तोहसे कोहान रहेउँ, मई तोहका दुःख दिहेउँ किन्तु अब मोर इच्छा अहइ कि तोह पइ कृपालु बनउँ। एह बरे मई तोहका चैन देबउँ।

11तोहार दुआर हमेसा ही खुला रहिहीं। उ सबइ दिन अथवा राति मँ कबहुँ बन्द नाहीं होइहीं। देस अउर राजा तोहरे पास धन लिअइहीं।

12कछू जाति अउर कछू राज तोहार सेवा नाहीं करिहीं किन्तु उ सबइ जातियन अउर राज नस्त होइ जइहीं।

13लबानोन क सबहिं महा वस्तुअन तोहका अर्पित कीन्ह जइहीं। लोग तोहरे लगे देवदार, तालीसपत्र अउर सरन क बृच्छ लिअइहीं। इ ठउर मोरे सिंहासन क समन्वा एक चौकी सा होइ अउर मई एका बहोत मान देबउँ।

14उ सबइ ही लोग जउन पहिले तोहका दुःख दिया करत रहेन, तोहरे समन्वा निहुरिहीं। उ सबइ ही लोग जउन तोहसे घिना करत रहेन, तोहरे चरणन मँ निहुर जइहीं। उ सबइ ही लोग तोहका कहिहीं, ‘यहोवा क नगर,’ सिय्योन नगर इस्त्राएल क पवित्तर क बाटइ।”

### नवा इस्त्राएल सान्ति क देस

15“फुन तोहका अकेल्ला नाहीं छोड़ा जाइ। फुन कबहुँ तोहसे घिना नाहीं होइ। तू फुन स कबहुँ भी उजड़बिउ नाहीं। तू महान रहबिउ, तू हमेसा अउर सर्वदा आनन्दित रहबिउ।

16तोहार जरूरत क चिजियन तोहका जातियन प्रदान करिहीं। इ एतना ही सहल होइ जइसे दूध मुँह बच्चा क महतारी क दूध मिलत ह। वइसे ही तू सासकन क सम्पत्तियन पिउबीउ। तब तोहका पता चली कि इ मई यहोवा हउँ जउन तोहार रच्छा करत ह। तोहका पता चल जाइ कि उ याकूब क महामहिम तोहका बचावत ह।

17फिलहाल तोहरे पास ताँबा अहइ परन्तु एकरी नगह मई तोहका सोना देब। अबहिं तउ तोहरे लगे लोहा अहइ, पर ओकर जगह तोहका चाँदी देब। तोहार लकड़ी क जगह मई तोहका ताँबा देबउँ। तोहार पाथरन क जगह तोहका लोहा देबउँ अउर तोहका दण्ड देइ क जगह मई तोहका सुख चैन देबउँ। जउन लोग अबहिं तोहका दुःख देत हीं उ सबइ ही

लोग तोहरे बरे अइसा काम करिहीं जउन तोहका सुख देइहीं।

18तोहरे देस में हिंसा अउर तोहरी सबइ सीमा में तबाही अउर बरबादी कबहुँ नाहीं सुनाई पड़ी। तोहरे देस में लोग फुन कबहुँ तोहार वस्तुअन नाहीं चोरइहीं। तू आपन परकोटन क नाउँ 'उद्धार' रखब्या अउर तू आपन दुआरन क नाउँ 'स्तुति' रखब्या।

19दिन क समय में तोहरे बरे सूरज क प्रकास नाहीं होइ अउर रात क समय में चाँद क प्रकास तोहार रोसनी नाहीं होइ। काहेकि यहोवा ही सदैव तोहरे बरे प्रकास होइ। तोहार परमेस्सर तोहार महिमा बनी।

20तोहार 'सूरज' फुन कबहुँ भी नाहीं छुपी। तोहार 'चाँद' कबहुँ भी करिआ नाहीं पड़ी। काहेकि यहोवा क प्रकास सदा सर्वदा तोहरे बरे होइ अउर तोहार दुःख क समय खतम होइ जाइ।

21तोहार सबहिं लोग उत्तिम बनिहीं। ओनका सदा बरे धरती मिलि जाइ। मई ओन लोगन क रचा ह। उ सबइ अद्भुत पउधन मोर आपन ही हाथन स लगाए भए अहई।

22छोटा स छोटा भी बिसाल घराना बन जाइ। छोटा स छोटा भी एक सक्तीसाली रास्ट बन जाइ। जब उचित समय आइ, मई यहोवा हाली ही आइ जाब अउर मई इ सबइ बातन घटित कइ देबउँ।"

### यहोवा क मुक्ति संदेश

61 यहोवा क सेवक कहत ह, "मोर सुआमी यहोवा मोहमाँ आपन आतिमा धरेस ह। उ मोका एक खास करइ बरे अभिसेक किहेस ह। उ मोका विनम्र लोगन क अच्छी खबर देइ बरे, टुटे हिरदइवालन क उत्साह बढ़ावइ बरे, बन्दी क आजाद करइ बरे, अउर कैदी क मुक्त करइ बरे पठएस ह। 2उ समय क घोसणा करब जब यहोवा आपन करुणा परगट करी; उ समय क घोसणा करब जब हमार परमेस्सर दुस्तन क दण्ड देइ; दुःखी लोगन क पुचकारब; 3सिय्योन क दुःखी लोगन क आदर देब (अबहिं तउ ओनके लगे बस राखी अहइ); सिय्योन क लोगन क खुसी क स्नेह प्रदान करब; (अबहिं तउ ओनके पास बस दुःख अहइ) सिय्योन क लोगन क परमेस्सर क स्तुति क गीत प्रदान करब (अबहिं तउ ओनके लगे बस ओनके दर्द अहई); सिय्योन क लोगन क उत्सव क ओढ़ना देब (अबहिं तउ ओनके लगे बस ओनकर दुःख ही अहई।) ओन लोगन क 'उत्तिमता क बृच्छ' क नाउँ देब; ओन लोगन क यहोवा क अद्भुत बृच्छ क संज्ञा देब।"

4"उ समय, ओन पुरान नगरन क जेनका उजाड़ दीन्ह गवा रहा, फुन स बसावा जाइ। ओन नगरन क वइसे ही नवा बनाइ दीन्ह जाइ जइसे उ पचे सुरु में रहेन। उ सबइ नगर जेनका बरिसन पहिले हटाइ दीन्ह गवा रहा, नवे जइसे बनाइ दीन्ह जइहीं।

5"फुन तोहार पचन्क दुस्मन तोहरे पचन्क लगे अइहीं अउर तोहार पचन्क भेड़िन चरावा करिहीं। तोहार पचन्क सत्रुअन क सन्तानन तोहरे पचन्क खेतन अउर तोहरे पचन्क बगियन में काम किया करहीं। 6तू पचे 'यहोवा क याजक'

कहवउब्या। तू पचे 'हमरे परमेस्सर क सहायक' कहवउब्या। धरती क सबहिं देसन स आई भइ सम्पत्ति क तू प्राप्त करब्या अउर तू पचन्क इ बात क गर्व होइ कि उ तोहार सम्पत्ति अहइ।

7"बीते समय में लोग तू पचन्क लज्जित करत रहेन अउर तोहरे पचन्क बारे में बुरी बुरी बातन बनावा करत रहेन। तू पचे एतना लज्जित रह्या जेतना अउर कउनो दूसर मनई नाहीं रहा। एह बरे तू पचे आपन धरती में दूसर लोगन स दुगुना हींसा प्राप्त होइ। तू पचे अइसी खुसी पउब्या जेकर कबहुँ अंत नाहीं होइ। 8अइसा काहे घटित होइ? काहेकि मई यहोवा हउँ अउर मोका नेकी स पिरेम अहइ। मोका चोरी स अउर हर उ बात स, जउन अनुचित अहइ, घिना अहइ। एह बरे लोगन क, जउन ओनका मिलइ चाही, उ भुगतान मई देबउँ। आपन लोगन क संग सदा सदा बरे मई इ वाचा करत हउँ कि 'सबहिं देसन क हर कउनो मनई मोर लोगन क जान जाइ। मोर जाति क बंसजन क हर कउनो जान पाइ। हर कउनो मनई जउन ओनका लखी, जान जाइ कि यहोवा ओनका आसीर्वाद देत अहइ।"

### यहोवा क सेवक उद्धार अउर उत्तिमता लावत अहइ

10"यहोवा मोका बहोत खुस करत ह। मोर संपूर्ण व्यक्तित्व परमेस्सर में टिका अहइ अउर खुसी में मगन अहइ। यहोवा उद्धार क ओढ़ना स मोका ढॉपि लिहेस। उ पचे अइसे ही भव्य अहई जइसे भव्य वस्त्र कउनो मनसेधू आपन सादी क मौके पइ पहिरत ह। यहोवा मोका नेकी क चोगा स ढकि लिहेस ह। इ चोगा वइसा ही सुन्नर अहइ जइसा सुन्नर कउनो नारी क विवाहे क वस्त्र होत ह।

11धरती पउधन उगावत ह। लोग बगियन में बिआ डावत हीं अउर उ बगिया ओन बिअन क उगावत ह। वइसे ही यहोवा नेकी क उगाई। इ तरह मोर सुआमी सबहिं जातियन क बीच स्तुति क बढ़ाई।"

### नवा यरूसलेम: नेकी का एक नगर

62 "मोका सिय्योन स पिरेम अहइ। एह बरे मई ओकरे समर्थन में बोलत रहब। मोका यरूसलेम स पिरेम अहइ, एह बरे मई चुप न होबउँ। मई उ समय तलक बोलत रहब जब तलक नेकी क चीन्ह चमकत भइ जोति सी नाहीं चमकी। मई उ समय तलक बोलत रहब जब तलक उद्धार आगी क लपट सा भव्य बनिके नाहीं धधकी।

2फुन सबहिं देस तोहरी नेकी क लिखिहीं। तोहरे सम्मान क सब राजा लिखिहीं। तबहिं तू एक नवा नाम पउब्या। खुद यहोवा तू लोगन बरे उ नवा नाम पाई।

3यहोवा क तू लोगन पइ बहोत गर्व होइ। तू पचे यहोवा क हाथन में सुन्नर मुकुट क समान होब्या।

4फुन तू पचे कबहुँ अइसे जन नाहीं कहवउब्या, 'परमेस्सर क तजे भए लोग।' तोहार पचन्क धरती कबहुँ अइसी धरती नाहीं कहवाइ जेका परमेस्सर उजाड़ेस। तू लोग परमेस्सर क प्रिय जन कहवउब्या। तोहार पचन्क धरती 'परमेस्सर क दुलहिन कहवाई।' काहेकि यहोवा तू पचन्स पिरेम करत ह अउर तोहार पचन्क धरती ओकर होइ जाइ।

5जइसे एक युवक कुँवारी क बीहत ह। वइसे ही तोहार पचन्क पूत तोहका बियाह लेइहीं। अउर जइसे दूल्हा आपन दुलहिन क संग आनन्दित होत ह वइसे ही तोहार पचन्क परमेस्सर तोहरे पचन्क संग खुस होइ।”

### परमेस्सर आपन बचन पाली

6“यरूसलेम क चारदीवारी पइ मई रखवारे (नवी) बइढाइ दिहेउँ ह कि ओकर धियान रखईं। इ सबइ रखवारे मूक नाहीं रहिहीं। इ सबइ रखवारे यहोवा क तोहरी पचन्क जरूरतन क याद दियावत हीं। हे रखवारो, तू पचन्क चुप नाहीं होइ चाही।

7तू पचन्क यहोवा स पराथना करब बन्द नाहीं करइ चाही। तू पचन्क सदा ओकर पराथना करत ही रहइ चाही। जब तलक उ फुन स यरूसलेम क निर्माण न कइ दे, तब तलक तू पचे ओकर पराथना करत रहा। यरूसलेम एक अइसा नगर अहइ जेकर धरती क सबहिं लोग जस गइहीं।

8यहोवा खुद आपन सक्ती क प्रमाण बनावत भए वाचा कइँती यहोवा आपन सक्ती क प्रयोग स ही उ वाचा क पाली। यहोवा कहे रहा, “मई तू पचन्क बचन देत हउँ कि मई तोहरे पचन्क खइया क कबहुँ तोहरे पचन्क दुस्मनन क न देबउँ। मई तू पचन्क बचन देत हउँ कि तोहार पचन्क बनाई दाखरस तोहार पचन्क दुस्मनन कबहुँ नाहीं लइ पाई।

9जउन मनई खाना जुटावत ह, उहइ ओका खाई अउर उ मनई यहोवा क गुण गाई। उ मनई जउन अंगूर बीनत ह, उहइ ओन अंगूरन क बनी दाखरस पिई। मोर पवित्तर धरती पइ अइसी बातन हुआ करिहीं।”

10दुआरे स होत भए आवा। लोगन बरे राहन साफ करा। मारग क तइयार करा। राहे पइ क पाथर हटाइ द्या। लोगन बरे संकेत क रूप में झण्डा उठाइ द्या।

11यहोवा सबहिं दूर देसन बरे बोलत अहइ। “सिय्योन क लोगन स कहि द्या, लखा, तोहार पचन्क उद्धारकर्ता आवत अहइ। उ तोहार पचन्क प्रतिफल लिआवत अहइ। उ अपने संग तोहरे बरे प्रतिफल लिआवत अहइ।”

12ओकर लोग बोलावइ जाइ: “पवित्तर जन,” “यहोवा क सुरच्छित लोग।” यरूसलेम बोलावइ जाइ: “उ नगर जेसे यहोवा पिरम करत ह,” “उ नगर जेका अउर तजि नाहीं जाइ।”

### यहोवा आपन लोगन क निआब करत ह

**63** इ कउन अहइ जउन एदोम स आवत अहइ? इ बोस्त्रा क नगरी स लाल धब्बन स युक्त ओढ़ना पहिरे आवत अहइ। उ आपन ओढ़नन में अति भव्य देखात अहइ। उ लम्बे डग बढ़ावत भवा आपन महासक्ती क साथ आवत अहइ अउर मई सच्चाई स बोलत हउँ।

2“तू अइसे वस्त्र जउन लाल धब्बन स युक्त अहइ, काहे पहिरत अहा? तोहार वस्त्र अइसे लाल काहे अहइ जइसे उ मनई क जउन अंगार स दाखरस बनावत ह?”

3उ जवाब देत ह, “दाखरस क कुण्डे में मई अकेले ही दाख रौंदैँ। कउनो भी मोका मदद नाहीं दिहस। मई कोहान

रहेउँ अउर मई लोगन क रौंदैँ जइसे अंगूर दाखरस बनावइ बरे रौंदा जात हीं। स छिटके मोरे ओढ़ना में लाग।

4मई रास्ट्रन क दण्ड देइ बरे एक समय चुनेउँ। मोर उ समय आइ गवा कि मई आपन लोगन क बचाउँ अउर ओनकर रक्षण करउँ।

5मई चकित भएउँ कि कउनो भी मनई मोर समर्थन नाहीं किहस। एह बरे मई आपन सक्ती क प्रयोग आपन लोगन क बचावइ बरे किहेउँ। खुद मोर आपन किरोध ही मोर समर्थन किहस।

6जब मई कोहान रहा, मई लोगन क रौंद दिहे रहेउँ। जब मई किरोध में पागल रहा, मई ओनका दण्ड दिहेउँ। मई ओनकर लहू धरती पइ उडेर दिहेउँ।”

### यहोवा आपन लोगन पइ दयालु रहा

7इ मई याद राखब कि यहोवा दयालु अहइ अउर मई यहोवा क स्तुति करब याद राखब। यहोवा इस्राएल क घराने क बहोत स वस्तुअन प्रदान किहस। यहोवा हमरे बरे बहोत ही कृपालु रहा। यहोवा हमरे बरे दया देखौएस।

8यहोवा कहे रहा, “इ सबइ मोर लोग अहई। इ सबइ बच्चन कबहुँ झूठ नाहीं कहत हीं।” एह बरे यहोवा ओन लोगन क बचाइ लिहस।

9ओनका सब संकटन स कउनो भी सरगादूत नाहीं बचाए रहा। उ खुद ही आपन पिरम अउर आपन दया स ओनका छुटकारा दिआए रहा।

10किन्तु उ सबइ लोग यहोवा स मुँह मोड़ चलेन। उ पचे ओकर पवित्तर आतिमा क बहोत दुःखी किहस। तउ यहोवा ओनकर दुस्मन बन गवा। यहोवा ओन लोगन क विरोध में जुद्ध किहस।

11किन्तु यहोवा अब भी पहिले क समय याद करत ह। यहोवा मूसा क अउर ओकर लोगन क याद करत ह। यहोवा उहइ रहा जउन लोगन क सागर क बीच स निकाारि के लिआवा। यहोवा आपन भेड़िन क अगुवाई क बरे आपन चरवाहन क प्रयोग किहस। किन्तु अब उ यहोवा कहाँ अहइ जउन आपन आतिमा क मूसा में रख दिहे रह्या।

12यहोवा आपन दाहिन हाथे स मूसा क अगुवाई किहस। यहोवा आपन अद्भुत सक्ती स मूसा क राह देखौएस। यहोवा जल क चीर दिहे रहा। जेहसे लोग सागर क पैदल पार कइ सके रहेन। इ अद्भुत कार्य क कइके यहोवा आपन नाउँ प्रसिद्ध किहे रहा।

13यहोवा लोगन गहिर सागर क बीच स पार किहेस। उ पचे अइसे चला रहेन जइसे रेगिस्तान क बीच स घोड़ा बिना लइखड़ाए चला जात ह।

14जइसे मक्सी घाटियन स उतरत अउर आराम क ठउर पावत हीं वइसे ही यहोवा क प्राण हमका विस्त्राम क जगहिया दिहेस ह। हे यहोवा, इ ढंग स तू आपन लोगन क राह देखाया अउर तू आपन नाउँ अद्भुत कइ दिहा।

### ओकरे लोगन क मदद बरे यहोवा स पराथना

15हे यहोवा, तू अकासे स खाले लखा ओन बातन क लखा जउन घटत अहई। तू हमका आपन महान पवित्तर घरे

स जउन अकासे में अहइ, खाले लखा। तोहार सुदृढ़ पिरेम हमरे बरे कहाँ अहई? तोहार सक्तीसाली कार्य कहाँ अहइ? तोहार हिरदय क पिरेम कहाँ अहइ? मोरे बरे तोहार कृपा कहाँ अहइ? तू आपन करूण पिरेम मोहसे कहाँ छुपाइ रखा अहइ?

16लखा, तू हमार पिता अहा! होइ सकत ह इब्राहीम हम पच क नाही पहिचान सकी। होइ सकत ह इस्राएल हमका नाही जान सकी कि हम पचे कउन अहउँ। किन्तु यहोवा तू हमार पिता अहा। तू उहइ यहोवा अहइ जउन हमका सदा छोड़ाएस ह!

17हे यहोवा, तू हमका आपन स दूर काहे ढकेलत अहा? तू हमरे बरे आपन अनुसरण करइ क काहे कठिन बनावत अहा? यहोवा तू हमरे लगे लउटि आवा। हम तउ तोहार दास अही। हमरे पास आवा अउर हमका सहारा द्या। हमार परिवार तोहार अहई।

18थोड़े समय बरे हमार दुस्मन तोहार पवित्तर लोगन पइ कब्जा कइ लिहे रहेन। हमार दुस्मन तोहरे मन्दिर क कुचरि दिहे रहेन।

19कछू लोग तोहार अनुसरण नाही करत हीं। उ पचे तोहरे नाउँ क धारण नाही करत हीं। जइसे उ सबइ लोग हम भी वइसे हुआ करत रहे।

**64** यदि तू अकास चीरिके धरती पइ खाले उतरि आवा तउ सब कछू ही बदल जाइ। तोहरे समन्वा पर्वत टेघर जाइ।

2पहाड़न में लपट उठिहीं। उ सबइ अइसे बरिहीं जइसे झाड़ियन बरत हीं। पहाड़ अइसे उबलिहीं जइसे उबलत पानी आगी पइ रखा गवा होइ। तब तोहार दुस्मन तोहरे बारे में समुझिहीं। जब सबहिं जातियन तोहका लखिहीं तब उ पचे भय स थर-थर काँपिहीं।

3किन्तु हम फुरइ नाही चाहित ह कि तू अइसे कामन क करा कि तोहरे समन्वा पहाड़ पिघल जाइ।

4फुरइ तोहार ही लोग तोहार कबहुँ नाही सुनेन। जउन कछू तू बातन कहया फुरइ तोहार ही लोग ओनका कबहुँ नाही सुनेन। तोहार जइसा परमेस्सर कउनो भी नाही लखेस। कउनो भी दूसर परमेस्सर नाही, बस सिरिफ तू ही अहा। यदि लोग धीरा धइके तोहरे सहारे क बाट जोहत रहई, तू ओनके बरे बड़े काम कइ देब्या।

5जेनका अच्छे काम करइ में मजा आवत ह, तू ओन लोगन क संग अहा। उ सबइ लोग तोहरे जिन्नगी क रीति क याद करत हीं। पर लखा, बीते दिनन में हम तोहरे विरूद्ध पाप किहा ह। एह बरे तू हमके कोहाइ ग रहया। अब भला कइसे हमार रच्छा होइ?

6हम सबहिं पाप स मैला अही। हमार सब 'नेकी' पुरान गन्दे कपड़न स अहइ। हम झुरान मुरझाए पत्तन स अही। हमार पाप हमका आँधी स उड़ाये अहइ।

7हम तोहार उपासना नाही करित ह। हम का तोहरे नाउँ में बिस्सास नाही अहइ। हम में स कउनो तोहार अनुसरण करइ क उत्साही नाही अहइ। एह बरे तू हमस मुँह मोड़ लिहा ह। काहेकि हम पाप स भरा अही एह बरे हम तोहरे समन्वा असमर्थ अही।

8किन्तु, यहोवा तू हमार पिता अहा। हम माटी क लौदा अही अउर तू कोमहार अहा। तोहरे ही हाथन हम सबक रचा ह।

9हे यहोवा, तू हमेसा कुपित जिन बना रहा। तू हमरे पापन क सदा ही याद जिन रखा। कृपा कइके तू हमरी कइँती लखा। हम तोहार ही लोग अही।

10तोहार पवित्तर नगरियन उजड़ी भई अहई। आजु उ सबइ नगरियन अइसी हो गइ अहई जइसे रेगिस्तान होई। सिय्योन रेगिस्तान होइ गवा अहइ। यरूसलेम ढल गवा अहइ।

11हमार पवित्तर मन्दिर भसम होइ ग अहइ। उ मन्दिर हमरे बरे बहोत ही महान रहा। हमार पूर्वज हुवाँ तोहार उपासना करत रहेन। अउर हम लोगन क सबइ बहुमुल्य वस्तुअन नास होइ ग अहइ।

12का इ सबइ वस्तुअन सदैव तोहका आपन पिरेम हम पइ परगट करइ स दूर रखिहीं। का तू कबहुँ कुछ नाही कहब्या? का तू अइसे ही चुप रह जाब्या? का तू सदा हमका दण्ड देत रहब्या?

### परमेस्सर क बारे में सबहिं लोग जनिहीं

**65** यहोवा कहत ह, "मई ओन लोगन क भी सहारा दिहेउँ ह जउन उपदेस ग्रहण करइ बरे कबहुँ मोरे लगे नाही आएन। जउन लोग मोका प्राप्त कइ लिहन, उ पचे मोरी खोज में नाही रहेन। मई एक अइसी जाति स बात किहेउँ जउन मोर नाउँ धारण नाही करत रही। मई कहे रहेउँ, 'मई हिआँ हउँ। मई हिआँ हउँ।'

2"जउन लोग मोहसे मुँह मोड़ गए रहेन, ओन लोगन क अपनावइ बरे मई तत्पर रहेउँ। मई इ बात क प्रतीच्छा करत रहेउँ कि उ सबइ लोग मोरे लगे लउटि आवइँ। किन्तु उ पचे जिन्नगी क एक अइसी राह पइ चलत रहेन जउन अच्छी नाही अहइ। उ पचे आपन मन क मुताबिक काम करत रहेन। 3उ सबइ लोग मोरे समन्वा रहत हीं अउर सदा मोका गुस्सैल करत रहत हीं। आपन बिसेस बागन में उ पचे लोग मिथ्या देवतन क बलियन क अर्पन करत हीं अउर अगारबत्ती बारत हीं। 4उ सबइ लोग कब्रन क बीच बइठत हीं अउर मरे भए लोगन स संदेस पावइ क प्रतीच्छा करत रहत हीं। हिआँ तलक कि उ पचे मुर्दन क बीच रहा करत हीं। उ पचे सुअर क माँस खात हीं। ओनकर पियालन में अपवित्तर वस्तुअन क सोरबा अहइ।

5"किन्तु उ सबइ लोग दूसर लोगन स कहा करत हीं, 'मोरे लगे जिन आवा, मोका उ समय तलक जिन छुआ, जब तलक मई तू पचन्क पवित्तर न कइ देउँ।' मोर आँखिन में उ सबइ लोग धुएँ क जइसे अहई अउर ओनकर आगी हर समय बरा करत ह।"

### इस्राएल क दण्डित होइ चाही

6"लखा, इ एक हुण्डी अहइ जेका पुनः भुगतान जरूर करइ क होइ। इ हुण्डी बतावत ह कि तू आपन पापन बरे अपराधी अहा। मई उ समय तलक चुप नाही होबउँ जब

तलक इ हुण्डी क भुगतान न कइ देउँ। अउर मई इ हुण्डी क भुगतान नेम क अनुसार करब।

7“तोहार पचन्क पाप अउर तोहार पचन्क पुरखन एक ही जइसे अहई।” यहोवा इ कहेस ह, “तोहार पचन्क पुरखन जब पहाड़न में धूप अगारबत्तियन बारे रहेन, तबहि एन पापन क किहे रहेन। ओन पहाड़न पइ उ पचे मोका लज्जित किहे रहेन अउर सबसे पहिले मई ओनका दण्ड दिहेउँ। जउन दण्ड ओनका मिलइ चाही रहा, मई ओनका उहइ दण्ड दिहेउँ।”

### परमेस्सर इस्त्राएल क पूरी तरह नस्ट नाहीं करी

8यहोवा कहत ह, “अंगूरन में जब नई दाखरस हुवा करत ह, तब लोग ओका निचोड़ लिया करत हीं, किन्तु उ पचे अंगूरन क पूरी तरह नस्ट तउ नाहीं कइ डउतेन। उ पचे एह बरे अइसा करत हीं कि अंगूरन क उपयोग तउ फिन भी किया जाइ सकत ह। आपन सेवकन क साथ मई अइसा ही करब। मई ओनका पूरी तरह नस्ट नाहीं करब: 9इस्त्राएल क कछू लोग क मई बचाए रखब। यहूदा क कछू लोग मोरे पर्वतन क प्राप्त करिहीं। मोरे सेवकन क हुवाँ निवास होइ। मोर चुने भए लोगन क धरती मिली। 10फुन तउ सारोन क घाटी हमार भेड़ी-बोकरियन क चरागाह होइ तथा आकोर क तराई हमरे मवेसियन क आराम करइ क जगह बन जाइ। इ सबइ सब बातन मोरे लोगन क बरे होइहीं। ओन लोगन बरे जउ मोर खोज में अहई।

11“किन्तु तू लोग, जउन यहोवा क तजि दिहेन ह, दण्डित कीन्ह जाब्या। तू अइसे लोग जउन मोरे पवित्तर पर्वत क बिसराइ दिहेन ह। तू अइसे लोग अहा जउन भाग्य क मिथ्या देवता क पूजा करत अहा। तू पचे भाग्यरूपी लबार देवता क सहारे रहत अहा। 12किन्तु तोहरे पचन्क भाग्य क निर्धारन तउ मई करत हउँ। मई तरवार स तोहका दण्ड देबउँ। जउन तू पचन्क दण्ड देइ। तू पचे सबहिं ओकरे अगवा मिमिआइ लगब्या। मई तू पचन्क गोहराएउँ किन्तु तू पचे कउनो जवाब नाहीं दिहा। मई तू पचन्स बातन किहेउँ किन्तु तू पचे सुन्या तलक नाहीं। तू पचे ओन कामन क ही करत रह्या जेनका मई बुरा कहे रहेउँ। तू पचे ओन कामन क करइ क ही ठान लिहा जउन मोका नीक नाहीं लागत रहेन।”

13तउ मोर सुआमी यहोवा इ सबइ बातन कहेस। “मोर दास भोजन पइहीं, किन्तु तू पचे भूखा मरब्या। मोर दास पीहीं किन्तु अरे दुस्टो, तू पचे पियासा मरब्या। मोर दास खुस होइहीं किन्तु अरे ओ दुस्टो, तू पचे लज्जित होब्या।

14मोरे दासन क मन खरे अहई एह बरे उ सबइ खुस होइहीं। किन्तु अरे ओ दुस्टो, तू पचे रोया करब्या काहेकि तोहरे पचन्क मने में पीरा बसी। तू पचे आपन टूटे भए मन स बहोत दुःखी रहब्या।

15तोहार पचन्क नाउँ मोरे लोगन क बरे गालियन क जइसे होइ जइहीं।” मोर सुआमी यहोवा तू पचन्क मारि डाइ अउर उ आपन दासन क एक नवे नाउँ स बोलाया करी।

16जब लोग दूसर क आसीस देइ, उ पचे धरती क नाउँ लइ के आसीस देइ। किन्तु अगवा आवइवाले दिनन में उ

पचे दूसर क बिस्सासी परमेस्सर क नाउँ लेइ के आसीस देइ। अबहिं लोग धरती क सकती क भरोसे रहा करत हीं जब उ पचे कउनो बचन देत हीं। किन्तु भविस्स में, उ सबइ बिस्सासी परमेस्सर क भरोसे रहा करिहीं। काहेकि पिछले दिनन क सबहिं विपत्तियन भुलाइ दीन्ह जइहीं। लोग फुन ओन पिछली विपत्तियन क याद नाहीं करिहीं।

### एक नवा समय आवत अहइ

17“लखा, मई एक नवे सरग अउर नई धरती क रचना करब। लोग मोरे लोगन क पिछली बात याद नाहीं रखिहीं। ओनमाँ स कउनो बात याद में नाहीं रही।

18मोर लोग दुःखी नाहीं रहिहीं। नाहीं, उ पचे आनन्द में रहिहीं अउर उ पचे सदा खुस रहिहीं। मई जउन बातन रचब जउन आनन्द स परिपूर्ण होइ अउर मई ओनका एक प्रसन्न जाति बनाउब।

19फुन मई यरूसलेम स खुस रहब। मई आपन लोगन स खुस रहब। तब उ नगरी में फुन कबहुँ विलाप अउर कउनो दुःख नाहीं होइ।

20उ नगरी में कउनो बच्चा अइसा नाहीं होइ जउन पइदा होइके पाछे कछू दिन जिई। उ नगरी क कउनो भी मनई आपन छोटी उमर में नाहीं मरी। हर पैदा भवा बच्चा लम्बी उमर जिई अउर उ नगरी क प्रत्येक बुढ़वा मनई एक लम्बे समय तलक जिअत रही। हुवाँ सौ साल क मनई भी जवान कहा जाइ। किन्तु कउनो भी अइसा मनई जउन सौ साल स पहिले मरी अभिसप्त कहा जाइ।

21लखा, उ नगरी में अगार कउनो मनई आपन घर बनाई तउ उ मनई आपन घरे में बसी। अगार कउनो मनई हुवाँ अंगूरे क बाग लगाई तउ उ आपन बाग क अंगूर खाई।

22हुवाँ अइसा नाहीं होइ कि कउनो आपन घर बनावइ अउर कउनो दूसर निवास करइ। अइसा भी नाहीं होइ कि बाग कउनो दूसर लगावइ अउर उ बाग क फल कउनो दूसर खाइ। मोर लोग एतना जीइहीं जेतना इ सबइ बृच्छ जिअत हीं। अइसा मनई जेनका मई चुनेउँ ह, ओन सबहिं वस्तुअन क आनंद लेइहीं जेनका उ पचे बनाए अहई।

23फुन लोग बियर्थ क परिस्त्रम नाहीं करिहीं। लोग अइसे ओन बच्चन क जन्म नाहीं देइहीं जेनके बरे उ पचे मने में डेरइहीं कि उ पचे कउनो अचानक बिपत्ति क सिकार न होइ। मोर सबहिं लोग यहोवा क आसीस पइहीं। मोर लोग अउर ओनकर संतानन आसीबाद पइहीं।

24मोका ओन सबहिं वस्तुअन क पता होइ जाइ जेनकर जरूरत ओनका होइ, एहसे पहिले कि उ पचे ओनका मोसे माँगई। एहसे पहिले कि उ पचे मोहसे मदद क पराथना पूरी कइ पइहीं, मई ओनका मदद देब।

25बिगवन अउर मेमनन एक संग चरत फिरिहीं। सिंह भी मवेसियन क जइसे ही भूसा खाइहीं अउर भुजंगन क भोजन बस माटी ही होइ। मोरे पवित्तर पर्वत पइ कउनो केउ क भी नोस्कान नाहीं पहाँचाइ अउर न ही ओनका नस्ट करी।” इ यहोवा कहेस ह।

### परमेस्वर सबहिं जातिउन क निआव करी

**66** यहोवा इ कहत ह, “अकास मोर सिंहासन अहइ। धरती मोरे पाँव क चौकी बनी अहइ। तउ का तू इ सोचत अहा कि तू मोरे बरे भवन बनाइ सकत अहा? नाहीं, तू नाहीं बनाइ सकत्या। का तू मोका बिस्त्राम क जगह दइ सकत ह? नाहीं, तू नाहीं दइ सकत्या।

मई खुद ही सारी वस्तुअन रचेउँ ह। इ सबइ सारी वस्तुअन हिआँ टिकी अहइ काहेकि ओनका मई बनाएउँ ह।” यहोवा इ सबइ बातन कहे रहा। “मोका बतावा कि मई कइसे लोगन क चिन्ता किया करत हउँ? मोका दीन हीन लोगन क चिन्ता अहइ। इ सबइ ही उ सबइ लोग अहउँ जउन बहोत दुःखी रहत हीं। अइसे ही लोगन क चिन्ता मई किया करत हउँ। जउन मोरे बचनन क पालन किया करत हीं।

ओका बलि क रूप मँ अर्पित करइ क कछू लोग बर्धा क बध किया करत हीं किन्तु उ सबइ लोगन स मारपीट भी करत हीं। मोका अर्पित करइ क इ सबइ भेड़िन क मारत हीं किन्तु इ सबइ कुकुरन क गर्दन भी तोड़न हीं अउर सुअन क लहू इ सबइ मोह पइ चढ़ावत हीं। अइसे लोगन क धूप स बारइ क याद बनी रहा करत ह किन्तु उ सबइ बियर्थ क आपन सबइ प्रतिमा स पिरेम करत हीं। अइसे इ सबइ लोग आपन मनचीती राहन पइ चला करत हीं, मोरी राहन पइ नाहीं। उ पचे पूरी तरह स आपन घिनौने मूरति क पिरेम मँ बूडा अहइँ।

एह बरे मई इ निहचय किहेउँ ह कि मई ओनकर जूती ओनहीं क सिर करब। मोर इ मतलब अहइ कि मई ओनका दण्ड देब ओन वस्तुअन क काम मँ लिआवत भए जेनसे उ पचे बहोत डेरात हीं। मई ओन लोगन क गोहराए रहेउँ किन्तु उ पचे नाहीं सुनेन। मई ओनसे बोले रहेउँ किन्तु उ पचे सुनेन ही नाहीं। एह बरे अब मई भी ओनके संग अइसा ही करब। उ सबइ लोग ओन सबहिं बुरे कामन क करत रहत हीं जेनका मई बुरा बताए रहेउँ। उ पचे अइसा काम करइ क चुनेन जउन मोका नाहीं भावत रहेन।”

5हे लोगो, यहोवा क भय विम्हय मानइवालो अउर यहोवा क हुकुमन क अनुसरण करइवालो, ओन बातन क सुना। यहोवा कहत ह, “तोहसे तोहार पचन्क भाइयन घिना किहेन काहेकि तू पचे मोरे पाछे चला करत रह्या, उ पचे तोहरे पचन्क विरूद्ध होइ गएन। तोहार पचन्क बंधु कहा करत रहेन, ‘जब यहोवा सम्मानित होइ हम पचे तोहरे सबन्क पाछे होइ लेव। फुन तोहरे सबन्क साथ मँ हम भी खुस होइ जाब।’ अइसे ओन लोगन क सजा दीन्ह जाइ।

### दण्ड अउर नई नीति

6“सुनन तउ, नगर अउर मन्दिर स एक ऊँच आवाज सुनाइ देत अहइ। यहोवा क जरिये आपन विरोधियन क, जउन दण्ड दीन्ह जात अहइ। उ आवाज उहइ क अहइ। यहोवा ओनका उहइ दण्ड देत अहइ जउन ओनका मिलइ चाही।

7-8“अइसा तउ नाहीं भवा करत रहा कि प्रसव पीरा स पहिले ही कउनो मेहरारू बच्चा पइदा करत होइ। अइसा तउ

कबहुँ नाहीं भवा कि कउनो मेहरारू कउनो पीरा क अनुभव करइ स पहिले ही आपन पूत क पइदा भवा लखे होइ। अइसा कबहुँ नाहीं भवा। इहइ प्रकार कउनो भी मनई एक दिन मँ कउनो नवा संसार आरम्भ होत भए नाहीं लखेस। कउनो भी मनई कउनो अइसी नई जाति क नाउँ कबहुँ नाहीं सुने होइ जउन एक ही दिन मँ सुरू होइ गई होइ। धरती क बच्चा जनई क दर्द जइसी पीरा निहचय ही पहिले सहइ क होइ। इ प्रसव पीरा क पाछे ही उ धरती आपन संतानन-एक नई जाति क जनम देइ। जब मई कउनो मेहरारू क बच्चा जनइ क पीरा देत हउँ तउ उ बच्चा क जनम दइ देत ह।”

तोहार पचन्क यहोवा कहत ह, “मई तू पचन्क बच्चा जनइ क पीरा मँ डाइके तोहार पचन्क गर्भद्वार बंद नाहीं कइ देत। मई तू पचन्क इहइ तरह एन विपत्तियन मँ बिना एक नई जाति प्रदान किए, नाहीं डाउब।”

10हे यरूसलेम, खुस रहा। हे लोगो, यरूसलेम क प्रेमियो, तू पचे निहचय ही खुस रहा। यरूसलेम क संग संग दुःख क बातन घटी रहिन एह बरे तू पचन्क स कछू लोग भी दुःखी अहइँ। किन्तु अब तू पचन्क चाही कि तू पचे बहोत बहोत खुस होइ जा।

11काहेकि अब तू पचन्क दाया अइसी मिली जइसे छाती स दूध मिला जाया करत ह। तू पचे यरूसलेम क वैभव क सच्चा आनंद पउब्या।

12यहोवा कहत ह, “लखा, मई तू पचन्क सान्ति देब। इ सान्ति तू पचन तलक अइसे पहोची जइसे कउनो महानदी बहत भी पहुँच जात ह। सब धरती क रास्टन क धन-दौलत बहत भइ तू पचन्तलक पहोच जाइ। इ धन-दौलत अइसे बहत भए आई जइसे कउनो बाढ़ क धारा। तू पचे नान्ह बच्चन स होब्या, तू पचे दूध पीब्या, तू पचन्क उठाइ लीन्ह जाइ अउर गोदी मँ थाम लीन्ह जाइ, तू पचन्क घुटनन पइ उछारा जाइ।

13मई तू पचन्क दुलारब जइसे महतारी आपन बच्चा क दुलारत ह। अउर तू पचे यरूसलेम क भीतर चैन पउब्या।

14तू पचे उ वस्तुअन क लखब्या जेनमाँ तू पचन्क रस आवत ह तू पचे अजाद होइके घास क तरह बढ़ब्या। यहोवा क सक्ती क ओकर लोग लखिही, किन्तु यहोवा क दुस्मन ओकर किरोध देखिही।”

15लखा, आगी क साथ यहोवा आवत अहइ। धूरि क बादलन क साथ यहोवा क फउजन आवति अहइँ। यहोवा आपन किरोध स ओन मनइयन क सजा देइ। यहोवा जब कोहाइ जाइ तउ ओन मनइयन क दण्ड देइ बरे आगी क लपटन क प्रयोग करी। 16यहोवा लोगन क निआत करी अउर फिन आगी अउर आपन तरवार स उ अपराधी लोगन क नस्ट कइ डाइ। यहोवा ओन बहोत स लोगन क नस्ट कइ देइ। उ आपन तरवार स ल्हास न क अम्बार लगा देइ।

17यहोवा क कहब अहइ, उ सबइ लोग जउन आपन बगीचन क पूजइ बरे स्नान कइके पवित्तर होत हीं अउर एक दूसर क पाछे परिक्रमा करत हीं,

“उ पचे जउन सुअर क गोस खात ही अउर मूस जइसे घिनौने जीव जन्तुअन क खात हीं, एन सबहिं लोगन क नास होइ।” यहोवा इ सबइ बातन कहे रहा।

18“बुरे बिचारन में पड़े भए उ सबइ लोग बुरे काम किया करत हीं। एह बरे ओनका सजा देइ क मई आवत हउं। मई सबहिं जातियन अउर सबहिं लोगन क बटोरब। परस्पर एकट्ठा भए सबहिं लोग मोर सक्ती लिखिहीं। 19कछू लोगन पइ मई एक चीन्हा लगाइ देब, मई ओनकर रच्छा करब। एन रच्छा कीन्ह लोगन में स कछू लोगन क मई तर्सीस लिब्या अउर लूदी क लोगन क पास पठउब। (एन देसन क लोग धनुर्धारी हुआ करत हीं।) तुबाल, यूनान अउर सबहिं दूर देसन में मई ओनका पठउब। दूर देसन क ओन लोग मोर उपदेस कबहुँ नाहीं सुनेन। ओन लोग मोरी महिमा क दर्सन भी नाहीं किहेन ह। तउ उ सबइ बचाए गए लोग ओन जातियन क मोरी महिमा क बारे में बतइहीं। 20उ पचे तोहार पचन्क सबहिं भाइयन अउर बहनन क सबहिं देसन स हिओँ लइ अइहीं। तोहार पचन्क भाइयन अउर बहनन क उ पचे मोर पवित्तर पर्वत पइ यरूसलेम में लइ अइहीं। तोहार पचन्क भाई बहिन हिओँ घोड़न, खच्चरन, ऊँटन, रथन अउर पालकियन में बइठिके अइहीं। तोहार पचन्क उ सबइ भाई बहिन उहइ प्रकार स उपहार

क रूप में लिआवा जइहीं जइसे इस्राएल क लोग सुद्ध थालन में रखिके यहोवा क मन्दिर में उपहार लिआवत हीं। 21एन लोगन में स कछू लोगन क याजकन अउर लेवियन क रूप में चुन लेब। इ सबइ बातन यहोवा बताए रहा।

### नवा अकास अउर नई धरती

22“मई एक नये संसार क रचना करब। इ सबइ नवे अकास अउर नई धरती सदा-सदा टिकी रहिहीं अउर उहइ प्रकार तोहार पचन्क नाउँ अउर तोहार पचन्क बंसजन भी सदा मोरे संग रहिहीं। 23हर सबित क दिन अउर महीने क पहिले दिन उ सबइ सबहिं लोग मोर उपासना बरे आवा करिहीं।” इ सबइ बातन यहोवा बताए रहा।

24“इ सबइ लोग मोर पवित्तर नगरी में होइहीं अउर कबहुँ उ पचे नगर स बाहेर जइहीं, तउ ओनका ओन लोगन क ल्हासन देखाई देइहीं जउन मोरे विरुद्ध पाप किहेन ह। ओन ल्हासन में किरवन पड़ा हुआ होइहीं अउर उ सबइ किरवन कबहुँ नाहीं मरिहीं। ओन देहन क आगी बारि डई अउर उ आगी कबहुँ खतम नाहीं होइ।”



# स्नेहगीत

1 सुलैमान क स्नेह गीत।

## सस्त्रेमिका क आपन प्रेमी क खातिर

2ओकरे ओठन क चुम्बनन स मोका ढौंपि लेइ द्या। ओसे उ कहेस, “तोहार पिरेम दाखरस स भी मीठा अहइ।

3तोहार इत्र क सुगन्ध मोहक अहइ, मुला तोहार नाउँ मोरे बरे मूल्यवान इत्र स भी जियादा मोहक अहइ! इहइ कारण अहइ कि कुँवरियन तोहसे पिरेम करत ही!

4हे मोर राजा, तू मोका आपन संग लइ ल्या। हाली चला! राजा मोका आपन कमरा में लइ आवा ह।

## मनसेधू क बरे यरूसलेम क मेहररूअन

हम तोहमाँ आनन्दित अउ मगन अही। हम मानत अही कि तोहार पिरेम दाखरस स उत्तम अहइ। अच्छा कारण क बरे कुँवरियन तोहसे पिरेम करत हीं।

## मेहरारू क बचन मेहररूअन बरे

5हे यरूसलेम क बिटियो, मई करिया हउँ, मुला मई सुन्नर हउँ। मई केदार क तम्बुअन जइसा अउ सलमोन\* क तम्बुअन क पर्दा जइसे करिया हउँ।

6किन्तु मोका करिया में सामिल जिन करा। इ सूज अहइ जउन मोका करिया कइ दिहस ह। मोर भइयन एकर कारण अहइ। उ मोका आपन अंगूरे क बगीचन क रखवारी करइ बरे मज़बू किहेन ह। एह बरे मई आपन क धियान नाहीं रखि सकेउँ।

## मेहरारू क बचन मनसेधू क बरे

7मई तोहका आपन पूरी आतिमा स पिरेम करत हउँ। मोर सच्चा पिरेमी, मोका बतावा कि तू आपन भेड़िन क कहाँ चरावत अहा? दुपहरिया में ओनका आरम करइ बरे कहाँ बइठावत अहा? मोका अइसी एक ठु लड़िकी क लगे काहे होइ चाही जउन घूँघट डारिके तोहरे मीतन क झुण्डन क रखवारी करत ह।

## मनसेधू क बचन मेहरारू बरे

8हे मेहररूअन सबन त सुन्नरी, अगर तू नाहीं जानत ह मई कहाँ होब, तउ भेड़ियन क पथ पाछा करा। तोहार बोकरियन क बचन क गइरियन क तम्बुअन क लगे चरा।

**सलमोन** इ केदार अउर सलमा क करिया उन क तम्बू क कईती इसारा करत ह। इ तरह क करिया तम्बूअन अब भी पूर्वी रेगिस्तान में देखा जात ह।

9हे मोर प्रिय मई तोहार तुलना उ घोड़ी स करत हउँ जउन घोड़िन फिरौन क रथ क हीँचइवाल घोड़न क आकर्सित करत ह।

10मई तोहार कल्पना चाँदी अउर रतन स सज़ा भवा घोड़ा स कइ सकत हउँ। तोहार गाल खूबसूरत आभूषण अउर कर्नफूल स भवा अहइ। तोहार गर्दन पइ माला बहोत सुन्नर लगत अहइ। 11जउन सोना अउर चाँदी क पतर लागत ह खास तोहरे बरे बना अहइ।

## मेहरारू क बचन

12जब राजा गद्दी पइ लेटत अहइ, मोरे इत्र क सुगन्ध ओह तलक पहेंचत ह।

13मोर प्रियतम रस गन्ध क कुप्पे जइसा अहइ। उ मोरे सीते क बीच सारी रात सोइ।

14मोर प्रिय मोरे बरे मेंहदी क फूलन क गुच्छन जइसा अहइ जउन एनगदी क अंगूरे क बगीचे में फलत ह।

## मनसेधू क बचन

15मोर प्रिये, तू रमणीय अहा। ओह, तू केतनी सुन्नर अहा। तोहार ओँखिन कबूतरन क जइसी सुन्नर अहइ।

## मेहरारू क बचन

16हे मोर प्रियतम, तू केतना सुन्नर अहा। हाँ, तू केतना मनमोहक अहा। हमार बिछाउन केतना ताज़ा अउर आनन्दित महक प्रदान करत हीं।

17हमार घरे क छत देवदारू क पउधन स बना अहइ। अउर देवारन सनोवर पउधन स बना अहइ।

2 मई सारोन क केसर क पाटल जइसा हउँ। मई घाटियन क कोका बेली हउँ।

## मनसेधू क बचन

2हे मोर प्रिये, दूसर जुवतियन तुलना में तू वइसी ही अहा माना काँटन क झारी क बीच लिली अहा।

## मेहरारू क बचन

3मोर प्रिय, दूसर नउजवानन क बीच तू अइसे लागत अहा जइसे जंगले क बृच्छन में कउनो सेब क पेड़।

## मेहरारू क बचन मेहररूअन बरे

मोका आपन प्रियतम क छाया में बइठब नीक लागत ह; ओकर फल मोका खाइ में बहोत मीठ लागत ह।

4मोर प्रिय मोका मधुसाला मैं लइ आवा अउर मोका आपन पिरेम क बारे मैं एक झण्डा क नाई लहराइके स्पस्ट किह्या।

5मई पिरेम क रोगी हउँ एह बरे किसमिस स मोका मज़बूत बनावा अउर मीठा सेबन स मोका ताजा करा।

6ओकरे बाँया हाथ मोर मुड़ि क पिआर स छुअत ही, अउर ओकर दाहिन हाथ सरीर क पिआर स छुअत ही।

7यरूसलेम क कुँवरियन कुरंगन अउ जंगली हिरनियन क साच्छी मानिके मोका बचन द्या, पिरेम क जिन जगावा अउ उसकावा जब तलक एकर इच्छा न होइ!"\*

8मई आपन प्रियतम क अवाज अनकत हउँ। इ पहाड़न स उछरत भइ अउर पहाड़ियन स कूदत भइ आवत ह।

9मोर प्रियतम कुरंग या जवान हरिन जइसा सुन्नर अहइ। लखा, उ हमरी देवारे क पीछे खड़ा अहइ, खिरकी स लखत अहइ, पर्दा क छेद स झाँकत अहइ।

10मोर प्रियतम मोसे बोलेत ह: हे मोर प्रिये, उठा, हे मोर सुन्नरी, आवा कहूँ चली।

11लखा, सीत-रितु बीत गइ अहइ। बर्खा खतम होइ गइ अउ चली गइ अहइ।

12धरती पइ फूल खिले भए अहइ। चिरइयन क गावइ क समइ आइ ग अहइ। धरती पइ कबूतरे क अवाज गूँजत अहइ।

13अंजीर क बृच्छन पइ अंजीर, पकइ लागेन हँ। अंगूरे क बेल फूलत अहइ अउर ओनकर भीती गन्ध फइलत अहइ। मोर प्रिय उठा, हे मोर सुन्नर, आवा कहूँ दूर चली।"

14हे मोर कबूतर, जउन ऊँच चट्टानन क सबइ गुफा मैं अउर पहाड़न मैं लुकान अहा, मोका आपन मुँह देखावा मोका आपन आवाज सुनावा काहेकि तोहार आवाज मीठ अउ तोहार मुँह सुन्नर अहइ।"

### मेहरारू क बचन मेहररूअन बरे

15जउन नान्ह लोखरियन दाख क बगियन क बिगाड़त ही हमरे बरे ओनका धरा। हमार अंगूर क बगियन अब फूलत अहइ।

16मोर प्रिय मोर अहइ अउर मई ओकर हउँ। मोर प्रिय आपन भेड़ी बोकरियन क कोकाबेलियन क बीच चरावत ह,

17हे प्रियतम, कुरंग स या जवान हरिन स रहा, जब तलक दिन नाहीं ढल जात ह अउर छाया लम्बी अउर खतम नाहीं होइ जात ह पहाड़न पइ चला।

### मेहरारू क बचन

3 हर राति आपन सेज पइ मई आपन मने मैं ओका हेरत हउँ। जउन मनसेधू मोर प्रिय अहइ, मई ओका हेरेउँ ह, मुला मई ओका नाहीं पाएउँ।

2अब मई उठब। मई सहर क चारिहुँ गलियन, बजारन मैं जाब। मई ओका हेरब जेका मई पिरेम करत हउँ। मई उ मनसेधू हेरेउँ उ मोका नाहीं मिला।

**पिरेम क ... होई** या कउनो क मोका जगावइ क अनुमति जिन द्या, या मोर पिरेम क उचित समइ तलक बाधा न होइ द्या।

3मोका सहर क पहरेदारी मिलेन। मई ओनसे पूछेउँ, "का तू उ मनसेधू क लख्या जेका मई पियार करत हउँ?"

4पहरेदारन स मई अबहिं तनिक दूर गएउँ कि मोका मोर प्रियतम मिलि गवा। मई ओका धइ लिहेउँ। मई ओका जाइ क अनुमति नाहीं दिहा अउर मई ओका आपन मताहरी क घरे लइ आवा, मई ओका उ कमरा मैं लइ आवा जहाँ पइ उ मोका जनम दिहे रहा।

### मेहरारू क बचन मेहररूअन बरे

5हे यरूसलेम क कुँवरियन, कुरंगन अउ जंगली हिरणियन क साच्छी मानिके मोका बचन द्या, पिरेम क जिन जगावा अउ उसकावा जब तलक एकर इच्छा न होइ।

### यरूसलेम क मेहररूअन बोलेस:

6इ मेहरारू कउन अहइ जउन धूल क बादर क संग रेगिस्तान स होत भए आवत ही, अउर गन्धरस अउर लोबान अउ उ सबइ तरह क खुसबू जउन व्यपारियन रखत ह स सुगन्धित अहइ?

7सुलैमान क पालकी क लखा। ओन जात्र क पालकी क साठ फउजी घेरे भए अहइ। इस्त्राएल क सक्तीसाली फउजी।

8उ पचे सबहिं फउजी तरवारन स सुन्नर ढंग स सज्जित अहइ। जउन जुद्ध मैं निपुण अहइ; हर मनई क बगल मैं तरवार लटकत अहइ, जउन राति क खउफनाक खतरन बरे तइयार अहइ।

9राजा सुलैमान लोगन स एक ठु पालकी लेबानोन क देवदारू काठे स बनावाए रहा।

10उ जात्रा क पालकी क बल्लन क चाँदी स बनाएस अउर ओकर टेक सोना स बनावा गवा। पालकी क गद्दी क उ बैगनी ओढ़ना स ढाँपि दिहस अउर इ यरूसलेम क बितियन क जरिये पिरेम स बुना गवा रहा।

11सिय्योन क बिटियो, बाहेर आइके राजा सुलैमान क ओकरे मुकुट क साथ लखा जउन ओका ओकर महतारी उ दिन पहिराए रही जब उ बियाहा गवा रहा, उ दिन उ बहोत खुस रहा।

### मनसेधू क बचन मेहरारू बरे

4 मोर प्रिये, तू बहोत सुन्नर अहा। घूँघट क ओट मैं तोहार आँखिन कबूतरे क आँखिन जइसी सरल अहइ। तोहार केस लम्बा अउ लहरात भवा अहइ जइसे बोकरी क बच्चन गिलाद क पहाड़ क ऊपर स नाचत उतरत हौंइ।

2तोहार दाँत एक भेड़न क झुण्ड जइसे अहइ जउन धोइके निकर आई; हरेक भेड़ जुड़ैवा बच्चन रखत हीं; ओकर बच्चन मैं स कउनो भी गाएब नाहीं होत ही।

3तोहार ओठ लाल धागा जइसा अहइ। तोहार मुँह सुन्नर अहइ। तोहार गाल घूँघट क खाले अनार क दुइ फाँकन क जइसी अहइ।

4तोहार गटइ पातर अउर ऊँच अहइ जइसा दाऊद क मीनार जउन कि हज़ारन सुनहरी ढालन क संग पाथरन क कतारन क ऊपर बना अहइ। हर ढाल जोद्धन क अहइ।

5तोहार दुई चूचियन जुड़वा दुई बाल हरिण जइसे अहईं, जइसे जुड़वा कुरंग लिलियन क बीच चरत होइ।

6मईं गन्धरस क पहाड पड़ जाब। मईं पहाड़ी पड़ तब तलक जाब जब तलक सुबह की सुहावनी हवा न बहइ अउर अंधेरापन फीका न होइ जाइ।

7मोर प्रिये, तू केतना अद्भुत अहा। कउनो दोख तोहार सुन्नरता क नाही लिहेस ह।

8ओ मोर दुलहिन, लबानोन स आवा, लबानोन स मोर संग आइ जा, मोरे साथ आइ जा, अमाना क चोटी स, सनीर क ऊँचाई स सेर क गुफन स अउर चीतन क पहाडन स आवा।

9हे मोर बहिन,\* हे मोर दुलहिन, तू मोका उतेजित करति अहा। तू मोर हिरदइ क आपन आँखिन क सिरिफ एक नज़र स अउर आपन माला क बस एक ही रतन स, कब्जा कइ लिहा ह।

10मोर बहिन, हे मोर दुलहिन, तोहार पिरेम केतना आनन्दप्रद अहइ! तोहार पिरेम दाखरस स जियादा उत्तिम बाटइ, तोहार इत्र क सुगन्ध कउनो भी सुगन्धि स उत्तिम अहइ।

11तोहारे ओठन स मधु टपकत ह। तोहरी जीभ क खाले में सहद अउ दूध अहइ। तोहारे ओढ़नन क गंध लबानोन क देवदारू जइसी अहइ।

12मोर बहिन, हे मोर दुलहिन, तू ताला लगा भवा बाग जइसी अहइ। तू रोका भवा तालाब क जइसा अउर बंद कीन्ह गवा फव्वारा जइसा अहइ।

13तोहार अंग उ उपवन जइसे अहईं जउन अनार अउर मोहक फलन स भरा होइ, जेहमाँ मेंहदी अउर जटामासी क फूल भरा होइ;

14जेहमाँ जटामासी, केसर, मुस्क अउ दालचीनी अउर हर तरह क मसाला, गन्धरस, अगर अउ सबइ उत्तिम मसाला भरा होईं।

15तू एक फव्वारे क बाग क नाई, एक ताज़ा पानी क कुवाँ क नाई, अउर एक झरना होई जउन लबानोन पहाड़ी स खाले बहत ह।

16जागा, हे उत्तर क हवा। आवा, तू दक्खिन पवन। मोरे उपवन पड़ बहा। जेहसे एकर मीठ, गन्ध चारिहुँ ओर फइल जाइ। मोर प्रिय मोरे उपवन में प्रवेश करइ अउर उ एकर मीठ फल खाइ।

### मनसेधु क बचन

5 मोर बहिन, हे मोर दुलहिन, मईं आपन बाग में प्रवेश कइ लिहउँ ह। मईं आपन गन्धरस क सुगन्धित मसाला बटोरेउँ ह। मईं आपन सहद क छता क सहद समेत खाइ चुकेउँ ह; मईं आपन दाखरस अउ दुध पी चुकेउँ ह।

### मेहररुअन क बचन प्रेमियन बरे

हे मीतो, खा, हे प्रेमियो, पिआ। पिरेम स मस्त होइ जा।

**बहिन** प्राचीन समाज में पत्नियन ब्याह क बन्धन क मज़बूत करइ बरे पत्नियन क “बहिन” क रूप में स्वीकार करत रहेन।

### मेहरारू क बचन

2मईं सोवत हउँ किन्तु मोर दिमाग सपना में जागत रहा। मईं एक ध्वनि सुनेउँ! मोर प्रियतम दुआरे पड़ दस्तक देत रहा!

### प्रमी आपन प्रेमी क संग सपना में:

“मोरे बरे खोला, मोर बहिन, मोर प्रिये, मोर फाखता, मोर निर्मल! मोरे सिरे ओस स गीला होइ गवा ह, मोर केस राति क नमी स भीगा अहईं।”

### मेहरारू जबवा देत ही:

3मईं आपन ओढ़ना उतार दिहेउँ ह। मईं एक फुन स पहिरइ चाहत हउँ। मईं आपन पाँच पखार चुकी हउँ, फुन स मईं एका मइला नाही करइ चाहत हउँ।

4मोर प्रियतम किवाड़ा क चाबी क छेद स हाथ डाएस, अउर ओकरे बरे मोर प्रेम उमड़ पड़ेस। 5मईं आपन प्रियतम बरे दुआर खोलइ बरे उठिउँ। मोरे हाथन स गन्धरस टपकत ह। गन्धरस मोर अँगुरियन स ताल क हत्थे पड़ टपकत ह।

6आपन प्रियतम बरे मईं दुआर खोल दिहेउँ, मुला मोर प्रियतम तब तलक जाइ चुका रहा। जब उ चला गवा तउ जइसे मोर प्राण निकरि गवा। मईं ओका हेरत फिरेउँ मुला मईं ओका नाही पाएउँ, मईं ओका गोहरावत फिरेउँ किन्तु उ मोका जवाब नाही दिहस।

7नगर क पहरेदारन मोका पाएन। उ पचे मोका मारेन अउर मोका घायल किहेन। नगर क परकोटे क पहरेदारन मोहसे मोर चोगा लइ लिहन।

8हे यरूसलेम क मेहररुअन, मईं तू पचक आदेस देत हउँ। अगर तू पचे मोर प्रियतम क पाइ जा तउ तू ओका का बताइ? बताइ द्या कि मईं ओकरे पिरेम क रोगी हउँ।

### यरूसलेम क बिटियन क ओकर जवाब

9हमका कहा कि तोहार प्रियतम अउरन स कइसे उत्तिम अहइ। हे सबन त सुन्नर मेहररुअन, तोहार प्रिय अउरन स उत्तिम काहे अहइ? तू हम पचन स इ बचन काहे करइ क कहेस?

### यरूसलेम क बिटियन क ओकर जवाब

10मारे प्रियतम तेजस्वी अउ मज़बूत अहइ। उ दसियउँ हजार मनसेधुअन में एक अहइ।

11ओकर माथा निखालिस सोना जइसा अहइ। ओकर घुँघराला केस खजूर क गुच्छन क जइसा अहइ अउ कउनन जइसा करिया अहईं।

12ओकरी आँखिन जलधारा क किनारे बइठा फ़ाखतन नाई अहइ। ओकर आँखिन दूधे क तालाब में नहाए फ़ाखतन क जइसी अहईं अउर अइसी अहईं जइसे सही तरीका स रतन जड़ होईं।

13ओकरे गाल बाग क नाई अहइ जउन गुल महेन्दी क पउथा क खुसबू स भार अहइ। ओकर ओठ लिलियन जइसेन अहईं जेनसे गंधरस टपकत ह।

14ओकर बाँहन सोना क छड़न जइसी अहई जेनमाँ हरितमणि जड़ा होई। ओकर देह नक्कासी कीन्ह भवा हाथी दाँत अहइ जेहमाँ नीलमनियन जड़ा होई।

15ओकर जाँघन संगमरमर क खम्मन जइसी अहई जेनका उत्तिम सुवर्ण पड़ बड़ठावा गवा होइ। ओकर ऊँचा कद लबनोन क देवदार जइसा अहइ जउन देवदार बृच्छन में उत्तिम अहइ।

16ओकर मुँह बहोत मीठा अहइ; ओकर हर चीज चाहनेयोग्य अहइ। हे यरूसलेम क मेहररुअन, उ मोर प्रियतम अहइ! उ मोर प्रेमी अहइ!

### यरूसलेम क बिटियन क ओहसे कहब

6 मेहररुअन में सबसे सुन्दर मेहरारू, बतावा तोहार प्रियतम कहाँ चला गवा? कउने राह स तोहार प्रियतम चला गवा ह? हमका बतावा ताकि हम तोहरे साथ ओका हेरि सकी।

### यरूसलेम क बिटियन क ओकर जवाब

2मोर प्रिय आपन बंगिया में चला गवा, मसालन क खेत में आपन भेड़ी चरावइ बरे अउर लिलियन क बटोरइ बरे।

3मई आपन प्रियतम स हउँ अउर उ मोर प्रियतम मोसे अहइ। उ लिलियन क बीच भेड़ चरावा करत ह।

### मनसेधू क बचन मेहरारू बरे

4मोर प्रियतम, तू तिरसा क नाई सुन्नर अहा। तू यरूसलेम में एक अद्भुत क नाई अहा। तू ऐतना अजूबा अहा जइसे कउनो फउज झण्डा क संग चलत ह।

5तू मोह पड़ स आपन आँखिन हटाइ ल्या, उ मोका उत्तेजित करत अहई। तोहार केस ऐतना लम्बा अउ लहरत अहई जइसे गिलाद क पहाड़ी क ढलान स बोकरियन क झुण्ड उछरत भवा उतरत आवत होइ।

6तोहार दाँत एक भेड़न झुण्ड जइसे अहई जउन धोइके निकर आई; हरेक भेड़ जुड़ौवा बच्चन रखत हीं; ओन में स कउनो एक ठू भी गाएब नाही होत ही।

7चूँघट क नीचे तोहार गाल अनार क दुइ ठू फाँकन क तरह अहई।

8होइ सकत ह हुआँ साठ रानियन, अस्सी रखैलन अउर अनगिनत जवान कुँवरियन होईं,

9किन्तु हुवाँ ओकरे जइसा कउनो नाही अहइ! उ आपन महतारी क एक खास बिटिया अहइ, उ ओनमाँ बहोत प्रिय अहइ जउन ओका जनम दिहेस ह। कुँवरियन ओका लखेन अउ ओका सराहेन। हाँ, रानियन अउ सबइ रखैलन भी ओकर तारीफ किहे रहिन।

### मेहररुअन क जरिये ओकर तारीफ

10उ पचे कहेस: “उ कउन अहइ जउन बढ़त भवा उसा क समान अहइ? उ कउन अहइ जउन चाँद क नाई सुन्नर अहइ? उ कउन अहइ जउन सूर्य क नाई चमकत अहइ? उ कउन अहइ जउन फउज जइसा अजूबा अहइ जउन झण्डा लड़ जात अहइ?”

### मेहरारू क बचन

11मई अखरोट क बगीचा स होत भवा इ देखइ बरे गवा कि का अंगूर क बेलन खिला अहइ अउर का अनार क कलियन खिली अहई या नाही।

12मोर राजकुमार, मई खुसी स भरि गवा जब तू मोका गन्धरस दिहे रहा।\*

### यरूसलेम क बिटियन ओकरे बरे बोलत ह

13हे “परिपूर्ण” मोर तरफ लउटि आवा! मोर तरफ आवा, मोर तरफ आवा, ताकि हम तोहका लखि सकी! काहे अइसे सुलेम्मिन क घूरति अहा जइसे उ महनैम क नाच क नर्तकी होइ?

### मनसेधू क जरिये सुन्दरता क वर्णन

7 हे सज्जन अउरत, तोहार गोड़ पनहियन में केतैना सुन्नर अहई! तोहार जाँघन क गोलाइ कउनो कलाकार क बना गवा गहना क नाई अहई

2तोहार नाभी क नीचे क भाग गोल कटोरा क समान अहई। होइ सकत ह एहमाँ कभी मिस्त्रित दाखरस कमी नाही होत। तोहार पेट गोहूँ क ढेरी क समान अहइ जेकर चउहददी लिलियन क अहई।

3तोहार चूचियन दुई जवान हिरण क जइसा अहइ, कुरंगी क जुड़वा।

4तोहार गटइ हाथी दाँत क मीनार क समान अहई। तोहार आँखिन हेसबोन क उ सबइ कुण्ड क समान अहइ जउन बेत-रब्बीम क फाटक क लगे अहइ। तोहार नाक लबानोन क मीनार क जइसा लम्बी अहइ जउन दमिस्क कइँती मुहँ किहे अहइ।

5तोहार मूँड कर्मेल क पहाड़ क जइसा अहइ। तोहार मूँडे क बार राजा क देवारन पड़ लहरत भवा लम्बा वस्त्र क नाई अहइ।

6तू केतनी सुन्नर अउ मनमोहक अहा ओ मोर प्रिय! तू मोका केतैना आनन्द देति अहा।

7तू खजूरे क बृच्छ जइसी लम्बी अहा। तोहार चूचियन अइसे अहई जइसे खजूर क गुच्छन।

8मई खजूर क बृच्छ पड़ चढ़ब, मई एकर डारन क धरब, तू आपन चूचियन क अंगूरे क गुच्छन स बनने द्या। तोहार साँस क गंध सेब क जइसा होइ द्या।

9तोहार मुँहना उत्तिम दाखरस जइसा होइ द्या, जउन धीरे स मोर प्रियतम में बहत होइ, जउन ओठन तलक बहत होइ जब हम साथ सोवत ह।

10मई आपन प्रियतम क अहउँ अउर उ मोका चाहत ह।

11आवा, मोर प्रियतम, आवा! हम खेतन में निकरी चली, हम गाँवन में राति बिताइ।

12हम बहोत हाली उठी अउर अंगूरे क बागन में निकरी जाइ। आवा, हम हुआँ लखी का अंगूरे क बेलन पड़ कलियन खिलति अहई। आवा, हम लखी का बहारन खिल

पद 12 या “मई आपन क बारे में नाही जानतउँ जब तू मोका सज्जन मनुस्य क रथन दिहस।

गइ अहई अउर का अनार क कलियन चटकति अहई। हुवई पइ मई आपन पिरेम तोहका अर्पण करबउँ।

13देवफलन\* क सुगन्ध फइल चुका अहइ। अउर सबहिँ प्रकार क कीमती फलन हमरे दुआरन क ऊपर\* जमा अहई। तोहार बरे नवा अउ पुराना दुइनउँ प्रकार क चीज बचाइ रखेउँ ह, हे मोर प्रिय।

8 कास, तू मोर सिसु भाइ होत्या, मोर महतारी क छाती क दूध पिअत भए। अगर मई तोहसे हुवई बाहेर मिल जाइत तउ तोहार चुम्बन मई लइ लेतेउँ, अउर कउनो मनई मोर निन्दा नाहीं कइ पावत।

2तोहका मई आपन महतारी क घरे मँ लइ अवतेउँ जहाँ तू मोका सिच्छा देइ सकतेउँ। मई तोहका पिअइ बरे, आपन मिश्रित अनारे स निकरा भवा दाखरस देतेउँ।

### मेहरारू क बचन मेहररूअन बरे

3ओकर बाँया हाथ मोरे मूँडे क छुअत ह, अउर ओकर दाहिन हाथ मोरे सरिर क छुअत ह।

4मई तोहका चेताउनी देत हउँ हे यरूसलेम क कुँवरियन: पिरेम क जिन जगावा अउ उसकावा जब तलक एकर इच्छा न होइ।

### यरूसलेम क बितियन क बचन

5इ कउन अहइ जउन आपन प्रियतम स लपटा भवा, रेगिस्तान स चली आवत ह?

### मेहरारू क बचन मनसेधू बरे

मई तोहका सेब क बृच्छ क खाले जगाए रहेउँ; हुवाँ तोहार महतारी तोहका गरभ मँ धरेस; हुवाँ तोहार मताहरी तोहार बरे प्रसव-पीड़ा सहेस अउर तोहार जनम भवा।

6मोका तू आपन हिरदय मँ महर क नाई धरा। ताबजि क समान मोका आपन बाँहि बांध ल्या। काहेकि पिरेम मउत क जइसा मजबत अहइ। भावना कब्र क नाई तेज होत ह। एकर चिंगारी आग क लपटन क नाई होत ह। एकर धधक धधकत भइ लपटन स होइ जात ह।

7बाढ़ पिरेम क नाहीं बूझाइ सकत। नदियन एका नीचा नाहीं कइ सकत। अगर कउनो मनई पिरेम आपन सारा धन देकर खरीदइ चाही, तउ पर भी ओकर धन बेकार ही समुझा जाब।

### ओकरे भाइयन क बचन

8हमार एक छोटकी बहिन अहइ, जेकर चूची अबहिँ फूटी नाहीं। हमका का करइ चाही जउने दिन ओकर सगाई होइ?

9अगर उ देवार अहइ तउ मई ओह पइ चाँदी क मीनार बनाइ देब। अगर उ दुअर अहइ तउ मई ओकरे पइ देवदारू क मुल्यवान पल्ला लगाइ देब।

### ओकर आपन भाइयन क जवाब

10मई परकोट हउँ अउर मोर चूची गुम्बद जइसे अहई। तउ मई ओकरे बरे सान्ति क दाता हउँ।

मनसेधू क बचन

11बाल्हामोन मँ सुलैमान क अंगूरे क बगिया रही। उ आपन बाग क रखवारी बरे दइ दिहस। हर रखवारा ओकरे फलन क बदले मँ चाँदी क एक हजार सेकेल लिआवत रहा।

12मुला सुलैमान, मोर आपन अंगूर क बाग मोरे बरे अहइ। हे सुलैमान, मोरी चाँदी क एक हजार सेकेल सब तू ही रख ल्या, अउर इ सबइ दुइ सौ सेकेल ओन लोगन बरे अहई। जउन खेतन मँ फलन क रखवारी करत हीं।

### मनसेधू क बचन मेहरारू बरे

13तू जउन बागे मँ रहति अहा, मोरे मित्र तोहार आवाज़ धियानपूर्वक सुनत अहई; मोका भी सुनइ दया!

### मेहरारू क बचन मनसेधू बरे

14मोर प्रियतम, हाली आवा! महकत द्रव्यन क पहाड़े पइ चिकारे या जवान हरिन जइसा बनि जा!

**देवफलन** हिब्रू सब्द क अरथ अहइ "पिरेम बृच्छ।" एकर जर क सकल मनई क नाई अहइ। लोगन क मानत रहिन कि इ बृच्छ मेहररूअन क गरभवती बनावइ मँ मदद करत ही।

**दुआरन क ऊपर** प्राचीन काल बगल पूर्व क भुइँया मँ फलन क अलमारियन मँ या दुआर क ऊपर रखत रहेन। उ ओका हुवाँ तब तलक रखत रहेन जब तलक उ सूखा, बहोत मीठा अउर मजेदार न होइ जाई।

# सभोपदेसक

1 इ सबइ दाऊद क पूत अउर यरूसलेम क राजा, उपदेसक क सब्द अहई।

2उपदेसक क कहब अहइ कि हर चीज बेमतलब क अहइ अउर अकारथ अहइ। मतलब इ कि हर बात बियर्थ अहइ। 3इ जिन्नगी में लोग जउन कड़ी मेहनत करत हीं, ओहसे ओनका फुरइ का कउनो लाभ होत ह? नाहीं।

## वस्तुअन अपरिवर्तन सील अहई

4एक पीढ़ी आवत ह अउर दूसर चली जात ह मुला संसार हमेसा अइसहिन बना रहत ह। 5सूरज उगत ह अउर फुन ढल जात ह अउर फुन सूरज हाली ही उहइ ठहर स उदय होइके जल्दी करत ह।

6हवा दक्खिन दिसा कईती बहत ह अउर हवा उत्तर कईती बहइ लागत ह। हवा एक चक्र में घूमत रहत ह अउर फुन हवा जहाँ स चली रही वापस हुवई बहइ लागत ह।

7सबहिं नदियन एक हीं जगह कईती बार बार बहा करत ही। उ सबइ समुदर स आइके मिलत हीं, किन्तु फुन भी समुदर कबहुँ नाहीं भरत।

8सबइ सब्दन कस्ट दायक अहइ; लोग ओहका पूरा-पूरा वर्णन नाहीं कइ सकतेन। हमेसा बोलत ही रहत हीं। सब्द हमरे काने में बार बार पड़त हीं मुला ओनसे हमार कान कबहुँ भी भरतेन नाहीं ह। हमार आँखिन भी, जउन कछू उ सबइ लखत हीं, ओहसे कबहुँ नाहीं अघातिन।

## कछू भी नवा नाहीं बाटइ

9सुरू स वस्तुअन जइसी रहिन वइसी ही बनी भई अहई। सब कछू वइसे ही होत रही, जइसे सदा स होत आवत अहइ। इ संसार में कछू भी नवा नाहीं अहइ।

10कउनो मनई कहि सकत ह, “लखा, इ बात नई अहइ।” मुला उ बात तउ हमेसा स होत रही। उ तउ हमसे भी पहिले स होत रही।

11उ सबइ बातन जउन पहिले घट चुकी अहई, ओनका लोग याद नाहीं करतेन अउर आगे भी लोग ओन बातन क याद नाहीं करिहीं जउन अब घटत अहई ओकरे बाद भी दूसर लोग ओन बातन क याद नाहीं रखिहीं जेनका ओनके पहिले क लोगन किहे रहेन। 12मई उपदेसक, यरूसलेम में इस्राएल क राजा भवा। 13निहचय किहेउँ कि इ जिन्नगी में जउन कछू होत ह ओका बुद्धि क जरिए ढूँढेँ अउर जाँच पड़ताल करेउँ। इ एक दुःखद तरीका परमेस्सर मानव जाति क दिहेस ह ताकि उ नम्र होइ सकीं। 14इ पृथ्वी पइ सबहिं वस्तुअन पइ मई निगाह डाएँ अउर लखेँ कि इ सब

कछू बियर्थ अहइ। इ वइसा ही अहइ जइसे हवा क धरब। 15तू ओन बातन क बदल नाहीं सकत्या। जदि कउनो बात टेढ़ अहइ तउ तू ओका सोझ नाहीं कइ सकत्या अउर अगर कउनो वस्तु क लेइ चाहत तउ तू ओका नाहीं गिन सकत।

16मई अपने आप स कहेउँ, “मई बहोत बुद्धिमान अहई। मोहसे पहिले यरूसलेम में जउन राजा लोग राज्ज किहेन ह, मई ओन सब स जियादा बुद्धिमान अहई। मई जानत हई कि असल में बुद्धि अउ गियान का अहइ।”

17मई इ जानइ क निहचय किहेउँ कि मूर्खता स भरे चिन्तन स विवेक अउर गियान कउने तरह स स्नेष्ठ बाटइ। मुला मोका मालूम भवा कि विवेकी बनइ क प्रयास वइसा ही अहइ जइसे हवा क धरइ क जतन।

18काहेकि जियादा गियान क संग हतासा भी उपजत ह। उ मनई जउन जियादा गियान पाइ जात ह उ जियादा दुःख भी पाइ जात ह।

## का “मनोविनोद” स सच्चा आनंद मिलत ह?

2 मई अपने मने में कहेउँ, “मोका मनोविनोद करइ चाही। मोका हर वस्तु क जेतना रस मई लइ सकउँ।” ओतना लेइ चाहीं।” मुला मई जानेउँ कि इ भी बियर्थ अहइ। 2हर समइ हँसत रहब भी मूर्खता अहइ। आनन्द स का प्राप्त होत ह?

3तउ मई निहचय किहेउँ कि मई आपन देह क दाखरस स भरि लेउँ जदपि मोर दिमाग मोका अबहिं गियान क राह देखावत रहा। मई इ मूर्खता स भरा आचरण किहेउँ, मई चाहत रहेउँ कि लोगन क बरे आपन जिन्नगी क थोड़ा स दिनन में का करब उतिम अहइ, एका हेर लेउँ।

## का कड़ी मेहनत स फुरइ आनन्द मिलत ह?

4फुन, मई बड़ेके बड़ेके काम करब सुरू किहेउँ। मई अपने बरे घर बनवाए। अउर अंगूरे क बाग लगावाएउँ। 5मइ बगियन लगावाएउँ अउर बाग बनवाएउँ। मई सबहिं तरह क फलन क बृच्छ लगावाएउँ। 6मई आपन बरे पानी क तालाब बनवाएउँ अउर फुन एन तालाबन क पानी क मई आपन बाढ़त बृच्छन क सींचइ क काम में लिआवइ लागेउँ।

7मई दास अउर दासियन खरीदेउँ अउर फुन मोरे घरे में पइदा भए दास भी रहेन। मई बड़की बड़की वस्तुअन क सुआमी बन गएउँ। मोरे लगे झुंड क झुंड पसु अउर भेड़न क ढेर रहेन। यरूसलेम में कउनो भी मनई क लगे जेतनी वस्तुअन रहिन, मोरे लगे ओसे भी जियादा रहिन।

8मई आपन बरे चाँदी सोना भी जमा किहेउँ। मई राजा लोगन अउर ओनके देसन स भी खजानन क बटोरैउँ। मोरे लगे बहोत सी रंडियन रहिन।

9मई बहोत धनवान अउर प्रसिद्ध होइ गएउँ। मोहसे पहिले यरूसलेम में जउन भी कउनो रहत रहा, मई ओहसे जिआदा महान रहा तउ मोर बुद्धि मोर संग रही। 10मई हर उ चीज जेका मई चाहत रहा प्राप्त किहेउँ। मई जउन कछू करत, मोर मन सदा ओसे खुस रहा करत अउर इ खुसी मोरे कठिन मेहनत क प्रतिफल रही।

11मुला मई जउन कछू किहे रहेउँ जब ओह पइ निगाह डालेउँ अउर आपन कीन्ह गवा कठिन मेहनत क बारे में विचार किहेउँ तउ मोका लाग इ सब अर्थहीन अहइ। इ अइसा ही रहा जइसे हवा क धरब। सच-मुच में इ जिन्गी में हम लोगन क सारे काम बरे संतोसजनक लाभ नाहीं अहइ।

### होइ सकत ह एकर जवाब बुद्धि होइ

12जेतना एक राजा कइ सकत ह, ओहसे जियादा कउनो भी मनई नाहीं कइ सकत। तू जउन भी कछू करइ चाह सकत ह, उ सब कछू कउनो राजा अब तलक कइ भी चुका होइ। मोरी समझ में आइ गवा कि एक राजा तलक जउन कामन क करत ह, उ सबइ सब भी बेकार अहई। तउ मई फुन बुद्धिमान बनइ, बेवकूफ बनइ अउर सनकीपन क कामन क करइ क बारे में साचेब सुरू किहेउँ। 13मई लखेउँ कि बुद्धि मूर्खता स उहइ प्रकार उत्तिम अहइ जउने तरह अँधियारा स प्रकास उत्तिम होत ह। 14इ वइसे ही अहइ जइसे: एक बुद्धिमान मनई, उ कहाँ जात अहइ, ओका लखइ क आपन बुद्धि क प्रयोग, आपन आँखिन क तरह करत ह। किन्तु एक मूर्ख मनई उ मनई क समान अहइ जउन अँधियारा में चलत अहइ।

किन्तु मई इ लखेउँ कि मूर्ख अउर बुद्धिमान दुइनउँ क अंत एक ही तरह स होत ह। दुइनउँ ही आखिर में मउत क पावत हीं। 15अपने मने में मई सोचेउँ, “कउनो मूर्ख मनई क संग जउन घटत ह उ मोर संग भी घटी तउ ऐतना बुद्धिमान बनइ बरे एतना कठिन मेहनत मई काहे किहेउँ?” आपन खुद स मई कहेउँ, “बुद्धिमान बनब भी बेकार अहइ।” 16बुद्धिमान मनई अउर मूर्ख मनई दुइनउँ ही मरि जइहीं अउर लोग सदा बरे न तउ बुद्धिमान मनई का याद रखिहीं अउर नही कउनो मूर्ख मनई क। उ पचे जउन कछू किहे रहेन, लोग ओका जल्दी बिसराइ देइहीं। इ सही नाहीं अहइ कि बुद्धिमान मनई मूर्ख मनई क जइसा मरइ चाहीं।

### का फुरइ आनन्द जिन्गी में अहइ?

17एकरे कारण मोका जिन्गी स घिना हो गइ। इ विचार स मई बहोत दुःखी भएउँ कि इ जिन्गी में जउन कछू बाटइ सब बेकार अहइ। बिल्कुल वइसे ही जइसे हवा क धरइ क कोसिस करब।

18मई जउन कठिन मेहनत किहे रहेउँ, ओहसे घिना करब सुरू कइ दिहेउँ। मई लखेउँ कि उ सबइ लोग जउन मोरे

पाछे जिअत रइहीं ओन चिजियन क लइ लेइहीं जेनके बरे मई कठिन मेहनत किहे रहेउँ। मई आपन ओन चिजियन क आपन संग नाहीं लइ गाइ सकब। 19कउनो दूसर मनई इ संसार म जउन चिजियन बरे मई मन लगाइके कठिन मेहनत किहे रहेउँ पइ नियंत्रण होइ। मई तउ इ भी नाहीं जानत कि उ मनई बुद्धिमान होइ या मूर्ख। पर इ सब भी तउ अर्थहीन ही अहइ।

20एह बरे मई जउन भी कठिन परिस्त्रम किहे रहेउँ, उ सबइ क बारे में मई बहोत दुःखी भएउँ। 21एक मनई आपन बुद्धि, आपन गियान अउर आपन चतुराई क प्रयोग करत भए कठिन मेहनत कइ सकत ह। मुला उ मनई तउ मरि जाइ अउर जिन चिजियन बरे उ मनई कठिन मेहनत किहे रहा, उ सबइ कउनो दूसर मनई क गिल जइहीं। ओन मनइयन ओन चिजियन बरे कउनो काम तउ नाहीं किहे रहा, मुला ओनका सबहिं कछू हाल होइ जाइ। एहसे मोका बहोत दुःख होत ह। इ निआब स पूर्ण तउ नाहीं अहइ।

22आपन जिन्गी में सारी मेहनत अउर सघंस क पाछे आखिर एक मनई क असल में का मिलत ह? 23आपन सारी जिन्गी उ कठिन मेहनत करत रहा मुला पीरा अउर निरासा क अलावा ओकरे हाथे कछू भी नाहीं लगा। राति क समइ भी मनई क मन आराम नाहीं पावत। इ सब भी अर्थहीन अहइ।

24-25जिन्गी क जेतना आनन्द मई लिहेउँ ह का कउनो भी अइसा मनई अउर अहइ जउन मोका जियादा जिन्गी क आनन्द लेइ क जतन किहे होइ? नाहीं। मोका जउन गियान भवा ह उ इ अहइ: कउनो मनई जउन नीक स नीक कइ सकत ह उ अहइ खाब, पिअब अउर उ करम का आनन्द लेब जउन ओका करइ चाही। मई इ भी समझेउँ ह कि सब कछू परमेस्सर स मिलन ह।

26जउन मनई क उ चाहत ओका उ बुद्धि अउर ग्यान अउर आनन्द देही। मुला जेका उ कस्ट देइ चाही ओका दुःख देब, उ आस्चर्यजनक वस्तुअन क जमा करब, उ सिरफ ओहका देब जेका परमेस्सर चाहत अहा। उ भी अर्थहीन अहई। इ वइसा ही अहइ जइसे हवा क धरइ क जतन करब।

### एक तु समय बाटइ...

3 हर बात एक उचित समय होत ह। अउर इ धरती पइ हर बात एक उचित समय पइ ही घटित होइ।

2जन्म लेइ क एक उचित समय निहचित अहइ, अउर मउत क भी। एक समय होत ह पेड़न क रोपइ क, अउर ओनका काटइ क।

3मरइ क होत ह एक समय, अउर एक समय होत ह ओकरे उपचार का। एक समय होत ह जब ढहाइ दीन्ह जात, अउर एक समय होत ह करइ क निर्माण।

4एक समय होत ह रोवइ-विलपइ क, अउर एक समय होत ह करइ क अट्टहास। एक समय होत ह होइ क दुखे में मगन, अउर एक समय होत ह उल्लास भरे नाच क।

5एक समय होत ह जब पाथर फेंका जात हीं, अउर एक समय होत ह ओनके एकत्र करइ क। केहउँ क गले लागन

क एक समय होत ह। अउर गले लगावइ स रुकइ क भी एक समय होत ह।

6 एक समय होत ह खोज क, अउर एक समय होत ह रूकए क। एक समय होत ह वस्तुअन क धरइ क, अउर एक समय होत ह चिजियन क फेंकइ क।

7 होत ह एक समय ओढ़नन क फारइ क, फुन एक समय होत ह जब ओनका सिया जात ह। एक समय होत ह साधइ क चुप्पी, अउर होत ह एक समय फुन बोल उठइ क।

8 एक समय होत ह पिआर क, अउर एक समय होत जब घिना कीन्ह जात ह। एक समय होत ह करइ क लड़ाई, अउर होत ह एक समय सात्ति क।

### परमेस्सर अपने संसार क नियन्त्रण करत ह

9 का कउनो मनई क आपन कठिन मेहनत स असल मँ कछू मिल पावत ह? 10 मई उ कठिन मेहनत लखेउँ ह जेका परमेस्सर हमका करइ क बरे दिहेस ह। 11 अपने संसार क बारे मँ सोचइ बरे परमेस्सर हमका छमता प्रदान किहेस ह। मुला परमेस्सर जउन करत ह, ओन बातन क पूरी तरह हम कबहुँ नाहीं समुझ सकित। फुन भी परमेस्सर हर एक चीज ठीक समय पइ करत ह।

12 मइ लखेउँ ह कि लोगन बरे सबसे उत्तम बात इ अहइ कि उ पचे कोसिस करत रहई अउर जब तलक जिअत रहई आनन्द करत रहई। 13 अउर अगर एक मनई खाइ, पिअइ अउर इ सबइ करम क आनन्द लेत रहइ, तउ इ बातन परमेस्सर कइँती स मिला भवा उपहार अहइ।

14 मई जानत हउँ कि परमेस्सर जउन कछू भी घटित करत ह उ सदा घटी ही। लोग परमेस्सर क काम मँ कछू भी बृद्धि नाहीं कइ सकतेन अउर इहइ तरह लोग परमेस्सर क कामे मँ कछू घटत भी नाहीं कइ सकत हीं। परमेस्सर अइसा एह बरे किहेस कि लोग ओकर आदर करई। 15 जउन अब होत अहइ पहिले भी होइ चुका अहइ। जउन कछू भविस्स मँ होइ उ पहिले भी भवा रहा। परमेस्सर घटनन क बार बार घटित करत रहत ह।

16 इ जिन्नगी मँ मई इ सबइ बातन लखेउँ ह। मई लखेउँ ह कि कचहरी जहाँ निआव अउर अच्छाइ होइ चाही, हुवाँ आजु बुराई भरि गइ अहइ। 17 एह बरे मई आपन मन स कहेउँ, “हर बात बरे परमेस्सर एक समय निहचित किहे अहइ। मनइयन जउन कछू करत हीं ओकर निआव करइ बरे भी परमेस्सर एक समय निहचित किहे अहइ। परमेस्सर नीक लोगन अउ बुरे लोगन क निआव करी।”

### का मनई पसुअन जइसे अहई?

18 लोग एक दूसर बरे जउन कछू करत हीं ओनके बारे मँ मई सोचेउँ अउर आप स कहेउँ, “परमेस्सर चाहत ह कि लोग आपन खुद क उ रूपे मँ लखई जउने रूपे मँ उ पचे पसुअन क लखत हीं।” 19 का एक मनई एक पसु स उत्तम अहइ? नाहीं। काहे? काहेकि हर वस्तु नाकारा अहइ। मउत जइसे पसुअन क आवत ह उहइ तरह मनइयन क भी। मनई

अउर पसु एक ही “सॉस” लेत हीं। का एक मरा भवा पसु एक मरे भए मनई स भिन्न होत ह? 20 मनइयन अउर पसुअन क तने क अंत एक ही तरह स होत ह। उ सबइ माटी स पइदा होत हीं अउर माटी मँ ही समाइ जात हीं। 21 कउन जानत ह कि मनई क आतिमा क का होत ह? का कउनो जानत ह कि एक मनई क आतिमा परमेस्सर क लगे जात ह जबकि एक पसु क आतिमा खाले उतरिके धरती मँ जाइके समात ह।

22 तउ मई इ लखेउँ कि मनई जउन सब स नीक बात कइ सकत ह उ इ अहइ कि उ आपन करम मँ आनन्द लेत रहइ। बस ओकरे लगे इहइ अहइ कि। कउनो मनई क भविस्स क चिन्ता भी नाहीं करइ चाही। काहेकि भविस्स मँ का होइ ओका लखइ मँ कउनो भी ओकर मदद नाहीं कइ सकत।

### का मर जाब स्नेस्ट अहई?

4 मई फुन इ भी लखेउँ ह कि कछू लोगन क संग बुरा बेउहार कीन्ह जात ह। मई ओनकर आँसू लखेउँ ह अउर फुन इ भी लखेउँ ह कि ओन दुःखी लोगन क ढाढ़स बँधावइवाला भी कउनो नाहीं अहइ। मई लखेउँ ह कि कठोर लोगन क लगे समूची सकती अहइ अउर ओका ढाढ़स देइवाला कउनो नाहीं अहइ। 2 मई इ निर्णय पइ पहुँचा अहउँ कि इ सबइ बातन ओन मनइयन बरे जियादा नीक अहई जउन मरि चुके अहई बजाय ओनके बरे जउन अबहिँ तलक जिअत अहई। 3 ओन लोगन बरे तउ इ सबइ बातन अउर भी नीक अहई जउन जन्म लेत ही मरि जाई। काहे? काहेकि, उ पचे इ संसार मँ जउन बुराइयन होत अहई, ओनका लखेन ही नाहीं।

### ऐँनी कठिन मेहनत काहे?

4 फुन मई सोचेउँ, “लोग ऐँनी कड़ी मेहनत काहे करत हीं?” मई लखेउँ ह कि लोग सफल होइ अउर दूसर लोगन स अउर जियादा ऊँच होइ क कोसिस मँ लगा रहत हीं। अइसा एह बरे होत ह कि लोग ईर्स्यालु अहई। उ पचे नाहीं चाहतेन कि जेतना ओनके लगे अहइ, दूसर क लगे ओहसे जियादा होइ। इ सब अर्थहीन अहइ। इ वइसा ही अहइ जइसे हवा क धरब।

5 कछू लोग कहा करत हीं, “हाथे पइ हाथ धइके बइठ रहब अउर कछू नाहीं करब बेवकूफी अहइ। अगर तू काम नाहीं करब्या तउ भूखन मरि जाब्या।” 6 जउन कछू मूठी भइ तोहरे लगे अहइ ओहमँ संतुट्ट रहब नीक अहइ बजाय कि जियादा स जियादा पावइ क तलब मँ जूसत भए हवा क पाछे दौड़त जात रहब।

7 फुन मई एक अउर बात लखेउँ, जेकर कउनो अरथ नाहीं अहइ। 8 एक मनई बे परिवारे क होइ सकत ह। होइ सकत ह ओकर कउनो पूत अउर हिआँ तलक कि कउनो भाई भी न होइ किन्तु उ मनई कठिन स कठिन मेहनत करइ मँ लगा रहत ह अउर जउन कछू ओकरे पास होत ह, ओहसे कबहुँ संतुट्ट नाहीं होत, “तउ मई भी ऐँनी कड़ी मेहनत काहे करत हउँ? मई खुद आपन जिन्नगी क



आनन्द काहे नाहीं लेत हउँ?” अब लखा इ भी एक दुःखभरी अउर बियर्थ क बात अहइ।

### मीतन अउ परिवारे स सक्ती मिलत ह

9एक मनई स दुइ मनई भला होत हीं। जब दुइ मनई मिलिके साथ साथ काम करत हीं तउ जउने कामे क उ पचे करत हीं, उ काम स ओनका जियादा लाभ मिलत ह।

10यदि एक मनई गिरि जाइ तउ दूसर मनई ओकर मदद कइ सकत ह। मुला कउनो मनई बरे अकेल्ला रहब नीक नाहीं अहइ काहेकि जब उ गिरत ह तउ ओकर सहायता बरे हुवाँ अउर कउनो नाहीं होत।

11अगर दुइ मनई एक संग सोवत हीं तउ ओनमाँ गरमाहट रहत ह मुला अकेल्ला सोवत भवा मनई कबहुँ गरम नाहीं होइ सकत।

12अकेले मनई क दुस्मन हराइ सकत ह मुला उहइ दुस्मन दुइ मनइयन क नाहीं हराइ सकत ह अउर तीन मनइयन क सक्ति तउ अउर भी जियादा होत ह। उ पचे एक ठु अइसे रस्सा क नाई होत हीं, जेकर तीन लटन आपुस में गुंथी भई होत हीं, जेका तोड़ पाउब बहुत कठिन अहइ।

### लोग राजनीति अउर प्रसिद्धि

13एक ठु गरीब मुला बुद्धिमान नउजवान नेता, एक बुढ़वा मुला मूरख राजा स नीक अहइ। उ बुढ़वा राजा चिताउनियन पइ कान नाहीं देत। 14होइ सकत ह उ नउजवान सासक उ राज मँ गरीबी मँ पइदा भवा होइ अउर होइ सकत ह उ जेल स छूटिके देस पइ हुकूमत करइ आवा होइ। 15मुला इ जिन्गगी मँ मई लोगन क लखेउँ ह अउर मई इ जानत हउँ कि लोग उ दूसर नउजवान नेता क ही अनुसरण करत हीं अउर उहइ नवा राजा बन जात ह। 16बहोत स लोग इ नउजवान क पाछे होइ लेत हीं। मुला अगवा चलिके उ सबइ लोग भी ओका पसन्द नाहीं करतेन एह बरे उ सब भी बियर्थ अहई। इ वइसा ही अहइ जइसे कि हवा क धरइ क जतन करब।

### वाचा मानइ मँ सावधानी

5 जब परमेस्सर क उपासना बरे जा तउ बहोत जियादा होसियार रहा। अग्यानियन क नाई बलियन चढ़ावइ क अपेच्छा परमेस्सर क आग्या मानब जियादा उत्तिम अहइ। अज्ञानी लोग अक्सर बुरे करम किया करत हीं अउर ओका जानत तलक नाहीं हीं। 2परमेस्सर क वाचा मानत समय होसियार रहा। परमेस्सर स जउन कछू कहा ओन बातन बरे होसियार रहा। भावना क आवेस मँ, जल्दी मँ कछू जिन कहा। परमेस्सर सरग मँ अहइ, अउर तू धरती पइ अहा। एह बरे तोहका परमेस्सर स बहोत तनिक बोलइ क जरूरत अहइ। इ कहतूत फुरइ अहइ

3अति चिंता स बुरे सपना आवा करत हीं। अउर जियादा बोलइ स मूरखता उपजत ही।

4अगर तू परमेस्सर स कउनो वाचा माँगत ह तउ ओका पूरा करा। जउने बाते क तू वाचा मान्या ह ओका पूरा करइ

मँ देर जिन करा। परमेस्सर मूरख मनइयन स खुस नाहीं रहत। तू परमेस्सर क जउन कछू अर्पित करइ क बचन दिहा ह ओका अर्पित करा। 5इ नीक बा कि तू कउनो वाचा माना ही नाहीं बजाय एकरे कि कउनो मनौती माना अउर ओका पूरा न कइ पावा। 6एका नाहीं होइ देइ कि तोहार सब्द तोहार पापे क कारण बनी। याजक स अइसा जिन बोला कि, “जउन कछू मई कहे रहेउँ ओकर इ अरथ नाहीं बाटइ।” यदि तू अइसा करब्या तउ परमेस्सर तोहरे सब्दन स रिसियाइके जउन वस्तुअन बरे तू करम किहा ह, ओन सबन्क उ बर्बाद कइ देइ। 7आपन बेकार क सपनन अउर डींग मारइ स मुसीबतन मँ जिन पइ। तोहका परमेस्सर क सम्मान करइ चाही।

### हर एक अधिकारी क ऊपर एक अधिकारी अहइ

8कछू देसन मँ तू अइसे दीन-हीन लोगन क लखब्या जेनका कड़ी मेहनत करइ क मजबूर कीन्ह जात ह। तू लखि सकत ह कि निर्धन लोगन क संग इ बेउहार उचित नाहीं अहइ। इ गरीब लोगन क अधिकारन क खिलाफ अहइ। मुला अचरज जिन करा। जउन अधिकारी ओन मनइयन क कारज करइ बरे मजबूर करत ह, अउर उ पचे दुइनउँ अधिकारी कउनो दूसर अधिकारी क जरिये मजबूर कीन्ह जात हीं। 9एतना होइ पइ भी कउनो खेती क जोगग भुईया पइ एक राजा क होब देस बरे फायदेमंद अहइ।

### धने स खुसी नाहीं बेसही जाइ सकत

10उ मनई जउन धने स पिरेम करत ह उ उ धने स जउन ओकरे लगे अहइ कबहुँ संतुट्ट नाहीं होइ। उ मनई जउन धन स पिरेम करत ह, जब जियादा स जियादा धन पाइ जात ह तब भी ओकर मन नाहीं भरत। तउ उ भी बियर्थ अहइ।

11कउनो मनई क लगे जेतना जियादा धन होइ ओका खरच करइ बरे ओकरे लगे ओतना ही जियादा “मीत” होइहीं। तउ उ धनी मनई क असल मँ प्राप्त कछू नाहीं होत ह। उ आपन धन क बस लखत भर रहि सकत ह।

12एक ठु अइसा मनई जउन सारे दिन कड़ी मेहनत करत ह, आपन घर लउटइ पइ चइन क संग सोवत ह। इ महत्व नाहीं रखत ह कि ओकरे लगे खाइ क कमती अहइ या जियादा अहइ। एक धनी मनई आपन धने क चिंता म बूड़ रहत ह अउर सोइ तलक नाहीं पावत।

13बहोत बड़के दुःखे क बात अहइ कि एक ठु जेका मई इ जिन्गगी मँ घटत लखेउँ ह। लखा एक मनई भविस्स बरे आपन धन बचाइके रखत ह। 14अउर फुन कउनो बुरी बात घटि जात ह अउर ओकर सब कछू जात रहत ह अउर मनई क लगे आपन पूत क देइ बरे कछू भी नाहीं रहत।

### हम खाली हाथ आइत ह अउर खाली हाथ चला जाइत ह

15एक मनई संसार मँ अपनी महतारी क गरभ स आवत ह अउर जब उ मनई क मउत होत ह तउ उ बगैर कछू अपने संग लिए सब हिअँई छोड़िके चला जात ह। वस्तुअन

क पावइ बरे उ कठिन मेहनत करत ह। किन्तु जब उ मरत ह तउ आपन संग कछू नाहीं लइ जात पावत। 16इ बड़े दुःखे क बात अहइ। इ संसार ओका उहइ तरह तजइ क होत ह जउने तरह उ आवा रहा। एह बरे “हवा क धरइ क कोसिस” स कउनो मनई क हाथे क लगत ह? 17ओका अगर कछू मिलत ह तउ उ अहइ दुःख अउर सोक स भरे हुआ दिन। तउ आखिरकार उ हतास, रोगी अउ चिड़चिड़ा होइ जात ह।

### आपन जिन्नगी क कर्म क रस ल्या

18मई तउ इ लखेउँ ह कि मनई जउन कइ सकत ह ओहमाँ सब स उत्तिम इ अहइ - एक मनई क चाही कि उ खाइ-पिअइ अउर जउने कामे क उ इ धरती पइ आपन छोटी स जिन्नगी क दौरान करत ह ओकर आनन्द लेइ। परमेस्सर इ सबइ तनिक क दिन स दिहेस ह अउर बस इहइ तउ ओकरे लगे अहइ।

19अगर परमेस्सर कउनो क धन, सम्पत्ति अउर ओन वस्तुअन का आनन्द लेइ क सक्ती देत ह तउ उ मनई क ओनकर आनन्द लेइ चाही। उ मनई क जउन कछू ओकरे लगे अहइ ओका कबूल करइ चाही अउर आपन कामे क जउन परमेस्सर कईती स एक उपहार अहइ ओकर रस लेइ चाही। 20तउ अइसा मनई कबहुँ इ सोचत ही नाहीं कि जिन्नगी केतनी छोट स बाटइ। काहेकि परमेस्सर ओहका दिमाग क आनन्द स भरी ही राखी हीं।

### धने स खुसी नाहीं मिलत

6 मई जिन्नगी में एक अउर बुरी बात लखेउँ ह अउर इ बहोत समान्य अहइ। 2परमेस्सर कउनो मनई क बहोत स धन देत ह, सम्पत्तियन देत ह अउर आदर देत ह। उ मनई क लगे ओकर जरूरत की चीज होत ह अउर जउन कछू भी उ चाह सकत ह उ भी होत ह। किन्तु परमेस्सर उ मनई क ओन वस्तुअन क भोग नाहीं करइ देत। तबहिं कउनो अजनबी आवत ह अउर ओन सबहिं वस्तुअन क छोरि लेत ह। इ एक बहोत बुरी अउर बियर्थ बात अहइ।

3कउनो मनई बहोत दिनन तलक जिअत ह अउर होइ सकत ह ओकर सौ बच्चन होइ जाई। किन्तु अगर उ मनई ओन अच्छी वस्तुअन स सन्तुट्ट नाहीं होत अउर अगर ओकर मउत क बाद कउनो ओका सुमिरत नाहीं तउ मई कहत हउँ कि 4उ मनई स तउ उ बच्चा ही अच्छा अहइ जउन जन्मत ही मरि जात ह। उ बच्चा क कउनो नाउँ नाहीं दिन जात अउर फउरन ही ओका एक अँधेरी कब्र में दफनाइ दीन्ह जात ह।

5उ बच्चा तउ कबहुँ सूरज तउ लखेस ही नाहीं। उ बच्चा कबहुँ कछू नाहीं जानेस किन्तु उ मनई क भागग जउन परमेस्सर क दीन्ह गइ वस्तुअन क कबहुँ आनन्द नाहीं लिहेस, उ बच्चा क जियादा चइन मिलत ह। 6अगर कउनो मनई दुइ हजार बरिस जिअत ह किन्तु जिन्नगी क आनन्द नाहीं उठावत, तउ का दुइनउँ क अन्त एक समान नाहीं अहइ।

7एक मनई लगातार काहे काम करत रहत ह? काहेकि ओका आपन सबइ इच्छा पूरी करइ क अहई। मुला उ संतुट्ट तउ कबहुँ नाहीं होत। 8इ तरह स एक बुद्धिमान मनई भी एक मूरख मनई स कउनो तरह उत्तिम नाहीं अहइ। एक दीनहीन मनई क बेहतर व्यवहार करइ जान लेइ में ओकर का भलाइ अहइ। 9उ सबइ वस्तुअन जउन तोहरे पास अहई, ओनमाँ संतोस करब नीक अहइ बजाय एकरे कि अउर लगन लगी रहइ। सदा जियादा क कामना करत रहब बेकार अहइ। इ वइसे ही अहइ जइसे हवा क धरइ क जतन करब।

10जउन कछू घटत अहइ ओकर योजना बहोत पहिले बन चुकी होत ह। एक मनई वइसा ही होत ह जइसा होइ बरे ओका बनावा गवा अहइ। हर कउनो जानत ह कि लोग कइसे होत हीं। 11तउ इ बारे में परमेस्सर स तर्क करब बेकार अहइ जउन कि कउनो भी मनई स जियादा सक्तीसाली अहइ। बहोत सी अइसी बातन अहइ जेकर बरे हम कउनो अन्त क तर्क कइ सकत हीं, किन्तु इ कउनो लाभ नाहीं देत ह।

12कउन जानत ह कि इ धरती पइ मनई क छोटी स जिन्नगी में ओकरे बरे सबस अच्छा का अहइ? ओकर जिन्नगी तउ छाया क नाई ढलि जात ह। बाद में का होइ कउनो नाहीं बताइ सकता।

### सूचित संग्रह

7 सुजस, अच्छी सुगन्धि स उत्तिम अहइ। अउर उ दिन जब मनई मरी, इ दिन उ दिन स उत्तिम होइ जब उ पइदा होइ।

2उत्सव में जाइ स जाब, सदा उत्तिम हुआ करत ह। काहेकि सबहिं लोगन क मउत तउ निहचित अहइ। हर जिअत मनई क सोचइ चाही एका।

3हँसी क ठहाके स सोक उत्तिम अहइ। काहेकि जब हमारे मुखे पइ उदासी क वास होत ह, तउ हमार हिरदय सुदुध होत हीं।

4विवेकी मनई तउ सोचत ह मउत क किन्तु मूरख जन तउ बस सोचत रहत हीं कि गुजरइ समय नीक।

5विवेकी स निन्दित होब उत्तिम होत ह, बनिस्वत एकरे कि मूरख स तारीफ कीन्ह जाइ।

6मूरख क ठहाका तउ बेकार होत ह। इ वइसे ही होत ह जइसे बर्तन क नीचे काँटे दरदराई।

7अत्याचार विवेकी क भी मूरख बनाइ देत ह, अउर घूस में मिला धन ओकर मति क हर लेत ह।

8बात क सुरू करइ स अच्छा ओकर अन्त करब अहइ। नम्रता अउर धीरज, गुस्सा दिखावइ अउर अहंकार स उत्तिम अहइ।

9किरोध में हाली स जिन आवा। काहेकि किरोध में आउब मूर्खता अहइ।

10जिन कहा, “अच्छे दिनन क का भाएन, तब सबकछू ठीक-ठाक रहेन। इ सवाल बुद्धि स नाहीं आवत हीं।

11जइसे वसीयतनामा में सम्पत्ति क पाउब अच्छा अहइ वइसे ही बुद्धि क पाउब भी उत्तिम अहइ। जिन्गगी बरे इ लाभदायक अहइ। 12धने क समान बुद्धि भी रच्छा करत ह। बुद्धि क गियान मनई क जिन्गगी क रच्छा करत ही।

13परमेस्सर क रचना क लखा। जेका परमेस्सर टेढ़ा कइ देइहीं ओका तू सीधा कर सकल्या। 14जब जिन्गगी उत्तिम अहइ तउ ओकर रस ल्या मुला जब जिन्गगी कठिन अहइ तउ याद राखा कि परमेस्सर हमका कठिन समय देत अहइ अउर अच्छा समय भी देत अहइ इसलिए भियान का होइ इ तउ कउनो नहीं जानत।

### लोग फुरइ नीक नाहीं होइ सकतेन

15आपन छोटी स जिन्गगी में मई सब कछू लखेउँ ह। मई लखेउँ ह अच्छे लोग जवानी में ही मरि जात हीं। मई लखेउँ ह कि बुरे लोग लम्बी आयु तलक जिअत रहत हीं। 16-17तउ अपने क हलाकान काहे करत अहा? न तउ बहोत जियादा धर्मी बना अउर न ही बुद्धिमान इ तोहका नास करब। न तउ बहोत जियादा दुट्ट बना अउर न ही मूरख अन्यथा समय स पहिले तू मरि जाब्या।

18तनिक इ बना अउर तनिक उ। हिआँ तलक कि परमेस्सर क मनवइयन भी कछू अच्छा करिहीं तउ पाप भी। 19-20निहचय ही इ धरती पइ कउनो अइसा नीक मनई नाहीं अहइ जउन सदा अच्छा ही अच्छा करत ह अउर बुरा कबहुँ नाहीं करत। बुद्धि मनई क सकती देत ह। कउनो सहर क दस मूरख सासकन स एक साधारण बुद्धिमान मनई जियादा सक्तीसाली होत ह।

21लोग जउन बातन कहत रहत हीं ओन सब पइ कान जिन द्या। होइ सकत ह तू आपन सेवक क ही तोहरे बारे में बुरी बातन कहत सुना। 22अउर तू जानत अहा कि तू भी अनेक अवसरन पइ दूसर लोगन क बारे में बुरी बातन कहया ह।

23एन सब बातन क बारे में मई आपन बुद्धि अउर विचारन क प्रयोग किहा ह। मई फुरइ बुद्धिमान बनइ चाहेउँ ह मुला इ तउ असंभव रहा। 24मई समुझ नाहीं पावत कि बातन वइसी काहे अहई जइसी उ सबइ अहई। कउनो क बरे इ समुझब बड़ा मुस्किल अहइ। 25मई अध्ययन किहेउँ अउर सच्ची बुद्धि क पावइ बरे बहुत कठिन मेहनत किहेउँ। मई हर चीज क कउनो कारण हेरइ क प्रयास किहेउँ किन्तु मई जानेउँ का? मई जानेउँ कि बुरा होब बेवकूफी बाटइ मूरखपन पागलपन अहइ।

26मई इ भी पाएउँ कि कछू मेहररूअन एक फन्दा क नाई खतस्नाक होत हीं। ओनकर हिरदय जाल जइसे होत हीं अउर ओनकर बाहन जंजीसन क तरह होत हीं। जउन लोग परमेस्सर क खुस करत हीं, अइसी मेहररूअन स बच निकरत हीं मुला उ सबइ लोग जउन परमेस्सर क नाखुस करत हीं ओनके जरिये फाँस लीन्ह जात हीं।

27उपदेसक कहत ह, “इ सब कछू एकत्र कइके इहइ अहइ जउन मई पाएस। 28मोर पूरा खोज बिचार क पाछे इहइ मई पाएउँ। हजारन में एक ठु मनई रहा जेका एकर छूट रही, कउनो मेहरारू क नाहीं।

29“इहइ अहइ जउन मई पाएन, परमेस्सर लोगन क इमान्दार अउर सीधा बनावत ह, किन्तु लोग जल्द ही आपन राह पावइ बरे योजना बनावत ह।”

### बुद्धि अउर सकती

8 वस्तुअन क जउने तरह एक बुद्धिमान मनई समुझ सकत ह अउर ओनकर बियाख्या कइ सकत ह, वइसे कउनो भी नाहीं कइ सकत ह। बुद्धि एक दुःखी मुँह क खुस मुँह में बदल देत ह।

2मई तू पचन्स कहत हउँ कि तू पचन्क सदा ही राजा क आग्या मानइ चाही। अइसा एह बरे करा काहेकि तू पचे परमेस्सर क बचन दिहे रहया। 3राजा क उपस्थिति स हटि में हाली जिन करा अउर बुरा जोजनन में सामिल जिन हो। जदि हालत प्रतिकूल होई तउ ओकरे इर्द-गिर्द जिन रहा काहेकि उ तउ उहइ करी जउन ओका नीक लागी। 4आग्यन देइ क राजा क अधिकार अहइ, कउनो नाहीं पूछ सकत कि उ का करत अहइ। 5जदि हुकूम क पालन करत ह तउ उ सुरच्छित रही। एक बुद्धिमान मनई जानत अहइ कि का उचित ह अउर कब अहइ।

6काहेकि सबइ कार्य के लिए उचित समइ अउर रास्ता अहइ, मुला लोग उ प बदकिस्मती स काफ़ी झूठ बोलइही। 7अगर अगवा अनिहचित होइ। काहेकि भविस्स में का होइ इ तउ ओका कउनो भी बताइ नाहीं सकत।

8कउनो में इ सक्ती नाहीं कि उ हवा क रोक सकत। इहइ तहर स कउनो मनई में अइसी सक्ती नाहीं अहइ कि उ आपन मउत क रोकि देइ। जब जुद्ध चलत रहत होइ तउ कउनो भी फउजी क इ अजादी नाहीं अहइ कि उ जहाँ चाहइ चला जाइ। इहइ तरह जदि कउनो मनई बुरा करत ह तउ उ बुराई उ मनई क अजाद नाहीं रहइ देत।

9मई इ सबइ बातन लखेउँ ह। इ जगत में जउन कछू घटत ह ओन बातन क बारे में मई बड़ी हलबुली में सोचेउँ ह उ समइ जब दूसर सासन करइ हीं ओका नोक्सान पहोंचात अहइ। 10मई ओन बुरे मनइयन क बहोत बिसाल सुन्दर ल्हास-जात्रन लखेउँ ह। अउर ल्हास जात्रन क पाछे लोग जब घरे लउटत हीं तउ उ पचे जउन बुरा मनई मरि चुका अहइ ओकरे बारे में नीक नीक बातन करत हीं। अइसा उहइ नगर में हुआ करत ह जहाँ उ बुरा मनई बहोत स बुरा काम किहेस ह। इ बगैर अरथ क अहइ।

### निआव प्रतिदान अउर दण्ड

11कबहुँ कबहुँ लोग जउन बुरे काम किहेन ह, ओनके बरे ओनका तुरंत दण्ड नाहीं मिलता। एकरे कारण दूसर लोग भी बुरे करम करइ चाहइ लागत हीं।

12कउनो पापी चाहे सैकड़न पाप करइ ओकर उमिर केतनी ही लम्बी होइ। मुला मई इ जानत हउँ कि जे परमेस्सर क सम्मान करब ओकर साथ उत्तिम होब। 13बुरे लोग परमेस्सर क सम्मान नाहीं करतेन। तउ अइसे लोग अच्छा नाहीं करतेन। उ सबइ बुरे लोग अधिक समइ तलक जिअत नाहीं रइहीं। ओनकर जिन्गगी बूडत सूरज में लम्बी स लम्बी होत जात छाया क नाई बड़ी नाहीं होइहीं।

14इ धरती पइ एक बात अउर होत ह जउन मोका निआव क लायक नाहीं लागत। बुरे लोगन क संग बुरी बातन घटइ चाही अउर नीक लोगन क संग नीक बातन। मुला कबहुँ कबहुँ नीक लोगन क संग बुरा बातन घटत हीं अउर बुरे लोगन क संग नीक बातन। इ तउ निआव नाहीं अहइ। 15तउ मई निहचय किहेउँ कि जिन्नगी क आनन्द लेब सबसे अच्छा अहइ। काहेकि इ जिन्नगी मँ एक मनई जउन सबसे नीक बात कइ सकत ह उ बाटइ खाब, पिअब अउर जिन्नगी क रस लेब। एहसे कम स कम मनई क इ धरती पइ ओकरे जिन्नगी क दौरान परमेस्सर कइ बरे जउन कठिन काम दिहेस ह ओकर आनन्द लेइ मँ मदद मिली।

16इ जिन्नगी मँ लोग जउन कठिन काम करत हीं ओकर मई बड़े धियान क साथ अध्ययन किहेउँ ह। मई लखेउँ ह कि लोग केतना व्यस्त अहइ। उ पचे अक्सर बगैर सोए राति दिन कामे मँ लगा रहत हीं। 17परमेस्सर जउन करत ह ओन बहोत स बातन क भी मई लखेउँ ह कि धरती पइ परमेस्सर जउन कछू करत ह, लोग ओका समुझ नाहीं सकतेन। ओका समुझइ बरे मनई बार बार जतन करत ह। मुला फुन भी समुझ नाहीं पावत। अगर कउनो बुद्धिमान मनई इ भी कइ कि उ परमेस्सर क कामन क समुझत ह तउ इ भी फुरइ नाहीं बाटइ। ओन सब बातन क तउ कउनो भी समुझ हीं सकत।

### का मउत उचित अहइ?

9 मई इन सबहिं बातन क बारे मँ बड़े धियान स सोचेउँ ह अउर लखेउँ ह कि नीक अउर बुद्धिमान लोगन क संग जउन घटित होत ह अउर उ पचे जउन काम करत हीं ओन पर नियंत्रण परमेस्सर करत ह। लोग नाहीं जानतेन कि ओनका पिरेम मिली या घिना अउर लोग नाहीं जानतेन कि भियान का होइवाला अहइ।

2किन्तु एक ठु बात अइसी अहइ जउन हम सबन क संग घटत ह - हम सबहिं मरित ह। मउत नीक लोगन क भी आवत ह अउर बुरे लोगन क भी। अपितर लोगन क जइसा पवितर लोगन क भी मउत आवत ह। धर्मी लोग जउन बलिदान चढ़ावत ह उ भी वइसे ही मरत ह जइसे उ लोग जउन बलिदान नाहीं चढ़ावत ह। अच्छे लोग भी बुरे लोग जइसा मरत हीं। उ मनई जउन परमेस्सर क बिसेस बचन देत ह, उ भी वइसे ही मरत ह जइसे उ मनई जउन परमेस्सर क बचन देइ स घबरात ह।

3इ जिन्नगी मँ जउन भी कछू घटित होत ह ओहमाँ सबसे बुरी बात इ अहइ कि सबहिं लोगन क अंत एक ही तरह स होत ह। साथ ही इ भी बहोत बुरी बात अहइ कि लोग जिन्नगी भर सदा ही बुरे अउर बेवकूफी स भरे विचारन मँ पड़ा रहत हीं अउर आखिर मँ मरि जात हीं। 4हर उ मनई क बरे जउन अबहिं जिअत अहइ, एक आसा बची अहइ। एहसे कउनो अंतर नाहीं पड़त कि उ कउन अहइ? इ कहावत फुरइ अहइ:

“कउनो मरे भए सेर स एक जिअत कूकूर नीक अहइ।”

5जिअत लोग जानत हीं कि ओनका मरब अहइ। किन्तु मरे भए तउ कछू भी नाहीं जानतेन। मरे भएन क कउनो

अउर प्रतिदान नाहीं मिलत। लोग ओनका हाली ही बिसरि जात हीं। 6कउनो मनई क मरि जाए क पाछे ओकर पिरेम घिना अउर ईस्यी सब समाप्त होइ जात हीं। मरा भवा मनई संसार मँ जउन कछू होत अहइ, ओहमाँ कबहुँ हीसा नाहीं बटावत।

### जिन्नगी क आनन्द ल्या जबकि तू लइ सकत ह

7तउ तू अब जा अउर आपन खइया क खा अउर ओकर आनन्द ल्या। आपन दाखमधु पिआ अउर खुस रहा। अगर तू इ सबइ बातन करत अहा तउ इ सबइ बातन परमेस्सर स समर्थित अहइ। 8उत्तिम ओढ़ना पहिरा अउर सुन्नर दिखा। 9जउन पत्नी क तू पिरेम करत अहा ओकरे संग जिन्नगी क भोग करा। आपन अरथहीन जिन्नगी क जेका परमेस्सर तोहका इ धरती मँ दिहेस, उ सबइ क बरे जेका तू अपने जिन्नगी मँ पाइ, इ संसार मँ कठिन कर्म कइ क पाइ, स हर एक दिन क आनन्द ल्या। 10जेका तू कइ सकत ह, एका तू जेतनी उत्तिमता स कइ सकत ह करा। कब्र मँ तउ कउनो काम होइ ही नाहीं। हुआँ न तउ चिन्तन होइ, न गियाण अउर न विवेक अउर मउत क उ उहर क हम सबहिं तउ जात अही।

### सौभाग्य? दुर्भाग्य? हम कर का सकित ह?

11मई इ जिन्नगी मँ कछू अउर बातन लखेउँ ह। सबसे जियादा दउड़इवाला सदा ही दउड़ मँ नाहीं जीतत, सक्तीसाली सेना ही जुद्ध मँ सदा नाहीं जीतत। सबसे जियादा बुद्धिमान मनई ही सदा कमाई क नाहीं खात। सबसे जियादा चुस्त मनई ही सदा धन दौलत हासिल नाहीं करत ह अउर एक पढ़ा लिखा मनई ही सदा वइसी तारीफ नाहीं पावत जइसी तारीफ क उ जोग्ग अहइ। जब समय आवत ह तउ हर कउनो क संग बुरी बातन घट जात हीं।

12कउनो भी मनई इ नाहीं जानत ह कि एकरे पाछे ओकरे संग का होइवाला अहइ। उ जाल मँ फँसी उ मछरी क नाई होत ह जउन इ नाहीं जानत कि आगे का होइ। उ उ जाल मँ फँसी चिरइया क समान होत ह जउन इ नाहीं जानत कि का होइवाला अहइ? इहइ प्रकार मनई ओन विपति मँ फँस जात अहइ, जे ओन प हाली अहइ।

### विवेक क सक्ती

13इ जिन्नगी मँ मई एक मनई क एक विवेकपूर्ण कार्य करत लखेउँ ह अउर मोका इ बहोत महत्वपूर्ण लाग ह।

14एक ठु नान्ह स नगर भवा करत रहा। ओहमाँ थोड़ा स लोग रहत रहेन। एक बहोत बड़ा राजा ओकरे खिलाफ जुद्ध किहेस अउर नगर क चारिहुँ कइती आपन फउज लगाइ दिहेस। 15\* उहइ नगर मँ एक बुद्धिमान मनसेधू रहत रहा। उ बहोत निर्धन रहा। किन्तु उ उ नगर क बचावइ बरे आपन बुद्धि क उपयोग किहेस। जब नगर क बिपद टरि गइ अउर सब कछू खतम होइ गवा तउ लोग

पद 15 इ पद क अरथ अहइ “ओका आपन बुद्धि क प्रयोग सहर क बचाइ क बरे कइ चाही किन्तु कउनो मनई ओका याद नाहीं राखत अहइ, मुला उ गरीब रहा।”

उ गरीब क बिसारि दिहन। 16किन्तु मई लखइ अहइ कि बल स बुद्धि स्नेष्ठ बाटइ। जदपि लोग गरीब मनई क बुद्धि क नज़र-अन्दाज़ कइ देत अहइ ओका नाहीं सुनत अहइ।

17धीमे स बोलि गएन, विवेकी क तनिक स सब्द जियादा उत्तिम होत हीं, बजाय ओन अइसे सब्दन क जेनका मूरख सासक ऊँची आवाज मँ बोलत ह।

18बुद्धि, ओन भोलन स अउर अइसी तरवारन स उत्तिम अहइ, जउन जुद्ध मँ काम आवत हीं। बुद्धिहीन मुला एउटा मनई, बहोत स उत्तिम बातन नस्त कइ सकत ह।

**10** कछू मरी भइ माखियन सर्वोत्तम सुगंध तलक क दुर्गंधित कइ सकत हीं। इहइ तरह छोटी सी बेवकूफी स समून्इ बुद्धि अउर प्रतिष्ठा नस्त होइ सकत ह। 2बुद्धिमान क विचार ओका उचित मारग पइ लइ चलावत हीं। किन्तु मूरख क विचार ओका बुरे सस्ते पइ लइ जात हीं। 3मूरख की मूरखता स्पस्ट हो जात ह जउन उ राह पइ चलत मात्र सुरू करत ह। हर मनई लखि सकत ह कि उ मूरख अहइ।

4तोहार अधिकारी तोहसे रिसियान अहइ, बस इहइ कारण स आपन काम कबहुँ जिन तजा। अगर तू सांत अउर सहायक बना रहा तउ बड़की स बड़की गलतियन क सुधार सकत अहा।

5अउर लखा इ बात कछू अलग अहइ जेका मई इ जिन्नगी मँ लखेउँ ह। इ बात निआवोचित भी नाहीं अहइ। इ वइसी भूल अहइ जइसी सासक जिया करत हीं। 6मूरख मनइयन क महत्वपूर्ण पद दइ दीन्ह जात हीं अउर धनी मनई अइसे कामन क पावत हीं जेनकर कउनो महत्व नाहीं होत। 7मई अइसे मनई लखेउँ ह जेनका नोकर होइ चाही रहा। किन्तु उ पचे घोड़न पइ चढ़ा रहत हीं। जबकि उ पचे मनई जेनका सासक होइ चाही रहा, नोकर क नाई ओनके आगे पाछे घूमत रहत हीं।

### हर कामे क आपन खतरा अहई

8उ मनई जउन कउनो गड़हा खनत ह ओहमाँ गिर भी सकत ह। उ मनई जउन कउनो देवारे क गिरावत ह, ओका साँप काट भी सकत ह। 9एक मनई जउन बड़के बड़के पाथरन क ढकेलत ह, ओनसे चोट भी खाइ सकत ह अउर उ मनई जउन बृच्छन क काटत ह, ओकरे बरे उ खतरा भी बना रहत ह कि बृच्छ ओकरे ऊपर न भहराइ जाइ।

10किन्तु बुद्धि क कारण हर काम आसान होइ जात ह। भोंटे, बेधार चाकू स काटब बहोत कठिन होत ह किन्तु अगर उ आपन चाकू पइना कइ ले तउ काम आसान होइ जात ह। बुद्धि इहइ प्रकार क अहइ।

11कउनो मनई इ जानत ह कि कीरा क बस मँ कइसे कीन्ह जात ह किन्तु जब उ मनई आस पास नाहीं अहइ अउर कीरा कउनो क डस लेत ह तउ उ बुद्धि बेकार होइ जात ह। बुद्धि इहइ प्रकार क अहइ।

12बुद्धिमान क सब्द तारीफ दियावत हीं। किन्तु मूरख क सब्दन स बिनास होत ह।

13एक ठु मूरख मनई बेवकूफी स भरी बातन कहिके सुरूआत करत ह। अउर आखिर मँ उ पागलपन स भरी भइ खुद क ही नोस्कान पहोंचावइ वाली बातन कहत ह।

14एक मूरख मनई मूरख बातन बोलइ से कबहुँ नाहीं रूकत ह। किन्तु भविस्स मँ का होइ इ तउ कउनो नाहीं जानत। भविस्स मँ का होइ जात अहइ, इ तउ कउनो बताइ ही नाहीं सकत।

15मूरख ऐतना चतुर नाहीं कि आपन घरे क मारग पाइ जाइ। एह बरे ओका तउ जिन्नगी भइ कठोर काम करब अहइ।

### करम क मूल्य

16कउनो देस क बरे इ बहोत बुरा अहइ कि ओकर राजा कउनो बच्चे जइसा होइ अउर कउनो देस क बरे इ बहोत बुरा अहइ कि ओकर अधिकारी आपन सारा समय खाइ मँ ही गुजारात होई। 17मुला कउनो देस क बरे इ बहोत अच्छा अहइ कि ओकर राजा कउनो उत्तिम बंस क होइ। कउनो देस बरे इ बहोत उत्तिम अहइ कि ओकर अधिकारी आपन खाइ अउर पिअइ पर काबू रखत हीं। उ सबइ अधिकारी बलसाली होइ बरे खात पिअत हीं ब कि मतवाले होइ जाइ बरे।

18अगर कउनो मनई काम करइ मँ सुस्त अहइ, तउ ओकर घर टपकब सुरू कइ देइ अउर ओकरे घर क छत ध्वंस्त होइ जाब।

19लोग भोजन क आनन्द लेत हीं अउर दाखरस जिन्नगी क अउर जियादा खुसियन स भरि देत हीं। किन्तु धन बहोत समस्या क हल करइ देत ह।

### निन्दा स भरी बातन

20राजा क बारे मँ बुरी बातन जिन करा। ओकरे बारे मँ बुरी बातन सोचा तलक जिन। संपन्न मनइयन क बारे मँ भी बुरी बातन जिन करा। चाहे तू आपन घरे मँ अकेल्ले ही काहे न हवा। काहेकि होइ सकत ह कउनो एक छोटी सी चिरइया उड़िके तू जउन कछू कह्या ह, उ हर बात ओनका कहइ देइ।

### निर्भीक होइके भविस्स क सामना करा

**11** तू जहाँ भी जा, हुवाँ उत्तिम काम करा। थोड़े समय पाछे तोहरे उत्तिम कार्य वापिस लउटिके तोहरे लगे अइहीं।

2जउन कछू तोहरे लगे अहइ ओकर कछू भाग सात, आठ अलग-अलग चिजियन पइ खरच कइ द्या। तू जान ही नाहीं सकत्या कि इ धरती पइ कब का बुरा घटि जाइ?

3कछू बातन अइसी अहई जेनके बारे मँ तू निहचित होइ सकत ह। जइसे बादल बर्खा स भरा अहई तउ उ सबइ धरती पइ जल बरसइहीं ही। जदि कउनो बृच्छ गिरत ह चाहे दाहिनी कईंती गिरइ, चाहे बाई तरफ गिरत ह। उ हुवैइ पड़ा रही जहाँ उ गिरा अहइ।

4किन्तु कछू बातन अइसी होत हीं जेनके बारे मँ तू निहचित नाहीं होइ सकत्या। फुन भी तोहका एक मौका तउ

लेइ ही चाही। जइसे अगर कउनो मनई पूरी तरह स उत्तिम मौसम क इंतजार करत रहत ह तउ उ आपन बीज बोइ ही नहीं सकत ह अउर इहइ तरह कउनो मनई इ बात क डेरात रहत ह कि हर बादल बरसी ही तउ उ आपन फसल कबहुँ नहीं काटि सकी।

5हवा कहाँ स आवत अहइ तू नहीं जान सकत्या। तू नहीं जानत्या कि महतारी क गरभ में बच्चा प्राण कइसे पावत ह? इहइ तरह तू इ नहीं जान सकत्या कि परमेस्सर का करी? सब कछू क घटित करइवाला तउ उहइ अहइ।

6एह बरे भिंसार होत ही रोपाई सुरू कइ द्या अउर दिन ढले तलक काम जिन रोका। काहेकि तू नहीं जानत्या कि कउन स बीज सफलता स उगब - होइ सकत ह इहइ या उहइ या सबइ क सब।

7जिनत रहब उत्तिम अहइ। सूरज क प्रकास लखब नीक अहइ। 8तोहका आपन जिन्नगी क हर दिन क आनन्द उठावइ चाही। तू चाहे केतनी ही लम्बी उमिर पावा। पर याद राखा कि तोहका मरब अहइ अउर तू जेतने समय तलक जिए अहा ओहसे कहुँ जियादा समय तलक तोहका मरा रहब अहइ अउर मरि जाए क पाछे तउ तू कछू कर नहीं सकत्या।

### जवानी में ही परमेस्सर क सेवा करा

9तउ हे जवानो! जब तलक तू जवान अहा, आनन्द मनावा। खुस रहा। अउर जउन तोहार मन चाहइ, उहइ करा। जउन तोहार रच्छा होइ उ करा। किन्तु याद राखा कि तोहरे हर कामे बरे परमेस्सर तोहार निआव करी। 10किरोध क खुद पइ काबू जिन पावइ द्या अउर आपन सरीर क भी कस्ट जिन द्या। तू जियादा समय तलक जवान नहीं बना रहब्या।

### बुढ़ाई क सबइ समस्या

12 लरकपन स ही आपन बनावइ वाला क सुमिरन करा। एहसे पहिले कि बुढ़ाई क बुरे दिन तोहका आइके घेरई। पहिले एकरे कि तोहका इ कहइ क पड़इ कि, “हाय, मई जिन्नगी क रस नहीं लइ सकत्या।” लरकपन स ही आपन बनावइ वाला क सुमिरन करा।

2जब तू बुढ़वा होब्या तउ सूरज चन्द्रमा अउर सितारन क रोसनी तोहका अँधियारी लगिहीं। अउर तोहार समस्या लगातार वापस आत रहब्या अउर इ सबइ समस्या ओन बादलन क तरह ही होइहीं जउन बर्खा करत हीं अउर सीध वापस नहीं छटैत हीं।

3उहइ समझ्या तोहार बलवान भुजन निर्बल होइ जइहीं। तोहार सुदृढ़ गोड़ कमजोर होइ जइहीं। तू आपन कछू बचे भाए दौतन क संग खाना तलक भी चबाइ नहीं सकत्या। आँखियन स साफ देखाई तलक नहीं देइ।

4तू बहिर होइ जाब्या। बाजार क सोर भी तू सुनि नहीं पउब्या। चलत चक्की भी तोहका सांत देखाइ देइ। तू बड़ी मुस्किल स लोगन क गावत सुन पउब्या। मूला चिरइयन क चहचहाट तोहका जगाई देब तू बढिया नीद स नहीं सोइ सकब।

5चढ़ाइवाले जगहियन स तू डेराइ लगब्या। राहन क हर नान्ह स नान्ह चीज स तू डेराइ लगब्या कि तू कइँ ओह पइ ठोकर खाइके गिर परब। तोहार बाल बादाम क फूलन क नाई उज्जवर होइ जइहीं। तू जब चलब्या तउ उ प्रकार घेरीत चलब्या जइसे कउनो टिड्डा होइ। तू अपन जीअइ क इच्छा खो देब्या। फुन तोहका आपन क भीतरी नवा घर यानी तोहार कब्र में नित निवास बरे जाइ क होइ अउर तोहार मुर्दनी में सामिल लोगन क भीड़ स गलियन भरि जइहीं।

### मउत

6अबहिं जब तू जवान अहा, आपन बनावइवाला क याद राखा। एकरे पहिले कि चाँदी क डोर टूटि जाइ। अउर सोना क पात्र टूटिके बिखर जाइ। एकरे पहिले कि तोहार जिन्नगी बेकार होइ जाइ जइसे कउनो कुएँ लगे पात्र टूट पड़ा होइ। एकरे पहिले कि तोहार जिन्नगी उ पाथर जइसे होइ जाइ जेका उपयोग दीवार क ढाकन में किया जात अहइ, मुला उ टूट कइ इ में गिर परत ह।

7तोहार देह माटी स उपजी अहइ अउर जब मउत होइ तउ तोहार उ देह वापिस माटी होइ जाइ। किन्तु इ प्राण तोहार परमेस्सर स आवा अहइ अउर जब तू मरब्या, तोहार इ प्राण वापिस परमेस्सर क लगे जाइ।

8सब कछू बेकार अहइ, उपदेसक कहत ह कि सब कछू बियर्थ अहइ।

### निस्कर्स

9उपदेसक बहोत बुद्धिमान रहा। उ लोगन क सिच्छा देइ में आपन बुद्धि क प्रयोग करत रहा। उपदेसक बड़ी होसियारी स अध्ययन किहस अउर अनेक सूक्तियन क व्यवस्थित किहस। 10उपदेसक उचित सबदन क बचन बरे कठिन मेहनत किहस अउर उ एन सीखन क लिखेस जउन फुरइ अहइँ अउर जेन पइ भरोसा कीन्ह जाइ सकत ह।

11विवेकी मनइयन क बचन ओन नोकीली छड़ियन क समान होत हीं जेनकर उपयोग पसुअन क उचित मारग पइ चलावइ बरे कीन्ह जात ह। इ सबइ उपदेसक ओन मजबूत खूँटेन क समान होत हीं जउन कबहुँ टूटतेन नहीं। जिन्नगी क उचित मारग देखावइ बरे तू एन उपदेसकन पइ बिस्सास कइ सकत ह। उ सबइ सबहिं विवेक स पूरी सीखन उहइ गड़रिया (परमेस्सर) स आवत हीं।

12तउ पूत! एक चिताउनी अउर लोग तउ सदा पुस्तकन लिखत ही रहत हीं। बहोत जियादा अध्ययन तोहका बहोत थकाइ देइ।

13-14इ सब कछू क सुन लेइ क पाछे अब एक अन्तिम बात इ बतावइ क बाटइ कि परमेस्सर क आदर करा अउर ओकरे आदेसन पइ चला काहेकि इ नियम हर मनई पर लागू होत ह। काहेकि लोग जउन करत हीं, ओका हिआँ तलक कि ओनकी छिपी स छिपी बातन क भी परमेस्सर जानत ह। उ ओनकर सबहिं नीक बातन अउर बुरी बातन क बारे में जानत ह। मनई जउन कछू भी करत हीं उ हर एक करम क उ निआव करी।

# नीतिवचन

1 दाऊद क पूत अउ इस्त्राएल क राजा सुलैमान क नीतिवचन (कहावतन)।

2इ सबइ बातन क मनइ क बुद्धि क पावइ, अनुसासन क ग्रहण करइ, जेनसे समुझ स भरी बातन क गियान होइ, 3मनई धरम स पूर्ण, निआव स पूर्ण सतय स पूर्ण क करम करइ क विवेकसील अउर अनुसासन में रहइ क जिन्नगी पावइ,

4सहल सोझवाले लोगन क इ सिखावाइ बरे कि विवेकसील जिन्नगी कइसे बिताइ जाइ, अउर जवान लोगन क गियान अउर बुद्धीमत्ता सिखावइ बरे, लिखा गवा अहई।

5बुद्धिमान लोगन क ओनका सुनिके आपन बुद्धि अउर समुझदारी बढ़ावइ द्या।

6एह बरे लिखा गवा, ताकि मनई नीतिवचन, गियानी क दृष्टान्तन क अउर पहेली भरी बातन क समुझ सकई। 7यहोवा क डर मानब गियान क प्रारम्भ अहइ। मुला मूरख जन तउ बुद्धि अउ सिच्छा क निरर्थक मानत ही।

## विवेकपूर्ण बना चिताउनी: प्रलोभन स बच

8हे मोर पूत, आपन बाप क सिच्छा पइ धियान द्या अउर आपन महतारी क नसीहत क जिन बिसरा। 9उ पचे तोहार मूँड सजावइ क मुकुट अउ सोभा स जोरइ तोहरे गले क हार बनिही।

## चिताउनी: बुरी संगत स बच

10हे मोर पूत, अगर पापी लोग तोहका बहलावइ फुसलावइ आवई ओनकर कबहुँ जिन मान्या। 11अउर अगर उ पचे कहई, “आवा हमरे संग। आ, हम पचे कउनो क घाते में बइठी। आ, निर्दोख पइ छुपिके वार करी। 12आ, हम पचे ओनका जिअत ही सारा क सारा लील जाइ वइसे ही जइसे कब्र लील लेत ही। जइसे खाले पाताल में कहुँ फिसरत चला जात ह। 13हम सबहिँ बहोत कीमती चिजियन पाइ जाब अउर आपन इ लूट स घरवा भरि लेब। 14आपन भाग्य क पाँसा हम लोग आपन बीच लोकावा, हम पचे सामुहिक बटुआ क सहभागी होब।”

15हे मोर पूत, तू ओनकर राहन पइ जिन चला, तू आपन गोड़ ओन लोगन क राहे पइ जिन रखा।

16काहेकि ओनकर गोड़ बुराई क ओर बढ़त ही। उ पचे रक्त बहावइ क बहोत सन्ध रहत ही।

17उ समइ जाल क फइलाना केतना बेकार अहइ जबकि पंछी पूरी तरह स लखत ही। 18जउन कउनो क रक्त बहावइ क इंतजार में बइठा अहई उ पचे अपने आप जालि में फँसि जइही। 19उ सबइ जउन बेइमानी क धन हासिल

करइ क जतन करत ह उ पचे आपन जिन्नगी उहइ में खो देत हीं।

## चिताउनी: बुद्धि हीन जिन बना

20बुद्धि, गलियन में गोहरावत ह, उ सर्वजनिक जगहन में आपन आवाज उठावत ह। 21सोर स भरी गलियन क नोक्कइ पइ गोहरावत ह, सहर क फाटक पइ आपन भासणा देत ह:

22“अरे नादान लोगो! तू कब तलक आपन नादानी स पिरेम करत रहब्या? हँसी ठट्ठाकरइवालो, तू कब तलक ठट्ठा करने में आनन्द लेब्या? अरे मूर्खो, तू कब तलक गियान स घिना करब्या? 23अगर मोर फटकार तोह पइ असर डवत तउ मई तोह पइ आपन हिरदय उड़ेर देत अउर तोहका अपने सबहिँ विचार देखाइ देतेउँ।

24“मुला काहेकि तू तउ मोका नकार दिहा जब मई तोहका गोहराएउँ, अउर कउनो धियान नाही दिहस, जब मई आपन हथवा बढ़ाए रहेउँ। 25तू मोर सबहिँ उपदेस क उपेच्छा किहा अउर मोर फटकार कबहुँ नाही स्वीकार किहा। 26एह बरे, बदले में, मई तोहरे नासे पइ हँसब। मई हँसी ठट्ठा करब जब तोहार बिनास तोहका घेरी। 27जब बिनास तोहका वइसे ही घेरी जइसे खउफनाक बबूला क चक्रवाद घेरत ह, जब बिनास जकड़ी, अउर जब बिनास अउ संकट तोहका बोर देइही।

28“तब, उ पचे मोका गोहरइही किंतु मई कउनो भी जवाब नाही देबउँ। उ पचे मोका हेरत फिरिही मुला नाही पइही। 29काहेकि उ पचे हमेसा गियान स घिना करत रहेन, अउर उ पचे कबहुँ नाही चाहेन कि उ पचे यहोवा स डेराई। 30काहेकि उ पचे, मोर उपदेस कबहुँ धारन नाही किहन, अउर मोर डाट-फटकार क रद्द करिही। 31उ पचे अपन जीवन क करमन क फल जरूर भोगिही, उ पचे आपन बुरे योजना स खुद आपन पेट भरिहीं।

32“नादान लोगन क हटी ओनका ही बिनास करिहीं मूरखन लोगन क लापरवाही वाला रवैया ओनका नस्ट कइ देइ। 33मुला जउन मोर सुनी उ सुरच्छित रही, उ बगैर कउनो नोस्कान अउर कउनो डर क हमेसा चैन स रही।”

## बुद्धि क नैतिक लाभ

2 हे मारे पूत, अगर तू मोरे बोध बचनन क सुना अउर मोर हुकुम मन में बटोरा, 2अउर तू बुद्धि क बातन पइ कान लगावा, मन आपन समुझदारी में लगावत भाए, 3अउर अगर तू अन्तदृष्टि बरे गोहरावा, अउर तू समुझबूझ क बरे पुकारा, 4अगर तू एका अइसे हेरा जइसे कउनो

कीमती चाँदी क हेरत ह, अउर तू एका हेरा, जइसे कउनो छुपे भए खजाना क हेरत ह, 5तब तू यहोवा क डर क समुझब्या अउर परमेस्सर क गियान पउब्या।

6काहेकि यहोवा बुद्धि देत ह अउर ओकरे मुँह स ही गियान अउ समुझवारी क बातन फूटत हीं। 7ओकरे भंडारे में खरी बुद्धि ओनके बरे रहत ह जउन खरा अहई। अउर ओनके बरे जउन कि इमानदारी स रहत ह एक ढाल जइसे अहइ। 8उ निआव क मारग क रखवारी करत ह अउर आपन वफादार लोगन क रह क रच्छा करत ह।

9तबहिं तू समुझब्या कि नेक निआव अउर इमानदारी का अहइ। इ सबइ नीक चिजियन अहइ। 10तउ बुद्धि तोहरे मने में प्रवेश करी अउर गियान तोहरी आतिमा क आनन्दित करी।

11तोहका नीक बुरा क बोध बचाइ, समुझबूझ भरी बुद्धि तोहार रखवारी करी। 12बुद्धि तोहका बुरे लोगन क रह स बचाइ। बुद्धि तोहका ओन लोगन स बचाइ जउन बुरी बात बोलत हीं। 13अँधियारी गलियन में भटकइ बरे उ पचे सहल-सोझ रहन क तजि देत रहत हीं। 14उ पचे बुरे करम करइ में हमेसा आनन्द मनावत हीं। उ पचे बुरे कार्य में हमेसा मगन रहत हीं। 15ओन लोगन पइ बिस्सास नाही कइ सकित। उ पचे लबार अहई अउर छल करइवाला अहई। मुला तोहार बुद्धि अउर समुझ तोहका इन बातन स बचायेगी।

16इ बुद्धि तोहका बदकार मेहरारु अउ ओकर चापललूसी स भरी बातन स बचाइ। 17जउन आपन जवानी क साथी तजि दिहन वाचा क उपेच्छा परमेस्सर क समच्छ किहे रहा। 18काहेकि ओकर घर मउत क गइदा में अहइ अउर ओकर रहन नरक में लइ जात हीं। 19जउन भी ओकरे घर जात ह उ कबहुँ नाही लउटि पावत अउर ओका जिन्नगी क रहन कबहुँ नाही मिलतिन।

20एह बरे तू नीक लोगन क मार्ग पइ चलइ चाही अउर तेहका हमेसा सत्यता क मार्ग पइ बना रहे चाही।

21इमानदार जन अउर बे कसूर लोग आपन धरती पइ बसा रहहीं। 22मुला जउन दुट्ट धोका बाज अहई ओनका धरती स हटा दीन्ह जइही।

### उत्तिम जिन्नगी स संपन्नता

3 हे मोर पूत, मेरी सिच्छा क जिन बिसरा, बल्कि तू मोर आदेसन क आपन हिरदय में बसाइ ल्या। 2काहेकि उ सबइ तोहार जिन्नगी क लम्बी अउर सान्तिमइ बनाहीं।

3वफादारी अउर सच्चाई क कबहुँ भी आपन स अलग न होइ द्या। तू एनका हार क नाई अपने गले में डवा। एनका आपन हिरदय क पटल पइ लिख ल्या। 4इ तरह स तू सफल होब्या अउर परमेस्सर अउ मनई दुइनउँ तोहसे आनन्दित होब्या।

### यहोवा में बिस्सास राखा

5आपन पूरे हिरदय स यहोवा में बिस्सास राखा। तू अपनी समुझ पइ निर्भर जिन करा। 6तू आपन सबइ करमन में जेका तू करत ह परमेस्सर क इच्छा क याद राखा। उहइ

तोहार सब रहन क सोझ करी। 7आपन ही आँखिन में तू बुद्धिमान जिन बना, यहोवा स डरेत रहा अउर बुराई स दूर रहा। 8एहसे तोहार बदन पूरा तन्दुरूस्त रही अउर तोहार हाडियन पुट्ट होइही।

### यहोवा क अर्पण कइ द्या

9आपन सम्पत्ति स, अउर आपन उपज स पहिले फलन स यहोवा क आदर करा। 10तोहार भण्डार बहुतायत स भरि जइही, अउर तोहार मधु क बर्तन दाखरस स उमण्डत रहही।

### यहोवा क दण्ड अंगीकार करा

11हे मोर पूत, यहोवा क अनुसासन क रद्द जिन करा। तोहका सुधार करइ क ओकर प्रयास बरे बुरा जिन बोला।

12काहेकि यहोवा सिरिफ ओनही क डँटत ह जेनसे उ पिआर करत ह। वइसे ही जइसे बाप उ पूत क डँटइ जउन ओका बहोतइ पिआरा अहइ।

### विवेक क महत्व

13धन्य अहइ उ मनई, जउन बुद्धि पावत ह। उ मनई धन्य अहइ जउन समुझ प्राप्त करइ। 14बुद्धि, कीमती चाँदी स जियादा लाभ देइवाली अहइ, अउर सोना स जियादा उत्तिम प्रतिदान देत ह। 15बुद्धि मणि माणिक स जियादा कीमती अहइ। जेका तू चाह सक्या। सबइ चिजियन में स कउनो भी चीज जेका तू सायद कि चाह रखत ह ओकर बराबरी क नाही हो सकत ह।

16बुद्धि क दाहिन हाथे में सुदीर्घ जिन्नगी अहइ अउर ओकरे बाएँ हाथे में सम्पत्ति अउ सम्मान अहइ। 17ओकर मारग मनोहर अहई अउर ओकर सबहिं राह सान्ति क रहत हीं। 18बुद्धि ओनके बरे जिन्नगी क दरखत अहइ जउन एका गले लगावत ह। उ पचे हमेसा धन्य रहहीं जउन मजबूती स बुद्धि क थामे रहत हीं।

19यहोवा धरती क नैव बुद्धि स धरेस, उ समुझ अकासे क स्थिर किहस। 20ओकरे ही गियान स गहिर सोतन फूटि पड़ेन अउ बादर ओसे क कण बरसावत हीं।

21हे मोर पूत, तू अपनी निगाह स बुद्धि क लुप्त जिन होइ द्या। किन्तु बजाए एका आपन जोग्यता क सही फैसला लइ बरे अउर विवेक बरे रच्छा करा। 22उ पचे तउ तोहरे बरे जिन्नगी बन जइही, अउर तोहरे कंठे क सजावइ क एक टु आभूषण। 23तब तू सुरच्छित बना अपना मार्ग पर चलेहीं अउर तोहार गोइ कबहुँ ठोकर नाही खइही। 24तोहका सोवइ पइ कबहुँ डर नाही खाहीं अउर सोइ जाए पइ तोहार नींद मधुर होइ। 25तू आकस्मिक बिनासे स या उ तबाही स जउन दुट्ट लोगन पइ आवत ह जिन डेराअ। 26काहेकि यहोवा तोहार संग होइ, अउर उ तोहरे गोड़े क फँद में फँसइ स बचाइ।

27जउन लोग नीक चीज क हकदार अहइ ओनका उहइ दइ स इन्कार जिन करा। जब तू नीक करइ क जोग्य ह तउ एका करा। 28जब आपन पड़ेसी क देब तोहरे लगे धरा होइ तउ ओहसे अइसा जिन कहा कि “बाद में आया काल्ह तोहका देब।”



29तोहार पड़ोसी बिस्सास स तोहरे लगे रहत होइ तउ ओकरे खिलाफ ओका नोस्कान पहोंचावइ बरे कउनो सडयंत्र जिन रचा।

30बिना कउनो कारण क कउनो मनइ क संग जउन कि तोहका कउनो छति नाही पहोंचाएस ह बहस जिन करा।

31कउनो उपद्रवी मनई स तू जलन जिन करा, अउर ओकर कउनो भी राहे क अनुसरन जिन करा। 32काहेकि यहोवा कुटिल लोगन स घिना करत ह अउ इमानदार लोगन क अपनावत ह।

33दुट्ट मनई क घरे यहोवा क सराप रहत ह, उ नेक क घरे क आसीर्वाद देत ह।

34उ स्वार्थी अउर घमंडी लोगन क हँसी उड़ावत ह, मुला विनर्म लोगन पइ उ मेहरबानी करत ह।

35विवेकी जन तउ आदर पइही, मुला उ मूर्खन क, लज्जित ही करी।

### विवेक क महत्व

4 हे मोर पूतो, बाप क सिच्छा क सुना ओह पइ धियान द्या अउर तू समुझबूझ पाइ लया। 2मई तू पचन्क गहिर-गंभीर सिच्छा देत हउँ। मोर इ सिच्छा क तू पचे जिन तज्या।

3जब मई आपन बाप क घर एक बालक रहेउँ अउर महतारी क बहोतइ कोमल एकलौता गदला रहेउँ, 4उ मोका सिखावत रहा, “मोरे सिखिया का पूर्ण रूप स पालन करा। जदि तू मोर आदेसन क माना तउ तू जिअब। 5तू बुद्धि प्राप्त करा अउ समुझबूझ प्राप्त करा, मोर वचन जिन बिसरा अउर ओनसे जिन डुगा, 6बुद्धि जिन तजा। उ तोहार रच्छा करी। ओहसे पिरेम करा उ तोहार धियान राखी।”

7बुद्धि सबन त नीक बाटइ: सब कछू दइके भी बुद्धि प्राप्त करा। गियान प्राप्त करा। 8बुद्धि स पिरेम करा। उ तोहका महान बनाहीं। ओका तू गले स लगाइ लया, उ तोहार सम्मान बढ़ाई। 9उ तोहरे मूँडे पइ सोभा क माला धरी अउर उ तोहका एक तु वैभव क मुकुठ देइ।

10सुना, हे मोर पूत! जउन कछू मई कहत हउँ तू ओका ग्रहण करा। तू अनगिनत बरिस जिअत रहब्या। 11मई तोहका बुद्धि क मार्ग पइ चलइ क रह देखावत हउँ, अउर सरल मार्गन पइ अगुवाई करत हउँ। 12जब तू अगवा बढ़ब्या तोहार गोड़ रूकावट नाही पइही, अउर जब तू दउड़ब्या ठोकर नाही खाब्या। 13सिच्छा क थामे रहा, ओका तू जिन छोड़। एकर रखवारी करा। इहइ तोहार जिन्नगी अहइ।

14तू दुट्ट लोगन क राहे पइ कदम जिन धरा। बुरे लोगन क राहे पइ जिन चला। 15तू एहसे बचत रहा। एह क ओर कदम जिन बढ़ावा। एहसे तू मुड़ि जा अउर एकरे बगल स गुजर जा। 16उ पचे बुरे करम किए बगैर सोइ नाही पउतेन। उ पचे नीद खोइ चुकत ही जब तलक कउनो क नाही गिरउतेन। 17उ पचे तउ बस हमेसा नीच होइ क रोटी खात ही अउर हिंसा क दाखसपिअत ही।

18मुला नीक लोगन क राह वइसे होत ह जइसे भिंसारे क किरण होत ह, जउन दिन क पूर्ण होइ तलक आपन प्रकास मँ बढ़त ही चली जात ह। 19मुला दुउन लोगन क

मारग अँधियारा जइसा होत ह। उ पचे नाही जानत ह कि केकर कारण उ पचे ठोकर खात ह या गिरत ह।

20हे मोर पूत, जउन कछू मई कहत हउँ ओह पइ तू धियान द्या। मोर बचनन क तू कान लगाइके सुना। 21ओनका आपन दृष्टि स ओझर जिन होइ द्या। आपन हिरदय पइ तू ओनका धरे रहा। 22काहेकि जउन ओनका पावत ही ओनके बरे उ सबइ जिन्नगी बन जात ही अउर उ पचे एक मनई क संपूर्ण तने क तन्दुरूस्ती बनत ही।

23सबन स बड़की बात इ अहइ कि तू आपन विचार क बारे मँ होसियार रहा। काहेकि तोहार विचार जिन्नगी क कब्जे मँ राखत ही।

24तू आपन मुँह स कुटिलता क दूर राखा। तू आपन ओठनस गलत बात दूर राखा। 25आपन अँखिन क हमेसा सिधे राखा, आपन पलकन क समन्वा क ओर राखा। 26आपन गोड़न बरे तू सोझ मारग बनावा। बस तू ओन राहन पइ चला जउन निहचइ ही सुरच्छित अहइँ।

27दाहिने क या बाएँ क जिन डुगा। तू आपन गोड़न क बुराई स रोके रहा।

### पराई मेहरारू स बचा रहा

5 हे मोर पूत तो मोरी बुद्धि क बातन पइ धियान द्या। मोर बुद्धिमाननी क सिच्छा क धियान स सुना। 2ताकि तोहार भला-बुरा क चेतना सुरच्छित रहइ अउर तोहरे ओठन गियान कि सुरच्छा करइ। 3काहेकि कउनो पराई मनइ क पतनी आपन ओठन क मधुर बातन स तोहका लुभा सकत ह, ओकर ओठन क वाणी तेल स भी जियादा चिकनी होत ह। 4अंत मँ उ तोहरे बरे भयंकर दुःख दर्द लाहीं उ दुधारी तरवार क नाई अहइ। 5ओकर गोड़ मउत क गइदा कइँती बढ़त ही अउर उ तोहका सिधे कब्र तलक लइ जात हीं। 6उ कबहुँ भी जिन्नगी क मारग क नाही सोचत। ओकर राहन खोटी अहइँ। किंतु हाय्य, ओका मालूम नाही।

### बिभिचार बिनासे क मूल बाटइ

7अब हे मोरे पूतन, तू मोर बात सुना। जउन कछू भी मई कहत हउँ ओहसे जिन मोड़। 8तू अइसी राह पइ चला जउन ओहसे काफी दूर होइ। ओकर घरे तलक जिन जा।

9नाहीं तउ दूसर कउनो तोहरे ताकत क उपयोग करिहीं, अउर तोहार जिन्नगी क बरिस कउनो अइसे मनइ लइ ले हीं जउन कि करुर होइ।

10अइसा न होइ, तोहरे धने पइ अजनबी मउज करइँ। तोहार मेहनत अउरन क घर भरइ। 11तोहार जिन्नगी क अंतिम दिना मँ जब तू बिमार होब्या अउर तोहार लगे कछू भी न होइ, तउ तोहका रोवत बिलबिलात भवा छोड़ दीन्हा जाहीं।

12अउर तू कहब्या, “हाय! मई अनुसासन स काहे घिना किहा? मई सुधार क काहे उपेच्छा किहा? 13मई आपन सिच्छकन क बात नाही मानेउँ या मई आपन प्रसिच्छकन पइ धियान नाही दिहेउँ। 14मई महानासे क किनारे पइ आइ गावा हउँ अउर हर एक इ जानत ह।”

**आपन पत्नी क संग आनन्द मनावा**

15-16तू आपन हौज स ही पानी पिया करा अउ तू आपन झरना स ही सुद्ध पानी पिया करा। तू आपन पानी क गलियन में इधर-उधर फइलइ जिन दया। एका गलियन में नदी क नाई बह्य जिन दया। 17इ तउ बस तोहार ही होइ, एकमात्र तोहार ही। ओनमँ कबहुँ कउनो अजनबी क हीसा न होइ, 18आपन पत्नी क संग धन्न रहा। ओकरे संग ही तू जीवन रस क पान करा जेक तू आपन जवानी क समइ सादी कीन्ह रहा। 19ओकर छातियन हरिणी अउर खुबसुरत पहाड़ी बोकरी क नाई तोहका हमेसा सन्तुस्त करइ, ओकर पिरेम जाल तोहका हमेसा फाँस लइ 20हे मोर पूत, कउनो बिभिचारिणी क तोहका विनासे क ओर काहे लइ जावइ चाही? तोहका कउनो अजनबी मेहरारू क काहे गले लगावइ चाही?

21यहोवा तोहार राहन पूरी तरह लखत अहइ अउ उ तोहार सबहिँ राहन परखत बाटइ। 22दुट्ट क बुरे करम ओका बाँध लेत ही। ओकर ही पाप जाल ओका फाँस लेत ह। 23उ अनुसासन क कमी क कारण मरि जात ह। ओकर महान मूरखता ओका विनास क ओर लइ जावत ह।

**कउनो चूक जिन करा**

6 हे मोर पूत, जदि तू बगैर समुझबूझिके कउनो अजनबी मनइ क बदले में कउनो क जमानत दिहा ह या कउनो स कउनो बचन किहस ह? 2तउ तू आपन ही कहनी क जालि में फाँसि गवा अहा, तू आपन मुँह क ही सब्बन क पिंजरे में बंद होइ गवा अहा। 3हे मोर पूत, काहेकि तू अउरन क हाथन क पुतला होइ गवा ह। तू आपन क रच्छा बरे अइसा ही करा जइसा मई कहत हउँ। ओन लोगन क निआरे जा अउ विनम्र होइके आपन पड़ोसियन स आग्रह करा। 4आपन आँखिन क आराम जिन करइ दया। आपन आँखियन क पलक झपकी तलक न लइ दया। 5खुद क हरिणी क नाई या सिकारी क हाथे स भागा भवा कउनो पंछी क नाई आजाद कइ ल्या।

**आलसी जिन बना**

6अरे ओ आलसी, चोटी क लगे जा। ओकर कार्य विधि लखा अउर ओहसे सीख ल्या। 7ओकर न तउ कउनो नायक अहइ, न ही कउनो निरीच्छक, न ही कउनो सासक अहइ। 8फुन भी उ गरमी में खइया क बटोरत ह अउ कटनी क समइ अन्न क दाना बटोरत ह।

9अरे ओ सुस्त मनइ, कब तलक तू हिआँ पड़ा रहव्या? आपन नींद स तू कब जाग उठव्या? 10तू तनिक सोव्या, तनिक झपकी लेव्या, तनिक सुस्ताइ बरे आपन हाथन पइ हाथ धइ लेव्या 11अउर बस तोहका गरीबी लुटेरा क नाई आइके घेरी अउर अभाव तोहका हतयार स लैस डाकोअन क नाई घेर लेइ।

**दुट्ट जन**

12नीच अउ दुट्ट मनइ उ होत ह जउन धोका दइवाले बातन बोलत भवा फिरत रहत ह। 13जउन आँख मारइ क

इसारा करत ह अउर आपन आँगुरियन अउर पैरन स संकेत देत ह। 14उ सडयंत्र रचत ह अउर हमेसा बहस व मुबाहिसा करत ह। 15एह बरे ओह पइ एकाएक महानास गिरी अउर फउरन नस्ट होइ जाइ। ओकरे लगे बनइ क उपाय नाही होइ।

**उ सात बातन जेसे यहोवा घिना करत ह**

16यहोवा छः चिजियन स घिना करत ह, अउर सातवें चीज ओकर बरे घृणित अहइ।

17गर्व स भरी आँखिन, झूठ स भरी वाणी, उ सबइ हाथन जउन निर्दोख लोगन क हतियार अहइँ।

18अइसा हिरदय जउन सडयंत्र रचत रहत ह, उ सबइ गोइ जउन बुराइ क मारग पइ तुरन्त दउइ पड़त हीं।

19उ लबार गवाह, जउन लगातार झूठ उगलत ह अउर अइसा मनई जउन भाइयन क बीच फूट डवइ।

**दुशचार क खिलाफ चिताउनी**

20हे मोर पूत, आपन बाप क आग्या क माना अउर आपन महतारी क सिच्छा क कबहुँ जिन तजा। 21आपन हिरदय पइ ओनका हमेसा ही बाँधे रहा अउर ओनका आपन गटइया क हार बनाइ ल्या। 22जब तू अगवा बढव्या, उ पचे राह देखइही। जब तू सोइ जाव्या, उ पचे तोहार रखवारी करिही अउर जब तू जागव्या, उ पचे तोहसे बातन करिही।

23काहेकि आदेस दीपक क नाई अहइँ अउर सिच्छा एक जोति क नाई हइ। अनुसासन क डौँट फटकार तउ जिन्नगी क मारग अहइ। 24उ सबइ तोहका चरित्रहीन मेहरारू स अउर बिभिचारणी क फुसलाहट स रच्छा करत हीं। 25तू आपन मन क ओकर सुन्नर क चाह जिन करइ द्या अउर ओकर आँखिन क जादू क सिकार जिन बना। 26काहेकि उ रणडी तउ तोहका रोटी-रोटी क मोहताज कइ देइ। मुला उ कुलटा तउ तोहार जिन्नगी हर लेइ।

27का इ होइ सकत ह कि कउनो केउ क गोदी में आगी रखि देइ अउर ओकर ओढ़ना फुन भी तनिकउ भी न जरइ? 28दहकत भए कोएले क अंगारन पइ का कउनो मनई अपन गोइवन क बगैर झुस्साए भए चल सकत ह? 29उ मनई अइसा ही अहइ जउन कउनो दूसर क पत्नी स समागम करत ह। अइसी पइ मेहरारू क जउन भी कउनो छुइ, उ बगैर दण्ड पाए नाही रहि पाइ।

30-31अगर कउनो चोर कबहुँ भूखन मरत होइ, अउर उ भूख मिटावइ बरे चोरी करइ तउ लोग ओहसे घिना नाही करिही। फुन भी अगर उ धरा जाइ तउ ओका सात गुना भरइ पड़त ह चाहे ओहसे ओकरे घरे क समूचा धन चुक जाइ।

32मुला एक मनइ जउन दूसर क पत्नी क संग सारीरिक सम्बंध करत ह तउ ओकरे लगे विवेक क कमी अहइ। जउन मनइ अइसा करत ह उ खुद बरे विनास लावत ह। 33प्रहार अउ अपमान ओकर भाग्य अहइ। ओकर कलंक कबहुँ नहीं धोइ जाइ। 34काहेकि पति क ईस्य्या किरोध जगावत ह अउर जब उ एकर बदला लेइ तब उ ओह पइ दया नाही करी। 35उ कउनो नोस्कान क पूर्ति अंगीकार नाही

करी अउर कउनो ओका केतना ही बड़ा लालच देइ, ओका उ अंगीकार किए बगैर ठुकराइ।

### विवेक दुगचार स बचावत ह

7 हे मोर पूत, मोरे वचनन क पाला अउ अपने मने में मोर आदेस संचित करा। 2जदि तू मोरे आदेसन क मानब्या तउ तू जियबा। तोहका मोहरे उपदेसन क आपन आँखी क पुतरी सरीखा सँभारिके रखइ चाही।

3ओनका आपन अँगुरियन पइ बाँधि ल्या, तू आपन हिरदय पटल पइ ओनका लिख ल्या। 4बुद्धि स कहा, “तू मोर बहिन अहा” अउर तू समुझबूझिके आपन कुटुम्बी जन कहा। 5उ सबइ हि तोहका बदकार मेहरारु क चिकनी व लुभावन बातन स बचाई।

6एक दिना मई अपन खिड़की क झरोखा स झाँकेउँ, 7सरल नउजवानन क बीच एक अइसा नउजवान लखेउँ जेका नीक-बुरा क पहिचान नाही रहा। 8उ उहइ गली स होइके उहइ बदकार मेहरारु क नुक्कड़ क लगे स जात रहा। उ ओकरे ही घरवा कइँती बढ़त जात रहा। 9सूरज सौँझ क धुँधल में बूड़त रहा, राति क आँधियारा क तहन जमत जात रहिन। 10तबहिँ एक मेहरारु ओहसे मिलइ बरे निकरिके बाहरे आइ। उ रण्डी क भेस में सजीभइ रही। अउर ओकरी इरादा बहोत प्रबल रही। 11उ वाचाल अउर ओकर प्रबल इरादे क रही। उ घरे में कबहुँ ठहरइ नाही चाहेस। 12उ कबहुँ-कबहुँ गलियन में, कबहुँ चउराहन पइ, अउर हर केउ क नोक्कड़े पइ घात लगावत रही। 13उ ओका रोक लिहस अउ ओका धरेस। उ ओका निर्लज्ज मुँहे स चूमेस, फुन ओहसे बोली, 14“आजु मोका मेलबलि अर्पण किहा। मई आपन प्रतिग्या परमेस्सर बरे पूरी कइ लिहेउँ। 15एह बरे मई तोहसे मिलइ अउर तोहका यह कहे बरे बाहरे आएहउँ कि आ अउर मोर दावत में सामिल होजा। मई तोहार तलास में रही अउर अंत में तोहका पाए लिहेउँ। 16मई मिस्र क मलमले क रंगन स भरी भइ चादर स सेज सजाएउँ ह। 17मई आपन सेज क गंधरस, दालचीनी अउर अगर गंध स सुगंधित किहेउँ ह। 18तू मोरे लगे आवा। भोर क किरण तलक दाखरस पिअत रही, हम आपुस में भोग करत रही। 19मोर पति घरे पइ नाही अहई। उ दूर जात्रा पइ गवा अहइ। 20उ आपन थैली रूपाया स भरिके लइ गवा अहइ अउर पुन्नवासी तलक घरे पइ नाही होइ।”

21उ ओका लुभावना सब्दन स मोह लिहस। ओका मीठ मधुरवाणी स फुसलाइ लिहस। 22उ फउसन ओकरे पाछे अइसे होइ लिहस जइसे कउनो बर्धा क जबह करइ बरे ले जाया जात ह। उ अइस चलत ह जइसे कउनो मूरख जालि में गोइ धरत होइ। 23जब तलक एक तीर ओकर हिरदय नाही बेधी तब तलक उ पंछी सा जालि पइ बगैर इ जाने दूट पड़ी कि जालि ओकर प्राण हरि लेइ।

24तउ मोरे पूतो, अब मोर बात सुना अउर जउन कछू मई कहत हउँ ओह पइ धियान द्या। 25आपन मन कुलटा क रहन में जिन हींचइ द्या अउर ओका ओकरे रहन पइ जिन भटकइ द्या। 26केतने ही सिकार उ मार गिराएन ह। उ जेनका मारेस ओनकर जमघट बहोत बड़ा बाटइ। 27ओकर

घर उ राजमार्ग अहइ जउन कब्र क जात ह अउर तरखाले मउते क कालकोठरी में उतरत ह।

### सुबुद्धि क पुकार

8 का बुद्धि तोहका गोहरावत नाही अहइ? का समुझबूझ ऊँचकी अवाज स तोहका नाही बुलावत अहइ?

2उ राह क किनारे ऊँचे ठउसन पइ अउर चौराहे पइ खड़ी रहत ह।

3उ सहर क जाइवालो दुआसन क सहारे सिंह दुआर क ऊपर गोहराइके कहत ह,

4“हे लोगो, मई तोहका गोहरावत हउँ, मइ समूची मानवजाति बरे अवाज अठावत हउँ।

5अरे नादा लोगो! बुद्धिमानी स रहइ क सिखा तू जउन मूरख बना अहा समुझबूझ सिखा।

6सुना। काहेकि मोरे लगे कहइ क उत्तम बातन अहई, आपन मुँहन खोलति हउँ, जउन कहइ क उचित बा

7मेरे मुखे स तउ उहइ निकरत ह जउन फुरइ अहइ, काहेकि मोरे ओठन क दुट्ठता स घिन अहइ।

8मोरे मुँहे स नकलइ वाले सबइ सब्द निआव स पूर्ण अहइ। ओन में स कउनो भी धोका देइ वाला नाही अहइ।

9विचारवान मनई बरे उ सबइ साफ साफ अहई अउर गियानी जन बरे उ सबइ सब देख रहित अहई।

10चाँदी नाही बल्कि तू मोर हिदायत ग्रहण करा उत्तम सोना नाही बल्कि तू मोर गियान ल्या।

11सुबुद्धि रत्नन मणि माणिकन स जियादा कीमती अहई। तोहार अइसी मनचाही कउनो वस्तु स ओकर तुलना नाही होइ।”

### सुबुद्धि का करत ह

12“मई बुद्धि अउर गियान क संग रहत हउँ। नीक अउर विवेक मोर मीत अहइ।।

13यहोवा स डरब, बुराई स घिना करब अहइ। स्वार्थीपन अउर घमण्ड, बुराइ क मारग झुटी मुँह स मई घिना करत हउँ।

14मोर लगे परामर्स अउ गियान अहइ। मोरे लगे बुद्धि सक्ती अहइ।

15मोरे ही सहारे राजा राज्ज करत ही, अउर सासक नेम रचत ही, जउन निआउ स पूर्ण अहइ।

16केवल मोरी ही मदद स धरती क सबइ नीक सासक राज्ज चलावत हीं।

17जउन मोहसे पिरेम करत हीं, मई भी ओनसे पिरेम करत हउँ, मोका जउन हेरत ही, मोका पाइ लेत ही।

18सम्पत्तियन अउ आदर मोर संग अहई। मई खरी सम्पत्ति अउ जस देत हउँ।

19मोर फल सोना स उत्तम अहई। मई जउन उपजावत हउँ, उ सुद्ध-चाँदी स जियादा नीक अहइ।

20मई निआउ क मारग क संग संग सत्य क मारग पइ चलत आवत हउँ।

21मोहसे जउन पिरेम करतेन ओनका मई धन देत हउँ, अउर ओनकर भंडार भरि देत हउँ।

22यहोवा सबइ चिजियन क रचइ स पहिले आपन पुराने करमन स भी पहिले मोका रचेस ह।

23मोर रचना सनातन काल में भइ रहा। धरती क रचान स पहिले मोर रचान भइ रहा।

24जब मोरे रचना कीन्हा गवा रहा तब न तउ सागर रहा अउर न ही पानी क सोता रहेन।

25मोका पहाड़न पहाड़ियन क थिर करइ स पहिले ही जन्म दीन्ह गवा।

26धरती क रचना, या ओकर खेत या जब धरती क, धूल कण रचा गएन। ओसे पहिले मोका रचेस ह।

27जब यहोवा अकासे क कायम किहे रहा ओहसे भी पहिले मोर अस्तित्व रहा। जब यहोवा सागर क पइ छितिज रेखा खिंचे रहा ओहसे भी पहिले मोर अस्तित्व रहा।

28उ जब अकासे में सघन बादल टिकाए रहा, अउर गहिर सागर क पानी स भरे रहा तउ स भी मई हुवाँ रहा।

29जब उ समुदर क चउहद्दी बाँधे रहा ताकि पानी ओहसे आगे न चला जाइ मई हुवाँ रहा। जब उ धरती क नैवन रखे रहा ओहसे पहिले मई राह।

30तब मई ओकरे संग कुसल सिल्पी स रहेउँ, मई दिन-प्रतिदिन आनन्द स पूरिपूर्ण होत चली गएउँ। ओकर समन्वा हमेसा आनन्द मनावत।

31ओकर पूरी दुनिया स मई आनन्दित रहेउँ। मोर खुसी समूचइ मानवता रही।

32तउ अब, मोर पूतो, मोर बात सुना। ओ धन्न अहइ जउन जन मोर रह पइ चलत ही।

33मोर उपदेस सुना अउर बुद्धिमान बना। एनकर उपेच्छा जिन करा।

34उहइ जन धन्न अहइ, जउन मोर बात सुनत अउर रोज मोरे दुआरन पइ दृस्टि लगाए रहत एवं मोर ड्योढ़ी पइ बाट जोहत रहत ह।

35काहेकि जउन मोका पाइ लेत उहइ जिन्नगी पावत अउर उ यहोवा क अनुग्रह पावत ह।

36मुला उ जउन मोर खिलाफ पाप करत ह खूद ही चोट खावत ह उ जउन मोहे स घिना करत ह उ मउत स गले लगावत ह।”

### सुबुद्धि अउर दुबुद्धि

9 बुद्धि आपन घर बनाएस ह। उ आपन सात खम्भन\* गढ़ेन ह। 2उ आपन खइया क तइयार किहस अउर मिलावा भवा दाखरस आपन खइया क खाइ क मेजे पइ सजाइ लिहस ह। 3अउर आपन दासियन क सहर क सबन त ऊँचके जगहिया स बोलावइ क पठाएस ह। 4“जउन भी नादान अहइ, किरपा कइ क हिआँ पइ आइ।” जउन मनइ क समुझ नाही अहइ उ ओनसे कहत ह, 5“आवई, मोर खइया क खाई, अउर मोर दाखरस पिअई जेका मई बनाएस हउँ। 6तू पचे आपन नादानी तजि द्या तउ तू जिअब्या। समुझ-बूझिके मारग पइ सिधे आगे बढ़ा।”

**सात खम्भन** प्राचीन इन्वाएल में बहोत सारे घरन में चार कमरा होत रहेन जेहमा सात खम्भन छत क सहारा देइ बरे होत रहेन। इ इ दिखावत ह कि बुद्धि क लगे नीक अउर गेस घर होत रहेन।

7जउन कउनो मसखरी करइवाले क सुधार देत ह उ अपमाने क बोलावत ह, अउर जउन कउनो दुट्ट मनइ क डॉट फटकार करइ चोट खात ह। 8मसखरी करइवाले वाले क कबहुँ भी जिन डॉटा-फटकारा, नाही तउ उ पचे तू पचन स ही घिना करइ लागी। मुला अगर तू कउनो विवेकी क डॉटा-टफकारा तउ उ तू पचन स पिरम ही करी। 9बुद्धिमान व्यक्ति क चेतावा, उ अउर जियादा बुद्धिमान होइ। कउनो नीक व्यक्ति क क सिखावा, उ आपन गियन क बुद्धि करी।

10यहोवा स डर, बुद्धि क हासिल करब क पहिला कदम बाटइ। यहोवा क गियान, समझबूझ क हासिल क पहिला कदम अहइ। 11काहेकि मोर जरिये ही तोहार उमिर बढ़ी, तोहार दिन बढ़िही, अउर तोहरी जिन्नगी में बरिस जुड़त ही जइही। 12“अगर तू बुद्धिमान अहा, सुदबुद्धि तोहका प्रतिफल देइ। अगर तू मसखरी करइवाले अहा, तउ तू अकेल्ले कस्ट झेलब्या।

13मूरखता अइसी मेहरारू क नाई अहइ जउन बातन बनावत ह किन्तु कछू नाही जानत ह। ओनके लगे गियान नाही अहइ। 14आपन घरे क दुआरे पइ उ बइठी रहत ही, सहर क सर्वोच्च बिंदु पइ उ आसन जमावत ह। 15उ हर एक क जउन ओकर ओर निगाह भी नाही करत ही, पुकारती ह, 16“अरे नादान लोगो तू पचे भितरे चले आवा!” उ इ ओनसे कहत ह जेनके लगे सुझ-बूझ क कमी अहइ। 17“चोरी क पानी तउ मीठ-मीठ होत ह, छुपके खइया क खावा गवा भोजन, बहोतइ सुआद देत ह।”

18मुला उ पचे इ नाही जानतेन कि हुआँ मृतकन क बास होत ह अउर उ सबइ जेका उ पहिले निओता दिहस रहा अब कब्र में अहई।

### सुलेमान क कहावत

10 इ सबइ सुलेमान क नीतिवचन (कहावतन) अहइ। एक बुद्धिमान पूत अपने बाप क आनन्द देत ह। मुला एकठु मूरख पूत, महतारी क दुःख देत ह।

2बुराई स कमाए भए धन क खजाना हमेसा बियर्थ रहत ही। जबकि धार्मिकता मउत स छोड़वत ह। सत्य क मारग हम लगन क मउत स बचावत ह।

3यहोवा कउनो भी नेक व्यक्ति क भूखा नाही रहइ देत ह। मुला दुट्ट क लालसा पइ पानी फेरि देत ह।

4सुस्त हाथ मनई क दरिद कइ देत ह, मुला मेहनती हाथ सम्पत्ति लिआवत ही।

5ग्रीस्मकाल में जउन उपज क बटोरके राखत ह, उहइ पूत बुद्धिमान अहइ; किन्तु जउन कटनी क समइ में सोवत ह उ पूत सर्मनाक होत ह।

6नीक लोगन क मुँइ पइ आसीसन क मुकुट होत ह मुला दुट्ट क मुँह हिंसा स भरा होत ह।

7नीक लोगन क यादगर आसीस होत ह, मुला दुट्ट लोगन क नाउँ मिट जाहीं।

8उ आग्या मानी जेकर मन विवेकसील अहइ, जबकि बक्वास मूरख नस्ट होइ जाइ।

9विवेकवाला मनई सुरच्छित रहत ह, मुला टेढ़ी चाल चलइवाले क भण्डा फूटी।

10जउन बुरे इरादे स आँखी क इसारा करइ, तउ ओका ओहसे दुःख ही मिली। अउर बकवासी मूरख नस्ट होइ जाइ।

11धर्मी व्यक्ति क मुँह तउ जिन्नगी क सोता अहइ, मुला दुट्ठ व्यक्ति क मुँह हिंसा स भरा पड़त ह।

12घिना वाद-विवाद क कारण अहइ। जबकि पिरेम सबइ अपराध क ढोंपि लेत ह।

13बुद्धि क निवास हमेसा समुझदार ओठन पड़ होत ह, मुला जेनमँ नीक बुरा क बोध नाही होत, ओकरे पिठिया पड़ डंडा होत ह।

14बुद्धिमान लोग, गियान क संचित करत रहेन, भुला मूरख क बाणी विपति क बोलावत ह।

15धनिक क धन, ओनकर मजबूत किला होत, दीन क दीनता पड़ ओकर बिनास अहइ।

16धर्मी मनइ क कमाई ओनका जिन्नगी प्रदान करत ह। मुला दुट्ठ मनइ आपन पाप बरे कीमत चुकावत ह।

17उ जउन अनुसासन स सीखत ह उ दूसर क जिन्नगी क मारग बरे निर्देस दे सकत ह। मुला उ जउन हिदायत क उपेक्षा करत ह अइसा मनई दूसर क भटकावा करत ह।

18जउन मनई बैर पड़ परदा डाए रखत ह, उ मिथ्यवादी अहइ अउर उ जउन निन्दा फइलावत ह, मूरख अहइ।

19जियादा बोलइ स, कबहुँ पाप दूर नाही होत मुला जउन आपन जवान क लगाम देता ह, उहइ बुद्धिमान अहइ।

20धर्मी क वाणी विसुद्ध चाँदी अहइ, मुला दुट्ठ क हिरदय क कउनो मोल नाही।

21धर्मी जन क बातन चाँदी क नाई होत ह। मुला दुट्ठ मनइ क सुझाव क कउनो कीमत नाही होत ह।

22यहोवा क वरदान स जउन धन मिलत ह, ओकरे संग उ कउनो दुःख नाही जोड़त।

23बुरे आचार मँ मूरख क सुख मिलत ह, मुला एक समुझदार विवेक मँ सुख लेत ह।

24जेहसे मूरख भयभीत होत ह ओका उहइ क कस्ट झेलइ क होइ। किन्तु एक धर्मी मनइ आपन इच्छा स आसिसित कीन्ह जाइ।

25आँधी जब गुजरत ह, दुट्ठ उड़ जात ही, मुला धर्मी लोग तउ सदा ही बिना हिले दुले खड़ा रहत ही।

26काम पड़ जउन कउनो आलसी क पठवत ह, उ बन जात ह जइसे अम्ल सिरका दँत क खटावत ह, अउर धुआँ आँखिन क तड़पावत दुःख देत ह।

27यहोवा क भय उमिर बढ़ावत ह। मुला एक दुट्ठ मनई क उमिर तउ घट जात ह।

28धर्मी क भविस्स आनन्द-उल्लास अहइ। मुला दुट्ठ क आसा तउ बियर्थ रहि जात ह।

29इमानदार लोगन बरे यहोवा क मारग सरणस्थल अहइ; मुला जउन बुरा जन अहइँ, ओनकर इ बिनास अहइ।

30धर्मी जन क कबहुँ उखाड़ा न जाइ, मुला दुट्ठ धरती पड़ कबहुँ टिक नाही पाइ। 31धर्मी क मुँह स बुद्धि क धार बहत ह, मुला कुटिल जीभ क तउ काटिके लोकावा जाइ।

32धर्मी क ओठ जउन उचित अहइ जानत ही, मुला दुट्ठ क मुँह बस कुटिल बातन बोलन ह।

1 यहोवा छले क तराजू स घिना करत ह, मुला ओकर आनंद सही नाप-तौल पड़ अहइ।

2अभिमान क संग अपमान आवत ह, मुला नम्रता क संग विवेक आवत ह।

3इमानदार लोगन क नेकी ओनकर अगुवाई करत ह, मुला बिस्सासघाती क कपट ओनका विनास करत ह।

4जब परमेस्सर लोगन क परखत ह तउ धन बियर्थ रहत ह। इ काम नाही आवत ह। मुला तब नेकी लोगन क मउत स बचावत ह।

5नेकी निर्देख जन बरे मारग सरल सोझ बनावत ह, मुला दुट्ठ जन क ओकर आपन ही दुट्ठई धूरि चटाइ देत ह।

6नेकी सज्जन लोगन क छोड़ावत ह। मुला धोकाबाज आपन ही बुरे योजना जालि क मँ फँस जात ह।

7जब दुट्ठ मरत ह तउ ओकर बरे कउनो आसा नाही रहत ह। बुरे मनइ क आसा बियर्थ होइ जाइ।

8धर्मी जन तउ बिपति स छुटकारा पाइ लेत ह, जबकि ओकरे बदले उ दुट्ठ पड़ आइ पड़त ह।

9बुरे लोगन क वाणी आपन पड़ोसी क लइ बूड़त ह। मुला गियान क जरिये धर्मी जन तउ बचि निकरत ह।

10धर्मी क विकास सहर क आनन्द स भरि देत ह। जबकि दुट्ठ क नास हर्षनाद उपजावत।

11सच्चे जने क आसीस तउ सहर क ऊँच उठाइ देत ह मुला दुट्ठ क बातन खाले गिराइ देत ही।

12अइसा मनई जेकरे लगे विवेक नाही होत, उ आपन पड़ोसी क अपमान करत ह, मुला समुझदार मनई चुपचाप रहत ह।

13जउन अफवाह फैलावत ह उ भेद परगट करत ह, किन्तु बिस्सासी जन भेद क छुपावत ह।

14जहाँ मारग दर्सन नाही, हुआँ रास्ट्र पतित होत ह, मुला बहुत सलाहकार जीत क सुनिश्चित करत ही।

15जउन अनजाने मनइयन क जामिन बनत ह, उ निहचइ ही पीड़ा उठाइ। मुला जउन जामिन बनावइ स बचत ह उ आपन आप क सुरच्छा करत ह।

16दयालु मेहरारू तउ आदर पावत ह जबकि क्रूर मनई क लाभ सिरिफ धन अहइ।

17दयालु मनई खुद आपन भला करत ह, जबकि निर्दयी मनई खुद पड़ विपत्ति लिआवत ह।

18दुट्ठ जन कपट भरी कमाई कमाता ह, मुला जउन नेकी क बोवत ह, ओका तउ सच्चा प्रतिफल क पाउब अहइ।

19उ जउन धार्मिकता मँ मजबूत अहइ लम्बी उमिर पावत ह। किन्तु जउन बुराई क अनुसरण करत ह कुसमइ मरि जात ह।

20कुटिल जनन स, यहोवा घिना करत ह मुला उ ओनसे खुस होत ह जेनका जिन्नगी स्वच्छ होत ही।

21इ जाना निहचित अहइ कि दुट्ठ जन कबहुँ सजा स नाही बचिही। किन्तु धर्मी जन अउर ओनकर गदेलन सजा स बचिही। 22जउन नीक बुरा मँ फरक नाही करत, उ मेहरारू क सुन्नरता अइसी अहइ जइसे कउनो सुअरे क थूथुन मँ सोना क नथुनी।

23धर्मी मनई क अभिलासा क भलाई में अंत होत ह। मुला दुट्ट क आसा सिरिफ किरोध में अंत होत ह।

24जउन उदार अजाद भाव स दान देत ह, उन्ती करिही। मुल उ जउन ओन चिजियन क आपन लगे रखत ह जेका देइ चाही, ओकर लगे उ नाही होइ जेन्का जरुरत ओका अहइ।

25उदार जन तउ हमेसा, फूली फली अउर जउन दूसरन क पिआस बुझाइ, ओकर तउ पिआस अपने आप ही बुझी।

26अन्न क जमाखोर लोगन क गारी खात ही, मुला जउन ओका बेचइ क राजी होत ह ओकरे मूँड़ बरदान क मकुट स सजत ह।

27जउन भलाई पावइ क जतन करत ह उहइ जस पावत ह; मुला जउन बुराई क पाछे पड़ा रहत ओकरे तउ हथवा बुराई ही लागत ह।

28जउन कउनो आपन धने क भरोसा करत ह, झरि जाइ उ बेजीव झुरान पाते जइसा; मुला धर्मी जन नवी हरियर कोपर स हरा-भरा ही रही।

29जउने आपन घराने पइ अपमान लिआइ ओका कछू भी नाही मिली। एक मूरख, बुद्धिमान क दास बनिके रही।

30धर्मी मनई क करम-फल "जिन्नगी क बृच्छ" अहइ, अउर जउन जन आतिमान क जीत लेत ह, उहइ बुद्धिमान अहइ।

31अगर इ धरती पइ धर्मी जन आपन उचित प्रतिफल पावत ही, तउ फुन पापी अउ दुट्ट जन आपन कुकरमन क केतना फल हिआँ पइही।

**12** जउन अनुसासन स पिरेम करत ह, उ तउ गियान स भी पिरेम करत ह। किन्तु जउन सुधार स घिना करत ह तउ उ निरा मूरख अहइ। 2सज्जन मनई यहोवा क किरपा पावत ह, मुला छल छछंदी क यहोवा सजा देत ह।

3दुट्टता, कउनो जने क थिर नाही कइ सकत किन्तु धर्मी जन कबहुँ उखड़ नाही पावत ह।

4एक उत्तिम पत्नी क संग पति खुस अउर अभिमानी होत ह। किन्तु उ पत्नी जउन आपन मनसेधू क लजावत ह उ ओका तने क बेरामी जइसे होत ह।

5धर्मी मनई क सबइ योजना निआव स पूर्ण होत ही जबकि दुट्ट क सलाह कपट स भरी होत ही।

6दुट्ट क सब्द लोगन क मारइ बरे घात में रहत ही। मुला सज्जन क मुहँ ओनका बचावत ह।

7जउन खोट होत ही उखाड़ फेंका जात ही, मुला धर्मी मनई क घराना टिका रहत ह।

8मनई आपन अच्छा बातन जउन उ बोलत ह क मुताबिक तारीफ पावत ह। मुला उ जउन मूरख अहइ ओका तुच्छ जाना जात ह।

9सामान्य मनई बनिके मेहनत करब उत्तिम अहइ एकरे कि भूखा रहिके महत्वपूर्ण मनई स सुआँगा भरब।

10धर्मी मनई आपन जानाबरन तलक क धियान रखत ह; किन्तु दुट्ट मनइ सदा ही जालिम होत ह।

11जउन अपने खेते में काम करत ह ओकरे लगे खाइके इफरात होइ। मुला जउन बियर्थ बिचारन क पाछा करत ह ओकरे लगे विवेक क अभाव रहत ह।

12दुट्ट जन बुरे योजना क इच्छा करत ह। मुला धर्मी जन क जइ फल लावत ह।

13पापी मनई क ओकर आपन ही सब्द ओका जाल में फँसाइ लेत ह। किन्तु खरा मनई बिपति स बच निकरत ह।

14आपन अच्छी बातन स जउन उ कहत ह मनइ अच्छा प्रतिफल पावत ह। इहइ तरह स एक मनइ आपन कार्य क अनुसार लाभ पावत ह।

15मूरख क आपन मारग ठीक जान पड़त ह, मुला बुद्धिमान मनई सम्मति सुनत ह।

16मूरख जन आपन झुँझलाहट इटपट देखावत ह मुला बुद्धिमान अपमान क उपेक्षा करत ह।

17फुरइ स पूर्ण गवाह खरी गवाही देत ह, मुला लबार साच्छी झूठी बातन बनावत ह।

18बिन बिचारे वाणी तरवार स छेदत, मुला विवेकी क वाणी घावन क भरत ह।

19फुरइ स भरी वाणी हमेसा हमेसा टिकी रहत ह, मुला झूठी जीभ बस छिन भर क टिकत ह।

20ओनके मने में छल-कपट भरा रहत ह, जउन कुचक्रे स भरी योजना रचत ही। मुला जउन सान्ति क बढ़ावा देत ही, आनन्द पावत ही।

21धर्मी जने पइ कबहुँ विपति नाही पड़ी, मुला दुट्टन क तउ विपतियन घेरिही।

22अइसे ओठन क यहोवा घिना करत ह जउन झूठ बोलत ही; मुला ओन लोगन स जउन सच स पूर्ण अहइँ, उ खुस रहत ह।

23गियानी जियादा बोलत नाही ह, चुप रहत ह मुला मूरख जियादा बोलिके आपन अगियानी क देखावत ह।

24मेहनती हाथ तउ सासन करिही, मुला आलस क परिणाम बेगार होइ।

25चिंता स भरा मन मनई क दबोच लेत ह। किन्तु सुभ समाचार ओका हर्स स भरि देत ही।

26धर्मी मनई आपन पड़ोसी क मार्गदर्शन करत ह। मुला दुट्टन क चाल ओनही क भटकावत ह।

27आलसी मनई आपन आलस क कारण आपन काम पूरा नाही कर सकत ह। मुला एक मेहनती मनइ आपन सखत मेहनत स धन दोलत पावत ह।

28नेकी क मारग में जिन्नगी रहत ह, अउर उ राहे क किनारे अमरता बसत ह।

**13** समुझदार पूत आपन बाप क सिच्छा पइ कान देत ह। मुला बिद्रोह पूत झिड़की पइ भी धियान नाही देत ह। 2सज्जन आपन वाणी क सुफल क आनंद लेत ही मुला दुर्जन तउ सदा हिंसा चाहत ह।

3जउन आपन वाणी क बरे चौकस रहत ह, उ आपन जिन्नगी क रच्छ करत ह। पर जउन गाल बजावत रहत ह, आपन बिनास क पावत ह।

4आलसी मनइ चिजियन क लालसा करत ह पर कछू नाही पावत, मुला एक ठू परिस्रमी क जेतनी भी इच्छी अहइ, पूर्ण होइ जात ह।

5धर्मी मनई ओहसे घिना करत ह, जउन झूठ अहइ जबकि दुट्ट लज्जा अउ अपमान लिआवत ही।

6सच्चरित्र मनई क रच्छा करइवाली नेकी अहइ; जबकि दुट्ठता पापी मनइयन क नास करत ह।

7एक ठु मनई जउन धन क देखावा करत ह, किंतु ओकरे लगे कछु भी नाही होत ह। किन्तु एक दूसर जउन गरीबी क जिन्नगी गुजारत ह ओकरे लगे बहोत धन होत ह। 8धनवान क आपन जिन्नगी बचावइ ओकर धन फिरौती में लगावइ पड़ी मुला दीन जन कउनो धमकी क भय स अजाद अहइ।

9धर्मी मनई क जिन्नगी प्रकास क नाई चमचमात ह। किंतु दुट्ठ मनई क दिया बुझाइ दीन्ह जात ह।

10अहंकार सिरिफ झगड़न क पनपावत ह। मुला विवेक उ अहइ जउन दूसर क राय क मानत ह।

11बेइमानी क धन यूँ ही धूरि होइ जाता ह मुला जउन परिस्त्रम कइके धन संचित करत ह, ओकर धन बढ़त ह।

12जदि कउनो आसा नाही होइ तउ मन उदास होइ जात ह, मुला कामना क पूर्ति खुसी देत ह।

13जउन जन सिच्छा क निरादर करत ह, ओका एकर कीमत चुकावइ क पड़ी। मुला जउन सिच्छा क आदर करत ह, उ तउ एकर प्रतिफल पावत ह।

14विवेक क सिच्छा जिन्नगी क उद्गम सोता बाटइ, उ लोगन क मउत क फदे स बचावत ह।

15उ जउन अच्छा समुझ बूझ रखत ह खियाती अर्जित करत ह, पर विस्सासघात सिरफ विस्साघात ही लावत ह।

16हर एक विवेकी गियान क साथ काम करत ह, मुला एक मूरख आपन बेवकूफी परगट करत ह।

17दुट्ठ सन्देसवाहक बिपति में पड़त ह, मुला बिस्सास क जोगग दूत सांति देत ह।

18अइसा मनई जउन सिच्छा क उपेक्षा करत ह, ओह पइ लज्जा अउ गरीबी आइ पड़त ह। मुला जउन डॉट फटकार पइ कान देत ह, उ महत्व वाला मनइ होइ जाइ।

19कउनो इच्छा क पूर होइ जाब मने क मधुर लागत ह। किन्तु मूरखन क बुरा क तजब नाही भावत ह।

20बुद्धिमान क संगति, मनई क बुद्धिमान बनावत ह। किंतु मूरखन क साथी नस्त होइ जात ह।

21दुर्भाग्य पापियन क पाछा करत रहत ह; किंतु धर्मियन प्रतिफले में खुसहाली पावत ही।

22सज्जन आपन नाती-पोतन क धन सम्पति छोड़तह जबकि पापी क धन धर्मियन क खातिर संचित होत रहत ह।

23दीन जन क खेत भरपूर फसल देत ह, मुला अनिआव ओका बुहार लइ जात ह।

24जउन आपन पूते क कबहुँ नाही दण्डित करत, उ आपन पूत क दुसमन अहइ। मुला जउन आपन पूत स पिरेम करत ह तउ उ ओका अनुसासन में रखत ह।

25धर्मी जन, मने स खात अउर पूरी तरह तृप्त होत ही किन्तु दुट्ठ क पास प्रयाप्त भोजन नाही होत ह।

**14** बुद्धिमान मेहरारू आपन घर बनावत ह; मुला मूरख मेहरारू आपन ही हाथन स आपन घर उजाड़ देत ह। 2उ लोग जउन सच्ची राह पइ चलत ह आदर क संग उ यहोवा स डेरत ह। मुला ओकर जेका राह टेढ़ी अहइ उ यहोवा स घिना करत ह।

3मूरख क बातन ओकरे बरे मुसीबत लावत ह। किंतु बुद्धिमानन क वाणी ओकर रच्छा करत ह।

4जहाँ बर्धा नाही होतेन, खरिहान खाली रहत ही, बर्धा क बल पइ ही भरपूर फसल होत ह।

5एक सच्चा साच्छी कबहुँ नाही छलत ह मुला झूठा गवाह, झूठ उगलत रहत ह।

6एक अनुसासनहीन मनइ बुद्धि तलास करत ह किन्तु एका नाही पावत ह। मुला जउन सिखइ क इच्छा करत ह आसानी स गियान पावत ह।

7मूरख क संगत स दूरी बनाए राखा, काहेकि ओकरी वाणी में तू गियान नाही पउब्या।

8गियानी जनन क गियान इहइ में अहइ कि उ पचे आपन रहन क चिंतन करइँ। किन्तु मूरखन आपन मूरखता स धोका खात ह।

9एक मूरख आपन कीन्ह भवा बुरा करम क दण्ड पइ जेका ओका देइ होइ हसँत ह। किन्तु एक बुद्धि मान मनइ छमा पावइ क जतन करत ह।

10हर मन आपन निजी पीड़ा क जानत ह, अउर ओकर दुःख कउनो नाही बाँटि पावत ह।

11दुट्ठ क इमारत क दहाइ दीन्ह जाइ, मुला सज्जन क डेर फूली फली।

12अइसी ही रह होत ह जउन मनई क उचित जान पड़त ह; मुला परिणाम में उ मउत क लइ जात ह।

13हँसत भए भी हिरदय रोवत रहि सकत ह, अउर आनन्द दुःखे में बदल सकत ह।

14बिस्सासहीन क, आपन कुमार्गन क फल भोगइ क पड़ी; अउर सज्जन सुमार्गन क प्रतिफल पाइ।

15एक नादान सब कछू क बिस्सास कइ लेत ह। मुला विवेकी जन सोच-समुझिके गोड़ धरत ह।

16बुद्धिमान मनई सचेत रहत ह अउर आपन क पापे स दूर रखत ह। मुला मूरख मनई लापरवाह होत ह अउर अतिबिस्सास रखत ह।

17अइसा मनई जेका हाली किरोध आवत ह, उ मूरखता स भरा काम कइ जात ह अउर उ मनई छल-छंदी होत ह उ तउ सब ही क पावत ह

18एक नादान जन क बस मूरखता मिल पावत ह मुला एक बुद्धिमान मनइ क सिरे पइ गियान क मकुट होत ह।

19दुर्जन नीक लोगन क समन्वा सिर निहुरइही, अउर दुट्ठ मनइ इमानदार लोगन क जरिए हराइ जाइ।

20गरीब क ओकर पड़ोसी भी दूर रखत ही; मुला धनी जन क मीत बहोत होत ही।

21जउन आपन पड़ोसी क तुच्छ मानत ह उ पाप करत ह मुला जउन गरीबन पइ दया करत ह उ जन धन्न अहइ।

22अइसे मनइयन जउन सडयंत्र रचत ही का गलती नाही करत ही? मुला जउन भली योजना रचत ही, उ तउ पिरेम अउर बिस्सास पावत ही।

23मेहनत क प्रतिफल मिलत ही; मुला कोरा बकवास बस दीनता लावत ह।

24विवेकी क प्रतिफले में धन मिलत ह; पर मूरखन क प्रतिफले में सिरिफ मूरखता मिलत ह।

25 एक सच्चा गवाह अनेक जिन्नगी बचावत ह। पर झूठा गवाह, तबाही लावत ह।

26 अइसा मनई जउन परमेस्सर स डेरात ह, उ परमेस्सर म सुरच्छित जगह पावत ह। अउर हुवई ओनके गदेलन क भी सरण मिलत ह।

27 यहोवा क भय जिन्नगी क सोता होत ह, उ मनई क मउत क फंदे स बचावत ह।

28 विस्तृत बिसाल परजा राजा क महिमा अहइ, मुला परजा बिना राजा नस्ट होइ जात ह।

29 धीरज स पूर मनई बहोतइ समुझ-बूझ राखत ह। मुला अइसा मनई जेका हाली स किरोध आवइ उ तउ आपन ही बेवकूफी देखावत ह।

30 सान्त मन तने क जिन्नगी देत ह मुला जलन हाइन तलक नास कइ देत ह।

31 जउन गरीब क सतावत ह, उ तउ सबक सिरजनहार क अपमान करत ह। मुला उ तउ कउनो गरीब पइ दयालु रहत ह, उ परमेस्सर क आदर करत ह।

32 जब विनास आवत ह तउ दुट्ठ मनइ तबाह होइ जाइ; मुला धर्मी जन तउ मउत में भी सुरच्छित स्थान पइ रहत ह।

33 बुद्धिमान क हिरदय में बुद्धि क निवास होत ह, अउर मूरखन क बीच भी उ आपन क जनावत ह।

34 नेकी स रास्ट्र क उत्थान होत ह; मुला पाप हर जाति क कलंक होत ह।

35 त्रिवेकी सेवक, राजा क खुसी अहइ, मुला उ सेवक जउन मूरख होत ह उ ओकर किरोध जगावत ह।

**15** कोमल जवाबे स किरोध सांत होत ह; किन्तु कठोर वचन किरोध क भड़कावत ह।

2 जब कउनो बुद्धिमान बोलत ह तउ दूसर ओका सुनइ चाहत ह, मुला मूरख क मुँह बेवकूफी उगलत ह।

3 यहोवा क आँखी हर कहूँ लगी भई अहइ। उ नीक-बुरे क देखत रहत ह।

4 दयावाली बात जिन्नगी क बृच्छ क नाई अहइ। मुला कपट स भरी वाणी मने क तोड़ देत ह।

5 मूरख आपन बाप क डॉट फटकार क तिरस्कार करत ह। मुला जउन डॉट फटकार पइ कान देत ह बुद्धिमान होत ह।

6 धर्मिन क घरे में बहोत सारा चिज रहत ह। दुट्ठ क कमाई ओह पइ मुसिबत लिआवत ह।

7 बुद्धिमान क वाणी गियान फइलावत ह, मुला मूरखन क मन अइसा नाहीं करत ह।

8 यहोवा दुट्ठ क चढ़ाव स घिना करत ह मुला ओका सज्जन क पराथन ही खुस कइ देत ह।

9 दुट्ठन क राहन स यहोवा घिना करत ह। मुला जउन धार्मिकता क राहे पइ चलत ही, ओनसे उ पिरेम करत ह।

10 ओकरी प्रतीच्छा में कठोर दण्ड रहत ह जउन राहे स भटक जात, अउर जउन सुधार स घिना करत ह, उ निहचय मरि जात ह।

11 जबकि यहोवा क समन्वा मउत अउ बिनासे क रहस्य खुला पड़ा अहई। तउ निहचित रूप स उ लोगन क हिरदयन क बारे में बहोत जियादा जानत ह।

12 उ व्यक्ति जउन डॉट फटकार करइवालन क मजाक उड़ावत ह, उ विवेकी स परामर्स नाहीं लेत।

13 मने क खुसी मुँह क चमकावत, मुला मने क दर्द आतिमा क कुचरि देत ह।

14 जउने मने क नीक-बुरा क बोध होत ह उ तउ गियान क खोज में रहत ह मुला मूरख क मन, मूरखता पइ लागत ह। 15 गरीब व्यक्ति बरे हर एक दिन बुरा अहइ, किन्तु आनन्दित हिरदय बरे हर एक दिन उत्सव क नाई अहइ।

16 बैचैनी क संग प्रचुर धन उत्तिम नाहीं, यहोवा भय मानत रहइ स तनिक भी धन उत्तिम अहइ।

17 घिना क संग जियादा खइया स, पिरेम क संग थोड़ा भोजन उत्तिम अहइ।

18 किरोधी जन वाद-विवाद भड़कावत ह। जबकि सहइवाला मनई वाद-बिवाद क सुलझावत ह।

19 आलसी क राह काँटन स रूँधी रहत ही, जबकि सज्जन क मारग राजमार्ग होत ह।

20 विवेकी पूत अपने बाप क खुस करत ह, मुला मूरख मनई अपनी महतारी स घिना करत ह।

21 निर्बुद्धि मनई सोचत ह कि मूरखता मजाक अहइ। मुला समुझदार मनई सोझ राह चलत ह।

22 बिना परामर्स क योजना बिफल होत ही। किन्तु एक मनई अनेक सलाहकारन क परामर्स स सफल होत ही।

23 मनई उचित जवाब देइ स खुस होत ह। जइसा उचित होइ समय क बचन केतना उत्तिम अहइ।

24 बुद्धिमान जन क मारग ओका ऊँच स ऊँच लइ जात ह, अउर ओका मउत क गइहा में गिरइ स बचा रहइ।

25 यहोवा अभिमानी क घरे क छिन्न-भिन्न करत ह। मुला उ गरीब रौँड क भुइयाँ क देखेख करत ह।

26 दुट्ठन क योजना स यहोवा क घिना अहइ। पर सज्जनन क योजना ओका हमेसा भावत ही।

27 लालची मनई अपने घराने पइ हमेसा बदनामी लिआवत ह मुला उहइ सांति स जिअत रहत ह जउन जन-घूस स घिना भाव राखत ह।

28 धर्मी जन बोलइ स पहिले सोचत ह। मुला दुट्ठ जन बेसोचे समुझे बियर्थ बातन बोलत ह।

29 यहोवा दुट्ठन स दूर रहत ह, बहोत दूर; मुला उ धर्मी क पराथना सुनत ह।

30 आनंद स भरी आँखी क चमक मने क हर्षित करत ह, नीक खबर हाइन तलक ताकत पहोंचावत ह।

31 जउन जीवनदायी डॉट सुनत ह, उहइ बुद्धिमान जनन क बीच चैन स रही।

32 अइसा मनई जउन अनुसासन क उपेच्छा करत, उ तउ आपन जिन्नगी क ही रद्द करत ह। मुला जउन सुधार पइ धियान देत ह समुझ-बूझ पावत ह।

33 यहोवा क भय लोगन क गियान सिखावत ह। आदर पावइ स पहिले नम्रता आवत ह।

**16** मनई तउ आपन योजना क बनावत ह, मुला ओनका यहोवा ही कारज क रूप देत ह।

2 मनई क आपन राहन पाप रहित लागत ही; मुला यहोवा ओकरी नियत क परखत ह।



3जउन कछू तू यहोवा क समर्पण करत अहा तोहार सारी जोजनन सफल होइही।

4यहोवा हर एक चिजियन बरे जोजना बनाएस ह, अउर आपन जोजना क मुताबिक दुट्ठन क नास कीन्ह जाब।

5जेनके मने में अहंकार भरा भवा अहइ, ओनसे यहोवा घिना करत ह। एका तू सुनिहचित जाना, कि उ पचे बगैर सजा पाए नाही बचिही।

6वफादारी अउर सच्चाइ स अपराध क खतम किया जा सकत ह। यहोवा क आदर करइ स तू बुराइ स बचब्या।

7यहोवा क जब मनई क राहन भावत ही, उ ओकरे दुस्मनन क भी संग सान्ति स रहइ क मीत बनाइ देत ह।

8अनिआव स मिले जियादा क अपेच्छा, नेकी क संग तनिक मिलब ही उत्तिम अहइ।

9मने में मनई निज राहन रचत ह, मुला यहोवा ओकरे गोड़न क सुनिहचित करत ह।

10राजा जउन बोलत ह नेम बन जात ह। ओका चाही उ निआव स नाही चूकइ।

11यहोवा चाहत ह कि सबइ तराजू अउ बाट खरा होइ। उ चाहत ह कि सबइ व्यापारिक कारोबार निस्पच्छ होइ।

12विवेकी राजा, बुरे करमन स घिना करत ह काहेकि नेकी पइ ही सिंहासन टिकत ह।

13राजा लोगन क निआव स भरी वाणी पसन्द करइ चाही। जउन जन फुरइ बोलत ह, उ पचन्क ओका सम्मान देइ चाइही। 14राजा क कोप मउत क दूत होत ह मुला गियानी जन स ही उ सांत होइ।

15राजा जब खुस होत ह तब सबइ क जिन्नगी उत्तिम होत ह, अगर राजा तोहसे खुस अहइ तउ उ बसंत ऋतु क बर्खा जइसी अहइ।

16विवेक सोना स जियादा उत्तिम अहइ, अउर समुझबूझ पाउब चौंटी स उत्तिम अहइ।

17सज्जन लोगन क राह बदी स दूर रहत ह। जउन आपन राहे क चौकस करत ह, उ आपन जिन्नगी क रखवारी करत ह।

18नास आवइ स पहिले अहंकार आइ जात ह; अउ पतन स पहिले अहंकारी आवत ह।

19स्वाभिमानी लोगन क संग लूटक सम्पति बाँट लेइ स, दीन अउ गरीब लोगन क संग विनम्र रहब उत्तिम अहइ।

20जउन भी आपन कारोबार म अच्छा अहइ उ फूली-फली। अउर जेकर भरोसा यहोवा पइ अहइ उहइ धन्न अहइ।

21बुद्धिमान मनवाला विवेक कहवावत हीं। अउर उ व्यक्ति जउन सवधानी स सब्दन क चुनत ह उ जियादा बिस्सास जोगग होत ह।

22जेनके लगे समुझबूझ अहइ, ओनके बरे समुझबूझ जिन्नगी सोता होत ह, मुला मूरखन क मूढ़ता ओनका सजा दिआवत ह।

23बुद्धिमान क हिरदय आपन वाणी क अनुसासन में धरत ह; अउर बिस्सास जोगग सब्दन क जाइत ह।

24मन क भावइ वाली वाणी सहद जइसी होत ह। ओनका सरलता स ग्रहण किया जात ह अउर तोहार स्वास्थ्य बरे नीक होत ह।

25मारग अइसा भी होत ह जउन उचित जान पड़त ह, मुला परिणाम में उ मउत क जात ह।

26काम करइवाला क भूखे स भरी सबइ इच्छा ओहसे काम करवावत रहत ही। इ भूख ही ओका अगावा ढकेलत ह।

27बुरा मनई सडयंत्र रचत ह, अउर ओकर वाणी अइसी होत ह जइसी झुरसत आगी।

28उत्पाती मनई बात-विवाद भइकावत ह। अउर कानाफूसी करइ वाला निचके क मीतन क फोड़ देत ह।

29आपन पड़ोसी क उ हिसंक फँसाइ लेत ह अउर कुमारग पइ ओका हीच लइ जात ह।

30जब भी मनई आँखी स इसारा कइके योजनन क रचत रहत ह उ बिनासकारी ह। जब पड़ोसी क चोट पहुचावइ बरे जोजना रच लेत ह तउ उ हसँत ह।

31सफेद बार महिमा मुकुट होत ही जउन धर्मी जिन्नगी स मिलत ही।

32धरि जन कउनो जोधा स भी उत्तिम अहइँ, अउर जउन किरोध पइ नियंत्रण धरत ह, उ अइसे मनई स उत्तिम होत ह, जउन पूरे सहर क जीत लेत ह।

33पासा तउ झोरी में डाइ दीन्ह जात ह, मुला ओकर हर फैसला यहोवा ही करत ह।

**17** झंझट झमेला भरे घरे क दावत स चैन अउ सान्ति क सूखी रोटी क टूका खाउब उत्तिम अहइ।

2बुद्धिमान दास एक अइसे पूत पइ सासन करी जउन घरे बरे सर्मानक होत ह। बुद्धिमान दास उ पूत क जइसा ही बसीयत पावइ में सहभागी होइ।

3जइसे चौंटी अउ सोना क आगी में डाइ क सुद्ध कीन्ह जात ह वइसे ही यहोवा लोगन क हिरदय क परखत सोधत ह 4दुट्ठ जन, दुट्ठ क वाणी क सुनत ह, लबार बैर भरी वाणी पइ धियान देत ह।

5अइसा मनई जउन गरीब क हँसी उड़ावत ह, उ ओकरे सिरजनहार क अपमान करत ह। अउर उ जउन कउनो दूसर क समस्या पइ खुस होत ह सजा झेलब्या।

6नाती-पोतन बृद्ध जन क मकुट होत ही, अउर महतारी-बाप ओनके लरिकन क मान अहइँ।

7मूरख बरे जियादा बोलब उत्तिम नाही अहइ वइसे ही सासक क झूठ बोलब केतना बुरा होइ!

8घूस देइवाले क घूस महामंत्र जइसे लागत ह, जेहसे उ जहाँ भी जाइ, सफल ही होइ जाइ।

9जदि कउनो मनइ कउनो क जउन ओकर बुरा किहस ह छमा कइ देत ह तउ उ पचे दोस्त होइ सकत ह। किन्तु उ मनइ जउन छमा करत ह उ लगातार दूसर क गलती क याद करत ह तउ ओनकर दोस्ती टूट जात ह।

10विवेकी क धमकाउब ओतना प्रभावित करत ह; जेतना मूरखन क सौ-सौ कोड़न भी नाही करतेन।

11दुट्ठ जन तउ बस हमेसा विद्रोह करत रहत ही; ओकरे बरे दया स हीन अधिकारी पठवा जाइ।

12आपन बेवकूफी में चूर कउनो मूरख स मिलइ स अच्छा बाटइ, कि उ रिछिन स मिलब जेहसे ओकर बचचन क छीन लीन्ह गवा होइ।

13भलाई क बदले में अगर कउनो बुराई करइ तउ ओकरे घरे क बुराई नाही तजी।

14झगड़ा सुरू करब अइसा अहइ जइसे बाँध क टूटब अहइ, तउ, एकरे पहिले कि तकरार सुरू होइ जाइ बात खतम करा।

15यहोवा एन दुइनउँ ही बातन स घिना करत ह, देखी क छोड़ब, अउर निर्दोष क सजा देब।

16मूरख क हाथन में धने क का प्रयोजन। काहेकि, ओका चाह नाही कि बुद्धि क मोल लेइ।

17मीत तउ सदा-सर्वदा पिरेम करत ह। एक सच्चा भाइ बुरे दिनन में साहयता करत ह।

18विवेकहीन जन ही किरिया स हाथ बँधाइ लेत अउर आपन पड़ोसी क ऋण ओढ़ लेत ह।

19जेका लड़ाई - झगड़ा भावत ह, उ तउ सिरिफ पापे स पिरेम करत ह अउर जउन डीग हाँकत रहत ह उ तउ आपन ही नास बोलावत ह।

20कुटिल हिरदय जन कबहुँ फूलत फलत नाही अउर जेकर वाणी छली भइ अहइ, विपद में गिरत ह।

21मूरख पूत बाप बरे पीरा लिआवत ह, मूरख क बाप क कबहुँ आनंद नाही होत।

22खुस रहब सब स बड़की दवा अहइ, मुला बुझा मन हाइन क झुराइ देत ह।

23दुट्ट मनई, निआव क गलत उपयोग करइ बरे एकांत में घूस लेत ह।

24बुद्धिमान जन बुद्धि क समन्वा धरत ह, मुला मूरख क आँखिन धरती क छोरन तलक भटकत ही।

25मूरख पूत बाप क तेज ब्यथा देत ह, अउर महतारी बरे जउन ओका जनम दिहस, कडुवाहट भरि देत ह।

26कउनो निर्दोष क दण्ड देब उचित नाही, ईमानदार नेता क पीटब नीक नाही अहइ।

27गियानी जन खामूस रहत ही, समुझ-बूझ वाला जन आपन पइ काबू राखत ह।

28मूरख भी जब तलक नाही बोलत नीक लागत ह। अउर अगर आपन वाणी रोकइ तउ गियानी जाना जात ह।

**18** कछू मनई आपन इच्छा क अनुसार काम करत ही। जदि दूसर कउनो ओनका सलाह देत ह तउ उ कोहान जात ह।

2मूरख जन दूसर स सीखइ में खुस नाही होत ह। उ जउन कछू सोचत ह उहइ बोलत में खुस होत ह।

3लोग दुट्ट व्यक्ति क नाही चाहवत ह। लोग मूरख लोग क मजाक उड़ावत ह।

4बुद्धिमान क सब्द गहिर जल क नाई होत ही, उ पचे बुद्धि क सोता स उछरत भए आवत ही।

5दुट्ट जन क पच्छ लेब अउर निर्दोष क निआव स वंचित राखब उचित नाही होत।

6मूरख क होठन बात-विबाद क जनम देत ह अउर आपन मुँह क कारण उ पिटा जात ह।

7मूरख क मुँह ओकरे कामे क बिगाड़ देत ह अउर ओकर आपन ही होठन क जाले में ओकर परान फँसि जात ह।

8लोग हमेसा गपसप सुनइ चाहत ही। इ उत्तिम भोजन क नाई अहइ जउन पेट क भीतर उतरत चला जात ह।

9जउन अपन काम मंद गति स करत ह, उ ओकर भाई अहइ, जउन विनास करत ह।

10यहोवा क नाउँ एक सुदृढ़ गढ़ क नाई अहइ। उ कइँती धर्मी जन दौड़ जात ही अउर सुरच्छित रहत ही।

11धनिक समुझत ही कि ओनकर धन ओनका बचाइ लेइ उ पचे समुझत ही कि उ एक सुरच्छित किला अहइ।

12पतन स पहिले मन अंहकारी बन जात ह, मुला सम्मान स पूर्व विनम्रता आवत ह।

13बात क बिना सुने ही, जउन जवाब में बोल पड़त ह, उ ओकर बेवकूफी अउ ओकर अपजस अहइ।

14मनई क मन ओका बियाधि में थामे राखत ह; मुला टूटे हिरदय क भला कउनो कइसे थामइ।

15बुद्धिमान क मन गियान क पावत ह, बुद्धिमान क कान एका खोज लेत ही।

16उपहार देइवाले क मारग उपहार खोलत ह अउर ओका महापुरुसन क समन्वा पहँचाइ देत ह।

17पहिले जउन बोलत ह ठीक ही लागत ह मुला बस तब तलक ही जब तलक दूसर ओहसे सवाल नाही करत ह।

18अगर दुइ बरिआर आपुस में झगड़त होइँ, उत्तिम अहइ कि ओनके झगड़न क पाँसा बहाइके निपटाउब।

19रूठे भए बन्धु क मनाउब कउनो गढ़ वाला सहर क जीत लेइसे जियादा कठिन अहइ। अउर आपुसी झगड़न अइसे होत ही जइसे गढ़ी क मुँदे दुआर होत ही।

20मनई क पेट ओकरे मुँह क फले स ही भरत ह, ओकरे होठन क खेती क प्रतिफल ओका मिलत ह।

21जीभ क वाणी जिन्नगी अउर मउत क सक्ती रखत ह। अउर जउन वाणी स पिरेम राखत ही, उ पचे ओकर फल स आनन्दित होत ही।

22जेका नीक पत्नी मिली अहइ, उ उत्तिम पदार्थ पाएस ह। ओका यहोवा क अनुग्रह मिलत ह।

23गरीब जन तउ दया क माँग करत ह, मुला धनी जन तउ कठोर जवाब देत ह।

24बहोत सारे मीतन क संगत तबाही लाइ सकत ह। किंतु आपन घनिष्ठ मीत भाई स भी उत्तिम होइ सकत ह।

**19** उ गरीब मनइ ओन व्यक्ति स बेहतर अहइ जउन झूट बोलत ह अउ मूरख अहइ।

2बिना गियान क उत्साह राखब नीक नाही अहइ एहसे उतावली में गलती होइ जात ह।

3मनई आपन बेवकूफी स आपन जिन्नगी बिगाड़ लेत ह, मुला उ यहोवा क देखी ठहरावत ह।

4धन स बहोत सारे मीत बन जात ही, मुला गरीब जन क ओकर मीत भी तजि जात ह।

5लबार गवाह बगैर सजा पाए नाही बची अउर जउन झूठ उगलत रहत ह, छूटइ नाही पाई।

6बहोत स लोग सासक क खुस करइ क जतन करत ह अउर हर एक मनइ ओकर मीत बन जावा चाहत ही, जउन उपहार देत रहत ह।

7निर्धन क सब संबंधी ओहसे कतरात ही। ओकर मीत ओहसे केतना बचत फिरत ही, जदपि उ ओन लोगन स मदद बरे बिनती करत ही तउ पइ भी उ पचे ओकर लगे नाही जाइही।

8जउन गियाण पावत ह उ आपन प्राण स ही प्रीति रखत ह, उ जउन समुझ-बूझ बढ़ावत रहत ह फलत अउर फूलत ह।

9लबार गवाह सजा पाए बिना नाही बची, अउर उ, जउन झूठ उगलत रहत ह, ध्वस्त होइ जाइल।

10मूरख धनी नाही बनइ चाही। उ अइसे होइ जइसे कउनो दास युवराजन पइ राज करइ।

11बुद्धिमान मनइ सदा साँत रहत ह। जब उ ओन लोगन क छिमा करत ह जउन ओकरे खिलाफ होइँ, तउ ओकर सम्मान अउर भी बढ़ जात ह।

12राजा क किरोध सेर क दहाइ जइसा अहइ, मुला ओकर कृपा घास पइ ओसे क बूँद स होत ह।

13मूरख पूत आपन बाप बरे बिनासे क लावत ह। अउर एक झगरालू पत्नी हमेसा टपकइ वाला पानी क नाई अहइ।

14भवन अउ धन-दौलत महतारी बाप स विरासत में मिल जात ह। मुला बुद्धिमान पत्नी यहोवा क ओर स धन्न अहइ।

15आलस गहिर घोर नीद देत ह; मुला उ आलसी भूखा मरत ह।

16अइसा मनई जउन आदेसन पइ चलत ह उ आपन जिन्नगी क रच्छा करत ह। मुला जउन आदेसन क उपेच्छा करत ह उ निहचय ही मउत अपनावत ह।

17गरीब पइ किरपा देखाउब यहोवा क उधार देब अहइ, यहोवा ओका, ओकरे इ कामे क प्रतिफल देइ।

18तू आपन पूत क अनुसासित करा अउर ओका सजा द्या, जब उ अनुचित होइ। बस इहइ आसा अहइ। अगर तू अइसा करइ क मना करा, तब तउ तू ओकरे बिनासे में ओकर सहायक बनत अहा।

19अगर कउनो मनई क तुरंत किरोध आवइ, ओका एकर कीमत चुकावइ क होइ। अगर तू ओकर रच्छा करत अहा, तउ केतनी ही बार तोहे ओका बचावइ क होइ।

20सुमति पइ धियान द्या अउर सुधार क अपनाइ ल्या तू जेहसे आखीर में तू बुद्धिमान बन जा।

21मनई अपने मने में का का करइ क सोचत ह; किंतु यहोवा क योजना पूरा होत ह।

22लोग चाहत ही मनई बिस्सास जोगग अउ सच्चा होइ। एह बरे गरीबी में बिस्सास क जोगग अउ सच्चा बनके रहब उचित अहइ अइसा मनई स जउन झूटा अउर धनी अहइ।

23यहोवा क भय सच्ची जिन्नगी क राह देखावत ह, एहसे मनई सान्ति पावत ह अउर कस्ट स बचत ह।

24एक आलसी आपन हाथ थारी में डालत ह मुला उ ओका मुँह तलक उठावइ में बहोत सुस्ती क अनुभव करत ह।

25ठट्टा करइवाला मनई क मारा ताकि एक साधारन जन आहसे सीख पाइ। मामूली डॉट डपट ही एक बुद्धिमान मनई बरे काफी होत ह।

26अइसा पूत जउन निन्द्य क जोगग करम करत ह घरे क अपमान होत ह; उ अइसा होत ह जइसे पूत कउनो आपन बाप स छोड़ अउर घरे स असहाय महतारी क निकारि बाहेर करइ।

27हे मोर पूत अगर अनुसासन पइ धियान देब तजि देब्या, तउ तू गियाण क बचनन स भटक जाब्या।

28भ्रस्ट गवाह निआव क सम्मान नाही देत ह। अउर दुस्ट क मुँह बुराई क भस्म कर देत ह।

29उ जउन सम्मान नाही देत ह सजा पाइ, अउर मूरख जन क पीठ कोड़न खाइ।

**20** सराब अउ दाखरस लोगन क काबू में नाही रहइ देतेन। उ ओनका हल्ला करइवाला अउर सेरवी जतावइ वाला बनावत ह। अउर उ जउन मदमसत होइ जात ह मूरखता क कार्य करत ह।

2राजा क किरोध सेर क दहाइ क सम्मान होत ह, जउन ओका किरोधित करत ह, प्राण स हाथ धोवत ह।

3झगड़न स दूर रहब मनई क आदर अहइ। मुला मूरख जन तउ सब झगड़ा करइ बरे तइयार रहत ह।

4मौसम आवइ पइ अदूरदर्सी आलसी हर नाही डावत ह, तउ कटनी क समइ उ ताकत रहि जात ह अउर कछू भी नाही पावत ह।

5व्यक्ति क सोच गहिर पानी क नाई होत ह। किंतु समुझदार मनई ओनका बाहेर हीँच लेत ह।

6लोग आपन बिस्सास जोगगता क बहोत ढोल पीटत ही। मुला बिस्सास क जोगग जन क कउन खोज सकत ह?

7धर्मी जन बेकलके क जिन्नगी जिअत ह ओकरे पाछे आवइवाली संतानन धन्न अहइँ।

8जब राजा निआव क सिंहासने पइ विराजत भवा आपन दृस्टि माय स बुराई क फटक के छँटत हइ।

9कउन कहि सकत ह, “मई आपन हिरदय रखेउँ ह, मई बिसुद्ध, अउर पाप रहित हउँ?”

10एन दुइनउँ स, खोट बाटन अउर खोट नापन स यहोवा घिना करत ह।

11बालक भी आपन करमन स जाना जात ह, कि ओकर चालचलन सुद्ध अहइ, या नाही।

12यहोवा कान बनाएस ह कि हम सुनी। यहोवा आँखिन बनाएस ह कि हम लखी। यहोवा इ दुइनउँ क एह बरे हमरे बरे बनाएस।

13नीद स पिरेम जिन करा दरिद्र होइ जाब्या; तू जागत रहा तोहरे लगे भरपूर भोजन होइ।

14गाहक बेसहत समइ कहत ह, “अच्छा नाही, बहोत मँहगा!” मुला जब उ हुआँ स उ दूर चला जात ह आपन खरीद क सेखी बघारत ह।

15कउनो मनई क लगे सोना बहोत बाटइ अउर मणिमणि क बहोत ढेर अहइँ, मुला अइसे ओठ जउन बातन गियाण क बतावत दुर्लभ रतन होत ही।

16जउन कउनो अजनबी क ऋण क जमानत देत ह उ आपन ओढ़ना तलक गँवाइ बइठत ह।

17छले स कमाई रोटी मीठ लागत ह पर अंत में ओकर मुँह काँकरे स भरि जात ह।

18सबइ योजना स पहिले तू उत्तिम सलाह पाइ लिहा करा। जदि तोहका जुद्ध करब होइ तउ उत्तिम लोगन स अगुवाइ ल्या।

19बकवादी रहस्य क फास कइ देत ह। यह बरे रहस्यमय बातन क बकवादी मनई स जिन कहा।

20कउनो मनई आपन बाप क या आपन महतारी क कोसइ, ओकर दीया बुझ जाइ अउर गहिर अँधियारा होइ जाइ।

21बेइमानी स प्राप्त कीन्ह गवा सम्पत्ति अंत में आसीस नाही लाइहीं।

22इ बुराई क बदला मई तोहसे लेब। अइसा तू जिन कहा, यहोवा क बाट जोहा तोहका उहइ अजाद करी।

23यहोवा खोटे बटखरन, गलत तराजू अउ पेमाना स घिना करत ह। खोटा माप नीक नाहीं बाटइ।

24यहोवा फैसला करत ह कि हर एक मनई क जिन्गी में का होइ। कउनो मनई कइसा समुझ सकत ह कि ओकरे जिन्गी में का घटइवाला अहइ?

25परमेस्सर क कछू अर्पण करइ क प्रतिग्या स पहिले ही विचार ल्या; भली भाँति विचार ल्या। होइ सकत ह जदि तू पाछे अइसा सोचा, “मई उ प्रतिग्या नाहीं करत। किन्तु तोहका उ प्रतिग्या पूरा करइ क होइ जउन तू परमेस्सर स किहा ह।”

26विवेकी राजा इ फैसला करत ह कि कउन बुरा जन अहइ। अउर उ राजा उ जन क सजा देइ।

27यहोवा क दीपक जन क आत्मा क जँच लेत ह। यहोवा जने क अन्दर तलक लखा सकत ह।

28वफादारी अउर सच्चाइ राजा क सुरच्छित रखत ह। किन्तु ओकर सिंहासन सिरिफ ओकर वफादारी पइ टिकत ह।

29नउजवानन क महिमा ओनके बल स होत ह अउर बृद्धन क गौरव ओनकर पके बाल अहई।

30अगर हमका सजा दीन्ह जाइ तउ हम बुरा करब तजि देइत ह। दर्द मनई क परिवर्तन कइ सकत ह।

**21** राजा लोगन क मन यहोवा क हाथे होत ह, जहाँ भी उ चाहत ह ओका मोड़ देत ह वइसे ही जइसे कउनो किसान पानी क खेते क। 2सबहिँ क आपन आपन रहन उत्तिम लागत ही; मुला यहोवा तउ मने क तउलत ह।

3तोहार उ करम क करब जउन उचित अउर नेक अहइ यहोवा क जियाद चढ़ावा चढ़ावइ स ग्राह्य बाटइ।

4घमण्डी अँखिन अउ दर्पीला मन पाप अहई इ सबइ दुट्ट क दुट्टता प्रकास में लिआवत ही।

5परिश्रमी क योजनन फायदा देत ही इ वइसे ही निहचित अहइ जइसे उतावली स गरीबी आवत ह।

6झूठ बोलि बोलिके कमावा धन दौलत अउ महिमा भाप क नाई स्थिर नाही अहइ। अउर नाही अहइ, अउ उ घातक फंदा बन जात ह।

7दुट्ट क हिंसा ओनका हीच लइ बूड़ी काहेकि उ पचे उचित करम करइ नाही चाहतेन।

8अपराधी क मारगा कुटिलतापूर्ण होत ह मुला जउन नीक अहई ओनकर राह सोझ सच्चा होत ही।

9झगड़ालू मेहरारू क संग घरे में निवास स, छत क कउने कोने पइ रहब नीक अहइ।

10दुट्ट जन हमेसा बुराइ करइ क इच्छुक रहत ह। ओकर पड़ोसी ओहसे दया नाही पावत।

11जब उच्छृंखल सजा पावत ह तब सरल जन क बुद्धि मिलि जात ह। मुला बुद्धिमान तउ डॉट फटकार करइ पइ ही गियान क पावत ह।

12निआव स पूर्ण परमेस्सर दुट्ट क घरे पइ अँखी धरत ह, अउर दुट्ट जन क उ नास कइ देत ह।

13अगर कउनो गरीब क, करुणा पुकार पइ कउनो मनई आपन कान बंद करत ह, तउ जब उ पुकारी तउ ओकर पुकार पइ भी कउनो उत्तर नाही दिही।

14गुप्त रूप स दीन्ह गवा भेंट किरोध क सांत करत ह। अउर गुप्त रूप स दीन्ह गवा उपहार खउफनाक किरोध क सांत करत ह।

15निआव जब पूर्ण होत ह धर्मी क सुख देत ह, मुला कुकर्मियन क महा भय होत ह।

16जउन मनई विवेक क पथ स भटकि जात ह, उ विस्त्राम करइ बरे मृतकन क साथी होइ जात ह।

17जउन सुख भोगन स पिरेम करत रहत ह उ दरिद्र होइ जाइ, अउर जउन दाखरस अउ अतर स पिरेम करत ह कबहुँ धनी नाही होइ।

18दुर्जन क कबहुँ ओन सबहिँ चिजियन क फल भुगतइ क ही पड़ी, जउन सज्जन क खिलाफ करत ही। बेईमान लोगन क ओनके किए गए क फल भुगतइ पड़ी जउन ईमानदार लोगन क विरुद्ध करत ही।

19चिड़चिड़ी झगड़ालू मेहरारू क संग रहइ स रेतिस्तान में रहब उचित अहइ।

20विवेकी क घर में मनचाहा खइया क अउर इफरात तेल क भंडारा भरा होत ह मुला मूरख मनई जउन ओकरे लगे होत ह चट कइ जात ह।

21जउन जन नेकी अउ पिरेम क पालन करत ह, उ जिन्गी संपन्नता अउर समादर क पावत ह।

22बुद्धिमान जन क कछू भी कठिन नाही अहइ। उ अइसे सहर पइ चढ़ाई कइ सकत ह जेकर रखवारी सूखीर करत होई, उ उ परकोटे क ध्वस्त कइ सकत ह जेकरे बरे उ आपन सुरच्छा क बिस्वास में रहेन।

23उ जउन आपन मुँह क अउर आपन जीभ क बस में राखत ह उ आपन आप क बिपति स बचावत ह।

24अइसा मनई अहंकारी होत ह, जउन आपन क औरन स स्नेष्ठ समुझत ह, ओकर नाउँ ही “अभिमानी” होत ह। आपन ही करमन स उ देखाइ देत ह कि उ दुट्ट होत ह।

25आलसी मनई बरे ओकर ही सबइ लालसा ओकरे मरण क कारण बन जात ही काहेकि ओकरे हाथे करम क नाही अपनउतेन।

26कछू लालची लोग दिन भइ इच्छा करत ही कि ओका अउर मिलाइ। अउर किन्तु धर्मी जन तउ उदारता स देत ह।

27दुट्ट क चढ़ावा यूँ ही घिना स पूर्ण होत ह फिन केतना बुरा होइ जब उ ओका बुरे भाव स चढ़ावइ?

28लबार गवाह क नास होइ जाइ अउर जउन ओकर झूठी बातन क सुनी उ भी ओकरे संग हमेसा सर्वदा बरे नस्ट होइ जाइ।

29दुट्ट मनई बुरा करइ बर ठान लेत ह। किन्तु एक ईमानदार व्यक्ति जानत ह कि ओकर राह सीधी अहइ।

30जदि यहोवा न चाहइ तउ, न ही कउनो बुद्धि अउर न ही कउनो अन्तदृष्टि, न ही कउनो जोजनन पूरी होइ सकत ह।

31जुद्ध क दिन तउ घोड़ा तैयार कीन्ह ह, मुला विजय तउ बस यहोवा पइ निर्भर अहइ।

**22** अच्छा नाउँ अपार धन पावइ स जोगग अहइ। चाँदी, सोना स, तारीफ क पात्र होब जियादा उत्तिम अहइ।

2धनियन में अउर निर्धनन में इ एक समता अहइ। यहोवा ही एन सबहिं क सिरजनहार अहइ।

3कुसल जन जब कउनो विपत्ति क लखत ह, ओका बचइ बरे एहर ओहर होइ जात ह मुला मूख उहइ राहे पइ बढ़त ही जात ह। अउर उ एकरे बरे दुःख ही उठत ह।

4जब मनई विनम्र होत ह अउ यहोवा क भय करत ह उ धन-दौलत, आदर अउर जिन्नगी पाइही।

5कुटिल क राहन काँटन स भरी होत ह अउर हुआँ पइ फंदन फइला होत ही; मुला जउन आतिमा क रच्छा करत ह उ तउ ओनसे दूर ही रहत ह।

6बच्चन क जबकि उ छोटा अहइ जिन्नगी क नीक राह क सिच्छा दइ। तउ उ बुढ़ापा में भी ओहसे भटकी नाही।

7धनी दरिद्रन पइ सासन करत ही। उधार लेइवाला, देइवाला क दास होत ह।

8अइसा मनई जउन दुट्टता क बीज बोवत ह उ तउ संकट क फसल काटी; अउर ओकर किरोध क लाठी नस्ट होइ जाइ।

9उदार मने क मनई खुद ही धन्न होइ, काहेकि उ आपन भोजन गरीब जने क संग बाँटिके खात ह।

10गुस्ताख मनई जउन कि कउनो क सम्मान नाही देत ह क दूर करा तउ कलह दूर होइ। एहसे झगड़ा अउ अपमान मिट जात ही।

11उ जउन पवित्तर मने स पिरेम करत ह अउर जेकर वाणी मनोरम होत ह ओकर तउ राजा भी मीत बन जात ह।

12यहोवा सदा विवेक क धियान राखत ह; मुला उ बिस्वासघाती क कार्य क नास करत ह।

13काम नाही करइ क बहाना बनावत भवा आलसी कहत ह, “बाहेर सेर बइठा अहइ, “होइ सकत ह कि गलियन में मोका मार डवा जाइ।”

14बिभिचार क पाप गहिर गढ़ा क नाई अहइ। यहोवा ओहसे बहोतइ कोहाइ जाइ जउन भी इ में गिरी।

15लरिकन सैतानी करत रहत ही; मुला अनुसासन क छड़ी ही सैतानी दूर कइ देत ह।

16अइसा मनई जउन आपन धन बढ़ावइ बरे गरीब पइ अत्याचार करत ह; अउर उ, जउन धनी क उपहार देत ह, दुइनउँ ही अइसे जन अहइ जउन निर्धन होइ जात ही।

### तीस विवेक स भरी कहावतन

17बुद्धिमान क कहावतन सुना अउर धियान द्या। ओह पइ धियान लगावा जउन मई सिखावत हउँ। 18अगर तू ओनका आपन मने में बसाइ ल्या तउ बहोत नीक होइ; तू ओनका हरदम आपन ओठन पइ तैयार राखा। 19मई तोहका आजु सिच्छा देत हउँ ताकि तोहार यहोवा पइ बिस्वास पैदा होइ। 20इ सबइ तीस सीखन मई तोहरे बरे रचेउँ, इ सबइ बचन सम्मति अउर गियान क अहइँ। 21उ सबइ बचन जउन महत्वपूर्ण होतिन, इ सबइ सत्य बचन तोहका सिखइहीं ताकि तू ओका उचित जवाब दइ सका, जउन तोहका पठएस ह।

-1-

22तू गरीब क सोसण जिन करा। एह बरे कि उ पचे बस दरिद्र अहइँ; अउर कंगाले क कचहरी में जिन हीचा। 23काहेकि परमेस्सर ओनकर सुनवाई करी अउर जउन ओनका लूटेन ह उ ओनका लूट लेइ।

-2-

24तू किरोधी सुभाव क मनइयन क संग कबहुँ मितार्इ जिन करा अउर ओकरे संग, आपन क जिन जोड़ा जेका हाली किरोध आइ जात ह। 25नाही तउ तू भी ओकरे राहे चालब्या अउर आपन क जालि में फँसाइ बइठब्या।

-3-

26तू कउनो दूसर क कर्ज बरे जमानतदार नाही बना। 27जदि ओका चुकावइ में तोहार साधन चुकिही तउ खाले क बिस्तर तलक तोहसे छोर लीन्ह जाइ।

-4-

28तोहरे धरती क सम्पति जेकर चउहदिन तोहार पुरखन निर्धारित किहन उस सीमा रेखा कबहुँ भी जिन हिलावा।

-5-

29अगर कउनो मनई आपन कारज में कुसल अहइ, तउ उ राजा लोगन क सेवा करइ क जोगग अहइ। अइसे मनइयन बरे जेनकर कछू महत्व नाही ओका काम करइ क जरूरत नाही अहइ।

-6-

**23** जब तू कउनो अधिकारी क संग खइया क बरे बइठा तउ एकर धियान राखा, कि कउन तोहरे समन्वा अहइ। 2अगर तू पेटू अहा तउ खाना पइ नियंत्रण राखा। 3ओकरे स्वादिस्ट पकवानन क लालसा जिन करा काहेकि उ खइया धोका बाज़ अहइ।

-7-

4धनवान बनइ क काम कइ कइके आपने क जिन थकावा। तू संयम देखावइ क, बुद्धि अपनाइ ल्या। 5इ सबइ धन सम्पत्तियन लखत हीं लखत लुप्त होइ जइहीं निहचय ही आपन पंखन क फइलाइके उ पचे गरूड़ क नाई अकासे में उड़ि जइहीं।

-8-

6अइसे मनई क संग जउन स्वार्थी अहइ भोजन जिन करा। तू ओकरे स्वादिस्ट पकवाने क लालसा जिन करा।

7काहेकि उ अइसा मनई अहइ जउन मन में हरदम ओकरी कीमत क हिसाब लगावत रहत ह; तोहसे तउ उ कहत ह- “तू खा अउर पिआ” मुला उ मने स तोहरे संग नाही अहइ।

8जउन कछू थोड़ा बहोत तू ओकर खाइ चुका अहा, तोहका तउ उ भी उलटइ पड़ी अउर उ पचे तोहार कहे भए आदर स पूर्ण वचन बियर्थ चला जइही।

-9-

9तू मूरख क संग बातचीत जिन करा, काहेकि उ तोहरे विवेक स भरे वचन स धिना ही करी।

-10-

10पुराने जमाने क सीमा क पत्थर क जिन सरका। अउर अनाथे क भुइयों क जिन हड़पा। 11काहेकि ओनकर संरच्छक सामरथ स पूरा अहइ, तोहरे खिलाफ ओनकर मुकदमा उ लड़ी।

-11-

12तू आपन मन सीख क बातन में लगावा। तू गियान स भरे वचन पइ कान द्या।

-12-

13तू कउनो गदला क अनुसासित करइ मैं कबहुँ जिन रोका अगर तू कबहुँ ओका छड़ी स सजा देव्या तउ उ एहसे नाही मरी।

14तू छड़ी स पीटिके ओका अउर ओकर जिन्नगी क मउत स बचाइ लेव्या।

-13-

15हे मोर पूत, यदि तोहार मन विवेक स पूर्ण रहत ह तउ मोर मन भी आनंद स पूर्ण रही। 16अउर यदि तोहार ओठ उचित बोलत ही, तउ मई बहोत खुस होव्या।

-14-

17तू आपन मने में भी पापे स भरा मनइयन क बरे जलन जिन करा। मुला तू एकर बजाए यहोवा स सदा डरा। 18तउ तोहार लगे भविश्य होई, अउर तोहार आसा कबहुँ ध्वस्त नाही होई।

-15-

19मोर पूत सुना! अउर विवेकी बनि जा अउर आपन मन क नेकी क राहे पइ चलावा। 20तू ओनके संग जिन रहा जउन पियक्कड़ अहई, अथवा अइसे, जउन ठूस ठूस गोस खात ही।

21काहेकि इ पचे पियक्कड़ अउर इ सबइ पेटू दलिद्र होइ जइही, अउर इ ओनकर खुमारी, ओनका चिथड़न पहिरइही।

-16-

22आपन बाप क सुना जउन तोहका जिन्नगी दिहेस ह, अपनी महतारी क निरादर जिन करा जब उ बुढ़िया होइ जाइ। 23सच्चाई क खरीद ल्या अउर ओका जिन बेचा। अइसे ही विवेक, अनुसासन अउ समुझ क भी खरीद ल्या। 24नेक पूत क बाप महा आनंद में रहत अउर जेकर पूत विवेक स पूर्ण होत ह उ तउ ओहमों ही खुस रहत ह। 25तोहार महतारी अउ तोहार बाप क आनंद प्राप्त होइ अउर तोहार महतारी जउन तोहका जन्म दिहस, ओका खुसी मिलत रहइ।

-17-

26मोर पूत, मोहमों मन लगावा अउर तोहार आँखिन मोह पइ टिकी रहईं। मोका आदर्स माना। 27एक वेस्या गहिर गइहा होत ह। अउर एक बदकार मेहरारु मुसीबत स भरा कुआँ अहइ। 28उ घात में रहत ह जइसे कउनो डाकू अउर उ लोगन में बिस्पास हीनन क संख्या बढ़ावत ह।

-18-

29कउन बिपत्ति में अहइ? कउन दुःखे में पड़ा अहइ? कउन झगड़न-टंटन में अहइ? कउने क सिकाइतन अहई? कउन क घाव अहइ? केकर आँखिन लाल अहई? 30उ पचे जउन लगातार दाखरस पिअत रहत ही अउर जेनमों मसाला मिली भइ दाखरस क ललक होत ह।

31जब दाखरस लाल होइ, अउर पिआलन में झिलमिलत होइ अउ धीरे धीरे डावत जात होइ, ओका ललचाही आँखिन स जिन लखा। 32सर्प क समान उ डसत, आखीर में जहर भरि देत ह जइसे नाग भरि देत ह।

33तोहरी आँखिन में अजीब दृश्य तैरइ लगीही, तोहार मन उल्टी-सोझ बातन में उलझी। 34तू अइसा होइ जाइ, जइसे उफनत सागरे पइ सोवत रहत होइ अउर जइसे मस्तूल क सिखर ओलरा होइ। 35तू कहव्या, “उ पचे मोका मारेन पर मोका तउ दर्द क अनुभव नाही हुआ। उ पचे मोका पीटेन, पर मोका याद ही नाही मई उठी क लायक नाही हई, मोका पिअइ क अउर द्या।”

-19-

**24** बुरे जन स तू कबहुँ डाह जिन करा। ओनकर संगत क तू चाहत जिन करा। 2काहेकि ओनके मन हिंसा क योजनन रचत अउर ओनकर ओठ दुःख देइ क बातन करत ही।

-20-

3बुद्धि स घरे क निर्माण होइ जात ह, अउर समुझ स ही उ थिर रहत ह। 4गियान क जरिये ओकर कमरा अद्भुत अउर सुन्नर खजानन स भरि जात ही!

-21-

5बुद्धिमान जन में महासक्ती होत ह अउर गियानी पुरूख सक्ती क बढ़ावत ह। 6जुद्ध लड़इ बरे परामर्स चाही अउर विजय पावइ बरे बहोत स सलाहकार।

-22-

7मूरख बुद्धि क नाही समुझत जब महत्व स पूर्ण बातन क चर्चा करत ही तउ मूरख समुझ नाही पावत।

-23-

8सड्यंत्रकारी उहइ कहवावत ह, जउन बुरी योजनन बनावत रहत ह। 9मूरख क योजनन पापी अहइ अउर घमण्डी निन्दक जन क लोग तजि देत ही।

-24-

10अगर तू बिपत्ति में हिम्मत छोड़ बइठब्या, तउ तोहार सक्ती केतनी थोड़ स अहइ।

-25-

11जदि कउनो क हत्तिया क कउनो सड्यंत्र रचइ तउ ओका बचावइ क तोहका जतन करइ चाही। 12तू अइसा नाही कहि सकत्या, “मोका एहसे का लेब।” यहोवा सब कछू जानत ह अउर इ भी उ जानत ह कि तू काहे काम करत अहा? यहोवा तोहका लखत रहत ह। उ तोहरे भीतर क जानत ह अउर उ हर एक क ओकर करमन क अनुसार प्रतिफल देत ह।

-26-

13हे मोर पूत, तू सहद खावा करा काहेकि उ उत्तिम अहइ। इ तोहका मीठ लागी। 14इहइ तरह इ तू भी जान ल्या कि आत्मा क तोहार बुद्धि मीठ लागी, अगर तू एका पउब्या तउ ओहमों निहित बाटइ तोहरी भविस्स क आसा अउर उ तोहार आसा कबहुँ भंग नाही होइ।

-27-

15धर्मी मनई क घरे क विरोध में लुटेरा क नाई घात में जिन बइठा अउर ओकरे निवासे पइ जिन छापा मारा। 16काहेकि एक नेक चाहे सात दाई गिरइ, फुन भी उठि बइठी। मुला दुट्ट जन विपत्ति में बूड़ि जात ह।

-28-

17सत्रु क पत्तन पइ आनन्द जिन करा। जब ओका ठोकर लागइ, तउ आपन मन खुस जिन होइ द्या। 18अगर तू अइसा करब्या, तउ यहोवा लखी अउर उ तोहसे खुस नाही होइ, अउर उ तोहार दुस्मन पइ कोहाइ तजि देब।

-29-

19तू दुर्जनन क संग कबहुँ जलन जिन राखा, ओन लोगन क कारण किरोधित जिन होवा। 20काहेकि दुट्ट जन क कउनो भविस्स नाही अहइ। दुट्ट जन क दीया बुझाइ दीन्ह जाइ।

-30-

21हे मोर पूत, यहोवा स अउर राजा स डरा विद्रोहियन क संग कबहुँ जिन मिला। 22काहेकि उ पचे दुइनउँ अचानक

नास ढाइ देइहीं ओन पइ; अउर कउन जानत ह केतनी खउफनाक विपत्तियन उ पचे पठइ देईं।

### कछू दूसर सूक्तियन

23इ सबइ सूक्तियन बुद्धिमान जनन क अहइँ:

निआव में पच्छपात करब उचित नाही अहइ। 24अइसा जन जउन अपराधी स कहत ह, “तू निरपराध अहा” लोग ओका कोसिहीं अउर जातियन तजि देइहीं। 25मुला जउन अपराधी क सजा देइहीं, सबहिं जन ओनसे खुस होइहीं अउर ओन पइ असीर्वाद क बर्खा होइ।

26निर्मल जवाबे स मन खुस होत ह, जइसे ओठंन पइ चुम्बन अंकित कइ देइ।

27पहिले बाहेर खेतन क काम पूरा कइ ल्या एकरे पाछे तू आपन घर बनावा।

28आपन पड़ोसी क विरूद्ध बगैर कउनो कारण गवाही जिन द्या, या तू आपन वाणी क कउनो क छलइ में जिन प्रयोग करा।

29जिन कहा अइसा, “ओकरे संग भी मई ठीक वइसा ही करब, मोरे संग जइसा उ किहेस ह।”

30मई आलसी व्यक्ति क खेते स निर्बुद्धि व्यक्ति क अंगुर क खेत स होत भए गुजरउँ। 31कंटीरी झाड़ियन निकरि आइ रहिन हर कहुँ खरपतवारे स खेत ढकि गवा रहा। अउर बाड़ पाथर क खंडहर होत रही। 32जउन कछू मई लखेउँ, ओहसे मोका एक सीख मिली। 33जरा एक झपकी, अउर तनिक स नीद, थोड़ा स सुस्ताब, धरिके हाथन पइ हाथ (दलिद्रता क बोलाउब अहइ) 34उ तोह पइ टूट पड़ी जइसे कउनो लुटेरा टूट पड़त ह, अउर अभाव तोह पइ टूट पड़ी जइसे कउनो सस्रधारी टूट पड़त ह।

### सुलैमान क कछू अउर सूक्तियन

25 इ सबइ भी सुलैमान क कहावतन अहइ: एन सबइ क यहूदा क राजा हिजकिय्याह क सेवक लोग जमा किहे रहेन।

2कउनो विसय-वस्तु क रहस्य स पूर्ण राखइ में परमेस्सर क अधिकार अहइ। अउर राजा क कउनो बात पइ निर्णय करइ स पहिले खोज विचार करइ क अधिकार अहइ।

3जइसे ऊपर अन्तहीन अकास अहइ अउर खाले अटल धरती अहइ, वइसे ही राजा लोगन क मन होत ही जेनकर ओर-छोर क अता पता नाही। ओकर थाह लेब कठिन अहइ।

4जदि तू चाँदी स ओकर मैल हटाउब्या तउ सुनार ओहसे पात्र बनाइ सकत ह। 5वइसे ही, जदि तू राजा क समन्वा स दुट्ट क दूर करब तउ भलाइ ओकरे सिंहासने क मजबूत कइ देब।

6राजा क समन्वा आपन बड़ाई जिन बखाना अउर महापुरूखन क बीच ठउर जिन चाहा। 7काहेकि उत्तिम इ होइ जदि राजा तोहसे कहइ, “आवा हिआँ, आइ जा” अपेच्छा एकरे कि महापुरूखन क समच्छ तोहार अपमान कीन्ह जाइ।

8तू कउनो व्यक्ति क जल्दी में कचहरी जिन घसीटा। काहेकि होइ सकत ह कि उ तोहार गलती क पोल खोल दइ। तउ तू क कहब्या।

9जब तू आपन विरोधी क खिलाफ में मुकद्दमा प वाद-विवाद करत ह तउ दूसर व्यक्ति क राज फास जिन करा। 10अइसा न होइ जाइ कि कउनो जउन ऐंका सुनत ह तोहका लज्जित करइ, तउ तू बदनाम होइ जाइही जेका कबहुँ मिटाइ नहीं जाइ।

11उचित अवसर पइ बोला बात अइसा ही अहइ जइसे चाँदी क तस्त म सुनहरा सेब। 12बुद्धिमान मनई क कान बरे झिड़की सोना क बाली क नाई अहइ।

13एक बिस्सास क जोगग दूत, जउन ओका पठवत ही ओनके बरे फसल कटनी क समइ क ठंडी बयार क जइसे होत ह। उ आपन स्वामी क आतिम क ताजा कर देत ह।

14उ मनई बर्खा रहित बादरन अउर पवन क जइसा होत ह, जउन कछू देइ क वचन देत ह किन्तु एका देइ नहीं चाहत ह।

15धीरा स पूर्ण बातन स राजा तलक मनावा जात ही अउर नम्र वाणी हाइ तलक तोरि सकत ह।

16जवपि सहद बहोत उत्तम अहइ, पर तउ भी तू बहोत जियादा जिन खा। अउर जदि तू जियादा खाब्या, तउ उल्टी आइ जाइ अउर तू रोगी होइ जाब्या। 17वइसे ही तू पड़ोसी क घरे में बार-बार गोइ जिन रखा। वरना उ तोहसे उब जाइ अउर तोहसे घिना करइ लागी।

18उ मनई, जउन झूटी गवाही आनप साथी क खिलाफ देत ह उ तउ अहइ हथौड़ा सा या तरवार सा या तीखे बाण सा। 19बिपति क काल में भरोसा बिस्सासघाती पइ होत ह अइसा जइसे दुःख देत दौत या लँगड़ात गोइ।

20जउन कउनो ओकरे समन्वा खुसी क गीत गावत ह जेकर मन भारी अहइ, तउ उ अइसा ही अहइ जइसा जाड़े में ओकर ओढ़ना उतार लइ या ओकरे फोड़े पइ सिरका उड़ेलना।

21अगर तोहार दुस्मन कबहुँ भुखान होइ, ओकरे खाइ क बरे, तू खइया क दइ द्या, अउर जदि उ पिआसा होइ, तउ ओकरे करे पानी पिअइ क दइ द्या। 22अगर तू अइसा करब्या उ लज्जित होइ। इ ओकर सिर पइ जलत भवा कोयला क अंगार रखइ क जइसा होइ। यहोवा तोहका ओकर प्रतिफल देइ।

23उत्तर क हवा जइसे बर्खा लिआवत ह वइसे ही बेकार क बातन किरोध क बढ़ावत ह।

24झगड़ालू मेहरारू क संग घरे में रहइ स छते क कउनो कोने पइ रहब उत्तम अहइ।

25कउनो दूर देस आई कउनो अच्छी खबर अइसी लागत ह जइसे थके माँदे पिआसे क सीतल जल।

26गाद भरा झरना या कउनो दूसित कुआँ सा होत उ धर्मी पुरूस जउन कउनो दुट्ट आगे निहर जात ह।

27जइसे बहोत जियादा सहद खाब अच्छा नाही वइसे आपन मान बढ़ावइ क जतन करब नीक नाही अहइ।

28अइसा जन जेका खुद पइ नियंत्रण नाही, तउ उ उ नगर जइसा अहइ, जेकर देवारन नाही अहइ।

## मूरखन क सम्बन्ध में विवेक स भरी सूक्तियन

26 जइसे बरफ क गर्मी में पड़ब अउर जइसे कटनी क समइ पइ बर्खा का आउब उपयुक्त नाही अहइ वइसे ही मूरख क मान देब उपयुक्त नाही अहइ।

2अगर तू कउनो क कछू बिगाइया नाही अउर तोहका उ सराप देइ, तउ उ सराप बियर्थ होइ। ओकर सरापपूर्ण बचन तोहरे ऊपरि स यूँ उड़िके निकरि जाइ जइसे चंचल चिरइया जउन टिकिके नाही बइठत।

3जइसे घोड़े क चाबुक अहइ अउर खच्चर लगाम स काबू होत ह अइसे ही मूरख बरे डंडा अहइ।

4मूरख क ओकर मूरखता क अनुसार जवाब जिन द्या नाही तउ तू भी खुद मूरख सा देखब्या। 5तउ मूरख क मूरख वाला जवाब द्या नाही तउ उ आपन ही आँखिन में बुद्धिमान बन बइठी।

6मूरख क हाथन सँदेसा पठउब वइसा ही होत ह जइसे आपन ही गोइन पइ कुल्हाड़ी मारब। इ बिपति क बोलाउब क नाई अहइ।

7कउनो मूरख क कहावत कहइ क जतन करइ वइसा ही अहइ जइसे कउनो लँगड़े क आपन लँगड़ा गोइ पइ चलइ क जतन करब।

8मूरख क सम्मान देब वइसा ही होत ह जइसे कउनो गुल्ले में पाथर रखब।

9मूरख क मुँहे में सूक्ति अइसी होत ह जइसे सराबी क होथे में काँटदार झाड़ी होइ।

10कउनो मूरख क या कउनो अनजाने मनई क काम पइ लगाउब खतरनाक होइ सकत ह। तू नाही जानत्या कि केका दुःख पहींची।

11जइसे कउनो कूकुर खाइके बेराम होइ जात ह अउर उल्टी कइके फुन ओका खात ह वइसे ही मूरख आपन मूरखता बार-बार दोहरावत ह।

12उ मनई जउन आपन क बुद्धिमान मानत ह, मुला होत नाही ह तउ उ कउनो मूरख स भी बुरा होत ह। ओकर बरे कउनो आसा नाही अहइ।

## आलसी लोगन बरे कहावतन

13आलसी चिचियात रहत ह, काम नाही करइ क बहाने कबहुँ उ कहत ह सइक पइ सेर बाटइ।

14जइसे आपन चूड़ी पइ चलत रहत ह किवाड़। वइसे ही आलसी बिस्तर पइ आपन ही करवटन बदलत ह।

15आलसी आपन हाथ थारी में ड़ावत ह मुला ओकर आलस, ओकरे आपन ही मुँहे तलक ओका खइयाके नाही लिआवइ देत।

16आलसी मनई, निज क मानत ह महाबुद्धिमान। सातउँ गियानी पुरुखन स भी बुद्धिमान।

17अइसे राही जउन दूसरन क झगड़न में टौंग अड़ावत ह जइसे कूकुर पइ काबू पावइ बरे कउनो ओकर कान धरइ।

18-19कउनो मनई जउन आपन पड़ोसी क छलत ह अउर तउ कहत ह: मईँ तउ बस यूँ ही मजाक करत रहेउँ। वइसा ही अहइ जइसे कउनो पागल घातक तीर फेंकत ह अउर कउनो क मार देत ह।



20जइसे ईधन बगैर आग बुझि जात ह वइसे ही कानाफूसी क बिना झगड़े मिटि जात ही।

21कोयला अंगारन क अउर आगी क लपट क काठ जइसे भड़कावत ह, वइसे ही झगड़ाळू झगड़न क भड़कावत ह।

22कानाफूसी करइ वाला क सब्दन वइसा ही सुआदिस्ट अहइ जइसा कि उ भोजन जउन आसानी स लोगन क पेट में उतरत चला जात ह।

23दुट्ट मनवाले क चिकनी चुपड़ी बातन होत ही अइसी, जइसे माटी क बर्तन पड़ चिपके चाँदी क बर्क। 24घिना स पूर्ण मनई आपन मीठ वाणी स घिना क ढॉपत ह। किंतु आपन हिरदय में उ छले क पालत ह। 25ओकर मोहक वाणी स ओकर भरोसा जिन करा, काहेकि ओकरे मने में घिना स भरी बातन समाई अहई। 26छले स कउनो क घिना चाहे छुप जाइ मुला ओकर दुट्टता सभा क बीच परगट हो जाइ।

27अगर कउनो गड़हा खोदत ह कउनो क बरे तउ उ खुद ही ओहमों गिरी सकत ह; अगर कउनो मनई कउनो पाथर क कउनो पड़ लुढ़कावत जतन करत ह तउ उ उहइ पाथर स कुचला जाइ सकत ह।

28अइसा मनई जउन झूठ बोलत ह, ओनसे घिना करत ह जेनका नोस्कान पहोंचावत अउर चापलूस खुद क नास करत ह।

**27** भविष्य क बरे सेखी जिन बघाड़ा। कउन जानत ह कि आगे का घटइ।

2आपन ही मुँहे स आपन बड़कई जिन करा दूसरन क तोहार तारीफ करइ द्या।

3कठिन अहइ पाथर ढोउब, अउर ढोउब रेत क, मुला इन दुइनउँ स कहूँ जियादा कठिन अहइ मूरख क जरिये उपजावा भवा कस्ट।

4किरोध त्रूर होत ह। प्रकोप बाढ़ क नाई अहइ मुला जलन बहोत ही घातक अहइ।

5छुपे भए पिरेम स, खुली घुड़की उत्तिम अहइ।

6देस्त क तमाचा पड़ विस्सास कइ जा सकत ह कि तोहार मदद कइ सकत ह। किन्तु दुस्मन तोहार संग दया करइ क बहाना बनावत ह। उ तोहका नोस्कान पहोंचाही।

7पेट भरि जाए पड़ सहद भी नाही भावत मुला भुखिया में तउ हर चीज भावत ह।

8आपन घर स दूर भटकत भवा मनई अइसा अहइ जइसे कउनो चिरइया आपन घोसला स दूर भटकत ह।

9इत्र अउर सुगंधित धूप मने क आनन्द स भरि देत ही अउर मीत क सच्चि सम्मति स मन उल्लासे स भरि जात ह। 10आपन मीत क जिन बिसरा न ही आपन बाप क मीत क। अउर बिपति में मदद बरे दूर आपन भाई क घरे जिन जा। दूर क भाई स पास क पड़ोसी नीक बा।

11हे मोर पूत, तू बुद्धिमान बन जा अउर मोर मन आनन्द स भरि द्या। ताकि मोरे निन्दा करइ वाला क मई जवाब दइ सकउँ। 12बिपति क आवत लखिके बुद्धिमान जन दूर हट जात ही किंतु मूरख जन बगैर राह बदले चलत रहत ही अउर फँस जात ही।

13जउन कउनो पराए मनई क जमानत भरत ह ओका आपन ओढ़ना भी खोवइ पड़ी।

14ऊँच सुरे में 'सुप्रभात' कहिके अलख भिंसारे आपन पड़ोसी क जिन जगाया करा। उ एक सराप क रूप में झेली आसीर्वाद में नाही।

15झगड़ाळू मेहरारू अइसी होत ह जइसी बर्खा क दिनन में लगातार टपकइ वाला बर्खा।

16ओका रोकब वइसा ही होत ह जइसे कउनो हवा क रोकइ क बेकार जतन करत ह या मूठी में तेल क धरइ क जतन करत ह।

17जइसे लोहे स लोहा धार धरत ह, वइसे ही एक व्यक्ति दूसर व्यक्ति स सीखत ह।

18जउन कउनो अंजीरे क बृच्छ सींचत ह, उ ओकर फल खात ह। वइसे ही जउन आपन सुआमी क सेवा करत ह, उ आदर पाइ लेत ह।

19जइसे जल मुखड़ा क प्रतिबिंबित करत ह, वइसे ही हिरदय मनई क प्रतिबिंबित करत ह।

20मउत अउ कबर कबहुँ तृप्त नाही अइसा ही मनई क आँखिन भी तृप्त नाही होत ह।

21चाँदी अउ सोना क भट्टी-कुठाली में परख लीन्ह जात ह। वइसे ही मनई उ तारीफ स परखा जात ह जउन उ पावत ह।

22तू कउनो मूरख क चूना में पीसिके चाहे जेतना महीन करा अउर ओका पीसिके अनाज जइसा बनाइ द्या ओकर चूरन मुला ओकरी मूरखता क, कबहुँ भी ओहसे दूर न कइ पउब्या।

23आपन रेवड़ क हानत तोहका निहचित ही जानइ चाही। आपन रेवड़ क धियान स देखरेख करा। 24काहेकि धन-दौलत तउ टिकाऊ नाही होतेन। इ राजमकुट पीढ़ी-पीढ़ी तलक बना नाही रहत ह। 25जब चारा कट जात ह, तउ नवी घास उग आवत ह। उ घास पहाड़ियन पड़ स फुन बटोर लीन्ह जात ह। 26मेमनन क ऊन काट ल्या अउर ओढ़ना बना ल्या बोकरियन क खेतन खरीदइ बरे बेच ल्या। 27तोहरे परिवार क, तोहरे दास दासियन क अउर तोहरे आपन बरे भरपूर बोकरी क दूध होइ।

**28** दुट्ट क मने में सदा भय समाया रहत ह अउर जब कउनो पाछा नाही करत ह तउ भी भागत फिरत ह। किन्तु एक धर्मी जन क सदा निर्भय रहत ह वइसे होइ जइसे सेर निर्भय रहत ह।

2देस में जब पाप ही पाप होइ तउ उ देस क सासक लम्बी समइ बरे सासन नाही करब्या। अइसा मनई ही देस क स्थिर रखत ह अउर लम्बी समइ तलक सासन करब्या।

3उ राजा जउन गरीबे क दबावत ह, उ बर्खा क बाढ़ सा होत ह जउन फसल नाही छोड़त।

4जउन व्यवस्था क विधाने क तजि देत ही, दुट्टन क तारीफ करत ही, मुला जउन व्यवस्था क विधान क पालन करत ही ओनकर विरोध में लड़ाइ करत ही।

5दुट्ट जन निआव क नाही समुझत ही। मुला जउन यहोवा क खोज में रहत ही, ओका पूरी तरह जानत ही।

6उ निर्धन जेकर राह खरी अहइ उ धनी मनई स जेकर राह दुट्ट अहइ उत्तिम अहइ।

7विवेकी पूत व्यवस्था क विधानन क पालन करत ह। मुला जउन विषय दोस्तन क साथी बनत ह, उ आपन बाप क निरादर करत ह।

8उ जउन मोट ब्याज उसूलिके आपन धन बढ़ावत ह, उ तउ इ धन जोरत ह कउनो अइसे दयालु बरे जउन गरीबन पइ दया करत ह।

9जदि कउनो व्यक्ति परमेस्सर क सिच्छा पइ कान नाही देत तउ परमेस्सर ओनकर पराथना पइ धियान नाही देत ह।

10उ तउ आपन ही जालि में फँस जाइ जउन सीधे लोगन क बुर मार्गे पइ भटकावत ह। मुला निर्दोस लोगन उत्तिम आसीस पाइ।

11धनी मनई आपन आँखिन में बुद्धिमान होइ सकत ह किन्तू गरीब जन जउन बुद्धि होत ह सच्चाई क लखत ह।

12सज्जन जब जीतत हीं, तउ सब खुस होत हीं। मुला जब दुट्ट क सकती मिल जात ह तउ एक भी अइसा मनई क खोज पाउब कठिन अहइ जउन कि खुस अहइ।

13जउन आपन पापन पइ पर्दा डावत ह, उ तउ कबहुँ नाही फूलत-फलत ह। मुला जउन आपन दोखन क कबूल करत ह अउर जउन गलत ह ओका तजत ह, उ दया पावत ह।

14धन्न अहइ, उ पुरुस जउन यहोवा स डेरात ह। मुला जउन आपन जिद्दी अहइ, विपत्ति में गिरत ह।

15दुट्ट सासक जउन असहाय जन पइ सासन करत हीं अइसे अहइ जइसे दहाड़त भवा सेर या झपट भवा रीछ।

16एक अविवेक सासक आपन लोगन पइ अत्याचार करत ह मुला जउन बुरे मारग स आए भए धने स घिना करत ह, लम्बी समइ तलक सासन करब्या।

17कउनो मनई क दूसर क हतिया क दोख ठहराया तउ उ मनई क सान्ति नाही मिली जब तलक कि उ नाही मरत ह। ओकर मदद जिन करा।

18अगर कउनो निहकलंक होइ तउ उ सुरच्छित अहइ। जदि उ बुरा मनई होइ तउ उ आपन सामरथ खोइ बइठी।

19जउन आपन धरती जोतत-बोवत ह अउर मेहनत करत ह, उसके लगे हमेसा भरपूर खाई क होइ। मुला जउन सदा सपनन में खोवा रहत ह, सदा दल्लि होइ।

20एक इमानदार मनई बहोत सारा आसीस पावत ह। मुला उ मनई जउन हाली धनी बनइ क जतन करत रहत ह; बिना दण्ड क नाही बची।

21निर्णय देइ में पच्छपात करब अच्छा नाही होत ह। किन्तु कछू लोग तउ सिरिफ रोटी क एक टुकरा बरे अनिआय करब।

22सूम सदा धन पावइ क लालच करत रहत ह अउर नाही जानत कि ओकरी ताक में दल्लिद्रता बाटइ।

23उ जउन कउनो जने क सुधारइ क डॉटत ह, उ जियादा पिरेम पावत ह, अपेच्छा ओकरे जउन चापलूसी करत ह।

24कछू लोग होत हीं जउन आपन बाप अउर महतारी स चोरावत हीं। उ कहत ह, "इ बुरा नाही अहइ।" इ उ बुरा

मनई जइसा अहइ। जउन घरे क भीतर आइके सबहिं चिजियन क तोड़-फोड़ कइ देत ह।

25लालची मनई तउ मतभेद भइकावत ह, मुला उ मनई जेकर भरोसा यहोवा पइ अहइ फूली-फली।

26मूरख क आपन पइ बहोत भरोसा होत ह। मुला जउन गियान क राहे पइ चलत ह, सुरच्छित रहत ह।

27जउन गरीबन क दान देत रहत ह ओका कउनो बातन क अभाव नाही रहत। मुला जउन ओनसें आँखी मूँद लेत ह, उ सराप पावत ह।

28जब कउनो दुट्टा सकती पाइ जात ह तउ सज्जन छुप जाइ क दूर चला जात हीं। मुला जब दुट्टा जन क बिनास होत ह तउ सज्जनन क बृद्धि परगट होइ लागत ह।

**29** जउन बार बार डॉट डपट खाइ क बाद भी उहइ बेउहार करत ह तउ निहचय ही उ अचानक बर्बाद होइ जाइ। ओकर बरे कउनो आसा तलक नाही बची।

2जब धर्मी जन क अधिकार पावत ह तउ लोग आनन्द मनावत हीं। जब दुट्ट सासक बन जात ह तउ लोग कराहत हीं। 3अइसा जब जउन विवेक स पिरेम राखत ह, बाप क आनन्द पहोचावत ह। मुला जउन रंडियन क संगत करत ह, आपन धन खोइ देत ह।

4निआव स राजा देस क स्थिरता देत ह। किन्तु राजा जब लालची होत ह तउ लोग आपन काम करवावइ बरे ओका घूस देत हीं। तब देस दुर्बल होइ जात ह।

5जउन अपने साथी क चापलूसी करत ह उ आपन गोड़वन बरे जाल पसारत ह।

6पापी खुद आपन बिछाइ भइ जालि में फँसत ह। मुला एक धर्मी गावत अउर खुस रहत ह।

7सज्जन चाहत हीं कि गरीब क निआव मिलइ किन्तु दुट्टन क ओनकी तनिकउ चिन्ता नाही होत ह।

8जउन अइसा सोचत हीं कि हम दूसरन स उत्तिम अही, उ पचे विपत्ति उपजावत अउर सारे सहर क तहस-नहस कइ देत हीं। मुला जउन जन बुद्धिमान होत हीं, सान्ति क कायम करत हीं।

9बुद्धिमान जन जदि मूरख क साथ में वाद-विवाद सुलझावइ चाहत ह, तउ मूरख उत्तेजित हो जात ह मूरखता क बातन करत ह जेहसे दुइनउँ क बीच सन्धि नाही होइ पावत

10खून क पिआसे लोग, सच्चे लोगन स घिना करत हीं। किन्तु सच्चे लोग ओनकर जिन्नगी बचावइ क जतन करत ह।

11मूरख मनई क लउ बहोतइ हाली किरोध आवत ह। मुला बुद्धिमान धीरा धइके आपन पइ नियंत्रण राखत ह।

12जदि एक सासक झूठी बातन क सुनत ह तउ ओकर सब अधिकारी भ्रस्ट होइ जात हीं।

13एक हिंसाब स गरीब अउर जउन मनई क लूटत ह, उ समान अहइ। यहोवा ही दुइनउँ क बनाएस ह।

14अगर कउनो राजा गरीब पइ निआव स पूर्ण रहत ह तउ ओकर सासन बहोत लम्बे काल बना रही।

15सजा अउर डॉट स सुबुद्धि मिलत ह किन्तु जदि महतारी-बाप मनचाहा करइ क खुला छोड़ि देई, तउ उ आपन महतारी क लज्जा बनी।

16दुट्ट क राज में पाप पनप जात हीं मुला अन्तिम जीत तउ सज्जन क ही होत ह।

17पूत क दण्डित करा जब उ अनुचित करइ, फुन तउ तोहका ओह पइ सदा ही घमण्ड होइ। उ तोहरी लज्जा क कारण कबहुँ नाहीं होइ।

18अगर कउनो देस परमेस्सर क राहे पइ नाहीं चलत तउ उ देस में सान्ति नाहीं होइ। किन्तु उ देस जउन परमेस्सर क व्यवस्था पइ चलत ह, आनन्दित रही।

19सिरिफ सब्द मात्र स दास नाहीं सुधरत ह। चाहे उ तोहार बात क समुझ लेइ, मुला ओकर पालन नाहीं करी।

20अगर कउनो बगैर बिचारे भए बोलत ह तउ ओकरे बरे कउनो आसा नाहीं। जियादा आसा होत ह एक मूख बरे अपेच्छा उ मनई क जउन बिचारे बिना बोलइ।

21अगर तू आपन दास क सदा उ देब्या जउन भी उ चाहइ, तउ अंत में उ तोहार एक उत्तिम दास नाहीं रही।

22किरोधी मनई मतभेद भड़कावत ह, अउर अइसा जन जेका किरोध आवत होइ, बहोत स पापन क अपराधी बनत ह।

23मनई क अहंकार नीचा देखावत ह, मुला उ मनई जेकर हिरदय विनम्र होत आदर पावत ह।

24जउन चोर क संग धरत ह उ आपन स दुस्मनी करत ह। काहेकि अदालत में जब ओका फुरइ बोलइ क होइ तउ उ कछू भी कहइ स बहोत डेरान रहब्या।

25डर मनई बरे फंदा साबित होत ह, मुला जेकर आस्था यहोवा पइ रहत ह, सुरच्छित रहत ह।

26बहोत लोग सासक क मीत होइ चाहत हीं, मुला उ यहोवा ही अहइ, जउन लोगन क फुरइ निआव करत ह।

27सज्जन घिना करत हीं अइसे ओन लोगन स जउन सच्चे नाहीं होतेन, अउर दुट्ट सच्चे लोगन स घिना राखत हीं।

### याके क पूत आगूर क सूक्तियन

**30** इ सबइ सूक्तियन आगूर क अहइँ, जउन याके क पूत रहा। इ पुरुस ईतीएल अउ उक्काल स कहत ह।

2मई महा बुद्धिहीन हउँ। मोहमाँ मनई क समुझदारी बिल्कुल नाहीं अहइ।

3मई बुद्धि नाहीं पाएँ अउर मोरे लगे उ पवित्तर क गियान नाहीं अहइ।

4सरग स कउनो नाहीं आवा अउर हुआँ क रहस्य लिआइ सका पवन क मूठी में कउनो नाहीं बाँधि सका। कउनो नाहीं बाँधि सका पानी क ओढ़ना में अउर कउनो नाहीं जानि सका धरती क छोर। अउर अगर कउनो एन बातन क करि सका ह, तउ मोहसे कहा, ओकर नाउँ अउर नाउँ ओकरे पूत क मोका बतावा, अगर तू ओका जानत अहा।

5परमेस्सर क सब्द दोखरहित होत ह, जउन कउनो भी ओकरी सरण जात हीं उ ओनकर ढाल होत ह। 6तू ओकरे सब्दन में कछू जिन बढ़ा। नाहीं तउ उ तोहका सजा दइ अउर झूठा ठहराइ।

7हे यहोवा, मई तोहसे दुइ बातन माँगत हउँ: ओनका मोरे मउत स पहिले इनकार जिन करा। 8तू मोहसे मिथ्या क, छल क दूर रखा। मोका दरिद्र जिन करा अउर न ही मोका धनी बनावा। मोका बस रोज खाइ क देत रहा। 9कहूँ अइसा न होइ जाइ बहोत कछू पाइके मई तहका तजि देउँ, अउर कहइ लागूँ 'कउन परमेस्सर अहइ?' अउर जदि निर्धन बनउँ अउर चोरी करउँ, अउर इ तरह मई आपन परमेस्सर क नाउँ क लजाउँ। 10तू सुआमी स सेवक क निन्दा जिन करा नाहीं तउ तोहका, उ अभिसाप देइ अउर तोहका ओकर भरपाइ करइ क होइ।

11अइसे भी होत हीं जउन आपन बाप क कोसत हीं, अउर आपन महतारी क धन्न नाहीं कहत हीं।

12होत हीं अइसे भी, जउन आपन आँखिन में तउ पवित्तर बने रहत हीं किन्तु अपवित्तरता स आपन नाहीं धोवा होत हीं।

13अइसे भी लोग अहइ जउन सोचत हीं कि उ पचे बहोत नीक अहइ। उ पचे सोचत हीं कि उ पचे दूसर स बेहतर अहा।

14अइसे भी होत हीं जेनकर दाँत कटार अहइँ अउर जेनकर जबड़न में खंजर जड़ा रहत हीं जेहसे उ पचे इ धरती क गरीबन क हड़प जाँइ, अउर जउन मानवन में स अभावग्रस्त अहइँ ओनका उ पचे लील लेइँ।

15जोंक क दुइ बिटियन होत हीं उ पचे सदा चिचियात रहत हीं, "दया, दया।" तीन चिजियन अइसी अहइँ जउन कबहुँ नाहीं अघातिन अउर चार अइसी जउन कबहुँ बस नाहीं कहतिन। 16कब्र, बाँझ कोख अउर धरती जउन जल स कबहुँ आघात नाहीं, अउर उ आगी जउन कबहुँ 'बस' नाहीं कहतिन।

17जउन आँखिन आपन ही बापे पइ हँसत हीं, अउर महतारी क बात मानइ स घिना करत ह, घाटी क कउआ ओका नोंच लेइँहीं अउर ओका गीध खाइ जइँहीं।

18तीन बातन अइसी अहइँ जउन मोका बहोत विचित्र लागत हीं, अउर चउथी अइसी जेका मई समुझ नाहीं पावत हउँ। 19अकासे मँ उड़त भए गरुड क मारग, अउर लीक नाग क जउन चट्टान पइ चला, अउर महासागरे पइ चलत जहाज क राह अउर उ पुरुस क मारग जउन कउनो कामिनी क पिरम जाल मँ बैँधा होइ।

20बिभीचारी मेहरारू क स्वभाव अइसी होत ह, उ खात रहत अउर आपन मुँह पोंछ लेत, अउर कहा करत ह, "मई तउ कछू भी बुरा नाहीं किहेउँ।"

21तीन बातन अइसी अहइँ जेनसे धरती काँपत ह अउर एक चउथी अहइ जेका उ सह नाहीं कइ पावत। 22दास जउन राजा बन जात अउर मूख जेकर लगे प्रयाप्त भोजन होत ह, 23अउर अइसी मेहरारू जेहसे घिना करत ह अउर अइसी दासी जउन सुआमिनी क जगह लइ लेइ।

24चार जीव धरती पइ क अइसा अहइ जउन कि बहोत छुद्र अहइँ मुला ओनमाँ बहोत जियादा विवेक भरा भवा अहइ।

25चीटियन जेनमाँ सक्ती नाहीं होत हीं फुन भी उ पचे गर्मी में आपन खइया क बटोरत हीं,

26बिजू (सापान) दुर्बल प्राणी अहई फुन भी उ पचे कड़ी चट्टानन में आपन घर बनावत हीं,

27टिड्डियन क कउनो भी राजा नाहीं होत ह फुन भी उ पचे पंक्ति बाँधिके साथ अगवा बढ़त हीं।

28अउर उ छिपकिली जउन जब सिरिफ हाथ स ही धरी जाइ सकत ह, फुन भी उ राजा क महलन में पाई जात ह।

29तीन प्राणी अइसे अहई जउन आन-बान स चलत हीं, किन्तु नाहीं, दर असल उ चार अहइ:

30एक सेर, जउन सबहिं पसुअन में सकतीवाला होत ह, जउन कबहुँ कउनो स नाहीं डेरत,

31घमण्डी चाल स चलत भवा मुर्गा अउ एक बोकरा अउर उ राजा जउन आपन सेना क अगवाइ करत ह।

32तू जदि कबहुँ आपन बेवकूफी क कारण स घमण्डी हो जात ह अउर दूसर क बिरुद्ध योजना बनावत ह तउ एका बन्द करा अउर जउन तू करत ह ओकरे बरे सोच्या।

33जइसे मथानी स दूध निकरत ह माखन अउर नाक मरोड़इ स लहू निकरि आवत ह वइसे ही जगाउब किरोध क होत ह झगड़न क भड़काउब।

### राजा लमूएल क सूक्तियन

**31** इ सबइ सूक्तियन राजा लमूएल क, जेनका ओका ओकर महतारी सिखाए रही।

2तू मोर पूत अहा उ पूत जउन मोका पिआरा अहइ। तोहका पावइ क मई परमेस्सर स मन्त माने रहेउँ। 3तू बियर्थ में आपन सकती मेहररूअन पइ जिन खर्च करा। मेहररू ही राजा लोगन क बिनास क कारण होत ह एह बरे तू ओन पइ आपन छय जिन करा। 4हे लमूएल! राजा क मधूपान सोभा नाहीं देता, अउर न ही इ कि सासक क यवसुरा ललचाइ। 5नाहीं तउ, उ पचे दाखरस क बहोत जियादा पान कइके, विधान क व्यवस्था क बिसरि जइहीं अउर उ पचे सारे दीन दलितन क अधिकारन क छोरि लेइहीं। 6ओन लोगन क जौ क दाखरस पिअइ द्या जउन बहोत बड़ा विपत्ती में अहइ। 7उ पचे पिअइ अउर आपन दीनता क बरे में बिसर जाइ। उ पचे आपन मुसीबतन क याद नाहीं राखइही।

8तू ओनके बरे बोल जउन कबहुँ भी आपन बरे बोल नाहीं पावत हीं, अउर ओन सबन क, अधिकारन बरे बोल जउन असाहय अहइ अउर विपती क मारा अहइ। 9तू ओन बातन क हेतु डटिके खड़ा रह जेनका तू जानत ह कि पचे उचित, निआवपूर्ण अहा। अउर बिना पच्छ-पात क सब क निआव कर। गरीब अउर जरुरत मन्द लोगन क अधिकार क रच्छा करा।

### आदर्स पत्नी

10गुणवन्ती पत्नी कउन पाइ सकत ह? उ जन मणि-मणिकन स कहुँ जियादा कीमती अहइ।

11ओकर पति ओकर बिस्सास कइ सकत ह। ओका कउनो भी अच्छी चिजियन क कमी नाहीं होइ।

12सतपत्नी पति क संग उत्तिम व्यवहार करत ह। आपन जिन्नगी भर ओकरे बरे कबहुँ विपत्ति नाहीं उपजावत।

13उ हमेसा ऊनी अउ सूती ओढ़ना बनावइ में व्यस्त रहत ह।

14उ उ पानी क जहाज क नाई अहइ जउन दूर देस स आवात ह अउर हर कहुँ स घरे पर भोज्य वस्तु लिआवत ह।

15भिसारे उठिके उ खइया क बनावत ह। अपने परिवारे क अउर दासियन क हींसा ओनका देत ह।

16उ लखिके अउ परखिके खेत मोल लेत ह। आपन कमात भवा धन स दाख क बारी लगावत ह।

17उ बड़ी मेहनत करत ह। उ आपन सबहिं काम करइ क समर्थ अहइ।

18जब भी उ आपन बनाई चीज क बेचत ह, तउ लाभ कमात ह। उ देर रात तलक दीप जलाइ क काम करत ह।

19उ सूत कातत अउर आपन वस्तु बुनत ह।

20उ हमेसा ही दीन्दुःखी क दान देत ह, अउर कंगाल जल क सहायता करत ह।

21जब सर्दी पड़त ह तउ उ आपन परिवार बरे चिंतित नाहीं होत ह। काहेकि उ सबहिं क उत्तिम गरम ओढ़ना दइ रखे अहइ।

22उ चादर बनावत ह अउर बिस्तरा पइ फैलावत ह। उ सने स बना भवा बढ़िया अउर बेगनी ओढ़ना पहिरत ह।

23लोग ओकरे पति क आदर करत ही उ जगह पावत ह नगर प्रमुखन क बीच।

24उ अति उत्तिम बइपारी बनत ह। उ ओढ़नन अउर कमरबंदन क बनाइके ओनका बइपारी लोगन क बेचत ह।

25उ सकतीवाली अहइ, अउर आन-बान वाली अहइ। अउर बिस्सास क संग भविष्य क ओर लखत ह।

26जब उ बोलत ह, उ विवेकपूर्ण रहत ह। ओकरी जीभ लोगन क पिरेम करइ अउर दाया करइ क सिच्छा देत ह।

27उ कबहुँ भी आलस नाहीं करत अउर आपन घर बार क चिजियन पइ हर एक दिन धियान रखत ह।

28ओकर बच्चन खड़ा होत हीं अउर ओका आदर देत हीं अउर ओकरे बारे में अच्छी बातन करत ह। ओकर पति ओकरी तारीफ करत ह।

29ओकर पति कहत ह, “बहोत स उच्चकोटि क मेहररूअन अहइ। किन्तू ओन सब में तू ही सर्वोत्तिम पत्नी अहा।”

30आकर्षण धोकाबाज़ अहइ अउर सुन्नरता दुइ पल क अहइ। मुला उ मेहररू जेका यहोवा क डर बाटइ, ओकरी तारीफ हाइ चाही।

31ओका उ प्रतिफल द्या जेकर उ जोगग अहइ। अउर जउन काम उ किहेस ह, ओनके बरे सारे लोग क बीच में ओकर तारीफ करा।

# भजन संहिता

## पहिला भाग भजन 1

1उ मनई सचमुच धन्य होइ जउन दुस्टन क सलाह न मानी, अउर पापियन क संग सामिल नाहीं होत ह अउर ओनकर संग नाहीं रहत ह जउन परमेस्सर क बरे सम्मान नाहीं दिखावत ह।\*

2उ नीक मनई अहइ जउन यहोवा क उपदेसन स पिरेम रखत ह। उ तउ दिन रात ओन उपदेसन क मनन करत ह।

3एहसे उ मनई उ बृच्छ जइसा मजबूत बनत ह जेका सिंचाई क नहर क किनारे रोपा गवा ह। उ उ बृच्छ क नाई बाटइ, जउन छेत्र में फल देत ह अउ जेकर पत्ता कबहुँ नाहीं मुझातेन। उ जउन भी करत ह सफल ही होत ह।

4मुला दुस्ट मनई अइसे नाहीं होतेन। दुस्ट मनई उ भूसा क नाई होत ही जेनका हवा क झोका उड़ाइ लइ जात ह।

5एह बरे दुस्ट मनई निआव क मुकाबला नाहीं कइ पइहीं। सज्जन लोगन क सभा में उ पचे दोखी ठहरावा जइहीं अउर ओन पापी लोगन क बख्सा न जाइ।

6एकर कारण इ बाटइ कि यहोवा सज्जन लोगन क अगुवाइ करत ह, मुला दुर्जन लोग खो जाइहीं।

## भजन 2

1दूसरे देसन क मनइयन काहे ऐतना हुल्लड़ मचावत हीं अउर रोवत ह? अउर काहे बियर्थ सइयन्त्र रचत हीं?

2अइसे देसन क राजा अउर नेता यहोवा अउर ओकरे चुने भएन राजा क खिलाफ होइ बरे आपुस में एकजुट होइ जात हीं।

3उ सबइ नेता लोग कहेन, “आवा परमेस्सर स अउ उ राजा स जेका उ चुनेस ह, हम पचे एकजुट होइ क विद्रोह करी। आवा ओकरे बन्धनन क हम उतारिके फेंकि देइ।”

4मुला मोर सुआमी, सरग क राजा, ओन लोगन प हँसत ह।

5-6परमेस्सर कोहान ह अउर उ ओनसे कहत ह, “मई इ पुरुस क राजा बनवइ बरे चुनेउँ ह। उ मोर पवितर पहाड़ सिन्धुन पइ राज करी अउर इहइ ओन नेता लोगन क डेरावत ह।

7अब मई यहोवा क फरमान क बारे में तोहका बतावत हउँ। यहोवा मोसे कहे रहा, “आजु मई तोहार बाप बनत हउँ अउर तू आजु मोर पूत बन गवा ह।

**उ मनई ... दिखावत ह** उ मनई भाग्यवान ह जउन दुदहन क सलाह पइ नाहीं चलत ह या पापियन क मारग नाहीं लेत ह या ठट्ठा करइ वालन क घरे में नाहीं रहत ह।

8अगर तू मोसे मँगव्या, तउ इ सबइ देसन क मई तोहका दइ देबउँ अउ इ धरती क सबहिं जन तोहार होइ जइहीं।

9तोहरे लगे ओनका बर्बाद करइ क वइसे ही सकती होइ जइसे कउनो माटी क भँड़ी क कउनो लोहे क डण्डा स चूर चूर कइ देइ।”

10एह बरे, हे राजा लोगो, तू पचे बुद्धिमान बना। हे सासक लोगो, तू पचे इ पाठे क सीख ल्या।

11तू पचे बहोतइ भय स यहोवा क आग्या माना।

12खुद क ओकर क पूत क बिस्सासपात्र देखेवा। वरना उ कोहाइ जाइ अउर तू पचन्क नास कइ देइ। असल में उ पहिले ही काफी कोहाइ चुका भवा ह। मुला जउन परमेस्सर पइ निर्भर करत अहई धन्य होब।

## भजन 3

*दाऊद क ओह समइ क गीत जब उ आपन पूत*

*अबसालोम स दूर पराइ ग रहा।*

1हे यहोवा, मोरे केतैना ही केतैना दुस्मन अहई, केतैना लोग मोरे खिलाफ ठाड़ होइ ग अहई।

2केतैना ही लोगन मोर खिलाफ सइयंत्र रचेन, उ कहत हीं, “परमेस्सर ऐंकर रच्छा नाहीं करी।”

3मुला यहोवा, तू मोर ढाल अहा। जउन मोर सम्मान बा उ तू ही अहा। हे यहोवा, तू ही मोर मूँड ऊँच करत अहा।

4मई यहोवा क ऊँची अवाजे में पुकारबउँ। उ आपन पवितर पर्वत स मोका जवाब देइ।

5मई आराम करइ बरे ओलर सकत हउँ। मई जानत हउँ कि मई जाग जाबेउँ, काहेकि यहोवा मोका बचावत अउर मोर रच्छा करत ह।

6चाहे हज़ारन सैनिक मोका घेर लेइहीं मुला ओन दुस्मनन स नाहीं डेराब।

7हे यहोवा, उठा! मोरे परमेस्सर मोका बचावा। तू बहोत सक्तीसाली अहा। अगर तू मोरे दुस्मनन क मुँहना पइ प्रहार करा, तउ ओनकइ सबहिं दँतन टूटि जाइहीं।

8यहोवा आपन लोगन क रच्छा कइ सकत ह। हे यहोवा, तोहरे मनइयन पइ तोहार आसीस रहइ।

## भजन 4

*तार स बजइ वाले साज क संग संगीत निर्देशक बरे*

*दाऊद क एक तु गीत।*

1मोर उत्तम परमेस्सर, जब भी मई तोहका गोहरावउँ तू मोका जवाब दिया। मोर बिनती क सुना अउर मोहे पइ कृपा करा। जब कबहुँ बिपतियन मोका घेरेस तू मोका बचाएस।

2अरे लोगो, कब तलक तू पचे मोरे बारे में बुरे सब्द कहब्या? तू लोग मोरे बारे में कहइ बरे नवा झूठ हेरत रहत अहा। ओन झूठन क कहइ स तू लोग पिरेम रखत ह।

3तू पचे जानत अहा कि आपन नेक लोगन क यहोवा सुनत ह। जब भी मई यहोवा क पुकारत हउँ, उ मोर पुकार क सुनत ह।

4जब भी तोहका कउनो बात क परेसानी होइ, तउ होइ सकत क तोहका किरोध आ जाइ, मुला पाप जिन करया। जब तू आपन बिछउना पइ जा, ओन बातन पइ बिचार करा अउ सांत होइ जा।

5ठीक तरह बलि क अर्पण करा अउ यहोवा पइ भरोसा रखा।

6बहोत स लोग कहत हीं, “परमेस्सर क नेकी हम पचन्क क कउन देखौइ? हे यहोवा, आपन प्रकास स चमकत मुँहना क प्रकास हम पचन पइ चमकावा।”

7हे यहोवा, तू मोका बहोत खुस बनाइ दिहा। कटनी क समइ भरपूर फसल अउ दाखरस पाइके जब हम पचे आनन्द अउ खुसी मनाइत ह ओसे भी कहूँ जियादा खुस अब मई अहउँ।

8मई बिछउना पइ ओलरत हउँ अउर सात्ति स सोवत हउँ। काहेकि यहोवा, तू ही मोका सुरच्छित कइके सोवइ बरे ओलरत ह।

### भजन 5

*बाँसुरी क बजनिया निर्देसक बरे वाऊद क गीत।*

1हे यहोवा, मोरे सब्द क सुना अउर तू ओकर सुध ल्या जेका तोका कहइ क मई जतन करत हउँ।

2हे मोरे राजा, मोर परमेस्सर मोर दुहाइ पइ धियान द्या, काहेकि मई तोहसे ही पराथना करत हउँ।

3हे यहोवा, हर भिंसारे तोहका, मई आपन भेंटन क अर्पण करत हउँ। तू ही मोर सहायक अहा। मोर निगाह तोहे पइ लागि अहइ अउर तू ही मोर पराथना हर भिंसारे सुनत अहा।

4तू अइसा परमेस्सर नाहीं जउन झूठे देवतन क नाई दुट्टता क चाहत ह। बद लोग तोहरे चारिहुँ कइँती नाहीं रहइ सकतेन!

5सेखी हाँकइ वाल लोग तोहार समन्वा नाहीं रुक सकतेन जउन दुस्टता करत ह तू ओनसे नफरत करत ह।

6जउन झूठ बोलत हीं ओनका तू नस्ट करत ह। यहोवा अइसेन मनइयन स घिना करत ह, जउन दूसर लोगन क नोस्कान पहुँचावइ क सइयन्त्र रचत रहत हीं।

7मुला हे यहोवा, तोहरी अपार करुणा स मई तोहरे मन्दिर में आउबा। हे यहोवा, मोका तोहार डर अहइ मई सम्मान तोहका देत अहउँ। एह बरे मई तोहरे पवितर मन्दिर कइँती निहुरिके तोहार पइलगी करबा।

8हे यहोवा, तू मोका आपन नेकी क राह देखौवा। तू आपन राह क मोरे समन्वा सोझ करा काहेकि मई दुस्मन स घिरा भवा अहउँ।

9उ सबइ लोग फुरइ नाहीं बोलतेन। उ सबइ लबार अहइँ, जउन फुरइ क तोड़त मरोड़त रहत हीं। ओनकर मुँह

खुली कब्र क नाई अहइँ। उ सबइ अउरन स उत्तिम चिकनी-चुपरी बातन करत उ पचे ओनका बस जालि मँ फँसावा चाहत हीं।

10हे परमेस्सर, ओनका सजा द्या। ओनकर आपन ही जालन मँ ओनका अरझइ द्या। इ सबइ लोग तोहरे खिलाफ होइ ग अहइँ, ओनका ओनकर आपन ही बहोत स पापन क सजा द्या।

11मुला जउन परमेस्सर मँ आस्था धरत रहत हीं, उ सबइ प्रसन्न होई अउ उ सबइ सदा सदा ही आनन्दित रहइँ। हे परमेस्सर, तू ओनकर रच्छा करा अउर ओनका सकती द्या जउन लोग तोहरे नाउँ स पिरेम राखत हीं।

12हे यहोवा, तू निहचय ही धर्मी क आसिस देत ह। आपन कृपा स तू ओन पचन्क एक ठु बड़की ढाल बनिके फुन ढक लेत ह।

### भजन 6

*सौमिनिथ सैली क तार वादय क संग निर्देसक बरे*

*दाऊद क एक ठु गीत।*

1हे यहोवा, जब तू किरोध मँ होब्या तउ मोका सजा मत द्या। मोका मत सुधारा जब तू बहोत कोहाइ भवा हवा।

2हे यहोवा, मोहे प दया करा। मई रोगी अउ दुर्बल अहउँ। मोरे बेरामियन क हर ल्या। मोर हाइ काँपत हीं।

3मोर समूचा देह थर-थर काँपत ह। हे यहोवा, मोर भारी दुःख तू कब तलक रखब्या।

4हे यहोवा, मोका फुन स बलवान करा। तू महा दयावान अहा, मोर रच्छा करा।

5मरे भए लोग तोका आपन कब्रन मँ याद नाहीं करतेन। मउत क देस मँ उ पचे तोहार स्तुति नाहीं करतेन। एह बरे मोका बचावा।

6हे यहोवा, सारी रात मई तोहका पुकारत रहत हउँ। मोर बिछउना मोरे आँसुअन स भीज गवा ह। मोरे बिछउना स आँसू टपकत रहत हीं। तोहरे बरे मई रोवत भवा छीन होइ गवा हउँ।

7मोर दुस्मनन मोका बहुतेरा दुःख दिहन। इ मोका सोक मँ डाइके अउर बहोत दुःखी कइ डाएन अउर अब मोर अँखियन बिलखइ स थकी भइ हारी अउर दुर्बल अहइँ।

8अरे ओ दुर्जन लोगो, तू मोसे दूर हटा। काहेकि यहोवा मोका रोवत भवा सुनि लिहस ह।

9मोर बिनती यहोवा क काने तलक पहोंच चुकी बाटइ अउर मोरी पराथना क सुनिके यहोवा जवाब दइ दिहस ह।

10मोर सबहिँ दुस्मनन डर जाई अउ निरास होइहीं। कछू अचानक ही घटित होइ अउर उ फुस स अपमानित कीन्ह जाइहीं।

### भजन 7

*दाऊद क एक भजन गीत: जेका उ यहोवा बरे गाएस।*

*इ गीत बिन्यामीन परिवार समूह क कीस क पूत*

*साऊल क बारे मँ अहइ।*

1हे मोर यहोवा परमेस्सर, मोका तोहे प भरोसा बा ओन मनइयन स तू मोर रच्छा कर, जउन मोरे पाछे पड़ा अहइँ। मोका तू बचाइ ल्या।

2अगर तू मोका नहीं बचउत्या तउ मोर दसा उ निरीह गोरू क नाई होइ, जेका कउनो सेर धइ दबोच लेत ह। उ मोका घेरइके लइ जाइ कउनो भी मनई मोका नहीं बचाइ पाइ।

3हे मोर यहोवा परमेस्सर कउनो पाप करइ क मई दोखी नहीं हउँ। मई तउ कउनो भी पाप नहीं किहेउँ।

4मई आपन मीतन क संग बुरा नहीं किहेउँ अउर आपन मीत क दुस्मनन क भी मई मदद नहीं किहेउँ।

5मुला एक दुस्मन मोका पाछे खदेरत बाटइ उ मोर हत्या करइ-चाहत ह। उ दुस्मन चाहत ह कि मोर जिन्गी क धरती पइ रउँद डवइ अउर मोर आतिमा क धूरि मँ मिलाइ देइ।

6यहोवा उठा, अउर आपन किरोध मोर दुस्मन क बिरुद्ध परगट करा। मोरे बरे निआव करा जेकर माँग तू हमेसा करत रहा ह।

7हे यहोवा, मनइयन क निआउ करा। आपन चारिहुँ कइँती क रास्ट्र क बटोरा अउ मनइयन क निआव करा।

8हे यहोवा, आपन निआव क कुसीं पइ बइठा। आपन निअरे क देसन क इकट्ठा करा अउर ओनका निआव करा यहोवा मई निर्दोख अहउँ, मोका निआव द्या जेका मई हकदार अहउँ।

9दुर्जन क दण्ड द्या अउर सज्जन क मदद करा। हे परमेस्सर, तू उत्तिम अहा। तू अन्तर्जामी अहा। तू तउ मनइयन क हिरदइ मँ निहारि सकत अहा।

10जेनकर मन सच्चा अहइँ, परमेस्सर ओन मनइयन क मदद करत ह। एह बरे उ मोर भी मदद करी।

11परमेस्सर उत्तिम निआवकर्ता अहइ। उ कबहुँ भी आपन किरोध परगट कइ देइ।

12परमेस्सर जब कउनो निर्णय लइ लेत ह, तउ फिन आपन मन नहीं फेरत।

13ओहमाँ मनइयन क सजा देइ क छमता बाटइ। उ मउत क सब सामान साथे रखे बाटइ।

14कछू अइसे लोग होत हीं जउन हमेसा कुकर्मन क योजना बनावत रहत हीं। अइसेन ही लोग गुप्त सड्यन्त्र रचत रहत हीं। अउर झूठ बोलत रहत हीं।

15उ पचे दूसर लोगन क जालि मँ फाँसइ अउर नोस्कान पहुँचावइ क जतन करत रहत हीं। मुला आपने ही जालि मँ फाँसिके उ पचे नोस्कान उठइहीं।

16उ पचे आपन ही कर्म क उचित सजा पइहीं। उ पचे दूसर लोगन क संग क्रूर रहेन। मुला जइसे ओनका चाही वइसेन ही फल पइहीं।

17मई यहोवा क जस गावत हउँ, काहेकि उ उत्तिम अहइ। मई यहोवा क सबन त ऊँच नाउँ क बड़कइ करत हउँ।

## भजन 8

*गित्तीथ क संगत पइ संगीत निर्देसक बरे दाऊद क एक तु पद।*

1हे यहोवा, हमार सुआमी, तोहार नाउँ सारी भुइँया पइ बहोतइ अद्भुत बाटइ। तोहार नाउँ सरगे मँ हरे कइँती तोहका बड़कइ देत बाटइ।

2लरिकन अउ नान्ह गदेलन क मुँहन स, तोहरी बड़कइ क गीत गावा जात हीं। तू आपन दुस्मनन क चुप करावइ मँ अइसा करत ह।

3हे यहोवा, जब मोर निगाह अकासे पइ पड़त ह, जेका तू आपन हाथे स रच्या ह। अउर जब मई चाँद तारन क लखत हउँ जउन तोहार रचना बाटइ, तउ मई अचम्भा स भरि जात हउँ।

4मनइयन तोहरे बरे काहे ऐतना महत्वपूर्ण होइ गएन? तू ओनका काहे बरे सुमिरत अहा? मनई क पूत तोहरे बरे काहे महत्वपूर्ण बाटइ? काहे तू ओन पइ धियान तलक देत अहा?

5मुला तोहरे बरे मनई महत्वपूर्ण अहइ! तू मनई क देवता क प्रतिरूप बनाया ह, अउ ओनके मूँडे पइ महिमा अउ सम्मान क मुकुट धरे अहा।

6तू आपन सृस्टि क जउन कछू भी रच्या ह मनइयन क ओकर हकदार बनाया ह।

7मनई भेड़िन पइ, गोरू धने पइ अउ जंगल क सबहिँ हिसक जन्तुअन पइ राज्ज करत ह।

8उ अकासे मँ पंछियन पइ अउ समुदर मँ तैरत भए जलचरन पइ राज्ज करत ह।

9हे यहोवा, हमार सुआमी, सारी धरती पइ तोहार नाउँ बहोतइ अद्भुत अहइ।

## भजन 9

*अलामौथ बैन राग पइ बनाव गवा*

*दाऊद क पद: संगीत निर्देसक बरे।*

1मई आपन सम्पूर्ण मन स यहोवा क स्तुति करत हउँ। हे यहोवा, तू जउन अद्भुत कर्म किहे अहा मई ओन सबन्क वर्णन करबउँ।

2तू ही मोका ऐतना आनन्द मँ रहइवाला बनाया ह। हे परम परमेस्सर, मई तोहरे नाउँ क बड़कई क गीत गावत हउँ।

3जब मोर दुस्मन मोसे पलटिके मोरे खिलाफ होत हीं, तब परमेस्सर ओनकर पतन करत ह अउ उ पचे बिलाइ जात हीं।

4तू सच्व निआव करवइया अहा। तू आपन सिंहासन पइ निआव करवइया क रूप मँ बिराजा। तू मोरे मुकदमा क सुनवाई किह्या अउर मोर निआव किहा।

5हे यहोवा, तू ओन दुस्मनन क कठोर झिड़की दिहा अउ हे यहोवा, तू ओन दुस्टन क नास किहा। ओनकइ नाउँ तू जिअत मनइयन क सूची स हमेसा हमेसा बरे मेट दिहा।

6दुस्मन नस्ट होइ गवा ह! हे यहोवा, तू ओनकर नगर मेट दिहा ह। ओनकर भवन अब सिरिफ खण्डहर होइ गवा अहइँ ओन बुरे मनइयन क हम पचन्क सुमरन तलक दिआवइ क कछू भी नहीं बचा बाटइ।

7मुला यहोवा, तोहार सासन अविनासी अहइ। यहोवा आपन राज्ज क सक्तीसाली बनाएस। उ दुनिया मँ निआव लिआवइ बरे इ किहस।

8यहोवा धरती क सबहिँ मनइयन क निस्पच्छ होइके निआव करत ह। यहोवा सबहिँ जातियन क बे पच्छपात क निआव करत ह।

9यहोवा दलित अउ सोसितन क सरण क ठउर अहइ। विपत्ति क समइ उ एक सुदृढ़ किला अहइ।

10जउन तोहे पइ भरोसा रखत हीं, तोहार नाउँ जानत हीं। हे यहोवा, अगर कउनो तोहरे दुआरे पइ आइ जाइ तउ बिना मदद पाए लउटत नाहीं।

11अरे ओ सिध्योन क निवासी लोगो यहोवा क गीत गावा जउन सिध्योन में विराजत अहइ। सबहिं जातियन क ओन बातन क विसय में बतावा जउन बड़की बातन यहोवा कहेस ह।

12यहोवा हत्यारन क सजा देत ह अउर ओनका याद रखत ह जउन ओकरे लगे मदद बरे जात ह। उ दीन लोगन क नाहीं भूलत जउन ओकरे लगे सहायता बरे रोवत अहइँ।

13यहोवा क स्तुति मई गाएँ ह: “हे यहोवा, मोहे पइ दया करा। लखा, कउने तरह मोरे सत्रु मोका दुःख देत हीं। ‘मउत क दुआर’ स तू मोका बचाइ ल्या।

14जेहसे यहोवा यरूसलेम क फाटक पइ मई तोहार स्तुति क गीत गाइ सकउँ। मई बहोतइ प्रसन्न होब काहेकि तू मोका बचाइ लिहा।”

15दूसर जातियन गइहा खोदेन जेहसे लोग ओनमाँ भरगइ जाई मुला उ पचे आपन ही खने भाए गइहन मँ खुद बिलाइ जइहीं। दुट्ठ लोग जालि छुपाइ छुपाइके बिछापन, जेहसे उ पचे ओहमाँ दूसर लोगन क फौंसि लेई। मुला ओनमाँ ओनकर ही गोइ धँसि गएन।

16यहोवा जउन निआव किहस उ ओहसे पहिचाना गवा कि जउन बुरा करम करत हीं। उ पचे आपन ही हाथन स कीन्ह भाए करम स जौलि मँ फौंसि गएन। (हिग्गायो, सेला)

17उ पचे दुर्जन होत हीं, जउन परमेस्सर क बिसरत हीं। अइसे लोग मउत क देस जइहीं।

18कबहुँ कबहुँ लागत ह जइसे परमेस्सर दुखियन क पीरा मँ बिसरि जात ह। इ अइसा लागत ह जइसे दीन लोग बिना आसा क अहइँ। मुला परमेस्सर दीन लोगन क हमेसा हमेसा बरे कबहुँ नाहीं बिसरत।

19हे यहोवा, उठा अउ गस्ट्रन क निआव करा। कहुँ उ पचे इ सोच न बइठईँ उ पचे प्रबल अउ सवतीसाली बाटेन।

20मनइयन क पाठ सिखाइ द्या, जेहसे उ पचे जान जाई कि उ पचे बस सिरिफ मनई अहइँ।

## भजन 10

1हे यहोवा, तू ऐतना दूर काहे खड़ा रहत ह? कि संकट मँ पड़ा लोग तोहका निहारि नाहीं पउतेन।

2अहंकारी दुट्ठ जन दुर्बल क दुःख देत हीं। उ पचे आपन सइयन्न क रचत रहत हीं।

3दुट्ठ जन ओन चिजियन पइ घमण्ड करत हीं, जेनकर ओनका गहरी इच्छा अहइ अउ लालची मनई परमेस्सर क कोसत रहत हीं। इ तरह दुट्ठ देखौवत हीं कि उ पचे यहोवा स घिना करत रहत हीं।

4दुट्ठ लोग ऐतना घमण्डी होत हीं कि उ पचे परमेस्सर क पाछे नाहीं चल सकतेन। उ पचे खराब खराब योजना रचत हीं। उ पचे अइसा करम करत हीं, जइसे परमेस्सर क कउनो अस्तित्व ही न बाटइ।

5दुट्ठ जन सदा कुटिल करम करत हीं। उ पचे परमेस्सर क विवेक स पूरी व्यवस्था अउ सिच्छन पइ धियान नाहीं देतेन। हे परमेस्सर, तोहार सबहिं दुस्मन तोहरे उपदेसन क उपेच्छा करत हीं।

6उ पचे सोचत हीं, जइसेन कउनो बुरी बात ओनके संग नाहीं घटि जाइ। उ पचे कहत रहत हीं, “हम पचे मउज मँ रहब अउ कबहुँ भी दण्डित नाहीं होब।”

7अइसेन दुट्ठ क मुँह सदा साप देत रहत ह। उ पचे दूसर जन क निन्दा करत हीं अउर काम मँ लिआवइ क सदा ही बुरी बुरी योजना रचत रहत हीं।

8अइसे लोग गुप्त ठउरन मँ लुकान रहत हीं, अउर लोगन क फौंसावइ क प्रतीच्छा करत हीं। उ पचे लोगन क नस्कान पहुँचावइ खातिर लुकान रहत हीं अउ निरपराधी लोगन क हत्या करत हीं।

9दुट्ठ जन सिंह क नाई होत हीं जउन ओन गोरूअन क धरइ क घात मँ रहत हीं। जेनका उ पचे खाइ जइहीं। दुट्ठ जन दीन लोगन पइ मार करत हीं ओनकर बनाए भाए जालि मँ बेसहारा दीन फौंसि जात हीं।

10दुट्ठ जन बार-बार दीनन पइ घात करत अउ ओनका दुःख देत ह।

11एह बरे दीन जन सोचइ लागत हीं, “परमेस्सर हमका बिसराइ ही दिहस। हमसे तउ परमेस्सर सदा-सदा बरे दूर होइ गवा बाटइ। उन कछू भी मोरे संग घटत अहइ, ओहसे परमेस्सर ट्रस्टि फेरि लिहस ह!”

12हे यहोवा, उठा अउर कछू तउ करा! हे परमेस्सर, ओन दुट्ठ जनन क आपन हाथ उठाइके सजा द्या! अउर ऐन दीन दुःखियन क जिन बिसरा।

13दुट्ठ जन काहे परमेस्सर क खिलाफ होत हीं? काहेकि उ पचे सोचत हीं कि परमेस्सर ओनका कबहुँ नाहीं दण्डित करी।

14हे यहोवा, तू ही अहइ जउन बुरे लोगन दुआरा कीन्ह भावा अत्याचार अउर बुरे कामन क कउनो स भी जियादा लखत ह। तू एकर बारे मँ कछू कदम उठा। दुःखन स घिरा लोग मदद माँगइ तोहरे लगे आवत हीं। हे यहोवा, सिरिफ तू ही अनाथ लोगन क सहायक अहा, एह बरे ओनकर रच्छा करा।

15हे यहोवा, दुट्ठ जनन क तू नस्त कइ द्या।

16तू ओनका आपन धरती स ढकेलिके बाहरे करा!

17हे यहोवा, दीन दुःखी लोग जउन चाहत हीं उ तू सुनि लिहा। ओनकर पराथना सुना अउर ओनका पूरा करा जेनका उ पचे माँगत हीं।

18हे यहोवा, अनाथ गदेलन क तू रच्छा करा। दुःखी लोगन क अउर जियादा दुःख जिन पावइ द्या। दुट्ठ लोगन क तू ऐतना भयभीत कइ द्या कि उ पचे हिआँ न टिक पावई।

## भजन 11

संगीत निर्देशक बरे दाऊद क पद।

1मई यहोवा पइ भरोसा करत हउँ! फुन तू मोसे काहे कहत ह कि मई पराइके कहुँ जाउँ। तू कहत अहा मोसे कि, “पंछी क नाई आपन पहाड़े पइ उड़ि जा!”



दुट्ट जन ओन सिकारी क समान अहई। उ पचे  
अँधियारे में लुकात हीं। उ पचे धनुस क डोरी क पाछे हीँचत  
हीं। उ पचे आपन बाणन क साधत हीं अउर उ पचे नीक,  
नेक मनइयन क हिरदइ में सोइइ बाण छोड़त हीं।

3धर्मी का कइ सकहीं जब समाज क नीव ही तबाह कइ  
दीन्ह जाइ?"

4यहोवा आपन विसाल पवित्तर मन्दिर में विराजा बाटइ।  
यहोवा सरगे में आपन सिंहासने पइ बइठत ह। यहोवा सब  
कछू लखत ह, जउन भी होनी होत ह। यहोवा क  
आँखिन लोगन क सज्जनाई व दुर्जनाई क परखइ मैं लाग  
रहत हीं।

5यहोवा धर्मी अउ दुट्ट लोगन क परख करत ह, अउर  
उ ओन लोगन स घिना करत ह जउन हिंसा स प्रीति धरत  
हीं।

6उ गरम कोयलन अउ बरत भइ गन्धक क बरखा क  
तरह ओन बुरे लोगन पइ गिराई। ओन बुरे लोगन क हींसा  
में बस झुसत भइ हवा बही।

7मुला यहोवा, तू धर्मी अहा। तोहका अच्छे जन भावत  
हीं। अच्छे मनई यहोवा क संग रइहीं अउर ओकरे मुँहना क  
दर्सन पइहीं।

## भजन 12

सौमिनिथ क संगत पइ संगीत निर्देसक बरे  
दाऊद क एक तु पद।

1हे यहोवा, मोका बचावा, काहेकि सबहिं वफ़ादार अउ  
दयालु जन चला गवा अहई। लोग वफ़ादारी क अरथ भूलि  
गवा बाटइ।

2लोग आपन साथी संगियन स झूठ बोलत हीं। हर  
कउनो आपन पड़ोसियन क झूठ बोलिके चापलूसी करत  
रहत हीं।

3यहोवा ओन ओंठन क सी देइ जउन झूठ बोलत हीं।  
यहोवा, ओन जिभियन क काट जउन आपन ही बारे में डींग  
हाँकत हीं।

4अइसे जन सोचत हीं, "हमार झूठ हमका बड़का मनई  
बनइहीं। कउनो भी मनई हमरी जीभ क कारण हमका जीत  
नाहीं पाई।"

5मुला यहोवा कहत ह: "बुरे मनइयन दीन दुर्बलन स  
चिजियन चुराइ लिहन ह। उ पचे असहाय दीन जनन स  
ओनकर चिजियन लइ लिहन ह। मुला अब मई ओन हारे  
थके लोगन क रच्छा ठाइ होइके करब।"

6यहोवा क वचन फुरइ अहई अउर ऐतना सुद्ध जइसे  
आगी में टेघराइ भइ सफेद चाँदी। उ सबइ वचन उ चाँदी क  
तरह सुद्ध अहई, जेका टेघराइ टेघराइके सात दाई सुद्ध  
बनावा गवा अहई।

7हे यहोवा, बेसहारा जन क सुधि ल्या। ओनकइ रच्छा  
अब अउर सदा सर्वदा करा।

8सबइ दुर्जन अकड़त हीं अउ बना ठना घूमत हीं। मुला  
उ पचे अइसेन होत हीं जइसे कउनो नकली आभूसण धारन  
करत ह। जउन लखइ मैं कीमती लागत हीं, मुला असलियत  
में बहोतइ सस्ता होत हीं।

## भजन 13

संगीत निर्देसक बरे दाऊद क एक तु पद।

1हे यहोवा, तू कब तलक मोका बिसरा रहब्या? कब  
तलक तू मोका अंगीकार नाहीं करब्या?

2तू मोका बिसरि गया इ कब तलक मई सोचउँ? आपन  
हिरदइ मैं कब तलक इ दुःख भोगउँ? कब तलक मोर  
दुस्मन मोका जीतत रइहीं?

3हे यहोवा, मोर परमेस्सर, मोर सुनि ल्या! अउर तू मोरे  
सवाल क जवाब द्या, मोका जवाब द्या नाहीं तउ मई मरि  
जाबउँ।

4साइद मोर सत्रु अइसेन ही कहइ लागेन, "मई ओका  
पीट दिहउँ।" मोर दुस्मन खुस होइहीं कि मोर अंत होइ गवा  
बाटइ।

5हे यहोवा, मई तोहरी करुणा पइ मदद पावइ बरे भरोसा  
राखेउँ। तू मोका बचाइ लिहा अउर मोका सुखी किहा।

6मई यहोवा बरे खुसी क गीत गावत हउँ, काहेकि उ  
मोरे बरे बहोत सी अच्छी बातन किहस ह।

## भजन 14

संगीत निर्देसक बरे दाऊद क पद।

1मूरख आपन मने में कहत बाटइँ, "परमेस्सर नाहीं  
अहइ।" मूरख लोग तउ अइसे कारज करत हीं जउन भ्रस्ट  
अउ घिन स भरा होत हीं। ओनमाँ स कउनो भी भला काम  
नाहीं करत ह।

2यहोवा अकासे स मनइयन क लखत ह, कि कउनो  
बुद्धिमान मनई ओका मिलि जाइ। बुद्धिमान मनई परमेस्सर  
कईती मदद पावइ बरे मुडि जात ह।

3मुला परमेस्सर स मुडिके सबहिं दूर होइ ग अहई।  
आपुस मैं मिलिके सबहिं लोग पापी होइ ग अहई। कउनो  
भी मनई नीक काम नाहीं करत अहइ।

4मोरे मनइयन क दुष्ट लोग नस्ट कइ दिहन। उ सबइ  
दुर्जन परमेस्सर क नाहीं जनतेन। दुस्टन क लगे खाइ बरे  
भरपूर भोजन बाटइ। इ सबइ लोग यहोवा क उपासना  
तलक भी नाहीं करतेन।

5-6इ सबइ दुस्ट मनई निर्धन क राय सुनइ नाहीं चाहतेन।  
अइसा काहे अहइ? काहेकि दीन लोग तउ परमेस्सर पइ  
निर्भर अहई। मुला दुट्ट लोगन पइ भय छाइ गवा अहइ।  
काहेकि परमेस्सर खरे लोगन क संग अहइ।

7सियोन पइ कउन जउन इस्त्राएल क बचावत ह? उ तउ  
यहोवा अहइ, जउन इस्त्राएल क रच्छा करत ह! यहोवा क  
मनइयन क दूर लइ गवा जवा अउर ओनका दबाव डइके  
बन्दी बनावा गवा। मुला यहोवा आपन मनवइयन क वापिस  
छुड़ाइ लिआइ। तब याकूब बहोतइ खुस होइ।

## भजन 15

दाऊद क एक गीत।

1हे यहोवा, तोहरे तम्बू मैं कउन समइ बिताई सकत ह?  
कउन व्यक्ति तोहरे पवित्तर पवते पइ रहि सकत ह?

2सिरिफ उहइ मनई जउन खरी जिन्गी जिअत ह, अउर जउन उत्तिम करमन क करत ह, अउर जउन हिरदइ स फुरइ बोलत ह। उहइ तोहरे पर्वत पइ रह सकत ह।

3अइसा मनई अउरन क बारे में कबहुँ बुरा नहीं बोलत ह। उ आपन घराने क बुराई नहीं करत ह।

4उ ओन मनइयन क इज्जत नहीं करत जउन परमेस्सर स घिना राखत ही। अउर उ ओन सबहिं क सम्मान करत ह, जउन यहोवा क सेवक अहई। अइसा मनई अगर कउनो वचन देत ह तउ उ उ वचन क पूरा भी करत ह, जउन उ दिहे रहा।

5उ मनई अगर कउनो क धन उधार देत ह तउ ओह पइ ब्याज नहीं लेत। उ मनई कउनो निरपराध मनई क नस्कान पहोंचावइ बरे घूस नहीं लेत। अगर कउनो मनई उ खरा मनई क तरह जिन्गी जिअत ह तउ उ मनई कबहुँ भी ठोकर नहीं खाइहीं।

### भजन 16

दाऊद क एक गीत।

1हे परमेस्सर, मोर रच्छा करा, काहेकि मई तोहे पइ निर्भर अहउँ।

2मोर यहोवा स निवेदन अहइ, "यहोवा, तू मोर सुआमी अहा। मोरे लगे जउन कछू उत्तिम अहइ उ सबइ तोहसे ही अहइ।"

3यहोवा आपन लोगन क धरती पइ अद्भूत काम करत ह। यहोवा इ देखौवत ह कि उ फुरइ ओनसे प्रेम करत ह।

4मुला जउन दूसर देवतन क पाछे ओनकर पूजा बरे परत ही, उ पचे दुःख उठइहीं। ओन मूर्तियन क जउन रकत अर्पण कीन्ह गवा, ओनकर ओन बलियन में मई हीसां नहीं लेब। मई ओन मूर्तियन क नाउँ तलक नहीं लेब।

5नाहीं, बस मोर हीसा यहोवा में अहइ। बस यहोवा स ही मोर अंस अउर मोर पात्र आवत ह। हे यहोवा मोका सहारा द्या अउर मोर हीसा द्या।

6मोर हीसा बहोतइ अद्भूत अहइ। असल में मोरे लगे बहोत स सुन्नर उत्तराधिकार अहइ।

7मई यहोवा क गुण गावत हउँ काहेकि उ मोका गियान दिहस। मोरे अन्तर्मन स राति में सिच्छन निकारिके आवत हीं।

8मई यहोवा क सदा ही आपन सम्मुख राखत हउँ। मई ओकर दाहिने छोर कबहुँ नहीं छोड़ब।\*

9इहइ स मोर मन अउर मोर आतिमा बहोतइ आनन्दित होइ अउर मोरी देह तलक सुरच्छित रही।

10काहेकि, यहोवा, तू मोर प्राण कबहुँ भी मउत क जगह में न तजी। तू आपन वफ़दार क कब्र में सड़इ नहीं देब्या।

11तू मोका जिन्गी क राह देखउब्या जउन मोका तोहार मौजूदगी में पूरा आनन्द देत ह। तोहार दाहिन कइँती होब मोका सदा सदा ही आनन्द देइ।

### भजन 17

दाऊद क पराथना गीत।

1हे यहोवा, मोरी पराथना निआव क खातिर सुना। मई तोहका ऊँच अवाज स गोहरावत अहउँ। मई आपन बात ईमानदारी स कहत हउँ। तउ कृपा कइके मोर पराथना सुना।

2यहोवा तू ही मोर उचित निआव करब्या तू ही फुरइ क लख सकत अहा।

3मोर मन परखइ क तू ओकरे बीच गहिराई में निहारि लिहा ह। तू मोरे संग राति भइ रहा तू मोका जाँचा, अउ तोका मोहे में कउनो खोट नहीं मिला। मई कउनो बुरी योजना नहीं रचेउँ रहे।

4तोहरे आदेसन क मानइ में मई कठिन जतन कियेहउँ जेतना कि कउनो मनई कइ सकत ह।

5मई तोहरी राहे पइ चलत रहत हउँ। मोर गोड़ तोहरे जिन्गी क रीति स नहीं डुगेन।

6हे परमेस्सर, मई हर कउनो अवसर पइ तोहका पुकारेउँ ह अउर तू मोका जवाब दिहा ह। तउ अब भी तू मोर सुना।

7हे परमेस्सर, तू आपन विस्वासी चेलन क दिखावा कि तू केतना अजूबा अहा! तू ओन लोगन क बचाया जउन ओन लोगन पइ हमला करत ह जउन ओन बचइ बरे तोहार सक्ती पइ निर्भर करत ह।

8मोर रच्छा तू आपन आँखी क पुतली क नाई करा। मोका आपन पखना क छाया क खाले तू छुपाइ ल्या।

9हे यहोवा, मोर रच्छा ओन दुट्ट जनन स करा जउन मोका नस्ट करइ क जतन करत अहई। उ सबइ मोका घेरे अहई अउ मोका हानि पहोंचावइ क प्रयत्नसील अहई।

10दुट्ट लोग घमण्ड क कारण परमेस्सर क बात पइ कान नहीं लगावत अहई। इ सबइ आपन ही डींगे हँकत रहत हीं।

11उ सबइ लोग मोरे पाछे पड़ा भवा अहई, अउर अब मई ओनके बीच में घिर गवा हउँ। उ पचे मोह पइ वार करइ क तय्यार ठाइ बाटेन।

12उ सबइ दुट्ट जन अइसे अहई जइसे कउनो सिंह घात में दूसर पसु क मारइ क बइठा होइ। उ पचे सिंह क नाई झपटइ बरे छुपा रहत हीं।

13हे यहोवा, दुस्मन क खिलाफ उठा अउर ओनका आत्मसर्मपन करइ बरे मज़बूर करा। आपनि तरवार उठावा अउ इ सबइ दुट्ट जनन स मोर रच्छा करा।

14हे यहोवा, जउन मनई सजीव अहई ओनका धरती स दुट्टन क आपन सक्ती स दूर करा। हे यहोवा, बहुतेरे तोहरे लगे सरण माँगइ आवत हीं। तू ओनका बहुतायत स भोजन द्या। ओनकर सन्तानन क परिपूर्ण कइ द्या। ओनके लगे आपन गदेलन क देइ क बहुतायत स धन होइ।

15मोर विनय निआव बरे अहइ। तउ मई यहोवा क मुँह क दर्सन करब । हे यहोवा, तोर दर्सन करतइ ही, मई पूरी तरह सन्तुष्ट होइ जाबउँ।

मई ... छोड़ब जहाँ मोका नहीं हिलावइ जाइ सकी काहेकि उ मोर दाहिने ओर बाटइ।

## भजन 18

यहोवा क दास दाऊद क एक पदः संगीत निर्देशक बरे। दाऊद इ पद यहोवा क बारे में उस अक्सर पढ़ लिखे रहा जब यहोवा दाऊद क ओकर सबइ दुस्मन अउ साऊल स ओकर रच्छा किहे रहा।

1उ कहेस, “यहोवा मोर सक्ती अहइ, मई तोहसे पिरेम करत हउँ।

2यहोवा मोर चट्टान, मोर गढ़, मोर सरणस्थल बाटइ।” मोर परमेस्सर मोर चट्टान अहइ। मई तोहरी सरण में आवा हउँ। ओकर सक्ती मोका बचावत ह। यहोवा ऊँचके पहाड़न पइ मोर सरणस्थल अहइ।

3यहोवा क जउन स्तुति क जोग्य अहइ, मई गोहराउब अउर मई आपन दुस्मनन स बचावा जाब।

4मोर दुस्मनन मोका मारइ क जतन किहन। मई चारिहूँ कइँती मउत क लसुरी स घिरा अहउँ। मोका अधर्म क बाढ़ भयभीत कइ दिहस।

5मोरे चारिहूँ कइँती पाताल क लसुरी रहिन। अउर मोह पइ मउत क फंद रहेन।

6मई घेरा भवा रहेउँ अउर यहोवा क मदद बरे गोहराएँ। मई आपन परमेस्सर क गोहराएँ। परमेस्सर पवितर मन्दिर में बिराजा। उ मोर पुकार अनकेस अउ मदद किहेस।

7तब्बइ भुईया हल गइ अउ थराई उठी; अउ पहाड़न क नैव थराईके हल उठिन काहेकि यहोवा बहोतइ कोहान रहा।

8परमेस्सर क नथुना स धुआँ फूटि पड़ा। परमेस्सर क मुँह स ज्वाला फूटि पड़िन, अउ ओहसे चिंगारियन छटक गइन।

9यहोवा सरगे क चीरके खाले उतरा। खूब घना करिआ बादर ओकरे गोड़े तरे रहेन।

10उ करूब सरगदूत पइ उड़ि गवा अउर हवा क पंख पइ सवार होइके ऊँचे आकास में उड़ि गवा।\*

11यहोवा खुद क अँधियारे में छुपाइ लिहस, ओका अकासे क चँदोबा घेरे रहा। उ गरजत बादर क खूब घना घटा-टोप में लुकान भवा रहा।

12फिन, परमेस्सर क तेज बादर फाड़िके निकरा। बरसा अउ बिजुरियन कौँधिन।

13यहोवा क उद्घोष नाद अकासे में गूँजा। परम परमेस्सर आपन वाणी क सुनइ दिहस। फुन अंगारे गिरेन अउ बिजुरियन कौँधिन।

14यहोवा बाण छोड़ेस अउर दुस्मन बिखराइ गएन। ओकर अनेक बिजुरी क बन्नन ओनका हराइ दिहन।

15हे यहोवा, तू गरज्या अउ मुँह स आँधी बहाया। पानी पाछे हटिके दब गवा अउ समुद्रे क पानी बगइर तले क देखीँइ लाग, अउर धरती क नैव तलक उधरि गइ।

16यहोवा ऊपर अकासे स खाले उतरा अउर मोर रच्छा किहस। मोका मोरे कस्टन स उबारि लिहस।

17मोर सत्रु मोहसे कछूँ जियादा ताकतवर रहेन। उ पचे मोहसे कछूँ जियादा बरिआर रहेन, अउ मोहसे दुस्मनी राखत रहेन। तउ परमेस्सर मोर रच्छा किहस।

**उ करूब सरगदूर ... उड़ि गवा** साब्दिक, “उ करूब पइ चढ़ेस अउर उड़ेस, हवा क पंख पइ ऊँची उड़ान भरत ह।” सब्द “हवा” क अरथ “आतिमा” भी होइ सकत ह।

18जब मई विपत्ति में रहेउँ, मोर दुस्मनन मोह पइ वार किहन मुला तबहि यहोवा मोका सँभारेस!

19यहोवा क मोहसे पिरेम रहा, तउ उ मोका बचाएस अउर मोका सुरच्छित ठउरे पइ लइ गवा।

20यहोवा मोका आपन अच्छाई क अनुसार इनाम देइ। उ मोका मोरे सुद्धता क अनुसार बदल देइ।

21काहेकि मई यहोवा क आग्या क पालन किहेउँ ह! आपन परमेस्सर यहोवा बरे मई कउनो भी बुरा काम नहीं किहेउँ।

22मई तउ यहोवा क व्यवस्था विधानन क अउ हुकुमन क हमेसा धियान में राखत हउँ!

23खुद क मई ओकरे समन्वा पवितर राखत हउँ अउ अबोध बना रहत हउँ।

24काहेकि मई अबोध अहउँ! एह बरे मोका मोर पुस्कार देइ! जइसा परमेस्सर लखत ह कि मई कउनो बुरा काम नहीं किहेउँ, एह बरे उ मोरे बरे उत्तिम चिजियन करी।

25हे यहोवा, तू वफ़ादार लोगन क संग वफ़ादार अहा अउ खरे लोगनक संग तू आपन क खरा दिखावत ह।

26हे यहोवा, तू सुद्ध लोगन क संग सुद्ध अहा, किन्तु तू दुदूठ लोगन स जियादा चालाक अहा।\*

27हे यहोवा, तू नम्र जनन बरे सहाय अहा, मुला जेनमाँ अहंकार भरा अहइ ओन मनइयन क तू बड़ा नहीं बनइ देत्या।

28उ तू ही अहा जउन मोर दीप बरत ह। हे मोरे परमेस्सर तू मोरे अंधकार क जोति में बदल देत अहा!

29हे यहोवा, तोहरी मदद स, मई फउजियन क संग पराइ सकत हउँ। तोहरी ही मदद स, मई दुस्मनन क चहरदीवार फाँद सकत हउँ।

30परमेस्सर क विधान पवितर अउ उत्तिम अहइ अउ यहोवा क सब्द सच स पूरा होत हीं। उ ओका बचावत ह जउन ओकरे भरोसे अहइँ।

31यहोवा क छोँड़ि बस अउर कउन परमेस्सर बाटइ? सिरिफ हमरे परमेस्सर क अउर कउन चट्टान अहइ?

32मोका परमेस्सर सक्ति देत ह। उ मोर रास्ता आसान बनावत ह।

33परमेस्सर मोरे गोड़न क हिरन क नाई तेज चाल देत ह। उ मोका स्थिर बनावत अउर मोका चट्टानी सिखरन स गिरइ स बचावत ह।

34परमेस्सर जुद्ध बरे मोरे बाँहन क प्रसिच्छित करत ह, एह बरे मई बहोत सक्तीसाली धनुस\* क मोड़ सकत हउँ अउ तीर छोड़ सकत हउँ।

35हे परमेस्सर, आपन ढार स मोर रच्छा करा। तू मोका आपन दाहिन भुजा स आपन महान सक्ती प्रदान कइके मदद द्या।

**किन्तु ... चालाक अहा** या, तू टेढ़े लोगन पइ मूरखता परगट करव्या।

**बहोत सक्तीसाली धनुस** साब्दिक अरथ, “कैसे क धनुस।”

36हे परमेस्सर, तू मोरे गोड़े क अउर टखना क मजबूत बनावा ताकि मई तेज होइके बगइर लड़खड़ाहट क बढ़ चलउँ।

37फुन आपन दुस्मनन क पाछा करउँ, अउ ओनका धड़ सकउँ। ओनमाँ स एक क भी बच पावइ देउँ।

38मई आपन दुस्मनन क हराउब। ओनमाँ स एक भी फुन ठाड़ नाही होइ। मोर सबहिँ दुस्मन मोरे गोड़वा प गिरि जइहीं।

39हे परमेस्सर, तू मोका जुद्ध मँ सकती दिहा, अउर मोरे सब दुस्मनन क मोरे समन्वा निहुगइ दिहा।

40तू मोरे दुस्मनन क पीठ मोरी कइँती फेरि दिहा, ताकि मई ओनका काटि डावउँ जउन मोसे जलन राखत हीं।

41जब मोर दुस्मनन मदद क गोहार लगाएन, ओनका मदद देइ अगवा कउनो नाही आवा। हिआँ तलक कि उ पचे यहोवा तलक क पुकारेन, मुला यहोवा स ओनका जवाब न मिला।

42मई आपन दुस्मनन क कूट कूट कइ धूरि मँ मिलइ देबउँ, जेका ब्यार उड़ाइ देत ह। मई ओनका कुचर दिहेउँ अउर माटी मँ मिलाइ दिहेउँ।

43मोका ओनसे बचाइ ल्या जउन मोसे जुद्ध करत हीं। मोका ओन जातियन क मुखिया बनाइ द्या, जेनका मई जानत तलक नाही हउँ ताकि उ पचे मोर सेवा करिहीं।

44फिन उ सबइ लोग मोर सुनिहीं अउर मोरे हुकुमन क मनिहीं, दूसर रास्ट्रन क लोग मोसे डेरइहीं।

45उ पचे विदेसी लोग मोरे समन्वा निहुरिहीं काहेकि उ पचे मोसे भयमीत होइहीं। उ पचे भय स थर्रात भए आपन छुपा ठउरन स बाहेर निकारि अइहीं।

46यहोवा सजीव अहइ! मई आपन चट्टान क जस गीत गावत हउँ। मोर महान परमेस्सर मोर रच्छा करत ह।

47धन्न बाटइ, मोर पटक देइवाला परमेस्सर जउन देस-देस क मनइयन क मोरे बस मँ कइ दिहस ह।

48यहोवा, तू मोका मोरे दुस्मनन स छोड़या ह। तू मोर मदद किहा ताकि मई ओन लोगन क हराइ सकउँ जउन मोरे खिलाफ खड़ा भएन। तू मोका कठोर मनइयन स बचाया ह।

49हे यहोवा, इहइ कारण मई देसन क बीच तोहार स्तुति करत हउँ। इहइ कारण मई तोहरे नाउँ क भजन गावत हउँ।

50यहोवा आपन राजा क मदद बहोत स जुद्धन क जीतइ मँ करत ह। उ आपन सच्चा पिरेम, आपन चुने भए राजा पइ देखौवत ह। उ दाऊद अउ ओकरे संताने बरे सदा बिस्सास क जोगग रही।

## भजन 19

संगीत निर्देशक बरे दाऊद क एक तु पद।

1अकास परमेस्सर क महिमा बखानत ह, अउ अकासमण्डल परमेस्सर क उत्तिम सबइ रचना क देखौवत ह।

2हर नवा दिन ओकर नई कथा कहत ह, अउ हर रात परमेस्सर क नई नई सक्तियन क परगट करत ह।

3हुवाँ न कउनो भासन या सब्दन होइ। न कउनो आवाज़ सुनाइ पड़त।

4मुला ओकर “वाणी” भूमण्डल मँ बियापत ह अउर ओकर “सब्दन” धरती क छोर तलक पहुँचत हीं। ओनमाँ उ सूरज बरे एक घर जइसा तय्यार किहस ह।

5सूरज नवखिल दुल्हा क नाई आपन सयन कच्छ स निकरत ह। सूरज आपन राहे पइ अकास क पार करइ निकरि पड़त ह, जइसे कउनो खिलाड़ी आपन दउड़ पूरी करइ बरे तइयार होइ।

6अकासे क एक छोर स सूरज चल पड़त ह अउर ओह पार पहुँचइ क, उ सारी राह दउड़त रहत ह। अइसी कउनो वस्तु नाही जउन आपन क ओकरी गर्मी स छुपाइ लेइ। यहोवा क उपदेस भी अइसेन ही होत हीं।

7यहोवा क सिच्छन सम्पूर्ण होत हीं, इ सबइ भक्त जनन क सकती देत हीं। यहोवा क करार पइ भरोसा कीन्ह जाइ सकत ह। जेनके लगे बुद्धि नाही अहइ इ ओनका सुबुद्धि देत ह।

8यहोवा क नेम निआव स पूरा होत हीं, उ सबइ लोगनक खुसी स भरि देत हीं। यहोवा क आदेस उत्तिम अहइ, उ सबइ मनइयन क जिअइ क नई राह देखौवत हीं।

9यहोवा क आराधना प्रकास जइसी होत ह, इ तउ सदा सर्वदा जोति स भरी रही। यहोवा क निआव निस्पच्छ होत हीं, उ सबइ पूरी तरह निआव स पूरा होत हीं।

10यहोवा क उपदेस उत्तिम सुबरन अउ कुन्दन स भी बढ़िके मनोहर अहइ, उ सबइ उत्तिम सहद स भी जियादा मधुर अहइ, जउन सोझ सहद क छल्ला स टपक आवत ह।

11हे यहोवा, तोहार उपदेस तोहरे सेवक क आगाह करत हीं। अउर जउन ओनकइ पालन करत हीं ओनका तउ बरदान मिलत ह।

12हे यहोवा, आपन सबहिँ दोसन क कउनो नाही लख पावत। एह बरे तू मोका ओन पापन्स बचावा जउन एकान्त मँ छुपिके कीन्ह जात हीं।

13हे यहोवा, मोका ओन पापन्क करइ स बचावा जेनका मई करइ चाहत हउँ। ओन पापन्क मोह पइ सासन न करइ द्या। अगर तू मोका बचावत ह तउ मई इमानदारी स भरि भवा होइ सकत हउँ अउ बहोत सारा पापन्स मुक्त होइ सकत हउँ।

14मोका आसा अहइ कि, मोर वचन अउ चिंतन तोहका प्रसन्न करिहीं। हे यहोवा, तू मोर चट्टान, अउर मोर बचावइवाला अहा।

## भजन 20

संगीत निर्देशक बरे दाऊद क एक तु पद।

1तोहरी पुकार क यहोवा जवाब देइ, अउर जब तू विपत्ति मँ हवा तउ याकूब क परमेस्सर तोहरे नाउँ क बढ़ावइ।

2परमेस्सर आपन पवित्तर ठउर स तोहार मदद करइ। उ तोहका सिध्थोन स सहारा देइ।

3परमेस्सर तोहरी सब भेंटन क याद राखइ, अउर तोहरे सबइ बलिदानन क अंगीकार करइ।

4परमेस्सर तोहका ओन सबहिँ वस्तुअन क देइ जेनका तू फुरइ फुरइ चाह्या। उ तोहार सबहिँ योजनन पूरी करइ।

5परमेस्सर जब तोहार मदद करइ हम पचे बहोतइ खुस होब। अउर हम पचे परमेस्सर क बड़कई क गीत गाउब। यहोवा उ सबइ चीज करी जेका तू पचे मैंग्या।

6मई अब जानत हउँ कि यहोवा मदद करत ह आपन उ राजा क जेका उ चुनेस। परमेस्सर तउ आपन सरगे मँ बिराजा अहइ अउर उ आपन चुने भए राजा क, जवाब दिहस उ राजा क रच्छा करइ बरे परमेस्सर आपन महासक्ती क प्रयोग मँ लिआवत ह।

7कछू क भरोसा आपन रथन पइ अहइ, अउर कछू क आपन फउजियन पइ भरोसा बा मुला हम पचे तउ आपन यहोवा परमेस्सर क सुमिरन करत अही।

8मुला उ सबइ लोग हारि गएन अउर जंगल मँ मार डावा गवा गएन अउर हम लोग जीते अउ खुसी मनावइ बरे इकट्ठा होब।

9अइसा कइसा भवा? काहेकि यहोवा आपन चुने भए राजा क रच्छा किहा उ परमेस्सर क गोहराए रहा अउर परमेस्सर ओकर सुनेस।

## भजन 21

*संगीत निर्देशक बरे दाऊद क एक तु पद।*

1हे यहोवा, तोर महिमा राजा क प्रसन्न करत ह, जब तू ओका बचावत ह। उ बहोतइ आनन्दित होत ह।

2तू राजा क उ सबइ वस्तुअन दिहा जेका उ चाहे रहा, राजा जउन भी पावइ क बिनती किहस। हे यहोवा, तू मन क चाहा भवा ओका दइ दिहा।

3हे यहोवा, सचमुच तू बहोत आसीस राजा क दिह्या। ओकरे मूँडे पइ तू सुवर्ण क मुकुट धइ दिह्या।

4उ तोहसे जिन्नगी क भीख माँगिस अउर तू ओका इ दइ दिह्या। परमेस्सर, तू सदा सर्वदा बरे राजा क अमर जीवन दिह्या।

5तू रच्छा किहा तउ राजा क महा वैभव मिल गवा। तू ओका आदर अउ प्रसंसा दिहा।

6हे परमेस्सर, सचमुच तू राजा क सदा सर्वदा बरे, आसीवाँद दिहा। जब राजा क तोहार दर्सन मिलत ह, तउ उ बहोत खुस होत ह।

7राजा क सचमुच यहोवा पइ भरोसा अहइ, तउ परमेस्सर ओका निरास नहीं करी।

8हे परमेस्सर! तू देखौँइ द्या आपन सबहिँ दुस्मनन क कि तू खूब मजबूत अउ सक्तीसाली अहा। जउन तोहसे घिना करत हीँ तोहार सक्ती ओनका हराइ देइ।

9हे यहोवा, जब तू राजा क साथ होत अहा तउ उ भभकत भार जइसा होइ जात ह, जउन सब कछू भसम करत ह। ओकर किरोध क आगी आपन सबहिँ दुस्मनन क भसम कइ देत ह।

10परमेस्सर क दुस्मनन क बंस नस्ट होइ जइहीं, धरती क ऊपर स उ सब मिटिही।

11अइसा काहे भवा? काहेकि यहोवा, तोहरे खिलाफ ओन मनइयन खइयन्त्र रचे रहेन। उ पचे बुरा करइ क योजना रचे रहेन, मुला उ पचे ओहमाँ सफल नहीं भएन।

12यहोवा जब तू ओन लोगन पइ आपन तीर स निसाना साध्या, तउ तू ओनका पीछे घुमाई दिहा अउर भगाइ दिहा।\*

13यहोवा क अउर ओकर सक्ती क गुण गावा आवा हम पचे गाई अउर ओकरे गीतन क बजाई जउन ओकर गरिमा स जुर ग अहई।

## भजन 22

*प्रभात क हरिणी नाउँ क राग पइ संगीत निर्देशक बरे दाऊद क एक तु भजन।*

1हे मोरे परमेस्सर, हे मोरे परमेस्सर, तू मोका काहे तजि दिहा ह? मोका बचावइ बरे तू काहे बहोतइ दूर अहा? मोर मदद क पुकार क सुनइ बरे तू बहोतइ दूर अहा।

2हे मोरे परमेस्सर, मई तोहका दिन मँ पुकारेउँ मुला तू जवाब नहीं दिहा, अउर मई राति भर तोहका पुकारत रहेउँ।

3हे परमेस्सर, तू पवितर अहा। तू राजा क नाई बिराजमान अहा। इस्त्राएल क स्तुतियन तोहार सिंहासन अहइ।

4हमार पुरखन तोह पइ बिस्सास किहन। हौँ हे परमेस्सर उ पचे तोहार भरोसा रहेन। अउर तू ओनका बचाए रह्या।

5हे परमेस्सर, हमार पुरखन तोहका मदद क गोहराएन अउर उ पचे आपन दुस्मनन स बच निकरेन। उ पचे तोह पइ बिस्सास किहन अउर उ पचे निरास नहीं भएन।

6तउ का मई फुरइ कउनो कीरा हउँ, जउन लोग मोहसे लज्जित भए बाटेन अउर मोहसे घिना करत हीँ?

7जउन भी मोका लखत ह मोर हँसी उड़ावत ह, उ पचे आपन मूँडे हलावत अउ आपन ओठ बिरावत ही।

8उ पचे मोसे कहत हीँ कि, “आपन रच्छा बरे तू यहोवा क गोहराई सकत ह। उ तोहका बचाइ लेइ। अगर तू ओका ऐतना भावत ह तउ, निहचय ही उ तोहका बचाइ लेइ।”

9हे परमेस्सर फुरइ तउ इ अहइ कि सिरिफ तू ही अहा जेकरे ऊपर मई निर्भर हउँ। तू मोका उ दिन स संभालया ह, जब स मोर जन्म भवा। तू ही अहा जेकर कारण स मई बचपन स बिस्सास किहेउँ।

10ठीक उहइ दिना स जब स मई जन्म लिहेउँ ह, तू मोर परमेस्सर रह्या ह। जइसे ही मई आपन महतारी क कोख स बाहरे आए रहेउँ, मोका तोहरी देखरेख मँ रख दीन्ह ग रहा।

11तउ हे, परमेस्सर! मोका जिन बिसरि जा, संकट निअरे बाटइ, अउर कउनो भी मनई मोर मदद क नहीं अहइ।

12मई ओन लोगन स घिरा अहउँ, जउन सक्तीसाली सौँइन जइसे मोका घेरे भए अहई।

13उ पचे ओन सिंहन जइसे अहई, जउन कउनो जन्तु क चीरत होई अउ दहाड़त होई अउर ओनकर मुँह विकराल खुला भवा होई।

14मोर सक्ती धरती पइ बिखरे जल स लुप्त होइ गइ। मोर हाइन अलगाइ ग अहई। मोर साहस खतम होइ चुका अहइ।

**यहोवा जब ... दिहा** या, “तू ओकर उपस्थिति मँ दृढ़ता स खडा रहब्या अउर आपन लसुरि स ओनका काँधा स काँधा मिलाइ कइ क बाँधब्या।” हिब्रू मँ हिआँ समझइ मँ कठिन अहइ।

15मोर मुँह एक पुराना टूटा भवा बर्तन क टूका क नाई सूख गवा अहइ। मोर जीभ आपन ही तालु स चिपकत अहइ। तू मोका कब्र क धूरि में डार दिहा ह।

16दुटठ लोग मोर चारिहुँ कइँती कुकुरन क नाई घेरे भए अहइँ, दुस्त जनन क उ समूह मोका फँसाएस ह। उ पचे मोरे हथवन अउर गोड़न क छेद दिहेन ह।

17मोका आपन हाड़ देखेँइ देत ह। इ सबइ लोग मोका घूरत अहइँ। इ सबइ मोका नस्कान पहोंचावइ क ताकत रखत हीं।

18उ पचे मोर कपड़ा आपुस में बाँटत अहइँ। मोरे ओढ़नन बरे उ पचे पाँसा लोकावत अहइँ।

19हे यहोवा, तू मोका जिन तजा। तू मोर बल अहा, मोर मदद करा। अब तू देर जिन लगावा।

20हे यहोवा, मोर प्राण तलवार स बचाइ ल्या। ओन कुत्तन स तू मोर मूल्यवान जिन्गी क रच्छा करा।

21मोका सेर क मुँह स बचाइ ल्या अउ साँड़ क सीगंन स मोर रच्छा करा।

22हे यहोवा, मई आपन भाइयन में तोर प्रचार करब। मई तोर प्रसँसा तोहरे भक्तन क सभा क बीच करब।

23ओ यहोवा क उपासक लोगो, यहोवा क बड़कई करा। इस्त्राएल क सन्तानन यहोवा क आदर करा। ओ इस्त्राएल क सबहि लोगो, यहोवा क भय माना अउ आदर करा।

24काहेकि यहोवा अइसे मनइयन क मदद करत ह जउन विपत्ति में होत हीं। यहोवा ओनसे घिना नहीं करत ह। अगर लोग मदद बरे यहोवा क पुकारइँ तउ उ खुद क ओनसे न छिपाइ।

25मई तोहका धार्मिक सभा में स्तुति बरे का भेंट कइ सकत हउँ। तोहार भक्त लोगन क समन्वा मई तोहका उ देबउँ जेका मई वादा किहेउँ ह।

26दीन जन भोजन पइहीं अउर सन्तुटठ होइहीं। तू लोग जउन ओका हेरत भए आवत अहा ओकर स्तुति करा। मन तोहार हमेसा हमेसा आनन्द स भरि जाईं।

27तब सबहि दूर भुइँयन क लोग यहोवा क सुमिरइँ अउर ओकर लगे लउटि आवइँ। हे यहोवा, धरती क सबइ परिवार क हरेक लोग तोहार समन्वा निहुरिहीं।

28काहेकि यहोवा राजा अहइ। उ हर एक रास्ट्र पइ सासन करत ह।

29मानव जाति घास क नाई स्थाइ नहीं अहइँ जउन कि समूचइ धरती में उगत हीं। हम सबहि आपन खइया क खाब अउर परमेस्सर क समन्वा निहुरि दण्डवत करब।\* हॉ मानव जाति मरत ह अउ ओनका कब्र में डार दीन्ह जात ह। सबइ लोग जउन जीवित अहइ या नहीं अहइ परमेस्सर क समन्वा नम्रता स निहुरिके दण्डवत करइँ।

30अउर भविस्स में हमार सन्तान यहोवा क सेवा करिहीं। लोग सदा सदा ही ओकरे बारे में बखनिहीं।

31उ सबइ लोग अइहीं अउर परमेस्सर क भलाई क प्रचार करिहीं जेनकर अबहिं जन्म ही नहीं भवा।

## भजन 23

दाऊद क एक पद।

1यहोवा मोर गइरिया अहइ। जउन कछू भी मोका अपेच्छित होइ, सदा मोरे लगे रही।

2हरे भरे चरागाह में मोका सुख स उ राखत ह। उ मोका सांत झरनन पइ लइ जात ह।

3उ आपन नाउँ क निमित्त मोरी आत्मा क नई सकती देत ह। उ मोर अगुआई करत ह कि उ फुरइ उत्तिम अहइ।

4मई मउत क अँधिअर घाटी स गुजरत भइ नहीं डेराब, काहेकि यहोवा तू मोरे संग अहा। तोहार चरवाहे क लाठी मोका सुख देत हीं।

5हे यहोवा, तू मोरे दुस्मनन क समन्वा मोर खइया बरे मेज सजाया ह। तू मोरे मूँडे पइ तेल उडेया ह। मोर कटोरा भरा ह अउ छलकत बाटइ।

6निचहय नेकी अउ करुणा मोर बाकी जिन्गी तलक मोरे संग रही। मई यहोवा क मन्दिर में लम्बी समइ तलक बार-बार जाबिउँ।

## भजन 24

दाऊद क एक तु पद।

1धरती अउ ओह प क सब चिजियन यहोवा क अहइँ; संसार अउ हर कउनो जउन एहमाँ रहत हीं ओकर अहइँ।

2यहोवा इ धरती क जल पइ रचे अहइ। उ एका जल क धारन पइ बनाएस।

3यहोवा क पहाड़े क मन्दिर में कउन जाइ सकत ह? कउन यहोवा क पवितर ठउर में खड़ा होइ सकत अउर आराधना कइ सकत ह?

4अइसा मनई जउन हाथन क साफ किहे ह, अइसा मनई जउन पवितर जीवन क अगुवाइ करत ह, अइसा मनई जउन मोरे नाउँ क प्रयोग कइके दूसर बरे गलत नहीं किहे ह, अउर अइसा मनई जउन झूठ न बोलेस, अउ न ही झूठा वचन दिहेस ह। बस अइसेन मनई ही हुआँ आराधना कइ सकत हीं।

5सज्जन तउ चाहत हीं यहोवा सब क भला करइ। उ पचे सज्जन परमेस्सर स जउन ओनकर उद्धारक अहइ, नेक चाहत हीं।

6उ पचे सज्जन परमेस्सर क अनुसरण क जतन करत हीं। उ पचे याकूब क परमेस्सर क लगे मदद पावइ जात हीं।

7फाटकन, आपन मूँड़ी जँची करा! सनातन दुआसन, खुलि जा! प्रतापी राजा भितरे आई।

8इ प्रतापी राजा कउन अहइ? यहोवा ही उ राजा अहइ, उहइ सबल सैनिक अहइ, यहोवा ही उ राजा अहइ, उहइ जुद्ध नायक बा।

9फाटकन, आपन, मूँड़ी जँची करा! सनातन दुआसन, खुलि जा! प्रतापी राजा भितरे आई।

**हम ... दण्डवत करब** इ ओन लोगन क ओर इसारा करत ह जउन पहाड़ क मन्दिर में इकट्ठा होइके मेलबलि खात रहा अउर तब परमेस्सर क आराधना बरे निहुरिके दण्डवत करत ह। इ बयान जीवन अउर मउत क याद रखइ बरे एक रूपक अहइ।

10उ प्रतापी राजा कउन अहइ? यहोवा सर्वसक्तिमान ही उ राजा अहइ। उ प्रतापी राजा उहइ अहइ।

## भजन 25

दाऊद क समर्पित।

1हे यहोवा, मई खुद क तोहका समर्पित करत हउँ।

2मोरे परमेस्सर, मोर सिरिफ तोह पइ बिस्सास बाटइ। मोका अपमानित होइ क अनुमति जिन द्या; मोर दुस्मनन क मोह पइ हँसी उड़ावइ क अनुमति जिन द्या।

3अइसा मनई, जउन तोहमौ बिस्सास धरत ह, उ निरास नाहीं होइ। मुला बिस्सासघाती निरास होइहीं अउर, उ पचे कबहुँ भी कछू नाहीं प्राप्त करिहीं।

4हे यहोवा, मोर मदद करा कि मई तोहरी राहन क सीखउँ! तू आपन मार्गन क मोका सिच्छा द्या।

5आपन सच्ची राह तू मोका देखोवा अउर ओकर उपदेस मोका द्या। तू मोर परमेस्सर तू मोर उद्धारकर्ता अहा। मोका हर दिन तोहार भरोसा अहइ।

6हे यहोवा, मोह पइ आपन दाया राखा अउर उ ममता क मोह पइ परगट करा, जेका तू हरदम राखत ह।

7आपन जवानी में जउन पाप अउर कुकर्म मई किहेउँ, ओनका जिन याद राखा। हे यहोवा आपन निज नाउँ निमित्त, मोका आपन करुणा स सुमिर ल्या।

8हे यहोवा, सचमुच उत्तिम अहइ, उ पापियन क जिन्नगी क नेक राह देखोवत ह।

9उ दीन लोगन क आपन राहन क सीख देत ह। बिना पच्छपात क उ ओनका मार्ग देखोवत ह।

10यहोवा क राहन ओन लोगन बरे छिमा स भरी अउ सच अहइँ, जउन ओकर करार अउर कानून क अनुसरण करत हीं।

11हे यहोवा, मई बहुतेरा पाप किहेउँ ह, मुला तू आपन नाउँ बरे मोर हर पापे क दयालुता स छिमा कइ दिहा।

12जदि कउनो मनई यहोवा क अनुसरण करइ चाहइ, तउ ओका परमेस्सर जिन्नगी क उत्तिम राह देखोइ।

13उ मनई उत्तिम वस्तुअन क सुख भोगी, अउर उ मनई क सन्तानन उ धरती क जेका परमेस्सर वचन दिहे रहा स्थायी रइहीं।

14यहोवा आपन भक्तन पइ आपन भेद खोलत ह। उ आपन निज भक्तन क आपन करार क सिच्छा देत ह।

15मोर आँखिन मदद पावइ क यहोवा पइ सदा टिकी रहत हीं। मोका मोरी बिपत्ति स उ सदा छोड़ावत ह।

16हे यहोवा, मई पीड़ित अउ अकेल्ला अहउँ। मोरी कइँती मूड अउ मोह पइ दाया देखोवा।

17मोरी बिपत्तियन स मोका अजाद करा। मोर समस्या सुलझाने क मदद करा।

18हे यहोवा, मोका परखा अउर मोरी बिपत्तियन पइ निगाह डावा। मोका जउन पाप मई किहे हउँ, ओन सबहि बरे छिमा करा।

19लखा मोर केतौना दुस्मनन अहइँ, अउ लखा उ मोहसे केतौना नफरत करत हीं।

20हे परमेस्सर, मोर रच्छा करा अउर मोका बचाइ ल्या। मई तोहार भरोसा राखत हउँ। तउ मोका निरास जिन करा।

21हे परमेस्सर, तू सचमुच उत्तिम अहा। मोका तोहार भरोसा अहइ, तउ मोर रच्छा करा।

22हे परमेस्सर, इस्त्राएल क लोगन क ओनकर सबहिं दुस्मनन स रच्छा करा।

## भजन 26

दाऊद क समर्पित।

1हे यहोवा, मोर निआव करा, प्रमाणित करा कि मई पवित्तर जिन्नगी बिताएउँ ह। मई यहोवा पइ कबहुँ बिस्सास करब नाहीं तजे रहेउँ।

2हे यहोवा, मोका परखा अउर मोर जाँच करा, मोर हिरदइ मँ अउर बुद्धि क निचके स लखा।

3मई तोहरे पिरम क सदा ही लखत हउँ, मई तोहरे सत्य क सहारे जिअत रहत हउँ।

4मई ओन बेकार लोगन मँ स नाहीं अहउँ।

5मई बुरे लोगन क संगति स घिना करत हउँ। मई दुस्ट लोगन मँ सामिल नाहीं होत हउँ।

6हे यहोवा, मई निर्दोखी दिखाइ बरे आपन हथवा धोए हउँ, एह बरे सायद मई तोहार वेदी पइ आइ सकत हउँ।

7हे यहोवा, मई तोहरी प्रसंसा क गीत गावत हउँ, अउर जउन अचम्भा स भरा करम तू किह्या ह, ओनके बारे मँ मई गीत गावत हउँ।

8हे यहोवा, मई तोहार मनोहर मन्दिर स अउ उ तम्बू स जहाँ तोहार महिमा\* निवास करत ह पिरम करत हउँ।

9हे यहोवा, तू मोका ओन पापियन क दले मँ जिन मिलावा, जब तू ओन हत्तियारन क प्राण लेब्या तब मोका जिन मार्या।

10उ हमेसा दूसर लोगन क धोखा देइ बरे अउर रिसवत लेइ बरे तइयार रहत ह।

11लेकिन मई अटल हउँ, तउ हे परमेस्सर, मोहे पइ दयालु हवा अउर मोर रच्छा करा।

12मई नेक जिन्नगी जिअत रहेउँ। मई तोहरी बड़कई गीत, हे यहोवा, जब भी तोहार भक्त मण्डली साथे मिलि गइ, गावत रहेउँ।

## भजन 27

दाऊद क समर्पित।

1हे यहोवा, तू मोरे जोति अउ मोर उद्धारकर्ता अहा। मोका तउ कउनो स भी नाहीं डरइ चाही। यहोवा मोरी जिन्नगी बरे सुरच्छित ठउर अहइ। तउ मई कउनो भी मनई स नाहीं डरब।

2होइ सकत ह, दुदुठ जन मोहे पइ चढ़ाई करइँ। होइ सकत ह, उ पचे मोरे सरीर क नस्ट करइ क जतन करइँ। होइ सकत ह मोर सत्रु मोका नस्ट करइ क मोह पइ आक्रमण क जतन करइँ।

**महिमा** इ यहोवा क मन्दिर मँ मौजूदगी क प्रतीक रहा। एका अक्सर करिया बादर क संग उजियारा प्रकास क नाई क रूप मँ वर्णित कीन्ह ग रहा जउन कि मन्दिर मँ भरि जात रहा।

3मुला चाहे पूरी फउज मोका घेरि लेइ, मई नार्ही डेराब। चाहे जुद्ध छेत्र में मोह पइ लोग प्रहार करई, मई नार्ही डेराब। काहेकि मई यहोवा पइ भरोसा करत हउँ।

4मई यहोवा स सिरिफ एक बर मॉंगइ चाहत हउँ, “मई आपन जिन्नगी भइ यहोवा क मन्दिर में बइठा रहउँ, ताकि मई यहोवा क सुन्दरता क लखउँ, अउर ओकरे मन्दिर में धियान करउँ।”

5जब कबहुँ कउनो बिपत्ति मोका घेरी, यहोवा मोर रच्छा करी। उ मोका आपन तम्बू में छुपाइ लेइ। उ मोका आपन सुरच्छित जगह पइ ऊपर उठाइ लेइ।

6मोका मोर दुस्मनन घेरि रखे अहई। मुला अब ओनका पराजित करइ में यहोवा मोर सहारा होइ। मई ओकरे तम्बू में फुन भेंट चढ़ाउब। जय जयकार कइके बलियन अर्पित करब। मई यहोवा क स्तुति बरे भजन गाउब अउर बनाउब।

7हे यहोवा, मोर पुकार सुना, मोका जवाब द्या। मोह पइ दयालु रहा।

8मोर हिरदइ कहत ह, “जा, ओकरे दर्सन बरे जा।” एह बरे यहोवा मई तोहसे बात करउँ बरे तोहार समन्वा आवा हउँ।

9हे यहोवा, किरोध में आपन सेवक स जिन मोइया! एक जउन मोर मदद कइ सकत ह उ तू अहा। मोका अकेल्ला जिन छोइया! मोका जिन त्यागा। परमेस्सर जउन मोका बचाइ सकत ह उ तू अहा!

10मोर महतारी अउ मोर बाप मोका तजि दिहन, पर यहोवा मोका अंगीकार किहस अउर आपन बनाइ लिहस।

11हे यहोवा, मोरे दुस्मनन क कारण, मोका आपन मारग देखवा। मोका नीक काम क सिच्छा द्या।

12मोह पइ मोर दुस्मनन हमला किहे अहई। उ पचे मोरे बरे झूठ बोलेन ह। उ पचे मोका नस्कान पहोंचावइ बरे झूठ बोलेन।

13मोका भरोसा अहइ कि मरइ स पहिले मई फुरइ यहोवा क धरम भावना क लखउँ।

14यहोवा क मदद क बाट जोहत रहा! साहसी अउ सुदृढ़ बना रहा अउर यहोवा क मदद क प्रतीच्छा करत रहा।

## भजन 28

1हे यहोवा, तू मोर चट्टान अहा, मई तोहका मदद पावइ क गोहरावत हउँ। मोरा पराथनन स आपन कान जिन मँदा, अगर तू मोर मदद क पुकार क जवाब नार्ही देब्या, तउ लोग मोका कब्र में मरा भवा जइसा पइहीं।

2हे यहोवा, आपन पवितर तम्बू कइँती बढ्या, मई तोहार पराथना बरे आपन हाथ उठाए हउँ। जब मई तोहका पुकारउँ, तू मोर सुना। तू मोहे पइ आपन करुणा देखेवा।

3हे यहोवा, मोका ओन बुरे मनइयन क तरह जिन सोचा जउन बुरा काम करत हीं। जउन आपन पड़ोसियन स सान्ति करत हीं, मुला आपन हिरदइ में आपन पड़ोसियन क बारे में कुचक्र रचत हीं।

4हे यहोवा, उ सबइ मनइयन दूसर लोगन क बुरा करत हीं। तउ तू ओनकी संग बुरी घटना क घटावा ओन दुर्जनन क तू वइसेन ही दण्ड द्या जइसे ओनका देइ चाही।

5दुर्जन ओन उत्तिम बातन क जउन यहोवा करत ओका नार्ही समुझतेन। उ पचे परमेस्सर क उत्तिम कारजन क नार्ही लखतेन। उ पचे ओकर भलाई क नार्ही समुझतेन। उ पचे तउ सिरिफ कउनो क नास करइ क जतन करत हीं।

6यहोवा क स्तुति करा! उ मोहे पइ करुणा करइ क बिनती सुनेस।

7यहोवा मोर सकती अहइ, उ मोर ढार अहइ। मोका ओकर भरोसा रहा। उ मोर मदद किहेस। मई बहोतइ खुस हउँ, अउ ओकर खुसी क गीत गावत हउँ।

8यहोवा आपन चुना राजा क रच्छा करत ह। उ ओका हर पल बचावत ह। यहोवा ही ओकर सकती अहइ।

9हे परमेस्सर, आपन लोगन क रच्छा करा। जउन तोहार अहई ओनका आसीस द्या। ओनका धियान रखा अउर हमेसा ओनका लइके चला।

## भजन 29

*दाऊद क एक गीत।*

1परमेस्सर क पूत लोगो, यहोवा क स्तुति करा। ओकर महिमा अउ सकती क प्रसंसा गीत गावा।

2यहोवा क प्रसंसा करा अउ ओकरे नाउँ क आदर करा। पवितर ओढ़ना पहिरिके यहोवा क आराधना करा।

3समुद्र क ऊपर यहोवा क वाणी खुद क गरजत ह। परमेस्सर क वाणी महासागर क ऊपर मेघ क गरजन क तरह गरजत ह।

4यहोवा क वाणी ओकर सकती क देखेवत ह। ओकर ध्वनि ओकर महिमा क परगट करत ह।

5यहोवा क वाणी देवदार बृच्छन क तोड़के चकनाचूर कइ देत ह। यहोवा लबानोन क विसाल देवदार बृच्छन क तोड़ देत ह।

6यहोवा लबानोन क पहाड़न क कपौइ देत ह। उ नाचत भाए बछवा क तरह देखेइ लागत ह। हेर्मीन क पहाड़ काँप उठत ह अउर उछरत जवान बकरी क तरह देखेवत ह।

7यहोवा क वाणी बिजली क कौंध स टकरात ह।

8यहोवा क वाणी मरुस्थल क कपौइ देत ह। यहोवा क स्वर स कादेस क मरुस्थल काँप उठत ह।

9यहोवा क वाणी स हिरन डेराइ जात हीं। यहोवा दुर्गम जंगलन क नस्ट कइ देत ह। मुला ओकरे मन्दिर में लोग ओकर प्रसंसा क गीत गावत हीं।

10जल प्रलय क समय यहोवा राजा रहा। उ सदा बरे राजा रही।

11यहोवा आपन भगतन क रच्छा सदा करी, अउर आपन जनन क सांति क आसीस देइ।

## भजन 30

*मन्दिर क समर्पण बरे दाऊद क एक तु पद।*

1हे यहोवा, तू मोरी बिपत्तियन स मोर उद्धार किहा ह। तू मोरे दुस्मनन क मोका हरावइ अउर मोर खिल्ली उड़ावइ नार्ही दिहा। तउ मई तोहरे बरे आदर परगट करब।

2हे मोर परमेस्सर यहोवा, मई तोहसे पराथना किहेउँ। तू मोका चँगा कइ दिहा।



3कब्र स तू मोर उद्धार किहा, अउर मोका जिअइ दिहा। मोका मुर्दन क संग मुर्दन क गड़हा में पड़े भए नार्ही रहइ पड़ा।

4परमेस्सर क भगतन, यहोवा क स्तुति करा! ओकरे सुभ नाउँ क प्रसंसा करा।

5यहोवा कोहाइ गवा, तउ निर्णय भवा “मउत!” मुला उ आपन पिरेम परगट किहस अउर मोका “जिन्नगी” दिहस। मई राति क रोवत विलापत सोएउँ। दूसर भिन्सारे मई गावत भवा खुस रहेउँ।

6मई अब इ कहि सकत हउँ, अउर मई जानत हउँ इ निहचय फुरइ अहइ, “मई कबहुँ नार्ही हारब!”

7हे यहोवा, जब तू मोहे पइ दयालु भया अउ तउ मई महसूस किहेउँ कि मई अइसा सुरच्छित अहउँ जइसा पहाड़े पइ एक किला। मुला मई डर स काँपि गएउँ जब तू मोका अस्वीकार कइ दिहा।

8हे परमेस्सर, मई तोहरी कइँती लउटेउँ अउर बिनती किहेउँ। मई आपन पइ दाया देखावइ क विनती किहेउँ।

9मई कहेउँ, “परमेस्सर का इ नीक अहइ कि मई मरि जाउँ अउर कब्र क भीतर खाले चला जाऊँ? मरे भए मनई तउ माटी में ओलरा रहत हीं, उ पचे तोहरे नेक क स्तुति जउन सदा सदा बनी रहत ह नार्ही करतेन।

10हे यहोवा, मोर पराथना सुना अउर मोह पइ करुणा करा! हे यहोवा, मोर मदद करा!”

11मई पराथना किहेउँ अउर तू मोर मदद किहा! तू मोरे रोवइ क नाच में बदल दिहा मोरे सोक वस्त्र क तू उतारिके बहाइ दिहा, अउर मोका आनन्द में सराबोर कइ दिहा।

12हे यहोवा, मई तोर सदा जसगान करब। मई अइसा करब जेहसे कबहुँ नीरवता न बियापइ। तोहार प्रसंसा में हमेसा कउनो न कउनो गावत रही।

### भजन 31

*संगीत निर्देशक क दाऊद क एक पद।*

1हे यहोवा, मई तोहरे भरोसे हउँ, मोका निरास जिन करा। मोह पइ कृपालु हवा अउर मोर रच्छा करा।

2हे यहोवा, मोर सुना, अउर तू हालि आइके मोका बचाइ ल्या। मोर चट्टान बनि जा, मोर रच्छा करा!

3हे परमेस्सर, तू मोर चट्टान अहा, तउ आपन निज नाउँ बरे मोका राह देखौवा अउर मोर अगुआई करा।

4मोरे बरे मोर दुस्मनन जाल फइलाएन ह। ओनके फँदा स तू मोका बचाइ ल्या, काहेकि तू मोर सुरच्छा स्थल अहा।

5हे परमेस्सर यहोवा, मई तउ तोहे पइ भरोसा कइ सकत हउँ। मई आपन जिन्नगी तोहरे हाथे में सउँपत हउँ। मोर रच्छा करा।

6जउन लबार देवतन क पूजत रहत हीं, ओन लोगन स मोका घिना अहइ। मई तउ बस यहोवा में बिस्सास रखत हउँ।

7हे यहोवा, तोहार करुणा मोका बहोतइ आनन्दित करत ह। तू मोरे दुःखन क लखि लिहा अउ तू मोर पीरा क बारे में जानत अहा।

8तू मोरे दुस्मनन क मोहे पइ भारी पड़इ नार्ही देव्या। तू मोका ओनके फँदन स छोड़इव्या।

9हे यहोवा, मोह पइ अनेक संकट अहइँ। तउ मोह पइ कृपा करा। मई ऐँतना बियाकुल अहउँ कि मोर आँखिन दुःखत अहइँ। मोर गटइ अउ पेट पिरात अहइँ।

10मोरी जिन्नगी क अंत दुःख में होत अहइ। मोर बरिस आह भरइ में बीतत अहइँ। मोर सबइ बेदना मोर सक्ती क निचोड़त अहइँ। मोर बल मोर साथ छोड़त जात अहइ।

11मोर सत्रु मोसे घिना राखत हीं। मोर पड़ोसी मोर बैरी बना अहइँ। मोर सबहिं रिस्तेदार मोका राहे में लखिके मोसे डेराइ जात हीं अउर मोसे सब कतरात हीं।

12मोका लोग पूरी तरह स बिसरि चुका अहइँ। मई तउ कउनो हेरान अउजार सा होइ गवा हउँ।

13मई ओन भयंकर बातन क सुनत हउँ जउन लोग मोरे बारे में करत हीं। उ पचे सबहिं लोग मोरे खिलाफ होइ ग बाटेन। उ पचे मोका मारि डावइ क योजना रचत हीं।

14हे यहोवा। मोर भरोसा तोहे पइ अहइ। तू मोर परमेस्सर अहा।

15मोर जिन्नगी तोहरे हाथन में अहइ। मोरे दुस्मनन स मोका बचाइ ल्या। ओन लोगन स मोर रच्छा करा, जउन मोरे पाछे पड़ा अहइँ।

16कृपा कइके आपन दास क अपनाइ ल्या। मोह पइ दाया करा अउर मोर रच्छा करा।

17हे यहोवा, मई तोहार बिनती किहेउँ। एह बरे मई निरास नार्ही होब। बुरे मनइयन तउ निरास होइ जइहीं। अउर उ पचे कब्र में नीरव चला जइहीं।

18दुर्जन लोग डींग हाँकत हीं अउर सज्जन क बारे में झूठ बोलत हीं। उ सबइ दुर्जन बहोत ही अभिमानी होत हीं। मुला ओनके होंठ जउन झूठ बोलत रहत हीं, बिना सबदन क होइहीं।

19हे परमेस्सर, तू आपन भगतन बरे बहोत स अजूबा चीजन क छुपाइके धरे अहा। तू सबन्क समन्वा अइसे मनइयन बरे जउन तोहार बिस्सासी अहइँ, भला काम करत अहा।

20दुर्जन लोग सज्जनन क नस्कान पहोंचावइ क बरे जुट जात हीं। उ सबइ दुर्जन लड़ाइ भइकावइ क जतन करत हीं। मुला तू सज्जनन क ओनसे छुपाइ लेत अहा, अउर ओनका बचाइ लेत अहा। तू सज्जन लोगन क रच्छा आपन सरण में करत अहा।

21यहोवा क स्तुति करा। जब नगर क दुस्मन लोग घेर लिहे रहेन, तब उ आपन सच्चा पिरेम अजूबी रीति स देखौएस।

22मई डेरान रहेउँ, अउर मई कहे रहेउँ, “मई तउ अइसे जगह पइ हउँ जहाँ मोका परमेस्सर नार्ही देख सकत ह।” मुला हे परमेस्सर, मई तोहार बिनती किहेउँ, अउर तू मोर सहायता क पुकार सुनि लिहा।

23परमेस्सर क भगतन, तोहका यहोवा स पिरेम करइ चाही। यहोवा ओन लोगन क जउन ओकरे बरे सच्चा अहइँ, रच्छा करत ह। मुला यहोवा ओनका जउन आपन

ताकत क ढोल पीटत हौं। ओनका उ वइसा ही दण्ड देत ह, जइसा दण्ड ओनका मिलइ चाही।

24अरे ओ मनइयो जउन यहोवा क मदद बरे प्रतीच्छा करत अहा, सुदुद अउ हिम्मती बना!

### भजन 32

दाऊद क एक गीत।

1धन्न अहइ उ जेकर पाप छमा भएन। धन्न अहइ उ जन जेकर पाप धुल गएन।

2उ पचे कइसे धन्य अहइँ जेका यहोवा दोखी नाही समुझत ह। उ जन जउन आपन गुप्त पापन क छुपावइ क जतन न करइ आसीसित होइहीं।

3हे परमेस्सर, मईँ तोहसे बार बार बिनती किहेउँ, मुला आपन छुपा पाप तोहका नाही बताएउँ। जेतनी दाईँ मईँ तोहार बिनती किहेउँ मईँ तउ अउर जियादा दुर्बल होत चला गएउँ।

4हे परमेस्सर, तू मोर जिन्नगी दिन रात कठिन स जियादा कठिन बनाइ दिहा। मोर ताकत अइसा झुराइ गवा अहइ जइसा गर्मी क मोसम क ताप झुलसाइ दिहे अहइ।

5मुला फिर मईँ यहोवा क समच्छ आपन सबहिँ पापन क मानइ क निहचय कइ लिहे हउँ। हे यहोवा, मईँ तोहका आपन पाप बताइ दिहेउँ। मईँ आपन कउनो अपराध तोहसे नाही छुपाएउँ। अउर तू मोरे पापन क दोख छिमा कइ दिहा।

6एह बरे, परमेस्सर, तोहरे भगतन क तोहार बिनती करइ चाही। हिआँ तलक कि जब विपत्ति जल प्रलय स उमइइ तब भी तोहरे भगतन क तोहार बिनती करइ चाही।

7हे परमेस्सर, तू मोर रच्छा क ढाल अहा तू मोका मोरी बिपत्तियन स उबारत अहा। तू मोका सुरच्छा क गीत स घेरि लिहा ह। तउ एह बरे मईँ, जइसे तू रच्छा किहा ह, ओनही बातन क गीत गावा करत हउँ।

8यहोवा कहत ह, “मईँ तोहका जइसे चलइ चाही सिखाउब अउर तोहका उ राह देखाउब। मईँ तोहार रच्छा करब अउर मईँ तोहार अगुआ बनब।

9तउ तू घोड़न या गदहन स बुद्धिहीन जिन बना। ओन पसुअन क तउ मुखरी अउ लगाम स चलावा जात ह। अगर तू ओनका लगाम या रास नाही लगउब्या, तउ उ सबइ पसु निअरे नाही अइहीं।”

10दुर्जनन क बहोत स पीड़ा घेरिहीं। मुला ओन लोगन क जेनका यहोवा पइ भरोसा अहइ, यहोवा क सच्चा पिरेम ढाक लेइ।

11सज्जन तउ यहोवा मँ सदा मगन अउ आनन्दित रहत हौं। अरे ओ लोगो, तू सब पवितर मन क साथ आनन्द मनउब्या।

### भजन 33

1हे सज्जन लोगो, यहोवा मँ आनन्द मनाव! सज्जनो सत मनइयो, ओकर स्तुति करा।

2वीणा बजावा अउर ओकर स्तुति करा। यहोवा बरे दस तार वाले सारंगी बजावा।

3अब ओकरे बरे नवा गीत गावा। खुसी क धुन सुन्दरता स बजावा!

4परमेस्सर क वचन सत्य अहइ। जउन भी उ करत ह ओकर तू पचे भरोसा कइ सकत ह।

5नेकी अउ निस्पच्छता परमेस्सर क भावत ह। यहोवा आपन खुद क करुणा स इ धरती क भरि दिहेस।

6यहोवा आदेस दिहस अउ सृस्टि फउरन पइदा होइ गइ। परमेस्सर क साँस स धरती पइ हर चीज बनी।

7परमेस्सर सागर मँ एक ही जगहिया पइ जल बटोरेस। उ सागर क आपन जगह पइ रखत ह।

8धरती क हर मनई क यहोवा क आदर करइ अउ डेराइ चाही। इ संसार मँ जउन भी मनई बसा अहइँ, ओनका चाही कि उ पचे ओसे डेराइँ।

9काहेकि परमेस्सर क सिरिफ बात भइ कहब अहइ, अउर उ बात तुरंत घटि जात ह। अगर उ कउनो क रुकइ क आदेस देइ, तउ उ तुरंत थम जात ह।

10परमेस्सर चाहइ तउ सबहिँ सुझाव बिअर्थ करइ। उ कउनो भी मनई क सब कुचक्रन क बिअर्थ कइ सकत ह।

11मुला यहोवा क उपदेस सदा ही खरे होत हौं। ओकर सब योजना पीढ़ी दर पीढ़ी खरी होत हौं।

12धन्न अहइँ उ सबइ मनई जेनकर परमेस्सर यहोवा अहइ। परमेस्सर ओनका आपन ही मनई होइ क चुनेस ह।

13यहोवा सरग स खाली लखत रहत ह। उ सबहिँ लोगन क लखत रहत ह।

14उ ऊपर ऊँचे पइ बनाए भए आसन स धरती पइ रहइवाले सब मनइयन क लखत रहत ह।

15परमेस्सर हर कउनो क मन रचेस ह। तउ कउनो का सोचत अहइ उ समुझत ह।

16राजा क रच्छा ओकरे बड़की सक्ती स नाही होत ह, अउर कउनो सिपाही आपन निज सक्ती स सुरच्छित नाही रहत।

17जुद्ध मँ फुरइ अस्वबल नाही जितावत। सचमुच तू ओकरी सक्ती स नाही बचि सकत्या।

18जउन लोग यहोवा क अनुसरण करत हौं, ओनका यहोवा लखत ह अउ रखवारी करत ह। जउन मनई ओकर आराधना करत हौं, ओनका ओकर महान पिरेम बचावत ह।

19परमेस्सर ओन लोगन क मउत स बचावत ह। उ सबइ जब भुखान होतेन तब उ ओनका सक्ती देत ह।

20एह बरे हम यहोवा क बाट जोहब। उ हमार मदद अउर हमार ढाल अहइ।

21परमेस्सर मोका आनन्दित करत ह। मोका फुरइ ओकरे पवितर नाउँ पइ भरोसा अहइ।

22हे यहोवा, हम सचमुच तोहार आराधना करित ह। तउ तू हम पइ आपन महान पिरेम देखावा।

### भजन 34

जब दाऊद अबीमेलेक क समन्वा पागल होइ क देखेवा किहस। जेहसे अबीमेलेक ओका भगाइ देइ, इ प्रकार दाऊद ओका तजिके चला गवा। उहइ अवसर पइ दाऊद क एक ठु पद।

1मईँ यहोवा क सदा धन्न कहब। मेरे ओठन पइ सदा ओकर स्तुति अहइ।

2हे नम्र लोगो! सुना अउ खुस होइ जा। मोर सेखी यहोवा क बारे में अहइ।

3मोरे संग यहोवा क गरिमा क गुणगान करा। आवा, हम एक साथ घोसना करी कि उ केतना अच्छा अहइ।

4मई परमेस्सर क लगे मदद माँगइ गएँ। उ मोर सुनेस। उ मोका ओन सबहिँ बातन स बचाएस जेनसे मई डेरात हउँ।

5गरीब लोग ओकरे कइँती मदद बरे लखत हीं। ओनकर फीका चेहरन खुसी स गाइ उठेन काहेकि उ ओनका उत्तर दिहस।

6इ दीन जन यहोवा क मदद बरे पुकारेस, अउर यहोवा मोर सुनि लिहस। अउर उ सब विपत्तियन स मोर रच्छा किहस।

7यहोवा क दूत ओकरे भगत जनन क चारिहुँ कइँती डेरा डाए रहत ह। अउर यहोवा क दूत ओन लोगन क रच्छा करत ह।

8चखा अउर समझा कि यहोवा केतना भला बाटइ। उ मनई जउन यहोवा क भरोसे अहइ फुरइ खुस रही।

9यहोवा क पवितर जन क ओकर आराधना करइ चाही। यहोवा क भगतन बरे कउनो दूसर सुरच्छित ठउर नाहीं बा।

10आजु जउन बरिआर अहइँ दुर्बल अउ भूखा होइ जइहीं। मुला जउन परमेस्सर क सरण आवत हीं उ सबइ लोग हर उत्तिम वस्तु पइहीं।

11हे बालको, मोर सुना, अउर मई तू पचन्क सिखाउब कि यहोवा क सेवा कइसे करई।

12अगर कउनो मनई जिन्नगी स पिरेम करत ह, अउर बढ़िया अउ बढ़की जिन्नगी क जिअइ चाहत ह,

13तउ उ मनई क बुरा नाहीं बोलइ चाही, उ मनई क झूठ नाहीं बोलइ चाही।

14बुरा काम जिन करा। नेक काम करत रहा। सान्ति क कारज करा। सान्ति क प्रयास में जुटा रहा जब तलक ओका पाइ न ल्या।

15यहोवा सज्जन लोगन क रच्छा करत ह। ओनकर पराथनन पइ उ कान देत ह।

16मुला यहोवा, जउन बुरा करम करत हीं, अइसे मनइयन क खिलाफ होत ह। एह बरे उ लोग मरइ क पाछे बिसरि दीन्ह जाइहीं।

17यहोवा स बिनती करा, उ तोहार सुनी। उ तू पचन्क तोहरी सबहिँ मुसीबतन स बचाइ लेइ।

18लोगन पइ मुसीबत आइ सकत हीं अउर उ पचे अभिमानी होब तजि देत हीं। यहोवा ओन लोगन क निअरे रहत ह। जेनकर टूटा मन अहइँ ओनका उ बचाइ लेइ।

19होइ सकत ह सज्जन भी बिपदन में घिर जाई। मुला यहोवा ओन सज्जन लोगन क ओनकर हर समस्या स रच्छा करी।

20यहोवा ओनकइ सब हाइन स रच्छा करी। ओनकर एक भी हाइ नाहीं टूटी।

21दुट्टता दुट्ट लोगन बरे मउत लावत ह। सज्जन क विरोधी नस्त होइ जइहीं।

22यहोवा आपन हर दास क आतिमा बचावत ह। जउन लोग ओह पइ भरोसा रखत हीं, उ ओन लोगन क नस्त नाहीं होइ देइ।

## भजन 35

दाऊद क समर्पित।

1हे यहोवा, मोरे मुकदमन क लड़ा। मोरे जुद्धन क लड़ा।  
2हे यहोवा, कवच अउ ढार धारण करा, खड़ा हवा अउ मोर रच्छा करा।

3बरछी अउ भाला उठावा, अउर जउन मोरे पाछे पड़ा अहइँ ओनसे जुद्ध करा। हे यहोवा, मोरी आतिमा स कहा, "मई तोहार उद्धार करबा।"

4कछू लोग मोका मारइ पाछे पड़ा अहइँ। ओनका निरास अउ लज्जित करा। ओनका मोड़ द्या अउ ओनका भगाइ द्या। मोका नस्कान पहाँचावइ क कुचक्र जउन रचत अहइँ ओनका असमंजस में डाइ द्या।

5तू ओनका अइसा भूसा स बनाइ द्या, जेका हवा उड़ाइ लइ जात ह। ओनके संग अइसा होइ द्या कि, ओनके पाछे यहोवा क दूत पड़ई।

6हे यहोवा, ओनकर राह अँधियारी अउ फिसल जाइवाली होइ जाइ। यहोवा क दूत ओनकइ पाछे पड़ई।

7उ पचे बिना कारण मोर बरे फंदा लगाएस ह। उ पचे बिना कारण मोका फँसावा चाहत हीं।

8तउ, हे यहोवा, अइसे लोगन क ओनकर आपन ही जालि में गिरइ द्या। ओनका आपन ही फंदन में पड़इ द्या। अउर कउनो न मालूम भवा खतरा ओन पइ पड़इ द्या।

9फुन तउ यहोवा मई तोहे में आनन्द मनाउब। यहोवा क संरक्षण में मई प्रसन्न होब।

10मई आपन पूरे मन स कहब, "हे यहोवा, तोहरे समान कउनो नाहीं अहइ। तू सबलन स दुर्बलन क बचावत ह। जउन लोग सक्तीवाला होत हीं, ओनसे तू चिजियन क छोर लेत अहा अउर दीन अउ बेसहारा लोगन क देत ह।"

11एक लबार साच्छी दल मोका दुःख देइ बरे कुचक्र रचत अहइ। उ पचे मोह पइ अपराधन क इलजाम लगवात ह जेकरे बरे मई जानत ही नाहीं हउँ।

12मई तउ बस भलाई ही भलाई किहेउँ ह। मुला उ पचे मोसे बुराई करिहीं। हे यहोवा, मोका उ उत्तिम फल द्या जउन मोका मिलइ चाही।

13ओन पइ जब दुःख पड़ा, ओनके बरे मई दुःख भएउँ। मई खइया क तजिके आपन दुःख परगट किहेउँ। जउन मई ओनके बरे पराथना किहेउँ, का मोका इहइ मिलइ चाही?

14ओन लोगन बरे मई सोक वस्त्र धारण किहेउँ। मई ओन लोगन क संग मीत वरना भाई जइसा बेउहार किहेउँ। मई उ रोवत मनई जइसा दुःखी भएँ, जेकर महतारी मरि गइ होइ। अइसे लोगन स सोक परगट करइ बरे मई करिआ वस्त्र पहिर लिहेउँ। मई दुःखे में बूड़ेँ अउर मूँइ निहुराइके चलेउँ।

15मुला जब मोसे कउनो एक चूक होइ गइ, उ सबइ लोग मोर खिल्ली उड़ाएन। उ सबइ लोग फुरइ मोर मीत

नाहीं रहेन। मई ओन लोगन क जानत तउ नाहीं। उ पचे मोका घेरि लिहन अउर मोह पइ प्रहार किहन।

16उ पचे मोह पइ दुर्जनता क संग मसखरी किहन अउ उ पचे मोह पइ दौँत पीसेन।

17मोर सुआमी, तू कब तलक इ सब बुरा होत लखब्या? इ सबइ लोग मोका नास करइ क जतन करत अहई। हे यहोवा, मोर प्राण बचाइ ल्या। मोरी पियारी जिन्गी क रच्छा करा। उ सबइ सिंह जइसा बन गवा अहई।

18हे यहोवा, मई महासभा में तोहार स्तुति करब। मई बरिआर लोगन क संग रहत भए तोहार जस बखानब।

19मोर लवार सत्रु हँसत नाहीं रहिहीं। फुरइ मोर दुस्मन आपन छुपी भइ योजना बरे सजा पइहीं।

20मोर दुस्मन सचमुच सान्ति क जोजनन क नाहीं रचतेन। उ पचे इ देस क सान्ति प्रिय लोगन क खिलाफत में छुप हुपिके बुरा करइ क कुचक्र रचत अहई।

21मोर दुस्मन मोरे बरे बुरी बातन क कहत अहई। उ सबइ झूठ बोलत भए कहत अहई, “अहा! हम सबइ जानत अही तू का करत अहा!”

22हे यहोवा, तू सचमुच लखत अहा कि का कछू घटत बाटइ। तउ तू जिन छुपा रहा, मोका जिन तजा।

23हे यहोवा, जागा! मोका रच्छा बर तइयार होइ जा! मोरे परमेस्सर यहोवा मोर लड़ाई लड़ा, अउर मोर निआउ करा।

24हे मोरे परमेस्सर यहोवा, आपन बगइर पच्छ लिहे मोर निआउ करा, तू ओन लोगन क मोह पइ हँसइ जिन द्या।

25ओन लोगन क अइसा जिन कहइ द्या, “अहा! हमका जउन चाही रहा ओका पाइ लीन्ह!” हे यहोवा, ओनका जिन कहइ द्या, “हम ओका बरबाद कइ दीन्ह।”

26मई आसा करत हउँ कि मोर दुस्मन निरास अउ लज्जित होइहीं। उ सबइ लोग खुस रहेन जब मोरे संग बुरी बातन घटत रहिन। उ सबइ सोचा करतेन कि उ सबइ मोसे स्नेष्ठ अहई! तउ अइसे लोगन क लाज में बूड़ि जाइ द्या।

27ओन लोगन क जउन मोका निर्दोष घोसित करइ चाहत ह, खुपी अउ आनन्दित होइ द्या। उ पचन क हमेसा कहइ द्या, “यहोवा महान बा! उ आपन सेवक क अच्छाई चाहत ह।”

28तउ, हे यहोवा, मई लोगन क तोहार अच्छाई बताउब। हर दिन, मई तोहार स्तुति करब।

### भजन 36

*संगीत निर्देशक बरे यहोवा क दास दाऊद क एक पद।*

1बुरा मनई बहोत बुराई करत ह जब उ खुद स कहत ह, “मई परमेस्सर क आदर नाहीं करत हउँ अउ न ही डेरत हउँ।”

2उ मनई खुद स झूठ बोलत ह। उ मनई खुद क आपन खोट नाहीं लखत। एह बरे उ छिमा नाहीं माँगत।

3ओकर वचन सिरिफ बियर्थ अउ झूठा होत हीं। उ विवेकवाला नाहीं होत अउर न ही अच्छा काम सीखत ह।

4राति क उ बिछउना में कुचक्र रचत ह। उ जागिके कउनो भी नीक काम नाहीं करत। उ कुकरम क तर्जई नाहीं चाहत।

5हे यहोवा, तोहार बिस्ससनीय पिरेम अकासे स भी ऊँच बाटइ। हे यहोवा, तोहार सच्चाई बादर स भी ऊँच बाटइ।

6हे यहोवा, तोहार धर्मी भावना सबन त ऊँची पवते स भी ऊँची बाटइ। तोहार सोभा गहिर सागर स भी गहिर अहइ। हे यहोवा, तू मनइयन अउ गोरूअन क रच्छक अहा।

7तोहरी करुणा स जियादा मूल्यवान कछू भी नाहीं अहइ। मनई अउ दूत तोहरे सरण में आवा अहई।

8हे यहोवा, तोहरे मन्दिर क उत्तिम बातन स उ सबइ नई सक्ती पावत हीं। तू ओनका आपन अद्भुत नदी क पानी क पिअइ देत अहा।

9हे यहोवा, तोहसे जिन्गी क झरना फूटत ह! तोहार जोति ही हमका प्रकास देखौवत ह।

10हे यहोवा, जउन तोहका सच्चाई स जानत हीं, ओनसे पिरेम करत रहा। ओन लोगन पइ तू आपन खुद क नेकी बरसावा जउन तोहरे बरे सच्चा अहई।

11हे यहोवा, तू मोका घमण्डियन क जाल में जिन फँसइ द्या। दुट्ट लोग मोका कबहुँ धइ न पावई।

12ओनकर कब्रन क पाथरन पइ इ लिखि द्या: “दुट्ट लोग हिआँ पइ गिरेन ह। उ सबइ कुचर दीन्ह गएन। उ पचे फिन कबहुँ खड़ा नाहीं होइ पइहीं।”

### भजन 37

*दाऊद क समर्पित।*

1दुर्जन लोगन स जिन घबरा, जउन बुरा करत हीं अइसे मनइयन स ईर्स्या जिन राखा।

2दुर्जन मनई घास अउ हरियर पौधन क नाई हाली पिअराइ जात हीं अउर मरि जात हीं।

3अगर तू यहोवा पइ भरोसा रखब्या अउर भला काम करब्या तउ तू जिअत रहब्या अउ ओन चिजियन क भोग करब्या जउन धरती देत ह।

4यहोवा क सेवा में आनन्द लेत रहा, अउर यहोवा तोहका तोहार मन चाहा देइ।

5यहोवा क भरोसे रहा। ओकर बिस्सास करा। उ वइसा करी जइसा करइ चाही।

6दुपहरिया क सूरज जइसा, यहोवा तोहार नेकी अउ खरेपन क चमकावइ।

7यहोवा पइ भरोसा धरा अउ ओकरे सहारे क बाट जोहा। तू दुट्टन क कामयाबी लखिके घबरावा जिन करा। तू दुट्टन क दुट्ट जोजनन क कामयाब होत लखिके जिन घबरा।

8तू किरोध जिन करा। तू उन्मादी जिन बना। ओतना जिन घबराइ जा कि तू बुरा काम करइ चाहा।

9काहेकि बुरे मनइयन क तउ नास कीन्ह जाइ। मुला उ सबइ लोग जउन यहोवा पइ भरोसा रखत हीं, उ धरती क पइहीं जेका देइ क परमेस्सर वचन दिहेस ह।

10तनिक समइ क पाछे कउनो दुर्जन नाहीं बच पाई। हेरइ स भी तोहका कउनो दुट्ट नाहीं मिली।

11नम्र लोग उ धरती पइहीं जेका परमेस्सर देइ क वचन दिहेस ह। उ सबइ सान्ति क आनन्द लेइहीं।

12दुट्ट लोग सज्जनन बरे कुचाल चलत हीं। दुट्ट जन सज्जनन क ऊपर दाँत पीसिके देखौवत हीं कि उ पचे कोहान अहईं।

13मुला हमार सुआमी ओन दुर्जनन पइ हँसत ह। उ ओन बातन क लखत ह जउन ओन पइ पड़इ क अहइ।

14दुर्जन तउ आपन तरवार उठावत हीं अउर धनुस साधत हीं। उ पचे दीन लोगन, बेसहारा लोगन क मारइ चाहत हीं। उ सबइ सच्चे लोगन, सज्जन लोगन क मारइ चाहत हीं।

15मुला ओनकर धनुस चूर चूर होइ जइहीं। अउर ओनकर तरवारन ओनकर आपन ही हिरदय में उतरिहीं।

16थोड़ा स भला मनई, दुर्जनन क भीड़ स भी उत्तम अहईं।

17काहेकि दुर्जनन क तउ नस्ट कीन्ह जाइ। मुला भले मनइयन क यहोवा धियान रखत ह।

18सुद्ध सज्जन लोगन क यहोवा ओनकइ जिनगी भइ बचावत ह। ओनकर प्रतिफल सदा बना रही।

19जबहिं संकट होइ, सज्जन बरबाद नाहीं होइहीं। जब अकाल पड़ी, सज्जन लोगन क लगे खइया क भरपूर होइ।

20मुला बुरा मनई यहोवा क दुस्मन होत रहत हीं। तउ ओन बुरे लोगन क नस्ट कइ दीन्ह जाइ, ओनकर सबइ घाटी झुराइ जइहीं अउर बर जइहीं। ओनका तउ पूरी तरह स मेट दीन्ह जाई।

21दुट्ट तउ फउरन ही धन उधार माँग लेत ह, अउर ओका फुन कबहुँ नाहीं चुकावत। मुला एक सज्जन अउरन क खुसी स देत रहत ह।

22अगर कउनो सज्जन कउनो क आसीर्बाद देइ, तउ उ सबइ मनई उ धरती क जेका परमेस्सर देइ क वचन दिहेस ह, पइहीं। मुला अगर उ सराप देइ मनइयन क तउ उ सबइ नास होइ जइहीं।

23यहोवा, सिपाही क होसियारी स चलइ मैं मदद करत ह। अउर उ ओका पतन स बचाइ लेत ह।

24फउजी अगर धावत भए दुस्मन पइ प्रहार करई, तउ ओकरे हाथे क यहोवा सहारा देत ह, अउर ओका गिरइ स बचावत ह।

25मई जुवक भवा रहेउँ पर अबहुँ मई बुढ़ाइ ग हउँ। मई कबहुँ यहोवा क सज्जन लोगन क बेसहारा तजत भए नाहीं लखेउँ। मई कबहुँ सज्जन लोगन क संतानन क भीख माँगत नाहीं लखेउँ।

26सज्जन सदा मुक्त भाव स दान देत ह। सज्जन लोगन क गदेलन वरदान होत हीं।

27अगर तू कुकरमन स आपन मुँह मोड़ ल्या, अउर अगर तू नीक करमन क करत रहा, तउ फिन तू सदा ही जिअत रहब्या।

28यहोवा खरेपन स पिरेम करत ह, उ आपन निज मनवइयन क बेसहारा नाहीं तजत। यहोवा आपन निज मनवइयन क हमेसा रच्छा करत ह, अउर उ दुट्ट जन क नस्ट कइ देत ह।

29सज्जन उ धरती क पइहीं जेका देइ क परमेस्सर वचन दिहेस ह, उ पचे ओहमाँ सदा सदा ही रहा करिहीं।

30भला मनई तउ खरी सलाह देत ह। ओकर निआउ सब क बरे निस्पच्छ होत ह।

31सज्जन क हिरदय में यहोवा क उपदेस रहत हीं। उ सोझ मारग पइ चलब नाहीं तजत।

32मुला दुर्जन सज्जन क दुःख पहोंचावइ क रस्ता हेरत रहत ह, अउर दुर्जन सज्जन क मारइ क जतन करत हीं।

33मुला यहोवा दुर्जनन क मुक्त नाहीं तजी। उ सज्जन क अपराधी नाहीं ठहरइ देइ।

34यहोवा क मदद क बाट जोहत रहा। यहोवा क पाछे पाछे चलत रहा। दुर्जन नस्ट होइहीं। यहोवा तोहका महत्वपूर्ण बनाई। तू उ धरती पउब्या जेका देइ क यहोवा वचन दिहेस ह।

35मई दुट्ट क बरिआर लखेउँ ह। मई ओका मजबूत अउ तन्दुरुस्त बृच्छ क नाई सक्तीसाली लखेउँ।

36मुला उ सबइ फुन मिट गएन। मोरे हेरे पइ ओनकर पता तलक नाहीं मिला।

37सच्चा अउ खरा बना, काहेकि इहइ स सान्ति मिलत ह।

38मुला जउन लोग व्यवस्था नेम तोड़त हीं नस्ट कइ दीन्ह जइहीं।

39यहोवा नेक मनइयन क रच्छा करत ह। उ आपन किला मैं रहा जब विपत्तियन आइन।

40यहोवा नेक लोगन क सहारा देत ह, अउर ओनकर रच्छा करत ह। सज्जन यहोवा क सरण मैं आवत हीं अउर यहोवा ओनका दुर्जनन स बचाइ लेत ह।

## भजन 38

1हे यहोवा, जब तू किरोध मैं रहा तउ मोका फटकार जिन लगावा; जब तू परेसानी मैं रहा मोका जिन सुधारा।

2हे यहोवा, तू मोका चोट दिहा ह। तोहार बाण मोहमाँ गहिर उतरा अहईं।

3तू मोका सजा दिहा ह अउर मोर पूरी देह दुःखत बाटइ, मई पाप किहेउँ अउ तू मोका सजा दिहा। एह बरे मोर हाइ दुःखत अहइ।

4मई बुरा काम करइ क अपराधी हउँ, अउर उ अपराध एक बड़का बोझा क नाई मोरे काँधि पइ चढ़ा अहइ।

5मई बना रहेउँ मूरख, अब मोर घाव दुर्गन्धि स भरिके रिसत अहईं, अउर उ सबइ सड़त अहईं।

6मई निहुरा अउ दबा भवा अहउँ। मई दिन भइ उदास रहत हउँ।

7बोखार स मोर गुर्दन दर्द करत ह, अउर मोर समूचे बदन मैं बेमारी अहइ।

8मई बहोत दुर्बल अउ थका भवा हउँ। मई कराहत हउँ काहेकि मोर हिरदइ कस्ट झेलत अहइ।

9हे यहोवा, तू मोर कराहब सुनि लिहा। मोर आह तउ तोहसे छुपी नाहीं।

10मोर हिरदइ चूर-चूर होइ गवा अहइ अउर मोर सकती मोका छोड़ दिहेस ह। मोरी आँखिन क जोति लगभग जात रही।

11काहेकि मई रोगी हउँ, एह बरे मोरे मीत अउ मोर पड़ोसी मोसे मिलइ नाही अउतेन। मोरे परिवार क लोग तउ मोरे लगे तलक नाही फटकतेन।

12मोर दुस्मन मोर निन्दा करत हीं। उ सबइ झूठ बातन अउ प्रतिवादन क फइलावत रहत हीं। मोरे ही बरे मँ उ सबइ हरदम बातचीत करत रहत हीं।

13मुला मई बहरा बना कछू नाही अनकत हउँ। मई गूँगा होइ गवा, जउन कछू नाही बोल सकत।

14मई उ मनई क तरह बना हउँ, जउन कछू नाही सुन सकत कि लोग ओकरे बारे मँ का कहत अहई। अउर मई इ तर्क नाही दइ सकत अउर सिद्ध नाही कइ सकत कि मोर दुस्मन अपराधी अहई।

15तउ, हे यहोवा, मोका तू ही बचाइ सकत ह। मोर परमेस्सर अउर मोर सुआमी मोरे दुस्मनन क तू ही फुरइ बताइ द्या।

16काहेकि मई पराथना किहेउँ, “ओनका दुर्जन स प्रसन्न होइ क अनुमति जिन द्या जब मई कउनो गलती किहेउँ। ओनका आपन क बारे मँ सेखी हौँकइ क अनुमति जिन द्या।

17मई जानत हउँ कि मई आपन कुकरमन बरे पापी हउँ। मई आपन पीरा क बिसरि नाही सकत हउँ।

18हे यहोवा, मई तोहका आपन कुकरम बताइ दिहेउँ। मई आपन पापन बरे दुःखी हउँ।

19मोर दुस्मन जिअत अउ पूरी तरह तन्दुरुस्त अहई। उ पचे बहोत-बहोत झूठी बातन बोलेन ह।

20मोर दुस्मन मोरे संग बुरा बेउहार करत हीं, जबकि मई ओनके बरे भला ही किहेउँ ह। मई बस भला करइ क जतन करत रहेउँ, मुला उ सबइ लोग मोरे खिलाफ होइ ग अहई।

21हे यहोवा, मोका जिन बिसरा। मोरे परमेस्सर, मोसे तू दूर जिन रहा।

22देरी जिन करा, आवा अउर मोर सुधि ल्या। हे मोर परमेस्सर मोका तू बचाइ ल्या।

### भजन 39

संगीत निर्देशक क यद्दतून बरे दाऊद क एक तु पद।

1मई कहेउँ, “जब तलक इ सबइ दुट्ट मोरे समन्वा रइहीं, तब तलक मई आपन कहनी बरे सचेत रहब। मई आपन वाणी क पाप स दूर रखब। अउर मई आपन मुँह क बंद कइ लेबउँ।”

2तउ एह बरे मई कछू नाही कहेउँ। मई भला भी नाही कहेउँ। मुला मई बहोत परेसान भएउँ।

3मई बहोत गुस्सान रहेउँ। इ बारे मँ मई जेतना सोचत चला गएउँ, ओतना ही मोर किरोध बाढ़त चला गवा। तउ मई आपन मुँह तनिकउ नाही खोलेउँ।

4हे यहोवा, मोका बतावा कि मोरे संग का कछू घटित होइवाला अहइ? मोका बतावा, मई कब तलक जिअत

रहब? मोका जानइ द्या फुरइ मोर जिन्नगी केतनी छोट अहइ।

5तू मोका जिअइ बरे बहोत कम समइ दिहा ह। तोहार तुलना मँ मोर जिन्नगी बहोत अल्प अहइ। एक मनई क जिन्नगी सिरिफ एक साँस अहइ। कउनो भी सदा नाही जिअत।

6उ जिन्नगी जेका हम लोग जिअत ह, उ झूठी छाया भइ होत ह। जिन्नगी क सारी भाग दौड़ निस्पयोजन होत ह। हम पचे तउ बेकार ही चिन्ता पालित ह। धन दौलत वस्तुअन क हम जोरिके धरित ह, मुला हम नाही जानित ओनका कउन भोगी।

7तउ, मोरे यहोवा, मई का आसा रखउँ? तू ही बस मोर आसा अहा!

8हे यहोवा, जउन कुकरम मई किहेउँ ह, ओनसे तू ही मोका बचउब्या। तू मोरे संग कउनो क भी कउनो विवेकी न होइवाला जन क संग क नाई बेउहार नाही करइ देब्या।

9मई आपन मुँह नाही खोलब। मई कछू भी नाही कहब। यहोवा तू वइसे किह्या जइसे करइ चाही रहा।

10मुला परमेस्सर, मोका सजा देब तजि देइ। अगर तू मोका सजा देब नाही तज्या, तउ तू मोर नास करब्या।

11हे यहोवा, तू लोगन क ओनकर कुकरमन क सजा देत अहा। अउर इ तरह जिन्नगी क खरी राह लोगन क सिखावत ह। हमार काया पुरान अउ दुबराइ जात ह। अइसे उ ओढ़ना क नाई जेहमाँ कीरा लाग होइ। हमार जिन्नगी एक तु नाह बादर जइसे लखत बिलाइ जात ह।

12हे यहोवा, मोर विनती सुना। मोरे ओन सबदन क सुना जउन मई तोहसे गोहराइके कहत हउँ। मोरे आँसुअन क लखा। मई बस राहगीर हउँ, तोहका संग लिए इ जिन्नगी क राहे स गुजरत हउँ। इ जिन्नगी क राहे पइ मई आपन पुरखन क तरह कछू समइ मात्र पइ टिका भवा हउँ।

13हे यहोवा, मोका अकेल्ले रहइ द्या। मरइ स अउ चलि जाइ स पहिले मोका फुन स आनन्दित होइ द्या।

### भजन 40

संगीत निर्देशक बरे दाऊद क एक पद।

1यहोवा क मई पुकारेउँ। उ मोर सुनेस। उ मोर रोदन क सुन लिहस।

2यहोवा मोका विनास क गइहा स उबारेस। उ मोका दलदल गइहा स उठाएस, अउर उ मोका चट्टाने पइ बइठाएस। उ ही मोरे कदमन क टेकाएस।

3यहोवा मोरे मुँह मँ एक तु नवा गीत बसाएस। परमेस्सर क एक तु स्तुति गीत। बहुतेरे लोग लखिहीं जउन मोरे संग भवा ह। अउर फुन परमेस्सर क आराधना करिहीं। उ पचे यहोवा क बिस्सास करिहीं।

4अगर कउनो मनई यहोवा क भरोसे रहत ह, तउ उ मनई सचमुच खुस होइ। अउ अगर कउनो मनई मूर्तिअन अउ झूठ देवतन क सरण मँ नाही जाइ, तउ उ मनई फुरइ खुस होइ।

5हमार परमेस्सर यहोवा, तू बहुतेरा अद्भुत काज किहा ह। हमरे बरे तोहरे लगे अद्भुत योजना अहई। कउनो मनई

नाहीं जउन ओका गन सकइ। मई तोहरे कीन्ह काम क बारंबार बखानबउँ।

6हे यहोवा, तू मोका इ समुझाया हः तू फुरइ कउनो अन्नबलि अउ पसुबलि नाहीं चाहत रहया। कउनो होमबलि अउ पापबलि तोहका नाहीं चाही।

7तउ मई कहेउँ, “लखा मई आवत हउँ! किताबे में मोरे बारे में इहइ लिखा अहइ।”

8हे मोरे परमेस्सर, मई उहइ करइ चाहत हउँ जउन तू चाहत ह। मई मनवा में तोहरी सिच्छन क बसाइ लिहेउँ।

9मई महासभा क बीच लोगन क उद्धार क खुस खबरी कहेउँ। हे यहोवा, तू जानत अहा कि एकरे बारे में कहेइ स डरेउँ नाहीं।

10मई तोहार उद्धार बरे चुप नाहीं रहब। हे यहोवा, मई तोहार बिस्सासी अउर मुक्ती बरे खुलके बोलेउँ। मई महासभा में तोहार बिस्ससनीय पिरम अउर दयालुता क बिना छुपाए बोलेउँ।

11एह बरे हे यहोवा, तू आपन दया मोहसे जिन छुपावा। तू आपन करुणा अउ सच्चाई स मोर रच्छा करा।

12मोका दुट्ट मनइयन घेरि लिहन, उ पचे ऐतना जियादा बाटेन कि गना नाहीं जातेन। मोका आपन पापन घेरि लिहे अहइ, अउर मई ओनसे बचिके पराइ नाहीं सकत हउँ। मोर पाप मोरे मूँडे क बारे स जियादा अहइ। मोर साहस मोहसे हेराइ चुका बाटइ।

13हे यहोवा, मोरी कइँती दउड़ा अउ मोर रच्छा करा। आवा, देरी जिन करा, मोका बचाइ ल्या।

14उ सबइ दुट्ट मनई मोका मारइ क जतन करत हीं। हे यहोवा, ओनका लज्जित करा अउ ओनका निरास कइ द्या। उ सबइ मनई मोका दुःख पहोंचावइ चाहत हीं। तू ओनका अपमानित होइके पराइ द्या।

15उ सबइ दुट्ट लोग मोर मसखरी उड़ावत हीं। ओनका ऐतना सर्मिन्दा करा कि उ पचे बोल तलक न पावई।

16मुला उ सबइ मनई जउन तोहका हेरत हीं, आनन्द में भरि जाई। उ सबइ मनई सदा इ कहत रहई, “यहोवा क गुण गावा!” ओन लोगन क तोहसे ही रच्छित होब नीक लागत ह।

17हे मोर सुआमी, मई तउ बस दीन, बेसहारा मनई अहउँ। मोर रच्छा करा, तू मोका बचाइ ल्या। हे मोर परमेस्सर, अब जियादा देर जिन करा।

### भजन 41

संगीत निर्देशक बरे दाऊद क एक तु गीत।

1जउन दीन क कामयाब होने में मदद करत ह उ धन्य अहइ। यहोवा ओनका बचावत ह जब उ पचे विपती में होत हीं।

2यहोवा उ मनई क रच्छा करी अउ ओकर जिन्गी बचाइ। उ मनई धरती पइ बहोतइ बरदान पाई। परमेस्सर ओकरे दुस्मन क जरिये ओकर नास नाहीं होइ देइ।

3जब मनई रोगी होइ अउर बिछउना में पड़ा होइ, ओका यहोवा सक्ती देइ। उ मनई बिछउना में चाहे रोगी पड़ा होइ, मुला यहोवा ओका चंगा कइ देइ।

4मई कहेउँ, “यहोवा, मोहे पइ दया करा। मई तेरे खिलाफ पाप कहेउँ ह, मुला मोका अउर अच्छा करा।”

5मोर दुस्मन मोरे बरे अपसब्द कहत अहई, उ पचे कहत अहई, “इ कब मरी अउर कब बिसराइ दीन्ह जाई?”

6कछू लोग मोरे लगे मिलइ बरे आवत हीं। उ पचे कउनो लाभदायक बात नाहीं बोलत हीं, उ पचे सिरिफ कछू समाचार मोरे बरे जमा करत हीं। बाद में इ ओनका हर जगह फइलावत हीं।

7मोर दुस्मन छुपे छुपे मोर निन्दा करत रहत हीं। उ पचे मोरे खिलाफ कुचक्र रचत हीं।

8उ पचे कहा करत हीं, “उ कउनो बुरा करम किहेस ह, इहइ स ओका कउनो बुरा लोग लगा ह। मोका आसा अहइ उ कबहुँ तन्दुरुस्त नाहीं होइ।

9मोर परम मित्र मोरे संग खात रहा। ओह पइ मोका भरोसा रहा। मुला अब मोर परम मित्र भी मोरे खिलाफ होइ ग अहइ।

10तउ हे यहोवा, मोह पइ कृपा करा अउ मोहे पइ कृपालु हवा। मोका खड़ा करा कि मई बदला लेउँ।

11हे यहोवा, अगर तू मोरे दुस्मनन क बुरा नाहीं करइ देव्या, तउ मई समुझब कि तू मोका अपनाइ लिहा ह।

12मई निर्देख रहेउँ अउर तू मोर मदद किहा। तू मोका खड़ा किहा अउर मोका तोहार सेवा करइ दिहा।

13इस्त्राएल क परमेस्सर, यहोवा क प्राचीन काल स लइके अन्तिम समई तलक धन्न होइ।

आमीन, आमीन!

## दूसर भाग

### भजन 42

संगीत निर्देशक बरे कोह परिवार क एक तु मस्किल।

1एक तु पिआसा हिरन क नाई जउन धार क पानी पिअइ क इच्छुक अहइ, वइसे ही, हे परमेस्सर, मोर प्राण तोहरे इच्छा रखत हीं।

2मोर प्राण जिअत परमेस्सर क पिआसा अहइ। मई ओहसे मिलइ बरे कब आइ सकत हउँ?

3राति अउ दिन मोर हर दिन क भोजन सिरिफ आँसू बाटइ। मोर दुस्मन कहत हीं, “तोहार परमेस्सर कहाँ बा?”

4तउ मोका इ सबइ बातन क सुमिरइ द्या। मोका आपन हिरदइ बाहेर उड़ेइ द्या। मोका सुमिरन अहइ मई परमेस्सर क मन्दिर में चलेउँ अउ भिड़िया क अगुआई करत रहेउँ। मोका सुमिरन अहइ उ लोगन क संग आनन्द स भरा बड़कई क गीत गाउब अउर उ उत्सव मनाउब।

5मई ऐतना दुःखी काहे हउँ? मई ऐतना बियाकुल काहे हउँ? मोका परमेस्सर क सहारे क बाट जोहइ चाही। मोका अबहुँ ओकर स्तुति क अवसर मिली। उ मोका बचाई।

6हे मोरे परमेस्सर, मई बहोतइ दुःखी हउँ। एह बरे मई यरदन नदी क स्रोत में, हर्मोन पहाड़ क आधार पइ छोटा पहाड़ी\* में तोहार आराधना कहेउँ ह।

**छोटा पहाड़ी** या, “मिसगार क पर्वत पइ” सायद अब इ जगह योराह कहा जात ह। इ इस्त्राएल क उत्तर में बनायाह (कसीरिया फिल्लिपी) अहइ। इ पुरानी दान नगर क बगल में रहा।

7जइसे नदी क लहरन आवत अउ गरजत ह मई झरना क कोलाहल करत भए सब्ब सुनत हउँ। वइसे ही मोका विपत्तियन बारम्बार घेरी रहिन। हे यहोवा, तोहार लहरन एक क बाद दूसरा आवत ह, मोर चारिहुँ कइँती घेरिके मोका दहबोच रखेन ह।

8अगर हर दिन यहोवा बिस्ससनीय पिरेम देखाइ। फुन तउ राति मँ मई ओकर गीत गाइ पाउब। मई आपन सजीव परमेस्सर क पराथना कइ सकब।

9मई आपन परमेस्सर, आपन चट्टान स बातन करत हउँ। मई कहा करत हउँ, “हे यहोवा, तू मोका काहे बिसराइ दिहा? ये यहोवा, तू मोका इ काहे नाहीं देखौया कि मई आपन दुस्मनन स बचिके कइसे निकरउँ?”

10मोर दुस्मनन मोका मारइ क जतन किहेन। उ पचे मोहे पइ आपन घिना देखौवत हीं जब उ पचे कहत हीं, “तोहार परमेस्सर कहाँ अहइ?”

11मई ऐतना दुःखी काहे हउँ? मई काहे ऐतना बियाकुल हउँ? मोका परमेस्सर क सहारे क बाट जोहइ चाही? मोका अब भी ओकर स्तुति करइ क अवसर मिली। उ मोका बचाइ।

### भजन 43

1हे परमेस्सर, एक मनई अहइ जउन तोहार अनुसरण नाहीं करत। उ मनई दुट्ट अहइ अउ झूठ बोलत ह। हे परमेस्सर, मोर मोकदमा लड़ा अउर इ निर्णय करा कि कउन सत्य बाटइ। मोका उ मनई स बचाइ ल्या।

2हे परमेस्सर, तू ही मोर सरणस्थल अहा! मोका तू काहे बिसराइ दिहा? तू मोका इ काहे नाहीं देखौया कि मई आपन दुस्मनन स कइसे बचिके निकरउँ?

3हे परमेस्सर, तोहार जोति अउ सच्चवाई क मोह पइ चमकइ द्या। उ मोका तोहार पवित्तर पर्वत पइ तोहार आपन वास-स्थान जाइ मँ अगुवाइ करइ।

4मई तउ परमेस्सर क वेदी क लगे जाब। परमेस्सर मई तोहरे पास आउब। उ मोका आनन्दित करत ह। हे परमेस्सर, हे मेरे परमेस्सर, मई वीणा पइ तोहार स्तुति करब।

5मई ऐतना दुःखी काहे हउँ? मई काहे ऐतना बियाकुल हउँ? मोका परमेस्सर क सहारे क बाट जोहइ चाही। मोका अब भी ओकर स्तुति क अवसर मिली। उ मोका बचाइ।

### भजन 44

*संगीत निर्देशक बरे कोरह परिवार क एक ठु भक्ति गीत।*

1हे परमेस्सर, हम पचे तोहरे बारे मँ सुने अही। हमार पुरखन ओनकइ दिनन मँ जउन काम तू किहे रह्या ओनके बारे मँ हम पचन्क बताया। उ पचे पुराने जमाने मँ जउन तू किह्या ह, ओनका हम पचन्क बताया।

2हे परमेस्सर, तू इ धरती आपन महासक्ती स पराये लोगन्स लिहा अउर हम का दिहा। ओन बिदेसी लोगन्क तू कुचर दिहा, अउर ओनका इ धरती तजिके देइ क दबाव डया।

3हमार पुरखन इ धरती आपन तरवारन क बल पइ नाहीं लिहे रहेन आपन भुजदण्डन क बल पइ बिजयी नाहीं भएन।

इ एह बरे भवा रहा। काहेकि तू हमरे पुरखन क संग रह्या। हे परमेस्सर, तोहार महान सक्ती हमरे पुरखन क रच्छा किहस। काहेकि तू ओनसे पिरेम करत रह्या।

4हे मोरे परमेस्सर, तू मोर राजा अहा। उ आदेस द्या जउन कि याकूब क लोगन क जीत मँ अगुवाइ करी।

5परमेस्सर, तोहरी सक्ती स हम आपन दुस्मनन क पीछे ढकेल दिहन। तोहार नाउँ स हम आपन दुस्मन क कुचरि देब।

6मोका आपन धनुस अउ बाणन पइ भरोसा नाहीं। मोर तरवार मोका बचाइ नाहीं सकत।

7हे परमेस्सर, तू ही हमका मिस्त्र स बचाया। तू हमरे दुस्मनन क लज्जित किहा।

8हर दिन हम परमेस्सर क गुण गाउब। हम तोहरे नाउँ क स्तुति सदा करब।

9मुला अब, हे यहोवा, तू हम लोगन स पीछे मुड़ि गवा ह अउ हमका नीचा कइ दिहा ह! तू हमरे फउज मँ जुरइ स इन्कार कइ दिहा ह जब हम जुद्ध मँ गए रहेन!

10तू हमका हमरे दुस्मनन क लगे छोड़ि दिहेस, तउ उ पचे हमार सारा धन दौलत छील लइ गएन।

11तू हमका उ भेड़ी क नाई तज्या जउन खइया क तरह खाइ क होत ह। तू हमका रास्ट्रन क बीच छितराइ दिहा।

12हे परमेस्सर, तू आपन लोगन क यूँ ही बेच दिहा, अउ ओनके मूल्य पइ भाव ताव नाहीं किहा।

13तू हमका हमरे पड़ोसियन मँ हँसी क पात्र बनाया। हमरे पड़ोसी हमार मसखरी करत हीं, अउर हमार मजाक बनावत हीं।

14लोग हमरी भी कथा उपहास कथा मँ कहत हीं। हिआँ तलक कि उ सबइ लोग जेनका आपन कउनो रास्ट्र नाहीं अहइ, आपन मूँड़ी हलाइके हमार मसखरी करत हीं।

15मई लज्जा मँ बूड़ा अहउँ। मई सारे दिन भइ निज लज्जा निहारत रहत हउँ।

16मोर दुस्मन मोका लज्जित किहेन ह। मोर मसखरी उड़ावत भए मोर दुस्मन, आपन बदला लेइ चाहत ह।

17हे परमेस्सर, हम तोहका बिसरावा नाहीं। फिन भी तू हमरे संग अइसा करत ह। हम जब आपन करार पइ तोहरे संग हस्ताच्छर किहे रहे, झूठ नाहीं बोले रहे।

18हे परमेस्सर, हम तउ तोहसे मुँह नाहीं मोड़ा। अउर न ही तोहार अनुसरण करब तजा ह।

19मुला, हे यहोवा, तू हमका इ ठउरे पइ अइसे ठूस दिहा ह जहाँ सियार रहत हीं। तू हमका इ जगह मँ जउन मउत क तरह अँधियर अहइ मूँद दिहा ह।

20का हम आपन परमेस्सर क नाउँ बिसरी? का हम विदेसी देवतन क अगवा निहुरी? नाहीं।

21निहचय ही, परमेस्सर ऐन बातन क जानत ह। उ तउ हमार गहिर रहस्य तलक जानत ह।

22हे परमेस्सर, हम तोहरे बरे रोज रोज मारा जात अही। हम ओन भेड़िन जइसा बना अही जउन बधइ बरे लइ जाई जात अहइँ।

23मोर सुआमी, उठ! नींदिया मँ काहे ओलरा अहा? उठा! हमका सदा बरे जिन तजा।



24हे परमेस्वर, तू हमसे काहे छुपत ह? का तू हमार दुःख अउर सबइ वेदना क बिसरि गवा अहा?

25हमका धूरि में पटक दीन्ह गवा ह। हम ओंधा मुँह कइके धरती पइ पड़ा भवा अही।

26हे परमेस्वर, उठा अउर हमका बचाइ ल्या। आपन नित्य पिरैम क कारण हमार रच्छा करा।

### भजन 45

*संगीत निर्देशक बरे सोसनीम राग क अनुसार  
कोरह परिवार क मस्किल एक ठु पिरैम गीत*

1सुन्नर सब्द मोरे मनवा में भरि जात हीं, जब मई राजा बरे बातन लिखत हउँ। मोरी जिभिया पइ सब्द अइसे आवइ लागत हीं जइसे उ पचे कउनो कुसल लेखक क लेखनी स निकरत होई।

2सबइ मनइयन में, तू अति सुन्नर अहइ। तोहार मुँह स कृपालु सब्द निकलत अहा। एह बरे परमेस्वर तोहका सदा-सर्वदा आसीस देइ।

3तू आपन तरवार क जोदधन क कमर पइ बाँधा। तू महिमा वाला वस्त्र धारण करा।

4तू अद्भुत देखैत अहा। जा, धरम अउ निआउ क जुद्ध जीत ल्या। अद्भुत करम क करइ बरे सक्ती स भरी दाहिनी भुजा क प्रयोग करा।

5तोहार तीर तइयार अहई। तू बहुतेन क हराइ देब्या। तू आपन दुस्मनन पइ हुकूमत करब्या।

6हे परमेस्वर,\* तोहार सिंहासन हमेसा रहब। तोहार साही राजदण्ड अच्छाई तोहार राज क मज़बूत बनावत ह।

7तू नेकी स पिआर अउ बुराई स घिना करत अहा। एह बरे सक्तीमान निआवाधीस, तोहार परमेस्वर तोहका तोहार साथियन क ऊपर राजा चुनेस ह।

8तोहार ओढ़ना महकत अहई जइसे गंध रस, अगर अउ तेज पात स मधुर गंध आवति होइ। हाथी दाँत स जड़ा भवा राजमहलन स तोहका आनन्द में भरि देइ क मधुर संगीत क झंकार फइलति अहई।

9राजा लोगन क बिटियन अइसा सेवा किहेन जइसा कि उ राजा क बिवाह में दुल्हन क सेविकन अहई। तोहार महारानी ओपीर क सोना स बना मुकुट पहिरे तोहरे दाहिन कइँती विराजति अहई।

10हे राजपुत्री, मोरी बात क सुना। धियानदइके सुना, तबहिं तू मोरी बात क समझबू। तू आपन निज लोगन अउर बाप क घराने क बिसरि जा।

11राजा तोहरे सुन्दरता पइ मोहित अहइ। इ तोहार नवा सुआमी होइ। तोहका एकर सम्मान करब अहइ।

12सूर सहर क लोग तोहरे बरे उपहार\* लइ अइहीं। अउर धनी मानी तोहसे मिलइ चइहीं।

**परमेस्वर** हिआँ सम्भवतः राजा क ओर इसारा करत ह, जउन आपन लोगन क निआवाधीस क रूप में सेवा करत ह।

**तोहरे बरे उपहार** "सूर क बिटिया, अमीर लोग तोहार लगे तोहसे मिलइ बरे उपहार लेइहीं।" साइद दुल्हन फोनिका क राजकुमारी अहइ। उ होइ सकत ह इस्त्राएल क (उत्तरी बंसज) राजा अहाब स बियाह किहेस ह।

13उ राजकन्या उ मूल्यवान रत्न क नाई अहइ जेका सुन्नर मूल्यवान सुवर्ण में जड़ा गवा होइ।

14ओका रमणीक वस्त्र पहिराइके लिआवा गवा बाटइ। ओकरी सखियन क भी जउन ओकरे पाछे अहई राजा क समन्वा लावा गवा।

15उ पचे हिआँ उल्लास में आई अहई। उ पचे आनन्द में मगन होइके राजमहल में प्रवेश करिहीं।

16राजा, तोहरे पाछे तोहार पूत सासक होइहीं। तू ओनका समूचे धरती क राजा बनउब्या।

17मई तोहरे नाउँ क प्रचार जुग जुग तलक करब। तू प्रसिद्ध होब्या, तोहरे जसे क गीतन क लोग सदा सदा ही गावत रइहीं।

### भजन 46

*अलामोथ क संगत पइ संगीत निर्देशक बरे  
कोरह परिवार क एक ठु पद।*

1परमेस्वर हमरे पराक्रम क भण्डार अहइ। संकट क समइ उ हमेसा मदद बरे हुवौ होइ।

2एह बरे जब धरती काँपत ह अउर जब पर्वत समुद्र में भहराइ लागत ह, हमका डर नाहीं लागत।

3हम नाहीं डेराइत जब सागर उफनत अउ मटमैला होइ जात ह, अउर धरती अउ पहाड़ काँपइ लागत हीं।

4हुआँ एक ठु नदी अहइ, जउन परम परमेस्वर क नगरी क आपन धारा स खुसी स भरि देत ह।

5उ सहर में परमेस्वर अहइ, इहइ स ओकर कबहुँ पतन नाहीं होइ। परमेस्वर ओकर मदद भोर स पहिले ही करी।

6यहोवा क गरजत ही, रास्ट्र डर स काँपि जइहीं। ओनकर राजधानियन क पतन होइ जात ह अउ धरती पिघल उठत ह।

7सर्वसक्तिमान यहोवा हमरे संग अहइ। याकूब क परमेस्वर हमार सरणस्थल अहइ।

8आवा ओन सक्ती स भरा कामे क लखा जेनका यहोवा करत ह। उ सबइ काम ही धरती पइ यहोवा क मसहूर करत हीं।

9यहोवा धरती पइ होत भए कहुँ भी जुद्ध क रोक सकत ह। उ सबइ फउजी क धनुसन क तोड़ सकत हीं, अउ ओनके भालन क चकनाचूर कइ सकत ह, रथन क उ बारिके भसम कइ सकत ह।

10परमेस्वर कहत ह, "सांत बना अउ जाना कि मई ही परमेस्वर अहउँ! रास्ट्रन क बीच मोर बड़कई होइ। धरती पइ मोर महिमा फइलि जाइ!"

11यहोवा सर्वसक्तिमान हम पचन्क संग बा। याकूब क परमेस्वर हमार ढाल अहइ।

### भजन 47

*संगीत निर्देशक बरे कोरह परिवार क एक ठु भजन।*

1हे सबहिं लोगो, ताली बजावा, अउर आनन्द में भरिके परमेस्वर क जय जयकार करा।

2महिमा महिम यहोवा भय अउर विस्मय स भरा बाटइ। सारी भुइँया क उहइ महान राजा अहइ।

3उ हुकुम दिहेस कि रास्ट्रन हमार नियंत्रन में होब एँह बरे हम पचन्क ओनका हराइ दिहा ह।

4हमार धरती उ हमरे बरे चुनेस ह। उ याकूब बरे अद्भुत धरती चुनेस जेहसे उ पिरेम करत ह।

5यहोवा परमेस्सर तुरही क ध्वनि अउर जुद्ध क नरसिंहे क स्वर क संग ऊपर उठत ह।

6परमेस्सर क गुणगान करत भए गुण गावा। हमरे राजा क बड़कई क गीत गावा। अउर ओकर जस क गीत गावा।

7परमेस्सर सारी भुइँया क राजा अहइ। ओकर बड़कई क गीत गावा।

8परमेस्सर आपन पवितर सिंहासन पइ बिराजत ह। परमेस्सर सबहिं रास्ट्रन पइ हुकूमत करत ह।

9रास्ट्रन क नेता, इबाहीम क परमेस्सर क लोगन क संग मिलत हीं। सबहिं रास्ट्रन क नेता, परमेस्सर क अहइँ। परमेस्सर ओन सबन क ऊपर अहइ।

### भजन 48

एक ठु भजन: कोरह परिवार क एक ठु पद।

1यहोवा महान अहइ। उ हमेसा मोर परमेस्सर क नगर में आपन पवितर पर्वत पइ बड़कई करत अहइ।

2सिस्थोन पर्वत असल में परमेस्सर क पवितर पर्वत बाटइ। इ महान राजा क नगर बाटइ। समूचइ संसार क लोग हिआँ खुस रहत हीं काहेकि इ प्रसन्नता क सिखर पइ अहइँ।\*

3उ सहर क महलन में, परमेस्सर क सरणस्थल क नाउँ स जाना जात ह।

4एक दाई कछू राजा आपुस में आइके मिलेन अउर उ पचे इ सहर पइ हमला करइ क कुचक्र रचेन। सबहिं एक अउटिके चढ़ाई बरे अगवा बढेन।

5राजा क लखिके उ सबइ सबहिं चकित भएन। ओनमाँ भगदइ मची अउ उ सबइ सबहिं पराइ गएन।

6ओनका डर दहबोच लिहस, उ सबइ डर स काँपि उठेन।

7प्रचण्ड पुरवइया हवा ओनके जहाजन क चकनाचूर कइ दिहस।

8हाँ, हम पचे तोहार प्रबलता क कहानी सुना ह। अउर हम पचे तउ एँका सर्वसक्तिमान यहोवा क सहर में हमरे परमेस्सर क सहर में घटत भए भी लखा। यहोवा उ सहर क हमेसा बरे सुदृढ़ बनाएस ह।

9हे परमेस्सर, हम तोहरे मन्दिर में तोहरी पिरेम स भरी करुणा पइ विचार करित ह।

10हे परमेस्सर, तू मसहूर अहा, लोग धरती पइ हर कहुँ तोहार स्तुति करत हीं। हर मनई जानत ह कि तू केतना भला अहा।

11हे परमेस्सर, तोहरे उचित निआउ क कारण सिस्थोन पर्वत खुस अहइ। अउर यहूदा क नगरियन आनन्द मनावत अहइँ।

**सिस्थोन पर्वत ... अहइँ** साब्दिक, “सिस्थोन पर्वत सिफोन स बहोत दूर अहइ।” कनानी पौराणिक कथा क अनुसार, सिफोन कानियन बरे पवितर पर्वत बाटइ अउर ओकर देवता हुवाँ निवास करत हीं।

12सिस्थोन क परिक्रमा करा। नगरी क दर्सन करा। तू मीनारन क लखा।

13ऊँच चहरदीवानन क लखा। सिस्थोन क महलन क सराहा, तबहिं तू आवइवाली पीढ़ी स एँकर बखान कइ सकब्या।

14सचमुच हमार परमेस्सर सदा सदा ही परमेस्सर रही। उ हमका सदा ही राह देखेई। ओकर कबहुँ भी अंत नाही होई।

### भजन 49

कोरह क संतानन क संगीत निर्देसक बरे एक ठु पद।

1अलग अलग देसन क निवासियो, इ सुना। धरती क वासियो इ सुना।

2सुना अरे दीन लोगो, अरे धनिको सुना।

3मई तू पचन्क गियान अउ विवेक क बातन बतावत हउँ।

4मई सबइ कथा सुनेउँ ह, मई अब उ सबइ कथा तू पचन्क आपन वीणा पइ सुनाउब।

5अइसा कउनो कारण नाही जउन मई कउनो भी बिनास स डेराइ जाउँ। अगर लोग मोका घेरई अउ फँदा फइलावई, मोका डेराइ क कउनो कारण नाही।

6उ सबइ लोग मूरख अहइँ जेनका आपन निज सक्ती अउ आपन धन पइ भरोसा अहइ।

7कउनो मानव मीत ओनका छोड़ा नाही सकत। कउनो मनई परमेस्सर क रिसवत दइके बिना सज़ा क जाई देइ नाही सकत।

8कउनो मनई क लगे ऐतना धन नाही होई कि जेहसे उ खुद आपन निज जिन्नगी मोल लइ सकइ।

9कउनो मनई क लगे ऐतना धन नाही होइ सकत कि उ आपन देह कब्र में सइइ स बचाइ सकइ।

10लखा, बुद्धिमान जन, बुद्धिहीन जन अउ पाथर जइसा मूरख जन एक जइसे मरि जात हीं, अउर ओनकर सारा धन दूसर लोगन क हाथे में चला जात ह।

11कब्र सदा ही बरे हर कउनो क घर बनी, एकर कउनो अरथ नाही कि उ पचे केतनी भुइँया क सुआमी रहेन।

12धनी मनई मूरख लोगन स अलग नाही होतेन। सबहिं लोग गोरूअन क तरह मर जात हीं।

13मूरख लोगन बरे इहइ होत ह। इ ओनकर भाग्य अहइ अउर ओकरे संतानन क भाग्य जउन ओकरे जइसा इच्छा रखत ह।

14सबहिं लोग भेड़ी जइसेन बाटेन। कब्र ओनकर बरे बाड़ा बन जाइ। मउत ओनके चरवाहा बनी। ओनकर काया छीन होइ जाइ अउर उ पचे कब्र में सइ गल जइहीं।

15मुला यहोवा मोर मूल्य चुकाई अउर मोका कब्र स बचाइ। काहेकि उ मोका आपन संग लेब।

16धनवानन स जिन डेराअ कि उ पचे धनी अहइँ। लोगन स ओनकर धन दौलत स भरा घरन क लखिके जिन डेराअ।

17उ सबइ लोग जब मरिहीं कछू भी संग न लइ जाइ जइहीं। ओन सुन्नर वस्तुअन में स कछू भी न लई जाइ पइहीं।

18लोगन क चाही कि उ सबइ जब तलक जिअत रइहीं परमेस्सर क स्तुति करइँ। जब परमेस्सर ओनके संग भलाई करइ, तउ लोगन क ओकर स्तुति करइ चाही।

19मनइयन बरे एक अइसा समइ आइ जब उ पचे आपन पुरखन क संग मिल जइहीं। फिर उ पचे कबहुँ दिन क प्रकास नाहीं लिखि पइहीं।

20धनी मनई मूरख लोगन स अलग नाहीं होतेन। सबहिं लोग गोरुअन क नाईं मरत हीं।

## भजन 50

*आसाफ क भक्ति गीतन में स एक ठु पद।*

1देवतन क देवता यहोवा कहेस ह। पूरब स पच्छिम तलक धरती क सब मनइयन क उ बोलाएस।

2सिय्योन स परमेस्सर क सुन्नरता प्रकासित होत बाटइ।

3हमार परमेस्सर आवत अहइ, अउर उ चुप नाहीं रही। ओकरे समन्वा बरत ज्वाला बा, ओका एक ठु बड़का तूफान घेरे बाटइ।

4हमार परमेस्सर आकास अउ धरती क गोहराइके आपन निजी लोगन क निआउ करइ बोलावत ह।

5“मोर मनवइयो, मोरे लगे बटुरा। मोर उपासको आवा हम आपुस में एक ठु करार किहे अही।”

6परमेस्सर निआउ क जज अहइ अकास ओकरी धार्मिक भावना क घोसणा करत ह।

7परमेस्सर कहत ह, “सुना मोरे भक्तो! इस्त्राएल क लोगो, मई तू पचन्क खिलाफ साच्छी देवउँ। मई परमेस्सर हउँ, तोहार परमेस्सर।

8मोका तोहरी बलियन स सिकाइत नाहीं। इस्त्राएल क लोगो, तू पचे सदा होम बलियन मोका चढ़ावत रहा। तू पचे हर रोज अर्पित करा।

9मई तोहरे घरे स कउनो बर्धा नाहीं लेब। मई तोहरे गोरू घरे स कउनो बोकरा नाहीं लेब।

10मोका तोहरे ओन गोरुअन क जरूरत नाहीं। मई ही तउ वन क सबहिं गोरुअन क सुआमी हउँ। हजारन पहाड़न पइ जउन गोरू विचरत हीं, ओन सबन क मई सुआमी हउँ।

11जिन चिरइयन क बसेरा सब स ऊँच पहाड़ पइ अहइ, ओन सबन क मई जानत हउँ। अचलन पइ जउन सचल अहइँ उ सबइ सब मोरे ही अहइँ।

12मई भुखान नाहीं हउँ। अगर मई भूखा होतउँ, तउ भी तू पचन्स मोका भोजन नाहीं माँगइ क पइत। मई जगत क सुआमी हउँ अउर ओकर भी हर चीज जउन इ जगत में बाटइ।

13मई बर्धा क गोस नाहीं खावा करत हउँ। बोकसन क खून नाहीं पिअत हउँ।”

14फुरइ जउन बलि क परमेस्सर क प्रसन्न करत ह धन्यवाद क भेंटन होइ अउर उ प्रतिग्या क पूरा करत ह जउन तू सर्वोच्च परमेस्सर क समन्वा किहे रहया।

15“परमेस्सर कहत ह, “मोका पुकारा जब तू मुसीबत में रहया, मई तू पचन्क खतरा स निकारब, अउर तब तू पचे मोर मान कइ सकब्या।”

16दुटठ लोगन स परमेस्सर कहत ह, “तू पचे मोर व्यवस्था क बातन करत अहा, “तू पचे मोरे करार क भी बातन करत अहा।

17फुन जब मई तू पचन्क सुधारत हउँ, तब भला तू पचे मोसे बैर काहे धरत अहा। तू पचे ओन बातन क उपेक्षा काहे करत अहा जेनका मई तू पचन्क बतावत हउँ?

18तू पचे चोर क लिखिके ओसे मिलइ बरे दौड़ जात अहा। तू पचे ओनके संग बिछउना में कूद पइत अहा जउन बिभिचार करत हीं।

19तू पचे बुरा वचन अउ झूठ बोलत अहा।

20तू पचे दूसर लोगन क हिआँ तलक कि आपन भाइयन क निन्दा करत अहा।

21तू पचे बुरा करम करत अहा, अउर तू सोचत अहा मोका चुप रहइ चाही। तू कछू नाहीं कहत अहा अउर सोचत अहा कि मोका चुप रहइ चाही। लखा, मई चुप नाहीं रहब, तोहका स्पस्ट कइ देब। तोहरे ही मुँह पइ तोहार दोख बताउब।

22तू लोग परमेस्सर क बिसरि गवा अहा। एकरे पहिले कि मई तोहका चीर डावउँ, अच्छी तरह समुझ ल्या। जब वइसा होइ कउनो भी मनई तू पचन्क बचाइ नाहीं पाई।

23अगर कउनो मनई स्तुति अउ धन्यवादन क बलि चढ़ावइ, तउ उ सचमुच मोर मान करी। अगर कउनो मनई आपन जिन्नगी बदल डावइ तउ ओका मई परमेस्सर क सक्ती देखौउब जउन बचावत हीं।”

## भजन 51

*संगीत निर्देशक बरे दाऊद क एक ठु पद। इ पद उ समइ क*

*अहइ जब दाऊद क बतसेबा क संग पाप करइ क पाछे*

*नातान नबी दाऊद क लगे गवा रहा।*

1हे परमेस्सर, आपन बिसाल पिरेम स भरी आपन करुणा स मोह पइ दाया करा। आपन बड़ी दयालुता स मोरे सबहिं पापन क तू मेट द्या।

2मोर सबइ पापन क धोइ डावा, अउर फुन स मोका स्वच्छ बनाइ द्या।

3मई जानत हउँ, जउन पाप मई किहे अहउँ। मई आपन पापन क सदा आपन समन्वा लखत हउँ।

4हे परमेस्सर, मई उहइ काम किहेउँ जेनका तू बुरा कहया। तू उहइ अहा, जेकरे खिलाफ मई पाप किहेउँ। मई स्वीकार करत हउँ इ सबइ बातन क, ताकि लोग जानि जाई कि मई पापी हउँ अउर तू निआउ स पूर्ण अहा, अउ तोहार निर्णय निस्पच्छ होत हीं।

5मोर महतारी मोका दोखी में जनमेस, अउर पाप में मोर महतारी मोका गर्भ में धारण किहस।

6हे परमेस्सर, तू चाहत अहा, हम बिस्सासी बनी। अउर निर्भय बन जाउँ। एह बरे तू मोका सच्चा विवेक स रहस्यन क सिच्छा द्या।

7मोह पइ जूफा क पौंधा क प्रयोग करा अउर मोका पापे स स्वच्छ करा। मोका तब तलक धोआ, जब तलक मई बर्फ स जियादा उज्जरन न होइ जाउँ।

8मोका खुस बनाइ द्या। बताइ द्या मोका कि कइसे खुस बनउँ? मोर उ सबइ हड्डियन जउन तू तोइया, फिन आनन्द स भरि जाइँ।

9मोरे पापन्क जिन लखा। ओन सबन्क धोइ डावा।

10हे परमेस्सर, मोहेमौँ एक तु नवा, सुद्ध हिरदइ बनावा। मोरी आतिमा क फुन सुद्ध कइ द्या।

11मोका आपन समन्वा स जिन दूर हटावा, तोहार पवितर आतिमा क मोहसे जिन छोर ल्या।

12उ उल्लास जउन तोहसे आक्ट ह, मोहमौँ भरि जाइ। मोरे चित्त क अडिग अउ तइयार करा सुरच्छित होइ बरे अउर तोहार हुकुम मानइ बरे।

13मईँ पापियन क तोहार जिन्नगी विधि सिखाउब, जेहसे उ सबइ लउटिके तोहरे लगे आवइँ।

14हे परमेस्सर, धरती पइ क हर कउनो दोख स मोर रच्छा करा, मोर परमेस्सर, परमेस्सर जउन मोका बचाएस, मोका तोहार सदाचारी क बारे मँ गावइ क अनुमति द्या?

15हे मोर सुआमी, मोका मोर मुँह खोलइ द्या कि मईँ तोहार बड़कई क गीत गावउँ।

16जउन बलियन तोहका नाहीं नीक लगतिन तउ मोका चढाउब नाहीं अहइँ। उ सबइ बलियन तोहका बांछित तलक नाहीं अहइँ।

17हे परमेस्सर, मोर टुटही आतिमा ही तोहरे बरे मोर बलि अहइ। हे परमेस्सर, तू एक कुचरा अउ टुटहा हिरदइ स मुँह नाहीं फेरब्या।

18हे परमेस्सर, सिन्धोन बरे दयालु होइके, उत्तिम बना। तू यरूसलेम क सहर क चहरदीवारी क बनावा।

19तू उत्तिमा बलियन क अउ सम्पूर्ण होमबलियन क आनन्द ल्या। लोग फुन स तोहरी वेदी पइ बर्धन क बलियन द्या।

## भजन 52

*संगीत निर्देशक बरे उ समइ क एक तु मस्किल। जब*

*एदमी दोग्ग साऊल क लगे आइके कहे रहा,*

*दाऊद अबीमेलेक क घरे मँ अहइ।*

1अरे ओ, बड़का मनई! तू काहे सेखी बघारत अहा जउन बुरे करमन क तू करत अहा? तू लगातार परमेस्सर क अपमान करत अहा।

2तू मूरखता भरा कुचक्र रचत अहा। तोहार जीभ वइसी ही भयानक अहइ, जइसे तेज उस्तरा होत ह। काहेकि तोहार जीभ झूठ बोलत रहत ह!

3तोहका नेकी स जियादा बदी भावत ह। तोहका झूठ क बोलब, फुरइ बोलइ स जियादा भावत ह।

4तोहका अउ तोहरी झूठी जीभ क, लोगन क हानि पहाँचाउब नीक लागत ह।

5तोहका परमेस्सर सदा बरे नस्ट कइ देइ। उ तोह पइ झपटी अउर तोहका धरिंके घरे से बाहेर करी। उ तोहका मारी अउ तोहार कउनो भी संतान नाहीं रही।

6सज्जन लोग ऐंका लिखिहीं अउ परमेस्सर स डेराब अउर ओकर आदर करब सिखिहीं। उ पचे तोह पइ, जउन घटा ओह पइ हँसिहीं अउर कइहीं,

7“लखा उ मनई क संग का भवा जउन यहोवा पइ निर्भर नाहीं रहा। उ मनई सोचेस कि ओकर धन अउर झूठ ऐंकर रच्छा करिहीं।”

8मुला मईँ परमेस्सर क मन्दिर मँ एक तु हरिअर जइतून क बृच्छा जइसा अहउँ। मोर परमेस्सर क बिस्सासी पिरेम मँ सदा-सदा बरे भरोसा अहइ।

9हे परमेस्सर, मईँ ओन कामे क बरे जेनका तू किह्या हमेसा स्तुति करब। मईँ तोहरे बिस्सासी मनवइयन क समन्वा तोहरे नाउँ क घोसना करब।

## भजन 53

*महलत क राग पइ संगीत निर्देशक बरे दाऊद क एक तु मस्किल*

1मूरख ही सोचत ह कि परमेस्सर नाहीं होत ह। इ तरह क लोग विनासकारी, भ्रस्ट, कुटिल होत हीं। उ पचे तउ कउनो नीक काम नाहीं करतेन।

2परमेस्सर अकासे मँ स नीचे सबइ लोगन क लखेस। इ लखत ह कि का हिआँ स कउनो बुद्धिमान मनई ओका हेरत रहत रहा?

3मुला सबहिँ लोग परमेस्सर स भटक गवा अहेन। हर मनई बुरा अहइ। कउनो भी मनई कउनो नीक करम नाहीं करत, एक तु भी नाहीं।

4परमेस्सर कहत ह, “निहचय ही उ सबइ दुट्ट लोग सत्य क जानत हीं। उ सबइ दुट्ट लोग मोरे मनवइयन क अइसे बरबाद करइ क तइयार अहइँ, जइसे उ सबइ निज खइया क खाइ क तइयार रहत हीं”

5मुला उ सबइ दुट्ट लोग ऐंता डेराइ जइहीं, जेतँना उ सबइ दुट्ट लोग पहिले कबहुँ डेरानेन नाहीं। एह बरे परमेस्सर इस्त्राएल क ओन दुट्ट दुस्मन लोगन क तजेस ह। परमेस्सर क मनवइयन ओनका हरइहीं अउर परमेस्सर ओन दुट्टन क हड्डियन क छितराइ देइ।

6कउनो एक सिन्धोन पर्वत स इस्त्राएल क बचाइ! जब परमेस्सर आपन लोगन क स्थिति पुनः स्थापित करी, याकूब क लोग खुस होइहीं। हँ इस्त्राएल बहोत खुस होइ।

## भजन 54

*तार वाला बाजन पइ संगीत निर्देशक बरे दाऊद क समइ क एक*

*तु भक्ति गीत जब जीपियन जाइके साऊल स कहे रहा, हम*

*सोचत अही दाऊद हमरे लोगन क बीच छुपा अहइ।*

1हे परमेस्सर, आपन सक्ती\* क प्रयोग करा अउर हम पचन्क क बचावा। आपन महान सक्ती क प्रयोग इ सिद्ध करइ बरे करा कि हम पचन क निर्दोष अही।

2हे परमेस्सर, मोर पराथना सुना। जउन मईँ कहत हउँ सुना।

3अजनबी लोग मोरे खिलाफ उठ खड़ा भएन अउ बरिआर लोग मोका मारइ क जतन करत अहइँ। हे परमेस्सर, अइसे इ सबइ लोग तोहरे बारे मँ सोचत भी नाहीं।

4लखा, मोर परमेस्सर, मोर मदद करी। मोर सुआमी मोका सहारा देइ।

*सक्ती सव्विक, “नाउँ” बाटइ।*

5मोर परमेस्सर ओन लोगन क सजा देइ, जउन मोरे खिलाफ उठ खड़ा भवा अहई। परमेस्सर मोरे बरे सच्चा सिद्ध होइ, अउर उ ओन लोगन क बरबाद कइ देइ।

6हे परमेस्सर, हम पचे आपन इच्छा स तोहका बलियन अर्पित करब। हे यहोवा, हम पचे तोहरे नीक नाउँ क बड़कई करब।

7मुला, मई तोहसे इ विनय करत हउँ, कि मोका तू मोरे दुःखन स बचाइ ल्या। तू मोका मोरे दुस्मनन क हारा भवा देखौइ द्या।

### भजन 55

*संगीत निर्देशक बरे। तार वाले बाजन क संग।*

*दाऊद क एक तु मस्किल।*

1हे मोर परमेस्सर, मोर पराथना सुना। कृपा कइके तू मोहसे दूर जिन हवा।

2हे परमेस्सर, कृपा कइके मोर सुना अउर मोका जवाब द्या। तू मोका आपन दुःख तोहसे कहइ द्या।

3मोर दुस्मन मोहसे दुर्बचन बोलैन ह। दुट्ट लोग मोह पइ चीखेन ह। मोर दुस्मन किरोध कइके मोह पइ टूट पड़ा अहई। उ पचे मोका नास करइ बिपति ढावत अहई।

4मोर मनवा भितरे स चूर-चूर होत बा, अउर मोका मउत स बहोत डर लागत अहइ।

5मई बहोत डेरान अहउँ। मई थरथर काँपत अहउँ। मई डेरान अहउँ।

6ओह, अगर कबूतरे क नाई मोरे पखना होतेन, अउर मई पखना पवतेउँ तउ दूर कउनो चैन पावइ क जगह उड़ि जातेउँ।

7मई उड़िके दूर निर्जन जगह मँ जातेउँ।

8मई दूर चला जाब अउर इ बिपति क आँधी स बचिके दूर भाग जाब।

9हे मोर सुआमी, हवाँ सहर मँ मतभेद अउर हिंसा अहइ। ओनके झूठन क रोका जउन मतभेद का कारण अहई।

10बाहरे दिन अउर रात इ सहर ओन स घेरे अहइ, अउर अन्दर मँ हुवाँ परेसानियन अउर अपराधन अहई।

11गलियन मँ बहोत जियादा अपराध फइलत अहइ। हर कहुँ लोग झूठ बोलिके छलत अहई।

12जदि इ मोर दुस्मन होत अउर मोका नीचा देखौवत तउ मई एँका सहि लेतेउँ। अगर इ सबइ मोर दुस्मन होतेन, अउर मोह पइ वार करतेन तउ मई छिप सकत रहेउँ।

13ओ। मोरे संगी, मोरे हमजोली, मोरे मीत, इ मगर तू अहा अउर तू ही मोका कस्ट पहुँचावत अहा।

14हम आपुस मँ गुप्त बातन बाँट रहेन। हम परमेस्सर क मन्दिर मँ साथ-साथ उपासना कीन्ह।

15कास कउनो दुस्मन आपन समइ स पहिले ही मरि जाई। कास ओनका जिअत ही गाड़ दीन्ह जाइ, काहेकि उ पचे आपन घसन मँ अइसे भयानक कुचक्र रचा करत ही।

16मई तउ मदद बरे परमेस्सर क पुकारब। यहोवा ओकर जवाब मोका देइ।

17मई तउ आपन दुःख क परमेस्सर स भिन्सारे दुपहरिया अउ राति मँ कहब। उ मोर सुनी।

18मई केतनी जुद्धन मँ लड़ाई लड़ेउँ ह। मुला परमेस्सर मोरे संग अहइ, अउर हर जुद्ध स मोका सुरच्छित लउटाइ।

19परमेस्सर मोर सुना अउर ओनका हराइ देब। उ अनन्त राजा बाटइ।

20मोर दुस्मन कबहुँ नाहीं बदलिहीं। उ पचे परमेस्सर स नाहीं डरतेन, अउर न ही ओकर आदर करतेन।

21मोर दुस्मन आपन ही मीतन पइ वार करतेन। उ सबइ ओन बातन क नाहीं करतेन, जेनका करइ क उ पचे सहमत होइ ग रहेन।

22मोर दुस्मन फुरइ मीठा बोलत हीं, अउर सुसात्ति क बातन करत रहत हीं। मुला असलियत मँ, उ पचे जुद्ध क कुचक्र रचत हीं। ओनकर सब्द काट करत हीं छुरी क तरह अउ फिसलन भरा अहई जइसे तेल होत ह।

23आपन सबइ चिन्ता क तू यहोवा क सौंप द्या। फुन उ तोहार रखवारी करी। यहोवा सज्जन क कबहुँ हारइ न देइ।

24एहसे पहिले कि ओनकर आधी उमर बीत जाइ। हे परमेस्सर, ओन हत्यारन क अउर ओन झूठन क कब्र मँ पठवा। जहाँ तलक मोर अहइ, मई तउ तोह पइ भरोसा रखब।

### भजन 56

*संगीत निर्देशक बरे सुदूर बाँझ वृच्छन क कबूतर नाउँ*

*क धुन पइ दाऊद क उ समइ क प्रगीत जब गात*

*सहर मँ ओका पलिस्तियन घेर लिहे रहेन।*

1हे परमेस्सर, मोह पइ दयालु रहा, काहेकि लोग मोह पइ वार किहेन ह। उ पचे मोरे खिलाफ समूचइ दिन लड़त रहत रहेन।

2मोर दुस्मन सारा दिन मोह पइ वार करत रहेन। हुआँ पइ डटा भए अनगिनत जोद्धा अहई।

3समूचइ दिन, जब कबहुँ मई डेरात हउँ, तउ मई तोह पइ भरोसा करबउँ।

4मई परमेस्सर क भरोसे अहउँ, तउ मई डेरान नाहीं अहउँ। लोग मोका नस्कान नाहीं पहुँचाइ सकतेन। मई परमेस्सर क बचनन बरे ओकर बड़कई करत हउँ जउन मोका दिहेस।

5मोर दुस्मन सदा मोरे सब्दन क तोड़त मरोड़त रहत हीं। मोरे खिलाफ उ पचे सदा कुचक्र रचत रहत हीं।

6उ पचे आपुस मँ मिलिके अउर लुक छिपिके मोर हर बाते क टोह लेत रहत हीं। मोर प्राण हर लेइ क कउनो राह सोचत हीं।

7हे परमेस्सर, ओनका बचिके निकरइ जिन द्या। ओनके बुरे करमन क सजा ओनका द्या।

8तू इ जानत अहा कि मई बहोत बियाकुल अहउँ। तू इ जानत अहा कि मई तोहका केतना पुकारेउँ ह? तू निहचय ही मोरे सबइ आँसुअन क लोखा-जोखा रखे भए अहा।

9तउ अब मई तोहका मदद पावइ क पुकारब। मोरे दुस्मनन क तू हराइ द्या। मई इ जानत हउँ कि तू इ कइ सकत अहा। काहेकि तू परमेस्सर अहा।

10मई परमेस्सर क गुण ओकरे वचन बरे गावत हउँ। मई परमेस्सर क गुणन क ओकरे उ वचन बरे गावत हउँ जउन उ मोका दिहेस ह।

11मोका परमेस्वर पड़ भरोसा अहइ एह बरे मई नाहीं डेरात हउँ। लोग मोर बुरा नाहीं कइ सकतेन।

12हे परमेस्वर, मई जउन तोहार मन्तन मानेउँ ह, मई ओनका पूरा करब। मई तोहका धन्यवादे क भेंट चढ़ाउब।

13काहेकि तू मोका मउत स बचाया ह। तू मोका हार स बचाया ह एह बरे मोका परमेस्वर क सेवा हिआँ रहइवाला लोगन क समन्वा करइ चाहीं।

### भजन 57

*संगीत निर्देशक बरे 'नास जिन करा' नाउँ क धुन पड़ उ समइ क दाऊद क एक मस्किल जब उ साऊल स पराइके गुफा में जाइके लुकान रहा।*

1हे परमेस्वर, मोह पड़ करुणा करा। मोह पड़ दयालु हवा काहेकि मोरे मनवा क आस्था तोहमाँ बाटइ। मई तोहरे लगे तोहार ओट पावइ क आवा हउँ। जब तलक संकट दूर न होइ।

2मई सर्वोच्च परमेस्वर क मदद बरे बुलाएउँ। उ मोर पूरी तरह धियान रखत ह।

3उ सरग स मोरे बरे मदद पठवत ह अउ मोका बचाइ लेत ह। जउन लोग मोका सतावा करत हीं। परमेस्वर आपन सच्चा पिरेम अउर विस्वासी मोह पड़ देखैवत ह।

4मोर दुस्मनन मोका चारिहूँ कइँती स घेरि लिहन ह। मोर प्राण संकट में अहइँ। उ पचे अइसेन अहइँ, जइसे नर भच्छी सिंह अउर ओनकर तेज दाँत भालन अउ तीर स अउर ओनकर जीभ तेज तरवार क जइसी अहइ।

5हे परमेस्वर, तू महान अहा। तोहार महिमा धरती पड़ छाई बाटइ, जउन अकासे स ऊँच अहइ।

6मोर दुस्मनन मोरे बरे जाल फइलाएन ह। मोका फँसावइ क उ पचे जतन करत अहइँ। उ पचे मोरे बरे गहिर गइहा खोदे अहइँ, कि मई ओहमाँ गिरि जाउँ।

7मुला परमेस्वर मोर रच्छा करी। मोर भरोसा अहइ, कि उ मोरे हिम्मत क बनाए रखी। मई ओकर जस गाथा क गावा करब।

8मोर मन खड़ा हवा! ओ सितारो अउ वीणाओ, बजब सुरू करा! आवा, हम मिलिके भिन्सारे क जगाइ।

9हे मोरे सुआमी, हर कउनो बरे, मई तोहार जस गावत हउँ। मई तोहार जस गाथा हर रास्ट्र क सुनावत हउँ।

10हे परमेस्वर तोहार बिस्ससनीय पिरेम सरगे स ऊँचा अहइ। तोहार बिस्ससी ओतैना ऊँचा अहइ जेतैना आकास।

11हे परमेस्वर तू सरगे स ऊँच अहइ, तोहार महिमा समूचइ धरती पड़ छाइ जाइ।

### भजन 58

*'नास जिन करा' धुन पड़ संगीत निर्देशक बरे दाऊद क एक ठु मस्किल।*

1निआवधीसो, तू पचे पच्छपात रहित नाहीं रहया। तू लोगन क निआउ निज निर्णयन में निस्पच्छ नाहीं करत अहा।

2नाहीं, तू पचे तउ सिरिफ बुरी बातन ही सोचत अहा। इ देस में तू पचे हिंसा स भरा अपराध करत अहा।

3उ सबइ दुटठ लोग जइसे ही पइदा होत हीं, बुरे कामन क करइ लग जात हीं। उ पचे पइदा होत ही झूठ बोलइ लग जात हीं।

4उ पचे उ भयानक साँप अउ नाग जइसे होत हीं, जउन सुन नाहीं सकत। उ सबइ दुटठ जन भी आपन कान सच्चाई स मूँद लेत हीं।

5बुरे लोग वइसे ही होत हीं जइसे सँपेरन क गीतन क या ओनकर संगीतन क करिया नाग सुन नाहीं सकत।

6हे यहोवा! उ सबइ लोग अइसेन होत हीं जइसे सिंह। एह बरे हे यहोवा, ओनकर दाँत तोड़ा।

7जइसे बहत जल लुप्त होइ जात ह, वइसेन ही उ सबइ लोग लुप्त होइ जइहीं। अउर जइसे राह क उगी भइ दूब कुचर दीन्ह जात ह, वइसेन उ सबइ भी कुचर दीन्ह जइहीं।

8उ सबइ घोघा क नाई होई जउन चलइ में गल जात हीं। उ सबइ उ गदेली क नाई होई जउन मरा ही पइदा भवा, जउन दिन क प्रकास कबहुँ नाहीं लखेस।

9उ सबइ उ बाड़े क काँटन क तरह हाली ही बरबाद होई, जउन आगी पड़ चढ़ी भइ हौँड़ी गरमावइ बरे हाली जरि जात हीं।

10जब सज्जन ओन लोगन क सजा पावत लखत ह जउन ओकरे संग बुरा किहेन ह, उ खुस होत ह। उ आपन गोड़ ओन दुटठन क खून में धोइ।

11जब अइसा होत ह, तउ लोग कहइ लागत हीं, "सज्जनन क ओनकर फल निहचय मिलत ह। फुरइ परमेस्वर जगत क निआउ कर्ता अहइ।"

### भजन 59

*संगीत निर्देशक बरे 'नास जिन करा' धुन पड़ दाऊद क उ समइ क एक ठु भक्ति गीत जब साऊल लोगन क दाऊद क घर पड़ निगरानी राखत भए ओका मारि डावइ क जुगुत करइ बरे पठए रहा।*

1हे परमेस्वर, तू मोका मोरे दुस्मनन स बचाइ ल्या मोर मदद ओनसे विजयी बनवइ में करा जउन मोरे खिलाफ जुद्ध करइ आवा अहइँ।

2अइसे ओन लोगन स, तू मोका बचाइ ल्या। तू ओन हत्यारन स मोका बचाइ ल्या। जउन बुरे कामन क करत रहत हीं।

3लखा! बलवान लोग मोका घात लगाए अहइँ। उ पचे मोका मारि डावइ क बाट जोहन अहइँ। एह बरे नाहीं कि मई कउनो पाप किहेउँ ह या मोसे कउनो अपराध बन पड़ा अहइ।

4उ पचे मोरे पाछे पड़ा अहइँ, मुला मई कउनो भी बुरा करम नाहीं किहेउँ ह। हे यहोवा, आवा! तू खुद अपने आप लख ल्या!

5हे परमेस्वर! इस्त्राएल क परमेस्वर! तू सर्वसक्तिसाली अहा। तू उठा अउर ओन लोगन क दण्डित करा। ओन बिस्सासघातियन ओन दुर्जन लोगन पड़ तनिकउ भी दया जिन देखैवा।

6उ सबइ दुर्जन साँझ क होत ही सहर में घुसि आवत हीं। उ सबइ लोग गुरात कूकुरन स सहर क बीच में घूमत रहत हीं।

7तू ओनकर धमकियन अउर अपमानन क सुना। उ पचे अइसी क्रूर बातन कहा करत ही। उ सबइ इ बात क चिंता तलक नाही करतेन कि ओनकर कउन सुनत ह।

8हे यहोवा, तू ओनकर उपहास कइके ओन सबहि लोगन क मजाक बनाइ द्या।

9हे परमेस्सर, तू मोर सक्ती अहा। मई तोहार बाट जोहत हउँ। हे परमेस्सर, तू ऊँचे पहाड़न पइ मोर सुरच्छा क ठउर अहा।

10परमेस्सर मोहसे पिरेम करत ह, अउर उ जीतइ में मोर राहायक होइ। उ मोरे दुस्मनन क हरावइ में मोर मदद करी।

11हे परमेस्सर, बस ओनका जिन मार डावा। नाही तउ होइ सकत ह मोर लोग बिसरि जाईं। हे मोर सुआमी अउ संरच्छक, तू आपन सक्ती स ओनका छितराइ द्या अउर हराइ द्या।

12उ सबइ बुरे लोग कोसत अउ झूठ बोलत रहत हीं। ओन बुरी बातन क सजा ओनका द्या, जउन उ पचे कहे अहईं। ओनका आपन अभिमान में फँसइ द्या।

13तू आपन किरोध स ओनका बरबाद करा। ओनका पूरी तरह बरबाद करा। लोग तबहिं जनिहीं कि परमेस्सर, याकूब क लोगन क अउर उ सारे संसार क राजा अहइ।

14फुन अगर उ सबइ लोग संझा क एहर ओहर टहरत गुरातन कूकुरन स सहर में आवईं,

15तउ उ सबइ खाइ क कउनो क चीज हेरत फिरिहीं, अउर खाइ क कछू भी नाही पइहीं अउर न ही सोवइ क कउनो ठउर पइहीं।

16मुला मई तोहार बड़कई क गीत गाउब। हर भिन्सारे मई तोहरे पिरेम में आनन्दित होब। काहेकि तू पर्वतन क ऊपर मोर सरणस्थल अहा मई तोहरे लगे आइ सकत हउँ, जब मोका विपत्तियन घेरिहीं।

17मई आपन गीतन क तोहरी बड़कई में गाउब काहेकि पर्वतन क ऊपर तू मोर सरणस्थल अहा। तू परमेस्सर अहा, जउन मोका पिरेम करत ह।

## भजन 60

संगीत निर्देशक बरे 'वाचा क कुमुदिनी' धुन पइ उ समइ क दाऊद क एक मस्किल जब दाऊद अरमहरैन अउ अरमसोबा स जुद्ध किहेस अउर जब योआब लउटा अउर उ नोन क घाटी में बारह हजार एदोमी फउजियन क मार डाएस।

1हे परमेस्सर, तू हमका बिसराइ दिहा। तू हमका तितर-बितर कइ दिहा। तू हम पइ कोहाइ गवा। तू कृपा कइके वापस आवा।

2तू धरती काँपाया अउर ओका फारि दिहा। हमार जगत बिखरत अहइ कृपा कइके ओका जोर द्या।

3तू आपन लोगन क बहोतइ यातना दिहा ह। हम दाखरस पिए लोग जइसे लड़खड़ात रहेन अउर भहरात अही।

4मुला तू आपन बिस्सासी मानइवालन क चेताइ बरे कि

उ पचन क अब आपन दुस्मन क धनुस चलाइवालन दुआरा तितर-बितर होइ क पाछे कहाँ जमा होइ चाही।

5तू आपन महासक्ति क प्रयोग कइके हमका बचाइ लिहा। मोर पराथना क जवाब द्या अउर उ मनई क बचाइ ल्या जउन तोहका पियारा अहइ।

6परमेस्सर आपन मन्दिर में कहेस: "मोर विजय होइ अउर मई विजय पइ खुस होब। मई इ धरती क आपन लोगन क बीच बाँटब। मई सकेम अउ सुक्कोत घाटी क बँटवारा करब।

7गिलाद अउ मनस्से मोर बनिहीं। एप्रैम मोरे मूँडे क टोप (हेलमेट) बनी। यहूदा मोर राजदण्ड बनी।

8मई मोआब क अइसा बनाउब, जइसा कउनो मोर गोड़ धोवइ क पात्र। एदोम एक दास जइसा जउन मोर पनहियन उठावत ह। मई पलिस्ती लोगन क हराउब अउर विजय क उद्घोस करब।"

9कउन मोका ओकरे खिलाफ जुद्ध करइ क सुरच्छित मजबूत सहर में लइ जाइ? मोका कउन एदोम तलक लइ जाइ?

10हे परमेस्सर, बस तू ही इ करइ में मोर मदद कइ सकत ह। मुला तू तउ मोका बिसराइ दिहा। परमेस्सर हमरे साथे नाही जाइ अउर उ हमरी सेना क संग नाही जाइ।

11हे परमेस्सर, तू ही हमका इ संकट क भुईया स उबार सकत ह। मनई हमार रच्छा नाही कइ सकतेन।

12मुला हमका परमेस्सर ही मजबूत बनाइ सकत ह। परमेस्सर हमार दुस्मनन क पराजित कइ सकत ह।

## भजन 61

तार क वाद्यन क संगीत निर्देशक बरे दाऊद क एक ठु गीत।

1हे परमेस्सर, मोर पराथना गीत सुना। मोर विनती सुना।

2जब मई मातम स भरि ग रहेउँ, मई तोहार मदद पावइ बरे तोहका पुकारब जहाँ कहेउँ भी मई होउँ! तू मोह पइ दयालु हवा अउर मोका बहोत ऊँच सुरच्छित ठउरे पइ जाइ बरे मोर अगुवाइ करा।

3तू ही मोर सरणस्थल अहा। तू ही मोर सुदृढ गढ़ अहा। जउन मोका मोरे दुस्मनन स बचावत ह।

4तोहरे डेरा में, मई सदा सदा बरे बसव। मई हुअईं छिपब जहाँ तू मोका बचाइ सका।

5हे परमेस्सर, तू मोर उ मन्नत सुन्या ह, जेका तोहे पइ चढ़ाउब, मुला तोहरे मनवइयन क लगे हर वस्तु ओनका तोहसे ही मिली अहईं।

6राजा क लम्बी उमर देइ। ओका हमेसा जिअइ द्या।

7ओका सदा परमेस्सर क आसीबादि में बना रहइ द्या। ओकर रच्छा बिस्ससनीय पिरेम अउ दयालुता स करा।

8मई तोहरे नाउँ क गुण सदा गाउब। ओन बातन क करब जेनका करइ क वचन मई दिहेउँ ह।

## भजन 62

'यदूतून' राग पइ संगीत निर्देशक बरे दाऊद क एक ठु भजन।

1मोर प्राण सान्ति स बाट जोहत अहइ कि परमेस्सर मोर रच्छा करी।

2परमेस्सर मोर किला अहइ। परमेस्सर मोका बचावत ह। ऊँच पहाड़ पइ, परमेस्सर मोर सुरच्छित ठउर अहइ। मोका बड़की फउजियन भी हराइ नाही सकतिन।

3तू मोह पइ कब तलक वार करत रहब्या? मई एक तु निहुरी देवार क नाई होइ गवा हउँ, अउर एक बाड़ा जइसा जउन भहराइ वाला अहइ।

4उ सबइ लोग मोरे नास क कुचक्र रचत अहइँ। मोरे बारे में उ सबइ झूठी बातन बनावत अहइँ। लोगन क बीच में, उ पचे मोर बड़कई करतेन, मुला उ पचे मोका लुकान-छिपान कोसत हीं।

5मोर प्राण सात्ति स परमेस्सर क बाट जोहत अहा काहेकि सिरिफ उ ही मोर उद्धार क आसा अहइ।

6परमेस्सर मोर गढ़ अहइ। परमेस्सर मोका बचावत ह। ऊँच पर्वत में परमेस्सर मोर सुरच्छा स्थल अहइ।

7महिमा अउ विजय, मोका परमेस्सर स मिलत ह। उ मोर सुदृढ़ गढ़ अहइ। परमेस्सर मोर सुरच्छा स्थल अहइ।

8लोगो, परमेस्सर पइ हर घड़ी भरोसा राखा। आपन सबइ समस्या परमेस्सर स कहा। परमेस्सर हमार सुरच्छा स्थल अहइ।

9फुरइ लोग कउनो मदद नाही कइ सकतेन। फुरइ तू ओनके भरोसे मदद पावइ क नाही रहि सकत्या। परमेस्सर क तुलना में उ पचे हवा क झोंका क नाई अहइँ।

10तू बल पइ भरोसा जिन रक्खा कि तू सक्ती क संग चिजियन क छोर लेब्या। जिन सोचा तू पचन्क चोरी करइ स कउनो लाभ होइ। अउर अगर धनवान भी होइ जाइ तउ कबहुँ दौलत पइ भरोसा जिन करा कि उ तू पचन्क बचाई लेइ।

11एक तु बात अइसी अहइ जउन परमेस्सर कहत ह जेकरे भरोसे तू फुरइ रहि सकत अहा: 'सक्ती परमेस्सर स आवत ह!'

12मोरे सुआमी, तोहार पिरिम सच्चा अहइ। तू कउनो जन क ओकरे ओन कामन क प्रतिफल या सजा देत ह। जेनका उ करत ह।

### भजन 63

दाऊद क उ समइ क एक भजन जब उ यहूदा क मरुभूमि में छुपा भवा रहा।

1हे परमेस्सर, तू मोर परमेस्सर अहा। वइसे केतौना मई तोहका चाहत हउँ। जइसे उ पियासी छीन धरती जेह पइ जल न होइ वइसे मोर देह अउर मन तोरे बरे पिआसा अहइ।

2हाँ, तोहरे मन्दिर में तोहार दर्सन किहेउँ। तोहार सक्ती अउर तोहार महिमा देख लिहेउँ ह।

3मोर बिस्ससयनीय पिरिम जिन्नगी स उत्तिम अहइ। मोर होंठ तोहार बड़कई करत हीं।

4हाँ, मई निज जीवन में तोहार गुण गाउब। मई हाथ ऊपर उठाइके तोहरे नाउँ पइ तोहार परथना करब।

5जइसा मोर जुबान\* मजेदार भोजन स आनन्दित होत ह, ठीक वइसा ही मोर होंठ तोहार स्तुति गाइके खुस होइहीं।

6मई आधी रात में बिछउना पइ ओलरा भवा तोहका याद करब।

7फुरइ तू मोर मदद किहा ह। मई खुस हउँ कि तू मोका बचाया ह।

8मोर मनवा तोहमाँ समात ह। तू मोर हथवा थामे रहत ह।

9कलू लोग मोका मारइ क जतन करत अहइँ। मुला ओनका नस्ट कइ दीन्ह जाइ। उ पचे आपन कब्रन में समाइ जइहीं।

10ओनका तरवारन स मार दीन्ह जाई। ओनकर लहासन क जंगली कूकुरन खइहीं।

11मुला राजा तउ आपन परमेस्सर क संग खुस होइ। उ सबइ लोग जउन ओकरे आग्या मानइ क वचन बद्ध अहइँ, ओकर स्तुति करिहीं। काहेकि उ सबहिं झूठन क हराइ दिहस।

### भजन 64

संगीत निर्देशक बरे दाऊद क एक तु भजन।

1हे परमेस्सर, मोर सुना जइसा मई बोलउँ। आपन दुस्मनन क डर स मोर रच्छा करा।

2तू मोका मोरे दुस्मनन क गहिर सड्यंत्रन स बचाइ ल्या। मोका तू ओन दुट्ट लोगन स छिपाइ ल्या।

3मोरे बारे में उ पचे बहोत बुरा झूठ बोलेन ह। ओनकर जिभिया तेज तरवार जइसी अउर ओनकर कटु सब्द बाणन जइसे अहइँ।

4उ पचे निर्दोख व्यक्ति पइ बाणन चलावइ बरे लुकाइ जात हीं। बिना डर स उ पचे अचानक बाण चलावत ह अउर निर्दोख व्यक्ति कबहुँ नाही लख सकत ह कि तीर ओकरे कइँती आवत हीं।

5उ पचे ओका हरावइ क बुरा काम करत हीं। उ पचे झूठ बोलतेन अउ आपन जाल फइलावत हीं। अउर उ पचे इ अच्छी तरह तय किहे अहइँ कि ओनका कउनो नाही धरी पकड़ी।

6लोग बहोत कुटिल होइ सकत हीं। उ सबइ लोग का सोचत अहइँ? एँका समुझ पाउब बड़ा कठिन अहइ।

7मुला परमेस्सर आपन "बाण" मार सकत ह! अउर एकरे पहिले कि ओनका पता चलइ, उ सबइ दुट्ट लोग घायल होइ जात हीं।

8दुट्ट जन दूसरन क संग बुरा करइ क योजना बनावत हीं। मुला परमेस्सर ओनकर कुचक्रन क चउपट कइ सकत ह। उ ओन बुरी बातन क खुद ओनके ऊपर खुद घटाइ देत ह। फुन हर कउनो जउन ओनका लखत अचरजे स भरिके आपन मूँड़ी हिलावत ह।

9जउन परमेस्सर किहेस ह, लोग ओन बातन क लखिहीं अउर उ पचे ओन बातन क वर्णन दूसर लोगन स करिहीं, फुन तउ हर कउनो परमेस्सर क बारे में अउर जियादा जानी। उ पचे ओकर आदर करब अउ डेराब सिखिहीं।

जुबान इ सब्दन क खेल बाटइ। हिब्रू भाखा में "प्राण" सब्द क अरथ "गला" भी होत ह।



10तउ सबइ बिस्सासी लोगन क लगे एक साथ परमेस्सर क स्तुति करइ क कारण होइ।

### भजन 65

निर्देसक बरे दाऊद क एक ठू भजन।

1हे परमेस्सर सिन्धोन पर्वत पड़, हम पचे तोहका इ सान्ति पराथना भेंट किहउँ ह अउर आपन प्रतिग्या क पूरा किहेउँ ह।

2मई तोहरे ओन कामन क बखान करत हउँ, जउन तू किहा ह। उ तू ही बाटइ जउन पराथनन क उत्तर दिह्या। एह बरे हर कउनो मनई तोहार लगे मँ आवत हीं।

3जब हमार पाप हम पड़ भारी पड़त हीं, हमस सहा नाहीं जाइ पावत, तउ तू हमार ओन पापन्क हरिके लइ जात ह।

4हे परमेस्सर, जेका तू चुन्या ह अउर आपन आँगनन मँ बसइ बरे लिआवा ह उ पचे बहोत असीसित होइहीं। उ पचे तोहार घर, तोहार पवित्र मन्दिर क बहोत बढ़ियाँ चिजियन स भरि देइहीं।

5परमेस्सर मोर उद्धारकर्ता, तू जउने तरह स लोगन क सम्मान दिहा ह इ बहोत नीक बाटइ। तू अचरज भरा काम करा, एह बरे दूर रास्ट्रन क लोगन अउर दूर क समुद्रन तोहार लगे सुरच्छा बरे आइहीं।

6परमेस्सर आपन महासक्ती क प्रयोग किहस अउ पर्वत रच डाएस। ओकर सक्ती हम आपन चारिहूँ कइती लखत अही।

7परमेस्सर उफनत भवा सागर सांत किहस। परमेस्सर जगत क सबहिं अनगिनत लोगन क बनाएस।

8जउन अद्भुत बातन क परमेस्सर करत अहइ, ओनसे धरती क हर मनई डेरात अहइ। परमेस्सर तू ही हर कहुँ सूरज क उगावत अउ डुबावत ह। हर जगह लोग तोहार गुणगान करत हीं।

9भुइँया क सारी रखवारी तू करत ह। तू ही ऐंका सींचत अउ तू ही ऐंहसे बहोत सारी वस्तुअन क उपजावत अहा। हे परमेस्सर, नदियन क पानी स तू ही भरत अहा। तू ही फसलन क बढ़त करत अहा।

10तू जोता भए खेतन पड़ बर्खा करत अहा। तू खेतन क जल स लबालब कइ देत ह, अउर धरती क बर्खा स नरम बनावत ह, अउर तू फिन पौधन क बढ़त करत ह।

11तू नवा बरिस क सुरूआत उत्तिम फसलन स करत ह। तू भरपूर फसलन स गाड़ियन भर देत अहा।

12बन अउ पर्वत दूब घासे स ढँकि जात हीं।

13भेड़िन स चरागाहन भर गइन। फसलन स घाटियन भरपूर होत अहइ। हर कउनो गावत अउ आनन्द मँ ऊँचा पुकारत अहइ।

### भजन 66

निर्देसक बरे एक ठू भजन।

1हे धरती क हर वस्तु, आनन्द क संग परमेस्सर क जय बोला।

2ओकर महिमामय नाउँ क स्तुति करा। ओकर आदर ओकर स्तुति गीतन स करा।

3ओकर जियादा अद्भुत कामन स परमेस्सर क बखान करा। हे परमेस्सर, तोहार सक्ती बहोतइ बड़ी अहइ। तोहार दुस्मन निहुरि जात अउ तोहसे डेरात हीं।

4जगत क सबहिं लोग तोहार उपासना करइँ अउर तोहरे नाउँ क हर कउनो गुण गावइ।

5तू ओनका लखा जउन अचरजे स भरा काम परमेस्सर किहस। उ सबइ चिजियन हमका अचरजे स भरि देत हीं।

6परमेस्सर लाल सागर क झुरान भुइँया मँ बदल दिहस। अउर ओकर लोग पैदर यरदन नदी क समूचइ रास्ता खुसी स पार किहेन।

7परमेस्सर आपन महासक्ती स इ संसार क सासन करत ह। परमेस्सर हर कहुँ लोगन पड़ निगाह रखत ह। कउनो भी मनई ओकरे खिलाफ नाहीं होइ सकत।

8लोगो, हमरे परमेस्सर क गुणगान तू पचे ऊँच स्वर मँ करा।

9परमेस्सर हमका इ जिन्नगी दिहस ह। उ हमार रच्छा करत ह।

10परमेस्सर हमार परीच्छा लिहस ह। परमेस्सर हमका वइसे ही परखेस, जइसे लोग चाँदी आगी मँ डाइके परखत हीं।

11हे परमेस्सर, तू हमका फँदा मँ फँसइ दिहा। तू हम पड़ भारी बोझा लाद दिहा।

12तू हमका दुस्मनन स गोड़े तरे रौंदवाया। तू हमका आग्री अउ पानी मँ घसीट्या। मुला तू फिन भी हमका सुरच्छित ठउर पड़ लइ आया।

13-14एह बरे मई तोहरे मन्दिर मँ बलियन चढ़ावइ आउब। जब मई विपति मँ रहेउँ, मई तोहार सरण माँगैउँ अउर मई तोहार बहुतेरी मन्त माँगैउँ। अब ओन वस्तुअन क जेनकर मई मन्त माँगैउँ, अर्पित करत हउँ।

15मई तोहका सुद्धिकरण क भेंट अर्पित करत हउँ, अउर भेड़न क संग सुगन्धि अर्पित करत हउँ। तोहका बर्धन अउ बोकन क बलि अर्पित करत हउँ।

16ओ सबहि लोगो, परमेस्सर क आराधको! आवा, मई तू पचन्क बताउब कि परमेस्सर मोरे बरे का किहस ह।

17मई ओकर बिनती किहेउँ। मई ओकर गुणगान किहेउँ।

18मोर मनवा पवित्र रहा, मोर सुआमी मोर बात सुनेस।

19परमेस्सर मोर सुनेस। परमेस्सर मोर बिनती सुन लिहस।

20परमेस्सर क गुण गावा। परमेस्सर मोहसे मुँह नाहीं मोड़ेस। उ मोर पराथना क सुन लिहस। परमेस्सर निज करुणा मोह पड़ देखौएस।

### भजन 67

संगीत निर्देसक बरे तारवालयन बाजन क संग एक ठू भजन।

1हे परमेस्सर, हम पड़ करुणा करा, अउ हमका असीस द्या। आपन मुस्कुरात भवा चेहरा हमका दिखावा।\*

2एह बरे समूचइ संसार तोहार रास्ता सीखइ सकी अउर हर कउनो मनई तोहार इ जान सकइ कि तू कइसा आपन लोगन क रच्छा करत ह।

तोहार मुस्कुरात ... दिखावा साब्दिक अरथ, "हम लोगन बरे ओकरे चेहरे पड़ चमक होइ।"

3हे परमेस्सर, लोग तोहार गुण गावई। सबहि लोग तोहार बड़कई करई।

4सबहि रास्ट्र आनन्द मनावई अउ आनन्द में भरा होई। काहेकि तू लोगन क निआउ निस्पच्छ करत अहा। अउर हर रास्ट्र पइ तोहार सासन अहइ।

5हे परमेस्सर, लोग तोहार गुण गावई। सबहि लोग तोहार बड़कई करई।

6हमार भुइयाँ हमका भरपूर फसल देइ। परमेस्सर, हे हमरे परमेस्सर हमका असीस द्या।

7हे परमेस्सर, हमका असीस द्या पृथ्वी क सबहि लोग परमेस्सर स डेराई, ओकर आदर करई।

## भजन 68

*संगीत निर्देशक बरे दाऊद क एक तु भजन।*

1हे परमेस्सर, उठा, आपन दुस्मनन क एहर ओहर करा। ओकर सबहि दुस्मनन ओकरे लगे स पराइ जाई।

2जइसे हवा स उड़ावा भवा धुआँ बिखरि जात ह, वइसे ही तोहार दुस्मन बिखरि जाई। जइसे आगी में मोम टेघर जात ह, वइसे ही तोहरे दुस्मनन क नास होइ जाइ।

3परमेस्सर क संग सज्जन सुखी होत हीं, अउर सज्जन सुखद पल बितावत हीं। सज्जन खुद ही आनन्द मनावत अउ खुद ही बहोत खुस रहत हीं।

4परमेस्सर क गीत गावा। ओकरे महिमा नाउँ क गुणागान करा। परमेस्सर बरे राह तइयार करा जउन आपन रथे क रेगिस्तान में हँकत ह। ओकरे समन्वा आन्दित भवा जेकर नाउँ याह अहइ।

5परमेस्सर अनाथन क पिता क समान अहइ अउर रौँड मेहरूअन क धियान रखत ह। उ आपन पवित्तर मन्दिर में अहइ।

6जेकर कउनो घर नाही होत, अइसे अकेले मनई क परमेस्सर घर देत ह। आपन मनवइयन क परमेस्सर बंधन स अजाद करत ह। उ पचे बहोत खुस रहत हीं। मुला जउन परमेस्सर क खिलाफ होत हीं, ओनका तपत भइ भुइँया पइ रहइ क होइ।

7हे परमेस्सर, तू आपन मनवइयन क मिस्त्र स निकार्या, अउ रेगिस्तान स पैदर ही पार निकार्या।

8इस्त्राएल क परमेस्सर जब सिथ्योन पर्वत पइ आवा रहा, तउ धरती काँप उठी रही, अउ अकास टेघरा रहा।

9हे परमेस्सर, बर्खा क तू पठए रह्या, अउ पुरान अउ दुर्बल पड़ी धरती क तू फुन ससक्त किहा।

10उहइ धरती पइ तोहार गोरू वापस आइ गएन। हे परमेस्सर, हुआँ क दीन लोगन क तू उत्तिम चिजियन दिहा।

11परमेस्सर हुकुम दिहस अउर बहोत लोग सुसंदेस सुनावइ गएन।

12“बरिआर राजा लोगन क फउजन एहर ओहर पराइ गइन। जुद्ध स जउन चिजियन क फउजी लिआवत हीं, ओनका घरे पइ रुकी मेहरूअन बाँटि लेइही। जउन लोग धरे में रूका बाटेन, उ सबइ उ धने क बाँटि लेइही।

13उ सबइ चाँदी स मढ़ा भवा कबूतरे क पखना पइही। उ सबइ सोना स चमकत भवा पखनन क पइही।”

14परमेस्सर जब सल्मोन पर्वत पइ दुस्मन राजा लोगन क बिखेर दिहस, तउ उ पचे अइसे छितरानेन जइसे बरफ गिरत ह।

15बासान पर्वत महान पर्वत अहइ, जेकर चोटियन बहोत सी बाटिन।

16बासान पर्वत, तू काहे सिथ्योन पर्वत क नान्ह समुझत बाट्या? परमेस्सर ओहसे पिरेम करत ह। परमेस्सर ओका हुआँ सदा रहइ बरे चुनेस ह।

17यहोवा पवित्तर पर्वत सिथ्योन पइ आवत अहइ। अउ ओकरे पाछे कई लाख रथ अहई।

18उ ऊँचे पइ चढ़ गवा। उ बंदियन क अगुआई किहस, उ मनइयन स हिआँ तलक कि आपन विरोधी लोगन स भेंट लिहस। यहोवा परमेस्सर हुआँ रहइ गवा।

19यहोवा क गुण गावा। उ हर दिन हमार, हमरे संग भार उठावइ में मदद करत ह। परमेस्सर हमार रच्छा करत ह।

20उ हमार परमेस्सर अहइ। उ उहइ परमेस्सर अहइ जउन हमका बचावत ह। हमार यहोवा परमेस्सर मउत स हमार रच्छा करत ह।

21परमेस्सर देखोई देइ कि आपन दुस्मनन क उ हराइ दिहस ह। अइसे ओन मनइयन क जउन ओकरे खिलाफ लड़ेन, उ सजा देइ।

22मोर सुआमी कहेस, “मई बासान स दुस्मन क वापस लिआउब, मई दुस्मन क समुद्दर क गहराई स वापस लाउब,

23ताकि तू ओनकर खून में विचरि सका, तोहार कूकुरन ओनकर खून चाट जाई।”

24लोग लखत हीं, परमेस्सर क विजय अभियान क अगुआई करत भए। लोग मोरे पवित्तर परमेस्सर, मोरे राजा क अभियान क अगुआई करत लखत हीं।

25अगवा-अगवा गवइयन क मण्डली चलत ह, पाछे-पाछे वादक लोगन क मण्डली आवति अहइ, अउ बीच में कुमारियन तम्बूरन बजावति अहई।

26परमेस्सर क बड़कई महासभा क बीच करा। इस्त्राएल क लोगो, तू यहोवा क गुण गावा।

27नान्ह बिन्यामीन ओनकर अगुआई करत बाटइ। यहूदा क बड़का परिवार हुआँ बाटइ। जबूलून अउ नपताली क नेता हुआँ पइ अहई।

28हे परमेस्सर, हमका आपन सक्ती देखोवा। हमका उ आपन सक्ती देखोवा जेकर उपयोग तू हमरे बरे बीते भए जमाने में किहे रहा।

29राजा लोग, जरूसलेम में तोहरे मन्दिर क बरे निज सम्पत्ति लिअइहीं।

30ओन “गोरूअन” स काम मनचाहा करावइ बरे आपन कुबरी क प्रयोग करा। ओन जातियन क “बर्धन” अउर “गइयन” क आग्या मानइवालन बनावा। तू जउन रास्ट्रन क जुद्ध में हराया। अब तू ओनसे चाँदी मँगवाइ ल्या।

31तू ओनसे मिस्त्र स धन मँगवाइ ल्या। हे परमेस्सर, तू आपन धन कूस स मँगवाइ ल्या।

32धरती क राजा लोगो, परमेस्सर बरे गावा। हमरे सुआमी बरे तू जसगान गावा।

33परमेस्सर बरे गावा। उ रथे पइ चढिके सनातन अकासन स निकरत ह। तू ओकरे सक्तीसाली स्वर क सुना।

34इस्त्राएल क परमेस्सर, तोहरे कउनो भी देवतन स जियादा बलवान अहइ। उ जउन निज मनवइयन क सुदृढ़ बनावत ह।

35परमेस्सर आपन मन्दिर में अद्भुत बाटइ। इस्त्राएल क परमेस्सर भक्तन क सकती अउ सामरथ देत ह। परमेस्सर क गुण गावा।

### भजन 69

‘कुमुदिनी’ नाउँ क धुन पइ संगीत निर्देशक बरे

दाऊद क एक ठु भजन।

1हे परमेस्सर, मोका मोर सब मुसीबतन स बचावा। मोरे मुँहना तलक पानी चढ़ि आवा अहइ।

2कछू भी नाहीं अहइ जउने पइ मई खड़ा होइ जाउँ। मई दलदले क बीच खाले धँसत ही चला जात हउँ। मई नीचे धँसत हउँ। मई अथाह जले में अहउँ अउर मोरे चारिहूँ कइँती लहरियन थपेड़ा मारति अहइँ। बस, मई बूड़इ क अहउँ।

3मदद क गोहार लगावत मई दुर्बल होत जात हउँ। मोर गटइ मदद बरे गोहराव क कारण सुखन बाटइ। मई बाट जोहत हउँ। तोहसे मदद पावइ अउ लखत लखत मोर अँखियन दुःखति अहइँ।

4मोर दुस्मन। मोरे मुँड़े क बारे स भी जियादा अहइँ। उ सबइ मोहसे बेकार दुस्मनी रखत हीं। उ पचे मोरे विनास क बहोतइ जुगत करत हीं। मोर दुस्मन मोरे बारे में झूठी बातन बनावत हीं। उ पचे मोका झूठइ ही चोर बताएन। अउर ओन विजियन क भरपाई करइ क मोका मजबूर किहन, जेनका मई चोराए नाहीं रहेउँ।

5हे परमेस्सर, तू तउ जानत अहा कि मई कछू अनुचित नाहीं किहेउँ। मई आपन पाप तोहसे नाहीं छुपाइ सकित।

6हे मोर सुआमी, हे सर्वसक्तिमान यहोवा, तू आपन मनवइयन क मोरे कारण लज्जित जिन होइ द्या। हे इस्त्राएल क परमेस्सर, अइसे ओन लोगन क मोरे बरे असमंजस में मत डावा जउन तोहार उपासना करत हीं।

7तोहार बरे मोर मुँह लज्जा स ढाँपि गवा। तोहार सेवा बरे मई इ लज्जा क जन्मेउँ ह।

8मोरे ही भाई, मोरे संग यूँ ही बर्ताव करत हीं। जइसे बर्ताव कउनो अजनबी स करत होइँ। मोरे ही सगे भाई, मोका पराया समुझत हीं। 9तोहरे मन्दिर क खातिर मोर गहरी लगन ही मोका जराइ डावत अहइ। उ पचे जउन तोहार मसखरी करत हीं उ मोह पइ आइ पड़ी बाटइ।

10मई तउ गोहरावत हउँ अउर उपवास करत हउँ, एह बरे उ पचे मोर हँसी उड़ावत हीं।

11मई आपन सोक दर्सावइ बरे मोटवार ओढ़नन क पहिरत हउँ, अउर लोग मोर मसखरी करत हीं।

12उ पचे जनता क बीच सबइ चर्चा करत हीं, अउर पियकड़, मोर गीत रचा करत हीं।

13हे यहोवा, जहाँ तलक मोर बात बाटइ, मोर तोहसे इ बिनती अहइ कि मई चाहत हउँ:तू मोका अपनाइ ल्या। हे

परमेस्सर, मई चाहत हउँ कि तू मोका पिरेम भरा जवाब द्या मई जानत हउँ कि मई तोह पइ सुरच्छा क भरोसा कइ सकत हउँ।

14मोका दलदले स उबार ल्या। मोका दलदल क बीच जिन बूड़इ द्या। मोका मोरे बैरी लोगन स तू बचाइ ल्या। तू मोका इ गहिर पानी स बचाइ ल्या।

15बाढ़ क लहरन क मोका बुड़ावइ न द्या। गहराई क मोका लीलइ न द्या। कब्र क मोरे ऊपर आपन मुँह बन्द न करइ द्या।

16हे यहोवा, तोहार करुणा खरी अहइ। तू मोका आपन सम्पूर्ण पिरेम स जवाब द्या। मोर मदद बरे आपन सम्पूर्ण कृपा क संग मोरी कइँती मुँह करा।

17आपन दास स जिन मुँह मोड़ा। मई संकटे में पड़ा अहउँ। मोका हाली सहारा द्या।

18आवा, मोर परान बचाइ ल्या। तू मोका मोरे दुस्मनन स छोड़ाइ ल्या।

19तू मोर निरादर जानत अहा। तू जानत अहा कि मोर दुस्मनन मोका लज्जित किहेन ह। ओनका मोरे संग तू अइसा करत लख्या ह।

20निन्दा मोका चकनाचूर कइ दिहस ह। बस निन्दा क कारण मई मरइवाला अहउँ। मई सहानुभूति क बाट जोहत रहेउँ, मई दिलासा क बाट जोहत रहेउँ, मुला मोका तउ कउनो नाहीं मिला।

21उ पचे मोका जहर दिहन, खइया क नाहीं दिहन। सिरका मोका दइ दिहन, दाखरस नाहीं दिहन।

22ओनकर मेजन खाना स भरी अहइ उ पचे ऐतना बड़का मैत्री भोज करत अहइँ। मई आसा करत हउँ कि उ सबइ भोजन ओनका बरबाद करइँ।

23उ सबइ आँधर होइ जाइँ अउर ओनकर करिहाउँ निहुरिके दुहरी होइ जाइ।

24अइसा लगइ कि ओन पइ तोहार भरपूर किरोध फूट पड़ा बा।

25ओनकर घरन क तू खाली बनाइ द्या। हुआँ कउनो जिअत न रहइ।

26ओनका सजा द्या, अउर उ सबइ दूर पराइ जाइँ। फुन ओनके लगे, ओनकर बातन क बारे में ओनकर दर्द अउर घाव होइँ।

27ओनकर बुरे कर्मन क ओनका सजा द्या, जउन उ पचे किहे अहइँ। ओनका जिन देखँवा कि तू अउर केतना भला होइ सकत ह।

28जिन्नगी क किताबे स ओनकर नाउँ मेट द्या। सज्जनन क नाउँ क संग तू ओनकर नाउँ उ किताबे में जिन लिखा।

29मइ दुःखी हउँ अउ दर्द में हउँ। हे परमेस्सर, मोका उबार ल्या। मोर रच्छा करा।

30मई परमेस्सर क नाउँ क गुण गीतन में गाउब। मई ओकर जस धन्यवाद क गीतन स गाउब।

31परमेस्सर एहसे खुस होइ जाइ। अइसा करब एक ठु बर्था क बलि या पूरा गोरू क ही बलि चढ़ावइ स जियादा उत्तिम अहइ।

32अरे दीन लोगो, तू पचे परमेस्सर क आराधना करइ आवा अहा। अरे दीन लोगो! ऐन बातन क जानिके तू पचे खुस होइ जाब्या।

33यहोवा, दीन लोगन अउ बेसहारा लोगन क सुना करत ह। यहोवा ओनका अबहुँ चाहत ह, जउन लोग बंधन में पड़ा अहई।

34हे सरग अउ हे धरती, हे सागर अउ एकरे बीच जउन भी समावा अहइ। परमेस्सर क स्तुति करा।

35यहोवा सियोन क रच्छा करी। यहोवा यहूदा क नगर क फुन निर्माण करी। उ लोग जउन इ धरती क सुआमी अहई, फिन हुआँ रइहीं।

36ओकरे सेवकन क संतानन उ धरती क पाई। अउर अइसे उ सबइ लोग निवास करिहीं जेनका ओकर नाउँ पियारा बाटइ।

### भजन 70

संगीत निर्देशक बरे दाऊद क एक ठु गीत।

इ लोगन क याद दियावइ बरे रहा।

1हे परमेस्सर, मोर रच्छा करा। हे परमेस्सर, हाली करा, अउर मोका सहारा द्या।

2लोग मोका मार डावइ क जतन करत अहई। ओनका निरास अउ बेज्जत कइ द्या। अइसा चाहत हीं कि लोग मोर बुरा कइ डावई। ओनकर पतन अइसा होइ जाइ कि उ पचे सर्मिन्दा होई।

3लोग मोर हँसी ठट्ठन उड़ाएन। मई ओनकर पराजय क आसा करत हउँ अउर इ बात क कि ओनका लज्जा महसूस होइ।

4मोका इ आस अहइ कि अइसे उ पचे सबहिं लोग जउन तोहार आराधन करत हीं, उ खूब खुस होइ। उ पचे सबहिं लोग तोहरी मदद क आसा मैं रहत हीं उ पचे सदा तोहार स्तुति करत रहई।

5हे परमेस्सर, मई दीन अउ बेसहारा हउँ। हाली करा! आवा, अउर मोका सहारा द्या। हे परमेस्सर, तू ही बस अइसा अहा जउन मोका बचाइ सकत अहा, जियादा देर जिन करा।

### भजन 71

1हे यहोवा, मोका तोहार भरोसा अहइ, एह बरे मई कबहुँ निरास नाहीं होब।

2आपन नेकी स तू मोका बचाई। तू मोका छोड़ाइ लेब्या। मोर सुना। मोर उद्धार करा।

3तू मोर गढ़ बना। सुरच्छा बरे अइसा गढ़ जेहमाँ मई दौड़ जाउँ। मोर सुरच्छा बरे तू हुकुम द्या, काहेकि तू ही तउ मोर चट्टान अहा:मोर सरणस्थल अहा।

4मोर परमेस्सर, तू मोका दुट्ट जनन स बचाइ ल्या। तू मोका क्रूर कुटिल लोगन स छोड़ाइ ल्या।

5मोर सुआमी, तू मोर आसा अहा। मई आपन बचपन स ही तोहरे भरोसे हउँ।

6जब मई आपन महतारी क गरभ मैं रहेउँ, तबहिं स तोहरे भरोसे रहेउँ। जउने दिन स मई जन्म धारण किहेउँ,

मई तोहरे भरोसे हउँ। मई तोहार पराथना सदा करत रहत हउँ।

7मई दूसर लोगन बरे एक उदाहरण रहेउँ ह। काहेकि तू मोर सक्ती क सोता रह्या ह।

8ओन अद्भुत कामन क सदा गावत रहेउँ ह, जेनका तू करत अहा।

9सिरिफ इ कारण कि मई बुढ़वा होइ गवा हउँ मोका निकारिके जिन लोकावा। सिरिफ इ कारण कि मई दुर्बल होइ गवा हउँ मोका निज छोड़्या।

10फुरइ, मोर दुस्मनन मोरे खिलाफ कुचक्र रच डाए बाटेन। फुरइ उ पचे सब बटुर ग अहई, अउर ओनकर जोजना मोका मार डावइ क अहइ।

11मोर दुस्मन कहत हीं, “परमेस्सर ओका तजि दिहस ह। जा, ओका धइ ल्या। कउनो भी मनई ओका मदद न देई।”

12हे परमेस्सर, तू मोका जिन बिसरा। हे परमेस्सर, हाली करा। मोका सहारा द्या।

13मोरे दुस्मनन क पूरी तरह स हराइ द्या। तू ओनकर नास कइ द्या। मोका कस्ट देइ क उ पचे जतन करत अहई। उ पचे लज्जा महसूस करई अउ अपमान सहई।

14फुन मई तोहरे ही भरोसे, सदा रहब। अउर तोहार गुण मई जियादा अउ जियादा गाउब।

15सबहिं लोगन स, मई तोहार बखान करब कि तू केतना उत्तिम अहा। उ समइ क बातन मई ओनका बताउब, जब तू अइसे मोका एक नाहीं अनगिनत अवसर पइ बचाए रह्या।

16हे यहोवा, मोर सुआमी। मई तोहरी महानता क वर्णन करब। बस सिरिफ मई तोहार अउ तोहरी ही अच्छाई क चर्चा करब।

17हे परमेस्सर, तू मोका बचपन स ही सिच्छा दिहा। मई आजु तलक बखानत रहा हउँ, ओन अद्भुत कामन क जेका तू करत अहा।

18अब मई बुढ़वा होइ गवा हउँ अउर मोर बार सफेद होइ ग अहई। मुला मई जानत हउँ कि तू मोका नाहीं तजब्या। हर नई पीढ़ी स, मई तोहरी सक्ती क अउर तोहरी महानता क वर्णन करब।

19हे परमेस्सर, तोहार धार्मिक भावना अकासन स ऊँच अहइ। हे परमेस्सर, तोहरे समान दूसर कउनो नाहीं। तू अजूबा अचरजभरा काम किहा ह।

20तू मोका बुरा समइ अउ कस्ट लखइ दिहा। मुला तू ही मोका ओन सब स बचाइ लिहा अउर जिअत राख्या ह। एकर कउनो अरथ नाहीं, मई केतना ही गहिर बूड़ेउँ तू मोका मोर संकटन स उबारि लिहा।

21तू अइसे काम करइ क मोका मदद द्या जउन पहिले स भी बड़ा होई। मोका सुख चैन देत रहा।

22वीणा क संग, मई तोहार गुण गाउब। हे मोरे परमेस्सर, मई इ गाउब कि तोह पइ भरोसा धरा जाइ सकत ह। मई ओकरे बरे गीत आपन सितार पइ बजावा करब जउन इस्त्राएल क पवित्र यहोवा अहइ।

23मोरे प्राणन क तू रच्छा किहा ह। मोर मन मगन होइ अउर आपन हौठन स, मई प्रसंसा क गीत गाउब।

24मोर जिभिया हर घड़ी तोहार धार्मिक भावना क गीत गावा करी। अइसे उ सबइ लोग जउन मोका मारइ चाहत हीं, उ पचे हारि जइहीं अउ अपमानित कीन्ह जइहीं।

## भजन 72

सुलैमान बरे।

1हे परमेस्सर, राजा क मदद करा ताकि उ भी तोहरी तरह स विवेक स भरिके निआउ करइ। राजपुत्र क सहायता करा ताकि उ तोहार धार्मिक भावना क जानि सकइ।

2राजा क सहायता करा कि तोहरे मनवइयन क उ निस्पच्छ निआउ करइ। सहायता करा कि उ दीन जनन क संग उचित बेउहार करइ।

3पहाड़न क सबइ बरे सान्ति लिआवइ द्या। समूचइ भुइँया बरे सान्ति अउर निआउ लिआवइ द्या।

4राजा निर्धन लोगन बरे निआउ स भरा रहइ। उ बेसहार लोगन क मदद करइ। उ सबइ लोग सजा पावइँ जउन ओनका सतावत होइँ।

5मोर इ कामना अहइ कि जब तलक सूरज अकास में चमकत ह, अउर चन्द्रमा अकासे में अहइ। लोग राजा क डर मानइँ। मोर आसा अहइ कि लोग ओकर डर सदा मनिहीं।

6राजा क मदद, धरती प पड़इवाली बरसात बनावइ में करा। ओकर मदद करा कि खेतन में पड़इवाली बौछार बनइ।

7जब तलक उ राजा अहइ, भलाइ फूलइ-फरइ। जब तलक चन्द्रमा अहइ, सान्ति बनी रहइ।

8ओकर राज्ज समुदर स समुदर तलक अउ परात नदी स लइके सुदूर तलक फइलि जाइ।

9रेगिस्ताने क लोग ओकरे अगवा निहुरइँ। अउर ओकर सबइ दुस्मन ओकरे अगवा औधे मुँह भहरान भए धरती पइ निहुरइँ।

10तर्सीस क राजा अउ दूर देसन क राजा ओकरे बरे उपहार लिआवइँ। सेबा क राजा अउ सबा क राजा ओका उपहार देइँ।

11सबइ राजा हमरे राजा क अगवा निहुरइँ। सबहिं रास्ट्र ओकर सेवा करत रहइँ।

12हमार राजा बेसहारन क सहायक अहइ। हमार राजा दीनन पइ अउर बेसहारा लोगन क सहारा देत ह।

13दीन, बेसहारा लोग ओकरे सहारे अहइँ। इ राजा ओनका जिअत रखत ह।

14इ राजा ओनक ओन लोगन स बचावत ह, जउन क्रूर अहइँ अउर जउन ओनका दुःख देइ चाहत हीं। राजा बरे ओन दीनन क जीवन बहोतइ महत्वपूर्ण अहइ।

15राजा लम्बी उमर क होइ! अउर सेबा स सोना प्राप्त करइ। राजा बरे सदा पराथना करत रहा, अउर तू हर दिन ओका असीस द्या।

16खेत भरपूर फसल देइ। पहाड़ियन फसलन स ढकि जाइँ। इ सबइ खेत लबानोन क खेतन स उपजाऊ होइ जाइँ। सहर लोगन क भीड़ स भरि जाइ, जइसेन खेत घनी घासे स भरि जात हीं।

17राजा क जस सदा बना रहइ। लोग ओकरे नाउँ क सुमिरन तब तलक करत रहइँ, जब तलक सूरज चमकत ह। ओकरे कारण सारी प्रजा धन्य होइ जाइ अउ उ पचे सबहिं ओका असीसइँ।

18यहोवा परमेस्सर क गुण गावा, जउन एस्त्राएल क परमेस्सर अहइ। उहइ परमेस्सर अइसे अचरज क कर्म कइ सकत ह।

19ओकरे महिमा स भरा नाउँ क बड़कई सदा करा। ओकर महिमा सारी दुनिया में भरि जाइ। आमीन अउ आमिन।

20यिसै क पूत दाऊद क पराथनन समाप्त भइन।

## तीसर भाग

### भजन 73

आसाफ क गीत।

1इस्त्राएल बरे परमेस्सर नीक अहइ। परमेस्सर ओन लोगन बरे नीक होत ह जेनकर हिरदइ पवित्तर अहइ।

2मईँ तउ करीब करीब फिसल गवा रहा अउर मईँ तउ करीब करीब गिर गवा रहा।

3काहेकि मईँ लखेउँ कि पापी सफल होत अहइँ अउर सान्ति स रहत अहइँ। तउ ओन अभिमानी लोगन स मोका जलन भइ।

4उ सबइ लोग तन्दुरुस्त अहइँ। ओनके जिन्नगी में कउनो संघर्ष नाहीं अहइ।

5ओन अहंकारी लोग दूसर लोगन क नाई परेसानी नाहीं उठावत हीं। उ पचे दूसर क नाई तकलीफ नाहीं झेलत हीं।

6एह बरे उ पचे सदा अहंकार स भरा रहत हीं। अउर उ पचे हिंसा स भी भरा भवा रहत हीं।

7उ पचे बुरे बिचारन स भरा भवा अहइँ अउर उ पचे बुरे योजना में बह गवा रहेन।

8उ पचे लोगन क बारे चिन्ता नाहीं करत हीं अउर ओनका सोसण करइ बरे बुरी योजना बनावत हीं। उ पचे घमण्ड में बात करत हीं।

9उ घमण्डी लोगन अइसे बात करत हीं जइसे उ पचे देवता अहइँ। उ पचे अइसे बात करत हीं जइसे उपचे धरती क सासक हीं।

10एँह बरे हिआँ तलक कि परमेस्सर क जन भी ओन दुट्ठन कइँती मुड़त अउर जइसा उ पचे कहत हीं, वइसा बिस्सास कइ लेत हीं।

11उ सबइ दुट्ठ जन कहत ही, “हमरे ओन कामन क परमेस्सर नाहीं जानत जेनका हम करत अही।

12दुट्ठ जन आराम क जिन्नगी जिअत हीं अउर उ पचे धनवान होत चला जात हीं।

13तउ मोका आपन हिरदय क पवित्तर रखइ क का लाभ अहइ! आपन मूँडे क निर्मल रखइ क का लाभ अहइ!

14हे परमेस्सर, मईँ सारे ही दिन दुःख भोगा करत हउँ। तू हर भिन्सारे मोका दण्ड देत अहा।

15हे परमेस्सर, मई इ सबइ बातन दूसरन क बतावइ क निर्णय कइ लिहे रहेउँ। मुला मई जानत रहेउँ कि मई तोहार लोगन क धोका देते रहेउँ।

16ऐन बातन क समुझइ क, मई जतन किहेउँ मुला ऐनका समुझब मोरे बरे बहोत कठिन रहा।

17जब तलक मई परमेस्सर क मन्दिर मँ नाही गवा तब तलक मई एका नाही समुझेउँ।

18हे परमेस्सर, फुरइ तू ओन लोगन क भाग फिसलइ वाले मार्ग मँ राख्या ह। तू ओन लोगन क गिरइ द्या अउर बर्बाद होइ द्या।

19एकाएक ओन पइ विपत्ति अइहीं। उ सबइ घमण्डी लोग बरबाद होइ जात हीं। ओनके संग भयंकर घटना घटिहीं। अउर फुन ओनकर अंत होइ जात ह।

20हे यहोवा, उ सबइ मनई अइसे होइहीं जइसे सपन जेका हम जागत ही बिसरि जात अहीं। ऐह बरे तू अइसे लोगन क हमरे सपन क भयानक जानवर क नाई अछन्न कइ द्या।

21जब मोर हिरदय किरया रहा अउर मोरे दिमाग जखमी रहा,

22मई विवेकहीन रहा अउर मई समुझइ मँ असमर्थ रहा। मई एक तोहार संग एक निर्बुद्धि जनावर जइसा बेउहार किहेउँ।

23तउ पइ भी मई सदा तोहार संग अहउँ। हे परमेस्सर, तू मोरे हाथ थामइ क मोर मदद किहा ह।

24हे परमेस्सर, तू मोका राह देखौवत, अउर मोका सलाह देत अहा। आखीर मँ तू आपन महिमा क मौजूदगी मँ मोका अगुवाई करब्या।

25हे परमेस्सर, सरगे मँ बस तू ही अकेला मोर अहा, अउर धरती पइ मोका का चाही, जब तू मोरे साथ अहा?

26चाहे मोर मनवा टूटि जाइ अउर मोर काया नस्ट होइ जाइ। मुला उ चट्टान मोरे लगे बाटइ जउन मोर सहायता करत ह। परमेस्सर मोरे लगे सदा अहइ।

27हे परमेस्सर, जउन लोग तोहका तजत हीं, उ पचन्क तू नास कइ देब्या। तू ओन लोगन क जउन तोहेसे मुड़ जात हीं, बर्बाद कइ देब्या।

28मुला मोरे बरे, परमेस्सर क निअरे रहब नीक अहइ। मई आपन सुरच्छा स्थान आपन सुआमी यहोवा क बनाएउँ ह। हे परमेस्सर, मई ओन सबहिं बातन क बखान करब जेनका तू किहा ह।

## भजन 74

आसाफ क मस्किल।

1हे परमेस्सर, तू हमका सदा बरे काहे बिसराइ दिहा ह? तू अबहिं तलक आपन निज लोगन स काहे कोहान अहा?

2ओन लोगन क सुमिरा जेनका तू बहोत पहिले मोल लिहे रह्या। तू हम लोगन क आपन लोग बनाइ बरे बचाइ लिहा ह। सियोन क पहाड़े क सुमिरा जहाँ तू रहत रहा।

3हे परमेस्सर, आवा अउ ऐन बहोत पुरान खण्डहरन स होइके चला। तू उ पवित्र ठउर पइ लउटिके आवा जेका दुस्मन बरबाद कइ दिहे अहइँ।

4दुस्मनन मन्दिर मँ सेरन क नाई दहाड़ेन। उ खुद क बिसेस चिन्ह\* क एक प्रमाण क रूप मँ, कि उ पचे जुद्ध जीत गएन, स्थापित किहेन।

5दुस्मनन क फउजियन एक अइसे कुलहारी क नाई परगट भवा रहेन जेका प्रयोग जलावन क लकड़ी क काटइ बरे कीन्ह गवा रहा।

6हे परमेस्सर, ऐन दुस्मन फउजियन निज कुल्हाड़न अउ फर्सन क प्रयोग किहेन, अउर तोहरे मन्दिर क नक्कासी फाड़िके लोकाएन।

7सबइ फउजियन तोहार पवित्र ठउर बार दिहेन। उ पचे तोहरे मन्दिर क धूरि मँ मिलइ दिहेन जेका तोहरे नाउँ क मान देइ बरे बनावा ग रहा।

8उ दुस्मन हमका पूरी तरह बरबाद करइ क ठान लिहेन। तउ उ पचे देस क हर पवित्र ठउर क फूँक दिहेन।

9हम लोग कउनो बिसेस चिन्ह नाही लखे। हुआँ अउर कउनो नबी जिअत नाही अहइ। एह बरे कउनो भी नाही जानत ह कि इ परिस्थिति कब तलक जारी रही।

10हे परमेस्सर, इ सबइ दुस्मन कब तलक हमार हँसी उड़इहीं? का तू ऐन दुस्मनन क तोहरे नाउँ क अपमान सदा सदा ही करइ देब्या?

11हे परमेस्सर, तू आपन सक्ती क काहे रोके रखा ह अउर तू हस्तछेप काहे नाही करत ह। ओन लोगन क नास करइ बरे कारवाई करा।

12हे परमेस्सर, बहोत दिनन स तू ही हमार सासक रह्या। इ देस मँ तू हम लोगन क अनेक जुद्ध मँ विजय दिहा।

13हे परमेस्सर, तू आपन महासक्ती स लाल सागर क दुइ हींसा कइ दिहा। तू विसाल काय क दानवन क मूड़न समुद्धर मँ चूर चूर कइ दिहा।

14तू लिव्यातान क मूँड़न कुचर दिहा, अउर ओकरे बदन क जंगली जनावरन क खाइ बरे लोकाइ दिहा।

15तू नदी, झरनन रच्या, चट्टान फोड़िके पानी बहाया। तू सदा बहइ वाली नदियन क झुराइ दिहा।

16हे परमेस्सर, तू दिन क सासक अहा, अउ राति क भी सासक तू ही अहा। तू ही चाँद अउ सूरज क बनाया।

17तू समुचइ धरती पइ सब बरे चउहद्दी बाँधत अहा। तू ही गर्मी अउ सर्दी क बनाया।

18हे यहोवा, इ बातन क सुमिर ल्या। अउर याद करा कि दुस्मन तोहार मजाक उड़ाएस ह। उ सबइ मूर्ख लोग तोहरे नाउँ क अपमान किहेन ह।

19ओनें जंगली जनावरन क आपन फारवता क जिन लेइ द्या। आपन दीन जनन क तू हमेसा जिन बिसरा।

20हम आपुस मँ जउन करार कीन्ह ह ओका याद करा, इ देस मँ हर कउनो अँधियारे ठउरे पइ हिंसा अहइ।

21हे परमेस्सर, तोहरे लोगन क संग अत्याचार झेलेइ क रहा, ओनका अउर अधिक सतावा अउ दुःख दीन्ह जाइ जिन द्या। तोहार असहाय जन, तोहार गुण गावइँ।

**बिसेस चिन्ह** इ सबइ सम्भवतः आगियन संकेत रहेन जेका लोग एक सहर स दूसर मँ संदेस पठवइ क विधि क रूप मँ जलाएन। जुद्ध मँ इ एक विधि रही जउन लोग दूसर सहरन क दिखाएन कि ओनकर सहरन क अब तलक बर्बाद नाही कीन्ह गवा रहेन।

22हे परमेस्सर, उठा अउर बदला ल्या। याद करा कि ओन मूरख लोग सदा ही तोहार अपमान किहेन ह।

23उ सबइ बुरी बातन जिन बिसरा जेनका तोहार दुस्मनन हर रोज तोहरे बरे कहेन। जिन बिसरा कि उ पचे तोहार खिलाफ लगातार चिचियाएन जब उ पचे तोहार खिलाफ जुद्ध करत रहेन।

### भजन 75

*‘नस्ट जिन करा’ नाउँ क धुन पइ संगीत निर्देसक बरे आसाफ क भजन।*

1हे परमेस्सर, हम तोहार बड़कई करत अही। हम तोहार बड़कई करत अही काहेकि तोहार मौजूदगी निअरे अहइ। अउर लोग तोहरे ओन अदभुत करमन क जेनका तू करत अहा, बयान करत हीं।

2परमेस्सर कहत ह, “मईं निआउ क समइ चुन लिहेउँ, मईं निस्पच्छ होइके निआउ करब।

3धरती अउ धरती क हर वस्तु डगमगाइ सकत ह अउर गिरइ क तइयार होइ सकत ह, किन्तु मईं ही ओका स्थिर राखत हउँ।”

4-5कछू लोग बहोत ही घमण्डी होत हीं। उ पचे सोचत रहत हीं कि उ पचे बहोत मजबूत अउ महत्वपूर्ण बाटेन। मुला मईं उनसे कहत हउँ। ‘घमण्डी जिन बना!’ ‘अइसा बिउहार जिन करा कि तू बहोत मजबूत अउ महत्वपूर्ण अहइ। अइसा जिन दिखावा कि तू बहोत सक्तीसाली अहइ अउर अहंकारी जिन बना।”

6इ फुरइ अहइ कि कउनो भी मनई धरती पइ नीच क महान नाहीं बनाइ सकत।

7परमेस्सर सासक ह। परमेस्सर ऐँकर फैसला करत ह कि कउन मनई महान होइ। परमेस्सर ही कउनो मनई क महत्व स भरा पद पइ बइठावत ह। अउर कउनो क महत्वहीन पद पइ उहइ बइठावत ह।

8परमेस्सर क पिआला मिलावटी मधु स भरा बाटइ। परमेस्सर दण्ड क इ दाखरस क उडेरत ह। अउर दुट्ट जन ओका आखिरी बूँद तलक पितत हीं।

9मईं इ बातन क घोसना करब जउन परमेस्सर सदा बरे करत ह। मईं इस्त्राएल क परमेस्सर क महिमा क गुण गाउब।

10परमेस्सर कहत ह, “मईं दुट्ट लोगन क सक्ती क हटाइ देब। किन्तु सबइ नीक लोगन क सम्मान सक्ती स कीन्ह जाइ।

### भजन 76

*संगीत निर्देसक बरे आसाफ क एक ठु भजन, तार वाद्यन क जरिये गवा भवा एक ठु गीत।*

1यहूदा क लोग परमेस्सर क जानत हीं। इस्त्राएल जानत ह कि फुरइ परमेस्सर क नाउँ बड़का अहइ।

2परमेस्सर क मन्दिर सालेम मँ बना अहइ। परमेस्सर क घर सिष्योन क पहाड़े पइ अहइ।

3उ जगह पइ परमेस्सर भारत भवा बाणन, ढालन, तरवानन अउ जुद्ध क दूसर सस्त्रन क तोड़ दिहस। (सेला)

4हे परमेस्सर, तू प्रकास क संग चमकत ह। तू जंगली पहाड़न स जियादा प्रताप वाला अहइ।

5ओन सिपाहियन सोचेन कि उ पचे बरिआर अहइँ। मुला उ पचे अब रणछेत्रन मँ मरा पड़ा अहइँ। ओनकर ल्हासन क छूट लीन्ह ग ह अउर नंगा पड़ा अहइँ। ओन बलवान सिपाहियन मँ कउनो अइसा नाहीं रहा, जउन खुद आपन क रच्छा कइ पावत।

6याकूब क परमेस्सर ओन फउजियन पइ फटकारेस। अउ उ फउज रथन अउर घोड़न सहित असहा मर गइ।

7हे परमेस्सर, तू अदभुत अहा। जब तू कोहाइ जात ह तोहरे समन्वा कउनो मनई टिक नाहीं सकत।

8जब परमेस्सर सरग स निआउ किहस तउ सारी धरती डर स काँप गइ।

9जब परमेस्सर निआवाधीस क रूप मँ धरती क विनम्र लोगन क बचावइ बरे करिवाई किहस तब इ भवा।

10हे परमेस्सर, लोगन क उ समइ भी तोहार स्तुति करइ चाही जब उ पचे किरोध मँ होइ। जब उ पचे किरोध करइ बंद कइ देइँ तउ उ पचे बरिआर होइ जाइँ।

11योहवा आपन परमेस्सर क संग वाचा करा अउर जउन वाचा किहा ओका पूरा करा। लोग हर कउनो ठउर स लोग परमेस्सर क भेंट लिअइहीं जउन सम्मान क जोग्य अहइँ।

12परमेस्सर महान नेतन क डरावत ह। धरती क सबहिँ सासक लोग ओकर रुतबा माना।

### भजन 77

*“यहूतन” राग पइ संगीत निर्देसक बरे आसाफ क भजन।*

1मईं मदद पावइ बरे परमेस्सर क गोहराउब। मईं परमेस्सर क गोहराउब अउर उ मोका सुनी।

2जब मईं दुःख मँ रहेउँ तउ मईं योहोवा क सरण मँ आवा। मईं सारी रात तोह तलक पहोंचइ जूझा हउँ। मईं एका नाहीं छोड़ा अउर आराम तलक नाहीं किहेउँ।

3मईं परमेस्सर क याद करत हउँ किन्तु मईं बेचेन हउँ। अउर ओका बतावा कि मईं कइसा अनुभव करत हउँ। किन्तु फुन भी मईं अइसा नाहीं कइ सकत हउँ। मईं बोलन चाहता रहेउँ, किन्तु मईं बहोत उदास रहेउँ। (सेला)

4तू मोका सोवइ नाहीं दिहा। मईं उदास रहेउँ, ऐँह बरे मईं कछू नाहीं कह सकत हउँ।

5मईं अतीत क बातन बरे सोचेउँ। बहोत दिना पहिले जउन बातन घटी भइ रहिन ओन घटनन क बारे मँ मईं सोचेउँ।

6राति मँ, मईं आपन गीतन क बारे मँ सोचा करत रहेउँ। मईं आपन आप स बातन किहेउँ। मईं समुझइ बरे जतन किहेउँ।

7मोका इ हैरानी अहइ कि का मोर सुआमी मोका सदा बरे तजि दिहे अहइ? का उ हमका फुन नाहीं चाही?

8का परमेस्सर क पिरेम हमेसा बरे खतम होइ गवा अहा? का उ मोहे स फिन कबहुँ बात नाहीं करी?

9का परमेस्सर दाया दिखावइ भूल गवा ह? का ओकर करुणा किरोध मँ बदल गइ बाटइ?”

10मई फुन इ सोचा करत हउँ, “उ सोच जउन मोका दर्द देत अहइ: ‘का सर्वोच्च परमेस्सर आपन निज सक्ती दिखावइ बन्द कइ दिहस ह?’”

11सक्ती भरा उ काम जेनका यहोवा किहस ह ओका याद रखा। हौं उ कामन जेनका तू पहिले किहा ह मोका याद बाटइ।

12मई ओन सबहिं कामन क जेनका तू किहा ह सोचे हउँ। जेन कामन क तू किहा मई धियान देत हउँ।

13हे परमेस्सर, तोहार निवास स्थान पवित्र अहई। कउनो भी अइसा महान नाहीं अहइ जइसा तू अहा।

14तू ही उ परमेस्सर अहा जउन अद्भुत काम किहा। तू रास्ट्रन क आपन निज महासक्ती देखोया।

15तू आपन सक्ती क प्रयोग किहा अउर आपन लोगन क बचाइ लिहा। तू याकूब अउ यूसुफ क संतानन क बचाइ लिहा।

16हे परमेस्सर, सागर तोहका लखेस अउर जब उ तोहका लखेस तउ डेराइ गवा। गहिर समुदर डर स थर थर काँप उठा।

17घनघोर बादरन स ओनकर पानी छूट पड़ा रहा। ऊँच बादरन स जोर क गर्जब लोग सुनेन। फुन ओन बादरन स बिजुरी क तोहार बाण नीचे चलेन।

18तोहार बिजुरी क गर्जन आंधी भरे हवा में फुन गर्जेस, तोहार बिजुरी चमचमात भवा जगत पड़ चमक उठी। धरती हिल गइ अउर थर थर काँपि गइ।

19हे परमेस्सर, तू गहिर समुदर में पैदर चल्या। तू चलिके ही सागर पार किहा। मुला तू कउनो पद चीन्हा नाहीं छोड़या।

20तू मूसा अउ हारून क उपयोग आपन मनवइयन क अगुआई भेड़िन क झुण्ड क नाई करइ में किहा।

## भजन 78

*आसाफ क एक मस्किल।*

1मोर मनवइयो, तू पचे मोरे उपदेसन क सुना। ओन बातन पड़ कान द्या जेनका मई बतावत हउँ।

2मई तू पचन्क इ कथा सुनाउब। मई तू पचन्क पुरान कथा सुनाउब।

3हम पचे इ कहानी सुना ह, अउर एँका अच्छी तरह जानित ह। हम लोगन क पुरखन इ कहानी कहेन ह।

4हम लोग एँन बातन क आपन सन्तानन स नाहीं छुपाउब। हम लोग एँन बातन क आपन अगवा पीढ़ी क बताउब। हम लोग ओनसे यहोवा क सक्ती अउर ओकरे अद्भुत कामन क बारे में बताउब। हम पचे ओनका ओन कामन बरे जेनका उ किहस ह बखान करब।

5यहोवा याकूब स वाचा किहस। परमेस्सर इस्त्राएल क व्यवस्था क विधान दिहस, अउर हमार परमेस्सर हमरे पुरखन क हुकुम दिहस। उ हमरे पुरखन क व्यवस्था क विधान आपन संतानन क सिखावइ क किहेस।

6इ तरह अगवा पीढ़ी एँन बातन क बरे में जानिहीं। अउर हर एक पीढ़ी में गदेलन पइदा होइ अउर बढ़ीइ अउर फुन उ पचे इ कहानी क आपन गदेलन क बतइहीं।

7एँह बरे उ सबहिं लोग यहोवा पड़ भरोसा करिहीं। उ पचे ओन सक्ती स भरा कामन क नाहीं बिसरिहीं। जेन्का परमेस्सर किहे रहा। उ पचे धियान स रखवारी करिहीं अउर परमेस्सर क हुकुम क मनिहीं,

8एँह बरे उ पचे आपन पुरखन क नाई नाहीं होइ। ओनकर पुरखन परमेस्सर क अनसुनी किहे रहेन अउर ओकर अनुसरण करइ स इन्कार किहे रहेन उ पचे हठी रहेन। उ पचे विस्सासी होइ क परमेस्सर क अनुसरण नाहीं किहेन।

9ओन मुड़ी भइ कमान की तरह जेका उ पचे लइ रहेन एँप्रेम क लोग जुद्ध स पीठ दिखाइ गए।

10उ पचे ओन करार क नाहीं मानेन जउन उ पचे यहोवा स किहे रहेन। उ पचे उ नाहीं किहे जउन उ ओन लोगन क करइ क हुकुम दिहे रहा।

11एँप्रेम क उ सबइ लोग ओन बड़की बातन क बिसरि गएन जेनका परमेस्सर किहे रहा। उ पचे ओन अद्भुत बातन क बिसरि गएन जेनका उ ओनका देखोए रहा।

12परमेस्सर ओनकर पुरखन क मित्र क भुइयाँ सोअन में निज महासक्ती देखोइस।

13परमेस्सर लाल सागर क चीरिके दुइ भाग कइके लोगन क पार उतार दिहस। उ पानी क मजबूत देवार क तरह दुइनउँ कइती खड़ा कइ दिहस रहा।

14परमेस्सर ओन लोगन क दिन क समइ में महा बादर स अगुवाई किहस। अउर रात क समइ में चमकत भवा आगी स राह देखोएस।

15उ चट्टान क फारेस अउर पानी तेजी स बाहर निकर आवा वइसे ही जइसे झड़ना स निकरत ह।

16परमेस्सर चट्टान स पानी क धारा नदी क नाई निकारे रहा।

17मुला लोग रेगिस्तान में सर्वोच्च परमेस्सर क खिलाफ पाप करत जारी रखे रहेन।

18फिन ओन लोग परमेस्सर क परखइ क पक्का इरादा किहेन। उ पचे बस आपन भूख मिटावइ बरे परमेस्सर स खइया क माँगैन।

19परमेस्सर क खिलाफ उ पचे बतियाइ लागेन, उ पचे कहइ लागेन, “का रेगिस्ताने में परमेस्सर हमका खाइ क दइ सकत ह?”

20लोगन ने कहा, “जब परमेस्सर चट्टाने पड़ चोट किहस तउ पानी क एक टु रेला फूटि पड़ा। किन्तु का उ हमका कछू रोटी अउ गोस भी दइ सकत ह?”

21जब यहोवा इ सुनि लिहस जउन लोग कहे रहेन तउ ओकर किरोध इस्त्राएल क रास्ट्र याकूब क खिलाफ भड़क गवा।

22काहेकि लोग ओह पड़ भरोसा नाहीं रखे रहेन, ओनका भरोसा नाहीं रहा, कि परमेस्सर ओनका बचाइ सकत ह।

23-24तब भी परमेस्सर ओन पड़ बादर क खोल दिहस। ओनका खाइ बरे खाले मन्ना बरसाइ दिहस। इ ठीक वइसेन ही भवा जइसे कि उ अकासे क दुआर खोल दिहस ह अउर ओनसे अनाज बाहेर उड़ेर दिहस ह।



25लोग उ भोजन खाएन अउर उ पचे बहोत ताकतवर होइ गएन। परमेस्सर ओन लोगन क तृप्त करइ बरे भर पूर भोजन पठाएस।

26-27फिन परमेस्सर पूरब स तेज हवा चलाएस अउर ओन लोगन बरे बटेर क बर्खा बरसात क नाई बरसाएस। परमेस्सर क महासक्ती तैमान कइँती स एक तु आँधी उठाएस अउर नीला अकास करिआ होइ गवा काहेकि हुवाँ अनगिनत पंछी छइ ग रहेन।

28उ सबइ पंछी क ठीक ओनकर डेरे क बीच में खेमन क चारिहुँ कइँती गिरा दिहे रहेन।

29ओनके लगे खाइ बरे भरपूर भोजन रहा। उ ओनका उहइ दिहस जउन उ पचन्क इच्छा रहेन।

30उ पचे उ भोजन अबहुँ तलक खाइ क खतम नाहीं किहे रहेन जेन्का इच्छा उ पचन्क रहेन अउर गोस अबहुँ तलक ओनकर मुँह में ही रहेन।

31तउ ओन लोगन पइ परमेस्सर बहोत कोहाइ गवा अउर ओनमाँ स सबन्क नीक क मारि दिहस। उ बरिआर जवानन क मउत दइ दिहस।

32फिन भी लोग पाप करत जारी राखे रहेन! उ पचे परमेस्सर क अद्भुत करमन पइ भरोसे नाहीं किहेन।

33तउ परमेस्सर ओनकर जिन्गगी क बियर्था में अउर बरिसन क डर में खतम किहस।

34जब कबहुँ परमेस्सर ओनमाँ स कउनो क मारेस ओनमाँ स बाकी लोग परमेस्सर कइँती लउटि गएन।

35उ सबइ लोग याद किहेन कि परमेस्सर ओनकर चट्टान रहत रहा। उ पचे याद किहेन कि परमेस्सर ओनकर मदद किहे रहा।

36किन्तु ओकर पाछे उ पचे अइस किहेन जइसे उ पचे ओन पइ विस्वास करत हीं, किन्तु असल में उ पचे झूट बोले रहेन। उ पचे ओकर विस्वासी नाहीं रहेन।

37उ पचे फुरइ मनवा स यहोवा क संग नाहीं रहेन। उ पचे आपन करार बरे सच्चा नाहीं रहेन।

38मुला परमेस्सर करुणा स भरा नाहीं रहा। उ ओनकइ पापन बरे छिमा किहेस, अउर उ ओनकर विनास नाहीं किहस। परमेस्सर अनेक अवसरन पइ आपन किरोध रोकेस। परमेस्सर आपन क बहोत किरोधी नाहीं होइ दिहस।

39परमेस्सर क याद रहा कि उ पचे सिरिफ मानव जात अहइँ। लोग सिरिफ हवा जइसे अहइँ जउन बहिके चली जात ह अउर कबहुँ नाहीं लउटत ह।

40हाय, उ पचे सबइ मरुभूमि में परमेस्सर क खिलाफ विद्रोह किहेन ह। उ पचे मरुभूमि में ओका बहोत दुःखी किहे रहेन।

41उ पचे लगातार परमेस्सर पइ सक किहेन अउर इस्त्राएल क पवितर क चोट पहुँचाएन।

42उ सबइ लोग परमेस्सर क सक्ती क बिसरि गएन। उ सबइ लोग बिसरि गएन कि परमेस्सर ओनका दुस्मन स कइसे बचाए रहा।

43उ सबइ लोग ओन अद्भुत बातन क बिसरि गएन जउन कि उ मिस्त्र क सोआन में किहे रहा अउर ओन

चमत्कारन क बिसरि गएन जउन उ उस भुइयाँ में किहे रहा।

44उ ओनकर नदियन क रक्त में बदल दिहे रहा। मिस्त्र क लोग आपन नदी-नाला स पानी पी नाहीं सकत रहेन।

45परमेस्सर भिड़न क झुण्ड पठाए रहा जउन मिस्त्र क मनइयन क काटेन। परमेस्सर ओन मेघन क पठाएस जउन ओन लोगन क भुइयाँ क नास कइ दिहन।

46उ ओनकर फसलन क जेकर बरे उ पचे बहोत सखत मेहनत किहे रहेन टिड्डन अउर झिंगुरन क दइ दिहस।

47उ मिस्त्रियन क अंगूरे क बगिया ओलन स बर्बाद किहस, अउर ओनकर गोलर क बृच्छन क पाला स बर्बाद कइ दिहस।

48उ ओनकर जनावरन क ओलन स मारि दिहस अउ बिजुरी गिराइके मवेसियन क बर्बाद कइ दिहस।

49उ मिस्त्री लोगन क खिलाफ आपन प्रचण्ड किरोध अउर फटकार देखौएस, अउर ओन लोगन पइ मुसीबत लिआएस। उ आपन विनास क दूत ओन लोगन क खिलाफ पठाएस।

50उ किरोध परगट करइ बरे एक राह पाएस। उ ओन लोगन क मउत स नाहीं बचाएस। उ ओनकर गोरुअन क बेरामी स मरि जाइ दिहस।

51परमेस्सर मिस्त्र क हर पहिलउटी पूत क मार डाएस। हाम क घराने क हर पहिलउटी पूत क उ मार डाएस।

52फिन उ इस्त्राएल क चरवाहा क नाई अगुवाई किहस। उ ओन लोगन क भेड़न क झुण्ड क नाई रेगिस्तान स होत भए निकारेस।

53उ आपन निज लोगन क सुरच्छा क संग लइ चला। परमेस्सर क भगतन क कउनो स डर नाहीं रहा। परमेस्सर ओनकर दुस्मनन क लाल सागर में डुबाएस।

54परमेस्सर आपन मनवइयन क आपन पवितर भुइँया पइ लइ आवा। उ ओनका उ पहाड़े पइ लिआवा जउन उ आपन सक्ती स पाएस।

55परमेस्सर दूसर जातियन क उ भुइँया तजइ क मजबूर किहस। परमेस्सर हर एक परिवारन क उ भुइँया में ओनकर खुदकास्त क हींसा दिहस। इ तरह इस्त्राएल क परिवारन आपन ही घरन में बस गएन।

56उ पचे लगातार सर्वोच्च परमेस्सर पइ सक किहेन अउर ओकर खिलाफ विद्रोह किहेन उ सबइ लोग परमेस्सर क आग्या क नाहीं मानेन।

57इस्त्राएल क लोग परमेस्सर स भटकिके विमुख होइ ग रहेन। उ सबइ आपन पुरखन क नाई परमेस्सर क अविस्वासी रहेन। उ पचे मुड़ा भवा धनुस\* क जइसे होइ गवा रहेन।

**मुड़ा भवा धनुस** पंछियन क सिकार बरे प्रयोग में लावइ जाइ वाला एक धनुस। जेका जदि सीधे फेंका जाइ तउ उ सीधे ऊपर स नीचे धरती क ओर जात ह फुन अचानक हवा में ऊपर उठत ह अउर फिर कबहुँ फेंकइ वालन कइँती ही वापस लौट आवत ह। मुलार्थ एका "लोकावइ वाला धनुस" या "“आँखियन क धोका देइ वाला धनुस” भी कहा जात ह।

58इस्त्राएल क लोग ऊँच पूजा क ठउरन बनाएन अउर परमेस्सर क कोहाइ दिहन। उ पचे मूर्तिथन गढ़ेन जउन परमेस्सर क किरोधित बनाएन।

59परमेस्सर इ सुनेस अउर बहोत कोहाइ गवा। उ इस्त्राएल क पूरी तरह रूढ़ कइ दिहस।

60परमेस्सर सिलोह क पवितर तम्बू क तजि दिहस। जहाँ उ लोगन क बीच निवास करत रहा।

61फिन उ दूसर रास्ट्रन क, करार क संदूख क कब्जा करइ क दिहस। दुस्मन ओकर महिमा क संकेत क लइ लिहस।

62उ आपन ही लोगन पइ आपन किरोध परगट किहस। उ ओनका जुद्ध में मार दिहस।

63ओनकर जवान मनइयन आगी में जरिके नास होइ गएन। अउर ओकर जवान कुआँरी लइकियन कबहुँ आपन बियाह गीत नहीं सुनि पाएन।

64याजक मार डावा गएन मुला ओनकर राँड़ मेहरारूअन ओनके बरे नहीं रोइ सकेन।

65आखिर में यहोवा उठ बइठा जइसे कउनो नींदे स जागिके उठी बइठत होइ। या कउनो जोद्धा क नाई जउन कि दाखरस क नसा स होस में आवा होइ।

66फुन तउ उ आपन दुस्मनन क मारिके भगाइ दिहस अउर ओनका हराइ दिहस। उ आपन दुस्मनन क हराइ दिहस अउर सदा बरे ओनका अपमानित किहस।

67मुला परमेस्सर यूसुफ क तम्बू\* क रूढ़ कइ दिहस। उ इब्राहीम परिवार क नहीं चुनेस।

68परमेस्सर यहूदा क पिरवार क चुनेस अउर उ सिथ्योन क पहाइ क चुनेस जउन ओका पियारा अहइ।

69उ ऊँचे पहाइन नाई अउर धरती क नाई जेका उ सदा बरे स्थापित किहस ह आपन पवितर मन्दिर क सुरच्छित बनाएस।

70परमेस्सर दाऊद क आपन विसेस सेवक बनावइ में चुनेस। दाऊद तउ भेड़िन क देखरेख करत रहा, मुला परमेस्सर ओका उ काम स लइ आवा।

71उ दाऊद क भेड़िन क रखवाली स लइ आवा। तउ उ ओका आपन लोगन याकूब क सन्तानन, इस्त्राएल\* क रखवाली क काम बरे बहाल किहा।

72तउ फिन दाऊद पुरे मन स ओन लोगन क देख-भाल किहस। उ ओनका पूरी बुद्धिमानी स राह देखीएस।

### भजन 79

आसाफ क एक ठु गीत।

1हे परमेस्सर, विदेसी लोग तोहरे सेवकन क संग लइइ बरे आवा अहइँ। उ मनइयन तोहरे पवितर मन्दिर क बर्बाद किहन, अउ यरूसलेम क उ पचे खण्डहर बनाइ दिहन।

तम्बू इ सम्भवतः सीलोह क पवितर तम्बू अहइ, किन्तु एका अर्थ यूसुफ क परिवार होइ सकत ह जउन कि एप्रैम अउर मनस्से क परिवार समूह अहइ।

याकूब ... इस्त्राएल इ उत्तरी दस परिवार समूह हइ।

2तोहरे चेलन क लहासन क उ पचे जंगली पंछी क खाइ बरे डाइ दिहन। तोहरे मनवइयन क लहासन क उ पचे जनावरन क खाइ बरे डाइ दिहन।

3ओन लोगन तोहार लोगन क रकत पानी जइसा यरूसलेम क चारिहूँ कइँती फइलाएन। ओनकर लहासन क दफनावइ क कउनो भी नहीं बचा।

4हमार पड़ोसी देस हमका अपमानित किहन ह। हमरे आस पास क लोग सबहिँ हँसत हीँ, अउर हमार मसखरी उड़ावत हीँ।

5हे यहोवा कब तलक अइसा रहब्या, का तू सदा क बरे हम पइ कोहान रहब्या? का तोहार किरोध आगी क तरह धधकत रही?

6आपन किरोध क ओन रास्ट्रन क विरोध में जउन तोहका नहीं पहिचानतेन मोड़ द्या आपन किरोध क ओन रास्ट्रन क खिलाफ मोड़ द्या जउन तोहरे नाउँ क मदद बरे नहीं पुकारतेन।

7काहेकि उ सबइ रास्ट्र याकूब क नास किहन। उ पचे याकूब क देस क नास किहन।

8तू हमरे पुरखन क पापन बरे कृपा कइके हमका सजा जिन द्या। हाली करा, तू हम पइ निज करुणा हाली देखीवा काहेकि हम पचन्क बहोत अपमानित बाटइ।

9मोर परमेस्सर, मोर उद्धारकर्ता, हमका सहारा द्या। आपन ही नाउँ क महिमा बरे हमार मदद करा। हमका बचाइ ल्या। निज नाउँ क महिमा क खातिर हम लोगन क पाप क प्रायश्चित करा।

10दूसर रास्ट्रन क लोगन क तू इ जिन कहइ द्या, "ओनकर परमेस्सर कहाँ बाटइ? का उ ओनका सहारा नहीं दइ सकत ह?" हे परमेस्सर, ओन लोगन क दण्ड द्या ताकि उ सजा क हम भी लखि सकी। ओन लोगन क तोहरे सेवकन क मारइ क सजा द्या।

11जेलि में बंद भए लोगन क कराहब कृपा कइके सुना। हे परमेस्सर, तू निज महासक्ती प्रयोग में लिआवा अउर ओन लोगन क बचाइ ल्या जेनका मरइ बरे ही चुना गवा ह।

12हे यहोवा हमरे आस-पास क रास्ट्रन क सात गुना सजा द्या काहेकि उ पचे तोहका अपमानित किहेन ह।

13हम तउ तोहार लोग अही। हम तोहरे झुण्ड भेड़ी अही जेका तू पालत ह। हम तोहार गुनगान सदा करब। हे परमेस्सर हम सदा तोहार महिमा क बारे में बताउब।

### भजन 80

करार क कुमुदिनी धुन पइ संगीत निर्देशक बरे

आसाफ क एक ठु स्तुति गीत।

1हे इस्त्राएल क चरवाहा, तू हमार सुनि ल्या। तू जउन यूसुफ क लोगन क अगुवाई करत ह। तू जउन राजा क तरह करूब सरगदूत पइ विराजत अहा। तू आपन आप क परगट करा।

2एप्रैम, बिन्यामीन अउ मनस्से क सामने तू आपन महिमा देखीवा, अउर आपन सक्ती स हमका बचाइ ल्या।

3हे परमेस्सर, हमका आपन बरे पुनः स्थापित कइ ल्या। तू हम लोगन पइ कृपा करा ताकि हम लोग बच सकी।

4हे सर्वसक्तिमान परमेस्सर यहोवा, कब तलक तू कोहान रहब्या अउर कब तलक तू हमरी पराथना क रद्द करब्या।

5आपन मनवइयन क तू बस खाइ क आँसू दिहा ह। तू आपन मनवइयन क पिअइ बरे आँसुअन स लबालब पिआला दिहा।

6तू हम लोगन क कूछ अइसा बिसय बनइ दिहा जउने पइ हमार पड़ोसियन झगड़त हीं। हमार दुस्मन हम लोगन क मसखरी उड़ावत हीं।

7हे परमेस्सर तू हम लोगन क आपन बरे पुनःस्थापित कइ ल्या। तू हम लोगन पइ कृपा करा ताकि हम बच सकी।

8पुराने जमाना में, तू हमका एक ठु बहोत महत्वपूर्ण पउधा सा समुझया। तू आपन दाखलता मिस्त्र स बाहेर लिआया। तू दूसर लोगन क इ धरती तजि देइ क मजबूर किहा अउर हिआँ तू आपन खुद क दाखलता रोप दिहा।

9तू दाखलता रोपइ क धरती तइयार किहा, ओकरी जड़न क पक्की करइ बरे तू सहारा दिहा अउर फिन हाली ही दाखलता धरती पइ हर कइँती फइल गइ।

10इ आपन छाया स पहाड़न क ढाँपि लिहा हिआँ तलक कि ओकर पात बड़का देवदार बृच्छ क भी ढाँकि लिहस।

11एँकर दाखलता भूमध्य सागर तलक फइलि गइन। एँकर जड़ परात नदी तलक फइला गइ।

12हे परमेस्सर, तू उ सबइ देवार काहे गिराइ दिहा, जउन तोहरी दाखलता क रच्छा करत रही। अब उ हर कउनो जउन हुवाँ स गुजरत ह, हुवाँ स अंगूर क तोड़ लेत हीं।

13बनेला सुअन आवत हीं, अउर तोहार दाखलता क रौदन भए गुजर जात हीं। जंगली जनावर आवत हीं, अउर ओकर पातिन चर जात हीं।

14हे सर्वसक्तीमान परमेस्सर, वापिस आवा। फुन स आपन दाखलता पइ सरगे स खाले लखा, अउर एकर रच्छा करा।

15हे परमेस्सर, आपन उ जड़ क लखा, जेका तू खूद आपन हाथे स रोपे रह्या। इ नान्ह पौधन क लखा जेका तू बढ़ाया ह।

16तोहार दाखलता गोबर क उपलन जइसा आगी में जरावा गवा। तोहरे डाँट फटकारन क कारण एकर लता नास होइ गवा।

17हे परमेस्सर, तू आपन हाथ उ मनई पइ धरा जउन तोहरे दाहिन कइँती अहइ। उ मनई\* पइ आपन हथवा धरा जेका तू खुद पाल्या।

18तउ मई तोहका नाहीं तजब। तू हम पचन क नवा जिन्नगी द्या ताकि हम लोग तोहार आराधना करइ सकब।

19सर्वसक्तिमान यहोवा परमेस्सर, तू आपन बरे पुनःस्थापित कइ ल्या। तू हम लोगन पइ कृपा करा ताकि हम पचे जी सकी।

## भजन 81

संगीत निर्देशक बरे आसाफ क एक ठु गीत

गित्तीथ वाद्य यंत्र क संग गावा भवा।

1परमेस्सर जउन हमार सक्ती अहइ ओकरे बरे आनन्द क गीत गावा। याकूब क परमेस्सर क जय जयकार करा।

मनई साब्दिक अर्थ, “मनई क पूत।”

2संगीत सुरू करा। तम्बूरा बजावा। वीणा सारंगी स मधुर धुन निकारा।

3नवा चंदा क समय में तू पचे नरसिंहा फूँका। पूर्णमासी क अवसर पइ तू पचे हम लोगन क त्यौहार क दिन में नरसिंहा फूँका।

4इस्त्राएल क लोगन क बरे अइसा ही नेम अहइ। इ आदेस परमेस्सर याकूब क दिहस ह।

5परमेस्सर यूसुफ क संग एक करार तब किहे रहा जब उ मिस्त्र गवा रहा जहाँ उ उ रास्ट्र क भाखा नाहीं जानेस रहेन।

6परमेस्सर कहत ह, “तोहरे काँधे क बोझा मई लइ लिहेउँ ह। ओकर हाथन में मजदूर क टोपा में स छुरावा गवा।

7जब तू मुसीबत में रह्या तू मदद क गोहार लगाया अउर मई तोहका बचाएउँ। मई तूफानी बदरन में छुपा रहेउँ अउर मई तू पचन्क जवाब दिहेउँ। मई तू पचन्क मरिबा क जल क लगे परखेउँ।

8अरे मोर मनइयो, तू पचे मोर बात सुना। अउर मई तू पचन्क चेताउनी देब। इस्त्राएल, तू मोका सुन्या।

9तू कउनो कउनो विदेसी देवता क पूजा जिन करा। कउनो विदेसी लोगन क देवता क समन्वा आपन मुँडि जिन झुकावा।

10मई, यहोवा तोहार परमेस्सर हउँ। मई उहइ परमेस्सर हउँ जउन तू पचन्क मिस्त्र स बाहेर लिआए रहेउँ। तू आपन मुँहना खोला, मई ओका भर देब।

11मुला मोर मनइयन मोर नाहीं सुनेन। इस्त्राएल मोर आग्या नाहीं मानेस।

12एह बरे मई ओनका ओकरे हठी जिद् पइ छोर दिहेउँ। इस्त्राएली लोग उहइ चिजियन क किहेन जेका उ उतिम समझेन।

13भला होत इस्त्राएल क लोग मोर बात सुन लेतेन, अउर उ लोग वइसी ही जिन्नगी जिअतेन जइसा मई ओहसे चाहत रहेउँ।

14तब मई इस्त्राएल क दुस्मनन क हाली हराइ देतेउँ। अउर मई ओन लोगन क सजा देतेउँ जउन इस्त्राएल क दुःख देतेन।

15तब यहोवा क दुस्मन डर स थर थर काँपत हीं। अउर उ पचे सदा सर्वदा सजा पइही।

16परमेस्सर आपन चलन क उत्तम गोहूँ देइ। चट्टान ओनका सम्पूर्ण तृप्त होइ तलक सहद देब।

## भजन 82

आसाफ क एक ठु गीत।

1परमेस्सर देवन क सभा\* क बीच निआवाधीस क रूप में विराजत ह। सरगदूत क बीच उ निआव करत ह।

देवन क सभा दूसर रास्ट्रन सिच्छा दिहेन कि एल (परमेस्सर) अउर दूसर देवतन एक साथ जमा भवा इ निर्णय लेइ बरे कि भुइयाँ पइ क लोगन क संग का कीन्ह जाइ। किन्तु बहोत बार राजन अउर नेतन भी “देवतन” कहवावत रहेन। एँह बरे इ भजन साइद कि इस्त्राएल क नेतन बरे एक ठु चेतावनी अहइ।

2परमेस्सर कहत ह, “कब तलक तू लोग अनिआव स भरा निआव करब्या? कब तलक तू लोग दुराचारी लोगन क खास सार्मथ दिखावा?

3अनाथन अउ कमज़ोर लोगन क रच्छा करा। जेनका संग उचित बेउहार नाहीं कीन्ह गवा ह। अउर दीन लोगन क अधिकारन क रच्छा करा।

4गरीब अउ बेसहारा लोगन क बचावा। दुस्टन क चंगुल स ओनका बचाइ ल्या।

5इस्त्राएली नाहीं जानते कि का कछू घटत बा एब बरे उ पचे नाहीं समझतेन। उ पचे नाहीं जानतेन कि बदी करने वाला का करत रहेन।”

6मईं कहेउँ, “तू देवतन\* अहा। तू सर्वोच्च परमेस्सर क पूत अहा।

7फिर भी तू मानव जाति क नाई मरब्या। तू पचे वइसेन मरब्या जइसे दूसर नेतन मरि जात हीं।”

8हे परमेस्सर, खड़ा हवा! धरती पइ निआव लइ आवा, काहेकि तू सारे ही देसन पइ नियन्त्रन रखत ह।

12हे परमेस्सर, उ सबइ लोग हम पचन क धरती तजइ क दबावइ चाहत रहेन।

13मोर परमेस्सर ओनका तू उखड़ा भवा पौधा सा बनावा जेका आँधी उड़ाइ लइ जात ह। ओन लोगन क अइसेन बिखराइ द्या जइसे भूसा क आँधी बिखराइ देत ह।

14दुस्मन क अइसेन बर्बाद करा जइसे वन क आगी बृच्छन क बर्बाद करत ह, अउर जइसेन जंगली आगी पहाड़न क बार डावत ह।

15एह बरे ओनका आँधी क नाई पाछा करा अउर ओनका कँपावा अउ फूँकिके उड़ा द्या जइसे कि आँधी करत ह।

16हे यहोवा उ सबइ क लज्जा स भरि द्या कि लोग तोहरे बारे में जानइ बरे तोहका तलास करईं।

17हे यहोवा, ओन लोगन क भयभीत कइ द्या अउ ओन लोगन क हमेसा अपमानित करा, ताकि उ तिरस्कार में मरि जाईं।

18तउ उ पचे जनिहीं कि तू यहोवा अहा! अउर तू ही अकेल्ला सर्वोच्च परमेस्सर अहइ जउन सारे संसार पइ सासन करत अहा।

### भजन 83

आसाफ क एक तु भजन।

1हे परमेस्सर, तू मौन जिन रहा! चुपचाप जिन रहा। हे सर्वसक्तिमान परमेस्सर, कृपा कइके सान्त जिन रहा।

2हे परमेस्सर, तोहार दुस्मन तोहरे विरोध में सड्यंत्र रचत बाटेन। जउन तोहसे घिना करत हीं अहंकारी बन जात हीं।

3उ पचे तोहरे मनवइयन क खिलाफ सड्यंत्र रचत बाटेन। तोहार दुस्मन ओन लोगन क खिलाफ जउन तोहका पिआरा अहईं सबइ योजना बनावत अहईं।

4उ सबइ दुस्मन कहत अहईं, “आवा, हम ओन लोगन क पूरी तरह मेट डाइ। तब कउनो भी मनई इस्त्राएल क नाउँ सुमिरन नाहीं करी।”

5काहेकि इ सबहिं रास्ट्रन इकट्ठा होइके तोहरे विरोध में योजना बनावत हीं। उ पचे तोहार खिलाफ एक ठ समझौता किहेन।

6उ पचे इ सामिल परिवारन एदोमी, इस्माएली, मोआबी अउर हाजिरा क संतानन क पूतन, गबाली अउर,

7अम्मोनी, अमालेकी अउर पलिस्ती, अउर सूर क लोगन क परिवारन क इ सबइ लोग हम लोगन क खिलाफ जुद्ध करइ बरे एक जुट होइ गएन।

8हिआँ तलक कि अस्सूरी भी ओन लोगन स मिल गएन। उ पचे लूत क संतानन क बहोत बलवान बनाएन।

9हे परमेस्सर तू दुस्मनन क वइसेन हरावा जइसेन तू मिद्यानी लोगन क, सिसरा क, यार्बान क, किसोन नदी क लगे याबीन क हराया।

10उ पचे एन्दोर में नास भएन। ओनकर लहासन धरती पइ पड़ी सड़त रहिन।

11दुस्मनन क सेनापतियन क वइसेन हरावा जइसेन तू ओरबे अउ जायेब क संग किहे रह्या। ओकरे सेनापतियन वइसेन हरावा जइसेन तू जेबह अउ सलमुन्ना क संग किहा।

देवतन या “निआवाधीसन” अहइ।

### भजन 84

गित्तिथ क वाद्य यंत्र क संग संगीत निर्देसक बरे

कोरह क पूरन बरे भजन गीत।

1सर्वसक्तिमान यहोवा, फुरइ तोहार पवितर मन्दिर केतौना मनोहर अहइ।

2मोर इच्छा अहइ कि मईं यहोवा क मन्दिर क आंगन में रहेउँ। मईं तोहार आवइ क बाट जोहत भए थक गवा हउँ। मोर पूरा सरीर जिअत यहोवा क संग होइ बरे रोवत ह।

3सर्वसक्तिमान यहोवा, मोर राजा, मोर परमेस्सर, गौरइया अउ सूपाबेनी तलक क आपन झोंझ होत हीं। इ सबइ पंछी तोहरी बेदी क लगे झोंझ बनावत ही अउर ओनहीं घोसलन में ओनकइ बच्चे होत हीं।

4जउन लोग तोहरे मन्दिर में रहत हीं, बहोत खुस रहत हीं। उ पचे तउ सदा ही तोहार गुन गावत हीं।

5उ सबइ लोग आपन हिरदइ में गीतन क संग जउन तोहरे मन्दिर में आवत हीं, बहोतइ आनन्दित अहईं।

6उ सबइ खुस लोग बाका घाटि जेका परमेस्सर झरना क तरह बनाएस ह गुजरत हीं गर्मी क गिरत भइ बर्खा क बूँदन जल क सरोवर बनावत हीं।

7लोग आपन परमेस्सर स मिलइ बरे सहर स सहर होत भए इ रास्ता पइ सियथोन पहाड़ पइ जात हीं।

8फउजन क परमेस्सर यहोवा, मोर पराथना सुना। याकूब क परमेस्सर तू मोर सुनि ल्या।

9परमेस्सर, हमरे संरच्छक क रच्छा करा। आपन अभिसिक्त भए राजा पइ दयालु हवा

10हे परमेस्सर, कहुँ अउर हजार दिन ठहरइ स तोहरे मन्दिर में एक दिन ठहरब उत्तिम अहइ। दुट्ट लोग क बीच बसइ स, आपन परमेस्सर क मन्दिर क दुआरे क लगे खड़ा रहइँ इहइ उत्तिम बाटइ।

11यहोवा हम लोगन क सूर्य अउर ढार अहइ। यहोवा महिमा अउ सम्मान देइ। उ जउन खरी जिन्नगी गुजारात ह ओका उ हर एक नीक चीज देत ह।

12हे सर्वसक्तिमान यहोवा, जउन लोग तोहरे भरोसे अहई उ पचे फुरइ बहोत खुस अहई।

### भजन 85

*संगीत निर्देशक बरे कोरह क पूतन बरे एक ठु भजन।*

1हे यहोवा, तू आपन देस पइ कृपालु भवा। तू विदेस भुइँया में स याकूब क सन्तानन वापिस लिआवा।

2हे यहोवा, तू आपन लोगन क पापन्क छिमा करा। तू ओनकर सबइ पाप मेट द्या। (सेला)

3हे यहोवा, कोहाइ जाब क तजि द्या। अउर तू आपन गुस्सा क लइ लिहा।

4परमेस्सर, हमार मुक्तिदाता, कृपा कइके हम पचन पइ कोहाइ जाब तजि द्या अउर हम लोगन क फुन हमार भुइँयाँ पइ वापिस लइ आवा।

5का तू हमेसा हमेसा कोहान रहब्या? का तू सदा आपन कोहान जारी रखब्या?

6कृपा कइके हमका फुन जिआइ द्या ताकि तोहार लोग तोहसे फुन स खुस होइ सकई।

7हे यहोवा, तू हमका आपन बिस्सासनीय पिरेम देखोवा। हमार रच्छा करा।

8जउन परमेस्सर कहत ह, मई ओह पइ कान दिहेउँ। उ अपने लोगन अउर अपने विस्वासी चेलों से सान्ति क वाचा करत ह उ नहीं चाहत ह कि उ पचे बेवकूफी क राहे पइ लउटि जाई।

9फुरइ, ओकर उद्धार ओन लोगन क निचके बाटइ जउन ओहसे डेरात ह, एह बरे ओकर महिमा तोहार देस में निवास करी।

10पिरेम अउर सच्चाई एक साथ मिलब। धर्मता अउ सान्ति एक दूसर क चुम्मा क संग स्वागत करिहीं।

11सच्चाई धरती स अंकुरित होइहीं, अउर धार्मिकता अकासे स बरिहीं।

12यहोवा बहोत स उत्तिम वस्तुअन क देइहीं। अउर हमार धरती प्रचुर मात्रा में फसल उपजिहीं।

13परमेस्सर क अगवा अगवा नेकी चली, अउर उ ओकरे बरे राह बनाई।

### भजन 86

*दाऊद क परथना।*

1मई एक दिन, असहाय मनई अहउँ। हे यहोवा, तू कृपा कइके मोर सुनि ल्या, अउर तू मोर बिनती क जवाब द्या।

2मई तोहार भगत हउँ, कृपा कइके मोर रच्छा करा। मई तोहार सेवक अहउँ अउर तू मोर परमेस्सर अहा। मई तोह पइ भरोसा किहेउँ, कृपा कइके मोका बचावा।

3मोर सुआमी, मोह पइ दया करा। मई सारा दिन तोहार बिनती करत रहत हउँ।

4हे मोर यहोवा, मई आपन जिन्नगी तोहार हाथन में देत हउँ। हे मोर सुआमी, मोका, आपन सेवक क सुखी बनावा।

5हे सुआमी, तू नीक अउ छिमाकर्ता अहा। तू आपन मनवइयन स बहोत पिरेम करत अहा, जउन सहारा पावइ क तोहका गोहरावत हीं।

6हे यहोवा, मोर बिनती सुनि ल्या। कृपा कइके तू आपन कान क मोर पराथना पइ दया बरे द्या।

7हे यहोवा, आपन संकट क घरी में मई तोहार बिनती करत हउँ। मई जानत हउँ तू मोका जवाब देब्या।

8हे सुआमी, तोहरे जइसा कउनो देवता नहीं अहइ। जइसेन काम तू किहा ह वइसा काम कउनो भी नहीं कइ सकत।

9हे सुआमी, तू ही सब लोगन क रच्या ह। उ पचे आइहीं अउर तोहार आराधना करिहीं। उ पचे सबहिं तोहरे नाउँ क आदर करिहीं।

10हे परमेस्सर, तू महान अहा। तू अजूबा करम करत अहा। तू अकेल्ले ही परमेस्सर अहा।

11हे यहोवा, मोका आपन राहन क सिच्छा द्या, तउ मई तोहरे सच्चाइ क अनुसार रहेबउँ। कृपा कइके मोर मदद करा, तउ मई पूरे हिरदय स तोहार उपासना करबउँ।

12हे मोर सुआमी परमेस्सर, मई सम्पूर्ण हिरदय स तोहार गुण गावत हउँ। मई तोहरे नाउँ क आदर सदा सदा ही करबउँ।

13काहेकि तू मोका बहोत जिआदा पिरेम किहा ह। तू मोका मउत क गहड़ा खाइ स बचाया ह।

14परमेस्सर, अहंकारी लोग मोह पइ वार करत अहई। क्रूर लोगन क समूह मोका मार डावइ चाहत अहई। अउर उ सबइ मनई तोहार आदर नहीं करत अहई।

15हे सुआमी, तू दयालु अउ कृपा स भरा परमेस्सर अहा। तू धीरज स भरा, बिस्सासी अउ पिरेम स भरा अहा।

16हे परमेस्सर, देखोवा कि तू मोर सुनत ह अउर मोह पइ कृपालु रहत ह। मई तोहार सेवक हउँ। तू मोका सक्ती द्या। मई तोहार सेवक हउँ। मोका बचावा!

17हे यहोवा, कछू अइसा करा जेहसे इ साबित होइ कि तू मोर सहायता करब्या। तब मोर दुस्मन एका जानिहीं अउ निरास होइ जइहीं। तउ इ परगट होइ तू उहइ अहा जउन मोर मदद किह्या अउर मोका आराम दिह्या।

### भजन 87

*कोरह परिवार क एक ठु भजन।*

1परमेस्सर यरूसलेम क पवित्तर पहाड़ियन पइ आपन मन्दिर बनाएस।

2यहोवा इस्त्राएल में कउनो भी दूसर सहर स जियादा सिथ्योन क दुआर क पसंद करत हीं।

3हे परमेस्सर क नगर, तोहरे बारे में लोग अजूबा बातन कहत हीं।

4मई सिथ्योन ओन लोगन क सूची बनाउब जउन मोका जानत ह, एहमों ओन लोगन भी सामिल अहई जउन मिश्र, बाबुल, पलिस्ती, सोर अउ इथोपिया में भी रहत हीं।

5उ हरेक जन क जउन सिथ्योन में पइदा भएन जानत ह। सर्वोच्च परमेस्सर इ सहर क स्थापना किहेस ह।

6यहोवा आपन रास्ट्रन क सूची राखत ह। उ जानत ह कि कउन सिथ्योन में पइदा भवा ह। सेला

7ओकर मनवइयन बहोत खुसी स गावत अउर नाचत हीं। उ पचे कहा करत हीं, “सबहिं उल्लिप्त चिजियन यरूसलेम स आइना।”

### भजन 88

संगीत निर्देशक बरे। कोरह परिवारन एज्रा-बंसी हेमान क

एक तु मस्किल। “माहालाथ लआन्नोथ” राग पइ।

1हे परमेस्सर यहोवा, तू मोर उद्धारकर्ता अहा। मई तोहार रात-दिन विनती करत रहत हईं।

2कृपा कइके मोर पराथना पइ धियान द्या। मोह पइ दाया कइके मोर पराथना सुना।

3मई आपन दुर्दसा स तंग होइ गवा हँउ। बस मई हाली ही मरि जाब।

4लोग मोरे संग मुर्दा जइसा बेउहार करइ लागेन ह। उ मनई क तरह जउन जिअत रहइ बरे बहोत कमजोर अहईं।

5मोका मुर्दा लोगन क बीच में रखा गवा ह। मई कब्र क मुर्दन जइसा हईं जेका तू बिसर जाब्या। अउर जेका तोहरे उपस्थिति स हटाई दीन्ह गवा अहइ।

6हे यहोवा, तू मोका कब्र क सबसे गहरी खाई में डाइ दिहा ह। तू मोका घोर अँधेरी जगह में रख दिहा ह।

7हे परमेस्सर, तोहका मोह पइ किरोध रहा, एह बरे तू मोका आपन किरोध क तरंगन स बर्बाद किहा ह।

8तू मोका मोरे मीत लोगन स अलगाइ दिहा। एह बरे उ पचे मोसे अलग रहइ क जतन करत अहईं, काहेकि तू मोका अइसा मनई बनाए अहा जेका कउनो भी छुअइ नाहीं चाहत ह। मई आपन घरे क ही भीतरे बंदी बनि गवा हईं अउर मई बाहेर जाइ नाहीं सकत हईं।

9विपदा क कारण मोर आँखिन में पीड़ा अहईं। हे यहोवा, मई तोहसे निरन्तर पराथना करत हईं अउर तोहार समर्थन में मई आपन हाथ उठावत हईं।

10हे यहोवा, का तू मृतक लोगन बरे अचरज भरा काम करब्या? का इ सम्भव अहइ कि एक मरा भवा आत्मा तोहार उपासना करी? (सेला)

11जउन मरा भए अहईं उ पचे आपन कब्र में स ओकरे कइँती तोहरे पिरेम क बारे में बताइ सकतेन। मरे भए लोगन मृत्युलोक स ओकरे कइँती तोहरी बिस्सास क नाहीं बताइ सकतेन।

12मरे भए लोग अँधियारे में सोवत हीं उ पचे ओन अद्भुत बातन क जेनका तू करत अहा, नाहीं लिख सकतेन। उ पचे छोड़ा भवा भुईँया में तोहार कीन्ह भवा धार्मिकता क बारे में नाहीं बताइ सकतेन।

13मुला मई मदद बरे तोहका गोहराएउँ ह, हे यहोवा। हर भिन्सारे मई तोहार समन्वा पराथना करत हईं।

14हे यहोवा, तू मोका काहे तजि दिहा ह? तू मोर सुनइ स काहे मना करत अहा?

15बचपन स ही मई सतावा गवा हईं अउर मउत क धमकी दीन्ह गवा हईं। मई असहाय हईं।

16तोहार गुस्सा मोका ढाँपि लिहे अहइ अउर तोहार आतंक मोका मार डावत ह।

17उ मोका बाढ़ क पानी क समान चारिहँ कइँती स घेरिके राखेस ह। उ मोका पूरी तरह स ढाँपिके राखेस ह।

18हे यहोवा, तू मोरे मीत अउ प्रिय मनइयन क मोका छोड़िके चला जाइ क मजबूर कइ दिहा। मोरे संग सिरिफ केवल अँधियारा ही रहत ह।

### भजन 89

एज्रा-बंसी एथान क एक तु मस्किल।

1मई हमेसा यहोवा क पिरेम क गीतन क गाउब। मई ओकरी हमेसा ओकरी बिस्सासी क गीत गावत रहब।

2हे यहोवा, मोका सचमुच बिस्सास अहइ, तोहार पिरेम अमर अहइ। तोहार बिस्सास लम्बी अकास क नाई अहइ।

3यहोवा परमेस्सर कहत ह, “मई आपन चुने भए राजा क संग एक तु करार किहेउँ ह। आपन सेवक दाऊद क मई वचन दिहेउँ ह।

4दाऊद तोहरे बंस क मई हमेसा बरे अमर बनाउब। तोहरे राज सदा सदा बरे बनाइ रखबेउँ।”

5हे यहोवा, तोहरे ओन अद्भुत करमन क अकास स्तुति करत हीं। सरगदूतन क सभा तोहरी ईमानदारी क गीत गावत हीं।

6सरगे में कउनो मनई यहोवा क तुलना नाहीं कइ सकत। कउनो भी देवता यहोवा क समान नाहीं।

7पवित्तर सरगदूतन क सभा में परमेस्सर अत्यंत सम्मानित बाटइ। उ सबइ जउन ओकर चारिहँ कइँती अहइ, क जरूर डरइ चाही अउर ओकर आदर करइ चाही।

8सर्वसक्तिमान परमेस्सर यहोवा, तोहस जियादा कउनो सक्तीसाली नाहीं अहइ। अउर यहोवा तू हमेसा भरोसेमन्द अहा।

9तू गरजत समुद्दर पइ सासन करत अहा। तू ओकर उमंगित तरंगन क सांत करत अहा।

10हे परमेस्सर, तू ही अहा जउन राहाब\* क हराए रह्या अउर ओका जुद्ध में मार डाए रह्या। तू आपन महासक्ती स आपन दुस्मन बिखराइ दिह्या।

11सरग अउ धरती तोहार अहइ। उ तू ही अहा जउन इस संसार क बनाय अउर संसार में क हर वस्तु रच्या।

12तू ही सब कछू उत्तर दक्खिन रच्या ह। ताबोर अउ हर्मोन पर्वत तोहार गुन गावत हीं।

13तू सक्तीसाली अहा। तोहार सक्ती महान अहइ। तोहार सक्ती क सम्मान कीन्ह जात हीं।

14तोहार राज धार्मिकता अउ निआउ पइ टिका बाटइ। पिरेम अउ बिस्सासी तोहरे सेवा करत अहईं।

15जउन तोहमों खुस अहईं उ धन्न अहईं। उ पचे तोहरी समर्थन क प्रकास में जिअत रहत हीं।

16तोहार नाउँ ओनका सदा खुस करत ह अउर तोहार धार्मिकता क कारण उ सम्मान पावत ह।

**राहाब** अजगर या सागरे क दैत्य अहइ। लोग सोचत अहीं कि राहाब सागरे पइ नियंत्रन रखत ह। अकसर राहाब परमेस्सर क दुस्मन क या कउनो बुरा काम करइ क प्रतीक रहा।

17तू ओनकर सक्ती क अद्भुत स्रोत अहा। उ तोहार समर्थन क कारण तोहसे सक्ती पावत ह।

18काहेकि हमार रच्छा यहोवा स सम्बंधित अहइ। हम लोगन क राजा इस्राएल क पवित्तर क कइँती स अहइ।

19एक बार दर्सन में तू आपन सच्चे मनइयन स कहे रहा, “मई ओनका मदद दिहै हउँ जउन मज़बूत अहइ, मई लोगन क बीच में स नउ जवान मनई क प्रतिष्ठित किहेउँ।

20मई आपन सेवक दाऊद क पाइ लिहेउँ, अउर मई ओकर ताजपोसी किहेउँ ह अउ ओकरे अभिसेक आपन तेल स किहेउँ ह।

21मई आपन दाहिने हाथे स दाऊद क सहारा दिहेउँ, अउर मई ओका आपन सक्ती स बलवान बनाएँ।

22कउनो दुस्मन चुने भए राजा क धोखा नाहीं देइ सकतेन। दुट्ट जन ओहे पइ अत्याचार नाहीं कइ सकतेन।

23मई ओकरे दुस्मनन क समाप्त कइ दिहेउँ। जउन लोग चुने भए राजा स बैर राखत रहेन, मई ओनका हराइ दिहेउँ।

24मई हमेसा आपन चुने भए राजा स पिरेम राखब अउर ओका समर्थन देब। उ मोहे पइ निर्भर रहिके मोर सक्ती स भरि जाइ।

25मई आपन चुने भए राजा क महासागर क नियंत्रक तइनात करब। उ नदियन पइ हुकुमत करी।

26उ मोहसे कही, ‘तू मोर पिता अहा। तू मोर परमेस्सर। मोर चट्टान अउ मोर उद्धारकर्ता अहा।’

27मई ओका आपन पहिलौटा पूत बनाउब। उ सबइ राजन पइ प्रमुख होइ।

28मई सदा ओका आपन पिरेम दिखावत हउँ। मोर करार ओकरे संग दृढ़ता स स्थापित होइ।

29मई इ बंस क अमर बनाउब। ओकर सासन हुआँ तब तलक टिका रही जब तलक कटनी क समई रही।

30अगर ओकर संतानन मोर कानून अउर आदेस क पालन तजि दिहन ह, अउर अगर उ लोग मोरे उपदेसन क मानब तजि दिहन ह।

31अगर मोर अभिसिक्त राजा क संतानन मोरे कानून क पालन नाहीं किहन अउर अगर मोरे आदेसन क न मानेन।

32तउ मई ओकर बिद्रोह बरे ओका दण्ड देइ बरे अधर्म चिजियन क न होइ देब, अउर मई ओकरे आग्याभंग करइ बरे मनइयन क दण्ड क रूप में देब।

33मुला मई ओन लोगन क परिवार स आपन पिरेम क नाहीं हटाउब। मई सदा ही ओनके बरे बिस्सासी रहब।

34जउन करार मोर दाऊद क संग अहइ, मई ओका नाहीं तोड़ब। मई आपन वाचा क नाहीं बदलब।

35मई आपन पवित्तरता प्रतिग्या लेब, अउर मई ओहे स आपन वाचा क नाहीं तोड़ब।

36दाऊद क बंस हुवाँ सदा बना रही। जब तलक हुवाँ सूरज रही तब तलक ओकर सिंहासन भी रही।

37उ सदा हुवाँ रहब। निहचय ही जब तलक आकासे में चन्द्रमा साच्छी रही तब तलक लगातार रही। (सेला)

38मुला अब, तू ओकर अपमान किहा ह अउर ओका तजि दिहा ह। तू आपन अभिसिक्त राजा पइ कोहाइ गवा ह।

39तू आपन सेवक क कीन्ह भवा करार क रद्द कइ दिहा। तू ओकरे मुकुट धूरी में लोकाइ दिहा।

40तू राजा क नगर क देवारन बर्बाद कइ दिहा, तू ओकरे सब किला क तहस नहस कइ दिहा।

41राजा क पड़ोसी ओह पइ हँसत अहइँ, अउर उ सबइ लोग जउन पास स गुजरत हीं, ओनकर चिजियन क चोराइ लइ जात हीं।

42तू राजा क दुस्मनन क खुस किहा। तू ओकरे दुस्मनन क जुद्ध में जिताइ दिहा।

43तू ओकरे तरवार क जुद्ध में असफल किहा। तू आपन राजा क जुद्ध जीतइ में मदद नाहीं किहा।

44तू ओकरे खास स्थान क समाप्त कइ दिहा ह, अउर तू ओकर पवित्तर सिंहासन क तू धरति पइ पटक दिहा।

45तू ओकरे जवानी क दिनन क घटा दिहा ह।

46हे यहोवा, इ कब तलक रही? का सदा-सदा हमार मदद नाहीं करब्या? का तू सदा सदा बरे आपन किरोध आगी क नाई धधकत भए रखब्या?

47याद करा मोर जिन्नगी केंतनी अल्पकालीन अहइ। तू ही हमका नान्ह जिन्नगी जिअइ अउर फुन मरि जाइ क रच्या ह।

48अइसा कउनो मनई नाहीं जउर सदा जिई अउर कबहुँ नाहीं मरी। कब्र स कउनो मनई बच नाहीं पाई। (सेला)

49हे सुआमी, उ पिरेम कहाँ अहइ जउन तू अतीत में देखौए रह्या अउर तू आपन बिस्सास क दाऊद क वचन दिह्या।

50हे सुआमी, कृया कइके याद करइ क जतन करा, कि लोगन तोहरे सेवक क कइसे अपमानित किहन।

51मई आपन हिरदय में बहोत सारे रास्ट्रन क अपमान क सहन किहे हउँ। केकरे बारे में तोहार दुस्मन मज़ाक उड़ाएन, हे यहोवा? तोहरे चुने भए राजा क उ पचे अपमानित किहेन ह।

52यहोवा, क हमेसा ही स्तुति होइ। आमीन आमीन!

## चउथा भाग

### भजन 90

*परमेस्सर क भक्त मूसा क परथना।*

1हे सुआमी, तू अनादि काल स हमार घर (सुरच्छा स्थल) रहा बाटइ।

2हे परमेस्सर, तू पर्वतन क पड़दा होइ स पहिले मौजूद रह्या। तू धरती अउर संसार क रचई स पहिले मौजूद रह्या। सुरू स अन्त तलक रह्या। तू सदा ही परमेस्सर रहब्या।

3तू ही इ जगत में लोगन क लिआवत ह। फुन स तू ही ओनका धूरी में बदल देत ह।

4तोहरे बरे हजार बरिस बीते भए काल्हि जइसेन या राति क एक ठ पहर बीत गवा बाटइ।

5तू मोर जिन्नगी क सपना क झरना क आसीस दिहा। अउर हम पचे बहोत भिंसार ही चला जात अही।

6जउन भिंसारे उगत ह अउर उ साँझ क सूखिके मुरझाइ जात ह।

7हे परमेस्वर, जब तू कोहाइ जात ह हम पचे बर्बाद होइ जात अही। हम तोहरे कोप स घबरान अही।

8तू हमरे सब पापन क जानत अहा। तू हमार हर छिपा भवा पाप क लखा करत अहा।

9जब तू किरोधित होत ह, हमार सबइ दिनन लुप्त होइ जात हीं अउर हमार बरिसन फुसफुसाहट क नाई खतम होइ जात हीं।

10हम पचे सत्तर बरिस तलक जिअत रहि सकित ह, अगर हम पचे सक्तीसाली अही तउ अस्सी बरिस जी सकी। हमार जिन्नगी कठिन परिस्त्रम अउ पीरा स भरी अहइ। एकाएक हमार जिन्नगी खतम होइ जात ह अउर हम पचे उड़िके चला जाइत ह।

11तोहरे किरोध क सक्ती क अउर तोहार भय योग्य गुस्सा क कउन जानत ह।

12तू हमका सिखाइ द्या कि हम पचे फुरइ इ जानी कि हमार जिन्नगी केर्तेनी कम अहइ। ताकि हम पचे बुद्धिमान बनि सकी।

13हे यहोवा, तू सदा हमरे लगे लउटि आवा। हम केर्तेना दिन प्रतीच्छा करी? आपन सेवकन पइ दया करा।

14हर रोज भिंसारे हम पचन क आपन सच्चा पिरेम स भरि दया। ताकि हम लोग आपन जिन्नगी क हर एक दिन आनन्दित होइ खुसी मनाइ।

15तू हम पचन क वइसा ही आनन्दित होइ द्या जइसा तू पहिले हमका पीरा दिहा रहा।

16तोहरे दासन क ओन अद्भुत बातन क लखइ द्या जेनका तू ओनके बरे कइ सकत ह, अउ आपन सन्तानन क आपन महिमा देखेवा।

17परमेस्वर, हमार सुआमी, हम पचन पइ कृपालु हवा। हम लोगन क उ कार्य दिखावा जेका हम लोगन क करइ चाही अउर हम लोगन क कार्य क कामयाब बनावा।

### भजन 91

1उ जउन कउनो सर्वोच्च परमेस्वर क सरण मैं रहत ह, तउ उ सर्वसक्तिमान परमेस्वर क सुरच्छा मैं रहत ह।

2मइँ यहोवा स कहत हउँ, “तू मोर सुरच्छा स्थल अहा मोर गढ़। हे परमेस्वर, मइँ तोहरे भरोसे हउँ।”

3यहोवा तोहका सबहिं छिपे भए खतरा स बचाइ। उ तोहका सब खउफनाक विपत्तियन स बचाइ।

4तू परमेस्वर क सरण मैं संरच्छण पावइ बरे जाइ सकत ह। उ तोहार अइसे रच्छा करी जइसे एक ठु पंछी आपन पखना फइलाइके आपन बच्चन क रच्छा करत ह। परमेस्वर क बिस्सास एक बिसाल ढाल क नाई अहइ जउन चारिहूँ कइँती स रच्छा करत ह।

5शति मैं तोहका कउनो क भय नाहीं होइ, अउ दुस्मन क बाणन स तू दिन मैं डेराब्या नाहीं।

6तोहका अँधियारे मैं आवइवालन रोगन अउ उ खउफनाक रोग स जउन दुपहर मैं आवत हीं डर नाहीं होइ।

7तू हजार दुस्मनन क हराइ देब्या। तोहार खुद दहिना हाथ दस हजार दुस्मनन क हराइ। अउर तोहार दुस्मन तोहका छुइ तलक नाहीं पइहीं।

8जरा लखा, अउर तोहका देखेँइ देइ कि उ पचे कुटिल मनई सजा पाइ चुका अहइँ।

9काहेकि तू यहोवा क भरोसे अहा। तू परम परमेस्वर क आपन सरणस्थल बनाया ह।

10तोहरे संग कउनो भी बुरी बात नाहीं घटी। कउनो भी रोग तोहरे घर क नजदीक नाहीं आइ।

11काहेकि परमेस्वर आपन सरगदूतन क तू जहाँ भी जाब्या हुआँ तोहार रच्छा करइ बरे नियुक्त करी।

12ओकर सरगदूतन तोहका आपन हाथन पइ ऊपर उठइहीं, ताकि तोहार गोइ चट्टान स न टकराइ।

13तू कोबरा अउर नाग पइ बगैर कउनो नोस्कान क चलब्या; तू सेर अउर अजगर क कुचरब्या।

14यहोवा कहत ह, “मइँ आपन सेवकन क रच्छा करब जउन मोहसे पिरेम करत ह। मइँ ओनेँ व्यक्ति क पालन-पोसन करब जउन मोर उपासना करत ह।”

15उ सहारा पावइ बरे मोका गोहरइहीं, मइँ ओनकर जवाब देब। उ पचे जब कस्ट मैं होइहीं मइँ ओनके संग रहब। मइँ ओनकर बचाव करब अउर ओनका आदर देब।

16मइँ आपन व्यक्तियन क एक लम्बी उमिर क आसीस देब। अउर मइँ ओका ओकर आपन बचान क सकित दिखाउब।

### भजन 92

*सबित क दिन बरे एक ठु स्तुति गीत।*

1यहोवा क महिमा क स्तुति करइ नीक अहइ। हे सर्वोच्च परमेस्वर, तोहरे नाउँ क गुणगान बरे नीक अहइ।

2भोर मैं तोहरे पिरेम क गीत गाउब अउ राति मैं तोहरे बिस्सास क गीत गाउब नीक अहइ,

3हे यहोवा तोहरे बरे दस तार वाद्य यंत्रन, सारंगियन अउ वीणन पइ संगीत बजाउब नीक बाटइ।

4हे यहोवा, तू फुरइ हमका आपन कीन्ह कामन स आनन्दित करत ह। हम आनन्द स भरिके ओन गीतन क गाइत ह, जउन काम तू किहा ह।

5हे यहोवा, तू महान कारज किहा ह। तोहार सोच-बिचार हमरे बरे समुझि पावइ आसान नाहीं अहइँ।

6लोग मूरख गोरुअन क जइसे अहइँ। मूरख जइसे तोहार सोच-बिचार क नाहीं समुझ पाइत।

7दुटठ जन घास क नाई पनपत हीं। उ पचन्क दुआरा कीन्ह भवा सबइ बेकार अबहीं फलत-फूलत हीं, किन्तु सदा-सदा बरे खतम होइ जइहीं।

8मुला हे यहोवा, अनन्त काल तलक तोहार आदर रही।

9हे यहोवा, तोहार दुस्मनन बर्बाद कइ दीन्ह जइहीं। उ सबहिं मनई जउन बुरा काम करत हीं, तितर-बितर कइ दीन्ह जइहीं।

10मुला तू मोका जंगली बर्धा क नाई मजबूत बनाया ह। हम बरियार भेड़ा स बन जाब जेकर करेँ सींग होत हीं तू मोह पइ खास तेल उड़ेर्या ह जउन ठंडापन देत ह।

11मइँ लखेउँ ह कि मोर दुस्मन मोका लखत हीं; मइँ सुनेउँ ह कि दुटठ लोग मोह पइ हमला करइ बरे तइयार बाटेन।



12नीक मनइयन लबानोन क बड़वार देवदार बृच्छ क तरह अहई जउन यहोवा क मन्दिर में रोपा ग अहई।

13नीक मनइयन बाढ़त भए ताड़ क बृच्छ क नाई अहई, जउन हमार परमेस्सर क मन्दिर क आँगन में फलदार होत अहई।

14उ पचे जब तलक बुढ़वा होइहीं तब तलक उ पचे फल देत रइहीं। उ पचे हरे भरे मोटा बृच्छ जइसे होइहीं।

15उ पचे हर कउनो क इ देखोवइ बरे हुआँ अहई कि यहोवा बिस्सास योग्य अहइ। उ मोर चट्टान अहइ। ओहमाँ कछू बुराइ नाहीं बाटइ।

### भजन 93

1यहोवा सासन करत ह! उ महिमा अउर सक्ति क पहिर लिहस ताकि धरती स्थिर रहइ अउर गिरे नाहीं।

2हे परमेस्सर, तोहार साम्राज्य अनादि काल स टिका भवा अहइ। तू सदा जिअत अहा।

3हे यहोवा, नदियन क गर्जन बहोत तीव्र बा। ओनकर लहरन क नस्त करइया अहइ।

4समुद्र क पछारा खात भइ लहरन गरजत हीं, अउर उ सबइ सक्तीसाली अहई। मुला ऊपर वाला यहोवा जियादा सक्तीसाली अहइ।

5हे यहोवा, तोहार कानून बहोत स्थिर अहइ। तोहार पवित्र मन्दिर लम्बी समई तलक खड़ा रही।

### भजन 94

1यहोवा तू परमेस्सर अहा जउन कि निआव लिआवत ह। निआव क परमेस्सर आपन क परगट करा।

2उठा, हे धरती क निआउकर्ता। तू घमण्डी लोगन क उचित सजा देत ह।

3हे यहोवा, दुट्ट जन कब तलक मजा मारत रइहीं? केतौना देरी तलक?

4उ सबइ दुट्ट-जन कब तलक आपन बुरे कामन क बारे में डीगं हँकत अउर सेखी बघारत रइहीं?

5हे यहोवा, उ सबइ लोग तोहार लोगन क मुसीबत में डालेन ह। उ पचे तोहरे आपन लोगन क सतावा करत हीं।

6उ पचे रँड अउरतन अउर ओन मेहमानन क जउन ओनके देस में ठहरा अहई, मारत हीं। उ पचे ओन अनाथ गदेलन क कतल करत हीं।

7उ पचे कहत हीं, यहोवा ओनकर बुरा करम करत भए नाहीं लिख सकत। अउर कहत हीं, 'इन्नाएल क परमेस्सर ओन बातन क नाहीं समुझत जउन घटति अहई।'

8ओ बुद्धिहीन लोग, तू कब आपन पाठ सिखब्या? अरे मूख लोगो, जतन करा अउर समुझया।

9परमेस्सर हमार कान बनाएस ह, तउ निहचय ही उ सुन सकिहीं। परमेस्सर हमार आँखिन बनाएस ह, तउ निहचय ही देख सकत हीं।

10उ रास्ट्रन क सम्मान करत हीं, तउ निहचय ही उ तोहार निआव कइ सकत ह। उ ओन लोगन क ओन सबहि बातन क सिच्छा देइ जउन ओनका करइ चाही।

11तउ जउन बातन क लोग सोचत अहई यहोवा जानत अहइ। उ इ जानत अहइ कि ओकर जोजनन हवा क झोंका अहई।

12तू लोग धन्न अहा जेका तू सम्मान देत ह, हे यहोवा। तू ओन लोगन क आपन कानून सिखावत ह।

13तू ओनका ओकरे विपत्तियन में सांत होइके सहायक करत ह, जब तलक दुट्ट लोग कब्र में नाहीं दफनाइ दीन्ह जइहीं।

14यहोवा आपन लोगन क कबहुँ नाहीं तजी। उ बिना सहारे ओका रहइ नाहीं देइ।

15निआउ लउटब अउर इमानदारी लिआइ। फुन लोग खरा बनिहीं।

16मोका दुट्टन क खिलाफ जुद्ध करइ मैं कउनो मनई सहारा नाहीं दिहस। कुकर्मियन क खिलाफ जुद्ध करइ मैं कउनो मोर संग नाहीं दिहस।

17यहोवा मोर सहायक नाहीं होत, तउ मोर जिन्गी मउत क दुआरा सांत होइ जाइतेन।

18जब मई गिरइ क रहेउँ, तोहार पिरेम मोका उठाएस, हे यहोवा।

19जब मई बहोतइ चिंतित अउ बियाकुल रहेउँ, तोहार सुख मोका आनन्दित किहस।

20हे परमेस्सर, तू कुटिल निआउ क मदद नाहीं करत्या, जउन परीसानी पइदा करइ बरे नेमन क घेर लेत ह।

21उ पचे नीक लोगन पइ हमला करत ह अउर निर्दोख व्यक्ति क कसूरवार कहत ह।

22मुला यहोवा मोर सुरच्छा क ठउर बाटइ। परमेस्सर मोर चट्टान अउर मोर सरण क ठउर अहइ।

23परमेस्सर ओनका ओकरे बुरा करमन बरे सजा देइ। उ ओका ओकरे पाप क कारण खतम कइ देइ। हमार परमेस्सर यहोवा ओनका नस्त कइ देइ।

### भजन 95

1आवा हम यहोवा क गुण गाई। आवा हम पचे उ चट्टान क जय जयकार करी जउन हमार रच्छा करत ह।

2आवा हम यहोवा क धन्यवाद बरे गीत गाई। आवा हम ओकर बड़कई क गीत आनन्द क संग गाई।

3काहेकि यहोवा महान परमेस्सर अहइ। उ महान राजा सबहि दूसर "देवतन" पइ सासन करत ह।

4गहिर सबइ गुफा अउ ऊँच पहाड़ यहोवा क अहई।

5सागर ओकर बा, उ ओका बनाएस ह। परमेस्सर खुद आपन हाथन स झुरान धरती क बनाएस ह।

6आवा, हम ओका पइलगी करी अउर ओकर उपासना करी। आवा हम परमेस्सर क गुण गाई जउन हमका बनाएस ह।

7उ हमार परमेस्सर अउर हम पचन ओकर बगल में भेड़ अही। कम स कम यदि तू आजु ओकर आवाज़ क पालन करब्या।

8यहोवा कहत ह, "तू मोका सुनई स वइसा इनकार जिन करा जइसा मरीबा मैं तोहार पुरखन किहे रहेन, अउ वइसा जिन करा जइसा उ पचे मस्सा मैं रहइ क दिन मैं किहे रहेन।

9तोहार पुरखन मोका परखे रहेन। उ पचे मोका परखेन, पर तब उ पचे लखेन कि मई का कइ सकत हउँ।

10मई ओन लोगन क चालीस बरिस तलक सहन किहे रहेउँ। मई इ अच्छी तरह जानत रहेउँ कि उ पीढ़ी इमानदार नाहीं अहइ। ओन लोगन मोर सिच्छा क नाही सीखेन।

11तउ मई कोहाइ गएउँ अउर मई प्रण किहेउँ कि उ पचे मोर भुइँया मँ आइववाले समई मँ प्रवेस नाहीं कइ पइहीं।”

### भजन 96

1यहोवा बरे एक तु गीत गावा। हे समस्त ब्रह्माण्ड यहोवा बरे गीत गावा।

2यहोवा बरे गावा। ओकरे नाउँ क धन्न कहा। हर दिन इ ओकरे उद्धार क बारे मँ सुसमाचार क सुनावा।

3दूसर रास्ट्रन क बतावा कि यहोवा फुरइ अद्भुत बाटइ। सब कतहूँ क लोगन मँ ओन अद्भुत बातन क जेनका उ करत ह बखान करा।

4यहोवा महान बा अउर बड़कई क जोग बा। उ कउनो “देवतन” स जियादा स्रद्धालु बा।

5दूसर रास्ट्रन क सबहिं “देवतन” सिरिफ मूर्तियन अहइँ, मुला यहोवा अकासन क रवेस।

6ओकरे समन्वा सुन्दर महिमा दमकत बा। परमेस्सर क पवित्तर मन्दिर सामरथ अउ सुन्दरता अहइँ।

7हे वंसो, अउर रास्ट्रो, यहोवा बरे महिमा अउर बड़कई क गीत गावा।

8यहोवा क नाउँ क गुणगान करा। आपन भेंटन उठावा अउ मन्दिर मँ जा।

9यहोवा क ओकर भव्य, मन्दिर मँ उपासना करा। अरे ओ धरती क मनइयो, यहोवा क उपासना करा।

10रास्ट्रन क जानइ द्या कि यहोवा राजा अहइ। निहचय ही उ उहइ अहइ जउन जगत क स्थिर अउर अखण्ड बनाएस ह। यहोवा मनइयन पइ निआउ स सासन करी।

11अरे अकास, खुस हवा। हे धरती, आनन्द मनावा। हे सागर, अउर ओहमाँ क सबइ चिजियन क आनन्द स ललकारा।

12अरे ओ खेतो अउर ओहमाँ उगइवाली हर वस्तु आनन्द स भरपूर होइ जा। हे जंगल क बृच्छो गावा अउर आनन्द मनावा।

13आनन्द स भरपूर होइ जा काहेकि यहोवा आवत अहइ। यहोवा जगत क सासन करइ आवत अहइ, उ खरेपन स निआउ करी।

### भजन 97

1यहोवा सासन करत ह, धरती क खुस रहइ द्या; दूर क देसन क प्रसन्न होइ द्या।

2यहोवा क करिया गहिर बादर घेरे भए अहइँ। नेकी अउ निआउ ओकरे राज्ज क मजबूत किहे अहइँ।

3यहोवा क समन्वा आगी चला करत ह, अउर उ ओकरे आपन दुस्मनन क नास करत ह।

4ओकर बिजुयी संसार क प्रकासित करत ह। लोग ओका लखत ही अउर डेरन रहत हीं।

5यहोवा क समन्वा पहाइ अइसे पिघल जात हीं, जइसे मोम पिघल जात ह। उ समूचइ धरती क सुआमी अहइ।

6अकास ओकरी नेकी क बखान करत हीं। हर कउनो परमेस्सर क महिमा लिखि लेइ।

7सबइ लोग जउन मूरतियन क पूजा करत हीं अउर ओकरे बियर्थ बातन बरे डींग हाँकत हीं, लजाइ जाइहीं। सबइ देवतन ओकरे समन्वा निहुरिहीं।

8हे सिय्योन, सुना अउ खुस हवा। हे यहूदा क सहरन, खुस हवा, तोहार निआउ क कारण, हे यहोवा।

9हे सर्वोच्च यहोवा, फुरइ तू ही धरती पइ सासन करत ह। तू दूसर “देवतन” स जियादा उत्तिम अहा।

10जउन लोग यहोवा स पिरेम रखत हीं, उ पचे पाप स घिना करत हीं। एह बरे उ आपन लोगन क रच्छा करत ह। उ ओन लोगन क दुट्ठ लोगन स बचावत ह जउन ओकरे बिस्सासी अहइँ।

11धर्मी लोगन पइ जोति छितराएस ह अउ इमानदार-जन बरे आनन्द फइलाएस ह।

12हे धर्मी लोगो, परमेस्सर मँ खुस रहा। ओकरे पवित्तर नाउँ क धन्यवाद द्या।

### भजन 98

एक तु स्तुति गीत।

1यहोवा बरे एक नवा गीत गावा, काहेकि उ नई अउ अद्भुत बातन क किहस ह। ओकर पवित्तर दाहिन भुजा ओकरे बरे फुन बिजय बनाई।

2यहोवा रास्ट्रन क समन्वा आपन रच्छा क सक्ती क परगट किहस ह। उ ओनका आपन बिजय देखौएस ह।

3उ इस्त्राएल पइ आपन पिरेम अउर बिस्सास क स्मरण किहस ह। दूर रास्ट्रन क लोग हमरे परमेस्सर क रच्छासक्ती निहारेन।

4हे धरती क हर मनई, चिचियाइके स्तुति कइके यहोवा क सुआगत करा। फूट पड़ा! चिचियावा! गावा!

5वीणन क संग यहोवा बरे गावा। मधुर स्वर स वीणा बजाइके, ओकर महिमा क स्तुति करा।

6वीणाओ, यहोवा क गुण गावा। हे बिगुल के मधुर संगीत ओकर गुण गावा, ओकर महिमा क स्तुति करा।

7बाँसुरी बजावा अउर नरसिंगन क फूँका। आनन्द स यहोवा, हमरे राजा क जय जयकार करा।

8हे सागर अउ धरती, अउ ओनमाँ क सबइ चिजियन ऊँच सुर मँ गावा।

9इ यहोवा क समन्वा होइ, काहेकि उ संसार क निआव करइ बरे जात ह। उ संसार क धार्मिकता स अउर ओकरे लोगन क इमानदारी स निआव करी।

10तू यहोवा क समन्वा गावा, काहेकि उ जगत क सासन करइ जात अहइ, उ जगत क निआउ नेकी अउ सच्चाई स करी।

### भजन 99

1यहोवा सासन करत ह। तउ हे रास्ट्रन, भय स काँप उठा। उ करूब दूतन ऊँपर आपन सिंहासन पइ विराजमान अहा। तउ हे संसार भय स काँपि उठा।

2यहोवा सिय्योन में महान अहइ। सारे रास्ट्रन क उहइ राजा अहइ।

3सबहिं लोगन क तोहरे महान अउर भय योग्य नाउँ क गुण गावइ द्या। परमेस्सर पवित्त बा।

4सक्तीसाली राजा क निआउ भावत ह। तू ही अहा जउन नेकी क स्थापना किहा ह। तू ही अहा जउन इस्त्राएल बरे निआव अउर खरापन क स्थापना किहा ह।

5यहोवा हमरे परमेस्सर क गुणगान करा। अउर ओकरे चउकी\* चरण निहुरिके दण्डवत करा। उ पवित्त अहइ।

6मूसा अउ हारून यहोवा क याजकन रहेन। समूएल ओन में स एक रहा जउन ओकरे नाउँ लेइवाला रहा। उ सबइ ओकर पराथना किहेन। अउर उ ओनका जवाब दिहस।

7उ बादर क खम्भा में स बातन किहेस। उ पचे ओकरे आदेसन क मानेन। परमेस्सर ओनका कानूनन क हुकुमन दिहेस।

8हे यहोवा हमार परमेस्सर, तू ओनकर पराथना क जवाब दिहा। तू ओनका इ देखाया कि छमा करइवाला परमेस्सर अहा, अउर तू लोगन क ओनकर बुरा कर्मन बरे सजा देत अहा।

9हमार परमेस्सर यहोवा बरे एक तु गीत गावा। ओकरे पवित्त पहाड़े कइँती निहुरिके ओकर उपासना करा। फुरइ यहोवा हमार परमेस्सर पवित्त अहइ।

### भजन 100

*धन्यवाद क एक तु गीत।*

1हे धरती, तू यहोवा बरे गावा।

2आनन्द स रहा जब तू यहोवा क सेवा करा। खुसी क गीतन क संग यहोवा क समन्वा आवा।

3तू जान ल्या कि यहोवा ही परमेस्सर अहइ। उ हमका बनएस ह अउ हम ओकर भगत अही। हम ओकर भेड़ अही।

4धन्यवाद क गीत संग लिए यहोवा क नगर में आवा, गुणगान क गीत संग लिए यहोवा क मन्दिर में आवा। ओकर आदर करा अउर ओकर नाउँ क धन्य करा।

5यहोवा उत्तिम अहइ। ओकर पिरेम सदा सदा ही अहइ। हम ओह पइ सदा सर्वदा बरे भरोसा कइ सकित ह।

### भजन 101

*वाक़द क एक तु गीत।*

1मई पिरेम अउ खरेपन क गीत गाउब। यहोवा मई तोहरे बरे गाउब।

2मई पूरी सावधानी स सुद्ध जिन्नगी बिताउब। मई आपन घर में सुद्ध जिन्नगी जिअब। हे यहोवा तू मोरे लगे कब अउब्या?

3मई कउनो भी बियर्थ मूरति समन्वा नाहीं राखब। जब लोग तोहार खिलाफ विद्रोह करत हीं तउ मई इ स घिना करत हँ। मई कबहुँ भी एकर हिस्सा नाहीं बनब।

4मई इमानदार रहब। मई बुरा काम स कबहुँ सम्बंध नाहीं राखब।

5अगर कउनो मनई छिप छिपके आपन पड़ोसी बरे चुगली कहइ, मई ओनका रोकब। मई डींग हाँकइवाला अउर महत्वाकांछी व्यक्तिन क सहन नाहीं करब।

6मई आपन संग काम करई बरे बिस्सासी लोगन क दूढ़ता हँ। सिरिफ ओन लोग मोर सेवक होइ सकत हीं जउन इमानदारी स जिन्नगी जिअत हीं।

7मई आपन घरे में अइसे लोगन क रहइ नाहीं देब जउन झूठ बोलत हीं। मई झूठ लोगन क आपन लगे भी फटकइ नाहीं देब।

8मई ओन दुट्टन क सदा ही नस्ट करब, जउन इ देस में रहत हीं। मई ओन दुट्ट लोगन क मजबूर करब, कि उ पचे यहोवा क नगर क तजि देईं।

### भजन 102

*एक पीड़ित मनई क उ समय क पराथना जब उ आपन क टूटा भवा महसूस करत ह अउर आपन वेदना अउ कस्टे क यहोवा स कहि डाकइ चाहत ह।*

1हे यहोवा, मोर पराथना क सुना। मोर पराथना क तोहे तलक आवइ द्या।

2जब मई विपत्ति में रहेउँ मोका नज़र अंदाज़ जिन करा। जब मई तोहार पराथना करेउँ तउ तू मोर सुना मोर पराथना क हाली जवाब द्या।

3मोर जिन्नगी वइसे बीती रही जइसे उड़त भवा धुआँ। मोर सकित अइसे अहइ जइसे धीरे धीरे बुझत आग।

4मोर सकती छीन होइ चुकी अहइ। मई वइसा ही अहउँ जइसा झुरान मुरझान घास। आपन सबइ वेदना में मोका भूख नाहीं लागत।

5दुःख क कारण, मई सिरिफ चमड़ा अउर हड्डियन होइ गवा अहउँ।

6मई अकेला अहउँ जइसे कउनो एकान्त निर्जन जगह में उल्लू रहत होइ। मई अकेला अहउँ जइसे कउनो पुरान खण्डहर में उल्लू रहत होइ।

7मई जाग कइ पूरी रात पहरा करत हँ। मई उ अकेले पंछी जइसा होइ गवा हँ, जउन छते पइ बइठा भवा होइ।

8मोर सत्रु सदा मोका बेइज्जत करत ही, अउर लोग मोर नाम लइके मोर हँसी उड़ावत हीं।

9दुःख मोर खइया होइ गवा अहइ। आँसू नीचे लुढ़किके मोर पिअइया बन जात ह।

10काहेकि यहोवा तू मोसे रूठ गवा अहा। तू ही मोका ऊपर उठाए रहया, अउर तू ही मोका बहाइ दिहा।

11मोर जिन्नगी क लगभग अंत होइ चुका अहइ। वइसे ही जइसे साँझ क लम्बी छाया हेराइ जात हीं। मई वइसा ही अहउँ जइसे झुरान अउ मुरझान घास।

12मुला हे यहोवा, तू तउ सदा ही अमर रहब्या। तोहार नाउँ सदा अउ सदा ही बना रही।

13तोहार उत्थान होइ अउ तू सिय्योन क चइन देब्या। उ समइ आवत अहइ, जब तू सिय्योन पइ कृपालु होब्या।

14तोहार सेवकन सिय्योन क पाथरन स पिरेम करत हीं। उ पचे ओकरे धूरि स भी पिरेम करत हीं।

15रास्ट्रन यहोवा क नाउँ क आराधना करिहीं। हे यहोवा, धरती क सबहिं राजा तोहार आदर करिहीं।

16जब यहोवा फुन स सिथ्योन क बनाई। तउ उ आपन पूरी महिमा में परगट होइ।

17जउन लोगन जिअत अहइ, उ ओनकर पराथना सुनीहीं। उ ओनकर पराथनन क नज़र अंदाज़ नाहीं करी।

18ओन बातन क लिखा ताकि भविस्स क पीढ़ी पढ़इ। ताकि जउन लोग अवइ वाला समइ में पढ़दा होइहीं यहोवा क स्तुति करिहीं।

19यहोवा आपन ऊँच पवित्र ठउर स खाले निहारी यहोवा सरण स खाले धरती पइ निहारी।

20उ कैदी लोगन क पराथना सुनी। उ ओन मनइयन क मुक्त करी जेनका राजा स मउत दीन्ह गइ रही।

21फुन सिथ्योन में लोग यहोवा क बखान करिहीं। यरूसलेम में लोग यहोवा क गुण गइहीं।

22अइसा तब होइ जब यहोवा लोगन क फिन बटोरी, अइसा तब होइ जब राज्ज यहोवा क सेवा करिहीं।

23मोर सकती मोका बिसराइ दिहस ह। यहोवा मोर जिन्नगी घटाइ दिहस ह।

24एह बरे मई कहेउँ, “मोर प्राण छोटी उमर में जिन ल्या। हे परमेस्सर, तू सदा अउ सर्वदा अमर रहब्या।

25पुराने जमाने में तू संसार रच्यो ह। तू खुद अपने हाथन स आकास रच्यो।

26इ जगत अउ आकास नस्ट होइ जइहीं, मुला तू ही सदा जिअत रहब्या। उ सबइ ओढ़नन क नाई फट जइहीं। ओढ़नन क नाई ही तू ओनका बदलब्या। उ पचे सबहिं बदल दीन्ह जइहीं।

27हे परमेस्सर, मुला तू कबहुँ नाहीं बदलत्या; तू सदा बरे अमर रहब्या।

28आज हम तोहार दास अही। हमार संतान भविस्स में हिअँइ रइहीं अउर ओनकर संतानन हिअँइ तोहार उपासना करिहीं।”

### भजन 103

*दाऊद क एक तु गीत।*

1हे मोर आतिमा, यहोवा क स्तुति करा। हे मोर अंग-प्रत्यंग ओकरे पवित्र नाउँ क बड़कई करा।

2हे मोर आतिमा, यहोवा क स्तुति करा अउर ओकरे सबइ कृपालु कामन क जिन बिसरा।

3उ तोहार पापन क छमा करत ह। उ तोहार सबइ बेरामियन स तोहका चंगा करत ह।

4उ तोहार प्राण क कब्र स बचावत ह, अउर उ तोहका पिरेम अउ करुणा स सज़वत ह।

5परमेस्सर हमका भरपूर उत्तिम वस्तुअन देत ह। उ हमका फुन उकाब क नाई जवान करत ह।

6यहोवा खरा कामन करत ह। परमेस्सर ओन लोगन क निआउ देत ह, जउने पइ दूसर लोग अत्याचार किहन ह।

7उ मूसा क आपन मारग सिखाएस। उ इस्त्राएलियन क आपन कार्यन बताएस।

8यहोवा करुणा स भरा अउर दयालु अहइ। परमेस्सर सहनसील अउ पिरेम स भरा अहइ।

9यहोवा सदा ही आलोचना नाहीं करत। अउर ठीक इहइ तहर उ सदा हम पइ कोहान नाहीं रहत ह।

10उ हम लोगन क संग हमार कीन्ह गवा पाप क अनुसार बेउहार नाहीं करत ह, अउर उ हमका वइसा सजा नाहीं देत जेका हम हकदार अहइँ।

11आपन बिस्सासी पइ परमेस्सर क पिरेम वइसे महान अहइ जइसे धरती पइ अहइ ऊँचा उठा भवा अकास।

12उ हमरे पापन क हम से एँतना ही दूर हटाएस जेतना पूरब क दूरी पच्छिम स अहइ।

13उ ओहे पइ जउन ओहसे डेरात ह वइसे ही दयालु अहइ, जइसे बाप आपन गदेलन पइ दया करत ह।

14परमेस्सर हमार सब कछू जानत ह। परमेस्सर जानत ह कि हम माटी स बना अही।

15परमेस्सर जानत ह कि मानव जिन्नगी नान्ह स अहइ। उ जानत ह हमार जिन्नगी घास जइसी अहइ। परमेस्सर जानत ह कि हम लोगन क जिन्नगी बनफूल जइसा अल्प अहइ।

16उ फूल जल्दी ही उगत ह। फिन गरम हवा चलत ह अउर उ फूल मुझात ह। अउर फुन हाली ही तू लख नाहीं पउत्या कि उ फूल कइसे ठउर पइ उगत बाटइ।

17मुला यहोवा क पिरेम सदा बना रहत ह। परमेस्सर सदा सदा ही आपन भगतन स पिरेम करत ह। परमेस्सर क दया ओकरे गदेलन स गदेलन तलक बनी रहत ह।

18उ अइसन पइ दयालु अहइ, जउन ओकरी करार पइ चलत हीं। उ अइसन पइ दयालु अहइ जउन ओकरे आदेसन क पालन करत हीं।

19परमेस्सर क सिंहासन सरगे में बना अहइ। हर चीज पइ ओकर हुकूमत अहइ।

20हे सरगदूतो, यहोवा क स्तुति करा। हे सक्तीसाली सरगदूतन जउन ओकरे वचन क सुनत ह अउर ओकर पालन करत, ओकर गुण गवा।

21हे सबइ ओकर दुस्मनो, यहोवा क स्तुति करा। तू जउन ओकर सेवा करत ह अउर उहइ करत ह जउन उ चाहत ह, ओकर गुण गवा।

22हे समूचइ जगत, यहोवा क स्तुति करा जउन हर जगह पइ सासन करत ह। हे मोर आतिमा, यहोवा क बड़कई करा

### भजन 104

1हे मोर आतिमा, यहोवा क स्तुति करा। हे यहोवा, हे मोरे परमेस्सर, तू अति महान अहा। तू महिमा अउ आदर क ओढ़ना पहिरे अहा।

2जइसे कउनो मनई चोगा पहिरत ही वइसा ही उ प्रकास क पहिरत हीं। पर्दा क नाई उ आकासे क फइलावत ह।

3उ ओनके ऊपर आपन निवास स्थान बनाएस। उ गहिर बादर क प्रयोग आपन रथ बनावइ में करत ह। उ पवन क पखना पइ चढ़िके अकास पार करत ह।

4उ निज सरगदूतन क पवन क नाई बनावत ह। उ निज सेवक क पवन क नाई बनाएस।

5इ उहइ अहइ जउन धरती क ओकरी नेंव पइ निर्माण किहस। इ कबहुँ न गिरी।

6उ जल क चादर स धरती क ढकेस। जल पहाड़न क ढँकि लिहस।

7तू आदेस दिहा अउर जल दूरि हट गवा। तू जल पइ गरज्या, अउर जल दूर भागा।

8पहाड़न स खाले घाटियन में ओन सबइ ठउरन पइ जेका तू ओकरे बरे तइयार किहे रहा या जल बहा।

9तू समुदर क चउहदूदी बाँध दिहा अउर फुन जल कबहुँ धरती क ढँकइ नाहीं जाई।

10उ पानी क पठवत ह जउन कि झरनन स पहाड़ियन क बीच में घाटियन में बहत ह।

11सबहिं जंगली पसुअन क सबइ धारा पानी देत हीं, जेनमाँ जंगली गदहा तलक आइके पिआस बुझावत हीं।

12जंगल क परिन्दा तलाबन क किनारे रहइ बरे आवत हीं। अउ निचके ठाड़ भए बृच्छन क डालियन पइ गावत हीं

13तू पहाड़न क ऊपर बर्खा पठया ह अउर ओन चिजियन ओनका दिहा जेका तू बनाया जउन ओनका चाही।

14परमेस्सर, पसुअन क खाइ बरे घास उपजाया, हम स्त्रम करित ह अउर उ हमका पौधा देत ह। इ सबइ पौधन उ भोजन अहइँ जेका हम धरती स पाइत ह।

15परमेस्सर, हमका दाखरस देत ह, जउन हमका खुस करत ह। हमार चाम नरम रखइ क तू हमका तेल देत ह। हमका पुटूठ करइ क उ हमका खइया क देत ह।

16परमेस्सर लबानोन क जउन देवदारू क विसाल बृच्छ लगाएस ह। ओन विसाल बृच्छ खातिर ओनकर बढवार बरे बहोत पानी रहत ह।

17पंछी ओन बृच्छन पइ आपन घोंसला बनावत हीं। देवदार क बृच्छन पइ सारस क बसेरा अहइ।

18बनैले पहाड़ी बोकनन क घर ऊँच पहाड़ में बना अहइँ। बीछियन खुद क बड़की चट्टान क आड़ में छुपावत अहइँ।

19तू मौसम क पता लगावइ बरे चाँद क रच्या ह। सूरज सदा जानत ह कि ओका कहाँ बूढब अहइ।

20तू औँधियारा बनाया जेहसे रात होइ ताकि जंगल क बनैला पसु एहर-ओहर घूमि सकिहीं।

21उ पचे झपटत सेर जब दहाड़त हीं तब अइसा लगत ह जइसे उ पचे यहोवा क पुकारत होइँ, जेका माँगइ स उ ओनका अहार देत।

22अउर पउ फाटइ पइ जीवजन्तु वापिस घरन क लउटत अउ आराम करत हीं।

23फिन लोग आपन काम करइ क बाहेर निकरत हीं। साँझ तलक उ पचे काम में लगा रहत हीं।

24हे यहोवा, तू अचरज भरा बहुतेरा काम किहा। धरती तोहरी वस्तुअन स भरी पड़ी अहइ। तू जउन कछू करत अहा, ओहमा आपन विवेक देखौत ह।

25इ समुदर क लखा, इ केतौना विसाल अहइ! हुआँ बहुतेरी जीव-जन्तु अहइ जेका गना नाहीं जाइ सकिहीं। ओहमाँ कछू बिसाल अहइँ अउर कछू नान्ह।

26समुदर क ऊपर जलपोत तैरत हीं, अउर लिब्याथान\* जेका तू बनाएस ह समुदर में खेल-खेलत ह।

27यहोवा, इ सब कछू तोहरे आसरे पइ अहइ। हे परमेस्सर, ओन सबहीं जीवन क खाना तू ठीक समइ पइ देत अहा।

28हे परमेस्सर, तू ही अहा जउन सबइ जीव-जन्तुअन क खाना जेका उ पचे खात हीं, उपलब्ध करावत अहा।

29फुन जब तू ओनसे मुँह मोड़ लेत अहा तब उ पचे डेराइ जात हीं। ओनकर साँस रुकि जात हीं। उ पचे दुर्बल होइ जात हीं अउर मर जात हीं। अउर ओनकर देह फुन धूरि में बदलि जात हीं।

30जब तू आपन आतिमा भेज्या ह, उ ओहसे जीवित होइ जात ह अउर अउर धरती पइ जिन्गी क संग फुन नवा कइ दीन्ह जात ह।

31यहोवा क महिमा सदा-सदा बनी रहइ। यहोवा आपन रचना स सदा आनन्द में रहइ।

32यहोवा क दृस्टि स इ धरती काँप उठी। पहाड़न स धुआँ उठइ लग जाइ।

33मई जिन्गी भइ यहोवा बरे गाउब। मई जब तलक जिअत हउँ यहोवा क गुण गावत रहब।

34मोर सोच-विचार ओका खुस करी। मई यहोवा क संग खुस अहउँ।

35धरती स पाप क लोप होइ जाइ। दुटूठ लोग सदा बरे मिटि जाइँ। हे मोर आतिमा, यहोवा क स्तुति करा।

## भजन 105

1यहोवा क धन्यवाद करा। ओकरे नाउँ क पुकारा। रास्ट्रन क ओकरे अद्भुत कारजन क बारे में बतावा।

2यहोवा बरे तू गावा। तू ओकर बड़कई क गीत गावा। ओन सबहिं अचरज स भरी बातन क वर्णन करा जेनका उ करत ह।

3यहोवा क पवितर नाउँ पइ गर्व करा। ओ सबहिं लोगो जउन यहोवा क उपासक अहा, तू पचे खुस होइ जा।

4सामरथ पावइ क तू यहोवा क लगे जा। सहारा पावइ क तू ओकरे लगे जा।

5ओन अद्भुत बातन क सुमिरा जेनका यहोवा करत ह। ओकरे अचरज कर्म अउर ओकर विवेक स भरा फइसला क याद राखा।

6तू परमेस्सर क सेवक इब्राहीम क संतान अहा। तू याकूब क संतान अहा, उ मनई जेका परमेस्सर चुने रहा।

7यहोवा ही हमार परमेस्सर अहइ। सारे संसार पइ यहोवा क सासन अहइ।

8उ आपन करार क सदा याद रखत ह। उ आपन आदेसन क हजार पीढ़ियन तलक याद रखत ह।

9इब्राहीम क संग परमेस्सर करार बाँधे रहा। परमेस्सर इसहाक क वचन दिहे रहा।

**लिब्याथाम** इ साइद एक ठु विसाल समुन्द्री दैत्य रहा। कछू लोगन क विचार अहइ कि इ एक मगरमच्छ अहइ। दूसर लोगन क विचार अहइ कि इ एक समुदर उफ्रेट ह। कछू लोग कहत ही कि इ जादूगर क मदद स सूर्य ग्रहण पइदा करत ह।

10उ याकूब क आपन करार क कानून क रूप में दिहे रहा। परमेस्सर इस्त्राएल क संग करार किहस। इ सदा सदा ही बना रही।

11परमेस्सर कहे रहा, 'मई कनान क भुईया क तोहका आपन सम्पत्ति क रूप देब।'

12जब इब्राहीम क परिवार छोटा रहा, अउर उ पचे हुवाँ महज़ ही बिदेसी रहेन।

13उ पचे एक रास्ट्र स दूसर रास्ट्र में, एक राज्ज स दूसर राज्ज में घूमत रहेन।

14मुला परमेस्सर उ घराने क दूसर लोगन स नस्कान नहीं पहुँचइ दिहस। परमेस्सर राजा लोगन क सावधान किहस कि उ पचे ओका हानि न पहुँचावइ।

15उ ओनका चेताउनी दिहे रहेन, "मोर अभिसिक्त भवा क\* तू नस्कान जिन पहुँचावा। तू मोर कउनो नबियन क बुरा जिन करा।"

16परमेस्सर उ देस में अकाल पठाएस। अउर लोगन क लगे खाइ क खूब भोजन नहीं रहा।

17मुला यहोवा एक मनई क ओनके लगे जेकर नाउँ यूसुफ रहा, ओनका अगवा मिस्त्र तलक पठाएस। यूसुफ क एक ठु दास क नाई बेचा ग रहा।

18उ पचे यूसुफ क गोड़ में जंज़ीर डालेन, अउर उ ओका विनम्र बनाएस। उ पचे ओकरी गटइ में एक लोहे क कड़ा डइ दिहन।

19यूसुफ क कैद में रखा गवा रहा जब तलक उ पचे बातन जउन उ कहे रहा फुरइ घटि नहीं गइन। यहोवा सुसन्देस स प्रमाणित कइ दिहस कि यूसुफ नीक रहा।

20मिस्त्र क राजा, आग्या दिहन कि यूसुफ क बंधनन स अजाद कइ दीन्ह जाइ। उ रास्ट्र क एक नेता ओका कैद स आजाद कइ दिहस।

21यूसुफ क आपन घर बार क अधिकारी बनाइ दिहन। यूसुफ राज्ज में हर बात क धियान रखइ लाग।

22यूसुफ आपन राजकुमार क वइसा ही निर्देस देत रहा जइसा उ चाहेन। यूसुफ राजा क सलाहकारन क सिच्छा दिहे रहा।

23जब इस्त्राएल मिस्त्र गवा, याकूब हाम क देस\* में रहइ लाग।

24याकूब क सन्तानन बहोत स होइ गएन। उ पचे मिस्त्र क लोगन स जियादा बलवान बन गएन।

25एह बरे मिस्त्री लोग याकूब क घराना स घिना करइ लागेन। मिस्त्र क लोग आपन दासन क खिलाफ कुचक्र रचइ लागेन।

26एह बरे यहोवा निज सेवक मूसा अउर हारून जेका उ चुने रहा, पठाएस।

27उ हाम क भुईया में अचरज अउ अद्भुत करम किहेस।

28परमेस्सर गहिरा अँधियारा पठाए रहा, मुला मिस्त्रियन ओकर नहीं सुनेन।

29तउ फुन परमेस्सर पानी क खून में बदल दिहस, अउर ओनकर सबइ मछरियन मरि गइन।

30बाद में, मिस्त्री लोगन क भुईया मेघन स भरि गवा। हिआँ तलक कि मेघन राजा क सयन कच्छ तलक भरि गएन।

31यहोवा आदेस दिहा, अउर माखियन अउ पिस्सू आएन अउर उ सबइ हर कतहूँ फइल गएन।

32परमेस्सर बर्खा क ओलन में बदल दिहस। मिस्त्रियन क देस में हर कतहूँ आगी अउ बिजरी गिरइ लाग।

33परमेस्सर मिस्त्रियन क अंगूरे क बंगिया अउ अंजीर क बृच्छ बर्बाद कइ दिहस। परमेस्सर ओनकर देस क हर बृच्छ क तहस नहस कइ दिहस।

34परमेस्सर हुकुम दिहस अउर टिड्डी दल आइ गएन। टिड्डी आइ गइन अउर ओनकर गनती अनगिनत रहीं।

35टिड्डी दल अउ टिड्डीयन उ देस क सबहिँ पौधन चट कइ गएन। उ सबइ धरती पइ जउन भी फसलन ठाड़ रहिन, सबहिँ क खाइ डएन।

36फिन परमेस्सर मिस्त्रियन क पहिलउटी सन्तान क मार डाएस। परमेस्सर ओनकर सब स बड़कन पूतन क मारेस।

37बाद में परमेस्सर निज सेवकन क मिस्त्र स बाहेर निकारेस। उ पचे आपन संग सोना अउ चाँदी लइ आएन। परमेस्सर क कउनो भी सेवक नहीं लइखड़न।

38ओन लोगन क जात भए लखिके मिस्त्र आनन्द में रहा, काहेकि उ पचे ओनसे डेरइ ग रहेन।

39परमेस्सर ओनके ऊपर कमरी जइसा एक बादर फइलाएस। उ राति में उजियारा देइ क बरे आगी क खम्भा क काम में लिआएस।

40लोग खाइ क माँग किहन अउ परमेस्सर ओनके खातिर बटेरन क लइ आवा। परमेस्सर अकास स ओनका भरपूर खइया क दिहस।

41परमेस्सर चट्टान क फाइस अउर जल उछरत भवा बाहेर फूटि पड़ा। उ रेगिस्ताने क बीच एक ठु नदी बहइ लाग।

42उ आपन पवितर वचन सुमिरेस जउन उ आपन दास इब्राहीम क संग किहे रहा।

43परमेस्सर आपन खास क मिस्त्र स बाहेर निकारि लिआवा। लोग खुसी क गीत गावत भए अउर खुसियन मनावत भए बाहेर आइ गएन।

44फिन परमेस्सर निज भगतन क उ देस दिहस जहाँ अउर लोग रहत रहेन। परमेस्सर क भगतन उ सबइ विजियन क पाइ लिहन जेनके बरे अउर लोग मेहनत किहे रहेन।

45परमेस्सर अइसा एह बरे किहस ताकि लोग ओकर व्यवस्था मानइँ। परमेस्सर अइसा एह बरे किहस ताकि उ पचे ओकरी सिच्छा पइ चलइँ। यहोवा क गुण गावा।

**अभिसिक्त भवा क** इ साइद कि राजन, राजकुमारन, या नबियन क ओर इसारा करत ह जेनका तेल स अभिसिक्त कीन्ह गा रहेन इ दिखावइ बरे कि उ पचक परमेस्सर क जरिए चुना गवा रहेन।

**हाम क देस** मिस्त्र क सामिल कइ क उत्तर-पूर्व आफ्रीकी देसन क दूसर नाउँ, हाम नोह क पूत रह।

## भजन 106

1यहोवा क बड़कई करा। यहोवा क धन्यवाद करा काहेकि उ उत्तम अहइ। परमेस्सर क परिम सदा ही रहत ह।

2फुरइ यहोवा केतौना महान अहइ, एकर बखान कउनो मनई कइ नार्ही सकत। परमेस्सर क पूरी बड़कई कउनो नार्ही कइ सकत।

3जउन लोग परमेस्सर क आदेस क पालन करत हीं, उ पचे धन्न अहइ। उ पचे हमेसा उत्तिम करम करत हीं।

4यहोवा, जब तू आपन भगतन पइ कृपा करा मोका याद करा। मोर भी उद्धार करइ बरे याद करा।

5यहोवा, मोका भी ओन भली बातन में हींसा बटावइ द्या जेनका तू आपन लोगन बरे करत अहा। तू आपन रास्ट्रन क संग मोका भी खुस होइ द्या। तोह पइ तोहार लोगन क संग मोका भी गर्व करइ द्या।

6हम पचे वइसेन ही पाप किहेन ह जइसे हमार पुरखन किहेन ह। हम गलत किहेन। हम बुरा काम किहे अही।

7हे यहोवा, मिस्र में हमार पुरखन तोहार अचरज कर्मन स कछू भी नार्ही सीखेन। उ पचे तोहरे पिरेम क अउर तोहार करुणा क याद नार्ही रखेन। हमार पुरखन हुआँ लाल सागर क किनारे तोहरे खिलाफ भएन।

8मुला परमेस्सर निज नाउँ क कारण ओनका बचाए रहा। उ आपन सकती क परगट किहेस।

9परमेस्सर हुकुम दिहस अउर लाल सागर झुरान होइ गवा। उ ओनका उ गहिर समुदर स अइसा निकारि चला जइसे कउनो रेगिस्तान होइ।

10परमेस्सर हमरे पुरखन क ओनकर दुस्मनन स बचाएस। उ ओनका आपन दुस्मनन स आजाद किहस।

11अउर फिन ओनकर दुस्मनन क उहइ सागर क बीच ढँपिके बोर दिहस। ओनकर एक दुस्मन बचिके निकर नार्ही पाएस।

12तब हमार पुरखन परमेस्सर क वचन पइ बिस्सास किहन। उ पचे ओकर गुण गाएन।

13मुला हमार पुरखन ओन बातन क हाली बिसरि गएन जउन परमेस्सर किहे रहा। उ पचे परमेस्सर क सम्मति पइ कान नार्ही दिहन।

14उ पचे दूसर विजियन क कामना किहेन। रेगिस्तान में उ पचे परमेस्सर क परखेन।

15मुला हमार पुरखन जउन कछू भी माँगन परमेस्सर ओनका दिहस मुला परमेस्सर ओनका एक महामारी भी दइ दिहस।

16लोग मूसा स डह रखइ लागेन अउर हारून स उ पचे डह रखइ लागेन जउन यहोवा क पवितर याजक रहा।

17एह बरे धरती फट गई अउ दातान क निगल गवा। अउर उ अबिराम क समूह क निगल लिहस।

18फिन आगी ओन दुट्ठ लोगन क बारि दिहस।

19ओ लोग होरब क पहाड़े पइ एक तु सोना क बछवा बनाएन। उ पचे उ मूरति क पूजा करइ लागेन।

20उ पचे आपन महिमावान परमेस्सर क एक घास खाइवाला बछवा क प्रतिमा स बदल डालेन।

21हमार पुरखन परमेस्सर क बिसरि गएन जउन ओनका मुक्ति दियाए रहा। उ पचे परमेस्सर क बिसरि गएन जउन मिस्र में अचरज भरा करम किहे रहा।

22परमेस्सर हाम क देस में अचरज भरा करम किहे रहा। परमेस्सर लाल सागर क लगे भय विस्मय भरा काम किहे रहा।

23परमेस्सर ओन लोगन क नस्ट करइ चाहत रहा। मुला परमेस्सर क चुना भवा सेवक मूसा, परमेस्सर क समन्वा ओन लोगन क नास करइ स बचाइ बरे बीच में आइ गएन।

24तब ओन लोग उ अद्भुत देस कनान में जाइ स मना कइ दिहन। उ पचे ओकरे वाचा क बिस्सास नार्ही किहेस।

25आपन तम्बुअन में उ पचे सिकाइत करत रहेन। हमार पुरखन परमेस्सर क बात मानइ स नकारेन।

26तउ परमेस्सर किरिया खाएस कि उ पचे रेगिस्तान में मरि जइहीं।

27परमेस्सर किरिया खाएस कि ओनकर सन्तानन क दूसर लोगन क हरावइ देइ। परमेस्सर कसम खाएस कि उ हमरे पुरखन क देसन में छितराइ।

28बाद में परमेस्सर क लोग “बाल-पिओर” में “बाल” क पूजइ करइ सुरू कइ दिहेन। उ पचे उ माँस खाइ लागेन जेका निर्जीव देवतन पइ चढ़ावा ग रहा।

29यहोवा ओन लोगन क करमन पइ बहोत कोहाइ गवा। अउर उ ओन लोगन क खिलाफ महामारी लिआएन।

30मुला पीनहास बिनती किहस अउ परमेस्सर उ बियधि क रोकेस

31परमेस्सर इ काम क ओकरे बरे आवइवालन पीढ़ियन बरे बहोत उत्तिम करम समझेस।

32लोग मरिबा में यहोवा क किरोध भइकाएन, अउर ओकरे कारण मूसा स बुरा काम कराएन।

33उ सबइ लोग मूसा क बहोत उदास किहन। तउ मूसा बिना ही बिचारे बोल उठा।

34तउ उ कनान क रास्ट्र क नस्ट नार्ही किहेस, हाँलाकि यहोवा ओनका इ करइ बरे कहे रहा।

35इस्त्राएल क लोग दूसर लोगन स हिल मिल गएन, अउर उ पचे भी वइसेन काम करइ लागेन जइसे दूसर लोग करत रहेन।

36उ सबइ दूसर लोग परमेस्सर क जनन बरे फंद बन गएन। परमेस्सर क लोग ओन देवन क पूजइ लागेन जेनकर उ पचे दूसर लोग पूजा करत रहेन।

37हिआँ तलक कि परमेस्सर क जन आपन ही गदेलन क हत्या करइ लागेन। अउर उ पचे ओन गदेलन क ओन दानवन क प्रतिमा पइ अर्पित करइ लागेन।

38परमेस्सर क लोग निर्दोख गदेलन क हत्या किहन। उ पचे आपन ही गदेलन क मारि डारि अउर ओनका कनान क देवन क अर्पित किहेन। उ पचे खून स धरती क दूसित किहेन।

39उ पचे आपन कामन स असुद्ध भएन अउर आपन कार्यन दुआरा अबिस्सासी बन गए रहेन।

40परमेस्सर आपन ओन लोगन पइ कोहाइ गवा। परमेस्सर ओनसे तंग आइ चुका रहा।

41तब परमेस्सर आपन ओन लोगन क दूसर जातियन क दइ दिहस। परमेस्सर ओन पइ ओनकर दुस्मनन क हुकूमत करवावइ दिहस।

42ओनकर दुस्मनन ओन पइ अत्याचार किहन अउ ओनकर जिअब बहोत कठिन कइ दिहन।

43परमेस्सर आपन लोगन क बहोत बार बचाएस। मुला उ पचे ओनका स मुँह मोड़ लिहन। अउर उ पचे अइसी बातन करइ लागेन जेनका उ पचे करइ चाहत रहेन। एह बरे उ पचे आपन पाप क कारण हराइ दीन्ह गवा रहेन।

44मुला जब कबहूँ परमेस्सर क जनन पइ विपद पड़ी उ पचे सदा ही मदद पावइ क परमेस्सर क गोहराएन। परमेस्सर हर दाई ओनकर सबइ पराथना क सुनेस।

45परमेस्सर सदा आपन करार क याद राखेस। परमेस्सर आपन महा पिरेम स ओनका सदा ही सुख चैन दिहस।

46परमेस्सर ओन लोगन बरे दूसर कैदियन क समन्वा दयालुता दिखाएस।

47यहोवा हमार परमेस्सर, हमार रच्छा किहस। परमेस्सर ओन दूसर देसन स हमका ऐकट्टा कइके लइ आवा, ताकि हम ओकरे पवितर नाउँ क गुणगान कइ सकी; तकि हम ओकर बड़कई क गीत गाइ सकी।

48इस्त्राएल क परमेस्सर यहोवा क धन्य कहा। परमेस्सर सदा ही जिन्दा रहत आवा ह। उ सदा ही जिन्दा रही। अउर सबइ जन बोलाई, “आमीन।” यहोवा क गुण गावा।

## पाँचवा भाग

### भजन 107

1यहोवा क धन्यवाद द्या, काहेकि उ उत्तिम अहइ। ओकर पिरेम हमेसा रहत ह।

2हर कउनो अइसा मनई जेका यहोवा बचाएस ह, ऐँन रास्ट्रन क कहा। हर कउनो अइसा मनई जेका यहोवा आपन दुस्मनन स छोड़ाएस ओकर गुण गावा।

3यहोवा आपन लोगन क बहोत स अलग अलग देसन स बटोरेस ह। उ ओनका पूरब अउ पच्छिम स, अउर उत्तर अउ दक्खिन स जुटाएस ह।

4कछू लोग अइसे रेगिस्तान में खोइ गए रहेन जहाँ कउनो लोग नाहीं। उ सबइ लोग अइसेन एक ठु नगर क खोज में रहेन। मुला ओनका कउनो अइसा नगर नाहीं मिला।

5उ सबइ लोग भुखान अउ पियासा रहेन अउर उ पचे दुर्बल होत जात रहेन।

6उ पचे संकट में रहेन, तउ उ पचे मदद पावइ क यहोवा क गोहराएन। उ ओन सबइ क आपन संकटन स बचाइ लिहस।

7यहोवा ओनका सोझइ उ सहरन में लइ गवा जहाँ उ पचे बसि सकिहीं।

8यहोवा क ओकरे विस्सनीय पिरेम बरे अउर ओन अद्भुत करमन बरे धन्यवाद द्या जेनका उ सबइ लोगन बरे करत ह।

9पियासी व्यक्ति परमेस्सर क सन्तुट्ठी बरे अउर उत्तिम वस्तुअन स भूखी व्यक्ति क पेट भरत ह।

10कछू लोगन क कारावासन में राखेन, जहाँ बहोत अँधियारा रहा। उ पचे कस्ट झेलेन, अउ जंजीर में बांध दीन्ह गएन।

11काहेकि उ पचे परमेस्सर क वचन क खिलाफ बिद्रोह किहेन अउर सर्वोच्च परमेस्सर क सलाह क सुनइ स नकारे रहेन।

12उ ओनका कठिनाइयन देइके उ पचन्क दिमाग क विनम्र बनाइ दिहस। उ पचे ठोकरन खाएन अउर उ पचे भहराइ पड़ेन, अउर ओनका सहारा देइ क कउनो भी नाहीं मिला।

13उ पचे संकट में रहेन, तउ उ पचे मदद पावइ क यहोवा क गोहराएन। उ ओन सबइ क आपन संकटन स बचाइ लिहस।

14परमेस्सर ओनका ओनकर अँधियारे जेलन स उबार लिहस। परमेस्सर उ सबइ जंजीरन, अउर बंधन क काटेस जेनसे ओनका बाँधा गवा रहा।

15यहोवा क ओकरे विस्सनीय पिरेम बरे अउर ओन अद्भुत करमन बरे धन्यवाद द्या जेनका उ सबइ लोगन बरे करत ह।

16परमेस्सर हमार दुस्मनन क हरावइ में हमका मदद देत ह। ओनकर काँसे क दुआरन क परमेस्सर तोड़ गिराइ सकत ह। परमेस्सर ओनकर दुआरन पइ लगी भइ लोहा क आगल क छिन्न-भिन्न कइ सकत ह।

17कछू मूरख लोग आपन अपराधन अउ पापन क कारण पीरा झेलेन ह।

18ओन लोग खइया क इच्छा तजि दिहेन अउर उ पचे मरे भए स होइ गएन।

19उ पचे संकट में रहेन, तउ उ पचे मदद पावइ क यहोवा क गोहराएन। उ ओन सबइ क आपन संकटन स बचाइ लिहस।

20परमेस्सर आदेस दिहस अउर लोगन क चँगा किहस। इ तरह उ पचन्क बर्बाद होइ स बच गएन।

21यहोवा क ओकरे विस्सनीय पिरेम बरे अउर ओन अद्भुत करमन बरे धन्यवाद द्या जेनका उ सबइ लोगन बरे करत ह।

22ओनका यहोवा क धन्यवाद देइ बरे बलि अर्पित करइ द्या, उ जउन किहे अहइ ओन बातन क आनन्द क संग बखाना।

23कछू लोग आपन काम करइ आपन नइयन स समुद्धर पार कइ गएन।

24ओन लोगन अइसी बातन क लखेन ह जेनका यहोवा कइ सकत ह। उ पचे ओन अद्भुत बातन क लखेन ह जेनका यहोवा सागर पइ किहे रहा।

25परमेस्सर आदेस दिहस, फिन एक तेज हवा चलइ लाग। बड़की स बड़की लहरन आकार लेइ लागिन।

26लहरन ऐँतना ऊपर उठिन जेतना अकास होइ तूफान ऐँतना भयानक रहा कि लोग डेराइ गएन।

27लोग लड़खड़ात रहेन, भहरान जात रहेन जइसे नसा में धुत होई। खेवैया ओनकर बुद्धि जइसे बियर्थ होइ गइ होइ।

28उ पचे संकट में रहेन, तउ उ पचे मदद पावइ क यहोवा क गोहराएन। उ ओन सबइ क आपन संकटन स बचाइ लिहस।



29परमेस्सर तूफान क रोकेस अउर लहरन सान्त होइ गइन।

30खेवैया खुस रहेन कि सागर सांत भवा होइ गवा। परमेस्सर ओनका अहइ सुरच्छित ठउरे पइ लइ गवा जहाँ उ पचे जाइ चाहत रहेन।

31यहोवा क ओकरे विस्सनीय पिरेम बरे अउर ओन अद्भुत करमन बरे धन्यवाद द्या जेनका उ सबइ लोगन बरे करत ह।

32महान सभा क बीच ओनका ऊँच होइ द्या। नेतन मिलन में ओकर बड़कई करइ द्या।

33उ नदियन क रेगिस्ताने में बदल दिहस। भुइँया सुखाइ बरे उ झरनन क प्रवाह क रोकेस।

34परमेस्सर उपजाऊ भुइँया क बेकार क रेही भुइँया में बदल दिहस। काहेकि हुआँ बसे दुट्ठ लोग बुरे करम किहे रहेन।

35अउर परमेस्सर मरूभूमि क झीलन क धरती में बदलेस। उ झुरान धरती स जल क स्रोत बहाइ दिहस।

36परमेस्सर भूखे लोगन क उ अच्छी धरती पइ लइ गवा अउर ओन लोग आपन रहइ बरे हुआँ एक ठु सहर बसाएन।

37फिन ओन लोग आपन खेतन में बीजन क रोप दिहन। अउर अंगूर क बगिया लगाएन, अउर उ पचे एक उत्तिम फसिल पाइ लिहन।

38परमेस्सर ओन लोगन क आसीर्बाद दिहस। ओनकर परिवार फलइ फूलइ लोगन। ओनके लगे बहोत सारे पसु भाएन।

39भयानक महामारी अउर संकट क कारण ओनकर परिवार नान्ह अउर कमजोर होइ गएन।

40परमेस्सर ओनकर प्रमुखन क कुचरि दिहस अउर बेज्जत किहे रहा। उ ओनका दिसाहीन रेगिस्ताने में भटकइ दिहेस।

41मुला परमेस्सर तबहिँ ओन दीन लोगन क ओनकर बिनती स बचाइके निकारि लिहस। अब तउ ओनकर घरानन बड़वार अहइँ, ओतना बड़वार जेतना भेड़िन क झुण्ड।

42इमानदार मनइयन एका देखत हीँ अउर आनन्दित होत हीँ, किन्तु दुट्ठ लोग एका लखत हीँ आपन मुँह बंद रखत हीँ।

43एक विवेकी मनई ओन बातन क धियान देत ह। अउर जउन कउनो मनई बुद्धिमान अहइ, यहोवा के सच्चा पिरेम क बारे में जान जाइहीँ।

### भजन 108

*वाद्य यंत्र दुआर बजा भवा वरुद क एक ठु गीत।*

1हे परमेस्सर, मई आपन हिरदय क तइयार कहेउँ ह। मई गाउब अउर उमंग क संगीत बजाउब।

2मोर आतिमा, जगा! वीणओ अउर सारंगियो, जगा। आवा हम भोर क जगाइ!"

3हे मोर सुआमी, मई तोहरे बड़कइ क रास्टून क समन्वा गाउब। मई विभिन्न लोगन क बीच तोहार स्तुति करब।

4हे परमेस्सर, तोहार पिरेम ओतैना ऊँच अहइ जेतैना अकास। तोहार बिस्सास ओतैना ऊँच अहइ जेतैना बादरन।

5हे परमेस्सर, तोहार सम्मान अकासन क ऊपर होइ, तोहार महिमा क सारा जगत क ढाँपि लेइ द्या।

6आपन भगत लोगन क बचावइ बरे इ करा। मोर बिनती क जवाब द्या, अउर हमका बचावइ क आपन महासक्ती क प्रयोग करा।

7परमेस्सर आपन मन्दिर स बोला। उ कहेस, "मई खुसी स चिचियाब। मई आपन लोगन क सोकेम प्रदान करब, अउर सुवकोत क घाटी ओनकर होइ।

8गिलाद अउ मनस्से मोर अहइँ। एप्रैम मोर सिरवाण अहइ अउर यहूदा मोर राजदण्ड अहइ।

9मोआब मोर गोइ पखारइ क पात्र बनी। एदोम उ दास होइ जउन मोर पादुका लइके चली, मई पलिस्तियन क हराइ क पाछे विजय-उल्लास स चिचियाब।"

10मोका दुस्मन क दुर्ग में कउन लइ जाइ? एदोम क हरावइ कउन मोर मदद करी!

11हे परमेस्सर, का इ फुरइ नाहीं बाटइ कि तू हमका तजि दिहा ह? अउर का तू हमरी सेना क संग नाहीं रहब्या?

12हे परमेस्सर, कृपा कइके, हमरे दुस्मन क हरावइ में हमार मदद करा। मनइयन तउ हमका बचाइ नाहीं सकतेन।

13हम महान कारज कइ सकित ह सिरिफ जब परमेस्सर हमार साथ होइ। सिरिफ परमेस्सर हमरे दुस्मनन क हराई सकत ह।

### भजन 109

*संगीत निर्देसक बरे वरुद क एक ठु स्तुति गीत।*

1हे परमेस्सर, जब मई तोहरे आगे पराथना करउँ तउ चुप नाहीं रहया।

2लोग मोरे बारे में बुरी बातन अउ झूठ बोलत ह। उ पचे मोरे बारे में उ सबइ कहत अहइँ जउन फुरइ नाहीं बाटइ।

3लोग मोरे बारे में घिना स बोलत अहइँ। उ पचे मोर खिलाफ बिना कारण हमला करत हीँ।

4मई ओनका पिरेम किहेउँ, फिर भी उ पचे मोहसे दुस्मनी करत हीँ। यद्यपि मई पराथना में वफादार हउँ।

5मई ओन मनइयन क संग भला किहे रहेउँ। मुला उ पचे मोरे बारे बुरा करत अहइँ। मई ओनसे पिरेम किहेउँ, मुला उ पचे मोसे बड़ रखत अहइँ।

6ओकरे खिलाफ एक ठु दुट्ठ मनई क नियुक्त करा, अउर कउनो दोख लगवइया ओका दोख लगावइ बरे ओकरे बगल में खड़ा करा।

7ओनमाँ दोख पावइ द्या जब उ अदालत में निआउ पइहीँ, ओकर पराथना क ओकरे पाप क सबूत होइ द्या।

8मोर दुस्मन क हाली मरि जाइ द्या। ओकरे क जगह कउनो दूसर क लेइ द्या।

9मोरे दुस्मनन क सन्तानन क अनाथ कइ द्या अउर ओकरी पत्नी क तू रौं कइ द्या।

10ओनका आवारा अउर भिखारी होइ द्या, अउर ओनका आस्रय क खोज तब तलक करइ द्या जब तलक कि ओकर आपन घर बर्बाद न होइ जाई।

11मोरे दुस्मन कर्जदार लोगन क जउन कछू मोर दुस्मन क लगे होई लइ जाइ द्या। अजनबियन क ओकर मेहनत क कमाइ क लूटिके जाइ द्या।

12कउनो मनई क मोरे दुस्मन पइ कउनो दया न देखौवइ। अउर ओकरे अनाथ गदेलन पइ कउनो भी मनई दया नहि देखौवइ।

13मोर दुस्मन क सन्तानन बर्बाद कइ द्या। आवइवाली पीढ़ी स ओकर नाउँ मिटइ द्या।

14मोरे दुस्मन क पुरखन क पापन क परमेस्सर सदा ही याद राखइ। ओकरे महतारी क पापन न मेटाइ।

15यहोवा सदा ही ओन पापन क याद रखी। अउर उ लोगन बरे मोरे दुस्मन क बिसरइ क कारण होइ।

16काहेकि दुटठ लोगन कउनो भी अच्छा करम कबहुँ नहि किहेन अउर उ लोगन क बिना आसा क मउत में धकेल दिहा। उ दीन लोगन असहाय लोगन क जिअब कठिन बनाइ दिहा।

17ओन दुटठ लोगन क सरापब भावत रहा। तउ अहइ सराप ओह पइ लउटिके गिर जाइ। उ बुरा मनई असीस कबहुँ नहि दिहस कि लोगन बरे कउनो अच्छी बात घटइ। तउ ओकरे संग कउनो भी भली बात मत होइ द्या।

18सराप ओकरे बरे ओढ़नन क नाई होइ। सराप ओकरे सररी में पानी क नाई भरि जाइ। अउर सराप ओकरे हड्डियन में चर्बी क नाई रहइ।

19उ दुटठ मनई बरे सराप क ओढ़ना बनी द्या। सराप क ओकरे बरे हमेसा बरे कमर बन्द बनइ द्या।

20यहोवा मोहे पइ दोख लगावइवालयन क अउर ओन लोगन क जउन मोरे खिलाफ बुरा योजना बनावत ह क, उ सबइ चिजियन क भुगतान क रूप में देइ द्या।

21किन्तु हे यहोवा, तू मोर सुआमी अहा। तउ मोरे संग अइसा बेउहार करा जेहसे तोहरे नाउँ क जस बाढ़इ। तोहार करुणा महान अहइ, तउ मोर रच्छ करा।

22काहेकि मई बस एक गरीब अउर असहाय व्यक्ति अहउँ। मई फुरइ दुःखी अहउँ।

23मोका अइसा लागत बाटइ जइसे मोर जिन्नगी साँझ क समइ क लम्बी छाया क तरह बीति चुकी बाटइ। मोका अइसा लागत रहा मई महसूस करत हउँ कि मई किरवा क नाई हउँ जउन मोका हिराइ दिहस ह।

24उपवास क कारण मोर घुटना दुर्बल होइ ग अहउँ। मोर वजन घटत ही जात अहइ, अउर मई झुरान जात अहउँ।

25बुरे लोग मोका अपमानित करत ही। उ पचे मोका घूरत अउ आपन मूँड़ी मटकावत ही।

26यहोवा मोर परमेस्सर, मोका सहारा द्या। आपन बिस्ससनीय पिरेम देखौवा अउर मोका बचाइ ल्या।

27फुन उ पचे लोग जान जइहीं कि तू ही मोका बचाया ह। ओनका पता चल जाइ कि उ तोहार सक्ति रही जउन मोका सहारा दिहस।

28यद्यपि दुटठ लोग मोका सराप देत ह, हे यहोवा तू मोका आसीबर्बाद दे। यद्यपि उ पचे मोह पइ वार करत ही, ओनका अपमानित होइ द्या। किन्तु तोहार सेवक क खुस होइ द्या।

29मोर विरोधियन क अपमान स ढोंपि लेइ द्या। ओनका लज्जा स घेरी लेइ द्या।

30मई यहोवा क बहोत अधिक धन्यवाद देत हउँ। बहोत लोगन क समन्वा ओकर गुण गावत हँउ।

31काहेकि यहोवा असहाय लोगन क साथ देत ह। उ ओनका लोगन स बचावत ह, जउन ओन पइ निआव करत ह।

## भजन 110

दाऊद क वाद्य यंत्र क संग एक तु गीत।

1यहोवा मोर सुआमी स कहेस, “तू मोर दाहिन कइँती तब तलक बैठि जा, जब तलक कि मई तोहरे दुस्मनन क तोहरे गोड़न क चौकी न बनाइ देउँ।”

2यहोवा तोहार राज क अधिकार सिन्धोन स स्थापित करी। तू आपन दुस्मनन पइ सासन करी।

3तोहरे पराक्रम क दिन तोहरी प्रजा क लोग स्वेछा बलि बनिहीं। तोहार जवान पवित्तर होइ स सुसोभित भिन्सारे क गर्भ स जन्मी ओसे क नाई तोहरे लगे अहई।

4यहोवा एक वचन दिहस, अउर उ आपन मन नहि बदली। “तू हमेसा बरे याजक अहा, जइसा मेलकीसेदेक क समूह क याजक रहा।”

5मोर सुआमी, तोहार मदद बरे तोहार निचके खड़ा रहत ह। ओकरे गुस्सा दिखावइ क दिन उ दूसर राजा लोगन क हराइ दिहे रहा।

6परमेस्सर रास्ट्रन क निआउ करी। परमेस्सर उ महान धरती प नेता लोगन क हराइ दिहस। ओनकर मरी देहन स धरती भरि गइ रही।

7राहे क झरना स पानी पिए क पाछे ही राजा आपन मूँड़ी उठाई अउर फुरइ बलवान होइ।

## भजन 111

1यहोवा क गुण गावा। यहोवा क आपन सम्पूर्ण मने स अइसी उ सभा में धन्यवाद करत हउँ जहाँ सज्जन मिला करत हीं।

2यहोवा महान करम करत ह। लोगन जउन ओन चिजियन क महत्त्व जानत हीं ओनका खोजत हीं।

3यहोवा फुरइ इ महिमामय अउर अचरजे स भरा काम करत हीं। ओकरा खरापन सदा-सदा बना रहत ह।

4परमेस्सर अद्भुत करम करत ह ताकि हम याद राखी कि यहोवा करुणा स भरा अउर दया स भरा बाटइ।

5उ आपन भगतन क भोजन देत ह। उ हमेसा आपन करार क याद राखत ह।

6उ आपन लोगन क ओन भुँइया देइके जउन दूसर रास्ट्रन अहइ महान कारज देखाएस ह।

7परमेस्सर जउन कछू करत ह उ बिस्सास योग्य अउर फुरइ बाटइ। ओकर सबहिं आग्यन नियावपूर्वक अहई।

8परमेस्सर क आग्यन सदा ही बना रहहीं। परमेस्सर क ओन आदेसन क देइ क प्रयोजन फुरइ अउ निस्पच्छ रहेन।

9उ आपन लोगन क मुक्त करत ह। उ ओनसे एक करार किहेस ह जउन सदा-सदा रहइ। परमेस्सर क नाउँ अचरजे स भरा अउर पवितर अहइ।

10विवेक भय अउर यहोवा क आदर स उपजत ह। उ पचे लोग बुद्धिमान होत हीं जउन यहोवा क आदर करत हीं। यहोवा क स्तुति सदा सदा गई जात रही।

### भजन 112

1यहोवा क बड़कई करा। अइसा मनई जउन यहोवा स डेरात ह अउर ओकर आदर करत ह उ बहोत सफल होइ। परमेस्सर क आदेस अइसे लोग क भावत हीं।

2धरती पइ अइसे मनई क संतानन मज़बूत होइहीं। अच्छे मनई क संतानन आसीबादि पाइहीं।

3अइसे मनई क परिवार बहोत धनवान होइ। ओकर नीक करम सदा सदा बनी रही।

4सच्चे लोगन बरे परमेस्सर अइसा होत ह जइसे अँधियारा में चमकत प्रकास होइ। उ सच्चा अहइ, अउर करुणा स भरा बाटइ अउर दया स भरा बा।

5इ मनई बरे नीक बाटइ कि उ दयालु अउर उदार होइ। मनई क इ उत्तिम अहइ कि उ आपन वादा में खरा रहइ।

6अइसा मनई क पतन कबहुँ नहीं होइ। एक सच्चा मनई क सदा याद कीन्ह जाइ।

7सज्जन व्यक्ति बुरी खबरन स नहीं डेरात। अइसा मनई यहोवा क भरोसे अहइ अउर आस्वस्त रहत ह।

8अइसा मनई आस्वस्त रहत ह उ ससान नहीं रहत। उ आपन दुस्मनन क हराइ देइ।

9अइसा मनई दीन जनन क मुक्त दान देत ह। ओकर नीक करम जेका उ दीन लोगन बरे दिखावत ह उ सदा सदा बना रइहीं। उ बहोत सम्मानित कीन्ह जाइ।

10कुटिल लोग ओका लखिहीं अउर कुपित होइहीं। उ पचे किरोध में आपन दाँतन क पिसिहीं अउर फुन लुप्त होइ जइहीं। दुट्ट लोग ओका कबहुँ नहीं पइहीं जेका उ सब स जियादा पावइ चाहत हीं।

### भजन 113

1यहोवा क स्तुति करा, हे यहोवा क सेवकन, ओकर स्तुति करा। यहोवा क नाउँ क बड़कई करा।

2यहोवा क नाउँ अबहुँ अउर सदा सदा बरे आसीसित होइ।

3मोर इ कामना अहइ, यहोवा क नाउँ क गुण पूरब स जहाँ सूरज उगत ह, पच्छिउँ तलक उ ठउरे में जहाँ सूरज बूडत ह गावा जाइ।

4यहोवा सबहिं रास्ट्रन स महान अहइ। ओकर महिमा अकासे तलक उठति ह।

5यहोवा हमरे परमेस्सर क नाई कउनो भी मनई नहीं अहइ जउन जँचाइ पइ विराजमान अहइ।

6भले ही उ सबइ बातन क जउन धरती अउर आकासे पइ घटत ह, लखइ बरे उ नीचे झुकिके निगाह डावइ ह।

7परमेस्सर गरीब मनइयन क धूरि स उठावत ह। उ ओनका क गन्दगी स निकारत ह।

8परमेस्सर ओनका महत्वपूर्ण बनावत ह। परमेस्सर ओन लोगन क महत्वपूर्ण मुखिया बनावत ह।

9कउनो मेहरारू बे औलाद होइ सकत ह, किन्तु परमेस्सर ओका बच्चा स आसीसित करी, अउर ओका खुस करी। यहोवा क गुणगान करा।

### भजन 114

1जब याकूब क घराना बिदेसियन क रास्ट्र मिस्र क तजेस।

2उ समइ यहूदा परमेस्सर क खास मनई बना, इस्त्राएल ओकर राज्ज बन गवा।

3लाल सागर ऐँका लखेस, उ पराइ गवा। यरदन नदी उलटिके बह चली।

4पर्वत मेमनन क नाई नाच गएन। पहाड़ी भेड़न क नाई नाचि गइन।

5हे लाल सागर, तू काहे पराइ गया? हे यरदन नदी, तू काहे उलटी बहिउ?

6हे पहाड़ो, काहे तू पचे भेड़न क नाई नाच्या? हे पहाड़ियो, तू पचे काहे मेमनन जइसी नाचिउ?

7हे धरती, यहोवा याकूब क परमेस्सर, सुआमी क समन्वा कौंप।

8परमेस्सर ही चट्टानन क चीरिके जल क बाहेर बहाएस। परमेस्सर पक्की चट्टान स जल क झरना बहाए रहा।

### भजन 115

1यहोवा। हमका कउनो गौरव ग्रहण नहीं करइ चाही। गौरव तउ तोहार अहइ। तोहार पिरेम अउ निस्था क कारण गौरव तोहार अहइ।

2रास्ट्रन काहे कहिइ, 'ओकर परमेस्सर कहाँ अहइ?'

3मोर परमेस्सर सरगे में अहइ। उ उहइ करत ह जउन कछू उ चाहत ह।

4ओन जातियन क "देवता" बस सिरिफ पुतला अहइँ जउन सोना चाँदी क बना अहइँ। उ सबइ बस सिरिफ पुतलन अहइँ जेनका कउनो मनई बनाएस ह।

5ओन पुतलन क मुँह अहइँ, मुला उ सबइ बोल नहीं पउतेन। ओनकर आँखिन अहइँ, पर उ सबइ लिख नहीं पउतेन।

6ओनके कान अहइँ, मुला उ सबइ सुन नहीं सकतेन। ओनके लगे नाक अहइँ, मुला उ सबइ सूँघ नहीं पउतेन।

7ओनके हाथ अहइँ, मुला उ पचे कउनो चीज क छुइ नहीं सकतेन। ओनके गोड़ अहइँ, मुला उ पचे चल नहीं सकतेन। उ पचे आपन गटइ स कउनो आवाज़ नहीं निकारइ सकतेन।

8जउन मनई इ सबइ पुतलन बनावत हीं, अउर ओनमाँ बिस्सास धरत हीं बिल्कुल इ सबइ मूरतियन जइसे बन जइहीं।

9ओ इस्त्राएल क लोगो, यहोवा में भरोसा रखा। यहोवा इस्त्राएल क मदद देत ह अउर ओकर रच्छा करत ह।

10ओ हारून क घराने, यहोवा में भरोसा रखा। हारून क घराने क यहोवा सहारा देत ह, अउ ओकर रच्छा करत ह।

11हे यहोवा क सबइ मनवइयो, ओनमों भरोसा रखा। उ सहारा देत ह अउर आपन लोगन क रच्छा करत ह।

12यहोवा हमका याद राखत ह। यहोवा हमका वरदान देइ, यहोवा इस्त्राएल क आसीसित करी। यहोवा हारून क परिवार क आसीसित करी।

13उ ओन लोगन क आसीसित करी जउन ओहसे डेरत ह, छोटा स लइके बरा तलक।

14मोका आसा अहइ यहोवा तोहार बढोतरी करी अउर मोका आसा अहइ, उ तोहार संतानन क भी जियादा स जियादा देइ।

15यहोवा जउन सरग अउ धरती क बनाएस ह, तोहका आसीस देइ।

16सरग यहोवा क अहइ। मुला उ धरती क मानव जाति क दिहेस ह।

17मरे भए लोग यहोवा क गुण नाहीं गउतेन। कब्र में पड़े भए लोग यहोवा क गुणगान नाहीं करतेन।

18मुला हम अबहुँ यहोवा क स्तुति करति ह, अउर हम ओकर स्तुति सदा-सदा करब।

### भजन 116

1मई यहोवा स पिरेम करत हउँ जब उ मोर पराथनन क सुनत ह अउर एकर जवाब देत ह।

2मई ओका पिरेम करत हउँ काहेकि उ मोर सुनत ह। मई आपन सारी जिन्नगी ओका मदद बरे बुलावत हउँ।

3मई लगभग मरि चुका रहेउँ। मोरी चारिहुँ कइँती मउत क रस्सा बँधि चुका रहेन। कब्र मोका लीलत रही। मई डेरान रहेउँ अउर मई चिंतित रहेउँ।

4तब मई यहोवा क ओकर मदद लेइ बरे गोहराएउँ, मई कहेउँ, “यहोवा, मेहरबानी कइक मोका बचाइ ल्या।”

5यहोवा खरा अहइ अउर दया स पूर्ण अहइ। परमेस्सर करुणा स पूर्ण अहइ।

6यहोवा असहाय लोगन क देख-रेख करत ह। मई परेसानी में रहेउँ अउर यहोवा मोका बचाएस।

7हे मोर प्राण, फुन स आराम करा। काहेकि यहोवा तोहार देख-रेख करत ह।

8हे परमेस्सर, तू मोर प्राण मउत स बचाया। मोर आँसुअन क तू रोक्या अउर गिरइ स तू मोका थाम लिहा।

9जीवित लोगन क धरती में मई यहोवा क सेवा करत हउँ।

10मई लगातार बिस्सास बनाए राखेउँ हिआँ तलक कि जब मई कहि दिहे रहेउँ, “मई बहोत पीड़ा में होइ गवा रहेउँ।”

11मई हिआँ तलक विस्सास संभाले राखेउँ जब कि मई डेरान रहेउँ अउर मई कहेउँ, “सबहिं लोग झूठा अहइ।”

12मई भला यहोवा क ओन नीक कामन क बदले में का अर्पित कइ सकत हउँ जउन उ मोर बरे किहेस?

13मई ओका पेय भेंट देब काहेकि उ मोका बचाएस ह। मई यहोवा पइ आस्त्रित रहब।

14मई यहोवा क लोगन क समन्वा आपन वचन क पूरा करब जउन मई ओहसे किहे रहेउँ।

15हिआँ तलक कि कउनो एक मउत भी ओन लोगन क जउन यहोवा बरे अपराध किहेन ह, ओकरे बरे बहोत महत्वपूर्ण अहइ।

16हे यहोवा मई तोहार एक मेहरारू नउकर क सन्तान हउँ। हे यहोवा, तू ही मोका मोरे बंधन स अजाद किहा।

17मई तोहका एक धन्यवाद बलि अर्पित करब। मई यहोवा क नाउँ स गोहराउब।

18मई यहोवा क लोगन क समन्वा आपन वचन क पूरा किहेउँ ह जउन मई ओहसे किहे रहेउँ।

19मई यहोवा क मन्दिर क आंगन में जाब जउन यरूसलेम में अहइ। यहोवा क क स्तुति करब।

### भजन 117

1समूचइ रास्ट्रन यहोवा क नाउँ क बड़कई करा। हे लोगो, यहोवा क गुण गावा।

2काहेकि उ हम पइ बहोत पिरेम दिखावत ह। ओकर बिस्सास सदा-सदा बरे रही। यहोवा क बड़कई करा।

### भजन 118

1मई यहोवा क धन्यवाद देत हउँ, काहेकि उ नीक अहइ। ओकर पिरेम सदा ही रहत ह।

2इस्त्राएल इ कहइ द्या, “ओकर बिस्ससनीय पिरेम सदा ही रहत ह।”

3याजक अइसा कहत हीं, “ओकर बिस्ससनीय पिरेम सदा अटल रहत ह।”

4तू लोग जउन यहोवा क उपासना करत अहा, कहा करत अहा, “ओकर बिस्ससनीय पिरेम सदा ही अटल रहत ह।”

5मई परेसानी में रहेउँ, एह बरे मई मदद बरे यहोवा क पुकारेउँ। उ मोका जवाब दिहस अउर यहोवा मोका अजाद किहस।

6यहोवा मोरे कइँती अहइ, मई कबहुँ नाहीं डेराब। लोग मोका कउनो हानि नाहीं पहोंचावइ सकतेन।

7यहोवा मोर सहायक अहइ। मई आपन दुस्मनन क हारा देखब।

8मनइयन पइ भरोसा रखइ स यहोवा पइ भरोसा राखब उत्तम अहइ।

9इ हमेसा उत्तम अहइ कि पहिले आपन यहोवा पइ भरोसा करा तउ आपन मुखियन पइ।

10मई आपन दुस्मनन दुआरा घेरि लिहे गवा रहेउँ। यहोवा क सक्ति स मई आपन बैरी लोगन क हराइ दिहेउँ।

11बहोत सारा दुस्मनन मोका चारिहउँ कइँती स घेरि लिहन ह। मई आपन दुस्मनन क यहोवा क सक्ति स हराएउँ।

12दुस्मनन मोका मधु माखियन क झुण्ड क नाई घेरि लिहन। मुला, उ सबइ हाली बरत भइ झाड़ी क नाई बर्बाद भएन। यहोवा क सक्ती स मई ओका हराएउँ ह।

13मोर दुस्मनन मोह पइ वार किहन अउ मोका लगभग बर्बाद कइ दिहन मुला यहोवा मोका सहारा दिहस।

14यहोवा मोर सक्ती अउर मोर विजय गीत अहइ। अउर उ रच्छक बनि गवा ह।

15सज्जनन क घर में जउन विजय पर्व मनत अहइ तू ओका सुन सकत ह। देखा, यहोवा आपन महासक्ती फुन देखाएस ह।

16यहोवा क भुजन विजय में उठी भइ अहइँ। देखा यहोवा आपन महासक्ती फुन स देखाएस।

17मईँ जिअत रहब, मईँ मरब नाहीं, अउर जउन करम यहोवा किहस ह, मईँ ओन लोगन क गनती फुन स करब।

18यहोवा मोका दण्ड दिहस, मुला उ मोका मरइ नाहीं दिहस।

19सच्चाई क दुआसन क खोला, ताकि मईँ भीतर आइ पाउँ अउर यहोवा क आराधना करउँ।

20यहोवा क मौजूदगी में जाइ क दुआर हिआँ अहइ। बस सिरिफ धर्मी लोग ही ओन दुआसन स होइके जाइ सकत हीं।

21हे यहोवा, मोर पराथना क जवाब देइ बरे अउर मोका रच्छा करइ बरे तोहका धन्यवाद देत अहउँ।

22जउन पाथर क राज मिस्त्रियन नकार दिहे रहेन उहइ पाथर क प्रयोग कोना क पाथर क रूप में कीन्ह गवा।

23यहोवा इ घटना क होइ दिहस। अउर हम सबइ एहमों अद्भूत महसूस कीन्ह।

24इ उहइ दिना अहइ जेका यहोवा बनाएस ह। आवा हम खुसी क अनुभव करी अउर आजु आनन्दित होइ जाइ।

25लोग कहेन, "हे यहोवा, हम पचन क बचाव करा, हे यहोवा हमार रच्छा करा।

26उ मनई धन्न होइ जउन यहोवा क नाउँ में आवत अहइ।" मईँ यहोवा क घर में तोहार स्तुति करित हउँ।

27यहोवा परमेस्सर अहइ। उ आपन प्रकास स हम पचन क छाया दिहेस ह। वेदी क कोनन पइ भेंट क मेमना क बाँधा।"

28हे यहोवा, तू हमार परमेस्सर अहा, अउर मईँ तोहार धन्यवाद करत हउँ। मईँ तोहार गुण गावत हउँ, हे मोर परमेस्सर।

29यहोवा क बड़कई करा काहेकि उ उत्तम अहइ। ओकर सच्ची करुणा सदा सदा बनी रहत ह।

## भजन 119

### आलेफ

1जउन लोग इमानदारी स जीवन जिअत हीं, उ सबइ कामयाब रहत हीं। अइसे लोग यहोवा क सिच्छा पइ चलत हीं।

2लोग जउन यहोवा क करार पइ चलत हीं, उ पचे कामयाब रहत हीं। आपन समूचइ मन स उ पचे यहोवा क मानइ बरे खोजत हीं।

3उ पचे लोग बुरा काम नाहीं करतेन। उ पचे यहोवा क आग्या क मानत हीं।

4हे यहोवा, तू आपन उपदेस इ बरे दिहा ह, हम पचे ओका धियान स पालन कइ सकी।

5हे यहोवा, मईँ सदा तोहरे कानून क नियमित रूप स पालन करेउँ,

6तब जब मईँ तोहर सबइ आग्यन क पढ़ब मईँ कबहुँ भी नाहीं लजाब।

7मईँ तोहार स्तुति पूरी मन स करब जेतैना जियादा मईँ तोहरे फइसलन क बारे में सिखेउँ ह।

8हे यहोवा, मईँ तोहरे कानूनन क पालन करब। तउ कृपा कइके मोका पूरी तरह स जिन बिसरा।

### बैथ

9एक जवान मनई तोहरे निर्देसन पइ चलइ कइ कइसे आपन जीवन पक्तर रख पावइ?

10मईँ, आपन पूर्ण मन स यहोवा क सेवा क जतन करत हउँ। कृपा कइके तोहरे आग्यन क मानइ में मोका जिन गलती करइ द्या।

11मईँ धियान पूर्वक तोहार वचन याद किहेउँ ह। काहेकि मईँ तोहरे खिलाफ फुन स पाप न करइ चाहत हउँ।

12हे यहोवा, मईँ तोहार स्तुति किहेउँ ह। कृपा कइके मोका तोहार कानून क सिखावा।

13मईँ तोहार सबहिं फइसलन क बारे में बताउब।

14तोहरे करार क निर्देसन क पालन करब मोका दूसर कउनो धन स जियादा भावत अहइ।

15मईँ तोहरे उपदेसन पइ विचार किहेउँ ह, अउर मईँ तोहरे सिद्धान्तन पइ चलत हउँ।

16मईँ तोहरे नियमन में आनन्द लेत हउँ। मईँ तोहरे बचनन क नाहीं भूलब।

### गिमेल

17आपन सेवक, मोर बरे अच्छा करा ताकि मईँ जी सकेउँ अउर तोहरे वचन पइ चलि सकेउँ।

18हे यहोवा, मोर आँखी खोला तउ होइ सकत ह कि मईँ एका लिख सकत हउँ। अउर तोहरी अद्भुत बातन पढ़ सकेउँ जेका तू किहा ह।

19मईँ इ धरती पइ एक अनजाना परदेसी हउँ। हे यहोवा, आपन सिच्छन क मोसे जिन छिपावा।

20मोर हमेसा तोहरे जरिए पइ बना भवा फइसलन क अध्ययन क अभिलासा रखत हउँ।

21हे यहोवा, तू अहंकारी जन क फटकारत ह। ओन अहंकारी लोगन पइ बुरी बातन घटित होइहीं। उ सबइ तोहरे आदेसन स मुरि गवा अहइँ।

22लज्जा अउर अपमान क मोसे हटाइ द्या। मईँ तोहरी करार क पालन किहेउँ ह।

23हिआँ तलक कि नेता लोगन भी मोरे बरे बुरी बातन किहेन ह। मुला मईँ तउ तोहार सेवक अहउँ। मईँ तोहरे विधियन क समुझत हउँ।

24तोहार करार मोर सर्वोत्तम मीत अहइ। इ मोका नीक सलाह दिया करत ह।

### दालथ

25मईँ हाली दालथ मरि जाब। हे यहोवा, तू आदेस द्या अउर मोका जिअइ द्या।

26मईँ तोहका आपन जिन्नगी क बारे में बताएँ ह, तू मोका जवाब दिहा ह अबइ तू मोका आपन विधान बतावा।

27हे यहोवा, मोर सहायता करा ताकि मई समुझ सकेऊँ कि तोहार उपदेसन क पालन कइसे कीन्ह जाई सकी। मोका ओन अद्भुत कर्मन क चिंतन करइ द्या जेनका तू किहा ह।

28मई दुःखी अउर थका हउँ। वचन क मुताबिक मोका तू फुन स मज़बूत बनाइ द्या।

29हे यहोवा, मोका कउनो परेसानी क जीवन जिन जिअइ द्या। तोहार कानून क मोका दयालुता स सिखावा।

30मई तोहार करार क मानइ बरे चुने रहेऊँ। मई आपन आप क तोहार विवेकी फइसलन क अध्ययन अउर पालन करइ क वचन बद्ध किहेऊँ ह।

31तोहार करार क संग मई लगनशील अहउँ। हे यहोवा, मोका असफल जिन होइ द्या।

32मई तोहरे आग्यन क पालन उत्सुकता स किह्या ह जब तू मोर समुझदारी क बढ़ाया ह।

### हे

33हे यहोवा, तू मोका आपन व्यवस्था सिखावा तब मई धियानपूर्वक ओनकर अनुसरण करब।

34ओनका समुझई मैं मोर मदद करा। अउर मई तोहरी सिच्छन क पालन करब। मई पूरी मन स ओनकर पालन करब।

35मोका आपन आग्यन क राहे पइ चलावा। मई ओन पइ प्रसन्न हउँ।

36मोर मदद करा कि मई तोहरे करार क मनन करउँ, बजाय ओकरे कि कइसे धन हासिल करेऊँ।

37मोका बियर्थ चिजियन पइ धियान जिन देइ द्या। तोहार राहे मैं रहइ बरे मोर मदद करा।

38मई तोहार सेवक अहउँ। तउ ओन बातन क करा जेनकर वचन तू दिहा ह ताकि मई तोहार सम्मान कइ सकउँ।

39मोका उ अपमान स मुक्त करा जेसा मई डेरात हउँ। तोहार फइसलन हमेसा नीक होत हीं।

40मई तोहरे उपदेसन क अभिलासी हउँ। मोर भला करा अउर मोका जिअइ द्या।

### वाव

41हे यहोवा, तू सच्चा निज पिरेम मोह पइ परगट करा। मोर रच्छा वइसे ही करा जइसे तू वचन दिहा।

42तब मोरे लगे ओन लोगन बरे एक जवाब होइ जउन मोर अपमान करत हीं। काहेकि मई तोहार वचन पइ भरोसा रखत हउँ।

43तोहार सच्ची सिच्छा क बोलइ मैं सदा मोरे मदद करा। मई तोहरे बुद्धिमान फइसलन पइ निर्भर अहउँ।

44हे यहोवा, मई तोहरी सिच्छन क पालन सदा अउ सदा बरे करब।

45तउ मई सुरच्छित जिनगी जिअब। मई तोहरी व्यवस्था क पालइ क कठिन जतन करत हउँ।

46मई यहोवा क करार क चर्चा राजा लोगन क संग करब अउर उ पचे उत्साह मैं होइके सुनिहीं मोहसे लजाइहीं नहीं।

47हे यहोवा, मोका तोहरी सबइ आग्यन क मनन जेहसे मई पिरेम करत हउँ भावत ह।

48मई तोहरी आग्यन कइती जेहसे मई पिरेम करत हउँ हाथ फइलाउब, अउर मई तोहार कानून पइ बिचार करत हउँ।

### जैन

49हे यहोवा, कृपा कइके आपन वचन क याद रखा, जउन तू मोहसे किह्या ह। उहइ वचन मोका आसा देत ह।

50जब मई झेलत रहेऊँ, तू मोका चइन दिहा। तोहार वचन मोका जीवन देत ह।

51लोग जउन खुद क मोहसे उत्तिम सोचत हीं, निरन्तर मोर अपमान करत अहई। मुला हे यहोवा मई तोहार सिच्छन पइ चलब नहीं तजेऊँ।

52मई तोहरे ओन फइसलन क याद करत हउँ जेका तू बहोत पहिले दिहा ह, अउर मई मोका चइन देत अहई।

53जब मई अइसे दुट्ठ लोगन क लखत हउँ, जउन तोहरी सिच्छन पइ चलब तजेन ह, तउ मई बहोत कोहाइ जात हउँ।

54तोहार सबइ कानून मोर बरे आनन्दित भजन होत जहाँ कहिउँ भी मई रहत हउँ।

55हे यहोवा, राति मैं मई तोहरे नाउँ क धियान अउर तोहरी नेमन क पालन करत हउँ।

### खेथ

56इ मोर अभ्यास होत रहत ह। मई होसियारी स तोहरे उपदेसन क मानत हउँ।

57हे यहोवा, तू मोर अंग अहइ, एह बरे मई तोहार आग्यन क पालन करब।

58हे यहोवा, मई पूरी मन स तोहार खोज किहेऊँ ह, जइसा वचन तू दिहा मोह पइ दयालु हवा।

59मई आपन राहे पइ बहोत धियान दिहेऊँ ह, ताकि मई तोहरी करार क मुताबिक चल सकउँ।

60मई बिना देरी किहे तोहरे आग्यन पइ चलइ क इच्छुक अहउँ।

61दुट्ठन आपन फन्दन मोका फंसाइ लिहेन ह। मई तोहरी सिच्छन क कबहुँ नहीं बिसेरेऊँ।

62तोहरे सच्चा फइसलन क तोहका धन्यवाद देइ बरे मई आधी रात क बीच जगत हउँ।

63जउन कउनो मनई तोहसे डेरात ह तउ मई ओकर मीत अहउँ। अगर कउनो मनई तोहरे उपदेसन पइ चलत ह, मई ओकर मीत अहउँ।

64हे यहोवा, इ समूचइ धरती तोहरी बिस्ससनीय पिरेम स भरी भइ बा। मोका तू मोका अपने विधान क सिच्छा द्या।

### टेथ

65हे यहोवा, तू आपन दास बरे अच्छा काम किहे अहा। तू ठीक वइसा ही किहा जइसा तू करइ क वचन दिहा रह्या।

66हे यहोवा, मोका सही बुद्धि अउ गियान द्या कि मई तोहार आदेसन पइ बिस्सास करेउँ।

67पीड़ित होइ स पहिले मूरखता स मई बुरे करम किहे रहेउँ। मुला अब, मई धियानपूर्वक तोहरे आग्यन क पालन करत हउँ।

68तू अच्छा अहइ, अउर अच्छा काम करत अहा। मोका आपन कानून क सिच्छा द्या।

69घमण्डी लोग मोरे बरे बहोत सारा झूठी बात बोलत हीं। किन्तु यहोवा मई आपन पूर्ण वचन बद्धता स तोहरे उपदेसन क पालन करब।

70उ लोगन क दिमाग तोहार उपदेसन क नाहीं समुझ सकतेन। मुला, मई तोहरी उपदेसन क अध्ययन कइके बहोत खुसी पावत हउँ।

71हिआँ तलक कि कस्ट भी मोर बरे बढिया बनि गवा रहा। उहइ तरह मई तोहरी कानून क सीख लिहेउँ।

72तोहरी सीखन मोरे बरे भली होत अहइ। तोहार सीखन हजारा सोना अउ चाँदी क टूकन स उत्तिम अहइ।

### योध

73हे यहोवा, तू मोका बनाया ह मोर स्थापना आपन निज हाथन स किह्या ह। आपन आग्यन क पढ़इ समुझ में तू मोर मदद करा।

74हे यहोवा, तोहार भगत मोका लखत हीं, अउर उ पचे खुस अहइ, काहेकि मई तोहार बातन पइ भरोसा रखत हउँ।

75हे यहोवा, मई इ जानत हउँ कि तोहार फइसला हमेसा नीक अउ खरा होत हीं। एह बरे इ मोरे बरे उचित रहा कि तू मोका कस्ट दिहा ह।

76अब, आपन सच्चे पिरेम स मोका आराम द्या। मोका आराम द्या जइसा तू आपन सेवक स किह्या ह।

77मोह पइ कृपा करा तइ मई जी सकेउँ। फुरइ मई तोहार उपदेसन में आनन्दित अहउँ।

78ओन लोगन क जउन सोचा करत हीं कि उ पचे मोसे उत्तिम बाटेन, ओनका लजाइ द्या। काहेकि उ पचे मोरे बारे में झूठी बातन कहेन ह। हे यहोवा, मई तोहरे उपदेसन क बिचार किहेउँ ह।

79आपन भगतन क मोरे लगे लउटि आवइ द्या। अइसे ओन लोगन क मोरे लगे लउटि आवइ द्या, जेनका तोहरी करार क जानकारी अहइ।

80मोरे हिरदय क हमेसा तोहार कानून क मानइ द्या, ताकि मई कबहुँ लज्जित न होबेउँ।

### काफ़

81मई तोहार इन्तज़ार करइ में कमज़ोर होइ गवा हउँ कि तू मोका बचउब्या। मुला यहोवा, मोका तोहार वचन पइ भरोसा बा।

82जउन बातन क तू वचन दिहे रह्या, मई ओनकर बाट जोहत रहत हउँ। मुला मोर आँखिन दुर्बल होइ गइ अहउँ। तू मोका कब आराम देब्या?

83हिआँ तलक जब मई कचड़ा क धुआँ पइ क दाखरस क झुरान मसक जइसा हउँ, बूढ़ा अउर झुरीदार तबहुँ भी तोहरे कानून क न भूलब।

84मई कब तलक जिअब? हे यहोवा, कब सज़ा देब्या तू अइसे ओन लोगन क जउन मोहका सतावत हीं?

85कछू अहंकारी लोग आपन फंदन स मोह पइ वार किहे रहेन। इ तोहरी सीखन क खिलाफ अहइ।

86हे यहोवा, सब लोग तोहरी आग्यन क भरोसे कइ सकत हीं। उ पचे मोका बिना कउनो कारण सतावत रहत हीं। मोर मदद करा।

87ओन सबइ लोग धरती स करीब करीब मोका बर्बाद कइ दिहन ह। तउ प भी मई तोहरे उपदेसन क नाहीं तजेउँ।

88हे यहोवा, आपन बिस्सासी पिरेम क मोह पइ परगट करा। अउर मोका जिन्गी द्या। तउ मई तोहार करार क पालन कइ सकेउँ।

### लामेध

89हे यहोवा, तोहरे वचन सरग में, उ सबइ सदा रहत हीं।

90तू हमेसा हमेसा बरे बिस्सासी अहा। तू ही धरती ओकरे जगह पइ रच्या अउर इ हमेसा स हिआँ रहत रह्या।

91तोहरे फइसलन क कारण ही अब तलक सबहिँ वस्तु मौजूद अहइ। काहेकि सबहिँ चिजियन तोहार सेवक अहइ।

92अगर तोहार सीखन मीत जइसी नाहीं होतिन, तउ मोर संकट मोका बर्बाद कइ डउतेन।

93हे यहोवा, तोहरे आदेसन क मई कबहुँ नाहीं बिसरब। काहेकि उ सबइ ही मोका जिअत राखत हीं।

94हे यहोवा, मई तउ तोहार अहउँ, मोर रच्छा करा। काहेकि तोहरे उपदेसन पइ चलइ क मई कठिन जतन करत हउँ।

95दुट्ट जन मोका विनास करइ क इन्तज़ार करत हीं, मुला मई तोहार करार क समुझइ बरे ओहे पइ विचार करत हउँ।

96सब कछू क सीमा अहइ, किन्तु तोहरी आग्यन आपन छेत्र में असीमित अहइ।

### मेम

97मई तोहरी उपदेसन स बहोत जिआदा पिरेम करत हउँ। हर घड़ी मई ओनकर ही बारे में सोचत हउँ।

98तोहार आदेसन मोका मोर दुस्मनन स जियादा बुद्धिमान बनाएन। तोहार कानून क वजह स उ सदा मोरे संग रहत ह।

99मई आपन सबइ सिच्छकन स जियादा बुद्धिमान हउँ, काहेकि मई तोहरी करार क अध्ययन किया करत हउँ।

100मई बुजुर्ग प्रमुखन स जियादा समुझत हउँ। काहेकि मई तोहरे आदेसन क मानत हउँ।

101मई तोहार आदेसन क पालन करइ बरे हर बुरे काम स बचा हउँ।

102हे यहोवा, तू मोर सिच्छक अहा। एह बरे मई तोहरे फइसलन स नाहीं मुरेउँ ह।

103तोहार वचन मोर मुहे में मधु स भी जियादा मीठा अहइ।

104तोहार उपदेसन क मई सावधान पूर्वक अध्यन करत हउँ, एह बरे मई झूठापन स घिना करत हउँ।

### सू

105हे यहोवा, तोहार सिच्छन मोका बुद्धिमान बनावत हीं। तउ झूठी सिच्छन स मई घिना किया करत हउँ।

106तोहार फइसलन बहोत नीक अहई। मई ओनका पालन करइ क प्रतिग्या कियेउँ, एह बरे मई पालन करब।

107हे यहोवा, बहोत समइ तलक मई विपदन झेलेउँ ह, कृपा कइके मोका वइसी जिन्नगी द्या जइसा तू देइ क वादा किहा ह।

108हे यहोवा, मोरी बिनती क तू अंगीकार करा जउन मई तोहका भेंट करत हउँ, अउर मोका आपन फइसलन क सिच्छा द्या।

109होइ सकत ह कि मई हर दिन आपन जीवन जोखिम में डालत हउँ, किन्तु मई तोहार उपदेसन क कबहुँ नाहीं बिसरत हउँ।

110दुटठ जन मोका फँसावइ क जतन करत हीं, मुला मई तोहरे उपदेसन नाहीं मुरेउँ ह।

111तोहार करार सदा बरे मोर खज़ाना अहइ। इ मोका बहोत खुस किया करत ह।

112मई सदा तोहरे विधान पइ चलइ क बहोत कठोर जतन करब।

### सामेख

113हे यहोवा, मोका अइसे ओन लोगन स घिना अहइ, जउन पूरी तरह स तोहरे बरे सच्चा नाहीं अहई। मोका तउ तोहार सिच्छन भावत हीं।

114तू मोर ढाल अउर रच्छक अहा। मई तोहार वचन पइ भरोसा कियेउँ ह।

115दुटठ लोगन क मोहसे दूर करा, ताकि मई आपन परमेस्सर क आग्यन क पालन कइ सकेउँ।

116हे यहोवा, मोका अइसे ही सहारा द्या जइसे तू वचन दिहा, ताकि मई जी सकेउँ। मोका तोहेमों बिस्सास अहइ, मोका निरास जिन करा।

117हे यहोवा, मोका सहारा द्या कि मोर उद्धार होइ। मई सदा तोहरे आदेसन क पाठ किया करब।

118हे यहोवा, तू हर अइसे मनई स विमुख होइ जात ह, जउन तोहार नेम तोइत हीं। काहेकि उ पचे छल क बियर्थ राहन क पालन करत हीं।

119हे यहोवा, तू इ धरती स सबहिं दुटठ लोगन क अइसा हटावा, जइसेन उ पचे बेकार पदार्थ होइ, मई तोहरी करार स सदा पिरेम करब।

120हे यहोवा, मई तोहसे डेरान हउँ, मई डेरत अहउँ, अउर तोहरे विधान क आदर करत हउँ।

### ऐम

121मई उ सबइ बातन कियेउँ ह जउन नीक अउर खरा अहई। हे यहोवा, तू मोका अइसेन ओन लोगन क जिन सौपा जउन मोका हानि पहुँचावइ चाहत हीं।

122मोका वचन द्या कि तू मोरे बरे अच्छा करब्या। मई तोहार दास अहउँ। हे यहोवा, अहंकारी लोगन क मोह पइ अत्याचार जिन करइ द्या।

123हे यहोवा, तू आपन अच्छाई स मोका वचन दिहे रह्या कि तू मोर मदद करब्या। मुला मोर आँखी तोहार राह निहारत भए थकी गइन।

124तू आपन बिस्ससनीय पिरेम मोह पइ परगट करा। मई तोहार दास हउँ। तू मोका आपन विधान क सिच्छा द्या।

125मई तोहार सेवक हउँ। आपन विवेस स मोका आसीस द्या तउ मई तोहार करार क समुझ सकेउँ।

126कार्यवाही करा, हे यहोवा, काहेकि ओन लोग तोहरे कानून क नाफरमानी करत हीं।

127हे यहोवा, उत्तिम सुवर्ण स भी जियादा मोका तोहार आदेस भावत हीं।

128तोहरे सब उपदेसन क बहोत सावधानी स मई पालन करत हउँ। मई सबइ झूठे रास्तन स घिना करत हउँ।

### पे

129हे यहोवा, तोहार करार अद्भुत बा। एह बरे मई ओकर अनुसरण करत हउँ।

130तोहार वचन क व्याख्या प्रकास लावत ह। तोहार सिच्छन बुद्धिहीन लोगन क समुझ देत ह।

131हे यहोवा, मई तोहरे आदेसन क पालन करइ इच्छुक हउँ। मई दौड़वालन क नाई हॉफब।

132हे परमेस्सर, मोरी कइती निगाह करा अउर मोह पइ दयालु हवा। तू ओन लोगन बरे वइसा ही करा जउन ओकरे बरे नीक अहइ जउन तोहार नाउँ स पिरेम किया करत हीं।

133हे यहोवा, मोका ओन लोगन स बचाइ ल्या जउन मोका दुःख देत हीं अउर मई तोहरे आदेसन क पालन करब।

134हे यहोवा मोका ओन आदेसन स बचाइ ल्या जउन मोका दुःख देत हीं। अउर मई तोहरे आदेसन क पालन करब।

135हे यहोवा, आपन सेवक पइ दया दिखावा अउर आपन विधान तू मोका सिखावा।

136रोवत रोवत आँसुअन क एक नदी मई बहाइ चुका हउँ। काहेकि लोग तोहरी सिच्छन क पालन नाहीं करत अहई।

### सादे

137हे यहोवा, तू सच्चा अहा अउर तोहार फइसला खरा अहई।

138उ सबइ चिजियन उत्तिम अहई जउन तू हमका करार में दिहा। हम पूरी तरह स तोहरे विधान क भरोसे रहि सकित ह।

139तोहरे बरे मोर धुन मोका बर्बाद करत ह। मई बहोत बेचैन हउँ, काहेकि मोर दुस्मन लोग तोहरे वचन क बिसराइ दिहन।

140हे यहोवा, तोहार वचन प्रमाणित अउर फुरइ अउर सच्चा बाटइ, अउर मई तोहार सेवक एहसे पिरेम करत हउँ।



141मई एक महत्त्वहीन हउँ अउर लोग मोर आदर नाहीं करत बाटेन। मुला मई तोहरे उपदेसन क बिसरत नाहीं अहउँ।

142हे यहोवा, तोहार अच्छाई अनन्त अहइ। तोहरे सिच्छन क भरोसे रहा जाइ सकत ह।

143संकट अउर परेसानी मोका घेरि लिहेस ह। मुला, मई तोहार उपदेसन क नाहीं बिसारे रहेउँ।

144तोहार करार हमेसा नीक बाटइ। एका समुझइ मँ मोर सहायता करा ताकि मई जी सकउँ।

### कोफ़

145सम्मूर्ण मन स यहोवा मई तोहका गोहरावत हउँ, मोका जवाब द्या। मई तोहरे आवेसन क पालन करत हउँ।

146हे यहोवा, मोर तोहसे बिनती बाटइ। मोका बचाइ ल्या। मई तोहरी करार क पालन करब।

147यहोवा, मई तोहरी पराथना करइ क भोर क तड़के उठा करत हउँ। मोका ओन बातन पइ भरोसा अहइ, जेनका तू कहत ह।

148पूरी रात मई तोहरे वचन पइ विचार करइ बरे बड़ठा रहत हउँ।

149हे यहोवा, तू आपन पूरे पिरेम स मोह पइ कान द्या, तू वइसा ही करा जेका तू ठीक कहत ह, अउर मोर जिन्नगी बनाए राखा।

150लोग मोरे विरुद्ध कुचक्र रचत अहइँ अउर मोर कइँती आवत हीं। अइसे इ सबइ लोग तोहरी सिच्छन पइ चला नाहीं करतेन।

151मुला तू मोरे लगे अहा। तोहरे सबइ आग्यन पइ बिस्सास कीन्ह जाइ सकत ह।

152बहोत दिनन पहिले ही तोहार करार दुआरा मई सीख लिहे रहेउँ कि ओकर नीव सदा बरे डाली गइ अहइ।

### रेस

153हे यहोवा, मोर यातना क लखा अउर मोका बचाइ ल्या, मई तोहरे उपदेसन क बिसरा नाहीं अहउँ।

154हे यहोवा, मोरे मुकदद्मा बरे बहस करा अउर मोका छुरावा। कृपा कइके मोका तोहार वाचा क अनुसार जिअइ द्या।

155दुट्ट बिजयी नाहीं होइहीं। काहेकि उ पचे तोहरे विधान पइ नाहीं चलत अहइँ।

156हे यहोवा, तू बहोत दयालु अहा। आपन नीक सासन क अनुसार मोका फुन स जिन्नगी द्या।

157मोर बहोत स सत्रु अहइँ जउन मोका हानि पहोंचावइ बरे जतन करतेन; मुला मई तोहरी करार क अनुसरण नाहीं तजेउँ।

158मई ओन बिस्सासघातियन क लखत हउँ। उ पचे तोहरे वचन क पालन नाहीं करतेन। मई ओनका तजि दिहेउँ ह।

159लखा, मई तोहार उपदेसन स पिरेम करत हउँ। हे यहोवा, कृपा कइके मोका तोहरे दयालु पिरेम स जिअइ द्या।

160सुरू स ही तोहार सबहिँ वचन बिस्सास क जोगग रहेन ह। अउर तोहार खरा फइसलन सदा बरे रहिहीं।

### सीन

161सक्तीसाली नेता मोह पइ बियर्थ ही वार करत हीं, मुला मई डेरात हउँ अउर बस तोहरे वचन क मई आदर करत हउँ।

162तोहार वचन मोका वइसेन आनन्दित करत हीं, जइसा एक जोद्धा आनन्दित होत ह, जेका अबहुँ अबहुँ कउनो जुद्ध क लूट क माल मिल गवा होइ।

163मई झूठ क नकारत हउँ। मई ओहसे घिना करत हउँ। किन्तु, मई तोहरी सिच्छन स पिरेम करत हउँ।

164मई दिन मँ सात दाई तोहरे उत्तम फइसला बरे तोहार स्तुति करत हउँ।

165उ पचे लोगन बहोत सान्ति पइहीं, जउन तोहार सिच्छन स पिरेम करत हीं। ओका कछू भी गिराइ नाहीं पाई।

166हे यहोवा, मई तोहरी प्रतीच्छा मँ हउँ कि तू मोर रच्छा करा। मई तोहरे आग्यन क पूरा किहेउँ ह।

167मई तोहरी करार पइ चलत रहत हउँ। हे यहोवा, मोका तोहरे विधान स गहन पिरेम अहइ।

168मई तोहरी करार क अउ तोहरे उपदेसन क पालन किहेउँ ह। तू सब कछू जानत ह जउन मई किहेउँ ह।

### ताव

169हे यहोवा, मदद बरे लगावा गवा मोर उँच गोहार तोहे तलक पहोंचइ मोका बुद्धिमान बनावा जइसा तू वचन दिहा ह।

170हे यहोवा, मोर बिनती सुना। तू जइसा वचन दिहा मोर उद्धार करा।

171मई बड़कई क गुण गावत हउँ। काहेकि तू मोका आपन कानून सिखाया ह।

172मोका तू आपन गीत गावइ द्या। काहेकि तोहार सबइ आग्यन सच्चा अहइँ।

173तू मोरे लगे आवा, अउर मोका सहारा द्या काहेकि मई तोहरे आदेसन पइ चलब चुन लिहेउँ ह।

174हे यहोवा, मई इ चाहत हउँ कि तू मोर उद्धार करा, तोहार सिच्छन मोका खुस करत हीं।

175मोका जिअइ द्या तउ मई तोहार स्तुति कइ सकेउँ। तोहार आदेस स मोका मदद मिलइ द्या।

176एक तु खोइ भइ भेइ क तरह, मई आपन रास्ता भटक गएउँ ह। आपन सेवक, मोका तलास करा, अउर मई तोहरे आग्यन क बिसरा नाहीं हउँ।

### भजन 120

मन्दिर क आरोहण गीत।

1मई संकटे मँ पड़ा रहेउँ, सहारा पावइ बरे मई यहोवा क गोहराएँ अउर उ मोका बचाइ लिहस।

2हे यहोवा, मोका तू अइसे लोगन स बचावा जउन मोर खिलाफ झूठ बोलेन ह।

3अरे ओ झूठो, का तू उ जानत अहा कि परमेस्सर तोहका कइसे सजा देइ?

4तू पचन्क दण्ड देइ बरे परमेस्सर जोद्धा क नोकंदार तीर अउ धधकत भए अंगारन क काम में लाइ।

5झूठो, तोहरे निचके रहब अइसा अहइ जइसे कि मेसेक में रहब। इ रहब अइसा अहइ माना कि कउनो केवार क तम्बू में रहब बा।

6जउन सान्ति क दुस्मन अहइँ, अइसे लोगन क संग बहोत लम्बी समई तलक रहा हईँ।

7मईँ इ कहे रहेउँ मोका सान्ति चाही। मुला उ पचे जुद्ध चाहत हीँ।

### भजन 121

*मन्दिर क आरोहण गीत।*

1मईँ ऊपर ऊँच पहाड़न क कईँती लखत हईँ। मुला फुरइ मईँ कहाँ स पावईँ?

2मोका तउ सहारा यहोवा स मिली जउन सरग अउ धरती क बनावइवाला अहइ।

3परमेस्सर तोहका गिरइ नाहीं देइ। तोहर बचवइया कबहुँ भी नाहीं सोइ।

4इस्त्राएल क उद्धारकर्ता कबहुँ न ही ओंघात ही अउर न ही सोवत अहइँ।

5यहोवा तोहार रच्छक अहइ। उ तोहका आस्रय देइ बरे तोहार बगल में अहइ।

6दिन क समइ सूरज तोहका हानि नाहीं पहोंचाइ सकत। राति में चाँद तोहार नोस्कान नाहीं कइ सकत।

7यहोवा तोहार रच्छा हर संकट स करी। यहोवा तोहरी आतिमा क रच्छा करी।

8यहोवा उ सबइ पइ धियान रखी जउन कछू तू करब्या। जहाँ कहुँ भी तू जाब्या अउ आउब्या, अबहुँ अउ सदा सर्वदा उ तोहार रच्छा करी।

### भजन 122

*दाऊद क एक ठु आरोहण गीत।*

1जब लोग मोसे कहें, “आवा, यहोवा क मन्दिर में चली तब मईँ बहोत खुस भएउँ।”

2हिआँ हम यरूसलेम क दुआसन पइ खड़ा अही।

3यरूसलेम नगर एक ठु संगठित नगर नाईँ बनि गवा ह।

4उ जगहिया बा जहाँ उ परिवार समूह जात रहेन, जउन यहोवा क परिवार समूह अहइ, काहेकि इ इस्त्राएल क लोग दुआरा यहोवा क धन्यवाद देइ क नेम अहइ।

5इ उहइ जगहिया बा जहाँ दाऊद क परिवार क राजा लोगन आपन सिंहासन कायम किहेन। उ पचे आपन सिंहासन लोगन क निआउ करइ बरे कायम किहन।

6तू यरूसलेम में सान्ति हेतु बिनती करा। “अइसे लोग जउन तोहसे पिरैम राखत हीँ हुआँ रच्छा में रहा।

7तोहरे परकोटन क भितरे सान्ति फइल जाइ, तोहरे बिसाल भवनन में सुरच्छा बनी रहइ।”

8मईँ पराथना करत हईँ आपन भाइयन अउ साथियन बरे कि हुवाँ सान्ति क बास होइ।

9यहोवा हमरे परमेस्सर क मन्दिर क भले बरे, मईँ पराथना करत हईँ कि इ नगर में भली बातन घटित होईँ।

### भजन 123

*आरोहण गीत।*

1हे परमेस्सर, मईँ आँखी उठाइके तोहार पराथना करत हईँ। तू सरग में राजा क रूप में बिराजत अहा।

2दास लोग आपन सुआमियन क ऊपर ओन चिजियन बरे आसरे पइ रहा करत हीँ, जेकर ओनका जरूरत अहइ। दासियन आपन सुआमिनियन क ऊपर आसरे पइ रहा करत हीँ। इहइ तरह हमका यहोवा हमरे परमेस्सर तब तलक लखत हईँ जब तलक उ हम पइ दया देखीवइ।

3हे यहोवा, हम लोगन पइ कृपालु हवा। हम लोगन पइ दयालु हवा काहेकि बहोत लम्बी समइ स हम लोगन क अपमान होत अहइ।

4घमण्डी लोग बहोत दिनन स हम लोगन क अपमानित कइ चुका अहइँ।

### भजन 124

*दाऊद क एक मन्दिर क आरोहण गीत।*

1अगर यहोवा हमरे संग नाहीं होतेन तउ इस्त्राएल क कहइ द्या,

2अगर यहोवा हमरे संग नाहीं होत, जब हमार बिरोधी हम लोगन पइ हमला किहे रहेन?

3तब हमार दुस्मन हमका जिअत ही निगल गए होतेन जब उ पचे गुस्सा भए रहेन।

4तब हमार सत्रुअन क फउजन बाढ़ क तरह हमका बहावत भइ उ नदी क जइसी होइ जातिन जउन हमका बोरत रही होईँ।

5तब उ सबइ घमण्डी लोग उ पानी जइसे होइ जातेन जउन हमका बोरत भवा हमरे मुँहना तलक बाढ़त आवति होइ।

6यहोवा क गुण गावा। उ हमरे दुस्मनन क हमका धरइ नाहीं दिहस अउर न ही मारइ दिहस।

7हम पचे जालि में फँसा भवा उ पंछी जइसा रहेन जउन फुनि बचि निकरा होइ। जालि फाटि फुट गवा अउर हम बचिके निकरे।

8यहोवा जउन सरग अउ धरती क बनाएस ह। हमार मदद किहेस।

### भजन 125

*आरोहण गीत।*

1जउन लोग यहोवा क भरोसे रहत हीँ, उ पचे सिय्योन क पहाड़ जइसे होईहीं। ओनका कबहुँ कउनो डुगाइ नाहीं पाई। उ पचे सब ही अटल रईहीं।

2यहोवा आपन लोगन क वइसे ही आपन आस्रय में लिहस ह, जइसे यरूसलेम चारिहुँ कईँती पहाड़न स घिरा बाटइ। यहोवा सदा-सर्वदा आपन लोगन क रच्छा करी।

3बुरे लोग भले लोगन क धरती क ऊपर राज्ज नाहीं कइ सकिहीं, अगर बुरे लोग अइसा करइ लग जाई तउ होइ सकत ह सज्जन लोग भी बुरा काम करइ लागई।

4हे यहोवा, भले लोगन क संग भला करा, जेनकर मन बेकसूर अहई।

5मुला यहोवा ओन लोगन क सजा देइ जउन दुट्ट मनई क संग ओनका मानइ तजि दिहस ह। हुवाँ इस्त्राएल में सान्ति रहइ द्या।

### भजन 126

आरोहण गीत।

1जब यहोवा सिंथ्योन क लोगन क कैद स वापिस लिआइ तउ इ कउनो सपना क नाई होइ।

2तब हम पचे हँसत रहत होब अउ खुसी क गीत गावत रहत होब। तब दूसर रास्ट्र क लोग कहत रहत रहब, “यहोवा ओकरे बरे महान कार्य किहस ह।”

3यहोवा हम लोगन बरे एक अद्भुत करम किहे होतेन, तउ हम पचे बहोत खुस होतेन।

4हे यहोवा, हमका रेगिस्तान में बहत रहे जलधारन क नाई, कैद स वापिस लिआवा।

5जउन कउनो रोवत भए बिआ बोवत ह, मुला उ कटनी क समइ खुसी क गीत गाउब।

6जउन कउनो आँसुअन क संग बिआ लइके जात ह, उ पचे जब फसल लिआवत हीं तउ आनन्दित होत हीं।

### भजन 127

सुलैमान क मन्दिर क आरोहण गीत।

1अगर घर क निर्माता खुद यहोवा नाहीं अहइ, तउ घरे क बनावइ वाला बेकार समइ गँवावत ह। अगर सहर क रखवाला खुद यहोवा नाहीं अहइ, तउ रखवारे बेकार समइ गँवावत हीं।

2अगर भिन्सारे जागिके तू देर राति तलक काम करा। एह बरे कि तू सबन्क बस खइया बरे कमाइ क अहइ, तउ तू पचे बेकार समइ गँवावत ह। परमेस्सर आपन भगतन क ओनके सोवत तलक में धियान रखत ह।

3गदेलन यहोवा क उपहार अहई। गदेलन क जनम माता बरे ओकर उपहार अहई।

4जवान मनई क पूत जोद्धा क हाथन में बाण क नाई होत हीं।

5जउन मनई बाण रूपी पूतन स तरकस क भरत ह उ बहोत खुस होइ।

6उ मनई कबहुँ हारी नाहीं। ओकर पूत आपन दुस्मनन स सार्वजनिक जगहियन पइ ओकर रच्छा करिहीं।

### भजन 128

आरोहण गीत।

1जउन कउनो यहोवा क सम्मान करत हीं धन्न अहई। उ पचे ओकरे राहन पइ चलत हीं।

2तू पचे जेनके बरे काम किहा ह, ओन चिजियन क तू आनन्द लेब्या। ओन अइसी वस्तुअन क कउनो भी मनई तू

सबन्स नाहीं छोरी। तू पचे खुस रहब्या अउर तोहरे संग भली बातन घटिहीं।

3घरे पइ तोहार घरवाली अंगूरे क बेल क नाई फलवती होइ। मेज क चरिहुँ कइँती तोहार संतानन अइसी होइहीं, जइसे जइतून क उ सबइ बृच्छ जेनका तू रोप्या ह।

4जउन मनई यहोवा क सम्मान करत हीं उ वइसा ही धन्न अहई।

5यहोवा सिंथ्योन स तोहका आसीस दइ। जीवन भर यरूसलेम में तोहका वरदानन क आनन्द मिलइ।

6तू आपन नाती पोतन क लखइ बरे जिअत रहा। इ मोर कामना अहइ। इस्त्राएल में सान्ति रहइ।

### भजन 129

मन्दिर क आरोहण गीत।

1पूरी जिन्नगी भइ मोर अनेक दुस्मन रहेन ह। इस्त्राएल क घोसना करइ द्या

2पूरी जिन्नगी भइ मोर अनेक दुस्मन रहेन ह। बहोत सारे दुस्मन मोह पइ हमला किहन। मुला उ पचे हमका हराइ नाहीं पाएन।

3उ पचे मोका तब तलक पीटेन जब तलक मोरी पिठिया पइ गहिर घाव नाहीं बनेन। मोरे बड़का बड़का अउर गहिर घाव होइ गएन।

4मुला यहोवा उ किहेस जउन नीक रहा अउर रस्सा काट दिहस। उ मोका ओन दुट्ट लोगन स अजाद किहस।

5ओन सबइ क जउन सिंथ्योन स घिना करत ह हारइ द्या, उ पचन क खदेइइ द्या।

6उ सबइ लोग अइसे रहेन, जइसे कउनो घरे क छत पइ क घास जउन उगइ स पहिले ही मुरझाइ जात ह।

7उ घसिया स कउनो मजदूर आपन मूठी तलक नाहीं भरि पावत अउर इ गठरी पुलंदा बनाइ बरे भी प्रयाप्त नाहीं होइ।

8अइसे ओन दुट्ट जनन क लगे स जउन लोग गुजरत हीं। उ पचे नाहीं कइहीं, “यहोवा तोहार भला करइ।” उ पचे नाहीं कहिहीं, “हम तू पचन्क यहोवा क नाउँ पइ आसीस देत अही।”

### भजन 130

आरोहण गीत।

1हे यहोवा, मई गहिर कस्ट में हउँ तउ सहारा पावइ क मई तोहका गोहरावत हउँ।

2मोर सुआमी, तू मोर सुनि ल्या। मोर मदद क गोहार पइ कान द्या।

3हे यहोवा, अगर तू लोगन क ओनकर सबहि पापन्क सचमुच सजा द्या तउ फुन कउनो भी बच नाहीं पाइ।

4मुला तू यहोवा, आपन लोगन क छिमा करा; तउ उ लोग तोहार सम्मान करिहीं।

5मई यहोवा क बाट जोहत अहउँ कि उ मोका मदद देइ। मोर आतिमा ओकरी प्रतीच्छा में अहइ। यहोवा जउन कहत ह ओह पइ मोर भरोसा अहइ।

6मई आपन सुआमी क बाट जोहत हउँ। मई उ रच्छक जउन उसा क अवाई क प्रतीच्छा मँ लगा रहत ह स जियादा उत्सुकता स ओकर प्रतीच्छा किहस।

7इस्त्राएल, यहोवा पइ बिस्सास करा। काहेकि सिरिफ उ ही बिस्ससनीय पिरेम देत ह। उ हमरी बार बार रच्छा किया करत ह। उ इस्त्राएल क ओनके सारे पापन स बचाइ।

### भजन 131

*आरोहण गीत।*

1हे यहोवा, मई घमण्डी या अभिमानी नाहीं हउँ। मई महत्वपूर्ण होइ क जतन नाहीं करत हउँ। मई उ काम करइ क जतन नाहीं करत हउँ। जउन मोरे बरे बहोत अद्भुत अहई।

2बदले मँ, मई आपन आतिमा क सान्त अउ चुप कइ दिहे हउँ।

3मोरे आतिमा आपन महतारी क बाँहे मँ एक संतुट्ट गदला क नाई अहइ।

4इस्त्राएल, यहोवा पइ भरोसा रखा। ओकर भरोसा रखा। अउर अब सदा सदा ही ओकर भरोसा रखा।

### भजन 132

*मन्दिर क आरोहण गीत।*

1हे यहोवा, जइसे दाऊद यातना भोगे रहा, ओका याद करा।

2मुला दाऊद यहोवा स एक सपथ लिहेस। दाऊद याकूब क सक्तीसाली परमेस्सर क एक मन्त माने रहा।

3दाऊद कहे रहा: “मई आपन घरे मँ तब तलक न जाब, आपन बिछउना पइ न ही ओलरब, न ही सोउब।

4मई आपन आँखिन क नाहीं सोवइ देब। अउर आपन पलकन क बन्द नाहीं होइ देब।

5एहमाँ स मई कउनो बात भी नाहीं करब जब तलक मई यहोवा बरे एक घर न प्राप्त कइ लेउँ। मई याकूब क सक्तीसाली परमेस्सर बरे एक तु मन्दिर पाइ क रहब।”

6एप्राता मँ हम दाऊद क वचन क बारे मँ सुनेउँ। हमका किरियथ योरीम क वन मँ करार क सन्दूख मिली रही।

7आवा, पवित्र तम्बू मँ चला। आवा, ओकरे सिंहासन क समन्वा आराधना करी।

8हे यहोवा, आपन आराम क जगह स उठा, अउ करार क सन्दूख संग होआ जहाँ तू सक्ती क संग सासन करत ह।

9हे यहोवा, तोहार याजक धरम क भावना क धारण किया करी। तोहर बिस्सासी भगतन बहोत खुस रहीं।

10तू आपन चुने भए राजा क आपन सेवक दाऊद क भले बरे जिन अस्वीकार करा।

11यहोवा दाऊद क एक वचन दिहेस ह जेका उ कबहुँ नाहीं तोड़िही। उ वचन दिहेस ह कि दाऊद क बंस स राजा अइहीं।

12यहोवा कहे रहा, “अगर तोहार संतानन मोर करार पइ अउर मई ओनका जउन सिच्छन सिखाइन ओन पइ चलिहीं तउ फुन तोहरे परिवार क कउनो न कउनो सदा ही राजा रही।”

13आपन मन्दिर क जगह बरे यहोवा सिथ्योन क चुने रहा। इ उ जगह अहइ जेका उ आपन भवन बरे चाहत रहा।

14यहोवा कहे रहा, “इ मोर जगह सदा-सदा बरे होइ। मई एका आपन जगह पइ रहइ बरे चुनेउँ ह।”

15भरपूर भोजन स मई इ सहर क आसीर्बाद देब, हिआँ तलक कि गरीब लोगन क लगे खाइ क भरपूर होइ।

16ओकरे याजकन क उद्धार क मई ओढ़ना पहिराउब। मोर भगत बहोत खुस होइहीं।

17इ जगह पइ मई हिआँ दाऊद क परिवार क सुदृढ़ करब। मई आपन चुने भए राजा क एक दीपक स्थापित करब।

18मई दाऊद क दुस्मनन क लज्जा स ढँपि देब। अउर दाऊद क राज्ज क चमकाउब।

### भजन 133

*दाऊद क आरोहण गीत।*

1इ फुरइ नीक अउ सुखदायी अहइ जब भाइयन आपुस मँ मिलिजुलिके रहई।

2इ वइसे महकउआ तेल जइसा होत ह जेका हारून क मूँडी पइ उड़ेरा गवा रहा। इ, उ तेल जइसा होत ह जउन हारून क दाढ़ी क पइ बहत होइ। इ, उ तेल जइसा होत ह जउन हारून क खास ओढ़नन पइ बहत रहा।

3इ उ कोमल बर्खा क बूँदन क समान अहइ जउन हेमोन क पहाड़ी स आवति हीँ अउ सिथ्योन क पहाड़ पइ गिरत हीँ,

4काहेकि हुवँइ यहोवा आपन अन्नतकालीन जिन्नगी क आसीस दिहे रहा।

### भजन 134

*आरोहण क गीत।*

1यहोवा क बड़कई करा, ओकरे सब सेवको, जउन सारी रति मन्दिर मँ सेवा किह्या।

2हे सेवको, पवित्र ठउर मँ आपन हाथन उठावा अउर यहोवा क बड़कई करा।

3यहोवा तोहका सिथ्योन स आसीस देइ। यहोवा सरग अउ धरती रचेस ह।

### भजन 135

1यहोवा क बड़कई करा। हे यहोवा क सेवको, यहोवा क नाउँ क बड़कई करा।

2तू लोग मन्दिर मँ खड़ा अहा। यहोवा क नाउँ क बड़कई करा। तू लोग मन्दिर क आँगन मँ खड़ा हवा। ओकरे नाउँ क बड़कई करा।

3यहोवा क बड़कई करा काहेकि उ खरा अहइ। ओकरे नाउँ क गुण गावा काहेकि उ आन्नदायक अहइ।

4यहोवा याकूब क चुने रहा। इस्त्राएल परमेस्सर क अहइ।

5मई जानत हउँ, यहोवा महान अहइ। हमार सुआमी दूसर देवन स महान अहइ।

6यहोवा जउन कछू चाहत ह सरग मँ, अउर धरती पइ, समुद्दर मँ या गहिर महासागरन मँ, करत ह।

7यहोवा धरती पड़ सब कहूँ बादरन क रचत ह। उ बिजुरी अउ बर्खा क रचत ह। उ हवा क ओकर जगह स निकारत ह।

8परमेस्सर मिस्त्र में मनइयन अउ गोरुअन क सबहि पहिलउटी बच्चन क नास कइ दिहस।

9यहोवा मिस्त्र में बहोत स अद्भुत अउर अचरज भरे कामन किहस। उ फिरौन अउ ओकरे सब अधिकारियन क खिलाफ अद्भुत बातन क दिखाएस।

10परमेस्सर बहोत स देसन क हराएस। परमेस्सर बलवान राजा लोगन क मारेस।

11यहोवा एमोरियन क राजा सीहोन क हराइ दिहस। उ बासान क राजा ओग क हराएस। उ कनान क सारी राजन क हराएस।

12यहोवा ओनका ओनकर धरती क अधिकार क रूप में दिहस, उ इस्त्राएल क स्थाई रूप स लेइ बरे दिहस।

13हे यहोवा, तू सदा बरे प्रसिद्ध होब्या। हे यहोवा, लोग तोहका सदा सर्वदा याद करत रइहीं।

14काहेकि यहोवा आपन लोगन बरे निआव लावत ह अउर उ आपन सेवकन प तरस खात ह।

15दूसर रास्ट्रन क लोग बस सोना अउर चाँदी क देवता बनावत रहेन। ओनकर देवता मात्र लोगन क जरिये बनाए भए पुतलन रहेन।

16पुतलन क मुँइ अहई, पर बोल नाहीं सकतेन। पुतलन क आँखी अहई, पर लखि नाहीं सकतेन।

17पुतलन क कान अहई, पर ओनका सुनाई नाहीं देत। पुतलन क नाक अहई, पर उ पचे साँस नाहीं लेइ सकतेन।

18उ सबइ लोग जउन एँन पुतलन क बनाएन, ओन पुतलन क समान होइ जइहीं। काहेकि उ सबइ लोग ओन पड़ बिस्सास किहेन ह।

19इस्त्राएल क संतानन, यहोवा क बड़कई करा। हारून क संतानन, यहोवा क बड़कई करा।

20हे लेवी क संतानन, यहोवा क बड़कई करा। तू जउन यहोवा क सम्मान दिहा, यहोवा क बड़कई करा।

21यहवो यरूसलेम में बास करत ह, सिष्योन स ओकर स्तुति होइ।

### भजन 136

1यहोवा क बड़कई करा, काहेकि उ उत्तम अहइ। ओकर बिस्ससनीय पिरेम सदा ही बना रहत ह।

2देवतन क परमेस्सर क बड़कई करा। ओकर बिस्ससनीय पिरेम सदा बना रहत ह।

3परभुअन क परभू क बड़कई करा। ओकर बिस्ससनीय पिरेम सदा बना रहत ह।

4परमेस्सर क गुण गावा। बस उहइ एक अहइ, जउन बहोत अद्भुत करम करत ह। ओकर बिस्ससनीय पिरेम सदा बना रहत ह।

5ओकर बड़कई करा, जउन आपन बुद्धि स आकास क रचेस ह। ओकर बिस्ससनीय पिरेम सदा बना रहत ह।

6परमेस्सर सागर क बीच में झुरान धरती क कायम किहस। ओकर बिस्ससनीय पिरेम सदा बना रहत ह।

7परमेस्सर महान ज्योतियन क रचेस। ओकर बिस्ससनीय पिरेम सदा बना रहत ह।

8परमेस्सर सूरज क दिन पड़ हुकूमत करइ बरे बनाएस। ओकर बिस्ससनीय पिरेम सदा बना रहत ह।

9परमेस्सर चाँद तारन क बनाएस कि उ पचे रात पड़ हुकूमत करइ। ओकर बिस्ससनीय पिरेम सदा बना रहत ह।

10उ मिस्त्र में पहिलउठी मनइयन अउर जनावरन क मारेस। ओकर बिस्ससनीय पिरेम सदा बना रहत ह।

11परमेस्सर इस्त्राएल क मिस्त्र स बाहेर लइ आवा। ओकर बिस्ससनीय पिरेम सदा बना रहत ह।

12परमेस्सर आपन सामरथ अउ आपन महासक्ती क परगट किहेस। ओकर बिस्ससनीय पिरेम सदा ही बना रहत ह।

13परमेस्सर लाल सागर क दुइ हीसा में फाड़ेस। ओकर बिस्ससनीय पिरेम सदा ही बना रहत ह।

14परमेस्सर इस्त्राएल क सागर क बीच स पार उतारेस। ओकर बिस्ससनीय पिरेम सदा ही बना रहत ह।

15परमेस्सर फिरौन अउ ओकर फउज क लाल सागर में बोड़ि दिहस। ओकर बिस्ससनीय पिरेम सदा ही बना रहत ह।

16परमेस्सर आपन निज भगतन क रेगिस्तान में राह देखीएस। ओकरे बिस्ससनीय पिरेम सदा ही बना रहत ह।

17परमेस्सर बलवान राजा क हराएस। ओकर बिस्ससनीय पिरेम सदा ही बना रहत ह।

18उ सदृढ़ राजा लोगन क मारेस। ओकर बिस्ससनीय पिरेम सदा ही बना रहत ह।

19परमेस्सर एमोरियन क राजा सीहोन क मारेस। ओकर बिस्ससनीय पिरेम सदा ही बना रहत ह।

20परमेस्सर बासान क राजा ओग क मारेस। ओकर बिस्ससनीय पिरेम सदा ही बना रहत ह।

21उ आपन भुइँया क मीरास क रूप में दइ दिहस। ओकर बिस्ससनीय पिरेम सदा ही बना रहत ह।

22उ उ भुइँया क आपन सेवक इस्त्राएल क अधिकार क रूप में दिहस। ओकर बिस्ससनीय पिरेम सदा ही बना रहत ह।

23उ हमका याद राखेस, जब हम लोगन क हरा दीन्ह गावा रहेन। ओकर बिस्ससनीय पिरेम सदा ही बना रहत ह।

24उ हमका हमरे दुस्मनन स मुक्त किहेस। ओकर बिस्ससनीय पिरेम सदा ही बना रहत ह।

25परमेस्सर हर एक क खइया क देत ह। ओकर बिस्ससनीय पिरेम सदा ही बना रहत ह।

26सरग क परमेस्सर क गुण गावा। ओकर बिस्ससनीय पिरेम सदा ही बना रहत ह।

### भजन 137

1बाबुल क नदियन क किनारे बइठिके हम सिष्योन क याद कइके रोइ पड़ेन।

2हम लंगिचे क बेंत क झाड़ियन पड़ आपन सबइ वीणा टाँगेन।

3बाबुल में जउन लोग हमका बन्दी बनाए रहेन, उ पचे हम से गावइ क कहेन। अत्याचारियन हम से खुसी क गीत

गावड़ क कहेन। उ पचे कहेन, 'हमरे बरे सिष्योन क गीत गावा।'

4मुला हम यहोवा क गीतन क कउनो दूसर देस में कइसे गाइ सकित ह।

5हे यरूसलेम, अगर मई तोहका बिसरउँ, तउ मई बिसरि जाउँ कि कइसा गीत गाइ जात ह।

6हे यरूसलेम, अगर मई तोहका याद न रखेउँ, अगर मई बड़ा खुसी क जइसा बेउहार न करेउँ, तउ मई कउनो गीत गावड़ में असमर्थ रहेउँ।

7हे यहोवा, याद करा एदोमियन उ दिना जउन किहे रहेन। जब यरूसलेम हार ग रहा, उ पचे चीखिके बोले रहेन, एँका चीर डावा अउर नेंव तलक एका बर्बाद करा।

8हे बाबुल, तोहका उजार दीन्ह जाइ। उ मनई क धन्य कहा जउन तोहका उ सजा देइ जउन तोहका मिलइ चाही। उ मनई क धन्य कहा जउन तोहका उ मुसीबत देइ जइसा तू हमका मुसीबत दिहे रहा।

9उ मनई क धन्य कहा जउन तोहरे गदेलन क चट्टान पइ झपटिके पछार देइ।

### भजन 138

दाऊद क एक तु पद।

1हे परमेस्सर, मई आपन पूर्ण मन स तोहार गीत गावत हउँ। मई सबहि देवन क समन्वा मई तोहार पद गाउब।

2हे परमेस्सर, मई तोहरे पवितर मन्दिर कइँती दण्डवत करब। मई तोहरे नाउँ क बड़कई करब, काहेकि तोहार बिस्ससनीय पिरेम सच्चा अउर पिआरा अहइ, अउर काहेकि तू आपन वचन क आपन महान सकती स किहा ह।

3हे यहोवा, जब मई मदद पावइ बरे तोहार पराथना करेउँ तउ मोका जवाब द्या। तू मोका बल देइके मोर साहस बढ़ाया।

4हे यहोवा, धरती क सबहि राजा तोहार अच्छाई क गुण गावइँ। जब उ पचे तोहार वचन क सुनिहीं।

5उ पचे यहोवा क स्तुति करइँ, काहेकि यहोवा क महिमा महान अहइ।

6काहेकि यहोवा महान अहइ, मुला उ अबहुँ तलक विन्नम मनई क थियान रखत ह। उ घमण्डी लोगन क कामन क पता दूर स ही जानत हीं।

7हे यहोवा, अगर मई संकट में पड़उँ तउ मोका जीवित रहइ द्या। अगर मोर दुस्मन मोह पइ किरोध करइँ तउ ओनसे मोका बचावा।

8यहोवा उ सबइ बातन क करी जेनका उ मोका वचन दिहेस ह। हे यहोवा, तोहार बिस्ससनीय पिरेम सब ही बना रहत ह। हे यहोवा, तू हमका रच्या ह। तउ तू हमका जिन बिसरा।

### भजन 139

संगीत निर्देशक बरे वाद्य यंत्र क संग

दाऊद क एक तु गीत।

1हे यहोवा, तू मोका जाँच्या ह। मोरे बारे में तू सब कछू जानत अहा।

2तू जानत अहा कि मई कब बड़ठत अउ कब खड़ा होत हउँ। तू दूर रहत भए मोरे मन क बात जानत अहा।

3हे यहोवा, तू जानत ह कि मई कहाँ जात अउ कहाँ ओलरत हउँ। तू बहोत अच्छी तरह जानत ह जउन कछू मई करत हउँ।

4हे यहोवा, एहसे पहिले क सब मोरे मुख स निकलइ तोहका पता होत ह कि मई का कहइ चाहत हउँ।

5हे यहोवा, तू मोरे चारिहुँ कइँती मौजूद अहा। मोरे समन्वा भी अउर पाछा भी, तू आपन निज हाथ मोरे ऊपर हौले स रखत अहा।

6मोका अचरज अहइ ओन बातन पइ जेनका तू जानत अहा। जेनका मोरे बरे समुझब बहोत कहिन अहइ।

7हर जगह जहाँ भी मई जात हउँ हुआँ तोर आतिमा होत ह। हे यहोवा, मई तोहसे बचिके कहुँ नाहीं जाइ सकत।

8हे यहोवा, अगर मई आकासे पइ जाब हुआँ पइ भी तू ही अहा। अगर मई मउत क देस पाताल में जाब हुआँ पइ तू ही अहा।

9अगर मई पूरब में जहाँ स सूरज निकरत ह, अगर मई समुद्र क पीछे रहब,

10हुआँ तलक भी तोहार दायँ हाथ पहोंचत ह। तू मोका आपन हाथ स धइके अगुवाइ करत ह।

11होइ सकत ह मई सोचउँ कि तोहसे छुपा अहउँ अउर कहइ लागूँ, "दिन रात में बदल गवा ह। निहचय ही अँधियारा मोका ढँपि लेइ।"

12मुला यहोवा अँधेरा भी तोहरे बरे अँधेरा नाहीं अहइ। हिआँ तलक कि तोहरे बरे रात भी दिन जइसी ही उजरी अहइ, काहेकि दुइनउँ अँधेरा अउर उजियारा तोहार समान अहइ।

13तू मोर देह क अन्दरोनी भाग क बनाया ह। तू मोका आपन महतारी क कोख में ही रचे रहा।

14हे यहोवा, मई तोहका ओन सबहि अचरज भरे काम बरे धन्यवाद देत हउँ जउन रास्ते स तू मोका बनाया ह, अउर मई सचमुच जानत हउँ कि तू जउन कछू करत अहा उ अचरजे स पूर्ण अहइ।

15जब मई आपन महतारी क कोख में रहा अउर मोरे देह गुप्त रूप में रूपधारण करत रहेन तबहि तू मोर हाइन क लख्या।

16तू मोरी देह क मोरी महतारी क गर्भ में बनत भए लख्या। अउर मोर सरीर क सबइ हीसा जउन दिन ब दिन बनत रहा, उ सबइ क बनइ स पहिले तोहार किताब में लिखा भवा रहेन।

17तोहार विचारन मोरे बरे बहोत कीमती अहइँ। उ गिनती में बहोत जियादा अहइँ।

18तू जउन कछू जानत अहा, ओन सब क अगर मई गन सकउँ, तउ उ सबइ सबहि धरती क रेत क कणन स भी जियादा होइहीं। यद्यपि अगर मई लगातार जगा रहेउँ, तउ भी मई ओनकर बरे तोहरे साथ गना जाब।

19हे परमेस्सर, दुर्जन क नस्ट करा। तू हत्यारन, मोसे दूर रहा।

20उ पचे बुरे लोग तोहरे बरे बुरी बातन कहत हीं। तोहार दुस्मन झूठ स तोहार नाउँ लेत ह।

21हे यहोवा, मोका ओन लोगन स घिना अहइ जउन तोहसे घिना करत हीं। मईँ ओन लोगन स घिना करत हउँ जउन तोहार खिलाफ बिद्रोह करत ह।

22मोका ओनसे पूरी तरह घिना अहइ। तोहार दुस्मन मोर भी दुस्मन अहइँ।

23हे परमेस्सर, मोका जाँच्या अउर मोर मन जान ल्या। मोका परख्या अउर मोर चिन्तन क जान ल्या।

24मोह पइ निगाह करा अउर लखा कि मोर लच्छ बुरे नाहीं अहइँ। तू मोका उ पथ पइ लइ चला जउन अन्नतकाल स परगट अहइ।

### भजन 140

*संगीत निर्देशक बरे वाऊद क एक तु स्तुति।*

1हे यहोवा, दुट्ट लोगन स मोका बचावा। क्रूर लोगन स मोर रच्छा करा।

2उ सबइ लोग नोस्कान पहोंचावइ कुचक्र रचत बाटेन। उ सबइ लोग सदा ही लइ जात हीं।

3ओन लोगन क जिभियन अइसन तेज बाटइ जइसे साँप। ओन लोगन क सबदन साँप क बिख क नाई अहइ। (सेला)

4हे यहोवा, तू दुट्ट लोगन स मोर रच्छा करा। क्रूर लोग स मोर रच्छा करा। उ सबइ मोर पाछे मोका खाले मँ लोकइ बारे अहइँ।

5ओन घमण्डी लोग मोरे बरे फँदा डान। मोका फँसावइ क उ पचे जाली फइलाएन ह। उ पचे मोर राहे मँ फँदा लगाएन।

6किन्तु मईँ यहोवा क स्वीकार किहेउँ, तू मोर परमेस्सर अहा। हे यहोवा, मोर पराथना सुना।

7हे यहोवा मोर सुआमी, तू मोर मज़बूत उद्धारकर्ता अहा। तू मोर मँडै क टोप जइसा अहा। जउन मोर मँडै क जुद्ध मँ बचावत ह।

8हे यहोवा, दुट्ट लोगन क इच्छा क पूरी न होइ द्या। ओनकर कउनो योजना क सफल जिन होइ द्या, वरना उ पचे घमण्डी होइ जाइहीं।

9मोरे दुस्मनन जउन मोका घेरि लिहेस बुरा जोजनन बनावत ह। ओनकर बुरा जोजनन ओनही क मुँडन पइ गिरइ द्या।

10ओनके मँडै पइ दहकत अंगारन क उड़ेर द्या। मोरे दुस्मनन क आगी मँ झोंकि द्या। ओनका गइहन (कब्रन) मँ लोकाइ द्या। उ पचे ओहसे कबहुँ बाहेर न निकरि पावई।

11ओन क्रूर बोलइवालन क इ धरती मँ स्थापित जिन होइ द्या। उ हिंसक लोगन क संग बुरी बातन बार-बार घटइ द्या।

12मईँ जानत हउँ यहोवा कंगालन क निआउ खराइ स करी। परमेस्सर असहायन क सहायता करी।

13हे यहोवा, सच्चे लोग तोहरे नाउँ क स्तुति करिहीं। इमानदार लोग तोहार समन्वा बास करिहीं।

### भजन 141

*वाङ्मय यंत्र क दुआरा बजा भवा वाऊद क एक तु गीत।*

1हे यहोवा, मईँ तोहका मदद पावइ बरे गोहरावत हउँ। जब मईँ गोहराएउँ तब तू मोर सुनि ल्या। मोका मदद हाली करा।

2मोर बिनती तोहार समन्वा बरत धूप क उपहार क तरह होइ। मोर बिनती तोहार बरे दीन्ह गइ साँझ क बलि जइसी होइ।

3हे यहोवा, मोरी वाणी पइ मोर काबू होइ। आपन वाणी पइ मईँ धियान रख सकउँ, एहमँ मोर सहायक हवा।

4मोका बुरी बात जिन करइ द्या। मोका रोके रहा बुरे लोगन क संगति स ओनकर सरस भोजन स अउर बुरे कामन स। मोका सामिल जिन होइ द्या अइसे ओन कामन मँ जेनका करइ मँ बुरे लोग रख लेत हीं।

5सज्जन लोगन क मोर सुधार करइ द्या। इ दयलुता क काम क नाई होइ। तोहार भगतन क मोर बुराई क निकारइ द्या। इ मोर मँडै बरे अभिसेक क तेल क नाई होइ। मुला मोर पराथना दुट्ट लोगन क कुकर्मन क खिलाफ अहइ।

6ओनकर राजा लोगन क सजा पावइ द्या अउर तब लोग जान जइहीं कि मईँ सच कहे रहेउँ।

7लोग खेत क खोदके जोता करत हीं अउर माटी क एहर-ओहर छितराइ देत हीं। ओन दुट्ट लोगन क हाइन भी इहइ तरह कब्रन क चारिहुँ तरफ एहर-ओहर छितराइहीं।

8हे यहोवा, मोर सुआमी, सहारा पावइ क मोर निगाह तोहे पइ लगी अहइ। मोका तोहार भरोसा अहइ। कृपा कइके मोका जिन मरइ द्या।

9मोका दुट्टन क फँदन मँ जिन पइइ द्या। ओन दुट्टन क जरिये मोका जिन फँसाइ द्या।

10उ सबइ दुट्ट खुद आपन फँदन मँ फँसि जाई जब मईँ बचिके निकर जाउँ बगैर नोस्कान उठाए भए।

### भजन 142

*वाऊद क एक कला गीत।*

1मईँ मदद बरे यहोवा क गोहराएउँ। मईँ यहोवा क समन्वा पराथना किहेउँ ह।

2मईँ यहोवा क समन्वा आपन दुःख रोउब। मईँ यहोवा स आपन कठिनाइयन कहब।

3मोर दुस्मनन मोरे बरे जाल बिछाएन ह। मईँ आसा छोरइ बरे तइयार अहउँ। मुला यहोवा जानत अहइ कि मोरे संग का घटत अहइ।

4मोर चारिहुँ कइँती नज़र करा अउ लखा, कउनो मीत कहुँ भी देखॉत नाहीं अहइ। हिआँ बचइ क कउनो जगह नाहीं बा। कउनो मनई मोका बचावइ क जतन नाहीं करत अहइ।

5एह बरे मईँ यहोवा क मदद बरे गोहराएउँ ह। मईँ कहेउँ, "हे यहोवा, तू मोर सरणस्थल अहा। तू ही अकेल्ले मोर जिन्गी मँ एक स्रोत अहइ।

6हे यहोवा, मोर पराथना क जवाब द्या, काहेकि मोर बहोत दुर्दसा होइ गवा ह। तू मोका ओन लोगन स बचाइ ल्या जउन मोर पाछा करत ह काहेकि उ पचे मोहे स जियादा मज़बूत अहइँ।

7मोका सहारा द्या कि इ कैद स पराइ जाउँ अउर तोहार नाउँ क स्तुति कइ सकेउँ। सच्चे लोगन मोर चारिहूँ कइँती इकट्ठा होइहीं। उ पचे आपस में मिलिहीं अउर तोहार गुणगान करिहीं काहेकि तू मोर रच्छा किहा ह।

### भजन 143

*वाद्य यंत्र क दुआरा बजा भवा दाऊद क एक तु गीत।*

1हे यहोवा, मोर पराथना सुना। मोर विनती सुना अउर फुन एकर जवाब द्या। मोका जवाब दया, काहेकि तू फुरइ भला अउ खरा अहा।

2आपन दास मोह पइ निआव जिन करा, इ कारण कि कउनो भी जिअत मनई तोहरे समन्वा निर्देख नाहीं ठहर सकत।

3मोर दुस्मन मोरे पाछे पड़ा अहई। उ मोर जिन्गी चकनाचूर कइके धूरि में मिलाएन। उ पचे मोका बहोत दिन क मुर्दे क समान अँधिअर कब्र में ढकेलत अहइ।

4मई निरास होत हउँ। मोर साहस छूटत अहइ।

5मुला मोका उ सबइ बातन याद अहई, जउन बहोत पहिले घटी रहिन। मई ओन अदभुत कामन क बारे में सोचा करत हउँ जेनका तू किहे रह्या।

6हे यहोवा, मई आपन हाथ उठाइके तोहार विनती करत हउँ। मई तोहरी मदद क बाट जोहत हउँ जइसे झुरान धरती बर्खा क बाट जोहत ह। (सेला)

7हे यहोवा, मोका हाली जवाब द्या। मई कमज़ोर होत रहत हउँ। मोका नज़र अन्दाज़ जिन करा। मोका ओन लोगन क जइसा जिन होइ द्या, जउन कब्र में ओलरा होई।

8हे यहोवा, भोर क फूटत ही मोका आपन बिस्ससनीय पिरेम देखीवा। मई तोहरे भरोसे हउँ। उ सबइ बातन में मोर अगुवाइ जेनका मोका करइ चाही, काहेकि मई मदद बरे तोहका लखत हउँ।

9हे यहोवा, मोरे दुस्मनन स रच्छा पावइ बरे मई तोहरी सरण में आवत हउँ। तू मोका बचाइ ल्या।

10सिच्छा द्या, तू मोहसे का करवावइ चाहत अहा? काहेकि तू मोर परमेस्सर अहा। तोहार नीक आतिमा क जमीन क तल क ऊपर मोर अगुवाइ करइ द्या।

11हे यहोवा, मोका तोहार नाउँ बरे जिअत रहइ द्या। मोका मुसीबत स बाहर निकारा काहेकि तू नीक अहा।

12हे यहोवा, मोह पइ आपन बिस्ससनीय पिरेम परगट करा। अउर मोर सन्तुअन क नस्ट करा जउन मोका मारइ क जतन करत हीं। काहेकि मई तोहार सेवक हउँ।

### भजन 144

*दाऊद क गीत।*

1यहोवा मोर चट्टान अहइ। यहोवा क धन्य कहा। यहोवा मोका लड़ाई बरे प्रसिच्छण देत अहइ। यहोवा मोका जुद्ध बरे प्रसिच्छण देत अहइ।

2यहोवा मोसे पिरेम रखत ह। उ मोर किला अहइ। उ पर्वत क ऊपर, मोर ऊँच सुरच्छा क सरण अहइ। उ मोका बचावत ह। उ मोर ढाल अहइ। मई ओकरे भरोसे हउँ। उ मोरे लोगन पइ राज्ज करइ मैं मोर मदद करत ह।

3हे यहोवा, मानव जाति तोहरे बरे काहे महत्वपूर्ण बना अहई? तू मानव जाति पइ काहे धियान देत अहा?

4मनई क जिन्गी एक फूँक क तरह होत ह। मनई क जिन्गी ढलत भइ छाया क तरह होत ह।

5अकासे क चीरके खाले उतरि आवा। पहाड़न क छुइ ल्या ताकि ओनसे धुआँ उठइ लाग।

6हे यहोवा, बिजुरियन पठइ द्या अउर मोरे दुस्मनन क कहूँ दूर भगाइ द्या। आपन बाणन क चलावा अउर ओनका मजबूर करा कि उ पचे कहूँ पराइ जाई।

7अकासे स मदद पठवा अउर मोका मुक्त करा अउ मोका बचाइ ल्या। एन, दुस्मनन क सागर में मोका जिन बूड़इ द्या। मोका एँन बिदेसियन स बचाइ ल्या।

8इ सबइ दुस्मन लबार अहई। उ पचे धोखेबाज़ अहई।

9हे यहोवा, मई नवा गीत गाउब तोहरे ओन अदभुत कर्मन क तू जेनका करत ह। मई तोहार जस दस तार वाली वीणा पइ गाउब।

10तू राजा लोगन क मदद ओनकर जुद्धन जीतइ मैं करत ह। तू आपन सेवक दाऊद क ओकरे दुस्मनन क तरवारन स मुक्त किहा ह।

11मोका एँन परदेसियन स मुक्त करा अउ मोका बचाइ ल्या। इ सबइ दुस्मन लबार अहई। उ पचे धोखेबाज़ अहई।

12हमार पूतन जवान होइके बिसाल बृच्छन जइसे मजबूत होई, हमार बिटियन महल क सुन्नर सजावटी कोने क पाथर जइसी होई।

13तोहार गोदाम फसलन स भरपूर होई। हमार भेड़िन चरागाहन में हजारन-हजारन मेमनन जनमत रहई।

14हमार बर्धन बहोत स पड़दावार ढोइहीं। हम पइ कउनो दुस्मन हमला न करी। हम में स कउनो कबहुँ जुद्ध मैं नाहीं जाई। हमार गलियन में चिचियाहट नाहीं होई।

15जउन लोगन बरे इ बातन नीक अहई उ धन्य अहई। जउन लोगन परमेस्सर यहोवा अहइ उ धन्य अहई।

### भजन 145

*दाऊद क एक तु स्तुति गीत।*

1हे मोरे परमेस्सर, हे मोरे राजा, मई तोहार गुण गावत हउँ। मई सदा-सदा तोहरे नाउँ क धन्य कहत हउँ।

2मई हर दिन तोहका सराहत हउँ। मई तोहरे नाउँ क सदा-सदा बड़कई करत हउँ।

3यहोवा महान अहइ। ओकर बहोत स्तुति होइ चाही। मई उ सबइ चिजियन क पता नाहीं लगाइ सकब जउन उ करत ह।

4पीढ़ी दर पीढ़ी क ओन बातन क गरिमा क बखानइ द्या जेनका तू सदा-सर्वदा करत ह। अउर ओनका तोहार सक्तीसाली करमन क घोसणा करइ द्या।

5तोहरे महिमामय प्रताप सुन्नर अहइ। मई तोहरे अचरज भरे करमन क बखानब।

6लोगन क ओन अचरज भरा सक्ती क बारे मैं कहइ द्या जेनका तू करत ह। मई ओन महान करमन क बखानब जेनका तू करत ह।



7लोगन क उ बहोत सारी नीक बातन क बारे में कहइ द्या जउन तू किहा ह। उ पचे तोहार सच्चाई क बारे में कहिहीं।

8यहोवा दयालु अहइ अउर करुणा स पूर्ण अहइ, उ धीरज अउ पिरेम स पूर्ण अहइ।

9यहोवा सब क बरे भला अहइ। उ जउन सबइ कछू रचेस ह ओकरे प्रति करुणा प्रगट करत ह।

10हे यहोवा, ओनका जेका तू रच्या ह तोहार बड़कई करइ द्या। तोहका तोहार भगत धन्य कहत हीं।

11उ सबइ लोग तोहरे महिमा स भरा राज्ज क बखान करत रहत हीं। ओनका तोहरी सक्ती क बारे में कहइ द्या।

12ताकि सबइ मानव जाति ओकरे सक्तीसाली करमन बारे में अउर ओकरे राज्ज क महिमामय प्रताप क बारे में जानईं।

13हे यहोवा, तोहार राज्ज सदा सदा बना रही। तू सर्वद्व राज्ज करव्या।

14यहोवा गिरे भए लोगन क उठावत ह। यहोवा ओन लोगन क उठावत ह जउन बोझन क ढोवत ह।

15सबहिं प्राणी तोहरी कइँती खाना पावइ बरे लखत हीं। तू ओनका ठीक समइ पइ खइया क देत रहत ह।

16तू आपन मूठी खोलत ह, अउर तू सबहिं प्राणियन क ओकरे जरूरत क चिजियन स संतुटठ करत अहा।

17जउन कछू यहोवा करत ह उ नीक बाटइ। यहोवा जउन भी करत ओहमों निज बिस्ससनीय पिरेम प्रकट करत ह।

18यहोवा हमेसा ओन लोगन क निचके रहत ह जउन इमानदारी क संग यहोवा स मदद क बिनती करत ह।

19यहोवा क भगत जउन ओहसे चाहत हीं, उ ओन बातन क करत ह। यहोवा आपन भगतन क सुनत ह। उ ओनकर पराथनन क जवाब देत ह अउर ओनकर रच्छा करत ह।

20यहोवा ओन सबइ क जउन ओह स पिरेम करत ह, क रच्छा करत ह। किन्तु उ हर दुटठ क नस्ट करत ह।

21मई यहोवा क गुण गाउब। हर कउनो ओकर पवित्र नाउँ क सदा अउ सर्वद्व स्तुति करइ द्या।

### भजन 146

1यहोवा क गुणगान करा। मोर मनवा, यहोवा क बड़कई करा।

2मई आपन जिन्नगी भइ यहोवा क गुण गाउब। मई जब तलक जिअब आपन परमेस्सर बरे संगीत बजावत रहब।

3आपन प्रमुखन क भरोसे जिन रहा। मदद पावइ बरे मनई क भरोसे जिन रहा, काहेकि तोहका मनई बचाइ नाहीं सकत ह।

4लोग मर जात हीं अउर दफनाइ दीन्ह जात हीं। फुन ओनकर मदद देइ क सबहिं जोजना यूँ ही चली जात हीं।

5ओनका धन्य होइ जउन याकूब क परमेस्सर क आपन सहायक क रूप में राखेस ह। ओनका धन्य होइ जउन यहोवा आपन परमेस्सर क भरोसे रहा करत हीं।

6उ सरग अउ धरती क बनाएस ह। उ सागर अउर ओहमों क हर चिजियन क बनाएस ह। उ हमेसा बिस्सासी रही।

7उ सताया भवा लोगन क संग उचित बेउहार करत ह। उ भुखान लोगन क भोजन देत ह। यहोवा बन्दी लोगन क छोड़ा दिया करत ह।

8यहोवा आँधर क आँखियन क खोलि दिहेस। यहोवा ओन लोगन क सहारा देत ह जउन ठोकर खाएन हीं। यहोवा सच्चे लोगन स पिरेम करत ह।

9यहोवा हमरे देस में रहइवालन बिदेसियन क रच्छा करत ह। यहोवा अनाथन अउ रौंइ मेहररूनन क धियान रखत ह। किन्तु दुर्जनन क मकसदन क विफल करत ह

10यहोवा सदा राजा क रूप में सासन करत रहइ। हे सिथ्योन तोहार परमेस्सर पीढ़ी दर पीढ़ी राज करत रहइ। यहोवा क गुणगान करा।

### भजन 147

1यहोवा क बड़कई करा काहेकि उ नीक अहइ। हमरे परमेस्सर क स्तुति क गीत गावा, काहेकि इ नीक अहइ अउ ओकरे बरे सुखदायी अहइ।

2उ यहोवा अहइ जउन यरूसलेम क बनाएस ह। उ उहइ जउन ओन लोगन क एक संग जमा किहेस ह जेनका इस्त्राएल स तितर-बितर कीन्ह गवा रहा।

3परमेस्सर ओनकर टूटे मनवा क चंगा करत रहत अउर ओनकर घावन पइ पट्टी बाँधत रहा।

4परमेस्सर तारन क गनत ह अउर हर एक तारा क नाउँ जानत ह।

5हमार सुआमी बहोत महान अउर सक्तीसाली अहइ। ओकरे गियान क सीमा न अहइ।

6यहोवा दीन लोग क सहारा देत ह। उ दुटठ लोगन क खाले में हींच लेत ह।

7गाइके यहोवा क धन्यवाद द्या। हमरे परमेस्सर क गुणगान वीणा क संग करा।

8उ बादरन स अकासे क ढौंपत ह। उ धरती पइ बर्खा करावत ह। उ पहाड़न पइ हरी घास क उगावत ह।

9उ गोरूनन क अउर नान्ह कउनन क जउन ओकरे मदद बरे गोहरावत हीं, चारा देत ह।

10ओका जुद्ध क घोड़न अउर सक्तीसाली सैनिक नाहीं भावत हीं।

11यहोवा ओन लोगन स प्रसन्न होत ह, जउन ओकर सम्मान करत हीं। यहोवा प्रसन्न अहइ, अइसे ओन लोगन स जेनकर आस्था ओकरे सच्चे पिरेम में अहइ।

12हे यरूसलेम, यहोवा क गुण गावा। सिथ्योन, आपन परमेस्सर क बड़कई करा।

13हे यरूसलेम, तोहरे फाटकन क परमेस्सर सुदृढ़ बनावत ह। तोहरे नगर क लोगन क परमेस्सर आसीस देत ह।

14परमेस्सर तोहार देस क सान्ति स आसीस देत ह, एह बरे तोहरे लगे खाइ बरे अनाज क ढेर अहइ।

15परमेस्सर धरती क आदेस देत ह अउर ओकर आदेस क फउरन पालन होत ह।

16परमेस्सर धरती पइ तब तलक पाला गिरावत जब तलक धरातल वइसा सफेद नाहीं होइ जात जइसा उज्जर

ऊन होत ह। उ बर्फ क छोटा टूकन क हवा क संग धूरि क नाई उड़त ह।

17परमेस्सर ओलन क अइसा बनावत ह मानो पाथरन अकासे स गिरत हीं। कउनो मनई उ ठिठुरन क नाहीं सह सकत ह जउन ओकरे दुआरा भेजा जात ह।

18फुन परमेस्सर दूसर आग्या देत ह, अउर गरम हवा फुन बहइ लग जात ह। बर्फ टेघरइ लागत अउर जल बहइ लग जात ह।

19परमेस्सर आपन आदेस याकूब क दिहे रहा। परमेस्सर इस्त्राएल क निज बिधि क विधान अउ नेमन क दिहस।

20यहोवा कउनो दूसर रास्ट्र क बरे अइसा नाहीं किहस। परमेस्सर आपन नेमन क, कउनो दूसर जाति क नाहीं सिखाएस। यहोवा क जस गावा।

### भजन 148

1यहोवा क बड़कई करा। ओकर बड़कई सरग स करा।

2हे सबहिं सरगदूतो, यहोवा क जस गावा। ग्रहो अउ नछत्रो ओकर गुण गान करा।

3सूरज अउ चाँद, तू पचे यहोवा क गुण गावा। अकासे क तारो अउ जेतियो, ओकर बड़कई करा।

4यहोवा क बड़कई सबन त ऊँच पर्वत में करा! हे जल अकासे क ऊपर, ओकर बड़कई करा।

5यहोवा क नाउँ क बड़कई करा। काहेकि उ आदेस दिहस, अउर सब कछू रचे रहा।

6उ ऐन सबन्क बनाएस एह बरे उ सबइ सदा-सदा बना रहई। उ अपरिवर्तनसील कानून बनाएस।

7ओ धरती पइ क हर वस्तु, यहोवा क गुण गावा। ओ बिसाल जन्तुओ अउ सबइ महासागरो, ओकर गुण गावा।

8आगी अउ ओलन, बरफ अउ कुहासा, तूफानी पवन जउन ओकर वचन क पूरा किहेन, ओकर गुण गावा।

9पर्वतन अउ सबइ पहाड़न, फलदार बृच्छ अउ देवदार क बृच्छ, ओकरे गुण गावा।

10बनेर पसुअन अउ सब पालतु मवेशी, रेंगइवाले जीव अउ पंछियन, ओकर गुण गावा।

11धरती क सबहिं राजा लोग अउ सबइ रास्ट्रन, प्रमुखन अउ धरती पइ क सबहिं निआवाधीसन, ओकर स्तुति करा।

12नव जवान मनसेधू अउ नव जवान मेहरारू, ओकर स्तुति करा। परमेस्सर बूढ़े लोगन अउ गदेलन क रचेस ह।

13ओनका यहोवा क नाउँ क स्तुति करइ द्या। अकेल्ले ओकरे नाउँ ही ऊँच सम्मानित अहइ। धरती अउ अकास ओकर चमक-दमक स भरि जाइहीं।

14उ आपन लोगन क मजबूती क स्रोत क निर्माण किहेस। उ आपन सबइ भगतन अरथ इस्त्राएलियन, अउ ओकरे समीप रहइवाले रास्ट्रन बरे, स्तुति क स्रोत क निर्माण किहेस। यहोवा क बड़कई करा।

### भजन 149

1यहोवा बरे एक ठु नवा गीत, ओन नई बातन क बारे में गावा जेनका यहोवा किहस ह। ओकरे भगतन क मण्डली में ओकर गुणगान करा।

2इस्त्राएलियन क आपन रचनाकर्ता में खुसी मनावइ द्या। सिथ्योन क लोगन आपन राजा क संग आनन्द मनावइ द्या।

3उ सबन क ओकरे नाउँ क स्तुति नाच क संग करइ द्या अउर उ पचन क तंबूरा अउ वीणन क ओकरे पराथना बरे बजावइ द्या।

4यहोवा आपन लोगन स खुस अहइ। उ पीड़ितन क बचावइ स उद्धार किहस।

5परमेस्सर क भगतन क विजय उत्सव मनावइ द्या। हिआँ तलक कि बिछोना पइ जाए क पाछे भी उ पचन क खुसी मनावइ द्या।

6ओनका परमेस्सर क विजय क जयजयकार करइ द्या। ओनका आपन में तेज तरवारन क धारण करइ द्या।

7तउ उ पचे दूसर रास्ट्रन स बदला लेइ सकई अउर ओन लोगन क सजा देइ सकई।

8परमेस्सर क लोग ओन राजा लोगन क बाँधिई, ओकर सज्जन लोगन क जंजीरे स बाँधिई।

9परमेस्सर क लोग ओनकर निआव परमेस्सर क आदेसन क अनुसार करिहीं। ओकरे सबहिं बिस्सासी भगतन क ओका सम्मान देइ क बिसेस अधिकार प्राप्त अहइ। यहोवा क स्तुति करा।

### भजन 150

1यहोवा क बड़कई करा। परमेस्सर क मन्दिर में ओकर गुणगान करा। आकासे में ओकर बड़कई करा जउन ओकर सक्ती दिखावत ह।

2ओकर ओन बड़के कारजन बरे ओकर बड़कई करा। ओकर सबहिं महानता बरे ओकर स्तुति करा।

3तुरही फूँकत अउ नरसिंहा बजावत भए ओकर स्तुति करा। ओकर गुणगान वीणा अउ सारंगी बजावत भए करा।

4तम्बूरन बजाइके अउ नाचिके ओकर स्तुति करा। तारवाला यंत्रन अउर बाँसुरियन बजाइके ओकर गुण गावा।

5तू परमेस्सर क जस झंकारत भए झॉँझन क बजावत गावा। ओकर बड़कई करा।

6सबइ जिअत पराणियन यहोवा क स्तुति करई। यहोवा क बड़कई करा!

# अय्यूब

## अय्यूब एक ईमानदार मनई

1 ऊज नाउँ क प्रदेस में एक तु मनई रहा करत रहा। ओकर नाउँ अय्यूब रहा। अय्यूब एक बहोत ईमानदार अउ बिस्सासी मनई रहा। अय्यूब परमेस्सर क उपासना करत रहत रहा अउ बुराई स दूर रहा करत रहा। 2ओकरे सात तु बेटहना अउ तीन तु बिटिहनी रहिन।

3अय्यूब सात हजार भेड़िन, तीन हजार ऊँटन, एक हजार बर्धन अउ पाँच सौ गदहियन क सुआमी रहा। ओकरे लगे बहोत स नौकर रहेन। अय्यूब पूरब क सब स जियादा धन्नासेठ में स एक रहा।

4अय्यूब क बेटहनन बारी-बारी स आपन घरन में एक दूसर क खइया क खाइ बरे बोलावा करत रहेन। उ पचे आपन बहिनियन क भी हुआँ ओकरे खाइ अउ पिइ बरे बोलात रहेन। 5अय्यूब क गदेलन जब भोज खाइ चुकतेन, तउ अय्यूब तड़के भिन्सारे उठत अउ आपन हर गदेलन क बदले होमबलि अर्पित करत रहा। काहेकि उ सोचत, “होइ सकत ह, मोर गदेलन आपन हिरदइ में परमेस्सर क निन्दा कइ के पाप किहे रहेन।” एह बरे अय्यूब हमेसा अइसा करत रहत रहा।

6फिन सरगदूतन बरे यहोवा क रिपोर्ट देइ क दिन आवा। सइतान भी ओनकर संग आवा।

7यहोवा सइतान स कहेस, “तू कहाँ रहया?”

सइतान जवाब देत भए यहोवा स कहेस, “मई धरती पइ एहर ओहर घूमत रहेउँ।”

8एह पइ यहोवा सइतान स कहेस, “का तू मोर सेवक अय्यूब क लख्या? इ धरती पइ ओकरे तरह कउनो दूसर मनई नाहीं अहइ। अय्यूब एक तु ईमानदार अउ बिस्सासी मनई अहइ। उ हमेसा परमेस्सर क आराधना करत ह अउर बुराई स सदा दूर रहत ह।”

9सइतान जवाब दिहस, “निहचय ही! मुला अय्यूब परमेस्सर क एक खास कारण स आराधना करत ह! 10तू सदा ओकर, ओकरे घराने क अउर जउन कछू ओकरे लगे अहइ ओकर रच्छा करत ह। जउन कछू उ करत ह तू ओका सफल बनावत ह। हौं, तू ओका बहोत सारा जनावरन झुण्ड अउर रेवड़ पूरे देस में फइलावइ बरे दिहस ह। 11मुला जउन कछू ओकरे लगे अहइ उ सब कछू क अगर तू बर्बाद कइ द्या तउ मई तोहका बिस्सास दियावत हउँ कि उ तोहरे मुँह पइ तोहरे बिरुद्ध बोलइ लागी।”

12यहोवा सइतान स कहेस, “अगर अइसा अहइ, अय्यूब क लगे जउन कछू अहइ ओकरे संग जइसा तू चाहत ह, करा। मुला ओकरे देह का चोट न पहुँचावा।”

ओकरे पाछे सइतान यहोवा क लगे स चला गवा।

## अय्यूब क सब कछू जात रहा

13एक दिन, अय्यूब क पूत अउ बिटियन आपन सब स बड़का भइया क घर खइया क खात रहेन अउ दाखरस पिअत रहेन। 14ठीक तबहिं अय्यूब क लगे एक तु संदेसवाहक आवा अउ ओका बोला, “जब बर्धा हर जोतत रहेन अउर गदहन मइदान चरत रहेन, 15कि सबा\* क लोग हम पचन पइ धावा बोल दिहन अउ तोहरे गोरुअन क लइ गएन। मोका तजिके तोहार सबहिं दासन क सबा क लोग मार डालेन। आप क इ खबर देइ बरे मई बचिके पराइ निकरि आवा हउँ।”

16अबहिं उ संदेसवाहक कछू कहत ही रहा कि अय्यूब क लगे दूसर संदेसवाहक आवा। दूसर संदेसवाहक कहेस, “अकासे स बिजुरी गिरी अउ आप क भेड़िन अउ दास जरिके राखी होइ गएन है। आप क खबर देइ बरे मई ही बचिके निकरि पावा हउँ।”

17अबहिं उ संदेसवाहक आपन बात कहत ही रहा कि एक तु अउर संदेसवाहक आइ गवा। इ तीसर संदेसवाहक कहेस, “कसदी क लोग तीन टोलियन क पठाए रहेन, जउन हम पइ हमला बोल दिहन अउर उ पचे सेवकन क मारि डई क पाछे ऊँटन क छीन लइ गएन। आपक खबर देइ बरे सिरिफ मई ही बचिके निकरि पाएउँ ह।”

18इ तीसर दूत अबहिं बोलत ही रहा कि एक अउर संदेसवाहक आइ गवा। इ चउथा संदेसवाहक कहेस, “आप क बेटवन अउ बिटियन सब स बड़का भाई क घर खइया क खात रहेन अउ दाखरस पिअत रहेन। 19ठीक तबहिं रेगिस्तान स एका-एक एक तु तेज आँधी उठी अउर उ मकान क उड़इके ढहाइ दिहस। मकान आप क पूतन, अउ बिटियन क ऊपर आइ पड़ा अउर उ पचे मरि गएन। आप क खबर देइ बरे सिरिफ मई ही बचिके निकरि पावा हउँ।”

20अय्यूब जब इ सुनेस तउ उ आपन ओढ़ना फारि डालेस अउर इ देखावइ बरे उ दुःखी अउर वियाकुल अहइ, उ आपन मूँह मुड़ाइ लिहस। अय्यूब तब धरती पइ गिरिके दण्डवत किहस। 21उ कहेस:

“मोर जब इ संसारे क बीच जनम भवा रहा, मई तब नंगा रहेउँ, मोरे लगे तब कछू भी नाहीं रहा। जब मई मरब अउ इ संसारे क तजब, मई नंगा होब अउर मोरे लगे कछू न होइ। यहोवा ही देत ह अउर यहोवा ही लेत, यहोवा क नाउँ क बड़कई करा।”

22जब इ सबहिं कछू घटना घटत रहा, अय्यूब न ही कउनो पाप किहस अउर न ही परमेस्सर क दोख दिहस।

**सबा** रेगिस्तान क लोगन क एक समूह। उ पचे लोगन पइ हमला कइके ओनकर धन दौलत छूट लेत रहेन।

## सइतान फुन अय्यूब क दुःख देत ह

2 फुन एक दिन, यहोवा स मिलइ बरे सरग दूत आपन। सइतान भी ओनके संग रहा। सइतान यहोवा स मिलइ आवा रहा। 2यहोवा सइतान स पूछेस, “तू कहीं रह्या”

सइतान यहोवा क जवाब दिहेस, “मई धरती पइ एहर-ओहर घूमत रहेई।”

3एह पइ यहोवा सइतान स पूछेस, “का तू मोर सेवक अय्यूब पइ धियान देत रहत अहा? ओकर जइसा धरती पइ कउनो नाहीं अहइ। अय्यूब ईमानदार अउ बिस्सासी मनई अहइ। उ हमेसा परमेस्सर क उपासना करत ह, बुराई स दूर रहत ह। उ अबहुँ भी ईमानदारी राखत ह हालाँकि तू मोका प्रेरित किहे रह्या कि मई बिना कारण ही ओका नस्ट कइ देई।”

4सइतान जवाब दिहस, “खाल क बदले खाल! कउनो मनई जिअत रहइ बरे, जउन कछू ओकरे लगे अहइ, सब कछू दइ डावत ह। 5यह बरे अगर तू आपन सक्ती क प्रयोग ओकरे देह क नोस्कान पहोंचावइ बरे करा, तउ उ सीधा ही तोहका कोसइ लागी।”

6तउ यहोवा सइतान स कहेस, “अगर अइसा अहइ, तउ मई अय्यूब क तोहार हवाले करत हउँ, मुला तोहका ओका मार डावइ क छूट नाहीं अहइ।”

7ओकरे पाछे सइतान यहोवा क लगे स चला गवा। उ अय्यूब क दुःख देइवाला फोइन क दइ दिहस। इ सबइ पीरा देइवाला फोइन ओकरे गोड़े क तलवा स लइके ओकरे मूँडे क ऊपर तलक देह मँ फइल गएन। 8तउ अय्यूब कूड़ा क ढेरी क लगे बइठ गवा। ओकरे लगे एक ठु ठीकरा रहा, जेहसे उ आपन पीरा दायक फोइन क खजुआवा करत रहा। 9अय्यूब क पत्नी ओसे कहेस, “का तू अबहुँ तलक ईमानदार रहइ चाहत ही? तू परमेस्सर क कोसिके मर काहे नाहीं जात्या।”

10अय्यूब जवाब देत भए आपन पत्नी स कहेस, “तू तउ एक मूसख मेहरारू क तरह बातन करति अहा। देखा, जब परमेस्सर उत्तिम वस्तुअन क देत ह, हम ओनका अंगीकार कइ लेइत ह। तउ हमका दुःख क भी अपनावइ चाही अउ सिकाइत नाहीं करइ चाही।” इ समूचइ दुःखे मँ भी अय्यूब कउनो पाप नाहीं किहस। परमेस्सर क खिलाफ उ कछू नाहीं बोला।

## अय्यूब क तीन मीतन क ओसे भेटइ आउब

11अय्यूब क तीन मित्र रहेन: तेमानी क एलीपज, सूही क बिलदद अउर नामाती क सोपर। एँन तीनहुँ मीतन अय्यूब क संग जउन बुरी घटना भइ रहिन, ओन सबन क बारे मँ सुनेन। एँन तीनहुँ मीत आपन-आपन घर तजिके आपुस मँ एक दूसर स भेटेन। उ पचे इ निहचय किहेन कि उ पचे अय्यूब क लगे जाइके ओकरे बरे सहानुभूति परगट करइ अउ ओकर हिम्मत बँधावई। 12जब इ तीनहुँ मीत दूर स अय्यूब क लखेन, तउ उ पचे ओका बहोत मुस्किल स पहिचान पाएन। उ पचे भोंकारा मारिके रोवइ लागेन। उ पचे आपन ओढ़ना फाड़ि डापेन। आपन दुःख अउ आपन बेचैनी देखावइ बरे उ पचे आपन आपन मूँडन पइ माटी डापेन।

13फुन उ सबइ तीनहुँ मीत अय्यूब क संग सात दिन अउ सात रात तलक भुईया पइ बइठा रहेन। अय्यूब स कउनो एक सब्द तलक नाहीं कहेस काहेकि उ पचे लखत रहेन कि अय्यूब भयानक पीरा मँ रहा।

## अय्यूब क उ दिना क कोसब जब उ जन्मा रहा

3 तब अय्यूब आपन मुँह खोलेस अउर उ दिन क कोसइ लाग जब उ पइद भवा रहा। 2-3उ कहेस:

“जउने दिन मई पइद भवा रहेई, बर्बाद होइ चाही रहा। उ राति कबहुँ न आई होइ चाही जब उ पचे कहे रहेन कि ‘एक ठु लरिका पइद भवा अहइ।’

4उ दिन अँधियारा स भरा जाइ चाही रहा। परमेस्सर उ दिन क बिसारि जात चाही रहा। उ दिन प्रकास न चमका चाही रहा।

5उ दिन अँधियारा स पूर्ण बना होत चाही रहा जेतना कि मउत अहइ। बादर उ दिन क घेरे रहतेन चाही रहा। जउनो दिन मई पइद भवा करिया बादर प्रकास क डेरवाइ क खदेर देतेन चाही रहा।

6उ राति क गहिर अँधियारा जकरि लेइ, उ राति क गनती न होइ। उ राति क कउनो महीना मँ सामिल जिन करा।

7उ राति कछू भी पइद न करइ। कउनो भी आनन्द क ध्वनि उ राति क सुनाई न देइ।

8सराप देइ मँ माहिर मनइयन क उ मनइयन क साथ जउन लिब्यातान\* क जगवाइ मँ सामर्थ अहइ, क उ दिना क सराप देइ द्या जउन दिना मई पइद भाएई।

9उ दिन क सौँझ तारा करिया पइ जाइ द्या। उ रात भिन्सारे क रोसनी बरे तरसइ अउर उ प्रकास कबहुँ न आवइ द्या। उ सूरज क पहिली किस्न न लखि सकइ।

10काहेकि उ रात मोका पइद होइ स नाहीं रोकेस। उ रात मोका इ सबइ कस्ट झेलेइ स नाहीं रोकेस।

11मई काहे नाहीं मरि गएई जब मई पइद भवा रहेई? जन्म क समइ ही मई काहे नाहीं मरि के बाहर आए रहेई?

12काहे मोर महतारी गोदी मँ मोका राखेस? काहे मोर महतारी क छातियन मोका दूध पियाएन।

13अगर मई तबहिँ मरि गवा होतेई जब मई पइद भवा रहेई तउ अब मई सान्ति स होतेई। अगर अइसा होतेन मई सोवत रहतेई अउर आराम पउतेई।

14राजा लोगन अउ बुद्धिमान मनइयन क संग जउन पृथ्वी पइ पहिले रहेन। ओन लोग आपन बरे ठउर जगह बनाएन, जउन अब नस्ट होइके मिट चुका अहई।

15मोका ओन सासक लोगन क संग दफनावा जात रहतेई जउन सोना-चाँदी स आपन घर भरे होतेन।

16मई गर्भपात मँ ही मरि जात रहतेई। मई दिन क प्रकास नाही देखि रहतेई।

लिब्यातान होइ सकत ह इ एक ठु भारि भरकम समुद्री दोत्य रहा। पुराने जमाने क साहित्य क अनुसार, परमेस्सर लिब्यातान क खिलाफ लइत रहेन अउर एका सर्जन क सुरू मँ ही हराए दिहेन। लोग सोचत रहेन कि जादू एकर मदद स सुर्य ग्रहन पइद करत रहेन।

17दुःख जन दुःख देब तब तजि देत हीं जब उ पचे कब्र में होत हीं अउर थके लोग कब्र में आराम पावत हीं।

18हिआँ तलक कि बंदी भी सुख स कब्र में रहत हीं। हुआँ उ पचे आपन अत्याचारियन क आवाज नाहीं सुनत हीं।

19हर तरह क लोग कब्र में रहत हीं चाहे उ पचे महत्व नामा होई या साधारण। हुआँ दस आपन सुआमी स छुटकारा पावत ह।

20अइसे मनई क प्रकास काहे देत रहा जउन दुःख झेल रहा ह? अइसे मनइ क काहे जिन्नगी देत रहा ह जेकर जिन्नगी कडुवापन स भर रहत ह?

21अइसा मनई मनइ चाहत ह मुला ओकर मउत नाहीं आवत। अइसा दुःखी मनई मउत पावइ क उहइ तरह तरस्त ह जइसे कउनो छुपे खजाना बरे।

22अइसे मनइयन कब्र पाइके खुस होत हीं अउर आनंद मनावत हीं।

23परमेस्सर ओनसे ओनकर भविस्स छिपाए राखत ह अउर ओनकर चारिहुँ कइँती सुरच्छा बरे देवार खड़ी करत ह।

24मोर गहरी उदासी मोर बरे रोटी बन गवा ह। मोर विलाप जल धारा क तरह बाहेर फूट पड़त ह।

25मई जउने डेराउनी बात स डेरात रहेउँ कि कहुँ उहइ मोरे संग न घटि जाइ अहइ मोरे संग घटि गइ। अउर जउने बाते स मई सबन त जियादा डरेउँ, उहइ मोरे संग होइ गइ।

26न ही मई सान्त होइ सकत हउँ, न ही मई आराम कइ सकत हउँ। मई बहोत ही विपत्ति में हउँ।”

### एलीपज क कथन

4 1-2तब तेमान क एलीपज जवाब दिहस: “अगर मई तोहका कउनो राय देउँ तउ का तू नाराज़ होब्या? अगर अइसा अहइ तउ भी मोका बोलइ चाही।

3“हे अय्यूब, तू बहोत स लोगन क सिच्छा दिहा अउर दुर्बल हाथन क तू सक्ती दिहा।

4जउन लोग लड़खड़ात रहत रहेन तोहार सब्दन ओनका हिम्मत बँधाए रहेन तू निर्बल गोइन क आपन उत्साह स सबल किहा।

5मुला अब तोह पइ विपत्ति क पहाड़ टूट पड़ बाटइ अउर तोहार हिम्मत टूट गइ अहइ। विपदा क मार तोह पइ पड़ी अउर तू ब्याकुल होइ उट्या।

6तोहका उ परमेस्सर पइ बिस्सास करइ चाही जेका तू उपासना करत ह। आपन ईमानदारी क आपन आसा बनने द्या।

7अय्यूब, इ बात क याद राखा कि कउनो भी निर्दोष कबहुँ नाहीं नस्ट कीन्ह गएन। नीक मनई कबहुँ नाहीं तबाह कीन्ह गवा अहइ।

8मई अइसे लोगन क लखेउँ ह जउन कस्टन क बढ़ावत हीं अउर जउन जिन्नगी क कठिन करत हीं। मुला उ पचे सदा ही दण्ड भोगत हीं।

9परमेस्सर क दण्ड ओन लोगन क मारि डवत ह, अउर ओकर किरोध ओनका नस्ट करत ह।

10दुर्जन सेर क तरह गुरीत अउ दहाड़त हीं। मुला परमेस्सर ओन दुर्जनन क चुप करावत ह।

11बुरे लोग ओन सेरन क तरह होत हीं जेनके लगे सिकार बरे कछू नाहीं होत। उ पचे मरि जात हीं अउर ओनकर गदेलन एहर-ओहर बिखराइ जात हीं।

12मोरे लगे एक सँदिसा चुपचाप पहुँचावा गवा, अउर मोरे काने में ओकर भनक पड़ी।

13जउने तरह राति क बुरा सपना नींद क उड़ाइ देत ह,

14मई डेराइ गएउँ अउ काँपइ लागेउँ। मोर सबइ हड्डियन हिल गइन।

15मोरे समन्वा स एक आतिमा जइसी गुजरी जेहसे मोरे बदन में रोंगटा खड़ा होइ गएन।

16उ आतिमा मोर समन्वा उठेस, मुला मई एका नाहीं पहिचान सकउँ। मोरी आँखिन क समन्वा एक सरूप खड़ा रहा। हुवाँ सन्नाटा स छावा रहा। फुन मई एक बहोत स सान्त आवाज सुनेउँ। उ पचे कहेस,

17“का एक मनई परमेस्सर क समन्वा दोखरहित होइ सकत ह? का एक मनई आपन सृजनहार स जियादा सुद्ध होइ सकत ह?

18परमेस्सर आपन सरग क सेवकन तक पइ भरोसा नाहीं कइ सकत। परमेस्सर क आपन दूतन तलक में देख मिलि जात हीं।

19तउ मनई तउ अउर भी जियादा गवा गुजरा बा। मनई तउ कच्ची माटा क घरौदा में रहत हीं। एँन माटी क घरौदन क नींव धूरि में रखी गइ अहइ। इ सबइ लोगन क ओहसे भी जियादा आसानी स मसलिके मार दीन्ह जात ह, जउने तरह भुनगन मसलिके मार दीन्ह जात ह।

20लोग भोर स सौँझ क बीच में मर जात हीं मुला ओन पइ कउनो धियान तलक नाहीं देत ह। उ पचे मरि जात हीं अउर सदा बरे चला जात हीं।

21ओनके तम्बूअन क खूँटी उखाड़ दीन्ह जात हीं अउर इ सबइ लोग बिना बुद्धि क मरि जात हीं।”

5 “अय्यूब, अगर तू चाहा तउ पुकारिके लखि ल्या मुला तोहका कउनो भी जवाब नाहीं देइ। तू कउनो भी सरगदूत कइँती मुड़ नाहीं सकत ह।

2मूरख क किरोध उहइ क नास कइ देइ। मूरख मनई क ईर्सिया ओका ही मरि डइहीं।

3मई एक मूरख क लखे रहेउँ जउन सोचत रहा कि उ सुरच्छित बाटइ। जेकर घर एका-एक सरापित कइ दीन्ह ग रहा।\*

4अइसे मूरख मनई क सन्तानन क कउनो भी मदद नाहीं कइ सका। कचहरी में ओनका बचइया कउनो नाहीं रहा।

5ओकरी फसल क भूखे लोग खाइ गएन। हिआँ तलक कि भूखे लोग काँटन क झाड़ियन क बीच जमा भवा अन्न क उठाइ लइ गएन। जउन कछू भी ओन लोगन क लगे रहा उ सबइ चिजियन क लालची मनइयन उठाइके लइ गएन।

6मुसीबत माटी स नाहीं निकरत ह, न ही विपत्ति मैदान में जामत ह।

जेकर ... रहा या मुला मई ओकरे घरे क एका-एक सरापेतउँ।

7मनई क जन्म दुःख भोगइ बरे भवा ह। इ ओतना ही फुरइ अहइ जेतना फुरइ अहइ कि आगी स चिनगारी ऊपर उठत ह।

8मुला अथर्व, अगर तोहरी जगह मईं होतेउँ तउ मईं परमेस्सर क लगे जाइके आपन दुःखड़ा कहितेउँ अउर ओकरे लगे राय माँगतेउँ।

9परमेस्सर क कारनामा समुझइ मँ बहोत अद्भुत अहईं। परमेस्सर क अजूबा गना नाही जाईं।

10परमेस्सर धरती पइ बर्खा क पठवत ह, अउर उहइ खेतन मँ पानी पठवा करत ह।

11परमेस्सर विनम्र लोगन क ऊपर उठावत ह। उ ओका ऊपर उठाइके दुःखी क धन क बचावत ह।

12परमेस्सर चालाक अउ दुदुठ लोगन क कुचाल क रोक देत ह। एह बरे ओनका सफलता नाही मिला करत।

13परमेस्सर चतुर क उहइ क चतुराइ भरी योजना मँ पकरि लेत ह। एह बरे ओनकर चतुराइ भरी सबइ योजना असफल होतिन।

14उ सबइ चालाक लोग दिन क प्रकास अँन्धियारा क नाई होइ गवा। हिआँ तलक कि दुपहर मँ भी उ पचे आधी-रात क जइसा ठेकर खात ही।

15परमेस्सर दीन मनई क मउत स बचावत ह अउर ओनका सक्तीसाली चतुर लोगन क सक्ती स बचावत ह।

16एह बरे दीन मनई क भरोसा अहइ कि परमेस्सर इ होइ क निआव नाही करब।

17उ मनई भाग्यवान अहइ, जेकर परमेस्सर सुधार करत ह एह बरे जब सर्व सक्तीसाली परमेस्सर तू पचन्क सजा देत होइ तउ तू आपन दुःखड़ा जिन रोआ।

18परमेस्सर ओन घावन पइ पट्टी बाँधत ह जेनका उ दिहस ह। उ चोट पहोंचावत ह मुला ओकर ही हाथ चंगा भी करत हीं।

19उ तोहका छः विपत्तियन स बचावा। हा! सात विपत्तियन मँ तोहका कउनो नोस्कान न होइ।

20अकाल क समइ परमेस्सर तोहका मउत स बचाइ अउर परमेस्सर जुद्ध मँ तोहार मउत स रच्छा करी।

21जब लोग आपन कठोर सब्दन स तोहरे बरे बुरी बात बोलिहीं, तब परमेस्सर तोहार रच्छा करी। विपत्तियन क समइ तोहका डेराइ क जरूरत नाही होइ।

22तू विनास अउ भुखमरी क समइ मँ भी खुस रहब्या। अउर तोहका जंगली जनावरन स भी कबहुँ नाही डेराइ चाही।

23मैदानन क चट्टानन तोहार साथी क होइ। जंगली जनावरन भी तोहरे संग सान्ति रखत हीं।

24तू सान्ति स रहब्या काहेकि तोहार तम्बू सुरच्छित अहइ। तू पचे आपन भेड़न क बाड़ा भी लखब्या, अउर ओहमँ एक भी भेड़ हेराइ नाही।

25तोहार बहोत सन्तानन होइहीं। उ सबइ एँतना होइहीं जेतना घासे क पाती भुइँ पइ अहईं।

26तू उ पका भवा गोहँ जइसा होब्या जउन कटनी क समइ तलक पकत रहत ह। हीं, तू पूरी उमर तलक जितअ रहब्या।

27अथर्व, हम पचे इ सबइ बातन जाँचित ह अउर हम पचे जानित ह कि इ सबइ फुर अहईं। एह बरे अथर्व मोर सुना अउर तू इ सबन्क खुद आपन आप समुझ ल्या।"

### अथर्व एलिपाज क जवाब देत ह

6 फुन अथर्व जवाब दिहेस, 2"मोर पीरा अउ दुःख क तराजु मँ तउलइ द्या।

3मोर व्यथा समुद्धर क समूची रेत स भी जियादा भारी होइ। एह बरे मईं गँवार जइसा बात किहेउँ ह।

4सर्वसक्तीमान परमेस्सर क बाण मोह मँ घुसा अहईं अउर मोर प्राण ओन बाणन क विख क पिअत रहत ह। परमेस्सर क उ सबइ भयानक सस्त्र मोरे खिलाफ एक संग रखा भवा अहईं।

5तोहार सब्दन कहइ बरे आसान अहइ जब कछू भी बुरा नाही भएन ह। हिआँ तलक कि जंगली गदहा भी नाही रेकंत अगर ओकरे लगे खाइ क रहइ। इहइ तरह कउनो भी गइया तब तलक नाही रँभात जब तलक ओकरे लगे चरइ क चारा अहइ।

6बे नमक क भोजन बिना स्वाद क होत ह। अउर अण्डा क सफेदी मँ भी स्वाद नाही होत ह।

7मोरे बरे तोहार सब्द ठीक उहइ तरह अहइ। इ भोजन क छुअइ स मईं इन्कार करत हउँ। इ तरह क भोजन मोका सड़ा भवा लागत ह।

8परमेस्सर क मोर माँग क अनुमोदन करइ द्या अउर मोका उ देइ द्या जे मँ चाहत हउँ।

9परमेस्सर क मोका सराप अउर मार डवइ द्या।

10अगर उ मोका मारत ह तउ एक तु बात क चैन मोका रही, आपन अनन्त पीरा मँ भी मोका एक तु बाते क खुसी रही कि मईं कबहुँ भी आपन पवित्र क हुकुमन पइ चलइ स इन्कार नाही किहेउँ।

11मोर सक्ती छीण होइ चुकी बाटइ एह बरे मोका जित रहइ क आसा नाही अहइ। मोका पता नाही कि आखीर मँ मोरे संग का होइ? एह बरे धीरज धरइ क मोरे लगे कउनो कारण नाही अहइ।

12मईं चट्टान क नाई मजबूत नाही अहउँ। न ही मोर देह काँसे स रची गइ अहइ।

13अब तउ मोहमँ एँतनी भी सक्ती नाही कि मईं खुद क बचाइ लेउँ। काहेकि मोहसे कामयाबी छीन लीन्ह गइ अहइ।

14काहेकि उ जउन आपन दोस्तन खातिर निस्था देखावइ स इन्कार करत ह। उ सर्वसक्तीमान परमेस्सर क भी अपमान करत ह।

15मुला मोरे बन्धु लोगो, तू बिस्सास क जोगग नाही रह्या। तू पचे नदी-तल क नाई अबिस्सासी ह जेहमँ बरिस क कछू भाग मँ ही जल रहत ह।

16उ सबहिँ अँन्धियारा नदी-तल, बरफ स उमड़ि जात ह जब बरफ टेघरत ही।

17मुला जब मौसम गरम अउ सूखा होत ह, तब पानी बहब बंद होइ जात ह, अउर जल क धारा झुराइ जात हीं।

18बड़पारी लोगन क दल आपन रास्ता क तजि देत ही अउर रेगिस्ताने में प्रवेश कइ जात ही अउर उ पचे लुप्त होइ जात हीं।

19तेमा क वड़पारी दल जल क हेरत रहेन अउर सबा क राही आसा क संग लखत रहेन।

20उ पचन्क विस्वास रहा कि पानी मिली मुला ओनका निरासा मिली।

21अब तू पचे ओन जल धारन क समान अहा। तू पचे मोर सबइ यातना क लखत अहा अउ डेरन अहा।

22का मई कहेउँ कि 'मोका उपहार द्या?' का मई कहेउँ कि 'मोर बरे रिस्वत क रूप में एक भेंट द्या?'

23का मई तू पचन्स कहेउँ, 'मोर दुस्मनन स मोका बचाइ ल्या? का मई तोहका कहेउँ कि ओका मुक्ती-धन द्या जउन मोका पकरेस ह?'

24एह बरे अब मोका सिच्छा द्या अउर मई सान्त होइ जाब। मोका देखौँ द्या कि मई का बुरा किहेउँ ह।

25सच्चा सब्द ताकतवर होत हीं, मुला तू पचे का आलोचना करत ह?

26का तू आलोचना क अविस्कार करत ह? का तू एहसे भी जिआदा निरासाजनक सब्द बोलब्या?

27हिआँ तलक कि जुआ में अनाथ क भी वस्तुअन क लेइ चाहत ह। हिआँ तलक कि तू आपन निज मीत क भी बेचइ चाहत ह।

28मुला अब, मोरे मुख क परखा। मई तोहसे झूठ नाही बोलब।

29एह बरे, आपन मने क बदल डावा। एक भी अनियाय जिन होइ द्या, फुन स जरा सोचा काहेकि मई कउनो बुरा काम नाही किहेउँ ह।

30मई झूठ नाही कहत हउँ। मोका भला अउ बुरे लोगन क पहिचान अहइ।"

**7** अय्यूब कहेस, "मनई क धरती पइ कड़ा सघर्ष करइ क पड़त ह। ओकर जिन्नगी भाड़े क मजदूर क जिन्नगी जइसी होत ह।

2मनई उ भाड़ा क मजदूर जइसा अहइ, जउन दिन क अन्त में ठंडी छौँह चाहत ह, अउ मजदूरी क इन्तज़ार करत ह।

3महीना दर महीना बेचइनी क बीत गवा अहइँ अउर पीरा भइ रति दर रत मोका दइ दीन्ह गइ अहइ।

4जब मई ओलरत हउँ, मई सोचत रहत हउँ, 'मोरे उठइ क अबहुँ अउर कितनी देर अहइ?' मुला इ रात तउ घसेटत चला जात ह। मई तउ पीरा झेल रहत हउँ अउ करवट बदलत हउँ जब तलक सूरज नाही निकरि आवत।

5मोर तन कीरन अउ धूरि स ढाक लीन्ह अहइ। मोर चमड़ी चटक गइ अहइ अउर एहमाँ रिसत भए फोड़ा भरि गवा अहइँ।

6मोर दिन जुलाहा क फिरकी स भी जियादा तेज चाल स बीतत अहइँ। मोर जिन्नगी क आखीर बिना कउनो आसा क होत अहइ।

7हे परमेस्सर, याद राखा, मोर जिन्नगी सिरिफ एक ठु साँस अहइ। अब मोर आँखी कछू भी नाही लखिहीं।

8अबहिँ तू मोका लखत अहा मुला फुन तू मोका नाही लख पउब्या। तू मोका हेरब्या मुला तब तलक मई जाइ चुका होब।

9एक बादर छोटा होइ जात ह अउर आखर में लुप्त होइ जात ह। इ तरह एक मनई जउन मर जात ह अउर कब्र में गाड़ दीन्ह जात ह, उ फुन वापिस नाही आवत ह।

10उ आपन पुराना घरे क वापिस कबहुँ नाही लउटी। ओकर घर ओका फुन कबहुँ भी नाही जानी।

11एह बरे मई चुप नाही रहब। मई सब कहि डाउब। मोर आतिमा दुखी अहइ अउर मोर मन कडुआहट स भरा अहइ, एह बरे मई उ सब बातन क बारे में सिकायत करब जउन मोर संग घटेस ह।

12हे परमेस्सर, तू मोर पइ पहरेदार काहे राखेस ह? का मई समुदूर हउँ, या समुदूर क कउनो दैत्य?

13-14हे परमेस्सर, जब मोका लगत ह कि खाट मोका सान्ति देइ अउर मोर पलंग मोका चइन अउ बिस्त्राम देइ, तब मोका सपना में डरावत ह।

15मई आपन गला घोटि जाइ पसन्द करब्या। मउत इ देह में रहइ स बेहतर अहइ।

16मई आपन जिन्नगी स घिना करत हउँ। मई हमेसा अइसा जिअत रहब नाही चाहत हउँ। मोका अकेल्ला रहइ द्या। मोर जिन्नगी बेकार अहइ।

17हे परमेस्सर, मनई तोहरे बरे काहे एँतना महत्वपूर्ण अहइ? काहे मनई पइ तोहका एँतना धियान देइ चाही?

18हर भिन्सारे काहे तू मनई क लगे आवत ह अउर हर छिन तू काहे ओका परखा करत अहा?

19हे परमेस्सर, तू कबहुँ भी मोका नज़र अन्दाज़ नाही करत ह अउर मोका एक छन अकेल्ला नाही छोड़त ह।

20हे परमेस्सर, तू हरेक चिजियन पइ जउन हम पचे करत हीं निगाह रखत ह! जदि मई पाप किहा तउ मई का किहा? तू मोका काहे निसाना बनाया ह? मई तोहार बरे काहे बोझ बन गवा हउँ।

21का तू मोर सबइ गलती क छिमा नाही करत्या अउर मोरे पापन क तू काहे छिमा नाही करत्या? मई हाली ही मरि जाब अउर कब्र में चला जाब। जब तू मोका हेरब्या मुला तब तलक मई जाइ चुका होब।"

### बिलदद अय्यूब स बोलत ह

**8** एकरे पाछे सूह प्रदेस क बिलदद जवाब देत भए कहेस।

2"तू कब तलक अइसी बातन करत रहब्या? तोहार सब्द तेज आँधी क तरह बहत अहइँ।

3परमेस्सर सदा स्वच्छ रहत ह। निआउवाली बातन क सर्वसक्तीवाला परमेस्सर कबहुँ नाही बदलत ह।

4एह बरे अगर तोहार सन्तानन परमेस्सर क खिलाफ पाप किहन ह तउ उ ओनका राजा दिहस ह। आपन पापन खातिर ओनका भोगइ क पड़ा ह।

5मुला अब अय्यूब, परमेस्सर कइँती निगाह करा, अउर सर्वसक्तीमान परमेस्सर स ओकर दया पावइ खातिर बिनती करा।

6अगर तू पवित्र अउर ईमानदार अहा, तउ उ हाली तोहार मदद बरे आइ। उ तोहार नीक घरे क रच्छा करब।

7जउन कछू भी खोया उ तोहका नान्ह स बात लगगी। काहेकि तोहार भविस्स बड़ा ही सुफल होइ।

8ओन बुढ़वा लोगन स पूछा अउर पता करा कि ओनकर पुरखन क सीखे रहेन।

9काहेकि अइसा लागत ह जइसा कि हम तउ बस काल्ह ही पइदा भएन ह, हम कछू नहीं जानित। परछाई क तरह हमार उमर भुईया पइ बहोत छोट क अहइ।

10होइ सकत ह कि बुढ़वा लोग तोहका कूछ सिखाइ सकई। होइ सकत ह जउन उ पचे सीखेन ह उ पचे मोका सिखाइ सकई।”

11बिलदद कहेस, “का भोजपत्र क बूच्छ दलदल भुईया क इलावा कहुँ बढ़ सकत ह? का नरकट बे पानी क बाढ़ि सकत ह?

12नाहीं, अगर पानी झुराइ जात ह तउ उ पचे भी मुरझाइ जइहीं। ओनका काटा जाइ जोगग काटिके काम में लिआवइ क उ पचे बहोत छोट रहि जइहीं।

13उ मनई जउन परमेस्सर क बिसारि जात ह, नरकट क तरह होत ह। उ मनई जउन परमेस्सर क बिसारि जात ह ओकरे बरे कउनो आसा नाही अहइ।

14उ मनई क बिस्सास बहोत दुर्बल होत ह। उ मनई मकड़ी क जाला क सहारे रहत ह।

15अगर कउनो मनई मकड़ी क जाले क सहारा लेत ह, इ टूटि जाइ। अगर उ मकड़ी क जाल क पकरत ह, इ नस्त होइ जाइ।

16उ मनई उ पौधे क नाई अहइ जेकरे लगे पानी अउ सूरज क रोसनी बहोतइ अहइ। ओकर डारियन बगिया में हर कइँती सँचरत हीं।

17उ पाथर क टीला क चारिहुँ कइँती आपन जड़न क फइलावत ह अउ चट्टान में जमइ बरे कउनो ठउर हेरत ह।

18जब पौधा आपन जगह स उखाड़ दीन्ह जात ह, तउ कउनो भि नाही जान पात ह कि हुआँ कबहुँ कउनो पौधा रहा।

19मुला उ पौधा हुआँ खुस रहा, अब दूसर पउधन हुआँ जमिहीं, जहाँ कबहुँ उ पउधा रहा।

20मुला परमेस्सर कबहुँ भी निर्दोख मनई क नाही तजी अउर उ बुरे मनई क सहारा नाही देइ।

21अबहुँ भी परमेस्सर तोहरे मुँह क हँसी स भरि देइ। तोहरे ओंठन क खुसी स चहकाइ देइ।

22परमेस्सर तोहरे दुट्ट दुस्मनन क लज्जा स झुकाइ देइ। अउर ओनकर घसन क नास कइ देइ।”

### अय्यूब बिलदद क जवाब देत ह

9 फुन अय्यूब जवाब दिहस।

2“हाँ, मई जानत हउँ कि तू फुरइ कहत ह मुला मनई परमेस्सर क समन्वा निर्दोख कइसे होइ सकत ह?

3मनई परमेस्सर स बहस नाही कइ सकत। परमेस्सर मनई स हजारन सवाल कइ सकत ह अउर कउनो ओनमें स एक तु क भी जवाब नाही दइ सकत ह।

4परमेस्सर बुद्धिमान अउर सक्तीसाली बाटइ। अइसा कउनो मनई नाही जउन परमेस्सर क कामयाबी क खिलाफ करी।

5जब परमेस्सर कोहाइ जात ह, उ पहाड़न क हटाइ देत ह, अउर उ सबइ समुझ तलक नाही पउतेन।

6परमेस्सर भुईया क कँपावइ बरे भुईडोल पठवत ह। परमेस्सर भुईया क खम्भन क हिलाइ देत ह।

7परमेस्सर सूरज क आग्या दइ सकत ह अउर ओका उगइ स रोक सकत ह। उ तारन क बंद कइ सकत ह ताकि उ सबइ न चमकई।

8सिरिफ परमेस्सर अकासन क रचेस ह। उ सागरे क लहरन पर बिचरि सकत ह।

9परमेस्सर सप्तसिं, मृगासिरा अउर कचपचिया तारन क बनाएस ह। उ ओन ग्रहन क बनाएस जउन दक्खिन क अकास पार करत हीं।

10परमेस्सर अइसेन अद्भुत करम करत ह जेनका मनई नाही समुझ सकत। परमेस्सर क महान अचरज भरे करमन क कउनो अन्त नाही अहइ।

11परमेस्सर जब मोरे लगे स निकरत ह तउ मई ओका लख नाही पावत हउँ। परमेस्सर जब मोरी बगल स निकरि जात ह तउ भी मई जान नाही पावत हउँ।

12अगर परमेस्सर छोड़ लागत ह तउ कउनो भी ओका रोक नाही सकत। कउनो भी ओहसे कह नाही सकत कि ‘तू का करत अहा?’

13परमेस्सर आपन किरोध क रोकी नाही। हिआँ तलक कि राहाब\* क सहायक भी परमेस्सर क सक्ती क आगे झुकत हीं।

14एह बरे परमेस्सर स मई बहस नाही कइ सकत। मई नाही जानत कि ओहसे का कहा जाइ।

15यद्यपि मई तउ निर्दोख अहउँ, मोरे लगे कउनो विकल्प नाही अहइ किन्तु ओहसे जउनो कि मोका निआव करत ह दाया क आग्रह कइ सकत हउँ। मई सिरिफ ओसे जउन मोर निआउ करत ह, दाया क भीख माँग सकत हउँ।

16अगर मई ओका गोहरावउँ अउर उ जवाब देइ, तबहुँ मोका बिस्सास नाही होइ कि उ सच ही ओह पइ धियान देत ह जउन मई कहत हउँ।

17परमेस्सर मोका कुचरइ बरे तूफान पठइ अउर उ मोका अकारण ही अउर जियादा घाव देइ।

18परमेस्सर मोका फुन साँस नाही लेइ देइ। उ मोका अउर जियादा दुख देइ।

19कउनो मनई परमेस्सर क सक्ती क मुकाबला में हराइ नाही सकत ह। कउनो मनई परमेस्सर क अदालत में लइ बरे मजबूर नाही कइ सकत ह।

20चाहे मई निर्दोख अहउँ, जउन कछू भी मई कहत हउँ उ मोका दोखी ठहराउब। चाहे मई कउनो बुरा काम नाही किहा, उ मोका भ्रस्ट क जइसा बनाउब्बा।

**राहाब** अजगर या सागरे क दैत्य अहइ। लोग सोचत अहा कि राहाब सागरे पइ नियंतन रखत ह। अकसर राहाब परमेस्सर क दुस्मन क या कउनो बुरा काम कइ क प्रतीक रहा।



21मई पाप रहित हउँ। मुला मोका आपन ही परवाह नाही अहइ मई खुद आपन ही जिन्नगी स घिना करत हउँ।

22मई खुद स कहत हउँ, 'हर कउनो क संग एक समान ही घटित होइ। निरपराध लोग वइसेन ही मरत हीं जइसे अपराधी मरत हीं। परमेस्सर ओन सबक जिन्नगी क अन्त करत ह।'

23का परमेस्सर मज़ाक करत ह जब अचानक विपति आवत अउर कउनो निर्दोख मनई मारा जात ह?

24अगर निआधीस क आँखिन क ढाँपि दीन्ह जाइ तउ धरती पइ दुटठन क राज होइ जाब्या। अगर इ परमेस्सर नाही किहस, तउ फुन कउन किहस ह?

25कउनो तेज धावक स तेज मोर दिन परत अहई। मोर दिन उड़िके बीतत अहई अउर ओनमौ कउनो खुसी नाही अहइ।

26तेजी स मोर दिन बीतत अहई जइसे भोजपत्र क नाव बहत चली जात ह। मोर दिन अइसे हीं बीतत अहई जइसे उकाब आपन सिकारे पइ टूट पड़त होइ।

27जदि मई कह सकब, 'मइ सिकाइत नाही करब। मई आपन दर्द भूल जाब। अउर खुस होइ जाब्या।'

28किन्तु मई अबहुँ तलक पीरा स डेरात हउँ काहेकि मई जानत हउँ कि अबहुँ भी तू (परमेस्सर) मोका निर्दोख नाही बनाउब्या।

29मई परमेस्सर क संग आपन दलील क खोइ देब। तउ कोसिस करइ में मोका आपन समइ काहे बरबाद करइ चाही।

30चाहे मई आपन हाथ धोइ बरे सबन त सुद्ध पानी अउर बड़िया साबुन क प्रयोग करा।

31फुन भी परमेस्सर मोका घिनौना गड़हा में ढकेल देइ जहाँ मोर ओढ़ना तलक मोहसे घिना करिहीं।

32परमेस्सर, मोर जइसा मनई नाही अहइ। एह बरे ओका मई जवाब नाही दइ सकत। हम दुइनउँ अवालत में एक दूसरे स मिल सकित नाही।

33हुवाँ कउनो एक बिचौलिया नाही जउन हमार बीच क बातन सुन सकत। हुवाँ कउनो एक नाही जउन हम दुइनउँ क ऊपर अधिकार रखइ सकत।

34अगर परमेस्सर मोका सज़ा देइ बन्द कइ देइ, अउर उ मोका बहोत जियादा नाही डेरावइ।

35तब मई बगैर डरे परमेस्सर स उ सब कहि सकत हउँ, काहेकि मई जानत हउँ कि मई अइसा दोखी नाही हउँ जइसा मोह क दोखी ठहराइ गवा ह।

**10** मुला हाथ, अब मई वइसा नाही कइ सकत। मोका खुद आपन जिन्नगी स घिना अहइ एह बरे मई अजाद भाव स आपन दुखड़ा रोउब। मोरे मने में कडुआहट भरी अहइ एह बरे अब मई बोलब।

2मई परमेस्सर स कहब 'मोह पइ दोख जिन लगावा। मोरे खिलाफ तोहरे लगे लगावइ बरे का अहइ?

3हे परमेस्सर, का तू मोका चोट पहाँचाइके खुस होत ह? अइसा लगत ह जइसे तोहका आपन सृस्टि बरे कउनो चिंता नाही अहइ। अउर सायद, तू दुस्टन क कुचालन क पच्छ लेत अहा।

4हे परमेस्सर, का तोहार आँखिन मनई क समान अहई? का तू चिजियन क अइसे ही लखत ह, जइसे मनइयन लखा करत हीं।

5का तोहार आयु हम जइसे मनइयन क तरह अल्प अहइ? का तोहार जिन्नगी हम मनइयन क जइसे अल्प अहइ?

6तू मोर गलतियन खोजत ह अउर मोरे पापन क हेरत ह।

7तू जानत ह कि मई निरपराध हउँ मुला मोका कउनो भी तोहार सक्ती स बचाइ नाही सकत।

8परमेस्सर, तू मोका रच्या अउर तोहार हाथन मोरे तन क सँवारेन, मुला अब तू ही मोरे खिलाफ होइ गया अउर मोका नस्ट करत अहा।

9हे परमेस्सर, याद करा कि तू मोका चिकनी माटी स मद्ध्या, मुला अब तू ही मोका फुन स धूलि में बदलब्या।

10तू मोका दुधे क नाई उडेरत ह, तब तू मोका दही बनावत ह अउर निचोड़त ह अउर फुन तू मोका दूधे स पनीर बनावत ह।

11तू मोका हाइन अउ मॉस पेसियन स बनाएस ह। तू मोका चमड़ी अउ मॉस स ढँकिस ह।

12तू मोका जिन्नगी क दान दिहा अउर मोरे बरे दयालु रह्या। तू मोरे धियान राख्या अउर तू मोरे प्राणन क रखवारी किहा।

13मुला इ उ अहइ जेका तू आपन मने में छुपाए राख्या। मई जानत हउँ कि इ उ अहइ जेकर तू आपन मने में गुप्त रूप स योजना बनाया ह।

14अगर मई पाप किहेउँ तउ तू मोका लखत रह्या। यह बरे तू मोका निर्दोख घोसित नाही कर सकत्या ह काहेकि मई बुरा काम किहेउँ ह।

15अगर मई दुस्ट जइसा बेउहार किहेउँ ह तउ तू मोका इ सब झेलइ चाही। अगर मई निरपराध भी हउँ तउ भी आपन मूँड़ नाही उठाइ पउतेउ काहेकि मई लज्जा अउ पीरा स भरा भवा हउँ।

16इ अइसा ही लागत ह कि तोहका सिंह क तरह मोर सिकार करइ पसन्द ह। तू आपन सक्ती मोर खिलाफ बार-बार देखावत ह।

17तू मोरे खिलाफ सदा ही कउनो न कउनो क नवा गवाह बनावत ह। तोहार किरोध मोरे खिलाफ अउर जियादा भड़क उठी अउर मोरे खिलाफ तू नई नई दुस्मन क सेना लिअउब्या।

18हे परमेस्सर, तू मोका काहे जन्म दिहा? एहसे पहिले कि मोका कउनो लख सकत कास! मई मरि जातेउँ!

19कास! मई जिअत न रहतेउँ। कास! मोका माता क गर्भ स सोझइ ही कब्र में उतार दीन्ह जातेउँ!

20मोर जिन्नगी करीब करीब खतम होइ चुकी अहइ। कृपा कइके मोका अकेल्ले रही द्या। ताकि मई इ अल्प समइ क अनन्द लेइ सकब।

21एहसे पहिले कि मई हुआँ चला जाउँ स कबहुँ मई वापस नाही आइ सकउँ, जउन जगह पइ अधियारा अउर घोर अन्धकार बाटइ,

22जउन तनिक समइ बचा अहइ मोका जिअइ लेइ द्या। एहसे पहिले कि मई हुआँ चला जाउँ जउने जगह क कउने लखि नाही पावत, अँधियारा क जगह, छाया अउर गड़वड़ क जगह, उ जगह पइ जहाँ रोसनी भी अँधियारा स भरी होत ह।”

### सोपर क अय्यूब स कहब

**11** एह पइ नामात नाउँ क पहुँटा क सोपर अय्यूब क जवाब देत भए कहेस,

2“इ सब्दन क प्रवाह क जवाब मिलइ चाही! का कउने मनई आपन आपन क सिरिफ जियाद बोलइ के निर्दोख बनावइ सकत ह।

3का तू सोचत ह कि तोहार सेखी हम लोगन क सांत कइ सकत? का तू सोचत ह कि बिना हमार स डांट खाए मज़ाक उड़ा सकत ह।

4अय्यूब, तू परमेस्सर स कहत रहया, ‘मोर सिद्धान्त सुद्ध अहइ। तू लख सकत ह कि मई निर्दोख अहउँ।’

5सचमुच मैं मोर इ इच्छा अहइ कि परमेस्सर बोलइ अउर तोहसे बात करिहीं।

6तउ उ तोहका बुद्धि क रहस्य बताइ। बुद्धि अनेक सच्चाइ राखत ह। अय्यूब, मोर सुना। परमेस्सर सचमुच ही तोहार कछू पापन क नज़र अन्दाज़ करत ह।

7अय्यूब का तू परमेस्सर क रहस्य समुझ सकत ह? का तू सर्वसत्कीमान परमेस्सर क बुद्धि क सीमा समुझ सकत ह?

8ओकर बुद्धि अकासे स ऊँच अहई, तू का कइ सकत्या? ओकर बुद्धि मृत्युलोक स गहिर अहई, का तू एका समुझ सकत्या?

9उ सबइ सीमा धरती स बड़ा अउर सागर स बिसाल अहई।

10अगर परमेस्सर तोहका बन्दी बनावइ अउर तोहका अदालत मैं लइ जाइ, तउ कउन ओका रोक सकत्या?

11परमेस्सर सचमुच जानत ह कि कउन धोखेबाज़ अहइ। परमेस्सर जब बुरी काम क लखत ह, तउ उ ओकर नज़र अन्दाज़ नाही करब्या।

12मुला कउने मूरख मनई कबहुँ बुद्धिमान नाही होइ सकत ह। जइसे एक जंगली गदहा एक मनई क जन्म नाही देइ सकत ह।

13तउ अय्यूब, तोहका आपन सोच-बिचार पइ जरूर रोक लगावइ चाही, अउर आपन हाथन पराथना मैं फइलावइ चाही।

14कउने दुट्ठता जउन तोहरे हाथन मैं बसा अहइ, ओका तू दूर करा। अउर आपन घरे मैं कउने बुराइ क जिन रहइ द्या।

15तबहिँ सिरिफ तोहार दोख क छिमा कीन्ह जाब्या। तू मजबूती स खड़ा रहब्या अउर नाही डेराब्या।

16अय्यूब, तब तू आपन विपत्ति क बिसरि जाब्या। तू आपन दुखड़ा क बस उ पानी जइसा सुमिरन करब्या जउन तोहरे लगे स बहिके चला गवा।

17तोहार जिन्गी दुपहर क सूरज स भी जियाद उज्जर होइ। जिन्गी क अँधियर घड़ियन अइसेन चमकिहीं जइसे भिन्सारे क सूरज।

18अय्यूब, तू सुरच्छित अनुभव करब्या काहेकि हुआँ आसा होइ। परमेस्सर तोहार रखवारी करी अउर तोहका आराम देइ।

19चइन स तू सोउब्या, कउने तोहका नाही डेराई अउर बहोत स लोग तोहसे मदद मंगिहीं।

20मुला जब बुरे लोग आसरा हेरिहीं, तब ओनका नाही मिली। ओनके लगे कउने आस नाही होइ। मउत ही ओनकर सिरिफ आसा होइ।”

### सोपर क अय्यूब क जवाब

**12** फुन अय्यूब सोपर क जवाब दिहस।

2“बिना संदेह क तू सोचत अहा कि सिरिफ तू ही लोग बुद्धिमान अहा, तू सोचत अहा कि जब तू मरब्या तउ विवेक मर जाइ तोहरे संग।

3मुला तोहार जेतनी बुद्धि भी उत्तम बाटइ, मई तोहसे कछू घटिके नाही अहउँ। अइसी बातन क जइसी तू कहत ह, हर कउने जानत ह।

4अब मोरे मीत मोर मसखरी उड़ावत हीं। ‘मई प्रतिदिन पराथना किहा करत रहा अउर उ मोर पराथना क जवाब देत रहा। किन्तु अब भी मई बेगुनाह अउर निर्दोख अहउँ, मोर परोसी मोर खिल्ली उड़ावत हीं।’

5अइसे लोग जेह पइ कबहुँ विपत्ति नाही पड़ी, विपदा स घिरा लोगन क हँसी किया करत हीं। मगर विपदा हमेसा उ लोगन पइ आइ बरे तइयार रहत ही जेकर गोड़ दूढ़ नाही अहई।

6डाकुअन आपन डेरन मैं बगैर चिन्ता क रहत हीं। अइसे लोग जउन परमेस्सर क क्रोधित करत हीं, सान्ति स रहत हीं। परमेस्सर ओनका धियान रखत हीं।

7चाहे तू पसु स पूछिके लखा, उ पचे तोहका सिखाइ देइहीं, या हवा क पँछियन स पूछा उ पचे तोहका बताइ देइहीं।

8या तू धरती स पूछि ल्या उ तोहका सिखाइ देइ या सागरे क मछरियन क आपन गियान तोहका बतावइ द्या।

9हर कउने जानत ह कि यहेवा एँन सबइ चिजियन क रचेस ह।

10हर जिअत पसु अउर हर एक प्राणी जउन साँस लेत ह, परमेस्सर क आधीन अहइ।

11जइसे जीभ भोजन क सुआद चखत ह वइसे ही कानन क सब्दन क परखत ह।

12लोग कहित ह, ‘अइसा ही बूढन क लगे विवेक रहत ह। अउर लम्बी उमर समुझ बूझ देत ही?’

13किन्तु उ परमेस्सर अहइ जेकर लगे बुद्धि अउर सक्ती अहइ। उ अच्छा सलाह अउर सूझबूझ रखत ही।

14अगर परमेस्सर कउने चिज क ढहाइ क गिराइ देइ तउ, फुन लोग ओका नाही बनाइ सकतेन। अगर परमेस्सर कउने मनई क बन्दी बनावइ, तउ लोग ओका अजाद नाही कइ सकतेन।

15अगर परमेस्सर बर्खा क रोकइ तउ धरती झुराइ जाइ। अगर परमेस्सर बर्खा क छूट दइ देइ, तउ उ धरती पइ बाढ़ लइ आई।

16परमेस्सर सक्तीसाली अहइ। उ सदा विजयी होत ह। उ मनई जउन छलत ह अउर उ मनई जउन छला जात ह दुउनउँ परमेस्सर क अहई।

17परमेस्सर सलाहकारन स ओनकर बुद्धि लेइ लेत ह। उ प्रमुखन क अइसा बनाइ देत ह कि उ पचे मूर्ख मनइयन जइसा बेउहार करइ लागत हीं।

18परमेस्सर राजा लोगन क अधिकार हटाइ लेत ह अउर ओनका दास बना देत ह।\*

19परमेस्सर याजक लोगन ओनकर सक्ती स वंचित कर देत ह अउर ओनकर दर्जा क सुरच्छा क छीन लेत ह।

20परमेस्सर बिस्सासनीय सलाहकार क चुप कराइ देत ह। उ बूढ़े लोगन क बुद्धि लइ लेत ह।

21परमेस्सर महत्वपूर्ण अधिकारियन क साथ अइसा बेउहार करत ह जइसा उ कछू नाही अहइ। उ सासकन क सक्ती लेइ लेत हीं।

22परमेस्सर अँधियारा स रहस्य स भरी सच्चाई क परगट करत ह। उ घना अँधियारा स घिरा जगहियन पइ, रोसनी पठवत ह।

23परमेस्सर रास्ट्रन क विसाल अउ सक्तीसाली होइ देत ह, अउर फुन ओनका उ नस्ट कइ डवत ह। उ रास्ट्रन क विकसित कइके विसाल बनइ देत ह, फुन ओनकर लोगन क उ तितर बितर कइ देत ह।

24परमेस्सर धरती क रास्ट्रन क प्रमुखन क मूर्ख अउर नासमुझ बनाइ देत ह। उ ओनका मरुभूमि में जहाँ कउनो राह नाही भटक बरे पठवत ह।

25उ पचे प्रमुख लोग अँधियारा में आपन राह टटोरत रहत हीं। कउनो भी प्रकास ओनके लगे नाही होत ह। परमेस्सर ओनका अइसे चलावत ह, जइसे पीके धुत भए लोग चलत हीं।”

**13** “मोर अँखिन पहिले स ही उ सब चिजियन क गवाही अहा जउन तू कह्या ह। मोर कानन पहिले ही सुन अउर समुझ चुका ह जउन कछू तू कहा करत अहा। 2मई भी ओतना ही जानत हउँ जेतना तू जानत अहा, मई तोहसे कम नाही हउँ। 3किन्तु मई सर्वसक्तीमान परमेस्सर स बोलइ चाहत हउँ, अउर मई ओकर समन्वा आपन मुकद्दमा क सफाई देउँ। 4मुला तू तीनउँ लोग आपन छूठ बातन स सच्चाई क ढाँपइ चाहत अहा। तू उ बेकार क चिकित्सक नाई अहा जउन कउनो क नीक नाही कइ सकत। 5मोर इ कामना अहइ कि तू पूरी तरह चुप होइ जा। इ तोहरे बरे बुद्धिमानी क बात होइ जउन तू कइ सकत ह।

6“अब, मोर तर्क सुना। सुना जब मई आपन सफाई देउँ।

7का तू परमेस्सर बरे झूठ बोलब्या? का तू सचमुच परमेस्सर क बारे में झूठ बोलब्या?

8का तू मोरे खिलाफ परमेस्सर क पच्छ लेब्या? का तू अदालत में परमेस्सर क बचावइ जात अहा?

**परमेस्सर ... देत ह** परमेस्सर राजा लोगन क सही करमबंध हटाइ लेत ह अउर ओनका बेकार कपड़ा पहनावत ह।

9अगर परमेस्सर तोहका बहोत करीब स जाँच लिहस तउ का उ कछू भी नीक बात पाई? का तू सोचत अहा कि तू परमेस्सर क छल पउब्या, ठीक उहइ तरह जइसे तू लोगन क छलत अहा?

10अगर तू अदालत में छुपा छुपा कउनो क तरफ़दारी करब्या, तउ परमेस्सर निहचय ही तोहका लताड़ी।

11ओकर तेज तोहका डरावत ह अउर तू डर जात ह।

12तोहार कहब धूलि जइसे बेकार अहई। तोहार तर्कन माटी जइसी दुर्बल अहई।

13चुप रहा अउ मोका कहि लेइ द्या। मोरे संग कछू बात होइ जाइ द्या।

14मई खुद क संकट में डवत हउँ अउर मई खुद आपन जिन्गी आपन हाथन में लइ लेत हउँ।

15होइ सकत ह परमेस्सर मोका मारि देइ। यद्यपि मोका जीत क कछू आसा नाही अहइ, तउ भी मई आपन मुकद्दमा क तर्क ओकरे समन्वा देब।

16परमेस्सर मोर मुक्ति अहइ, काहेकि कउनो दुट्ट मनई ओकर आपने-सामने नाही आइ सकत।

17ओका धियान स सुना जेका मई कहत हउँ, ओह पइ कान द्या जेकर व्याख्या मई करइ चाहत हउँ।

18अब मई आपन बचाव करइ क तैयार हउँ। इ मोका पता अहइ कि मोका निर्दोष सिद्ध कीन्ह जाइ।

19कउनो भी मनई इ प्रमाणित नाही कइ सकत कि मई गलत हउँ। अगर कउनो मनई इ सिद्ध कइ देइ तउ मई चुप होइ जाब अउर मरि जाब।

20हे परमेस्सर, तू मोका दुइ बातन दइ द्या, फिन मई तोहसे नाही छुपब।

21मोका दण्ड देइ रोकि द्या, अउर मोसा जियादा लइइ छोड़ द्या।

22फिन तू मोका पुकारा अउर मइ तोहका जवाब देब, या मोका बोलइ द्या अउर तू मोका जवाब द्या।

23केतँना पाप मई किए हउँ? कउन सा अपराध मोहसे होइ गवा? मोका मोर पाप अउर अपराध देखँवा।

24हे परमेस्सर, तू मोहसे काहे बचत अहा? तू मोर संग दुस्मन जइसा बेउहार काहे करत अहा?

25का तू मोका डेरउब्या? मई एक पत्ता जइसा हउँ जेका पवन उड़ावत ह। एक झुरान तिनका क तू खदेड़त अहा।

26हे परमेस्सर, तू मोरे विरोध में गंभीर दोसपूर्ण बात लिखत अहा। का तू मोका अइसे पापन बरे दुःख देत ह जउन मई आपन जवानी में किहे रहेउँ?

27मोरे गोड़न में तू काठ डाइ दिह्या ह। तू मोर हर कदम पइ अँखी गड़ाए रखत ह। मोरे कदमन क तू सीमा बाँध दिहा ह।

28मई सड़ी चीज जइसा छीन होत जात हउँ कीसन स खाए भए ओढ़नन क टूका जइसा।”

**14** “उहइ दिना स जब हमार मताहरी हम पचन क जन्मेस ह, हमार जिन्गी छोट अउ दुःख स भरी अहइ। 2मनई क जिन्गी फूल क नाई अहइ जउन हाली जमत ह अउर फुन खतम होइ जात ह। मनई क जिन्गी

अहइ जइसे कउनो छाया जउन तनिक देर टोकत ह अउर बनी नाहीं रहत।

3हे परमेस्सर, का तू उ मनई पइ धियान देब्या जउन मरा भवा लागत ह? का तू मोर निआउ करइ मोका समन्वा लिअउब्या?

4“कउनो अइसी चीज स जउन खुद स्वच्छ नाहीं अहइ स्वच्छ चीज कउन पाइ सकत ह? कउनो नाहीं।

5मनई क जिन्नगी सीमित अहइ। तू ओकर जीवन काल क सीमित कइ दिहेस ह। तू मनई बरे जउन सीमा बाँध्या ह, ओका कउनो भी नाहीं बदल सकत।

6तउ परमेस्सर, तू हम पइ आँखी रखब तजि द्या। हम लोगन क अकेल्ला तजि द्या। हम पचन्क क आपन जिन्नगी क उहइ तरह समाप्त करइ द्या जे तरह मजदूरन आपन काम क समाप्त करत ह।

7मुला अगर बृच्छ क काटिके गिराइ दीन्ह जाइ तउ भी आसा ओका रहत ह कि उ फुन स पनप सकत ह, काहेकि ओहमा नई नई डारन फूटत रइहीं।

8चाहे ओकर जइन धरती में पुरान काहे न होइ जाई अउर ओकर तना चाहे माटी में गल जाइ।

9मुला पानी क सिरिफ गंध स उ नई बढ़त देत ह अउर एक पउध क तरह ओहसे डारन फूटत हीं।

10मुला एक मनई कमजोर होइ जात ह अउ मरि जात ह, अउर तब उ चला जात ह।

11समुदर स पानी गाएब होइ सकत ह अउर नदियन सूख कइ फट सकत ह,

12अउर तउ भी जउन कउनो आपन कब्र में मरा भवा अहइ कबहुँ भी नाहीं जी उठब! ओकर नींद स जगाइ स पहिले ही आकास लुप्त होइ जाइ।

13मोर इच्छा अहइ कि तू मोरी कब्र में तक तलक छुपाइ लेइ चाही जब तलक तोहार किरोध कम नाहीं होइ जाइ। अउर तोहका आदेस दीन्ह जाइतेन अउर मोका जगावा जातेन।

14अगर कउनो मनई मरि जाइ तउ का जिन्नगी कबहुँ पउब्या? मई तब तलक बाट जोहब, जब तलक मोर कर्तव्य पूरा नाहीं होइ जात अउर जब तलक मई अजाद न होइ जाऊँ।

15हे परमेस्सर, तू मोका बोलउब्या अउर मई तोहका जवाब देब। उ तू ही अहइ जउन मोका बनाया ह यह बरे तोहका मोह पइ धियान देइ चाही।

16तब मोरी इच्छा अहइ कि तू मोर हर कदम क जाँच करा, मुला तोहका मोहमों कउनो गलती खोजइ क कोसिस नाहीं करइ चाही।

17तउ इ अइसा होइतेन कि मोर पापन क एक थडला मैं बन्दा कीन्ह जातेन। अउर तू मोरे पापन क हटाइ देतेन।

18एक नस्ट भवा पहाइ क जइसा जेकर टूका ले लइ जात ह अउर एक चट्टान जउन आपन जगह स हटाइ लेइ जात ह।

19जइसे पानी पाथर क घँसि डवत ह अउ माटी क पानी बहाइके तल मैं लइ जात ह। हे परमेस्सर, उहइ तरह मनई क आसा क तू नस्ट करत अहा।

20तू एक दौई मनई क हरावत अहा अउर उ खतम होइ जात ह। तू ओकरे मुँह बिगाड़त ह अउर ओका पठइ देत ह।

21अगर ओकर पूत कबहुँ सम्मान पावत हीं तउ ओका कबहुँ ओकर पता नाहीं चल पावत। अगर ओकर पूत कबहुँ अपमान भोगत हीं, तउ उ कबहुँ ओका लखि नाहीं पावत ह।

22तउ मनई क देह क कारण ही ओका पीड़ा होत ह अउर ओकर आत्मा ओकरे बरे सोक मनावत ह।”

### एलीपज अथर्व क जवाब देत ह

15 एह पइ तेमान नगर क बसइया एलीपज अथर्व क जवाब दिहेस।

2“का तू सोचत अहा कि कउनो बुद्धिमान मनई बे अरथ सब्द स जवाब देत ह अउ आपन आप क गर्म हवा स भरि देत ह?

3का तू सोचत ह कि कउनो बुद्धिमान मनई व्यर्थ क सब्दन स अउर ओन भासणन स बहस करी जेनकर कउनो लाभ नाहीं अहइ?

4अथर्व, तोहार जवाब लोगन क परमेस्सर क आदर अउर ओकर उपासना करइ स रोकइ क कारण होइ।

5तू जउने बातन क कहत ह उ तोहार पाप साफ साफ देखावत ह। अथर्व, तू चतुराई स भरे भए सब्दन क प्रयोग कइके आपन पापन क छुपावइ क प्रयत्न करत अहा।

6मोका जरुरी नाहीं कि तोहका गलत सिद्ध करँउ। काहे? तू खुद आपन मुँह स जउन बातन कहत ह, उ देखँवत हीं कि तू बुरा अहा अउर तोहार ओठं खुद तोहरे खिलाफ बोलत हीं।

7अथर्व, का तू सोचत ह कि जन्म लेइवाला पहिला मनई तू ही अहा अउर पहाइन क रचना स ही पहिले तोहार जन्म भवा रहा।

8का तू परमेस्सर क रहस्य स भरी सबइ योजना क सुने रह्या? का तू सोचत ह कि तू बुद्धिमान अहा?

9अथर्व, तू हम पचन स जियादा कछू नाहीं जानत अहा। उ सबइ बातन हम पचन समझत अही, जेनकर तोहका समुझ अहइ।

10उ सबइ लोग जेनकर बार सफेद अहई अउर बुढ़वा मनई अहई उ पचे हम स सहमत रहत हीं। हाँ, तोहरे बाप स भी बुढ़वा लोग हमरे समर्थन मैं अहई।

11परमेस्सर तोहका सुख देइ क जतन करत ह। अउर तोहसा नमी स बात करत ह। का इ तोहरे बरे काफी नाहीं अहइ? मुला तू सोचत अहा कि इ तोहार बरे काफी नाहीं अहइ।

12अथर्व, तू काहे नाहीं समुझब्या? तू सच्चाइ क काहे नाहीं लखइ सकब्या?

13जब कभी तू इ तरह बोलत ह तू परमेस्सर क खिलाफ होत ह।

14फुरइ कउनो मनई सुद्ध नाहीं होइ सकत। मरनसील मनई नीक नाहीं होइ सकत ह।

15हिआँ तलक कि परमेस्सर आपन दूतन तलक पइ भी निभर नाही रहत ही। हिआँ तलक कि सरग भी परमेस्सर क अपेच्छा सुद्ध नाही अहइ।

16मानव जाति बहोत जियादा पापी अउर भ्रस्ट अहई। उ बुराई क पानी क तरह गटक जात ह।

17अय्यूब, मोरी बात तू सुना अउर मई ओकर व्याख्या तोहसे करब। मई तोहका बताउब, जउन मई जानत हई।

18मई तोहका उ सहइ बतउब्या जउन बुद्धिमान मनई बतउब्या। उ पचे एन बातन क आपन पुरखन स सुनेस ह अउर ओनका छिपाइ बिना बताएस।

19सिरिफ ओनकर पुरखन क ही भुईया दीन्ह गवा रहा। ओनकर देस में कउनो परदेसी नाही रहा।

20दुट्ट मनई जिन्गी भइ पीरा झेली। एक क्रूर मनई ओन सबहि बरिसन में जउन ओकरे बरे निहचित कीन्ह ग अहई, दुःख भोगत रही।

21ओकरे कानन में भयंकर ध्वनियन होत रहहीं। जब उ सोची उ सुरच्छित अहइ तबहि ओकर दुस्मन ओह पइ हमला करहीं।

22दुट्ट मनई कउनो आसा नाही अहइ कि उ अँधियारा बचिके निकरि पावइ। कहुँ एक अइसी तरवार अहइ जउन ओका मार डवइ क इन्तज़ार करत अहइ।

23उ एँह कइँती ओह कइँती भटकत भवा फिरत ह मुला ओकर देह गीधन क चारा बनि जाइ। ओका इ पता अहइ कि ओकर मउत बहोत निचके अहइ।

24चिन्ता अउ यातना ओका डरपोक बनावत हीं। इ सबइ बातन ओह पइ अइसे वार करत हीं जइसे कउनो राजा जुद्ध करइ बरे तइयार होत ही।

25काहेकि दुट्ट मनई परमेस्सर क हुकुम मानइ स इन्कार करत ह अउर सर्वसक्तीमान क नज़र-अन्दाज़ करत ह।

26उ दुट्ट मनई बहोत हठी अहइ। उ परमेस्सर क खिलाफ लड़इ चाहत ह, सोचत अहा कि उ मजबूत ढाल स ओका हराइ सकत ह।

27दुट्ट मनई क मुँहे पइ चर्बी चढ़ी रहत ह। ओकर कमर माँस भर जाइ स मोटवार होइ जात ह।

28मुला उ उजाड़ सहरन में रही। उ अइसे घरन में रही जहाँ कउनो नाही रहत ह। ओकर घरन हाली ही रौदा जइहीं।

29दुट्ट मनई जियादा समइ तलक धनी नाही रही। ओनकर भाग्य क धरती पइ स्थिर रूप में ठहरावा नाही जाब्या।

30दुट्ट मनई अँधियारा स न बच पाई। उ उ बृच्छ क नाई होइ जेकर सबइ डारन आगी स झउँस गइ अहई। परमेस्सर क साँस दुट्टन क उड़ाइ देइ।

31दुट्ट लोग बेकार क चिजियन क भरोसे रहिके आपन क मूरख न बनावई काहेकि ओका कछू प्राप्त न होइ पाई।

32दुट्ट मनई समइ स पहिले ही मरि जाब। उ पचे उ बृच्छ क नाई होइ जाइ जेकर चोटी क डारन मरि गवा ह।

33दुट्ट मनई उ अंगूरे क बेल क नाई होत ह जेकर फल पाकइ स पहिले ही झरि जात हीं। अइसा मनई जइतून क बृच्छ क नाई होत ह, जेकर फूल सारि जात हीं।

34काहेकि परमेस्सर क बगइर लोग खाली हाथ रइहिं। अइसे लोग जेनका पइसन स पियार अहइ, घूस लेत हीं। ओनकर घर आगी स नस्ट होइ जइहीं।

35उ पचे मूसीबत क कुचक्र रचत हीं अउर बुरे करम करत हीं। उ पचे लोगन क छलइ क तरकीब क योजना बनावत हीं।”

### अय्यूब एलीपज क जवाब देत ह

16 एह पइ अय्यूब जवाब देत भए कहेसः  
2“मई पहिले ही इ सबइ बातन क बहोत बार सुनेउँ ह। तू “आरामदेइवाला लोग” सचमुच सिरिफ मोका तंग करत ह!

3तोहार बेकार क लम्बी बातन कबहुँ खतम नाही होतिन। तू काहे तर्क करत ही रहत ह?

4जइसे तू कहत अहा वइसे बातन तउ मई भी कहइ सकत्या। अगर तू पचन्क मोर दुःख झेलइ क पड़त, मई भी तोहार खिलाफ तर्क देइ सकत हउँ अउर तोहार अपमान कइ सकत्या।

5मुला मई आपन बचनन स तोहार हिम्मत बढ़ाइ सकत्या अउर तोहरे बरे आसा बँधाइ सकत्या।

6मुला जउन कछू मई कहत हउँ ओहसे मोर दुःख दूर नाही होइ सकत। मुला अगर मई कछू भी न कहउँ तउ भी मोका चइन नाही पड़त।

7पुरइ हे परमेस्सर तू मोर सक्ती क हर लिहा ह। तू मोर सारा घराने क बर्बाद कइ दिहा ह।

8तू मोर सरिर क झूरीदार बनाइ दिहेस ह, अउर इ मोर खिलाफ गवाही दिहेस ह। मई खउफनाक देखौत हउँ अउर लोग अइसा सोचत हीं कि मई बुराइ करइ क कारण अपराधी हउँ।

9परमेस्सर मोह पइ प्रहार करत ह। उ मोह पइ कोहान अहइ। उ मोरी देह क फारिके अलगाइ दिहेस ह। परमेस्सर मोरे ऊपर दौत पीसत ह। मोर दुस्मन घिना स भरी निगाह स घूरत हीं।

10लोग मोर हँसी करत हीं। उ पचे सबहिं मोर खिलाफ इकट्ठा होत ह अउर मोरे मुँह क थपड़ावत ह।

11परमेस्सर मोका दुट्ट लोगन क हाथे में अर्पण कइ दिहे अहइ। उ दुट्ट मनई मोहे पइ सक्ती दिहेस ह।

12मोरे संग सब कछू भला चंगा रहा। तबहिं परमेस्सर मोका कुचर दिहेस। हाँ, उ मोका गटई स धइ लिहेस अउर मोर चिथरा चिथरा कइ डाएस। परमेस्सर मोका निसाना बनाइ लिहेस।

13परमेस्सर क तीरंदाज मोरे चारिहुँ कइँती अहई। उ मोरे गुर्दन क बाणन स बेधत ह। उ मोहे पइ दया नाही देखावत ह। उ मोरे पित्त क धरती पइ बहाइ देत ह।

14परमेस्सर मोह पइ बार बार वार करत ह। उ मोह पइ अइसे झपटत ह जइसे कउनो फउजी जुद्ध में नाही झपटत ह।

15मई बहोत ही दुःखी हउँ। एह बरे मई विलाप क ओढ़ना पहिरत हउँ। मई हिआँ धूलि में बइठा भवा हउँ अउर हरा भवा अनुभव करत हउँ।

16मोर मुँह रोवत बिलखत भए लाल भवा। मोरी आँखिन क खाले करिया घेरा अहई।

17मई कउनो क संग कबहुँ भी क्रूर नाहीं भएउँ। मुला इ सबइ बुरी बातन मोरे संग घटित भइन। मोर पराथनन सही अहई।

18हे भुइयाँ, तू कबहुँ ओन अत्याचारन क जिन छिपाया जउन मोरे संग कीन्ह गवा अहई। मोर निआउ क बिनती क तू कबहुँ रुकइ जिन द्या।

19अब तलक भी होइ सकत ह कि हुआँ आकास मँ कउनो तउ मोरे पच्छ मँ होइ। कउनो ऊपर अहइ जउन मोका देख स रहित सिद्ध करी।

20मोर मीत मोर बारे मँ बोलत अहई, जब मई आसा स रोवत रही कि परमेस्सर मोर मदद करब।

21मोर इच्छा अहइ कि कउनो एक मोर अउर परमेस्सर क बिचउली करी जइसे कउनो एक मनई अउर परोसी क बीच बिचउली करत ही।

22कछू ही बरिस बाद मई हुआँ चला जाब जहाँ स फुन मई कबहुँ वापस न आउब।

**17** मोर जिउने कि इच्छा नस्त कीन्ह ग अहइ। मोर प्राण लगभग जाइ चुका अहइ। कब्र मोर बाट जोहत अहइ।

2लोग मोका घेर लेत हीँ अउर मोह पइ हँसत हीँ। मई ओनका लखत हउँ जब लोग मोर अपमान करत हीँ।

3परमेस्सर, मोर बेकसूर होइ क पुस्टि करा। मोर निर्दोष होइ क गवाही देइ बरे कउनो तइयार नाहीं होइ।

4मोरे मीतन क मन तू मूँद ल्या ह। एह बरे उ पचे जीत नाहीं सकब।

5लोग जउन कहत ह उ तू जानत ह, 'मनई आपन मीत क मदद करइ बरे आपन गदेलन क नज़र अन्दाज़ करत ह।'

6परमेस्सर मोर नाउँ हर कउनो बरे अपसब्द बनाएस ह अउर लोग मोरे मुँह पइ थूका करत हीँ।

7मोर आँखी लगभग आँधर होइ चुकी अहइ काहेकि मई बहोत दुःखी हउँ। मोर देह एक छाया क तरह दुर्बाल होइ चुकी अहइ।

8नीक लोगन ब्याकुल अहई कि इ घटि सकत ह। निरअपराध लोग ओन क खिलाफ उत्तेजित अहइ। जउन परमेस्सर क मज़ाक उड़ावत ह।

9मुला सज्जन नेकी क जिन्नगी जिअत रइहीं। निरापराधी लोग सक्तिसाली होइ जइहीं।

10जदि तू लउटि आउब्या, तउ आवा। किन्तु मई दिखाउब कि तू पचन मँ स कउनो बुद्धिमान नाहीं अहई।

11मोर जिन्नगी यो ही बीतन अहइ। मोर सबइ जोजना टूट गइ अहई अउर आसा चली गइ अहइ।

12हरेक चीज क उलझा दीन्ह ग ह, उ पचे रात क दिन कहत ह अउर प्रकास अँधियारा लिआवत ह।

13मई आसा करउँ कि कब्र मोर घर अउ अँधियारा मोर बिछउना होइ।

14अगर मई कब्र स कहउँ 'तू मोर बाप अहा,' अउर कीरा स 'तू मोर महतारी अहा,' या 'तू मोर बहिन' अहा।

15अगर उ मोर सिरिफ एक ठु आसा अहइ तबइ तु कउनो आसा मोका नाहीं अहइ अउर कउनो भी मनई मोरे बरे कउनो आसा नाहीं लखि सकत ह।

16का मोर आसा भी मोरे संग मरि जाइ? का मई अउर मोर आसा एक संग कब्र मँ मिलिहीं?"

### अय्यूब क बिल्दद क जवाब

**18** फिन सूहू प्रदेस क बिल्दद जवाब देत भए कहेस।  
2"अय्यूब, इ तरह क बातन करब तू कब तज देब्या? तोहका चुप रहइ चाही अउर सुनइ चाही, सिरिफ तब ही हम कहि सकित ह।

3तू काहे इ सोचत ह कि हम ओतँना मूरख अही जेतना मूरख एक ठु बर्धा होत ह?

4अय्यूब, तू आपन किरोध स आपन ही नोस्कान करत अहा। का लोग भुइँया बस तोहरे बरे तजि देई? का तू इ सोचत अहा कि बस तोहका तृप्त करइ क परमेस्सर धरती क हलाइ देई।

5हाँ, बुरा मनई क प्रकास बुझी अउर ओकर आगी क लौ न चमकी।

6ओकरे घरे क प्रकास करिया पड़ि जाइ अउर जउन दिया ओकरे लगे अहइ उ बुझ जाइ।

7सक्तीसाली मनई क कदम धीमे स बढ़त ह। आपन ही बुरा जोजनन स उ पतन क झेलब्या।

8ओकर आपन ही कदम ओका एक जाल क फंदा मँ गिराइ देइहीं। उ चलिके जालि मँ जाई अउर फँस जाई।

9कउनो जाल ओकर एड़ी क पकड़िके धइ लेइ। एक ठु जाल ओका कसिके जकर लेइ।

10एक रस्सा ओकरे बरे धरती मँ छुपा रही। कछू फंदा ओकरे राहे मँ झूठ बोलब्या।

11ओकरे चारिहुँ कइँती सबहिँ आतंक होइ। ओकर हर कदम क डर पाछा करत रही।

12खउफनाक मुसीबतन ओकरे बरे भुखान होई। जब उ गिरी, विध्वंस ओकरे बरे तइयार रइहीं।

13महा बियाधि ओकरे चमड़ी क हींसन क लील जाई। उ ओकरी बाँहिन अउ ओकर हँगिन क सड़ाइ देइ।

14आपन घरे क सुरच्छा स दुट्ठ व्यक्ति क दूर कीन्ह जाइ। आतंक क राजा क लगे ओका लइ जावा जाइ।

15ओकरे घरे मँ तब तलक कछू भी न बची जब तलक ओकरे समूचइ घरे मँ धधकत भइ गन्धक बिखेरी जाइ।

16ओकर खाले गइ भइ जइन झुराइ जइहीं अउर ओकरे ऊपर क डानस मुरझाइ जइहीं।

17धरती क लोग ओका याद नाहीं करिहीं। बस अब कउनो भी ओका याद नाहीं करी।

18प्रकास स ओका हटाइ दीन्ह जाइ अउर उ अँधियारा मँ ढकेला जाइ। उ पचे ओका दुनिया स दूर भगाइ देइहीं।

19ओकर कउनो गदेलन अउ सन्तानन नाहीं होइहीं। ओकरे घरे मँ कउनो जिअत नाहीं बची।

20पच्छिम क लोग सहमा रहि जइहीं जब उ पचे जानिहीं कि उ दुट्ठ मनइयन क संग का घटेस ह। पूरब मँ लोग आतंकित होइके सन्न रहि जइहीं।

21फुरइ दुर्जन व्यक्ति क घरे क संग अइसा ही घटी। अइसा ही घटी उ मनई क संग जउन परमेस्सर क नाहीं जानतेन।”

### अय्यूब क जवाब

19 तब अय्यूब जवाब देत भए कहेस।  
2“कब तलक तू पचे मोका सतावत रहब्या अउर सबदन स मोका ताइत रहब्या?

3अब लखा, तू पचे दसउ दाई मोका बेज्जत किहा ह। मोह पइ वार करत तू पचन्क सर्प नाहीं आवति ह।

4अउर जदि मइ कउनो बुराई किहेउँ तउ इ मोर गल्टी अहइ।

5तू पचे इहइ चाहत अहा कि तू पचे मोहसे उल्लिम देखौंउन। तू पचे कहत अहा कि मोर कस्ट मोका दोखी साबित करत हीं।

6मुला उ तउ परमेस्सर अहइ जउन मोरे संग बुरा किहस ह अउर जउन मोरे चारिहुँ कइँती आपन फंदा फइलाएस ह।

7मई गोहरावत हउँ ‘मोरे संग बुरा किहा ह।’ मुला मोका कउनो जवाब नाहीं मिलत ह। चाहे मई निआउ क गुहार गोहरावउँ मोर कउनो नाहीं सुनत ह।

8मोर रस्ता परमेस्सर रोकेस ह, एह बरे ओका मई पर नाहीं कइ सकत। उ अँधियारा मँ मोर रस्ता छुपाइ दिहस ह।

9मोर सम्मान परमेस्सर छोर लिहस ह। उ मोरे मूँड स मुकुट छोर लिहस ह।

10परमेस्सर मोर पूरा सरीर मँ मोर प्राण निकरि तलक मारब। उ मोर आसन क अइसे उखाड़ देत ह जइसे कउनो जइ स बृच्छ क उखाड़ि देइ।

11मोरे खिलाफ परमेस्सर क किरोध भइकत अहइ। उ मोका आपन दुस्मन कहत ह।

12परमेस्सर आपन फउज मोह पइ प्रहार करइ क पठवत ह। उ पचे मोरे चारिहुँ कइँती बुर्जियन खरा करत हीं। उ पचे मोरे तम्बू क चारिहुँ कइँती छावनी बनावत हीं।

13परमेस्सर मोरे बन्धुअन क मोर दुस्मन बनाइ दिहेस। आपन मीतन बरे मई पराया होइ गएँ।

14मोर रिस्तेदारन मोका तजि दिहन। मोर मीतन मोका बिसराइ दिहन।

15मोरे घरे क अतिथियन स लइके मेहरारू नउकरन तलक मोरे संग अइसा बेउहार करत ह जइसा मई कउनो अजनबी अहउँ।

16मई आपन नउकर क बोलावत हउँ पर उ मोर नाहीं सुनत ह। उ पचे मोका मदद बरे भीख माँगाएस ह।

17मोर पत्नी मोरे साँस क गंध स घिना करत ह। मोर आपन ही गदेलन मोहसे घिना करत हीं।

18नन्ह गदेलन तलक मोर हँसी उड़ावत हीं। जब कबहुँ मई जागत हउँ, तउ उ पचे मोरे खिलाफ बोलत हीं।

19मोर आपन मीत मोहसे घिना करत हीं। हिआँ तलक कि अइसे लोग जउन प्रिय अहइँ, मोर बिरोधी होइ गवा अहइँ।

20मई ऐतना दुर्बल अहउँ जइसे मई सिरिफ खाल अउर हाइन होइ गवा अहउँ। अब मई सिरिफ जिअत हउँ।

21हे मोर मीतो मोह पइ दया करा, दया करा मोह पइ काहेकि परमेस्सर क हाथ मोहका छू गवा अहइ।

22काहे मोका तू भी सतावत अहा जइसे मोका परमेस्सर सताएस ह? काहे तू मोका दुख देत भए कबहुँ अघात्या नाहीं?

23जउन मई कहत हउँ ओका कउनो क याद राखइ चाही अउ किताबे मँ लिख देइ चाही! मोर सब्द कउनो क गोल पत्रक पइ लिख देइ चाही!

24मई जउने बातन क कहत ओनका कउनो लोहा क कलम स सीसा पइ लिखा जाइ चाही या ओनका चट्टाने पइ खोद दीन्ह जाइ चाही ताकि उ हमेसा बरे रहइ जाइ।

25मोका इ जानत हउँ कि कउनो एक अइसा अहइ जउन मोर बरे बोलब्या अउर मोर रच्छा करब्या। मोका बिस्सास अहइ कि आखीर मँ उ धरती पइ खड़ा होब्या अउर मोरे बचाव करब्या।

26मोरे आपन देह छोड़इ अउर मोर चमड़ी तबाह होइक पाछे भी मई जानत हउँ कि मई परमेस्सर क लखब।

27मई परमेस्सर क खुद आपन आँखिन स लखब। मई खुद स कउनो दूसर नाहीं, परमेस्सर क लखब। मई बता नाहीं केतँना खुसी अनुभव करत हउँ।

28होइ सकत ह तू कहा, ‘हम अय्यूब क तंग करब। मई मामला क जइ तलक जाब।’

29मुला तोहका तरवारे स डरइ चाही, काहेकि परमेस्सर किरोधित होब्या अउर तोहका तरवार स सजा देब्या। अउर तब तू पचन्क समझब्या कि हुआँ निआउ क एक निहचित समइ अहइ।”

### सोपर क जवाब

20 एह पइ नामात प्रदेस क सोपर जवाब दिहस।  
2“अय्यूब, धियान द्या। मई परेसानी मँ हउँ। यह बरे मई हाली तोहका बताएउँ क कि मई का सोचत हउँ।

अतोहार आलोचना हमार अपमान करत हीं। मुला मई बुद्धिमान हउँ अउर जानत हउँ कि तोहका कइसे जवाब दीन्ह जाइ चाही।

4-5एका तू तब स जानत ह जब बहोत पहिले लोगन क धरती पइ पठवा ग रहा, दुट्ट मनई क आनन्द बहोत दिन नाहीं टिकत ह। अइसा मनई जेका परमेस्सर क चिन्ता नाहीं अहइ उ तनिक समइ बरे आनन्द मँ भरि जात ह।

6चाहे दुट्ट मनई क अपमान अकासे तलक छू जाइ।  
7उ आपन तने क मल क नाई नस्ट होइ जाइ। उ सबइ लोग जउन ओका जानत हीं कइहीं, ‘उ कहाँ अहइ?’

8उ अइसे बिलाइ जाइ जइसे सपन हाली ही कहुँ उड़ जात ह। फिन कबहुँ कउनो ओका लिखि नाहीं सकी, उ नस्ट होइ जाइ, ओका राति क सपना क तरह हँक दीन्ह जाइ।

9उ सबइ मनई जउन ओका लखे रहेन फुन कबहुँ नाहीं लखेन। ओकर परिवार फुन कबहुँ ओका नाहीं लिखि पाइ।

10जउन कछू भी उ (दुट्ट) गरीबन स लिहे रहा ओकार संतानन चुकइहीं। ओनका आपन ही हाथन स धन लौटाए होइ।

11जब उ जवान रहा, ओकर सरीर मजबूत रही, मुला उ हाली ही धूलि होइ जाइ।

12दुस्ट क मुँह क दुस्तता बड़ी मीठी लागत ह, उ ओका आपन जिभिया क खाले छुपाइ लेइ।

13बुरा मनई उ बुराई क धामे रही, ओकर दूर होइ जाब ओका कबहुँ नाहीं भाई, तउ उ ओका आपन मुँहे में थामे रही।

14मुला ओकरे पेटे में ओकर भोजन जहर बन जाइ, उ ओकरे भीतर अइसे बन जाइ जइसे कउनो नाग क विख सा कडुवा जहर।

15दुस्ट धन दौलत क लील जात ह मुला उ ओन सबका बाहेर उगिली। परमेस्सर दुस्ट क पेटे स ओन सबका उगालिवाइ।

16दुस्ट मनई क विख चूसब सॉपि क नाई होइ। मुला सॉपि क विसैला जीभ ओका मारि डइहीं।

17मुला दुस्ट मनई लखइ क आनन्द नाहीं लेइहीं अइसी ओन नदियन क जउन सहद अउर मलाई बरे बहा करत ह।

18दुट्ट क ओकर लाभ वापिस करइ क दबावा जाइ। ओका ओन चिजियन क आनन्द नाहीं लेइ दीन्ह जाइ जेनके बरे उ मेहनत किहे अहइ।

19काहेकि उ दुस्ट मनई दीन मनई क चिन्ता नाहीं किहस। बलकि, उ दूसर लोगन क घसन क भी लइ लिहसे जेका उ पचे आपन बरे बनाएस रहा।

20दुस्ट मनई कबहुँ संतुट्ट नाहीं होत ह। उ आपन सबहि धन क लइ ले जात ह।

21जब उ खात ह तउ कछू नाहीं तजत ह, तउ ओकर कामयाबी बनी नाहीं रही।

22जब दुस्ट जन क लगे भरपूर होइ तबहि ओन पइ विपत्ती आइहीं अउर उ कस्ट क अनुभव करिहीं।

23दुस्ट जन उ सब कछू खाइ चुकी जेका उ खाइ चाहत ह। परमेस्सर आपन बरत भवा किरोध ओह पइ डाइ। उ दुस्ट मनई पइ परमेस्सर सजा बरसाइ।

24होइ सकत है कि उ दुस्ट लोहा क तरवार स बच निकरइ, मुला कहूँ स काँसा क बाण ओका मार गिरावइ।

25तीर खींचत लिहसे ह, अउर बिजुरि क नाई ओकरे पीठ में घुसत ह अउर ओकर करेजा बाहर आ जात ह, अउर उ आंतकित होइके काँप उठत ह।

26ओकर सबहि खजाना नस्ट होइ जइहीं, एक तु अइसी आगी जेका कउनो नाहीं बोरेस ओका नस्ट करी, उ आगी ओनका जउन ओकरे घरे में बचा अहइँ नस्ट कइ डाइ।

27सरग सिद्ध करी कि उ दुस्ट अपराधी अहइ, इ गबाही धरती ओकरे खिलाफ देइ।

28जउन कछू भी ओकरे घरे में अहइ, उ परमेस्सर क किरोध क बाढ़ में बहि जाइ।

29इ उहइ अहइ जेका परमेस्सर दुस्टन क संग करइ क योजना रचत ह। इ उहइ अहइ जइसा परमेस्सर ओनका देइ क योजना बनावत ह।”

### अय्यूब क जवाब

21 एह पइ अय्यूब जवाब देत भए कहेस।  
2“तू पचे चित्त दइके सुना जउन मई कहत हउँ, तोहार सुनइ क आपन तरिके स मोर दिलासा होइ जाइ।

3जब मई बोलत हउँ तू धीरा धरा, “फुन जब मई बोल चुकउँ तब तू मोर हँसी उड़ाइ सकत ह।

4मोर सिकाइत मनइयन क खिलाफ नाहीं अहइ, मई काहे सहनसील नाहीं अहउँ ओकर खास वजह अहइ।

5तू मोका लखा अउर चकित होइ जा, आपन सोक दिखाइ बरे आपन हाथ आपन मुँहे पइ धरा।

6जब मई सोचत हउँ ओन सब क जउन मोर संग घटा तउ मोका डर लागत ह अउर मोर देह थर थर काँपत ह।

7काहे बुरे लोगन क उमर लम्बी होत ह? काहे उ पचे बुढ़ाइ जात हीं अउर कामयाब होत हीं?

8बुरे लोग आपन संतानन क आपन संग बढ़त भए लखत हीं। बुरे लोग आपन आपन नाती पोतन क लखइ क जिअत रहत हीं।

9ओनकर घर सुरच्छित रहत हीं अउर उ पचे डेरातेन नाहीं। परमेस्सर दुस्टन क सजा देइ बरे आपन सजा काम में नाहीं लाआवत ह।

10ओकर सौँड कबहुँ भी मिला कइ में नाहीं चुकत ह। ओनकर गइयन बछवन क जनम देइ बरे गाभिन होत। ओनकर भ कबहुँ नाहीं गिरत हीं।

11बुरे लोग गदेलन क बाहेर खेलइ पठवत हीं मेमनन क जइसे, ओनकर गदेलन नाचत हीं चारिहुँ ओर।

12मजीरा, वीणा अउर बाँसुरी क धुन पइ उ पचे गावत हीं अउर नाचत हीं।

13बुरे लोग आपन जिन्नगी भइ कामयाबी क आनन्द लेत हीं। फुन बिना दुख भोगे उ पचे मरि जात हीं अउर आपन कब्रन क बीच चला जात हीं।

14मुला बुरे लोग परमेस्सर स कहा करत हीं, ‘हमका अकेला तजि द्या। अउर एकर हमका परवाह नाहीं कि तू हमसे कइसा जिन्नगी जिअइ चाहत ह।’

15दुट्ट लोग कहा करत हीं, ‘सर्वसक्तीमान परमेस्सर कउन अहइ? हमका ओकरी सेवा क जरूरत नाहीं अहइ। ओकरी पराथना करइ क कउनो लाभ नाहीं।’

16दुस्ट मनई सोचत हीं कि ओनका आपन ही कारण कामयाबी मिलत ह, मुला मई ओनकर विचारन क नाहीं अपनाइ सकत हउँ।

17मुला का अइसा होत ह कि दुस्ट जन क प्रकास बुताइ जावा करत ह? केतनी दाई दुस्टन क दुःख घेरा करत हीं? का परमेस्सर ओनसे कोहाइ जात ह, अउर ओनका सजा देत ह?

18का परमेस्सर दुस्ट लोगन क अइसे उड़ावत ह जइसे हवा तिनके क उड़ावत ह अउर तेज हवा अनाजे क भूसा उड़ाइ देत हीं?

19मुला तू कहत ह: ‘परमेस्सर एक गदेलन क ओकरे बाप क पापन्क सजा देत ह।’ नाहीं, परमेस्सर क चाही कि बुरे जन क राजा देइ। तबहिं उ बुरा मनई जानी कि ओका ओकरे निज पापन बरे सजा मिलति अहइ।



20तू पापी क ओकरे आपन राजा क देखौंइ द्या, तब उ सर्वसक्तीसाली परमेस्सर क कोप क अनुभव करी।

21जब बुरा मनई क उमर क महीना खतम होइ जात हीं अउर उ मर जात ह; उ उ परिवार क परवाह नहीं करत जेका उ पाछे तजि जात ह।

22कउनो मनई परमेस्सर क गियाण नहीं दइ सकत, उ ऊँच ओहदन क लोगन क भी निआउ करत ह।

23एक पूरा अउ सफल जिन्गी क जिअइ क पाछे एक मनई मरत ह, उ एक सुरच्छित अउ सुखी जिन्गी जिअत ह।

24ओकर लगे पिवइ बरे भरपूर दूध रहा। अब समइ तलक ओकर हाइ तन्दुरुस्त रहिन।

25मुला कउनो एक अउर मनई कठिन जिन्गी क पाछे दुःख भरे मने स मरत ह, उ जिन्गी क कबहुँ कउनो रस नहीं चखेस।

26इ सबइ दुइनउँ मनई एक संग माटी मँ गड़ सोवत हीं, किरउनन दुइनउँ क एक संग ढँपि लेइहीं।

27मुला मई जानत हउँ कि तू का सोचत अहा, अउर मोका पता अहइ कि तोहरे लगे मोरा बुरा करइ क कुचाल अहइ।

28मोरे बरे तू इ कहा करत ह, 'अब कहीं बाटइ उ महामानुस क घर? कहीं बा उ घर जेहमँ उ दुस्ट रहत रहा?'

29-30मुला तू कबहुँ बटोहियन क नहीं पूछ्या? का तू ओकर कहानियन पइ बिस्सास नहीं किहस कि उ दिन जब परमेस्सर कोहाइके सजा देत ह दुस्ट मनई सदा बच जात ह?

31अइसा कउन मनई नहीं जउन ओकरे समन्वा ही ओकरे करमन क बुराइ करइ। ओकरे पाप क सजा कउनो मनई ओका नहीं देत ह।

32जब कउनो मनई कब्र मँ लइ जावा जात ह, तउ ओकरे कब्र क लगे एक पहरवा खड़ा रहत ह।

33उ दुट्ट मनई बरे उ घाटी क माटी मुलायम होइ। अनगिनत लोग ओकर समन्वा कब्र मँ गएन ह, अउर भविस्स मँ अउर भी लोग ओहस मिली।

34तउ आपन कोरे सबदन स तू मोका चइन नहीं दइ सकत्या, तोहार जवाब सिरिफ झूठा अहइँ।"

### एलीपज क जवाब

22 फुन तेमान क एलीपज जवाब देत भए कहेस।  
2"परमेस्सर क कउनो भी मनई सहारा नहीं दइ सकत, हिअँ तलक कि उ भी जउन बहोत बुद्धिमान मनई होइ परमेस्सर बरे हितकर नहीं होइ सकत।

3अगर तू उहइ किहा जउन उचित रहा एहसे सर्वसक्तीमान परमेस्सर क आनन्द नहीं मिली, अउर अगर तू खरा रहा हवा तउ एहसे ओका पछू नहीं मिली।

4अय्यूब तोहका परमेस्सर काहे सजा देत ह अउर काहे तोह पइ दोख लगावत ह? का इ एह बरे कि तू भक्त अहा।

5नाहीं, इ सबइ एह बरे कि तू बहोत स पाप किहा ह, अय्यूब, तोहार पाप नहीं रुकत अहइँ।

6अय्यूब, होइ सकत ह कि तू आपन कउनो भाई क कछू चिज बिना कउनो कारण क गिरवी रख सकत ह। होइ सकत ह कि तू कउनो दीन मनइ क ओढ़ना रख लिहे हवा अउर ओनका नंगा बना किहे हवा।

7तू थके-मँदे लोगन क पानी नहीं दिहा, तू भुखान मनइयन क भोजन नहीं दिहा।

8अय्यूब, अगर तू सक्तीसाली अउ धनी रह्या, तू ओन लोगन क सहारा नहीं दिहा। तू बड़का जमींदार अउ समरथ वाला मनई रह्या।

9मुला तू रँइ अउरतन क बगइर कछू दिहे लउटाइ दिहा। अय्यूब, तू अनाथ गदेलन क लूट लिहा अउर ओनसे बुरा बेउहार किहा।

10एह बरे तोहरे चारिहुँ कइँती जाल बिछा भवा अहइँ अउर तोहका एकाएक आवत विपत्तियन डेरावत हीं।

11एह बरे घना अँधियारा तोहका ढँक लिहस ह अउर एह बरे बाढ़ क पानी तोहका लीलत बाटइ।

12परमेस्सर अकास क सब स ऊँच हींसा मँ रहत ह। उ आपन जगह स सबन स ऊँच तारन क लखइ बरे खाले लखत ह।

13मुला अय्यूब, तू कहा करत ह, 'परमेस्सर कछू नहीं जानत, करिमा बादरन स कइसे परमेस्सर हमका जाँच सकत ह?'

14घना बादर ओका छुपाइ लेत हीं, एह बरे जब उ अकास क सबन त ऊँच हींसा मँ बिचरत ह तउ हमका ऊपर अकासे स लखि नहीं सकत।

15अय्यूब, तू उ ही पुरानी राह पइ जेन पइ दुस्ट लोग चला करत हीं, चलत अहा।

16आपन मउत क समइ स पहिले ही दुट्ट लोग मर गएन। बाढ़ ओनका बहाइके लइ गइ रही।

17इ सबइ उहइ लोग अहइँ जउन परमेस्सर स कहत हीं, 'हमका अकेल्ले तजि द्या। उ पचे सोचेन कि सर्वसक्तीमान परमेस्सर हमार कछू नहीं कइ सकत ह।'

18मुला परमेस्सर ओन लोगन क कामयाब बनाएस ह अउर ओनका धनवान बनाइ दिहा। मुला मई उ ढंग स जेहसे दुस्ट सोचत हीं, अपनाइ नहीं सकत हउँ।

19सज्जन जब बुरे लोगन क नास देखत हीं, तउ उ पचे खुस होत हीं। पाप स रहित लोग दुस्टन पइ हँसत हीं, अउर कहा करत हीं।

20'हमार दुस्मन फुरइ नस्ट होइ गएन। आगी ओनके धने क बारि देत ह।'

21अय्यूब, अब खुद क तू परमेस्सर क अर्पित कइ द्या, तब तू सान्ति पउब्या। अगर तू अइसा करा तउ तू धन्य अउर कामयाब होइ जाब्या।

22ओकर सीख अपनाइ ल्या अउर ओकरे सब्द आपन मने मँ सुरच्छित रखा।

23अय्यूब, अगर तू फुन सर्वसक्तीमान परमेस्सर क लगे आवा तउ फिन स पहिले जइसा होइ जाइ। तोहका अपने घरे स पाप क बहोत दूर करइ चाही।

24तोहका सोना क धूरी क नाई अउर ओफीर क सोना क नदी क तराई क चट्टान क नाई समझइ चाही।

25तब सर्वसक्तीमान परमेस्सर तोहरे बरे सोना अउर चाँदी बन जाइ।

26तब तू बहोत खुस होब्या अउर तोहका सुख मिली। परमेस्सर क समन्वा तू बिना कउनो सर्प क मूँड़ि उठाइ सकब्या।

27जब तू ओकर बिनती करब्या तउ उ तोर सुना करी, जउन प्रतिग्या तू ओहसे किहे रह्या, तू ओका पूरा कइ सकब्या।

28जउन कछू तू करब्या ओहमाँ तोहका कामयाबी मिली, तोहरे रास्ते पइ प्रकास चमकी।

29परमेस्सर अहंकारी जन क लज्जित करी, मुला परमेस्सर नम्र मनई क रच्छा करी।

30परमेस्सर जउन मनई भोला नाहीं अहइ ओकर भी रच्छा करी, तोहरे हाथन क सफाई स ओका उद्धार मिली।”

### अय्यूब जवाब देत ह

23 फिन अय्यूब जवाब देत भए कहेस।

2“मई आजु भी बुरी तरह सिकाइत करत हउँ कि परमेस्सर मोका करी सजा देत अहइ, एह बरे मई सिकाइत करत रहत हउँ।

3कास! मई इ जान पावत कि ओका कहीं हेरउँ। कास! मई इ जान पावत कि परमेस्सर क लगे कइसे जाउँ।

4मई आपन मुकद्मा क सफाई परमेस्सर क समन्वा पेस करब्यु। मई आपन क निर्दोख साबित करइ बरे बहस करब्या।

5मई इ जानइ चाहत हउँ कि परमेस्सर कइसे मोरे दलीलन क जवाब देत ह, तब मई परमेस्सर क जवाब समुझ पउतेउँ।

6का परमेस्सर आपन महासक्ती क संग मोरे खिलाफ होत? नाहीं! उ मोर सुनी।

7मई एक नेक मनई हउँ। परमेस्सर मोका आपन कहानी क कहइ देइ, तब मोर निआउ कत्ती परमेस्सर मोका अजाद कइ देइ।

8मुला अगर मई पूरब क जाउँ तउ परमेस्सर हुआ नाहीं अहइ अउर अगर मई पच्छिउँ क जाउँ तउ भी परमेस्सर मोका नाहीं देखत ह।

9परमेस्सर जब उत्तर मँ छिपत ह\* तउ मई ओका देख नाहीं पावत हउँ। जब परमेस्सर दक्खिन क छिपत ह तउ भी उ मोका नाहीं देखत ह।

10मुला परमेस्सर मोरे हर चरण क लखत ह, जेका मई उठावत हउँ। जब उ मोर परीच्छा लइ उठी तउ उ लखी कि मोहमाँ कछू भी बुरा नाहीं अहइ, उ लखी कि मई खरा सोना जइसा अहउँ।

11परमेस्सर जउन चाहत ह मई हमेसा उहइ पइ चलत हउँ मई कबहुँ भी परमेस्सर क राहे पइ चलइ स नाहीं रुकेहउँ।

12मई हमेसा उहइ बात करत हउँ जेनकर आसा परमेस्सर देत ह। मई आपन मुँहे क भोजन स जियादा परमेस्सर क मुँहे क सब्दन स पिरेम किहेउँ ह।

13मुला परमेस्सर एक मन वाले अहा, अउर कउनो भी ओका बदल नाहीं बदलत। परमेस्सर जउन चाहत ह उहइ करत ह।

14परमेस्सर जउन भी योजना मोरे विरोध मँ बनाइ लिहस ह उहइ करी, ओकरे लगे मोरे बरे अउर भी बहोत सारी योजना अहइ।

15एह बरे मई ओसे डेरात हउँ। एह बरे परमेस्सर मोका भयभीत करत ह।

16परमेस्सर मोर हिरदइ क दुर्बल करत ह अउर मोर हिम्मत टूट जात ह। सर्वसक्तीमान परमेस्सर मोका भयभीत करत ह।

17अगर तउ मोर मुँह सघन अँधियारा ढकत ह तउ भी अँधियारा मोका चुप नाहीं कइ सकत ह।

24 “सर्वसक्तीमान परमेस्सर काहे नाहीं निआउ करइ बरे समइ मुकरर करत ह? लोग जउन परमेस्सर क मानत हीं ओनका काहे निआउ क समइ क बेकार बाट जोहइ क पड़त ह?

2“लोग आपन धन दौलत क चीन्हन क, जउन ओकर चउहद्दी बतावत हीं, सरकावत रहत हीं ताकि आपन पड़ोसी क थोड़ी अउर धरती हड़प लेइँ। लोग पसु क चोराइ लेत हीं अउर ओनका दूसर चरागाहन मँ हाँक लइ जात हीं।

3अनाथ बच्चन क गदहन क उ पचे चोराइ लइ जात हीं। उ पचे रँड़ मेहरारुअन क बर्धन खोल लइ जात हीं जब तलक कि उ ओनकर कर्ज नाहीं चुकावत हीं।

4उ पचे दीन जन क मजबूर करत हीं कि उ तजिके दूर हटि जाइके मजबूर होइ जात ह, एन दुस्टन स खुद क छुपावइ क।

5उ सबइ दीन लोग ओन जंगली गदहन जइसे अहइँ जउन मरु भूमि मँ आपन चारा हेरा करत हीं। गरीबन अउ ओनकर बच्चन क मरुभूमि भोजन देत रहत ह।

6गरीब लोगन क कउनो दूसर क खेत मँ अनाज काटइ चाही। दुस्टन क अंगूरन क बगियन स बच भवा फलन उ पचे चुना करत हीं।

7दीन लोगन क बगइर ओढ़नन क सबइ रात बितावइ क होइ। सर्दी मँ ओनके लगे आपन क ढाँकइ बरे कछू नाहीं होइ।

8उ पचे बर्खा स पहाड़न मँ भीज गवा अहइँ, ओनका बड़की चट्टानन स लिपट क रहइ क होइ, काहेकि ओनके लगे कछू नाहीं जउन ओनका मौसम स बचाइ लेइ।

9बुरे लोग ओन गदेलन क जेकर बाप नाहीं अहइ ओनकइ महतारी स छिन लेत हीं। उ पचे गरीब लोगन क आपन दास बनावत हीं।

10गरीब लोगन क लगे ओढ़ना नाहीं होत हीं। यह बरे ओन लोगन क नंगा ही घूमइ क होइ। उ पचे दुस्टन क गठरी क भार ढोवत हीं, मुला फुन भी उ पचे भुखान रहत हीं।

11गरीब लोग जइतून क तेल पेरिके निकारत हीं। उ पचे कुंडन मँ अंगूर सूँदत हीं फुन भी उ पचे पिआसा रहत हीं।

12मरत भए लोग जउन आहें भरत हीं उ सबइ सहर में सुनाइ पड़त ह। सतावा भवा लोग सहारा क पुकारत हीं, मुला परमेस्सर नाहीं सुनत ह।

13कछू अइसे लोग अहई जउन प्रकास क खिलाफ होत हीं। उ पचे नाहीं जानइ चाहत हीं कि परमेस्सर ओनसे का करवावइ चाहत ह। परमेस्सर क राह पइ उ पचे नाहीं चलत हीं।

14हत्यारा भिंसारे जाग जात ह गरीबन अउ जरुरतवाले लोगन क हत्या करत ह। उ राति में चोर क नाई बन जात ह।

15उ मनई जउन बिभिचार करत ह, रात आवइ क बाट जोहा करत ह, उ सोचत ह 'ओका कउनो नाहीं लखी' अउर उ आपन मुँह ढँपि लेत ह।

16दुट्ट मनई जब रात में अँधेरा होत ह तउ सेंधे लगाइके घरे में घुसत हीं। मुला दिन में उ पचे आपन हि घरन में छुपा रहत हीं। उ पचे प्रकास स बचत हीं।

17ओन दुट्ट लोगन क अँधियारा सबुह क नाई होत ह, उ पचे आतंक अउ अँधियारा क मीत होत हीं।

18दुट्ट लोग अइसे बाहइ दीन्ह जात हीं जइसे झाग बाढ़ क पानी पाइ। उ धरती अभिसाप स ढकी बा जेकर उ पचे मालिक अहई। कउनो भी अंगूर क बगियन में अंगूर जमा करइ बरे नाहीं जात ह।

19जइसे गरम व सूखा मौसम पिघलत बरफ क पानी क सोख लेत ह, वइसे ही दुस्ट लोग कब्र क जरिये लील जइहीं।

20दुस्ट मनइयन मरइ क पाछे ओकर महतारी तलक ओका बिसरि जाइ। दुस्ट लोगन क देह क कीरा खाइ जइहीं। कउनो भी ओन लोगन क याद नाहीं रखइहीं। दुस्ट जन गिरे भए बृच्छ क नाई नष्ट कीन्ह जइहीं।

21दुस्ट मनइ बाँझ मेहरारुअन क सतावा करत हीं। उ पचे उ तरह क मेहरारु क दुःख देत हीं। उ पचे कउनो भी रँड अउरत बरे दया नाहीं देखँवत हीं।

22दुस्ट मनई आपन सक्ती क उपयोग बलसाली क नस्ट करइ बरे करत हीं। बुरे लोग सक्तीसाली होइ जइहीं मुला आपन ही जिन्नगी क भरोसा नाहीं होइ कि उ पचे जियादा दिन जी पइहीं।

23होइ सकत ह कि तनिक समइ बरे परमेस्सर सक्तीसाली क सुरच्छित रहइ देइ, मुला परमेस्सर सदा ओन पइ आँखी रखत ह।

24दुस्ट मनई तनिक समइ बरे कामयाबी पाइ जात हीं, मुला फुन उ पचे नस्ट होइ जात हीं। दूसर लोगन क तरह उ पचे भी मुझी जात ही अउर उदास होइ जात हीं। अनाजे क कटी भइ बाले क नाई उ पचे गिर जात हीं।

25अगर इ सबइ बातन फुरइ नाहीं अहई तउ कउन सिध्द कइ सकत ह कि मई झूठ कहेउँ ह। कउन देखँइ सकत ह कि मोर सब्द सतय नाहीं अहई?"

2"परमेस्सर सासक अहइ अउर हर मनई क चाही कि परमेस्सर स डेराइ अउर ओकर मान करइ। परमेस्सर आपन सरग क राज्ज में सान्ति रखत ह।

3कउनो आपन फउजन क गन नाहीं सकत ह, परमेस्सर क प्रकास सब पइ चमकत ह।

4मुला फुरइ परमेस्सर क अगवा कउनो मनई उचित नाहीं ठहर सकत ह। कउनो मनई जउन मेहरारु स पइवा भवा होइ फुरइ निर्देख नाहीं होइ सकत ह।

5परमेस्सर क आँखिन क समन्वा चाँद तलक चमकीला नाहीं अहइ। परमेस्सर क आँखिन क समन्वा तारन निर्मल नाहीं अहई।

6मनई तउ बहोत कम भला अहई। मनई तउ बस कीरा अहइ एक तु अइसा कीरा जउन बेकार क होत ह।"

### अय्यूब क बिल्दद क जवाब

26 तब अय्यूब कहेस।

2"हे बिल्दद, सोपर अउर एलीपज जउन लोग दुर्बल अहई तू फुरइ ओनका सहारा दइ सकत ह। अरे हों, तू दुर्बल बाँहन क फुन स सक्तीसाली बनाया ह।

3हों, तू निर्बुध्दि क सम्मति दिहा ह। कइसा महागियान तू देखँया ह।

4इ बातन क कहइ में कउन तोहार मदद किहस? केकर आतिमा तोहका प्रेरणा दिहस?

5जउन लोग मरि गवा अहई ओनकर आतिमा धरती क खाले पानी में भय स बहोत काँपति अहई।

6मउत क जगह परमेस्सर क आँखी क समन्वा खुली अहइ, परमेस्सर क अगवा विनास क जगह ढका नाहीं अहइ।

7परमेस्सर उत्तरी अकासे क खाली जगह पइ फइलावत ह। परमेस्सर खाली जगह में धरती लटकाएस ह।

8परमेस्सर घने बादरन क पानी स भरत ह, मुला पानी क भारी भार स बादरन क फाटइ नाहीं देत ह।

9परमेस्सर पूरा चन्द्रमा क ढँपत ह, परमेस्सर चाँद पइ आपन बादर फइलावत ह अउर ओका ढँकि लेत ह।

10परमेस्सर छितिज क रचत ह प्रकास अउ अँधेरा क सीमा रेखा क रुप में समुदर पइ।

11जब परमेस्सर डौंटत ह तउ उ सबइ नेवंन जउने पइ आकास टिका अहइ डर स काँपइ लागत हीं।

12परमेस्सर क सक्ती सागर क सांत कइ देत ह। परमेस्सर क बुध्दि राहब\* क नस्ट किहस।

13परमेस्सर क साँस अकास क साफ कइ देत ह। परमेस्सर क हाथ उ साँप क मारि दिहस जउन पराइ जाइ क जतन किहस।

14इ सबइ तउ परमेस्सर क अजूबा कारजन क तनिक सी बातन अहई। बस हम थोड़के परमेस्सर क अवाज क फुसफुसाहट क सुनित ह। मुला फुरइ कउनो मनई परमेस्सर क सक्ती क गर्जन क नाहीं समुझ सकत ह।"

### बिल्दद क अय्यूब क जवाब

25 फिन सूह प्रदेस क निवासी बिल्दद जवाब देत भए कहेस।

**27** फुन अय्यूब कहइ क जारी राखेस। उ कहेस,  
 2<sup>1</sup>“फुरइ परमेस्सर जिअत ह अउर इ जेतँना सच  
 अहइ कि परमेस्सर जिअत ह फुरइ उ वइसेन ही मोरे बोर  
 अनिआउ स भरा रहा अहइ। हौं! सर्वसक्तीसाली परमेस्सर  
 मोरे जीवन में कइवाहट भरेस ह।

3मुला जब तलक मोहमाँ प्राण अहइ अउर परमेस्सर क  
 साँस मोहे में अहइ।

4तब तलक मोरे होंठ झूठी बातन नाहीं बोलिहीं, अउर  
 मोर जिभिया कबहुँ झूठ नाहीं बोली।

5मई कबहुँ न मानब कि तू लोग सही अहा। जब  
 तलक मई मरब उ दिन तलक कहत रहब कि मई निर्दोष  
 हउँ।

6मई आपन धार्मिक भाव क मजबूती क थामे रहब। मई  
 कबहुँ उचित करम करब न तजब मोर चेतना मोका तंग  
 नाहीं करी जब तलक मई जिअत हउँ।

7मोरे दुस्मनन क दुस्ट जइसा बनइ द्या, अउर ओनका  
 सजा पावइ द्या जइसे दुस्ट लोग दण्डित होत हीं।

8अइसे उ मनई बरे मरत वक्त कउनो आसा नाहीं अहइ  
 जउन परमेस्सर क परवाह नाहीं करत ह। जब परमेस्सर  
 ओकर प्राण लेइ तब भी ओकरे बरे कउनो आसा नाहीं  
 अहइ।

9जब उ बुरा मनई दुःखी पड़ी अउर ओका पुकारी,  
 परमेस्सर नाहीं सुनी।

10ओका चाही कि उ उ आनन्द क चाहइ जेका सिरिफ  
 सर्वसक्तीमान परमेस्सर देत ह। ओका चाही कि उ हर समइ  
 परमेस्सर स पराधना करत रहा।

11मई तोहका परमेस्सर क सक्ती सिखाउब। मई  
 सर्वसक्तीसाली परमेस्सर क योजनन क नाहीं छिपाउब।

12खुद तू आपन अँखिन स परमेस्सर क सक्ती लख्या ह,  
 तउ काहे तू बेकार क बातन क बोलत ह?

13दुस्ट लोगन बरे अइसी जोजना बनाया ह। दुस्ट लोगन  
 क सर्वसक्तीसाली परमेस्सर स अइसा ही मिली।

14दुस्ट क चाहे केतँनी ही सन्तानन होइँ, मुला ओकर  
 संतानन जुद्ध में मारी जइहीं। दुस्टन क सन्तानन कबहुँ  
 भरपेट खाना नाहीं पइहीं।

15अउर अगर दुस्टन क सन्तानन ओकरी मउत क पाछे  
 भी जिअत रहइँ तउ महामारी ओनका मारि डई। ओकर रँड  
 ओनके बरे दुःखी नाहीं होइहीं।

16दुस्ट जन चाहे चाँदी क ढेर बटोरइँ, एतना बड़का ढेर  
 जेतँना माटी क ढूहा होत ह, माटी क ढूहन जइसे ओढ़ना  
 होइँ ओकरे लगे।

17जउने ओढ़नन क दुस्ट मनई जुटावत रहा ओन ओढ़नन  
 क सज्जन पहिरी, दुस्ट क चाँदी निर्दोखन में बँटी।

18दुस्ट क बनावा घर जियादा दिनन नाहीं टिकत ह, उ  
 मकड़ी जाल जइसा या कउनो चौकीदार क झोपड़ी जइसा  
 कमजोर होत ह।

19दुस्ट लोग आपन खुद क दौलत क संग आपन  
 बिछउना पइ सोवइ जात ह, मुला एक अइसा दिन आइ जब  
 उ फुन बिस्तरे में वइसे ही नाहीं जाइ पाई। जब उ आँखी  
 खोली तउ ओकर सम्पत्ति जाइ चुकी होइ।

20दुःख ओका बाढ़ क जइसा ढाँक लेइहीं, रातउ रात  
 तूफान ओका उड़ाइ लइ जाइ।

21पुर वइया हवा ओका दूर उड़ाइ देइ, तूफान ओका  
 ओकरे घरे क बाहेर खींचली।

22तू फान ओह पइ बगैर दया किए भए पइ आइ अउर  
 उ ओमें स दूर भागइ क जतन करी। मुला लपेटके मारी।

23जब दुस्ट मनई पराई, लोग ओह पइ तालियन बजाइहीं,  
 दुस्ट जन जब निकरिगे पराई, अपने घरे स तउ लोग ओह  
 पइ सीटियन बजइहीं।

**28** “हुआँ चाँदी क खान बाटइ जहाँ लोग चाँदी पावत  
 हीं, हुआँ अइसे ठउर अहइँ जहाँ लोग सोना  
 देघराइके ओका सुद्ध करत हीं।

2लोग धरती स खनिके तोहा निकारत हीं, अउर चट्टानन  
 स टेघराइके ताँबा निकारत हीं।

3लोग सबइ गुफा में प्रकास लिआवत हीं उ पचे सबइ  
 गुफा क गहिराइ में हेरा करत हीं, घना अँधियारा में उ पचे  
 खनिज क चट्टानन हेरत हीं।

4जहाँ लोग रहत हीं ओहसे बहोत दूर लोग गहिर गइहा  
 खना करत हीं, कबहुँ कउनो अउर एँन गइहन क नाहीं  
 छुएस। जब मनई गहिर गइहन में रस्सन स लटकत ह, तउ  
 उ दूसरन स बहोत दूर होत ह।

5भोजन धरती क सतह स मिला करत ह, मुला धरती क  
 भीतर उ बढ़त जावा करत ह जइसे आगी चिजियन क बदल  
 देत ह।

6धरती क भितरे चट्टानन क खाले नीलम मिलि जात हीं,  
 अउर धरती क खाले माटी आपन आप में सोना रखत ह।

7जंगली पंछी धरती क खाले क राहन नाहीं जानत हीं न  
 ही कउनो बाज इ मारग लखत ह।

8उ राहन पइ कउनो बड़का डीलडोल वाला पसु नाहीं  
 चलेन, कबहुँ सेर इ राहे पइ नाहीं विचरेन।

9मजदूर सब स कठोर चट्टानन क खनत हीं अउर उ  
 पचे पहाड़न क ओकर जइ स खनिके गिरा देत हीं।

10काम करइवालन चट्टानन स सुरंग काटत हीं उ  
 पचन्क आँखन हुआँ खजानन क लखि लेत हीं।

11काम करइवालन बाँध बनवा करत ही कि पानी ऊपर  
 स होइके न बहइ। उ पचे छिपी भइ चिजियन क ऊपर  
 प्रकास में बिआवत हीं।

12मुला कउनो मनई विवेक कहाँ पाइ सकत ह? अउर  
 हम कहाँ जाइ सकित ह समुझ पावइ क?

13गियान कहाँ रहत ह लोग नाहीं जानत हीं, लोग जउन  
 धरती पइ रहत हीं, ओमाँ इ नाहीं पाइ जात ह।

14सागरे क गहराइ बतावत ह, ‘मोह माँ गियान नाहीं।’  
 अउर समुद् कहत ह, ‘हिआँ मोहमाँ गियान नाहीं अहइ।’

15गियान क बहोत कीमती सोना भी मोल नाहीं लइ  
 सकत ह, गियान क दाम चाँदी स नाहीं गना जाइ सकत ह।

16गियान ओपीर देस क सोना स या कीमती सुलैमानी  
 पाथर या नीलमगियान स नाहीं बेसहा जाइ सकत ह।

17गियान सोना अउ स्फटिक स जियादा कीमती बाटइ,  
 कउनो मनई बहोत कीमती सोना स जड़े भए रत्नन स गियान  
 नाहीं बेसहि सकत ह।

18 गियान मूँगा अउ सूर्यकान्त मणि स जियाद कीमती बा। गियान क कउनो मनई सिद्ध सोने में जुरे कीमती रतन स नहीं बेसहा सकत ह।

19 जेतना उत्तिम गियान अहइ कूस देस क पद्मराग भी ओतना उत्तिम नहीं अहइ। गियान क तू चोख सोना स मोल नहीं लइ सकत्या।

20 तउ फुन हम कहाँ गियान क पावइ जाइ? हम कहाँ समुझ सीखइ जाइ?

21 गियान धरती क हर मनई स लुका भवा अहइ। हिअँ तलक कि ऊँच अकास क पंछी भी गियान क नहीं लखि पावत हीं।

22 मउत अउ विनास कहा करत हीं, 'हम तउ बस गियान क बातन सुनी ह।'

23 मुला बस परमेस्सर गियान तलक पहोंचइ क राहे क जानत ह। परमेस्सर जानत ह गियान कहाँ रहत ह।

24 परमेस्सर गियान क जानत ह काहेकि उ धरती क अखिरी छोर तलक लखा करत ह। परमेस्सर उ हर वस्तु क जउन अकास क खाले अहइ लखा करत ह।

25 जब परमेस्सर हवा क ओकर सकती दइ दिहस अउर इ निहचित किहस कि समुदरन क केतना बड़का बनावइ क अहइ।

26 अउर जब परमेस्सर निहचय किहस कि ओका कहाँ स बर्खा पठवइ क अहइ, अउर बउडरन क कहाँ तलक जात्रा करइ क अहइ।

27 तब परमेस्सर गियान क लखे रहा। उ ओका मापेस, ओका साबित किहसे अउर इका परखेस।

28 अउर लोगन स परमेस्सर कहे रहा कि 'यहोवा क भय माना अउर ओका आदर दया।' बुराइयन स मुँह मोड़ि लेब ही गियान अहइ, इहइ समझदारी अहइ।"

### अय्यूब आपन बात जारी रखत ह

**29** आपन बात क जारी रखत भए अय्यूब कहेस।  
2 "मोर जिन्नगी वइसे ही होइ चाही रही जइसे गुजरे महीने में रही। जब परमेस्सर मोर खवारी करत रहा, अउर मोर धियान रखत रहा

3 मई अइसे उ समइ क इच्छा करत हउँ जब परमेस्सर क प्रकास मोरे मूँडे पइ चमचमात रहा। मोका प्रकास देखौवइ क उ समइ जब मई अँधियारा स होइके चलत रहेउँ।

4 अइसे ओन दिनन क इच्छा करत हउँ, जब मोर जिन्नगी सफल रही, अउर परमेस्सर मोरे निचके मीत रहा। उ सबइ अइसेन दिन रहेन जब परमेस्सर मोरे घरे क असीसे रहा।

5 अइसे समइ क मई इच्छा करत हउँ, जब सर्वसक्तीसाली परमेस्सर अबहुँ तलक मोरे संग में रहा अउर मोरे संग मोर गदेलन रहेन।

6 अइसा लगा करत रहा कि दूध-दही क नदियन बहा करत रहिन, अउर मोरे बरे चट्टानन जइतून क तेल क नदियन उड़ेरत रहिन।

7 इ सबइ ओ दिन रहेन जब मई नगर क दुआर अउर गलीयन क चौराहन पइ जात रहेउँ, अउर नगर नेता लोगन क संग बइठत रहेउँ।

8 हुवाँ सबइ लोग मोर सम्मान किहा करत रहेन। जवान मनसेधू जब मोका लखत रहेन तउ मोरी राह स हट जावा करत रहेन अउर बुढ़वा मनसेधू मोरे बरे सम्मान देखौवइ बरे उठ खड़ा होत रहेन।

9 जब लोगन क नेता लोग मोका लखि लेत रहेन, तउ बोलब बंद कइ देत रहेन।

10 हिअँ तलक कि बहोतइ महत्ववाले नेता भी आपन स्वर हल्का कइ लेत रहेन, जब मई ओनके नियरे जात रहेउँ। हीं! अइसा लागत रहा कि ओनकर जिभियन ओनकर तालु स चिपक गइ होइँ।

11 जउन कउनो भी मोका बोलत सुनेस, मोरे बारे में नीक बात कहेस, जउनो कउनो भी मोका लखे रहा, मोर बड़कई किहे रहा।

12 काहेकि जब कउनो दीन मदद बरे गोहँराएस, मई मदद किहेउँ। उ गदेलन क मई सहारा दिहेउँ जेकरे महतारी बाप नहीं अउर जेकर कउनो भी नहीं धियान रखइ क।

13 मोका मरत भए मनई क आसीस मिला, मई ओन रँड मेहररुअन क जउन जरुरत में रहिन, मई सहारा दिहेउँ अउर ओनका खुस किहेउँ।

14 मोर ओढ़ना पहिरब मोर खरी जिन्नगी रही, निस्पच्छ होब मोर चोगा अउर मोर पगड़ी सी रही।

15 मई अँधरन बरे अँखी बन गएउँ अउर मई ओनकर गोड़ बनेउँ जेनकर गोड़ नहीं रहेन।

16 दीन लोगन बरे मई बाप क तरह रहेउँ, मई पच्छ लेत रहेउँ अइसे अनजानन क जउन विपत्तियन में पड़ा रहेन।

17 मई दुस्ट लोगन क सकती नस्ट करत रहेउँ। निर्दोख लोगन क मई दुस्टन स अजाद करावत रहेउँ।

18 मई सोचत रहेउँ कि मई बहोत लम्बी जिन्नगी\* जिअब अउर फुन आपन ही घरे में प्राण तजब।

19 मई एक तु अइसा बृच्छ बनब जेकर जड़न सदा जल में रहत होइँ अउर जेकर डारन सदा ओस स भीजी रहत होइँ।

20 मोर सान सदा ही नई बनी रही, मई सदा ही वइसा बलवान रहब जइसे, मोरे हाथे में एक नवा धनुस।

21 पहिले, लोग मोर बात सुनत रहत रहेन, अउर उ सबइ जब मोर सलाह मसवरा क इंतजार करत रहेन, तउ चुप रहा करत रहेन।

22 मोर चुकइ क पाछे, ओन लोगन क लगे जउन मोर बात सुनत रहेन, कछू भी बोलइ क नहीं होत रहा। मोर सब्द धीरे धीरे ओनकर काने में बर्खा क तरह पइ जात रहेन।

23 लोग जइसे बर्खा क बाट जोहत हीं वइसे ही उ पचे मोरे बोलइ क बाट जोहा करत रहेन। मोरे सब्दन क उ पचे पी जावा करत रहेन, जइसे मोर सब्द बसन्त में बरसा होइ।

24 जब मई दाया करइ क ओन पइ मुस्कात रहेउँ, तउ ओनका पहिले पहल ए पइ बिस्सास नहीं होत रहा। फुन मोर खुस मुँह दुखी जन क सुख देत रहा।

**लम्बी जिन्नगी** सम्भवतः ओतना ही लम्बी जिन्नगी जेतना कि एक टू अमर पंछी जिअत ह।

25मई जिम्मेदारी बिहेउँ अउर लोगन बरे पइसला किहेउँ, मई नेता बन गएँ। मई ओनकर सोना क दलन क बीच राजा जइसा जिन्गी जिएँ। मई अइसा मनई रहेउँ जउन लोगन क चइत देत रहा जउन बहोत ही दुःखी बाटइ।

**30** अब, उमर मँ छोटा लोग मोर मसखरी करत हीं। ओन जवान मनसेधुअन क बाप बिल्कुल ही निकम्मा रहेन। ओन कूकुरन जउन मोर भेड़िन क रखवाण करत ह ओन लोगन स बेहतर अहई।

2ओन जवान मनसेधुअन क बाप मोका मदद देइ क कउनो सक्ती नाहीं राखत हीं, उ पचे बुढ़वा होइ चुका अहई अउ थका भवा अहई।

3उ सबइ मनई भूख स मरत अहई यह बरे उ पचे झुरान अउर उजाड़ धरती खावत ह।

4उ सबइ लोग रेगिस्तान मँ खारे पउधन क उखाड़त हीं अउर उ पचे झाड़ीदार बृच्छन क जड़न क खात हीं।

5उ पचन्क दूसर लोगन स भगाइ दइ गएन। उ पचे ओन लोगन पइ अइसे गोहरावत हीं जइसे लोग चोर पइ गोहरावत हीं।

6अइसे उ सबई बुढ़वा लोग झुरान भइ नदी क तलन मँ चट्टानन क सहारे अउ धरती क बिलन मँ रहइ क मजबूर अहई।

7उ पचे झाड़ियन क बीच गुराँत हीं। कँटेहरी बृच्छन क नीचे उ पचे आपुस मँ बटुर जात हीं।

8ओन पचन्क फसादी लोगन क दल अहइ, जेनकर नाउँ तलक नाहीं अहइ। ओनका आपन भुइँया तजि देइ क मजबूर कीन्ह गवा अहइ।

9अब अइसे ओन लोगन क पूत मोर हँसी उड़ावइ क मोरे बारे मँ गीत गावत हीं। मोर नाउँ ओनके बरे अपसब्द जइसा बन गवा अहइ।

10उ सबइ नउजवान मोहसे घिना करत हीं। उ पचे मोसे दूर खड़ा रहत हीं। हिआँ तलक कि उ पचे मोरे मुँहे पइ थूकत हीं।

11परमेस्सर मोरे धनुस स ओकर डोर छोर लिहस ह अउर मोका दुर्बल किहस ह। उ पचे मोह पइ कोहान होत भए मोरे खिलाफ होइ जात ह।

12उ सबइ जवान मोर दाहिनी कइँती स मोह पइ प्रहार करत हीं। उ पचे मोर गोड़न पइ हमला कइके मोका गिरावत ह अउर मोका चारिहुँ कइँती स घेर लेत ह।

13उ पचे नव जवान मोरी राह पइ निगरानी रखत हीं कि मई बचिके निकरिके पराइ न सकउँ। उ पचे मोका नस्ट करइ मँ सफल होइ जात हीं। ओनके खिलाफत मँ मोर मदद करइ क मोरे संग कउनो नाहीं अहइ।

14उ पचे मोह पइ अइसे वार करत हीं जइसे कि सहर क दिवार क दरार स होत ह। उ पचे टुटे हुए हिस्से स अन्दर आवत हीं।

15मोका भय जकड़ लेत ह। जइसे हवा चिजियन क उड़ाइ लइ जात ह, वइसेन ही उ पचे जवान मोर इज्जत धुवस्त करइ देत हीं। जइसे बादर अदृश्य होइ जात ह, वइसे ही मोर सुरच्छा अदृश्य होइ जात ह।

16जब मोर जिन्गी बीतइ क अहइ अउर मई हाली ही मर जाब। मोका संकट क दिन दहबोच लिहे अहई।

17मोर सबइ हाड़न राति क दुख देत हीं, पीरा मोका चबाव नाहीं छोड़त ह।

18मोरे कोट क गिरेबान क परमेस्सर बड़ी ताकत स धरत ह, उ मोरे लिबास क ताकत स पकड़ लेत ह।

19परमेस्सर मोका कीचं मँ बहाइ दिहस अउर मई माटी व राखी स बनत हउँ।

20हे परमेस्सर, मई सहारा पावइ क तोहका गोहरावत हउँ, मुला तू उत्तर नाहीं देत ह। मई खड़ा होत हउँ अउ पराथना करत हउँ, मुला तू मोह पइ धियान नाहीं देत्या।

21हे परमेस्सर, तू मोर बरे निर्दयी होइ गवा अहा, तू मोका नोस्कान पहोंचावइ क आपन सक्ती क प्रयोग करत अहा।

22हे परमेस्सर, तू मोका तेज आँधी स उड़ाइ देत ह। तू मोका तू फाने क बीच मँ डाल देत ह।

23मई जानत हउँ तू मोका मोर मउत कइँती लइ जात अहा जहाँ आखीर मँ हर कउनो क जाब अहइ।

24मुला इ निहचय ह कि तू कउनो मनई जउन मदद बरे गोहरावत ह, ओन स नाहीं मुड़त ह।

25हे परमेस्सर, तू तउ जानत ह कि मई ओनके खातिर रोएँ जउन संकट मँ पड़ा अहई। तू तउ इ जानत ह कि मोर मन गरीब लोगन बरे बहोत दुखी रहत रहा।

26मुला जब मई भला चाहत रहा, तउ बुरा होइ जात रहा। मई प्रकास हेरत रहेउँ अउर आँधियारा छाड़ जात रहा।

27मई भितरे स फट गवा हउँ अउर इ अइसा अहइ कि संकट कबहुँ नाहीं थम जात। अउर जियादा संकट आवइ क अहइ।

28मई सोक क ओढ़ना पहिनके माना बगइर सूरज की गर्मी स करिया होइ गना हूँ। मई सभा क बीच मँ खड़ा होत हउँ, अउर मदद क गोहरावत हउँ।

29मई जंगली कूकुरन क भइया अउर सुतुरमुर्ग क मीत होइ गवा हउँ।

30मोर चमड़ी करिया पड़ि गइ बाटइ। मोर तन बुखारे स तपत बाटइ।

31मोर वीणा करुण गीत गावइ क सधी बाटइ अउर मोर बाँसुरी स दुःख क रोवइ जइसे स्वर निकरत हीं।

**31** “मई आपन आँखिन क संग एक समझौता किहेउ ह कि उ सबइ कउनो लड़िकी क वासना क निगाह स न लखहीं।

2सर्वसक्तीमान परमेस्सर लोगन क संग कइसा करत ह? उ कइसे आपन ऊँच सरगे क घरे से ओनकर करमन क प्रतिफल देत ह?

3परमेस्सर दुस्त लोगन बरे सकंठ अउ विनास पठवत ह, अउर जउन बुरा करम करत हीं ओनके बरे बर्बादी पठवत ह।

4मई जउन भी करत हउँ परमेस्सर जानत ह। अउर मोरे हर कदम क उ लखत ह।

5अउर मई झूठी जिन्गी जिया हउँ या झूठ बोलिके लोगन क मूर्ख बनाए हउँ,

6तउ उ मोका खरी तरजू स तौलेइ, तब परमेस्सर जान लेइ कि मई निरपराध हउँ।

7अगर मई खरा रास्ता स हटा होउँ, अगर मई आपन आप क बुरे लालसा में लइ गइ होइ या अगर मई आपन हाथ क पवित्तर नहीं राखत हईँ,

8तउ मोर उपजाई भइ फसल दूसर लोग खाइ जाई अउर मोर फसलन क उजारिके लइ जाईँ।

9अगर मई मेहररुअन बरे कामुक रहा होउँ, या अगर मई आपन पड़ोसी क दुआरे क ओकरी पत्नी क संग व्यभिचार करइ क बरे ताकत रहा होउँ,

10तउ मोर पत्नी दूसर लोगन क भोजन बनावइ अउर ओकरे संग दूसर लोग सोवईँ।

11काहेकि यौन पाप लज्जा स भरा होत ह? इ अइसा पाप अहइ जेका निहचय ही सजा पावइ चाही।

12व्यभिचार उ पाप क समान अहइ, जउन बारत अउ बर्बाद कइ डावत ह। मोरे लगे जउन कछू भी अहइ बिभिचार क पाप ओका बारि डाइ।

13-14“अगर मई आपन दास-दासियन क समन्वा उ समइ निस्पच्छ नहीं रहेउँ जब ओनका मोसे कउनो सिकाइत रही। तउ जब मोका परमेस्सर क समन्वा जाइ क होइ, तउ मई का करब? जब उ मोका मोरे करमन क सफाई माँगइ बोलाइ तउ मई परमेस्सर क का जवाब देब?

15परमेस्सर मोका अउर मोरे सेवकन क हमरी आपन-आपन महतारी क गर्भ में बनाएस ह।

16मई कबहुँ भी दीन जन क मदद क मना नहीं किहेउँ। मई रौंइ मेहररुअन क सहारे क बिना नहीं रहइ दिहेउँ।

17मई स्वार्थी नहीं रहेउँ। मई आपन भोजन क संग अनाथ बच्चन क भूखा नहीं रहइ दिहेउँ।

18मई अइसे गदेलन क जेनके बाप नहीं अहईँ, मई बाप जइसा रहेउँ ह। मई जिन्नगी भइ रौंइ मेहररुअन क धियान रखेउँ ह

19जब मई कउनो क एह बरे कस्ट भोगत भए पाएउँ ह कि ओकरे लगे ओढ़ना नहीं अहइ, या मई कउनो दीन क बगैर कोट क पाएउँ।

20तउ मई सदा ओन लोगन क ओढ़ना देत रहेउँ, मई ओनका गरम राखइ क मई खुद आपन भेड़िन क ऊन बइपरेउँ, तउ उ पचे मोका समूचइ मने स असीसत रहेन।

21मई कउनो अनाथे क खिलाफ कबहुँ आपन हाथ नहीं उठाएस जब कबहुँ मई ओका सहर क फाटके पइ मदद माँगत भए निहारेउँ।

22अगर मइ अइसा किहेउँ तउ मोर काँधा आपन जगह स छूट कइ गिर जाइ अउर मोर बाजू आपन जोड़ स अलग होइ जाइ।

23मुला मई तउ ओनमाँ स कउनो बुरा करम नहीं किहेउँ। मई परमेस्सर क दण्ड स डेरात हउँ। मई ओकरी तेजस्विता स डेरात हउँ।

24मई कबहुँ आपन धन दौलत क भरोसा नहीं किहेउँ, अउर मई कबहुँ नहीं चोरखा सोने स कहेउँ कि ‘तू मोर आसा अहा।

25मई धने स सम्पन्न रहेउँ। मुला मई ओसे घमण्डी नहीं भाएउँ। मई खूबइ धन कमाएउँ। मुला उहइ नहीं जेहसे मई आनन्दित भाएउँ।

26मई कबहुँ नहीं चमकत सूरज क पूजा किहेउँ या मई सुन्नर चाँद क पूजा नहीं किहेउँ।

27मई कबहुँ भी आपन हाथ क चूम कइ सूरज अउर चाँद क पूजा करइ क मूरखता नहीं किहा रहा।

28अगर मई एनमाँ स कछू किहेउँ तउ उ मोर पाप होइ अउ मोका सजा मिलइ। अगर मई ओन बातन क पूजा किहे होतेउँ तउ सर्वसक्तीसाली परमेस्सर क अबिस्सासी होइ जातेउँ।

29“जब मोर दुस्मन बर्बाद भएन तउ मई खुस नहीं भाएउँ। जब मोरे दुस्मनन क दुख-मुसीबत डाली गवा, तउ मई ओकर बरे खूस नहीं भवा।

30मई आपन मुँह खोलिके आपन दुस्मनन क सरापत भए पाप नहीं किहेउँ अउ मई ओकरे मोत क इच्छा नहीं कहेस।

31मोरे घरे क सबहि लोग जानत ही कि मई सदा अजनबी लोगन क खइया क दिहेउँ।

32मई सदा अजनबी लोगन क घरे में बोलाएउँ, ताकि ओनका राति में गलियन में सोवइ क न पड़इ।

33दूसर लोग आपन पापे क छुपावइ क जतन करत हीं, मुला मई आपन दोख कबहुँ नहीं छुपाएउँ।

34मई कबहुँ नहीं डेराउँ कि लोग का कहत रहत हीं। मई कबहुँ चुप नहीं रहेउँ अउ मई आपन घर स बाहेर जाइ बरे कबहुँ नहीं डेरउँ।

35कास! कउनो होत जउन मोर सुनत। मोका आपन बात अपनी कईती स समझावइ द्या। कास! सक्तीसाली परमेस्सर मोका अउर कास उ ओन बातन क लिखत जउन मई ओकरी निगाहे में गलत किहे रहेउँ।

36काहेकि फुरइ ही मई उ लिखावट आपन खुद क काँधे पइ धइ लेब अउर मई ओका मुकुट क तरह मूँड़े पइ धइ लेब।

37“अगर परमेस्सर किहेस तउ जउन कछू मई किहेउँ ह, मई ओका परमेस्सर क समुझाउब। मई परमेस्सर क लगे आपन मूँडी उठाइके जाब, जइसे मई कउनो मुखिया होउँ।

38मई आपन भुइँया पइ कबहुँ बेगुनाह क खुन नहीं बहाया हउँ एँह बरे मोर मिट्टी या मोर धरती क खिलाफ कबहुँ आवाज़ा नहीं उठाएस।

39मई हमेसा मजदूरन क फसल काटइ बरे ओनकर मजूरी दिहेउँ। मई कबहुँ भी ओकर मालिक स जबरदस्ती अनाज़ नहीं लिहेउँ।

40हाँ! एनमाँ स अगर कउनो भी बुरा काम मई किहे होउँ, तउ गोहूँ क जगह पइ काँटा अउर जौ क बजाय खर-पतवार खेतन में उग जाईँ।”

अय्यूब क सब्द खतम भएन।

## एलीहू क वचन

**32** फुन अथर्व क तीनउँ मीत अथर्व क जवाब देइ क जतन करब तजि दिहेन। काहे कि उ अपने नजर मँ सच्चा रहेन। 2हुआँ एलीहू नाउँ क एक मनई भी रहा। एलीहू बारकेल क पूत रहा। बारकेल बुज क निवासी रहा। एलीहू राम क परिवारे स रहा। एलीहू क अथर्व पइ बहोत किरोध आवा काहेकि अथर्व अपने आप क सही ठहराएस बजाय परमेस्सर क सही ठहरइ क। 3एलीहू अथर्व क तीनउँ मीतन स भी कोहान रहा काहेकि उ पचे तीनउँ ही अथर्व क सवालन क जुक्ति संगत जवाब नाहीं दइ पाए रहेन अउर इ साबित नाहीं कइ सकन कि अथर्व कसूरवार अहइ। 4हुआँ जउन लोग रहेन ओनमाँ एलीहू सबसे लहुरा रहा। एह बरे उ तब तलक बाट जोहत रहा जब तलक हर कउनो आपन आपन बात पूरी नाहीं कइ चुका। 5एलीहू जब इ लखेस कि अथर्व क तीनहुँ मीतन क लगे कहइ क अउर कछू नाहीं अहइ तउ ओका बहोत किरोध आवा। 6तउ बुज क निवासी बारकेल क पूत एलीहू आपन बात कहब सुरु किहस। उ बोला:

“मई लहुरा अहउँ अउर तू लोग मोहसे जेठ अहा, मई एह बरे तोहका उ बतावइ मँ डेरत रहेउँ जउन मई सोचत रहेउँ।

7मई मन मँ सोचेउँ, ‘बड़के क पहले बोलइ चाही, अउर ओका बुद्धि सिखाइ चाही।’

8मुला मनई मँ परमेस्सर क आतिमा बुद्धि देत ह अउर सर्वसक्तीसाली परमेस्सर क जरिये दिया भवा साँस मनई क गियान देत ह।

9उमर मँ जेठ मनई ही नाहीं गियानी होत हीं। का बस बड़ी उम्र क लोग ही इ जानत हीं कि उचित का अहइ?

10एह बरे मई जउन कछू जानत हउँ तोहका कहत हउँ। तू पचे मोर बात सुना मई तू पचन्क बताउब कि मई का सोचत हउँ।

11जब तलक तू लोग बोलत रह्या, मई बाट जोहत रहा। मई तोहार बुद्धि सुनइ चाही रहा। मई खामूस रह्या जब तू पचे बोलइ बरे सोच बिचार किहस।

12मई तोहरे मर्म स भरे सब्दन क अथर्व क उत्तर देइ खातिर धियान स सुनत रहेउँ। मुला तीनउँ ही इ सिद्ध नाहीं कइ पाया कि अथर्व बुरा अहइ। तोहमाँ स कउनो भी अथर्व क तर्कन क जवाब नाहीं दइ पावा।

13तू लोगन क इहइ नाहीं कहइ चाही कि तू पचे गियान क पाइ लिहा ह। लोग नाहीं, परमेस्सर निहचय ही अथर्व क तर्कन क जवाब देइ।

14मुला अथर्व मोरे खिलाफत मँ नाहीं बोलत रहा, एह बरे मई ओन तर्कन क प्रयोग नाहीं करब जेकर प्रयोग तू पचे तीनहुँ किहा ह।

15अथर्व, तोहरे तीनहुँ मीत असमंजस मँ पड़ा अहइँ, ओनके लगे कछू भी अउर कहइ क नाहीं अहइ, ओनके लगे जवाब दइ बरे अउर कछू नाहीं अहइ।

16इ सबइ तीनहुँ लोग हिआँ चुप खड़ा अहइँ अउर ओनके लगे जवाब नाहीं अहइ। तउ का अबहिं भी मोका प्रतीच्छा करइ चाही?

17नाहीं! मई भी आपन जवाब देब। मई भी बताउब तू पचन्क कि मई का सोचत हउँ।

18काहेकि मोरे लगे कहइ क बहोत अहइ। मोरे भितरे जउन आतिमा अहइ, उ मोका बोलइ क मजबूर करत ह।

19मई आपन भितरे अइसी नई दाखरस सा हउँ, जउन हाली ही बाहेर उफनइ क अहइ। मई उ नई दाखरस मसक जइसा हउँ जउन हाली ही फट जाइ क अहइ।

20तउ निहचय ही मोका बोलइ चाही, तबहिं मोका नीक लागी। आपन मुँह मोका खोलइ चाही अउर मोका अथर्व क सिकाइतन क जवाब देइ चाही।

21इ बहस मँ मई कउनो क पच्छ नाहीं लेबइँ अउ अथर्व क वइसे ही पच्छ लेबउँ जइसे दूसर क होइ चाही। मई कउनो क खुसामद न करब।

22मई नाहीं जानत हउँ कि कइसे कउनो मनई क खुसामद कीन्ह जात ह। अगर मई कउनो क खुसामद करइ जानत तउ हाली ही परमेस्सर ओका सजा देत।

**33** “मुला अथर्व अब, मोर संदेस सुना। ओन बातन पइ धियान द्या जेनका मई कहत हउँ।

2मई आपन बात कहइ क तइयार हउँ। मई आपन सब्द चुनत हउँ।

3मोर मन सच्चा अहइ तउ मई सच सब्द बोलब। ओन बातन क बारे मँ जेनका मई जानत हउँ मई सच कहब।

4परमेस्सर क आतिमा मोका बनाएस ह, मोका सर्वसक्तीसाली परमेस्सर स जिन्नगी मिलत ह।

5अथर्व, सुना अउ मोका जवाब द्या अगर तू सोचत ह कि तू दइ सकत ह। आपन जवाबन क तइयार रखा ताकि तू मोहसे तर्क कइ सक्या।

6परमेस्सर क समन्वा हम दुइनउँ एक जइसे अहइँ, अउर हम दुइनउँ क ही उ माटी स बनाएस ह।

7अथर्व, तू मोहसे जिन डेरअ। मई तोहरे संग कठोर न होब।

8मुला अथर्व, मई सुनेउँ ह कि तू जउन कहा करत ह।

9तू इ कहे रह्या, ‘मई अथर्व, दोखी नाहीं हउँ, मई पाप नाहीं किहेउँ, या मई कछू भी अनुचित नाहीं करत हउँ।’

10अगर मई कछू भी अनुचित नाहीं किहेउँ, तउ भी परमेस्सर कछू खोट मोहमाँ पाएस ह। परमेस्सर सोचत ह कि मई अथर्व, ओकर दुस्मन हउँ।

11एह बरे परमेस्सर मोरे गोड़े मँ बेड़ी डावत ह, मई जउन कछू भी करत हउँ, उ लखत रहत ह।’

12मुला अथर्व, मई तोहका निहचय क संग बतावत हउँ कि तू इ बारे मँ गैर मुनासिब अहा। काहेकि परमेस्सर कउनो भी मनई स जियादा जानत ह।

13तू काहे सिकाइत करत अहा कि परमेस्सर तोहरे इलजाम जवाब नाहीं देत ह?

14मुला परमेस्सर निहचय ही हर उ बात क जेका उ करत ह स्पस्ट कइ देत ह। परमेस्सर अलग अलग रीति स बोलत ह मुला लोग ओका समुझ नाहीं पउतेन।

15-16होइ सकत ह कि परमेस्सर सपन मँ लोगन क काने मँ बोलत होइ, या कउनो दिव्यदर्शन मँ राति क जब उ



पचे आपन बिसतरा पड़ गहिर निदिया में होई। जब परमेस्सर क चितउनियन सुनत हीं तउ बहोतइ डर जात हीं।

17परमेस्सर मनइयन क बुरी बात करइ स रोकइ क होसियार करत ह, अउ ओनका अहंकारी बनवइ स रोकइ क।

18परमेस्सर मनइयन क मउत क देस में जाइ स बचावइ खातिर होसियार करत ह। परमेस्सर मनई क नास स बचावइ बरे अइसा करत ह।

19कउनो मनई परमेस्सर क वाणी तब सुन सकत ह जब उ बिस्तरे पड़ ओलरा होइ अउर परमेस्सर क सजा स दुःख भोगत होइ। उ मनई एँतनी गहिर पीरा में होता ह, कि ओकर हाइन दुःखत हीं।

20फुन अइसा मनई कछू खाइ नहीं सकत, उ मनई क एँतनी जियादा पीरा होत ह कि ओका सबन ते बढ़िया खइया क नहीं सोहात।

21ओकरे देहे क छय तब तलक होत जात ह, जब तलक उ कंकाल मात्र नहीं होइ जात, अउर ओकर सबइ हाइन नहीं देखींइ लग जातिन।

22अइसा मनई मउत क देस क निअरे होत ह, अउर ओकर जिन्गी मउत क निअरे होत ह।

23मुला होइ सकत ह कि कउनो सरगदूत, हजारन सरगदूत में स एक होइ जउन ओकरे उत्तिम चरित्तर क गवाही देइ।

24उ सरगदूत उ मनई पड़ दयालु होइ, उ दूत परमेस्सर स कही: 'महरबानी कइ क इ मनई क मउत क देस स बचा। एकर दाम चुकावइ क एक रस्ता मोका मिली गवा अहइ।'

25फिन मनई क देह जवान अउ खूब मजबूत होइ जाइ। उ मनई वइसा ही होइ जाइ जइसा उ तब रहा, जब उ जवान रहा।

26उ मनई परमेस्सर क स्तुति करी अउर परमेस्सर ओकरी स्तुति क जवाब देइ। फुन उ परमेस्सर क व्यक्तित्व में खुसी खुसी आइ जाब। अउर उ बहोत खुस होइ काहेकि परमेस्सर ओका ओकर ईमानदारी बरे बदला देहीं।

27फिन उ मनई मनइयन क समन्वा स्वीकार करी। उ कही: 'मई पाप किहे रहेउँ, भले क बुरा मई किहे रहेउँ, मुला मोका एहसे का मिला!

28परमेस्सर मउत क देस में गिरइ स मोर आतिमा क बचाएस। मई अउर जियादा जिअब अउर फुन स जिन्गी क रस लेब।'

29-30परमेस्सर मनई क संग ओका मउत क देस में दाखिल होवइ स रोक कइ अइसा बार-बार करत ह। अइसा मनई फिन जिन्गी क रस लेत ह।

31अय्यूब, धियान द्या अउर मोर बात सुना। तू चुप रहा अउर मोका कहइ द्या।

32अगर तोहार लगे कहइ बरे कछू अहइ तउ ओका कहा काहेकि मई तोहका निर्दोख लखइ चाहत हउँ।

33अय्यूब, अगर तोहका कछू नहीं कहइ क अहइ तउ तू मोर बात सुना। चुप रहा, मई तोहका बुद्धिमान बनवइ सिखाउबउँ।"

34 फिन एलीहू बात क जारी रखत भए कहेस:

2"अरे ओ गियानी मनइयो। तू पचे धियान स सुना जउन बातन मई कहत हउँ। अरे ओ चतुर लोगो, मोह पड़ धियान द्या।

3कान ओन सबन्क परखत ह जेनका उ सुनत ह, जइसेन जीभ जउने खइया क छुअति ह, ओकर सुआद पता करत ह।

4तउ आवा इ परिस्थिति क परखा अउर खुद फइसला करा कि उचित का बाटइ। हम संग संग सीखब कि का खरा बाटइ।

5अय्यूब कहेस: 'मई निर्दोख हउँ; मुला परमेस्सर मोरे बरे निस्पच्छ नहीं अहइ।

6मई निरीह अहउँ मुला लोग सोचत हीं कि मई बुरा अहउँ। उ पचे सोचत हीं कि मई एक झूठा हउँ अउर चाहे मई निर्दोख भी होउँ फुन भी मोर घाव नहीं भरि सकत।'

7अय्यूब क नाई कउनो भी मनई नहीं अहइ जेकर मुँह परमेस्सर क निन्दा स भरा रहत ह। अय्यूब बरे परमेस्सर क बेज्जती करइ में आसानी स पानी क पीवइ जइसा अहइ।

8अय्यूब बुरे लोगन क साथी अहइ अउर अय्यूब क बुरे लोगन क संगत भावत ह।

9काहेकि अय्यूब कहत ह 'अगर कउनो मनई परमेस्सर क हुकुम मानइ क जतन करत ह तउ एहसे उ मनई क कछू भी भला न होइ।

10"अरे ओ लोगो जउन समुझ सकत हवा, तउ मोर बात सुना, परमेस्सर कबहुँ भी बुरा नहीं करत ह। सर्वसक्तीमान परमेस्सर कबहुँ भी बुरा नहीं करी।

11परमेस्सर मनई क ओकर कीन्ह करमन क फल देइ। उ मनइयन क जउन मिलइ चाही, देइ।

12उ फुरइ अहइ परमेस्सर कबहुँ बुरा कारज नहीं करत ह। सर्वसक्तीसाली परमेस्सर सदा निस्पच्छ रही।

13कउनो इनसान ओका धरती क प्रभारी नहीं बनाएस। कउनो भी मनई ओका इ समूचइ जगत क जिम्मेदारी नहीं दिहस।

14अगर परमेस्सर ठान लेत तउ उ लोगन स जिन्गी क साँस लइ लेत ह।

15तउ धरती क सबहिं मनई मर जातेन, फिन सबहिं लोग माटी बन जातेन।

16"अगर तू पचे विवेकी अहा तउ तू पचे ओका सुनब्या जेका मई कहत हउँ।

17अइसा कउनो मनई जउन निआउ स घिना राखत ह सासक नहीं बन सकत ह। अय्यूब, का तू सोचत अहा कि तू परमेस्सर क दोखी साबित कइ सकत अहइ?

18सिरिफ परमेस्सर अइसा अहइ जउन राजा लोगन स कहत रहत ह कि 'तू पचे बेकार अहइ।' परमेस्सर नेता लोगन स कहत रहत ह कि 'तू पचे दुस्ट अहा।'

19परमेस्सर प्रमुखन स दूसर मनइयन क अपेच्छा अधिक पिरेम नहीं करत, अउर परमेस्सर धन्नासेठन क अपेच्छा गरीबन स जियादा पिरेम नहीं करत ह। काहेकि सबहिं क परमेस्सर रचेस ह।

20 होइ सकत ह रात में अचानक कउनो मनई मरि जाइ। परमेस्सर बहोत जल्दी ही लोगन क रोगी करत ह अउर उ पचे प्राण तउ देत हीं। परमेस्सर बगइर कउनो जतन क सक्तीसाली लोगन क उठाइ लइ जात ह।

21 मनई जउन करत ह परमेस्सर ओका देखत ह। मनई जउन भी चरण उठावत ह परमेस्सर ओका जानत ह।

22 कउनो जगहिया अइसी अँधियारा नाहीं अहइ, चाहे उ जगह कइसा भी अँधियारा होइ, जेह में कि कउनो भी दुस्ट मनई अपने क परमेस्सर स छुपाइ पावइस।

23 कउनो मनई बरे इ उचित नाहीं कि उ परमेस्सर स निआउ क अदालत में मिलइ क समइ निहचित करइ।

24 परमेस्सर क प्रस्नन क पूछइ क जरुरत नाहीं, मुला परमेस्सर बरिआरन क नस्ट करी अउर ओनकर जगह पइ कउनो अउर क बइठाई।

25 तउ परमेस्सर जानत ह कि लोग का कर हीं। एह बरे परमेस्सर राति में दुस्टन क हराई, अउर ओनका नस्ट कइ देइ।

26 परमेस्सर बुरे लोगन क ओनके बुरे करमन क कारण नस्ट कइ देइ अउर बुरे मनई क सजा क उ सब लखइ देइ।

27 काहेकि बुरे लोग परमेस्सर क आग्या मानइ क तजि दिहेन अउर उ पचे बुरे लोग परवाह नाहीं करत हीं ओन कामन क करइ क जेनका परमेस्सर चाहत ह।

28 ओन बुरे लोग गरीबन क दुःख दिहेन अउर ओनका मजबूर किहेन परमेस्सर क मदद बरे गोहरावइ क। गरीब मदद बरे गोहरावत ह, तउ परमेस्सर ओकर सुनत ह।

29 जब परमेस्सर खामोस रही क फइसला करत ह तउ कउनो मनई परमेस्सर क दोखी नाहीं ठहराइ सकत ह। अगर परमेस्सर आपना मुख छिपा लेत ह तउ कउनो भी रास्ट्र या कउनो मनई ओका नाहीं पाइ सकत ह।

30 तउ फुन एक तु अइसा मनई अहइ जउन परमेस्सर क खिलाफ अहइ अउर लोगन पइ जुलम करत ह। तउ परमेस्सर ओका राजा बनइ नाहीं दइ सकत ह।

31 होइ सकत ह कि कउनो परमेस्सर स कहइ, 'मई अपराधी हउँ अउर फुन मई पाप नाहीं करब।

32 हे परमेस्सर, तू मोका उ सबइ बातन सिखावा जउन मई नाहीं जानत हउँ। अगर मई कछू बुरा किहेउँ तउ फुन, मई ओका नाहीं करबउँ।'

33 मुला अथ्यूब, जब तू बदलइ क मना करत अहा, तउ का परमेस्सर तोहका वइसा प्रतिफल देइ, जइसा तू चाहत अहा? इ तोहार फइसला अहइ इ मोर नाहीं अहइ। तू ही बतावा कि तू का सोचत अहा?

34 कउनो भी मनई जेहमाँ विवेक अहइ अउर जउन समझत ह उ मोरे संग सहमत होइ। कउनो भी विवेकवाला मनई जउन मोर सुनत, उ कही,

35 'अथ्यूब, अबोध मनई क जइसी बातन करत अहा, जउन बातन अथ्यूब करत ह ओनमाँ कउनो सच्चाई नाहीं।'

36 मोर इ इच्छा अहइ कि अथ्यूब क परखइ क अउर भी जियादा कस्ट दीन्ह जाई। काहेकि अथ्यूब हमका अइसा जवाब देत ह, जइसा कउनो दुस्ट मनई जवाब देत होइ।

37 अथ्यूब पाप पइ पाप किए जात ह अउर ओह पइ उ बगावत किहेस। तोहरे ही समन्वा उ परमेस्सर क खिलाफ बहोत सारे इलाजाम लगावत रहत ह।"

**35** एलीहू कहत चला गवा। उ बोल।  
2 "अथ्यूब, इ तोहरे बरे कहब उचित नाहीं कि "मई अथ्यूब, परमेस्सर क खिलाफ निआउ पइ हउँ।"

3 अथ्यूब, तू परमेस्सर स पूछत अहा, 'मनई परमेस्सर क खुस कइके का पाई? अगर मई पाप न करउँ तउ मोका का फायदा होइ?'

4 अथ्यूब, मई तोहका अउ तोहरे मीतन क जउन हिआँ तोहरे संग अहई जवाब देइ चाहत हउँ।

5 अथ्यूब! ऊपर लख अकासे में निगाह उठाइके कि बादर तोहसे जियादा ऊँचा अहई।

6 अथ्यूब, अगर तू पाप करा तउ परमेस्सर का कछू नाहीं बिगड़त, अउर अगर तोहार पाप बहोत होइ जाई तउ ओहसे परमेस्सर क कछू नाहीं बिगड़त।

7 अथ्यूब, अगर तू भला अहा तउ एहसे परमेस्सर क भला नाहीं होत, तोहसे परमेस्सर क कछू नाहीं मिलत।

8 अथ्यूब, तोहार पाप खुद तोहरे जइसे मनई क नोस्कान पहुँचावत ही, तोहार नीक करम बस तोहरे जइसे मनई क ही भला करत हीं।

9 अगर बुरे मनइयन क संग अनिआउ होत ह अउर बुरा बेउहार कीन्ह जात ह, तउ उ पचे मदद क पुकारत हीं, उ पचे बड़के बड़के बरिआर क मदद पावइ क दोहाइ देत हीं।

10 मुला बुरे मनइयन परमेस्सर स मदद नाहीं माँगतेन। उ पचे नाहीं कहत हीं, 'परमेस्सर जउन हमका रचेस ह उ कहीं बा? परमेस्सर हम लोगन क रात में गावइ बरे गीत देत ह।

11 उ बुरे मनइयन इ नाहीं कहा करतेन कि, 'परमेस्सर जउन गोरु अउ चिरइयन स जियादा बुद्धिमान मनई क बनाएस ह उ कहीं बा?'

12 अगर बुरे लोग परमेस्सर क मदद पावइ क दुहाइ देत हीं तउ परमेस्सर ओनका जवाब नाहीं देत ह। काहेकि उ पचे बहोत घमंडी अउर बुरा होत हीं।

13 इ सच अहइ कि परमेस्सर ओनकर बेकार क दुहाई क नाहीं सुनी। सर्वसवतीमान परमेस्सर ओनेँ पइ धियान नाहीं देत।

14 अथ्यूब, इहइ तरह जब तू परमेस्सर क समन्वा आपन मामला पइ बहस कइ बरे इन्तजार करत ह, अउर अगर तू सिकायत करत ह कि उ तोहरे समन्वा प्रकट नाहीं होएह, तउ परमेस्सर तोहका जवाब नाहीं देब्या।

15 अथ्यूब, तू सोचत अहा कि परमेस्सर दुस्टन क सजा नाहीं देत ह अउर परमेस्सर पाप पइ धियान नाहीं देत ह।

16 एह बरे अथ्यूब आपन बेकार क बातन करत रहत ह। अथ्यूब बहोत बोलतह मुला उ नाहीं जानत कि उ का कहत रहत ह।"

**36** एलीहू बात जारी राखत भए कहेस।  
2 "अथ्यूब, मोरे संग तनिक देर अउर धीरा धरा। मई तोहका देखौंउब कि परमेस्सर क पच्छ में अबर्हि कहइ क अउर अहइ।"

3मई आपन गियान क सब स बाँटब। मोका परमेस्सर रचेस ह। मई जउन कछू भी जानत हउँ मई ओकर प्रयोग तोहका इ देखौवइ बरे करब कि परमेस्सर निस्पच्छ अहइ।

4अय्यूब, मई तोहका फुरइ कहत हउँ कि मई झूट नाहीं कहत हउँ। मई जानत कि मई का बात करत हउँ।

5परमेस्सर महान अहइ मुला उ आम लोगन क तुच्छ नाहीं समुझत ह। परमेस्सर बहोत सामर्थी बाटइ अउ विवेक स पूर्ण बाटइ।

6परमेस्सर दुट्ठ लोगन क जिअइ नाहीं देइ अउर परमेस्सर हमेसा गरीब लोगन क संग खरा बेउहार करत ह।

7उ सबइ लोग जउन मुनासिब बेउहार करत हीं, परमेस्सर ओनकर धियान राखत ह। उ राजा लोगन क संग ओनका सिंहासन देत ह अउर उ पचे सदा आदर पावत हीं।

8मुला अगर लोग सजा पावत होई अउर अउर बेड़ियन मँ जकरि गवा होई। अगर उ पचे पीरा भोगत रहत होई अउर संकटे मँ होई।

9तउ परमेस्सर ओनका बताई कि उ पचे कउन सा बुग करम किहेन ह। परमेस्सर ओनका बताई कि उ पचे पाप किहेन ह अउर उ पचे अहंकारी रहेन।

10परमेस्सर ओनका ओकर चिताउनी सुनइ क मजबूर करी। उ ओनका पाप करइ स रोकइ खातिर आदेस देइ।

11जदि लोग परमेस्सर क सुनिहीं अउर ओकर अनुसरण करिहीं तउ परमेस्सर ओनका खुसहाल दिन आनन्दित बरिस देब्या।

12मुला अगर उ पचे परमेस्सर क आग्या क नकारिहीं तउ उ पचे बिना जाने ही मउत क दुनिया मँ चला जइहीं।

13अइसे लोग जेनका परमेस्सर क परवाह नाहीं अहइ उ पचे सदा कडुवाहट स भरा रहत हीं। हिओँ तलक कि जब परमेस्सर ओनका सजा देत ह, उ पचे परमेस्सर स सहाय पावइ क विनती नाहीं करतेन।

14अइसे लोग जवान होत ही मरि जइहीं। उ पचे भ्रस्ट लोगन क संग सर्प स मरिहीं।

15मुला परमेस्सर दुखित लोगन क बचाव। परमेस्सर लोगन क जगावइ बरे विपत्ति पठवत ह ताकि लोग ओकर सुनईं।

16सचमुच मँ परमेस्सर तोहार दुख-मुसीबत मँ तोहार मदद करइ चाहत ह। उ तोहार बोझन क दूर करइ चाहत ह जउन तोहका कुचरत ह। उ तोहार मेजे पइ भरपूर खइया रखइ चाहत ह।

17किन्तु तू दोख, निर्णय अउर निआव क बातन स भरा भवा अहा!

18अय्यूब, तू आपन किरोध क परमेस्सर बरे संका क कारण जिन बना द्या। मुक्ति क बडा मूल्य तोहका राह स दूर भटकावइ क कारण जिन बना द्या।

19तू इ जान ल्या कि न तउ अब तोहार समूचा धन अउर न ही तोहार सक्ती तोहार मदद कइ सकत ह।

20तू राति क अवाई क इच्छा जिन करा। जब लोग आपन ठउरन स गाइब हो जात ह।

21अय्यूब, बुरा करम करइ स तू होसियार रहा। तोह पइ मुसीबतन पठइ गइ अहई ताकि तू पापे क ग्रहण न करा।

22लखा, परमेस्सर क सक्ती ओका महान बनावत ह। परमेस्सर सबहिं स महानतम सिच्छक अहइ।

23कउनो भी मनई परमेस्सर स नाहीं कह सकत ह कि का करब। कउनो भी परमेस्सर स नाहीं कहि सकत, 'परमेस्सर तू बुरा किहा ह।'

24परमेस्सर क कर्मन क बड़कइ करब तू जिन बिसरा। लोग गीत गाइके परमेस्सर क सबइ काम क बड़कइ किहेन ह।

25परमेस्सर क करम क हर कउनो मनई लखि सकत ह। दूर देसन क लोग ओन कर्मन क लखि सकत हीं।

26इ फुरइ अहइ कि परमेस्सर महान अहइ। ओकरी महिमा क हम नाहीं समुझ सकित ह। परमेस्सर क उमर क बरिसन क गनती क कउनो गन नाहीं सकत।

27परमेस्सर पानी क धरती स ऊपर उठावत ह अउर ओका बर्खा अउ कुहरा क रूप मँ बदल देत ह।

28परमेस्सर बादरन स लोगन पइ भरपूर पानी बरसावत ह।

29का कउनो मनइ इ ब्यान कइ सकत ह कि परमेस्सर कइसे बादरन क फैलावत ह, या ओकर घर, आकास मँ बिजुरि क गरज क समझ सकत ह?

30लखा, परमेस्सर कइसे आपन बिजुरी क अकासे मँ चारिहूँ कइँती बिखेरत ह अउर कइसे समुझदर क गहिरे हींसा क ढँपि लेत ह।

31परमेस्सर रास्टून क नियंत्रण मँ रखइ अउर ओनका भरपूर भोजन देइ बरे एन बादरन क उपयोग करत ह।

32परमेस्सर आपन हाथे स बिजुरी क पकरि लेत ह अउर जहाँ, उ चाहत ह, हुओँ बिजुरी क गिरइ क हुकुम देत ह।

33गर्जन लोगन क तूफाने क अवाई क चिताउनी देत ह। इ गर्जन दिखावत ह कि इ दुस्टता क खिलाफ किरोध मँ अहइ।

**37** "हे अय्यूब, जब एँन बातन क बारे मँ मई सोचत हउँ, मोर हिरदइ बड़े जोर स धक धक करत ह।

2हर कउनो सुनइ, परमेस्सर क वाणी बादर क गर्जन जइसी सुनाई देत ह। अनका गरजत भी ध्वनि क जउन परमेस्सर क मुँह स आवति अहइ।

3परमेस्सर आपन बिजुरी क सारे अकासे स होइके चमकइ क पठवत ह। उ सारी धरती क ऊपर चमका करत ह।

4बिजुरी क कौंधइ क पाछे परमेस्सर क गर्जन भरी वाणी क सुना जाइ सकत ह। परमेस्सर आपन अद्भुत वाणी क संग गरजत ह। जब परमेस्सर क वाणी गरजत ह तउ बिजुरी कौंधत ह तब।

5परमेस्सर क गरजत भइ वाणी अद्भुत अहइ। उ अइसे बड़े करम करत ह, जेनका हम समुझ नाहीं पावत अही।

6परमेस्सर बर्फ क हुकुम देत ह, 'तू धरती पइ गिरा' अउर परमेस्सर बर्खा स कहत ह 'तू धरती पइ जोर स बरसा।'

7परमेस्सर अइसा एह बरे कहत ह कि सबहिं मनई जेनका उ बनाएस ह जान लेइ कि उ का कइ सकत ह। उ ओकर प्रमाण अहइ।

8पसु आपन खोहन में पराइ जात हीं, अउर हुआँ ठहरा रहत हीं।

9ओनका कमरन स आँधी आवत हीं, अउ हवा सर्दि मोसम लियावत ह।

10परमेस्सर क साँस बर्फ बनवत ह, अउर समुद्दरन क जमाइ देत ह।

11परमेस्सर बादरन क जल स भरा करत ह, अउ बिजुरी क बादर क जरिये बिखेर देत ह।

12परमेस्सर बादरन क चारिहूँ कइँती मोड़ देत ह ताकि उ पचे उहइ कइ सकइ जेका उ ओनका करइ क हुकुम दिहेस ह उ पचे पुरी धरती पइ छाइ जात ह।

13परमेस्सर लोगन क सजा देइ बरे कबहुँ बाढ़ लिआवत ह। कबहुँ आपन सहानुभूती देखावइ बरे बादरन क पठवत ह अउर धरती पइ पानी बरसावत ह।

14अय्यूब, तू छिन बरे रुका अउ सुना। रुक जा अउ सोचा ओन अद्भुत कारजन क बारे में जेनका परमेस्सर किया करत ह।

15अय्यूब, का तू जानत अहा कि परमेस्सर बादरन पइ कइसे काबू राखत ह? का तू जानत ह कि परमेस्सर आपन बिजुरी क काहे चमकावत ह?

16का तू जानत ह कि आकास में बादर कइसे लटका रहत हीं। इ सबइ बादरन एक तु उदाहरण अहइँ। परमेस्सर क गियान संपूर्ण अहइ अउर इ सबइ बादर परमेस्सर क अद्भुत कारज अहइँ।

17मुला अय्यूब, तू इ सबइ बातन क नाहीं जानत ह। तू बस एँतना जानत अहा कि तोहका पसीना आवत ह अउर तोहार ओढ़ना तोहसे चिपका रहत हीं जब सब कछू आराम करत रहत होत ह अउर दक्खिन स गरम हवा बहत ह।

18अय्यूब, का तू परमेस्सर क मदद आकस मण्डल क तानइ में अउर ओका झलकत भए दर्पण क नाई चमकावइ में कइ सकत अहा?

19अय्यूब, हमका बतावा कि हम परमेस्सर स का कही? हम ओसे कछू भी कहइ क सोच नाहीं पाइत काहेकि हम पर्याप्त कछू भी नाहीं जानित।

20का परमेस्सर क बतावा जाइ कि मई ओकरे खिलाफ बोलइ चाहत हउँ। इ वइसे ही होइ जइसे आपन विनास माँगव।

21लखा, कउनो भी मनई चमकत भए सूरज क नाहीं लख सकत ह। जब हवा बादरन क उड़ाइ देत ह ओकरे पाछे उ बहोतइ उज्जवर अउ चमचमात भवा होत ह।

22अउ परमेस्सर भी ओकरे समान अहइ। परमेस्सर क सुनहरी महिमा चमकत ह। परमेस्सर अद्भुत महिमा क संग उत्तर कइँती स आवत ह।

23सर्वसक्तीमान परमेस्सर सचमुच महान अहइ, हम परमेस्सर क नाहीं जान सकित। परमेस्सर सदा ही लोगन क संग निआउ, अउ निस्पच्छ होइके बेउहार करत ह। उ कउनो लोग क संग ना इन्साफी क संग पीड़ा नाहीं देत ह। 24एह बरे लोग परमेस्सर क आदर करत हीं, मुला परमेस्सर ओन अभिमानी लोगन क आदर नाहीं देत ह जउन खुद क बुद्धिमान समुझत हीं।”

परमेस्सर अय्यूब स बोलत ह

**38** फिन यहोवा बौडर में स अय्यूब क जवाब दिहस। परमेस्सर कहेस।

2“इ कउन मनई अहइ जउन मूर्खता स भरी भइ बातन करत अहइ?”

3अय्यूब, तू मनई क तरह सुदृढ़ बना। जउन सवात मई पूछउँ ओकर जवाब देइ क तइयार होइ जा।

4अय्यूब, बतावा तू कहाँ रहया, जब मई भुइँया क रचना किहे रहेउँ? अगर तू एँतना समुझदार अहा तउ मोका जवाब दया।

5अय्यूब, अगर तू एँतना हाज़िर जवाब अहा तउ मोका बता कि इ संसारे क विस्तार कउन तय किहेस? कउन इ संसार क नापइ वाला सूत स नापेस?

6इ पृथ्वी क नीव काहे पइ धरी गइ अहइ? कउन पृथ्वी क नीव क रुप में सवन त जियादा महत्व क पाथर क धरेस ह?

7जब परमेस्सर अइसा करत रहेन तउ भोर क तारन एक संग खुस होइके गाना गाएन। अउर सरगदूतन खुस होइके चिल्ला उठेन।

8अय्यूब, जब सागर धरती क गरम स फूट बहत निकर, तउ कउन ओका रोकइ बरे दुआर क बँद किहे रहा।

9उ समइ मई बादरन स समुद्दर क ढाँपि दिहेउँ अउ अँधियारा में सागर क लपेट दिहे रहेउँ (जइसे गदेली क चादर में लपेटा जात ह।)

10“सागर क चउहद्दी मई निहचित किहे रहेउँ अउर ओहमाँ ताला डाइके दुआरन क पाछे रख दिहे रहेउँ।

11मई समुद्दरे स कहेउँ, ‘तू हिआँ तलक आइ सकत ह मुला अउर जियादा आगो नाहीं। तोहार घमण्डी लहरन हिआँ पइ रुकि जइहीं।’

12अय्यूब, का तू कबहुँ आपन जिन्गी में भोर क हुकुम दिहा ह निकरि आवइ अउर दिन क सुरु करइ क?

13अय्यूब, का तू कबहुँ भिन्सारे क प्रकास क धरती पइ छाइ जाइ क कहया ह अउर का कबहुँ ओहसे दुस्टन क लुकाइ क जगाहिया क तजि देइ क मजबूर करइ क कहया ह?

14जब भिन्सारे क प्रकास धरती पइ पड़त ह तउ धरती क रूप व आकृति अइसा प्रगट होत ह जइसे नरम मिट्टी क मुहर स दबाइ स होत ह। एकर रूप रेखा ओढ़नन क सलवटन क नाई उभरत ह।

15दुदूठ लोगन स प्रकास लइ लीन्हा गवा ह। नीक अउर ओन बाजूअन क जउन कि उ पचे बुरा करम करइ बरे उठाएस तोइ दीन्हा ग रहेन।

16अय्यूब, बतावा का तू कबहुँ सागर क गहिर तहे में गवा अहा जहाँ स सुरु होत ह? का तू कबहुँ सागर क स्त्रितों पइ चला अहा?

17अय्यूब, का तू कबहुँ उ फाटकन क लख्या ह, जउन मउते क लोक क लइ जात हीं? का तू कबहुँ ओन फाटकन क लख्या जउन मउत क अँधियर जगह क लइ जात हीं?

18अय्यूब, तू जानत अहा कि इ धरती केतनी बड़ी अहइ? तू मोका बतावा अउर तू इ सब कछू जानत अहा।

19अय्यूब, प्रकास कहीं स आवत अहइ? अउर अँधियारा कहा स आवत ह?

20अय्यूब, का तू प्रकास अउ अँधियारा क अइसी जगह लइ जाइ सकत ह जहाँ स उ सबइ आए होई? जहाँ उ सबइ रहत हीं हुअँ पइ जाइ क मारग का तू जानत अहा?

21अय्यूब, मोका निहचय अहइ कि तोहका सारी बातन मालूम अहई काहेकि तू बहोत ही बूढ़ा अहा। जब वस्तुअन क रचना भइ रही तब तू हुअँ रहया।

22अय्यूब, का तू कबहुँ ओन भण्डार क कोठरियन में गना अहा जहाँ मई बरफ अउ ओलन क धरा करत हउँ?

23मई बरफ अउ ओलन क विपत्ति क समइ में अउ जुद्ध अउर लड़ाई क समइ में उपयोग करइ बरे बचाए रखत हउँ।

24अय्यूब, का तू कबहुँ अइसी जगह गवा अहा, जहाँ स सूरज उगत ह अउ जहाँ स पुरवइया सारी धरती पइ छाइ जाइ बरे आवत ह?

25अय्यूब, भारी बर्खा बरे अकास में कउन नहर खोदेस ह, अउर कउन गरजनवाले बिजली क रस्ता बनाएस ह?

26अय्यूब, कउन हुअँ भी पानी बरसाएस, जहाँ कउनो भी नाही रहत ह?

27उ बर्खा उ खानी भुइँया क खूब देर क पानी देत ह अउ घास जामब सुरु होइ जात ह।

28अय्यूब, का बर्खा क कउनो बाप अहइ? ओस क बूँदन क कउन बनावत अहइ?

29अय्यूब, बरफ क महतारी कउन अहइ? आकास क पाला क कउन पइदा करत ह?

30पानी जमिके चट्टान जइसा कठोर बन जात ह, अउर सागर क ऊपर क सतह जम जावा करत ह।

31अय्यूब, सप्तर्षि तारन क का तू बाँध सकत ह? का तू मिरगसरा का बन्धन खोल सकत ह?

32अय्यूब, का तू तारा समूहन (कहकसौँ) क ठीक वेला पइ निकार सकत ह? का तू भालू क ओकरे बच्चन क संग अगुअइ कइ सकत ह?

33का तू ओन नेमन क जानत ह, जउन नभ पइ सासन करत हीं? का तू ओन नेमन क धरती पइ लागू कइ सकत ह?

34अय्यूब, का तू गोहराइके बादरन क आदेस दइ सकत ह, कि उ पचे भारी बर्खा क साथ घेरि लेईं।

35अय्यूब बतावा, का तू बिजुली क जहाँ चाहत्या पठइ सकत अहा? अउर का तोहरे निअरे आइके बिजुरी कही अय्यूब, 'हम हिअँ अही बतावा तू का चाहत ह?'

36मनई क मन में विवेक क कउन रखत ह? लोगन क चिजियन क समझइ बरे छमता कउन देत ह?

37अय्यूब, कउन आपन बुद्धि स बादरन क गनेस ह? कउन आकास क पानी क चाम थैले क उंडेल सकत ह?

38बर्खा धूरि क कीचंड बनाइ देत ह अउर माटी क लौँद आपुस में चिपक जात हीं।

39अय्यूब, का तू सिंह क आहार पाइ सकत ह? का तू मुखान सेसी क बच्चन क पेट भरि सकत ह?

40उ सबइ सेर आपन खोहन में पड़ा रहत हीं अउर सिकार बरे झाड़ी में दुबक क घात लगनवइ बरे बइठा रहत हीं।

41अय्यूब, कउआ क कबेला चारा पाए बगइर एहर ओहर भटकत भए परमेस्सर क दुहाइ देत हीं। कउन ओनका चारा देत ह?

**39** "अय्यूब, का तू जानत अहा कि कब पहाड़ी बोकरियन बियात हीं? का तू कबहुँ लख्या जब हिरणी बियात ह?

2अय्यूब, का तू जानत ह पहाड़ी बोकरियन अउ महतारी हरिणियन केतनी महीने आपन बच्चन क गर्भ में राखत हीं? का तोहका पता अहइ कि ओनकर बियाइ क उचित समइ का अहइ?

3का तू जानत ह क उ पचे बच्चा क जनम दइ बरे कब झुकत ह। का तू जानत ह कि उ पचे आपन बच्चन क कब जनम देत ह।

4पहाड़ी बोकरियन अउर हरिणी महतारी क बच्चन खेतन में हट्टा कट्टा होइ जात हीं। फुन उ पचे आपन महतारी क तजि देत हीं, अउर फुन लउटिके वापस नाही अउतेन।

5अय्यूब, जंगली गदहन क कउन अजाद छोड़ देत ह? कउन ओनकर रस्सन क खोलेस अउर ओनका बन्धन स अजाद किहस?

6इ मई परमेस्सर हउँ जउन बनेर गदहा क घर क रुप में रेगिस्तान दिहेउँ। मई ओनका रहइ बरे उजाड़ धरती दिहेउँ।

7बनेर गदहा सोर स भरा भवा सहसन क लगे नाही जात ह अउर कउनो भी मनई ओका काम करवावइ बरे नाही साधत ह।

8बनेर गदहन पहाड़न में घूमत हीं अउर उ पचे हुअँइ घास चरत रहत हीं। उ पचे हुअँइ पर हरिअर घास चरइ क हेरत रहत हीं।

9अय्यूब, बतावा, का कउनो जंगली सौँइ तोहरी सेवा बरे राजी होइ? का उ तोहरे चरही में राति क रुकी?

10अय्यूब, का तू जंगली बर्धा पइ जुआ रख कइ आपन खेत जोतँवाइ सकत ह? का घाटी क तोहरे वास्ते जोतँइ बरे उ पचन पइ जुआ रखइ जाब्या?

11जंगली सौँइ बहोत मजबूत होत ह। मुला का तू आपन काम करइ बरे ओन पइ भरोसा कइ सकत ह?

12का तू ओह पइ भरोसा कइ सकत ह कि उ तोहार अनाज बटोरइ अउर ओका दौँवइ मँइइ\* क खरिहाने में लिआवइ।

13सुतुरमुर्गा जब खुस होत ह उ आपन पंख फड़फड़ावत ह। मुला ओकर पंख सारस क पंख जइसे नाही होतेन।

14मादा सुतुरमुर्गा धरती पइ अण्डा देत ह। सबइ अण्डा रेत में गरम होइ जात ह।

**दौँवइ मँइइ** खेले क काठे क पाछे झुरान दाना ओर पउथा क खरिहाने में लिआवइ क बाद दाना क धिलका स अलग कीन्ह जात ह। पिटना सा या बर्धा क वैर्था क मँइइ अउ दौँवइ कीन्ह जात ह।

15मुला सुतुरमुर्ग बिसरि जात ह कि कउनो ओकरे अण्डन पइ चलिके कुचर सकत ह, या कउनो बनेर पसु ओनका तोड़ सकत ह।

16मादा सुतुरमुर्ग आपन नान्ह बच्चन पइ कठोर होइ जात ह जइसे उ पचे ओकर बच्चन नाहीं अहई। अगर ओकर बच्चन मरि भी जाई तउ भी ओका चिन्ता नाहीं होत ह, अउर ओकर सब काम अकारथ होत ह।

17परमेस्सर सुतुरमुर्ग क विवेक नाहिं दिहस, अउर उ ओका कउनो समझवारी नाहीं दिहस ह।

18मुला जब सुतुरमुर्ग दउड़इ क उठत ह तब उ घोड़न अउ ओकरे सवार पइ हँसत ह।

19अभ्युब, बतावा का तू घोड़न क बल दिहा अउर का तू ही ओकर गटई पइ फहराती अयाल जमाया ह?

20अभ्युब, बतावा जइसे टिड्डी कूद जात ह का तू वइसे घोड़ा क कुदाया ह? घोड़ा ऊँची अवाजे में हिनहिनात ह अउर लोग डेराइ जात हीं।

21घोड़ा घुस अहइ कि उ बहोत बलवान बाटइ अउर आपन खुरे स धरती क खनत रहत ह। जुद्ध में जात भवा घोड़ा तेज दौड़ जात ह।

22घोड़ा डरे क हँसी उड़ावत ह काहेकि उ कबहुँ नाहीं डेरत। घोड़ा कबहुँ भी जुद्ध स मुँह नाहीं मोड़त ह।

23घोड़ा क बगल में तरकस थिरकत रहत हीं। घोड़सवारन क भालन अउ हथियार धूपे में चमचमात रहत हीं।

24घोड़ा बहोत उत्तेजित अहइ, मैदान पइ उ तेज चाल स दउड़त ह। घोड़ा जब बिगुल क आवाज सुनत ह तब उ सान्त खड़ा नाहीं रहि सकत।

25बिगुल क ध्वनी पइ घोड़ा हिन हिनावत ह। उ बहोत ही दूर स जुद्ध क सूँघ लेत ह। उ सेना क सनापती क आदेस अउर जुद्धा क हाहाकार अउ जयजकार क सुन लेत ह।

26अभ्युब, का तू बाज क सिखाया आपन पखनन क फइलाउब अउर दक्खिन कइँती उड़ि जाब।

27अभ्युब, का तू उकाब क उड़इ क अउर ऊँच पहाड़न में आपन झोंझ बनावइ क आग्या देत ह?

28उकाब चट्टाने पइ रहा करत ह। ओकर किला चट्टान होत ह।

29उकाब किला स आपन सिकार पइ निगाह राखत ह। उ बहोत दूर स आपन सिकार क लिख लेत ह।

30गिद्ध क बच्चन लहू चाटा करत हीं। जहाँ भी लहासन पड़ा होत हीं हुवाँ गिद्ध बटुर जात हीं।”

40 यहोवा अभ्युब स कहत ह:

2“अभ्युब तू सर्वसक्तीमान परमेस्सर स तर्क किहा। तू मोर निन्दा किहस। अब तोहका जवाब दइ चाही।”

3एह पइ अभ्युब जवाब देत भए परमेस्सर स कहेस:

4“मई तउ कछू कहइ बरे बहोत ही तुच्छ हउँ। मई तोहसे का कहि सकत हउँ? मई आपन हाथ आपन मुँहे पइ रख लेब।

5मई एक दाई कहेउँ मुला अब मई जवाब नाहीं देबउँ। फुन मई दुबारा कहेउँ मुला अब अउर कछू नाहीं बोलब।”

6एकरे पाछे यहोवा आँधी में बोलत भए अभ्युब स कहेस।

7अभ्युब, तू मनई क तरह तइयार होइ ज। मई तोहसे कछू सवाल पूँछब अउर तू ओन सवालन क जवाब मोका देब्या।

8अभ्युब का तू सोचत अहा कि मई निआउ स पूरा नाहीं हउँ। का तू मोका बुरा काम करइ क दोखी मानत अहा ताकि तू इ देखौँइ सका कि तू उचित अहा?

9अभ्युब, बतावा का मोर सस्त्र एँतना सक्तीसाली अहई जेतना कि मोर (परमेस्सर) सस्त्र अहई! का तू आपन वाणी क ओतना ऊँच गरजिके बोल सकत ह जेतना मोर वाणी अहइ!?

10अगर तू वइसा कइ सकत ह तउ तू खुद क आदर अउर महिमा द्या अउ ओढ़ना क तरह वफादारी क सान क ओढ़ ल्या।

11अभ्युब, अगर तू मोरे समान अहा, तउ अभिमानी लोगन स घिना करा। अभ्युब, तू ओन अहंकारी लोगन पइ आपन किरोध बरसावा अउ तू ओनका विनम्र बनाइ द्या।

12हाँ, अभ्युब, ओन अहंकारी लोगन क लखा अउर तू ओनका विनम्र बनाइ द्या। ओन दुस्टन क तू कुचर द्या जहाँ भी उ पचे खड़ा होई।

13तू सबहिं घमण्डियन क माटी में गाड़ द्या अउर ओनकइ देहन पइ कफन लपेटिके तू कब्रन में धइ द्या।

14अभ्युब, अगर तू एँन सबइ बातन क कइ सकत ह तउ मई तहार परसंसा लरब काहेकि तू खुद क बचाइ सकत ह।

15अभ्युब, लखा मई उ बहमोथ (जलगजे)\* क पैदा किहउँ। अउर उ मई ही ह जउन तोहका बनाएउँ ह। उ बहमोथ उहइ तरह घास खात ह, जइसे गइया घास खात ह।

16बहमोथ क बदन में बहोत ताकत होत ह। ओकरे पेटे क माँसपेसियन बहोत ताकतवर होत हीं।

17बहमोथ क पूँछ मजबूत अइसी होत ह जइसे देवदार क बृच्छ खड़ा रहत ह। ओकरे गोड़े क माँसपेसियन बहोत मजबूत होत हीं।

18बहमोथ क हाड़न काँसा क तरह मजबूत होत हीं, अउर गोड़ ओकरे लोहे क ढूँडन जइसे।

19बहमोथ महानतम पसु अहइ जेका मई बनाएउँ ह। हिआँ तलक कि ओकर सिरजनहार भी ओका लगे तरवार लइ क जात ह।

20बहमोथ ओन घासे क खात ह जउन पहाड़े पइ उपजत ह जहाँ बनेर पसु खेलत हीं।

21बहमोथ कमल क पउधन क नीचे सोवत रहत ह अउ कीचंड में सरकण्डन क आड़ में छुपा रहत ह।

22कमल क पउधन बहमोथ क आपन छाया में छिपावत हीं। उ बेंत क पेड़न क खाले रहत ह, जउन नदी क निचके उगत हीं।

**बहमोथ (जलगजे)** इ स्पसट नाहीं अहइ कि इ कउन तरह क जानेबर अहइ। होइ सकत ह कि इ दरियाइ घोड़ा अहइ या हाथी।

23 अगर नदी में बाढ़ आइ जाइ तउ भी जलगज परत नार्ही ह। अगइ यरदन नदी भी ओकरे मुँह पइ थपड़ियावइ तउ भी उ डेरत नार्ही ह।

24 बहमोथ क कउनो भी हुक लगाइ क नार्ही पकड़ सकत ह। कउनो भी ओका जाली में नार्ही फँसाइ सकत।

### अय्यूब क यहोवा बरे जवाब

**41** “अय्यूब, बतावा, का तू लिब्यातान क कउनो मछरी क काँटा स धइ सकत ह? का तू एकर जिभ क रस्सी स बंध सकत ह?

2 अय्यूब, का तू लिब्यातान क नाक में नकेल डाइ सकत ह? या ओकरे जबड़न में काँटा फँसाइ सकत ह?

3 अय्यूब, का तू लिब्यातान क अजाद होइके बरे तोहसे बिनती करी? का उ तोहसे मीठी मीठी बातन करी?

4 अय्यूब, का लिब्यातान तोहसे सन्धि करी अउर सदा तोहरी सेवा क तोहका वचन देइ?

5 अय्यूब, का तू लिब्यातान क वइसे ही खेलब्या जइसे तू कउनो चिड़िया स खेलत ह? का तू ओका रस्सा स बँधब्या जेहसे तोहार दासियन ओहसे खेल सकइँ।

6 अय्यूब, का तू मछुआरा लिब्यातान क तोहसे बेसहइ क कोसिस करिहीं? का उ पचे ओका कटिहीं अउर ओनका बइपारियन क हाथे बेचि सकिहीं?

7 अय्यूब, का तू लिब्यातान क खाल में अउर माथे पइ भाला फेंक हमला कइ सकत ह?

8 अय्यूब, लिब्यातान पइ अगर तू हाथ डवा तउ जउन भयंकर जुद्ध होइ, तू कबहुँ भी बिसारि नार्ही पउब्या अउर फुन तू ओहसे कबहुँ जुद्ध न करब्या।

9 अउर अगर तू सोचत ह कि तू लिब्यातान क पकड़ सकत ह, तउ इ बात क तू भूल जा। काहेकि ओका पकड़इ बरे कउनो आसा नार्ही अहइ। तू तो बस ओका लखइ भर स ही डेराइ जाब्या।

10 कउनो भी एतना वीर नार्ही अहइ, जउन लिब्यातान क जगाइके भइकावइ। तउ फुन अय्यूब बतावा, मोरे विरोध में कउन टिक सकत ह?

11 कउनो भी मनई जउन कि मोहे स मुकाबला करब उ सुउच्छित नार्ही रब्या। सारे अकासे क खाले जउन कछू भी अहइ, उ सब कछू मोर ही अहइ।

12 अय्यूब, मई तोहका लिब्यातान क सकती क बारे में बताउब। मई ओकर सकती अउर ओकरे रुप क सोभा क बारे में बताउब।

13 कउनो भी मनई ओकर बाहरी आवरण(खाल) क भेद नार्ही सकत। ओकर खाल दोहरी कवच क नाई अहइ।

14 लिब्यातान क कउनो भी मनई मुँह खोलइ बरे मजबूर नार्ही कइ सकत ह। ओकरे जबड़े क दाँत सबहि क भयभीत करत हीं।

15 लिब्यातान क पिठिया पइ ढालन क कतार होत हीं, जउन आपुस में स जुड़ी होत हीं।

16 इ सबइ ढालन आपुस में एँतनी सटी होत हीं कि हवा तलक ओहमें प्रवेस नार्ही कइ पावत ह।

17 इ सबइ ढालन एक दूसर स जुड़ी होत हीं। उ सबइ मजबूती स एक दुसरे स जुड़ी भई अहइ कि कउनो भी ओनका उखाड़िके अलग नार्ही कइ सकत।

18 लिब्यातान जब छींकत ह तउ अइसा लागत ह जइसे बिजली सी कौंध गइ होइ। आँखी ओकर अइसी चमकत हीं जइसे कउनो तेज प्रकास होइ।

19 ओकरे मुँहना स बरत भइ मसाल निकरत हीं, अउर ओहसे आगी क चिनगारियन बिखत हीं।

20 लिब्यातान क नथुनन स धुआँ अइसा निकरत ह, जइसे उबलत भइ हँड़ी स भाप निकलत होइ।

21 लिब्यातान क फूँक स कोयला सुलग उठत हीं अउर ओकरे मुँह स लपक निकरत हीं।

22 लिब्यातान क गटई बड़ी जबरदस्त अहइ, अउर लोग ओसे उरिंके दूर पराइ जात हीं।

23 ओकरे खाल में कहीं भी कोमल जगह नार्ही अहइ। उ लोहा क तरह कठोर अहइ।

24 लिब्यातान क हिरदइ चट्टान क तरह होत ह। ओकर हिरदइ चक्की क नीचे क पाट क तरह सख्त अहइ।

25 लिब्यातान स सरगदूत भी डर जात हीं। लिब्यातान जब फूँछ फटकारत ह, तउ ओन सबइ भाग जात हीं।

26 लिब्यातार पइ जइसे ही भालन, तीर अउ तरवार पड़त हीं उ सबइ उछरिंके दूर होइ जात हीं।

27 लोहा क मोटी छड़न क उ तिनका जइसा अउर काँसा क सड़ी लकड़ी क तरह तोड़ देत ह।

28 बाण लिब्यातान क नार्ही भगाइ पावत हीं। ओह पइ पाथर फेंकना, एक सुखा तिन्का फेंकन क नाई अहइ।

29 लिब्यातान पइ जब मुगदर पड़त ह तउ ओका अइसा लागत ह माना उ कउनो बिनका होइ। जब लोग ओह पइ भालन फेंकत हीं, तब उ हँसा करत ह।

30 विब्यातान क पेट क नीचे सिरा टूटा भए मट्टी क बासन क नाई तेज अहइ। जब उ चलत ह तउ कीचड़ में अइसा निसान छोड़त ह माना कि खेतन में हेगा लगावा गवा होइ।

31 लिब्यातान पानी क अइसे मथत ह, माना कउनो हाइन उबलत होई। उ अइसे बुलबुले बनावत ह माना बासन में खउलत भवा तेल होइ।

32 लिब्यातान जब सागर में तैरत ह तउ आपन पीछे उ सफेद झागन जइसी रह छोड़त ह, जइसे कउनो उज्जर बारे क सफेद बिसाल फूँछ होइ।

33 लिब्यातान सा कउनो अउर जन्तु धरती पइ नार्ही अहइ। उ अइसा पसु अहइ जेका निडर बनाव गवा।

34 उ हर एक घमण्डी जानेबर क ऊपर नजर रखत ह। सबहि जंगली पसुअन क उ राजा अहइ।”

### अय्यूब क यहोवा क जवाब

**42** एँह पइ अय्यूब यहोवा क जवाब देत भए कहेस।  
2 “यहोवा, मई जानत हउँ कि तू सब कछू कइ सकत अहा। तू सबइ योजना बनाइ सकत अहा अउर तोहर सबइ योजना क कउनो भी नार्ही बदल सकत अउर न ही ओका रोका जाइ सकत ह।

3यहोवा, तू इ सवाल पूछ्या कि 'इ अबोध मनई कउन अहइ? जउन इ सबइ मूर्खता स भरी बातन कहत अहइ?' यहोवा, मई ओन चीजन क बारे में बातन किहेउँ जेनका मई समझत नाहीं रहेउँ। यहोवा, मई ओन चीजन क बारे में बातन किहेउँ जउन मोरे समुझ पावइ बरे बहोत अचरज भरी रहिन।

4यहोवा, तू मोसे कह्या, 'हे अय्यूब सुना अउर मई बोलब। मई तोहसे सवाल पूँछब अउर तू मोका जवाब देब्या।'

5यहोवा, बीते भए काल में मई तोहरे बारे में सुने रहेउँ मुला खुद आपन आँखिन स मई तोहका देखि लिहेउँ ह।

6एह बरे अब मई खुद आपन बरे लज्जात हउँ। मई आपन जिन्नगी क राह बदलइ क इच्छा दिखावइ बरे धूर अउर राखी में बैठा करत हउँ।"

### यहोवा क अय्यूब क संपत्ति क लउयउब

7यहोवा जब अय्यूब स आपन बात कइ चुका तउ यहोवा तेमान क निवासी एलीपज स कहेस: "मई तोहसे अउर तोहरे दुइनउ दोस्तन स कोहान हउँ काहेकि तू मोरे बारे में उचित बातन नाहीं कहे रह्या। मुला अय्यूब मोरे बारे में उचित बात कहे रहा। अय्यूब मोर दास अहइ।

8एह बरे अब एलीपज तू सात बर्धा अउर सात ठु भेड़िन लइके मोर दास अय्यूब क लगे जा अउर आपन बरे होमबलि क रुप में ओनकर भेंट चढ़ावा। मोर सेवक अय्यूब तोहरे बरे पराथना करी। तब निहचइ ही मई ओकरी पराथना क जवाब देबउँ। फुन मई तोहका वइसी सजा नाहीं देब जइसे सजा दीन्ह जाइ चाही रही काहेकि तू बहोतई मूरख रह्या। मोरे बारे में उचित बातन नाहीं किह्या जबकि मोरे सेवक अय्यूब मोरे बारे में उचित बातन कहे रहा।"

9तउ तेमान क निवासी एलीपज, सूह क निवासी बिल्दद

अउर नामात क निवासी सोपर यहोवा क आग्या क मानेस। एँह पइ यहोवा अय्यूब क पराथना सुन लिहस।

10इ तरह जब अय्यूब आपन मीतन बरे पराथना कइ चुका तउ यहोवा अय्यूब क फुन स कामयाब किहेस। परमेस्सर जेतना ओकरे लगे पहिले रहा, ओहसे भी दुगुना ओका दइ दिहस।

11अय्यूब क सबहिं भाई अउ बहिनियन अय्यूब क घर वापस आइ गएन अउर हर कउनो जउन अय्यूब क पहिले जानत रहा, ओकरे घरे आवा। अय्यूब क संग उ सबइ एक बड़की दावत में खाना खाएन। काहेकि यहोवा अय्यूब क बहोत कस्ट दिहे रहा, एह बरे उ पचे अय्यूब क दिलासा दिहन। ओन में स हर कउनो अय्यूब क सोने क सिक्का अउर सोना क कान क बाली भेंट में दिहस।

12यहोवा अय्यूब क जिन्नगी क पहिले हींसा स भी जियादा ओकरी जिन्नगी क पिछला हींसा क आपन आसीर्वाद दिहस। अय्यूब क लगे चौदह हजार भेड़, छः हजार ऊँट, दो हजार बैल जउर एक हजार गदहिन होइ गइन। 13अय्यूब क सात पूत अउ तीन बितियन भी होइ गइन। 14अय्यूब आपन सब स बड़की बितिया क नाउँ राखेस यामीना। दुसरकी बितिया क नाउँ धेरस कसीआ। अउर तीसरी क नाउँ राखेस केरेन्हप्पूक। 15सारे प्रदेस में अय्यूब क बितियन सब स सुन्नर मेहररुअन रहिन। अय्यूब आपन पूतन क साथ आपन दौलत क एक हींसा आपन बितियन क भी वसीयत में दिहस। 16एकरे पाछे अय्यूब एक सौ चालीस साल तलक अउर जिअत रहा। उ आपन बच्चन, आपन पोतन, आपन परपोतन अउर परपोतन क भी संतानन यानी चार पीढ़ियन क लखइ बरे जिअत रहा। 17जब अय्यूब क मउत भइ, उ समइ उ बहोत बुढ़ान रहा। ओका बहोत नीक अउर लम्बी जिन्नगी प्राप्त भइ रही।



# एस्तेर

## महारानी वसती क जरिये राजा क आग्या क उल्लंघन

**1** इ ओन दिनन क बात अहइ जब छयर्स नाउँ क राजा राज् किया करत रहा। भारत स लइके कूस क एक सौ सताईस प्रान्तन पइ ओनकर राज् रहा। **2**महाराजा छयर्स, सूसन नाउँ क नगरी, जउन राजधानी भवा करत रही, मैं अपने सिंहासन स सासन चलावा करत रहा।

**3**अपने सासन क तीसरे बरिस मैं, छयर्स अपने अधिकारियन अउ मुखिया लोगन बरे एक भोज क प्रबंध किहेस। फारस अउ मादै क फउज क मुखियन अउ दूसर महत्वपूर्ण मुखियन अउ प्रान्तीय अधिकारियन उ भोज मैं मौजूद रहेन। **4**इ भोज एक सौ अस्सी दिन तलक चला। इ समइ क दौरान, महाराजा छयर्स अपने राज् क महान सम्पत्ति अउ आपनी महानता क भव्य सुन्नरता देखावत रहा। **5**एकरे पाछे जब एक सौ अस्सी दिन क इ भोज समाप्त भवा, तउ महाराजा छयर्स एक ठु अउर भोज दिहेस जेहमाँ सूसा क जिला महल क सबहिँ लोगन साथ ही महत्वपूर्ण अउ बे-महत्वपूर्ण लोगन क बोलवा गवा रहा। इ भोज सात दिन तलक चला। इ भोज क आयोजन महल क भतीरी बगीचे मैं कीन्ह गवा रहा। **6**भोज क जगह सफेद अउ नीले रंग क मलमल सूती कपड़न स सजावा ग रहा। इ बैंगनी रंग की डोरियन स पकड़ा रहा। उ संगमर क खम्भन क बीच मैं चाँदी क छड़न दुआरा लटकत रहा। हुवाँ सोने अउ चाँदी क चौकियन रहिन। इ सबइ चौकियन लाल अउ सफेद रंग क अइसी स्फटिक क भूमितल मैं जुड़ी भई रहिन जेहमाँ संगमरमर, प्रकेलास, सीप अउ दूसर कीमती पाथर जड़े रहेन। **7**सोने क पियालन मैं दाखरस परोसा गवा रहा। हर पियाला एक दूसरे स अलग रहा। महाराजा क ओकर महान सम्पत्ति क अनुसार दाखरस परोसा गवा रहा। **8**महाराजा अपने सेवकन क आग्या दिहेस कि हर कउनो मेहमेन क जेतना दाखरस उ चाहे ओतनी दीन्ह जाइ। **9**राजा क महल मैं ही महारानी वसती भी मेहररुअन क एक ठु भोज दिहस। **10**भोज क सातएँ दिन, महाराजा छयर्स दाखरस पिअइ क कारण मगन रहा। उ ओन सात हिजड़न क आग्या दिहस जउन ओकर सेवा किया करत रहेन। एन हिजड़न क नाउँ रहेन: गहूमान, बिजता, हबौना, बिगता, अबगता, जेतेर अउर कर्कस। महाराज आपन सेवकन क आग्या किहेस **11**उ पचे राजमुकुट धारण किए भए महारानी वसती क ओकरे लगे लिआवई। उ चाहत रहा कि उ मुखिया लोगन अउर महत्वपूर्ण लोगन क अपनी सुन्दरता देखाइ काहेकि उ फुरइ बहोत सुन्नर रही।

**12**मुला उ सेवकन जब राजा क आदेस क बात महारानी वसती स कहेन तउ उ हुवाँ जाइ स मना कइ

दिहस। राजा बहोत कोहाइ गवा अउर उ ओह पइ क्रोध स जरइ लाग। **13-14**एह बरे महाराज इ ताज़ा घटना क बारे मैं अपने अनुभवी मनइयन स बात किहेस। इ रीति रहा कि राजा अपने अनुभवी मनइयन स नेम अउ सज़ा क बारे सलाह लेत रहत रहेन। इ सबइ अनुभवी मनई महाराजा क बहोत निचके रहेन। एनकर नाउँ रहेन: कर्सना, सेतार, अदमाता, तर्सीस, मेरेस, मर्सना अउर ममूकान। इ सबइ सातहुँ फारस अउर मादै क बहोत महत्वपूर्ण अधिकारी रहेन। एके लगे राजा स मिलइ क बिसेस अधिकार रहा। उ पचे राज् मैं सबन त उच्च अधिकारी रहेन। **15**राजा ओन लोगन स पूछेस, “महारानी वसती क संग का कीन्ह जाइ? इ बारे मैं नेम का कहत ह? उ महाराजा छयर्स क उ मोर आग्या क मानइ स मना कइ दिहस जेका हिजड़न ओकरे लगे लइ गए रहेन।”

**16**एह पइ दूसर अधिकारियन क उपस्थिति मैं महाराजा स ममूकान कहेस, “महारानी वसती अपराध किहस ह। महारानी महाराजा क संग-संग सबहिँ मुखिया लोगन अउर महाराजा छयर्स क सबहिँ प्रदेसन क लोगन क बिरुद्ध अपराध किहेस ह। **17**मई अइसा एह बरे कहत हउँ कि दूसर मेहररुअन जउन महारानी वसती किहस ह, ओका जब सुनिहीं तउ उ पचे अपने भतारन क आग्या मानब बंद कइ देइहीं। उ पचे अपने भतारन स कहिहीं, ‘महाराराजा छयर्स महारानी वसती क अपने लगे लिआवइ क आग्या दिहे रहा किन्तु उ आवह स मना कइ दिहस।’

**18**“आनु फारस अउ मादै क मुखिया लोगन क मेहररुअन, रानी जउन किहे रही, सुनि लिहन ह अउर लखा अब उ सबइ मेहररुअन भी जउन कछू महारानी किहस ह, ओहसे प्रभावित होइहीं। उ सबइ मेहररुअन राजा लोगन क महत्वपूर्ण मुखिया लोगन क संग वइसा ही करिहीं अउर इ तरह बहोत जियादा अनादर अउर क्रोध फइल जाइ। **19**तउ जदि महाराजा क अच्छा लगइ तउ एक ठु सुआव इ अहइ: महाराजा क एक राजाग्या देइ चाही अउर ओका फारस अउ मादै क नेम मैं लिख दीन्ह जाइ चाही एह बरे इ नेम ना ही बदला जाइ सकत ह या न ही संसोधन कीन्ह जाइ सकत। राजा क आग्या इ होइ चाही: महाराजा छयर्स क समन्वा रानी वसती अब कबहुँ न आवइ। साथ ही महाराजा क रानी क पद भी कउनो अइसी मेहररुअन क देइ चाही जउन ओहसे उत्तम होइ। **20**फुन जब राजा क इ आग्या ओकरे बिसाल राज् क सबहिँ हीसन मैं घोसित कीन्ह जाइ, तउ सबहिँ मेहररुअन अपने भतारन क आदर करइ लागिहीं, चाहे ओकर भतारन महत्वपूर्ण लोग अहइ या न अहइ।”

21इ सुआव स महाराजा अउर ओकर बड़े-बड़े अधिकारी सबहिं खुस भएन। तउ महाराजा छयर्स वइसा ही किहस जइसा ममूकान सुझाए रहा। 22महाराजा छयर्स अपने राज क सबहिं प्रान्तन में पत्रन पठइ दिहस। हर प्रान्त में जउन पत्रन पठवा गवा, उ उहइ प्रान्त क लिपि में लिखा गवा रहा। हर जाति में उ ओकरे भाखा में पत्रन पठएस। उ पचे पत्रन में हरेक व्यक्ति क भाखा में इ घोसना कीन्ह ग रहेन कि हरेक मनई क आपन परिवार पइ नियंत्रण रखइ क होइ।

### एस्तेर महारानी बनाई गइ

2 आगे चलिके महाराजा छयर्स क क्रोध सान्त भवा तउ ओका वसती अउर वसती क कार्य याद आवइ लागेन। वसती क बारे में उ जउन आदेस दिहे रहा, उ भी ओका याद आवा। 2एकरे पाछे राजा क निजी सेवकन ओका एक ठु सुझाव दिहन। उ पचे कहेन, “राजा क बरे सुन्नर कुँवारी कन्यन क खोज करा। 3हे राजा, तोहका अपने राज क हर प्रान्त में नेतन क चुनाव करइ चाही। फुन ओन नेतन लोगन क चाही कि उ पचे सुन्नर कुँवारी कन्याओं क सूसन क जिला महल में लइके आवई। उ पचे लइकियन राजा क हरम सरा में तोहार दूसरी मेहररूअन क संग रहब। उ पचे हेगे क देख-रेख में रखी जइहीं। हेगे महाराजा क हिजड़ा जउन कि ओन मेहररूअन क निगारोंकार अहइ। फुन ओनका सुन्नरता क प्रसाधन दीन्ह जाई। 4फुन उ लरकी जउन राजा क भावइ, वसती क जगह पइ राजा क नई महारानी बनाइ दीन्ह जाइ।” राजा क इ सुआव बहोत अच्छा लगा। तउ उ एका अंगीकार कइ लिहस।

5बिन्यामीन परिवार समूह क मोर्दकै नाउँ क एक ठु यहूदी हुवाँ रहा करत रहा। मोर्दकै याईर क पूत रहा अउर याईर सिमी क पूत रहा अउर सिमी कीस क पूत रहा। सूसन क महल प्रान्त में रहत रहा। 6ओहका यरुसलेम स बाबेल क राजा नबूकदनेस्सर बंदी बनाइके लइ गवा रहा। उ यहूदा क राजा यकोन्याह क संग उ दल में रहा, जेका बंदी बनाइ लीन्ह गवा रहा। 7मोर्दकै क हदस्सा नाउँ क एक चचेरी बहिन रही। उ अनाथ रही। न ओकरे बाप रहा, न महतारी। तउ मोर्दकै ओकर धियान रखत रहा। मोर्दकै ओकरे महतारी बाप क मरइ क पाछे ओका अपनी बितिया क रूप में गोद लइ लिहे रहा। हदस्सा क नाउँ एस्तेर भी रहा। एस्तेर क मुँह अउ ओकरे तने क बनावट बहोत सुन्नर रही।

8जब राजा क आदेस सुनावा गवा, तउ सूसन क जिला महल में बहोत स जवान मेहररूअन क लिआवा गवा। ओन जावान मेहररूअन क हेगेक देख-रेख में रख दीन्ह गवा। एस्तेर एनहीं जवान मेहररूअन में स एक रही। एस्तेर क राजा क महल में लइ जाइके हेगे क देख-रेख में रख दीन्ह गवा रहा। हेगे मेहररूअन क महल क निगारोंकार रहा। 9हेगे क एस्तेर बहोत अच्छी लगी। उ ओकर मनपसंद बन गइ। हेगे हाली ही सुन्नरता क उपचार अउ जरूरी भोजन ओका दिहस। हेगे राजा क महल स सात दासियन चुनेस अउ ओनका एस्तेर क दइ दिहस। अउर एकरे पाछे हेगे एस्तेर अउ ओकर सातहुँ दासियन क जहाँ राजघराने क मेहररूअन रहा करत रहिन। 10एस्तेर इ बात कउनो क नाहीं

बताएस कि उ एक यहूदी अहइ। काहेकि मोर्दकै ओका मना कइ दिहे रहा, एह बरे उ अपने परिवार क पृष्ठभूमि क बारे में कउनो क कछू नाहीं बताएस। 11मोर्दकै जहाँ रनवास क मेहररूअन रहा करत रहिन, हुवाँ आसपास अउर आगे पाछे घूमा करत रहा। उ इ पता लगावइ चाहत रहा कि एस्तेर कइसी अहइ अउर ओकरे संग का कछू घटत अहइ? एह बरे उ अइसा करत रहा।

12एहसे पहिले कि राजा छयर्स क लगे जाइ क बरे कउनो लइकी क बारी आवत, ओका इ सब करइ क पड़त रहा। बारह महीने तलक ओका सुन्नरता उपचार करइ पड़त रहा यानी छः महीने तलक ओका गंधरस क तेल लगावा जात अउर छः महीने तलक सुगंधित द्रव्य अउर तरह-तरह क प्रसाधन सामग्रियन क उपयोग करइ होत रहा। 13रीति क अनुसार जब कउनो जवान लइकी राजा क लगे जाइ ओनका उ सबहिं दीन्ह जात ह जेका उ मेहरारू महल स राजा क महल में लेइ जात चाहत ह। 14सौँझ क समइ उ लइकी राजा क महल में जात अउर भिंसारे दूसर मेहरारू क महल में उ लउटि आवत। फुन ओका सासगज नाउँ क मनई क देखरेख में रख दीन्ह जात। सासगज राजा क हिजड़ा रहा जउन राजा क रखैलन क अधिकारी रहा। जदि राजा ओहसे खुस न होता, तउ उ लइकी फुन कबहुँ राजा क लगे न जात। अउर जदि राजा ओहसे खुस होत तउ ओका राजा नाउँ लइके वापस बोलावत।

15जब एस्तेर क राजा क लगइ जाइ क बारी आइ, तउ उ कछू नाहीं पूछेस। उ राजा क हिजड़ा, हेगे स, जउन रनवास क आधिकारी रहा, बस उहइ लिहस जउन हेगे ओका आपन संग लेइ क कहेस। (एस्तेर उ लइकी रही जेका मोर्दकै गोद लइ लिहे रहा अउर जउन ओकरे चाचा अबीहैल क बितिया रही।) एस्तेर क जउन कछू भी लखत, ओका पसंद करत रहा। 16तउ एस्तेर क महाराजा छयर्स क महल में लइ जावा गवा। इ उ समइ भवा जब ओकरे राजकाल क सताएँ बरिस क तेबत नाउँ क दसवाँ महीना चलत रहा।

17राजा एस्तेर कउनो भी अउर लरकी स जियादा पियेम किहस अउर उ ओकर कृपा पाएस। कउनो भी दूसर लरकी स जियादा, राजा क उ भाइ गइ। तउ राजा छयर्स एस्तेर क मूँड़ि पइ मुकुट पहिराइके वसती क जगह पइ नई महारानी बनाइ लिहस। 18तब राजा एस्तेर क बरे एक बहोत बड़का भोज दिहस। इ भोज ओकरे महत्वपूर्ण मनइयन अउर मुखिया लोगन क बरे रही। उ सबहिं प्रान्तन में छुट्टी क घोसणा कइ दिहस। लोगन क ओकरे साही सम्पत्ति क अनुसार उपहार दिहस।

### मोर्दकै क एक बहोत बुरी योजना क पता चला

19मोर्दकै उ समइ राजदुआर क निअरे ही बइठा रहा, जब दूसरी दाई लरकियन क एकट्ठा कीन्ह गवा रहा। 20एस्तेर भी अबहुँ भी इ रहस्य क छुपाए भए रही कि उ एक यहूदी रही। अपने परिवार क पृष्ठभूमि क बारे में उ कउनो क कछू नाहीं बताए रही, काहेकि मोर्दकै ओका अइसा करइ स रोक दिहे रहा। उ मोर्दकै क आग्या क अब

भी वइसे पालन करत रही, जइसे उ तब किहे, करत रही, जब उ मोर्दैकै क देख-रेख में रही।

21उहइ समइ जब मोर्दैकै राजदुआर क निअरे बइठा करत रहा, इ घटना घटी: राजा क दुइ अधिकारियन बिकतान अउर तेरेस जउन साही दुआर क रच्छा करत रहेन, उ पचे राजा पइ बहोत कोहाई गएन अउर ओकर हत्या करइ क योजना बनाएन। 22मोर्दैकै क उ सड्यंत्र क पता चल गवा अउर उ ओका महारानी एस्तेर क बताइ दिहस। फुन महारानी एस्तेर ओका राजा स कहि दिहस। उ राजा क इ भी बताइ दिहस कि मोर्दैकै ही उ मनई अहइ, जउन इ सड्यंत्र क पता चलाएस ह। 23एकरे पाछे उ सूचना क जाँच कीन्ह गइ अउर इ पता चला कि मोर्दैकै क सूचना सही रही अउर उ दुइ पहरेदारन क जउन राजा क मार डावइ क सड्यंत्र बनाए रहेन, एक ठु खम्भे पइ लटकाइ दीन्ह गवा। राजा क सामने ही इ सबहिं बातन राजा क इतिहास क पुस्तक में लिख दीन्ह गइन।

### यहूदियन क बिनास क बरे हामान क योजना

3 एन बातन क घटइ क पाछे महाराजा छयर्स हामान क सम्मान किहस। हामान अगागी हम्मदाता नाउँ क मनई क पूत रहा। महाराजा हामान क कउनो दूसर अधिकारियन स जउन ओकर संग रहेन स बइका अउ महत्वपूर्ण पद दिहस। 2राजा क दुआर पइ महाराजा क सबहिं मुखिया हामान क अगवा निहुरिके ओका आदर देइ लागेन। उ पचे महाराजा क आग्या क अनुसार ही अइसा किया करत रहेन। किन्तु मोर्दैकै हामान क अगवा निहुरइ या ओका आदर देइ क मना कइ दिहस। 3एह बरे राजा क दुआर पइ राजा क दूसर सेवकन मोर्दैकै स पूछेन, “तू महाराजा क आग्या क पालन काहे नाहीं किहा?”

4राजा क सबइ अधिकारियन हररोज मोर्दैकै स बात किहन, किन्तु उ हामान क आदेस क मानइ स इन्कार करत रहा। तउ ओन अधिकारियन हामान स एकरे बारे में बताइ दिहन, काहेकि उ पचे इ सबइ जानइ चाहत रहेन कि का मोर्दैकै क इ बेउहार क लगातार रहइ क अनुमति होइ। काहेकि मोर्दैकै ओन सबइ लोगन क बताइ दिहे रहा कि उ एक यहूदा रहा। 5हामान जब इ लखेस कि मोर्दैकै ओकरे अगवा निहुरइ अउर ओका आदर देइ क मना कइ दिहस ह तउ ओका बहोत किरोध आवा। 6हामान क इ पता तउ चल ही चुका रहा कि मोर्दैकै एक यहूदी अहइ। किन्तु उ मोर्दैकै क हत्या मात्र स संतुस्ट होइवाला नाहीं रहा। हामान तउ इ भी चाहत रहा कि उ कउनो एक अइसा रस्ता ढूँढ निकारइ जेहसे छयर्स क समूचे राज क ओन सबहिं यहूदियन क मार डावइ जउनो मोर्दैकै क लोग अहइ।

7महाराजा छयर्स क राज क बारहवें बरिस में नीसान नाउँ क पहिले महीने में, हामान क मौजूदगी में यहूदी लोगन क बर्बाद करइ क दिन चुनई बरे पास लोकावा गवा। इ तरह अदार नाउँ क बारहवें महीना चुन लीन्ह गवा। (ओन दिनन लाटरी निकारइ बरे इ सबइ पासन, “पुर” कहवावा करत रहेन।) 8फुन हामान महाराजा छयर्स क लगे आवा अउर ओहसे बोला, “हे महाराजा छयर्स तोहरे राज क हर प्रान्त में

लोगन क बीच एक खास समूह क लोग फइले भए अहइ। इ सबइ लोग अपने आप क दूसर लोगन स अलग रखत हीं। एन लोग क रीतिरिवाज भी दूसर लोगन स अलग अहइ अउर इ सबइ लोग राजा क नेमन क पालन नाहीं करत हीं। अइसे लोगन क अपने राज में सखइ क अनुमति देब महाराजा क बरे अच्छा नाहीं अहइ।

9“जदि महाराजा क अच्छा लगइ तउ मोरे लगे एक सुझाव अहइ: ओन लोगन क नस्ट कइ डावइ क आग्या दीन्ह जाइ। एकरे बरे मई साही अधिरियन क दस हजार चाँदी क सिक्कन महाराजा क खजाने में जमा करइ बरे देब।”

10इ तरह महाराजा राजकीय अंगूठी अपनी अँगुरि स निकारेस अउर ओका हामान क सौप दिहस। हामान अगागी हम्मदाता क पूत रहा। उ यहूदियन क दुस्मन रहा। 11एकरे पाछे महाराजा हामान स कहेस, “इ धन अपने लगे रखा अउर ओन लोगन क संग जउन चाहत ह, करा।”

12फुन उ पहिले महीने क तेरहवें दिन महाराजा क सचिवन क बोलावा गवा। उ पचे हामान क सबहिं आदेसन क हर प्रान्त क लिपि अउर हर लोगन क भाखा में अलग-अलग लिख दिहस। उ पचे राजा क मुखिया लोगन, विभिन्न प्रान्तन क राजपालन, अलग-अलग कबीलन क मुखिया लोगन क नाउँ पत्र लिख दिहस। उ पचे इ आदेस महाराजा छयर्स कइँती स लिखेन अउर ओह पइ खुद क अंगूठी स मोहर लगाइ दिहस।

13सँदेस वाहक राजा क विभिन्न प्रान्तन में ओन पत्रन क लइ गएन। एन पत्रन पइ इ आदेस रहा कि सबहिं यहूदियन जवान, बूढ़े, मेहररु अउर नान्ह गदेलन क भी एक ही दिन मार दीन्ह जाइँ अउर पूरी तरह नस्ट कइ दीन्ह जाइ। उ दिन बारहवें महीने क तेरहवीं तारीख क रहा जउन अदार क महीना अहइ। अउर इ भी आदेस रहा कि यहूदियन क सब कछू चिजिय लइ लीन्ह जाइ।

14एन पत्रन क प्रतिपन उ आदेस क संग एक नेम क रूप में दीन्ह जाब रही। हर प्रान्त में एका एक नेम बनावा जाब रहा। सबहिं लोगन में एकर घोसना कीन्ह जाब रही, ताकि उ पचे सबहिं लोग उ दिन क बरे तइयार रहइँ। 15महाराजा क आग्या अनुसार सँदेस वाहक फउरन चल दिहन। अउर इ राजधानी नगरी सूसन में भी इ ऐलान कइ दीन्ह गइ। महाराजा अउर हामान तउ दाखरस पिअइ क बरे बइठ गएन किन्तु सूसन नगर क लोग घबरा गए रहेन अउ चकित भए रहेन।

### मदद क बरे एस्तेर स मोर्दैकै क बिनती

4 मोर्दैकै, जउन कछू होत रहा, ओकरे बारे में सब कछू सुनेस। जब उ यहूदियन क बिरुद्ध राजा क आग्या सुनेस तउ अपने ओढ़नन फार डाएस। उ सोक वस्त्र धारण कइ लिहस अउर अपने मँड्रे पइ राखी डाइ लिहस। उ ऊँच सुर स बिलाप करत भए नगर में निकर पड़ा। 2मोर्दैकै राजा क दुआर तलक गएन, किन्तु उ दुआर क पार नाहीं किहेन जउन महल क छेत्र में जात ह, काहेकि सोक वस्त्रन क

पहिरके दुआर क भीतर जाइ क आग्या कउनो क भी नाहीं रही। अहर कउनो प्रांत में जहाँ कहूँ भी राजा क इ आदेस पहोचा, यहूदियन में रोउब-धोउब अउर सोक फइल गवा। उ पचे खाना छोड़ दिहन अउर उ पचे ऊँच सुर में बिलपइ लागेन। बहोत स यहूदी अपने सोक वस्त्रन क धारण किहे भए अउर अपने मूंडन पइ राखी डाए भए धरती पइ पड़े रहेन।

4एस्तेर क दासियन अउर खोजन एस्तेर क लगे जाइके ओका मोर्दैके क बारे में बताएन। एहसे महारानी एस्तेर बहोत दुखी अउर बियाकुल होइ उठी। उ मोर्दैके क लगे सोक वस्त्रन क बजाय दूसर ओढ़नन पहिरइ क पठएस। मुला उ उ सबइ ओढ़नन स्वीकार नाहीं किहस। 5एकरे पाछे एस्तेर हताक क अपने लगे बोलाएस। हताक एक अइसा हिजड़ा रहा जेका राजा ओकरी सेवा बरे नियुक्त केहे रहा। एस्तेर ओका इ पता लगावइ क आदेस दिहस कि मोर्दैके क का बियाकुल बनाए भए अहई अउर काहे? 6एह बरे हताक नगर क खुले चौराहे में गएन जहाँ मोर्दैके मौजूद रहा। 7हुवाँ मोर्दैके हताक स, जउन कछू भवा रहा, सब कहि डाएस। उ हताक क इ भी बताएस कि हामान यहूदियन क हत्या बरे राजा क खजाने में केतना धन जमा करावइ क वादा किहेस ह। 8मोर्दैके हताक क यहूदियन क हत्या क बरे राजा क आदेस पत्र क एक प्रति भी दिहेस। उ आदेस पत्र पहिले ही सूसन नगर में हर कहूँ पठवा गवा रहा। मोर्दैके इ चाहत रहा कि हताक ओका एस्तेर क देखाइ देइ अउर हर बात ओका पूरी तरह निर्देस देइ अउर उ ओहसे इ भी कहेस कि उ एस्तेर क राजा क लगे जाइके मोर्दैके अउर अपने लोगन क बरे दया क याचना करइ क प्रेरित करइ।

9हताक एस्तेर क लगे लउटि आवा अउर उ एस्तेर स मोर्दैके जउन कछू कहइ क कहे रहा, सब बताइ दिहस।

10फुन एस्तेर मोर्दैके क हताक स इ कहवाइ पठएस: 11“मोर्दैके, राजा क सबहिं मुखिया अउर राजा क प्रान्तन क सबहिं लोग इ जानत हीं कि कउनो भी मनई या मेहरारू क बरे राजा क बस इहइ नेम अहइ कि राजा क भीतरी आंगन में बिना बोलाए जउन भी जात ह, ओका मारि दीन्ह जातेन। इ नेम क पालन बस एक ही स्थिति में उ समइ नाहीं कीन्ह जात रहा जब राजा अपने सोने क राजदण्ड क उ मनई कइती बढ़ाइ देत रहा। यदि राजा अइसा कइ देत तउ उ मनई क प्राण बच जात रहेन। मुला मोका तीस दिन होइ गएन ह अउर राजा स मिलइ क बरे मोका नाहीं बोलावा गवा ह।”

12-13एकरे पाछे एस्तेर क सँदेसा मोर्दैके क लगे पहोँचाइ दीन्ह गवा। उ सँदेसा क पाइके मोर्दैके ओका वापस जवाब पठएस: “एस्तेर, अइसा जिन सोचा कि तू राजा क महल में रहइ क कारण बच जाब्या, जबकि सबइ यहूदियन मारा जाब। 14जदि अबहिं तू चुप रहति अहा यहूदियन क मदद अउर मुक्ती कहुँ अउर स मिल जाब। मुला तू अउर तोहरे बाप क परिवार मारा डावा जाइ सकत्या। अउर कउन जानत ह कि तू कउनो अइसे ही समइ क लिए महारानी बनाई गई अहा, जइसा समइ इ अहइ।”

15-16एह पइ एस्तेर मोर्दैके क आपन इ जवाब पठएस: “मोर्दैके, जा अउर जाइके सबहिं सूसन नगर सबहिं यहूदी लोगन क एकट्ठा करा अउर मोरे बरे उपवास राखा। तीन दिन अउ तीन रात तलक न कछू खा अउर न कछू पिआ। तोहरी तरह मई अउर मोर मेहरारू नउकर भी उपवास रखब। हमरे उपवास रखइ क पाछे मई राजा क लगे जाब। मई जानत हउँ कि जदि राजा मोका न बोलावइ तउ ओकरे लगे जाब, नेम क खिलाफ अहइ। अगर मई अइसा करब्या तउ हो सकत ह कि मई मारा डावइ जाइ। किन्तु कउनो बात नाहीं मई अइसा करब।”

17इ तरह मोर्दैके हुवाँ स चला गवा अउर एस्तेर ओहसे जइसा करइ क कहे रहा उ सब कछू वइसा ही किहस।

### एस्तेर क राजा स बिनती

5 तीसरे दिन एस्तेर आपन बिसेस साही पोसाक पहिरेस अउर राजमहल क भीतरी आंगन में जाइ खड़ी भइ। इ जगह राजा क बैठका क समन्वा रही। राजा दरबार में अपने सिंहासने पइ बइठा रहा। राजा उहइ कइती मुँह किहे बइठा रहा जहाँ स लोग सिंहासन क कच्छ कइती प्रवेस करत रहेन। 2तउ राजा महारानी एस्तेर क हुवाँ दरबार में खड़े लखेस। ओका लखिके उ बहोत खुस भवा। उ ओकरी कइती अपने हाथ में थामे भए सोने क राजदण्ड क आगे बढ़ाइ दिहस। इ तरह एस्तेर उ कमरे में प्रवेस किहस अउर उ राजा क लगे चली गइ अउर उ राजा क सोने क राजदण्ड क सिरे क छुइ लिहस।

3एकरे पाछे राजा ओहसे पूछेस, “महारानी एस्तेर, तू बेचैन काहे अहा? तू मोहसे का चाहति अहा? तू जउन चाहा मई तोहका उहइ देब। हिआँ तक कि आपन आधा राज तलक, मई तोहका दइ देब।”

4एस्तेर कहेस, “मई आपके अउर हामान क बरे एक तु भोज क आयोजन किहेउँ ह। कृपा कइ आप अउर हामान आजु मोरे हिआँ भोज में पधारें।”

5एह पइ राजा कहेस, “हामान क तुरंत बोलावा जाइ ताकि एस्तेर जउन चाहत ह, हम ओका पूरा कइ सकी।”

तउ महाराजा अउर हामान एस्तेर ओनके बरे जउन भोजन आयोजित किहे रही, ओहमाँ आइ गएन। 6जब उ पचे दाखरस पिअत रहेन तबहिं राजा एस्तेर स फुन पूछेस, “एस्तेर, कहा अब तू का माँगति चाहति अहा? कछू भी माँग ल्या, मई तोहका उहइ दइ देब। कहा तउ उ का अहइ जेकर तोहका इच्छा अहइ? तोहार जउन भी इच्छा होइ, उहइ मई तोहका देब। अपने राज क आधा हीसां तलक।”

7एस्तेर कहेस, “मई इ माँगइ चाहत हउँ। 8जदि मोका महाराज अनुमति देई अउर जदि जउन मई चाहउँ, उ मोका देइ स महाराज खुस होई तउ मोर इच्छा इ अहइ कि महाराज अउर हामान भियान मोरे हिआँ आवई। भियान मई महाराज अउर हामान क बरे एक अउर भोज देइ चाहत हउँ अउर उहइ समइ में इ बताउब कि असल में मई का चाहति हउँ।”

### मोर्दैकै पइ हामान क किरोध

9उ दिन हामान राजमहल क बहोत जियादा खुस होइके बिदा भवा। किन्तु जब उ राजा क दुआर पइ मोर्दैकै क लखेस तउ ओका मोर्दैकै पइ बहोत किरोध आवा। हामान मोर्दैकै क लखत ही किरोध स पागल होइ उठा, काहेकि जब हामान हुवाँ स गुजरा, मोर्दैकै नाहीं खड़ा भवा अउर नाहीं काँपिस अउर नाहीं हामान बरे कउनो आदर देखाएस। 10किन्तु हामान अपने किरोध पइ काबू किहस अउर घरे चला गवा। एकरे पाछे हामान अपने मीतन अउ अपनी मेहरारु जेरेस क एक संग बोलाएस। 11उ अपने मीतन क अगवा अपने धन अउ अनेक पूतन क बारे में डीगं मारत भए इ बतावइ लागा कि राजा ओकर कउने प्रकार स सम्मान करत ह। उ बढ़ाइ चढ़ाइ के इ भी बतावइ लाग कि दूसर सबहिं हाकिमन स राजा कउने तरह ओका अउर जियादा ऊँच पद पइ पदोन्नति दिहस ह। 12“एतना ही नाहीं” हामान इ भी बताएस। “एक मात्र मई ही अइसा मनई हउँ जेका महारानी एस्तेर अपने भोज में राजा क संग बोलाए रहा अउर महारानी मोका भियान फुन राजा क संग बोलाइ पठए रही। 13मुला मोका एन सब बातन स फुरइ कउनो खुसी नाहीं अहइ। असल में मई उ समइ तलक खुस नाहीं होइ सकत जब तलक राजा क दुआर पइ मई उ यहूदी मोर्दैकै क बइठे भए लखत हउँ।”

14एह पइ हामान क मेहरारु जेरेस अउर ओकर मीतन ओका एक सुझाव दिहन। उ पचे बोलेन, “कउनो स कहिके पचहत्तर फुट ऊँच ओका फाँसी देइ क एक तु फाँसी क खम्भा खड़ा करा। फुन भिंसारे राजा स कहा कि उ मोर्दैकै क ओह पइ लटकइ क आदेस दे। फुन राजा क संग तू भोज पइ जाया अउर आनन्द स रह्या।”

हामान क इ सुआव नीक लागा। तउ उ फाँसी क खम्भा बनवावइ क बरे कउनो क आदेस दइ दिहस।

### मोर्दैकै क सम्मान

6 उ राति राजा सोइ नाहीं पावा। तउ उ अपने एक दास स इतिहास क किताब लिआइके अपने समन्वा ओका बाँचइ क कहेस। (राजा लोगन क इतिहास क किताबे में उ सब कछू अंकित रहत ह जउ एक राजा क सासनकाल क दौरान धटित होत ह।) 2तउ उ दास राजा क बरे उ किताब बाँचेस। उ महाराजा छयर्स क मार डावइ क सड्यंत्र क बारे में बाँचेस। बिगताना अउ तेरेस क सड्यंत्रन क पता मोर्दैकै क चला रहा। इ सबइ दुईनउँ ही मनई दुआर क रच्छा करइवाले राजा क हाकिम रहेन। उ पचे राजा क हत्या क योजना बनाए रहेन किन्तु मोर्दैकै क इ योजना क पता चल गवा रहा अउर उ ओकरे बारे में कउनो क बताइ दिहे रहा।

3एह पइ महाराजा सवाल किहस, “इ बात क बरे मोर्दैकै क कउन सा आदर अउर कउन स उत्तिम चिजियन प्रदान कीन्ह गइ रहिन।” उ दासन राजा क जवाब दिहेन, “मोर्दैकै बरे कछू नाहीं कीन्ह गवा रहा।”

4उहइ समइ राजा क महल क बाहरी आँगन में हामान प्रवेस किहस। उ, हामान फाँसी क जउन खम्भा बनावावा रहा, ओह पइ मोर्दैकै क लटकवावइ क बरे राजा स कहइ

क आवा रहा। राजा ओकरी आहट सुनिके पूछेस, “अबहिं अबहिं आँगन में कउन आवा ह?”

5राजा क नौकरन जवाब दिहस, “आँगन में हामान खड़ा भवा ह।” तउ राजा कहेस, “ओका भीतर लइ आवा।”

6हामान जब भीतर आवा तउ राजा ओहसे एक सवाल पूछेस, “हामान, राजा जदि कउनो क आदर देइ चाहइ तउ उ मनई बरे राजा क का करइ चाही?”

हामान अपने मने में सोचेस, “अइसा कौन होइ सकत ह जेका राजा मोहसे जियादा आदर देइ चाहत होइ? राजा निहचइ ही मोका आदर देइ क बरे ही बात करत होइ।”

7तउ हामान जवाब देत भए राजा स कहेस, “राजा जेका आदर देइ चाहत ह, उ मनई क संग उ अइसा करइ: 8राजा जउन ओढ़ना खुदपहिरे होइ, उहइ बिसेस ओढ़ना क तू अपने सेवकन स मँगवाइ लीन्ह जाइ अउर उ घोड़े क भी मँगवाइ लीन्ह जाइ जेह पइ राजा खुद सवारी कीन्ह होइ। फुन सेवकन क जरिये उ घोड़े क मूँड़ि पइ राजा क बिसेस चीन्ह अंकित करावा जाइ। 9एकरे पाछे, राजा क सज्जन अधिकारी कपड़े अउर घोड़े क अधिकारी होइ चाही। फुन उ राजा क अधिकारी उ मनई क, जेका राजा सम्मानित करइ चाहत ह, उ ओढ़ना क पहिरावइ अउर फुन एकरे पाछे उ पचे अधिकारी उ घोड़े क आगे-आगे चलत भवा ओका नगर क गलियन क बीच स गुजारइ। उ पचे अपनी अगुवाई में घोड़न क लइ जात भए इ घोसना करत जाइ, ‘इ उ मनई क बरे कीन्ह गवा ह, राजा जेका आदर देइ चाहत ह।’”

10राजा हामान क आदेस दिहस, “तू फउरन चले जा अउर ओढ़ना अउ घोड़ा लइके यहूदा मोर्दैकै क बरे वइसा ही करा, जइसा तू सुझाव दिहा ह। मोर्दैकै राजदुआर क लगे बइठा बाटइ। जउन कछू तू सुझाया ह, सब कछू वइसा ही करया।”

11तउ हामान ओढ़ना अउ घोड़ा लिहस अउर ओढ़ना मोर्दैकै क पहिराइके घोड़े पइ चढ़ाइके नगर क गलियन स होत भए घोड़े क आगे आगे चल दिहस। मोर्दैकै क आगे आगे चलत भवा हामान घोसणा करत रहा, “इ सब उ मनई क बरे कीन्ह गवा ह, जेका राजा आदर देइ चाहत ह।” 12एकरे पाछे मोर्दैकै फुन राजदुआर पइ चला गवा किन्तु हामान फउरन अपने घरे कइँती चल दिहस। उ आपन मूँड़ि छुपाए भए रहा काहेकि उ परेसान अउर लज्जित रहा। 13एकरे पाछे, हामान अपनी मेहरारु जेरेस अउर अपने सबहिं मीतन स जउन कछू घटा रहा, सब कछू कहि सुनाएस। हामान क पत्नी अउर ओकर सलाहकारन ओहसे कहेन, “जदि मोर्दैकै यहूदी अहइ, तउ तू जीत नाहीं सकत्या। तू आपन सक्ती खोइ सुरू करि चुका ह। तू निहचइ ही नस्ट होइ जाब्या।” 14अबहिं उ सबइ लोग हामान स बात करत ही रहेन कि राजा क हिजड़ा हामान क घरे आएन अउर फउरन ही हामान क एस्तेर क भोज में बोलाइ लइ गएन।

### हामान क प्राण दण्ड

7 फुन राजा अउ हामान एक संग महारानी एस्तेर क भोज बरे चले गएन। 2एकरे पाछे जब उ पचे दूसरे

दिन क भोज में दाखरस पिअत रहेन तउ राजा एस्तेर फुन एक सवाल किहस, “महारानी एस्तेर, तू मोहसे का माँगइ चाहति अहा? जउन कछू तू माँगबिउ, पउबिउ। बतावा, तोहका का चाही? मई तोहका कछू भी दइ सकत हउँ। हिअँ तलक कि मोर आधा राज भी।”

3एह पइ महारानी एस्तेर जवाब दिहस, “हे महाराज! जदि मई तोहका भावतिउँ, अउर जदि इ तोहका प्रसन्न करत ह। तउ कृपा कइके मोका जिअइ द्या अउर मई तोहसे इ चाहति हउँ कि मोरे लोगन क भी जिअइ द्या। बस मई इहइ माँगति हउँ। 4अइसा मई एह बरे चाहति हउँ कि मोका अउर मोरे लोगन क बिनास, हल्या अउ पूरी तरह स नस्ट कइ डावइ क बरे बेच डावा गवा ह। जदि हमका दासन क रुप में बेचा जात, तउ मई कछू नाहीं कहतिउँ काहेकि कउनो एतनी बड़ी समस्या नाहीं होत जेकरे बरे राजा क कस्ट दीन्ह जात।”

5एह पइ महाराज छयर्स महारानी एस्तेर स पूछेस, “तोहरे संग अइसा कौन किहस? कहाँ अहइ उ मनई जउन तोहरे लोगन क संग अइसा बेउहार कइ क हिम्मत किहस?”

6एस्तेर कहेस, “हमार बिरोधी अउर हमार दुस्मन इ दुस्ट हामान ही अहइ।”

तब हामान राजा अउ रानी क सामने आतंकित होइ उठा। 7राजा बहोत कोहान रहा। उ खड़ा भवा। उ आपन दाखरस हुवँइ तजि दिहस अउर बाहेर बगिया मैं चला गवा। मुला हामान, रानी एस्तेर स अपने प्राणन क भीख माँगइ बरे भीतर ही ठहरा रहा। हामान इ जानत रहा कि राजा ओकर प्राण लेइ क निहचइ कइ लिहस ह। एह बरे उ अपने प्राणन क भीख माँगत रहा। 8राजा जइसे ही बगिया स भोज क कमरे कइँती वापस आवत रहा, तउ उ का लखत ह कि जउने बिछौने पइ एस्तेर ओलरी अहइ, ओह पइ हामान निहुरा भवा अहइ। राजा किरोध भरे सुर मैं कहेस, “महल मैं मोरे रहत भए महारानी पइ आक्रमण कइ क तोहार हिम्मत कइसा भवा।” जइसेन ही राजा क मुँह स इ सबइ सब्द निकरेन, राजा क सेबकन भीतरे आइके हामान क मार डाएस।\*

9राजा क एक ठु हिजड़ा सेवक जेकर नाउँ हरबौना रहा, कहेस, “हुवाँ एक पचहतर फुट ऊँचा फाँसी क खम्बा जउन हामान क दुआरा ओकरे घरे क लगे मोर्दकै क फाँसी देइ बरे खड़ा किहा गवा ह। मोर्दकै उहइ मनई अहइ जउन तोहरी हल्या क सइयंत्र बरे बताइके तोहार मदद किहे रहा।”

राजा बोला, “उ खम्भे पइ हामान क लटकाइ दीन्ह जाइ।”

10तउ उ पचे उहइ खम्भे पइ जेका उ मोर्दकै क बरे बनाए रहा हामान क लटकाइ दिहस। एकरे पाछे राजा किरोध करब तजि दिहस।

### यहूदियन क मदद बरे राजा क आदेस

8 अहइ दिन राजा छयर्स यहूदी लोग क दुस्मन हामान क लगे जउन कछू रहा, उ सब महारानी एस्तेर क दइ दिहस। एस्तेर राजा क बताइ दिहस कि मोर्दकै रिस्ते मैं

हामान क मार डाएस साबिक “हामान क चेहरा ढाँपि दिहस।”

ओकर भाई लागत ह। एकरे पाछे मोर्दकै राजा स मिलइ आवा। 2राजा हामान स अपनी जउन अँगूठी वापस लइ लिहस रहा, ओका अपनी अगुलि स निकारिके मोर्दकै क दइ दिहस। एकरे पाछे एस्तेर मोर्दकै क हामान क सारी सम्पत्ति क अधिकारी नियुक्त कइ दिहस।

3तब एस्तेर राजा स फुन कहेस अउर उ राजा क गोड़न मैं गिरिके सेवइ लाग। उ राजा स पराथन किहस कि उ अगागी हामान क उ बुरी योजना क खतम कइ देइ जेका हामान यहूदियन क बरे सोचे रहा।

4एह पइ राजा अपने सोने क राजदण्ड क एस्तेर कइँती आगे बढ़ाएस। एस्तेर उठी अउर राजा क अगवा खड़ी होइ गइ। 5फुन एस्तेर कहेस, “मोर सुआमी! जदि तू मोका पसंद करत ह अउर इ तोहका प्रसन्न करत ह, तउ कृपा कइके मोरे बरे इ कइ द्या। जदि तोहका लगि कि इ अच्छा सुझाव अहइ। तउ एका करा। जदि तू मोह पइ खुस अहइँ तउ कृपा कइके एक ठु आदेस पत्र लिखइँ, जउन उ आदेस पत्र क रद्द कइ देइ जेका हामान राजा क राज क सबहिँ प्रान्तन मैं बसे यहूदियन क नस्ट कइ बरे पठइ दिहे रहा ह।

6मई महाराज स इ पराथना एह बरे करति हउँ कि मई अपने लोगन के संग उ भयानक तबाही क घटत लखब सहन नाहीं कइ पाउब। मई आपन परिवार क हल्या क लखब सहन नाहीं कइ पाउब।”

7महाराज छयर्स महारानी एस्तेर अउर यहूदी मोर्दकै क जवाब देत भए कहे रहा, उ इ अहइ, “हामान, काहेकि यहूदियन क बिरोध मैं रहा, एह बरे ओकर सम्पत्ति मई एस्तेर क दइ दिहेउँ अउर मोरे सिपाहियन ओका फाँसी देइ क खम्भा पइ लटकाइ दिहन। 8अब तू जइसन चाहत ह राजा नाउँ स यहूदियन क मदद बरे एक ठू दूसर आग्या पत्र लिखा। फुन राजा क बिसेस अँगूठी स उ पत्र पइ मुहर लगाइ द्या। काहेकि जउन पत्र राजा कइँती स लिखा गवा ह अउर राजा क अँगूठी स मुहर दीन्ह गइ होइ अइसा कउनो राजाधिकारी पत्र रद्द नाहीं कीन्ह जाइ सकत।”

9राजा क सचिवन क फउरन बोलावा गवा। सीवान नाउँ क तीसरे महीने क तेइसवी तारीख क उ आदेस पत्र लिखा गवा। यहूदियन क बरे मोर्दकै क सबहिँ आदेसन क सचिवन लिखिके यहूदियन, मुखिया लोगन, राजपालन अउर एक सौ सताईस प्रान्तन क अधिकारियन क लगे पहोंचाइ दिहन। इ सबइ प्रान्त भारत स लइके कूस तलक फइले भए रहेन। इ सबइ आदेस पत्र हर प्रान्त क लिपि अउ भाखा मैं लिखे गए रहेन अउर हर देस क लोगन क भाखा मैं ओकर अनुवाद कीन्ह गवा रहा। यहूदियन क बरे इ सबइ आदेस ओनकी अपनी भाखा अअउर ओनकी अपनी लिपि मैं लिखे गए रहेन। 10मोर्दकै इ सबइ आदेस महाराज छयर्स कइँती स लिखे गए रहेन अउर फुन ओन पत्रन पइ उ राजा क अँगूठी स मुहर लगाइ दीन्ह रही। फुन ओन पत्रन पइ उ राजा क अँगूठी स मुहर लगाइ दीन्ह रही। फुन ओन पत्रन क ओन सँदेसवाहकन क जरिये भेजा गएन रहेन जउन तेज रफतार घोड़न पइ सावर रहेन।

11ओन पत्रन पइ राजा क इ सबइ आदेस लिखे रहेन:

यहूदियन क हरेक नगर मैं आपुस मैं एक जुट होइके

अपनी रच्छा करइ क अधिकार अहइ। ओनका अधिकार अहइ कि उ पचे कउनो भी राष्ट्र या प्रान्त क कउनो भी फउज जउन कि ओन लोगन पइ अउर ओनके मेहररुअन अउ गदेलन पइ हमला करइ सकत ह क नास कइ देइ, मार डावई अउर पूरी तहर स तबाह कइ देइ। यहूदियन क इ अधिकार भी अहइ कि उ पचे आपन दुस्मन क सम्पत्ति लूट लेई।

12जब यहूदियन क बरे अइसा कीन्ह जाइ, ओकरे बरे उदार नाउँ क बारहवें महीने क तेरहवीं तारीख क दिन निहचित कीन्ह गवा। महाराजा छयर्स अपने सबहिं प्रान्तन में यहूदियन क अइसा करइ क अनुमति दइ दीन्ह गइ। 13इ पत्र क एक प्रति राजा क आदेस क संग हर प्रान्त में पठई जाब रही। हर प्रान्त में इ एक नेम बन गवा। राज्ज में रहइवाले हर जाति क लोगन क बीच एकर प्रचार कीन्ह गवा। उ पचे अइसा एह बरे किहन ताकि यहूदी उ बिसेस दिन क बरे तइयार होइ जाई जउन दिन उ पचे अपने दुस्मनन स बदला लेइ सकई। 14राजा क घोड़न पइ सवार संदेस वाहक हाली स बाहेर निकरि गएन। ओनका राजा आग्या दिहे रहा कि हाली करई। इ आग्या सूसन क महल प्रान्त में भी घोसना कीन्ह गएन।

15फुन मोर्दकै राजा क लगे स चला गवा। मोर्दकै राजा स मिले ओढ़नन क धारण किहे भए रहा। ओकर ओढ़नन नीले अउ सफेद रंग क रहेन। उ ऐक ठु लम्बा सोने क मुकुट पहिर रखे रहा। बढिया सूत क बना बैंगनी रंग क चोगा भी ओकरे लगे रहा। लोग बहोत खुस रहेन। 16यहूदियन क बरे इ बिसेस खुसी क दिन रहा। इ आनन्द, खुसी अउर बड़े सम्मान क दिन रहा।

17जहाँ कहुँ भी कउनो प्रान्त या कउनो भी नगर में राजा क इ आदेस- पत्र पहाँचा, यहूदियन में आनन्द अउ खुसी क लहर दउइ गइ। यहूदी भोज देत रहेन अउर उत्सव मनावत रहेन अउर दूसर बहोत स सामान्य लोग यहूदी बन गएन। काहेकि उ पचे यहूदियन स बहोत डरा करत रहेन, इहइ बरे उ पचे अइसा किहन।

### यहूदियन क बिनइ

9 लोगन क अदार नाउँ क बारहवें महीने क तेरह तारीख क राजा क आग्या क पूरा करब रहा। यहूदी क दुस्मनन क आसा रहने कि उहइ दिना उ पचन्क यहूदी क हराइ सकतेन। किन्तु अब सब कछू उलटा होइ चुकी रही अब यहूदी अपने ओन दुस्मनन क हराब्या जउन ओसे घिना करत रहेन। 2महाराजा छयर्स क सबहिं प्रान्तन क नगरन में यहूदी आपुस में उ पचन्क पइ हमला करइ बरे इकट्ठा भएन जउन ओनका नस्ट करइ चाहत रहा। इ तरह ओनके बिरोध में कउनो भी जियाद सक्तिसाली नाहीं रहा काहेकि लोग यहूदी लोगन स डेराइ लागेन। 3प्रान्तन क सबहिं हाकिम, मुखिया, राज्जपाल अउर राजा क प्रबन्ध अधिकारी यहूदियन क मदद करइ लागेन। उ पचे सबहि अधिकारी यहूदियन क मदद एह बरे किया करत रहेन कि उ

पचे मोर्दकै स डेरात रहेन। 4राजा क महल में मोर्दकै एक बहोत महत्वपूर्ण मनई बन गवा। सबहिं प्रान्तन में हर कउनो ओकर नाउँ जानत रहा अउर जानत रहा कि उ केतना महत्वपूर्ण अहइ। तउ मोर्दकै जियादा सक्तिसाली होत चला गवा।

5यहूदियन अपने सबहिं दुस्मनन क पराजित कइ दिहन। अपने दुस्मनन क मारइ अउ नस्ट करइ क बरे उ पचे तरवानन क प्रयोग किया करत रहेन। जउन लोग यहूदियन स घिना किया करत रहेन, ओनके संग यहूदी जइसा चाहतेन, वइसा बेउहार करतेन। 6सूसन क राजधानी नगरी में यहूदियन पाँच सौ लोगन क मारिके नस्ट कइ दिहन। 7यहूदियन जउन लोगन क हत्या किहे रहेन ओनमें इ सबइ लोग भी सामिल रहेन: पर्सन्दाता, दल्पोन, अस्पाता, 8पोराता, अदल्या, अरीदाता, 9पर्सता, अरीसै, अरीदै अउर वैजाता। 10इ सबइ दस लोग हामान क पूत रहेन। हम्मदाता क पूत हामान यहूदियन क बैरी रहा। यहूदियन ओन सबहिं मनसेधुअन क मार तउ दिहेन किन्तु उ पचे ओनकर सम्पत्ति नाहीं लिहन।

11जउन दिन राजा सुनेन कि सूसन क महल प्रान्त में बहोत स लोग मारे गएन ह। 12तउ महारानी एस्तेर स कहेस, “सूसन नगर में यहूदियन पाँच सौ मनइयन क मार डाएन ह तथा उ पचे सूसन म हामान क दस पूतन क भी हत्या कइ दिहन ह। राजा क दूसर प्रान्तन में का होत अहइ? अब मोका बतवा तू अउर का करावइ चाहति अहा? जउन कहा मई ओका पूरा कइ देब।”

13एस्तेर कहेस, “जदि अइसा करइ क बरे महाराज खुस अहई तउ यहूदी लोगन जउन सूसन में अहइ ओका कल्ह फुन स सूसा में राजा क आग्या पूरी करइ दीन्ह जाइ, अउर हामान क दसहुँ पूतन क फाँसी क खम्भे पइ लटकाइ दीन्ह जाइ।”

14तउ राजा इ आदेस दइ दिहस कि सूसन में भियान भी राजा क इ आदेस लागु रहइ अउर उ पचे हामान क दसहु पूतन क फाँसी पइ लटकाइ दिहन। 15आदार महीने क चौदहवीं तारीख क जउन यहूदी सूसन क महल प्रान्त में अहइ एक संग बटुरेन। फुन उ पचे हुवाँ तीन सौ मनइयन क मउत क घाट उतार दिहन किन्तु उ पचे तीन सौ लोगन क सम्पत्ति क नाहीं लिहन।

16अदार क तेरहवें दिन दूसर प्रान्तन में रहइवाले दूसर यहूदी भी आपुस में बटुरेन। उ पचे एह बरे बटुरेन कि अपने बचाव क लिए उ पचे पर्याप्त बलसाली होइ जाई अउर इ तरह उ पचे अपने दुस्मनन स छुटकारा पाइ लिहन। यहूदी लोग अपने पचहतर हजार दुस्मनन क मउत क घाट उतार दिहन। किन्तु उ पचे जउने दुस्मनन क हत्या किहे रहेन, ओनकर कउनो भी वस्तु क नाहीं लिहेन। 17इ अदार नाउँ क महीने क तेरहवीं तारीख क भवा अउर फुन चौदहवीं तारीख क यहूदियन बिस्त्राम किहन। यहूदियन उ दिन क एक ठु खुसी भरे दिन क रुप में बनाइ दिहन।

### पूरीम क लौहार

18किन्तु यहूदी लोग जउन सूसन में रहा अदार महीने क तेरहवीं अउर चौदही तारीख में आपुस में बटुरेन, तउ

पन्द्रहवीं तारीख में उ पचे बिस्त्राम किहन। उ पचे पन्द्रहवीं तारीख क फुन एक खुसी भरे छुट्टी क दिन बनाइ दिहन। 19इहइ कारण उ गाँव क प्रदेस क नान्ह नान्ह गाँवन में रहइवाले यहूदियन चौदहवीं तारीख क खुसियन भरी छुट्टी क रूप में रखेन। उ दिन उ पचे आपुस में एक दूसर क भोज दिहन।

20जउन कछू घटा रहा, ओकर हर बात क मोर्देकै पत्र में लिख लिहस अउर फुन पत्रन क महाराजा छयर्स क सबहिं प्रान्तन में बसे सबहिं यहूदी लोगन क पठइ दिहस। दूर-पास सब कहूँ उ पत्रन पठएस। 21मोर्देकै यहूदियन क इ बतावइ बरे अइसा किहस कि उ पचे हर साल अदार महीने क चौदहवीं अउर पन्द्रहवीं तारीख क पूरिम क उत्सव मनाया करई। 22यहूदी लोग एँ दिनन क पर्व क रूप में एह बरे माने रहेन कि ओनहीं दिनन यहूदियन अपने दुस्मनन स छुटकारा पाए रहेन। ओनका उ महीने क एह बरे भी मानब रहा कि इहइ उ महीने रहा जब ओनकर ओनके आनन्द में बदल गवा रहा। उहइ इ महीना रहा जब ओनकर रोउब धोउब एक ठु उत्सव क दिन क रूप में बदल गवा रहा। उ ओन लोगन स कहेस कि य पचे ओन दिनन क उत्सव क रूप में मनावई। इ समइ एक अइसा समइ होइ जब लोग आपुस में एक दूसरे क उत्तम भोजन क उपहार पठइ तथा गरीब लोगन क भी उपहार देई।

23इ तरह मोर्देकै यहूदियन क लिखे रहा, उ पचे ओका मानइ क तइयार होइ गएन। उ पचे इ बात पइ सहमत होइ गएन कि उ पचे जउन उत्सव क आरम्भ किहन ह, उ पचे ओका मनावत रहिहीं।

24काहेकि अगागी हम्मदाता क पूत हामान यहूदी लोगन क दुस्मन रहा। उ पचे यहूदी लोगन क खिलाफ ओनका नस्ट करइ बरे बुरा जोजोना बनाए रहा। उ पचे ओनका बर्बाद कइ डावइ बरे दिन चुनइ वास्ते पास लोकाए रहा। ओन दिन पौसा क “पुर” कहा जात रहा। इहइ बरे इ उत्सव क नाउँ “पूरीम” रखा गवा। 25किन्तु राजा क लगे गइ अउ उ ओनसे बातचीत किहस। इहइ बरे राजा क नवे आदेस जारी कइ दिहे गएन। यहूदियन क खिलाप हामान जउन सडयंत्र रचे रहा, ओका रोकइ क बरे राजा अपने पत्र जारी किहस। राजा ओन ही बुरी बातन क हामान अउ ओकरे परिवार क संग घटाइ दिहस। ओन आदेसन में कहा गवा रहा कि हामान अउ ओकर पूतन क फाँसी पइ लटकाइ दीन्ह जाइ।

26-27इ समइ पास “पूरीम” कहलाएन। एह बरे इ ल्यौहार “पूरीम” कहलाएन। यहूदी लोग हर बरिस इन दुइ दिनन क उत्सव क रूप में मनावइ क सुरूआत करइ क निहचइ

किहन। उ पचे इ एह बरे किहन ताकि अपने संग होत भए जउन बातन उ पचे लखे रहेन, ओनका याद रखइ में ओनका मदद मिलइ। यहूदियन हर साल सही समइ पइ एन दिनन क मनावइ क जिम्मा आपन पइ लिहा। उ पचे इ भी तय किहेस कि ओकर सन्तानन अउर दूसर लोगन जउन ओकरे संग मिले, मोर्देकै क निर्देस क अनुसार जउन उ अपने आदेस पत्र में दिहे रहा उहइ रीति अउ उहइ समइ पइ मनाउब। 28इ दुई दिनन पीढ़ी दर पीढ़ी अउर हर परिवार क याद रखब अउर मनाब। एनका हर प्रान्त अउ हर नगर में निहचइ पूर्वक क मनवा जाइ चाही। यहूदी लोग क एनका मनाउब कबहुँ नाहीं तजइ चाही। यहूदी लोगन क सन्तानन क चाही कि उ पचे पूरिम क एन दुइ दिनन क मनाउब कबहुँ फेल नाही होइ चाही।

29महारानी एस्तेर अबीहैल क बिटिया अउर यहूदी मोर्देकै इ दूसर पत्र पूरिम क बारे में लिखेस। उ पत्र फुरइ रहा, एँका साबित करइ बरे उ पचे एका राजा क सम्पूर्ण अधिकार क साथ लिखेन। 30तउ महाराजा छयर्स क राज क एक सौ सताईस प्रान्तन में सवाहिं यहूदियन क लगे मोर्देकै पत्र पठएस। मोर्देकै सान्ति अउ सच्चाई क एक सँदेसा लिखेस। 31मोर्देकै पूरिम क लोगन क उत्सव क सुरू करइ क बारे में लिखेस। एँ दिनन क मोर्देकै अउर एस्तेर दुआरा अपने बरे अउर अपनी सन्तानन बरे उपवास अउर विलाप क बारे में ठीक ओकरे नियुक्त कीन्ह समइ पइ ही मनावा जाब रहा। 32एस्तेर क पत्र पूरिम क बिसय में एन नेमन क स्थापना किहन अउर पूरिम एन नेमन क किताबन में लिख दीन्ह गवा।

### मोर्देकै क सम्मान

**10** महाराजा छयर्स लोगन पइ कर लगाएस। राज क सबहिं लोगन हिआँ तलक कि सागर तट क सुदूर नगरन क भी कर चुकावइ पडत रहेन। 2राजा छयर्स जउन महान कार्य अपनी सक्ती अउ सामरथ स किहे रहेन उ सबइ “मादै अउर फारस क राजा लोगन क इतिहास” क किताबे में लिखे अहई। ओन ‘इतिहास क किताबन’ में मोर्देकै जउन कछू किहे रहा, उ सब कछू भी लिखा अहइ। राजा मोर्देकै क एक महान मनई बनाइ दिहस। 3महाराजा छयर्स क हिआँ यहूदी मोर्देकै महत्व की दृष्टि स दूसरी जगह पइ रहा। मोर्देकै यहूदियन में बहोत महत्वपूर्ण मनई रहा। अउर ओकर साथी यहूदी ओकर बहोत आदर करत रहेन। उ पचे मोर्देकै क आदर एह बरे करत रहेन कि उ अपने लोगन क भले क बरे काम किहे रहा। मोर्देकै सबहिं यहूदियन क कल्याण क बातन किया करत रहा।



# नहेमायाह

## नहेमायाह क बिनती

1 इ सबइ हकल्याह क पूत नहेमायाह क बचन अहई: मई, नहेमायाह, किसलवे नाउँ क महीने में सूसन नाउँ क राजधानी नगरी में रहेउँ। इ उ समई रहा जब अर्तछत्र नाउँ क राजा क राज क बीसवों बरिस चलत रहा। 2मई जब अबहिं सूसन में रहेउँ तउ हनानी नाउँ क मोर एक भाई अउर कछू दूसर लोग यहूदा स हुवाँ आएन। मई ओनसे हुवाँ रह रहे यहूदियन क बारे में पूछेउँ। इ सबइ उ सब लोग रहेन जउन बन्धुआई स बच निकरे रहेन अउर अबहिं तलक यहूदा में रहत रहेन। मई ओनसे यरूसलेम नगरी क बारे में भी पूछे रहेउँ।

3हनानी अउ ओकरे संग क लोग बताएन, “हे नहेमायाह, उ सबइ यहूदी जउन बंधुआई स बच निकरे रहेन अउर जउन यहूदा में रहत अहई, गहन बिपत्ति में पड़ा अहई। ओन लोगन क समन्वा बहोत स समस्या अहई अउर उ पचे बड़े लज्जित होत अहई। काहेकि यरूसलेम क नगर परकोटा ढह गवा अहइ अउर ओकर प्रवेस दुआर आगी स जरिके राखी होइ गए अहई।”

4मई जब यरूसलेम क लोगन अउर नगर परकोटन क बारे में उ सबइ बातन सुनेउँ तउ मई बहोत बियाकुल होइ उठेउँ। मई बइठ गएउँ अउर रोइ उठेउँ। मई बहुत दिना तलक विलाप करत रहउँ। बहोत दिना तलक मई सरग क परमेस्सर स पराथना करत भए उपवास करत रहेउँ। 5एकरे पाछे मई इ पराथना किहेउँ:

“हे यहोवा, हे सरग क परमेस्सर, तू महान अहा अउर तू सक्तीसाली परमेस्सर अहा जउन ओन लोगन क संग अपने पिरिम क वाचा क पालन करत ह जउन तोहसे पिरिम करत ही अउर तोहरे आदेसन पड़ चलत ही।

6“आपन आँखिन अउ अपने कान खोला। कृपा कइके तोहरे समन्वा तोहार सेवक राति दिन जउन पराथना करत रहत ह, ओह पड़ कान द्या। मई तोहार सेवक, इस्राएल क लोगन क बरे बिनती करत हउँ। मई ओन पापन क स्वीकार करत हउँ जेनका हम इस्राएल क लोग तोहरे खिलाफ किहन ह। अउर मई इ भी स्वीकार करत हउँ कि मई तोहरे खिलाफ पाप किहेउँ ह, अउर इ भी कि मोरे बाप क परिवार क दूसरे लोग तोहरे खिलाफ पाप किहेन ह। 7हम इस्राएल क लोग तोहरे बरे बहोत बुरे रहेन ह। हम तोहरे ओन आदेसन अउ नेमन क पालन नाही किहे अही जेनका तू अपने सेवक मूसा क दिहे रह्या।

8“तू अपने सेवक मूसा क जउन सिच्छा दिहे रह्या, कृपा कइके ओका याद करा। तू ओहसे कहे रह्या, “जदि इस्राएल क लोग आपन बिस्सास नाही बनाए रख्या तउ मई तोहका तितर-बितर कइके दूसर देसन में फइलाइ देब। 9मुला जदि इस्राएल क लोग मोरी कइँती लउटइँ अउर मोरे आदेसन पड़ चलइँ, तउ मई अइसा करब: मई तोहरे ओन लोगन क, जेनका अपने घरन क छोड़इ बरे अउर धरती क दूसरे छोन तलक निर्वासन होइ बरे मज़बूर कीन्ह ग रहेन बटोरब अउर ओन जगह स उ जगह पड़ वापस लइ आउब मई जउने जगह क आपन नाउँ स्थापित करइ बरे चुनेउँ ह।”

10“इस्राएल क लोग तोहार सेवक अहई अउर उ पचे तोहरे ही लोग अहई। तू अपनी महासक्ती दुआरा ओन लोगन क बचाएस ह अउर ओका सुरच्छित जगह पड़ लइ आवा ह। 11एह बरे हे यहोवा, कृपा कइके अब मोर बिनती सुना। मई तोहार सेवक अहउँ अउर कृपा कइके अपने सेवकन क बिनती पड़ कान द्या जउन तोहरे नाउँ क मान देइ चाहत ही। जब मई राजा स सहारा माँगब तब तू मोर सहायता करा। मोका सफल बनावा। मोका सहायता द्या ताकि मई राजा क बरे प्रसन्नतादायक बना रहउँ। तब मई राजा क दाखरस सेवक रहा।”

## राजा अर्तछत्र क नहेमायाह क यरूसलेम पठउब

2 राजा अर्तछत्र क बीसवें बरिस क नीसान नाउँ क महीने में, रात्री-भोज क समइ में दाखरस राजा क परोसइ बरे रखा भवा रहा। मई उ दाखरस क लिहेस अउर राजा क दइ दिहेस। मई जब पहिले राजा क संग रहा तउ मई कभी भी दुःखी नाही भवा रहा किन्तु अब मई उदास रहेउँ। 2एह पड़ राजा मोहसे पूछेस, “का तू बीमार अहा? तू उदास काहे देखाई देत अहा? मोर विचार अहइ तोहार मन दुख स भरा अहइ।”

एहसे मई बहोत जियादा डर गएउँ। 3मुला जदपि मई डर गवा रहेउँ किन्तु फुन भी मई राजा स कहेउँ, “राजा जिअत रहई। मई एह बरे उदास हउँ कि उ नगर जेहमाँ मोर पुरखन दफनाए गए रहेन उजाड़ पड़ा ह अउ उ नगर क प्रवेस दुआर आगी स भसम होइ गएन ह।”

4फुन राजा मोहसे कहेस, “एकरे बरे तू मोहसे का कर्वावइ चाहत ह?”

एहसे पहिले कि मई जवाब देतेउँ, मई सरग क परमेस्सर स बिनती किहेउँ। 5फुन मई राजा क जवाब देत भए कहेउँ,

“जदि इ राजा क भावइ अउर जदि मई राजा क बरे सच्चा रहउँ तउ यहूदा क नगर यरूसलेम मँ मोका पठइ दीन्ह जाइ जहाँ पुरखन दफनाए भए अहईँ। मई हुवाँ जाइके उ नगर क फुन स बसावइ चाहत हउँ।”

६रानी राजा क बराबर बइठी भइ रही, तउ राजा अउर रानी मोहसे पूछेस, “तोहार इ जात्रा मँ केतने दिन लगिही? हिआँ तू कब तलक लउत अउब्या?”

राजा मोका पठवइ बरे रानी होइ गवा। तउ मई ओका एक निहचित समइ दइ दिहेउँ। 7मई इ राजा स इ भी कहेउँ, “जदि राजा क मोरे बरे कछू करइ मँ खुसी होइ तउ मोका इ माँगइ क अनुमति दीन्ह जाइ। कृपा कइके परात नदी क पच्छिम छेत्र क राजपालन क देखावइ क बरे कछू पत्र दीन्ह जाईँ। इ सबइ पत्र मोका एह बरे चाही ताकि उ पचे राजपाल यहूदा जात भए मोका अपने-अपने इलाकन स सुरच्छापूर्वक निकरइ देईँ। ८मोका दुआरन, देवारन, मन्दिरन क चारिहुँ कइँती क प्राचीरन अउ अपने घरे क बरे काठे क भी जरूरत अहइ। एह बरे मोका आप स आसाप क नाउँ भी एक पत्र चाही। आसाप आपके जंगलात क हाकिम अहइ।”

तउ राजा मोका पत्र अउर उ हर चीज दइ दिहस जउन मई माँगै रहेउँ। काहेकि परमेस्सर मोरे बरे दयालु रहा एह बरे राजा इ सब कइ दिहे रहा।

९इ तरह मई परात नदी क पच्छिमी पहँटा क राजपालन क लगे गएँ अउर ओनका राजा क जरिये दीन्ह गए पत्र देखाएँ। राजा फउज क अधिकारी अउ घुड़सवार फउजी मोरे संग कइ दीन्ह रहेन। 10सम्बल्लत अउर तोबियाह नाउँ क दुइ मनइयन मोरे कामन क बारे मँ सुनेन। उ पचे इ सुनिके बहोत बेचैन अउर किरोधित भएन कि कउनो इस्राएल क लोगन क मदद बरे आवा ह। सम्बल्लत होरोन क निवासी रहा अउर तोबियाह अम्मोनी क अधिकारी रहा।

### नहेमायाह क जरिये यरूसलेम क देवार क निरीच्छण

11मई यरूसलेम पहोंचेउँ अउर हुवाँ तीन दिन तलक ठहरेउँ 12अउर कछू लोगन क संग लइके मई राति मँ बाहेर निकरि पड़ेउँ। परमेस्सर यरूसलेम क बरे करइ क जउन बात मोरे मने मँ बसाइ दिहे रहा ओकरे बारे मँ मई कउनो क कछू भी नाही बताए रहेउँ। उ घोड़ा क सिवा, जेह पइ मई सवार रहेउँ, मोरे संग अउर कउनो घोड़न नाही रहेन। 13अबहि जब अँधेरा ही रहा तउ मई तराई दुआर स होइके गुजरेउँ। अजगर क कुएँ क तरफ मई आपन घोड़ा मोड़ दिहेउँ अउर मई उ दुआर पइ भी घोड़े क लइ गएँ, जउन कूड़ा फाटक कइँती खुलत रहा। मई यरूसलेम क उ देवार क निरीच्छण करत रहेउँ जउन टूटिके ढह चुका रहा अउर ओकर फाटकन जउन कि आगि दुआरा तबाह कीन्ह गए रहेन। 14एकरे पाछे मई सोते क फाटक कइँती अपने घोड़े क लइ गएँ अउर फुन राजसरोवर क लगे जाइ निकरेउँ। किन्तु जब मई निअरे पहोंचेउँ तउ मई लखेउँ कि हुवाँ मोरे घोड़े क निकरइ बरे काफी जगह नाही अहइ। 15एह बरे अँधियारा मँ ही मई देवार क निरीच्छण करत भए घाटी कइँती ऊपर निकरि गवा अउर आखीर मँ मई लउत

पड़ा अउर तराई क फाटक स होत भवा भीतर आइ गवा। 16ओन अधिकारियन अउर इस्राएल क महत्वपूर्ण लोगन क इ पता नाही चला कि मई कहाँ गवा रहेउँ। उ पचे इ नाही जान पाएन कि मई का करत रहेउँ। मई यहूदी लोग, याजकन, राजा क परिवार, अधिकारियन अउर ओन लोगन क जउन हुवाँ काम करब रहा, अबहि कछू भी नाही बताए रहा।

17एकरे पाछे मई ओन सबहि लोगन स कहेउँ, “हिआँ हम जउने विपतियन मँ पड़े अहईँ, तू ओनका लिखि सकत ह। यरूसलेम खण्डहरन क ढेर बना भवा ह अउर एकर दुआर आगी स जरि चुके अहईँ। आवा, हम यरूसलेम क देवार क फुन स निर्माण करी। एहसे हम क भविस्स मँ फुन कबहुँ लज्जित नाही रहइ पड़ी।”

18मई ओन लोगन क इ भी कहेउँ कि मोह पइ परमेस्सर क कृपा अहइ। राजा मोहसे जउन कछू कहे रहा, ओका मई उ सबइ बातन बताएउँ। एह पइ ओन लोग जवाब देत भए कहेन, “आवा, अब हम काम करब सुरू करी।” तउ उ पचे उत्तम कार्य क करब सुरू कइ दिहन। 19मुला होरोन क सम्बल्लत अम्मोनी क अधिकारी तोबियाह अउर अरब क गोसेम जब इ सुनेन कि फुन स निर्माण करत अहईँ तउ उ पचे बहोत भददे ढंग स हमार मजाक उड़ाएन अउर हमार अपमान किहन। उ पचे बोलेन, “इ तू का करत अहा? का तू राजा क विरोध मँ होत रहे अहा?”

20मुला मई तउ ओन लोगन स बस एतना ही कहेउँ, “हम क सफल होइ मँ सरग क परमेस्सर हमार मदद करी। हम परमेस्सर क सेवक अही अउर हम इ नगर क फुन स निर्माण करब। इ काम मँ तू हमार मदद नाही कइ सकत्या। हिआँ यरूसलेम मँ तोहार कउनो भी पुरखा पहिले कबहुँ भी नाही रहा। इ धरती क कउनो भी भाग तोहार नाही अहइ। इ जगह मँ बने रहइ क तोहका कउनो अधिकार नाही अहइ।”

### परकोटा बनावइ वाले

3 हुवाँ क महायाजक क नाउँ रहा एल्यासीब। एल्यासीब अउ ओकर याजक भाईयन निर्माण क काम करइ बरे गएन अउर उ पचे भेड़ दुआर क निर्माण किहन। उ पचे दुआर क यहोवा क समर्पित किहेस। उ पचे दुआर क दरवाजन क देवारे मँ लगाएन। ओन याजकन यरूसलेम क देवार पइ काम करत भए हम्मेआ क गुम्बद अउ हननेल क गुम्बद तलक ओकर निर्माण किहन। उ पचे आपन काम क यहोवा बरे समर्पित किहेन।

2याजकन क जरिये बनाए गए परकोटन स आगे क देवार क यरीहो क लोगन बनाएन अउर फुन यरीहो क लोगन क जरिये बनाए गए परकोटन क आगे क देवार क निर्माण इम्री क पूत जक्कूर किहस।

3तउ हस्सना क पूतन मछरी दरवाजे क निर्माण किहन। उ पचे एकर सहतीर रखेन अउर एकर दरवाजे, चिठकनियन अउर छड़न लगाएन।

4उरियाह क पूत मरेमोत देवार क अगवा क हीसा क मरम्मत किहस। उरियाह हक्कोस क पूत रहा।

बरेक्याह क पूत मसूल्लाम देवार क ओहसे आगे क हीसा क मरम्मत किहस। बरेक्याह मसेजबेल क पूत रहा।

बाना क पूत सादोक एहसे आगे क देवार क मरम्मत किहस।

5देवार क आगे क हीसा तकोई लोगन क जरिये सुदुद्ध कीन्ह गवा किन्तु तकोई क मुखिया लोगन अपने सुआमी नहेमायाह क देखरेख में काम करइ स मना कइ दिहस।

6पासेह क पूत योयादा, अउर बसोदायाह क पूत मसुल्लाम पुराने दरवाजे क मरम्मत किहस। उ पचे सहतीरन क बइठाएन। उ पचे कब्जन पइ जोड़ियन चढ़ाएन अउर फुन दरवाजे पइ तालन लगाएन अउर चिठकनियन जड़ेन।

7गीबोन स मलल्याह, मेरनोत स यादोन, गिबोनी लोगन, अउर मिस्या में रहइवालन लोगन एकरे आगे क देवार क मरम्मत किहेन। इ सबइ लोग इफ्रात नदी क पच्छिमी पहुँटा छेत्र क राजपालन दुआरा सासन कीन्ह जात रहा।

8देवार क अगले हीसा क मरम्मत हर्हयाह क पूत उजीएल किहस। हर्हयाह क पूत उजीएल एक सोनार रहा। एहसे आगे क देवार क मरम्मत हनन्याह सुगन्ध बनावइवालन किहेन। एन लोग यरूसलेम क देवार क चउड़ी देवार तलक मरम्मत कइके ओकर बनाएस।

9एहसे आगे क देवार क मरम्मत हूर क पूत रपायाह किहस। रपायाह आधे यरूसलेम क प्रसासक रहा।

10देवार क दूसर हीसा हरूपम क पूत यदायाह बनाएस। यदायाह अपने घर क ठीक पाछे क देवार क मरम्मत किहस। एकरे पाछे क हीसे क मरम्मत क काम हसब्याह क पूत हतूस किहस। 11हारीम क पूत मल्लिकयाह अउर पहत्मोआब क पूत हस्सूब देवार क अगले एक दूसरे हीसे क मरम्मत किहस। एन ही लोग भट्टन क मीनारन क मरम्मत भी किहेन। 12सल्लूम जउन हल्लोहेस क पूत रहा, उ देवार क अगले हीसे क बनाएस। इ काम में ओकर बिटियन भी ओकर मदद किहेन। सल्लूम यरूसलेम क दूसर आधे हीसे क राजपाल रहा।

13हानून नाउँ क एक मनई अउर जानोह नगर क निवासियन तराई फाटक क मरम्मत किहेन। ओन ही लोग तराई फाटक क निर्माण किहेन। उ पचे कब्जन पइ जोड़ियन चढ़ाएन अउर फुन दरवाजन पइ तालन लगाएन अउर मेखन जड़ेन। उ पचे पाँच सौ गज लम्बी देवार क मरम्मत किहेन। उ पचे कुरड़ी दरवाजन तलक इ देवार क निर्माण किहेन।

14रेकाब क पूत मल्लिकयाह कुरड़ी दरवाजे क मरम्मत किहस। मल्लिकयाह बेथक्केरेम जिले क हाकिम रहा। उ दरवाजन क मरम्मत किहस, कब्जन पइ जोड़ियन चढ़ाएन अउर फुन दरवाजन पइ तालन लगावाइके मेखन जड़ेन।

15कोल्होजे क पूत सल्लूम स्रोत दुआर क मरम्मत किहस। सल्लूम मिस्या कस्बे क राजपाल रहा उ उ दरवाजन क लगावाएस अउर ओकरे ऊपर एक ठु छत डरवाएस। कब्जन पइ जोड़ियन चढ़ाएस अउर फुन दरवाजन पइ तालन लगावाइके मेखन जड़ेस। सल्लूम सेलह क तलाव क देवार क मरम्मत भी करवाएस। इ तलाव राजा क बगीचे क लगे ही रहा। दाऊद क नगरी क उतरइवाली सीद्धियन तलक समूची देवार क भी उ मरम्मत करवाएस।

16अजबूक क पूत नहेमायाह अगले हीसे क मरम्मत करवाएस। इ नहेमायाह बेतसूर नाउँ क जिले क आधे हीसे क राजपाल रहा। उ जगह तलक भी मरम्मत करवाएस जउन दाऊद क कब्रिस्तान क समन्वा पडत रहा। आदमियन क बनाए भए तलाव तलक, अउर बीरन क निवास नाउँ क जगह तलक भी उ मरम्मत क इ कार्य करवाएस।

17लेवीवंसी परिवार समूह क लोग देवार क अगले हीसे क मरम्मत किहस। लेवीवंस क एन लोग बानी क पूत रहूम क देखरेख में काम किहस। अगले हीसे क मरम्मत हसब्याह किसह। हसब्याह कीला नाउँ क कस्बे क आधे हीसा क प्रसासक रहा। उ अपने जिले क कइँती स मरम्मत क इ काम करवाएस।

18अगले हीसे क मरम्मत ओनके भाइयन किहेन। उ पचे हेनादाद क पूत बव्वै क अधीनता में काम किहस। बव्वै कीला कस्बे क आधे हीसे क प्रसासक रहा।

19एहसे अगले हीसे क मरम्मत क काम येसु क पूत एजेर किहस। एजेर मिस्या क राजपाल रहा। उ सस्त्रागार स लइके परकोट क देवार क कोने तलक मरम्मत क काम किहस। 20एकरे पाछे बारूक क पूत जब्बै ओहसे अगले हीसे क मरम्मत किहस। उ उ कोने स लइके एल्यासीब क घरे क दुआर तलक देवार क इ हीसे क बड़ी मेहनत स मरम्मत किहस। एल्यासीब महायाजक रहा। 21उरियाह क पूत मरेमोत एहसे आगे क देवार क एल्यासीब क घरे क दरवाजे स लइके ओकरे घर क आखीर तलक मरम्मत किहेन। उरियाह हक्कोस क पूत रहा। 22एकरे पाछे क देवार क हीसे क मरम्मत क काम ओन याजकन क जरिये कीन्ह गवा जउन उ इलाके में रहत रहेन।

23फुन बिन्यामीन अउ हस्सूब अपने घरन क आगे क नगर देवार क हीसन क मरम्मत किहेन। ओकरे घर क बाद क देवार मासेयाह क पूत अजर्याह किहेन। मासेयाह अन्नयाह क पूत रहा।

24फुन हेनादाद क पूत बिनूर्ई अजर्याह क घरे स लइके देवार क मोड अउ फुन कोने तलक क हीसे क मरम्मत किहेस।

25एकरे पाछे ऊजै क पूत पालाल देवार क उ मोड स लइके बुर्ज तलक क देवार क मरम्मत क बरे काम किहस। इ मीनार राजा क ऊपरी भवन पइ रही। इ राजा क पहरेदारन क आँगन क लगे ही रहा। पालाल क पाछे परोस क पूत पदायाह इ काम क अपने हाथन में लिहस।

26मन्दिर क जउन सेवक ओपेल पहाड़ी पइ रहा करत रहेन उ पचे देवार क अगले हीसे क जल दुआर क पूर्व कइँती अउर ओकरे निअरे क गुम्बद तलक क मरम्मत क काम किहेन।

27बिसाल गुम्बद स लइके ओपेल क पहाड़ी स लगी देवार तलक क समूचे हीसे क मरम्मत क काम तकोई क लोगन पूरा किहेन।

28अस्व दुआर क ऊपरी हीसे क मरम्मत क काम याजकन किहस। हर याजक अपने घर क आगे क देवार क मरम्मत किहस। 29इम्मेर क पूत सादोक अपने घरे क समन्वा क हीसे क मरम्मत किहस। ओहसे आगे क हीसा

क देवार क मरम्मत सकन्याह क पूत समयाह किहस। समयाह पूर्बी फाटक क दुआरपाल रहा।

30देवार क बचे भए हीसे क मरम्मत क काम सेलेम्याह क पूत हनन्याह अउर सालाप क पूत हानून पूरा किहस। (हानून सालाप क छठवाँ पूत रहा।)

बरेक्याह क पूत मसुल्लाम अपने कार्यालय क आगे क देवार क मरम्मत किहस। 31फुन सोनार मल्लिक्याह मन्दिर क सेवकन क घरन अउर बइपारियन क घरन तलक क देवार क मरम्मत किहस। यानी निरीच्छण दुआर क सामने स देवार क कोने क ऊपरी कच्छ तलक क हीसे क मरम्मत मल्लिक्याह किहस। 32कोने क ऊपरी कमरे स भेड़ दुआर तलक क बीच क देवार क समूचा हीसा सोनारन अउ बइपारियन ठीक किहन।

### सम्बल्लत अउर तोबियाह

4 जब सम्बल्लत सुनेस कि हम लोग यरूसलेम क नगर देवार क पुनःनिर्माण करत अही, तउ उ बहोत किरोधित अउ बियाकुल होइ उठा। उ यहूदियन क हँसी उड़ावइ लाग। 2सम्बल्लत अपने मीतन अउर फउज स सोमरोन में इ बिसय क लइके बातचीत किहस। उ कहेस, “इ सबइ सवितहीन यहूदी का करत अहई? ओनकर बिचार का अहइ? का उ पचे आपन बलियन चढ़ाइ पइही? साइद उ पचे अइसा सोचत ही कि उ पचे एक दिन में ही इ निर्माण कार्य क पूरा कइ लेइही। धूर माटी क इ ढेर में स उ पचे पाथरन क उठाइके फुन स नवी जिनगी नाही दइ पइही। इ सबइ तउ अब राखी अउ माटी क ढेर बन चुका अहई।”

3अम्मोन क निवासी तोबियाह सम्बल्लत क संग रहा। तोबियाह बोला, “इ सबइ यहूदी जउन निर्माण करत रहे ओकरे बारे में इ सबइ का सोचत ही? जदि कउनो नान्ह स लोखरी भी उ देवार पइ चढ जाइ तउ ओनकर उ पाथरन क देवार ढह जाइ।”

4तब नहेमायाह परमेस्सर स पराथना किहस अउर उ बोला, “हे हमरे परमेस्सर, हमरी बिनती सुना। उ सबइ लोग हम स घिना करत ही। सम्बल्लत अउ तोबियाह हमार अपमान करत ही। एन बुरी बातन क तू ओन ही क संग घटाइ द्या। ओनका ओन मनइयन क नाई लज्जित कइके जेनका बन्दी क रूप में लइ जावा जात रहा होइ। 5ओनकर उ अपराध क दूर जिन करा अथवा ओनके ओन पापन क छिमा जिन करा जेनका उ पचे तोहरे लखत किहन ह। उ पचे देवार क बनावइ बालन क अपमान किहन ह अउर ओनकर हिम्मत तोड़न ह।”

6हम यरूसलेम क देवार क पुनः निर्माण किहा ह। हम नगर क चारिहूँ कइँती देवार बनाववा ह। मुला ओका जेतना ऊँच होइ चाही, उ ओहसे आधी ही रहि गइ ह। हम इ एह बरे कइ पाए कि हमार लोग अपने समूचे मन स इ कार्य क किहा।

7किन्तु सम्बल्लत, तोबियाह, अरब क लोगो, अम्मोन क निवासियो अउर असदोद क रहइवाले लोगन क उ समइ बहोत किरोध आवा। जब उ पचे इ सुनेन कि यरूसलेम क

देवार पइ लोग निरंतर काम करत अहई। उ पचे सुने रहेन कि लोग देवार क टूटा भवा भाग क भरत अहई। 8तउ उ पचे सबहि लोग आपुस में बटुरेन अउर उ पचे यरूसलेम क खिलाफ जोजनन बनाएन। उ पचे यरूसलेम क खिलाफ गड़बड़ी पइदा करइ क सडयन्त्र रचेस। उ पचे इ योजना भी बनाएन कि नगर क ऊपर चढ़ाई कइके जुद्ध कीन्ह जाइ। 9मुला हम अपने परमेस्सर स बिनती किहस अउर नगर देवार क देवारन पइ हम पहरेदार बइठाए दिहन ताकि उ पचे हीओँ दिन-रात रखवारी करई जेहसे हम ओन लोगन क मुकाबला करइ क बरे तुरन्त तइयार रहई।

10उधर उहइ समइ यहूदा क लोग कहेन, “कारीगर लोग थकत जात अहई। हुवाँ बहोत स कचरा पड़ा अहइ। तउ हम अब देवार पइ निर्माण कार्य करत नाही रहि सकित। 11अउर हमार दुस्मन कहत अहई, ‘एहसे पहिले कि यहूदियन क एकर पता चलइ या उ पचे हम क लखि लेई, हम ठीक ओनके बीच पहोंच जाब। हम ओनका मार डाउब जेहसे ओनकर काम रुक जाइ।’”

12एकरे पाछे हमरे दुस्मनन क बीच रह रहे यहूदी हमरे लगे आवई अउर उ पचे हम स दस दाई इ कहेन, “हमरे चारिहूँ कइँती हमार दुस्मन अहई, हम जिधर भी मुड़ी, हर कहूँ हमार दुस्मन फइले अहई।”

13तउ मई देवार क देवार क संग-संग जउन जगह सब स खाले पड़त रहिन, ओनके पाछे कछू लोगन क नियुक्त कइ दिहेउँ अउर मई देवार में जउन नाके पडत रहेन, ओन पइ भी लोगन क लगाइ दिहेउँ। मई समूची देवारन क ओनकर तरवारन, भालन अउर धनुस बागन क संग हुवाँ लगाइ दिहेउँ। 14मई सारी स्थिति क अंजाद लिहेउँ अउर फुन खड़े होइके महत्त्वपूर्ण परिवारन, हाकिमन अउ दूसरे लोगन स कहेउँ, “हमरे दुस्मनन स डेराअ जिन। हमरे सुआमी क याद राखा। यहोवा महान अहइ अउ सक्तीसाली अहइ। तू पचन्क अपने भाइयन, अपने पूतन अउ अपनी बिटियन क बरे इ लडाई लडब ही अहइ। तू पचन्क अपनी मेहररूअन अउ अपने घरन क बरे जुद्ध करब ही होइ।”

15एकरे पाछे हमरे दुस्मनन क कान में इ भनक पड गइ कि हम क ओनकी जोजनन क पता चल चुका ह। उ पचे जान गएन कि परमेस्सर ओनकी जोजनन पइ पानी फेर दिहस। एह बरे हम सबहि नगर देवार क देवार पइ काम करइ क वापस लउटि गए। हर मनई फुन अपने जगह पइ वापस चला गवा अउर अपने हीसे क काम करइ लाग। 16उ दिन क पाछे स मोरे आधे लोग देवार पइ काम करइ लागेन अउर मोर आधे लोग भालन, ढारन, तीरन अउर कवचन स सुसज्जित होइके पहरा देत रहे। यहूदा क ओन लोगन क पाछे जउन नगर देवार क देवार क निर्माण करत रहेन, फउज क अधिकारी खड़े रहत रहेन। 17सामान ढोवइवाले मजदूर एक हाथ स काम करतेन तउ ओनके दूसर हाथे में हथियार रखत रहेन। 18हर कारीगर क बगल में जब उ काम करत भवा होत, तरवार बँधी रहत रही। लोगन क सावधान करइ बरे तुरही बजावइवाला मनई मोरे लगे ही रहत। 19फुन प्रमुख हथियारन, हाकिमन अउर बाकी दूसरे लोगन क सम्बोधित करत भए मई कहेउँ, “इ बहोत

बड़ा काम अहइ। हम देवार क सहारे सहारे फइले भाए अही। हर एक दूसरे स दूर पड गए अही। 20तउ जदि तू तुरही क अवाज सुना, तउ उ निर्धारित जगह पइ भाग आवा हूँवइ हम सब बटुरब अउर हमरे बरे परमेस्सर जुद्ध करी।”

21इ तरह हम यरूसलेम क उ देवार पइ काम करत रहे अउर हमरे आधे लोग भाले थामे रहे। हम भिंसारे क पहली किरण स लइके रात में तारे छिटकइ तलक काम किया करत रहे।

22उ अवसर पइ लोगन स मई इ भी कहे रहेउँ: “रात क समइ हर मनई अउर ओकर सेवक यरूसलेम क भीतर ही ठहरइ ताकि राति क समइ में उ पचे पहरेदार रहई अउर दिन क समइ कारीगर।”

23इ प्रकार हम में स कउनो भी कबहुँ अपने ओढ़ने नाही उतारत रहा न मई, न मेरे साथी, न मेरे लोग अउर न पहरेदार। हर समइ हम में स हर एक मनई अपने दाहिने हाथ में हथियार तइयार रखा करत रहा।

### नहेमायाह क जरिये गरीबन क मदद

5 बहोत स गरीब लोग अपने यहूदी भाइयन क खिलाफ सिकाइत करइ लगे रहेन। 2ओनमों स कछू कहा करत रहेन, “हमरे बहोत स बच्चन अहई। जदि हम क खइया क खाब अहइ अउर जिअत रहब अहइ तउ हम क थोडा अनाज तउ मिलइ ही चाही।”

3दूसर लोगन क कहब अहइ, “इ समइ अकाल पड़त अहइ। हम क अपने खेत अउ घर गिरवी रखइ पड़त अहई ताकि हम क थोडा अनाज मिलि सकइ।”

4कछू लोग इ भी कहत रहेन, “हम क अपने खेतन अउर अँगूर क बगीचन पइ राजा क कर चुकावइ पड़त ह मुला हम कर चुकाइ नाही पाइत एह बरे हम क चुकावइ क बरे धन उधार लेइ पड़त ह। 5ओन धनवान लोगन क तरफ लखा। हम भी वइसे ही अच्छे अही जइसे उ पचे हमरे पूत भी वइसे ही अच्छे अहई, जइसे उनके पूत। किन्तु हम क अपने पूत बिटिया दासन रूप में बेचइ पड़त अहइ। हम में स कछू क तउ दासन क रूप में अपनी बिटियन क बेचइ भी पडा हे। अइसा कछू भी तउ नाही अहइ जेका हम कइ सकई। हम अपने खेतन अउ अँगूर क बगीचन क खोइ चुके अहई। अब दूसर लोग ओनके मालिक अहई।”

6जब मई ओनकर इ सबइ सिकाइतन सुनेउँ तउ मोका बहोत किरोध आवा। 7मई खुद क सांत किहेउँ अउर फुन धनी परिवारन अउ हाकिमन क लगे जाइ पहीचेउँ। मई ओनसे कहेउँ, “तू पचे अपने ही लोगन क उ धने पइ बियाज चुकावइ क बरे मजबूर करत अहा जेका तू ओनका उधार देत अहा। निहचइ ही तू पचन्क अइसा बन्द कइ देइ चाही।” फुन मई लोगन क एक ठु सभा बोलाएउँ 8अउर फुन मई ओन लोगन स कहेउँ ‘दूसरे देसन में हमरे यहूदी भाइयन क दासन क रूप में बेचा जात रहा। ओनका वापस बेसहइ अउ अजाद करावइ क बरे हम स जउन बन पडा, हम कीन्ह अउर अब तू पचे ओनका फुन दासन क रूप में बेचत अहा अउर हम क फुन ओनका वापस लेइ पड़ी।’ इ

तरह उ सबइ धनी लोग अउर उ सबइ हाकिम चुप्पी साधे रहेन। कहइ क ओनके लगे कछू नाही रहा। 9तउ मई बोलत चला गवा। मई कहेउँ, “तू लोग जउन कछू करत अहा, उ उचित नाही अहइ। तू पचे इ जानत अहा कि तू पचन्क परमेस्सर स डेराइ चाही अउर ओकर सम्मान करइ चाही। तू पचन्क अइसे लज्जापूर्ण कार्य नाही करइ चाही जइसे दूसर लोग करत ही। 10मोर लोग, मोरे भाई अउर खुद मई भी लोगन क धन अउर अनाज उधार पइ देत ही। मुला आवा हम ओन कर्जन पइ बियाज चुकावइ क बरे ओनका मजबूर करब बन्द कइ देइ। 11इहइ दिना तू पचन्क ओनके खेतन, अंगूरे क बगीचन, जैतून क बाग अउर ओनकर घर ओनका जरूर वापस लउटाइ देइ चाही अउर उ बियाज भी तू पचन्क ओनका लउटाइ देइ चाही जउन तू पचे ओनसे वसूल किहा ह।”

12एह पइ धनी लोगन अउ हाकिमन कहेन, “हम इ ओनका लउटाइ देब अउर ओनसे हम कछू भी नाही माँगब। हे नहेमायाह, तू जइसा कहत ह, हम वइसा ही करब।”

एकरे पाछे मई याजकन क बोलाएउँ। मई धनी लोगन अउ हाकिमन स इ प्रतिग्या करवाएउँ कि जइसा उ पचे कहेन ह, उ पचे वइसा ही करिही। 13एकरे पाछे मई अपने ओढ़नन क सलवटन क फाड़त भाए कहेउँ, “हर उ मनई क साथ, जउन अपने बचन क नाही निभाई, परमेस्सर तदनुकूल करी। परमेस्सर ओनका ओनके घरन स उखाइ देइ अउर उ पचे जउन भी विजियन क बरे काम किहन ह उ पचे सबहिँ ओनके हाथ स जाती रही। उ मनई आपन सबहिँ कछू खोइ बइठी।”

मई जब एन बातन क कहब समाप्त किहेउँ तउ सबहिँ लोग एनसे सहमत होइ गएन। उ पचे सबहिँ बोलेन, “आमीन।” अउर फुन उ पचे यहोवा क बडकई किहन अउर इ तरह जइसा उ पचे बचन दिहे रहेन, वइसा ही किहन।

14अउर फुन यहूदा क धरती पइ अपने राज्जपाल काल क दौरान ज तउ मई अउर न मोरे भाइयन उ भोजन क ग्रहण किहेन जउन राज्जपाल क बरे निआव पूर्ण नाही रहा। मई अपने भोजन क बेसहइ क वास्ते कर चुकावइ बरे कबहुँ कउनो पइ दबाव नाही डाएउँ। राजा अर्तलत्र क सासन काल क बीसवे साल स बतीसवे बरिस तलक मई हुवों क राज्जपाल रहा। मई बारह बरिस तलक यहूदा क राज्जपाल रहा। 15मुला मोहसे क पहिले क राज्जपालन लोगन क जिन्नगी क दूभर बनाइ दिहे रहेन। उ सबइ राज्जपाल लोगन पइ लगभग एक पौण्ड चाँदी चालीस सकेल देइ क बरे दबाव डावा करत रहेन। ओन लोगन पइ उ पचे खाना अउ दाखरस देइ क बरे भी दबाव डावत रहेन। ओन राज्जपालन क नीचे क हाकिम भी लोगन पइ हुकूमत चलावत रहेन अउर जिन्नगी क अउर जियादा दूभर बनावत रहेन। किन्तु मई काहेकि परमेस्सर क आदर करत रहेउँ, अउर ओहसे डेरात रहेउँ, एह बरे मई कबहुँ वइसे काम नाही किहेउँ। 16यरूसलेम क देवार क बनावइ में मई कड़ी मेहनत किहे रहेउँ। मोर सबहिँ सेवकन देवार पइ काम करत रहेन। हम पचे कउनो भी जमीन नाही लिहेन।

17मई, अपने भोजन क चउकी पड़ नियमित रूप स हाकिमन क संग एक सौ पचास यहूदियन क खाइ पड़ बोलाया करत रहेउँ। मई चारिहूँ ओर क देसन क लोगन क भी भोजन देत रहेउँ जउन मोरे लगे आवा करत रहेन। 18मोरे संग मेरी मेज पड़ खाइवाले लोगन क बरे ऐतना खाना सुनिहचित कीन्ह गवा रहा: एक ठु बर्धा, छ तगड़ी भेड़िन अउर अलग-अलग तरीके क पंछी। एकरे अलावा हर दसन दिन मोरी मेज पड़ हर तरह क दाखरस लावा जात रहा। फुन भी मई कबहूँ अइसे भोजन क माँग नाही किहेउँ, जउन राज्जपाल क बरे अनुमोदित नाही रहा। मई अपने भोजन क दाम चुकावड़ क वास्ते, ओन लोगन पड़ कबहूँ दबाव नाही डाएउँ। मई इ जानत रहेउँ कि उ सबइ लोग जउने काम क करत अहई उ बहोत कठिन अहइ। 19परमेस्सर, ओन लोगन क बरे मई जउन अच्छा किहेउँ ह, तू ओका याद राखा।

### जियादा समस्यान

6 एकरे पाछे सम्बल्लत, तोबियाह, अरब क रहइवाले गोसेम अउर हमार दुस्मनन इ सुनेन कि मई देवार क निर्माण कराइ चुका हउँ। हम उ देवार मँ दरवाजन बनाइ चुके रहेन किन्तु तब तलक दरवाजन पड़ जोड़ियन नाही चढ़ाई गई रहिन। 2तउ सम्बल्लत अउर गोसेम मोरे लगे इ सँदेसा पठएन: “नेहमायाह, तू आइके हम स मिला। हम ओनो क मइदान मँ कैफरीम नाउँ क कस्बे मँ मिल सकत ही।” किन्तु ओनकर योजना तउ मोका नोस्कान पहोंचावड़ क रही। 3तउ मई ओनके लगे इ जवाब क संग सँदेस पठइ दिहेउँ: “मई हिआँ महत्त्वपूर्ण काम मँ लगा हउँ। तउ मई नीचे तोहरे लगे नाही आइ सकत। मई सिरिफ एह बरे काम बन्द नाही करइ चाहब कि तोहरे लगे आइके तोहसे मिल सकउँ।”

4सम्बल्लत अउ गोसेस मोरे लगे चार दाई वइसे ही सँदेसा पठएन अउर हर दाई मई भी ओनका उहइ जवाब पठवाइ दिहेउँ।

5फुन पाँचवी दाई सम्बल्लत उहइ सँदेसा क संग अपने सहायक क मोरे लगे पठएस। ओकरे हाथ मँ एक पत्र रहा जउने पड़ मोहर नाही लगी रही। 6उ पत्र मँ लिखा रहा: “चारिहूँ तरफ एक अफवाह फइली भइ अहइ। हर कहूँ लोग उहइ बात क चर्चा करत अहई अउर गोसेस क कहब अहइ कि उ फुरइ अहइ। लोगन क कहब अहइ कि तू अउर यहूदी, राजा स बगावत क योजना बनावत रहे अहा अउर इहइ बरे तू यरूसलेम क नगर देवार क निर्माण करत अहा। लोगन क इ भी कहब अहइ कि तू ही यहूदियन क नवा राजा बनब्या।

7“अउर इ अफवाह भी अहइ कि तू यरूसलेम मँ अपने विसय मँ इ घोसणा करइ बरे भविस्सबक्ता भी चुन लिहा ह: ‘यहूदा मँ एक ठु राजा अहइ।’

“नहेमायाह! अब मई तोहका चितउनी देत हउँ। राजा अर्तछत्र इ विसय क सुनवाई करी तउ हमरे लगे आ अउर हमसे मिलिके इ बारे मँ बातचीत कर।”

8तउ मई सम्बल्लत क लगे इ जवाब पठवाइ दिहेउँ, “तू जइसा कहत रहया ह वइसा कछू नाही होत अहइ। इ सब बातन तोहार अपनी खोपड़ी क उपज अहई।”

9हमार दुस्मन बस हम क डेरावड़ क जतन करत अहई। उ पचे अपने मने मँ सोचत रहेन, “यहूदी लोग डेराइ जइही अउर काम क चलत रखइ बरे बहोत निर्बल पड़ जइही अउर फुन देवार पूरी नाही होइ पाई।”

किन्तु मई अपने मन मँ इ बिनती किहेउँ, “परमेस्सर मोका मजबूत बनाव।”

10मई एक दिन दलायाह क पूत समायाह क घर गएउँ। दलायाह महेतबेल क पूत रहा। समायाह क अपने घरे मँ ही रूकइ पड़त रहा। समायाह कहेस,

“नहेमायाह आवा हम परमेस्सर क मन्दिर क भीतर मिली। आवा चली भीतर हम पक्वितर ठउर क अउर बन्द दुआसन क कइ लेइ आवा, वइसा करी हम काहे? काहेकि लोग अहई आवत रहे मारइ क तोहका। उ पचे आवत अहई आजु रात मार डावड़ क तोहका।”

11किन्तु मई समायाह स कहेउँ, “का मोरे जइसे कउनो मनई क पराइ जाइ चाही? तू तउ जानत ही अहा कि मोरे जइसे मनई क आपन परान बचावड़ क बरे मन्दिर मँ भाग जाइ चाही। तउ मई हुवाँ नाही जाबउँ।”

12मई जानत रहेउँ कि समायाह क परमेस्सर नाही पठएस ह। मई जानत रहेउँ कि मोरे खिलाफ उ एह बरे अइसी झूठ भविस्सबाणियन करत अहइ कि तोबियाह अउर सम्बल्लत ओका वइसा करइ बरे धन दिहस ह। 13समायाह क मोका डेरावड़ बरे भाड़े पड़ रखा गवा रहा। उ पचे इ चाहत रहेन कि डरके छिपइ बरे मन्दिर मँ पराइके मई पाप करउँ ताकि मोका लज्जित करइ अउ बदनाम करइ क कउनो आधार होइ।

14हे परमेस्सर! तोबियाह अउ सम्बल्लत क याद राखा। ओन बुरे कामन क याद राखा जउन उ पचे किहन ह। उ नबिया नोअद्याह अउ ओन नबियन क याद राखा जउन मोका भयभीत करइ क जतन करत अहई।

### परकोटा पूरा होइ गवा

15इ तरह एलूल नाउँ क महीने क पच्चीसवी तारीख क यरूसलेम क परकोटा बनिके तइयार होइ गवा। देवार क बनिके पूरा होइ मँ बावन दिन लगनेन। 16फुन हमार सबहिं दुस्मनन सुनेन कि हम परकोटा बनाइके तइयार कइ लिहा ह। हमरे आस पास क सबहिं देसन लखेन कि निर्माण कार्य पूरा होइ चुका ह। एहसे ओनकर हिम्मत टूट गइ काहेकि उ पचे जानत रहेन कि हम इ कार्य हमरे परमेस्सर क मदद स पूरा किहा ह।

17एकरे अलावा ओन दिनन जब उ देवार बनिके पूरी होइ चुकी रही तउ यहूदा क धनी लोग तोबियाह क पत्र लिख-लिखके पत्र पठवइ लागेन, तोबियाह ओनके पत्रन क जवाब दिया करत। 18उ पचे एन पत्रन क एह बरे पठवा करत रहेन कि यहूदा क बहोत स लोग ओकरे बरे वफादार बने रहइ क कसम उठाए भए रहेन। एकर कारण इ रहा कि तोबियाह सकम्याह क दामद रहा। जउन आरह क पूत

रहा अउर तोबियाह क पूत यहोहानान बेरेक्याह क पूत मसुल्लाम क बिटिया स बियाह किहे रहे। 19अउर उ सबइ लोग मोहसे कहत रहत रहेन कि तोबियाह केतना अच्छा अहइ अउर उधर उ पचे जउन काम मई किया करत रहेउँ, ओकरे बारे में तोबियाह क खबर देत रहेन। तोबियाह मोका डरावइ बरे पत्र पठवत रहत रहा।

**7** इ तरह हम देवार बनावइ क काम पूरा कीन्ह। फुन हम देवार पइ दरवाजन लगाए। फुन हम दुआर क पहरेदारन, मन्दिर क गायकन अउ लेबियन क चुनेन। 2एकरे पाछे मई अपने भाई हनानी क यरूसलेम क हाकिम नियुक्त कइ दीन्ह। मई हनन्याह नाउँ क एक ठु अउर मनई क चुनेउँ अउर ओका किलेदार नियुक्त कइ दिहेउँ। मई हनानी क एह बरे चुने रहेउँ कि उ बहोत ईमानदार मनई रहा अउर उ परमेस्सर स आप लोगन स कहूँ जियादा डेरात रहा। 3तब मई हनानी अउर हनन्याह स कहेउँ, “तोहका हर दिन यरूसलेम क दुआर खोलइ स पहिले घंटन सूरज चढ जाइ क पाछे तलक इंतजार करत रहइ चाही अउर सूरज छुपइ स पहिले ही तोहका दरवाजन बन्द कइके ओन पइ ताला लगाइ देइ चाही। यरूसलेम में रहइवाले लोगन में स तोहका कछू अउर लोग चुनइ चाही अउर ओनका नगर क रच्छा करइ बरे बिसेस जगहन पइ नियुक्त करा अउर कछू लोगन क ओनके घरन क लगे ही पहरे पइ लगाइ द्या।”

### लउटे भए बन्दियन क सूची

4अब लखा, उ एक बहोत बडा नगर रहा जहाँ पर्याप्त जगह रही। किन्तु ओनमाँ लोग बहोत कम रहेन अउर मकान अबहि तलक फुन स नाही बनाए गए रहेन। 5एह बरे मोर परमेस्सर मोरे मन में एक बात पइदा किहस कि मई सबहि लोगन क एक सभा बुलाएउँ तउ मई सबहि महत्त्वपूर्ण लोगन क, हाकिमन क अउर सर्वसाधारण क एक संग बोलाएउँ। मई इ काम एह बरे किहेउँ कि मई ओन सबहि परिवारन क एक सूची तइयार कइ सकउँ। मोका अइसे लोगन क पारिवारिक सूचियन मिली जउन दासता स सब स पहिले छूटइवालन में स रहेन। हुवा जउन लिखा भवा मोका मिला, उ इ तरह अहइ।

6इ सबइ पहँटा क उ सबइ लोग अहई जउन दासत्व स अजाद होइके लउटेन (बाबेल क राजा, नबूकदनेस्सर एन लोगन क बन्दी बनाइके लइ गवा रहा। इ सबइ लोग यरूसलेम अउ यहूदा क लउटेन। हर मनई अपने-अपने नगर में चला गवा। 7इ सबइ लोग जरुब्बाबेल, येसू, नहेमायाह, अजर्याह, राम्याह, नहमानी, मोर्दकै, बिलसान, मिस्पेरेत, बिग्वै, नहूम अउर बाना क संग लउटे रहेन।

### इस्त्राएल क लोगन क सूची

8पॅरोस क संतान	2,172
9सपत्याह क संतान	372
10आरह क संतान	652
11पहल्मोआब क संतान (येसू अउर योआब क परिवार क संतानन)	2,818

12 एलाम क संतान	1,254
13जतू क संतान	845
14जकै क संतान	760
15बिन्नुई क संतान	648
16बेबै क संतान	628
17अजगाद क संतानन	2,322
18अदोनीकाम क संतान	667
19बिग्वै क संतान	2,067
20आदीन क संतान	655
21आतेर क संतान (हिजीक्याह क परिवार स)	98
22हासम क संतान	328
23बेसै क संतान	324
24हारीप क संतान	112
25गिबोन क संतान	95
26बेतलेहेम अउर नतोपा नगरन क लोग	188
27अतानोत नगर क लोग	128
28बेतजमावत नगर क लोग	42
29किर्यत्यारीम, कपीर तथा बेरोत नगरन क लोग	743
30रामा अउर गोबा नगरन क लोग	621
31मिकपास नगर क लोग	122
32बेतेल अउर ऐ नगर क लोग	123
33नबो नाउँ क दूसर नगर क लोग	52
34एलाम नाउँ क दूसर नगर क लोग	1,254
35हरीम नाउँ क नगर क लोग	320
36यरीहो नगर क लोग	345
37लोद, हादीद अउर ओनो नाउँ क नगरन क लोग	721
38सना नाउँ क नगर क लोग	3,930
39याजकन क सूची यदायाह क संतान (येसू क परिवार स)	973
40इम्मेर क संतान	1,052
41पसहूर क संतान	1,247
42हारीम क संतान	1,017

43लेवी परिवार समूह क लोगन क सूची:

येसू क संतान (कदमीएल क जरिये होदवा क परिवार स)	74
--	----

44गायकन क सूची:

आसाप क संतान	148
--------------	-----

45दुआरपालन क सूची:

सल्लूम, आतेर, तल्मोन, अवकूब, हतीता अउर सोबै क संतान	138
---	-----

46मन्दिर क सेवकन क सूची:

सीहा, हसूपा अउर तब्बाओत क संतानन,
47केरोस, सीआ अउर पादोन क संतानन,
48लबाना, हगाबा अउर सल्मै क संतान,
49हानान, गिददेल, गहर क संतान

- 50राया, रसीन अउर नकोदा क संतानन,  
 51गज्जाम, उज्जा, अउर पासेह क संतान  
 52बेसै, मूनीम, नपूसस क संतान,  
 53बकबूक, हकूपा, हहूर क संतान,  
 54बसलीत, महीदा अउर हर्सा क संतानन,  
 55बर्कोस, सीसरा अउर तेमेह क संतानन,  
 56नसीह अउर हतीपा क संतान।
- 57सुलैमान क सेवकन क संतान:  
 सोतै, सोपेरेत अउर परीदा क संतान  
 58याला दकोर्न अउर गिहोल क संतान,  
 59सपत्याह, हतील, पोकेरेत-हैस्सबायीम अउर आमोन  
 क संतानन,  
 60मन्दिर क सबहि सेवक अउ  
 सुलैमान क सेवकन क संतान रहिन। 392
- 61इ ओन लोगन क सूची अहइ जउन तेलमेलह,  
 तेलहर्सा, करूब अद्दोन अउर इम्मेर नाउँ क नगरन स  
 यरूसलेम आए रहेन। मुला इ सबइ लोग साबित नाही कइ  
 सकेन कि ओनकर परिवार असल मँ इस्त्राएल क लोगन स  
 सम्बन्धित रहेन:  
 62दलायाह, तोबियाह अउ नेकोदा  
 क संतानन 642
- 63इ ओन याजकन क सूची अहइ जउन  
 होबायाह, हवकोस अउ बर्जिल्लै (जउन कउनो भी  
 मनई गिलाद क बर्जिल्लै क बिटियन स बियाह किहा  
 ओका बर्जिल्लै कहा जात रहा) क सन्तानन रहेन।
- 64जउन लोग अपने परिवारन क ऐतिहासिक दस्तावेजन  
 क हेरेन अउर उ पचे ओनका पाइ नाही सकेन, ओनकर  
 नाउँ याजकन क सूची मँ नाही जोरा जाइ सका। उ पचे  
 असफल रहेन एह बरे याजक नाही बन सकत रहेन। 65उ  
 राज्जपाल ओनका एक आदेस दिहस जेकरे तहत उ पचे  
 कउनो भी बहोत पवित्र भोजन क नाही खाइ सकत रहेन।  
 उ भोजन मँ स उ पचे उ समइ तलक कछू भी नाही खाइ  
 सकत रहेन जब तलक महायाजक ऊरीम अउर तुम्मीम क  
 उपयोग न कइ लेत रहेन।
- 66उ समूचे समूह मँ लोगन क गनती 42,360 रही  
 67अउर ओनके लगे 7,337 दास अउर दासियन रहिन  
 जउन गनती मँ नाही लीन्ह गवा रहेन, ओनके पास 245  
 गायक अउर गायिकन रहिन। 68ओनके लगे 736 घोड़न  
 अउर 245 खच्चर, 69अउर 435 ऊँट अउर 6,720 गदहन  
 रहेन।
- 70परिवार क कछू नेता लोगन उ कामे क सहारा देइ बरे  
 धन दिहे रहेन। राज्जपाल क जरिये निर्माण कोस मँ 19  
 पौण्ड सोना दीन्ह गवा रहा। उ याजकन क बरे 50 खोरन  
 अउ 530 जोड़ी ओढ़नन भी दिहे रहेन। 71परिवार क मुखिया  
 लोग 375 पौण्ड सोना उ कामे क सहारा देइ क बरे  
 निर्माण कोस मँ दिहन अउर 1 1/3 टन चाँदी ओनके जरिये

भी दीन्ह गइ। 72दूसर लोग कुल मिलाइके 375 पौण्ड सोना  
 उ कामे क सहारा देइ बरे निर्माण कोस क दिहन। उ पचे  
 1 1/3 टन चाँदी अउर याजकन क बरे 67 जोड़े ओढ़नन  
 भी दिहन।

73इ तरह याजक लेवी परिवार समूह क लोग, गायक  
 अउर मन्दिर क सेवक अपने-अपने नगरन मँ बस गएन  
 अउर इस्त्राएल क दूसर लोग भी अपने-अपने नगरन मँ रहइ  
 लागेन अउर फुन साल क सतएँ महीने तलक इस्त्राएल क  
 सबहि लोग अपने-अपने नगरन मँ बस गएन।

### एज्रा क जरिये व्यवस्था विधान क बाँवा जाब

8 फुन इस्त्राएल क सबहि लोग आपस मँ एकट्ठे भएन।  
 उ पचे सबहि एक रहेन अउर इ तरह एकमत रहेन  
 जइसे माना उ पचे एक मनई होई। जल दुआर क समन्वा  
 क खुले चौक मँ उ पचे आपस मँ मिलेन। उ पचे लिपिक  
 एज्रा स मूसा क व्यवस्था क किताब क लिआवइ बरे  
 कहेन। इ उहइ व्यवस्था क विधान अहइ जेका इस्त्राएल क  
 लोग यहोवा क दिहे रहेन। 2तउ याजक एज्रा आपस मँ  
 एकट्ठे भएन। ओन लोगन क समन्वा व्यवस्था क विधान  
 क किताब क लइ आवा। उ दिन महीने क पहिली तारीख  
 रही अउर उ महीना बरिस क सातवाँ महीना रहा। उ सभा  
 मँ मनसेधू रहेन, मेहररूअन रहिन, अउर उ पचे सबहि रहेन  
 जउन बातन क सुन अउर समुझ सकत रहेन। 3एज्रा भिसारे  
 क तइके स लइके दोपहर तलक इ व्यवस्था क विधान क  
 किताबे स पाठ किहा। उ समइ एज्रा क मुँह उ खुले चौक  
 क तरफ रहा जउन जल दुआर क समन्वा पड़त रहा। उ  
 सबहि मनसेधूअन, मेहररूअन अउ ओन सबहि लोगन क  
 बरे ओका बाँचेस जउन सुन समुझ सकत रहेन। सबहि लोग  
 व्यवस्था क विधान क सावधानी स सुनेन।

4एज्रा काठे क उ ऊँच मंच पइ खड़ा रहा जेका इ  
 बिसेस अवसर क बरे ही बनावा गवा रहा। एज्रा क दाहिन  
 कईती मत्तित्याह, सेमा, अनायाह, उरिय्याह, हिल्कियाह  
 अउर मासेयाह खड़े रहेन अउर एज्रा क बाई कईती पदायाह,  
 मीसाएल, मल्कियाह, हासूम, हस्बद्दाना, जकर्याह अउर  
 मसुल्लाम खड़े भए रहेन।

5फुन एज्रा उ किताबे क खोलेस। एज्रा सबहि लोगन क  
 देखाई देत रहा काहेकि उ सब लोगन स ऊपर एक ऊँचे  
 मंच पइ खड़ा रहा। एज्रा व्यवस्था क विधान क किताब क  
 जइसे ही खोलेस, सबहि लोग खड़े होइ गएन। 6एज्रा महान  
 परमेस्सर यहोवा क प्रसंसा किहस अउर सबहि लोग अपने  
 हाथ ऊपर उठावत भए एक सुर मँ कहेन, “आमीन!  
 आमीन!” अउर फुन सबहि लोग आपन मूँडि खाले निहुराइ  
 दिहन अउर धरती पइ दण्डवत करत भए यहोवा क अराधना  
 किहन।

7लेवीबंस परिवार समूह क एन मनइयन व्यवस्था क  
 विधान क व्याख्या तब किहेन सबहि हुवाँ खड़े रहेन।  
 लेवीबंस क ओन लोगन क नाउँ रहेन: येसू, बानी,  
 सेरेब्याह, यामीन, अक्कूब, सब्बतै, होदियाह, मासेयाह,  
 कलिता, अजर्याह, योजबाद, हानान अउ पलायाह। 8लेवीबंस  
 क एन लोग परमेस्सर क व्यवस्था क विधान क किताब क



पाठ किहिन। उ पचे ओनकर अइसी स्पस्ट किहेन कि लोग ओका समुझ सकइँ।

9एकरे पाछे राज्जपाल नहेमायाह याजक अउ सिच्छक एज्रा अउ लेवीबंस क लोग जउन लोगन क सिच्छा देत रहेन, बोलेन। उ पचे कहेन, “आजु क दिन तोहरे परमेस्सर यहोवा क बिसेस दिन अहइ दुःखी जिन ह्वा, बिलाप जिन करा।” उ पचे अइसा एह बरे कहे रहेन कि लोग व्यवस्था क विधान में परमेस्सर क संदेसा सुनत भए रोवइ लगे रहेन।

10नहेमायाह कहेस, “जा, अउर जाइके उत्तिम भोजन अउ सर्बत क आनन्द ल्या। अउर तनिक खाना अउर सर्बत ओन लोगन क भी द्या जउन कउनो खाना नाही बनावत ही। आजु यहोवा क खास दिन अहइँ। दुःखी जिन रहा। काहेकि यहोवा क आनन्द तोहका मजबूत बनाइ देब।”

11लेवीबंस परिवार क लोग लोगन क सांत होइ में मदद किहिन। उ पचे कहेन, “चुप होइ जा, सांत रहा, इ एक बिसेस दिन अहइ। दुखी जिन ह्वा।”

12एकरे पाछे सबहि लोग खावइ अउर पीवइ बरे चले गएन। उ पचे खइया क ओका दिहेन जेका ओकर जरूरत अहइ। उ पचे बहोत खुस रहेन अउर इ तरह उ पचे उ बिसेस दिन क मनाएन काहेकि उ पचे यहोवा क ओन सिच्छन क समुझ लिहिन जेनका ओनका समुझावइ क सिच्छक जतन किया करत रहेन।

13फुन महीने क दूसरी तारीख क सबहि परिवारन क मुखिया, एज्रा, याजकन अउ लेवीबंसियन, स भेटइ गएन अउर ब्यवस्था क विधान क बचनन क समुझइ क बरे सबहि लोग सिच्छक एज्रा क घेरिके खड़े होइ गएन।

14उ पचे समुझिके इ पाएन कि व्यवस्था क विधान में इ आदेस दीन्ह गवा ह कि साल क सतएँ महीने में इस्त्राएल क लोगन क एक बिसेस पवित्तर पर्व मनावइ क बरे यरूसलेम जाइ चाही। ओनका चाही कि उ पचे अस्थायी झोपड़ियन बनाइके हुवाँ रहइँ। लोगन क इ आदेस यहोवा मूसा क जरिये दीन्ह रहा। 15लोगन क चाही रहा कि उ पचे अपने नगरन अउ यरूसलेम स गुजरत भए एन बातन क घोसणा करइँ: “पहाड़ी प्रदेस में जा अउर हुवाँ स तरह तरह क जइतून क बृच्छन क टहनियन लइके आवा। मेंहदी, खजूर अउर छायादार सघन बृच्छन क डारन लिआवा, फुन ओन टहनियन स अस्थायी आवास बनाव। वइसा ही करा जइसा व्यवस्था क विधान बनावत ह।”

16तउ लोग बाहेर गएन अउर ओन-ओन बृच्छन क टहनियन लइ आएन अउर फुन ओन टहनियन स उ पचे अपने बरे अस्थायी झोपड़ियन बनाइ लिहिन। अपने घरे क छतन पइ अउर अपने-अपने अँगनन में उ पचे झोपड़ियन डाइ लिहिन। उ पचे मन्दिर क आँगन जल-दुआर क निअरे क खुले चौक अउर एपैम दुआरे क निअरे झोपड़ियन बनाइ लिहिन। 17इस्त्राएल क लोगन क उ समूची टोली जउन बैधुआपन स छूटिके आई रही, आवास बनाइ लिहिस अउर उ पचे अपनी बनाई झोपड़ियन में रहइ लागेन। नून क पूत यहोसू क समइ स लइके उ दिन तलक इस्त्राएल क लोग झोपड़ियन क त्रौहार क कबहुँ इ तरह नाही मनाए रहेन। हर मनई आनन्द स मगन रहा।

18उ पर्व क हर रोज एज्रा ओन लोगन बरे व्यवस्था क बिधान क किताब में स पाठ करत रहा। उ पर्व क पहिले दिन स अन्तिम दिन तलक एज्रा ओन लोगन क व्यवस्था क बिधान बाँचिके सुनावत रहा। इस्त्राएल क लोग सात दिन तलक उ पर्व क मनाएन। फुन व्यवस्था क विधान क मुताबिक अठएँ दिन लोग एक बिसेस सभा क बरे आपुस में एकट्ठा भएन।

## इस्त्राएल क लोगन क जरिये अपने

### पापन क अंगीकार

9 फुन उहइ महीने क चौबीसवी तारीख क एक दिन क उपवास क बरे इस्त्राएल क लोग आपुस में एकट्ठे भएन। उ पचे इ देखावइ क बरे कि उ पचे दुःखी अउर बेचैन अहइँ, उ पचे सोक वस्त्र धारण किहिन, अपने अपने मूँडन पइ राखी डाएन। 2उ सबइ लोग जउन इस्त्राएल में जनमा रहेन, उ पचे बाहेर क लोगन स अपने आप क अलग कइ दिहिन। इस्त्राएली लोग खड़े होइके अपने अउर अपने पुरखन क पापन क कबूल किहिन। 3उ सबइ लोग हुवाँ लगभग तीन घण्टे खड़े रहेन अउर उ पचे अपने यहोवा परमेस्सर क व्यवस्था क विधान क किताब क पाठ किहिन अउर फुन तीन घण्टे उ पचे यहोवा परमेस्सर क समन्वा आपन मुँडे क खाले निहुरेन अउर ओकर आराधना किहेन अउर अपने पापन क कबूल किहिन।

4फुन लेवीबंसी येसू, बानी, कदमीएल, सबन्याह, बुनी, सेरेब्याह, बानी अउर कनानी मंच पइ खड़े होइ गएन अउर उ पचे अपने परमेस्सर यहोवा क ऊँच सुर में गोहराएन। 5एकरे पाछे लेवीबंसी येसू, कदमीएल, बानी, हसबन्याह, सेरेब्याह, होदियाह, सबन्याह अउर पतहयाह फुन कहेस। उ पचे बोलेन: “खड़े होइ जा अउर अपने यहोवा परमेस्सर क स्तुति करा।”

परमेस्सर सदा स जिअत रहा। अउर सदा ही जिअत रही। लोगन क चाही कि स्तुति करइँ तोहरे बडकईवाले नाउँ क। सबहि आसीसन अउ सारे गुण गानन स नाउँ ऊपर उठइ तोहार।

6तू तउ परमेस्सर अहा। यहोवा, बस तू ही परमेस्सर अहा। अकासे क तू बनाया ह। सब स ऊँच अकासन क रचना किहा तू, अउर जउन कछू अहइ ओनमाँ सब तोहार बनावे अहइ! धरती क रचना किहा तू ही, अउर जउन कछू धरती पइ अहइ। सागर क, अउर जउन कछू अहइ सागर में। तू बनाया ह हर कउनो वस्तु क जिन्गी तू देत ह! सितारे सारे अकास क, निहुरत ही समन्वा तोहरे अउर उपासना करत ही तोहार।

7यहोवा तू ही परमेस्सर अहा। तू मोका कसदियन क ऊर जगह स बाहेर निकालेस ह। तू ओकर नाउँ बदलेस ह अउर ओका नाउँ इब्राहीम दिहेस ह।

8तू इ लखे रहया कि उ सच्चा अउर निष्ठावान रहा तोहरे बरे। कइ लिहा उ साथ ओकरे वाचा एक ओका देइ क धरती कनान क बचन दिहा तू धरती, जउन हुवा करत रही हितियन क अउर एमोरियन क। धरती, जउन हुवा करत

रही परिज्जियन, यबूसियन अउर गिर्गासियन क। मुला बचन दिहा तू उ धरती क देइ क इब्राहीम क संतानन क अउर आपन बचन उ पूरा किहा तू काहे? काहेकि तू उत्तिम अहा।

9यहोवा लखत रहा तड़पत भए तू हमरे पुरखन क मिस्त्र में। गोहरावत मदद क लाल सागर क तट पइ तू ओनका सुने रह्या।

10फिरौन क तू देखाए रह्या चमत्कार। तू हाकिमन क ओकरे अउर ओकरे लोगन क देखाए रह्या अद्भुत करम। तोहका इ गियान रहा कि सोचा करत रहे मिस्त्री कि उ पचे उत्तिम अहइँ हमरे पुरखन स। किन्तु साबित कइ दिहा तू कि तू केतना महान अहा। अउर अहइ ओकर याद बनी भइ ओनका आजु तलक भी।

11सामने ओकरे लाल सागर क बाटँ दिहा तू अउर उ पचे पार होइ ग रहेन झुरान धरती पइ चलत भए। मिस्त्र क फउजी पाछा करत रहेन ओनका। मुला बोर दिहा तू ही रह्या दुस्मन क सागर में। अउर उ पचे बूड़ गएन सागर में जइसे बूड़ जात ह पानी में पाथर।

12मीनार जइसे बादर स दिन में ओनका राह तू देखँया अउर आगी क खंभे क प्रयोग कइके राति में ओनका तू देखँया राह। मार्ग क तू ओनके इ तरह कइ दिहा ज्योतिर्मय अउर देखाइ दिहा ओनका कि कहाँ ओनका जाब अहइ।

13फुन तू उतरया सीनै पहाड़ पइ अउर अकासे स तू रह्या ओनका सम्बोधित किहा। उत्तिम विधान दइ दिहा तू ओनका सच्ची सिच्छा क रहा तू दिहा ओनका। व्यवस्था क विधान ओनका तू दिहा अउर तू दिहा आदेस ओनका बहोत उत्तिम।

14तू बताया ओनका सबित यानी अपने विस्राम क बिसेस दिन क विसय में। तू अपने सेवक मूसा क जरिये ओनका आदेस दिहा। व्यवस्था क विधान दिहा अउर दिहा सिच्छन।

15जब ओनका भूख लगी बरसाइ दिहे भोजन रह्या, तू अकासे स। जब ओनका पियास लाग, चट्टान स परगट किहे तू रह्या जल क अउर कहे तू रह्या ओनसे आवा, 'लइ ल्या इ प्रदेश क।' तू बचन दिहा ओन क उठाइके हाथ इ प्रदेश क ओनका।

16मुला उ सबइ पुरखन हमारे होइ गएन अभिमानी; उ पचे होइ गए हठी रहेन। कइ दिहन उ पचे मना आग्यन मानइ स तोहार।

17कइ दिहन उ पचे मना सुनइ स। उ पचे भूलेन ओन अचरज भरी बातन क जउन तू ओनके संग किहे रह्या। उ पचे होइ गएन जिद्दी। बिद्रोह उ पचे किहन, अउर बनाइ लिहन, आपन एक नेता जउन ओनका लउटाइके लइ जाइ। फुन ओनकर उहइ दासता में मुला तू तउ अहा दयावान परमेस्सर। तू अहा दयालु अउर करुणापूर्ण, धीरजवान, अउ पिरेम स भरा अहा तू। एह बरे तू रह्या त्यागा नाही ओनका।

18चाहे उ पचे बनाइ लिहन सोने क बछवा अउर कहेन, 'बछवा अब देव अहइ तोहार' इहइ स निकारा रहा तू पचन्क मिस्त्र स बाहर मुला ओनका तू त्यागा नाही।'

19तू बहोत ही दयालु अहा। एह बरे तू ओनका रेगिस्ताने में त्यागा नाही। दूर ओनसे हटाया नाही दिन में तू बादर क

खम्भन क मारग तू देखावत रहा ओनका। अउर राति में तू रह्या दूर किहे नाही ओनसे आगी क पुंज क। प्रकासित तू करत रह्या रास्ते क ओनके। अउर तू देखावत रह्या कहाँ ओनका जाब अहइ।

20निज उत्तिम चेतना, तू दिहा ओनका ताकि तू बिवेकी बनाया ओनका। खाइ क देत रह्या, तू ओनका 'मन्ना' अउर पियास क ओनका तू देत्या रहा पानी।

21तू रख्या ओनकर धियान चालीस बरिसन तलक रेगिस्तान में। ओनका मिली हर वस्तु जेकर ओनका दरकार रही। ओढ़ना ओनकर फटे तलक नाही गोड़न में ओनके कबहुँ नाही आई सूनन कबहुँ कउनो पीरा में।

22यहोवा तू दिहा ओनका राज्ज, अउर ओनका दिहा जातियन अउर दूर सुदूर क जगह रहिन ओनका दिहा जहाँ बसत रहेन कछू लोग धरती ओनका मिल गइ सीहोन क, सीहोन जउन हसबोन क राजा रहा धरती ओनका मिल गइ ओग क, ओग जउन बासान क राजा रहा।

23तू ओनका अनन्त संतान जेतने अंबर में तारे अहइँ दिहा ह। ओनका तू उ धरती लइ आया जेकरे बरे ओनके पुरखन क तू कहे रहा कि उ पचे हुवाँ जाई अउर ओह पइ अधिकार करई।

24धरती उ ओन संतानन लइ लिहन। हुवाँ रह रहे कनानियन क उ पचे हराइ दिहन। पराजित कराया तू ओनसे ओन लोगन क साथ ओन प्रदेशन क अउर ओन लोगन क उ पचे जइसा चाहई वइसा करई अइसा रहा तू कराइ दिहा।

25सक्तीसाली नगरन क उ पचे हराइ दिहन। कब्जा किहन उपजाउ धरती पइ उ पचे। उत्तिम चिजियन स भरे भए लइ लिहन उ पचे घर; खोदे भए कुँअन क लइ लिहन उ पचे। लइ लिहन उ पचे रहेन बगीचे अंगूर क। जइतून क बृच्छ अउ फलन क बृच्छ भर पेट खाया उ पचे करत रहेन तउ उ पचे होइ गएन मोटे। तोहार दीन्ह सबहि अद्भुत चिजियन क आनन्द उ पचे लेत रहेन।

26अउर फुन उ पचे तोहार नाफरमानी किहेस अउर तोहार खिलाफ बिद्रोह किहेस। उ तोहरी नेम आपन पीठ क पीछे लोकाइ दिहन अउर तोहरे नबियन क मार डएन। अइसे नबियन क जउन लोगन क सचेत करत रहेन। उ पचे लोगन क तोहरी ओर वापिस लिआवइ क जतन किहेन। मुला हमार पुरखन तोहरे खिलाफ भयानक पाप किहेन।

27तउ तू ओनका ओनके दुस्मनन क हाथन में पकड़इ दिहा। ओनका दुस्मन बहुतेरे कस्ट दिहन। जब हमार पुरखन पइ बिपदा पड़ी तउ उ पचे तोहका गोहारत रहेन। अउर सरग में तू रह्या ओनका सुन लिहा। तू दायलु अउर रहम दिल अहइ एँह बरे तू ओन लोगन क बचावइ बरे लोगन क भेजेस। अउर ओन लोग ओनके दुस्मनन स छुड़ाइके ओनका बचाइ लिहन।

28मुला, जइसे ही चैन ओनका मिलत रहा, वइसे ही उ पचे बुरे काम करइ लग जातेन बार बार। तउ दुस्मनन क हाथन ओनका सौंप दिहा तू ताकि उ पचे करई ओन पइ राज। फुन तोहार दोहाई उ पचे दिहन अउर सरग में तू सुन्या ओनकर अउर मदद ओनकर किहा। तू केतना दयालु अहा! होत रहा अइसा ही अनेकन बार।

29तू चेताया ओनका! फुन स लउटि आवइ क तोहरे विधान में मुला उ पचे रहेन बहोत अभिमानी। उ पचे नकार दिहन तोहरे आदेस क। जदि चलत ह कउनो मनई नेमन पइ तोहरे तउ फुरइ जिण्गा उ किन्तु हमरे पुरखन तउ तोड़े रहेन तोहरे नेमन क उ पचे रहेन हठीले। मुँह फेर, पीठ दिहे रहेन उ पचे तोहका। तोहार सुनइ स ही उ पचे रहेन मना किहे।

30तू रह्या बहोत सहनसील, संग हमरे पुरखन क, तू ओनका करइ दिहा बर्ताव बुरा अपने संग बरिसन तलक। सजग किहा तू ओनका अपनी आतिमा स। ओनका देइ चितउनी पठए रह्या नबियन क तू। मुला हमरे पुरखन तउ ओनकर सुनेन ही नाही। एह बरे तू रह्या दूसरे देसन क लोगन क सौप दिहा ओनका।

31मुला तू केतना दयालु अहा। तू किहे रह्या नाही पूरी तरह नस्ट ओनका। तू तज्या नाही ओनका रह्या। हे परमेस्सर। तू अइसा दयालु अउर करूणापूर्ण अइसा अहा।

32हमार परमेस्सर महान परमेस्सर अहइ! तू एक अचरजमय अउर सक्तीसाली सैनिक अहा जउन बिस्सास करइ जोगग अहा। तू निज वाचा क निभावत ह अउर तू हमेसा दयालु अहा। हमार सबहि परेसानियन क जेका हम पचन्क झेलेस ह साधारण जिन समुझा। साथ में हमरे राजा लोगन क अउर मुखिया लोगन क साथ बहोत परेसानियन घटि रहेन। याजकन क संग में हमरे अउर संग में नबियन क अउर हमरे सबहि लोगन क संग बातन बुरी घटी रहिन। अस्सूर क राजा स लइके आजु तलक उ सबइ बातन भयानक घटी रहिन।

33किन्तु हे परमेस्सर। जउन कछू भी घटब अहइ साथ हमरे घटी ओनके बरे निआव पूर्ण तू रहा। तू तउ अच्छा ही रहा, बुरे तउ हम ही रहे।

34हमरे राजा लोगन मुखियन, याजकन अउर पुरखन नाही पालेन तोहरी सिच्छन क। उ पचे नाही दिहन कान तोहरे आदेसन, तोहार चिताउनियन उ पचे सुनेन ही नाही।

35हिआँ तलक कि जब पुरखन हमरे अपने राज्ज में रहत रहेन, उ पचे नाही सेवा किहन तोहार। तजेन उ पचे नाही बुरे करमत क करब। जउन कछू भी उत्तम वस्तु ओनका तू दिहे रह्या, ओनकर रस उ पचे रहेन लेत। आनन्द उ धरती क लेत रहेन जउन रही सम्पन्न बहोत। अउर जगह बहोत स रही ओनके लगे। किन्तु उ पचे नाही छोडेन निज बुरी राह।

36अउर अब हम बने दास अही; हम दास अही उ धरती पइ, जेका तू दिहे रह्या हमरे पुरखन क। तू इ धरती रह्या ओनका दिहे, कि भोगइँ उ पचे ओकर फल अउर आनन्द लेइँ ओन सबहि चिजियन क जउन हिआँ उगत ही।

37इ धरती क फसल अहइ भरपूर मुला पाप किहा हम तउ हमार उपज जात ह लगे ओन राजा लोगन क जेनका तू बइठाय़ा ह मूँडे पइ हमरे। हम पइ अउर गोरुअन पइ हमरे उ सबइ राजा राज करत ही उ पचे चाहत ही जइसा भी वइसा ही करत ही। हम अही बहोत कस्ट में।

38तउ, सोचिके एन सबहि बातन क बारे में हम करित ह वाचा एक, जउन न बदला जाइ कबहुँ भी। अउर इ वाचा क लिखतम हम लिखत अही अउर इ वाचा पइ अंकित

करित ह आपन नाउँ हाकिम हमरे, लेवी क संतान अउर उ पचे करत ही हस्ताच्छर लगाइके ओह पइ मुहर।

**10** मुहर लगी वाचा पइ निम्नलिखित नाउँ लिखे रहेन: हकल्याह क पूत राज्जपाल नहेमायाह। सिदकिय्याह, 2सरायाह, अजर्याह, यिर्मयाह, 3पसहूर, अमर्याह, मल्किय्याह, 4हत्तूस, सबन्याह, मल्लूक, 5हारीम, मरेमोत, ओबद्याह, 6दानिय्येल, गिन्नतोत, बारूक, 7मसूल्लाम, अबिय्याह, मिय्यामीन, 8माज्याह, बिलगै अउर समायाह। इ सबइ ओन याजक क नाउँ अहइँ जउन मुहर लगी वाचा पइ आपन नाउँ अंकित किहेन।

9इ सबइ ओन लेवीबंसियन क नाउँ अहइँ जउन मुहर लगी वाचा पइ आपन नाउँ अंकित किहेन: आजन्याह क पूत येसू, हेनानाद क संतान बिन्ई अउर कदमिएल 10अउर ओनके भाइयन क नाउँ इ सबइ रहेन: सबन्याह, होदियाह, कलीता, पलायाह, हानान, 11मीका, रहोब, हसब्याह 12जक्कूर, सेरेब्याह, सकन्याह, 13होदियाह, बानी अउर बनीन।

14इ सबइ नाउँ ओन मुखिया लोगन क अहइँ जउन उ मुहर लगी वाचा पइ अपने नाउँ अंकित किहेन: परोस, पहत-मोआब, एलाम, जत्तू, बानी, 15बुन्नी, अजगाद, बेबै, 16अदोनिय्याह, बिग्वै, आदीन, 17आतेर, हिजकिय्याह, अज्जूर, 18होदियाह, हास्पूम, बेसै, 19हारीफ अनातोत, नोबै, 20मगापिआस, मसूल्लाम, हेजौर 21मेसजबेल, सादोक, यद्दू, 22पलत्याह, हानान, अनायाह, 23होसै, हनन्याह, हस्सूब, 24हल्लोहेस, पिलहा, सोबेक, 25हूम, हसब्ना, मासेयाह, 26अहियाह, हानान, आनान, 27मल्लूक, हारीम अउर बाना।

28तउ अब इ सबइ सबहि लोग जेनकर नाउँ ऊपर दीन्ह गए अहइँ परमेस्सर क समन्वा इ बिसेस प्रतिग्या लेत ही। इ बचा भवा लोग भी प्रतिग्या किहेस ह: याजकन, लेवीबंसी, दुआरपाल, गायक, यहोवा क भवन क सेवक, अउर उ सबइ सबहि लोग जउन आस-पास रहइवाले लोगन स परमेस्सर क नेमन क पालन करइ बरे, अपने आप क अलग कइ लिहे रहा। ओन लोगन क मेहररुअन, पूतन, बिटियन अउर हर उ मनई जउन जान अउर समझ सकत ह कि उ पचे का करत अहा।

29इ सबइ लोग जउन अपने भाई बंधुअन अउ अपने मुखियन क संग इ प्रतिग्या क अपनावइ मैं सम्मिलित भएन कि उ पचे परमेस्सर क सेवक मूसा क जरिये दीन्ह गए बिधान क पालन करिही। उ पचे सहमत भएन कि जदि आपन प्रतिग्या में असफल होइ तउ सराप पाइही। परमेस्सर हमका आपन बिधान ओकर सेवक मूसा जरिये दिहेन। इ सबइ लोग प्रतिग्या किहेन कि उ पचे सावधानी क संग अपने यहोवा आपन परमेस्सर क आदेसन, नेमन अउर अध्यादेसन क पालन करिही। उ पचे सुआमी ओकर परमेस्सर क हुकुमन आदेसन अउर फइसलन क अनुसरण करिही।

30“हम प्रतिग्या करित ह कि अपने आस-पास रहइवाले लोगन क संग अपनी बिटियन क बियाह नाही करिही अउर हम इ प्रतिग्या भी करित ह कि ओनकी बिटियन क संग अपने बेटवन क नाही बियाहब।

31“हम इ प्रतिग्या करित ह कि सबित क दिन काम नाही करब अउर जदि हमरे आस-पास रहइवाले लोग सबित क दिन बेचइ क अनाज या दूसर चिजियन लिआउब तउ बिस्त्राम क उ बिसेस दिन या कउनो भी दूसर बिसेस क दिन, ओन चिजियन क नाही बेसहिही। हर सतएँ बरिस हम न तउ आपन धरती क जोतब अउर न बोउब, अउ हर सतएँ बरिस मैं हम दूसरे लोगन क कर्ज क माफ कइ देब।

32“परमेस्सर क भवन क धियान रखइ क बरे ओकरे आदेसन पइ चलइ क जिम्मेदारी क हम ग्रहण करब। हम हर बरिस एक तिहाई सेकेल हमरे परमेस्सर क सम्मान मैं भवन क सेवा, उपासना क बढ़ावा देइ क बरे दिया करब। 33इ धन क उपयोग उ बिसेस रोटी बरे कीन्ह जाइ जेका याजक मन्दिर क वेदी पइ अर्पित करत ह। इ धने क उपयोग हर दिन क अन्नबलि अउ होमबलि बरे कीन्ह जाइ। सबित नवे चाँद क त्यौहार अउर दूसरी सभन पइ इहइ धने स खरचा होइ। ओन पवितर चढ़ावन अउ पाप बलियन बरे भी इ धन क ही उपयोग कीन्ह जाई जेनसे इस्त्राएल क लोग अभिसेक होइ। इ धन स ही हर उ काम क खरच चली जउन हमरे परमेस्सर क मन्दिर क बरे जरूरी अहइ।

34“हम, यानी याजक, लेवीबंसी अउर लोग मिलिके इ निहचित करइ बरे पासे लोकाएन कि हमरे हर परिवार क हर बरिस एक निहचित समइ हमरे परमेस्सर क मन्दिर मैं काठे क उपहार कब लिआउब अहइ। उ काठ जेका हमरे परमेस्सर यहोवा क वेदी पइ बारा जात ह। हम क इ काम क जरूर करइ चाही काहेकि इ हमार व्यवस्था क विधान मैं लिखा अहइ।

35“हम क अपने फलन क हर बृच्छ अउर अपनी फसल क पहिले फलन क लिआवइ क जिम्मेदारी भी ग्रहण करित ह। हर बरिस यहोवा क मन्दिर मैं हम उ फसल क लिआइके अर्पित किया करब।

36“काहेकि ब्यवस्था क विधान मैं इ भी लिखा अहइ एह बरे हम एका भी किया करब: हम अपने पहिलौटे पूत, पहिलौटी गइया क बच्चन, भेड़िन अउर बोकरियन क पहिले छौनन क लइके परमेस्सर क मन्दिर मैं आवा करब। ओन याजकन क लगे हम एन सब क लइ जावा करब जउन हुवाँ मन्दिर मैं सेवा आराधना करत ही।

37“हम परमेस्सर क मन्दिर क भण्डार मैं याजकन क लगे इ सबइ चिजियन भी लिआवा करब: पहिला गूँधा भवा आटा, पहली अन्न बलियन, हमरे सबहिँ बृच्छन क फल, हमरी नई दाखरस अउर तेल क पहिला भाग। हम लेवीबंसियन बरे अपनी उपज क दसवाँ हीसा भी दिया करब काहेकि हर एक नगर मैं जहाँ हम काम करित ह, लेवीबंसी हम स इ सबइ चिजियन लिया करत ही।

38“लेवीबंसी जब उपज क इ भाग एकट्ठा करइँ तउ हारून क परिवार क एक याजक ओनके संग जरूर होइ चाही, अउर फुन एन सबइ चिजियन क दसवे हीसे क हुवाँ स लइके लेवीबंसियन क चाही कि उ पचे ओनका हमरे परमेस्सर क मन्दिर मैं लइ आवइँ अउर ओनका मन्दिर क खजाने क कोठियारन मैं धइ देइँ। 39इस्त्राएल क लोग अउर लेवीबंसियन क चाही कि उ पचे अपने उपहारन क

कोठियारन मैं लइ आवइँ। उपहार क अन्न, नई दाखरस अउर तेल क ओनका हुवाँ लइ आवइ चाही। मन्दिर मैं काम आवइवाली सबहिँ चिजियन ओन कोठियारन मैं रखी जात ही अउर अपने कार्य पइ नियुक्त याजक, गायक अउर दुआरपालन क कमरन भी उहइ रहन।

“हम सबहिँ प्रतिग्या करित ह कि हम अपने परमेस्सर क मन्दिर क देख रेख किया करब।”

### यरूसलेम में नवे लोगन क प्रवेश

11 लखा अब इस्त्राएल क लोगन क मुखिया यरूसलेम मैं बस गएन। इस्त्राएल क दूसरे लोगन क इ निहचित करब रहा कि नगर मैं अउर कउन लोग बसिही। एह बरे उ पचे पासे लोकाएन जेकरे मुताबिक हर दस मनइयन मैं स एक क यरूसलेम क पवितर नगर मैं रहब रहा अउर दुसर नौ मनइयन क अपने-अपने मूल नगरन मैं बसब रहा। 2यरूसलेम मैं रहइ क बरे कछू लोग खुद अपने आप क प्रस्तुत किहन। अपने आप क खुद प्रस्तुत करइ क बरे दूसर मनइयन ओनका धन्नुवाद देत भए आसीर्बाद दिहन।

3इ सबइ प्रांतन क उ सबइ मुखिया अहइँ जउन यरूसलेम मैं बस गएन। (कछू इस्त्राएल क निवासी कछू याजक लेवीबंसी मन्दिर क सेवक अउर सुलैमान क ओन सेवकन क संतान अलग-अलग नगरन मैं अपनी निजी धरती पइ यहूदा मैं रहा करत रहन, 4अउर यहूदा अउर बिन्यामीन क परिवारन क दूसर लोग यरूसलेम मैं ही रहत रहे रहन।)

यहूदा क उ सबइ संतानन जउन यरूसलेम मैं बस गए रहन, उ सबइ इ सब अहइँ: अतायाह। (अतायाह उज्जियाह क पूत रहा। उज्जिया जकर्याह क पूत रहा। जकर्याह अमर्याह क पूत रहा अउर अमर्याह सपत्याह क पूत रहा। सपत्याह महललेल क पूत रहा अउर महललेल पेरेस क संतान रहा।) 5मासेयाह बारूक क पूत रहा (अउर बारूक कोल-होजे क पूत रहा। कोल-होजे हजायाह क पूत रहा। हजायाह अदायाह क पूत रहा। अदायाह योयारीब क पूत रहा। योयारीब जकर्याह क पूत रहा। जकर्याह सिलोई क संतान रहा।) 6पेरेस क संतान यरूसलेम मैं रहत रहिन, ओनकर गनती रही चार सौ अडसठ। उ पचे सबहिँ लोग सूरवीर रहन।

7बिन्यामीन क जउन संतान यरूसलेम मैं आइन उ सबइ इ सब रहिन: सल्लू। (सल्लू मसुल्लाम क पूत रहा। मसुल्लाम योएद क पूत रहा। योएद पदायाह क पूत रहा अउर पदायाह कोलायाह क पूत रहा। कोलायाह मासेयाह क पूत रहा, मासेयाह इतीएह क पूत रहा अउर इतीएह यसायाह क पूत रहा।) 8जउन लोग यसायाह क अनुसरण किहन उ पचे रहन गब्वै अउर सल्लै। एनके संग नौ सौ अट्टाईस मनसेधू रहन। 9जिक्री क पूत योएल एनकर प्रधान रहा अउर हस्सनूआ क पूत यहूदा नगर क दूसर प्रधान रहा।

10यरूसलेम मैं जउन याजक बस गएन, उ सबइ अहइँ; योयारीब क पूत यदायाह अउ याकीन, 11अउर सरायाह हिलकियाह क पूत रहा। हिलकियाह मसुल्लाम क पूत रहा। मसुल्लाम सादोक क पूत रहा। सादोक मरायोत क पूत रहा।

मरायोत अहीतूब क पूत रहा। अहीतूब परमेस्सर क भवन क देखरेख करइ वाला रहा।

12ओनके भाइयन क आठ सौ बाइस मनसेधू जउन मन्दिर क बरे काम किहे रहेन अउर यरोहाम क पूत अदायाह। यरोहाम पलल्याह क पूत रहा। पलल्याह अम्सी क पूत रहा। अम्सी जकर्याह क पूत रहा। जकर्याह पसहूर क पूत रहा। पसहूर मल्किय्याह क पूत रहा। 13मलकियाह क भाइयन क संख्या दुई सौ बियालीस रही। इ सबइ लोग अपने-अपने परिवारन क मुखिया रहेन। अमसै अजरेल क पूत रहा। अजरेल अहजै क पूत रहा। अहजै मसिल्लेमोत क पूत रहा। मसिल्लेमोत इम्मेर क पूत रहा), 14अमसै अउर ओकर साथी वीर जोधा रहेन। उ पचे गनती में एक सौ चौबीस रहेन। हग्गदोलीन क पूत जब्दिएल ओनकर अधिकारी हुआ करत रहा।

15इ सबइ उ सब लेवीबंसी अहई, जउन यरूसलेम में जाइ बसे रहेन: समायाह हस्सूब क पूत रहा। हस्सूब अत्रीकाम क पूत रहा। अत्रीकाम हुसब्याह क पूत रहा। हुसब्याह बुन्नी क पूत रहा। 16सब्बत अउर योजाबाद (इ सबइ दुइ मनई लेवीबंसियन क मुखिया रहेन। उ पचे परमेस्सर क मन्दिर क बाहरी कामन देखरेख करइवालन रहेन।)

17मत्न्याह, (मत्न्याह मीका क पूत रहा, अउर मीका जब्दी क पूत रहा, अउ जब्दी आसाप क पूत रहा। आसाप स्तुति गीत अउर पराथनन क गायन में लोगन क धन्यवाद देइवालन क अगुवाई किया करत रहा।) बकबुकियाह अपने भाइयन क ऊपर दूसरे दर्जे क अधिकारी रहा।) अउर अब्दा सम्मू क पूत रहा। (सम्मू गालाल क पूत रहा। गालाल यदूतून क पूत रहा।) 18इ तरह दुइ सौ चौरासी लेवीबंसी यरूसलेम क पवित्र नगर में जाइ बसे रहेन।

19जउन दुआरपाल यरूसलेम चले गए रहेन, ओनकर नाउँ इ सबइ रहेन: अक्कूब, तलमोन, अउर ओनकर साथी। इ सबइ लोग नगर दुआरन पइ नजर रखत भए ओनकर रखवारी किया करत रहेन। इ सबइ गनती में एक सौ बहतर रहेन।

20इस्त्राएल क दूसर लोग, दूसर याजक अउर लेवीबंसी यहूदा क सबहिं नगरन में रहइ लागेन। हर कउनो मनई उ धरती पइ रहा करत रहा जउन ओनकर पुरखन क रही। 21मन्दिर में सेवकन ओपेल क पहाड़ी पइ बस गएन। सीहा अउ गिरपा मन्दिर क ओन सेवकन क निगारौं कार रहेन।

22यरूसलेम में लेवीबंसियन क ऊपर उज्जी क अधिकारी बनावा गवा। उज्जी बानी क पूत रहा। (बानी, मीका क पड़पोता, मत्न्याह क पोता, अउर हसब्याह क पूत रहा।) उज्जी आसाप क संतान रहा। आसाप क संतान उ सबइ गायक रहेन जउने पइ परमेस्सर क मन्दिर क सेवा क भार रहा। 23 इ सबइ गायक राजा क आग्यन क पालन किया करत रहेन। राजा क आग्यन एन गायकर क बतावत रहिन कि ओनका हर रोज का करब अहइ। 24मसेजबेल क पूत पतहियाह, लोगन स सम्बन्धित मामलन क बिसय में राजा क प्रतिनिधि रहा। मसेजबेल जेरह क पूत रहा। जेरह यहूदा क पूत रहा।)

25यहूदा क लोग एन कस्बन में बस गएन: किर्यतर्बा अउर ओकरे आस-पास क नान्ह-नान्ह गाँव, दिबोन अउर ओकरे आस-पास क नान्ह-नान्ह गाँव यकब्सेल अउर ओकरे आस-पास क नान्ह-नान्ह गाँव 26अउर येसू, मोलादा, बेतपेलेत, 27हसर्यूयाल बेरसेबा अउर ओकरे आस-पास क नान्ह गाँव 28अउर सिकलग, मकोना अउर ओकरे आस-पास क नान्ह गाँव। 29एन्निम्मोन, सोरा, यर्मूत, 30जानोह अउर यदुल्लाम अउ ओकरे आस-पास क नान्ह-नान्ह गाँव। लाकीस अउर ओकरे आस-पास क खेतन, अजेका अउर ओकरे आस-पास क नान्ह-नान्ह गाँव। इ तरह बरसेवा स लइके हिन्नौम क तराई तलक क इलाके में यहूदा क लोग रहइ लागेन।

31जउने जगहन में बिन्यामीन क संतान रहइ लागे रहेन, उ सबइ इ सब रहिन: गोबा मिकमस, अय्या, बेतेल अउर ओकरे आस-पास क नान्ह-नान्ह गाँव, 32अनातोत, नोब, अनन्याह 33हासोर रामा, गितैम, 34हादीद, सबोईम, नबल्लत, 35लोद, ओनो अउर कारीगरन क तराई। 36लेवीबंसियन क कछू समुदाय जउन यहूदा में रहा करत रहेन बिन्यामीन क धरती पइ बस गए रहेन।

### याजक अउर लेवीबंसी

12 जउन याजक अउर लेवीबंसी यहूदा क धरती पइ लउटिके वापस आए रहेन, उ सबइ इ सब रहेन। उ सबइ सालतीएल क पूत जरूब्बाबेल अउ येसू क संग लउटे रहेन, ओनके नाउँन क सूची इ अहइ: सरायाह, यिर्मयाह, एज्रा, 2अमर्याह, मल्लूक, हतूस, 3सकन्याह, रहूम, मरेमोत, 4इद्दो, गिन्तोई, अबियाह, 5मिन्यामीन, माद्याह, बिल्गा, 6समायाह, योआरीब, यदायाह, 7सल्लू, आमोक, हिल्किय्याह अउर यदायाह। इ सबइ लोग याजकन अउर ओनके सम्बन्धियन क मुखिया रहेन। येसू क दिनन में इ सबइ ही ओनके मुखिया हुआ करत रहेन।

8लेवीबंसी लोग इ सबइ रहेन: येसू, बिन्नीई, कदमिएल, सेरेब्याह, यहूदा अउर मत्न्याह भी। मत्न्याह क सम्बन्धियन समेत इ सबइ लोग परमेस्सर क धन्यवाद गीतन क अधिकारी रहेन। 9बकबुकियाह अउ उन्नो एन लेवीबंसियन क सम्बन्धी रहेन। इ दुइनुँ आराधना सेवा क अवसरन पइ ओनके समन्वा खड़े रहा करत रहेन। 10येसू योयाकीम क बाप रहा अउर योयाकीम एल्यासीब क बाप रहा अउर एल्यासीब योयादा क बाप रहा। 11योयादा योनातान क बाप रहा। योनातान यहूदा बाप रहा।

12योयाकीम क दिनन में इ सबइ मनसेधू याजकन क परिवारन क मुखिया हुआ करत रहेन:

सरायाह क घराने क मुखिया मरायाह रहा

यिर्मयाह क घराने क मुखिया हनन्याह रहा।

13मस्सूलाम एज्रा क घराने क मुखिया रहा

अमर्याह क घराने क मुखिया रहा यहोहानान।

14योनातान मल्लूक क घराने क मुखिया रहा

योसेप सबन्याह क घराने क मुखिया रहा।

15अदना हारीम क घराने क मुखिया रहा।

हेलैक मेरेमोत क घराने क मुखिया रहा।

- 16जकर्याह इद्दो क घराने क मुखिया रहा।  
मसुल्लाम गिन्नतोन क घराने क मुखिया रहा।  
17जिक्री अबियाह क घराने क मुखिया रहा।  
पिलतै मिन्यामीन अउर मोअद्याह क घराने  
क मुखिया रहा।  
18सम्मू बिल्गा क घराने क मुखिया रहा।  
यहोनातान सामायह क घराने क मुखिया रहा।  
19मतैन योयारीब क घराने क मुखिया रहा।  
उजी, यदायाह क घराने क मुखिया रहा।  
20कल्लै सल्लै क घराने क मुखिया रहा।  
एबेर आमोक क घराने क मुखिया रहा।  
21हसब्याह हिल्किय्याह क घराने क मुखिया रहा।  
अउर नतनेल यदायाह क घराने क मुखिया रहा।

22फारस क राजा दारा क सासन काल में लेवी परिवारन क मुखिया लोगन अउर याजक घरानन क मुखिया लोगन क नाउँ एल्यासीब, योयादा, योहानान अउ यहूदा क दिनन में लिखे गएन। 23लेवी परिवार क संतानन क बीच जउन परिवार क मुखिया रहेन, ओनकर नाउँ एल्यासीब क पूत योहानान तलक इतिहास क पुस्तक में लिखे गएन।

24लेवियन क मुखिया लोगन क नाउँ इ सबई अहईँ: हसब्याह, सेरेब्याह, कदमिएल क पूत येसू ओकर भाईयन। ओनके भाईयन स्तुतिगान अउ धन्यवाद-गीत क वास्ते ओनके समन्वा खड़ा रहत रहेन। उ पचे आमने-सामने इ तरह खड़े होत रहेन कि एक गायक समूह दूसरे गायक समूह क जवाब में गीत गावत रहा। परमेस्सर क भक्त दाऊद क अइसी ही आग्या रही।

25जउन दुआरपाल दुआरन क लगे क कोठियारन पइ पहरा देत रहेन, उ पचे इ सब रहेन: मत्तन्याह, बकबुकियाह, ओबाद्याह, मसुल्लाम, तलमोन अउर अक्ककूब। 26इ सबइ दुआरपालक येसू क पूत योयाकीम क दिनन में सेवा कार्य किया करत रहेन। येसू जउन कि योसादाक क पूत रहा। एन दुआरपालन ही राजपाल नहेमायाह अउर याजक अउ विद्वान एज्रा क दिनन में सेवा कार्य किहे रहेन।

### यरूसलेम क देवार क समर्पित किया जाब

27लोग यरूसलेम क देवार क समर्पित किहन। उ पचे सबहिं लेवीबंसियन क बोलाएन। तउ लेवी जउने नगर में रहत रहेन, हुवाँ स उ पचे आएन। यरूसलेम क देवार क समर्पण क मनावइ क बरे उ पचे यरूसलेम आएन। परमेस्सर क धन्यवाद देइ अउ स्तुतिगीत गावइ क बरे लेवीबंसी हुवाँ आएन उ पचे आपन झाँझ, सारंगी अउर वीणन बजाएन।

28दूसर सबइ गायकन भी यरूसलेम आएन। उ पचे गायक यरूसलेम क आसपास क नगरन स आए रहेन। उ पचे नतोपतियन क गाँवन स, 29बेत-गिलगाल, गोबा अउर अजमाबेत क नगरन स आए रहेन। गायकन, यरूसलेम क इर्द-गिर्द नान्ह-नान्ह बस्तियन बनाइ रखी रहिन।

30इ तरह याजकन अउ लेवियन एक समारोह क जरिये अपने अपने क सुद्ध किहन। फुन एक सभारोह क जरिये उ

पचे लोगन, दुआरन अउर यरूसलेम क देवार क भी सुद्ध किहन।

31फुन मईँ यहूदा क मुखिया लोगन स कहेउँ कि उ पचे ऊपर जाइके देवार क सिखर पइ खड़े होइ जाईँ। मईँ परमेस्सर क धन्यवाद देइ क बरे दुइ बडकी गायक मण्डलियन क चुनाव भी किहेउँ। एनमों स एक गायक मण्डली क कुरडी दुआर कइँती दाहिनी तरफ देवार क सिखर पइ जाब सुरू रहा। 32होसायाह अउर यहूदा क आधे मुखिया ओन गायकन क पाछे होइ लिहन। 33अजर्याह, एज्रा मसुल्लाम, 34यहूदा बिन्यामीन, समायाह, अउर यिर्मयाह भी ओनके पाछे होइ लिहे रहेन। 35तुरही बरे कछू याजक भी देवार पइ ओनकर अनुसरण करत भए गएन। जकर्याह भी ओनके पाछे पाछे रहा। जकर्याह योहानान क पूत रहा। योहानान समायाह क पूत रहा। समायाह मत्तन्याह क पूत रहा। मत्तन्याह मीकायाह क पूत रहा। मीकायाह जक्कूर क पूत रहा। जक्कूर आसाप क पूत रहा। 36हुवाँ जकरिया क भाई समायाह, अजरेल, मिल्लै, गिल्लै, माए, नतनेल, यहूदा अउर हनानी भी मौजूद रहेन। ओनके लगे परमेस्सर क मनसेधू, दाऊद क बनाए भए बाजन रहेन। देवार क समर्पित करइ क बरे जउन लोग हुवाँ रहेन, ओनके समूह क अगुवाई, विद्वान एज्रा किहस। 37अउर उ पचे स्रोत दुआर पइ चले गएन। फुन उ पचे सामने क सीढियन स होत भए दाऊद क नगर पैदल ही गएन। फुन उ पचे नगर देवार क सिखर पइ जाइ पहेचेन अउर इ तरह दाऊद क घर पइ स होत भए उ पचे पूर्वी जल दुआर पइ पहुँच गएन।

38गायकन क दूसर मण्डली बाई कइँती दूसर दिसा में चल पड़ी। उ पचे जब देवार क सिखर कइँती जात रहेन, मईँ ओनके पाछे होइ लिहेउँ। आधे लोग भी ओनके पाछे होइ लिहन। भट्टन क मीनारन क पाछे छोड़त भए उ पचे चौड़े देवार पइ चले गएन। 39एकरे पाछे उ पचे एन दुआरन पइ गएन एप्रैम दुआर, पुरान दरवाजा अउर मछरी फाटक अउर फुन उ पचे हननेल अउ हम्मैआ क बुर्जन पइ गएन। उ पचे भेड दुआर तलक जाइ पहेचेन अउर पहरेदारन क दुआर पइ जाइके रुक गएन। 40फुन गायकन क उ सबइ दुइनउँ मण्डलियन परमेस्सर क मन्दिर में अपने-अपने जगहन क चली गइन अउर मईँ अपने जगह पइ खड़ा होइ गवा अउ आधे हाकिम मन्दिर में अपने अपने जगहन पइ जा खड़े भएन। 41फुन एकरे पाछे अपने-अपने जगहन पइ जउन याजक जाइ खड़े भए रहेन, ओनकर नाउँ अहईँ एल्याकीम, मासेयाह, मिन्यामीन, मीकायाह, एल्योएनै, जकर्याह अउर हनन्याह। ओन याजकन अपनी अपनी तुरहीयन लइ रखे रहेन। 42एकरे पाछे इ सबइ याजक मन्दिर में अपने-अपने जगहन पइ आइ खड़े भएन: मासेयाह, समायाह, एलियाजर, उज्जी, यहोहानाम, मल्कियाह, एलाम अउर एजेर।

फुन दुइनउँ, गायक मण्डलियन यिज्रहियाह क अगुवाई में गाना सुरू किहन। 43तउ उ बिसेस दिन, याजकन बहोत स बलियन चढ़ाएन। हर कउनो बहोत खुस रहा। परमेस्सर हर कउनो क आनंदित किहे रहा। हिआँ तलक कि मेहररूअन अउर बच्चन तलक बहोत उल्लास में भरे अउ खुस रहेन।

दूर दराज क लोग भी यरूसलेम स आवत भए आनन्दपूर्ण सौर क सुन सकत रहेन।

44उ दिन मुखिया लोग कोठियारन क अधिकारियन क नियुक्ति किहन। इ सबइ कोठियार ओन उपहार क रखइ क बरे रहेन जेनका लोग अपने पहिले फलन अउर अपनी फसल अउर आय क दसवें हीसे क रूप में लिआवा करत रहेन। ब्यवस्था क विधान क अनुसार लोगन क नगर क चारिहूँ ओर क खेतन अउ बगीचन स उपज क एक हीसा, याजकन अउ लेवियन बरे लिआवइ चाही। यहूदा क लोग जउन याजक अउ लेवी सेवा कार्य करत रहेन ओनके बरे अइसा करइ में खुसी क अनुभव करत रहेन। 45याजकन अउ लेवियन अपने परमेस्सर बरे अपना कर्तव्य पालन किहे रहेन। उ पचे उ सबइ समारोह किहे रहेन जेनसे लोग पवित्र भएन। गायकरन अउर दुआरपालन भी अपने हीसे क काम किहन। दाऊद अउर ओकर पूत सुलैमान जउन भी आग्यन दिहे रहा, उ पचे सब कछू वइसा ही किहे रहेन। 46(बहोत दिनन पहिले दाऊद अउर आसाप क दिनन में उ धन्नुवाद क गीतन अउर परमेस्सर क स्तुतियन अउ गायकन क मुखिया हुवा करत रहेन।)

47तउ जरूबबबेल अउ नहेमायाह क दिनन में गायकन अउर दुआरपालन क रखरखाव बरे इस्राएल क सबहिं लोग हर रोज दान दिया करत रहेन। दूसरे लेवियन क बरे भी उ पचे बिसेस दान दिया करत रहेन अउर फुन लेवी ओहमों स हारून क संतानन अउ याजकन क बरे बिसेस योगदान दिया करत रहेन।

### नहेमायाह क अन्तिम आदेस

**13** उ दिन मूसा क किताब क ऊँचे सुर में पाठ कीन्ह गवा ताकि सबहिं लोग ओका सुन सकइँ। मूसा क किताब में ओनका इ नेम लिखा भवा मिला कउनो भी अम्मोनी मनई क अउर कउनो भी मोआबी मनई क परमेस्सर क सभन में सामिल न होइ दीन्ह जाइ। 2इ नेम एह बरे लिखा गवा रहा कि उ पचे इस्राएल क लोगन क भोजन या जल नाही दिया करत रहेन, अउ उ पचे इस्राएल क लोगन क सराप देइ क बरे बालाम क धन दिया करत रहेन। मुला हमार परमेस्सर उ सराप क हमरे बरे वरदान में बदल दिहस। 3तउ इस्राएल क लोग इ नेम क सुनिके एकर पालन किहन अउर पराए लोगन क संतानन क इस्राएल स अलग कइ दिहन।

4किन्तु अइसा होइ स पहिले एल्यासीब तोबियाह क मन्दिर में एक तु बड़की कोठरी दइ दिहस। एल्यासीब परमेस्सर क मन्दिर क भण्डार घरन क अधिकारी याजक रहा। अउर एल्यासीब तोबियाह क घनिष्ठ मीत भी रहा। 5पहिले उ कोठरी क प्रयोग भेट में चढ़ाए गए अन्न, सुगन्ध अउर मन्दिर क बर्तनन अउर दूसर चिजियन क रखइ क बरे कीन्ह जात रहा। उ कोठरी में गायकन लेवियन अउर दुआरपालन क बरे अन्न क दसवों हीसा, नई दाखरस अउर तेल भी रखा भवा रहेन। याजकन क दीन्ह गए उपहार भी उ कोठरी में रखे जात रहेन। किन्तु एल्यासीब उ कोठरी क तोबियाह क दइ दिहे रहा।

6जउने समइ इ सब कछू भवा रहा, उ समइ मई यरूसलेम में नाही रहा। मई बाबेल क राजा क लगे वापस गवा भवा रहा। जब बाबेल क राजा अर्तछत्र क सासन क बतीसवों साल रहा, तब मई बाबेल गवा रहेउँ। पाछे मई राजा स यरूसलेम वापस लउट जाइ क अनुमति माँगेउँ 7अउर इहइ तरह मई यरूसलेम लउट आएउँ। एल्यासीब क इ बुरा काम क बारे में मई सुनेउँ कि एल्यासीब हमरे परमेस्सर क मन्दिर क दालान क एक कोठरी तोबियाह क दइ दिहस। 8एल्यासीब जउन किहे रहा, ओहसे मई बहोत कोहान रहेउँ। तउ मई तोबियाह क चिजियन उ कोठरी स बाहरे निकारि लोकाएउँ। 9ओन कोठरियन क स्वच्छ अउर पवित्र बनावइ क बरे मई आदेस दिहेउँ अउर फुन ओन कोठरियन में मई मन्दिर क भौंड़ी अउर दूसर चिजियन भेट में चढावा भवा अन्न अउ सुगन्धित द्रव्य फुन स रखवाइ दिहेउँ।

10मई इ भी सुनेउँ कि लोग लेवियन क ओनकर हीसा नाही दिहन ह जेहसे लेवीबंसी अउर गायक अपने खेतन में काम करइ बरे वापस चले गएन ह। 11तउ मई ओन अधिकारियन स कहेउँ कि उ पचे गलत अहइँ। मई ओन स पूछेउँ, “तू पचे परमेस्सर क मन्दिर क देखभाल काहे नाही किहा?” मई सबहिं लेवीबंसियन क बटोरेउँ अउर मन्दिर में ओनकी जगहन अउ ओनके कामन पइ वापस लउट आवइ क कहेउँ। 12एकरे पाछे यहूदा क हर कउनो मनई ओनके दसवे हीसे क अन्न, नई दाखरस अउर तेल मन्दिर में लिआवइ लगा। ओन चिजियन क भण्डार गृहन में रख दीन्ह जात रहा।

13मई एन मनइयन क भण्डार ग्रहन क देखरेख करइवाला नियुक्त किहेउँ: याजक सेलेम्याह, विद्वान सादोक अउ पादायाह नाउँ क एक लेवी साथ ही मई पतन्याह क पोतन अउर जक्कूर क पूत हानान क ओनकर सहायक नियुक्त कइ दिहेउँ। जक्कूर मत्न्याह क पूत रहा। मई जानत रहेउँ कि ओन मनइयन पइ बिस्सास कीन्ह जाइ सकत रहा। ओन लोगन क कार्य आपन नातेदारन में खावइ अउर पीवइ क सामान बाँटइ क रहा।

14हे परमेस्सर, मोरे कीन्ह गए कामन क तू मोका याद राखा अउर अपने परमेस्सर क मन्दिर अउर ओकरे सेवा कार्यन क बरे बिस्सास क संग जउन कछू मई किहेउँ ह, उ सब कछू क तू जिन बिसराया।

15ओनही दिनन यहूदा में मई लखेउँ कि लोग सबित क दिन भी काम करत ही। मई लखेउँ कि लोग दाखरस बनावइ क बरे रस निकारत अहइँ। मई लोगन क अनाज लिआवत अउर ओका गदहन पइ लावत लखेउँ। मई लोगन क नगर में अंगूर, अंजीर अउ हर तरह क चिजियन लइके आवत भए लखेउँ। उ पचे एन सबहिं चिजियन क सबित क दिन यरूसलेम में लिआवत रहेन। तउ एकरे बरे मई ओनका चितउनी दिहेउँ। मई ओनसे कहि दिहेउँ कि ओनका सबित क दिन खाइ क चिजियन कबहुँ भी नाही बेचइ चाही।

16यरूसलेम में कछू सीरी नगर क लोग भी रहा करत रहेन। उ सबइ लोग मछरी अउर दूसर तरह क दूसर चिजियन यरूसलेम में लिआवा करतेन अउर ओनका सबित

क दिन बेचा करतेन अउर यहूदी ओन चिजियन क बेसहा करत रहेन। 17मई यहूदा क महत्वपूर्ण लोगन स कहेउँ कि उ पचे ठीक नाही करत अहई। ओन महत्वपूर्ण लोगन स मई कहेउँ, “तू पचे इ बहोत बुरा काम करत अहा। तू पचे सबित क दिन भ्रस्ट करत अहा। तू पचे सबित क दिन क एक आम दिन जइसा बनाए डारत अहा। 18तू पचन्क इ गियान अहइ कि तोहरे पचन्क पुरखन अइसे ही काम किहेन। एह बरे हमरे परमेस्सर हम पइ अउर हमरे नगर पइ बिपतियन पठए रहेन अउर बिनास ढाए रहेन। अब तू लोग वइसा ही काम अउर भी जियादा करत अहा, जेहसे इस्त्राएल पइ वइसी ही बुरी बातन अउर जियादा घटिही काहेकि तू सबित क दिन क बर्बाद करत अहा अउर एका अइसा बनाए डारत अहा जइसे इ कउनो महत्वपूर्ण दिन ही नाही अहइ।”

19तउ हर सुक्रवार क साम क साँझ होइ स पहिले ही मई इ किहेउँ कि दुआरपालन क आग्या दइके यरूसलेम क दुआर बंद करवाइके ओन पइ ताले डरवाइ दिहेउँ। मई इ भी आग्या दइ दिहेउँ कि जब तलक सबित क दिन पूरा न होइ जाइ दुआर न खोले जाई। कछू अपने ही लोग मई दुआरन पइ नियुक्त कइ दिहेउँ। ओन लोगन क इ आदेस दइ दीन्ह गवा रहा कि सबित क दिन यरूसलेम मँ कउनो भी माल असबाब न आवइ पावइ एका उ पचे सुनिहचित कइ लेई।

20एक आध दाई बइपारियन अउ सौदागरन क यरूसलेम स बाहेर ही रात गुजारइ पडी।

21किन्तु मई ओन बइपारियन अउ सौदागरन क चितउनी दइ दिहेउँ। मई ओनसे कहेउँ, “देवार क देवार क आगे न ठहरा करा अउर जदि तू पचे फुन अइसा करब्या तउ मई तू पचन्क बंदी बनाइ लेब।” तउ उ दिन क पाछे स सबित क दिन अपना सामान बेचइ बरे उ पचे फुन कबहुँ नाही आएन।

22फुन मई लेवीबंसियन क आदेस दिहेउँ कि उ पचे खुद क पवित्तर करई। अइसा कर चुकइ क पाछे ही ओनका दुआरन क पहरे पइ जाब रहा। इ एह बरे कीन्ह गवा कि सबित क दिन क एक पवित्तर दिन क रूप मँ रखा गवा ह, एका सुनिहचित कइ लीन्ह जाइ।

हे परमेस्सर! एन कामन क करइ क बरे तू मोका याद राखा। मोरे बरे दयालु हवा अउर मोह पइ अपना महान पिरेम परगट करा।

23ओनही दिनन मई इ भी लखेउँ कि कछू यहूदी मनसेधून आसदोद, अम्मोन अउर मोआब पहुँटन क मेहररूअन स बियाह किहे भएन ह, 24अउर ओन बियाहन स पइदा भए आधे बच्चन तउ यहूदी भाखा क बोलब तलक नाही जानत ही। उ पचे बच्चन अस्दौद, अम्मोन अउर मोआब क बोली बोलत रहेन। 25तउ मई ओन लोगन स कहेउँ कि उ पचे गलती पइ अहई। ओन पइ परमेस्सर क कहर बरपा होइ। कछू लोगन पइ तउ मई चोट ही कर बइठेउँ अउर मई ओनके बार उखाड लिहेउँ। परमेस्सर क नाउँ पइ एक प्रतिग्या करइ क बरे मई ओन पइ दबाव डाएउँ। मई ओनसे कहेउँ, “ओन पराए लोगन क पूतन क संग तू पचन्क अपनी बिटियन क बियाह नाही करब अहइ अउर ओन पराए लोगन क बिटियन क भी अपने पूतन स बियाह नाही करइ देब अहइ। ओन लोगन क बिटियन क संग तू पचन्क बियाह नाही करब अहइ। 26तू पचे जानत ह कि सुलैमान स इहइ तरह क बियाहन पाप करवाए रहेन। तू पचे जानत ह कि कउनो भी रास्ट्र मँ सुलैमान जइसा महान कउनो राजा नाही भवा। किन्तु परमेस्सर सुलैमान स पिरेम करत रहा अउर ओका सुलैमान क समूचे इस्त्राएल क राजा बनाए रहा। किन्तु ऐतना होइ पर भी बिजातीय मेहररूअन क कारण सुलैमान तलक क पाप करइ पड़ेन।

27अउर अब का, हम तोहार पचन्क सुनी अउर वइसा ही भयानक पाप करी अउ बिजाति औरतन क संग बियाह कइके अपने परमेस्सर क बरे सच्चे नाही रही।”

28योयादा क एक पूत होरोन क सम्बल्लत क दामाद रहा। योयादा महायाजक एल्यासीब क पूत रहा। तउ मई योयादा क उ पूत पइ दबाव डाएउँ कि उ मोरे पास स पराइ जाइ। 29हे मोरे परमेस्सर! ओनका याद राखा काहेकि उ पचे याजकपन क भ्रस्ट किहे रहेन। उ पचे याजकपन क अइसा बनाइ दिहे रहेन जइसे ओनकर कउनो महत्व न होइ। तू याजकन अउ लेवियन क संग जउन वाचा किहे रह्या, उ पचे ओकर पालन नाही किहन।

30तउ मई हर कउनो बाहरी चीज क याजकन अउर लेवियन क पवित्तर अउ स्वच्छ बनाइ दिहेउँ ह अउर मई हर एक मनसेधू क ओकरे अपने कर्तव्य अउ दायित्व भी सौपेउँ ह। 31मई काठे क उपहारन अउर एक निहचित समइ पइ अपने फलन क लिआवइ सम्बन्धी जोजनन भी बनाइ दिहेउँ ह। हे मोरे परमेस्सर! एन नीक करमन बरे तू मोका याद राखा।



# एजा

## कुसू बन्दियन क वापसी में मदद करत ह

1 फारस क राज कुसू क सासन क पहिले बरिस यहोवा कुसू क आतिमा क एक तु घोसणा करइ क बरे उत्साहित किहस। कुसू उ घोसणा क लिखवाएस अउ अपने राज में हर एक जगह बँचवाएस। इ एह बरे कीन्ह गवा रहा ताकि यहोवा क उ सँदेसा जउन यिर्मयाह क जेरिये कहा गवा रहा, पूरा होइ सकइ। घोसणा इ अहइ:

2“फारस क राजा कुसू क सँदेसा:

सरग क परमेस्सर यहोवा, पृथ्वी क सारे राज मोक दिहेस ह अउर यहोवा मोक यहूदा देस क यरूसलेम में ओकर एक तु मन्दिर बनावइ बरे चुनेस। अयहोवा, इस्राएल क परमेस्सर अहइ, उ परमेस्सर जउन यरूसलेम में अहइ। जदि परमेस्सर क कउनो लोग तोहरे बीच रहत अहइ तउ मई इ पराथना करत हउँ कि परमेस्सर ओका आसीर्बाद देइ। उ पचे क यहूदा देस क यरूसलेम में जाइ चाही। उ पचे यहोवा क मन्दिर क बनावइ बरे जाइ चाही, 4अउर एह बरे कउनो भी उ जगह में जहाँ इस्राएल क लोग बचे होई। उ जगहिया क लोगन क ओन बचे हुवन क मदद करइ चाही। ओन लोगन क चाँदी, सोना, गाइ अउर दूसर चिजियन द्या। यरूसलेम में परमेस्सर क मन्दिर बरे ओका भेंट द्या।”

5एह बरे यहूदा अउर बिन्यामीन क परिवार समूहन क प्रमुखन यरूसलेम जाइ क तइयारी किहन। उ पचे यहोवा क मन्दिर क बनवाइ बरे यरूसलेम जात रहेन। परमेस्सर जउन लोगन क प्रोत्साहित किहे रहा उ पचे भी यरूसलेम जाइ क तइयार होइ गएन। 6ओनकर सबहि पड़ोसियन ओका चाँदी अउर सोना क चिजियन औजार, जनावरन अउर कीमती चिजियन क ओन दुसर चिजियन क अतिरिक्त जउन उ पचे मेल भेंट क रूप में दिहन, दइ क ओनका मदद किहन। 7राजा कुसू भी ओन चिजियन क लिआवा जउन यहोवा क मन्दिर क रहिन। नबूकदनेस्सर ओन चिजियन क यरूसलेम स लूट लिआवा रहा। नबूकदनेस्सर ओन चिजियन क अपने उ मन्दिर में धरेस, जेहमाँ उ अपने लबार देवतन क धरत रहा। 8फारस क राजा कुसू अपने उ मनई स ओकरे धने क देखरेख करत रहा, एन चिजियन क बाहेर लिआवइ बरे कहेस। उ मनई क नाउँ मिथूदात रहा। एह बरे मिथूदात ओन चिजियन क यहूदा क प्रमुख सेसबस्सर क लगे लइके आवा।

9जिन चिजियन क मिथूदात यहोवा क मन्दिर स लिआवा रहा, उ सबइ इ सबइ रहिन:

सोना क भाँड़ी	30
चाँदी क भाँड़ी	1,000
चाकू अउर कड़ाहियन	29
10सोना क खोसन	30
सोना क खोसन जइसे चाँदी क खोसन	410
अउ एक हजार दूसर तरह क भाँड़ी	1,000

11सब मिलाइके हुवाँ सोना चाँदी क बनी पाँच हजार चार सौ चिजियन रहिन। सेसबस्सर एन सबहि चिजियन क अपने संग उ समइ लिआवा जब बन्दियन बाबेल छोड़न अउर यरूसलेम क वापस लउट गएन।

## छुटके वापस आवइ वाले बन्दियन क सूची

2 इ सबइ राज क उ सबइ मनई अहई जउन बंधुवाई स लउटके आएन। बाबेल क राजा नबूकदनेस्सर ओन लोगन क बन्दी क रूप में बाबेल लिआवा रहा। इ सबइ लोग यरूसलेम अउ यहूदा क वापस आएन। हर एक मनई यहूदा में अपने-अपने नगर क वापस गवा। 2इ सबइ उ सब लोग अहई जउन जरूबबाबेल क संग वापस आएन: येसू, नहेम्याह, सरायह, रेलायह, मोर्दकै, बिलसान, मिस्पर, बिगवै, रहूम अउर बाना। इ इस्राएल क ओन लोगन क नाउँ अउर ओनकर गनती अहइ जउन वापस लउटेन:

3परोस क संतान	2,172
4सपत्याह क संतान	372
5आरह क संतान	775
6येसू अउर योआब क परिवार क पहलमोआब क संतान	2,812
7एलाम क संतान	1,254
8जत्तू क संतान	945
9जक्कै क संतान	760
10बानी क संतान	642
11बेबै क संतान	623
12अजगाद क संतान	1,222
13अदोनीकाम क संतान	666
14बिगवै क संतान	2,056
15आदीन क संतान	454
16आतेर क संतान (हिजकिय्याह क परिवारिक पीढ़ी स)	98
17बेसै क संतान	323
18योरा क संतान	112
19हासूम क संतान	223
20गिब्बार क संतान	95
21बेतलेहेम नगर क लोग	123

22	नतोपा क नगर स	56
23	अनातोत नगर स	128
24	अजमावेत क नगर स	42
25	किर्यतारीम, कपीरा अउर बेरोत नगरन स	743
26	रामा अउ गोबा नगर स	621
27	मिकमास नगर स	122
28	बेतेल अउर ऐ नगर स	223
29	नबो नगर स	52
30	मगबीस नगर स	156
31	एलाम नाउँ क दूसर नगर स	1,254
32	हारीम नगर स	320
33	लोद, हादीद अउ ओनो नगरन स	725
34	यरीहो नगर स	345
35	सना नगर स	3,630
36	याजकन क नाउँ अउर ओनकर गनती क सूची इ	

अहइ:

यदायाह क संतान (येसू क पारिवारिक पढ़ी स)	973	
37	इम्मरे क संतान	1,052
38	पसहूर क संतान	1,247
39	हारीम क संतान	1,017

40 लेवीबंसी कहे जाइवाले लेवी क परिवार क गनती इ अहइ:

येसू अउर कदमिएल (होदग्याह क पारिवारिक पढ़ी स)	74	
41	गायकन क गनती इ अहइ:	
आसाप क संतान	128	
42	मन्दिर क दुआरपालन क गनती इ अहइ:	
सल्लूम, आतेर, तल्मोन, अक्कूब, हतीता अउर सोबै क संतान	139	

43 मन्दिर क खास सेवक क इ सबइ सन्तानन अहइ: सीहा क संतानन, हसूपा क संतानन, तब्बओत क संतानन,

44 केरोस क संतानन, सीअहा क संतानन, पादोन क संतानन,

45 लबाना क संतानन, हागाब क संतानन, अक्कूब क संतानन,

46 हागाब क संतानन, सल्मै क संतानन, हानान क संतानन,

47 गिहल क संतानन, गहर क संतानन, रायाह क संतानन,

48 रसीन क संतानन, नकोदा क संतानन, गज्जाम क संतानन,

49 उज्जा क संतानन, पासेह क संतानन, बेसै क संतानन,

50 अस्ना क संतानन, मूनीम क संतानन, नपीसीम क संतानन,

51 बकबूक क संतानन, हक्पा क संतानन, हहूर क संतानन,

52 बसलूत क संतानन, महीदा क संतानन, हर्सा क संतानन,

53 बर्कोस क संतानन, सीसरा क संतानन, तेमह क संतानन,

54 नसीह अउ हतीपा।

55 इ सबइ सुलैमान क सेवकन क संतानन अहइ: सोतै क संतानन, हस्सोपैरेत क संतानन, परूदा क संतानन।

56 याला क संतानन, दर्कोन क संतानन, गिद्देल क संतानन,

57 सपल्याह क संतानन, हतील क संतानन, पोकरेत क संतानन, सबायीम क संतानन,

58 मन्दिर क सेवक अउ सुलैमान क सेवकन क कुल संतान। 392

59 कछू लोग एन नगरन स यरूसलेम आएन: तेलमेलह, तेलहर्सा, करूब, अद्दान अउर इम्मोर। मुला इ सबइ लोग इ प्रमाणित नाहीं कइ सकेन कि ओनकर परिवार इस्त्राएल क परिवार स अहइँ। ओनकर नाउँ अउर ओनकर गनती इ अहइ:

60 दलायाह क संतानन, तोबिय्याह क संतानन अउर नकोदा क संतानन 652

61 याजकन क परिवारन क नाउँ इ अहइँ:

हबायाह क संतानन, हक्कोस क संतानन अउ बर्जिल्लै क संतानन (एक मनई जउन गिलादी क बर्जिल्लै क बिटिया स बियाह किह रहा अउर बर्जिल्लै क पारिवारिक नाउँ स ही जान जाना रहा।)

62 एन लोग अपने पारिवारिक इतिहासन क खोज किहन, मुला ओका पाइ नाहीं सकेन। ओनकर नाउँ याजकन क सूची में नाहीं सामिल कीन्ह गए रहेन। उ सबइ इ प्रमाणित नाहीं कइ सकेन कि ओनकर पुरखा याजक रहेन। इहइ कारण उ पचे याजक नाहीं होइ सकत रहेन। 63 राज्यापाल एन लोगन क आदेस दिहेस कि इ सबइ लोग कउनो भी पवित्र भोजन न करइँ। उ पचे तब तलक इ पवित्र भोजन नाहीं खाइ सकतेन जब तलक ओन में स कउनो एक ऊरीम अउर तुम्मीम\* क उपयोग न कइ ले।

64 सब मिलाइके 42,360 लोग उ समूह में रहेन जे वापस लउट आएन। 65 ओनके अतिरिक्त एहमाँ 7,337 सेवक अउर सेविकन रहेन। ओनके संग 200 गायक अउ गायिकन भी रहिन। 66 ओनके लगे 736 घोड़न, 245 खच्चर, 67 चार स पेंतीस उँट अउ 6,720 गदहन रहेन।

68 उ समूह यरूसलेम में यहोवा क मन्दिर क पहोंचा। तब परिवार क प्रमुखन यहोवा क मन्दिर क बनावइ क बरे

**ऊरीम अउर तुम्मीम** एक बिसेस तरह क पाथर जेका महा याजक परमेस्सर क इच्छा जानइ बरे प्रयोग करत रहा। लखा, निर्गमन 28:30; गनती 27:21

आपन भेंट दिहेन। उ पचे जउन मन्दिर नस्ट होइ गवा रहा उहइ क जगह पइ नवा मन्दिर बनावइ चाहेन। 69ओन लोग ओतना दिहन जेतना उ पचे दइ सकत रहेन। इ सबइ उ सब चिजियन अहई जेनका उ पचे मन्दिर बनावइ क बरे दिहेन: लगभग 500 किलो सोना, तीन टन चाँदी अउर याजकन क पहिरइ वाले 100 चोगन।

70इ तरह याजक, लेवीवंसी अउर कछू दूसर लोग यरूसलेम अउर ओकरे चारिहुँ कइँती क पहँटा मँ बस गएन। इ समूह मँ मन्दिर क गायक, दुआरपाल अउर मन्दिर क सेवक सामिल रहेन। इस्त्राएल क दूसर लोग अपने निजी निवास जगहन मँ बस गएन।

### वेदी क फुन स बनब

3 एह बरे सतवें महीने स इस्त्राएल क लोग अपने अपने नगरन मँ लउट गएन। उ समइ, सबहिँ लोग यरूसलेम मँ एक संग एकट्टे भएन। उ पचे सबहिँ एक इकाई क रूप मँ संगठित रहेन। 2तब योसादाक क पूत येसू अउर ओकरे संग याजकन अउ सालतीएल क पूत जरूब्बाबेल अउ ओकरे संग क लोग इस्त्राएल क परमेस्सर क वेदी बनाएन। ओन लोग इस्त्राएल क परमेस्सर बरे वेदी एह बरे बनाएन ताकि उ पचे एह पइ बलि चढ़ाइ सकइँ। उ पचे ओनका ठीक मूसा क नेमन क अनुसार बनाएन। मूसा परमेस्सर क बिसेस सेवक रहा।

3उ सबइ लोग अपने आस पास क रहइवाले दूसर लोगन स डरे भए रहेन। मुला इ डर ओनका रोक न सका अउर उ पचे वेदी क पुरानी नैव पइ वेदी बनाएन अउर ओह पइ यहोवा क होमबलि दिहन। 4तब उ पचे आस्रयन क ल्यौहार ठीक वइसे ही मनाएन जइसा मूसा क नेम मँ कहा गवा अहइ। उ पचे उत्सव क हर एक दिन क बरे उचित गनती मँ होमबलि दिहन। 5ओकरे पाछे, उ पचे लगातार चलइवाली हर दिन क होमबलि नवा चाँद, अउर सबहिँ दूसर उत्सव व बिस्राम क दिनन क भेंटन चढ़ाउब सुरू किहन जइसा कि यहोवा क जरिये आदेस दीन्ह गवा रहा। लोग दूसर ओन भेंटन क भी चढ़ावइ क लागेन जेनका उ पचे यहोवा क चढ़ावइ चाहत रहेन। 6एह बरे सतएँ महीना क पहिले दिन इस्त्राएल क एन लोग यहोवा क फुन भेंट चढ़ाउब सुरू किहन। इ तब भी कीन्ह गवा जब कि मन्दिर क नैव अबहिँ फुन स नाहीं बनी रही।

### मन्दिर क फुन निर्माण

7तब ओन लोग जउन बन्धुवाई स छुटिके आए रहेन, संगतरासन अउर बढइयन क धन दिहेन अउर उ पचे सोर अउर सीदोन क लोगन क भोजन, दाखरस अउर जैतून क तेल दिहन। ताकि उ पचे लबानोन क देवदार क बूच्छ लिआवइ सकेन। उ पचे चाहत रहेन कि उ पचे जापा नगर क समुद्री तट पइ लट्ठन क जहाजन क मँ लिआवइँ। फारस क राजा कुस्तू इ करइ बरे ओनका मंजूरी दइ दिहस।

8एह बरे यरूसलेम मँ मन्दिर पइ ओनके पहोंचइ क दूसर बरिस क दूसर महीने मँ सालतीएल क पूत जरूब्बाबेल अउर योसादाक क पूत येसू काम करब सुरू किहस।

ओनकर भाइयन, याजकन, लेवीबंसियन अउ हर एक मनई जउन बन्धुवाई स यरूसलेम लउटे रहेन, सब ओनके संग काम करब सुरू किहन। उ पचे यहोवा क मन्दिर क बनावइ बरे ओन लेवीबंसियन क निरीच्छक चुनेन जउन बीस बरिस या ओहसे जियादा उमिर क रहेन। 9इ सबइ उ सब लोग रहेन जउन मन्दिर क बनइ क देखरेख करत रहेन, येसू क पूत अउर ओकर भाई, कदमीएल अउ ओकर पूत (यहूदा क सन्तान रहेन) हेनादाद क पूत अउ ओनकर बंधु लेवीबंसी। 10कारीगरन यहोवा क मन्दिर क नेव डाउब पूरी कइ दिहन। जब नैव पइ गइ तब याजकन अपने खास ओढ़ना पहिरेन। तब उ पचे आपन तुरुही लिहन अउ आसाप क पूतन अपनी झॉइन क लिहन। उ पचे यहोवा क स्तुति क बरे अपने अपने जगह लइ लिहन। इ उहइ तरह कीन्ह गवा जउने तरह करइ क बरे भूतकाल मँ इस्त्राएल क राजा दाऊद आदेस दिहे रहा। 11यहोवा जउन कछू किहस, उ पचे ओकरे बरे ओकर बड़कई करत भए अउ धन्नवाद देत भए, इ गीत गाएन “उ अच्छा अहइ, ओकर इस्त्राएल क बरे पिरेम सास्वत अहइ।” अउर तब सबहिँ लोग खुस भएन। उ पचे बहोत जोर स उद्घोस अउ यहोवा क स्तुति किहन। काहे? काहेकि मन्दिर क नैव पूरी होइ चुकी रही।

12मुला बुजुर्ग याजकन मँ स बहोत स, लेवीबंसी अउर परिवार प्रमुख रोइ पड़ेन। काहे? काहेकि ओन लोग पहिले मन्दिर क लखे रहेन, अउर उ पचे इ याद करत रहेन कि उ केतना सुन्नर रहा। उ सबइ रोइ पड़ेन जब उ पचे नवे मन्दिर क लखेन। उ पचे रोवत रहेन जब बहोत स दूसर लोग खुस रहेन अउर सोर मचावत रहेन। 13उद्घोस बहोत दूर तलक सुना जाइ सकत रहा। ओन सबहिँ लोग एँतना सोर मचाएन कि कउनो मनई खुसी क उद्घोस अउ रोवइ मँ अन्तर नाहीं कइ सकत रहा।

### मन्दिर क पुनः निर्माण क बिरुद्ध दुस्मन

4 1-2उ पहँटा मँ रहइवाले बहोत स लोग यहूदा अउ बिन्यामीन क लोगन क बिरुद्ध रहेन। ओन दुस्मनन सुनेन कि सबइ लोग जउन बन्धुवाई स आएन ह उ सबइ, इस्त्राएल क परमेस्सर यहोवा क बरे एक ठु मन्दिर बनावत अहई। एह बरे उ सबइ दुस्मन जरूब्बाबेल अउ परिवार प्रमुखन क लगे आएन अउ उ पचे कहेन, “मन्दिर बनावइ मँ हम क तू पचन क मदद करइ द्या। हम लग उहइ अही जउन तू अहा, हम तोहरे पचन्क परमेस्सर स मदद माँगित ह। हम लोग तोहरे पचन्क परमेस्सर क तब स बलि चढ़ावा ह जब स अस्सूर क राजा एसहर्ददोन हम लोगन क हिआँ लिआव।”

3मुला जरूब्बाबेल, येसू अउर इस्त्राएल क दूसर परिवार प्रमुखन जवाब दिहन, “नाहीं, तू जइसे लोग हमरे परमेस्सर क बरे मन्दिर बनावइ मँ हम क मदद नाहीं कइ सकतेन। सिरिफ हम लोग ही यहोवा क बरे मन्दिर बनाइ सकित ह। उ इस्त्राएल क परमेस्सर अहइ। फारस क राजा कुस्तू जउन करइ क आदेस दिहस ह, उ इहइ अहइ।”

4यह बरे उ देस क लोग मन्दिर क बनावइ क कार्य रोकइ क बरे जतन करत भए यहूदी लोगन क हिम्मत तोड़इ क बरे ओनका डराउब सुरु किहन। 5ओन दुस्मनन सलाहकारन क यहूदा क लोगन क खिलाफ काम करइ क बरे बेसहि लिहन। उ सलाहकारन ओनके जोजनन में बाधा डवइ क जतन किहेन। इ कारज तब तलक लगातार चलत रहा जब तलक कुस्रू फारस क राजा रहा अउर बाद में जब तलक दारा फारस क राजा नाहीं होइ गवा।

6ओन दुस्मनन यहूदियन क रोकइ क बरे जतन करत भए फारस क राजा क पत्र भी लिखेन। अउर उ पचे इ पत्र फारस क राजा छयर्स क सासन काल क सुरु में लिखेन।

### यरूसलेम क पुनः निर्माण क बिरुद्ध दुस्मन

7पाछे, जब अर्तछत्र फारस क नवा राजा भवा, एन लोगन में स कछू यहूदियन क खिलाफ सिकाइत करत भए एक ठू अउर पत्र लिखेन। जउन लोग उ पत्र लिखेन, उ सबइ इ सब रहेन: बिसलाम, मिथदात, ताबेल अउर ओकरे दल क दूसर लोग। उ पचे पत्र राजा अर्तछत्र क अरामी में अरामी लिपि क उपयोग करत भए लिखेन।

8तब सासन अधिकारी रहूम अउर लिपिक सिमसै यरूसलेम क लोगन क खिलाफ पत्र लिखेन। उ पचे राजा अर्तछत्र क पत्र लिखेन। उ पचे जउन लिखेन उ इ रहा:

9सासन अधिकारी रहूम, लिपिक सिमसै, निआधीसन अउर तर्पली, फारसी, एरेकी, बाबेली लोगन पइ क महत्त्वपूर्ण उच्चय अधिकारियन अउर सूसनी क एलामी लोगन क कईती स, 10अउ उ सबइ दूसर लोग क ओर स जेनका महान अउर सक्तीसाली ओस्नप्पर सोमरोन क नगरन अउर परात नदी क पच्छिमी पहँटा क दूसर जगहन पइ बसाए रहेन।

11इ उ पत्र क प्रतिलिपि अहइ जेका ओन लोग अर्तछत्र क पठाए रहेन।

राजा अर्तछत्र क, परात नदी क पच्छिमी पहँटा में आप क सेवकन कईती स अहइ।

12राजा अर्तछत्र हम आप क सूचित करइ चाहित ह कि जउन यहूदियन क आप-अपने लगे स पठया ह, उ पचे हिआँ आइ गएन ह। उ सबइ यहूदी उ नगर क फुन स बनावइ चाहत हीं। यरूसलेम एक बुरा अउर बिद्रोही नगर अहइ। अब उ पचे यहूदी परकोटन क जेवन क पक्का करत बाटेन अउर देवानन खड़ी करत अहइँ।

13राजा अर्तछत्र आप क इ जान लेइ चाही कि यदि यरूसलेम अउर एकर परकोटन फुन बन गएन तउ यरूसलेम क लोगन कर देब बन्द कइ देइहीं। उ पचे आप क सम्मान करइ बरे धन पठउब बन्द कइ देइहीं। उ पचे सेवा कर भी रोक देइहीं अउर राजा क उ सारे धन स हाथ धोवइ पड़ी।

14राजा क एकर जानकारी होइ चाही कि हम लोग राजा क वफ़ादार होइ क वादा किहे रहेन। एँह बरे

जिम्मेदारी हम लोगन पइ अहइ। हम लोगन क इ सबइ घटित होब नाहीं लखइ चाहतेउँ कि राजा क अपमान होइ। इहइ कारण अहइ कि हम लोग इ पत्र क जरिये राजा क इ बात क सम्बंध में सूचना दिहे अहउँ।

15राजा अर्तछत्र हम इ चाहित ह कि आप ओन राजा लोगन क लेखन क पता लगावइँ कि जउन आपक पहिले हुकूमत किहन। आप ओन लेखन में लिखिहीं कि यरूसलेम में सदा ही दूसर राजा लोगन क बरे बिद्रोह किहन। इ दूसर राजा लोगन अउ रास्ट्रन क बरे बहोत कठिनाइयन पइदा किहन ह। पुराने समइ स ही इ नगर बिद्रोह क उभारत अहइ ह। इहइ कारण अहइ कि यरूसलेम नस्ट भवा। 16राजा अर्तछत्र हम आप क सूचित करइ चाहित ह कि यदि इ नगर अउ एकर परकोटन फुन स बन गवा तउ फरात नदी क इ कईती क छेत्र आप क हाथे स निकरि जइहीं।

17तब अर्तछत्र इ जवाब पठाएस:

सासन अधिकारी रहूम अउ लिपिक सिमसै अउ ओनकर सबहिं साथियन क जउन सोमरोन अउ परात नदी क दूसर पच्छिमी प्रदेश में रहत हीं क सुभ-कामनाएँ,

18तू लोग जउन हमरे लगे पत्र पठया ओकर अनुवाद भवा अउर मोका सुनावा गवा। 19मइँ आदेस दिहेउँ कि मोरे पहिले क राजा लोगन क लेखन क खोज कीन्ह जाइ। लेख बाँचे गएन अउर हम लोगन क ग्यात भवा कि यरूसलेम क जरिये राजा लोगन क खिलाफ बिद्रोह करइ क एक लम्बा इतिहास अहइ। यरूसलेम अइसी जगह रहा नगर जहाँ अक्सर बिद्रोह अउ गद्दारी होत रहत हीं। 20यरूसलेम अउ फरात नदी क पच्छिम क पूरे पहँटा पइ सक्तीसाली राजा राज करत रहेन ह। राज कर अउ राजा क सम्मान बरे धन अउ बिबिध प्रकार क कर ओन राज लोगन क दीन्ह गएन ह।

21अब तू पक्क ओन लोगन क काम बन्द करइ क बरे एक ठु आदेस देइ चाही। इ आदेस यरूसलेम क पुनः निर्माण क रोकइ क बरे तब तलक अहइ, जब तलक कि मइँ वइसा करइ क आग्या न देउँ। 22सावधान रहया अउर इ आग्या क पालन करइ स इनकार जिन करा यरूसलेम क पुनःनिर्माण चलत नाहीं रहइ चाही, वरना मइँ यरूसलेम स मिलइवाला आमदनी क खोइ देबउँ।

23तउ उ पत्र क प्रतिलिपि, जेका राजा अर्तछत्र पठाएस रहूम, लिपिक सिमसै अउ ओकरे संग क लोगन क बाँचिके सुनाई गइ। तब उ सबइ लोग बड़ी तेजी स यरूसलेम में यहूदियन क लगे गएन। उ पचे यहूदियन क निर्माण कार्य बन्द करइ क मजबूर किहन।

### मन्दिर क कार्य रुका

24इ तरह यरूसलेम में परमेस्सर क मन्दिर क काम रुक गवा। फारस क राजा दारा क सासनकाल क दूसरे बरिस तलक इ कार्य नाहीं चला।

**5** तब हागौ नबी अउ इदो क पूत नबी जकर्याह इस्त्राएल क परमेस्सर क नाउँ पड़ यहूदा अउ यरूसलेम में यहूदियन स नबुवत करब सुरु किहन। 2एह बरे सालतीएल क पूत जरुब्बाबेल अउ योसादाक क पूत येसू फुन यरूसलेम में मन्दिर क निर्माण करब सुरु कइ दिहस। अउर परमेस्सर क नबी ओनके संग रहेन अउ कार्य में मदद करत रहेन। 3उहइ समइ फरात नदी क पच्छिम क पहेँटा क राजपाल तत्नै रहा। तत्नै, सतर्बोजनै अउ ओनके संग क लोग जरुब्बाबेल अउ येसू अउ निर्माण करइवालन क लगे गएन। तत्नै अउ ओकरे संग क लोग जरुब्बाबेल अउ ओकरे साथ क लोगन स पूछेस, “तू पचन्क इ मन्दिर क फुन स बनावइ अउ एका दिवारन क बनावइ क काम पूरा करइ क आदेस कउन दिहस?” 4उ पचे जरुब्बाबेल स इ भी पूछेन, “जउन लोग इ इमारत क बनावइ क काम करत अहइँ ओनकर नाउँ क अहइ?”

5मुला परमेस्सर यहूदा क प्रमुखन पड़ दृस्टि रखत रहा। निर्माण करइ वालन क तब तलक काम नाहीं रोकब पड़ा जब तलक ओनकर विवरण राजा क जरिये न पठइ दीन्ह गवा। उ पचे तब तलक काम करत रहेन जब तलक राजा दारा आपन जवाब वापस नाहीं पठएस।

6फरात क पच्छिम क छेत्रन क सासन अधिकारी तत्नै, सतर्बोजनै अउ ओनके संग क महत्त्वपूर्ण मनइयन राजा दारा क लगे पत्र पठएन। 7इ उ पत्र क प्रतिलिपि अहइ:

राजा दारा का अभिवादन

8राजा दारा, आप क मालूम होइ चाही कि हम लोग यहूदा प्रदेस में गएन। हम लोग महान परमेस्सर क मन्दिर क गए। यहूदा क लोग उ मन्दिर क बड़के पाथरन स बनावत अहइँ। उ पचे देवारन में काठे क बड़की बड़की सहतीसन डावत अहइ। काम बड़ी होसियारी स कीन्ह जात अहइ, अउर यहूदा क लोग बहोत मेहनत करत अहइँ।

9हम लोग ओनके प्रमुखन स कछू सवाल ओनके निर्माण कार्य क बारे में पूछेन हम लोग ओनसे पूछेन, “तू पचन्क इ मन्दिर क फुन स बनावइ अउर एकरी छते क काम पूरा करइ क मंजूरी कउन दिहस ह?”

10हम लोग ओनकर नाउँ भी पूछेन। हम लोग ओन लोगन क प्रमुखन क नाउँ लिखइ चाहेउँ जेहसे आप जान सकइँ कि उ पचे कउन लोग अहइँ।

11उ पचे हमक इ जवाब दिहन:

“हम लोग सरग अउ पृथ्वी क परमेस्सर क सेवक अही। हम लोग उहइ मन्दिर क बनावत अही जेका बहोत बरिस पहिले इस्त्राएल क एक महान राजा बनाएस अउर पूरा किहे रहा। 12मुला हमार पुरखन सरग क परमेस्सर क किरोधित किहन। एह बरे परमेस्सर हमरे पुरखन क बाबेल क राजा नबूकदनेस्सर क दिहस। नबूकदनेस्सर इ मन्दिर क नस्ट किहेस अउर उ लोगन क बन्दी क रूप में बाबेल जाइ क मजबूर किहस। 13मुला बाबेल पड़ कुसू क राजा होइ क पहिले बरिस

में राजा कुसू परमेस्सर क मन्दिर क फुन स बनावइ क बरे बिसेस आदेस दिहस। 14कुसू बाबेल में अपने लबार देवता क मन्दिर स ओन सोने चाँदी क चिजियन क निकारिस जउन भूतकाल में परमेस्सर क मन्दिर स चोरी कइ क लइ जाइ गइ रहिन। नबूकदनेस्सर ओन चिजियन क मन्दिर स लिहेस अउर ओनका बाबेल में लबार देवतन क मन्दिर में लइ आवा। तब राजा कुसू ओन सोने चाँदी क चिजियन क सेसबसार क दइ दिहस, कुसू सेसबस्सर क राज्यपाल मुकरर किहस।

15कुसू तब सेसबस्सर स कहेस रहा, “एन सोना चाँदी क चिजियन क ल्या अउर ओनका यरूसलेम क मन्दिर में वापस रखा। उ जगह पड़ परमेस्सर क मन्दिर क बनावे जहाँ उ पहिले रहा”

16एह बरे सेसबस्सर आवा अउर उ यरूसलेम में परमेस्सर क मन्दिर क नैव क काम पूरा किहस। उ दिना स आजु तलक मन्दिर क निर्माण क कार्य चलत आवत अहइ। मुला इ अबहिँ तलक पूरा नाहीं भवा ह।”

17अब यदि राजा चाहत हीँ तउ कृपा कइके उ पचे राजा लोगन क लेखन क हेरइँ। इ लखइ बरे हेरइँ कि का कुसू राजा क जरिये यरूसलेम में परमेस्सर क मन्दिर क फुन स बनावइ क दीन्ह गवा आदेस फुरइ अहइ अउर तब, महामहिमा, कृपा कइके आप हम लोगन क पत्र पठवइँ जेहसे हम जान सकी कि आप इ विसय में का करइ क निर्णय लिहन ह।

### दारा क आदेस

**6** एह बरे राजा दारा अपने पहिले क राजा लोगन क लेखन क जाँच करइ क आदेस दिहस। उ सबइ लेख बाबेल में हुवइँ रखे रहेन जहाँ खजाना धरा गवा रहा, 2अहमता क किले में एक दण्ड में चिपका गोल पत्रक मिला। एकवतन मादे प्रान्त में अहइ। उ दण्ड में लिपटे गोल पत्रक पड़ जउन लिखा रहा, उ इ अहइ:

सरकारी टिप्पणी: 3उ कुसू क राजा होइ क पहिले बरिस में कुसू यरूसलेम में परमेस्सर क मन्दिर क बरे एक ठू आदेस दिहस। आदेस इ रहा:

परमेस्सर क मन्दिर फुन स बनइ द्या। इ बलि भेंट करइ क जगह होइ। एकरी नैव क बनइ द्या। मन्दिर साठ हाथ उँच अउ साठ हाथ चौड़ा होइ चाही। 4एकर परकोटन में बिसाल पाथरन क तीन ठु कतारन अउर बिसाल काठे क सहतीसन क एक ठू कतार होइ चाही। मन्दिर क बनावइ क खर्च राजा क खजाने स कीन्ह जाइ चाही। 5साथ ही साथ, परमेस्सर क मन्दिर क सोना अउ चाँदी क चिजियन ओकरे जगह पड़ वापस रखी जाइ चाही। नबूकदनेस्सर ओन चिजियन क यरूसलेम क मन्दिर स लिहे रहा अउर ओनका बाबेल लिआए रहा। उ सबइ परमेस्सर क मन्दिर में वापस रख दीन्ह जाइ चाही।

6एह बरे अब, मई दारा, फरात नदी क पच्छिम क पहुँचन क सासन अधिकारी तनै अउ सतर्बोजनै अउ उ प्रान्त क रहइवाले सबहि अधिकारियन, तू पचन्क आदेस देत हउँ कि तू लोग यरूसलेम स दूर रहा। 7समिकन क परेसान जिन करा। परमेस्सर क उ मन्दिर क काम क बन्द करइ क जतन जिन करा। यहूदा क राज्यपाल अउर यहूदा क बुर्जुगन क एनका फुन स बनावइ द्या। ओनका परमेस्सर क मन्दिर क उहइ जगह पइ फुन स बनावइ द्या जहाँ पहिले रहा।

8अब मई एक आदेस देत हउँ कि तू पचन्क परमेस्सर क मन्दिर क बनावइ वाले यहूदा क बुर्जुगन बरे का करइ चाही: इमारत क लागत क भुगतान राजा क खजाने स होइ चाही। इ धन फरात नदी क पच्छिम क छेत्र क प्रान्तन स कर क रूप मँ इकट्ठा कीन्ह गवा रहा। इ सबइ काम हाली स करा, जेहसे काम रुकइ नाहीं। 9ओन लोगन क उ सब द्या जेकर ओनका जरूरत होइ। जदि ओनका सरग क परमेस्सर क बलि क बरे जवान बर्धन, भेड़न या मेमनन क जरूरत पड़इ तउ ओनका उ सब कछू द्या। जदि यरूसलेम क याजक गोहूँ, नोन, दाखरस अउ तेल माँगइ तउ बिना भूल चूक क हर रोज इ सबइ चिजियन ओनका द्या। 10इन चिजियन क ओनका द्या जेहसे उ पचे सरग क परमेस्सर क खुस करइवाली बलियन भेंट करइँ अउर राजा अउ ओकरे पूतन क कल्यान बरे पराथना करइँ।

11मई इ आदेस भी देत हउँ कि जदि कउनो मनई इ आदेस क बदलत ह तउ उ मनई क मकान स एक तु काठे क कड़ी क निकार लेइ चाही अउ उ काठे क कड़ी क उ मनई क तने पइ घँसाइ देइ चाही अउ ओकरे घरे क तब तलक नस्ट कीन्ह जाइ चाही जब तलक कि उ पाथरन क ढेर न बनि जाइ।

12परमेस्सर यरूसलेम पइ आपन नाउँ अंकित करइ अउर मोका आसा अहइ कि परमेस्सर कउनो भी उ राजा या मनई क पराजित करी जउन इ आदेस क बदलइ क जतन करत ह। जदि कउनो यरूसलेम मँ इ मन्दिर क नस्ट करइ चाहत ह तउ मोका आसा अहइ कि परमेस्सर ओका नस्ट कइ देइ।

मई, दारा, इ आदेस दिहेउँ ह। इ आदेस क पालन हाली अउर पूर्ण रूप स होइ चाही।

### मन्दिर क पूर्ण अउर समर्पित होब

13एह बरे फरात नदी क पच्छिम पहुँचा क प्रसासक तत्तनै, सतर्बोजनै अउर ओकरे संग क लोग राजा दारा क आदेस क पालन किहन। ओन लोगन आग्या क पालन हाली अउर पूर्ण रूप स किहन, 14एह बरे यहूदी अग्रजन (प्रमुखन) निर्माण कार्य जारी रखेन अउर उ पचे सफल भाएन काहेकि हग्नै नबी अउ इद्दो क पूत जकर्याह ओनका प्रोत्साहित किहस। ओन लोग मन्दिर क निर्माण कार्य पूरा कइ लिहन। इ इस्त्राएल क परमेस्सर क आदेस पालन करइ क बरे कीन्ह गवा। इ फारस क राजा लोगन, कुस्रू, दारा अउर अर्तछत्र जउन आदेस दिहे रहेन ओनकर

पालन करइ बरे कीन्ह गवा। 15मन्दिर क निर्माण अदर महीने क तीसरे दिन भवा। इ राजा दारा क सासन क छठँ बरिस मँ भवा।

16तब इस्त्राएल क लोग बहोत उल्लास क संग परमेस्सर क मन्दिर क समर्पण उत्सव मनाएन। याजक, लेवीबंसी अउर बन्धुवाई स वापस आए दूसर सबहि लोग इ उत्सव मँ सामिल भएन।

17उ पचे परमेस्सर क मन्दिर क इ तरह समर्पित किहन: उ पचे एक सौ बर्धन, दुइ सौ भेड़न अउर चार सौ मेमनन भेंट किहन अउर उ पचे पूरे इस्त्राएल क बरे पाप भेंट क रूप मँ बारह बोकसन भेंट किहन अर्थात इस्त्राएल क बारह परिवार समूह मँ स हर एक क बरे एक बोकरा भेंट किहन। 18तब उ पचे यरूसलेम मँ मन्दिर मँ सेवा करइ क बरे याजकन अउ लेवी बंसियन क समूह बनाएन। इ सब उ पचे उहइ प्रकार किहन जउने प्रकार मूसा क किताबे मं बतावा गवा ह।

### फसह त्यौहार

19पहिले महीने क चौदहवें दिन ओन यहूदियन फसह क त्यौहार मनाएन जउन बन्धुवाई स वापस लउटे रहेन। 20याजकन अउर लेवीबंसियन अपने क सुद्ध किहन। ओन सबहि फसह क त्यौहार मनावइ क बरे अपने क स्वच्छ अउ तइयार किहन। उ पचे बन्धुवाई स लउटइवाले सबहि यहूदियन क बरे फसह क त्यौहार क मेमने क मारेन। उ पचे इ अपने बरे अउर अपने याजकन बंधुअन क बरे किहन। 21एह बरे बन्धुवाई स लउटे इस्त्राएल क सबहि लोग फसह क त्यौहार क बलि खाएस अउर उ प्रदेस मँ रहइवाले दूसर सबइ लोग जउन अपने आप क ओन असुद्ध चिजियन स अलग हटिके सुद्ध कइ रहेन अउर जउन ओन लोगन मँ सामिल होइ रहेन, ओन लोग भी फसह क त्यौहार क भोजन मँ हीसा लिहन। ओन लोग इ एह बरे किहन ताकि उ पचे भी यहोवा इस्त्राएल क परमेस्सर क उपासना करइ सकइँ। 22उ पचे अखमीरी रोटी क उत्सव सात दिन तलक बहोत जियादा खुसी स मनाएन। यहोवा ओनका बहोत खुस किहस काहेकि उ अस्सूर क राजा क बेउहार क बदल दिहे रहा। अस्सूर क राजा इस्त्राएल क परमेस्सर क मन्दिर क बनावइ मँ ओनकर मदद किहे रहा।

### एज़्रा यरूसलेम आवत ह

7 फारस क राजा अर्तछत्र क सासनकाल मँ एन सब बातन क होइ जाइ क पाछे एज़्रा बाबेल स यरूसलेम आवा। एज़्रा सरायाह क पूत रहा। सरायाह अजर्याह क पूत रहा। अजर्याह हिल्किय्याह क पूत रहा। 2हिल्किय्याह सल्लूम क पूत रहा। सल्लूम सादोक क पूत रहा। सादोक अहीतूब क पूत रहा। 3अहीतूब अमर्याह क पूत रहा। अमर्याह अजर्याह क पूत रहा। अजर्याह मरार्थोत क पूत रहा। 4मरार्थोत जरह्याह क पूत रहा। जरह्याह उज्जी क पूत रहा। उज्जी बुक्की क पूत रहा। 5बुक्की अबीसू क पूत रहा।

अबीसू पीनहास क पूत रहा। पीनहास एलीआज़र क पूत रहा। एलीआज़र महायाजक हारून क पूत रहा।

6एज़ा बाबेल स यरूसलेम आवा। एज़ा एक लिपिक रहा। उ मूसा क नेमन क माहिर रहा। मूसा क नेम यहोवा इस्त्राएल क परमेस्सर क जरिये दीन्ह गवा रहा। राजा अर्तछत्र एज़ा क उ हर चीज़ दिहस जेका उ मॉगिस काहेकि यहोवा परमेस्सर एज़ा क संग रहा। 7इस्त्राएल क कछू लोग, अउर कछू याजकन, लेबियन, गायकन, दुआरपालन अउर मन्दिर क सेवकन एज़ा क संग आएन। उ पचे अर्तछत्र क सासनकाल क सतएँ बरिस यरूसलेम आएन। 8एज़ा यरूसलेम में राजा अर्तछत्र क राजकाल क सतएँ बरिस क पाँचवें महीने में आवा। 9एज़ा अउ ओकर समूह बाबेल क पहिले महीने क पहिले दिन यरूसलेम पहुँचा। यहोवा परमेस्सर एज़ा क संग रहा। 10एज़ा आपन पूरा धियान यहोवा क नेमन क अध्ययन अउर ओनका पालन करइ में दिहस। एज़ा इस्त्राएल क लोगन क यहोवा क नेमन अउर आदेसन क सिच्छा देइ चाहत रहा।

### राजा अर्तछत्र क एज़ा क पत्र

11एज़ा, एक ठु याजक अउर लिपिक रहा। इस्त्राएल क यहोवा क जरिये दीन्ह गए आदेसन अउर नेमन क बारे में उ काफी गियान रखत रहा। इ उ पत्र क प्रतिलिपि अहइ जेका राजा अर्तछत्र लिपिक एज़ा क दिहे रहा:

12राजा लोगन क राजा अर्तछत्र कइँती स याजक एज़ा क जउन सरग क परमेस्सर क नेमन क पिपिक अहइ:

सुभ-कामनाएँ!

13मई इ आदेस देत हउँ: कउनो मनई जउन इस्त्राएल क अहइ, याजक अउर इस्त्राएल क लेवीवंसी जउन मोरे राज में रहत ह अउर एज़ा क संग यरूसलेम जाइ चाहत ह, तोहार संग जाइ सकत ह। 14एज़ा, मई अउर मोरे सात सलाहकार तू पचन्क पठवत हीं। तू पचन्क यहूदा अउर यरूसलेम क जाइ चाही। इ लखा कि तोहार लोग तोहरे परमेस्सर क नेमन क पालन कइसे करत अहइँ। तोहरे पचन्क लगे नेम अहइ।

15मई अउ मोर सलाहकार इस्त्राएल क परमेस्सर क सोना चाँदी देत अहइँ। परमेस्सर क निवास यरूसलेम में अहइ। तू पचन्क इ सोना चाँदी अपने संग लइ जाइ चाही। 16तू पचन्क बाबेल क सबहिं प्रान्तन स होइके जाइ चाही। लोगन अउर याजकन क स्वच्छा भेंट क संग सबइ सोना अउ चाँदी क बटोरा। इ सबइ भेंटन यरूसलेम में ओनके परमेस्सर क मन्दिर बरे अहइँ।

17इ धने क उपयोग बर्धन, भेड़न अउ मेमनन बेसहइ में करा। ओन बलियन क संग जउन अन्न भेंट अउ पेय भेंट चढ़ाई जाब अहइँ, ओनका बेसहा। तब ओनका यरूसलेम में अपने परमेस्सर क मन्दिर क वेदी पइ बलि चढ़ावा। 18ओकरे पाछे तू अउर दूसर यहूदी बचे भए सोने चाँदी क जइसा भी चाहा, खर्च कइ सकत

ह। एकर उपयोग वइसे ही करा, जउन तोहरे परमेस्सर क खुस करइवाला होइ। 19ओन सबहिं चिजियन क यरूसलेम क परमेस्सर क लगे लइ जा। उ सबइ चिजियन तोहरे परमेस्सर क मन्दिर में उपासना क बरे अहइँ। 20तू कउनो भी दूसर चिजियन लइ सकत ह जेनका तू अपने परमेस्सर क मन्दिर क बरे जरूरी समुझत अहा। राजा क खजाने क धन क उपयोग जउन कछू तू चाहत अहा ओकरे बेसहइ क बरे कइ सकत ह।

21अब मई, राजा अर्तछत्र इ आदेस देत हउँ: मई ओन सबहिं लोगन क जउन फरात नदी क पच्छिमी पहेँटा में राजा क कोसपाल अहइँ, आदेस देत हउँ कि उ पचे एज़ा क जउन कछू भी मॉगइ देइँ। एज़ा सरग क परमेस्सर क नेमन क लिपिक अउर याजक अहइ। इ आदेस क हाली अउ पर्ण रूप स पालन करा। 22एज़ा क एतना तलक दइ द्या: पौने चार टन चाँटी, छः सौ बुसल गोहूँ, छः सौ गौलन दाखरस, छः सौ गौलन जइतून क तेल अउ ओतना नोन जेतना एज़ा चाहइ। 23सरग क परमेस्सर, एज़ा क जउने चीज क पावइ बरे आदेस द्या ओका तू पचन्क हाली अउर पूरी तरह स एज़ा क देइ चाही। सरग क परमेस्सर क मन्दिर क बरे इ सबइ सब चिजियन करा। हम नाहीं चाहित कि परमेस्सर मोरे राज या मोरे पूतन पइ किरोधित होइ।

24मई चाहत हउँ कि तू लोगन क मालूम होइ कि याजकन, लेबियन, गायकन, दुआरपालन अउ परमेस्सर क मन्दिर क दूसर कर्मचारियन अउ सेवकन क कउनो भी तरह क कर देइ क बरे मजबूर करब, नेम क खिलाफत अहइ। 25एज़ा मई तोहका तोहरे परमेस्सर क जरिये प्राप्त बुद्धि क उपयोग अउ सरकारी अउर धार्मिक निआव अधीसन क चुनइ क अधिकार देत हउँ। इ सबइ लोग फरात नदी क पच्छिम में रहइवाले सबहिं लोगन क बरे निआव अधीस होइहीं। उ पचे ओन सबहिं लोगन क निआव करिहीं जउन तोहरे परमेस्सर क नेमन क जानत हीं। जदि कउनो मनई ओन नेमन क नाहीं जानत तउ उ पचे निआव अधीस ओका ओन नेमन क बतइहीं। 26जदि कउनो अइसा मनई जउन तोहरे परमेस्सर क नेमन या राजा क नेमन क पालन नाहीं करत होइ, तउ ओका जरूर दण्डित कीन्ह जाइ चाहीं। अपराध क अनुसार ओका मृत्यु दण्ड, देस निकारी, ओकरी सम्पति क जब्त करब या जेल में डावइ क सजा दीन्ह जाइ चाही।

### एज़ा परमेस्सर क स्तुति करत ह

27हमरे पुरखन क परमेस्सर यहोवा क स्तुति करा। उ राजा क मन में इ सबइ बिचार डाएस कि उ यरूसलेम में यहोवा क मन्दिर क सम्मान करइ।

28यहोवा क राजा, ओकरे सलाहकारन अउर बड़के अधिकारियन क सामने मोह पइ आपन सच्चा पिरेम परगट किहा। यहोवा मोरे परमेस्सर मोरे संग रहा, एह बरे मई

साहसी रहा अउर मई इस्त्राएल क प्रमुखन क अपने संग यरूसलेम जाइ बरे एकट्ठा किहेउँ।

### एज़ा क संग लउटइवाले परिवार प्रमुखन क सूची

**8** इ बाबेल स यरूसलेम लउटइवाले परिवार प्रमुखन अउर दूसर लोगन क सूची अहइ जउन मोरे (एज़ा) क संग लउटेन। हम लोग राजा अर्तछत्र क सासनकाल में यरूसलेम लउटेन। इ नाउँन क सूची अहइ: 2पीनहास क संतानन में स गोर्सीम रहा; ईतामार क संतानन में स दानिय्येल रहा; दाऊद क संतानन में स हत्सू रहा, 3सकन्याह क संतानन में स परोस, जकर्याह क संतान अउ डेढ़ सौ दूसर लोग; 4पहल्मोआब क संतानन में स जरह्याह क पूत एल्यहोएनै अउर दूसर दूइ सौ लोग, 5जन्तू क संतानन में स यहजीएल क पूत सकन्याह अउर तीन सौ दूसर लोग; 6आदीन क संतानन में स योनातान क पूत एबेद अउर पचास दूसर लोग, 7एलाम क संतानन में स अतल्याह क पूत यसायोह अउर सतर दूसर लोग, 8सपत्याह क संतानन में स मीकाएल क पूत जबघाह अउर अस्सी दूसर लोग, 9योआब क संतानन में स यहीएल क पूत ओबद्याह अउर दूइ सौ अट्ठारह दूसर मनई, 10बानी, योसियाह क पूत सलोमति क संतानन में स अउर एक सौ साठ दूसर लोग, 11बेबै क संतानन में स बेबै क पूत जकर्याह अउर अट्ठाईस दूसर मनई, 12अजगाद क संतानन में स हक्कातान क पूत योहानान अउर एक सौ दस दूसर लोग; 13अदोनीकाम क अंतिम संतानन में स एलीपेलेत योएल, समायाह अउर साठ दूसर मनई रहेन, 14बिगवै क संतानन में स उचै, जब्बूद अउर सतर दूसर लोग।

### यरूसलेम क वापसी

15मई ओन सबहिं लोगन क अहवा कइँती बहइवाली नदी क लगे एक संग एकट्ठा होइ क बोलाएउँ। हम लोग हुवाँ तीन दिन तलक डेरा डाए। मोका इ पता लगा कि उ समूह में याजक रहेन, मुला कउनो लेवीबंसी नाहीं रहा। 16तउ मई एन प्रमुखन क बोलाएउँ: एलीएजेर, अरीएल, समायाह, एलनातान, यारीब, एलनातान, नातान, जकर्याह अउ मसुल्लाम अउ मई योयारीब अउर एलनातान (इ सबइ लोग सिच्छक रहेन) क बोलाएस। 17मई ओन मनइयन क इद्दो क लगे पठएउँ। इद्दो कासियाह नगर क प्रमुख रहा। मई उ मनई क बताएउँ कि उ पचे इद्दो अउर ओकर सम्बंधियन स का कहइँ। ओकर सम्बंधी कासियाह में मन्दिर क सेवक अहइँ। मई ओन लोगन क इद्दो क लगे पठएउँ जेहसे इद्दो परमेस्सर क मन्दिर में सेवा करइ क बरे हमरे लगे सेवकन क पठएस। 18काहेकि परमेस्सर क कृपालु हाथ हमरे ऊपर रहेन। इद्दो क सम्बंधियन एन मनइयन क हम लोगन क लगे पठएस: महली क संतानन में स सेरेब्याह नाउँ क बुद्धिमान मनई। महली लेवी क पूतन में स एक रहा। लेवी इस्त्राएल क पूतन में स एक रहा। उ पचे हमरे लगे सेरेहब्याह अउर ओकरे पूतन क पठएस। इ सबइ सब मिलाइके उ परिवार स इ सबइ अट्ठारहे मनई रहेन। 19उ पचे मरारी क संतानन में स हसब्याह अउर यसायाह क भी

ओनकर बन्धुअन अउर ओनके पूतन क संग पठएस। उ परिवार स कुल मिलाइके बीस मनई रहेन। 20उ पचे मन्दिर क दुइ सौ बीस सेवक भी पठएन। ओनकर पुरखन उ सबइ लोग रहेन जेनका दाऊद अउ बड़के अधिकारियन लेवीबंसियन क मदद बरे चुने रहा। ओन सब क नाउँ सूची में लिखे भाए रहेन।

21हुवाँ अहवा नदी क लगे, मई घोसणा किहेउँ कि हमका उपवास रखइ चाही। हम क अपने क परमेस्सर क समन्वा बिनम्र बनावइ क बरे उपवास रखइ चाही। हम लोग परमेस्सर स अपने बरे, अपने बच्चन क बरे, अउर जउन चिजियन हमार रहिन, ओनके संग सुरच्छित जात्रा क बरे पराथना करइ चाहत रहे। 22राजा अर्तछत्र अपनी जात्रा क समइ अपनी सुरच्छा बरे फउजी अउ घुड़सवारन क माँगइ मई लजान रहेउँ। सइकिया पइ दुस्मन रहेन। मोरी लज्जा क कारण इ रहा कि हम राजा स कहि रखे रहे कि, “हमार परमेस्सर उ हर मनई स संग अहइ जउन ओह पइ बिस्सास करत ह अउर परमेस्सर उ हर मनई पइ किरोधित होत ह जउन ओहसे मुँह फेरि लेत ह।” 23एह बरे हम लोग अपनी जात्रा क बारे में उपवास रखे अउर परमेस्सर स पराथना कीन्ह। उ हम लोगन क पराथना सुनेस।

24तब मई याजकन में स बारह क नियुक्त किहेउँ जउन प्रमुख रहेन। मई सेरेब्याह, हसब्याह अउर ओनके दस भाइयन क चुनेउँ। 25मई चाँदी, सोना अउर दूसर चिजियन क तउलेउँ जउन हमरे परमेस्सर क मन्दिर क बरे दीन्ह गइ रहिन। मई एन चिजियन क ओन बारह याजकन क दिहेउँ जेनका मई नियुक्त किहे रहेउँ। राजा अर्तछत्र, ओकर सलाहकार, ओकर बड़के अधिकारियन अउर बाबेल में रहइवाले सबहिं इस्त्राएलियन परमेस्सर क मन्दिर क बरे ओन चिजियन क दिहन। 26मई एन सबहिं चिजियन क तउलेउँ। हुवाँ चाँदी पच्चीस टन रही। हुवाँ चाँदी क बर्तन व दूसर चिजियन रहिन। जेनकर वजन पौने चार किलोग्राम रहा। हुवाँ सोना पौने चाट टन रहा। 27अउर मई ओनका बीस सोना क खोरन दिहेउँ। खोरन क वजन लगभग साढ़े आठ किलो रहा अउर मई ताँबा क चमकदार दूई ठु बरतन दिहस जउन कि सोना क समान कीमती रहा। 28तब मई ओन बारह याजकन स कहेउँ: “तू अउर इ सबइ चिजियन यहोवा क बरे पवित्र अहइँ। लोग इ चाँदी अउर सोना यहोवा तोहरे पचन्क पुरखन परमेस्सर क दिहन। 29एह बरे एनकर रच्छा होसियारी स करा। तू पचे एकरे बरे तब तलक जिम्मेदार अहा जब तलक तू पचे एका यरूसलेम में मन्दिर क प्रमुखन क नाहीं दइ देत्या। तू पचे एनका प्रमुख लेवीबंसियन क अउर इस्त्राएल क परिवार प्रमुखन क देब्या। उ सबइ ओन चिजियन क तउलिहीं अउर यरूसलेम में यहोवा क मन्दिर क कोठरियन में धरिहीं।”

30तउ ओन याजकन अउ लेवियन उ चाँदी, सोना अउर ओन बिसेस वस्तुअन क ग्रहण किहन जेनका एज़ा तउले रहा अउर ओनका यरूसलेम में परमेस्सर क मन्दिर में इ सबइ चिजियन लइ जाइ क बरे कहा गवा रहा।

31पहिले महीने क बारहवें दिन हम लोग अहवा नदी क छोड़े अउर हम यरूसलेम कइँती चल पड़े। परमेस्सर हम



लोगन क संग रहा अउर उ हमार रच्छा दुस्मनन अउ डाकुअन स पूरे रास्ते भर किहस। 32तब हम यरूसलेम आइ पहुँचे। हम हुवाँ तीन दिन आरम कीन्ह। 33चउथे दिन हम परमेस्सर क मन्दिर क गए अउर चाँदी, सोना अउर बिसेस चिजियन क तउले। हम याजक ऊरीयाह क पूत मरेमोत क उ सबइ चिजियन दिहेन। पीनहास क पूत एलीआजर मरेमोत क संग रहा। अउर लेवीबंसी येसू क पूत योजाबाद अउर बिन्तूर्ई क पूत नोअद्याह भी ओनके संग रहा। 34हम हर एक चीज गिने अउर ओनका तउले। तब हम उ समइ कुल वजन लिखे।

35तब ओन यहूदी लोग जउन बंधुवाई स आए रहेन, इस्राएल क परमेस्सर क होमबलि दिहेन। उ पचे बारह बर्धन पूरे इस्राएल क बरे छियानबे भेड़न, सतहतर मेमनन अउ बारह बोकसन पाप भेंट बरे चढ़ाएन। इ सब यहोवा क बरे होमबलि रही।

36तब ओन लोग राजा अर्तछत्र क पत्र, राजकीय अधिपतियन अउ फरात क पच्छिम क छेत्र क प्रसासकन क दिहेन। तब उ पचे इस्राएल क लोगन अउर मन्दिर क अपना समर्थन दिहेन।

### विदेसी लोगन स बियाह क बारे में एज़ा क पराथना

9 जब हम लोग इ सब कइ चुके तब इस्राएल क प्रमुख मोरे लगे आएन। उ पचे कहेन, “एज़ा इस्राएल क लोगन अउ याजकन अउ लेवी बंसियन अपने चाहिहूँ कइँती रहइवाले लोगन स अपने क अलग नार्ही रखेस ह। इस्राएल क लोग कनानियन, हितियन, परिजियन, यबूसियन, अम्मोनियन, मोआबियन, मिस्त्र क लोगन अउ एमोरियन क जरिये कीन्ह जाइवालो बहोत स बुरी बातन स प्रभावित भए हैं। 2इस्राएल क लोग एन लोगन क बिटियन स बियाह किहेन ह। जउन कि इस्राएली नार्ही रहेन इस्राएल क लोग पवित्तर पीढ़ी\* अहइ। मुला अब उ पचे अपने चारिहूँ ओर रहइवाले दूसर लोगन स मिलिके दोगले अउर असुद्ध होइ गएन ह। इस्राएल क लोगन क नेतन अउर बड़के अधिकारियन इ अपराध क करइ में पहिले रहेन ह।” 3जब मई इ बारे में सुनेउँ, मई अपना लबादा अउ अंगरखा इ देखावइ बरे फार डाएउँ कि मई बहोत परेसान हउँ। मई अपने मूँड़ अउर दाढ़ी क बार नौच डाएउँ। मई दुःखी अउ अस्त - व्यस्त बइठ गएउँ। 4तब हर एक मनई जउन इस्राएल क परमेस्सर क नेमन क आदर करत रहा, भय स काँप उठा। उ पचे डर गएन काहेकि जउन इस्राएल क लोग बन्धुवाई स लउटेन, उ पचे परमेस्सर क भक्त नार्ही रहेन। मोका धक्क लगा अउर मई घबराइ गएउँ। मई हुवाँ साँझ क बलि भेंट क समइ तलक बइठा रहेउँ अउर उ पचे लोग मोरे चारिहूँ कइँती एकट्ठा रहेन।

5तब, जब साँझ क बलि भेंट क समइ भवा, मई आपन दुःख क अवस्था में ही उठेउँ। मई बहोत लजान रहेउँ। मोर लबादा अउ अंगरखा दुइनउँ फटे रहेन अउर मई घुटरुअन

क बल बइठिके यहोवा अपने परमेस्सर कइँती हाथ फइलाएउँ। 6तब मई पराथना किहेउँ:

हे मोरे परमेस्सर, मई एतना लजान अउर संकोच में हँउ कि तोहरी कइँती मोर आँखिन नार्ही उठतिन, हे मोर परमेस्सर! मई लजान हउँ काहेकि हमरे पाप हमरे मूँड़ स ऊपर चले गए हैं। हमरे अपराधन क ढेरी एतनी होइ गइ ह कि उ अकासे तलक पहुँच चुकी ह। 7हमरे पुरखन क समइ स अब तलक हम लोग बहोत जियादा पाप किहा ह। हम लोग पाप किहा, एह बरे हम, हमरे राजा अउर हमरे याजक दण्डित भएन। हम लोग बिदेसी राजा लोगन क जरिये तरवार स अउर बन्दीखाने में धौंधे जाइ तलक दण्डित भएन ह। उ पचे राजा हमार धन लइ गएन अउर हमका लजित किहेन। इ स्थिति आजु भी वइसी अहइ।

8आखीर में अब तू हम पइ कृपालु भवा ह। तू हमरे बचा भवा लोगन क बन्धुआई स निकरि आवइ दिहा ह अउर आपन पवित्र जगह में पनाह दिहा ह। यहोवा, तू हम क नवा जीवन दिहा ह अउर हमरी गुलामी स अजाद किहा ह। 9हँ, हम दास रहे, मुला तू हम क सदा ही क बरे दास नार्ही रहइ देइ चाहत रहा। तू हम पइ कृपालु रहा। तू फारस क राजा लोगन क हम पइ कृपालु बनाया। तोहार मन्दिर नेस्त नाबूद होइ गवा रहा। मुला तू हम क नवी जिन्नगी दिहा जेहसे हम तोहरे मन्दिर क फुन बनाइ सकित ह अउर नवे क तरह पक्का कइ सकत हीं। ह परमेस्सर तू हम पचन्क यहूदिया अउर यरूसलेम में बेरा\* बनाइ दिहस।

10हमरे परमेस्सर, अब हम तोहसे का कहि सकित ह? हम लोग तोहरी आग्या क पालन करब फुन तजि दीन्ह ह। 11हमरे परमेस्सर, तू अपने सेवकन अर्थात नबियन क उपयोग किहा अउर ओन आदेसन क हम क दिहा। तू कहे रहया: “जउने देस में तू रहइ जात अहा अउर जेका आपन बनावइ जात रहया ह, उ देस भ्रस्ट अहइ। इ ओन बहोत बुरे कामन स भ्रस्ट भवा ह जेनका हुवाँ रहइवालन किहेन ह। ओन लोग इ देस में हर जगह पइ बहोत जियादा बुरे काम किहेन ह। उ पचे इ देस क अपने पापन स गंदा कइ दिहेन ह। 12एह बरे इस्राएल क लोगो, अपने बच्चन क ओनके बच्चन स बियाह जिन करइ द्या। ओनके संग सम्बंध न रखा। अउर ओनकर चिजियन क लालसा न करा। मोरे आदेसन क पालन करा जेहसे तू सक्तीसाली होब्या अउर इ देस क अच्छी चिजियन क भोग करब्या। तब तू इ देस क बनाए रखब्या अउर अपने बच्चन क देब्या।”

13जउन बुरी घटनन हमरे संग घटिन उ सबइ हमार अपनी अपनी गलतियन स घटिन। हम लोग पाप क करम किहे अही अउर हम लोग बहोत अपराधी अही। मुला हमार परमेस्सर, तू हम क ओहसे बहोत, कम दण्ड दिहा ह जेतना हम मिलइ चाही। हम लोग बड़े भयानक करम किहे अही अउर हम लोगन क एहसे जियादा दण्ड मिलइ चाही। अइसा होत भए भी तू हमरे लोगन में स कछू क बन्धुवाई स अजाद होइ जाइ दिहा ह। 14एह बरे हम जानित ह कि हम क तोहरे आदेसन क तोड़इ नार्ही चाही। हम क ओन लोगन

**पवित्तर पीढ़ी** काहेकि मूसा क व्यस्था अंतरजातीय बियाह क रोकत ह, एज़ा अउर नेतन चिन्ति अहइ कि इ यहूदी साइद गैर यहूदी स मिल जाइ अउर आपन यहूदीपन खो देइ।

**बेरा** बेरा सब्द क उपयोग यहूदियन क यरूसलेम इस्राएल वापिस ओन क मालिकाना अधिकार क दसाइ बरे कीन्ह गवा ह।

क संग बियाह नाही करइ चाही। उ सबइ लोग बहोत बुरे काम करत हीं। परमेस्सर जदि हम लोग ओन बुरे लोगन क संग बियाह करत रही तउ हम जानित ह कि तू हम क नस्ट कइ देब्या। तब इस्राएल क लोगन में स कउनो भी जिअत नाही बचि पाइ।

15यहोवा, इस्राएल क परमेस्सर, तू अच्छा अहइ। अउर तू अब भी हम में स कछू क जिअत रहइ देब्या। हाँ, हम अपराधी अहइ। अउर अपने अपराध क कारण हम में कउनो क भी तोहरे समन्वा खड़े होइ नाही दीन्ह जाइ चाही।

### लोग आपन पाप स्वीकार करत हीं

**10** एज्रा पराथना करत रहा अउर पापन क स्वीकार करत रहा। उ परमेस्सर क मन्दिर क समन्वा रोवर रहा अउर निहुरिके प्रणाम करत रहा। जउने समइ एज्रा इ कहत रहा उ समइ इस्राएल क लोगन क एक बड़ा समूह मेहरारू मनसेधू अउर बच्चन ओकरे चारिहूँ कइँती बटुर गएन। उ सबइ लोग भी जोर-जोर स रोवत रहेन। 2तब यहीएल क पूत सकन्याह जउन एलाम क सन्तानन में स रहा, एज्रा स बातन किहस। सकन्याह कहेस, “हम लोग अपने परमेस्सर क भक्त नाही रहे। हम लोग इ भुइँया क लोग क बिदेसी मेहररूअन क संग बियाह किहा ह। मुला जदपि हम इ कइ चुके अहइ तउ भी इस्राएल क बरे आसा अहइ। 3अब हम अपने परमेस्सर क समन्वा ओन सबहिं मेहररूअन अउर ओनके बच्चन क वापस पठवइ क वाचा करी। हम लोग इ एज्रा क सलाह मानइ बरे अउ ओन लोगन क सलाह मानइ क बरे करब जउन परमेस्सर क नेमन क सम्मान करत हीं। हम परमेस्सर क नेमन क पालन करब। 4एज्रा खड़े हवा, इ तोहार उत्तरदायित्व अहइ, किन्तु हम तोहार समर्थन करब। एह बरे साहसी बना अउर एका करा।”

5एह बरे एज्रा उठ खड़ा भवा। उ प्रमुख याजक, लेवीबंसियन अउर इस्राएल क सबहिं लोगन स जउन कछू उ कहेस, ओका करइ क प्रतिग्या कराएस। 6तब एज्रा परमेस्सर क भवन क समन्वा स दूर हट गवा। जब तलक एज्रा हुवाँ रहा उ भोजन नाही किहस अउर न ही पानी पियस। उ इ किहस काहेकि उ तब भी बहोत दुःखी भवा। उ इस्राएल क ओन लोगन बरे दुःखी रहा जउन यरूसलेम क वापस आए रहेन। 7उ पचे यहूदा अउ यरूसलेम में हर एक जगहिया में इ एलान किहस कि सबइ यहूदी लोग जउन कि बन्धुवाई स वापस लउटे यरूसलेम में एक संग एकट्ठा होइ। 8कउनो भी मनई जउन तीन दिन क भीतर यरूसलेमा नाही आई, तउ ओकर सम्पत्ति उ भुइँया में जबत कइ लीन्ह जाई। बड़के अधिकारियन अउर नेतन (प्रमुखन) इ निर्णय लिहन अउर उ मनई ओन लोगन क समूह क निअंवर नाही रहि जाई जउन कि बन्धुवाई स वापस लउटी क आएन।

9एह बरे तीन दिन क भीतर यहूदा अउ बिन्यामीन के परिवार क सबहिं मनई यरूसलेम में एकट्ठा भएन अउर नवें महीने क बीसवें दिन सबहिं लोग मन्दिर क आँगन में

आइ गएन। उ पचे इ बिसय क डर स अउर भारी बर्खा क कारण काँपत रहेन। 10तब याजक एज्रा खड़ा भवा अउर उ ओन लोगन स कहेस, “तू लोग परमेस्सर क बरे बिस्सासी नाही रहेन। तू पचे बिदेसी मेहररूअन क संग बियाह किहा ह। तू पचे वइसा कइके इस्राएल क अउर जियादा अपराधी बनाया ह। 11अब तू लोगन क यहोवा क समन्वा स्वीकार करब होइ कि तू पचे पाप किहा ह। यहोवा तू लोगन क पुरखन क परमेस्सर अहइ। तू पचनक यहोवा क आदेस क पालन करइ चाही। अपने चारिहूँ ओर रहइवाले लोगन अउ अपनी बिदेसी मेहररूअन स अपने अलग करा।”

12तब पूरा समूह जउन एक संग एकट्ठा रहा, एज्रा क जवाब दिहस। उ पचे ऊँची आवाज में कहेन: “एज्रा तू बिल्कुल ठीक कहत ह। हम क उ करइ चाही जउन तू कहत ह। 13मूला हुवाँ बहोत स लोग अहई अउर इ बर्खा क समइ अहइ तउ हम लोग बाहरे खड़े नाही रहि सकित। इ समस्या एक या दुइ दिन में हल नाही होइ काहेकि हम लोग बुरी तरह पाप किहे अही। 14पूरे समूह क सभा कइँती स हमरे प्रमुखन क निर्णय करइ द्या। तब निहचित समइ पइ हमरे नगरन क हर एक मनई जउन कउनो बिदेसी मेहरारू स बियाह किहस ह, यरूसलेम आएन। ओनका अपने अग्रजन (प्रमुखन) अउर नगरन क निआव अधीसन क संग हिआँ आवइ दीन्ह जाइ। तब हमार परमेस्सर हम पइ किरोधित होब तजि देइ।”

15सिरिफ थोड़े स मनई इ योजना क बिरुद्ध रहेन। इ सबइ मनई रहेन असाहेल क पूत योनातान अउ तिकवा क पूत यहजयाह रहेन। लेवीबंसी मसुल्लाम अउ सब्बतै भी इ योजना क बिरुद्ध रहेन।

16एह बरे इस्राएल क उ सबइ लोग, जउन यरूसलेम में वापस आए रहेन, उ योजना क स्वीकार करइ क सहमत होइ गएन। याजक एज्रा परिवार क प्रमुख मनईयन क चुनेस। उ हर एक परिवार स एक मनई क चुनेस। हर एक मनई नाउँ लइके चुना गवा। दसवें महीने क पहिले दिन जउन लोगन चुने गए रहेन हर एक मामले क जाँच क बरे बइठेन। 17पहिले महीने क पहिले दिन तलक उ पचे ओन सबहिं मनइयन पइ बिचार करब पूरा कइ लिहन जउन बिदेसी मेहररूअन स बियाह किहे रहेन।

### बिदेसी मेहररूअन स बियाह करइवाला क सूची

18याजकन क सन्तानन में इ सबइ नाउँ अहई जउन बिदेसी मेहररूअन स बियाह किहन: योसादाक क पूत येसू क सन्तानन, अउर येसू क भाइयन में स इ सबइ मनई: मासेयाह, एलीआज़र, यारीब अउर गदल्याह। 19एन सबहिं अपनी-अपनी मेहररूअन स सम्बंध तोरब स्वीकार किहन अउर अपने-अपने अपराध क स्वीकार करत भए हर एक अपने रेवइ स एक-एक भेड़ा अपराध भेंट क रूप में चढ़ाएस। उ पचे अइसे अपने-अपने अपराधन क कारण किहन।

20इम्मेर क सन्तानन में स इ सबइ मनई रहेन: हनानी, अउर जबधाह।

21हारीम क सन्तानन में स इ सबइ मनई रहेन: मासेयाह, एलीयाह, समायाह, यहीएल अउर उज्जियाह।

22पसहूर क सन्तानन में स इ सबइ मनई रहेन: एल्योएनै, मासेयाह, इसमाएल, नतनेल, योजाबाद अउर एलासा।

23लेवीबंसियन में स एन मनइयन बिदेसी मेहररूअन स बियाह किहस: योजाबाद, सिमी, केलायाह (एका कलीता भी कहा जात)। ह पतद्दाह, यहूदा अउर एलीआज़र।

24गायकन में सिरिफ इ मनई अहइ, जउन बिदेसी मेहरारू स बियाह किहस:

एल्यासीब, दुआरपालन में स इ सबइ लोग अहई जउन बिदेसी मेहररूअन स बियाह किहस: सल्लूम, तेलेम अउर ऊरी। 25इस्त्राएल क लोगन में स इ सबइ लोग अहई जउन बिदेसी मेहररूअन स बियाह किहन:

परोस क सन्तानन स इ सबइ मनई: रम्याह, यिज्जियाह, मल्कियाह, मियामीन, एलीआज़र, मल्कियाह अउर बनायाह।

26एलाम क सन्तानन में स इ सबइ मनई: मत्तन्याह, जकर्याह, यहीएल, अब्दी, यरेमोत अउर एलीयाह।

27जत्तू क सन्तानन में स इ सबइ मनई एल्योएनै, एल्यासीब, मत्तन्याह, यरेमोत, जाबाद अउर अजीज़ा।

28बेबै क सन्तानन में स इ सबइ मनई: यहोहानान, हनन्याह, जब्बै, अउर अतलै।

29बानी क सन्तानन में स इ सबइ मनई: मसुल्लाम, मल्लूक, अदायाह, यासूब, साल अउर यरामोत।

30पहतमोआब क सन्तानन में स इ सबइ मनई: अदना, कलाल, बनायाह, मासेयाह, मत्तन्याह, बसलेल, बिन्नूई अउर मनस्से।

31हारीम क सन्तानन में स इ सबइ मनई: एलीआज़र, यिस्सियाह, मल्कियाह, समायाह, सिमोन, 32बिन्यामीन, मल्लूक अउर समर्याह।

33हासूम क सन्तानन में स इ सबइ मनई: मत्तनै, मत्तता, जाबाद, एलीपेलेत, यरेमै, मनस्से अउर सिमी।

34बानी क सन्तानन में स इ सबइ मनई: मादै, अग्राम, ऊएल, 35बनायाह, बेदयाह, कलूही, 36बन्याह, मरेमोत, एल्यासीब, 37मत्तन्याह, गत्तनै, यासू,

38बिन्नूई क सन्तानन में स इ सबइ मनई: सिमी, 39सेलेम्याह, नातान, अदायाह, 40मक्नदबै, सासै, सारै, 41अजरेल, सेलेम्याह, सेमर्याह, 42सल्लूम, अमर्याह, अउर योसेफ।

43नबो क सन्तानन में स इ सबइ मनई: यीएल, मत्तित्याह, जाबाद, जबीना, यद्दो, योएल अउर बनायाह।

44एन सबहिं लोग बिदेसी मेहररूअन स बियाह किहे रहेन अउर एनमाँ स कछू क एन मेहररूअन में स बच्चे भी रहेन।

# दूसर इतिहास

## सुलैमान बुद्धि क याचना करत ह

1 सुलैमान एक बहोत सक्तीसाली राजा बन गवा काहेकि यहोवा ओकरे परमेस्सर, ओकर संग रहा। यहोवा सुलैमान क बहोत जियादा महान बनाएस।

2सुलैमान इस्त्राएल क सबहि लोगन स बातन किहस। उ सेना क सेनापतियन, सहस्रपतियन, निआवअधीसन, इस्त्राएल क सबहि नेता लोगन अउर परिवारन क प्रमुखन स बातन किहस। 3तब सुलैमान अउर सबहि लोग ओकरे संग बटुरेन अउ उ ऊँच जगह क गएन जउन गिबोन नगर मँ रहा। परमेस्सर क मिलाप क तम्बू हुवाँ रहा। यहोवा क सेवक मूसा ओका तब बनाए रहा जब उ अउर इस्त्राएल क लोग रेगिस्ताने मँ रहेन। 4दाऊद परमेस्सर क करार क सन्दूख क किर्यत्थारीम स यरूसलेम तलक लिआवा रहा। दाऊद यरूसलेम मँ एका रखइ बरे एक ठु जगह बनाए रहा। दाऊद यरूसलेम मँ करार क सन्दूख बरे एक तम्बू लगाइ दिहे रहा। 5हूर क पूत ऊरी अउर ऊरी क पूत बसलेल एक काँसे क वेदी बनाए रहा। उ काँसे क वेदी गिबोन मँ पवितर तम्बू क समन्वा रही। एह बरे सुलैमान अउर उ सबइ लोग यहोवा स राय लेइ गिबोन गएन। 6मिलाप क तम्बू मँ यहोवा क समन्वा काँसे क वेदी तलक सुलैमान गवा। सुलैमान एक हजार होमबलि वेदी पइ चढ़ाएस।

7उ राति परमेस्सर सुलैमान क लगे आवा। परमेस्सर कहेस, “सुलैमान, मोहसे तू उ माँगा जउन कछू तू चाहत अहा कि मई तोहका देउँ।”

8सुलैमान परमेस्सर स कहेस, “तू मोरे दाऊद क बरे बहोत कृपालु अहा। तू मोका, मोरे बाप क जगह पइ नवा राजा होइ बरे चुन्या ह। 9यहोवा परमेस्सर, अब, तू जउन बाचन मोरे पिता दाऊद क दिहा ह ओका बना रहइ द्या। तू मोका अइसी प्रजा क राजा बनाया, जउन पृथ्वी क रेत कणन क नाई अनगिनत अहई। 10तू मोका बुद्धि अउ गियान द्या। ताकि मई एन लोगन क सही रहा पइ लइ चल सकव। कउनो भी मनई तोहरी मदद क बिना तोहार एँन महान लोगन पइ हुकूमत नाहीं कइ सकत ह।”

11परमेस्सर सुलैमान स कहेस, “तोहार रूख बिल्कुल ठीक अहई। तू धन या सम्पति या सम्मान नाहीं माँग्या ह। तू इ भी नाहीं माँग्या ह कि तोहार दुस्मन मरि जाई। तू लम्बी उमिर भी नाहीं माँग्या ह। किन्तु तू अपने बरे बुद्धि अउ गियान माँग्या ह जेहसे तू मोर प्रजा क सम्बन्ध मँ बुद्धिमानी स निर्णय लइ सका, जेकर मई तोहका राजा बनाएउँ ह। 12एह बरे मई तोहका बुद्धि अउ गियान देब। मई तोहका धन, बैभव अउर सम्मान भी देब। तोहरे पहिले होइवाले राजा लोगन क लगे एतना धन अउर सम्मान

कबहुँ नाहीं रहा अउर तोहरे पाछे होइवाले राजा लोगन क लगे भी एँतना धन अउर सम्मान नाहीं होइ।”

13तउ सुलैमान गिबोन क आराधना क जगह मँ गवा। जब सुलैमान उ मिलापवाले तम्बू क छोड़ेस अउ यरूसलेम लउट गवा अउ इस्त्राएल पइ राज करइ लाग।

## सुलैमान धन संग्रह अउर अपनी फउज खड़ी करत ह

14सुलैमान घोड़न अउ रथ अपनी फउज क बरे एकटठा करब सुरू किहस। सुलैमान क लगे एक हजार चार सौ रथ अउर बारह हजार घोड़सवार रहेन। सुलैमान ओनका रथ नगरन मँ रखेस। सुलैमान यरूसलेम मँ भी ओनमाँ स कछू क रखेस, अर्थात हुवाँ जहाँ राजा क निवास रहा। 15सुलैमान यरूसलेम मँ बहोत सी चाँदी अउ सोना एकटठा किहस। उ एँतना अधिक चाँदी अउ सोना एकटठा किहस कि उ चट्टानन स सामान्य होइ गवा। सुलैमान देवदारु क एँतना लकड़ी बटोरेस कि उ पच्छिमी पहाड़ प्रदेश क गूलर क बृच्छ क नाई सामान्य होइ गइ। 16सुलैमान, मिस्त्र अउर कुए स घोड़न मँगाएस। राजा क बइपारियन घोड़न कुए स बेसहेन। 17सुलैमान क बइपारियन मिस्त्र स एक रथ चाँदी क छः सौ सेकेल मँ अउर घोड़ा चाँदी क एक सौ पचास सेकेल मँ बेसहेन। तब बइपारियन घोड़न अउर रथन क हिली लोगन क राजा लोगन तथा अराम क राजा लोगन क हाथ बेच दिहस।

## सुलैमान मन्दिर बनावइ क योजना बनावत ह

2 सुलैमान यहोवा क नाउँ क प्रतिष्ठा क बरे एक मन्दिर अउर अपने बरे एक राजमहल बनावइ क निहचइ कहस। 2सुलैमान सत्तर हजार बोझ ढोवइया अउर पहाड़ी पहँटा मँ पाथर खनइ बरे अस्सी हजार मनइयन क चुनेस अउर उ तीन हजार छः सौ मनई मजदूरन क निगरानी बरे चुनेस।

3तब सुलैमान हूराम क सँदेसा पठएस। हूराम सोर नगर क राजा रहा। सुलैमान सँदेसा दिहे रहा, “मोका वइसे ही मदद द्या जइसे तू मोरे बाप दाऊद क मदद दिहे रह्या। देवदार क बृच्छन स ओनका काठ पठए रह्या जेहसे उ पचे अपने रहइ क बरे महल बनाइ सके रहेन। 4मई एक ठु मन्दिर बनाउब अउर ओका यहोवा आपन परमेस्सर क नाउँ क सम्मान देइ बरे अर्पित करब। हम पचे यहोवा क समन्वा सुगन्धित धूप जराब। हम पचे हमेसा पवितर रोटी क बिसेस मेज पई भेंट करब। हम पचे हर भिसारे, हर सांझ, हर सबित क दिन मँ, हर नवा चन्द्र क दिन मँ अउर दूसर त्यौहार मँ जउन यहोवा हमार परमेस्सर हम पचन क मनावइ

बरे आदेस दिहे रहा, मैं होमबलि भेंट चढ़ाउब। इ ओकर नेम अहइ जेका इस्राएल क लोगन क सदा पालन करइ चाही।

5“जउन मन्दिर मई बनाउब उ महान होइ, काहेकि हमार परमेस्सर सबहिं देवतन स बड़ा अहइ। 6किन्तु कउनो भी मनई सही अर्थ मैं हमरे परमेस्सर बरे भवन नाहीं बनाइ सकत। सरग हौं, उच्चतम सरग भी परमेस्सर क अपने भीतर नाहीं रख सकत। मई सिरिफ एक जगह परमेस्सर क समन्वा सुगन्धि बारइ बरे बनाइ सकत हउँ।

7“अब, मोरे लगे सोना, चाँदी, काँसा अउर लोहा क काम करइ मैं एक ठु कुसल मनई क पठवा। उ मनई क एकर गियान होइचाही कि बैगनी, लाल अउ नीले ओढ़नन क उपयोग कइसे कीन्ह जात ह। उ मनई क हिआँ यहूदा अउ यरूसलेम मैं मोरे कुसल कारीगरन क संग नक्कासी करब होइ। मोर बाप दाऊद एन कुसल कारीगरन क चुने रहा। 8मोरे लगे लबानोन देस स देवदार, चीर अउ चन्दन अउर सनोवर क लकड़ियन भी पठएन। मई जानत हउँ कि तोहार सेवक लबानोन स बृच्छन क काटइ मैं अनुभवी अहई। मोर सेवक तोहरे सेवकन क मदद करिहीं। 9काहेकि मोका प्रचुर मात्रा मैं इमारती लकड़ी चाही। जउन मन्दिर मई बनावइ जात अहउँ उ बिसाल अउ अद्भुत होइ। 10मई एक लाख पचीस हजार बुसल गोहूँ अउर एक लाख पचीस हजार बुसल जौ, एक लाख पन्द्रह हजार गैलन दाखरस अउर एक लाख पन्द्रह हजार गैलन तेल तोहरे ओन सेवकन क बरे दिहेउँ ह जउन इमारती लकड़ी बरे बृच्छन क काटत हीं।”

11तब सोर क राजा हूराम सुलैमान क जवाब दिहस। उ सुलैमान क एक ठु पत्र पठएस। पत्र मैं इ कहा गवा रहा: “सुलैमान, यहोवा अपने लोगन स पिरेम करत ह। इहइ कारण अहइ कि उ तोहका ओनकर राजा चुनेस।” 12हूराम इ भी कहेस, “इस्राएल क यहोवा, परमेस्सर क बड़कई करा। उ धरती अउ अकास बनाएस। उ राजा दाऊद क बुद्धिमान पूत दिहस। सुलैमान, तोहका बुद्धि अउर समुझ दिहस ह। तू एक ठु मन्दिर यहोवा बरे बनावत अहा। तू अपने बरे भी एक राजमहल बनावत अहा। 13मई तोहरे लगे एक ठु कुसल कारीगर पठउब। ओका बिभिन्न प्रकार क बहोत सी कलन क जानकारी अहइ। ओकर नाउँ हूराम-अबी अहइ। 14ओकर महतारी दान क परिवार समूह क रही अउर ओकर बाप सोर नगर क रहा। हूराम-अबी सोना, चाँदी, काँसा, लोहा, पाथर अउ काठे क काम मैं कुसल अहइ। उ बैगनी, नीला, लाल ओढ़नन अउ कीमती मलमल ओढ़नन मैं कढ़ाई क काम मैं भी कुसल अहइ। उ हर कउनो डिज़ाइन क जेहका तू देखउब्या, कइ सकत ह। उ तोहरे कुसल कारीगरन क मदद करी अउर तोहरे बाप दाऊद क कुसल कारीगरन क मदद करी।

15“तू गोहूँ, जौ, तेल अउर दाखरस पठावइ क जउन बचन दिहे रह्या, ओका पूरा करा अउर उ सबइ चिजियन क मोरे सेवकन क लगे पठइ द्या। 16अउर हम लोग लबानोन देस स लकड़ी काटब। हम लोग ओतनि लकड़ी काटब जेतनी तोहका जरुरत अहइ। हम लोग समुद्धर मैं लकड़ी क लट्ठन क बेड़ा क उपयोग जापा नगर तलक

लकड़ी पहोंचावइ बरे करब। तब तू लकड़ी क यरूसलेम लइ जाइ सकत ह।”

17तब सुलैमान इस्राएल मैं बसइवाले सबहिं बाहरी लोगन क गनवाएस। इ उ समइ क पाछे भवा जब दाऊद लोगन क गने रहा। दाऊद, सुलैमान क बाप रहा। ओका 1,53,600 बाहरी लोग मिलेन। 18सुलैमान 70,000 बिदेसियन क चिजियन ढोवइ बरे, 80,000 बिदेसियन क पहाड़न मैं पाथर काटइ बरे अउर 3,600 बिदेसियन क पहाड़न मैं पाथर काटइवाले मनईन क निरिच्छक बरे चुनेस।

### सुलैमान मन्दिर बनावत ह

3 सुलैमान यहोवा क मन्दिर मोरिय्याह पर्वत पइ यरूसलेम मैं बनाउब सुरु किहस। पर्वत मोरिय्याह उ जगह अहइ जहाँ यहोवा सुलैमान क बाप दाऊद क दर्शन दिहे रहा। सुलैमान उहइ जगह पइ मन्दिर बनाएस जेका दाऊद तइयार कइ चुका रहा। उ जगह उ खरिहाने मैं रही जउन ओर्नान क रहा। ओर्नान यबूसी लोगन मैं स एक रहा। 2सुलैमान इस्राएल मैं अपनी हुकूमत क चउथे बरिस क दूसरे महीने मैं मन्दिर बनाउब सुरु किहस।

3सुलैमान परमेस्सर क मन्दिर क नेव क निर्माण क बरे जउने माप क उपयोग किहसे, इ उ अहइ: नेव साठ हाथ लम्बी अउर बीस हाथ चउड़ी रही। सुलैमान पुराने हाथ क माप क ही उपयोग तब किहस जब उ मन्दिर क मापेस। 4मन्दिर क सामने क दुआर मण्डप बीस हाथ लम्बा अउर बीस हाथ ऊँच रहा। सुलैमान दुआर मण्डप क भीतरी हीसा क निखालिस सोना स मढ़वाएस 5सुलैमान बड़े कमरन क देवार पइ सनोवर लकड़ी क बनी चौकोर सिल्लियन धरेस। तब उ सनोवर क सिल्लियन क निखालिस सोना स मढ़ेस अउर उ निखालिस सोने पइ खजूरे क बृच्छ क चित्र अउ जंजीरन बनाएस। 6सुलैमान मन्दिर क सुन्नरता क बरे ओहमाँ बहुमूल्य रतन लगाएस। जउने सोने क उपयोग सुलैमान किहस उ पैम स आवा रहा। 7सुलैमान मन्दिर क भीतरी भवन क सोना स मढ़ दिहस। सुलैमान छते क कड़ियन चौखटन, देवारन अउर दरवाजन पइ सोना मढ़वाएस। सुलैमान देवारन पइ करूब सरगदूतन क खुदवाएस।

8तब सुलैमान सब स जियादा पवित्तर जगहिया बनाएस। सब स जियादा पवित्तर जगहिया बीस हाथ लम्बी अउर बीस हाथ चउड़ी रही। इ ओतनी ही चउड़ी रही जेतना पूरा मन्दिर रहा। सुलैमान सब स जियादा पवित्तर जगहिया क देवारन पइ सोना मढ़वाएस। सोना क वजन लग भग बीस हजार चार सौ किलोग्राम रहा। 9सोना क कीलन क वजन पाँच सौ पचहत्तर ग्राम रहा। सुलैमान ऊपरी कमरन क सोना स मढ़वाएस। 10सुलैमान दुइ करूब सरगदूत सब स जियादा पवित्तर जगह पइ धरइ बरे बनाएस। कारीगरन करूब सरगदूतन क सोना स मढ़ दिहन। 11करूब (सरगदूतन) क हर एक पखना पाँच हाथ लम्बा रहा। पखनन क पूरी लम्बाई बीस हाथ रही। पहिले करूब सरगदूत क एक पखना कमरा क एक कइँती क देवार क छुअत रहा। दूसर पखना दूसरे करूब सरगदूत क पखना क छुअत रहा।

12दूसरे करूब सरगादूत क दूसर पखना कमरा क दूसरी कइँती क देवार क छुअत रहा। 13करूब सरगादूत क पखना सब मिलाइके बीस हाथ फइले रहेन। करूब सरगादूत भीतर पवितर जगह कइँती लखत भए खड़े रहेन।

14उ नीला, बैंगनी, लाल अउर कीमती ओढ़नन अउर कीमती सूती ओढ़नन स पर्दे\* क बनवाएस। परदे पइ करूबन क चित्र काढ़ दिहस।

15सुलैमान मन्दिर क समन्वा दुइ खम्भन खड़ा किहस। खम्भन पैतीस हाथ ऊँच रहेन। दुइनउँ खम्भन क सीर्स हींसा दुइ पाँच हाथ लम्बा रहा। 16सुलैमान जंजीरन क हार बनाएस। उ जंजीरन क खम्भन क सीर्स पइ धरेस। सुलैमान सौ अनार बनाएस अउर ओनका जंजीरन स लटकाएस। 17तब सुलैमान मन्दिर क समन्वा खम्भन खड़े किहस। एक खम्भा दाई कइँती रहा। दूसर खम्भा बाई कइँती रहा। सुलैमान दाई कइँती क खम्भा क नाउँ “याकीन” अउर बाई कइँती क खम्भा क नाउँ “बोअज” रखेस।

### मन्दिर क सजा

4 सुलैमान वेदी बनावइ बरे काँसा क उपयोग किहस। उ काँसा क वेदी बीस हाथ लम्बी, बिस हाथ चउड़ी अउर दस हाथ ऊँच रही। 2तब सुलैमान टेधरे काँसे क उपयोग एक बिसाल हौज बनावइ क बरे किहस। बिसाल हौज गोल रहा अउर एक सिरे स दूसर सिरे तलक एकर माप दस हाथ रही अउर इ पाँच हाथ ऊँच अउर तीस हाथ घेरे वाला रहा। 3बिसाल हौज क खाले मँ बर्धन क आकृतियन क दुई कतारन मँ जउन हौज क चारिहुँ कइँती दस हाथ ढाँपि लिहेन, बनान गएन। उ सबइ तब ढाले गएन जब हौज बनावा ग रहा। 4उ बिसाल काँसा क हौज बारह बर्धन क बिसाल प्रतिमा पइ स्थित रहा। तीन बर्धन उत्तर कइँती लखत रहेन। तीन बर्धन पच्छिम कइँती लखत रहेन। तीन बर्धन दक्खिन कइँती लखत रहेन। तीन बर्धन पूरब कइँती लखत रहेन। बिसाल काँसा क हौज एन बर्धन क ऊपर रहा। सबहिँ बर्धन अपने पिछवड़े केन्द्र कइँती रखके खड़ा रहा। 5बिसाल काँसा क तलाव चार अंगुल मोटा रहा। बिसाल तलाव क सिरा एक पियाले क सिरे क नाई रहा। सिरा खिली भइ लिली क तरह रहा। एहमाँ छाछठ किलो लीटर आइ सकत रहा।

6सुलैमान दस चिलमचियन बनाएस। उ बिसाल काँसे क हौज क दाई कइँती पाँच चिलमचियन रखेस अउर सुलैमान काँसा क बिसाल हौज क बाई कइँती पाँच चिलमचियन रखेस। एन चिलमचियन क उपयोग होमबलि बरे चढ़ाई जाइवाली चिजियन क धोवइ बरे होब रहा, किन्तु बिसाल हौज क उपयोग बलि चढ़ावइ क पहिले याजकन क नहाइ बरे होब रहा।

7सुलैमान क निर्देस क अनुसार सोना क दस डीबट बनाएस अउर ओनका मन्दिर मँ रख दिहस: पाँच दाहिन

कइँती अउर पाँच बाई कइँती। 8सुलैमान दस मेजन बनाएस अउर ओनका मन्दिर मँ धरेस। मन्दिर मँ पाँच तु मेजन दाई रहिन अउर पाँच मेजन बाई। सुलैमान सौ चोलमचियन बनावइ क बारे सोना क उपयोग किहस। 9सुलैमान याजकन बरे आँगन बनाएन, बड़ा आँगन अउर दरवाजन ओकरे बरे बनाएस। उ आँगन मँ खुलइवाले दरवाजन क मढ़इ बरे काँसे क उपयोग किहस। 10तब उ बिसाल काँसे क तलाव क मन्दिर क दक्खिन पूरब कइँती दाई कइँती रखेस।

11हूराम बर्तन, बोलचन अउर खोरन क बनाएस। तब हूराम परमेस्सर क मन्दिर मँ सुलैमान बरे अपने काम खतम किहेस। 12हूराम दुइनउँ खम्भन अउर दुइनउँ खम्भन क सीर्सभाग क दुइनउँ बिसाल खोरन क बनाए रहा। हूराम दुइनउँ खम्भन क सीर्सभाग कि दुइनउँ बिसाल खोरन क ढकइ बरे सजावटी जाल क दुइ सेट भी बनाए रहा। 13हूराम चार सौ अनार दुई सेट सजावटी जाल बरे बनाएस। हर एक जाल क बरे अनारन क दुइ पंक्तियन रहिन। दुइनउँ खम्भन क सीर्सभाग पइ बिसाल खोरन जाल स ढके रहेन। 14हूराम आधार दण्ड अउर ओनके ऊपर क पियालन क भी बनाएस। 15हूराम एक बिसाल काँसे क तलाव अउर तलाव क खाले बारह बर्धन बनाएस। 16हूराम बर्तन, बेलचन, काँटन अउर सबहिँ चिजियन राजा यहोवा क मन्दिर बरे राजा सुलैमान क अनुरोध क अनुसार बनाएस। इ सबइ चिजियन कलई चढ़े काँसे क बनी रहिन। 17राजा सुलैमान पहिले एन चिजियन क माटी क साँचे मँ डारेस। इ सबइ साँचिन सुक्कोत अउर सरेदा नगरन क बीच यरदन घाटी मँ बने रहेन। 18सुलैमान इ सबइ ऐतनी जियादा तादाद मँ बनाएस कि कउनो मनई उपयोग मँ लाए गए काँसा क तउलइ क जतन नाहीं किहस। 19सुलैमान परमेस्सर क मन्दिर बरे भी चिचियन बनाएस। सुलैमान सुनहरी वेदी बनाएस। उ उ सबइ मेजन बनाएस जेन पइ उपस्थिति क रोटियन रखी जात रहिन। 20सुलैमान डीबट अउर ओनकर दिया निखालिस सोना क बनाएस। बनी भइ योजना क मुताबिक डीबटन क पवितर जगह क समन्वा भीतर बारब रहा। 21सुलैमान फूलन, दीयन अउर चिमटन क बनावइ बरे निखालिस सोना क उपयोग किहस। 22सुलैमान झालरन, पियालन, कड़ाहियन अउर धूपदान बनावइ बरे निखालिस सोना क उपयोग किहस। सुलैमान मन्दिर क दरवाजन, सब स जियादा पवितर जगह अउर मुख्य बिसाल कच्छ क भीतरी दरवाजन क बनावइ बरे निखालिस सोने क उपयोग किहस।

5 तब सुलैमान यहोवा क मन्दिर क बरे कीन्ह गए सबहिँ काम पूरे कइ लिहस। सुलैमान ओन सबहिँ चिजियन क लिआएस जउन ओकर बाप दाऊद क मन्दिर बरे दिहे रहा। सुलैमान सोना चाँदी क बनी भइ सबहिँ चिजियन अउर सबहिँ फर्निचरन (लकड़ी स बना भवा चिजियन) क लिआएन। सुलैमान ओन सबहिँ चिजियन क परमेस्सर क मन्दिर क खाजना मँ रखेस।

### पवितर सन्दूख मन्दिर मँ पहुँचावा गवा

2सुलैमान इघ्राएल क सबहिँ परिवार समूहन क प्रमुखन अउर परिवारन क एकट्ठा किहेस। उ सबहिँ क यरूसलेम

पर्दे इ पर्दा एक बड़ा ओढ़नना क टुका क रहा। इ पवितर ठउर अउर महा पवितर ठउर क बीच मँ लटकत रहा। एकरे कारण कउनो भी यहोवा क करार क सन्दूक क अउर करूब सरगादूतन क जउन भीतर रहा, नाहीं लख सकतेन।

में बटोरें। सुलैमान इ एह बरे किहस कि लेवी बंसी यहोवा क करार क सन्दूख क दाऊद क नगर स लाई सकई, जउन सिप्योन अहइ। 3राजा सुलैमान इस्राएल क सबहि लोगन क संग महीने क कुटीर क त्यौहार पइ जमा भएस।

4जब इस्राएल क सबहि बुजुगन आइ गएन तब लेवीबंसियन करार क सन्दूख क उठाएस। 5तब याजक अउर लेवीबंसी करार क सन्दूख क मन्दिर में लइ गएन। उ पचे मिलापवाले तम्बू अउ एहमाँ जउन पवितर चिजियन रहिन ओनका भी यरूसलेम लइ आएन।

6राजा सुलैमान अउ इस्राएल क सबहि लोग करार क सन्दूख क समन्वा मिलेन। राजा सुलैमान अउ इस्राएल क सबहि लोग भेड़िन अउ बर्धन क बलि चढ़ाएन। हुवाँ एँतेने जियादा भेड़िन अउ बर्धन रहेन कि कउनो मनई ओनका गन नाहीं सकत रहा। 7तब याजकन यहोवा क करार क सन्दूख क उ जगह पइ रखेन, जउन एकरे बरे तइयार कीन्ह गवा रहा। उ सब स जियादा पवितर जगह मन्दिरे क भीतर रही। करार क सन्दूख क करूब सरगदूत क पखनन क खाले धरा गवा।

8करार क सन्दूख क जगह क ऊपर करूब सरगदूतन क पखनन फइले भए रहेन, करूब सरगदूत करार क सन्दूखे क ऊपर अउर बल्लियन क ऊपर जउन सन्दूख क लइ जाइ में प्रयोग आवत होत ह, खड़े रहेन। 9बल्लियन एँतनी लम्बी रहिन कि महा पवितर ठउर क समन्वा स ओनकर सिन क लखे जाइ सकतेन। मुला ओनका मन्दिर क बाहेर स कउनो नाहीं लखत सकतेन। बल्लियन, आजु तलक हुवाँ अहई।

10करार क सन्दूख में दुई ठू पाथर क सिलन क अलावा दूसर कछू नाहीं रखा रहा। मूसा दुइनउँ सिलन क होरेब पर्वत पइ करार क सन्दूख में रखे रहा। होरेब उ जगह रही जहाँ परमेस्सर इस्राएल क लोगन क संग जब उ पचे मिस्त्र छोड़ दिहे रहेन। एक करार किहे रहा।

11सबहि याजक जउन हुवाँ रहेन आपन आप क सुद्ध अउर पवितर करइ बरे समारोह क आयोजन किहेस। ओकर पाछे उ पचे महा पवितर ठउर स बाहर आएन, उ पचे एक संग खड़ा भएन, लेकिन एक बिसेस समूह में नाहीं। 12अउर सबहि लेवीबंसी गायक वेदी क पूरब कइँती खड़े रहेन। सबहि आसाप, हेमान अउ यदूतन क गायक समूह हुवाँ रहेन अउर ओनकर पूत अउर ओनकर सम्बन्धी भी हुवाँ रहेन। उ सबई लेवीबंसी गायक सफेद कीमती मलमल क ओढ़ना पहिरे भए रहेन। उ पचे झॉँझ, वीणा अउर सारंगी लिहे रहेन। ओन लेवी बंसी गाएकन क संग हुवाँ एक सौ बीस याजकन तुरही बजावत रहेन। 13जउन तुरही बजावत रहेन अउर गावत रहेन, उ पचे एक ठु मनई क तरह रहेन। जब उ पचे यहोवा क स्तुति करत रहेन अउर ओका धन्यवाद देत रहेन तब उ पचे एक ही स्वर में गावत रहेन। तुरही, झॉँझ अउ दूसर वाद्य यंत्रन पइ उ पचे जोर स आवाज करत रहेन, उ पचे यहोवा क स्तुति में इ गीत गाएन:

“यहोवा क स्तुति करा काहेकि उ भला अहइ। ओकर पिरेम अउर दया सास्वत अहइ।”

तब यहोवा क मन्दिर बादर स भरि उठा। 14बादर क कारण याजक लगातार सेवा कइ न सकेन। एकर कारण रहा यहोवा क महिमा मन्दिर में भरि गइ रही।

6 तब सुलैमान कहेस, “यहोवा कहेस कि उ करिया घने बदरे में रही। 2हे यहोवा, मई इ भव्य मन्दिर तोहरे बरे एहमाँ सदा-सर्वदा रहइ बरे बनाएउँ ह।”

### सुलैमान क भासण

3राजा सुलैमान मुड़ा अउर उ अपने समन्वा खड़े सबहि इस्राएल क लोगन क आसीबादि दिहस। 4सुलैमान कहेस, “इस्राएल क परमेस्सर, यहोवा क बड़कई करा। यहोवा उ कइ दिहेस ह जउन करइ क बचन उ तब दिहे रहा जब उ मोरे बाप दाऊद स बातन किहे रहा। परमेस्सर यहोवा इ कहे रहा: 5‘उहइ दिना स जब मई अपने लोगन क मिस्त्र स बाहेर लिआएउँ तब स अब तलक मई इस्राएल क कउनो परिवार समूह स कउनो नगर नाहीं चुनेउँ ह, जहाँ मोरे नाउँ क एक ठु भवन बनइ। मई अपने निज लोगन इस्राएलियन पइ हुकूमत करइ बरे भी कउनो मनई क नाहीं चुनेउँ ह। 6किन्तु अब मई यरूसलेम क अपने नाम बरे चुनेउँ ह अउर मई दाऊद क अपने इस्राएली लोगन क अगुवाई करइ बरे चुनेउँ ह।’

7‘मोरे बाप दाऊद क इ इच्छा रही कि उ इस्राएली रास्ट्र क यहोवा परमेस्सर क नाउँ क महिमा बरे एक ठु मन्दिर बनवावई। 8इसलिए यहोवा मोरे बाप स कहेस, ‘दाऊद, जब तू मोरे नाउँ बरे मन्दिर बनावइ क इच्छा किहा तब तू ठीक काम किहा ह। 9मुला तू मन्दिर बनाइ नाहीं सकत्या। मुला तोहार आपन पूत मोरे नाउँ बरे मन्दिर बनवाइ।’ 10अब, यहोवा उ कइ दिहेस ह जउन उ करइ क कहे रहा। मई अपने बाप क जगह पइ नवा राजा हउँ। दाऊद मोर बाप रहेन। अब मई इस्राएल क राजा अहउँ। यहोवा इहइ करइ क बचन दिहे रहा। मई इस्राएल क यहोवा परमेस्सर क नाउँ पइ मन्दिर बनवाएउँ ह। 11मई करार क सन्दूख क मन्दिर में धरेउँ ह। करार क सन्दूख हुवाँ अहइ जहाँ यहोवा क संग कीन्ह गइ वाचा रखी जात ह। यहोवा इ वाचा इस्राएल क लोगन क संग किहेस।”

### सुलैमान क पराथना

12सुलैमान यहोवा क वेदी क समन्वा खड़ा भवा। उ ओन इस्राएल क लोगन क समन्वा खड़ा भवा जउन हुवाँ बटुरे भए रहेन। तब सुलैमान अपने हाथन अउर अपनी भुजन क फइलाएस। 13सुलैमान एक ठु काँसे क मंच पाँच हाथ लम्बा, पाँच हाथ चउड़ा अउर तीन हाथ ऊँच बनाए रहा अउर एका बाहरी आँगन क बीच में रखे रहा। तब उ मंच पइ खड़ा भवा अउर इस्राएल क जउन लोग हुवाँ बटुरे भए रहेन ओनकर उपस्थिति में घुटने टेकेस। सुलैमान अकासे कइँती हाथ फइलाएस। 14सुलैमान कहेस:

“हे इस्राएल क परमेस्सर, यहोवा, तोहार समान कउनो भी परमेस्सर न तउ सरग में बाटइ, न ही धरती पइ अहइ। तू आपन पिरेम अउ दया क प्रतिग्या बनाए रख जेका तू आपन सेवकन क संग जउन नीक रास्ते पइ चलत ही अउर

पूरे हिरदइ स तोहरी आग्या क पालन करत हीं किहस ह। 15तू अपने सेवक दाऊद क दिए गए बचन क पूरा किहे रह्या, अउर आजु तू अपने हाथन स इ बचन क पूरा किहा ह। 16अब, हे यहोवा, इस्राएल क परमेस्सर! तू अपने सेवक दाऊद क दिए बचन क बनाए राखा। तू इ बचन दिहे रह्या: तू कहे रह्या, 'दाऊद, तू अपने परिवार स, मोरे समन्वा इस्राएल क सिंहासने पइ बइठइ बरे, एक मनई क पावइ म कबहुँ असफल नहीं होब्या। इहइ होइ यदि तोहार पूत ओन सबहिं बातन में सावधान रहिहीं जेनका उ पचे करिहीं। ओनका मोरे नेमन क पालन वइसे ही करइ चाही जइसा तू मोरे नेमन क पालन किहा ह।' 17अब, हे यहोवा, इस्राएल क परमेस्सर अपने बचन क पूर होइ द्या। तू इ बचन अपने सेवक दाऊद क दिहा ह।

18"हे परमेस्सर, हम जानित ह कि तू यथार्थ में, लोगन क संग धरती पइ नाहीं रहब्या। सरग, सब स ऊँच सरग भी तोहका अपने भीतर रखइ क छमता नाहीं राखत अउर हम जानित ह कि इ मन्दिर जेका मई बनाएउँ ह तोहका अपने भीतर नाहीं रखि सकत। 19किन्तु हे यहोवा, परमेस्सर तू हमार पराथना अउर कृपा याचना पइ धियान द्या। हे यहोवा, मोर परमेस्सर! तोहरे बरे कीन्ह गइ मोर पुकार तू सुना। मई तोहसे जउन पराथना करत हउँ, सुना। मई तोहार सेवक हउँ। 20मई पराथना करत हउँ कि तोहार आँखिन मन्दिर क लखइ बरे दिन रात खुली रहई। तू कहे रह्या कि तू इ जगह पइ आपन नाउँ अंकित करब्या। मन्दिर क लखत भवा जब मई तोहसे पराथना करत हउँ तउ तू मोर पराथना सुना। 21मोर पराथनन क सुना अउर तोहरे इस्राएल क लोग जउन पराथनन करत अहई, ओनका भी सुना। जब हम तोहरे मन्दिर क लखत भए पराथनन करित ह तउ तू हमार पराथनन क सुना। तू सरग में जहाँ रहत ह हुवई स सुना अउर जब तू हमार पराथनन सुन्या तउ तू हमका छिमा करा।

22"अगर कउनो मनई कउनो दूसर मनई क संग कछू बुरा करइ क कलंकित होइ, तउ उ कलंकित मनई तोहार नाउँ लेइके प्रतिग्या करी कि उ निरपराध अहइ, तउ जब उ तोहरी वेदी क समन्वा सपथ लेइ बरे आवइ, 23तउ तू सरग स सुना। तू अपने सेवकन क फैसला करा अउर ओका कार्यान्वित करा। दोखी मनई क सजा द्या अउर ओका ओतना कस्ट होइ द्या जेतना कस्ट उ दूसरे क दिहेस होइ। इ साबित करा कि जउन मनई अच्छा कार्य किहेस ह, उ निरपराध अहइ अउर ओका ओकर अच्छाई क कारण ओका इनाम द्या।

24"होई सकत ह तोहार लोग, इस्राएलियन आपन दुस्मनन स पराजित होइ, काहेकि उ पचे तोहरे खिलाफ पाप किहेन ह। अगर उ पचे तोहार लगे पराथना करइ बरे लउटी आई अउर इ मन्दिर स तोहार नाउँ क स्तुति करी, तउ 25सरग स अपने लोगन क सुना अउर इस्राएलियन क पापन क छिमा करा। ओनका उ भुइयाँ में लउटावा जेका तू ओनका अउर ओनके पुरखन क दिहे रह्या।

26"होई सकत आसमान बन्द होइ एह बरे बर्खा न होइ। उ तब होइ जब इस्राएल क लोग तोहरे बिरुद्ध पाप

करिहीं। यदि उ पचन्क एकर पछतावा होइ अउर तोहार नाउँ क स्वीकार करइ अउ इ मन्दिर क ओर पारथना करइ अउर यदि उ पचे पाप करब तजि देइहीं काहेकि तू ओनका सजा दिहेस ह, 27तउ सरग स तू ओनकर सुना। तू ओनकर सुना अउर ओनके पापन क छिमा करा। इस्राएल क लोग तोहार सेवक अहई। तब ओनका सही मारग क उपदेस द्या जेह पइ उ पचे चल सकत। तू अपनी भुइयाँ पइ बर्खा करा जउन तू अपने लोगन क दिहे रह्या।

28"अगर हुवाँ भुइयाँ में कउनो अकाल या महामारी या अगर फसलन क बेरामी बर्बाद होइ जाइ या अगर फफूँदी या अगर टिड्डी अउर टिड्डे या यदि इस्राएल क लोगन क नगरन में ओनकर दुस्मन घेरा डाइ देई, या यदि इस्राएल में कउनो प्रकार क बेरामी होइ, 29अउर तब तोहार लोग अर्थात इस्राएल क कउनो मनई पराथना या याचना करइ अउ हर एक मनई अपनी आपति अउ पीरा क जानत रहइ अउ यदि उ मनई इ मन्दिर क लखत भए आपन आपन हाथ अपनी बाँह उठावइ 30तउ तू ओनकर सरग स सुना। सरग उहइ अहइ जहाँ तू अहा। सुना अउर छिमा करा। हर एक मनई क ओकरे हक द्या काहेकि तू जानत ह कि हर एक मनई क हिरदइ में का बाटइ। सिरिफ तू ही जानत ह कि मनई क हिरदइ में का बाटइ। 31तब लोग तोहसे डेरइहीं अउर तोहार आग्या मानिहीं जब तलक उ पचे देस में रहिहीं जेका तू हमरे पुरखन क दिहे रह्या।

32"कउनो अइसा अजनबी होइ सकत ह जउन तोहार इस्राएल क लोगन में स न होइ, किन्तु उ देस स आवा होइ जउन बहोत दूर होइ अउर उ अजनबी इ बरे आवा होइ काहेकि उ तोहार महान नाउँ, तोहार महान सक्ती अउर बड़की ताकत बरे सुनेइ होइ। जब उ मनई आवइ अउर इ मन्दिर क लखत भवा पराथना करइ, 33तब सरग स जहाँ तू रहत ह, सुना अउर तू ओका अनुदान द्या जउन उ चाहत ह। तब सारे संसार क राष्ट्र तोहार नाउँ जनिहीं अउर तोहार आदर वइसे करिहीं जइसे तोहार लोग अर्थात इस्राएली करत हीं अउर संसार क सबहिं लोग जनिहीं कि जउने मन्दिर क मई बनवाएउँ ह उ तोहरे नाउँ स जाना जात ह।

34"जब तू अपने लोगन क कउनो जगह पइ ओनकर दुस्मनन क संग लइइ बरे पठएस अउर उ पचे इ नगर कईंती लखिके पराथना करई, जेका तू चुन्या ह अउ इ मन्दिर कईंती लखई जेका मई तोहरे नाउँ बरे बनाएउँ ह। 35तउ ओकर पराथना अउर याचना क सरग स सुना अउर ओकर सहायता करा।

36"लोग तोहरे खिलाफ पाप करिहीं कउनो अइसा मनई नाहीं जउन पाप न करत होइ अउर तू ओन पइ क्रोधित होब्या। तू कउनो दुस्मन क ओनका हरावइ देब्या अउर ओनसे धरे जाइ देब्या अउ बहोत दूर या निचके क भुइयाँ में जाइ देब्या। 37किन्तु जब उ पचे आपन बिचार बदलिहीं अउर पछतावा करिहीं अउर तोहसे याचना करिहीं जब कि उ पचे बन्दी बनाए जाइवाले देस में ही अहई। उ पचे कहिहीं, 'हम लोग पाप किहा ह, हम लोग बुरा किहा ह अउ हम लोग दुट्ठता कीन्ह ह।' 38तब उ पचे उ देस में जहाँ उ पचे बन्दी क रूप में अहई, अपने पूरे हिरदइ व आत्मा स



तोहरे लगे लउटिहीं अउर इ देस कइँती जउन तू ओनके पुरखन क दिहा ह, इ नगर कइँती जेका तू चुन्या ह, अउर इ मन्दिर कइँती जउन मई तोहरे नाउँ क महिमा बरे बनाएउँ ह, ओकरे कइँती मुँह कइके पराथना करिहीं। 39 जब अइसा होइ तउ तू सरग स ओकर सुना। सरग तोहार आवास अहइ। ओनकर पराथना अउर याचना क स्वीकार करा अउर ओनकर सहायता करा अउर अपने ओन लोगन क छिमा कइ द्या जउन तोहरे खिलाफ पाप किहन ह। 40 अब, मोरे परमेस्सर, मई तोहसे माँगत हउँ, तू अपनी आँखी अउर कान खोल ल्या। तू हम लोगन क, जउन पराथना इ जगह पइ करत अहइँ ओका सुना अउर ओह पइ धियान द्या।

41 “अब, हे यहोवा परमेस्सर उठा अउर अपने करार क सन्दूख क संग जउन कि तोहार सक्ती क स्थल अहइ आपन बिस्वाम स्थल पइ आवा। तोहार याजक मुक्ती रूपी वस्त्र पहिरा रहइ। हे यहोवा, परमेस्सर तोहार भक्तजन तोहार अच्छाई में आनन्दित होइ।

42 हे यहोवा, परमेस्सर अपने अभिसिक्त राजा क स्वीकार करा। अपने सेवक दाऊद क विस्वासभक्ति क याद राख।”

### मन्दिर यहोवा क अर्पित

7 जब सुलैमान पराथना पूरी किहस तउ अकासे स सागी उतरी अउर उ होमबलि अउर बलियन क बारेस। यहोवा क तेज मन्दिर क भर दिहस। 2 याजक यहोवा क मन्दिर में नहीं जाइ सकत रहेन काहेकि यहोवा क तेज ओका भरि दिहे रहा। 3 इस्त्राएल क सबहि लोग आकासे स आगी क उतरत लखेन। इस्त्राएल क लोग मन्दिर पइ भी यहोवा क तेज क लखेन। उ पचे अपने चेहरे क चबूतरे क फर्स तलक निहुराएन। उ पचे यहोवा क उपासना किहन अउ ओका धन्यवाद दिहन। उ पचे गाएन, “यहोवा भला बा, अउर ओकर दाया सदा रहत ह।”

4 तब राजा सुलैमान अउ इस्त्राएल क सबहि लोग बलि यहोवा क समन्वा चढ़ाएन। 5 राजा सुलैमान बाईस हजार बर्धा अउ एक लाख बीस हजार भेड़िन भेंट किहस। राजा अउ सबहि लोग परमेस्सर क मन्दिर क समर्पित किहसे। 6 याजक आपन कार्य करइ बरे तइयार खड़े रहेन। लेवीबंसी भी यहोवा क वाद्य यंत्र क संग खड़े रहेन। इ सबइ यंत्र राजा दाऊद क जरिये यहोवा क धन्नवाद देइ बरे बनाए गए रहेन। याजक अउ लेवीबंसी कहत रहेन, “यहोवा क स्तुति करा काहेकि ओकर पिरेम हमेसा रहत हीं।” याजकन लेवीबंसियन क दूसरी कइँती खड़े रहेन, तउ याजकन अपनी तुरहियन बजाएन अउर इस्त्राएल क सबहि लोग खड़े रहेन।

7 सुलैमान यहोवा क मन्दिर क समन्वा वाले आँगन क मध्य हींसा क भी पवितर किहस। इ उहइ जगह अहइ जहाँ सुलैमान होमबलि अउर मेलबलि क चर्बी चढ़ाएस। सुलैमान आँगन क बीच क हींसा काम में लिहस काहेकि काँसे क वेदी पइ जेका सुलैमान बनाए रहा, सारी होमबलि, अन्नबलि अउ चर्बी नहीं आइ सकत रही काहेकि भेंटन बहोत जियादा रहिन।

8 सुलैमान अउ इस्त्राएल क सबहि लोग सात दिना तलक दावतन क उत्सव मानएन। सुलैमान क संग लोगन क एक बहोत बड़ा समूह रहा। उ सबइ लोग उत्तर दिसा क हमथ नगर क प्रवेश दुआर अउ दक्खिन क मिस्र क झरनन जइसे सुदूर पहुँचन स आए रहेन। 9 वेदी क पवितर करइ, अउर कुटीर क त्यौहार क सात दिना क उत्सव मनाइ क पाछे, उ पचे अठएँ दिन एक ठु पवितर सभा किहे रहेन। 10 सातवें महीने क तेईसवें दिन सुलैमान लोगन क वापस ओनके घरे पठइ दिहस। लोग बड़े खुस रहेन अउर ओनकर हिरदइ आनन्द स भरा रहा काहेकि यहोवा दाऊद, सुलैमान अउर अपने इस्त्राएल क लोगन क बरे बहोत भला रहा।

### यहोवा सुलैमान क लगे आवत ह

11 सुलैमान यहोवा क मन्दिर अउ राजमहल ज पूरा कइ लिहस। सुलैमान यहोवा क मन्दिर अउर अपने आवास में जउन कछू करइ क योजना बनाए रहा ओहमाँ ओका कामयाबी मिली। 12 तब यहोवा सुलैमान क लगे राति में परगट भवा। यहोवा ओहसे कहेस, “सुलैमान, मई तोहार पराथना सुनेउँ ह अउर मई इ जगह क अपने बरे मन्दिर क रूप में भेंट चढ़ावइ बरे चुनेउँ ह। 13 जब मई अकास क बंद करत हउँ तउ बरखा नहीं होत या मई टिड्डियन क आदेस देत हउँ कि उ सबइ फसल क खाइ जा या अपने लोगन में बेरामी पठवत हउँ, 14 अउर मोरे नाउँ स गोहरावइ जाइवाले लोग जदि बिनम्र होतेन अउर पराथना करत हीं, अउर मोका हेरत हीं अउर अपने बुरे राहन स दूर हट जात हीं तउ मई सरग स ओनकर सुनब अउर मई ओनके पापन क छिमा करब अउर ओनके देस क नीक कइ देब। 15 अब, मोरी आँखिन खुली अहइँ अउर मोरे कान इ जगह पइ कीन्ह गइ पराथना पइ धियान देइहीं। 16 मई इ मन्दिर क चुनेउँ ह अउर मई एका पवितर किहेउँ ह जेहसे मोर नाउँ हिआँ सदा ही रहइ। हाँ, मोर आँखिन अउर मोर हिरदइ इ मन्दिर में सदा रही।

17 “अब सुलैमान, जदि तू मोरे समन्वा वइसे ही रहब्या जइसे तोहार बाप दाऊद रहा, जदि तू ओन सबहि क पालन करब्या जेनके बरे मई आदेस दिहेउँ ह अउर जदि तू मोर बिधियन अउ नेमन क पालन करब्या। 18 तब मई तोहका सक्तीसाली राजा बनाउब अउर तोहार राज महान होइ। इहइ वाचा अहइ जउन मई तोहरे बाप दाऊद स कीन्ह अहइ। मई ओहसे काहे रहेउँ, ‘दाऊद, तू अपने परिवार में एक ठु अइसा मनई सदा पउब्या जउन इस्त्राएल में राजा होइ।’

19 “किन्तु जदि तू मोरे नेमन अउर आदेसन क नहीं मनब्या जेनका मई दिहेउँ ह अउर तू दूसर देवतन क पूजा अउर सेवा करब्या, अउर ओकर समन्वा निहुरब्या, 20 तब मई इस्त्राएल क लोगन क अपने उ देस स बाहेर करब जेका मई ओनका दिहेउँ ह। अउर मई इ मन्दिर क जेका मई आपन नाउँ बरे पवितर बनाएउँ ह अस्वीकार कइ देब। मई इ मन्दिर क सबहि रास्ट्रन बरे मजाक अउर सम्मानहीन बनाइ देब। 21 हर एक मनई जउन एकर पास स गुजरी इ प्रतिष्ठित मन्दिर देखिके चकित होइ जाई। उ पचे कहिहीं, ‘यहोवा अइसा भयंकर काम इ देस अउ इ मन्दिर क संग

काहे किहस?’ 22तब लोग जवाब देईहीं, ‘काहेकि इस्राएल क लोगन यहोवा, परमेस्सर जेकरी आग्या क पालन ओनके पुरखन करत रहेन, ओकरी आग्या क पालन करइ स इन्कार कइ दिहस। उ ही परमेस्सर अहइ जउन ओनका मिस्र क बाहेर लइ आवा। किन्तु इस्राएल क लोग दूसर देवतन क अपनाएस। उ पचे मूर्ति रूप में देवतन क पूजा अउर सेवा किहस। इहइ कारण अहइ कि यहोवा इस्राएल क लोगन पइ ऐतना सब भयंकर घटित कराएस ह।”

### सुलैमान क बसाए नगर

8 यहोवा क मन्दिर क बनावइ अउर आपन महल बनावइ में सुलैमान क बीस बरिस लागेन। 2तब सुलैमान फुन ओन नगरन क बनाएस जउन हूराम ओका दिहस अउर सुलैमान इस्राएल क कछू लोगन क ओन नगरन में रहइ क आग्या दइ दिहस। 3एकरे पाछे सुलैमान सोबा क हमात क गवा अउर ओह पइ अधिकार कइ लिहस। 4सुलैमान रेगिस्ताने में तदमोर नगर भी बनाएस। उ चिजियन क संग्रह क बरे हमात में सबहिं नगर बनाएस। 5सुलैमान ऊँच बेशेरोन अउ निम्म बेरोथोन क नगरन क फुन बनाएस। उ ओन नगरन क सक्तीसाली गढ़ बनाएस। ओन नगरन क मजबूत देवारन अउर फाटकन रहेन अउर फाटकन में छड़न लगे रहेन। 6सुलैमान बालात नगर क फुन बनाएस अउर दूसर नगरन क भी जहाँ उ चिजियन क संग्रह किहस। उ सबहिं नगरन क बनाएस जहाँ रथ रखे गए रहेन तथा जहाँ सबहिं नगरन में घुड़सवार रहत रहेन। सुलैमान यरूसलेम, लबानोन अउर ओन सबहिं प्रदेशन क जहाँ उ राजा रहा, जउन चाहेन बनाएस।

7-8जहाँ इस्राएल क लोग रहत रहेन हुवाँ बहोत स अजनबी बचे रहि गए रहेन। उ पचे हिती, एमोरी, परिब्जी, हिब्वी अउर यबूषी लोग रहेन। सुलैमान ओन अजनबियन क दास-मजदूर होइ बरे मजबूर किहस। उ सबइ लोग इस्राएल क लोगन में स नाहीं रहेन। उ सबइ लोग ओनकर संतान रहेन जउन देस में बचे रहि गए रहेन अउर तब तलक इस्राएल क लोगन क जरिये नस्ट नाहीं कीन्ह गए रहेन। इ अब तलक चलत अहइ। 9सुलैमान इस्राएल क कउनो भी मनई क दास मजदूर बनावइ क मजबूर नाहीं किहस। उ पचे ओकर जोधन, फउज क सेनापतियन, ओकर फउज क मुख्य अधिकारियन, ओकर रथन क सेनापतियन अउर सारथियन क सेनापति रहेन। 10अउर इस्राएल क कछू लोग सुलैमान क महत्त्वपूर्ण अधिकारियन क प्रमुख रहेन। लोगन क निरीच्छण करइवाले ढाई सौ प्रमुखन रहेन।

11सुलैमान दाऊद क नगर स फिरौन क बिटिया क उ महल में लिआवा जेका उ ओकरे खातिर बनाए रहा। सुलैमान कहेस, “मोर मेहरारू राजा दाऊद क महल में नाहीं रहि सकत काहेकि जउने जगहन पइ करार क सन्दूख रहा होइ, उ सबइ जगह पवितर अहई।”

12तब सुलैमान यहोवा क होमबलि यहोवा क वेदी पइ चढ़ाएस। सुलैमान उ वेदी क मन्दिर क ओसारे क समन्वा बनाएस। 13सुलैमान हर एक दिन मूसा क आदेस क अनुसार बलि चढ़ाएस। इ बलि सबित क क दिन नवचन्द्र उत्सव क

अउर तीन वार्षिक पर्वन क दीन्ह जाइ क रही। इ सबइ तीन वार्षिक पर्व अखमीरी रोटी क पर्व सप्ताहन क पर्व अउर आस्रय क पर्व रहेन। 14सुलैमान अपने बाप दाऊद क निर्देसन क पालन किहस। सुलैमान याजकन क वर्ग हुवाँ सेवा करइ बरे चुनेस। सुलैमान लेवीबंसियन क भी ओनके कार्य क बरे चुनेस। लेवीबंसियन परार्थना में अगुवाइ करत रही अउर मन्दिर में जउन कछू रोज रोज कीन्ह जाब होत रहा ओनमाँ याजकन क मदद करत रहा। सुलैमान दुआर पालन क चुनेस जेनके समूहन हर दुआर पइ सेवा करब रही। परमेस्सर क मनई दाऊद क निर्देसन क अनुसार इ सबइ काम कीन्ह गवा रहेन। 15इस्राएल क लोग सुलैमान क जरिये याजकन अउर लेवीबंसियन क दीन्ह गए निर्देसन क न बदलेस, नाहीं ओनकर उल्लंघन किहस। उ पचे कउनो भी निर्देस में वइसे भी परिवर्तन नाहीं किहन जइसे उ पचे कीमती चिजियन क रखइ में करत रहेन।

16सुलैमान क सबहिं कारज पूरे होइ गएन। यहोवा क मन्दिर क आरम्भ होइ स ओकर पूरे होइ क दिन तलक योजना ठीक बनी रही। इ तरह यहोवा क मन्दिर पूरा भवा।

17तब सुलैमान एष्योनगेबेर अउर एलोट नगरन क गवा। उ पचे नगर एदोम प्रदेश में लाल सागर क किनारा में बसा रहेन। 18हूराम सुलैमान क जहाज पठएस। हूराम क उ मनइयन जउन समुदर में जहाज चलाई में कुसल रहेन जहाज क चलावत रहेन। हूराम क मनई सुलैमान क सेवकन क संग ओपीर गएन अउर सत्रह टन सोना लइके राजा सुलैमान क लगे लउटेन।

### सीबा क राही सुलैमान क हिआँ आवत ह

9 सीबा क रानी सुलैमान क जस सुनेस। उ यरूसलेम में कठिन सवालन स सुलैमान क परिच्छा लेइ आइ। सीबा क रानी अपने संग एक लोगन क बड़ा समूह लइके आइ रही। ओकरे पास ऊँट रहेन जेन पइ मसालन, बहोत जिआदा सोना अउ कीमती पाथर लदे रहेन। उ सुलैमान क लगे आइ अउर उ सुलैमान स बातन किहस। ओका सुलैमान स अनेक सवाल पूछब रहेन। 2सुलैमान ओकरे सबहिं सवालन क उत्तर दिहस। सुलैमान क बरे व्याख्या करइ या जवाब देइ बरे कछू भी बहोत कठिन नाहीं रहा। 3सीबा क रानी सुलैमान क बुद्धिमानी अउ ओकर बनाए महल क लखेस। 4उ भोजन क निरिच्छन किहस जउन सुलैमान क मेज पई परोसा जात रहा। उ लखेन कि अधीकारियन अउर नउकर कइसा कार्य करत अहई अउर उ पचे कइसा वस्त्र पहिरे रखे अहई, उ लखेस कि ओकर दाखरस पिआवइवाले सेवक कइसे कार्य करत अहई अउर उ पचे कइसे वस्त्र पहिर रखे अहई। उ यहोवा क मन्दिर क ओर जात भवा जुल्स क लखेस। जब सीबा क रानी एन सबहिं चिजियन क लखेस तउ माना कि ओकर मुँह क बोली बन्द होइ गवा। 5तब उ राजा सुलैमान स कहेस, “मई अपने देस में तोहरे महान कार्यन अउर तोहार बुद्धिमानी क बारे में जउन कहानी सुनेउँ ह। उ सबइ सच अहइ! 6ओका एन कहानियन पइ तब तलक बिस्सास नाहीं होत रहा जब तलक मई आई नाहीं अउर अपनी आँखिन स लखेउँ नाहीं।

ओह! तोहरी बुद्धिमानी क आधा भी मोहसे नहीं कहा गवा रहा। जउन कछु मई सुनेउँ तू उ सबइ स जियादा महान अहइ। 7तोहार मेहरुअन अउर तोहार अधिकारी बहोत भाग्यसाली अहई। उ पचे तोहार गियान क बातन तोहार सेवा करत भए सुन सकत हीं। 8तोहरे परमेस्सर यहोवा क बड़कई होइ। उ तोह पइ खुस अहइ अउर उ तोहका अपने सिंहासन पइ, परमेस्सर यहोवा बरे, राजा बनई क बइठाएस ह। तोहार परमेस्सर इस्त्राएल स पिरेम करत ह अउर इस्त्राएल क मदद सदा ही करत रही। इहइ कारण अहइ कि यहोवा तोहका इस्त्राएल क राजा बनाएस ह कि तू निआव अउर धार्मिकता क बनाए राख।”

9तब सीबा क रानी राजा सुलैमान क 4,140 किलोग्राम सोना, बहोत स मसाला अउर कीमती पाथर दिहस। कउनो एताना नीक मसाला राजा सुलैमान क नहीं दिहस जेतना नीक रानी सीबा दिहस।

10हूराम क नउकर अउर सुलैमान क नउकर ओपीर स सोना लइ आएन। उ पचे चन्दन क काठ अउर बहुमुल्य रत्न पाथर भी लइ आएन। 11राजा सुलैमान यहोवा क मन्दिर अउर महल क सीढियन क बरे चन्दन क काठे क उपयोग किहस। सुलैमान चन्दन क काठे क उपयोग गायकन क बरे वीणा अउर तम्बूरा बनावइ क बरे भी किहस। यहूदा देस में चन्दन क काठे स बनी ओन जइसी सुन्नर चिजियन कउनो कवहुँ लखे नहीं रहा।

12जउन कछु भी सीबा देस क रानी राजा सुलैमान स माँगस, ओका उ दिहस। जउन उ दिहस, उ ओहसे जियादा रहा जउन उ राजा सुलैमान बरे लिआइ रहीं। ओकरे पाछे उ अपने सेवक अउर सेविकाओं क संग बिदा भइ। उ अपने देस लउट गइ।

### सुलैमान क खूब धनदौलत

13एक बरिस में सुलैमान जेतना सोना पाएस, ओकर वजन पचीस टन रहा। 14बड़पारी अउर सौदागर सुलैमान क लगे अउर जिआदा सोना लाएन। अरब क सबहिं राजा अउर प्रदेशन क सासक भी सुलैमान क बरे सोना चाँदी लाएन। 15राजा सुलैमान सोने क पत्तर क दुइ सौ बरा ढारन बनाएस। लगभग छः सौ सेकेल पीटा सोना हर एक ढार क बनावइ में उपयोग में आवा। 16सुलैमान तीन सौ नान्ह ढारन भी सोने क पत्तर क बनाएस। लगभग तीन सौ सेकेल सोना हर एक ढार क बनावइ में उपयोग में आवा रहा। राजा सुलैमान सोना क ढारन क “लबानोन क बन महल” में रखेस।

17राजा सुलैमान एक बिसाल सिंहासन बनावइ क बरे हाथी दाँत क उपयोग किहस। उ सिंहासने क निखालिस सोना स मढ़ेस। 18सिंहासने पइ चढ़इ क छः सीढियन रहिन अउर एकर एक टु पद पीठ रहा। उ सोने क बना रहा। सिंहासने में दुइनउँ कइँती भुजन क आराम देइ क बरे बाजू लगी एक-एक सेर क मूर्ती खड़ी रही। 19हवों छः सीढियन स लगे बगल में बारह सेरन क मूर्तियन खड़ी रहिन। हर सीढी क हर कइँती एक सेर रहा। इ तरह क सिंहासन कउनो दूसर राज में नहीं बना रहा। 20राजा सुलैमान क

सबहिं पिअइ क पियालन सोना क बने रहेन। लबानोन वन महल क सबहिं हर रोज क चिजियन निखालिस सोना क बनी रहिन। सुलैमान क समइ में चाँदी कीमती नहीं समुझी जात रही। 21राजा सुलैमान क लगे जहाज रहेन जउन तसीस क जात रहेन। हूराम क आदमी सुलैमान क जहाजन क चलावत रहेन। हर तीसरे बरीस जहाज तसीस स सोना, चाँदी, हाथी-दाँत, बनार अउर मोर लइके सुलैमान क लगे लउटन रहेन।

22राजा सुलैमान धन अउर बुद्धि दुइनउँ में संसार क कउनो भी राजा स बड़ा होइ गवा। 23संसार क सारे राजा सुलैमान क लखइ बरे आइतेन अउर ओकरे बुद्धिमानी क सब्दन जउन परमेस्सर ओका दिहस ह सुनतेन। 24हर बरिस उ पचे राजा सुलैमान क भेंट लिआवत रहेन। उ पचे चाँदी सोना क चिजियन, ओढ़ना, कवच, मसालन, घोड़न अउर खच्चर लिआवत रहेन।

25सुलैमान क लगे ओकर घोड़न अउर रथन क रखइ बरे चार हजार अस्तबल रहेन। ओकरे लगे बारह हजार सारथी रहेन। सुलैमान ओनका आपन रथन क नगरन में रखत रहा अउर कछु क यरूसलेम में अपने लगे रखत रहा। 26सुलैमान फरात नदी स लगातार पलिस्ती लोगन क देस तलक अउर मिस्त्र क सीमा तलक क राजा लोगन क सम्राट रहा। 27राजा सुलैमान क लगे बहोत स चाँदी क पाथर समान्य पाथर जइसा अउर बहोत सारा देवदार काठ क पहाड़ी देस में गूलर क बृच्छन जइसा रहेन। 28लोग सुलैमान क बरे मिस्त्र अउर दूसर सबहिं देसन स घोड़न लिआवत रहेन।

### सुलैमान क मउत

29सुरू स लइके अन्त तलक सुलैमान अउर जउन कछु किहस उ नातान नबी क लेखन, सीलो क अहिय्याह क भविस्सबाणियन अउर इहो दर्सी क दर्सनन में अहइ। इहो एक दर्सी रहा जउन नबात क पूत यारोबाम क बारे में भविस्सबाणी किहस। 30सुलैमान यरूसलेम में पूरे इस्त्राएल क राजा चालीस बरिस तलक रहा। 31तब सुलैमान अपने पुरखन क संग बिस्त्राम करइ गवा। लोगन ओका ओकरे बाप दाऊद क नगर में दफनाएन। सुलैमान क पूत रहूबियाम सुलैमान क जगह नवा राजा भवा।

### रहूबियाम बेवकूपी क काम करत ह

10 रहूबियाम सकेम नगर क गवा काहेकि इस्त्राएल क सबहिं लोग ओका राजा बनावइ बरे हुवई गएन। 2नाबात क पूत यारोबाम मिस्त्र में रहा काहेकि उ राजा सुलैमान क हिआँ स पराइ गवा रहा। किन्तु यारोबाम सुनेस कि सुलैमान मरि गवा अउर रहूबियाम नवा राजा होइ जात अहइ। एह बरे यारोबाम मिस्त्र स लउट आवा। 3इस्त्राएल क लोग यारोबाम क अपने संग रहइ क बरे बोलाएस। तब यारोबाम अउर इस्त्राएल क सबहिं लोग रहूबियाम क हिआँ गएन। उ पचे ओहसे कहेन, “रहूबियाम, 4तोहरे बिना हम लोगन क जिन्नगी क कस्टकर बनाएस। उ भारी वजन लइ

चलइ क नाई रहा। उ वजन क हल्का करा तउ हम तोहार सेव करब।”

5रहूबियाम ओनसे कहेस, “तीन दिन पाछे लउटिके मोरे लगे आवा।” एह बरे लोग चले गएन।

6तब राजा रहूबियाम ओन बुजुर्ग लोगन स बातन किहस जउने पहिले ओकरे बाप क सेवा किहे रहेन। रहूबियाम ओनसे कहेस, “आप एन लोगन स का कहइ बरे सलाह देत ही?” 7बुजुर्ग रहूबियाम स कहेन, “जदि तू ओन लोग क बरे दयालु अहा अउर ओनका खुस करत अहा अउ ओहसे नीक बातन कहत अहा तउ उ पचे तोहार सेवा सदा ही करिहीं।”

8मुला रहूबियाम बुजुर्गन क दीन्ह सलाह क अंगीकार नाहीं किहस। रहूबियाम ओन जुवकन स बात किहस जउन ओकरे संग जुवा रहेन अउर ओकर सेवा करत रहेन। 9रहूबियाम ओनसे कहेस, “तू लोग का सलाह देत अहा जेका मई ओन लोगन स कहउ? उ पचे मोहसे अपने काम क हल्का करइ क कहे ह अउर उ पचे चाहत ही कि मई अपने बाप क जरिये ओन पइ डाले गए वजन क कछू कम करउँ।”

10तब ओन जुवकन जउन रहूबियाम क संग जुवा भए रहेन, ओहसे कहेन, “जउन लोगन तोहसे बातन किहन ओनसे तू इ कहा। लोगन तोहसे कहेन, ‘तोहार बाप हमरी जिन्गी क कस्टकर बनाएन रहेन। इ भारी वजन लइ चलइ क नाई रहा। मुला हम चाहित ह कि तू हम लोगन क वजन क कछू हल्का करा।’ किन्तु रहूबियाम, तोहका इ इहइ ओन लोगन स कहइ चाही। ओनसे कहा, ‘मोर नान्ह अँगरी भी मोरे बाप क करिहाउँ स मोटी होइ। 11मोर बाप तोह पइ भारे बोझा लादेन। मुला मई उ बोझा क बढ़ाउव। मोर बाप तोहका कोड़ा लगावइ क सजा दिहे रहेन। मई अइसे कोड़ा लगावइ क सजा देब जेकरे छोर पइ तेज धातु क टूका अहई।”

12राजा रहूबियाम लोगन स कहे रहा: “तीसरे दिन लउटिके आवा।” एह बरे तीसरे दिन यारोबाम अउ सब इस्त्राएली जनता राजा रहूबियाम क लगे आएन। 13तब राजा रहूबियाम ओनसे कठोरता स बातन किहस। राजा रहूबियाम बुजुर्ग लोगन क सलाह न मानेस। 14राजा रहूबियाम लोगन स वइसे ही बात किहस जइसे जुवकन सलाह दिहे रहेन। उ कहेस, “मोर बाप तोहरे बोझ क भारी किहे रहा, किन्तु मई ओका अउर जिआदा भारी करब। मोर बाप तोह पइ कोड़न लगावइ क सजा दिहे रहेन, किन्तु मई अइसे कोड़न लगावइ क सजा देब जेनकर छोर तेज धातु क टूकन होइहीं।” 15इ तरह राजा रहूबियाम लोगन क एक न सुनेन। एकर कारण इ रहा कि उ परमेस्सर रहा जउन इ किहेस ह। यहोवा आपन बचन क पूरा करइ चाहत ह जउन उ सीलो क अहिय्याह क जरिये नबात क पूत यारोबाम स किहे रहा।

16इस्त्राएल क लोग लखेन कि राजा रहूबियाम ओनकर एक नाहीं सुनत। उ पचे राजा स कहेन, “का हम दाऊद क पखिरे क अंग अही? नाहीं! का हम क यिसै क कउनो भुईया मिलइ क अहइ? नाहीं! एह बरे इस्त्राएलियन क हम लोगन क सिबिर में वापिस जाइ द्या। दाऊद क पूत क

ओकरे अपने लोगन पइ हुकूमत करइ देई।” तब इस्त्राएल क सबहिं लोग अपने सिबिरन में लउटि गएन। 17किन्तु इस्त्राएल क कछू अइसे लोग रहेन जउन यहूदा नगर में रहत रहेन अउर रहूबियाम ओनकर राजा रहा।

18हदोराम काम करइ क बरे मजबूर कीन्ह जाइवाले लोगन क अधीच्छक रहा। रहूबियाम ओका इस्त्राएल क लोगन क लगे पठाएस। किन्तु इस्त्राएल क लोग हदोराम पइ पाथर लोकाएन अउर ओका मार डारएन। तब रहूबियाम भागा अउर अपने रथ में कूद पड़ा अउ बच निकरा। उ पराइके यरूसलेम गवा। 19उ समइ स लइके अब तलक इस्त्राएली दाऊद क परिवार क खिलाफ होइ गएन ह।

**1** जब रहूबियाम यरूसलेम आवा, उ एक लाख अस्सी हजार सर्वोत्तम जोधन क बटोरेस। उ एन जोधन क यहूदा अउ बिन्यामीम क परिवार समूहन स बटोरेस। उ एनका इस्त्राएल क खिलाफ लइइ बरे तइयार किहेस जेहसे उ राज क रहूबियाम क वापस लउटाइ सकइ। 2किन्तु यहोवा क सँदिस समायाह क लगे आवा। समायाह परमेस्सर क मनई रहा। यहोवा कहेस, 3“समायाह यहूदा क राजा, सुलैमान क पूत रहूबियाम स बातन करा अउर यहूदा अउ बिन्यामीन में रहइवाले सबहिं इस्त्राएल क लोगन स बातन करा। 4ओनसे कहा, यहोवा इ कहत ह: ‘तोहका अपने भाइयन क खिलाफ नाहीं लइइ चाही। हर एक मनई अपने घर लउटि जाइ। मई ही अइसा होइ दिहेउँ ह।” एह बरे राजा रहूबियाम अउर ओकर फउज यहोवा क सँदिस मानेस अउर उ पचे लउटि गएन। उ पचे यारोबाम पइ हमला नाहीं किहन।

### रहूबियाम यहोवा क सक्तीसाली बनावत ह

5रहूबियाम यरूसलेम में रहइ लाग। उ हमलन क खिलाफ रच्छा बरे यहूदा में सुदृढ़ नगर बनाएस। 6उ बेतलेहेम, एताम, तकोआ, 7बेत्सूर, सोको, अदुल्लाम, 8गत, मारेसा, जीप, 9अदौरैम, लाकीस, अजेका, 10सोरा, अय्यालोन, अउर हेब्रोन नगरन क मरम्मत कराएस। यहूदा अउ बिन्यामीन में इ सबइ नगर मजबूत बनाए गएन। 11जब रहूबियाम ओन नगरन क मजबूत बनाइ लिहस तउ ओनमाँ सेनापति रखेस। उ ओन नगरन में भोजन, तेल अउर दाखरस क पूर्ति क व्यवस्था किहस। 12रहूबियाम ढार अउ भालन भी हर एक नगर में रखेस अउर ओनका बहोत सक्तीसाली बनाएस। रहूबियाम यहूदा अउ बिन्यामीन क लोगन अउर नगरन क अपने अधिकार में रखेस।

13पूरे इस्त्राएल क याजक अउ लेवीबंसी रहूबियाम स सहमत रहेन अउर उ पचे ओकरे संग होइ गएन। 14लेवी बंसियन अपनी घासवाली भुइयाँ अउर आपन खेत छोड़ दिहन अउर उ पचे यहूदा अउ यरूसलेम आइ गएन। लेवीबंसियन इ एह बरे किहेन कि यारोबाम अउर ओकर पूतन ओनका यहोवा क याजक क रूप में सेवा करावइ क अनुमति देइ स इन्कार कइ दिहस। 15यारोबाम अपने ही याजकन क हुवाँ ऊँची जगहन पइ सेवा करइ बरे नियुक्त किहस जहाँ उ बोकनन अउ बछवन क ओन मूरतियन क स्थापना किहस जेनका उ बनाए रहा। 16जब लेवीबंसियन इस्त्राएल क तजि

दिहन तब इस्त्राएल क परिवार समूह क उ सबइ लोग जउन इस्त्राएल क यहोवा परमेस्सर क बरे बिस्सास जोगग रहेन, यरूसलेम में यहोवा, अपने बापन क परमेस्सर क बलि चढ़ावइ आपन। 17ओन लोग यहूदा क राज क सक्तीसाली बनाएस अउर उ पचे सुलैमान क पूत रहूबियाम क तीन बरिस तलक समर्थन दिहन। उ पचे अइसा करत रहेन काहेकि इ समइ में उ पचे वइसे रहत रहेन जइसे दाऊद अउ सुलैमान रतह रहेन।

### रहूबियाम क परिवार

18रहूबियाम महलत स बियाह किहेस। ओकर बाप यरीमोत रहा। ओकर महतारी अबीहैल रही। यरीमोत दाऊद क पूत रहा। अबीहैल एलीआब क बिटिया रही अउर एलीआब यिसै क पूत रहा। 19महलत स रहूबियाम क इ सबइ पूत पइदा भएन: यूस, समर्याह अउर जाहम। 20तब रहूबियाम माका स बियाह किहेस। माका अबसलोम क पोती रही अउर माका स रहूबियाम क इ सबइ बच्चन भएन: अबिय्याह, अते, जीजा अउर सलोमीत। 21रहूबियाम माका स सबहिं दूसर मेहररुअन अउ दासियन स जियादा पिरेम करत रहा। माका अबसालोम क पोती रही। रहूबियाम क अट्टारह मेहररुअन अउ साठ रखैल रहिन। रहूबियाम अट्टाईस पूतन अउ साठ बिटियन क बाप रहा।

22रहूबियाम अपने भाइयन में माका क पूत अबिय्याह क प्रमुख चुनेस। रहूबियाम इ एह बरे किहेस काहेकि उ अबिय्याह क राजा बनावइ क योजना बनाएस। 23रहूबियाम इ बुद्धिमानी क काम अपने पूतन क यहूदा अउर बिन्यामीन क पूरा प्रान्तन में अउर हर एक सक्तीसाली नगर में फैइलाइ कइ क किहेस। उ अपने पूतन क बहोत जियादा भोजन दिहेस अउर ओकरे बरे मेहररुअन क खोज किहेस।

### मिस्री राजा सीसक क यरूसलेम पइ हमला

12 रहूबियाम एक सक्तीसाली राजा होइ गवा। अपने राज क सक्तीसाली बनाइ क पाछे उ अउ यहूदा क सबहिं लोग यहोवा क नेम क पालन करइ क बन्द कइ दिहन। 2रहूबियाम क राजकाल क पाँचवे बरिस सीसक यरूसलेम पइ हमला किहेस। सीसक मिस्र क राजा रहा। इ एह बरे भवा कि रहूबियाम अउ यहूदा क लोग यहोवा क बरे निष्ठावान नाहीं रहेन। 3सीसक क लगे एक हजार दुई सौ रथ, साठ हजार घुड़सवार, अउर एक फउज रही जेका कउनो गन नाहीं सकत रहा। सीसक क फउज में लूबी, सुक्किथ्यी अउर कूसी फउजी रहेन। 4सीसक यहूदा क सक्तीसाली नगरन क पराजित कइ दिहेस। तब सीसक अपनी फउज क यरूसलेम लिआवा।

5तब समायाह नबी रहूबियाम अउ यहूदा क प्रमुखन क लगे आवा। यहूदा क उ सबइ प्रमुख यरूसलेम में बटुरे रहेन काहेकि उ पचे सबहिं सीसक स ससान रहेन। समायाह रहूबियाम अउ यहूदा क प्रमुखन स कहेस, “यहोवा जउन कहत ह, उ इ अहइ: ‘रहूबियाम, तू अउर यहूदा क लोग मोका तजि दिहा ह अउर मोरे नेमन क पालन करइ स

इन्कार कइ दिहा ह। एह बरे मई तोहका अपनी मदद क बिना सीसक क सामना करइ क छोड़बा।” 6तब यहूदा क प्रमुखन अउर राजा रहूबियाम पछतावा करत भए अपने क विनम्र किहेस अउर कहेस, “यहोवा नियावी अहइ।”

7यहोवा लखेस कि राजा अउर यहूदा क प्रमुखन अपने आप क विनम्र बनाएन ह। तब तहोवा क सँदिसा समायाह क लगे आवा। यहोवा समायाह स कहेस, “राजा अउर लोग अपने क विनम्र किहेन ह, एह बरे मई ओनका नस्त नाहीं करब बल्कि मई ओनका हाली ही बचाउब। मई सीसक क उपयोग यरूसलेम पइ आपन क्रोध उतारइ क बरे नहीं करब। 8किन्तु यरूसलेम क लोग सीसक क सेवक होइ जइहीं। इ होई एह बरे कि उ पचे सीख सकई कि मोर सेवा करब दूसर रास्ट्रन क राजा लोगन क सेवा करइ स अलग अहइ।”

9मिस्र क राजा सीसक यरूसलेम पइ हमला किहेस अउर यहोवा क मन्दिर में जउन खजाना रहेन, ओका लइ गवा। अउर उ उ सबइ खजाने क भी लइ लिहेस जउन राजा क महल में रहेन। उ सोने क ढारन क भी लिहेस जेनका सुलैमान बनाए रहा। 10राजा रहूबियाम सोने क ढारन क जगह पइ काँसे क ढारन बनाएस। रहूबियाम ओन सेनापतियन क जउन राजमहल क दुआरन क रच्छा क जिम्मेदार रहेन, काँसे क ढारन दिहेस। 11जब राजा यहोवा क मन्दिर में जात तहा तउ रच्छक काँसे क ढारन बाहेर निकारत रहेन। ओकरे पाछे उ पचे काँचे क ढारन क रच्छक घर में वापस रखत रहेन।

12जब रहूबियाम पछतावा किहेने अउर अपने क विनम्र कइ लिहेस तउ यहोवा अपने क्रोध क ओह पइ रोकि दिहेस। एह बरे यहोवा रहूबियाम क पूरी तरह नस्त नाहीं किहेस। यहूदा में कछू अच्छाई बची रही।

13राजा रहूबियाम यरूसलेम में अपने क सुदृढ़ राजा बनाइ लिहेस। उ उ समइ इकतालीस बरिस क रहा, जब राजा बना। रहूबियाम यरूसलेम में सत्रह बरिस तलक राजा रहा। यरूसलेम उ नगर रहा जेका यहोवा इस्त्राएल क सारे परिवार समूह में स चुने रहा। यहोवा यरूसलेम क अपने नाउँ स्थापित करइ बरे चुनेस। रहूबियाम क महतारी नामा रही। जउन कि अम्मोन देस क रही। 14रहूबियाम बुरी चिजियन किहेस काहेकि उ यहोवा क आग्या क पालन करइ बरे अपने हिरदइ में निहचइ नहीं किह रहेन।

15सबइ चिजियन जउन रहूबियाम आपन हुकूमत में सुरू स आखीर तलक किहेस उ नबी समायाह अउर सीर (दर्सी) इदो क किताब में लिखा गवा ह। उ पचे परिवारिक इतिहास क बारे में अउर यहूबियाम अउ यहूबियाम अउ यहोबाम जब तलक हुकुमत किहेने ओकर बीच होइवाले जुद्ध क बारे में लिखेन। 16रहूबियाम अपने पुरखन क संग बिस्त्राम किहेस। रहूबियाम क दाऊद नगर में दफनावा गवा। रहूबियाम क पूत अबिय्याह नवा राजा भवा।

### यहूदा क राजा

13 जब राजा यारोबाम इस्त्राएल क राजा क रूप में अट्टारहवें बरिस में रहा अबिय्याह यहूदा क नवा

राजा बना। 2अबिव्याह यरूसलेम में तीन बरिस तलक राजा रहा। गिबा नगर क ऊरीएल क बिटिया, मीकायाह अबिव्याह क महतारी रही। अउर हुवाँ अबिव्याह अउर यारोबाम क बीच जुद्ध चलत रहा। 3अबियाह क फउज में चार लाख वीर सैनिक रहेन। अबियाह जुद्ध बरे आपन फउज में गएन। यारोबाम अबिव्याह क खिलाफ जुद्ध बरे तइयारी किहस। ओकरे लगे आठ लाख वीर सैनिक रहेन।

4तब अबिव्याह एप्रैम क पर्वतीय पहेँटा में समारैम पर्वत पइ खड़ा भवा। अबिव्याह कहेस, “यारोबाम अउर सारे इस्राएल मोर बात सुना। 5तू लोगन क जानइ चाही कि यहोवा, इस्राएल क परमेस्सर दाऊद अउर ओकरी सन्तानन क इस्राएल सासन करइ क अधिकार दिहस ह। यहोवा दाऊद क इ अधिकार सास्वत करार क संग दिहस। 6किन्तु यारोबाम अपने सुआमी क खिलाफ होइ गवा। यारोबाम जउन नबात क पूत रहा, दाऊद क पूत सुलैमान क अधिकारियन में स एक रहा। 7तब निकम्मे, बुरे मनइयन यारोबाम क मीत होइ गएन अउर यारोबाम अउर उ सबइ बुरे मनइयन सुलैमान क पूत रहूबियाम क खिलाफ होइ गएन। रहूबियाम जुवक रहा अउर ओका अनुभव नाहीं रहा। एह बरे रहूबियाम यारोबाम अउर ओकरे बुरे मीतन क रोकने न सका।

8“तू लोग परमेस्सर क राज, जउन दाऊद क पूतन क जरिये सासित अहइ, हरावइ क योजना बनाया ह। तू लोगन क गनती बहोत अहइ अउर यारोबाम क तोहरे बरे बनावा गवा सोने क बछवा तोहार इस्सर अहइ। 9तू लोग हारून क संतानन यहोवा क याजकन अउ लेवीबंसियन क बाहेर फेंकि दिहस ह। तू पचे पृथ्वी क दूसर देसन क समान अपने याजकन क चुन्या ह। तब तउ कउनो भी मनई जउन एक जुवक बर्घा अउर सात ठु भेड़न लिआवइ, ओन ‘अइसन देवतन क जउन परमेस्सर ह ही नाहीं’ क सेवा करइवाला याजक बन सकत ह।

10“किन्तु जहाँ तलक हमार बात अहइ यहोवा हमार परमेस्सर अहइ। हम यहूदा क निवासी लोग यहोवा क आग्या पालन स इन्कार किहा नाहीं ह। हम लोग ओका तजा नाहीं ह। जउन याजक यहोवा क सेवा करत हीं, उ पचे हारून क सन्तान अहइँ अउर लेवीबंसी यहोवा क सेवा करइ मैं याजकन क मदद करत हीं। 11उ पचे होमबलि चढ़ावत हीं अउर धूपे क सुगन्धि यहोवा क हर भिंसारे साँझि बारत हीं। उ पचे मन्दिर में बिसेस मेज पइ रोटियन कतारन में रखत भी अहइँ अउर उ पचे सोना क डीबट पइ रखे भए दीपकन क देख भाल करत हीं ताकि हर साँझि क उ प्रकास क संग चलइ। हम लोग यहोवा, अपने परमेस्सर क सेवा सावधानी क संग करित ह। किन्तु तू लोग ओका तजि दिहा ह। 12खुद परमेस्सर हम लोगन क संग अहइ। उ हमार सासक अहइ अउर ओकर याजक हमरे संग अहइँ। परमेस्सर क याजक आपन तुरही तोहका जगावइ अउर तोहका ओकरे लगे आवइ क उत्साहित करइ क बरे फूँकत हीं। ऐ इस्राएल क लोगो, अपने पुरखन क यहोवा, परमेस्सर क खिलाफ जिन लड़ा। काहेकि तू कामयाब नाहीं होव्या।”

13किन्तु यारोबाम फउजियन क एक टुकड़ी क चुपके चुपके गुप्त रूप स अबिव्याह क फउज क पाछे पठएस, इ तरह स जब यारोबाम क फउज अबिव्याह क फउज क समन्वा रही तब यारोबाम क फउज क गुप्त फउजी अबिव्याह क फउज क पाछे रही। 14जब अबिव्याह क यहूदा क फउजियन चारिहुँ कइँती लखेन तउ उ पचे यारोबाम क फउज क आगे अउर पाछे स हमला करत पाएन। तउ यहूदा क लोग यहोवा क जोर स गोहराएन अउर याजकन तुरहियन बजाएन। 15तब अबिव्याह क फउज क लोग चिचियाएस। जब यहूदा क लोग चिचियाएस तउ परमेस्सर यारोबाम क फउज के हराइ दिहस। यारोबाम क इस्राएल क सारी फउज क अबिव्याह क यहूदा क फउज क जरिये हराइ दीन्ह गइ। 16इस्राएल क लोग यहूदा क लोगन क समन्वा भाग पराइ गएन। परमेस्सर यहूदा क फउज क जरिये इस्राएल क फउज क हरावइ दिहस। 17अबिव्याह क फउज इस्राएल क फउज क बुरी तरह हराएस अउर इस्राएल क पाँच लाख उत्तिम फउज मारे गएन। 18इ तरह उ समइ इस्राएल क लोग पराजित अउर यहूदा क लोग बिजयी भएन। यहूदा क फउज बिजयी भइ काहेकि उ अपने पुरखन क परमेस्सर, यहोवा पइ निर्भर रही।

19अबियाह क फउज यारोबाम क फउज क पाछा किहस। अबियाह क फउज यारोबाम स बेतेल, यसाना अउ एपोन नगरन पइ कब्जा कइ लिहस। उ पचे ओन नगरन अउर ओनके आस पास क नान्ह गाँवन पइ अधिकार कइ लिहस।

20यारोबाम जियादा सक्तीसाली फुन कबहुँ नाहीं भवा जब तलक अबिव्याह जिअत रहा। यहोवा यारोबाम क मार डाएस। 21किन्तु अबिव्याह सक्तीसाली होइ गवा। उ चौदह मेहररुअन स बियाह किहस अउर उ बाईस पूतन अउ सोरह बिटियन क बाप रहा। 22दूसर जउन कछू अबिव्याह किहस, उ इद्दो नबी क किताबन में लिखा अहइ।

**14** अबिव्याह अपने पुरखन क संग बिस्त्राम किहस। लोगन ओका दाऊद नगर में दफनाएन। तब अबिव्याह क पूत आसा अबिव्याह क जगह पइ नवा राजा भवा। आसा क समइ मैं देस मैं दस बरिस सान्ति रही।

### यहूदा क राजा आसा

2आसा उहइ काम किहस जउन यहोवा ओकर परमेस्सर क समन्वा अच्छा अउ ठीक रहा। 3आसा ओन विचित्र वेदियन क हटाइ दिहस जेनकर उपयोग मूरतियन क पूजा क बरे होत रहा। आसा ऊँच जगहन क हटाइ दिहस अउर पवित्र पाथरन क बर्बाद कइ दिहस अउर आसा असेरा खम्भन क तोर डाएस। 4आसा यहूदा क लोगन क ओनकइ पुरखन क यहोवा परमेस्सर क अनुसरण करइ क आदेस दिहस। अउ आसा लोगन क यहोवा क नेमन अउ आदेसन क पालन करइ क आदेस दिहस। 5आसा ऊँची जगहन क अउर सुगन्धि क वेदियन क यहूदा क सबहिँ नगरन स हटाएस। इ तरह जब आसा राजा रहा, राज सान्ति रहा। 6आसा यहूदा मैं सान्ति क समइ सक्तीसाली नगर बनाएस।

आसा एन दिनन जुद्ध स मुक्त रहा काहेकि यहोवा ओका सान्ति दिहस।

7आसा यहूदा क लोगन स कहेस, “हम पचन क नगरन क निर्माण अउ एनके चारिहूँ कइँती चरहदीवार बनावइ द्या। हम गुम्बद, दुआर अउ दुआसन मँ छड़न लगावइँ। हम पचन क तब तलक करइ द्या जब तलक इ देस हमार अहइ। इ हमार देस अहइ काहेकि हम लोग अपने यहोवा क अनुसरण किहा ह। उ हम लोगन क सब कइँती स सान्ति दिहस ह।” एह बरे उ पचे इ सबइ बनाएस अउर उ पचे सफल भएन।

8आसा क लगे यहूदा क परिवार समूह स तीन लाख अउर बिन्यामीन क परिवार समूह स दुइ लाख अस्सी हजार फउज रही। यहूदा क मनइयन बड़ी ढारन अउर भालन लइके चलत रहेन। बिन्यामीन क मनइयन नान्ह ढारन अउ धनुस स चलइवाले बाण लइ चलत रहेन। उ पचे सबहि बलवान अउर साहसी जोधा रहेन।

9जब जेरह आसा क फउज क खिलाफ आवा। जेरह कूस द रहा। जेरह क फउज मँ दस लाख मनई अउर तीन सौ रथ रहेन। जेरह क फउज मारेसा नगर तलक गइ। 10आसा जेरह क खिलाफ लइइ बरे गवा। आसा क फउज मारेस क निअरे सापता घाटी मँ जुद्ध क बरे तइयार भइ।

11आसा यहोवा परमेस्सर क गोहराएस अउर कहेस, “यहोवा, तू केवल तू ही बलवान लोगन क खिलाफ कमजोर लोगन क मदद कइ सकत ह। हे मोर यहोवा परमेस्सर हमार मदद करा। हम तोह पइ निर्भर अही। हम तोहरे नाउँ पइ इ बिसाल फउज स जुद्ध करित ह। हे यहोवा, तू हमार परमेस्सर अहा। अपने खिलाफ कउनो क जीतइ न द्या।”

12तब यहोवा यहूदा कइँती स आसा क फउज क उपयोग कूस क फउज क पराजित करइ बरे किहस अउर कूस क फउज भाग खड़ी भइ। 13आसा क फउज कूस क फउज क लगातार गारार नगर तलक पाछा किहस। एतने जियादा कूस क लोग मारे गएन कि उ पचे जुद्ध करइ बरे एक फउज क रूप मँ फुन बटुर न सकइँ। उ पचे यहोवा अउ ओकरी फउज क जरिये कुचर दीन्ह गएन। आसा अउर ओकर फउज दुस्मन स बहोत सारी लूट क माल लइ लिहन। 14आसा अउर ओकर फउज गारार क नजिक क सबहि नगरन क हराएस। ओन नगरन मँ रहइवाले लोग यहोवा स डरात रहेन। ओन नगरन मँ अनगिनत कीमती चिजियन रहिन। आसा क फउज ओन नगरन स एन कीमती चिजियन क संग लइ आइ। 15आसा क फउज ओन डेरन पइ भी हमला किहस जेनमों गइरियन रहत रहेन। उ पचे अनेक भेड़िन अउ ऊँट लूट लिहेन अउर ओनका लइ गएन। तब आसा क फउज यरूसलेम लउटि गइ।

### आसा क परिवर्तन

**15** परमेस्सर क आत्मा आदेद क पूत अजर्याह पइ उतरी। 2अजर्याह आसा स भेंटइ गवा। अजर्याह कहेस, “आसा अउ यहूदा अउ बिन्यामीन क सबहि लोग मोर सुनइँ। यहोवा तोहरे संग तब अहइ जब तू ओकरे संग

अहा। जदि तू यहोवा क हेरब्या तउ तू ओका पउब्या। किन्तु जदि तू ओका छोड़ब्या तउ उ तोहका तजि देइ। 3बहोत समइ तलक इस्त्राएल बिना सच्चे परमेस्सर क, सिच्छा देइ वाला बिना याजक क अउ बिना नेम क रहेन। 4किन्तु जब इस्त्राएल क लोग कस्ट मँ पइइँ तउ उ पचे फुन इस्त्राएल क यहोवा परमेस्सर कइँती लउटइ। उ पचे यहोवा क हेरेन अउ ओका पाएन। 5ओन बिपति क दिनन मँ कउनो मनई सुरच्छित जात्रा नाहीं कइ सकत रहा। सबहि रास्ट्र बहोत जियादा उपद्रव ग्रस्त रहेन। 6एक रास्ट्र दूसरे रास्ट्र क अउर एक नगर दूसरे नगर क नस्ट करत रहा। इ एह बरे होत रहा कि परमेस्सर हर तरह क बिपतियन स ओनका परेसान करत रहा। 7किन्तु आसा, तू अउर यहूदा अउ बिन्यामीन क लोगो, सक्तीसाली बना। कमजोर न पड़ा, ढीले न पड़ा काहेकि तोहका पचनक अपने नीक काम क पुरस्कार मिली।”

8आसा जब एन बातन अउर ओदेद नबी क संदेसा क सुनेस, तउ उ बहोत उत्साहित भवा। तब उ सारे यहूदा अउ बिन्यामीन छेत्र स घिनौनी मूरतियन क हटाइ दिहस अउर उ एप्रैम क पहाड़ी देस मँ अपने अधिकार मँ लाए गए नगरन मँ मूरतियन क हटाएस अउर उ यहोवा क उ वेदी क मरम्मत किहस जउन यहोवा क मन्दिर क ओसारे क समन्वा रही।

9तब आसा यहूदा अउ बिन्यामीन क सबहि लोगन क बटोरेस। उ एप्रैम, मनस्से अउर सिमोन परिवारन क भी बटोरेस जउन इस्त्राएल देस स यहूदा देस मँ रहइ बरे आइ ग रहेन। ओनकर बड़ी गनती यहूदा मँ आइ काहेकि उ पचे लखेन कि आसा क यहोवा परमेस्सर, आसा क संग अहइ।

10आसा क हुकूमत क पन्द्रहवें बरिस क तीसरे महीने मँ आसा अउर उ सबइ लोग यरूसलेम मँ बटुरेन। 11उ समइ उ पचे यहोवा क सात सौ बर्धन अउ सात हजार भेड़िन अउ बोकसन क बलि दिहन। आसा क फउज ओन जनावरन अउर दूसर कीमती चिजियन क अपने दुस्मनन स लिहे रहा। 12तब उ पचे आपन पुरखन क यहोवा परमेस्सर क सेवा पूरे हिरदइ अउर आपन पूरी जान स करइ क एक करार अउर वाचा मँ किहन। 13कउनो मनई जउन यहोवा परमेस्सर क सेवा स इन्कार करत रहा, मार दीन्ह जात रहा। इ बात क कउनो महत्व नाहीं रहा कि उ मनई महत्वपूर्ण या साधारण अहइ या मनसेधू या मेहरारु अहइ। 14तब आसा अउ लोगन यहोवा क किरिया लिहन। उ पचे ऊँची अवाज मँ उद्घोस किहन। उ पचे तुरही अउ भेड़न क सींग बजाएन। 15यहूदा स सबहि लोग खुस रहेन काहेकि उ पचे पूरे हिरदइ स किरिया खाए रहेन। उ पचे पूरे हिरदइ स यहोवा क अनुसरण किहन अउ यहोवा क खोज किहन अउर ओका पाएन। एह बरे यहोवा यहोवा ओनके पूरे देस मँ सान्ति दिहस।

16राजा आसा अपनी महतारी आका क राजमाता क पद स हटाइ दिहस। आसा इ एह बरे किहस काहेकि माका असेरा क सम्मान देइ बरे एक भयंकर खम्भा खड़ा किहे रहा। आसा इ खम्भा क काट दिहस अउर एका नान्ह नान्ह टूकन मँ तहस नहस कइ दिहस। तब उ ओन नान्ह टूकन

क किद्रोन घाटी में बार दिहस। 17ऊँच जगहन क यहूदा स नाहीं हटावा गवा, किन्तु आसा क हिरदइ जिन्गी भइ यहोवा क बरे स्रद्धालु रहा।

18आसा ओन पवित्र भेंटन यहोवा क मन्दिर में लिआएस जेनका ओकर बाप राखस रहेन। उ सबइ चिजियन चाँदी अउ सोना क बनी रहिन। 19आसा क हुकूमत क पैतीस बरिस तलक कउनो जुद्ध नाहीं भवा।

### आसा क आखिरी बरिसन

**16** आसा क राजकाल क छतीसवें बरिस बासा यहूदा क भुइँया पइ हमला किहस। बासा इस्राएल क राजा रहा। उ रामा नगर गवा अउर एका लोगन क राजा आसा क लगे जावइ अउ आवइ स रोकइ बरे किला बनाइ दिहस।

2आसाने यहोवा क मन्दिर क कोसागार में रखे भए चाँदी अउर सोना क लिहस अउर उ राजमहल स चाँदी सोना लिहस। तब आसा बेन्हदद क सँदेसा पठएस। बेन्हदद अराम क राजा रहा अउर दमिस्क में रहत रहा। आसा क सँदेसा रहा: 3“बेन्हदद, मोरे अउर अपने बीच एक तु सन्धि होइ द्या। इ सन्धि क वइसे ही होइ द्या जइसा उ हमरे बाप अउर तोहरे बाप क बीच कीन्ह गइ रही। धियान द्या, मई तोहरे लगे चाँदी सोना पठवत हउँ। अब तू इस्राएल क राजा बासा क संग कीन्ह गइ सन्धि क तोड़ द्या जेहसे उ मोका अजाद छोड़ देब्या अउर मोका परेसान करब बन्द कइ देब्या।”

4बेन्हदद आसा क बात मान लिहस। बेन्हदद आपन फउजे क सेनापतियन क इस्राएल क नगरन पइ हमला करइ क बरे पठएस। एन सेनापतियन इय्योन, दान अउर आबेलमैम नगरन पइ हमला किहस। उ पचे नप्ताली देस में ओन सबहिँ नगरन पइ हमला किहस जहाँ खजाने रखे रहेन। 5बासा इस्राएल क नगरन पइ हमला क बात सुनेस। एह बरे उ रामा में किला बनावइ क काम रोक दिहस अउर आपन काम छोड़ दिहस। 6तब राजा आसा यहूदा क सबहिँ लोगन क बटोरेस। उ पचे रामा नगर क गएन अउर काठ अउ पाथर उठाइ लाएन जेनकर उपयोग बासा किला बनावइ बरे किहे रहा। आसा अउर यहूदा क लोग पाथरन अउ काठे क उपयोग गोवा अउ मिस्या नगरन क जियादा मजबूत बनावइ बरे किहस।

7उ समइ द्रस्टा हनानी यहूदा क राजा आसा क लगे आवा। हनानी ओहसे कहेस, “आसा, तू मदद क बरे अराम क राजा पइ आस्रित रहया, किन्तु तू यहोवा आपन परमेस्सर पइ मदद बरे आस्रित नाहीं रहया। एह बरे अराम क राजा क फउज तोहसे पराइ निकरी। 8कूस अउ लुबी बहोत बिसाल अउ सक्तीसाली फउज रखत रहेन। “ओकरे लगे अनेक रथ अउ सारथी रहेन। किन्तु आसा, तू उ बिसाल सक्तीसाली फउज क हरावइ में मदद क बरे यहोवा पइ आस्रित भए अउर यहोवा तोहका ओनका हरावइ दिहस। 9यहोवा क आँखिन सारी पृथ्वी पइ ओन लोगन क लखत फिरत हीँ जउन ओकरे बरे स्रद्धालु अहईँ जेहसे उ ओन लोगन क सक्तीसाली बनाइ सकइ। आसा, तू बेवकूफी क

काम किहा। एह बरे अब स लइके आगे तलक तोहका जुद्ध क सामना करइ क पड़ी।”

10आसा हनानी पइ उ बात स कोहाइ गवा जउन उ कहेस। आसा एँतना किरोध स पागल होइ उठा कि उ हनानी क बन्दीघरे में डाइ दिहस। आसा उ समइ कछू लोगन पइ अत्याचार भी करत रहा।

11आसा जउन कछू सुरु स आखीर तलक किहस। उ इस्राएल अउर “यहूदा क राजा लोगन क इतिहास” क पुस्तक में लिखा अहइ। 12आसा क गोड़ ओकरे राजकाल क उन्तालीसवें बरिस में रोगी होइ गवा। ओकरे रोग बहोत बुरा रहा किन्तु उ यहोवा स मदद नाहीं चाहेस। आसा वैद्यन स मदद चाहेस। 13आसा अपने राजकाल क इकतालीसवें बरिस में मरा अउर इ प्रकार आसा अपने पुरखन क संग बिस्त्राम किहस। 14लोग आसा क ओकरी कब्र में दफनाएन जेका खुद दाऊद क नगर में बनाए रहा। लोग ओका एक आखिरी चारपाई पइ रखेन जेह पइ सुगन्धित द्रव्य अउर अलग अलग तरह क मिले इत्र रखे रहेन। लोग आसा क सम्मान करइ क आगी क महाज्वाला किहन।

### यहूदा क राजा यहोसापात

**17** आसा क जगह पइ यहोसापात यहूदा क नवा राजा भवा। यहोसापात आसा क पूत रहा। यहोसापात यहूदा क सक्तीसाली बनाएस जेहसे उ पचे इस्राएल क खिलाफ लड़ सकत रहेन। 2उ फउजे क टुकड़ियन क यहूदा सबहिँ किलाबन्द नगरन में रखेस। यहोसापात फउजे क टुकड़ियन क यहूदा अउ एप्रैम क ओन नगरन में राखेस जेनका ओकर बाप आसा अपने अधिकार में किहे रहेन।

3यहोवा यहोसापात क संग रहा काहेकि पहिले क बरिसन में उ उ सबइ नीक काम किहेस जेनका ओकर पुरखा दाऊद किहे रहा। यहोसापात बाल क मूरतियन क अनुसरण नाहीं किहस। 4यहोसापात उ परमेस्सर क हेरेस जेकर अनुसरण ओकरे पुरखन करत रहेन। उ परमेस्सर क आदेसन क पालन किहेस। उ उ तरह नाहीं रहा जइसा इस्राएल क दूसर लोग रहत रहेन। 5यहोवा यहोसापात क यहूदा क सक्तीसाली राजा बनाएस। यहूदा क सबहिँ लोग यहोसापात क भेंट लिआएन। इ तरह यहोसापात क लगे बहोत स सम्पत्ति अउ सम्मान दुइनउँ रहेन। 6यहोसापात यहोवा क मारग पइ चलेस अउ ओका ओन पइ गर्व रहा। उ ऊँच जगहियन अउ असेरा क खम्भन क यहूदा देस स बाहेर किहस।

7यहोसापात अपने प्रमुखन क यहूदा क नगरन में सिच्छा देइ क बरे पठएस। इ यहोसापात क राजकाल क तीसरे बरिस भवा। उ पचे बेन्हैल, ओबद्याह, जकर्याह, नतनेल अउर मीकायाह रहेन। 8उ लेवीबंसी क ओनकर संग पठइ दिहेस। उ सबइ समाया, नतन्याह, असाहेल, समीरामोत, यहोनातान, अदोनियाह अउर तोबियाह रहेन। यहोसापात याजक एलीसामा अउर यहोराम रहेन। 9ओन प्रमुखन, लेवीबंसियन अउ याजकन यहूदा में लोगन क सिच्छा दिहन। ओनके लगे, “यहोवा क नेमन क किताब” रही। उ पचे



यहूदा क सबहिं नगरन में गएन अउर लोगन क उ पचे सिच्छा दिहन।

10 यहूदा क आस-पास क रास्ट्रन यहोवा स डेरात रहेन। इहइ कारण रहा कि उ पचे यहोसापात क खिलाफ जुद्ध नाहीं छेडेन। 11 कछू पलिस्ती लोग यहोसापात क लगे भेंट लिआएन। उ पचे यहोसापात क लगे चाँदी लिआएन काहेकि उ पचे जानत रहेन कि उ बहोत सक्तीसाली राजा अहइ। कछू अरब क लोग यहोसापात क लगे रेवड़न लिआएन। उ पचे ओकरे लगे सात हजार सात सौ भेड़िन अउर सात हजार सात सौ बोकरियन लिआएन।

12 यहोसापात जियादा स जियादा सक्तीसाली होत गवा। उ यहूदा देस में किलन अउर मज़बूत नगर बनाएन। 13 यहोसापात क लगे बहोत स कलाकार अउर मजदूर रहेन जउन ओकरे बरे ओन नगरन में काम करत रहेन। उ यरूसलेम में प्रसिच्छित सैनिक रखेन। 14 ओन फउजियन क अपने परिवार समूह में गनती रही। यरूसलेम क ओन फउजियन क सूची इ अहइ:

यहूदा क परिवार समूह स इ सेनाध्यच्छ रहेन: अदना तीन लाख फउजियन क सेनाध्यच्छ रहा। 15 यहोनानान दुइ लाख अस्सी हजार फउजियन क सेनाध्यच्छ रहा। 16 अमस्याह दुइ लाख फउजियन क सेनाध्यच्छ रहा। अमस्याह जिक्री क पूत रहा। अमस्याह अपने क यहोवा क सेवा में अर्पित करइ में खुस रहा।

17 बिन्यामीन क परिवार समूह स इ सेनाध्यच्छ रहेन: एल्यादा क लगे दुइ लाख फउजी रहेन जउन धनुस, बाण अउर ढाल क उपयोग करत रहेन। एल्यादा एक साहसी फउजी रहा। 18 यहोनाबाद क लगे एक लाख अस्सी हजार मनई जुद्ध बरे तइयार रहेन। 19 उ सबइ सबहिं फउजी यहोसापात क सेवा करत रहेन। राजा पूरे यहूदा देस क किलन में दूसर मनइयन क भी रखे रहा।

### मीकायाह राजा अहाब क चिताउनी देत ह

18 यहोसापात क लगे सम्पत्ति अउ सम्मान रहा। उ राजा अहाब क संग बियाह क जरिये एक तु सन्धि किहस। 2 कछू बरिस पाछे, यहोसापात सोमरोन नगर में अहाब स भेंटइ गवा। अहाब बहोत स भेड़िन अउर गोरुअन क बलि यहोसापात अउ ओकरे संग क मनइयन क बरे चढ़ाएस। अहाब यहोसापात क गिलाद क रामोद नगर पइ हमला बरे प्रोत्साहित किहस। 3 अहाब यहोसापात स कहेस, “का तू मोरे संग गिलाद क रामोत पइ हमला करइ चलब्या?” अहाब इस्राएल क अउर यहोसापात यहूदा क राजा रहा। यहोसापात अहाब क जवाब दिहस, “मई तोहरि तरह हउँ अउर हमरे लोग तोहरे लोगन क तरह अहइँ। हम जुद्ध में तोहार साथ देब।” 4 यहोसापात अहाब स इ कहेस, “आवा, पहिले हम यहोवा स सँदेसा प्राप्त करी।”

5 एह बरे अहाब चार सौ नबियन क बटोरेस। अहाब ओनसे कहेस, “का हम क गिलाद क रामोत नगर क बिरुद्ध जुद्ध में जाइ चाही या नाहीं?” नबियन अहाब क उत्तर दिहन, “जा, काहेकि यहोवा गिलाद क रामोत क तोहका पराजित करइ देइ।”

6 किन्तु यहोसापात कहेस, “का कउनो हिआँ यहोवा क नबी अहइ? हम लोग ओकरे नबियन में स एक क जरिये यहोवा स पूछइ चाहित ह।”

7 तब राजा अहाब यहोसापात स कहेस, “हिआँ हमार लगे सिरिफ एक मनई अहइ। हम ओकरे माध्यम स यहोवा क पूछ सकित ह। किन्तु मई इ मनई स घिना करत हउँ काहेकि इ कबहुँ मोका यहोवा स कउनो अच्छा सँदेसा नाहीं दिहस। इ सदा ही बुरा सँदेसा मोरे बरे दिहस ह। इ आदमी क नाउँ मीकायाह अहइ। जउन कि यिम्ला क पूत अहइ।” किन्तु यहोसापात कहेस, “अहाब, तोहका अइसा नाहीं कहइ चाही।”

8 तब इस्राएल क राजा अहाब अपने अधिकारियन में स एक क बोलाएस अउ कहेस, “हाली करा, यिम्ला क पूत मीकायाह क हिआँ लिआवा।”

9 इस्राएल क राजा अहाब अउ यहूदा क राजा यहोसापात अपने राजसी ओढ़ना पहिर रखे रहेन। उ पचे अपने सिंहासनन पइ खरिहान में सोमरोन नगर क सम्मुख दुआरे क निचके बइठे रहेन। उ सबइ चार सौ नबी आपन सँदेसा दुइनउँ राजा लोगन क समन्वा देत रहेन। 10 कनान क पूत सिदकिय्याह लोहा क कछू सींगन बनाएस। सिदकिय्याह कहेस, “इहइ अहइ जउन यहोवा कहत ह: ‘तू लोग लोहे क सींगन क उपयोग तब तलक अस्सूर क लोगन में घोंपइ क बरे करब्या जब तलक उ पचे नस्ट न होइ जाई।’”

11 सबहिं नबियन इहइ बात कहेन। उ पचे कहेन, “गिलाद क रामोत नगर क जा। तू लोग सफल होब्या अउर जितब्या। यहोवा राजा अउ अस्सूर क लोगन क हरावइ देइ।”

12 जउन दूत मीकायाह क लिआवइ गवा रहा उ ओहसे कहेस, “मीकायाह, मोका, सबहिं नबी एक ही बात कहत रहत हीं। उ पचे कहत रहत हीं कि राजा क कामयाबी मिली। एह बरे उहइ कहा जउन उ पचे कहत रहत हीं। तू भी अच्छी बात कहा।”

13 किन्तु मीकायाह जवाब दिहेस, “यहोवा क जिन्नगी क किरिया मई उहइ कहब जउन मोर परमेस्सर कहत ह।”

14 तब मीकायाह राजा अहाब क लगे आवा। राजा ओहसे कहेस, “मीकायाह, का हम क जुद्ध करइ बरे गिलाद क रामोत नगर क जाइ चाही या नाहीं?” मीकायाह कहेस, “जा अउर हमला करा। यहोवा तोहका ओन लोगन क हरावइ देइ।”

15 राजा अहाब मीकायाह स कहेस, “कइउ दाई मई तोहसे प्रतिग्या करवाई रही कि तू यहोवा क नाउँ पइ मोका सिरिफ फुरइ बतावा।”

16 तब मीकायाह कहेस, “मई इस्राएल क सबहिं लोगन क पहाड़न पइ बिखेर भए लखेउँ। उ पचे गइरियन क बिना भेड़ी क नाई रहेन। यहोवा कहेस, ‘ओनकर कउनो नेता नाहीं अहइ। हर एक मनई क ओकरे घरे में सुरच्छित लउटइ द्या।’”

17 इस्राएल क राजा अहाब यहोसापात स कहेस, “मई कहे रहेउँ कि मीकायाह मोरे बरे यहोवा स बढ़िया सँदेसा नाहीं पाइ। उ मोरे बरे सिरिफ बुरे सँदेसा रखत ह।”

18मीकायाह कहेस, “यहोवा क सँदेसा सुना: मई यहोवा क अपने सिंहासने पड़ बड़ठे लखेउँ। सरग क पूरी फउज ओकरे चारिहूँ कईती खड़ी रही। कछू ओकरे दाहिन कईती अउर कछू ओकरे बाई कईती। 19यहोवा कहेस, ‘इस्त्राएल क राजा अहाब क कउन बहकाएस? जेहसे उ गिलाद क रामोत नगर पड़ हमला करब अउर उ हुवाँ मार दीन्ह देब?’ यहोवा क चारिहूँ कईती खड़े अलग अलग अतिमा अलग अलग मस्वरा दिहल। 20तब एक आतिमा आइ अउर उ यहोवा क समन्वा खड़ी भइ। उ आतिमा कहेस, ‘मई अहाब क धोखा देब। यहोवा आतिमा स पूछेस, ‘कइसे?’ 21उ आतिमा जवाब दिहस, ‘मइ बाहेर जाब अउर अहाब क नबियन क मुँह में झूठ बोलइवाली आतिमा बनब’ अउर यहोवा कहेस, ‘तोहका अहाब क धोखा देइ मैं कामयाबी मिली। एह बरे जा अउर एका करा।’

22“अहाब, अब धियान द्या, यहोवा तोहरे नबियन’ क मुँह में झूठ बोलइवाली आतिमा प्रवेस कराएस ह। यहोवा कहेस ह कि तोहरे संग बुरा घटी।”

23तब सिदकिय्याह मीकायाह क लगे गवा अउर ओकरे मुँह पड़ मारेस। कनना क पूत सिदकिय्याह कहेस, “मीकायाह, यहोवा क आतिमा मोका तजिके तोहसे बातचीत करइ कइसे आइ?” 24मीकायाह जवाब दिहस, “सिदकिय्याह, तू उ दिन एका जनब्या जब तू एक भीतरी घरे में छुपइ जाब्या।”

25तब राजा अहाब कहेस, “मीकायाह क ल्या अउर एँका नगर क प्रसासक आमोन अउ राजा क पूत योआस क लगे पठइ द्या। 26आमोन अउ योआस स कहा, ‘राजा इ कहत हीं: मीकायाह क बन्दीघरे में डाइ द्या। ओका सेटी अउ पानी क अलावा तब तलक कछू खाइ क जिन द्या जब तलक मई जुद्ध स सुरच्छित न लउटउँ।”

27मीकायाह जवाब दिहस, “अहाब, जदि तू जुद्ध स सुरच्छित लउटि आवत ह तउ यहोवा मोरे जरिये नाहीं कहेस ह। तू सबहि लोग सुना अउर मोरे बचन क याद रखा।”

### अहाब गिलाद क रामोद में मारा गवा

28एह बरे इस्त्राएल क राजा अहाब अउ यहूदा क राजा यहोसापात गिलाद क रामोत नगर पड़ हमला किहस। 29इस्त्राएल क राजा अहाब यहोसापात स कहेस, “मई जुद्ध में जाइ क पहिले आपन रुप बदल देब। किन्तु तू अपना राजवस्त्र ही पहिरा।” एह बरे इस्त्राएल क राजा अहाब अपना रुप बदल दिहस अउर दुइनउँ राजा जुद्ध में गएन।

30अराम क राजा अपने रथन क रथपतियन क आदेस दिहस। उ ओनसे कहेस, “कउनो भी मनइ स चाहे उ बड़ा फउज होइ या छोट फउज होइ ओहसे जुद्ध जिन करा। किन्तु सिरिफ इस्त्राएल क राजा अहाब स जुद्ध करा।” 31जब रथपतियन यहोसापात क लखेन उ पचे सोचेन, “उहइ इस्त्राएल क राजा अहाब अहइ।” उ पचे यहोसापात पड़ हमला करइ क बरे ओकरी कईती मुडेन। किन्तु यहोसापात उदघोस किहस अउर यहोवा ओकर मदद किहस। परमेस्सर रथपतियन क यहोसापात क समन्वा स दूर मुड़ जाइ दिहस। 32जब उ पचे समुझेन कि यहोसापात इस्त्राएल क राजा नाहीं अहइ उ पचे ओकर पाछा करब छोड़ दिहल।

33किन्तु एक फउजी स बिना कउनो लच्छ बेध क धनुस स बाण छूट गएन। उ बाण इस्त्राएल क राजा अहाब क बेध दिहस। इ, अहाब क कवच क खुले आग में बेधेस। अहाब अपने रथे क सारथी स कहेस, “पाछे मुड़ा अउर मोहसे जुद्ध स बाहेर लइ चला। मई घायल होइ गवा अहउँ।” 34उ दिन जुद्ध घमासान होइ गवा। इस्त्राएल क राजा आपन रथ में अरामियन क सामना करत भए साँझ तलक अपने क सँभारे रखेस। तब अहाब सूरज बूड़ाइ पड़ मर गवा।

19 यहूदा क राजा यहोसापात सुरच्छित यरूसलेम अपने घरे लउटा। 2दूस्टा येहू यहोसापात स भेंटइ गवा। येहू क बाप क नाउँ हनानी रहा। येहू राजा यहोसापात स कहेस, “तू बुरे मनइयन क मदद काहे करत ह? तू ओन लोगन स काहे पिरैम करत ह जउन यहोवा स घिना करत हीं? इहइ कारण अहइ कि यहोवा तोह पड़ कोहान अहइ। 3किन्तु तोहरी जिन्नगी में कछू अच्छी बातन अहइ। तू असेरा खम्भन क इ देस स बाहेर किहा अउर तू हिरदइ स परमेस्सर क अनुसरण करइ क निहिचय किहा।”

### यहोसापात निआवाधीसन क चुनत ह

4यहोसापात यरूसलेम में रहत रहा। उ लोगन स संग मिलइ बरे फुन एप्रैम क पहाड़ी पहुँटा स बेर्सेबा नगर तलक गएन। यहोसापात ओन लोगन क उ यहोवा परमेस्सर क लगे लउटाएस जेकर अनुसरण ओनकर पुरखन करत रहेन। 5यहोसापात यहूदा में निआवाधीस चुनेस। उ यहूदा क हर किला नगर में रहइ क बरे निआवाधीस चुनेस। 6यहोसापात एन निआवाधीसन स कहेस, “जउन कछू तू करा ओहमों सावधान रहा काहेकि तू, लोगन क बरे निआव नाहीं करत रह्या मुला यहोवा बरे करत अहा। जब तू निर्णय करब्या तब यहोवा तोहरे संग होइ। 7तोहमों स हर एक क अब यहोवा स डेराइ चाही। जउन करा ओहमों सावधान रहा काहेकि हमार यहोवा परमेस्सर निआवी बाटइ। उ कउनो मनई क दूसर मनई स जियादा महत्त्वपूर्ण मानिके बेउहार नाहीं करत। उ अपने निर्णय क बदलइ क बरे धन नाहीं लेत।”

8अउर यहोसापात यरूसलेम में, लेवीबंसियन, याजकन अउर इस्त्राएल क परिवार क प्रमुखन क निआवाधीस चुनेस। ओन लोगन क यहोवा क नेमन क उपयोग यरूसलेम क लोगन क समस्यन क निपटावइ बरे करब रहा। 9यहोसापात ओनका आदेस दिहस अउ कहेस, “तोहका अपने पूरे हिरदइ स निस्तावान पुर्वक सेवा करइ चाही। तोहका यहोवा स जरूर डेराइ चाही। 10तोहरे लगे हत्या, परमेस्सर क नेम में हिंसा, आदेस, सासन या कउनो दूसर नेमन क मामले आइ सकत हीं। इ सबइ सबहि मामले नगरन में रहइवाले तोहरे भाइयन दुआरा तोहार समन्वा आइहीं। एन सबहि मामलन में तोहका लोगन क इ बात क चितउनी देइ चाही कि उ तोहार निर्देसन क जरूर मानिहीं अन्यथा उ परमेस्सर क समन्वा दोखी होइ अउर ओकर किरोध ओन पड़, तोह पड़ अउर तोहार भाइयन क ऊपर उतरिहीं। इ करा तब तू अपराधी नाहीं होब्या। 11अमर्याह मार्गदर्सक याजक अहइ। उ

यहोवा क सम्बन्ध क सबहिं बातन में तोहरे ऊपर होइ। इस्माएल क पूत जबद्याह राजा क सबहिं बातन क अधिकारी होइ। जबद्याह यहूदा क परिवार समूह में प्रमुख अहइ। लेवीबंसी अधिकारियन क रूप में भी तोहार सहायता करिहीं। जउन कछू करा ओहमों साहस रखा। यहोवा ओन लोगन क संग होइ, जउन उहइ करत हीं जउन ठीक अहइ।”

### यहोसापात जुद्ध क सामना करत ह

**20** कछू समइ पाछे मोआबी, अम्मोनी अउर कछू मूनी लोग यहोसापात क संग जुद्ध करइ आएन। 2कछू लोग आएन अउर उ पचे यहोसापात स कहेस, “तोहरे खिलाफ एदोम स, मृत-सागर क दूसर कईंती स एक ठु बिसाल फउज आवति अहइ। उ पचे हसासोन्तामार में पहिले स ही अहई।” (हसासोन्तामार क एनगदी भी कहा जात ह।) 3यहोसापात डर गवा अउर उ यहोवा स इ पूछइ क निहचइ किहेस कि ओका का करइ चाही? उ यहूदा में हर एक क बरे उपवास क समइ घोसित किहस। 4यहूदा क लोग एक संग यहोवा स मदद माँगइ आएन। उ पचे यहूदा क सबहिं नगरन स यहोवा क मदद माँगइ आएन।

5यहोसापात यहोवा क मन्दिर में नवे अंगना क समन्वा रहा। य यरूसलेम अउ यहूदा स आए लोगन क सभा में खड़ा भवा। 6उ कहेस,

“हे हमरे पुरखन क यहोवा परमेस्सर, तू सरग में परमेस्सर अहा। तू सबइ देसन क सबइ राज्जन पइ हुकूमत करत ह। तोहार लगे सक्ती अउ ताकत अहइ! कउनो मनई तोहरे बिरूद्ध खड़ा नाहीं होइ सकत। 7तू हमार परमेस्सर अहा। तू इ भुईया में रहइवालन क एका तजइ क मजबूर किहा। इ तू अपने इस्त्राएली लोगन क समन्वा किहा। तू इ भुईया तू आपन मीत इब्राहीम क संतानन क सदा ही क बरे दइ दिहा। 8इब्राहीम क संतान इ देस में रहत रहेन अउर उ पचे एक ठु मन्दिर तोहरे नाउँ पइ बनाएन।” 9उ पचे कहेन, “जदि हम लोगन पइ बिपद आइ जइसे तरवार, दण्ड, रोग या अकाल तउ हम इ मन्दिर क समन्वा अउर तोहरे समन्वा खड़े होब। इ मन्दिर पइ तोहार नाउँ अहइ। जब हम लोगन पइ बिपति आइ तउ हम लोग तोहका गोहराउब। तब तू हमरी सुनब्या अउर हमार रच्छा करब्या।”

10“मुला इ समइ हिआँ अम्मोन, मोआब अउर सेईर पर्वत क लोग चढ़ आएन ह। तू इस्त्राएल क लोगन क उ समइ ओनकी भुईया में नाहीं जाइ दिहा जब उ पचे मिस्त्र स बाहेर आएन। एह बरे इस्त्राएल क लोग मुड़ गए रहेन अउर ओन लोग ओनका नस्ट नाहीं किहेन। 11मुला लखा कि उ सबइ लोग हम क ओनका नस्ट न करइ क कउनो तरह क पुरस्कार देत अहई। उ पचे हम क तोहरी भुईया स बाहेर होइ बरे मजबूत करइ आए अहई। इ भुईया तू हम क दिहा ह। 12हे हमार परमेस्सर, ओन लोगन क दण्ड देइ। हम लोग उ बिसाल फउज क खिलाफ कउनो सक्ती नाहीं रखतेन जउन हमरे खिलाफ आवति अहइ। हम नाहीं जानित कि का करी। इहइ कारण अहइ कि हम तोहार मदद बरे लखिही!”

13यहूदा क सबहिं लोग यहोवा क समन्वा अपने गदेलन, मेहररुअन अउ बच्चन क संग खड़े रहेन। 14तब यहोवा क आतिमा यहजीएल पइ उतरी। यहजीएल जकर्याह क पूत रहा बनायाह यीएल क पूत रहा अउर यीएल मत्न्याह क पूत रहा। यहजीएल एक लेवीबंसी रहा अउर आसाप क संतान रहा। 15उ सभा क बीच यहजीएल कहेस, “हे राजा यहोसापात अउ यहूदा अउ यरूसलेम में रहइवाले लोगो, मोर सुना। यहोवा तोहसे इ कहत ह: ‘इ बिसाल फउज स न तउ डरा, न ही चिन्ता करा काहेकि इ तोहार जुद्ध नाहीं अहइ। इ परमेस्सर इ जुद्ध अहइ। 16भियान तू हुवाँ जा अउर ओन लोगन स लड़ा। उ पचे सीस क दर् स होइके अइहीं। तू लोग ओनका घाटी क आखिर में यरूसलेम रेगिस्तान क दूसरि कईंती पउब्या। 17इ जुद्ध में तोहका लड़ब नाहीं पड़ी। अपने जगहन पइ मजबूती स खड़ा रहा। तू लखब्या कि यहोवा तोहका कइसे बचावत ह। यहूदा अउ यरूसलेम क लोगो, डेराअ नाहीं। चिन्ता जिन करा! यहोवा तोहरे संग अहइ एह बरे भियान ओन लोगन क खिलाफ जा।”

18यहोसापात बहोत नम्रता स निहुरा। ओकर मुँड भुईया क छूअत रहा अउर यहूदा अउ यरूसलेम में रहइवाले सबहिं लोग यहोवा क समन्वा गिर गएन अउर ओन सबहिं यहोवा क उपासना किहन। 19कहाती परिवार समूह क लेवीबंसी अउ कहाती लोग, इस्त्राएल क यहोवा परमेस्सर क स्तुति क बरे खड़े भएन। उ पचे बहोत ऊँची अवाज में स्तुति किहन।

20यहोसापात क फउज तकोआ रेगिस्तान में बहोत सबेरे गइ। जब उ पचे बढ़ब आरम्भ करत रहेन, यहोसापात खड़ा भवा अउर उ कहेस, “यहूदा अउ यरूसलेम क लोगो, मोर सुना। अपने यहोवा परमेस्सर में बिस्सास रखा अउर तब तू मजबूती क संग खड़े रहब्या। यहोवा क नबियन में बिस्सास रखा। तू लोग सफल होब्या।”

21यहोसापात लोगन क उत्साहित किहेस अउर निर्देस दिहेस। तब उ यहोवा क बरे गायक चुनेस। उ पचे गायक यहोवा क स्तुति करइ क बरे चुने ग रहेन काहेकि उ पवित्तर अउर महिमामय बाटइ। उ पचे फउजे क समन्वा कदम मिलावत भए बढ़ेन अउर उ पचे यहोवा क स्तुति किहन। एन गायकन गाएन, “परमेस्सर क धन्यवाद दया काहेकि ओकर पिरेम सदैव रहत ह।” 22जइसे ही ओन लोग गाना गाइके यहोवा क स्तुति सुरु किहन, यहोवा अम्मोनी, मोआबी अउर सेईर पर्वत क लोगन क खिलाफ अचानक हमला किहेस। इ सबइ उ सब लोग रहेन जउन यहूदा पइ आक्रमन करइ आए रहेन। उ सबइ लोग पिट गएन। 23अम्मोनी अउ मोआबी लोग सेईर पर्वत स आए लोगन क क खिलाफ जुद्ध करइ सुरु कइ दिहेन अउ ओनका नस्ट कइ दिहन। जब उ पचे सेईर क लोगन क मार चुकेन तु पचे एक दूसर क मार डाएन।

24यहूदा क लोग एक अइसी जगह पइ आएन जहाँ स उ पचे सारे रेगिस्तान क लखइ सकत। उ पचे दुस्मन क बिसाल सेना क लखेन। किन्तु उ पचे सिरिफ लहासन क भुईया पइ पड़े लखेन। कउनो मनई बचा न रहा। 25यहोसापात अउर ओकर फउज लहासन स कीमती चिजियन लइ लिहेस।

उ पचे बहोत स सामानन, वस्त्रन अउ कीमती चिजियन पाएन। उ पचे बहोत सारा जनावरन भी पाएन। चिजियन ओहसे अधिक रहिन जेतना यहोसापात अउर ओकर फउज लइ जाइ सकत रही। ओनका ल्हासन स कीमती चिजियन बटोरइ में तीन दिन लगने, काहेकि हुवाँ बहोत जियादा रहेन। 26 चउथे दिन यहोसापात अउर ओकर फउज बराका क घाटी\* में मिलेन। उ पचे उ जगह पइ यहोवा क स्तुति किहिन। इहइ कारण अहइ कि उ जगह क नाउँ आनु तलक “बराका क घाटी” अहइ।

27 तब यहोसापात यहूदा अउ यरूसलेम क लोगन क यरूसलेम लउटाइके लइ गवा। यहोवा ओनका बहोत खुस किहस काहेकि ओनकर दुस्मन पराजित होइ गए रहेन। 28 उ पचे यरूसलेम में प्रवेश किहेन अउर वीणा, सितार अउ तुरहियन बजावत भए यहोवा क मन्दिर में दाखिल भएन।

29 सबहिँ देस क सारे राज्ज यहोवा स डेरान रहेन काहेकि उ पचे सुनेन कि यहोवा इस्त्राएल क दुस्मनन स लड़ा। 30 इहइ कारण अहइ कि यहोसापात क राज्ज में सान्ति रही। यहोसापात क परमेस्सर ओका चारिहुँ कइँती स सान्ति दिहस।

### यहोसापात क सासन क अन्त

31 यहोसापात यहूदा देस पइ हुकूमत किहस। यहोसापात जब सासन सुरु किहस तउ उ पैतीस बरिस क रहा। उ पच्चीस बरिस यरूसलेम में हुकूमत किहस। ओकर महतारी क नाउँ अजूबा रहा। अजूबा सिल्ही क बिटिया रही। 32 यहोसापात सच्चे मारग पइ अपने बाप आसा क तरह रहा। यहोसापात, आसा क मारग क अनुसरण करइ स मुड़ा नाहीं। यहोसापात यहोवा क दृष्टि में उचित किहस। 33 मुला ऊँच जगहियन नाहीं हटाई गइन अउर लोग आपन हिरदय परमेस्सर क अनुसरण करइ में नाहीं लगाएस जेकर अनुसरण ओनकर पुरखन करत रहेन।

34 यहोसापात सुरु स आखीर तलक जउन कछू किहस उ येहू क सबइ रचना में लिखा अहइ। येहू क बाप क नाउँ हनानी रहा। इ सबइ बातन “इस्त्राएल क राजा लोगन क इतिहास” नाउँ क किताब में लिखा भवा अहइ।

35 कछू समइ पाछे यहूदा क राजा यहोसापात इस्त्राएल क राजा अहज्याह क संग सन्धि किहस। अहज्याह बुरा किहस। 36 यहोसापात अहज्याह क संग जहाजन क बरे, बनाइ बरे राजी होइ गएन जउन तर्सीस नगर जाइहीं। उ पचे जहाजन क एस्योन गेबेर नगर में बनाएस। 37 तब दोदावाह जउन मारेस क रहा क पूत एलीआज़ार यहोसापात क खिलाफ भविस्सबाणी किहेस। उ कहेस, “यहोसापात, तू अहज्याह क संग मिल गए अहा, इहइ कारण अहइ कि यहोवा तोहरे कारज क नस्ट करी।” जहाज टूट गएन, एह बरे यहोसापात अउ अहज्याह ओनका तर्सीस नगर क न पठइ सकेन।

**21** तब यहोसापात अउर अपने पुरखन क संग दफनावा गवा। ओका दाऊद नगर में दफनावा गवा। यहोराम यहोसापात क जगह पइ नवा राजा भवा। यहोराम

यहोसापात क पूत राह। 2 यहोराम क भाई अजर्याह, यहीएल, जकर्याह, अजर्याह, मीकाएल अउर सपत्याह रहेन। उ सबइ लोग यहोसापात क पूत रहेन। यहोसापात यहूदा क राजा रहा। 3 यहोसापात अपने पूतन क चाँदी, सोना अउर कीमती चिजियन भेंट में दिहस। उ ओनका यहूदा में सक्तीसाली किलन भी दिहस। किन्तु यहोसापात राज यहोराम क दिहस काहेकि यहोराम सब स बड़का पूत रहा।

### यहूदा क राजा यहोराम

4 यहोराम अपने बाप क राज प्राप्त किहस अउर अपने क सक्तीसाली बनाएस। उ आपन तरवारे स आपन सबहिँ भाइयन क मार डाएस। उ इस्त्राएल क कछू प्रमुखन क मार डाएस। 5 जब यहोराम सासन सुरु किहेस तउ उ बतीस बरिस क रहा। उ यरूसलेम में आठ बरिस तलक हुकूमत किहस। 6 उ उहइ तरह रहा जइसे इस्त्राएल क राजा रहत रहेन। उ उहइ तरह रहा जउने तरह अहाब क परिवार रहत रहा। इ एह बरे भवा कि यहोराम अहाब क बिटिया स बियाह किहस अउर यहोराम यहोवा क निगह में बुरा किहस। 7 किन्तु यहोवा दाऊद क परिवार क नस्ट नाहीं करइ चाहत रहा, काहेकि उ दाऊद क संग वाचा किहे रहा। यहोवा बचन दिहे रहा कि दाऊद अउर ओकरी सन्तान क एक बंस सदा ही सासन करब।

8 यहोराम क समइ में, एदोम यहूदा क अधिकार छेत्र स बाहेर निकर गवा। एदोम क लोग अपना राजा चुन लिहिन। 9 एह बरे यहोराम अपने सबहिँ सेनापतियन अउर रथन क संग एदोम गवा। एदोमी सेना यहोराम अउर ओकरे रथ क रथपतियन क घेर लिहस। किन्तु यहोराम रात में जुद्ध कइके अपने निकरइ क रस्ता हेर लिहस। 10 उ सबइ स अब तलक एदोन क देस यहूदा क खिलाफ बिद्रोही रहा ह। लिब्ना नगर क लोग भी यहोराम क बिरुद्ध होइ गएन। इ एह बरे भवा कि यहोराम पुरखन क, यहोवा परमेस्सर क छोड़ दिहस। 11 यहोराम ऊँची जगह भी यहूदा क पहाड़ियन पइ बनाएस। यहोराम यरूसलेम क लोगन क परमेस्सर बरे अबिस्सासी बनइ क कारण बनेस। उ यहूदा क लोगन क यहोवा क खिलाफ भड़काएस।

12 एलिय्याह नवी स यहोराम क एक सँदेसा मिला। सँदेसा में इ कहा गवा रहा: “इ उ अहइ जउन परमेस्सर यहोवा कहत ह। इहइ उ परमेस्सर अहइ जेकर अनुसरण तोहार पुरखा दाऊद करत रहा। यहोवा कहत ह, ‘यहोराम, तू उ तरह नाहीं रह्या जउने तरह तोहार बाप यहोसापात रहा। तू उ प्रकार नाहीं रह्या जउने तरह यहूदा क राजा आसा रहा। 13 मुला तू उ तरह रह्या जउने तरह इस्त्राएल क राजा रहेन। तू यहूदा अउ यरूसलेम क लोगन क उ काम करइ स रोक्वा ह जउन यहोवा चाहत ह। इहइ अहाब अउर ओकर परिवार किहस। उ पचे यहोवा क बरे बिस्सास क जोगग न रहेन तू अपने भाइयन क मार डया। तोहार भाई तोहसे नीक रहेन। 14 एह बरे अब यहोवा हाली ही तोहरे लोगन क बहोत जियादा सजा देइ। यहोवा तोहरे बच्चन, मेहरुअन अउर तोहार सारी सम्पती क सजा देइ। 15 तू पचन्क आँतन में भयंकर बीमारी होइ। इ हर रोज जियादा बिगड़त जाइ।

**बराका क घाटी** इ सब्द क अरथ अहइ “आसीर्बाद” या “पराथना”।

तब तोहार भयंकर बीमारी क कारण आँतन बाहेर निकरि अइहीं।”

16यहोवा इथियोपियन क लगे रहइवाले पलिस्तियन अउ अरबियन क यहोराम स रूठाइ दिहस। 17उ पचे यहूदा देस पइ हमला कइ दिहन अउर राजमहल क सारी सम्पत्ति अउ यहोराम क पूतन अउ मेहररुअन क लइ गएन। सिरिफ यहोराम क सब स छोटका पूत छोड़ दीन्ह गवा। यहोराम क सब स नान्ह पूत क नाउँ यहोआहाज रहा।

18ओन चिजियन क होइ क पाछे यहोवा यहोराम क आँतन में अइसा रोग पइदा किहस जेकर उपचार न होइ सका। 19तब यहोराम क आँतन, दुइ बरिस पाछे ओकरी बीमारी क कारण बाहेर आइ गइ। उ बहोत बुरी पीरा में मरा। यहोराम क सम्मान में लोग आगी क महाज्वाला नाहीं बारेन जइसा उ पचे ओकरे बाप क बरे किहे रहेन। 20यहोराम उ समइ बतीस बरिस क राह जब उ राजा भवा रहा। उ यरूसलेम में आठ बरिस हुकूमत किहस। जब यहोराम मरा तउ कउनो मनई दुखी नाहीं भवा। लोग यहोराम क दाऊद क नगर में दफनाएन किन्तु ओन कब्रन में नाहीं जहाँ राजा दफनाए जात हीं।

### यहूदा क राजा अहज्याह

**22** यरूसलेम क लोग अहज्याह क यहोराम क जगह पइ नवा राजा होइ क बरे चुनेन। अहज्याह यहोराम क सबस नान्ह पूत रहा। अरब लोगन क संग जउन लोग यहोराम क डेरन पइ हमला करइ आए रहेन उ पचे यहोराम क बड़े पूतन क मार डाए रहेन। एह बरे यहूदा में अहज्याह सासन करब सुरु किहस। 2अहज्याह जब हुकूमत करब सुरु किहस तब उ बाईस बरिस क रहा। अहज्याह यरूसलेम में एक बरिस हुकूमत किहस। ओकरी महतारी क नाउँ अतल्याह रहा। अतल्याह क बाप क नाउँ ओम्री रहा। 3उ अहज्याह भी वइसे ही रहा जइसे अहाब क परिवार रहत रहा। उ उ तरह रहा काहेकि ओकर महतारी ओका गलत काम करइ क बरे हुसकाएस। 4अहज्याह यहोवा क दृष्टि में बुरे काम किहस, जइसा कि अहाब क परिवार किहे रहा। अहाब क परिवार अहज्याह क ओकरे बाप क मरई क पाछे बुरी सलाह दिहस। उ बुरी सलाह ओकरे मउत क कारण रहा। 5अहज्याह उहइ सलाह क मानेस जउन अहाब क परिवार ओका दिहस। अहज्याह राजा योराम क संग अराम क राजा हजाएल क खिलाफ गिलाद क रामोत नगर में गवा। योराम क बाप क नाउँ अहाब रहा जउन इस्त्राएल क राजा रहा। किन्तु अर्मिया क लोग योराम क जुद्ध में घायल कइ दिहन। 6योराम लउटिके यिज्रेल नगर क स्वस्थ होइ क बरे गवा। उ रामोत में तब घायल भवा रहा जब उ अराम क राजा हजाएल क खिलाफ जुद्ध करत रहा।

तब यहोराम क पूत अहज्याह अहाब क पूत योराम स मिलइ यिज्रेल नगर क गवा। योराम यिज्रेल नगर में रहा काहेकि उ घायल रहा।

7परमेस्सर अहज्याह क मउत तब करवाइ दिहस जब उ योराम स भेंटइ गवा। अहज्याह पहोंचा अउर योराम क संग यहू स भेंटइ गवा। यहू क बाप क नाउँ निमसी रहा। यहोवा

येहू क अहाब क परिवार क नस्ट करइ बरे चुनेस। 8येहू अहाब क परिवार क सजा देत रहा। येहू यहूदा क प्रमुखन अउर अहज्याह क ओन सम्बन्धियन क पता लगाएस जउन अहज्याह क सेवा करत रहेन। येहू यहूदा क ओन प्रमुखन अउर अहज्याह क सम्बन्धियन क मार डाएस। 9तब येहू अहज्याह क खोज में रहा। येहू क लोग ओका उ समइ पकरि लिहन जब उ सोमरोन नगर में छुपइ क जतन करत रहा। उ पचे अहज्याह क येहू क लगे लिआएन। उ पचे अहज्याह क मार दिहन अउर ओका दफनाइ दिहन। उ पचे कहेन, “अहज्याह यहोसापात क संतान अहइ। यहोसापात पूरे हिरदइ स यहोवा क अनुसरण किहे रहे।” अहज्याह क परिवार में उ सक्ती नाहीं रही कि यहूदा क राज क अखण्ड रख सकइ।

### रानी अतल्याह

10अतल्याह अहज्याह क महतारी रही। जब उ लखेस कि ओकर पूत मर गवा तउ उ यहूदा में राजा क सबहिं पूतन क मार डाएस। 11एहँ बरे राजा यहोराम क बिटिया यहोसावत अहज्याह क पूत योआस क लिहस अउर ओका छुपाइ दिहस। जब राजा क दूसर पूतन क मार दीन्ह ग रहेन। यहोसापात योआस अउर ओकरी धाई क अपने सयनकच्छ क भीतर रखेस। यहोसावत याजक यहोयादा क मेहरारु रही अउर उ अहज्याह क बहिन रही। यहोसावत योआस क छुपाइ दिहे रहा। एँह बरे रानी अतल्याह ओका नाहीं मार सकेस। 12योआस याजकन क संग परमेस्सर क मन्दिर में छः बरिस तलक छुपा रहा। उ जमाने में अतल्याह रानी क रुप में देस पइ हुकूमत किहस।

### याजक यहोयादा अउर राजा योआस

**23** सताएँ बरिस में यहोयादा आपन सक्ती देखाएस। उ सेनापितयन क संग सन्धि किहस। उ सबइ नायकः यरोहाम क पूत अजर्याह यहोहानान क पूत इस्माएल, ओबेद क पूत अजर्याह, अदायाह क पूत मासेयाह अउर जिब्री क पूत एलीसापात रहेन। 2उ पचे यहूदा क चारिहुँ कइँती गएन अउर यहूदा क सबहिं नगरन स उ पचे लेवीबंसियन क बटोरेन। उ पचे इस्त्राएल क परिवारन क प्रमुखन क भी बटोरेन। तब उ पचे यरूसलेम गएन। 3सबहिं लोग एक संग मिलिके राजा क संग परमेस्सर क मन्दिर में एक ठु सन्धि किहन।

यहोयादा एन लोगन स कहेस, “राजा क पूत हुकूमत करी। इहइ उ बचन अहइ जउन यहोवा दाऊद क संतानन क सम्बन्धित दिहे रहा। 4अब, तोहका इ जरूर करइ चाहीः याजकन अउ लेवीयन सबित क दिन तू पचन्में स जउन सेवा पइ जात हीं ओनकर एक तिहाई दुआरे क रच्छा करी। 5तोहार एक तिहाई राजमहल पइ रही अउर तोहार एक तिहाई पहिले फाटक पइ रही। मुला दूसर सबहिं लोग यहोवा क मन्दिर क अँगना में रहिहीं। 6कउनो भी मनई क यहोवा क मन्दिर में न आवइ दया। सिरिफ सेवा करइवाले याजकन अउ लेवीबंसियन क पवितर होइ क कारण, यहोवा क मन्दिर में आवइ क आग्या अहइ। मुला दूसर लोग उ

कारज करिहीं जउन यहोवा दइ रखेस ह। 7लेवीबंसियन जरूर राजा क नजिक रहइ चाही। हर एक मनई अपनी तरवार अपने संग रखी। जदि कउनो मनई मन्दिर में प्रवेस करइ क कोसिस करत ह तउ उ मनई क मार डावा। तू पचन्क राजा क संग रहब बाटइ उ जहाँ।”

8लेवीबंसी अउ यहूदा क सबहि लोग याजक यहोयादा जउन आदेस दिहस, ओकर पालन किहस। याजक यहोयादा याजकन क समूह में स कउनो क छूट नाहीं दिहस। इ तरह हरेक सेनापित आपन सबहि लोगन क जउन सबित क दिन सेवा में जात रहेन, अउर जउन सेवा में नाहीं जात रहेन लइ लिहेन। 9याजक यहोयादा अधिकारियन क उ सबइ भालन अउर बड़ा अउ नान्ह ढारन क दिहन जउन राजा दाऊद क रहिन। उ सबइ हथियार परमेस्सर क मन्दिर में धरे रहेन। 10तब यहोयादा लोगन क बताएस कि ओनका कहाँ खड़ा होब अहइ। हर एक मनई अपने हथियार अपने हाथ में लिहे रहा। उ पचे मन्दिर क दाई अउ बाई सबइ रासतन में खड़ा भएन। उ पचे वेदी, मन्दिर अउर राजा क निचके खड़े रहेन। 11उ पचे राजा क पूत क बाहेर लिआएन अउर ओका मुकुट पहिराइ दिहन। उ पचे ओका व्यवस्था क किताब क एक प्रति दिहन। तब उ पचे योआस क राजा बनाएसन यहोयादा अउर ओकरे पूतन योआस क अभिसेक किहन। उ पचे कहेन, “राजा दीर्घायु होइ।”

12अतल्याह मन्दिर कईती दउड़त भए अउर राजा क बड़कइ करत भए लोगन क सोर सुनेस। उ यहोवा क मन्दिर पइ लोगन क लगे आइ। 13उ नजर दउड़ाएस अउर राजा क लखेस। राजा राज स्तम्भ क संग सामनेवाले दुआर पइ खड़ा रहा। अधिकारी अउ लोग जउन तुरही बजावत रहेन, राजा क लगे रहेन। देस क लोग खुस रहेन अउर तुरही बजावत रहेन। गायक संगीत क बाजन क बजावत रहेन। गायक बड़कई क गायन में लोगन क अगुवाई करत रहेन। तब अतल्याह अपने ओढ़नन क फारि डाएस, अउर उ कहेस, “सङ्गन्त्र, सङ्गन्त्र।”

14याजक यहोयादा फउजे क नायकन क बाहेर लिआवा। उ ओनसे कहेस, “अतल्याह क, सेना स, बाहेर लइ आवा। अपनी तरवार क उपयोग उ मनई क मार डावइ बरे करा जउन ओकरे संग जात ह।” तब याजक फउजियन क चितउनी दिहस, “अतल्याह क यहोवा क मन्दिर में जिन मारा।” 15तब ओन लोग अतल्याह क पकड़ लिहन जब उ राजमहल क घोड़ दुआर पइ आइ। तब उ पचे उहइ जगह पइ ओका मार डाएन।

16तब यहोयादा राजा अउर सबहि लोगन क संग एक ठु सन्धि किहस। सबहि स्वीकार किहन कि उ पचे यहोवा क लोग रहिहीं। 17सबहि लोग बाल क मूर्ति क मन्दिर में गएन अउर ओका उखाड़ डाएन। उ पचे बाल क मन्दिर क वेदियन अउर मूरतियन क तोड़ डाएन। उ पचे बाल क वेदी क समन्वा बाल क याजक मतान क मार डाएस।

18तब यहोयादा याजकन क चुनेस अउर ओनका यहोवा क मन्दिर बरे उत्तरदायी बनाएस। उ पचे याजक लेवीबंसी रहेन अउर दाऊद ओनका यहोवा क मन्दिर क बरे उत्तरदायी होइ क कार्य सौपे रहा। ओन याजकन क होमबलि मूसा क

आदेस क अनुसार यहोवा क चढ़ाउब रही। उ पचे बहोत खुसी स दाऊद क निर्देस क अनुसार गावत भए बलि चढ़ावत रहेन। 19यहोयादा यहोवा क मन्दिर क दुआरे पइ दुआरपाल रखेस जेहसे कउनो मनई जउन कउनो दृस्टि स सुद्ध नाहीं रहा मन्दिर में नाहीं जाइ सकत रहा।

20यहोयादा फउज क नायकन, प्रमुखन लोगन क प्रसासकन अउ देस क सबहि लोगन क अपने संग लिहस। तब यहोयादा राजा क यहोवा क मन्दिर स बाहेर निकारेस अउर उ पचे ऊपरी दुआरे स राजमहल में गएन। उ जगह पइ उ पचे राजा क गद्दी पइ बइठाएन। 21यहूदा क सबहि लोग बहोत खुस रहेन अउर यरूसलेम नगर में सान्ति रही काहेकि अतल्याह तरकारे स मार दीन्ह गइ रही।

### योआस फुन मन्दिर बनावत ह

24 योआस जब राजा बना सात बरिस क राहा। उ यरूसलेम में चालिस बरिस तलक सासन किहस। ओकरी महतारी क नाउँ सिब्या रहा। सिब्या बेर्सेबा नगर क रही। 2योआस उ काम जउन यहोवा क नज़र में नीक अहा तब तलक करत रहेन जब तलक याजक यहोयादा जितत रहा। 3यहोयादा योआस क बरे दुइ मेहररुअन चुनेस। योआस क पूत अउर बितियन रहिन।

4तब कछू समइ पाछे, योआस यहोवा क मन्दिर दुबारा बनावइ क निहचइ किहस। 5योआस याजकन अउ लेवीबंसियन क एक संग बोलाएस। उ ओनसे कहेस, “यहूदा क नगरन में जा अउर उ धने क बटोरा जेकर भुगतान इस्राएल क लोग हर बरिस करत हीं। उ धने क उपयोग परमेस्सर क मन्दिर दुबारा बनावइ में करो। हाली करा अउर एका पूरा कइ ल्या।” मुला लेवीबंसियन हाली नाहीं किहन।

6एह बरे राजा योआस मुख्य याजक, यहोयादा क बोलाएस। राजा कहेस, “यहोयादा, तू यहूदा अउ यरूसलेम स यहोवा क सेवक मोसा दुआरा कर क धन वसूलइ बरे लेवीबंसियन क नाहीं लिहा? मूसा अउर इस्राएल क लोग पवितर तम्बू बरे इ कर क धन क उपयोग किहे रहेन।”

7पुराने जमाने में अतल्याह क पूत, परमेस्सर क मन्दिर में जबरदस्ती घुस गए रहेन। उ पचे यहोवा क मन्दिर क पवितर चिजियन क उपयोग अपने बाल देवतन क पूजा क बरे किहस। अतल्याह एक ठु दुट्ट मेहरारु रही।

8राजा योआस एक ठु सन्दूख बनावइ क आदेस दिहेस अउर ओका यहोवा क मन्दिर क दुआरे क बाहेर रखइ क आदेस दिहस। 9तब लेविबंसियन यहूदा अउ यरूसलेम में इ घोसणा किहन। उ पचे लोगन स कर क धन यहोवा क बरे लिआवइ क कहेन। यहोवा क सेवक मूसा इस्राएल क लोगन स रेगिस्ताने में रहत समइ जउन कर क रुप में धन माँगे रहा ओतना ही इ धन अहइ। 10सबहि प्रमुख अउर सबहि लोग खुस रहेन। उ पचे धन लइके आपन अउर उ पचे ओका सन्दूखे में डाएन। उ पचे तब तलक देत रहेन जब तलक सन्दूख नाहीं भरि गवा। 11तब लेवीबंसियन क राजा क अधिकारियन क समन्वा सन्दूख लइ जाइ क पड़ी। उ पचे लखेन कि सन्दूख धन स भरि गवा ह। राजा क

सचिव अउर प्रमुख याजक क अधिकारी आएन अउर उ पचे धने क सन्दूख स निकारेन। तब उ पचे सन्दूख क अपनी जगहिया पइ फुन वापस लइ गएन। उ पचे बार-बार किहन अउर धन बटोरैन। 12तब राजा योआस अउर यहोयादा उ धन ओन लोगन क दिहस जउन यहोवा क मन्दिर क बनावइ क कार्य करत रहेन अउर यहोवा क मन्दिर बनावइ में कार्य करइवालन यहोवा क मन्दिर क दुबारा बनावइ बरे कुसल बढई अउर काठे पइ खुदाई क कार्य करइवालन क मजदूरी पइ धरेन। उ पचे यहोवा क मन्दिर क दुबारा बनावइ बरे काँसे अउर लोहा क काम करइ क जानकारी रखइवालन क भी मजूरी पइ रखेन।

13काम क निगरानी रखइवाले मनई बहोत बिस्सास क जोगग रहेन। यहोवा क मन्दिर क दुबारा बनावइ गवा। उ पचे परमेस्सर क मन्दिर क पहिले क तरह ही बनाएन अउर इ पहिले स जियादा मजबूत बनाएन। 14जब कारीगरन कार्य पूरा कइ लिहन तउ उ पचे उ धने क जउन बचा रहा राजा योआस अउर यहोयादा क लगे लइ आएन। उ पचे धन क उपयोग यहोवा क मन्दिर बरे चिजियन बनावइ बरे किहन। उ सबइ चिजियन मन्दिर क सेवाकार्य में अउर होमबलि चढ़ावइ में काम आवति रहिन। उ पचे खोरन अउर दूसर चिजियन क सोना अउ चाँदी स बनाएन। याजकन यहोवा क मन्दिर में हर एक दिन क होमबलि तब तलक चढ़ाएन जब तलक यहोयादा जितत रहा।

15यहोयादा बूढ़ा भवा। उ बहोत लम्बी उमिर बिताएस तब उ मरा। यहोयादा जब मरा, उ एक सौ तीस बरिस क रहा। 16लोगन यहोयादा क दाऊद क नगर में हुवाँ दफनाएन जहाँ राजा दफनाए जात हीं। लोगन यहोयादा क हुवाँ दफनाएन काहेकि अपनी जिन्गी में उ परमेस्सर अउ परमेस्सर क मन्दिर बरे बहोत अच्छे कार्य किहस।

17यहोयादा क मरई क पाछे यहूदा क प्रमुख आएन अउर उ पचे राजा योआस क समन्वा निहुरेन। राजा एन प्रमुखन क सुनेस। 18राजा अउ प्रमुखन उ यहोवा, परमेस्सर क मन्दिर क छोड़ दिहस जेकर अनुसरण ओनकर पुरखन करत रहेन। उ पचे असेरा स्तम्भ अउर दूसर मूरतियन क पूजा सुरू किहस। परमेस्सर यहूदा अउ यरूसलेम क लोगन पइ कोहाइ गवा काहेकि राजा अउ उ प्रमुखन अपराधी रहेन। 19परमेस्सर लोगन क लगे नबियन क ओनका यहोवा कईती लउटाइ क बरे पठएस। नबियन लोगन क चितउनी दिहन। किन्तु लोग सुनइ स इन्कार कइ दिहन।

20तब परमेस्सर क आतिमा याजक यहोयादा क पूत जकर्याह पइ उतरी। जकर्याह लोगन क समन्वा खड़ा भवा अउर उ कहेस, “जउन यहोवा कहत ह उ इ अहइ: ‘तू लोग यहोवा क आदेस पालन करइ स काहे इन्कार करत अहा? तू कामयाब नाहीं होब्या। तू यहोवा क तजा ह। एह बरे यहोवा भी तोहका छोड़ दिहस ह।”

21लेकिन लोग जकर्याह क खिलाफ योजना बनाएस। राजा जकर्याह क मार डावइ क आदेस दिहस, एह बरे उ पचे ओह पइ तब तलक पाथर मारेन जब तलक उ मर नाहीं गवा। लोगन इ मन्दिर क आँगन में किहन। 22राजा योआस अपने ऊपर यहोयादा क दयालुता क भी याद नाहीं

रखेन। यहोयादा जकर्याह क बाप रहा। मुला योआस यहोयादा क पूत जकर्याह क मार डाएस। मरइ क पहिले जकर्याह कहेस, “यहोवा ओह क लिखि जउन तू करत अहा अउर तोहका दण्ड देइ।”

23बरिस क आखीर में अराम क फउज योआस क खिलाफ आइ। उ पचे यहूदा अउ यरूसलेम पइ हमला किहन अउर लोगन क सबहिं प्रमुखन क मार डाएन। उ पचे सारी कीमती चिजियन दमिस्क क राजा क लगे पठइ दिहन। 24अराम क फउज बहोत कम सैनिकन क संग आइ रही किन्तु यहोवा ओका यहूदा क बहोत बड़ी फउज क हरावइ दिहस। यहोवा इ एह बरे किहस कि यहूदा क लोग यहोवा परमेस्सर क तजि दिहन जेकर अनुसरण ओनकर पुरखन करत रहेन। इ तरह योआस क सजा मिली। 25जब अराम क लोग योआस क छोड़ैन, उ बुरी तरह घायल रहा। योआस क अपने सेवकन ओकरे खिलाफ योजना बनाएन। उ पचे अइसा एह बरे किहन कि योआस याजक यहोयादा क पूत जकर्याह क मार डाए रहा। सेवकन योआस क ओकरी अपनी चारपाई पइ मार डाएन। योआस क मरइ क पाछे लोग ओका दाऊद क नगर में दफनाएन। किन्तु लोग ओका उ जगहिया पइ नाहीं दफनाएन जहाँ राजा दफनाए जात हीं।

26जउन सेवकन योआस क खिलाफ योजना बनाएन, उ पचे इ सबइ अहई जाबाद अउ यहोजाबाद जाबाद क महतारी क नाउँ सिमात रहा। सिमात अम्मोन क रही। यहोजाबाद क महतारी क नाउँ सिम्रित रहा। सिम्रित मोआब क रही।

27योआस क पूतन क कथा, ओकर खिलाफ बहोत सारी भविस्सबाणियन अउर उ फुन परमेस्सर क मन्दिर कइसे बनाएस, “राजा लोगन क व्याख्या” नाउँ क किताबे में लिखा अहइ। ओकरे पाछे योआस क पूत अमस्याह नवा राजा भवा।

### यहूदा क राजा अमस्याह

**25** अमस्याह राजा बनई क समइ पचीस बरिस क रहा। उ यरूसलेम में उन्तीस बरिस तलक हुकूमत किहस। ओकरी महतारी क नाउँ यहोअद्दान रहा। यहोअद्दान यरूसलेम क रही। 2अमस्याह उहइ किहस जेका यहोवा नीक समुझत ह। मुला उ पूरे हिरदइ स नाहीं किहस। 3अमस्याह क हाथ में राजसत्ता सुदृढ़ होइ गइ। तब उ ओन अधिकारियन क मार डाएस जउन ओकरे बाप राजा क मारे रहेन। 4मुला अमस्याह ओन अधिकारियन क बच्चन क नाहीं मारेस। काहेकि उ मूसा क किताबे में लिखे नेमन क मानेस। यहोवा आदेस दिहे रहा, “पिता लोगन क अपने पूतन क पाप बरे नाहीं मरइ चाही। बच्चन अपने बाप क पापन क बरे नाहीं मरइ चाही। हर एक मनई क अपने खुद क पाप क बरे मरइ चाही।”

5अमस्याह यहूदा क लोगन क बटोरैस। उ ओनके परिवार क एक तु बर्ग बनाएस अउर ओन बर्गन क अधिकारि सेनाध्यच्छ अउर नायक नियुक्त कीन्ह गएन। उ पचे प्रमुख यहूदा अउर बिन्यामीन क सबहिं फउजियन क

अधिकारी भएन। सबहिं लोग जउन फउजी होइ बरे चुने गएन, बीस बरिस क या ओहसे जियादा क रहेन। उ पचे सब तीन लाख प्रसिच्छित फउजी भालन अउर ढार क संग लड़इवालन रहेन। 6अमस्याह एक लाख फउजियन क इस्त्राएल स भाड़े पड़ रखेस। उ पउने पौने चार टन चाँदी क भुगतान ओन फउजियन क किराये पड़ लेइ बरे किहस। 7मुला परमेस्सर क एक मनई अमस्याह क लगे आवा। परमेस्सर क मनई कहेस, “राजा, अपने संग इस्त्राएल क सेना क न जाइ द्या। परमेस्सर इस्त्राएल क संग नाहीं अहइ। परमेस्सर एप्रैम क लोगन क संग नाहीं अहइ। 8हिआँ तलक कि अगर तू आपन आप क मज़बूत बनाइ लिहा अउर जुद्ध बरे तइयार होइ गवा, तउ भी परमेस्सर तोहका हराइ देब, कहेकि जीत अउर हार दुइनउँ यहोवा क मदद पड़ निर्भर करत ह।” 9अमस्याह परमेस्सर क मनई स कहेस, “किन्तु हमरे धने क का होइ जउन मई पहिले ही इस्त्राएल क फउज क दइ दिहे हउँ?” परमेस्सर क मनई जवाब दिहस, “यहोवा क लगे बहोत जियादा अहइ। उ ओहसे भी जियादा तोहका दइ सकत ह।”

10एह बरे अमस्याह इस्त्राएल क फउज क वापस घर एप्रैम क पठइ दिहस। उ सबइ लोग राजा अउर यहूदा क लोगन क खिलाफ बहोत कोहाइ गएन। उ पचे बहोत जियाद किरोधित होइके अपने घरे लउटेन।

11तब अमस्याह बहोत हिम्मती होइ गवा अउर उ अपनी फउज क एदोम देस में नमक क घाटी में लइ गवा। उ जगह पड़ अमस्याह क फउज सेईर क दस हजार फउजियन क मार डाएस। 12यहूदा क फउज सेईर स दस हजार मनई धरेस। उ सबइ ओन मनइयन एक ऊँच चोटि पड़ लइ गएन। उ सबइ लोग तब तलक जिअत रहेन। तब यहूदा क फउज ओन मनइयन क उ ऊँच चट्टान क चोटी स खाले लोकाइ दिहस अउर ओनकर तन खाले क चट्टानन पड़ ध्वस्त होइ गएन।

13किन्तु उहइ समइ इस्त्राएली फउज यहूदा क कछू नगरन पड़ हमला करत रही। उ सबइ सोमरोन स बेथोरोन नगर तलक क नगरन पड़ हमला करत रहेन। उ पचे तीन हजार लोगन क मार डाएन अउर उ पचे बहोत स कीमती चिजियन लइ गएन। उ फउजे क लोग एह बरे कोहान रहेन काहेकि अमस्याह ओनका जुद्ध में अपने संग सामिल नाहीं होइ दिहस।

14अमस्याह एदोमी लोगन क हरावइ क पाछे घरे लउटा। उ सेइर क लोगन क ओन देवमूरतियन क लिआवा जेनकर उ पचे पूजा करत रहेन। अमस्याह ओन देवमूरतियन क पूजब सुरु किहस। उ ओन देवतन क प्रणाम किहस अउर ओनका सुगन्धि भेंट किहस। 15यहोवा अमस्याह पड़ बहोत कोहाइ गवा। यहोवा अमस्याह क लगे एक नबी पठाएस। नबी कहेस, “अमस्याह, तू ओन देवतन क काहे पूजा किहा जेनका उ सबइ लोग पूजत रहेन? उ सबइ देवता तउ अपने लोगन क भी तोहसे रच्छा न कइ सकेन।”

16जब नवी इ बोला, अमस्याह नवी स कहेस, “हम लोग तोहका कबहुँ राजा क सलाहकार नाहीं बनावा। चुप रहा, जदि तू चुप नाहीं रह्या तउ मार डावा जब्या।” नबी

चुप होइ गवा, मुला उ तब कहेस, “परमेस्सर फुरइ तोहका नस्ट करइ क निहचइ कइ लिहस ह। काहेकि तू बुरी बातन करत अहा अउर मोर सलाह नाहीं सुनत्या।”

17यहूदा क राजा अमस्याह अपने सलाहकार क संग सलाह किहस। तब उ योआस क लगे सँदिसा पठाएस। अमस्याह योआस स कहेस, “हम लोग आपने आमने-सामने मिलइ द्या।” योआस यहोआहाज क पूत रहा। यहोआहाज येहू क पूत रहा। येहू इस्त्राएल क राजा रहा।

18तब योआस अपना जवाब अमस्याह क पठाएस। योआस इस्त्राएल क राजा रहा अउर अमस्याह यहूदा क राजा रहा। योआस इ कथा सुनाएस: “लबानोन क एक तु नान्ह कँटेहरी झाड़ी लबानोन क एक बिसाल देवदारु क बृच्छ क सँदिसा, पठाएस। नान्ह कँटेहरी झाड़ी कहेस, ‘अपनी बिटिया क बियाह मोरे पूत क सँग कइ द्या,’ मुला एक तु जंगली जनावर निकरा अउर उ कँटेहरी झाड़ी क कुचरेस अउर ओका नस्ट किहस। 19तू कहत ह, ‘मई एदोम क हराएँ ह।’ तोहका ओकर घमण्ड अहइ अउर ओकर डींग हँकत अहा। मुला तोहका घरे में घुसा रहइ चाही। तोहका खतरा मोल लेइ क जरूरत नाहीं अहइ। जदि तू मोहसे जुद्ध करब्या तउ तू अउर यहूदा नस्ट होइ जइहीं।”

20मुला अमस्याह सुनइ स इन्कार कइ दिहस। इ परमेस्सर कइँती स भवा। परमेस्सर यहूदा क इस्त्राएल क जरिये हरावइ क योजना बनाएस काहेकि यहूदा क लोग ओन देवतन क अनुसरण करत रहेन जेनकर अनुसरण एदोम क लोग करत रहेन। 21एह बरे इस्त्राएल क राजा योआस बेतसेमेस नगर में यहूदा क राजा अमस्याह स आमने-सामने मिला। बेतसेमेस यहूदा में अहइ। 22इस्त्राएल यहूदा क हराएस। यहूदा क हर एक मनई अपने घरन क पराइ गवा। 23योआस अमस्याह क बेतसेमेस में धरेस अउर ओका यरूसलेम लइ गवा। अमस्याह क बाप क नाउँ योआस रहा। योआस क बाप क नाउँ यहोआहाज रहा। योआस छःसौ फुट लम्बी यरूसलेम क उ देवार क जउन एप्रैम फाटक स कोने क फाटक तलक रही, गिराइ दिहस। 24तब योआस परमेस्सर क मन्दिर क सोना, चाँदी अउ कइउ दूसर सामान लइ लिहस। ओबेदेदोम मन्दिर में ओन चिजियन क सुरच्छा क जिम्मेदार रहा। मुला योआस ओन सबहिं चिजियन क टाइ लिहस। योआस राजमहल स भी कीमती चिजियन क लिहस। तब योआस कछू लोगन क बन्दी क रूप में लिहा अउर सोमरोन लउटि गवा।

25अमस्याह योआस क मरइ क पाछे पन्द्रह बरिस जिअत रहा। अमस्याह क बाप यहूदा क राजा योआस रहा। 26अमस्याह सुरु स आखीर तलक दूसर जउन कछू किहस उ सब, “इस्त्राएल अउर यहूदा क राजा क इतिहास” नाउँ क किताबे में लिखा अहइ। 27जब अमस्याह यहोवा क आग्या क पालन करब तजि दिहस, यरूसलेम क लोग ओकरे खिलाफ एक ठु योजना बनाएन। उ लाकीस नगर क पराइ गवा। किन्तु लोग लाकीस में मनइयन क पठाएन अउर उ पचे अमस्याह क हुवाँ मार डाएन। 28तब उ पचे अमस्याह क लहासे क घोड़न पड़ लइ गएन अउर ओका ओकरे पुरखन क संग दाऊद नगर में दफनाएन।



### यहूदा क राजा उज्जियाह

**26** तब यहूदा क लोग अमस्याह क जगह पड़ नवा राजा होइ क बरे उज्जियाह क चुनेन। अमस्याह उज्जियाह क बाप रहा। जब इ भवा तउ उज्जियाह सोलह बरिस क राह। 2उज्जियाह एलोट नगर क दुबारा बनाएस अउर एका यहूदा क लउटाइ दिहस। उज्जियाह इ अमस्याह क मरि जाइ अउ पुरखन क संग ओकरे दफनाए जाइ क पाछे किहस।

3उज्जियाह जब राजा भवा तउ उ सोलह बरिस क रहा। उ यरूसलेम में बावन बरिस तलक राज्ज किहस। ओकर महतारी क नाउँ यकील्याह रहा। यकील्याह यरूसलेम क रही। 4उज्जियाह उ कामन किहस जेका यहोवा नीक समुझत ह। उ यहोवा क अनुसरण वइसा ही किहस जइसे ओकर बाप अमस्याह किहे रहा। 5उज्जियाह परमेस्सर क अनुसरण जकर्याह क जीवन-काल में किहस। जकर्याह उज्जियाह क सिच्छा दिहस कि परमेस्सर क सम्मान अउ ओकरी आग्या क पालन कइसे कीन्ह जात ह। जब उज्जियाह यहोवा क आग्या क पालन करत रहा तब परमेस्सर ओका कामयाबी दियाएस।

6उज्जियाह पलिस्ती लोगन क खिलाफ एक जुद्ध किहस। उ गत, यब्ने, अउर असदोद नगर क देवारन क गिराइ दिहस। उज्जियाह अस्दोद नगर क लगे अउर पलिस्ती लोगन क बीच दूसर जगहन में नगर बसाएस। 7परमेस्सर उज्जियाह क पलिस्तियन अउर अरबियन जउन गुर्बाल नगर में रहत रहेन अउर मूनियन क खिलाफ जुद्ध करइ में मदद किहेन। 8अम्मोनी उज्जियाह क नज़राना (कर) देत रहेन। उज्जियाह क नाउँ मिस्त्र क सीमा तलक प्रसिद्ध होइ गवा। काहेकि उ बहोत सक्तीसाली रहा।

9उज्जियाह यरूसलेम में कोने क फाटक पड़, घाटी क फाटक पड़ अउर देवारे क मुड़इ क जगहन पड़ मीनारन बनावास। उज्जियाह ओन मीनारन क दृढ़ बनाएस। 10उज्जियाह मीनारन क रेगिस्ताने में बनाएस। उ बहोत स कुएँ भी खोदवास। ओकरे लगे पहाड़ी देसन अउर मइदानी छेत्र में बहोत स गोरूअन रहेन। उज्जियाह क लगे पर्वतन में अउर जहाँ अच्छी उपज होत रही, उ भुइँया में किसान रहेन। उ अइसे मनइयन क भी रखे भए रहा जउन ओन खेतन क रखवारी करत रहेन जेनमाँ अंगूर रहेन। ओका खेती स पिरेम रहा।

11उज्जियाह क लगे प्रसिच्छित फउजियन क एक फउज रही। उ सबइ फउजी सचिव यीएल अउर अधिकारी मासेयाह जरिये बर्गन में बेटे रहेन। हनन्याह ओनकर प्रमुखन रहा। यीएल अउर मासेयाह ओन फउजियन क गनेस अउर ओनका बर्गन में रखेस। हनन्याह राजा क अधिकारियन में स एक रहा। 12फउजियन क ऊपर दुइ हजार छः सौ प्रमुखन रहेन। 13उ पचे परिवार परिवार प्रमुखन तीन लाख सात हजार पाँच सौ मनसेधुअन क उ फउज क अधिपति रहेन जउन बड़की सक्ती स लड़त रहिन। उ सबइ फउजी राजा क दुस्मनन क बिरुद्ध मदद करत रहेन। 14उज्जियाह फउज क ढार, भालन, टोप, कवच, धनुस अउ गुल्लेन बरे पाथर दिहे रहा। 15यरूसलेम में उज्जियाह जउन यन्त्र बनाएस

उ बुद्धिमानन क आविस्कार रहेन। उ सबइ यन्त्र मीनारन अउ कोने क देवारन पड़ रखे गए रहेन। इ सबइ यन्त्र क बड़के पाथर लोकावइ अउर बाण चलावइ बरे प्रयोग रहेन। उज्जियाह प्रसिद्ध होइ गवा। लोग ओकर नाउँ दूर-दूर क देसन में जानत रहेन। ओकरे लगे बड़की मदद रही अउर उ सक्तीसाली राजा होइ गवा।

16किन्तु जब उज्जियाह सक्तीसाली होइ गवा, तउ ओकर घमण्ड ओकरे नस्ट क कारण बनेस। उ यहोवा आपन परमेस्सर यहोवा क मन्दिर में वेदी पड़ सुगन्धित बारइ बरे जाइ क धोका दिहस। 17याजक अजर्याह अउर यहोवा क अस्सी हिम्मती याजक सेवक उज्जियाह क पाछे मन्दिर में गएन। 18उ पचे उज्जियाह स कहेन कि तू गलत अहा। उ पचे ओहसे कहेन, “उज्जियाह यहोवा क बरे सुगन्धि बारब तोहार काम नहीं अहइ। याजक, हारून क संतान ही सिरिफ यहोवा बरे सुगन्धि बारत हीं। एन याजकन क सुगन्धि बारइ क पवितर सेवा क बरे प्रसिच्छण दीन्ह गवा अउर समर्पित कीन्ह गवा ह। सब स जियादा पवितर ठउर स बाहेर निकरि जा तू यहोवा परमेस्सर क धोका देत ह। उ तोहका एकरे बरे सम्मान नहीं देइ।”

19मुला उज्जियाह कोहाइ गवा। ओकरे हाथे में सुगन्धि बारइ बरे एक ठु खोरा रहा। जउने समइ उज्जियाह याजकन पड़ बहोत कोहाइ गवा, उहइ समइ माथे पड़ कोढ़ होइ गवा। इ याजकन क समन्वा यहोवा क मन्दिर में सुगन्धि बारइ क वेदी क लगे भवा। 20प्रमुख याजक अजर्याह अउ सबहिं याजकन उज्जियाह क लखेन। उ पचे ओकरे माथे पड़ कोढ़ देखत रहेन। याजकन हाली स उज्जियाह क मन्दिर स बाहेर जाइ क मजबूर किहन। उज्जियाह खुद ही हाली स बाहेर गएस काहेकि यहोवा ओका सजा दइ दिहे रहा। 21राजा उज्जियाह मउत तलक कोढ़ी रहा। उ यहोवा क मन्दिर में प्रवेस नहीं कइ सकत रहा। उ दूसर घरन स दूर एक अलग घरे में रहेन। उज्जियाह क पूत योताम राजमहल क कब्जा में रखेस अउर लोगन क प्रसासक रहेन।

22उज्जियाह सुरु स लइके आखीर तलक जउन कछू किहस उ यसायाह नबी क जरिये लिखा गवा। यसायाह क बाप यामोस रहा। 23उज्जियाह मरा अउर अपने पुरखन क लगे दफनावा गवा। उज्जियाह क राजा लोगन क कब्रिस्तान क लगे मैदान में दफनावा गवा। काहे? काहेकि लोग कहेन, “उज्जियाह क कोढ़ अहइ।” योताम उज्जियाह क जगह पड़ नवा राजा भवा। योताम उज्जियाह क पूत रहा।

### यहूदा क राजा योताम

**27** योताम पचीस बरिस क रहा जब उ राजा भवा। उ सोलह बरिस तलक यरूसलेम में हुकूमत किहस। ओकरी महतारी क नाउँ यरूसा रहा। यरूसा सादोक क बिटिया रही। 2योताम उ काम किहस जेका यहोवा नीक समुझत ह। उ परमेस्सर क आग्या क पालन वइसे ही किहस जइसे ओकर बाप उज्जियाह किहे रहा। मुला योताम यहोवा क मन्दिर में सुगन्धि बारइ क बरे उहइ तरह नहीं घुसा जइसे ओकर बाप घुसा रहा। मुला लोग बुरा काम करब जारी रखेन। 3योताम यहोवा क मन्दिर क ऊपरी दुआर

क दुबारा बनाएँ। उ ओपेल नाउँ क जगह पइ बहोत स निर्माण कार्य सुरू किहस। 4योताम यहूदा क पहाड़ी पहुँटा में नगर बनाएँ। योताम मीनार अउर किलन जंगलन में बनाएँ। 5योताम अम्मोनी लोगन क राजा अउर ओकरी फउज क खिलाफ लड़ा अउ ओनका हराएँ। एह बरे हर साल तीन बरिस तलक अम्मोनी लोग योताम क पौने चार टन चाँदी, बासठ हजार बुसल गोहूँ अउर बासठ बुसल जौ देत रहेन।

6योताम सक्तीसाली होइ गवा काहेकि उ बिस्सास पूर्वक यहोवा, अपने परमेस्सर क आग्या क पालन किहस। 7योताम दूसर जउन कछू भी किहस अउ ओकर सबहिं जुद्ध “यहूदा अउ इस्राएल क राजा लोगन क इतिहास” क पुस्तक में लिखे भए अहई। 8योताम जब राजा भवा, पच्चीस बरिस क रहा। उ यरूसलेम में सोलह बरिस हुकूमत किहस। 9तब योताम मरा अउर अपने पुरखन क संग दफनावा गवा। लोग ओका दाऊद क नगर में दफनाएँ। योताम क जगह पइ आहाज राजा भवा। आहाज योताम क पूत रहा।

### यहूदा क राजा आहाज

**28** आहाज बीस बरिस क रहा जब उ राजा भवा। उ यरूसलेम में सोलह बरिस तलक राज् किहस। आहाज उ नाही किहस जेका ओकर पुरखन दाऊद किहस जेका यहोवा नीक समुझत ह। 2आहाज इस्राएली राजा लोगन क बुरे उदाहरणन क अनुसरण किहस। उ बाल-देवता क पूजा क बरे मूरतियन क बनावइ क बरे साँचे क उपयोग किहस। 3आहाज हिन्नोम क घाटी में सुगन्धि बारेस। उ अपने पूतन क आगी में जराइके बलि भेंट किहस। उ उ सबइ सब भयंकर पाप किहस जेका उ पहुँटा में रहइवाले मनइयन किहे रहेन। ओन सबइ पापन क करण यहोवा ओन मनइयन क बाहेर जाइ क मजबूर किहे रहा जब इस्राएल क लोग उ भुइँया में आएँ रहेन। 4आहाज बलि भेंट किहस अउर सुगन्धि क ऊँची जगहियन अर्थात पहाड़ियन अउर हर एक हरियर बृच्छ क खाले बारेस।

5आहाज पाप किहस, एह बरे यहोवा, ओकर परमेस्सर अराम क राजा क ओका पराजित करइ दिहस। अराम क राजा अउर ओकर फउज आहाज क हराएँ अउर यहूदा क अनेक लोगन क बन्दी बनाएँ। अराम क राजा ओन बन्दिन क दमिस्क नगर क लइ गवा। यहोवा इस्राएल क राजा अउर रमल्याह क पूत पेकह क भी आहाज क पराजित करइ दिहस। 6पेकह अउर ओकर फउज एक दिन में यहूदा क एक लाख बीस हजार बीर फउजियन क मार डाएँ। पेकह यहूदा क ओन लोगन क एह बरे हराएँ कि उ पचे उ यहोवा, परमेस्सर क आग्या क पालन करइ बन्द कइ दिहस जेकर आग्या ओनकर पुरखन मानत रहेन। 7जिक्री एप्रैमी क एक बीर सिपाही रहा। जिक्री राजा आहाज क पूत मासेयाह अउ राजमहल क सरंछक अधिकारी अज्रीकाम अउ एलकाना क मार डाएँ। एलकाना राजा क ठीक पाछे दूसर सक्ती रहा।

8इस्राएल क फउज यहूदा में रहइवाले दुइ लाख अपने निचके सम्बन्धियन क धरेस। उ पचे मेहररुअन, बच्चन

अउर यहूदा स बहोत कीमती चिजियन लिहस। इस्राएली ओन बन्दिन अउर ओन चिजियन क सोमरोन नगर क लइ आएँ। 9मुला हुवाँ यहोवा क एक नबी रहा। इ नबी क नाउँ ओदेद रहा। ओदेद इस्राएल क इ सेना स मिला जउन सोमरोन लउटि आइ। ओदेद इस्राएल क सेना स कहेस, “यहोवा परमेस्सर जेकर आग्या तोहरे पुरखन मानेन, तोहका यहूदा क लोगन क हरावइ दिहन काहेकि उ ओन पइ कोहान रहा। तू लोग यहूदा क लोगन क बहोत क्रूरता स मारया अउर दण्डित किहा। अब परमेस्सर तू पचनपइ कोहान अहइ। 10तू पचे यहूदा अउ यरूसलेम क लोगन क दास क तरह रखइ क जोजना बनावत अहा। तू लोग भी यहोवा, अपने परमेस्सर क बिरुद्ध पाप किहा ह। 11अब मोर सुना। अपने जउने भाई बहिनियन क तू लोग बन्दी बनाया ह ओनका वापस कइ दया। इ करा काहेकि यहोवा क भयंकर किरोध तोहरे पचनक बिरुद्ध अहइ।”

12तब एप्रैम क कछू प्रमुखन इस्राएल क फउजियन क जुद्ध स लउटिके घर आवत लख्या। उ सबइ प्रमुखन इस्राएल क फउजियन स मिलेन अउर ओनका चितउनी दिहन। उ पचे प्रमुख योहानान क पूत अजय्याह, मसिल्लेमोत क पूत बेरेक्याह, सल्लूम क पूत यहिजकिय्याह अउर हदलै क पूत अमासा रहेन। 13ओन प्रमुखन इस्राएली फउजियन स कहेन, “यहूदा क बन्दिन क हिआँ जिन लिआवा। जदि तू इ करत अहा तउ इ हम लोगन क यहोवा क बिरुद्ध बुरा पाप कराइ। उ हमरे पाप अउर अपराध क अउर जियादा बुरा करी अउ यहोवा इस्राएलियन क बिरुद्ध बहोत कोहान होइ।”

14एह बरे फउजियन बन्दिन अउ कीमती चिजियन क ओन प्रमुखन अउ इस्राएल क लोगन क दइ दिहस। 15उ सबइ प्रमुखन खड़े भएँ अउर उ पचे बन्दिन क मदद किहन। एन चारिहुँ मनइयन ओन ओढनन क लिहन जउन इस्राएली फउज लिहे रही अउर एका ओन लोगन क दिहस जउन नंगे रहेन। ओन प्रमुख ओन लोगन क जूते भी दिहन। उ पचे यहूदा क बन्दिन क कछू खाइ अउर पिअइ क दिहन। उ पचे ओन लोगन क ओकर घाव क नरम करइ बरे अउ उपचार बरे तेल मलेन। तब एप्रैम क प्रमुख लोग कमजोर बन्दिन क गदहन पइ चढ़ाएँ अउर ओनका ओनके घर खजूर क बृच्छ क नगर यरीहो में ओनके परिवारन क लगे लइ गएँ। तब उ सबइ चारिहुँ प्रमुख अपने घर सोमरोन क लउटि गएँ।

16-17उहइ समइ, एदोम क लोग फुन आएँ अउर उ पचे यहूदा क लोगन क हराएँ। एदोमी लोग लोगन क बन्दी बनाएँ अउर ओनका बन्दी क रुप में लइ गएँ। एह बरे राजा आहाज अस्सूर क राजा स मदद माँगैस। 18पलिस्ती लोग भी पहाड़ी क नगरन अउर दक्खिन यहूदा पइ हमला किहन। पलिस्ती लोग बेतसेमेस, अथ्यालोन, गदरोत, सोको, तिम्ना अउर गिमजो नाउँ क नगरन पइ कब्जा कइ लिहन। उ पचे ओन नगरन क लगे क गाँवन पइ भी कब्जा कइ लिहन। तब ओन नगरन में पलिस्ती रहइ लागेन। 19यहोवा यहूदा बरे परेसानियन लाएँस काहेकि यहूदा क राजा आहाज यहूदा क लोगन क पाप करइ क बरे

प्रोत्साहित किहस। उ यहोवा क धोखा दिहस। 20अस्सूर क राजा तिलगतपिलनेसेर आवा अउर आहाज क मदद देइ क जगह पइ उ परेसानी दिहस। 21आहाज कछू कीमती चिजियन यहोवा क मन्दिर, राजमहल अउ राजकुमार भवन स एकट्ठा किहस। आहाज उ सबइ चिजियन अस्सूर क राजा क दिहस। किन्तु उ आहाज क मदद नहीं दिहस।

22आहाज क परेसानियन क समइ मैं उ अउर जियादा बुरे पाप किहस अउर यहोवा क अउर जियादा अबिस्सास जोगग बन गवा। 23उ दमिस्क क लोगन क जरिये पूजे जाइवाले देवतन क बलि भेंट किहस। दमिस्क क लोग आहाज क पराजित किहे रहेन। एह बरे उ मन ही मन सोचे रहा, “अराम क लोगन क देवतन क पूजा ओनका मदद दिहस। जदि मई ओन देवतन क बलि भेंट करउँ तउ संभव अहइ, उ पचे मोर भी मदद करई।” आहाज ओन देवतन क पूजा किहस। किन्तु एँकर बवले ओका अउर इस्राएल क लोगन क पतन क कारण बनेस।

24आहाज यहोवा क मन्दिर स चिजियन बटोरेस अउर ओनकर टूकन कइ दिहस। तब उ यहोवा क मन्दिर क दरवाजन क बन्द कइ दिहस। उ वेदियन बनाएस अउर यरूसलेम मैं सड़क क हर मोड़ पइ ओनका रखेस। 25आहाज यहूदा क हर नगर मैं दूसर देवतन क पूजा अउर धूपबलि क बारइ बरे जँची जगह बनाएस। आहाज यहोवा ओकरे पिता क परमेस्सर क बहोत किरोधित कइ दिहस।

26आहाज सुरु स आखीर तलक जउन कछू दूसर किहस उ “यहूदा अउ इस्राएल क राजा लोगन क इतिहास” नाउँ क किताबे मैं लिखा अहइ। 27आहाज मरा अउर अपने पुरखन क संग दफनावा गवा। लोग आहाज क यरूसलेम नगर मैं दफनाएन। किन्तु उ पचे आहाज क उहइ कब्रिस्तान मैं नहीं दफनाएन जहाँ इस्राएल क राजा दफनाएन गए रहेन। आहाज क जगह पइ ओकर पूत हिजकिय्याह नवा राजा बना।

### यहूदा क राजा हिजकिय्याह

**29** हिजकिय्याह जब पच्चीस बरिस क रहा, राजा भवा। उ उनतीस बरिस तलक यरूसलेम मैं हुकूमत किहस। जकर्याह क बिटिया अबिव्याह ओकरी महतारी रही। 2हिजकिय्याह उहइ किहस जेका ओकर पुरखा दाऊद किहस अउर जेका यहोवा नीक समुझत अहा।

3हिजकिय्याह यहोवा क मन्दिर क दरवाजन क जोड़ेस अउर ओनका मज़बूत किहस। हिजकिय्याह मन्दिर क फुन खोलेस। उ राजा होइ क पाछे, बरिस क पहिले महीने मैं इ किहस। 4हिजकिय्याह याजकन अउ लेवीबंसियन क एक बैठक मैं एक संग बइठाएस। उ मन्दिर क पूरब क दिसा मैं खुले अँगना मैं ओनके संग बैठक मैं सामिल भवा। 5हिजकिय्याह ओनसे कहेस, “मोर सुना, लेवीबंसियो। पवितर सेवा बरे अपने क तइयार करा। आपन आपका अउर यहोवा आपन पुरखन क परमेस्सर क मन्दिर क पवितर सेवा बरे तइयार करा। असुद्ध चिजियन क पवितर जगह स हटाइ द्या। 6हम लोगन क पुरखन, यहोवाह हम लोगन क परमेस्सर क धोखा दिहन। उ पचे उ काम किहेन जेका उ

बुरा समुझेन। उ पचे ओका छोड़ दिहस अउर आपन मुँह यहोवा क मन्दिर क ओर स दूर फरि लिहस। उ पचे आपन पीठ ओकर कइँती कइ दिहस। 7उ पचे मन्दिर क सुआगत कच्छ क दखाजे क बन्द कइ दिहन अउर दीपकन क बुझाइ दिहन। उ पचे सुगन्धि क बारब अउर इस्राएल क परमेस्सर क पवितर ठउर मैं होमबलि भेंट करब बन्द कइ दिहन। 8एह बरे, यहोवा यहूदा अउ यरूसलेम क लोगन पइ बहोत किरोधित भवा। यहोवा ओन लोगन क भयभीत अउर चकित दण्ड दिहस। तू अपनी आँखिन स एका लखि सकत ह। 9इहइ कारण अहइ कि हमार पुरखन जुद्ध मैं मारे गएन। हमरे पूत, बिटियन अउर मेहररुअन बन्दी बनाई गइन। 10एह बरे मई हिजकिय्याह इ निहचइ किहेउँ ह कि मई यहोवा, इस्राएल क परमेस्सर क संग एक वाचा करउँ। तब उ हम लोगन पइ आगे किरोधित नहीं होब। 11एह बरे मोर पूतन तू लोग सुस्त जिन हवा या अउर जियादा समइ नस्ट न करा। यहोवा तू लोगन क अपनी सेवा करे चुनेस ह। तू पचन्क ओकर सेवा करइ चाही अउर ओकरे बरे सुगन्धि बारइ चाही।”

12ओन लेवीबंसियन क इ सूची अहइ जउन हुवाँ रहेन अउर जउन कार्य सुरु किहन। कहाती परिवार क अमासै क पूत महत अउर अजर्याह क पूत योएल रहेन। मरारीत परिवार क अब्दी क पूत कीस अउर यहल्लेलेल क पूत अजर्याह रहेन। गेसोनी परिवार स जिम्मा क पूत योआह अउर योआह क पूत एदेन रहेन। 13एलिसापान क संतानन मैं स सिम्री अउर यूएल रहेन। आसाप क संतानन मैं जकर्याह अउर मत्न्याह रहेन। 14हेमान क संतानन मैं स यहूएल अउर सिमी रहेन। यदूतन क संतानन मैं स समायाह अउर उज्जीएल रहेन। 15तब एन लेवीबंसियन अपने भाइयन क एकट्ठा किहन अउर मन्दिर मैं पवितर सेवा बरे अपने क तइयार किहस। उ पचे राजा क ओन आदेसन क पालन किहन जउन यहोवा क लगे स आए रहेन। उ पचे यहोवा क मन्दिर मैं ओका स्वच्छ करइ गएन। 16याजक यहोवा क मन्दिर क भीतरी भाग मैं ओका स्वच्छ करइ गएन। उ पचे सभी असुद्ध चिजियन क बाहेर निकारेन जेनका उ पचे मन्दिर मैं पाएन। उ पचे असुद्ध चिजियन क यहोवा क मन्दिर क आँगन मैं लइ आएन। तब लेवीबंसी असुद्ध चिजियन क यहोवा क मन्दिर क अंगना मैं लइ आएन। तब लेवीबंसी असुद्ध चिजियन क किद्रोन क घाटी मैं लइ गएन। 17पहिले महीने क पहिले दिन लेवीबंसी अपने आपका पवितर करइ सुरु कइ दिहन। महीने क अठएँ दिन लेवीबंसी यहोवा क मन्दिर क दुआर मण्डप मैं आएन। आठ दिन अउर, उ पचे यहोवा क मन्दिर क पवितर करइ क कार्य जारी रखेन। उ पचे पहिले महीने क सोलहवें दिन इ काम पूरा किहन।

18तब उ पचे राजा हिजकिय्याह क लगे वापिस गएन। उ पचे ओहसे कहेन, “राजा हिजकिय्याह, हम लोग यहोवा क पूरे मन्दिर क साथ ही होमबलि चढ़ावइ बरे वेदी क भी ओकर सबइ बरतन क संग सुद्ध कइ दिहें। हम लोग पवितर रोटी प्रदर्सित करइवाले मेज अउ ओकरे बरे उपयोग मैं आवइवाली सबहि चिजियन क स्वच्छ कइ दिहें। 19ओन दिनन जब आहाज राजा रही उ परमेस्सर क बरे विरोध

किहस। उ बहोत स चिजियन हटाइ दिहे रहेन जउन मन्दिरे में रहिन। मुला हम लोग फुन ओन चिजियन क रख दिहा ह अउर ओनका पवित्तर कार्य बरे सुदुध कइ दिहा ह। उ पचे अब यहोवा क वेदी क समन्वा अहई।”

20राजा हिजकिय्याह नगर अधिकारियन क एकट्टा किहस अउर अगले भिंसारे उ यहोवा क मन्दिर गवा। 21उ सबइ सात तु बर्धा, सात तु भेइन, सात तु मेमनन अउ सात तु नान्ह बोकन लिआएन। उ सबइ जनावर यहूदा क राज क पापबलि बरे पवित्तर जगह अउ यहूदा क लोगन बरे रहेन। राजा हिजकिय्याह याजकन क जउन हारून क संतान रहेन, आदेस दिहस कि उ पचे ओन जनावरन क यहोवा क वेदी पइ चढ़ावई। 22एह बरे याजक लोग बर्धन क मार डाएन अउर ओनकर रक्त धइ लिहन। तब उ पचे बर्धन क रक्त वेदी पइ छिछकारेन। तब याजक लोग भेइन क मारेन अउर वेदी पइ भेइन क रक्त छिछकारेन। तब याजक लोग मेमनन क मारेन अउर ओनकर रक्त वेदी पइ छिछकारेन। 23-24तब याजक लोग बोकन क राजा अउर एक संग एकट्टे लोगन क समन्वा लिआएन। बोकन पापबलि रहेन। याजक लोग अपने हाथे बोकन पइ धरेन अउर ओनका मारेन। याजक लोग बोकन क रक्त स वेदी पइ पापबलि चढ़ाएन। उ पचे इ एह बरे किहन कि यहोवा इस्त्राएल क लोगन क छिमा कइ देइ। राजा कहेस कि होमबलि अउ पापबलि इस्त्राएल क सबहि लोगन क बरे होइहीं।

25राजा हिजकिय्याह लेवीबंसियन क यहोवा क मन्दिर में मंजीरन, तम्बूरन अउ वीणा क संग रखेन जइसा दाऊद, राजा क द्रस्टा गाद अउर नातान नबी आदेस दिहे रहा। इ आदेस यहवो क हिओँ स ओकर नबियन क जरिये स आवा रहा। 26इ रतह लेवीबंसी, दाऊद क गीत क बाजन क संग, अउर याजक अपनी तुरहियन क संग खड़े भएन।

27तब हिजकिय्याह होमबलि क बलि वेदी पइ चढ़ावइ क बरे आदेस दिहस। जब होमबलि देब सुरू भवा, यहोवा बरे गायन भी सुरू भवा। तुरहियन बजाई गइन अउर इस्त्राएल क राजा दाऊद क वाद्ययंत्र बजेन। 28सारी सभा दण्डवत किहस, गायकन गाएन अउर तुरही वादकन अपनी तुरहियन तब तलक बजाएन जब तलक होमबलि क चढ़ावा जाब पूरा नाहीं भवा।

29बलिदानन क पूरे होइ क पाछे राजा हिजकिय्याह अउर ओकरे संग क सबहि लोग निहुरेन अउर उ पचे उपासना किहन। 30राजा हिजकिय्याह अउर ओकर अधिकारि लोग लेवीबंसियन क यहोवा क स्तुति क आदेस दिहन। उ पचे ओन गीतन क गाएन जेनका दाऊद अउर द्रस्टा आसाप लिखे रहा। उ पचे यहोवा क स्तुति किहन अउर प्रसन्न भएन। उ पचे सबहि निहुरेन अउर उ पचे यहोवा क उपासना किहस। 31हिजकिय्याह कहेस, “यहूदा क लोगो, अब तू लोग खुद क यहोवा क अर्पित कइ चुका अहा। निचके आवा, बलि अउ धन्यवाद क भेंट यहोवा क मन्दिर में लिआवा।” तब लोग बलि अउ धन्यवाद क भेंट लिआएन। कउनो मनई, जउन चाहत रहा, उ होमबलि भी लिआवा। 32सभा क जरिये मन्दिर में लाइ गइ होमबलियन क संख्या इ रहा: सत्तर बर्धा, सौ भेइन अउर दुई सौ मेमनन। इ सबइ

सबहि जनावर यहोवा क होमबलि क रूप में बलि कीन्ह गएन। 33यहोवा क बरे पवित्तर भेंटन छ: सौ बर्धन अउर तीन हजार भेड़ी बोकन रहेन। 34मुला हुवाँ होमबलि बरे चढ़ावा गवा जनावरन क खाल उतारइ अउर ओका काटइ बरे प्रयाप्त याजकन नाहीं रहेन। एह बरे ओनकर सम्बन्धी लेवीबंसियन ओनकर मदद तब तलक किहन जब तलक काम पूरा न भवा अउर जब तलक दूसर याजक अपने क पवित्तर फउज क बरे तइयार न कइ सकेन। लेवीबंसी यहोवा क सेवा बरे अपने क तइयार करइ में जियादा याजकन क अपेच्छा जियादा लगनसील रहेन। 35हुवाँ अनेक होमबलि, मेलबलि क चर्बी अउ पेय भेंट चढ़िन। इ तरह यहोवा क मन्दिर में सेवा फुन सुरु भइ। 36हिजकिय्याह अउर सबहि लोग ओन चिजियन क बरे खुस रहेन जेनका यहोवा अपने लोगन क बरे बनाएस अउर उ सबइ खुस रहेन कि उ पचे ओनका ऐतनी हाली स किहन।

### हिजकिय्याह फसह पर्व मनावत ह

30 हिजकिय्याह इस्त्राएल अउ यहूदा क सबहि लोगन क सँदेसा पठाएस। उ एप्रैम अउ मनस्से क लोगन क भी पत्र लिखेस। हिजकिय्याह ओन सबहि लोगन क यरूसलेम में यहोवा क मन्दिर में आवइ बरे न्यैतेस जेहसे उ सबइ सबहि फसहपर्व यहोवा, इस्त्राएल क परमेस्सर बरे मनाइ सकई। 2हिजकिय्याह आपन सबहि अधिकारियन अउ यरूसलेम क सभा क संग फसह पर्व दूसरे महीने में मनावइ बरे राजी होइ गएन। 3उ सबइ फसह पर्व क नियमित समइ स न मनाइ सकई। काहे? काहेकि प्रायाप्त संख्या में याजक पवित्तर सेवा बरे अपने आप क तइयार नाहीं किहे रहा अउर दूसर कारण इ रहा कि लोग यरूसलेम में एकट्टे न होइ सके रहेन। 4इ सुझाव राजा हिजकिय्याह अउर पूरी सभा क सन्तुट्ट किहस। 5एह बरे उ पचे इस्त्राएल में बेर्सेबा नगर स लइके लगातार दान तलक हर एक जगह पइ घोसणा किहन। उ पचे लोगन स कहेन कि उ पचे यरूसलेम में यहोवा, इस्त्राएल क परमेस्सर बरे फसह पर्व मनावइ आवई। इस्त्राएल क बहोत बड़का समूह बहोत समइ स फसह पर्व उ तहर नाहीं मनाए रहा, जउने तरह मूसा क नेमन एका मनावइ क कहे रहेन। 6एह बरे दूत राजा क पत्र पूरे इस्त्राएल अउर यहूदा में लइ गएन। ओन पत्रन में इ लिखा रहा:

इस्त्राएल क सन्तानों, इब्राहीम, इसहाक अउर इस्त्राएल, जउन यहोवा, परमेस्सर क आग्या मानत रहेन ओकरे निअरे लोउटा। तब यहोवा तू लोगन क लगे वापस आइ जउन अस्सूर क राजा लोगन स बच गएन ह अउर अबहि तलक जिअत अहई। 7अपने पुरखन अउर भाइयन क तरह न बना। यहोवा ओनका परमेस्सर रहा, मुला उ पचे ओका धोखा दिहेन। एह बरे उ ओन लोगन क बर्बाद होइ दिहस। तू खुद अपनी आँखी स इ लिख सकत ह। 8अपने पुरखन क तरह हठी जिन बना। अपितु सच्चे हिरदइ स यहोवा क आग्या माना। सब स जियादा पवित्तर जगह पइ आवा। यहोवा सब स जियादा

पवित्र जगह क सदा ही क बरे पवित्र बनाएस ह। अपने यहोवा, परमेस्सर क सेवा करा। तब यहोवा क डरावना किरोध तोह पड़ स हट जाइ। 9जदि तू यहोवा क लगे लउटब्या अउर ओकरे आग्या मनब्या तब तोहार सम्बन्धी, भाइयन अउर बच्चन ओन लोगन क दया पड़हीं जउन ओनका बन्दी बनाएन ह अउर तोहार सम्बन्धी अउर बच्चन इ देस में लउटिहीं। यहोवा, तोहार परमेस्सर कृपालु अउ दयालु अहइ। जदि तू ओकरे लगे लउटब्या तउ उ तोहसे नाहीं मुरब्या।

10दूत एप्रैम अउ मनस्से क पहुँचन क सबहिं नगरन में गएन। उ पचे लगातार पूरे जबूलन देस में गएन। किन्तु लोग दून क हँसी उड़ाएन अउर ओनकर मजाक उड़ाएन। 11मुला आसेर, मनस्से अउ जबूलन देस क कछू लोग आपन क बिनम्र बनाएन अउर यरूसलेम गएन। 12यहूदा में परमेस्सर क सक्ती लोगन क संगठित किहस ताकि उ पचे राजा हिजकिय्याह अउ ओकरे अधिकारियन क आग्या क पालन कइ सकत ही। इ तरह उ पचे यहोवा क आग्या क पालन किहन।

13बहोत स लोग एक संग यरूसलेम, दूसरे महीने में अखमोरी रोटी क उत्सव मनावइ आएन। इ बहोत बड़ी भीड़ रही। 14ओन लोग यरूसलेम स लबार देवतन क वेदियन क हटाइ दिहन। उ पचे लबार देवतन क बरे सुगन्धि भेंट क वेदियन क भी हटाइ दिहन। उ पचे ओन वेदियन क किद्रोन क घाटी में लोकाइ दिहन। 15तब उ पचे फसह पर्व क मेमने क दूसर महीने क चौदहवें दिन मारेन। याजक अउ लेवीबंसी लज्जित भएन। एँह बरे उ पचे अपने क पवित्र सेवा बरे तइयार किहन। याजक अउर लेवीबंसी होमबलि यहोवा क मन्दिर में लइ आएन। 16मन्दिर में अपने बरे मुकरर जगह पड़ उ पचे वइसे ही बइठेन जइसा परमेस्सर क मनई मूसा क नेम में कहा गवा रहा। लेवीबंसी लोग याजकन क रक्त दिहन। तब याजक लोग रक्त क वेदी पड़ छिछकारेन। 17उ समूह में बहोत स लोग अइसे रहेन जउन अपने क पवित्र सेवा क बरे तइयार नाहीं किहे रहेन एह बरे उ पचे फसह पर्व क मेमने क मारइ क मँजूरी नाहीं पाइ सकेन। इहइ कारण रहा कि लेवीबंसी ओन सबहिं लोगन क बरे फसह पर्व क मेमने क मारइ क जिम्मेदार रहेन जउन सुद्ध नाहीं रहेन। लेवीबंसी हर एक मेमना क यहोवा क बरे पवित्र बनाएन।

18एप्रैम, मनस्से, इस्साकार अउर जबूलन क बहोत स लोग फसह पर्व उत्सव क बरे अपने क ठीक तरह स तइयार नाहीं किहे रहा। उ पचे फसह पर्व क मेमनन क खाएन जब कि उ पचे मूसा क नेम क अनुसार असुद्ध रहेन। मुला हिजकिय्याह ओन लोगन बरे पराथना किहस। एह बरे हिजकिय्याह इ पराथना किहस, “यहोवा, तू अच्छा अहा। 19इ सबइ लोग तू यहोवा हम लोगन क पुरखन क परमेस्सर क सेवा करइ बरे आपन पूरे दिल स तइयार रहेन। किन्तु उ पचे अपने क पवित्र सेवा में भाग लेइ बरे नेम क अनुसार सुद्ध न कइ सकेन। एँह बरे कृपा कइके ओन लोगन बरे प्रायश्चित्त करा।” 20यहोवा राजा हिजकिय्याह क

पराथना सुनेस। यहोवा लोगन क छिमा कइ दिहस। 21इस्त्राएल क संतानन यरूसलेम में अखमीरी रोटी क उत्सव सात दिन तलक मनाएन। उ पचे बहोत खुस रहेन। लेवीबंसी अउ याजक लोग अपनी पूरी सक्ती स हर एक दिन यहोवा क स्तुति किहन। 22राजा हिजकिय्याह ओन सबहिं लेवीबंसियन क उत्साहित किहस जउन अच्छी तरह समुझ गए रहेन कि यहोवा क सेवा कइसे कीन्ह जात ह। लोग सात दिन तलक पर्व मनाएन अउर मेलबलि चढ़ाएन। उ पचे अपने पुरखन क यहोवा परमेस्सर क धन्यवाद दिहन अउर ओकर स्तुति किहन।

23सबहिं लोग सात दिन अउर ठहरइ क सहमत होइ गएन। एह बरे उ पचे सात अउर दिना तलक बहोत खुसी स फसह पर्व मनाएन। 24यहूदा क राजा हिजकिय्याह उ सभा क एक हजार बर्धन अउ सात हजार भेड़िन मारइ अउर खाइ क बरे दिहस। प्रमुखन सभा क एक हजार बर्धन अउ दस हजार भेड़िन दिहन। बहोत स याजक लोग पवित्र सेवा बरे अपने क तइयार किहन। 25यहूदा क पूरी सभा, याजक, लेवीबंसी, इस्त्राएल स आवइवाली पूरी सभा अउर उ सबइ यात्री जउन इस्त्राएल स आए रहेन अउ यहूदा पहुँच गए रहेन, सबहिं लोग बहोत जियादा खुस रहेन। 26इ तरह यरूसलेम में बहोत आनन्द रहा। इ पर्व क समान कउनो भी पर्व इस्त्राएल क राजा, दाऊद क पूत सुलैमान क समइ क बाद स नाहीं भवा रहा। 27याजक अउ लेवीबंसी खड़े भएन अउर यहोवा स लोगन क आसीर्वाद देइ क कहेन। परमेस्सर ओनकर सुनेस। ओनकर पराथना सरग में यहोवा क पवित्र निवास तलक पहुँची।

### राजा हिजकिय्याह सुधार करत ह

**31** फसह पर्व क उत्सव पूरा भवा। इस्त्राएल क जउन लोग फसह पर्व क क बरे यरूसलेम में रहेन, उ पचे यहूदा क नगरन क चले गएन। तब उ पचे पाथर क ओन मूरतियन क नेस्तनाबूत किहन जउन ओन नगरन में रहिन। ओन पाथर क मूरतियन क पूजन लबार देवतन क रुप में होत रहा। ओन लोग असेरा क खम्भन क भी काट डाएन अउर उ पचे ओन ऊँची जगहियन अउर वेदियन क भी तोर डाएन जउन बिन्यामीन अउर यहूदा क पूरे देसन में रहेन। लोग एप्रैम अउर मनस्से क छेत्र में उहइ किहन। लोग इ तब किहन जब उ पचे लबार देवतन क पूजा क सबहिं चिजियन क नस्त नाहीं किहन। तब सबहिं इस्त्राएली अपने नगरन क घर लउट आएन।

2राजा हिजकिय्याह फुन याजकन अउ लेवीबंसियन क समूहन में बाँटिस अउर हर एक समूह क आपना बिसेस कार्य करब होत रहा। एह बरे राजा हिजकिय्याह ओन समूहन क आपन कार्य फुन स करइ क कहेस। एह बरे याजकन अउ लेवीबंसियन क फुन स होमबलि अउ मेलबलि चढ़ावइ क काम रहा। ओन क काम मन्दिर में सेवा करब, गाना अउ यहोवा क भवन क दुआर पड़ परमेस्सर क स्तुति करब रहा। 3हिजकिय्याह अपने गोरुअन में स कछू क होमबलि बरे दिहस। इ सबइ गोरु हर रोज भिंसारे अउ साँझ क होमबलि बरे प्रयोग में आवत रहेन। इ सबइ गोरु सबित क

दिनन में अउर नवचन्द्र क समइ अउर दूसर बिसेस उत्सवन पइ दीन्ह जात रहिन। इ वइसे ही कीन्ह जात रहा जइसा यहोवा क ब्यवस्था में लिखा अहइ। 4हिजकिय्याह यरूसलेम में रहइवाले लोगन क आदेस दिहस कि आपन अनाज क हींसा याजकन अउ लेवीबंसियन क देइँ। तबहिं याजक अउ लेवीबंसी आपन क यहोवा क नेम क अनुसार सेवा बरे देइ चाही रही। 5देस क चारिहुँ कइँती क लोग इ आदेस क बारे में सुनेन। एह बरे इस्राएल क लोग अपने कटा भवा अन्न, अंगूर, तेल, सहद अउ जउन कछू भी उ पचे अपने खेतन में उगावत रहने ओन सबहिं फसलन क पहिला हींसा दिहस। उ पचे स्वेच्छा स एन सबहिं चिजियन क दसवाँ हींसा लिआएन। 6इस्राएल अउ यहूदा क लोग जउन यहूदा क नगरन में रहत रहने अपने गोरुअन अउ भेड़िन क दसवाँ हींसा भी लिआएन। उ पचे ओन चिजियन क दसवाँ हींसा भी लिआएन जेका अलगाइ दीन्ह ग रहने अउर यहोवा ओनका परमेस्सर क अर्पित कीन्ह ग रहने। उ पचे ओन सबहिं चिजियन क अपने यहोवा, परमेस्सर क बरे लइके आएन। उ पचे ओन सबहिं चिजियन क ढेरन में धरेन।

7लोग तीसरे महीने में अपनी चिजियन क संग्रह क लिआउब सुरु किहने अउर उ पचे संग्रह क लिआउब सातवें महीने पूरा किहने। 8जब हिजकिय्याह अउ प्रमुख लोग आएन तउ उ पचे संग्रह कीन्ह गइ चिजियन क ढेरन क लखेन। उ पचे यहोवा क स्तुति किहने अउर इस्राएल क लोगन अर्थात यहोवा क लोगन क बड़कई किहने।

9तब हिजकिय्याह याजकन अउ लेवीबंसियन क ढेरन क सम्बंध में पूछेस। 10सादोक परिवार क मुख्य याजक अजर्याह हिजकिय्याह स कहेस, “उ समइ स जब स लोग भेंटन क यहोवा क मन्दिर में लिआउब सुरु कइ दिहने ह एह बरे हम लोगन क लगे खाइ बरे बहोत जियादा अहइ। हम लोग भर पेट खाए अउर अबहिं तलक हम लोगन क लगे बहोत बचा ह। यहोवा अपने लोगन क सच में आसीस दिहस ह। एह बरे हम लोगन क लगे इ सब बचा ह।”

11तब हिजकिय्याह याजकन क आदेस दिहस कि उ पचे यहोवा क मन्दिर में भण्डार घर तइयार रखइँ। एह बरे इ कीन्ह गवा। 12तब याजक लोग उपहार, भेंटन क दसमांस अउर दूसर चिजियन लिआएन जउन सिरिफ यहोवा क दीन्ह जाब रहिन। उ पचे सबहिं संग्रह कीन्ह गइ चिजियन मन्दिर क भण्डार घरन में रख दीन्ह गइने। लेवीबंसि कोनन्याह सबहिं संग्रह कीन्ह गइ चिजियन क अधीच्छक रहा। कोनन्याह क भाई सिमी ओन चिजियन क उपाधीच्छक रहा। 13कोनन्याह अउ ओकर भाई एन मनइयन क निरीच्छक रहने: अहीएल, अजज्याह, नहत, असाहेल, यरीमेत, योजाबाद, एलीएल, यिस्मक्याह, महत अउर बनायाह। राजा हिजकिय्याह अउ यहोवा क मन्दिर क अधीच्छक अधिकारी अजर्याह ओन मनइयन क चुनेस। 14यिम्ना लेवी क पूत कोरे ओन भेंटन क अधीच्छक रहा जेनका लोग स्वेच्छा स चढ़ावत रहने। उ ओन चिजियन क उत्तरदायी रहा जउन यहोवा क दीन्ह जात रहने अउ उ ओन उपहारन क बाँटइ क जिम्मेदार रहा जउन यहोवा बरे पवितर बनाई जात रहिन। कोरे पूर्वी दुआर क दुआरपाल रहा। 15एदेन, मिन्यामीन, येसू समायाह,

अमर्याह अउ सकन्याह कोरे क मदद करत रहने। उ सबइ लोग ईमानदारी स ओन नगरन में सेवा करत रहने जहाँ याजक रहते रहने। उ पचे बहोत महत्त्वपूर्ण अउर कम महत्त्वपूर्ण दुइँउ याजकन क समान मात्रा में चिजियन दिहने। 16इ सबइ लोग संग्रह कीन्ह भइ चिजियन क तीन बरिस अउ ओहसे जियादा उमिर क लरिकन अउर मनइयन क भी देत रहने जेनकर नाउँ लेविबंस क इतिहास में लिखा भवा रहने। एन सबहिं मनइयन यहोवा क मन्दिर में आपन हर दिन क सेवा अउर दूसर काम जेकर उ जिम्मेदार रहने, बरे जाइ क रहने। हरेक समूह क आपन नैतिक जिम्मेदारी रहने। 17याजकन क संग्रह कीन्ह भवा चिजियन स ओनकर हींसा दीन्ह जात रहने। परिवारिक आधार पइ, परिवार क इतिहास में लिखित सूची अनुसार इ कीन्ह गए रहने। बीस बरिस या ओहसे अधिक उमिर क लेवीबंसियन क संग्रह क ओनकर हींसा दीन्ह जात रहा। इ ओनकर जिम्मेदारी अउ वर्ग क अनुसार कीन्ह जात रहा। 18लेवीबंसियन क बच्चन, मेहररुअन, पूत अउ बितियन भी संग्रह चिजियन क आपन हींसा पावत रहने। इ ओन सबहिं लेवीबंसियन क बरे कीन्ह जात रहा जउन परिवार क इतिहासन में अंकित रहने। इ लेवीबंसियन बरे कीन्ह ग रहने ताकि उ पचे आपन आप क बिस्सास क संग पवितर राखेन अउर सेवा करइ बरे तइयार रहने। 19याजक हारून क कछू संतानन क लगे कछू खेती जोगग नगर क लगे हुवाँ रहने जहाँ लेवीबंसी रहत रहने अउर हारून क संतानन में स कछू नगरन में भी रहत रहने। ओन नगरन में स हर एक में हारून क एन संतानन क संग्रह चिजियन क हींसा देइ बरे मनई नामांकन क जरिये चुने जात रहने। मनसेधू अउर उ सबइ सबहिं जेनकर नाउँ लेवीबंस क इतिहास में रहा सबहिं संग्रह चिजियन क हींसा पानत रहने।

20इ तरह राजा हिजकिय्याह पूरे यहूदा में उ सबइ सब चिजियन क किहने। उ उहइ किहस जउन यहोवा, ओकरे परमेस्सर क दृष्टि में अच्छा, ठीक अउर बिस्सास जोगग रहा। 21उ जउन भी कार्य परमेस्सर क मन्दिर क सेवा में, नेमन व सबइ आग्या क पालन करइ में अउर अपने परमेस्सर क अनुसरण करइ में किहेस ओहमाँ ओक कामयाबी मिली। हिजकिय्याह इ सबइ सबहिं कार्य अपने पूरे हिरदइ स किहस।

### अस्सूर क राजा यहूदा पइ कब्जा करत ह

32 इ सबइ चिजियन क पाछे हिजकिय्याह बहोत बिस्सास पूर्वक कार्य किहस। अस्सूर क राजा सन्हेरीब यहूदा देस पइ हमला करइ आवा। सन्हेरीब अउर ओकर फउज किला क बाहेर डेरा डाएस। उ इ एह बरे किहस कि उ नगरन क जीतइ चाहत रहा। 2हिजकिय्याह जानत रहा कि उ यरूसलेम, एह पइ हमला करइ आवा ह। 3तब हिजकिय्याह आपन अधिकारियन अउर फउज क अधिकारियन स सलाह लिहस। उ पचे एकमत होइ गएन कि यरूसलेम क बाहेर क सोतन क पानी रोक दीन्ह जाइ। ओन अधिकारियन अउर फउज क अधिकारियन हिजकिय्याह क मदद किहने। 4बहोत स लोग एक संग आएन अउर

झरन अउर स्रोतन क जउन नगर क बीच स होइके बहत रहेन, रोक दिहन। उ पचे कहेन, “अस्सूर क राजा क हिऔं आए पइ बहोत जियादा पानी नाहीं मिली।” 5 हिजकिय्याह यरूसलेम क पहिले स जियादा मजबूत बनाएस। इ उ इ तरह किहस: उ देवार क टूटे हींसन क फुन बनवाएस। उ देवारन पइ मीनारन बनाएस, उ पहली देवार क बाहेर दूसर देवार बनवाएस। उ फुन पुरान यरूसलेम क पूरब कइँती दूसर देवार बनवाएस। उ अनेक हथियार अउर ढारन बनवाएस। 6 हिजकिय्याह फउज क अधिकारियन क लोगन क अधीच्छक होइ बरे चुनेस। उ एन अधिकारियन स नगर दुआर क बाहेर खुली जगह में मिला। हिजकिय्याह ओन अधिकारियन स सलाह किहस अउर ओनका उत्साहित किहस। 7 उ कहेस, “मजबूत अउर साहसी बना। अस्सूर क राजा या ओकरे संग क बिसाल फउज स जिन डेरावा, न ही ओहसे चिन्ता हवा। अस्सूर क राजा क लगे जउन सकती अहइ ओहसे भी बड़की सकती हम लोगन क संग अहइ। 8 अस्सूर क राजा क लगे सिरिफ मनई अहइँ। किन्तु हम लोगन क संग यहोवा, आपन परमेस्सर अहइ। हमार परमेस्सर हमार मदद करी। उ हमार जुद्ध खुद लड़ी।” इ तरह यहूदा क राजा हिजकिय्याह लोगन क उत्साहित किहस अउर ओनका पहिले स जियादा सक्तीसाली होइ क अनुभव कराएस।

9 अस्सूर क राजा सन्हेरीब अउर ओकर सारी फउज लाकीस नगर क लगे डेरा डाए पड़ी रही ताकि उ पचे एका हराइ सकइँ। तउ उ यरूसलेम में यहूदा क राजा हिजकिय्याह क लगे अउर यहूदा क सबहिँ लोगन क लगे आपन अधिकारियन पठाएस। सन्हेरीब क अधिकारियन हिजकिय्याह अउर यरूसलेम क सबहिँ लोगन क बरे एकटु सँदेसा लइ आएन। 10 उ पचे कहेन, “अस्सूर क राजा सन्हेरीब इ कहत ह: ‘तू केहमौं बिस्सास करत अहा जउन तोहमौं यरूसलेम में जुद्ध क स्थिति में ठहरब सिखावत ह? 11 हिजकिय्याह तू पचन्क मूरख बनावत ह। तू पचन्क यरूसलेम में ठहरे रखइ क बरे धोखा दीन्ह जात अहइ। इ तरह तू पसे भूख पियास स मार जाब्या। हिजकिय्याह तू पचन्स करत ह, “यहोवा, हमार परमेस्सर हम क अस्सूर क राजा स बचाई।” 12 हिजकिय्याह खुद यहोवा क ऊँच जगहियन अउर वेदियन क हटाएस ह। उ यहूदा अउ यरूसलेम क तू लोगन स कहेस कि तू लोगन क सिरिफ एक वेदी पइ उपासना करइ अउर सुगन्धि बारइ चाही। 13 निहचइ ही, तू पचे जानत अहा कि मोर पुरखन अउर मईँ दूसर देसन क लोगन क संग का किहेउँ ह? दूसर देसन क देवता अपने लोगन क नाहीं बचाइ सकेन। उ सबइ देवता मोका ओनके लोगन अउ ओकर देसन क नस्ट करइ स नाहीं रोक सकतेन। 14 मोर पुरखन ओन देसन क नस्ट किहन। कउनो भी अइसा देवता नाहीं जउन मोहसे अपने लोगन क नस्ट होइ स बचाइ लेई। एह बरे का तू सोचत ह कि तोहार देवता तोहका मोसे बचाइ लेई? 15 हिजकिय्याह क तू पचन्क मूरख बनावइ अउर गुमराह करइ जिन द्या। ओह पइ बिस्सास न करा काहेकि कउनो रास्ट्र या राज क कउनो देवता कबहुँ हम स या हमरे पुरखन स अपने लोगन क बचावइ में समर्थ नाहीं भवा ह।

एह बरे इ जिन सोचा कि तोहार देवता मोका तू पचन्क नस्ट करइ स रोक लेइ।”

16 अस्सूर क राजा क सेवक लोग एहसे भी बुरी बातन यहोवा परमेस्सर अउ परमेस्सर क सेवक हिजकिय्याह क खिलाफ कहेन। 17 अस्सूर क राजा अइसे पत्र भी लिखेस जउन इस्राएल क यहोवा परमेस्सर क अपमान करत रहेन। अस्सूर क राजा ओन पत्रन में स जउन कछू लिखा रहा उ इ अहइ: “दूसर राजन क देवता मोहसे नस्ट होइ स अपने लोगन क न बचाइ सकेन। उहइ तरह हिजकिय्याह क परमेस्सर अपने लोगन क मोरे जरिये नस्ट कीन्ह जाइ स नाहीं रोक सकत।” 18 तब अस्सूर क राजा क सेवक यरूसलेम क ओन लोगन पइ जोर स नरियानेन जउन नगर क देवार पइ रहेन। ओन सेवकन उ समइ हिब्रू भासा क प्रयोग किहन जब उ पचे देवार पइ क लोगन क बरे नरियानेन। अस्सूर क राजा क ओन सेवकन इ सब एह बरे किहन कि यरूसलेम क लोग डरि जाइँ। उ पचे उ सबइ बातन एह बरे कहेन कि यरूसलेम नगर पइ अधिकार कइ सकइँ। 19 उ अधिकारियन ओन देवतन क बिरूद्ध बुरी बातन कहेन जउन संसार क लोगन दुआरा पूजा जात रहेन। उ सबइ देवता सिरिफ अइसी चिजियन अहइँ जेनका मनइयन अपने हाथे स बनाएन ह। इहइ तरह ओन अधिकारियन भी यरूसलेम क परमेस्सर क खिलाफ बुरी बातन कहेन।

20 राजा हिजकिय्याह अउ आमोस क पूत यसायाह नबी इ समस्या क बारे में पराथना किहन। उ पचे जोर स सरग क गोहराएन। 21 तब यहोवा अस्सूर क राजा क खेमे में एक टु सरगदूत क पठाएस। उ सरगदूत अस्सूर क फउज क सब अधिकारियन, प्रमुखन अउर फउजियन क मार डाएन। एह बरे अस्सूर क राजा अपने देस में अपने घर लउट गवा अउर ओकर लोग ओहसे बहोत लजानेन। उ अपने देवता क मन्दिर में गवा अउर उहइ क पूतन में स कउनो ओका हुवाँ तरवार स मार डाएस। 22 इ तरह यहोवा हिजकिय्याह अउर यरूसलेम क लोगन क राजा सन्हेरीब अस्सूर क राजा अउर सबहिँ दूसर लोगन स बचाएस। यहोवा हिजकिय्याह अउर यरूसलेम क लोगन क देखभाल किहस। 23 बहोत स लोग यरूसलेम में यहोवा क बरे भेंट लिआएन। उ पचे यहूदा क राजा हिजकिय्याह क लगे कीमती चिजियन लइ आएन। उ समइ क पाछे सबहिँ रास्ट्र हिजिय्याह क सम्मान दिहन।

24 ओन दिन हिजकिय्याह बहोत बेराम पड़ा अउर मउत क निचके रहा। उ यहोवा स पराथना किहस। यहोवा हिजकिय्याह स बोला अउर ओका एकटु चीन्हा दिहस। 25 मुला हिजकिय्याह क हिरदइ घमण्ड स भरि गवा एह बरे उ परमेस्सर क कृपा बरे परमेस्सर क धन्नवाद नाहीं किहस। इहइ कारण अहइ कि परमेस्सर हिजकिय्याह अउ यरूसलेम अउ यहूदा क लोगन पइ कोहाइ गवा। 26 मुला हिजकिय्याह अउ यरूसलेम में रहइवाले लोग आपन हिरदइ अउ जिन्नगी क बदल दिहेन। उ पचे बिनम्र होइ गएन अउर घमण्ड करब तजि दिहन। एह बरे जब तलक हिजकिय्याह जितत रहा यहोवा क किरोध ओह पइ नाहीं उतरा।

27 हिजकिय्याह क बहोत धन अउ सम्मान प्राप्त रहा। उ चाँदी, सोना, कीमती रतन, मसालन, ढारन अउर दूसरी कीमती चिजियन क रखइ बरे महल बनाए रहेन। 28 हिजकिय्याह लोगन क जरिये पठए गए अनाज, नवा दाखरस अउ तेल क बरे भण्डारण भवन बनाएन। ओकरे लगे गोरुअन क बरे पसु-सालन अउर भेड़िन क बरे भेड़-सालन रहिन। 29 हिजकिय्याह बहोत स नगर भी बनाएस अउर ओका अनेक गोरुअन क झुण्ड अउ भेड़िन क रवेड़न मिलिन। परमेस्सर हिजकिय्याह क बहोत जियादा धन दिहस। 30 इ हिजकिय्याह ही रहा जउन यरूसलेम में गिहोन सोते क ऊपरी जलधारन क उद्गमन क रोकेस अउर ऐकर जलधारन क नगर क भीतर स दाऊद नगर क पच्छिम क कइँती मोड़ दिहस। अउर हिजकिय्याह ओन सब में सफल रहा जउन कछू उ किहस।

31 कउनो समइ बाबुल क प्रमुखन हिजकिय्याह क लगे दूत पठएन। ओन दूतन एक चमत्कारिक चिन्ह क बारे में पूछेन जउन रास्ट्रन में परगट भवा रहा।\* जब उ पचे आएन तउ परमेस्सर हिजकिय्याह क अकेले छोड़ दिहस जेहसे कि उ अपनी जाँच कइ सकइ अउर उ सब कछू जान सकइ जउन हिजकिय्याह क हिरदइ में रहा।

32 हिजकिय्याह क बाकी कामन अउर कइसे उ यहोवा क परिम किहस क विवरण आमोस क पूत यसायाह नबी क दर्सन ग्रन्थ अउर “यहूदा अउ इस्त्राएल क राजा लोगन क इतिहास” क किताब में लिखा भावा ह। 33 हिजकिय्याह मरा अउ अपने पुरखन क संग दफनावा गवा। लोग हिजकिय्याह क उ पहाड़ी पइ दफनाएन जहाँ दाऊद क पूतन क कब्रन अहई। जब उ मरा तउ यहूदा क सबहि लोग अउ यरूसलेम क रहइवालन हिजकिय्याह क सम्मान दिहन। हिजकिय्याह क जगह पइ पनस्से नवा राजा भवा। मनस्से हिजकिय्याह क पूत रहा।

### यहूदा क राजा मनस्से

**33** मनस्से जब यहूदा क नवा राजा भवा उ बारह बरिस क राहा। उ यरूसलेम में पचपन बरिस तलक राजा रहा। 2 मनस्से उ सबइ सब कार्य किहस जेनका यहोवा गलत कहे रहा। उ दूसर रास्ट्रन क भयंकर अउर पापपूर्ण रीतियन क अनुसरण किहस। यहोवा ओन रास्ट्रन क बाहेर निकर जाइ क बरे मजबूर किहे रहा जब उ इस्त्राएल क लोगन क उ भुईया पइ लिआए रहा। 3 मनस्से फुन ओन ऊँच जगहन क बनाएस जेनका ओकर बाप हिजकिय्याह तोर गिराये रहा। मनस्से बाल देवतन बरे वेदियन बनाएस अउ असेरा खम्भन खड़े किहस। उ नछत्र-समूह क प्रणाम करत रहा अउ ओनका पूजत रहा। 4 मनस्से यहोवा क मन्दिर में लबार देवतन क बरे वेदियन बनाएस। यहोवा मन्दिर क बारे में कहे रहा, “मोर नाउँ यरूसलेम में सदा ही रही।” 5 मनस्से सबहि नछत्र-समूहन क बरे यहोवा क मन्दिर क दुइनउँ अंगनन में वेदियन बनाएस। 6 मनस्से अपने बेटवन क भी बलि बरे हिन्नोम क घाटी में बारेस। मनस्से सान्तिपाठ, दैवीकरण अउ भविस्स कथन क रूप में जादू-टोना क उपयोग किहस। उ ओइन अउ भूतसिद्धि करइवालन क

संग बातन किहस अउर उ यहोवा क दृष्टि में बहोत पाप किहस। मनस्से क पापन यहोवा क किरोधित किहन। 7 उ एक ठु देवता क मूर्ति बनाएस अउर ओका परमेस्सर क मन्दिर में धरेस। परमेस्सर दाऊद अउ ओकर पूत सुलैमान स मन्दिर क बारे में कहे रहा, “मई इ मन्दिर में अउर यरूसलेम में आपन नाउँ क स्थापित करब जेका मई इस्त्राएल क सबहि परिवार समूहन क नगरन क बीच स चुनेउँ ह, अउर हुवाँ मोर नाउँ हमेसा रहब। 8 मई फुन इस्त्राएलियन क उ भुईया स बाहेर नाहीं करब जेका मई ओनके पुरखन क देइ क बरे चुनेउँ। किन्तु ओनका ओन नेमन क बिधियन अउर आदेसन क पालन जरूर करइ चाही जेनका मई मूसा क ओनका देइ क हुकुम दिहेउँ।”

9 मनस्से यहूदा क लोगन अउर यरूसलेम में रहइवाले लोगन क पाप करइ बरे उ उत्साहित किहेउँ। उ ओन रास्ट्रन स भी जियादा पाप किहस जेनका यहोवा नस्ट किहे रहा अउर जउन इस्त्राएलियन स पहिले उ पहेँटा में रहेन।

10 यहोवा मनस्से अउर ओकरे लोगन स बातचीत किहस। किन्तु उ पचे सुनइ स इन्कार कइ दिहन। 11 एह बरे यहोवा यहूदा पइ हमला करइ क बरे अस्सूर क राजा क सेनापतियन क हुवाँ पहेँचाएस। एन सेनापतियन मनस्से क धइ लिहन अउर ओका बन्दी बनाइ लिहन। उ पचे ओका बेड़ियन पहिराइ दिहन अउर ओकरे हाथन में पीतर क जंजीरन डारन। उ पचे मनस्से क बन्दी बनाएन अउर ओका बाबुल देस लइ गएन। 12 मनस्से क कस्ट भवा। उ समइ उ यहोवा अपने परमेस्सर स याचना किहस। मनस्से खुद क अपने पुरखन क परमेस्सर क समन्वा बहोत विनम्र किहेस। 13 मनस्से परमेस्सर स पराथना किहस अउर परमेस्सर स मदद माँगेस। यहोवा मनस्से क याचना सुनेस अउ ओका ओह पइ दया आइ। यहोवा ओका यरूसलेम अपने सिंहासन पइ लउटइ क आदेस दिहस। तब मनस्से समुझेस कि यहोवा फुरइ परमेस्सर अहइ।

14 इ घटइ क पाछे, मनस्से दाऊद नगर क बरे बाहरी देवार बनाएस। इ गिहोन क पस्चिमी सोते तलक मछरी-फाटक क प्रवेस दुआर अउर ओपेल पहाड़ी क चारिहुँ कइँती तलक गएन। उ देवार क बहोत ऊँच बनाएस। तब उ अधिकारियन क यहूदा क सबहि किलन में रखेस। 15 मनस्से यहोवा क मन्दिर स दूसर रास्ट्रन क देवतन अउ मूर्तियन क हटाइ दिहस। उ ओन सबहि वेदियन क लोकाएस जेनका उ मन्दिर क पहाड़ी पइ अउ यरूसलेम में बनाएस। मनस्से ओन सबहि वेदियन क यरूसलेम नगर स बाहेर लोकाएस। 16 तब उ यहोवा क वेदी पुनः एकत्र किहस अउ मेलबलि अउ धन्यवाद भेंट एह पइ चढ़ाएस। मनस्से यहूदा क सबहि लोगन क इस्त्राएल क यहोवा परमेस्सर क सेवा करइ क आदेस दिहस। 17 लोग ऊँच जगहियन पइ बलि देब जारी रखेस, मुला ओनकर भेंटन केवल यहोवा ओनके परमेस्सर बरे रहिन।

18 मनस्से जउन कछू दूसर किहस अउर ओकर परमेस्सर स पराथनन अउ ओन द्रस्टा लोगन क कथन जउन इस्त्राएल क यहोवा परमेस्सर क नाउँ पइ ओहसे बातन किहे रहा, उ सबइ सबहि इस्त्राएल क राजा नाउँ क किताबे में लिखी



अहईं। 19मनस्से कइसे पराथना किहस अउर परमेस्सर कइसे सुनेस अउर ओह पइ दाय़ा किहस, इ “द्रस्टा लोगन क पुस्तक” में लिखा अहइ। मनस्से क सबहिं पाप अउ बुराइयन जउन उ खुद क बिनम्र कइ स पहिले किहस अउर उ सबइ जगह जहाँ उ ऊँच जगह बनाएस अउर असेरा-खम्भा खड़ा किहस भी “दसी लोगन क पुस्तक” में दर्ज अहईं। 20मनस्से मरि गवा, अउर उ जगह पइ दफनावा गवा जहाँ पइ ओकर पूरखन क दफनावा गवा रहा। लोग मनस्से क ओकर महल में दफनाएन। मनस्से क जगह पइ ओकर पूत आमोन नवा राजा भवा।

### यहूदा क राजा आमोन

21आमोन जब यहूदा क राजा भवा, बाईस बरिस क रहा। उ दुइ बरिस तलक यरूसलेम में हुकूमत किहस। 22आमोन ठीक वइसा ही किहस जइसा ओकर बाप किहे रहा, उ उ काम किहस जेका यहोवा बुरा समुझत ह। आमोन सबहिं खुदी मूरतियन अउ अपने बाप मनस्से क बनाई मूरतियन क बलि चढ़ाएस। आमोन ओन मूरतियन क लगे निहुरेस अउर ओनकर पूजा किहस। 23आमोन खुद क अपने बाप मनस्से क तरह यहोवा क समन्वा विनम्र नाहीं बनाएस। आमोन जियादा स जियादा पाप करत गवा। 24आमोन क सेवकन ओकरे बिरुद्ध योजना बनाएन उ पचे आमोन क ओकरे घरे में मार डिएन। 25मुला यहूदा क लोग ओन सबहिं सेवकन क मार डिएन जउन राजा आमोन क बिरुद्ध योजना बनाए रहेन। तब लोग योसियाह क नवा राजा चुनेन। योसियाह आमोन क पूत रहा।

### यहूदा क राजा योसियाह

34 योसियाह जब राजा बना, आठ बरिस क रहा। उ यरूसलेम में इकतीस बरिस तलक राजा रहा। 2योसियाह आपन पुरखा दाऊद क तरह उहइ किहस जेका यहोवा नीक समुझत ह। योसियाह दाऊद क राह स नाहीं मुड़स, न दायों अउर न ही बायों। उचित काम करइ स नाहीं हटा। 3जब योसियाह आठ बरिस तलक राजा रहि चुका, तउ उ परमेस्सर क, अपने पुरखा दाऊद क परमेस्सर क अनुसरण करइ लाग। योसियाह लरिका ही रहा जब उ परमेस्सर क आग्या क पालन सुरू किहस। जब योसियाह राजा क रूप में बारह बरिस क भवा, उ ऊँच जगहन, असेरा खम्भन पइ खुदी मूरतियन अउ यहूदा अउ यरूसलेम में ढरी मूरतियन क नस्ट करब सुरू कइ दिहस। 4लोग बाल देवतन क वेदियन योसियाह क समन्वा तोर दिहन। तब योसियाह ओन सुगन्धित वेदियन क नस्ट कइ डिएन जउन ओन वेदियन क ऊपर रहेन जउन कि बाल क अर्पित कीन्ह गए रहेन। उ खुदी भवा अउर ढरी भवा मूरतियन क तोर डिएन अउर उ ओन मूरतियन क पीस कइ धूरि बनाइ दिहन। तब योसियाह ओन चूरा क ओन लोगन क कब्रन पइ छिड़केस जउन बाल देवतन क बलि चढ़ावत रहेन। 5योसियाह ओन याजकन क हड्डियन तलक क बारेस जउन अपनी वेदियन पइ बाल देवतन क सेवा किहे रहेन। इ तरह योसियाह मूरतियन अउ मूरति पूजा क यहूदा अउ यरूसलेम

स नस्ट किहस। 6योसियाह इहइ काम मनस्से, एप्रैम, सिमोन अउ नप्ताली तलक क राजन क नगरन में किहस। उ उहइ काम ओन सबइ नजिक क नगरन क खण्डहर संग किहस। 7योसियाह वेदियन अउर असेरा खम्भन क तोर दिहस। उ मूरतियन क पीटिके चूरा बनाइ दिहस। उ पूरे इस्त्राएल देस में ओन सुगन्धि वेदियन क काट डिएस जउन बाल क पूजा में काम आवाति रहिन। तब योसियाह यरूसलेम लउट गवा।

8जब योसियाह यहूदा क राजा क रूप में अपने अट्टारहवें बरिस में रहा, उ असल्याह क पूत सापान नगर क प्रमुख मासेयाह अउर योआहाज क पूत लिपिक योआह क अपने यहोवा परमेस्सर मन्दिर क मरम्मत करइ क बरे पठएस।

योसियाह यहूदा अउर मन्दिर क स्वच्छ रखइ बरे मन्दिर क फुन मरमत करइ क आदेस दिहस। 9उ सबइ लोग महा याजक हिल्कियाह क लगे आएन। उ पचे उ धन ओका दिहन जउन लोग परमेस्सर क मन्दिर बरे दिहे रहेन। लेवीबंसी दुआरपालन इ धन मनस्से, एप्रैम अउर बचे सबहिं इस्त्राएलियन स बटोरेन। उ पचे इ धन सारे यहूदा, बिन्यामीन अउर यरूसलेम में रहइवाले सबहिं लोगन स भी बटोरेन। 10तब लेवीबंसी ओन मनइयन क इ धन दिहन जउन यहोवा क मन्दिर क काम क देख-रेख करत रहेन अउर निरीच्छकन ओन मजदूरन क इ धन दिहन जउन यहोवा क मन्दिर क फुन बनाइके स्थापित करत रहेन। 11उ पचे बड़इयन अउ राज-मिस्तरियन क पहिले स कटी बड़की चट्टानन क बेसहइ क बरे अउर काठ खरीदइ क बरे धन दिहन। काठे क उपयोग भवनन क फुन स बनावइ अउ भवन क सहतीरन क बरे कीन्ह गवा। भूतकाल में यहूदा क राजा मन्दिरन क देखभाल नाहीं करत रहेन। उ सबइ भवनन पुराने अउर खंडहर होइ गए रहेन। 12लोग बिस्सासपूर्वक काम किहन। ओनकर निरीच्छक यहत अउ ओबद्याह रहेन। यहत अउ ओबद्याह लेवीबंसी रहेन अउर उ पचे मरारी क परिवार स रहेन। दूसर निरीच्छक जकर्याह अउर मसुल्लाम रहेन। उ पचे कहात क परिवार स रहेन। 13जउन लेवीबंसी संगीत बाजा बजावइ में कुसल रहेन, उ पचे मजदूरन क अउर दूसर काम करइवाले कर्मचारियन क भी निरीच्छण करत रहेन। कछू लेवीबंसी सचिव, अधिकारी अउर दुआरपाल क काम करत रहेन।

### व्यवस्था क पुस्तक मिली

14लेवीबंसियन उ धन क निकारेन जउन यहोवा क मन्दिर में रहा। उ समइ याजक हिल्कियाह यहोवा क व्यवस्था क उ किताब प्राप्त किहस जउन मूसा क जरिये दिन्ह गइ रही। 15हिल्कियाह सचिव सापान स कहेस, “मईं यहोवा क मन्दिर में व्यवस्था क किताब पाएँ ह।” हिल्कियाह सापान क किताब दिहस। 16सापान उ किताब क राजा योसियाह क लगे लिआवा। सापान राजा क खबर दिहस, “तोहरे सेबक हर काम करत अहईं जउन तू करइ क कह्या ह। 17उ पचे यहोवा क मन्दिर स धन क निकारेन अउर ओका निरीच्छकन अउ मजदूरन क देत अहईं।” 18तब सापान राजा

योसियाह स कहेस, “याजक हिल्कियाह मोका एक ठु किताब दिहेस ह।” तब सापन राजा क मोजूदगी में किताब स पढ़ेन। 19जब राजा योसियाह नेमन क पढ़े जात भए सुनेस, उ अपने ओढ़ना फार डाएस। 20तब राजा योसियाह हिल्कियाह, सापान क पूत अहीकाम, मीका क पूत अब्दोन, सचिव सापान अउ सेवक असायाह क आदेस दिहेस। 21राजा कहेस, “जा, मोरे बरे अउ इस्राएल अउ यहूदा में जउन लोग बचे अहई ओनके बरे यहोवा स याचना करा। जउन किताब मिली बाटइ ओकरे कथनन क बारे में पूछा। यहोवा हम लोगन पड़ बहोत कोहान अहइ काहेकि हमार पुरखन यहोवा क कथनन क पालन नाहीं किहन। उ पचे उ सबइ काम नाहीं किहन जउन इ पुस्तक करइ क कहत ह।”

22हिल्कियाह अउर राजा क सेवकन नबिया हुल्दा क लगे गएन, हुल्दा सल्लूम क मेहरारु रही। सल्लूम तोखत क पूत रहा। तोखत हस्त्रा क पूत रहा। हस्त्रा राजा क ओढ़नन क देखरेख करत रहा। हुल्दा यरूसलेम क नवे हीसा में रहत रही। हिल्कियाह अउर राजा क सेवक लोग हुल्दा क सब कछू बताएन जउन होइ चुका रहा। 23हुल्दा ओनसे कहेस, “इस्राएल क परमेस्सर यहोवा जउन कहत ह उ इ अहइ: राजा योसियाह स कहा: 24यहोवा जउन कहत ह उ इ अहइ, ‘मई इ जगह जउ हिआँ क निवासियन पड़ बिपति डाउब। मई सबहिं भयंकर बिपतियन क जउन यहूदा क राजा क समन्ना बाचेउँ किताबे में लिखी गई अहई, लिआउब। 25मई इ एह बरे करब कि लोग मोका छोड़ें अउ दूसर देवतन क बरे सुगन्धि बारेन। ओन लोग उ सबइ बुरे कामन क कारण जउन उ पचे किहेन मोका किरोधित किहस। एह बरे मई आपन किरोध इ जगह पड़ डारब। मोर किरोध उ आगी क नाई होइ जेका बुझइ नाहीं जा सकत ह?’

26“किन्तु यहूदा क राजा योसियाह स कहा। उ यहोवा स पूछइ क बरे तोहका पठएस। इस्राएल क यहोवा परमेस्सर, ‘जउन कथनन क तू कछू समइ पहिले सुन्याह, ओनके बारे में कहत ह: 27योसियाह तू पस्चताप किहा अउर तू अपने क मोर समन्वा बिनम्र किहा। तू मोर समन्वा चिचियाएस जब तू सुनेस ह कि मई इ जगह अउर हिवाँ रहइवालगन लोगन क खिलाफ, बोलेस रहा। एह बरे मई तोहार बिनती सुनेस ह। 28मई तोहका तोहरे पुरखन क लगे लइ जाब। तू अपनी कब्र में सान्तिपूर्वक जाब्या। तोहका ओन बिपतियन में स कउनो भी नाहीं लखइ क पड़िहीं जेनका मई इ जगह अउर हिआँ रहइवाले लोगन पड़ लिआउब।” हिल्कियाह अउर राजा क सेवक योसियाह क लगे इ सँदेसा लइके लउटेन।

29राजा योसियाह अउर यहूदा अउ यरूसलेम क सबहिं अग्रजन क अपने लगे आवइ अउर मिलइ बरे बोलाएस। 30राजा, यहोवा क मन्दिर में गवा। यहूदा क सबहिं लोग, यरूसलेम में रहइवाले लोग, याजक, लेवीबंसी अउर सबहिं साधारण व असाधारण लोग योसियाह क संग रहेन। योसियाह ओन सब क समन्वा उ करार क किताब स वचन क बाँचिस जउन कि यहोवा क मन्दिर में मिली रही। 31तब राजा अपने जगह पड़ खड़ा भवा। उ यहोवा क संग

वाचा किहस। उ यहोवा क अनुसरण करइ क अउर यहोवा क आदेसन, बिधियन अउर नेमन क आपन पूरे हिरदइ अउर आपन पूरे जान स पालन करइ क वाचा किहस। उ इ किताब में लिखे करार क सब्दन क पालन करइ क सहमत भवा। 32तब योसियाह यरूसलेम अउ बिन्यामीन क सबहिं लोगन स परमेस्सर क वाचा क स्वीकार करइ क प्रतिग्या कराएस। यरूसलेम में लोग परमेस्सर, ओकर पुरखन क परमेस्सर क करार क पालन किहन। 33इस्राएल क लोगन क लगे बहोत स देस क मूरतियन रहिन। योसियाह ओन सबहिं भयानक मूरतियन क नस्ट कइ दिहेन। यहोवा ओन मूरतियन स घिना करत ह। योसियाह इस्राएल क हर एक मनई क अपने यहोवा परमेस्सर क सेवा में पहाँचाएस। जब तलक योसियाह जिअत रहा, लोग पुरखन क यहोवा परमेस्सर क आग्या क पालन करब बन्द नाहीं किहस।

### योसियाह फसह पर्व मनावत ह

35 यरूसलेम में राजा योसियाह यहोवा क बरे फसह पर्व मनाएस। पहिले महीने क चौदहवें दिन फसह पर्व क मेमना मारा गवा। 2योसियाह आपन आपन कार्य करइ बरे याजकन क चुनेस। उ याजकन क उत्साहित किहस, जब उ पचे यहोवा क मन्दिर में सेवा करत रहेन। 3योसियाह ओन लेवीबंसियन स बातन किहस जउन इस्राएल क लोगन क उपदेस देत रहेन अउ जउन यहोवा क बरे पवितर बनाए गए रहेन। उ ओन लेवीबंसियन स कहेस: “पवितर सन्दूख क उ मन्दिर में रखा जेका दाऊद क पूत, इस्राएल क राजा सुलैमान बनाए रहा। पवितर सन्दूख क अपने काँधे पड़ फुन एक जगह स दूसरे जगह पड़ जिन लइ जा। अब यहोवा आपन परमेस्सर क सेवा करा अउर परमेस्सर क लोग, इस्राएलियन क सेवा करा। 4अपने क, अपने परिवार समूहन क अनुसार मन्दिर क सेवा बरे तइयार करा। ओन कार्यन क करा जेनका राजा दाऊद अउ ओकर पूत राजा सुलैमान तोहका करइ क निर्देस लिखित रूप में दिहे रहा। 5हरेक परिवार समूहन, पवितर ठउर में लेविबंसियन क परिवार समूह क संग खड़ा भवा ताकि तू पचे आपन देस क बचा भवा लोगन क प्रस्तुत कइ सकब। 6फसह पर्व क मेमनन क मारा अउर यहोवा क बरे अपने क पवितर करा। मेमनन क अपने भाई इस्राएलियन क बरे तइयार करा। सब कछू वइसे ही करा जइसा करइ क आदेस यहोवा मूसा क जरिये दिहे रहा।”

7योसियाह इस्राएल क लोगन क तीस हजार भेड़ी-बोकरियन फसह पर्व क बलि बरे दिहस। उ लोगन क तीन हजार गोरु भी दिहस। इ सबइ सबहिं जनावर राजा योसियाह क अपने जनावरन में स रहेन। 8योसियाह क अधिकारियन भी, स्वेच्छा स लोगन क, याजकन क अउर लेवीबंसियन क फसह पर्व में उपयोग करइ बरे जनावरन अउ चिजियन दिहन। प्रमुख याजक हिल्कियाह, जकर्याह अउ यहीएल मन्दिर क उत्तरदायी अधिकारी रहेन। उ पचे याजकन क दुई हजार छः सौ मेमनन अउ बोकरन अउ तीन सौ बर्धन फसह पर्व बलि क बरे दिहन। 9कोनन्याह भी समायाह, नतनेल अउ ओकरे भाइयन क संग अउ हसब्याह, यीएल अउ

योजाबाद पाँच सौ भेड़िन-बोकरियन, पाँच सौ बर्धन फसह पर्व बलि क बरे लेवीबंसियन क दिहन। उ सबइ लोग लेवीबंसियन क प्रमुख रहेन।

10जब हर एक चीज फसह पर्व क सेवा सुरू करइ स पहिले तइयार होइ गइ, तउ याजक अउर लेवीबंसी लोग जगहन पइ गएन। इ उहइ भवा जउन राजा क आदेस रहा। 11फसह पर्व क मेमनन मारे गएन। तब लेवीबंसियन जनावारन क खाल उतारेन अउ याजकन क रक्त दिहन। याजक लोग रक्त क वेदी पइ छिछकारेन। 12तब उ पचे जनावारन क अलग अलग परिवार अमूहन क होमबलि में उपयोग क बरे दिहस। इ एह बरे कीन्ह गवा कि होमबलि उ तरह दीन्ह जाइ सकइ जउने तरह मूसा क नेमन सिखाए रहेन। 13लेवीबंसियन फसह पर्व क बलियन क आगी पइ इ तरह भूजेन जइसा ओनका आदेस दीन्ह गवा रहा अउर उ पचे पवित्र भेटन क हौड़ी, डेग अउ कड़ाहियन में पकाएन। तब उ पचे लोगन क हाली स मौस दिहन। 14जब इ पूरा भवा तब लेवीबंसियन क अपने बरे अउर ओन याजकन क बरे मौस मिला जउन हारून क संतान रहेन। ओन याजकन क काम करत करत भए अंधियारा होइ तलक काम में बहोत जियादा लगाए गवा रखा। उ पचे होमबलि अउर बलिदानन क चर्बी क भारत भए कड़ी मेहनत किहन। 15आसाप क परिवार क लेवीबंसी गायक ओन जगहन पइ पहोंचेन जेनका राजा दाऊद ओनके खड़े होइ क बरे चुने रहा। उ पचे आसाप, हेमान अउर राजा क नबी यदूतून रहेन। हर एक दुआरे पइ दुआरपाल अपनी जगह नाहीं छोड़ सकत रहेन काहेकि ओनकर लेवीबंसी भाइयन हर एक चीज ओनके फसह पर्व क बरे तइयार कइ दिहे रहेन।

16उ दिन सब कछू यहोवा क उपासना क बरे वइसा ही कीन्ह गवा रहा जइसा राजा योसियाह आदेस दिहस। फसह पर्व क त्यौहार मनावा गवा अउर होमबलि यहोवा क वेदी पइ चढ़ाई गइ। 17इस्त्राएल क जउन लोग हुवाँ रहेन उ पचे फसह पर्व मनाएन अउर अखमीरी रोटी क पर्व सात दिन तलक मनाएस। 18समूल नबी दिन स ही फसह पर्व इ तरह नाहीं मनावा गवा रहा। इस्त्राएल क कउनो राजा कबहुँ इ तरह फसह पर्व नाहीं मनाए रहेन। राजा योसियाह, याजक, लेवीबंसी अउर इस्त्राएल अउ यहूदा क लोग, यरूसलेम में सबहि लोगन क संग, फसह पर्व क बहोत ही बिसेस रुप म मनावा। 19इ फसह पर्व योसियाह क राजकाल क अट्ठारहवें बरिस मनावा गवा।

### योसियाह क मउत

20योसियाह जब मन्दिर क ओन अच्छे कामन क कइ चुका, तउ उ समइ मिस्र क राजा नको जुद्ध करइ बरे आपन फउज क परत नदी क बगल में स्थित कर्कमीस नगर पइ लइके आवा। नको मिस्र क राजा रहा। राजा योसियाह नको क खिलाफ लइइ बाहेर निकरा। 21किन्तु नको योसियाह क लगे दूत पठएस। उ पचे कहेन, “राजा योसियाह, इ जुद्ध तोहरे बरे समस्या नाहीं अहइ। मई तोहरे बिरुद्ध लइइ नाहीं आवा हउँ। मई अपने दुस्मम स लइइ आवा हउँ। परमेस्सर ओका हाली करइ क कहेस ह।

परमेस्सर मोरी कइँती बाटइ एह बरे मोका परेसान करा। जदि तू मोरे खिलाफ लइइया, परमेस्सर तोहका नस्ट कइ देइ।” 22मुला योसियाह हटा नाहीं। उ नको स जुद्ध करइ क निहचइ किहस, एह बरे उ आपन भेस बदलेस अउ जुद्ध करइ गवा। योसियाह ओका सुनइ स इन्कार कइ दिहस जउन नको परमेस्सर क आदेस क बारे में कहेस। योसियाह मगिदो क मइदान में जुद्ध करइ गवा। 23जउने समइ योसियाह जुद्ध में रहा, उ बाणन स बेध दीन्ह गवा। उ अपने सेवकन स कहेस, “मोका दूर लइ चला। मई बुरी तरह घायल हउँ।”

24एह बरे सेवकन योसियाह क रथे स बाहेर निकारेन, अउर ओका दूसरे रथ में बइठाएन जेका उ अपने संग जुद्ध में लिआवा रहा। तब उ पचे योसियाह क यरूसलेम लइ गएन। राजा योसियाह यरूसलेम में मरा। योसियाह क हुवाँ दफनावा गवा जहाँ ओकरे पुरखन दफनाए गए रहेन। यहूदा अउ यरूसलेम क सबहि लोग योसियाह क मरइ पर बहोत दुःखी रहेन। 25थिर्मयाह योसियाह क बरे कछू बहोत जियादा करुण गीत लिखेस अउर गाएस। आग भी सबहि मेहरारु-मनसेधू गाएक ओन “करुण गीतन” क गावत हीं। योसियाह क दुःखी क गीतन इस्त्राएलियन बरे रीति बन गवा। उ पचे गीत “करुण गीतन” क संग्रह में लिखे अहईं।

26-27दूसर जउन कछू योसियाह अपने राजकाल में, हुकुमत क सरू स आखीर तलक किहस, उ “यहूदा अउर इस्त्राएल क राजा लोगन क इतिहास” नाउँ क किताबे में लिखा गवा अहइ। उ किताब यहोवा क बरे ओकर भक्ति अउर उ यहोवा क नेमन क पालन कइसे किहस, हम लोगन क बतावत ह।

### यहूदा क राजा यहोआहाज

36 यहूदा क लोग यरूसलेम में नवा राजा क रूप में योसियाह क पूत यहोआहाज क ताजपोसी किहस। यहोआहाज जब यहूदा क राजा भवा, उ तेईस बरिस क रहा। उ यरूसलेम में तीन महीने राजा रहा। 3तब मिस्र क राजा नको यहोआहाज क बन्दी बनाइ लिहस। नको यहूदा क लोगन क पौने चार टन चाँदी अउ पचहत्तर पौण्ड सोना दण्डरासि देइ क मजबूर किहस। 4नको यहोआहाज क भाई क यहूदा अउ यरूसलेम क नवा राजा होइ क बरे चुनेस। यहोआहाज क भाई क नाउँ एल्याकीम रहा। तब नको एल्याकीम क एक नवा नाउँ दिहस। उ ओकर नाउँ यहोयाकीम रखेस किन्तु नको यहोआहाज क मिस्र लइ गवा।

### यहूदा क राजा यहोआकीम

5यहोआकीम उ समइ पच्चीस बरिस क रहा जब उ यहूदा क राजा भवा। उ गियारह बरिस तलक यरूसलेम में राजा रहा। यहोयाकीम उहइ किहस जेका यहोवा बुरा समुझत अहा। उ अपने यहोवा परमेस्सर क बिरुद्ध पाप किहस।

6बाबेल क राजा नबूकदनेस्सर यहूदा पइ हमला किहस। उ यहोयाकीम क बन्दी बनाएस अउर ओका काँसे क जंजीरन में डाएस। तब नबूकदनेस्सर राजा यहोयाकीम क

बाबेल लड़ गवा। 7नबूकदनेस्सर यहोवा क मन्दिर स कछू चिजियन लड़ गवा। उ ओन चिजियन क बाबेल लड़ गवा अउर अपने घर अर्थात राजमहल में रखेस। 8यहोवाकीम जउन दूसर काम किहस, जउन भयंकर पाप उ किहस अउर हर एक काम जेका करइ क उ अपराधी रहा, इ सबइ काम “यहूदा अउ इस्त्राएल क राजा लोगन क इतिहास” नाउँ किताबे में लिखे अहई।

यहोवाकीन, यहोवाकीम क जगह पड़ नवा राजा भवा। यहोवाकीन, यहोवाकीम क पूत रहा।

### यहूदा क राजा यहोवाकीन

9यहोवाकीन जब यहूदा क राजा भवा, अट्ठारह बरिस क रहा। उ यरूसलेम में तीन महीने दस दिन राजा रहा। उ उ सबइ काम किहस जेका यहोवा दुआरा बुरा समुझा जात रहा। 10बसन्त में राजा नबूकदनेस्सर कछू सेवकन क यहोवाकीन क धरइ क पठाए। उ पचे यहोवाकीन अउ यहोवा क मन्दिर में स कछू कीमती खजाना बाबेल लड़ गए। नबूकदनेस्सर सिदकिय्याह क यहूदा अउ यरूसलेम क नवा राजा होइ बरे चुनेस। सिदकिय्याह यहोवाकीन क सम्बन्धी रहा।

### यहूदा क राजा सिदकिय्याह

11सिदकिय्याह जब यहूदा क राजा बना, इक्कीस बरिस क रहा। उ यरूसलेम में गियारह बरिस तलक राजा रहा। 12सिदकिय्याह उहइ किहस जेका यहोवा दुआर बुरा समुझा जात रहा। यिर्मयाह नबी यहोवा कईंती स सँदिसन ओका दिहस मुला उ अपने क बिनम्र नहीं बनाएस अउर यिर्मयाह नबी जउन कहेस ओकर पालन नहीं किहस।

### यरूसलेम नेस्त नाबूद भवा

13सिदकिय्याह नबूकदनेस्सर क खिलाफ विद्रोह किहस। कछू समइ पहिले नबूकदनेस्सर सिदकिय्याह स प्रतिग्या कराए रहा कि उ नबूकदनेस्सर क बिस्सासपात्र रही। सिदकिय्याह परमेस्सर क नाउँ लिहस अउर नबूकदनेस्सर क बरे बिस्सासपात्र बने रहइ क प्रतिग्या किहस मुला सिदकिय्याह बहोत अड़ियल रहा अउर उ आपन जिन्नगी बदलइ, इस्त्राएल क यहोवा परमेस्सर क लगे लउटइ अउ ओकरी आग्या मानइ स इन्कार कइ दिहस। 14याजकन क सबहिं प्रमुखन अउ यहूदा क लोगन क प्रमुखन यहोवा क धोखा दिहस। उ पचे रास्ट्रन क भयंकर करमन स भी बुरा करम किहस। ओन प्रमुखन लोगन यहोवा क मन्दिर क अपमान किहेन जेका उ यरूसलेम में अर्पित किहे रहा। 15ओनके पुरखन क यहोवा

परमेस्सर अपने लोगन क चितउनी देइ क बरे बार बार नबियन क पठाएस। यहोवा इ एह बरे किहस कि ओका ओन पड़ कृपालु रही अउर मन्दिर क लिए दुःख रहा। 16किन्तु परमेस्सर क लोगन परमेस्सर क नबियन क मजाक उड़ाएन। उ पचे परमेस्सर क नबियन क सुनइ स इन्कार किहस। उ पचे परमेस्सर क संदेस क नकार दिहस। आखीर में परमेस्सर अपने लोगन पड़ ऐतना कोहान कि ओका रोकइ क बरे कछू भी नहीं रहा। 17एह बरे परमेस्सर बाबेल क राजा क यहूदा क लोगन पड़ हमला करइ बरे लिआवा। बाबेल क राजा जुवा मनइयन क मन्दिर में होइ प भी मार डाएस। उ यहूदा अउ यरूसलेम क लोगन पड़ दया नहीं किहस। बाबेल क राजा जुवा मनइयन, जुवा मेहररूअन अउ बूढ़ा मनइयन सबहिं लोगन क मारेस। परमेस्सर नबूकदनेस्सर क यहूदा अउ यरूसलेम क लोगन क दण्ड देइ दिहस। 18नबूकदनेस्सर परमेस्सर क मन्दिर क, राजा अउ राजा क अधिकारियन क सबहिं कीमती चिजियन लड़ लिहस।

19नबूकदनेस्सर अउ ओकर फउज मन्दिर क आगी लगाइ दिहस। उ पचे यरूसलेम क चहारदीवारी गियाइ दिहन अउर राजा अउ ओकरे अधिकारियन क सबहिं घरन क बार दिहन। उ पचे यरूसलेम स हर एक कीमती चीज लिहन या ओका नस्ट कइ दिहन। 20नबूकदनेस्सर एकरे पाछे भी जिअत बचे लोगन क, बाबुल लड़ गवा अउर ओनका दास होइ क मजबूर किहस। उ सबइ लोग बाबेल में दास क तरह तब तलक रहेन जब तलक फारस क सम्राट बाबेल क राज क पराजित नहीं किहस। 21इ तरह यहोवा, इस्त्राएल क लोगन क जउन कछू यिर्मयाह नबी स कहवावा, उ सबइ ठीक घटित भवा। यहोवा यिर्मयाह क जरिये कहे रहा: “इ जगह सतर बरिस तलक सूनी अउ उजाड़ देस रही। इ भूइँया क सबइ सबित विस्राम क खुसी मनावइ बरे होइ जेका लोग नहीं किहे रहा।”

22इ तब पहिले बरिस भवा जब फारस क राजा कुसू हुकूमत करत रहा। यहोवा कुसू क हिरदइ क एक खास प्रायश्चित करइ बरे उत्तेजित किहस ताकि जउन कछू यहोवा यिर्मयाह नबी क माध्यम स कहेस सबइ घटित सकतेन। जेहसे उ आदेस लिखेस अउर अपने राज में हर एक जगह पड़ पठाएस:

23फारस क राजा कुसू इहइ कहत ह: सरग क परमेस्सर यहोवा मोका पूरी पृथ्वी क राजा बनाएस ह। उ मोका अपने बरे एक मन्दिर यरूसलेम में बनावइ क जिम्मेदारी दिहस ह। अब तू सबहिं जउन परमेस्सर क लोग अहा, यरूसलेम जाइ क बरे अजाद हवा। यहोवा परमेस्सर तोहरे संग होइ।

# पहिला इतिहास

## आदम स नूह तलक परिवारे क इतिहास

- 1 1-3आदम, सेत, एनोस, केनान, महललेल, येरेद, हनोक, मतूसेलह, लेमेक, नूह।  
4नूह क पूत सेम, हाम अउ येपेत रहेन।

## येपेत क सन्तान

- 5येपेत क पूत गोमेर, मागोग, मादै, यावान, तूबल मेसेक अउर तीरास रहेन।  
6गोमेर क पूत असकनज, दीपत अउ तोगर्मा रहेन।  
7यावान क पूत एलीसा, तर्सीस, किती अउर रोदानी रहेन।

## हाम क सन्तान

- 8हाम क पूत कूस (मिस्त्रम), पूत अउ कनान रहेन।  
9कूस क पूत सबा, हबीला, सबाता, रामा अउर राब्तका रहेन। रामा क पूत सबा अउ ददान रहेन। 10कूस क संतान निम्रोद संसार में सब स जियादा सक्तीसाली बीर जोधा भवा।  
11मिस्त्र लूदी, अनामी, लहावी, नप्तही, 12फत्रूसी, कसलूही अउ कप्तोरी क बाप रहा। (पलिस्ती क लोग कसलूही क संतान रहेन।)  
13कनान सीदोन क बाप रहा। सीदोन ओकर पहिला पूत रहा। कनान, हितियन, 14यबूसी एमोरी, गिर्गासी, 15हिक्वी, अर्की, सीनी, 16अर्वदी, समारी अउ हमाती क लोगन क भी बाप रहा।

## सेम क सन्तान

- 17सेम क पूतन एलाम, अस्सूर, अर्पच्छद, लूद अउर अराम रहेन। अराम क पूत ऊस, हूल, गोतेर अउ मेसेक रहेन। 18अर्पच्छद सेलह क बाप रहा। सेलह एबेर क पिता रहा।  
19एबेर क दुइ पूत रहेन। एक ठु पूत क नाउँ पेलग रहा, काहेकि धरती क मनई ओकरे जीवनकाल में कइउ भाखन में बटे रहेन। पलेग क भाई क नाउँ योक्तान रहा। (20योक्तान स पइदा भए अल्मोदाद, सुलेप, हसमवित, येरह, 21हदोराम, ऊजाल, दिक्ला, 22एबाल, अबीमाएल, सबा, 23ओपीर, हवीला अउ योबाब, इ सबइ सब योक्तान क सन्तान रहेन।)

## इब्राहीम क परिवार

### सेम क सन्तान

- 24सेम, अर्पच्छद, सेलह, 25एबेर, पेलग, रु 26सरूम, नाहोर, तेरह 27अउर अब्राम (अब्राम क इब्राहीम भी कहा जात ह।)

28इब्राहीम क पूत इसहाक अउर इस्माएल रहेन। 29इ सबइ एकर सन्तान अहईँ:

### हाजिरा क सन्तान

इस्माएल क पहिला पूत नबायोत रहा। इस्माएल क दूसर पूत केदार, अदवेल, मिबसाम, 30मिस्मा, दूमा, मस्सा, हदद, तेमा, 31यतूर नापीस अउ केदमा रहेन। उ सबइ इस्माएल क पूत रहेन।

### कतूरा क पूतन

32कतूरा इब्राहीम क रखैल रही। उ जिम्नान, योच्छान, मदान, मिद्यान, यिसबाक अउ सूह क जन्म दिहस।  
योच्छान क पूत सबा अउ ददान रहेन।  
33मिद्यान क पूत एपा, एपेर, हनोक, अबीदा अउर एलदा रहेन। इ सबहिं कतूरा क पूत रहेन।

### सारा क पूतन

34इब्राहीम इसहाक क बाप रहा। इसहाक क पूत एसाव अउ इस्त्राएल रहेन। 35एसाव क पूत एलीपज, रुएल, यूस यालाम अउर कोरह रहेन।  
36एलीपज क पूत तेमान, ओमार, सपी, गाताम अउर कनज रहेन। एलीपज अउ तिम्ना क पूत अमोलेक नाउँ क रहा। 37रूएल क पूत नहत, जेरह, सम्मा अउ मिज्जा रहेन।

## सेईर क एदोमी

- 38सेईर क पूत लोतान, सोबाल, सिबोन, अना, दीसोन, एसेर अउ दीसान रहेन।  
39लोतान क पूत होरी अउ होमाम रहेन। लोतान क एक बहिन तिम्ना नाउँ क रही।  
40सोबाल क पूत अल्यान, मानहत, एबाल, सपी अउर ओनाम रहेन। सिबोन क पूत अय्या अउ अना रहेन।  
41अना क पूत दीसोन रहा।  
दीसोन क पूत हम्नान, एसबान, यिन्नान अउ करान रहेन।  
42एसेर क पूत बिल्हान, जावान अउ याकान रहेन।  
दीसोन क पूत ऊस अउ अरान रहेन।

## एदोम क राजा

43इस्त्राएल में राजा लोगन क होइ क बहोत पहिले एदोम में राजा रहेन। एदोम क राजा लोगन क नाउँ इ सबइ अहईँ: ओनकर नाउँ रहेन: बोर क पूत बेला पहिला राजा रहेन। बेला क नगर क नाउँ दिन्हाबा रहा।

44जब बेला मरा, तब जेरह क पूत योबाब नवा राजा बना। योबाब बोस्त्रा स आएस।

45जब योबाब मरा, हूसाम नवा राजा भवा। हूसाम तेमनी लोगन क देस क रहा।

46जब हूसाम मरा, हदद क पूत हदद नवा राजा बना। हदद मिद्दानियन क मोआब देस में हराएस। हदद नगर क नाउँ अवीत रहा।

47जब हदद मरा, सम्ला नवा राजा भवा। सम्ला मस्केकाइ क रहा।

48जब सम्ला मरा, साऊल नवा राजा बना। साऊल महानद क किनारे क रहोबोत क रहा।

49जब साऊल मरा, अकबोर क पूत बाल्हानान नवा राजा भवा।

50जब बाल्हानान मरा, हदद नवा राजा बना। हदद क नगर क नाउँ पउ रहा। हदद क मेहरारु क नाउँ महेतबेल रहा। महेतबेल मत्रेद क बिटिया रही। मत्रेद, मेज़ाहाब क बिटिया रही। 51तब हदद मरा।

एदोम क प्रमुख तिम्ना, अल्या, यतेत, 52ओहोलीवामा, एला, पीनोन, 53कनज, तेमान,मिबसार, 54मग्दीएल अउर ईराम रहेन। इ एदोम क प्रमुखन क एक ठु सूची अहइ।

### इस्त्राएल क पूतन

2 इस्त्राएल क पूत रुबेन, लेवी, यहूदा, इस्साकार, जबूलून, 2दान, यूसुफ, बिन्यामीन, नप्ताली, गाद अउर आसेर रहेन।

### यहूदो क पूतन

3यहूदा क पूत एर, ओनान अउ सेला रहेन। बतसू ओनकर महतारी रही। बतसू कनान क मेहरारु रही। यहोवा लखेस कि यहूदा क पहिला पूत एर बुरा अहइ। इहइ कारण रहा। कि यहोवा ओका मार डाले। 4यहूदा क पतोहू तामार पेरेस अउ जेरह क जन्म दिहस। इहइ प्रकार यहूदा क पाँच पूत रहेन।

5पेरेस क पूत हेस्त्रोन अउ हामूल रहेन।

6जेरह क पाँच पूत रहेन। उ पचे जिम्नी, एतान हेमान, कलकोल अउ दारा रहेन।

7जिम्नी क पूत कर्मी रहा। कर्मी क पूत आकान रहा। आकान उ मनई रहा जउन इस्त्राएल में बहोत परीसानी लाएस। उ लूट क सामान जउन जुद्ध में पाएस रख लिहस। ओका इ सबहि चिजियन क परमेस्सर क देइ क रही।

8एतान क पूत अजर्याह रहा। 9हेस्त्रोन क पूत यरहोल राम अउ कालेब रहेन।

### राम क सन्तान

10राम अम्मीनादाब क बाप रहा अउर अम्मीनादाब नहसोन क बाप रहा। नहसोन यहूदा क लोगन क प्रमुख रहा। 11नहसोन सल्मा क बाप रहा। सल्मा बोअज़ क बाप रहा। 12बोअज़ ओबेद क बाप रहा। ओबेद यिसै क बाप रहा। 13यिसै एलीआब क बाप रहा। एलीआब यिसै क पहिला पूत रहा। यिसै क दूसर पूत अबीनादाब रहा। ओकर

तीसर पूत सिमा रहा। 14नतनेल यिसै क चउथा पूत रहा। यिसै क पाँचवा पूत रदै रहा। 15ओसेम यिसै क छठा पूत रहा। अउर दाऊद ओकर सातवाँ पूत रहा। 16ओनकर बहिनियन सरुयाह अउ अबीगैल रहिन। सरुयाह क तीन पूत अबीसै, योआब अउ असाहेल रहेन। 17अबीगैल अमासा क महतारी रही। अमासा क बाप येतेर रहा। येतेर इस्त्राएली लोगन में स रहा।

### कालेब क सन्तान

18कालेब हेस्त्रोन क पूत रहा। कालेब क मेहरारु अजूबा स सन्तान भइल। अजूबा यरीओत क बिटिया रही। अजूबा क पूत येसेर सोबाब, अउर अर्देन रहेन। 19जब अजूबा मरी, कालेब एप्रात स बियाह किहस, कालेब अउ एप्रात क एक पूत रहा। उ पचे ओकर नाउँ हूर रखेन। 20हूर ऊरी क बाप रहा। ऊरी बसलेल का बापर रहा।

21जब हेस्त्रोन साठ बरिस क होइ गवा, उ माकीर क बिटिया क सादी किहस अउर उ सगूब क जन्म दिहस। माकीर गिलाद क पिता रहा। 22सगूब याईर क बाप रहा। याईर क लगे गिलाद देस में तेईस नगरन रहेन। 23किन्तु गसूर अउ अराम याईर क गाँवन क लइ लिहस। ओनके बीच कनत अउ एकरे चारिहुँ कइँती क नान्ह नगर रहेन। सब मिलाइके साठ नान्ह नगर रहेन। इ सबइ सबहि नगर गिलाद क बाप माकीर, क पूतन क रहेन।

24हेस्त्रोन, एप्राता क कालेब नगर में मरा। जब उ मर गवा, ओकर मेहरारु अबिय्याह ओकरे पूत क जन्म दिहस। पूत क नाउँ असहूर रहा। असहूर तको क बाप रहा।

### यरहोल क सन्तान

25यरहोल हेस्त्रोन क पहिला पूत रहा। यरहोल क पूत राम, बूना, ओरेन, ओसेम, अउ अहिय्याह रहेन। राम यरहोल क पहिला पूत रहा। 26यरहोल क दूसर मेहरारु अतारा रही। अतारा ओनाम क महतारी रही।

27यरहोल क पहिला पूत, राम क पूत मास, यामीन अउ एकेर रहेन।

28ओनाम क पूत सम्मै अउ यादा रहेन। सम्मै क पूत नदाब अउ अबीसूर रहेन।

29अबीसूर क मेहरारु क नाउँ अबीहैल रहा। ओनकर दुइ पूत रहेन। ओनकर नाउँ अहबान अउर मोलीद रहेन।

30नादाब क पूत सेलेद अउ अप्पैम रहेन। सेलेद बिना सन्तान मरा।

31अप्पैम क पूत यिसी रहा। यिसी क पूत सेसान रहा। सेसान क पूत अहलै रहा।

32यादा सम्मै क भाई रहा। यादा क पूत येतेर अउ योनातान रहेन। येतेर बिना सन्तान मरा।

33योनातान क पूत पेलेत अउ जाजा रहेन। इ यरहोल क सन्तान क सूची रही।

34सेसान क पूत नाहीं रहेन। ओका सिरिप बिटियन रहिन। सेसान क लगे यर्हा नाउँ क एक ठु मिस्त्री सेवक रहा।

35सेसान अपनी बिटिया क बियाह यर्हा क संग होइ दिहस। ओनकर एक पूत रहा। ओकर नाउँ अतै रहा।

36अतै, नातान क बाप रहा। नातान जाबाद क बाप रहा। 37जाबाद एपलाल क बाप रहा। एपलाल ओवेद क बाप रहा। 38ओवेद येहू क बाप रहा। येहू अजर्याह क बाप रहा। 39अजर्याह हेलेस क बाप रहा। हेलेस एलासा क बाप रहा। 40एलासा सिस्मै क बाप रहा। सिस्मै सल्लूम क बाप रहा। 41सल्लूम यकम्याह क बाप रहा अउ यकम्याह एलीसामा क बाप रहा।

### कालेब क परिवार

42कालेब यरहोल क भाई रहा। कालेब क कछू पूत रहेन। ओकर पहिला पूत मेसा रहा। मेसा जीप क बाप रहा। मारेसा हेब्रोन क बाप रहा।

43हेब्रोन क पूत कोरह, तप्पूह, रेकेम अउर सेमा रहेन। 44सेमा, रहम योर्काम क बाप रहा। रहम योर्काम क बाप रहा। रेकेम सम्मै क बाप रहा। 45सम्मै क पूत माओन रहा। माओन बेत्सूर क बाप रहा।

46कालेब क रखैल क नाउँ एपा रहा। एपा हारान, मोसा अउर गाजेज़ क महतारी रही। हारान, गाजेज़ क बाप रहा।

47याहदै क पूत रेगेम, योताम, गोसान, पेलेत, एपा अउर साप रहेन।

48माका, कालेब क दूसर रखैल रही। माका, सेबेर अउ तिर्हाना क महतारी रही। 49माका, साप अउ सबा क भी महतारी रही। साप, मदमन्ना क बाप रहा। सबा, मकबेना अउर गिबा क बाप रहा। कालेब क बिटिया अकसा रही।

50इ कालेब सन्तान न क सूची अहइ: हूर कालेब क पहिला पूत रहा। उ एप्राता क जन्म दिहेस। हूर क पूत सोबाल जउन किर्यत्यारीम क संस्थापक रहा, 51सल्मा, जउन बेतलेहेम क संस्थापक रहा। अउर हारेप बेतगादेर क संस्थापक रहा।

52सोबाल किर्यत्यारीम क संस्थापक रहा। इ सोबाल क सन्तानन क सूची अहइ: हारोए, मनुहोत क आधे लोग, 53अउर किर्यत्यारीम क परिवार समूह। इ सबइ यित्री, पूती, सूमाती अउर मिस्त्राई लोग अहइँ। सोराई अउ एस्ताओली लोग मिस्त्राई लोगन स निकरेन।

54इ सल्मा क सन्तानन क सूची अहइ: बेतलेहेम क लोग, नतोपाई, अत्रोत, बेत्योआब, ममाहत क आधे लोग, सोरी लोग, 55अउर ओन सास्त्रियन क परिवार जउन याबेस, तिराती, सिमाती अउर सूकाती में रहत रहेन। इ सबइ सास्त्री, उ सबइ कनानी लोग अहइँ जउन हम्मत स आपन। हम्मत बेतरेकाब क संस्थापक रहा।

### दाऊद क पूतन

3 दाऊद क कछू पूत हेब्रोन नगर में पइदा भए रहेन। दाऊद क पूतन क इ सूची अहइँ

दाऊद क पहिला पूत अम्मोन रहा। अम्मोन क महतारी अहीनोअम रही। उ यिज्रेली नगर क रही। दूसर पूत दानिय्येल रहा। ओकर महतारी अबीगैल-कर्मेल (यहूदा) क रही 2तीसर पूत अबसालोम रहा। ओकर महतारी तल्मै क बिटिया माका रही तल्मै गसूर क राजा रहा। चउथा पूत ओदानिय्याह रहा। ओकर महतारी हग्गीत रही।

3पाँचवा पूत सपत्याह रहा। ओकर महतारी अबीतल रही। छठा पूत यित्राम रहा। ओकर महतारी दाऊद क मेहरारु एगला रही। 4हेब्रोन में दाऊद क इ सबइ छः पूत पइदा भए रहेन।

दाऊद हुवाँ सात बरिस छः महीने सासन किहस। दाऊद, यरुसलेम में तैतीस बरिस राजा रहा।

5दाऊद क यरुसलेम में पइदा भए पूत इ सबइ रहेन:

चार बच्चे बतसेबा स पइदा भएन। बतसेबा अम्मीएल क बिटिया रही, सिमा, सोबाब, नातान अउ सुलैमान। 6-8दूसर नौ बच्चन इ सबइ रहेन: यिभार, एलीसामा, एलीपेलेत, नेगाह, नेपेग, यापी, एलीसामा, एल्यादा अउर एलीपेलेत। 9उ सबइ सबहिँ दाऊद क पूत रहेन। दाऊद क दूसर पूत रखैलन स रहेन। तामार दाऊद क बिटिया रही।

### दाऊद क समइ क पाछे क यहूदा क राजा

10सुलैमान क पूत रहबाम रहा अउर रहाबाम क पूत अबिय्याह रहा। अबिय्याह क पूत आसा रहा। आसा क पूत यहोसापात रहा। 11यहोसापात क पूत योराम रहा। योराम क पूत अहजयाह रहा। अहजयाह क पूत योआस रहा। 12योआस क पूत अमस्याह रहा। अमस्याह क पूत अज्याह रहा। अज्याह क पूत योताम रहा। 13योताम क पूत आहाज़ रहा। आहाज़ क पूत हिजकिय्याह रहा हिजकिय्याह क पूत मनस्से रहा। 14मनस्से क पूत आमोन रहा। आमोन क पूत योसिय्याह रहा।

15योसिय्याह क पूतन क सूची इ अहइ: पहिला पूत योहानान रहा। दूसर पूत यहोयाकीम रहा। तीसर पूत सिदकिय्याह रहा। चउथा पूत सल्लूम रहा।

16यहोयाकीम क पूत यकोन्याह, अउर ओकर पूत सिदकिय्याह रहेन।

### बाबुल क जरिये यहूदा क हराइ दिहे क

#### पाछे क दाऊद क बंसवली

17यकोन्याह क बाबुल में बन्दी होइ क पाछे यकोन्याह क पूतन क इ सूची अहइ। ओकर सन्तानन इ सबइ रहिन: सालतीएल, 18मल्कीराम, पदायाह, सेनास्सर, यकम्याह, होरामा अउर नदब्याह।

19पदायाह क पूत जरुब्बावेल अउ सिमी रहेन। जरुब्बावेल क पूत मसुल्लाम अउ हन्नयाह रहेन। सलोमीत ओनकर बहिन रही। 20जरुब्बावेल क दूसर पाँच पूत भी रहेन। ओनकर नाउँ हसूबा, ओहेल, बैरेक्याह, हसघाह, अउर यूसमेसेद रहा।

21हन्नयाह क सन्तानन: हन्नयाह क पूत पलत्याह, पलत्याह क पूत यसायाह, यसायाह क पूत रपायाह, रपायाह क पूत अर्नान, अर्नान क पूत ओबद्याह अउर ओबद्याह क पूत सकन्याह रहा।

22इ सूची तकन्याह क सन्तान समायाह क अहइ:

समायाह क छः पूत रहेन: समायाह, हत्सू अउर यिगाल, बारीह, नार्याह अउर सपात।

23नार्याह क तीन पूत रहेन। उ पचे एल्योएनै, हिजकिय्याह अउ अजीकाम रहेन।

24एल्योएनै क साप पूत रहेन। होदव्याह, एल्यासीब, पलायाह, अककूब, योहानान, दलायाह अउ अनानी रहेन

### यहूदा क दूसर परिवार समूह

4 इ यहूदा क पूतन क सूची अहइ: उ पचे पेरैस, हेस्त्रोन, कर्मी हूर अउ सोबाल रहेन।

2सोबाल क पूत रायाह रहा। रायाह, यहत क बाप रहा। यहत, अहूमै अउ लहद क बाप रहा। सोराई लोग अहूमै अउ लहद क सन्तान रहेन।

3पूताम क पूत यिज्जेल, यिस्मा, अउ यिद्वास रहेन अउर ओनकर एक बहिन हस्सलेलपोनी नाउँ क रहा।

4पनूएल गदोर क बाप रहा अउर एजेर रुसा क बाप रहा।

हूर क इ सबइ पूत रहेन: हूर एप्राता क पहिला पूर रहा अउर एप्राता बेतलहेम क संस्थापक रहा।

5तको क बाप असहूर रहा। तको क दुइ पत्नियन रहिन। ओनकर नाउँ हेबा अउ नारा रहा। 6नारा क अहुज्जाम, हेपेर, तेमनी अउ हाहस्तारी पूत रहेन। इ सबइ असहूर स नारा क पूत रहेन। 7हेला क पूत सेरेत, यिसहर अउ एत्नान अउ कोस रहेन। 8कोस आनूब अउ सोबेबा क बाप रहा। कोस, अहर्हेल परिवार समूह क भी बाप रहा। अहर्हेल हारून क पूत रहा।

9याबेस बहोत नीक मनई रहा। उ अपने भाइयन स जियादा आदरणीय रहा। ओकर महतारी कहेस, “मई ओकर नाउँ याबेस धरेउँ ह काहेकि मई उ समइ बड़ी पीरा में रही जब मई एका जन्म दिहेउ।” 10याबेस इस्राएल क परमेस्सर स पराथना किहस। याबेस कहेस, “मई चाहत हउँ कि तू मोका फुरइ आसीबादि द्या। मई चाहत हउँ कि तू मोका जियादा भुईया द्या। मोरे निचके रहई अउर कउनो क मोका चोट न पहेँचावइ देई। तब मोका कउनो कस्ट नाहीं होइ” अउर परमेस्सर याबेस क उ दिहस, जउन उ माँगिस।

11कलूब सूहा क भाई रहा। कलूब महीर क बाप रहा। महीर एस्तोन क बाप रहा। 12एस्तोन, बेतरामा, पासेह अउ तहिन्ना क बाप रहा। तहिन्ना ईर्नाहास क बाप रहा। उ सबइ लोग रेका स रहेन।

13कनज क पूत ओत्नीएल अउ सरायाह रहेन। ओत्नीएल क पूत हतत अउ ओनोतै रहेन। 14मोनोतै ओप्रा क बाप रहा। अउर सरायाह योआब क बाप रहा। योआब गेहरासीम क संस्थापक रहा। इ सबइ लोग इ नाउँ क उपयोग करत रहेन काहेकि उ पचे कारीगर रहेन।

15कालेब यपुन्ने क पूत रहा। कालेब क पूत इरू, एला अउ नाम रहेन। एला क पूत कनज रहा।

16यहल्लेलेल क पूत जीप, जीपा, तीरया अउ असरेल रहेन।

17-18एज्रा क पूत येतेर, मेरेद, एपेर अउ यालोन रहेन। मेरेद, मिय्यामि, सम्मै अउ यिसबह क बाप रहा। यिसबह, एस्तमो क बाप रहा। मेरेद क एक मेहरारु मिस्त्र क रही। ओकर पूत येरेद, हेबेर, अउर यकूतीएल रहेन। येरेद गदोर क बाप रहा। हेबेर सोको क बाप रहा अउर यकूतीएल जानोह क बाप रहा। इ सबइ बिल्या क पूत रहेन। बिल्या फिरौन क बितिया रही। उ मिस्त्र क मेरेद क पत्नी रही।

19मेरेद क मेहरारु नहम क बहिन रही। मेरेद क मेहरारु यहूदा क रही। मेरेद क मेहरारु क पूत कीला अउ एस्तमो क बाप रहेन। कीला गेरेमी लोगन में स रहा अउ एस्तमो माकाई लोगन में स रहा। 20सिमोन क पूत अम्मोन, रिन्ना बेन्हानान अउ तोलोन रहेन।

यिसी क पूत जोहेत अउर बेनजोहेत रहेन।

21-22सेला यहूदा क पूत रहा। सेला क पूत एर, लादा, योकीम, कोर्जवा क लोग, योआस, अउर साराप रहेन। एर लेका क बाप रहा। लदा मारेसा क बाप रहा अउर बेतेआसबे क सन कारीगरन क परिवार समूह क रहा। योआस अउ साराप मोआबी मेहरारुअन स बियाह किहस। तब उ पचे बेतलेहेम क लउट आएन। उ परिवार क बारे में लिखी गई सामग्री बहोत पुरानी अहइ। 23सेला उ सबइ पूत अइसे कारीगर रहेन जउन माटी स चिजियन बनावत रहेन। उ पचे नताईम अउ गदेरा में रहत रहेन। उ पचे ओन नगरन में रहत रहेन अउर राजा बरे काम करत रहेन।

### सिमोन क गदेलन

24सिमोन क पूत, नम्मूएल, यामीन, यारीब, जेरह अउर साऊल रहेन। 25साऊल क पूत सल्लूम रहा। सल्लूम क पूत मिबसाम रहा। मिबसाम क पूत मिस्मा रहा।

26मिस्मा क पूत हम्मूएल रहा। हम्मूएल क पूत जक्कूर रहा। जक्कूर क पूत सिमी रहा। 27सिमी क सोलह पूत अउ छः बिटियन रहिन। किन्तु सिमी क भाइयन क जियादा बच्चन नाहीं रहेन। सिमी क भाइयन क बड़के परिवार नाहीं रहेन। ओनकर परिवार ओतने बड़े नाहीं रहेन जेतने बड़के यहूदा क दूसर परिवार समूह रहेन।

28सिमी क बच्चन बेर्सना, मोलादा, हसर्सुआल, 29बिल्हा, एसेम, तोलाद, 30बतूएल होर्मा, सिकलग, 31बेत मर्काबोत, हसर्सुसीम, बेतबिरी, अउर सारैम में रहत रहेन। उ पचे ओन नगरन में तब तलक रहेन जब तलक दाऊद राजा नाहीं भवा। 32एन नगरन क समीप क पाँच गाँव एताम, ऐन, रिम्मोन, तोकेन अउ आसान रहेन। 33दूसर गाँव जइसे बाल बहोत दूर रहेन अउर उ पचे अपने परिवार क इतिहास भी लिखेन। 34-38इ सूची ओन लोगन क अहइ जउन अपने परिवार समूह क प्रमुख रहेन। उ पचे मसोबाब, यम्लेक, अमस्याह क पूत योसा, योएल, योसिय्याह क पूत येहू, सरायाह क पूत योसिय्याह, असीएल क पूत सरायाह, एल्योएनै, याकोबा, यसोहायाह, असायाह, अदीएल, यसीमीएल, बनायाह अउर सिपी क पूत जीजा रहेन। सिपी अल्लोल क पूत रहा। अउर अल्लोन यदायाह क पूत रहा। यदायाह सिम्री क पूत रहा। अउर सिम्री समायाह क पूत रहा।

एन मनसेधुअन क इ सबइ परिवार बहोत विस्तृत भएन।

39उ पचे गदोर नगर क बाहेर, घाटी क पूरब क छेत्र में गएन। उ पचे अपनी भेड़िन अउर गोरुअन बरे चरागाह हेरइ बरे उ जगह पइ गएन। 40ओनका बहोत घासवाले अच्छे मैदान मिलेन। उ पचे हुँवा बहोत जियादा अच्छी भुईया पाएन। उ पहेँटा सात्तिपूर्ण अउ सान्त रहा। पुराने जमाने में हिआँ हम लोगन क सन्तानन रहत रहिन। 41इ तब भवा जब हिजकिय्याह यहूदा क राजा रहा। उ पचे लोग गदोर



पहोचैन अउर हमीत लोगन स लड़ेन। उ पचे हमीत लोगन क डेसन क नस्ट कइ दिहन। उ सबइ लोग मूनी लोगन स भी लड़ेन जउन हुवाँ रहत रहेन। एन लोग सबहिं मूनी लोगन क नस्ट कइ डाएन। आजु भी एन जगहन में कउनो मूनी नाही अहई। एह बरे ओन लोग हुँवा रहब सुरु किहन। उ पचे हुवाँ रहइ लागेन। काहेकि ओनकर भेड़ियन बरे उ भुइया पइ घास रही। 42पाँच सौ लोग सिमोनी लोगन सिमोनी क पर्वत क छेत्र में गएन। सिमी क पूतन ओन लोगन क मार्ग दर्सन किहन। उ पचे पूतन रहेन: पलत्याह, नार्याह, रपायाह अउर उज्जीएल रहेन। सिमोनी लोग उ जगह पइ रहइवाले लोगन स लड़ेन। 43हुवाँ अबहिं थोड़े स सिरिफ अमेलेकी लोग रहत रहेन अउर एन सिमोनी लोग ओनका मारि दिहन अउर हुवाँ आजु तलक लगातार रहत आवत हीं।

### रूबेन क सन्तानन

5 1-3रूबेन इस्राएल क पहिला पूत रहा। रूबेन क सब स बड़के पूत होइ क बिसेस अधिकार प्राप्त होइ चाही रही। किन्तु रूबेन अपने बाप क पत्नी क संग सरीर क सम्बन्ध कायम किहस। एह बरे उ सबइ अधिकार यूसुफ क पूतन पाएन। परिवार क इतिहास में रूबेन क नाउँ पहिले पूत क रूप में लिखा नाही अहइ। यहूदा अपने भाइयन स जियादा बलवान होइ गवा, एह बरे ओकरे परिवार स प्रमुख आएन। किन्तु यूसुफ क परिवार उ सबइ दूसर अधिकार पाएन। जउन सब स बड़के पूत क मिलत रहिन। रूबेन क पूत हनोक, पल्लू अउर हेस्त्रोन अउ कर्मी रहेन।

4योएल क सन्तानन क नाउँ इ सबइ अहई: समायाह योएल क पूत रहा। गोग समायाह क पूत रहा। सिमी गोग क पूत रहा। 5मीका सिमी क पूत रहा। रायाह मीका क पूत रहा। बाल रायाह क पूत रहा। 6बेरा बाल क पूत रहा। अस्सूर क राजा तिलगत पिलनेसेर बेरा क आपन घर तजइ क मजबूर किहन। इ तरह बेरा राजा क बन्दी बना। बेरा रूबेन क परिवार समूह क प्रमुख रहा।

7योएल क भाइयन अउर ओकरे सारे परिवार समूहन क वइसे ही लिखा जात अहइ जइसे उ पचे परिवार क इतिहास में अहई: यीएल पहिला पूत रहा, तब जकर्याह 8अउ बेला अजाज क पूत रहा। अजाज सेमा क पूत रहा। सेमा योएल क पूत रहा। उ पचे अरोएर स लगातार नबो अउर बाल्मोन तलक क छेत्रन में रहत रहेन। 9बेला क लोग पूरब में परात नदी क लगे, रेगिस्ताने क किनारे तलक रहत रहेन। उ पचे उ जगह पइ रहत रहेन काहेकि गिलाद प्रदेश में ओनके लगे बहोत स बर्धा रहेन। 10जब साऊल राजा रहा, बेला क लोग हाग्री लोगन क खिलाफ जुद्ध किहन अउ ओनका हराएन। बेला क लोग ओन खेमन में रहेन जउन हाग्री लोगन क रहेन। उ पचे ओन खेमन में रहेन अउर गिलाद क पूरब क सारे छेत्र स होइके जात्रा करत रहेन।

### गाद क सन्तानन

11गाद क परिवार समूह क लोग रूबेन क परिवार समूह क लगे रहत रहेन। गादी लोग बासान क छेत्र में लगातार

सल्का नगर तलक रहत रहेन। 12बासान में योएल पहिला प्रमुख रहा। सापम दूसरा प्रमुख रहा। तब यानै प्रमुख भवा। 13ओकर परिवार स सात भाई इ सबइ रहेन: मीकाएल, मसुल्लाम, सेबा, यौरै, याकान जी अउर एबेर। 14उ सबइ लोग अबीहैल क सन्तान रहेन। अबीहैल सूरी क पूत रहा। हूरी याराह क पूत रहा। योराह गिलाद क पूत रहा। गिलाद मीकाएल क पूत रहा। मीकाएल यसीसै क पूत रहा। यसीसै यहदो क पूत रहा। यहदो बूज क पूत रहा। 15अही अब्दीएल क पूत रहा। अब्दीएल गूनी क पूत रहा। अही ओनके परिवार क प्रमुख रहा।

16गाद क परिवार समूह क लोग गिलाद छेत्र में रहत रहेन। उ पचे बासान छेत्र में बासान क चारिहुँ कइँती क नान्ह नगरन में अउ सारोन छेत्र क चारागाहन में ओकरी चउहदी तलक निवास करत रहेन।

17योनातान अउ यारोबाम क समइ में, एन सबहिं लोगन क नाउँ गाद क परिवार इतिहास में लिखे रहेन। योनातन यहूदा क राजा रहा। अउर यारोबाम इस्राएल क राजा रहा।

### जुद्ध में निपुण कलू फउजी

18मनस्से क परिवार क आधे तथा रूबेन अउ गाद क परिवार समूहन स चौवालीस हजार सात सौ साठ वीर जोधा जुद्ध क बरे तइयार रहेन। उ पचे जुद्ध में निपुण रहेन। उ पचे ढार-तरवार धारण अउ करत रहेन। उ पचे धनुस-बाण में भी कुसल रहेन। 19उ पचे हग्री अउ यतूर, नापीस अउ नोदाब लोगन क खिलाफ जुद्ध सुरु किहन। 20मनस्से, रूबेन अउ गाद परिवार समूह क ओन लोग जुद्ध में परमेस्सर स पराथना किहन। उ पचे परमेस्सर स मदद माँगिन काहेकि उ पचे ओह पइ बिस्सास करत रहेन। एह बरे परमेस्सर ओनकर मदद किहस। परमेस्सर ओनका हाग्री लोगन क पराजित करइ दिहस अउर ओन लोग दूसर लोगन क हराएन जउन हग्री लोगन क संग रहेन। 21उ पचे ओन जनावरन क लिहन जउन हग्री लोगन क रहेन। उ पचे पचास हजार ऊँट, ढाई लाख भेड़िन, दुइ हजार गदहन अउ एक लाख लोग लिहन।

22बहोत स हग्री लोग मारे गएन काहेकि परमेस्सर रूबेन क लोगन क खिलाफ जुद्ध जीतइ में मदद किहस। तब मनस्से, रूबेन अउ गाद क परिवार समूह क लोग हग्री लोगन क भूइँया पइ रहइ लागेन। उ पचे हुवाँ तब तलक रहत रहेन जब तलक बाबुल क फउज इस्राएल क लोगन क नाही लइ गइ अउर जब तलक बाबुल में बन्दी नाही बनावा गवा।

23मनस्से क परिवार समूह क आधे लोग बासान क पहँटा क लगातार बाल्हेर्मोन, सनीर अउ हेर्मोन पर्वत तलक रहत रहेन। उ पचे एक बिसाल जन समूहवाले लोग बन गएन।

24मनस्से क परिवार समूह क आधे क प्रमुख इ सबइ रहेन: एपेर, यिसी, एलीएल, अज्रीएल, यिर्मयाह, होदब्याह अउर यहदीएल। उ सबइ सबहिं सक्तीसाली अउर वीर मनई रहेन। उ पचे मसहूर मसनसेधू रहेन अउर उ पचे अपने परिवार क प्रमुख रहेन। 25किन्तु ओन प्रमुखन उ परमेस्सर

क विरुद्ध पाप किहन, जेनकर उपासना ओनकर पुरखन किहे रहेन। उ पचे हुवाँ रहइवाले ओन मनइयन क लबार देवतन क पूजा करब सुरु किहन जेनका परमेस्सर नस्ट किहस।

26इस्त्राएल क परमेस्सर पूल क जुद्ध में जाइ क इच्छुक बनाएस। पूल अस्सूर क राजा रहा। ओकर नाउँ तिलगपित्लेनेस भी रहा। उ मनस्से, रूबेन अउ गाद क परिवार समूहन क विरुद्ध लड़ा। उ ओनका आपन घर तजइ क मजबूर किहस अउर ओनका बन्दी बनाएस। पूज ओनका हलह, हबोर, हारा अउर गोजान नदी क लगे लिआवा। इस्त्राएल क उ सबइ परिवार समूह ओन जगहन में उ समइ स अब तलक रहत रहेन ह।

### लेवी क सन्तान

6 लेवी क पूत गोर्सेन, कहात अउ मरारी रहेन। 2कहात क पूत अग्राम, यिसहार, हेब्रोन अउ उज्जीएल रहेन। 3अग्राम क बच्चन हारून, मूसा अउ मरियम रहेन।

हारून क पूत नादाब, अबीहू, एलीआजर अउ ईतामार रहेन। 4एलीआजर, पीनहास क बाप रहा। पीनहास, अबीस क बाप रहा। 5अबीस, बुक्की क बाप रहा। बुक्की उज्जी क बाप रहा। 6उज्जी, जरहयाह क बाप रहा। जरहयाह, मरायोत क बाप रहा। 7मरायोत, अमर्याह क बाप रहा। अमर्याह, अहीतूब क बाप रहा। 8अहीतूब, सादोक क बाप रहा सादोक, अहीमास क बाप रहा। 9अहीमास अजर्याह क बाप रहा। अजर्याह, योहानान क बाप रहा। 10योहानान, अजर्याह क बाप रहा। (अजर्याह उ मनइ रहा जउन यरूसलेम में सुलैमान क जरिये बनाए गए मन्दिर में याजक क रूप में सेवा किहस।) 11अजर्याह, अमर्याह क बाप रहा। अमर्याह अहीतूब क बाप रहा। 12अहीतूब, सादोक क बाप रहा। सादोक, सल्लूम क बाप रहा। 13सल्लूम, हिलकिय्याह क बाप रहा। हिलकिय्याह, अजर्याह क बाप रहा। 14अजर्याह, सरायाह क बाप रहा। सरायाह, यहोसादाक क बाप रहा।

15यहोसादाक तब आपन घर तजइ बरे मजबूर कीन्ह गवा जब यहोवा यहूदा अउ यरूसलेम क लोगन क नबूकदनेस्सर क बन्दी क रूप में जिला-वतन में पठइ दिहस।

### लेवी क दूसर सन्तान

16लेवी क पूत गोर्सेन, कहात अउर मरारी रहेन।

17गोर्सेन क पूतन क नाउँ लिब्नी अउ सिमी रहेन।

18कहात क पूत अग्राम, यिसहार, हेब्रोन अउ उज्जीएल रहेन।

19मरारी क पूत महली अउर मूसी रहेन।

लेवी क परिवार समूहन क परिवारन क इ सूची अहइ। एनकर सूची ओनके बापन क नाउँ क पहिले राखिके इ अहइ।

20गोर्सेन क सन्तान इ सबइ रहेन: लिब्नी, गोर्सेन क पूत रहा। यहत, लिब्नी क पूत रहा। जिम्मा, यहत क पूत रहा। 21योआह, जिम्मा क पूत रहा। इद्दो, योआह क पूत रहा। जेरह, इद्दो क पूत रहा। यातरै जेरह क पूत रहा।

22इ सबइ कहात क सन्तान रहेन: अम्मीनादाब, कहात क पूत रहा। कोरह, अम्मीनादाब क पूत रहा। अस्सीर, कोरह क पूत रहा। 23एल्काना, अस्सीर क पूत रहा। एब्बासाप, एल्काना क पूत रहा। अस्सीर, एब्बासाप क पूत रहा। 24तहत अस्सीर क पूत रहा। ऊरीएल तहत क पूत रहा। उज्जिय्याह ऊरीएल क पूत रहा। साऊल उज्जिय्याह क पूत रहा।

25एल्काना क पूत अमासै अउ अहीमोत रहेन। 26सोपै, एल्काना क पूत रहा। नहत सोपै क पूत रहा। 27एलीआब, नहत क पूत रहा। यरोहाम, एलीआब क पूत रहा। एल्काना, यरोहाम क पूत रहा। समूएल एल्काना क पूत रहा।

28समूएल क पूतन में स सब स बड़का योएल अउ दूसर अबिय्याह रहा। 29मरारी क इ सबइ पूत रहेन: महली, मरारी क पूत रहा। लिब्नी, महली क पूत रहा। सिमी, लिब्नी क पूत रहा: उज्जा, सिमी क पूत रहा। 30सिमा, उज्जा क पूत रहा। हगिगयाह, सिमी क पूत रहा। असायाह, हगिगयाह क पूत रहा।

### मन्दिर क गायक

31इ सबइ उ सब लोग अहई जेनका दाऊद यहोवा क भवन क तम्बू में करार क सन्दूक धरे जाइ क पाछे संगीत क प्रबन्ध बरे चुनेस। 32इ सबइ मनई पवित्र तम्बू पड़ गाइके सेवा करत रहेन। पवित्र तम्बू क मिलापवाला तम्बू भी कहत हीं अउर एन लोग तब तलक सेवा किहन जब तलक सुलैमान यरूसलेम में यहोवा क मन्दिर नाहीं बनाएस। उ पचे अपने काम क बरे दीन्ह गए नेमन क अनुसरण करत भए सेवा किहन।

33इ सबइ नाउँ ओन मनइयन अउ ओनके पूतन क अहई जउन संगीत क जरिये सेवा किहन:

कहाती लोगन क सन्तान रहेन: गायक हेमान। हेमान योएल क पूत रहा। योएल, समूएल क पूत रहा। 34समूएल, एल्काना क पूत रहा। एल्काना, योहाम क पूत रहा। यरोहाम एलीएल क पूत रहा। एलीएल तोह क पूत रहा। 35तोह, सूप क पूत रहा। सूप एल्काना क पूत रहा। एल्काना, महत क पूत रहा। महत अमासै क पूत रहा। 36अमासै, एल्काना क पूत रहा। एल्काना, योएल क पूत रहा। योएल, अजर्याह क पूत रहा। अजर्याह, सपन्याह क पूत रहा। 37सपन्याह, तहत क पूत रहा। तहत, अस्सीर क पूत रहा। अस्सीर, एब्बासाप क पूत रहा। एब्बासाप, कोरह क पूत रहा। 38कोरह, यिसहार क पूत रहा। यिसहार, कहात क पूत रहा। कहात, लेवी क पूत रहा। लेवी, इस्त्राएल क पूत रहा।

39हेमान क सम्बंधी असाप रहा। असाप हेमान क दाहिनी कईंती खड़े होइके सेवा किहस। असाप बेरेक्याह क पूत रहा। बेरेक्याह सिमा क पूत रहा। 40सिमा मीकाएल क पूत रहा। मीकाएल बासेयाह क पूत रहा। बासेयाह मल्लिकय्याह क पूत रहा। 41मल्लिकय्याह एन्नी क पूत रहा। एन्नी जेरह क पूत रहा। जेरह अदायाह क पूत रहा। 42अदायाह एतना क पूत रहा। एतना जिम्मा क पूत रहा। जिम्मा सिमी क पूत रहा। 43सिमी यहत क पूत रहा। यहत गोर्सेन क पूत रहा। गोर्सेन लेवी क पूत रहा।

44मरारी क सन्तान हेमान अउ असाप क सम्बंधी रहेन। उ पचे हेमान क बाएँ पच्छ क गायक समूह रहेन। एताव कीसी क पूत रहा। कीसी अब्दी क पूत रहा। अब्दी मल्लूक क पूत रहा। 45मल्लूक हसब्याह क पूत रहा। हसब्याह अमस्याह क पूत रहा। अमस्याह हिलकय्याह क पूत रहा। 46हिलकय्याह अमसी क पूत रहा। अमसी बानी क पूत रहा। बानी सेमेर क पूत रहा। 47सेमेर महली क पूत रहा। महली मूसी क पूत रहा। मूसी मरारी क पूत रहा। मरारी लेवी क पूत रहा।

48हेमान अउ आसाप क भाई लेवी क परिवार समूह स रहेन। लेवी क परिवार समूह क लोग "लेवी बंसी" भी कहे जात रहेन। लेवीय पवितर तम्बू में करइबरे चुने जात रहेन। पवितर तम्बू परमेस्सर क घर रहा। 49किन्तु सिरिफ हारून क सन्तान क होमबलि क वेदी अउ धूप क वेदी पइ होमबलि अउर अउ धूपबलि चढ़ावइ क अनुमति रही। हारून क सन्तान परमेस्सर क घर में सब स जियादा पवितर स्थान में सारा काम करत रहेन। उ पचे इस्त्राएल क लोगन बरे प्रायस्चित क काम भी करत रहेन। उ पचे ओन सब नेमन अउ विधियन क अनुसरण करत रहेन जेनके बरे परमेस्सर क सेवक मूसा आदेस दिहे रहा।

### हारून क सन्तान

50हारून क पूत इ सबइ रहेन: एलीआज़र हारून क पूत रहा। पीनहास एलीआज़र क पूत रहा। अबीसू पीनहास क पूत रहा। बुक्की अबीसू क पूत रहा। उज्जी बुक्की क पूत रहा। 51बुक्की अबीसू क पूत रहा। उज्जी बुक्की क पूत रहा। जरहयाह उज्जी क पूत रहा। 52मरायोत जरहयाह क पूत रहा। अमयीह मरायोत क पूत रहा। अहीतूब अमर्याह क पूत रहा। 53सादोक अहीतूब क पूत रहा। अहीमास सादोक क पूत रहा।

### लेवीबंसी परिवारन क बरे घर

54इ सबइ उ सब जगहिया अहई जहाँ हारून क सन्तान रहिन। उ पचे उ भुइँया पइ जउन ओनका दीन्ह गइ रही अपने उपनिवेशन में रहत रहेन। कहाती परिवारन उ भुइँया क पहिला भाग पाएस जउन लेवीवंस क दीन्ह गइ रही। 55ओनका हेब्रोन नगर अउ ओकरे चारिहुँ कइँती क खेत दीन्ह ग रहेन। इ यहूदा पहँटा म रहा। 56किन्तु हेब्रोन क नजिक क गाँवअन अउ दूर क खेतन, यपुन्ने क पूत कालेब क दीन्ह ग रहेन। 57हारून क सन्तानन क हेब्रोन नगर दीन्ह गवा रहा। हेब्रोन क सुरच्छा नगर रहा। ओनके लिब्ना, यतीर, एसतमो, 58हीलेन, दबीर, 59आसान, जुत्ता, अउ बेतसेमेस नगर भी दीन्ह गएन। उ पचे ओन सबहिँ नगरन अउर ओनके चारिहुँ कइँती क खेत प्राप्त किहन। 60बिन्यामीन क परिवार समूह क लोगन क गिबोन, गोबा अउ अल्लेमेत अउर अनानोत नगरन दीन्ह गएन। उ पचे ओन सबहिँ नगरन अउर ओनके चारिहुँ ओर क खेतन क प्राप्त किहन। कहाती परिवार क तेरह नगर दीन्ह गएन।

61बाकी कहात क सन्तानन मनस्से परिवार समूह क आधे स दस नगर प्राप्त किहन।

62गोर्सेम क सन्तानन क परिवार समूह तेरह नगर प्राप्त किहन। उ पचे ओन नगरन क इस्साकार, आसेर, नप्ताली अउर बासान छेत्र में रहइवाले मनस्से क एक हीसा स प्राप्त किहन।

63मरारी क सन्तानन क परिवार समूह बारह नगर प्राप्त किहन। उ पचे ओन नगरन क रूबेन, गाद, अउर जबूलून क परिवार समूहन स प्राप्त किहन। उ पचे नगरन क गोत्न डाइके प्राप्त किहन।

64इ तरह इस्त्राएली लोग ओन नगरन अउ खेतन क लेवीबंसन क लोगन क दिहन। 65उ पचे सबहिँ नगर, यहूदा, सिमोन अउर बिन्यामीन क परिवार समूहन स मिलेन। उ पचे गोत्न डाइके इ निहचइ किहन कि कउन सा नगर परिवार लेवी क कउन सा परिवार प्राप्त करी।

66एप्रैम क परिवार समूह कछू कहाती परिवारन क कछू नगर दिहन। उ सबइ नगर गोत्न डाइके चुने गएन। 67ओनका साकेम नगर दीन्ह गवा। साकेम सुरच्छ नगर अहइ। ओनका गोजेर 68योक्मान, बेथोरेन, 69अय्यालोन, अउर गत्रिमोन भी प्राप्त किहन। उ पचे ओन नगरन क संग क खेत भी पाएन। उ पचे एप्रैम नगर क पहाड़ी प्रदेश में रहेन। 70अउर इस्त्राएली लोग, मनस्से परिवार समूह क आधे स, आनेर अउ बिलाम नगरन क कहाती परिवारन क दिहन। ओन कहाती परिवारन ओन नगरन क संग खेतन क भी प्राप्त किहन।

### दूसर लेवीबंसी परिवारन घर प्राप्त किहन

71गोर्सेमी परिवारन मनस्से परिवार समूह क आधे स, बासान अउ अस्तारीत छेत्रन में गोलान क नगरन क प्राप्त किहन। उ पचे ओन नगरन क लगे क खेत भी पाएन।

72-73गोर्सेमी परिवार केदसे, दाबरात, रामोत अउर गानेम नगरन क आसेर परिवार समूह स प्राप्त किहन। उ पचे ओन नगरन क लगे क खेतन भी प्राप्त किहन।

74-75गोर्सेमी परिवार मसाल, अब्दोन, हूकोक अउर रहोब क नगरन क आसेर परिवार समूह स प्राप्त किहस। उ पचे ओन नगरन क लगे क खेतनभी प्राप्त किहन।

76गोर्सेमी परिवार गालील में केदेस, हम्मोन अउर कियतिम नगरन क भी नप्ताली क परिवार समूह स प्राप्त किहस। उ पचे ओन नगरन क लगे क खेतन भी प्राप्त किहन। 77लेवीबंसी लोगन में स बाकी मरारी परिवार क अहई। उ पचे जेक्रयम, कर्ता, सिम्मोन अउ ताबोर नगरन क जबूलून परिवार समूह स प्राप्त किहन। उ पचे ओन नगरन क लगे क खेत भी प्राप्त किहन।

78-79मरारी परिवार रेगिस्ताने में बेसेर क नगरन, यहसा, कदेमोत, अउ मेपाता क भी रूबेन क परिवार समूह स प्राप्त किहन। रूबेन क परिवार समूह यरदन नदी क पूरब कइँती यरीहो नगर क पूरब में रहत रहा। एन मरारी परिवारन नगर क लगे क खेत भी पाएन।

80-81मरारी परिवार गिलाद में रामोत, महनैम, हेसोबोन अउर याजेर नगरन क गाद क परिवार समूह स प्राप्त किहन। उ पचे ओन नगरन क लगे क खेत भी प्राप्त किहन।

**इस्साकार क सन्तान**

7 इस्साकार क चार पूत रहेन। ओनकर नाउँ तोला, पूआ, यासूब, अउ सिमोन रहेन।

2 तोला क पूत उज्जी, रपयाह, यरीएल, यहमै, यिब्साम अउर समूएल रहेन। उ पचे सबहिं अपने परिवारन क प्रमुख रहेन। उ पचे मनसेधू अउ ओनकर सन्तान जोधा रहेन। ओनकर परिवार बाढ़त रहेन अउ जब दाऊद राजा भवा, तब हुवाँ बाईस हजार छः सौ मनई जुद्ध बरे तइयार रहेन।

3 उज्जी क पूत यिज़ह्याह रहा। यिज़ह्याह क पूत मीकाएल, ओबद्याह, योएल, यिस्सिय्याह, रहेन। उ पचे सबहिं पाँचहु अपने परिवारन क प्रमुख रहेन। 4 ओनके परिवार क इतिहास इ बतावत ह कि ओनके लगे छतीस हजार जोधा जुद्ध क बरे तइयार रहेन। ओनकर बड़ा परिवार रहा। काहेकि ओनकर बहोत स मेहरारुअन अउ बच्चन रहेन।

5 परिवार इतिहास इ बतावत ह कि इस्सकार क सबहिं परिवार समूहन में सत्तासी हजार सक्तीसाली फउजी रहेन।

**बिन्यामीन क सन्तान**

6 बिन्यामीन क तीन पूत रहेन। ओनकर नाउँ बेला, बेकेर अउ यदीएल रहेन।

7 बेला क पाँच पूत रहेन। ओनकर नाउँ एसबोन, उज्जी, उज्जीएल, यरीमोत, अउ इरी रहेन। उ पचे अपने परिवारन क प्रमुखन रहेन। ओनकर परिवार इतिहास बतावत ह कि ओनके लगे बाईस हजार चौतीस फउजी रहेन।

8 बेकेर क पूत जमीरा, योआस, एतीएजेर, एल्योएनै, ओम्री, यरेमोत, अबिय्याह, अनातोत अउ आलेमेत रहेन। उ पचे सबहिं बेकेर क बच्चा रहेन। 9 ओनकर परिवार इतिहास बतावत ह कि परिवार प्रमुख कउन रहेन अउर ओनकर परिवार इतिहास इ भी कहत ह ओनकर बीस हजार दुइ सौ फउजी रहेन।

10 यदीएल क पूत बिल्लहन रहा। बिल्लन क पूत यूस, बिन्यामीन, एहद, कनान, जेतान, तर्सीस अउ अहीसहर रहेन। 11 यदीएल क सबहिं पूत अपने परिवार क प्रमुख रहेन। ओनकर सतरह हजार दुइ सौ फउजी जुद्ध बरे तइयार रहेन।

12 सुप्पीम अउ हुप्पीम ईर सन्तान रहेन। हूसी अहेर क पूत रहा।

**नप्ताली क सन्तान**

13 नप्ताली क पूत एसीएल, गूनी, येसेर अउ सल्लूम रहेन। अउर इ सबइ बिल्हा क सन्तान रहेन।

**मनस्से क सन्तान**

14 इ सबइ मनस्से क सन्तान अहईं।

मनस्से क उसीएल नाउँ क पूत रहा। जउन ओकर अरामी रखैल स रहा। ओनकर माकीर भी रहा। माकीर गिलाद क बाप रहा। 15 माकीर हुप्पीम अउर सुप्पीम लोगन क एक मेहरारु स बियाह किहस। माका क दूसर मेहरारु क नाउँ सलोफाद रहा। सलोफाद क सिरिफ बिटियन रहिन। माकीर क बहिन क नाउँ भी माका रहा।

16 माकीर क मेहरारु माका क एक पूत भवा। माका अपने पूत क नाउँ पेरेस धरेस। पेरेस क भाई क नाउँ सेरेस रहा। सेरेस क पूत ऊलाम अउ राकेम रहेन। 17 ऊलाम क पूत बदान रहा।

इ सबइ गिलाद क सन्तान रहेन। गिलाद माकीर क पूत रहा। माकीर मनस्से क पूत रहा। 18 माकीर क बहिन हम्मोलेकेत क पूत ईसहोद, अबीएजेर, अउर महला रहेन।

19 समीदा क पूत अहयान, सेकेम लिखी अउर अनीआम रहेन।

**एप्रैम क सन्तान**

20 एप्रैम क सन्तानन क इ सबइ नाउँ रहेन। एप्रैम क पूत सूतेलह रहा। सूतेलेह क पूत बेरेद रहा। बेरेद क पूत तहत रहा। तहत क पूत एलाद रहा। 21 एलाद क पूत तहत रहा। तहत क पूत जाबाद रहा। जाबाद क पूत सूतेलह रहा।

कछू मनइयन जउन गत नगर में बड़े भए रहेन, येजेर अउ एलाद क मार डाएन। इ एह बरे भवा कि येजेर अउ एलाद ओन लोगन क गइयन अउ भेड़िन चोरावइ गत गए रहेन। 22 एप्रैम एजेर अउ एलाद क बाप रहा। उ कइउ दिनन तलक रोवत रहा। काहेकि येजेर अउर एलाद मर गए रहेन। एप्रैम क परिवार ओका सांत्वना देइ आवा। 23 तब एप्रैम अपनी मेहरारु क संग तने क सम्बंध किहस। एप्रैम क मेहरारु गर्भवती भइ अउ उ एक पूत क जन्म दिहस। एप्रैम अपने नवे पूत क नाउँ बरीआ धरेस काहेकि ओकरे परिवार क संग कछू बुरा भवा रहा। 24 एप्रैम क बिटिया सेरा रही। सेरा नीच बेथोरान अउ ऊँच बेथोरान अउर नीच उज्जेनसेरा अउ ऊँच उज्जेनसेरा बसाएस।

25 रेपा एप्रैम क पूत रहा। रेसेप रेपा क पूत रहा। तेलह रेसेप क पूत रहा। तहन तेलह क पूत रहा। 26 लादान तहन क पूत रहा अम्मीहूद लादान क पूत रहा। एलीसाम अम्मीहूद क पूत रहा। 27 नून एलीसामा क पूत रहा। यहोसू नून क पूत रहा।

28 इ सबइ उ नगर अउ प्रदेश अहईं जहाँ एप्रैम क सन्तान रहत रहेन। बेतेल अउ एकरे नगिचे क गाँव पूरब में नारान, गोजेर अउ पच्छिम में एकरे निअरे क गाँव, अउ सेकम अउ अज्जा क रास्ते तलक क निअरवाले गाँव। 29 मनस्से क भुइँया क चउहद्दी पइ बेतसान, मगिदो अउ दोर नगर अउर ओनका नजिक सक सबहिं गाँव रहेन। इस्त्राएल क पूत यूसुफ क सन्तान एन नगरन में रहत रहिन।

**आसेर क सन्तान**

30 आसेर क पूत थिम्ना, थिस्वा, थिस्वी अउ बरीआ रहेन। ओनकर बहिन क नाउँ सरेह रहा।

31 बरीआ क पूत हेबरे अउ मलकीएल रहेन। मलकीएल बिर्जोत क बाप रहा।

32 हेबरे यपलेत, सोमेर होताम अउर ओनकर बहिन सूआ क बाप रहा।

33 यपलेत क पूत पासक, बिम्हाल अउ अस्नात रहेन। इ सबइ यपलेत क बच्चन रहेन।

34 सेमरे क पूत अही, रोहगा, यहुब्बा अउ अराम रहेन।

35सेमेर क भाई क नाउँ हेलेम रहा। हेलेम क पूत सो पह, यिम्ना, सेलेस अउ आमाल रहेन।

36सोपह क पूत सूह, हर्नेपे, सूआल, बेरी, इम्रा, 37बेसेर, होद, सम्मा, सिलसा, यित्रान अउ बेरा रहेन।

38येतेर क पूत यपुन्ने, पिस्पा अउ अरा रहेन।

39उल्ला क पूत आरह, हन्नीएल, अउ सिस्वा रहेन।

40इ सबइ मनई आसेर क सन्तान रहिन। उ पचे अपने परिवारन क प्रमुख रहेन। उ पचे उत्तिम पुरुख रहेन। उ पचे योद्धा अउ महान प्रमुख रहेन। ओनके परिवारे क इतिहास बतावत ह कि छब्बीस हजार फउजी जुद्ध बरे तइयार रहेन।

### राजा साऊल क परिवार इतिहास

8 बिन्यामीन बेला क बाप रहा। बेला बिन्यामीन क पहिला पूत रहा। अबेल बिन्यामीन क दूसर पूत रहा। अहरह बिन्यामीन क तीसर पूत रहा। 2नोहा बिन्यामीन क चउथा पूत रहा अउ रापा बिन्यामीन क पाँचवाँ पूत रहा।

3बेला क पूत अद्दार, गेरा, अबीहूद, 4अबीसू, नामान, अहोह, 5गेरा, सपूपान अउ हूराम रहेन।

6एहूद क सन्तान इ सबइ रहेन। इ सबइ गोबा में अपने परिवारन क प्रमुख रहेन। उ पचे आपन घर तजइ अउर मानहत में रहइ क मजबूर कीन्ह गए रहेन। 7एहूद क सन्तान नामान, अहिय्याह, अउर गेरा रहेन। गेरा ओनका घर तजइ क मजबूर किहस। गेरा उज्जा अउ अहीलूद क बाप रहा।

8सहरैम आपन पत्नियन हसीम अउ बारा क मोआब में तलाक दिहस। इ करइ क पाछे, ओकर कछू दूसर गदेलन दूसर पत्नी स पइदा भएन। 9-10सहरैम क योआब, सिब्बा, मेसा, मल्काम, यूस, सोक्वा, अउर मिर्मा ओकर मेहरारु होदेस स भएन। उ पचे अपने परिवारन क प्रमुख रहेन। 11सहरैम अउर हसीम क दुइ पूत अबीतूब अउ एल्पाल रहेन।

12-13एल्पाल क पूत एबेर, मिसाम, सेमेद, बरीआ अउ सेमा रहेन। सेमेद ओनो अउ लोद नगर अउ लोद क चारिहूँ कइँती नान्ह नगर बनाएस। बरीआ अउ सेमा अय्यालोन में रहइवाले परिवारन क प्रमुख रहेन। ओन पूतन गत में रहइवालन क ओका तजइ क मजबूर किहन।

14बरीआ क पूत सासक अउर यरमोत, 15जबद्याह, अराद, एदेर, 16मीकाएल, यिस्पा अउ योहा रहेन। 17एल्पाल क पूत जबद्याह, मुसुल्लाम, हिजकी, हेबर, 18यिसमरै, थिजलीआ अउ योबाब रहेन।

19सिमी क पूत याकीम, जिक्री, जब्दी, 20एलीएनै, सिल्लतै, एलीएल, 21अदायाह, बरायाह अउ सिम्रात रहेन।

22सासक क पूत यिसपान, यबेर, एलीएल, 23अब्दोन जिक्री, हानान, 24हनन्याह, एलाम, अन्तोतिय्याह, 25यिपदयाह, अउर पनूएल रहेन।

26यरोहाम क पूत समसैरै, सहर्याह, अतल्याह, 27योरेस्याह, एलिय्याह, अउर जिक्री रहेन।

28इ सबइ सबहिं मनई अपने परिवारन क प्रमुख रहेन। उ पचे अपने परिवार क इतिहास में प्रमुख क रूप में अंकित रहेन। उ पचे यरूसलेम में रहत रहेन।

29येयील गिबोन क बाप रहा। उ गिबोन नगर में रहत रहा। ययील क मेहरारु क नाउँ माका रहा। 30येयील क सबस बड़का पूत अब्दोन रहा। दूसर पूत सूर, कीस, बाल, नेर, नादाब, 31गदोर, अह्यो, जेकेर अउर मिकोत रहेन, 32मिकोत सिमा क बाप रहा। इ सबइ पूत भी यरूसलेम में अपने सम्बन्धियन क नगिचे रहत रहेन।

33नेर, कीस, क बाप रहा कीस साऊल क बाप रहा। अउर साऊल योनातान, मल्कीसू, अबीनादाब अउर एसबाल क बाप रहा।

34योनातान क पूत मरीब्बाल रहा। मरीब्बाल मीका क बाप रहा।

35मीका क पूत पीतोन, मेलेक, तारे अउ आहाज रहेन।

36आहाज यहोअद्दा क बाप रहा। यहोअद्दा आलेमेत, अजमावेत अउ जिम्री क बाप रहा। जिम्री मोसा क बाप रहा। 37मोसा बिना क बाप रहा। रापा बिना क पूत रहा। एलासा रापा क पूत रहा अउर आसेल एलासा क पूत रहा।

38आसेल क छः पूत रहेन। ओनकर नाउँ अञ्जीकाम, बोकरु, यिस्माएल, सार्याह, ओबद्याह अउर हानान रहेन। इ सबइ सबहिं पूत आसेल क सन्तान रहेन।

39आसेल क भाई एसेक रहा। एसेक क कछू पूत रहेन। एसेक क इ सबइ पूत रहेन: ऊलाम एसेक क सब स बड़का पूत रहा। यूसा एसेक क दूसर पूत रहा। एलीपेलेत एसेक क तीसर पूत रहा। 40ऊलाम क पूत बलवान जोधा अउर धनुस-बाण क प्रयोग में कुसल रहेन। ओनकर बहोत स पूत अउ पोता रहेन। सब मिलाइके डेढ़ सौ पूत अउ पोता रहेन। सब मिलाइके डेढ़ सौ पूत अउ पोता रहेन।

इ सबइ सबहिं मनई बिन्यामीन क सन्तान रहिन।

9 इस्राएल क लोगन क नाउँ ओनके परिवार क इतिहास में अंकित रहेन। उ सबइ परिवार इतिहास "इस्राएल क राजा लोगन क इतिहास" क पुस्तक में सम्मिलित भए रहेन।

### यरूसलेम क लोग

यहूदा क लोग बन्दी बनाए गए रहेन अउर बाबेल क जाइ क मजबूर कीन्ह गए रहेन। उ पचे उ जगह पइ एह बरे लइ जावा गएन, काहेकि उ पचे परमेस्सर क बरे बिस्सास क जोगग नाहीं रहेन। 2सब स पहिले लउटिके आवइवाले अउर अपने नगरन अउ अपने पहुँटा में रहइवाले लोगन में कछू इस्राएली, याजक, लेवीबंसी अउ मन्दिर में सेवा करइवाले सेवक रहेन।

3इ सबइ यरूसलेम में रहइवाला यहूदा, बिन्यामीन, एप्रैम अउर मनस्से परिवार समूह क लोग अहइँ।

4ऊतै अम्मीहूद क पूत रहा। अम्मीहूद ओम्री क पूत रहा। ओम्री इम्री क पूत रहा। इम्री बानी क पूत रहा। बानी पेरैस क सन्तान रहा। पेरैस यहूदा क पूत रहा।

5सीलोइ लोग जउन यरूसलेम में रहत रहेन, इ सबइ रहेन: असायाह, सब स बड़का पूत रहा। अउ असायाह क पूत रहेन। 6जेरह लोग, जउन यरूसलेम में रहत रहेन, इ सबइ रहेन; यूएल अउर ओकर सम्बन्धी, उ सबइ सब मिलाइके छः सौ नब्बे रहेन।

7बिन्यामीन क परिवार समूह स जउन लोग यरूसलेम में रहेन, उ सबइ इ सब अहई: सल्लू मसुल्लाम क पूत रहा। मुसल्लाम होदब्याह क पूत रहा। होदब्याह हस्सनूआ क पूत रहा। 8थिबनाय्याह यरोहाम क पूत रहा। एला उज्जी क पूत रहा। उज्जी मिक्री क पूत रहा। मसुल्लाम सपत्याह क पूत रहा। सपत्याह रूएल क पूत रहा। रूएल थिबिन्याह क पूत रहा। 9बिन्यामीन क परिवार इतिहास बतावत ह कि यरूसलेम में ओनकर नौ सौ छप्पन मनई रहत रहेन। उ सबइ सबहिं मनई अपने परिवारन क प्रमुख रहेन।

10इ सबइ उ सब याजक अहई जउन यरूसलेम में रहत रहेन: यदायाह, यहोयारीब, याकीन अउ अज़र्याह। 11अज़र्याह हिलकिय्याह क पूत रहा। हिलकिय्याह मसुल्लाम क पूत रहा। मसुल्लाम सादोक क पूत रहा। सादोक मरायोत क पूत रहा। मरायोत अहीतूब क पूत रहा। अहीतूब परमेस्सर क मन्दिर क बरे बिसेस उत्तरदायी अधिकारी रहा। 12यरोबाम क पूत अदायाह भी रहा। यरोहाम पसहूर क पूत रहा पसहूर मल्किय्याह क पूत रहा अउर हुवाँ अदोएल क पूत मासै रहा। अदोएल जहजेस क पूत रहा। जेरा मसुल्लाम क पूत रहा। मसुल्लाम मसिल्लीत क पूत रहा। मलिल्लीत इम्मेर क पूत रहा।

13हुवाँ एक हजार सात सौ साठ याजकन रहेन। उ पचे अपने परिवारन क प्रमुख रहेन। उ पचे परमेस्सर क मन्दिर में सेवा करइ क कार्य क बरे उत्तरदायी रहेन।

14लेवी क परिवार समूह स जउन लोग यरूसलेम में रहत रहेन, उ पचे इ सबइ अहई: हस्सूब क पूत समायाह, हस्सूब अज़्रीकाम क पूत रहा। अज़्रीकाम हसब्याह क पूत रहा। हसब्याह मरारी क सन्तानन क पूत रहा। 15यरूसलेम में बकबक्कर, हरेस, गालाल अउ मत्न्याह भी रहेन। मत्न्याह मीका क पूत रहा। मीका जिक्री क पूत रहा। जिक्री आसाप क पूत रहा। 16ओबद्याह समायाह क पूत रहा। समायाह गालाल क पूत रहा। गालाल यदूतून क पूत रहा अउर आसा क पूत बैरेक्याह यरूसलेम में रहत रहा। आसा एल्काना क पूत रहा। एल्काना नेतोपा लोगन क लगे गाँवन में रहत रहा।

17इ सबइ उ सब दुआरपाल अहई जउन यरूसलेम में रहत रहेन: सल्लूम, अक्कूब, तल्मोन, अहीमान अउर ओनकर सम्बंधी। सल्लूम ओनकर प्रमुख रहा। 18अब इ सबइ मनई पूरब कईंती राजा क दुआर क ठीक बगल पढ़ाव डालि रहत रहेन। उ सबइ दुआरपाल लेवी परिवार समूह स रहेन। 19सल्लूम कोरे क पूत रहा। कोरे एब्बासाप क पूत रहा। एब्बाहसाप कोरह क पूत रहा। सल्लूम अउ ओकर भाई दुआरपाल रहेन। उ पचे कोरे परिवार स रहेन। ओनका पवितर तम्बू क दुआर क रच्छा करइ क कार्य करइ रहा। उ पचे एका वइसे ही करत रहेन जइसे एनकर पुरखन एनके पहिले किहे रहेन। ओनके पुरखन क इ कार्य रहा कि उ पचे पवितर तम्बू क दुआर क रच्छा करई। 20पुराने जमाने में, पीनहास दुआरपालन क निरिच्छक रहा। पीनहास एलीआज़र क पूत रहा। यहोवा पीनहास क संग रहा: 21मेसेलम्याह क पूत जकर्याह पवितर तम्बू क दुआर क दुआरपाल रहा।

22सब मिलाइके दुइ सौ बारह मनई पवितर तम्बू क दुआर क रच्छा बरे चुने गए रहेन। ओनकर नाउँ ओनके परिवार इतिहास में ओनके नान्ह नगरन में लिखे। भए रहेन। दाऊद अउ समूएल नबी ओन लोगन क चुनेन, काहेकि ओन पइ बिस्सास कीन्ह जाइ सकत रहा। 23दुआरपालन अउर ओनकर सन्तानन क जिम्मेदारी यहोवा क मन्दिर, पवितर तम्बू क रच्छा करब रहा। 24हुवाँ चारिहुँ तरफ दुआर रहेन: पूरब, पच्छिम, उत्तर अउर दक्खिन। 25दुआरपालन क सम्बन्धियन क, जउन नान्ह नगर में रहत रहेन, समइ-समइ पइ आइके ओनका मदद करइ पड़त रही। उ पचे आवत रहेन अउर हर बार सात दिन तलक दुआरपालन क सहायता करत रहेन। 26दुआरपालन क चार प्रमुख दुआरपाल हुवाँ रहेन। उ पचे लेवीबंसी मनई रहेन। ओनकर कर्तव्य परमेस्सर क मन्दिर क कमरन अउ खजाना क देखभाल करब रहा। 27उ पचे रातिभर परमेस्सर क मन्दिर क रच्छा में खड़े रहत रहेन अउर परमेस्सर क मन्दिर क हर रोज भिसारे खोलइ क ओनकर काम रहा।

28कछू दुआरपालन क काम मन्दिर क सेवा में काम आवइवाली तशतरियन क देखभाल करब रहा। उ पचे एन तशतरियन क तब गनत रहेन जब उ पचे भीतर लाई जात रहिन। उ पचे एन तशतरियन क तब भी गनत रहेन जब उ पचे बाहेर जात रहिन। 29दूसर दुआरपाल रस्मी-सामग्री अउर ओन बिसेस तशतरियन क देखभाल क बरे चुने जात रहेन। उ पचे आटा, दाखरस, तेल, सुगन्धि अउर बिसेस तेल क भी देखरेख करत रहेन। 30किन्तु सिरिफ याजक ही बिसेस तेल क मिलावइ क काम करत रहेन।

31एक मतित्याह नाउँ क लेवीबंसी रहा जेकर काम भेंट में उपयोग क बरे रोटी पकाउब रहा। मतित्याह सल्लूम क सब स बड़ा पूत रहा। सल्लूम कोरह परिवार क रहा। 32दुआरपालन में स कछू जउन कहात परिवार क रहेन, हर एक सबित क मेज पइ रखी जाइवाली रोटी क तइयार करइ क काम करत रहेन।

33उ पचे लेवीबंसी जउन गायक रहेन अउर अपने परिवारन क प्रमुख रहेन, मन्दिर क कमरन में ठहरत रहेन। ओनका दूसर काम नाहीं करइ पड़त रहेन। काहेकि उ पचे मन्दिर में दिन-रात काम क बरे उत्तरदायी रहेन।

34इ सबइ लेवीबंसी अपने परिवारन क प्रमुख रहेन। उ पचे अपने परिवारन क इतिहास में प्रमुख क रूप में अंकित रहेन। उ पचे यरूसलेम में रहत रहेन।

### राजा साऊल क परिवार इतिहास

35यीएल गिबोन क बाप रहा। यीएल गिबोन नगर में रहत रहा। यीएल क मेहरारु क नाउँ माका रहा। 36यीएल क सब स बड़का पूत अब्दोन रहा। दूसर पूत सूर, कीस, बाल नेर, नादाब, 37गदोर, अह्यो, जकर्याह अउर मिल्कोत रहेन। 38मिल्कोत सिमाम क बाप रहा। यीएल क परिवार अपने सम्बन्धियन क संग यरूसलेम में रहत रहा।

39नेर कीस क बाप रहा। कीस साऊल क बाप रहा अउर साऊल योनातान, मल्कीस अबीनादाब अउर एसबाल क बाप रहा।

40योजनातान क पूत मरीब्बाल रहा। मरीब्बाल मीका बाप रहा।

41मीका क पूत पीतोन, मेलेक, तहरे अउर अहाज रहेन, 42आहाज जदा क बाप रहा। जदा यारा क बाप रहा। आलेमेत, अजमावेत अउर जिम्नी क बाप रहा। जिम्नी मोसा क बाप रहा। 43मोसा बिना क पूत रहा। रपायाह बिना क पूत रहा। एलासा रपायाह क पूत रहा अउर आसेल एलासा क पूत रहा।

44आसेल क छः पूत रहेन। ओनकर नाउँ रहेनः अज्रीकाम, बोकरू, इस्माएल, सार्याह, ओबद्याह, अउर हनान। उ पचे आसेल क बच्चन रहेन।

### राजा साऊल क मउत

**10** पलिस्ती लोग इस्राएल क लोगन क खिलाफ लड़ेन। इस्राएल क लोग पलिस्तिन क समान्वा पराइ गएन। बहोत इस्राएली लोग गिलबो पर्वत पइ मारे गएन। 2पलिस्ती लोग साऊल अउर ओकरे पूतन क पाछा लगातार करत रहेन। उ पचे ओनका धइ लिहेन अउर ओनक मार डाएन। पलिस्तिन साऊल क पूतन योजनातान, अबीनादाब अउर मलकीसू क मार डाएन। 3साऊल क चारिहूँ कइँती जुद्ध घमासान होइ गवा। धनुर्धारियन साऊल पइ आपन बाण छोड़ेन अउर ओका घायल किहन।

4तब साऊल अपने कवच वाहक स कहेस, “अपनी तरवार बाहेर हींचा अउर एकर उपयोग मोका मारइ मैं करा। तब उ पचे खतनारहित जब अइहीं तउ न मोका चोट पहोंचइहीं न ही मोर हँसी उड़इहीं।”

किन्तु साऊल क कवच वाहक ससान रहा। उ साऊल क मारब अस्वीकार किहस। तब साऊल अपनी तरवार क उपयोग खुद क मारइ बरे किहस। उ अपनी तरवार क नोक पइ गिरा। 5कवचवाहक लखेस कि साऊल मर गवा, तब उ खुद क मार डाएस। उ अपनी तरवार क नोक पइ गिरा अउर मर गवा। 6इ तरह साऊल अउर ओकर तीनउँ पूतन मर गएन। साऊल क सारा परिवार एक संग मर गवा।

7घाटी में रहइवाले इस्राएल क सबहिं लोग लखेन कि ओकर आपन फउज भाग गएन। उ पचे लखेन कि साऊल अउर ओकर पूत मर गएन। एह बरे उ पचे अपने नगरन क तजेन अउ पराइ गएन। तब पलिस्ती ओन नगरन में आएन जेनका इस्राएलियन तज दिहे रहेन अउर पलिस्ती ओन नगरन में रहइ लागेन।

8अगले दिन, पलिस्ती लोग लहासन क बहुमूल्य चिजियन लेइ आएन। उ पचे साऊल क लहासन अउर ओकरे पूतन क लहासन क गिबोन पर्वत पइ पाएन। 9पलिस्तिन साऊल क लहास स चिजियन उतारेन। उ पचे साऊल क मूँड अउर कवच लिहेन। उ पचे आपन पूरे देस में अपने लबार देवतन अउर लोगन क सूचना देइ बरे दूत पठाएन। 10पलिस्तिन साऊल क कवच क अपने लबार देवता क मन्दिर में धरेन। उ पचे साऊल क मूँड क दागोन क मन्दिर लटकाएन।

11याबेस गिलाद नगर में रहइवाले सब लोग उ हर एक बात सुनेन जउन पलिस्ती लोग साऊल क संग किहे रहेन। 12याबेस क सबहिं बीर मनई साऊल अउर ओकरे पूतन क

लहास लेइ गएन। उ पचे ओनका याबेस में लइ आएन। ओन बीर मनसेधुअन साऊल अउर ओकरे पूतन क हाइन क, याबेस में एक बिसाल बृच्छ क खाले दफनाएन। तब उ पचे अपना दुःख परगट किहन अउर सात दिन तलक उपवास रखेन।

13साऊल एह बरे मरा कि उ यहोवा क बरे बिस्सास पात्र नाहीं रहा। साऊल यहोवा क आदेसन क पालन नाहीं किहस। साऊल एक माध्यम क लगे गवा अउर 14यहोवा क तजिके ओहसे सलाह माँगैस। इहइ कारण अहइ कि यहोवा ओका मार डाएस अउर यिसै क पूत दाऊद क राज्ज दिहस।

### दाऊद इस्राएल क राजा होत ह

**11** इस्राएल क सबहिं लोग हेब्रोन नगर में दाऊद क लगे गएन। उ पचे दाऊद स कहेन, “हम तोहार ही रक्त-मौंस अही। 2बीते दिन में, जब साऊल राजा रहा तब भी हमार तू जुद्ध में सन्चालन किहा। हे दाऊद, यहोवा तोहसे केहस, ‘तू मोरे लोगन क गइरिया रहब्या। तू मोरे लोगन क ऊपर सासक होब्या।’”

3इस्राएल क सबहिं प्रमुखन दाऊद क लगे हेब्रोन नगर में आएन। दाऊद हेब्रोन में ओन प्रमुखन क संग यहोवा क सामने एक समझौता किहस। प्रमुखन दाऊद क अभिसेक किहन। इ तरह उ इस्राएल क राजा बन गवा। यहोवा समूएल दुआरा इ बचन दिहे रहा कि इ होइ।

### दाऊद यरूसलेम क कब्जा किहस

4दाऊद अउर इस्राएल क सबहिं लोग यरूसलेम नगर क गएन। यरूसलेम ओन दिनन यबूस कहा जात रहा। उ नगर में रहइवाले यबूसी कहे जात रहेन। 5उ नगर क निवासी लोग दाऊद स कहेन, “तू हमारे नगर क प्रवेस नाहीं कइ सकल्या।” किन्तु दाऊद ओन लोगन क पराजित किहस। दाऊद सिथ्योन क किले पइ कब्जा कइ लिहस। इ जगह “दाऊद नगर” बना।

6दाऊद कहेस, “उ मनई जउन यबूसी लोगन पइ आक्रमण क संचालन करी, मोर पूरी फउज क सेनापति होइ।” एह बरे योआब आक्रमण क संचालन किहस। योआब सरूयाह क पूत रहा। योआब सेना क सेनापित होइ गवा।

7तब दाऊद किला में आपन महल बनाएस। इहइ कारण अहइ ओकर नाउँ दाऊद नगर पड़ा। 8दाऊद किले क चारिहूँ कइँती नगर बसाएस। उ एकोँ मिल्लो स नगर क चारिहूँ कइँती की दीवार तलक बसाएस। योआब नगर क दूसर भागन क मरम्मत किहेस। 9दाऊद लगातार महान बनता गवा। सर्वशक्तीमान यहोवा ओकरे संग रहा।

### दाऊद क विसिष्ठ बीर

10दाऊद क विसिष्ठ बीरन क ऊपर क प्रमुखन क इ सूची अहइः इ सबइ बीर दाऊद क संग ओकरे राज्ज में बहोत सक्तीसाली बन गएन। उ पचे अउर इस्राएल क सबहिं

लोग दाऊद क सहायता किहन अउर ओका राजा बनाएन। इ ठीक वइसा भवा जइसा परमेस्सर बचन दिहे रहा।

11इ दाऊद क बीर मनइयन क सूची अहइ:

यासोबाम हक्मोनी लोगन में स रहा। यासोबाम राजा क बिसिष्ठ फउज क प्रमुख रहा। यासोबाम अपने भाले क उपयोग तीन सौ मनइयन स जुद्ध करइ बरे किहस। उ एक ही दाई ओन तीन सौ मनइयन क मार डाएस।

12एलीआज़ार दोदो क पूत, अदोही स रहा। एलीआज़ार तीन बीरन में स एक रहा। 13एलीआज़ार पसदम्मीम में दाऊद क संग रहा। पलिस्ती लोग उ जगह पइ जुद्ध करइ आएन। उ जगह पइ एक जौ स भरा खेत रहा। उहइ जगह, जहाँ इस्त्राएली लोग पलिस्ती लोगन स भागे रहेन। 14किन्तु उ सबइ तीन बीर उ खेत क बीच रुक गएन अउर पलिस्तिथन स लड़ेन अउ ओनका हराइ डाएन अउर इ तरह यहोवा इस्त्राएलियन क बड़ी जीत दइ दिहस।

15एक दाई, दाऊद, अदुल्लाम गुफा क लगे रहा अउर पलिस्ती फउज खाले रपाईम क घाटी में रही। तीस बीरन में स तीन बीरन उ गुफा तलक, लगातार रंगत भए दाऊद क लगे पहुँचेन।

16दूसर अवसर पइ, दाऊद किले में रहा, अउर पलिस्ती सेना क एक समूह बेतलेहेम में रही। 17एक बार दाऊद कहेस, “कास कउनो मोका बेतलेहेम नगर क दुआर क लगे क कुआँ स थोड़ा पानी लाइके पिलातेन!”

18तब तीन बीरन पलिस्ती सेना क बीच जुद्ध करत भए अपना रास्ता बनाएन अउर नगर-दुआर क निचके बेतलेहेम क कुएँ स पानी लिहिन। तीनहुँ बीरन दाऊद क लगे पानी लइ गएन। दाऊद पानी पिअइ स इन्कार कइ दिहस। उ उ पानी क यहोवा बरे भेंट क रूप में बाहेर उड़ेर दिहस। 19दाऊद कहेस, “परमेस्सर, मई इ पानी क नाहीं पी सकत। एन मनइयन मोरे बरे इ पानी क लिआवइ मैं अपनी जिन्गी क खतरे में डाएन। एह बरे जदि मई इ पानी क पिअत हउँ तउ इ ओनकर खून पिअइ क समान होइ।” एह बरे दाऊद उ जल क पिअइ स इन्कार किहस। तीनहुँ बीर उ तरह क बहोत स बहादुरी क काम किहन।

### दूसर बीर जोधा

20योआब क भाई, अबीसै, तीन बीरन क प्रमुख रहा। उ अपने भाले स तीन सौ मनइयन स लड़ा अउर ओनका मार डाएस। अबीसै तीन बीरन क तरह मसहूर होइ गवा। 21अबीसै उ तीनहुँ बीरन स दुइगुना जियादा प्रसिद्ध रहा। उ ओनकर प्रमुख होइ गवा, जदपि उ तीनहुँ बीरन में स नाहीं रहा।

22यहोवादा क पूत बनायाह, कबजेल क एक बीर जोधा रहा। उ एक सक्तीसाली मनइ क पूत रहा। बनायाह अनेक बीरता क काम किहेस। उ मोआब देस क दुइ सर्वोत्तम सिपाहियन क मार डाएस। एक दिन जब बर्फ गिरत रही, उ जमीन क अन्दर एक ठु माँदे में घुसा अउर हुवाँ एक सेर क मार डाएस। 23बनायाह मिस्त्र क एक मनई क मार डाएस। उ मनई लगभग साढ़े सात फिट ऊँचा रहा। उ मिस्त्र क मनई क लगे एक बहोत बड़का अउ भारी भाला रहा।

इ बुनकर क करघे क बिसाल खम्भे क नाई रहा अउर बनायाह क लगे सिरिफ एक ठु लाठी रही। किन्तु बनायाह मिस्त्री स भाला छोर लिहस। मुला बनायाह मिस्त्री स भाले क छीन लिहेस। बनायाह मिस्त्री मनई क भाले क उपयोग किहेस अउर ओका मार डाएस। 24इ सबइ कार्य रहेन जेनका योहयादा क पूत बनायाह किहस। बनायाह तीन बीरन क तरह प्रसिद्ध भवा। 25बनायाह तीस बीरन में सब स जियादा मसहूर रहा, मुला उ तीनहुँ बीरन में स नाहीं रहा। दाऊद बनायाह क अपने अंगरच्छकन क प्रमुख चुनेस।

### तीस बीरन

26इ सबइ राजा क बिसिष्ठ फउज में स रहेन: असाहेल, योआब क भाई, एल्हानान, दोदो क पूत बेतलेहेम नगर क रहा, 27हरोरी लोगन में स सम्मोत, पलोनी लोगन में स हेलेस; 28इक्केस क पूत, ईरा, ईरा तकोई नगर क रहा, अनातोत नगर क अबीएजेर; 29होसती लोगन में स सिब्बके, अहोही स ईलै; 30नतोपाई लोगन में स महरै; बाना क पूत हेलेद, हेलेद नतोपाई लोगन में स रहा; 31सीबै क पूत इतै, इतै बिन्यामीन क गिबा नगर स रहा, पिरातोनी लोगन में स बनायाह; 32गास घाटियन स हरै; अराबा लोगन में स अबीएल; 33बहूरीमा लोगन में स अजमावेत; सल्बोनी लोगन में स एल्यहबा; 34गुजोई लोगन में स हासेम क पूतन; सागे क पूत योनातन, योनातन हरारी लोगन में स रहा। 35सकार क पूत अहीआम, अहीआम हरारी लोगन में स रहा; ऊर क पूत एलीपाल; 36मेकराई लोगन में स हेपेर; पलोनी लोगन में स अहिय्याह; 37कर्मेली लोगन में स हेस्त्रो, एज्बै क पूत नारै; 38नातान क भाई योएल; हाग्री क पूत मिभार, 39अम्मोनी लोगन में स सेलेक; बरोती नहरै, (नहरै योआब क कवचवाहक रहा। योआब सरूयाह क पूत रहा।) 40येतेरी लोगन में स ईरा; इथ्री लोगन में स गारेब, 41हिती लोगन में स ऊरिय्याह; अहलै क पूत जाबाद; 42सीजा क पूत अदीना, सीजा रूबेन क परिवार समूह स रहा। (अदीना रूबेन क परिवार समूह क प्रमुख रहा। परन्तु उ भी अपने संग क तीस बीरन में स एक रहा।); 43माका क पूत हानान; मेतेनी लोगन में स योसापात; 44असतारोती लोगन में स उज्जिय्याह; होताम क पूत सामा अउर यीएल, होताम अरोएरी लोगन में स रहा। 45सिम्री क पूत यदीएल; तीसी लोगन स योहा, योहा यदीएल क भाई रहा; 46महवीमी लोगन में स एलीएल, एलनाम क पूत यरीबै अउर योसब्याह; मोआबी लोगन में स यित्मा; 47मसोबाई लोगन में स एलीएल, ओबेद अउर यासीएल।

### उ पचे बीर मनई जउन दाऊद क संग भएन

12 इ ओन मनईयन क सूची अहइ जउन दाऊद क लगे आएन जब दाऊद सिकलगा नगर में रहा। दाऊद तब भी कीस क पूत साऊल स अपने क छुपाए रहत रहा। इ मनईयन दाऊद क जुद्ध में मदद दिहे रहेन। 2इ सबइ मनई अपने दाएँ या बाएँ हाथ स धनुस क बाण क जरिये बेध सकत रहेन। अपनी गुल्ले स दाएँ या बाँए हाथ स पाथर लोकाइ सकत रहेन। उ पचे बिन्यामीन परिवार



समूह क साऊल क सम्बन्धी रहेन। ओनकर नाउँ इ सबइ रहेन:

3ओनकर प्रमुख अहीएजेर अउ योआज रहा। उ पचे समाआ क पूत रहेन। समाआ गिबावासी लोगन में स रहा; यजीएल अउर पेलेत उ पचे अजमावेत क पूत रहेन, अनातोनी नगर क बराका अउर येहू। 4गिबोनी नगर क यिसमायाह, (यिसमायाह एक बीर रहा अउर उ तीस बीरन क प्रमुख भी रहा।) गदेरा लोगन में स: यिर्मयाह, यहजीएल, योहानान अउर योजाबाद, 5एलूज़ै, यरीमोत बाल्याह, अउर समर्याह, हारूपी स सपत्याह, 6कोरह परिवार समूह स एल्काना, यिसिथ्याह, अजरेल, योएजेर अउर यासोबाम सबहिं, 7गदोर स यरोहाम क पूत योएला अउर जबद्याह।

### गादी लोग

8गाद क परिवार समूह क एक हीसा रेगिस्तान में दाऊद स ओकरे किले में आइ मिला। उ पचे जुद्ध बरे प्रसिच्छित फउजी रहेन। उ पचे भालन अउ डाल क उपयोग में कुसल रहेन। उ पचे सेर क तहर खौफनाक देखात रहेन अउर उ पचे हिरइ क नाई पहाड़न में दउड़ सकत रहेन।

9गाद क परिवार समूह क सेना क प्रमुख एजेर रहा। ओबद्याह अधिकार में दूसर रहा। एलीआब अधिकार में तीसरा रहा। 10मिसमन्ना अधिकार में चउथा रहा। यिर्मयाह अधिकार में पाँचवा रहा। 11अतै अधिकार में छठा रहा। एलीएल अधिकार में सातवाँ रहा। 12योहानान अधिकार मा आठवाँ रहा। एलजाबाद अधिकार में नवाँ रहा। 13यिर्मयाह अधिकार में दसवाँ रहा। मकबन्नै अधिकार में गियारहवाँ रहा।

14उ सबइ लोग गादी सेना क प्रमुख रहेन। उ समूह क सब स कमजोर फउजी भी दुस्मन क सौ फउजियन स जुद्ध कइ सकत रहा। उ समूह क सब स जियादा बलिस्ट फउजी दुस्मन क एक हजार फउजियन स जुद्ध कइ सकत रहा। 15गाद क परिवार समूह क उ सबइ फउजी रहेन जउन बरिस क पहिले महीने में यरदन नदी क उ पार गएन। इ बरिस क उ समइ रहा, जब यरदन नदी में बाढ़ आई रही। उ पचे घाटियन में रहइवाले सबहिं लोगन क पाछा कइके भगाएन। उ पचे ओन लगोन क पूरब अउ पच्छिम में पाछा कइके भगाएन।

### दूसर जोधा दाऊद क संग आवत ही

16बिन्यामीन अउ यहूदा क परिवार समूह क दूसर लोगन भी दाऊद क लगे किला में आएन। 17दाऊद ओनसे भेंटइ बाहरे निकरा। दाऊद ओनसे कहेस, “जदि तू लोग सान्ति क संग मोर सहायता करइ आए हो, तउ मई तू लोगन क सुआगत करत हउँ। मोरे संग राह। किन्तु जदि तू मोका मोर दुस्मनन क हाथ में देइ बरे आवा अहा, जब कि मई तोहार कछू भी बुरा नाहीं किहे अहउँ, तउ हमरे पुरखन क परमेस्सर लखी कि तू का किहा अउर तोहका दण्ड देइ।”

18अमसै तीस बीरन क प्रमुख रहा। तब अमासै पइ आतिमा उतरी। अमासै कहेस,

“दाऊद हम तोहार अही। यिसै क पूत, हम तोहार संग अही। सान्ति होइ तोहारे संग। सान्ति ओन लोगन क जउन तोहार मदद करई। काहकि तोहार परमेस्सर, तोहार मदद करत ह।”

तब दाऊद एन लोगन क सुआगत किहस। उ ओनका आपन सैनिकन क प्रमुखन बनाएस।

19मनस्से क परिवार क समूह क कछू लोग भी दाऊद क संग होइ गएन। उ पचे दाऊद क संग तब होइ गएन जब ओका पलिस्तियन क संग साऊल क खिलाफ जुद्ध करइ बरे जाइ क रहा। मुला असल में दाऊद अउ ओकर लोग पलिस्तियन क मदद नाहीं किहन। एह बरे पलिस्तियन क प्रमुख सलाह क बाद दाऊद क बाहरे पठइ देइ क निर्णय लिहन। ओन सासकन कहेन, “जदि दाऊद अपने सुआमी साऊल क लगे जाइ, तउ हमार मूँड़ि काट डाइ जइहीं।” 20इ सबइ मनस्से क लोग रहेन जउन दाऊद क संग उ समइ मिलेन जब उ सिकलग: अदना, योजाबाद, यदीएल, मीकाएल, योजाबाद, एलीहू अउर सिल्लतै नगर क गवा। उ पचे सबहिं मनस्से क परिवार समूह क सेनाध्यच्छ रहेन। 21उ पचे दाऊद क मदद डाकूअन क गिरोह क खिलाफ जुद्ध करइ में करत रहेन। उ पचे मनस्से क बीर जोधन रहेन। उ पचे दाऊद क सेना क प्रमुख रहेन।

22दाऊद क मदद बरे रोजाना जियादा स जियादा मनई आवत रहेन। इ तरह दाऊद क लगे बिसाल अउ ताकतवर फउज होइ गइ।

### हेब्रोन में दूसर लोग दाऊद क संग आवत ही

23हेब्रोन नगर में जउन लोग दाऊद क लगे आएन, ओनकर गनती इ अहइ। इ सबइ मनई जुद्ध बरे तइयार रहेन। उ पचे साऊल क राज क, दाऊद क देइ आएन। इहइ उ बात रही जेका यहोवा कहे रहा कि होइ। इ ओनकर गनती अहइ:

24यहूदा क परिवार समूह स छ: हजार आठ सौ मनई जुद्ध बरे तइयार रहेन। उ पचे भालन अउ डाल रखत रहेन।

25सिमोन क परिवार समूह स सात हजार एक सौ मनई रहेन। उ पचे जुद्ध बरे तइयार बीर सैनिक रहेन।

26लेवी क परिवार समूह स चार हजार छ: सौ मनई रहेन। 27यहोयादा उ समूह में रहा। उ हारून क परिवार स प्रमुख रहा। यहोयादा क संग तीन हजार सात सौ मनई रहेन। 28सादोक भी उ समूह में रहा। उ बीर जवान फउजी रहा। उ अपने परिवार स बाईस अधिकारियन क संग आवा।

29बिन्यामीन क परिवार समूह स तीन हजार मनइयन रहेन। उ सबइ साऊल क सम्बन्धी रहेन। उ समइ तलक, ओनके जियादातर मनई साऊल परिवार क भगत रहेन।

30एप्रैम परिवार समूह स बीस हजार आठ सौ मनई रहेन। उ पचे बीर जोधा रहेन। उ पचे अपने परिवार क मसहूर मनईरहेन।

31मनस्से क आधे परिवार समूह स अटठारह हजार मनईरहेन। ओनका नाउँ लइके आवइ क बोलावा गवा अउर दाऊद क राजा बनाइ क कहा गवा।

32इस्सकार क परिवार स दुइ सौ बुद्धिमान प्रमुख रहेन। उ पचे इस्त्राएल बरे उचित समइ पइ ठीक काम करब जानत रहेन। ओनकर सम्बन्धी ओनके संग रहेन अउर ओनकर आदेस क पालन करत रहेन।

33जबूलून क परिवार समूह स पचास हजार मनइयन रहेन। उ सबइ प्रसिच्छित फउजी रहेन। उ पचे हर तरह क अस्त्र-सस्त्र स जुद्ध बरे प्रसिच्छित रहेन। उ पचे दाऊद क मदद पूरी वफादारी क संग किहस।

34नप्ताली क परिवार समूह स एक हजार अधिकारी रहेन। ओनके संग सैंतीस हजार मनई रहेन। उ सबइ मनई भालन अउ डालन लइके चलव रहेन।

35दान क परिवार समूह स जुद्ध बरे तइयार अटठाईस हजार छः सौ मनई रहेन।

36आसेर क परिवार समूह स जुद्ध बरे तइयार चालीस हजार प्रसिच्छित फउजी रहेन।

37यरदन नदी क पूरब स रूबेन, गादी अउ मनस्से क आधे परिवारन स एक लाख बीस जहार मनई रहेन। ओन लोगन क लगे हर तरह क अस्त्र-सस्त्र रहेन।

38उ पचे सबहिं मनई बीर जोधा रहेन। उ पचे हेब्रोन नगर स दाऊद क सारे इस्त्राएल क राजा बनावइ क पूरी सलाह कइके आए रहेन। इस्त्राएल क दूसर लोग भी सलाह किहेन कि दाऊद राजा होइ। 39ओन लोग दाऊद क संग हेब्रोन में तीन दिन बिताएन। उ पचे खाएन अउ पीएन, काहेकि ओनकर सम्बन्धियन ओनके बरे भोजन बनाए रहेन। 40जहाँ इस्साकार, जबूलून अउर नप्ताली क समूह रहत रहेन, उ छेत्र स भी ओनकर पड़ोसी गदहन, ऊँट खच्चर अउर गइया पइ भोजन लइके आए रहेन। उ पचे बहोत सा आटा, अंजीर पूड़ा, रसिन, दाखरस, तेल, गाय-बर्धा अउर भेड़िन लिआएन। इस्त्राएल में लोग बहोत खुस रहेन।

### करार क सन्दूख क वापस लिआउब

**13** दाऊद अपनी फउज क सबहिं अधिकारियन स बात किहस। 2तब दाऊद इस्त्राएल क सबहिं लोगन क एक संग बोलाएस। उ ओनसे कहेस: “जदि तू लोग एक नीक बिचार सुमझत अहा। अउर जदि इ उहइ अहइ जेका यहोवा चाहत ह, तउ हम लोग अपने भाइयन क इस्त्राएल क सबहिं छेत्रन में सँदेस पठइ। हम लोग ओन जादकन अउ लेवीबंसियन क भी सँदेस पठइ जउन हम लोगन क भाइयन क संग नगरन अउ ओनके निअरे क खेतन में रहत हीं। सँदेसा में ओनसे आवइ अउर हमार साथ देइ क कहा जाइ। 3हम लोग करार क सन्दूख क यरूसलेम में अपने में अपने लगे वापस लिआइ। हम लोग करार क सन्दूख क देखभाल साऊल क सासन काल में नाहीं कीन्ह।” 4एह बरे इस्त्राएल क सबहिं लोग दाऊद क सलाह स्वीकार किहन। ओन सबहिं इ विचार किहेन कि इहइ करब ठीक अहइ।

5एह बरे दाऊद मिस्र क सीहोर नदी स हमात क प्रवेस दुआर तलक क सबहिं इस्त्राएल क लोगन क बटोरस। उ पचे किर्यत्यारीम नगर स करार क सन्दूख क वापस लइ जाइ क बरे एक संग आएन। 6दाऊद अउ इस्त्राएल क सबहिं लोग ओकरे संग यहूदा क बाला क गएन। (बाला

किर्यत्यारीम क दूसर नाउँ अहइ।) उ पचे हुवाँ करार क सन्दूख क लिआवत बरे गएन। उ करार क सन्दूख यहोवा परमेस्सर क सन्दूख अहइ। उ करार सगरादूत क ऊपर बइठत ह। इहइ सन्दूख अहइ जउन यहोवा क नाउँ स गोहराइ जात ह।

7लोग करार क सन्दूख अबीनादाब क घरे स हटाएन। उ पचे ओका एक नई गाड़ी में रखेन। उज्जा अउ अह्यो गाड़ी क चलावत रहेन।

8दाऊद अउ इस्त्राएल क सबहिं लोग परमेस्सर क सम्मुख उत्सव मनावत रहेन। उ पचे परमेस्सर क स्तुति करत रहेन अउ गीत गावत रहेन। वे पचे वीणा तम्बूरा, दोत, मंजीरा अउ तुरही बजावत रहेन।

9उ पचे कीदोन क खरिहाने में आएन। गाड़ी हींचइवाले बर्धन क ठोकर लाग अउ करार क सन्दूख लगभग भहराइ गवा। उज्जा सन्दूख क धरइ बरे आपन हाथ आगे बढ़ाएस। 10यहोवा उज्जा पइ बहोत जियादा कोहाइ गवा। यहोवा उज्जा क मार डाएस काहेकि उ सन्दूख क छुइ लिहस। इ तरह उज्जा परमेस्सर क समन्वा हुवाँ मरा। 11परमेस्सर आपन किरोध उज्जा पइ देखाएल अउर एहसे दाऊद कोहाइ गवा। उ समइ स अब तलक उ जगह “पेरेसउज्जा” कही जात ह।

12उ दिन दाऊद परमेस्सर स डेराइ गवा। दाऊद कहेस, “मई करार क सन्दूख क हिआँ अपने लगे नाहीं लिआइ सकत।” 13उ एह बरे दाऊद करार क सन्दूख क अपने संग दाऊद नगर में नाहीं लइ गवा। उ करार क सन्दूख क ओबेद-एदोम क घर पइ तजेस। ओबेद-एदोम गत नगर स रहा। 14करार क सन्दूख ओबेद-एदोम क परिवार में ओकरे घरे में तीन महीने रहा। यहोवा ओबेद-एदोम क परिवार अउर ओकरे हिआँ जउन कछू रहा, क आसीर्बाद दिहस।

### दाऊद क राज बित्सार

**14** हीराम सूर नगर क राजा रहा। हीराम दाऊद क लगे सँदेस वाहक पठएस। हीराम देवदारु क लट्ठन, संगतरास अउ बड़ई भी दाऊद क लगे पठएस। हीराम ओनका दाऊद बरे एक ठु महल बनावइ बरे पठएस। 2तब दाऊद समुझ सका कि यहोवा ओका फुरइ ही इस्त्राएल क राजा बनाएस ह। यहोवा दाऊद क राज क बहोत विस्तृत अउ सक्तीसाली बनाएस। परमेस्सर इ एह बरे किहस कि उ दाऊद अउर इस्त्राएल क लोगन स पिरेम करत रहा। 3दाऊद यरूसलेम में बहोत सी मेहरारुअन क संग बियाह किहेस अउर ओकरे बहोत स बिटवा अउ बिटिया भइन। 4यरूसलेम में पइदा भइ दाऊद क सन्तानन क नाउँ इ सबइ अहई: सम्मू, सोबाब, नातान, सुलैमान, 5यिभार, एलीसू, एलपेलेत, 6नेगह, नेपेग, यापी, 7एलीसामा, बेल्यादा, अउर एलीपेलेद।

### दाऊद पलिस्तिन क पराजित करत ह

8पलिस्ती लोग सुनेन कि दाऊद क अभिसेक इस्त्राएल क राजा क रूप में भवा ह। एह बरे, सबहिं पलिस्ती लोग दाऊद क खोज में गएन। दाऊद एकरे बारे में सुनेस। एह बरे उ पलिस्ती लोगन स लइइ गवा। 9पलिस्तिन रपाईम

क घाटी में रहइवले लोगन पइ हमला किहेन अउर ओनकी चिजियन चुराएन। 10दाऊद परमेस्सर स पूछेस, “का ओका जानइ चाही अउर पलिस्ती लोगन स जुद्ध करइ चाही? क तू मोका ओनका हरावइ देव्या?”

यहोवा दाऊद क जवाब दिहस, “जा! मई तौहका पलिस्ती लोगन क हरावइ देब।”

11तब दाऊद अउर ओकर लोग बालपरासीम नगर तलक गएन। हुवाँ दाऊद अउ ओकर लोग पलिस्ती लोगन क हराएन। दाऊद कहेस, “जिस तरह टूटहे बाँधि स पानी फूट पड़त ह उहइ तरह, परमेस्सर मोरे दुस्मनन पइ फूट पड़ा ह। परमेस्सर इ मोरे माध्यम स किहस ह।” इहइ कारण अहइ कि इ जगह बालपरासीम क नाउँ स जाना जात ह। 12पलिस्ती लोग अपनी मूरतियन क बालपरासीम में तजि दिहन। दाऊद ओन मूरतियन क बार देइ क आदेस दिहस।

### पलिस्ती लोगन पइ दूसर बिजइ

13पलिस्तियन रपाईम घाटी में रहइवाले लोगन पइ फुन हमला किहन। 14दाऊद फुन परमेस्सर स पराथना किहस। परमेस्सर दाऊद क पराथना क जवाब दिहस। परमेस्सर कहेस, “दाऊद, जब तू हमला करा तउ पलिस्ती लोगन क पाछे पहाड़ी पइ जिन जा। एकरे बदले, ओनके चारिहुँ कइँती जा। हुवाँ छुपा, जहाँ मोखा क बृच्छ अहइ। 15एक ठू पहरेदार क बृच्छ क चोटी पइ चढ़इ क कहा। जइसे ही उ बृच्छन क चोटी स फउज क चलइ क आवाज क सुनी, उहइ समइ तू पलिस्तियन पइ हमला करा। परमेस्सर तोहरे समन्वा आइहीं अउ पलिस्ती फउज क हराइहीं।” 16दाऊद उहइ किहस जउन परमेस्सर करइ क कहेस एह बरे दाऊद अउ ओकर फउज पलिस्ती फउज क हराएस। उ पचे पलिस्ती फउजियन क लगातार गिबोन नगर स गेजेर नगर तलक मारेन। 17इ तरह दाऊद सबहिँ देसन में मसहूर होइ गवा। यहोवा सबहिँ रास्ट्रन क हिरदइ में ओकर डर बइठाइ दिहस।

### करार क सन्दूख यरूसलेम में

15 दाऊद, अपने बरे दाऊद नगर में महल बनवाएस। तब उ करार क सन्दूख क बरे एक ठु जगहिया बनाएस। उ एकरे बरे एक तम्बू डाएस। 2तब दाऊद कहेस, “सिरफ लेवीबंसियन क करार क सन्दूख लइ चलइ क मंजूरी अहा। यहोवा ओनका करार क सन्दूख चलइ अउर ओकर सदा ही सेवा बरे चुनेस ह।”

3दाऊद इस्राएल क सबहिँ लोगन क यरूसलेम में एक संग मिलइ बरे बोलाएस जब तलक लेवीबंसियन करार क सन्दूख क उ जगहिया पइ लइके आएन जउन उ ओकरे बरे बनाए रहा। 4दाऊद हारून क सन्तानन अउ लेवीबंसियन क एक संग बोलाएस। 5कहात परिवार समूह स एक सौ बीस मनई रहेन। ऊरीएल ओनकर प्रमुख रहा। 6मरारी क परिवार समूह स दुई सौ बीस मनई रहेन। असायाह ओनकर प्रमुख रहा। 7गोसोमियन क परिवार समूह क एक सौ तीस लोग रहेन। योएल ओनकर प्रमुख रहा। 8एलिसापान क परिवार समूह क दुई सौ लोग रहेन। समायाह ओनकर प्रमुख रहा।

9हेब्रोन क परिवार समूह क सत्तर लोग रहेन। एलीएल ओनकर प्रमुख रहा। 10उज्जीएल क परिवार समूह क एक सौ बारह लोग रहेन। अम्मीनादाब ओनकर प्रमुख रहा।

### याजक अउ लेवीबंसियन स

#### दाऊद बातन करत ह

11तब दाऊद सादोक अउ एब्यातार याजकन स कहेस कि उ पचे ओकरे लगे आवइँ। दाऊद ऊरीएल, असायाह, योएल, समायाह, एलीएल अउर अम्मीनादाब लेवीबंसियन क भी अपने लगे बोलाएस। 12दाऊद ओनसे कहेस, “तू लोग लेवी परिवार समूह क प्रमुख अहा। तू पचन्क अपने अउर दूसर लेवीबंसियन क पवितर बनावइ चाही। तब करार क सन्दूख क उ जगह पइ लिआवा, जेका मई ओकरे बरे बनाएउँ ह। 13पिछली दाई हम लोग यहोवा परमेस्सर स नाही पूछा कि करार क सन्दूख क हम कइसे लइ चली। लेवीबंसियन, तू पचे एका नाही लइ चल्या, इहइ कारण अहइ कि यहोवा हम क सजा दिहस।”

14तब याजक अउ लेवीबंसियन अपने क पवितर किहन जेहसे उ पचे इस्राएल क यहोवा परमेस्सर क सन्दूख क लइके चल सकइँ। 15लेवीबंसियन बिसेस डंडन क उपयोग, अपने काँधन पइ करार क सन्दूख क लइ चलइ बरे किहन जइसा मूसा क आदेस रहा। उ पचे सन्दूख क उ तरह स लइ चलें जइसा यहोवा कहे रहा।

#### गायक

16दाऊद लेवीबंसियन क ओनके गायक भाइयन क लिआवइ बरे कहेस। गायकन क अपनी वीणा, तम्बूरा अउर मंजीरा लिआउब रहा अउर खुसी क गीत गाउब रहा।

17तब लेवीबंसियन हेमान अउर भाइयन आसाप अउ एतान क बोलाएन। हेमान योएल क पूत रहा। आसाप बरेक्याह क पूत रहा। एतान कूसयाह क पूत रहा। इ सबइ मनई मरारी परिवार समूह क रहेन। 18हुवाँ लेवीबंसियन क दूसर समूह भी रहा। उ पचे जकर्याह, बेन याजीएल, समीरामोत, यहीएल, उन्नी, एलीआब, बनायाह, मासेयाह, मत्तियाह, एलीपलेह, मिकनेयाह, ओबेदेदोम अउ यीएल रहेन। इ सबइ लोग लेवीबंस क रच्छक रहेन।

19गायक हेमान, आसाप अउ एतान काँसे क मँजीरा बजावत रहेन। 20जकर्याह, अजीएल, समीरामोत, यहीएल, उन्नी, एलीआब, मासेयाह अउ बनायाह, अलामोत वीणा बजावत रहेन। 21मत्तियाह, एलीपलेह, मिकनेयाह, ओबेदेदोम, यीएल अउर अजज्याह सेमिनिथ तम्बूरा बजावत रहेन। इ ओनकर सदा ही क काम रहा। 22लेवीबंसी प्रमुख कनन्याह गायन क प्रबन्धक रहा। कनन्याह क इ काम मिला रहा काहेकि उ गावइ में बहोत जियादा कुसल रहा।

23बरेक्याह अउ एलकाना, करार क सन्दूख क रच्छकन में स दुइ रहेन। 24याजक सबन्याह, योसापात, नतनेल, अमासै, जकर्याह, बनायाह अउर एलीएजेर क काम करार क सन्दूख क समन्वा चलत समइ तुरही बजाउब रहा। ओबेदेदोम अउर यहिय्याह करार क सन्दूख बरे दूसर रच्छक रहेन।

25दाऊद इस्त्राएल क अग्रज अउ सेनापति करार क सन्दूख क लेइ गएन। उ पचे ओका ओबेदेदोम क घरे स बाहरे लिआएन। हर एक बहोत खुस रहा। 26परमेस्सर ओन लेवीबंसियन क मदद किहस जउन यहोवा क करार क सन्दूखे क लइके चलत रहेन। उ पचे सात बर्धन अउर सात भेड़न क बलि दिहन। 27सबहिं लेवीबंसी जउन करार क सन्दूख लइके चलत रहेन, उत्तिम सन क चोगे पहिरे रहेन। गायन क प्रबन्धक कनन्याह अउर सबहिं गायक उत्तिम सन चोगान पहिरे रहेन अउ दाऊद भी उत्तिम सन क बना एपोद पहिरे रहा।

28इ तरह इस्त्राएल क सारे लोग यहोवा क करार क सन्दूख क लइ आएन। उ पचे उद्घोष किहन, उ पचे भेड़न क सींग अउ तुरही बजाएन अउर उ पचे मँजीरन, वीणा अउर तम्बूरन बजाएन।

29जब करार क सन्दूख दाऊद नगर में पहुँचा, मीकल खिड़की स लखेस। मीकल साऊल क बिटिया रही। उ राजा दाऊद क चारिहुँ कइँती नाचत अउर बजावत लखेस। उ अपने हिरदइ में दाऊद क बरे सम्मान क खोइ दिहस उ सोचेस कि उ मूरख बनत बाटइ।

**16** लेवीबंसी करार क सन्दूख लइ आएन। अउर ओका उ तम्बू में धरेन जेका दाऊद एकरे बरे खड़ी कइ रखे रहा। तब उ पचे परमेस्सर क होमबलि अउ मेलबलि चढ़ाएन। 2जब दाऊद होमबलि अउ मेलबलि देब पूरा कइ चुका तउ उ लोगन क आसीर्बादि देइ क बरे यहोवा क नाउँ लिहस। 3तब उ हर एक इस्त्राएली मेहरारु-मनई क एक-एक रोटी, खजूर अउ किसमिस दिहस।

4तब दाऊद करार क सन्दूख क समन्वा सेवा बरे कछू लेवीबंसियन क चुनेस। ओन लेवीबंसियन क इस्त्राएलियन क यहोवा परमेस्सर बरे उत्सव क मनावइ, आभार परगट करइ अउ स्तुति करइ क जिम्मेदारी सौंपा गवा। 5आसाप, पहिले समूह क प्रमुख रहा। आसाप क समूह सांरंगी बजावत रहा। जकर्याह दूसरे समूह क प्रमुख रहा। इ सबइ दूसर लेवीबंसियन रहेन: यीएल, समीरामोत, यहीएल, मत्तित्याह, एलीआब, बनायाह, ओबेद-एदोम अउ यीएल। इ सबइ मनई वीणा अउ तम्बूरा बजावत रहेन 6बनायाह अउर यहजीएल अइसे याजक रहेन जउन करार क सन्दूख क समन्वा सदा ही तुरही बजावत रहेन। 7इ उहइ समइ रहा जब दाऊद पहिली बार आसाप अउर ओकरे भाइयन क यहोवा क स्तुति करइ क काम किहस।

### दाऊद क आभार गीत

8यहोवा क स्तुति करा, ओकर नाउँ ल्या। लोगन क ओन महान कार्यन क जानकारी द्या जेनका यहोवा किहेस ह।

9यहोवा क गीत गावा, यहोवा क स्तुतियाँ गवा। ओकर सबहिं महान कार्यन क गुणगान करा।

10यहोवा क पवित्तर नाउँ पइ गर्व करा। सबहिं लोग जउन यहोवा क मदद पइ भरोसा करत हीं, खुस ह्वा।

11यहोवा अउर ओकरी सक्ती क खोज करा। सदा ही मदद बरे ओकरे लगे जा।

12ओन अजूबे कार्यन क याद करा जउन यहोवा किहेन ह। ओकरे निर्णयन क याद राखा अउर सक्ती स भरपूर कार्यन क जउन उ किहेस।

13इस्त्राएल क सन्तानन यहोवा क सेवक अहइँ। याकूब क पूतन यहोवा क जरिये चुने गए लोग अहइँ।

14यहोवा हमार परमेस्सर अहइ, ओकर नेमन सबहिं जगह अहइ।

15ओकरी करार क सदा ही याद राखा, उ अपने आदेसन हजार पीढ़ियन बरे दिहेस ह।

16इ करार अहइ जेका यहोवा इब्राहीम क संग किहे रहा। इ करार अहइ जउन यहोवा इसहाक क संग किहेस।

17यहोवा एका याकूब क लोगन क बरे कानून बनाएस। इ करार इस्त्राएल क संग अहइ जउन सदा ही बनी रही।

18यहोवा इस्त्राएल स कहे रहा: “मई कनान देस तोहका देब इ प्रतिग्या क पहुँटा तोहार ही होइ।”

19परमेस्सर क लोग गनती में थोड़े रहेन। उ पचे उ देस में अजनबी रहेन।

20उ पचे एक रास्ट्र स दूसर रास्ट्र क गएन। उ पचे एक राज स दूसर क गएन।

21मुला यहोवा कउनो क ओनका चोट पहुँचवइ न दिहस। यहोवा राजा लोगन क चितउनी दिहस कि उ पचे ओनका चोट न पहुँचावइँ।

22यहोवा ओन राजा लोगन स कहेस, “मोरे चुने लोगन क चोट न पहुँचावा। मोरे नबियन क चोट न पहुँचावा।”

23यहोवा बरे सारी धरती पइ गुनगान करा, हर रोज तू पचन्क यहोवा क जरिये हमार रच्छा क सुभ समाचार परगट करइ चाही।

24यहोवा क प्रताप क सबहिं रास्ट्रन स कहा यहोवा क अजूबे कार्यन क सबहिं लोगन स कहा।

25यहोवा महान अहइ, यहोवा क स्तुति होइ चाही यहोवा दूसर देवतन स अधिक भए जोगग अहइ।

26काहेकि ओन रास्ट्रन सबहिं देवता मात्र मूरतियन अहइँ। मुला यहोवा आकासे क बनाएस।

27यहोवा महिमा अउ सम्मान रखत अहइ। ताकत अउर आनन्द ओकर जगह में मौजूद अहइ।

28परिवार अउ लोग यहोवा क महिमा अउ सक्ती क स्तुति करत हीं।

29यहोवा क प्रताप क स्तुति करा। ओकरे नाउँ क सम्मान द्या। यहोवा क अपनी भेंटन चढ़ावा, यहोवा अउ ओकर पवित्तर सुन्दरता क उपासना करा।

30यहोवा क समन्वा भय स सारी धरती काँपइ चाही। किन्तु उ धरती क मजबूत बनाएस। एह बरे धरती हिली नाहीं।

31धरती अउ आकासे क आनन्द में झूमइ द्या। चारिहुँ कइँती लोगन क कहइ द्या, “यहोवा सासन करत ह।”

32सागर अउ एहमाँ क सबहिं चिचियन क चिचयाइ द्या। खेतन अउ ओनमाँ क हर एक चीज क आपन आनन्द परगट करइ द्या।

33यहोवा क समन्वा बन क बृच्छ आनन्द स गइहीं। काहेकि यहोवा आवत अहइ। उ संसार क निआव करइ आवत बाटइ।

34अहा! यहोवा क धन्य द्या, उ अच्छा अहइ। यहोवा क पिरेम सदा बना रहत ह।

35यहोवा स कहा, “हे परमेस्सर, हमरे रच्छक, हमार रच्छा करा। हम लोगन क एक संग बटोरा, अउर हमका दूसर रास्ट्रन स बचावा। अउर तब हम तोहरे पवितर नाउँ क स्तुति कइ सकित ह। तब हम तोहरे स्तुति अपने गीतन स कइ सकित ह।”

36इस्त्राएल क यहोवा परमेस्सर क सदा स्तुति होत रहइ जइसे कि सदा ही ओकर बड़कई होत रहत ह। सबहि लोगन कहेन, “आमीन!” उ पचे यहोवा क स्तुति कहेन।

37तब दाऊद आसाप अउ ओकरे भाइयन क हुवाँ यहोवा क करार क सन्दूख क समन्वा छोड़ेस। दाऊद ओनका ओकरे समन्वा हर रोज सेवा करइ बरे छोड़ेस। 38दाऊद आसाप अउर ओकरे भाइयन क संग सेवा करइ बरे ओबेद-एदोम अउर दूसर अइसठ लेबीबंसियन क छोड़ेस। ओबेद-एदोम अउर होसा रच्छक रहेन। ओबेद-एदोम यदूतन क पूत रहा।

39दाऊद याजक सादोक अउ दूसर याजकन क जउन गिबोन में ऊँची जगह पइ यहोवा क तम्बू क समन्वा ओकरे संग सेवा करत रहेन ओकर संग छोड़ेस। 40हर भिसारे अउ साँझ सादोद अउ दूसर याजक होमबलि क वेदी पइ होमबलि चढ़ावत रहेन। उ पचे इ यहोवा व्यवस्था में लिखे गए ओन नेमन क पालन करइ बरे करत रहेन जेनका यहोवा इस्त्राएल क दिहे रहा। 41हेमान अउ यदूतन अउ सबहि दूसर लेबीबंसियन यहोवा क स्तुतिगान करइ बरे नाउँ लइके चुने गए रहेन, काहेकि ओकर पिरेम सदा ही बना रहत ह। 42हेमान अउ यदूतन ओनके संग रहेन। ओनकर काम तुरही अउ मँजीरा बजाउब रहा। उ पचे दूसर संगीत बाजा बजावइ क काम भी करत रहेन, जब परमेस्सर क स्तुति क गीत गाए जात रहेन। यदूतन क पूतन दुआसन क रच्छा करत रहा।

43उत्सव मनावइ क पाछे, सबहि लोग चले गएन। हर एक मनई अपने-अपने घर चला गवा अउर दाऊद भी अपने परिवार क आसीबाद देइ बरे घर गवा।

### परमेस्सर दाऊद क बचन दिहस

**17** दाऊद अपने घरे चले जाइ क पाछे नातन नबी स कहेस, “लखा, मई देवदारु स बने घरे में रहत हउँ, मुला यहोवा क करार क सन्दूख तम्बू में धरा अहइ। मई परमेस्सर बरे एक मन्दिर बनावइ चाहत अहउँ।”

2नातान दाऊद क जवाब दिहस, “तू जउन कछू करइ चाहत अहा, कइ सकत अहा। परमेस्सर तोहरे संग अहइ।”

3मुला परमेस्सर क संदेसा उ रात नातान क मिला। 4परमेस्सर कहेस, “जा अउर मोर सेवक दाऊद स इ कहा: “यहोवा इ कहत ह, ‘दाऊद, तू उ नाही अहइ जउन मोर बरे एक घर बनाइ। 5जब स मई इस्त्राएल क मिश्र स बाहेर लिआएउँ तब स अब तलक, मई घरे में नाही रहा हउँ। मई

एक तम्बू स दूसर तम्बू क चरिहूँ कइँती घूमत रहा हउँ। 6जउने समइ मई इस्त्राएल में विभिन्न जगहन पइ चारिहूँ कइँती घूमत रहेउँ, मई कउनो प्रमुख स जेनका मई आपन लोगन क अगवाइ करइ बरे आदेस दिहेउँ रहा इ नाही कहेउँ: तू मोरे बरे देवदारु बृच्छ क काठे स घर काहे नाही बनाया ह?’

7“अब तू मोरे सेवक दाऊद स कहा: सर्वसवतीमान यहोवा तोहसे कहत ह, ‘मई तोहका चरागाह स अउर भेड़िन क देखरेख करइ स लिएउँ। मई तोहका अपने इस्त्राएली लोगन क सासक बनाएउँ। 8तू जहाँ गया, मई तोहारे संग रहेउँ। मई तोहारे अगवा-अगवा चलेउँ अउर मई तोहारे दुस्मनन क मारेउँ। अब मई तोहका पृथ्वी पइ सब स जियादा मसहूर मनइयन में स एक बना रहेउँ। 9मई इ जगह अपने इस्त्राएल क लोगन क दइ देत अहइ। मई ओनका उ जगह पइ स्थापित करब, अउर उ पचे हुवाँ सान्तिपूर्वक रइहीं। उ पचे अब आगे अउर परेसान नाही कीन्ह जइहीं। बुरे लोग ओनका वइसे चोट नाही पहेंचाइही जइसा उ पचे पहिले पहेंचाए रहेन। 10उ समइ स जब मई आपन लोग इस्त्राएल क अगुवाइ अउ रच्छा करइ बरे निआवधीसन क नियुक्त किहा, मई तोहार सबइ दुस्मनन क हराएस हउँ।

“मई तोहसे कहत हउँ कि यहोवा तोहार परिवार क एक सही परिवार बनाई। 11जब तू मरब्या अउर अपने पुरखन स जाइ भेंटब्या, तब मई तोहारे निज पूत क नवा राजा होइ देब। नवा राजा तोहारे पूतन में स एक होइ अउर मई ओकर राज क सक्तीसाली बनाउब। 12तोहार पूत मोरे बरे एक ठु घर बनाई। मई तोहारे पूत क परिवार क सदा बरे सासक बनाउब। 13मई ओकर बाप बनब अउर उ मोर पूत होइ। साऊल तोहसे पहिले राजा रहा। मई ओह प स आपन पिरेम अउर मदद हटाइ लिएउँ। किन्तु मई तोहारे पूत स पिरेम क नाही हटाउब। 14मई ओका सदा बरे अपने घर अउर राज क संरच्छक बनाउब। ओकर सासन सदा ही चलत रही।”

15नातन अपने इ दर्सन अउर परमेस्सर जउन सबहि बातन कहे रहा ओकरे बारे में दाऊद स कहेस।

### दाऊद क पराथना

16तब दाऊद पवितर तम्बू में गवा अउर यहोवा क समन्वा बइठा। दाऊद कहेस, “यहोवा परमेस्सर, तू मोरे बरे अउर मोरे परिवार बरे ऐतना जियादा किहा ह अउर मई नाही समुझत कि काहे? 17अउर माना कि इ काफी नाही रहा, किन्तु, ओ परमेस्सर, तू मोका मोरे परिवार क भविस्स बताएस ह। तू मोरे बरे एक बहोत महत्वपूर्ण मनई जइसा बेउहार किहा ह। 18मई अउर जियादा का काहि सकत हउँ? तू मोरे बरे ऐतना जियादा किहा ह अउर तू मोका बहोत सम्मान दिहेस ह अउर मई सिरिफ तोहार सेवक हउँ। तू मोका जानत ह। 19यहोवा, तू इ अजूबा कार्य मोरे बरे किहा ह अउर इ तू किहा काहेकि तू इ महान कार्य क बतावइ चाहत ह। 20यहोवा, तोहरे समान अउर कउनो नाही अहइ। तोहरे अलावा कउनो परमेस्सर नाही अहइ। हम लोग कबहुँ कउनो देवता क अइसे अजूबा कार्य करत नाही सुना ह।

21का इस्त्राएल क समान दूसर कउनो रास्ट्र अहइ? इस्त्राएल ही पृथ्वी पइ एकमात्र रास्ट्र अहइ जेकरे बरे तू इ अजूबा कार्य किहा। तू हम क महान अउर चमत्कारवाला अद्भुत कार्य कइ के मिस्र स बाहेर निकार्या अउर हमक आजाद किहा। तू अपने लोगन क समन्वा गया अउर दूसर लोगन क हमरे बरे भुइँया छोड़ेइ क मजबूर किहा। अउर इ महान कार्य कइके तू मसहूर होइ गवा। 22तू इस्त्राएल क सदा बरे आपन लोग बनाया अउर यहोवा तू ओकर परमेस्सर भया।

23“यहोवा, तू इ प्रतिग्या मोहसे अउर मोरे परिवार स किहा ह। अब स तू सदा बरे इ प्रतिग्या क बनाए राखा। उ करा जउन तू करइ कह्या। 24अपनी प्रतिग्या क पूरा करा, जेहसे लोग तोहरे नाउँ क सम्मान सदा बरे कइ सकइँ। तब लोग कहिहीं, ‘सर्वसक्तीसाली यहोवा इस्त्राएल क परमेस्सर अहइ।’ मई तोहार सेवक अहउँ। कृपा कइके मोरे परिवार क सक्तीसाली होइ द्या अउर उ तोहार सेवा सदा करत रहइ।

25“मोरे परमेस्सर, तू मोहसे, अपने सेवक कह्या, कि तू मोरे परिवार क एक ठु राजपरिवार बनउब्या। एह बरे मई तोहारे समन्वा ऐतना निडर होत हउँ, एह बरे मई तोहसे इ सबइ चिजियन करइ बरे कहत हउँ। 26यहोवा तू परमेस्सर अहा अउर परमेस्सर तू एन नीक चिजियन क वचन मोरे, आपन सेवक बरे किहा ह। 27यहोवा, तू मोरे परिवार क आसीस देइ मँ ऐतना जियादा दयालु रहा ह। तू प्रतिग्या किहा, कि मोरे परिवार तोहार सेवा सदा सदा ही करत रही। यहोवा तू मोर परिवार क आसीस दिहा ह, एह बरे मोरे परिवार सदा आसीस पाई।”

### दाऊद विभिन्न रास्ट्रन क जीत लेत ह

**18** पाछे दाऊद पलिस्ती लोगन पइ हमला किहस। उ ओनका हराएस। उ गत नगर अउर ओकरे चाहिँ कइँती क नगरन क पलिस्ती लोगन स जीत लिहस।

2तब दाऊद मोआब देस क हराएस। मोआबी लोग दाऊद क गुलाम बन गएन अउर ओकर लगे नजराना लाएन।

3दाऊद हददेजेर क सेना क बिरुद्ध भी लड़ा। हददेजेर सेबा क राजा रहा। दाऊद उ सेना क संग लगातार हमात नगर तलक लड़ा। दाऊद इ एह बरे किहस कि हददेजेर अपने राज्ज क परात नदी तलक फइलावाइ क कोसिस किहस। 4दाऊद हददेजेर एक हजार रथ, सात हजार सारथी अउर बीस हजार फउजी लिहस। दाऊद हददेजेर क जियादातर घोड़न अंग-अंग कइ दिहस जउन रथ हींचत रहेन। मुला दाऊद सौ रथन क हींचइ बरे काफी घोड़न क बचाइ लिहस।

5दमिस्क नगर स अरामी लोग हददेजेर क मदद करइ बरे आएन हददेजेर सोबा क राजा रहा। मुला दाऊद बाईस हजार अरामी फउजियन क पराजित किहस अउ मार डाएस। 6तब दाऊद दमिस्क नगर मँ राजपालन क राखेस। अरामी लोग दाऊद क प्रजा बन गएन अउ ओकरे लगे नजराना लइके आएन। एह बरे यहोवा दाऊद क, जहाँ कहुँ उ गवा, बिजइ दिहस।

7दाऊद हददेजेर क सेनापतियन क सोना क ढालन लिहस अउर ओनका यरूसलेम लइ आवा। 8दाऊद तिभत अउ कून नगरन स बहोत जियादा काँसा प्राप्त किहस। उ पचे नगर हददेजेर क रहेन। पाछे, सुलैमान इ काँसे क उपयोग काँसे क हौदन, काँसे क खम्भा अउर सबइ दूसर चिजियन बनावइ मँ किहस जउन मन्दिर क बरे काँसे स बनी रहिन।

9तोऊ हमात नगर क राजा रहा। हददेजेर सोबा क राजा रहा। तोउ सुनेस कि दाऊद हददेजेर क सारी सेना क हराइ दिहस। 10एह बरे तोउ अपने पूत हदोराम क राजा दाऊद क लगे सान्ति क याचना करइ अउ जीत क मुबारकबाद देइ बरे पठाएस। उ इ किहस काहेकि दाऊद हददेजेर क खिलाफ जुद्ध किहे रहा अउर ओका हराए रहा। पहिले हददेजेर तोउ स जुद्ध किहे रहा। हदोराम दाऊद क हर एक तरह क सोना, चाँदी अउर काँसा स बनी चिजियन दिहस। 11राजा दाऊद ओन चिजियन क पवितर बनाएस अउर यहोवा क दिहस। दाऊद अइसा उ सारे चाँदी, सोना क संग किहस जेका उ एदोमी, मोआबी, अम्मोनी पलिस्ती अउर अमालेकी लोगन स प्राप्त किहे रहा।

12सरूयाह क पूत अबीसै नून क घाटी मँ अट्टारह हजार एदोमी लोगन क मारेस। 13अबीसै एदोमी मँ राजपाल क राखेन अउर सबहिँ एदोमी लोग दाऊद क गुलाम होइ गएन। दाऊद जहाँ कहुँ भी गवा, यहोवा ओका बिजइ दिहस।

### दाऊद क महत्वपूर्ण अधिकारी

14दाऊद पूरे इस्त्राएल क राजा रहा। उ उहइ किहस जउन सब क बरे उचित अउ निआवपूर्ण रहा। 15सरूयाह क पूत योआब, दाऊद क सेना क सेनापति रहा। अहीछूद क पूत यहोसापात ओन कामन क बारे मँ लिखेस जउन दाऊद किहस। 16सादोक अउ अबीमेलक याजक रहेन। सादोक अहीतूब क पूत रहा अउर अबीमेलक एब्यातार क पूत रहा। सबसा लिपिक रहा। 17यहोयदा क पूत बनायाह करेतियन अउ पलेती लोगन क मार्गदर्शन क उत्तरदायी रहा। अउर दाऊद क पूतन बिसेस अधिकारी रहेन। उ पचे राजा दाऊद क संग सेवारत रहेन।

### अम्मोनी दाऊद क लोगन क लज्जित करत हीं

**19** नाहास अम्मोनी लोगन क राजा रहा। नाहास मरा अउर ओकर पूत नवा राजा बना। 2तब दाऊद कहेस, “नाहास मोरे बरे दयालु रहा, एह बरे मई नाहास क पूत हानून बरे दयालु रहबा।” एह बरे दाऊद अपने दूतन क ओकरे बाप क मउत पइ सान्त्वना देइ पठाएस। दाऊद क दूत हानून क सान्त्वना देइ अम्मोन देस क गएन।

3मुला अम्मोनी प्रमुखन हानून स कहेन, “मूरख जिन बना। दाऊद इ मनईयन क तोहका सान्त्वना देइ बरे या तोहरे मरे बाप क सम्मान देइ बरे नाहीं पठाएस ह। नाहीं, दाऊद अपने दूतन क तोहार अउर तोहरे देस क जासूसी करइ चाहत ह। असल मँ दाऊद तोहरे देस क नस्ट करइ चाहत ह।” 4एह बरे हानून दाऊद क सेवकन क बन्दी बनाएस अउर ओनकर दाढ़ी मुड़वाइ दिहस। हानून क

करिहाउँ तलक ओकरे ओढ़न क छोर क कटवाइ दिहस। तब उ ओनका बिदा कइ दिहस।

5दाऊद क मनई एतने लजित भएन कि उ पचे घर क नाहीं जाइ सकत रहेन। कछू लोग दाऊद क लगे गएन अउर बताएन कि ओकरे मनइयन क संग कइसा बर्ताव भवा ह। एह बरे राजा दाऊद अपने लोगन क लगे इ खबर पठएस: “तू लोग यरीहो नगर में तब तलक रहा जब तलक फुन डाढ़ी न जम जाइ। तब तू घरे वापस जाइ सकत ह।”

6अम्मोनी लोग पता पाएन कि दाऊद ओनका आपन दुस्मन समुझत ह। तब हानून अउ अम्मोनी लोग पचहतर हजार पौण्ड चाँदी, रथन अउर सारथियन क मेसोपोटामियन स बेसाहइ में लगाएन। उ पचे अराम में अरम्माका अउ सोबी लोगन स भी रथन अउर सारथियन क प्राप्त किहन। 7अम्मोनी लोग बत्तीस हजार रथ बेसहेन। उ पचे माका क राजा क अउर ओकरी फउज क भी आवइ अउ मदद करइ बरे भुगतान किहन। माका क राजा अउर ओकर लोग आएन अउर उ पचे मेदबा नगर क लगे आपन डेरा डाएन। अम्मोनी लोग खुद अपने नगरन स बाहेर अउर आएन जुद्ध बरे तइयार होइ गएन।

8दाऊद सुनेस कि अम्मोनी लोग जुद्ध बरे तइयार होत अहई। एह बरे उ योआब अउ इस्त्राएल क पूरी फउज क अम्मोनी लोगन स जुद्ध करइ बरे पठाएस। 9अम्मोनी लोग बाहेर निकरेन अउर जुद्ध बरे तइयार होइ गएन। उ पचे नगर दुआर क लगे रहेन जउन राजा मदद बरे आए रहेन, उ पचे खुद खुले मइदान में खड़े रहेन।

10योआब लखेस कि ओकरे खिलाफ लड़इवाली फउज क दुइ मोर्चन रहेन। एक तु मोर्चा ओकरे समन्ना रहा अउर दूसर ओकरे पाछे रहा। एह बरे योआब इस्त्राएल क कछू सब स उत्तम जोधन क चुनेस। उ ओनका अराम क सेना स लड़इ बरे पठएस। 11योआब इस्त्राएल क बाकी फउज क अबीसै क सेनापतित्व में राखेस। अबीसै योआब क भाइ रहा। उ सबइ फउजी अम्मोनी सेना क खिलाफ लड़इ गएन। 12योआब अबीसै स कहेस, “जदि अरामी फउज मोरे बरे बहोत जियादा सक्तीसाली पड़इ तउ तोहका मोर मदद करइ क होइ मुला जदि अम्मोनी फउज तोहारे बरे बहोत जियादा सक्तीसाली साबित होइ तउ मई तोहार मदद करब। 13हम अपने लोगन अउ अपने परमेस्सर क नगरन क बरे जुद्ध करत समइ बीर अउ मजबूत बनी यहोवा उ करइ जेका उ उचित मानत ह।”

14योआब अउ ओकरे संग क सेना अराम क पइ हमला किहस। अराम क सेना योआब अउर ओकरी फउज क समान्वा स भाग खड़ी भइ। 15अम्मोनी सेना लखेस कि अराम क सेना भागत अहइ एह बरे उ पचे भी पराइ गएन। उ पचे अबीसै अउर ओकरी सेना क समन्वा स भाग खड़े भएन। अम्मोनी अपने नगर क चले गएन, अउर योआब यरूसलेम क लउट गवा।

16अरामी क प्रमुखन लखेस कि इस्त्राएल ओनका पराजित कइ दिहस। एह बरे उ पचे परात नदी क पूरब रहइवाले अरामी लोगन स सहायता बरे दूत पठाएस। सोपक हददेजेर क अरामी क सेना क सेनापति रहा। सोपक ओन दूसर

अरामी फउजिन क भी संचालन किहस जउन मदद बरे आएस।

17दाऊद सुनेस कि अराम क लोग जुद्ध बरे एकट्ठा होइ ग अहइ, एह बरे दाऊद इस्त्राएल क सबहिं फउजियन क बटोरेस। दाऊद ओनका यरदन नदी क पार लइ गवा। उ पचे अरामी लोगन क ठीक आमने-सामने आइ गएन। दाऊद अपनी फउज क हमला करइ बरे तइयार किहस अउर अरामियन पइ हमला कइ दिहस। 18अरामी इस्त्राएलियन क समन्वा स भाग खड़े भएन। दाऊद अउर ओकर फउज सात हजार सारथी अउर चलीस हजार अरामी फउजियन क मार डाएस। दाऊद अउर ओकर फउज अरामी सेना क सेनापति सोपक क भी मार डाएस।

19जब हददेजेर क अधिकारियन लखेन कि इस्त्राएल ओनका हराइ दिहस तउ उ पचे दाऊद स सन्ति कइ लिहन। उ पचे दाऊद क प्रजा बन गएन। इ तरह अरामियन अम्मोनी लोगन क फुन सहायता करइ स इन्कार कइ दिहन।

### योआब अम्मोनियन क नस्ट करत ह

**20** बसन्त में, योआब इस्त्राएल क फउज क जुद्ध बरे अगवाइ किहस। इ उहइ समइ रहा जब राजा लोग जुद्ध करइ बरे निकलेस रहेन मुला दाऊद यरूसलेम में रहा। तब इस्त्राएल क फउज अम्मोन देस क गवा अउ एका नस्ट कइ दिहस। तब उ पचे ओकर राजधानी रब्बा नगर क गएन। सेना लोगन क भीतर आवइ अउर बाहेर जाइ स रोकइ बरे नगर क चारिहुं कइँती डेरा डाएस। योआब अउ ओकर फउज रब्बा नगर क खिलाफ तब तलक जुद्ध किहस जब तलक ओका नस्ट नाहीं कइ डाएस।

2दाऊद ओनके राजा मुकुट क उतार लिहस। उ सोने क मुकुट तोल में लगभग पचहतर पौण्ड रहा। मुकुट में बहुमुल्य रतन जड़े रहेन। मुकुट दाऊद क मूँड़े पइ धरा गवा। तब दाऊद रब्बा नगर स बहोत स मूल्यवान चिजियन प्राप्त किहस। 3दाऊद रब्बा क लोगन क संग लिआवा अउर ओनका आरन, लोहे क गैती अउ कुल्हाड़ियन स काम करइ क मजबूर किहस। दाऊद अम्मोनी लोगन क सबहिं नगरन क संग इहइ बर्ताव किहस। तब दाऊद अउर सारी फउज यरूसलेम क वापस लउट गइ।

### पलिस्ती क दैत्य मारे जात हीं

4पाछे, इस्त्राएल क लोगन क जुद्ध गोजेर नगर में पलिस्तियन क संग भवा। उ समइ, हूसा क सिब्वकै सिप्यै क मार डाएस। सिप्यै दैत्यन क पूतन में स रहा। इ तरह पलिस्ती लोग लोगन क हराइ दीन्ह गवा रहेन।

5दूसर अवसर पइ, इस्त्राएल क लोगन क जुद्ध फुन पलिस्तियन क खिलाफ भवा। याईर क पूत एल्हानान लहमी क मर डाएस। लहमी गोलियात क भाई रहा। गोल्यह गत नगर क रहा। लहमी क भाला बहोत लम्बी अउर भारी रहा। इ करघे क लम्बे हथ्ये क तरह रहा।

6तब इस्त्राएलियन गत नगर में फलिस्तियन क संग दूसर जुद्ध किहन। इ नगर में एक बहोत बिसाल मनई रहा।

ओकरे हाथ अउ गोड़ क चौबीस उँगलियन रहिन। उ मनई क हरेक हाथ अउ हरेक गोड़ में छः छः उँगलियन रहिन। उ दैत्य क पूत भी रहा। 7एह बरे जब उ इस्त्राएल क मज़ाक उड़ाएस तउ योनातान ओका मार डाएस। योनातान सिमा क पूत रहा। सिमा दाऊद क भाई रहा।

8उ पचे पलिस्ती लोग गत नगर क दैत्यन क पूत रहेन। दाऊद अउ ओकर सेवक लोग ओन दैत्यन क मार डाएस।

### इस्त्राएलियन क गनके दाऊद पाप करत ह

**21** सइतान इस्त्राएल क लोगन क खिलाफ रहा। उ दाऊद क इस्त्राएल क लोगन क गनइ क प्रोत्साहन दिहस। 2एह बरे दाऊद योआब अउर लोगन क प्रमुखन स कहेस, “जा अउर इस्त्राएल क सबहि लोगन क गणना करा। बर्सेबा नगर स लइके लगातार दान नगर तलक देस क हर मनई क गना। तब मोका बतान, एहसे मई जान सकब कि हिआँ केतने लोग अहई।”

3एह बरे योआब जवाब दिहस, “यहोवा अपने लोगन क सौ गुना बिसाल बनावइ! महामाहिम, इस्त्राएल क सबहि लोगन तोहार सेवक अहई। मोरे सुआमी, अउर राजा, आप इ कार्य काहे करइ चाहत हीं? आप इस्त्राएल क सबहि लोगन क पाप करइ क अपराधी बनइहीं।”

4मुला राजा दाऊद हठ धरे रहा। योआब क उ करइ पड़ा जउन राजा कहेस। एह बरे योआब गवा अउर पूरे इस्त्राएल देस में गणना करत घूमत रहा। तब योआब यरूसलेम लउटा 5अउर दाऊद क बताएस कि केतने मनई रहेन। इस्त्राएल में गियारह लाख मनई रहेन अउर तरवार क उपयोग कइ सकत रहेन अउर तरवार क उपयोव करइवाले चार लाख सत्तर हजार मनई यहूदा में रहेन। 6योआब लेवि अउर बिन्यामीन क परिवार समूह क गणना नाहीं किहेस। योआब ओन परिवार समूहन क गणना नाहीं किहेस काहेकि उ राजा दाऊद क आदेसन क पसन्द नाहीं करत रहा। 7इ हुकुम देइ के, परमेस्सर क दृष्टि में दाऊद एक बुरा काम किहे रहा, एह बरे परमेस्सर इस्त्राएल क दण्ड दिहस।

### परमेस्सर इस्त्राएल क दण्ड देत ह

8तब दाऊद परमेस्सर स कहेस, “मई एक बहोत बेवकूफी क काम किहेउँ ह। मई इस्त्राएल क लोगन क गणना कइके भयंकर पाप किहेउँ ह। अब, मई पराथना करत हउँ कि तू इ सेवक क पापन क छिमा कइ द्या।”

9-10गाद दाऊद क दर्सी रहा। यहोवा गाद स कहेस, “जा अउर दाऊद क कहा: ‘यहोवा जउन कहत ह उ इ अहइ: मई तोहका तीन विकल्प देत हउँ। तोहका ओहमाँ स एक चुनब अहइ अउर तब मई तोहका उ तरह दण्डित करब जेका तू चुने लेब्या।”

11तब गाद दाऊद क लगे गवा। गाद दाऊद स कहेस, “यहोवा कहत ह, ‘दाऊद, तू जउन दण्ड चाहत अहा ओका चुना: 12पर्याप्त अन्न क बगैर तीन बरिस, या तोहार पाछा करइवाले तरवार क उपयोग करत भए दुस्मनन स तीन

महीने तलक भागब, या परमेस्सर स तीन दिन क दण्ड। पूरे देस में भयंकर महामारी फइली अउर यहोवा क दूत लोगन क नस्ट करत भवा पूरे देस में आइ।’ परमेस्सर मोका पठएस ह। अब, तोहका निर्णय करब अहइ कि ओका कउन सा जवाब देउँ।”

13दाऊद गाद स कहेस, “मई विपत्ति में हुउँ। मई नाहीं चाहत कि कउनो मनई मोरे दण्ड क निहचइ करइ। यहोवा बहोत दयालु अहइ, एह बरे यहोवा क ही निर्णय करइ द्या कि मोका कइसे दण्ड देइ।”

14एह बरे यहोवा इस्त्राएल में भयंकर महामारी पठएस अउर सत्तर हजार लोग मर गएन। 15परमेस्सर एक सरगदूत क यरूसलेम क नस्ट करइ क पठएस। किन्तु जब सरगदूत यरूसलेम क नस्ट करब सुरू किहस तउ यहोवा लखेस अउ ओका दुःख भवा। एह बरे यहोवा यरूसलेम क नस्ट न करइ क निर्णय किहस। यहोवा उ सरगदूत स, जउन नस्ट करत रहा कहेस, “रूक जा, इहइ पर्याप्त अहइ।” यहोवा क सरगदूत उ समइ यबूसी ओनान क खरिहान क लगे खड़ा रहा।

16दाऊद नज़र उठाएस अउर यहोवा क दूत क अकासे में लखेस। सरगदूत यरूसलेम पइ आपन तरवार हींच रखे रहा। तब दाऊद अउर प्रमुखन अपने मूँड़ क धरती पइ टेक के प्रणाम किहन। दाऊद अउर प्रमुखन अपने सोक बरे टाट पहिरे रहे। 17दाऊद अपने परमेस्सर स कहेस, “मई लोगन क गणना करइ क आदेस दिहे रहेउँ। मई हुउँ जुन इ बहोत बुरा काम किहेउँ। इस्त्राएल क लोगन कछू भी गलत नाहीं किहन।

यहोवा मोरे परमेस्सर, मोका अउर मोरे परिवार क दण्ड द्या किन्तु उ भयंकर महामारी क रोक द्या जउन तोहार आपन लोगन क मास्त अहइ।”

18तब यहोवा क दूत गाद स बात किहस। उ कहेस, “दाऊद स कहा कि उ यहोवा क उपासना बरे एक तु वेदी बनाएस। दाऊद क एका यबूसी ओनान क खरिहान क लगे बनावइ चाही।” 19गाद इ सबइ बातन दाऊद क बताएस अउर दाऊद ओनान क खरिहान क लगे गवा।

20ओनान गोहूँ दौवत रहा। ओनान मुड़ा अउर उ सरगदूत क लखेस। ओनान क चारिहूँ पूत छुपइ बरे पराइ गएन। 21दाऊद ओनान क लगे पहुँचा। ओनान ओका लखेस अउर उ खरिहान क छोड़ि दिहस। उ दाऊद तलक पहुँचा अउर ओकरे समन्वा आपन माथा जीमन पइ टेकिके प्रणाम किहेस।

22दाऊद ओनान स कहेस, “तू आपन खरिहान मोका बेच द्या। मई तोहका पूरी कीमत देबउँ। तब मई यहोवा क उपासना बरे एक वेदी बनावइ बरे एकर उपयोग कइ सकत हुउँ। तब लोगन प स भयंकर महामारी रूक जाई।”

23ओनान दाऊद स कहेस, “इ खरिहाने क लइ ल्या। तू मोरे सुआमी अउर राजा अहई। उहइ करा जउन आप उपयुक्त समुझत ही। लखा, मई भी होमबलि बरे जनावरन देब। मई आप क काहे क तखन देब जेका आप वेदी पइ आगी बरे बार सकत हीं अउर मई अन्नबलि बरे गोहूँ देब। मई इ सबइ आप क देब।”



24 किन्तु राजा दाऊद ओर्नान क जवाब दिहस, “नाहीं, मई तोहका पूरी कीमत देब। मई कउनो तोहार उ चीज नाही लेब जेका मई यहोवा क देब। मई उ कउनो भेंट नाही चढ़ाउब जेकर मोका कउनो मूल्य न देइ पड़इ।”

25 एह बरे दाऊद उ जगह क बरे ओर्नान क पन्द्रह पौण्ड सोना दिहस। 26 दाऊद हुँवा यहोवा क उपासना बरे एक वेदी बनाएस। दाऊद होमबलि अउर मेलबलि चढ़ाएस। दाऊद यहोवा स पराथना किहस। यहोवा सरग स आगी पठइके दाऊद क जवाब दिहस। आगी होमबलि क वेदी पड़ उतरी। 27 तब यहोवा सरगदूत क आदेस दिहस कि उ अपनी तरवार क वापस म्यान में धड़ लेइ।

28 दाऊद लखेस कि यहोवा ओका ओर्नान क खरिहान पड़ उत्तर दइ दिहस ह, एह बरे यहोवा क बलि भेंट किहस। 29 (पवित्र तम्बू अउ होमबलि क वेदी ऊँच जगह पड़ गिबोन नगर में रही। मूसा पवित्र तम्बू क तब बनाए रहा जब इस्राएल क लोग रेगिस्ताने में रहेन। 30 दाऊद पवित्र तम्बू में परमेस्सर स बातन करइ नाही जाइ सकत रहा, काहेकि उ भयभीत रहा। दाऊद यहोवा क दूत अउ ओकरी तरवार स भयभीत रहा।)

**22** दाऊद कहेस, “यहोवा परमेस्सर क मन्दिर अउर इस्राएल क लोगन बरे भेंटन क बारइ क वेदी हिआँ बनी।”

### दाऊद मन्दिर बरे योजना बनावत ह

2 दाऊद आदेस दिहस कि इस्राएल में रहइवाले सबहि तोहार बीच रहइवाला बिदेसी एक संग बटुरइँ। तोहार बीच रहइवाला बिदेसियन क उ समूह में स दाऊद संगतरासन क चुनेस। ओनकर काम परमेस्सर क मन्दिर बरे पाथरन क काटिके तइयार करइ क रहा। 3 दाऊद दुआर क पालन बरे कीलन अउर चुलन बनावइ बरे बहोत सारा लोहा प्राप्त किहस। दाऊद ओतना काँसा भी प्राप्त किहस जउन तउला न जाइ सकइ। 4 अउर दाऊद एँते जियादा देवदारु क पेड़न बटोरिस जउन न गना जाइ सकेन। सीदोन अउ सोर क लोग बहोत स देवदारु क पेड़न लिआएन।

5 दाऊद कहेस, “हम क यहोवा बरे एक बिसाल मन्दिर बनावइ चाही। किन्तु मोरे पूत सुलैमान अबहुँ तलक बालक अउर अनुभवहीन अहइ। यहोवा क मन्दिर बहोत बिसाल होइही। एका अपनी बिसालता अउ सुन्दरता क बरे सबहि रास्ट्रन में प्रसिद्ध होइ चाही। इहइ कारण अहइ कि मई यहोवा क मन्दिर बनावइ क योजना बनावत।” एह बरे दाऊद मरइ स पहिले मन्दिर बनावइ बरे बहोत स योजना बनावस।

6 तब दाऊद अपने पूत सुलैमान क बोलाएस। दाऊद सुलैमान स इस्राएल क यहोवा परमेस्सर बरे मन्दिर क बनावइ क कहेस। 7 दाऊद सुलैमान स कहेस, “मोर पूत, मई अपने परमेस्सर यहोवा क नाउँ बरे एक ठू मन्दिर बनावइ चाहत रहेउँ। 8 मुला यहोवा मोहसे कहेस, ‘दाऊद तू बहोत स जुद्ध किहा ह अउर बहोतस लोगन क मर्या ह एह बरे तू मोरे नाउँ क बरे मन्दिर नाही बनाइ सकत्या। 9 किन्तु तोहार एक पूत अहइ जउन सान्ति प्रिय अहइ। मई तोहरे पूत क सान्ति क समइ प्रदान करब। ओकरे चारिहुँ कइँती क दुस्मन

ओका परेसान नाही करिहीं। ओकर नाउँ सुलैमान अहइ अउर मई इस्राएल क उ समइ सुख सान्ति देब जउने समइ सुलैमान राजा होइ। 10 सुलैमान मोरे नाउँ क एक मन्दिर बनाई सुलैमान मोरे पूत अउर मई ओकर बाप रहब अउर मई सुलैमान, क राज क सक्तीसाली बनावत अउर ओकरे परिवार क कउनो निअँबर सदा इस्राएल पर ही हुकूमत करी।”

11 दाऊद इ भी केहस, “पूत, अब यहोवा तोहरे संग रहइ। तू सफल बना अउर जइसा यहोवा कहेस ह, अपने यहोवा क मन्दिर बनाव। 12 यहोवा तोहका इस्राएल क राजा बनाई। होइ सकत ह यहोवा तोहका बुद्धि अउ समुझ देइ जेहसे तू लोगन क मार्गदर्शन कइ सका अउर अपने यहोवा परमेस्सर क व्यवस्था क पालन कइ सका। 13 अउर तोहका कामयाबी तब मिली जब तू ओन नेमन अउर व्यवस्था क पालन में सावधान रहब्या जउन यहोवा मूसा क इस्राएल बरे दिहे रहा। सक्तीसाली अउर वीर रहा। जिन डेरावा अउ जिन निरास भवा।

14 “सुलैमान, मई यहोवा क मन्दिर क योजना बनावइ में करी मेहनत किहेउँ ह। मई तीन हजार सात सौ पचास टन सोना दिहेउँ ह अउर मई लगभग सैंतीस हजार पाँच सौ टन चाँदी दिहेउँ ह। मई कासाँ अउ लोहा एँतना जियादा दिहेउँ ह कि तउला नाही जाइ सकत अउर मई लकड़ी अउ पाथर दिहेउँ ह। सुलैमान, तू एहमें अउर जियादा जोर सकत ह। 15 तोहरे लगे बहोत स संगतरास अउ बढई अहइँ। तोहरे लगे हर एक प्रकार क काम करइ वाले कुसल मनई अहइँ। 16 उ पचे सोना, चाँदी, काँसा, अउर लोहे क काम करइ में कुसल अहइँ। तोहरे लगे एतने जियादा कुसल मनई अहइँ कि उ पचे गने नाही जाइ सकतेन। अब काम सुरू करा अउर यहोवा तोहरे संग होइ।”

17 तब दाऊद इस्राएल क सबहि प्रमुखन क आपने पूत सुलैमान क सहायता करइ क आदेस दिहस। 18 दाऊद ओन प्रमुखन स कहेस, “यहोवा तोहर परमेस्सर तोहार संग अहइ। उ तोहका सान्ति क समइ दिहस ह। उ हम लोगन क उ भुइँया में रहइवाले लोगन क पराजित करइ में मदद किहस ह। अब यहोवा अउर ओकर लोग इ भुइँया पड़ पूरा अधिकार किहेन ह। 19 अब तू अपने हिरदइ अउर आत्मा क अपने यहोवा परमेस्सर क समर्पित कइ द्या अउर उ जउन कहइ, करा। यहोवा परमेस्सर बरे पवित्र जगह बनाव। यहोवा क नाउँ बरे मन्दिर बनाव। तब करार क सन्दूख अउ दूसर सबहि पवित्र विजियन मन्दिर क अन्दर लिआवा।

### मन्दिर में लेवीबंसियन क जरिये सेवा क योजना

**23** दाऊद बूढ़ा होइ गवा, एह बरे उ अपने पूत सुलैमान क इस्राएल क नवा राजा बनावस। 2 दाऊद इस्राएल क सबहि प्रमुखन क बटोरिस। उ याजकन अउ लेवीबंसियन क भी एकट्ठा किहस। 3 दाऊद तीस बरिस अउर ओहसे ऊपर क उमर क लेवीबंसियन क गनेस। सब मिलाइके अइतीस हजार लेवीबंसियन रहेन। 4 दाऊद कहेस, “चौबीस हजार लेवीबंसियन यहोवा क मन्दिर क निर्माण कार्य क देखरेख करिहीं। छः हजार लेवीबंसी अधिकारी

अउर निआवधीस होइहीं। 5चार हजार लेवीबंसी दुआरपाल होइहीं अउर चार जहार लेवीबंसी संगीतन होइहीं मई ओनके बरे बिसेस बाजा बनाएँउ ह। उ पचे ओन बाजन क उपयोग यहोवा क स्तुति बरे करिहीं।”

6दाऊद लेवीबंसियन क तीन बार्न मँ बाँट दिहस। उ पचे लेवी क तीन पूतन गोर्सोन, कहात अउ मरारी क परिवार समूह रहेन।

### गोर्सोन क परिवार समूह

7गोर्सोन क परिवार समूह स लदान अउ सिमी रहेन। 8लदान क तीन पूत रहेन। ओकर सब स बड़ा पूत यहीएल रहा। ओकर दूसर पूत जेताम अउ योएल रहेन। 9सिमी क पूत सलोमीत, हजीएल अउ हारान रहेन। इ सबइ तीनहुँ पूत लदान क परिवारन क रहेन।

10सिमी क चार पूत रहेन। उ पचे यहत, जीना, यूस अउ बरीआ रहेन। 11यहत सब स बड़का अउ जीजा दूसर पूत रहा। मुला यूस अउ बरीआ क जियादा पूत नाहीं रहेन। एह बरे यूस अउ बरीआ एक परिवार क रूप मँ गने जात रहेन।

### कहात क परिवार समूह

12कहात क चार पूत रहेन। उ पचे अग्रान, थिसहार, हेब्रोन अउ उज्जीएल रहेन। 13अग्राम क पूत हारून अउर मूसा रहेन। हारून अउर ओकर पूतन सदा-सदा पवितर कार्य करइ बरे, यहोवा क समन्वा धूप भेंट चढ़ावइ बरे, याजक क रूप मँ यहोवा क सेवा करइ बरे अउर यहोवा क नाउँ पइ लोगन सदा-सदा आसीर्बादि देइ बरे प्रतिष्ठित कीन्ह गवा रहेन।

14मूसा परमेस्सर क मनई रहा। मूसा क पूत, लेवी क परिवार समूह क हींसा स रहेन। 15मूसा क पूत गोर्सोम अउ एलीएजेर रहेन। 16गोर्सोम क बड़का पूत सबूल रहा। 17एलीएजेर क बड़का पूत रहब्याह रहा। एलीएजेर क अउर कउनो पूत नाहीं रहा। मुला रहब्याह क बहोत स पूत रहेन।

18थिसहार क सब स बड़का पूत सलोमीत रहा।

19हेब्रोन क सब स बड़का पूत यरीय्याह रहा। हेब्रोन क दूसर पूत अमर्याह रहा। यहजीएल तीसर पूत रहा। अउर यकमाम चउथा पूत रहा। 20उज्जीएल क सब स बड़का पूत मीका रहा अउर थिसिय्याह ओकर दूसर पूत रहा।

### मरारी क परिवार समूह

21मरारी क पूत महली अउ मूसी रहेन। महली क पूत एलीआज़ार अउ कीस रहेन।

22एलीआज़ार बिना पूतन क मरा। ओकर सिरिफ बिटियन रहिन। एलीआज़ार क बिटियन अपने सम्बन्धियन स बियाह किहेन। ओनकर सम्बन्धी कीस क पूत रहेन। 23मूसी क पूत महली, एदेर अउर यरेमोत रहेन। सब मलाइके तीन पूत रहेन।

### लेवीबंसियन क काम

24इ सबइ लेवी क संतान रहेन। उ पचे अपने परिवार क अनुसार सूची मँ अंकित रहेन। उ पचे परिवारन क प्रमुख

रहेन। सबइ व्यक्ति क नाउँ सूची मँ रहेन। जउन सूची मँ अंकित रहेन उ सबइ बीस बरिस क या ओहसे ऊपर क रहेन। उ पचे यहोवा क मन्दिर मँ सेवा करत रहेन।

25दाऊद कहे रहा, “इस्त्राएल क यहोवा परमेस्सर अपने लोगन क सान्ति दिहस ह। यहोवा यरूसलेम मँ सदा ही रहइ बरे आइ गवा। ह।

26एह बरे लेवीबंसियन क पवितर तम्बू या एकर सेवा मँ काम आवइवाली कउनो चीज़ क भविस्स मँ ढोवइ क जरूरत नाहीं अहइ।”

27दाऊद क अन्तिम निर्देस इस्त्राएल क लोगन क बरे, लेवी क परिवार समूह क सन्तानन क गनब रहा। उ पचे लेवीबंसियन क बीस बरिस अउर ओहसे ऊपर क मनइयन क गनेन।

28लेवीबंसियन क काम हारून क सन्तानन क यहोवा क मन्दिर मँ सेवा कार्य करइ मँ मदद करब रहा। लेवीबंसी मन्दिर क आँगन अउर बगल क कमरन क भी देखभाल करत रहेन। ओनकर काम सबहिँ पवितर चिजियन क सुद्ध करइ क रहा। ओनकर काम इ भी रहा कि परमेस्सर क मन्दिर मँ सेवा करइँ। 29मन्दिर मँ बिसेस रोटी क मेज पइ रखइ क जिम्मेदारी ओनकर ही रहेन। उ पचे आटा, अन्नबलि अउ अखमीरी रोटी बरे भी जिम्मेदार रहेन। उ पचे पकावइ क कढ़ाइन अउर मिश्रित भेंटन क बरे जिम्मेदार रहेन। उ पचे सारा नाप तउल क काम करत रहेन। 30लेवीबंसी हर एक भिंसारे खड़े होत रहेन अउर यहोवा क धन्यवाद अउ स्तुति करत रहेन। उ पचे एका हर एक साँझ क करत रहेन।

31लेवीबंसी यहोवा क सबहिँ होमबलियन बिस्त्राम क बिसेस दिनन, नवा चन्द्रिमा क उत्सव अउर सबहिँ बिसेस पर्व क दिनन पइ तइयार करत रहेन। उ पचे यहोवा क समन्वा हर रोज़ सेवा करत रहेन। केतने लेवीबंसी हर दाई सेवा करइ चाही एकरे बरे बिसेस नेम रहेन। 32एह बरे लेवीबंसी उ सब काम करत रहेन जेनकर आसा ओनसे कीन्ह जात रही। उ पचे पवितर तम्बू क देखभाल करत रहेन। उ पचे पवितर जगह क देखभाल करत रहेन अउर उ पचे अपने सम्बन्धियन हारून क सन्तान याजकन क मदद देत रहेन। लेवीबंसी यहोवा क मन्दिर मँ सेवा कइके याजकन क मदद करत रहेन।

### याजकन क समूह

24 हारून क पूतन क इ सबइ समूह रहेन: हारून क पूत नादाब, अबीहू, एलीआजर अउ ईतामार रहेन। 2मुला नादाब अउ अबीहू अपने बाप क मउत क पहिले ही मर गएन अउर नादाब अउ अबीहू क कउनो पूत नाहीं रहा एह बरे एलीआजर अउ ईतामार याजक क रूप मँ कर्या किहेन। 3दाऊद एलीआजर अउ ईतामार क परिवार समूह क दुइ भिन्न समूहन मँ बाँटिस। दाऊद इ एह बरे किहस कि इ सबइ समूह ओनका दीन्ह गए कर्त्तव्यन क पूरा कइ सकइ। दाऊद इ सब सादोक अउर अहीमेलेक क मदद स किहेस। सादोक एलीआजर क सन्तान रहा अउर अहीमेलेक ईतामार क सन्तान रहा। 4एलीआजर क परिवार

समूह क प्रमुख ईतामार क परिवार समूह क प्रमुखन स जियादा रहेन। एलीआजर क परिवार समूह क सोलह प्रमुख रहेन अउर ईतामार क परिवार समूह स आठ प्रमुख रहेन। 5हर एक परिवारे स मनईयन चुने गए रहेन। उ पचे गोट डाइके चुने गए रहेन। कछू मनईयन पवित्र जगह क अधिकारी चुने गए रहेन अउर दूसर मनई याजक क रूप में सेवा बरे चुने गए रहेन। इ सबइ मनई एलिआजर अउर ईतामार क परिवार समूहन स चुने गए रहेन।

6समायाह लिपिकार रहा। उ नतनेल क पूत रहा। समायाह लेवी परिवार समूह स रहा। समायाह ओन सन्तानन क नाउँ लिखेस। उ ओन नामन क राजा दाऊद अउर एन प्रमुखन क समन्वा लिखेस: याजक सादोक, अहीमेलक अउ याजक अउ लेवीबंसियन क परिवारन क प्रमुख। अहीमेलक एब्यातार क पूत रहा। हर एक दाई उ पचे गोट डाइके एक मनई चुनत रहेन अउर समायाह उ मनई क नाउँ लिख लेत रहा। इ तरह उ पचे एलीआजर अउर ईतामार क परिवारन में काम क बाँटिस।

7पहला समूह यहोयारीब क रहा। दूसरा समूह यदायाह क रहा।

8तीसरा समूह हारीम क रहा। चउथा समूह सोरीम क रहा।

9पंचवा समूह मलिकय्याह क रहा। छठा समूह मिय्यामीन क रहा।

10सातवाँ समूह हक्कोस क रहा। आठवाँ समूह अबिय्याह क रहा।

11नवाँ समूह येसू क रहा। दसवाँ समूह सकन्याह क रहा।

12गियारहवा समूह एल्ल्यासीब क रहा। बारहवाँ समूह याकीम क रहा।

13तेरहवाँ समूह हुप्पा क रहा। चौदहवाँ समूह येसेबाब क रहा।

14पन्द्रहवाँ समूह बिल्गा क रहा। सोलहवाँ समूह इम्मर क रहा।

15सत्रहवाँ समूह हेजीर क रहा। अट्ठरहवाँ समूह हप्पित्सेस क रहा।

16उन्नीसवाँ समूह पतह्याह क रहा। बीसवाँ समूह यहजेकेल क रहा।

17इक्कीसवाँ समूह याकीन क रहा। बाईसवाँ समूह गामूल क रहा।

18तेईसवाँ समूह दलायाह क रहा। चौबीसवाँ समूह माज्याह क रहा।

19यहोवा क मन्दिर में सेवा करइ क बरे इ सबइ समूह चुने गए रहेन। उ पचे मन्दिर में सेवा करइ बरे हारून क नेमन क मानत रहेन। इस्त्राएल क यहोवा परमेस्सर एन नेमन क हारून क दिहे रहा।

### दूसर लेवीबंसी

20इ सबइ नाम सेस लेवी सन्तान क अहईँ

अग्राम क सन्तानन स सूबाएल। सूबाएल क सन्तानन स येहदयाह।

21रहब्याह स: यिस्सिय्याह (यिस्सिय्याह सब स बड़का पूत रहा)

22इसहारी परिवार समूह स: सलोमोत। सलोमोत क परिवार स: यहत।

23हेब्रोन क सब स बड़का पूत यरिय्याह रहा। अमर्याह हेब्रोन क दूसर पूत रहा। यहजीएल तीसर पूत रहा। अउर यकमान चउथा पूत

24उज्जीएल क पूत मीका रहा। मीका क पूत सामीर रहा।

25यिस्सिय्याह मीका क भाई रहा। यिस्सिय्याह क पूत जकर्याह रहा।

26मरारी क सन्तान महली, मूसी अउर ओकर पूत याजिय्याह रहेन।

27मरारी क पूत याजिय्याह क पूतन नाउँ: सोहम, जक्कू अउर इब्री रहेन।

28महली क पूत एलीआजर रहा किन्तु एलीआजर क कउनो पूत नाहीं रहा।

29कीस क पूत यरह्मेल रहा।

30मूसी क पूत महली, एदेर अउर यरीमोत रहेन।

उ पचे लेवीबंसी परिवारन क प्रमुख अहइ। उ पचे अपने परिवारन क सूची में अहइ। 31उ पचे बिसेस कामन बरे चुने गए रहेन। उ पचे अपने सम्बन्धी याजकन क तरह गोट डावत रहेन। याजक हारून क सन्तान रहेन। उ पचे राजा दाऊद, सादोक, अहीमेलक अउर याजकन अउ लेवी क परिवारन क प्रमुखन क समन्वा गोटन डाएन। जब ओनके काम दिए गएन तउ पुराने अउ नवा परिवारन क एक सा बेउहार भवा।

### संगीत समूह

25 दाऊद अउ सेनापतियन आसाप क पूतन क बिसेस सेवा बरे अलग किहन। आसाप क पूत हेमान अउ यदूतून रहेन। ओनकर बिसेस काम परमेस्सर क सँदेसा क भविस्वाणी सारंगी, वीणा, मंजीरे क उपयोग कइके करब रहा। हिआँ ओन मनईयन क सूची अहइ जउन इ तरह सेवा किहन।

2आसाप क परिवार समूह स, जक्कूर, योसेप, नतन्याह अउर असरेला रहेन। राजा दाऊद आसाप क भविस्सबाणी क बरे चुनेस अउ आसाप अपने पूतन क अगुवाइ किहेस।

3यदूतून परिवार स: गदल्ल्याह, सरी, यसायाह, सिमी, हसब्याह अउर मत्तियाह रहेन। इ सबइ छ: रहेन। यदूतून आपन पूतन क अगुवाइ किहेन। यदूतून सारंगी क उपयोग भविस्सबाणी करइ अउर यहोवा क धन्यवाद देइ अउर ओकर स्तुति बरे किहस।

4हेमान क पूत जउन सेवा करत रहेन बुक्किय्याह, मत्तन्याह, लज्जीएल, सबूएल अउर यरीमोत, हनन्याह, हनानी, एलीआता, गिददलती अउर रोममतीएजेर, योसबकासा, मल्लोती, होतीर अउर महजीओत रहेन। 5इ सबइ सबहिँ मनई हेमान क पूत रहेन। हेमान दाऊद क दर्सी रहा। परमेस्सर हेमान क सक्तीसाली बनावइ क बचन दिहस। एह बरे हेमान क कई

पूत रहेन। परमेस्सर हेमान क चौदह पूत अउ तीन बिटियन दिहस। 6हेमान अपने पूतन क यहोवा क मन्दिर में गायन में अगुवाइ किहेन। ओन पूतन सारंगी, वीणा, मजीरा क उपयोग किहस। उ पचे परमेस्सर क मंदिर में राजा आसप क आदेस क अनुसार जउन उ यदूतून अउर हेमान क दिहे रह इहइ तरिका स सेवा किहस। 7उ सबइ मनई अउर लेवी क परिवार समूह क ओनकर सम्बन्धियन गायन में प्रसिच्छित रहेन। दुई सौ अट्ठासी मनइयन यहोवा क स्तुति क गीत गाउब सीखेन। 8हर एक मनई जउने भिन्न कार्य क करी, ओकरे चुनाव बरे उ पचे गोट डावत रहेन। हर एक मनई क संग समान बेउहार होत रहा। बूढ़े अउर जवान क संग समान बेउहार रहा अउर गुरु क संग उहइ बउहार हरा। जउन सिस्व क संग।

9पहिले, आसाप (यूसुफ) क पूतन अउ सम्बन्धियन में स बारह मनई चुनेस गए रहेन।

दूसर, गदल्याह क पूतन अउर सम्बन्धियन में स बारह मनई चुने गएन।

10तीसरे, जक्कूर क पूतन अउ सम्बन्धियन में स बारह मनई चुने गएन।

11चउथे, यिस्त्री क पूतन अउ सम्बन्धियन में स बारह मनई चुने गएन।

12पाँचवे, नतन्याह क पूतन अउ सम्बन्धियन में स बारह मनई चुने गएन।

13छठे, बुक्कियाह क पूतन अउ सम्बन्धियन में स बारह मनई चुने गएन।

14सातवें, यसरेला क पूतन अउ सम्बन्धियन में स बारह मनई चुने गएन।

15आठवें, यसायाह क पूतन अउ सम्बन्धियन में स बारह मनई चुने गएन।

16नवें, मत्न्याह क पूतन अउ सम्बन्धियन में स बारह मनई चुने गएन।

17दसवें, सिमी क पूतन अउ सम्बन्धियन में स बारह मनई चुने गएन।

18गियारहवें, अजरेल क पूतन में अउर सम्बन्धियन में स बारह मनई चुने गएन।

19बारहवें, हसब्याह क पूतन अउर सम्बन्धियन में स बारह मनई चुने गएन।

20तेरहवें, सूबाएल क पूतन अउ सम्बन्धियन में स बारह मनई चुने गएन।

21चउदहवें, मत्तियाह क पूतन अउर सम्बन्धियन में स बारह मनई चुने गएन।

22पन्द्रहवें, यरेमोत क पूतन अउर सम्बन्धियन में स बारह मनई चुने गएन।

23सोलहवें, हनन्याह क पूतन अउर सम्बन्धियन में स बारह मनई चुने गएन।

24सत्रहवें, योसबकासा क पूतन अउर सम्बन्धियन में स बारह मनई चुने गएन।

25अट्ठरहवें, हनानी क पूतन अउ सम्बन्धियन में स बारह मनई चुने गएन।

26उन्नीसवें, मल्लोती क पूतन अउ सम्बन्धियन में स बारह मनई चुने गएन।

27बीसवें, इलिय्याता क पूतन अउ सम्बन्धियन में स बारह मनई चुने गएन।

28इक्कीसवें होतीर क पूतन अउ सम्बन्धियन में स बारह मनई चुने गएन।

29बाईसवें, गिददलती क पूतन अउ सम्बन्धियन में स बारह मनई चुने गएन।

30तेईसवें, महजीओत क पूतन अउ सम्बन्धियन में स बारह मनई चुने गएन।

31चौबीसवें, रोममतीएजेर क पूतन अउर सम्बन्धियन में स बारह मनई चुने गएन।

### दुआरपाल

26 दुआरपालन क समूह: इ सबइ दुआरपाल कोरह परिवार स अहई। आसाप क परिवार क कोरह क पूत मसेलेम्याह अउर ओकरे पूत। 2मसेलेम्याह क पूत रहेन। जकर्याह सब स बड़का पूत रहा। यदीएल दूसर पूत रहा। जबद्याह तीसर पूत रहा। यतीएल चउथा पूत रहा। 3एलाम पाँचवाँ पूत रहा। यहोहानान छठा पूत रहा अउर एल्यहोएनै सातवाँ पूत रहा।

4ओबेदेदोम अउर ओनकर पूत। ओबेदेदोम क सब स बड़का पूत समायाह रहा। यहोजाबाद ओकर दूसर पूत रहा। योआह ओकर तीसर पूत रहा। साकार ओकर चउथा पूत रहा। नतनेल ओकर पाँचवाँ पूत रहा। 5अम्मीएल ओकर छठौँ पूत रहा। इस्साकार ओकर सातवाँ पूत रहा अउर पुल्लतै ओकर आठवाँ पूत रहा। परमेस्सर फुरइ ओबेदेदोम क बरदान दिहस। 6ओबेदेदोम क पूत समायाह रहा। समायाह क भी पूत रहेन। समायाह क पूत अपने बाप क परिवार में प्रमुख रहेन काहेके उ पचे बीर जोधा रहेन। 7समायाह क पूत ओती, रपाएल, ओबेद, एलजाबाद, एलीहू अउर समक्याह रहेन। एलजाबाद क सम्बन्धी कुसल कारीगर रहेन। 8उ पचे सबहि लोग ओबेदेदोम क सन्तान रहेन। उ सबइ मनईयन अउर ओनकर पूत अउर ओनकर सम्बन्धी सक्तीसाली मनईयन रहेन। उ सबइ अच्छे रच्छक रहेन। ओबेदेदोम क बासठ संतान रहिन।

9मसेल्म्याह क पूत अउर सम्बन्धी सक्तीसाली लोग रहेन। सब मिलाइके अट्ठारह पूत अउर सम्बन्धी रहेन।

10मरारी क परिवार स इ सबइ दुआरपाल रहेन ओनमाँ एक ठू होसा रहा। सिम्री पहिला पूत चुना गवा रहा। सिम्री असल में स बड़ा नाहीं रहा, मुला ओकर बाप ओका पहिलौठा पूत चुना लिहे रहा। 11हिल्कियाह ओकर दूसर पूत रहा। तबल्याह ओकर तीसर पूत रहा। अउर जकर्याह ओकर चउथा पूत रहा। सब मिलाइके होसा क तेरह पूत अउ सम्बन्धी रहेन। 12इ सबइ दुआरपालन क समूह क प्रमुख रहेन। दुआरपालन क यहोवा क मन्दिर में सेवा करइ क खास ढंग रहा, जइसा कि ओनकर सम्बन्धी करत रहेन। 13हर एक परिवार क एक दुआर रच्छा करइ बरे दीन्ह गवा रहा। एक परिवार क बरे दुआर चुनइ क गोट डार्ड जात

रही। बड़ा अउ जवानन क संग एक समान बर्ताव कीन्ह जात रहा।

14मसेल्मयाह पूरबी दुआर क रच्छा बरे चुना गवा रहा। तब मसेल्मयाह क पूत जकर्याह बरे गोट डाइ गइ। जकर्याह एक बुद्धिमान सलाहकार रहा। जकर्याह उत्तरि दुआर बरे चुना गवा। 15ओबेदेदोम दक्खिन दुआर बरे चुना गवा अउर ओबेदेदोम क पूत उ घर क रच्छा क बरे चने गएन जेहमों कीमती चिजियन रखी जात रहिन। 16सुप्पीम अउर होसा पच्छी दुआर अउर ऊपरी सड़क पइ सुल्लेकेत दुआर बरे चुने गएन।

दुआरपाल एक दूसरे क बगल में खड़े होत रहेन। 17पूरबी दुआर पइ छः लेवीबंसी रच्छक हर दिन खड़े होत रहेन। उत्तरी दुआर पइ हर दिन चार लेवीबंसी रच्छक खड़े होत रहेन। दक्खिनी दुआर पइ चार लेवीबंसी रच्छक खड़े होत रहेन अउर दुइ लेवीबंसी रच्छक उ घरे क रच्छा करत रहेन जेहमों कीमती चिजियन धरी जात रहिन। 18चार रच्छक पच्छिमी निआव घर पइ रहेन दुइ रच्छक निआव घरे तलक क सड़कियन पइ रहेन।

19इ सबइ दुआरपालन क समूह रहेन। उ सबइ दुआरपाल कोरह अउर मरारी क परिवार में स रहेन।

### कोसाध्यच्छ अउर दूसर अधिकारी

20अहिय्याह लेवी क परिवार समूह स रहा। अहिय्याह परमेस्सर क मन्दिर क कीमती चिजियन क देखभाल क जिम्मेदार रहा। अहिय्याह ओन जगहन क रच्छा बरे भी उत्तरदायी रहा जहाँ पवित्र चिजियन रखी जात रहिन।

21लादान गोर्सीन परिवार स रहा। यहोएल लादान परिवार समूह क प्रमुखन में स एक रहा। 22यहोएला क पूत जेताम अउ जेताम क भाई योएल रहेन। उ पचे यहोवा क मन्दिर में कीमती चिजियन क बरे उत्तरदायी रहेन।

23दूसर प्रमुख अग्राम, यिसहार, हेब्रोन अउर उज्जीएल क परिवार समूह स चुने गए रहेन। 24सबूलल यहोवा क मन्दिर में चिजियन क रच्छा क उत्तरदायी प्रमुख रहा। सबूलल गोर्सीम क पूत रहा। गोर्सीम मूसा क पूत रहा। 25इ सबइ सबूलल क सम्बंधी रहेन: एलीआज़ार स ओकर सम्बंधी रहेन: एलीआज़ार क पूत रहब्याह, रहब्याह क पूत यसायाह, यसायाह क पूत योराम, योराम क पूत जिक्की अउर जिक्की क पूत सलोमोत। 26सलोमोत अउर ओकर सम्बंधी ओन सब चिजियन क बरे उत्तरदायी रहेन जेका दाऊद मन्दिर क बरे एकट्ठा किहे रहा।

सेना क अधिकारियन भी मन्दिर क बरे चिजियन दिहन। 27उ पचे जुद्धन में लीन्ह गइ चिजियन में स कछू चिजियन दिहेन। उ पचे यहोवा क मन्दिर क मरम्मत करइ बरे उ सबइ चिजियन दिहन। 28सलोमोत अउर ओकर सम्बंधी दर्सी समूएल, कीस क पूत साऊल, नेर क पूत अबनेर, सरूयाह क पूत योआब क जरिये दीन्ह गइ पवित्र चिजियन क भी रच्छा करत रहेन। सलोमोत अउ ओकर सम्बंधी लोगन क जरिये, यहोवा क दीन्ह गइ सबहिं पवित्र चिजियन क रच्छा करत रहेन।

29कनन्याह यिसहार परिवार क रहा। कनन्याह अउर ओकर पूत मन्दिर क बाहेर काम करत रहेन। उ पचे इस्राएल क विभिन्न जगहन पइ अधिकारी अउर निआवधीस क कार्य करत रहेन। 30हसब्याह हेब्रोन परिवार स रहा। हसब्याह अउर ओकर सम्बंधी यरदन नदी क पच्छिम में इस्राएल क राजा दाऊद क कामन अउर यहोवा क सबहिं कामन क बरे उत्तरदायी रहेन। हसब्याह क समूह में एक हजार सात सौ सक्तीसाली मनई रहेन। 31हेब्रोन क परिवार समूह इ बात पइ प्रकास डावत ह कि यरिय्याह ओनकर प्रमुख रहा। जब दाऊद चालीस बरिस तलक राजा रह चुका, तउ उ अपने लोगन क परिवार क इतिहासन स सक्तीसाली अउर कुसल मनइयन क खोज क आदेस दिहस। ओनमों स कछू हेब्रोन परिवार में मिलेन जउन गिलाद क याजार नगर में रहत रहेन। 32यरिय्याह क लगे दुइ हजार सात सौ सम्बंधी रहेन जउन सक्तीसाली मनईयन रहेन अउर परिवारन क प्रमुख रहेन। दाऊद ओन दुइ हजार सात सौ सम्बंधियन क रूबेन, गाद अउ आधे मनस्से क परिवार क संचालन अउर यहोवा अउ राजा क कार्य क जिम्मेदारी सौंपेस।

### सेना क समूह

27 इ ओन इस्राएली लोगन क सूची अहइ जउन राजा क सेना में सेवा करत रहेन। हर एक समूह हर बरिस एक महीने अपने काम पइ रहत रहा। ओहमों परिवारन क सासक, नायक, सेनाध्यच्छ अउर अधिकारी लोग रहेन जउन राजा क सेवा करत रहेन। हर एक सेना क समूह में चौबीस हजार मनईयन रहेन।

2जबदीएल क पूत यासोबाम पहिले महीने बरे पहिले समूह क अधीच्छक रहा। यासोबाम क समूह में चौबीस हजार मनइयन रहेन। 3यासोबाम पेरस क सन्तानन में स एक रहा। यसोबाम पहिले महीने क फउजी अधिकारियन क प्रमुख रहा। 4दोदै दूसरे महीने बरे सेना समूह क अधीच्छक रहा। उ ओहोही स रहा। दोदै क समूह में चौबीस हजार मनई रहेन।

5यहोयादा क पूत बनायाह तीसरा सेनापति रहा। बनायाह तीसरे महीने क सेनापति रहा। यहोयादा प्रमुख याजक रहा। बनायाह क समूह में चौबीस हजार मनइयन रहेन। 6इ उहइ बनायाह रहा जउन तीस बीसन में स एक ठू वीर फउजी रहा। बनायाह ओन मनइयन क संचालन करत रहा। बनायाह क पूत अम्मीजाबाद बनायाह क समूह क अधीच्छक रहा।

7चउथा सेनापति असाहेल रहा। असाहेल चउथे महीने क सेनापति रहा असाहेल योआब क भाई रहा। पाछे, असाहेल क पूत जबद्याह ओकर जगह सेनापति क रूप में लिहस। असाहेल क समूह में चौबीस हजार मनई रहेन।

8पाँचवाँ सेनापति सम्हूत रहा, सम्हूत पाँचवें महीने क सेनापति रहा। सम्हूत यिज़्राही क परिवार स रहा। सम्हूत क समूह में चौबीस हजार मनई रहेन।

9छठा सेनापति ईरा रहा। ईरा छठवें महीने क सेनापति रहा। ईरा इक्केस क पूत रहा। इक्केस तकोई नगर स रहा। ईरा क समूह में चौबीस हजार मनई रहेन।

10सातवाँ सेनापति हेलेस रहा। हेलेस सातवें महीने क सेनापति रहा। उ पेलोनी लोगन स रहा अउर एप्रैम क सन्तान रहा। हेलेस क समूह में चौबीस हजार मनई रहेन।

11सिब्बकै आठवाँ सेनापति रहा। सिब्बकै आठवें महीने क सेनापति रहा। सिब्बकै हूस स रहा। सिब्बकै जेरह परिवार क रहा। सिब्बकै क समूह में चौबीस हजार मनई रहेन।

12नवाँ सेनापति अबीएजेर रहा। अबीएजेर नवें महीने क सेनापति रहा। अबीएजेर अनातोत नगर स रहा। अबीएजेर बिन्यामीन क परिवार समूह क रहा। अबीएजेर क समूह में चौबीस हजार मनई रहेन।

13दसवाँ सेनापति महरै रहा। महरै दसवें महीने क सेनापति रहा। महरै नतोप स रहा। उ जेरह परिवार क रहा। महरै क समूह में चौबीस हजार मनई रहेन।

14गियारहवाँ सेनापति बनायाह रहा। बनायाह गियारहवें महीने क सेनापति रहा। बनायाह पिरातोत स रहा। बनायाह एप्रैम क परिवार समूह क रहा। बनायाह क समूह में चौबीस हजार मनई रहेन।

15बारहवाँ सेनापति हेल्लै रहा। हेल्लै बारहवें महीने क सेनापति रहा। हेल्लै, नपोत स रहा। हेल्लै ओल्नीएल क परिवार क रहा। हेल्लै क समूह में चौबीस हजार मनई रहेन।

### परिवार समूह क प्रमुख

16इस्त्राएल क परिवार समूहन क प्रमुख इ सबइ रहेन:

रूबेन: जिक्री क पूत रहा एलीआजर।

सिमोन: माका क पूत सपत्याह।

17लेवी: समूएल क पूत हसब्याह। हारून: सादोक।

18यहूदा: एलीहू (एलीहू दाऊद क भाइयन में स एक रहा।) इस्साकार: मीकाएल क पूत ओम्नी।

19जबूलून: ओबद्याह क पूत यिसमायाह, नप्ताली: अज्रीएल क पूत यरीमोत।

20एप्रैम: अजज्याह क पूत होसे। पच्छिमी मनस्से: फदायाह क पूत योएल।

21पूर्वी मनस्से: जकार्याह क पूत इद्दो। बिन्यामीन: अब्नेर क पूत यासीएल।

22दान: यारोहाम क पूत अजरेल।

उ सबइ इस्त्राएल क परिवार समूह क प्रमुख रहेन।

### दाऊद इस्त्राएलियन क गणना करत ह

23दाऊद इस्त्राएली क मनइयन क गणना क निहचइ किहस। हुवाँ बहोत लोग रहेन काहेकि परमेस्सर इस्त्राएल क लोगन क आसमान क तारन क बराबर बनावइ क प्रतिग्या किहस। एह बरे दाऊद सिरिफ बीस बरिस अउर ओहसे ऊपर क मनइयन क गणना किहस। 24सरूयाह क पूत योआब लोगन क गनब सुरू किहस। मुला उ गणना क पूरा नाहीं किहस। परमेस्सर इस्त्राएल क लोगन पइ कोहाइ गवा। इहइ कारण अहइ कि लोगन क गिनती "राजा दाऊद क इतिहास" क किताबे में नाहीं लिखी गइ।

### राजा क प्रसासक

25इ ओन मनइयन क सूची अहइ जउन राजा क सम्पत्ति बरे उत्तरदायी रहेन:

अदीएल क पूत अजमावेत राजा भण्डारन क अधीच्छक रहा।

उज्जिय्याह क पूत यहोनातान नान्ह नगरन क भण्डारन, गाँव, खेतन, अउ मीनारन क अधीच्छक रहा।

26कलूब क पूत एज्री खेत में काम करइवालन क अधीच्छक रहा।

27सिमी अंगूर क खेतन क अधीच्छक रहा। सिमी रामा नगर क रहा।

जब्दी अंगूर क खेतन स आवइवाली दाखरस क देखरेख अउ भंडारण करइ क अधीच्छक रहा। जब्दी सापाम क रहा।

28बाल्हानान पच्छिमी पहाड़ी पहेँटा में जइतून अउर अंजीर क बृच्छन क अधीच्छक रहा।

बाल्हानान गदेर क रहा। योआस जइतून क तले क भंडारण क अधीच्छक रहा।

29सित्रै सारोन छेत्र में पसुअन क अधीच्छक रहा। सित्रै सारोन छेत्र क रहा।

अदलै क पूत सापात घाटियन में पसुअन क अधीच्छक रहा।

30ओबील ऊँटन क अधीच्छक रहा। ओबील इस्माएली रहा।

येहदयाह गदहन क अधीच्छक रहा। येहदयाह एक मरोनेतवासी रहा।

31याजीज भेड़िन क अधीच्छक रहा। याजीज हग्री लोगन में स रहा।

इ सबइ सबहिं मनई उ सबइ प्रमुख रहेन जउन दाऊद क सम्पत्ति क देखभाल करत रहेन।

32योनातान एक ठू बुद्धिमान सलाहकार अउर सास्त्री रहा। योनातान दाऊद क चाचा रहा। हक्मोन क पूत एलीएल राजा क पूतन क देखभाल करत रहा। 33अहीतोपेल राजा क सलाहकार रहा। हूसै राजा क मीत रहा। हूसै एरेकी लोगन में स रहा। 34पाछे यहोयदा अउर एब्यातार राजा क सलाहकार क रूप में अहीतोपेल क जगह लिहस। यहोयदा बनायाह क पूत रहा। योआब राजा क सेना क सेनापति रहा।

### दाऊद मन्दिर क योजना बनावत ह

28 दाऊद इस्त्राएल क सबहिं प्रमुखन क एकट्ठा किहस। उ सबइ प्रमुखन क यरूसलेम आवइ क हुकुम दिहस। दाऊद परिवार समूहन क हरेक प्रमुखन, राजा क सेवा करइवाली सेना क टुकड़िन क सेनापतियन, सेनाध्यच्छन अउर अधिकारीयन जउन राजा अउ ओनके पूतन क जनावरन अउ सम्पत्ति क देखरेख करत रहेन, राजा क महत्त्वपूर्ण अधिकारियन, सक्तीसाली बीरन अउर सबहिं बीर जोधन क बोलाएस।

2राजा दाऊद खड़ा भवा अउर कहेस, “मोर भाइयो अउर मोरे लोगो, मोरे बात सुना। मई अपने हिरदइ स यहोवा क करार क सन्दूख क रखइ बरे एक जगह बनावइ चाहत हउँ। मई एक अइसी जगह बनावइ चाहत हउँ जउन परमेस्सर क पद पीठ बन सकइ अउर मई परमेस्सर बरे एक ठू मन्दिर बनावइ क योजना बनाएउँ। 3मुला परमेस्सर मोहसे कहेस, ‘नाहीं दाऊद, तोहका मोरे नाउँ बरे मन्दिर नाहीं बनावइ चाही। तोहका इ नाहीं करइ चाही काहेकि तू एक जोधा अहा अउर तू बहोत स मनइयन क मारया ह।’

4“यहोवा इस्त्राएल क परमेस्सर इस्त्राएल क परिवार समूहन क अगुवाई करइ क बरे यहूदा क परिवार समूह क चुनेस। तब उ परिवार समूहस में स, यहोवा मोरे पिता क परिवार क चुनेस अउर उ परिवार स परमेस्सर मोका सदा बरे इस्त्राएल क राज चुनेस। परमेस्सर मोका इस्त्राएल क राजा बनावइ चाहत रहा। 5यहोवा मोका बहोत स पूत दिहेस ह अउर ओन सारे पूतन में स, सुलैमान क यहोवा इस्त्राएल क नवा राजा चुनेस। परन्तु इस्त्राएल फुरइ यहोवा क राज अहइ। 6यहोवा मोहसे कहेस, ‘दाऊद, तोहार पूत सुलैमान मोर मन्दिर अउर एकरे चारिहुँ कइँती क पहँटा बनाई, काहेकि मई सुलैमान क आपन पूत चुनेउँ ह अउर मई ओकर बाप रहब। 7जदि सुलैमान मोर विधियन अउर नेमन पालन करत रहत ह जइसा कि आज करत ह। तउ मई ओकर राज क सदा क बरे सक्तीसाली बनाइ देबउँ।”

8दाऊद कहेस, “अब, सबहिँ इस्त्राएलियन अउ परमेस्सर क समन्वा मई तोहसे इ सबइ बातन कहत हउँ: यहोवा अपने परमेस्सर क सबहिँ आदेसन क मानइ में सावधान रहा। तब तू इ अच्छे देस क अपने लगे रख सकत ह अउर तू सदा क बरे एका अपने सन्तानन क दइ सकत ह।

9“अउर मोरे पूत सुलैमान, तू अपने बाप क परमेस्सर क जानत अहा। समूचइ हिरदइ अउ इच्छा स परमेस्सर क सेवा करा। काहेकि यहोवा परखत ह कि हर एक क हिरदइ में का बाटइ। हर बात जउन सोचत ह यहोवा जानत ह। जदि तू यहोवा क लगे मदद क बरे जाब्या, तउ तोहका उ मिली। किन्तु जदि ओका तजत ह, तउ उ तोहका सदा क बरे तजि देइ। 10सुलैमान, तोहका इ समुझइ चाही कि यहोवा तोहका आपन पवित्र मन्दिर बनवइ बरे चुनेस ह। सक्तीसाली बना अउर काम क पूरा करा।”

11तब दाऊद अपने पूत सुलैमान क मन्दिर बनावइ बरे जोजनन दिहस। उ सबइ जोजनन मन्दिर क चारिहुँ कइँती ओसारा, अउर एकर भवन, एकर भंडार-कच्छ, एकरे ऊपरी कच्छ, एकरे भीतरी कच्छ अउ दयापीठ क जगह बरे रही। 12दाऊद मन्दिर क सबहिँ हींसक क बरे जोजनन बनाए रहा। दाऊद ओन जोजनन क सुलैमान क दिहस। दाऊद यहोवा क मन्दिर क चारिहुँ ओर क आँगन अउर एकरे चारहिँ कइँती क कच्छन जोजनन दिहस। दाऊद मन्दिर क भंडारकच्छन अउर ओन भण्डारकच्छन क योजना दिहस जहाँ उ पचे ओन पवित्र चिजियन क धरत रहेन जउन मन्दिर में काम आवत रहिन। 13दाऊद सुलैमान क याजकन अउर लेवीबंसियन क समूहन क बारे में बताएस। दाऊद सुलैमान क यहोवा क मन्दिर में सेवा करइ क काम क बारे में अउर मन्दिर में

काम आवइवाली चिजियन क बारे में बताएस। 14दाऊद सुलैमान क बताएस कि मन्दिर में काम आवइवाली चिजियन क बनावइ में केतना सोना अउ चाँदी लागइ चाही। 15सोना क दीपकन अउ दीपाधारन क जोजनन रहिन अउर चाँदी क दीपकन अउर दीपाधारन क जोजनन रहिन। दाऊद बताएस कि हर एक दीपधार अउ ओकरे दीपक बरे केतना सोना या चाँदी क उपयोग कीन्ह जाइ। बिभिन्न दीपधार, जहाँ जरूरत रही, उपयोग में आवइवाले रहेन। 16दाऊद बताएस कि पवित्र रोटी क बरे काम में आवइवाली हर एक मेज क बरे केतना सोना काम में आइ। दाऊद बताएस कि चाँदी क मेज बरे केतनी चाँदी काम में आई। 17दाऊद बताएस कि केतना सुद्ध सोना, काँटन, छिछकारइ क चिलमची अउर कलसा बनाइ में लागी। दाऊद बताएस कि हर एक तस्तरी में केतनी चाँदी लागी। 18दाऊद बताएस कि सुगन्धि क वेदी बरे केतना सुद्ध सोना लागी। दाऊद सुलैमान क परमेस्सर क रथ, यहोवा क करार क सन्दूख क ऊपर अपने पखनन क फइलास सोना क करूब सरगदूत क संग दयापीठ क योजना भी दिहेस।

19दाऊद कहेस, “इ सबइ योजना यहोवा स मिले निर्देसन क अनुसार लिखा ग रहेन अहइँ। यहोवा योजना क हर एक भाग समुझइ में मोका मदद दिहस।”

20दाऊद अपने पूत सुलैमान स इ भी कहेस, “दृढ़ अउर बीर बना अउर इ काम क पूरा करा। डेराअ जिन, काहेकि यहोवा, मोर परमेस्सर तोहरे संग अहइ। उ तोहार मदद तब तलक करी जब तलक तोहार इ काम पूरा नाहीं होइ जात। उ तोहका छोड़ी नाहीं। तू यहोवा क मन्दिर बनाउब्या। 21परमेस्सर क मन्दिर क सबहिँ काम करइ बरे याजकन अउ लेवीबंसियन क समूह तइयार अहइँ। सबहिँ काम न मैं तोहका मदद देइ बरे कुसल कारीगर तइयार अहइँ जउन भी तू आदेस देब्या ओकर पालन अधिकारी अउर सबहिँ लोग करिहीं।”

### मन्दिर बनावइ बरे भेंट

29 राजा दाऊद हुवाँ एक संग बटुरे इस्त्राएल क सबहिँ लोगन स कहेस, “परमेस्सर मोरे पूत सुलैमान क चुनेस। सुलैमान बालक अहइ अउर उ ओन सब बातन क नाहीं जानत जेनकर जरूरत ओका इ काम क करइ बरे अहइ। किन्तु काम बहोत महत्वपूर्ण अहइ। इ भवन लोगन क बरे नाहीं अहइ अपितु यहोवा परमेस्सर क बरे अहइ। 2मई आपन पूरी सक्ती स परमेस्सर क मन्दिर बनावइ क चिजियन क प्रबंध किहेउँ ह। मई सोना स बनइवाली चिजियन बरे सोना दिहेउँ ह। मई चाँदी स बनइवाली चिजियन क बरे चाँदी दिहेउँ ह। मई काँसा स बनइवाली चिजियन क बरे काँसा दिहेउँ ह। मई लोहा स बनइवाली चिजियन क बरे लोहा दिहेउँ ह। मई काठे स बनइवाली चिजियन क बरे काठ दिहेउँ ह। मई नीलमणि, रतनजटित फकनन क बरे बिभिन्न रंग क सबहिँ प्रकार क कीमती रतन अउ सफेद संगमरमर भी दिहेउँ ह। मई यहोवा क मन्दिर क बनावइ बरे इ सबइ चिजियन बहोत जियादा

संख्याँ में दिहेउँ ह। 3मई अपने परमेस्सर क मन्दिर बरे सोना अउ चाँदी क एक बिसेस भेंट देत अहई। मई इ एह बरे करत हउँ कि मई फुरइ अपने परमेस्सर क मन्दिर क बनावइ चाहत हउँ। मई इ पवित्र मन्दिर क बनावइ बरे एन सब चिजियन क देत हउँ। 4मई ओपीर स एक सौ दस टन सुद्ध सोना दिहेउँ ह। मई दुई सौ साठ टन सुद्ध चाँदी दिहेउँ ह। चाँदी मन्दिर क भवनन क देवासन क ऊपर मढ़इ बरे अहइ। 5मई सोना अउ चाँदी ओन सब चिजियन बरे दिहेउँ ह जउन सोना अउ चाँदी क बनी होत हीं। मई सोना अउ चाँदी दिहेउँ ह जेनेसे कुसल कारीगर मन्दिर क बरे सबहिं विभिन्न तरह क चिजियन बनाइ सकई। अब आप लोगन में स केतने आजु यहोवा क काम बरे योगदान देइ बरे तइयार अहई?”

6परिवारन क प्रमुख, इस्राएल क परिवार समूहन क प्रमुख, उच्च अधिकारियन, कप्तान लोगन अउर राजा क काम करइ क बरे जिम्मेदार अधिकारी सबहिं तइयार रहेन अउर उ पचे कीमती चिजियन दिहन। 7इ सबइ उ सब चिजियन अहई जउन उ पचे परमेस्सर क घर क बरे दिहन: एक सौ नब्बे टन सोना, तीन सौ पचहत्तर टन ऐ चाँदी, छः सौ पचहत्तर टन ऐ काँसा; तीन हजार सात सौ पचास टन ऐ लोहा; 8जउने लोगन क लगे कीमती रतन रहेन, उ पचे एका यहोवा क मन्दिर क खज़ाना में जउन यहीएल क सुरच्छा में रहेन, दिहेन। यहीएल गोर्सीन क परिवार स रहा। 9लोग बहोत खुस रहेन। काहेकि ओनकर प्रमुख ओतना जियादा देइ में खुस रहेन। प्रमुख स्वतंत्रता पूर्वक खुले दिल स देइ में खुस रहेन। राजा दाऊद भी बहोत खुस रहा।

### दाऊद क सुनर पराथना

10तब दाऊद ओन लोगन क समन्वा, जउन हुवाँ एक संग बटुरे रहेन, यहोवा क बड़कई किहन। दाऊद कहेस:

“यहोवा इस्राएल क परमेस्सर, हमार बाप, सदा-सदा बरे तोहार स्तुति होइ।

11महानता, सक्ती, यस बिजइ अउर प्रतिष्ठा तोहार अहइ। काहेकि हर एक चीज धरती अउर आसमान क तोहार ही अहइ। हे यहोवा! राज तोहार अहइ: तू हर एक क ऊपर सासक अहा।

12सम्पत्ति अउर प्रतिष्ठा तोहसे अवत ह। तोहार सासन हर चीज पइ अहइ। तू सक्ती अउर बल अपने हाथे में रखत ह। तोहरे हाथे में सक्ती अहइ कि तू कउनो क भी महान अउर सक्तीसाली बानावइ सकत ह।

13अब, हमार परमेस्सर हम तोहका धन्यवाद देत अही, अउर हम तोहरे यसस्वी नाउँ क स्तुति करत अही।

14इ सबहिं चिजियन ओहसे अउर मोरे लोगन स नाहीं आइ अहई। इ सबइ सबहिं चिजियन तोहसे आइन अउर हम तोहका उ सबइ चिजियन दिहेउँ जउन तोहसे आई अहई।

15हम पचे ठीक अपने पुरखन क नाई इ संसार में तोहरे समन्वा बिदेसी क तरह रहत हउँ। इ धरती पइ हमार समइ बिना उम्मीद क छाया क नाई गुज़रत अहइ।

16हे यहोवा हमार परमेस्सर, हम इ सबइ चिजियन तोहार मन्दिर बनवइ बरे बटोरेन ह। हम लोग तोहार मन्दिर तोहार नाउँ क सम्मान बरे बनावब। मुला इ सबइ चिजियन तोहसे आई अहई अउर हर चीज तोहर अहइ।

17मोरे परमेस्सर, मई इ भी जानत हउँ तू लोगन क हिरदइ क जाँच करत ह, अउर तू खुस होत ह, जदि लोग अच्छे काम करत हीं, मई सच्चे हिरदइ स इ सबइ चिजियन देइ में खुस रहेउँ। अब मइ तोहरे लोगन क हुवाँ बटुरा लखइ सकत हउँ जउन इ सबइ चिजियन तोहका देइ में खुस अहई।

18हे यहोवा, तू परमेस्सर अहा हमार पुरखा इब्राहीम, इसहाक अउ इस्राएल क। कृपा कइके तू लोगन क मदद सही योजना बनावइ में कइके ओनका तोहरे बरे बिस्सास जोगग अउर सच्चा होइ में करा।

19अउर मोरे पूत सुलैमान क तोहरे बरे सच्चा होइ में मदद द्या तोहार कानून, नेमन अउर आदेसन क सर्वदा पालन करी में मदद द्या। ओन कामन क करइ में सुलैमान क मदद करा अउर उ सानदार महल क बनावइ में ओकर मदद करा जेकर योजना मई बनाएउँ ह।”

20तब दाऊद हुवाँ एक संग बटुरे सबहिं समूहन क लोगन स कहेस, “अब यहोवा, अपने परमेस्सर क स्तुति करा।” एह बरे सब यहोवा परमेस्सर, उ परमेस्सर क जेकर आराधना ओनकर पुरखन किहेन, स्तुति किहस। उ पचे यहोवा तथा ओकर राजा क सम्मान देइ क बरे धरती पइ माथा टेकिके प्रणाम किहन।

### सुलैमान राजा होत ह

21अगले दिन लोगन यहोवा क बलि भेंट किहन। उ पचे यहोवा क होमबलि भेंट किहेन। उ पचे एक हजार बैल, एक हजार भेड़न एक हजार मेमनन भेंट क रूप में दिहन अउर उ पचे पेयबलि भी भेंट किहेन। इस्राएल क सबइ लोगन बरे हुवाँ अनेक बलिदान दिए गएन। 22उ दिन लोग खाएन अउर पीएन अउर यहोवा हुवाँ ओनके संग रहा उ पचे बहोत खुस रहेन।

अउर पचे दाऊद क पूत सुलैमान क दूसरी दाई राजा बनाएन। उ पचे सादोक क अभिसेक राजा क रूप में किहन अउर उ पचे सादोक क अभिसेक याजक बनवावइ बरे किहन। उ पचे इ उ जगह पइ किहन जहाँ यहोवा रहा।

23तब सुलैमान राजा क रूप में यहोवा क सिंहासन पइ बइठा सुलैमान अपने बाप क जगह लिहस। सुलैमान बहोत सफल रहा। इस्राएल क सबहिं लोगन सुलैमान क आदेस मानत रहेन। 24सबहिं प्रमुख, फउजी अउर राजा दाऊद क सबहिं पूतन सुलैमान क राजा क रूप में स्वीकार किहन अउर ओकरी आग्या क पालन किहन। 25यहोवा सुलैमान क बहोत महान बनाएस। इस्राएल क सबहिं लोग जानत रहेन कि यहोवा सुलैमान क महान बनावत अहइ। यहोवा सुलैमान क उ सम्मान दिहस जउन एक राजा क मिलइ चाही। यहोवा सुलैमान क साही प्रताप दिहस जउन पहिले इस्राएल क कउनो राजा क नाहीं मिला।



**दाऊद क मउत**

26-27यिसै क पूत दाऊद पूरे इस्त्राएल पइ चालीस बरिस तलक राजा रहा। दाऊद हेब्रोन नगर में सात बरिस तलक राजा रहा। तब दाऊद यरूसलेम में तैंतीस बरिस तलक राजा रहा। 28दाऊद तब मरा जब उ बूढ़ा रहा। दाऊद एक नीक लम्बी जिन्नगी बिताएस। दाऊद क लगे बहोत सम्पत्ति अउ प्रतिस्था रही अउर दाऊद क पूत सुलैमान ओकरे पाछे राजा बना।

29उ सबइ कार्य, जउन सुरू स लइके आखिर तलक दाऊद किहस, समूएल दर्सी क रचना में अउर नातान नबी क रचना में अउ गाद दर्सी क रचना में लिखे गएन ह। 30उ सबइ रचना इस्त्राएल क राजा क रूप में दाऊद जउन काम किहेस ओन सब क सूचना देत ह। उ सबइ दाऊद क सक्ती अउर ओकरे संग जउन घटा, ओकरे बिसय में भी बतावत हीं, अउर उ सबइ इस्त्राएल अउ ओकरे चारिहुँ कइँती क राजन में जउन भवा, ओकरे बारे में बतावत ह।

# दूसर राजा

## अहज्याह बरे सँदिसा

1 अहाब क मरइ क पाछे मोआब इस्त्राएल क हुकूमत स अजाद होइ गवा।

2 एक दिना अहज्याह सोमरोन में अपने घरे क छत पइ क ऊपर क कमरा क जंगले में स गिर गवा। उ बुरी तरह घायल होइ गवा। अहज्याह सँदिसवाहक क बोलाएस अउ ओनसे कहेस, “एक्रोन क देवता बालजबूब क याजकन क लगे जा। ओनसे पूछा कि का मई अपनी चोटन स तन्दुरूस्त होइ सकबा।”

3 किन्तु यहोवा क दूत तिसबी एलिय्याह स कहेस, “राजा अहज्याह सोमरोन स कछू सँदिसवाहक पठएस ह। जा अउर एन लोगन स मिला। ओनसे इ कहा, ‘इस्त्राएल में परमेस्सर अहइ। तउ तू लोग एक्रोन क देवता बालजबूब स सवाल करइ काहे जात अहा? 4 राजा अहज्याह स इ सबइ बातन कहा: यहोवा कहत ह: तू अपने बिछउना स उठि नाहीं पउब्या। तू मरब्यो।” तब एलिय्याह चल पड़ा अउर उ अहज्याह क सेवकन स इहइ सब्ब कहेस। 5 सँदिसवाहक अहज्याह क लगे लौटि आएन। अहज्याह सँदिसवाहकन स पुछेस, “तू लोग एँतना हाली काहे लउट्या?”

6 सँदिसवाहकन अहज्याह स कहेन, “एक तु मनई हम स भेंटइ आवा। उ हम लोगन स उ राजा क लगे वापस जाइ क कहेस जउन हमका पठए रहा अउर ओहसे यहोवा जउन कहेस, उ कहइ क कहेस, ‘इस्त्राएल में एक परमेस्सर अहइ। तउ तू एक्रोन क देवता बालजबूब स सवाल करइ बरे सँदिसवाहकन क काहे पठया। काहेकि तू इ किहा ह इ कारण तू अपने बिछउना स नाहीं उठब्या। तू मरब्या।”

7 अहज्याह सँदिसवाहकन स पूछेस, “जउन मनई तोहसे मिला अउर जउन तोहसे अइसा कहेस उ कइसा देखोइ पड़ता रहा?” 8 सँदिसवाहकन अहज्याह स कहेन, “उ मनई क बदन पइ बहोत बार रहा अउर अपनी कमर में एक तु चमड़ा क पेटी बाँधे रहा।” तब अहज्याह कहेस, “इ तिसबी एलिय्याह अहइ।”

## अहज्याह क जरिये पठए गए फउजियन

### क आगी नस्ट करत ह

9 अहज्याह एक तु सेनापति अउर पचास मनइयन क एलिय्याह क लगे पठएस। सेनापति एलिय्याह क लगे गवा। उ समइ एलिय्याह एक तु पहाड़ी क चोटी पइ बइठा रहा। सेनापति एलिय्याह स कहेस, “परमेस्सर क जन राजा क आदेस अहइ, ‘खाले आवा।”

10 एलिय्याह पचास फउजियन क सेनापति क जवाब दिहस, “जदि मई परमेस्सर क जन हउँ तउ सरग स आगी

भहराइ पड़इ अउर तोहका एवं पचास फउजियन क नस्ट कइ देइ।”

एह बरे सरग स आगी गिर पड़ी अउर उ सेनापति अउ ओकरे पचास मनइयन क नस्ट कइ दिहस।

11 अहज्याह दूसर फउजी अउ पचास फउजियन क पठएस। सेनापति एलिय्याह स कहेस, “परमेस्सर क जन राजा क आदेस अहइ ‘हाली खाले आवा।”

12 एलिय्याह सेनापति अउर ओकरे पचास फउजियन स कहेस, “जदि मई परमेस्सर क जन हउँ तउ सरग स आगी भहराइ पड़इ अउर उ तोहका अउ तोहरे पचास फउजियन क बर्बाद कइ देइ।” परमेस्सर क आगी सरग स गिर पड़ी अउर सेनापति एवं पचास फउजियन क बर्बाद कइ दिहस।

13 अहज्याह तीसरे सेनापति क पचास फउजियन क संग पठएस। पचास फउजियन क सेनापति एलिय्याह क लगे आवा। सेनापतियन घुटनन क बल झुक कइ पराथना किहस, “हे परमेस्सर क जन मई तोह स पराथना करत हउँ, कृपा कइके मोर जिन्नगी अउ मोर एन पचास सेवकन क जिन्नगी क अपनी निगाह में मूल्यवान मानई। 14 सरग स आगी गिर पड़ी अउर पहिले दुइ सेनापतियन अउ ओनके पचास फउजियन क उ बर्बाद कइ दिहस। किन्तु अब कृपा करई अउर हमका जिअत रहइ देई।”

15 यहोवा क दूत एलिय्याह स कहेस, “सेनापति क संग जा। ओहसे डेराअ जिन।” एह बरे एलिय्याह सेनापति क संग राजा अहज्याह क लखइ गवा। 16 एलिय्याह अहज्याह स कहेस, “इस्त्राएल में परमेस्सर अहइ ही, तउ भी तू सँदिसवाहकन क एक्रोन क देवता बालजबूब स सवाल करइ काहे पठया? काहेकि तू इ किहा ह, इ कारण तू अपने बिछउना स नाहीं उठब्या। तू मरब्या।”

## यहोराम, अहज्याह क जगह लेत ह

17 अहज्याह वइसे ही मरा जइसा यहोवा एलिय्याह क जरिये कहे रहा। अहज्याह क कउनो पूत नाहीं रहा। एह बरे अहज्याह क पाछे यहोराम नवा राजा भवा। यहोराम यहूदा क राजा यहोसापात क पूत यहोराम क राजकाल क दूसरे बरिस हुकूमत करब सुरू किहस। 18 अहज्याह जउन दूसर कारज किहस उ सबइ “इस्त्राएल क राजा लोगन क इतिहास” क किताबे में लिखे गए अहई।

## एलिय्याह क अपने लगे लेइ क यहोवा क योजना

2 इ लगभग उ समइ रहा जब यहोवा एक हाव क चक्रवात क जरिये एलिय्याह क सरग में लइ जाइवाला रहेन। एलिय्याह एलीसा क संग गिलगाल गवा।

2एलिय्याह एलीसा स कहेस, “कृपा कइके हिअई रूका, काहेकि यहोवा मोका बेतेल जाइ क कहेस ह।”

किन्तु एलीसा कहेस, “मई यहोवा अउर तोहार जिन्नगी क किरिया खाइके प्रतिग्या करत हउँ कि तोहार क संग नार्ही छोड़ब।” एह बरे दुइनउँ लोग बेतेल तलक गएन।

3बेतेल क नबियन क समूह एलीसा क लगे आवा अउर उ एलीसा स कहेस, “का तू जानत अहा कि आजु तोहरे सुआमी क यहोवा तोहसे अलग कइके लइ जाइ?”

एलीसा कहेस, “हाँ, मई एका जानत हउँ। इ बारे मैं बातन न करा।”

4एलिय्याह एलीसा स कहेस, “मेहरबानी कइके हिअँ ठहरा काहेकि यहोवा मोका यरीहो जाइ क कहेस ह।”

किन्तु एलीसा कहेस, “मई यहोवा अउर तोहार जिन्नगी क किरिया खाइके प्रतिग्या करत हउँ कि मई तोहार संग नार्ही तजब।” एह बरे दुइनउँ लोग यरीहो गएन।

5यरीहो क नबियन क समूह एलीसा क लगे आवा अउर उ पचे ओहसे कहेन, “का तोहका मालूम अहइ कि यहोवा आजु तोहरे सुआमी क तोहसे दूर लइ जाइ।”

एलीसा कहेस, “हाँ, मई एका जानत हउँ। इ बारे मैं बातन न करा।”

6एलिय्याह एलीसा स कहेस, “मेहरबानी कइके हिअँ ठहरा काहेकि यहोवा मोका यरदन नदी तलक जाइ क कहेस ह।”

एलीसा जवाब दिहस, “मई यहोवा अउर तोहार जिन्नगी क किरिया खाइके प्रतिग्या करत हउँ कि मई तोहार क संग नार्ही तजब।” एह बरे दुइन मनई चलत रहेन।

7नबियन क समूह मैं स पचास मनइयन ओनकर अनुसरण किहना। एलिय्याह अउर एलीसा यरदन नदी पइ रूक गएन। पचास मनई एलिय्याह अउर एलीसा स कछू दूर खड़े रहेन। 8एलिय्याह आपन अंगरखा उतारेस, ओका तह किहस अउर ओहसे पानी पइ चोट किहस। पानी दाई कइँती बाई कइँती क फट गवा। एलिय्याह अउर एलीसा झुरान भुईया पइ चलिके नदी क पार किहस।

9जब उ पचे यरदन नदी क पार कइ लिहना तब एलिय्याह एलीसा स कहेस, “एहसे पहिले कि परमेस्सर मोका तोहसे दूर लइ जाइ, तू का चाहत अहा कि मई तोहरे बरे करउँ।”

एलीसा कहेस, “मोका तोहार आतिमा क दुईगुणा हीसा द्या।”

10एलिय्याह कहेस, “तू कठिन चीज माँग्या ह। जदि तू मोका उ समइ लखब्या जब मोका लइ जावा जाइ तउ उहइ होइ। किन्तु जदि तू मोका नार्ही लखि पउव्या तउ उ नार्ही होइ।”

### परमेस्सर एलिय्याह क सरग मैं लइ जात ह

11एलिय्याह अउर एलीसा एक संग बातन करत भए टहरत रहेन। अचानक कछू घोड़न अउर एक ठु रथ आवा अउर उ पचे एलिय्याह क एलीसा स अलग कइ दिहेन। घोड़न अउर रथ आगी क तरह रहेन। तब एलिय्याह एक ठु बौडर मैं सरग क चला गवा।

12एलीसा एका लखेस अउर जोर स गोहराएस, “मोर बापा। मोर बापा। इस्त्राएल क रथ अउर ओकर घोड़सवार फउजी।”

एलीसा एलिय्याह क फुन कबहुँ नार्ही लखेस। एलीसा आपन आपन ओढ़नन क मूठी मैं भरेस, अउर आपन सोक परगट करइ बरे, ओनका फार ड्राएस। 13एलिय्याह क अंगरखा भुईया पइ गिर पड़ा रहा। एह बरे एलीसा ओका उठाइ लिहस। फुन उ वापिस आएन अउर यरदन नदी क किनारे पइ खड़ा होइ गवा।

14एलीसा एलिय्याह क अंगरखा लिहस, जउन भुईया पइ गिर गवा रहा। एलीसा एका पानी पइ चोट किहस अउर कहेस, “एलिय्याह क परमेस्सर यहोवा, कहाँ अहइ?” जइसेन ही एलीसा पानी पइ चोट किहस, पानी दाई अउर बाई कइँती फट गवा अउर एलीसा नदी पार किहस।

### नबी एलिय्याह क माँग करत हीं

15जब यरीहो क नबियन क समूह एलीसा क लखेस, उ पचे कहेन, “एलिय्याह क आतिमा अब एलीसा पइ अहइ।” उ पचे एलीसा स मिलइ आएन। उ पचे एलीसा क समन्वा खाले भुईया तलक प्रणाम करइ निहुरेन। 16उ पचे ओहसे कहेन, “लखा, हम अच्छे खासे पचास मनई अही। मेहरबानी कइके एका जाइ द्या अउर अपने सुआमी क हेरइ द्या। होइ सकत ह यहोवा क सवती एलिय्याह क ऊपर लइ लिहे होइ अउर ओका कउनो पर्वत या घाटी मैं भहराइ दिहे होइ।”

मुला एलीसा जवाब दिहस, “नार्ही, एलिय्याह क खोज बरे मनइयन क जिन पठवा।”

17नबियन क समूह एलीसा स एतना जियादा पराथना किहस, कि उ उलझन मैं पइ गवा। तब एलीसा कहेस, “ठीक अहइ, एलिय्याह क खोज मैं मनइयन क पठइ द्या।”

नबियन क समूह पचास मनइयन क एलिय्याह क खोज बरे पठएस। उ पचे तीन दिन तलक खोज किहेन मुला उ पचे एलिय्याह क न पाइ सकेन। 18एह बरे उ सबइ लोग यरीहो गएन जहाँ एलीसा ठहरा रहा। उ ओन लोगन स कहेस, का मई तोहसे न खोजइ बरे नार्ही कहे रहा।

### एलीसा पानी क सुद्ध करत ह

19नगर क बसइया लोग एलीसा स कहेन, “महोदय, आप अनुभव कइ सकत हीं कि इ नगर सुन्दर ठउर मैं अहइ। किन्तु हिअँ पानी बुरा अहइ। इहइ कारण अहइ कि भुईया मैं फसल क उपज नार्ही होत।”

20एलीसा कहेस, “मोरे लगे एक ठु नवा खोरा लिआवा अउर ओहमा नून रखा।”

लोग नवा खोरा क एलीसा क लगे लइ आएन। 21तब एलीसा उ ठउरे पइ गवा जहाँ पानी भुईया स निकरत रहा। एलीसा नून क पानी मैं लोकाइ दिहस। उ कहेस, “यहोवा कहत ह, ‘मई इ पानी क सुद्ध करत हउँ। अब, मई इ पानी स कउनो क मरइ नार्ही देब, अउर न ही भुईया क अच्छी फसल देइ स रोकेब।’”

22पानी सुद्ध होइ गवा अउर पानी अब तलक भी सुद्ध अहइ। इ वइसा ही भवा जइसा एलीसा कहे रहा।

### कछू लरिकन एलीसा क मजाक उड़ावत हीं

23उ नगर स एलीसा बेतेल गवा। एलीसा नगर कँइती पहाड़ी पइ चलत रहा जब कछू लरिकन नगर स खाले आवत रहेन। उ पचे एलीसा क मजाक उड़ावइ लागेन अउर उ पचे कहेन, “हे गंजे, तू ऊपर चढ़ि जा। हे गंजे तू ऊपर चढ़ि जा।”

24एलीसा मुड़िके ओनका लखेस। उ यहोवा स बिनती किहेस कि ओनके संग बुरा होइ। उहइ समइ जंगल स दुइ ठु रीछ आइके ओन लरिकन पइ हमला किहन, हुवाँ बयालीस लरिकन रछिन क जरिये फार दीन्ह गएन।

25हुवाँ स एलीसा कम्मेल पर्वत पइ गवा, ओकरे पाछे उ वापिस सोमरोन क गवा।

### यहोराम इस्त्राएल क राजा बना

3 अहाब क पूत यहोराम सोमरोन मँ इस्त्राएल क राजा बना। यहोसापात क यहूदा पई राजकाल क अट्टारहवें बरिस मँ यहोराम राज्ज करब सुरू किहेस। यहोराम बारह बरिस तलक इस्त्राएल पई राज किहेस। यहोराम उ सब किहेस जउन यहोवा क निगाह मँ बुरा अहइ। परन्तु यहोराम अपने महतारी बाप क तरह न रहा काहेकि उ उ स्तम्भ क दूर कइ दिहस जउन ओकर बाप बाल क पूजा बरे बनवाए रहा। 3परन्तु उ नबात क पूत यारोबाम क अइसे पापन क, जइसे उ इस्त्राएल स भी कराएस, करत रहा अउर ओनसे न फिरा।

### मोआब इस्त्राएल स अलग होत ह

4मेसा मोआब क राजा रहा। ओकरे लगे बहोत बोकुरियन रहिन। मेसा एक लाख मेमनन अउर एक लाख भेड़ा क ऊन इस्त्राएल क राजा क भेटेंस। 5मुला अहाब क मउत क पाछे मोआब क राजा इस्त्राएल क राजा क बिरूद्ध बिद्रोह कई दिहेस।

6तब राजा यहोराम सोमरोन क बाहेर निकरा अउ उ इस्त्राएल क सबहिं मनइयन क बटोरेस। 7यहोराम यहूदा क राजा यहोसापात क लगे संदेसवाहक पठएस। यहोराम कहेस, “मोआब क राजा मोर बिरूद्ध बिद्रोह कई दिहा ह। का तू मोआब क खिलाफ जुद्ध करइ मोरे संग चलब्या?”

यहोसापात कहेस, “हाँ, मई तोहरे संग चलब। हम दुइनउँ एक फउज क तरह मिल जाब। मोर फउज तोहकरे फउजियन जइसे होइहीं। मोर घोड़न तोहरे घोड़न जइसे होइहीं।”

### एलीसा स तीन राजा सलाह माँगत हीं

8यहोसापात यहोसाराम स पूछेस, “हमका कउने राहे स चलइ चाही? “यहोराम कहेस, “एदोम क मरूस्थल क रास्ता स।”

9एह बरे इस्त्राएल क राजा यहूदा अउ एदोम क राजा लोगन क संग गवा। उ पचे लगभग सात दिन तलक

चारिहुँ कइँती घूमत रहेन। सेना व ओनके गोरूअन बरे पर्याप्त पानी नाहीं रहा। 10आपिर मँ इस्त्राएल क राजा यहोराम कहेस, “ओह, यहोवा फुरइ ही हम तीनहुँ राजा लोगन क एक संग एह बरे बोलाएस कि मोआबी हम लोगन क हरावई।”

11मुला यहोसापात कहेस, “का हिआँ यहोवा क नबी नाहीं अहइ? हम लोग नबी स पूछी कि यहोवा हम क का करइ क बरे कहत ह।”

इस्त्राएल क राजा क सेवकन मँ स एक ठु कहेस, “सापात क पूत एलीसा हिआँ अहइ। एलीसा, एलिय्याह क सेवक रहा।”\*

12यहोसापात कहेस, “यहोवा क वागी एलीसा क लगे अहइ।”

एह बरे इस्त्राएल क राजा (यहोराम), यहोसापात अउर एदोम क राजा एलीसा स मिलइ गएन।

13एलीसा इस्त्राएल क राजा (यहोराम) स कहेस, “तू मोहसे का चाहत अहा? आपन बाप अउर महतारी क नबियन क लगे जा।”

इस्त्राएल क राजा एलीसा स कहेस, “नाहीं, हम लोग तोहसे मिलइ आए अही, काहेकि यहोवा हम तीन राजा लोगन क एह बरे एक संग हिआँ बोलवा ह कि मोआबी हम लोगन क हरावइ।”

14एलीसा कहेस, “मई यहूदा क राजा यहोसापात क सम्मान करत हउँ अउर मई सर्वसक्तीमान यहोवा क सेवा करत हउँ। उ निहचइ ही जिअत अहइ, एह बरे मई फुरइ कहत हउँ: मई न तउ तोह पइ दृस्टि डावत अउर न ही तोह पइ धियान देता, जदि यहूदा क राजा यहोसापात हिआँ न होत।” 15किन्तु अब एक अइसे मनई क मोरे लगे लिआवा जउन वीणा बजावत होइ।”

जब उ मनई वीणा बजाई तउ यहोवा क सक्ती एलीसा पइ उतरी। 16तब एलीसा कहेस, “यहोवा इ कहत ह, घाटी मँ गइहा खना। 17यहोवा इहइ कहत ह: तू हवा क अनुभव नाहीं करब्या, तू बरखा भी नाहीं लखब्या। मुला उ घाटी जल स भरि जाइ। तू, तोहार गइयन अउ दूसर जनावन क पानी पिअइ क मिली। 18यहोवा क बरे इ करब सहल अहइ। उ तोहका मोआबियन क भी पराजित करइ देइ। 19तू हर एक सुदृढ़ नगर अउर प्रमुख सहर पर आक्रमण करब्या। तू हर एक अच्छे वृच्छ क काट डउब्या। तू सबहिं पानी क सोतन क रोक देब्या। तू हरेक हरियर खेत क पाथरन स भरके नस्ट कइ देब्या।”

20भिंसारे सुबह क बलि क समइ, एदोम क कइँती स पानी बहइ लाग अउर घाटी पानी स भर ग रहा।

21मोआब क लोग सुनेन कि इस्त्राएल, यहूदा अउर एदोम क राजा लोग ओनके खिलाफ लड़इ बरे आए अहइँ। एह बरे मोआब क लोग कवच धारण करइवाला उमिर क सबहिं मनइयन क बटोरेन। ओन लोग जुद्ध बरे तइयार होइके चउहदूदी पइ प्रतीच्छा किहेन। 22मोआब क लोग भी

**एलीसा** एलिय्याह क सेवक रहा मूलार्थ एलिय्याह क हाथन पइ पानी डावा एकर अरथ अहइ कि एलीसा ओकर करीबी चेला रहा।

बहोत भिंसारे उठेन। उगत भवा सूरज घाटी क जल पड़ चमकत रहा अउर मोआब क लोगन क उ खून क नाई देखाइ देत रहा। 23मोआब क लोग कहेन, “खून क धियान स लखा। राजा लोग जरूर ही एक दूसर क खिलाफ जुद्ध किहे होइहीं। उ पचे एक दूसर क जरूर नस्ट कइ दिहे होइहीं। हम चली अउर ओनके लहासन स कीमती चिजियन लइ लेइ।”

24मोआबी लोग इस्राएली डेरे तलक आएन। किन्तु इस्राएली बाहेर निकरेन अउर उ पचे मोआबी फउज पड़ आक्रमण कइ दिहन। मोआबी लोग इस्राएलियन क समन्वा स भाग खड़े भएन। इस्राएली मोआबियन स जुद्ध करइ ओनके पहुँटा में घुस आएन। 25उ नगरन क बर्बाद किहन। अउ उ पचे अच्छे खेत क हर एक फउजी दुआरा फेंकइ गवा पाथरन स भर दिहेस। उ पचे सबहि पानी क सोतन क रोक दिहन अउर सबहि नीक बृच्छन क काट डाएन। अउर कीहरेसेत में सिरिफ पाथर रहे गएन जउन ओनकर गुलेलन स फेंकइ गवा रहेन जउन नगर क घेर रखा रहेन।

26मोआब क राजा लखेस कि जुद्ध ओकरे बरे बहोत जियादा प्रबल अहइ। एह बरे उ तरवार धारी सात सौ मनइयन क एदोम क राजा क बध करइ बरे सोझ फउज भेद क खातिर पठइ दिहेस। किन्तु उ पचे एदोम क राजा तलक फउज भेद नाहीं कइ पाएन। 27तब मोआब क राजा अपने जेठ पूत क लिहस जउन ओकरे पाछे राजा होत। नगर क चारिहुँ कइँती क देवार पड़ मोआब क राजा आपन पूत क भेंट होमबलि क रूप में दिहस। अउर हुआँ इस्राएल क विरुद्ध बहोत जियादा गुस्सा रहा। एह बरे इस्राएल क लोग मोआब क राजा क तजेन अउर अपने देस क लउट गएन।

### एक तु नबी क रौंइ मेहरारू एलीसा स मदद माँगत ह

4 नबियन क समूह में स एक तु मनई क मेहरारू रही। उ मनई मर गवा। ओकर मेहरारू एलीसा क समन्वा आपन दुखड़ा रोएस, “मोर भतार तोहरे सेवक क नाई रहा। अब मोर भतार मर गवा ह। तू जानत ह कि उ यहोवा क सम्मान करत रहा। किन्तु ओह पड़ एक मनई क करजा रहा अउर अब उ मनई मोर दुइ लरिकन क आपन दास बनावइ बरे लेइ आवत अहइ।”

2एलीसा पूछेस, “मई तोहार मदद कइसे कइ सकत हउँ? मोका बतावा कि तोहरे घरे में का अहइ?”

उ मेहरारू कहेस, “मोरे घरे मैं कछू नाहीं। मोरे लगे सिरिफ जइतून क तेल क गगरी अहइ।”

3तब एलीसा कहेस, “जा अउर आपन सब पड़ोसियन से खोरन उधार ल्या। उ सबइ खाली होइ चाही। बहोत स खोरन उधार ल्या। 4तब अपने घरे जा अउर दरवाजन बन्द कइ ल्या। सिरिफ तू अउर तोहार पूत घरे मैं रहिहीं। तब एन सबइ खोरन में तेल नावा जब उ खोरन भर जाइ तउ ओनका एक अलग ठउरे पड़ धरा।”

5अब उ मेहरारू एलीसा क हिआँ स चली गइ, अपने घरे पहुँची अउर दरवाजन बंद कइ लिहस। सिरिफ उ अउर ओकर पूत घरे मैं रहेन। ओकर पूतन खोरन ओकरे लगे

लिआएन अउर उ तेल नाएस। 6उ बहोत स खोरन भरेस। आखिर मैं उ अपने पूत स कहेस, “मोरे लगे दूसर खोरन लिआवा।”

मुला सभी खोरन भर चुका रहेन। पूतन में स एक तु मेहरारू स कहेस, “अब कउनो खोरा नाहीं रहि गवा ह।” उ समइ गगरी क तेल खतम होइ चुका रहा।

7तब उ मेहरारू आइ अउर उ परमेस्सर क जन (एलीसा) स इ घटना बताएस। एलीसा ओहसे कहेस, “जा, तेल क बेच द्या अउर अपना करजा लउटाइ द्या। जब तू तेल क बेच चुकब्यू अउ अपना करजा लउटाइ देब्यू तब तोहार अउ तोहरे पूतन क गुजारा बची रकम स होइ।”

### सूनेम में एक तु मेहरारू एलीसा क कमा देत ह

8एक दिना एलीसा सूनेम क गवा। सूनेम में एक तु महत्वपूर्ण मेहरारू रहत रही। इ मेहरारू एलीसा स कहेस कि उ ठहरइ अउर ओकरे घरे खइया क खाइ। एह बरे जब भी एलीसा उ ठउरे स होइके जात रहा तब भोजन करइ बरे हुवाँ रुकत रहा।

9उ मेहरारू अपने भतार स कहेस, “लखा मई समुझत हउँ कि एलीसा परमेस्सर क जन पवितर जन अहइ। उ सदा हमरे घरे होइके जात ह। 10मेहरबानी कइके हम लोग एक तु कमरा एलीसा बरे छते पड़ बनाई। ओहमाँ हम लोग एक तु बिछउना, एक तु मेज, एक कुर्सी अउर एक तु डीबट रख देइ। जब जब उ हमरे घर आवइ तउ उ इ कमरा क अपने रहइ बरे प्रयोग कइ सकत ह।”

11एक दिना एलीसा उ मेहरारू क घरे आवा। उ उ कमरे में गवा अउर हुवाँ आराम किहेस। 12एलीसा अपने सेवक गेहजी स कहेस, “सूनेमिन मेहरारू क बोलावा।”

सेवक सूनेमिन मेहरारू क बोलाएस अउर उ ओकरे समन्वा आइ खड़ी भइ। 13एलीसा अपने सेवक स कहेस, अब इ मेहरारू स कहा, ‘लखा हम लोगन क देखभाल बरे तू यथासंभव नीक किहा ह। हम लोग तोहरे बरे का करी? का तू चाहति अहा कि हम लोग तोहरे बरे राजा या सेना क सेनापति स बात करी?’”

उ मेहरारू जवाब दिहस, “मई हिआँ बहोत अच्छी तरह अपने लोगन में रहत हउँ।” 14एलीसा गेहजी स कहेस, “हम ओकरे बरे का कइ सकित ह?”

गेहजी कहेस, “मई जानत हउँ कि ओकर पूतन नाहीं अहइ अउर ओकर भतार बूढ़ा अहइ।”

15तब एलीसा कहेस, “ओका बोलावा।”

एह बरे गेहजी उ मेहरारू क बोलाएस। उ आइ अउ ओकरे दरवाजे क लगे खड़ी होइ गइ। 16एलीसा मेहरारू स कहेस, “अगले बसन्त मैं इ समइ तू अपने पूत क गले स लगाइ रही होइब्यू।”

उ मेहरारू स कहेस, “नाहीं महोदय! परमेस्सर क जन, मोहसे झूठ जिन बोला।”

### सूनेमिन मेहरारू क पूत होत ह

17मुला उ मेहरारू क गरभ भवा। उ अगले बसन्त मैं एक तु पूत क जन्म दिहस, जइसा एलीसा कहे रहा।

18 लड़का बड़ा भवा। एक दिन उ लड़का खेतन में अपने बाप अउर फसल काटत मनइयन क लखइ गवा। 19 लड़का अपने बाप स कहेस, “ओह मोर मूँड़। मोर मूँड़ फटा जात अहइ।”

बाप अपने सेवक स कहेस, “एका अपनी महतारी क लगे लइ जा।”

20 सेवक उ लरीका क ओकरी महतारी क लगे लइ गवा। लरिका दुपहर तलक अपनी महतारी क गोदी में बइठा। तब उ मरि गवा।

### महतारी एलीसा स मिलइ जात ह

21 उ मेहरारू लरिका क परमेस्सर क जन क बिछउने पइ ओलराइ दिहस। तब उ दरवाजा बन्द किहस अउर बाहेर चली गइ। 22 उ अपने भतारे क बोलाएस अउ कहेस, “मेहरबानी कइके मोरे लगे सेवकन में स एक अउ गदहन में स एक क पठवा। तब मई परमेस्सर क जन स भेंटइ हाली जाबइ अउर लउटि अउबइ।”

23 उ मेहरारू क भतार कहेस, “तू आज परमेस्सर क जन क लगे काहे जाइ चाहति अहा? इ नवचन्द्र या सबित क दिन नाहीं अहइ।”

उ कहेस, “परेसान जिन हवा। सब कछू नीक होइ।”

24 तब उ एक गदहे पइ काठी धरेस अउ अपने सेवक स कहेस, “आवा चली अउ हाली करी। धीरे तबहि चला जब मई कहउँ।”

25 उ मेहरारू परमेस्सर क जन स भेंटइ कर्मेल पर्वत पइ गइ।

परमेस्सर क जन सूनेमिन मेहरारू क दूर स आवत लखेस। एलीसा अपने सेवक गोहजी स कहेस, “लखा, उ सूनेमिन मेहरारू अहइ। 26 कृपा कइके अब दउड़ि के ओहसे भंटा। ओहसे पूछा, ‘का सब कछू ठीक अहइ? का तू कुसल स अहा? का तोहार भतार कुसल स अहइ? का तोहार पूत कुसल ह?’”

गोहजी उ सूनेमिन मेहरारू स इहइ पूछेस। उ जवाब दिहस, “सब कुसल अहइ।”

27 मुला सूनेमिन मेहरारू स पर्वत पइ चढ़िके परमेस्सर क जन क लगे पहुँची। उ प्रणाम करइ निहुरी अउर उ एलीसा क गोड़ धइ लिहस। गोहजी सूनेमिन मेहरारू क दूर हींच लेइ बरे निअरे आवा। किन्तु परमेस्सर क जन गोहजी स कहेस, “ओका अकेला छोड़ द्या। उ बहोत परेसान अहइ अउर यहोवा एकरे बारे में मोहसे नाहीं कहेस। यहोवा इ खबर मोहसे छुपाएस।”

28 तब सूनेमिन मेहरारू कहेस, “महोदय, मई आप स पूत नाहीं माँग रहेउँ। मई आप स कहे रहेउँ, ‘आप मोका मूर्ख न बनावइँ।’”

29 तब एलीसा गोहजी स कहेस, “जाइ बरे तइयार होइ जा। मोर टहराइ क कुबरी लइ ल्या अउर जा। कउनो स बात करइ बरे न रूका। यदि तू कउनो मनई स मिला तउ ओका नमस्कार भी न कहा। यदि कउनो मनई नमस्कार करइ तउ तू ओकर जवाब भी न द्या। मोर टहरइ क कुबरी क बच्चा क चेहरा पइ रखा।”

30 मुला बच्चा क महतारी कहेस, “जइसा कि यहोवा सास्वत अहइ अउर आप जिअत अहइँ मई प्रतिग्या करति अहइँ कि मई तोहार बिना हिआँ स नाहीं जाब।”

एह बरे एलीसा उठा अउर सूनेमिन मेहरारू क संग चल पड़ा।

31 गोहजी सूनेमिन मेहरारू क घर, एलीसा अउ सूनेमिन स पहिले पहुँचा। गोहजी टहरइ क कुबरी क बच्चा क चेहरे पइ धरेस। मुला बच्चा न कउनो बात किहस अउर न ही कउनो अइसा संकेत दिहस जेहसे इ लागइ कि उ कछु सुनेस ह। तब गोहजी एलीसा स मिलइ लउटा। गोहजी एलीसा स कहेस, “बच्चा नाहीं जगा।”

### सूनेमिन मेहरारू क पूत पुन जिअत ह

32 एलीसा घरे स आवा अउर बच्चा अपने बिछउना पइ मरा पड़ा रहा। 33 एलीसा कमरे में आवा अउर उ दरवाजा बन्द कइ लिहस। अब एलीसा अउर उ बच्चा कमरा में अकेल्ले रहेन। तब एलीसा यहोवा स पराथना किहसे।

34 एलीसा बिछउना पइ गवा अउ बच्चा पइ ओलरा। एलीसा आपन मुँह बच्चा क मुँह पइ धरेस। एलीसा आपन आँखिन बच्चा की आँखिन पइ धरेस। एलीसा अपने हाथन क बच्चा क हाथन पइ धरेस। एलीसा अपने क बच्चा क ऊपर फइलाएस। तब बच्चा क तन गरम होइ गवा।

35 एलीसा उठा अउर कमरे में चारिहुँ कइँती घूमा। तब उ पुन बच्चा क ऊपर झुक गवा। तब बच्चा सात दाईं छीकेस अउर उ आँखिन खोलेस।

36 एलीसा गोहजी क बोलाएस अउर कहेस, “सूनेमिन मेहरारू क बोलावा।”

गोहजी सूनेमिन मेहरारू क बोलाएस अउर उ एलीसा क लगे आइ। एलीसा कहेस, “अपने पूत क उठाइ ल्या।”

37 तब सूनेमिन मेहरारू कमरा में गइ अउ एलीसा क चरणन पइ निहुरी। तब उ अपने पूत क उठाएस अउर उ बाहेर गइ।

### एलीसा अउ जहरीला सुरवा

38 एलीसा पुन गिलगाल आइ गवा। उ समइ देस में भुखमरी क समइ रहा। नबियन क समूह एलीसा क समन्वा बइठ गवा। एलीसा अपने सेवक स कहेस, “बड़के बर्तन क आगी पइ धरा अउ नबियन क समूह बरे कछू सुरवा बनावे।”

39 एक ठु मनई खेतन में जड़ी-बूटी बटोरइ गवा। ओका एक जंगली बेल मिली। उ कछू जंगली लौकियन इ बेल स तोड़ेस अउ अपने लबादे क भर लिहस। तब उ आवा अउर जंगली लौकियन क बर्तन में डाइ दिहस। मुला न ओका अउर न ही दूसर नबियन क पता चला रहा कि उ कइसी लउकियन अहइँ?

40 तब उ पचे तनिक सुरवा मनइयन क खाइ बरे दिहन। मुला जब उ पचे सुरवा क खाब सुरू किहन, तउ उ पचे एलीसा स चिचिआइके कहेन, “परमेस्सर क जन! बर्तन में जहर बाटइ।” उ पचे बर्तन स कछू नाहीं खाइ सकेन काहेकि भोजन खाब खतरा स रहित नाहीं रहा।

41मुला एलीसा स कहेस, “कछू आटा लिआवा।” उ पचे एलीसा क लगे आटा लइ आएन अउर उ पचे ओका बर्तन में नाइ दिहन। तब एलीसा कहेस, “सुरवा क लोगन क बरे नावा जेहसे उ पचे खाइ सकई।”

तब सुरवा में कउनो दोख नहीं रहा।

### एलीसा नबियन क समूह क भोजन करावत ह

42एक ठु मनई बालसालीसा स आवा अउर पहिली फसल स परमेस्सर क जन बरे रोटी लिआवा। उ मनई बीस ठु जौ क रोटियन अउ नवा अनाज क अपनी बोरी में लिआवा। तब एलीसा कहेस, “इ भोजन लोगन क द्या जेका उ पचे खाइ सकई।”

43एलीसा क सेवक कहेस, “आप का कहेन? हिआँ तउ सौ मनई अहई। ओन सबहिं मनइयन क इ भोजन मई कइसे दइ सकत हई?”

किन्तु एलीसा कहेस, “लोगन क खाइ बरे भोजन द्या। यहोवा कहत ह, ‘उ पचे भोजन कइ लेइहीं अउर भोजन बच भी जाइ।’”

44तब एलीसा क सेवक नबियन क समूह क समन्वा भोजन परोसेस। नबियन क समूह क खाइ बरे भोजन पर्याप्त भवा अउर ओनके लगे भोजन बचा भी रहा। इ वइसा ही भवा जइसा यहोवा कहे रहा।

### नामान क समस्या

5 नामान अराम क राजा क सेना क सेनापति रहा। नामान अपने राजा बरे बहोत जियादा महत्वपूर्ण रहा काहेकि यहोवा ओकर उपयोग अराम क बिजय करावइ बरे किये रहा। नामान एक ठु महान अउ ताकतवर मनई रहा, मुला उ विकट चरमरोग स पीड़ित रहा।

2एक बार कछू आरामी सिपाहियन इस्त्राएल में छापामारइ बरे गएन। ओनक कैदियन में एक ठु नान्ह लरकी रहेन जउन नामान क मेहरारू क सेविका होइ गइ। 3इ लरकी नामान क मेहरारू स कहेस, “मई चाहत हई कि मोर सुआमी (नामान) उ नबी (एलीसा) स मिलेन जउन सोमरोन में रहत ह। उ नबी नामान क बिकट चरमरोग क ठीक कइ सकत ह।”

4नामान आपन सुआमी (अराम क राजा) क लगे गवा। नामान अराम क राजा क उ बात बताएस जउन इस्त्राएली लरिको कहे रही।

5तब अराम क राजा कहेस, “अबहिं जा अउर मई एक ठु पत्र इस्त्राएल क राजा क नाउँ पठउब।”

एह बरे नामान इस्त्राएल गवा। नामान अपने संग कछू भेंट लइ गवा। नामान साढ़े सात सौ पौण्ड चाँदी, छः हजार सोन क सिक्क, अउर दस हजार बदलइ क कपड़ा लइ गवा। 6नामान इस्त्राएल क राजा बरे अराम क राजा क पत्र भी लइ गवा। पत्र में इ लिखा रहा, “...इ पत्र इ जानकारी देइ बरे अहइ कि मई आपन सेवक नामान क तोहरे हिआँ पठवत हई। ओकरे विकट चरमरोग क नीक करा।”

7जब इस्त्राएल क राजा उ पत्र क बाँच चुका तउ उ आपन चिन्ता क परगट करइ बरे आपन ओढ़ना फारेस।

इस्त्राएल क राजा कहेस, “का मई परमेस्सर अहई? नाहीं। जिन्नगी अउ मउत पइ मोर कउनो अधिकार नाहीं। तब अराम क राजा मोरे लगे बिकट चरमरोग क रोगी क चंगा करइ बरे काहे पठएस? एका जरा सोचा अउर तू लखब्या कि अराम क राजा मोर संग झगड़ा करइ चाहत ह।”

8परमेस्सर क जन सुनेस कि इस्त्राएल क राजा परेसान अहइ अउर उ आपन ओढ़ना फार डाएस ह। एलीसा आपन सँदिसा राजा क लगे पठएस: “तू आपन ओढ़ना काहे फारया? नामान क मोरे लगे आवइ द्या। तब उ समुझी कि इस्त्राएल में कउनो नबी भी अहइ।”

9एह बरे नामान आपन घोड़न अउ रथन क संग एलीसा क घरे आवा अउर घरे क दुआर पई रुकि गवा। 10एलीसा एक ठु सँदिसबाहक क नामान क लगे पठएस। सँदिसबाहक कहेस, “जा, अउर यरदन नदी में सात दाई नहा। तब तोहार चरमरोग नीक हो जाइ अउर तू पवितर अउ सुद्ध होइ जाब्य।”

11नामान कोहाइ गवा अउर हुवाँ स चल पड़ा। उ कहेस, “मई समुझे रहेई कि कम स कम एलीसा बाहेर आई, मोरे समन्वा खड़ा होइ अउर यहोवा, अपने परमेस्सर क समन्वा पराथना करी। मई समुझ रहेई कि उ मोरे बदन पइ आपन हाथ फेरी अउ चामरोग क नीक कइ देइ। 12दमिस्क क नदियन अबाना अउ पपर इस्त्राएल क सबहिं जलासयन स नीक अहई। का मई ओन नदियन में नहाइके पवितर नाहीं होइ सकत रहा?” एह बरे नामान कोहाई गवा। अउ वापस जाई बरे मुड़ गवा।

13मुला नामान क सेवक ओकरे लगे ओसे बात करइ बरे गएन उ पचे कहेन, “पिता, जदि नबी तोहार स कउनो महान काम करइ क कहे होत तउ तू ओका जरूर कतेन। एह बरे तोहका ओकर आग्या क पालन करइ चाही। जदि उ सहल काम करइ क भी कहत ह अउर उ कहेस, ‘नहा अउर तू पवितर अउर सुद्ध होइ जाब्य।’”

14एह बरे नामान उ काम किहेस जउन परमेस्सर क जन कहेस, नामान खाले उतरा अउर उ सात दाई यरदन नदी में नहाएस अउर नामान पवितर अउ सुद्ध होइ गवा। नामान क चमड़ी बच्चा क चमड़ी क तरह कोमल होइ गइ।

15नामान अउ ओकर सारा समूह परमेस्सर क जन क लगे गवा। उ एलीसा क समन्वा खड़ा भवा अउर ओहसे कहेस, “लखा, अब मई समुझत हई कि इस्त्राएल क अलावा पृथ्वी पइ कहुँ परमेस्सर नाहीं अहइ। अब मेहरबानी कइके मोर भेंट स्वीकार करई।”

16मुला एलीसा कहेस, “मई यहोवा क सेवा करत हई। मई यहोवा क जिन्नगी क किरिया खाइके प्रतिग्या करत हई कि मई कउनो भेंट नाहीं लेब।”

नामान बहोत जतन किहस कि एलीसा भेंट लेइ मुला एलीसा इन्कार कइ दिहस। 17तब नामान कहेस, “जदि तू इ भेंट क स्वीकार नाहीं करतेन तउ कम स कम मोरे बरे एँतना करई। मोका एस्त्राएल क एतनी पर्याप्त धूरि लेइ देई जेहसे मोर दुइ खच्चरन पइ धरे टोपन भरि जाई, काहे? काहेकि मई फुन कबहुँ होमबलि या बलि कउनो दूसर देवता क नाहीं चढ़ाउब। मई सिरिफ यहोवा क ही बलि भेंट

करब। 18अउर अब मई पराथना करत हउँ कि यहोवा मोका इ बात बरे छिमा करी कि भविस्स मँ मोर सुआमी (अराम क राजा) लबार देवता क पूजा करइ बरे, रिम्मोन क मन्दिर मँ आइ। राजा सहारा बरे मोह पइ निहुरइ चाही, एह बरे मोका रिम्मोन क मन्दिर मँ निहुरइ पड़ी। अब मई यहोवा स पराथना करत हउँ कि मोका छिमा करइ जब वइसा होइ।”

19तब एलीसा नामान स कहेस, “सान्तिपूर्वक जा।”

एह बरे नामान एलीसा क तजेस अउ तनिक दूर गवा। 20मुला परमेस्सर क जन एलीसा क सेवक गेहजी बोला, “लखइँ, मोर सुआमी (एलीसा) अरामी नामान क, ओकर लिआई भइ भेंट क स्वीकार किए बिना ही जाइ दिहस ह। मई यहोवा क जिन्नगी क किरिया खाइके प्रतिग्या करत हउँ कि नामान क पाछे दउड़ब अउर ओहसे कछू लिआउब।” 21एह बरे गेहजी नामान कइँती दउड़ा।

नामान अपने पाछे कउनो क दौड़के आवत लखेस। उ गेहजी स भेंटइ क अपने रथे स उतर पड़ा। नामान पूछेस, “सब कुसल तउ अहइ?”

22गेहजी कहेस, “हाँ, सब कुसल अहइ। मोर सुआमी एलीसा मोका पठएस ह। उ कहेस, ‘लखा, एप्रैम क पहाड़ी पहुँटा क नबियन क समूह स दुइ नउजवान नबी मोरे लगे आएन ह। मेहरबानी कइके ओनका पचहत्तर पौण्ड चाँदी अउर दुइ दाई बदलइ क ओढ़ना दइ द्या।”

23नामान कहेस, “मेहरबानी कइके डेढ़ सौ पौण्ड लइ ल्या।” नामान गेहजी क चाँदी लेइ बरे मनाएस। नामान डेढ़ सौ पौण्ड चाँदी क दुइ बोरियन मँ धरेस अउर दुइ दाई बदलइ क ओढ़ना लिहस। तब नामान एन चिजियन क अपने सेवकन मँ स दुइ क दिहस। सेवक ओन चिजियन क गेहजी क बरे लइके आएन। 24जब गेहजी पहाड़ी तलक आवा तउ उ ओन चिजियन क सेवकन स लइ लिहस। गेहजी सेवकन क लउटाइ दिहस अउर उ पचे लउटि गएन। तब गेहजी ओन चिजियन क घरे मँ छुपाइ दिहस।

25गेहजी आवा अउर अपने सुआमी एलीसा क समन्वा खड़ा भवा। एलीसा गेहजी स पूछेस, “गेहजी, तू कहाँ गए रह्या?”

गेहजी कहेस, “मई कहुँ भी नाहीं गवा रहेउँ।”

26एलीसा गेहजी स कहेस, “इ फुर नाहीं अहइ। मोर हिरदइ तोहरे संग रहा जब नामान अपने रथे स तोहसे मिलइ क मुड़ा। इ समइ पैसा, कपड़ा, जैतून, अंगूर, भेड़, गइयन या सेवक-सेविकन लेइ क नाहीं अहइ। 27अब तोहका अउ तोहर बच्चन क नामान क बेरामी लगा जाइ। तोहका सदा ही बिकट चरमरोग रही।”

जब गेहजी एलीसा स बिदा भवा तउ गेहजी क चमड़ी बर्फ क तरह सफेद होइ गइ। गेहजी क कोढ़ होइ गवा रहा।

### एलीसा अउ लौह फलक

6 नबियन क समूह एलीसा स कहेस, “जहाँ पइ हम लोग रहत अहइँ उ जगह हमरे बरे बहोत छोट अहइ। 2हम लोग यरदन नदी क चली अउर कछू लकड़ियन काटी। हम पचन मँ स हर एक एक तु लट्ठा लेइ अउर हम

लोग अपने बरे रहइ क एक ठउर हुवाँ बनाई।” एलीसा कहेस, “बहोत अच्छा, जा अउर करा।”

3ओनमाँ स एक मनई कहेस, “कृपा कइके हमरे संग चलईँ।”

एलीसा कहेस, “बहोत अच्छा, मई तोहरे संग चलब।”

4एह बरे एलीसा नबियन क समूह क संग गवा। जब उ पचे यरदन नदी पइ पहुँचेन तउ उ पचे कछू बृच्छ काटइ सुरू किहन। 5मुला जब एक मनई एक तु बृच्छ काटत रहा तउ कुल्हाड़ी क लोहा क फलक कुल्हाड़ी स निकर गवा अउर पानी मँ गिर पड़ा। तब उ मनई चिचियान, “हे सुआमी, मई उ कुल्हाड़ी उधार लिहे रहेउँ।”

6परमेस्सर क जन (एलीसा) कहेस, “उ कहाँ गिरी?”

उ मनई एलीसा क उ जगह देखाएस जहाँ लोहा क फलक गिरा रहा। तब एलीसा एक तु डण्डी काटेस अउर उ डण्डी क पानी मँ लोकाइ दिहस। उ डण्डी लोहा क फलक क तैराइ दिहस। 7एलीसा कहेस, “लोहा क फलक क पकड़ ल्या।” तब उ मनई अगवा बढ़ा अउर उ लोहे क फलक लइ लिहस।

### अराम क राजा इस्राएल क राजा क फँसावइ क जतन करत ह

8अराम क राजा इस्राएल क खिलाफ जुद्ध करत रहा। उ फउज क अधिकारियन क संग परिषद क बैठक बोलाएस। उ हुकुम दिहस, “इ ठउरे पइ छुप जा अउर इस्राएलियन पइ तब आक्रमण करा जब हिआँ स होइके निकरउँ।”

9मुला परमेस्सर क जन (एलीसा) इस्राएल क राजा क एक सँदेसा पठएस। एलीसा कहेस, “सावधान रहा। उ ठउरे स होइके जिन जा। हुवाँ अरामी फउजी छिपे अहइँ।”

10इस्राएल क राजा उ ठउरे पइ जेकरे बारे मँ परमेस्सर क जन चितउनी दिहे रहा, अपने मनइयन क सँदेसा पठएस। इ एक या दुई दाई स जियाद भवा।

11अराम क राजा एहसे बहोत घबरान। अराम क राजा आपन फउजी अधिकारियन क बोलाएस, अउर ओनसे पूछेस, “मोका बतावा कि इस्राएल क राजा बरे जासूसी कउन करत अहइ।”

12अराम क राजा क फउजी अधिकारियन मँ स एक कहेस, “मोर पभू अउ राजा, हम पचन मँ स कउनो भी जासूस नाहीं अहइ। एलीसा, इस्राएल क नबी इस्राएल क राजा क अनेक गुप्त सूचना दइ सकत ह, हिआँ तलक कि आप जउन अपने बिछउन मँ कहिहीं, ओकर भी।”

13अराम क राजा कहेस, “एलीसा क पता लगावा अउर मई ओका धरइ बरे मनइयन क पठउब।”

सेवकन अराम क राजा स कहेस, “एलीसा दोतान मँ अहइ।”

14तब अराम क राजा घोड़न, रथ अउ विसाल फउज क दोतान पठएस। उ पचे रात क पहुँचेन अउर पचे नगर क घेर लिहन। 15एलीसा क सेवक उ भिंसारे हाली उठेन। एक सेवक बाहेर गवा अउर उ एक फउज क घोड़न अउ रथन क संग नगर क चारिहुँ कइँती लखेस।



एलीसा क सेवक एलीसा स कहेन, “ओह, मोर सुआमी हम का कइ सकित ह?”

16एलीसा कहेस, “डेराअ जिन। उ फउज जउन हमरे बरे जुद्ध करत ह, उ फउज स बड़ी अहइ जउन अराम क बरे जुद्ध करत ह।”

17तब एलीसा पराथना किहेस अउर कहेस, “यहोवा, मई तोहसे पराथना करत हउँ कि तू मोरे सेवक क आँखिन खोला जेहसे उ लखि सकइ।”

यहोवा जुवक क आँखिन खोलेस अउ सेवक लखेस कि पूरा पर्वत आगी क घोड़न अउ रथन स ढका पड़ा रहा। उ पचे सबहिँ एलीसा क चारिहुँ कइँती रहेन।

18इ सबइ आगी क घोड़न अउ रथ एलीसा क लगे आएन। एलीसा यहोवा स पराथन किहेस अउर कहेस, “मई पराथना करत हउँ कि तू एन लोगन क आँधर कइ द्या।”

तब यहोवा अरामी फउज क आँधर कइ दिहस, जइसे एलीसा पराथना किहे रहा। 19एलीसा अरामी फउज स कहेस, “इ गलत मारग अहइ। इ उ सहर नाहीं अहइ जेका तू खोजत ह। मोरे पाछे आवा। मई उ मनई क लगे तू पचन क लइ जाब जेकर खोज तू करत अहा।” तब एलीसा अरामी फउज क सोमरोन लइ गवा।

20जब उ पचे सोमरोन पहोंचेन तउ एलीसा कहेस, “यहोवा, एँन लोगन क आँखिन खोल द्या जेहसे इ सबइ लखि सकइँ।”

तब यहोवा ओनकर आँखिन खोल दिहस अउर अरामी फउज लखेस कि उ सोमरोन नगर में रहेन। 21इस्त्राएल क राजा अरामी फउज क लखेस। इस्त्राएल क राजा एलीसा स पूछेस, “मोरे बाप, का मई एनका मार डावउँ? का मई एनका मार डावउँ?”

22एलीसा जवाब दिहस, “नाहीं, ओन लोगन क जिन मार। तू ओनका आपन तरवार या धनुस स नाहीं पकड़ेस ह किन्तु तू तउ अब ओन मनइयन क मराइ चाहत ह अरामी फउज क कछू रोटी पानी द्या। ओनका खाइ पिअइ द्या। तब एनका अपने सुआमी क लगे लउटि जाइ द्या।”

23इस्त्राएल क राजा अरामी सेना बरे बहोत स भोजन तइयार कराएस। अरामी फउज खाएस-पीएस। तब इस्त्राएल क राजा अरामी फउज क ओनके घरे वापस पठइ दिहस। अरामी फउज अपने सुआमी क लगे क घर लउटे गइ। अरामी लोग एकरे पाछे इस्त्राएल पइ आक्रमण करइ बरे फुन कउनो फउज नाहीं पठएस।

### भयंकर भुखमरी सोमरोन क कस्ट देत ह

24जब इ सब होइ गवा तउ अराम क राजा बेन्हदद अपनी सारी फउज बटोरैस अउ उ सोमरोन नगर पइ घेरा डावइ अउर ओह पइ आक्रमण करइ गवा। 25फउजियन लोगन क नगर में भोजन सामग्री भी नाहीं लिआवइ दिहन। एह बरे सोमरोन में भयंकर भुखमरी क समइ आइ गवा। इ एँतना भयंकर रहा कि एक गवहे क मूँड चाँदी क अस्सी सिक्कन में बिकइ लाग अउर एक ठु छोटा टोकरी कबूतर क गोबरी क कीमत पाँच चाँदी क सिक्कन रही।

26इस्त्राएल क राजा नगर क प्राचीर पइ घूमत रहा। एक ठु मेहरारू चिचिआइके ओका गेहराएस। उ मेहरारू कहेस, “मोर पभूँ, अउर राजा, कृपा करके मोर मदद करइँ।”

27इस्त्राएल क राजा कहेस, “जदि यहोवा तोहार मदद करत तउ मई कइसे तोहका मदद दइ सकत हउँ? मोरे लगे तोहका देइ क कछू भी नाहीं अहइ। खरिहानन स कउनो अन्न नाहीं आवा, या दाखरस क कारखाने स कउनो दाखरस नाहीं आइ।” 28तब इस्त्राएल क राजा उ मेहरारू स पूछेस, “तोहार परेसानी का अहइ?”

मेहरारू जवाब दिहेस, “इ मेहरारू मोहसे कहेस, ‘अपने पूत क मोका द्या जेहसे हम ओका मार डाइ अउर ओकर आज खाइ लेइ। फुन काल्ह मई आपन पूत क मारिके खाउब्या। 29तब हम अपने पूत क पकावा अउर खावा। तब दूसरे दिन इ मेहरारू स कहेउँ, ‘अपने पूत क द्या जेहसे हम ओका मार सकी अउर खाइ सकी।’ किन्तु उ अपने पूत क छुपाए दिहेस ह।”

30जब राजा उ मेहरारू क बातन सुनेस तउ उ आपन ओढ़नन क अपनी सम्मया बतावइ बरे फार डाएस। जब राजा प्राचीर स होइके चला तउ लोग लखेन कि उ अपने पहिरावे क नीचे मोटा वस्त्र पहिरे रहा जेहसे पता चलत रहा कि उ बहोत दुखी अउ परेसान अहइ।

31राजा कहेस, “परमेस्सर मोका निहचित ही दण्डित करइ जदि सापात क पूत एलीसा क मूँड इ दिन क आखिर तलक भी ओकरे धड़ पर रहि जाइ।”

32राजा एलीसा क लगे एक ठु सँदिसवाहक पठएस। एलीसा अपने घरे में प्रमुखन क संग बइठा रहा। सँदिसवाहक क अवाइ क पहिले एलीसा प्रमुखन स कहेस, “लखा, उ हत्तियारा क पूत (इस्त्राएल क राजा) लोगन क मोर मूँड काटइ क पठवत अहइ। जब सँदिसवाहक आवइ तउ दरवाजा बन्द कइ ल्या। दरवाजा क बन्द रखा अउर ओका घुसइ जिन द्या। एहमों कउनो सक नाहीं कि ओकर सुआमी क कदमन क आवाज़ ओकरे पाछा करब्या।”

33जउने समइ एलीसा अग्रजन स बातन करत ही रहा, सँदिसवाहक ओकरे करीब आवा। सँदिसा इ रहा: “इ बिपति यहोवा कइँती स आई अहइ। मई यहोवा क प्रतीच्छा आगे अउर काहे करउँ?”

7 एलीसा कहेस, “यहोवा कइँती स सँदिस सुना। यहोवा कहत ह: ‘काल्ह इहइ समइ सोमरोन क फाटक क संग क बाजार में लोग एक डलिया अच्छा आटा या दुइ डलिया जौ एक सेकेल में खरीदब्या।”

2तब उ अधिकारी जउन राजा क बिस्सासपात्र रहा, परमेस्सर क जन स बातन किहेस। अधिकारी कहेस, “जदि यहोवा आकास में खिड़कियन भी बनाइ देइ तउ भी इ नाहीं होइ।”

एलीसा कहेस, “एका तू अपनी आँखिन स लखब्या। किन्तु उ भोजन में स तू कछू भी नाहीं खाब्या।”

### कोढ़ी, अरामी डेरा क खाली पावत हीं

अंगर क दुआर क लगे चार मनई कोढ़ स पीड़ित रहेन। उ पचे आपुस में बातन किहन, “हम हिआँ मरइ क

प्रतीच्छा करत भए काहे बइठा अही? 4सोमरोन में कछू भी खाइ क बरे नाहीं अहइ। जदि हम लोग नगर क भीतर जाब तउ हुवाँ हम भी मरि जाब। किन्तु जदि हम पचे हिआँ रहा, तउ भी मरि जाब। एह बरे हम लोग अरामी डेरा कइँती चली। जदि उ पचे हम क ज़िअत रहइ देत हीं तउ हम ज़िअत रहब। जदि उ पचे हम क मार डावत हीं तउ मर जाब।”

5एह बरे उ साँझ क उ चारिहुँ कोढ़ी अरामी डेरा क गएन। उ पचे अरामी डेरा क छोर तलक पहुँचेन। मुला हुवाँ कउनो नाहीं रहेन। 6यहोवा अरामी सेना क, रथन, घोड़न अउ बिसाल सेना क उद्घोस सुनाए रहा। एह बरे अरामी फउजियन आपुस में बातन किहन, “इस्त्राएल क राजा हिती राजा लोगन अउ मिसियन क हम लोगन क खिलाफ किराये पइ बोलाएस ह।”

7अरामी फउजी उ साँझ क आरम्भ में ही पराइ गएन उ पचे सब कछू अपने पाछे छोड़ गएन। उ पचे अपने डेरन, घोड़न, गदहन छोड़न अउ आपन जिन्नगी बचावइ क भाग खड़े भएन।

### कोढ़ी अरामी डेरा में

8जब इ सबइ कोढ़ी उ डेरा क छोर तलक पहुँचेन, उ पचे एक डेरा में गएन। उ पचे खाएन अउर पिएन। तब चारिहुँ कोढ़ी उ तम्बू स चाँदी, सोना अउ वस्त्र लइ लिहेन तउ उ पचे ओन चिजियन क लुकाइ दिहन। तब उ पचे लउटेन अउर दूसर तम्बू में गएन। उ हुआँ स भी सबइ कीमती चिजियन लइ आएन। उ पचे बाहेर गएन अउर एन चिजियन क लुकाइ रिहन। 9तब एन कोढ़ियन आपुस में बात किहन, “हम लोग बुरा करत अही। आजु हम लोगन क लगे सुभ खबर अहइ। मुला हम लोग चुप अही। जदि हम लोग सूख स निकरइ तलक प्रतीच्छा करब तउ हम लोगन क दण्ड मिली। अब हम चली अउर ओन लोगन क सुभ सूचना देइ जउन राजा क महल में रहत हीं।”

### कोढ़ी लोग सुभ खबर देत हीं

10एह बरे इ सबइ कोढ़ी नगर क दुआरपाल क लगे गएन। कोढ़ी रोगियन दुआरपालन स कहेन, “हम अरामी डेरा में गए रहे। किन्तु हम लोग कउनो मनई क हुवाँ नाहीं पावा। हुवाँ कउनो भी नाहीं रहा। घोड़न अउ गदहन तब भी बंधे रहेन अउर डेरन वइसे क वइसे लगे रहेन। किन्तु सबहिं लोग चले गए रहेन।”

11तब नगर क दुआरपाल जोर स चीखन अउर राजमहल क मनइयन क इ बात बताएन। 12राति क समइ रहा, किन्तु राजा अपने पलंग स उठा। राजा अपने अधिकारियन स कहेस, “मई तू लोगन क बताउब कि अरामी फउजी हमरे संग का करत अहइ। उ पचे जानत हीं कि हम भुखान अही। उ पचे खेतन में छुपइ बरे, डेरन क खाली कइ गएन ह। उ पचे इ सोचत अहइ, ‘जब इस्त्राएली नगर क बाहेर अइहीं, तब हम ओनका ज़िअत धइ लेब अउर तब हम नगर में प्रवेस करब।”

13राजा क अधिकारियन में स एक कहेस, “कछू मनइयन क नगर में अबहिं तलक बचे पाच तु घोड़न क लेइ द्या। निहचइ ही इ सबइ घोड़न भी हाली ही ठीक वइसे ही मर जइहीं, जइसे इस्त्राएल क सबहिं लोग जउन अबहिं तलक बचे रहि गए अहइ, मरिहीं। एन मनइयन क इ लखइ क पठवा जाइ कि का घटित भवा ह।”

14एह बरे लोग घोड़न क संग दुइ रथ लिहेन। राजा एन लोगन क अरामी फउज क पाछे लगाएस। राजा ओनसे कहेस, “जा अउर पता लगावा कि का घटना घटी?”

15उ सबइ मनई अरामी फउज क पाछे यरदन नदी तलक गएन। पूरी सड़क पइ वस्त्र अउ अस्त्र फइले भए रहेन। अरामी लोग हाली में भागत भए ओन चिजियन क लोकाइ दिहे रहेन। सँदेसवाहक सोमरोन क लउटेन अउर राजा क बताएन।

16तब लोग अरामी डेरा कइँती टूट पड़न, अउर हुवाँ स उ पचे कीमती चिजियन लइ लिहन। एह बरे उहइ भवा जउन यहोवा कहे रहा। कउनो भी मनई एक तु डलिया निक आटा या दुइ डलिया जौ सिरिफ एक तु सेकेल में खरीद सकत रहा।

17राजा आपन व्यक्तिगत सहायक अधिकारी क दुआरे क रच्छा बरे चुनेस। किन्तु लोग दुस्मन क डेरा स भोजन पावइ बरे दौड़ पड़न। लोग अधिकारी क धक्का दइके गिराइ दिहन अउर ओका रौदत भए निकर गएन अउर उ मर गवा। एह बरे उ पचे सबहिं बातन वइसे ही ठीक घटित भइन जइसा परमेस्सर क जन तब कहे रहा जब राजा एलीसा क घरे आवा रहा। 18एलीसा कहे रहा, “कउनो भी मनई सोमरोन क नगरदुआर क बजार में एक सेकेल में एक तु डलिया नीक आटा या दुइ उलिया जौ बेसहि सकी।” 19किन्तु परमेस्सर क जन क उ अधिकारी जवाब दिहस, “जदि यहोवा सरग में खिड़कियन भी बनाइ देइ, तउ भी वइसा नाहीं होइ सकी” अउर एलीसा उ अधिकारी स कहे रहा, “तू अइसा अपनी आँखिन स लखब्या। किन्तु तू उ भोजन क कछू भी नाहीं खाइ पउब्या।” 20अधिकारी क संग ठीक वइसा ही घटित भवा। लोग नगरदुआर पइ ओका धक्का दइके गिराइ दिहन, ओका रौद डाएन अउर उ मर गवा।

### राजा अउ सूनेमिन मेहरारू

8 एलीसा उ मेहरारू स बातन किहस जेकरे पूत क उ जीवन में वापिस लाए रहा। एलीसा कहेस, “तोहका अउर तोहरे परिवार क कउनो दूसर देस में चले जाइ चाही। काहे? काहेकि यहोवा निहचइ किहेस ह कि हिआँ भुखमरी क समइ लाई। इ देस में इ भुखमरी क समइ सात बरिस क होइ।”

2एह बरे उ मेहरारू उहइ किहस जउन परमेस्सर क जन कहेस। उ अपने परिवार क संग सात बरिस पलिस्तियन क देस में रहइ चली गइ। 3जब सात बरिस पूरे होइ गएन तउ उ मेहरारू पलिस्तियन क देस स लउटि आइ। उ मेहरारू राजा स बातन करइ गइ। उ चाहत रही कि उ ओकरे घरे अउर ओकरी भुईया क ओका लउटावइ में ओकर मदद करइ।

4राजा परमेस्सर क जन क सेवक गेहजी स बातन करत रहा। राजा गेहजी स पूछेस, “कृपा कइके उ पचे सबहिं महान कार्य हमका बतावई जेनका एलीसा किहे अहई।”

5गेहजी राजा क एलीसा क बारे में एक मरे मनई क जिअत करइ क बात बतावत रहा। उहइ समइ उ मेहरारू राजा क लगे गइ जेकरे पूत क एलीसा जिआए रहा। उ चाहत रही कि उ अपने घरे अउर अपनी भुईया क वापस दिआवइ में ओहसे सहायत माँगइ। गेहजी कहेस, “मोर पर्भू राजा, इ अहइ मेहरारू अहइ अउर इ उहइ पूत अहइ जेका एलीसा जिआए रहा।”

6राजा पूछेस कि उ का चाहत ह। उ मेहरारू अपनी इच्छा जताएस। तब राजा एक अधिकारी क उ मेहरारू क मदद क बरे चुनेस। राजा कहेस, “इ मेहरारू क उ सब कछू द्या जउन एकर अहइ अउर एकर भुईया क सारी फसला जब स इ देस तजेस तब स अब तक क, एका द्या।”

### बेन्हदद इस्त्राएल क एलीसा क लगे पठवत ह

7एलीसा दमिस्क गवा। अराम क राजा बेन्हदद बीमार रहा। कउनो मनई बेन्हदद स कहेस, “परमेस्सर क जन हिआँ आवा अहइ।”

8तब राजा बेन्हदद इस्त्राएल स कहेस, “भेंट साथे में ल्या अउर परमेस्सर क जन स मिलइ जा। ओका कहा कि उ पचे यहोवा स पूछई कि का मई अपनी बेरामी स चँगा होइ सकत हउँ।”

9एह बरे हजाएल एलीसा स भेंटइ गवा। हजाएल अपने संग भेंट लिआवा। उ दमिस्क स हर प्रकार क अच्छी चिजियन लिआवा। एन सब क लिआवइ बरे चालीस ऊँटन क जरूरत पड़ी। हजाएल एलीसा क लगे गवा। हजाएल कहेस, “तोहार अनुयायी अराम क राजा बेन्हदद मोका आप क लगे पठएस ह। उ पूछत ह कि का मई बेरामी स नीक होइ जाब।”

10तब एलीसा हजाएल स कहेस, “जा अउर बेन्हदद स कहा, ‘तू जिअत रहब्या।’ किन्तु यहोवा फुरइ मोका इ कहेस ह, ‘उ निहचइ ही मरी।’”

### एलीसा हजाएल क बारे में भविस्सवाणी करत ह

11एलीसा हजाएल क तब तलक लखत रहा जब तलक हजाएल नाही होइ गवा। तब परमेस्सर क जन रोवइ लाग।

12हजाएल कहेस, “महोदय, आप काहे रोवत अहई?”

एलीसा जवाब दिहेस, “मई रोवत अहउँ काहेकि मई जानत हउँ कि तू इस्त्राएलियन बरे का कछू बुरा करब्या। तू ओनके मजबूत नगरन क जरउब्या। तू ओनके जुवकन क तरवार स मार डउब्या। तू ओनके बचन क मार डउब्या। तू ओनकर गाभिन मेहररूअन क गरभ क चीर डउब्या।”

13हजाएल कहेस, “मई कउनो ताकतवर मनई नाही हउँ। मई एन बड़के कामन क नाही कइ सकत।”

एलीसा जवाब दिहेस, “यहोवा मोका बताएस ह कि तू अराम क राजा होब्या।”

14तब हजाएल एलीसा क हिआँ स चला गवा अउर अपने राजा क लगे गवा। बेन्हदद हजाएल स पूछेस, “एलीसा तोहसे का कहेस?”

हजाएल जवाब दिहेस, “एलीसा मोहसे कहेस कि तू जिअत रहब्या।”

### हजाएल बेन्हदद क हत्या करत ह

15मुला अगले दिन हजाएल एक ठु मोटा कपड़ा लिहस अउर एका पानी स गीला कइ लिहस। तब उ मोटके कपड़े क बेन्हदद क मुँह पइ डइके ओकर साँस रोक दिहस। बेन्हदद मर गवा। एह बरे हजाएल नवा राजा बना।

### यहोराम आपन हुकूमत आरम्भ करत ह

16यहोसापात क पूत यहोराम यहूदा क राजा भवा। यहोराम अहाब क पूत योराम क इस्त्राएल क राज्जकाल क पँचएँ बरिस में हुकूमत आरम्भ किहस। 17यहोराम बत्तीस बरिस क रहा, जब उ हुकूमत करब आरम्भ किहस। उ यरूसलेम में आठ बरिस हुकूमत किहस। 18किन्तु यहोराम इस्त्राएल क राजा लोगन क तरह रहा अउर ओन कामन क किहस जेनका यहोवा बुरा बताए रहा। यहोराम अहाब क परिवार क लोगन क तरह रहत रहा। यहोराम इ तरह रहा काहेकि ओकर मेहरारू अहाब क बिटिया रही। 19मुला यहोवा ओका नस्ट नाही किहस काहेकि उ अपने सेवक दाऊद स प्रतिग्या किहे रहा कि ओकरे परिवार क कउनो न कउनो सदा ही राजा होइ।

20यहोराम क समइ में एदोम यहूदा क हुकूमत स टूट गवा। एदोम क लोग अपने बरे एक ठु राजा चुन लिहस।

21तब यहोराम अउ ओकर सबहिं रथ सार्इर क गएन। एदोमी सेना ओनका घेर लिहस। यहोराम अउ ओकर अधिकारियन ओन पइ रात में हमला किहेन अउर बच निकरेन। यहोराम क सबहिं फउजी अपने घरन क भाग गएन। 22इ तरह एदोमी यहूदा क हुकूमत क खिलाफ बिद्रोह किहा अउर उ पचे आजु भी बिद्रोह करत अहई।

उहइ समइ लिब्ना भी यहूदा क हुकूमत क बिरूध बिद्रोह कइ दिहा।

23यहोराम जउन कछू किहस उ सब “यहूदा क राजा लोगन क इतिहास” क किताबे में लिखा अहइ।

24यहोराम मरा अउर अपने पुरखन क संग दाऊद नगर में दफनावा गवा। यहोराम क पूत अहज्याह नवा राजा भवा।

### अहज्याह आपन हुकूमत सुरू करत ह

25यहोराम क पूत अहज्याह, अहाब क पूत इस्त्राएल क राजा योराम क राज्जकाल क बारहवें बरिस में यहूदा क राजा भवा। 26हुकूमत सुरू करइ क समइ अहज्याह बाईस बरिस क रहा। उ उरूसलेम में एक बरिस हुकूमत किहस। ओकरी महतारी क नाउँ अतल्याह रहा। उ इस्त्राएल क राजा ओम्नी क बिटिया रही। 27अहज्याह उ सबइ काम किहस जेनका यहोवा बुरा बताए रहा। अहज्याह अहाब क परिवार क लोगन क तरह बहोत स बुरे काम किहस। अहज्याह उ तरह रहा काहेकि ओकर मेहरारू अहाब क परिवार स रही।

### योराम हजाएल क खिलाफ जुद्ध में घायल होइ जात ह

28अहाब क पूत योराम अराम क राजा हजाएल स गिलाद क रामोत में जुद्ध करइ गवा। अहज्या जुद्ध में योराम क संग होइ गवा। अरामियन योराम क घायल कइ दिहन। 29राजा योराम यिज्रैल क लउटि गवा ताकि उ ओन घावन क ठीक कइ सकी जउन अरामियन ओका उ समइ दिहे रहेन जब उ रमाह में आराम क राजा हजाएल क खिलाफ लड़े रहेन। यहोराम क पूत, यहूदा क राजा अहज्याह, अहाब क पूत योराम क लगे यिज्रैल में गवा, काहेकि उ घायल होइ गवा रहा।

### एलीसा जुवा नबी क येहू क अभिसेक करइ क कहत ह

9 एलीसा नबी नबियन क समूह में स एक क बोलाएस। एलीसा इ मनई स कहेस, “तइयार होइ जा अउर अपने हाथे में तेल क इ नान्ह बोतल क ल्या। गिलाद क रामोत क जा। 2जब तू हुवाँ पहुँचा तउ निमसी क पौत अर्थात यहोसापात क पूत येहू स मिला। तब अन्दर जा अउर ओकर भाइयन में स ओका उठावा। ओका कउनो भीतरी कमरों में लइजा। 3तेल छोटी बोतल लइ जा अउर येहू क मूँड़ पइ उ तेल क डवा। इ कहा, ‘यहोवा कहत ह: मईँ तोहार अभिसेक इस्राएल क राजा होइ बरे किहेउँ ह।’ तब दरवाजा खोला अउ भाग चला। हुवाँ प्रतीच्छा न करा।”

4एह बरे इ जुवा नबी गिलाद क रामोत गवा। 5जब जुवक नबी हुवाँ पहुँचा, उ फउज क सेनापतियन क बइठे लखेस। जुवक कहेस, “सेनापति, मईँ तोहार क बरे एक सँदिसा लिआएउँ ह।” येहू कहेस, “हम सबहिं हिआँ अही। हम लोगन में स केकरे बरे सँदिस अहइ?”

जुवक कहेस, “सेनापति, सँदिस तोहार बरे अहइ।”

6येहू उठा अउर अन्दर गवा। तब जुवा नबी उ तेल क येहू क मूँड़ पइ डाइ दिहस। जुवा नबी येहू स कहेस, “इस्राएल क परमेस्सर, यहोवा कहत ह, ‘मईँ यहोवा क लोगन, इस्राएलियन पइ नवा राजा होइ क बरे तोहार अभिसेक करत हउँ? 7तोहका अपने राजा अहाब क परिवार क नस्ट कइ देइ चाही। इ प्रकार मईँ ईजेबेल क अपने सेवकन, नबियन तथा दूसर ओन सबहिं जउन मोर सेवा किहेन जेका उ मार डाएस क मउत क बरे दण्डित करब। 8इ तरह अहब क सारा परिवार मरि जाइ। मईँ अहाब क परिवार क कउनो मर्द क जिअत नाहीं रहइ देब। एकर कउनो महत्व नाहीं होइ कि उ मर्द दास अहइ या स्वतंत्र मनई अहइ। 9मईँ अहाब क परिवार क, नबात पूत क यारोबाम या अहिययाह क पूत बासा क परिवार जइसा कइ देब। 10यिज्रैल क छेत्र में ईजेबेल क कूकुरन खइहीं। ईजेबेल क दफनावा नाहीं जाइ।”

तब जुवक नबी दरवाजा खोलेस अउ भाग गवा।

### सेवक येहू क राजा घोसित करत हीं

11येहू अपने राजा क अधिकारियन क लगे लउटा। अधिकारियन में स एक येहू स कहेस, “का सब कुसल अहइ? इ पागल मनई तोहरे लगे काहे आवा रहा?”

येहू अपने अधिकारियन क उत्तर दिहस, “तू उ पागल मनई क अउर जउन बातन उ कहत ह, जानत अहा।”

12अधिकारियन कहेस, “नाहीं! हमका सच्ची बात बतावा। उ का कहत ह?” येहू अधिकारियन क उ बताएस जउन जुवक नबी कहे रहा। येहू कहेस, “उ कहेस, ‘यहोवा इ कहत ह: मईँ इस्राएल क नवा राजा होइ क बरे तोहार अभिसेक किहेउँ ह।”

13तब हर एक अधिकारी हाली स आपन चोगा उतारेन अउर येहू क समन्वा पइड़ियन पइ ओनका धरेन। तब उ पवे तुरही बजाएन अउर इ घोसणा किहन, “येहू राजा अहइ।”

### येहू यिज्रैल जात ह

14एह बरे येहू, जउन निमसी क पोता अउर यहोसापात क पूत रहा योराम क खिलाफ योजना बनाएस।

उ समइ योराम अउ इस्राएली, अराम क राजा हजाएल स, गिलाद क रामोत क रच्छा क जतन करत रहेन। 15मुला राजा योराम आपन घाव स ठीक होइ बरे यिज्रैल क गवा। अरामियन योराम क तब घायल किहे रहेन जब उ अराम क राजा हजाएल क खिलाफ जुद्ध किहे रहा।

एह बरे येहू अधिकारियन स कहेस, “जदि तू लोग स्वीकार करत अहा कि मईँ नवा राजा हउँ तउ नगर क कउनो मनई क यिज्रैल में सूचना देइ बरे बचिके निकरइ न द्या।”

16योराम यिज्रैल में अराम करत रहा। एह बरे येहू रथ में सवार भवा अउर यिज्रैल गवा। यहूदा क राजा अहज्याह भी योराम क लखइ यिज्रैल गवा।

17एक ठु रच्छक यिज्रैल में रच्छक खम्भा पइ खड़ा रहा। उ येहू क बिसाल दल क आवत लखेस। उ कहेस, “मईँ लोगन क एक ठु बिसाल दल क लखत हउँ।”

योराम कहेस, “कउनो क ओनसे भेंटइ घोड़ा पइ पठवा। इ मनई स इ कहइ बरे कहा, “का आप सान्ति क इच्छा स आए अहइँ?”

18एह बरे एक सँदिसवाहक येहू स मिलइ बरे घोड़ा पइ सवार होइके गवा। सँदिसवाहक कहेस, “राजा योराम पूछत हीं, ‘का तू सान्ति स आए अहइँ?’”

येहू कहेस, “तोहका सान्ति स कछू लेब-देब नाहीं। आवा अउ मोरे पाछे चला।”

रच्छक योराम स कहेस, “उ दल क लगे सँदिसवाहक गवा, किन्तु उ अब तलक लउटिके नाहीं आवा।”

19तब योराम एक दूसरे मनई क घोड़ा पइ पठएस। उ मनई येहू क दल क लगे आवा अउर उ कहेस, “राजा योराम कहत हीं, ‘सान्ति।’”

येहू जवाब दिहस, “तोहका सान्ति स कछू भी लेब-देब नाहीं। आवा अउर मोरे पाछे चला।”

20रच्छक योराम स कहेस, “दूसर मनई उ दल क लगे गवा, किन्तु उ अबहिं लउटिके नाहीं आवा। रथचालक रथे क निमसी पोता येहू क तरह चलावत बाटइ। उ पागलन जइसा चलावत अहइ।”

21योराम कहेस, “मोरे रथे क तइयार करा।”

एह बरे सेवक योराम क रथे क तइयार किहन। इस्राएल

क राजा योराम अउ यहूदा क राजा अहज्याह निकर गएन। हर एक राजा अपने-अपने रथे स येहू स मिलइ गएन। उ पचे येहू स यिज़्रैली नाबोत क भुइया पड़ भेंटन।

22योराम येहू क लखेस अउर ओहसे पूछेस, “येहू का तू सात्ति क इरादे स आए अहा?”

येहू जवाब दिहेस, “जब तलक तोहार महतारी ईज़ेबेल रण्डीबाजी अउर जादू टोना करति रही तब तलक सात्ति नाहीं होइ सकी।”

23योराम भाग निकरइ बरे अपने घोड़न क बाग मोड़ेस। योराम अहज्याह स कहेस, “अहज्याह! इ एक ठु चाल अहइ।”

24किन्तु येहू अपनी पूरी ताकत स अपने धनुस क हींचेस अउर योराम क पीठ में बाण चलाइ दिहस। बाण योराम क हिरदइ क बेधत भवा पार होइ गवा। योराम अपने रथे में मरि गवा।

25येहू अपने सारथी बिदकर स कहेस, “योराम क लहास क उठावा अउर यिज़्रैली नाबोत क खेत में लोकाइ द्या। याद करा, जब हम अउर तू योराम क बाप अहाब क संग चले रहे। तब यहोवा कहे रहा कि एकरे संग अइसा ही होइ। 26यहोवा कहे रहा, ‘कल मई नाबोत अउ ओकरे पूतन क खून लखे रहेउँ। एह बरे मई अहाब क इहइ मइदान में सजा देब।’ यहोवा अइसा कहे रहा। एह बरे योराम क लहास क इहई मइदान में लोकाइ द्या जइसा यहोवा कहेस।”

27यहूदा क राजा अहज्याह इ लखेस, एह बरे उ भाग निकरा। उ बारी क भवन क रास्ते स होइके भागा। येहू ओकर पाछा किहस। येहू कहेस, “अहज्याह क भी ओकरे रथे में मार डावा।”

एह बरे येहू क लोग यिबलाम क लगे गूर क जाइ वाली सड़क पड़ अहज्याह पड़ प्रहार किहस। अहज्याह मगिद्दो तलक भागा, किन्तु हुवों उ मर गवा। 28अहज्याह क सेवक अहज्याह क लहास क रथे में यरूसलेम लइ गएन। उ पचे अहज्याह क, ओकरी कब्र में ओकरे पुरखन क संग दाऊद नगर में दफनाएन।

29अहज्याह इस्त्राएल पड़ योराम क राजकाल क गियारहवें बरिस में यहूदा क राजा बना रहा।

### ईज़ेबेल क भयंकर मउत

30येहू यिज़्रैल गवा अउर ईज़ेबेल क इ खबर मिली। उ अपने क सजाएस अउर अपने बानन क बाँधेस। तब उ खिड़की क सहारे खड़ी भइ अउर बाहेर क लखइ लाग। 31येहू नगर में प्रवेस किहस। ईज़ेबेल कहेस, “जिम्नी जउन आपन ही सुआमी क मार डाएस, का तू सात्ति में आवा ह?”

32येहू ऊपर खिड़की कइँती लखेस। उ कहेस, “मोरी कइँती कउन अहइ? कउन?”

दुइ या तीन खोजन खिड़की स येहू क लखेन, 33येहू ओनसे कहेस, “ईज़ेबेल क खाले लोकावा।”

तब खोजन ईज़ेबेल क खाले लोकाएन। ईज़ेबेल क तनिक खून देवार अउर घोड़न पड़ छिटक गवा। घोड़न ईज़ेबेल क तने क कुचरि डाएस। 34येहू महल में घुसा अउर

उ खाएस अउर पिएस। तब उ कहेस, “अब इ सरापित मेहरारू क बारे में इ करा। ओका दफनाइ द्या काहेकि उ राजा क बिटिया अहइ।”

35कछू लोग जउन ईज़ेबेल क दफनाए गएन। रहेन ओकरे लहास क न पाइ सकेन। उ पचे सिरिफ ओकर खोपड़ी, ओकर गोड़ अउ ओकरे हाथन क हथेलियन पाइ सकेन। 36एह बरे उ पचे लोग लउटेन अउर उ पचे येहू स कहेन। तब येहू कहेस, “यहोवा अपने सेवक तिसबी एलिय्याह स इ सँदिसा देइ क कहे रहा। एलिय्याह कहे रहा: ‘यिज़्रैल क पहेँटा में ईज़ेबेल क लहासे क कूकुर खइहीं। 37ईज़ेबेल क लहास यिज़्रैल क पहेँटा में खेत क गोबर क तरह होइ। लोग ईज़ेबेल क लहास क पहिचान नाहीं पइहीं।’”

### येहू सोमरोन क प्रमुखन क लिखत ह

10 अहाब क सतर पूत सोमरोन में रहेन। येहू पत्र लिखेस अउर ओनका सोमरोन में यिज़्रैल क सासकन अउ प्रमुखन क पठएस। उ ओन लोगन क भी पत्र लिखेस जउन अहाब क पूतन क अभिभावक रहेन। पत्र में येहू लिखेस, 2-3“जइसे ही तू इ पत्र क पावा तू अपने सुआमी क पूतन में स सब स जियादा जोगग अउर उतिम मनई क चुना। तोहरे लगे रथ अउर घोड़न अहई अउर तू एक मजबूत नगर में रहत अहा। तोहरे लगे अस्त्र-सस्त्र भी अहई। जउने पूत क चुना ओका ओकरे बाप क सिहांसने पड़ बइठावा। तब अपने सुआमी क परिवार क बरे जुद्ध करा।”

4किन्तु यिज़्रैल क सासक अउर प्रमुख बहोत ससान रहेन। उ पचे कहेन, “दुइनउँ राजा (योराम अउर अहज्याह) येहू क रोक नाहीं सकेन। एह बरे हम भी ओका रोक नाहीं सकित।”

5अहाब क महल क प्रबन्धक, नगर प्रसासक, प्रमुख वरिष्ठ-जन अउर अहाब क बच्चन क अभिभावकन येहू क लगे एक सँदिसा पठएन। “हम आप क सेवक अही। हम उ सब करब जउन आप कहिहीं। हम कउनो मनई क राजा नाहीं बनाउब। उहइ करई जउन आप ठीक समुझत हीं।”

### सोमरोन क प्रमुख अहाब क

#### बच्चन क मार डावत हीं

6तब येहू एक दूसर पत्र एन प्रमुखन क लिखेस। येहू कहेस, “जदि तू मोर समर्थन करत अहा अउर मोर आदेस मानत अहा तउ अहाब क पूतन क मूँड़ काट डावा अउर इहइ समइ कल यिज़्रैल में मोरे लगे ओनका लइ आवा।”

अहाब क सतर पूत रहेन। उ पचे ओन प्रमुखन क लगे रहेन जउन ओनकर सिखलाई देत करत रहेन। 7जब नगर क प्रमुख लोग पत्र पाइ गएन तब उ पचे राजा क पूतन क लिहन अउर सबहिं सतर पूतन क मार डाएन। तब प्रमुखन राजपूतन क मूँड़ टोकरियन में धरेन। उ पचे टोकरियन क यिज़्रैल में येहू क लगे पठइ दिहन। 8सँदिसवाहक येहू क लगे आएन अउर ओहसे कहेन, “उ पचे राजपूतन क मूँड़ लइके आए अहई।”

तब येहू कहेस, “नगर दुआर पड़, भिंसारे तलक ओन मूँइन क दुइ टेस बनाइके रखा।”

9 भिंसारे येहू बाहेर निकरा अउर लोगन क समन्वा खड़ा भवा। उ लोगन स कहेस, “तू निरपराध अहा इ मई अउर जउन आपन सुआमी क विरूद्ध योजना बनावा। अउर ओका मार डावा मुला अहाब क एन सब पूतन क कउन मारेस? 10 तू पचन्क समुझइ चाही कि यहोवा जउन कछू कहत ह उ घटित होइ अउर यहोवा एलिय्याह क उपयोग अहाब क परिवार क बरे एन बातन क कहइ बरे किहे रहा। अब यहोवा उ कइ दिहस जेनके बरे उ कहे रहा कि “मई करब।”

11 इस तरह येहू यिज्रैल में रहइवाले अहाब क पूरे परिवार क मार डाएस। येहू सबहिं महत्वपूर्ण मनइयन, जिगरी दोस्तन अउर याजकन क मार डाएस। उ अहाब क लोगन में स एक भी मनई क जिअत नाही छोड़ेस।

### येहू अहज्याह क सम्बन्धियन क मार डावत ह

12 येहू यिज्रैल स चला अउर सोमरोन पहुँचा। राहे में येहू “गड़रियन क डेरा” नाउँ क जगह पड़ रूका। जहाँ गड़रियन भेड़िन क ऊन कतरत रहेन। 13 येहू यहूदा क राजा अहज्याह क सम्बन्धिया स मिला। अउर ओनसे पूछेस, “तू पचे कउन अहा?”

उ पचे जवाब दिहेन, “हम लोग यहूदा क राजा अहज्याह क रिस्तेदार अही। हम लोग हिआँ राजा क बच्चन अउर राजमाता रानी क गदेलन स मिलइ आए अही।”

14 तब येहू अपने लोगन स कहेस, “एनका जिअत धइ ल्या।”

येहू क लोग अहज्याह क रिस्तेदारन क जिअत धइ लिहन। उ पचे बयालीस लोग रहेन। येहू ओनका बेथ-एकद क लगे कुआँ पड़ मार डाएस। येहू कउनो मनई क जिअत नाही छोड़ेस।

### येहू यहोनादाब स मिलत ह

15 येहू जब उ ठउर स चला तउ रेकाब क पूत यहोनादाब स भेंटा। यहोनादाब येहू स मिलइ आवत रहा येहू यहोनादाब क सुआगत क सुआगत किहेस अउर ओहसे पूछेस, “का तू मोरे ओतने बिस्सासी मीत अहा जेतना मई तोहार हउँ?”

यहोनादाब जवाब दिहस, “हाँ, मई तोहार बिस्सासी मीत हउँ।”

येहू कहेस, “जदि तू अहा तउ, तू आपन हाथ मोका द्या।”

तब येहू बाहेर निहुरा अउर उ यहोनादाब क अपने रथे में हीचं लिहेस।

16 येहू कहेस, “मोर संग आवा। तू लखब्या कि यहोवा बरे मोर भावना केतनी प्रबल अहइँ।”

इ तरह यहोनादाब येहू क रथे में बइठा। 17 येहू सोमरोन में आवा अउर अहाब क उ सारे परिवार क मार डाएस जउन जिअत रहा। येहू ओन सबहिं क मार डाएस। येहू सबइ काम किहेस जेनका यहोवा एलिय्याह क भविस्सबाणी में कहे रहा।

### येहू बाल क उपासकन क बोलाबत ह

18 तब येहू सबहिं लोगन क एक संग एकदटा किहस। येहू ओनसे कहेस, “अहाब बाल क सेवा बहोत कम किहस। मुला येहू बाल क बहोत जियादा सेवा करी। 19 अब बाल क सबहिं याजकन अउर नबियन अउर ओन सबहिं लोगन क एक संग बोलावा जउन बाल क उपासना करत हीं। कउनो मनई क इ सभा में गैर हाजिर न रहइ द्या। मई बाल क बहोत बड़की बलि चढ़ावइ जात अहउँ। मई उ कउनो भी मनई क मार डाउब जउन एहमाँ हाजिर नाही होइ।”

किन्तु येहू बाल क उपासना करइ वाले लोगन क तबाह करइ बरे गुमराह करत रहेन। 20 येहू कहेस, “बाल क बरे एक धर्मसभा करा” अउर याजक लोग धर्मसभा क घोसणा कइ दिहन। 21 तब येहू पूरे इस्राएल देस में सँदिसा पठएस। बाल क सबहिं उपासक आएन। कउनो भी मनई अइसा नाही रहा जउन घरे पड़ रहि गवा होइ। बाल क उपासक बाल क मन्दिर में आएन। मन्दिर लोगन स भर गवा।

22 येहू लबादा धरइवाले मनई स कहेस, “बाल क सबहिं उपासकन क बरे लबादा लिआवा।” एह बरे उ मनई बाल पूजकन बरे लबादन लिआवा।

23 तब येहू अउर रेकाब पूत यहोनादाब बाल क मन्दिर क भीतर गएन। येहू बाल क उपासकन स कहेस, “अपने चारिहुँ कइँती लख ल्या अउर इ निहचइ कइ ल्या कि तोहरे संग कउनो यहोवा क सेवक तउ नाही अहइ। इ निहचइ कइ ल्या कि केवल बालपूजक लोग ही अहइँ।”

24 बाल-पूजक बाल क मन्दिर में बलि अउर होमबलि चढ़ावइ गएन।

मुला बाहेर येहू अस्सी मनइयन क प्रतिच्छा में तइयार रखे रहा। येहू कहेस, “मई तोहका कछू लोग देइ वाल हउँ ओनमें स कउनो मनई क बचिके निकरइ न द्या। जदि कउनो मनई कउनो मनई क बचि निकरइ देइ तउ ओकर भुगतान ओका अपनी जिन्गी स करइ होइ।”

25 येहू जइसेन ही बलि अउर होमबलि चढ़ाउब पूरा किहस तइसेन ही उ रच्छकन अउर अधिकारियन स कहेस, “भीतर जा अउर बाल-पूजकन क मार डावा। पूजाघर स कउन जिअत मनई क बाहेर न आवइ द्या।”

एह बरे अधिकारियन अपनी पतरी तरवारन क उपयोग किहस अउर बाल-पूजकन क मार डाएन। रच्छकन अउर अधिकारियन बाल-पूजकन क लहासन क बाहेर लोकाइ दिहन तब रच्छक अउर अधिकारियन बाल क पूजाघरे ज भीतरी कमरे में गएन।

26 उ पचे बाल क पूजाघर क स्मृति-पासाण क बाहर लइ आएन अउर पूजाघरे क जराइ दिहन। 27 तब उ पचे बाल क स्मृति पासाण क तहस-नहस कइ दिहन। उ पचे बाल क पूजाघर क भी मटियामेट कइ दिहन। उ पचे बाल क पूजाघर क एक सौचालय में बदल दिहन। आजु भी ओकर उपयोग सौचालय क बरे होत ह।

28 इ तरह येहू इस्राएल में बाल-पूजा क खतम कइ दिहस। 29 मुला येहू, नबात क पूत यारोबाम क ओन पापन क करइ स पूरी तरह स नाही रोक सका, जउन इस्राएल स

पाप कराए रहा। येहू दान अउर बेतेल में सोने क बछवन क तबाह नहीं किहिस।

### इस्त्राएल पइ येहू क हुकूमत

30यहोवा येहू स कहेस, “तू बहोत नीक किहा ह। तू उ काम किहा ह जेका मई अच्छा बताएउँ ह। तू अहाब क परिवार क उ तरह बर्बाद किहा ह जइसा तोहसे मई ओका बर्बाद करइ चाहत रहा। एह बरे तोहार सन्तान इस्त्राएल पइ चार पीढ़ी तलक हुकूमत करिहीं।”

31मुला येहू पूरे हिरदइ स यहोवा क नेमन क पालन करइ में सावधान नाहीं रहा। येहू यारोबाम क ओन पापन क करब बन्द नाहीं किहिस जउन इस्त्राएल स पाप कराए रहेन।

### हजाएल इस्त्राएल क हरावत ह

32उ समइ यहोवा ने इस्त्राएल क कछू हिस्सन पइ ओनकर दुस्मन का कब्जा कइ लेइ दिहिस। अराम क राजा हजाएल इस्त्राएलियन क हर एक सीमा पइ हराएस। 33हजाएल यरदन नदी क पूरब क गिलाद प्रदेस क, गाद, रूबेन अउ मनस्से क परिवार समूह क प्रदेसन सहित जीत लिहिस। हजाएल असेएर स लइके अर्नोन घाटी क सहारे गिलाद अउ साशान तलक क सारी भुईया जीत लिहिस।

### येहू क मउत

34उ सबइ बड़के कार्य, जउन येहू किहिस, “इस्त्राएल क राजा लोग क इतिहास” क किताबे में लिखे गए अहई। 35येहू मरा अउर ओका ओकरे पुरखन क संग दफनाइ दीन्ह गवा। लोग येहू क सोमरोन में दफनाएन। ओकरे पाछे येहू क पूत यहोआहाज इस्त्राएल क नवा राजा भवा। 36येहू सोमरोन में इस्त्राएल पइ अट्ठाईस बरिस तलक हुकूमत किहिस।

### अतल्याह यहूदा क सबहि राजपूतन क बर्बाद कइ देत ह

11 अहज्याह क महतारी अतल्याह लखेस कि ओकर पूत मरि गवा। तब उ उठी अउर उ राजा क पूरे परिवार क मार डाएस।

2यहोसेबा राजा योराम क बिटिया अउर अहज्याह क बहिन रही। योआस राजा क पूतन में स एक रहा। यहोसेबा योआस क तब छुपाइ लिहिस जब राजा क बाकी पूतन मारे जाइ रहेन। यहोसेबा योआस क छुपाइ दिहिस। उ योआस अउर ओकर धायी क अपने सोना क कमरा में छुपाइ दिहिस। इ तरह यहोसेबा अउ धायी योआस क अतल्याह स छुपाइ लिहिस। इ तरह योआस मारा नाहीं गवा।

3तब योआस अउ यहोसेबा यहोवा क मन्दिर में जाइ छुपेन। योआस हुवाँ छः बरिस तलक छुपा रहा उ छः बरिस अतल्याह यहूदा पइ हुकूमत किहिस।

4सतएँ बरिस प्रमुख याजक यहोयादा करीतन क सेनापतियन क अउ रच्छकन क बोलाएस अउर उ पचे यहोवा क मन्दिर में ओसे भेंटन आएन। तब यहोयादा ओनके संग एक

तु वाचा किहिस। मन्दिर में यहोयादा ओनका प्रतिग्या करइ क मजबूर किहिस। तब उ राजा क पूत योआस क ओनका देखाएस।

5तब यहोयादा ओनका आदेस दिहिस। उ कहेस, “तोहका इ करइ होइ। तोहमाँ स एक तिहाई सबित क दिन में तोहार काम करत ह ओका राजा क महल क रच्छा क जिम्मेवारी दीन्ह जाई। 6दूसर एक तिहाई क सूर- दुआर पइ रहइ क होइ अउर बचे एक तिहाई क रच्छकन क पाछे, दुआर पइ रहब होइ। इ तरह तू लोग इमारत क चारिहुँ कइँती नज़र रख सकब। 7तोहमाँ स दुइ तिहाइ जउन सबित क दिन काम नाहीं करत ह, ओका राजा योआस अउर यहोवा क मन्दिर क रच्छा करइ क होइ। 8जब कहुँ उ जाइ तोहका पचन्क राजा योआस क संग रहइ चाही। पूरे दल क ओका घेरे रहइ चाही। हर एक रच्छक क अपने अस्त्र-सस्त्र अपने हाथे में रखइ चाहीं, अउर तू लोगन क उ कउनो भी मनई क मार डावइ चाही जउन तोहरे पचन्क बहोत जियादा निचके पहाँचइ।

9सेनापतियन याजक यहोयादा क दीन्ह गए सबहि आदेसन क पालन किहिस। हर एक सेनापति अपने फउजियन क लिहिस, कछू जउन उस हफता काम पइ रहेन अउर कछू जउन काम पइ नाहीं रहेन, अउर ओन सबइ क याजक यहोयादा क लगे लइ गएन 10अउर याजक सेनापतियन क भालन अउ ढास दिहेन। इ पचे उ सब भालन अउ ढास दिहेन जेनका दाऊद यहोवा क मन्दिर में धरे रहा। 11इ सबइ रच्छक अपने हाथन में अपने सस्त्र लिहे मन्दिर क दक्खिन कोने स लइके उत्तर कोने तलक खड़े रहेन। उ पचे वेदी अउर मन्दिर क चारिहुँ कइँती खड़े रहेन, ताकि उ पचे राजा क रच्छा सदा कइ सकेन।

12इ सबइ मनई योआस क बाहेर लइ आएन। उ पचे योआस क मुँड़े पइ मुकुट पहिराएन अउर परमेस्सर अउ राजा क बीच क वाचा क ओका दिहेन। तब उ पचे ओकर अभिसेक किहेन अउर ओका नवा राजा बनाएन। उ पचे तालियन बजाएन अउर उद्घोस किहेन, “राजा दीर्घायु होइ।”

13रानी अतल्याह क रच्छकन अउर लोगन क चीखन सुनेन। एह बरे उ यहोवा क मन्दिर में लोगन क लगे गइ। 14अतल्याह उ खम्भा क सहारे राजा क लखेस जहाँ राजा अक्सर खड़े होत रहेन। उ प्रमुखन अउ लोगन क राजा क बरे तुरही बजावत भए भी लखेन। उ लखेस कि सबहि लोग बहोत खुस रहेन। उ तुरही क बजावत भए सुनेस अउर उ आपन ओढ़ना इ परगठ करइ बरे फार डाएस कि ओका बड़ी घबराहट अहइ। तब अतल्याह चिल्लाइ उठी, “सड्यन्त्र! सड्यन्त्र!”

15याजक यहोयादा फउजियन क व्यवस्था क अधिकारी सेनापतियन क हुकूम दिहिस। यहोयादा ओनसे कहेस, “अतल्याह क आपन फउजियन क पंक्तिन में स होइके मन्दिर क छेत्र स बाहेर लइ जा अउर जउन भी ओकर पाछा करइ मार डावा।”

यहोयादा नाहीं चाहत रहा कि उ भी यहोवा क मन्दिर में मरे।

16उ पचे ओकरे बरे रास्ता बनाएस अउर ओन दरवाजन स होइके महल स बाहर निकारा जउने जगह स घोड़ा निकरत ह, अउर ओका मार डाएस।

17तब यहोयादा यहोवा, राजा अउ लोगन क बीच एक तु सन्धि कराएस। इ वाचा स इ पता चलत रहा कि राजा अउ लोग यहोवा क अपने ही अहई। यहोयादा राजा अउ लोगन क बीच भी एक तु वाचा कराएस।

18तब सबहिं लोग बाल क पूजागृह क गएन। लोग बाल क मूर्ति अउ ओकर बेदियन क बर्बाद कइ दिहन। उ पचे ओनकर बहोत स टूकन कइ डाएन। लोग बाल क याजक मत्तन क भी वेदी क समन्वा मार डाएन।

तब याजक यहोयादा कछू लोगन क यहोवा क मन्दिर क देखभाल बरे निगराकार क रूप में रखा। 19यहोयादा सेनापतियन, बिसेस फउजियन अउर आम लोगन क लिहेस, अउर उ सबइ राजा योआस क यहोवा क मन्दिर स महल में लइ गएन। उ पचे रच्छकन क दुआर होइके स राजा क महल तलक गएन। तब राजा योआस राजसिंहासने पइ बइठा। 20सबहिं लोग खुस रहेन। नगर सान्त रहा। रानी अतल्याह, राजा क महल क लगे तरवार क घाट उतार दीन्ह गइ रही।

21जब योआस राजा भवा, उ सात बरिस क रहा।

### योआस आपन हुकूमत सुरू करत ह

12 योआस इस्त्राएल में येहू क राजकाल क सताएँ बरिस में हुकूमत करब सुरू किहस। योआस चालीस बरिस तलक यरूसलेम में हुकूमत किहस। योआस क महतारी सिब्या बर्सेवा क रही। 2योआस उ सबहिं कार्य किहस जेनका यहोवा नीक कहे रहा। योआस पूरी जिन्नगी यहोवा क आग्या क पालन किहस। उ उ सबइ कार्य किहस जेनकर सिच्छा याजक यहोयादा ओका दिहे रहा। 3मुला उ उच्च ठउरन क बर्बाद नाहीं किहस। लोग तब तलक भी ओन पूजा क ठउरन पइ बलि भेंट करतेन अउ सुगन्धि बारत रहेन।

### योआस मन्दिर क मरम्मत क आवेस दिहस

4-5योआस याजकन स कहेस, “यहोवा क मन्दिर में बहोत धन अहइ। लोग मन्दिर में चिजियन दिहे अहई। लोग गणना क समइ मन्दिर क कर दिहेन ह अउर लोगन आपन इच्छा स धन दिहे ह। याजकन, आप लोग उ धन क लइ लेई अउर यहोवा क मन्दिर क मरम्मत करवाइ देई।”

6मुला याजक लोग मरम्मत नाहीं किहन। योआस क राजकाल क तेईसवें बरिस में भी याजक लोग तब तलक मन्दिर क मरम्मत नाहीं किहे रहेन। 7एह बरे योआस याजक यहोयादा अउ दूसर याजकन क बोलाएस। योआस यहोयादा अउ दूसर याजकन स पूछेस, “आप मन्दिर क मरम्मत काहे नाहीं किहन? आप ओन लोगन स धन लेब बन्द करई जेनकर आप सेवा करत हीं। उ धने क उपयोग में लिआउब बंद करई। उ धने क उपयोग मन्दिर क मरम्मत में होइ चाही।”

8याजक लोग यहोवा स धन न लेब स्वीकार किहन। मुला उ पचे मन्दिर क मरम्मत न करइ क निहचइ किहेन। 9एह बरे याजक यहोयादा स एक तु सन्दूख लिहस अउ ओकरे ऊपरी हीसा में एक छेद कइ दिहस। तब यहोयादा सन्दूख क बेदी क दक्खिन कइँती रख दिहस। इ सन्दूख उ दरवाजे क लगे रहा जेहसे लोग यहोवा क मन्दिर में आवत रहेन। कछू याजक मन्दिर क दुआर- पथे क रच्छा करत रहेन। उ सबइ याजक उ धने क जेका लोग यहोवा क देत रहेन, लइ बते रहेन अउर उ सन्दूख में डाइ देत रहेन। जब लोग मन्दिर क जात रहेन तब उ पचे उ सन्दूख में सिक्कन डावत रहेन।

10जब भी राजा क सचिव अउ महायाजक इ जानतेन कि मन्दिर में रखे सन्दूख में बहोत धन अहइ तउ उ पचे अउतेन अउर सन्दूख स धन क निकार लेतेन। उ पचे धन क थइलन में रखतेन अउर ओका गिन लेत रहेन। 11तब उ पचे ओन मजदूरन क भुगतान करतेन जउन यहोवा क मन्दिर में काम करत रहेन। उ पचे यहोवा क मन्दिर में काम करइवालन बढइयन अउ दूसर कारीगरन क भुगतान करत रहेन। 12उ पचे धन क उपयोग पाथर क कामगारन अउ पाथर तरासन क भुगतान करइ में करत रहेन अउर उ पचे उ धने क उपयोग लकड़ी, काटे पाथर, अउर यहोवा क मन्दिर क मरम्मत क बरे दूसर चिजियन क बेसहइ में करत रहेन।

13-14लोग यहोवा क मन्दिर क बरे धन दिहन। किन्तु याजक उ धने क उपयोग चाँदी क बर्तन, बत्ती- झाड़नी, चिलमची, तुरही या कउनो भी सोना- चाँदी क तस्तरियन क बनाबइ में नाहीं कइ सकेन। उ धन मजदूरन क भुगतान करइ में लगा अउर ओन मजदूरन यहोवा क मन्दिर क मरम्मत किहन। 15कउनो सारे धन क हिसाब नाहीं किहस या कउनो कार्यकर्ता क इ बतावइ बरे मजबूर नाहीं कीन्ह गवा कि धने क का भवा? काहेकि ओन कार्यकर्तन पइ बिस्पास कीन्ह जाइ सकत रहा।

16लोग उ समइ धन दिहस जब उ पचे दोखबलि या पापबलि चढाएन। किन्तु उ धने क उपयोग मजदूर क भुगतान क बरे नाहीं कीन्ह गवा। उ धन याजकन क रहा।

### योआस हजाएल स यरूसलेम क रच्छा करत ह

17हजाएल अराम क राजा रहा। हजाएल गत नगर क खिलाफ जुद्ध करइ गवा। हजाएल गत क हराएस। तब उ यरूसलेम क खिलाफ जुद्ध करइ जाइ क योजना बनाएस।

18यहोसापात, यहोराम अउ अहज्याह यहूदा क राजा रह चुके रहेन। उ पचे योआस क पुरखा रहेन। उ पचे यहोवा क बहोत स चिजियन भेंट किहे रहेन। उ सबइ चिजियन मन्दिर में रखी रहिन। योआस भी बहोत स चिजियन यहोवा क भेंट किहे रहा। योआस ओन सबहिं बिसेस चिजियन अउ मन्दिर अउ अपने महल में रखे भए सारे सोना क लिहस। तब योआस ओन सबहिं कीमती चिजियन क अराम क राजा हजाएल क लगे पठाएस। इहइ स हजाएल अपनी फउज क यरूसलेम स हटाइ लिहस।



**योआस क मउत**

19योआस जउन बड़के कारज किहस उ सबइ सबहिं “यहूदा क राजा लोगन क इतिहास” क किताबे में लिखे गए अहईं।

20योआस क अधिकारी लोग ओकरे खिलाफ योजना बनाएस। उ पचे योआस क सिल्ला तलक जाइ वाली सड़किया पर स्थित मिल्लो क घरे पइ मार डाएस। 21सिमात क पूत योजाकर अउ सोमेर क पूत यहोजाबाद योआस क अधिकारी रहेन। ओन मनइयन योआस क मार डाएन। लोग दाऊद नगर में योआस क ओकरे पुरखन क संग दफनाएन। योआस क पूत अमस्याह ओकरे पाछे नवा राजा बना।

**यहोआहाज अपनी हुकूमत सुरू करत ह**

**13** येहू क पूत यहोआहाज सोमरोन में इस्त्राएल क राजा बना। इ अहज्याह क पूत योआस क यहूदा में राजकाल क तेईसवें बरिस में भवा। राजा बनइ क पाछे यहोआहाज सत्रह बरिस सोमरोन में राज किहस।

2यहोआहाज उ सबइ कारज किहस जेनका यहोवा बुरा बताए रहा। यहोआहाज नबात क पूत यारोबाम क पापन क अनुसरण किहस जउन इस्त्राएल स पाप कराएस। यहोआहाज ओन कामन क करब बंद नाहीं किहस। अतब यहोवा इस्त्राएल पइ बहोत कोहाइ गवा। यहोवा इस्त्राएल क अराम क राजा हजाएल अउ ओका पूत बेन्हदद क अधीन कइके लम्बे समइ तलक सजा दिहस।

**यहोवा इस्त्राएल क लोगन पइ कृपा किहस**

4तब यहोआहाज यहोवा स मदद बरे पराथना किहस अउर यहोवा ओकर पराथना सुनेस। यहोवा इस्त्राएल क लोगन क कस्ट अउ अराम क राजा क उत्पीड़न लखे रहा।

5एह बरे यहोवा एक मनई क इस्त्राएल क रच्छा बरे पठाएस। इस्त्राएली अरामियन स अजाद होइ गएन। एह बरे, इस्त्राएली, पहले क तरह अपने घरे लउट गएन।

6मुला इस्त्राएलियन फुन भी, ओन यारोबाम क परिवार क पापन क करव बंद नाहीं किहस। यारोबाम इस्त्राएल स पाप करवाएस, अउर इस्त्राएली निरंतर पाप करम करत रहेन। उ पचे असेरा क खंभन क भी सोमरोन में धरेन।

7अराम क राजा यहोआहाज क फउज क हराइ दिहस। अराम क राजा जियादा हीसा क लोगन क नस्ट कइ दिहस। उ सिरिफ पचास घुड़सवार, दस रथ, अउर दस हजार पैदल फउजी छोड़ेस। यहोआहाज क फउजी दायं चलावत समइ हवा स उड़ाए गए भूसे क तरह रहेन।

8सबहिं बड़े कारज जउन यहोआहाज कहेस, “इस्त्राएल क राजा लोगन क इतिहास” क किताबे में लिखे अहईं। 9यहोआहाज मरा अउर अपने पुरखन क संग दफनावा गवा। लोग यहोआहाज क सोमरोन में दफनाएन। यहोआहाज क पूत यहोआस ओकरे पाछे नवा राजा भवा।

**इस्त्राएल पइ यहोआस क हुकूमत**

10यहोआहाज क पूत यहोआस सोमरोन में इस्त्राएल क राजा भवा। इ योआस क यहूदा में राजकाल क सैतीसेवें

बरिस में भवा। यहोआस इस्त्राएल पइ सोलह बरिस तलक राज किहस। 11इस्त्राएल क राजा यहोआस उ सबइ कारज किहस जेनका यहोवा बुरा बताए रहा। उ नबात क पूत यारोबाम क पापन क बंद नाहीं किहस जउन इस्त्राएल स पाप कराएस। यहोआस ओन पापन क करत रहा। 12सबहिं बड़के कारज जउन यहोआस किहस अउर यहूदा क राजा अहज्याह क खिलाफ उ जउन जुद्ध किहस उ सबइ “इस्त्राएल क राजा लोगन क इतिहास” क किताबे में लिखे अहईं। 13यहोआस मरा अउर अपने पुरखन क संग दफनावा गवा। यारोबाम नवा राजा बना अउर यहोआस क राजा सिहांसने पइ बइठा। यहोआस सोमरोन में इस्त्राएल क राजा लोगन क संग सफनावा गवा।

**यहोआस एलीसा स भेट करत ह**

14एलीसा बीमार पड़ा। पाछे एलीसा बेरामी स मर गवा। इस्त्राएल क राजा यहोआस एलीसा भेंटइ गवा। यहोआस एलीसा बरे रोएस। यहोआस कहेस, “मोर बाप। मोर बाप! का इ इस्त्राएल क रथन अउर घोड़न क बरे समइ अहइ?”

15एलीसा यहोआस स कहेस, “एक ठु धनुस अउर कछू बाण ल्या।”

अतः बह धनुस-बाण ले आया। 16तब एलीसा इस्त्राएल क राजा स कहेस, “आपन हाथ धनुस पइ धरा।” तब एलीसा आपन हाथ राजा क हाथे पइ रखेस। 17एलीसा कहेस, “पूरब क खिड़की खोला।” यहोआस खिड़की खोलेस। तब एलीसा कहेस, “बाण चलावा।”

यहोआस बाण चलाइ दिहस। तब एलीसा कहेस, “इ यहोवा क बिजय क बाण अहइ। इ अराम पइ बिजय क बाण अहइ। तू अरामियन क अपेक में हरउब्या अउर तू ओनका नस्ट कइ देब्या।”

18एलीसा कहेस, “बाण ल्या।” योआस बाण लिहस। तब एलीसा इस्त्राएल क राजा स कहेस, “भुईया पइ प्रहार करा।”

योआस भुईया पइ दीन दाई प्रहार किहस। तब उ रूक गवा। 19परमेस्सर क जन योआस पइ कोहाइ गवा। एलीसा कहेस, “तोहका पाँच या छः दाई धरती पइ प्रहार करइ चाही रहा। तब तू अराम क ओका नस्ट करइ तलक हरउब्या। किन्तु अब तू अराम क सिरिफ तीन दाई हरउब्या।”

**एलीसा क कब्र पइ एक अद्भुत बात होत ह**

20एलीसा मरा अउर लोग ओका दफनाएन।

एक दाई बसन्त में मोआबी फउजियन क एक दल इस्त्राएल पई छापा मारेस। उ पचे जुद्ध में सामग्री लेइ आएन। 21कछू इस्त्राएली एक मरे मनई क दफनावत रहेन अउर उ पचे फउजियन क उ दल क लखेन। इस्त्राएलियन हाली में लहास क एलीसा क कब्र में फेंक दिहेन अउर उ पचे भाग खड़े भएन। जइसेन ही उ मरा मनई एलीसा क हाड़न क छुएस, मरा मनई जी उठा अउर अपने गोड़न पइ खड़ा होइ गवा।

### यहोआस एलीसा स भेट करत ह

22 यहोआहाज पूरे सासन काल में अराम क राजा हजाएल इस्त्राएल क परेसान किहस। 23 किन्तु यहोवा इस्त्राएलियन पइ दयालु रहा। यहोवा क दया आइ अउर उ इस्त्राएलियन कइँती भवा। काहे? काहेकि इब्राहीम, इसहाक अउर याकूब क संग अपनी वाचा क कारण, यहोवा इस्त्राएलियन क अबहिं नस्ट करइ बरे तइयार नाहीं रहा। उ अबहिं तलक ओनका अपने स दूर नाहीं फेंके रहा।

24 अराम क राजा हजाएल मरा अउर ओकरे पाछे बेन्हदद नवा राजा बना। 25 मरइ क पहले हजाएल योआस क पिता यहोआहाज क जुद्ध में कछू नगर लिहे रहा। किन्तु अब यहोआहाज हजाएल क पूत बेन्हदद स उ सबइ नगर वापस लइ लिहस। योआस बेन्हदद क तीन दाईं हराएस अउर इस्त्राएल क नगरन क वापस लिहस।

### अमस्याह यहूदा में आपन हुकूमत सुरू करत ह

14 योआस क पूत अमस्याह, इस्त्राएल क राजा यहोआहाज क पूत योआस क हुकूमत काल क दूसरे बरिस में यहूदा क राजा भवा। 2 अमस्याह जब हुकूमत करब सुरू किहस, उ पचीस बरिस क रहा। अमस्याह उनतीस बरिस तलक यरूसलेम में राज्ज किहस। अमस्याह क महतारी यहोअददान यरूसलेम क निवासी रही। 3 अमस्याह उ सबइ कारज किहेस जेनका यहोवा नीक बताए रहा। किन्तु उ आपन पुरखा दाऊद क तरह परमेस्सर क अनुसरण पूरी तरह स नाहीं किहस। अमस्याह उ सबइ सारे काम किहस जउन ओकर बाप योआस किहे रहेन। 4 उ उच्च ठउरन क नस्ट नाहीं किहस। लोग ओन पूजा क ठउरन पइ बलि देतेन अउर सुगन्धि बारत रहेन।

5 राज्ज पइ पूरा अधिकार करइ क पाछे अमस्याह ओन अधिकारियन क मार डाएस जउन ओकरे बाप क मारे रहेन। 6 मुला उ हतियारन क बच्चन क, “मूसा क व्यवस्था” क किताबे में लिखे नेमन क कारण नाहीं मारेस। यहोवा आपन इ आदेस मूसा क व्यवस्था में दिहे रहा: “महतारी- बाप बच्चन क जरिये कछू कीन्ह जाइ क कारण मारे नाहीं जाइ सकतेन अउर बच्चन अपने महतारी बाप क जरिये कछू कीन्ह जाइ क कारण मारे नाहीं जाइ सकतेन। कउनो मनई सिरिफ अपने ही बुरे कारज बरे मारा जाइ सकत ह।”

7 अमस्याह नून घाटी में दस हजार एदोमियन क मार डाएस। जुद्ध में अमस्याह सेला क जीतेस अउर ओकर नाउँ “योक्तेल” धरेस। उ ठउर आजु भी योक्तेल कहा जात ह।

### अमस्याह योआस क खिलाफ जुद्ध छेड़ि चाहत ह

8 अमस्याह इस्त्राएल क राजा येहू क पूत यहोआहाज अउर यहाआहाज क पूत योआस क लगे संदेसवाहक पठएस। अमस्याह क संदेस में कहा, “आवा, हम आपुस में जुद्ध करी। आमने सामने होइके एक दूसरे क मुकाबला करी।” 9 इस्त्राएल क राजा योआस यहूदा क राजा अमस्याह क उत्तर पठएस। योआस कहेस, “लबानोन क एक ठु कँटहरी

झाड़ी देवदारू बृच्छ क लगे एक संदेसा पठएस। संदेसा इ रहा, ‘अपनी बिटिया, मोरे पूत क संग बियाहे बरे द्या।’ मुला लबानोन क एक जंगली जनावर ओहर स निकरा अउर कँटहरी झाड़ी क कुचर गवा। 10 इ फुर अहइ कि तू एदोम क हराया ह। किन्तु तू एदोम पइ जीत क कारण घमण्डी होइ गवा अहा। अपनी प्रसिद्धि क आनंद उठावा अउर घरे पइ रहा। अपने बरे परेसानियन मत खड़ी करा। जदि तू अइसा करब्या तउ तू हार जाब्या अउर तू आपन संग यहूदा क भी हराउब्या।”

11 मुला अमस्याह योआस क चितवनी क नाहीं सुनेन। एह बरे इस्त्राएल क राजा योआस यहूदा क राजा अमस्याह क खिलाफ यहूदा क बेतसेमेस में लड़इ बरे गवा। 12 इस्त्राएल यहूदा क हराइ दिहस। यहूदा क हर एक मनई घरे पराइ गवा। 13 बेतसेमेस में इस्त्राएल क राजा योआस यहूदा क राजा अमस्याह क बन्दी बनाइ लिहस। अमस्याह योआस क पूत रहा। योआस अहज्या क पूत रहा। योआस अमस्याह क यरूसलेम लइ गवा। योआस एप्रैम दुआर स कोने क फाटक तलक लगभग छः सौ फुट यरूसलेम क देवार क गिरवाएस। 14 तब योआस सारा सोना- चाँदी अउर जउन भी बर्तन यहोवा क मन्दिर अउर राजमहल क खजाने में रहेन। ओन सब क लूट किहस। योआस कछू लोगन क बन्दी बनाइ लिहस। तब उ सोमरोन क वापस लउट गवा।

15 जउन सबहिं बड़के कारज योआस किहस, साथ ही साथ यहूदा क राजा अमस्याह क संग उ कइसे लड़ा, “इस्त्राएल क राजा लोगन क इतिहास” क किताबे में लिखे गए अहइँ। 16 योआस मरा अउर अपने पुरखन क संग दफनावा गवा। योआस सोमरोन में इस्त्राएल क राजा लोगन क संग दफनावा गवा। योआस क पूत यारोबाम ओकरे पाछे नवा राजा भवा।

### अमस्याह क मउत

17 यहूदा क राजा योआस क पूत अमस्याह इस्त्राएल क राजा यहोआहाज क पूत योआस क मउत क पाछे पन्द्रह बरिस तलक जिआ। 18 अमस्याह जउन कारज किहस उ सबइ “यहूदा क राजा लोगन क इतिहास” क किताबे में लिखे गएन अहइँ। 19 लोग यरूसलेम में अमस्याह क खिलाफ एक ठु योजना बनाएन। अमस्याह लाकीस क पराइ निकरा। मुला लोग अमस्याह क खिलाफ लाकीस क अपने मनई पठएस अउर ओन लोग लाकीस में अमस्याह क मार डाएस। 20 लोग घोड़न पइ अमस्याह क ल्हास क वापस लइ आएन। अमस्याह दाऊद नगर में अपने पुरखन क संग यरूसलेम में दफनावा गवा।

### अजर्याह यहूदा पइ आपनी हुकूमत सुरू करत ह

21 तब यहूदा क सबहिं लोग अजर्याह क ओकरे बाप अमस्याह क जगह पइ नवा राजा बनाएन। अजर्याह सोलह बरिस क रहा। 22 इ तरह अमस्याह मरा अउर अपने पुरखन क संग दफनावा गवा। तब अजर्याह एलत क यहूदा बरे फुन पाएस अउर ओका फुन बनाएस।

### यारोबाम दूसरा इस्राएल पइ हुकूमत सुरू करत ह

23इस्राएल क राजा योआस क पूत यारोबाम सोमरोन में यहूदा क राजा योआस क पूत अमस्याह क राजकाल क पन्द्रहवें बरिस में हुकूमत करब सुरू किहस। 24यारोबाम उ सबइ कारज किहेस जेनका यहोवा बुरा बताएस। यारोबाम उ नबात क पूत यारोबाम क पापन क करब बंद नाहीं किहस, जउन इस्राएल क पाप करइ बरे मजबूर किहस। 25यारोबाम उ भुइँया क, जउन लेवी हमात स अराबा क सागर तलक जात रही, वापस लिहस। इ वइसा ही भवा जइसा इस्राएल क यहोवा परमेस्सर अपने सेवक, अमितै क पूत योना स कहे रहा। जउन कि गथेपेर क नबी रहा। 26यहोवा लखेस कि सबहिं इस्राएली, चाहे उ पचे अजाद होईं या दास, बहोत स परेसानियन में अहईं। कउनो मनई अइसा नाहीं बचा जउन इस्राएल क मदद कइ सकत रहा। 27यहोवा इ नाहीं काहे रहा कि उ संसार स इस्राएल क नाउँ उठाइ लेइ। एह बरे यहोवा योआस क पूत यारोबाम क उपयोग इस्राएल क लोगन क रच्छा बरे किहेस।

28यारोबाम जउन बड़के कारज किहस उ सबइ “इस्राएल क राजा लोगन क इतिहास” क किताबे में लिखे अहईं। ओहमें इस्राएल क बरे दमिस्क अउर हमात क यारोबाम जरिये वापस जीत लेइ क कथा सामिल अहइ। (पहिले इ सबइ नगर यहूदा क आधिपत्य में रहेन।) 29यारोबाम मरा अउर इस्राएल क राजा लोगन, अपने पुरखन क संग दफनावा गवा। यारोबाम क पूत जकर्याह ओकरे पाछे नवा राजा भवा।

### यहूदा पइ अजर्याह क हुकूमत

15 यहूदा क राजा अमस्याह क पूत अजर्याह इस्राएल क राजा यारोबाम क राजकाल क सत्ताइसवें बरिस में राजा बना। 2हुकूमत करब सुरू करइ क समइ अजर्याह सोलह बरिस क रहा। अजर्याह यरूसलेम में बावन बरिस तलक हुकूमत किहस। अजर्याह क महतारी यकोल्याह यरूसलेम स रही। 3अजर्याह ठीक अपने बाप अमस्याह क तरह उ सबइ काम किहस जेनका यहोवा अच्छा बताए रहा। अजर्याह ओन सबहिं कामन क अनुसरण किहस जेनका ओकर बाप अमस्याह किहे रहा। 4मुला उ ऊँच ठउरन क नस्ट नाहीं किहस। लोगन हुआँ बलियन चढ़ावत रहे अउर धूप जरावत रहे।

5यहोवा राजा अजर्याह क नोस्कान करइवाले कोढ़ रोग क रोगी बनाइ दिहस। उ मरइ क दिन तलक इहइ रोग स पीड़ित रहा। अजर्याह एक अलग महल में रहत रहा। राजा क पूत योताम राजमहल क देखभाल अउर जनता क संग निआत करत रहा।

6अजर्याह जउन काम किहस उ सबइ, “यहूदा क राजा लोग क इतिहास” क किताबे में लिखे अहईं। 7अजर्याह मरा अउर अपने पुरखन क संग दाऊद क नगर में दफनावा गवा। अजर्याह क पूत योताम ओकरे पाछे नवा राजा भवा।

### इस्राएल पइ जकर्याह क अल्पकालीन सासन

8यारोबाम क पूत जकर्याह सोमरोन में इस्राएल पइ छः महीने तलक हुकूमत किहस। जकर्याह यहूदा क राजा अजर्याह क राजकाल क अड़तीसवें बरिस में राजा भवा। 9जकर्याह उ सबइ कारज किहेस जेनका यहोवा बुरा कहे रहा। उ उ सबइ ही कारज किहेस जउन ओकरे पुरखन किहे रहेन। उ नबात क पूत यारोबाम क पापन क करब बंद नाहीं किहेस जउन इस्राएल क पाप करइ बरे मजबूर किहस।

10याबेस क पूत सल्लूम जकर्याह खिलाफ योजना बनाएस अउर लोगन क बीच में ओह पइ हमला कइके ओका इल्लैम में मार डाएस। फुन सल्लूम ओकरे जगह पइ नवा राजा भवा। 11जकर्याह जउन दूसर कारज किहेस उ सबइ “इस्राएल क राजा लोगन क इतिहास” क किताबे में लिखे अहईं। 12इ तरह यहोवा क कथन फुरइ सिद्ध भवा। यहोवा येहू स कहे रहा कि ओकरे संतानन क चार पीढ़ियन इस्राएल पइ राजा क तरह राज करब्या।

### सल्लूम क इस्राएल पइ अल्पकालीन सासन

13याबेस क पूत सल्लूम यहूदा क राजा उज्जियाह क राजकाल क उनतालीसवें बरिस में इस्राएल क राजा बना। सल्लूम सोमरोन में एक महीने तलक सासन किहस।

14गादी क पूत मनहेम तिस्रा स सोमरोन आइ पहोंचा। मनहेम याबेस क पूत सल्लूम क मार डाएस। तब ओकरे पाछे मनहेम नवा राजा भवा। 15सल्लूम जकर्याह क खिलाफ सडयंत्र करइ सहित जउन कारज किहेस, उ सबइ सबहिं “इस्राएल क राजा लोगन क इतिहास” क किताबे में लिखे गएन अहईं।

### इस्राएल पइ मनहेम क हुकूमत

16सल्लूम क मरइ क पाछे मनहेम तिप्सह, एहमें रहइवाले सबइ लोगन क अउर तिस्रा स सुरू होइवालन छेत्रन क हराई दिहेस। लोग ओकरे बरे नगर दुआर क खोलब मना कइ दिहन। एह बरे मनहेम ओनका हराइ दिहस अउर नगर क सबहिं गरभवती मेहररूअन क गरभ क चीर गिराएस।

17गादी क पूत मनहेम यहूदा क राजा जकर्याह क राजकाल क उनतालीसवें बरिस में इस्राएल क राजा भवा। मनहेम सोमरोन में दस बरिस हुकूमत किहस। 18मनहेम उ सबइ काम किहेस जेनका यहोवा बुरा बताए रहा। मनहेम पूरी जिन्नगी, नबात क पूत यारोबाम क पापन क करब बंद नाहीं किहेस, जउन इस्राएल स पाप कराएस।

19अस्सूर क राजा पूल इस्राएल क खिलाफ जुद्ध करइ आवा। मनहेम पूल क पचहतर हजार पौण्ड चाँदी दिहस। उ इ एह बरे किहस कि पूल मनहेम क बल प्रदान करी अउर जेहसे राज पइ ओकर अधिकार सुदढ़ होइ जाइ। 20मनहेम सबहिं धनी अउर सक्तीसाली लोगन स करन क भुगतान करवाइके धन बटोरेस। मनहेम हर मनई पइ चाँदी क पचास सेकेल कर लगाएस। तब मनहेम अस्सूर क राजा क धन

दिहस। एह बरे अस्सूर क राजा चला गवा अउर इस्राएल में नाहीं ठहरा।

21मनहेम जउन कारज किहेस उ सबइ “इस्राएल क राजा लोगन क इतिहास” क किताबे में लिखे अहई। 22मनहेम मरा अउर अपने पुरखन क संग दफनावा गवा। मनहेम क पूत पकह्याह ओकरे पाछे नवा राजा भवा।

### इस्राएल पइ पकह्याह क हुकूमत

23मनहेम क पूत पकह्याह यहूदा क राजा अजर्याह क राजकाल क पचासवें बरिस में सोमरोन में इस्राएल क राजा भवा। पकह्याह दुइ बरिस तलक राज्ज किहस। 24पकह्याह नबात क पूत यारोबाम क पापन क करब बन्द नाहीं किहस जउन इस्राएल क पाप करइ बरे मजबूर किहे रहा।

25पकह्याह क फउज क सेनापति रमल्याह क पूत पेकह रहा। पेकह पकह्याह क मार डाएस। उ ओका सोमरोन में राजा क महल में मारेस। पेकह जब पकह्याह क मारेस, ओकरे संग अरगोब अरीआह अउर गिलाद क पचास मनसेधू रहेन। तब पेकह ओकरे पाछे नवा राजा भवा।

26पकह्याह जउन काम किहस उ सबइ “इस्राएल क राजा लोगन क इतिहास” क किताबे में लिखे अहई।

### इस्राएल पइ पेकह क हुकूमत

27रमल्याह क पूत पेकह यहूदा क राजा अजर्याह क राजकाल क बावनेवे बरिस में इस्राएल पइ हुकूमत करब सुरू किहेस। पेकह बीस बरिस तलक सासन किहस। 28पेकह उ सबइ काम किहस जेनका यहोवा बुरा कहे रहा। पेकह इस्राएल क पाप करइ बरे मजबूर करइवाले नबात क पूत यारोबाम क पाप करमन क करब बंद नाहीं किहस।

29अस्सूर क राजा तिगलत्पिलेसेर इस्राएल क खिलाफ लड़इ आवा। इ उहइ समइ रहा जब पेकह इस्राएल क राजा रहा। तिगलत्पिलेसेर इयोनन अबेल्बेत्माका, यानोह, केदेस, हासोर, गिलाद, गालील अउर नप्ताली क सारे छेल पइ अधिकार कइ लिहस। तिगलत्पिलेसेर एन जगहन पइ लोगन क बन्दी बनाइके अस्सूर लड़ गवा।

30एला क पूत होसे रमल्याह क पूत पेकह क खिलाफ सइयंत्र किहस। होसे पेकह क मार डाएस। तब होसे पेकह क पाछे नवा राजा बना। इ यहूदा क राजा उज्जियाह क पूत योताम क राजकाल क बीसवें बरिस में भवा।

31पेकह जउन सारे कारज किहस उ सबइ “इस्राएल क राजा लोगन क इतिहास” क किताबे में लिखे अहई।

### यहूदा पइ योताम हुकूमत करत ह

32उज्जियाह क पूत योताम यहूदा क राजा बना। उ इ इस्राएल क राजा रमल्याह क पूत पेकह क राजकाल क दूसरे बरिस में भवा। 33योताम जब राजा बना, उ पच्चीस बरिस क रहा। योताम यरूसलेम में सोलह बरिस तलक हुकूमत किहस। योताम क महतारी सादोक क बिटिया यरूसा रही। 34योताम अपने बाप उज्जियाह क तरह उ सबइ काम किहेस, जेनका यहोवा ठीक बताए रहा। 35मुला उ ऊँच ठउरन क नस्त नाहीं किहेस। लोग ओन पूजा ठउरन

पइ तब भी बलि चढ़ावत अउर सुगन्धि बारत रहेन। योताम यहोना क मन्दिर क उपरी दुआर बनवाएस। 36सबहिं कारज जउन योताम किहस उ सबइ “यहूदा क राजा लोगन क इतिहास” क पुस्तक में लिखे अहई।

37उ समइ यहोवा अराम क राजा रसीन अउर रमल्याह क पूत पेकह क यहूदा क खिलाफ लड़इ पठएस।

38योताम मरा अउर अपने पुरखन क संग दफनावा गवा। योताम अपने पुरखन दाऊद क नगर में दफनावा गवा। योताम क पूत आहाज ओकरे पाछे नवा राजा भवा।

### आहाज यहूदा क राजा बनत ह

16 योताम क पूत आहाज इस्राएल क राजा रमल्याह क पूत पेकह क राजकाल क सत्रहवें बरिस में यहूदा क राजा बना। 2आहाज जब राजा बना उ बीस बरिस क रहा। आहाज यरूसलेम में बीस बरिस तलक राज्ज किहस। आहाज उ सबइ काम नाहीं किहेस जेनका यहोवा अच्छा बताए रहा। उ परमेस्सर क आग्या क पालन अपने पुरखा दाऊद क तरह नाहीं किहेस। 3आहाज इस्राएल क राजा लोगन क तरह रहा। उ अपने पूत क बलि आगी में दिहस। उ ओन रास्ट्रन क घोर पापन क किहेस जेनका यहोवा देस छोड़इ क मजबूर तब किहे रहा जब इस्राएली लोग हुवाँ आए रहेन। 4आहाज ऊँची जगहन, पहाड़ियन अउर हर एक हरे पेड़ क नीचे बलि चढ़ाएस अउ सुगन्धि बारेस।

5अराम क राजा रसीन अउर इस्राएल क राजा रमल्याह क पूत पेकह, दुइनउँ यरूसलेम क खिलाफ लड़इ आएन। रसीन अउ पेकह आहाज क घेरि लिहन किन्तु उ पचे ओका हराइ नाहीं सकेन। 6उ समइ अराम क राजा अराम क बरे एलत क वापस लड़ लिहस। रसीन एलत में रहइवाले सबहिं यहूदा क निवासियन क जबरदस्ती निकारेस। अरामी लोग एलत में बस गएन अउर उ पचे आजु भी हुवाँ रहत अहई।

7आहाज अस्सूर क राजा तिगलत्पिलेसेर क लगे सदेसवाहक पठएस। सँदेसा इ रहा: “मई आपक सेवक हउँ। मई आपके पूत क तरह हउँ। आवई, अउर मोका अराम क राजा अउर इस्राएल क राजा स बचावई। उ पचे मोहसे जुद्ध करइ आए अहई।” 8आहाज यहोवा क मन्दिर अउ राजमहल क खजाने में जउन सोना अउर चाँदी रहा ओका भी लड़ लिहस। तब आहाज अस्सूर क राजा क भेंट पठएस। 9अस्सूर क राजा ओकर बात मान लिहस। उ दमिस्क क खिलाफ लड़इ बरे गवा। राजा उ नगर पइ अधिकार कइ लिहस अउर लोगन क किर क बन्दी बनाइके लड़ गवा। उ रसीन क भी मार डाएस।

10राजा आहाज अस्सूर क राजा तिगलत्पिलेसेर स भेंटइ गवा। आहाज दमिस्क में वेदी क लखेस। राजा आहाज इ वेदी क एक ठु नमूना अउर ओकर व्यापक रूपरेखा, याजक ऊरियाह क पठएस। 11तब याजक उरियाह राजा आहाज क जरिये दमिस्क स पठए गए नमूने क समान ही एक ठु वेदी बनाएस। याजक उरियाह इ प्रकार क वेदी राजा आहाज क दमिस्क स लउटइ क पहिले बनाएस।

12जब राजा दमिस्क स लउटा तउ उ वेदी क लखेस। उ वेदी पइ भेंट चढ़ाएस। 13वेदी पइ आहाज होमबलि अउ अन्नबलि चढ़ाएस। उ आपन पेयबोलि डाएस अउर अपनी मेलबलि क खून क इ वेदी पइ छिछकारेस।

14आहाज उ काँसे क वेदी क जउन यहोवा समन्वा रही मन्दिर क समन्वा क जगह स हटाएस। इ काँसे क वेदी आहाज क वेदी अउर यहोवा क मन्दिर क बीच रही। आहाज काँसे क वेदी क अपने वेदी क उत्तर कइँती रखेस। 15आहाज याजक ऊरिय्याह क आदेस दिहस। उ कहेस, “बिसाल वेदी क उपयोग भिंसारे क होमबलियन क बारइ क बरे, साँझ क अन्नबलि क बरे अउर इ देस क सबहि लोगन क पेयबलि बरे करा। होमबलि अउ बलियन क सारा खून बिसाल वेदी पइ छिछकारा। किन्तु मइँ काँसे क वेदी क उपयोग परमेस्सर स सवाल पूछइ बरे करब।” 16याजक ऊरिय्याह उ सबइ किहस जेका करइ बरे राजा आहाज आदेस दिहस।

17हुवाँ पइ काँसे क कवचवाली गाड़ियन अउ याजकन क हाथ धोवइ बरे चिलमचियन रहिन। तब राजा आहाज मन्दिर में प्रयुक्त काँसे क गाड़ियन क काट डाएस अउर ओनसे पल्लन निकार लिहस। उ गाड़ियन में स चिलमचियन क लइ लिहस। उ बिसाल टंकी क भी काँसे क ओन बर्धन स हटाइ लिहस जउन ओकरे नीचे खड़ी रहिन। उ बिसाल टंकी क एक ठु पाथर क चबूतरे पइ रखेस। 18कारीगरन सबित क सभा बरे मन्दिर क अंदर एक ठु ढकी जगह रहेन। आहाज सबित बरे ढकी जगह क भी हटाइ लिहस। आहाज इ सबइ चिजियन यहोवा क मन्दिर स लिहस। इ सबइ उ अस्सूर क राजा क कारण किहस।

19आहाज जउन कारज किहस उ सबइ “यहूदा क राजा लोगन क इतिहास” क किताबे में लिखे अहइँ। 20आहाज मरा अउ अपने पुरखन क संग दाऊद नगर में दफनावा गवा। आहाज क पूत हिजकिय्याह ओकरे पाछे नवा राजा भवा।

### होसे इस्राएल पइ हुकूमत करब सुरू करत ह

**17** एला क पूत होसे सोमरोन में इस्राएल पइ हुकूमत करब सुरू किहस। इ यहूदा क राजा आहाज क राजकाल क बारहवें बरिस में भवा। होसे नौ बरिस तलक सोमरोन में हुकूमत किहस। 2होसे उ सबइ कारज किहेस जेनका यहोवा बुरा कहे रहा। मुला होसे इस्राएल क ओतना बुरा राजा नाहीं रहा जेतने उ पचे राजा रहेन जउन ओकरे पहिले सासन किहे रहेन।

3अस्सूर क राजा सल्मनेसेर होसे क खिलाफ जुद्ध करइ आवा। सल्मनेसेर होसे क हराएस अउर होसे सल्मनेसेर क सेवक बन गवा। होसे सल्मनेसेर क अधीनस्थ कर देइ लाग।

4मुला पाछे अस्सूर क राजा क पता चला कि होसे ओकरे खिलाफ सड्यंत्र रचेस ह। होसे मिस्त्र क राजा क लगे मदद मँगइ बरे राजदूत पठएस। उ बरिस होसे अस्सूर क राजा क नाहीं पठएस जइसे उ हर बरिस पठवत रहा।

एह बरे अस्सूर क राजा होसे क बन्दी बनावा अउर ओका कैद में डाइ दिहस।

5तब अस्सूर क राजा इस्राएल क सबहि प्रदेशन पइ आक्रमण किहस। उ सोमरोन पहुँचा। उ तीन साल तलक सोमरोन क घेरे राखेस। 6अस्सूर क राजा इस्राएल पइ होसे क राजकाल क नवे बरिस में, सोमरोन पइ अधिकार जमाएस। अस्सूर क राजा इस्राएलियन क बन्दी क रूप में अस्सूर लइ गवा। उ ओनका हलह, हाबोर नदी क तट पइ जउन गोजान क नदी अहइ अउर मादियन क नगरन में बसाएस।

7इ सबइ घटना घटी काहेकि इस्राएलियन अपने परमेस्सर यहोवा क बिरूद्ध पाप किहे रहा। यहोवा इस्राएलियन क मिस्त्र स बाहेर लिआवा। यहोवा ओनका राजा फिरौन क चंगुल स बाहेर निकारेस। किन्तु इस्राएलियन दूसर देवतन क पूजब सुरू किहे रहेन। 8इस्राएली उहइ सब करइ लगे रहेन जउन दूसर रास्ट्र करत रहेन। यहोवा ओन लोगन क अपना देस छोड़इ क मजबूर किहे रहा जब इस्राएली आए रहेन। इस्राएलियन भी राजा लोगन स सासित होब पसन्द किहन, परमेस्सर स सासित होब नाहीं। 9इस्राएलियन गुप्त रूप स अपने यहोवा परमेस्सर क खिलाफ काम किहस। जेका ओनका नाहीं करइ चाही रहा।

इस्राएलियन अपने सब स नान्ह नगर स लइके सब स बड़के नगर तलक, अपने सबहि नगरन में ऊँच जगह बनाएस। 10इस्राएलियन हर एक ऊँची पहाड़ी पइ अउर सबहि हरियर बृच्छ क खाले स्मृति पाथर अउ असेरा स्तम्भ लगाएस।

11इस्राएलियन पूजा क ओन सबहि जगहन पइ सुगन्धि बारेस। उ पचे इ सबइ सबहि कारज ओन रास्ट्रन क तरह किहस जेनका यहोवा ओनके समन्वा देस तजइ क मजबूर किहे रहा। इस्राएलियन उ सबइ कारज किहेन जउन यहोवा क कोहाइ दिहस। 12उ पचे देवमूरतियन क सेवा किहन अउर यहोवा इस्राएलियन स कहे रहा, “तू पचन्क इ नाहीं करइ चाही।”

13यहोवा हर एक नबी अउर हर एक द्रस्टा क उपयोग इस्राएल अउ यहूदा क चितउनी देइ बरे किहस। यहोवा कहेस, “तू पचे बुरे करमन स दूर हटा। मोरे आदेसन अउर नेमन क पालन करा। ओन सबहि नेमन क पालन करा जेनका मइँ तोहरे पुरखन क दिहेउँ ह। मइँ अपने सेवक नबियन क उपयोग इ नेम तू पचन क देइ बरे किहेउँ।”

14लेकिन लोग एक नाहीं सुनेन। उ पचे अपने पुरखन क तरह बड़े हठी रहेन। ओनके पुरखा यहोवा, अपने परमेस्सर में पतियात नाहीं रहेन।

15लोग अपने पुरखन क संग यहोवा क कीन्ह गइ वाचा क रद्द कइ दिहस। अउर यहोवा क नेमन क मानइ स इन्कार किहन। उ पचे यहोवा क चितउनियन क सुनइ स इन्कार किहन। उ पचे व्यर्थ देवमूरतियन क अनुसरण किहन अउर खुद व्यर्थ बन गएन। उ पचे अपने चारिहुँ कइँती क रास्ट्रन क अनुसरण किहन। इ सबइ रास्ट्र उ करत रहेन जेका न करइ क चितउनी इस्राएल क लोगन क यहोवा दिहे रहा।

16लोग यहोवा, अपने परमेस्सर क आदेसन क पालन करब बंद कइ दिहस। उ पचे बछवन क दुइ मूरतियन बनाएन। उ पचे असेरा स्तम्भ बनाएन। उ पचे आकास क सबहिं नछत्रन क पूजा किहन अउर बाल क सेवा किहन। 17उ पचे अपने बेटवन -बिटियन क बलि आगी में दिहन। उ पचे जादू अउ प्रेत बिद्या क उपयोग भविस्स क जानइ बरे किहेन। उ पचे आपन क ओन चिजियन क करइ बरे बेचेस जेका यहोवा कहे रहा दुस्ट अहइ, जउन यहोवा क क्रधित कई दिहेन। 18एह बरे यहोवा इस्त्राएल पइ बहोत कोहाइ गवा अउर ओनका अपनी निगाह स दूर लइ गवा। यहूदा क परिवार समूह क अलावा कउनो इस्त्राएली बचा नाहीं रहा।

### यहूदा क लोग भी अपराधी अहईं

19मुला यहूदा क लोग भी यहोवा, अपने परमेस्सर क आदेसन क पालन नाहीं किहन। यहूदा क लोग भी इस्त्राएल क लोगन क तरह ही रहत रहेन।

20यहोवा इस्त्राएल क सबहिं लोगन क अस्वीकार किहस। उ ओन पइ बहोत बिपतियन दाएस। उ लोगन क ओनका छूटइ दिहस अउर अन्त में उ ओनका अपनी निगाह स लोकाए दिहस। 21यहोवा दाऊद क परिवार स इस्त्राएल क निकार दिहस। इस्त्राएलियन नबात क पूत यारोबाम क अपना राजा बनाएस। यारोबाम इस्त्राएलियन क यहोवा क अनुसरण करइ स दूर कइ दिहस। यारोबाम इस्त्राएलियन स एक भीषण पाप कराएस। 22इ तरह इस्त्राएलियन ओन सबहिं पापन क अनुसरण किहन जेनका यारोबाम किहे रहा। उ पचे एन पापन क करब तब तलक बंद नाहीं किहन। 23जब तलक यहोवा इस्त्राएलियन क अपनी निगाह स दूर नाहीं हटाएस। लोगन क बतावइ क बरे कि इ होइ, उ अपने नबियन क पठएस। एह बरे इस्त्राएली अपने देस स बाहेर अस्सूर पहुँचाए गएन अउर उ पचे आज तलक हुँवइ अहईं।

### सोमरोनी लोगन क आरम्भ

24अस्सूर क राजा बाबेल, कूता, अच्वा, हमात अउर सपवैम स लोगन क लिआवा। उ इस्त्राएलियन क हटावइ बरे ओन लोगन क सोमरोन में ठहरा दिहस। ओन लोग सोमरोन पइ अधिकार किहन अउर ओकरे चारिहुँ कईती क नगरन में रहइ लागेन। 25जब लोग सोमरोन में रहइ लागेन तउ उ पचे यहोवा क सम्मान नाहीं किहन। एह बरे यहोवा सिंहन क एन पइ आक्रमण क बरे पठएस। एन सिंहन ओनके कछू लोगन क मार डाएन। 26कछू लोग इ बात अस्सूर क राजा स कहेन। “उ सबइ लोग जेनका तू लइ गएन अउर सोमरोन क नगरन में बसाएन, उ देस क परमेस्सर क नेमन क नाहीं जानतेन। एह बरे उ पचे सिंहन क ओका मारइ दिहेन।”

27एह बरे अस्सूर क राजा इ आदेस दिहस: “तू कछू याजकन क सोमरोन स लिहे रह्या। मईं जिन याजकन क बन्दी बनाएस रहेउँ ओनमीं स एक क सोमरोन क वापस पठइ द्या। उ याजक क जाइ अउर हुवाँ रहइ द्या। तब उ

याजक लोगन क उ देस क देवता क नेम सिखाइ सकत हा।”

28एह बरे अस्सूरियन क जरिये सोमरोन स लिआए भए याजकन में स एक ठु बतेल में रहइ आवा। उ याजक लोगन क सिखाएस कि ओनका यहोवा क सम्मान कइसे करइ चाही।

29मुला ओन सबहिं रास्ट्रन अपने निजी देवता बनाएन अउर ओनका सोमरोन क लोगन क जरिये बनाए गए ऊँची जगहन पइ पूजा ठउरन में रखेस। ओन रास्ट्र इहइ किहन, जहाँ कहुँ भी उ पचे बसेन। 30बाबेल क लोग लबार देवता सुक्कोतबनोत बनाएन। कूत क लोग लबार देवता नेर्गल क बनाएन। हमात क लोगन असत्य देवता असीम क बनाएन। 31अच्वी लोग लबार देवता निभज अउर तर्ताकि बानएन अउर सपवमी लोग लबार देवतान अद्रम्मेलेक अउर अनम्मेलेक क सम्मान बरे अपने बच्चन क आगी में बारेन।

32मुला ओन लोग यहोवा क भी उपासना किहन। उ पचे अपने लोगन में स ऊँची जगहन बरे याजक चुनेन। इ सबइ याजक ओन पूजा क ठउरन पइ लोगन बरे बलि चढ़ावत रहेन। 33उ पचे यहोवा क सम्मान करत रहेन, मुला उ पचे अपने देवतन क भी सेवा करत रहेन। उ सबइ लोग अपने देवता क वइसी ही सेवा करत रहेन जइसी उ पचे ओन देसन में करत रहेन जहाँ स उ पचे लाए गए रहेन।

34आजु भी उ सबइ लोग वइसे ही रहत हीं जइसे उ पचे पहिले रहत रहेन। उ पचे यहोवा क सम्मान नाहीं करत अहईं। उ पचे यहोवा क आदेसन अउर नेमन क पालन नाहीं करत हीं। उ पचे ओन नेमन या आदेसन क पालन नाहीं करत रहेन जेनका यहोवा याकूब (इस्त्राएल) क सन्तानन क दिहे रहा। 35यहोवा इस्त्राएल क लोगन क संग एक वाचा किहे रहा। यहोवा ओनका आदेस दिहस, “तू पचन्क दूसर देवतन क सम्मान नाहीं करइ चाही। तू पचन्क ओनकर पूजा या सेवा नाहीं करइ चाही या बलि भेंट नाहीं करइ चाही।

36किन्तु तू पचन्क यहोवा क अनुसरण करइ चाही। यहोवा उहइ परमेस्सर अहइ जउन तू पचन्क मिश्र स बाहेर लइ आवा। यहोवा आपन महान सक्ती क उपयोग तू पचन्क बचावइ बरे किहस। तू पचन्क यहोवा क सम्मान, उपासना करइ चाही अउर उहइ क बलि भेंट करइ चाही। 37तू पचन्क ओकरे ओन नेमन, विधियन, उपदेसन अउर आदेसन क पालन करइ चाही जेनका उ तोहरे पचन्क बरे लिखेस। तू पचन्क एनकार पालन सदा ही करइ चाही। तू पचन्क दूसर देवतन क सम्मान नाहीं करइ चाही। 38तू पचन्क उ वाचा क नाहीं बिसरइ चाही, जउन मईं तोहरे संग किहेउँ। तू पचन्क दूसर देवतन क आदर नाहीं करइ चाही। 39तू पचन्क सिरिफ यहोवा, अपने परमेस्सर क ही सम्मान करइ चाही। तब उ तू पचन्क तोहरे पचन्क सबहिं दुस्मनन स बचाइ।”

40मुला इस्त्राएलियन एका नाहीं सुनेन। उ पचे उहइ करत रहेन जउन पहिले करत चले आवत रहेन। 41एह बरे अब तउ उ सबइ दूसर रास्ट्र यहोवा क सम्मान करत हीं, किन्तु उ पचे अपनी देवमूरतियन क भी सेवा करत हीं। ओनकर

पुत्र-पौत्र उहइ करत हीं, जउन ओनकर पुरखन करत रहेन। उ पचे आजु तलक उहइ काम करत हीं।

**हिजकिय्याह यहूदा पइ आपन सासन करब सुरू करत ह**

**18** आहाज क पूत हिजकिय्याह यहूदा क राजा रहा। हिजकिय्याह इस्राएल क राजा एला क पूत होसे क राजकाल क तीसरे बरिस में सासन करब सुरू किहस। 2 हिजकिय्याह जब सासन करब सुरू कहिसह, उ पच्चीस बरिस क रहा। हिजकिय्याह यरूसलेम में उनतीस बरिस तलक सासन किहस। ओकर महतारी जकर्याह क बितिया, अबी रही।

3 हिजकिय्याह ठीक अपने पुरखा दाऊद क तरह उ सबइ कारज किहस जेनका यहोवा अच्छा बताए रहा।

4 हिजकिय्याह ऊँची जगहन क नस्ट किहस। उ स्मृति पाथरन अउ असेरा स्तम्भन क खंडित कइ दिहस। ओन दिनन इस्राएल क लोग मूसा क जरिये बनाए गए काँसे क साँप बरे सुगन्धि बारत रहेन। इ काँसे क साँप क नाउँ “नहुसतान” रहा। हिजकिय्याह इ काँसे क साँप क टूकन कइ डाँस काहेकि लोग उ साँप क पूजा करत रहेन।

5 हिजकिय्याह यहोवा, इस्राएल क परमेस्सर में भरोसा रखत रहा। यहूदा क राजा लोगन में स कउनो क संग चाहे उ ओकर पहिले रहेन या ओकर पाछे रहेन हिजकियाह क समानता नाही कीन्ह जा सकत रहा। 6 हिजकिय्याह यहोवा क बहोत भक्त रहा। उ यहोवा क अनुसरण करब नाही तजेस। उ ओन आदेसन क पालन किहस जेनका यहोवा मूसा क दिहे रहेन। 7 यहोवा हिजकिय्याह क संग रहा। हिजकिय्याह जउन कछू किहस, ओहमाँ उ सफल रहा।

हिजकिय्याह अस्सूर क राजा क विरुद्ध विद्रोह किहस। हिजकिय्याह अस्सूर क राजा क सेवा करब बंद कइ दिहस। 8 हिजकिय्याह लगातार गाज्जा तलक अउर ओकरे चारिहूँ कइँती क पलिस्तिन क पराजित किहस। उ सबहिं नान्ह स लइके बड़के पलिस्ती नगरन क पराजित किहस।

**अस्सूरी सोमरोन पइ अधिकार करत हीं**

9 अस्सूर क राजा सल्मनेसेर सोमरोन क खिलाफ जुद्ध करइ गवा। ओकर फउज नगर क घेर लिहस। इ हिजकिय्याह क यहूदा पइ राजकाल क चउथे बरिस में भवा। इ इस्राएल क राजा, एला क पूत होसे क भी सतवाँ बरिस रहा। 10 तीन बरिस पाछे सल्मनेसेर सोमरोन पइ अधिकार कइ लिहस। उ सोमरोन क यहूदा क राजा हिजकिय्याह क राजकाल क छठे बरिस में लइ लिहस। इ इस्राएल क राजा होसे क राजकाल क भी नवाँ बरिस रहा। 11 अस्सूर क राजा इस्राएलियन क बन्दी क रूप में अस्सूर लइ गवा। उ ओनका हलह, हाबोर नदी पइ (जउन कि गोजान नदी भी अहइ) अउर मादियन क नगरन में बसाएस। 12 इ भवा, काहेकि इस्राएलियन यहोवा, अपने परमेस्सर क आग्या क पालन नाही किहन। उ पचे यहोवा क वाचा क तोड़न। उ पचे ओन सबहिं नेमन क नाही मानेन जेनके बरे यहोवा आपन सेवक मूसा क आदेस दिहे रहा।

इस्राएल क लोग यहोवा क वाचा क नाही सुनेन अउर ओन कामन क नाही किहन जेनका करइ क सिच्छा ओहमाँ दीन्ह गइ रही।

**अस्सूर यहूदा क लेइ क तैयार होत ह**

13 हिजकिय्याह राजकाल क चौदहवें बरिस अस्सूर क राजा सन्हेरीब यहूदा क सबहिं सुदूढ़ नगरन क खिलाफ जुद्ध छेढ़इ गवा। सन्हेरीब ओन सबहिं नगरन क पराजित किहस। 14 तब यहूदा क राजा हिजकिय्याह अस्सूर क राजा क लाकीस में एक संदेसा पठाएस। हिजकिय्याह कहेस, “मई बुरा किहेउँ ह। मोका सान्ति स रहइ द्या। तब मई तू पचन क उ भुगतान करब जउन कछू तू चाहब्या।”

तब अस्सूर क राजा यहूदा क राजा हिजकिय्याह स गियारह टन चाँदी अउर एक टन सोना स जियादा माँगेस। 15 हिजकिय्याह सारी चाँदी जउन यहोवा क मन्दिर अउर राजा क खजानन में रही, उ सब दइ दिहस। 16 उ समइ हिजकिय्याह उ सोने क उतार लिहस जउन यहोवा क मन्दिर क दरवाजन अउ चउखटन पइ मढ़ा गवा रहा। राजा हिजकिय्याह एन दरवाजन अउर चउखटन पइ सोना मढ़वाए रहा। हिजकिय्याह इ सोना अस्सूर क राजा क दिहस।

**अस्सूर क राजा अपने लोगन क यरूसलेम पठवत ह**

17 अस्सूर क राजा अपने तीन बहोत जियादा महत्वपूर्ण सेनापतियन क एक बिसाल सेना क संग यरूसलेम में राजा हिजकिय्याह क लगे पठाएस। उ सबइ लोग लाकीस स चलन अउर यरूसलेम क गएन। उ सबई ऊपरी स्रोत क लगे छोटकी नहर क निचके खड़े भएन। (ऊपरी स्रोत धोबी तलक लइ जाइवाली सड़किया पइ अहइ।) 18 एन लोग राजा क बोलाएन। हिलकिय्याह क पूत एल्याकीम (एल्याकीम राजमहल क अधीच्छक रहा।) सेबना (सास्त्री) अउर आसाप क पूत योआह (अभिलेखपाल) ओनसे भेंटइ आएन।

19 सेनापतियन में स एक ओनसे कहेस, “हिजकिय्याह स कहा कि अस्सूर क महान सम्राट इ कहत ह,

केह पइ तू भरोसा करत अहा? 20 तू सिरिफ अरथहीन सब्द कह्या ह। तू कहत अहा “मोरे लगे उपयुक्त सलाह अउर सकती जुद्ध में मदद बरे अहइ।” किन्तु तू केह पइ पतियात अहा जउन तू मोरे विरुद्ध कीन्ह अहा? 21 तू टूट बेतं क कुबरी क सहारा लेत रहा अहा। इ कुबरी मिस्त्र अहइ। जदि कउनो मनई इ कुबरी क सहारा लेइ तउ इ टूटी अउर ओकरे टापे क बेधत भइ ओका घायल करी। मिस्त्र क राजा ओन सबहिं लोगन बरे वइसा ही अहइ, जउन ओह पइ भरोसा करत हीं। 22 होइ सकत ह, “तू कहा हम यहोवा, अपने परमेस्सर पइ पतियाइत ह।” किन्तु मई जानत हउँ कि हिजकिय्याह ऊँच जगहन अउर वेदियन क हटाइ दिहस जहाँ लोग यहोवा क उपासना करत रहेन। अउर याहूदा अउर यरूसलेम स कहेस, “तू पचनक सिरिफ यरूसलेम में वेदी क समन्वा उपासना करइ चाही।”

23अब अस्सूर क राजा हमरे सुआमी स इ वाचा करा। मई प्रतिग्या करत हउँ कि मई दुइ हजार घोड़न देव, जदि आप एन पइ चढ़इवाले घुड़सवारन क प्राप्त कइ सकब्या। 24मोरे सुआमी क अधिकारियन में स सब स निचले दर्जे क अधिकारी क भी तू हराइ नाहीं सकब्या। तू रथ अउर घुड़सवार सैनिक पावइ क बरे मिस्त्र पइ बिस्सास किहा ह। 25मई यहोवा क बिना यरूसलेम क बर्बाद करइ नाहीं आवा हउँ। यहोवा मोहसे कहेस ह, “इ देस क खिलाफ जा अउर एका नस्ट करा।”

26तब हिलकिय्याह क पूत एल्याकीम, सेब्ना अउर योआह प्रमुख सेनापती स कहेस, “कृपा कइके हम स अरामी में बातन करइँ। हम उ भाखा क समुझित ह। यहूदा क भाखा में हम लोगन स बातन न करी काहेकि देवार पइ क लोग हम लोगन क बातन सुन सकत हीं।”

27मुला रबसाके ओनसे कहेस, “मोर सुआमी मोका सिरिफ तू पचन्स अउर तोहरे पचन्क राजा स बातन करइ बरे नाहीं पठएस ह। मई ओन दूसर लोगन बरे भी कहत रहा अहउँ जउन देवारे पइ बइठे रहत हीं। उ पचे आपन मल अउ मूत्र तोहरे पचन्क संग खइहीं-पीइहीं।”

28तब सेनापति हिब्रू भाखा में जोर स चिचियान, “अस्सूर क महान सम्राट क इ सँदेसा सुना। 29सम्राट कहत ह, ‘हिलकिय्याह क अपने क गुमराह जिन करावइ द्या। उ तू पचन्क मोरी सकती स बचाइ नाहीं सकत।’ 30हिलकिय्याह क तोहका यहोवा में भरोसा न कराइ द्या, हिलकिय्याह कहत ह, ‘हम क यहोवा बचाइ लेइ। अस्सूर क सम्राट इ नगर क पराजित नाहीं कइ सकत ह।’ 31मुला हिलकिय्याह क एक न सुना।

“अस्सूर क सम्राट इ कहत ह: ‘मोरे संग सन्धि करा अउर मोहसे मिला। तब तू पचे हर एक अपनी अंगूर क बेलन अउर अपने अंजीर क पेड़न स खाइ सकत ह अउ अपने कुएँ स पानी पी सकत ह। 32इ तू पचे तब तलक कइ सकत ह जब तलक मई तोहका तोहरे पचन्क देस जइसे देस में न लइ न जाउँ। इ अन्न अउर नवी दाखरस, इ रोटी अउ अंगूर भरे खेत अउर जइतून एवं मधु क देस अहइ। तब तू पचे जिअत रहब्या, मरब्या नाहीं। मुला हिलकिय्याह क एक न सुना। उ तोहरे पचन्क गुमराह करइ चाहत ह। उ कहत रहत ह, ‘यहोवा हमका बचाइ लेइ।’ 33दूसर रास्ट्रन क देवतन आपन रास्ट्रन क अस्सूर क सम्राट स न बचाइ सकइहीं। 34हमात अउ अर्पाद क देवता कहीं अहइँ? सपवैम, हेना अउर इव्वा क देवता कहीं अहइँ? उ पचे मोहसे सोमरोन क न बचाइ सकेन। नाहीं। 35कउनो दूसरे देस में कउनो देवता अपनी भुइँया क मोहसे न बचाइ सका? यहोवा मोहसे यरूसलेम क न बचाइ सका।”

36मुला लोग चुप रहेन। उ पचे एक तु सब्द भी प्रमुख सेनापतिन क नाहीं कहेन काहेकि राजा हिलकिय्याह ओनका अइसा आदेस दइ रखे रहा। उ कहे रहा, “ओहसे कछू जिन कहा।”

37हिलकिय्याह क पूत एल्याकीम (एल्याकीम राजमहल क अधीच्छक रहा।) सेब्ना (सास्त्री) अउ आसप क पूत योआह (अभिलेखपाल) हिलकिय्याह क लगे लउटेन। ओकर कपड़ा फाटा भावा रहेन काहेकि उ परेसान रहेन। उ पचे हिलकिय्याह उ सब कहेन जउन अस्सूर क सेनापति कहे रहा।

### हिलकिय्याह यसायाह नबी क लगे अपने अधिकारियन क पठवत ह

19 राजा हिलकिय्याह उ सबइ सुनेस अउर इ देखौवइ बरे कि उ बहोत दुःखी अहइ अउर घबरावा भावा अहइ, अपने ओढ़नन क फार डाएस अउर मोटे ओढ़नन पहिर लिहेस। तब उ यहोवा क मन्दिर में गवा।

2हिलकिय्याह एल्याकीम (एल्याकीम राजमहल क अधीच्छक रहा।) सेब्ना (सास्त्री) अउर याजकन क अग्रजन क आमोस क पूत यसायाह नबी क लगे पठएस। उ पचे मोटे ओढ़नन पहिरन जेहसे पता चलत रहा कि उ पचे परेसान अउर दुःखी अहइँ। 3उ पचे यसायाह स कहेन, “हिलकिय्याह इ कहत ह, ‘इ हमरे बरे संकट, दण्ड अउर अपमान क दिन अहइ। इ बच्चन क जनम देइ क समइ अहइ, मुला ओनका जनम देइ बरे कउनो सकती नाहीं अहइ। 4अस्सूर क राजा जिअत परमेस्सर क निन्दा करइ बरे आपन प्रमुख सेनापति क हमरे लगे पठएस ह। होइ सकत ह कि यहोवा तोहर परमेस्सर ओन सबहिं बातन क सुन लेइ। इ होइ सकत ह कि यहोवा इ प्रमाणित कइ देइ कि दुस्मन गलती पइ अहइ। एह बरे एन लोगन बरे पराथना करा जउन सबहिं तलक जिअत बचा अहइँ।”

5राजा हिलकिय्याह क अधिकारी यसायाह क लगे गएन। 6यसायाह ओनसे कहेस, “अपने सुआमी हिलकिय्याह क इ सँदेसा द्या: ‘यहोवा कहत ह। ओन बातन स डेराअ नाहीं जेनका अस्सूर क राजा क अधिकारियन मोर मसखरी उड़ावत भाए कहेन ह। 7मई हाली ही ओकरे मने में अइसी भावना पइदा करब जेहसे उ एक अफवाह सुनिके अपने देस वापिस जाइ क मजबूर होइ अउर मई ओका ओकरे देस में एक तु तरवार क घाट उतरवाइ देब।”

### हिलकिय्याह क अस्सूर क राजा क पुन वितउनी

8प्रमुख सेनापति सुनेस कि अस्सूर क राजा लाकीस स चल पड़ा अहइ। एह बरे उ गवा अउर इ पाएस कि ओकर सम्राट लिब्ना क खिलाफ जुद्ध करत बाटइ। 9अस्सूर क राजा एक तु अफवाह कूस क राजा तिर्हाका क बारे में सुनेस। अफवाह इ रही “तिर्हाका तोहरे खिलाफ लड़इ आवा ह।”

एह बरे अस्सूर क राजा हिलकिय्याह क लगे सँदेसवाहक क एक सँदेसा क संग पठएस। 10यहूदा क राजा हिलकिय्याह स इ कहा:

‘जउने परमेस्सर में तू पतियात अहा ओका तू अपने क गुमराह करइ जिन द्या। उ कहत ह, “अस्सूर क राजा यरूसलेम क पराजित नाहीं करी।”



11तू ओन बातन क सुन्या ह जउन अस्सूर क राजा लोग दूसर सबहिं देसन क संग घटित किहन ह। हम ओनका पूरी तरह स नस्ट कीन्ह। तू भी नाहीं बचि पउब्या।

12ओन रास्ट्रन क देवता अपने लोगन क रच्छा नाहीं कइ सकेन। मोर पुरखन गोजान, हारान, रेसेप अउ तलस्सार में एदेन क लोगन क नस्ट किहन। 13हमात अपादि, अउर सपवैम नगर क राजा कहाँ अहई? हेना अउ इला क राजा? उ पचे सबहिं समाप्त होइ गएन ह।”

### हिजकिय्याह यहोवा स पराथना करत ह

14हिजकिय्याह संदेसबाहकन स पत्र पाप्त किहेस अउ ओनका बाँचेस। तब हिजकिय्याह यहोवा क मन्दिर तलक गवा अउर यहोवा क समन्वा पत्रन क बिखेस। 15हिजकिय्याह यहोवा क समन्वा पराथना किहेस अउर कहेस, “यहोवा इस्त्राएल क परमेस्सर। तू करूब सरगदूतन पइ सम्राट क तरह बइठत ह। तू ही सिरिफ सारी पृथ्वी क राज्जन क परमेस्सर अहा। तू पृथ्वी अउ अकासे क बनाया। 16यहोवा मोर पराथना सुना। यहोवा अपनी आँखिन खोला अउ इ पत्र क लखा। ओन सबदन क सुना जेनका सन्हेरीब जीवित परमेस्सर क अपमान करइ बरे पठाएस ह। 17यहोवा, इ फुरइ अहइ। अस्सूर क राजा लोग एन सबहिं रास्ट्रन क नस्ट किहन। 18उ पचे रास्ट्रन क देवतन क आगी में लोकाइ दिहन। किन्तु उ पचे सच्चे देवता नाहीं रहेन। उ पचे सिरिफ काठ अउ पाथर क मूर्ति रहेन जेनका मनइयन बनाइ रखे रहेन। इहइ कारण रहा कि अस्सूर क राजा ओनका नस्ट कइ सकेन। 19एह बरे यहोवा, हमार परमेस्सर, अब हमका अस्सूर क राजा स बचा। तब पृथ्वी क सारे राज्ज समुझिहीं कि यहोवा, सिरिफ तू ही परमेस्सर अहा।”

### परमेस्सर हिजकिय्याह क जवाब दिहस

20आमोस क पूत यसायाह हिजकिय्याह क इ सँदेस पठाएस। उ कहेस, “यहोवा, इस्त्राएल क परमेस्सर इ कहत ह, ‘तू मोहसे अस्सूर क राजा सन्हेरीब क खिलाफ पराथना किहा ह। मई तोहार पराथना सुनि लिहेउँ ह।’

21“सन्हेरीब क बारे में यहोवा क इ सँदेसा अइसा अहइ: ‘सिथ्योन क कुँवरी बिटिया तोहका तुच्छ समुझत ह, उ तोहार मजाक उड़ावत ह। यरूसलेम बिटिया तोहरे पीठ क पाछे तोहार मजाक उड़ावत ह।

22तू केकर अपमान किहया? तू केकर मजाक उड़ाया? केकरे खिलाफ तू बातन किहया? तू अइसे बातन किहा जइसा कि तू इस्त्राएल क परम पवित्र स महान अहइ।

23तू अपने सँदेसबाहकन क यहोवा क अपमान करइ क पठया। तू कहया, “मई अपने अनेक रथन सहित ऊँचे पर्वतन तलक आया। मई लबानोन में भीतर तलक आएउँ। मई लबानोन क उच्चतम देवदारू क बृच्छन, अउ लबानोन क उत्तम चीड़ क बृच्छन क काटा। मई लबानोन क सब स ऊँच अउर सब स घन बने में घुसेउँ।

24मई खुद कुअँन खोदेस अउ विदेसन क पानी पिएउँ। मई मिस्त्र क नदियन क झुराएउँ अउर उ देस क रउँदेउँ।”

25मुला का तू नाहीं अनक्या? “मई (परमेस्सर) बहोत पहिले इ योजना बनाए रहेउँ, पुराने जमाने स ही ह सबइ जोजनन बनाइ दिहे रहेउँ, अउर अब मई ओका ही पूरी होइ देत हउँ। मई तू पचन्क मजबूत नगरन क ढेर बनावइ दिहेउँ।

26नगर में रहइवाले मनई कउनो ताकत नाहीं रखतेन। उ सबइ लोग डरे भए अउर सरमिन्दा रहेन। लोग खेतन क जंगली पौधन क तरह होइ गएन, जउन बढ़इ क पहिले ही मर जात हीं, इ लोग उ घास क तरह अहइ जउन छत पइ उगत ह अउर जे बढ़इ स पहिले ही मुड़झा जात ह।

27मई जानत हउँ तू कब उठत ह अउर तू कब बइठत ह। बइठा, मई जानत हउँ कि तू कब जुद्ध करइ जात अहा अउर कब घरे आवत अहा, मई जानत हउँ कि तू अपने क कब मोरे खिलाफ करत अहा।

28तू मोरे खिलाफ गया मई तोहरे घमण्ड क सब्द सुनेउँ। एह बरे मई आपन अंकुस तोहरे नाके में डाउब। अउर मई आपन लगाम तोहरे मुँह में डाउब। तब मई तोहका पाछे लउटाउब अउर उ राहे लउटाउब जेहसे तू आवा रहया।”

### हिजकिय्याह क यहोवा क सँदेसा

29“मई तोहार मदद करब, एकर सँदेसा इ होइ: इ बरिस तू उहइ अन्न खाब्या जउन अपने आप उगी अउर अगले बरिस तू उहइ अन्न खाब्या जउन उ बिआ स पइदा होइ। मुला तू बिआ बोउब्या अउर तीसरे बरिस में आपन फसल कटब्या। तू अंगूरे क बेलन खेतन में लगउब्या अउर ओनसे अंगूर खाब्या। 30अउर यहूदा क परिवारे क जउन लोग बचि गवा अहई उ पचे फुन फूली फरिहीं ठीक वइसे ही जइसे पौधा अपनी जड़न मजबूत कइ लेइ पइ ही फरत ह 31काहेकि यरूसलेम में रहइवालन कछू लोग जिअत रहब्या। सिथ्योन पर्वत पइ रहइवालन में स कछू लोग बच जाईं। यहोवा क जोस इ सब करावाएब।”

32“अस्सूर क सम्राट क बारे में यहोवा अइसा कहत ह:

उ इ नगर में नाहीं आई। उ इ नगर में एक ठु भी बाण नाहीं चलाइ। उ इ नगर क खिलाफ ढाल क संग नाहीं आइ। उ इ नगर पइ आक्रमण क माटी क टीलन नाहीं बनाइ।

33उ उहइ राहे स लउटी जेहसे उ आवा। उ इ नगर में नाहीं आई। इ यहोवा कहत ह।

34मई अपने बरे अउर अपने सेवक दाऊद बरे इ नगर क रच्छा करब अउर बचाइ लेब।”

### अस्सूरी फउज बर्बाद होइ गइ

35उ राति यहोवा क दूत अस्सूरी डेरा में गवा अउर एक लाख पचासी हजार लोगन क मार डाएस। भिन्सोर क जब लोग उठेन तउ उ पचे सारी ल्हासन लखेन।

36एह बरे अस्सूर क राजा सन्हेरीब चला गवा अउर नीनवे वापस पहाँचा, अउर हुवई रुक गवा। 37एक दिना सन्हेरीब मन्दिर में अपने देवता निसरोक क पूजा करत रहा।

ओकरे पूतन अद्रेम्मेलेक अउर सरेसेर ओका तरवार स मार डाएन। तब उ पचे अरारात प्रदेस में पराइ निकरेन अउर सन्हेरीब क पूत एसहर्ददोन ओकरे पाछे नवा राजा भवा।

### हिजकिय्याह बीमार पड़ा अउर मरइ क भवा

**20** उ समइ हिजकिय्याह बीमार पड़ा अउर लगभग मरि ही गवा। आमोस क पूत नबी यसायाह हिजकिय्याह स भेंटेस। यसायाह हिजकिय्याह स कहेस, “यहोवा कहत ह, ‘अपने परिवार क लोगन क बरे वसीयत नामा लिख ल्या। तू मर जाब्या। तू जिअत नहीं रहब्या।”

2हिजकिय्याह आपन मुँहना देवारे कइँती कइ लिहस। उ यहोवा स पराथना किहस अउर कहेस, 3“यहोवा याद रखा कि मई पूरे हिरदइ क संग सच्चाई स तोहार सेवा किहेउँ ह। मई उ किहेउँ ह जेका तू नीक बताया ह।” तब हिजकिय्याह फूट-फूटके रोइ पड़ा।

4बीच क आँगन क यसायाह क छोड़इ क पहिले यहोवा क सँदेसा ओका मिला। यहोवा कहेस, 5“लउटा अउर मोरे लोगन क अगुवा हिजकिय्याह स कहा, ‘यहोवा तोहार पुरखा दाऊद क परमेस्सर इ कहत ह, मई तोहार पराथना सुनि लिहेउँ ह अउर तोहार आँसू लखेउँ ह। एह बरे मई तोहका स्वस्थ करब। तीसरे दिन तू यहोवा क मन्दिर में जाब्या। 6अउर मई तोहरी जिन्नगी क पन्द्रह बरिस बढ़ाइ देब। मई अस्सूर क सम्राट क सक्ती स तोहका अउर इ नगर क बचाउब। मई अइसन अपने बरे अउर अपने सेवक दाऊद क बरे इ करब।”

7तब यसायाह कहेस, “अंजीर क एक मिस्त्रन बनावा अउर एका घाव क जगह पड़ लगावा।”

एह बरे उ पचे अंगीरे क मिस्त्रन लिहन अउर हिजकिय्याह क घाव क जगह पड़ लगाएन। तब हिजकिय्याह स्वस्थ होइ गवा।

### हिजकिय्याह क स्वस्थ होइ क संकेत

8हिजकिय्याह यसायाह स कहेस, “एकर संकेत का होइ कि यहोवा मोका स्वस्थ करी अउर मई यहोवा क मन्दिर में तीसरे दिन जाब?”

9यसायाह कहेस, “तू का चाहत अहा? का छाया दस पैड़ी आगे जाइ या दस पैड़ी पाछे जाइ? इहइ यहोवा क तोहरे बरे संकेत अहइ कि जउन यहोवा कहेस ह, ओका उ करी।” 10हिजकिय्याह जवाब दिहेस, “छाया क बरे दस पैड़ियन आगे जाब सहल बाटइ। नहीं, छाया क दस पैड़ी पाछे हटइ द्या।”

11तब नबी यसायाह यहोवा स पराथना किहस अउर अहाज क धूप-घड़ी पई यहोवा छाया क दस पैड़ियन पाछे हटाएस। उ ओन पैड़ियन पड़ लउटी जेन पड़ इ पहिले रही।

### हिजकिय्याह अउ बाबेल क मरई

12ओन दिनन बलदान क पूत बरोदक बलदान बाबेल क राजा रहा। उ पत्रन क संग एक टु भेंट हिजकिय्याह क पठाएस। बरोदक-बलदान इ एह बरे किहस काहेकि उ सुनेस कि हिजकिय्याह बीमार होइ गवा ह। 13हिजकिय्याह बाबेल

क लोगन क सुआगत किहस अउर उ अपने महल क सबहिं कीमती चिजियन क ओनका देखाएस। उ ओनका चाँदी, सोना, मसालन, कीमती इत्र, अस्त्र-सस्त्र अउर अपने खजाने क हर एक चीज देखाएस। हिजकिय्याह क पूतरा महल अउर राज्ज में अइसा कछू नहीं रहा जेका उ ओनका न देखाए होइ।

14तब यसायाह नबी राजा हिजकिय्याह क लगे आवा अउर ओहसे पूछेस, “इ सबइ लोग का कहत रहेन? उ पचे कहीं स आए रहेन?”

हिजकिय्याह कहेस, “उ पचे बहोत दूर क देस बाबेल स आए रहेन।”

15यसायाह पूछेस, “उ पचे तोहरे महल में का लखेन ह?”

हिजकिय्याह जवाब दिहेस, “उ पचे मोरे महल क सबहिं चिजियन लखेन ह। मोरे खजानन में अइसा कछू नहीं बाटइ जेका मई ओनका न देखॉया होइ।”

16तब यसायाह हिजकिय्याह स कहेस, “यहोवा क हिआँ स इ सँदेसा क सुना। 17उ समइ आवति अहइ जब तोहरे महल क सबहिं चिजियन अउर उ सबइ सबहिं चिजियन जेनका तोहार पुरखन आजु तलक सुरच्छित रखेन ह, बाबेल स लइ जाइ जइहीं। कछू भी नहीं बची। यहोवा इ कहत ह। 18बाबेल तोहरे पूतन क लइ लेइहीं अउर तोहार पूत बाबेल क राजा क महल में खोजे बने रहिहीं।”

19तब हिजकिय्याह यसायाह स कहेस, “यहोवा क हिआँ स इ सँदेसा नीक अहइ।” हिजकिय्याह सोचेस, “कम स कम मोर जीवनकाल में सात्ति अउर रच्छा रहइहीं।”

20हिजकिय्याह जउन बढ़के कारज किहस, जेनमें जलकुण्ड पड़ कीन्ह गए काम अउ नगर में पानी लिआवइ बरे नहर बनावइ क काम सामिल अहइँ “यहूदा क राजा लोगन क इतिहास” क किताबे में लिखे गए अहइँ। 21हिजकिय्याह मरा अउ अपने पुरखन क संग दफनावा गवा अउर हिजकिय्याह क पूत मनस्से ओकरे पाछे नवा राजा भवा।

### मनस्से अपना कुसासन यहूदा पड़ आरंभ करत ह

**21** मनस्से जब हुकुमत करइ लाग तब उ बारह बरिस क रहा। उ पचपन बरिस तलक यरूसलेम में हुकुमत किहस। ओकरी महतारी क नाउँ होसीबा रहा।

2मनस्से उ सबइ काम किहस जेनका यहोवा बुरा बाताए रहा। मनस्से उ सबइ भयंकर काम करत रहा जउन दूसर रास्ट्र करत रहेन। (अउर यहोवा ओन रास्ट्रन क अपना देस तजइ पर मजबूर किहे रहा जब इस्त्राएली आए रहेन।) 3मनस्से फुन ओन ऊँच जगहन क बनाएस जेनका ओकर बाप हिजकिय्याह बर्बाद किहे रहा। मनस्से भी ठीक इस्त्राएल क राजा अहाब क तरह बाल क सम्मान देई बरे वेदियन बनाएस अउर असेरा क सम्मान बरे स्तम्भ बनाएस। मनस्से अकासे में तारन क पूजा करब सुरू किहस। 4मनस्से यहोवा क मन्दिर में झूठे देवतन क पूजा क वेदियन बनाएस। (इ उहइ ठउर अहइ जेकर बारे में यहोवा बातन करत रहा जब उ कहे रहा, “मई अपना नाउँ यरूसलेम में रखब।”) 5मनस्से यहोवा क मन्दिर क दुइ आँगनन में अकासे क

नछत्रन बरे बेदियन बनाएस। 6मनस्से अपने पूत क बलि दिहस अउर ओका वेदी पइ बारेस। मनस्से भविस्स जानइ क कोसिस मँ कइउ तरीकन क उपयोग किहस। उ ओझा लोगन अउ भूत सिद्धियन स मिला।

मनस्से जियादा स जियादा उ करत गवा जेका यहोवा बुरा कहे रहा। इ यहोवा क कोहाइ दिहस। 7मनस्से असेरा क खुदी भइ मूर्ति बनाएस। उ इ मूर्ति क मन्दिर मँ धरेस। यहोवा दाऊद अउ दाऊद क पूत सुलैमान स इ मन्दिर क बारे मँ कहे रहा: “मइँ यरूसलेम क पूरे इस्त्राएल क नगरन मँ स चुनेउँ ह। मइँ आपन नाउँ यरूसलेम क मन्दिर मँ सदा ही बरे रखब। 8मइँ इस्त्राएल क लोगन स उ भुइँया जेका मइँ ओनके पुरखन क दइ दिहे रहेउँ, क तहइ बरे नाहीं कहब। मइँ लोगन क ओनके देस मँ रहइ देब, जदि उ पचे ओन सब चिजियन क पालन करिहीं जेनका आदेस मइँ दिहेउँ ह अउर जउन उपदेस मोर सेवक मूसा ओनका दिहस ह।” 9किन्तु लोग परमेस्सर क एक न सुनेन। मनस्से ओन लोन स पाप कराएस। इस्त्राएलियन आवइ क पहिले कनान मँ रहइ वाले सबहिँ रास्ट्र जेतना बुरा करत रहेन मनस्से ओहसे भी जियादा बुरा किहे रहा। यहोवा ओन रास्ट्रन क नस्ट कइ दिहे रहा जब इस्त्राएल क लोग इ भुइँया लेइ आए रहेन।

10यहोवा अपने सेवक, नबियन क उपयोग इ किहइ बरे कहस: 11“यहूदा क राजा मनस्से एन घिनौने पापन क किहेस ह अउर अपने स पहिले रहइवाले एमोरियन स भी बड़की बुराई किहेस ह। मनस्से अपने देवमूरतियन क साथ यहूदा स भी पाप कराएस ह। 12एह बरे इस्त्राएल क परमेस्सर यहोवा करत ह, ‘लखा! मइँ यरूसलेम अउ यहूदा पइ ऐँतनी विपतियन ढाउब कि जदि कउनो मनई एनके बारे मँ सुनी तउ ओकर हिरदइ बइठ जाइ। 13मइँ यरूसलेम क माप पई सोमरोन क माप पंक्ति अउर अहाब क परिवार क साहुल क उपयोग करब। कउनो मनई तस्तरी क पोंछत ह अउर तब उ ओका उलटिके रख देत ह। मइँ यरूसलेम क साथ भी अइसा ही करब। 14हुवौँ मोर कछू मनई फुन भी बचे रहि जइहीं। किन्तु मइँ ओन मनइयन क तजि देब। मइँ ओनका ओनके दुस्मनन क दइ देब। ओनकर दुस्मन ओनका बन्दी बनइहीं, उ पचे ओन कीमती चिजियन क तरह होइहीं जेनका फउजी जुद्ध मँ प्राप्त करत हीं। 15काहे? काहेकि मोर लोग उ सबइ काम किहन जेनका मइँ बुरा बताएउँ। उ पचे मोका उ दिन स कोहाइ दिहन ह जउने दिन स ओनकर पुरखन मिस्त्र स बाहेर आएन। 16अउर मनस्से अनेक निरपराध लोगेन क मारेस। उ यरूसलेम क एक सिरे से दूसर सिरे तलक खून स भरि दिहेन। इ सारे पाप ओन पापन क अलावा अहइँ जेका उ यहूदा स कराएस। मनस्से यहूदा स उ कराएस जेका यहोवा बुरा बताए रहा।”

17ओन पापन सहित अउर भी जउन कार्य मनस्से किहस, उ सबहिँ “यहूदा क राजा लोगन क इतिहास” क किताबे मँ लिखे अहइँ। 18मनस्से मरा अउर अपने पुरखन क संग दफनावा गवा। ओका उज्जा क बाग मँ दफनावा गवा जउन कि मनस्से क महल मँ रहा। मनस्से क पूत आमोन ओकरे पाछे नवा राजा भवा।

### आमोन क अल्पकालीन सासन

19आमोन जब हुकूमत करब सुरू कहस तउ उ बाईस बरिस क रहा। उ यरूसलेम मँ दुइ बरिस तलक सासन किहस। ओकरी महतारी क नाउँ मसुल्लेमेत रहा, जउन योव्बा स हारूस क बिटिया रही।

20ठीक अपने बाप क तरह आमोन उहइ काम किहस, जेनका यहोवा बुरा कहे रहा। 21आमोन ठीक अपने बाप क तरह रहत रहा। आमोन ओनहीं देवमूरतियन क पूजा अउ सेवा करत रहा जेनकर ओकर बाप करत रहा। 22आमोन अपने पुरखन क परमेस्सर यहोवा क तज दिहस अउर उ तरह नाहीं रहा जइसा यहोवा चाहत राहा।

23आमोन क सेवकन ओकर खिलाफ सडयंत्र रचेन अउर ओका ओकरे महल मँ मार डाएस। 24साधारण जनता ओन सबहिँ अधिकारियन क मार डाएस जउन आमोन क खिलाफ सडयंत्र रचे रहेन। तब लोग आमोन क पूत योसियाह क ओकरे पाछे नवा राजा बनाएन।

25जउन दूसर काम आमोन किहस उ सबइ “यहूदा क राजा लोगन क इतिहास” क किताबे मँ लिखे अहइँ। 26आमोन उज्जर क बाग मँ अपनी कब्र मँ दफनावा गवा। आमोन क पूत योसियाह नवा राजा बना।

### योसियाह यहूदा पइ अपना सासन सुरू करत ह

22 योसियाह जब हुकूमत करब सुरू किहस तउ उ आठ बरिस क रहा। उ इकतीस बरिस तलक यरूसलेम मँ हुकूमत किहस। ओकर महतारी बोस्कत क अदाया क बिटिया, यदीदा रही। 2योसियाह उ सबइ काम किहेस जेनका यहोवा नीक बताए रहा। योसियाह परमेस्सर क अनुसरण अपने पुरखन दाऊद क तरह किहेस। योसियाह ठीक वइसे ही किहेस जइसे परमेस्सर चाहत रहा।

### योसियाह मन्दिर क मरम्मत क आदेस देत ह

3अपने राजकाल क अट्ठारहवे बरिस मँ, अपने सचिव, मसुल्लाम क पोता व असल्याह क पूत सापान क यहोवा क मन्दिर मँ पठएस। योसियाह कहेस, 4“महायाजक हिलकिय्याह क लगे जा। ओहसे कहा कि ओका उ गनइ अउर लइ लेइ चाही जेका लोब यहोवा क मन्दिर मँ लिआएस ह। द्वारपालन उ धने क लोगन स बटोर रहेन। 5याजकन क इ धन ओन कारीगरन क देइ मँ उपयोग करइ चाही जउन यहोवा क मन्दिर क मरम्मत करत हीं। याजकन क इ धन क ओन लोगन क देइ चाही जउन यहोवा क मन्दिर क देखभाल करत हीं। 6बढ़ई, पाथरे क देवार बनावइवाले मिस्त्री अउर पाथर क काटइवालन क तनख्वाह बरे धने उपयोग करा। मन्दिर मँ लगावइ बरे इमारती लकड़ी अउ कटे पाथर क बेसहइ मँ धने क उपयोग करा। 7उ धने क जिन गना जेका तू मजदूरन क द्या। ओन मजदूरन पइ बिस्सास कीन्ह जाइ सकत ह।”

### व्यवस्था क किताब मन्दिर मँ मिली

8महायाजक हिलकिय्याह सचिव सापान स कहेस, “लखा! मोका व्यवस्था क किताब यहोवा क मन्दिर मँ मिली ह।”

हिलकिय्याह इ पुस्तक क सापान क दिहस अउर सापान एका बाँचेस।

9-10सास्त्री सापान, राजा योसिय्याह क लगे आवा अउर ओका बताएस जउन भवा रहा। सापान कहेस, “तोहरे सेवकन मन्दिर स मिले धने क लिहस अउर ओका ओन कारीगरन क दिहस जउन यहोवा क मन्दिर क काम करत रहेन। अउर जउन मन्दिर क देख-रेख करत रहेन।” तब सास्त्री सापान राजा स कहेस, “याजक हिलकिय्याह मोका इ किताब दइ दिहस ह।” तब सापान राजा क किताब बाँचिके सुनाएस।

11जब राजा व्यवस्था क कितावे क सब्दन क सुनेस, उ आपन दुःख अउर परेसानी परगठ करइ क बरे अपने ओढ़नन क फारि डाएस। 12तब राजा याजक हिलकिय्याह, सापान क पूत अहीकाम, मीकायाह क पूत अकबोर, सास्त्री सापान अउर राजसेवक असाया क आदेस दिहस। 13राजा योसिय्याह कहेस, “जा, अउर यहोवा स पूछा कि हम क का करइ चाही। यहोवा क समन्वा मोरे बरे, लोगन क बरे अउर पूरे यहूदा क बरे याचना करा। इ मिली भइ पुस्तक क सब्दन क बारे में पूछा। यहोवा हम लोगन पइ कोहान अहइ काहेकि हमार पुरखन इ किताबे क सिच्छा क नाहीं मानेन। उ पचे हम लोगन क बरे लिखी सब बातन क नाहीं किहन।”

### योसिय्याह अउर नबिया हुल्दा

14एह बरे याजक हिलकिय्याह, अहीकाम, अकबोर, सापान अउर असाया, नबिया हुल्दा क लगे गएन। हुल्दा हर्हस क पोता व तिकवा क पूत सल्लूम क मेहरारू रही। उ याजक क ओढ़नन क देखभाल करत रहा। हुल्दा यरूसलेम क दूसरे हिस्सा में रहत रही। उ पचे गएन अउर उ पचे हुल्दा स बातन किहन।

15तब हुल्दा ओनसे कहेस, “यहोवा इस्राएल क परमेस्सर कहत हः उ मनई स कहा जउन तू पचन्क मोरे लगे पठएस हः 16‘यहोवा इ कहत हः मई इ जगह पइ बिपत्ति लावत हउँ अउर ओन मनइयन पइ भी जउन हिआँ रहत हीं। इ सबइ उ सब बिपत्तियन अहई जेनका उ किताबे में लिखा गवा ह जेका यहूदा क राजा बाँचेस ह। 17यहूदा क लोग मोका त्याग दिहन ह अउर दूसर देवतन क बरे सुगन्धि बारेन ह। उ पचे मोका बहोत किरोधित किहन ह। उ पचे बहोत स देवमूरतियन बनाएन। इहइ कारण अहइ कि मई इ जगह क खिलाफ आपन किरोध परगट करब। मोर विरोध उ आगी क तरह होइ जउन बुझाइ न जाइ सकी।’

18‘यहूदा क राजा योसिय्याह स इ कहा जउन तोहका यहोवा स सलाह लेइ बरे भजेस ह। ‘यहोवा इस्राएल क परमेस्सर उ कहेस जउन तू सुने। तू उ सुन्या जउन मई इ जगह अउर इ जगह पइ रहइवाले लोगन क बारे में कहेउँ। तोहार हिरदइ कोमल अहइ। 19जब तू इ सुन्या तउ तोहका दुःख भवा। मई कहेउँ कि भयंकर घटनन इ जगह क संग घटित होइहीं। अउर तू अपने दुःख क परगट करइ बरे अपने ओढ़नन क फारि डाया अउर तू रोवइ लाग्या। इहइ कारण अहइ कि मई तोहार बात सुनेउँ।’ यहोवा इ कहत ह,

20‘मई तू पचन्क तोहरे पुरखन क संग मिलइ देब्या। तू पचे मरब्या अउर अपनी कब्र में सान्तिपूर्वक जाब्या। एह बरे तोहार पचन्क अँखियन ओन बिपत्तियन क नाहीं लिखहीं जेनका मई इ जगह पइ ढावइ जात अहउँ।’”

तब याजक हिलकिय्याह, अहीकाम, अकबोर, सापान अउर असाया राजा स इ सब कहेस।

### लोग नेम क सुनत हीं

23 राजा योसिय्याह यहूदा अउर इस्राएल क सबहिं प्रमुखन से आवइ अउर ओहसे मिलइ क बरे कहेस। 2तब राजा यहोवा क मन्दिर गवा। सबहिं यहूदा क लोग अउर यरूसलेम में रहइवाले लोग ओकरे संग गएन। याजक, नबी, अउर सबहिं मनई, सब स जियादा महत्वपूर्ण स सब स कम महत्वपूर्ण सबहिं ओकरे संग गएन। तब उ “साच्छीपत्र क पुस्तक” बाँचेस। इ उहइ, “नेम क पुस्तक रही” जउन यहोवा क मन्दिर स मिली रही। योसिय्याह उ पुस्तक क इ तरह बाँचेस कि सबहिं लोग ओका सुनि सकई।

अराजा स्तम्भ क लगे खड़ा भवा अउर उ यहोवा क संग वाचा किहस। उ यहोवा क अनुसरण करब, ओकर आग्या, वाचा अउर नेमन क पालन करब अंगीकार किहस। उ पूरी आत्मा अउर हिरदइ स इ करब अंगीकार किहस। उ किताबे में लिखी वाचा क मानब अंगीकार किहस। सबहिं लोग इ परगट करइ क बरे खड़े भएन कि उ पचे राजा क वाचा क समर्पन करत ही।

4तब राजा महायाजक हिलकिय्याह दूसर याजकन अउर द्वारपालन क बाल, असेरा अउर अकासे क नछयन क सम्मान बरे बनी सबहिं चिजियन क यहोवा क मन्दिर क बाहेर लिआवइ क आदेस किहस। तब योसिय्याह ओन सबहिं क यरूसलेम क बाहेर किद्रोन क खेतन में बार दिहस। तब राखी क उ पचे बेतेल लइ गएन।

5यहूदा क राजा लोग कछू सामान्य मनइयन क याजकन क रूप में सेवा बरे चुने रहा। इ सबइ लोग हारून क परिवार स नाहीं रहेन। उ पचे झूठे याजक यहूदा क सबहिं नगरन अउर यरूसलेम क नजिक क नगरन में ऊँच जगहन पइ सुगन्धि बारत रहेन। उ पचे बाल, सूरज, चाँद, नछत्रन क समूह अउर अकासे क सबहिं नछत्रन क सम्मान में सुगन्धि बारत रहेन। किन्तु योसिय्याह ओन बनावटी याजकन क रोक दिहस।

6योसिय्याह असेरा स्तम्भ क यहोवा क मन्दिर स हटाएस। उ असेरा स्तम्भ क नगर क बाहेर किद्रोन घाटी क लइ गवा अउर ओका हुवई बार दिहस। तब उ जरे खण्डन क कूटेस अउर उ राखी क साधारण लोगन क कब्रन पइ छितराएस।

7तब राजा योसिय्याह यहोवा क मन्दिर में बने पुरुसगामियों क कोठान क गिरवाइ दिहस। ओन घरन में मेहररूअन झूठी देवी असीराह क सम्मान देइ बरे तम्बू क छोटे अवरण बिना करत रहिन।

8-9उ समइ याजक बलि यरूसलेम क नाहीं लिआवत रहेन अउर ओका मन्दिर क वेदी पइ नाहीं चढ़ावत रहेन।

याजक सारे यहूदा क नगरन में रहत रहेन अउर उ पचे ओन नगरन में ऊँच नगरियन पइ सुगन्धि भारत अउ बलि भेंट करत रहेन। उ पचे ऊँची जगह गेबा स लइके बर्सेबा तलक हर जगह रहेन। याजकन अखमिरी रोटी यरूसलेम में मन्दिर में याजकन बरे बनावा गवा स्थान में एका खावइ क बजाए ओन सहरन में साधारण लोगन क संग खाएँस। परन्तु राजा योसिय्याह ओन ऊँची जगहन क नस्ट कइ डाएँस अउर याजकन क यरूसलेम लइ गवा। योसिय्याह ओन ऊँची जगहन क भी नस्ट किहे रहा जउन यहोसू दुआर क लगे बाई ओर रहेन। (यहोसू नगर क प्रसासक रहा।)

10तोपेत "हिन्नोम क पूत क घाटी" में एक जगह रही जहाँ लोग अपने बच्चन क मारत रहेन अउर लबार देवता मोलेक क सम्मान में ओनका वेदी पइ भारत रहेन। योसिय्याह उ जगहिया क ऐतना भ्रस्ट कइ डाएँस कि लोग उ जगहिया क प्रयोग न कइ सकइँ। 11बीते समइ में यहूदा क राजा लोग यहोवा क मन्दिर क दुआर क लगे कछू घोड़न अउर रथन रख छोड़े रहेन। इ नतन्मलेख नाउँ क महत्वपूर्ण अधिकारी क कमरे क लगे रहा। घोड़न अउ रथन सूर्य देव क सम्मान बरे रहेन। योसिय्याह घोड़न क हटाएँस अउर रथे क बार दिहस।

12बीते समइ में यहूदा क राजा लोग अहाब क इमारत क छते पइ बेदियन बनाइ रखे रहेन। राजा मनस्से भी यहोवा क मन्दिर क दुइ आँगनन में वेदियन बनाइ रखे रहा। योसिय्याह ओन वेदियन क तोरि डाएँस अउर ओनकर टूटे टूकन क किद्रोन क घाटी में लोकाइ दिहस।

13बीते समइ में राजा सुलेमान यरूसलेम क निअरे विध्वंसक पहाड़ी क दक्खिन में कछू ऊँच जगह बनाए रहा। राजा सुलेमान पूजा क ओन जगहन क, सीदोन क लोग जउन घिनौनी चीज अस्तोरेत क पूजा करत रहेन, ओकरे सम्मान बरे बनाए रहेन। सुलैमान मोआब लोगन क जरिये पूजित घिनौनी चीज कमोस क सम्मान बरे भी एक ठु वेदी बनाए रहा अउर राजा सुलैमान अम्मोन लोगन क जरिये पूजित घिनौनी चीज मिल्कोम क सम्मान बरे एक ऊँची जगह बनाए रहा। किन्तु राजा योसिय्याह ओन सबहिँ पूजा ठउरन क नस्ट कइ दिहस। 14राजा योसिय्याह सबहिँ स्मृति पाथरन अउ असेरा स्तम्भन क तोड़ डाएँस। तब उ ओन जगहन क ऊपर मृतकन क हाइन क छितराएँस।

15योसिय्याह बेतेल क वेदी अउ ऊँच जगहन क भी तोरि डाएँस। नबात क पूत यारोबाम इ वेदी क बनाए रहा। यारोबाम इस्त्राएँल स पाप कराए रहा। योसिय्याह ऊँची जगहन अउ वेदी दुइनउँ इ तोरि डाएँस। योसिय्याह वेदी क पाथर क टूकन कइ दिहस। तब उ ओनका कूटिके धुरि बनाइ दिहस अउर उ असेरा स्तम्भ क बार दिहस। 16योसिय्याह चारिहुँ कइँती नजर दउड़ाएँस अउर पहाड़े पइ कब्रन क लखेस। उ मनइयन क पठाएँस अउर पचे ओन कब्रन स हाइन लइ आएँन। तब उ वेदी पइ हाइन क बारेस। इ तरह योसिय्याह वेदी क भ्रस्ट कइ दिहस। इ उहइ तरह भवा जइसा यहोवा क सँदेसा क परमेस्सर क जन घोसित किहे रहा। परमेस्सर क जन एकर घोसणा तब किहन जब यारोबाम वेदी क बहल में खड़ा रहा।

तब योसिय्याह चारिहुँ कइँती निगाह दउड़ाएँस अउर परमेस्सर क जन क कब्र खोदेस।

17योसिय्याह कहेस, "जउने स्मारक क मई लखत हउँ, उ का अहइ?"

नगर क लोग ओहसे कहेन, "इ परमेस्सर क उ जने क कब्र अहइ जउन यहूदा स आवा रहा। इ परमेस्सर क जन उ सब बताए रहा जउन आप बेतेल में वेदी क संग किहन। उ इ सबइ बातन बहोत पहिले बताए रहा।"

18योसिय्याह कहेस, "परमेस्सर क जन क अकेला छोड़ द्या। ओकरी हाइन क जिन हटावा।" एह बरे उ पचे हाइन तजि दिहन, अउर साथ ही सोमरोन स आएँ परमेस्सर क जन क हाइन भी छोड़ दिहन।

19योसिय्याह सोमरोन नगर क सबहिँ ऊँच नगरन क पूजागृह क भी नस्ट कइ दिहस। इस्त्राएँल क राजा लोग पूजा गृहन क बनाए रहेन अउर उ यहोवा क बहोत कोहाइ दिहे रहेन। योसिय्याह ओन पूजा-गृहन क वइसे ही नस्ट किहेस जइसे उ बेतेल क पूजा क जगहन क नस्ट किहस।

20योसिय्याह सोमरोन में रहइवाले ऊँची जगहन क सबहिँ पुरोहितन क मार डाएँस। उ ओनहीं वेदियन पइ पुरोहितन क बध किहस। उ मनइयन क हाइन वेदियन पइ बारेस। इ तरह उ पूजा इ ओन जगहन क भ्रस्ट किहस। तब उ यरूसलेम में लउटि आवा।

### यहूदा क लोग फसल पर्व मनावत हीं

21तब राजा योसिय्याह सबहिँ लोगन क हुकुम दिहस। उ कहेस, "यहोवा अपने परमेस्सर क फसह पर्व मनाव। एका उहइ तरह मनाव जइसा साच्छीपत्र क पुस्तक में लिखा अहइ।"

22लोग इ तरह फसह पर्व क तब स नाहीं मनाए रहेन जब स इस्त्राएँल पइ न्यायाधीस सासन करत रहेन। इस्त्राएँल क कउनो राजा या यहूदा क कउनो भी राजा कबहुँ फसल पर्व क ऐतना बड़का उत्सव नाहीं मनाए रहा। 23एह बरे ओन लोग यहोवा बरे फसह पर्व योसिय्याह क राजकाल क अट्टारहवें बरिस में यरूसलेम में मनाएँन।

24योसिय्याह ओझा लोगन क, भूतसिच्छकन, गृह-देवतन, देवमूरतियन अउर यहूदा अउ इस्त्राएँल में जउन घिनवनी चिजियन क पूजा होत रही, सब क नस्ट कइ दिहस। योसिय्याह इ यहोवा क मन्दिर में याजक हिलकिय्याह क मिली पुस्तक में लिखे गएँ परमेस्सर क नेमन क अनुसार किहस।

25एकरे पहिले योसिय्याह क समान कबहुँ कउनो राजा नाहीं भवा रहा। योसिय्याह यहोवा कइँती, अपनी पूरी आतिमा अउर अपनी पूरी सक्ती स गवा। योसिय्याह क तरह कउनो राजा मूसा क सबहिँ नेमन क अनुसरण नाहीं किहे रहा। उ समइ स योसिय्याह क तरह क कउनो दूसर राजा कबहुँ नाहीं भवा।

26किन्तु यहोवा यहूदा क लोगन पइ किरोध करब तजेस नाहीं। यहोवा अबहुँ भी ओन पइ सारे कामन क बरे कोहान रहा जेनका मनस्से किहे रहा। 27यहोवा कहेस, "मई इस्त्राएँलियन क ओनकर देस तजइ क मजबूत किहेउँ। मई

यहूदा क संग वइसा ही करब मई यहूदा क अपनी आँखिन स ओझल करब। बेसक मई यरूसलेम अउर एकर मन्दिर क चुना रहा जेकर बारे मँ मई कहे रहेउँ, 'मोर नाउँ हुवाँ रहब मई यरूसलेम अउर मन्दिर क रद्द कइ देब।"'

28योसियाह जउन दूसर काम किहस उ सबइ "यहूदा क राजा लोगन क इतिहास" क किताबे मँ लिखे अहई।

### योसियाह क मउत

29योसियाह क समइ मिस्त्र क राजा फिरौन नको अस्सूर क राजा क खिलाफ जुद्ध करत परात नदी क गवा। राजा योसियाह नको स भेंटइ मगिद्दो गवा। फिरौन नको योसियाह क लखि लिहस अउर तब ओका मार डाएस। 30योसियाह क अधिकारियन ओकरे बदन क एक तु रथे मँ धरेन अउर ओका मगिद्दो स यरूसलेम लइ गएन। उ पचे योसियाह क ओकरी अपनी कब्र मँ दफनाएन।

तब साधारण लोग योसियाह क पूत यहोआहाज क लिहन अउर ओकर राज्ज अभिसेक कइ दिहन। उ पचे यहोआहाज क नवा राजा बनाएस।

### यहोआहाज यहूदा क नवा राजा बनत ह

31यहोआहाज तेईस बरिस क रहा, जब उ राजा बना। उ यरूसलेम मँ तीन महीने तलक हुकूमत किहस। ओकर महतारी लिब्ना क यिर्मयाह क बिटिया हमूतल रही। 32यहोआहाज उ सबइ काम किहस जेनका यहोवा बुरा बताए रहा। यहोआहाज उ सब ही काम किहस जेनका ओकरे पुरखन किहे रहेन।

33फिरौन नको यहोआहाज क हमात प्रदेश मँ रिबला मँ कैद रखेस। एह बरे यहोआहाज यरूसलेम मँ सासन नाहीं कइ सका। फिरौन नको यहूदा क सात हजार पाँच सौ पौण्ड चाँदी अउर पचहतर पौण्ड सोना देइ क मजबूर किहस।

34फिरौन नको योसियाह क पूत एल्याकीम क नवा राजा बनाएस। एल्याकीम अपने बाप योसियाह क जगह लिहस। फिरौन-नको एल्याकीम क नाउँ बदलिके यहोयाकीम कइ दिहस अउर फिरौन-नको यहोआहाज क मिस्त्र लइ गवा। यहोआहाज मिस्त्र मँ मरा। 35यहोयाकीम फिरौन क सोना अउ चाँदी दिहस। किन्तु यहोयाकीम साधारण जनता स बसूलेस अउर उ धने क उपयोग फिरौन नको क देइ मँ किहस। एह बरे हर मनई चाँदी अउ सोना क अपने हीसे क भुगतान किहस अउर राजा यहोयाकीम फिरौन क उ धन दिहस।

36यहोयाकीम जब राजा भवा तउ उ पच्चीस बरिस क रहा। उ गियारह बरिस तलक यरूसलेम मँ राज्ज किहस। ओकर महतारी रूमा क अदायाह क बिटिया जबीदा रही। 37यहोयाकीम उ सबइ काम किहस जेनका यहोवा बुरा बताए रहा। यहोयाकीम उ सब ही काम किहस जउन ओकरे पुरखन किहे रहेन।

### राजा नबूकदनेस्सर यहूदा आबत ह

24 यहोयाकीम क समइ मँ बाबेल क राजा नबूकदनेस्सर यहूदा देस मँ आवा। यहोयाकीम नबूकदनेस्सर क सेवा तीन बरिस तलक किहस। तब यहोयाकीम नबूकदनेस्सर

क खिलाफ होइ गवा अउर ओकरे विरूद्ध विद्रोह कइ दिहा। 2यहोवा कसदियन, अरामियन, मोआबियन अउ अम्मोनियन क दलन क यहोयाकीम क विरूद्ध लइइ बरे पठएस। यहोवा ओन दलन क यहूदा क नस्ट करइ बरे पठएस। इ वइसा ही भवा जइसा यहोवा करे रहा। यहोवा अपने सेवक नबियन क उपयोग उ कहइ बरे किहे रहा।

3यहोवा ओन घटनन क यहूदा क संग घटित होइ क आदेस दिहस। इ तरह उ ओनका अपनी निगाह स दूर करी। उ इ एन पापन क कारण किहस जउन मनस्से किहस। 4यहोवा इ एह बरे किहस कि मनस्से बहोत स निरपराध मनइयन क मार डाएस। मनस्से ओनके खून स यरूसलेम क भरि दिहस अउर यहोवा ओन पापनक छिमा नाहीं कइ चाहत रहा।

5यहोयाकीम जउन दूसर काम किहस उ सबइ "यहूदा क राजा लोगन क इतिहास" क किताबे मँ लिखे अहई।

6यहोयाकीम मरा अउर अपने पुरखन क संग दफनावा गवा। यहोयाकीम क पूत यहोयाकीम ओकरे पाछे नवा राजा भवा।

7मिस्त्र क राजा आपन सीमा स ओग अउर जियादा जमीन पइ कब्जा नाहीं कइ पाएस, काहेकि बाबेल क राजा मिस्त्र क नाला स परात नदी तलक सारे देस पइ, अधिकार कइ लिहे रहा। ओन जगहन पइ पहिले भी मिस्त्र क राजा क सासन रहा।

### नबूकदनेस्सर यरूसलेम पइ अधिकार करत ह

8यहोयाकीम जब हुकूमत करइ लाग तब उ अट्टारह बरिस क रहा। उ यरूसलेम मँ तीन महीने तलक हुकूमत किहस। ओकर महतारी यरूसलेम क एलनातान क बिटिया नहुस्ता रही। 9यहोयाकीम ओन कामन क किहस जेनका यहोवा बुरा बताए रहा। उ उ सब ही सब काम किहस जउन ओकर बाप किहे रहेन।

10उ समइ बाबेल क राजा नबूकदनेस्सर क अधिकारी यरूसलेम आएन अउर हमला करइ बरे नगर क घेरि लिहस। 11तब बाबेल क राजा नबूकदनेस्सर नगरे मँ आवा। जब ओकर अधिकारियन एका हमला बरे घेरइ राखत रहेन। 12यहूदा क राजा यहोयाकीम बाबेल क राजा स भेंटइ बाहेर आवा। यहोयाकीम क महतारी, ओकर अधिकारी, प्रमुख अउ दूसर अधिकारी भी ओकरे संग गएन। तब बाबेल क राजा यहोयाकीम क बन्दी बनाइ लिहस। इ नबूकदनेस्सर क सासनकाल क अठवाँ बरिस रहा।

13नबूकदनेस्सर सारा खजाना लइ लिहस जउन यहोवा क मन्दिर मँ अउर राजा क महल मँ रहा। उ नबूकदनेस्सर ओन सबहिं स्वर्ण-पात्रन क टूकन मँ काट डाएस जेनका इस्त्राएल क राजा सुलैमान यहोवा क मन्दिर क बरे बनाए रहा। इ वइसा ही भवा जइसा यहोवा कहे रहा।

14नबूकदनेस्सर यरूसलेम क सबहिं लोगन क बन्दी बनाएस। उ सबहिं प्रमुखन अउर दूसर धनी लोगन क बन्दी बनाइ लिहस। उ दस हजार लोगन क धरेस अउर ओनका बन्दी बनाएस। नबूकदनेस्सर सबहिं कुसल मजदूरन अउर कारीगरन क लइ लिहस। साधारण लोगन मँ स सबन त गरीब लोगन क अलावा नगर मँ कउनो भी नाहीं बचे

रहेन। 15नबूकदनेस्सर यहोयाकीन क बाबेल लइ गवा। नबूकदनेस्सर राजा क महतारी, ओकर मेहररूअन, अधिकारी अउर देस क प्रमुख लोगन क भी लइ गवा। नबूकदनेस्सर ओनका यरूसलेम स बाबेल बन्दी क रूप में लइ गवा। 16बाबेल क राजा साढ़े सात हजार फउजी अउर एक हजार कुसल मजदूर अउर कारीगर भी लइ गवा। इ पचे सबहिं मनई प्रसिच्छित फउजी रहेन अउर जुद्ध में लइ सकत रहेन। बाबेल क राजा ओनका बन्दी क रूप में बाबेल लइ गवा।

### राजा सिदकिय्याह

17बाबेल क राजा मत्तन्याह क नवा राजा बनाएस। मत्तन्याह यहोयाकीन क चाचा रहा। बाबेल क राजा मत्तन्याह क नाउँ बदलिके सिदकिय्याह रख दिहस। 18सिदकिय्याह जब सासन करब सुरू किहस तउ उ इक्कीस बरिस क रहा। उ गियारह बरिस यरूसलेम में सासन किहस। ओकर महतारी लिब्ना क यिर्मयाह क बिटिया हमूतल रही। 19सिदकिय्याह उ सबइ काम किहेस जेनका यहोवा बुरा बताए रहा। सिदकिय्याह उ सब ही सारे काम किहेस जउन यहोयाकीम किहे रहा। 20यहोवा यरूसलेम अउ यहूदा पइ ऐतना कोहाइ गवा कि उ ओनका दूर लोकाइ दिहस।

### नबूकदनेस्सर क जरिये सिदकिय्याह क हुकूमत क समाप्ति

उ समइ सिदकिय्याह बाबेल क राजा क खिलाफ बिद्रोह कइ दिहस।

**25** 1एह बरे बाबेल क राजा नबूकदनेस्सर अपनी सारी फउज क संग यरूसलेम क खिलाफ जुद्ध करइ आवा। सिदकिय्याह क राज्ज क नौवें बरिस क दसवें महीने क दसवें दिन इ घटना घटित भइ। नबूकदनेस्सर यरूसलेम क चारिहुँ कइँती डेरा डाएस। तब उ पचे यरूसलेम क चारिहुँ कइँती ढलवान खड़ी किहन। 2नबूकदनेस्सर क फउज यरूसलेम क चारिहुँ कइँती सिदकिय्याह क यहूदा में सासनकाल क गियारहवे बरिस तलक बनी रही। 3उ नगर में भुखमरी क दसा बद स बदतर होत जात रही। चउथे महीने क नौवें दिन साधारण लोगन बरे कछू भी भोजन नहीं रहि गवा रहा।

4नबूकदनेस्सर क फउज नगर प्राचीर में एक ठु छेद बनाएस। उ राति क राजा सिदकिय्याह अउर ओकर सारे फउजी पराइ गएन। उ पचे राजा क बाग क सहारे दुइ देवान क दुआर स बच निकरेन। बाबेल क फउज नगर क चारिहुँ कइँती रही। किन्तु सिदकिय्याह अउर ओकर फउज रेगिस्ताने कइँती क सड़क पइ पराइ निकरेन। 5बाबेल क फउज सिदकिय्याह क पाछा किहस अउर ओका यरीहो क लगे रेगिस्तान में पकड़ लिहस। सिदकिय्याह क सारी फउज पराइ गइ अउर ओका अकेला छोड़ दिहस।

6बाबेल सिदकिय्याह क रिबला में बाबेल क राजा क लगे लइ गएन। बाबेल क राजा सिदकिय्याह क दण्ड देइ क निर्णय लिहस। 7उ पचे सिदकिय्याह समन्वा ओकरे पूतन क मार डाएस। तब उ पचे सिदकिय्याह क आँखिन निकारि

लिहन। उ पचे ओका जंजीरे में जकरेन अउर ओका बाबेल लइ गएन।

### यरूसलेम क नस्ट कइ दीन्ह गवा

8नबूकदनेस्सर क बाबेल क सासनकाल क उन्नीसवे बरिस क पाँचवे महीने क सतवे दिन नबूजरदान यरूसलेम आवा। नबूकदनेस्सर क अंगरच्छकन क नायक नबूजरदान रहा। 9नबूजरदान यहोवा क मन्दिर अउ राजमहल बार डाएस। नबूजरदान यरूसलेम क सबहिं घरन क भी बार डाएस। उ बड़की इमारतन क भी बार डाएस।

10तब नबूजरदान क संग जउन बाबेल क फउज रही उ यरूसलेम क चारिहुँ कइँती क देवान क महराइ दिहस। 11अउर नबूजरदान ओन सबहिं लोगन क धरेस जउन तब तलक नगर में बचे रह गए रहेन। नबूजरदान सबहिं लोगन क बन्दी बनाइ लिहस अउर ओनका भी जउन आत्मसमर्पण करइ क कोसिस लिहन। 12नबूजरदान सिरिफ साधारण मनइयन में सब स गरीब लोगन क हुवाँ रहइ दिहस। उ ओन गरीब लोगन क हुवाँ अंगूर अउर दूसर फसलन क देखरेख क बरे रहइ दिहस।

13बाबेल क फउजी यहोवा क मन्दिर क काँसे क वस्तुअन क टूकन कइ डाएन। उ पचे काँसे स स्तम्भन, काँसे क गाड़ी क अउर काँसे क बिसाल सरोवर क भी टूकन कइ डाएन, तब बाबेल क फउजी ओन काँसे क टूकन क बाबेल लइ गएन। 14कसदियन बर्तन, बेलचे, दीप-झारू चम्मच अउर काँसे क बर्तन जउन यहोवा क मन्दिर में काम आवत रही, क भी लइ गवा। 15नबूजरदान सबहिं कढ़ाहियन अउ पियालन क लइ लिहस। उ जउन सोने क बने रहेन ओनका सोना क बरे अउर जउन चाँदी क बने रहेन ओनका चाँदी क बरे लिहस। 16-17जउन चिजियन उ लिहस ओनकर सूची इ अहइ: दुइ काँसे क खम्भा, एक हौज अउर गाड़ियन जेका सुलैमान क जरिये यहोवा क मन्दिर बरे बनावा गवा रहा। इन चिजियन में लगा काँसा ऐतना भारी रहा कि ओका तोला नहीं जाइ सकत रहा। हर एक स्तम्भ लगभग सताइस फुट ऊँचा रहा। स्तम्भन क सीर्स काँसे क बने रहेन। हर एक सीर्स साढ़े चार फुट ऊँचा रहा। हर एक सीर्स पइ जाल अउर अनार क नमूना बना रहा। एकर सब कछू काँसे क बना रहा। दुइनउँ खम्भन पइ एक ही प्रकार क आहतियन रहिन।

### बन्दी बनावा गए यहूदा क लोग

18तब नबूजरदान मन्दिर स महायाजक सरायाह, दूसरा याजक सपन्याह अउर तीन दुआर रच्छनन क लिहस।

19नगर में नबूजरदान एक ठु अधिकारी क लिहस। उ सेना क सेनापति रहा। नबूजरदान राजा क पाँच सलाहकारन क भी लिहस जउन नगर में पाए गएन। अउर उ सेनापति क सचिव क लिहस। सेनापति क सचिव उ मनई रहा जउन साधारण लोगन क गणना करत रहा अउर ओनमें स कछू क फउजी क रूप में चुनत रहा। नबूजरदान साठ दूसर लोगन क भी लिहस जउन नगर में पाए गएन।

20-21 सेनापति तब नबूजरदान एन सबहिं लोगन क रिबला में बाबेल क राजा क सम्नवा लइ गवा। बाबेल क राजा हमात क छेत्र रिबला में एनका मार डाएस। इ तरह यहूदा क लोगन क कैदी बनाइके ओनका, ओनके देस स निर्वासित कीन्ह गवा।

### गदल्याह, यहूदा क सासक

22 बाबेल क राजा नबूकदनेस्सर यहूदा देस में कछू लोगन क छोड़ दिहे रहा। उ अहीकाम क पूत गदल्याह क यहूदा क ओन लोगन पइ राजपाल बनाएस। अहीकाम सापान क पूत रहा।

23 जब फउज क सबहिं सेनापतियन अउ सिपाहियन सुनेन कि बाबेल क राजा गदल्याह क राजपाल बनाएस ह। तउ उ पचे गदल्याह क लगे मिस्पा में आएन। फउजी सेनापतियन में नतन्याह क पूत इस्माएल, कारेहू क पूत योहानान, नतोपाई तन्हूमेत क पूत सरायाह अउ माकाई क पूत याजन्याह रहेन। 24 तब गदल्याह इ फउजे क सेनापतियन अउर ओनके मनइयन अउर ओनके मनइयन क बचन दिहस। गदल्याह ओनसे कहेस, “बाबेल क अधिकारियन स जिन डेराअ। इ देस में रहा अउर बाबेल क राजा क सेवा करा। तब तोहरे पचन्क संग सब कछू ठीक रही।”

25 किन्तु सतवें महीने राजा क परिवारे क एलीसामा क पोता व नतन्याह क पूत इस्माएल दस मनसेधुअन क संग आवा अउ गदल्याह क मार डाएस। उ पचे मिस्पा में गदल्याह क संग जउन यहूदी अउ कासदी रहेन, ओनका भी मार डाएस। 26 तब सबहिं लोग सब स कम महत्वपूर्ण अउर सब स जियादा अउ सेना क नायक मिस्त्र क पराइ गएन। उ पचे एह परे पराइन् कि उ पचे कसदियन स ससान रहेन।

27 पाछे राजा एवील्मरोदक बाबेल क राजा बना। उ यहोयाकीन क जेल स आज़ाद कई दिहस। इ यहूदा क राजा यहोयाकीन क बन्दी बनाए जाइ क सैतीसवें बरिस में भवा। इ एवील्मरोदक क सासन सुरू करइ क बारहवें महीने क सत्ताइसवें दिन भवा। 28 एवील्मरोदक यहोयाकीन स दयापूर्वक बातन किहस। एवील्मरोदक यहोयाकीन क बाबेल में रहइवाले ओकरे सबहिं साथी राजा लोगन स जियादा ऊँच स्थान प्रदान किहस। 29 एवील्मरोदक यहोयाकीन क बन्दीगृह क वस्त्रन क पहिरब बन्द करवाएस। यहोयाकीन एवील्मरोदक क संग एक ही मेज पइ खाएस। उ अपनी बाकी जिन्नगी में हर एक दिन अइसा ही किहस। 30 इ तरह राजा एवील्मरोदक यहोयाकीन क जिन्नगी भर नियमित रूप स रह दिन क भोजन दिहस।



# पहिला राजा

## अदोनियाह राजा बनइ चाहत ह

1 राजा दाऊद बहोत जियादा बूढ़ा रहा। उ अपन क गरम नहीं रख सकेत। ओकर सेवक ओका कमरी स ओढ़ावत रहेन मुला उ फुन भी ठंडा रहत रहा। 2एह बरे ओकर नौकर ओहसे कहेन, “हम आप क देख-भाल बरे एक ठु जुवती क हेरब। उ आप क निचके ओलरी अउ आप क गरम राखी।” 3एह बरे राजा क नउकरन इस्राएल पहुँटा में चारिहुँ कइँती एक ठु जुवती क हेरब सुरु किहन। उ पचे राजा क गरम रखइ बरे एक ठु सुन्नर लड़की क हेरत रहेन। ओनका अबीसग नाउँ क एक लड़की मिली। उ सुनेमि नगर क रही। उ पचे जुवती क राजा क लगे लइ आएन। 4लड़की बहोत सुन्नर रही। उ राजा क देख-रेख अउ सेवा किहस। किन्तु राजा दाऊद ओकरे संग सारीरक सम्बन्ध नहीं किहस।

5-6अदोनियाह राजा दाऊद अउर ओकर पत्नी हग्गीत क पूत रहा। अदोनियाह आपन भाई अबसालोम क बाद पइदा भवा। उ बहोत सुन्नर मनई रहा। राजा दाऊद ओकर सुधार कबहुँ नहीं किहस। उ कबहुँ नहीं पुछेस: “तू काहे अइसा बेउहार करत ह?” अदोनियाह बहोत घमम्डी होइ गवा, उ फइसला किहस, मई अगला राजा होउब एह बरे उ अपने बरे एक ठु रथ, घोड़न अउ अगवा दउड़इवाले पाचस मनइयन क लिआएस।

7अदोनियाह सरुयाह क पूत योआब अउ याजक एब्यातार स बातन किहस। उ पचे ओकरे राजा बनई बरे मदद देइ क फइसला किहस। यह बरे उ पचे ओकर मदद किहेन। 8मुला कछु लोग उ स्वीकार नहीं किहेन जउन कछु अदोनियाह करत रहा। उ पचे राजा दाऊद क संग वफादार रहेस। उ अदोनियाह क संग नहीं मिलेस। इ सबइ लोग याजक सादोक, यहोयादा क पूत बनायाह, नातान, नबी, सिमी, रेई अउर राजा दाऊद क बिसेस रच्छक रहेन। 9तब अदोनियाह कछू जनावरन क मेलबलि बरे मारेस। उ कछू भेड़िन, कछू गइयन अउ कछू मोटवार बछवन क मारेस। अदोनियाह एनरोगेल क लगे जोहेलैत क चट्टान पइ इ सबइ बलियन चढ़ाएस। अदोनियाह आपन सबहिँ भाइयन, (राजा क दूसर पूतन) अउ यहूदा क समूचे राज्ज कर्मचारियन क न्यौतेस। 10मुला अदोनियाह नातान नबी, या बनायाह या अपने बाप क खास रच्छकन या अपने भाई सुलैमान क न्यौतेस नहीं।

## नातान अउर बतसेबा क सुलैमान क बारे में बात

11जब नातान एकरे बारे में सुनेस, उ सुलैमान क महतारी बतसेबा क लगे गवा। नातान ओहसे पूछेस, “का तू सुन्या

ह कि हग्गीत क पूत अदोनियाह का करत अहइ? उ अपने क राजा घोसित कइ दिहेस अउ हमार सुआमी राजा दाऊद एकरे बारे में कछू नहीं जानत। 12तोहार जिन्नगी अउ तोहार पूत सुलैमान क जिन्नगी खतरे में पइ सकत ह। किन्तु मई तोहका बताउब कि अपने क बचावइ बरे तोहका का करइ चाही। 13राजा दाऊद क लगे जा अउर ओहसे कहा, ‘मोर राजा, आप मोका बचन दिहे रहेन कि आप क पाछे मोर पूत सुलैमान अगला राजा होइ। फुन, अदोनियाह राजा काहे बन गवा ह?’ 14तब, जब तू ओहसे बात कर ही रही होउबी, मई अन्दर आउब। तोहार जाइ क पाछे, तब मई जउन कछू घटित भवा ह ओकरे बारे में राजा क बताउब। एहसे इ प्रदर्शित होइ कि तू अदोनियाह क बारे में जउन कछू कह्या ह, उ फुरइ अहइ।”

15एह बरे बतसेबा राजा क सोवइ क कमरा में भीतरे ओहसे मिलइ गइ। राजा बहोत जियादा बुढ़वा रहा। सुनेमिन स आई लड़की अबीसग हुवाँ ओकर देख-रेख करत रही। 16बतसेबा राजा क समन्वा प्रणाम करइ निहुरी। राजा पूछेस, “तू का चाहति अहा?”

17बतसेबा जवाब दिहस, “मोर राजा, आप अपने परमेस्सर, यहोवा क नाउँ लइके मोहसे प्रतिग्या किहे रह्या। आप कहे रह्या, ‘तोहार पूत सुलैमान मोरे पाछे राजा होइ। मोरे सिंहासने पइ सुलैमान हुकूमत करी।’ 18मुला अब अदोनियाह राजा होइ गवा ह अउर आप एका जानतेन भी नहीं। 19अदोनियाह मेलबलि बरे कहउ जनावरन क मार डाएस ह। उ बहोत स बर्धन, मोटवार बछवन अउ भेड़िन क मारेस ह अउर उ आप क सबहिँ पूतन क न्यौतेस ह। उ याजक एब्यातार अउ आप क फउज क सेनापति योआब क भी न्यौतेस ह। किन्तु उ आप क पूत सुलैमान क न्यौतेस नहीं, जउन आप क सेवा करत ह। 20मोर सुआमी अउर राजा, इस्राएल क सबहिँ लोगन क निगाहन आप पइ लगी अहइ। उ पचे आप क इ निर्णय क प्रतीच्छा करत अहइ कि आप क पाछे कउन राजा होइ। 21जब आप मरिही तउ आप अपने पुरखन क संग दफनावा जइहीं। तउ लोग मोर अउर मोर पूत सुलैमान क संग अपराधी जइसा बेउहार करिही।”

22जब बतसेबा राजा स बातन करत रही, नातान नबी ओहसे भेंटइ आवा। 23सेवक लोग राजा स कहेन, “नातान नबी आवा अहइ।” एह बरे नातान प्रवेस किहस अउ राजा क लगे गवा। नातान राजा क समन्वा धरती तलक निहुरा। 24तब नातान कहेस, “मोर राजा, का आप इ घोसना कइ दिहा ह कि आप क पाछे अदोनियाह नवा राजा होइ? का आप इ निर्णय कइ लिहा ह कि आप क पाछे अदोनियाह

लोगन पड़ हुकूमत करी। 25 आजु उ घाटी में खास मेलबलियन भेंट किहस ह। उ कइउ बर्धन, मोटवार बछवन अउर भेड़िन क मारेस ह उ आप क दूसर सबहि पूतन, फउज क सेनापतियन अउ याजक एब्यातार क न्यौतेस ह। अब उ पचे ओकरे संग खात अहई अउर पिअत अहई अउर उ पचे कहत अहई, 'राजा अदोनिय्याह दीर्घायु होइ।' 26 मुला उ मोका या याजक सादोक, यहोयादा क पूत बनायाह या आप क पूत सुलैमान क न्यौतेस नाहीं। 27 मोर सुआमी अउर राजा, का आप आपन सेवकन हम पचन्क, बिना कहइ इ किहसे? आप हम लोगन स पहिले ही काहे नाहीं कह्या कि उ तोहार पाछे होइवाला राजा चुना गवा ह?"

28 तब राजा दाऊद कहेस, "बतसेबा स भितरे आवइ क कहा।" एह बरे बतसेबा भितरे आइ अउर राजा क समन्वा खड़ी भई।

29 तब राजा एक प्रतिग्या किहसे: "यहोवा परमेस्सर मोका हर एक खतरा स बचाएस ह अउर यहोवा क जिन्नगी क किरिया खाइके मई तोहसे प्रतिग्या करत हउँ। 30 मई आजु उ प्रतिग्या क पूरा करब जेकर बचन मई पहिले तोहका दिहे रहेउँ। मई इ प्रतिग्या यहोवा इस्त्राएल क परमेस्सर स किहे रहेउँ कि तोहार पूत सुलैमान मोरे पाछे राजा होइ अउर मोरे पाछे सिंहासने पड़ मोरे जगह उहइ लेइ। यह बरे आजु मई आपन प्रतिग्या क पूरा करब।"

31 तब बातसेबा राजा का समन्वा धरती तलक निहुरी के प्रणाम किहसे अउ कहेस, "मोर सुआमी राजा दाऊद हमेसा हमेसा जिअत रहे!"

### सुलैमान नवा राजा क रूप में चुना जात ह

32 तब राजा दाऊद स कहेस, "याजक सादोक नातान नबी अउ यहोयादा क पूत बनायाह स हिआँ अन्दर आवइ क कहा।" एह बरे तीनहुँ मनइयन राजा क समन्वा आएन। 33 तब राजा ओनका कहेस, "मोरे अधिकारियन क अपने संग ल्या अउर मोरे पूत सुलैमान क मोरे निजी खच्चर पड़ बइठावा। ओका गीहोन सोता पड़ लइ जा। 34 उ जगह पड़ याजक सादोक अउ नातान नबी, इस्त्राएल क राजा क रूप में ओकर अभिसेक करई। तू लोग तुरही बजावा अउ इ घोसणा करा, 'इ सलेमान नवा राजा बा।' 35 तब एकरे पाछे ओकरे संग हिआँ लउट आवा। सुलैमान मोरे सिंहासने पड़ बइठी अउर हमरे जगह पड़ नवा राजा होइ। मई सुलैमान क इस्त्राएल अउ यहूदा क सासक होइ बरे चुनेउँ ह।"

36 यहोयादा क पूत बनायाह राजा क जवाब दिहस, "आमीन! यहोवा परमेस्सर खुद इ कहेस ह, मोर सुआमी अउ राजा! 37 मोर सुआमी राजा, यहोवा हमेसा आप क संग रहेस ह। यहोवा सुलैमान क भी संग रहइ अउर ओकर राज्ज तेहार राज्ज स भी बड़का अउर मजबूत होइ, मोर सुआमी अउ राजा!"

38 एह बरे सादोक, नातान, बनायाह अउ राजा क अधिकारियन राजा दाऊद क आग्या क पालन किहस। उ पचे सुलैमान क राजा दाऊद क खच्चरे पड़ चढ़ाएन अउर ओकरे संग गीहोन क सोते पड़ लइ गएन। 39 याजक

सादोक पवितर तम्बू स तेल लिहस। सादोक, इ देखावइ क बरे कि सुलैमान राजा अहइ, ओकरे मूँडे पड़ तेल डाएस। उ पचे तुरही बजाएन अउर सबहि लोग उद्घोस किहेन, "राजा सुलैमान दीर्घायु होइ।"

40 सबहि लोग नगर में सुलैमान क पाछे आएन। उ पचे बांसुरी बजावत रहेन अउ खुसी क नारा लगावत रहेन। उ पचे एँतना सोर करत रहेन कि धरती काँप उठी।

41 इ समइ अदोनिय्याह अउ ओकर संग क सबहि अतिथि आपन भोजन खतम करत रहेन। उ पचे तुरही क अवाज सुनेन। योआब पूछेस, "इ सोर कइसा अहइ? नगर में का होत अहइ?"

42 जब योआब बोलत ही रहा, याजक एब्यातार क पूत योनातन हुँवा पहाँचा। अदोनिय्याह कहेस, "हिआँ आवा। तू एक योग्य मनई अहा। मोका सुभ समाचार सुनावा।"

43 मूला योनातन जवाब दिहसे, "नाही! इ तोहरे बरे सुभ सूचना नाहीं अहइ। हमरे राजा दाऊद सुलैमान क नवा राजा बनाएस ह। 44 अउर राजा दाऊद याजक सादोक, नातान नबी, यहोयादा क पूत बनायाह अउर राजा क सबहि अधिकारियन क ओकरे संग पठाएस ह। उ पचे सुलैमान क राजा क खच्चर पड़ बइठाएन। 45 तब याजक सादोक अउ नातान नबी गीहोन सोते पड़ सुलैमान क अभिसेक किहेन अउर तब उ पचे नगर में गएन। लोग ओनकर अनुसरण किहेन अउर अब नगर में लोग बहोत खुस अहई। उ सोर जउन् तू सनत अहा, उहइ क अहइ। 46 सुलैमान अब राजा क सिंहासने पड़ बइठा अहइ।

47 हिआँ तलक कि राजा क सबहि सेवक राजा दाऊद क धन्यवाद देइ बरे आएन, अउ कहेन, 'राजा दाऊद, आप एक ठु महान राजा अहई अउर अब हम पराथना करित हीं कि आप क परमेस्सर, सुलैमान क आप स भी जियाद प्रसिद्ध बनाई। आप क परमेस्सर सुलैमान क आप स भी जियादा महान राजा बनाई अउर ओकर राज्ज आप क राज्जय स भी जियादा महान होई।'

"हिआँ तलक कि राजा दाऊद भी हुवाँ रहेन, अउर उ अपने बिछउना स ही निहुरेन। 48 राजा दाऊद केहस, 'इस्त्राएल क परमेस्सर यहोवा क स्तुति करा। यहोवा मोरे पूतन में स एक क मोरे सिंहासने पड़ बइठाएस ह अउर एका मोका लखइ दिहसे ह।'"

49 तब अदोनिय्याह क सबहि अतिथि डेराइ गएन अउर हाली स चले गएन। 50 अदोनिय्याह भी सुलैमान स डेराइ गवा रहा। एह बरे उ वेदी तलक गवा अउ वेदी क सींगन क धइ लिहस। 51 तब कउनो सुलैमान स कहेस, "अदोनिय्याह तोहसे बहोत डेरान अहइ। अदोनिय्याह वेदी क लगे अहइ। उ वेदी क सींगन क धइ लिहसे ह अउ ओका तजइ स इन्कार करत ह। अदोनिय्याह कहत ह, 'राजा सुलैमान स इ प्रतिग्या करइ क कहा कि उ मोका मारी नाहीं।'"

52 एह बरे सुलैमान जवाब दिहसे, "जदि अदोनिय्याह इ प्रमाणित करत ह कि उ एक नीक मनई अहइ तउ मई प्रतिग्या करत हउँ कि ओकरे मूँडे क एक ठु बार बाँका नाहीं होइ। किन्तु जदि उ कछू बुरा करी तउ मार दीन्ह जाइ।" 53 तब राजा सुलैमान कछू मनइयन क अदोनिय्याह क

लिआवइ बरे पठएस। उ पचे ओका वेदी स नीचे लिआएस। अदोनिय्याह क राजा सुलैमान क समन्ना आवा अउर निहुरिके प्रणाम किहेस। तब सुलैमान कहेस, “घरे जा।”

### राजा दाऊद क मउत

2 दाऊद क मरइ क समइ लगभग आइ पहेंवा। एह बरे दाऊद सुलैमान स बातन किहस अउर ओहसे कहेस, 2“मई मरइ प हउँ जइसा सबहिं मनई मरत ह। लेकिन तू मज़बूती क संग बढत अहा अउर एक मनई बनत अहा।” 3ओन सबहिं आदेसन क होसियारी क संग पालन करा जउन यहोवा हमार परमेस्सर दिहस ह। ओकरे सबहिं नेमन, आदेसन, फइसलन अउ करारन क पालन करा जउन मूसा क बेवस्था क किताबे में लिखा अहइ। जदि तू एन सबहिं क पालन करब्या तउ तू जउन कछू करब्या अउर जहाँ कहुँ जाब्या, सफल होब्या। 4अउर जदि तू यहोवा क आग्या क पालन करत रहब्या तउ यहोवा मोरे बरे कीन्ह गइ प्रतिग्यन क पालन करी। मोरे बरे यहोवा जउन प्रतिग्या किहेस, उ इ अहइ, ‘तोहरे पूतन क मोरी आग्या क पालन करइ चाहो अउर ओनका वइसे रहइ चाही जइसा रहइ बरे मई कहउँ। तोहरे पूतन क पूरे हिरदय अउ आतिमा स मोहमाँ बिस्सास रखइ चाही। जदि तोहरे पूत इ करिहीं तउ तोहरे परिवार क एक तु मनई सदा इस्त्राएल क लोगन क सासक होइ।”

5दाऊद इ भी कहेस, “तू इ भी याद राखा जउन सरुयाह क पूत योआब मोरे संग किहेस ह। उ इस्त्राएल क फउजे क दुइ सेनापतियन क मार डाएस। उ नेर क पूत अब्नेर अउ येतेर क पूत अमासा क मारेस। तोहका जरूर याद होइ कि उ ओनका सान्ति क समइ मारेस रहा। एन मनइयन क खून क दाग ओकरी तरवार क मूठ अउ ओकरे पहिरे भए फउजियन क जून पइ लगा भवा रहा। मोका ओनका सजा देइ चाही। 6किन्तु अब राजा तू अहा। एह बरे तोहका ओका इ तरह सजा देइ चाही जेका तू सब स जियादा बुद्धिमत्तापूर्ण समुझा। किन्तु तोहका इ निहचइ कइ लेइ चाही कि उ मार डावा जाइ। ओका बुढ़ापे क सान्ति स भरी मौत न पावइ द्या।

7“गिलाद क बर्जिल्लै क बच्चन पइ दयालु रहा। ओनका आपन मीत होइ द्या अउ अपनी मेज पइ भोजन करइ द्या। उ पचे मोर तब मदद किहेन, जब मई तोहरे भाई अबसालोम स भाग खड़ा भवा रहेउँ।

8“अउर याद राखा गेरा क पूत सिमी तोहरे संग हिआ अहइ। उ बहुरीम क बिन्यामीन परिवार समूह क अहइ। याद राखा कि उ मोका दुःखदायक सराप स सरापेस ह\* जउने दिन मई महनैम क भाग गवा रहेउँ। तब उ मोहसे मिलइ यरदन नदी पइ आवा रहा। किन्तु मई यहोवा क समन्वा प्रतिग्या किहे रहेउँ, ‘सिमी मई तोहका नाहीं मारब।’ 9किन्तु सिमी क सजा दिए बगैर न रहइ द्या। तू बुद्धिमान मनई अहा, तू समुझ जाब्या कि ओकरे संग का करइ चाही। मुला ओका बुढ़ापे क सान्ति स भरी मौत न पावइ द्या।”

10तब दाऊद मर गवा। उ दाऊद नगर में दफनावा गवा। 11दाऊद इस्त्राएल पइ चालीस बरिस तलक हुकूमत किहस। उ हेब्रोन में सात बरिस अउ यरूसलेम में तैतीस बरिस तलक हुकूमत किहस।

### सुलैमान आपन राज क देख-रेख

12अब सुलैमान दाऊद क सिंहासन पइ हुकूमत करइ लाग अउर उ आपन राज पइ पूरा अधिकार कइ लिहेन।

13इ समइ हग्गीत क पूत अदोनिय्याह सुलैमान क महतारी बतसेबा क लगे गवा। बलसेबा ओहसे, पूछेस, “का तू सान्ति क भाव स आवा अहा?”

अदोनिय्याह जवाब दिहस, “हाँ इ सान्ति स भरा मिलन अहइ। 14मोका आप स कछू कहब अहइ।” बतसेबा कहेस, “तउ कहा।”

15अदोनिय्याह कहेस, “तोहका याद अहइ कि एक समइ राज मोर रहा। इस्त्राएल क सबहिं लोग मोका आपन अगला राजा समुझत रहेन। किन्तु स्थिति बदल गइ। अब मोर भाई राजा अहइ। यहोवा ओका राजा होइ बरे चनेस। 16एह बरे मई तोहसे एक तु चीज माँगत हउँ। मेहरबानी कइके इन्कार न करई।”

बतसेबा पूछेस, “तू का चाहत अहा?”

17अदोनिय्याह जवाब दिहेस, “मई जानत हउँ कि राजा सुलैमान उ सब कछू करिहीं जउन तू कहबिउ। एह बरे कृपा कइके ओनसे कह्या कि मोका सुनेम क अबीसग क संग बियाह करइ द्या।”

18तब बतसेबा कहेस, “ठीक अहइ, मई तोहरे बरे राजा स बात करब।”

19एह बरे बतसेबा राजा सुलैमान क लगे ओहसे बात करइ गइ। राजा सुलैमान ओका लखेस अउर उ ओहसे मिलइ बरे खड़ा भवा। तब उ ओकरे समन्वा प्रणाम करइ निहुरा अउ सिंहासने पइ बइठ गवा। उ सेवकन स, अपनी महतारी बरे दूसर सिंहासन लिआवइ क कहेस। तब उ ओकरी दाहिन कइँती बइठ गइ।

20बतसेबा ओहसे कहेस, “मई तोहसे एक नान्ह चीज माँगत हउँ। कृपा कइके इन्कार न करया।”

राजा उत्तर दिहेस, “महतारी तू जउन चाहा, माँग सकति अहा। मई तोहका मना नाहीं करबेउँ।”

21एह बरे बतसेबा कहेस, “सूनेमिन मेहरारू अबीसग क अपने भाई अदोनिय्याह क संग बियाह करइ द्या।”

22राजा सुलैमान अपनी महतारी स कहेस, “तू अबीसग क ओका देइ बरे मोहसे काहे कहति अहा? तू मोहसे इ काहे नाहीं कहतिउ कि मई ओका राजा भी बनाइ देउँ काहेकि उ मोर बड़का भाइ अहइ? याजक एब्यातार अउ योआब ओकर समर्थन करिहीं।”

23तब सुलैमान यहोवा स एक तु प्रतिग्या किहेस। उ कहेस, “मई प्रतिग्या करत हउँ कि मोहसे इ माँग करइ क बरे मई अदोनिय्याह स भुगतान कराउब। उ पचे इ माँग बरे आपन जिन्नगी देइ देब। 24यहोवा मोका इस्त्राएल क राजा होइ दिहस ह। उ उ सिंहासन मोका दिहेस ह जउन मोर बाप दाऊद क अहइ। यहोवा अपनी प्रतिग्या पूरी किहेस ह अउ

राज मोक़ा अउ मोरे परिवार क दिहस ह। मई सास्वत परमेस्सर क समन्वा, प्रतिग्या करत हउँ कि अदोनिय्याह आज मरी!”

25 राजा सुलैमान बनायाह क आदेस दिहस। बनायाह बाहेर गवा अउर उ अदोनिय्याह क मार डाएस।

26 तब राजा सुलैमान याजक एब्यातार स कहेस, “मोका तोहका मार डावइ चाही, किन्तु मई तोहका अपने घरे अनातोत मँ लउट जाइ देत हउँ। मई तोहका अबहुँ मारब नाहीं काहेकि मोर बाप दाऊद क संग चलत समइ तू पवित्तर सन्दूख क लइ चलइ मँ मदद किहे रह्या जब तू मोरे बाप दाऊद क संग रह्या। मई जानत हउँ कि तू मोर बाप क मदद किहे रहा अउर मोर बाप क सबहिँ कठिन समइ मँ साथ दिहे रहा।” 27 सुलैमान एब्यातार स कहेस कि तू याजक क रुप मँ यहोवा क सेवा करत नाहीं रह सकत्या। इ सब बइसे ही भवा, जइसा यहोवा होइ बरे कहे रहा। परमेस्सर याजक एली अउ ओकरे परिवार क बारे मँ सीलो मँ इ कहे रहा अउर एब्यातार एली क परिवार स रहा।

28 योआब इ बारे मँ सुनेस अउर उ डेराइ गवा। उ अदोनिय्याह क समर्थन किहे रहा, किन्तु अबसालोम क नाहीं। योआब यहोवा क तम्बू कइँती दउड़ा अउर वेदी क सींगो क धइ लिहस। 29 कउनो राजा सुलैमान स कहेस कि योआब यहोवा क तम्बू मँ वेदी क लगे अहइ। एह बरे सुलैमान बनायाह क जाइ अउ ओका मार डावइ क आदेस दिहस।

30 बनायाह यहोवा क तम्बू मँ गावा अउ योआब स कहेस, “राजा कहत हीं, ‘बाहेर आवा।”

मुला योआब जवाब दिहेस, “नाहीं, मई हिअई मरब।”

एह बरे बनायाह राजा क लगे वापस गवा अउ ओहसे उहइ कहेस जउन योआब कहे रहा। 31 तब राजा बनायाह क आदेस दिहस, “वइसा ही करा जइसा उ कहत ह। ओका हुवँई मार डावा। तब ओका दफनाइ द्या। तब हमार परिवार अउर हम योआब क दोख स अजाद होब। इ अपराध एह बरे भवा कि योआब निरपराध लोगन क मारे रहा। 32 योआब दुइ मनइयन क मार डाएस, जउन ओहसे बहोत नीक रहेन। इ पचे नेर क पूत अब्नेर अउ येतेर क पूत अमासा रहेन। अब्नेर इस्त्राएल क फउज क प्राधान सेनापति रहा अउर अमासा यहूदा क फउज क सेनापति रहा। उ समइ, मोर बाप दाऊद इ नाहीं जानत रहेन कि योआब ओनका मार डाए रहा। एह बरे यहोवा योआब क ओन मनइयन बरे सजा देइ जेनका उ मार डाए रहा। 33 उ ओनकर मउत बरे अपराधी होइ अउर ओकर परिवार भी सदा बरे दोखी होइ। किन्तु परमेस्सर कइँती स दाऊद क, ओकरे सन्तानन, ओकरे राज परिवार अउ सिंहासन क सदा-सदा बरे सान्ति मिली।”

34 एह बरे यहोयादा क पूत बनायाह योआब क मार डाएस। योआब मरुभूमि मँ अपने घरे क लगे दफनावा गवा। 35 सुलैमान तब योहादा क पूत बनायाह क योआब क जगह पइ सेनापति बनाएस। सुलैमान एब्यातार क ठउरे पइ सादोक क महायाजक बनाएस। 36 एकरे पाछे राजा सिमी क

बोलाएस। राजा ओहसे कहेस, “हिआँ यरूसलेम मँ तू अपने बरे एक तु घर बनावा, उहइ घरे मँ रहा अउर नगर क जिन तजा। 37 जदि तू नगर क तजब्या अउ किद्रोन क नाले क पार जाब्या तउ तू मार डावा जाब्या अउर इ तोहार दोख होइ।”

38 एह बरे सिमी जवाब दिहेस, “मोर राजा, आप जउन कहेन ह, ठीक बाटइ। मई आप क हुकुम क मानबा।” एह बरे सिमी यरूसलेम मँ बहोत समइ तलक रहा। 39 किन्तु तीन बरिस पाछे सिमी क दुइ सेवक पराइ गएन। उ पचे गत क राजा क लगे पहुँचेन। ओकर नाउँ आकीस रहा जउन माका क पूत रहा। सिमी सुनेस कि ओकर सेवक गत मँ अहइ। 40 एह बरे सिमी आपन काठी अपने खच्चर पइ रखेस अउर गत मँ राजा आकीस क लगे गवा। उ अपने सेवकन क प्राप्त करइ गवा। उ ओनका ढूँढ लिहस अउर अपने घरे वापस लिआवा।

41 मुला कउनो सुलैमान स कहेस, कि सिमी यरूसलेम सगत गवा रहा अउर लउटि आवा ह। 42 एह बरे सुलैमान ओका बोलवाएस। सुलैमान सिमी स कहेस, “मई तोहका चिताउनी देत हउँ कि मई यहोवा क नाउँ पइ इ प्रतिग्या किहे रहेउँ कि जदि तू यरूसलेम तजब्या, तउ मारा जाब्या। मई चितउनी दिहे रहेउँ कि जदि तू दूसर कहुँ जाब्या तउ तोहरे मारे जाइ क दोख तोहार होइ। अउर तू ओका अंगीकार किहे रहा जउन कछू मई कहेस रहा। तू कहेस रहा कि तू मोर आग्या अउर आदेसन क पालन करब्या। 43 तू अपनी प्रतिग्या काहे तोइया? तू मोरे आदेस क पालन काहे नाहीं किहा? 44 तू जानत ह कि तू मोरे बाप दाऊद क खिलाफ बहोत स गलत काम किहा, अब यहोवा ओन गलत कामन बरे तोहका सजा देइ। 45 किन्तु यहोवा मोका आसीर्वाद देइ। उ दाऊद क सिंहासन क सदा ही सुरच्छा करी।”

46 तब राजा बनायाह क सिमी क मार डावइ क आदेस दिहेस अउर इ एका पूरा किहस। अब सुलैमान अपने राज पइ पूरा नियंत्रण कइ चुका रहा।

### सुलैमान बुद्धि माँगत ह

3 सुलैमान मिस्र क राजा फिरौन क बिटिया के संग बियाइ कइके ओकरे संग सन्धि किहेस। सुलैमान ओका दाऊद नगर क लइ आवा। इ समइ अबहुँ भी सुलैमान आपन महल अउर यहोवा क मन्दिर बनावत रहा। सुलैमान यरूसलेम चहारदीवारी भी बनावत रहा। 2 मन्दिर अबहुँ तलक पूरा नाहीं भावा रहा। एह बरे लोग अबहुँ भि उच्च जगहन पइ जनावरन क बलि भेंट करत रहेन। 3 सुलैमान देखाएस कि उ यहोवा स पिरेम करत ह। ओकरे आपन बाप दाऊद जउन कछू करइ क कहे रहा, उ ओन सब क पालन किहेस किन्तु सुलैमान कछू अइसा भी किहस जेका करइ बरे दाऊद नाहीं कहे रहा। सुलैमान अबहुँ तलक उच्च जगहन क उपयोग बलि भेंट अउ सुगन्धि बारइ क बरे करत रहा।

4 राजा सुलैमान बलि भेंट करइ गिबोन गवा। उ हुँवा एह बरे गवा काहेकि उ सब स जियादा महत्वपूर्ण ऊँच जगह

रही। सुलैमान एक हजार बलियन उ वेदी पइ भेंट किहस। 5जब सुलैमान गिबोन में रहा उहइ रात क ओकरे लगे सपन में यहोवा आवा। परमेस्सर कहेस, “जउन चाहत अहा तू माँगा, मई ओका तोका देबउँ।”

6सुलैमान जवाब दिहिस, “तू अपने सेवक मोर बाप दाऊद पइ बहोत दयालु रह्या। उ तोहार अनुसरण किहिस। उ नीक रहा अउ सच्चाई स रहा अउर तू ओकरे बरे तब सब स बड़की कृपा किहा जब तू ओकरे पूत क ओकरे सिंहासने पइ हुकुमूत करइ दिहा। 7यहोवा मोर परमेस्सर, तू मोका अपने बाप क जगह पइ राजा होइ दिहा ह। किन्तु मई एक नान्ह बालक क नाई हउँ। मोरे लगे, मोका जउन करइ चाही ओका करइ बरे बुद्धि नाहीं अहइ। 8तोहार सेवक, मई हिआँ तोहरे चुने लोगन में एक महान लोगन में अहउँ, उ पचे एँते जियादा अहइँ कि गना नाहीं जाइ सकेतेन। 9एह बरे मई तोहसे माँगत हउँ कि तू मोका बुद्धि द्या जेहसे मई सच्चाई स लोगन पइ हुकुमत अउ ओनकर निआउ कइ सकउँ। एहसे मई सही अउ गलत क फरक क जान सकउँ। इ स्वेष्ठ बुद्धि क बिना एँन महान रास्ट्रन पइ सासन करब असंभव अहइ।”

10यहोवा खुस भवा कि सुलैमान ओहसे इ माँगेस। 11एह बरे परमेस्सर ओहसे कहेस, “तू अपने बरे दीर्घायु नाहीं माँग्या। तू अपने बरे सम्पत्ति नाहीं माँग्या। तू अपने दुस्मनन क मउत नाहीं माँग्या। मुला तू बुद्धि अउर सही निर्णय करइ बरे ग्यान माँग्या। 12एह बरे मई तोहका उहइ देब जउन तू माँग्या। मई तोहका बुद्धिमान अउ बिवेकी बनाउब। मई तोहरी बुद्धि क एँतना महान बनाउब कि बीते जमाने में कबहुँ तोहरे जइसा कउनो मनई नाहीं भवा ह अउर भविस्स में जइसा कबहुँ कउनो नाहीं होइ। 13अउर तोहका पुरस्कृत करइ बरे मई तोहका उ सबइ चिजियन भी देबउँ जेनका तू नाहीं माँग्या। तोहरे पूरी जिन्नगी में सम्पत्ति अउ प्रतिस्था बनी रही। संसार में तोहरे जइसा महान राजा दूसर कउनो नाहीं होइ। 14मई तोहसे चाहत हउँ कि तू मोर अनुसरण करा अउर मोरे नेमन अउर आदेसन क पालन करा। इ उहइ प्रकार करा जउने प्रकार तोहार बाप दाऊद किहिस। जदि तू अइसा करब्या तउ मई तोहका दीर्घायु भी करब।”

15सुलैमान जाग गवा। उ जान गवा कि परमेस्सर ओकरे संग सपन में बातन किहिस ह। तब सुलैमान यरूसलेम गवा अउर यहोवा क करार क सन्दूखे क समन्वा खड़ा भवा। सुलैमान यहोवा क होमबलि अउर मेलबलि चढ़ाएस। एकरे पाछे उ ओन सबहिँ प्रमुखन अउ अधिकारियन क दावत दिहिस जउन हुकुमत करइ में ओकर मदद करत रहेन।

16एक दिन दुइ मेहररुअन जउन रंडियन रहिन, सुलैमान क लगे आइन। 17मेहररुअन में स एक कहेस, “महाराज, इ मेहररु अउर मई एक ही घरे में रहत हीं। हम दुइनउँ गर्भवती भएन अउर अपने बच्चन क जन्म देइ ही वाले रहेन। मई अपने बच्चे का जन्म दिहेउँ जब इ हुवाँ मोरे साथ रही। 18तीन दिन बाद इ मेहररु भी अपने बच्चा क जन्म दिहिस। हम लोगन क संग कउनो दूसर मनई घरे में नाहीं रहा। सिरिफ हम दुइनउँ ही रहेन। 19एक रात इ मेहररु क बच्चा मर गवा काहेकि उ बच्चा पइ सोई गइ रही। 20एह

बरे रात क जब मई सोई रही, इ मोरे पूत क मोरे बिछउन स लइ लिहिस। तब इ मेरे बच्चे क मोरे बिछउन पइ डाइ दिहिस। 21अगले भिंसारे मई जागी अउर अपने बच्चे क दूध पिआवइ वाली रही। किन्तु मई लखेउँ कि बच्च मरा भवा ह। तब मई ओका जियादा निचके स लखेउँ। मई लेखेउँ कि इ मोर बच्च नाहीं अहइ।”

22मुला दुसर मेहररु कहेस, “नाहीं! जिअत बच्चा मोर अहइ। मरा बच्चा तोहार अहइ।”

किन्तु पहिली मेहररु कहेस, “नाहीं! तू गलत अहा। मरा बच्चा तोहार अहइ अउर जिअत बच्चा मोर अहइ।” इ तर दुइनउँ मेहररुअन राजा क समन्वा बहस किहन।

23तब राजा सुलैमान कहेस, “तू दुइनउँ कहति अहा कि जिअत बच्चा हमार आपन अहइ अउर तू पचन में स हर एक कहत अहइ कि मरा बच्चा दूसरी क अहइ।”

24तब राजा सुलैमान अपने सेवक क तरवार लिआवइ पठएस। 25अउर राजा सुलैमान कहेस, “हम इहइ करब। जिअत बच्चे क दुइ टुकन कइ द्या। दुइनउँ मेहररु क आधा आधा बच्चा दइ द्या।”

26दूसर मेहररु कहेस, “इ ठीक अहइ। बच्चा क दुइ टुकन में काट डवा। तब हम दुइनउँ में स ओका कउनो नाहीं पाई।” किन्तु पहिली मेहररु, जउन सच्ची महतारी रही, अपने बच्चे क बरे पिरेम स भरी रही। उ राजा स कहेस, “मेहरबानी कइके बच्चा क जिन मारा। एका ओका ही दइ देई।”

27तब राजा सुलैमान कहेस, “बच्च क जिन मारा। एका, पहिली मेहररु क दइ द्या। उहइ सच्ची महतारी अहइ।”

28इस्त्राएल क लोग राजा सुलैमान क निर्णय क सुनेन। उ पचे ओकर बहोत आदर अउ सम्मान किहेन काहेकि उ पचे जान गएन कि ओकर ठीक निआउ करइ क बुद्धि ओकरे लगे परमेस्सर स आई।

### सुलैमान क राज्ज

4 राजा सुलैमान इस्त्राएल क सबहिँ लोगन पइ सासन करत रहा। 2इ सबइ प्रमुख अधिकारियन क नाउँ अहइँ जउन सासन करइ में ओकर मदद करत रहेन:

सादोक क पूत अजर्याह याजक रहा।

3सीसा क पूत एलीहोरेप अउ अहिय्याह उ विवरण क लिखइ क कार्य करत रहेन जउन निआबालय में होत रहा।

अहीलूद क पूत यहोसापात, यहोसापात लोगन क इतिहास क विवरण लिखत रहा।

4यहोयादा क पूत बनायाह सेनापति रहा,

सादोक अउ एब्यातार याजक रहेन।

5नातान क पूत अजर्याह जनपद- प्रसासकन क अधीच्छक रहा।

नातान क पूत जाबूद याजक अउर राजा सुलैमान क एक सलाहकार रहा।

6अहीसार राजा क घर क हर एक चीज क उत्तरदायी रहा।

अब्दा क पूत अदोनीराम दासन क अधीच्छक रहा।

7इस्त्राएल बारह छेत्रन में बँटा रहा। जेनका जनपद कहत रहेन। सुलैमान हर जनपद पइ सासन करइ क बरे राजपालन क चुनत रहा। एन राजपालन क आदेस रहा कि उ पचे अपने जनपद में भोजन क चीज एकटठा करई अउर ओका राजा अउ ओकरे परिवारन क देई। हर साल एक महीने क भोजन सामग्री राजा क देइ क जिम्मेदारी बारह राजपालन में हर एक क रहा। 8बारह राजपालन क इ नाउँ सबइ अहई:

बेन्हूर, एप्रैम क पर्वतीय प्रदेस क राजपाल रहा।

9बेन्डेकर, माकस, सालबीम, बेतसेमेस अउ एलोनबेथानान क राजपाल रहा।

10बेन्हेसेद, अरूबोत, सौको अउर हेपेर क राजपाल रहा।

11बेनबीनादाब, नपोत दोर क राजपाल रहा। ओकर बियाह सुलैमान क बिटिया तापत स भवा रहा।

12अहीलूद क पूत बाना, तानाक, मगिददो स लइके अउर सारतान स लगे पूरे बेतसान क राजपाल रहा। इ यिज्रेल क खाले, बेतसान स लइके आबेलमहोला तलक योकमाम क पार रहा।

13बेनगोबेर, रामोत गिलाद क राजपाल रहा। उ गिलाद में मनस्से क पूत यार्ईर क सारे सहरन अउ गाँवन क भी राजपाल रहा। उ बासान में अर्गोब क जनपद क भी राजपाल रहा। इ पहँटा में ऊँची चहारदेवारवाले साठ नगर रहेन। एँन नगरन क फाटकन में काँसे क छड़न लगी रहिन।

14इददो क पूत अहीनादाब, महनैम क राजपाल रहा।

15अहीमास, नप्ताली क राजपाल रहा। ओकर बियाह सुलैमान क बिटिया बासमत स भवा रहा।

16हूसै क पूत बाना, आसेर अउ आलोत क राजपाल रहा।

17पारुह क पूत यहोसापात, इस्साकार क राजपाल रहा।

18एला क पूत सिमी, बिन्यामीन क राजपाल रहा।

19ऊरी क पूत गोबेर गिलाद क राजपाल रहा। गिलाद उ पहँटा रहा जहाँ एमोरी लोगन क राजा सीहोन अउर बासान क राजा ओग रहत रहेन। किन्तु सिरिफ गोबेर ही उ जनपद क राजपाल रहा।

20यहूदा अउ इस्त्राएल में बहोत बड़ी गिनती में लोग रहत रहेन। लोगन क गनती समुदर क किनारे क बालू क कणन जेतनी रही। लोग सुख स भरी जिन्नगी बितावत रहेन: उ पचे खात पिअत अउ आनन्दित रहत रहेन।

21सुलैमान परात नदी स लइके पलिस्ती लोगन क पहँटा तलक सबहिं राजन पइ हुकूमत करत रहा। ओकर राज मिस्त्र क सीमा तलक फइला रहा। इ सबइ देस सुलैमान के भेंट पठवत रहेन अउर ओकरे पूरी जिन्नगी तलक ओकर आग्या क पालन करत रहेन।

22इ भोजन सामग्री अहइ जेकर जरूरत हर रोज सुलैमान क खुद अउ ओकरी मेज पइ सबहिं भोजन करइवालन क बरे होत रही:

डेढ़ सौ बुसल महीन आटा,

तीन सौ बुसल आटा,

23अच्छा अन्न खाइ भवा दस ठु बर्धा,

मैदानन में पाले गए बीस ठु बर्धा अउर सौ भेड़िन,

जंगली जनावरन जइसा हिरन, चिकारे, मगृ अउ सिकारी पछियन भी!

24सुलैमान परात नदी क पच्छिम क सबहिं देसन पइ हुकूमत करत रहा। इ प्रदेस तिप्सह स अज्जा तलक रहा अउर सुलैमान क राज क चारिहुँ कइँती सान्ति रही। 25सुलैमान क जिन्नगी क समइ इस्त्राएल अउ यहूदा क सबहिं लोग लगातार दान स लइके बेर्सेबा तलक सान्ति अउ सुरच्छा में रहत रहेन। लोग सान्ति क साथ अपने अंजीर क बृच्छन अउ अंगूरे क बेलन क तले बइठत रहेन।

26सुलैमान क लगे ओकरे रथन क बरे चार हजार घोड़न क रखइ क जगह अउ ओकरे पास बारह हजार घोड़सवार रहेन। 27हर महीने बारह जनपद क राजपालन में स एक ठु सुलैमान क उ सबइ चिजियन देत रहा जेकर ओकर जरूरत पड़त रही। इ राजा क मेज पइ खाइ वाले हर एक मनई बरे काफी होत रही। 28जनपद राजपालन राजा क रथन क घोड़न अउ सवारी क घोड़न बरे बहोत अधिक चारा अउ सूखा घास भी देत रहेन। उ पचे इ अन्न क एक उचित जगह पइ लिआवत रहा।

### सुलैमान क बुद्धि

29परमेस्सर सुलैमान क उत्तिम बुद्धि दिहेस। सुलैमान अनेक बातन समुझ सकत रहा। ओकर बुद्धि कल्पना क परे तेज रही। 30सुलैमान क बुद्धि पूरब क सबहिं मनइयन क बुद्धि स जियादा तेज रही। ओकर बुद्धि मिस्त्र में रहइवाले सबहिं मनइयन क बुद्धि से जियादा तेज रही। 31उ पृथ्वी क कउनो भी मनइयन स जियादा बुद्धिमान रहा। उ एज्रेही एतान स भी जियादा बुद्धिमान रहा। उ हेमान, कलकोल अउ दर्दा स जियादा बुद्धिमान रहा। इ सबइ माहोल क पूत रहेन। राजा सुलैमान इस्त्राएल अउ यहूदा क चारिहुँ कइँती क सबहिं देसन में प्रसिद्ध होइ गवा। 32अपने जिन्नगी क समइ में राजा सुलैमान तीन हजार बुद्धि क बातन अउर पन्द्रह सौ गीतन लिखेस।

33सुलैमान प्रकृति क बारे में बहोत कछू जानत रहा। सुलैमान लबानोन क बिसाल देवदारू बृच्छन स लइके देवारन में उगलवाली जूफा क अलग प्रकार क पेड़-पौधन में स हर एक क बारे में सिच्छा दिहेस। राजा सुलैमान जनावरन, पँछियन अउ रेंगइवाले जान्तुअन अउ मछरियन क चर्चा किहेस ह। 34सुलैमान क बुद्धिमत्तापूर्ण बातन क सुनइ बरे सबहिं रास्ट्रन स लोग आवत रहेन। सबहिं रास्ट्रन क राजा अपने बुद्धिमान मनइयन क राजा सुलैमान क बातन क सुनइ बरे पठवत रहेन।

### सुलैमान मन्दिर बनावत ह

5 हीराम सोर क राजा रहा। हीराम सदा ही दाऊद क मीत रहा। एह बरे जब हीराम क मालूम भवा कि

सुलैमान दाऊद क पाछे नवा राजा भवा ह तउ उ सुलैमान क लगे आपन सेवक पठाएस। 2सुलैमान हीराम राजा क इ सबइ संदेस पठाएस: 3“तोहका याद अहइ कि मोर बाप राजा दाऊद क अपने चारिहुँ कइँती अनेक जुद्ध लड़इ पड़े रहेन। एह बरे उ यहोवा अपने परमेस्सर क मन्दिर बनाववाइ मँ समर्थ नाहीं होइ सका। राजा दाऊद तब तलक प्रतीच्छा करत रहा जब तलक यहोवा ओकर सबहिँ दुस्मनन क ओहसे पराजित नाहीं होइ दिहस। 4किन्तु अब यहोवा मोर परमेस्सर मोर देस क चारिहुँ कइँती मोका सान्ति दिहस ह। अब मोर कउनो दुस्मन नाहीं अहइ। मोर प्रजा अब कउनो खतरे मँ नाहीं अहइ।

5“यहोवा मोर बाप दाऊद क संग एक ठु प्रतिग्या किहे रहा। यहोवा कहे रहा, ‘मईँ तोहरे पूत क तोहरे पाछे राजा बनाउब अउर तोहार पूत मोर सम्मान करइ बरे एक ठु मन्दिर बनाई।’ अब मईँ, यहोवा आपन परमेस्सर क सम्मान करइ बरे उ मन्दिर बनावइ क योजना बनाएँउ ह। 6अउर एह बरे मईँ तोहसे मदद माँगत हउँ। अपने मनइयन क लबानोन पठवा। हुवाँ उ पचे मोरे बरे देवदारु क बृच्छन क कटिहीं। मोर सेवक तोहरे सेवकन क संग काम करिहीं। मईँ उ कउनो भी मजदूरी भुगतान करब जउन तू अपने सेवकन बरे तय करब्या। किन्तु मोका तोहार मदद क जरूरत अहइ। मोर बढई सीदोन क बढइयन क तरह नीक नाहीं अहइ।”

7जब हीराम, जउन कछू सुलैमान माँगेस, उ सुनेस तउ उ बहोत खुस भवा। राजा हीराम कहेस, “आजु मईँ यहोवा क धन्यवाद देत हउँ कि उ दाऊद क इ विसाल रास्ट्र पइ सासन करइ बरे एक ठु बुद्धिमान पूत दिहस ह।” 8तब हीराम सुलैमान क एक संदेसा पठाएस। संदेसा इ रहा, “तू जउन माँग किहा ह, उ मईँ सुनेउँ ह। मईँ तोहका सारे देवदारु क बच्छ अउर चीर क बृच्छ देब, जेनका तू चाहत अहा। 9मोर सेवक लबानोन स ओनका समुदर तलक लइहीं। तब मईँ ओनका एक संग बाँध देब अउर ओनका समुदर मँ उ जगह कइँती बहाइ देब जहाँ तू चाहत अहा। हुवाँ मईँ लट्ठन क अलग कइ देब अउर बृच्छन क तू लइ सकब्या। एकर बदले मँ तू मोर साही घरे क लोगन बरे भोजन प्रदान कराउब्या।”

10एह बरे हीराम, सुलैमान क सबइ देवदार अउर सनौवर क बृच्छ दिहेन जेका उ चाहत रहेन। 11अउर सुलैमान हर साल लगभग एक लाख बीस हजार बुसल गोहूँ अउ लगभग एक लाख बीस हजार गैलन निखालिस जइतून क तेल हीराम क ओकरे परिवार क भोजन बरे दिहस।

12यहोवा आपनी प्रतिग्या क अनुसार सुलैमान क बुद्धि दिहस अउ सुलैमान अउ हीराम क बीच सान्ति रही। इ दुइनँ राजा लोग आपुस मँ सन्धि किहन।

13राजा सुलैमान इ काम मँ मदद बरे इस्राएल क तीस हजार मनइयन क मजबूर किहन। 14राजा सुलैमान अदोनीराम नाउँ क एक ठु मनई क ओनकी ऊपर अधिकारी बनाएस। सुलैमान ओन मनइयन क तीन ठु टुकड़ियन मँ बाँटिस। हर एक टुकड़ी मँ दस हजार मनई रहेन। हर समूह एक महीना लबानोन मँ काम करत रहा अउर तब दुइ महीना बरे अपने घरे लउटत रहा। 15सुलैमान अस्सी हजार मनइयन क भी

पहाड़ी प्रदेश मँ काम करइ बरे मजबूर किहस। एन मनइयन क काम चट्टानन क काटब रहा अउर हुवाँ सत्तर हजार मनई पाथर क ढोवइवाले रहेन। 16अउर तीन हजार तीन सौ मनई रहेन जउन काम करइवाले मनइयन क ऊपर अधिकारी रहेन। 17राजा सुलैमान, मन्दिर क नेंव बरे बिसाल अउ कीमती चट्टानन क कटाइ क आदेस दिहस। इ सबइ पाथर सावधानी स काटे गएन। 18तब सुलैमान क मकान बनावइया अउ कारीगरन अउ हीराम क मकान बनावइया अउ कारीगरन अउ गबाली क मनइयन पाथरन क काटेन अउ ओन पइ नक्कासी क काम किहेन। उ पचे मन्दिर क बनावइ बरे पाथरन अउ लट्ठन क तइयार किहेन।

### सुलैमान मन्दिर बनावत ह

6 तब सुलैमान मन्दिर बनाउब सुरु किहस। इ इस्राएल क लोगन क जरिये मिस्र तजइ क चार सौ अस्सीवाँ बरिस पाछे रहा। इ राजा सुलैमान क इस्राएल पइ हुकूमत क चउथे बरिस मँ रहा, इ जीव क महीना, बरिस क दूसर महीना रहा। 2मन्दिर साठ हाथ लम्बा, बीस हाथ चौड़ा अउर तीस हाथ ऊँचा रहा। 3मन्दिर मण्डप तीस हाथ लम्बा अउ दस हाथ चौड़ा रहा। इ मण्डप मन्दिर क ही मुख्य हीसा क समन्वा बराबर लम्बा रहा। एकर लम्बाई मन्दिर क चौड़ाई क बराबर रही। 4मन्दिर मँ सँकरी खिड़कियन रहिन। इ सबइ खिड़कियन बाहेर कइँती सँकरी अउ भीतेर कइँती चौड़ी रहिन। 5तब सुलैमान मन्दिर क मुख्य हीसा क चारिहुँ कइँती कमरन क एक कतार बनाएस। उ पचे एक दूसर क छते क ऊपर बने रहेन। 6कमरन मन्दिर क देवार स सटा रहेन किन्तु ओनकर सहतीरन ओनकी देवार मँ नाहीं घुसी रहिन। सिखर पइ, मन्दिर क देवार पातर होइ गइ। एह बरे ओन कमरन क एक कइँती क देवार ओकरे खाले क देवार स पातर रही। खाले क मंजिल क कमरन पाँच हाथ चौड़ा रहेन। बीच क मंजिल क कमरन छः हाथ चौड़ा रहेन। ऊपर क कमरन सात हाथ चौड़ा रहेन। 7काम करइवाला मनईयन देवारन क बनावइ बरे बड़के पाथरन क उपयोग किहन। काम करइवाला मनईयन उहइ जगह पइ पाथरन क काटेन जहाँ उ पचे ओनका जमीने स निकारेन। एह बरे मन्दिर मँ हथौड़ियन, कुल्हाड़ियन अउ दूसर कउनो भी लोहा क औजार क आवाज़ मन्दिर क बगल मँ एकरे निर्माण क समई नाहीं सुनाई दिहे रहेन।

8खाले क कमरन क प्रवेस दुआर मन्दिर क दक्खिन कइँती रहा। भीतर सीढ़ियन रहिन जउन मन्दिर क दूसर मंजिल क कमरन अउ तब तीसरे मंजिल क कमरन तलक जात रहिन।

9इ तरह सुलैमान मन्दिर बनाउब पूरा किहस। मन्दिर क हर एक भाग देवदारु क तख्तन स मढ़ा गवा रहा। 10सुलैमान मन्दिर क चारिहुँ कइँती कमरन क बनाउब भी पूरा किहस। हर एक मंजिल पाँच हाथ ऊँचा रही। ओन कमरन क देवदार क सहतीरन मन्दिर क छुअत रहिन।

11यहोवा सुलैमान स कहेस, 12‘इ मन्दिर क बारे मँ जका तू निर्माण करत ह यदि तू मोर सबहिँ नेमन अउ आदेसन क पालन करब्या तउ मईँ उ सबइ करब जेकरे बरे

मई तोहरे बाप दाऊद स प्रतिग्या किहे रहेउँ। 13अउर मई इस्त्राएल क गदेलन क संग रहब, अउर मई इस्त्राएल क लोगन क कबहूँ छोड़ब नहीँ।”

### मन्दिर क विस्तृत विवरण

14इ तरह सुलैमान मन्दिर क निर्माण पूरा किहस।

15मन्दिर क भीतर क देवारन देवदारु क पल्लन स मढ़ी गइ रहिन। देवदारु क पल्लन फर्स स छत तलक रहेन। पाथर क फर्स चीड़ क पल्लन स ढका रहा। 16उ पचे मन्दिर क पिछले हींसा मँ एक ठु कमरा बीस हाथ अन्दर गहिरा बनाएन। उ पचे इ कमरा क देवारन क देवदारु क पल्लन स मढ़ेन। देवदारु क पल्लन फर्स स छते तलक रहेन। इ कमरा सब स जियादा पवित्र जगह कहा जात रहा। 17महा पवित्र स्थान क समन्वा वाला भाग मन्दिर क सबन त जियादा पवित्र भाग रहा। इ कमरा चालीस हाथ लम्बा रहा। 18उ पचे इ कमरे क देवारन क देवदारु क पल्लन स मढ़ेन, देवारे क कउनो भी पाथर नहीँ लखा जाइ सकत रहा। उ पचे फूलन अउ कद्दू क चित्र देवदारु क पल्लन मँ नक्कासी किहन।

19सुलैमान मन्दिर क पाछे भीतर गहिर कमरन क तइयार किहस। इ कमरा यहोवा क करार क सन्दूखे क बरे रहा। 20इ कमरा बीस हाथ लम्बा बीस हाथ चौड़ा अउ बीस हाथ ऊँचा रहा। 21सुलैमान इ कमरे क निखालिस सोना स मढ़ेस। उ इ कमरा क समन्वा एक ठु धूप वेदी बनाएस। उ वेदी क सोने स मढ़ेस अउर एकरे चारिहूँ कइँती सोने क जंजीरन लपेटेस। 22सारा मन्दिर सोना स मढ़ा रहा अउर सब स जियादा पवित्र जगह क समन्वा वेदी सोना स मढ़ी गइ रही।

23सिल्पकार पखना सहित दुई ठु करूब सरगदूतन क मूरती बनाएन। सिल्पकार जइतून क काठे स मूर्तियन बनाएन। दुइनउँ सरगदूतन सब स जियादा पवित्र जगह मँ धरे गएन। हर एक सरगदूत दस हाथ ऊँच रहा। 24-26उ सबइ दुइनउँ सरगदूत एक ही माप क रहेन अउर एक ही सैली मँ बने रहेन। हर एक सरगदूत क दुइ पखनन रहेन। हर एक पखना पाँच हाथ लम्बा रहा। एक पखना क सिरे स दूसर पखना क सिरे तलक दस हाथ रहा अउर हर एक सरगदूत दस हाथ ऊँच रहा। 27इ सबइ करूब सरगदूत सब स जियादा पवित्र ठउर मँ धरे गए रहेन। उ सबइ एक दूसर क बगल मँ खड़े रहेन। ओनकर पखना कमरा बीच मँ एक दूसर क छुअत रहेन। दूसर दुइ पखनन हर एक बगल क देवार क छुअत रहेन। 28दुइनउँ करूब सरगदूत सोना स मढ़े गए रहेन।

29मुख्य कच्छ अउ भीतरी कच्छ चारिहूँ कइँती क देवारन पइ करूब सरगदूतन, ताड़ क बृच्छन अउ फूल क चित्र उकेरे गए रहेन। 30दुइनउँ कमरन क फर्स सोना स मढ़ी गइ रही।

31कारीगरन जइतून क काठे क दुइ दरवाजा बनाएन। उ पचे ओन दुइ दरवाजन क सब स जियादा पवित्र जगह क प्रवेस दुआर मँ लगाएन। दरवाजन क चारिहूँ कइँती क चौखट पाँच पहलदार बनी रही। 32उ पचे दुइनउँ दरवाजन

क जैतून क काठे क बनाएन। कारीगरन दरवाजन पइ करूब सरगदूत, ताड़ क बृच्छन अउ फूलन क चित्रन क उकेरेन। तब उ पचे दरवाजन क सोना स मढ़ेन।

33उ पचे मुख्य कच्छ मँ प्रवेस बरे भी दरवाजन बनाएन। उ पचे एक वर्गाकार दरवाजे क चौखट बनावइ बरे जैतून क काठे क उपयोग किहन। 34तब उ पचे दरवाजा बनावइ बरे चीर क लकड़ी क उपयोग किहन। 35हुवाँ दुइ दरवाजा रहेन। हर एक दरवाजे क दुइ भाग रहेन, एह बरे दुइनउँ दरवाजन मुड़िके बंद होत रहेन। उ पचे दरवाजन पइ करूब सरगदूत ताड़ क बृच्छन अउ फूलन क चित्रन क उकेरेन। तब उ पचे ओनका सोना स मढ़ेन।

36तब उ पचे भीतरी आँगन बनाएन। उ पचे इ आँगन क चारिहूँ ओर देवारन बनाएन। हर एक देवार कटे पाथरन क तीन कतारन अउ देवार क काठन क एक कतार स बनाइ गइ।

37उ पचे बरिस क दूसरे महीने जिन माह मँ मन्दिर क निर्माण सुरु किहन। इस्त्राएल क लोगन पइ सुलैमान क हुकूमत क चउथे बरिस मँ, इ भवा। 38मन्दिर क निर्माण बरिस क अठएँ महीने बूल माह मँ पूरा भवा। लोगन पइ सुलैमान क हुकूमत क गियारहवें बरिस इ भवा रहा। मन्दिर क निर्माण मँ सात बरिस लगेन। मन्दिर ठीक उहइ प्रकार बना रहा जइसा ओका बनावइ क योजना रही।

### सुलैमान क महल

7 राजा सुलैमान अपने बरे एक महल भी बनवाएस। सुलैमान क महल क निर्माण क पूरा करइ मँ तेरह बरिस लगेन। 2उ उ इमारत क भी बनाएस जेका, “लबानोन क बन” कहा जात ह। इ सौ हाथ लम्बा, पचास हाथ चौड़ा, अउर तीस हाथ ऊँच रहा। एहमँ देवदारु क खम्भन क चार कतारन रहिन। हर एक कतारे क सिरे पइ देवदारु क सीर्स रहा। खम्भन क कतारन क आर पार जात भइ देवदारु क सहतीरन रहिन। उ पचे देवदारु क पल्लन क छते क बरे एन सहतीरन पइ धरे रहेन। खम्भन क हर एक विभाग क बरे पन्द्रह सहतीरन रहिन। सब निलाइके पैतालीस सहतीरन रहिन। 4बगल क हर एक देवारे मँ खिड़कियन क तीन कतारन रहिन। खिड़कियन परस्पर आमने-सामने रहिन। 5हर एक क आखिर मँ तीन दरवाजन रहेन। सबहिँ दरवाजन क दुआर अउ चौखटन वर्गाकार रहेन।

6सुलैमान “खम्भन क प्रवेस दुआर मण्डप” भी बनाएस। इ पचास हाथ लम्बा अउ तीस हाथ चौड़ा रहा। प्रवेस दुआर मण्डप क अगला भाग क संग-संग खम्भन पइ टिकी एक ठु छत रही।

7सुलैमान एक ठु सिंहासन कच्छ बनाएस जहाँ उ लोगन क निआउ करत रहा। उ एका “निआव कच्छ” कहत रहा। कच्छ फर्स स लइके छते तलक देवदारु स मढ़ा रहा।

8जउन भवन मँ सुलैमान रहत रहा, उ निआव महाकच्छ क पाछे दूसर आँगन मँ रहा। इ महल वइसे ही बना रहा जइसा निआव महाकच्छ बना रहा। उ अपनी मेहरारु स जउन मिस्र क राजा क बिटिया रही, क बरे बइसा ही महल बनाएस।



9इ सबहिं इमारतन महंगा पाथर क ठुकन स बनी रहिन। इ सबइ पाथर समुचित आकार में आरे स काटे ग रहेन। उ सबइ सामने अउ पाछे कईती स कटे रहेन। इ सबइ महंगा पाथर नेंव स लइके देवार क ऊपरी तहे तलक लगे रहेन। अंगे क चारिहुँ कईती क देवार भी महंगा पाथर टूकन स बनी रहिन। 10नेव बिसाल महंगा पाथरन स बनी रही। कछू पाथर दस हाथ लम्बे रहेन अउर दूसर बारह फुट लम्बे रहेन। 11ओन पाथरन क सीर्स पइ दूसर महंगा पाथर अउ देवदारु क सहतीरन रहिन। 12महल क आँगन, मन्दिर क आँगन अउ मन्दिर क प्रवेश दुआर मण्डप क चारिहुँ कईती देवारन रहिन। उ सबइ देवारन पाथर क तीन कतारन अउ देवदारु काठे क एक कतार स बनी रहिन।

13राजा सुलैमान हीराम नाउँ क मनई क लगे सोर में सँदेसा पठएस। सुलैमान हीराम क यरूसलेम लिआवा। 14हीराम क महतारी नप्ताली परिवार समूह स इस्त्राएली रही। ओकर मरा बाप सोर क रहा जउन काँसा क काम में कुसल रहा। हीराम काँसे स चिजियन बनावत रहा। उ बहोत कुसल अउ अनुभवी कारीगर रहा। एह बरे राजा सुलैमान ओका आवइ बरे कहेस अउर हीराम ओका स्वीकार किहस। एह बरे राजा सुलैमान हीराम क काँसे स निर्मित सबहिं चिजियन क बनाएस।

15हीराम काँसा क दुइ खम्भा बनाएस। हर एक खम्भा अठारह हाथ लम्बा अउ बारह हाथ गोलाईवाला रहा। खम्भा खोखले रहेन अउर धातु तीन इन्च मोटी रही। 16हीराम दुइ काँसा क सीर्स भी बनाएस जउन पाँच हाथ ऊँचे रहेन। हीराम एन सीर्सन क खम्भन क सिरन पइ रखेस। 17तब उ दुइनउँ खम्भन क ऊपर क सीर्सन क ढाँपइ बरे जंजीरन क दुइ जाल बनाएस। 18तब उ अलंकरन क दुइ कतारन बनाएस जउन अनार क तरह देखात रहेन। उ पचे एन काँसन क अनारन क हर एक खम्भा क जालन में, खम्भन क सिरन क सीर्सन क ढाँपइ बरे रखेस। 19पाँच हाथ ऊँच खम्भन क सिरन क सीर्स फूल क आकार क बना रहेन। 20सीर्स खम्भन क सिरन पइ रहेन। उ सबइ कटोरन क आकार क जाल क ऊपर रहेन। उ ठउरे पइ सीर्सन क चारिहुँ कईती कतारन में दुई सौ अनार रहेन। 21हीराम एन दुइनउँ काँसा क खम्भन क मन्दिर क प्रवेश दुआर पइ खड़ा किहस। दुआर क दक्खिन कईती एक खम्भा अउ दुआर क उत्तर कईती दूसर खम्भा खड़ा कीन्ह गवा। दक्खिन क खम्भा क नाउँ याकीन रखा गवा। उत्तर क खम्भा क नाउँ बोआज़ रखा गवा। 22उ पचे फूल क आकार क सीर्सन क खम्भन क ऊपर रखेन। इ तरह दुइनउँ खम्भन पइ काम पूरा भवा।

23तब हीराम काँसा क एक गोल हौज बनाएस। उ पचे इ हउज क “सागर” कहेन। हौज लगभग तीस हाथ गोलाई में रहा। इ आर-पार दस हाथ अउर पाँच हाथ गहिर रहा। 24हौज क बाहरी सिरे पइ एक ठु बारी रही। इ बारी क खाले काँसा क कददुअन क दुइ कतारन हौज क घेरे भए रहिन। काँसे क कददू हौज क हीसा क रूप में एक ठु इकाई में बने रहेन। 25हौज बारह काँसे क बर्धन क पीठन पइ टिका रहा। इ सबइ बारहुँ बर्धा तालाब स दूर बाहेर क

लखत रहेन। तीन ठु उत्तर कईती, तीन दक्खिन क अउ तीन पच्छिम कईती लखत रहेन।

26हौज क देवारन तीन इन्च मोट रहिन। तालाब क चारिहुँ कईती क किनारी एक पयाले क किनारी या फूल क पुंखड़ियन क तरह रहिन। तालाब क छमता लगभग गियारह हजार पाँस सौ गैलन रही।

27तब हीराम दस काँसे क गाड़ियन बनाएस। हर एक चार हाथ लम्बी, चार हाथ चौड़ी अउ पाँच हाथ ऊँच रही। 28गाड़ियन वर्गाकार पल्लन क चउखटन में मड़िके बनाई गइ रहिन। 29पल्लन अउ चउखटन पइ काँसे क सिंह, बर्धा अउ करूब सरगदूत रहेन। सिंह अउ बर्धन क ऊपर अउ खाले फूलन क डिज़ाईन हथौड़ा स पीट-पीट के काँसे में बनाव ग रहेन। 30हर एक गाड़ी में चार काँसे क पहियन काँसे क धुरी क संग रहेन। कोनन पइ काँसे क टेकन बिसाल कटोरा बरे बने रहेन। टेकन पइ हथौड़न स पीट-पीट के फूलन क डिज़ाईन काँसे में बनाव ग रहेन। 31कटोरा बरे ऊपरी सिरे पइ एक ढाँचा बना रहा। इ कटोरन स ऊपर स एक हाथ ऊँच रहा। कटोरा क खुल भवा गोल हीसा डेढ़ हाथ व्यास वाला रहा। काँसे क ढाँचे पइ जउन डिज़ाईन खोदा गए रहेन इ चौकोर रहेन, गोल नाही। 32ढाँचा क खाले चार पहियन रहेन पहिये डेढ़ हाथ व्यासवाले रहेन। पहिये क बीच धुरे गाड़ी क संग एक इकाई क रूप में बने रहेन। 33पहियन रथे क पहियन क नाई रहेन। पहियन क हर एक चीज-धुरे, परिधि, तीलियन अउ नाभी काँसे क बनी रही।

34हर एक गाड़ी क चारिहुँ कोनन पइ चार आधार रहेन। उ सबइ गाड़ी क संग एक इकाई क रूप में बने रहेन। 35हर एक गाड़ी क ऊपरी सिरे क चारिहुँ कईती एक काँसा क आधा हाथ गहिरा पट्टी रही। टेकन अउर पटरियन एक इकाई में बन के गाड़ी क साथ जुड़े रहेन। 36इ गाड़ी बगल अउ ढाँचे पइ करूब सरगदूतन, सिंहन अउ ताड़ क बृच्छन क चित्र काँसा में गाड़ी क बगल अउर ढाँचे पइ खोदे गए रहेन। इ सबइ चित्र गाड़ियन पइ जहाँ भी जगह रही, उकेरे गए रहेन अउर गाड़ी क चारिहुँ कईती क ढाँचे पइ फूल उकेरे गए रहेन। 37हीराम दस गाड़ियन बनाएस अउर उ सबइ सबहिं एक जइसी रहिन। हर एक गाड़ी काँसा क बनी रही। काँसा क गलावा गवा रहा अउर साँचा में ढाला गवा रहा। एह बरे सबहिं गाड़ियन एक ही आकार अउर एक ही रूप क रहिन।

38हीराम दस कटोरन भी बनाएस। एक कटोरा दस गाड़ियन में स हर एक बरे रहा। हर एक कटोरा चार हाथ व्यास वाला रहा अउर हर एक कटोरे में दुइ सौ तीस गैलन आइ सकत रहा। 39हीराम पाँच गाड़ियन क मन्दिर क दक्खिन अउ दूसर पाँच गाड़ियन क मन्दिर क उत्तर में धरेस। उ बिसाल तालाब क मन्दिर क दक्खिन पूर्व कोने में धरेस। 40हीराम बर्तन, नान्ह बेलचन अउ नान्ह कटोरन भी बनाएस। हीराम ओन सारी चिजियन क बनाउब पूरा किहस जेनका राजा सुलैमान ओहसे बनाववाइ चाहत रहा। हीराम यहोवा क मन्दिर बरे जउन कछू बनाएस ओकर सूची इ अहइ:

41 दुइ खम्भा, खम्भन क सिरन बरे कटोरा क आकार क दुइ सीर्स, सीर्सन क चारिहुँ कइँती लगाए जाइवाले दुइ जाल।

42 दुइ जातन बरे चार सौ अनार खम्भन क सिरन पइ सीर्सन क दुइनउँ कटोरन क ढकइ बरे हर एक जात क वास्ते अनारन क दुइ कतारन रहिन।

43 हुँवा दस गाड़ियन रहिन, हर गाड़ी पइ एक कटोरा रहा, 44 एक बिसाल तालाब जउन बारह बर्धन पइ टिका रहा, 45 बर्तन, नान्ह बेलचन, नान्ह कटोरन, अउर यहोवा क मन्दिर बरे सबहिं तस्तरियन।

हीराम उ सबहिं चिजियन बनाइन जेनका राजा सुलैमान चाहत रहा। उ सबइ सबहिं झलकाए भए काँसा स बनी रहिन। 46-47 सुलैमान उ काँसे क कबहुँ नाहीं तौलेस जेकर उपयोग एन चिजियन क बनावइ बरे भवा रहा। उ एँतना जियादा रहा कि एकर तउलब संभव नाहीं रहा। एह बरे सारे काँसे क तौल क कुल योग कबहुँ मालूम नाहीं भवा। राजा एँन चिजियन क सुक्कोत अउ सारतान क बीच यरदन नदी क निचके बनावइ क आदेस दिहस। उ पचे एँन चिजियन क, काँसा क गलाइके अउर जमीन मँ बने साँचन मँ ढालिके, बनाएस।

48 सुलैमान इ भी आदेस दिहस कि मन्दिर बरे सोने क बहोत स चिजियन बनाई जाई। सुलैमान मन्दिर बरे सोना स जउन चिजियन बनाएस, उ सबइ इ अहई।

सुनहरी वेदी;

सुनहरी मेज ओन रोटी बरे जउन कि पवितर स्थान मँ धरी जात रहा।

49 सुद्ध सोना क दीपधार सब स जियादा पवितर ठउर क समन्वा इ सबइ मँ स पाँच दीपधार दक्खिन कइँती अउर पाँच उत्तर कइँती धरी जात रहेन।

सुनहरा फूल, दीपक अउ चिमटन; 50 सुद्ध सोना क कटोरन, पलीता काटई बरे कौंचियन, छोटा कटोरन, कढ़ाईयन, कोइला ढोवइ बरे सुद्ध सोना क तस्तरियन; भीतरी कमरा क दरवाजन बरे जउन सबन त जियादा पवितर स्थान अहइ, अउर मन्दिर क मुख्य कमरा क दूसर दरवाजन बरे सोने क कब्जन।

51 इ तरह सुलैमान, यहोवा क मन्दिर बरे जउन काम उ करइ चाहत रहा, पूरा किहस। तब सुलैमान उ सबइ सबहिं चिजियन लिहस जेनका ओकर पिता दाऊद इ उद्देस्य क बरे सुरच्छित रखे रहिन। उ एन चिजियन क मन्दिर मँ लिआवा। उ चाँदी अउ सोना यहोवा क मन्दिर क खजानन मँ धरेस।

### मन्दिर मँ करार क सन्दूख

8 तब राजा सुलैमान इस्राएल क सबहिं बुर्जुगन, परिवार समूहन क प्रमुखन अउ इस्राएल क परिवारन क प्रमुखन क एक संग यरूसलेम मँ बोलाएस। सुलैमान ओनका सामिल करइ चाहत रहा कि उ पचे करार क सन्दूख क दाऊद नगर स मन्दिर मँ लिआवई। 2 एह बरे इस्राएल क सबहिं लोग इकट्ठा होइके राजा सुलैमान क

लगे आएन। इ एतानीम महीना मँ कुटीर क त्यौहार क मौका रहा, इ बरिस क सतवाँ महीना रहा।

3 इस्राएल क सबहिं बुर्जुगन उ ठउरे पइ आएन। तब याजक लोग पवितर सन्दूख उठाएन। 4 उ पचे पवितर तम्बू अउ तम्बू मँ क सबहिं चिजियन सहित यहोवा क पवितर सन्दूख क लइ आएन। लेवी वंसियन याजक लोगन क मदद एन चिजियन क लइ जाइ मँ किहेन। 5 राजा सुलैमान अउर इस्राएल क सबहिं लोग करार क सन्दूख क समन्वा इकट्ठे भएन। उ पचे अनेक बलि भेंट किहिन। उ पचे एँतना जियादा भेड़िन अउ गोरुअन मारेन कि ओन सबहिं क कउनो मनई गनइ या दर्ज करइ मँ सार्मथ नाहीं रहा। 6 तब याजक लोग यहोवा क करार क सन्दूखे क ओकरे उचित ठउरे पइ धरेन। इ मन्दिर क भीतर सब स जियादा पवितर ठउरे मँ रहा। करार क सन्दूख करुब सरगदूतन क पखनन क खाले धरा गवा। 7 करुब सरगदूतन क पखना करार क सन्दूख क अउर ओका लइ चलइ मँ सहायक बल्लियन क ढाँपे रहेन। 8 इ सबइ सहायक बल्लियन बहोत बड़ी रहिन। जदि कउनो मनई पवितर ठउर मँ सब स जियादा पवितर ठउर क समन्वा खड़ा होइ, तउ उ बल्लियन क सिरन क लख सकत ह। किन्तु बाहेर क कउनो भी ओनका नाहीं लख सकत। उ सबइ बल्लियन आजु भी हुँवा अहई। 9 हिओँ पवितर सन्दूख क भीतर सिरिफ दुइ सिलन रहिन। उ सबइ दुइ सिलन उहइ रहिन जेनका मूसा होरेब नाउँ क ठउरे पइ पवितर सन्दूख मँ धरे रहेन। होरेब उ ठउर रहा जहाँ यहोवा इस्राएल क लोगन क संग ओनके मिश्र स बाहेर आवइ क पाछे करार किहस।

10 याजक सन्दूखे क सब स जियादा पवितर ठउर मँ धरेस। जब याजक पवितर ठउर स बाहेर आएन तउ बादल यहोवा क मन्दिर मँ भर गवा। 11 याजक आपन सेवा करत नाहीं रहि सकेन काहेकि बादर क कारण मन्दिर यहोवा क प्रताप स भर गवा रहा। 12 तब सुलैमान कहेस:

“यहोवा अकासे मँ सूरज चमकाएस, मुला उ करिआ बादर मँ रहब पसन्द किहस।

13 मई तोहरे बरे एक सानदार मन्दिर बनाएउँ, एक निवास जेहमँ तू सदा ही रहब्या।”

14 इस्राएल क सबहिं लोग हुँवा खड़े रहेन। एह बरे सुलैमान ओनकी ओर मुड़ा अउर परमेस्सर ओनका आसीबाँद देइ क कहेस।

15 तब राजा सुलैमान यहोवा स एक लम्बी पराथना किहस। उ जउन पराथना किहस उ इ अहइ:

“इस्राएल क यहोवा परमेस्सर क प्रसंसा करा। यहोवा मोर पिता दाऊद स जउन कछु प्रतिग्या किहस ओनका उ खुद पूरा किहस ह। यहवा मोरे बाप स कहेस,

16 मई अपने लोगन, इस्राएल क मिश्र स बाहेर लिआएउँ। लेकिन मई अबहिं तलक इस्राएल परिवार समूह स कउनो नगर क नाहीं चुनेउँ ह, कि मोका सम्मान देइ बरे मन्दिर-निर्माण करइ। अउर मई इस्राएलियन क नेता कउनो मनई क नाहीं चुनेस ह। किन्तु अब मई यरूसलेम क चुनेउँ ह जहाँ मई सम्मानित होत रहब अउर मई दाऊद क इस्राएली लोगन पइ हुकूमत करइ बरे चुनेउँ ह।”

17“मोर बाप दाऊद जियादा चाहत रहेन कि उ पचे यहोवा, इस्राएल क परमेस्सर क सम्मान बरे मन्दिर बनावड़ें। 18किन्तु यहोवा मोर बाप दाऊद स कहेस, ‘मई जानत हउँ कि तू मोरे सम्मान बरे मन्दिर बनावड़ क प्रबल इच्छा रखत अहा अउर इ नीक अहइ कि तू मोर मन्दिर बनावड़ चाहत अहा। 19किन्तु तू उ मनई नाहीं अहा जेका मई मन्दिर बनावड़ बरे चुनेउँ ह। तोहार पूत मोर मन्दिर बनाई।’

20“इ तरह यहोवा जउन प्रतिग्या किहे रहा ओका पूरी कइ दिहेउँ ह। अब मई अपने बाप दाऊद क ठउरे पइ राजा अहउँ। अब मई यहोवा क प्रतिग्या क अनुसार इस्राएल क लोगन पइ सासन करत हउँ अउर मई यहोवा इस्राएल क परमेस्सर बरे मन्दिर बनावड़ ह। 21मई मन्दिर में एक ठउर पवित्तर सन्दूखे बरे बनावउँ ह। उ पवित्तर सन्दूखे में उ करार अहइ जउन वाचा यहोवा हमरे पुरखन क संग किहे रहा। यहोवा उ वाचा तब किहेस जब उ हमरे पुरखन क मिस्त्र स बाहेर लइ आवा रहा।”

22तब सुलैमान यहोवा क वेदी क समन्वा खड़ा भवा। सबहि लोग ओकरे समन्वा खड़े भएन। राजा सुलैमान अपने हाथन क अकासे कइती फइलाएस। 23उ कहेस,

“हे यहोवा इस्राएल क परमेस्सर तोहरे समान धरती पइ या अकास में कउनो दूसर परमेस्सर नाहीं अहइ। तू अपने लोगन क संग करार किहा अउर ओहमों कायम रहया। तू ओन लोगन क बरे दयालु अउर स्नेहपूर्ण रहा जउन तोहार अनुसरण आपन पूरा हिरदइ स करत हीं। 24तू अपने सेवक मोरे बाप दाऊद स, एक प्रतिग्या किहे रहया अउर तू उ पूरी किहा ह। तू उ प्रतिग्या खुद अपने मुँह स किहे रहया अउर तू अपनी महान सक्ती स उ प्रतिग्या क आज फुरइ घटित होइ दिहा ह। 25अब, यहोवा इस्राएल क परमेस्सर, ओन दूसर प्रतिग्यन क पूरा करा जउन तू अपने सेवक, मोर बाप दाऊद स किहे रहया। तू कहे रहया, ‘दाऊद जइसा तू किहा वइसे ही तोहार सन्तानन क मोर हुकुम क पालन होसियारी स करइ चाही। जदि उ पचे अइसा करिहीं तउ तोहरे परिवार क कउनो न कउनो मनई सदा इस्राएल क लोगन पइ सासन करी।’ 26अउर हे यहोवा, इस्राएल क परमेस्सर, मई फुन तोहसे माँगत हउँ कि तू कृपा कइके मोरे बाप क संग कीन्ह गइ प्रतिग्या क पूरी करत रहा।

27“मुला परमेस्सर, का तू फुरइ इ पृथ्वी पइ हम लोगन क संग रहब्या? तोहका सारा आकास अउ सरग क उच्चतम ठउर भी धारण नाहीं कइ सकत्या? निहचइ ही इ मन्दिर भी, जेका मई बनावउँ ह, तोहका धारण नाहीं कइ सकत। 28मुला तू मोर पराथना अउ मोरे निवेदन पइ धियान द्या। मई तोहार सेवक हउँ अउर तू मोर यहोवा परमेस्सर अहा। इ पराथना क तू स्वीकार करा जेका आज मई तोहसे करत हउँ।

29बीते समइ में तू कहया रहा, ‘मोर हुवाँ सम्मान कीन्ह जाइ।’ एह बरे इ मन्दिर क देख-रेख दिन-रात करा। कृप्या कइके तू मोर, आपन सेवक क पराथना क सुन्या, जेका मई तोहसे इ मन्दिर में कहत हउँ। 30यहोवा, मई अउर तोहरे इस्राएल क लोग इ मन्दिर की ओर पराथना करिहीं। कृपा कइके एन पराथनन पइ धियान द्या। हम जानित ह कि

तू सरग में रहत ह। कृप्या कइके हुँवा स आपन सेवक क पराथना सुन्या अउर हम क छिमा कर्या।

31“जदि कउनो मनई कउनो दूसर मनई क खिलाफ कउनो अपराध करी तउ उ हिओँ तोहरी वेदी क लगे लिआवा जाइ। जदि उ मनई दोखी नाहीं अहइ तउ उ एक किरिया लेइ। उ किरिया लेइ कि उ निर्दोख अहइ। 32उ समइ तू सरग में सुना अउर उ मनई क संग निआव करा। जदि उ मनई अपराधी अहइ तउ कृपा कइके हम क दिखावा कि उ अपराधी अहइ। जदि उ मनई निरपराध अहइ तउ हमक दिखावा कि उ अपराधी नाहीं अहइ।

33“कबहुँ-कबहुँ तोहरे इस्राएल क लोग तोहरे खिलाफ पाप करिहीं अउर ओनकर दुस्मन ओनका हराइ देइहीं। तब लोग तोहरे लगे लउटिहीं अउर उ सबइ लोग इ मन्दिर में तोहार नाउँ क स्तुति करिहीं अउ तोहसे पराथना अउर निवेदन करइहीं। 34तउ मेहरबानी कइके सरग स ओनकर पराथना सुना। तब अपने इस्राएली लोगन क पापन क छिमा करा अउर ओनकर भुइँया ओनका फुन स प्राप्त करइ द्या। तू इ भुइँया ओनके पुरखन क दइ दिहे रहया।

35“कबहुँ-कबहुँ उ पचे तोहरे खिलाफ पाप करिहिं, अउर तू ओनकर भुइँया पर बर्खा होब बन्द कइ देब्या। तब उ पचे इ ठउरे की ओर मुँह कइके पराथना करिहीं। अउर तोहरे नाउँ क स्मृति करिहीं। तू ओनका कस्ट सहइ देब्या अउर उ पचे अपने पापन वापिस घूमि जाइही। 36एह बरे मेहरबानी स सरग में ओनकर पराथना सुना। तब हम पचक्क हमरे पापन बरे छिमा करा। लोगन क सच्ची जिन्नगी जिअई क सिच्छा द्या। हे यहोवा तब कृपा कइके तू उ भुइँया पई बर्खा करा जेका तू ओनका दिहा ह।

37“भुइँया बहोत जियादा झुराइ सकत ह अउर ओह पइ कउनो अन्न उग नाहीं सकी। संभव अहइ लोगन में महामारी फइलइ। संभव अहइ सारा पइदा भवा अन्न कीड़न मकोड़न क जरिये बर्बाद कइ दीन्ह जाइ या तोहार लोग अपने कछू नगरन में अपने दुस्मनन क हमला क सिकार बनई या तोहार अनेक लोग बीमार पड़ि जाईं। 38जब एनमों स कछू भी घटित होइ, अउर एक भी मनइ अपने पापन बरे पछतावा करइ, अउर अपने हाथन क इ मन्दिर कइती पराथना में फइलावइ तउ 39मेहरबानी कइके ओकर पराथना सुना। ओकर पराथना क सुना, जब तू अपने निवास स्थान सरग में अहा। तब लोगन क छिमा करा अउर ओनकर मदद करा। सिरिफ तू इ जानत अहा कि मनई क हिरदय में का बाटइ? एह बरे हर एक क संग ओकर काम अउर उदेस क अनुसार निआव करा। 40इ एह बरे करा ताकि तोहार लोग तोहसे डेरई अउर तोहार सम्मान उ समइ तलक करई जब तलक उ पचे इ भुइँया पइ रहई जेहका तू हमरे पुरखन क दिहे रहया।

41-42“दूसर जगहन क लोग तोहार महानता अउ तोहरी सक्ती क बारे में सुनिहीं। उ पचे बहोत दूर स इ मन्दिर में पराथना करइ अइहीं। 43मेहरबानी कइके आपन निवास स्थान, सरग स ओनकर पराथना सुना। मेहरबानी कइके तू उ सब कछू करा जेका दूसर जगहन क लोग तोहसे माँगत ही। तब उ सबइ लोग भी इस्राएली लोगन क तरह ही

तोहसे डेरइहीं अउर तोहार सम्मान करिहीं। तब सबहिं जगहन क लोगन इ जानिहीं कि मई इ मन्दिर क तोहका सम्मान देइ बरे बनाएँ ह।

44“कबहुँ-कबहुँ तू अपने लोगन क अपने दुस्मनन क खिलाफ जाइ अउर ओनसे जुद्ध करइ क आदेस देब्या। तब तोहार लोग तोहार चुने भए इ नगर अउर मोर बनाए भए मन्दिर की ओर अभिमुख होइहीं। जेका मई तोहरे सम्मान में बनाएँ ह अउर उ पचे तोहार पराथना करिहीं। 45उ समइ तू अपने निवास स्थान सरग स ओनकर पराथना क सुना अउर ओनकर मदद करा।

46“तोहार लोग तोहरे खिलाफ पाप करिहीं। मई एका एह बरे जानत हउँ काहेकि हर एक मनई पाप करत ह अउर तू अपने लोगन पइ कोहाब्या। तू ओनके दुस्मनन क ओनका हरावइ देब्या। ओनकर दुस्मन ओनका बंदी बनइहीं। अउर ओनका कउनो बहोत दूर क देस में लइ जइहीं। 47उ दूर क देस में तोहार लोग समुझिहीं कि का होइ गवा ह। उ पचे अपने पापन बरे पछतावा करिहीं अउर तोहसे पराथना करिहीं। उ पचे आप क समन्वा पराथना करिहीं अउर कहिहीं, ‘हम पाप अउ अपराध किहा ह।’ 48उ पचे उ दूर क देस में रहिहीं। किन्तु जदि उ पचे इ देस जेका तू ओनके पुरखन क दिहा अउर तोहार चुने नगर अउर इ मन्दिर जेका मई तोहरे सम्मान में बनाएँ ह। अउर अगर उ तोहरे पास पूरा हिरदय स लउटत ह, 49तउ तू मेहरबानी कइके ओकर पराथना अउर माँग क अपने निवास स्थान सरग स सुना अउर ओकरे उदेस क सहारा द्या। 50अपने लोगन क सबहिं पापन बरे छिमा कइ द्या अउर तू ओनका तोहार विरोध होइ बरे छिमा करा अउर कइके ओनके दुस्मनन क ओनके बरे दयालु बनावा। 51याद राखा कि उ पचे तोहरे लोग अहइँ, याद राखा कि तू ओनका मिस्त्र स बाहेर लिआया। इ वइसा ही रहा जइसा तू बरत भट्ठी स ओनका धइके हींच लिहे हवा।

52“यहोवा परमेस्सर, कृपा कइके मोर पराथना अउर अपने इस्त्राएली लोगन क पराथना सुना। ओनकर पराथना, जब कबहुँ उ पचे तोहार मदद करइ, सुना। 53तू ओनका पृथ्वी क सारे मनइयन में स अपन खास लोग होइ बरे चुन्या ह। यहोवा तू ओका हमरे बरे करइ क प्रतिग्या किहा ह। तू हमरे पुरखन क मिस्त्र स बाहेर लिआवत समइ इ प्रतिग्या अपने सेवक मूसा क माध्यम स किहे रह्या।”

54सुलैमान परमेस्सर स इ पराथना किहेस। उ वेदी क समन्वा अपने घुटनन क बल रहा। सुलैमान सरग कइँती भुजन उठाइके पराथना किहेस। तब सुलैमान पराथना पूरी किहेस अउर उ उठ खड़ा भवा। 55तब उ ऊँच आवाज में इस्त्राएल क सबहिं लोगन क आसीर्वाद देइ बरे परमेस्सर स याचना किहेस। सुलैमान कहेस:

56“यहोवा क स्तुति करा। उ प्रतिग्या किहेस, कि उ अपने इस्त्राएल क लोगन क आराम देइ अउर उ हम क आराम दिहेस। यहोवा अपने सेवक मूसा क उपयोग किहेस अउर इस्त्राएल क लोगन क बरे बहोत स नीक प्रतिग्या किहेस अउर यहोवा ओन हर एक प्रतिग्यन क पूरा किहेस ह। 57मई पराथना करत हउँ कि यहोवा, हमार परमेस्सर हम

लोगन क संग उहइ तरह होइ जइसे उ हमरे पुरखन क संग रहा। मई पराथना करत हउँ कि यहोवा हम क कबहुँ न तजी। 58मई पराथना करत हउँ कि हम ओकरी कइँती अभिमुख होब अउर ओकर अनुसरण करब। तब हम लोग ओकरे सबहिं नेमन, निर्णयन अउ आदेसन क पालन करब जेनका उ हमरे पुरखन क दिहेस। 59मई आसा करत हउँ कि यहोवा हमार परमेस्सर सदा ही इ पराथना क अउर जउने चिजियन क मई याचना किहेउँ ह, याद राखी। मई पराथना करत हउँ कि यहोवा अपने सेवक राजा अउर अपने लोग इस्त्राएल क बरे इ सबइ सब कछू करी। मई पराथना करत हउँ कि उ हर रोज इ करी। 60जदि यहोवा एन कामन क करी तउ संसार क सबहिं मनई इ जनिहीं कि मात्र यहोवा ही फुरइ परमेस्सर अहइ। 61ऐ लोगो, तू पचन्क यहोवा हमरे परमेस्सर क वफदार अउर ओकरे बरे सच्चा होइ चाही। तू पचन्क ओकरे सबहिं नेमन अउ आदेसन क हमेसा अनुसरण अउ पालन करइ चाही। जइसा कि अबहुँ करत ह।”

62तब राजा सुलैमान अउ ओकरे संग क इस्त्राएल क लोग यहोवा क बलि भेंट किहन। 63सुलैमान बाईस हजार गोरुअन अउ एक लाख बीस हजार भेड़िन क मारेस। इ सबइ मेलबलि बरे रहिन। इहइ मारग रही जेहसे राजा अउ इस्त्राएल क लोग यहोवा क मन्दिर क समर्पण किहन।

64उहइ दिन राजा सुलैमान मन्दिर क समन्वा क आँगन समर्पित किहेस। उ पचे होमबलि, अन्नबलि अउ मेलबलि क चर्बी क भेंट चढ़ाएस। उ इ एह बरे किहेस कि एन सारी भेंटन क धारण करइ बरे यहोवा क समन्वा क काँसा क वेदी बहोत जियादा नान्ह रही।

65इ तरह मन्दिर में राजा सुलैमान अउ इस्त्राएल क सारे लोग छुट्टी क पर्व मनाएन। सारा इस्त्राएल, उत्तर में हमात दर्रे स लइके दक्खिन में मिस्त्र क सीमा तलक हुवाँ मौजूद रहा। हुवाँ असंख्या लोग मौजूद रहेन। उ पचे सात दिना तलक यहोवा क संग मिलिके उत्सव मनाएन। तब उ पचे अगले सात दिनन तलक हुवाँ ठहरेन। उ पचे सब मिलिके चौदह दिनन तलक उत्सव मनाएन। 66अगले दिन सुलैमान लोगन स घरे जाइ क कहेस। सबहिं लोग राजा क धन्यवाद दिहन, बिदा लिहन अउर उ पचे घरे चले गएन। उ पचे खुस रहेन काहेकि यहोवा अपने सेवक दाऊ क बरे अउर इस्त्राएल क लोगन क बरे बहोत सारी नीक चिजियन किहे रहेन।

### परमेस्सर सुलैमान क लगे फुन आवत ह

9 इ तरह सुलैमान यहोवा क मन्दिर अउर अपने महल क बनाउब पूरा किहेस। सुलैमान ओन सबहिं क बनाएस जेनकर निर्माण उ करइ चाहत रहा। 2तब यहोवा सुलैमान क समन्वा फुन वइसे ही परगट भवा जइसे उ एकरे पहिले गिबोन में भवा रहा। 3यहोवा ओहसे कहेस: “मई तोहार पराथना सुनेउँ। मई तोहरे निवेदन भी सुनेउँ, जउन तू मोहसे करवावइ चाहत रह्या। तू इ मन्दिर क बनाया अउर मई एँका एक पवित्र ठउर बनाएँउ ह। एह बरे हिआँ मोर सदा ही सम्मान होइ। मई एह पइ अपनी निगाह

रखब अउर एकरे बारे में सदा ही सोचत रहब। 4तोहका मोर सेवा वइसे ही करइ चाही जइसी तोहरे बाप दाऊद किहेस। उ एका मन क खराई अउ ईमानदारी स किहेस अउर तोहका मोरे नेमन अउर ओन आदेसन क पालन करइ चाही जेनका मई तोहका दिहेउँ ह।

5“जदि तू इ सब कछू करत रहब्या तउ मई इ निहचित लखब कि इस्राएल क राजा सदा ही तोहरे परिवार में स ही कउनो होइ। इहइ प्रतिग्या अहइ जेका मई तोहरे बाप दाऊद स कहे रहेउँ। मई ओहसे कहे रहेउँ कि इस्राएल पइ सदा ही ओकरे सन्तानन में स एक क सासन होइ।

6-7“मुला जदि तू या तोहार सन्तानन मोर अनुसरण करब तजत ही, मोर दिए गए नेमन अउ आदेसन क पालन नाहीं करत हीं अउर दूसर देवता क सेवा करत अहीं तउ मई इस्राएल क उ देस तजइ क मजबूर करब जेका मई ओनका दिहेउँ ह। इस्राएल दूसर लोगन क बरे उदाहरण होइ अउर इस्राएल दूसर लोगन क मजाक क बिसय होइ। मई मन्दिर क पवित्र किहेउँ ह। इ उ जगह अहइ जहाँ लोग मोर सम्मान करत हीं। किन्तु जदि तू मोर आग्या क पालन नाहीं करत्या तउ एका मई बर्बाद कइ देब। 8इ मन्दिर बर्बाद कइ दीन्ह जाइ। हर एक मनई जउन एका लखी अचम्भ अउ हैरान होइ। उ पचे पूछिहीं, ‘यहोवा इ देस क बरे अउर इ मन्दिर क बरे ऐतना भंयकर बात काहे किहेस?’ 9दूसर लोग जवाब देइहीं, ‘इ एह बरे भवा कि उ पचे यहोवा अपने परमेस्सर क तजि दिहस। उ ओनके पुरखन क मिस्त्र स बाहेर लिआए रहा। मुला उ पचे दूसर देवतन क अनुसरण करइ क निहचइ किहेन। उ पचे ओन देवतन क सेवा अउ पूजा करब सरु किहन। इहइ कारण अहइ कि यहोवा ओनके बरे ऐतना खौफनाक कार्य किहस।”

10यहोवा क मन्दिर अउ अपना महल बनावइ में सुलैमान क बीस बरिस लगन। 11बीस बरिस क पाछे, राजा सुलैमान सोर क राजा हीराम क गलील में बीस नगर दिहस। सुलैमान राजा हीराम क उ सबइ नगर दिहस काहेकि हीराम मन्दिर अउ महल बनावइ में सुलैमान क मदद किहेस। हीराम सुलैमान क ओतने सारे देवदारु अउर चीर बृच्छ तथा सोना दिहस जेतना उ चाहेस। 12एह बरे हीराम सोर स एन नगरन क लखइ बरे जात्रा किहस, जेनका सुलैमान ओका दिहस। जब हीराम ओन नगरन क लखेस तउ उ खुस नाहीं भवा। 13राजा हीराम कहेस, “जउन नगरन तू मोका दिहा ह उ सबइ का अहइ?” राजा हीराम उ पहेँटा क नाउँ काबूल प्रदेस धरेस अउर उ छेत्र आजु भी कबूल कहा जात ह। 14हीराम सुलैमान क लगे लग भग नौ हजार पौंड सोना मन्दिर क बनावइ में उपयोग करइ बरे पठए रहा।

15राजा सुलैमान दासन क अपने मन्दिर अउ महल बनावइ क बरे काम करइ क नाते मजबूर किहस। तब राजा सुलैमान एन दासन क उपयोग बहोत स चिजियन क बनावइ में किहस। उ मिल्लो बनावस। उ यरूसलेम नगर क चारिहूँ कइँती देवार भी बनावस। तब उ हासोर, मगिद्दो अउर गेजेर नगरन क फुन बनावस।

16बीते समइ में मिस्त्र क राजा गेजेर नगर क बिरूद्ध लड़ा रहा अउर ओका जराइ दीन्ह ग रहा। उ ओन कनानी

लोगन क मार डाएस जउन हुवाँ रहत रहेन। सुलैमान फिरौन क बिटिया स बियाह किहेस। एह बरे फिरौन उ नगर क सुलैमान क बरे बियाह क भेंट क रुप में दिहस। 17सुलैमान उ नगर क फुन बनावस। सुलैमान खाले बथोरेन नगर क भी बनावस। 18राजा सुलैमान जुदेन रेगिस्तान में बालात अउ तामार नगरन क भी बनावस। 19राजा सुलैमान उ सबइ नगर भी बनावस जहाँ उ अन्न अउर दूसर चिजियन क भण्डार करत रहत रहेन। उ अपने रथन अउ घोड़न क बरे जगह बनावस। सुलैमान दूसर बहोत स चिजियन बनावस जेनका उ यरूसलेम, लबानोन अउ अपने सासित दूसर सबहिं जगहन में चाहत रहा।

20देस में अइसे लोग भी रहेन जउन इस्राएली नाहीं रहेन। उ सबइ लोग एमोरी, हिती, परिज्जी, हिब्बी अउर यबूमी रहेन। 21किन्तु इस्राएली ओन लोगन क बर्बाद नाहीं कइ सके रहेन। किन्तु सुलैमान ओनका दास क रुप में अपने बरे काम करइ क मजबूर किहस। उ पचे अबहिं तलक दास अहइ। 22सुलैमान कउनो इस्राएली क अपना दास होइ बरे मजबूर नाहीं किहस। इस्राएल क लोग फउजी, राज कर्मचारी, अधिकारी, नायक अउर रथचालक रहेन।

23सुलैमान क परिजोजनन क साढ़े पाँच सौ पर्यवेच्छक रहेन। उ पचे मजदूरन क अधिकारी रहेन। 24फिरौन क बिटिया दाऊद क नगर स हुवाँ गइ जहाँ सुलैमान ओकेर बरे बिसाल महल बनावस। तब सुलैमान मिळों बनावस।

25हर बरिस तीन दाई सुलैमान होमबलि अउ मेलबलि वेदी पइ चढ़ावत रहा। इ उहइ वेदी रही जेका सुलैमान यहोवा बरे बनावे रहा। राजा सुलैमान यहोवा क समन्वा सुगन्धि भी बारत रहा। एह बरे मन्दिर क बरे जरूरी चिजियन दिया करत रहा। 26राजा सुलैमान एस्योन गेबेर में जहाज भी बनावस। इ नगर एदोम पहेँटा में लाल सागर क किनारे एलोत क लगे रहा। 27राजा हीराम क लगे नाविक रहेन जउन समुदर क बारे में बढ़िया गियान रखत रहेन। राजा हीराम ओन मनइयन क सुलैमान क नाविक बेड़ा में सुलैमान क मनइयन क संग सेवा करइ बरे पठएस। 28सुलैमान क जहाज ओपोर क गाएन। उ सबइ जहाज एकतीस हजार पाँच सौ पौण्ड सोना आपोर स सुलैमान क बरे लइके लउटेन।

### सीबा क रानी सुलैमान स मिलइ आवत ह

10 सीबा क रानी सुलैमान क बारे में सुनेस। एह बरे उ कठिन सवालन स ओकर परीच्छा लेइ आइ। उ सेवकन क बिसाल गिनती क संग यरूसलेम क जात्रा किहस। अनेक ऊँट मसालन, रतन अउ बहोत सा सोना ढोवत रहेन। उ सुलैमान स मिली अउर उ ओन सब सवालन क पूछेस जेनका उ सोच सकत रही। 3सुलैमान सबहिं सवालन क जवाब दिहेस। ओकर कउनो भी सवाल ओका जवाब देइ बरे बहोत जियादा कठिन नाहीं रहा। 4सीबा क रानी समुझ लिहस कि सुलैमान बहोत बुद्धिमान अहइ। उ उ सुन्नर महल क भी लखेस जेका उ बनावे रहा। 5रानी राजा क मेज पइ भोजन भी लखेस। उ ओकरे अधिकारियन

क एक संग मिलत लखेस। उ महल क सेवकन अउर पिलाइवालन जउन अच्छे ओढ़नन क पहिर रखे रहा ओनका भी लखेस। उ ओकर दावतन अउर उ भेंटन क लखेस जउन उ यहोवा क मन्दिर में चढ़ाएस रहा। ओन सबहिं चिजियन असल में ओका चकित कइ दिहन। 'मानो ओकर मुँह क बोली बन्द होइ गवा!'

6एह बरे रानी राजा स कहेस, "मई अपने देस में आप क बुद्धिमानी अउ बहोत सी बातन क बारे में सुनेउँ जउन आप किहन। उ सबइ सबहिं बातन फुरइ अहई। 7मई एन बातन में तब तलक नाही पतियात जब तलक मई हिओँ नाही आइ अउर एन चिजियन क अपनी आँखियन स नाही लखेउँ। अब मई लखत हउँ कि मोका एकर आधा भी नाही कहा गवा रहा। जेतना मोका लोग कहे रहा तोहार बुद्धिमता अउ सम्पति ओहसे बहोत जियादा अहइ। 8आप क मेहररुअन अउ आप क अधिकारी बहोत भाग्साली अहई। उ पचे रोजाना आप क सेवा कइ सकत हीं अउर आपका बुद्धिमता स भरी बातन सुन सकत हीं। 9आप क यहोवा परमेस्सर स्तुति जोगगा अहइ। उ तोहका इस्त्राएल क राजा बनावइ में खुस भइ रहा। यहोवा परमेस्सर इस्त्राएल स हमेसा पिरेम करत ह। एह बरे उ आप क राजा बनावस। आप नेमन क अनुसरण करत हीं अउर लोगन क संग निआव स भरा बेउहार करत हीं।"

10तब सीबा क रानी राजा क लगभग नौ हजार पौण्ड सोना दिहेन। उ ओका अनेक मसालन अउ रतन भी दिहस। जेतना मसाला पहिले कबहुँ कउनो इस्त्राएल क लिआइके दिहे रहा। सीबा क रानी ओहसे जियादा मसालन सुलैमान क दिहस।

11हीराम क जहान ओपोर स सोना लइ आएन। उ सबइ जहाज बहोत जियादा लकड़ी अउ रतन भी लिआएन। 12सुलैमान लकड़ी क उपयोग मन्दिर अउ महल क सम्भारइ बरे किहस। उ लकड़ी क उपयोग गायकन क बरे वीणन अउ बाँसुरियन बनावइ में भी किहेस। दूसर कउनो भी मनई उ तरह क लकड़ी इस्त्राएल में कबहुँ नाही लिआवा, अउर कउनो भी मनई तब स उ प्रकार क लकड़ी नाही लखेस।

13तब राजा सुलैमान सीबा क रानी क उ सबइ भेंटन दिहस जउन कउनो कउनो दूसर देस क सासक क सदा ही देत ह। तब उ ओका सब कछू दिहस जउन कछू भी उ माँगस। एकरे पाछे रानी सेवकन सहित अपने देस क वापस लउट गइ।

14राजा सुलैमान हर बरिस लगभग उन्नासी हजार नौ सौ बीस पौण्ड सोना प्राप्त करत रहा। 15बइपार क जहाजन स सोना लिआए जाइ क अलावा उ वाषिक, बइपारियन अउ अरब क राजा लोग अउ देस क प्रसासकन क भी सोना प्राप्त किहन।

16राजा सुलैमान दुइ सौ बड़की ढारन पीटा भवा सोना स बनावस। हर एक ढार में लगभग पन्द्रह पौण्ड सोना लगा रहा। 17उ पीटा भवा सोना स तीन सौ नान्ह ढारन भी बनावस। हर एक ढार में लगभग चार पौण्ड सोना लगा रहेन। राजा ओनका उ भवन में धरेस जेका "लबानोन क वन" कहा जात रहा।

18राजा सुलैमान एक ठु बिसाल हाथी दाँत क सिंहासन भी बनावस। उ ओका निखालिस सोना स मढ़ेस। 19सिंहासने पइ पहोंचइ बरे ओहमाँ छः पैड़ियन रहिन। सिंहासन क पिछला भाग सिरे पइ गोल रहा। कुर्सी क दुइनउँ कइँती हत्थन अउर कुर्सी क बगल लगे रहेन, अउ कर्सी क दुइनउँ हत्थन क खाले सिंहन क मूर्ती बनी रहिन। 20छः पैड़ियन में स हर एक पइ दुइ सिंह रहेन। हर एक क सिरे पइ एक सेर रहा। कउनो भी दूसर राज्ज में इ तरह क कछू भी नाही रहा। 21सुलैमान क सबहिं पियालन अउ मग सोना क बने रहेन। सबहिं बरतन "लबानोन क वन" नाउँ क भवन में रखा रहेन उ सबइ भी निखालिस सोना क बने रहेन। हुवाँ महल में कछू भी चाँदी क नाही बना रहा। सुलैमान क समइ में सोना ऐतना जियादा रहा कि लोग चाँदी क महत्वपूर्ण नाही समुझत रहेन।

22राजा क लगे बहोत स बइपार क जहाज भी रहेन जेनका उ दूसर देसन स चिजियन क बइपार करइ बरे बाहरे पठवत रहा। इ सबइ जहाज हीराम क जहाज क संग जात्रा करत रहेन। हर तीसरे बरिस जहाज सोना, चाँदी, हाथी दाँत अउ गोरु लिआवत रहेन।

23सुलैमान भुईया पइ महानतम राजा रहा। उ सबहिं राजा लोगन स जियादा धनवान अउ बुद्धिमान रहा। 24सर्वत्र लोग राजा सुलैमान क लखइ चाहत रहेन। उ पचे परमेस्सर क जरिये दीन्ह गइ ओकर बुद्धिमानी क बात सुनइ चाहत रहेन। 25हर बरिस लोग राजा क दर्सन करइ आवत रहेन अउ हर मनई भेंट लिआवत रहा। उ पचे सोना, चाँदी, ओढ़नन, अस्त्र-सस्त्र, मसालन, घोड़न अउ खच्चरन लिआवत रहेन।

26एह बरे सुलैमान क लगे अनेक रथ अउर घोड़न रहेन। ओकरे पास चौदह सौ रथ अउर बारह हजार घोड़न रहेन। सुलैमान एन रथन क बरे बिसेस नगरन बनावस। राजा सुलैमान इ नगरन में कछू रथन राखेन अउर कछू क अपने लगे यरूसलेम में भी रखेस। 27राजा इस्त्राएल क बहोत सम्पन्न बनावइ दिहस। यरूसलेम नगर में चाँदी ऐतनी साधारण रही जेतनी चट्टानन, देवदारु क लकड़ी अउ पहाड़न पइ उगाइवाले असंख्य अंजीर क बृच्छ साधारण रहेन। 28सुलैमान घोड़न क मिस्त्र अउ कुए स मँगाएस। ओकरे बइपारी ओनका कुए में खरीदेस रहेन अउर ओनका इस्त्राएल लिआवत रहेन। 29मिस्त्र क एक ठु रथ क कीमत लगभग पन्द्रह सौ पौण्ड चाँदी रही अउर एक ठु घोड़े क कीमत पौने चार पौण्ड चाँदी रही। सुलैमान घोड़न अउर रथ हित्ती अउ अरामी राजा लोगन क हाथ बेचत रहा।

### सुलैमान अउ ओकर बहोत स मेहररुअन

**11** राजा सुलैमान बहोत सारे गैर इस्त्राएली मेहररुअन स पिरेम किहे रहा। एनमाँ फिरौन क बिटिया, हित्ति, मोआबी, अम्मोनी, एदोमी अउर सीदोनी मेहररुअन रहिन। 2बीते समइ में यहोवा इस्त्राएल क लोगन स कहे रहा, "तोहका दूसर रास्ट्रन क मेहररुअन स बियाह नाही करइ चाही। जदि तू अइसा करब्या तउ उ सबइ लोग तोहार हिरदय क आपन देवतन क अनुसरण करइ बरे फिराइ लेइ।" किन्तु सुलैमान ओन मेहररुअन क पिरेम पासा में

पड़ा। 3सुलैमान क सात सौ पत्नियन रहिन। (इ सबइ राजकुमारी रहिन।) ओकरे पास तीन सौ दासियन भी रहिन, जउन ओकर रखैल रहिन। ओकरी पत्नियन ओकरे हिरदय क परमेस्सर स दूर हटाइ दिहेन। 4जब सुलैमान बुढ़वा भवा तउ ओकर पत्नियन ओहसे दूसर देवतन क अनुसरण करइ बरे मज़बूर किहेन। सुलैमान पूरी हिरदय स यहोवा क अनुसरण नाहीं किहेस जउने तरह ओकर बाप दाऊद किहे रहा। 5सुलैमान सीदोन क देवी, असतोरेत क पूजा किहस। उ अम्मोनियन क भयानक देवमूरति, मिलकोम क भी पूजा किहेन। 6इ तरह सुलैमान यहोवा क बरे अपराध किहस। सुलैमान यहोवा क अनुसरण पूरी तरह उहइ प्रकार नाहीं किहस जउने प्रकार ओकर बाप दाऊद किहे रहा।

7सुलैमान कमोस क पूजा बरे ऊँच ठउर बनाएस। कमोस मोआबी लोगन क भयानक देवमूरति रही। सुलैमान कामोस क ऊँच ठउर क यरूसलेम क अगली पहाड़ी पड़ बनवाएस। सुलैमान उहइ पहाड़ी पड़ मोलेक क ऊँच ठउर भी बनाएस। मोलेक अम्मोनी लोगन क भयानक देवमूरति रही। 8तब सुलैमान दूसर देसन क अपनी सबहिं मेहररुअन क बरे उहइ किहस। ओकर मेहररुअन सुगन्धि बारत रहिन अउर अपने देवतन क बलि भेंट करत रहिन।

9सुलैमान यहोवा, इस्राएल क परमेस्सर क अनुसरण करइ स दूर हट गवा। ओकरे पाछे यहोवा सुलैमान क लगे दुइ दाई प्रगट भवा रहा। एह बरे यहोवा सुलैमान पड़ कोहाइ गवा। 10यहोवा सुलैमान स कहेस कि तोहका दूसर देवतन क अनुसरण नाहीं करइ चाही। किन्तु सुलैमान यहोवा क आदेस क पालन नाहीं किहस। 11एह बरे यहोवा सुलैमान स कहेस, “तू मोरे सँग कीन्ह गइ आपन करार क तोड़ब पसन्द किहा ह। तू मोरे आदेसन क पालन नाहीं किहा ह। एह बरे मई प्रतिग्या करत हउँ कि मई तोहसे तोहार राज्ज लइ लेब। मई प्रतिग्या करत हउँ कि मई तोहसे तोहार राज्ज धोर लेब। मई एका तोहरे सेवकन में स एक क देब। 12मुला मई तोहरे बाप दाऊद स पिरेम करत रहेउँ। एह बरे जब तलक तू जिअत अहा तब तलक मई तोहार राज्ज नाहीं लेब। मई तब तलक प्रतीच्छा करब जब तलक तोहार पूत राजा नाहीं बन जात। तब मई ओहसे एका लेब। 13तउ भी मई तोहरे पूत स सारा राज्ज नाहीं लेब। मई ओका एक परिवार समूह पड़ हुकूमत करइ देब। इ मई दाऊद बरे करब। उ एक ठु नीक सेवक रहा। अउर इ मई अपने चुने भए नगर यरूसलेम बरे भी करब।”

### सुलैमान क दुस्मन

14उ समइ यहोवा एदोमी हद क सुलैमान क दुस्मन बनाएस। हद एदोम क राजा परिवार क रहा। 15इ इ तरह घटित भवा। कुछ समइ पहिले दाऊद एदोम क हराएस। योआब दाऊद क सेना क सेनापति रहा। योआब एदोम में मरे मनइयन क दफनावइ गवा। तब योआब हुवाँ जिअत सबहिं मनइयन क मार डाएस। 16योआब अउ सारे इस्राएली एदोम में छः महीने तलक ठहरेन। उ समइ क बीच उ पचे एदोम क सबहिं मनइयन क मार डाएन। 17मुला उ समइ

हदोद अबहिं एक ठु किसोर ही रहा। एह बरे हद मिस्त्र क पराइ निकरा। ओकरे बाप क कछू सेवक ओकरे संग गाएन। 18उ पचे मिद्यान क तजेन अउर उ पचे परान क गाएन। हुवाँ दूसर लोग भी ओकरे संग सामिल भएन। अउर पूरा समूह मिस्त्र गाएन। उ पचे मिस्त्र क राजा फिरौन क लगे गाएन अउर ओहसे मदद माँगैन। फिरौन हद क एक ठु घर अउर कछू भुइँया दिहस। फिरौन ओका मदद भी दिहस अउर ओका खाइ क बरे भोजन भी दिहस।

19फिरौन हद क बहोत पसन्द किहस यह बरे उ ओका एक ठु पत्नी भी दिहस। मेहरारु फिरौन क पत्नी तहपनेस क बहिन रहिन। 20एह बरे तहपनेस क बहन हद स बीही गइ। ओकर एक ठु पूत गनूबत नाउँ क भवा। रानी तहपनेस गनूबत क अपने बच्चन क संग फिरौन क महल में बड़ा होइ दिहस।

21मिस्त्र में हद सुनेस कि दाऊद मर गवा। उ इ भी सुनेस कि सेनापित योआब मर गवा। एह बरे हद फिरौन स कहेस, “मोका अपने देस में अपने घर वापस लउट जाइ द्या।”

22किन्तु फिरौन जवाब दिहस, “मइ तोहका सारी चीच, जेनकर हिआँ जरुरत अहइ, दीन्ह ह। तू अपने देस में वापस काहे जाइ चाहत अहा?”

हद जवाब दिहस, “मेहरबानी कइके मोका घरे लउटइ द्या।”

23यहोवा दूसरे मनई क भी सुलैमान क खिलाफ दुस्मन बनाएस। इ मनई एल्यादा क पूत रजोन रहा। रजोन अपने सुआमी क हिआँ स पराइ गवा रहा। ओकर सुआमी सोबा क राजा हददेजेर रहा।

24दाऊद जब सोबा क सेना क हराइ दिहस तब ओकरे पाछे रजोन कछू मनइयन क बटोरैस अउर एक ठु नान्ह सेना क प्रमुख बन गवा। रजोन दमिस्क गवा अउर हुवईँ ठहरा। रजोन दमिस्क क राजा होइ गवा। 25रजोन अराम पड़ हुकूमत करत रहा। रजोन इस्राएल स घिना करत रहा, एह बरे सुलैमान जब तलक जिअत रहा उ पूरे समइ इस्राएल क दुस्मन बना रहा। रजोन अउ हद इस्राएल बरे बड़की परेसानियन पइदा किहन।

26नबात क पूत यारोबाम सुलैमान क सेवकन में स एक रहा। यारोबाम एप्रैम परिवार समूह स रहा। उ सरेदा नगर क रहा। यारोबाम क महतारी क नाउँ सरुयाह रहा। ओकर बाप मर चुका रहा। उ राजा क खिलाफ होइ गवा।

27यारोबाम राजा क खिलाफ कइसे भवा। एकर कहानी इ अहइ। सुलैमान मिल्लो बनावत रहा अउर आपन बाप दाऊद क नगर क देवार क मजबूत करत रहा। 28यारोबाम एक ठु बलवान मनई रहा। सुलैमान लखेस कि इ जवान एक ठु नीक स्त्रिमिक अहइ। एह बरे सुलैमान ओका यूसुफ परिवार समूह क स्त्रिमिकन क अधिकारी बनाइ दिहस। 29एक दिन यारोबाम यरूसलेम क बाहेर जात्रा करत रहा। सीलो क अहिय्याह नबी ओहसे सड़किया पड़ मिला। अहिय्याह एक ठु नवा अंगरखा पहिरे रहा। इ दुइनउँ मनई देस में अकेले रहैन। 30अहिय्याह आपन नवा अंगरखा लिहस अउर एका बाहर टूकन में फार डाएस।

31तब अहिय्याह यारोबाम स कहेस, “इ अंगरखा क दस टूकन तू अपने बरे लइ ल्या। यहोवा इस्त्राएल क परमेस्सर कहत ह, ‘मई सुलैमान स राज क छीन लेब अउर मई परिवार समूहन में स दस क तोहका देब। 32अउर मई दाऊद क परिवार क सिरिफ एक परिवार समूह पइ हुकूमत करइ देब। मई ओनका सिरिफ इ समूह क लेइ देब। मई इ अपने दाऊद अउ यरूसलेम बरे अइसा करइ देब। यरूसलेम उ नगर अहइ जेका मई सारे इस्त्राएल के परिवार समूह स चुनेउँ ह। 33मई सुलैमान स राज लइ लेब काहेकि उ मोर अनुसरण करब तजि दिहस। उ सीदानी देवमूर्ति अस्तोरेत, मोआबी देवता क मोस अउ अम्मोनी देवता मिल्कोम क पूजा करत ह। सुलैमान उ नाही करत ह जउन मोरे नजर में नीक अहइ। उ मोरे नेमन अउ आदेसन क पालन नाही करत। उ उ मारग में नाही रहत जेह पइ ओकर बाप दाऊद रहत रहा।

34एह बरे मई राज क सुलैमान क परिवार स लइ लेब। किन्तु मई सुलैमान क ओकरे बाकी जिन्नगी भइ ओनकर सासक रहइ देब। इ मई अपने सेवक दाऊद बरे करब। मई दाऊद क एह बरे चुने रहेउँ कि उ मोर सबहिं आदेसन व नेमन क पालन करत रहा। 35मुला मई ओकरे पूत स राज लइ लेब। अउर मई तोहका दस परिवार समूहन पइ हुकूमत करइ क अनुमति देब। 36मई सुलैमान क पूत क एक परिवार समूह पइ हुकूमत करत भए रहइ देब। मई एका एह बरे करब कि मोर सेवक दाऊद क हुकूमत यरूसलेम में मोर समन्वा सदा ही रही। यरूसलेम उ नगर अहइ जेका मई आपन निजी नगर चुनेउँ ह।

37मुला मई तोहका ओन सबहिं पइ हुकूमत करइ देब जेका तू चाहत अहा। तू पूरे इस्त्राएल पइ हुकूमत करब्या। 38अगर तू उ करब्या जेका मई आदेस दिहेउँ ह अउर तू सच्चाई क संग रहब्या अउर अउर तू मोरे सारे नेमन अउ आदेसन क पालन करब्या जइसा मोर सेवक दाऊद किहे रहा, तउ मई तोहरे संग रहब। मई तोहरे परिवार क राजा लोगन क परिवार वइसे ही बनाइ देब जइसे मई दाऊद क बनाएउँ। मई तोहका इस्त्राएल देब।

39मई दाऊद क सन्तानन क ओकर सजा देब जउन सुलैमान किहस। किन्तु मई हमेसा क बरे ओनका सजा नाही देब।”

### सुलैमान क मउत

40सुलैमान यारोबाम क मार डवइ क जतन किहस। मुला यारोबाम मिस्र पराइ गवा। उ मिस्र क राजा सीसक क लगे गवा। यारोबाम हुँवा सुलैमान क मरि तलक रहा।

41सुलैमान अपने सासन-काल में बहोत बड़के अउर बुद्धिमानी स पूर्ण काम किहस। जेनकर विवरण “सुलैमान क इतिहास-ग्रन्थ” में लिखा अहइ। 42सुलैमान यरूसलेम में पूरे इस्त्राएल पइ चालीस बरिस तलक हुकूमत किहस। 43तब सुलैमान मरा अउ अपने पुरखन क संग दफनावा गवा। उ अपने बाप क दाऊद नगर में दफनावा गवा, अउर ओकर पूत रहुबियाम ओकरे जगह पइ राजा बना।

### गृह जुद्ध

12 1-2नबात क पूत यारोबाम तबउ मिस्र में रहा, जहाँ उ सुलैमान स भागके पहुँचा रहा। जब उ सुलैमान क मउत क खबर सुनेस तउ उ एप्रैम क पहाड़ियन में अपने जेरदा नगर में वापस लउट आवा।

राजा सुलैमान मरा अउर अपने पुरखन क संग दफनावा गवा। ओकर पाछे ओकर पूत रहुबियाम नवा राजा बना। इस्त्राएल क सबहिं लोग सकेम गएन। उ पचे रहुबियाम का राजा बनावइ गएन। रहुबियाम भी राजा बनइ बरे सकेम गवा। लोग रहुबियाम स कहेन, 4“तोहार बाप हम लोगन क बहोत कठोर मेहनत करइ बरे मजबूर किहस। अब तू एका हम लोगन बरे कछू सरल करा। उ कठिन काम क बन्द करा जेका करइ बरे तोहार बाप हम क मजबूर किहसे ह। तब हम तोहार सेवा करब।”

5रहुबियाम जवाब दिहस, “तीन दिन में मोरे लगे वापस लउटके आवा अउर मई जवाब देब।” एह बरे लोग चले गएन।

6कछू अग्रज लोग रहेन जउन सुलैमान क जिअत रहत ओकरे निर्णय करइ में मदद करत रहेन। एह बरे राजा रहुबियाम एन मनइयन स पूछेस कि ओका का करइ चाही। उ कहेस, “आप लोग क सोचत हीं, मोका एन लोगन क जवाब देइ चाही?”

7अग्रज लोग जवाब दिहन, “जदि आजु तू ओनके सेवक क तरह रहब्या अउर ओनका सेवा करब्या अउर जदि तू दयापूर्वक ओनसे बातन करब्या तब उ पचे तोहार सदा सेवा करिही।”

8मुला रहुबियाम ओनकर इ सलाह नाही मानेस। उ ओन नउजवानन स सलाह लिहस जउन ओकर मीत रहेन। 9रहुबियाम कहेस, “लोग इ कहत हीं, ‘हम क ओहसे सरल काम दया जउन तोहार बाप दिहे रहा।’ तू का सोचत ह, मोका लोगन क कइसे जवाब देइ चाही? मई ओनसे का कहउँ?”

10राजा क जवान सलाहकारन ओन स कहेस, “उ सबइ लोग तोहरे लगे आएन अउर उ पचे कहेन, ‘तोहार बाप हम क कठिन मेहनत करइ बरे मजबूर किहस। अब हम लोगन क काम सरल करई।’ एह बरे तोहका ओनसे कहइ चाही, ‘मोर नान्ह उँगरी मोरे बाप क पूरे तने स जियादा सक्तीसाली अहइ। 11मोर बाप तोहका कठिन मेहनत करइ क मजबूर किहस। किन्तु मई ओहसे भी बहोत कठिन काम कराउब। मोर बाप तोहसे काम लेइ बरे कोइन क उपयोग किहे रहा। मई तोहका बिच्छू\* स पीटब।”

12रहुबियाम लोगन स कहे रहा, “तीन दिन में मोरे लगे वापस आवा।” एह बरे तीन दिन पाछे इस्त्राएल क सबहिं लोग रहुबियाम क लगे लउटेन। 13उ समइ राजा रहुबियाम ओनसे कठोर सब्द कहेस। उ अग्रजन क सलाह न मानेस। 14उ उहइ किहस जउन ओकर जवान सलाहकारन कइ क सलाह दिहस। उ कहेस, “मोर बाप तोहका कठिन मेहनत करइ क मजबूर किहस। एह बरे मई तोहका अउर जियादा काम देब। मोर बाप तोहका कोड़ा स पीटेस। किन्तु मई

बिच्छू अइसा किरवा जेकर सिरा लोहा क होत ह।



तोहका बिच्छू स पीटबा।” 15एह बरे राजा उ नाहीं किहस जेका लोग चाहत रहेन। यहोवा अइसा होइ दिहस। यहोवा इ आपन उ प्रतिग्या क पूरा करइ बरे किहस जउन उ नाबात क पूत यारोबाम क संग किहे रहा। यहोवा अहिय्याह नबी क उपयोग इ प्रतिग्या करइ बरे किहे रहा। अहिय्याह सीलो क रहा।

16इस्त्राएल क सबहिं लोग समुझ लिहन कि नवा राजा ओनकर बात अनसुनी कइ दिहस ह। एह बरे लोग राजा स कहेन, “का हम दाऊद क परिवार क अंग अही? नाहीं। का हम क यिसै क कउनो भुइँया मिला अहइ? नाहीं। एह बरे इस्त्राएलियन हम अपने घर चलइँ। दाऊद क पूत क अपने लोगन पइ हुकूमत करइ द्या।” एह बरे इस्त्राएल क लोग अपने घरे वापस गएन। 17मुला रहुबियाम फुन भी ओन इस्त्राएलियन पइ हुकूमत करइ जारी रखत रहा, जउन यहूदा क नगर मँ रहत रहेन।

18अदोराम नाउँ क एक ठु मनई सब स्रमिकन क अधिकारी रहा। राजा रहुबियाम अदोराम क लोगन स बातचीत करइ बरे पठएस। किन्तु इस्त्राएल क लोग ओह पइ तब तलक पाथर बरसाएन जब तलक उ नाहीं मर गवा। तब राजा रहुबियाम अपने रथे तलक दउड़ा अउर यरूसलेम क पराइ निकरा। 19इ तरह इस्त्राएल दाऊद क परिवार स विद्रोह कइ दिहस अउर उ पचे अबहुँ भी आजु तलक दाऊद क परिवार क खिलाफ अहइँ।

20इस्त्राएल क सबहिं लोग सुनेन कि यारोबाम वापस लउट आवाा ह। एह बरे उ पचे एक सभा मँ न्यौतेन अउर ओका पूरे इस्त्राएल क राजा बनाइ दिहन। सिरिफ यहूदा क परिवार समूह ही एक मात्र परिवार समूह रहा जउन दाऊद क परिवार क अनुसरण करत रहा।

21रहुबियाम यरूसलेम क वापस गवा। उ यहूदा क परिवार समूह अउ बिन्यामीन क परिवार समूह क बटोरस। इ एक लाख अस्सी हजार मनइयन क फउज रही। रहुबियाम इस्त्राएल क लोगन क खिलाफ जुद्ध लइइ चाहत रहा। उ अपने राज्ज क वापस लेइ चाहत रहा।

22किन्तु यहोवा परमेस्सर क एक मनई स बातन किहस। ओकर नाउँ समायाह रहा। यहोवाह कहेस, 23“यहूदा क राजा, सुलेमान क पूत, रहुबियाम अउ यहूदा अउ बिन्यामीन क सबहिं लोगन अउर बाकी सबहिं लोगन स बात करा। 24ओनसे कहा, ‘यहोवा कहत ह कि तू पचन्क अपने भाइयन इस्त्राएल क लोगन क खिलाफ जुद्ध मँ नाहीं जाइ चाही। तू पचन्क घरे लउटि जाइ चाही। मइँ एन सबहिं घटनन क घटित होइ दिहेउँ ह।’” एह बरे रहुबियाम क सेना के मनइयन यहोवा क आदेस मानेन। उ पचे, सबहिं अपने घरे लउटि गएन।

25सकेम, एप्रैम क पहाड़ी प्रदेश मँ एक नगर रहा। यारोबाम सकेम क एक सुदृढ़ नगर बनाएस अउर ओहमँ रहइ लाग। एकरे पाछे उ पनूएल नगर क गवा अउर ओका भी सुदृढ़ किहस।

26यारोबाम अपने मने मँ सोचेस, “राज फिर स दाऊद क परिवार क लगे वापस जाइ सकत ह। 27जदि लोग यरूसलेम मँ यहोवा क मन्दिर मँ बलि चढ़ाइ बरे जात जारी

रखेन तउ होइ सकत ह कि उ पचे इ चाही हीं दाऊद क परिवार ओन लोगन पइ सासन करा। होइ सकत ह कि लोग फुन यहूदा क राजा रहुबियाम क अनुसरण करब सुरु कइ देइहीं। तब उ पचे मोका मार डइहीं।” 28एह बरे राजा अपने सलाहकारन स पूछेस कि ओका का करइ चाही? उ पचे ओका आपन सलाह दिहन। एह बरे यारोबाम दुइ ठु सुनहरे बछवन बनाएस। राजा यारोबाम लोगन स कहेस, “तोहका उपासना करइ बरे यरूसलेम जाइ बंद कइ देइ चाही। इस्त्राएलियन, इ सबइ देवता अहइँ जउन तू पचन्क मिस्त्र स बाहेर लइ आएन।” 29राजा यारोबाम एक ठु सुनहरा बछवा क बतेल मँ रखेस। उ दूसर सुनहरे बछवा क दान मँ रखेस। 30किन्तु इ बहोत संगीन पाप होइ गवा। इस्त्राएल क लोग बतेल अउ दान नगरन क जात्रा बछवन क पूजा करइ बरे किहन।

31यारोबाम ऊँच जगहन, पइ पूजा घर भी बनाएस। उ इस्त्राएल क अलग अलग परिवार समूहन स याजक भी चुनेस। (उ सिरिफ लेवी परिवार समूह स याजक नाहीं चुनेस।) 32अउर राजा यारोबाम एक ठु नवा पर्व सुरु किहस। इ पर्व यहूदा क “फसहपर्व” क तरह रहा। किन्तु इ पर्व अठएँ महीने क पन्द्रहवे दिन रहा। पहिले महीने क पन्द्रहवे दिन नाहीं। उ समइ राजा बतेल नगर क वेदी पइ बलि भेंट करत रहा अउर उ बलि ओन बछवन क भेंट करत रहा जेनका उ बनवाए रहा। उ बतेल मँ याजकन क भी ऊँची जगह पइ सेवा करइ बरे जेका उ बनवाए रहा चुनेस। 33एह बरे राजा यारोबाम इस्त्राएलियन क खातिर पर्व बरे अपना ही समइ चुनेस। इ अठएँ महीने क पन्द्रहवाँ दिन रहा। ओन दिनन उ उ वेदी पइ बलि भेंट करत रहा अउर सुगन्धि भारत रहा जेका उ बतेल नगर मँ बनाए रहा।

### परमेस्सर बतेल क खिलाफ घोसणा करत ह

**13** यहोवा यहूदा क निवासी, परमेस्सर क एक मनई क बतेल नगर मँ जाइ का आदेस दिहस। राजा यारोबाम उ समइ सुगन्धि भेंट करत भवा वेदी क लगे खड़ा रहा जउने समइ परमेस्सर क मनई हुवाँ पहेँचा। 2यहोवा उ समइ परमेस्सर क मनई क आदेस दिहस कि तू वेदी क खिलाफ बोल्यो। उ कहेस, “वेदी, यहोवा तोहसे कहत ह: ‘दाऊद क परिवार मँ एक पूत योसिय्याह नाउँ क पइदा होइ। इ सबइ याजक अब ऊँच जगहन पइ पूजा करत अहइँ। किन्तु वेदी, योसिय्याह ओन याजकन क तोह पइ रखी अउर उ ओनका मार डाइ। अब उ सबइ याजक तोह पइ सुगन्धि भारत हीं। किन्तु योसिय्याह तोह पइ नर-अस्थियन क बारी। तब तोहार उपयोग दुबारा नाहीं होइ सकी।’”

अपरमेस्सर क मनई लोगन क नबुवत वाली प्रमाण दिहस कि इ सब घटित होइ। उ कहेस, “यहोवा जेकरे बारे मँ मोहसे कहेस ह ओकर प्रमाण इ अहइ। यहोवा कहेस, ‘इ वेदी टूकन टूकन मँ टूट जाइ अउर एकर राख जमीन पइ गिर पड़ी।’”

4राजा यारोबाम परमेस्सर क मनई स बतेल मँ वेदी क बरे दीन्ह सँदिसा सुनेस। उ वेदी स हाथ हींच लिहसे अउर मनई कइँती सकत किहस। उ कहेस, “इ मनई क बन्दी

बनाइ ल्या।” मुला राजा जब इ कहेस तउ ओकरे हाथे क लगवा मार गवा। उ ओका हलाइ नार्ही सका। 5वेदी क टूका-टूका होइ गएन। ओकर सारी राख भुईया पइ गिर पड़ी। इ प्रमाण रहा जउन कि परमेस्सर क मनई लोगन क दिहस। इ साबित किहस कि इ वचन परमेस्सर क तरफ स रहा। 6तब राजा यारोबाम परमेस्सर क मनई स कहेस, “मेहरबानी कइके यहोवा अपने परमेस्सर स मोरे बरे पराथना करई। यहोवा स याचना करई कि इ मोर भुजा स्वस्थ कइ देई।”

एह बरे “परमेस्सर क मनई” यहोवा क पराथना किहसे अउर राजा क भुजा स्वस्थ होइ गइ। इ वइसे ही होइ गइ जइसे पहिले रही। 7तब राजा परमेस्सर क मनई स कहेस, “मेहरबानी कइके मोरे संग घरे चलई। आवई अउर मोरे संग भोजन करई मई आप क एक टु भेंट देब।”

8किन्तु परमेस्सर क मनई राजा स कहेस, “मई आप क संग घरे नार्ही जाब। यदि आप मोका अपना आधा राज्ज भी देई तउ भी मई नार्ही जाब। मई इ ठउरे पइ न कछू खाब, न ही कछू पिअब। 9यहोवा आदेस दिहस ह कि मई न कछू खाउँ अउर न ही पिउँ अउर न ही उ मारग स जात्रा करउँ जेकर उपयोग मई हिआँ आवत समइ किहसे।” 10एह बरे ओहसे अलग सइक स जात्रा किहस। उ उहइ सइक क उपयोग नार्ही किहस जेकर उपयोग उ बतेल क आवत समइ किहे रहा।

11बतेल नगर मँ एक टु बुढ़वा नबी रहत रहा। ओकर पूत आएन अउर उ पचे ओका बताएन कि परमेस्सर क मनई बतेल मँ का किहस। उ पचे अपने बाप स उ भी किहेन कि जउन परमेस्सर क मनई राजा यारोबाम स कहे रहा। 12बुढ़वा नबी कहेस, “जब उ चला तउ कउने सइक स गवा?” एह बरे पूतन अपने बाप क उ सइक देखाएन जेहसे यहूदा स आवइवाला परमेस्सर क मनई गवा रहा। 13बुढ़वा नबी अपने पूतन स अपने गदहे पइ काठी धरइ बरे कहेस। एह बरे उ पचे काठी गदहे पइ डान। तब नबी अपने गदहे पइ चल पड़ा।

14बुढ़वा नबी परमेस्सर क मनई क पाछे गवा। बुढ़वा नबी परमेस्सर क मनई क एक टु बाँजबृच्छ क खाले बइठे लखेस। बुढ़वा नबी पूछेस, “का आप उहइ परमेस्सर क मनई अहई जउन यहूदा स आएन ह?” परमेस्सर क मनई जवाब दिहस, “हाँ, मई ही अहई।”

15एह बरे बुढ़वा नबी कहेस, “मेहरबानी कइके घरे चलई अउर मोरे संग भोजन करई।”

16मुला परमेस्सर क मनई जवाब दिहस, “मई तोहरे संग घरे नार्ही जाइ सकत हउँ। मई इ ठउरे पइ तोहरे संग खाइ पीइ नार्ही सकत। 17यहोवा मोहसे कहेस, ‘तू उ ठउरे पइ कछू खाया पिआ नार्ही अउर तोहका उहइ सइकिया स वापस लउटब भी नार्ही अहइ जेहसे तू हुवाँ आया।”

18तब बुढ़वा नबी कहेस, “किन्तु मई भी तोहरी तरह नबी हउँ।” तब बुढ़वा नबी एक झूठ बोलेस। उ कहेस, “यहोवा क हिआँ स एक टु सरगदूत मोरे लगे आवा अउर यहोवा क सब्द मोरे स कहेस कि एका अपने घरे ले जा अउर एका हुआँ भोजन पानी करइ दया।”

19एह बरे परमेस्सर क मनई बुढ़वा नबी क घर गवा अउर ओकर संग खाएस-पियस। 20जब उ पचे मेज पइ बइठे रहेन तउ यहोवा बुढ़वा नबी स कहेस, 21अउर बुढ़वा नबी यहूदा क निवासी परमेस्सर क मनई क संग बातचीत किहसे। उ कहेस, “यहोवा कहेस कि तू ओकरी आग्या क पालन नार्ही किहा। तू उ नार्ही किहा जेकरे बरे यहोवा क आदेस रहा। 22यहोवा आदेस दिहे रहा कि तोहका इ जगह पइ कछू भी खाइ या पिअइ नार्ही चाही। किन्तु तू वापस लउट्या अउर तू खाया पिआ। एह बरे तोहार ल्हास तोहरे परिवार क कब्रगाह मँ नार्ही दफनावा जाइ।”

23परमेस्सर क मनई भोजन करब अउर पिअब खतम किहस। तब बुढ़वा नबी ओकरे बरे गदहे पइ काठी कसेस अउर उ चला गवा। 24घरे कइँती जात्रा करत समइ सइक पइ एक टु सेर हमला किहस अउर परमेस्सर क मनई क मार डाएस। नबी क ल्हास सइक पइ पड़ी रही। गदहा अउ सेर ल्हास क लगे खड़े रहेन। 25कछू दूसर मनई उ सइक स जात्रा करत रहेन। उ पचे ल्हास क लखेन अउर सेर क खड़ा पाएन। उ सबई मनई उ नगर क आएन जहाँ बुढ़वा नबी रहत रहा अउर हुवाँ उ बताएस जउन उ पचे सइक पइ लखे रहेन।

26बुढ़वा नबी उ मनई क धोखा दिहे रहा अउर ओका वापस लइ गवा रहा। उ जउन कछू भवा रहा उ सुनेस अउर उ कहेस, “उ परमेस्सर क मनई अहइ जउन यहोवा क आदेस क पालन नार्ही किहसे। एह बरे यहोवा ओका मारइ बरे एक टु सेर पठएस। यहोवा कहेस कि ओका इ करइ चाही।” 27तब नबी अपने पूतन स कहेस, “मोरे गदहे पइ काठी डाला।” एह बरे ओकर पूतन ओकरे गदहे पइ काठी डान। 28बुढ़वा नबी गवा अउर ओकरे ल्हासे क सइकिया पइ पड़ा पाएस। गदहा अउ सेर तब भी ओकरे लगे खड़ा रहेन। सेर ल्हास क नार्ही खाए रहा अउ गदहे क भी चोट नार्ही पहुँचाए रहा।

29बुढ़वा नबी ल्हास क अपने गदहे पाइ राखेस अउर उ ल्हास पइ रोइ बरे अउर ओका दफनाइ बरे नगर वापस लाएस।

30बुढ़वा नबी ओका अपने परिवार क कब्रगाह मँ दफनाएस। बुढ़वा नबी ओकरे बरे रोएस। बुढ़वा नबी कहेस, “ए मोरे भाई मई तोहरे बरे दुःखी हउँ।” 31इ तरह बुढ़वा नबी ल्हास क दफनाएस। तब उ अपने पूतन स कहेस, “जब मई मरउँ तउ मोका इहइ कब्र मँ दफनावा। मोरे हाइन क ओकरे हाइन क निचके रख्या। 32जउन बातन यहोवा ओकरे जरिये कहलवाएस ह उ सबइ निहचइ ही फुरइ घटित होइहीं। यहोवा ओकर उपयोग बतेल क बेदी अउ सोमरोन क दूसर नगरन मँ स्थित ऊँच जगहन क खिलाफ बोलइ बरे किहस।”

33एकर बाद भी राजा यारोबाम अपने बुरे कारनामन क नार्ही बदलेस। उ अलग अलग परिवार समूहन स लोगन क याजक बनइ बरे चुनत रहा। उ सबइ याजक ऊँच जगहन पइ सेवा करत रहेन। जउन कउनो याजक होइ चाहत रहा याजक बन जाइ दीन्ह रहा। 34इहइ पाप रहा जउन यारोबाम क साही खानदान क बरबादी अउ बिनासे क कारण बना।

## यारोबाम क पूत मर जात ह

**14** उ समइ यारोबाम क पूत अबिय्याह बहोत बीमार पड़ा। 2यारोबाम अपनी मेहरारु स कहेस, “सीलो जा। जा अउर अबिय्याह नबी स मिला। अहिय्याह उ मनई अहइ जउन कहे रहा कि मई इस्त्राएल क राजा बनब। अपना ओढ़ना अइसे पहिरा कि कउनो न समुझइ कि तू मोर मेहरारु अहा। 3नबी क दस रोटियन, कछू पुअन अउ सहद क एक ठु गगरी द्या। तब ओहसे पूछा कि हमरे पूत क का होइ। अहिय्याह नबी तोहका बताइ।”

4एह बरे राजा क मेहरारु उ किहस जउन उ कहेस। उ सीलो गइ। उ अहिय्याह नबी क घरे गइ। अहिय्याह बहोत बुढ़वा अउ आँधर होइ गवा। 5मुला यहोवा ओहसे कहेस, “यारोबाम क मेहरारु तोहसे आपन पूत क बारे में पूछइ बरे आवति अहइ। उ बीमार अहइ।” यहोवा अहिय्याह क बताएस कि ओका का कहइ चाही।

यारोबाम क मेहरारु आपन भेस बदल कइ अहिय्याह क घरे पहोंची काहेकि उ कोसिस करत रही कि लोग न जानई कि उ कउन अहइ। 6अहिय्याह ओकरे दुआरे पइ आवइ क अवाज अनकेस। एह बरे अहिय्याह कहेस, “यारोबाम क मेहरारु, हिआँ आवा। तू काहे इ जतन करति अहा कि लोग इ समुझई कि तू कउनो दूसर अहा? मोरे लगे तोहरे बरे कछू बुरी खबर अहई। 7वापस लउटा अउर यारोबाम स कहा कि यहोवा इस्त्राएल क परमेस्सर, जउन कहत ह, उ इ अहइ। यहोवा कहत ह, ‘यारोबाम, इस्त्राएल क सबहि लोगन में स मई तोहका चुनेउँ। मई तोहका अपने लोगन क सासक बनाएउँ। 8दाऊद क परिवार इस्त्राएल पइ सासन किहस, मुला मई ओनसे ओकर राज्ज क छीन के ओका तोहका दिहेउँ। मुला तू मोरे सेवक दाऊद क समान नाहीं अहा। उ मोरे आदेसन क हमेसा पालन किहस अउर मोर पूरा हिरदय स अनुसरण, उ सबइ काम कइके किहस जउन मोर नज़र म नीक रहा। 9किन्तु तू पहिले क सासक स जियादा घटिया पापन किहस ह। तू मोर अनुसरण करब बन्द कइ दिहा ह। तू मूरतियन अउर दूसर देवतन बनाया। इ मोका बहोत कोहाइ दिहस। तू आपन पीठ मोर तरफ घुमाइ दिहस ह। 10एह बरे यारोबाम, मई तोहरे परिवार पइ विपत्ति लिआउब। मई तोहरे परिवार क सबहि मनइयन क मार डाउब। मइ तोहरे परिवार क पूरी तरह वइसे ही बर्बाद करब जइसे आगी उपरी क बर्बाद करति ह। 11तोहरे परिवार क जउन कउनो नगर में मरी ओका कूकुर खइहीं अउर तोहरे परिवार क जउन कउनो मनई मइदान में मरी ओका पंछी खइहीं। यहोवा इ कहेस ह।”

12तब अहिय्याह नबी यारोबाम क पत्नी स लगातार बात करत रहा ह। उ कहेस, “अब तू घरे जा। जइसे ही तू अपने नगर में प्रवेस करब्या तोहार पूत मरी। 13सारा इस्त्राएल ओकरे बरे रोई अउर ओका दफनाइ। सिरिफ तोहार पूत ही यारोबाम क परिवार में अइसा व्यक्ति होइ जेका दफनावा जाइ। एकर कारण इ अहइ कि यारोबाम क परिवार में सिरिफ उहइ अइसा मनई अहइ जउन यहोवा, इस्त्राएल क परमेस्सर क खुस किहस ह। 14यहोवा इस्त्राएल क एक ठु नवा राजा बनाई। उ नवा राजा यारोबाम क परिवार क नस्त

करी। इ बहोत हाली होइ। 15तब यहोवा इस्त्राएल क पीटिहीं। इस्त्राएल क लोग बहोत डेराइ जइहीं। उ पचे उ तरह कैपिहीं जइसा जल में सरकण्डा डोलत ह। यहोवा इस्त्राएलियन क इ नीक पहँटा स उखाइ देइ। इ उहइ भुईया अहइ जेका उ ओनके पुरखन क दिहे रहा। उ ओनका फरात नदी क दूसरी कइँती बिखेर देइ। इ होइ काहेकि यहोवा लोगन पइ कोहान अहइ। लोगन ओका तब गुस्सैल किहन जब उ पचे असेरा क पूजा क बरे खास खम्भन खड़ा किहेन। 16यारोबाम पाप किहस अउर तब यारोबाम इस्त्राएल क लोगन स पाप करवाएस। एह बरे यहोवा इस्त्राएल क लोगन क पराजित होइ दिहन।”

17यारोबाम क मेहरारु तिरजा क लउट गइ। जइसेन हि उ घरे में घुसी, लरिका मर गवा। 18पूरा इस्त्राएल ओका दफनाएस अउर ओकरे बरे उ रोएन। इ ठीक वइसे ही भवा जइसा यहोवा होइ क कहे रहा। यहोवा अपने सेवक अहिय्याह नबी क उपयोग इ सबइ बातन कहइ बरे किहस।

19राजा यारोबाम दूसर बहोतन स काम किहस। ओकर जुद्ध क लेखा जोखा, उ कइसे हुकूमत करत रहा, अउर ओकर दूसर कामन इ सब “इस्त्राएल क राजा लोगन क इतिहास” नाउँ क किताबे में लिखा भवा अहइ। 20यारोबाम बाईस बरिस तलक राजा क रूप में हुकूमत किहस। उ तब मरा अउर अपने पुरखन क संग दफनावा गवा। ओकर पूत नादाब ओकरे पाछे नवा राजा भवा।

21उ समइ जब सुलैमान क लरिका रहूबियाम यहूदा क राजा बना, उ इक्कीस बरिस क रहा। रहूबियाम यरूसलेम नगर में सत्रह बरिस तलक हुकूमत किहस। इ उहइ नगर अहइ जेहमा यहोवा सम्मानित होब चुनेस। उ इस्त्राएल क सबहि दूसर नगरन में स इ नगर क चुनेस। रहूबियाम क नामा नाउँ क महतारी अम्मोन क रही।

22यहूदा क लोग पाप किहन अउ ओन कामन क किहन जेनका यहोवा बुरा कहे रहा। लोग अपने ऊपर यहोवा क गुस्सैल करइ बरे अउर बुरे काम किहन। उ सबइ लोग अपने पुरखन स भी बुरे रहेन। 23लोग ऊँच ठउर, पाथर क स्मारक अउर पवित्र खम्भन बनाएन। उ पचे ओनका हर एक पहाइ पइ अउ हर एक बृच्छ क खाले बनाएन। 24हुवों भुईया पइ मन्दिर क देवदासन भी रहेन। लोग अनेक धिनाना करम करत रहेन अउर उ रास्ट्र क अनुसरण करत रहेन जेनका यहोवा भुईया तजइ बरे मज़बूर किहे रहेन। अउर परमेस्सर ओन लोगन स उ देस लइ लिहे रहा। अउर इस्त्राएल क लोगन क दइ दिहे रहा।

25रहूबियाम क राज्जकाल क पचाँ बरिस मिस्त्र क राजा सीसक यरूसलेम क खिलाफ लड़ा। 26सीसक यहोवा क मन्दिर अउ राजा क महल स खजानन लइ लिहस। उ ओन सुनहरी ढालन क भी लइ लिहस जेनका दाऊद अराम क राजा हददजर क अधिकारियन स लिहे रहा। दाऊद एन ढालन क यरूसलेम लइ गवा रहा। किन्तु सीसक सबहि सुनहरी ढालन लइ लिहस। 27एह बरे राजा रहूबियाम ओनके ठउर पइ रखइ बरे अनेक ढालन बनवाएस। किन्तु इ सबइ ढालन काँसे क रहिन, सोना क नाहीं। उ इ सबइ ढालन ओन मनइयन क दइ दिहस जउन महल क दुआरन क

रच्छा करत रहेन। 28जब कबहुँ राजा यहोवा क मन्दिर क जात रहा, रच्छकन ओकरे साथ हर दाई जात रहेन। उ सबइ ढालन लइ जात रहेन। जब उ पचे काम पूरा कइ लेत रहेन तब उ पचे रच्छक-कच्छ मँ ढालन क लटकाइ देत रहेन।

29राजा रहुबियाम जउन कछू किहेस उ सब, “यहूदा क राजा लोगन क इतिहास” नाउँ क किताबे मँ लिखा भवा अहइ। 30रहुबियाम अउ यारोबाम हमेसा ही एक दूसर क खिलाफ जुद्ध करत रहेन।

31रहुबियाम मरा अउ अपने पुरखन क संग दफनावा गवा। ओका ओकरे पुरखन क संग दाऊद नगर मँ दफनावा गवा। (ओकर महतारी नामा एक अम्मोनी रही।) रहुबियाम क पूत अबिय्याम\* ओकरे पाछे नवा राजा बनइ मँ कामयाब होइ गवा।

### यहूदा क राजा अबिय्याम

15 नाबात क पूत यारोबाम इस्त्राएल पइ हुकूमत करत रहा। यारोबाम क राजकाल क अट्टारहवें बरिस, अबिय्याम यहूदा क नवा राजा बना। 2अबिय्याम तीन बरिस तलक यरूसलेम पइ हुकूमत किहेस। ओकर महतारी क नाउँ माका रहा। उ अबसालेम क बिटिया रहा।

3उ उ सबइ पाप किहेस जउन ओकर बाप ओकरे पहिले किहे रहा। अबिय्याम क हिरदय यहोवा आपन परमेस्सर क प्रति पूरा भक्तिवान नाही रहेन जइसा ओकर दादा दाऊद किहे रहा। 4दाऊद के वास्ते, यहोवा ओका यरूसलेम मँ एक ठू बंस दिहेस। उ दाऊद क बंसज क यरूसलेम पई सासन करइ द्या अउर एका सुरच्छित रखइ क प्रतिग्या किहेस। 5दाऊद हमेसा ही उचित करम किहेस जेनका यहोवा चाहत रहा। उ हमेसा ही यहोवा क आदेसन क पालन किहे रहा। सिरिफ एक दाई दाऊद यहोवा क आदेस नाही माने रहा जब दाऊद हिती ऊरिग्याह क खिलाफ पाप किहे रहा।

6रहुबियाम अउ यारोबाम हमेसा एक दूसर क खिलाफ जुद्ध लइत रहेन। 7जउन कछू दूसर काम अबिय्याम किहे रहा उ “यहूदा क राजा लोगन क इतिहास” नाउँ क किताबे मँ लिखा बाटइ।

उ सारे समइ मँ जब अबिय्याम राजा रहा, यारोबाम अउ अबिय्याम क खिलाफ जुद्ध चलत रहा। 8जब अबिय्याम मरा तउ दाऊद-नगर मँ दफनावा गवा। अबिय्याम क पूत “आसा” ओकरे पाछे नवा राजा भवा।

### यहूदा क राजा आसा

9इस्त्राएल क ऊपर यारोबाम क राजा क रुप मँ सासन करइ क बीसवें बरिस मँ आसा यहूदा क राजा बना। 10आसा यरूसलेम मँ इकतालिस बरिस तलक सासन किहेस। ओकरे दादी क नाउँ माका रहा अउर माका अबसालेम क बिटिया रही।

11आसा अपने पुरखा दाऊद क तरह ओन करमन क किहेस जेनका यहोवा उचित ठहराएस। 12ओन दिनन हुवौँ मन्दिर क देवदासन रहेन। आसा ओन लोगन क देस तजइ बरे मजबूर किहेस। आसा ओन देव मूरतियन क भी दूर

अबिय्याम या अबिजाह।

किहेस जउन ओकरे पुरखन बनाए रहेन। 13आसा अपनी दादी माका क, रानी पद स हटाइ दिहेस। माका देवी असेरा क ओन भयंकर मूरतियन मँ स एक क बनाए रहा। आसा ओका काट डाएस अउर एका उ किद्रोन क घाटी मँ बारेस। 14आसा ऊँच ठउरन क बर्बाद नाही किहेस, किन्तु उ पूरी जिन्नगी भइ यहोवा क मनवइया रहा। 15आसा यहोवा क मन्दिर मँ सोना, चाँदी अउर उ चिजियन लाएन जउन उ अउर ओकर बाप अर्पित किहे रहेन।

16जब तलक राजा आसा यहूदा क राजा रहा, उ हमेसा ही इस्त्राएल क राजा बासा क खिलाफ जुद्ध करत रहा। 17बासा यहूदा क खिलाफ लइत रहा। बासा लोगन क, आसा क देस यहूदा स आवइ या जाइ स रोकइ चाहत रहा। एह बरे उ रामा नगर क बहोत मजबूत बनाइ दिहेस। 18एह बरे आसा यहोवा क मन्दिर अउर राजमहल क खजानन स सोना अउ चाँदी निकारेस। उ इ सोना-चाँदी अपने सेवकन क दिहेस अउर ओनका अराम क राजा बेन्हदद क लगे पठएस। बेन्हदद हेज्योन क पूत तब्रिमोन क पूत रहा। दमिस्क बेन्हदद क राजधानी नगर रहा। 19आसा इ सँदिसा पठएस, “मोरे बाप अउर तोहार बाप क बीच एक ठू सान्ति-सन्धि रही। अब मई तोहरे अउर अपने बीच एक ठू सान्ति-सन्धि करइ चाहत हुउँ। मई तोहरे लगे सोना-चाँदी क भेंट पठवत अहउँ। इस्त्राएल क राजा बासा क संग अपनी सन्धि तोड़ द्या। तब बासा मोरे देस क तजि देइ।”

20राजा बेन्हदद आसा क सँदिसा क अंगीकार किहेस। एह बरे उ इस्त्राएल क नगरन क खिलाफ लइइ बरे अपनी फउज पठएस। बेन्हदद इज्योन, दान, आबेल्चेत्माका अउ गलीली झील क चारिहुँ ओर क नगरन क हराइ दिहेस। उ सारे नप्ताली पहँटा क हराएस। 21बासा एन हमलन क बारे मँ सुनेस। एह बरे उ रामा क मजबूत बनाउब बन्द किहेस। उ उ नगर क तजि दिहेस अउर तिसाँ क लउट गवा। 22तब राजा आसा यहूदा क सबहिँ लोगन क मदद करइ क हुकूम दिहेस-कउनो मनई बिना मदद क नाही होइ। उ पचे रामा क गएन अउर उ पचे ओन पाथरन अउ काठन क उठाइ लिहन जेनकर उपयोग बासा नगर क मजबूत बनावइ बरे करत रहा। उ पचे ओन चिजियन क मिस्पा अउर बिन्यामीन प्रदेश मँ गोबा क लइ गएन। तब आसा ओन नगरन क बहोत मजबूत बनाएस।

23आसा क बारे मँ दूसर बातन व महान कारज जउन उ किहेस अउर नगरन जेनका उ बनाएस “यहूदा क राजा लोगन क इतिहास” नाउँ क किताबे मँ लिखा बाटइ। जब आसा बुढ़वा भवा तउ ओकरे गोड़े मँ एक रोग पइदा भवा। 24आसा मरा अउर ओका ओकर पुरखा दाऊद का नगर मँ दफनावा गवा। तब आसा क पूत यहोसापात ओकरे पाछे नवा राजा बना।

### इस्त्राएल क राजा नादाब

25यहूदा पइ आसा क राजकाल क दूसर बरिस मँ यारोबाम क पूत नादाब इस्त्राएल क राजा भवा। नादाब इस्त्राएल पइ दुइ बरिस तलक हुकूमत किहेस। 26नादाब उ करम किहेस जेका यहोवा दुआरा बुरा समुझा जात रहा। उ

वइसे ही पाप किहस जइसे ओकर बाप यारोबाम इस्त्राएल क लोगन स पाप करवाइ क किहे रहा।

27बासा अहिय्याह क पूत रहा। उ पचे इस्साकार क परिवार समूह स रहेन। बासा राजा नादाब क मार डावइ क एक ठु योजना बनाएस। इ उ समइ रहा जब नादाब अउर सारा इस्त्राएल गिब्तोन नगर क खिलाफ जुद्ध में लडत रहेन। इ एक पलिस्ती नगर रहा। उ ठउरे पइ बासा नादाब क मार डाएस। 28इ यहूदा पइ आसा क राजकाल क तीसरे बरिस में भवा अउर बासा इस्त्राएल क अगला राजा बना।

### इस्त्राएल क राजा बासा

29जब बासा नवा राजा बना तउ उ यारोबाम क परिवार क हर एक मनई क मार डाएस। बासा यारोबाम क परिवार में कउनो मनई क जिअत नाहीं बख्सेस। इ वइसे ही भावा जइसा होइ बरे यहोवा कहे रहा। यहोवा सीलो क आपन सेवक अहिय्याह क जरिये इ कहे रहा। 30इ भवा, काहेकि यारोबाम अनेक पाप किहे रहा अउर यारोबाम इस्त्राएल क लोगन स अनेक पाप कराए क कारण रहा। यारोबाम यहोवा इस्त्राएल क परमेस्सर क बहोत किरोधित कइ दिहे रहा।

31नादाब जउन दूसर काम किहेस उ सबइ "इस्त्राएल क राजा लोगन क इतिहास" नाउँ क किताबे में लिखा भवा अहइ। 32पूरे समइ, जब तलक बासा इस्त्राएल क सासक रहा, उ यहूदा क राजा आसा क बिरुद्ध जुद्ध में लडत रहा।

33अहिय्याह क पूत बासा, यहूदा पइ आसा क राजकाल क तीसरे बरिस में इस्त्राएल क राजा भवा रहा। बासा तिसाँ में चौबीस बरिस तलक राजा रहा। 34किन्तु बासा उ सबइ कारज किहस जेनका यहोवा बुरा बताए रहा। उ उ सबइ ही पाप किहेस जउन ओकर पुरखा यारोबाम किहे रहा। यारोबाम इस्त्राएल क लोगन स पाप कराए रहा।

**16** तब यहोवा हनान क पूत येहू स बातन किहस। यहोवा राजा बासा क बिरुद्ध बातन कहत रहा। 2"मई तोहका धूरि-माटी स चुन कइ उठाएउँ। मई तोहका इस्त्राएल क लोगन क ऊपर राजा बनाएउँ। किन्तु तू यारोबाम क मारग क अनुसरण किहा ह। तू मोर लोगन, इस्त्राएलियन स पाप कराया ह। उ पचे अपने पापन स मोका गुस्सैल किहन ह। अएह बरे बासा, मई तोहका अउर तोहरे परिवार क बर्बाद करब। मई तोहरे संग उहइ करब जउन मई नाबात क पूत यारोबाम क परिवार क संग किहेउँ। 4तोहरे परिवार क लोग नगर क सड़कियन पइ मरिहीं अउर ओनके लहासन क कूकुर खइहीं। तोहरे परिवार क कछू लोग मइदानन में मरिहीं अउर ओनके लहासन क पंछी खइहीं।"

5बासा क बारे में दूसर बातन अउर जउन महान कारज उ किहेस सबहिं "इस्त्राएल क राजा लोगन क इतिहास" नाउँ क किताबे में लिखा अहइ। 6बासा मरा अउ तिसाँ में दफनावा गवा। ओकर पूत एला ओकरे पाछे नवा राजा बना।

7एह बरे यहोवा येहू नबी क एक सँदिसा दिहस। इ सँदिसा बासा अउ ओकरे परिवार क बिरुद्ध रहा। बासा उहइ करम किहे रहा जेका यहोवा बुरा करम ठेहराएस। एहसे यहोवा बहोत कोहाई गवा। बासा उहइ किहस यारोबाम क परिवार ओहसे पहिले किहे रहा। यहोवा एह बरे भी कोहान रहा कि बासा यारोबाम क समूवे परिवार क मार डाए रहा।

### इस्त्राएल क राजा एला

8यहूदा पइ आसा क राजकाल क छब्बीसवें बरिस में एला इस्त्राएल क राजा भवा। एला बासा क पूत रहा। उ तिसाँ में दुई बरिस तलक हुकूमत किहस।

9एला राजा क अधिकारियन में स जिम्मी एक रहा। जिम्मी एला क आधे रथन क आदेस देत रहा। किन्तु जिम्मी एला क बिरुद्ध योजना बनाएस। राजा एला तिसाँ में रहा।

उ अर्सा, क घरे में दाखरस पिअत रहा अउर मदमस्त होत रहा। अर्सा तिसाँ क महल क अधिकारी रहा। 10जिम्मी उ घरे में गवा अउ उ राजा एला क मार डाएस। यहूदा पइ आसा क राजकाल क सताइसवें बरिस में इ भवा। तब एला क पाछे इस्त्राएल क नवा राजा जिम्मी भवा।

### इस्त्राएल क राजा जिम्मी

11जब जिम्मी राजा भवा तउ उ बासा क पूरे परिवार क मार डाएस। उ बासा क परिवार में कउनो मनई क जिअत नाहीं रहइ दिहस। जिम्मी बासा क मीतन क भी मार डाएस। 12इ तरह जिम्मी बासा क पूरा परिवार क बर्बाद किहस। इ वइसे ही भवा जइसा यहोवा, येहू नबी क उपयोग बासा क खिलाफ कहइ क कहे रहा। 13इ बासा अउ ओकर पूत एला क सबहिं पापन क कारण भवा। उ पचे पाप किहे रहेन अउर इस्त्राएल क लोग स पाप कराए रहेन। यहोवा कोहान रहा काहेकि उ पचे बहोत स देवमूरतियन धरे रहेन।

14"इस्त्राएल क राजा लोगन क इतिहास" नाउँ क किताबे में दूसर सबहिं बातन लिखी अहइ जउन एला किहे रहा। 15यहूदा पइ आसा क राजकाल क सताइसवें बरिस में जिम्मी इस्त्राएल क राजा बना। जिम्मी तिसाँ में सात दिन सासन किहस। जउन कछू भवा, इ अहइ: इस्त्राएल क फउज गिब्तोन क पलिस्तियन क निचके डेरा डाए पड़ी रहिन। उ पचे जुद्ध बरे तइयार रहेन। 16पड़ाव में टिके लोग सुनेन कि जिम्मी राजा क खिलाफ गुप्त सडयन्त्र रचेस ह। अउर ओका मार डाएस। एह बरे सारे इस्त्राएल डेरा में, उ दिन ओम्मी क इस्त्राएल क राजा बनाएस। ओम्मी सेनापति रहा। 17एह बरे ओम्मी अउर सारे इस्त्राएल गिब्तोन क तजेन अउ तिसाँ पई हमला कइ किहन। 18जिम्मी लखेस कि नगर पइ अधिकार कइ लीन्ह गएस ह। एह बरे उ महल क भीतर गएन अउर जराइ सरू किहेन। उ महल अउ खुद क जराइ दिहेस। अउर उ मरि गवा। 19इ तरह जिम्मी मरा काहेकि उ पाप किहे रहा। जिम्मी ओन कामन क किहेस जेनका यहोवा बुरा कहे रहा। उ वइसे ही पाप किहेस जइसे यारोबाम किहे रहा अउ यारोबाम इस्त्राएल क लोगन स पाप कराए रहा।

20“इस्त्राएल क राजा लोगन क इतिहास” नाउँ क किताबे में जिम्मी क गुप्त सड्यन्त्र अउ दूसर बातन लिखी अहई जउन उ राजा एला क बिरुद्ध किहे रहा।

### इस्त्राएल क राजा ओम्री

21इस्त्राएली लोग दुइ दलन में बँट गए रहेन। आधे लोग गीनत क पूत तिब्नी क अनुसरण करत रहेन अउर ओका राजा बनावइ चाहत रहेन। दूसर आधे लोग ओम्री क अनुयायी रहेन। 22किन्तु ओम्री क अनुयायी गीनत क पूत तिब्नी क अनुयायियन स जियादा सक्तीसाली रहेन। एह बरे तिब्नी मारा गवा अउर ओम्री राजा भवा।

23यहूदा पइ आसा क राजकाल क इकतीसवें बरिस में ओम्री इस्त्राएल क राजा भवा। ओम्री इस्त्राएल पइ बारह बरिस तलक सासन किहस। ओन बरिसन में स छः बरिस तलक उ तिसा नगर में सासन किहस। 24किन्तु ओम्री सोमरोन क पहाड़ी क बेसहि लिहस। उ एका लगभग डेढ़ सौ पौण्ड चाँदी समेर स बेसहेस। ओम्री उ पहाड़ी पइ एक ठु नगर बनावस। बाद में, इ पहिले क मालिक समेर क नाउँ पइ सोमरोन पुकारा गएस।

25ओम्री उ सबइ काम किहस जेनका यहोवा बुरा घोसित किहे रहा। ओम्री ओन सबहि राजा लोगन स बुरा रहा जउन ओकरे पहिले होइ चुके रहेन। 26उ उ सबइ ही पापन किहेस जउन नबात क पूत यारोबाम किहे रहा। यारोबाम इस्त्राएल क लोगन स पाप कराए रहा। एह बरे उ पचे यहोवा, इस्त्राएल क परमेस्सर क बहोत किरोधित कइ दिहे रहेन। यहोवा कोहान रहा, काहेकि उ पचे बेकार क देवमूरतियन क पूजा करत रहेन।

27“इस्त्राएल क राजा लोगन क इतिहास” नाउँ क पुस्तक में ओम्री क बारे में दूसर बातन अउर ओकर किहे महान कारज लिखे गएन ह। 28ओम्री मरा अउ सोमरोन में दफनावा गवा। ओकर पूत अहाब ओकरे पाछे नवा राजा बना।”

### इस्त्राएल क राजा अहाब

29यहूदा पइ आसा क राजकाल क अड़तीसवें बरिस में ओम्री क पूत अहाब इस्त्राएल क राजा बना। अहाब इस्त्राएल पइ सामरिया में बाईस बरिस तलक हुकूमत किहेस। 30अहाब उ सबइ काम किहेस जेनका यहोवा बुरा बताए रहा अउर अहाब ओन सबहि राजा लोगन स भी बुरा रहा जउन ओकरे पहिले भए रहेन। 31अहाब क बरे ऐतना काफी नाहीं रहा कि उ वइसे ही पापन करइ जइसे नबात क पूत यारोबाम किहे रहा, उ अहाब एतबाल क बिटिया ईजबेल स बियाह किहेस। एतबाल सीदोन क राजा रहा। तब अहाब बाल क सेवा अउर पूजा करब सुरू किहेस। 32अहाब बाल क पूजा करइ बरे सोमरोन में पूजा घर बनावस। उ पूजाघरे में एक वेदी रखेस। 33अहाब असेर क पूजा बरे एक बिसेस खम्भा भी खड़ा किहस। अहाब यहोवा, इस्त्राएल क परमेस्सर क किरोधित करइवाले बहोत स काम, ओन सबहि राजा स जियादा किहेस, जउन ओकरे पहिले रहेन।

34अहाब क राजकाल में बतेल क हीएल यरीहो नगर क दुबारा बनावस। जउने समइ हीएल नगर बनावइ क काम सुरु किहस, ओकर बड़ा पूत अबीराम मर गवा अउर जब हीएल नगर दुआर बनावस, ओकर सब स नान्ह पूत सगूब मर गवा। इ ठीक वइसे ही भवा जइसा यहोवा नून क पूत यहोसू स बातन करत भए कहे रहा।

### एलिय्याह अउ अनावृष्टि क समइ

17 एलिय्याह गिलाद में तिसबी नगर क एक नबी रहा। एलिय्याह राजा अहाब स केहस, “मई यहोवा, इस्त्राएल क परमेस्सर क सेवा करत हउँ। ओकरी सक्ती पइ मई प्रतिग्या करत हउँ कि अगले कछू बरिसन में न हुवाँ बर्खा होइ अउर न ही ओस गिरी जब तलक मई ओकरे होइ क आदेस न देब।”

2तब यहोवा एलिय्याह स कहेस, 3“इ जगह क तजि द्या अउर पूरब कइँती चला जा। करीत नाले क लगे छुप जा। इ नाला यरदन नदी क पूरब में अहइ। 4तू नाला स पानी पी सकत ह। मई कउअन क हुकुम दिहे अहउँ कि उ पचे तोहका उ जगह पइ भोजन पहुँचइहीं।” 5एह बरे एलिय्याह उहइ किहस जउन यहोवा करइ क कहेस। उ यरदन नदी क पूरब करीत नाला क निचके रहइ चला गवा। 6हर एक भिंसारे अउ साँझ क कौवन एलिय्याह क बरे भोजन लिआवत रहेन। एलिय्याह नाला स पानी पिअत रहा।

7बर्खा नाहीं भइ एह बरे कछू समइ उपरान्त नाला झुराइ गवा। 8तब यहोवा एलिय्याह स कहेस, 9“सीदोन में सारपत क जा। हुँवइ रहा। उ जगह पइ एक ठु राँड़ मेहरारु रहत ह। मई ओका तोहका भोजन देइ क आदेस दिहेउँ ह।”

10एह बरे एलिय्याह सारपत पहुँचा। उ नगर-दुआर पइ पहुँचा अउर उ एक ठु मेहरारु क लखेस। ओकर भतार मर चुका रहा। उ मेहरारु ईधन बरे लकड़ियन एकट्ठी करत रही। एलिय्याह ओहसे कहेस, “का तू एक ठु पियाला में थोड़ा पानी देबिउ जेका मई पी सकउँ?” 11उ मेहरारु ओकरे बरे पानी लिआवइ जात रही, तउ एलिय्यह कहेस, “मेहरबानी कइके एकठु रोटी क टूका भी लिआवा।”

12उ मेहरारु जवाब दिहेस, “सच में मई यहोवा, तोहरे परमेस्सर क किरिया खाइके कहति हउँ कि मोरे लगे रोटी नाहीं अहइ। मोरे लगे बर्तन में मूठी भइ आटा अउर बर्तन में तनिक स जइतून क तेल अहइ। इ ठउरे पइ मई ईधन बरे दुइ चार लकड़ियन बटोरइ आइ रहिउँ। मई एका लइके घरे लउटब अउर आपन आखिरी भोजन बनावब। मई अउर मोर पूत दुइनउँ एका खइहीं अउर तब फिर पाछे में भूख स मर जइहीं।”

13एलिय्याह मेहरारु स कहेस, “परसान जिन हवा। घरे लउटा अउर जइसा तू कहया, आपन भोजन बनाव। मुला तोहरे लगे जउन आटा अहइ ओकर पहिले एक ठु नान्ह रोटी बनाव। उ रोटी क मोरे लगे लिआवा। तब आपन अउ अपने पूत बरे पकावा। 14इस्त्राएल क परमेस्सर, यहोवा कहत ह, ‘उ आटे क बर्तन कबहुँ खाली नाहीं होइ। बर्तन में तेल हमेसा ही रही। अइसा तब तलक होत रही जउने दिन तलक यहोवा इ भुईँया पइ पानी नाहीं बरसावत।”

15एह बरे उ मेहरारु अपने घरे लउटी। उ उहइ किहस जउन एलिय्याह ओहसे करइ क कहे रहा। एलिय्याह, उ मेहरारु अउ ओकर पूत बहोत दिनन तलक पार्याप्त भोजन पावत रहेन। 16आटा क बर्तन अउ तेल क पीपा दुइनउँ कबहुँ खाली नाहीं भवा। इ वइसा ही भवा जइसा यहोवा होइ क कहे रहा। यहोवा एलिय्याह क जरिये बातन किहे रहा।

17कछू समइ पाछे उ मेहरारु क लरिका बीमार पड़ा। उ जियादा, अउर जियादा बीमार होता गवा। आखिर मँ लरिका साँस लेब बन्द कइ किहस। 18मेहरारु एलिय्याह स कहेस, “हे परमेस्सर क मनई, तू मोर बरे का किहेस ह? का तू मोका सारे पापन क सुमिरइ बरे हिआँ आवा अहा? का तू हिआँ मोरे पूत क मरवावइ आवा रहया?”

19एलिय्याह ओहसे कहेस, “आपन पूत मोका द्या।” एलिय्याह ओकरे लरिके क ओहसे लिहस अउर सीढ़ियन स ऊपर लइ गवा। उ ओका उ कमरा मँ बिछउना पड़ ओलराएस जेहमाँ उ रुका भवा रहा। 20तब एलिय्याह पराथना किहेस, “हे यहोवा, मोर परमेस्सर, इ रँड मोका अपने घरे मँ ठहरावति अहइ। का तू ओकरे संग इ बुरा काम करब्या? का तू ओकरे पूत क मरइ देब्या?” 21तब एलिय्याह लरिका क ऊपर तीन दाई ओलरा। एलिय्याह एलिय्याह पराथना किहस, “हे यहोवा, मोर परमेस्सर। इ लरिका क फुन जीवित कर।”

22“यहोवा एलिय्याह क पराथना अंगीकार किहस। लरिका फुन साँस लेइ लाग। उ जिन्दा होइ गवा। 23एलिय्याह बच्चा क सीढ़ियन स खाले लइ गवा। एलिय्याह उ लरिका क ओकरी महतारी क दिहस अउर कहेस, “लखा, तोहार पूत जी उठा।”

24उ मेहरारु जवाब दिहस, “अब मोका बिस्सास हो गवा कि तू फुरइ परमेस्सर क हिआँ क मनई अहा। मई समुझ गइ हउँ कि फुरइ यहोवा तोहरे माध्यम स बोलत ह।”

### एलिय्याह अउ बाल क नबी

18 अनावृस्टि क तीसरे बरिस यहोवा एलिय्याह स कहेस, “जा अउर राजा अहाब स मिला। मई हाली ही बर्खा पठउब।” 2एह बरे एलिय्याह अहाब क लगे गवा।

उ समइ सोमरोन मँ भोजन नाहीं रह गवा रहा।” 3एह बरे राजा अहाब ओबधाह स अपने लगे आवइ क कहेस। ओबधाह राजमहल क अधिकारी रहा। ओबधाह यहोवा क सच्चा अनुयायी रहा। 4एक दाई ईज़ेबेल यहोवा क सबहिं नबियन क जान स मारत रही। एह बरे ओबधाह सौ नबियन क लिहस अउर ओनका दुइ गुफन मँ छुपाएस। ओबद्याह एक गुफा मँ पचास नबी अउ दूसर गुफा मँ पचास नबी रखेस। तब ओबधाह ओनके बरे पानी अउ भोजन लिआएस। 5राजा अहाब ओबधाह स कहेस, “मोरे संग आवा। हम लोग इ प्रदेश क हर एक सोता अउर नाला क खोज करब। हम लोग पता लगाउब कि का हम अपने घोड़न अउ खच्चरन क जिअत रखइ बरे पर्याप्त घास कहीं पाइ सकित ह। तब हम क आपन कउनो जनावर खोउब नाहीं पड़ी।”

6हर एक मनई देस क एक ठु हीसा चुनेस जहाँ उ पचे पानी क खोज कइ सकई। तब दुइनउँ। मनई पूरे देस मँ घूमेन। अहाब एक दिसा मँ अकेले गवा। ओबधाह दूसर दिसा मँ अकेले गवा। 7जब ओबधाह जात्रा करत रहा तउ उ समइ उ एलिय्याह स मिला ओबधाह जब ओका लखेस एलिय्याह क पहचान लिहस। ओबधाह एलिय्याह क समन्वा प्रणाम करइ निहुरा उ केहेस, “एलिय्याह का सुआमी फुरइ आप अहइ?”

8एलिय्याह जवाब दिहस, “हाँ, मई ही हउँ। जा अउर आपन सुआमी राजा स कहा कि मई हिआँ अहउँ।”

9तब ओबधाह कहेस, “जदि मई ओहाब स कहब कि मई जानत हउँ कि तू कहाँ अहा, तउ उ मोका मार डाइ। मई तोहार कछू नाहीं बिगाड़ेउँ ह। तू काहे चाहत अहा कि मई मरि जाउँ? 10यहोवा, तोहरे परमेस्सर क जिन्नगी क किरिया खाइके कहत हउँ कि राजा तोहार खोज करइ बरे हरेक देस मँ मनइयन क भेज दिहस ह। जदि कउनो देस क राजा इ कहेस कि तू ओकरे देस मँ नाहीं अहा, तउ अहाब ओका इ किरिया खाइ क मजबूर किहस कि तू सच मुच मँ ओकरे देस मँ नाहीं अहा। 11अब तू चाहत अहा कि मई जाउँ अउर आपन सुआमी स कहउँ कि तू हुआँ अहा? 12जदि मई जाउँ अउर राजा अहाब स कहउँ कि तू हिआँ अहा, तउ यहोवा क आतिमा तोहका कउनो दूसर जगह पड़ पहोंचाइ सकत ह। राजा अहाब हिआँ आई अउर उ तोहका नाहीं पाइ सकी। तब उ मोका मार डाइ। मई यहोवा क अनुसरण तब स किहेउँ ह जब मई एक बालक रहा। 13तू सुन्या ह कि मई का किहे रहेउँ। ईज़ेबेल यहोवा क नबियन क मारत रही अउर मई सौ नबियन क गुफन मँ छुपाए रहेउँ। मई एक गुफा मँ पचास नबियन अउर दूसर गुफा मँ पचास नबियन क रखे रहेउँ। मई ओनके बरे अन्न-पानी लिआएउँ। 14अब तू चाहत अहा कि मई जाउँ अउर राजा स कहउँ कि तू हिआँ अहा। राजा मोका मार डाइ।”

15एलिय्याह जवाब दिहस, “जेतनी सर्वसत्कीमान यहोवा क सत्ता निहचित अहइ, ओतना ही निहचित इ अहइ कि मई आजु राजा क समन्वा खड़ा होउँ।”

16एह बरे ओबधाह राजा अहाब क लगे गवा। उ बताएस कि एलिय्याह हुवाँ अहइ। राजा अहाब एलिय्याह स भेंटइ गवा। 17जब अहाब एलिय्याह क लखेस तउ उ पूछेस, “का इ तू अहा? का तू ही उ मनई अहा जउन इस्त्राएल पड़ बिपत्ति का कारण अहा?”

18एलिय्याह जवाब दिहस, “मई इस्त्राएल पड़ बिपत्ति क कारण नाहीं अहउँ। तू अउर तोहरे बाप क परिवार इ सारी बिपत्ति क कारण अहा। जब तू यहोवा क आदेसन क पालन करब बन्द कइ दिहा अउर लबार देवतन क अनुसरण सुरु किहा। 19अब सारे इस्त्राएलियन क कर्ममल पवति पड़ मोहसे भेंटइ क कहा। उ ठउरे पड़ बाल क चार सौ पचास नबियन क भी लिआवा अउर लबार देबी असेरा क चार सौ नबियन क लिआवा। रानी ईज़ेबेल ओन नबियन क समर्थन करत ह।”

20एह बरे अहाब सबहिं इस्त्राएलियन अउर ओन नबियन क कर्ममल पवति पड़ बोलाएस। 21एलिय्याह सबहिं लोगन

क लगे आवा। उ कहेस, “आप लोग कब निर्णय करिहीं कि आप क केकर अनुरसण करब अहइ? जदि यहोवा सच्चा परमेस्सर अहइ तउ आप लोगन क ओकर अनुयायी होइ चाही। किन्तु जदि बाल फुरइ परमेस्सर अहइ तउ तोहका ओकर अनुयायी होइ चाही।”

लोग कछू भी नहीं कहेन। 22एह बरे एलिय्याह कहेस, “मइ हिआँ यहोवा क एकमात्र नबी हउँ। मई अकेला हउँ। किन्तु हिआँ बाल क चार सौ पचास नबी अहई। 23एह बरे दुइ ठु बर्धा लिआवा। बाल क नबी क एक ठु बर्धा लेइ द्या। ओनका ओका मारइ द्या अउर ओकर टूकन करइ द्या अउर तब ओनका, मास क लकड़ी पइ धरइ द्या। किन्तु उ पचे आगी लगाउब सुरु न करई। तब मई उहइ काम दूपरे बर्धा क लइके करब अउर मई आगी लगाउब सुरु नहीं करब। 24बाल क नबी! बाल स पराथना करिहीं अउर मई यहोवा स पराथना करब। जउन ईस्सर पराथना क अंगीकार करइ अउर अपने काठे क बारब सुरु कइ देइ, उहइ सच्चा परमेस्सर अहइ।”

सबहि लोग अंगीकार किहेन कि इ उचित बिचार अहइ।

25तब एलिय्याह बाल का नबियन स कहेस, “तू बड़की गनती में अहा। एह बरे तू लोग पहल करा। एक ठु बर्धा क चुना अउर ओका तइयार करा। आपन देवता क समन्वा पूजा किहेस किन्तु आगी लगाउब सुरु जिन करा।”

26एह बरे नबियन उ बर्धा क लिहन जउन ओनका दीन्ह गवा। उ पचे ओकर तइयार किहन। उ पचे दुपहर तलक बाल स पराथना किहन। उ पचे पराथना किहन, “बाल, कृपा कइके हम क जवाब द्या।” किन्तु कउनो अवाज नहीं आइ। कउनो कउन जवाब नहीं दिहस। नबी उ वेदी क चारिहुँ कइँती नाचत रहेन जेका उ पचे बनाए रहेन। किन्तु आगी फुन भी नहीं लागी।

27दुपहरे क एलिय्याह ओनकर मसखरी उड़ाउब सुरु किहेस। एलिय्याह कहेस, “जदि बाल फुरइ देवता अहइ तउ सायद तोहका अउर जियादा जोर स पराथना करइ चाही। सायद उ सोचत रहा होइ या सायद उ बहोत व्यस्त होइ, या सायद उ कउनो जात्रा पइ निकरि गवा होइ। उ सोवत रहि सकत ह। सायद तू लोग अउर जियादा जोर स पराथना करा अउर जगावा।” 28उ पचे अउर जोर स पराथना किहन। उ पचे अपने क तरवार अउर भालन स काटेन-छेदेन। (इ ओनकर पूजा क पद्धति रही) उ पचे अपने क ऐतना काटेन कि ओनके ऊपर खून बहइ लाग। 29तीसर पहर बीत गवा। किन्तु तब तलक आगी नहीं लागी। नबी साँझ क बलि-भेंट क समइ तलक लगातार गवॉरू भविस्साबाणी करत रहेन। किन्तु तब तलक भी बाल कउनो जवाब नहीं दिहस। कउनो अवाज नहीं आइ। कउनो भी नहीं सुनत रहा।

30तब एलिय्याह सबहि लोगन स कहेस, “अब मोरे लगे आवा।” एह बरे सबहि लोग एलिय्याह क चारिहुँ कइँती बटुर गएन। यहोवा क वेदी उखाड़ दीन्ह गइ। एह बरे एलिय्याह एका जमाएस। 31एलिय्याह बारह पाथर प्राप्त किहस। हर एक बारह परिवार समूहन बरे एक ठु पाथर रहा। एन बारह परिवार समूहन क नाउँ याकूब जेका यहोवा

इस्त्राएल नाउँ दिह रहा, क बारह पूतन क नाउँ पइ रहेन। 32एलिय्याह ओन पाथरन क उपयोग यहोवा क सम्मान देइ क बरे वेदी क निर्माण में किहस। एलिय्याह वेदी क चारिहुँ कइँती एक ठु नान्ह खाई खोदेस। इ ऐतनी चौड़ी अउर एतनी गहिर रही कि एहमाँ लगभग सात गैलन पानी आइ सकइ। 33तब एलिय्याह वेदी पइ काठ धरेस। उ बर्धा क टूकन में काटेस। उ टूकन क काठन पइ धरेस। 34तब एलिय्याह कहेस, “चार गगरियन क पानी स भरा। पानी क मास क टूकन अउ काठन पइ डवा।” तब एलिय्याह कहेस, “इहइ फुन करा।” तब उ कहेस, “एका तीसरी दाई करा।” 35पानी वेदी स बाहेर बहा अउर ओहसे खाई भर गइ।

36इ तीसर पहर क बलि भेंट क समइ रहा। एह बरे एलिय्याह नबी वेदी क लगे गवा अउर पराथना किहस, “हे यहोवा, इब्राहीम, इसहाक अउ इस्त्राएल क परमेस्सर, मई तोहसे याचना करत हुउँ कि तू प्रमाणित करा कि तू इस्त्राएल क परमेस्सर अहा अउर प्रमाणित करा कि मई तोहार सेवक अहउँ। एन लोगन दिखाइ द्या कि तू इ सब करइ क मोका आदेस दिहा ह। 37यहोवा मोर पराथना क जवाब द्या। एन लोगन क जानइ द्या कि हे यहोवा, तू असल में परमेस्सर अहा। तब लोग समुझिहीं कि तू ओनका अपने लगे वापस लिआवत अहा।”

38एह बरे यहोवा खाले आगी पठएस। आगी बलि, काठ, पाथरन अउ वेदी क चारिहुँ कइँती क भुईया क बार दिहस। आगी खाई क समूचा पानी भी झुराइ दिहस। 39सबहि लोग इ होत लखेन। लोग भुईया पइ प्रणाम करइ निहुरेन अउर कहइ लोगन, “यहोवा परमेस्सर अहइ। यहोवा परमेस्सर अहइ।”

40तब एलिय्याह कहेस, “बाल क नबियन क धइ ल्या। ओनमाँ स कउनो क बच निकरइ न द्या।” एह बरे लोग सबहि नबियन क धरेन। तब एलिय्याह ओन सबहि किसोन नाले तलक लइ गवा। उ जगह पइ उ सबहि नबियन क मार डाएस।

### बर्धा फुन होत ह

41तब एलिय्याह राजा अहाब स कहेस, “अब जा, खा अउर पिआ। एक घनघोर बर्खा आवति अहइ।” 42एह बरे राजा अहाब भोजन करइ गवा। उहइ समइ एलिय्याह कर्मेल पवते क चोटी पइ चढ़ा। पर्वत क चोटी पइ एलिय्याह प्रणाम करइ निहुरा। उ अपने मूँड क अपने घुटरुअन क बीच रखेस। 43तब एलिय्याह अपने सेवक स कहेस, “समुद्र कइँती लखा।”

सेवक उ जगह तलक गवा जहाँ स उ समुद्र क लख सकइ। तब सेवक लउटके आवा अउर उ कहेस, “मई कछू नहीं लखेउँ।” एलिय्याह ओका फुन जाइ अउर लखइ क कहेस। इ सात दाई भवा। 44सातवीं दाई सेवक लउटके आवा अउर उ कहेस, “मई एक नान्ह बादर मनई क मूठी क बराबर लखेउँ ह। बादर समुद्र स आवत रहा।”

एलिय्याह सेवक स कहेस, “राजा, अहाब क लगे जा अउर ओहसे कहा कि उ आपन रथ तइयार कइ लेइ अउर



अब घर वापस जाइ। यदि उ अबहिं नार्हीं जाइ तउ बर्खा ओका रोक लेइ।”

45 थोड़े समइ क पाछे अकास काले मेघन स ढक गवा। तेज हवा चलइ लागिन अउर घनघोर बर्खा होइ लाग। अहाब अपने रथे में बइठा अउर थिज़ेल क वापस जाना करब सुरु कियेस। 46 एलिय्याह क भीतर यहोवा क ताकत आइ। एलिय्याह अपने ओढ़नन क अपने चारिहुँ कइती कसेस, जेहसे उ दउड़ सकइ। तब एलिय्याह थिज़ेल तलक क पूरे मारग पइ राजा अहाब स अगवा दउड़त रहा।

### सिनाइ पर्वत पइ एलिय्याह

19 राजा अहाब ईज़ेबेल क उ सबइ बातन बताएस जउन एलिय्याह कहेस। अहाब ओका बताएस कि एलिय्याह कइसे सबहिं नबियन क एक ही तरवार स मउत क घाट उतारेस। 2 एह बरे ईज़ेबेल एलिय्याह क लगे एक ठु दूत पठाएस। ईज़ेबेल कहेस, “मई प्रतिग्या करति हउँ कि काल्ह इ समइ स पहिले मई तोहका वइसे ही मारब जइसे तू नबियन क मारया ह। यदि मई सफल नार्हीं होतिउँ तउ देवता मोका मार डावई।”

3 जब एलिय्याह इ सुनेस तउ उ डेराइ गवा। एह बरे उ अपनी जान बचावइ क लिए पराइ गवा। उ अपने संग अपने सेवक क लइ गवा। उ पचे बेर्सेबा पहोंचेन जउन यहूदा में अहइ। एलिय्याह अपने सेवक क बेर्सेबा में तजेस। 4 तब एलिय्याह पूरे दिन रेगिस्तान में चला। एलिय्याह एक झाड़ी क खाले बइठा। उ कामना कियेस कि उ मरि जातइ। एलिय्याह कहेस, “यहोवा इ मोरे बरे बहोत अहइ। मोका मरइ दया। मई अपने पुरखन स नीक नार्हीं अहउँ।”

5 तब एलिय्याह बृच्छ क खाले ओलर गवा अउर सोइ गवा। एक ठु सरगदूत एलिय्याह क लगे आवा अउर उ ओका छुएस। सरगदूत कहेस, “उठा, खा।” 6 एलिय्याह चारिहुँ कइती लखेस अउर ओकर माथे क बगल में कोयले पइ पका एक ठु रोटी अउर पानी भरी गगरी अहइ। एलिय्याह खाएस अउ पीएस अउर तब उ फुन सोइ गवा।

7 पाछे, यहोवा क सरगदूत ओकरे लगे फुन आएस अउर ओका छुएस। सरगदूत कहेस, “उठा, खा।” यदि तू अइसा नार्हीं खाल्या तउ तू एतने जियादा सवित्साली नार्हीं होब्या, जेहसे तू लम्बी जाना कइ सका।” 8 एह बरे एलिय्याह उठा। उ खाएस अउर पीएस। भोजन ओका एतना सवित्साली बनाई दिहस कि उ चालीस दिन अउ रात जाना कइ सकइ। उ होरेब पर्वत तलक गवा जेका परमेस्सर क पर्वत कहा जात अहइ। 9 हुवाँ एलिय्याह एक ठु गुफा में घुसा अउ सारी रात ठहरा।

तब यहोवा एलिय्याह स बातन कियेस। यहोवा कहेस, “एलिय्याह, तू हिआँ काहे आया ह?”

10 एलिय्याह जवाब दिहस, “यहोवा सर्वसक्तिमान परमेस्सर, मई यहोवा बरे बहोत जोसीला रहा ह। यथासम्भव मई तोहार सेवा सब स उत्तम रूप में हमेसा ही कियेउँ ह। किन्तु इस्त्राएल क लोग तोहरे संग कीन्ह गइ समझौता क तोड़ेन ह। उ पचे तोर वेदियन क बर्बाद कियेन ह। उ पचे तोहरे नबियन क मार डाएन ह। मई एकमात्र अइसा नबी हँउ

जउन जिअत बचा हँउ अउर अब उ पचे मोका मार डावइ चाहत हीं।”

11 तब यहोवा एलिय्याह स कहेस, “जा, मोरे समन्वा पर्वत पइ खड़ा हवा। मई तोहरे बगल स निकरबा।” तब एक प्रचण्ड आँधी चली। आँधी पर्वतन क तोड़ गिराएस। इ यहोवा क समन्वा बिसाल चट्टानन क तोड़ डाएस। मुला उ आँधी यहोवा नार्हीं रहा। उ आँधी क पाछे भुईँडोल आवा। किन्तु उ भुईँडोल यहोवा नार्हीं रहा। 12 भुईँडोल क पाछे हुवाँ आगी रही। किन्तु उ आगी यहोवा नार्हीं रही। आगी क पाछे हुवाँ एक कोमल अउ फुसफुसाहट क स्वर सुनाई पड़ा।

13 जब एलिय्याह उ स्वर सुनेस तउ उ अपने अंगरखे स आपन मुँह ढाँपि लिहस। तब उ गवा अउर गुफा क दुआर पइ खड़ा भवा। तब एक वाणी ओहसे कहेस, “एलिय्याह, हिआँ तू कहाँ अहा?”

14 एलिय्याह जवाब दिहस, “यहोवा सर्वसक्तिमान परमेस्सर, मई यहोवा बरे बहोत जियादा जोसीला रहा ह। मई यथासम्भव सब स उत्तम सेवा तोहका अर्पित कियेउँ ह। मुला इस्त्राएल क लोग तोहरे संग कीन्ह गइ आपन करार तोड़ेन ह। उ पचे तोहार वेदियन बर्बाद कियेन। उ पचे तोहरे नबियन क मारेन। मई एकमात्र अइसा नबी हउँ जउन अबहिं तलक जिअत ह अउर अब उ पचे मोका मार डावइ क जतन करत अहइ।”

15 यहोवा कहेस, “उ सड़क पइ वापस लउट जा जउन दमिस्क क चारिहुँ कइती क रेगिस्तान तलक जात ह। दमिस्क में जा अउर हजाएल क अभिसेक अराम क राजा क रूप में अभिसेक करा। 16 ओकरे पाछे निमसी क पूत येहू क इस्त्राएल क राजा क रूप में अभिसेक करा। ओकर बाद आबेल महोला क सापात क पूत एलीसा क अभिसेक करा। उ तोहरे जगह पइ नबी बनी। 17 हजाएल अनेक बुरे लोगन क मार डाइ। येहू कउनो क भी मार डाइ जउन हजाएल क तरवार स बच निकरत ह। अउर एलीस कउनो क भी मार डाइ जउन येहू क तरवार स बच निकरत ह। 18 एलिय्याह! इस्त्राएल में तू ही एक मात्र बिस्सासपात्र मनई नार्हीं अहा। उ सबइ मनई बहोत स लोगन क मार डइहीं, किन्तु ओकरे पाछे भी हुवाँ इस्त्राएल में सात हजार लोग अइसे होइहीं जउन बाल क कबहुँ प्रणाम नार्हीं कियेन। मई ओन सात हजार लोगन क जिअत रहइ देब, काहेकि ओन लोगन में स कउनो कबहुँ बाल क देवमूर्ति क चूमेस तलक नार्हीं।”

### एलीसा एक ठु नबी बनत ह

19 एह बरे एलिय्याह उ जगह क तजेस अउर सापात क पूत एलीसा क खोज में निकरा। एलीसा बारह जोड़ा बर्धन स भुईँया क जोतत रहा अउर एलीसा खुद बारहवाँ जोड़ा स हल जोतत रहा जब एलिय्याह आपन अंगरखा\* एलीसा क

अंगरखा इ बिसेस चोगा रहा। जेसे इ पता चलत रहा कि इ नबी अहा। एलीसा क इ अंगरखा को देइ स इ प्रगट होत ह कि एलीसा एल्लिया क जगह पइ नबी होइ गवा ह।

पहिराइ दिहस। 20एलीसा फउरन आपन बर्धन क छोड़ेस अउर एलिय्याह क पाछे दउड़ गवा। एलीसा कहेस, “मोका अपनी महतारी अउर बाप क चूमइ द्या अउर ओनसे बिदा लेइ द्या। फुन मई तोहरे पीछे चलब।” एलिय्याह जवाब दिहस, “हाँ तू अइसा कइ सकत ह। मई तोहका नाहीं रोकब।”

21तब एलीसा अपने परिवार क संग बिसेस भोजन किहस। एलीसा गवा अउर अपने बर्धन क मार डाएस। उ हरे क काठ क उपयोग आगी बारह इ बरे किहस। तब उ मास क पकाएस अउर लोगन में बाँट दिहस। लोग मास खाएन। तब एलीसा गवा अउर उ एलिय्याह क अनुसरण किहस। एलीसा एलिय्याह क सहायक बना।

### बेन्हदद अउ अहाब जुद्ध को जात ह

20 बेन्हदद अराम क राजा रहा। उ आपन सारी फउज बटोरेस। ओकरे संग बतीस राजा रहेन। ओकरे लगे घोड़न अउ रथ रहेन। उ पचे सोमरोन पइ हमला किहन अउर ओकरे खिलाफ लड़ेन। 2राजा, नगर में इस्त्राएल क राजा अहाब क लगे दूत पठाएस। 3सूचना इ रही, “बेन्हदद कहत ह, ‘तोहका आपन सोना-चाँदी मोका देइ क पड़ी। तोहका आपन मेहररूअन अउ बच्चन भी मोका देइ क होइ।”

4इस्त्राएल क राजा जवाब दिहस, “ऐ मोर सुआमी राजा! मई अंगीकार करत हउँ कि अब मई आप क मातहत हउँ अउर जउन कछू मोर अहइ उ आप क अहइ।”

5तब दूत अहाब क लगे वापस आवा। उ पचे कहेन, “बेन्हदद कहत ह, ‘मई पहिले ही तोहसे कहे रहेउँ कि तोहका सारा सोना-चाँदी तथा आपन मेहररूअन, बच्चन क मोका देइ क पड़ी। 6काल्ह मई अपने मनइयन क पठवत हउँ जउन महल में सब जगह अउर तोहरे मातहती में सासन करइवाले अउर अधिकारियन क घरन में खोज करिहीं। मोर मनई सबइ मुल्यवान वस्तुअन क लेइहीं अउर ओनका मोर लगे लइ आइहीं।”

7एह बरे राजा अहाब अपने देस क सबहिं बुर्जुगन क एक बैठक बोलाएस। अहाब केहस, “लखा बेन्हदद परेसानी क कारण अहइ। पहिले उ मोहसे इ माँग किहस ह कि मई ओका आपन मेहररूअन, आपन बच्चन अउर आपन सोना-चाँदी दइ देउँ। मई ओका उ सबइ चिजियन देब अंगीकार कइ लिहेउँ अउर उ सब कछू लेइ चाहत ह।”

8किन्तु अग्रजन अउर सबहिं लोग कहेन, “ओकर आदेस न माना। उ न करा जेका करइ क उ कहत ह।”

9एह बरे अहाब बेन्हदद क सँदेसा पठाएस। अहाब कहेस, “मई उ कइ देब जउन तू पहिले कहे रह्या। किन्तु मई तोहार दूसरे आदेस क पालन नाहीं कइ सकत।”

राजा बेन्हदद क दूत सँदेसा राजा तलक लइ गएन। 10तब उ पचे बेन्हदद क दूसर सँदेसा क संग लउटेन। सँदेसा इ रहा, “मई सोमरोन क पूरी तरह बर्बाद करब। मई प्रतिग्या करत हउँ कि उ नगर क सबहिं चिजियन क बर्बाद कीन्ह जाइहीं। जदि मोरे हरे एक मनई उ नगर क एक मुट्ठी धूरि

भी आपन घरे लेइ जाइ बरे लेइ तउ उ ओन सबइ लोगन बरे प्रयाप्त नाहीं होब्या। परमेस्सर मोका बर्बाद करइ द्या जदि मई अइसा न करउँ।”

11राजा अहाब जवाब दिहस, “बेन्हदद स कहा कि उ मनइ क, जउन आपन कवच धारण किहे होइ, उ मनई क तरह डींग नाहीं डँकइ चाही जउन ओका उतारइ बरे लम्बी जिन्गी जितत ह।”

12राजा बेन्हदद अपने दूसर प्रसासकन क संग अपने तम्बू में दाखरस पान करत रहा। उहइ समइ दूतन आवा अउर उ राजा अहाब क सँदेसा दिहस। राजा बेन्हदद अपने मनइयन क नगर पइ हमला करइ बरे तैयार होइ क आदेस दिहस। एह बरे फउजी जुद्ध बरे अपनी जगह लेइ बरे बढेन।

13इहइ समइ, एक ठु नबी इस्त्राएल क राजा, अहाब क लगे पहुँचा। नबी कहेस, “राजा अहाब यहोवा तोहसे कहत ह, ‘का तू उ बड़की फउज क लखत अहा। मई, यहोवा, आज तोहका उ सेना क हरावइ देब। तब तू जनब्या कि मई यहोवा हउँ।”

14अहाब कहेस, “ओनका पराजित करइ क बरे तू केकर उपयोग करब्या?”

नबी जवाब दिहस, “यहोवा कहत ह, ‘सरकारी अधिकारियन क युवक सहायक।”

तब राजा पूछेस, “कउन सेना क अगुवाइ करब अउर जुद्ध सुरू करब?” नबी जवाब दिहस, “तू।”

15एह बरे अहाब सरकारी अधिकारियन क युवक सहायकन क बटोरेस। सब मिलाइके इ सबइ दुइ सौ बतीस युवक रहेन। तब राजा इस्त्राएल क सेना क एक संग बोलाएस। सारी गनती सात हजार रही।

16दुपहर क, राजा बेन्हदद अउ ओकर सहायक बतीस राजा अपने डेरा में दाखरस पान करत रहेन अउर मद मत्त होत रहेन। इहइ समइ राजा अहाब क हमला भवा। 17युवक सहायकन पहिले हमला किहन। बेन्हदद क मनइयन ओहसे कहेन कि फउजी सोमरोन स बाहेर निकरि आए अहइँ। 18एह बरे बेन्हदद कहेस, “उ पचे जुद्ध करइ बरे या सान्ति-सन्धि करइ बरे आवइ सकत ह। ओनका जिन्दा धइ ल्या।”

19राजा अहाब क युवक आक्रमण क पहल करत रहेन। इस्त्राएल क फउज ओनके पाछे चलत रही। 20इस्त्राएल क हर एक सैनिक उ मनइयन क मार डाएस जउन ओकरे खिलाफ आवा। एह बरे अराम क फउजियन पराब सुरू किहन। इस्त्राएल क फउज ओनकर पाछा किहस। राजा बेन्हदद अपने रथन क एक घोड़े पइ बैठिके भाग निकरा। 21राजा अहाब फउज क अगुवाइ किहस अउर आगे बढेस। उ अराम क फउज क सारे घोड़न अउ रथन क लइ लिहस। इ तरह राजा अहाब अरामियन सेना क भारी पराजय दिहस।

22तब नबी राजा अहाब क लगे पहुँचा, इस्त्राएल क राजा कहेस, “अराम क राजा बेन्हदद अगले बसन्त में तोहसे जुद्ध करइ बरे फुन आइ। एह बरे तोहका अब घरे लउटि जाइ चाही अउर अपनी फउज क पहिले स जियादा

सक्तीसाली बनवाइ चाही अउर ओका हराइ बरे उचित योजना बनावा।”

### बेन्हदद फुन हमला करत ह

23राजा बेन्हदद क अधिकारी लोग ओहसे कहेन, “इस्त्राएल क देवता पर्वतीय देवता अहइ। हम लोग पर्वतीय पहुँटा में लड़े रहे। एह बरे इस्त्राएल क लोग बिजयी भएन। एह बरे हम लोग ओनसे समथर मइदान में जुद्ध करी। तब हम बिजयी पाउब। 24इ उहइ अहइ जेका तोहका करइ चाही। बत्तीस राजा लोगन क फउज क संचालन करइ क अनुमति न द्या। सेनापतियन क ही अपनी फउज क नेतृत्व करइ द्या।

25“अब तू उहइ क समान एक फउज बनावा जउन तू खो दिहस ह। उहइ फउज क तरह घोड़न अउर रथ ँकट्ठा करा जइसा तू पहिले रहा। तब हम लोग इस्त्राएलियन स समथर मइदान में जुद्ध करी। तब हम बिजय प्राप्त करब।” बेन्हदद ओनकी सलाह मान लिहस। उ उहइ किहस जउन उ पचे कहेन।

26एह बरे बसन्त में बेन्हदद अराम क लोगन क बटोरेस। उ इस्त्राएल क खिलाफ जुद्ध करइ अपेक गवा।

27इस्त्राएलियन भी जुद्ध क तइयारी किहन। इस्त्राएल क लोग अराम क सेना स लड़इ गएन। उ पचे अपने सिबिर अराम क सिबिर क समन्वा डएन। दुस्मन क तुलना में इस्त्राएली फउज बोकरियन क दुइ ठू नान्ह झुण्डन क समान देखाइ पड़त रहेन किन्तु अराम क फउज सारे छेत्र क ढाँपे रही।

28परमेस्सर क एक मनई इ सँदिसा क संग इस्त्राएल क राजा क लगे आवा: “यहोवा कहेस ह, ‘अराम क लोग कहेन ह कि मई, यहोवा पर्वतन क परमेस्सर हुँ। उ पचे सोचत हीं कि मई घाटियन क परमेस्सर भी नहीं हउँ। एह बरे, मई तोहका इ बिसाल सेना क हरावइ देब। तब तू समुझब्या कि मई यहोवा सब जगह हउँ।”

29फउजन सात दिन तलक एक दूसरे क आमने-सामने डेरा डए रहिन। सतएँ दिन जुद्ध सुरु भवा। इस्त्राएलियन एक दिन में अराम क एक लाख फउजियन क मार डएन। 30बचे भए फउजी अपेक नगर क भाग पराइ गएन। नगर प्राचीर ओन सताईस हजार फउजियन पड़ भहराइ पड़ी। बेन्हदद भी नगर क पराइ गवा। उ एक ठु कमरा में छुप गवा। 31ओकर अधिकारियन ओहसे कहेन, “हम लोग सुना ह कि इस्त्राएल क राजा लोग दया दिखावत ह। हम लोग मोरे ओढ़ना पहिरे अउर सिरे पड़ रस्सी डए। तब हम लोग इस्त्राएल क राजा क लगे चली होइ सकत ह कि उ हम क जिअत रहइ देइ।”

32उ पचे मोरे ओढ़ना पहिरेन अउर लसुरी मूँड़े पड़ डएन। उ पचे इस्त्राएल क राजा क लगे आएन। उ पचे कहेन, “तोहार सेवक बेन्हदद कहत ह, ‘कृपा कइके मोका जिअत रहइ द्या।’” अहाब जवाब दिहस, “का उ अबहिं तलक जिअत अहइ? उ मोर भाई अहइ।”

33बेन्हदद क मनई राजा अहाब क सब्द में कछू सुराग सुनि क आसावादी रहेन जेहसे इ निहिचित होइ कि उ

बेन्हदद क नहीं मारी। जब अहाब बेन्हदद क आपन भाई कहेस तउ सलाहकारन तुरन्त कहेन, “हाँ, बेन्हदद आप क भाई अहइ।”

अहाब कहेस, “ओका मोरे लगे लिआवा।” एह बरे बेन्हदद राजा अहाब क लगे आवा। राजा अहाब अपने संग ओका अपने रथ में बइठइ क कहेस।

34बेन्हदद ओहसे कहेस, “अहाब मई ओन नगरन क तोहका दइ देब जेनका मोर बाप तोहरे बाप स लड़ लिहे रहेन अउर तू दमिस्क में वइसे ही दुकानन रखि सकत ह जइसे मोर बाप सोमरोन में रखे रहा।”

अहाब जवाब दिहस, “जदि तू एका अँगीकार करत ह तउ मई तोहका जाइ बरे अजाद करत हउँ।” एह बरे दुइनउँ राजा लोग एक ठु सान्ति-सन्धि किहन। तब राजा अहाब बेन्हदद क जाइ बरे अजाद कइ दिहस।

### एब नबी अहाब क बिरुद्ध भविस्सवाणी करत ह

35नबियन में स एक दूसर नबी स कहेस, “मोह पड़ चोट करा।” उ ओहसे इ करइ बरे कहेस काहेकि यहोवा अइसा आदेस दिहे रहा। किन्तु दूसर नबी ओह पड़ चोट करइ स मना कइ दिहेस। 36एह बरे पहिला नबी कहेस, “तू यहोवा क आदेस क पालन नहीं किहा। एह बरे जब तू इ जगह क तजब्या, एक ठु सेर तोहका मार डाइ।” दूसर नबी उ जगह क तजेस अउर ओका एक सेर मार डएस।

37पहिला नबी दूसर मनई क लगे गवा अउर कहेस, “मोह पड़ चोट करा।”

उ मनई ओह पड़ चोट किहस। नबी क चोट आइ। 38एह बरे नबी अपने चेहरे पड़ एक ओढ़ना लपेट लिहस। इ तरह कउनो इ नहीं समुझ सकत रहा कि उ कउन अहइ। उ नबी गवा अउर उ सड़क क किनारे राजा क प्रतीच्छा सुरु किहस। 39राजा उ सड़क स निकरा अउर नबी ओहसे कहेस, “मई जुद्ध में लड़इ गवा रहेउँ। हमरे मनइयन में स एक मोरे लगे एक दुस्मन फउजी क लिआवा। उ मनई कहेस, ‘इ मनई क पहरेदारी करा। जदि उ भाग गवा, तउ एकरे जगह पड़ तोहका आपन जिन्नगी देइ क होइ या तोहका पचहत्तर पौण्ड चाँदी जुमनि में देइ क होइ।’ 40किन्तु मई ब्यस्त होइ गवा। एह बरे उ मनई भाग निकरा।”

इस्त्राएल क राजा कहेस, “तू कह्या ह कि तू फउजी क पराइ जाइ देइ क अपराधी अहा। एह बरे तोहका जवाब मालूम अहइ। तोहका उहइ करइ चाही जेका करइ क उ मनई कहेस ह।”

41तब नबी अपने मुँहना स ओढ़ना हटाएस। इस्त्राएल क राजा लखेस अउर इ जान लिहस कि उ नबियन में स एक अहइ। 42तब नबी राजा स कहेस, “यहोवा तोहसे इ कहत ह, ‘तू उ मनई क अजाद किहा जेका मई मर जाइ क कहेउँ। एह बरे ओकर जगह तू लेब्या, तू मर जाब्या अउर तोहार लोग दुस्मनन क जगह लेइहीं, तोहार लोग मरिहीं।”

43तब राजा समारिया अपने घरे लउट गवा। उ बहोत गुस्सा में अउ घबराया भवा रहा।

### नाबोत क अंगूर क बाग

**21** राजा अहाब क महल सोमरोन म रहा। महल क लगे एक ठु अंगूरन क बाग रहा। यिज़्रेल नाबोत नाउँ क मनई इ फलन क बाग क सुआमी रहा। 2 एक दिन अहाब नाबोत स कहेस, “अपना अंगूर क बाग मोका दइ द्या। मई एका सब्जियन क बाग बनावइ चाहत हउँ। तोहार बाग मोरे महल क लगे अहइ। मई एकरे बदले तोहका एहसे अच्छा अंगूर क बाग देब या, जदि तोर इच्छा होइ तउ मई एकरे मुख्य चुकाइके एका खरीद लेब।”

3 नाबोत जवाब दिहस, “मई आपन भुईया तोहका कबहूँ नाहीं देब। इ भुईया मोरे परिवार क बाटइ।”

4 एह बरे अहाब अपने घर गवा। उ नाबोत पइ किरोधित अउ बिगड़ा भवा रहा। उ इ बात क पसन्द नाहीं किहस जउन यिज़्रेल क मनई कहे रहा। (नाबोत कहे रहा, “मई अपने परिवार क भुईया तोहका नाहीं देब।”) अहाब अपने बिछउना पइ ओलर गवा। उ आपन मुंह मोड़ लिहस अउर खाइ स इन्कार कइ दिहस।

5 अहाब क मेहरारू ईज़ेबेल ओकरे लगे गइ। ईज़ेबेल ओहसे कहेस, ‘तू ऐतना उदास काहे अहा? तू खाइ स इन्कार काहे किहा ह?’

6 अहाब जवाब दिहस, “मई यिज़्रेल क नाबोत स ओकर भुईया माँगेउँ। मई ओहसे कहेउँ कि मई ओकर पूरी कीमत चुकाउब, या, जदि उ चाही तउ मई ओका दूसर बाग देब किन्तु नाबोत आपन बाग देइ स इन्कार कइ दिहस।”

7 ईज़ेबेल जवाब दिहस, “किन्तु तू तउ पूरे इस्त्राएल क राजा अहा अपने बिछउना स उठा। कछू खइया क खा, तू अपने क बेहतर महसूस करब्या। मई नाबोत क बाग तोहरे बरे लइ लेब।”

8 तब ईज़ेबेल कछू पत्र लिखेस। उ पत्रन पइ अहाब क हस्ताच्छर बनाएस। उ अहाब क मुहर पत्रज क बंद करइ बरे ओन पइ लगाएस। तब उ ओनका अग्रजन (प्रमुखन) अउर बिसेस मनइयन क लगे पठएस जउन उहइ नगर में रहत रहेन, जेहमों नाबोत रहत रहा। 9 पत्र में इ लिखा रहा:

इ घोसणा करा कि एक इ एक उपवास क दिन होइ। तब नगर क सबहि लोगन क एक संग एक बइठक बोलावा। बइठक में, नाबोत क लोगन क समन्वा खास स्थान पइ बइठवा। 10 कउनो अइसे दर्ई बुरा मनइयन क हासिल करा जउन नाबोत क खिलाफ झूठा गवाही देइ। ओनका इ कहइ द्या उ पचे सुनेन कि नाबोत राजा अउ परमेस्सर क खिलाफ कछू बातन कहेस। तब नाबोत क नगर क बाहेर लइ जा अउर ओका पाथरन स मार डवा।

11 एह बरे यिज़्रेल क बुर्जुगन अउर महत्वपूर्ण मनइयन उ आदेस क पालन किहन जउन उ पत्र में लेखि के ओनका लगे भेजि रहेन। 12 प्रमुखन घोसणा किहन कि एक दिन अइसा होइ जब सबहि मनई कछू भी भोजन नाहीं करिहीं। उ दिन उ पचे सबहि लोगन क बइठक एक संग बोलाएन। उ पचे नाबोत क बिसेस ठउरे पइ लोगन क समन्वा रखेन।

13 तब दुइ बुरा मनइयन लोगन स कहेन कि उ पचे नाबोत क परमेस्सर अउ राजा क बिरुद्ध बातन करत सुनेन ह। एह बरे लोग नाबोत क नगर क बाहेर लइ गएन। तब उ पचे ओका पाथरन स मार डएन। 14 तब प्रमुखन एक सँदेसा ईज़ेबेल क पठएन। सँदेसा रहा: “नाबोत पाथरन स मार डवा गवा।” 15 जब ईज़ेबेल इ सुनेस तउ उ अहाब स कहेस, “नाबोत मर गवा। अब तू जाइ सकत ह अउर उ बाग क लइ सकत ह जेका उ तोहका बेचइ स इन्कार किहे रहा।” 16 जब अहाब सुनेस कि नाबोत मर गवा, उ अंगूर क बाग में ओह पइ कब्जा करइ बरे गवा।

17 इ समइ यहोवा एलिय्याह स बातन किहस। (एलिय्याह तिसबी क नबी रहा) यहोवा कहेस, 18 “इस्त्राएल क राजा अहाब क लगे सोमरोन क जा। अहाब नाबोत क अंगूरन क बाग में होइ। उ हुँवा पइ उ बाग पइ कब्जा करइ बरे होइ। 19 अहाब स कहा, मई यहोवा ओहसे कहत हउँ, ‘अहाब! तू नाबोत नाउँ क मार डया ह। अब तू ओकर भुईया लेत अहा। एह बरे मई तोहसे कहत हउँ, तू भी उहइ जगह पइ मरब्या जउने जगह पइ नाबोत मरा। जउन कूकुरन नाबोत क खून क चाटेन, उ सबइ ही तोहार खून उ जगह पइ चटिहीं।”

20 एह बरे एलिय्याह अहाब क लगे गवा। अहाब एलिय्याह क लखेस अउ कहेस, “तू मोका फुन पाइ लिहा ह। तू सदा मोरे खिलाफ अहा।”

एलिय्याह जवाब दिहस, “हौं मई तोहका फुन पाइ लिहेउँ ह। तू सदा अपनी जिन्गी क उपयोग यहोवा क खिलाफ पाप करइ में किहा। 21 एह बरे यहोवा तोहसे कहत ह, ‘मई तोहका बर्बाद कइ देब। मई तोहका अउर तोहरे परिवार क हर एक मनसेधू निअंबर क मार डउब।

22 “तोहरे परिवार क उहइ दसा होइ जउन दसा नाबोत क पूत यारोबाम क परिवार क भइ अउर तोहार परिवार बासा क परिवार क तरह होइ। इ सबइ दुइनउँ पूरी तरह बर्बाद कइ दीन्ह गए रहेन। मई तोहारे संग उहइ करब काहेकि तू मोका गुस्सैल किहा ह। तू इस्त्राएल क लोगन स पाप कराया ह।’ 23 अउर यहोवा इ भी कहत ह, ‘तोहार मेहरारू ईज़ेबेल क ल्हास यिज़्रेल नगर में कूकुर खइहीं। 24 तोहार परिवार कउनो भी निअंबर क जउन नगर में मरी, कूकुर खइहीं जउन मनई मइदानन में मरी उ पंछियन क जरिये खा जाइ।”

25 ओलेना बुरे काम जेका यहोवा बुराई में सामिल करत ह कउनो भी मनई नाहीं किहेस ह जेतना अहाब किहेस ह। ओकर पत्नी ईज़ेबेल ओहसे इ सबइ काम कराएस ह। 26 अहाब बहोत भयंकर पाप किहेस ह जउन उ ओन काठे क देवमूरतियन क पूजेस ह। इ उहइ काम रहा जेका एमोरी लोग करत रहेन अउर यहोवा ओनसे पहँटा छोर लिहस अउर इस्त्राएल क लोगन क दइ दिहे रहा।

27 एलिय्याह क कथन क पूरा होइ पइ अहाब दुःखी भवा। उ अपने ओढ़नन क इ देखावइ बरे फार डएस कि ओका दुःख अहइ। तब उ सोक क बिसेस ओढ़ना पहिरेस। अहाब खाइ स इन्कार कइ दिहस। उ ओनही बिसेस ओढ़नन क पहिरे भवा रहा। अहाब बहोत दुःखी अउ उदास रहा।

28यहोवा एलिय्याह, तिसबी क नबी स कहेस, 29“का तू लखया ह कि अहाब मोरे समन्वा विनम्र होइ गवा ह। एह बरे मई ओकरे जिन्गी क काल में ओह पइ विपत्तियन क नाहीं आवइ देब। मई तब तलक प्रतीच्छा करब जब तलक ओकर पूत राजा नाहीं बन जात। तब मई अहाब क परिवार पइ विपत्तियन आवइ देब।”

### मीकायाह अहाब क चितउनी देत ह

22 अगले दुइ बरिस क भीतर इस्राएल अउ अराम क बीच सान्ति रही। 2तब तीसरे बरिस यहूदा क राजा यहोसापात इस्राएल क राजा अहाब स भेंटइ गवा।

3इ समइ अहाब अपने अधिकारियन स पूछेस, “तू पचे जानत ह कि अराम क राजा गिलाद में रामोत क हम स लइ लिहे रहा। हम लोग रामोत वापस लेइ क कछू भी जतन काहे नाहीं किहा? इ हम लोगन क नगर होइ चाही।” 4एह बरे अहाब यहोसापात स पूछेस, “का आप हमरे संग आउब अउर रामोत में अराम क फउज क खिलाफ जुद्ध करब?” भेंटइ बरे तैयार अहई।

यहोसापात जवाब दिहस, “हाँ, मई तोहार साथ देब। मोर फउजी अउर मोर घोड़न तोहरी फउज क संग भेंटइ बरे तैयार अहइ। 5किन्तु पहिले हम लोगन क यहोवा स सलाह लेइ चाही।”

6एह बरे अहाब नबियन क एक बैठक बोलाएस। उ समइ लगभग चार सौ नबी रहेन। अहाब नबियन स पूछेस, “का मई जाउँ अउर रामोत में अराम क फउज क खिलाफ जुद्ध करउँ? या मई कउनो दूसर अवसर क प्रतीच्छा करउँ?”

नबियन जवाब दिहन, “तोहका अबहिं जुद्ध करइ चाही। यहोवा तोहका विजय पावइ देइ।”

7किन्तु यहोसापात कहेस, “का हिआँ यहोवा क नबियन में स कउनो दूसर नबी अहइ? जदि कउनो अहइ तउ हम क ओहसे पूछइ चाही कि परमेस्सर का कहत ह।”

8राजा अहाब जवाब दिहस, “एक दूसर नबी अहइ। उ यिम्ला क पूत मीकायाह अहइ। किन्तु ओहसे मई घिना करत हउँ। जब कबहुँ उ यहोवा क बारे में बतावत ह, उ मोर बारे में कछू नीक नाहीं बल्कि बुरा कहत ह। उ सदा ही उहइ कहत ह जेका मई पसन्द नाहीं करत।”

यहोसापात कहेस, “राजा अहाब, तोहका इ सबइ बातन नाहीं कहइ चाही।”

9एह बरे राजा अहाब अपने अधिकारियन में एक स कहेस जा अउर मीकायाह क जल्दी खोज के लिआवा।

10उ समइ दुइनउँ राजा अपनी राजसी पोसाक पहिरे रहेन। उ पचे सिंहासने पइ बइठे रहेन। इ सोमरोन क दुआर क लगे निआव करइ क जगह पइ रहा। सबहिं नबी ओकरे समन्ना खड़े रहेन। उ सबइ भविस्सवाणी करत रहेन। 11नबियन में स एक सिदकिय्याह नाउँ क मनई रहा। इ कनान क पूत रहा। सिदकिय्याह कछू लोहा क सींगन बनाएस। तब उ अहाब स कहेस, “यहोवा कहत ह, ‘तू लोहा एन सींगन क उपयोग अराम क फउज क खिलाफ

लइइ में करब्या। तू ओनका हरउब्या अउर ओनका बर्बाद करब्या।” 12सबहिं दूसर नबियन ओकर समर्थन किहन जउन कछू सिदकिय्याह कहेस। नबियन कहेन, “तोहार फउज अबहिं कूच करइ। ओनका रामोत में अरम क सेना क संग जुद्ध करइ चाही। तू जुद्ध जितब्या। यहोवा तोहका विजय देइ।”

13जब इ होत रहा तबहिं अधिकारी मीकायाह क हेरइ गवा। अधिकारी मीकायाह क हेर निकारेस अउर ओहसे कहेस, “सबहिं दूसर नबियन कहेन ह कि राजा क जुद्ध जीतब तोहका भी इ कहइ चाही अउर तोहका राजा क बारे में अच्छी बातन क भविस्सवाणी करइ चाही।”

14किन्तु मीकायाह जवाब दिहस, “नाहीं! मई प्रतिग्या करत हउँ कि मई सिरिफ परमेस्सर क सक्ती क बारे में उहइ कहब जउन कहइ बरे यहोवा कहेस ह।”

15तब मीकायाह राजा अहाब क समन्वा खड़ा भवा। राजा ओहसे पूछेस, “मीकायाह, का मोका अउर राजा यहोसापात क अपनी फउजन एक कइ लेइ चाही? अउर का हम क अराम क फउज स रामोत में जुद्ध करइ बरे जाइ चाहीं?”

मीकायाह जवाब दिहस, “हाँ! तोहका जाइ चाही अउर ओनसे अबहिं जुद्ध करइ चाही। यहोवा तोहका विजय स आसिस देइ।”

16किन्तु अहाब पूछेस, “तू यहोवा क सक्ती स नाहीं बतावत अहा। तू अपनी निजी बात कहत अहा। एह बरे मोहसे फुर कहा। केतनी दाई मोका तोहसे कहइ क पड़ी? मोहसे उ कहा जउन यहोवा कहत ह।”

17एह बरे मीकायाह जवाब दिहस, “मई जउन कछू होइ, लखि सकत हउँ। इस्राएल क फउज पहाड़ियन में बिखर जाइ। उ पचे ओन भेड़न क तरह होइहीं जेनकर कउनो भी संचालक न होइ। इहइ यहोवा कहत ह: ‘एन मनइयन क अगुवाइ कउनो नाहीं करइ। ओनका घर जाइ चाही अउर जुद्ध नाहीं करइ चाही।’” 18जब अहाब यहोसापात स कहेस, “लख ल्या। मई तोहका बताए रहेउँ। इ नबी मोरे बारे में कबहुँ कउनो नीक बात नाहीं कहत। इ सदा उहइ बात कहत ह जेका मई सुनइ नाहीं चाहत।”

19किन्तु मीकायाह यहोवा क माध्यम बना कहत ही रहा। उ कहेस, “सुना! इ सबइ उ सबइ सब्द अहई जेनका यहोवा कहेस ह! मई यहोवा क सरग में अपने सिंहासने पइ बइठा लखेउँ। ओकर दूत ओकरे दाई अउर बाई ओर खड़ा रहेन।

20यहोवा कहेस, ‘तू पचन में स कउन राजा अहाब क चकमा दइ सकत ह? मई ओका रामोत में अराम क फउज क खिलाफ जुद्ध करइ क बरे जाइ देइ चाहत हउँ। तब उ मारा जाइ।’ अलग-अलग सरगदूतन अलग-अलग सुझाव दिहेन। 21तब एक तु सरगदूत यहोवा क लगे गवा अउर उ कहेस, ‘मई ओका चकमा देब।’ 22यहोवा पूछेस, ‘तू राजा अहाब क चकमा कइसे देब्या?’ सरगदूत जवाब दिहस, ‘मई ओकर सबइ नबियन क मुँह में झूठ बोलइवाला आतिमा होइ जाब।’ मई नबियन क अहाब स झूठ बोलाउब नबियन क सँदेसन झूठ होइहीं।’ एह बरे यहोवा कहेस, ‘बहोत अच्छा। जा अउर राजा अहाब क चकमा द्या। तू सफल होब्या।’”

23मीकायाह अपनी कथा पूरी किहस। तब उ कहेस, “एह बरे हिआँ इ सब भवा। यहोवा तोहरे नबियन स तोहका लबार बोलवाइ दिहस ह। यहोवा खुद निर्णय लिहस ह कि तोह पड़ बड़की परेसानी लिआवइ।”

24तब सिदकिय्याह नबी मीकायाह क लगे गवा। सिदकिय्याह मीकायाह क मुँह पड़ मारेस। सिदकिय्याह कहेस, “का तू फुरइ पतियात अहा कि यहोवा क सक्ती मोका तजि दिहस ह अउर तोहरे माध्यम स बात करत अहइ।”

25मीकायाह जवाब दिहस, “हाली ही बिपद आइ। उ समइ तू पराब्या अउर एक छोटके कमरे में छिपब्या अउर तब तू समुझब्या कि मई फुर कहत हउँ।”

26तब राजा अहाब अपने अधिकारियन में स एक क मीकायाह क बन्दी बनावइ क आदेस दिहस। राजा अहाब कहेस, “एका बन्दी बनाइ ल्या अउर एका नगर क प्रसासक आमोन अउर राजकुमार योआस क लगे लइ जा। 27ओनसे कहा कि मीकायाह क बन्दीघर में डाइ द्या। ओका खाइ क सिरिफ रोटी अउर पानी द्या। ओका हुवाँ तब तलक राखा जब तलक मई जुद्ध स घरे न आइ जाउँ।”

28मीकायाह जोर स कहेस, “आप सबहिं लोग सुनई जउन मई कहत हउँ। राजा अहाब, जदि तू जुद्ध स घरे जित लउटि अउब्या, तउ एकर अरथ होइ कि यहोवा मोर जरिया स नाही बोले रहा।”

29तब राजा अहाब अउ राजा यहोसापात जुद्ध में अराम क फउज स जुद्ध करइ गएन। इ गिलाद नाउँ क पहुँटा में रहा। 30अहाब यहोसापात स कहेस, “हम जुद्ध क तैयारी करब। मई अइसे ओढ़ना पहिरब जउन मोका अइसा रुप देइहीं कि मई अइसा लगब कि मई राजा नाही अहउँ। किन्तु तू अपने बिसेस ओढ़ना पहिरा जेहसे तू अइसे लगा कि तू राजा अहा।” इ तरह इस्राएल क राजा जुद्ध क सुरुआत उ मनई क तरह ओढ़ना पहिरके किहन जउन राजा न होइ।

31अराम क राजा क लगे बत्तीस रथ-सेनापति रहेन। उ राजा एन बत्तीस रथ-सेनापतियन क आदेस दिहस कि उ पचे इस्राएल क राजा क खोज निकारइँ अउर ओका मार डाई। उ कहेस कि इस्राएल क राजा क इलावा कउनो क संग जिन लड़ा चाहे उ महत्वपूर्ण अहइ या नाही।” 32एह बरे जुद्ध क बीच सेनापतियन राजा यहोसापात क लखेन। सेनापतियन समुझेन कि उहइ इस्राएल क राजा अहइ। एह बरे उ पचे ओका मारइ गएन। यहोसापात चिचिआब सुरू किहस। 33सेनापतियन समुझ लिहन कि उ राजा अहाब नाही अहइ। एह बरे उ पचे ओका नाही मारेन। 34मुला एक ठु फउजी हवा में बाण छोड़ेस, उ कउनो खास मनई क आपन लस्य नाही बनावत रहा। किन्तु ओकर बाण इस्राएल क राजा अहाब क जाइ लगा। बाण राजा क उ छोटी जगह में भेदेस, जउन तने क हीसा ओकरे कवच स नाही ढका रहा। एह बरे राजा अहाब अपने सारथी स कहेस, “मोका एक ठु बाग भेद दिहस ह। इ छेत्र स रथे क बाहेर लइ चला। हम क जुद्ध स दूर निकरि जाइ चाही।”

35फउज लगातार जुद्ध करत रहिन। राजा अहाब अपने रथे में ठहरा। उ रथ क टेक क सहारा निहरा भवा रहा। उ

अराम क फउज क लखत रहा। ओकर खून खाले बहत रहा अउर उ रथ क तले क ढाँपि लिहस। पाछे, साँझ क राजा मर गवा। 36साँझ क समइ इस्राएल क फउज क सबहिं मनसेधुअन अपने नगर अउर प्रदेस वापस लउटइ क आदेस दीन्ह गवा।

37एह बरे राजा अहाब इ तरह मरा। कछू मनई ओकरे लहास क सोमरोन लइ आएन। उ पचे ओका हुँवइ दफनाइ दिहन। 38लोग अहाब क रथे क सोमरोन में एक तालाब में धोएन, जहाँ रंडियन नहावत ही। कूकुर राजा अहाब क खून क ओकर रथ स चाटेन। इ सबइ बातन वइसे वइसे ही भइज जइसा यहोवा होइ क कहे रहा।

39अपने राजकाल में अहाब जउन कछू किहस उ “इस्राएल क राजा लोगन क इतिहास” नाउँ क किताबे में लिखा अहइ। उहइ किताब में राजा अपने महल क जियादा सुन्नर बनावइ बरे जउने हाथी-दाँत क उपयोग किहे रहा, ओकरे बारे में कहा गवा ह अउर उ किताबे में ओन नगरन क बारे में लिखा गवा ह। जेका उ बनाए रहा। 40अहाब मरा, अउर अपने पुरखन क लगे दफनाइ दीन्ह गवा। ओकर पूत अहज्याह राजा बना।

### यहूदा क राजा यहोसापात

41इस्राएल क राजा अहाब क चउथे बरिस। यहोसापात यहूदा क राजा भवा। यहोसापात आसा क पूत रहा। 42यहोसापात जब राजा भवा तब उ पैतीस बरिस क रहा। सिल्ली क बिटिया अजूबा यहोसापात क महतारी रही। उ यरूसलेम में पचीस बरिस तलक सासन किहे रहेन। 43यहोसापात नीक मनई रहा। उ उ सबइ चिजियन क किहेस जउन ओकर बाप किहे रहेन अउर ओका करइ में दृढ़ रहेन। उ उहइ किहेन जेका यहोवा नीक समुझत ह। किन्तु यहोसापात ओन जगहन क बर्बाद नाही किहस। लोग ओन जगहन पड़ बलि-भेंट करब अउर सुगन्धि बारब जारी रखेन।

44यहोसापात इस्राएल क राजा क संग एक सान्ति-सन्धि किहेस। 45यहोसापात बहोत वीर रहा अउर उ कई जुद्ध लड़ा। जउन कछू उ किहेस उ, “यहूदा क राजा लोगन क इतिहास” नाउँ क किताबे में लिखा अहइ। 46यहोसापात मन्दिर क ओन पुरुस अउर स्त्री पतूरिया क मन्दिर स ज़बरदस्ती बाहेर निकारेस। ओन मनइयन ओन मन्दिर में तब सेवा किहे रहेन जब ओकर बाप आसा राजा रहा।

47इ समइ क बीच एदोम देस क कउनो राजा नाही रहा। उ देस एक ठु प्रसासक क जरिये सासित होत रहा। प्रसासक यहूदा क राजा क जरिये चुना जात रहा।

### यहोसापात क समुद्री बेड़ा

48राजा यहोसापात अइसे समुद्री जहाजन क बनाएस जउन सामानन क ढोवत रहेन। उ चाहत रहेन कि ओकर जहाज ओपीर प्रदेस स सोना लिआवइ। किन्तु जहाजन ओकर ग्रह-बन्दरगाह एस्योनगेबेर में बर्बाद होइ गएन। 49इस्राएल क राजा अहज्याह यहोसापात क मदद देइ क न्योता दिहेन। अहज्याह यहोसापात स कहे रहा कि उ कछू अइसे मनइयन क अपने मनइयन क संग ल्या जउन जहाजी कामे में

होसियार अहड़ै।” किन्तु यहोसापात अहज्याह क मनइयन क अंगीकार करइ स इन्कार कइ दिहस।

50यहोसापात मरा अउ अपने पुरखन क संग दफनावा गवा। उ दाऊद नगर में अपने पुरखन क संग दफनावा गवा। तब ओकर पूत यहोराम राजा बना।

### इस्राएल क राजा अहज्याह

51अहज्याह अहाब क पूत रहा। उ इस्राएल क राजा यहोसापात क यहूदा पइ राजकाल क सत्रहवें बरिस में राजा बना। अहज्याह सोमरोन में दुइ बरिस राज्ज किहस।

52अहज्याह यहोवा क बिरुद्ध पाप किहस। उ उ सबइ ही पाप किहस जउन ओकर बाप अहाब ओकर महतारी ईजेबेल अउ नबात क पूत यारोबाम किहे रहा। इ सबइ सबहिं सासक इस्राएल क लोगन क अउर जियादा पाप कईंती लइ गएन।

53अहज्याह अपने स पहिले अपने बाप क समान लबार देवता बाल क पूजा अउर सेवा किहेन। एह बरे अहज्याह यहोवा, इस्राएल क परमेस्सर क बहोत जियादा किरोधित किहस। यहोवा अहज्याह पइ वइसा ही कोहाइ गवा जइसा ओकरे पहिले उ ओकर बाप पइ कोहान रहा।

# दूसर समूएल

## दाऊद क साऊल क मउत क पता चलत ह

1 अमालेकियन क हरावइ क पाछे दाऊद सिकलग लउटा अउर हुवाँ दुइ दिन ठहरा। इ साऊल क मउत क पाछे भवा। 2तीसरे दिन, एक ठु नउजवान सिकलग आवा। उ साऊल क फउजी सिबिर स आए रहेन। उ मनई क ओढ़ना फटे रहेन अउर ओकरे मूँडे पइ धूरि रही।\* उ मनई दाऊद क लगे आवा अउर दाऊद क समन्वा मुँहै क बल गिरिके दण्डवत कहिस।

3दाऊद उ मनई स पूछेस, “तू कहाँ स आवा अहा?”

उ मनई दाऊद क जवाब दिहस, “मई इस्त्राएलियन क सिबिर स बचि निकरा हउँ।”

4दाऊद ओहसे कहेस, “कृपा कइके मोका इ बतावा कि जुद्ध कउन जीतेस?”

उ मनई जवाब दिहस, “हमार लोग जुद्ध स पराइ गएन। बहोत सारा लोग जुद्ध में मार डावा गएन। साऊल अउ ओकर पूत योनातन दुइनउँ मर गएन ह।”

5दाऊद नउजुवक स पूछेस, “तू कइसे जानत अहा कि साऊल अउ ओकर पूत योनातन दुइनउँ मर गएन ह?”

6नउजुवक दाऊद स कहेस, “मई गिलबो पर्वत पइ रहेउँ। हुवाँ मई साऊल क अपने भाले पइ निहुरन लखेउँ। पलिस्ती रथ अउ घुड़सवार साऊल क नज़दीक स नज़दीक आवत रहेन। 7साऊल पाछे मुड़ा अउर उ मोका लखेस। उ मोहका गोहराएस। मई जवाब दिहेउँ, मई हिआँ अहउँ। 8तब साऊल मोहसे पूछेस, ‘तू कउन अहा?’ मई जवाब दिहेउँ, ‘मई अमालेकी हउँ।’ 9साऊल कहेस, ‘कृपा कइके मोका मार डावा। मई बुरी तरह घायल हउँ अउर मई वइसे भी लगभग मरि गवा हउँ।’ 10एह बरे मई रुकेउँ अउर ओका मार डाएउँ। उ एतना बुरी तरह घायल रहा कि मई समुझ गएउँ कि उ जिअत नाहीं रहि सकत। तब मई ओकरे मूँडे स मुकुट अउ भुजा स बाजूबन्द उतारेउँ अउर मोर सुआमी, मई मुकुट अउ बाजूबन्द हिआँ आप क खातिर लिआए अहउँ।”

11तब दाऊद अपने ओढ़नन क इ परगट करइ बरे फार डाएस कि उ बहोत सोक में बूड़ा अहइ। दाऊद क संग सबहि लोग अइसा ही किहेन। 12दाऊद अउर ओकर मनइयन बहोत दुःखी रहेन अउर रोए रहेन। उ पचे साँझ तलक कछू खाएन नाहीं। उ पचे दाऊद क लोगन बरे रोएन जउन मारा ग रहेन। उ पचे एह बरे रोएन कि साऊल, ओकर पूत योनातन अउर बहोत स इस्त्राएली जुद्ध में मारा ग रहेन।

उ मनइ ... धूरि रही इ दिखावत ह कि उ मनई बहोत दःखी रही।

## दाऊद अमालेकी क मार डावइ क हुकुम देत ह

13दाऊद उ जुवक स बातचीत किहस जउन साऊल क मउत क सूचना दिहस। दाऊद पूछेस, “तू कहाँ क निवासी अहा?”

जुवक जवाब दिहस, “मई एक बिदेसी क पूत हउँ। मई अमालेकी हउँ।” 14दाऊद जुवक स पूछेस, “तू यहोवा क चुने राजा क मारइ स ससान काहे नाहीं भया?”

15-16तब दाऊद अमालेकी जुवक स कहेस, “तू खुद आपन मउत क बरे जिम्मेदार अहा। तू कह्या कि तू यहोवा क चुने राजा क मार डाया। एह बरे तोहार खुद क सब्दन तोहका अपराधी सिद्ध किहन ह।” तब दाऊद आपन सेवक जुवकन में स एक ठु जुवक क बोलाएस अउर अमालेकी क मार डावइ क कहेस।” इस्त्राएली जुवक अमालेकी क मार डाएस।

## साऊल अउ योनातन क बारे में दाऊद क सोकगीत

17दाऊद साऊल अउ ओकर पूत योनातन क बारे में एक ठु सोकगीत गाएस। 18दाऊद अपने मनइयन स इ गीत क यहूदा क लोगन क सिखावइ क कहेस, इ सोकगीत क धनुस कहा गवा ह। इ गीत यासार क किताबे में लिखा बाटइ।

19“ओह इस्त्राएल, तोहार महिमा तोहरे पहाड़न में मटियामेट भवा। ओह, कइसे उ सूखीर जुद्ध में हार गएन।

20एका गत में न कहा, एका अस्कलोन क गलियन में एलान न करा। उ पचे पलिस्तिन क सहर एहसे खुस होइहीं। उ पचे विदेसियन खुस होइहीं।

21मोर इच्छा अहइ कि गिलबो क पर्वत पइ ओस अउर बर्खा न होइ, मोर इच्छा अहइ कि ओन खेतन स आवइवाली बलि-भेंटन न होइँ। सक्तीसाली मनसेधुअन क ढाल अइसा फैंकि जाइ जइसे इ बेकार रही। साऊल क ढाल जियादा दिना तलक तेल स पालिस कीन्ह भइ नाहीं रही।

22योनातन क धनुस अपने भाग क दुस्मनन क मारेस, अउर साऊल क तरवार अपने हीसे क दुस्मनन क मारेस। उ पचे ओन मनइयन क खून स धब्बा लगाएन जउन अब मरि चुका अहइँ, उ पचे उ सक्तीसाली मनइयन क चर्बी क काटि दिहिस।

23साऊल अउ योनातन, एक दूसर स पिरिम करत रहेन। उ पचे एक दूसर स सुखी रहेन जब तलक उ पचे जिअत रहेन, साऊल अउर योनातन मउत तलक में भी साथ रहेन। उ पचे उकाब स भी तेज जात रहेन, उ पचे सेर स जियादा बरिआर रहेन।



24इस्त्राएल क बिटियो, साऊल खातिर रोवा। साऊल तोहका लाल पहिरावा दिहस, साऊल तोहरे ओढ़नन पड़ सोने क जेवर सजाएस ह।

25सक्तीसाली मनसेधू जुद्ध में काम आएन। योनातान गिलबो पहाड़े पड़ मरा।

26मोर भाई योनातान, मई तोहरे खातिर रोवत हउँ। मोका तोहार दोस्ती स बहोत आनन्द मिलेस ह। तोर पिरेम मोरे बरे एक ठु मेहरारू क पिरेम जियाद रहा।

27सक्तीसाली मनसेधू जुद्ध में काम आएन, जुद्ध क सस्त्र चले गएन ह।”

### दाऊद अउ ओकर लोग हेब्रोन जात हीं

2 पाछे दाऊद यहोवा स पराथना किहस। दाऊद कहेस,

“का मोका यहूदा क कउनो नगर में जाइ चाही?”

यहोवा दाउद स कहेस, “जा” दाऊद पूछेस, “मोका कहाँ जाइ चाही?” यहोवा जवाब दिहस, “हेब्रोन क।”

2एह बरे दाउद हुवाँ गवा। ओकर दुइनउँ मेहररूअन ओकरे संग गइन। (उ पचे यिज्जेली क अहीनोअम अउ कर्मेल क नाबाल क राँड अबीगैल रहिन।) 3दाऊद अपने लोगन अउ ओनके परिवारन क भी लिआवा। उ पचे हेब्रोन अउ निचके क नगरन में बस गएन।

### दाऊद याबेस क लोगन क धन्यवाद देत ह

4यहूदा क लोग हेब्रोन आएन अउर उ पचे दाऊद क अभिसेक यहूदा क राजा क रूप में किहन। तब उ पचे दाऊद स कहेन, “याबेस गिलाद क मनइयन साऊल क दफनाएन।”

5दाऊद याबेस गिलाद क लोगन क लगे दूत पठएस। एन दूत याबेस गिलाद क लोगन क दाऊद क सँदिसा दिहस: “यहोवा तोहका आसीबाँद देइ, काहेकि तू लोग अपने सुआमी साऊल बरे, ओकर जरी भइ हड्डियन क दफनाइके दया देखीया ह। 6यहोवा अब तोहरे बरे दयालु अउ सच्चा रही। मई भी तोहरे बरे दयालु रहब काहेकि तू लोग जरी भइ हड्डियन क दफनाया ह। 7अब, सक्तीसाली अउ बीर बना, तोहार सुआमी साऊल मर चुका अहई, अउ यहूदा क परिवार समूह अपने राजा क रूप में मोर अभिसेक किहेस ह।”

### ईसबोसेत राजा होत ह

8नेर क पूत अब्नेर साऊल क फउज क सेनापति रहा। अब्नेर साऊल क पूत ईसबोसेत क महनैम लइ गवा। 9उ ठउरे पड़ अब्नेर ईसबोसेत क गिलाद, आसेर, यिज्जेल, एप्रैम, अउ बिन्यामीन अउर समस्त इस्त्राएल\* क राजा बनाएस। ईसबोसेत सारे इस्त्राएल क राजा बन गवा। 10ईसबोसेत साऊल क पूत रहा। ईसबोसेत चालीस बरिस क रहा जब उ इस्त्राएल पड़ सासन करब सुरू किहेस। उ दुइ बरिस तलक

**समस्त इस्त्राएल** कबहुँ-कबहुँ एकर अरथ अहइ पूरा इस्त्राएल क देस, यानी यहूदा अउर इस्त्राएल। हिवाँ एकर अरथ अहइ सिरिफ इस्त्राएल क उहइ परिवार समूहन जउन यहूदा क परिवार स जुड़ा भवा नाही रहेन।

सासन किहस। किन्तु यहूदा क परिवार समूह दाऊद क अनुसरण करत रहा। 11दाउद हेब्रोन में यहूदा क परिवार समूह क राजा सात बरिस छः महीने तलक रहा।

### प्राण घातक मुकाबला

12नेर क पूत अब्नेर अउ साऊल क पूत क अधिकारी लोग ईसबोसेत महनैम क तजेन। उ पचे गिबोन क गएन। 13सरूयाह क पूत योआब अउ दाऊद क सेवकगण भी गिबोन गएन। उ पचे अब्नेर अउ ईसबोसेत क सेवकन स, गिबोन क तालाब पड़ मिलेन। अब्नेर क टोली तालाब क एक कईती बइठी रही। योआब क टोली तालाब क दूसरी ओर बइठी रही।

14अब्नेर योआब स कहेस, “हम लोग जुवकन क खड़ा होइ देइ अउर हिआँ एक मुकाबला होइ जाइ द्या।” योआब कहेस, “हाँ, ओनमाँ मुकाबला होइ जाइ दया।”

15तब जुवक उठेन। दुइनउँ टोलियन मुकाबला बरे अपने जुवकन क गनेन। बियामीन क परिवार समूह स बारह जुवक मनइयन साऊल पूत ईसबोसेत क तरफ स जुद्ध बरे चुना गएन, अउर बारह जुवक दाऊद क मनइयन में स चुने गएन।

16हर एक जुवक अपने दुस्मन क मूँड़े क धरेस अउ आपन तरवार अन्दर भोंक दिहस। एह बरे जुवक मनइयन एक ही संग गिर पड़ेन। इहइ कारण अहइ कि उ ठउर, “तेज चाकुअन क खेत”\* कहा जात ह। इ ठउर गिबोन में अहइ।

### अब्नेर असाहेल क मार डावत ह

17उ दिन मुकाबला भयंकर जुद्ध में बदल गवा। दाऊद क मनइयन अब्नेर अउ इस्त्राएलियन क हराइ दिहन। 18सरूयाह क तीन पूत रहेन, योआब, अवीस अउ असाहेल। असाहेल तेज दउड़इवाला रहा। उ जंगली हिस्न क तरह तेज दउड़त रहा। 19असाहेल अब्नेर क पाछा किहस। असाहेल सोझइ अब्नेर कईती दउड़ गवा। 20अब्नेर मुड़िके लखेस अउर पूछेस, “का तू असाहेल अहा?” असाहेल कहेस, “मई हउँ।”

21अब्नेर असाहेल क चोट नाहीं पहाँचावइ चाहत रहा। तब अब्नेर असाहेल स कहेस, “मोर पाछा करब तजा अपनी दाहिन या बाई कईती मुड़ा जुवकन में स कउनो एक क पाछा करा अउर ओकर कवच अपने बरे लइ ल्या।” किन्तु असाहेल अब्नेर क पाछा करब तजइ स इन्कार कइ दिहस।

22अब्नेर असाहेल स फुन कहेस, “मोर पाछा करब तजा। यदि तू पाछा करब नाहीं तजत्या तउ मई तोहका मार डाउब। यदि मई तोहका मार डाउब तउ मई फुन तोहरे भाई योआब क मुँह नाहीं लखि सकब।”

23किन्तु असाहेल अब्नेर क पाछा करब नाहीं तजेस। एह बरे अब्नेर आपन भाला क पिछले हींसा क उपयोग किहस अउर असाहेल क पेट में ओका घुसेइ दिहस। भाला

तेज चाकुअन क खेत या, “हेल्कत-हस्सूमि।”

असाहेल क पेट में एतना गहिर घँसा कि उ ओकरी पीठ स बाहेर निकरि आवा। असाहेल हुवाँ तुरंत मरि गवा।

### योआब अउ अबीस अब्नेर क पाछा करत हीं

असाहेल क तन जमीन पड़ गिर पड़ा। लोग ओकरे लगे दउड़िके गएन, अउर रूक गएन। 24किन्तु योआब अउ अबीस अब्नेर क पाछा करब जारी रखेन।

जउन समइ उ पचे अम्मा पहाड़ी पड़ पहोंचेन सूरज बूडत रहा। (अम्मा पहाड़ी गहि क समन्वा गिबोन रेगिस्तान क राहे पड़ रही।) 25बिन्यामीन परिवार समूह क लोग अब्नेर क लगे आएन। उ पचे सबहिं एक संग पहाड़ी क चोटी पड़ खड़े होइ गएन।

26अब्नेर चिचियाइके योआब क गोहराएस। अब्नेर कहेस, “का हम क लड़ जाइ चाही अउर हमेसा बरे एक दूसर क मारि डवइ चाही? निहचइ ही तू जानत अहा कि एकर अन्त सिरिफ सोक होइ। लोगन स कहा कि अपने ही भाइयन क पाछा करब बन्द करइँ।”

27तब योआब कहेस, “इ जउन तू कह्या उ ठीक अहइ। यहोवा क जिन्नगी क किरिया, जदि तू कछू नाहीं कहि होतेन, तउ मनइयन अपने भाइयन क पाछा सबेरे में भी करत रहतेन।”

28तब योआब एक तुरुही बजाएस अउ ओकर लोग इस्राएलियन क पाछा करब बन्द किहन। उ पचे अउर अगवा इस्राएलियन स लड़इ क जतन नाहीं किहन।

29अब्नेर अउ ओकर लोग यरदन घाटी स होइके रात भर चलेन। उ पचे यरदन घाटी क पार किहन। उ पचे पूरे दिन चलत रहेन अउर महनैम पहोंचेन।

30योआब अब्नेर क पाछा करब बन्द करइ क पाछे अपनी फउज में वापिस लउट आवा। जब योआब लोगन क बटोरिस, दाऊद क उन्नीस सेवक लापता रहेन। असाहेल भी लापता रहा। 31किन्तु दाऊद क सेवकन बिन्यामीन परिवार समूह क तीन सौ साठ निअम्बरन क, जउन अब्नेर क अनुसरण करत रहेन, मार डए रहा। 32दाऊद क सेवक लोग असाहेल क लिहन अउर ओका बेतलेहेम में ओकरे पिता क कब्रिस्तान में दफनाएन।

योआब अउ ओकर मनई रात भइ चलत रहेन। जब उ पचे हेब्रोन पहोंचेन तउ सूरज निकरा।

### इस्राएल अउ यहूदा क बीच जुद्ध

3 साऊल क परिवार अउ दाऊद क परिवार लम्बे समइ तलक एक दूसर क खिलाफ जुद्ध करत रहा। दाऊद जियादा स जियादा बरिआर होत गवा अउर साऊल क परिवार कमजोर पड़ कमजोर होत गवा।

### दाऊद क छः पूत हेब्रोन में पड़दा भएन

2दाऊद क इ सबइ पूत हेब्रोन में पड़दा भए रहेन। पहिला पूत अम्नोन रहा। अम्नोन क महतारी थिज़ेल क अहीनोअम रही। 3दूसर पूत किलाब रहा। किलाब क महतारी अबीगैल इ नाबाल क रौंड रहा जउन कर्मेल स रहा। तीसरा पूत अबसालोम रहा। अबसालोम क महतारी गसूर क राजा

तल्मै क बिटिया माका रही। 4चौथा पूत अदोनिय्याह रहा। अदोनिय्याह क महतारी हग्गीत रही। पाँचवा पूत सपत्याह रहा। सपत्याह क महतारी अबीतल रही। 5छठवाँ पूत थित्राम रहा। थित्राम क महतारी दाऊद क मेहरारू एग्ला रही। दाऊद क इ सबइ छः पूत हेब्रोन में पड़दा भएन।

### अब्नेर दाऊद स मिल जाइ क फैसला करत ह

6जउने समइ साऊल क परिवार तथा दाऊद परिवार में जुद्ध चलत रहा, अब्नेर साऊल क फउज में जियादा स जियादा सक्तीसाली बन गवा। 7साऊल क दासी रिस्पा नाउँ क रही। रिस्पा अय्या क बिटिया रही। ईसबोसेत अब्नेर स कहेस, “तू मोर पिता क दासी क संग तने क सम्बन्ध काहे करत ह?”

8अब्नेर, ईसबोसेत जउन कछू कहेस, ओहसे बहोत कोहाइ गवा। अब्नेर कहेस, “मई साऊल अउ ओकरे परिवार क वफ़ादार रहा हउँ। मई तोहका दाऊद क नाहीं दिहेउँ। मई तोहका ओहका हरावइ नाहीं दिहेउँ। मई यहूदा बरे काम करइवाला देसद्रोही नाहीं हउँ।\* किन्तु अब तू कहन अहा कि मई इ बुराई कीन्ह। 9-10मई इ प्रतिग्या करत हउँ- मोका पर्ण बिस्सास ह कि अब उ सबइ कछू होब्या जउन परमेस्सर कहेस ह। यहोवा कहेस कि उ साऊल क परिवार क राज्ज क लड़ लेइ अउर एका दाऊद क देइ। यहोवा दाऊद क यहूदा अउ इस्राएल क राजा बनाई। उ दान स लड़के बेसेबा तलक हुकूमत करी। परमेस्सर मोका सज़ा दे जदि मई वइसा होइ नाहीं द्या।”

11ईसबोसेत अब्नेर स कछू भी नाहीं कहि सका। ईसबोसेत ओहसे बहोत जियादा ससान रहा।

12अब्नेर दाऊद क लगे दूत पठएस। अब्नेर कहेस, “तोहार सोचत क मुताबिक केका इ देस पड़ हुकूमत करइ चाही? मोरे संग एक ठु सन्धि करा अउर मई तोहका पूरे इस्राएल क लोगन क सासक बनइ में मदद करब।”

13दाऊद जवाब दिहस, “ठीक अहइ। मई तोहरे संग सन्धि करब। किन्तु तोहसे मई सिरिफ एक बात कहत हउँ: मई तोहसे तब तलक नाहीं मिलब जब तलक तू साऊल क बिटिया मीकल क मोर लगे भेंटइ बरे नाहीं लाउब्या।”

### दाऊद आपन मेहरारू मीकल क वापिस लिआवत ह

14दाऊद साऊल क पूत ईसबोसेत क लगे दूत पठएस। दाऊद कहेस, “मोर मेहरारू मीकल क मोका वापिस करा। मई ओका पावइ बरे सौ पलिस्तिन क मोरे रहेउँ।”

15तब ईसबोसेत ओन लोगन क आदेस दिहेस कि उ लैस क पूत पलतीएल नाउँ क मनई क पास स मीकल क लड़ आवइ। 16मीकल क भतार पलतीएल मीकल क संग गवा। उ बहरीम नगर तलक मीकल क पाछे-पाछे रोवत भवा गवा। किन्तु अब्नेर पलतीएल स कहेस, “घरे लउटि जा।” एह बरे पलतीएल घरे लउटि डवा।

मई यहूदा ... नाहीं हउँ साब्दिक, “मई यहूदा क कूकुर क मूँ हउँ?”

**अब्नेर दाऊद क मदद क प्रतिग्या करत ह**

17अब्नेर इस्राएल क प्रमुखन क इ सँदिसा पठएस। उ कहेस, “आप लोग दाऊद क आपन राजा बनावइ क इच्छुक रहेन। 18अब एका करई। यहोवा दाऊद क बारे में कहत रहा जब उ कहे रहा, ‘मई अपने इस्राएली लोगन क पलिस्तियन अउ ओनकर सबहिं दुस्मनन स बचाउब। मई इ अपने सेवक दाऊद क जरिये करब।’”

19अब्नेर इ सबइ बातन बिन्यामीन क परिवार समूह क लोगन स कहेस। अब्नेर जउन कछू कहे रहा उ बिन्यामीन परिवार क लोगन अउ इस्राएल क सबहिं लोगन क नीक लगा। एह बरे अब्नेर हेब्रोन में दाऊद क उ सबइ सबहिं बातन बताएन, जेका करइ में इस्राएल क लोग अउ बिन्यामीन परिवार क लोग सहमत रहेन।

20जब अब्नेर दाऊद क लगे हेब्रोन आवा। उ अपने संग बीस लोगन क लिआवा। दाऊद अब्नेर क अउर ओनके संग आए सबहिं लोगन क दावत दिहस।

21अब्नेर दाऊद स कहेस, “सुआमी, मोरे राजा, मई जाब अउर सबहिं इस्राएलियन क आप क लगे लिआउब। तब उ पचे आप क संग सन्धि करिहीं, अउर आप पूरे इस्राएल पइ हुकूमत करिहीं जइसा आप चाहत हीं।”

तब दाऊद अब्नेर क बिदा किहस अउर अब्नेर सात्ति पूर्वक गवा।

**अब्नेर क मउत**

22योआब अउ दाऊद क अधिकारी जुद्ध स लउटिके आएन। ओनके लगे बहोत स कीमती सामान रहेन जउन उ पचे दुस्मन स लिआए रहेन। दाऊद अब्नेर क सात्तिपूर्वक जाइ दिहस। एह बरे अब्नेर दाऊद क संग हेब्रोन में नाहीं रहा। 23योआब अउर ओकर सारी फउज हेब्रोन पहाँची। फउज योआब स कहेस, “नेर क पूत अब्नेर राजा दाऊद क लगे आवा रहा अउर दाऊद ओका सात्तिपूर्वक जाइ दिहस।”

24योआब राजा क लगे आवा अउर कहेस, “इ आप का किहेन? अब्नेर आप क लगे आवा अउर आप ओका बिना चोट पहाँचाए जाइ दिहन। काहे? 25आप नेर क पूत अब्नेर क जानत हीं। उ आप क संग चाल चलइ आवा। उ ओन सबहिं बातन क पता करइ आवा रहा जउन आप करत अहई।”

26योआब दाऊद क छोड़ेस अउ सीरा क कुआँ पइ अब्नेर क लगे दूत पठएस। दूत अब्नेर क वापिस लिआएन। किन्तु दाऊद क एकर पता न चला। 27जब अब्नेर हेब्रोन आवा तउ योआब, प्रवेस दुआर क एक किनारे ओका लइ गवा अउर तब योआब अब्नेर क पेट में प्रहार किहस अउर अब्नेर मर गवा। पिछले दिनन में अब्नेर योआब क भाई असाहेल क मारे रहा। एह बरे अब योआब अब्नेर क मार डाएस।

**दाऊद अब्नेर बरे रोवत ह**

28पाछे दाऊद इ खबर सुनेस। दाऊद कहेस, “मई अउर मोर राज्ज नेर क पूत अब्नेर क मउत बरे निरपराध अहइ। यहोवा एका जानत ह। 29योआब अउर ओकर परिवार ऐकर

जिम्मेदार अहइ, अउर ओकरे पूरा परिवार क दोखी ठेहराइ जाइ। मोका इ आसा अहइ कि ओकरे परिवार में कछू लोग ज़ख्मी होइ अउर कछू भंयकर चर्मरोग स पीडित होइ या कछू लोग लंगड़ा लूला होइ, कछू जुद्ध में मारा जाइ अउर कछू बगैर भोजन क रही।”

30योआब अउर ओकर भाई अबीसै अब्नेर क मार डाएस काहेकि अब्नेर ओकरे भाई असाहेल क गिबोन क लड़ाई में मारे रहा।

31-32दाऊद योआब क संग सबहिं मनइयन स कहेस, “अपने ओढ़नन क फार डावा अउर सोक वस्त्र पहिरा। अब्नेर बरे रोवा।” उ पचे अब्नेर क हेब्रोन में दफनाएन। दाऊद अन्त्येस्टि में गवा। राजा दाऊद अउर सबहिं लोग अब्नेर क कब्र पइ रोएन।

33दाऊद अब्नेर बरे आपन सोक-गीत गाएस: “का अब्नेर कउनो मूरख अपराधी क तरह मरब रहा?”

34अब्नेर तोहार हाथ बँधे नाहीं रहेन। तोहार गोड़ जंजीरन में कसा नाहीं रहेन। नाहीं अब्नेर, तोहका दुस्टन मारेन।”

तब सबहिं लोग फुन अब्नेर बरे रोएन। 35सबहिं लोग दाऊद क दिन रहत भोजन करइ बरे प्रेरित करइ आएन। किन्तु दाऊद खास प्रतिग्या किहस। उ कहेस “परमेस्सर मोका दण्ड देइ अउर मोरे कस्टन क बढ़ावइ जदि मई सूज बूड़इ क पहिले रोटी या कउनो दूसर भोजन करउँ।” 36जउन कछू भवा सबहिं लोग लखेन अउर उ पचे ओन सबहिं कामन स सहमत भएन जउन राजा दाऊद करत रहा। 37उ दिन यहूदा क लोगन अउर सबहिं इस्राएलियन समुझ लिहन कि राजा दाऊद नेर क पूत अब्नेर क मारइ क आदेस नाहीं दिहे रहा ह।

38राजा दाऊद अपने मनइयन स कहेस, “तू लोग जानत अहा कि आज इस्राएल में एक बहोत महत्वपूर्ण नेता मरि गवा ह। 39इ सबइ उहइ दिन भवा जउने दिन मोर अभिसेक राजा क रूप में भवा रहा। किन्तु सरूयाह क पूत मोर बरे बहोत जियादा मज़बूत अहइ। यहोवा बुरा व्यक्ति क ओकरे बुरा कामन क अनुसार ओका सज़ा दइ।”

**साऊल क परिवारे में परेसानियन आवत हीं**

4 साऊल क पूत (ईसबोसेत) सुनेस कि अब्नेर क मउत हेब्रोन में होइ गइ। ईसबोसेत अउ ओकर सबहिं लोग बहोत जियादा ससान रहेन। 2दुइ मनई साऊल क पूत क लखइ गएन। इ दुइनउँ मनई फउज क सेनापति रहेन। एक ठु मनई क नाउँ बाना रहा अउर दूसर क नाउँ रेकाब रहा। बाना अउ रेकाब बेरोत क रिम्मोन क पूत रहेन। (उ पचे बिन्यामीन परिवार समूह क रहेन। बेरोत नगर बिन्यामीन परिवार समूह क रहा। 3बेरोत क लोग गितैम क पराइ गएन अउर उ पचे आजु हुवाँ तलक रहत हीं।)

4साऊल क पूत योनातन क एक पूत रहा जेकर नाउँ मपीबोसेत रहा, जउन लँगड़ा रहा। योनातन क पूत उ समइ पाँच बरिस क रहा, जब इ खबर मिली रही कि साऊल अउ योनातन यिज़्रेल में मारे गएन। इ पूत क धाई इ बच्चा क उठाएस अउर उ पराइ गइ। किन्तु जब धाई भागइ में हाली किहस, तउ योनातन क पूत ओकरी बाँहन स भहराइ

पड़ा। इहइ कारण रहा कि योनातन क पूत लँगड़ा होइ गवा रहा।

5बेरोत क रिम्मोन क पूत रेकाब अउ बाना, दोपहर क ईसबोसेत क घरे में गएन। ईसबोसेत गर्मी क कारण आराम करत रहा। 6-7रेकाब अउ बाना अपने घरे में इ तरह आएन माना उ पचे कछू गोहूँ लेइ जात होई। ईसबोसेत अपने बिछौना में अपने सयनकच्छ में ओलरा भवा रहा। रेकाब अउ बाना आघात किहेन अउर ईसबोसेत क मार डाएन। तब उ पचे ओकर मूँड़ि काटेन अउर ओका अपने संग लइ गएन। उ पचे यरदन घाटी स होइके रात भर चलत रहेन। 8उ पचे हेब्रोन पहुँचेन, अउर उ पचे ईसबोसेत क मूँड़ि, दाऊद क दिहन।

रेकाब अउ बाना दाऊद स कहेस, “इ आप क दुस्मन साऊल क पूत ईसबोसेत क मूँड़ि अहइ। उ आप क मारइ क जतन किहस। यहोवा साऊल अउर ओकरे परिवार क आप खातिर आजु दण्ड दिहस ह।”

9दाऊद रेकाब अउ ओकर भाई बाना क जवाब दिहस, दाऊद कहेस, “यहोवा क जिन्नगी क किरिया, उ मोका सबहिं आपत्तियन स बचाएस ह। 10किन्तु बीते दिन में एक मनई सोचेस कि उ मोरे बरे अच्छी खबर लिआई। उ मोहसे कहेस, ‘साऊल मर गवा।’ ओका आसा रही कि मई ओका इ खबर क लिआवइ क कारण पुरस्कार देब। किन्तु मई उ मनई क धरेउँ अउर सिकलगा में मार डाएँ। 11एह बरे अब मई तू पचन क मारि के ईसबोसेत क मृत्यु क बदला लेब काहेकि दुस्त मनइयन एक नीक मनई क, उ समई मारेस ह जब उ अपने घरे क सयन कच्छ में बिछउना पइ आराम करत रहा। तू पचे जिअत नाही रहब्या। मई धरती क तू पचन्क स मुक्त करब।”

12दाऊद जुवकन क आदेस दिहस कि उ पचे रेकाब अउ बाना क मार डावई। तब, जुवकन रेकाब अउ बाना क हाथ-पैर काट डाएन अउर हेब्रोन क झरना क सहारे लटकाइके मार डाएस। तब, उ पचे ईसबोसेत क मूँड़ि क लिहस अउर उहइ ठउरे पइ ओका दफनाएस, जउने ठउरे पइ हेब्रोन में अबेरे क दफनावा गवा रहा।

### इस्राएली दाऊद क राजा बनावत हीं

5 तब इस्राएल क सारे परिवार समूहन क लोग दाऊद क लगे हेब्रोन आएन। उ पचे दाऊद स कहेन, “हम सब एक ही मांस अउर खून क अहई। 2बीते जमाने में जब साऊल हमार राजा रहा, तउ उ पचे आप ही रहेन जउन इस्राएल क बरे जुद्ध में हमार नेतृत्व करत रहेन अउर आप इस्राएल क जुद्धन स वापिस लिआएन। यहोवा आप स कहेस, ‘तू मोरे लोग अर्थात इस्राएलियन क गड़रिया होब्या। तू इस्राएल क सासक होब्या।’”

3इस्राएल क सबहिं प्रमुखन राजा दाऊद क लगे हेब्रोन में मिलइ बरे आएन। दाऊद एन प्रमुखन क संग हेब्रोन में यहोवा क मोजुद्गी में एक ठु सन्धि किहेन। तब उ पचन इस्राएल क राजा क रूप में दाऊद क अभिसेक किहन।

4दाऊद उ समइ तीस बरिस क रहा जब उ हुकूमत करब सुरू किहेस। उ चालीस बरिस हुकूमत किहस। 5उ हेब्रोन में

अउर यहूदा पइ सात बरिस, छः महीने तलक हुकूमत किहस अउर उ, सारे इस्राएल अउ यहूदा पइ यरूसलेम में तैतीस बरिस तलक हुकूमत किहस।

### दाऊद यरूसलेम नगर क जीतत ह

6राजा अउ ओकर मनइयन यरूसलेम में यबूसियन क खिलाफ जउन यरूसलेम में रहत रहेन जुद्ध करइ बरे गएन। यबूसियन दाऊद स कहेन, “तू हमरे नगर में नाही आइ सकत्या। हिआँ तलक कि एक आँधर अउ लँगड़ा भी तोहका रोक सकत हीं।” (उ पचे अइसा एह बरे कहत रहेन काहेकि उ पचे सोचत रहेन कि दाऊद ओनके नगर में प्रवेस नाही करइ सकत्या। किन्तु दाऊद सिथ्योन क किला लइ लिहस। इ किला दाऊद-नगर बना।)

8उ दिन दाऊद अपने लोगन स कहेस, “जदि तू लोग यबूसियन क हरावइ चाहत अहा, तउ जलसुरंग स जा अउर ओन ‘आँधर अउ अपाहिज’ दुस्मनन पइ हमला करा।” इहइ कारण अहइ कि लोग कहत हीं, “आँधर अउ विकलंग घरे\* में नाही आइ सकतेन।”

9दाऊद किले में रहत रहा अउर एका “दाऊद क नगर” कहत रहा। दाऊद उ छेत्र क बनाएस अउर मिल्लो नाउँ दिहस। उ नगर क भीतर दूसर भवन भी बनाएस। 10दाऊद जियादा स जियादा सक्तीसाली होत गवा काहेकि सर्वसक्तीमान यहोवा ओकरे संग रहा। 11सोर क राजा हीराम दाऊद क लगे दूतन क पठएस। हीराम देवदारू क बृच्छ, बढई अउ राजमिस्त्री लोगन क भी पठएस। उ पचे दाऊद बरे एक ठु महल बनाएस। 12उ समइ दाऊद जान गएन कि यहोवा ओका फुरइ इस्राएल क राजा बनाएस ह। दाऊद इ भी जान गएन कि यहोवा ओकरे राज क परमेस्सर क लोगन, अर्थात इस्राएलियन बरे बहोत महान बनाएस ह।

13दाऊद हेब्रोन स यरूसलेम चला गवा। यरूसलेम में दाऊद अउर जियादा अउ पत्नियन अउ उप-पत्नियन क पाएस। ओका हुवाँ बहोत अधिक बेटवन अउर बिटियन भएन। 14यरूसलेम में पइदा भए दाऊद क पूतन क नाउँ इ सबइ अहई: सम्मू, सोबाब, नातान, सुलैमान, 15दिभार, एलोस नेपेग, यापी 16एलीसामा, एल्यादा अउ एलीपेलेत।

### दाऊद पलिस्तिन क खिलाफ जुद्ध में जात ह

17पलिस्तिन इ सुनेन कि इस्राएलियन दाऊद क अभिसेक इस्राएल क राजा क रूप में किहेस ह तब सबहिं पलिस्ती दाऊद क मार डावइ बरे ओकर खोज करइ बाहरे निकरेन। किन्तु दाऊद क इ खबर मिल गइ। उ एक किला में चल गवा। 18पलिस्ती आएन अउर रपाईस क घाटी में उ पचे आपन डेरा डाएन।

19दाऊद बात कइके यहोवा स पूछेस, “का मोका पलिस्तिन क खिलाफ जुद्ध में जाइ चाही? का तू मोका पलिस्तिन क हरावइ देब्या?”

यहोवा दाऊद स कहेस, “जा, काहेकि मई निहचइ ही, पलिस्तिन क हरावइ में तोहार मदद करब।”

घर सम्भवत, एकर अरथ अहइ राजा क महल या मन्दिर।

20तब दाऊद बालपरासीम आवा। हुवाँ उ पलिस्तियन क हराएस। दाऊद कहेस, “यहोवा मोरे समन्वा मोरे दुस्मनन क फउज क इ तरह दउड भगाएस जइसे जल बाँथ क तोरिके बहत ह।” इहइ कारण अहइ कि दाऊद उ ठउरे क नाउँ “बालपरासीम” रखेस। 21पलिस्तियन बालपरासीम में अपनी देवमूरतियन क पाछे तजि दिहन। दाऊद अउ ओकर लोग ओन देवमूरतियन क हुवाँ स हटाइ दिहन।

22पलिस्ती फुन आएन अउर रपाईम क घाटी में उ पचे डेरा डाएन।

23दाऊद यहोवा स पराथना किहस। इ समइ यहोवा कहेस, “ओन लोगन पई सामन्वा स हमला जिन करा। ओनके चारिहुँ कइँती ओनकर फउज क पाछे स जा। तूत बृच्छन क लगे ओन पर हमला करा। 24तूत बृच्छन क चोटी स तू पलिस्तियन क सामरिक प्रमाण क ध्वनि सुनब्या। तब तू पचन्क हाली स करइ चाही, काहेकि उ समइ यहोवा जाइ अउर तोहरे बरे पलिस्तियन क हराइ देइ।”

25दाऊद उहइ किहस जउन करइ क बरे यहोवा आदेस दिहे रहा। उ पलिस्तियन क हराएस। उ ओनकर पाछा सबइ रास्ते स गोबा स गेजेर तलक किहस।

### परमेस्सर क पवितर सन्दूख यरूसलेम लिआवा गवा

6 दाऊद फुन इस्राएल क सबहिं चुने गए तीस हजार लोगन क बटोरेस। 2तब दाऊद अउ ओकर सबहिं लोग यहूदा क बाले\* में स परमेस्सर क पवितर सन्दूख क यरूसलेम में लइ बरे गएन। पवितर सन्दूक सर्वसक्तीमान यहोवा क नाउँ स जाना जात हीं। पवितर सन्दूख यहोवा क सिंहासन क तरह अहइ। पवितर सन्दूख क ऊपर करूब क मूरतियन अहइँ, अउर यहोवा एन सरगदूतन पइ राजा क तरह बइठत ह। 3उ पचे परमेस्सर क सन्दूख क एक तु नवी गाड़ी में रखेन। उ पचे गिबियाह में एक पहाड़ी पइ स्थित अबीनादाब क घरे स पवितर सन्दूख क लइ जात रहेन, उज्जा अउ अहहयो अबीनादाब क पूतन नवी गाड़ी चलावत रहेन। 4जब उ पचे गिबियाह में अबीनादाब क घर जउन पहाड़ी प रहा स पवितर सन्दूख क लइ जात रहेन। अहहयो सन्दूखवाली गाड़ी क आगे-आगे चलत रहेन। 5दाऊद अउ सबहिं इस्राएली यहोवा क समन्वा पूरे उत्साह क संग नाचत अउ गावत रहेन अउर सबइ प्रकार क संगीत यंत्र जइसे: वीणा, सितार, ढोल, झाँझ अउ मँजीरा बजावत रहेन। इ सबइ सनौवर क लकड़ी क बना रहेन। 6जब दाऊद क लोग नकोन खरिहाने में आएन तउ बर्धा लइखड़ाइ पड़ेन। परमेस्सर क पवितर सन्दूख बन्द गाड़ी स गिरइ लाग। उज्जा पवितर सन्दूखे क धइ लिहस। 7यहोवा उज्जा पइ कोहाइ गवा अउर ओका मार डाएस। उज्जा पवितर सन्दूख छुइके परमेस्सर बरे अस्त्रद्धा देखौएस। उज्जा हुवाँ परमेस्सर क पवितर सन्दूख क बगल में मरा। 8दाऊद बहोत कोहाइ गवा काहेकि यहोवा उज्ज क आपन क्रोध में मार डाए रहा। दाऊद उ जगह क “पेरेसुज्जा” कहेस। उ जगह आजु तलक पेरेसुज्जा कहा जात ह।

यहूदा क बाले दूसर नाउँ किर्यात-येरिम अहइ। लखा 1 इतिहास 13:6

9दाऊद उ दिन यहोवा स डर गवा। दाऊद कहेस, “अब मई यहोवा क पवितर सन्दूख हिआँ कइसे लाइ सकत हउँ?”

10एह बरे दाऊद यहोवा क पवितर सन्दूख क दाऊद नगर में नाहीं लेइ चाहत रहा। उ पवितर सन्दूख क गत स आए भए एक मनई ओबेदोदोम क घरे में रखेस। दाऊद एका सड़क स गत क ओबेदोदोम क घर लइ गवा। 11यहोवा क सन्दूख ओबेदोदोम क घरे में तीन महीने तलक रहा। यहोवा ओबेदोदोम अउ ओकरे सारे परिवार क आसीर्वाद दिहस।

12लोग दाऊद स कहेन, “यहोवा ओबेदोदोम क परिवार अउर ओकर सारी चिजियन क आसीर्वाद दिहस काहेकि परमेस्सर क पवितर सन्दूख हुवाँ अहइ।” एह बरे दाऊद गवा अउ ओबेदोदोम क घरे स परमेस्सर क पवितर सन्दूख क दाऊद नगर स लइ आवा। दाऊद एका खुसी स किहस। 13जब यहोवा क पवितर सन्दूखे क लइ चलइवाले छ कदम चलेन तउ उ पचे रूक गएन अउर दाऊद एक तु बर्धा अउ एक तु माटेवार बछवा क बलि भेंट किहेस। 14तब दाऊद यहोवा क समन्वा पूरे उत्साह क संग नाच किहेस। दाऊद सूती कपड़ा क एपोद पहिर रखे रहा।

15दाऊद अउर सबहिं इस्राएली यहोवा क पवितर सन्दूख क नगर लिआवत समइ उल्लास स उद्घोस करइ अउर तुरूही बजावइ लागेन। 16साऊल क बिटिया मीकल खिड़की स लखत रही जब यहोवा क पवितर सन्दूख नगर में आवा। दाऊद यहोवा क समन्वा नाचत अउ कूदत रहा। मीकल इ लखेस अउर उ आपन हिरदय में तुच्छ समझेस।

17दाऊद पवितर सन्दूखे बरे एक तु तम्बू लगाएस। इस्राएलियन यहोवा क सन्दूख क तम्बू में ओकरी जगह पइ रखेस। तब दाऊद होमबलि अउ मेलबलि यहोवा क चढ़ाएस।

18जब दाऊद होमबलि अउ मेलबलि चढ़ाउब पूरा किहस तब उ सर्वसक्तीमान यहोवा क नाउँ पइ लोगन क आसीर्वाद दिहस। 19दाऊद रोटी, किसमिस क टुकड़ा, अउर खजूर क रोटा क हींसा इस्राएल क हर एक मेहरारू मनसेधू क दिहस। तब सबहिं लोग अपने घर चले गएन।

### मीकल दाऊद क डाटत ह

20दाऊद अपने घरे में आसीर्वाद देइ गवा। किन्तु साऊल क बिटिया मीकल ओहसे भेटइ निकरि आइ। मीकल कहेस, “आज इस्राएल क राजा अपना ही सम्मान नाहीं किहस। तू अपनी प्रजा क दासियन क समन्वा आपन ओढ़ना उतार दिहा। तू उ मूरख क तरह रह्या जउन बगैर लज्जा क आपन ओढ़ना उतारत ह।”

21तब दाऊद मीकल स कहेस, “यहोवा मोका चुनेस ह, न कि तोहार बाप अउ ओकरे परिवार क कउनो मनई क। यहोवा मोका इस्राएल, अपने लोगन क मार्ग दर्सक बनवई बरे नियुक्त किहेस ह। इहइ कारण अहइ कि मई यहोवा क समन्वा उत्सव मनाउब अउर नाचब। 22मई अउर भी जिआदा सरमनाक हरकत कइ सकत हउँ! अउर आपन नज़र में अपमानित होइ जाउँ। होइ सकत ह तू मोका सम्मान न देइ। किन्तु जउन लइकियन क बारे में तू बात करति अहा उ पचे मोर सम्मान करति हीं।”

23साऊल क बिटिया क कबहुँ सन्तान न भइ। उ बिना सन्तान क मरी।

### दाऊद एक ठु उपासना-घर बनावइ चाहत ह

7 राजा दाऊद क अपने नवे महल में रहइ क पाछे, यहोवा ओका चारिहुँ कइँती क दुस्मनन स ओका सान्ति दिहस। 2राजा दाऊद नातान नबी स कहेस, “लखा, मई देवदारू क काठे स बने महल में रहत हउँ। किन्तु परमेस्सर क पवितर सन्दूख अबहुँ भी तम्बू में रखा भवा ह।”

3नातान राजा दाऊद स कहेस, “जा, अउर जउन कछू तू करइ चाहत ह, करा। यहोवा तोहरे संग होइ।”

4किन्तु उहइ राति नातान क यहोवा क सँदेसा मिला। 5“जा, अउर मोरे सेवक दाऊद स कहा, ‘यहोवा इ कहत ह: तू उ मनई नाहीं अहा जउन मोरे रहइ बरे एक ठु घर बनावइ ह। 6मई उ समइ घरे में नाहीं रहत रहेउँ जल मई इस्त्राएलियन क मिस्त्र स बाहेर लाएउँ। नाहीं, मई उ समइ स चारिहुँ ओर तम्बू में जात्रा करत रहेउँ। मई तम्बू क उपयोग अपने घर क रूप में किहेउँ। 7जब कबहुँ मई इस्त्राएलियन क संग चलेस ह, मई कउनो भी सासक क जेका मई इस्त्राएल क लोगन पइ धियान रखइ बरे कहेस रहा कबहुँ आपन खातिर देवदारू क काठे क सुन्नर घर बनावइ बरे नाहीं कहउँ।’

8“तोहका मोर सेवक दाऊद स इ कहइ चाही, ‘सर्वसक्तीमान यहोवा इ कहत ह: मई तोहका चरागाह स लिआएउँ। मई तोहका तब लिआएउँ जब तू भेड़िन चरावत रह्या। मई तोहका अपने लोग इस्त्राएलियन क सासक चुनेउँ। 9मई तोहरे संग तू जहाँ कहुँ गया रह्या रहेउँ। मई तोहरे दुस्मनन क तोहरे बरे हराएउँ। मई तोहका पृथ्वी महान मनइयन में स एक बनाएउँ। 10-11अउर मई आपन लोग इस्त्राएलियन बरे एक ठउर चुनब। तब इस्त्राएलियन अउर कबहुँ एक जगह स दूसर जगह पइ नाहीं जाइ क होइ। बीते दिना में मई अपने इस्त्राएल क लोगन क मार्गदर्शन बरे निआवाधीसन क पठए रहेउँ किन्तु पापी लोगन मोर लोगन क परेसान किहन। अब वइसा नाहीं होइ। मई तोहका सबहिँ दुस्मनन स सान्ति देब। मई तोहसे इ भी कहत हउँ कि मई तोहरे परिवार क राजा लोगन क परिवार बनाउब।

12“जब तू मरब्या अउर अपने पुरखन क संग दफनावा जाब्या, तब मई तोहरे पूतन में स एक क राजा क रूप में चूनब अउर मई ओकर राज क सक्तीसाली बनाउब। 13मोरे नाउँ पइ उ एक ठु मन्दिर बनवाइ। मई ओकरे राज क हमेसा बरे सक्तीसाली बनाउब। 14मई ओकर बाप बनब अउर उ मोर पूत होइ। जब उ पाप करी, मई ओका दण्ड देइ बरे दूसर रास्ट्रन क उपयोग करब। मई ओकर प्रयोग दूसर लोगन क दण्ड देइ बरे चाबुक क रूप में करब। 15किन्तु मई ओहसे प्रेम करब बन्द नाहीं करब। मई ओह पइ हमेसा कृपालु अउ वफादार बना रहब। मई आपन प्रेम अउ अपनी कृपा साऊल स हटाइ लिहेउँ। मई साऊल क सिंहासन स हटाइ दिहेउँ, मई तोहका चुनेउँ। मई तोहरे परिवार क संग उहइ नाहीं करब। 16तोहरे राजा लोगन क

परिवार हमेसा चलत रही, तू ओह पइ निर्भर रहि सकत ह। तोहार राज तोहरे बरे लगातार हमेसा चलत रही। तोहार सिंहासन सदा ही बना रही।”

17नातान दाऊद क हर एक बात बनाएस। उ दाऊद स हर एक बात कहेस जउन उ दर्शन में सुनेस।

### दाऊद परमेस्सर स पराथना करत ह

18तब राजा दाऊद भितरे गवा अउर यहोवा क समन्वा बैठ गवा। दाऊद कहेस, “यहोवा, मोर सुआमी, मई तोहरे बरे ऐतना महत्वपूर्ण काहे अहउँ? मोर परिवार महत्वपूर्ण काहे अहइ? तू मोका महत्वपूर्ण काहे बनाइ दिहा। 19मई तोहरे सेवक क अलावा अउर कछू नाहीं हउँ, अउर तू मोह पइ एतना जियादा कृपालु रह्या ह। किन्तु तू इ सबइ कृपा मोरे भविस्स क परिवार क खातिर करइ क कह्या ह। यहोवा मोर सुआमी, तू हमेसा लोगन बरे अइसी ही बातन नाहीं कहल्या, का तू कहत ह?

20“मई तोहसे अउर जियादा, का कहि सकत हउँ? यहोवा, मोर सुआमी, तू जानत ह कि मई केवल तोहार सेवक हउँ। 21तू इ सबइ महान कारज एह बरे किहा ह काहेकि तू कह्या ह कि तू एनका करब्या अउर काहेकि तू ओनका संग अइसा करइ चाहत ह, अउर तू मोका एन कारजन का जानउँ। 22हे यहोवा, मोर सुआमी, इहइ कारण अहइ कि तू महान अहा। तोहरे समान कउनो नाहीं अहइ। तोहरी इलावा कउनो देवता नाहीं अहइ! हम इ जानित ह काहेकि हम लोग खुद इ सब सुने अही। ओन कारजन क बारे में जउन तू किह्या।

23“तोहरे इस्त्राएल क लोगन क तरह पृथ्वी पइ कउनो रास्ट्र नाहीं अहइ। उ पचे बिसेस लोग अहइ। उ सबइ दास रहेन। किन्तु तू ओनका मिस्त्र स निकार्या अउर ओनका अजाद किहा। तू ओनका आपन लोग बनाया। तू इस्त्राएलियन बरे महान अउ अद्भुत कारज किह्या। हे यहोवा, तू अपने भुइँया में आपन लोगन क पहिले, दूसर रास्ट्रन अउर ओकर देवतन क निकारिके अचरज भरा कारज किहा। 24तू इस्त्राएलियन क सदा बरे अपने लोग बनाया ह, अउर यहोवा तू ओनकर परमेस्सर भवा।

25“यहोवा परमेस्सर, करा जउन तू मोर, तोहार सेवक अउर मोरे परिवार बरे करइ क प्रतिग्या किहेस ह। तू मोरे परिवार क सदा साही परिवार बनावइ क प्रतिग्या किहेस ह। 26तब तोर नाउँ सदा सम्मानित रही अउर लोग कहिहीं, ‘सर्वसक्तीमान यहोवा परमेस्सर इस्त्राएल पइ हुकूमत करत ह अउर तोहार सेवक दाऊद क परिवार तोहरे समन्वा स्थिर होइ देइ।’

27“सर्वसक्तीमान यहोवा, इस्त्राएल क परमेस्सर, तू मोका बहोत चिजियन स हटाइ दिहेस ह। तू कहेस, ‘मई तोहरे परिवार क महान बनाउब।’ इहइ कारण अहइ कि मई तोहार सेवक, तोहरे बरे इ पराथना करइ क निहचइ किहेउँ। 28यहोवा मोर सुआमी, तू परमेस्सर अहा अउर तोहार कथन सच होत हीं अउर तू इ अपने सेवक बरे, इ नीक चीज क बचन दिहा ह। 29हे यहोवा मोर सुआमी! कृपा कइके मोरे परिवार क असीस द्या। जेहसे उ लगातार तोहार

बना रहइ अउर तोहार सेवा करी। तू इ सब ही बचन दिहे रह्या। अपने आसीबादि स मोरे परिवार क हमेसा बरे असीस द्या।”

### दाऊद अनेक जुद्ध जीतत ह

8 पाछे दाऊद पलिस्तियन क हराएस। उ ओनकर राजधानी पइ अधिकार कइ लिहस। 2दाऊद मोआब क लोगन क भी हराएस। उ ओनका भुइँया पइ ओलरइ क मजबूर किहस। तब उ एक ठु लसुरी क ओनका नापइ बरे किहस। जब दुइ मनई नाप लिहेन तब दाऊद ओनका आदेस दिहस कि उ पचे मारे जइहीं। किन्तु हर एक तीसर मनई जिअत रहइ दीन्ह गवा। मोआब क लोग दाऊद क सेवक बन गएन। उ पचे ओका राजस्व दिहन।

3रहोब क पूत हददेजेर, सोबा क राजा रहा। दाऊद हददेजेर क उ समइ हराइ दिहस जब उ महानद क लगे क पहुँटा पइ अधिकार करइ क जतन किहस। 4दाऊद हददेजेर स सत्रह सौ घुइसवार फउजी लिहस अउर बीस हजार पैदल फउजी क कैद कइ लिहेस। दाऊद एक सौ क रथ-घोड़न क अलावा सबहिँ घोड़न क लँगड़ा कइ दिहस। उ एक सौ घोड़न क बचाइ लिहस।

5दमिस्क क अरामी लोग सोबा क राजा हददेजेर क मदद बरे आएन। किन्तु दाऊद ओन बाईस हजार अरामियन क हराइ दिहस। 6तब दाऊद दमिस्क क अराम में फउज क टुकड़ियन रखेस। अरामी दाऊद क सेवक बन गएन अउर राजस्व लिआएन। यहोवा दाऊद क, जहाँ कहुँ उ गवा जीत दिहस।

7दाऊद ओन सोने क ढाल क लिहस जउन हददेजेर क फउजियन क रहिन। दाऊद एन ढालन क लिहस अउर ओनका यरूसलेम लिआवा। 8दाऊद तौबे क बनी बहोत स चिजियन बेतह अउर बरौते स भी लिहस। (बेतह अउर बरौते दुइनँ नगर हददेजेर क रहेन।)

9हमात क राजा तोई सुनेस कि दाऊद हददेजेर क पूरी फउज क हराइ दिहस। 10तब तोई आपन पूत योराम क राजा दाऊद क लगे पठएस। योराम दाऊद क अभिवादन किहस अउर आसीबादि दिहस काहेकि दाऊद हददेजेर क खिलाफ जुद्ध किहस अउर ओका हराइ दिहेस रहा। (हददेजेर, तोई स, पहिले जुद्ध किहे रहा।) योराम चाँदी, सोना अउर तौबा क बनी चिजियन लिआएस। 11दाऊद एन चिजियन क लिहस अउर यहोवा क समर्पित कइ दिहस। उ ओका दूसर सोना-चाँदी क संग रखेस जेका उ हराए भए रास्ट्रन स लइके समर्पित किहे रहा। 12इ सबइ रास्ट्र अराम, मोआब, अमोन, पलिस्ती अउ अमालेक रहेन। दाऊद जउन कछू उ रहोब क पूत हददेजेर अउ सोबा क राजा क हराइ क पाछे ओहसे लिहेन यहोवा क समर्पित किहेन। 13दाऊद अट्टारह हजार अरामियन क नमक क घाटी में हराइ दिहस। उ उ समइ मसहूर रहा जब उ घर लउटा। 14दाऊद एदोम में फउज क टुकड़ियन रखेस। उ एन फउजियन क टुकड़ियन क एदोम क पूरे देस में रखेस। एदोम क सबहिँ लोग दाऊद क सेवक हो गएन। जहाँ कहुँ दाऊद गवा यहोवा ओका जीत दिआएस।

### दाऊद क हुकूमत

15दाऊद सारे इस्त्राएल पइ हुकूमत किहस। ओकर निर्णय सबहिँ लोगन बरे नीक अउ स्वच्छ होत रहेन। 16सरूयाह क पूत योआब फउज क सेनापति रहा। अहीलूद क पूत इतिहासकार रहा। 17अहीतूब क पूत सादोक अउर एब्यातार क पूत अहीमेलेक दुइनँ याजक रहेन। सरयाह सचिव रहा। 18यहोयादा क पूत बनायाह करेतियन अउ पलेतियन क अधिकारी रहा, अउर दाऊद क पूत महत्वपूर्ण प्रमुख रहेन।

### दाऊद साऊल क परिवार पइ कृपालु अहइ

9 दाऊद पूछेस, “का साऊल क परिवार में अब तलक कउनो बचा अहइ? मई योनातन क कारण उ मनई पइ दया करइ चाहत हउँ।”

2हुवाँ साऊल क परिवार स एक सेवक रहा जेकर नाउँ सीबा रहा। दाऊद क सेवकन सीबा क दाऊद क लगे बोलाएन। राजा दाऊद स पूछेस, “का तू सीबा अहा?”

सीबा कहेस, “हाँ मई सीबा, आप क सेवक हउँ।”

3राजा पूछेस, “का साऊल क परिवार में कउनो बचा ह? मई उ मनई पइ परमेस्सर क कृपा देखावइ चाहत हउँ।”

सीबा राजा दाऊद स कहेस, “योनातन क पूत अबहिँ तलक जिअत अहइ? उ दुइनँ गोड़वन स लँगड़ा अहइ।”

4राजा सीबा स कहेस, “इ पूत कहाँ अहइ?”

सीबा राजा स कहेस, “उ लोदबार क अम्मीएल क पूत माकीर क घसन में अहइ।”

5दाऊद न आपन सेवकन क लोदबार क अम्मीएल क पूत माकीर क घरे स योनातन क पूत क लिआवइ क कहेस। 6योनातन क पूत मपीबोसेत दाऊद क लगे आवा अउर आपन मूँड भुइँया तलक निहराएस।

दाऊद कहेस, “मपीबोसेत।”

मपीबोसेत कहेस, “हाँ इ मई, आप क सेवक हउँ।”

7दाऊद मपीबोसेत स कहेस, “डैराअ जिन। मई तोहरे बरे दयालु रहब। मई इ तोहार बाप योनातन बरे करब। मई तोहार पितामह साऊल क सारी भुइँया तोहका देब, अउर तू सदा मेरी मेज पइ खइया क खाइ सकब्या।”

8मपीबोसेत दाऊद क समन्वा फुन निहरा। मपीबोसेत कहेस, “आप अपने सेवक पइ बहोत कृपालु रहेन ह अउर मई एक ठु मरा कूकुर स जियादा नाहीं हउँ।”

9तब राजा दाऊद साऊल क सेवक सीबा क बोलाएस। दाऊद सीबा स कहेस, “मई साऊल अउर ओकरे परिवार क सबहिँ चिजियन जउन कछू ओकर अहइ, ओका तोहरे सुआमी क पोता मपीबोसेत क दइ दिहेउँ ह। 10तू मपीबोसेत बरे भुइँया पइ खेती करब्या। तोहार पूत अउर सेवक मपीबोसेत बरे इ करिहीं। तू फसल कटब्या। तब तोहरे सुआमी क पोता मपीबोसेत क खाइ बरे अपार भोजन होइहीं। किन्तु मपीबोसेत तोहरे सुआमी क पोता मोरी मेज पइ खाइ क हमेसा अधिकारी होइ।”

सीबा क पन्द्रह पूत अउर बीस सेवक रहेन। 11सीबा राजा दाऊद स कहेस, “मई आप क सेवक हउँ। मई उ सब कछू करब, जउन मोर सुआमी, मोर राजा हुकूम देइहीं।”

एह बरे मपीबोसेत दाऊद क मेज पइ राजा क पूतन में स एक क तरह भोजन किहस। 12मपीबोसेत क एक नान्ह पूत मीका नाउँ क रहा। सीबा परिवार क सबहिं लोग मपीबोसेत क सेवक होइ गएन। 13मपीबोसेत दुइनउँ गोउन स लँगड़ा रहा। मपीबोसेत यरूसलेम में रहत रहा। हर एक दिन मपीबोसेत राजा क मेज पइ भोजन करत रहा।

### हानून दाऊद क मनइयन क लज्जित करत ह

10 पाछे, अम्मोनियन क राजा नाहास मरा। ओकरे पाछे ओकर पूत हानून राजा भवा। 2दाऊद कहेस, “नाहास मोरे बरे कृपालु राहा। एह बरे मईँ ओकरे पूत हानून क बरे कृपालु रहब।” एह बरे दाऊद हानून क ओकरे बाप क मउत पइ ढाँढस देइ बरे अपने अधिकारियन क पठएस। एह बरे दाऊद क सेवक अम्मोनियन क देस में चले गएन। 3किन्तु अम्मोनी प्रमुख लोग आपन सुआमी हानून स कहेस, “का आपु समुझत हीं कि दाऊद कछू मनइयन क आपक लगे ढाँढस देइ बरे पठइके आप क बाप क सम्मान देइ क जतन करत अहइ? नाहीं। दाऊद एन मनइयन क आप क नगर क बारे में गुप्त रूप स जानइ अउ समुझइ बरे पठएस ह। उ पचे आप क बिरूद्ध जुद्ध क योजना बनावत अहई।”

4एह बरे, हानून दाऊद क सेवकन क धरेस अउर ओकर आधी डाढ़ी कटवाइ दिहस। उ ओनके ओढ़नन क नीचे स आधा काटि दिहस, ओनका कमर क नीचे स नंगा कइ दिहस। तब उ ओनका पठइ दिहस।

5जब लोग दाऊद स कहेन, तउ उ आपन अधिकारियन स मिलइ बरे दूतन क पठएस। उ इ एह बरे किहस काहेकि इ सबइ लोग बहोत लजान रहेन। राजा दाऊद स कहेस, “जब तलक तोहार दाढ़ियन फुन स न बाढ़ई तब तलक यरीहो में ठहरा। तब यरूसलेम लउटि आवा।”

### अम्मोनियन क खिलाफ जुद्ध

6जब अम्मोनियन जान लिहन कि उ पचे दाऊद क दुस्मन होइ गएन। उ पचे अरामी क बेत्रहोब अउ सोबा स भाड़े पइ बोलाएन। हुवाँ बीस हजार अरामी पैदल-फउजी आए रहेन। अम्मोनियन तोब स बारह हजार फउजियन अउ माका क राजा क एक हजार फउजियन क संग परिस्रमिक पइ बोलाएन।

7दाऊद इ बिसय में सुनेस। एह बरे उ योआब अउर सक्तीसाली मनइयन क सारी फउज पठएस। 8अम्मोनी फउज बाहेर निकरेन अउर जुद्ध बरे तइयार भएन। उ पचे नगर दुआर पइ खड़े भएन। योआब अउ रहोब स अरामियन फउज तथा तोब अउ माका क मनइयन नगर क बाहेर मैदान में इकट्ठा भएन।

9योआब लखेस कि अम्मोनी ओकरे खिलाफ समन्वा अउर पाछे दुइनउँ कइँती खड़े अहई। एह बरे, उ इस्राएलियन में स कछू उत्तम जोधन क चुनेस। योआब एन उत्तम फउजियन क अरामियन क खिलाफ लड़इ बरे पंक्तिबध किहस। 10तब योआब बचा भवा फउजियन क अपने भाई अबीसै क अगुआई में किहस। तब अबसै ओनका अम्मोनी

क बिरूद्ध जुद्ध करइ बरे पंक्तिबध किहस। 11योआब अबीसै स कहेस, “जदि अरामी हमारी फउज स जियादा सक्तीसाली होई, तू मोर मदद करया। जदि अम्मोनी तोहार फउज स जियादा ताकतवर होई तउ मईँ आइके तोहार मदद करब। 12सक्तीसाली बना! हम पचन क अपने लोगन अउर अपने परमेस्सर क नगर क रच्छा बरे बहादुरी स जुद्ध करइ द्या। होइ सकत ह यहोवा उहइ करी जेका उ ठीक मानत ह।”

13तब योआब अउ ओकर फउजी अरामियन पइ हमला किहन। अरामी योआब अउ ओकरे फउजियन क समन्वा भाग खड़े भएन। 14अम्मोनियन लखेन कि अरामी भागत अहई, एह बरे उ पचे अबीसै क समन्वा स भाग खड़े भएन अउर अपने नगर में लउट गएन। इ तरह योआब अम्मोनियन क संग जुद्ध स लउटा अउर यरूसलेम वापस आवा।

### अरामी फुन लड़इ क निहचइ करत हीं

15अरामियन लखेन कि इस्राएलियन ओनका हराइ दिहन। एह बरे उ पचे एक तु बिसाल फउज क रूप में एकट्ठे भएन। 16हददेजेर परात नदी क दूसर कइँती रहइवाले अरामियन क लिआवइ बरे दूत पठएस। इ सबइ अरामी हेलाम पहोंचेन। सोबक, जउन हददेजेर क फउज क सेनापति रहा ओनकर अगुवाइ करत रहेन।

17दाऊद क एकर पता लगा। एह बरे उ सारे इस्राएलियन क एक संग बटोरेस। उ पचे यरदन नदी क पार किहन अउर उ पचे हेलाम पहोंचेन।

हुवाँ अरामियन हमला क तइयारी किहन अउर धावा बोल दिहन। 18किन्तु दाऊद अरामियन क हराइ दिहस अउर उ पचे इस्राएलियन क समन्वा भाग खड़े भएन। दाऊद बहोत स अरामियन क मार डाएस। सात सौ सारथी अउ चालीस हजार घुड़सवार दाऊद अरामी सेना क सेनापति सोबक क भी मार डाएस।

19जउन राजा हददेजेर क सेवा करत रहेन उ पचे लखेन कि इस्राएलियन ओनका हराइ दिहन। एह बरे उ पचे इस्राएलियन स सन्धि किहन अउर ओनकर सेवा करइ लागेन। अरामियन अम्मोनियन क अउर जियादा मदद देइ क साहस नाहीं राखेन।

### दाऊद बतसेबा स मिलत ह

11 बसन्त में, जब राजा जुद्ध बरे बाहेर निकरत हीं दाऊद योआब, ओकर अधिकारियन अउर सबहिं इस्राएलियन क अम्मोनियन क नस्ट करइ बरे पठएस। योआब क फउज राजधानी रब्बा पइ भी हमला किहस।

मुला दाऊद यरूसलेम में रूक। 2साँझ क उ अपने बिछउना स उठा। उ राजमहल क छत पइ चारिहुँ कइँती घूमा। जब दाऊद छत पइ रहा, उ एक तु मेहरारू क नहात लखेस। मेहरारू बहोत सुन्नर रही। 3एह बरे दाऊद अपने सेवकन क बोलाएस अउर ओनसे पूछेस कि उ मेहरारू कउन रही? एक सेवक जवाब दिहस, “उ मेहरारू एलीआम



क बिटिया बतसेबा अहइ। उ हिती ऊरिख्याह क मेहरारू अहइ।”

4दाऊद बतसेबा क अपने लगे बोलावइ बरे दूत पठएस। जब उ दाऊद क लगे आइ, तउ उ ओकरे संग सारीरिक सम्बन्ध किहस। उ नहाएस\* अउर उ अपने घरे चली गइ। 5किन्तु बतसेबा गर्भवती भइ। उ दाऊद स कहइ बरे सब्द पठाएस: “मई गर्भवती हउँ।”

### दाऊद अपने पाप क छुपावइ चाहत ह

6दाऊद योआब क सँदिसा पठएस, “हिती ऊरिख्याह क मोरे लगे पठवा।”

एह बरे योआब ऊरिख्याह क दाऊद क लगे पठएस। 7ऊरिख्याह दाऊद क लगे आवा। दाऊद ऊरिख्याह स बात किहस। दाऊद ऊरिख्याह स पूछेस कि योआब कइसा अहइ, फउजी कइसे अहइ अउर जुद्ध कइसे चलत अहइ। 8तब दाऊद ऊरिख्याह स कहेस, “घरे जा अउर आराम करा।”

ऊरिख्याह राजा क महल तजेस। राजा ऊरिख्याह क एक ठु भेट भी पठएस। 9किन्तु ऊरिख्याह अपने घर नहीं गवा। ऊरिख्याह राजा क महल क दुआरे पइ सोएस। उ उहइ तरह सोएस जइसे राजा क दूसर सेवक सोएन। 10सेवकन दाऊद स कहेन, “ऊरिख्याह अपने घरे नहीं गवा।”

तब दाऊद ऊरिख्याह स कहेस, “तू लम्बी जात्रा स आया। तू घरे काहे नहीं गवा?”

11ऊरिख्याह दाऊद स कहेस, “पवित्त सन्दूर अउ इस्त्राएल क यहूदा फउजियन अउ सिबिर में ठहरत अहइ। मोर सुआमी योआब अउर मोर सुआमी दाऊद क अधिकारियन खुला मैदानन में सिबिर डाए पड़े अहइ। एह बरे इ नीक नहीं कि मई घर जाउँ, खाऊँ, पिअउँ अउर अपनी पत्नी क संग सोऊँ।” मई आपन अउर तोहार जिन्नगी क किरिया खात हउँ, कि मई अइसा नहीं करवा।”

12दाऊद ऊरिख्याह स कहेस, “आजु हिअइँ ठहरा। भियान मई तोहका जुद्ध में वापस पठउवा।”

ऊरिख्याह उ दिन यरूसलेम में ठहरा। उ अगले भिंसारे तलक रूका। 13तब दाऊद ओका आवइ अउ खाइ क बरे बोलाएस। ऊरिख्याह दाऊद क संग पिएस अउ खाएस। दाऊद ऊरिख्याह क नसा में कइ दिहस। किन्तु ऊरिख्याह, फुन भी घरे नहीं गवा। उ साँझ क ऊरिख्याह राजा क सेवकन क संग राजा क दुआर क बाहेर सोवा।

### दाऊद ऊरिख्याह क मउत क योजना बनावत ह

14अगले भिंसारे, दाऊद योआब बरे एक ठु पत्र लिखेस। दाऊद ऊरिख्याह क उ पत्र लइ जाइ क दिहस। 15पत्र में दाऊद लिखेस: “ऊरिख्याह क कतार क आगे में रखा जहाँ पइ जुद्ध मुसकिल होत ह। तब ओका अकेले तजि द्या अउर ओका जुद्ध में मारा जाइ द्या।”

उ नहाएस साब्दिक, एकर अरथ अहइ कि “उ अभी ही आपन मासिक-धर्म स मुक्त भएस ह।” एकर अरथ अहइ कि उ आपन मासिक-धर्म क आखरी दिन में सुद्धीकरण बरे नहाएस जइसा रीति क अनुसार होत ह।

16जब योआब नगर क घेर लिहस तउ उ लखेस कि सब स जियादा बीर अम्मीनी जोधा कहाँ अहइ। उ ऊरिख्याह क हुवाँ जाइ बरे चुनेस। 17नगर (रब्बा) क आदमी योआब क खिलाफ लइइ क आएन। दाऊद क कछू फउजी मारे गएन। हिती ऊरिख्याह ओन लोगन में स एक रहा।

18तब योआब दाऊद क जुद्ध में जउन भवा, ओकर खबर पठएस। 19योआब दूत स कहेस: “राजा दाऊद क इ सबइ जउन जुद्ध में का भवा ह क पाछे। 20”होइ सकत ह कि राजा कोहाइ जाइ। होइ सकत ह कि राजा पूछइ, ‘योआब क फउज नगर क निचके लइइ काहे गइ? का इ योआब अहइ मालूम नहीं कि लोग नगर क देवारन स भी बाण चलाइ सकत हीं? 21का ओका याद नहीं कि यरुब्बेसेत क पूत अबीमेलेक क कउन मारेस? हुवाँ एक ठु मेहरारू नगर-दीवार पइ रही जउन अबीमेलेक क ऊपर चक्की क ऊपरी पाट लोकाएस। उ मेहरारू ओका तेबेस में मार डाएस। तू देवार क निचके काहे गया?’ (जदि राजा दाऊद इ पूछत ह) तउ तोहका जवाब देइ चाही: “आप क सेवक हिती ऊरिख्याह भी मर गवा।”

22दूत गवा अउर उ दाऊद क उ सब बताएस जउन ओका योआब कहइ क कहे रहा। 23दूत दाऊद स कहेस, “अम्मोन क लोग जिअत रहेन उ पचे बाकेर आगन अउ उ पचे खुले मैदान में हम पइ हमला किहेन। किन्तु हम लोग ओन्से नगर-दुआर पइ लड़ेन। 24नगर देवार क फउजियन अपने अधिकारियन पइ बाण चलाएन। आप क कछू अधिकारियन मारे गएन। आप क अधिकारी हिती ऊरिख्याह भी मारा गवा।”

25दाऊद दूत स कहेस, “तोहका योआब स इ कहब अहइ: ‘इ परिणाम स उदास न होइ। एक तरवार एक क वइसा ही मारत ह जइसा दूसर क। रब्बा नगर पइ खौफनाक हमला करा। तब तू उ नगर क नस्त करब्या।’ योआब क एन सब्दन स प्रोत्साहित करा।”

### दाऊद बतसेबा स बियाह करत ह

26बतसेबा सुनेस कि ओकर भतार ऊरिख्याह मर गवा। तब उ अपने भतार बरे रोइ। 27जब उ सोक क समइ पूरा कइ लिहेस, तब दाऊद ओका अपने घरे में लिआवइ बरे सेवकन क पठएस। उ दाऊद क मेहरिया होइ गइ, अउर उ दाऊद बरे एक ठु पूत पइदा किहस। दाऊद जउन बुरा काम किहस यहोवा ओका पसन्द नहीं किहस।

### नातान दाऊद स बात करत ह

12 यहोवा नातान क दाऊद क लगे पठएस। नातान दाऊद क लगे गवा। नातान कहेस, “एक नगर में दुइ मनई रहेन। एक ठु मनई धनी रहा। किन्तु दूसर गरीब रहा। 2धनी आदमी क लगे बहोत जियादा भेड़िन अउर गोरू रहेन। 3किन्तु गरीब मनई क लगे एक ठु नान्ह मादा मेमना क अलावा जेका उ बेसहे रहा, कछू नहीं रहा। गरीब मनई उ मेमना क खिआवत रहा। इ मेमना उ गरीब आदमी क भोजन में स खात रहा अउ ओकर पियाला में स पानी पिअत रहा। उ गरीब मनई क बाँह पइ सोवत ह। उ ओकरे

गदेलन क संग बढ़त रहा। मेमना उ मनई क बिटिया क नाई रहा।

4“तब एक ठु यात्री धनी मनई स मिलइ बरे हुवाँ आवा। धनी मनई यात्री क भोजन देइ चाहत रहा। किन्तु धनी मनई आपन भेड़ी या अपने गोरूअन में स कउनो क यात्री क खिआवइ बरे नाहीं लेइ चाहत रहा। उ धनी मनई उ गरीब स ओकर मेमना लइ लिहस। धनी मनई ओकरे मेमना क मार डाएस अउर अपने अतिथि बरे ओका पकाएस।”

5दाऊद धनी मनई क खिलाफ बहोत कोहाइ गवा। उ नातान स कहेस, “यहोवा क जिन्गी क किरिया, जउन मनई इ किहस उ जरूर मरी! 6ओका मेमना क चौगुनी कीमत चुकावइ पड़ी, काहेकि उ इ खौफनाक कारज किहस अउर ओहमाँ दया नाहीं रही।”

### नातान दाऊद क ओकरे पाप क बारे में बतावत ह

7तब नातान दाऊद स कहेस, “तू उ धनी मनसेधू अहा। यहोवा इस्राएल क परमेस्सर इ कहत ह, ‘मई तोहका इस्राएल क राजा क रूप में चुनेउँ।’\* मई तोहका साऊल स बचाएउँ। 8मई ओकर परिवार अउर ओकर मेहररूअन तोहका लेइ दिहेउँ, अउर मई तोहका इस्राएल अउ यहूदा क राजा बनाएउँ। जइसे उ पर्याप्त नाहीं होइ, मई तोहका जियादा स जियादा दिहेउँ। 9फुन तू यहोवा क आदेस क तिरस्कार काहे किहा? तू इ भयंकर काम काहे किहा जेका यहोवा बुरा समुझत ह? तू हिती ऊरिय्याह क तरवार स मारया अउर तू ओकर मेहरारू क अपनी मेहरारू बनावइ बरे लिहा। हाँ, तू ऊरिय्याह क अम्मोनियन क तरवार स मार डया। 10एह बरे, तरवार तोहरे परिवार कबहुँ नाहीं छोर्ब्या। तू ऊरिय्याह हिती क पत्नी क अपने पत्नी क रूप में लिहा। इ तरह तू मोर तिरस्कार किहा।’

11“इहइ अहइ जउन यहोवा कहत ह: ‘मई तोहरे खिलाफ आपत्तियन लिआवत हउँ। इ आपत्ति तोहार आपन परिवार स अइहीं। मई तोहार मेहररूअन क लइ लेब अउर ओका देब जउन तोहरे बहोत जियादा निच के अहइँ। इ मनई तोहरे मेहररूअन क संग सोई अउर एका हर एक जानी। 12तू बतसेबा क संग गुप्त रूप में सोया। किन्तु मई तोहका इ तरह सजा देब जेहसे इस्राएल क सारे लोग एका लिख सकईँ।”

13तब दाऊद नातान स कहेस, “मई यहोवा क खिलाफ पाप किहेउँ ह।” नातान दाऊद स कहेस, “यहोवा तोहका छिमा कइ दिहेस ह, एक बरे तू इ पाप क कारण नाहीं मरब्या। 14किन्तु तू पचे इ पाप कइके यहोवा बरे बहोत असम्मान दिखाएस ह। इ पाप क कारण जउन तोहार पूत पइदा भवा ह, मरि जाइ।”

### दाऊद अउ बतसेबा क बच्चा मर जात ह

15तब नातान अपने घर गवा अउर यहोवा दाऊद अउ ऊरिय्याह क मेहरारू स जउन पूत पइदा भवा रहा ओका

चुनेउँ साब्दिक, “अभिसिक्त,” एक मनई क मूड़ पइ खास तेल डालना जे इ दिखावत ह कि उ मनई परमेस्सर दुआरा राजा, याजक या नबी चुना गवा ह।

बहोत बीमार कइ दिहस। 16दाऊद मरद बच्चा बरे परमेस्सर स पराथना किहस। दाऊद खाब-पिअब बंद कइ दिहस। उ अपने घर में गवा अउर ओहमाँ ठहरा। उ रात भइ भुईया पइ ओलरा रहा।

17दाऊद क परिवार क प्रमुख आएन अउर उ पचे ओका भुईया स उठावइ क जतन किहन। किन्तु दाऊद उठब इन्कार किहस। उ एन प्रमुखन क संग खइया क खाइ स भी इन्कार कइ दिहस।

18सतएँ दिन मरद बच्चा मर गवा। दाऊद क सेवक दाऊद स इ कहइ स डेरत रहेन कि मरद बच्चा मर गवा। उ पचे कहेन, “लखा, हम लोग दाऊद स उ समइ बात करइ क प्रयत्न कीन्ह जब मरद बच्चा जिअत रहा। किन्तु उ हम लोगन क बात सुनइ स इन्कार कइ दिहस। जदि हम दाऊद स कहब कि मरद बच्चा मर गवा तउ होइ सकत ह उ अपने क कछू नोस्कान कइ लेइ।”

19किन्तु दाऊद अपने सेवकन क कानाफूसी करत लखेस। तब उ समुझ लिहस कि मरद बच्चा मर गवा। एह बरे दाऊद अपने सेवकन स पूछेस, “का मरद बच्चा मर गवा?” सेवकन जवाब दिहन, “हाँ, उ मर गवा।”

20दाऊद फर्स स उठा। उ नहाएस। उ आपन ओढ़ना बदलेस अउर तइयार भवा। तब उ यहोवा क घरे में उपासना करइ गवा। तब उ घरे गवा अउर कछू खइया क माँगिस। ओकर सेवकन ओका कछू खाइके दिहन अउर उ खाएस।

21दाऊद क नौकरन ओहसे कहेन, “आप इ काहे करत अहइँ? जब बच्चा जिअत रहा तब आप खाइ स इन्कार किहन। आप रोएन। किन्तु जब बच्चा मर गवा तब आप उठेन अउर आप भोजन किहेन।”

22दाऊद कहेस, “जब मरद बच्चा जिअत रहा, तब मई उपवास किहेउँ अउर मई रोएउँ। मई सोचेउँ, ‘कउन जानत ह, संभव अहइ यहोवा मोरे बरे दयालु होइ अउर मरद बच्चा क जिअत रहइ देइ।’ 23किन्तु अब बच्चा मर गवा। एह बरे अब मई काहे उपवास करउँ? का मई बच्चा क फुन जीवित कइ सकत हउँ? नाहीं! एक दिन मई ओकरे लगे जाब, किन्तु उ मोरे लगे लउटिके नाहीं आइ सकत ह।”

### सुलेमान पइदा होत ह

24तब दाऊद आपन मेहरारू बतसेबा क सान्त्वना दिहस। उ ओकरे संग सोएस अउर ओकरे संग सारीरिक सम्बन्ध किहस। बतसेबा फुन गर्भवती भइ। ओकर दूसर पूत भवा। दाऊद उ लरिका क नाउँ सुलेमान रखेस। यहोवा सुलेमान स पिरेम रखत रहा। 25यहोवा नबी नातान क जरिये सँदिसा पठएस। नातान सुलेमान क नाउँ यदीद्याह रखेस। नातान इ यहोवा बरे किहस।

### दाऊद रब्बा पइ अधिकार करत ह

26रब्बा नगर अम्मोनियन क राजधानी रही। योआब रब्बा क खिलाफ लड़ा। उ नगर क लइ लिहस। 27योआब दाऊद क लगे दूतन पठएस अउर कहेस, “मई रब्बा क खिलाफ जुद्ध किहेउँ ह। मई ओकरे किलाबन्ध सुरच्छित जलापूर्ति प भी कब्जा कइ लिएउँ ह। 28अब दूसर लोगन क संग

लिआवई अउर इ नगर (रब्बा) पइ आक्रमण करई। इ नगर पइ अधिकार कइ ल्या, एकरे पहिले कि मई एह पइ अधिकार करउँ। जदि इ नगर पइ मई अधिकार करत हउँ तउ नगर क नाउँ मोरे नाम पइ होइ।”

29तब दाऊद सबहिं लोगन क एकट्ठा किहेस अउर रब्बा क गवा। उ रब्बा क खिलाफ लड़ा अउर नगर पइ उ अधिकार कइ लिहस। 30दाऊद ओनके राजा क मूड़े स मुकुट उतार लिहस। मुकुट सोने क रहा अउर उ तउन मँ लगभग पचहत्तर पौंड रहा। इ मुकुट मँ बहुमूल्य रत्न रहेन। उ पचे मुकुट क दाऊद क मूँड़े पइ रखेन। दाऊद नगर स बहोत सी कीमती चिजियन लइ गवा।

31दाऊद रब्बा नगर स भी लोगन क बाहेर लिआवा। दाऊद ओनका आसन, लोहा क गैतिन अउर कुल्हाड़ियन स काम करवाएस। उ ओनका ईटन स निर्माण कार्य कइ क बरे मजबूर किहस। दाऊद उहइ बेउहार सबहिं अम्मोनी नगरन क संग किहस। तब दाऊद अउर ओकर सारी फउज यरूसलेम लउटि गइ।

### अम्मोन अउ तामार

**13** दाऊद क अबसालोम नाउँ क एक पूत रहा। अबसालोम क बहिन क नाउँ तामार रहा। तामार बहोत सुन्नर रही। अम्मोन दाऊद क दूसर पूत रहा जउन तामार स पिरेम करत रहा। 2तामार कुँवारी रही। अम्मोन सोचेस कि उ ओकरे संग कभी आपन यौन इच्छा पूरा नाहीं कइ सकत्या। किन्तु अम्मोन ओका बहोत चाहत रहा। अम्मोन ओकरे बारे मँ बहोत सोचइ लगा उ बीमार होइ क एक बहना बनाएस।

3अम्मोन क एक ठु मीत सिमा क पूत योनादाब रहा। (सिमा दाऊद क भाई रहा।) योनादाब बहोत चालाक आदमी रहा। 4योनादाब अम्मोन स कहेस, “हर दिन तू दूबर दूबर स देखौई पड़त अहा। तू राजा क पूत अहा। तोहका खाइ बरे बहोत जियादा अहइ, तउ भी तू आपन वजन काहे खोवत जात अहा? मोका बतावा।” अम्मोन योनादाब स कहेस, “मई तामार स पिरेम करत हउँ। किन्तु उ मोर सौतेला भाई अबसालोम क बहिन अहइ।”

5योनादाब अम्मोन स कहेस, “बिछउना मँ ओलरा। अइसा बेउहार करा कि तू बीमार अहा। तब तोहार बाप तोहका लखइ अइहीं। ओनसे कह्या, ‘मेहरबानी कइके मोर बहिन तामार क आवइ द्या अउर मोका खाना देइ द्या। ओका मोरे समन्वा भोजन बनाइ देई। तब मई ओका लखब अउर ओकरे हाथे स खाब।।’”

6एह बरे अम्मोन बिछउना मँ ओलर गवा, अउर अइसा बेउहार किहस माना उ बीमार अहइ। राजा दाऊद अम्मोन क लखइ आवा। अम्मोन राजा दाऊद स कहेस, “कृपा कइके मोर बहिन तामार क हिआँ आवइ देई। मोरे लखत भए ओका मोरे बरे दुइ रोटी बनावइ देई। तब मई ओकरे हाथन स खाइ सकत हउँ।”

7दाऊद तामार क घरे सँदेसवाहकन क पठएस। सँदेसवाहकन तामार स कहेन, “अपने भाई अम्मोन क घरे जा अउर ओकरे बरे कछू भोजन बनावा।”

### तामार अम्मोन बरे भोजन बनावत ह

8एह बरे तामार अपने भाई अम्मोन क घरे गइ। अम्मोन बिछउना मँ रही। तामार कछू गूँथा आटा लिहस अउर एका अपने हाथन स एक साथे दबाएस। उ अम्मोन क लखत भए कछू रोटियन बनाएस। 9जब तामार रोटियन क पकाउब पूरा किहेस तउ उ कढ़ाही मँ स रोटियन क अम्मोन बरे निकारेस। किन्तु अम्मोन खाइ स इन्कार किहस।

अम्मोन अपने सेवकन स कहेस, “तू सबहिं मनई चला जा” मोका अकेला रहइ द्या।” एह बरे सबहिं सेवक अम्मोन क कमरा स बाहेर चले गएन।

### अम्मोन तामार क संग कुकर्म करत ह

10अम्मोन तमार स कहेस, “भोजन भीतरवाले कमरा मँ लइ चला। तब मई तोहरे हाथ स खाब।”

तामार अपने भाई क लगे सयन-कच्छ मँ गइ। उ ओन रोटियन क लिआइ जउन उ बनाए रही। 11उ अम्मोन क लगे गइ जेहसे उ ओकरे हाथन स खाइ सकइ। किन्तु अम्मोन तामार क धइ लिहस। उ ओहसे कहेस, “बहन, आवा अउर मोरे संग सोवा।”

12तामार अम्मोन स कहेस, “नाहीं, भाई। मोका मजबूर जिन करा। इ भयंकर काम इस्त्राएल मँ कबहुँ नाहीं कीन्ह जाइ चाही। इ लज्जाजनक काम जिन करा। 13मई इ लज्जा स कबहुँ मुक्त नाहीं होब्या अउर लोग इ सोचिही कि तू एक आम अपराधी अहा। कृपा कइके राजा स बात करा। उ तोहका मोर संग बियाह करइ देइ।”

14किन्तु अम्मोन तामार क एक न सुनेस। उ तामार स जियादा सक्तीसाली रहा। उ ओहका सारीरिक सम्बन्ध करइ बरे मजबूर किहस। 15ओकरे बाद अम्मोन तामार स घिना करइ लाग। अम्मोन ओकरे संग ओहसे भी जियादा घिना किहेस जेतना उ पहिले पिरेम करत रहा। अम्मोन तामार स कहेस, “उठा अउर चली जा।”

16तामार अम्मोन स कहेस, “नाही! मोका बाहेर जिन पठावा! मोका अब बाहेर पठाना उ स जियादा गलत होइ जउन तू पहिले मोर संग कइ लीन्ह ह।”

किन्तु अम्मोन तामार क एक न सुनेस। 17अम्मोन आपन जवान सेवक स कहेस, “इ लइकी क इ कमरा स अबहिं बाहेर निकारा। ओकरे जाइ पइ दरवाजे मँ ताला लगाइ द्या।”

18एह बरे अम्मोन क सेवक तामार क कमरे क बाहेर लइ गवा अउर ओकरे जाइ पइ ताला लगाइ दिहस।

तामार कइउ रंग क लम्बा लबादा पहिर रखे रहा। राजा क कुवौरी बिटियन अइसा ही लबादा पहिरत रहिन।

19तामार राख लिहस अउर अपने मूँड़े पइ डाइ लिहस। उ अपने बहुरंगे लबादे क फार डाएस। उ आपन हाथ अपने मूँड़े पइ रख लिहस अउर उ जोर स रोवइ के चलत लागेन।

20तामार क भाई अबसालोम तामार स कहेस, “का तोहार भाई अम्मोन तोहका मारेस? अम्मोन तोहार भाई अहइ। बहन, अब सान्त रहा। एहसे तू बहोत परेसान न हवा।” एह बरे तामार कछू नाहीं कहेस। उ अबसालोम क

घरे रहइ चली गइ अउर हुवाँ अकेली अउ उदास रहइ लाग।

21राजा दाऊद क एकर खबर मिली। उ बहोत कोहाइ गवा। 22अबसालोम अम्मोन स घिना करत रहा। अबसालोम अच्छा या बुरा अम्मोन स कछू नाहीं कहेस। उ अम्मोन स घिना करत रहा काहेकि अम्मोन ओकरी बहन क संग कुकर्म किहे रहा।

### अबसालोम क बदला

23दुइ बरिस पाछे कछू मनई एप्रैम क लगे बाल्हासोर में अबसालोम क भेड़िन क ऊन काटइ आएन। अबसालोम राजा क सबहिं पूतन क आवइ अउ लखइ बरे न्यौतेस। 24अबसालोम राजा क लगे गवा अउर उ कहेस, “मोरे लगे कछू मनई मेरी भेड़िन क ऊँट काटइ आवत अहई। कृपा कइके आपन सेवकन क संग आवइँ अउर लखइँ।”

25राजा दाऊद अबसालोम स कहेस, “पूत नाहीं। हम सबहिं नाहीं जाब। एहसे तोहका परेसानी होइ।”

अबसालोम दाऊद स चलइ क पराथना किहस। दाऊद नाहीं गवा, किन्तु उ आसीबाद दिहस।

26अबसालोम कहेस, “जदि आप जाइ नाहीं चाहतेन तउ, कृपा कइके मोरे भाई अम्मोन क मोर संग जाइ देई।”

राजा दाऊद अबसालोम स पूछेस, “उ तोहरे संग काहे जाइ?”

27अबसालोम दाऊद स पराथना करत रहा। आखिर में दाऊद अम्मोन अउ सबहिं राजपूतन क अबसालोम क साथ जाइ दिहस।

### अम्मोन क हत्या कीन्ह जाइ

28तब अबसालोम आपन सेवकन क आदेस दिहस। उ ओनसे कहेस, “अम्मोन पइ नजर राखा। जब उ नसे में धुत होइ तब मई तोहका आदेस देब अम्मोन क जान स मार डावा। सज़ा पावइ स डेराअ नाहीं। काहेकि तू सिरिफ मोर हुकूम क पालन करत रहा। अब सक्तीसाली अउ बीर बना।”

29अबसालोम क जुवक लोग अबसालोम क आदेस क मुताबिक अम्मोन क मार डाएन। किन्तु दाऊद क दूसर पूत बच निकरेन। हर एक पूत अपने एक खच्चरे पइ बइठा अउर भाग गवा।

### दाऊद अम्मोन क पूत क खबर पावत ह

30जब राजा क पूत मारग में रहेन, दाऊद क खबर मिली। खबर इ रही, “अबसालोम राजा क सबहिं पूतन क मार डाएस ह। कउनो भी पूत बचा नाहीं ह।”

31राजा दाऊद आपन ओढ़ना फार डाएस अउर धरती पइ ओलर गवा। दाऊद क लगे खड़े ओकर सबहिं अधिकारियन भी आपन ओढ़नन फार डाएन।

32किन्तु योनादाब, दाऊद क भाई क पूत सिमा दाऊद स कहेस, “अइसा मत सोचा कि राजा क सबहिं जुवक पूत मार डावा गएन ह। नाहीं, इ सिरिफ अम्मोन अहइ जउन मारा गवा ह। जब स अम्मोन ओकर बहिन तामार क संग

कुकरम किहे रहा तबहिं स अबसालोम इ योजना बनाए रहा। 33मोर सुआमी राजा इ न सोचई कि सबहिं राजपूत मार गएन ह। सिरिफ अम्मोन ही मारा गवा।”

34अबसालोम पराइ गवा।

एक ठु रच्छक नगर क देवार पइ खड़ा रहा। उ पहाड़ी क दूसर कइँती स कई मनइयन क आवत लखेस। 35एह बरे योनादाब दाऊद स कहेस, “लखा, मई बिल्कुल सही रहेउँ। राजा क पूत आवत अहई।”

36जइसे ही बातन करइ खत्म किहेन राजपूतन आइ गएन। उ पचे जोर-जोर स रोवत रहेन। दाऊद अउर ओकर सबहिं अधिकारियन रोवइ लागेन। उ पचे सबहिं बहोत बिलाप करत रहेन। 37दाऊद आपन पूत बरे बहोत दिनन तलक रोएस।

### अबसालोम गसूर क पराइ गवा

अबसालोम गसूर क राजा अम्मीहूर क पूत तल्मै क लगे पराइ गवा। 38अबसालोम क गसूर भाग जाइ क बाद, उ हुवाँ तीन बरिस तलक ठउरा। 39अम्मोन क मउत क पाछे, दाऊद धैर्य बांध लिहेस। लेकिन उ अबसालोम क खोइ दिहेस अउर ओका ओका देखइ क लालसा रहा।

### योआब एका बुद्धिमती मेहरारू क दाऊद क लगे पठवत ह

14 सरूयाह क पूत योआब जानत रहा कि राजा दाऊद अबसालोम क बारे में सोचत अहइ अउर ओका देखइ क लालसा अही। 2एह बरे योआब तकोआ क एक दूत हुवाँ स एक ठु बुद्धिमती मेहरारू क लिआवइ क बरे पठएस। योआब इ बुद्धिमती मेहरारू स कहेस, “कृपा कइके बहोत जियादा सोकग्रस्त होइ क देखवा करा। सोक-वस्त्र पहिर ल्या, आपन चाम अउ बार में तेलन जिन लगावा। अइसी मेहरारू क जइसा बेउहार करा जउन कउनो मरे भए क बरे कइउ दिनन स रोवत ह। राजा क लगे जा अउर जउन मई कहत हउँ, इनही सब्दन क उपयोग करत भए ओनसे बातन करा।” तब योआब उ बुद्धिमती मेहरारू क का कहब अहइ, इ बताइ दिहस।

4तब ताकोआ क उ मेहरारू राजा स बातन किहस। उ फर्स पइ भहराइ पड़ी ओकर ललाट फर्स पइ जाइ टिका। उ निहुरी अउ बोली, “राजा, मोका मदद द्या।”

5राजा दाऊद ओहसे कहेस, “तोहार समस्या का अहइ?”

उ मेहरारू कहेस, “मई राँड़ हउँ। मोर भतार मर चुका अहइ। 6मोरे दुइ ठु पूत रहेन। इ सब दुइनउँ बाहेर मैदानन में लड़ेन। ओनका कउनो रोकइवाला न रहा। एक पूत दूसर पूत क मार डाएस। 7सारा परिवार अब मोरे खिलाफ अहइ। उ पचे मोहसे कहत रहेन, ‘उ पूत क लिआवा जउन अपने भाई क मार डाएस। तब हम ओका मार डाउब, काहेकि उ आपन भाई क मार डाएस।’ मोर पूत आगी क आखिरी चिनगारी क तरह अहइ, काहेकि उ ही सिरिफ उ ही एक पूत जिअत रही जउन ओकर पिता क सम्पत्ति क उत्तराधिकारी होइ। अगर उ ओका मार डाइ तउ उ आग जल उठब अउर खतम होइ जाब अउर उ सम्पत्ति दूसर क पास चली

जाइ अउर तब मोर मरे भतार क नाउँ इ धरती स मिट जाइ।”

8तब राजा मेहरारू स कहेस, “घरे जा। मई खुद तोहार मामला निपटाउब।”

9तकोआ क मेहरारू राजा स कहेस, “हे राजा मोर सुआमी, दोख मोह पइ आवइ द्या। किन्तु आप अउर आप क राज्ज निर्दोख अहइ।”

10राजा दाऊद कहेस, “उ मनई क लिआवा जउन तोहका बुरा-भला कहत ह। तब उ मनई तोहका फुन परेसान न करी।”

11मेहरारू कहेस, “कृपा कइके आपन यहोवा परमेस्सर क नाउँ पइ किरिया लेई कि आप एन लोगन क रोकहीं। तब उ पचे मोर पूत क हत्या क बदले में नाहीं मारिहीं।”

दाऊद कहेस, “यहोवा क जिन्नगी क किरिया, तोहरे पूत क कउनो मनई चोट नाहीं पहोंचाइ। तोहरे पूत क एक ठु बार भी धरती पई नाहीं गिरी।”

12उ मेहरारू स कहेस, “मोर सुआमी, राजा कृपा कइके मोका आप स कछू कहइ क मौका द्या”

राजा कहेस, “कहा।”

13तब उ मेहरारू कहेस, “परमेस्सर क लोगन क खिलाफ इ योजना काहे बनाया ह? हौं, जब आप इ कहत हीं आप इ परगट करत हीं कि आप अपराधी अहई। काहे? काहेकि आप अपने पूत क वापस नाहीं लाएन ह जेका आप अपने घर तजइ क मजबूर किहे रहेन। 14इ सही अहइ कि हम सबहिं कउनो दिन मरब। हम लोग उ पानी क तरह होब, जउन भुईया पइ फेंका गवा ह। कउनो भी मनई भुईया स उ पानी क एकट्ठा नाहीं कइ सकत। किन्तु परमेस्सर माफ करत ह। ओकरे लगे ओन लोगन बरे एक ठु योजना अहइ जउन अपने घर तजइ क मजबूत कीन्ह गएन ह, उ ओनका वापिस करइ चाहत ह। 15मोर प्रभु, राजा मई इ बात कहइ मई आप क लगे आइ। काहे? काहेकि लोग मोका ससाइ दिहन। मई अपने मने में कहेउँ कि, ‘मई राजा स बात करब। होइ सकत ह राजा मोर सुनई। 16राजा मोर सुनिहीं, अउर मोर रच्छा उ मनई स करिहीं जउन मोका अउर मोरे पूत दुइनउँ क मारइ चाहत हीं अउर ओन चिजियन क प्राप्त करइ स रोकइ चाहत हीं जेनका परमेस्सर हम क दिहेस ह।’ 17मई जानत हउँ कि मोर राजा, मोरे सुआमी क सब्द मोका सात्ति देईहीं काहेकि आप परमेस्सर क दूत क समान अहई। आप समुझ ह कि का अच्छा का बुरा अहइ। यहोवा आप क परमेस्सर, आप क संग अहइ।”

18राजा दाऊद उ मेहरारू क जवाब दिहस, “तोहका उ सवाल क उत्तर देइ चाही, जेका मई तोहसे पूछउँ मोसे कछू जिन छुपाया।”

उ मेहरारू कहेस, “हे मोर प्रभू, मोर राजा, कृपा कइके आपन सवाल पूछई।”

19राजा कहेस, “का योआब इ सबइ सारी बातन तोहसे कहइ क कहेस ह?”

उ मेहरारू जवाब दिहस, “मोर पभू राजा, आप क जिन्नगी क किरिया, आप सही अहई। आप क सेवक

योआब इ सबइ बातन कहइ बरे कहेस। 20योआब इ एह बरे किहेस जेहसे आप तथ्यन क दूसर निगाह स लिखिहीं। मोर पभू आप परमेस्सर क दूत क नाई बुद्धिमान अहई। आप सब कछू जानत हीं जउन पृथ्वी पइ होत ह।”

### अबसालोम यरूसलेम लउटत ह

21राजा योआब स कहेस, “लखा, मई इ करब। आप कृपा कइके जा अउ नउजुवक मनई अबसालोम क वापस लिआवा।”

22योआब भुईया आपन माथा निहुराएस। उ राजा दाऊद बरे आभार परगट किहस अउर कहेस, “आजु मई समुझत हउँ कि आप मोसे खुस अहइ, काहेकि आप उहइ किहन जउन मोर मोंग रही।”

23तब योआब उठा अउर गसूर गवा अउ अबसालोम क यरूसलेम लिआवा। 24किन्तु राजा दाऊद कहेस, “अबसालोम अपने घरे क लउट सकत ह।” उ मोहसे भेंटइ नाहीं आइ सकत। एह बरे अबसालोम अपने घरे क लउट गवा। अबसालोम राजा स भेंटइ नाहीं जाइ सका।

25अबसालोम क जियादा स जियादा तारीफ ओकरे सुन्नर रूप क बरे रही। इस्त्राएल में कउनो मनई एतना सुन्नर नाहीं रहा जेतना अबसालोम। अबसालोम क मूँडे स गोड़े तलक कउनो दोख नाहीं रहा। 26हर एक बरिस क आखिर में अबसालोम अपने मूँडे क बार काटत रहा अउर ओका तउलत रहा। बारन क तौल लगभग पाँच पौण्ड रही। 27अबसालोम क तीन पूत रहेन अउ एक ठु बिटिया। उ बिटिया क नाउँ तामार रहा। तामार एक ठु सुन्नर मेहरारू रही।

### अबसालोम योआब क अपने स भेंटइ क बरे मजबूर करत ह

28अबसालोम पूरे दुइ बरिस तलक राजा दाऊद स भेंटइ क इजाजत बिना यरूसलेम में रहा। 29अबसालोम योआब क लगे इ कहइ बरे पठाएस कि मोर तरफ स राजा क लगे जाइ। किन्तु योआब अबसालोम स मिलइ नाहीं गवा। अबसालोम दूसरी दाई सँदिसा पठाएस। किन्तु योआब फुन भी आउब इन्कार किहस।

30तब अबसालोम अपने सेवकन स कहेस, “लखा, योआब क खेत मोरे खेते स लगा बाटइ। ओकरे खेते में जौ क फसल अहइ। जा अउर जौ क बार द्या।”

एह बरे अबसालोम क सेवक गएन अउर योआब क खेते में आगी लगाउब सुरू किहेन। 31योआब उठा अउर अबसालोम क घरे गवा। योआब अबसालोम स कहेस, “तोहार सेवकन मोर खेत काहे बारेन।”

32अबसालोम योआब स कहेस, “मई तोहका सँदिसा पठाँउ। मई तोहसे हिआँ आवइ क कहेउँ। मई तोहका राजा क लगे पठवइ चाहत रहेउँ। मई ओहसे पूछइ चाहत रहेउँ कि उ गसूर स मोका घरे काहे बोलाएस। मई ओहसे मिल नाहीं सकत, एह बरे गसूर में रहब कहुँ जियादा नीक रहा। अब मोका राजा स भेंटइ द्या। जदि मई पाप किहेउँ ह तउ उ मोका मार सकत ह।”

### अबसालोम दाऊद स मिलत ह

33तब योआब राजा क लगे आवा अउ अबसालोम क कहा भवा सुनाया। राजा अबसालोम क बोलाएस। तब अबसालोम राजा क लगे आवा। अबसालोम राजा क समन्वा भुइँया पइ माथा टेकिके प्रणाम किहेस, अउर राजा अबसालोम क चुम्बन किहस।

### अबसालोम बहोत स मीत बनावत ह

**15** एकरे पाछे अबसालोम एक रथ अउ घोड़न अपने बरे लिहस। जब उ रथ चलावत रहा तउ अपने सामने पचास ठु दउड़त मनइयन क रखत रहा। 2अबसालोम जल्दी उठत अउर दुआरे क निचके खड़ा होत। जदि कउनो मनई अइसा होत जेकर कउनो समस्या होत अउर निआउ बरे राजा दाऊद क लगे आवत होत, अबसालोम ओहसे पूछत, “तू कउनो नगर क अहा?” उ मनई जवाब देत, “मई अमुक हउँ अउ इस्राएल क अमुक परिवार समूह क हूँ।” 3तब अबसालोम ओन मनइयन स कहा करत, “लखा, जउन तू कहत रह्या उ सुभ अउर उचित अहइ किन्तु राजा दाऊद तोहर एक ठु नहीं सुनी।”

4अबसालोम इ भी कहत, “अह, मई चाहत कि कउनो मोका इ भूइँयाँ क निआवाधीस बनावत। तब मई ओन मनइयन में स हर एक क मदद कइ सकत जउन निआव बरे समस्या लइके अउतेन।”

5जब कउनो मनई अबसालोम क लगे आवत अउर ओकरे समन्वा प्रणाम कइ क निहुरत, तउ अबसालोम हाथ बढ़ाइके ओका पकरलेत अउ ओकर चुम्बन करत जइसा उ ओकर नजिक क मीत अहइ। 6अबसालोम अइसा ओन सबहिँ इस्राएलियन क संग करत जउन राजा दाऊद क लगे निआव बरे अउतेन। इ तरह अबसालोम इस्राएल क सबहिँ लोगन क हिरदइ जीत लिहस।

### अबसालोम क जरिये दाऊद क राज्ज क लेइ क योजना

7चार बरिस पाछे अबसालोम राजा दाऊद स कहेस, “कृपा कइके मोका अपनी खास प्रतिग्या क पूरी कइ जाइ द्या जेका मई हेब्रोन में यहोवा क समन्वा किहे रहेउँ। 8मई इ प्रतिग्या तब किहे रहेउँ जब मई गसूर अराम में रहत रहेउँ। मई कहे रहेउँ, ‘जदि यहोवा मोका यरूसलेम लउटाई तउ मई यहोवा क सेवा करब।’”

9राजा दाऊद कहेस, “सान्तिपूर्वक जा।”

अबसालोम हेब्रोन गवा। 10किन्तु अबसालोम इस्राएल क सबहिँ परिवार समूहन में जासूस पठएस। एन जासूनन लोगन स कहेन, “जब तू पचे तुरही क आवाज सुना, तउ कहा कि ‘अबसालोम हेब्रोन में राजा होइ गवा।’”

11अबसालोम दुइ सौ मनइयन क अपने संग चलइ बरे न्यौतेस। उ सबइ मनई ओकरे संग यरूसलेम स बाहेर गएन। किन्तु उ पचे इ नहीं जानत रहेन कि ओकर योजना का अहइ। 12अहीतोपेल दाऊद क सलाहकारन में स एक रहा। अहीतोपेल दाऊद क सलाहकारन में स एक रहा। अहीतोपेल गीलो नगर क निवासी रहा। जब अबसालोम बलि-भेंटन क चढ़ावत रहा, उ अहीतोपेल क गीलो नगर

स बुलाएस। अबसालोम क योजना ठीक-ठाक चलत रही अउर जियादा स जियादा लोग ओकर समर्थन कइ लागेन।

### दाऊद क अबसालोम क योजना क सूचना

13एक ठु मनई दाऊद क सूचना देइ आवा। उ मनई कहेस, “इस्राएल क लोग अबसालोम क अनुसरण करब सुरू करत अहई।”

14तब दाऊद यरूसलेम में रहइवाले आपन सबहिँ अधिकारियन स कहेस, “हम पचन्क जरूर पराइ चाही, अन्यथा हम में स कउनो भी अबसालोम स बच के नाही निकरि सकब्या। अबसालोम क जरिये धरें जाइ क पहिले हम लोग हाली करी। नाही तउ उ हम सबहिँ क नस्ट कइ देइ अउर उ यरूसलेम क लोगन क मार डाइ।”

15राजा क सेवकन राजा स कहेन, “जउन कछू भी आप कहिहीं, हम लोग करब।”

### दाऊद अउ ओकर आदमी बच निकरत हीं

16राजा दाऊद अपने घर क सबहिँ लोगन क संग बाहेर निकर गवा। राजा घर क देखभाल क बरे अपनी दस उप-पत्नियन क हुवाँ तजेस। 17राजा अपने सबहिँ लोगन क साथ लइके जउन ओका अनुसरण किहा बाहेर निकरा। उ पचे नगर क आखिरी मकाने पइ रुकेन। 18ओकर सबहिँ सेवक राजा क पास स गुजरेन, अउर सबहिँ करेती, सस्बहिँ पलेनी अउ गती (गत स छः सौ मनई) राजा क लगे स गुजरेन।

19राजा गत क इतै स कहेस, “तू लोग भी हमरे संग काहे जात अहा? लउट जा अउर नवा राजा (अबसालोम) क संग रहा। तू बिदेसी अहा। इ तू लोगन क ग्रह-भूइँया नाही अहइ। 20ठीक कछू देरी तू हमरे संग जुड्या। का मोका अलग-अलग जगहन पइ तोहका हमारे संग भटकई चाही? नाही! लउटा अउर आपन भाइयन क अपने संग ल्या। मोर पराथना अहइ कि तोहरे बरे दाया अउ वफ़दारी देखवा जाइ।”

21किन्तु इतै राजा क जवाब दिहेस, “यहोवा क जिन्नगी क किरिया, जब तलक आप जिअत अहई मई आप क संग रहब। मोर सुआमी, राजा मई तोहार संग रहब जहाँ कहुँ भी जाब्या चाहे इ जीवन अही या मरण।” 22दाऊद इतै स कहेस, “आवा, हम लोग किद्रोन नाला क पार करी।”

एह बरे गत क इतै अउ ओकर सबहिँ लोग अपने बच्चन सहित किद्रोन नाले क पार गएन। 23सबहिँ लोग जोर स रोवत रहेन। राजा दाऊद किद्रोन नाले क पार किहस। तब सबहिँ लोग रेगिस्ताने कइँती बढेन। 24सादोक अउ ओकर संग क लवीबंसी परमेस्सर क करार क सन्दूख क लइके चलत रहेन। उ पचे परमेस्सर क पवित्तर सन्दूख क खाले रखेन। एब्यातार तब तलक पराथना किहेस\* कि जब तलक सबहिँ लोग यरूसलेम स बाहेर नाही निकर गएन।

**पराथना किहेस** साब्दिक, “चला गवा” एकर अरथ होइ सकत ह, “धूप जराइ” “भेंट चढ़ाई” या एकर साधारण अरथ अहइ कि एब्यातार एक तरफ पत्तर सन्दूक क साथ तब तलक खड़ा भवा रहेस जब तलक सबइ लोग गुजर न गइ।

25राजा दाऊद सादोक स कहेस, “परमेस्सर क पवितर सन्दूक क यरूसलेम लउटाइ लइ जा। यदि यहोवा मोह पइ दयालु अहइ, तउ उ मोका वापस लउटाइ अउर यहोवा मोका यरूसलेम अउर आपन मन्दिर क देखइ देइ। 26किन्तु यदि यहोवा कहत ह कि मोहे पइ खुस नाहीं अहइ तउ उ मोरे खिलाफ, जउन कछू भी चाहत ह, कइ सकत ह।”

27राजा याजक सादोक स कहेस, “तू एक ठु दूस्ट अहा सात्तिपूर्वक नगर क जा। आपन पूत अहीमास अउ एब्यातार क पूत योनातन स अपने संग ल्या। 28मई ओन ठउरन क निचके प्रतीच्छा करब जहाँ स लोग नदी पार होइ रेगिस्तान में जात हीं। मई हुवाँ तब तलक प्रतीच्छा करब जब तलक तोहसे कउनो सूचना नाहीं मिलत।”

29एह बरे सादोक अउ एब्यातार परमेस्सर क पवितर सन्दूक वापस यरूसलेम लइ गएन अउर हुवाँ ठहरेन।

### अहीतोपेल क खिलाफ दाऊद क पराथना

30दाऊद जइतून क पर्वत पइ चढ़ा। उ रोवत रहा। उ आपन मूँड ढाँपि लिहस अउर उ बिना जूते क गवा। दाऊद क संग क सबहिं लोगन आपन मूँड ढाँपि लिहेन। उ पचे दाऊद क संग रोवत भए गएन।

31एक ठु मनई दाऊद स कहेस, “अहीतोपेल लोगन में स एक अहइ जउन अबसालोम क संग योजना बनाएस।” तब दाऊद पराथना कियेस, “हे यहोवा, मई तोहसे पराथना करत हउँ कि तू अहीतोपेल क सलाह क नाकामयाब कइ द्या।” 32दाऊद पर्वत क चोटी पइ आवा। इहइ उ ठउर रहा जहाँ उ अक्सर परमेस्सर स पराथना करत रहा। उ समइ ऐकी हूसै ओकरे लगे आवा। हूसै क अंगरखा फटा रहा अउर ओकरे झूँड़ि पइ धूरी रही।

33दाऊद हूसै स कहेस, “जदि तू मोरे संग चलत अहा तउ तू देख-रेख करइवाले अलावा मनई होब्या। 34किन्तु जदि तू यरूसलेम क लउट जात ह तउ तू अहीतोपेल क सलाह क ब्यर्थ कइ सकत ह। अबसालोम स कहा, ‘महाराज, मई आप क सेवक हउँ। मई आप क बाप क सेवा कियेउँ, किन्तु अब मई आप क सेवा करब।’

35याजक सादोक अउ एब्यातार तोहरे संग होइहीं। तोहका उ सबइ बातन ओनसे कहइ चाही जेनका तू राजमहल में सुना। 36सादोक क पूत अहीमास अउ एब्यातार क पूत योनातन ओनके संग होइहीं। तू ओनका, हर बात जउन सुना, मोहसे कहइ बरे पठउब्या।”

37तब दाऊद क मीत हूसै नगर में गवा, अउर अबसालोम यरूसलेम आवा।

### सीबा दाऊद स भेंट ह

16 दाऊद जैतून पर्वत क चोटी पइ तनिक दूर चला। हुवाँ मपीबोसेत क सेवक सीबा, दाऊद स मिला। सीबा क लगे काठी क संग दुइ ठु खच्चर रहेन। खच्चरन पइ दुइ सौ रोटियन, सौ किसमिस क गुच्छन, सौ गर्मी क फल अउ दाखमधु स भरी एक ठु मसक रही। 2राजा दाऊद सीबा स कहेस, “इ सबइ चिजियन काहे बरे अहइँ?”

सीबा जवाब दिहिस, “गदहन राजा क परिवार क सवारी बरे अहइ। रोटी अउ गर्मी क फल सेवकन क खाइ बरे अहइ अउर जदि कउनो मनई रेगिस्ताने में कमजोरी महसूस करइ, उ दाखमधु पी सकी।”

3राजा पूछेस, “मपीबोसेत कहाँ अहइँ?”

सीबा राजा क जवाब दिहिस, “मपीबोसेत यरूसलेम में ठहरा अहइ काहेकि उ सोचत ह, ‘आजु इस्राएली मोरे पितामह क राज मोका वापस दइ देइहीं।’”

4तब राजा सीबा स कहेस, “ओकरे कारण, जउन कछू मपीबोसेत क अहइ ओका अब मई तोहका देत हउँ।”

सीबा कहेस, “मई आप क प्रणाम करत हउँ। मई आसा करत हउँ कि मई आप क सदा खुस कइ सकउँ।”

### सिमी दाऊद क साप देत ह

5दाऊद बहूरीम पहुँचा। साउल क परिवारे क एक ठु मनई बहूरीम स बाहरे निकरा। इ मनई क नाउँ सिमी रहा जउन गेरा क पूत रहा। सिमी दाऊद क बुरा कहत भवा बाहरे आवा अउर उ बुरी-बुरी बातन बार-बार करत रहा।

6सिमी दाऊद अउ ओकरे सेवकन पइ पाथर लोकाउब सुरू कियेस। किन्तु लोग अउर फउजी दाऊद क चारिहुँ कइँती बटुर गएन उ पचे ओकरे चारिहुँ ओर रहेन। 7सिमी दाऊद क सरापेस। उ कहेस, “निकरि जा, निकरि जा! तू हत्यारा अहा, तू दुस्त अहा! 8यहोवा तोहका दण्ड देत अहइ। काहे? काहेकि तू साऊल क परिवारे क मनइयन क मार डया। तू साऊल क जगह एक राजा क रूप में चोराया। किन्तु अब, यहोवा राज्ज तोहरे पूत अबसालोम क दिहस ह। अब उ पचे ही बुरी घटनन तोहरे बरे घटित होत अहइँ। काहे? काहेकि तू हत्यारा अहा।”

9सरूयाह क पूत अबीसै राजा स कहेस, “मोर पभूँ राजा! इ मरा कूकुर आप क सरापत काहे अहइ? मोका आगे जाइ द्या अउ सिमी क मूँड काट लेइ द्या।”

10किन्तु राजा जवाब दिहिस, “सरूयाह क पूतो! तू इ चिजियन क चिन्ता काहे करत ह जउन मोर संग होत? निहचइ ही सिमी मोका सरापत अहइ। अगर यहोवा ओका कहेस कि उ मोका सरापि, अउर कउन अहइ जउन यहोवा स इ बातन बरे प्रस्न पूछ सकत्या?”

11दाऊद अबीसै अउर आपन सबहिं सेवकन स इ भी कहेस, “लखा मोर आपन पूत ही (अबसालोम) मोका मारइ क जतन करत अहइ। इ मनई (सिमी) जउन बिन्यामीन परिवार समूह क अहइ, मोका मार डायइ क जियादा अधिकार रखत ह। ओका अकेला तजा। ओका मोका बुरा भला कहइ द्या। यहोवा ओका अइसा करइ क कहेस ह। 12इ होइ सकत ह कि ओन बुराइयन क जउन मोरे संग होत अहइँ, यहोवा लखइ। तब होइ सकत ह कि यहोवा मोका हर बुरा सब्द क बदले में कछू अच्छा देइ जउन कि सिमी आजु मोहसे कहेस ह।”

13एह बरे दाऊद अउ ओकर मनइयन अपने राहे पइ खाले सरक स उतर आवइँ। किन्तु सिमी दाऊद क पाछे लगा रहा। सिमी सरक क दूसर कइँती पहाड़ी क बगल होइ के चलइ लाग। सिमी अपने राहे पइ दाऊद क

बुरा-भला कहत रहा। सिमी दाऊद पइ पाथर अउ धूरि भी लोकाएस।

14राजा दाऊद अउर ओकर सबहि लोग यरदन नदी पइ पहुँचेन। राजा अउ ओकर लोग थक गए रहेन। एह बरे उ पचे हुवाँ आराम किहन अउर आपन क ताज़ा किहेन।

15अबसालोम, अहीतोपेल अउ इस्त्राएल क सबहि लोग यरूसलेम आएन। 16दाऊद क एरेकी मीत हूसै अबसालोम क लगे आवा। हूसै अबसालोम स कहेस, “राजा दीर्घायु होई। राजा दीर्घायु होई।”

17अबसालोम पूछेस, “तू आपन मीत दाऊद क बिस्सास पात्र काहे नाहीं अहा? तू आपन मीत क संग यरूसलेम क काहे नाहीं तज्या?”

18हूसै कहेन, “मई उ मनई क अहउँ, जेका यहोवा चुनत ह। एन लोग अउ इस्त्राएल क लोग आप क चुनेन। मई आपक संग रहब। 19बीते समइ में मई आप क बाप क सेवा किहेउँ। एह बरे, अब मई दाऊद क पूत क सेवा करब। मई आप क सेवा करब।”

### अबसालोम अहीतोपेल स सलाह लेत ह

20अबसालोम अहीतोपेल स कहेस, “कृपा कइके मोका बतावा कि का करइ चाही।”

21हीतोपेल अबसालोम स कहेस, “तोहार बाप आपन कछू उप-पत्नियन क घर क देख-भाल क बरे तजेस ह। जा अउर ओनके संग सारीरिक सम्बंध करा। तब सबहि इस्त्राएली इ जनिहीं कि तोहार बाप तोहसे घिना करत ह। अउर तोहार सबहि लोग तोहका जियादा समर्थन देइ बरे उत्साहित होइहीं।”

22तब ओन लोग अबसालोम बरे महले क छते पइ एक तम्बू डाएन अउ अबसालोम अपने बाप क रखैलन क संग सारीरिक सम्बन्ध किहस। सबहि इस्त्राएलियन एका लखेन। 23उ समइ, दाऊद अउ अबसालोम अहीतोपेल क सलाह क बहोत महत्वपूर्ण समुझेस। इ ओतनी ही महत्वपूर्ण रही जेतनी मनई बरे परमेस्वर क बात।

### अहीतोपेल दाऊद क बारे में सलाह देत ह

17 अहीतोपेल अबसालोम स इ भी कहेस, “मोका अब बारह हजार फउजी चुनइ द्या। तब मई आजु क रात दाऊद क पाछा करब। 2मई ओका तब धरब जब उ थका अउ कमजोर होइ। मई ओका ससाउब अउ ओकर सबहि मनई ओका तजिके परइहीं। किन्तु मई सिरिफ राजा दाऊद क मारब। 3तब मई सबहि लोगन क तोहरे लगे वापस लिआउब। जदि दाऊद मरि गवा, तउ सबइ लोगन क सान्ति प्राप्त होइ।”

4इ योजना अबसालोम अउ इस्त्राएल क सबहि प्रमुखन क पसन्द आइ। 5किन्तु अबसालोम कहेस, “एरेकी हूसै क अब बोलावा। मई ओहसे भी सुनइ चाहत अहउँ कि उ का कहत ह।”

### हूसै अहीतोपेल क सलाह नस्ट करत ह

6हूसै अबसालोम क लगे आवा। अबसालोम हूसै स

कहेस, “अहीतोपेल इ योजना बताएस ह। का हम लोग यह पइ अमल करी? जदि नाहीं तउ हमका, अपनी बतावा।”

7हूसै अबसालोम स कहेस, “इ समइ अहीतोपेल क सलाह ठीक नाहीं अहइ।” 8उ आगे कहेस, “तू जानत ह कि तोहार बाप अउ ओकर आदमी ताकतवार अहइ। उ पचे उ रीछनी क तरह खूँखार अहइ जेकत बच्चन छोर लीन्ह गवा होइ। तोहार बाप कुसल जोधा अहइ। उ सारी रात लोगन क संग नाहीं ठहरी। 9सायद उ पहिले स ही कउनो गुफा या दूसर ठउरे पइ छुपा अहइ। जदि तोहार बाप तोहरे मनइयन पइ पहिले हमला करत ह, तउ लोग एकर खबर पइहीं, अउर उ पचे सोचिहीं, ‘अबसालोम क समर्थक हारत अहइ।’ 10तब उ पचे लोग भी जउन सेर क तरह वीर अहइ, ससाइ जइहीं। काहे? काहेकि सबहि इस्त्राएली जानत हीं कि तोहार बाप ताकतवर जोधा अहइ अउ ओकर मनई वीर अहइ।”

11“मोर सुझाव इ अहइ: तोहका दान स लइके बेसेबा तलक सबहि इस्त्राएलियन क बटोरइ चाही। तब बड़ी तादाद में लोग समुद्धर क रेती क कणन क नाई होइहीं। तब तोहका खुद ओनकर जुद्ध में अगुवाइ करइ चाही। 12हम पचे दाऊद क उ ठउरे स जहाँ उ लुकान अहइ, धइ लेब। हम पचे दाऊद पइ बहोत सारा फउज स हमला करब, हम लोग ओस क बहोत सारा बूँद क नाई होब्या जउन कि धरती पइ पड़त अहा। हम लोग दाऊद अउर ओकर सबहि मनइयन क मार डाउब। कउनो मनई क जिअत नाहीं बक्सा जाइ। 13जदि दाऊद कउनो नगर में परात ह, तउ सबहि इस्त्राएली उ नगर में रस्सियन लिअइहीं अउर हम लोग उ नगर क देवारन क तोड़ब अउर एका घाटी में बदल देब। उ नगर में एक पाथर भी नाहीं बचब्या।”

14अबसालोम अउ सबइ इस्त्राएलियन कहेन, “एरेकी हूसै क सलाह अहीतोपेल क सलाह स बेहतर अहइ।” उ पचे अइसा कहेन काहेकि इ यहोवा क योजना रही। यहोवा अहीतोपेल क सलाह क ब्यर्थ करइ क नीक योजना बनाए रहा। इ तरह यहोवा अबसालोम क सजा दइ सकत रहा।

### हूसै दाऊद क लगे चितउनी पठवत ह

15हूसै उ सबइ बातन याजकन, सदोक अउ एब्यातार स कहेस। हूसै उ योजना क बारे में ओनका बताएस जेका अहीतोपेल अबसालोम अउ इस्त्राएल क प्रमुखन क सुझाए रहा। हूसै सदोक अउ एब्यातार क उ योजना भी बताएस जेका उ सुझाए रहा। हूसै कहेस, 16“हाली। दाऊद क खबर पठवा। ओहसे कहा कि आज क रात उ ओन ठउरन पइ न रहइ जहाँ स लोग रेगिस्तान क पार करत हीं। अपितु यरदन नदी क तुरत पार कइ ल्या। जदि उ नदी क पार कइ लेत ह तउ राजा अउ ओकर लोग नाहीं धरा जइहीं।”

17याजकन क पूत योनातन अउ अहीमास, एनरोगेल पइ प्रतीच्छा करत रहेन। उ पचे नगर में जात भए देखोइ नाहीं पड़इ चाहत रहेन। एह बरे एक तु गुलाम लइकी ओनके लगे आइ। उ ओनका सँदसा दिहस। तब योनातन अउ अहीमास गएन अउर उ पचे इ सँदसा राजा दाऊद क दिहेन।



18 किन्तु एक लरिका योनातन अउ अहीमास क लखेस। लरिका अबसालोम स कहइ बरे दउड़ा। योनातन अउ अहीमास तेजी स पराइ निकरेन। उ पचे बहारीम में एक तु मनई क घरे पहुँचेन। उ मनई क आँगन में एक कुआँ रहा। योनातन अउ अहीमास इ कुआँ में उतर गएन। 19 उ मनई क पत्नी देवार पइ एक तु चादर डाइ दिहस। तब उ पूरे कुआँ क अन्न स ढाँक दिहस। कुआँ अन्न क ढेर जइसा देखौत रहा, एह बरे कउनो मनई इ नाहीं जान सकत रहा कि योनातन अउ अहीमास हुवाँ छुपा रहेन। 20 अबसालोम क सेवकन उ घरे क मेहरारू क लगे गएन। उ पचे पूछेन, “योनातन अउ अहीमास कहाँ अहई?”

उ मेहरारू अबसालोम क सेवकन स कहेस, “उ पचे पहिले ही नाला क पार कइ गएन ह।”

अबसालोम क सेवकन तब योनातन अउ अहीमास क खोज में चले गएन। किन्तु उ पचे ओनका न पाइ सकेन। एह बरे अबसालोम क सेवकन यरूसालेम लउट गएन।

21 जब अबसालोम क सेवक चले गएन, योनातन अउ अहीमास कुआँ स बाहेर आएन। उ पचे गएन अउ उ पचे दाऊद स कहेन, “हाली करा, नदी क पार जा। अहीतोपेल इ सबइ बातन क तोहार खिलाफ करइ बरे योजना बनावत ह।” 22 तब दाऊद अउ ओकर सबहि लोग यरदन नदी क पार चले गएन। सूरज निकरइ स पहिले दाऊद क सबहि लोग यरदन नदी क पार कइ चुके रहेन।

### अहीतोपेल आत्महत्या करत ह

23 अहीतोपेल लखेस कि इस्राएली ओकर सलाह नाहीं मानतेन। अहीतोपेल अपने गदहे पइ काठी धरेस अउर आपन ग्रह-नगर क वापिस हँकिस। उ अपने परिवार क पच्छ में एक वसीयत लिखेस। तब उ अपने क फाँसी लगाइ लिहस। तब अहीतोपेल मर गवा, लोगन ओका ओकरे बाप क कब्र में दफनाइ दिहन।

### अबसालोम यरदन नदी क पार करत ह

24 दाऊद महनैम पहुँचा।

अबसालोम अउ सबहि इस्राएली जउन ओकरे संग रहेन, यरदन नदी क पार कइ गएन। 25 अबसालोम अमासा क फउज क सेनापति बनाएस। अमासा योआब क जगह लिहस। अमासा इस्राएली यिन्नन क पूत-रहा। अमासा क महतारी, सरूयाह क बहिन अउ नाहास क बितिया, अबीगैल रही (सरूयाह योआब क महतारी रही।)

26 अबसालोम अउ इस्राएलियन आपन डेरा गिलाद प्रदेश में डाएन।

### सोबी, माकीर, बर्जिल्लै

27 दाऊद महनैम पहुँचा। सोबी, माकीर अउ बर्जिल्लै उ ठउरे पइ रहेन। (नाहास क पूत सोबी अम्मोनी नगर रब्बा क रहा। अम्मोनी क पूत माकीर लोदबर क रहा अउर बर्जिल्लै, गिलाद क रेगलीम स रहा।)

28-29 उ पचे कहेन, “रेगिस्ताने में लोग थके, भुखान अउ पिआसे अहई।” एह बरे उ पचे दाऊद अउ ओकरे

लोगन क खाइ क बरे इ सबइ चिजियन लिआएन: गोहूँ, जौ, आटा, भूँजी अन्न क फलियन, तिल, झुरान बिआ, सहद, माखन, भेड़िन अउ गइया क दूध क पनीर भी लइ आएन। उ पचे दाऊद अउ ओकर लोगन क खाना परोसेन। उ पचे बिछौना, खोरा अउ माटी क भांडी भी लइ आएन।

### दाऊद जुद्ध क तइयारी करत ह

18 दाऊद अपने लोगन क गनेस। उ हजार फउजियन अउर सौ फउजियन क ऊपर सेनापतियन नियुक्त किहेस। 2 दाऊद लोगन क तीन टुकड़ियन में बाँटिस, अउर तब दाऊद लोगन क आगे पठएस। योआब क भाई, सरूयाह क पूत अबीसै दूसर एक तिहाई फउज क अगुवाई किहेस। अउर इतै जउन गात स रहा उ बचा भवा एक तिहाई फउज क अगुवाई किहेस।

राजा दाऊद लोगन स कहेस, “मई भी तू लोगन क संग चलब।”

3 किन्तु लोग कहेन, “नाहीं। आप क हमरे संग नाहीं जाइ चाही। काहे? काहेकि हम लोग जुद्ध स परानेन तउ अबसालोम क फउजी परवाह नाहीं करिहीं। यदि हम आधा मार दीन्ह जाइ तउ भी अबसालोम क फउजी पखाह नाहीं करिहीं। किन्तु आप हम लोगन क दस हजार क बराबर अहई। आप क बरे अच्छा अहइ कि आप नगर में रहई। तब, यदि हम क मदद क जरूरत पड़इ तउ आप मदद कइ सकई।”

4 राजा अपने लोगन स कहेस, “मई उहइ करब जेका आप लोग सर्वोत्तम समुझत हीं।”

तब राजा दुआर क बगल में खड़ा रहा। फउज आगे बढ़ गइ। उ पचे एक सौ अउ एक हजार क टुकड़ियन में गएन।

### “जुवक अबसालोम क संग कोमल रहा”

5 राजा योआब, अबीसै अउ इतै क आदेस दिहस: “मोरे बरे इ करा: जुवक अबसालोम क बरे कोमल रहा।” सबहि लोग अबसालोम क बारे में नायकन को राजा क आदेस सुनेन।

### दाऊद क फउज अबसालोम क फउज क हरावत ह

6 दाऊद क फउज अबसालोम क इस्राएलियन क खिलाफ रणभूमि में गइ। उ पचे एप्रैम क जँगल में जुद्ध किहन। 7 दाऊद क फउज इस्राएलियन क हराइ दिहस। उ दिन बीस हजार मनई मारे गएन। 8 जुद्ध पूरे देस में फइल गवा। किन्तु उ दिन तरवार स मरइ क अपेक्षा जँगल में मनई जियादा मरेन।

9 इसा भवा कि अबसालोम दाऊद क सेवकन स मिला। अबसालोम बच पराइ बरे अपने खच्चर पइ चड़ा। खच्चर बिसाल बाँज क बूच्छ क डारन क नीचे गवा। डारन मोटी रहिन अउ अबसालोम क मूँड़ बूच्छ में फँस गवा। ओकर खच्चर ओकरे नीचे स पराइ निकरा एह बरे अबसालोम भुईया क ऊपर लटका रहा।

10 एक तु मनई इ होत लखेस। उ योआब स कहेस, “मई अबसालोम क एक बाँज बृच्छ में लटकत लखेउँ ह।”

11 योआब उ मनई स कहेस, “तू ओका मार काहे नाहीं डाय, अउर ओका जमीन पइ काहे नाहीं गिर जाइ दिहा? मई तोहका एक जोद्धन-कमरबंध अउ चाँदी क दस सिक्कन देतेउँ।” 12 उ मनई योआब स कहेस, “मई राजा क पूत क तब भी चोट पहुँचावइ क कोसिस नाहीं करतेउँ, जहाँ तू मोका हजार चाँदी क सिक्कन देत्या। काहेकि हम लोग, तोहका अबीसै अउ इतै क दीन्ह गए राजा क आदिस क सुना। राजा कहेस, ‘होसियार रहा, जुवक अबसालोम क चोट नाहीं पहुँचे।’ 13 जदि मई अबसालोम क मार दिहे होतेउँ, तउ राजा खुद एकर पता लगाइ लेतइ अउर तू मोर बचाव बरे नाहीं आत्या।”

14 योआब कहेस, “मई तोहरे संग समइ नस्ट नाहीं करब।” अबसालोम अबहुँ बाँज बृच्छ में लटका भवा, जिअत रहा। योआब तीन तु भाला लिहस। उ भालन क अबसालोम पइ लोकाएस। भालन अबसालोम क हिरदइ क बेधत भए निकरि गएन। 15 हुवाँ दस तु जुवक रहेन जउन योआब क हथियार लेइ जाइवाल रहेन। उ सबइ दस मनई अबसालोम क चारिहुँ कइँती आपन अउर ओका मार डएन।

16 योआब तुरही बजाएस अउर अबसालोम क सैनिकन क टोलियन क इस्त्राएली लोगन क पाछा करब बंद करइ क संकेत देत रहेन। इ तरह उ दूसर जुद्ध स लोगन क बचाइ लिहस। 17 तब योआब क मनइयन अबसालोम क लहास उठाएन अउर ओका जँगल क एक बड़के गड़हे में फेंक दिहन। उ पचे गड़हे क बहोत स पाथरन स भर दिहन। सबइ इस्त्राएलियन आपन-आपन घरे क पराइ गएन।

18 जब अबसालोम जिअत रहा, उ राजा क घाटी में एक तु खंभा खड़ा किहे रहा। अबसालोम कहे रहा, “मोर कउनो पूत मोरे नाउँ क चलावइ वाला नाहीं अहइ।” एह बरे उ खम्भा क आपन नाउँ दिहस। एह बरे एका आपन बाद नाउँ दिहस। इ खम्भा आजु भी “अबसालोम स्मारक” क रूप जाना जात ह।

### योआब दाऊद क खबर देत ह

19 सादोक क पूत अहीमास योआब स कहेस, “मोका अब दउड़ जाइ द्या अउर राजा दाऊद क खबर पहुँचावइ द्या। मई ओहसे कहब कि यहोवा ओनका ओनके दुस्मनन क हाथे स अजाद कइ दिहस ह।”

20 योआब अहीमास क जवाब दिहस, “नाहीं, आजु तू दाऊद क खबर नाहीं देब्या। तू खबर कउनो दूसरे समइ पहुँचाइ सकत ह, किन्तु आजु नाहीं काहे? काहेकि राजा क पूत मरि गवा ह।”

21 तब योआब एक कूसी मनई स कहेस, “जा राजा स उ सब कहा जउन तू लख्या ह।” कूसी योआब क प्रणाम किहस। तब कूसी दाऊद क खबर देइ दउड़ पड़ा।

22 किन्तु सादोक क पूत अहीमास योआब स फुन पराथना किहस, “जउन कछू भी होइ, ओकर चिन्ता नाहीं, कृपा कइके मोका भी कूसी क पाछे दउड़ जाइ द्या।” योआब कहेस, “बेटे, तू समाचार काहे लइ जाइ चाहत अहा? तू

जउन समाचार लइ जाब्या ओकर कउनो पुरस्कार नाहीं मिली।”

23 अहीमास जवाब दिहस, “चाहे जउन होइ, चिन्ता नाहीं, मई दाऊद क लगे दउड़ जाब।” योआब अहीमास स कहेस, “दउड़!” तब अहीमास यरदन क घाटी स होइके दउड़ा उ कूसी क पाछे छोड़ गवा।”

### दाऊद खबर पावत ह

24 दाऊद नगर क दुइनउँ फाटकन क बीच बइठा रहा। पहरेदार फाटकन क देवारन क ऊपर छते पइ गवा। पहरेदार धियान स लखेस अउ एक तु मनई क अकेले दउड़त लखेस। 25 पहरेदार दाऊद स कहइ बरे जोर स गोहराएस।

राजा दाऊद स कहेस, “जदि मनई अकेला अहइ तउ उ खबर लावत ह।” मनई नगर क निअरे स निअरे आवत जात रहा। 26 पहरेदार दूसर मनई क दउड़त लखेन। पहरेदार दुआर रच्छक क बोलाएस, “लखा! दूसर मनई अकेले दउड़त बा।” राजा कहेस, “उ भी समाचार लाआवत अहइ।”

27 पहरेदार कहेस, “मोका लागत ह कि पहिला मनई सादोक क पूत अहीमास क तरह दउड़त अहइ।”

राजा कहेस, “अहीमास अच्छा मनई अहइ। उ अच्छी समाचार लावत रहा होइ।” 28 अहीमास राजा क गोहराइ क कहेस। “सब कछू बहोत नीक अहइ।” अहीमास राजा क समन्वा प्रणाम करइ निहुरा। ओकर माथा भुइँया क करीब रहा। अहीमास कहेस, “अपने यहोवा परमेस्सर क स्तुति करा। मोर सुआमी राजा, यहोवा ओन मनइयन क हराइ दिहस ह जउन आप क खिलाफ रहेन।”

29 राजा पूछेस, “का जुवक अबसालोम कुसल स अहइ?” अहीमास जवाब दिहस, “जब योआब मोका पठाएस मई बड़ी उतेजना भीड़ लखेउँ, किन्तु मई नाहीं जानत हउँ कि उ का रहा?” 30 तब राजा कहेस, “हिआँ आ अउर प्रतीच्छा करा।” अहीमास हटके खड़ा होइ गवा अउ प्रतीच्छा करइ लाग।

31 कूसी आवा। उ कहेस, “मोर सुआमी अउर राजा, मोर लगे तोहार बरे अच्छा समाचार अहइ। आजु यहोवा ओन सबइ लोगन क सजा दिहस ह जउन आप क खिलाफ रहेन।”

32 राजा कूसी स पूछेस, “का जुवक अबसालोम कुसल स अहइ?” कूसी जवाब दिहस, “मोका आसा अहइ कि आप क दुस्मन अउर सबहिँ लोग जउन आप क खिलाफ चोट करत अइहीं, उ पचे इ जुवक (अबसालोम) क तरह सजा पइहीं।” 33 तब राजा समुझ लिहस कि अबसालोम मर गवा ह। राजा बहोत काँपत रहा ह। उ नगर दुआर क ऊपर क कमरा में चला गवा अउर रोएस। जइसे ही उ गवा उ रोवा अउर कहेस, “ऐ मोर पूत अबसालोम, मई चाहत हउँ कि मई तोहरे बरे मर गवा होत। ऐ अबसालोम, मोर पूत, मोर पूत।”

### योआब दाऊद क फटकारत ह

19 लोग योआब क खबर दिहन। उ पचे योआब स कहेन, “लखा, राजा अबसालोम बरे रोवत अहइ अउर बहोत दुखी अहइ।”

दाऊद क फउज उ दिन जीत पाए रही। मुला उ दिन सबहि लोगन बरे बहोत सोक क दिन होइ गवा। इ सोक क दिन रहा, काहेकि लोग सुनेन, “राजा अपने पूत बरे बहोत दुखी अहइ।”

3लोग नगर में चुपचाप आएन। उ पचे ओन लोगन क तरह रहेन जउन जुद्ध में पराजित होइ गए होई अउ पराइ आए होई। राजा आपन मुँहना ढाँपि लिहस। उ जोर-जोर स अउ फूट-फूटि के रोवत रहा, “मोर पूत अबसालोम! मोर पूत, मोर बेटवा।”

5योआब राजा क महल में आवा। योआब राजा स कहेस, “आजु तू आपन सबहि अधिकारियन क समन्वा अपमानित भवा ह। आजु तोहार सेवकन तोहार जिन्नगी बचाएन। उ पचे तोहरे पूतन, बिटियन, पत्नियन अउ उप-पत्नियन क जिन्नगी क बचाएन। 6तोहार अधिकारियन अपमानित महसूह करत ह कि तू ओनसे पिरेम करत ह जउन तोहसे घिना करत हीं अउर तू ओनसे घिना करत ह जउन तोहसे पिरेम करत हीं। आजु तू इ स्पस्ट कइ दिहा ह कि तोहार अधिकारी अउ तोहार लोग तोहरे बरे कछू नाहीं अहई। आजु मई समुझत हई कि जदि अबसालोम जिअत रहत अउ हम सबहि मार दिए गए होत तउ तोहका बड़ी खुसी होत।

7“अब खड़ा हवा अउ आपन सेवकन स बात करा अउर ओनका प्रोत्साहित करा। मई यहोवा क किरिया खाइके कहत हई कि जदि तू इ करइ बाहेर नाहीं निकरत्या तउ आजु क रात तोहार कउनो मनई नाहीं बची। बचपन स आजु तलक तोह पइ जेतनी बिपत्तियन आई अहई, ओन सब स इ बिपत्ति अउर बदतर होइ।”

8तब राजा नगर दुआर पइ गवा। खबर फइली कि राजा नगर दुआरे पइ अहइ। एह बरे सबहि लोग राजा क लखइ आएन।

### दाऊद फुन राजा बनत ह

सबहि अबसालोम क समर्थक इस्त्राएली अपने घरन क पराइ गए रहेन। 9इस्त्राएल क सबहि परिवार समूहन क लोग आपुस में तर्क-वितर्क करइ लागेन। उ पचे कहेन, “राजा दाऊद हम क पलिस्तियन अउ हमार दूसर दुस्मनन स बचाएस। मुला अब उ अबसालोम क समन्वा स पराइ गवा। 10हम लोग अबसालोम क अपने ऊपर सासन करइ बरे चुने रहेई। किन्तु अब उ जुद्ध में मर चुका ह। हम लोगन क दाऊद क फुन राजा बनावइ चाही।”

11राजा दाऊद याजकन सादोक अउ एब्यातार क सँदिसा पठाएस। दाऊद कहेस, “यहूदा क प्रमुखन स बात करा। कहा, ‘तू लोग अन्तिम परिवार समूह काहे अहा जउन राजा दाऊद क अपने राजमहल में वापस लिआवइ चाहत अहा? समूचइ इस्त्राएल में राजा क ओकर महल में वापिस लिआवइ बरे जउन कछू भी कहा गवा, इ राजा तलक पहोच गवा ह। 12तू मोर भाइयन अहा, तू मोरे परिवार अहा। फुन भी तोहार परिवार समूह राजा क महल में वापस लिआवइ में अन्तिम काहे रहा?’ 13अउर अमासा स कहा, ‘तू मोरे परिवारे क अंग अहा। जदि तोहका अभी ही स

योआब क जगह पइ सेना क नायक न बनावउँ, तउ परमेस्सर मोका सजा देइ।”

14दाऊद यहूदा क लोगन क दिल क जीत लिहस। एह बरे उ पचे एक ठु मनई क तरह एकमत होइ गएन। यहूदा क लोग राजा क सँदिसा पठाएन। उ पचे कहेन, “अपने सबहि सेवकन क संग वापस आवा।”

15तब राजा दाऊद यरदन नदी तलक आवा। यहूदा क लोग राजा स भेंटइ गिलगाल आएन। उ पचे एह बरे आएन कि उ पचे राजा क यरदन नदी क पार लइ जाई।

### सिमी दाऊद स छमा-याचना करत ह

16गेरा क पूत सिमी बिन्यामीन परिवार समूह क रहा। उ बहूरीम में रहत रहा। सिमी राजा दाऊद स भेंटइ क हाली किहस। सिमी यहूदा क लोगन क संग आवा। 17सिमी क संग बिन्यामीन परिवार क एक हजार लोग भी आएन। साऊल क परिवार क सेवक सीबा भी आवा। सीबा अपने संग अपने पन्द्रह पूतन अउ बीस सेवकन क लिआवा। इ पचे सबहि लोग राजा दाऊद स भेंटइ बरे यरदन नदी पइ जल्दी स पहुँचेन।

18इ सबइ लोग यरदन नदी पार कइके राजा क परिवार क यहूदा में वापस लिआवइ में मदद करइ बरे, अउर उ सबइ कछू करइ बरे गएन जउन राजा चाहेस, गएन। जब राजा नदी पार करत रहा, गेरा क पूत सिमी ओहसे मिलन आवा। सिमी राजा क समन्वा भुईया तलक प्रणाम करइ निहुरा। 19सिमी राजा स कहेस, “मोर सुआमी, जउन मई अपराध किहेई ओन पइ धियान न देई। मोर सुआमी राजा, ओन बुरे करमन क याद न करई जेनका मई तब किहेई जब आप यरूसलेम क तजेन। 20मई जानत हई कि मई पाप किहेई ह। मोर सुआमी राजा, इहइ कारण अहइ कि आजु मई यूसुफ क परिवार क पहिला मनई हई जउन आप स मिलइ आवा ह।”

21किन्तु सरूयाह क पूत अबीसै कहेस, “सिमी क जरूर मरइ चाही काहेकि इ यहोवा दुआरा अभिसिक्त भवा राजा क सरापेस।”

22दाऊद कहेस, “सरूयाह क पूतो, मई तोहरे संग का करउँ? आजु तू मोरे खिलाफ अहा। आजु इस्त्राएल में कउनो मनई मारा नाहीं जाइ चाही। आजु मई जानत हई कि मई इस्त्राएल क राजा हई।”

23तब राजा सिमी स कहेस, “तू मरब्या नाहीं।” राजा सिमी क बचन दिहस कि उ सिमी क खुद नाहीं मारी।

### मपीबोसेत दाऊद स मिलइ जात ह

24साऊल क पोता मपीबोसेत राजा दाऊद स भेंटइ आवा। मपीबोसेत उ सारे समइ तलक अपने गोड़न क फिकर नाहीं किहेस, अपनी मूँहन क कतरेस नाहीं या अपने ओढ़नन क नाहीं धोएस जब तलक राजा यरूसलेम तजइ क पाछे फुन: सान्ति क साथ वापस नाहीं आइ गवा। 25जब मपीबोसेत यरूसलेम में राजा क लगे मिलइ आवा, राजा ओहसे प्रस्न पूछेस: “मपीबोसेत तू मोरे संग उ समइ काहे नाहीं आया जब मई यरूसलेम स भाग गवा रहेई?”

26मपीबोसेत जवाब दिहस, “हे राजा, मोर सुआमी। मोर सेवक सीबा मोका मूरख बनाएस। मई सीबा स कहेउँ, ‘मई विकलंग हउँ। एह बरे गदहे पड़ काठी लगावा। तब मई गदहे पड़ बड़ठव, अउर राजा क संग जाब।’ 27किन्तु मोर सेवक मोका धोखा दिहस। मोरे बारे में आप स बुरी बातन कहेस। किन्तु हे, मोर सुआमी अउ राजा, परमेस्सर क एक सरगदूत क समान अहइ। आप उहइ करइँ जउन आप उचित समुझत हीं। 28आप मोरे पितामह क सारे परिवार क मार दिहे होतेन। किन्तु आप इ नाहीं किहन। आप मोका ओन लोगन क संग रखेन जउन आप क मेज पड़ खात हीं। एह बरे मई राजा स कउनो बात बरे सिकाइत करइ क अधिकार नाहीं राखत।”

29राजा मपीबोसेत स कहेस, “अपनी समस्यन क बारे में जियादा कछू जिन कहा। मई इ निर्णय करत हउँ। तू अउ सीबा भुइयाँ क बँटवारा कइ सकत ह।”

30मपीबोसेत राजा स कहेस, “सीबा क सारी भुइयाँ लइ लेइ द्या। काहे? काहेकि मोर सुआमी राजा अपने महल में सान्तिपूर्वक लउट आएन ह।”

### दाऊद बर्जिल्लै स अपने संग यरूसलेम चलइ क कहत ह

31गिलाद क बर्जिल्लै रोगलीम स आवा। उ राजा दाऊद क संग नदी तलक आवा। उ राजा क संग, यरदन नदी पार करावइ बरे गवा। 32बर्जिल्लै बहोत बूढ़ा मनई रहा। उ अस्सी बरिस क रहा। जब दाऊद महनैम में ठहरा रहा तब उ ओका भोजन अउ दूसर चिजियन दिहे रहा। बर्जिल्लै इ सब कइ सकत रहा काहेकि उ बहोत धनी मनई रहा। 33दाऊद बर्जिल्लै स कहेस, “नदी क पार मोरे संग चला। जदि तू मोरे संग यरूसलेम में रहब्या तउ हुवाँ मई तोहार देखभाल करब।”

34किन्तु बर्जिल्लै राजा स कहेस, “का आप जानत हीं कि मई केतना बूढ़ा हउँ? का आप सोचत हीं कि मई आप क संग यरूसलेम का जाइ सकत हउँ? 35मई अस्सी बरिस क हउँ। मई ऐतना जियादा बुढ़वा अहउँ कि मई इ नाहीं बताइ सकत कि नीक का अहइ अउर बुरा का अहइ। मई ऐतना जियादा बुढ़वा हउँ कि मई जउन खात पिअत हउँ ओकर सुआद नाहीं लइ सकत हउँ। मई ऐतना बुढ़वा हउँ कि मनसेधुअन अउ मेहरारूअन क गावइ क अवाज भी नाहीं सुन सकत। एह बरे मोका काहे आपन सुआमी राजा बरे एक बोझा बन के जोर जाइ चाही? 36मई आप क ओर स पुरस्कार नाहीं चाहत। मई आप क संग यरदन नदी क पार करब। 37मुला, कृपा कइके मोका वापस लउट जाइ द्या। तब मई अपने नगर में मरब अउर अपने महतारी-बाप क कब्र में दफनावा जाब। मुला इ किम्हाम आप क सेवक होइ सकत ह। मोर सुआमी राजा ओका अपने संग लउटइ देई। जउन आप चाहई, ओकरे संग करई।”

38राजा जवाब दिहस, “किम्हाम मोरे संग लउटी। मई तोहरे कारण ओह पड़ दयालु रहब। मई तोहरे बरे कछू भी कइ सकत हउँ।”

### दाऊद घरे लउटत ह

39राजा बर्जिल्लै क चूमेस अउर ओका आसीबादि दिहस। बर्जिल्लै घरे लउट गवा अउर राजा सबहिं लोग क साथ नदी क पार वापस गएन।

40यरदन नदी क पार होइके पाछे, राजा गिलगाल गवा। किम्हाम ओकरे संग गवा, यहूदा क सबहिं लोग अउ आधे इस्राएल क लोग दाऊद क नदी क पार पहुँचाएन।

### इस्राएली यहूदा क लोगन स तर्क-बितर्क करत हीं

41सबहिं इस्राएली राजा क लगे आएन। उ पचे राजा स कहेन, “हमार भाई यहूदा क लोग, आप क चुराइ लइ गएन अउर आप क अउर आप क परिवार क, आप क लोगन क संग यरदन नदी क पार लइ आएन। काहे?”

42यहूदा क सबहिं लोग इस्राएलियन क जवाब दिहन, “काहेकि राजा हमारा निचके क रिस्तेदार अहइ। इ बात क बरे आप लोग हम लोगन स कोहान काहे अहई? हम लोग राजा क कीमत पड़ खइया क नाहीं खावा ह। राजा हम लोगन क कउनो भेंट नाहीं दिहस।”

43इस्राएलियन जवाब दिहन, “हम लोग दाऊद में दस भाग\* पावत अही। एह बरे हम लोगन क अधिकार दाऊद पड़ तोहसे जियादा अहइ। किन्तु तू लोग हम लोगन उपेच्छा किहा। काहे? कउन हमार राजा क सब स पहिले वापस लिआवइ क बात किहस।”

यह बरे यहूदा क लोग इस्राएल क लोगन क बड़ा गन्दा जवाब दिहन।

### सेबा दाऊद क खिलाफ बिद्रोह किहेन

20 उ जगह पड़ एक परेसानी पड़दा करइवाल बिक्री क पूत सेबा नाउँ क मनई रहा। सेबा बिन्यामीन परिवार समूह क रहा। उ तुरही बजाएस अउर कहेस,

“हम लोगन क कउनो हींसा दाऊद में नाहीं अहइ, यिसै क पूत में हम पचन क कउनो अंस नाहीं अहइ। पूरे इस्राएली, हम लोग अपने डेरन में घरे चले।”

2तब इस्राएलियन दाऊद क छोड़ दिहन, अउर बिक्री क पूत सेबा क अनुसरण किहन। किन्तु यहूदा क लोग अपने राजा क संग लगातार यरदन नदी स यरूसलेम तलक बने रहेन।

दाऊद अपने घरे यरूसलेम क आवा। दाऊद अपनी उप-पत्नियन में स दस क घरे क देखभाल क बरे छोड़े रहा। दाऊद एन मेहरारूअन क एक बिसेस घरे में रखेस। उ घरे क चारिहुँ कइँती रच्छकन राखेस। मेहरारूअन उ घरे में तब तलक रहिन जब तलक उ पचे मरी नाहीं। दाऊद ओनका भोजन दिहस, किन्तु ओनके संग सारीरिक सम्बंध नाहीं किहस। उ पचे मरइ क समइ तलक राँइ रहिन।

दाऊद में दस भाग यहूदा अउर बिन्यामीन दुई परिवार समूह रहा जउन राज क विभाजन क पाछे यहूदा क राज बन गवा। अउर दूसर दस परिवार समूह इस्राएल क राज में रहेन।

4राजा अमासा स कहस, “यहूदा क लोगन स कहा कि उ पचे मोहसे तीन दिन क भीतर मिलई, अउर तोहका भी हिआँ आवइ क होइ अउर मोरे समन्वा खड़ा होइ क होइ।”

5तब अमासा यहूदा क लोगन क एक संग बोलावइ गवा। किन्तु उ, जेतना समइ राजा दिहे रहा, ओहसे जियादा समइ लिहस।

### दाऊद अबीसै स सेवा क मारइ क कहत ह

6दाऊद अबीसै स कहस, “बिक्री क पूत सेवा हम लोगन बरे ओहसे भी जियादा खतरनाक अहइ जेतना अबसालोम रहा। एह बरे मोरे सेवकन क ल्या अउर सेवा क पाछा करा। हाली करा एसे पहिले कि उ किलाबन्द नगर में घुस जाइ अउर हम लोगन स बच के निकल जाइ।”

7योआब क मनई करेती, पलेती अउ फउजी यरूसलेम स बाहेर गएन। उ पचे बिक्री क पूत सेवा क पाछा किहन।

### योआब अमासा क मार डवत ह

8जब योआब अउर फउज गिबोन क बड़ा चट्टान तलक आइ, अमासा ओनसे मिलइ आवा। योआब अपने फउजी पोसाक में रहा। योआब पेटी बाँध रखे रहा। ओकर तरवार ओकरे म्यान में रही। 9योआब अमासा स पूछेस, “भाई, तू हर तरह कुसल स तउ अहा?”

योआब चूमइ बरे अपने दाएँ हाथ स, अमासा क ओकरी डाढ़ी क सहारे धरेस। 10अमासा उ तरवार पइ धियान नाहीं दिहेस जउन ओकरे हाथे में रही। योआब अमासा क पेट में तरवार घुसेइ दिहस अउर ओकर आँतन भुईया पइ आइ पड़िन। योआब क अमासा पइ दुबारा चोट नाहीं करइ पड़ी, उ पहिले ही मर चुका रहा।

### दाऊद क लोग सेवा क खोज में लगे रहेन

तब योआब अउ ओकर भाई अबीसै दुइनउँ बिक्री क पूत सेवा क खोज जारी किटन। 11योआब क जुवकन में स एक ठु मनई अमासा क ल्हासे क लगे खड़ा रहा। उ जुवक कहस, “हर एक मनई जउन योआब अउ दाऊद क समर्थन करत ह, ओका योआब क अनुसरण करइ चाहीं।”

12अमासा क ल्हास सड़क बीच में रहा सड़क ओकर खून स ढाँपि गवा। जुवकन लखेन कि सभी लोग ल्हास क लखइ बरे रुकत रहेन। एह बरे उ अमासा क ल्हास क लइ गवा अउर ओका मइदान में रख दिहस। तब उ अमासा क ल्हास पइ एक ठु कपड़ा डाइ दिहस। 13जब अमासा क ल्हास सड़किया स हटाइ लीन्ह गवा, सबहि लोग ओकर पीछे चलेन अउ योआब क अनुसरण किहन। उ पचे बिक्री क पूत सेवा क पाछा करइ योआब क संग गएन।

### सेबा आबेल बेतमाका क बच निकरत ह

14बिक्री क पूत सेवा सबहि इस्त्राएल क परिवार समूहन स होत भवा आबेल बेतमाका पहुँचा। सबहि बेरी लोग भी एक संग गएन अउर उ पचे सेवा क अनुसरण किहन।

15योआब अउ ओकर लोग आबेल बेतमाका आएन। योआब क फउज नगर क घेर लिहस। उ पचे नगर देवार

क सहारे माटी क ढेर लगाएन। अइसा करइ क पाछे उ पचे देवार क ऊपर चढ़ सकत रहेन। तब योआब क फउजियन ओका नीचे गिरावइ बरे देवार स पाथरन क निकालइ सुरू किहन।

16एक बुद्धिमती मेहरारू नगर क ओर स चिचिआइ। उ कहस, “मोरउ सुना। योआब क हिआँ बोलावा। मई ओहसे बात करइ चाहत हउँ।”

17योआब उ मेहरारू क लगे बात करइ गवा। उ मेहरारू पूछेस, “का तू योआब अहा?” योआब जवाब दिहस, “हाँ, मई अहउँ।”

तब उ मेहरारू योआब स कहस, “मई जउन कहउँ सुना।” योआब कहस, “मई सुनत हउँ।”

18तब उ मेहरारू कहस, “पुराने जमाने में लोग कहत रहेन, ‘आबेल में सलाह माँगा तब समस्या सुलझ जाइ।’ 19मई इस्त्राएल क राजभक्त अउ सात्ति क चहेता लोगन में स एक हउँ। तू इस्त्राएल क एक महत्वपूर्ण नगर क नस्ट करत अहा। तोहका, उ कउनो भी चीज, जउन यहोवा क अहइ, नस्ट नाहीं करइ चाहीं।”

20योआब कहस, “नाहीं, मई कछू भी नस्ट नाहीं करइ चाहत। 21मुला हुवाँ तोहार नगर में एप्रैम क पहाड़ी प्रदेश क एक ठू मनई अहइ। उ बिक्री क पूत सेवा अहइ। उ राजा दाऊद क बिरूद्ध होइ गवा ह। जदि तू ओका मोरे लगे लिआवा तउ मई नगर क सात्त छोड़ देबउँ।”

उ मेहरारू कहस, “बहोत ठीक, ओकर मँडू देवारे क ऊपर स तोहरे बरे लोकाइ दीन्ह जाइ।”

22तब उ मेहरारू बड़ी बुद्धिमानी स नगर क सबहि लोगन स बातन किहस। लोग बिक्री क पूत सेवा क मँडू काट डापन। तब लोग योआब बरे सेवा क मँडू नगर क देवार स लोकाइ दिहन। एह बरे योआब तुरुही बनाएस अउर फउज नगर क तजि दिहस। हर एक मनई अपने घरे में गवा, अउर योआब राजा क लगे यरूसलेम लउटा।

### दाऊद क सेवक लोग

23योआब इस्त्राएल क सारी फउज क नायक रहा। यहोयादा क पूत बनायाह, करेतियन अउ पलेतियन क संचालन करत रहा। 24अदोराम ओन लोगन क संचालन करत रहा जउन कठिन मेहनत करइ बरे मजबूत रहेन। अहीलूद क पूत यहोसापात इतिहासकार रहा। 25सेबा साही सचिव रहा। सादोक अउ एब्यातात याजक रहेन। 26अउर याईरी ईरा दाऊद क याजक रहा।

### साऊल क परिवार दण्डित भवा

21 दाऊद क सासन काल में भुखमरी आवा। इ लगातार तीन बरिस तलक रही। दाऊद यहोवा स पराथना किहेस। यहोवा जवाब दिहस, “इ भुखमरी क कारण साऊल अउ ओकर हत्यारा परिवार अहइ। अब भुखमरी आइ काहेकि साऊल गिबोनियन क मार डापस।” 2(गिबोनी इस्त्राएली नाहीं रहेन। उ पचे अइसे एमोरियन क समूह रहेन जउन अबहुँ तलक जिअत छोड़ दीन्ह गए रहेन। इस्त्राएलियन गिबोनियन स प्रतिग्या किहे रहेन कि उ पचे ओन क चोट

नाहीं पहुँचईहीं। किन्तु साऊल इस्राएल अउ यहूदा क लोगन क बारे में आपन भावना क कारण ओन लोगन क मारइ क जतन किहेन)

राजा दाऊद गिबोनी क एक संग बटोरेस। उ ओनसे बातन किहस। 3दाऊद गिबोनी स कहेस, “मई आप लोगन बरे का कइ सकत हउँ? मोका इस्राएलियन क पापन क हटावइ बरे का करइ चाही। जेहसे आप लोग यहोवा क लोगन क आसीबाद दइ सकई?”

4गिबोनी दाऊद स कहेस, “साऊल अउ ओकरे परिवार क लगे एतना सोना-चौदी नाहीं अहइ कि उ पचे ओका कीमत चुकाइ सकई जउन उ पचे किहेन। किन्तु हम लोगन क लगे इस्राएल क कउनो मनई क भी मारइ क अधिकार नाहीं अहइ।” दाऊद पूछेस, “किन्तु मई तोहरे बरे का कइ सकत हउँ?”

5गिबोनी दाऊद स कहेस, “साऊल हमरे खिलाफ जोजनन बनाएस। उ हमरे सबहिं लोगन क, जउन इस्राएल में रहत अहई, नस्ट करइ क जतन किहस। 6साऊल क सात पूतन क हम लोगन क सुर्पुद करा। साऊल यहोवा क चुना भवा राजा रहा। तब हम लोग ओनका साऊल क गिबा पर्वत पइ यहोवा क समन्वा फाँसी चढ़ाइ देब।”

राजा दाऊद कहेस, “मई ओन पूतन क तोहका दइ देब।” 7किन्तु राजा योनातन क पूत मपीबोसेत क रच्छा किहेस। योनातन साऊल क पूत रहा। दाऊद यहोवा क नाउँ पइ योनातन स प्रतिग्या किहे रहा। एह बरे राजा मपीबोसेत क ओनका चोट नाहीं पहोंचावइ दिहस। 8किन्तु राजा अर्मोनी अउर मपीबोसेत क जउन रिस्पा अउर साऊल क पूतन क रहेन, लिहस। रिस्पा अय्या क बिटिया रही। राजा रिस्पा क एन दुइ पूतन अउ साऊल क बिटिया मेरब क पाँचहु पूतन क लिहस। उ महोल नगर क निवासी बर्जिल्लै क पूत अद्रीएल स बियाह किहे रहेन। 9दाऊद एन सात पूतन क गिबोनियन क सुर्पुद कइ दिहस। तब गिबोनियन ओनका यहोवा क समन्वा गिबा पर्वत पइ फाँसी दइ दिहस। सबइ सातहुँ पूत एक संग मरेन। उ पचे फसल क कटनी क पहिले दिन मार डाए गएन। जौ क कटनी सुरु होइ जात रही।

### दाऊद अउ रिस्पा

10अय्या क बिटिया रिस्पा सोक क वस्त्र लिहेस अउ ओका चट्टान पइ रख दिहस। उ वस्त्र फसल क कटनी सुरु होइ स लइके जब तलक बर्खा भइ चट्टान पइ पड़ा रहा। दिन में रिस्पा अपने पूतन क लहास क अकासे क पंछियन क जरिये छुअइ नाहीं देत रही। राति क रिस्पा खेतन क जनावरन क अपने पूतन क लहासन क छुअइ नाहीं देत रही।

11लोग दाऊद क बताएन, जउन कछू साऊल क उप-पत्नी, अय्या क बिटिया रिस्पा करत रही। 12तब दाऊद साऊल अउ योनातन क अस्थियन याबेस गिलाद क लोगन स लिहस। (याबेस क मनइयन एन अस्थियन क बेतसान क सार्वजनिक चौ-राहे स चुरइ लिहे रहेन, जहाँ पलिस्तियन साऊल अउ योनातन क लहासन क लटकावा रहा।)

13दाऊद, साऊल अउ ओकर पूत योनातन क अस्थियन क याबेस गिलाद से लिआवा। तब लोग सात मनइयन क लहासन क बटोरेन, जउन फाँसी पइ चढ़ाइ दिन्ह ग रहेन। 14उ पचे साऊल अउ ओकर पूत योनातन क अस्थियन क बिन्यामीन छेत्र क, जेला जगह में दफनाएस। लोग लहासन क साऊल क बाप कीस क कब्र में दफनाएन। लोग उ सब किहेन जउन राजा आदेस दिहस। तब परमेस्सर देस क बरे कीन्ह गइ ओकर पराथना सुनेस।

### पलिस्तियन क संग जुद्ध

15पलिस्तियन इस्राएलियन क खिलाफ जुद्ध छेडेन। दाऊद अउ ओकर लोग पलिस्तियन स लड़इ गएन। किन्तु दाऊद थक गवा अउर कमजोर होइ गवा। 16यिसबोबनोब एक दैत्य\* रहा। यिसबोबनोब क भाले क वजन साढ़े सात पौण्ड रहा। यिसबोबनोब क लगे एक तु नई तरवार रही। उ दाऊद क मार डावइ क जतन किहेस। 17किन्तु सरूयाह क पूत अबीसै उ पलिस्ती क मार डाएस अउ दाऊद क जिन्नगी क बचाएस।

तब दाऊद क लोग दाऊद स प्रतिग्या किहेस। उ पचे ओहसे कहेन, “तू हम लोगन क संग भविस्स में जुद्ध करइ नाहीं जाइ सकत्या। जदि तू फुन जुद्ध में जात ह अउर मार दीन्ह जात ह तउ इस्राएल अपने सब स बड़े मार्ग दर्सक क खोइ देइ।”

18ओकरे पाछे पलिस्तियन क संग गोब में दूसर जुद्ध भवा। हूसाई सिब्वकै सप नाउँ क एक दूसर दैत्य क मार डाएस।

19तब गोब में पलिस्तियन क बिरूद्ध दूसर जुद्ध छिड़ा। यारयोरगीम क पूत एलहानान जउन बेतलेहेम क रहा, लहमी क मार डाएस जउन गात स गोल्यात क भाइ रहा। लहमी क भाला जुलाहे क छड़े क बराबर लम्बा रहा।

20गात में फुन दूसर जुद्ध सुरु भवा। हुवाँ एक बिसाल मनई रहा। उ मनई क हर एक हाथे में छः छः उँगरियन अउ हर एक गोड़े में छः छः अँगूठे रहेन। सब मिलाइके ओकर चौबीस उँगरियन अउ अँगूठे रहेन। उ मनई भी दैत्यन में स एक रहा। 21इ मनई इस्राएल क संग दलाली किहेस अउर ओनका ललकारेस। किन्तु योनातन इ मनई क मार डाएस। (योनातन दाऊद क भाई सिमी क पूत रहा।)

22इ सबइ चारिहुँ मनई दैत्य रहेन जउन गत क रहेन। उ पचे सबहिं दाऊद अउ ओकरे लोगन क जरिये मारे गएन।

### यहोवा क स्तुति बरे दाऊद क गीत

22 दाऊद यहोवा बरे इ गीत गाएस जब यहोवा ओका साऊल अउर ओकर दूसर दुस्मनन स बचाएस।

2यहोवा मोर चट्टान, मोर गढ़, मोर सरण-ठउर अहइ।

3मई परमेस्सर मोर चट्टान अहइ। मई सुरच्छा बरे एह पई दउइ सकत ही। परमेस्सर मोर ढाल अहइ। ओकर सकती

दैत्य या “रापा (रपाई)” क पूतन रहेन।

मोका बचावत ह। यहोवा मोर ऊँच गढ़ अहइ, अउर मोर सुरच्छा क जगह अहइ। मोर परमेस्सर क्रूर दुस्मन स मोर रच्छा करत ह।

4यहोवा जउन अराधना क योग्य अहा! मई मदद बरे यहोवा क गोहराएउँ। यहोवा मोका मोरे दुस्मन स बचाएस ह।

5मोर दुस्मन मोका मारइ चाहत रहेन। मउत-तरंगन मोका लपेट लिहन। मई बाढ़ दुआरा पकड़ लीन्ह गवा रहा जउन मोका मृत्यु क जगह परई लइ जात रहा ह।

6कब्र क लसुरियन मोरे चारिहूँ ओर लिपटिन, मई मउत क जालि में फँसेउँ।

7मई बिपति में रहा, किन्तु मई यहोवा क गोहराएउँ। हाँ, मई अपने परमेस्सर क गोहराएउँ, उ अपने उपासना-घरे में रहा, उ मोर पुकार सुनेस, मोर मदद क पुकार ओकरे काने में पड़ी।

8तब धरती में काँप भइ, धरती डोल उठी, अकासे क नीव काँप उठेन। काहे? काहेकि यहोवा कोहान रहा।

9ओकरी नाक स धुआँ निकरा, ओकरे मुँह स आग क सोला छिटकिन, ओहसे दहकत अंगारन निकरि पड़ेन।

10यहोवा अकासे क फाड़िके खोल डाएस, अउर खाले आवा। उ सघन करिया मेघ पइ खड़ा भवा।

11यहोवा करूब दूत पइ बइठा, अउर उड़ा, उ हवा क पंखन पइ चढ़िके उड़ गवा।

12यहोवा तम्बू क जइसा करिया मेघन क अपने चारिहूँ कइँती लपेट लिहस। उ सघन मेघन में जल जमा किहेस।

13ओकर तेज एतना प्रखर रहा, माना बिजुरी क चमक हुँवई स आई होइ।

14यहोवा गगन स गरजा। परमेस्सर, बहोत ऊँचा, बोला।

15यहोवा बाण स दुस्मनन क बिखराएस, यहोवा बिजुरी पठाएस, अउर लोग भय स भागेन।

16यहोवा तू जोर स बोलेस अउर जोरदार हवा तोहार नाथुन स निकलेस। ऐह बरे हुआँ धरती क नेंव अउ सागर क तल सबइ क लखइ बरे प्रदर्सित कीन्ह गवा रहेन।

17यहोवा गगन स खाले पहोंचा, यहोवा मोका धइ लिहस, उ मोका गहरे जल (बिपति) स निकार लिहस।

18उ ओन लोगन स बचाएस, जउन घिना करत रहेन, मोहसे मोर दुस्मन मोहसे जियादा ताकतवर रहेन, एह बरे उ मोर रच्छा किहस।

19मई बिपति में रहा, जब मोरे दुस्मनन क मोह पइ हमला भवा, किन्तु मोर यहोवा मोर मदद किहस।

20यहोवा मोका सुरच्छा में लइ आवा, उ मोर रच्छा किहस, काहेकि उ मोहसे पिरिम करत ह।

21यहोवा इमानदारी क अनुसार मोका पुरस्कार देत ह। यहोवा मोका पुरस्कार देत ह काहेकि मोर हाथ पाप रहित अहई।

22काहे? काहेकि मई यहोवा क नेमन क पालन किहेउँ। मई अपने परमेस्सर क खिलाफ पाप नहीं किहेउँ।

23मई सदा याद करत हउँ यहोवा क निर्णय, मई ओकरे नेमन क मानत हउँ।

24यहोवा जानत ह-मई अपराधी नहीं अहउँ, मई अपने क पापन स दूर रखत हउँ।

25इहइ कारण अहइ कि यहोवा मोका मोर ईमानदारी क अनुसार पुरस्कार देत ह, मई निआव में उचित रहत हउँ। यहोवा लखत ह, कि मई स्वच्छ जिन्नगी बितावत हउँ।

26जदि कउनो मनई तोहसे पिरिम करी तउ तू आपन पिरिम स पूर्ण दाया ओह पइ करब्या। जदि कउनो तोहरे बरे सच्चा अहइ, तब तू भी ओकरे बरे सच्चा होब्या।

27जदि कउनो तोहरे बरे अच्छी जिन्नगी बितावत ह, तब तू ओकरे बरे अच्छा बनब्या। किन्तु जदि कउनो मनई तोहरे खिलाफ होत ह, तब तू भी ओकरे बिरुद्ध होब्या।

28तू बिनम्र लोगन मदद करत ह। किन्तु तू घमण्डी लोगन क अपमानित करत ह।

29यहोवा तू मोर दीपक अहा, यहोवा मोरे चारिहूँ ओर क अँधेरे क प्रकास में बदलत ह।

30तू फउजिन क दल क हराबइ में मोर मदद करत ह। परमेस्सर क सक्ती स मई देवार क ऊपर चढ़ सकत हउँ।

31परमेस्सर क सक्ती पूर्ण अहइ। यहोवा क बचन क जाँच होइ चुकी अहइ। यहोवा रच्छा बरे, अपने लगे पराइवाले हर मनई क ढाल अहइ।

32यहोवा क अलावा कउनो दूसर परमेस्सर नहीं, हमरे परमेस्सर क अलावा दूसर कउनो आस्रय-सिला नहीं।

33परमेस्सर मोर मजबूत गढ़ अहइ। उ सुद्ध आतिमन क ओकर राह पइ रहइ बरे मदद करत ह।

34यहोवा मोरे गोड़न क हिरन क गोड़न-स तेज बनावत ह, उ उच्च ठउरन पइ मोका मजबूत करत ह।

35यहोवा मोका जुद्ध बरे सिच्छा देत ह। अउर मोर भुजा पीतर क धनुस क चलाइ सकत हीं।

36परमेस्सर तू मोर रच्छा करत ह अउर जीत में मोर मदद करत ह। तू दुस्मन क हराइ बरे मोर मदद किहेस ह।

37मोर गोड़न अउ टखनन क मजबूत करा, जेहसे मोर गोड़ फिसलइ नहीं।

38मई अपने दुस्मनन क पाछा, ओनका नस्ट करइ तलक किहेउँ। मई तब तलक नहीं लउट सकत हउँ, जब तलक दुस्मन नस्ट नहीं भएन।

39मई अपने दुस्मनन क नस्ट किहेउँ ह, मई ओनका पूरी तरह नस्ट किहेउँ ह, उ पचे फुन उठ नहीं सकतेन, हाँ मोर दुस्मन मोरे गोड़न क तले गिरेन।

40परमेस्सर तू मोका जुद्ध बरे, ताकतवर बनाया। तू मोरे दुस्मनन क हराया ह।

41तू मोरे दुस्मनन क भगाया ह, एह बरे मई ओन लोगन क हराइ सकत हउँ, जउन मोहसे घिना करत हीं।

42मोर दुस्मनन मदद बरे लखेन, किन्तु ओनकर रच्छक कउनो नहीं रहा। उ पचे यहोवा स मदद माँगेन, मुला उ ओनका जवाब नहीं दिहस।

43मई अपने दुस्मनन क कूटिके टूकन-टूकन करत हउँ, उ पचे भुइँया पइ धूरि स होइ जात हीं। मई ओनका सड़क क कीच क तरह रौंद दिहेउँ।

44तू तब मोका उ लोगन स बचाएस ह जउन मोरे बिरुद्ध लड़ाई किहना। तू मोका रास्ट्रन क सासक बनाए रख्या। लोग मोर सेवा करिहीं, जेनका मई अबहुँ तलक नहीं जानत हउँ।

45दूसर भूईया क लोग मोर आग्या मानत हीं, जइसे ही सुनत हीं, तउ हाली ही मोर आग्या मानत हीं।

46दूसर देसन क लोग भयभीत होइहीं, उ पचे अपने छिपइ क जगहियन स भय स काँपत निकरिहीं।

47यहोवा जीवित अहइ। मई आपन चट्टान क स्तुति करत हउँ। परमेस्सर महान अहइ, उ चट्टान अहइ जउन मोर रच्छा करत ह।

48उ परमेस्सर अहइ, जउन मोरे दुस्मनन क मोरे बरे सजा देत ह। उ लोगन क मोरे अधीन करत ह।

49यहोवा तू मोका मोरे दुस्मनन स बचाएस ह। हौं, तू उ लोगन क हराइ मँ मदद किहेस ह जउन मोरे खिलाफ उठेस। तू मोका क्रूर लोगन स बचाएस ह।

50हे यहोवा, इहइ कारण अहइ कि मई रास्ट्रन क बीच मँ तोहका धन्यवाद दिहेउँ, इहइ कारण अहइ कि मई तोरे नाउँ क स्तुति गीत गावत हउँ।

51यहोवा अपने राजा क मदद, बहोत स जुद्ध मँ बिजय पावइ मँ करत ह, यहोवा अपने अभिसिक्त भवा राजा पइ सच्चा पिरेम अउ दया दिखावत ह। उ दाऊद अउ ओकर सन्तान पइ सदा दयालु रहब।

### दाऊद क आखिरी सब्द

**23** इ सबइ यिसै क पूत दाऊद क अन्तिम सब्द अहइँ, दाऊद इ गीत गाएस:

इ सँदिस उ मनई स रही जेका परमेस्सर महान बनाएस, उ याकूब क परमेस्सर क जरिये चुना गवा राजा अहइ, उ इस्राएल क प्रिय गायक अहइ।

2यहोवा क आतिमा मोरे माध्यम स बोलेस। ओकर सब्द मोरी जीभ पइ रहेन।

3इस्राएल क परमेस्सर बातन किहन। इस्राएल क आस्रय, चट्टान मोहसे कहेस, “उ मनई जउन लोगन पइ निआउपूर्ण सासन करत ह, उ मनई जउन परमेस्सर क सम्मान दइके हुकूमत करत ह।

4उ भिसारे क प्रकास क नाई होइ; उ मनई मेघहीन सबेरे क तरह होइ, उ मनई उ बर्खा के बाद धूप क नाई होइ; बर्खा जउन भुईया मँ कोमर घास उगावत ह।”

5परमेस्सर मोरे परिवार क ताकतवर बनाए रहा। परमेस्सर मोरे संग सदा ही क बरे एक तु वाचा किहेस, परमेस्सर मोर संग इ हमेसा रहइवालन करार क सच्चा अउर सुरच्छित बनाएस ह। एह बरे उ मोका हर बिजय दिलाउव्या। उ मोर सबइ इच्छा क पूरा करब।

6मुला सबहिं बुरे मनई काँटन क तरह अहइँ। लोग काँटन क नाहीं पकड़ कइ नाहीं रखतेन, उ पचे ओनका दूर लोकाइ देत हीं।

7जदि कउनो मनई ओनका छुअत ह, तउ उ पचे भाले क दण्ड क तरह चुभत हीं जउन काठे अउ लोहा स बना होइ। उ पचे ओन काँटन क तरह होइहीं। उ पचे आगी मँ झोक दीन्ह जइहीं, अउर उ पचे पूरी तरह भस्म होइ जइहीं।

### तीन महाजोधा

8दाऊद क फउजियन क नाउँ इ सबइ अहइँ: तहकमोनी

क रहइवाला योसेव्यस्सेबेत। योसेव्यस्सेबेत राजा क बिसेस सैनिकन क प्रमुख रहा। योसेव्यस्सेबेत एक दाई मँ आठ सौ मनइयन क मारे रहा।

9ओह स अगला अहोही स दौदे क पूत एलीआजर रहा। एलीआजर ओन तीन बहादुरन मँ स एक रहा, जउन दाऊद क संग उ समइ रहेन जब उ पचे पलिस्तियन क चुनौती दिहे रहेन। पलिस्तियन एक संग जुद्ध बरे तब आए रहेन, किन्तु इस्राएली फउज भाग गए रहेन। 10एलीआजर पलिस्तियन क संग तब तलक लड़त रहा जब तलक उ बहोत थक नाहीं गवा। किन्तु उ अपनी तरवार क मजबूते स धरे रहा अउर जुद्ध करत रहा। उ दिन यहोवा इस्राएलियन क बड़की बिजय दिहस। लोग तब आएन जब एलीआजर जुद्ध जीत चुका रहा। किन्तु उ पचे सिरिफ मृत फउजन स अस्त्र-सस्त्र अउ कवचन लेइ बरे आएन।

11ओकरे बाद हरार क रहइवाला आगे क पूत सम्मा रहा। पलिस्ती एक संग मसूर क खेत मँ लड़इ बरे आए रहेन। लोग पलिस्तियन क समन्वा स पराइ गए रहेन। 12सम्मा खेते क बीच खड़ा रहा। उ ओकर रच्छा किहेस अउर पलिस्तियन क हराइ डाएस। उ समइ यहोवा बड़की बिजय दिहस।

13एक दाई जब दाऊद अदुल्लाम क गुफा मँ रहा। तीस जोधन मँ स तीन दाऊद क लगे आएन। इ सबइ तीनहुँ मनई अदुल्लाम क गुफा तलक रेगंत भए दाऊद क लगे आएन। पलिस्ती फउज आपन डेरा रपाईम क घाटी मँ डाए रही।

14उ समइ दाऊद किले मँ रहा। पलिस्तियन क एक फउज टुकरी बेतलेहेम मँ रहेन। 15दाऊद क बड़ी इच्छा रही कि ओका गृह-नगर क पानी मिलइ। दाऊद कहेस, “ओह, मई चाहत हउँ कि कउनो मनई बेतलेहेम क नगर-दुआर क लगे क कुएँ क पानी मोका देइ।”

16किन्तु तीनहुँ जोधा पलिस्ती फउज क संग लड़त भए आपन मारग स निकल गएन। एन तीनहुँ बहादुरन बेतलेहेम क नगर-दुआर क निचके क कुएँ स पानी निकारेन। तब तीनहुँ बहादुर दाऊद क लगे पानी लइके आएन। किन्तु दाऊद पानी पिअइ स इन्कार कइ दिहस। उ यहोवा क समन्वा ओका भेंटन क रूप मँ भुईया पइ डाइ दिहस। 17दाऊद कहेस, “यहोवा, मई एका पी नाहीं सक्तेउँ। इ ओन मनइयन क खून पिअइ जइसा होइ जउन अपनी जिन्नगी क मोरे बरे खतरे मँ डाएन।” इहइ कारण रहा कि दाऊद उ पानी पिअब अस्वीकार किहस। एन तीनहुँ जोधन उ तरह क अनेक कारज किहेन।

### दूसर बहादुर फउजी

18सरूयाह क पूत, योआब क भाई अबीसै तीनहुँ जोधन क प्रमुख रहा। अबीसै अपने भाले क उपयोग तीन सौ दुस्मनन पइ किहस अउर ओनका मार डाएस। उ एँतना ही प्रसिद्ध भवा कि जेतने तीन तु जोधा। 19अबीसै बाकी तीन जोधन स जियादा सम्मान पाएस। उ ओनकर प्रमुख होइ गवा, यद्यपि उ ओन मँ स एक नाहीं रहा।



20यहोयादा क पूत बनायाह एक रहा। उ ताकतवर मनई क पूत रहा। उ कबसेल क निवासी रहा। बनायाह अनेक बहादुरी क काम किहस। बनायाह मोआब क अरियल क दुई उत्तम फउजियन क मार डाएस। जब बर्फ गिरत रही, बनायाह एक तु गड़हे में खाले गवा अउर एक तु सेर क मार डाएस। 21बनायाह एक तु मिस्त्री क मारेस जउन ताकतवर जोधा रहा। मिस्त्री क हाथे में एक तु भाला रहा। किन्तु बनायाह क हाथे में एक तु लाठी रही। बनायाह मिस्त्री क हाथे क भाले क धड़ लिहस अउर ओहसे छोर लिहस। तब बनायाह मिस्त्री क भाले स मिस्त्री क मार डाएस। 22यहोयादा क पूत बनायाह उ तरह क अनेक काम किहसे। बनायाह तीन बहादुरन क जइसा प्रसिद्ध रहा। 23बनायाह क तीन जोधन स भी अधिक सम्मान पाएस, किन्तु उ तीन जोधन में स नहीं रहा। बनायाह क दाऊद अपने रच्छकन क प्रमुख बनाएस।

### तीस महाजोधा

24तीस जोधन में स एक तु योआब क भाई असाहेल रहा। तीस जोधन क समूह में स दूसर मनई इ सबइ रहेन: बेतलेहेम क दोबो क पूत एल्हानन; 25हेरोदी सम्मा, हेरोदी एलीका, 26पेलेती हेलेस, तकोई इक्केस क पूत इरा; 27अनातोती क एबीएजेर; हूसई मबुनै; 28अहोही सल्मोन, नतोपाही महरै; 29नतोपाही क बाना क पूत हेलेब, बिन्यामीनी गिबा क रीबै क पूत हुतै; 30पिरातोनी बनायाह, गास क नालों क हिद्दै; 31अराबाई अबीअल्बोन, बहूरीमी अजमावेत; 32सालबोनी एल्याहबा, यासेन क पूतन; 33हरारी सम्मा क पूत योनातान, हरारी सारार क पूत अहीआम; 34माकाई अहसबै क पूत एलीपेलेप्त, गीलोई अहीतोपेल क पूत एलीआम; 35कम्मेली हेस्त्रो, अराबी पारै; 36सोबाई क नातान क पूत यिगाल, गादी बानी; 37अम्मोनी सेलेक, बेरोती क नहरै; (नहरै सरूयाह क पूत योआब क कवच लइ जात रहा); 38येतेरी ईरा, येतेरी गारेब; 39अउर हिती ऊरिव्याह सब मिलाइके इ सबइ सैंतीस रहेन।

### दाऊद अपनी फउज क गनइ चाहत ह

24 यहोवा फुन इस्राएल क बिरुद्ध कोहाइ गवा। उ दाऊद क इस्राएलियन क बिरुद्ध इ कहत भवा भड़काएस, “जा, इस्राएल अउर यहूदा क लोगन क गना।”

2राजा दाऊद फउज क सेनापति योआब स कहेस, “इस्राएल क सबहि परिवार समूहन में दान स बेसेबा तलक जा, अउर लोगन क गना। तब मई जान सकब कि हुवों केतने मनइयन अहई।”

अकिन्तु योआब राजा स कहेस, “यहोवा तोहार परमेस्सर आप क सौ गुना लोग स आसिस देइ अउर आप क आँखिन इ घटित भवा लिख सकई। किन्तु आप इ काहे करइ चाहत हीं?”

4राजा दाऊद मजबूती स योआब अउ फउज क सैनापितयन क लोगन क गणना करइ क आदेस दिहस। एह बरे योआब अउ फउज क सैनापितयन दाऊद क हिआँ स इस्राएल क लोगन क गनइ गएन। 5उ पचे यरदन नदी क

पार किहेन। उ पचे आपन डेरा अरोएर में डाएन। ओनकर डेरा नगर क दाहिनी ओर रहा। (इ नगर गाद क घाटी क बीच में याजेर जाइ क रस्ता में रहा)

6तब उ पचे तहतीम्होदसी क भुईया क सारे रास्ता स होइके गिलाद क गएन। उ पचे दान्यान अउ सीदोन क चारिहुँ ओर गएन। 7उ पचे सोर क किला क गएन। उ पचे हिब्वियन अउ कनानियन क सबहि नगरन क गएन। उ पचे दक्खिनी यहूदा में बेसेबा क गएन। 8उ पचे समूचे भुईया क भ्रमण कइ चुके रहेन। उ पचे नौ महीने बीस दिन बाद यरूसलेम आएन।

9योआब लोगन क सूची राजा क दिहस। इस्राएल में आठ लाख मनई रहेन जउन तरवार भाँज सकत रहेन अउर यहूदा में पाच लाख मनई रहेन।

### यहोवा दाऊद क दण्ड देत ह

10तब दाऊद क अन्तरात्मा गनती करइ क पाछे ओका परीसान कइ सुरू किहसे। दाऊद यहोवा स कहेस, “मई इ कार्य कइके बहोत घोर अपराध किहेउँ। यहोवा, मई पराथना करत हउँ कि तू मोरे पाप क छिमा करा। मई बड़की बेवकूफी किहेउँ ह।”

11जब दाऊद भिंसारे उठा, यहोवा क सँदिसा गाद नवी क मिला जउन दाऊद क द्रस्टा रहा। 12यहोवा गाद स कहेस, “जा, अउर दाऊद स कहा, ‘यहोवा जउन कहत ह उ इ अहइ। मई तोहका तीन बिकल्प देत हउँ। ओनमाँ स एक क चुना जेका मई तोहरे बरे करउँ।”

13गाद दाऊद क लगे गवा अउर उ बातन किहस। गाद दाऊद स कहेस, “तीन में स एक क चुना:

1. तोहरे बरे अउर तोहरे देस क बरे सात बरिस क भुखमरी।
2. तोहार दुस्मन तोहार पाछा तीन महीने तलक करई।
3. तोहरे देस में तीन दिन तलक बीमारी फइलइ।

एकरे बारे में सोचा अउर निर्णय करा कि मई एन में स यहोवा जउन मोका पठाएस ह, क कउन स चीज बतावउँ।”

14दाऊद गाद स कहेस, “मई फुरइ परेसानी में हउँ। किन्तु एह बरे यहोवा क मोका सज़ा देइ द्या उ बहोत दयालु अहइ। मोका मनइयन स दण्डित जिन होइ द्या।”

15एह बरे यहोवा इस्राएल में महामारी पठाएस। इ भिंसारे सुरू भइ अउर इ तब तलक रहा जब तलक उ चाहेस। दान स बेसेबा तलक सत्तर हजार लोग मर गएन। 16सरगदूत आपन बाँह यरूसलेम कइँती ओका नस्त करइ बरे उठाएन। किन्तु जउन बुरी बातन भइन ओनके बरे यहोवा बहोत उदास भवा। यहोवा उ सरगदूत स कहेस कउन लोगन क नस्त करत ह, “बहोत होइ चुका। अपनी बाँह नीचे करा।” यहोवा क सरगदूत यबूसी यरौना क खरिहाने स किनारे रहा।

### दाऊद अरौना क खरिहाने क बेसहत ह

17दाऊद उ सरगदूत क लखेस जउन लोगन क मारेस। दाऊद यहोवा स बातन किहस। दाऊद कहेस, “मई पाप

किहेउँ ह। मई गलत किहेउँ ह। किन्तु इ लोग मोर अनुसरण भेड़ी क नाई किहन। उ पचे कउनो गलती नाहीं किहन। कृपा कइके सजा मोका अउर मोरे बाप क परिवार क द्या।”

18उ दिन गाद दाऊद क लगे आवा। गाद दाऊद स कहेस, “जा अउर एक वेदी यबूसी अरौना क खरिहान में यहोवा बरे बनावा।” 19तब दाऊद उ सबइ काम किहेस जउन गाद करइ क कहेस। दाऊद यहोवा क आदेसन क पालन किहस। दाऊद अरौना स भेंटइ गवा। 20जब अरौना निगाह उठाएस, उ राजा दाऊद अउर ओकरे सेवकन क अपने लगे आवत लखेस। अरौना बाहेर निकरा अउ आपन माथा धरती पइ टेकत भए प्रणाम किहेस। 21अरौना कहेस, “मोर सुआमी, राजा, तू आपन सेवक क लगे काहे आया ह?” दाऊद जवाब दिहस, “तोहसे खरिहान बेसहइ बरे। तब मई यहोवा बरे वेदी बनाइ सकत हउँ। तब बेमारी रुक जाइ।”

22अरौना दाऊद स कहेस, “मोर सुआमी राजा, आप कछू भी बलि-भेंट क बरे लइ सकत हीं। हिवाँ कछू गइयन सबइ होमबलि बरे अहइँ। आगी क काठ बरे दैवरी क औजार अउ बर्धन क जुआ भी अहइ। 23हे राजा! मई आप क हर एक चीज देत हउँ।” अरौना राजा स इ भी कहेस, “यहोवा तोहार परमेस्सर तोह पइ खुस होइ।”

24मुला राजा अरौना स कहेस, “नाहीं। मई तोहसे फुरइ कहत हउँ, मई तोहसे भुइँया क ओकरी कीमत पइ बेसहब। मई यहोवा अपने परमेस्सर क कछू भी अइसी होमबलि नाहीं चढ़ाउब जेकर कउनो मूल्य मई नाहीं दिहे होउँ।”

एह बरे दाऊद खरिहान अउ गइयन क चाँदी क पचास सेकेल स बेसहेस।

25तब दाऊद हुवाँ यहोवा क बरे एक तु वेदी बनाएस। दाऊद होमबलि अउ मेलबलि चढ़ाएस।

यहोवा देस बरे ओकर पराथना अंगीकार किहस। यहोवा इन्नाएल में बेरामी रोक दिहस।

# पहिला समूएल

## एल्काना अउ ओकर परिवार सीलो में आराधना करत ह

1 एल्काना नाउँ क एक मनई रहा। उ एप्रैम क पहाड़ी पहाँटा क रामातैसोपीम क बसइया रहा। एल्काना जुफ परिवार स रहा। एल्काना यरोहाम क पूत रहा। यरोहाम एलीहू क पूत रहा। एलीहू तोहू क पूत रहा। अउर तोहू सूप क पूत रहा जउन एप्रैम क परिवार कबीला स रहा।

2एल्काना क दुइ मेहरारू रहीं। एक क नाउँ हन्ना रहा अउ दूसरी क नाउँ पनिन्ना रहा। पनिन्ना लड़कोर रहिन, मुला हन्ना क कउनो अउलाद नाहीं रही।

3एल्काना हर बरिस आपन सहर रामातैसोपीम क तजि देत रहा अउ सीलो नगर जात रहा। एल्काना सर्वसक्तीमान यहोवा क आराधना सीलो में करत रहा अउ हुवाँ यहोवा क बलि भेंट\* चढ़ावत रहा। सीलो उ जगह रही जहाँ होपनी अउ पीनहास यहोवा क याजक क तरह सेवा करत रहेन। होपनी अउ पीनहास एली क पूत रहेन। 4जब कबहुँ एल्काना आपन बलि भेंट चढ़ावत रहा, उ गोस क एक हीसा आपन मेहरारू पनिन्ना क देत रहा। एल्काना गोस क भाग पनिन्ना क लरिकन क भी देत रहा। 5एल्काना गोस क हीसा क बराबर हन्ना क भी हमेसा दइ देत रहा। एल्काना इ तब भी करत रहा जब यहोवा हन्ना क कउनो अउलाद नाहीं दिहे रहेन। एल्काना इ ऐह बरे करत रहा कि हन्ना ओकर इ मेहरारू रही जेसे उ सच्चा पियेम करत रहा।

## पनिन्ना हन्ना क परेसान करत रही

6पनिन्ना हन्ना क हमेसा चिढ़ाइके खिसियावत रही अउ ओका परेसान करत रही। पनिन्ना इ ऐह बरे करत रही काहेकि हन्ना कउनो बच्चा क कोख स पइदा नाहीं कइ सकत रही। 7हर बरिस जब ओकर परिवार सीलो में यहोवा क घरे में जात पनिन्ना हन्ना क परेसान करत अउर उ रोवत अउर कछू भी नाहीं खावत। 8ओकर भतार, एल्काना, उ से कहेस, “हन्ना, तू काहे रोवति अहा? तू काहे नाहीं खाइया? तू दुःखी काहे अहा? का मई तोहार बरे दस बेटवन स बेहतर नाहीं अहइ?”

## हन्ना क बिनती

9खाए अउ पिए क पाछे हन्ना चुपचाप उठी अउ यहोवा स पराथना करइ गइ। यहोवा क पवितर आराधनालय क दुआरे क निअरे कुर्सी प याजक एलि बइठा रहा। 10हन्ना बहोत दुखी रही। उ फूट-फूट कर रोवत रही। उ यहोवा स बिनती करेस। 11उ परमेस्सर स खास प्रतिग्या किहेस। उ

**यहोवा क बलि भेंट** इ खास जनावर होत रहा अउ मारा जात रहा अउ वेदी प अक्सर चढ़ावत जात रहा।

कहेस, “सर्वसक्तीमान यहोवा, लखा मई केतना जिआदा दुखी हउँ। मोका याद राखा। मोका बिसरा नाहीं। जदि आप मोका एक पूत देब्या तउ मई पूरी जिन्नगी भइ ओका आपका अर्पण कइ देब। उ नाज़ीर होइ जाब। उ दाखरस या कउनो नसीला दाखरस न पिइ। अउ कउनो ओकर बार नाहीं काटी।”

12जब तलक हन्ना यहोवा क समन्वा आराधना करत रही, एली ओकर मुँह निहारत रहेस। 13हन्ना हिरदय स बिनती करत रही। ओकर ओठ हीलत रहेन, मुला कउनो अवाज नाहीं निकरत रही। एली समझेस कि हन्ना दाखरसे स मदमस्त बा। 14एली हन्ना स कहेस, “तोहरे लगे पिअइ क बहोत जियादा रहा। अब समइ आ गवा कि दाखरस पिअइ छोड़ देइ चाही।”

15हन्ना जवाब दिहेस, “मई सराब या जौ क दाखरस नाहीं पिअँ ह। मई बहोत जिआदा मसीबत म अहउँ। मई यहोवा क आपन सब समस्या क बतावत रहेउँ ह। 16जिन सोचा कि मई बुरी अउरत हउँ। मई ऐतनी देर ताई ऐह बरे पराथना करत रहेउँ ह कि मोका ढेर परेसानी अहइ अउ मई जिआदा दुखी अहउँ।”

17एली जवाब दिहेस, “सान्ति स जा। इस्त्राएल क परमेस्सर तोहका उ देई जउन तू मांग्या ह।”

18हन्ना कहेस, “मोका आसा अहइ कि आप मोसे खुस अहइँ।” तब्बइ हन्ना गइ अउ तनिक खाएस। उ अब तनिकउ दुखी नाहीं रही।

19दूसर दिन भिन्सारे एल्काना क परिवार उठा। उ सबइ परमेस्सर क आराधना किहेन अउर उ पचे आपन घर रामा क लउटि आएन।

## समूएल क जन्म

एल्काना आपन मेहरारू क लगे सोएस। यहोवा हन्ना क याद राखेस। 20तब उस समइ निम्नलिखित साल में हन्ना गोइ स भारी भइ अउ ओसे एक बेटवा भवा। हन्ना ओकर नाउँ समूएल राखेस। उ कहेस, “एकर नाउँ समूएल अहइ काहेकि मई एक यहोवा स माँगा ह।”

21उ बरिस एल्काना बलि भेंट देइ अउ परमेस्सर क समन्वा कीन्ह गइ प्रण क पूरा करइ सीलो गवा। उ आपन परिवारे क आपन संग लइ गवा ह। 22मुला हन्ना नाहीं गइ। उ एल्काना स कहेस, “जब लरिका कछू ठोस चीज खाइ लागी तबहिं मई ऐका सीलो लइ जाब। मई ओका यहोवा क देब। उ एक नाज़ीर बनी। उ सीलो में रही।”

23हन्ना क भतार एल्काना ओसे कहेस, “उहइ कर जउन तू उत्तिम समझत ह। तू तब ताई घर में रहि सकत ह जब

तलक लरिका कछू ठोस खइया क खाइ के जोगगा बाढ़ नहीं जात। जउन तू कह्या ह यहोवा उहइ करई।” एँह बरे आपन बचवा क पालब पोसब बरे तब ताई घरे प रहि गइ जब ताई उ ठोस खइया क खाइ बरे बाढ़ नहीं जात।

### हन्ना समूह क सीलो में एली क लगे लइ जात ह

24जब लरिका ठोस खइया खाइ बरे बाढ़ गवा तब हन्ना सीलो में यहोवा क आराधनालय लइ गइ। हन्ना आपन संग तीन बरिस क एक बछवा, बीस पौण्ड आटा अउ एक मसक दाखरस भी लइ गइ।

25उ पचे यहोवा क समन्वा गएन। एल्काना यहोवा क बलि क रुप में, जइसा उ अक्सर करत रहा, बर्धा क मारेस। तबहिं हन्ना बचवा क एली क लगे लइ गइ। 26हन्ना एली स कहेस, “महोदय, छिमा करई। मई उहइ मेहरारु हउँ जउन परमेस्सर क पराथना करत आप क बगल में खड़ी रही। मई बचन दिए रहेउँ कि मई फुरइ कहत हउँ। 27मई इ बचवा बरे पराथना किहे रहेउँ। यहोवा मोका इ बचवा दिहेस ह। 28अउर अब मई इ बचवा क यहोवा क दइ देत हउँ। इ पूरी जिन्नगी यहोवा क रही।” तबहिं हन्ना बचवा क उहई छोड़ेस अउ यहोवा क आराधना किहेस।

### हन्ना धनवादे देत ह

2 हन्ना कहेस, “यहोवा में, मोर हिरदइ खुस अहइ। मई आपन परमेस्सर में जिआदा सक्ती\* पावत हउँ। मई आपन दुस्मनन क हराइ दिहउँ ह मई आपन जीत स खूब खुस हउँ।\* मई आपन दुस्मनन प हसेउँ ह।

2“कउनो अइसा नहीं अहइ जउन यहोवा क नाई पवितर अहइ। तोहार अलावा कउनो परमेस्सर नहीं। हम लोगन क परमेस्सर क नाई कउनो चट्टान नहीं अहइ।

3बन्द कइ द्या डींग मारब, घमण्ड भरी बात जिन करा। काहेकी यहोवा परमेस्सर अहइ सब कछु जानत ह। परमेस्सर मनइयन क रह देखौवत ह अउ ओनकइ निआव करत ह।

4सक्तीसाली जोधा क धनुस टूटत हीं, अउ दुर्बल सक्तीसाली बनत हीं।

5जउन लोगन क पास पाछे टेमें में खाइ बरे ढेर क खइया रहेन अब ओका रोटी प्राप्त करइ बरे काम करइ क होइ। मुला जउन लोग बीत गवा टेमें में भूखा रहेन, अब ओका देर तलक भूखा नहीं रहइ क होइ। मेहरारु जउन बच्चा क पइदा नहीं कइ सकत रहेन, अब सात गदेलन की में अहई। मुला जेकर पास ढेर गदेलन रहेन उ दुःखी अहइ काहेकि उ पचे अब मरि गएन।

6यहोवा लोगन क मउत देत ह, अउ उ ओन सब क जिआवत ह। यहोवा लोगन क नरके में पठवत ह, अउर उ फुन स ओन सब क ऊपर उठावत ह।

**सक्ती** यहोवा क उपासना में मोर सींग उठा बाटइ।” सींग क अरथ सक्ती अहइ।

**मई आपन ... खुस हउँ** साब्दिक अरथ दुस्मनन “मोर मुँहना दुस्मनन प खुला बाटइ।”

7यहोवा मनइयन क दीन बनवत ह, अउ उहइ मनइयन क धनी बनवत ह। यहोवा मनइयन क विनम्र बनवत ह, अउ उ मनइयन क बड़कवा बनावत ह।

8यहोवा गरीबन क धूरि स उठावत ह। यहोवा गरीबन क दुखे स उबारत ह। यहोवा गरीबन क राजा क संग बइठावत ह। उ गरीबन क खास मनई बनवत ह अउ उ ओनका मान्य मेहमान बनवत ह। यहोवा समूचइ दुनिया क रचेस ह। उ सारे जग क खंभा प टेकाएस ह।

9यहोवा आपन पवितर लोगन क रच्छा करत ह। उ ओनका ठोकर खाई स बचावत ह। मुला पापी मनइयन क नास कइ दीन्ह जाई। उ पचे घनघोर अँधियारे में भरइहीं। ओकर सक्ती ओकर विजय प्राप्त करइ में मददगार नहीं होइ।

10यहोवा आपन दुस्मनन क नास करत ह। सर्वोच्च परमेस्सर अकास में लोगन क खिलाफ गरजब। यहोवा जमीन क छोर ताई निआव करिहीं। उ आपन राजा क सक्ती देइहीं। उ आपन राजा क बरिआर करी।”

11एल्काना अउ ओकर परिवार आपन घरे रमा क गएन। लरिका सीलो में रहि गवा अउ याजक एली क मातहत होइके यहोवा क सेवा करत रहा।

### एली क पापी बेटवा

12एली क दुइ बेटवन बुरा मनई रहेन। उ पचे यहोवा क परवाह नहीं करत रहेन। 13उ पचे एकर परवाह नहीं करत रहेन कि याजकन स मनइयन बरे कइसे ब्योहार क आसा कीन्ह जात ह। याजकन क मनइयन बरे इ करइ क चाही। जब कबहुँ कउनो मनई बलि भेंट लइ आवत ह तउ याजकन क एक बासन में मौस क खउलत पानी में बुलकावइ चाही। याजक क सेवक बरे आपन हाथे में खास काँटा लइके आवइ चाही। काँटा में तीन नोक होइ चाही। 14याजक क सेवक क काँटा क बासन या कतली में नावइ चाही। काँटा जउन कछू बासन क बाहेर लइ आवइ उ मौस याजकन क होइ। इ अहइ जउन याजकन क जरिए उ इस्त्राएलियन बरे कीन्ह जाइ चाही जउन सीलो में बलि भेंट करइ आवई।

15मुला एली क बेटवन इ नहीं किहेन। चर्बी क वेदी प जराई जाइ स पहिले भी ओनकइ बेटवन उ लोगन क लगे आइ जे बलि चढ़ात ह अउ ओनका कहेस, “याजक क कछू मौस भूँजइ बरे द्या। याजक तोहसे बुलकावा भवा मौस न लेइहीं।”

16बलि क देवइया इ कइ सकत ह, “चर्बी पहिले बारा। तब तू जउन चाहा लइ सकत ह।” अगर अइसा होत तउ याजक क नउकर जवाब देत, “नहीं मोका अबहीं गोस द्या, अगर तू मोका इ नहीं देत ह तउ मई एँका तोहसे लइ जाब।”

17इ तरह एली क बेटवन इ देखावत रहेन कि उ पचे यहोवा क भेंटे में दीन्ह बलि क वास्ते मान नहीं देत रहेन। इ यहोवा क खिलाफ बहोत बुरा पाप रहा।

18मुला समूहल यहोवा क सेवकई करत रहा। समूहल सन क बना खास एपोद पहिरत रहा। 19हर बरिस समूहल क

महतारी एक ठु नान्ह चोगा समूएल बरे बनवत रही। उ हर बरिस आपन भतार क संग बलि भेंट करइ बरे सीलो जात रही तउ उ नान्ह क चोगा समूएल बरे लइ जात रही।

20एली एल्काना अउ ओकर मेहरारू क आसीबाद देत रहा। एली कहेस, “यहोवा, तोहका हन्ना क जरिए जिआद लरिका देई। इ लरिकन उ लरिका क ठउर लेइहीं जेकरे सन्ती हन्ना पराथना किहेस ह अउ यहोवा क दिहेस ह।”

तब एल्काना अउ हन्ना घरवा लउटेन, अउर 21यहोवा हन्ना प दया किहेस। ओकर तीन पूत अउ दुइ बिटिया भइन। अउर लरिका समूएल यहोवा क लगे बाढ़ गवा।

### एली आपन पापी बेटवन क बस में नाहीं कइ सका

22एली बहोत बूढ़ा होइ गवा। उ बार बार ओन कुकर्म क बारे में सुनत रहा जउन ओकर पूत सीलो में सबहिं इस्त्राएलियन क संग करत रहेन। एली इ भी सुनेस कि जउन मेहरारू मिलापवाला तम्बू क दुआर प सेवकाई करत रहीं ओनके संग ओकर बेटवन सोवत रहेन।

23एली आपन बेटवन स कहेस, “तू पचे जउन कछू बुरा करम किहे अहा ओकरे बारे में मनइयन हिआँ मोका बताएन ह। तू पचे इ बुरा करम काहे करत ह? 24मोर बेटवन, इ बुरा करम क जिन करा। इ सबइ अच्छा नाहीं अहइ, यहोवा क लोग तोहरे बारे में अफवाह फैला रहत ह। 25अगर कउनो मनई कउनो दूसर मनई क खिलाफ पाप करत ह तउ यहोवा ओकर मदद करत ह। अगर कउनो मनई यहोवा क खिलाफ पाप करत ह तउ उ मनई क मदद कउन कइ सकत ह?”

मुला एली क बेटवन एली क बात सुनइ स इनकार कइ दिहन। एँह बरे यहोवा एली क बेटवन क मार डावइ क ठान लिहेस।

26लरिका समूएल बाढ़त रहा। उ परमेस्सर अउ मनइयन क खुस किहेस।

### एली क परिवार क बारे में खउफनाक भविस्सबाणी

27परमेस्सर क एक मनई एली क लगे आवा अउ कहेस, “यहोवा इ कहत ह, ‘तोहार पुरखन फिरौन क परिवार क गुलाम रहेन। मुला उ टेम में मई तोहरे पुरखन क समन्वा परगट भवा रहेउँ। 28मई तोहरे परिवार क इस्त्राएल क सबहिं परिवार समूहन में स चुनेउँ ह। मई तोहरे परिवार समूह क आपन याजकन बनवइ बरे चुनेउँ ह। मई ओनका आपन वेदी प बलि चढ़ावइ बरे चुनेउँ ह। मई ओनका धूप सुलगावइ अउ एपोद पहिरइ बरे चुनेउँ ह। मई तोहरे परिवार क भेंट क गोस दीन्ह ह जउन इस्त्राएल क मनई मोका चढ़ावत हीं। 29एँह बरे तू पचे ओन बलिदानन अउ अन्नबलि क मान काहे नाहीं करत्या? तू पचे आपन बेटवन क मोसे जिआद पियेम करत ह। तू पचे गोस क बढ़िया हींसा खाइके मोटा होइ गवा ह जेका लोग मोका भेंट चढ़ात हीं।’

30“इस्त्राएल क परमेस्सर यहोवा इ बचन दिहे रहेन कि तोहरे बाप क परिवार सदा ओनकइ सेवकाई करिहीं। मुला अब यहोवा इ कहत हीं, “वइसा कबहुँ न होइ। मई ओन मनइयन क मान करब जउन मोर मान करिहीं। मुला ओनकइ

बुरा होइ जउन मोर मान करइ स इन्कार करत हीं। 31उ टेमें आवत अहइ जब मई तोहरे सन्तानन क नास करब। तोहरे बंस में कउनो बुढ़वा होइ बरे न बची। 32इस्त्राएल बरे नीक चीज होइहीं, मुला तू घरे में खराब घटना घटत देखब्या। कउनो मनई बुढ़वा होइ बरे न बची। 33सिरिफ एक मनई क आपन वेदी प याजक क नाई सेवा बरे बचाउब। उ बहोत जिआद बुढ़ाई तलक जिई। उ तब तक रही जब ताई ओकरे आँखिन क अउर ओकर सक्ती जात रही। तोहरे बचा खुचा सन्तानन तरवारे क घाट उतार दीन्ह जईहीं। 34मई तोहका एक चीन्हा देब जेहसे इ मालूम होइ कि बात फुर होइहीं। तोहार दुइनउँ पूत होफिन अउ फिनहस एक ही दिना मरिहीं। 35मई आपन बरे एक बिस्सासी याजक चुनब। उ याजक मोर बात मानी अउर जउन मई चाहब उ करी। मई इ याजक बरे परिवार क सक्तीवाला बनउब। उ हमेसा मोरे चुना भवा राजा क समन्वा सेवा करी। 36तब सबहिं मनइयन जउन तोहरे परिवारे में जिअत रइहीं, अइहीं अउ इ याजक क अगवा निहरिहीं। इ सब मनई तनिक धन स रोटी क टूका बरे भीख मँगिहीं। उ पचे कइहीं, “मेहरबानी कइके याजक क काम हमका दइ दया जेसे हम खइया क पाइ सकी।””

### परमेस्सर समूएल क बोलावत ह

3 लरिका समूएल एली क अधीन होइके यहोवा क सेवा करत रहा। ओन दिनन में यहोवा अक्सर लोगन स सीधा बात नाहीं करत रहा। अउर बहोत कम लोगन क दर्सन होत रहा।

2एली क आँख एँतनी कमजोर रही कि उ आँधर जइसा रहा। एक रात उ बिछौना प ओलरा रहा। 3समूएल यहोवा क पवित्त आराधनालय में बिस्तर प पउढा रहा। उ पवित्त आराधनालय में परमेस्सर क पवित्त सन्दूख रही। यहोवा क दिया अबहुँ जरत रहा। 4यहोवा समूएल क बोलाएस। समूएल जवाब दिहेस, “मई हिआँ हाजिर हउँ।” 5समूएल सोचा कि ओका एली बोलावत ह। एँह बरे समूएल दौड़त भवा एली क लगे गवा। समूएल एली स कहेस, “मई हिआँ हउँ। आप मोका बोलाएन ह।”

मुला एली कहेस, “मई तोहका नाहीं बोलाएउँ, आपन बिछौना प जा।”

समूएल बिछौना प गवा। 6यहोवा फुन बोलाएस, “समूएल।” समूएल फुन दौड़के एली क लगे गवा अउ कहेस, “मई हिआँ हउँ। आप मोका बोलाएन ह।”

एली कहेस, “मई तोहका नाहीं बोलाएउँ, आपन बिछौना प जा।”

7समूएल अबहिं तलक यहोवा क नाहीं जानत रहा। यहोवा अबहिं तलक ओसे सोझ बात नाहीं किहे रहा।\*

8यहोवा समूएल क तिसरी दाई बोलाएस। समूएल फिन उठा अउ एली क लगे गवा, “मई आवा हउँ, आप मोका बोलाएन ह।”

तबहिं एली समझेस कि यहोवा लरिका क बोलावत अहइ। 9एली समूएल स कहेस, “बिछौना प जा। अगर उ

**यहोवा ... रहा** यहोवा क संदेसा ओका नाहीं करियाइ गवा रहा।

तोहका फुन बोलावत ह तउ कहा, 'यहोवा मोर संग बात करा काहेकि मई आप सेवक हउँ अउ सुनत हउँ।'

तउ समूह बिछौना प चला गवा। 10 यहोवा आवा अउ हुवाँ खड़ा होइ गवा। उ पहिले क नाई बोलाएस। उ कहेस, "समूह, समूह!"

समूह कहेस, "कहा, मई आपक सेवक हउँ अउ सुनत हउँ।"

11 यहोवा समूह स कहेस, "मई इस्राएल में कछू करइ ही वाला हउँ जेकर बरे जब कबहुँ कउनो मनई सुनिहीं, इ ओकर कानन क चकित कइ देइहीं। 12 मई सब कछू करब। मई कहेउँ उ मई एली अउ ओकरे परिवार क खिलाफ करब। मई सुरु स आखिर तलक सब कछू करब। 13 मई एली स कहेउँ ह कि मई ओकरे परिवार बरे सदा सजा देब। मई इ ऐह बरे करब कि एली जानत ह कि ओकर बेटवन परमेस्सर क खिलाफ बुरा कहेन ह अउ किहेन ह। अउ एली ओन प बस में करइ बरे कामयाब नाहीं भवा। 14 इहइ कारण अहइ कि मई एली क परिवार बरे किरिया खायो हउँ कि बलिदान अउ अन्नबलि भेंट ओनकइ पापन क प्रायश्चित कबहुँ नाहीं कइ सकत हीं।

15 समूह जब तलक भिन्सार नाहीं भवा बिछौना प पउड़ा रहा। उ बड़े तड़के उठा अउ उ यहोवा क आराधनालय क किवाड़ा खोलेस। समूह आपन दरसन क बात एली स बतावइ में डेरन।"

16 मुला समूह स एली कहेस, "मोर बेटवा, समूह।"

समूह जवाब दिहेस, "हाँ, महोदय।"

17 एली पूछेस, "यहोवा तोहसे का कहेन? ओका मोसे जिन छिपावा। परमेस्सर तोहका सजा देइहीं, अगर तू परमेस्सर जउन संदेसा तोहका दिहेन ह, ओहमों स कछू भी छिपउव्या।

18 ऐह बरे परमेस्सर एली स उ हर एक बात बताएस। समूह एली स भी कछू नाहीं छिपाएस।

एली कहेस, "उ यहोवा अहइ। ओका वइसा ही करइ दया जइसा ओका नीक लागत ह।"

19 यहोवा समूह क संग रहा। समूह बाढ़त गवा। यहोवा समूह क कउनो संदेस क असफल नाहीं होइ दिहस। 20 तब समूह इस्राएल, दन स लइके वीरसेबा ताई समझ गवा कि समूह यहोवा क सच्चा धर्मदूत अहइ। 21 सीलो में यहोवा समूह क समन्वा परगट भएस। यहोवा सीलो में समूह क अगवा अपने आप क यहोवा क बचन\* क तरह परगट किहेस।

**4** समूह क बारे में खबर समूहइ इस्राएल में सँचर गइ। एली बहोत बुढ़ाइ गवा रहा। ओकर पूत यहोवा क समन्वा कुकरम करत रहेन।\*

**यहोवा क बचन** कबहुँ कबहुँ यहोवा क वचन क अरथ परमेस्सर क संदेस भी होत ह। मुला कबहुँ कबहुँ ओकर अरथ इ भी होत ह कि इ परमेस्सर क एक बिसेस प्रकार या रूप होत ह जेका उ उ समइ काम में लात ह जब उ आपन नबियन क संग बात करत ह।

**एलि बहोत ... रहेन** इ कथन पुराने ग्रीक अनुवाद में बा, मुला हिब्रू में नाहीं।

## पलिस्तिन इस्राएलियन क हराइ दिहेन

उ समइया इस्राएलियन पलिस्ती क खिलाफ जुद्ध बरे तइयार भएन। इस्राएलियन आपन डेरा एबेनेजर में डएन। पलिस्तिन आपन डेरा अपेक में डएन। 2 पलिस्ती इस्राएल प हमला बोलइ बरे तइयार भएन। जुद्ध सुरु होइ गवा।

पलिस्तिन इस्राएलियन क ओकर लगभग चार हजार मनइयन क जुद्ध क मइदान में मारि के ओका जुद्ध में हराएन। 3 इस्राएलियन क बाकी सिपाही आपन डेरा में लौटि आएन। इस्राएल क बुजुर्गन पूछेन, "यहोवा पलिस्तिन स हमका काहे हराइ दिहेन ह? आवा हम पचे सीलो स यहोवा क करार क सन्दूख क लइ आई। इ तरह परमेस्सर हम पचन क संग जुद्ध में जइहीं। उ पचे हमरे दुस्मनन स हमार रच्छा करिहीं।"

4 ऐह बरे लोग दूतन स करूब सरगदूतन क सिंहासन पइ विराजमान सैनिकन क यहोवा क करार क सन्दूख लिवाइ बरे सीलो पठएन। एली क दुइनउँ बेटवन होपनी अउ पीनहास सन्दूख क लइ आएन।

5 जबहिँ यहोवा क करार क सन्दूख डेरा क भीतर आवा तउ सारे इस्राएली ऐतने जोर स गरजेन कि उ अवाज स धरती काँप उठी। 6 पलिस्तिन इस्राएलियन क गरजब सुनेन। उ पचे पूछेन, "हिब्रू मनइयन क डेरा में अइसा गरजब काहे अहइ?"

तब पलिस्तिन जानेन कि इस्राएल क डेरा में यहोवा क करार क सन्दूख आवा अहइ। 7 पलिस्ती डेराइ गएन। पलिस्तिन कहेन, "परमेस्सर ओनकइ डेरा में आइ ग अहइँ। हम सबइ विपत्ती में अही। अइसा पहिले कबहुँ नाहीं भवा। 8 हमका फिकिर अहइ कि इ बरिआर देवतन स हमका कउन बचाइ सकत ह? इ सबइ उहइ देवता अहइ जउन मिस्त्रियन क उ सबइ बेरामियन अउर महामारियन दिहे रहा। 9 पलिस्तिनियो, हिम्मत करा। बहादुरन क तरह लड़ा। पुराने जमाने में हिब्रू लोग हमार दास रहेन। ऐह बरे बहादुरन क नाई लड़ा नाहीं तउ तू पचे ओनकइ गुलाम होइ जाव्या।"

10 पलिस्ती बहोत बहादुरी स लड़ेन अउ उ पचे इस्राएलियनक हराइ दिहेन। हर एक इस्राएली जोधा आपन डेरा में पराइ गवा। इस्राएल बरे खउफनाक हार रही। तीस हजार इस्राएली फौजी मारा गएन। 11 पलिस्तिन ओनसे परमेस्सर क पवितर सन्दूख छीन लिहेस। अउर उ पचे एली क दुइनउँ बेटवन होपनी अउ पीनहास क मार डएन।

12 उ दिना बिन्यामीन परिवार क एक मनई भी जुद्ध स परान रहा। उ आपन दुःख क परगट करइ बरे आपन ओढ़ना क फाड़ि डएस अउ आपन मुँडवा प धूरि दुःख परगट करइ बरे धइ लिहेस। 13 जब इ मनई सीलो पहुँचा तउ एली आपन कुर्सिया प नगर क दुआरे बइठा रहा। उ परमेस्सर क पवितर सन्दूख बरे परेसान रहा, ऐह बरे उ जोहत भवा बइठा रहा। तबहिँ बिन्यामीन क एकउटे परिवार क एक मनई सीलो आवा अउ उ दुःखे क हाल बताएस। सहर क सब मनई जोर स रोवइ लागेन। 14-15 एली अल्लाननब्बे बरिस क बूढ़ा अउ आँधर रहा। उ इ नाहीं लखि सका कि का होत बा? मुला एली रोवइ क अवाज सुनेस तउ एली पूछेस, "इ जोर क सोर काहे होत अहइ?"

उ बिन्यामीन परिवारे क मनई एली क लगे दौड़िके गवा अउ जउन कछू भवा रहा ओका बताएस। 16बिन्यामीन परिवार क मनई कहेस कि “मई आज जुद्ध स पराइ आएउँ ह।”

एली पूछेस, “बेटवा, का भवा?”

17बिन्यामीन परिवार क मनई जवाब दिहेस, “इस्त्राएलियन पलिस्तिथन क समन्वा पराइ गएन। इस्त्राएली फउज क ढेर सिपाही मारा गवा अहई। तोहार दुइनउँ पूत मारि डावा ग अहई। अउर पिलिस्ती परमेस्सर क पवितर सन्दूख छीन लिहेन ह।”

18एली दुआरे क नगिचे आपन कुर्सिया स पाछे गिर परेस अउ ओकर गटइ टूटि गएन जब उ परमेस्सर क पवितर सन्दूख क बारे जानेस। एली बुढ़वा अउ मोट मनइ रहा अउ उ हालि मरि गवा। एली चालीस बरिस तलक इस्त्राएल क नेता रहा।

### महिमा खतम भइ

19एली क पतोहू क फिनहस क मेहरारु, उ दिना कोख भरी रही। बच्चा पइदा होइ क उ निचकान रही। जब उ इ खबर सुनेस कि परमेस्सर क पवितर सन्दूख छीन लइ ग अहइ। उ इहउ सुनेस कि ओकरे ससुर एली क मउत होइ ग अहइ अउ ओकर भतार फिनहस मारि डावा ग अहइ। जइसे ही उ इ खबर सुनेस ओकर कोख पिराय लाग। अउर उ बच्चा बेटवा क जन्मब सुरु किहेस। 20उ मरइवाली रही। नउकरानी कहेस, “दुःखी जिन होवा, तोहका एक तु बेटवा जन्मी।”

मुला एली क पतोहू न तउ जवाब दिहेस अउर न ओह प धियान दिहेस।

21उ आपन बचवा क नाउँ इकबाद राखेस काहेकी “इस्त्राएल क महिमा मटियामेट होइ गइ। परमेस्सर क पवितर सन्दूख चला गवा अउ ओकर ससुर अउ मनसेधू मरि गवा रहेन। 22उ कहेस, “इस्त्राएल क महिमा मिट गइ।” काहेकि पलिस्ती परमेस्सर क पवितर सन्दूख लइ गएन।

### परमेस्सर क पवितर सन्दूख पलिस्ती क सतावत ह

5 पलिस्ती परमेस्सर क पवितर सन्दूख लिहे क पाछे, एबनेजेर स ओका उ पचे असदोद लइ गएन। 2पलिस्ती परमेस्सर क पवितर सन्दूख क दागोन क मन्दिर मँ लइ गएन। उ पचे परमेस्सर क पवितर सन्दूख क दागोन क बगल मँ धरेन। 3दुसरे दिन भिन्सारे असदोद क मनइयन उठेन अउ लखेन कि दागोन मुँह क बल ओलरा बा।

दागोन यहोवा क सन्दूख क समन्वा गिरइ पड़ा। असदोद क मनइयन दागोन क मूरति क फुन हुवई खड़ा कइ दिहेन। 4मुला जब दुसरे दिन भिन्सारे असदोद क मनई उठेन तउ उ पचे दागोन क फुन जमीन प ओलरा पाएन। दागोन फुन यहोवा क पवितर सन्दूखे क समन्वा गिरइ पड़ा। दागोन क हाथ अउ गोड़ टूट गवा रहेन अउ चौखट प पड़ा रहेन। सिरिफ दागोन क देह एक खण्ड मँ रहा। 5इहइ कारण बा कि आजु तलक दागोन क याजक या असदोद मँ दागोन क

मन्दिर मँ घुसइवाला दूसर मनई इयोदी प चलइ स मना कइ देत ह।

6यहोवा असदोद क मनइयन अउ ओनकइ पड़ोसियन क जिन्गी दूभर कइ दिहेन। यहोवा ओनका मुसीबत मँ डाइ दिहेन। उ ओन सबन्क गिलटी दिहेस। यहोवा ओनके लगे मूस पठएस। मूस ओनकइ सबहिं जहाजे अउ भुइयाँ प दौड़त रहेन। सहर मँ सब मनइयन डेराइ गएन। 7असदोद क मनइयन लखेन कि का होत अहइ। उ पचे कहेन, “इस्त्राएल क परमेस्सर क सन्दूख हिआँ नाहीं रहि सकत। परमेस्सर हमका अउ हमरे देवता दागोन क सजा देत बा।”

8असदोद क मनइयन पलिस्ती सासकन क बोलाएन। असदोद क मनइयन राजा लोगन स पूछेन, “हम पचे पवितर सन्दूख क का करी?”

राजा लोगन जवाब दिहेन, “इस्त्राएल क परमेस्सर क पवितर सन्दूख क गथ लइ जा।” एँह बरे पलिस्तिथन परमेस्सर क पवितर सन्दूख क हटाइ दिहेन।

9मुला जब पलिस्ती परमेस्सर क पवितर सन्दूख क गथ क पठइ दिहेन तब यहोवा उ सहर क सजा दिहेस। मनइयन बहोत डेराइ गएन। अउर परमेस्सर सहर क लोगन छोट स बड़ा सबइ क फड़ा-फुंसी क मसीबत मँ मुबतला कइ दिहेस। 10एँह बरे पलिस्ती परमेस्सर क पवितर सन्दूख क एकोन पठइ दिहेन। मुला जब परमेस्सर क पवितर सन्दूख एकोन आवा, एकोन क मनइयन सिकाइत किहेन। उ पचे कहेन, “तू पचे इस्त्राएल क परमेस्सर क पवितर सन्दूख हमरे सहर एकोन मँ काहे लइ आवत ह? का तू पचे हमरे मनइयन क मारा चाहत ह?”

11एकोन क मनइयन सबहिं पलिस्ती राजा लोगनक एक संग बोलाएस। एकोन क मनइयन राजा लोगनस कहेन, “इस्त्राएल क परमेस्सर सन्दूख क, ओकरे पहिले कि उ हमका अउ हमरे मनइयन क मारि डावइ, एकरे पहिले क ठउर प पठइ द्या।”

एकोन क मनइयन बहोत डेराइ ग रहेन। परमेस्सर उ ठउर प ओनकइ जिन्गी क बहोत दुःखमय बनइ दिहेस। 12बहोत स मनई तउ मर बिलाइ गएन। अउर जउन लोग नाहीं मरेन ओनका गिलटी निकरि आइ। एकोन क मनइयन जोर स रोइके अकास दहलाएन।

### परमेस्सर क पवितर सन्दूख घर लौटि आइ

6 पलिस्ती पवितर सन्दूख क आपन देस मँ सात महीना तलक धरेन। 2पलिस्तिथन आपन याजक अउ जादूगरनक बोलाएन। पलिस्तिथन कहेन, “हम यहोवा क सन्दूखे क का करी? बतावा कि हम कइसे सन्दूखे क वापिस एकरे घरे पठइ।”

याजकन अउ जादूगरन जवाब दिहेन, “अगर तू पचे इस्त्राएल क परमेस्सर क पवितर सन्दूखे क पठवत ह तउ एकोँ बिना दोखबलि चढ़ाए जिन पठवा। तोहका इस्त्राएल क परमेस्सर क दोख बलि चढ़ावइ चाही, ताकि तू पचे चंगा होब। तोहका इ एँह बरे करइ चाही कि जेहसे परमेस्सर तू सबन्क सजा देब बंद कइ देइ।”

4पलिस्ती पूछेन, “हम पचन्क कउन स भेंट, आपन क छिमा करइ क इस्त्राएल क परमेस्सर क पठवइ चाही?”

याजक अउ जादूगारन कहेन, “हिआँ पाँच पलिस्ती प्रमुख अहईँ। हर एक सहर क एक प्रमुख बा। तू सब मनइयन अउ तोहरे प्रमुखन क एक समस्या अहइ। एँह बरे तोहका पाँच सोना क अइसा नमूना जउन पाँच गिल्टियन क तरह होईँ देखावइ बरे बनवइ चाही। अउर पाँच नमूना मूसे क तरह देखावइ बरे बनवइ चाही। 5इ तरह गिल्टी अउर मूसे क नमूना बनावा जउन देस क मटियामेट करत अहईँ। इस्त्राएल क परमेस्सर क इ सोना क नमूना अदा करइ क रूप में दइ द्या। तब इ होइ सकत ह कि इस्त्राएल क परमेस्सर तोहका, तोहरे देवतन क अउर तोहरे देस क सजा देब रोक देईँ। 6फिरौन अउ मिस्त्री मनइयन क तरह जिद्दी न बना। परमेस्सर मिस्त्री मनइयन क सजा दिहेस। इहइ कारण रहा कि मिस्त्री मनइयन इस्त्राएलियन क मिस्त्र तजि देइ दिहेन।

7“तोहका एक नई बंद गाड़ी बनवइ चाही अउर दुइ गाइ जउन बछवा जन्मे होईँ लइ आवइ चाही। इ गइयन अइसी होइ चाही जउन खेते में न जोती गइ होईँ। गइयन क बन्द गाड़ी में जोत द्या अउ बछवन क घरे लौटाइ द्या। बछवन क गउसाला में राखा। ओनकइ आपन महतारी क पाछे न जाइ द्या।

8यहोवा क पवितर सन्दूखे क बंद गाड़ी में धरा। तोहका सोना क नमूनन क पेटी में सन्दूख क बगल में राखइ चाही। सोना क नमूनन परमेस्सर बरे तोहार दोखबलि अहइ। बंद गाड़ी क सोझइ रस्ता प पठवा। 9बंद गाड़ी क लखत रहा। जदि बंद गाड़ी बेतसेमेस कइँती इस्त्राएल क भुइयाँ में जात ह तउ इ संकेत अहइ कि ओकर परमेस्सर हम पचन्क इ बड़का रोग दिहे अहईँ। मुला जदि इ गइयन बेतसेमेस क नाहीं जातिन तउ हम पचे समझब कि इस्त्राएल क परमेस्सर हमका सजा नाहीं दिहे अहइ। हम समझ जाब कि हमार बेरामी खुद होइ गइ।” 10पलिस्तियन उहइ किहेन जउन याजक अउ जादूगारन कहेन। पलिस्तियन वइसी दुइ गइया लिहेन जउन हाली ही बछवा दिहे रहिन। पलिस्तियन गइयन क बंद गाड़ी स जोड़ दिहेन। पलिस्तियन बछवन क घरे प गउसाला में राखेन। 11तब पलिस्तियन यहोवा क पवितर सन्दूख क उ पेटी क साथ जे में सोना क मूसा अउर फौड़ा क नमूना रहा बंद गाड़ी में धरेन। 12गइयन सोझइ बेतसेमेस क गइन। गइयन लगातार चोकड़त भइ सड़क पइ ही चलत रहिन। गइयन दाहिन बाएँ नाहीं मुड़िन। पलिस्ती राजा गइयन क पाछे बेतसेमेस क सहर क पहुँटा तलक गएन।

13बेतसेमेस क मनई घाटी में आपन गोहूँ क फसिल काटत रहेन। उ पचे निगाह उठाएन अउ पवितर सन्दूख क लखेन। उ पचे सन्दूखे क लखिके बहोत खुस भएन। उ सबइ ओका लेइ बरे दौड़ेन। 14बन्द गाड़ी उहइ खेत में आइ जउन बेतसेमेस क यहोसू क रहा। बन्द गाड़ी खेते में एक बहोत बड़की चट्टान क समन्वा रुक गइ। बेतसेमेस क मनइयन बन्द गाइयन क काट दिहेन। तब उ पचे गाड़ी क मारि डिएन। उ पचे यहोवा बरे गइयन क बलि दिहेन।

15लेवी बंसी परिवार क मनइयन यहोवा क पवितर सन्दूखे क उतारेन। उ पचे उ पेटी क भी उतारेन जेहमा सोना क

नमूना धरा रहेन। लेवीबंसियन परिवार क मनइयन यहोवा क सन्दूख अउ पेटी क बड़की चट्टान प धरेन। उहइ दिना, बेतसेमेस क लोगन यहोवा बरे बलि चढ़ाएन।

16पाँचउ पलिस्ती राजा लोगन बेतसेमेस क मनइयन क इ सब करत लखेन। तबहिँ उ पचे पाँचउ पलिस्ती राजा लोग उहइ दिना एकरोन लौटि गएन।

17इ तरह पलिस्तियन सोना क मिल्टियन क नमूना क दोखबलि क रूप में यहोवा क दिहेस। उ पचे हर एक तु पलिस्ती सहर बरे गिल्टी क एक सोना क नमूना पठएन। इ सबइ पलिस्ती सहर असदोद, अज्जा, असकालोन, गत अउ एकरोन रहेन। 18अउर पलिस्तियन सोना क मूसा क नमूना पठएन। सोना क मूसन क उहइ गनती रही, जउन पाँचउ पलिस्ती राजा लोगन्क सहर क रही। इ सहरन क चारिहुँ कइँती चहरदेवार रही। अउ हर सहर क चारिहुँ कइँती गाँव रहेन। बेतसेमेस क मनइयन यहोवा क पवितर सन्दूख क चट्टान प धरेन। उ चट्टान आजु भी बेतसेमेस क जोसुआ क खेत में अहइ। 19मुला जउन टेमें बेतसेमेस क मनइयन यहोवा क पवितर सन्दूख क लखेन, उ समइया हुआँ कउनो याजकन नाहीं रहा। एँह बरे परमेस्सर बेतसेमेस क सत्तर मनइयन क मार डिएन। बेतसेमेस क मनइयन रोवइ लागेन काहेकि यहोवा एँतनी कठोर सजा दिहेन। 20एँह बरे बेतसेमेस क मनइयन कहेन, “याजक कहाँ अहइ जउन इ पवितर सन्दूख क देखरेख कइ सकइ? हिआँ स सन्दूख कहाँ जाइ?”

21किर्यत्यारीम में एक याजक रहा। बेतसेमेस क मनइयन किर्यत्यारीम क मनइयन क लगे दूत पठएन। दूतन कहेन, “पलिस्तियन यहोवा क पवितर सन्दूख लौटाइ दिहेन। आवा अउ एँका आपन सहर में लइ आवा।”

7 किर्यत्यारीम क मनइयन आएन अउ यहोवा क पवितर सन्दूख क लइ गएन। उ पचे यहोवा क सन्दूख क पहाड़ी प अबीनादब क घर लइ गएन। उ पचे अबीनादब क बटवा एलीआज़ार क यहोवा क सन्दूखे क रच्छा करइ बरे नियुक्त किहेन। 2सन्दूख किर्यत्यारीम में बहोत समइ तलक धरा रहा। उ हुवाँ बीस बरिस तलक रहा।

### यहोवा इस्त्राएलियन क रच्छा करत ह

इस्त्राएल क मनइयन यहोवा क कइँती लउटना सुरू किहेन। 3समूह इस्त्राएल क मनइयन स कहेस, “अगर तू फुरे यहोवा क नगिचे सच्चा मन स लौटत बाट्या तउ तोहका बिदेसी देवता लोगन्क बहाइ देइ चाही। तोहका अस्तोरेत क मूरत लोकाइ देइ चाही। अउ तोहका पूरी तरह यहोवा क अपने क न्यौछावर कइ देइ चाही। तोहका सिरिफ यहोवा क ही सेवा करइ चाही। तबहिँ यहोवा तोहका पलिस्तियन स बचइहीं।”

4एँह बरे इस्त्राएलियन आपन बाल अउ अस्तोरेत क मूरत क लोकाइ दिहेन। इस्त्राएलियन सिरिफ यहोवा क सेवकाई करइ लागेन।

5समूह कहेस, “सबहिँ इस्त्राएलियन मिस्या में बटुर जाईँ। मईँ तोहरे बरे यहोवा स पराथना करब।”

6इस्त्राएलियन मिस्या में बटुर गएन। उ सबइ जल लइ आएन अउ यहोवा क समन्वा जल चढ़ाएन। इ तरह उ पचे



उपवास क समइ सुरु किहेन। उ पचे उ दिन खइया क नाहीं खाएन, अउ आपन पापन्क कबूलेन। उ पचे कहेन, “हम पचे यहोवा क खिलाफ पाप किहे अही।” इ तरह समूएल मिस्या में इस्त्राएल क जज क तरह काम किहेस।

7पलिस्तिन इ सुनेन कि इस्त्राएलियन मिस्या में बटुर ग अहई। पलिस्ती राजा इस्त्राएलियन क खिलाफ हमला करइ गएन। इस्त्राएलियन सुनेन कि पलिस्ती आवत अहई, अउर उ पचे डेरइ गएन। 8इस्त्राएलियन समूएल स कहेन, “हमार परमेस्सर यहोवा क पराथना हमरे बरे करब बन्द जिन करा। यहोवा स माँगा कि उ पलिस्तिन स हमार रच्छा करइ।”

9समूएल एक तु मेमना लिहस। उ यहोवा बरे होमबलि क रुप में मेमना क बारेस। समूएल यहोवा स इस्त्राएल बरे पराथना किहेस अउर यहोवा ओका क जवाब दिहेस। 10जब समूएल बलि क बारत रहा, पलिस्ती इस्त्राएल स लइइ आएन। मुला यहोवा पलिस्तिन क नगिचे खूब जोर क गर्जब कराएस। ऐहसे पलिस्ती घबराइ गएन। अउ उ पचे गरजइ स ससाइ गएन। ओनकइ मुखिया ओनका बस में नाहीं कइ सकेन। इ तरह पलिस्तिन क इस्त्राएली जुद्ध में हराइ दिहेन। 11इस्त्राएल क मनइयन मिस्या स बाहेर भागेन अउ पलिस्तिन क पाछा किहेन। उ पचे लगातार बेत कर तलक ओनकइ पाछा किहेन। उ सबइ रस्ता भइ पलिस्ती सिपाही क मार डापन।

### इस्त्राएल में सान्ति आइ गइ

12एकरे पाछे, समूएल एक खास पाथर खइ किहेस। उ ऐह बरे किहेस कि मनइयन याद राखई कि परमेस्सर का किहेस। समूएल पाथर क मिस्या अउ सेन क बीच रखेस। समूएल पाथर क नाउँ “मदद क पाथर” धरेस। समूएल कहेस, “यहोवा लगातार पूरी रह भइ हमार मदद किहेस।”

13पलिस्ती हार गएन। उ पचे इस्त्राएल देस में फुन नाहीं घुसेन। समूएल क बाकी जिन्नगी में यहोवा पलिस्तिन क खिलाफ रहेन। 14पलिस्तिन एक्रोन स गथ तलक क पहुँटा क सहर क लइ लिहे रहेन। मुला इस्त्राएली ओनका जीतके फुन लइ लिहेन। अउर इस्त्राएली इ सहरन क चारिहुँ कइँती क भुईया क भी फुन लइ लिहेन।

इस्त्राएल अउ अमोरियन क बीच भी सान्ति रही।

15समूएल आपन पूरी जिन्नगी भइ इस्त्राएल क निआव करत रहेस। 16समूएल एक ठउर स दूसर ठउर ताई इस्त्राएल क मनइयन क निआव करत गवा। हर बरिस उ देस क चारिहुँ कइँती जात्रा किहेस। उ बेथेल, गिलिगाल अउ मिस्या क गवा। ऐह बरे उ इ सबहिँ ठउरन में इस्त्राएली मनइयन निआव अउ ओन पइ राज किहेस। 17मुला समूएल क घर रामा में रहा। ऐह बरे समूएल हमेसा रामा क लौट जात रहा। समूएल उहइ सहर स इस्त्राएल क निआव अउ राज किहेस। अउ समूएल रामा में यहोवा बरे एक वेदी बनाएन।

### इस्त्राएल एक राजा क माँग करत ह

8 जब समूएल बुढाइ गवा तउ उ आपन पूत न क इस्त्राएल क जज बनाएस। 2समूएल क पहिलौटी क बेटवा योएल नाउ क रहा। ओकर दूसर पूत अबिय्याह नाउँ

क रहा। योएल अउ अबिय्याह बेर्सेबा में जज रहेन। 3मुला समूएल क पूत वइसे ही नाहीं रहत रहेन जइसे उ रहत रहा। योएल अउ अबिय्याह घूस लेत रहेन। उपचे चुप्पे स घूस लेतेन अउ अदालत में आपन निर्णय बदल देत रहेन। उ पचे अदालत में मनइयन क उगत रहेन। 4ऐह बरे इस्त्राएल क सबहिँ बुजुर्गन मिलिके बटुर गएन। उ पचे समूएल स भेंटइ रामा गएन। 5बुजुर्गन लोग समूएल स कहेन, “तू बुढाइ गया, अउ तोहार पूत ठीक स नाहीं रहतेन। उ पचे तोहरे तरह नाहीं अहई। अब तू दूसर रास्ट्र क तरह हम सबन प राज करइ बरे एक राजा द्या।”

6इ तरह बुजुर्गन अपने क राह देखावइ बरे एक राजा मांगेन। समूएल सोचेस कि इ बिचार बुरा अहइ। ऐह बरे समूएल यहोवा क पराथना किहेस। 7यहोवा समूएल स कहेस, “उहइ करा जउन लोग तोहसे करइ क कहत हीं। उ पचे तोहका अस्वीकार नाहीं करत हीं। उ पचे मोका आपन राजा बनावन बरे अस्वीकार करत हीं। 8उ पचे उहइ करत अहई जउन हमेसा करत रहेन। मई ओन सबन्क मिस्र स बाहेर लइ आएउँ। मुला उ पचे मोका तजि दिहेन, अउर दूसर देवतन क पूजेन। उ पचे तोहरे संग भी वइसा करत अहई। 9ऐह बरे मनइयन क सुना अउर जउन उ पचे कहई करा। मुला ओनका चिताउनी द्या। ओनका बतावा कि राजा ओनकइ संग का करी। ओनकइ बतावा कि एक राजा मनइयन प कइसे राज करत ह।”

10उ पचे एक राजा बरे माँग किहेन। ऐह बरे समूएल मनइयन स उ सबइ बात किहेन जउन यहोवा कहे रहेन। 11समूएल कहेस, “अगर तू आपन पइ राज करइ वाला राजा राखत बाट्या तउ उ इ करी। उ तोहरे बेटवन क लइ लेइ। उ तोहरे बेटवन क सेवा बरे मजबूर करी। उ ओन पचन्क सिपाही बनवइ बरे मजबूर करी, ओन पचन्क ओकरे रथे स लइइ क पड़ी अउर उ पचे ओकरी फउज क घोइसवार होइहीं। तोहार पूत राजा क रथे क आगे धावइवाला रच्छक बनिहीं।

12“राजा तोहरे पूतन्क फौजी बनइ बरे मजबूर करी। ओहमाँ स कछू एक हजार मनई क ऊपर अफसर होइहीं। अउर दूसर, पचास मनई क ऊपर अफसर होइहीं।

“राजा तोहरे पूतन में स कछू क आपन खेत जोतइ क अउर फसिल काटइ क मजबूर करी। उ ओनका आपन रथे क सामान बनवइ बरे मजबूर करी।

13“एक राजा तोहरी बिटियन क लइ लेइ। उ तोहरी बिटियन में स कछू क आपन बरे महकउआ चीज बनवइ क मजबूर करी। अउर उ तोहरी बिटियन में स कछू क पकावइ अउ रोटी सेकइ क मजबूर करी। 14राजा तोहार सब स बढिया खेत, अंगूर क बाग अउर जैतून क बाग लइ लेई। उ ओन चीजन्क तोहसे लइ लेई अउर आपन अफसरन्क दइ देई। 15उ तोहार अन्न अउ अंगूर क दसवाँ हींसा लइ लेइ। उ इन चीजन्क आपन नउकरन अउ अफसरन्क दइ देइ।

16“इ राजा तोहरे मनसेधू नउकरन अउ नउकरनियन क लइ लेइ। उ तोहार सबन त बढिया गोरु अउ गधा क लइ लेइ। उ ओनकइ आपन कामे बरे बइपरी। 17उ तोहरे भेड़ी अउ बोकरी क दसवाँ हींसा लेई।

“अउर तू खुद इ राजा क दास होब्या। 18जब उ टेमें आई तब तू राजा क चुनइ क कारण रोउब्या। मुला उ टेमें यहोवा तू पचन्क जवाब न देइहीं।”

19मुला लोगन समूह क अनसुनि किहेन। उ पचे कहेन, “नाहीं! हम पचे आपन ऊपर राज करइ बरे एक तु राजा चाहित ही। 20तब हम पचे दूसर रास्ट्रन क जइसा होइ जाब। हमार राजा हम पचन्क रास्ता देखीई। उ हम पचन्क संग जाइ अउर हमरे जुद्धन क लड़ी।”

21समूह जब मनइयन क सब कछू कहा भवा सुनेस तबहिं उ यहोवा क समन्वा ओनकइ कहब क दोहराएस। 22यहोवा उत्तर दिहेस, “ओनकइ बात सुना। ओनका एक राजा द्या।”

तबहिं समूह इस्त्राएल क मनइयन स कहेस, “ठीक बा! तोहार एक नवा राजा होइ। अबहिं आप सब लोग घरे जाईं।”

### साऊल आपन बाप क गदहन क हेरत ह

9 बिन्यामीन परिवार समूह स किस एक सक्तीसाली योद्धा रहा। किस अबीएल क पूत रहा। अबीएल ससोर क पूत रहा। सरोर बकारत क पूत रहा। बकारत बिन्यामीन क एक मनई अफिया क पूत रहा। 2कीस क पूत साऊल नाउँ क रहा। साऊल एक सुन्नर जवान रहा। हुवाँ साऊल स बढिके जिआब सुन्नर कउनो न रहा। ठाड़ होए प साऊल क मूँइ इस्त्राएल क कउनो भी मनई स ऊँच रहत रहा।

3एक दिना कीस क गदहन हेराइ गएन। एँह बरे कीस आपन पूत साऊल स कहेस, “नउकरन में स एक क संग लइ ल्या अउर गदहन क हेर इ जा।” 4साऊल गदहन क हेरब सुरु किहेस। साऊल एप्रैम क पहाड़ियन में होइके घूमा। तबहिं साऊल सालीम क चारिहुँ कइँती पहुँटा में घूमा। मुला साऊल अउ ओकर नउकर, किस क गदहन क नाहीं पाइ सकेन। एँह बरे साऊल अउ नउकर सालिम क चारिहुँ कइँती पहुँटा में गएन। मुला गदहा हुवाँ नाहीं मिलेन। एँह बरे साऊल बिन्यामीन क पहुँटा में होइके जात्रा किहेस। मुला उ अउ ओकर नउकर गदहन क तबहुँ नाहीं पाइ सकेन।

5आखिर में साऊल अउ ओकर नउकर जुफ नाउँ क सहर में आएन। साऊल आपन नउकर स कहेस, “चला, हम पचे लौटी। मोर बाप गदहा क बारे में सोचब बंद देइहीं अउर हम पचन क बारे में फिकिर करिहीं।”

6मुला नउकर जवाब दिहेस, “इ सहर में परमेस्सर क एक तु मनई अहइ। मनई ओकर मान करत हीं। उ जउन कहत ह सच होत ह। एँह बरे हम सबइ इ सहर में चली। अइसा लागत ह कि परमेस्सर क उ मनई हमका बताई कि एँकरे पाछे हम पचे कहाँ जाइ।”

7साऊल आपन नउकर स कहेस, “हम पचे सहर में जाइ सकित ह। मुला हम पचे उ मनई का इ सकित ह? हम पचन क झोरी क भोजन खतम होइ ग बाटइ। हम पचन क लगे कउनो भी भेंट परमेस्सर क मनई क देइ बरे नाहीं अहइ। हमरे लगे ओका देइ क का अहइ?”

8नउकर फिन जवाब दिहेस, “सुना, मोरे लगे तनिक धन अहइ। हम परमेस्सर क मनई क इहइ देइ। तबहिं उ बताई कि हम पचे कहाँ जाइ।”

9-11साऊल आपन नउकर स कहेस, “नीक सुझाव अहा, हम पचे चली।” उ पचे सहर में हुवाँ गएन जहाँ परमेस्सर क मनई रहा।

साऊल अउ ओकर नउकर पहड़िया प चढ़त भए सहर क जात रहेन। राहे में उ पचे कछू जवान अउरतन स भेंटेन। जवान अउरत बाहेर स पानी लेइ जात रहिन। साऊल अउ ओकर नउकर जवान अउरतन स पूछेन, “का दर्सी हीओँ अहइ?” (पुराने जमाना में इस्त्राएल क बसइया नबियन क “दर्सी” कहत रहेन। एँह बरे उ पचे परमेस्सर स कछू मागँइ चाहत रहेन तउ पचे कहत रहेन, “हम पचे दर्सी क लगे चली।”)

12जवान अउरतन जवाब दिहेन, “हाँ, दर्सी हीओँ अहइँ।” उ सोइइ इ सड़क प आगे अहइँ। उ आज ही नगर में आवा अहइँ। कछू मनइयन हुवाँ एकट्ठइ बटुरा अहइ। उ पचे आराधना ठउर प मेलबलि चढ़ावइ बरे जाइ। 13आप लोग सहर में जाईं अउ ओनसे भेंटाइ लेइहीं। जदि आप सब जल्दी जाइहीं तउ आप ओनसे आराधना ठउर प भोजन प जाइ स पहिले मिलि लेइहीं। दर्सी बलि-भेंट क आसीबाद देत हीं। एँह बरे मनइयन जब तलक खाइया क खाब सुरु नाहीं करिहीं जब ताई उ हुवाँ न पहाँच जाईं। एँह बरे आप सबइ हाली करईं तउ आप लोग दर्सी क भेंटि सकत हीं।”

14साऊल अउ नउकर ऊपर पहड़िया प सहर कइँती बढब सुरु किहेन। जइसे ही उ पचे सहर में घुसेन उ पचे समूह क आपन कइँती आवत देखेन। समूह सहर क बाहेर पूजा क ठउर प जाइ बरे अबहिं आवत रहा।

15एक दिन पहिले यहोवा समूह स कहेस, 16“काल्ह मई इहइ टेमें तोहरे लगे एक मनई क पठउब। वह बिन्यामीन क गोत क होइ। तू सबन क ओकर अभिसेक कर देइ चाही। तब उ हमार मनइयन इस्त्राएलियन क नवा नेता होइ। इ मनई हमरे मनइयन क पलिस्तिन स बचाइ। मई आपन मनइयन क दुःख क देखेउँ ह। मई आपन मनइयन क रोउब सुनेउ ह।”

17समूह साऊल क लखेस अउ यहोवा ओसे कहेस, “इहइ उ मनई अहइ जेकरे बारे में मई तोहसे कहेउँ रहे। इ मोरे मनइयन क बस में राखी।”

18साऊल दुआर क लगे समूह क निअरे आवा। साऊल समूह स पूछेस, “मेहरबानी कइके बतावा दर्सी क घर कहाँ अहइ?”

19समूह जवाब दिहेस, “मई ही दर्सी अहँउ। मोरे अगवा आराधना क ठउर प पहुँचा। तू अउ तोहार नउकर आज हमरे संग खइया क खइहीं। मई भियान भिन्सारे तोहका घरे जाइ देब। मई तोहरे सबहिं सवालन क जवाब देब। 20अउर ओन गदहन क फिकिर जिन करा जेका तू तीन दिना पहिले खोइ दिहा ह। उ सब मिल गवा बाटेन। अब, तोहका समूचा इस्त्राएल चाहत अहइ। उ सबइ तोहका अउ तोहरे बाप क परिवारे क सब मनइयन क चाहत हीं।”

21साऊल जवाब दिहेस, “मुला मई बिन्यामीन परिवार समूह क निअम्बर अहउँ। इ इस्त्राएल में सबन क छोटका समूह अहइ। मोर परिवार मोर पूरा परिवार समूह में सब त

छोटा अहइ। आप काहे कहत बाटेन कि इस्राएल मोका चाहत ह?"

22तब समूएल साऊल अउ ओकरे नउकर क भोजन क जगहिया में लइ गवा। लगभग तीस न्यूताहरी एक संग भोजन बरे अउर बलि-भेंट लेइ बरे बोलावा ग रहेन। समूएल साऊल अउ ओकरे नउकर क मेज प सबन ते जिआदा खास जगह दिहेस। 23समूएल रसोइया स कहेस, "उ गोस लइ आवा जउन मई तोहका दिहेउँ ह। इ उहइ हीसा अहइ जेका मई तोहसे जोगइ क रक्खइ बरे केहउँ रहे।"

24रसोइया रान लिहेस अउ साऊल क समन्वा मेज प धरेस। समूएल कहेस, "इहइ उ गोस बा जेका मई तोहरे बरे जोगइ क रखेउँ रहे। ओका खा काहेकि इ इ खास टेमें बरे जोगावा रहा।" इ तरह उ दिना साऊल समूएल क संग खइया क खाएस।

25जबहिं उ पचे खइया क खाइ लिहेन, उ पचे पूजा क ठउर स उतरेन अउ सहर क लौटेन। समूएल छते प साऊल बरे बिछौना दसाएस। अउर साऊल सोइ गवा।

26भियन भिन्सारे समूएल साऊल क छते प जोर स पुकारेस। समूएल कहेस, "उठा। मई तोहका तोहरे रहे प पठउबा।" साऊल उठा, अउर तब समूएल क संग घर क बाहेर गवा।

27साऊल अउ ओकर नउकर संग संग सहर क सिरे क उतराई प टहरत रहेन। समूएल साऊल स कहेस, "आपन नउकर स हम पचन स अगवा जाइ क कहा। मोरे लगे तोहरे बरे परमेस्सर क एक संदेसा अहइ।" तउ नउकर ओन पचन स तनिक अगवा चला गवा।

### समूएल साऊल क अभिसेक करत ह

10 समूएल खास तेल क एक ठु मेटिया लिहेस। समूएल तेल क सौर क मूडे प नाएस। समूएल साऊल क चुम्मा लिहेस अउर कहेस, "यहोवा तोहार अभिसेक क चुनाव आपन मनइयन क मुखिया बनवइ बरे कहेस ह। तू यहोवा क मनइयन क बस में करब्या। तू ओन पचन्क ओन दुस्मनन स बचउब्या जउन ओनका चारिहूँ कइँती स घेरे बाटेन। यहोवा तोहार अभिसेक चुनाव आपन मनइयन क ऊपर प्रधान होइ बरे कहे अहइ। हियाँ एक चीन्हा अहइ जउन परमान देइ कि इ फुर बाटइ। 2जब तू मोसे अलगाइ जाब्या तउ तू रकेल क मकबरा क निअरे दुइ मनइयन स बिन्यामीन क इलाका में जलजा में मिलब्या। उ दुइनउँ मनई तोहसे कहिहीं, 'जउन गदहन क तू हेरत बाट्या ओनका कउनो मनई पाइ लिहेस ह। तोहार बाप गदहन क बारे में फिकिर करब तजि दिहेस ह। अब ओका तोहार फिकिर बा। उ कहत अहइ, 'मई आपन पूत क बारे में का करउँ।'"

3समूएल कहेस, "जब तू तब्बइ तलक चलत रहब्या जब तलक तबोर में साह बलूत बृच्छ ताई नाहीं पहाँच जात्या। हुवाँ तोहसे तीन मनई मिलिहीं। उ तीनउँ मनई बेतेल में परमेस्सर क आराधना बरे जात्रा प होइहीं। एक ठु मनई बोकरी क तीन बच्चन क ढोवत होइ। दूसर मनई तीन डबल रोटी लइ जात होइ। अउ तीसरा मनई एक गगरी दाखरस

लइ जात होइ। 4इ तीनउँ मनई कहिहीं, आपक सुआगत अहइ। उ पचे तोहका दुइ रोटी देइहीं। तू ओनसे उ दुइ डबल रोटी क लइ लिहा। 5तब तू गिबियथ-एलोहिम जाब्या। उ ठउर प पलिस्तियन क एक ठु किला अहइ। जबहिं तू उ सहर में पहाँचब्या तउ कइउ नबियन निकरिहीं। इ नबियन आपन ठउर स पूजा बरे अइहीं। उ सबइ भविस्सबाणी करिहीं। उ सबइ सितार, तम्बूरा, बाँसुरी अउ बीणा बजावत रइहीं। 6तब तुरंतही यहोवा क आतिमा तेजी स तोह पइ उतरी। तू बदल जाब्या। तू एक अलगाइ मनई होइ जाब्या। तू इ नबी क संग भविस्सबाणी करइ लगब्या। 7इ बातन क होइ जाए क पाछे तू जउन चहब्या करब्या। परमेस्सर तोहरे संग होइहीं।

8"मोसे पहिले गिलगाल जा। मई तोहरे लगे उ ठउरे प आउबा। तब मई होमबलि अउ मेलबलि चढ़ाउबा। मुला तोहका सात दिना तलक प्रतीच्छा करइ क होइ। तबहिं मई आउब अउ बताउब कि तोहका अगवा का करइ क अहइ।"

### साऊल क नबी जइसा होब

9जइसे ही साऊल समूएल क विदाह देइ घूमा परमेस्सर साऊल क मन पूरी तरह बदल दिहस। इ सबहिं होनी उहइ दिन भइन। 10साऊल अउ ओकर नउकर गिबियथ-एलाहिम गएन। उ ठउर प साऊल नबियन क एक धार्मिक सभा स भेटेस। परमेस्सर क आतिमा साऊल प तेजी स उतरी अउ साऊल नबियन क संग भविस्सबाणी करइ लागेस। 11जउन मनइयन साऊल क पहिले स जानत रहेन उ पचे नबियन क संग ओका भविस्सबाणी करत लखेन। उ पचे आपुस में पूछइ-पछोरइ लागेन, "किस क पूत क का होइ ग अहइ? का साऊल नबियन में स एक अहइ।"

12एक मनई जउन गिबियथ-एलोहिम में रहत रहा कहेस, "हाँ, अउर अइसा लगत ह कि इ ओनकइ मुखिया अहइ।"\* इहइ कारण अहइ कि इ परसिद्ध कहतून बन गइ, "का साऊल नबियन में स कउनो एक अहइ।"

### साऊल घरे लौटत ह

13अखिर उ नबी क तरह भविस्सबाणी बंद कहेस अउर एक आराधना क ठउर प घर क नगिचे चला गवा 14साऊल क काका ओसे अउ ओकरे पिता क नउकर स पूछेस, "तू पचे कहाँ गवा रह्या?"

उ जवाब दिहेस, "हम पचे गदहन क लखइ गवा रहे अउ ओनकइ हेरइ चला ही जात रहे, उ सब कहूँ नाहीं मिल पाएन। एँह बरे हम पचे समूएल क लगे गएन।"

15इ सुनिके साऊल क काका कहेस, "कृपा कइके तू पचे मोका बतावा कि समूएल तू दुइनउँ स का कहेस?"

16साऊल जवाब दिहेस, "समूएल हमका बताएस, कि गदहन पहिले मिलि गवा रहेन।" साऊल काका क राजा होइ क बारे में कछू बात नाहीं बताएस।

हाँ ... मुखिया अहइ इ सब्द क अरथ अहइ "पिता।" अक्सर इ उहइ मनई होत रहा, जउन धरमदूतन क सिच्छा देत रहा अउर ओनकइ रह देखावत रहा। ओका "पिता" कहत रहेन।

**समूह साऊल क राजा होइ क बारे में डुगी पीटिस**

17समूह इस्त्राएल क सबहिं मनइयन स मिस्पा में यहोवा स मिलइ बरे एक संग बटुरइ बरे कहेस। 18समूह इस्त्राएल क मनइयन स कहेस, “इस्त्राएल क परमेस्सर यहोवा कहत हीं, ‘मई इस्त्राएल क मिस्त्र स बाहरे निकारेउँ ह। मई तोहका मिस्त्र क गुलामी स अउ दूसर राज्ज क गुलामी स बचाएउँ ह जउन तोह पइ चोट करइ चाहत रहेन।’ 19मुला आज तू आपन परमेस्सर क तुच्छ जान लिहा ह। तोहार परमेस्सर तोहका सब कस्टन अउ सब समस्या स बचावत ह। मुला तू कह्या, ‘नाहीं हम आपन ऊपर राज्ज करइ बरे एक तु राजा चाहित ह।’ अब आवा अउ यहोवा क समन्वा आपन परिवार अउ आपन गोत क संग खड़ा हवा।”

20समूह इस्त्राएल क सबहिं परिवार क गोते क निअरे लइ गवा। तब समूह नवा राजा चुनब सुरु कियेस। पहिले बिन्यामीन क परिवार गोत चुना गवा। 21समूह बिन्यामीन क परिवार-गोत क हर एक परिवार क एक एक कइके निकसइ क कहेस, मंत्री क परिवार चुना गवा। तब समूह मंत्री क परिवार क हर एक मनई क एक एक कइके ओकरे अगवा स निकसइ क कहेस। इ तरह कीस क पूत साऊल चुना गवा।

मुला जब मनइयन साऊल क खोज कियेन, तउ उ पचे ओका नाहीं पाइ सकेन। 22तब उ पचे यहोवा स पूछेन, “का साऊल अबहिं तलक हियाँ आइ गवा अहइ?”

यहोवा कहेस, “साऊल सामग्री क बीच में छुपा बा।”

23मनइयन दौडेन अउर साऊल क सामग्री क बीच में स लइ आपन। साऊल मनइयन क बीच खड़ा भवा। साऊल बस एतना लम्बा रहा कि सब मनइयन सिरिफ ओकरे काँधे तलक रहेन।

24समूह सब मनइयन स कहेस, “उ मनई क लखा जेका यहोवा चुने अहइ। मनइयन में स कउनो साऊल क नाई नाहीं बा।”

तब मनइयन नारा लगाएन, “राजा क लम्बी उमर होइ।”

25समूह राज्ज क नेमें क मनइयन क समझाएस। उ इ नेमन क एक किताबे में लिखेस। उ किताबे क यहोवा क समन्वा रखेस। तब समूह मनइयन क घर जाइ बरे कहेस।

26साऊल भी आपन घरे गिबा में चला गवा। परमेस्सर बहादुर मनइयन का हिरदय क छुएस अउ बहादुर मनई साऊल क पाछा करइ लागेन। 27मुला कछू परीसानी पइदा करइवाला मनइयन कहेन, “इ मनई हम मनइयन क रच्छा कइसे कइ सकत ह?” उ पचे साऊल क बुराई अउ ओका उपहार देइ स मना कइ दिहेन। मुला साऊल कछू नाहीं कहेस।

**अम्मोनियन क राजा नाहास**

अम्मोनियन क राजा नाहास, गिलाद अउ याबेस क परिवार समूह क कस्ट देत रहा। नाहास ओनके परिवार क हर एक मनई क दाहिन आँखी निकरवाइ डिए रहा। नाहास कउनो क ओनकइ मदद नाहीं करइ देत रहा। अम्मोनियन क राजा नाहास यरदन नदी क पूरब में बसइयन क हर एक इस्त्राएली मनइयन क दाहिन आँखी निकरवाइ लिए रहा। मुला

सात हजार इस्त्राएली अम्मोनियन क हियाँ स पराइ गएन अउर याबेस गिलाद में आइ गएन।

**1** अउर अम्मोनी नाहास अउ ओकर फउज याबेस गिलाद क घेर लिहस। याबेस क सबहिं मनइयन नाहास स कहेस, “अगर तू हमरे संग मेल करब्या, तउ हम पचे तोहार सेवकन बन जाब।”

2मुला अम्मोनी नाहास स जवाब दिहेस, “मई तू पचन क संग तब मेल करब जब मई हर कउनो मनई क दाहिन आँखी निकारि लेब। एँहसे सबहिं इस्त्राएलियन लजाइ जइहीं।”

याबेस क बुजुर्गन नाहास स कहेन, “हम पचे सात दिना क टेमें लेब। हम समूह इस्त्राएल में दूत पठउब। जदि कउनो मदद बरे न आई तउ हम पचे तोहरे लगे आउब अउर आपन क अर्पण कइ देब।”

**साऊल याबेस गिलाद क रच्छा करत ह**

4तउ उ सबइ दूतन गिबा में आएन जहाँ साऊल रहत रहा। उ पचे मनइयन क खबर दिहेन। लोग जोर स रोवत रहेन। 5साऊल आपन गइयन क संग खेते गवा रहा। साऊल खेते स लौटा अउर उ मनइयन क रोउब सुनेस। साऊल पूछेस, “मनइयन क कस्ट अहइ? उ पचे काहे रोवत अहइ?”

तब मनइयन याबेस क दूतन जउन कहे रहेन साऊल क बताएन। 6साऊल ओनकइ बातन क सुनेस। तबइ परमेस्सर क आतिमा साऊल प बड़ी जल्दी स उतरी। साऊल जिआद कोहाइ गवा। 7साऊल गाय क जोड़ी लिहिस अउ ओनकइ बोटी बोटी कइ डिएस। तब उ गइयन क बोटी क ओन दूतन क दिहस। उ दूतन क हुकुम दिहिस कि उ पचे इस्त्राएल क समूह देस में लइ जाई। उ ओनसे इस्त्राएल क मनइयन क इ संदेसा देइ बरे कहेस, “आवा, साऊल अउ समूह क अनुसरण करा। जदि कउनो मनई नाहीं आवत अउर ओकर मदद नाहीं करत तउ ओकरी गाय क संग इहइ होई।”

लोगन में यहोवा क डर छाइ गवा। उ पचे एक तु इकाई क तरह एक संग बटुर गएन। 8साऊल सबहिं मनइयन क बजक स एक संग बटोरेस। हुवाँ इस्त्राएल क तीन लाख मनसेधू अउ यहूदा स तीस हजार मनसेधू रहेन।

9साऊल अउ ओकर फउज याबेस क दूतन स कहेन, “गिलाद में याबेस क मनइयन स कहा कि भियान दुपहरे तलक तू पचन क रच्छा होइ जाइ।”

दूतन साऊल क संदेसा याबेस क मनइयन क दिहेन। याबेस क मनई बहोत खुस भएन। 10तबहिं याबेस क मनइयन अम्मोनी नाहास स कहेन, “हम पचे भियान तोहरे लगे आउब। तब तू हम सबन क संग जउन चाहा कइ सकत ह।”

11दूसर दिन भिन्सारे साऊल आपन फउज क तीन हींसा में बाँटेस। जइसे ही सूरज निकरत साऊल अउ ओकर फउज अम्मोनी डेरा में हमला कियेन। साऊल उ टेम में हमला कियेस, जब उ पचे भिन्सारे रच्छक क बदलत रहेन। साऊल अउ ओकर फउज दुपहर स पहिले ओनका हराइ दिहेन। अम्मोनी फउज अलग अलग दिसा में पराइ

गएन यहाँ तलक कि दुइ सिपाही भी एक संग नहीं जम सकेन।

12तब मनइयन समूएल स कहेन, “उ पचे कहाँ बाटेन जउन कहत हीं कि हम साऊल क राजा क रूप में हुकुम करइ देब नहीं चाहित? उ मनइयन क लइ आवा हम ओनका मारि डउब।”

13मुला साऊल कहेस, “नहीं आज कउनो क जीन मारा। आज यहोवा इस्त्राएल क रच्छा किहेस ह।”

14तब साऊल मनइयन स कहेस, “आवा हम पचे गिलगाल चली। हम पचे साऊल क राजा क तोर पर फुन अनुमोदन करब।”

15तउ सबहिं मनइयन गिलगाल चला गएन। हुवाँ यहोवा क समन्वा मनइयन साऊल क राजा बनाएन। उ पचे यहोवा क मेलबलि चढ़ाएन। अउर सबइ इस्त्राएलियन खुसी मनाएन।

### समूएल इस्त्राएलियन स बात करत ह

12 समूएल सब इस्त्राएलियन स कहेस: “मई उ सब कछू दिहेउँ ह जउन तू पचे मोसे चाहत ह। मई तू पचन क ऊपर एक राजा रखेउँ ह। 2अब तोहका राह देखावइ बरे एक राजा अहइ। मई बुढ़ाइ गवा हउँ अउ मोर बार सफेद होइ ग अहइँ, मुला मोरे बेटवा तोहरे संग अहइ। जब मई एक नन्ह लरिका रहेउँ तब स मई तोहार अगुआ रहेउँ। 3मई हियाँ अहउँ। जदि मई बुरा करम किए अहउँ तोहका ओकरे बारे में यहोवा स अउ ओनकइ चुना भवा राजा स कहइ चाही। का मई कबहुँ कउनो क गइया या गदहा चुरायो हउँ? का मई कउनो क कबहुँ धोखा दिहेउँ ह या नस्कान पठुँचयो हउँ? का मई कउनो का बुरा करइ बरे कबहुँ कउनो स धन या एक जोड़ी पनही लिहउँ ह? जदि मई एहमाँ स कउनो बुरा काम किहेउँ ह तउ मई एँका नीक करब।”

4इस्त्राएलियन जवाब दिहेन, “नहीं, तू हम पचन क कबहुँ बुरा नहीं किहा। तू न हम पचन्क ठग्या, न ही तू हम लोगन्स कबहुँ कछू लिह्या।” 5समूएल इस्त्राएलियन स कहेस, “जउन तू कह्या यहोवा ओकर गवाह अहइ। यहोवा क चुना भवा राजा भी आज गवाह अहइ। उ दुइनउँ गवाह अहइँ कि तू मोहे में कउनो दोख नहीं पाया।” अउर लोगन कहेन, “उ एक गवाह अहइ।”

6तब समूएल मनइयन स कहेस, “यहोवा लखेस ह कि का भवा ह। यहोवा उहइ अहइ जउन मूसा अउ हारुन क चुनेस ह। उ तोहरे पुरखन क मिस्त्र स बाहेर लइ आवा। 7अब चुपचाप हुवाँ खड़ा रहा जब मई तोहका नीक काम बताउब जउन यहोवा तोहरे पुरखन अउ तोहरे बरे किहेस ह।

8“याकूब मिस्त्र गवा। पाछे, मिस्त्र क लोग ओकरे औलाद क जिन्नगी कस्ट स भरि दिहेन। एँह बरे उ सबइ मदद बरे यहोवा क समन्वा रोएन। यहोवा मूसा अउ हारुन क पठएस। मूसा अउ हारुन तोहरे पुरखन क मिस्त्र स बाहेर लइ आपन अउर इ ठउर में बसइ बरे ओनका राह देखाएन।

9“मुला तोहार पुरखन, आपन यहोवा आपन परमेस्सर क बिसरि गएन। एँह बरे परमेस्सर ओनका सिसरा क गुलाम होइ दिहस। सिसरा, हजोर फउज क सेनापति रहा। तब

यहोवा ओनका पलिस्तियन अउ मोआब क राजा क गुलाम बनाएस। उ पचे सबइ तोहरे पुरखन क खिलाफ लड़ेन। 10मुला तोहार पुरखन मदद बरे यहोवा क समन्वा गिड़गिड़नेन। उ पचे कहेन, ‘हम पचे पाप किहे अही। हम सबइ यहोवा क तजा ह अउर झूठ देवता लोग-बाल अउ अस्तोरेत क सेवा कीन्ह ह। मुला अब आप हमका हमरे बैरी स बचावा, अउ हम आप क सेवा करब।’

11“एँह बरे यहोवा यरूबाल (गिदोन), बदान, बरक, यिप्तह अउ समूएल क हुवाँ पठएस। यहोवा तोहरे चारिहुँ कइँती क दुस्मनन स तोहार रच्छा किहेस। अउर तू बचा रह्या। 12मुला तब तू अम्मोनियन क राजा नाहास क आपन खिलाफ लइइ बरे आवत देख्या। तू कह्या, ‘नहीं! हमका आपन ऊपर राज्ज करइ बरे एक तु राजा चाही!’ तू पचे इहउ कह्या, हालाँकि तोहार परमेस्सर यहोवा राजा पहिले स ही रहेन। 13अब तोहार चुना भवा राजा हियाँ अहइ। यहोवा इ राजा क तोहरे ऊपर बइठाए अहइ। 14तू सबन्क परमेस्सर स डेराइ अउ मान करइ चाही। तू पचन्क ओकरे खिलाफ नहीं जाइ क चाही। तू पचन अउ राज करइ वाला राजा क आपन परमेस्सर यहोवा क हुकुम मानइ चाही। अगर तू पचे इ करत रहब्या तउ परमेस्सर तोहार रच्छा करिहीं। 15मुला अगर तू परमात्मा क आग्या क नहीं मन्त्या अउ ओकरे हुकुम क खिलाफ लइत बाद्या, तउ उ तोहरे खिलाफ होइ जाइ। यहोवा तोहका अउ तोहरे राजा क नास कइ देइहीं।

16“अब चुपचाप खड़ा रहा अउ उ बड़का काम क लखा जेका यहोवा तोहरी आँखी क समन्वा करिहीं। 17इ गोहूँ क फसिल काटइ क टेमें अहइ।\* मई यहोवा स पराथना करब। मई ओसे बिजुरी क कइकब अउ बर्खा क भीख माँगब। तब तू बुझब्या कि तू पचे ओ समइ प यहोवा क खिलाफ बुरा किहे रहा जब तू पचे एक राजा क माँग किहे रह्या।

18“तब समूएल यहोवा स पराथना किहेस। उ दिना यहोवा बिजुरी क कइकब अउ बर्खा पठएस। एँहसे यहोवा अउ समूएल स बहोत डेराइ गएन। 19सब मनइयन समूएल स कहेन, “आपन परमेस्सर यहोवा स तू पचे आपन सेवक, हम लोगन बरे पराथना करा। हम पचन्क मरइ जिन द्या! हम पचे बहोत पाप किहे अही। अउर अब एक राजा बरे माँग कइके ओन पापन्क अउर बढ़ाइ दिहा ह।”

20समूएल जवाब दिहस, “डेरा जिन। इ फुरइ अहइ। तू पचे उ सबइ कुकरम किहे ह। मुला यहोवा क पाछा करब बन्द जिन करा। आपन सच्चा हिरदय स यहोवा क सेवा करा। 21देवमूरत तउ मूरत अहइँ, उ सबइ तोहार मदद न करिहीं। एँह बरे ओनकइ पूजा जिन करा। देव मूरत न तउ तोहार मदद कइ सकत हीं, न ही रच्छा कइ सकत हीं। उ सबइ कछू भी नहीं अहइँ।

22“मुला यहोवा आपन मनइयन क तजिहीं नहीं। यहोवा तोहका आपन मनई बनाइके खुस भवा रहा। एँह बरे आपन नीक कामे क रच्छा बरे उ तोहका तजिहीं नहीं। 23जदि मई तोहरे बरे पराथना करब बंद कइ देत हउँ तउ इ यहोवा बरे

इ गोहूँ ... टेमें अहइ बरिस सूखा मौसम रहा अउ उ बिरिया बर्खा नहीं होत रही।

पाप होइ। मई तोहका सही रास्ता अच्छी जिन्नगी जिअइ बरे बताउब। 24मुला तोहका भी यहोवा क मान करइ चाही। तोहका पूरे हिरदय स यहोवा क सेवा सचर्चाइ स करइ चाही। ओन चमत्कारी कार्य क याद राखा जउन उ तोहरे बरे किहेस ह। 25अगर तू जिद्दी अहा अउ बुरा करत बाद्या तउ परमेस्सर तोहका अउ तोहरे राजा क अइसा फूँक देइ जइसे झाड़ू कूड़ा क बटोर देत ह।”

### साऊल पहली गलती करत ह

**13** अब ताई साऊल एक बरिस तलक राज कइ चुका रहा। अउर फुन जब साऊल इस्राएल प दुइ बरिस राज कइ चुका, 2उ इस्राएल स तीन हजार मनई चुनेस। ओहमों दुइ हजार उ पचे रहेन जउन बेतेल क पहाड़ी पहुँटा क मिकमास में ओकरे संग ठहरा रहेन। अउर एक हजार उ मनई रहेन जउन बिन्यामीन क अंदर गिबा में योनातान क संग ठहरा रहेन। साऊल फउज क दूसर सिपाहियन क ओनकइ आपन घर पठइ दिहस।

3योनातान गिब में जाइके पलिस्तियन क ओनकइ सिबिर पइ हमला किहस। पलिस्तियन एकरे बारे में सुनेन। उ पचे कहेन, “हिब्रू लोग बगावत किहे अहइ।”

साऊल कहेस, “हिब्रू मनइयन क जउन कछू भवा अहइ ओका सुनावा।” एँह बरे साऊल लोगन्स कहेस कि उ पचे समूचइ इस्राएल देस में तुरही बजावई। सबइ इस्राएलियन इ खबर सुनेन। उ पचे कहेन, “साऊल पलिस्ती फउज प्रमुख क मारि डाएस। अब पलिस्तियन फुरे इस्राएलियन स घिना करत हीं।”

इस्राएली लोगन्क साऊल स भेंटइ बरे गिलगाल में बोलावा गवा। 5पलिस्ती इस्राएल स लइइ बरे बटुर गएन। पलिस्तियन क लगे तीन हजार रथ अउ छःहजार घुडसवार ओकरे फउज में रहेन। हुवों ऐतना जिआदा पलिस्ती फउजी रहेन जेतना समुदर क किनारे बालू क कन। पलिस्तियन मिकमास में सिबिर डाएन। मिकमास बेतावेन क पूरब में बाटइ।

6इस्राएलियन लखेन कि उ पचे विपत्ति में अहइँ। उ पचे आपन क जालि में अरझा पाएन। उ पचे गुफा अउ चट्टान क खोदरे में छुप जाइ बरे परानेन। उ सबइ चट्टान, कुआँ अउ भुइयों क गइहा में छुप गएन। 7कछू हिब्रू यरदन नदी पार कइके गाद अउ गिलाद प्रदेश में पराइ गएन। साऊल गिलगाल में रहा। ओकरी फउज क सबइ फउजी सिपाहियन डर स थरथरात रहेन।

8समूह कहेस कि उ साऊल स गिलगाल में मिली। साऊल हुवों सात दिनों तलक ओकर प्रतीच्छा किहस। मुला समूह तब भी गिलगाल नहीं पहुँचा। सिपाहियन साऊल क तजि देइ लागेन। 9एँह बरे साऊल कहेस, “मोरे बरे होमबलि अउ मेलबलि लइ आवा।” तब साऊल होमबलि चढ़ाएस। 10जइसन साऊल बलि-भेंट चढ़ाउब खतम किहेस, समूह आइ गवा। साऊल ओसे भेंटइ गवा।

11समूह पूछेस, “इ तू का कइ दिहे अहा?”

साऊल जवाब दिहस, “मई सिपाहिन क आपन क तजत लखा अउर तू तब तलक हियों नहीं रहया, अउर पलिस्ती

मिकमास में ऐकट्ठा होत रहेन।” 12मई आपन मने में सोचेउँ, ‘पलिस्ती हियों गिलगाल में आइके मोह प हमला करिहीं। अउर मई अबहुँ तलक यहोवा स मदद करइ बरे बिनती नहीं किहेउँ ह। एँह बरे मई आपन क दबाइ दिहेउँ अउ होमबलि चढ़ाएउँ।”

13समूह कहेस, “तू मूरख क काम किहे ह। तू आपन परमेस्सर यहोवा क हुकुम क नहीं मान्या। जदि तू परमेस्सर क हुकुम क माने होत्या तउ परमेस्सर तोहरे परिवार क सदा इस्राएल प राज करइ देत। 14मुला अब तोहार पहुँटा लगातार नाही रही। यहोवा अइसे मनई क खोज में रहेन जउन ओकरे हुकुम क मानइ चाहत होइ। उ उ मनई क पाइ लिहेस ह अउर उ ओका आपन मनइयन क नवा प्रमुख चुनिहीं। तू सबइ यहोवा क हुकुम क मान्या नहीं। एँह बरे यहोवा नवा प्रमुख चुनिहीं।”

15तब समूह उठा अउर उ गिलगाल क तजि दिहेस।”

### मिकमास क जुद्ध

साऊल अउ ओकर बची भइ फउज गिलगाल क तजि दिहेस। उ पचे बिन्यामीन में गिबा क गएन। साऊल उ मनइयन क गनेस जउन ओकरे संग रहेन। हुवों करीब छः सौ मनसेधू रहेन। 16साऊल, ओकर पूत योनातान अउ फउजी बिन्यामीन में गिबा क गएन।

पलिस्तियन मिकमास में डेरा डाएन। 17पलिस्तियन उ पहुँटा में रहइवालन इस्राएलियन क सजा देइ क ठान लिहेन। एँह बरे ओनकइ सबन्ते बरिआर फउज हमला करइ खातिर आपन ठउर तजि दिहेस। पलिस्ती फउज तीन हींसा में बँट गइ रहिन। एक टुकड़ी उत्तर में ओप्रा क जाइवाली सड़क स समूह क पहुँटा में गइ। 18दूसर टुकड़ी दक्खिन पूरब बेथोरोन क जाइवाली सड़के प गइ। अउ तीसर टुकड़ी पूरब में चौहद्दी तलक जाइवाली सड़क स गइ। इ सड़क सबोईम क घाटी में रेगिस्तान कइँती खुलत रही।

19इस्राएली मनइयन में स कउनो लोहा क सामान नहीं बनाइ सकत रहा। ओन दिन इस्राएल में लोहार नहीं रहेन। पलिस्ती इस्राएलियन क लोहा क सामान बनवइ नहीं सिखात रहेन काहेकि पलिस्ती डेरात रहेन कि इस्राएलियन कहुँ लोहा क तरवार अउ भाला न बनावइ लग जाईं। 20सिरिफ पलिस्ती लोहा क औजार प धार चढ़ाइ सकत रहेन। एँह बरे जदि इस्राएली आपन हरे क फार कुदार अउ कुल्हाड़ी या दरती प धार चढ़ावइ चाहतेन तउ ओनका पलिस्तियन क लगे जाइ क पड़त रहा 21पलिस्ती लुहार एक तिहाइ औसे चाँदी क हरे क फार अउ कुदाल पइ धार चढ़ावइ बरे लेत रहेन। अउर एक छटा औस चाँदी क फरुआ, कुल्हाड़ी अउ बैल क साँटी क लोहा क सिरे प धार चढ़ावइ बरे लेत रहेन। 22एँह बरे जुद्ध क दिन इस्राएलियन फउजी में स कउनो क लगे लोहा क तरवार या भाला नहीं रहा। सिरिफ साऊल अउ ओकर पूत योनातान क लगे लोहा क औजार रहेन।

23पलिस्ती सिपाहियन क एक ठु टुकड़ी मिकमास क दर्ा क रच्छा करत रही।

### योनातान पलिस्तिन प हमला करत रहेन

**14** उ दिना, साऊल क पूत उ नउजवान स बात किहेस जउन ओकरे औजारन क लइके चलत रहा। योनातान कहेस, “हम पचे घाटी क दुसरी कईती पलिस्तिन क डेरा प चली।” मुला योनातान आपन बाप क नाहीं बताएस।

2साऊल एक अनार क पेड़ क नीचे पहाड़ी क सिरे प मिग्रोन मँ बइठा रहा। इ एक ठउर प खरिहान क नगिचे रहा। साऊल क संग उ समइ 600 जोधा रहेन। 3एक मनई क नाउँ अहिय्याह रहा। एली सीलो मँ यहोवा क याजक रहा। अब अहिय्या याजक रहा। अहिय्या अब एपोद याजक रहा। अहिय्या ईकाबोद क भाई अहीतूब क पूत रहा।

ईकाबोद पीनहास क पूत रहा। पीनहास एली क पूत रहा। 4दर्रा क दुइनउँ कईती एक तु बड़की चट्टान रही। योनातान पलिस्ती डेरा मँ उ दर्रा स जाइ क तजबीजेस। बड़की चट्टान क एक कईती बोजज रहा अउर उ बड़की चट्टान क दूसर कईती सेने रहा। 5एक बड़की चट्टान उत्तर क मिकमास क देखत भइ ठाड़ रही। दूसर बड़की चट्टान दक्खिन कईती गीबा क अउर लखत स ठाड़ रही।

6योनातान आपन उ जवान मददगार स कहेस जउन ओकरे औजार क ढोड़ के चलत रहा, “आवा, हम ओन बिदेसियन क डेरा मँ चली। इ होइ सकत ह यहोवा हम मनइयन क बइपरइ इ मनइयन क हरावइ मँ करइँ। यहोवा क कछू भी नाहीं रोक सकत ऐहसे कउनो फर्क नाहीं पड़त कि हमरे लगे ढेरि फउजी अहइँ कि तनिक फउजी।”

7योनातान क अउजार ढोवइया जवान ओसे कहेस, “जेका तू सब स नीक समझा, करा। मईँ हर कईती स तोहरे संग हउँ।”

8योनातान कहेस, “हम सबइ क चलि द्या! हम पचे घाटी पार करब अउर ओन पलिस्ती रच्छक तलक जाबइ। तबहीं हम सबइ ओनका आपन क लखइ देब। 9जदि उ पचे हम स कहत हीं, ‘तू हुवँइ रुकि जा जब तलक हम तोहरे लगे आवत अही।’ तउ हम पचे हुवँइ ठहरब जहाँ हम होब। हम ओनके नगिचे न जाब। 10मुला अगर पलिस्ती लोग इ कहत हीं, ‘हमरे लगे आवा’ तउ हम ओनकइ लगे ताई चढ़ जाब। काहे? काहेकि इ परमेस्सर कईती स इ एक इसारा होइ। ओकर अरथ इ होइ कि यहोवा हम पचन क ओनका हरावइ देइ।”

11ऐह बरे योनातान अउ ओकर सहायक आपन क पलिस्तिन स लखइ देइ दिहस। पलिस्ती रच्छक कहेन, “लखा, हिब्रू ओन बिलिन स निकरिके आवत बाटेन जेहमँ उ सबइ लुकान रहेन।”

12किला क पलिस्ती योनातान अउ ओकरे सहायक बरे चिचिआइँ “हमरे लगे आवा। हम तोहका अबहीं पाठ पढ़ावत अही।” योनातान आपन सहायक स कहेस, “पहाड़ी क ऊपर तलक मोका पछिआवा। यहोवा इस्राएल बरे पलिस्तिन क दइ दिहे बाटइ।”

13-14ऐह बरे योनातान आपन हाथ अउ गोड़ क पहाड़ी प चढ़इ बरे बइपरेस। ओकर सहायक सोझ ओकरे पाछे चढ़ा। योनातान अउ ओकर सहायक पलिस्तिन क हराएन। पहिले

हमला मँ उ पचे लगभग आधा एकड़ पहँटा मँ पलिस्तिन क मारेन। योनातान उ मनइयन स लड़ा जउन समन्वा स हमला बोलत रहेन। अउ योनातान क सहायक ओनकइ पाछे आवा अउ ओन मनइयन क मारत चला गवा जउन अबहीं सिरिफ चोटाइ होइ ग रहेन।

15सबहिं पलिस्ती सिपाही जंग क मैदान मँ सिपाही अउ किला क सिपाही ससाइ गएन। हिउँ तलक कि सबन त बरिआर जोधा भी डेराइ गएन। धरती काँपइ लाग अउ पलिस्ती सिपाही भयानक तरीका स डेराइ गएन।

16साऊल क रच्छक बिन्यामीन देस मँ गिबिया क पलिस्ती सिपाहियन क अलग अलग दिसा मँ भागत परत लखेन। 17साऊल आपन संग क सेना स कहेस, “सिपाहियन क गनती करा। मईँ इ जानइ चाहत हउँ कि डेरा क कउन छोड़ि दिहस।” उ पचे सिपाहियन क गनेन। योनातान अउ ओकर सहायक चला ग रहेन।

18साऊल अहिय्या स कहेस, “परमेस्सर क पवितर सन्दूख लइ आवा।” उ टेमें परमेस्सर क पवितर सन्दूख इस्राएलियन क संग रही। 19साऊल याजक अहिय्या स बतियात रहा। साऊल परमेस्सर क परामर्स क जोहत रहा। मुला फिलिस्तीनी छावनी मँ सोर अउ धमाचउकड़ी लगातार बढ़त जात रही। साऊल धीरा खोइ चुका रहा। आखिर मँ साऊल याजक अहिय्या स कहेस, “बहोत होइ गवा। आपन हाथ नीचे हइँवा अउ पराथना करब बन्द करा।”

20साऊल आपन फउज क बटोरेस अउर लड़ाई मँ चला गवा। पलिस्ती सिपाही बहोत उलझन मँ रहेन। उ सबइ आपन तरवारे स आपुस मँ ही एक दूसर स जुद्ध करत रहेन। 21हुवँ हिब्रू भी रहेन जउन ऐकरे पहिले पलिस्तिन क सेवा मँ रहेन अउर जउन पलिस्ती डरा मँ रुका रहेन। मुला अब उ हिब्रू लोग साऊल अउ योनातान क संग क इस्राएलियन क साथ दिहेन। 22उ इस्राएलियन जउन एप्रैम क पहाड़ी देस मँ लुकान रहेन, पलिस्ती सिपाहियन क पराइ क बात सुनेन। तउ इ इस्राएलियन भी जुद्ध मँ साथ दिहन अउ पलिस्तिन क पाछा करब सुरु किहेन।

23इ तरह यहोवा उहइ दिन इस्राएलियन क बचाव किहेन। जुद्ध बेतावेन क बाहेर फैलि गवा। सारी फउज साऊल क संग रही, ओनकइ लगे लगभग दस हजार मनइयन रहेन। एप्रैम क पहाड़ी पहँटा क हर सहर मँ जुद्ध फइलत गवा।\*

### साऊल दूसर गलती करत ह

24उ दिना साऊल एक भारी गलती किहेस।\* इस्राएलियन भुखान अउ थका मौँवा रहेन। इ ऐह बरे भवा कि साऊल मनइयन क प्रण करइ क मजबूर किहेस। साऊल कहेस, “अगर कउनो मनई सँझ होइ स पहिले खइया क खात ह या मोरे जरिया दुस्मन क हरावइ क पहिले खाइया क खात ह तउ उ मनई क सजा दीन्ह जाइ।” ऐह बरे कउनो भी इस्राएली सिपाही भोजन नाहीं किहेन।

**एप्रैम ... फइलत गवा** इ वाक्य पुरान ग्रीक अनुवाद मँ बाटइ, मुला हिब्रू मँ नाहीं बा।

**उ दिना ... किहेस** इ वाक्य पुरान ग्रीक अनुवाद मँ बाटइ, मुला हिब्रू मँ नाहीं बा।

25-26 जुद्ध क कारण मनई जंगल में चला गएन। उ पचे हुआँ भुईया प पड़ा भवा मधु क छत्ता लखेन। इस्त्राएली लोग उहइ ठउरे प आएन जहाँ मधु क छत्ता रहा। मनइयन भुखान रहेन, मुला उ पचे तनिक भी मधु नहीं पिएन। उ पचे उ प्रण तोड़इ स डेरान रहेन। 27 मुला योनातान उ प्रण क बारे में नहीं जानत रहा। योनातान इ नहीं सुने रहा कि ओकर बाप उ प्रण करइ क मनइयन क बेबस किहे रहा। योनातान क हाथे में एक टहरइ क छड़ी रही। उ मधु क छत्ता में ओकरे सिरा क घुसेड़ेस। उ तनिक मधु निकारेस अउ खाएस। अउर उ आपन क चंगा किहेस।

28 सिपाहियन में स एक ठु योनातान स कहेस, “तोहार बाप एक खास प्रण करइ बरे सिपाहियन क मजबूर किहेस ह। तोहार बाप कहेस ह कि जउन कउनो आज खाइ, सजा पाइ। इहइ कारण रहा कि मनई कछू खाएन नहीं। इहइ कारण अहइ कि मनई कमजोर अहइ।”

29 योनातान कहेस, “मोर बाप धरती बरे परोसानी पइदा किहे अहइ। लखा इ तनिक मधु चाटे स मई केतना चंगा महसूस करत हउँ। 30 बहोत नीक होत कि मनइयन उ खइया क खातेन जउन उ पचे आजु दुस्मन स लिहे अहइँ। हम बहोत जिआदा पलिस्ती मनइयन क मारि सकित रहे।”

31 उ दिना इस्त्राएलियन पलिस्ती मनइयन क हराएन। उ पचे ओनसे मिकमास स अय्यालोन तलक क पूरा रस्ता प लड़ेन। काहेकी मनइयन बहोत भुखान अउ थका मौँवा रहेन। 32 उ पचे पलिस्ती स भेड़ी, गाइ अउ बछवा लिहे रहेन, काहेकि अब इस्त्राएल क मनइयन ऐतना भुखान रहेन कि उ सबइ पसु क भुईया प मारि डिएन अउ ओनका गोस रकत क साथ खाइ लिहेन।

33 एक मनई साऊल स कहेस, “लखा! लोग यहोवा क खिलाफ पाप करत अहइँ। उ पचे अइसा गोस खात अहइँ जेहमों खून बा!”

तब साऊल कहेस, “तू पचे पाप किहे अहा। हिआँ एक ठु बड़का पाथर टहराइ क लिआवा।”

34 तब साऊल कहेस, “मनइयन क लगे जा अउर कहा कि हर मनई आपन साँड़ अउ भेड़ी मोरे लगे हिआँ लिआवइ। तबहिँ मनइयन क आपन साँड़ अउ भेड़ी हिआँ मारइ चाही। यहोवा क खिलाफ पाप जिन करा। उ गोस क जिन खा जेहमों रकत बा।”

उ राति में हर मनई आपन गोरु क लइ आवा अउ ओनका हुवाँ मारेस, 35 फिन साऊल एक ठु वेदी बनएस। साऊल यहोवा बरे खुद इ वेदी बनउब सुरु किहेस।

36 साऊल कहेस, “हम पचे आजु रात क पलिस्तियन क पाछा करब। हम सबइ हर चीज क लइ लेब। हम ओन सब क मारि डाउब।”

फउज जवाब दिहेस, “वइसा ही करा जइसा ठीक समुझत ह।”

मुला याजक कहेस, “हमका परमेस्सर स पूछइ द्या।”

37 एह बरे साऊल परमेस्सर स पूछेस, “का मोका पलिस्तियन क पाछा करइ चाही? का आप लोग हम पचन क पलिस्तियन क हरावइ देइहीं?” मुला परमेस्सर साऊल क उ दिन जवाब नहीं दिहेस।

38 एह बरे साऊल कहेस, “मोरे लगे सबहिँ प्रमुखन क लइ आवा। हम सबइ मालूम करी कि आज कउन पाप किहेस ह। 39 मई इस्त्राएल क रच्छा करइवाला यहोवा क किरिया खाइके इ प्रण करत हउँ। यदि मोर आपन पूत योनातान भी पाप किहेस ह तउ उ जरुर मरी।” फउज में कउनो भी कछू नहीं कहेस।

40 तब साऊल सबहिँ इस्त्राएलियन स कहेस, “आप लोग इ कइँती खड़ा हवा। मई अउर मोर पूत योनातान दूसर कइँती खड़ा होइहीं।”

सिपाहियन जवाब दिहेन, “महाराज, आप जइसा चाहईं।”

41 तब साऊल पराथना किहेस, “इस्त्राएल क परमेस्सर यहोवा मई आपका सेवक हउँ आजु आप मोका जवाब काहे नहीं देत अहइँ? अगर मई या मोर पूत योनातान पाप किहेस ह तउ इस्त्राएल क परमेस्सर यहोवा आप उरीम देईं। अउर यदि आप क मनई इस्त्राएलियन पाप किहेन ह तउ तुम्मिम देईं।”

साऊल अउ योनातान चुनि लीन्ह गएन अउ मनइयन अजाद होइ गएन। 42 साऊल कहेस, “ओनका फिन स लोकाइ द्या कि कउन पाप करइवाला अहइ मई या मोर पूत योनातान।” योनातान चुनि लीन्ह गवा।

43 साऊल योनातान स कहेस, “मोका बतावा कि तू का किहे अहा?”

योनातान साऊल स कहेस, “मई आपन कुबरी क नोंक स सिरिफ तनिक मधु चाटे रहे। का मोका उ करइ क कारण मरइ चाही?”

44 साऊल कहेस, “जदि मई आपन प्रण पूर नहीं करत हउँ तउ परमेस्सर मोरे बरे बहोत खराब करइ। योनातान क मरइ चाही।”

45 मुला सिपाहियन साऊल स कहेन, “योनातान आज इस्त्राएल क बड़की जीत ताई पहोंचाएस। का योनातान क मरइ ही चाही? कबहुँ नहीं। हम पचे परमेस्सर क किरिया खाइके बचन देइत ह कि योनातान क एक ठु बार भी बाँका नहीं होइ। परमेस्सर आज पलिस्तियन क खिलाफ लड़इ में योनातान क मदद किहेस ह।” इ तरह मनइयन योनातान क बचाएस। ओका फाँसी क सजा नहीं दिन्ह गइ।

46 साऊल पलिस्तियन क पाछा नहीं किहेस। पलिस्ती आपन ठउर क लौटि गएन।

### साऊल क इस्त्राएल क दुस्मन स जुद्ध

47 साऊल इस्त्राएल प पूरा कब्जा कइ लिहेस अउ देखाइ दिहस कि उ राजा अहइ। साऊल इस्त्राएल क चारिहुँ कइँती रहइवालन दुस्मन स लड़ा। साऊल अम्मोनी राजा मोआबी, सोबा क राजा एदोम, अउ पलिस्तियन स लड़ा। जहाँ कहुँ साऊल गवा, उ इस्त्राएल क दुस्मनन क हराइ दिहस। 48 साऊल बहोतइ बहादुर रहा। साऊल अमालेकियन क हराई अउर इस्त्राएलियन क ओकरे ओन दुस्मनन स बचाएस जउन इस्त्राएल क मनइयन स ओकर धन-दौलत छोड़ि चाहत रहेन।

49 साऊल क पूत रहेन योनातान, यिसवी अउ मलकीस। साऊल क बड़की बिटिया क नाउँ मेरब रहा। साऊल क ननकी बिटिया क नाउँ मीकल रहा। 50 साऊल क मेहरारु क नाउँ अहीनोअम रहा। अहीनोअम अहीमास क बिटिया रही।



साऊल क फउज क सेनापति क नाउँ अब्नेर रहा, जउन नेर क पूत रहा। नेर साऊल क काका रहा। 51साऊल क बाप कीस अउ अब्नेर क बाप नेर, अबीएल क पूत रहेन।

52साऊल आपन जिन्नगी भइ बीर बना रहा अउ पलिस्तिन क खिलाफ बहादुरी स लड़ा। साऊल जब भी कबहुँ कउनो मनई क अइसा बहादुर लखत जउन ताकतवर होत तउ उ ओका लइ लेत अउर ओका उ फौजियन क टुकड़ी में धरत जउन ओकरे निअरे रहतेन अउर ओकर रच्छा करत रहेन।

### साऊल क अमालेकियन क नास करब

**15** एक दिन समूह साऊल स कहेस, “यहोवा मोका आपन इस्त्राएली लोगन प राजा क रूप में तोहार अभिसेक करइ पठाए रहा। अब यहोवा क संदेस सुना। 2सर्वसक्तीमान यहोवा कहत ह: ‘जब इस्त्राएलियन मिश्र स बाहरे आएन तबहिं अमालेकियन ओनका कनान पहुँचइ स रोक देइ क जतन किहेन। मई लखेउँ कि अमालेकियन ओनका का किहेन। 3अब आवा अउ अमालेकियन स जुद्ध करा। तोहका अमालेकियन अउ ओनकी सबहिं चीजन क नास कइ देइ चाही। कछू भी जिन्दा न रहइ द्या, तोहका सबहिं मनसेधू अउ मेहररुअन क मार डवइ चाही। तोहका सबहिं गदेलन अउ बचवन क मारि डवइ चाही। तोहका ओनकइ सबहिं गइयन अउ भेड़िन अउर ऊँट अउ गदहन क मारि डवइ चाही।”

4साऊल तलाईम में फउज बटोरेस अउर ओहका गनती किहेस। ओहमाँ दुइ लाख पैदर सिपाही अउ दस हजार दूसर फउजी मनई रहेन। एहमाँ यहूदा क मनई भी मिला रहेन। 5तब साऊल अमालेक सहर क गवा अउर उ पचे घाटी में ओनका प्रतीच्छा किहस। 6साऊल केनियन मनइयन स कहेस, “चला जा अउ अमालेकियन क तजि द्या। तब मई तू पचन क अमालेकियन क संग नास नाहीं करब। तू पचे इस्त्राएल बरे दया देखाए रह्या जब उ पचे मिश्र स आवा रहेन।” एँह बरे केनीत मनइयन अमालेकियन क तजि दिहेन। 7साऊल अमालेकियन क हराएस। उ ओनसे हविला स मिश्र क सीमा सुर तलक लगातार जुद्ध किहेस। 8साऊल अगाग क जिन्दा धइ लिहस। अगाग अमालेकियन क राजा रहा। अगाग क फउज क सबहिं मनइयन क साऊल मारि डवइस। 9मुला साऊल अउ इस्त्राएल क सिपाहियन अगाग क जिन्दा रहइ दिहेन। उ पचे सब ते बढ़िया भेड़ी, मोटवार तगड़ी गाइ अउ मेमना क भी धइ लिहेन। उ पचे धरइ क जोगग सबहिं चीजन क धइ लिहेन। अउर उ पचे ओन सबहिं चीजन क नास कइ दिहेन जउन कउनो काम क न रहिन।

### समूह साऊल क ओकरे पाप क बारे में बताउब

10समूह यहोवा क संदेसा पाएस। 11यहोवा कहेस, “साऊल मोर पाछा करब तजि दिहेस ह। एँह बरे मोका ऐँकर दुःख बा कि मई ओका राजा बनएउँ ह। उ ओन काम-काज क नाहीं करत बाटइ जेका करइ क हुकुम मई ओका देत हउँ।” समूह कोहाइ गवा अउ फिन उ राति भइ यहोवा क पराथना किहेस।

12समूह दूसर दिना बड़े तड़के उठा अउ साऊल स भेंटइ गवा। मुला मनइयन बताएन, “साऊल यहूदा में कर्मल नाउँ सहर क गवा बा। साऊल हुवाँ आपन मान-सम्मान में एक पाथर क स्मारक बनावइ ग रहा। तब साऊल कइउ ठउरन क जात्रा किहेस अउ आखिर में गिलगाल क चला गवा।”

एँह बरे समूह हुवाँ गवा जहाँ साऊल रहा। साऊल अमालेकियन स लीन्ह भइ चिजियन क पहिला हीसा भेंटे में चढ़ाए रहा।\* साऊल ओनका होमबलि यहोवा क भेंट चढ़ावत रहा। 13समूह साऊल क लगे पहुँचा। साऊल कहेस, “सुआगत, यहोवा तोहका आसीर्वाद देइ, मई यहोवा क हुकुम क मानेउँ ह।”

14मुला समूह कहेस, “तउ मई इ सब कउने आवाजन क सुनत हउँ? मई तउ भेड़ी अउ गोरु क आवाजे क काहे सुनत हउँ?”

15साऊल जवाब दिहेस, “फउजी ओनका अमालेकियन स लिहेन ह। फउजी सबन ते उत्तिम भेड़ी अउ गोरु क तोहरे परमेस्सर यहोवा क बलि क तरह बारइ बरे बचाइ लिहेन ह। मुला हम पचे दूसर सबहिं चिजियन क नसाइ दिहेउँ ह।”

16समूह साऊल स कहेस, “रुकि जा! मोका तोहसे हुवँइ कहइ द्या जेका पिछली राति में यहोवा मोसे कहे रहा।”

साऊल जवाब दिहेस, “मोका बतावा।”

17समूह कहेस, “बीता भवा टेमें में तू इ बिचारे रह्या कि तू खास मनई न बाट्या। मुला तबहुँ तू इस्त्राएल क परिवार समूह क मुखिया बन गया। यहोवा तोहका इस्त्राएल क राजा चुनेस ह। 18यहोवा तोहका एक खास सेवा काम बरे पठाएस ह। यहोवा कहेस, ‘जा अउर ओन सबहिं खराब अमालेकियन क नास कइ द्या। ओनसे तब तलक लड़त रहा जब तलक उ सबन क नास न होइ जाइ।’ 19मुला तू पचे यहोवा क नाहीं सुन्या। तू पचे ओन चिजियन क धरइ चाहत बाट्या। एँह बरे तू उहइ किह्या जेका यहोवा खराब कहे रहा।”

20साऊल कहेस, “मुला मई तउ यहोवा क हुकुम क पालन किहेउँ ह। मई हुवाँ गएँ जहाँ यहोवा मोका पठाएस। मई सबहिं अमालेकियन क नास किहेउँ ह। मई सिरिफ एक मनई क लइ आएँ ह। ओनकइ राजा अगाग। 21फउजी जवान सबन त उत्तिम भेड़ी अउ गोरु क गिलगाल में तोहरे परमेस्सर यहोवा क बलि देइ बरे चुने रहेन।”

22मुला समूह जवाब दिहेस, “यहोवा क इ दुइनउँ में स कउन जिआदा खुस करत होमबलि अउ बलिदान या कि मनइयन क जरिए आग्या क मानब? इ जिआदा नीक अहइ कि परमेस्सर क बात सुनि लीन्ह जाइ बजाय ऐँकरे कि भेड़ा क चर्बी चढ़ाइ जाइ। 23आग्या क मानइ स इन्कार करब जादूगरी करइ क पाप जइसा अहइ। जिद्दी होब अउर मनमानी करब-मूरत क पूजब जइसा पाप अहइ। तू पचे यहोवा क हुकुम मानइ स इन्कार किहा ह। इहइ कारण

साऊल ... चढ़ाए रहा इ पुरान ग्रीक अनुवाद में बाटइ। इ हिब्रू मानक पाठ में नाहीं बा।

यहोवा अब तोहका राजा क रूप में अंगीकार करइ स इन्कार करत ह।”

24तबहिं साऊल समूएल स कहेस, “मई पाप किहेउँ ह। मई यहोवा क हुकुम क नहीं मानेउँ ह अउर मई उ नहीं किहेउँ ह जउन तू करइ बरे कह्या ह। मई मनइयन स डेरत हउँ एँह बरे मई उहइ किहेउ जउन उ सबइ कहेन। 25अब मई पराथना करत हउँ कि मोरे पाप क छिमा करा। मोरे संग लौटि आवा जेहसे मई यहोवा क आराधना कइ सकउँ।”

26मुला समूएल साऊल स कहेस, “मई तोहरे संग न लउटब। तू पचे यहोवा क हुकुम क नहीं मान्या ह अउर अब यहोवा तोहका इस्त्राएल क राजा क रूप में नकारत बाटइ।”

27जब समूएल ओका बिदा करइ बरे मुड़ि गवा, साऊल समूएल क लबादे क धइ लिहेस। लबादा फाटि गवा। 28समूएल साऊल स कहेस, “तू मोरे लबादा का फारि डया ह। इहइ तरह यहोवा आज इस्त्राएल क राज्ज क तोहसे फारि डाएस ह। यहोवा राज्ज क तोहरे मीतन में स एक क दइ दिहेस ह। उ मनई तोहसे नीक बाटइ। 29यहोवा इस्त्राएल क परमेस्सर अहइ। यहोवा हमेसा रहत ह। यहोवा लबार बोलत नहीं अउर न ही आपन इरादा बदल देत ह। यहोवा मनइयन क नाई नहीं जउन आपन पक्का बिचार बगदाइ देत ह।”

30साऊल जवाब दिहेस ह, “ठीक बा, मई पाप किहेउँ ह। मुला कृपा कइके मोरे संग लउटा। इस्त्राएल क मनइयन अउ नेता लोगन क समन्वा कछू मान द्या। मोरे संग लउटि आवा जेहसे मई तोहरे यहोवा परमेस्सर क आराधना कइ सकउँ।” 31समूएल साऊल क संग लउटि गवा अउ साऊल यहोवा क आराधना किहेस।

32समूएल कहेस, “अमालेकियन क राजा अगाग क मोरे लगे लइ आवा।” अगाग समूएल क समन्वा आवा।

अगाग जंजीरे में बाँधा रहा। अगाग सोचेस, “फुरइ इ मोका मारी नहीं।”

33मुला समूएल अगाग स कहेस, “तोहार तरवारि गदेलन क ओनकइ महतारी स छीनि लिहेस। एँह बरे अब तोहरी महतारी क कउनो लरिका न रही।” अउर समूएल गिलगाल में यहोवा क समन्वा अगाग क बोटी बोटी कइ डाएस।

34तब समूएल हुवाँ स चला अउ रामा पहोँचा। अउर साऊल आपन घर गिबिया क गवा। 35ओकरे पाछे समूएल आपन पूरी जिन्नगी साऊल क नहीं लखेस। समूएल साऊल बरे बहोत दुःखी रहा। अउर यहोवा क बहोत दुःख भवा कि उ पचे साऊल क इस्त्राएल क राजा बनएन।

### समूएल क बेतलेहेम जाब

16 यहोवा समूएल स कहेस, “तू कब ताई साऊल बरे दुःखी रहब्या? मई तोहका बताइ दिहेउँ ह कि साऊल इस्त्राएल क राजा न होइ तउ भी तू पछतात बाट्या। आपन सींग में तेल भरा अउ चल पड़ा। मई तोहका यिसै नाउँ क मनई क लगे पठवत हउँ। यिसै बेतलेहेम में रहत ह। मई ओकरे पूतन में स एक क नवा राजा चुनेउँ ह।”

2मुला समूएल कहेस, “जदि मई जाउँ तउ साऊल इ खबर क सुनी। तबहिं उ मोका मारि डवइ क जतन करी।”

यहोवा कहेस, “बेतलेहेम जा। एक बछवा आपन संग लइ जा। इ कहा, ‘मई यहोवा क बलि चढ़ावइ आइ अहउँ।’ 3यिसै क बलि क टेमें बोलोँवा। तब मई तोहका बताउब कि तोहका का करब अहइ। तोहका उ मनई क अभिसेक करइ चाही जेका मई देखौँउब।”

4समूएल उहइ किहेस जउन यहोवा ओका करइ क कहे रहेन। समूएल बेतलेहेम गवा। बेतलेहेम क पुरख डर स काँप गएन। उ पचे समूएल स भेंटेन अउ उ सबइ ओसे पूछेन, “का आप लोग सान्ति स आइ अहेन?”

5समूएल जवाब दिहेस, “हाँ, मई सान्ति स आवा हउँ। मई यहोवा क बलि-भेंट चढ़ावइ आवा हउँ। आपन क तइयार करा अउ मोरे संग बलि भेंट में आवा।” समूएल यिसै अउ ओकरे बेतहनन क तइयार किहेस। तब समूएल ओनका आवइ अउ बलि भेंट में हाथ बटावइ बरे बोलावा दिहेस।

6जब यिसै अउर ओकर पूत आपन, तउ समूएल एलीआब क लखेस। समूएल सोचेस, “सचमुच इहइ उ मनई बा जेका यहोवा चुनेस ह।”

7मुला यहोवा समूएल स कहेस, “एलीआब सुन्नर बा मुला ओकरे बारे में जिन विचारा। एलीआब लम्बा बा मुला ओकरे बारे में जिन सोचा। परमेस्सर ओन चीजन्क नहीं निहारत जेका मामूली मनई लखत हीं। लोग मनई क बाहरी रूप क निहारत हीं, मुला यहोवा मनई क हिरदइ क लखत ह। एलीआब नीक मनई नहीं अहइ।”

8तब यिसै आपन दूसर पूत अबीनादाब क बोलाएस। अबीनादाब समूएल क लगे स गुजरा। मुला समूएल कहेस, “नाहीं, इहइ उ मनई नहीं अहइ कि जेका यहोवा चुने बा।”

9तब यिसै सम्मा क समूएल क लगे स गुजरइ क कहेस। मुला समूएल कहेस, “नाहीं, यहोवा इ मनई क भी नहीं चुने अहइ।”

10यिसै आपन साताहु पूतन क समूएल क देखौँएस। मुला समूएल यिसै स कहेस, “यहोवा इ मनइयन में स कउनो क भी नहीं चुने अहइ।”

11तब समूएल यिसै स पूछेस, “का तोहार सबहिं पूत इ सबइ ही बाटेन?”

यिसै जवाब दिहेस, “नाहीं मोर सबन त छोट एक अउर पूत अहइ, मुला उ भेड़िन क खवारी करत ह।”

समूएल कहेस, “ओका बोलावा। ओका हिआँ लिआवा। हम पचे तब तलक खइया क खाइ बरे नहीं बइठब जब तलक उ आइ नहीं जाता।”

12यिसै कउनो क आपन सब ते छोटका बेटवा क लइ आवइ बरे पठाएस। उ सुन्नर अउ लाल बार वाला नउजवान रहा। इ बहोत सुन्नर रहा।

यहोवा समूएल स कहेस, “उठा, एका तेल स अभिसेक करा। इ उहइ व्यक्ति अहइ।”

13समूएल तेल स लबालब भरा सींग उठाएस अउ उ खास तेल क यिसै क सब ते छोट पूत क मूँडे प ओकरे भाई लोगन क समन्वा उड़ेरेस। उ दिना क पाछे यहोवा क आत्मा दाऊद प उतरा। समूएल आपन घर, रामा क लउटि गवा।

### दुष्ट आतिमा साऊल क परेसान करत ह

14यहोवा क आतिमा साऊल क तजि दिहेस। तब यहोवा साऊल प एक परेत आतिमा पठएस। उ ओका बहोत परेसान किहेस। 15साऊल क नउकरन ओसे कहेन, “परमेस्सर क जरिए पठइ गइ एक परेत आतिमा तोहका परेसान करत बाटइ। 16हम सबन क हुकुम द्या हम पचे कउनो क हेरब जउन वीणा बजाइ। यदि परेत आतिमा यहोवा क हियँ स तोहरे ऊपर आइ अहइ तउ उ मनई वीणा बजाइ। तब उ परेत आतिमा तोहका अकेल्ले मँ तजि देइ अउर तू चंगा अनुभव करब्या।”

17एँह बरे साऊल आपन नउकरन स कहेस, “अइसे मनई क हेरा जउन वीणा ठीक तरह बजावत ह अउर ओका मोरे लगे लइ आवा।”

18नउकरन मँ स एक कहेस, “बेतलहेम मँ रहइवाला एक मनई अहइ। मईं यिसै क पूत क लखेउँ ह। उ जानत ह कि वीणा कइसे बजाइ जात ह। उ एक बीर पुरुख भी बा अउ अच्छी तरह लइत ह। उ चउकन्ना बा अउ सुन्नर भी अहइ अउर यहोवा ओकरे संग अहइ।”

19एँह बरे साऊल यिसै क लगे दूत पठएस। उ पचे यिसै स उ कहेस जउन साऊल स कहे रहा। “तोहार पूत दाऊद नाउँ क अहइ। उ तोहार भेड़ी क रखवारी करत ह। ओका मोरे लगे पठवा।”

20फुन यिसै साऊल क भेंट देइ बरे कछू चीज तइयार किहेस। यिसै एक गदहा, कछू रोटी अउ एक गगरी दाखरस अउ एक बोकरी क बच्चा लिहेस। यिसै उ चीजन क दाऊद क दिहेस, अउर उ साऊल क लगे पठइ दिहेस। 21इ तरह दाऊद साऊल क लगे गवा अउ ओकरे समन्वा ठाड़ भवा। साऊल दाऊद स बहोत पिआर किहेस। फुन दाऊद साऊल क हथियार लइ चलइवाला बन गवा। 22साऊल यिसै क लगे एक खबर पठएस, “दाऊद क मोरे लगे रहइ अउ मोर सेवा करइ द्या। मईं ओका बहोत पसन्द करत हउँ।”

23जब कबहुँ परमेस्सर क परेत आतिमा साऊल प आवत, तउ दाऊद आपन बाँसुरी उठावत अउ ओका बजावइ लागत। परेत आतिमा साऊल क तजि देत अउ उ चंगा महसूस करइ लागत।

### गोलियत इस्त्राएल क ललकारत ह

17 पलिस्तिन आपन फउज लड़ाई बरे बटोरेन। उ पचे यहूदा मँ बसा सोको मँ जुद्ध बरे एकट्ठा भएन। ओनकइ डेरा। सोको अउ अजेका क बीच एपेसदम्मीन नाउँ क सहर मँ रहा।

2साऊल अउ इस्त्राएली सिपाही भी हुवाँ एक संग जमा भएन। ओनकइ डेरा एला क घाटी मँ रहा। साऊल क फउजी मोर्चा प तैनात पलिस्ती स जुद्ध करइ बरे तैयार रहेन 3पलिस्ती एक पहाड़ी प रहेन अउ इस्त्राएली दूसर पहाड़ी प अउर ओकर क बीच मँ घाटी रही।

4पलिस्तिन मँ एक बरिआर जोध्दा रहा। गोलियत गत से रहा। गोलियत लगभग नौ फीट ऊँचा रहा। गोलियत पलिस्ती डेरा स बाहेर आवा। 5ओकरे मूँडे प काँसा का टोपा

रहा। उ पट्टीधारी कवच क कोट पहिरे रहा। इ कवच काँसे क बना रहा अउर एकर तौल करीब एक सौ पच्चीस पौण्ड रहा। 6गोलियत आपन गोड़े मँ काँसा क रच्छा कवच पहिरे रहा। ओकरे लगे काँसा का भाला रहा जउन ओकरी पीठी प बाँधा रहा। 7गोलियत क भाला क फाल जुलाहे क छड़ क तरह रहा। भाला क फाल क तौल पन्द्रह पौण्ड रही। गोलियत क सहायक गोलियत क ढाल क धरे भए ओकरे आगे आगे चलत रहा।

8गोलियत रोज रोज बाहेर निकरत रहा अउ उ इस्त्राएली फउजियन कइँती गोहराइके कहत रहा, “तोहार सब फउजी लड़ाई बरे मोर्चा काहे लगाए बाटेन? तू पचे साऊल क सेवक अहा। मईं एक पलिस्ती हउँ। एँह बरे कउनो एक मनई क चुना अउ ओका मोसे लड़इ क पठवा। 9जदि उ मनई मोका मारि डवत ह तउ हम पलिस्ती तोहार गुलाम होइ जाब। मुला जदि मईं ओका जीत लिहेउँ अउ तोहरे मनई क मारि डवउँ तउ तू सबइ हमार दास होइ जाया। तब तू पचे हमार सेवा करब्या।”

10पलिस्ती इ भी कहेस, “आजु मईं खड़ा हउँ अउ इस्त्राएल क फउज क मसखरी उड़ावत हउँ। मोका आपन मँ स एक क संग लड़इ द्या।”

11गोलियत जउन कहे रहा ओका साऊल अउ इस्त्राएली फउजी सुनेन अउर उ पचे बहोत ससाइ गएन।

### दाऊद क लड़ाई क मैदान जाब

12दाऊद यिसै क पूत रहा। यिसै एप्राती परिवार स यहूदा बेतलेहम स रहा। यिसै क आठ पूत रहेन। साऊल क टेम मँ यिसै एक बुढ़वा मनई रहा। 13यिसै क तीन बड़का पूत साऊल क संग जुद्ध मँ गवा रहेन। पहिला पूत एलीआब रहा। दूसर पूत अबिनादाब रहा। अउर तीसर पूत सम्मा रहा। 14दाऊद सबसे छोटा बेटवा रहा। तीनउँ बड़े बेटवन साऊल क फउज मँ रहेन। 15मुला दाऊद कबहुँ कबहुँ बेतलेहम मँ आपन पिता क भेड़ी क रखवारी करइ बरे साऊल क लगे स चला जात रहा।

16पलिस्ती गोलियत हर रोज भिन्सारे-साँझ क बाहेर आवत रहा अउ इस्त्राएल क फउज क समन्वा खड़ा होइ जात रहा। गोलियत चालीस दिन तलक इ तरह इस्त्राएल क मसखरी उड़ावत रहा।

17एक दिन यिसै आपन पूत दाऊद स कहेस, “पका भवा दाना क इ टोपा अउ इ दस रोटी क डेरा मँ आपन भाई लोगन क लगे लइ जा। 18पनीर क इ दस लोंदा क भी एक हजार सिपाहियन वाली आपन भाई क टुकड़ी क नायक अफसर क लगे लइ जा। लखा कि तोहार भाई कइसे अहइँ। कछू अइसा साच्छी लावा जैसे मोका पता लागइ कि तोहार भाई ठीक-ठाक बाटेन। 19तोहार भाई साऊल क संग अहइँ अउ इस्त्राएल क सब फउजी एला घाटी मँ जमा अहइँ। उ पचे पलिस्ती क खिलाफ लड़त अहइँ।”

20भोर होत भिन्सारे दाऊद भेड़ी क रखवारी दूसर गइरिया क सौंपेस। दाऊद खइया क खाएस अउ हुवाँ बरे चल पड़ा जहाँ खातिर यिसै कहे रहा। दाऊद आपन गाड़ी क डेरा मँ लइ गवा। उ समइया फउजी आपन लड़ाई मँ मोर्चा थामइ

जात रहेन जब दाऊद हुवाँ पहुँचा। फउजी आपन जुद्ध क बिगुल बजावइ लागेन। 2इस्त्राएल अउ पलिस्ती आपन आपन मनइयन क जुद्ध में एक दूसर स भिड़इ बरे पंक्ती-बध करत रहेन।

22दाऊद भोजन अउ चीजन क उ मनई क लगे तजि दिहेस जउन सामान क बाँटत रहा। दाऊद पराइके उ ठउरे प पहाँचा जहाँ इस्त्राएली फउजी रहेन। दाऊद आपन भाइयन क बारे में पूछेस।

23दाऊद आपन भाइयन क संग बात करब सुरु किहेस। उहइ टैम पलिस्ती सबन त बरिआर जोधा जेकर नाउँ गोलियत रहा अउर जउन गथ क बसइया रहा, पलिस्ती फउज स बाहेर आवा। पहिले क तरह गोलियत इस्त्राएल क खिलाफ उहइ बात नरियाइके कहेस।

24इस्त्राएली फउजी गोलियत क लखेन अउर पराइ गएन काहेकि उ लोगन बहोत डरे भवा रहा। 25इस्त्राएली मनइयन में स एक कहेस, “अरे देसबासियो! तोहमों स कउनो लखेस ह जउन बार-बार इस्त्राएल क हँसी उड़ावत ह। जउन कउनो उ मनई क मार देइ धनी होइ जाइ। राजा साऊल ओका बहोत धन देइ। साऊल आपन बितिया क उ मनई स बीहि देइ जउन गोलियत क मार देइ। अउर साऊल उ व्यक्ति क परिवार क इस्त्राएल में अजाद कइ देइ।”

26दाऊद आपन बगली खड़ा मनई स पूछेस, “उ का कहेस? इ पलिस्ती क मारइ अउ इस्त्राएल क इ बेज्जती क दूर करइ क इनाम का अहइ? आखिर में इ गोलियत बाटइ का? सिरिफ इ एक बिदेसिया बा। गोलियत एक पलिस्ती स जियादा कछू नहीं। उ काहे सोचत ह कि उ सोझइ परमेस्सर क फउज क खिलाफ बोल सकत ह?”

27एँह बरे इस्त्राएलियन गोलियत क मारइ क इनाम क बारे में बताएन। 28दाऊद क बड़ा भाई एलीआब दाऊद क फउजी स बात करत सुनेस। एलीआब दाऊद प कोहाइ गवा। एलीआब दाऊद स पूछेस, “तू हिआँ काहे आया? रेगिस्तान में उ थोड़ी स भेड़ी क केकरे लगे तजिके आया ह? मई जानत हउँ कि तू हिआँ काहे आया ह? तू उ करब नहीं चाहत्या जउन तोहसे करइ क कहा गवा रहा। तू सिरिफ हिआँ जुद्ध लखइ बरे आवइ चाहत बाट्या।”

29दाऊद कहेस, “अइसा मई का किहेउँ ह? मई कउनो गलती नहीं किहेउँ ह। मई सिरिफ बात करत रहेउँ।” 30दाऊद दूसर मनइयन कइँती मुड़ा अउ ओनसे उ सबइ सवाल किहेस। उ पचे दाऊद वइसे ही जवाब दिहेन।

31कछू मनइयन दाऊद स बात करत सुनेन। उ पचे दाऊद क बारे में साऊल स कहेस। साऊल हुकुम दिहेस कि उ पचे दाऊद क ओकरे लगे लइ आवइँ। 32दाऊद साऊल स कहेस, “कउनो मनई क ओकरे कारण हिम्मत हारइ जिन द्या। मई आपक सेवक हउँ। मई इ पलिस्ती स लड़इ जाब।”

33साऊल जवाब दिहेस, “तू फिलिस्तीन क खिलाफ जुद्ध में नहीं जाइ सकत्या। तू अबहुँ छोटा बच्चा बाट्या। गोलियत जब बच्चा रहा, तबहिँ स जुद्ध में लड़त रहा।”

34मुला दाऊद साऊल स कहेस, “मई आपक सेवक अहउँ। अउर मई आपन बाप क भेड़ी क रखवारी भी करत

रहेउँ ह। जदि कउनो सेर या रीछ आवत अउ झुण्ड स कउनो भेड़ी क उठाइ लइ जात। 35तउ मई ओकर पाछा करत रहेउँ। मई आपन भेड़ी क बचावइ बरे उ जंगली जनावर प हमला करत रहेउँ अउ ओका मारत रहेउँ। अउर जदि उ मोर तरफ मुड़तेन अउर मुझ पइ हमला करतेन तउ मई ओकर गरदन क नीचे क बार पकड़तेन अउर मातेन अउर ओका मरि डालतेन। 36मई एक सेर अउ एक ठु रीछ क मारेउँ ह। मई इ विदेसी गोलियत क वइसे मार डाउब। गोलियत मरी, काहेकि उ साच्छात परमेस्सर क फउज क मसखरी किहेस ह। 37यहोवा मोका सेर अउ रीछ स बचाएस ह। यहोवा इ पलिस्ती गोलियत स भी मोर रच्छा करिहीं।”

साऊल दाऊद स कहेस, “जा यहोवा तोहरे संग होईँ।” 38साऊल आपन ओढ़ना दाऊद क पहिराएस। साऊल एक काँसा क टोप दाऊद क सिर प धरेस अउ ओकरे तन प कवच पहिराएस। 39दाऊद तरवार क लिहेस अउ ओका कवच पइ बाँधिस अउर चलइ क कोसिस किहेस, मुला उ उस भारी भरकम कवच क लेकर चल नहीं सकत काहेकि उ ओन भारी चीजन क पहिरइ क आदत नहीं रही।

दाऊद साऊल स कहेस, “मई इ चीजनक संग नहीं लड़ सकत्या। मोर आदत ओनके बरे नहीं बा।” एँह बरे दाऊद ओन सबन क उतार दिहेस। 40दाऊद आपन टहरइ क छड़ी आपन हाथे में लिहस। नदी क तले स दाऊद पाँच चीकन पाथर चुनेस। उ ओन पाथरन क आपन गड़रियावाला झोरी में राखेस। उ आपन गोफना (गुलेल) आपन हाथे में लिहस अउर उ पलिस्ती गोलियत स मिलइ चल पड़ा।

### दाऊद गोलियत क मारत डावत ह

41पलिस्ती गोलियत धीमे धीमे दाऊद क नगिचे अउर नगिचे स नगिचे होत गवा। गोलियत क सहायक ओकर ढाल लइके ओकरे आगे चलत रहा। 42गोलियत दाऊद क निहारेस अउ हँसा। गोलियत लखेस कि दाऊद फउजी नहीं बा। उ सिरिफ लाल बारेवाला जवान लरिका अहइ। 43गोलियत दाऊद स कहेस, “इ छड़ी काहे बरे बाटइ? का तू कूकुर क नाई मोर पाछा कइके मोका भगावइ आवा बाट्या।” तब गोलियत आपन देवतन क नाउँ लइके दाऊद क खिलाफ सरापेस। 44गोलियत दाऊद स कहेस, “हिआँ आवा, मई तोहरे तने क पंछी अउ पसू क खियाइ देब।”

45दाऊद पलिस्ती गोलियत स कहेस, “तू मोरे लगे तरवार, बर्छी अउ भाला चलावइ आवा अहा। मुला मई तोहरे लगे इस्त्राएल क फउज क परमेस्सर सर्वसक्तीमान यहोवा क नाउँ प आवा हउँ। तू ओनके खिलाफ बुरी बात कह्या ह। 46आजु यहोवा तोहका मोसे हराइ देइहीं। मई तोहका मारि डइहउँ। आजु मई तोहार मूँड कटिहउँ अउ तोहरे देह क पंछी अउ जंगली जनावर क खियाइ देइहउँ। हम पचे दूसर पलिस्तिन क संग हिआँइ करब। तबइ समूचइ संसार जानी कि इस्त्राएल में परमेस्सर बा। 47हिआँ बटुरा सबहिँ मनइयन जनिहई कि मनइयन क रच्छा बरे यहोवा क तरवार अउ भाला क सरोकार नहीं। जुद्ध यहोवा क बा। अउर यहोवा तू सबहिँ पलिस्तिन क हरावइ में हमार मदद करी।”

48पलिस्ती गोलियत दाऊद प हमला करइ ओकरे लगे आवा। दाऊद गोलियत स भिड़इ तेजी स दउड़ा।

49दाऊद एक पाथर आपन झोरी स निकारेस। उ ओका आपन गोफना प चढ़ाएस अउ ओका चलाएस अउ उ गोलियत क कपाल प चोट किहेस। पाथर ओकरे कपाल में गहिर घुसि गवा अउ गोलियत मुँह क बल गिर पड़ा।

50इ तरह दाऊद एक गोफना अउ एक पाथर स पलिस्ती क हराइ दिहस। उ पलिस्ती प चोट किहेस अउ ओका मार डाएस। दाऊद क लगे कउनो तरवार नाहीं रही। 51एँह बरे, दाऊद दउड़ा अउ पलिस्ती क बगल में खड़ा होइ गवा। दाऊद ओका खुद क तरवार ओकरी मियान स निकारेस अउ ओसे गोलियत क मुँह क ओकर सरिर स अलग कइ दिहस। इ तरह उ ओका मारेस।

जब दूसर पलिस्तिन लखेन कि ओनकइ फउज क प्रमुख मारा गवा अहइ तउ उ पचे मुडेन अउ भाग गएन। 52इस्त्राएल अउ यहूदा क फउजी सिपाही चिचियाएन अउ पलिस्तिन क पाछा पलिस्तिन क गत सहर क चउहददी तलक अउ एक्रोन क फटके तलक किहेस। उ पचे ढेर पलिस्तिन क मारेन। ओनकइ लहास सारैम सड़क प गत अउर एक्रान कइँती बिछ गएन। 53पलिस्तिन क पाछा करइ क पाछे इस्त्राएली पलिस्तिन क डेरा में लौटेन। इस्त्राएली उ डेरा स बहोत स चीज ढोइ लइ गएन।

54दाऊद पलिस्ती प्रमुख गोलियत क मुँह यरूसलेम लइ गवा। दाऊद पलिस्तिन क औजार क अपने लगे तम्बू में रखेस।

### साऊल दाऊद स डेराइ लग

55साऊल दाऊद क गोलियत स लइइ बरे जात निहारे रहा। साऊल सेनापति अब्नेर स बात किहेस, “अब्नेर, उ नउजवान क “बाप कउन अहइ?”

अब्नेर जवाब दिहेस, “महाराज, मइँ किरिया खाइके कहत हउँ-मइँ नाहीं जानत।”

56राजा साऊल स कहेस, “पता लगावा कि उ नउ जवान क पिता कउन अहइ।”

57जब दाऊद गोलियत क मारे क पाछे लउटा तउ अब्नेर ओका साऊल क लगे लइ आवा। दाऊद तब भी फिलिस्तीनी क मुँह हाथे में धरे रहा।

58साऊल ओसे पूछेस, “जवान मनई तोहार पिता के अहइ?”

दाऊद जवाब दिहस, “मइँ आप क सेवक बेतलेहेम क यिसै क पूत हउँ।”

### दाऊद अउ योनातान क गहिरी दोस्ती

18 दाऊद जब साऊल स बात पूरी कइ लिहस तब योनातान, दाऊद क बहोत खासमखास मीत बन गवा। योनातान दाऊद स ओतैना ही पिरेम करइ लाग जेतैना आपन स।

2साऊल उ दिन क पाछे दाऊद क आपन लगे रखेस। साऊल दाऊद क ओकरे घर पिता क लगे नाहीं जाइ दिहस।

3योनातान दाऊद स बहोत खासमखास मीत रहा। योनातान दाऊद स एक समझौता किहेस। 4योनातान जउन कोट पहिरे रहा ओका उतारेस अउ दाऊद क दइ दिहस। योनातान आपन सारी वर्दी दाऊद क दइ दिहस। उ आपन धनुस, तरवार अउ कमर बंद भी दाऊद क दइ दिहस।

### साऊल क दाऊद क सफलता प धियान देब

5साऊल दाऊद क अलग अलग जुद्ध में लइइ पठएस। दाऊद बहोत कामयाब रहा। तबहिँ साऊल ओका फउजियन क ऊपर प्रभारी बनाएस। एहसे सब खुस भएन, हिओँ तलक कि साऊल क सब अफसर भी खुस भएन। 6दाऊद पलिस्तिन क खिलाफ लइइ जात रहा। जुद्ध क पाछे उ घर लउटत रहा। इस्त्राएल क सबहिँ सहरन स मेहररुअन साऊल क समन्वा दाऊद क सुआगत में ओसे भेंटइ आवत रहिन। उ सबइ हँसतिन, नाचतिन अउ ढोलक अउ सितार तीन या जियादा धागा वाला क बजावत रहतिन। उ सबइ दाऊद क समन्वा आपन खुसी जाहिर करत रहिन। 7मेहररुअन गावत रहिन,

“साऊल हजारन क मारेस।

दाऊद दसहु हजारन क मारेस।”

8मेहररुअन क इ गीत साऊल क दुःखी कइ दिहस। उ बहोत कोहाइ गवा। साऊल सोचेस, “मेहररुअन दाऊद क प्रसंसा करत अहइँ कि उ दसहु हजार मारेस ह। अउर उ पचे कहत अहइँ कि मइँ सिरिफ हजार मारेउँ। ओका कब्जा करइ बरे का बचा सिरिफ, बादसाहत हीँ?” 9एँह बरे उ समइ स साऊल दाऊद प निगाह रखइ लाग।

### साऊल दाऊद स ससाइ गवा

10दूसरे दिन परमेस्सर स पठइ गइ एक दुट्ट अतिमा साऊल पर जोर स सवारी भरेस। साऊल आपन घर में बहसी होइ ग।\* दाऊद पहिले क तरह वीणा बजाएस। 11मुला साऊल क हाथे में भाला रहा। साऊल सोचेस, “मइँ दाऊद क देवारे में ठोंक देब।” साऊल दुइ बार भाला स हमला किहेस, मुला दाऊद बचि गवा।

12यहोवा दाऊद क संग रहा। अउर यहोवा साऊल क तजि दिहेस। एँह बरे साऊल दाऊद स डेरान रहा। 13साऊल दाऊद क आपन स दूर पठइ दिहस। साऊल दाऊद क दस हजार क सेनापति बनाएस। दाऊद जुद्ध में फउजियन क अगुअइ किहेस। 14यहोवा दाऊद क संग रहा। एँह बरे दाऊद हर कहुँ सफल रहत रहा। 15साऊल लखेस कि दाऊद क बहोत जिआदा कामयाबी मिलत बाटइ तउ साऊल दाऊद स अउर भी जिआदा ससाइ लाग।

16मुला इस्त्राएल अउ यहूदा क सबहिँ मनई दाऊद स पिरेम करत रहेन। उ पचे ओसे पिरेम एँह बरे करत रहेन

साऊल ... बहसी होइ ग या “भविस्सवाणी” क मुताबिक हिब्रू सब्ब क अरथ अहइ-उ मनई क अधिकार आपन कहा अउ रिप प नाहीं रहा। एकर इ मतलब होत ह कि परमेस्सर दूसर मनइयन क विसेस संदेस देइ उ मनई क बइपरत ह।

काहेकि उ जुद्ध में ओनका रस्ता देखौवत रहा अउ ओनकइ बरे लड़त रहा।

### साऊल क आपन बिटिया स दाऊद क बियाहे क योजना

17साऊल दाऊद क मार डवइ चाहत रहा। साऊल दाऊद क धोख देइ क एक उपाय सोचेस। साऊल दाऊद स कहेस, “इ मोर सबन ते बड़की बिटिया मेरब अहइ। मई तोहका एहसे बियाह करइ देब। तबहिं तू सक्तीसाली जोधा होइ जाब्या। तू हमरे पूत क नाई होब्या। तब तू जाया अउ यहोवा क जुद्ध लइया।” इ एक चाल रही। साऊल सचमुच अब इ तखड़ा बखड़ा करत रहा, “इ तरह दाऊद क मोका दाऊद क मारइ क न होइ। मई पलिस्तिथन स ओका आपन खातिर मरवाइ देब।”

18मुला दाऊद कहेस, “मई कउनो खास परिवारे स नाहीं अहउँ। अउर मोर कउन हस्ती कि मई राजा क बिटिया क संग बियाह कइसे कइ सकत हउँ?”

19तउ फुन जब साऊल क बिटिया मेरब क दाऊद क संग बियाह टेमें आवा तब साऊल मेहोलाई क अद्रीएल स ओकर बियाह कइ दिहस।

20साऊल दूसर बिटिया मीकल दाऊद स पियार करत रही। मनइयन साऊल स कहेन कि मीकल दाऊद स पियार करत ह। एहसे साऊल क खुसी भइ। 21साऊल सोचेस, “मई मीकल क साऊल क झाँसा देइ में बइपरब। मई मीकल क दाऊद स बियाह करइ देब। तब पलिस्तिथन दाऊद क खिलाफ होइ जाब अउ उ पचे ओका मरि देब।” एँह बरे साऊल दाऊद स दूसर दाई कहेस, “आजु तू मोरी बिटिया स बियाह कइ सकत ह।”

22साऊल आपन अफसरन क हुकुम दिहस, “दाऊद स छिपके बात करा, उ ओनसे कहा, ‘देखा, राजा तोहका पसन्द करत ह। ओकर अफसर तोहका पसन्द करत हीं। तोहका ओकरी बिटिया स बियाह कइ लेइ चाही।”

23साऊल क अफसरन उ बातन दाऊद स कहेन। मुला दाऊद जवाब दिहस, “का तू पचे समझत ह कि राजा क दमाद बनब सहल बाटइ? मोरे लगे ऐतना धन नाहीं कि राजा क राजकुमारी क दइ सकउँ। मई तउ एक साधरण गरीब मनई हउँ।”

24साऊल क अफसरन साऊल क उ सब बताएन जउन दाऊद कहे रहा। 25साऊल ओनसे कहेस, “दाऊद स इ कहा, ‘दाऊद, राजा इ नाहीं चाहत कि तू ओकरी बिटिया बरे धन द्या। साऊल आपन दुस्मनन स बदला लेइ चाहत ह। एँह बरे बियाह करइ बरे कीमत क रुप में सिरिफ एक सौ पलिस्तिथन क लिंग क खलरी अहइ।” इ साऊल क छिपी चाल रही। साऊल सोचेस कि पलिस्ती इ तरह दाऊद क मारि डइहीं।

26साऊल क अफसरन दाऊद स इ सब बातन कहेन। दाऊद राजा क दमाद बनइ चाहत रहा, एँह बरे उ तुरंतही कछू कइ देखाएस। 27दाऊद अउ ओकर मनई पलिस्तिथन क खिलाफ लड़इ आएन। उ पचे दुइ सौ पलिस्ती मारि डिएन। दाऊद ऐनकइ लिंग क खलरी लिहस अउ साऊल

क दइ दिहस। दाऊद इ एँह बरे किहस काहेकि उ राजा क दमाद बनइ चाहत रहा।

साऊल दाऊद क आपन बिटिया मीकल स बियाह करइ दिहस। 28साऊल निहारेस कि यहोवा दाऊद क संग रहा। मुला साऊल इ भी धियान में राखेस कि ओकर बिटिया मीकल दाऊद स पियार करत रही। 29एँह बरे साऊल दाऊद स अउर भी जिआदा ससाइ गवा। साऊल उ पूरा टेमें दाऊद क खिलाफ रहा।

30इस्त्राएलियन क खिलाफ लड़इ बरे पलिस्ती सेनापति बाहेर निकरत रहेन। मुला हर दाई दाऊद ओनका हराएस। दाऊद साऊल क सबहिं अफसरन में सब स जिआदा सफल रहा तउ दाऊद मसहूर होइ गवा।

### योनातान दाऊद क मदद करत ह

19 साऊल आपन पूत योनातान अउ आपन अफसरन क दाऊद क मार डवइ बरे कहेस। मुला योनातान दाऊद क बहोतइ चाहत रहा। 2-3योनातान दाऊद क चिताउनी दिहस, “होसियार रहा, साऊल तोहका जान स मारि डवइ क मौका तलासत बाटइ। भिन्सारे खेते में जाइके लुकाइ जा। मई आपन बाप क संग खेते में जाब। जहाँ तू लुकान रहब्या हम पचे हुआँ खेते में खड़ा रहब। मई तोहरे बारे में आपन बाप स बतियाब। जउन मोका जानि पड़ी तउन तोहका बताउब।”

4योनातान आपन बाप साऊल स बतियान। योनातान दाऊद क बारे में नीक नीक बात कहेस। योनातान कहेस, “आप राजा अहइँ। दाऊद आपक सेवक बाटइ। दाऊद आप क कउनो नोसकान नाहीं पहुँचाए बाटइ। एँह बरे ओकरे संग कछू बुरा जिन करा। दाऊद हमेसा आप बरे नीक रहा ह। 5दाऊद आपन जिन्नगी प खेला रहा जब उ पलिस्ती गोलियत क मारे रहा। यहोवा समूचइ इस्त्राएल बरे एक बड़की जीत पाए रहेन। आप ओका निहारेन अउ आप ओह प बहोत खुस रहेन। आप दाऊद क नोसकान काहे पहुँचावइ चाहत बाटेन? उ बड़ा मासूम अहइ। ओका मारि डवइ क कउनो कारण नाहीं अहइ।”

6साऊल योनातान क सुनेस। साऊल प्रण किहस। साऊल कहेस, “यहोवा जब ताई जिन्द रहत ह तब ताई दाऊद मारा न जाई।”

7एँह बरे योनातान दाऊद क बोलाएस। उ ओसे उहइ कहेस जउन साऊल योनातान स कहेस। तबहिं योनातान दाऊद क साऊल क लगे लइ आवा। इ तरह दाऊद साऊल क हाजिरी में पहिले क तरह होइ गवा।

### साऊल फुन दाऊद क जान स मारि

#### डवइ क जतन करत ह

8फुन जुद्ध सुरु भवा। अउर दाऊद पलिस्तिथन स जुद्ध करइ गवा। उ पलिस्तिथन क हराएस अउर उ पचे ओकरे समन्वा पराइ गएन। 9मुला यहोवा क जरिए पठइ गइ दुट्ट आतिमा साऊल प सवारी भरेस। साऊल आपन घरे में बइठा रहा। साऊल क हाथे में ओकर भाला रहा। दाऊद वीणा बजावत रहा। 10साऊल दाऊद प हमला किहस अउ आपन भाला स ओका देवारे प ठोक देइ क जतन किहस। दाऊद

फौंदि क निकरि गवा अउ भाला देवारे स टकराइ क रहि गवा। तउ उहइ राति दाऊद हुआँ स पराइ निकरा।

11साऊल मनइयन क दाऊद क घरे पठएस। मनइयन दाऊद क घरे निगरानी करत रहेन। उ पचे राति भइ हुँवई ठहरेन। उ सबइ भिन्सारे दाऊद क मारि डावइ बरे जोहत रहेन। मुला दाऊद क मेहरारु मीकल ओका हुसियार कइ दिहस। उ कहेस, “तोहका आनु क राति पराइ निकरइ चाही। अउ आपन जिन्नगी क रच्छा करइ चाही। जदि तू अइसा न करब्या, तउ भियान मारि दीन्ह जाब्या।” 12फुन मीकल दाऊद क खिड़की स खाले उतारि दिहस अउर उ हुआँ स पराइ निकरा। 13मीकल आपन परिवार क देवता क मूरत लिहस अउ ओका बिछउना प ओलार दिहस। मीकल उ मूरत प ओढ़ना डाइ दिहस। उ ओकरे मूँड़े प बोकरी क बार भी लगाइ दिहस।

14साऊल दाऊद क बंदी बनावइ बरे दूत पठएस। मुला मीकल कहेस, “दाऊद बेमौर बा।”

15तउ पचे हुवाँ स गएन अउर उ सबइ साऊल स जाइके इ बताइ दिहेन, मुला उ पचे दूतन क दाऊद क लखइ बरे वापस पठइ दिहेन। साऊल इ सब मनइयन स कहेस, “दाऊद क मोरे लगे लइ आवा। अगर जरुरत होइ तउ ओका आपन बिछउना प ओलरा भवा उठाइ लिआवा। मई ओका मारि डाउबा।”

16तउ दूत फुन दाऊद क घरे गएन। उ पचे दाऊद क धरइ भीतर गएन, मुला हुवाँ उ पचे लखेन कि बिछउना प सिरिफ एक ठु मूरत रही। उ पचे लखेन कि ओकर बार बस बोकरी क बार रहेन।

17साऊल माइकल स कहेस, “तू मोका इ तरह काहे धोखा दिहा? तू मोरे दुस्मन क पराइ जाइ दिहा। दाऊद पराइ गवा अहइ।” माइकल साऊल क जवाब दिहेस, “दाऊद मोसे कहे रहा कि उ मोका मारि डाइ जदि मई पराइ जाइ मैं ओकर मदद न करबा।”

### दाऊद क रामा क डेरा में जाब

18दाऊद हिफाजत स बचि के निकरि गवा। दाऊद समूएल क लगे रामा पहोंचा। दाऊद समूएल स उ सब बताएस जउन साऊल ओकरे संग किहे रहा। तब दाऊद अउ समूएल ओन डेरन में गएन जहाँ नबियन रहत रहेन अउ उ हुवई थमा गएन।

19साऊल क पता लाग कि दाऊद रामा क नगिचे डेरा में रहन। 20साऊल दाऊद क बंदी बनावइ बरे मनइयन क पठएस। मुला जब उ पचे डेरन में पहोंचेन तउ उ टेमें नबियन क एक टुकरी भबिस्सबाणी करत रही। समूएल नबियन क अगुअइ करत भवा हुआँ खड़ा रहा। परमेस्सर क आतिमा साऊल क दूतन प ओतरी अउर उ पचे भबिस्सबाणी कइ लागेन।

21साऊल इ बारे में सुनेस, एँह बरे उ हुवाँ दूसर दूत पठएस। मुला उ सबइ भबिस्सबाणी कइ लागेन। एँह बरे साऊल तिसरी दाई दूत पठएस। अउर उ पचे भी भबिस्सबाणी कइ लागेन। 22आखिर मैं साऊल खुद रामा पहोंचा। साऊल

सेकु मैं खरिहाने क नगिचे एक ठु बड़का कुआँ क लगे आवा। साऊल पूछेस, “समूएल अउ दाऊद कहाँ बाटेन?”

मनइयन जवाब दिहेन, “रामा क नगिचे डेरा में।”

23तबहिं साऊल रामा क नगिचे डेरा में गवा। परमेस्सर क आतिमा साऊल प उतरी अउर साऊल भबिस्सबाणी करब सुरु किहेस। साऊल रामा क डेरा तलक लगातार भबिस्सबाणी करत गवा। 24तब साऊल आपन ओढ़ना उतारेस। इ तरह साऊल भी समूएल क समन्वा भबिस्सबाणी करत रहा। साऊल हुवाँ सारा दिन अउ सारी रात नंगा होइके ओलरा रहा।

इहइ कारण स कहतूत चल गइ कि, “का साऊल नबियन में स कउनो एक बाटइ?”

### दाऊद अइ योनातान एक समझौता करत हीं

20 दाऊद रामा क नगिचे डेरा स पराइ गवा। दाऊद योनातान क लगे पहोंचा अउ ओसे पूछेस, “मई कउन सा गलती किहेउँ ह? मोर अपराध का अहइ? तोहार बाप मोका मारइ क काहे चाल चपेट करत बाटइ?”

2योनातान जवाब दिहेस, “इ फुरे नाहीं बाटइ। मोर बाप तोहका मारइ क जतन नाहीं करत अहइ। मोर बाप मोका पहिले बगैर बताए कछू नाहीं करत। इ खास बात नाहीं कि इ बात खास होइ या तुच्छ, मोर बाप हमेसा मोका बतावत हीं। मोर बाप मोका इ बतावइ स काहे इन्कार करिहीं कि उ पचे तोहका मारि डावइ चाहत हीं? नाहीं, का इ फुर नाहीं बा।”

3मुला दाऊद जवाब दिहेस, “तोहार बाप ठीक तरह जानत बाटेन कि मई तोहार मीत अहउँ। तोहार बाप आपन मने मैं इ विचारे अहउँ, ‘योनातान, क इ बारे मैं जानकारी नाहीं होइ चाही। जदि उ जानी तउ दाऊद स कहि देइ।’ मुला जइसे यहोवा क होब फुरे बाटइ अउर तू जिअत बाट्या, उहइ तरह इ भी फुर अहइ कि मई मउत क जिआदा नगिचे अहउँ।” 4योनातान दाऊद स कहेस, “मई उ सब कछू करब जउन तू मोसे करवावइ चाहत बाट्या।”

5तबहिं दाऊद कहेस, “लखा भियान नवा चन्द्रिमा क जलसा अहइ। मोका राजा क संग भोजन कइ क अहइ। मुला मोका तीसरे साँझ ताई खेत में लुकाइ रहइ द्या। 6अगर तोहरे बाप क इ जान ‘पड़इ कि मई टरि गवा हउँ तउ ओनसे कह्या कि दाऊद आपन घरे बेतलेहेम जाइ चाहत रहा। ओकर परिवार इ महीना क बलि खातिर खुद न्यैता देत बाटइ। दाऊद मोसे पूछेस कि मई ओका बेतलेहेम जाइ अउ ओकरे परिवारे स ओका भेंटइ देउँ।’ 7अगर तोहार पिता कहत बाटेन, ‘बहोतइ नीक भवा,’ तउ मई अच्छी तरह बचा हउँ। मुला अगर तोहार बाप कोहाइ जात हीं तउ बूझा कि मोर अनभल कइ चाहत हीं। 8योनातान मोहे प दया करा। मई तोहार चाकर अहउँ। तू यहोवा क समन्वा समझौता किहे अहा। अगर मई अपराधी अहउँ तउ तू खुद मोका मारि सकत ह। मुला मोका आपन बाप क लगे जिन लइ जा।”

9योनाताना जवाब दिहेस, “नाहीं, कबहुँ नाहीं। अगर मई जान जाब कि मोर पिता तोहार अनभल कइ चाहत हीं तउ तोहका होसियार कइ देब।”

10दाऊद कहेस, “अगर तोहार पिता करी होइके जवाब देत हीं तउ ओकरे बारे में मोका कउन बताई?”

11तबहिं योनातान कहेस, “आवा, हम पचे खेते में चली।” तउ योनातान अउ दाऊद एक संग खेते में चला गएन।

12योनातान दाऊद स कहेस, “मई इस्त्राएल क यहोवा परमेस्सर क समन्वा इ प्रण किहेउँ ह। मई प्रण करत हउँ कि मई तखराउब बखराउब कि मोर पिता तोहरे बरे कइसा बिचार धरत हीं। मई पता लगाउब कि उ तोहरे बारे में नीक बिचार रखत हीं कि नाहीं। तउ तीन दिन मँ मई तोहरे खेते में खबर पठउब। 13अगर मोर पिता तोह पड़ वार करइ चाहत हीं, तउ मई तोहका जानकारी देब। मई तोहका हिआँ स सुरच्छित जाइ प्रबंध कइ देब। यहोवा तोहका हिआँ स सुरच्छित होइके जाइ देइहीं। यहोवा मोका सजा देई, जदि मई अइसा न करउँ। यहोवा तोहरे संग रहई, जइसा उ मोरे पिता क संग रहेन ह। 14जब तलक मई जिअत रहउँ मोरे प दया राख्या। अउ जब मई मरि जाउँ तउ 15मोरे परिवारे प दया करब बन्द जिन करया। यहोवा दाऊद क सबहिं दुस्मनन क धरती स नास कइ देइहीं। 16अगर उ समइ योनातान क परिवार दाऊद क परिवारे स अलगाइ दीन्ह जाइ क होइ, तउ ओका होइ जाइ द्या। दाऊद क दुस्मनन क यहोवा सजा देइहीं।”

17तब योनातान दाऊद स कहेस कि उ ओकरे बरे पिरेम क प्रण क दोहराइ देइ। योनातान इ एँह बरे किहेस काहेकि उ दाऊद स ओतना ही पिरेम करत रहा जेतना उ अपने स।

18योनातान दाऊद स कहेस, “भियान नवा चन्द्रिमा क जलसा अहइ। तोहार आसन खाली रही। एँह बरे मोर बाप समुझ जइहीं कि तू चला ग अहा। 19तीसरे दिन उहइ जगह प जा जहाँ तू इ परेसानी सुरु होइ क पहिले लुकान रहया। उ पहाड़ी क बगल में प्रतीच्छा करा। 20अउर मई इस पहाड़ी क बगल स तीन अइसा बाण छोड़ब, जइसे मई कउनो निसान प बाण मारत हउँ। 21तब मई बाण क हेरइ बरे, आपन अउजार क ढोवइया लरिका स जाइ बरे कहब। जदि सब कछू नीक होइ तउ मई लरिका स कहब, ‘तू बहोतउ दूर निकरि गवा अहा बाण तउ मोरे लगे बाटइ। लउटा अउ ओका उठाइ लइ आवा।’ जदि मई अइसा कहेउँ तउ तू लुकाइ क जगह स बाहेर आइ सकत ह। मई बचन देत अही कि तू जइसे यहोवा हमेसा बना रहत ह वइसे तू बचा रहब्या। कउनो भी खतरा नाहीं बा। 22मुला जदि खतरा होइ तउ मई लरिका स कहब। ‘बाण बहोतइ दूर बाटइ, जा अउ ओका लइ आवा।’ अगर मई अइसा कहेउँ तउ तोहका चला जाइ चाही। 23हमरे अउ आपन बीच क समझौता क सुमिरिके राखा। यहोवा हमेसा बरे गवाह बा।”

24तउ दाऊद खेते में लुकाइ गवा।

### जेउनर में साऊल क इराद

नवा चन्द्रिमा क जलसा क टैम आवा अउ राजा खइया बरे बइठा। 25राजा देवार क निचके हुवई बइठा जहाँ अक्सर उ बइठत रहा। योनातान साऊल क दूसरी कइँती बइठा। अन्नेर साउब क पाछे बइठा। मुला दाऊद क जगह खाली रही। 26उ दिन साऊल कछू नाहीं कहेस। उ सोचेस, “होइ

सकत ह दाऊद क कछू भवा होइ अउर उ सुद्ध\* न होइ।”

27भियान भए, महीना क दूसर दिन, दाऊद क जगइ फुन खाली रही। तबहिं साऊल आपन पूत योनातान स पूछेस, “यिसै क पूत नवा चन्द्रिमा क जलसा में काल्ह या आजु काहे नाहीं आवा?”

28योनातान जवाब दिहेस, “दाऊद मोका स बेतलेहेम जाइ बरे अनुमती मांगत रहा। 29उ कहे रहा, ‘मोका जाइ द्या। मोर परिवार बेतलेहेम में एक बलि भेंट करत अहइ। मोर भइया हुवाँ रहइ बरे हुकुम दिहे अहइ। अब मई तोहार मीत अहउँ तउ मोका जाइ द्या अउ भाइयन स मिलइ द्या।’ इहइ कारण अहइ कि दाऊद राजा क मेज प नाहीं आवा अहइ।”

30साऊल योनातान प बहोतइ कोहाइ गवा। उ योनातान स कहेस, “तू एक दास अउरत क पूत अहा! मई जानत हउँ कि तू दाऊद क पच्छ में अहा। तू आपन महतारी अउ आपन बरे लज्जा क कारण अहा। 31जब तलक यिसै क पूत जिअत रही तब तलक तू कबहुँ राजा नाहीं बनब्या अउर न तोहार राज्ज होइ। अब दाऊद क हमरे लगे लइ आवा। उ एक मरा मनई अहइ।”

32योनातान आपन बाप स पूछेस, “दाऊद क काहे मारि डावा जाइ चाही? उ कउन अपराध किहे अहइ?”

33मुला साऊल आपन भाला योनातान प चलाएस अउर ओका मारि डावइ क जतन किहेस। एँह बरे योनातान समुझ गवा कि मोर बाप दाऊद फुरइ मार डावइ चाहत ह। 34योनातान कोहाइ गवा अउ उ मेजिया तजि दिहेस। योनातान एँतना घबराइ गवा अउ आपन बाप प कोहान कि जेउनर क दूसर दिन कछू भी खाइ स मना कइ दिहेस। योनातान एँह बरे कोहान काहेकी साऊल ओका बेज्जत किहे रहा अउ साऊल दाऊद क मारि डावइ चाहत रहा।

### दाऊद अउ योनातान क बिद्य होब

35दूसर दिन भिन्सारे योनातान खेते में गवा। उ दाऊद स भेंटइ गवा, जइसा उ पचे राजी भ रहेन। योनातान एक अउजार क ढोवइया लरिका क आपन साथ लइ आवा। 36योनातान लरिका स कहेस, “थावा अउर जउन बाण मई चलावत अहउँ, ओनका लइ आवा।” लरिका धाउब सुरु किहेस अउ योनातान ओकरे मूँडे क ऊपर स बाण चलाएस। 37लरिका उ ठउरे क धावत जहाँ बाण गिरत रहा। मुला योनातान गोहराएस, “बाण तोहसे बहोतइ दूर बाटइ।” 38तब योनातान बोलाइ, “हाली करा। ओनका लइ आवा, हुआँ खड़ा जिन रहा!” लरिका बाणन क उठाएस अउ आपन मालिक क लगे वापस लइ आवा। 39लरिका क कछू पता नाहीं लाग कि का भवा। सिरिफ योनातान अउ दाऊद जान लिहन। 40योनातान आपन धनुस बाण लरिका क दिहेस। तबहिं योनातान लरिका स कहेस, “सहर में लउटि आवा।”

41लरिका वपिस चला गवा। दाऊद आपन उ लुकाइ क ठउर स बाहेर आवा जउन पहाड़ी क दूसर कइँती रहा। दाऊद

सुद्ध या “लेइ काबिल” पक्तर या परमेस्सर क पूजा में काम आवइ जोग्गा। लखा लेवी बंस अध्याय 11-15 जेहमें सुद्ध अउ असुद्ध चीजन क बारे में “पुरान नेम” क नेम दीन्ह अहई।



आपन मूँड़ि क भुँइया तलक निहुराई कइ प्रणाम किहस। दाऊद तीन दाई निहुरा। तब दाऊद अउ योनातान एक दूसरे क चूमन। उ दुइनँ एक संग रोएन, मुला दाऊद योनातान स जिआदा रोएस।

42योनातान दाऊद स कहेस, “सान्ति स जा। हम पचे यहोवा क नाउँ लइके मीत होइके प्रण किहे रहे। हम पचे कहे रहे कि यहोवा हम पचन अउ हमरे सन्तानन क बीच हमेसा गवाह रइहीं।”

### दाऊद क याजक अहीमेलक स मिलइ जाब

21 तब दाऊद चला गवा अउ योनातान सहर क लउट गवा। 2दाऊद नौब नाउँ क नगर में याजक अहीमेलक स मिलइ गवा।

अहीमेलक दाऊद स मिलइ स डरत रहेन। अहीमेलक डर स काँपत रहा। अहीमेलक दाऊद स पूछेस: “तू अकेले काहे अहा? तोहरे संग कउनो मनई काहे नहीं अहइ?”

3दाऊद अहीमेलक क जवाब दिहेस, “राजा मोका खास हुकुम दिहे अहइ। उ मोसे कहेस ह कि ‘इ उददेस क कउनो क जानइ न द्या। कउनो भी मनई ओका न जानइ जेका मई तोहका करइ क कहेउँ ह।’ मई आपन मनइयन स कहि दिहेउँ ह कि उ पचे कहाँ भेंटइँ? 4अब इ बतावा कि तोहरे लगे खाइ क बरे का बाटइ? मोका पाँच ठु रोटी या जउन कछू तू पाइ सका द्या।”

5याजक दाऊद स कहेस, “मोरे लगे हिआँ साधारण रोटी नहीं अहइँ। मुला मोरे लगे कछू पवितर रोटी तउ अहइँ। तोहार अफसर ओका खाइ सकत हीं, जदि उ पचे कउनो मेहरारु क संग यौन सम्बंध न किहे होइँ।”

6दाऊद याजक क जवाब दिहेस, “हम पचे इ दिनन में कउनो मेहरारु क संग नहीं रहे। हमार मनई आपन तन क पवितर राखत हीं हिआँ तलक कि साधरण उददेस बरे जाए पर भी।\* अउर आजु बरे तउ इ खास तरह स फुर बाटइ काहेकि हमार कारज बहोत खास बाटइ।”

7हुआँ पवितर रोटी क अलावा कउनो रोटी नहीं रही। एँह बरे याजक दाऊद क हुवँई रोटी दिहस। इ उहइ रोटी रही जेका याजक यहोवा क समन्वा पवितर मेजे प धरत रहेन। उ पचे उ दिन मेज स इ रोटी क हटाइ लेत रहेन अउ ओकरी जगह ताजी रोटी धरत रहेन।

8उ दिन साऊल क अफसरन में स एक ठु हुआँ रहा। उ एदोमी दोएग रहा। दोएग क हुआँ यहोवा क समन्वा रखा गवा रहा।\* दोएग साऊल क गडरियन क नेता रहा।

9दाऊद अहीमेलक स पूछेस, “का तोहरे लगे हिआँ कउनो भाला या तरवार बाटइ? राजा क कारज बहोत जल्दी

**हमार मनई ... पर भी** लखा समूह 2:11-11 अउ व्यव विव 23:9-14 क नेम।

**दोएग ... गवा रहा** एकर अरथ होइ सकत ह कि दोएग परमेस्सर बरे खास प्रतिज्ञा क एक हीसा क रुप में हुआँ आवा रहा। कउनो दूसर धार्मिक कारण स हुआँ रहा। या एकर इ अरथ होइ सकत ह कि उ हुआँ गवा रहा कि उ कउनो किहे रहा जइसे क मारि डउब।

बा। मोका फउरन जाइ क अहइ, अउर मई आपन तरवार या दूसर कउनो अउजार नहीं लाइ।”

10याजक उत्तर दिहस, “एक मात्र तरवार जउन हिआँ अहइ उ पलिस्ती गोलियत क अहइ। इ उहइ तरवार अहइ जेका तू ओका तब लिहे रहा जब तू ओका एला क घाटी में मारे रह्या। उ तरवार एक ओढ़ना में लिपटी भइ एपोद क पाछे धरी अहइ। जदि तू चाहा तउ ओका लइ सकत ह।

दाऊद कहेस, “एका मोका द्या। गोलियत क तरवार क तरह कउनो तरवार नहीं बा।”

### दाऊद क गत क जाब

11उ दिन दाऊद साऊल क हिआँ स पराइ गवा। दाऊद गथ क राजा अकिस क लगे गवा। 12उ पचे कहेन, “का इ इस्राएल क राजा दाऊद नहीं अहइ? इहइ उ मनई अहइ जेकर गवनिया इस्राएलियन गावत हीं। उ पचे गावत हीं अउ ओकरे बरे नाचत हीं। इस्राएलियन इ गीत गावत हीं:

“साऊल हजारन क मारेस।

दाऊद दसहु हजारन क मारेस।”

13दाऊद क इ बात याद रहिन। दाऊद गत क राजा आकीस स बहोत डेरन रहा। 14एँह बरे, दाऊद आकीस अउ ओकरे अफसरन क समन्वा अपने क पागल मनई जइसा बहाना किहस। जब तलक दाऊद ओनके संग रहा उ पागल मनइयन जइसा बहाना किहस। उ दरवाजा क पल्ला प थूक देत रहा। उ आपन थूक क आपन डाढ़ी प गिराइ देत रहा।

15आकीस आपन अफसरन स कहेस, “इ मनई क लखा। इ तउ पागल जइसा अहइ। तू सबइ एँका मोरे लगे काहे लइ आया ह?” 16का मोर लगे मनई क कमी अहइ कि तू इ मनई क मोरे घरे में मोरे पागलपन क खेल करई बरे लइ आवा ह?”

### दाऊद क अलग अलग ठउर प जाब

22 दाऊद गथ क तजि दिहस। दाऊद अदुल्लाम क गुफा में पराइ गवा। दाऊद क भइयन अउ रिस्तेदारन सुनेन कि दाऊद अदुल्लाम में रहा। उ पचे दाऊद क मिलइ हुआँ गएन। 2बहोत स मनई दाऊद क लगे होइ गएन। उ सबइ, जउन कउनो विपत्ति में रहेन या कर्जा में रहेन या संतुदठ नहीं रहेन। दाऊद क संग होइ गएन। दाऊद क लगे चार सौ मनसेधू रहेन।

3दाऊद अदुल्लाम क तजि दिहस अउर उ मोआब में बसा मिस्पा चला गवा। दाऊद मोआब क राजा स कहेस, “कृपा कइके मोरे महतारी बाप क आवइ द्या अउर आपन लगे तब तलक रहइ द्या जब ताई मई इ न समुझ सकऊँ कि परमेस्सर मोरे संग का करइ जात अहइ।” 4दाऊद आपन महतारी-बाप क मोआब क राजा क लगे तजि दिहस। दाऊद क महतारी बाप मोआब क राजा क लगे तब तलक ठहरेन जब तलक दाऊद किला में रहा।

5मुला नबी गद दाऊद स कहेस, “किला में जिन ठहरा। यहूदा पहुँटा में जा।” एँह बरे दाऊद हुआँ स चल पड़ा अउ हरथ क जंगल में गवा।

### साऊल अहीमेलक क परिवार क नसावत

6साऊल जानि लिहिस कि दाऊद अउ ओकरे मनइयन क बारे में पता चल गवा अहइँ। साऊल गीबा में पहाड़ी प एक पेड़ क नीचे बइठा रहा। साऊल क हाथ में ओकर भाला रहा। साऊल क सबहिँ अफसरन ओकरे चारिहुँ कइँती खड़ा रहेन। 7साऊल आपन उ अफसरन स कहेस, जउन ओकरे चारिहुँ कइँती खड़ा रहेन, “बिन्यामीन क मनइयो, सुना। का तू पचे समुझत ह कि यिसै क पूत तोहका खेत अउ अंगूरे क बगिया देइ? का तू पचे समुझत ह कि उ तोहका तरक्की देइ अउर तू पचन्क हजार मनई अउ सौ मनइयन क ऊपर अफसर बनइ। 8तू पचे मोरे खिलाफ जाल रचत बाट्या। तू पचे छिपी भइ चाल चल्या ह। तू पचन में स कउनो भी मोर पूत योनातान क बारे में नाहीं बताएस ह। तोहमाँ स कउनो भी इ नाहीं बताएस ह कि उ यिसै क पूत क संग क समझौता किहेस ह। तोहमाँ स कउनो भी मोर परवाह नाहीं करत। तोहमाँ स कउनो भी इ नाहीं बताएस कि मोर पूत योनातान दाऊद क हुस्काएस ह। योनातान मोर नउकर दाऊद स कहेस कि उ लुकाइ जाइ अउर मोहे प हमला करइ। अउर इ उहइ अहइ कि जउन दाऊद अब करत बाटइ।”

9एदोमीत दोएग साऊल क अफसरन क संग खड़ा रहा। दोएग कहेस, “मई यिसै क पूत दाऊद क नोब में लखेउँ ह। दाऊद अहीतूब क पूत अहीमेलक स भेंटइ आवा। 10अहीमेलक यहोवा स दाऊद बरे बिनती किहस। अहीमेलक दाऊद क भोजन भी दिहस। अउर अहीमेलक दाऊद क पलिस्ती गोलियत क तरवार भी दिहस।”

11एँह बरे राजा याजक अहीतूब क पूत अउर ओकर सारा परिवार, याजकन जे नोब में रहत भवा, ओका अपन लगे अवइ बरे संदेस भेजेस, अउर उ पचे सबहिँ राजा लगे आएन।

12साऊल अहीमेलक स कहेस, “अहीतूब क पूत, अब सुनि ल्या।” अहीमेलक जवाब दिहस, “हाँ, महाराज।”

13साऊल अहीमेलक स कहेस, “तू अउर यिसै क पूत दाऊद मोरे खिलाफ छिपी योजना काहे बनाया? तू दाऊद क रोटी अउ तरवार दिहा। तू परमेस्सर स ओकरे बरे बिनती किह्या। अउर अब सोझइ, दाऊद मोह पइ हमला करइ क जोहत अहइ।”

14अहीमेलक जवाब दिहस, “दाऊद आप क बड़का पतियाइ क काबिल अहइ। तोहरे अफसरन में स कउनो ओरतना पतियाइ क काबिल नाहीं जेतना दाऊद बा। दाऊद तोहार आपन जमाई अहइ। अउर दाऊद अंगरच्छक क नायक अहइ। तोहार आपन परिवार दाऊद क सम्मान करत ह। 15उ पहली दाई नाहीं रहा, कि मई दाऊद बरे परमेस्सर स बिनती कीन्ह। अइसी बात बिल्कुल नाहीं। मोका या मोरे कउनो नातेदार प दोख जिन लगावा। हम पचे तोहार नउकर अही। मोका कछू भी पता नाहीं कि इ सब का होत बाटइ।”

16मुला राजा कहेस, “अहीमेलक, तू पचन क अउ तोहरे सबहिँ नातेदारन क मरब अहइ।” 17तब राजा आपन बगल में खड़ा भवा रच्छकन स कहेस, “जा अउ यहोवा क याजकन क मारि डावा। एँह बरे इ करा काहेकि उ पचे दाऊद क पच्छ में अहइँ। उ पचे जानत रहेन कि दाऊद परान बाटइ, मुला उ पचे मोका बताएन नाहीं।”

मुला राजा क अफसरन यहोवा क याजकन क मारइ स इन्कार कइ दिहन।

18एँह बरे राजा दोएग क हुकुम दिहस। साऊल कहेस, “दोएग तू जा अउ याजकन क मारि डावा।” एँह बरे एदोमीत दोएग गवा अउ उ याजकन क मारि डाएस। उ दिना दोएग सन क एपोद पहिरइवालन पचासी मनसेधू याजकन क मारि डाएस। 19नोब याजकन क सहर रहा। दोएग सहर क सबहिँ मनइयन क मारि डाएस। दोएग आपन तरवार क भाँजेस उ सबहिँ मनसेधुअन, मेहररुअन, लरिकन अउ गदेलन क जपि दिहस। दोएग ओनकइ गइयन, खच्चरन अउ भेड़ी तलक क जपि दिहस।

20मुला एब्यातार हुआँ स बचि निकरा। एब्यातार अहीमेलक क पूत रहा। अहीमेलक अहीतूब क पूत रहा। एब्यातार बचिके निकरा अउ दाऊद स मिलि गवा। 21एब्यातार दाऊद स कहेस कि साऊल यहोवा क याजकन क मारि डाएस ह। 22तब दाऊद एब्यातार स कहेस, “मई एदोमी दोएग क उ दिना नोब में लखेउँ रहे। अउर मई जानत हउँ कि उ साऊल स कही। मई तोहरे बाप क परिवारे क मउत बरे जिम्मेदार हउँ। 23जउन मनई साऊल तोहका मारइ चाहत ह उ मोका भी मारइ चाहत ह। मोरे संग ठहरा। जिन डेराअ। तू मोरे संग बचा रहब्या।”

### दाऊद कीला में

23 लोगन दाऊद स कहेन, “लखा, पलिस्ती कीला क खिलाफ जुद्ध करत बाटेन। उ पचे खरिहाने स अन्न लूटत अहइ।”

2दाऊद यहोवा स पूछेस, “का मई जाउँ अउ इ पलिस्तियन स लड़उँ?”

यहोवा दाऊद क जवाब दिहस, “जा अउ पलिस्तियन प हमला करा। कीला क बचावा।”

3मुला दाऊद क मनइयन ओसे कहेन, “लखा, हम सबइ हिँओँ यहूदा में अही अउर हम डेरान अही। तनिक सोचा कि हम पचे केँतना डेरान होबइ जब कीला जाब जे जगह पूरा पलिस्ती फउज स भरि अहइ।”

4दाऊद फुन यहोवा स पूछेस। यहोवा दाऊद क जवाब दिहस, “कीला क जा। मई तोहार मदद पलिस्तियन क हरावइ मैं करब।” 5एँह बरे दाऊद अउ ओकर मनई कीला गएन। दाऊद क मनइयन पलिस्तियन स लड़ेन। दाऊद क मनइयन पलिस्तियन क हराएन अउ ओनकइ गइयन क लइ लिहन। इ तरह दाऊद कीला क मनइयन क बचाएस। 6जब एब्यातार दाऊद क लगे पराइके गवा रहा तबहिँ एब्यातार आपन संग एक ठु एपोद संग लइ गवा रहा।

7लोगन साऊल क सूचना दिहिस कि अब दाऊद कीला में बाटइ। साऊल कहेस, “परमेस्सर दाऊद क पकड़इ बरे

मोका एक अवसर दइ दिहस ह। दाऊद खुद जाल में फँस गवा अहइ। उ अइसे कस्बा में गवा अहइ जेहमाँ फाटक अउ छड़ अहइ।” 8साऊल जुद्ध करइ बरे आपन सारी फउज क एक संग बोलाएस। उ पचे आपन तइयारी कीला जाइ अउ दाऊद अउ ओकरे मनइयन क पकड़ेन बरे किहस।

9दाऊद क पता लाग कि साऊल ओकरे खिलाफ चाल चलत अहइ। दाऊद तब याजक एब्द्यातार स कहेस, “एपोद लइ आवा।”

10दाऊद बिनती किहस, “यहोवा इस्त्राएल क परमेस्सर, मई सुनेउँ ह कि साऊल कीला में जाइ अउ मोरे कारण ऐँका नास करइ क चाल चलत बाटइ। 11का साऊल कीला में आइ? का कीला क मनई मोका साऊल क दइ देइहीं? यहोवा इस्त्राएल क परमेस्सर, मई आपक नउकर हउँ। कृपा कइके मोका बतावई।”

यहोवा जवाब दिहस, “साऊल आइ।”

12दाऊद फुन पूछेस, “का कीला क मनई मोका अउ मोरे मनइयन क साऊल क दइ देइहीं।”

यहोवा जवाब दिहस, “उ पचे अइसा करहीं।”

13ऐँह बरे दाऊद अउ ओकर मनई कीला क तजि दिहस। हुआँ लगभग छः सौ मनई रहेन जउन दाऊद क संग गएन। दाऊद अउ ओकर मनई एक ठउर स दूसर ठउर टहरत रहेन। साऊल क पता लग गवा कि दाऊद कीला स बचि निकरा। ऐँह बरे साऊल उ नगर क नहीं गवा।

### साऊल दाऊद क पाछ करत ह

14दाऊद मरुभूमि क चला गवा अउर हुआँ किला में ठहर गवा। दाऊद जिफ क रेगिस्तान क पहाड़ी देस में भी गवा। साऊल रोज दाऊद क हेरत रहा, मुला यहोवा साऊल क धरइ नहीं देत रहा।

15दाऊद जीप क रेगिस्तान होरेस में भी ठहरा रहा। उ ससान रहा काहेकि साऊल ओका मारइ आवत रहा। 16मुला साऊल क पूत योनातान होरेस में दाऊद स भेंटइ गवा। योनातान परमेस्सर प पक्का बिस्सास धरइ बरे दाऊद क मदद किहस। 17योनातान दाऊद स कहेस, “डेराअ जिन। मोर बाप साऊल तोहका नहीं पाउब। तू इस्त्राएल क राजा बनब्या। मई तोहरे बाद दूसर दर्जा प रहब। मोर बाप इ भी जानत हीं।”

18योनातान अउ दाऊद दुइनउँ यहोवा क समन्वा समझौता किहन। तब योनातान घर चला गवा। अउर दाऊद होरेस में टिका रहा।”

### जिफ क मनई दाऊद क बारे में साऊल क बतावत हीं

19जिफ क मनई गीबा में साऊल क लगे आएन। उ पचे साऊल स कहेन, “दाऊद हम पचन क पहुँटा में लुकान अहइ। उ होरेस क कीला में बाटइ। उ हकीला पहाड़ी प यसीमोन क दक्खिन में अहइ। 20महराज आप जब चाहई आवई। इ हम सबन क कर्तब अहइ कि हम पचे आपक दाऊद क दइ देइ।”

21साऊल जवाब दिहस, “यहोवा आप लोगन क मोर मदद बरे असीसई। 22जा अउ ओकरे बारे में अउर जिआव

पता लगावा। पता लगावा कि दाऊद कहाँ रहत ह। अउर इ तोहा कि दाऊद क हुआँ कउन लखेस ह। साऊल सोचेस, ‘दाऊद चतुर बाटइ। उ मोका भरमावइ क कोसिस करत बाटइ।’ 23लुकाइ क जउन ठउरन क प्रयोग दाऊद करत बाटइ, ओन सबहिँ ठउरन क पता लगावा। अउर मोरे लगे वापिस लउटि आवा अउ मोका सब कछू बतावा। तबहिँ मई तोहरे संग चलब। जदि दाऊद उ पहुँटा में होइ तउ मई ओकर पता लगाउब। मई ओकर पता तब भी लगाइ लेब जदि मोका यहूदा क सबहिँ परिवारन क तलासी लेइ क होइ।”

24तब जीपी निवासी साऊल क अगवा अगवा जीपी क लौटि आएन।

दाऊद अउर ओकर मनई मओन क रेगिस्तान में रहेन। उ पचे यसीमोन क दक्खिन में रेगिस्तानी पहुँटा में रहेन। 25साऊल अउ ओकर मनई दाऊद क खोजइ गएन। मुला मनइयन दाऊद क होसियार किहेन। उ पचे बताएन कि साऊल ओनका हेरत अहइ। दाऊद तब माओन क रेगिस्तान में ढलान कईती “चट्टान” प गवा। साऊल सुनेस कि दाऊद माओन क रेगिस्तान में गवा अहइ। ऐँह बरे साऊल उ ठउर प दाऊद क धरइ गवा।

26साऊल पहाड़े क एक कईती रहा। दाऊद अउ ओकर मनई उहइ पहाड़े क दूसर कईती रहेन। दाऊद साऊल स दूर निकरइ बरे हाली करत रहा। साऊल अउ ओकर सिपाही पहाड़े क चारिहुँ कईती अउ ओकरे मनइयन क धरइ जात रहेन।

27मुला साऊल क लगे एक दूत आवा। दूत कहेस, “हाली हाली करा। पलिस्ती हम पचन प हमला करत बाटेन।”

28ऐँह बरे साऊल दाऊद क पाछ करब तजि दिहस अउ पलिस्तिन स लड़इ निकरि गवा। इहइ कारण बाटइ कि मनइयन उ ठउर क “फिसलनी क चट्टान” कहत हीं। 29दाऊद माओन क रेगिस्तान क तजि दिहस अउ एनगोदी क लगे किला में गवा।

### दाऊद साऊल क झेंपावत ह

24 जब साऊल पलिस्तिन क पाछा कइके भगाइ दिहस, तब मनइयन साऊल स कहेन, “दाऊद एनगोदी क लगे रेगिस्तानी इलाका में बा।”

2ऐँह बरे साऊल पूरा इस्त्राएल क तीन हजार मनइयन क चुनेस। साऊल इ मनइयन क संग लिहस अउ दाऊद अउर ओकर मनइयन खोज करब सुरु किहेन। उ पचे जंगली बोकरियन क चट्टान क नचिके हेरेन। 3साऊल सड़क क किनारे भेड़ी क बारा क लगे आवा। हुआँ निअरे एक ठु गुफा रही। साऊल खुद गुफा में आराम करइ बरे गवा। दाऊद अउ ओकर मनई बहोत पाछे उ गुफा में लुकान रहेन। 4मनइयन दाऊद स कहेन, “आजु उ दिन अहइ जेकरे बारे में यहोवा बात किहेन ह। यहोवा तोहसे कहे रहेन, ‘मई तोहार दुस्मनन क तोहका देब, तब तू जउन चाहा आपन दुस्मनन क संग कइ सकब्या।’”

तब दाऊद साऊल क लगे चुपचाप आवा। दाऊद साऊल क लबादे क एक कोना काट लिहस। साऊल दाऊद क नहीं लखेस। 5 पाछे साऊल क लबादे क एक कोना काट लिहे क दाऊद क पछतावा भवा। 6 दाऊद आपन मनइयन स कहेस, “यहोवा मोका आपन सुआमी क संग कछु भी अइसा करइ स रोका। साऊल यहोवा क चुना भवा राजा अहइ। मोका साऊल क खिलाफ कछू भी नहीं करइ चाही। उ यहोवा क चुन लीन्ह गवा राजा बाटइ।” 7 दाऊद इ बात आपन मनइयन क रोकइ बरे कहेस। दाऊद आपन मनइयन क साऊल प हमला करइ नहीं दिहस।

साऊल गुफा तजि दिहस अउ आपन राहे प चला। 8 दाऊद गुफा स निकरा। दाऊद साऊल क जोर स पुकारेस, “मोर पभूँ महाराज।”

साऊल पाछे घूमिके लखेस। दाऊद आपन माथा भुइँया प धइके पैलगी किहस। 9 दाऊद साऊल स कहेस, “आप काहे सुनत ही। जब मनई इ कहत ही कि ‘दाऊद आप प वार करइ क कुचाल गूँथत मथत बाटइ?’” 10 मई आप क चोट पहुँचावइ नहीं चाहत हई। आप एँका आपन आँखिन स लखत ही। यहोवा आजु एँका आप क गुफा में मोरे हाथे में दइ दिहे अहई। मुला मई आपक मारि डवइ स इन्कार किहेउँ ह। मई आप प दया किहेउँ ह। मई कहेउँ, ‘मई आपन सुआमी क चोट नहीं पहुँचावइ। साऊल यहोवा क चुना भवा राजा अहइ।’ 11 मोरे हाथे में इ ओढ़ना क टूका क लखा। मई आप क लबादे क एक टूका काटि लिहेउँ ह। मई आप क मारि सकत हई, मुला मई इ नहीं किहेउँ ह। अब मई चाहत हई कि आप एँका समुझई। मई चाहत हई कि आप क खिलाफ कउनो कुचाल नहीं बनावत हई। मई आपक कउनो बुराई नहीं किहेउँ ह। मुला आप मोर पाछा करत ही अउर मोका मारि डवइ चाहत ही। 12 यहोवा क निआव करइ द्या। यहोवा आप क उ अनिआव क सजा देइहीं जउन आप मोरे संग किहेन ह। मुला मई आपन आप आप स न जूझब। 13 पुरान कहावत अहइ:

‘बुरी चीज बुरी मनई स आवत ही।’

मई कछू भी बुरा नहीं किहेउँ ह। मई बुरा मनई नहीं हई। एँह बरे मई आप प चोट नहीं करब। 14 आप केकर पाछा करत बाटेन। इस्त्राएल क राजा केकरे खिलाफ लइइ आवत अहई? आप अइसे कउनो क पाछा नहीं करत बाटेन जउन आपक चोट पहुँचाइ। इ अइसा ही बाटइ जइसेन आप एक ठु मरा कूकुर या मच्छर क पाछा करत ही। 15 यहोवा क निआव करइ द्या। ओनका आपन अउ मोरे बीच निर्णय करइ द्या। उ हालत क वास्तविकता क देखब अउर मोर मामला क वकालत करब। परमेस्सर मोका तोहार रच्छा करब।”

16 दाऊद आपन इ कहब खतम किहेस, साऊल पूछेस, “मोर पूत दाऊद, का उ तोहार आवाज अहइ?” तब साऊल रोवइ लाग। साऊल बहोत रोएस। 17 साऊल कहेस, “तू सही अहा अउर मई गल्ली पइ अहई। तू हमरे बरे नीक रहया। मुला मई तोहरे बरे बुरा रहेउँ। 18 तू उ बतियन क बताया जेनका तू मोरे बरे किहा। यहोवा मोका तोहरे हवाला किहेस, मुला तू मोका नहीं मारि डया। 19 एहसे पता चलत ह कि

मई तोहार दुस्मन नहीं अहई। यदि कउनो आपन दुस्मन क धरत ह तउ उ ओका बच निकरइ नहीं देत। उ आपन दुस्मन बरे नीक काम नहीं करत। यहोवा तोहका एँकर ईनाम देई काहेकि तू आजु मोरे बरे नीक रहया। 20 मई जानत हई कि तू नवा राजा बनब्या। तू इस्त्राएल क राज्ज क ऊपर करब्या। 21 अब मोसे एक प्रतिज्ञा करा। यहोवा क नाउँ लइके इ प्रतिग्या करा कि तू मोरे सन्तानन क न मरब्या। प्रतिग्या करा कि तू मोरे बाप क परिवार स मोर नाउँ मिटउब्या नहीं।”

22 एँह बरे दाऊद साऊल स प्रतिग्या किहस। दाऊद प्रतिग्या किहेस कि उ साऊल क परिवार क न मारी। तब साऊल लउटि गवा। दाऊद अउ ओकर मनई किला में चला गएन।

### दाऊद अउ नाबाल

**25** समूएल मरि गवा। इस्त्राएल क सबहिँ मनइयन बटुर गएन अउर उ पचे समूएल क मउत प अफसोस परगट किहेन। उ पचे समूएल क ओकरे घर रामा में दफनाइ दिहेन। तबइ दाऊद परन क रेगिस्तान में चला गवा।

2 हवाँ एक ठु मनई रहा जउन माओन में रहत रहा। उ बहोत धनी मनई रहा। ओकरे लगे तीन हजार भेड़ी अउर एक हजार बोकरी रहिन। उ कर्मेल में आपन भेड़ी क ऊन काटत रहा। 3 उ मनई क नाउँ नाबाल रहा। उ कालेब क परिवार क रहा। ओकरी मेहरारु क नाउँ अबीगैल रहा। उ बुद्धिमती अउ बहोतइ सुन्नर मेहरारु रही। मुला नाबाल क्रूर नीच रहा।

4 दाऊद रेगिस्ताने में रहा, अउर उ सुनेस कि नाबाल आपन भेड़ी क ऊन काटत बाटइ। 5 एँह बरे दाऊद दस जवानन क नाबाल स बात करइ पठएस। दाऊद कहेस, “कर्मेल जा। जबल स भेंटा अउर ओका मोरी कइँती स ‘पैलगी’ कहा।” 6 दाऊद नाबाल बरे इ सदेसा पठएस, “मोका आसा अहइ कि तू अउ तोहार परिवार सुखी अहइ। मई आसा करत हई कि जउन कछू तोहार अहइ, ठीक ठाक बाटइ। 7 मई सुनेउँ ह कि तू आपन भेड़ी स ऊन काटत बाट्या। तोहार गइरियन कछू समइ तलक हम पचन क संग रहत रहेन। अउर हम पचे ओनका कउनो कस्ट नहीं दीन्ह। जब तलक तोहार गइरिया कर्मेल में रहेन, हम ओनसे कछू नहीं लीन्ह। 8 आपन सेवकन स पूछा अउर उ पचे बताइ देइहीं कि इ सब कछू फुरे अहइ। कृपा कइके हमरे जवानन प दया करा। इ खुसी क मौका प हम पचे आपक लगे पहुँचत अही। कृपा कइके आप जउन कछू चाहई, दइ देई। कृपा कइके इ मोरे बरे, आपन मीत दाऊद बरे करई।”

9 दाऊद क मनई नाबाल क लगे गएन। उ पचे दाऊद क सँदेसा नाबाल क दिहन। 10 मुला नाबाल ओनकइ बरे छोटपन स बेउहार किहस। नबत कहस, “दाऊद अहइ कउन? इ जेसे क पूत कउन होत ह? इ दिनन ढेरिके दास बाटेन जउन आपन सुआमी लोगन क हिँओँ स पराइ ग अहई। 11 मोरे लगे रोटी अउ पानी अहइ। अउर मोरे लगे उ माँस भी अहइ जेका मई भेड़ी स ऊन कतरइ वालन नउकरन बरे

मारिके लिहेउँ ह। मुला मई ओका उ मनइयन क नाहीं दइ सकत हउँ जेनका मई जानत भी नाहीं हउँ।”

12दाऊद क मनइयन लउटि गएन अउर नाबाल जउन कछू कहे रहा दाऊद क बताइ दिहस। 13तब दाऊद आपन मनइयन स कहेस, “आपन तरवार उठावा।” एँह बरे दाऊद अउ ओकर मनइयन तरवार उठाइ लिहन। लगभग चार सौ मनई दाऊद क संग गएन। अउर दुइ सौ मनई सामान क संग रुका रहेन।

### अबीगैल मसीबत क रोकत ह

14नाबाल क नउकरन मँ स एक तु नाबाल क मेहरारु अबीगैल स बतियान। नउकर कहेस, “दाऊद रेगिस्तान स आपन दूतन क हमरे सुआमी (नाबाल) क लगे पठएस। मुला नाबाल दाऊद क दूतन क संग आपन निचकई क बेउहार किहस। 15इ पचे हम पचन बरे बहोत भला रहेन। हम पचे भेड़ी लइके खेतन मँ जात रहेन। दाऊद क मनइयन हमरे संग बराबर रहेन। अउर उ पचे हमरे संग कउनो बुरा नाहीं किहेन। उ पचे पूरे समइ मँ हमार कछू भी नाहीं चोराएन। 16दाऊद क मनइयन दिन रात हमार रच्छा किहेन। उ पचे हम लोग बरे चहरदेवार क नाई रच्छक रहेन। उ पचे हमार रच्छा तबहिं किहेन जब हम पचे भेड़ी क रखवारी करत भए ओनकइ संग रहेन। 17अब इ बारे मँ सोचा अउर तय करा कि तू का कइ सकत ह। नाबाल कछू कहेस उ मूरखपन स भरा अहइ। हमार सुआमी अउर ओकरे समूचइ परिवार बरे अला बला आवति अहइ।”

18अबीगैल हाली किहस। उ दुइ सौ पाव रोटी, दुइ दाखरस स भरा मसक, पाँच तु भुना भइ भेड़ी, लगभग एक बुसल भुना भवा अनाज, दुइ क्वार्टि मुनक्का अउर दुइ सौ झूरान अंजीर क टिकिया लिहेस अउ एँका गदहन प लादि दिहस। 19तब अबीगैल आपन नउकरन स कहेस, “आगे चलत रहा। मई तोहरे पाछे आवति अहउँ।” मुला उ आपन भतार स कछू नाहीं कहेस।

20अबीगैल आपन गदहा प बइठी अउर पहाड़े क दूसर कइँती पहुँची। उ दूसर कइँती स आवत भइ दाऊद अउ ओकरे मनइयन स भेटेस।

21अबीगैल स मिलइ क पहिले दाऊद कहत रहा, “मई नाबाल क धन दौलत क रच्छा रेगिस्तान मँ कीन्ह। मई चिन्तित रहा कि ओकर कउनो भेड़ी खोवइ नाहीं। मई इ सब कछू बिना लिहे किहेउँ। मई ओकरे बरे नीक किहेउँ। मुला उ मोरे बरे कछू नीक नाहीं किहे रहा। 22परमेस्सर मोका सजा देइ जदि मई नाबाल क परिवारे क कउनो एक मनई क जिअत रहइ देउँ।”

23ठीक उहइ टेमें प अबीगैल आइ। मुला जब अबीगैल दाऊद क लखेस। उ हाली हाली आपन गदहा स उतरि पड़ी। उ दाऊद क समन्वा प्रणाम करइ निहुरी। उ आपन माथा भुइँया प टेकेस। 24अबीगैल दाऊद क गोड़े प गिर पड़ी। उ कहेस, “मान्, कृपा कइके मोका कछू कहइ देई। जउन मई कहउँ ओका सुना। जउन कछू भवा ओकरे बरे मोका दोख द्या। 25मई उ मनइयन क नाहीं लखेउँ जेनका आप पठएन ह। साहब! उ बेकार मनई (नाबाल) प धियान जिन द्या। उ

ठीक उहइ अहइ जइसे ओकर नाउँ अहइ। अउर उ फुरे ‘मूरख’ अहइ। 26यहोवा आप क बेकसूर मनइयन क मारइ स रोकेस ह। फुरइ जइसे यहोवा हमेसा रहत ह वइसे आप जिअत अहई। मई आसा करत हउँ कि आपक दुस्मन लोग अउर जउन आप क नोस्कान पहुँचावइ चाहत हीं, उ सबइ नाबाल क राज्ज मँ होइहीं। 27अब मई आप बरे इ भेंट लइ आइ अहउँ। कृपा कइके इ चीजन क आप उ मनइयन क दइ देई जउन आप क पाछे चलत हीं। 28जुर्म करइ बरे मोका छिमा करई। मई जानत हउँ कि यहोवा आप क परिवार क मजबूत करिहीं अउ तोहरे परिवारे स ढेर क राजा अइहीं। यहोवा इ करिहीं काहेकि आप सब ओनके बरे जुद्ध करत हीं। मनइयन तब तलक आप मँ बुराई न पइहीं जब तलक आप जिअत रइहीं। 29जदि कउनो मनई आप क मारि डवइ क पाछा करत ह, तउ यहोवा आपक परमेस्सर आपक जिन्नगी क रच्छा करिहीं। मुला यहोवा ओकर जिन्नगी क अइसे दूरि लोकइहीं जइसे गुलेल स पाथर लोकाइ दीन्ह जात ह। 30यहोवा आप बरे बहोत स नीक चीजन क करइ क प्रण किहेस ह। अउर यहोवा आपन सबहिं वचन क पूरा करिहीं। परमेस्सर आप क इस्त्राएल क राजा बनइहीं। 31अउर आप बेकसूर मनई क मारि डवइ क अपराधी न होइहीं। अउ आप इ जाल मँ न फँसिहीं। मेहराबानी कइके मोका उ टेमें मँ याद राखा जब यहोवा आप क सफलता देइ।”

32दाऊद अबीगैल क उत्तर दिहेस, “इस्त्राएल क परमेस्सर, यहोवा क गुण गावा। परमेस्सर तोहका मोसे भेंटइ पठए अहइ। 33परमेस्सर तोहार नीक निर्णय बरे तोहका आसीबादि देई। तू आज मोका बेकसूर मनइयन क मारइ स बचावा। 34सचमुच जइसे इस्त्राएल क परमेस्सर, यहोवा हमेसा रहत ह, जदि तू जल्दी स मोसे भेंटइ न आइ होती तउ भियान भिन्सारे तलक नाबाल क परिवार क कउनो भी मनई जिअत नाहीं बच पावत।”

35तउ दाऊद अबीगैल क भेंट क अंगीकार किहस। दाऊद ओसे कहेस, “सान्ति स घर जा। मई तोहार बातन क सुनेउँ ह अउर मई उहइ करब जउन तू करइ क कह्या ह।”

### नाबाल क मउत

36अबीगैल नाबाल क लगे लउटी। नाबाल घरे मँ मौजूद रहा। नाबाल एक तु राजा क तरह भोज खात रहा। नाबाल जी भरिके दाखरस पिए रहा। उ बहोत जियादा पिए रहा। एँह बरे अबीगैल नाबाल क दूसर भिन्सारे तलक कछू भी नाहीं बताएस। 37दूसर दिन भिन्सारे ओकर नसा उतरा। एँह बरे ओकर मेहरारु हर बात बताइ दिहस। फिन नाबाल क दिल क दउरा पड़ि गवा। उ चट्टान क नाई कठोर होइ गवा। 38दस दिनों क पाछे यहोवा नाबाल क मरि जाइ दिहस।

39दाऊद सुनेस कि नाबाल मरि गवा अहइ। दाऊद कहेस, “यहोवा क गुन गावा। नाबाल मोरे खिलाफ खराब बात किहेस ह, मुला यहोवा मोर समर्थन किहस। यहोवा मोका पाप करइ स बचाएस। अउर यहोवा नाबाल क मरि जाइ दिहस काहेकी उ अपराध किहे रहा।” तब दाऊद अबीगैल क सँदेसा पठएस। दाऊद ओका आपन मेहरारू होइ क कहेस। 40दाऊद क नउकर कार्मल गएन अउ अबीगैल स

कहेस, “दाऊद हम पचन क तोहका लइ आवइ क पठएस ह। दाऊद चाहत ह कि तू ओकर मेहरारु बना।”

41अबीगैल भुइँया तलक आपन माथा निहुराएस। उ कहेस, “मई आपक दासी अहउँ। मई सुआमी क सेवकन क गोड़ धोवइ बरे तइयार अहउँ।”

42अबीगैल फउरन गदूहा प बइठी अउ दाऊद क दूतन क संग चल दिहस। अबीगैल आपन संग पाँच ठु नउकरानी लइ आइ। उ दाऊद क मेहरारु बनी।

43दाऊद यिज्रेल क अहिनोअम स बियाह किहेस। अहिनोअम अउ अबीगैल दुइनउँ दाऊद क मेहरारु रहिन। 44दाऊद साऊल क बिटिया मीकल स भी बियाह किहे रहेस। मुला साऊल ओका लइ लिहस अउर ओका एक मनई जेकर नाउँ पलती रहा, जउन लैस क पूत अउर गल्लीम क निवासी रहा ओकर क संग बियाही दिहस।

### दाऊद अउ अबीसै साऊल क डेरा में घुसत हीं

26 जीप क मनई साऊल स भेंटइ गिबिया गएन। उ पचे साऊल स कहेन, “दाऊद हकिला क पहाड़ी में लुकान बा। इ पहाड़ी यसीमोन क ओह पार बा।” 2साऊल जीप क रेगिस्तान में गवा। साऊल तीन हजार सिपाहियन क खुद समूचइ इस्त्राएल स छोटिके साथ लिहस। साऊल अउ इ मनई जीप क रेगिस्ताने में दाऊद क हेरत रहेन। 3साऊल आपन डेरा हकीला क पहाड़ी प डाएस। डेरा सड़क क किनारे यसीमोन क पार रहा।

दाऊद रेगिस्तान में रहत रहा। दाऊद क पता लाग कि साऊल ओकर हुवाँ पाछा किहेस ह। 4तब दाऊद आपन जासूसन क पठएस अउ दाऊद क पता लाग कि साऊल हकीला क पहाड़ी प आइ गवा अहइ। 5तब दाऊद उ ठउरे प गवा जहाँ साऊल आपन डेरा डाए रहा। दाऊद लखेस कि साऊल अउ अब्नेर कहाँ सोवत अहइँ। नेर क पूत अब्नेर साऊल क फउज क सेनापति रहा। साऊल डेरा क बीच सोवत रहा। सारी फउज साऊल क चारिहुँ कइँती रही।

6दाऊद हिल्ती अहीमेलेक अउ यरूयाह क पूत अबीसै स बात किहस। अबीसै योआब क भाई रहा। उ ओसे कहेस, “मोरे संग साऊल क नगिचे ओकरे डेरा में कउन चली?”

अबीसै उत्तर दिहस, “मई तोहरे संग चलबा।”

7तब भइ। दाऊद अउ अबीसै साऊल क डेरा में गएन। साऊल डेरा क बीच सोवा रहा। ओकर भाला भुइँया में ओकरे मूँडे क लगे धँसा रहा। अब्नेर अउ फउज साऊल क चारिहुँ कइँती सोइ रही। 8अबीसै दाऊद स कहेस, “आजु, परमेस्सर तोहरे दुस्मनन क हरवइ दिहेन ह। मोका साऊल क ओकरे भाला स ही जमीन में भोक देइ द्या। मई ओका एक ही वार में मार देबा।”

9मुला दाऊद अबीसै स कहेस, “साऊल क जिन मारा। जउन कउनो चुना भवा राजा क मारत ह उ जरुर सजा पावत ह। 10इ सच अहइ यहोवा जब तलक रही उ साऊल क खुद ही सजा देइ। होइ सकत ह साऊल आपन मउत पाइ या इ होइ सकत ह कि साऊल जुद्ध में मारा जाइ। 11मुला मई पराथना करत हउँ कि यहोवा आपन चुना भवा राजा क मोसे

चोट न करवावइ। अब पानी क गगरी अउर भाला उठावा जउन साऊल क मूँडे क लगे बा। तब हम पचे चली।”

12एँह बरे दाऊद भाला अउ पानी क गगरी लिहस जउन साऊल क मूँडे क लगे रहेन। तब दाऊद अउ अबीसै साऊल क डेरा क तजि दिहस। कउनो मनई एकरे बारे में न जान सका। कउनो भी मनई जागा नहीं। साऊल अउ ओकर सिपाही सोवत रहेन काहे यहोवा ओनका गहिर नींद में डाइ दिहे रहा।

### दाऊद साऊल क फुन लजावत ह

13दाऊद घाटी क दूसर कइँती निकरि गवा। साऊल क डेरा स घाटी क पार पहाड़े क चोटी प खड़ा रहा। दाऊद अउ साऊल क डेरा बहोत दूरी प रहेन। 14दाऊद सेना अउ नेर क पूत अब्नेर क नरियाइके गोहराएस, “अब्नेर, मोका जवाब द्या।”

अब्नेर पूछेस, “तू कउन अहा? तू राजा क काहे बोलावत अहा?”

15दाऊद जवाब दिहस, “तू एक मनई अहा। मोसे कहा, का तू नहीं अहा? अउर तू इस्त्राएल में कउनो भी दूसर मनई स नीक अहा। तब तू आपन सुआमी, राजा क रच्छा काहे नहीं किहा? एक मामूली मनई तोहरे डेरा में तोहार सुआमी, राजा क मारइ आवा। 16तू बहोतइ बड़ी गलती किहा। यहोवा क जिन्नगी क किरिया तोहका अउर तोहरे सिपाहियन क मरि जाइ चाही। काहेकि तू आपन सुआमी अउर यहोवा क चुना भवा राजा क रच्छा नहीं किहा। साऊल क मूँडे क लगे भाला अउ पानी क गगरी क खोज करा। उ सबइ कहाँ बाटेन?”

17साऊल दाऊद क अवाज पहिचानत रहा। साऊल कहेस, “मोर पूत दाऊद, का इ तोहार अवाज बाटइ?”

दाऊद जवाब दिहस, “मोर सुआमी अउ राजा, हँ! इ मोर अवाज अहइ।” 18दाऊद इ भी पूछेस, “महाराज, आप मोर पाछा काहे करत अहइँ? मई कउन सी गलती किहेउँ ह? मई का करइ क अपराधी अहउँ? 19मोर सुआमी अउ राजा, हमरउँ सुना। जदि यहोवा मोरे खिलाफ कोहाइ बरे किहेन ह तउ ओनका एक ठु भेंट अंगीकार करइ द्या। जदि मनई मोरे खिलाफ आपक कोहाएन ह तउ यहोवा क जरिए ओनकइ बरे कछू मुसीबत आवइ द्या। मनइयन मोका इ देस तजइ बरे मजबूर किहन ह, जेका यहोवा मोका दिहन ह। लोग मोसे कहेन, ‘जा। बिदेसी मनइयन क संग रहा। जा दूसर देवतन क पूजा करा।’ 20मोका यहोवा क हाजिरी स दूर जिन मरइ द्या। इस्त्राएल क राजा एक मच्छर क हेरइ निकरा बा। आप उ मनई क तरह अहइँ जउन पहाड़े में तीतर क सिकार करइ निकरा होइँ।”

21तबहिं साऊल कहेस, “मई पाप किहेउँ ह। मोर पूत दाऊद लउटि आवा। आज तू देखेइ दिहा कि मोर जिन्नगी तोहरे बरे अनमोल बाटइ। यह बर मई तोहका चोट पहुँचावइ क कोसिस न करब। मई मूरखपन क काम किहेउँ ह। मई एक ठु बहोत बड़ी गलती किहेउँ ह।”

22दाऊद जवाब दिहस, “राजा क भाला इ बाटइ। आपन कउनो नउ जवान क हिओँ आवइ द्या अउर उ लइ जाइ।

23यहोवा मनइयन क करमे क फल देत हीं। जदि उ नीक करत ह तउ ओका ईनाम देत हीं अउर ओका सजा देत हीं जउन बुरा करत ह। यहोवा आज आप क मोका हरावइ दिहन, मुला मई यहोवा क चुना भवा राजा प चोट नाहीं करब। 24आजु मई आपक देखेइ दिहेउँ ह कि आपक जिन्नगी मोरे बरे अनमोल अहइ। इ तरह यहोवा देखेइहीं कि मोर जिन्नगी ओनकइ बरे महत्व क बाटइ। यहोवा मोर रच्छा हर मुसीबते स करिहीं।”

25तब साऊल दाऊद स कहेस, “मोर पूत दाऊद, परमेस्सर तोहका आसीबादि देई। तू बड़का कारज करब्या अउ सुफल होब्या।”

दाऊद आपन राहे प गवा, अउर साऊल घर लउटी आवा।

### दाऊद पलिस्तियन क संग रहत ह

27 दाऊद सोचेस, “होइ सकत ह साऊल मोका कउनो दिन धइ लेइ। सबन ते बढिया इहइ अहइ मई कि पलिस्तियन क देस स बचि निकरँ। तब साऊल इस्राएल मँ मोर खोज मँ थक जाब इ तरह मई साऊल स बचि निकरब।”

28एह बरे दाऊद अउ ओकर छः सौ मनइयन इस्राएल तजि दिहन। उ सबइ माओक क पूत आकीस क लगे गएन। आकीस गत क राजा रहा। 29दाऊद, ओकर मनइयन आपन पूरा परिवार क साथ आकीस क संग गत मँ रहइ लागेन। दाऊद क संग ओकर दुइ पत्नी रहिन। उ पचे यिज्जेली क अहीनोअम अउ कार्मेल क अबीगैल रहिन। अबीगैल नाबाल क रँइ रही। 4मनइयन साऊल स कहेन कि दाऊद गत क पराइ ग अहइ। अउर साऊल ओकर खोज बन्द कइ दिहस।

5दाऊद आकीस स कहेस, “जदि आप मोसे खुस अहई तउ मोका आपन देस क नगरन मँ स एक मँ एक ठउर दइ देई। मई आप क सिरिफ एक सेवक अहउँ। मोका हुवाँ रहइ चाही, आप क संग हुवाँ रजधानी-सहर मँ नाहीं।”

6उ दिना आकीस दाऊद क सिकलगा नगर दिहस। अउर तब स सिकलगा अब तलक यहूदा क राजा लोगन क बना अहइ। 7दाऊद पलिस्तियन क संग एक बरिस अउ चार महीना रहा।

### दाऊद आकीस राजा क मूरख बनावत ह

8दाऊद अउ ओकर मनई अमालेकी अउ गसूर मँ रहइवालन मनइयन क संग जुद्ध करइ गएन। दाऊद क मनइयन ओका हराएन अउ ओनकइ धन दौलत लइ लिहन। लोग उ पहँटा मँ सुर क नगिचे तेलम स लइके लगातार मिस्र तलक रहत रहेन। 9दाऊद उ पहँटा मँ मनइयन क हराएस। दाऊद ओनकइ सब भेड़िन, पसु, गदहा, ऊँट अउ ओढ़ना लिहस। तब उ इ सबन क आकीस लइ आवा।

10दाऊद इ कई दाईं किहेस। हर दाईं आकीस पूछत कि उ कहाँ लइ अउ ओन चीजन क कहाँ स लइ आवा। दाऊद कहत रहा, “मई यहूदा क दक्खिन कईती लइ।” इ “सब मई यरहमेलियन क दक्खिनी भाग मँ लइ” या “मई

केनियन क दक्खिनी भाग मँ लइ।” 11दाऊद गत क कबहुँ जिअत मेहरारु या मनसेधू नाहीं लइ आवा। दाऊद सोचेस, “जदि हम कउनो मनई क जिअत रहइ देइत ह तउ उ आकीस स कहि सकत ह कि सचमुच मई का किहेउँ ह।”

दाऊद पूरे टेमें, जब तलक पलिस्तियन क देस मँ रहा, इहइ किहस। 12आकीस दाऊद प पतियाब सुरु किहस। आकीस अपने आप सोचेस, “अब दाऊद क आपन लोग ही ओसे घिन करत हीं। इस्राएलियन दाऊद स बहोत जिआदा घिन करत हीं। अब दाऊद मोर सेवा करत रही।”

### पलिस्ती जुद्ध क तइयारी करत हीं

28 पाछे पलिस्तियन आपन फउज क इस्राएल क खिलाफ लइइ बरे बटोरेन। आकीस दाऊद स कहेस, “का तू समुझत ह कि तोहका अउ तोहरे मनइयन क इस्राएलियन क खिलाफ मोरे संग लइइ जाइ चाही?”

29दाऊद जवाब दिहस, “सचमुच ही, तब आप खुद ही लखई कि मई का करि सकत हउँ।”

आकीस कहेस, “बहोत अच्छा, मई तोहका आपन अंग रच्छक बनउब। तू हर समइ मोर रच्छा करब्या।”

### साऊल अउ एन्दोर क मेहररुअन

3समूह मर गवा। सबहिँ इस्राएलियन समूह क मउत प सोक मनाएन। उ पचे समूह क निवास सहर, रामा मँ ओका दफनाए रहेन।

एँकरे पहिले साऊल ओझा अउ भविस्स बतावइवालन क इस्राएल तजइ क मजबूर किहे रहा।

4पलिस्तियन जुद्ध क तइयारी किहन। उ पचे सूनेम आएन अउ उ ठउरे प डेरा ड्राएन। साऊल सबहिँ इस्राएलियन क बटोरेस अउ आपन डेरा गिलबो मँ ड्राएस। 5साऊल पलिस्ती सेना क लखेस, अउर उ डेराइ गवा। ओकर हिरदय डर स धइकइ लाग। 6साऊल यहोवा स बिनती किहेस, मुला यहोवा ओका जवाब नाहीं दिहस। परमेस्सर साऊल स सपन मँ बात नाहीं किहस। परमेस्सर ओका जवाब देइ बरे ऊरीम क नाहीं बइपरेस। परमेस्सर साऊल स बात करइ बरे नबियन क नाहीं बइपरेस। 7आखिर मँ साऊल आपन अफसरन स कहेस, “मोरे बरे कउनो अइसी मेहरारु क पता लगावा जउन ओझा होइ। तब मई ओसे पूछइ जाइ सकत हउँ कि जुद्ध मँ का होइ।” ओकर अफसरन जवाब दिहन, “एन्दोर मँ एक ठु ओझा अहइ।”

8साऊल कइउ तरह क ओढ़वा पहिरेस। साऊल इ एँह बरे किहस कि कउनो मनई इ न जान सकइ कि उ कउन अहइ। रात क उ आपन दुइ मनई क संग उ मेहरारु स भेंटइ गवा। साऊल उ मेहरारु स कहेस, “परेत स मोका मोर भविस्स बतवावा। उ मनई क बोलावा जेकर नाउँ मई लेउँ।”

9मुला उ मेहरारु साऊल स कहेस, “तू सचमुच ही जानत ह कि साऊल का किहेस ह। उ सोखा अउ भविस्स बतावइ वालन क इस्राएल देस तजि देइ क मजबूर किहस ह। तू मोका जाल मँ फाँसइ अउ मजबूर अउ मारि डवइ चाहत ह।”

10साऊल यहोवा क नाउँ लिहस अउ उ मेहरारु स प्रतिग्या किहस, “सचमुच ही यहोवा सास्वत अहइ। एँह बरे तोहका इ करइ क सजा न मिली।”

11मेहरारु पूछेस, “तू केका चाहत बाट्या कि मई ओका हिआँ बोलावउँ?”

साऊल जवाब दिहस, “समूह क बोलावा।”

12अउर इ भवा। मेहरारु समूह क लखेस अउ जोर स चिचियान। उ साऊल स कहेस, “तू मोका धोखा दिहा। तू साऊल अहा।”

13राजा मेहरारु स कहेस, “तू जिन डेराअ। तू का लखति अहा?”

उ मेहरारु कहेस, “मई एक तु परेत आतिमा क धरती स निकरिके आवति लखत हउँ।”

14साऊल पूछेस, “उ कइसा देखेइ पड़त ह?”

मेहरारु जवाब दिहस, “उ लबादा पहिरे एक बुढ़वा क तरह देखेइ पड़त ह।”

साऊल समुझ गवा कि उ समूह रहा। साऊल धरती पर अपना माथा टेका। 15समूह साऊल स कहेस, “तू मोका काहे परेसान किहा?” तू मोका ऊपर काहे बोलाया? साऊल जवाब दिहस, “मई मुसीबत में अहउँ। पलिस्ती मोरे खिलाफ लड़इ आवा अहई, अउर परमेस्सर मोका तजि दिहे अहइ। परमेस्सर अब मोका जवाब न देही। उ मोका जवाब देइ बरे नबियन या सपन क प्रयोग न करिही। इहइ कारण अहइ कि मई तोहका बोलाएँ। मई चाहत अहउँ कि तू बतावा कि मई का करउँ।”

16समूह कहेस, “यहोवा तोहका तजि दिहे अहइ। अब उ तोहरे पड़ोसी क संग अहइ। एँह बरे तू मोका काहे बोलाया? 17यहोवा उहइ किहस जउन उ करइ क कहे रहा। यहोवा मोर प्रयोग तोहका बतावइ बरे कि उ का करी, किहेस ह। यहोवा तोहरे हाथे स राज्ज झपट लिहस ह। यहोवा तोहरे हाथ स राज्ज तोहरे पड़ोसियन में स एक क दइ दिहस। उ पड़ोसी दाऊद अहइ। 18तू यहोवा क आग्या क पालन नाहीं किहा। तू अमालेकियन क नास नाहीं किहा अउ ओनका नाहीं देखाया कि यहोवा ओन पइ केतँना कोहान बाटइ। उहइ कारण अहइ कि यहोवा तोहरे संग आजु इ किहस ह। 19फुन यहोवा तोहरे संग इस्राएलियन क पलिस्ती स हरवइही। अउर भियान तू अउ तोहार पूत हिआँ मोर संग होइही।”

20साऊल भुइयँ प भरइ पड़ा। साऊल, समूह स कही गइ बातन स डेरान रहा। साऊल बहोत दुर्बल होइ गवा काहेकि उ पूरा दिन अउ रात कउनो खइया नाहीं खाए रहा।

21मेहरारु साऊल क लगे आइ। उ लखेस कि साऊल फुरइ ससान रहा। उ कहेस, “लखा, मई आपक सेविका अहउँ। मई आपक आग्या क मानेउँ ह। मइ आपन जिन्नगी क खतरा में नाएँ ह अउर आप जउन कहेन ह, उहइ किहेउँ। 22अब कृपा कइके मोरउ सुना। मोका तोहरे बरे कछू खइया क देइ द्या। तब आप में ऐतनी सक्ती आइ कि आप अपने राहे प जाइ सकई।”

23मुला साऊल इनकार किहस। उ कहेस, “मई न खाब।” साऊल क अफसर लोग उ मेहरारु क साथ दिहन अउ

ओसे भोजन बरे बिनती किहन। साऊल ओनकइ बात सुनेस। उ भुइयँ स उठा अउ बिछउना प बइठा। 24उ मेहरारु क घरे में एक तु मोट बछवा रहा। उ हाली स बछवा क मारेस। उ कछू आटा लिहस अउ ओका हाथे स सानेस। तब उ बे खमीरे क रोटी बनाएस। 25मेहरारु भोजन साऊल अउ ओकरे अफसरन क अगवा धरेस। साऊल अउ ओकर अफसरन ओका खाएन। तउ उ लोग उठेन अउर उहइ रात क चली गएन।

### “दाऊद मोरे संग नाहीं आइ सकत”

29 पलिस्तियन आपन सब सिपाहियन क आपुस में बटोरेन। इस्राएलियन सोता क पास यिज्रेल में डेरा डाएन। 2पलिस्ती अफसर लोगन आपन एक सौ अउर एक हजार फउज क टुकड़ी क संग आगे बढ़त रहेन। दाऊद अउ ओकर मनई आकीस क संग फउज क पाछे पाछे कदम बढ़ावत चलत रहेन।

3पलिस्ती अफसरन पूछेस, “इ सबइ हिब्रू हिआँ का करत अहई।”

आकीस पलिस्ती अफसरन स कहेस, “इ दाऊद अहइ। दाऊद साऊल क अफसरन में स एक रहा। दाऊद मोरे लगे बहोत टेमें स बाटइ। मई दाऊद में कउनो दोख तब स नाहीं लखेउँ जब ते इ साऊल क तजेस अउ मोरे लगे आवा।”

4मुला पलिस्ती अफसर लोग आकीस पइ कोहाइ गएन। उ पचे कहेन, “दाऊद क वापस पठवा। दाऊद क उ सहर में वापस जाइ चाही जेका तू ओका दिहा ह। उ हम पचन क संग जुद्ध में नाहीं जाइ सकत्या। जदि उ हिआँ बाटइ तउ हम पचे आपन डेरा में एक दुस्मन क धरे अही। उ हमार आपन मनइयन क मारिके आपन राजा साऊल क खुस करी। 5दाऊद उहइ मनई अहइ जेकरे बरे इ गाना में इस्राएली मनई गावत अउ नाचत हीं:

‘साऊल हजारन क मारेस।

मुला दाऊद दसहु हजारन क मारेस।’

6एँह बरे, आकीस दाऊद क बोलाएस। उ कहेस, “यहोवा सास्वत अहइ, तू हमार भगत अहा। मई खुस होत जदि तू हमरी फउज में सेवा करत्या। जउने दिना स तू मोरे लगे आया ह, मई तोहमाँ कउनो दोख नाहीं पाएँ ह। मुला पलिस्ती अफसर लोगन तोहार बरे नीक नाहीं सोचत। 7अब तू सान्तिपूर्वक जा। पलिस्ती अफसर लोगन क खिलाफ कछू न करा।”

8दाऊद कहेस, “मई का गलती किहेउँ ह? जब ते मई तोहरे लगे आवा हउँ तू मोरे भीतर कउन तब स आजु तलक कउन बुराई लख्या ह। मोरे पभूँ राजा क दुस्मनन क खिलाफ तू मोका काहे नाहीं लड़इ देत्या?”

9आकीस उत्तर दिहस, “मई जानत हँउ कि मई तोहका पसन्द करत हँउ। तू परमेस्सर क हिआँ सरगदूत क समान अहा। मुला पलिस्ती अफसर अबहुँ कहत हीं, ‘दाऊद हम पचन क संग जुद्ध में नाहीं जाइ सकत।’ 10तइके भिन्सारे तू अउर तोहार लोग वापिस जइही। उ सहर क लउटि जा



जेका मँइ तोहका दिहेउँ ह। ओन अफसर लोग पइ धियान जिन दया जउन तोहरे बरे बुरी बात कहत हीं। ऐह बरे जइसे ही सूरज निकरइ चल दया।”

11ऐह बरे दाऊद अउ ओकर लोग तइके भिन्सार होत उठेन। उ पचे पलिस्तिन क देस में लौटि गएन। अउ पलिस्ती यिज्जेल क गएन।

### अमालेकी सिकलग पइ हमला करत हीं

30 तिसरे दिना दाऊद अउ ओकर मनई सिकलग पहुँचि आएन। उ पचे लखेन कि अमालेकी सिकलग प हमला करत बाटइ। अमालेकी नेगव पहुँटा प हमला किहे रहेन। उ पचे सिकलग प हमला किहन अउ सहर क बारि दिहन। 2उ पचे सिकलग क मेहररुअन क बन्दी बनाइके लइ गएन। उ सबइ जवान अउ बूढन सबहिं क लइ गएन। उ पचे कउनो मनइयन क मारेन नाहीं। उ पचे सिरिफ ओनकइ लइके चलि दिहन।

3दाऊद अउ ओकर मनई सिकलग आएन। अउर उ पचे नगर क बरत पाएन। ओनकई मेहरारुअन, पूतन अउ बिटियन क बन्दी बना लेइ गवा रहा अमालेकी लोग ओनका लइ गएन। 4दाऊद अउ ओकरी फउज क दूसर लोग तब तलक रोवत रहेन जब तलक उ सबइ थक जाइके कारण रोवइ क लायक नाहीं रहि पाएन। 5अमालेकी दाऊद क दुइ मेहरारू यिज्जेल क अहीनोअम अउ कर्मेल क नाबाल क रँड अबीगैल क लइ गएन।

6फउज क सब लोग दुःखी अउ गुस्सान रहेन काहेकि ओनकइ बेटवा-बिटिया कइदी बनइ लीन्ह ग रहिन। उ पचे दाऊद क पाथर स मारि डावइ क सलाह करत रहेन। ऐहसे दाऊद बहोतइ घबराइ गवा। मुला दाऊद आपन यहोवा परमेस्सर में सक्ती पाएस। 7दाऊद याजक एब्यातार स कहेस, “एपोद लइ आवा।” ऐह बरे एब्यातार दाऊद बरे एपोद लइ आएस। 8तब दाऊद यहोवा स पराथना किहस, “का मोका उ मनइयन क पाछा करइ चाही जउन हमरे परिवारे क उठाइ लइ ग बाटेन? का मँइ धइ लेइ?” यहोवा जवाब दिहस, “ओनकइ पाछा करा। तू ओनका धइ लेब्या। तू आपन परिवार क बचाइ लेब्या।”

### दाऊद अउ ओकर मनई मिस्त्री दस क धरत हीं

9-10दाऊद आपन छः सौ मनइयन क संग लिहस अउ उ बसोर क घाटी में गवा। ओहमों स कछू लोग उहइ ठउर प ठहर गएन। लगभग दुई सौ मनई ठहर गएन काहेकी उ पचे बहोत जिआदा थक ग रहेन अउ दुर्बल होइ जाइ स नाहीं चल सकत रहेन। ऐह बरे दाऊद अउ चार सौ मनइयन अमालेकियन क पाछा किहन।

11दाऊद क मनइयन एक तु मिस्त्री क खेत में लखेन। उ पचे मिस्त्री क दाऊद क लगे लइ गएन। उ पचे पिअइ क तनिक पानी अउ खाइ बरे भोजन दिहन। 12उ पचे मिस्त्री क अंजीर क टिकिया अउ झुरान अंगूरे क दुइ गुच्छन दिहन। खइया क खाए क पाछे उ चंगा भवा। उ तीन दिन अउ तीन राति स न कछू खाए रहा अउ न ही पानी पिए रहा।

13दाऊद मिस्त्री स पूछेस, “तोहार सुआमी कउन अहइ? तू कहीं आवा ह?”

मिस्त्री जवाब दिहस, “मँइ मिस्त्री अहउँ। मँइ एक तु अमालेकी क दास अहउँ। तीन दिना पहिले मँइ बेराम पड़ि गवा रहेउँ अउ मोर सुआमी मोका तजि दिहस। 14हम पचे नेगव प धावा बोलि दीन्ह जहाँ करथीत रहत हीं। हम पचे यहूदा पहुँटा प धावा बोलेन अउ नेगव पहुँटा प जहाँ कालेब लोग रहत हीं। हम पचे सिकलग क भी बार दीन्ह।”

15दाऊद मिस्त्री स पूछेस, “का तू उ मनइयन क लगे मोका पहुँचउब्या जउन हमरे परिवारे क लइ गवा अहइ?”

मिस्त्री जवाब दिहस, “तू परमेस्सर क समन्वा प्रण करा कि तू मोका न मरब्या न ही मोका मोर सुआमी क हाथ में देब्या! जदि तू अइसा करब्या तउ मँइ ओका धरवावइ में तोहार मदद करब।”

### दाऊद अमालेकी क हरावत ह

16मिस्त्री अमालेकियन क दाऊद क हिआँ पहुँचाएस। उ पचे चारिहुँ कइती जमीन प मधु पीतेन अउ खइया क खात ओलरा रहतेन। उ पचे पलिस्ती अउ यहूदा क पहुँटा स बहोत सी चीज जउन लइ आए रहेन, उहइ स जलसा मनावत रहेन। 17दाऊद ओनका हराएस अउ ओनका मारि डाएस। उ पचे सूरज निकरइ स अगवा दिन तक जुझेन। अमालेकियन में स चार सौ जवानन क अलावा जउन ऊँट प चढ़िके परानेन कउनो नाहीं बच पावा।

18दाऊद क आपन दुइनउँ मेहरारू फुन मिल गइन। दाऊद उ सबहिं चीजन क पाएस जेनका अमालेकी लइ ग रहेन। 19कउनो चीज खोइ नाहीं। उ पचे सब गदेलन अउ बुढवन क पाइ लिहन। उ पचे आपन सब पूत अउ बिटियन क पाएन। ओनका आपन कीमती चीज मिल गइ। उ पचे आपन हर एक चीज वापस पाएन जउन अमालेकी लइ ग रहेन। दाऊद हर चीज क फुन लौटाइ लिआइ। 20दाऊद हर भेड़ी अउ गोरु क लइ लिहस। दाऊद क मनइयन इ पसून क अगवा चलाएन। दाऊद क मनइयन कहेन, “इ सब दाऊद क ईनाम अहइ।”

### सब मनइयन क हींसा बराबर होइ

21दाऊद हुवाँ आवा जहाँ दुई सौ मनई बेसोर क घाटी में ठहरा रहेन। उ उहइ मनई रहेन जउन बहोतइ थका अउ कमजोर रहेन। ऐह बरे दाऊद क संग नाहीं जाइ सकत रहेन। उ मनइयन दाऊद अउ उ सिपाहियन क सुआगत करइ बाहरे आएन जउन ओकरे संग गवा रहेन। बेसोर क घाटी में ठहरे भए मनइयन दाऊद अउ ओकरी फउज क बधाई दिहन जइसे ही उ निअरे आएन। 22मुला जउन टुकड़ी दाऊद क संग गइ ओहमों कछू बुरा अउ परेसानी पइदा करइवाला मनई रहेन। उ परेसानी पइदा करइवालन कहेन, “इ दुई सौ मनई हम पचन क संग नाहीं गएन। ऐह बरे जउन चीज हम लइ आए अही ओहमों स कछू हम एँनका न देब। इ मनइयन सिरिफ आपन मेहरारू अउ बचवन क लइ सकत हीं।”

23दाऊद जवाब दिहस, “नाहीं मोर भइया लोगो, अइसा जिन करा। इ बिषय में सोचा कि यहोवा हमका का दिहे अहइ। यहोवा हम पचन क उ दुस्मन क हरावइ दिहेस ह जउन हम पचन प हमला किहस ह। 24जउन तू कहत अहा ओका कउनो न मानी। उ मनइयन क हींसा भी, जउन बाँटइ वाली चीजन क संग ठहरा रहेन, ओतनई होइ जेतैना ओनका जउन जुद्ध में गवा रहेन। सब क हींसा बराबर होइ।” 25दाऊद ओका इस्त्राएल बरे हुकुम अउ नेम बनाइ दिहस। इ नेमें अब तलक लागू होइके चला आवा बाटइ।

26दाऊद सिकलगा में आवा। तब उ उ चीजन में स, जउन अमालेकियन स लइ लीन्ह ग रहिन, कछू चीजन क आपन मीत लोगन यहूदा क नेता लोगन क पठएस। दाऊद कहेस, “इ सब भेंट आप लोगन क उ चीजन में स अहइ जेनका हम पचे यहोवा क दुस्मनन स पावा ह।”

27दाऊद उ चीजन में स जउन अमालेकियन स मिली रहिन, कछू जउन बेतेल क प्रमुख लोग, नेगव क रमीथ, यतीर, 28अरोएर, सिपमोत, एस्तमो, 29रकल, यरहमेलियन अउ केनि क सहरन, 30होर्मा, बोरासान अउ अताक में, 31अउ हेब्रान क पठएस। दाऊद उ चीजन में स कछू क ओन सबहिं ठउरन क प्रमुख लोगन क पठएस जहाँ दाऊद अउ ओकर लोग रहत रहेन।

### साऊल क मउत

**31** पलिस्ती इस्त्राएल क खिलाफ लड़ेन, अउ इस्त्राएली पलिस्तियन क समन्वा स पराइ गएन। बहोत स इस्त्राएली गिलबो पहाड़े प मारा गएन। 2पलिस्ती साऊल अउ ओकरे पूतन क पकड़ेन। पलिस्ती साऊल क पूत योनातान, अबीनादाब अउ मल्लिकसु क मारि जाएन।

3जुद्ध साऊल क खिलाफ बहोतइ बुरा रहा। धनुर्धारी लोग साऊल प बाण बरसाइ दिहिन अउ साऊल बुरी तरह घायल होइ गवा। 4साऊल आपन उ नउकर स जउन कवच लइके चलत रहा कहेस, “आपन तरवार निकारा अउ मोका मारि डावा। तउ उ सबइ बिदेसी मोका चोट पहुँचावइ अउ मोर मसखरी करइ न अइहीं।” मुला साऊल क कवच

ढोवइया अइसा करइ स इनकार किहस। साऊल क सहायक बहोत डरा भवा रहा।

एँह बरे साऊल आपन तरवार लिहेस अउ आपन क मारि डाएस। 5कवच क ढोवइया लखेस कि साऊल मरि गवा। एँह पइ उ भी आपन तरवारि स आपन क मारि डाएस। उ हुवँइ साऊल क संग मरि गवा। 6इ तरह साऊल, ओकर तीन पूत अउ ओकर कवच ढोवइया सबहिं एक संग उहइ दिन मर गएन।

### पलिस्ती साऊल क मउत प खुस होत हीं

7इस्त्राएलियन जउन घाटी क दूसर कईंती अउर यरदन नदी क दूसर कईंती रहत रहेन, लखेन कि इस्त्राएली फउज परात बाटइ। उ पचे लखेन कि साऊल अउ ओकर पूत मर गएन। एँह बरे उ इस्त्राएलियन आपन सहर तजि दिहिन अउ भाग पराइ गएन। तब पलिस्ती आएन। उ पचे उ सहरन में रहइ लागेन।

8दूसरे दिन, पलिस्तियन लहासे स चीजन क लेइ आएन। उ पचे साऊल अउ ओकर तीनहुँ पूतन क गिलबो पहाड़े प मरा पाएन। 9पलिस्तियन साऊल क मूँड़ काटि लिहिन अउ ओकर कवच लइ लिहिन। उ पचे इ खबर क पलिस्ती मनइयन अउ आपन देवमूर्तिथन क मन्दिर तलक लइ गएन। 10उ पचे साऊल क कवच क आस्तोरेत क मन्दिर में धरेन। पलिस्तियन साऊल क लहास बेतसान क देवारे प टँगेन भी।

11याबेस गिलाद क मनइयन ओनें सबहिं कारनामन क सुनेन जउन पलिस्तियन साऊल क संग किहस। 12एँह बरे याबेस क सबहिं फउजी बेतसान पहुँचेन। उ पचे सारी रात चलत रहेन। अउर उ पचे साऊल क लहासे क बेतसान क देवारे स उतारेन। उ पचे साऊल क पूतन क लहासन क भी उतारेन। तब उ पचे इ लहासन क याबेस लइ गएन अउर हुवँ साऊल अउ ओकरे तीनहुँ पूतन क लहासे क फूँकि दिहिन। 13तब उ लोगन साऊल अउ ओकरे तीनहुँ पूतन क अस्थियन क बटोर लिहिन। अउर ओनका याबेस में पेड़ क तरे दफनाइ दिहिन। तब याबेस क लोग सोक मनाएन। याबेस क मनइयन सात दिना तलक उपवास राखेन।”

# रूत

## यहूदा में अकाल

1 बहुत समझ पहिले जब निआवाधीसन क हुकुमत रही, तबहि एक बुरा समझ आवा कि भुइँया पड़ अकाल पड़ि गवा। उहइ समझ में एलीमेलेक नाउँ क एक मनई यहूदा क बेतलेहेम क छोड़ दिहस। उ आपन मेहरारू अउ दुइ पूतन क संग मोआब क भुइँया में चला गवा। 2ओकरी मेहरारू क नाउँ नाओमी रहा अउ ओकरे पूतन क नाउँ महलोन अउ किल्योन रहेन। इ सबइ लोग यहूदा क बेतलेहेम क एप्राती परिवार स रहेन। इ परिवार मोआब क पहाड़ी प्रदेश क जात्रा किहेस अउ हुवैँ बस गवा।

3पाछे नाओमी क भतार एलीमेलेक मर गवा। एह बरे सिरिफ नाओमी अउ ओकर दुइ पूत बचे रहि गएन। 4ओकर पूतन मोआब देस क मेहरारूअन क संग बियाह किहन। पहिला पूत क मेहरारू क नाउँ ओर्पा अउ दूसर पूत क मेहरारू क नाउँ रूत रहा। उ पचे मोआब में लगभग दस बरिस रहेन। 5ओकर पाछे महलोन अउ किल्योन भी मर गएन। एह बरे नाओमी आपन भतार अउ पूतन क बिना अकेली हो गइ।

## नाओमी अपने घरे जात ह

6जब नाओमी मोआब क पहाड़ी भुइँया में रहत रही, तबहि नाओमी सुनेस कि यहोवा ओकरे लोगन क मदद किहेस ह। उ अपने लोगन क भोजन प्रदान करत ह। एह बरे नाओमी मोआब क पहाड़ी भुइँया क तजइ अउर आपन घर यहूदा में लउटइ क निहचइ किहेस। ओकर पतोहुअन भी ओकरे संग जाइ क निहचइ किहेन। 7उ पचे उ प्रदेश क तजेन जहाँ उ पचे रहत रहिन अउर यहूदा कइँती लउटब सुरू किहन।

8तब नाओमी आपन पतोहुअन स कहेस, “तू दुइनउँ क अपने घर आपन महतारिन क घरे लउट जाइ चाही। तू पचे मोरे पूतन क बरे बहोतइ दयालु रहिउँ ह। यहोवा तोह पड़ दयालु होइ। 9तउ मई पराथना करत हउँ कि यहोवा, अच्छा भतार अउ नीक घर पावइ मैं तू दुइनउँ क मदद करइ।” नाओमी आपन पतोहियन क पियार किहेस अउ उ पचे सबहि रोवइ लागिन।

10तब पतोहियन कहेन, “किन्तु हम आप क संग चलइ चाहित ह अउर आप क लोगन में जाइ चाहिन ह।”

11किन्तु नाओमी कहेस, “नाहीं, बिटियो, अपने घरे लउटि जा। तू पचे मोरे संग काहे जाबिउ? मई तू पचन क मदद नाहीं कइ सकिन। मोरे लगे अब कउनो पूत नाहीं जउन तोहार संग बियाह कइ सकइ। 12अपने घरे लउटि जा। मई एतनी बुढ़िया अहउँ कि नवा भतार नाहीं रखि सकिन।

हिआँ तलक कि जदि मई फुन बियाह करइ क बात सोचउँ, तउ भी मई तोहार पचन्क मदद नाहीं कइ सकित। जदि मई आजु क राति ही गर्भवती होइ जाउँ अउर दुइ पूतन क पड़दा करउँ, तउ भी एहसे तोहार पचन्क मदद नाहीं मिली। 13बियाह करइ स पहिले ओनकर बालिग होइ तलक तू पचन्क इंतजार करइ पड़ी। मई तू पचन्स एँतने लम्बे समझ तलक बिना भतारे क प्रतीच्छा नाहीं करवाउब। एहसे मोका बहोत दुःख होइ। मई पहिले स ही बहोत दुःखी हउँ काहेकि यहोवा मोरे खिलाफ बहोत कछू कइ दिहस ह।”

14एह बरे मेहररूअन बहोत रोइन। तब ओर्पा नाओमी क चूमेस अउ उ चली गइ। किन्तु रूत ओका बाहन में गहियाइ लिहस अउर ओकरे लगे ठहर गइ।

15नाओमी कहेस, “लखा, तोहार जेठानी आपन लोगन अउ आपन देवतन में लउट गइ। एह बरे तोहका ही उहइ करइ चाही।”

16किन्तु रूत कहेस, “आपन क तजिके मोका मजबूर जिन करा। आपन लोगन में लउटइ बरे मोका मजबूर जिन करा। मोका अपने संग चलइ द्या। जहाँ कहुँ तू जाबिउ मई जाब। जहाँ कहुँ तू सोउबिउ, मई सोउब। तोहार लोग मोर लोग होइहीं। तोहार परमेस्सर मोर परमेस्सर होइ। 17जहाँ तू मरबिउ, मई भी हुआई मरब अउर मई हुवई दफनाई जाब। होइ सकत ह यहोवा हमरे बरे इ करी, अउर होइ सकत ह एँह स भी जियादा, जब तलक कि मउत हम लोगन क जुदा न कइ द्या।”

## घरे लउटब

18नाओमी लखेस कि रूत क ओकर संग चलइ क प्रबल इच्छा अहइ। एह बरे नाओमी ओकरे संग बहस करब बन्द कइ दिहस। 19फुन नाओमी अउर रूत तब तलक जात्रा किहन जब तलक उ पचे बेतलेहेम नाहीं पहुँच गइन। जब दुइनउँ मेहररूअन बेतलेहेम पहुँचिन तउ सबहि लोग बहोत उत्तेजित भएन। उ पचे कहब सुरू किहन, “का इ नाओमी अहइ?”

20मुला नाओमी लोगन स कहेस, “मोका नाओमी जिन कहा, मोका मारा कहा। काहेकि सर्वसक्तीमान परमेस्सर मोर जिननगी क बहोत दुःखी बनाई दिहस ह। 21जब मई गइ रहिउँ, मोरे लगे उ सबइ चिजियन रहिन जेनका मई चाहत रहिउँ। किन्तु अब, यहोवा मोका खाली हाथे घरे लियावा ह। यहोवा मोका दुःखी बनाएस ह। एह बरे मोका नाओमी काहे कहत अहा? सर्वसक्तीमान परमेस्सर मोका बहोत जियादा कस्ट दिहस ह।”

22इ तरह नाओमी अउ ओकर पतोहू रूत मोआबी मेहरारू मोआब क भुइँया स लउटि गएन। इ दुइनउँ मेहररूअन जौ क कटती क समइ यहूदा क बेतलेहेम मँ आइन।

### रूत क बोअज़ स मिलन

2 बेतलेहेम मँ एक ठु धनी मनई रहत रहा। ओकर नाउँ बोअज़ रहा। बोअज़ एलीमेलेक परिवार स नाओमी क निअरे रिस्तेदारन मँ स एक रहा।

2एक दिना रूत (मोआबी मेहरारू) नाओमी स कहेस, “मईँ सोचत हउँ कल्ह मईँ खेतन मँ जाउँ। होइ सकत ह कि कउनो अइसा मनई मोसे मिलइ जउन मोह पइ दाया कइके, मोरे बरे उ अन्न क बटोरइ देइ जेका उ आपन खेत मँ तजत होइ।”

3नाओमी कहेस, “बिटिया, ठीक अहइ जा।” एह बरे रूत खेतन मँ गइ। उ फसल काटइ वाले मजदूरन क पाछे चलत रही अउर उ अन्न बटोरैस जउन तज दीन्ह गवा रहा। अइसा भवा की उ खेते क एक हींसा एलीमेलेक परिवार क एक मनई बोअज क रहा।

4पाछे, बेतलेहेम स बोअज़ खेत मँ आवा। उ आपन मजदूरन क हालचाल पूछेस। उ कहेस, “यहोवा तोहरे संग होइ।” मजदूरन जबाब दिहन, “यहोवा आप क आसीर्बाद देइ।”

5तब बोअज़ आपन उ सेवक स बातन किहेस, जउन मजदूरन क निरीच्छक रहा। उ पूछेस, “बिटिया केकर अहइ?”

6सेवक जबाब दिहस, “इ उहइ मोआबी मेहरारू अहइ जउन मोआब क पहाड़ी पहँटा स नाओमी क संग आई अहइ। 7उ बहोत भिन्सारे आइ अउ मोहसे उ पूछेस कि का मईँ मजदूरन क पाछे चल सकत हउँ अउ भुइँयाँ पइ छिटके अन्न क बटोरा सकत हउँ। उ तउ तलक स काम करत रहत ही, किन्तु उ तनिक देरी बरे आस्रय स्थान मँ रही।”

8तब बोअज़ रूत स कहेस, “हे मोर बिटिया, सुना! तू अपने बरे अन्न बटोरइ बरे मोरे खेते मँ रहा। तोहका कउनो दूसर मनई क खेत मँ जाइ क जरूरत नाहीं अहइ। मोर मेहररू नउकरन क पाछे चलत रहा। 9इ धियान मँ रखा की उ पचे कउने खेते मँ जात अहइँ अउर ओनकर अनुसरण करा। मईँ नउजवानन क चितउनी दइ दिहे अहउँ कि उ पचे तोहका परेसान न करइँ। जब तोहका पियास लगइ, तउ उहइ गगरी स पानी पिआ जेहसे मोर मनई पानी पिअत हीँ।”

10तब रूत प्रणाम करइ आने धरती तलक निहुरी। उ बोअज़ स कहेस, “मोका अचरज अहइ कि आप मोह पइ धियान दिहेन। मईँ एक अजनबी अहउँ, किन्तु आप मोह पइ बड़ी दाया किहेन ह।”

11बोअज़ ओका जबाब दिहस, “मईँ ओन सारी मदद क जानत हउँ जउन तू आपन सास नाओमी क दिहे ह। मईँ जानत हउँ कि तू ओकर मदद तब भी किहे रहया जब तोहार भतार मर गवा रहा अउर मईँ जानत हउँ कि तू आपन महतारी-बाप अउ आपन देस तजिके इदेस मँ हिउँ

आइ अहा। तू इ देस क कउनो भी मनई क नाहीं जानतिउ, फिन भी तू हिउँ नाओमी क संग आइउ। 12यहोवा तोहका ओन सबहि नीक कामे बरे इनाम देई जउन तू किहा ह। यहोवा इस्त्राएल क परमेस्सर तोहका भरपूर इनाम देइ। तू ओकरे सुरच्छा क ओढ़ना मँ आसरा बरे आइ अहा।”

13तब रूत कहेस, “आप मोह पइ बड़े दयालु अहइँ, महोदय। मईँ तउ सिरिफ एक दासी अहउँ। मईँ आप क सेवकन मँ स भी कउनो क बराबर नाहीं अहउँ। किन्तु आप मोका दाया स भरी बातन किहा ह। अउर मोका सात्त्वना दिहा ह।”

14दुपहरिया क भोजन क समइ, बोअज़ रूत स कहेस, “हिउँ आया। हमारी रोटियन मँ स कछू खा। एह कइँती हमरे सिरकें मँ आपन रोटी बोड़ा।”

तब रूत मजदूरन क संग बठइ गइ। बोअज़ ओनका कछू भूँजा भवा अनाज दिहन। रूत जेतना चाहत रहा ओतना खाएस अउर कछू भोजन बचि गवा।

15तब रूत उठी अउर काम करइ लउटी। तब बोअज़ आपन सेवकन स कहेस, “रूत क आन्त क ढेरी क लगे भी अन्न बटोरइ द्या। ओका जिन रोका। 16ओकरे काम क, ओकरे बरे कछू दाना स भरी बालन गिराइके, हलका करा। ओका उ अन्न क बटोरइ द्या। ओका रोकइ बरे जिन कहा।”

### नाओमी बोअज़ क बारे मँ सुनत ह

17रूत साँझ तलक खेत मँ अनाज एकट्ठा किहस। तब उ भूसा स अन्न क अलग किहस। उ लगभग आधा बुसल जौ जमा किहस। 18रूत उ अन्न क आपन सास क इ देखावइ बरे लइ गइ कि उ केतना अन्न बटोरैस ह। उ ओका उ भोजन भी दिहस जउन दुपहर क भोजन मँ स बन गवा रहा। रूत उ अन्न क अपनी सास क देखावइ बरे लइ गइ कि उ केतना अन्न बटोरैस ह। उ मोका भोजन भी दिहस जउन दुपहरिया क भोजन मँ स बच गवा रहा।

19ओकर सास ओहसे पूछेस, “इ अन्न तू कहाँ स बटोरया ह? तू कहाँ काम किहा? जउन मनई तोहका सूचना दिहस आसीर्बाद पाइ।”

तब रूत ओका बताएन कि उ केकरे संग काम किहे रही। उ कहेस, “जउने मनई क संग मईँ आजु काम किहे रहेउँ, ओकर नाउँ बोअज़ अहइ।”

नाओमी अपनी पतोहू स कहेस, “यहोवा ओका आसीर्बाद देइ। यहोवा सबहि पइ निरन्तर दाया करत रहत ह चाहे उ पचे जिअत होईँ या मरा होउँ।”

20तब नाओमी आपन पतोहू स कहेस, “बोअज़ हमारे संबन्धियन मँ स एक अहइ। बोअज़ हमार संरच्छक\* मँ स एक अहइ।” 21तब रूत कहेस, “बोअज़ मोका वापस आवइ अउर काम करइ क भी कहेस ह। बोअज़ कहेस ह कि मईँ

**संरच्छक** “कस्ट स मुक्ती देइवाला।” उ मनई जउन मृत मनई क सम्बन्धियन क देखरेख अउ रच्छा करत ह। इ कबहुँ कबहुँ अपने गरीब सम्बन्धी क वापस खरीदके दासता स अजाद (कस्ट क छुटकारा) करावइवाला होत ह।

सेवकन क संग तब तलक काम करत रहउँ जब तलक फसल क कटाई पूरी नाहीं होइ जात।”

22तब नाओमी अपनी पतोहू रूत स कहेस, “इ नीक अहइ कि तू ओकरी दासियन क संग काम करत रहा। यदि तू कउनो दूसर क खेत मैं काम करबिउ तउ कउनो मनई तोहका कउनो नोस्कान पहेंचाइ सकत ह।” 23एह बरे रूत बोअज़ क मेहररू नउकरन क संग काम करत रही। उ तब तलक अन्न बटोरैस जब तलक फसल क कटाई पूरी नाहीं भई। उ हुवाँ गोहूँ क कटनी क आखिर तलक भी काम किहस। रूत आपन सास क संग रहत रही।

### खरिहान

3 तब रूत क सास, नाओमी ओहसे कहेस, “हे मोर बिटिया, होइ सकत ह कि मई तोहरे बरे एक ठु नीक भतार अउर घर पाइ सकउँ! तउ मई तोहार बरे नीक होब। 2बोअज़ उपयुक्त मनई होइ सकतेन? बोअज़ हमार निचके क सम्बन्धी अहइ। तू ओकरी दासियन क संग काम किहा ह। आजु राति उ खरिहाने मैं काम करत रहा होइ। 3जा, नहा अउर नीक ओढ़ना पहिरा। मटकउना द्रव्य लगावा अउर खरिहाने मैं जा। किन्तु बोअज़ क समन्वा तब तलक जिन पड़ा जब तलक उ राति क भोजन न कइ लेइ। 4खइया क खाइ क पाछे, उ अराम करइ बरे ओलरी। लखत रहा जेहसे तू इ जान सका कि उ कहाँ सोवत ह। हुवाँ जा अउर ओकरे गोड़े क ओढ़ना उघारा। तब ओलरी जा। उ तोसे कहब्या तोहका का करी चाही।”

5तब रूत जवाब दिहस, “आप जउन करइ क कहति अहा, मई करबेउँ।”

6एह बरे रूत खरिहाने मैं गइ। रूत उ सब किहस जउन ओकर सास ओहसे करइ क कहेस। 7खाइ अउर पिअइ क पाछे बोअज़ बहोत संतुटठ रहा। बोअज़ अन्न क ढेर क लगे ओलरइ गवा। तब रूत बहोत धीमे स ओकरे लगे गइ अउर उ ओकरे गोड़े क ओढ़न उघार दिहस। रूत ओकरे गोड़े क बगल मैं ओलर गइ।

8करीब आधी रात क बोअज़ नींद मैं आपन करवट बदलेस अउर उ जाग पड़ा। उ बहोत चकित भवा। ओकरे गोड़न क निचके एक ठु मेहरारू ओलरी रही।

9बोअज़ पूछेस, “तू कउन अहा?”

उ कहेस, “मई तोहार नउकर लइकी रूत अहउँ। आपन सरच्छा क ओढ़ना मोरे ऊपर फइला द्या। तू मोर रच्छक अहा।”

10तब बोअज़ कहेस, “हे जुवती, यहोवा तोहका आसीबाँद देइ। तू मोह पइ बिसेस कृपा किहा ह। तोहार इ कृपा मोरे बरे ओहसे भी जियादा अहइ जउन तू सुरूआत मैं नाओमी क बरे देखाए रहया। तू बियाह बरे कउनो भी धनी या गरीब नउजवान क खोज कइ सकत रहिउँ, मुला तू वइसा नाहीं किहा। 11जुवती, अब डेराअ नाहीं। मई उहइ करब जउन तू चाहति अहा। मोरे नगर क सबहि लोग जानत हीं कि तू एक ठु नीक मेहरारू अहा। 12अउर इ फुरि अहइ, कि मई तोहरे परिवार क निचके क सम्बन्धी अहउँ। मुला एक दूसर मनई अहइ जउन तोहरे परिवार क मोहसे भी जियादा निचके

क सम्बन्धी अहइ। 13आजु क राति हिअँइ ठहरा। भिन्सारे हम पता लगाउब कि का उ तोहार मदद करी। यदि उ तोहका मदद देइ क फैसला लेत ह तउ बहोत नीक होइ। यदि उ तोहार मदद करइ स इन्कार करत ह, तउ यहोवा क जिन्नगी क सपथ लेइके मई प्रतिज्ञा करत हउँ कि मई तोहसे बियाह करब अउर एलीमेलक क भुइँया क तोहरे बरे बेसाही के लउटाउब। एह बरे भिन्सारे तलक हिअँइ सोआ रहा।”

14एह बरे रूत बोअज़ क गोड़े क लगे भिन्सारे तलक ओलरी रही। उ अँधियारा रहत ही उठी, एहसे पहिले क एतना प्रकास होइ कि लोग एक दूसरे क पहिचान सकइँ।

बोअज़ ओहसे कहेस, “हम एका कउनो क इ नाहीं बताउब कि तू पिछली रात हिअँ मोर लगे आई रहिउ।” 15तब बोअज़ कहेस, “आपन ओढ़नी मोरे लगे लिआवा। अब, एका फइलाइके राखा।”

एह बरे रूत आपन ओढ़नी क फइलाइके राखेस अउर बोअज़ लगभग एक बुसल जौ ओकरी सास नाओमी क उपहार मैं दिहस। तब बोअज़ ओका रूत क ओढ़नी मैं बाँध दिहस अउर ओका ओकरी पीठ पइ रख दिहस। तब उ नगर क गवा।

16रूत आपन सास, नाओमी क घर गइ। नाओमी दुआरे पइ आई अउर उ पूछेस, “बाहेर कउन अहइ?”

रूत घरे क भीतर गइ अउर उ नाओमी क हर बात जउन बोअज़ किहे रहा, बताएस। 17उ कहेस, “बोअज़ इ जौ उपहार क रूप मैं तोहका दिहेस ह। बोअज़ कहेस कि आप क बरे उपहार लिए बिना मोका घर नाहीं जाइ चाही।”

18नाओमी कहेस, “हे मोर बिटिया, तब तलक धीरा राख जब तलक हम इ सुनी कि का भवा। बोअज़ तब तलक आराम नाहीं करी जब तलक उ ओका नाहीं कइ लेत जे ओका करइ चाही। हम लोगन क दिन बीतइ क पहिले मालूम होइ जाइ कि का होइ।”

### बोअज़ तथा दूसर सम्बन्धी

4 बोअज़ उ ठउरे पइ गवा जहाँ नगर दुआरे पइ लोग एकट्ठा होत हीं। बोअज़ तब तलक हुअँ बइठा रहा जब तलक उ संरच्छक हुवाँ स नाहीं गुजरा जेकर जिक्र बोअज़ रूत स किहे रहा। तब बोअज़ ओका बोलाएस, “हिअँ आवा मित्र! हिअँ बइठा।” यह बरे उ हुअँ बइठेस।

2तब बोअज़ हुअँ गवाहन क बटोरैस। बोअज़ नगर क दस बुजुर्गन क बुलाएस। उ कहेस, “हिअँ बइठा!” एह बरे उ पचे हिअँ बइठ गएन।

3तब बोअज़ उ संरच्छक स बातन किहस। उ कहेस, “नाओमी मोआब क धरती स लउट आइ अहइ। उ भुइँया क एक टूका बेचेस ह। जउन हमारे सम्बन्धी एलीमेलक क रहेन। 4मई तय किहेउँ ह कि मई इ बिसय मैं हिअँ क बसइया लोगन अउर आपन बुजुर्ग लोगन क समन्वा तोहसे कहउँ। अगर तू इ भुइँया क मुल्य वापिस लइ क चाहत ह तउ एका खरीद ल्या। अगर तू इ भुइँया क वासप नाहीं खरीदइ चाहत ह तउ मोका कहा। मई जानत हउँ कि तोहरे पाछे उ मनई मई ही हउँ जउन भुइँया क खरीद सकत हउँ।

जदि तू उ भुइँया क नाही खरीदब्या, उ मई हउँ जउन ओका खरीदब। तब उ मनई जवाब दिहेस: मई इ भुइँया क खरीदब।”

5तब बोअज़ कहेस, “जदि तू भुइँया नाओमी स बेसहब्या तउ तोहका मृतक क मेहरारू, मोआबी मेहरारू रूत भी मिली। जब रूत क बच्चा होइ तउ उ भुइँया उ बच्चे क होइ। इ तरह भुइँया मृतक क परिवार में ही रही।”

6निचके क सम्बन्धी जवाब दिहस, “मई भुइँया क वापस बेसहि नाही सकत। जदि इ भुइँया मोर होइ चाही किन्तु मई एका बेसही नाही सकत। जदि मई अइसा करत हउँ तउ मोका आपन सम्पत्ति स हाथ धोऊब पड़ सकत ह। एह बरे तू उ भुइँया क बेसहि सकत ह।” 7(इस्त्राएल में बहोत समइ पहिले जब कउनो मनई कउनो सम्पत्ति क बेसहत, छुड़ावत या सम्पत्ति क बदलि करत रहा, तउ एक मनई आपन जूता क उतारत रहा अउर दूसर मनई क दइ देत रहा। इ ओनके बेसहइ क प्रमाण रहा।) 8तउ उ निचके क सम्बन्धी बोअज़ स कहेस, “भुइँया तू आपन बरे बेसही लइ!” तउ उ आपन एक जूता क उतारेस अउर एका बोअज़ क दइ दिहस।

9तब बोअज़ बुजुर्गिन अउ सबहि मनइयन स कहेस, “आजु आप लोग मोरे गवाह अहउँ कि मई नाओमी स उ सबइ सबहि चिजियन खरीदत हउँ जउन एलीमेलेक, किल्योन अउ महलोन क अहई। 10मई रूत क भी आपन मेहरारू बनावइ बरे बेसहत हउँ। मई इ एह बरे करत अहउँ कि मृतक क सम्पत्ति ओकरे परिवार क लगे ही रही। इ तरह मृतक क नाउँ ओकरे परिवार अउ ओकरी भुइँया स नाही हटावा जाई। आप लोग आजु एकर गवाह अहई।”

11इ तरह सबहि लोग अउर बुजुर्गिन जउन नगर दुआर क समीप रहेन, गवाह भएन। उ पचे कहेन:

“इ मेहरारू जउन तोहरे घर जाई, यहोवा ओका राहेल अउ लिआ जइसी करइ जउन इस्त्राएल बंस क बनाएस। हम पराथना करित ह तू एप्राता में सक्तीसाली ह्वा! तू बेतलेहेम

में प्रसिद्ध ह्वा। 12जइसे तामार यहूदा क पूत पेरेस क जनम दिहेस अउर ओकर परिवार महान बना। उहइ तरह यहोवा तोहका भी रूत स कई पूत देइ। अउर तोहार परिवार भी ओकरी तरह महान होइ।”

13इ तरह बोअज़ रूत स बियाह किहेस। यहोवा रूत क गर्भवती होइ दिहस अउर रूत एक ठु पूत क जन्म दिहस। 14नगर क मेहररूअन नाओमी स कहेन:

“उ यहोवा क आभार माना जउन तोहका अइसा संरच्छक दिहस। यहोवा करइ उ, इस्त्राएल में प्रसिद्ध होइ। 15उ तोहका फुन स जवान बनाइ देइ। अउर बुढ़ापे में उ तोहार धियान राखी। तोहरी बहू क कारण इ घटना घटी अहइ। उ इ बच्चा तोहरे बरे गर्भ में धारण किहेस उ तोहसे पिआर करत ह, अउर उ तोहरे बरे सात बेटन स जियादा उत्तिम अहइ।”

16नाओमी लरिका क लिहस, ओका आपन बाहन में उठाइ लिहस, अउर ओकर पालन-पोसण किहस। 17पड़ोसियन बच्चा क नाउँ राखेन। ओन मेहररूअन कहेन, “अब नाओमी क लगे एक पूत अहइ।” पड़ोसियन ओकर नाउँ ओबेद राखेन। ओबेद यिसै क बाप रहा अउर यिसै, दाऊद क बाप रहा।

### रूत अउ बोअज़ क परिवार

18पेरेस क परिवार क बंसावली इ अहइ:

पेरेस हिस्त्रोन क बाप रहा।

19राम क बाप हिस्त्रोन रहा।

अम्मीनादाब क बाप राम रहा।

20नहसोन क बाप अम्मीनादाब रहा।

सल्मोन क बाप नहसोन रहा।

21बोअज़ क बाप सल्मोन रहा।

ओबेद क बाप बोअज़ रहा।

22यिसै क बाप ओबेद रहा।

दाऊद क बाप यिसै रहा।

# निआवाधीसन

## यहूदा क लोग क कनानियन स जुद्ध करत ही

1 यहोसू मर गवा। तब इस्राएल क लोग यहोवा स पराथना किहेन। उ पचे कहेन, “हमरे परिवार समूह में स कउन पहिले कनानी लोगन स हम लोगन क बेर जुद्ध लड़इ बरे जाइ?”

2 यहोवा इस्राएली लोगन स कहेस, “यहूदा क परिवार समूह पहिले जाइ। मई ओनका इ भुईया क प्राप्त करइ देइ।”

3 यहूदा क लोग सिमोन परिवार समूह क आपन भाइयन स मदद माँगिस। यहूदा क लोग कहेन, “भाइयो, जदि तू पचे हम लोगन क भुईया बरे जुद्ध करइ मैं मदद करइ बरे हमरे संग अउब्या तउ हम लोग भी तू पचन्क क भुईया बरे तू पचन्क जुद्ध लड़ब।” सिमोन क लोग ओनकर संग जाइ बरे तइयार होइ गएन।

4 यहोवा यहूदा क लोगन क कनानियन अउ परिज्जी लोगन क हरावइ मैं मदद किहेस। यहूदा क लोग बेजेक नगर मैं दस हजार मनइयन क मार डाएन। 5 बेजेक नगर मैं यहूदा क लोग बेजेक क सासक अदोनीबेजेक क पाएस अउर ओहसे जुद्ध किहेन। यहूदा क लोग कनानियन अउ परिज्जी लोगन क हराएन।

6 बेजेक क सासक अदोनीबेजेक भाग पराइ क जतन किहेन। किन्तु यहूदा क लोग ओकर पाछा किहेन अउर ओका धड़ लिहेन। जब उ पचे ओका धरेन तब उ पचे ओकर हाथ अउर गोड़ क अंगूठन क काट डाएन। 7 तब बेजेक क सासक अदोनीबेजेक कहेस, “मई सत्तर राजा लोगन क हाथ अउर गोड़ क अंगूठन काटेउँ अउर ओन राजा लोगन क भोजन क उहइ टूकन खाइ क पड़ा जउन मोरी मेजे मैं स गिरा भवा रहा। अब यहोवा मोका ओकर बदला दिहेस ह जउन मई ओन राजा लोगन क संग किहे रहा।” यहूदा क लोग बेजेक क सासक क यरूसलेम लड़ गएन अउर उ हुवँइ मरा।

8 यहूदा क लोग यरूसलेम क खिलाफ लड़ने अउर ओह पड़ कब्जा कइ लिहेन। यहूदा को लोग यरूसलेम क लोगन क मारइ बरे तरवार क उपयोग किहन। तब उ पचे नगर क जलाइ दिहन। 9 ओकरे पाछे यहूदा क लोग कछू दूसर कनानी लोगन स जुद्ध करइ बरे गएन। तब उ पचे कनानी पहाड़ी प्रदेशन, नेगेव अउ समुद्र क किनारे क पहाड़ियन मैं रहत रहेन। 10 तब यहूदा क लोग ओन कनानी लोगन क खिलाफ लड़इ गएन जउन हेब्रोन नगर मैं रहत रहेन। पूर्वकाल मैं हेब्रोन क किर्यत-अरब कहा जाता रहा यहूदा क लोग सेसै, अहीमन अउ तल्मै कहा जाइवाले लोगन क हराएन।

## कालेब अउ ओकर बिटिया

11 यहूदा क लोग उ जगहिया क तजेन। उ पचे दबीर नगर, हुवाँ क लोगन क खिलाफ जुद्ध करइ गएन। (पूर्वकाल मैं दबीर क किर्यत्सेपेर कहा जात रहा।)

12 यहूदा क लोगन क जुद्ध बरे खाना होइ स पहिले कालेब ओन लोगन स एक ठु प्रतिग्या किहेस, “मई आपन बिटिया अकसा क उ मनई क पत्नी क रूप मैं देब जउन किर्यत्सेपेर नगर पड़ हमला करत ह अउर ओह पड़ कब्जा करत ह।”

13 कालेब क एक लहुरा भाई रहा जेकर नाउँ कनज रहा। कनज क एक पूत ओत्नीएल नाउँ क रहा। ओत्नीएल किर्यत्सेपेर नगर क जीत लिहेस। एह बेर कालेब आपन बिटिया अकसा क पत्नी क रूप मैं ओत्नीएल क दिहेस।

14 जब अकसा ओत्नीएल क संग रहइ बरे गएस, तब ओत्नीएल ओहसे कहेस कि उ आपन पिता स कछू भुईया माँगइ। अकसा आपन बाप क लगे गइ। एह बेर उ आपन गदहा स उतरी अउर कालेब स पूछेस, “का कठिनाई अहइ?”

15 अकसा कालेब क उत्तर दिहेस, “मुझे आसीर्बाद दे। आप मोका नेगेव क झुरान रेगिस्तान दिहेन ह। कृपा कइके मोका कछू पानी क सोतावली भुईया देई।” एह बेर कालेब ओका उ दिहेस जउन उ चाहत रही। उ ओका उ भुईया क ऊपर अउ नीचे क पानी क सोता दइ दिहेस।

16 केनी लोग ताड़बृच्छन क नगर (यरीहो) क तजेन अउर यहूदा क लोगन क संग गएन। उ सबइ लोग यहूदा क रेगिस्तान मैं हुवाँ क लोगन क संग रहइ गएन। इ नेगेव मैं अरद नगर क लगे रहा। (केनी लोग मूसा क ससुर क परिवार स रहेन)

17 कछू कनानी लोग सपत नगर मैं रहत रहेन। एह बेर यहूदा क लोग अउ सिमोन क परिवार समूह क लोग ओन कनानी लोगन पड़ हमला किहेस। उ पचे नगर क पूरी तरह नस्ट कइ दिहेन। एह बेर उ पचे नगर क नाउँ होर्मा रखेन।

18 यहूदा क लोग अजा क नगर अउ ओकर चारिहुँ कइँती क इलाका पड़ अधिकार किहन। यहूदा क लोग असकलोन अउ एकोन नगरन अउ ओकरे चारिहुँ कइँती क इलाका पड़ भी कब्जा किहन।

19 यहोवा उ समइ यहूदा क लोगन क संग रहा, जब उ पचे जुद्ध करत रहेन। उ पचे पहाड़ी प्रदेश क भुईया पड़ कब्जा किहन। किन्तु उ पचे घाटियन क भुईया लेइ मैं नाकामयाब रहेन काहेकि हुवाँ क निवासियन क लगे लोहे क रथ रहेन।

20मूसा कालेब क हेब्रोन क लगे क भुईया देइ क बचन दिहे रहा। एह बरे उ भुईया कालेब क परिवार क दइ दीन्ह गइ। कालेब क लोग अनाक क तीनहुँ पूतन क उ जगह तजइ क मजबूर किहन।

### बिन्यामीन लोग यरूसलेम में बसत हीं

21बिन्यामीन परिवार समूह क लोग यबूसी लोगन क यरूसलेम तजइ क मजबूर न कइ सकेन। उ समइ स लइके अब तलक यबूसी लोग यरूसलेम में बिन्यामीन लोगन क संग रहत आएन ह।

### यूसुफ क लोग बेतेल पइ कब्जा जमावत हीं

22यूसुफ क परिवार समूह क लोग भी बेतेल नगर क खिलाफ लइइ बरे गएन। यहोवा ओन लोगन क संग रहा। 23यूसुफ क परिवार क लोग कछू जासूसन क बेतेल नगर पठएन। पूर्वकाल में बेतेल क लूज कहा जात रहा। 24जब उ पचे बेतेल नगर क लखत रहेन उ पचे एक ठु मनई क नगर स बाहेर आवत लखेन। जासूस लोगन ओहसे कहेन, “हम लोगन क नगर में जाइ क गुप्त मारग बतावा। हम लोग नगर पइ हमला करब। किन्तु जदि तू हमार मदद करब्या तउ हम तोहका चोट नहीं पहुँचाउब।”

25उ मनई जासूसन क नगर में जाइ क गुप्त मारग बताएस। यूसुफ क लोग बेतेल क लोगन क मारइ बरे आपन तरवार क उपयोग किहन। उ पचे उ मनई ओकरे परिवार क सुरच्छित जाइ दिहेन। 26उ मनई उ प्रदेस में गवा जहाँ हिती लोग रहत रहेन। हुआँ उ एक ठु नगर बसाएस। उ उ नगर क नाउँ लूज रखेस, जेका आजु तलक उहइ नाउँ अहइ।

### दूसर परिवार समूह कनानियन स जुद्ध करत हीं

27कनानी लोग बेतसान, तानाक, दोर, थिबलाम, मगिदो अउर ओनकर चारिहुँ कइँती क नान्ह नान्ह नगर में रहत रहेन। मनस्से क परिवार समूह क लोग ओन लोगन क ओन नगरन क तजइ बरे मजबूर नहीं कइ सके रहेन। एह बरे कनानी लोग हुवाँ टिके रहेन। 28पाछे इस्राएल क लोग जियादा ताकतवर भएन अउर कनानी लोगन क दासन क तरह अपने खातिर काम करइ बरे मजबूर किहन। किन्तु इस्राएल क लोग सबहिं कनानी लोगन स ओनकर प्रदेस नहीं छुड़वाइ सकेन। 29इहइ बात एप्रैम क परिवार समूह क संग भइ। कनानी लोग गोजेर में रहत रहेन अउर एप्रैम क लोग सबहिं कनानी लोगन स ओनकर देस नहीं छुड़वाइ सकेन। एह बरे कनानी लोग एप्रैम क लोगन क संग गोजेर में रहत चले गएन।

30जबूलन क परिवार समूह क संग इहइ बात भइ। कित्रोन अउर नहलोल नगरन में कछू कनानी रहत रहेन। जबूलन लोग ओन लोगन स ओकर देस नहीं छुड़वाइ सकेन। उ सबइ कनानी लोग टिके रहेन अउर जबूलन लोगन क संग रहत चले आएन। किन्तु जबूलन क लोग ओन लोगन क दासन क तरह काम करइ क मजबूर किहन।

31आसेर क परिवार समूह क संग भी इहइ बात भइ। आसेर क लोग ओन लोगन स अक्को, सीदोन, अहलाब, अकजीब, हेलबा, अपीक अउर होब नगरन क न छोड़वाइ सकेन। 32आसेर क लोग कनानी लोगन स आपन देस न छोड़वाइ सकेन। एह बरे कनानी लोग आसेर क लोगन क संग रहत चले गएन।

33नप्ताली क परिवार समूह क संग भी इहइ बात भइ। नप्ताली परिवार क लोग ओन लोगन स बेतसेमेस अउर बेतनात नगरन क न छुड़वाइ सकेन। एह बरे नप्ताली क लोग ओन नगरन में ओन लोगन क संग रहत चले आएन। उ सबइ कनानी लोग टिके रहेन अउर नप्ताली लोगन बरे दासन क तरह काम करइ क मजबूर किहन।

34एमोरी लोग दान क परिवार समूह क लोगन क पहाड़ी प्रदेस में रहइ बरे मजबूर कइ दिहेन। दान क लोगन क पहाड़ियन में ठहरब पड़ा काहेकि एमोरी लोग ओनका घाटियन में उतरइ अउर ठहरइ नहीं देत रहेन। 35एमोरी लोग हेरेस पहाड़ी, अय्यालोन अउर सालबीम में ठहरइ क निहचइ किहेन। पाछे, यूसुफ क परिवार समूह सक्तीसाली होइ गवा। तब उ पचे एमोरी लोगन स दासन क तरह काम करवाएस। 36एमोरी लोगन क प्रदेस बिच्छु दर स सेला अउर सलो क परे पहाड़ी प्रदेस तलक रहा।

### बोकीम में यहोवा क सरगदूत

2 यहोवा क सरगदूत गिलगाल नगर स बोकीम नगर क गवा। सरगदूत यहोवा क एक ठु सँदेसा इस्राएल क लोगन क दिहस। सँदेसा इ रहा: “तू पचे मिस्त्र में दास रहया। किन्तु मई तू पचन्क अजाद किहेउँ अउर मई तू पचन्क मिस्त्र स बाहेर लिआएउँ। मई तू पचन्क इ भुईया में लाएउँ जेहसे तोहरे पचन्क पुरखन क देइ बरे मई प्रतिग्या किहे रहेउँ। मई कहेउँ, मई तू पचन्स आपन वाचा कबहुँ नहीं तोड़ेब। 2किन्तु एकरे बदले में तू पचन्क इ भुईया क निवासियन क संग कोइ समझौता नहीं करइ क होइ। तोहका ओनकर वेदीयन नस्ट करइ चाही। इ मई तू पचन्स कहेउँ किन्तु तू लोग मोर आग्या नहीं मान्या। तू अइसा काहे किहेन?

3“अब मई तू पचन्स इ कहत हउँ, ‘मई इ भुईया स अब अउर लोगन क बाहेर नहीं हटाउब। इ सबइ लोग तोहरे लोगन बरे फँदा साबित होइ। ओनकर झूठे देवता लोग तू पचन्क फँसावइ बरे जाल बनिहीं।”

4यहोवा क सरगदूत इस्राएल क लोगन क जब यहोवा क सँदेसा दइ चुका, तब लोग जोर स रोइ पड़ेन। 5एह बरे इस्राएल क लोग उ ठउरे क बोकीम नाउँ दिहेन जहाँ उ पचे रोइ पड़े रहेन। बोकीम में इस्राएल क लोग यहोवा बरे बलि दिहेन।

### आग्या क उल्लंघन अउर पराजय

6तब यहोसू लोगन स कहेस कि उ पचे आपन घसन क लउटि जाइँ। एह बरे हर एक परिवार समूह आपन भुईया क छेत्र लेइ गवा अउर ओहमाँ रहइ। 7इस्राएल क लोग तब तलक यहोवा क सेवा किहन जब तलक यहोसू जिअत रहा।



ओन बुजुर्गन क जीवन काल में भी उ पचे यहोवा क सेवा करत रहेन जउन यहोसू क बाद भी जिअत रहेन। एन बुजुर्ग लोग इस्त्राएल क लोग बरे जउन यहोवा बरे महान कारज किहे रहा, ओनका लखे रहा। 8नून क पूत यहोसू, जउन यहोवा क सेवक रहा, एक सौ दस बरिस क उमर में मरा। 9एँह बरे इस्त्राएल क लोग यहोसू क मृत सरिर क उ भूइयाँ में दफनावा गवा, जउन ओका दीन्ह गवा रहा। उ भूइयाँ तिन्मथ हेरेस में रही जउन एप्रैम क पहाड़ी छेत्र में गास पहाड़े क उत्तर में रही।

10एकरे पाछे उ पूरी पीढ़ी मर गइ अउर नई पीढ़ी पइदा भइ। इ नवी पीढ़ी यहोवा क बारे में न तउ जानत रही अउ न ही ओका, यहोवा इस्त्राएल क लोगन क बरे का कीन्ह रहा, एकर गियान रहा। 11एह बरे इस्त्राएल क लोग पाप किहेन अउ बाल क मूर्तियन क सेवा किहेन। उ पचे उहइ पाप किहेन जउन यहोवा क दृस्टि में बुरा रहा। 12यहोवा इस्त्राएल क लोगन क मिस्त्र स बाहेर लिआए रहा। ओन लोगन क पुरखन यहोवा क उपासना किहे रहेन। किन्तु इस्त्राएल क लोग यहोवा क अनुसरण करब तज दिहेन। इस्त्राएल क लोग ओन लोगन क लबार देवतान क पूजा करब सुरू किहेन, जउन ओनके चारिहूँ कइँती रहत रहेन। इ करम यहोवा क गुस्सैल कइ दिहेस। 13इस्त्राएल क लोग यहोवा क अनुसरण करब तजि दिहेन अउर बाल अउ अस्तोरेत क पूजा कइ लगने।

14यहोवा इस्त्राएल क लोगन पइ बहोत कोहाइ गवा। एह बरे यहोवा दुस्मनन क इस्त्राएल क लोगन पइ हमला कइ दिहस। अउ ओनकर धन-दौलत लेइ दिहस। ओनके चारिहूँ कइँती रहइवाले दुस्मनन क यहोवा ओनका पराजित कइ दिहस। इस्त्राएल क लोग आपन रच्छा आपन दुस्मनन स नहीं कइ सकेन। 15जब इस्त्राएल क लोग जुद्ध बरे निकरेन तउ उ पचे पराजित भएन उ पचे पराजित भएन काहेकि यहोवा ओनकर पच्छ में कबहुँ नहीं रहा। यहोवा पहिले स इस्त्राएल क लोगन क चितउनी दिहे रहा कि उ पचे पराजित होइहीं, जदि उ पचे ओन लोगन क देवतन क सेवा करिहीं जउन ओनके चारिहूँ कइँती रहत हीं। इस्त्राएल क लोगन क बहोत जियादा नोस्कान भवा।

16तब यहोवा निआवाधीस कहइ जाइवाले प्रमुखन चुनेस। एन निआवाधीसन इस्त्राएल क लोगन क ओन दुस्मनन स बचाएस जउन एनकर सम्पत्ति लइ लिहे रहेन। 17किन्तु इस्त्राएल क लोग आपन निआवाधीसन क एक न सुनेन। उ पचे दूसर देवतन क अनुसरण अउर पूजा करत रहेन। उ पचे हाली ही आपन पुरखन जउन यहोवा क आदेस क पालन करत रहेन, क राह स मुड गएन। उ पचे अब इ अउर नहीं किहेन।

18मुला जब कबहुँ यहोवा ओनकर बरे निआवाधीस पठाएस, तउ यहोवा निआवाधीस क संग रहेन। एँह बरे जब तलक निआवाधीस जिअत रहा उ ओन लोगन क ओनकइ दुस्मनन स बचाएस। यहोवा इ किहेस काहेकि जब उ पचे ओन लोगन क कारण जउन ओन लोगन पइ जुल्म अउ अत्याचार किहेन, चिचियात रहेन तउ उ ओन पइ दया किहे रहेन। 19किन्तु जब हर निआवाधीस मर गवा, तब इस्त्राएल

क लोग फुन पाप किहेन अउर लबार देवतन क अनुसरण अउर पूजा सुरू किहेन। उ पचे आपन पुरखन क भी जिआदा बुरा बेउहार किहेन। इस्त्राएल क लोग बहोत हठी रहेन, उ पचे आपन पाप क मार्ग बदलइ स इन्कार कइ दिहेन।

20इ तरह यहोवा इस्त्राएल क लोगन पइ बहोत कोहाइ गवा अउर उ कहेस, “इ रास्ट्र उ करार क तोड़ेस ह जेका मईँ ओनके पुरखन क संग किहे रहेउँ। उ पचे मोरे नहीं सुनेन। 21एह बरे मईँ दूसर रास्ट्रन क अउर पराजित नहीं करब, अउर न ही इस्त्राएल क लोगन क राह साफ करब। उ सबइ रास्ट्र ओन दिनन भी उ पहेँटा में रहेन जब यहोसू मरा रहा अउर मईँ ओन रास्ट्रन क प्रदेस में रहइ देब। 22मईँ ओन रास्ट्रन क उपयोग इस्त्राएल क लोगन क परीच्छा लइ बरे करव। मईँ इ लखब कि इस्त्राएल क लोग आपन यहोवा क आदेस वइसे ही मानत हीं या नाही जइसे ओनकर पुरखन मानत रहेन।” 23यहोवा ओन रास्ट्रन क ओन प्रदेस में रहइ दिहे रहा। यहोवा हाली स ओन रास्ट्रन क आपन देस छोड़इ नहीं दिहेस। उ ओनका हरावइ में यहोसू क सेना क मदद नहीं किहेस।

**3** इ सबइ रास्ट्रन अहइ जेनका यहोवा प्रदेस में छोड़ दिहे रहा। उ अइसा ओन सबहिँ इस्त्राएली लोगन क परीच्छा लेइ बरे किहे रहा जउन कनान क कब्जा करइवाले जुद्ध नहीं लड़े रहेन। 2उ पहेँटा में यहोवा क जरिये ओन रास्ट्रन क रहइ देइ क कारण इहइ रहा कि इस्त्राएल क ओन लोगन क सिच्छा दीन्ह जाइ जउन जुद्धन में नहीं लड़ा रहेन। अलिस्ती लोगन क पाँच सासक, सबहिँ कनानी लोग सीदोन क लोग अउर हिब्बी लोग जउन लबानोन क पहाइ में बालहेर्मोन पर्वत स लइके हमात तलक रहत रहेन। 4यहोवा ओन रास्ट्रन क इस्त्राएल क लोगन क परीच्छा लेइ बरे उ पहेँटा में रहइ दिहस। परमेस्सर इ लखइ चाहत रहा कि इस्त्राएल क लोग यहोवा क ओन आदेसन क पालन करिहीं या नहीं, जेनका उ मूसा क जरिये ओनके पुरखन क दिहे रहा।

5इस्त्राएल क लोग कनानी, हिती, एमोरी, परिज्जी, हिब्बी अउर यबूसी लोगन क संग रहत रहेन। 6इस्त्राएल क लोग ओन लोगन क बिटियन क संग बियाह करब सुरू कइ दिहेन। इस्त्राएल क लोग आपन बिटियन क ओन लोगन क बेटवन क संग बियाह कइ दिहेन अउर इस्त्राएल क लोग ओन लोगन क देवतन क सेवा किहेन।

### पहिला निआवाधीस ओत्नीएल

7इस्त्राएल क लोग उहइ किहेन जेनका यहोवा बुरा ठेहराएन। पाप करत अहइँ। इस्त्राएल क लोग यहोवा आपन परमेस्सर क बिसरि गएन अउर बाल क मूर्तियन अउ आसेर क मूर्तियन क सेवा अउर पूजा कइ लागेन। 8यहोवा इस्त्राएल क लोगन पइ कोहाइ गवा। यहोवा कुसन रिस आइतम क जउन मेसोपोटामिया क राजा रहा, इस्त्राएल क लोगन क हरावइ अउर ओन पइ सासन कइ दिहस। इस्त्राएल क लोग उ राजा क सासन में आठ बरिस तलक रहेन। 9किन्तु इस्त्राएल क लोग यहोवा क रोइके गोहराएन।

यहोवा एक मनई क ओनकर रच्छा बरे पठएस। उ मनई क नाउँ ओत्नीएल रहा। उ कनजी क पूत रहा। कनजी कालेब क लहुरा भाई रहा। ओत्नीएल इस्त्राएल क लोगन क बचाएस। 10 यहोवा क आतिमा ओत्नीएल पड़ उतरी। उ इस्त्राएल क लोगन क निआवाधीस होइ गवा अउर ओन लोगन क जुद्ध में अगुवाइ किहेन। यहोवा मेसोपोटामिया क राजा कूसत्रिसातैम क हरावइ में ओथनिएल क मदद किहेस। 11 इ तरह उ भुईया चालीस बरिस तलक सान्त रहा, जब तलक कनजी नाउँ क मनई क पूत ओत्नीएल नहीं मरा।

### निआवाधीस एहूद

12 एक दाई फुन इस्त्राएल क लोग उहइ किहेन जेका यहोवा गलत कहेस। एह बरे यहोवा मोआब क राजा एग्लोन क इस्त्राएल क लोगन क हरावइ क सकती दिहेस काहेकि उ पचे उहइ किहेन जेका यहोवा बुरा कहेस। 13 एग्लोन इस्त्राएल क लोगन पड़ हमला करत समइ अम्मोनियन अउ अमालेकियन क अपने संग लिहस एग्लोन अउ ओकर फउज इस्त्राएल क लोगन क हराएस अउर ताइ क बृच्छनवाले नगर स ओनका निकार बाहेर किहस। 14 इस्त्राएल क लोग अट्ठारह बरिस तलक मोआब क राजा एग्लोन क सासन में रहेन।

15 तब लोग यहोवा स पराथना किहेन अउर रोइके ओका गोहराएन। यहोवा इस्त्राएल क लोगन क रच्छा बरे एक मनई क पठएस। उ मनई क नाउँ एहूद रहा उ बिन्यामीन क परिवार समूहे क गेरा नाउँ क मनई क पूत रहा। एहूद बायों हाथ क रहा। इस्त्राएल क लोग एहूद क मोआब क राजा एग्लोन बरे कर क रूप में कछू धन देइ क पठएस। 16 एहूद अपने बरे एक तु तरवार बनाएस। उ तरवार दुइधारी रही अउर लगभग अट्ठारह इंच लम्बी रही। एहूद तरवारे क आपन दाहिना जाँघि में बाँधिस अउर आपन ओढ़नन में छुपाइ लिहस।

17 इ तरह एहूद मोआब क राजा एग्लोन क लगे आवा अउ ओका भेंट क रूप में धन दिहस। (एग्लोन बहोत मोटा आदमी रहा।) 18 एग्लोन क धन देइ क पाछे एहूद ओन मनइयन क घर पठइ दिहेस, जउन धन लिआए रहेन। 19 उ पचे राजा क महल छोड़े दिहेस। जब एहूद गिलगाल क मूरतियन क पास पहुँचैन तउ उ वापिस मुडेन अउर राजा क लखइ बरे गएन। एहूद एग्लोन स कहेस, “राजा, मई आप क बरे एक गुप्त सँदेसा लाएँ ह।” राजा कहेस, “चुप रहा।” तब उ सबहिं नउकरन क कमरा स बाहेर पठइ दिहस। 20 एहूद राजा एग्लोन क लगे गवा। एग्लोन एकदम अकेला आपन गर्मी महल क ऊपर क कमरे में बइठा रहा। तब एहूद कहेस, “मई परमेस्सर क हिआँ स आप क बरे सँदेसा लाए अहउँ।” राजा आपन सिंहासने स उठा, उ एहूद क बहोत निचके रहा। 21 जइसेन ही राजा अपने सिंहासने स उठा, एहूद आपन बाएँ हाथ क बढ़ाएस अउर उ तरवार क निकारेस जउन ओकर दाई जाँघि में बाँधी रही। तब एहूद तरवार क राजा क पेट में भोंक दिहेस। 22 तरवार एग्लोन क पेट में ऐतनी भीतर गइ कि ओकर मूठ भी ओहमों समाइ गइ। राजा क चर्बी पूरी तरवार क छुपाइ

लिहस। एह बरे एहूद तरवार क एग्लोन क अन्दर छोड़ दिहस। जब एग्लोन क भोंका गवा रहा तउ उ आपन अत्रि अउ अमासय पर नियन्त्रण नहीं रख सकेन अउर ओकर मल बाहार आगएन।

23 एहूद कमरा स बाहेर गवा अउर उ आपन पाछे दरवाजन में ताला लगाइके बन्द कइ दिहस। 24 एहूद क चले जाइ क ठीक पाछे नौकर वापस आएन। उ पचे कमरा क दरवाजन में ताला लगाइ पाएन। एह बरे नौकर लोग कहेन, “राजा आपन आराम कच्छ क हवादार सौचालय में सौच करत रहा होइहीं।” 25 एह बरे नौकर लोग लम्बे समइ तलक प्रतीच्छा किहेन। राजा अटारी के कमरे के द्वार कबहुँ नहीं खोलेस। आखिर में उ सबइ चिन्तित भएन। उ पचे चाभी लिहेन अउ दरवाजन खोलेन। जब नौकर लोग घुसेन तउ उ पचे राजा क फर्स पड़ मरा पड़ा निहारेन।

26 जब तलक नौकर लोग राजा क प्रतीच्छा करत रहेन तब तलक एहूद क भाग पराइ क समइ मिल गवा। एहूद मूरतियन क लगे स होइके सेइरे नाउँ क ठउरे कइँती गवा। 27 एहूद सेइरे नाउँ क ठउरे पड़ पहुँचा। तब उ एप्रैम क पहाड़ी छेत्र में तुरही बजाएस। इस्त्राएल क लोग तुरही क आवाज सुनेन अउर उ पचे पहाड़ियन स उतरेन। एहूद ओनकर संचालक रहा। 28 एहूद इस्त्राएल क लोगन स कहेस, “मोरे पाछे चला। यहोवा मोआब क लोगन अर्थात हमरे दुस्मनन क हरावइ में हमार मदद किहेस ह।”

एह बरे इस्त्राएल क लोग एहूद क अनुसरण किहेन। उ पचे एहूद क अनुसरण ओन ठउरन पड़ अधिकार करइ बरे करत रहेन जहाँ स यरदन नदी आसानी स पार कीन्ह जाइ सकत रही। उ सबइ ठउर मोआब क प्रदेश तलक पहुँचावत रहेन। इस्त्राएल क लोग कउनो क यरदन नदी क पार नहीं जाइ दिहेन। 29 इस्त्राएल क लोग मोआब क करीब दस हजार बलवान अउ साहसी मनइयन क मार डाएन। एक भी मोआबी पराइके बच नहीं सका। 30 एह बरे उहइ दिना स मोआब क लोगन क इस्त्राएल क लोगन क सासन में रहइ क मजबूर कीन्ह गएन अउर हुआँ उ भुईया में अस्सी बरिस तलक सात्ति बिराज रही।

### निआवाधीस समगर

31 एहूद क बाद एक दूसर मनई इस्त्राएल क बचाएस। उ मनई क नाउँ समगर रहा उ अनात नाउँ क पूत रहा। समगर कोड़े क उपयोग छः सौ पलिस्ती मनइयन क मार डावइ बरे किहेस।

### अउरत निआवाधीस दबोरा

4 एहूद क मृत्यु क पाछे इस्त्राएलियन एक बार फुन उहइ किहेन जउन यहोवा क नजर में बुरा रहा। 2 एह बरे यहोवा कनान प्रदेश क राजा याबीन क इस्त्राएली लोगन क पराजित करइ दिहस। याबीन हासोर नाउँ क नगर में सासन करत रहा। राजा याबीन क सेना क सेनापति सीसरा नाउँ क मनई रहा। सीसरा हरोसेत हाग्योथीम नाउँ क नगर में रहत रहा। 3 सीसरा क लगे नौव सौ लोहा क रथ रहेन अउर उ बीस बरिस तलक इस्त्राएल क लोगन क बरे बहोत

क्रूर रहा। इस्राएल क लोगन क संग बहोत बुरा बेउहार कीन्ह गवा। एह बरे उ पचे यहोवा क पराथना किहेस अउर मदद बरे रोइके पुकारेस।

4दबोरा नाउँ क एक ठु मेहरारू नबी रही। उ लपतीदोत नाउँ क मनई क पत्नी रही। उ उ समइ इस्राएल क निआवाधीस रही। 5एक दिन दबोरा, ताड़ क बृच्छ क खाले बइठी रही जेका “दबोरा क ताड़ बृच्छ” कहा जात रहा। इस्राएल क लोग ओकर लगे इ पूछइ बरे आपन कि सीसरा क बारे में का कीन्ह जाइ। दबोरा क ताड़ बृच्छ एप्रैम क पहाड़ी प्रदेश में रामा अउ बेतेल नगरन क बीच रहा। 6दबोरा बाराक नाउँ क मनई क लगे सँदेसा पठएस। उ ओका ओहसे मिलइ क कहेस। बाराक अबीनोअम नाउँ क मनई क पूत रहा। बाराक नप्ताली क छेत्र में केदेस नाउँ क नगर में रहत रहा। दबोरा बाराक स कहेस, “यहोवा, इस्राएल क परमेस्सर तोहका आदेस देत ह, ‘जा अउर नप्ताली अउर जबूलून क परिवार समूहन स दस हजार मनइयन क इकट्ठा करा अउर ओनका ताबोर पहाड़ी पड़ लइ जा। 7मई याबीन क सेना क सेनापति सीसरा क तोहरे पास पठउब। मई सीसरा, ओकर रथन अउर ओकर सेना क कीसोन नदी पड़ पहेँचाउब। मई हुवाँ सीसरा क हरावइ मैं तोहार मदद करब।”

8तब बाराक दबोरा स कहेस, “जदि तू मोरे संग चलबिउ तउ मई जाब अउर इ करब। किन्तु जदि तू नहीं चलबिउ तउ मई नहीं जाब।”

9दबोरा जवाब दिहस, “निहचय ही, मई तोहरे संग चलब। किन्तु तोहरी स्वभाव क कारण जब सीसरा हरावा जाइ, तोहारा प्रसिद्धता नहीं मिली। यहोवा एक ठु मेहरारू क जरिये सीसरा क हराइ देइ।”

एह बरे दबोरा बाराक क संग केदेस नगर क गइ।

10केदेस नगर में बाराक जबूलून अउ नप्ताली क परिवार समूहन क एक संग बोलाएस। बाराक ओन परिवार समूह स, अपने संग चलइ बरे दस हजार मनइयन क बटोरिस। दबोरा भी बाराक क संग गइ।

11हुआँ हेबेर नाउँ क एक अइसा मनई रहा जउन केनी लोगन में स रहा। हेबेर दूसर केनी लोगन क छोड़ चुका रहा। (केनी लोग होबाब क सन्तान रहेन। होबाब मूसा क ससुर रहा।) हेबेर साननीम बलूत क बृच्छ क लगे सिबिर लगाएस। साननीम केदेस नगर क लगे अहइ।

12तब सीसरा स इ कहा गवा कि बाराक जउन कि अबीनोअम क पूत अहइ, ताबोर पर्वत तलक पहेँच गवा अहइ। 13एह बरे सीसरा आपन नौव सौ लोहा क रथन क बटोरिस। सीसरा आपन सबहिं फउजियन क भी संग लिहस। हरोसेत हाग्योयीम नगर स उ पचे कीसोन नदी तलक जात्रा किहेन।

14तब दबोरा बाराक स कहेस, “आजु जा! यहोवा तोहका सीसर क हरावइ मैं मदद देइ। निहचइ ही, तू जानत अहा कि यहोवा पहिले स ही तोहरे बरे रस्ता साफ कइ रखेस ह।” एह बरे बाराक दस हजार फउजियन क ताबोर पर्वत स निचे उतारेस। 15बाराक अउर ओकर फउजियन सीसरा पड़ हमला कइ दिहन। जुद्ध क दौरान यहोवा सीसरा, ओकर

फउज अउ रथन क अस्तव्यस्त कइ दिहस। एह बरे बाराक अउ ओकर फउज सीसरा क फउज क हराइ दिहस। किन्तु सीसरा आपन रथ क तजि दिहस अउ पैदल पराइ गवा। 16बाराक अउर ओकर फउजी सीसरा क रथन अउर फउज क पाछ हरोसेत हाग्योयीम तलक लगातार किहन। बाराक क फउजियन सीसरा क फउजियन क मारइ बरे आपन तरवासन क उपयोग किहन। सीसरा क कउनो फउजी जिअत नहीं बचा।

17मूला सीसरा परइ गवा। उ उ तम्बू क लगे आवा, जहाँ याएल नाउँ क एक ठु मेहरारू रहत रही। याएल, हेबेर नाउँ क मनई क मेहरारू रही। उ केनी लोगन में स एक रही। हेबेर क परिवार हासोर क राजा याबीन स सान्ति-सन्धि किए भए रहा। एह बरे सीसरा, याएल क तम्बू में पराइ गवा।

18याएल सीसरा क आवत लखेस, एह बरे उ ओहसे मिलइ बाहेर गइ। याएल सीसरा स कहेस, “मोरे तम्बू में आवा, मोर सुआमी, आवा डेराअ नहीं।” एह बरे सीसरा याएल क तम्बू में गवा अउर उ ओका एक ठु कमबल स ढाँपि लिहिस।

19सीसरा याएल स कहेस, “मई पिआसा अहउँ। कृपा कइके मोका पिअइ क तनिक पानी द्या।” एह बरे याएल एक मसक खोलेस, जेहमँ उ दूध रखे रहा अउर उ पिअइ क दिहस। तब उ सीसरा क ढाँपि लिहिस।

20तब सीसरा याएल स कहेस, “तम्बू क दुआर पड़ जा। जदि कउनो हुवाँ स गुजरत ह अउर पूछत ह, ‘का हिआँ कउनो अहइ?’ तउ तू कह्या - ‘नहीं।’”

21किन्तु हेबेर क मेहरारू याएल तम्बू क एक खूँटी अउ हथौड़ा लिहस। याएल चुपचाप सीसरा क लगे गइ। सीसरा बहोत थका रहा एह बरे उ सोवत रहा। याएल तम्बू क खूँटी क सीसरा क मूँड क एक कइँती धरेस अउर ओह पड़ हथौड़ा स चोट किहस। तम्बू क खूँटी सीसरा क मूँड क एक कइँती स होइके जमीन में धँस गइ अउर इ तरह सीसरा मर गवा।

22ठीक तुरंत बाद बाराक सीसरा क हेरत भवा याएल क तम्बू क लगे आवा। याएल बाराक स मिलइ बाहेर निकरी अउर बोली, “अन्दर आवा अउर मई उ मनई क देखाउब जेका तू हेरत अहा।” एह बरे बाराक याएल क साथ तम्बू में घुसा। बाराक हुवाँ सीसरा क जमीन पड़ मरा पड़ा पाएस, तम्बू क खूँटी ओकरे मूँडी क एक कइँती स दूसरी कइँती निकरी भइ रही।

23उ दिन यहोवा कनान क राजा याबीन को इस्राएल क लोगन क समन्वा हराएस। 24इ तरह इस्राएल क लोग क्रम स जियादा सक्तिसाली होत गएन अउर उ पचे कनान क राजा याबीन क हराइ दिहन। इस्राएल क लोग कनान क राजा याबीन क आखिरी रूप स हराएस।

### दबोरा क गीत

5 जउने दिन इस्राएल क लोग सीसरा क हराएन उ दिन दबोर अउर अबीनोअम क पूत बाराक इ गीत क गाएस:

2इस्त्राएल क लोग अपने क जुद्ध बरे तइयार किहन। उ पचे जुद्ध में भाग लेइ बरे खुद आएन। यहोवा क बखान करा!

3राजा लोग, सुना। सासक लोगो, धियान द्या। मई गाउब। मई खुद यहोवा क बरे गाउब। मई यहोवा, इस्त्राएल क लोगन क परमेस्सर क स्तुति करब।

4हे यहोवा, अतीत में तू सेईर देस स आया। तू एदोम प्रदेस स चलकर आया, अउर धरती काँप उठी। गगर बरसा किहेस, मेघन जल गिराएन।

5पर्वत यहोवा, सिनाई पर्वत क परमेस्सर क समन्वा, यहोवा, इस्त्राएल क लोगन क परमेस्सर क समन्वा काँप उठेन।

6अनात क पूत समगर क समइ में अउर याएल क समइ में, राजमार्गन सूना रहेन। काफिले अउ राही, गौण पथन स चलत रहेन।

7इस्त्राएल में कउनो जोधा नहीं रहा, हे दबोरा, जब तलक तू नहीं आएस रहा, जब तलक तू इस्त्राएल क महतारी बनिके न खड़ी भइउ रहा हुआँ कउनो फउजी नहीं रहा।

8परमेस्सर नवे प्रमुखन क चुनेस कि उ पचे नगर-द्वार पइ जुद्ध करई। इस्त्राएल क चालीस हजार फउजियन में, कउनो ढाल अउ भाला नहीं पाइ सका।

9मोर हिरदय इस्त्राएल क सेनापतियन क संग अहइ। इ सबइ सेनापति खुद आपन इच्छा स जुद्ध में गएन। यहोवा प्रसंसा करा।

10सफेद गदहन पइ सवार होइवाले लोगो तू पचे, जउन कम्बले क काठी पइ बइठत अहा अउर तु जउन राजपथे पइ अहा, धियान द्या।

11घुंघरुअन क छमछम संगीत, गोरुअन बरे पानी वाले कुअँन पइ, सुना जा सकत ह। लोग यहोवा क विजय गीत गावत ह। उ पचे इस्त्राएल में यहोवा अउ ओकर वीरन क विजय-कथा कहत हीं। उ जब समइ यहोवा क लोग नगर दुआसन पइ लड़ेन अउर विजयी भएन।

12दबोरा जागा, जागा! जागा, जागा गीत गावा जागा, बाराक! जा, हे अबीनोअम के पूत आपन दुस्मनन क धरा!

13तउ कछू मनइयन ताकतवर मनइयन स लइइ बरे गएन। “यहोवा क लोगो, सक्तीसाली सिपाहियन क खिलाफ मोरे संग आवा।

14एप्रैम क कछू लोग अमालेक क पहाड़ी प्रदेस स आएन। हे बिन्यामीन, तू अउर तोहार लोग ओन मनइयन क अनुसरण किहन। माकीर क परिवार समूह स सेनापतियन आगे आएन। काँसे क दण्ड क संग जबूलून परिवार समूह स नेता लोग आएन।

15इस्साकार क नेता दबोरा क संग रहेन। इस्साकार क परिवार समूह बाराक क बरे सच्चा रहा। उ सबइ मनई पैदल ही घाटी में पठवा गएन। रूबेन तोहार फउज में बहोत सारे बहादुर सिपाही अहइ।

16एह बरे आपन भेड़वाले देवार स लगे तू सबहिं काहे बइठा अहा? रूबेन क वीर फउजियन जुद्ध बरे बहोत जियादा सोचेन। किन्तु उ पचे घर बइठेन भेड़िन बरे बजाइ जा रहेन संगीत क अनकत रहेन।

17गिलाद क लोग यरदन नदी क पार आपन डेसन में पड़ा रहेन। ऐ, दान क लोगो, जहाँ तलक बात तोहार पचन्क अहइ तू पचे जहाजन क संग काहे चिपका रह्या? आसेर क लोग सागर तट पइ पड़ा रहेन। उ पचे आपन सुरच्छित बन्दरगाहन में डेरा डाएन।

18किन्तु जबूलून क लोग अउर नप्टाली क लोग, मैदान क ऊच छेत्रन में जुद्ध क खतरे में जीवन क डाएन।

19राजा लोग आएन, उ पचे लड़ेन, उ समइ कनान क राजा लोगन, तानक सहर में मगिद्दो क जलासय पइ लड़ा किन्तु उ पचे इस्त्राएल क लोगन क कउनो सम्पति नहीं लइ जाइ सकेन।

20गगन क नछत्रन जुद्ध किहेन। नछत्रन आपन पथ स, सीसरा स जुद्ध किहन।

21कीसोन नदी, सीसरा क फउजियन क बहाइ लइ गइ, उ पुरानी नदी-कीसोन नदी। मोर आतिमा, सक्ती स आगे बढ़ा!

22उ समइ घोड़न क खरन भुइँया क पीटेन। सीसरा क सक्तीसाली घोड़न भागत गएन, भागत गएन।

23यहोवा क दूत कहेस, “मेरोज नगर क अभिसाप द्या। लोगन क अभिसाप द्या। लोगन क अभिसाप द्या जोधन क संग उ पचे यहोवा क मदद करइ नहीं आएन।”

24केनी हेबेर क मेहरारू याएल सबहिं मेहरारूअन में स सब स जियादा धन्य होइ।

25सीसरा जल माँगेस, किन्तु याएल दूध दिहस, उ सासक क बरे एक ठु उपयुक्त पिआला में मलाई लिआएस।

26याएल बाहेर गइ अउर तम्बू क खूँटी लिआएस। ओकर दाहिने हाथे में हथौड़ा रहा जेका मजदूर काम लिअवतेन। अउर उ सीसरा पइ हथौरा चलाएस। उ ओकरे मूँड़ चूर किहेस। उ ओकरे मूँड़ क एक कइँती स बेधेस।

27उ याएल क गोड़न क बीच बूड़ा। उ मर गवा। उहुवँइ पइ गवा। उ ओकरे गोड़न क बीच बूड़ा। उ मर गवा जहाँ सीसरा बूड़ा। हुवँइ उ गिरा, मर गवा।

28सीसरा क महतारी, खिड़की स लखत अउर पर्दन स झाँकत भइ चिचियाइ उठी। “सीसरा क रथ क आवई में देरी काहे भवा? सीसरा क रथ क घोड़न क हिनहिनाइ में देरी काहे भवा?”

29सब स चतुर ओकर सेविकन जवाब ओका देतिन, हाँ सेविका ओका जवाब देत।

30“निहचइ ही उ पचे विजय पाएन ह, निहचय ही पराजितन क चिजियन उ पचे हड़पत अहई निहचय ही उ पचे आपुस में चिजियन क बाँटत हीं। एक ठु या दुइ लइकी, हर फउजी क दीन्ह जात हीं।

संभव अहइ सीसरा कउनो रंगा ओढ़ना लेत अहइ, संभव अहइ इ एक कढ़े ओढ़ना क टूका होइ, या संभव अहइ, विजय सीसरा क पहिरइ बरे दुइ हुका होइ।”

31हे यहोवा। इ तरह तोहार, दुस्मन मर-मिट जाइँ। किन्तु उ सबइ लोग जउन तोहका पियार करत हीं उदय होत भवा चमकीला क समान सक्तीसाली बनइ।”

तउ देस में चालीस बरिस तक सान्ति रही।

**मिदयानी इस्राएल क लोगन स जुद्ध करत हीं**

6 तउ इस्राएलियन उहइ किहस जेका यहोवा बुरा कहेस। एह बरे सात बरिस तलक यहोवा मिदयानी लोगन क इस्राएल क पराजित करइ दिहस।

2मिदयानी लोग बहोत सक्तिसाली रहेन अउ इस्राएल क लोगन क बरे बहोत क्रूर रहेन। एह बरे इस्राएल क लोग पहाड़न में बहोत स छुपइ क ठउर बनाएन। उ पचे आपन भोजन भी गुफन में अउर ओन ठउरन में जेका खोजब कठिन रहा छुपाएन। 3उ पचे इ किहेन, काहेकि मिदयानी, अमालोकी अउर पूर्वी लोगन सदा आवत रहेन अउर फसलन क नस्ट करत रहेन। 4उ सबइ लोग उ प्रदेस में डेरन डावत रहेन अउ उ फसल क नस्ट करत रहेन जउन इस्राएल क लोग जमावत रहेन। ऊज्जा नगर क निअरे तलक क प्रदेस क इस्राएल क लोगन क फसल क उ पचे लोग नस्ट करत रहेन। उ सबइ लोग इस्राएल क लोगन क खाइ क बरे कछू भी नहीं छोड़त रहेन। उ पचे ओनके बरे भेड़ या पसु या गदधा भी नहीं छोड़त रहेन। 5मिदयानी लोग आपन अउर उ पचे उ प्रदेस में डेरा डाएन। उ पचे अपने संग आपन परिवार अउर जनावसन क भी लिआएन। उ पचे एतने जियादा रहेन जेतने टिडिइयन क दल। ओन लोगन अउ ओनकर ऊँटन क गिनती एतनी जियादा रही कि ओनका गनब संभव नहीं रहा। इ सबइ लोग उ भुइँया में आएन अउ ओका नस्ट कइ डाएन। 6इस्राएल क लोग मिदयानी लोगन क कारण बहोत गरीब होइ गएन। एह बरे इस्राएल क लोग यहोवा क मदद बरे रोइके गोहराएन।

7जब मिदयानियन क कारण इस्राएलियन यहोवा क समन्वा रोएस। 8तउ यहोवा ओनके लगे एक ठु नबी पठाएस। नबी इस्राएल क लोगन स कहेस, “यहोवा, इस्राएल क परमेस्सर इ कहेस ह कि, ‘तू लोग मिस्र देस में दास रहया। मई तू लोगन क अजाद किहेउँ अउर मई उ देस स तू पचन्क बाहेर लिआएउँ। 9मई मिस्र क सक्तीसाली लोगन स तोहार पचन्क बचाएउँ। तब कनान क लोग तू पचन्क कस्ट दिहेन। एह बरे मई फुन तोहार पचन्क बचाएउँ। मई ओन लोगन स ओनकर देस छोड़वाएउँ अउर मई ओनकर देस तू पचन्क दिहेउँ। 10तब मई तू पचन्स कहेउँ, ‘मई यहोवा तोहार पचन्क परमेस्सर अहउँ। तू लोग एमोरी लोगन क भुइँया में रहब्या, किन्तु तू पचन्क ओनकर लबार देवतन क पूजा नहीं करइ चाही।’ परन्तु तू लोग मोरी आग्या क पालन नहीं किहया।”

**यहोवा क दूत गिदोन क लगे आवत ह**

11उ समइ, यहोवा क दूत गिदोन नाउँ क मनई क लगे आवा। यहोवा क दूत आवा अउर ओप्रा में बलूत क तले बइठा। इ बलूत क बृच्छ योआस नाउँ क मनई क रहा। योआस अबीएजेरी लोगन में स एक रहा। योआस गिदोन क बाप रहा। गिदोन कछू गोहूँ दाखरस निकारइ क यंत्र में कूटत रहा। गिदोन मिदयानी लोगन स आपन गोहूँ छुपावइ क जतन करत रहा। 12यहोवा क दूत गिदोन क समन्वा परगट भवा अउर ओहसे कहेस, “सक्तिसाली योद्धा, यहोवा तोहरे संग होइ!”

13तब गिदोन कहेस, “महोदय, मई किरिया खाइके कहत हउँ कि यदि यहोवा हमारे संग अहइ तउ हम लोगन क एतना कस्ट काहे अहइ? हम लोग सुना ह कि उ हमार पुरखन बरे अजूबा कारज किहे रहा। हमार पुरखन हम लोगन स कहेन कि यहोवा हम लोगन क मिस्र स बाहेर लिआबा। किन्तु अब यहोवा हम लोगन क तजि दिहेस ह। यहोवा मिदयानी लोगन क हम लोगन क हरावइ दिहस।”

14यहोवा गिदोन कइँती मुड़ा अउर ओनसे बोला, “आपन सक्ती क प्रयोग करा। जा अउर मिदयानी लोगन स इस्राएल क लोगन क रच्छा करा। का इ अइसा नहीं अहइ कि मई तोहका पठवत हउँ?”

15किन्तु गिदोन जवाब दिहेस अउर कहेस, “महोदय, छिमा करइँ, मई इस्राएल क रच्छा कइसे कइ सकत अहउँ? मारे परिवार मनस्से क परिवार समूह में सबसे कमजोर अहइ अउर मई आपन परिवार में सबसे लहुरा हउँ।”

16यहोवा गिदोन क जवाब दिहेस अउर कहेस, “मिदयानी लोगन क हरावइ मैं मदद करइ बरे मई तोहरे संग रहब। इ ऐसा मालूम होइ कि तू एक मनई क खिलाफ लड़न अहा।”

17तब गिदोन यहोवा स कहेस, “जदि तू मोहसे खुस अहा तउ सबूत द्या कि तू फुरइ यहोवा अहा। 18कृपा कइके तू हिआँ रूका। जब तलक मई लउट न आवउँ तब तलक तू न जा। मोका मोर भेट लिआवइ द्या अउर ओका तोहरे समन्वा रखइ द्या।”

एह बरे यहोवा कहेस, “मई तब तलक प्रतीच्छा करब जब तलक तू लउटत्या नाही।”

19एह बरे गिदोन गवा अउर उ एक ठु बोकरी क बच्चा खउलात पानी में पकाएस। गिदोन लगभग एक एपा आटा भी लिहस अउर बेखमीरी रोटियन बनाएस। तब गिदोन माँस क एक टोकरा में अउ पके भए माँस क सोरबे क एक बर्तन में लिहस। तउ गिदोन माँस, पके माँस क सोरबा अउ बेखमीरी रोटियन क निकारेस। गिदोन उ खइया क बलूत क बृच्छ क नीचे यहोवा क दिहस।

20परमेस्सर क दूत गिदोन स कहेस, “माँस अउ बेखमीरी रोटियन क हुवाँ चट्टाने पइ धरा। तब पका भवा माँस क सोरबा क गिरावा।” गिदोन वइसा ही किहस जइसा करइ क कहा गवा रहा।

21यहोवा क सरगदूत अपने हाथ में एक ठु कुबरी लइ रखे रही। यहोवा क सरगदूत माँस अउ रोटियन क कुबरी क सिरे स छुएस। तब चट्टाने स आगी बरि उठी। माँस अउ रोटियन पूरी तरह बरि गइन। तब यहोवा सरग क दूत अन्तर्ध्यान होइ गवा।

22तब गिदोन समुझेस कि उ यहोवा क सरगदूत स बातन करत अहइ। एह बरे गिदोन चिचियाइ उठा, “सर्वसक्तीमान यहोवा! मई यहोवा क सरगदूत क आमने-सामने लखेउँ ह!”

23किन्तु यहोवा गिदोन स कहेस, “सान्त रहा। डेराअ नाही। तू मरब्या नाही।”

24एह बरे गिदोन यहोवा क उपासना बरे उ ठउरे पइ एक वेदी बनाएस। उ वेदी क नाउँ “यहोवा सान्ति अहइ”

धरेस। उ वेदी अब तलक ओप्रा में खड़ी अहइ। ओप्रा हुवैँ अहइ जहाँ एजेरी लोग रहत ही।

### गिदोन बाल क वेदी क गिराइ डावत ह

25उहइ रात यहोवा गिदोन स बातन किहस। यहोवा गिदोन स कहेस, “आपन पिता क एक संपूर्ण प्रौढ़ बर्धा अउर दूसर जउन सात बरिस क अहइ लिआवा। तोहरे पिता क लबार देवता बाल क एक ठु वेदी अहइ। उ वेदी क बगल में एक काठे क खम्भा भी अहइ। खम्भा लबार देवी असेरा क सम्मान बरे बनावा गवा रहा। वेदी क नास कइ द्या अउ असेरा क खम्भा क काट द्या। 26तब यहोवा, आपन परमेस्सर बरे उचित तरह क वेदी बनावा। इ ऊँच ठउरे पइ उ वेदी बनावा। तब एक ठु सम्पूर्ण प्रौढ़ बर्धा क मारा अउर इ वेदी पइ ओका बार द्या। असेरा क खम्भे क काठ क उपयोग आपन भेट क बारइ बरे करा।”

27एह बरे गिदोन आपन नउकरन स दस नउकर क लिहस अउर उहइ किहस जउन यहोवा करइ क कहे रहा। किन्तु गिदोन डेरात रहा कि ओकर परिवार क सदस्य अउर नगर क नागरिक लिख सकत ही कि उ का करत अहइ। गिदोन अहइ किहस जउन यहोवा ओका करइ क कहेस। किन्तु उ इ रात में किहस, दिन में नाहीं।

28अगले भिंसारे नगर क नागरिक सोइके उठेन अउर उ पचे लखेन कि बाल क वेदी नस्त कइ दीन्ह गइ अहइ। उ पचे इ भी लखेन कि असेरा क खम्भा काट डावा ग अहइ। असेरा क खम्भा बाल क वेदी क ठीक पाछे गिर पड़ा। ओन लोग उ वेदी क भी लखेन जेका गिदोन बनाए रहा अउर उ पचे उ वेदी पइ बलि दीन्ह गए बर्धा क भी निहारेन।

29नगर क लोग एक दूसरे क लखेन अउ कहेन, हमरी वेदी क कउन गिराएँस? “हमार असेरा क खम्भे क कउन काटेस? इ नवा वेदी पइ कउन इ बर्धा क बलि दिहस?” उ पचे कइउ सवाल किहेन अउर इ पता लगावइ चाहेन कि उ सबइ काम कउन किहेस।

कउनो कहेस, “योआस क पूत गिदोन इ काम किहेस।”

30एह बरे नगर क लोग योआस क लगे आएन। उ पचे योआस स कहेन, “तोहका आपन पूत क बाहेर लिआवइ चाहीं। उ बाल क वेदी क गिराएँस ह अउर उ असेरा क खम्भे क काटेस ह जउन उ वेदी क बगल में रहा। एह बरे तोहरे पूत क मारा जाइ चाहीं।”

31तब योआस ओन सबइ स जउन ओकरे चारिहुँ ओर खड़ी रही कहेस, “का तू बाल क मुकद्दमा क वकालत करब्या? का तू ओका बचाउब्या? यदि उ एक देवता अहइ तउ जउन कउनो ओकरे खिलाफ करइ उ भिंसारे तलक मरि जाइ! यदि उ देवता अहइ तउ ओका खुद ओकर खिलाफ लइइ चाहीं जउन ओकर वेदी क काटेस ह।” 32योआस कहेस, “जदि गिदोन बाल क वेदी क गिराएँस तउ बाल क ओहसे संघर्ष करइ द्या।” एह बरे उ दिन योआस गिदोन क एक ठु नवा नाउँ दिहस। उ ओका यरूबाल कहेस।

### गिदोन मिद्यान क लोगन क हरावत ह

33मिद्यानी, अमालेकी अउ पूर्व क दूसर सबहिँ लोग इस्त्राएल क लोगन क खिलाफ जुद्ध लइइ बरे एक संग मिलेन। उ सबइ लोग यरदन नदी क पार गएन अउर उ पचे यिजेरल क घाटी में डेरा डाएन। 34किन्तु गिदोन पइ यहोवा क आतिमा आएँस अउ ओका बड़ी सक्ती प्रदान किहेस। गिदोन अबीएजेरी लोगन क आपन पाछे (अनुसरण) चलइ बरे तुरही बजाएँस। 35गिदोन मनस्से परिवार समूह क सबहिँ लोगन क लगे दूत पठएँस। उ सबइ दूतन मनस्से क लोगन स आपन हथियार निकारइ अउ जुद्ध बरे तइयार होइ क कहेस। गिदोन असेर, जबूलून अउ नप्ताली क परिवार समूहन क भी दूत पठएँस। एह बरे उ सबइ परिवार समूह भी गिदोन स अउर ओकरे आदमियन स भेंटइ गएन।

36तब गिदोन यहोवा स कहेस, “अगर तू इस्त्राएल क लोगन क बचावइ बरे मोर उपयोग करब्या, जइसा तू किहेस, 37मई खरिहान क फर्स पइ एक भेड़ी क ऊन रखत हउँ। जदि सिरिफ भेड़ी क ऊन पइ ही ओस क बँदन होइहीं, जबकि सारी भुइयाँ सूखी अहइ, तब मई समुझब कि तू आपन कहइ क अनुसार मोर उपयोग इस्त्राएल क बचावइ में करब्या।”

38अउर उ ठीक वइसा ही भवा। गिदोन अगले भिंसारे उठा अउ भेड़ क ऊने क निचोड़ेस। उ भेड़ी क ऊन स पियाला भइ पानी निचोड़ सका।

39तब गिदोन परमेस्सर स कहेस, “मोह पइ जिन कोहाअ। मोका सिरिफ एक अउर अनुरोध करइ द्या। मोका भेड़ी क ऊन स एक दाई अउर परीच्छण करइ द्या। इ समइ भेड़ी क ऊन क उ दसा में झुरान रहइ द्या जब एकरे चारिहुँ कइँती क भुइँया ओस स भीगी होइ।”

40उ रात परमेस्सर उहइ किहेस। सिरिफ भेड़ी क ऊन झुरान रही, किन्तु चारिहुँ कइँती क भुइँया ओसे स भीगी रही।

**7** भोर भए भिंसारे, यरूबाल (गिदोन) अउर ओकर सबहिँ लोग आपन डेन हरोद क झरने पइ लगाएँस। मिद्यानी लोग मोरह नाउँ क पहाड़ी क खाले डेरा डाए रहेन। इ गिदोन अउर ओकर मनइयन क उत्तर में जहाँ उ पचे डेरा डाए रहेन, रहा।

2तब यहोवा गिदोन स कहेस, “मई तोहरे मनइयन क मदद मिद्यानी लोगन क हरावइ बरे करइ जात हउँ। किन्तु तोहरे लगे इ काम बरे जरूरत स जियादा मनई अहइँ। मई नाहीं चाहत कि इस्त्राएल क लोग मोका बिसरि जाई अउर सेखी मारई कि उ पचे आपन रच्छा खुद किहेन। 3एह बरे आपन लोगन में घोसणा करा। ओनसे कहा, ‘जउन कउनो डेरात होइ, उ गिलाद पहाड़ी छोड़कर आपन घर लउटि सकत ह।’”

एह बरे 22,000 मनइयन गिदोन क तजेन अउर उ पचे अपने घर लउट गएन। किन्तु 10,000 फुन भी ओकर संग रहेन।

4तब यहोवा गिदोन स कहेस, “अबहुँ भी जरूरत स जियादा लोग अहइँ। एन लोगन क जल क लगे लइ जा अउर हुवाँ मई एनकर परीच्छा तोहरे बरे करब। जदि मई

कहब, 'इ मनई तोहरे संग जाई' तउ उ जाइ। किन्तु जदि मई कहब, 'इ मनई तोहरे संग नाही जाइ।' तउ उ नाही जाइ।"

5एह बरे गिदोन लोगन क जल क लगे लइ गवा। उ जल क लगे यहोवा गिदोन स कहेस, "इ तरह लोगन क अलग करा: जउन मनई कूकुर क नाई लपलप कइके जल पीइहीं, उ पचे एक वर्ग में होइहीं। जउन पिअइ बरे निहुरिही, दूसर वर्ग में होइहीं।"

6हुवाँ तीन सौ मनई अइसे रहेन जउन जल मुँहे तलक लिआवइ बरे आपन हाथन क उपयोग किहन अउर ओका कूकुर क नाई लपलप कइके पिएन। बाकी लोग घुटुरूअन क बले निहुरेन अउर उ पचे जल पिएन। 7तब यहोवा गिदोन स कहेस, "मई तीन सौ मनइयन क उपयोग करब अउर कूकुर क नाई लपलप कइके जल पिएन। मई ओनही लोगन क उपयोग मिद्यानी लोगन क हरावइ बरे तोहार सहायता बरे अउर इस्त्राएल क रच्छा कइ बरे करब। दूसर लोगन क अपने घर लउटि जाइ द्या।"

8एह बरे गिदोन इस्त्राएल क सेस मनइयन क ओनके घर पठइ दिहस। किन्तु गिदोन तीन सौ मनइयन क आपन संग रखेस। ओन तीन सौ मनइयन डेरा छोड़ कइ जाइवाले मनइयन क भोजन, सामग्री अउर तुरहियन क रख लिहेन। अबहिं मिद्यानी लोग, गिदोन क खाले घाटी में डेरा डाए भए रहेन।

9रात क यहोवा गिदोन स बातन किहेस। यहोवा ओहसे कहेस, "उठा गिदोन, मिद्यानी फउजी क डेस में जा अउर हमला करा काहेकि मई तोहका ओन लोगन क हरावइ देब। 10किन्तु जदि तू अकेले हुआँ जाइ स डेरात ह तउ आपन नउकर फूरा क अपने संग लइ ल्या। 11जब तू मिद्यानी लोगन क डेरा क लगे जा तउ इ सुना कि उ सबइ लोग का कहत रहे हैं। तब तू इ सुन लेब्या कि उ पचे का कहत अहई तब तू उ डेरा पइ हमला कइ स नाही डेराब्या।"

एह बरे गिदोन अउ ओकर नउकर फूरा दुइनउँ दुस्मन क डेरा क छोर पइ पहुँचेन। 12मिद्यानी, अमालेकी अउ पूरब क दूसर सबहिं लोग उ घाटी में डेरा डाए रहेन। हुवाँ उ पचे एतनी बड़ी गनती में रहेन कि टिड्डी-दल क नाई जान पड़त रहेन। अइसा जान पड़ा कि ओन क लगे ऐतना ऊँट रहेन, जेतना समुदर क किनारे बाल क कण।

13जब गिदोन दुस्मनन क डेरा में पहुँचा, उ एक मनई क बातन करत सुनेस। उ मनई आपन देख भए सपन क आपन मित्र क बतावत रहा। उ मनई कहत रहा, "मई इ सपना लखेउँ कि मिद्यान क लोगन क डेरा में एक गोल रोटी चक्कर खात भइ आइ। उ रोटी डेरा पइ ऐतनी करी चोट किहेस कि डेरा पलट गवा अउर चौड़ा होइके गिर गवा।"

14उ मनई क मीत उ सपन क अरथ जानत रहा। उ मनई क मीत कहेस, "तोहरे सपन क सिरिफ एक ही अरथ बाटइ। यह इस्त्राएल क मनई, यहोसू क पूत गिदोन क तरवार बरे अहइ। एकर मतलब इ अहइ कि परमेस्सर मिद्यानी लोगन क सारी फउज क गिदोन क जरिये परास्त करवाई।"

15जब गिदोन सपन क बारे में सुनेस अउर ओकर अरथ समुझेस तउ उ परमेस्सर क बरे निहुरा। तब गिदोन इस्त्राएली लोगन क डेरा में लउट गवा। गिदोन लोगन क बाहेर बोलाएस, "तइयार होइ जा। यहोवा हम पचन्क मिद्यानी लोगनक हरावइ में मदद करी।" 16तब गिदोन तीन सौ मनइयन क तीन दलन में बाँटेस। गिदोन हर एक मनई क एक तुरही अउर एक खाली घड़ा दिहेस। हर एक घड़ा में एक तु बरत मसाल रही। 17तब गिदोन लोगन स कहेस, "मोका लखत रहा अउर जउन मई करउँ, उहइ करा। मोरे पाछे-पाछे दुस्मन क डेस क छोर तलक चला। जब मई डेस क छोर पइ पहुँच जाउँ, ठीक उहइ करा जउन मई करउँ। 18तू दुस्मन क डेरा क घेर ल्या। मई अउर मोर संग क सबहिं मनइयन आपन तुरही बजइहीं। जब हम लोग तुरही बजाउब तउ तू लोग भी आपन तुरही बजाया। तब एन सब्दन क संग घोसणा करा: 'यहोवा बरे, गिदोन क बरे।'"

19इ तरह गिदोन अउ ओकरे संग क एक सौ मनई दुस्मन क डेस क छोर पइ आएन। उ पचे दुस्मन क डेस में ओनके पहरेदारन क बदली क ठीक पाछे आएन। इ रात क पहरेदारी क आधी समइ रहा। गिदोन अउ ओकर मनइयन तुरहियन क बजाएन अउ आपन घड़न क फोड़ें। 20तब गिदोन क तीनहुँ दलन अपनी तुरहियन बजाएन अउर आपन गगरियन क फोड़ें। ओकर लोग आपन बाएँ हाथे में मसाल लिहेन अउ दाएँ हाथ में तुरहियन लिए भए रहेन। जब उ सबइ लोग तुरहियन बजउतेन तउ उदघोस करतेन, "यहोवा बरे तरवार, गिदोन बरे तरवार!"

21गिदोन क हर एक मनई डेरा क चारिहुँ कइँती अपने ठउरे पइ खड़ा रहा। मुला डेस क भीतर मिद्यानी लोग चिचियानेन अउ पराइ लागेन। 22जब गिदोन क तीन सौ मनइयन अपनी तुरहियन क बजाएन तउ यहोवा मिद्यानी लोगन क आपुस में एक दूसर क तरवारन स मरवाएस। दुस्मन क फउज उ बेतसित्ता नगर क भागी जउन सरेरा नगर कइँती अहइ। उ सबइ लोग उ आबेत महोला नगर क सीमा तलक परानेन जउन तब्बात नगर क निअरे अहइ।

23तब नप्ताली, आसेर अउ मनस्से क परिवारन क फउजियन क मिद्यानी लोगन क पाछा कइ बरे बुलावा गवा। 24गिदोन एप्रैम क सारे पहाड़ी पहुँटा में दूत पठएस। दूतन कहेन, "अगवा आवा अउर मिद्यानी लोगन पइ हमला करा। बेतबारा तलक नदी पइ अउर यरदन नदी पइ अधिकार करा।"

एह बरे उ पचे एप्रैम क परिवार स सबहिं मनइयन क बोलाएस। उ पचे बेतबारा तलक नदी पइ कब्जा किहन। 25एप्रैम क लोग मिद्यानी लोग क दुइ प्रमुखन क धरेन। एन दुइ प्रमुखन क नाउँ ओरेब अउ जेब रहा। एप्रैम क लोग ओरेब क औरैब क चट्टान नाउँ क ठउरे पइ मार डाएन। तब उ पचे जेब क जेब क दाखरस क कोल्हू नाउँ क ठउरे पइ मारेन। एप्रैम क लोग मिद्यानी लोगन क पाछा करब जारी रखेन। किन्तु पहिले उ पचे ओरेब अउ जेब क मूँडिन क काटेन अउ मूँडिन क गिदोन क लगे लइ गएन। गिदोन यरदन नदी क पार करइवाले घाट पइ ठहरा रहा।

8 एप्रैम क लोग गिदोन स रूठ रहेन। जब एप्रैम क लोग गिदोन स मिलेन, उ पचे गिदोन स पूछेन, “तू हम लोगन क संग अइसा बेउहार काहे किहा? जब तू मिदयानी लोगन क खिलाफ लड़इ गया तउ हम लोगन क काहे नाही बोलाया?” एप्रैम क लोगन गिदोन क संग किरोध में बात किहेन।

2किन्तु गिदोन एप्रैम क लोगन क जवाब दिहेस, “मई ओतनी अच्छी तरह जुद्ध नाही किहा जेतनी अच्छी तरह आप लोग किहना। इ सच अहइ कि तू एप्रैमी लोग फसल काटइ क पाछे जेतना अंगूर बिन तोड़े छोड़ेस रहा। उ सबइ मोर परिवार अबिएजेर क पूरी फसल स भी जियादा रहा। 3इहइ तरह इ बार भी तोहार फसल अच्छी पहिले स नीक अहइ। यहोवा तू लोगन क मिदयानी लोगन क राजकुमारन ओरेब अउ जेब क धरइ दिहेस। मई आपन कामयाबी क तू लोगन क जरिये कीन्ह गए कामन स कइसे तुलना कइ सकत हउँ?” जब एप्रैम क लोग गिदोन क जवाब सुनेन तउ उ पचे खामोस होइ गएन।

### गिदोन दुइ मिदयानी राजा लोगन क धरत ह

4तब गिदोन अउ ओकर तीन सौ मनई यरदन नदी पइ आएन अउर ओकरे दूसर कइँती गएन। मुला उ पचे थकेन अउर तउ भी दुस्मनन क पाछा करत रहेन। रहेन। 5गिदोन सुक्कोत नगर क लोगन स कहेस, “मोरे फउजियन क कछू खइया क द्या। मोर फउजी बहोत थके अहइँ। हम लोग अबहिँ तलक जेबह अउर सुल्मुन्ना क पाछा करित अही जउन मिदयानी लोगन क राजा अहइँ।”

6सुक्कोत नगर क प्रमुखन गिदोन स कहेस, “हम तोहरे फउजियन क कछू खइया क काहे देइ? तू जेबह अउर सल्मुन्ना क अबहिँ तलक धर्या नाहीं ह।”

7तब गिदोन कहेस, “काहेकि तू हमका खइया क देइ स इनकार किहेस ओकर बाद जब यहोवा जेबह अउर सल्मुन्ना क धरइ मैं मोका मदद करी। मई हिआँ लउटब अउर मरूभूमि क काँटन अउ कँटरी झाड़ियन क कोड़न स पीटब अउ तोहार चमड़ी उधेड़ब।”

8गिदोन सुक्कोत नगर क तजेस अउर पनूएल नगर क गवा। गिदोन जइसे सुक्कोत क लोगन स भोजन माँगे रहा वइसे ही पनूएल क लोगन स भी भोजन माँगेस। मुला पनूएल क लोग ओका उहइ जवाब दिहेन जउन सुक्कोत क लोग जवाब दिहे रहेन। 9एह बरे गिदोन पनूएल क लोगन स कहेस, “जब मई बिजय पाउब तब मई हिआँ आउब अउर तोहार इ मीनारे क गिराइ देब।”

10जेबह, सल्मुन्ना अउर ओनकर फउजन कर्कोर नगर में रहिन। इ फउज मैं 15,000 सिपाही रहेन। पहिले क फउज मैं सिरिफ इ सबइ सिपाही ही बचा रहेन। उ सक्तीसाली सेना क 1,20,000 बहादुर फउजी पहिले ही मारे जाइ चुका रहेन। 11गिदोन अउ ओकर फउजियन खानाबदोसन क मारग क अपनाएस। उ मारग नोबह अउर योगबहा नगरन क पूरब में अहइ। गिदोन कर्कोर नगर में आवा अउर उ दुस्मन पइ धावा बोलेस। दुस्मन क फउज क हमला क उम्मीद नाही रही। 12मिदयानी लोगन क राजा जेबह अउ सल्मुन्ना पराइ

गएन। मुला गिदोन ओनका पाछा किहेस अउर ओन राजा लोगन क धइ लिहेस। गिदोन अउ ओकर लोग दुस्मन फउज क हराइ दिहेस।

13तब योआस क पूत गिदोन जुद्ध स लउटा। गिदोन अउर ओकर फउजी हेरेस दर्रा नाउँ क दर्रे स होइके लउटेन। 14गिदोन सुक्कोत क एक जवान क धरेस। गिदोन जवान स कछू सवाल पूछेस। जवान कछू नाउँ गिदोन क बरे लिखेस। उ सुक्कोत क प्रमुखन अउर अग्रजन क नाउँ लिखेस। उ सतहत्तर मनइयन क नाउँ दिहेस।

15तब गिदोन सुक्कोत नगर में आवा। उ नगर क लोगन स कहेस, “जेबह अउर सल्मुन्ना हिआँ अहइँ। तू मोर मजाक इ कहिके उड़ाया, ‘हम पचे तोहरे थके फउजियन क खइया क काहे देइ। तू अबहिँ तलक जेबह अउर सल्मुन्ना क नाही धर्या ह।’” 16गिदोन सुक्कोत नगर क अग्रजन क लिहस अउर ओनका दण्ड देइ बरे रेगिस्तान क काँटन अउ कँटरी झाड़ियन स पीटेस। 17गिदोन पनूएल नगर क मीनार क भी गिराइ दिहेस। तब उ ओन लोगन क मार डाएस जउन उ नगर में रहत रहेन।

18अब गिदोन जेबह अउर सल्मुन्ना स कहेस, “तू ताबोर पर्वत पइ कछू मनइयन क मार्या। उ सबई मनई कउने तरह क रहेन?”

जेबह अउर सल्मुन्ना जवाब दिहेन, “उ सबइ मनई तोहरी तरह रहेन। ओनमाँ स हर एक राजकुमार क तरह रहा।”

19गिदोन कहेस, “उ सबइ मनई मोर भाई अउर मोर महतारी क पूत रहेन। यहोवा क जिन्गी क किरिया, जदि तू ओनका नाही मारया, तउ अब मई भी तू पचक्क नाही मारब्या।”

20तब गिदोन येतेर कइँती मुड़ा। येतेर गिदोन क सब स बड़का पूत रहा। गिदोन ओहसे कहेस, “एन राजा लोगन क मार डावा।” मुला येतेर एक ठु लड़का ही रहा अउर डेरात रहा। एह बरे उ आपन तरवार नाहीं निकारेस।

21तब जेबह अउर सल्मुन्ना गिदोन स कहेस, “अगवा बढ़ा अउर खुद हमका मारा। तू पुरूख अहा अउ इ काम करइ बरे काफी बलवान अहा।” एह बरे गिदोन उठा अउ जेबह अउर सल्मुन्ना क मार डावा। तब गिदोन चाँद क तरह बनी सज्जा क ओनके ऊँटन क गटइया स उतार दिहेस।

### गिदोन एपोद बनावत ह

22इस्त्राएल क लोग गिदोन स कहेस, “तू हम लोगन क मिदयानी लोगन स बचाएस। एह बरे हम लोगन पइ सासन करा। हम चाहित ह कि तू, तोहार पूत अउ तोहार पोतन हम लोगन पइ सासन करइँ।”

23किन्तु गिदोन इस्त्राएल क लोगन स कहेस, “यहोवा तोहार सासक होइ, न तउ मई तू लोगन पइ हुकूमत करब अउर न ही मोर पूत तोहरे ऊपर सासन करी।”

24इस्त्राएली क लोग जेनका हराएन, ओनमाँ कछू इस्त्राएली लोग रहेन। इस्त्राएली लोगन सोने क कान क बालियन पहिरत रहेन। एह बरे गिदोन इस्त्राएल क लोगन स कहेस, “मई चाहत हउँ कि तू मोरे बरे इ काम करा। मई तू पचन



में स हर एक स इ चाहत हउँ कि तू लोग जुद्ध में जउन पाया ओनमाँ स एक-एक कान क बाली हमका द्या।”

25एह बरे इस्त्राएल क लोग गिदोन स कहेस, “जउन तू चाहत ह ओका हम खुसी स देब।” एह बरे उ पचे भुईया पइ एक अंगरखा बिछाएन। हर एक मनई अंगरखा पइ एक ठु कान क बाली क लोकाएस। 26तब उ सबइ बालियन बटोरिके तउली गइन तउ उ सबइ लग भग तैतालीस पौड निकरिन। इ वजन क सम्बंध ओन चीजन क वजन स नाही अहइ जेनका इस्त्राएल क लोग गिदोन क दूसर भेटन क रूप में दिहे रहा। उ पचे चन्दा क आकार अउर आँसू क बूँद क आकार क नाई रतन भी ओका दिहन अउर उ पचे ओका बैंगनी रंग क चोगन भी दिहन। इ सबइ उ सब चिजियन रहिन जउन मिदयानी लोगन क राजा लोग पहिरे रहेन। उ पचे मिदयानी लोगन क राजा लोग ऊँटन क जंजीरियन भी ओका दिहेन।

27गिदोन उ सोना क उपयोग एपोद बनावइ क बरे किहेस। उ एपोद क आपन निवास क उ नगर में रखेस जेका ओप्रा कहा जात रहा। इस्त्राएल क सबहि लोग एपोद क पूजत रहेन। मुला इ तरह इस्त्राएल क लोग यहोवा बरे अबिस्सासी रहेन अउर एपोद क पूजा करत रहेन। उ एपोद, गिदोन अउ ओकरे परिवार बरे मुसीबत क कारण बन गएन।

### गिदोन क मउत

28इ तरह मिदयानी लोग इस्त्राएल क हुकूमत में रहइ बरे मजबूर कीन्ह गए रहेन। मिदयानी लोग अब अगवा कउनो कस्ट नाही दिहेन। इ तरह गिदोन क जिनगी काल में चालीस बरिस तलक पूरे देस में सान्ति रही।

29योआस क पूत यरूबाल (गिदोन) अपने घर गवा। 30गिदोन क आपन सत्तर पूत रहेन। एकर ऐतना जियादा पूत रहेन काहेकि ओकर अनेक मेहररून रहिन। 31गिदोन क एक ठु रखैल भी रही। जउन सकेम नगर में रहत रही। उ रखैल स भी ओका एक पूत रहा। उ उ पूत क नाउँ अबीमेलेक राखेस।

32इ तरह योआस क पूत गिदोन खूब बुढ़ाइ जाए पइ मरा। गिदोन उ कब्र में दफनावा गवा, जउन ओकर पिता योआस क रहा। उ कब्र ओप्रा नगर में बाटइ जहाँ अबीएजेरी लोग रहत ही। 33जइसेन ही गिदोन मरा तइसे ही इस्त्राएल क लोग फिन परमेस्सर बरे अबिस्सासी बन गए रहेन। उ सबइ बाल क अनुसरण करइ लागेन। उ पचे बाल बरीत क आपन देवता चुन लिहेस। 34इस्त्राएल क लोग यहोवा, आपन परमेस्सर क याद नाही करत रहेन, जदपि उ ओनका ओन सबहि दुस्मन स बचाएस जउन इस्त्राएल क लोगन क चारिहुँ कइँती रहत रहेन। 35इस्त्राएल क लोग यरूबाल क परिवार बरे कउनो दया नाही देखाएन, जदपि उ ओनके बरे बहोत स नीक करम किहे रहेन।

### अबीमेलेक राजा बना

9 अबीमेलेक यरूबाल क पूत रहा। अबीमेलेक आपन ओन मामा लोगन क लगे गवा जउन सकेम नगर में

रहत रहेन। उ आपन मामा लोगन अउ महतारी क परिवार स कहेस, 2“सकेम नगर क प्रमुख लोगन स इ सवाल पूछा: ‘यरूबाल का सत्तर पूतन स आप लोगन क सासित होब तोहार बरे नीक अहइ या कउनो एक मनई स सासित होब? याद राखा, मई तोहार सम्बंधी हउँ।”

3अबीमेलेक क मामा लोग सकेम क प्रमुख लोग स बात किहेन अउर ओनेस इ सवाल किहेन। सकेम क प्रमुख लोग अबीमेलेक क अनुसरण करइ क निहचइ किहेन। उ पचे कहेन, “आखिरकार उ हमार सम्बंधी अहइ।” 4एह बरे सकेम क प्रमुख लोग अबीमेलेक क सत्तर चाँदी क टुकन दिहेन। उ चाँदी बालबरीत देवता क मन्दिर क रही। अबीमेलेक चाँदी क उपयोग कछू मनइयन क काम पइ लगावइ बरे किहेन। इ सबई मनई लापरवाह अउ बेकार रहेन। उ सबइ अबीमेलेक क पाछे, जहाँ कहुँ उ गवा, चलत रहेन।

5अबीमेलेक ओप्रा नगर क गवा। ओप्रा ओकरे पिता क निवास स्थान रहा। उ नगर में अबीमेलेक आपन सत्तर भाइयन क कतल कइ दिहेस। उ सबइ सत्तर भाई अबीमेलेक क बाप यरूबाल क पूत रहेन। उ सबहि क एक पथरे पइ मारेस किन्तु यरूबाल क सब स नान्ह पूत अबीमेलेक स छुप गवा अउर पराइ निकरा। सब स नान्ह पूत क नाउँ योताम रहा।

6तब सकेम नगर क सबहि प्रमुख अउर बेतमिल्लो क महल क निअम्बर एक संग आएन। उ सबइ सबहि उ पाथर-खम्भा क निअरे क बड़का बृच्छ क लगे बटुर गएन जउन सकेम नगर में रहा अउर उ पचे अबीमेलेक क आपन राजा बनाएन।

### योताम क कथा

7योताम सुनेस कि सकेम क प्रमुख लोग अबीमेलेक क राजा बनाइ दिहेन ह। जब उ सुनेस तउ उ गवा अउर गरिज्जीम पर्वत क चोटी पइ खड़ा भवा। योताम लोगन क इ कथा चिचियाइके सुनाएस।

सकेम क लोग, मोर बात सुना अउ तब आप क बात परमेस्सर सुनी। 8एक दिन बृच्छ आपन ऊपर हुकूमत करइ बरे एक ठु राजा चुनइ क निर्णय किहन। बृच्छन जइतून क बृच्छ स कहेन, “तू हमरे ऊपर राजा बना।”

9मुला जइतून क बृच्छ कहेस, “मनई अउ देवता मोर बड़कई मोरे तेल बरे करत ही। का मई जाइके सिरिफ दूसर बृच्छन पइ हुकूमत करइ क बरे आपन तेल बनाउब बन्द कइ देउँ?”

10तब बृच्छन अंजीर क बृच्छ स कहेन, “आवा अउर हमार राजा बना।”

11मुला अंजीर क बृच्छ जवाब दिहस, “का मई सिरिफ जाइके दूसर बृच्छन पइ हुकूमत करइ बरे आपन मीठ अउ नीक फल पइदा करब बन्द कइ देब?”

12तब बृच्छन अंगूर क बेल स कहेन, “आवा अउ हमार राजा बना।”

13मुला अंगूर क बेल जवाब दिहस, “मोर दाखरस मनईयन अउ राजा लोगन क खुस करत ह। का मोका सिरिफ जाइके अउर बृच्छन पइ सासन करइ बरे आपन दाखरस पइदा करब बन्द कइ देइ चाही।”

14आखीर में सबइ बृच्छन कँटैरी झाड़ी स कहने, “आवा अउ हमार राजा बना।”

15किन्तु कँटैरी झाड़ी बृच्छन स कहेस, “जदि तू फुरइ मोका अपने ऊपर राजा बनावइ चाहत ह तउ आवा अउर मोर छाया में आपन सरण बनावा। जदि तू अइसा करइ नाहीं चाहत ह तउ इ कँटैरी झाड़ी स आगी निकरइ द्या, अउर उ आगी क लबानोन, क चीड़ क बृच्छन क भी जराइ देइ द्या।”

16“अब जदि आप अबीमेलिक क आपन राजा बनाइके ठीक करत हीं। अउर जदि आप ओका राजा बनाइके यरूबाल अउर ओकर परिवार बरे निआव संगत अहई, अउर आप यरूबाल क संग उहई बताव करत ह जेका उ हकदार अहइ, तउ इ ठीक अहइ! 17किन्तु तनिक सोचा कि मोर बाप आपन बरे का किहेस ह? मोर बाप आप लोगन बरे लड़ेन। उ पचे आपन जिन्नगी क उ समइ खतरा में डाएन जब उ पचे आपन लोगन क मिद्यानी लोगन स बचाएस। 18किन्तु अब आप लोग मोरे बाप क परिवार क खिलाफ होइ गवा अहई। आप लोग मोरे बाप क सत्तर पूतन क एक पाथर पइ मारेन ह। आप लोग अबीमेलिक क सकेम क राजा बनाएन ह। उ मोरे बाप क दासी क पूत अहइ। आप लोग अबीमेलिक क सिरिफ एह बरे राजा बनाएन ह कि उ आप क रिस्तेदार अहइ। 19एह बरे जदि आज आप लोग यरूबाल अउ ओकरे परिवार क बरे ठीक किहेस ह, तब अबीमेलिक क आपन राजा मानिके आप क खुस होइ चाही अउर ओका भी तोहार संग खुस होइ चाही। 20मुला जदि आप उचित नाही किहेन ह तउ, अबीमेलिक सकेम अउर मिल्लो सहर क सबइ प्रमुखन क नस्ट कइ डाएन। अउर सकेम नगर क अउर मिल्लो नगर क प्रमुखन भी अबीमेलिक क नस्ट कइ डाएन।”

21योताम इ सब कहइ क पाछे भाग खड़ा भवा। उ पराइके बेर नगर में पहुँचा। योताम उ नगर में रहत रहा, काहेकि उ आपन भाई अबीमेलिक स डेरत रहा।

### अबीमेलिक सकेम क खिलाफ जुद्ध करत ह

22अबीमेलिक इस्त्राएल क लोगन पइ तीन बरिस तलक हुकूमत किहस। 23-24अबीमेलिक यरूबाल क सत्तर पूतन क मार डाए रहा। उ पचे अबीमेलिक क भाई रहेन। सकेम नगर क प्रमुख लोग ओन भाईयन क मारइ में ओकर मदद किहे रहेन। एह बरे परमेस्सर अबीमेलिक अउ सकेम क प्रमुखन क बीच झगड़ा पइदा कराएस अउ सकेम क प्रमुख लोग अबीमेलिक क नोस्कान पहुँचावइ बरे योजना बनाएन। 25ओन लोग पहाड़ियन क चोटी पइ स जाइवालन पइ हमला करइ अउर ओनकर सब कछू लूटइ बरे डाकू लोगन क किराये पइ राखेस। अबीमेलिक ओन हमलन क बारे में पता लगाएस।

26गाल नाउँ क एक मनई अउर ओकर भाई सकेम नगर क आएन। गाल, एबेद नाउँ क मनई क पूत रहा। सकेम क प्रमुख लोग गाल पइ बिस्सास अउ ओकर अनुसरण करइ क निहचय किहेन।

27एक दिन सकेम क लोग आपन बागन में अंगूर तोड़इ गएन। लोग दाखरस बनावइ बरे अंगूरन क निचोरेन अउर तब उ पचे आपन देवता क मन्दिर पइ एक ठु दावत दिहन। उ पचे खाएन अउ दाखरस पिएन। तब उ पचे अबीमेलिक क अभिसाप दिहेन।

28तब एबेद क पूत गाल कहेस, “हम लोग सकेम क मनई अही। हम अबीमेलिक क आग्या काहे मानी? का उ यरूबाल क पूत नाहीं अहइ? का जबूल ओकर अधिकारी नाहीं अहइ? हम का अबीमेलिक क आग्या नाहीं मानइ चाही। हम का हमोर क लोगन क आग्या मानइ चाही। (हमोर सकेम क पिता रहा।) 29जदि आप मोका एन लोगन क सेनापति बनावत ही तउ मई अबीमेलिक स मुक्ति दियाइ देब। मई ओहसे कहब, ‘आपन फउज क तइयार करा अउर जुद्ध बरे आवा।’”

30जबूल सकेम नगर क राजपाल रहा। जबूल उ सब सुनेस जउन एबेद क पूत गाल कहेस अउर जबूल बहोत कोहाइ गवा। 31जबूल अबीमेलिक क लगे अरूमा नगर\* में दूतन क पठएस। सँदसा इ रहा:

एबेद क पूत गाल अउ एकर भाई सकेम नगर में आएन ह अउर तोहरे बरे कठिनाई पइदा करत अहई। गाल पूरे नगर क तोहरे खिलाफ भड़कावत अहइ। 32एह बरे अब तू पचन्क अउर तोहरे पचन्क लोगन क राति में उठइ चाही अउर नगर क बाहेर खेतन में छुपइ चाही। 33जब भिसारे सूरज निकरइ तउ नगर पइ हमला कइ द्या। गाल अउर ओकर मनईयन तोहार संग जुद्ध करइ बरे नगर क बाहेर आइ। जब उ सबइ लोग लड़इ बरे बाहेर आवई तउ तू पचे ओनकर जउन कइ सका, करा।

34एह बरे अबीमेलिक अउर सबहिं फउजी राति क उठेन अउर नगर क गएन। उ सबइ फउजी चार टुकड़िन में बँट गएन। उ पचे सकेम नगर क लगे छुप गएन। 35एबेद क पूत गाल बाहेर निकरिके सकेम नगर क फाटक क प्रवेस दुआर पइ रहा। जब गाल हुआँ खड़ा रहा उहइ समइ अबीमेलिक अउर ओकर फउजी आपन छुपइ क ठउरन स बाहेर आएन।

36गाल फउजियन क लखेस। गाल जबूल स कहेस, “धियान द्या, पर्वतन स लोग खाले उतरत अहई।”

किन्तु जबूल कहेस, “तू सिरिफ पर्वतन क परछाँइयन लखत अहा। परछाँइयन लोगन क तरह देखाइ देत अहई।”

**अरूमा नगर** या “छिपा भवा” या “तोरमा नगर में” जहाँ अबिमले राजा क रूप में रहेन। इ सकेम स लगभग आठ मील दक्खिन रहा।

37किन्तु गाल फिन कहेस, “लखा, प्रदेस क नाभि नाउँ क ठउरे स लोग बढ़त अहई, अउर जादूगार क बृच्छ क ओर स एक दुसर दल आवति अहइ।” 38तब जबूल ओहसे कहेस, “अब तोहार बड़की-बड़की बातन कहौं गइन, जउन तू कहत रहया, ‘अबीमेलेक कउन होत ह, जेकरी मातहत में हम रहेन?’ का उ सबइ उहइ लोग नाही अहई जेनकर तू मसखरी उड़ावत रहया? जा अउर ओनसे लड़ा।”

39एह बरे गाल सकेम क प्रमुखन क अबीमेलेक स जुद्ध करइ बरे लइ गवा। 40अबीमेलेक अउर ओकर फउजियन गाल अउ ओकरे मनइयन क पाछा किहेन। गाल क लोग सकेम नगर क फाटक कँइती स पाछे परानेन। गाल क बहोत स लोग फाटक पइ पहुँचइ स पहिले मार डावा गएन।

41तब अबीमेलेक अरूमा नगर क लउटि गवा। जबूल गाल अउर ओकरे भाइयन क सकेम नगर तजइ क मजबूर किहस।

42अगले दिन सकेम क लोग आपन खेतन में काम करइ क गएन। अबीमेलेक ओकरे बारे में पता लगाएस। 43एह बरे अबीमेलेक आपन फउजियन क तीन टुकड़ियन में बाँटिस। उ सकेम क लोगन पइ अचानक हमला करइ क योजना बनाएस। एह बरे उ आपन मनइयन क खेतन में छुपाएस। जब उ लोगन क नगर स बाहेर आवत लखेस तउ उ टूट पड़ा अउर ओन पइ हमला कइ दिहिस। 44अबीमेलेक अउ ओकर लोग सकेम नगर क फाटक क लगे दौड़िके आएन। दूसर दुइ टुकड़ियन खेत में लोगन क लगे दौड़िके गइन अउर ओनका मारि डाएन। 45अबीमेलेक अउ ओकर फउजी सकेम नगर क संग पूरे दिन लड़ेन। उ पचे सकेम नगर पइ कब्जा कइ लिहेन अउ उ नगर क लोगन क मार डाएन। तब अबीमेलेक उ नगर क बर्बाद किहस अउर उ ध्वंस पइ नोन फेंकवाइ दिहिस।

46कछू लोग सकेम क मीनार क लगे रहत रहेन। जब उ ठउरे क लोग सुनेन कि सकेम का संग का भवा ह तब उ पचे सब स जियादा सुरच्छित उ कमरा में बटुर गएन जउन एलबरीत देवता क मन्दिर रहा।

47अबीमेलेक सुनेस कि सकेम क मीनार क सबहि प्रमुख एक संग बटुर गएन ह। 48एह बरे अबीमेलेक अउ ओकर सबहि लोग सलमोन पर्वत प गएन। अबीमेलेक एक तु कुल्हाड़ी लिहस अउर उ कछू डारन क काटेस। उ ओन डारन क आपन काँधन पइ धरेस। तब उ आपन मनइयन स कहेस, “हाली करा, जउन मई किहेउँ ह, उहइ करा।” 49एह बरे ओन लोग डारन क काटेन अउर अबीमेलेक क पाछा किहेन। उ पचे डारन क ढेर एलबरीत देवता क मन्दिर क सब स जियादा सुरच्छित कमरा क लगे लगाएस। तब उ पचे डारन में आगी लगाइ दिहेन अउर कमरा में लोगन क बार डाएन। इ तरह लगभग सकेम क मीनार क निवासी एक हजार मेहरारू-मनसेधू मर गएन।

### अबीमेलेक का मउत

50तब अबीमेलेक अउर ओकर मनइयन साथी तेबेस नगर क गएन। उ पचे उ नगर पइ कब्जा कइ लिहेन। 51किन्तु

तेबेस नगर में एक मजबूत मीनार रही। उ नगर क सबहि मेहरारू-मनसेधू अउ उ नगर क प्रमुख उ मीनार क लगे पराइके पहुँचेन। जब नगर क लोग मीनार क भीतर घुस गएन तउ उ पचे अपने पाछे मीनार क दरवाजा बन्द कइ दिहेन अउ ताला लगाइ दिहेन। तब उ पचे मीनार क छते पइ चढ़ गएन। 52अबीमेलेक अउ ओकर साथी मीनार क लगे ओह पइ हमला करइ बरे पहुँचेन। अबीमेलेक मीनार क दरवाज तलक गवा। उ मीनार क आगी लगावइ चाहत रहा। 53जब अबीमेलेक दूआरे पइ खड़ा रहा, उहइ समइ एक मेहरारू एक तु चक्की क पाथर ओकरे मूँड़े पइ फेंकेस। चक्की क पाथर अबीमेलेक क मूँड़े क चूर-चूर कइ डाएस।

54अबीमेलेक हाली स आपन उ नौकर स कहेस जउन ओकर औजार लइ चलत रहा, “आपन तरवार निकारा अउर मोका मार डावा। मई चाहत हउँ कि तू मोका मार डावा जेहसे लोग इ न कहई कि, ‘एक तु मेहरारू अबीमेलेक क मार डाएस।’” एह बरे उ नौकर आपन तरवार उस के सरीर में घुसेइ दिहस अउर अबीमेलेक मर गवा। 55इस्त्राएल क लोग लखेन कि अबीमेलेक मर गवा। एह बरे उ पचे सबहि आपन घसन क लउटि गएन।

56इ तरह परमेस्सर अबीमेलेक क ओकर सबहि कीन्ह गवा पापन खातिर दण्ड दिहस। अबीमेलेक आपन सत्तर भाइयन क मारिके अपने बाप क खिलाफ पाप किहे रहा। 57परमेस्सर सकेम नगर क लोगन क भी ओनके जरिये कीन्ह गए पापन क दण्ड दिहस। इ तरह योताम जउन कहेस, फुरइ भवा। (योताम यरूबाल क सब स लहुरा पूत रहा। यरूबाल गिदोन रहा।)

### निआवाधीस तोला

10 अबीमेलेक क मरइ क पाछे इस्त्राएल क लोगन क बचावइ बरे परमेस्सर क जरिये दूसर निआवाधीस पठवा गवा। उ मनई क नाउँ तोला रहा। तोला पुआ नाउँ क मनई क पूत रहा। पुआ दोवो नाउँ क मनई क पूत रहा। तोला इस्साकार क परिवार समूह क रहा। तोला सामीर नगर में रहत रहा। सामीर नगर एप्रैम क पहाड़ी पहुँटा में रहा। 2तोला इस्त्राएल क लोगन बरे तेईस बरिस तलक निआवाधीस रहा। तब तोला मर गवा अउ सामीर नगर में दफनावा गवा।

### निआवाधीस याईर

3तोला क मरइ क पाछे, परमेस्सर क जरिये एक तु अउर निआवाधीस पठवा गवा। उ मनई क नाउँ याईर रहा। याईर गिलाद क पहुँटा में रहत रहा। याईर इस्त्राएल क लोगन क बरे बाईस बरिस तलक निआवाधीस रहा। 4याईर क तीस पूत रहेन। उ सबह तीस पूत तीस गधन पइ सवार होत रहेन। उ सबइ तीस पूत गिलाद छेत्र क तीस नगरन क इन्तजाम करत रहेन। उ सबइ नगर “याईर क सहर” आजु तलक कहा जात हीं। 5याईर मरा अउ कामोन नगर में दफनावा गवा।

### अम्मोनी लोग इस्राएल क लोगन क खिलाफ लड़त ही

6तब इस्राएल क लोग फुन उहइ किहेन जउन यहोवा क नज़र में बुरा रहा। उ सबइ बाल देवतन, अउर अस्तारोत, अउर अरामीय सीदोन, मोआब, अम्मोनियन अउर पलिस्तियन क देवतन क पूजा किहेस। इस्राएल क लोगन यहोवा क तजि दिहेन अउर ओकर उपासना अउर सेवा बन्द कइ दिहन।

7एह बरे यहोवा इस्राएल क लोगन पइ कोहान। यहोवा पलिस्तियन अउ अम्मोनियन क ओनका पराजित करइ दिहस। 8उहइ बरिस ओन लोग इस्राएल क ओन लोगन क बर्बाद किहेस जउन गिलाद पहुँटा में यरदन नदी क पूरब में रहत रहेन। इ उहइ भुइँया अहइ जहाँ अमोरियन लोग रह चुका रहेन। इस्राएल क उ सबइ लोग अट्ठारह बरिस तलक कस्ट भोगत रहेन। 9तब अम्मोनी लोग यरदन नदी क पार गएन। उ सबइ लोग यहूदा, बिन्यामीन अउ एप्रैम क लोगन क खिलाफ लड़इ गएन। अम्मोनी लोग इस्राएल क लोगन पइ अनेक बिपत्तियन ढाएन।

10एह बरे इस्राएल क लोग यहोवा क रोइके गोहराएन, “हम लोग, परमेस्सर, तोहरे खिलाफ पाप किहा ह। हम लोग अपने परमेस्सर क तजा अउ बाल क मूरतियन क पूजा कीन्ह।”

11यहोवा इस्राएल क लोगन क जवाब दिहस, “तू लोग मोका तबइ रोइके गोहराया जब मिस्री, एमोरी, अम्मोनी तथा पलिस्ती लोग तोहरे सबन पइ अत्याचार किहेन। मई तू पचन्क एन लोगन स रच्छा करवा। 12तू लोग तबइ चिचियाया जब सीदोन क लोग, अमालेकियन अउ मिद्यानियन तू पचन पइ प्रहार किहेन। मई ओन लोगन स भी तू पचन्क बचाएउँ ह। 13किन्तु तू पचे मोका तजा ह। तू पचे दूसर देवतन क उपासना किहा ह। एह बरे मई तू पचन्क फुन बचावइ स इन्कार करत हउँ। 14तू पचे ओन देवतन क पूजा करब पसन्द करत अहा। एह बरे ओनके निचके मदद खातिर गोहरावइ जा। जब तू पचे विपत्ति में पड़इ तउ उहइ समय ओन देवतन क तू लोगन क रच्छा करइ द्या।”

15किन्तु इस्राएल क लोग यहोवा स कहेन, “हम लोग पाप कीन्ह ह। तू हम पचन्क संग जउन चाहत ह, करा। किन्तु कृपा करके आजु हम लोगन क बचा।” 16तब इस्राएल क लोग अपने लगे क विदेसी देवतन क लोकाइ दिहा। उ पचे फुन स यहोवा क उपासना सुरू किहेन। एह बरे जब यहोवा ओनका कस्ट उठावत लखेस, तब उ ओनके बरे दुःखी भवा।

### यिप्तह प्रमुख चुना गवा

17अम्मोनी लोग जुद्ध करइ बरे एक संग बटुरेन, ओनकर डेरा गिलाद पहुँटा में रहा। इस्राएल क लोग एक संग बटुरेन, ओनकर डेरा मिसा नगर में रहा। 18गिलाद छेत्र में रहइवाले लोगन क प्रमुखन कहेन, “अम्मोन क लोगन पइ हमला करइ में जउन मनई हमार अगुआई करी, उहइ मनई, ओन सबहि लोगन क प्रमुख होई जाई जउन गिलाद पहुँटा में रहत ही।”

1 यिप्तह गिलाद क परिवार समूह स रहा। उ एक ताकतवर जोधा रहा। किन्तु यिप्तह एक ठु रण्डी क पूत रहा। ओकर बाप गिलाद नाउँ क मनई रहा। 2गिलाद क मेहरारू क अनेक पूत रहेन। जब उ पचे बड़े भएन तउ उ पचे यिप्तह क पसन्द नाहीं किहेन। ओन पूतन यिप्तह क आपन जनम क नगर क तजइ बरे मजबूर किहेन। उ पचे ओहसे कहेन, “तू हमरे बाप क दौलत में कछू नाहीं पाइ सकत अहा। तू दूसर मेहरारू क पूत अहा।” 3एह बरे यिप्तह आपन भाइयन क कारण दूर चला गवा। उ तोब प्रदेस में रहत रहा। तोब प्रदेस में कछू मुल्यहीन लोग यिप्तह क अनुसरण करइ लागेन।

4कछू समइ पाछे अम्मोनी लोग इस्राएल क लोगन स लड़ेन। 5अम्मोनी लोग इस्राएल क लोगन क खिलाफ लड़त रहेन। एह बरे गिलाद प्रदेस क अग्रज (प्रमुख) यिप्तह क लगे आएन। उ पचे चाहत रहेन कि यिप्तह तोब प्रदेस क तजि देइ अउर गिलाद प्रदेस में लउटि आवइ।

6प्रमुखन यिप्तह स कहेन, “आवा, हमार प्रमुख बना, जेहसे हम लोग अम्मोनियन क संग लड़ सकी।”

7मुला यिप्तह गिलाद प्रदेस क अग्रजन स कहेस, “का इ फुरइ नाहीं कि तू लोग मोहसे घिना करत अहा? तू लोग मोका आपन पिता क घर तजइ बरे मजबूर किहा। एह बरे जब तू पचे विपत्ति में हवा तउ मोरे लगे काहे आवत रह्या?”

8गिलाद प्रदेस क अग्रजन यिप्तह स कहेन, “इहइ कारण अहइ जेहसे हम अब तोहरे लगे आवा अही। कृपा कइके हम लोगन क संग आवा अउर अम्मोनी लोगन क खिलाफ लड़ा। तू ओन सबहि लोगन क सेनापति होब्या जउन गिलाद प्रदेस में रहत ही।”

9तब यिप्तह गिलाद प्रदेस क अग्रजन स कहेस, “जदि तू लोग चाहत अहा कि मई गिलाद क लउटउँ अउर अम्मोनी लोगन क खिलाफ लड़उँ तउ इ बहोत नीक बात अहइ। किन्तु जदि यहोवा मोका विजय पावइ में मदद करइ तउ मई तोहार पचन्क नवा प्रमुख बनब।”

10गिलाद प्रदेस क अग्रजन यिप्तह स कहेन, “हम लोग जउन बातन करत अही, यहोवा उ सबइ सुनत अहइ। हम लोग इ सबइ करइ क प्रतिग्या करत अही जउन तू पचे हमका करइ क कहत रह्या।”

11एह बरे यिप्तह गिलाद क अग्रजन क संग गवा। ओन लोग यिप्तह क आपन प्रमुख तथा आपन फउज क सेनापति बनाएन। यिप्तह मिसा नगर में यहोवा क समन्वा आपन सबहि बातन दोहराएस।

### यिप्तह अम्मोनी राजा क लगे सँदेसा पठवत ह

12यिप्तह अम्मोनी राजा क लगे दूतन पठएस। दूतन राजा क इ सँदेसा दिहस: “अम्मोनी अउ इस्राएल क लोगन क बीच समस्या का अहइ? तू हमरे भुइँया में लड़इ बरे काहे आवा अहा?”

13अम्मोनी लोगन क राजा यिप्तह क दूतन स कहेस, “हम लोग इस्राएल क लोगन स एह बरे लड़त अही काहेकि इस्राएल क लोग हमार भुइँया तब लड़ लिहिन जब

उ पचे मिस्त्र स आवा रहेन। उ पचे हमार भुईया अर्नोल नदी स यब्बोक नदी अउ हुवाँ स यरदन नदी तलक लइ लिहने अउ अब इस्राएल क लोगन स कहा कि उ पचे हमार भुईया हम का सात्तिपूर्वक वापस दइ देई।”

14एह बरे यिप्तह क दूतन इ सँदेसा यिप्तह क लगे वापस लइ गवा। तब यिप्तह अम्मोनी लोगन क राजा क लगे फुन दूत पठएस। 15उ पचे इ सँदेसा लइ गएन:

“यिप्तह इ कहत बाटइ। इस्राएल मोआब क लोगन या अम्मोन क लोगन क भुईया नाही लिहस। 16जब इस्राएल क लोग मिस्त्र देस स बाहेर आएन तउ उ पचे मरूभूमि स होइके जात्रा किहेन। उ पचे लाल सागर क गएन। तब उ पचे उ ठउर क गएन जेका कादेस कहा जात ह। 17इस्राएल क लोग एदोम क राजा क लगे दूत पठए रहेन। उ पचे कहे रहेन, “इस्राएल क लोगन क तोहार भुईया स गुजर जाइ दया।” किन्तु एदोम क राजा अपने भुईया स हम लोगन क नाही जाइ दिहस। हम लोग उहइ सँदेसा मोआब क राजा क लगे पठवा। मुला मोआब क राजा भी अपने भुईया स होइके हम लोगन क नाही जाइ दिहस। एह बरे इस्राएल क लोग कादेस में ठहरा रहेन।

18तब इस्राएल क लोग मरूभूमि स होइके गएन अउर एदोम प्रदेश तथा मोआब भुईया क छोरन क चारिहुँ कइँती चक्कर काटत रहेन। इस्राएल क लोग मोआब भुईया क पूरब क तरफ स जात्रा किहेन। उ पचे आपन डेरा अर्नोन नदी क दूसर कइँती डाएन। उ पचे मोआब क चउहद्दी क पार नाही किहेन। (अर्नोन नदी मोआब क भुईया क सीमा रही।)

19तब इस्राएल क लोग एमोरी लोगन क राजा सीहोन क लगे दूत पठएन। सीहोन हेस्बोन नगर क राजा रहा। दूत लोग सीहोन स माँग किहेन, “इस्राएल क लोगन क अपने भुईया स गुजर जाइ दया। हम लोग अपने भुईया में जाइ चाहित ह।” 20किन्तु एमोरी लोगन क राजा सीहोन इस्राएल क लोगन क आपन चउहद्दी पार नाही करइ दिहस। सीहोन आपन सबहिँ लोगन क बटोरिस अउर यहस पइ आपन डेरा डाएस। तब एमोरी लोग इस्राएल क लोगन क संग लड़ेन। 21किन्तु यहोवा इस्राएल क लोगन क परमेस्सर, इस्राएल क लोगन क मदद, सीहोन अउ ओकर फउज क हराइवइ मैं, किहस। एमोरी लोगन क सारी भुईया इस्राएल क लोगन क सम्पत्ति बन गइ। 22इ तरह इस्राएल क लोग एमोरी लोगन क सारा भुईया पाएस। इ अर्नोन नदी स यब्बोक नदी तलक फइला रहा। इ भुईया मरूभूमि स यरदन नदी तलक भी फइला रहा।

23इ यहोवा, इस्राएल क परमेस्सर रहा जउन एमोरी लोगन क आपन देस तजइ बरे बलपूर्वक मजबूर किहस अउर यहोवा उ प्रदेश इस्राएल क लोगन क दिहस। का तू पचे सोचत अहा कि तू पचे इस्राएल क लोगन स इ छोड़वाइ देव्या? 24निहचइ ही, तू पचे उ भुईया में रहि सकत ह जेका तोहार पचन्क देवता

कमोस तोहका पचन्क दिहस ह। एह बरे हम लोग उ भुईया में रहब, जेका यहोवा, हमार परमेस्सर हमका दिहस ह। 25का तू पचे सिप्पोर नाउँ क मनई क पूत बालाक स जियादा नीक अहा? उ मोआब क राजा रहा। का उ इस्राएल क लोगन स बहस किहस? का उ कबहुँ इस्राएल क लोगन स लड़ा? 26इस्राएल क लोग हेस्बोन अउ ओकर चारिहुँ ओर क सहरन में, अरोएर अउर ओकर चारिहुँ कइँती क सहर अउर अर्नोन नदी क किनारे क सबइ सहरन में तीन सौ बरिस तलक रहि चुकेन ह। तू एन नगरन क उहइ समय पर वापिस लेइ क जतन काहे नाही किहेन? 27मई तोहार खिलाफ कउनो पाप नाही किहेन ह। किन्तु तू मोर खिलाफ बहोत बुरा अहा। यहोवा क, जउन सच्चा निआवाधीस अहइ, निहचइ करइ दया कि इस्राएल क लोग ठीक राहे पइ अहई या अम्मोनी लोग।

28अम्मोनी लोगन क राजा यिप्तह इ सँदेसा क अनसुना किहस।

### यिप्तह क प्रतिग्या

29तब यहोवा क आतिमा यिप्तह पइ उतर आएस। यिप्तह गिलाद अउर मनस्से क भुईया स गुजरा। उ गिलाद भुईया में मिस्से नगर क गवा। गिलाद भुईया में मिस्से नगर क पार करत भवा यिप्तह, अम्मोनी लोगन क भुईया में गवा।

30यिप्तह यहोवा क बचन दिहस। उ कहेस, “जदि तू एमोरी लोगन क मोका हरावइ देत ह, 31तउ मई उ पहिली जीवित चीज क तोहका भेंट करव जउन मोर विजय स लउटइ क समइ मोरे घर स बाहेर आइ। मई एका यहोवा क होमबलि क रूप मैं देब।”

32तब यिप्तह अम्मोनी लोगन क भुईया में गवा। यिप्तह अम्मोनी लोगन स लड़ा। यहोवा अम्मोनी लोगन क हरावइ मैं ओकर मदद किहस। 33उ ओनका अरोएर नगर स मिन्नीत क छेत्र क छोर तलक हराएस। यिप्तह बीस नगरन पइ कब्जा किहस। उ अम्मोनी लोगन स आबेलकरामीम नगर तलक जुद्ध किहस। इ अम्मोनी लोगन बरे बड़की हार रही। अम्मोनी लोग इस्राएल क लोगन क जरिये हराइ दीन्ह गएन।

34यिप्तह मिसपा क लउटा अउर अपने घरे गवा। ओकर बिटिया आपन घरे स बाहेर ओहसे भेटइ बरे आएन। उ एक तम्बूरा बजावत रही अउर नाचत रही। उ ओकर एकलउटी बिटिया रही। यिप्तह ओसे बहोत पियार करत रहा। ओका लगे कउनो दूसर बिटिया या पूत नाही रहेन। 35जब यिप्तह लखेस कि पहिली जिबित चीज ओकर बिटिया ही रही, जउन ओकर घर स बाहेर आइ तब उ दुःख क परगट करइ बरे आपन ओढ़ना फारि डाएस अउर इ कहेस, “आह! मोर बिटिया तू मोका बर्बाद कइ दिहा। तू मोका बहोत दुःखी कइ दिहा। मई यहोवा क बचन दिहे रहेउँ, मई ओका वापिस नाही लइ सकत।”

36तब ओकर बिटिया यिप्तह स कहेस, “बाप, आप यहोवा स प्रतिग्या किहा ह। एह बरे उहइ करा जउन आप करइ क प्रतिग्या किहा ह। तू मोर संग उहइ करा जउन

प्रतिग्या तू यहोवा स किहा ह। आखीर में यहोवा आपका दुस्मनन, अम्मोनी लोगन क हरावड़ में तोहार मदद किहस ह।”

37तब ओकर बिटिया अपने बाप यिप्तह स कहेस, “किन्तु मोरे बरे पहिले एक तु काम करा। दुइ महीने तलक मोका अकेली रहइ द्या। मोका पहाड़न पड़जाइ द्या। जइसा कि मई बियाह नाही करब, नाही कउनो बच्चा क जनम देब। मोका अउर मोरी सहेलियन क एक संग जाइ अउर एक संग रोवइ क अनुमति द्या।”

38यिप्तह कहेस, “जा अउर वइसा ही करा,” यिप्तह ओका दुइ महीने तलक पठइ दिहस। यिप्तह क बिटिया अउर ओकर सहेलियन पहाड़न में रहिन। उ पचे ओकरे बरे रोएन अउर चिचियानेन, काहेकि उ न बियाह करी अउर न ही बच्चन पड़दा करी।

39दुइ महीने क पाछे यिप्तह क बिटिया आपन पिता क लगे लउटी। यिप्तह उहइ किहस जउन उ यहोवा स प्रतिग्या किहे रहा। यिप्तह क बिटिया एक कुवाँरी रही। ओकर कउनो क संग कउनो सरिरे क सम्बन्ध नाही रहा। एह बरे इस्त्राएल में इ रिवाज बन गवा। 40इस्त्राएल क मेहररूअन हर बरिस गिलाद क यिप्तह क बिटिया क याद करत रहिन। मेहररूअन यिप्तह क बिटिया बरे हर एक बरिस चार दिन तलक रोवत रहिन।

### यिप्तह अउर एप्रैम

**12** एप्रैम क परिवार समूह क लोग आपन फउजियन क बटोरेन। तब उ पचे नदी पार कइके सापोन नगर गएन। उ पचे यिप्तह स कहेन, “तू हम लोगन क अम्मोनी लोगन क बिरोध में जुद्ध करइ बरे काहे नाही बोलाया? हम लोग तोहका अउर तोहरे घरे क बार देब।”

2यिप्तह ओनका जवाब दिहस, “अम्मोनी लोग हम लोगन बरे अनेक समस्या पड़दा करत अहइँ। एह बरे मई अउर हमार लोग ओनके खिलाफ लड़ेन। मई तू लोगन क बोलाएँ, किन्तु तू लोग हम लोगन क मदद करइ नाही आया। 3मई लखेँ कि तू लोग मदद नाही करब्या। एह बरे मई आपन जिन्गी खतरा में डाएँ। मई अम्मोनी लोगन स लड़इ बरे नदी क पार गएँ। यहोवा ओनका हरावड़ में मोर मदद किहस। अब आजु तू मोरे खिलाफ लड़इ बरे काहे आया ह?”

4तब यिप्तह गिलाद क मनईयन क एक संग बोलाएँ। उ पचे एप्रैम क परिवार समूह क लोगन क संग लड़ेन। उ पचे एप्रैम क लोगन क संग एह बरे लड़ेन, काहेकि ओन लोग गिलाद क मनईयन क अपमान किहे रहेन। उ पचे कहे रहेन, “गिलाद क लोगो, तू लोग एप्रैम परिवार क बचे भाए लोगन क अलावा दूसर कछू नाही अहा। तू लोगन क लगे आपन भुइँया भी नाही अहइ। तू लोगन क एक तु हीसा एप्रैम में स अहइ तथा दूसर हीसा मनस्से में स अहइ।” गिलाद क लोग एप्रैम क लोगन क हराएँ।

5गिलाद क लोग यरदन नदी क घाटन क कब्जा कइ लिहिन। उ सबइ घाटन एप्रैम प्रदेस तलक लइ जात रहेन। जब कबहुँ भी एप्रैम स बचा भवा जउन कउनो भी नदी पड़

आवत, अउर कहत, “मोका नदी पार करइ द्या” तउ गिलाद क लोग ओहसे पूछतेन, “का तू एप्रैम में स अहा?” जदि उ “नाही” कहत तउ, 6उ पचे कहतेन, ‘सिब्बोलेत’ सब्द क उच्चारण करा।” एप्रैम क लोग उ सब्द क सुद्ध उच्चारण नाही कइ सकत रहेन। उ पचे ओका “सिब्बोलेत” सब्द उच्चारण करते रहेन। जदि एप्रैम में स बचा मनई “सिब्बोलेत” क उच्चारण करत तउ गिलाद क लोग ओका घाटे पड़ ही मार देत रहेन। इ तरह उ समइ एप्रैम में स 42,000 मनई मारा ग रहेन।

7यिप्तह इस्त्राएल क लोगन क निआवाधीस छः बरिस तलक रहा। तब गिलाद क निवासी यिप्तह मर गवा। ओका गिलाद में ओकर आपन नगर में दफनावा गवा।

### निआवाधीस इबसान

8यिप्तह क मरइ क पाछे इस्त्राएल क लोगन क निआवाधीस इबसान नाँउ क मनई भवा। इबसान बेतलेहेम नगर क निवासी रहा। 9इबसान क तीस पूत अउ तीस बिटियन रहिन। उ अइसी तीस मेहररूअन आपन पूतन क संग बियाही बरे लिआवा, जउन ओकर रिस्तेदार नाही रहिन। इबसान इस्त्राएल क लोगन क निआवाधीस सात बरिस तलक रहा। 10तब इबसान मर गवा। उ बेतलेहेम नगर में दफनावा गवा।

### निआवाधीस एलोन

11इबसान क मरइ क पाछे इस्त्राएल क लोगन क निआवाधीस एलोन नाँउ क मनई भवा। एलोन जबूलून क परिवार समूह स रहा। उ दस बरस तक इस्त्राएल क लोगन क निआवाधीस रहा। 12तब जबूलून क परिवार समूह क मनई एलोन मर गवा। उ जबूलून क भुइँया में अय्यालोन नगर में दफनावा गवा।

### निआवाधीस अब्दोन

13एलोन क मरइ क पाछे इस्त्राएल क लोगन क निआवाधीस अब्दोन नाँउ क मनई भवा। अब्दोन हिल्लेल नाँउ क मनई क पूत रहा। अब्दोन पिरातोन नगर क निवासी रहा। 14अब्दोन क चालीस पूत अउ तीस पोता रहेन। उ सबइ सतर गधन पड़ सवार होत रहेन। अब्दोन इस्त्राएल क लोगन क निआवाधीस आठ बरिस तलक रहा। 15तब हिल्लेल क पूत अब्दोन मर गवा। उ पिरातोन नगर में दफनावा गवा। पिरातोन एप्रैम भुइँया में अहइ। इ उ पहाड़ी देस अहइ जहाँ अमालेकी लोग रहत रहेन।

### सिमसोन क जनम

**13** फुन इस्त्राएल क लोग उहइ कार्य किहेन जुन यहोवा क नज़र में बुरा रहा। एह बरे यहोवा पलिस्ती लोगन क ओन पड़ चालीस बरिस तलक सासन करइ दिहस।

2एक मनई सोरा नगर क निवासी रहा। उ मनई क नाँउ मानोह रहा। उ दान क परिवार समूह स रहा। मनोह क एक तु मेहरारू रही। मुला उ कउनो संतान पड़दा नाही कइ

सकत रही। 3यहोवा क सरगदूत मानोह क मेहरारू क समन्वा परगट भवा अउर उ कहेस, “तू सन्तान उत्पन्न नाही कइ सकत अहा। मुला तू गर्भ धारण करबिउ अउर तोहका एक ठु पूत होइ। 4तू दाखरस या कउनो नसीली पिअइ क चीज जिन पिआ। कउनो भी असुद्ध भोजन\* क न खा। 5काहेकि तू फुरइ गर्भ धारण करबिउ अउर तोहका एक ठु पूत होइ। परमेस्सर बरे एक खास रूप में समर्पित होइ। उ एक नाज़ीर\* होइ। एह बरे तोहका ओकरे बाल कबहुँ नाही काटइ चाही। उ पइदा होइ स पहिले परमेस्सर क मनई होइ। उ इस्राएल क लोगन क पलिस्ती लोगन क सकती स अजाद कराई।”

6तब उ मेहरारू आपन भतार क लगे गइ अउर जउन कछू भवा रहा, बताएस। उ कहेस, “परमेस्सर क निअरे स एक ठु मनई मोरे लगे आवा। उ परमेस्सर क एक सरगदूत क तरह मालूम होत रहा। उ बहोतइ अद्भुत देखाइ पड़त रहा अउर मई डेराइ गइ रही। मई ओहसे इ नाही पूछेउँ कि, तू कहाँ स आवा अहा। उ मोका आपन नाउँ नाही बताएस। 7मुला उ मोसे कहेस, ‘तू गर्भ धारण करे अहा अउर तोहका एक ठु पूत होइ। कउनो दाखरस या नसीली चीज पिअइ क जिन पिआ। कउनो असुद्ध खइया जिन खा, काहेकि उ गदेल बिसेस रूप स परमेस्सर क समर्पित होइ। उ लइका जनम क पहिले स लइके मरइ क दिन तलक परमेस्सर क नाज़ीरी होइ।”

8तब मानोह यहोवा स पराथना किहेस, “हे यहोवा, मई तोहसे पराथना करत हउँ कि तू परमेस्सर क मनई क हम लोगन क लगे फिन भेजा। हम चाहित ह कि उ हमका सिखावइ कि हम लोगन क हिअँ जउन बहोत हाली ही जनम लेइवाले गदेलन अहइ ओकरे संग हमका का करइ चाही?”

9परमेस्सर मानोह क पराथना सुनेस। परमेस्सर क सरगदूत फुन उ मेहरारू क लगे, तब आता जब व खेते में बइठी रही। किन्तु ओकर भतार मानोह ओकरे संग नाही रहा। 10एह बरे उ मेहरारू आपन भतारे स इ कहइ खातिर दउड़ी, “उ मनई लउटा ह। जउन मनई दूसर दिना मोरे लगे आवा रहा, उ हिअँ अहइ।”

11मानोह उठा अउर आपन मेहरारू क पाछे चला। जब उ उ मनई क लगे पहुँचा तउ उ कहेस, “का तू उहइ मनई अहा जउन मोर मेहरारू स बातन किहे रही।”

सरगदूत कहेस, “मई ही अहउँ।”

12एह बरे मानोह कहेस, “मोका आसा अहइ कि जउन तू कहत अहा उ होइ। इ बतावा कि उ लइका कैसी जिन्गी बिताइ? उ का करब?”

13यहोवा क सरगदूत मानोह स कहेस, “तोहार मेहरारू क उ सब आदेस क पालन करइ चाही, जउन मई ओका करइ क कहेउँ ह। 14ओका अंगूर क बेल पइ उगी कउनो

**असुद्ध भोजन** “जउन स्वीकार नाही कीन्ह जा सके” सुद्ध नाही अउर परमेस्सर क आराधना बरे प्रयोग नाही कीन्ह जाइ सकी। लखा लेवी. 11-15 पराना नेम सुद्ध असुद्ध क बारे में जानइ बरे।

**नाज़ीर** एक मनई जउन परमेस्सर क संग बिसेस वाचा करत ह। नाज़ीर क वाचा क विधि बरे लखा गन्ती 6:1-21

चीज नाही खाइ चाही। ओका दाखरस या कउनो नसीली पिअइ क चीज नाही पिअइ चाही। ओका कउनो ऐसे खइया क नाही खाइ चाही जउन असुद्ध होइ। ओका उ सब करइ चाही, जउन करइ क आदेस मई दिहे अहउँ।”

15तब मानोह यहोवा क सरगदूत स कहेस, “हम इ चाहित ह कि तू तनिक देर अउर रूका। हम लोग तोहरे भोजन बरे नया बोकरा पकाउब चाहत ही।”

16तब यहोवा क सरगदूत मानोह स कहेस, “जदि तू हिअँ स जाइ स मोका रोकब्या तउ भी मई तोहार खइया नाही खाउब। किन्तु जदि तू कछू तइयार करइ चाहत अहा तउ यहोवा क होमबलि द्या। मानोह नाही समुझेस कि उ मनई फुरइ यहोवा क सरगदूत रहा।

17तब मानोह यहोवा क सरगदूत स कहेस, “तोहार नाउँ का अहइ? हम लोग एह बरे जानइ चाहित ह कि हम तोहार सम्मान तब करि सकब, जब तोहार वचन सच्च होब्या।”

18यहोवा क सरगदूत मानोह स कहेस, “तू मोर नाउँ काहे पूछत अहा? इ अद्भुत अहइ।”\*

19तब मानोह चट्टाने पइ एक ठु बोकरा क बलि दिहस। उ यहोवा क कछू अन्न भी भेंट क रूप में दिहस। अउर जब मनोह अउर ओकर पत्नी देखत रहेन तउ उ एक अद्भुत काम किहस। 20जइसी आगी क लपटन वेदी स अकास तलक उठिन, वइसे ही यहोवा क सरगदूत आगी में स आकास क चला गवा। जब मानोह अउ ओकर मेहरारू इ लखेन तउ उ पचे धरती पइ भहराइ गएन। उ पचे अपने मूँडे क धरती स लगाएन। 21मानोह अन्त में समुझेस कि उ मनई फुरइ यहोवा क दूत रहा। यहोवा क सरगदूत फुन मानोह अउर ओकरे पत्नी क समन्वा परगट नाही भवा। 22मानोह कहेस, “हम लोग परमेस्सर क लखे अही! निहचइ ही इ कारण स हम लोग मरबा।”

23लेकिन ओकर मेहरारू ओहसे कहेस, “यहोवा हम लोगन क मारइ नाही चाहत। जदि यहोवा हम लोगन क मारइ चाहत तउ उ हम लोगन क होमबलि अउर अन्नबलि अंगीकार न करत। उ हम लोगन क उ सब न देखाए होत, अउर हम लोगन स इ सबइ बातन न कहे होत।”

24एह बरे मेहरारू क एक ठु पूत भवा। उ ओकर नाउँ सिमसोन धरेस। सिमसोन बड़ा भवा अउर यहोवा ओका आसीर्वाद दिहेस। 25यहोवा क अतिमा सिमसोन क हिलाना डोलाना सुरू किहेस, जब उ महनेदान नगर में रहत रहा। उ नगर सोरा अउ एसताओल नगर क बीच अहइ।

### सिमसोन क बियाह

**14** सिमसोन तिम्ना नगर क गवा। उ हुवाँ एक ठु पलिस्ती जुवती क लखेस। 2जब उ वापस लउटा तउ उ आपन महतारी बाप स कहेस, “मई एक पलिस्ती लइकी क तिम्ना में लखेउँ ह। मई चाहत हउँ तू ओका मोरे बरे लिआवा। मई ओहसे बियाह करइ चाहत हउँ।”

**इ अद्भुत अहइ** इ सब्द क अरथ अहइ “अद्भुत”, “आस्चर्यजनक” इ एक नाउँ क जइसा अहइ, अरथात “आस्चर्यजनक सलाहकार” लखा यसायाह 9:6

3ओकर बाप अउ महतारी जवाब दिहेन, “निहचय ही हमार सम्बंधियन में या हमार लोगन में स एक लड़की अहइ जेहसे तू बियाह कइ सकत ह। का तू पलिस्ती लोगन में स एक ठु लड़की स बियाह करब्या? पलिस्ती लोगन में स कउनो क भी खतना नाहीं भएस ह।”

किन्तु सिमसोन कहेस, “मोरे खातिर उहइ लड़की लिआवा। मई ओका ही चाहत हउँ।” 4(सिमसोन क महतारी-बाप नाहीं समझत रहेन कि यहोवा अइसा ही होइ देइ चाहत ह। यहोवा एक पलिस्ती लोगन क खिलाफ जाई बरे कारण खोजइ चाहत रहा। उ समइ पलिस्ती लोग इस्त्राएल क लोगन पइ हुकूमत करत रहेन।)

5सिमसोन आपन महतारी-बाप क संग तिमना नगर क गवा। उ पचे नगर क निचके अंगूर क खेतन तलक पहुँचन। उ ठउरे पइ एक ठु जवान सेर गरज उठा अउर सिमसोन पइ कूदा। 6यहोवा क आतिमा क बड़की ताकत स सिमसोन पइ उतरी। उ अपने खाली हाथन स सेर क चीर डाएस। इ ओकरे बरे सहल मालूम भवा। इ वइसा सहल मालूम भवा जइसा एक ठु बोकरी क बच्चा क चीरब। किन्तु सिमसोन आपन महतारी-बाप क नाहीं बताएस कि उ का किहेस ह।

7एह बरे सिमसोन नगर में गवा अउ पलिस्ती लड़की स बातन किहेस। उ ओका खुस किहेस। 8कईउ दिना पाछे सिमसोन उ पलिस्ती लड़की क संग बियाह करइ वापस आवा। आवत समइ रास्ता में मरा सेर क लखइ गवा। उ मरे सेर क तने में मधुमक्खिन क एक ठु छत्ता पाएस। उ सबइ कछू सहद तइयार कइ लिहे रहिन। 9सिमसोन अपने हाथे स कछू सहद निकारेस। उ सहद चाटत भवा रास्ते पइ चल पड़ा। जब उ आपन महतारी-बाप क लगे आवा तउ उ ओनका कछू सहद दिहस। उ पचे भी ओका खाएन किन्तु सिमसोन अपने महतारी-बाप क नाहीं बताएस कि उ मरे सेर क तने स सहद लिहस ह।

10सिमसोन क बाप पलिस्ती लड़की क लखइ गवा। दूल्हे बरे इ रिवाज रहा कि ओका एक दावत देब होत ह। एह बरे सिमसोन दावत दिहेस। 11जब लोग लखेन कि उ एक ठु दावत देत अहइ तउ उ पचे ओकरे संग तीस मनई पठाएन।

12तब सिमसोन ओन तीस मनइयन स कहेस, “मई तू पचन्क एक ठु पहेली सुनावइ चाहत हउँ। मोर दावत सात दिन तलक चली। उ समइ ही जवाब हेरइ क कोसिस कर्या। जदि तू पचे पहेली क जवाब उ समइ क अन्दर दइ सक्या तउ मई तू पचन्क तीस ठु सूती कमीजन, तीस ओढ़नन क जोड़ा देब। 13किन्तु जदि तू पचे एकर जवाब न निकारि सक्या तउ तू पचन्क तीस सूती कमीजन अउ तीस जोड़ी ओढ़नन मोका देइ क होइ।” एह बरे तीस मनइयन कहेन, “पहिले आपन पहेली सुनावा, हम एका सुनइ चाहित ह।”

14सिमसोन इ पहेली सुनाएस:

खाइवालन में स कछू खाइ क चीज। अउर ताकतवर में स कछू मधुर चीज निकरेस।

एह बरे तीस मनइयन तीन दिना तलक एकर जवाब हेरइ क जतन किहेन, किन्तु उ पचे कउनो जवाब न पाइ सकेन।

15चउथे दिन\* उ सबइ मनई सिमसोन क मेहरारू क निचके आएन। उ पचे कहेन, “का तू हम पचन्क गरीब बनावइ खातिर हिआँ हम क बोलाया ह? तू अपने भतार क, हम लोगन क पहेली क जवाब देइ बरे फुसलावा। जदि तू हम लोगन बरे जवाब नाहीं निकारतित तउ हम लोग तोहका अउर तोहरे बाप क घरे में रहइवालन सबहिँ लोगन क बार देब।”

16एह बरे सिमसोन क मेहरारू ओकरे लगे गइ अउर रोवइ-चिचियाइ लाग। उ कहेस, “तू मोहसे सिर्फ घिना करत अहा। तू मोहसे सच्चा पियरेम नाहीं करत अहा। तू मोरे लोगन क एक ठु पहेली सुनाया ह अउर तू ओकर जवाब मोका नाहीं बताइ सकत्या।”

सिमसोन जवाब दिहेस, “किन्तु मैं आपन माता-पिता क भी नहीं बताएस, तउ फिर मोका इ तोहका काहे बताइ चाही।”

17सिमसोन क मेहरारू दावत क आखिर सात दिना तलक रोवत चिचियात रही। एह बरे आखिर मैं उ सतएँ दिन पहेली क जवाब ओका दिहस। उ बताइ दिहस काहेकि उ ओका बराबर परेसान करत रही। तब उ आपन लोगन क बीच गइ अउर ओनका पहेली क जवाब दइ दिहस।

18इ तरह दावत वाले सतएँ दिन सूरज बूड़इ स पहिले पलिस्ती लोगन क लगे पहेली क जवाब रहा। उ पचे सिमसोन क लगे आएन अउर उ पचे कहेन,

“सहद स मीठ का बाटइ? सेर स ताकतवर कउन अहइ?”

तब सिमसोन ओनसे कहेस,

“जदि तू पचे मोरी गइया क न जोते होत्या तउ, मोरी पहेली क जवाब नाहीं निकार पाए होत्या।”

19सिमसोन बहोतइ कोहाइ गवा। यहोवा क आतिमा ओकरे ऊपर बड़की ताकत क संग आइ। उ आस्कलोन नगर क गवा। उ नगर में उ ओनकर तीस पलिस्तीय मनइयन क मारेस। तब उ ल्हासन स सारे ओढ़नन अउ सारी दौलत लिहस। उ ओन ओढ़नन क लइके लउटा अउर ओन मनइयन क दिहस, जउन पहेली क जवाब दिहे रहेन। तब उ आपन बाप क घर लउटा। 20सिमसोन आपन मेहरारू क नाहीं लइ गवा। बियाह समारोह में हाजिर सब स नीक मनई ओका रख लिहस।

### सिमसोन पलिस्तीयन बरे बिपत्ति पइदा करत ह

**15** गोहूँ क फसल तइयार होइ क समइ सिमसोन अपनी मेहरारू स भेंटइ गवा। उ आपन संग उपहार में एक ठु बोकरी क बच्चा लइ गवा। उ कहेस, “मई अपनी मेहरारू क कमरा में जात अहउँ।”

किन्तु ओकर बाप ओका अन्दर नाहीं जाइ देइ चाहत रहा। 2ओकर बाप सिमसोन स कहेस, “मई सोचेउँ कि तू

**चउथे दिन** इ पराचीन ग्रीक रूपान्तरन स लीन्ह गवा ह। हिब्रू में इ “सात दिन” रहा।



फुरइ अपनी मेहरारू स घिना करत अहा एह बरे बियाह में सामिल सब स जियादा नीक मनई क मई ओका मेहरारू क रूप में दइ दिहेउँ। ओकर नान्ह बहिन ओहसे जियादा सुन्नर अहइ। ओकर छोटकी बहिन क लइ ल्या।”

3किन्तु सिमसोन ओहसे कहेस, “तू पलिस्ती लोगन पइ प्रहार करइ क मोरे लगे अब उचित कारण बाटइ। अब कउनो मोका दोखी नाही बताई।”

4सिमसोन बाहेर निकारेस अउर तीन सौ लोखरियन क धरेस। उ दुइ लोखरियन क एक दाई एक संग लिहस अउर ओनकर जोड़ा बनावइ बरे ओनकर पूँछ एक संग बाँध दिहस। तब उ लोखरियन क हर जोड़न क पूँछन क बीच एक-एक मसाल बाँधिस। 5सिमसोन लोखरियन क पूँछ क बीच क मसालन क बारेस। तब उ पलिस्ती लोगन क खेतन में लोखरियन क छोड़ दिहस। इ तरह उ ओनकर खड़ी फसलन अउर ओनकर अनाज क ढेरन क बार दिहस। उ ओनकर अंगूरे क खेतन अउर जइतून क बृच्छन क भी बार डाएस।

6पलिस्ती लोग पूछेन, “इ कउन किहस?”

कउनो ओनसे कहेस, “तिम्ना क मनई क दामाद सिमसोन इ किहस ह। उ इ एह बरे किहस कि ओकर ससुर सिमसोन क मेहरारू क ओकरे बियाह क समइ हाजिर सब स नीक मनई क दइ दिहस।” एह बरे पलिस्ती सिमसोन क मेहरारू अउ ओकरे ससुर क बारिके मार डाएन।

7तब सिमसोन पलिस्ती क लोगन स कहेस, “तू लोग इ बुरा किहा। एह बरे मई तू लोगन पइ प्रहार करब। मई तब तलक नाही रूकब जब तक तू लोगन स मई आपन बदला नाही लेइ लउब!”

8तब सिमसोन पलिस्ती लोगन पइ हमला किहस। उ ओनमाँ स बहोतन क मार डाएस। तब उ गवा अउर एक ठु गुफा में ठहरा। उ गुफा ‘एताम क चट्टान’ नाँउ क ठउरे पइ रही।

9तब पलिस्ती लोग यहूदा क भुईया में गएन। उ पचे लही नाउँ क ठउरे पाइ रूकेन। ओनकर फउज हुवाँ डेरा डाएस अउर जुद्ध बरे तइयारी किहस। 10यहूदा परिवार समूह क लोग ओनसे पूछेस, “तू पलिस्तीयो, हम लोगन स जुद्ध करइ काहे आया ह?”

उ पचे जवाब दिहन, “हम लोग सिमसोन क धरइ आए अही। हम लोग ओका आपन बन्दी बनावइ चाहित ह। हम लोग ओका ओकर बदला चुकावइ चाहित ह जउन उ हमरे लोगन क संग किहस ह।”

11तब यहूदा परिवार समूह क तीन हजार मनई सिमसोन क लगे गएन। उ पचे एताम क चट्टान क लगे क गुफा में गएन। उ पचे ओहसे कहेन, “तू हम लोगन बरे का किहस ह? का तोहका पता नाही अहइ कि पलिस्ती लोग, हम पइ सासन करत हीं?”

सिमसोन जवाब दिहस, “उ पचे मोरे संग जउन किहेन ओकर मई बदला दिहेउँ।”

12तब उ पचे सिमसोन स कहेन, “हम तोहका बन्दी बनावइ आए अही। हम लोग तोहका पलिस्ती लोगन क दइ देब।”

सिमसोन यहूदा क लोगन स कहेस, “प्रतिग्या करा कि तू लोग खुद मोह पइ प्रहार नाही करब्बा।”

13तब यहूदा क मनइयन कहेन, “हम अंगीकार करित ह। हम लोग सिरिफ तोहका बाँधब अउर तोहका पलिस्ती लोगन क दइ देब। हम प्रतिग्या करित ह कि हम तोहका जान स न मारब।” एह बरे उ पचे सिमसोन क दुइ नवी रस्सियन स बाँधा। उ पचे ओका चट्टान क गुफा स बाहर लइ गएन।

14जब सिमसोन लही नाउँ क ठउरे पई पहाँचा तउ पलिस्ती लोग ओहसे मिलइ आएन। उ पचे खुसी स सोर मचावत रहेन। तब यहोवा क आतिमा बड़की ताकत स सिमसोन में आएस। ओकरे ऊपरे क लसुरियन अइसी कमजोर होइ गइन अइसे माना उ सबइ जल गइ होई। वासुरियन ओकर हाथन स अइसे गिरिन माना उ सबइ गल गइ होई। 15सिमसोन क उ गद्धा क जबड़ा क हाइ मिला जउन मरा पड़ा रहा। उ जबड़ा क हाइ लिहस अउर ओहसे एक हजार पलिस्ती लोगन क मार डाएस। 16तब सिमसोन कहेस,

एक ठु गद्धा क जबड़ा क हाइ, स मई एक हजार मनइयन क मार दिहेउँ ह। एक ठु गद्धा क जबड़ा क हाइ स मई ओनकर ल्हासन क एक ठु ऊँचा ढेर लगाइ दिहेउँ ह।

17जब सिमसोन बोलब खतम किहेस तब उ जबड़ा क हाइ क लोकाइ दिहस। एह बरे उ ठउरे क नाउँ रामत लही पड़ा। 18सिमसोन क बहोत पिआस लाग। एह बरे उ यहोवा क गोहराएस। उ कहेस, “मई तोहार सेवक हउँ। तू मोका इ बहोत बड़की विजय दिहा ह। का अब मोका पिआस स मरब पड़ी? का मोका ओनसे धरा जाइ क होइ जेनकर खतना नाही भवा ह?”

19लही में धरती में एक ठु छेद रहा परमेस्सर एका खोलेस अउर पानी बाहेर आइ गवा। सिमसोन पानी पिएस अउर सुसताएस अउर उसने फिर से सक्ति अनुभव किहेस। एह बरे उ पानी क सोते क नाउँ एनहक्कोरे रखेस। इ सब तलक आजु भी लही नगर में बाटइ। 20इ तरह सिमसोन इस्त्राएल क लोगन क निआवाधीस बीस बरिस तलक रहा। उ पलिस्ती लोगन क समइ में रहा।

### सिमसोन अज्जा नगर क जात ह

**16** एक दिन सिमसोन अज्जा नगर क गवा। उ हुवाँ एक ठु रण्डी क लखेस। उ ओकरे संग रात बितावइ बरे भीतर गवा। 2कउनो अज्जा क लोगन स कहेस, “सिमसोन हिआँ आवा ह।” उ पचे ओका जान स मार डावा चाहत रहेन। एह बरे उ पचे नगर क घेर लिहन। उ पचे छुपा रहेन अउर उ पचे नगर दुआर क लगे छुप गएन अउर सारी रात सिमसोन क प्रतीच्छा किहन। उ पचे पूरी रात एकदम चुप रहेन। उ पचे आपुस में कहेन, “जब भिंसार होइ, हम लोग सिमसोन क मार डाउब।”

3किन्तु सिमसोन रण्डी क संग आधी राति तलक ही रहा। सिमसोन आधी राति में उठा अउर नगर क फाटक क

कैवाड़न क धड़ लिहस अउर उ ओनका खीचिके देवार स अलग कइ दिहस। सिमसोन कैवाड़न, दुइ खड़ी चउखटन अउर अबेड़न क जउन कैवाड़ क बन्द करत रहिन, धड़के अलग उखाड़ी लिहस। तब सिमसोन ओनका काँधन पइ लिहस अउर उ पहाड़ी क चोटी पइ लइ गवा जउन हेब्रोन नगर क निचके बाटइ।

### सिमसोन अउ दलीला

4एकरे बाद सिमसोन दलीला नाउँ क मेहरारू स पिरेम करइ लाग। उ सोरेक घाटी क रही।

5पलिस्ती लोगन क सासक दलीला क लगे गएन। उ पचे कहेन, “हम जानइ चाहित ह कि सिमसोन ओतना जियादा ताकतवर कइसे अहइ? ओका फुसलावा अउर आपन गुप्त बात बताइ देइ। तब हम लोग जान जाब कि ओका कइसे बाँधी। अउर ओह पइ कइसे नियंत्रण कइ सकित ह। यदि तू अइसा कर बिउ तउ हम में स हर एक तोहका एक हजार एक सौ सेकेल देइ।”

6एह बरे दलीला सिमसोन स कहेस, “मोका बतावा कि तू एतना जियादा ताकतवर काहे अहा? तू पचन में स कउनो कइसे बाँध सकत ह अउर तू पचन क कइसे असहाय कइ सकत ह?”

7सिमसोन जवाब दिहस, “कउनो मनई मोका सात नवी धनुस क ओन डोरियन स बाँध सकत ह जेका अब तलक उपयोग नाहीं कीन्ह ग अहइ अउर जउन कबहुँ झुरान न होइ। यदि कउनो अइसा करी तउ मईँ दूसर कउनो मनइयन क तरह दुर्बल होइजाब।”

8तब पलिस्ती क सासक लोग सात ठु नवी धनुस क डोरियन दलीला बरे लाएन। उ सबइ डोरियन अब तलक झुरान नाहीं रहिन। उ सिमसोन क ओहसे बाँधिस। 9कछू मनई दूसर कमरन में छुपा रहने। दलीला सिमसोन स कहेस, “सिमसोन पलिस्ती क लोग तोहका धरइ आवत अहइँ।” किन्तु सिमसोन धनुस डोरियन क आसानी स तोड़ दिहस। उ सबइ वइसे ही टूट गइन जइसे कउनो धागा आगी क काफी निकट आवइ क पाछे टूट जात ह। इ तरह पलिस्ती लोग सिमसोन क ताकत क राज पता नाहीं लगाइ सकेन।

10तब दलीला सिमसोन स कहेस, “तू मोका बेवकूफ बनाया ह। तू मोहसे लबार बोल्या ह। मेहरबानी कइके मोका फुर-फुर बतावा कि तोहका कउनो कइसे बाँध सकत ह।”

11सिमसोन कहेस, “कउनो मनई मोका ओन नवी लसुरियन स बाँध सकत ह जेका पहिले उपयोग नाहीं कीन्ह गवा ह। जादि कउनो अइसा करी तउ मईँ एतना कमजोर हो जाब, जेतना कउनो दूसर मनई होत ह।”

12एह बरे दलीला कछू नवी लसुरियन लिहस अउर सिमसोन क बाँध दिहस। कछू मनई अगले कमरे में छुपा रहेन। तब दलीला ओका आवाज़ दिहस, “सिमसोन, पलिस्ती लोग तोहका धरइ आवत अहइँ।” किन्तु उ लसुरियन क आसानी स तोड़ दिहस। उ ओनका धागा क तरह तोड़ डाएस।

13तब दलीला सिमसोन स कहेस, “तू मोका फुन बेवकूफ

बनाया ह! तू मोहसे झूठ बोल्या ह। अब तू मोका बतावा कि तोहका कउनो कइसे बाँध सकत ह।”

उ कहेस, “जदि तू उ करघा क उपयोग करा, अउर मोरे मूँड़े क बारन स सात चूटी बना लेइ अउर एका एक काँटा स कस देइ तउ मईँ एँतना कमजोर होइ जाब, जेतना कउनो दूसर मनई होत ह।”

तब सिमसोन सोबइ चला गवा। एह बरे दलीला करघा क उपयोग ओकरे मूँड़े क बारन क सात चूटी बनावइ बरे किहा। 14तब दलीला जमीन में खेमा क खूँटी गाड़िके, करघा क ओहसे बाँध दिहस। फुन उ सिमसोन क अवाज दिहस, “सिमसोन, पलिस्ती क लोग तोहका धरइ जात अहइँ।” सिमसोन नींद स उठिके तम्बू क खूँटी, करघा अउर दरकी क उखाड़ दिहस।

15तब दलीला सिमसोन स कहेस, “तू मोका कइसे कह सकत ह, ‘मईँ तोहसे पिरेम करत हउँ,’ जबकि तू मोह पइ बिस्सास तलक नाहीं करत्या। तू आपन राज बतावइ स इन्कार करत अहा। इ तिसरी दाईँ तू मोका बेवकूफ बनाया ह। तू आपन भीसण सक्ती क राज मोका नाहीं बताया ह।” 16उ सिमसोन क दिन पइ दिन हर समइ डाँट-डपट करत रहत रहेन। उ ओका एँतना परेसान किहेस कि उ ओहस तंग आइ गवा अउर मरि जावा चहेस। 17एह बरे उ दलीला क सब कछू बताइ दिहस। उ कहेस, “मईँ आपन बार कबहुँ नाहीं कटवाए अहउँ। मईँ जनम क पहिले बिसेस रूप स परमेस्सर क समर्पित रहेउँ। जदि कउनो मोरे बारन क कतर देइ तउ मोरे सक्ती चली जाइ। मईँ वइसा ही कमजोर होइ जाब, जेतना कउनो दूसर मनई होत ह।”

18दलीला लखेस कि सिमसोन आपन हिरदइ क सारी गुप्त बात कहि दिहेस ह। उ पलिस्ती क लोगन क सासकन क लगे दूत पठएस। उ कहेस, “फुन वापस लउटा। सिमसोन मोका सब कछू कहि दिहेस ह।” एह बरे पलिस्ती लोगन क सासक दलीला क लगे लउटेन। उ सबइ उ धन संग लिआएन जउन उ पचे ओका देइ क प्रतिग्या किहे रहेन।

19दलीला सिमसोन क उ समइ सोइ जाइ दिहस, जब उ ओकरी गोद में मूँड़ि धड़के ओलरा रहा। तब उ एक मनई क भीतर बोलाएस अउर सिमसोन क बारन क सात लटन क कतरवाइ दिहस। इ तरह उ ओका ताकतरहित बनाई दिहस। सिमसोन क सक्ती ओका तजि दिहस। 20तब दलीला ओका अवाज दिहस, “सिमसोन पलिस्ती क लोग तोहका धरइ आत अहइँ।” उ जाग पड़ा अउर सोचेस, “मईँ पहिले क तरह पराइ निकरब अउर आपन क अजाद राखब।” किन्तु सिमसोन क इ नाहीं मालूम रहा कि यहोवा ओका तजि दिहस ह।

21पलिस्ती क लोग सिमसोन क धड़ लिहिन। उ पचे ओकर अँखिन निकरवाइ लिहिन अउर ओका अज्जा नगर क लइ गएन। तब ओका पराइ स धरइ बरे ओकरे पैसन में उ पचे बेड़ियन डाइ दिहिन। उ पचे ओका जेल में धाँध दिहिन अउर ओहसे चक्की चलवाएन। 22किन्तु सिमसोन क बार फुन बढ़व सुरू किहिन।

23पलिस्ती लोगन क सासक उत्सव मनावइ बरे एक ठउरे पइ बटुरेन। उ पचे आपन देवता दागोन क एक ठु

बड़की बलि चढ़ावइ जात रहेन। उ पचे कहेन, “हम लोगन क देवता हमार दुस्सन सिमसोन क हरावइ मैं मदद किहेन ह।” 24जब पलिस्ती लोग सिमसोन क लखेन तब उ पचे अपने देवता क बड़कई किहेन। उ पचे कहेन,

“इ मनई हमरे लोगन क बर्बाद किहस। इ मनई हमरे अनेक लोगन क मारेस। किन्तु हमार देवता हमरे दुस्सन क धरवावइ मैं हमार मदद किहस।”

25लोग उत्सव में खुसी मनावत रहेन। एह बरे उ पचे कहेन, “सिमसोन क बाहेर लिआवा। हम ओकर मजाक उड़ावइ चाहित ह।” एह बरे उ पचे सिमसोन क जेल स बाहेर लइ आएन अउर ओकर मजाक उड़ाएन। उ पचे सिमसोन क दागोन देवता क मन्दिर क खम्भन क बीच में खड़ा किहेन। 26एक तु जवान नउकर सिमसोन क हाथ धरे भए रहा। सिमसोन ओनसे कहेस, “मोका हुवाँ राखा जहाँ मई ओन खम्भन क छुड़ सकउँ, जउन इ मन्दिर क ऊपर रोके भए राखेस अहइ। मई ओनकर सहारा लेइ चाहत हउँ।”

27मन्दिर में मेहररूअन-मनसेधुअन क बड़ा भीड़ रही। पलिस्ती लोगन क सबहिँ सासक भी हुआँ रहेन। हुवाँ लगभग 3,000 मेहरारू-मनसेधु मन्दिर क छत पइ रहेन। उ सबइ हँसत रहेन अउर सिमसोन क मजाक उड़ावत रहेन। 28तब सिमसोन यहोवा स पराथना किहेस। उ कहेस, “सर्वसक्तिमान यहोवा, मोका याद रखा। परमेस्सर मोका कृपा कइके सिरिफ एक दाई अउर सक्ति द्या। मोका सिरिफ इ काम करइ द्या कि पलिस्तीयन स आपन आँखिन निकारइ क बदला चुकाइ सकउँ।” 29तब सिमसोन मन्दिर क केन्द्र क दुइनउँ खम्भन क धरेस। इ दुइनउँ खम्भा पूरे मन्दिर क टेकाए भए रहेन। उ दुइनउँ खम्भन क बीच में अपने क जमाएस। एक तु खम्भा ओकर दाहिन कइँती अउ दूसर ओकर बाई कइँती रहा। 30सिमसोन कहेस, “एन पलिस्तीयन स संग मोका मरइ द्या।” तब उ आपन पूरी सक्ती स खम्भन क ठेलेस अउर मन्दिर सासकन पइ अउ दुसर लोगन जउन हुआँ जमा भवा रहेन पइ भहराइ पड़ा। इ तरह सिमसोन आपन जिन्नगी भर क समइ मैं जेतने पलिस्ती लोगन क मारेस, ओहसे कहुँ जियादा लोगन क तब मारेस जब उ मरा।

31सिमसोन क भाइयन अउर ओकरे बाप क परिवार हुआँ गएन अउर ओकरे लहास क लेइ गएन। उ पचे ओका वापिस लिआएन अउर ओका ओकर बाप मानोह क कब्र में दफनाएस। इ कब्र सोरा अउर एस्ताओल नगरन क बीच अहइ। सिमसोन इस्त्राएल क लोगन क निआवाधीस बीस बरिस तलक रहा।

### मीका क मूरतियन

17 मीका नाउँ क एक मनई रहा जउन एप्रैम क पहाड़ी पहेँटा मैं रहत रहा। 2मीका आपन महतारी स कहेस, “का तोहका चाँदी क गियारह सौ सिक्कन याद अहइ जउन तोहसे चोराइ लीन्ह ग रहेन। मई तोहका ओकरे

बारे मैं सराप देत सुनेउँ। उ चाँदी मोरे लगे अहइ। मई ओका लिहेउँ ह।”

ओकर महतारी कहेस, “मोर पूत, तोहका यहोवा आसीर्बाद देइ।”

3मीका आपन महतारी क गियारह सौ सिक्के वापस दिहस। तब उ कहेस, “मई इ सबइ सिक्कन यहोवा क एक खास भेंट क रूप मैं देब। मई इ चाँदी आपन पूत क देब अउर उ एक तु मूरति बनाई अउर ओका चाँदी स ढाँपि देइहीं। एह बरे पूत, अब इ चाँदी मई तोहका लउटावत हउँ।”

4मुला मीका उ चाँदी आपन महतारी क लउटाइ दिहस। एह बरे उ दुइ सौ सेकेल चाँदी लिहेस अउ एक तु सुनार क दइ दिहस। सुनार चाँदी क उपयोग चाँदी स ढाँपी एक तु मूरति बनावइ मैं किहस। मूरति मीका क घरे मैं धरी गइ। 5मीका क एक तु मन्दिर मूरतियन क पूजा करइ बरे रहा। उ एक एपोद अउर कछू घरेलू मूरतियन बनाएस अउर ओनका हुआँ रखेस तब मीका आपन पूतन मैं स एक क आपन याजक चुनेस। 6(उ समइ इस्त्राएल क लोगन क कउनो राजा नाही रहा। एह बरे हर एक मनई उ करत रहा जउन ओका नीक जँचत रहा।)

7एक तु लेवीवंसी नउजवान रहा। उ यहूदा भुइँया मैं बेतलेहेम नगर क निवासी रहा। उ यहूदा क परिवार समूह मैं रहत रहा। 8उ नउजवान यहूदा मैं बेतलेहेम क तजि दिहस। उ रहइ बरे दूसर ठउर हेरत रहा। जब उ जात्रा करत रहा, उ मीका क घरे एप्रैम क पहाड़ी पहेँटा मैं आवा 9मीका ओहसे पूछेस, “तू कहाँ स आवा अहा?”

नउजवान जवाब दिहस, “मई उ बेतलेहेम नगर क लेवी बंसी अहउँ जउन यहूदा मैं अहइ। मई रहइ खातिर एक तु ठउर हेरत हउँ।”

10तब मीका ओहसे कहेस, “मोरे संग रहा। मोर बाप अउर मोर याजक बना। मई हर साल तोहका दस तु चाँदी क सिक्कन देब। मई तोहका ओढ़ना अउ खइया क देब।”

11लेवी बंसी नउजवान मीका क संग रहइ क तइयार होइ गवा। नउजवान मीका क पूतन क जइसा होइ गवा। 12मीका नउजवान क आपन याजक नियुक्त किहा। इ तरह नउजवान याजक बन गवा अउर मीका क घरे मैं रहइ लाग। 13मीका कहेस, “अब मई जानत अहउँ कि यहोवा मोरे बरे नीक होइ। मई इ एह बरे जानत हउँ कि मई लेवी बंसी क परिवारे क एक तु मनई क याजन क रूप मैं रखेउँ ह।”

### दान लैस नगर पइ कब्जा करत ह

18 उ समइ इस्त्राएल मैं कउनो राजा नाही रहा। उ दिन दान क परिवार समूह, आपन रहइ बरे, भुइँया क खोज मैं रहा। इस्त्राएल क दूसर परिवार समूह पहिले ही आपन भुइँया पाइ लिहे रहेन। किन्तु दान क परिवार समूह अबहिँ तलक आपन भुइँया नाही लिया सका रहा।

2एह बरे दान क परिवार समूह पाँच तु फउजियन क कछू भुइँया हेरइ बरे पठएस। उ पचे रहइ बरे नीक ठउर हेरइ गएन। इ पचे पाँचहुँ सिपाही जोरा अउ एस्ताओल

नगरन क रहेन। उ पचे एह बरे चुना ग रहेन कि उ पचे दान क परिवार समूहन में स रहेन। उ पचन्क आदेस दीन्ह ग रहा, “जा अउर कउनो भुइँया क खोज करा।”

पाँचहुँ मनइयन एप्रैम क पहाड़ी छेत्र में आएन। उ पचे मीका क घरे आएन अउर हुँवई रात बिताएन। जब पाँचहुँ मनई मीका क घरे क निअरे आएन तउ उ पचे लेवी बंस क परिवार समूह क नउजवान क अवाज सुनेन। उ पचे ओकर अवाज पहिचानेन, एह बरे उ पचे मीका क घर पइ रूकेन। उ पचे लेवी बंसी नउजवान स पूछेन, “तोहका इ ठउरे पइ कउन लावा ह? तू हिआँ का करत अहा? तोहार हिआँ का काम अहइ?”

4उ ओनसे उहइ कहेस जउन मीका ओकर संग किहे रहा, “मीका मोका किराए पइ राखेस ह। मई ओकर याजक हउँ।”

5उ पचे ओहसे कहेन, “कृपा कइके परमेस्सर स हम लोगन बरे कछू माँगा हम लोग कछू जानइ चाहित ह। का हमरे रहइ बरे भुइँया क खोज सफल होइ?”

6याजक पाँचहुँ मनइयन स कहेस, “सान्ति स जा। यहोवा तोहार मारग-दरशन करी।”

7एह बरे पाँचहुँ मनई हुवाँ स चलेन। उ पचे लैस नगर क आएन। उ पचे लखेन कि उ नगर क लोग सुरच्छित रहत ही। ओन पइ सीदोन क हुकूमत रही। उ पचे सान्ति अउ सुरच्छा क संग रहत रहेन। लोगन क लगे हर एक चीज बहोत जियादा रही अउर ओन पइ प्रहार करइवाला आसपास कउनो दुस्मन नाहीं रहा अउर उ पचे सीदोन नगर क लोगन स बहोत जियादा दूर रहत रहेन। ओनकर कउनो दूसर स कउनो मतलब नाहीं रहेन।

8पाँचहुँ मनइयन सोरा अउ एस्ताकोल नगर क वापस लउटेन। ओनकर सम्बन्धियन पूछेन, “तू का पता लगाया ह?”

9पाँचहुँ मनइयन जवाब दिहेन, “हम पचे भुइँया लखा ह अउर उ बहोतइ नीक बाटइ। हमका ओन पइ हमला करइ चाही। प्रतीच्छा जिन करा। हम चली अउ उ भुइँया क लइ लेइ। 10जब तू पचे उ भुइँया में चलब्या तउ लखब्या कि हुवाँ पइ बहोत जियादा भुइँया अहइ। हुवाँ सब कछू बहोत जियादा अहइ। तू पचे इ भी पउब्या कि हुवाँ क लोगन क हमला क आसंका नाहीं अहइ। निहचइ ही परमेस्सर उ भुइँया हमका दिहस ह।”

11एह बरे दान क परिवार समूह क छः सौ मनइयन सोरा अउ एस्ताओल क नगरन क तजेन। उ पचे जुद्ध बरे तइयार रहेन। 12लैस नगर क जात्रा करत समइ उ पचे यहूदा भुइँया में किर्य्त्यारीम नगर में रूकेन। उ पचे हुवाँ डेरा डाएन। इहइ कारण अहइ कि किर्य्त्यारीम क पच्छिम क स्थान आजु तलक महनेदाम कहा जात ह। 13तब उ छः सौ मनइयन हुआँ स एप्रैम क पहाड़ी प्रदेस क जात्रा किहेन। उ पचे मीका क घर आएन।

14तब ओन पाँचहुँ मनइयन जउन लैस क चारिहुँ कइँती क भुइँया क खोज किहे रहेन, आपन भाइयन स कहेन, “का तोहका मालूम अहइ कि एन घरन में स एक में एपोद, दूसर घरेलू देवता, एक खुदाईवाली मूर्ति एक ठु ढाली गइ

मूर्ति अहइ? अब तू पचे जानत अहा कि तोहका का करइ क अहइ, जा अउर ओनका लइ आवा।” 15एह बरे उ पचे मीका क घर रूकेन जहाँ लेवी बंसी नउजवान रहत रहा। उ पचे नउजवान स पूछेन कि उ कइसा रहा। 16दान क परिवार समूह क छः सौ लोग फाटक क दुआरे पइ खड़ा रहेन। ओनके लगे सबहिँ तरह क हथियार रहेन तथा उ सबइ जुद्ध क बरे तइयार रहेन। 17-18पाँचहुँ गुप्तचर घरे में गएन। उ पचे खुदाई वाली मूर्ति, एपोद, घरेलू मूर्तियन अउ ढाली भइ मूर्ति क लिहेन। जब उ पचे अइसा करत रहेन तब लेवी बंसी याजक अउर जुद्ध बरे तइयार छः सौ स्त्रधारी फउजी फाटक क दुआर पइ खड़े रहेन। लेवी बंसी याजक ओनसे पूछेस, “तू का करत अहा?”

19पाँचहुँ मनइयन कहेन, “चुप रहा, एक सब्द भी न बोला। हम लोगन क संग चला। हमार बाप अउर याजक बना। तोहका खुद चुनइ चाही कि तू केका जियादा नीक समुझत अहा? का इ तोहरे बरे जियादा नीक अहइ कि तू एक ठु मनई क याजक रहा? या ओहसे कहुँ जियादा इ अहइ कि तू इस्राएल क लोगन एक पूरा परिवार समूह क याजक बना?”

20एहसे लेवी बंसी खुस भवा। एह बरे उ एपोद, घरेलू मूर्तियन अउ खुदाईवाली मूर्ति क लिहस। उ दान क परिवार समूह क ओन लोगन क संग गवा।

21तब दान परिवार समूह क छः सौ मनई लेवी बंसी क संग मुडेन अउर उ पचे मीका क घरे क तजेन। उ पचे आपन नान्ह गदेलन, जनावरन अउ आपन सबहिँ चीजन अपने समन्वा धरेस।

22दान क परिवार समूह क लोग उ ठउरे स बहोत दूर गएन जब मीका क निअरे रहइवाले लोग एकत्र भएन। तब उ पचे दान क लोगन क पाछा किहेन अउर ओनका जाइके धरेन। 23मीका क लोग दान क लोगन पइ बरस पड़ेत रहेन। दान क लोग मुडेन। उ पचे मीका स कहेन, “तोहार समस्या का अहइ? तू मनईयन क लड़ाइ करइ बरे काहे बोलाएस?”

24मीका जवाब दिहस, “दान क तू लोग, तू पचे मोर मूर्तियन लिहा ह। मई ओन मूर्तियन क अपने बरे बनाएँ ह। तू पचे हमरे याजक क भी लइ लिहा ह। तू पचे तज्या का अहा? तू पचे मोका कइसे पूछ सकत ह, ‘समस्या का अहइ।’”

25दान क परिवार समूह क लोग जवाब दिहेन, “नीक होत, तू हम से बहस जिन करत्या, हम पचन में स कछू मनई गरम स्वभाव क बाटेन। जदि तू हम पइ चिचियात्या तउ उ पचे गरम स्वभाववाले लोग तोह पइ प्रहार कइ सकत ही। तू अउर तोहार परिवार मार डावा जाइ सकत ह।”

26तब दान क लोग मुडेन अउ आपन राहे पइ अगवा बढ गएन। मीका जानत रहा कि उ सबइ लोग ओकरे बरे बहोत जियादा सक्तीसाली अहइँ। एह बरे उ घर लउटि गवा।

27इ तरह दान क लोग उ सबइ मूर्तियन लिहेन जउन मीका बनाए रहा। उ पचे मीका क संग रहइवाले याजक क भी लिहेन। तब उ पचे लैस पहोंचेन। उ पचे लैस क लोगन

पइ हमला किहन जउन कि सान्ति क साथ रहे रहने काहेकि लैस क लोगन क हमला क आसंका नाहीं रही। दान क लोग ओन लोगन क आपन तरवारन क घाट उतारेन। तब उ पचे नगर क बार डाएन। 28 लैस में रहइवाले लोगन क रच्छा करवइया कउनो नाहीं रहा। उ पचे सीदोन क नगर स एतना जियादा दूर रहने कि ओन लोगन क स मदद नाहीं लइ सकत रहने। अउ कउनो दूसर स कउनो मतलब नाहीं रखत रहने। लैस नगर बेतहर होब प्रदेस क अधिकार में एक घाटी में रहा। दान लोग उ ठउरे पइ एक तु नवा नगर बनाएन अउर उ नगर ओनकर निवास ठउर बना। 29 दान क लोग लैस नगर क नवा नाउँ धरेन। उ पचे उ नगर क नाउँ आपन पुरखन क पाछे दान धरेन। दान इस्राएल क पूतन में स एक पूत रहा। पुराने समइ में इ नगर क नाउँ लैस रहा।

30 दान क परिवार समूह क लोग दान नगर में मूरतियन क स्थापना किहन। उ पचे गोसोम क पूत योनातान क आपन याजक बनाएन। गोसोम मनस्सी क पूत रहा। योनातान अउर ओकर पूत दान क परिवार समूह क तब तलक याजक रहेन जब तलक इस्राएल क लोगन क बन्दी बनाइके बाबेल नाहीं लइ जावा गवा। 31 दान क लोग ओन मूरतियन क पूजा किहन जेनका मीका बनाए रहा। उ पचे उ पूरे समइ तलक ओन मूरतियन क पूजत रहने जब तलक सीलो में परमेस्सर क घर रहा।

### लेवी बंसी अउर ओकर रखैल

19 उ समइ इस्राएल क कउनो राजा नाहीं रहा। एक तु लेवी बंसी मनई एप्रैम क पहाड़ी प्रदेस क बहोत दूर क छेत्र में रहत रहा। उ मनई क एक तु जवान रखएल रहा। उ यहूदा प्रदेस क बेतलेहेम नगर क निवासी रही। 2 किन्तु उ ओकर संग झगड़ा किहा। एह बरे उ ओका तजि दिहस अउर यहूदा प्रदेस क बेतलेहेम नगर में आपन बाप क घर चली गइ। उ हुवाँ चार महीने रही। 3 तब ओकर भतार ओकरे लगे गवा। उ ओहसे पिरेम क संग बात करइ चाहत रहा, जेहसे उ ओकरे लगे लउट जाइ। उ अपने संग आपन नउकर अउर दुइ गदहन क लइ गवा रहा। लेवी बंसी मनई उ मेहरारू क बाप क घरे आवा। ओकर बाप लेवी बंसी मनई क लखेस अउर ओकर स्वागत करइ बरे खुसी स बाहेर आवा। 4 जुवती क बाप ओका ठहरइ बरे न्यौतेस। एह बरे लेवी बंसी तीन दिन ठहरा। उ खाएस, पीएस अउर उ अपने ससुरे क घर सोएस।

5 चउथे दिन बहोतइ भिसारे उ उठा। लेवी बंसी चल पइइ क तइयारी करत रहा। किन्तु जुवती क बाप अपने दामाद स कहेस, “पहिले कछू खा ल्या। जब तू खइया क खाइ ल्या तउ तू जाइ सकत ह।” 6 एह बरे लेवी बंसी मनई अउर ओकर ससुर एक संग खाइ अउर दाखरस पिअइ बइठेन। ओकरे पाछे जुवती क बाप उ लेवीबंसी स कहेस, “कृपा कइके आजु भी ठहरा। आराम करा अउर आनन्द मनावा।” इ तरह दुइनउँ मनइयन एक संग खाएन। 7 जब लेवी मनई जाइ क तइयार भवा तउ ओकर ससुर ओका हुवाँ राति भइ रूकइ क हठ किहस।

8 पाँचवाँ दिन लेवी बंसी मनई भिसारे उठेस। लेवी बंसी मनई चलइ बरे तइयार रहने। किन्तु मेहरारू क बाप आपन दामाद से कहेस, “पहिले कछू खाइ ल्या। आरम कइ ल्या अउर दोपहर तलक हियोँ रहा।” तब दुइनउँ मनईयन फुन एक संग खाएस।

9 तब लेवी बंसी मनई, ‘ओकर रखैल अउर ओकर नउकर चलइ बरे उठेन। किन्तु जुवती क बाप, ओकर ससुर कहेस, “लगभग अँधियारा होइ गवा अहइ। दिन लगभग बीत चुका अहइ। राति हिअँई बितावा अउर आनन्द मनावा। कल बहोत भिसारे तू उठि सकत ह अउर आपन घरे क रास्ता पकड़ सकत ह।”

10 किन्तु लेवी बंसी मनई एक अउर रात हुवाँ ठहरइ नाहीं चाहत रहा। उ आपन दुइ गदहन अउर आपन रखैल क लिहस। उ यबूस नगर जउन यरूसलेम भी कहलावत ह, तलक गवा। 11 उ दिन लगभग खतम होइ गवा रहा। उ पचे यबूस नगर क लगे रहने। एह बरे नउकर आपन सुआमी लेवी बंसी स कहेस, “हम लोग इ नगर में रूक जाइ। इ यबूसी लोगन क नगर अहइ। हम लोग हिअँई राति बिताई।”

12 किन्तु ओकर सुआमी लेवी बंसी कहेस, “नाहीं हम लोग अपरिचित नगर में नाहीं जाब, जेकर लोग इस्राएल क लोगन में स नाहीं अहइँ। हम लोग गिबा नगर तलक जाब।” 13 उ इ भी कहेस, “आगे बढ़ा। हम लोग गिबा या रामा तलक पहुँचइ क कोसिस करइँ। हम ओन नगरन में स कउनो एक में रात बिताइ सकित ह।”

14 एह बरे लेवी बंसी अउ ओकरे संग क लोग अगवा बढेन। जब उ पचे गिबा नगर क लगे आएन तउ सूरज बूडन रहा। गिबा बिन्यामीन क परिवार समूह क प्रदेस में अहइ। 15 एह बरे उ पचे गिबा में रूकेन। उ पचे उ नगर में रात बितावइ क योजना बनाएन। उ पचे नगर में सार्वजनिक चउराहे में गएन अउर हुवाँ बइठ गएन। किन्तु कउनो ओन लोगन क रात बितावइ बरे अपने घर नाहीं न्यौतेन।

16 उ साँझ क एक बूढ़ा मनई अपने खेतन स नगर में आया। ओकर घर एप्रैम क पहाड़ी देस में रहा। किन्तु अब उ गिबा नगर में रहत रहा। गिबा क लोग बिन्यामीन क परिवार समूह क रहेन। 17 बूढ़ा मनई लेवी बंसी मनई क नगर क चउराहे पइ लखेस। बूढ़ा मनई पूछेस, “तू कहाँ जात अहा? तू कहाँ स आवा अहा?”

18 लेवी बंसी मनई जवाब दिहस, “यहूदा प्रदेस क बेतलेहेम नगर स हम लोग जात्रा करत अहीं। हम आपन घर दूर क पहटौँ एप्रैम क पहाड़ी देस जात अहइ। मई यहूदा क बेतलेहेम क गवा रहेउँ। अब मई आपन घरे जात हउँ।”

19 “किन्तु कउनो भी हम लोगन क रात ठहरइ बरे न्यौता नाहीं दिहस। हम लोगन क लगे आपन गदहन बरे पुआल अउ भोजन अहइ। हम लोगन क लगे रोटी अउ दाखरस भी अहइ। हम लोगन में स कउनो भी न मई न इ मेहरारू अउर न ही मोर नउकर कछू भी नाहीं चाहत ह।”

20 बूढ़ा कहेस, “तोहार स्वागत अहइ। तू मोरे हिआँ ठहरा। तोहका जरूरत क सबहिँ चिजियन मई देबउँ। तू नगर क सार्वजनिक चउराहे में राति जिन बितावा।” 21 तब उ बूढ़ा

मनई लेवी बंसी मनई अउर ओकरे संग क लोगन क अपने संग अपने घरे लइ गवा। बूढ़ा मनई ओकरे गदहन क खवाएस। उ पचे आपन गोड़ धोएन। तब उ कछू भोजन खाइ अउर कछू दाखरस पिया।

22जब लेवी बंसी मनई अउर ओकरे संग क मनई आनन्द लेत रहेन, तबहिं उ नगर से कछू मनई आएन अउर घर क चारिहुँ कइँती स घेर लिहिन। उ पचे बहोतइ बुरे मनई रहेन। उ पचे जोर स दरवाजा क ऊपर पीटइ लागेन। उ पचे उ बुढ़वा मनई स, जेकर उ घर रहा, गोहराइके बोलें, “उ मनई क अपने घरे स बाहेर करा। हम ओकरे संग सम्भोग करइ चाहित ह।”

23बुढ़वा मनई बाहेर गवा अउर ओन दुट्ठ लोगन स कहेस, “भाइयो, नाही, अइसा बुरा काम जिन करा। उ मनई मोरे घरे में मेहमान अहइ। इ खौफनाक पाप जिन करा। 24सुना, हिआँ मोर बिटिया अहइ। उ एक कुवारी कन्या अहइ। मई ओका अउ इ मनसेधू क रखैल क तोहरे लगे बाहेर लिआवत हउँ। तू ओकर उपयोग जइसा चाहा कइ सकत ह। किन्तु इ मनई क खिलाफ अइसा खौफनाक पाप जिन करा।”

25मुला ओन दुट्ठ लोग उ बुढ़वा मनई क एक न सुनेन। एह बरे लेवी बंसी मनई आपन रखैल क ओन दुट्ठ मनइयन क संग बाहेर कइ दिहिन। ओन दुट्ठ मनइयन पूरी रात ओकरे संग कुकरम किहिन। अउर पूरी तरह गालियन दिहिन। तब भिंसारे ओका जाइ दिहिन। 26भिंसारे उ मेहरारू हुआँ लउटी जहाँ ओकरे सुआमी ठहरा रहा। उ समन्वा दरवाजे पइ भहराइ पड़ी। उ तब तलक पड़ी रही जब तलक पूरा दिन नाही निकरि आवा।

27भिंसारे लेवी बंसी मनई उठा अउर उ घरे क दरवाजा खोलेस। उ अपने राहे जाइ बरे बाहेर निकरा किन्तु हुवाँ ओकर रखैल पड़ी रही। उ घरे क राहे पइ पड़ी रही। ओकर हाथ दरवाजा क ड्यौड़ी पइ रहेन। 28तब लेवी बंसी मनई ओहसे कहेस, “उठा, हम लोग चली।” किन्तु उ जवाब नाही दिहस काहेकि उ मरि गवा रहा।

एह बरे उ ओका आपन गदहे पइ धरेस अउ घरे गवा। 29जब लेवीबंसी मनई अपने घरे आवा तब उ एक ठु छुरी निकारेस अउर आपन रखैल क बारह टूकन में काटेस। तब उ मेहरारू क ओन बारह हीसन में ओन सबहिं छेत्रन में पठएस जहाँ इस्त्राएल क लोग रहत रहेन। 30जउन इ लखेन ओन सबइ कहेन, “अइसा कबहुँ नाही भवा रहा जब स इस्त्राएल क लोग मित्र स आपन, बाद-विवाद करा अउर तय करा कि एकरे बारे में का करइ क चाही।”

### इस्त्राएल अउ बिन्यामीन क बीच जुद्ध

**20** इ तरह इस्त्राएल क सबहिं लोग मिस्या नगर में यहोवा क समन्वा खड़े होइ बरे एक संग आपन। उ पचे पूरे इस्त्राएल देस स आपन: दान से बेरसेबा तलक। गिलाद प्रदेस क सबहिं इस्त्राएली लोग भी हुवाँ रहेन। इस्त्राएल क परिवार समूहन क सबहिं प्रमुख लोग हुवाँ रहेन। उ पचे परमेस्सर क लोगन क सभा में आपन-आपन ठउर पइ बइठेन। उ ठउरे पइ तरवार क संग चार लाख

फउजी रहेन। 3बिन्यामीन क परिवार समूह क लोग सुनेन कि इस्त्राएल क लोग मिस्या नगर में पहुँचेन ह। इस्त्राएल क लोग कहेन, “इ बतावा कि इ भयंकर पाप कइसे भवा।”

4एह बरे मेहरारू जेकर हतिया भइ रही ओकर भतार कहेस, “मोर रखैल अउ मई बिन्यामीन क गिबा नगरन में पहुँचेन। हम लोग हुवाँ राति बितावा। 5मुला राति में गिबा नगर क प्रमुख उ घरे पइ आएन जेहमाँ मई ठहरा रहेउँ। उ पचे घरे क घेर लिहिन अउ उ पचे मोका मारि डावइ चाहत रहेन। उ पचे मोरी रखैल क संग कुकरम किहिन अउर उ मर गइ। 6एह बरे मई आपन रखैल क लइ गएँ अउर ओकर टूका कइ डाएँ। तब मई हर एक टूका इस्त्राएल क हर एक परिवार समूह क पठएँ। मई बारह टूकन ओन भुइँया क पठएँ जेनका हम पाए। मई इ एह बरे किहेँ कि बिन्यामीन क परिवार समूह क लोग इस्त्राएल क देस में इ क्रूर अउ खउफनाक करम किहिन ह। 7अब, इस्त्राएल क सबहिं लोगो, आप बोलइँ। आप आपन निर्णय देइँ कि हमका का करइ चाही?”

8तब सबहिं लोग उहइ समइ उठि। उ पचे एकत्र होइके कहेन, “हम लोगन में स कउनो घरे नाही लउटी। हम लोगन में स एक भी घरे नाही लउटी। 9गिबा बरे हम लोग इ करब: हम गोटी डाउब। 10अउर हम लोग इस्त्राएल क लोगन क सबहिं परिवार समूहन स एक सौ में स दस मनई चुनब अउर हम लोग हर एक हजार में स सौ मनई चुनब। हम लोग हर एक दस हजार में स एक हजार चुनब। जउने लोगन क हम लोग चुन लेब उ पचे फउजे खातिर जरूरी सामग्री पइही। तब फउज बिन्यामीन में गिबा नगर क जाइ। उ फउज ओन लोगन स बदला चुकाई जउन इस्त्राएल में इ भयंकर काम किहेन ह।”

11एह बरे इस्त्राएल क सबहिं लोग गिबा नगर में बटुर गएन। उ पचे ओकर एकमत रहेन, जउन उ पचे करत रहेन। 12इस्त्राएल क परिवार समूह एक सँदिस क संग लोगन क बिन्यामीन क परिवार समूह क लगे पठएस। सँदिसा इ रहा, “इ पापे क बारे में का कहेब अहइ जउन तोहार कछू लोग किहो ह? 13ओन गिबा क दुस्ट मनइयन क हमरे लगे पठवा। ओन लोगन क हमका दया जेहसे हम ओनका जान स मारि सकी। हम लोगन क इस्त्राएल क लोगन क बीच स बुराइ क दूर करइ चाही।”

किन्तु बिन्यामीन क परिवार समूह क लोग आपन सम्बंधी इस्त्राएल क लोगन क दूतन क बात सुनइ स इन्कार करइ दिहेन। 14बिन्यामीन क परिवार समूह क लोग आपन नगरन क तजेन अउर उ पचे गिबा नगर में पहुँचेन। उ पचे गिबा में इस्त्राएल क दूसर परिवार समूह क खिलाफ लइइ गएन। 15बिन्यामीन क परिवार समूह क लोग छब्बीस हजार फउजियन क बटोरेन उ पचे सबहिं फउजी जुद्ध बरे प्रसिच्छित रहेन। ओनके संग गिबा नगर क सात सौ प्रसिच्छित फउजी भी रहेन।

16ओनकर सात सौ अइसे प्रसिच्छित मनई भी रहेन जउन जुद्ध में बाँया हाथ चलावइ क सिच्छा पाए रहेन। ओनमाँ स हर एक गुल्ले क उपयोग दच्छता स कइ सकत रहा। उ

पचे सबइ एक तु बारे पइ भी पाथर मार सकत रहेन अउर निसाना नाहीं चूकत रहा।

17इस्त्राएल क सारे परिवार समूह बिन्यामीन क अतिरिक्त चार लाख जोधन क एकत्र किहना। ओन चार लाख जोधन क लगे तरवासन रहिन। ओनमाँ स हर एक प्रसिच्छित फउजी रहा। 18इस्त्राएल क लोग बेतेल नगर तलक गएन। बेतेल में उ पचे परमेस्सर स पूछेन, “कउन सा परिवार समूह बिन्यामीन क परिवार समूह पइ पहिला हमला करी?”

यहोवा जवाब दिहस, “यहूदा क परिवार समूह पहिले जाइ।”

19अगले भिंसारे इस्त्राएल क लोग उठेन। उ पचे गिबा क निअरे डेरा डाएन। 20तब इस्त्राएल क फउज बिन्यामीन क फउज स जुद्ध बरे निकरि पड़ी। इस्त्राएल क फउज गिबा नगर में बिन्यामीन क खिलाफ जुद्ध बरे आपन मोर्चा लगाएस। 21तब बिन्यामीन क फउज गिबा नगर क बाहेर निकरी। उ पचे उ दिन क लड़ाई में इस्त्राएल क फउजे क बाईस हजार लोगन क मार डाएन।

22-23इस्त्राएल क लोग यहोवा क समन्वा गएन। उ पचे साँझ तलक रोवत चिल्लात रहेन। उ पचे यहोवा स पूछेन, “का हमका फुन बिन्यामीन क खिलाफ लड़इ जाइ चाही? उ सबइ लोग हमार सम्बन्धी अहईँ।”

यहोवा जवाब दिहस, “जा अउर ओनके खिलाफ लड़ा। इस्त्राएल क लोग एक दूसर क हिम्मत बढ़ाएन।” एह बरे उ पचे पहिले दिन क तरह फुन लड़इ गएन।

24तब इस्त्राएल क फउज बिन्यामीन क फउज क लगे आइ। इ जुद्ध क दूसर दिन रहा। 25बिन्यामीन क फउज दूसर दिन इस्त्राएल क फउज पइ हमला करइ बरे गिबा नगर स बाहेर आइ। इ समइ बिन्यामीन क फउज इस्त्राएल क फउजे क दूसर अट्ठारह हजार फउजियन क मार डाएन। इस्त्राएल क फउज क उ सबइ सबहिं प्रसिच्छित फउजी रहेन।

26तब सबइ इस्त्राएली लोग अउर सबहिं बेतेल नगर तलक गएन। उ ठउरे पइ उ पचे बइठेन अउर यहोवा क रोइके गोहराएन। उ पचे पूरा दिन साँझ तलक कछू नाही खाएन। उ पचे होमबलि अउर मेलबलि भी यहोवा बरे चढ़ाएस। 27इस्त्राएल क लोग यहोवा स एक तु सवाल पूछेन। (एन दिन परमेस्सर क साच्छीपत्र क सन्दूक बेतेल में रहा। 28पीनहास जउन एलीआज़ार क पूत रहा अउर एलीआज़ार हारून क पूत रहा नाउँ क एक तु याजक करार क सन्दूक क समन्वा सेवा करत रहा। इस्त्राएल क लोग पूछेन, “का हमका बिन्यामीन क लोगन क खिलाफ फुन लड़इ जाइ चाही। उ सबइ लोग हमार सम्बन्धी अहईँ या हम लोग जुद्ध करब बंद कइ देइ?”

यहोवा जवाब दिहस, “जा। काल्ह भियान मईँ ओनका हरावइ में तोहार मदद करब।”

29तब इस्त्राएल क फउज गिबा नगर क चारिहुँ कइँती आपन मनइयन क छुपाइ दिहस। 30इस्त्राएल क फउज तीसरे दिन गिबा नगर क खिलाफ लड़इ गइ। उ पचे जुद्ध बरे आपन मोर्चा संभालेन जइसा उ पचे पहिले किहे रहेन। 31बिन्यामीन क फउज इस्त्राएल क फउज स जुद्ध करइ बरे

गिबा नगर क बाहेर निकर आइ। इस्त्राएल क फउज पाछे हटी अउर उ बिन्यामीन क फउज क नगर क बहोतइ पाछे छोड़ देइ बरे धोखा दीन्ह गवा।

बिन्यामीन क फउज इस्त्राएल क फउज क कछू लोगन क वइसे ही मारब सुरू किहेन जइसे उ पचे पहिले मारे रहेन। इस्त्राएल क लगभग तीस मनई मारे गएन। ओनमाँ स कछू लोग मैदानन में मारे गए रहेन। ओनमाँ स कछू मनई सड़कियन पइ मारे गए रहेन। एक तु सड़क बेतेल क जात रही। दूसर सड़क गिबा क जात रही। 32बिन्यामीन क लोग कहेन, “हम पहिले क तरह जीतत अही।”

मुला इस्त्राएल क लोग पाछे भागत परात रहेन काहेकि उ पचे बिन्यामीन क लोगन क ओनके नगर स दूर सड़कियन पइ लियावइ चाहत रहेन। 33इस्त्राएल क फउजे क सबहिं लोग आपन ठउरन स हटेन। उ पचे बालतामार पइ रूकेन अउर जुद्ध बरे मोर्चा लगाएन। तब जउन लोग गिबा क पच्छिम में लुकान रहेन आपन छुपइ क ठउरन स दौड़ पड़ेन अउर गिबा पइ आक्रमण किहेन। 34इस्त्राएल क फउज क पूरे प्रसिच्छित दस हजार फउजियन गिबा नगर पइ हमला किहना। जुद्ध बड़ी भीसण रही। किन्तु बिन्यामीन क फउज आपन भंयकर विनास स अवगत नाहीं रहेन।

35यहोवा इस्त्राएल क फउज क उपयोग किहस अउर बिन्यामीन क फउज क हराइ दिहस। उ दिन इस्त्राएल क फउज बिन्यामीन क पच्चीस हजार एक सौ फउजियन क मार डाएस। उ सबइ सबहिं फउजी जुद्ध बरे प्रसिच्छित रहेन। 36इ तरह बिन्यामीन क लोग लखेन कि उ पचे हार गएन।

इस्त्राएल क फउज पाछे हटी। उ पचे पाछे हटेन काहेकि उ पचे अचानक हमला पइ निर्भर करत रहेन जेकरे बरे ओनकर मनइयन गिबा क निचके छुपा भवा रहेन। 37जउन मनई गिबा क चारिहुँ ओर लुकान रहेन उ सबइ गिबा नगर में टूट पड़ेन। उ पचे फइल गएन अउर उ पचे आपन तरवासन स नगर क हर एक क मार डाएन। 38इस्त्राएली फउज क दल अउ लुकाइके घात लगावइ वाले दल क बीच इ संकेत चीन्हा निहचित कीन्ह गवा रहा कि लुकाइके घात लगावइ वाला दल नगर में धुएँ क बिसाल बादर उड़ाइ।

39जुद्ध क उहइ समइ पइ बिन्यामीन क फउज लगभग तीस इस्त्राएल फउज क मार दिहस। उ पचे कहत रहेन, “हम वइसे जीतत अही जइसे पहिले जुद्ध में जीतत रहे।” 40किन्तु तबहिं धुएँ क बिसाल बादर नगर स उठब सुरू भवा। बिन्यामीन क फउजी मुडेन अउर धुएँ क लखेन। पूरा नगर आगी क लपटन में रहा। 41तब इस्त्राएल क फउज मुड़ी अउर लड़इ लाग। बिन्यामीन क लोग डर गए रहेन। अब उ पचे समुझ गएन कि ओन पइ तबाही आ गए रहेन।

42एह बरे बिन्यामीन क फउज इस्त्राएल क फउज क समन्वा स भाग पराइ खड़ी भइ। उ पचे रेगिस्तान कइँती भागेन। लेकिन उ पचे जुद्ध स बच न सकेन। इस्त्राएल क लोग नगरन स बाहेर आएन अउर ओनका मार डाएन। 43इस्त्राएल क लोग बिन्यामीन क लोगन क घेर लिहेन। उ पचे ओनका पाछा किहना। उ पचे ओनका अराम नाही करइ

दिहेन। उ पचे ओनका गिबा क पूरब क भुइँया में हराएन। 44इ तरह अट्टारह हजार वीर अउर ताकतवर बिन्यामीन क फउज क फउजी मारे गएन।

45बिन्यामीन क फउज मुडी अउर रेगिस्तान कइँती भागी परानी। उ पचे रिम्मोन क चट्टान नाउँ क ठउरे पइ पराइके गएन। किन्तु इस्राएल क फउज सड़कन पइ बिन्यामीन क फउज क पाँच हजार सिपाहियन क मार डाएन। उ पचे बिन्यामीन क लोगन क पाछा करत रहेन। उ पचे ओनकर पाछा गिदोन नाउँ क ठउरे तलक किहन। इस्राएल क फउज उ ठउरे पइ बिन्यामीन क फउज वहाँ दुइ हजार अउर सिपाहियन क मार डाएस।

46उ दिना बिन्यामीन क फउज क पच्चीस हजार फउजी मारे गएन। ओन सबहिं मनइयन अपन तरवार क संग बहादुरी स जुद्ध किहन। 47मुला बिन्यामीन क छः सौ मनई मुडेन अउर रेगिस्तान में पराइ गएन। उ पचे रिम्मोन क चट्टान नाउँ क ठउरे पइ गएन। उ पचे हुवाँ चार महीने तलक ठहरे रहेन। 48इस्राएल क लोग बिन्यामीन क भुइँया में लउटिके गएन। जउने नगरन में उ पचे पहोंचेन, ओन नगरन क मनइयन क उ पचे मार डाएन। उ पचे सबहिं जनावरन क भी मार डाएन। उ पचे जउन कछू पाइ सकत रहेन, ओका नस्ट कइ दिहन। उ पचे जउने नगर में गएन, ओका बार डाएन।

### बिन्यामीन क लोगन बरे मेहररूअन पाउब

**21** मिस्या में इस्राएल क लोग प्रतिग्या किहन। ओनकर प्रतिग्या इ रही, “हम लोगन में स कउनो आपन बिटिया क बिन्यामीन क परिवार समूह क कउनो मनई स बियाह नाही करइ देइ।”

2इस्राएल क लोग बेतेल नगर क गएन। इ नगर में उ सबइ परमेस्सर क समन्वा साँझ तलक बइठे रहेन। उ पचे जोर स अउर फुट-फुट कइ रोवत रहेन। 3उ पचे परमेस्सर स कहेन, “यहोवा, तू इस्राएल क लोगन क प्रमेस्सर अहा। अइसी भयंकर बात हम लोगन क संग कइसे होइ गइ अहइ? इस्राएल क परिवार समूहन में स एक परिवार समूह काहे कम होइ जाइ।”

4अगले दिन भिंसारे इस्राएल क लोग एक ठु वेदी बनाएन। उ पचे उ वेदी पइ परमेस्सर क होमबलि अउ मेलबलि चढ़ाएन। 5तब इस्राएल क लोग कहेन, “का इस्राएल क कउनो अइसा परिवार समूह अहइ जउन यहोवा क समन्वा हम लोगन क संग मिलइ नाही आवा ह?” उ पचे इ सवाल एह बरे पूछेन काहेकि उ पचे एक गंभीर प्रतिग्या किहे रहेन। उ पचे प्रतिग्या किहे रहेन कि जउन कउनो मिस्या में दूसर परिवार समूह क संग मिलइ बरे नाही आइ, मार डावा जाइ।

6इस्राएल क लोग आपन रिस्तेदारन, बिन्यामीन क परिवार समूह क लोगन बरे, बहोत दुःखी रहेन। उ पचे कहेन, “आजु इस्राएल क लोगन स एक ठु परिवार समूह कट गवा ह। 7हम लोग यहोवा क समन्वा प्रतिग्या किहे रहे कि हम आपन बिटियन क बिन्यामीन परिवार क कउनो मनई स

बियाह नाही करइ देब। हम लोगन क कइसे बिस्सास होइ कि बिन्यामीन क परिवार समूह क लोगन क बियाही बरे मेहररूअन मिलिहीं?”

8तब इस्राएल क लोग पूछेन, “इस्राएल क परिवार समूहन में स कउन मिस्या में हिआँ नाही आवा ह? हम लोग यहोवा क समन्वा एक संग आए अही। किन्तु एक परिवार समूह हिआँ नाही अहइ?” तब ओनका पता लाग कि इस्राएल क दूसर लोगन क संग यावेस गिलाद नगर क कउनो मनई हुवाँ नाही रहा। 9इस्राएल क लोग इ जानइ बरे कि हुवाँ कउन रहा अउर कउन नाही रहा, हर एक क गनेस। उ पचे पाएन कि यावेस गिलाद क कउनो भी हुवाँ नाही रहा। 10एह बरे इस्राएल क लोग बारह हजार फउजियन क यावेस नगर क पठएस। उ पचे ओन फउजियन स कहेन, “जा अउर यावेस गिलाद लोगन क मेहररूअन अउ गदेलन समेत आपन तरवार स मउत क घाट उतार द्या। 11तू पचन्क इ जरूर करइ क होइ। यावेस गिलाद में हर एक मनसेधू क मार डावा। उ मेहरारू क भी मार डावा जउन एक ठु मनसेधू क संग रहि चुकी होइ। किन्तु उ मेहरारू क जिन मारा जउन कउनो मनसेधू क संग कबहुँ सारीरिक सम्बन्ध न किहे होइ।” फउजियन इहइ किहन। 12ओन बारह हजार फउजियन यावेस गिलाद में चार सौ अइसी कुवाँरी कन्या क पाएन, जउन कउनो मनई क संग कबहुँ सारीरिक सम्बन्ध नाही किहे रहिन। फउजी ओन मेहररूअन क सीलो नगर क डेरा पइ लइ गएन। सीलो कनान भुइँया में अहइ।

13तब इस्राएल क लोग बिन्यामीन क लोगन क लगे एक ठु सँदिस पठएन। उ पचे बिन्यामीन क लोगन क संग सात्ति-सन्धि करइ क प्रस्ताव रखेन। बिन्यामीन क लोग रिम्मोन क चट्टान नाउँ क ठउरे पइ रहेन। 14एह बरे बिन्यामीन क लोग उ समइ इस्राएल क लोगन क पूरे परिवार क लगे लउटेन। इस्राएल क लोग ओनका ओन यावेस गिलाद क मेहररूअन क दिहन, जेनका उ पचे मारे नाही रहेन। किन्तु बिन्यामीन क सबहिं लोगन क बरे डेर मेहररूअन नाही रहिन।

15इस्राएल क लोग बिन्यामीन क लोगन क बरे दुःखी भएन। उ पचे ओनके बरे एह बरे दुःख महसूस किहन काहेकि यहोवा इस्राएल क परिवार समूहन क अलग कइ दिहे रहा। 16इस्राएल क लोगन क अग्रज लोग कहेन, “बिन्यामीन परिवार समूह क मेहररूअन मार डाली गइ अहइ। हम लोग बिन्यामीन क जउन लोग जिअत अहइ ओनके बियाह बरे मेहररूअन कहाँ पइहीं। 17बिन्यामीन क जउन लोग अबहिं जिअत अहइ, अपने परिवार क अगवा बढ़ावइ बरे ओनका गदेलन चाही। इ एह बरे करइ क होइ कि इस्राएल क एक परिवार समूह नस्ट न होइ। 18मुला हम लोग आपन बिटियन क बिन्यामीन लोगन क संग बियाह करइ क मंजूरी नाही दइ सकित। हम इ प्रतिग्या कइ चुका अही: ‘कउनो मनई जउन बिन्यामीन क मनई क पत्नी देइ, अभिसप्त होइ।’ 19हम लोगन क समन्वा एक ठु उपाय अहइ। इ सीलो नगर में यहोवा बरे उत्सव क समइ अहइ। इ उत्सव हिआँ हर बरिस मनावा जात ह। (सीलो नगर



बेतेल नगर क उत्तर में अहइ अउर उ सड़किया क पूरब में अहइ जउन बेतेल स सकेन क जात ह। अउर इ लबोना नगर क दक्खिन में भी अहइ।)

20एह बरे अग्रज लोग बिन्यामीन लोगन क सुझाव दिहेन। उ पचे कहेन, “जा, अउर अंगूर क बेलन क खेतन में लुकाइ जा। 21उत्सव में उ समइ क प्रतीच्छा करा जब सीलो क जुवतियन नाच में हीसा लेइ आवइँ। तब अंगूरे क खेतन में आपन लुकाइ क ठउरे स बाहेर निकर दउडा। तू पचन में स हर एक सीलो नगर क मेहररूअन क बिन्यामीन क भुइँया में लइ जा अउर ओकरे संग बियाह करा। 22ओन जुवतियन क बाप अउ भाई हम लोगन क निअरे अइही अउर सिकाइत करिही। किन्तु हम लोग ओनका इ तरह जवाब देब: ‘बिन्यामीन क लोगन पइ कृपा करा। ओन लोगन क ओन मेहररूअन क संग बियाह करइ द्या। उ पचे अपने बरे मेहररूअन एह बरे नहीं पावत अहइँ कि उ सबइ लोग तू पचन स लइइँ अउर उ पचे इ तरह स

मेहररूअन क लइ गवा अहइँ, एह बरे तू पचे आपन परमेस्सर क समन्वा कीन्ह गइ प्रतिग्या नाही तोइया। तू पचे प्रतिग्या किहे रह्या कि तू पचे ओनका मेहररूअन नाही देब्या, सचमुच, तू पचे बिन्यामीन क लोगन क मेहररूअन नाही दिहा परन्तु उ पचे तू पचन स मेहररूअन लइ लिहन। एह बरे तू पचे प्रतिग्या भंग नाही किहा।”

23एह बरे बिन्यामीन क परिवार समूह क लोग उहइ किहन। जब जुवतियन नाचत रहिन, तउ हर एक मनई ओनमों स एक-एक क धइ लिहस। उ पचे ओन मेहररूअन क लइ गएन अउर ओनके संग बियाह किहन। तउ उ पचे आपन भुइँया में लउटेन। बिन्यामीन क लोग भुइँया में फुन नगर बसाएन अउर रहइ लागेन।

24तब इस्राएल क लोग अपने घर लउटेन। उ पचे आपन आपने भुइँया अउर परिवार समूह में लउट गएन। 25ओन दिनन इस्राएल क लोगन क कउनो राजा नाही रहा। हर एक मनई उहइ करत रहा, जेका उ ठीक समुझत रहा।

# यहोसू

## परमेस्वर यहोसू क इस्राएल क अगुअइ करइ बोलावत ह

1 मूसा यहोवा क सेवक रहा। नून क पूत यहोसू मूसा क सहायक रहा। मूसा क मनइ क पाछे यहोवा यहोसू स बातन किहस। यहोवा यहोसू स कहेस, 2“मोर सेवक मूसा मर गावा। अब इ सबइ लोग अउर तू यरदन नदी क पार जा। तू पचन्क उ भुइँया मँ जाइ चाही जेका मइँ इस्राएल क लोगन क यानी तू पचन्क दइ देत अहउँ। 3मइँ मूसा क इ वचन दिहे रहेउँ कि इ भुइँया मइँ तू पचन्क देब। एँह बरे मइँ तू पचन्क उ हर एक पहुँटा देब, जउन कउने ठउरे पइ भी तू जाब्या।

4“इ भुइँयाँ अउर रेगिस्तानी भुइँया लोबानोन स लइके फरात नदी तलक, हितियन क पूरी भुइँया अउर हिआँ स लइके पच्छिम मँ भूमध्य सागर तलक क भुइँया तोहार इलाके क अन्दर तलक होइ। 5मइँ मूसा क संग रहेउँ अउर मइँ उहइ तरह तोहरे संग रहब। तोहरे पूरी जिन्नगी मँ, तू पचन्क कउनो भी मनई तोस स खिलाफ करइ मँ समरथ नाहीं होइ। मइँ तू पचन्क छोड़ब नाहीं। मइँ कबहु तू पचन्क दूर नाहीं होब।

6“यहोसू, तू पचन्क मजबूत अउ हिम्मती होइ चाही। तोहका, इ मनइयन क अगुआ होइ चाही उ जइसे पचे आपन भुइँया लइ सकइँ। इ उहइ भुइँया बाटइ जेका मइँ ओनका देइ क ओनके पुरखन क वचन दिहे रहेउँ। 7मुला तू पचन्क मजबूत अउ हिम्मती रहइ क होइ। तू पचन्क ओन आदेसन क मानब निहचय क संग करइ चाही, जेनका मोर सेवक मूसा तू पचन्क दिहस ह। दाहिने या बाए कइती मत मुड़ा, तउ तू जउन कछू करब्या ओहमाँ सफल होब्या। 8व्यवस्था क इ किताब हमेसा तोहरे दिमाग मँ होइ चाही। इ किताब क सावधानी स दिन-रात पढ़ब, ताकि तू हर उ कछू जउन एहमाँ लिखा भवा अहइ कइ सकब्या। अगर तू इ करब्या, तउ तू बुद्धिमान बनब्या अउर जउन कछू करब्या ओहमाँ सफल होब्या। 9याद राखा, कि मइँ तोहका मजबूत अउ हिम्मती बना रहइ क हुकुम दिहे रहेउँ। एँह बरे कबहुँ जिन डेराअ, काहेकि तोहार परमेस्वर यहोवा तोहरे संग सबहिँ जगह रही, जहाँ कहुँ तू जाब्या।”

## यहोसू क कार्य निर्वहण

10एँह बरे यहोसू लोगन क प्रमुखन क आदेस दिहस। उ कहेस 11“डेरा स होइके जा अउर लोगन क तइयार होइ क कहा। लोगन स कहा, ‘कछू खइया क तइयार कइ लेइँ। अबहिँ स तीन दिना पाछे, हम पचे यरदन नदी पार करब। हम पचे जाब अउ उ भुइँया क आपन कब्जा मँ लेब जेका परमेस्वर यहोवा तोहका दइ देत ह।”

12तब यहोसू रूबेन अउ गाद क परिवार समूहन स, अउ मनस्से क आधे परिवार समूह स बतियान। यहोसू कहेस, 13“ओका याद राखा, जउन यहोवा क सेवक मूसा तू सबन स कहे रहा। उ कहे रहा कि परमेस्वर, तोहार यहोवा तू पचन्क आराम अउर सांति क ठउर देइ। उ इ भुइँया क तू पचन्क देइ। तोहार पचन्क पत्नियन, तोहार पचन्क गदेलन अउ तोहार पचन्क जनावरन इ भुइँया मँ रहि सकत हीँ। 14मुला तोहार पचन्क जोधा लोग तोहरे पचन्क भइयन क संग यरदन नदी क जरुर पार करिहीं। तू पचन्क जुद्ध बरे तइयार रहइ चाही अउ आपन भुइँया लेइ मँ आपन भइयन क मदद करइ चाही। 15यहोवा तू पचन्क आराम देइ क एक जगह दिहेस बाटइ, अउर उ तोहरे पचन्क भइयन बरे वइसा ही करी। मुला तू पचन्क आपन भइयन क मदद बरे तब तलक करइ चाही जब तलक उ पचे उ भुइँया क नाहीं लइ लेतेन जेका यहोवा, तोहार परमेस्वर ओनका दइ देत अहइ। तब तू पचे यरदन नदी क पूरब आपन भुइँया मँ लउटि सकत ह। उहइ उ भुइँया अहइ जेका यहोवा क सेवक मूसा तू पचन्क दिहे रहा।”

16तब मनइयन यहोसू क जवाब दिहेन, “जउन भी करइ बरे तू हुकुम देब्या, हम पचे करब। जउने जगह पइ तू पठउब्या, हम पचे जाब! 17हम पचे पूरी तरह मूसा क हुकुम माना ह। उहइ तरह हम पचे सब मानब जउन तू कहब्या। हम पचे यहोवा स सिरिफ एक बात चाहित ह। हम पचे परमेस्वर यहोवा स इहइ माँग करित ह कि उ तोहरे संग वइसा ही रहइ जइसेन ही उ मूसा क संग रहा। 18तब, कउनो व्यक्ति तोहार हुकुम मानइ स इन्कार करत ह या कउनो मनई तोहरे खिलाफ खड़ा होत ह, तब उ मारी डावा जाइ। सिरिफ मजबूत अउ हिम्मती रहा!”

## यरीहो मँ गुप्तचर

2 नून क पूत यहोसू अउ सब मनइयन सित्तीम मँ डेरा डाए रहेन। यहोसू दुइ ठु गुप्तचरन क पठएस। कउनो दूसर मनई क पता नाहीं लाग कि यहोसू इ मनइयन क पठए रहा। यहोसू इ मनइयन स कहेए, “जा अउ भुइँया क जाँच कर, यरीहो सहर क होसियारी स लखा।”

एँह बरे उ पचे यरीहो गएन। उ पचे एक ठु रंडी क घर गएन अउर हुआँ ठहरेन। इ मेहरारू क नाउँ राहाब रहा।

2कउनो यरीहो क राजा स कहेस, “इस्राएल क कछू लोग आजु रात हमरी धरती पइ गुप्तचरी करइ आवा अहइँ।”

एँह बरे यरीहो क राजा राहाब क हिआँ इ खबर पउएस: “ओन मनइयन क छिपावा नही जउन आइके तोहार

हिआँ ठहरा अहई। ओनका बाहेर लिआवा। उ पचे मेदलेइ आपन देस में आवा अहई।”

4मेहरारु दुइनउँ मनई क छिपाइ रही। मुला मेहरारु कहेस, “उ पचे दुइनउँ मनई आए तउ रहेन, मुला मई नहीं जानत हउँ कि उ पचे कहीं स आए रहेन। 5सहर दुआर बन्द होइ क समइ उ पचे मनई साँझ क चला गएन। मई नहीं जानत हउँ कि उ पचे कहीं गएन। मुला अगर तू हाली जाब्या, तउ साइद तू पचे ओनका धइ लेब्या।” 6(राहाब उ सबइ स कहेस, मुला असिल में मेहरारु ओनका छते पइ पहोंचाइ दिहे रही, अउर ओनका उ चारा में छिपाइ दिहे रही, जेकर ढेर उ ऊपर लगाए रही।)

7एँह बरे इस्राएल क दुइ ठु मनइयन क खोज में राजा क मनई चला गएन। राजा क मनइयन क जरिये सहर छोड़ देइ क तुरन्त पाछे सहर क दुआर बन्द कइ दीन्ह गएन। उ पचे ओन ठउरन पइ गएन जहाँ स लोग यरदन नदी क पार करत रहेन।

8दुइनउँ मनई रात में सोवइ क तइयारी में रहेन। मुला मेहरारु छते पइ गइ अउ उ ओनसे बात किहस। 9राहाब कहेस, “मई जानत हउँ कि इ भुईया यहोवा तोहरे लोगन क दिहेस ह। तु पचे हम लोग क डेरावत अहा। इ देस में रहइवाले सबहि लोगन तू स बहोत डेरान अहई। 10हम पचे डेरान अही काहेकि हम पचे सुनि चुका अही कि यहोवा तू लोगन क मदद कइसे किहस ह। हम सुने अही कि तू पचे मिस्र स बाहेर आवा अहा तउ यहोवा लाल सागर क पानी क सोखाइ दिहस। हम पचे इ भी सुने अही कि तू लोग दुइ ठु एमोरी राजा लोग, सीहोन अउ ओग क संग का किहया। हम पचे सुने अही कि तू लोग यरदन नदी क पूरब में रहइवाले ओन दुइ राजा लोगन क कइसे पूरी तरह स हरा दिहेस। 11हम पचे ओन सबइ घटना क सुने अही अउर बहोत जियादा डेराइ ग अही अउर अब हम में स कउनो मनई ऐतना हिम्मती नहीं कि तू लोगन स लड़ि सकइ। काहेकि तोहार परमेस्सर यहोवा ऊपर सरग अउ तरखाले भुईया पइ हुकुमत करत ह। 12तउ अब, मई चाहत हउँ कि तू पचे मोका वचन द्या। मई तोहार पचन्क मदद किहेउँ ह अउ तू पचन्पइ दया किहेउँ ह। एँह बरे यहोवा क समन्वा वचन द्या कि तू पचे हमरे परिवारे पइ दया करब्या। कृपा कइके मोका कछू निसान द्या कि तू पचे अइसा करब्या। 13मोसे तू पचे इ कहा कि तू पचे मोरे परिवार क जिअत रहइ देब्या जेहमाँ मोरे पिता, भाई, बहिनियन अउर ओनके परिवार होइहीं। तू पचे प्रण करा कि तू पचे हमका मउत स बचउब्या।”

14ओ मनइयन ओका मान लिहन। उ पचे कहेन, “हम तोहरी जिन्नगी बरे अपनी जिन्नगी क बाजी लगाइ देब। कउनो मनई स न बतावा कि हम पचे का करत अही। तब जब यहोवा हम लोगन क हमार देस देइ, तब हम पचे तोहे पइ दया करब। तू हम पचन्पइ बिस्सास कइ सकत ह।”

15उ मेहरारू क घर सहर क देवारे में देवारे क एक ठु हीसा क रूप में बना रहा। एँह बरे उ मेहरारू सहर क देवारे क अन्दर अउर बाहेर क हीसा में रहर रहेन। एँह बरे उ मेहरारू लसुरी क उपयोग कइ क ओनका आपन खिड़की

स नीचे (सहर क बाहेर भुईया प) उतारहेस। 16तब उ मेहरारू ओनसे कहेस, “पच्छिम क पहाड़ियन में जा, जेहसे राजा क सिपाही तू पचन्क एकाएक न घर पकड़ई। हुआँ तीन दिन छुपा रहा। राजा क मनई जब लउटि आवई तब तू पचे आपन रहे पइ जाइ सकत ह।”

17मनइयन ओसे कहेन, “हम पचे तोहका वचन दिहे अही। मुला तोहका एक ठु काम करइ क होइ, नहीं तउ हम पचे आपन वचन बरे जिम्मेदार नहीं होब। 18तू इ लाल लसुरी क उपयोग हम पचन्क बचिके पराइ जाइ बरे करति अहा। हम पचे इहइ ठउर में लउटब। उ समइ तोहका इ लाल लसुरी क आपन खिड़की स जरुर बाँधइ क होइ। तोहका आपन पिता, आपन महतारी, आपन भाई अउर आपन पूरा परिवार क आपन संग इ घरे में रखइ क होइ। 19हम पचे हर एक मनई क सुरिच्छत रखब जउन इ घरे में होइ। अगर तोहरे घरे क भीतर कउनो क चोट पहोंचत ह, तउ ओकरे बरे हम जिम्मेदार होब। अगर तोहरे घरे स कउनो मनई बाहेर जाइ, तउ उ मार डवा जाइ सकत ह। उ मनई बरे हम जिम्मेदार नहीं होब। इ ओकर आपन दोख होइ। 20हम पचे इ वाचा तोहरे संग करत अही। मुला अगर तू कउनो क बतउबिउ कि हम पचे क करत अही, तउ हम पचे आपन इ वचन स अजाद होब।”

21मेहरारू जवाब दिहस, “मई ऐँका अंगीकार करत हउँ।” मेहरारू नमस्कार किहस अउर मनइयन ओकर घर छोड़ दिहन। मेहरारू खिड़की में लाल लसुरी बाँधिस।

22उ पचे ओकरे घरे क तजिके पहाड़ियन में चला गएन जहाँ उ पचे तीन दिन रुकेन। राजा क मनइयन पूरी सड़किया पइ ओनकर खोजबीन किहस। तीन दिन पाछे राजा क मनइयन खोज बन्द कइ दिहन। उ पचे ओनका नहीं हरे पाएन, सो उ पचे सहर में लउटि आएन। 23तब दुइनउँ मनइयन यहोसू क लगे लउटि आएन। मनइयन पहाड़ियन क तजेन अउर नदी पार किहन। उ पचे नून क पूत यहोसू क लगे गएन अउर जउन कछू ओनके संग भए रहेन, उ सबइ यहोसू क बताएन। 24उ पचे यहोसू स कहेन, “यहोवा फुरइ सारा भुईया हम लोगन क दइ दिहस ह। उ देस क सबहि लोग हम पचन्स डेरान अहई।”

### यरदन नदी पइ अचरजे क काम

3 दूसर दिन भिन्सारे यहोसू अउ इस्राएल क सबहि लोग उठेन अउ उ पचे सिस्तीम क छोड़ि दिहेन। उ पचे यरदन नदी तलक जात्रा किहन। उ पचे पार करइ स पहिले यरदन नदी पइ डेरा डएन। 2तीन दिन पाछे सेनापति डेरा क बीच स होइके निकरेन। 3उ पचे लोगन क हुकुम दिहेन। उ पचे कहेन, “तू लोग याजक अउ लेवी परिवार समूह क आपन परमेस्सर यहोवा क करार क सन्दूख लइ जात भए लखब्या। उ समइ तू पचे जहाँ हवा, ओका तजि देब्या अउ ओनके पाछे चलब्या। 4मुला ओनके बहोत निअरे जिन रहा। लगभग एक हजार गज दूर ओनके पाछे रहा। तू पचे यह सासता क जात्रा कबहुँ नहीं किहया ह। एँह बरे अगर तू पचे ओनके पाछे चलब्या, तउ तू पचे जान लेब्या कि तू पचन्क कहीं जाइ क अहइ।”

5तब यहोसू लोगन स कहेस, “आपन क पवितर करा, काहेकि काल्ह भियान यहोवा तू लोगन क बीच में चमत्कार देखाइ।”

6तब यहोसू याजकन स कहेस, “करार क सन्दूख क उठावा अउर लोगन क समन्वा स नदी क पार चला।” एँह बरे याजक लोग सन्दूख क उठाएन अउर ओका लोगन क समन्वा लइ गएन।

7तब यहोवा यहोसू स कहेस, “आजु मई इस्त्राएल क लोगन क निगाह में तू पचन्क महान मनई बनाउब सुरु करब। तब लोग जनिहीं कि मई तोहरे सबन क संग वइसेन ही अहउँ जइसेन में मूसा क संग रहेउँ। 8याजक लोग करार क सन्दूख लइ चलिहीं। याजक लोगन स इ कहा, ‘यरदन नदी क किनारे तलक जा अउर यरदन नदी में रुकि जा।’”

9तब यहोसू इस्त्राएल क लोगन स कहेस, “आवा अउर आपन परमेस्सर यहोवा क हुकुम सुना। 10इ इ बात क प्रमाण अहइ कि यहोवा तू लोगन क संग अहइ अउर उ तोहरे पचन क सत्रु कनान क लोगन हित्तिथन, हिब्वियन, परिज्जियन, गिर्गासियन, एमोरी लोगन अउर यबूसी लोगन क हराइ अउर ओनका उ देस तजइ क विवस करी। 11प्रमाण हिआँ अहइ। सारा संसार क सुआमी क करार क सन्दूख उ समइ तोहरे पचन्क अगवा चली जब तू पचे यरदन नदी पार करब्या। 12आपन बीच स बारह मनइयन क चुना। इस्त्राएल क बारह परिवार समूहन में स हर एक स एक मनई चुना। 13याजक लोग समूचे संसार क सुआमी, यहोवा क करार क सन्दूख क लइके चलिहीं। उ पचे उ सन्दूख क तोहरे समन्वा यरदन नदी में लइ जइहीं। जब उ पचे पानी में घुसिहीं, तउ यरदन क पानी क बहब रुकि जाइ। पानी रुकि जाइ अउर उ जगह क पाछे ढेर में ठाड़ होइ जाइ।”

14याजक मनइयन क समन्वा करार क सन्दूख लइके चलेन अउर मनइयन यरदन नदी पार करइ बरे डेरा क तजि दिहन। 15(फसिल कटइ क समइ यरदन नदी आपन किनारन स ऊपर बहत ह। एँह बरे नदी पूरी तरह भरी भई रही।) सन्दूख लइ चलइवालन याजक लोग नदी क किनारे पहोचैन। उ पचे पानी में गोड़ धरेन। 16अउर फौरन उहइ समइ पानी क बहब बन्द होइ गवा। पानी नदी क ऊपर ढेर में खड़ा होइ गवा। पानी नदी क चढ़व कइँती लम्बी दूरी तलक लगातार आदम तलक (सारतान क निअरे एक ठु सहर) ठाड़ होत चला गवा। मनइयन यरीहो क लगे नदी क पार किहन। 17याजक लोग यहोवा क करार क सन्दूखे क नदी क बीच लइ जाइके खड़ा होइ गएन अउर हुवाँ भुईँया झुरान होइ गएन जब तलक इस्त्राएल क लोग यरदन नदी क झुरान भुईँया स होत भए चलिके पार नाहीं करइ लइ, तब तलक याजक हुआँ ओनका जोहत रहेन।

#### मनइयन क सुमिरन करावइ बरे सिलन

4 जब सबहिँ लोग यरदन नदी क पार कइ लिहन तब यहोवा यहोसू स कहेस। 2मनइयन में स बारह ठु मनई चुना। हर एक ठु परिवार समूह स एक ठु मनई चुना।

3मनइयन क हुकुम द्या कि उ पचे हुआँ नदी क बीच में स सिलन क बटोरा जहाँ याजक लोग खड़ा अहइ। ओन बारह सिलन क आपन संग लइ जा। ओन बारह सिलन क उ जगह पइ धरा जहाँ तू पचे आजु रात ठहरा।”

4एँह बरे यहोसू हर एक परिवार समूह स एक ठु मनई चुनेस तब उ बारह मनइयन क एक संग बोलाएस। 5यहोसू ओनसे कहेस, “नदी में हुआँ तलक जा जहाँ पवितर सन्दूख अहइ जेहमाँ तोहार परमेस्सर यहोवा क वाचा अहइ। तू पचन में स हर एक क एक सिला क खोज करइ चाही। इस्त्राएल क बारह परिवार समूहन में स हर एक बरे एक ठु सिला होइ। उ सिला क आपन काँधि पर ढोवा। 6इ सबइ सिलन याद रखइ बरे तोहरे पचन्क बीच चीन्हा होइहीं। भविस्स में तोहर पचन्क गदेलन इ पुछिहीं, ‘इ सबइ सिलन क का महत्व अहइ?’ 7गदेलन स कहा कि यहोवा यरदन नदी में पानी क बहब बन्द कइ दिहे रहा। जब यहोवा क करार क सन्दूख नदी क पार किहस तब पानी क बहब बन्द होइ ग रहा। इ सिलन इस्त्राएल क लोगन बरे इ घटना सदा ही यादगारी होब्या।”

8एँह बरे इस्त्राएल क मनइयन यहोसू क हुकुम मानेन। उ पचे यरदन नदी क बीच स बारह सिलन लइ गएन। इस्त्राएल क बारह परिवार समूहन में स हर एक बरे एक ठु सिला रही। उ पचे उ वइसेन ही किहन जइसा यहोवा यहोसू क आदेस दिहे रहा। उ पचे मनई सिलन क आपन संग लइ गएन। तब उ पचे ओन सिलन क हुआँ रखेन जहाँ उ पचे आपन डेरा डाएन। 9(यहोसू क भी यहोवा क पवितर सन्दूखे क ढोवइवाला याजकन जहाँ खड़ा रहेन, हुआँई यरदन नदी क बीच में बारह सिलन रखइ क रहेन। उ सबइ सिलन आजु भी उ जगह पइ अहइँ।)

10यहोवा यहोसू क आदेस दिहे रहा कि उ लोगन स कहइ कि ओनका का करइ चाही। उ सबइ उहइ बातन रहिन, जेनका जरुर करइ बरे मूसा यहोसू स कहे रहा। एँह बरे पवितर सन्दूख क ढोवइवाला याजकन नदी क बीच में तब तलक खड़ा ही रहेन, जब तलक इ सबइ सबहिँ काम पूरा नाहीं होइ गएन। मनइयन हाली किहन अउ नदी पार कइ गएन। 11जब लोग नदी क पार कइ लिहेन, तब याजक यहोवा क सन्दूख लइके मनइयन क समन्वा आएन।

12रूबेन अउर गादी क परिवार समूह, अउ मनस्से क आधा परिवार समूह, मूसा ओनका जउन करइ क कहे रहा, किहस। इ मनइयन दूसर लोगन क समन्वा नदी क पार किहेन। इ सबइ लोग जुद्ध बरे तइयार रहेन। इ सबइ लोग इस्त्राएल क दूसर लोगन क उ देस क लेइ में मदद करइ जात रहेन, जेका यहोवा ओनका देइ क वचन दिहे रहा। 13लगभग चालीस हजार फउजी, जउन जुद्ध बरे तइयार रहेन, यहोवा क समन्वा स गुजरेन। उ पचे यरीहो क मइदान कइँती बढ़त रहेन।

14उ दिन यहोवा इस्त्राएल क सबहिँ लोगन क निगाह में यहोसू क एक महान मनई बनाइ दिहस। उ समइ स अगवा लोग यहोसू क सम्मान करइ लागेन। उ पचे यहोसू क सम्मान जिन्नगी भइ वइसेन ही करइ लागेन जइसेन मूसा क करत रहेन।

15जउने समइ सन्दूख लइ ढोवइवाला याजकन अबहिं नदी में खड़ा ही रहेन, यहोवा यहोसू स कहेस। 16“याजकन क नदी स बाहेर आवइ क हुकुम द्या।”

17एँह बरे यहोसू याजक लोगन क आदेस दिहस। उ कहेस, “यरदन नदी क बाहेर आवा।”

18याजक लोग यहोसू क आग्या मानेन। उ पचे सन्दूखे क लइके नदी स बाहेर आएन। जब याजक लोगन क गोड़ नदी क दूसरे कइँती भुइँया क छुएन, तब नदी क पानी फुन बहइ लाग। पानी फुन किनारन क ऊपर स वसाइ बहत लाग जइसे इ सबइ लोगन क नदी पार करइ क पहिले रहा।

19मनइयन यरदन नदी क पहिले महीना क दसाँ दिन पार किहन। मनइयन यरीहो क पूरब गीलगाल में डेरा डाएन। 20मनइयन ओन बारह सिलन क आपन संग लइ चलत रहेन जेनका उ पचे यरदन नदी स निकारे रहेन अउर यहोसू ओन सिलन क गीलगाल में कायम किहे रहा। 21तब यहोसू लोगन स कहेस “भविस्स में तोहार गदेलन आपन महतारी अउर बाप स पूछिहीं, ‘इ सबइ सिलन क का महत्व अहइ?’ 22तू पचे गदेलन क बतउब्या, ‘इ सबइ सिलन हम लोगन क इ सुमिरन करावइ मैं मदद करत हीं कि इस्त्राएल क लोग कउने तरह झुरान भुइँया पइ स यरदन नदी क पार किहन। 23तोहार परमेस्सर यहोवा नदी क पानी बहब रोक दिहस। नदी तब तलक झुरान रही जब तल इस्त्राएल क लोग नदी क पार नहीं कइ किहन। यहोवा यरदन नदी पइ लोगन बरे उहइ किहस, जउन उ पचे लोगन बरे लाल सागर पइ किहे रहेन। याद करा कि यहोवा लाल सागर पइ पानी क बहब एँह बरे रोके रहा कि लोग ओका पार कइ सकइँ।’ 24यहोवा इ एँह बरे किहस कि इ देस क सबहिं लोग जान लेइँ कि तोहार परमेस्सर यहोवा महान सक्ती धरत ह जेहसे लोग सदा ही यहोवा तोहरे परमेस्सर स डेरात रहइँ।”

5 इ तरह, यहोवा यरदन नदी क तब तलक झुरान राखेस जब तलक इस्त्राएल क लोग ओका पार नहीं कइ लिहन। यरदन नदी क पच्छिम में बसइयन एमोरी राजा लोग अउर भूमध्य सागर क किनारे पइ बसइयन कनानी राजा लोग एकरे बारे में सुनेन अउर उ पचे बहोत जियादा डेराइ ग रहेन। ओकरे पाछे उ पचे मैं इस्त्राएल क लोगन क विरुद्ध जुद्ध करइ क हिम्मत नहीं रहि गएन।

### इस्त्राएलियन क खतना

2उ समइ, यहोवा यहोसू स कहेस, “चकमक पाथर क छूरी बनावा अउर इस्त्राएल क लोगन क खतना फुन करा।”

3एँह बरे यहोसू चकमक पाथर क छूरी बनाएस। तब उ इस्त्राएल क लोगन क खतना क रीति गिबआत हाअरलोत में पूरा किहस।

4-7इहइ कारण अहइ कि यहोसू ओन सबहिं मनइयन क खतना किहस, जउन इस्त्राएल क लोगन क जरिये मिस्त्र छोड़ देइ क पाछे फउज में रहइ क उम्र क होइ ग रहेन। रेगिस्तान में रहइ क समझ ओन फउजियन में स कई लोगन यहोवा क बात नहीं मानेन। एँह बरे यहोवा ओन

मनइयन क अभिसाप दिहे रहा कि उ पचे “दूध अउ सहद क नदियन वाले भुइँया” क नहीं लखि पाइँही। यहोवा हमरे पुरखन क उ भुइँया देइ क वचन दिहे रहा, मुला इ सबइ मनइयन क कारण लोगन क चालीस बरिस तलक रेगिस्ताने में भटकइ क पड़ा अउर इ तरह उ सबइ फउजी मरि गएन अउर ओनकर जगहिया ओनकइ बेटवन लइ लिहन। मुला मिस्त्र स होइवाली जात्रा में जेतने गदेलन रेगिस्ताने में पइदा भ रहेन, ओनमाँ स कउनो क खतना नहीं होइ सका। एँह बरे यहोसू ओनकइ खतना किहस।

8यहोसू सबहिं मनइयन क खतना पूरा किहस। उ पचे तब तलक डेरा में रहेन, जब तलक तन्दुरुस्त नहीं भएन।

### कनान में पहला फसह पर्व

9उ समइ यहोवा यहोसू स कहेस, “जब तू मिस्त्र में गुलाम रह्या तब तोहका गुलामी क लज्जा रह्या। मुला आजु मइँ तोहार लज्जा दूर किहेउँ ह।” एँह बरे यहोसू उ जगह क नाउँ गिलगाल धरेस अउर उ जगह आजु भी गिलगाल कही जात ह।

10जउने समइ इस्त्राएल क लोग यरीहो क मइदान में, गिलगाल क जगह डेरा डाए रहेन, उ पचे फसह पर्व मनावत रहेन। इ महीना क चउदहवाँ दिन क साँझ क रहा। 11फसह पर्व क पाछे, अगला दिन मनइयन अनाज क उ खइया क खाएन जउन भुइँया पइ उगि रहा। उ पचे बेखमीरे क रोटी अउर भूँजा अनाज खाएन। 12उ दिना जब मनइयन भोजन कइ लिहन, ओकरे पाछे सरग स खास भोजन क आउब बन्द होइ ग। ओकरे पाछे, इस्त्राएल क लोग सरग स बिसेख भोजन नहीं पाएन। ओकरे पाछे उ पचे उहइ भोजन खाएन जउन कनान में पइदा होइ रहा।

13जब यहोसू यरीहो क निअरे रहा तब उ ऊपर आँखी उठाएस अउर उ आपन समन्वा एक तु मनई क लखेस। उ मनई क हाथे मैं एक तु तरवार रही। यहोसू उ मनई क लगे गवा अउ ओहसे पूछेस, “का तू हमरे मीतन में स कउनो एक अहा या हमार दुस्मनन में स?”

14उ मनई जवाब दिहस, “मइँ दुस्मन नहीं हउँ। मइँ यहोवा क फउज क सेनापति अहउँ। मइँ अबहुँ-अबहुँ तोहरे लगे आवा हउँ।”

तब यहोसू आपन मूँड़ भुइँया तलक आपन सम्मान परगट करइ बरे निहुराएन। उ पूछेस, “का मोरे सुआमी क मोर बरे कउनो हुकुम अहइ? मइँ तोहार सेवक अहउँ।”

15यहोवा क फउज क सेनापति जवाब दिहस, “आपन पनही उतारा। जउन जगह पइ तू खड़ा अहा उ ठउर पवित्त अहइ।” एँह बरे यहोसू ओकर हुकुम मानेस।

### यरीहो पइ कब्जा

6 यरीहो सहर क दुआर बन्द रहेन। उ सहर क लोग डेरान रहेन काहेकि इस्त्राएल क लोग निअरे रहेन। कउनो सहर में नहीं जात रहा अउर कउनो सहर स बाहेर नहीं आवत रहा।

2तब यहोसू यहोवा स कहा, “लखा, मइँ यरीहो सहर क तोहरे अधिकार में दइ दिहेउँ ह। एँकर राजा अउर एकर सारे

सिपाही तोहरे मातहत अहईं। 3छः दिना तलक हर एक दिन आपन फउज क संग सहर क चारिहुँ कइँती गस्त करा। 4भेड़ क सींगन क तुरहियन क लइके सात याजकन क चलइ द्या। याजकन स कहा कि उ पचे पवितर सन्दूखन क समन्वा चलइँ। सतएँ दिन सहर क चारिहुँ कइँती सात फेरा करा। सतएँ दिन याजक लोगन स कहा कि उ पचे चलइ क समइ तुरही बजावईं। 5याजक लोग तुरहियन स खूब जोर क अवाज करिहीं। जब तू उ अवाज सुना तउ तू सब लोगन स चिचियाब सुरु करइ कहा। जब तू अइसा करब्या तउ सहर क देवारन भहराइ जइहीं। तब तोहार लोग सीधा सहर में जइहीं।”

6इ तरह नून क पूत यहोसू याजकन क बटोरेस। यहोसू ओनसे कहेस, “यहोवा क पवितर सन्दूख क लइ चला। सात याजकन क भी तुरही लइ चलइ बरे ल्या। ओन याजकन क सन्दूखे क समन्वा चलइ चाही।”

7तब यहोसू लोगन क हुकुम दिहस, “जा अउर सहर क चारिहुँ कइँती ताकत क परिक्रमा करा। अस्त्र-सस्त्र वाले फउजी यहोवा क पवितर सन्दूखे क अगवा चलइँ।”

8जब यहोसू लोगन स बोलब पूरा किहस तउ यहोवा क समन्वा सात याजक लोग चलब सुरु किहेन। उ पचे तुरहियन लिए भए रहेन। चलत समइ उ पचे तुरहियन बजावत रहेन। यहोवा क सन्दूख क लइके चलइवालन याजक लोग ओनके पाछे चलन रहेन। 9अस्त्र-सस्त्र धारण करइवाले फउजी याजक लोगन क अगवा चलत रहेन। याजक तुरही बजावत रहेन। बचा भवा मनई तुरही बजावत भए पवितर सन्दूख क पाछे चलत रहेन। 10मुला यहोसू ओनका आवाज न लगइ बरे हुकुम दिहस। उ कहेस, “जिन बोला अउ नाही आवाज करा जब तलक कि मई हुकुम न दइ। मोरे कहइ क समइ तू पचे ललकार सकत ह।”

11एँह बरे यहोसू याजक लोगन क यहोवा क पवितर सन्दूख क संग सहर क चारिहुँ कइँती लइ चलइ क हुकुम दिहस। तब उ पचे आपन डेरा में लउटि गएन अउर रात भइ हुवँइ ठहरेन।

12दूसर दिन, भिन्सारे यहोसू उठा। याजक फिन यहोवा क पवितर सन्दूख क लइके चलेन। 13अउर सातउँ याजक लोग सात तुरही लइके यहोवा क पवितर सन्दूख क समन्वा बजावत भएन चलेन। उ पचे कदम स कदम मिलावत रहेन। ओनके समन्वा अस्त्र-सस्त्र धारणकरइवालन फउजी चलत रहेन। अस्त्र-सस्त्र धारणकरइवालन फउजी जउन याजक लोग तुरहियन बचावत रहेन क संग यहोवा क सन्दूख क पाछे चलत रहेन। 14एँह बरे दूसर दिन, ओन सबइ लोग एक दाई सहर क चारिहुँ कइँती चक्कर लगाएन अउर तब उ पचे आपन डेरन में लउटि गएन। उ पचे लगातार छः दिन तलक इ किहन।

15सतएँ दिन उ पचे भोर में उठेन अउर उ पचे सहर क चारिहुँ कइँती सात चक्कर लगाएन। उ पचे उहइ तरह सहर क चक्कर लगाएन जउने तरह उ पचे ओकरे पहिले लगाइ चुका रहेन, मुला उ दिन उ पचे सात चक्कर लगाएन। 16जब उ पचे सतईँ दाई सहर क चक्कर लगाएन तउ याजक लोग आपन तुरही बजाएन। उ समइ यहोसू आदेस

दिहस, “अब तू जोर स आवाज लगा। यहोवा इ नगर तू पचन्क देत अहइ। 17सहर अउ एहमाँ क हर एक चीज यहोवा क अहइ।\* सिरिफ पतुरिया राहाब अउ ओकरे घरे में रहइवाले लोग ही जिअत रइहीं। इ सबइ मारा नाही जाइ चाही काहेकि राहाब ओन दुइनउँ गुप्तचरन क मदद किहे रही। 18इहउ सुमिरा कि हम क एँकरे अलावा दूसर चिजियन्क बरबाद करइ क अहइ। ओन चिजियन्क जिन ल्या। अगर तू पचे ओन चिजियन्क लेत अहा अउर आपन डेरन में लिआवत अहा तउ तू पचे खुद बरबाद होइजाब्या अउर तू पचे आपन सबहिँ इस्त्राएली लोगन पइ भी मुसीबत लिअउब्या 19सबहिँ चाँदी, सोना अउर लोहा क बनी चिजियन यहोवा क अहईं। इ सबइ चिजियन यहोवा क खजाने में ही धरी जाइ चाही।”

20याजक लोग तुरही बजाएन। मनइयन तुरहियन क अवाज सुनेन अउर आवाज लगवत सुरु किहेन। देवारन भहरानिन अउर लोग सीधे सहर में धावइ लागेन। इ तरह इस्त्राएल क लोग सहर क हराएन। 21मनइयन सहर क हर एक चीज बरबाद किहेन। उ पचे हुआँ क हर एक जिअत परानी क बरबाद किहेन। उ पचे नउजवान, बुढवन, जवान मेहररुअन, बुढियन, भेड़िन अउर गदहन क मार डएन।

22यहोसू दुइनउँ गुप्तचरन स बतियान। उ कहेस, “पतुरिया क घरे जा। ओका बाहेर लइ आवा। सबइ मनइयन क बाहेर लइ आवा अउर ओन लोगन क भी बाहेर लइ आवा जउन ओकरे संग अहईं। इ तू पचे एँह बरे करा कि तू पचे ओका वचन दिहे अहा।”

23दुइनउँ मनई घर में गएन अउर राहाब क बाहेर लिआएन। उ पचे ओकर पिता, महतारी, भाइयन अउ ओकर समूचइ परिवार अउ ओकरे साथे क दूसर सबहिँ क बाहेर निकारेन। उ पचे इस्त्राएल क डेरा क बाहेर इ सबहिँ लोगन क सुरच्छित रखेन।

24तब इस्त्राएल क लोग सारा सहर जराए दिहन। उ पचे सोना, चाँदी, काँसा, अउर लोहा स बनी चिजियन क अलावा सबहिँ चिजियन क जराए दिहन। इ सबइ चिजियन यहोवा क खजाने बरे बचाइ लीन्ह गइन। 25यहोसू राहाब, ओकर परिवार अउ ओकरे रिस्तेदारन क बचाइ लिहस। यहोसू ओनका जिअत रहइ दिहस काहेकि राहाब ओन लोगन क मदद किहे रही, जेनका उ यरीहो में जासूसी करइ बरे पठए रहा। राहाब आज भी इस्त्राएल क लोगन में आपन सन्ताने क रूप में रहति ह।

26उ समइ, यहोसू किरिया खाएस। उ कहेस:

“कउनो मनई जउन यरीहो सहर क फिन निर्माण क जतन करी यहोवा कइँती स अभिसापित होब्या। जउन मनई सहर क नीव रखी, आपन पहिलउटी बटवा क खोइ। जउन मनई फाटक लगाइ उ आपन सबन त लहुरा बटवा क खोई।”

27एह बरे यहोवा, यहोसू क संग रहा अउर इ तरह यहोसू पूरे भुईया में प्रसिद्ध होइ गवा।

**हर एक चीज यहोवा क अहइ** एँकर अक्सर इ अरथ होत रहा कि सबइ चीजन मन्दिर क कोसागार में जमा होत रहिन या बरबाद कइ दिन्ह जात रहिन ताकि दूसर लोग ओनकर प्रयोग न कइ सकईं।

## आकान क पाप

7 मुला इस्राएल क लोग परमेस्सर क आग्या नाहीं मानेन। यहूदा परिवार समूह क एक मनई आकान कर्मी क पूत जउन जब्दी क पूत रहा। आपन संग कछू वर्जित चिजियन धइ लिहिस जेनका बरबाद करइ क रहा। एँह बरे यहोवा इस्राएल क लोगन पइ कोहाइ गवा। जब उ पचे यरीहो क हराइ चुकेन तब यहोसू कछू लोगन क पठाएस। ऐ, बेतेल क पूरब बेतावेन क लगे रहा। यहोसू ओनसे कहेस, “ऐ जा अउर उ छेत्र क कमजोरियन क लखा।” एँह बरे लोग उ देस में जासूसी करइ गएन।

3पाछे उ मनईयन यहोसू क लगे लउटिके आएन। उ पचे कहेन, “ऐ कमजोर छेत्र अहइ। हम लोगन क ओनका हरावइ बरे आपन सबहि लोगन क जरूरत नाहीं पड़ी। हुओं लइइ बरे दुइ हजार या तीन हजार मनइयन क पठवा। आपन सबहि फउजन क हुओं उपयोग करइ क जरूरत नाहीं अहइ। हुओं पइ थोड़ा मनई हम लोगन क खलाफ लइइवाला अहइ।”

4-5एँह बरे लगभग तीन हजार मनईयन ऐ क खिलाफ गएन। मुला ऐ क लोग लगभग छत्तीस इस्राएल क मनइयन क जंग में मार गिराएन अउ बचा भवा इस्राएल क लोग पराइ गएन। ऐ क लोग सहर-दुआर स लगातार पाथर क खदानन तलक पाछा किहन। इ तरह ऐ क लोग ओनका ढलवान पइ बुरी तरह हराएन।

जब इस्राएल क लोग इ लखेन तउ उ पचे बहोत डेराइ गएन अउर आपन हिम्मत हार गएन। 6जबहिं यहोसू एकरे बारे में सुनेस तउ उ आपन ओढ़ना फाड़ि डाएस। उ पवितर सन्दूखे क समन्वा भुईया पइ ओलरा। यहोसू हुओं साँझ तलक पड़ा रहा। इस्राएल क नेता लोग इहइ किहन। उ पचे आपन मूँडि पइ धूरि डाएन।

7तब यहोसू कहेस, “यहोवा, मोर सुआमी। तू हमरे लोगन क यरदन नदी क पार लिआया। मुला तू हमका ऐतनी दूर काहे लिआया, का सिरिफ एमोरी लोगन क जरिये स हम लोगन क बरबाद करइ बरे लिआया? हम लोग यरदन नदी क दूसरे किनारे पइ ठहरा होइत अउर सन्तुट्ट रहित। 8मोरे मालिक, मई आपन जिन्नगी क कसम खाइके कहत हउँ कि मई तोहस का कहइ सकत हउँ। इस्राएल आपन दुस्मनन क पास स भाग गहेस ह। 9कनानी अउ इ देस क सबहि लोग इ सुनिहीं जउन भवा, तब उ पचे हम लोगन क खिलाफ अइहीं अउर हम सबन क मारि डइहीं। तब इ तू आपन महान नाउँ क रच्छा बरे का करब्या?”

10यहोवा यहोसू स कहेस, “खड़ा होइ जा। तू आपन मुँह क बल काहे गिरा अहा? 11इस्राएल क लोग मोरे खिलाफ पाप किहन। उ पचे मोरी उ करार क तोड़ें, जेका मई ओनका संग किहेस रहेउँ। उ पचे उ चिजियन में स कछू चिजियन लिहन जेनका बरबाद करइ क हुकुम मई दिहेउँ ह। उ पचे मोर चोरी किहेन ह। उ पचे लबार बात कहेन ह। उ पचे उ सबइ चिजियन आपन लगे धरेन ह। 12इहइ कारण अहइ कि इस्राएल क फउज आपन दुस्मनन क नाहीं हराइ सकेस। उ पचे पलटेन अउर आपन दुस्मनन स पराइ गएन काहेकि कउनो मनई ओन चिजियन क लिहेन जेका बरबाद

करइ चाहत रहा। मई तब तलक तोहार मदद नाहीं करब जब तलक तू उ चिजियन क बरबाद नाहीं करब्या जेका मई तू पचन्क क बरबाद कइ करइ क हुकुम दिहे रहा।

13“अब तू जा अउर लोगन क पवितर करा। लोगन स कहा, ‘उ पचे आपन क पवितर करइ। भियान बरे तइयार होइ जा। इस्राएल क परमेस्सर यहोवा कहत ह कि कछू लोग उ सबइ चिजियन आपन लगे धरे अहइ, जेनका मई बरबाद करइ क हुकुम दिहे रहेउँ। तू तब तलक आपन दुस्मनन क हरावइ क जोगगा नाहीं होब्या, जब तलक तू ओन चिजियन क खतम नाहीं कइ देब्या।

14“भियान भिन्सारे तू सबन्क यहोवा क समन्वा खड़ा होइ क होइ। सबहि परिवार समूह यहोवा क समन्वा पेस होइहीं। दूसर परिवार समूह में स यहोवा एक परिवार समूह क चुनी। तब सिरिफ उहइ परिवार समूह यहोवा क समन्वा खड़ा होइ। तब बस उहइ परिवार समूह स यहोव एक कबीला क चुनी। तब सिरिफ उहइ कबीला यहोवा क समन्वा खड़ा होइ। तब यहोवा उ कबीला क प्रत्येक परिवार क परखी अउर उ में स एक क चुनी। तब उ परिवार अकेले यहोवा क समन्वा खड़ा होइ जउन कि उ परिवार स एक एक क चुनी। 15उ मनई जउन इ चिजियन क संग पावा जाइ जेनका मई बरबाद करइ क हुकुम दिहे रहेउँ, धइ लीन्ह जाइ। तब उ मनई क अउर ओकरे संग ओकर हर एक चीज आगी में झोंकिके जरि दीन्ह जाइ। उ मनई यहोवा क करार क तोड़ेंस ह। उ इस्राएल क लोगन क बीच में बहोत ही सरमनाक काम किहेस ह।”

16दूसरे भिन्सारे यहोसू इस्राएल क सबहि लोगन क यहोवा क समन्वा लइ गवा। सारा परिवार समूह यहोवा क समन्वा खड़ा होइ गवा। यहोवा यहूदा परिवार-समूह क चुनेस। 17तब यहूदा क सारा परिवार समूह यहोवा क समन्वा खड़ा भएन। यहोवा ओन में स जेरह कबीला क चुनेस। तब जेरह कबीला क सबहि परिवार यहोवा क समन्वा खड़ा भएन। ऐनमें स जब्दी क परिवार चुना गवा। 18तब यहोसू इ परिवार क सबहि मनसेधुअन क यहोवा क समन्वा आवइ क कहेस। यहोवा कर्मी क पूत आकान क चुनेस। (कर्मी जब्दी क पूत अउर जब्दी जेरह क पूत रहेन।)

19तब यहोसू आकान स कहेस, “पूत, तोहका आपन पराथना कहइ चाही। इस्राएल क यहोवा परमेस्सर क सम्मान करइ चाही अउर ओहसे तोहका पापन्क कबूलइ चाही। मोका बतावा कि तू क किह्या? मोहसे कछू छुपावइ क कोसिस जिन करा।”

20आकान जवाब दिहस, “इ फुरइ अहइ! मई इस्राएल क यहोवा परमेस्सर क खिलाफ पाप किहेउँ ह। मई जउन किहे हउँ उ इ अहइ:

21“हम लोग यरीहो सहर क एँकर सबहि चिजियन क संग आपन कब्जे में लीन्ह। ओन चिजियन में मई सिनार क एक सुन्नर आढ़ना अउर लगभग पाँच पौण्ड चाँदी अउर एक पौण्ड सोना लखा। मोर ऐन चिजियन क अपने बरे धरइ क बहोतइ इच्छा रही। एँह बरे मई ओनका लइ लिहेउँ। तू ओन चिजियन क मोरे तम्बू क खाले जमीन में गड़ा भवा पउब्या। चाँदी ओढ़ना क खाले अहइ।”

22एँह बरे यहोसू कछू मनइयन क तम्बू में पठएस। उ पचे धावत धावत पहोंचेन अउर ओन चिजियन क तम्बू में छुपा पाएन। चाँदी ओढ़ना क नीचे रही। 23उ पचे ओन चिजियन क तम्बू स बाहेर लिआएन। उ पचे ओन चिजियन क यहोसू अउ इस्त्राएल क सबहिं लोगन क लगे लइ गएन। उ पचे ओका यहोवा क समन्वा जमीने पइ लिआइके पटक दिहेन।

24तब यहोसू अउर सबहिं लोग जेरह क पूत आकान क घाटी में लइ गएन। उ पचे चाँदी, ओढ़ना, सोना, आकान क बिटियन-बेटवन, ओकर गोरुअन, ओकर गदहन, भेड़िन, तम्बू अउर सबहिं चिजियन क भी लिहना। एँन सबहिं चिजियन क उ पचे आकान क संग आकोर क घाटी में लइ गएन। 25तब यहोसू कहेस, “तू हमरे बरे इ सबइ मुसीबतन काहे किहया? अब यहोवा तोह पइ मुसीबत लिआइ।” तब सबहिं लोगन आकान अउर ओकर परिवार पइ तब तलक पाथर लोकाएन जब तलक उ पचे मरि नहीं गएन। उ पचे ओकरे परिवार क मार डाएन। तब मनइयन ओनका अउ ओकर सबहिं चिजियन क बारि दिहेन। 26आकान क बारि देइ क पाछे ओकरे तने पइ उ पचे कईउ सिलन क धरेन। इ सबइ सिलन आजु भी हुआँ अहइँ। इ तरह यहोवा आकान पइ विपद दाएस। इहइ कारण अहइ कि ठउर ओकोर घाटी कही जात ह। एँकरे पाछे, यहोवा लोगन स नाखुस नहीं रहा।

### ऐ बरबाद भवा

8 तब यहोवा यहोसू स कहेस, “डेराअ जिन। हिम्मत न छोड़ा आपन सबहिं सिपाहियन क ऐ लइ जा। मईँ ऐ क राजा क हरावइ में तोहार मदद करब। मईँ ओकर नागरिक क, ओकरे सहर क अउर ओकर भुइँया क तोहका दइ देत अहँउ। 2तू ऐ अउर ओकरे राजा क संग उहइ करब्या, जउन तू यरीहो अउ ओकरे राजा क संग किहया ह। इ दईँ तू सिरिफ इ सहर क सारी सम्पत्ति अउ पसु-धन लेब्या अउर आपन लगे धरब्या अउर आपन लगे धरब्या। फुन तू आपन लोगन क बीच में ओकर बँटवारा करब्या। अब तू आपन कछू सिपाहियन क सहर क पाछे छुपइ क हुकुम देब्या।”

3एँह बरे यहोसू आपन पूरी फउज ऐ कईँती लइ गवा। तब यहोसू तीस हजार ताकतवर लराकन आपन फउज में स चुनेस। उ एँनका राति क बाहेर पठइ दिहस। 4यहोसू ओनका इ हुकुम दिहस: “मईँ जउन कहत हउँ, ओका होसियारी स सुना। तू पचन्क सहर क पाछे क धेत्र में छुपा रहइ चाही। हमला क समइ क बाट जोहा। सहर स बहोत दूर जिन जा। होसियारी स लखत रहा अउ तइयार रहा। 5मईँ फउजियन क आपन संग सहर कईँती हमला बरे लइ जाबउँ। हम लोगन क खिलाफ लइइ बरे सहर क लोग बाहेर अइहीं। हम लोग मुड़ि जाब अउर पहिले क तरह पराइ जाब। 6उ पचे हम लोगन क तब तलक पाछा करिहीं जब तलक हम लोग ओनका सहर स दूर न लइ जाब। काहेकि उ पचे इ आपन आप में सोचिहीं कि उ पचे हम पचन स पहिले क तरह परात अही। एँह बरे हम लोग ओन लोगन स पराइ जाब। 7तब तू पचे आपन लुकाइ क जगहिया स अउब्या अउ सहर

पइ कब्जा कइ लेब्या। तोहार परमेस्सर यहोवा तू पचन्क जीत जाइ क सक्ती देइ।

8“एँह बरे तू पचे जब सहर पइ कब्जा कइ लया तब ओका बारि द्या। जइसा कि यहोवा तू पचे स कहेस ह। लखा मईँ तू पचन्क इ करइ क हुकुम देत अहउँ।”

9तब यहोसू ओन सिपाहियन क ओनके लुकाइ क जगहिया पइ पठइ दिहस अउ जोहइ लाग। उ पचे बेतेल अउर ऐ क बीच क जगह गएन। इ जगह ऐ क पच्छिम में रही। मुला यहोसू आपन लोगन क संग रात भइ हुआँई रुका रहा।

10अगले भिन्सारे यहोसू लोगन क बटोरेस। तब यहोसू अउर इस्त्राएल क बुजुर्गन सिपाहियन क ऐ लइ गएन। 11यहोसू क सबहिं सिपाहियन ऐ पइ हमला किहना। उ पचे सहर क दुआर क समन्वा रुकेन। फउज आपन डेरा सहर क उलर दिसा में डाएस। फउज अउर ऐ क बीच में एक तु घाटी रही।

12यहोसू लगभग पाँच हजार फउजियन क चुनेस। यहोसू एँनका सहर क पच्छिम में छिपइ बरे उ जगह पठएस, जउन बेतेल अउर ऐ क बीच में रही। 13मुख्य डेरा सहर क उत्तर दिसा में रहा। दूसर सिपाहियन पच्छिम में लुकान रहेन। उ रात यहोसू घाटी में बिताएस।

14पाछे, ऐ क राजा इस्त्राएल क फउज क लखेस। राजा अउर ओकर लोग लखेन अउ हाली स इस्त्राएल क फउज स लइइ बरे अगवा बढेन। ऐ क राजा सहर क पूरब यरदन घाटी कईँती बाहेर गवा। एँह बरे उ इ न जान सका कि सहर क पाछे फउजी लुकान रहेन।

15यहोसू अउ इस्त्राएल क सबहिं सिपाहियन ऐ क फउज क जरिये आपन क पाछे ढकेलइ दिहना। यहोसू अउ ओकरे फउजियन पूरब में रेगिस्तान कईँती धाउब सुरू किहना। 16सहर क लोग सोर मचाइ अउर यहोसू क खदेरइ सुरू किहना। अउर ओकरे सिपाहियन सहर तजइ सुरू किहना। 17ऐ अउर बेतेल क सबहिं लोग इस्त्राएल क फउज क पाछा फिहना। सहर खुला छोड़ दीन्ह गवा रहा, कउनो भी सहर क रच्छा बरे नहीं रहा।

18यहोवा यहोसू स कहेस, “आपन भाला क ऐ सहर कईँती किए रहा। मईँ इ सहर तोहका देबउँ।” एँह बरे यहोसू आपन भाला क ऐ सहर कईँती किहस। 19इस्त्राएल क लुकान फउजियन एँका लखेन। उ पचे हाली स आपन लुकाइ क जगहियन स निकरेन अउर सहर कईँती तेजी स चल पड़ेन। उ पचे सहर में घुस गएन अउर ओह पइ कब्जा कइ लिहना। तब फउजियन सहर क बारइ बरे आगी लगाउब सुरू किहना।

20ऐ क लोग मुड़िके लखेन अउ आपन सहर क जरत पाएन। उ पचे धुआँ अकासे में उठत निहारेन। एँह बरे उ पचे आपन ताकत अउ हिम्मत खोइ दिहना। उ पचे इस्त्राएल क लोगन क पाछा करब छोड़ेन। इस्त्राएल क लोगन पराब बन्द किहना। उ पचे मुड़ि गएन अउ ऐ क लोगन स लइइ चल पड़ेन। ऐ क लोगन बरे पराइ क कउनो सुरच्छित जगह नहीं रही। 21यहोसू अउ ओकर फउजियन लखेन कि ओकर फउज सहर पइ कब्जा कइ लिहस। उ पचे सहर स धुआँ



भी उठत निहारेन। इ तब उ पचे पराब बन्द किहन अउर ऐ क लोगन स जुद्ध करइ सुरु किहन। 22तब उ सबइ फउजियन जउन छुकान रहेन, जुद्ध मँ मदद बरे सहर स बाहरे निकरि आएन। ऐ क फउजियन क दुइनउँ कइँती इस्त्राएल क फउजी रहेन, ऐ क फउजी जाल मँ फँस ग रहेन। इस्त्राएल ओनका हराइ दिहस। उ पचे तब तलक लइत रहेन जब तलक ऐ क कउनो भी मनसेधू जिअत न रहा, ओनमँ स कउनो पराइ नाहीं सका। 23मुला ऐ क राजा जिअत छोड़ दीन्ह गावा। यहोसू क फउजी ओका ओकरे लगे लिआएन।

### जुद्ध क विवरण

24जुद्ध क समइ, इस्त्राएल क फउज ऐ क फउजियन क मइदानन अउर रेगिस्ताने मँ ढकेल दिहन अउर इ तरह इस्त्राएल क फउज ऐ स सबहिं फउजियन क मारइ क काम मइदानन अउर रेगिस्ताने मँ पूरा किहस। तब इस्त्राएल क सबहिं फउजी ऐ क लउटेन। तब उ पचे ओन लोगन क जउन सहर मँ जिअत रहेन, मारि डाएन। 25उ दिन ऐ क सबहिं लोग मारा गएन। हुआँ बारह हजार मनसेधू अउ मेहरारु रहेन। 26यहोसू आपन भाला क, ऐ कइँती आपन लोगन क सहर बरबाद करइ क संकेत क बनाए राखेस अउर यहोसू संकेत देब तब तलक बन्द नाहीं किहस जब तलक सहर क पुरी आबादी बरबाद नाहीं होइ गएन। 27इस्त्राएल लोग गोरुअन अउ सहर क चीजन्क अपने लगे धरेन। इ उहइ बात रही कि जेका करइ क यहोवा यहोसू क हुकुम देत समइ, कहे रहा।

28तब यहोसू ऐ सहर क बार दिहस। उ सहर सूनी चट्टानन क ढेर बन गावा। इ आजु भी वइसा ही अहइ। 29यहोसू ऐ क राजा क एक बृच्छ पइ फाँसी दइके टाँग दिहस। उ ओका साँझ तलक बृच्छ पइ टाँग रहइ दिहस। सूरज डूबे पइ यहोसू राजा क ल्हास क बृच्छ स उतारइ क हुकुम दिहस। उ पचे ओका सरीर क सहर क दुआर पइ लोकाइ दिहन अउर इका सिलन स ढाँकि दिहन। सिलन क उ ढेर आजु तलक हुआँइ अहइ।

### आसीर्बादन अउ अभिसापन क पढ़ा जाब

30तब यहोसू इस्त्राएल क परमेस्सर यहोवा बरे एक वेदी बनाएस। उ इ वेदी एबाल पर्वत पइ बनाएस। 31यहोवा क सेवक मूसा इस्त्राएल क लोगन क बताए रहा कि वेदियन कइसे बनई जाई। ऐह बरे यहोसू वेदी क वइसे ही बनाएस जइसे मूसा क व्यवस्था क किताबे मँ समुझावा ग रहा। वेदी बगैर कटे भए पाथरन स बनी रही। ओन पाथरन पइ कबहुँ कउनो औजार क उपयोग नाहीं भवा रहा। उ पचे उ वेदी पइ यहोवा क होमबलि अउ मेलबलि चढ़ाएन।

32उ ठउर पइ यहोसू मूसा क व्यसस्था क एक नकल क पाथरन पइ लिखेस। उ इ इस्त्राएल क सबहिं लोगन क लखइ बरे किहस। 33सबइ अगुआ नेता लोग, अफसरन, निआव क अफसरन अउ इस्त्राएल क सबहिं लोग पवितर सन्दूखे क चारिहुँ कइँती खड़ा रहेन। उ पचे ओन लेवी कबीला क याजकन क समन्वा खड़ा रहेन, जउन यहोवा क

करार क पवितर सन्दूखे क लइ चलत रहेन। इस्त्राएली अउर बिदेसी प्रवासियन सबहिं लोग हुआँ खड़ा रहेन। आधा लोग एबाल पर्वत क समन्वा खड़ा रहेन अउर दूसर आधा लोग गिरिज्जीम पर्वत क समन्वा खड़ा रहेन। यहोवा क सेवक मूसा ओनसे अइसा करइ क कहेस रहा। मूसा ओनसे अइसा करइ क इ आसीर्बाद बरे कहे रहा।

34तब यहोसू व्यवस्था क सब वचनन क बाँचेस। यहोसू आसीर्बाद अउ अभिसाप बाँचेस। उ सबहिं कछू उ तरह बाँचेस, जउने तरह उ व्यवस्था क किताबे मँ लिखा रहा। 35इस्त्राएल क सबहिं लोग हुआँ बटुरा रहेन। सबहिं मेहररुअन, गदेलन अउ इस्त्राएल क लोगन क संग रहइवाला सबहिं विदेसियन हुआँ बटुरा रहेन अउ यहोसू मूसा क जरिये दीन्ह गएन हर एक आदेस क बाँचेस।

### गिबोनियन क जरिये यहोसू क छला जाब

9 यरदन नदी क पच्छिम क सब राजा लोग इ सबइ घटना क बारे मँ सुनेन। इ सबइ हिल्ली, एमोरी, कनानी, परिज्जी, हिक्वी, यबूसी लोगन क राजा लोग रहेन। उ पचे पहाड़ी भुइँयन अउर मइदानन मँ रहत रहेन। उ पचे लबानोन तलक भूमध्य सागर क किनारन क लगे भी रहत रहेन। उ पचे सबहिं राजा लोग बटुरेन। उ पचे यहोसू अउ इस्त्राएल क लोगन क संग जुद्ध क योजना बनाएन।

3गिबोन क लोग उ तरीका क बारे मँ सुनेन, जेहसे यहोसू यरीहो अउ ऐ क हराए रहा। 4ऐह बरे उ पचे इस्त्राएल क लोगन क धोखा देइ क ठान लिहन। ओनकर इ योजना रही: उ पचे चाम क पुराना बोरियन क आपन गोरुअन पइ लादेस। उ पचे आपन गोरुअन क ऊपर दाखरस क चाम क पुराना मसक क भी डाएन, जेहसे उ पचे अइसा देखींइ पड़ई मान ल्या कि उ पचे बहोतइ दूरी क जात्रा कइके आवा अहईं।

5मनइयन पुरान पनहियन पहिर लिहन। उ पचे पुरान ओढ़ना भी पहिर लिहेन। उ मनइयन कछू बासी, रुखी, खराब रोटियन भी लइ लिहन। इ तरह उ सबइ मनसेधुअन अइसा लगत रहेन मान ल्या उ पचे बहोतइ दूरी क देस स जात्र किहे होईं। 6तब इ सबइ मनसेधुअन इस्त्राएल क लोगन क डेरन क लगे गएन। इ डेरा गिलगाल क लगे रहा।

उ सबइ मनसेधुअन यहोसू क लगे गएन अउर उ पचे ओसे कहेन, “हम लोग एक बहोतइ दूर क देस स आवा अही। हम लोग तोहरे संग सान्ति क सन्धि करइ चाहित ह।”

7इस्त्राएल क लोग इ हिक्वी लोगन स कहेन, “होइ सकत ह तू लोग हम पचन्क धोखा दइ देत ह्वा। होइ सकत ह तू हमरे निचके क रहइवाला ह्वा। हम तब तलक सान्ति क संधि नाहीं कइ सकित जब तलक हम इ नाहीं जान लेइत कि तू पचे कहीं स आवा अहा।”

8हिक्वी लोग यहोसू स कहेन, “हम पचे आप क सेवक अही।”

मुला यहोसू पूछेस, “तू पचे कउन अहा? तू पचे कहीं स आवा अहा?”

१मनसेधुअन जवाब दिहन, “हम लोग आप क सेवक अही। हम पचे एक बहोलइ दूरी क देस स आवा अही। हम ऐह बरे आर कि हम पचे तोहरे परमेस्सर यहोवा क महान सक्ती क बारे में सुना ह। हम लोग उ भी सुने अही, जउन उ किहस। हम लोग उ सब कछू सुना ह, जउन उ मिस्र में किहस। 10अउर हम लोग इ भी सुना कि उ यरदन नदी क पूरब दुइ ठु एमोरी लोगन क राजा लोगन क हराएस। हेस्बोन क राजा सीहोन अउर असतारोत क देस में बासान क राजा ओग रहेन। 11ऐह बरे हमरे अगुआ अउर हमरे लोग हमसे कहेन, ‘आपन जात्रा बरे जियादा भोजन लइ ल्या। जा अउ इस्राएल क लोगन स बात करा। ओनसे कहा, “हम आप क सेवक अही। हम लोगन क संग सान्ति क सन्धि करा।”

12“हमरी रेटियन क लखा। जब हम लोग घर छोड़ तब इ सबइ गर्मागरम अउ ताजी रहिन। मुला अब आप लखत ही कि इ सबइ द्युरान अउ बासी अहई। 13हम लोगन क दाखरस क मसकन क निहारा। जब हम लोग घर तजा तउ इ सबइ नई अउ दाखरस स भरी रहिन। आप लखि सकत ही कि इ सबइ फाट अउ फुरान अहई। हमार ओढनन अउ चपलन क लखा। आप लखि सकत ही कि लम्बी जात्रा हमरी चिजियन क खराब कइ दिहे अहइ।”

14इस्राएल क लोग जाना चाहत रहेन कि इ सबइ मनई का फुरइ बोलत अहई। ऐह बरे उ पचे रेटियन क चखेन, मुला उ पचे यहोवा स नाही पूछेन कि ओनका क करइ चाही।

15यहोसू ओनके संग सान्ति-सन्धि करइ बरे तइयार होइ गवा। उ ओनका जिअत छोड़इ बरे तइयार होइ गवा। इस्राएल क प्रमुखन यहोसू क वचन क समर्थन कइ दिहन।

16तीन दिना पाछे, इस्राएल क लोगन क पता चला कि उ सबइ लोग ओनके डेरा क बहोत निचके रहत ही। 17ऐह बरे इस्राएल क लोग हुआँ गएन, जहाँ उ सबइ लोग रहत रहेन। तीसरे दिन, इस्राएल क लोग गिबोन, कपीरा, बेरोत अउर किर्यत्यारीम सहरन क आएन। 18मुला इस्राएल क फउज इ सहरन क खिलाफ लइइ क जतन नाही किहस। उ पचे ओन लोगन क संग सान्ति संधि कइ चुका रहेन। उ पचे ओन लोगन क संग इस्राएल क परमेस्सर यहोवा क समन्वा प्रण किहे रहेन।

सबहि लोग ओन प्रमुखन क खिलाफ सिकाइत करत रहेन, जउन सन्धि किहे रहेन। 19मुला प्रमुख लोगन जवाब दिहन, “हम पचे प्रण किहे अही। हम लोग इस्राएल क परमेस्सर यहोवा क समन्वा प्रण किहे अही। हम ओनके खिलाफ अब लइ नाही सकित। 20हम लोगन क सिरिफ ऐतना ही करइ चाही। हम ओनका जरुर जिअत रहइ देब। हम ओनका चोट नाही पहुँचाइ सकित काहेकि ओनके संग कीन्ह गवा प्रण क तोड़ देइ पइ यहोवा क किरोध हम लोगन क खिलाफ होइ। 21ऐह बरे ऐनका जिअत रहइ द्या। इ सबइ हमार सेवक होइहीं। उ पचे हमरे बरे लकड़ी कटिहीं अउर हमरे मनइयन बरे पानी ढोइहीं।” इ तरह प्रमुखन इ सबइ लोगन क संग कीन्ह गइ आपन सान्ति-सन्धि क नाही तोड़ें।

22यहोसू गिबोनी लोगन क बोलाएस। उ कहेस, “तू लोग हम स झूठ काहे बोल्या? तोहार भुइँया हम लोगन क डेरा क लगे रहा। मुला तू लोग कह्या कि हम लोग बहोत दूरी क देस क अही। 23अब तोहरे लोगन क बहोत कस्ट होइ। तोहार सबहि लोग दास होइहीं। ओनका परमेस्सर क निवास\* बरे लकड़ी काटब अउर पानी भरइ क पड़ी।”

24गिबोनी लोग जवाब दिहन, “हम लोग आप स झूठ बोले काहेकि हम लोगन क डर रहा कि आप कहुँ हम लोगन क मारि न डवईं। हम लोग सुना ह कि परमेस्सर आपन सेवक मूसा क इ आदेस दिहे रहा कि उ पचे तोहका इ सारा भुइँया दइ देई अउर परमेस्सर तोहसे उ भुइँया में रहइवालन सबहि लोगन क मारि डवइ बरे कहेस। इहइ कारण अहइ कि हम लोग आप स झूठ बोले। 25अब हम आप क सेवक अही। आप हमार उपयोग जइसा ठीक समुझईं, कइ सकत हीं।”

26इ तरह गिबोन क लोग दास होइ गएन। मुला यहोसू ओनकर जिन्नगी बचाएस। यहोसू इस्राएल क लोगन क ओनका मारइ नाही दिहस। 27यहोसू गिबोन क लोगन क इस्राएल क लोगन क दास बनइ दिहस। उ पचे इस्राएल क लोगन अउ यहोवा क चुने भए जउनो भी उठर क वेदी बरे लकड़ी काटत अउ पानी भरत रहेन। उ सबइ लोग अब तलक दास अहईं।

### उ दिन जब सूरज स्थिर रहा

**10** इ समइ अदोनीसेदेक यरूसलेम क राजा रहा। इ राजा सुनेस कि यहोसू ऐ क जीतेस ह अउर एका पूरी तरह बरबाद कइ दिहस ह। राजा क इ पता लाग कि यहोसू यरीहो अउ ओकरे राजा क संग भी इहइ किहस ह। राजा क इ भी जानकारी मिली कि गिबोनी लोग इस्राएल क संग सान्ति-सन्धि कइ लिहस ह अउर उ सबइ लोग यरूसलेम क बहोत निचके रहत रहेन। 2ऐह बरे अदोनीसेदेक अउ ओकर लोग इ सबइ घटना क कारण बहोत डेरान रहेन। गिबोन ऐ क तरह नान्ह सहर नाही रहा। गिबोन एक ठु बहोत बड़ा सहर\* रहा जेहमें राजा रहे रहा। अउर सहर क सबहि मनसेधू अच्छा जोधा रहेन। 3यरूसलेम क राजा अदोनीसेदेक हेब्रोन क राजा होहाम स बातन किहसे। उ यर्मूत क राजा पिराम, लाकीस क राजा यापी, एगलोन क राजा दबीर स भी बातचीत किहस। यरूसलेम क राजा इ मनइयन स पराथना किहस, 4“मोरे संग आवईं अउर गिबोन प हमला करइ मैं मोर मदद करईं। गिबोन यहोसू अउ इस्राएल क लोगन क संग सान्ति-सन्धि कइ लिहस ह।”

5इ तरह पाँच एमोरी राजा लोग फउजन क मिलाएन। (इ सबइ पाँचउ यरूसलेम क राजा, हेब्रोन क राजा, यर्मूत क राजा, लाकीस क राजा, अउर एगलोन क राजा रहेन।) उ

**परमेस्सर क निवास** ऐकर अरथ “परमेस्सर क परिवार” (इस्राएल) या “पवित्र तम्बू” या “मन्दिर” होइ सकत ह।

**बड़ा सहर** मजबूत अउ अच्छी तरह सुरच्छित सहर जउन निचके क नान्ह सहरन पइ हुकूमत करत रहेन।

सबइ फउज्जन गिबोन गइन। फउज्जन सहर क घेरि लिहिन अउ एकरे खिलाफ जुद्ध करब सुरु किहिन।

6 गिबोन सहर मँ बसइयन मनइयन गिलगाल क डेरा मँ यहोसू क खबर भेजेन: “हम पचे तोहर सेवक अही। हम लोगन क अकेल्ले मँ जिन तजा। आवा अउर हमार रच्छा करा। हाली करा। हम पचन्क बचावा। पहाड़ी देसन क सबहिं एमोरी राजा आपन आपन फउज्जन क एकउट कइ चुका बाटेन अउर हम पचन पइ हमला किहेस।”

7 एह बरे यहोसू गिलगाल स आपन पूरी फउज्ज क संग जुद्ध बरे चला। यहोसू क उत्तिम जोधा ओकरे संग रहेन। 8 यहोवा यहोसू स कहेस, “ओन फउज्जन स जिन डेराअ। मइँ तू पचन क ओनका हरावइ देब। ओन फउज्जन मँ स कउनो भी तू पचन क हरावइ मँ समर्थ नाहीं होइ।”

9 यहोसू अउ ओकर फउज्ज रात भइ गिबोन कइँती बढ़त रही। दुस्मन क पता नाहीं रहा कि यहोसू आवत अहइ। एँह बरे जब उ हमला किहस तउ उ पचे चौक पड़ेन।

10 यहोवा ओन फउज्जन क इस्त्राएल क फउज्जन क जरिये हमाला क समइ का करइ या न करइ चाही सोच मँ डाइ दिहस। यह बरे इस्त्राएलियन ओनका हराइके बहोत बड़ी जीत पाइ लिहिन। इस्त्राएलियन पाछा कइके ओनका गिबोन स खदेर दिहिन। उ पचे बेथोरोन तलक जाइवाली सड़क तलक ओनकर खदेर दिहिन। इस्त्राएल क फउज्ज अजेका अउ मक्केदा तलक क समूचइ राहे मँ मनसेधुअन क मारेस। 11 इस्त्राएल क फउज्ज बेथ-हरोन क जाइवाली सड़क तलक दुस्मनन क खदेर दिहस। जबहिं उ पचे दुस्मनन क खदेरत रहेन तउ यहोवा भारी ओला क बर्खा अजेका तलक अकासे स किहस। बहोत स दुस्मन एँन भारी ओला क बर्खा स मरि गएन। इ सबइ ओला स ओहसे जियादा दुस्मन मारा गएन जेतना इस्त्रलियन क तरवानन स मरि ग रहेन।

12 उ दिना यहोवा इस्त्राएलियन क जरिये एमोरी लोगन हार जाइ दिहिन अउ उ दिन यहोसू इस्त्राएल क सबहिं क समन्वा खड़ा भवा अउ उ यहोवा स कहेस:

“हे सूरज, गिबोन क अकासे मँ खड़ा रहा अउ हट्या जिन। हे चन्द्र, तू अय्यालोन क घाटी क ऊपर अकासे मँ ठाड़ रहा अउ जिन हटा।”

13 सूरज स्थिर होइ गवा अउ चन्दा भी तबहिं तलक चलब तजि दिहस जब तलक मनइयन आपन दुस्मनन क हराइ नाहीं दिहिन। इ फूरे भवा, इ कथा यासार क किताबे मँ लिखी अहइ। सूरज असमान क बीच रुका। इ पूरा दिन हुआँ स नाहीं हटा। 14 अइसा उ दिन क पहिले कउनो भी समइ कबहुँ नाहीं भवा रहा अउर तब स अब तलक कबहुँ नाहीं भवा बाटइ। उहर दिन रहा, जब यहोवा मनई क बिनती सुनेस। असल मँ यहोवा इस्त्राएलियन बरे जुद्ध करत रहा।

15 एकरे पाछे, यहोवा अउ ओकर फउज्ज गिलगाल क डेरा मँ वापस भइ। 16 जुद्ध क समइ पाँचहु राजा पराइ गएन। उ पचे मक्केदा क निअरे गुफा मँ लुकाइ गएन। 17 मुला कछु मनइयन ओनका गुफा मँ लुका भवा पाएस। यहोसू क एकरे बारे मँ पता चला। 18 एँह बरे उ कहेस, “गुफा क जाइवाला दुआरे क बड़वार सिलन स ढाँपि द्या। कछु मनसेधुअन क गुफा क रखवारी बरे हुआँ रखा। 19 मुला हुआँ

खुद न रहा। दुस्मन क पाछा करत रहा। ओन पइ पाछे स हमला करत रहा। दुस्मनन क आपन सहर तलक सुरच्छित जिन पहाँचइ द्या काहेकि तोहार परमेस्सर यहोवा तू पचन्क ओन पइ विजय दिहेस ह।”

20 इ तरह यहोसू अउ इस्त्राएल क मनइयन दुस्मनन क मर जाएन। मुला दुस्मनन मँ स कछु आपन सहरन मँ जाइ सकेन अउ लुकाइ गएन। उ सबइ मनइयन नाहीं मारा गएन। 21 जुद्ध क पाछे, यहोसू क फउजी मक्केदा मँ ओनके लगे आएन। उ प्रदेस मँ कउनो मँ कउनो भी जाति क लोगन मँ स कउनो भी एँतना हिम्मती नाहीं रहा कि उ लोगन क खिलाफ कछु कहि सकइ।

22 यहोसू कहेस, “गुफा क दुआर क रोकइवाली सिलन क हटावा। ओन पाँचउ राजा लोगन क मोरे लगे लिआवा।” 23 एँह बरे यहोसू क लोग पाँचउ राजा लोगन क गुफा स बाहेर लिआएन। इ सबइ पाँचउ यरूसलेम, हेब्रोन, यमूर्त, लाकीस अउ एग्लोन क राजा लोग रहेन। 24 एँह बरे उ सबइ ओन पाँचउ राजा लोगन क यहोसू क लगे लिआएन। यहोसू आपन सबहिं लोगन क हुआँ आवइ बरे कहेस। यहोसू फउज्ज क अफसरन स कहेस, “हिआँ आवा। एँन राजा लोगन क गले पइ आपन गोड़ धरा।” एँह बरे यहोसू क फउज्ज क अफसर लोग निचके आएन। उ पचे राजा लोगन क गले पइ आपन गोड़ धरेन।

25 तब यहोसू आपन फउज्जियन स कहेस, “मजबूत अउ हिम्मती बना। डेराअ जिन। मइँ देखाउब कि यहोवा ओन दुस्मनन क संग का करी, जेनसे तू पचे भविस्स मँ जुद्ध करब्या।”

26 तब यहोसू पाँचउ राजा लोगन क मार जाएस। उ ओनकर लहास पाँच ठु बूच्छन पइ लटकाइ दिहस। यहोसू ओनका सूरज बूड़इ तलक हुआँइ लटकत छोड़े रखा। 27 सूरज बूड़े पइ यहोसू आपन लोगन स लहासन क बूच्छन स उतारइ क कहेस। तब उ पचे ओन लहासन क उ गुफा मँ बहाइ दिहस, जेहमँ उ पचे लुकान रहेन। उ पचे गुफा क दुआर क बड़वार पाथर क सिलन स ढाँकि दिहिन, जउन आजु तलक हुआँइ अहइँ।

28 उ दिन यहोसू मक्केदा क हराएस। यहोसू राजा अउ उ सहर क लोगन क मार जाएस। हुआँ कउनो मनई जिअत नाहीं छोड़ा गवा। यहोसू मक्केदा क राजा क संग उहइ किहस जउन उ यरीहो क राजा क संग किहे रहा।

### दक्खिनी सहरन क लीन्ह जाब

29 तब यहोसू ऊउ इस्त्राएल क सबहिं लोग मक्केदा स जात्रा किहिन। उ पचे लिब्ना गएन अउर उ सहर पइ हमला किहिन। 30 यहोवा इस्त्राएल क लोगन क उ सहर अउ ओकरे राजा क हार जाइ दिहस। इस्त्राएल क लोग उ सहर क हर मनई क मार जाएन। कउनो मनई जिअत नाहीं छोड़ा गवा। यहोसू लिब्नाह क राजा क संग उहइ किहेस जइसा उ पचे यरीहो क राजा क संग किहे रहेन।

31 तब यहोसू अउ इस्त्राएल क सबहिं लोग लिब्ना क तजि दिहिन अउर उ पचे लाकीस तलक क जात्रा किहिन। यहोसू अउ ओकर फउज्ज लिब्ना क चारिहुँ कइँती डेरा जाएस

अउर तब उ पचे सहर पइ हमला किहन। 32यहोवा इस्राएल क मनइयन क जरीये लाकीस सहर क हार जाइ दिहस। दुसरे दिना उ पचे सहर क हराएन। इस्राएल क मनइयन इ सहर क हर एक मनई क मार डापन। इ वइस ही रहा जइसा उ लिब्ना में किहे रहा। 33इहइ समइ गोजेर क राजा होरोम लाकीस क मदद करइ आवा। मुला यहोसू ओका अउ ओकरी फउज क भी हराएस। कउनो मनई जिअत नाहीं छोड़ा गवा।

34तब यहोसू अठर इस्राएल क सबहिं लोग लाकीस स एग्लोन गएन। उ पचे एग्लोन क चारिहुँ कइँती डेरा डापन अउर ओह पइ हमला किहन। 35उहइ दिन उ पचे सहर पइ कब्जा किहन अउर सहर क सबहिं लोगन क मार डापन। इ वइसा ही किहन जइसा उ पचे लाकीस में किहे रहेन। उ पचे सहर क बरबाद किहन अउ ओकरे सबहिं मनइयन क मार डापन।

36तब यहोसू अउ इस्राएल क सबहिं लोग एग्लोन स हेब्रोन क जात्रा किहन। उ पचे हेब्रोन पइ हमला किहन। 37उ पचे सहर अउ हेब्रोन क निअरे क सबहिं नान्ह कस्बन पइ कब्जा कइ लिहन। इस्राएल क लोग सहर क हर एक मनई क मार डापन। हुआँ कउनो भी जिअत नाहीं छोड़ा गवा। इ वइसा ही रहा जइसा उ पचे एग्लोन में किहे रहेन। उ पचे सहर क बरबाद किहन अउ ओकर सबहिं मनइयन क मार डापन।

38तब यहोसू अउ इस्राएल क सबहिं लोग दबीर क गएन अउर उ सहर पइ हमला किहन। 39उ पचे उ सहर, ओकर राजा अउ दबीर क निअरे क सबहिं कस्बन क जीत लिहन। उ पचे उ सहर क सबहिं लोगन क मार डापन। हुआँ कउनो जिअत नाहीं छोड़ा गवा। इस्राएल का मनइयन दबीर अउ ओकरे राजा क संग उहइ किहन जउन उ पचे हेब्रोन अउ ओकरे राजा क संग किहे रहेन। इ वइसा ही रहा जइसा उ पचे लिब्ना अउ ओकरे राजा क संग किहे रहेन।

40इ तरह यहोसू पहाड़ी देस नेगेव पच्छिमी अउ पूर्वी पहाड़ियन क तराई क सहरन क राजा लोगन क हराएन। इस्राएल क परमेस्सर यहोवा यहोसू स सबहिं लोगन क मारि डवइ क हुकुम दिहे रहा। एँह बरे यहोसू ओन जगहियन पइ कउनो क जिअत नाहीं छोड़ेस।

41यहोसू कादेसबर्ने स अज्जा तलक क सबहिं सहरन पइ कब्जा कइ लिहस। उ गोसेन क भुईँया स लइके गिबोन तलक क सबहिं सहरन पइ कब्जा कइ लिहस। 42यहोसू एक अभियान में ओन सहरन अउ ओनके राजा लोगन क जीत लिहस। यहोसू इ एँह बरे किहस कि इस्राएल क परमेस्सर यहोवा इस्राएल बरे लइत रहा। 43तब यहोसू अउ इस्राएल क सबहिं लोग गिलगाल क आपन डेरा में लउटि आएन।

#### उत्तरी सहरन क हराउब

**11** हासेर क राजा, याबीन जउन कछू भवा ओकरे बारे में सुनेस। एँह बरे उ कइउ राजा लोगन क फउजन क एक संग बोलावइ क निर्णय लिहस। याबीन मादोन क राजा योबाब, सिमोन क राजा, अच्छाप क राजा अउर 2उत्तर

क पहाड़ी देस क अउ रेगिस्ताने क सबहिं सासकन लोगन क लगे संदेसा पठएस। याबीन किन्नेरेत क दक्खिन क राजा लोगन, नेगेव अउ पच्छिम निची पहाड़ियन क राजा लोगन क आपन सँदेसा पठएस। उ पच्छिम में नफोथ दारे क राजा क भी सँदेसा पठएस। 3याबीन पूरब अउ पच्छिम क कनानी लोगन क राजा लोगन क लगे सँदेसा पठएस। उ पहाड़ी प्रदेशन में बसइयन एमोरी, हित्तियन, परिज्जियन अउ यबूसियन क लगे सँदेसा पठएस। उ मिसपा पहुँटा क हेर्मोन पहाड़ क नीचे बसइयन हिक्वी लोगन क भी सँदेसा पठएस। 4एँह बरे एँन सबहिं राजा लोगन क फउजन एक संग आइन। हुआँ अनेक जोधा, घोड़न अउ रथ रहेन। उ बहोत बड़वार फउज रही, उ अइसी देखाइ पड़त रही, मान ल्या ओहमाँ एँतना फउजी रहेन जेतना समुदर क किनारे बालू क कण।

5इ सबइ राजा छोटकी नदी मेरोम क निअरे बंदुर गएन। उ पचे आपन फउजन क एक डेरा में बटोरेन। उ पचे इस्राएल क खिलाफ जुद्ध करइ क योजना बनाएन।

6तब यहोवा यहोसू स कहेस, “उ फउज स जिन डेराअ। भियान इहइ समइ, मई तू पचन्क ओनका हरावइ देब। तू पचे ओन सबहिं क मार डउब्या। तू पचे ओनकइ घोड़न क लगड़ा छूला करइ देब्या। अउ ओनकर सबहिं रथन क बार डउब्या।”

7यहोसू अउ ओकर पूरी फउज एकाएक हमला कइके ओनका चौकाइ दिहस। उ पचे मेरोम नदी पइ दुस्मनन पइ हमला किहन। 8यहोवा इस्राएलियन क ओनका हरावइ दिहस। इस्राएल क फउज ओनका हराएस अउर ओनकर पूरब में वृहत्तर सीदोन, मिस्त्रपोत-मैम अउ मिसपा क घाटी तलक पाछा किहस। इस्राएल क फउज ओनसे तब तलक जुद्ध करत रही जब तलक दुस्मनन में स कउनो भी मनई जिअत न बचा। 9यहोसू उहइ किहस जउन यहोवा कहे रहा कि उ करी यानी यहोसू ओनकइ घोड़न क टँगियन काटेस अउ ओनकर स्यन क बारेस।

10तब यहोसू लउटा अउ हासोर सहर पइ कब्जा किहस। यहोसू हासोर क राजा क मार डापस। (हासोर ओन सबहिं राज्यन में प्रमुख रहा जउन इस्राएल क खिलाफ लड़ा रहेन।) 11इस्राएल क फउज उ सहर क हर एक क मार डापस। उ पचे सब लोगन क पूरी तरह बरबाद कइ दिहन। हुआँ कछू भी जिअत नाहीं रहइ दीन्ह गवा। तब उ पचे सहर क जराइ दिहन।

12यहोसू इ सबइ सहरन पइ कब्जा किहस। उ ओनके सबहिं राजा लोगन क मार डापस। यहोसू इ सबइ सहरन क हर एक चीज क पूरी तरह बरबाद कइ दिहस। उ इ यहोवा क सेवक मूसा जइसा हुकुम दिहे रहा वइसा ही किहस। 13मुला इस्राएल क फउज कउनो भी अइसे सहर क नाहीं जराएस जउन पहाड़ी पइ बना रहा। उ पचे पहाड़ी पइ बने सिरिफ एक ठु हासोर सहर क जराएस। इ उ सहर रहा, जेका यहोसू बारेस। 14इस्राएल क मनइयन उ सबइ चिजियन क आपन लगे धरेन, जउन ओनका उ सहरन में स मिलिन। उ पचे ओन जनावरन क अपन लगे धरेन, जउन ओनका सहर में मिलेन। मुला उ पचे हुआँ क सबहिं मनइयन क मार डापन। उ पचे कउनो मनई क जिअत नाहीं छोड़ेन।

15यहोवा बहोत पहिले आपन सेवक मूसा क इ करइ क हुकुम दिहे रहा। तब मूसा यहोवा क इ करइ क हुकुम दिहे रहा। इ तरह यहोसू यहोवा क आग्या पूरा किहस।

16काहेकि उ ओन चिजियन में स कछु भी नाहीं लिहस जउन का यहोवा लइ क हुकुम नाहीं दिहे रहा। इ तरह यहोसू इ पूरे देस क सबहिं लोगन क हराइ दिहस। पहाड़ी प्रदेस, नेगेव-छेत्र, सारा गोसोन-छेत्र, पच्छिमी निची पहाड़ियन क प्रदेस, यरदन घाटी, इस्राएल क पहाड़ अउ ओनकर निचके क पहाड़ियन पइ ओकर अधिकार होइ गवा रहा। 17यहोसू क अधिकार सेईर क निअरे हालाक पहाड़े स लइके हेर्मोन पहाड़े क खाले लबानोन क घाटी में बालगाद तलक क प्रवेस पइ होइ ग रहा। उ राजा लोगन क गिरफतार कइ क मरि दिहे रहा। 18यहोसू ओन राजा लोगन स कइउ बरिस लड़ा। 19उ पूरा देस में सिरिफ एक सहर इस्राएल क संग सान्ति-संधि किहस। उ हिब्बी लोगन क सहर गिबोन रहा। दूसर सबहीं सहर जुद्ध में हार गएन। 20यहोवा चाहत रहा कि उ सबइ लोग सोचई कि उ पचे सक्तीसाली रहेन। तब उ पचे इस्राएल क खिलाफ लड़िहीं। इ तरह उ पचे बगैर दया क ओनका बरबाद कइ सकत रहेन, जउने तरह यहोवा मूसा क करइ क हुकुम दिहे रहा।

21अनाकी लोग हेब्रोन, दबीर, अनाब अउ यहूदा अउर इस्राएल क छेत्रन क पहाड़ी प्रदेस में रहत रहेन। यहोसू इ सबइ अनाकी लोगन क खिलाफ लड़ा। यहोसू इ लोगन अउ इ सबन्क सहरन क पूरी तरह बरबाद कइ दिहस। 22हुआँ कउनो भी अनाकी मनई इस्राएल में जिअत न छोड़ा गवा। जउन अनाकी लोग छोड़ दीन्ह ग रहेन, उ सबइ अज्जा, गत अउर असदोद में रहेन। 23यहोसू पूरा इस्राएल प्रदेस पइ कब्जा कइ लिहस। इ बात क यहोवा मूसा स बहोत पहिले ही कहि दिहस। यहोवा उ इ देस इस्राएल क एँह बरे देहस काहेकि उ एँनकइ बरे वचन दिहे रहा। तब यहोसू इस्राएल क परिवार समूहन में उ प्रदेस क बाँट दिहस तब जुद्ध बन्द भवा अउ अखिरी रुप में सान्ति कायम होइ गइ।

### इस्राएल क जरिये राजा लोग हरावा गएन

**12** इस्राएल क लोग यरदन नदी क पूरब क भुईया पइ कब्जा कइ लिहन। ओनकइ अधिकार में अब अर्नोन क संकरी घाटी स हेर्मोन पहाड़े तलक क भुईया अउ यरदन घाटी क पूरब क सारा प्रदेस रहा। इ देस क लेइ बरे इस्राएल क लोग जउन राजा लोग क हराएन ओनकइ इ सूची अहइ:

2हेसबोन सहर में बसइयन एमोरी लोगन क राजा सीहोन अर्नोन क संकरी घाटी पइ अरोएर स लइके यब्बोक नदी तलक क प्रदेस पइ सासन करत रहा। ओकर प्रदेस उ दरी क बीच स सुरु होत रहा। अम्मोनी लोगन क संग इ ओनकर चउहद्दी रही। सीहोन गिलाद क आधा प्रदेस पइ हुकूमत करत रहा। 3उ गिलगाल स मृत सागर (खारा सागर) तलक यरदन क पूरब क प्रदेस पइ भी सासन करत रहा अउ बेत्यसीमोत स दक्खिन पिसगा क पहाड़ियन तलक सासन करत रहा।

4बासान क राजा ओग रपाई लोगन संतान रहा। ओग असतारोत अउ एद्रेई में सासन करत रहा। 5ओग हेर्मोन पहाड़, सलका सहर, अउ बासान क समूचइ छेत्र पइ सासन करत रहा। ओकरे प्रदेस क चउहद्दी हुआँ तलक जात रही जहाँ गसूर अउ माका लोग रहत रहेन। ओग गिलाद क आधा भाग पइ सासन करत रहा। इ प्रदेस क सीमा क आखीर हेसबोन क राजा सीहोन क प्रदेस पइ होत रहा।

6यहोवा क सेवक मूसा अउ इस्राएल क लोग इ सबहिं राजा लोगन क हराएन अउ मूसा उ प्रदेस क रूबेन क परिवार समूह, गाद क परिवार समूह अउ मनस्से क परिवार समूह क आधा लोगन क दिहस। मूसा इ प्रदेस ओनका आपन कब्जा में रखइ बरे दिहस।

7इस्राएल क लोग उ प्रदेस क राजा लोगन क भी हराएन, जउन यरदन नदी क पच्छिम में रहा। यहोसू लोगन क इ प्रदेस में लइ गवा। यहोसू लोगन क इ पहुँटा दिहस अउर एका साढ़े नौ परिवार समूहन में बाटेस। इ उ देस रहा जेका ओनका देइ बरे यहोवा वचन दिहे रहा। इ प्रदेस लबानोन क घाटी में बालगात अउ सेईर क निअरे हालाक पहाड़े क बीच रहा। 8एहमों पहाड़ी देस, पच्छिम क तराई क प्रदेस, यरदन घाटी, पूर्वी पहाड़ियन, रेगिस्तन अउ नेगेव सामिल रहेन। इ उ प्रदेस रहा जेहमों हित्ती, एमोरी, परिज्जी, कनानी, अब्बी अउर यबूसी लोग रहत रहेन। जउन लोगन क इस्राएल क लोग हराएन ओनकर सूची इ बाटइ:

9यरीहो क राजा	1
ऐ क राजा बेतेल क निअरे	1
10यरूसलेम क राजा	1
हेब्रोन क राजा	1
11यर्मूत क राजा	1
लाकीस क राजा	1
12एगलोन क राजा	1
गेजेर क राजा	1
13दबीर क राजा	1
गेदेर क राजा	1
14होर्मा क राजा	1
अराद क राजा	1
15लिब्ना क राजा	1
अदुल्लाम क राजा	1
16मक्केदा क राजा	1
बेतेल क राजा	1
17तप्पूह क राजा	1
हेपेर क राजा	1
18अपेक क राजा	1
लरसारोन क राजा	1
19मादोन क राजा	1
हासोर क राजा	1
20सिम्रोन मरोन क राजा	1
अच्छाप क राजा	1
21तानाक क राजा	1
मगिद्दो क राजा	1

22केदेस क राजा	1
कर्मेल में योकनाम क राजा	1
23दोर क पर्वत में दोर क राजा	1
गिलगाल में गोयीम क राजा	1
24तिर्सी क राजा	1
सब मिलाइके राजा लोगन क संख्याँ रहेन	31

**प्रदेस जउन अबहिं तलक नाहीं लीन्ह गएन**

**13** जब यहोसू बहोतइ बुढ़वा होइ गवा तउ यहोवा ओहसे कहेस, “यहोसू तू बुढ़वा होइ ग अहा, मुला अबहिं तोहका बहोत स भुइँया पइ कब्जा करइ क बाटइ। 2तू अबहिं तलक गसूर लोगन क भुइँया अउर पलिस्तिन क भुइँया नाहीं लिह्या ह। 3तू मिस्त्र क चउहद्दी पइ सिहोर नदी स लइके उत्तर में एक्रोन चउहद्दी तलक क छेत्र नाहीं लिह्या ह। उ उबहिं तलक कनानी लोगन क अहइ। तू पचन्क अज्जा, असदोद, असकलोन, गत अउ एक्रोन पाँचहूँ पलिस्ती क प्रमुख्य सहरन क हराउब अहइ। तू पचन्क ओन अब्बी लोगन्क हरावइ चाही, 4जउन कनान क सारे भुइँया क दक्खिन में अउर मिराह में जउन कि सिदोनी लोगन, अफेक क अधिकार में अहइ अउर अमोरी लोगन सरहद तलक क भुइँया में रहत हीं। 5तू अभी तलक गबाली लोगन्क छेत्र क नाहीं हराया ह अउर बालगाद क पूरब अउ हेर्मान पहाड़े क घाटी हमाथ क प्रवेस दुआर तलक क बीच क अलबानोन क छेत्र भी अभी तलक हराइ क बचा भवा अहइ।

6“सिदोन क लोग लबानोन स मिस्त्रपोतमैम तलक पहाड़ी प्रदेस में रहत अहइ। मुला मई इस्राएल क लोगन बरे इ सबहिं क दबाइके निकारि बाहेर करब। जब तू इस्राएल क लोगन में भुइँया बाँट्या, तु इ प्रदेस क निहचय ही सुमिर लिह्या। एँका वइसेन ही करा जइसेन मई कहेउँ ह। 7अब, तू भुइँया क नौ परिवार समूह अउ मनस्से क आधा परिवार समूह क मैं बाटा।”

**प्रदेसन क बाँटवारा**

8मई मनस्से क आधा परिवार समूह क लोगन क पहिले ही भुइँया दइ दीन्ह ह। मई रूबेन क परिवार समूह अउ गाद क परिवार समूह क भी पहिले ही भुइँया दइ दीन्ह ह। यहोवा क सेवक मूसा यरदन नदी क पूरब क प्रदेस ओनका दिहस। 9मूसा अउन भुइँया यरदन नदी क पूरब मैं ओनका दिहे रहा, उ इ अहइ: इ भुइँया क भीतर दीबोन स मेदबा तलक क पूरा मइदान आवत ह। इ भुइँया अर्नी सँकरी घाटी स सुरु होत ह। इ भुइँया घाटी क बीच सहर तलक लगातार फइली अहइ। 10एमोरी लोगन क राजा सीहोन जउने सहरन पइ सासन करत रहा, उ पचे इ भुइँया में रहेन। उ राजा हेसबोन सहर मैं सासन करत रहा। उ भुइँया लगातार उ छेत्र तलक रही जेहमँ एमोरी लोग रहत रहेन। 11गिलाद सहर भी अहइ भुइँया में रहा। गसूर अउ माका लोग जउने छेत्र मैं रहत रहेन उ उहइ भुइँया में रहा। सारा हेर्मान पहाड़ अउर सल्का तलक सारा बासान उ भुइँया में रहा। 12राजा

ओग क सारा राज्ज उहइ भुइँया में रहा। राजा ओग बासान मैं सासन करत रहा। पहिले उ आसतरोत अउ एदेई मैं सासन करत रहा। ओग रपाइ लोगन मैं स रहा। मूसा ओन लोगन क हराए रहा अउर ओनका प्रदेस लइ लिहे रहा। 13इस्राएल क लोग गसूर अउर माका लोगन क जबरदस्ती निकारिके बाहेर नाहीं कइ सकेन। उ सबइ लोग अब तलक आजु भी इस्राएल क लोगन क संग रहत रहेन।

14सिरिफ लेवी क परिवार समूह ही अइसा रहा जेका कउनो भुइँया नाहीं मिली। ओकरे बदले आनेका उ सबइ भेंटन मिलिन जेका इस्राएल क परमेस्सर यहोवा क चढ़ाई जात रहिन। यहोवा लेवी परिवार समूह क सन्तानन क इ वचन दिहे रहा।

15मूसा रूबेन क परिवार समूह स हर एक परिवार समूह क कछू भुइँया दिहस। इ भुइँया अहइ जेका उ पचे पाएन 16अर्नोन क सँकरी घाटी क निअरे अरोएर स लइके मेदबा सहर तलक क भुइँया। एहमँ सारा मइदान अउ दरकि बीचक सहर सामिल रहा।

17इ भुइँया हेसबोन तलक लगातार फइली रही। इ भुइँया मैं मइदान क सबहिं सहर रहेन। इ सबइ सहर दीबोन, बोमोतबाल, बेतबालमोन, 18यहसा, कदेमोत, मेपात, 19किर्यातैम, सिबमा, इ मैं घाटी क सहरन सेरेध-साहार, 20बेतपोर, पिस्गा क पहाड़ियन अउ बेत्यसीमोत सामिल रहेन। 21इ भुइँया मैं मइदान क सबहिं सहर अउ एमोरी लोगन क राजा सीहोन जउने छेत्रन पइ सासन किहे रहा उ सबइ छेत्र रहा। उ राजा हेसबोन पइ सासन किहे रहा। मुला मूसा ओका अउर मिद्यानी लोगन क हराए रहा। उ सबइ लोग एवी, रेकेम, सूर, हूर अउर रेबा रहेन। इ सबइ नेतन जउन उ देस मैं रहत रहेन सीहोन क संग जुद्ध करत रहेन। 22इस्राएल क लोग बारे क पूत बिलाम क मारेन। बिलाम भविस्सवाणी बरे जादू क उपयोग करइ क जतन किहस। इस्राएल क लोग जुद्ध मैं अनेक लोगन क मारेन। 23जउन पहँटा रूबेन क दीन्ह ग रहा, ओकर अन्त यरदन नदी क किनारे पइ होत रहा। एँह बरे इ भुइँया रूबेन क परिवार समूहन क दइ दीन्ह गइ, एहमँ इ सबइ सहर अउ सूची मैं लिखे भए सबहिं खेत सामिल रहेन।

24मूसा गाद क परिवार समूह क भुइँया क गाद कबिलन क बीच मैं बाँटे दिहस।

25गाद क प्रदेस याजेर क पहँटा अउ गिलाद क सबहिं नगर मैं रहेन। मूसा ओनका अम्मोनी लोगन क भुइँया का आधा हींसा रब्बा क निअरे अरोएर तलक भी दिहे रहा। 26इ प्रदेस मैं हेसबोन रामतमिस्पे अउ बेतोनीम क छेत्र सामिल रहेन। इ प्रदेस मैं महनैम स दबीर तलक क छेत्र सामिल रहेन। 27एहमँ बेथारम क घाटी, बेत्रिम्ना, सुक्कोत अउर सापोन सामिल रहेन। बाकी क उ समूचा हींसा जेह पइ हेसबोन क राजा सीहोन सासन किहे रहा, एहमँ सामिल रहा। इ भुइँया यरदन नदी क पूरब कइती अहइ। इ भुइँया लगातार गलील झिलिया क आखीर तलक फइली अहइ। 28इ सारा पहँटा उ अहइ जेका मूसा गाद क परिवार समूह क दिहे रहा। इ भुइँया मैं इ सबइ देस रहेन जउन सूची मैं अहइ। मूसा उ भुइँया हर एक कबिलन क बाँटे दिहस।

29मूसा मनस्से क आधा परिवार समूह क कबिलन क बीच में भी भुइँया बांटे रहा। मनस्से क परिवार समूह क कबिलना इ भुइँया पाएन:

30भुइँया महनैम स सुरु भइ। एहमों उ पूरा बासान यानी जउन सारा प्रदेस पइ बासान क राजा ओग सासन करत रहा अउर बासान में याइर क सबहिं सहर सामिल रहेन। (सब मिलाइके साठ सहर रहेन।) 31इ भुइँया में आधा गिलाद, अस्तारोत अउ एदेई सामिल रहेन। (गिलाद, अस्तारोत अउ एदेई उ सबइ सहर रहेन जेहमों ओग रहत रहा।) इ सारा प्रदेस मनस्से क पूत माकीर क परिवार क दीन्ह गएन। ऐन आधा पूतन इ पहँटा क पाएन।

32मूसा मोआब क मइदान में इ सबइ परिवार समूह क इ पूरी भुइँया दिहस। इ यरीहो क पूरब में यरदन नदी क पार रही। 33मुला मूसा लेवी परिवार समूह क कउनो भुइँया नाहीं दिहस। इस्राएल क परमेस्सर यहोवा इ वचन दिहस कि उ खुद लेवी क परिवार समूह क भेंट क रूप में होइ।

**14** याजक एलीआज़ार, नून क पूत यहोसू अउ इस्राएल क परिवार समूह क प्रमुख लोग निहचय किहन कि उ पचे कउने भुइँया क कउन लोगन क दिहन। इ सारी भुइँया यरदन नदी क पच्छिम कइँती कनान में रहेन। 2यहोवा उ ढंग मूसा क बहोत पहिले बताइ दिहे, जउने ढंग स उ चाहत रहा कि लोग आपन भुइँया चुनइँ। साढ़े नौ परिवार समूह क लोग कउन स भुइँया उ पचे पइहीं ऐंकर निहचय करइ बरे गोट डाएन। 3मूसा अढ़ाई परिवार समूहन क ओनकर भुइँया ओनका यरदन नदी क पूरब में दइ दिहे रहा। मुला लेवी क परिवार समूह क दूसर लोगन क तरह कउनो भी भुइँया नाहीं मिली। 4बारह परिवार समूहन क आपन खुद क भुइँया दइ दीन्ह गइ। यूसुफ क पूत दुइ परिवार-समूहन-मनस्से अउ एप्रैम में बँट ग रहेन अउर हर एक परिवार समूह कछु भुइँया पाइ लिहस। मुला लेवी क परिवार समूह क कबिलन क कउनो भुइँया नाहीं दीन्ह गइ। ओनका रहइ बरे कछु सहर दीन्ह ग रहेन अउर इ सबइ सहर हर एक परिवार-समूह क भुइँया में रहेन। ओनका जनावरन बरे खेत भी दीन्ह ग रहेन। 5यहोवा मूसा क बताइ दिहे रहा कि उ कउने ढंग स इस्राएल क परिवार समूहन क भुइँया देइ। इस्राएल क लोग उहइ ढंग स भुइँया क बाँटेन, जउने ढंग स बाँटेइ बरे यहोवा क हुकुम रहा।

### कालेब क ओकर प्रदेस मिलत ह

6एक दिन यहूदा परिवार समूह क लोग गिलगाल में यहोसू क लगे गएन। ओन लोगन में कनजी यपुन्ने क पूत कालेब रहा। कालेब यहोसू स कहेस, “कादेसबर्ने में यहोवा जउन बातन कहे रहा। तोहका याद अहइ। यहोवा आपन सेवक\* बातन करत रहा। यहोवा तोहरे अउ मोरे बारे में बात करता रहा। 7यहोवा क सेवक मूसा मोका उ भुइँया क जासूसी करइ बरे पठएस जहाँ हम पचे जात रहे। उ समइया मई चालीस बरिस क रहेउँ। जब मई लउटेउँ तउ मूसा क मई उ बताएउँ, जउन मई उ भुइँया क बारे में अनुभव

राखत रहेउँ। 8मुला जउन दूसर मनई मोरे संग गए रहेन उ पचे ओनसे अइसी बातन किहन जेहसे लोग डेराइ गएन। मुला मई यहोवा क हुकुमन क वफादारी स पालन किहस। 9एह बरे मूसा वचन दिहसा, ‘जउने देस में तू गए रह्या उ तोहार होइ। उ देस सदा तोहरे गदेलन क होइ। मई उ छेत्र तोहका देब, काहेकि तू यहोवा मोरे परमेस्सर पइ पूरा भरोसा किह्या ह।’

10“अब, सोचा कि उ समइ स यहोवा जइसा कहे रहा उहइ तरह मोका पैतालीस बरिस तलक जिअत रखेस ह। उ समइ हम सब रेगिस्तान में भटकत रहेन। अब, मई पचासी बरिस क होइ गवा हउँ। 11मई अबहुँ भी ओतना ही सकतीसाली हउँ जेतना सक्तीसाली मई उ समइ रहेउँ, जब मूसा मोका पठए रहा। मई ओन दिनन क तरह अब भी जुद्ध करइ क तइयार अहउँ। 12एह बरे उ पहाड़ी देस मोका दइ द्या जेका यहोवा बहोत पहिले उ दिन मोका देइ क वचन दिहे रहा। उ समइ तोहका पता लग रहा कि सहर बहोत बड़ा अउर किलेदार रहेन अउ ओन दिनन सक्तीसाली अनाकी लोग ओन सहरन पइ सासन करत रहेन। मुला अब यहोवा मोरे संग अहइ अउर मई उ प्रदेस क वइसेन ही लइ लेब जइसा यहोवा कहेस ह।”

13यहोसू यपुन्ने क पूत कालेब क आसीर्बद दिहस। यहोसू हेब्रोन सहर क ओकरे अधिकार में दइ दिहस। 14अउर उ सहर अब भी कनजी यपुन्ने क पूत कालेब क परिवार क अहइ। उ प्रदेस अब तलक ओकरे लोगन क अहइ काहेकि, उ इस्राएल क परमेस्सर यहोवा क आग्या मानेस अउर ओह पइ पूरा बिस्वास किहस। 15पहिले इ सहर क नाउँ किर्यतर्बा रहा। सहर क नाउँ अनाकी लोगन क सब त महान अर्बा नाउँ क मनई क नाउँ पइ रखा गवा रहा।

एकरे पाछे, उ देस में सान्ति रही।

### यहूदा बरे प्रदेस

**15** यहूदा क जउन प्रदेस दीन्ह गवा उ ओकरे सारे कबिलन क बीच में बाँटा। उ प्रदेस एदोम क छेत्र तलक अउर सीन क रेगिस्तान में एँका सबइ त दक्खिन छेत्र तलक फइला रहा। 2यहूदा क प्रदेस क दक्खिनी सीमा मृत सागर क दक्खिनी छोर स सुरु होत रही। 3इ सीमा बिच्छू दर्श क दक्खिन तलक जात रही अउर सीन तलक बढ़ी भइ रही। तब इ सीमा कादेसबर्ने क दक्खिन तलक लगातार गइ रही। इ सीमा हेब्रोन क आगे अद्वार तलक चलत चली गइ रही। अद्वार स चउहद्दी मुडत रही अउर कर्काआ तलक गइ रही। 4इ सीमा अम्मोन स होत भइ मिस्र क नहर तलक लगातार चलिके अन्त में भूमध्य सागर तलक पहुँचत रही। उ प्रदेस, प्रदेस क दक्खिनी सीमा बनावत रही।

5उ प्रदेस क पूर्बी सीमा मृत सागर (खारा समुद्र) क किनारे स सुरु होत रही जहाँ पइ यरदन नदी समुद्र में गिरत रही।

उत्तरी सीमा उ छेत्र स सुरु होत रही जहाँ यरदन नदी मृत सागर में गिरत रही। 6तब उत्तरी सीमा बेथोग्ला स होत

भइ गएन अउर बोहन चट्टान (बोहन रूबेन क पूत रहा।) होत भइ उत्तरी बेतराबा तलक चली गइ रही। 7तब उत्तरी सीमा आकोर क घाटी स होइके दबीर तलक गइ रही। हुआँ सीमा उत्तर क मुड़ि जात रही अउर गिलगाल तलक जात रही। गिलगाल उ सड़क क पार अहइ जउन अदुम्मीम पहाड़े स होइके जात ह जउन कि घाटी क दक्खिन कईँती अहइ। इ सीमा एनसेमेस पानी क बहाव क संग लगातार गइ रही। एन रोगेल पइ सीमा खतम रही। 8तब इ सीमा यबूसी सहर क दक्खिन कईँती स बेन हिन्नोम घाटी स होइके गइ रही। उ यबूसी सहर क यरूसलेम कहा जात रहा। (उ जगह पइ सीमा हिन्नोम घाटी क उलरी छोर प रही।) 9तब सीमा पहाड़ क चोटी पइ स नेप्तोह क पानी क झील तलक जात रही। ओकरे पाछे सीमा एप्रोन पहाड़े क निचके क सहरन तलक जात रही। उ जगह पइ सीमा मुडत रही अउर बाला क जात रही जो कि किर्यत-यारीम अहइ। 10बाला स सीमा पच्छिम कईँती मुड़ी अउर सेईर क पहाड़ी देस क गइ। यारीम पहाड़े क उत्तर क छोर तलक सीमा चलत रही (एका कासालोन भी कहा जात ह) अउर बेतसमेस तलक गइ। हुआँ स सीमा तिम्ना क पार गइ। 11तब इकरोन क उत्तरी छोर में क गइ। तब उ जगह स सीमा सिक्करोन क मुड़ी अउर बाला पर्वत क पार गइ। इ सीमा लगातार यब्वेल तलक गइ अउर भूमध्य सागर पइ खतम भइ। 12भूमध्य सागर यहूदा प्रदेस क पच्छिमी सीमा पइ रहा। इ सबइ यहूदा क प्रदेस सीमा रहेन। यहूदा क परिवार समूह इ प्रदेस में रहत रहा।

13यहोबा यहोसू क आदेस दिहे रहा कि उ यपुने क पूत कालेब क यहूदा क भुईया में स हीसा देइ। एँह बरे यहोसू कालेब क उ प्रदेस दिहस जेकरे बरे परमेस्सर आदेस दिहे रहा। यहोसू ओका किर्यत-अर्बा क सहर दिहस (जउन हेब्रोन भी कहा जात रहा)। (अर्बा अनाक क बाप रहा।) 14कालेब तीन अनाक परिवारन क हेब्रोन, जहाँ उ पचे रहत रहेन, छोड़ देइ क मजबूर किहस। उ सबइ परिवार रहेन: सेसाइ, अहीमन अउ तल्मै। उ सबइ अनाक क परिवार क रहेन। 15कालेब दबीर में रहइवाले लोगन स लड़ा। (पुराने जमाना में दबीर भी किर्यत्सेपेर कहा जात रहा।) 16कालेब कहेस, “कउनो मनई जउन किर्यत्सेपेर पइ हमला करी अउर उ सहर क जीत लइ, उहइ मोर बिटिया अकास स बियाह कइ सकी। इ ओकरे बरे एक भेंट होब्य।”

17कालेब क भाई कनजी क पूत ओत्नीएल उ सहर क हराएस। एँह बरे कालेब आपन बिटिया अकसा क ओका आपन पत्नी होइ बरे कन्यादान दिहस। 18ओत्नीएल अकसा स कहेस कि उ आपन बाप स कछू जियादा भुईया माँगइ। अकसा आपन बाप क लगे गइ। जब उ आपन गदहा स उतरी तउ ओकर बाप ओहसे पूछेस, “तू का चाहति अहा?”

19अकसा जवाब दिहस, “मई आपन एक ठु आसीबीद पावइ चाहत हउँ। मई पानीवाली भुईया चाहत हउँ जउन भुईया आप मोका जेगेब में दिहा ह, उ बहोत झुरान अहइ, एँह बरे मोका अइसी भुईया द्या जेहमाँ पानी क सोता होई।” एँह बरे कालेब ओका भुईया क ऊपरी अउ खाले क हीसा में सोतन क साथ भुईया दिहस।

20यहूदा क परिवार समूह उ भुईया पाएस जेका परमेस्सर ओका देइ क वचन दिहे रहा। हर एक कबीला समूह भुईया क हीसा पाएस। 21यहूदा क कबीला दक्खिन में सबइ सहरन क पाएस। इ सबइ सहर एदोम क प्रदेस क निचके रहेन। इ सबइ रहेन:

कबसेल, एदेर, यागूर, 22कीना, दीमोना, अदादा, 23केदेस, हासोर, यित्ना, 24जीप, तेलम, बालोत, 25हासोर्हदत्ता, किर्य्योत-हेन्नोन (हासोर भी कहा जात रहा), 26अमाम, समा, मोलादा, 27हसर्गद्दा, हेसमोन, बेत्पालेत, 28 हसर्सूआल, बेर्सेबा, बिज्योत्या, 29बाला, इथ्यीम, एसेम, 30एलतोलद, कसील, होर्मी, 31सिकलग, मदमन्ना, सनसन्ना, 32लबाओत, सिल्हीम ऐन अउ रिम्मोन। सब मिलाइके उन्तीस सहर अउर ओनके सबहिं खेत रहेन।

33पच्छिमी पहाड़ियन क तलहटी क सहरन: एसताओल, सोरा, असना, 34जानोह, एनगन्नीम, तप्पूह, एनाम, 35यर्मूत, अदुल्लाम, सोको, अजेका, 36सारैम, अदीतैम अउ गदेरा (गदेरोतैम भी कहा जात रहा)। सब मिलाइके हुआँ चोचह सहर अउ ओनकर सारे खेत रहेन।

37सनान, हदासा, मिगदलगाद, 38दिलान, मिस्पे, योक्तेल, 39लाकीस, बोस्कत, एग्लोन, 40कब्बोन, लहमास, कितलीस, 41गोदेरेत, बेतदागोन, नामा, अउर मक्केदा, सब मिलाइके हुआँ सोलह सहर अउर ओनकर सारा खेत रहेन।

42लिब्ना, ऐतेर, आसान, 43यिप्ताह, असना, नसीब, 44कीला, अकजीब अउ मारेसा। सब मिलाइके इ सबइ नौ सहर अउर ओनकर सारा खेत रहेन।

45एक्रोन अउर एँकर चारिहुँ कईँती क गाँव, अउर खेतन। सहर अउ निचके क नान्ह सहर सारा खेतन क संग पाएन। 46एक्रोन क पच्छिम क छेत्र, सारा खेत अउर असदोद क निअरे क सहरन। 47असदोद क चारिहुँ कईँती क छेत्र अउर हुआँ क नान्ह नगर जउन कि यहूदा प्रदेस क हीसा रहेन, एँकर संग चारिहुँ ओर क खेतन अउर सहरन समेत। गाजा क सबइ कईँती क छेत्र ओनकर प्रदेस मिस्त्र क नदी अउर आगे लगातार भूमध्य सागर क किनारे तलक फइला रहा।

48पहाड़ी देस सहरन: सामीर, यत्तीर, सोको, 49दन्ना, किर्यत्सन्ना (एका दबीर भी कहत रहेन), 50अनाब, एसतमो, आनीम, 51गोसेन, होलोन अउर गीलो सब मिलाइके ग्यारह सहर अउर ओनकर खेत रहेन।

52अराब, दूमा, एसान, 53आनीम, बेत्तप्पूह, अपेका, 54हुमता, किर्यतर्बा (हेब्रोन) अउर सीओर इ सबइ नौ सहर अउर एनकर सारा खेत रहेन।

55माओन, कर्मेल, जीप, यूता, 56यिज्रेल, योकदाम, जानोह, 57कैन, गिबा अउर तिम्जा। इ सबहिं दस सहर अउर ओनकर सारा खेत रहेन।

58हलहूल, बेतसूर, गदोर, 59मरात, बेतनोत अउर एलतकोन सबहिं छः सहर अउर ओनकर सारा खेत रहेन।

60रब्बा अउर किर्यत-बाल, जेका किर्यत-यारीम भी कहा जात रहा। 61यहूदा क लोगन क रेगस्तान में सहर दीन्ह ग रहेन। ओन सहरन क सूची इ अहइ। बेतराबा, मिददीन, सकाका, 62निबसान, लवण सहर अउर एनगदी। सब मिलाइके छः सहर अउर ओनकर सारा खेत रहेन।



63 यहूदा क फउज यरूसलेम में बसइयन यबूसी लोगन क जबरदस्ती बाहेर करइ मैं समरथ नार्हीं भइ। एँह बरे अब तलक यबूसी लोग यरूसलेम में यहूदा लोगन क बचि रहत हीं।

### एप्रैम अउ मनस्से बरे प्रदेस

**16** इ उ प्रदेस अहइ जेका यूसुफ क परिवार पाएस। इ प्रदेस यरीहो क लगे यरदन नदी स सुरु भवा अउ आगे पूरब में यरीहो पानी तलक रहा। तउ इ प्रदेस यरीहो स बतेल क रेगिस्तानी पहाड़ी तलक चली गइ। 2सीमा लगातार बतेल स लूज तलक अउर फुन अतारोत पइ ऐरेकी सीमा तलक चली गइ रही। 3तब इ चउहद्दी पच्छिम में यपलेती लोगन क चउहद्दी तलक चली गइ। इ चउहद्दी लगातार खाले बेथोरोन तलक चली गइ रही। इ चउहद्दी गोजेर तलक गइ अउर समुदर तलक चलतइ चलत गइ।

4इ तरह मनसे अउर एप्रैम आपन प्रदेस पाएस। (मनस्से अउ एप्रैम यूसुफ क पूत रहेन।)

5इ उ प्रदेस अहइ जेका एप्रैम क कबिलन क दीन्ह गवा: ओनकर पूरबी चउहद्दी ऊपरी बेथोरोन क निअरे अत्रोतदार पइ सुरु भइ। 6अउर इ हुआँ स सागर तलक जात रही। चउहद्दी उत्तर में मिकमतात क छोड़ कर तानतसीलो क मुड़ी अउ लगातार पूरब कइँती यानोह तलक चली गइ रही। 7तब चउहद्दी यानोह स अतारोथ अउ नारा तलक चली गइ। इ चउहद्दी लगातार चलत भइ यरीहो छुअत ह अउर यरदन नदी पइ खतम होइ जात ह। 8इ चउहद्दी तप्पूह स होत भइ पच्छिम कइँती कानाह नाला क जात ह अउर सागर पइ खतम होइ जात ह। इ उ प्रदेस अहइ जउन एप्रैम क लोगन क ओकरे परिवार समूह क अनुसार दीन्ह गवा रहा। 9एप्रैम क बहोत स चउहद्दी क सहर असल मैं मनस्से क चउहद्दी मैं रहेन मुला एप्रैम क लोगन ओन सहरन अउर आपन खेतन क पाएन। 10मुला एप्रैम लोग कनानी लोगन क गोजेर सहर छोड़इ क मजबूर करइ मैं समर्थ नार्हीं होइ सकेन। एँह बरे कनानी लोग अब तलक एप्रैमी लोगन क बीच रहत हीं। मुला कनानी लोग एप्रैमी लोगन क दास क रूप मैं रहत रहेन।\*

**17** तब मनस्से क परिवार समूह क भुइँया दीन्ह गइ। मनस्से यूसुफ क पहिला पूत रहा। मनस्से क पहिला पूत माकीर रहा जउन गिलाद क बाप\* रहा। माकीर महान जोधा रहा, एँह बरे गिलाद अउ बासान माकीर क परिवार क दीन्ह गएन। 2मनस्से क परिवार समूह क दूसर कबिलन क भी भुइँया दइ दीन्ह गइ। उ सबइ कबिलन अबीएजेर, हेलेक, अस्त्रीएल, सेकेम, हेपेर अउ समीदा रहेन। इ सबहिं मनस्से क दूसर पूत रहेन, जउन यूसुफ क पूत रहा।

3सलोफाद हेपेर क पूत रहा। हेपेर गिलाद क पूत रहा। गिलाद माकीर क पूत रहा अउर माकीर मनस्से क पूत रहा। मुला सलोफाद क कउनो पूत नार्हीं रहा। ओकर पाँच

बिटियन रहिन। बिटियन क नाउँ महला, नोआ, होग्ला, मिल्का अउर तिस्रा रहेन। 4बिटियन याजक एलीआज़ार अउर नून क पूत यहोसू क इलावा सबहिं प्रमुखन क लगे गइन। बिटियन कहेन, “यहोवा मूसा स निर्देस दिहस कि उ हमका वइसेन ही भुइँया देइँ जइसेन हमार भाईयन क दीन्ह जात हीं।” एँह बरे एलीआज़ार, यहोवा क हुकुम मानत भए एन बिटियन क वाइसेन ही भुइँया दिहेस जइसेन ओनके चाचा लोगन क मिली रही।

5इ तरह मनस्से क परिवार क लगे यरदन नदी क पच्छिम में भुइँया क दस छेत्र रहेन अउर यरदन नदी क दुसरी कइँती दुइ तु दूसर छेत्र गिलाद अउ बासान रहेन। 6मनस्से क पोतियन क वइसेन ही भुइँया दीन्ह गइ जइसेन मनस्से क दूसर बेटवन सन्तानन क दीन्ह गइ रही। गिलाद प्रदेस मनस्से क सेस परिवार क दीन्ह गवा।

7मनस्से क भुइँया आसेर अउ मिकमतात क छेत्र क बीच रही। इ सकेम क निअरे अहइ। एकर चउहद्दी एनतप्पूह स दक्खिन तलक जात रही। 8तप्पूह क भुइँया मनस्से क रही मुला तप्पूह सहर ओकर नार्हीं रहा। तप्पूह सहर जउन कि मनस्से क प्रदेस क चउहद्दी पइ रहा उ एप्रैम क बेटवन स आबाद रहा। 9मनस्से क चउहद्दी काना नाले क दक्खिन मैं रही। मनस्से क इ छेत्र क सहर एप्रैम क रहेन। मनस्से क चउहद्दी नदी क उत्तर मैं रही अउर इ पच्छिम मैं लगातार भूमध्य सागर तलक चली गइ रही। 10दक्खिन क भुइँया एप्रैम क रही अउर उत्तर क भुइँया मनस्से क रही। भूमध्य सागर पच्छिम क चउहद्दी बनावत रहा। इ चउहद्दी उत्तर मैं आसेर क प्रदेस क छुअत रही अउ पूरब मैं इस्साकार क प्रदेस क।

11इस्साकार अउ आसेर क छेत्र क बेतसान अउ एकर चारिहुँ कइँती क गाँव उ यिबलाम अउ एकर चारिहुँ कइँती क गाँव मनस्से क रहेन। मनस्से क कब्जा मैं दोर अउ एकर चारिहुँ कइँती क गाँव अउ एनदोर अउर एकर चारिहुँ कइँती क गाँव भी रहेन। नापात क तीन तु सहरन समेत तानाक अउर ओकर चारिहुँ कइँती क गाँव भी मनस्से क कब्जा मैं रहा। 12मनस्से क लोग ओन सहरन क नार्हीं हराइ सका रहेन। एँह बरे कनानी लोग हुआँ रहत रहेन। 13मुला इस्त्राएल क लोग सक्तीसाली भएन। जबहिं अइसा भवा तउ उ पचे कनान क लोगन क गुलामी मैं जाइ बरे मनबूर किहेन। मुला उ पचे कनानी लोगन क उ भुइँया तजि देइ बरे मजबूर नार्हीं किहेस।

14यूसुफ क परिवार समूहन यहोसू स बातन किहेन अउर कहेन, “तू भुइँया क हमका एक हीसा दिहया ह। मुला हम बहोत स लोग अहइँ। तू हम लोगन क उ देस क एक हीसा ही काहे दिहया जबकि यहोवा हम लोगन क आसीर्बाद दिहस?”

15अउर यहोसू ओनका जवाब दिहस, “अगर तू लोग गनती मैं जियादा हवा तउ पहाड़ी प्रदेस क जंगलन मैं ऊपर चढ़ा अउर हुआँ रहइ बरे अपन जगह बनाव। इ प्रदेस परिज्जन अउ रपाई लोगन क अहइ। अगर एप्रैम क पहाड़ी प्रदेस तू लोगन क जरूरत स छोटवार अहइ तउ उ भुइँया क लइ ल्या।”

**कनानी लोग ... रहत हीं** यानी जब यहोसू सर्ग लिखा गवा, कनानी लोग गोजेर मैं तब तलक रहत रहेन।

**गिलाद क बाप** “या गिलाद छेत्र क प्रमुख।”

16यूसुफ क लोग कहेन, “इ फुरइ अहइ कि एप्रैम क पहाड़ी प्रदेस हम लोगन बरे काफी नाहीं अहइ। मुला इ प्रदेस जहाँ कनानी लोग रहत हीं खतस्नाक बाटइ। उ सबइ कुसल जोधा अउ ओनके लगे लोहा क रथ अहइ। अउर उ सबइ थिज्रेल क घाटी अउर एकर चारिहुँ कइँती क गाँव क इलावा बेतसान क छेत्र पइ दबदबा रखत हीं।”

17तब यहोसू यूसुफ, एप्रैम अउर मनस्से क लोगन स कहेस, “मुला तू लोगन क गनती बहोतइ जियादा अहइ। अउर तू लोग बड़की ताकत धरत ह। तू लोगन क जियादा भुइँया मिलइ चाही। 18तू लोगन क पहाड़ी प्रदेस लेइ क होइ। इ जंगल अहइ, मुला तू लोग बृच्छन क काटि सकत ह अउर रहइ जोगग नीक जगह बनाइ सकत ह। इ सारा पचन्क होइ। तू लोग कनानी लोगन क उ प्रदेस क तीज देइ बरे मजबूर करब्या। तू लोग ओनका सक्तीसाली रथ क होत भए भी जउन ओनका सक्ती प्रदान करत ह हराइ देब्या।”

### बचे भए प्रदेस क बँटवारा

**18** इस्राएल क सबहिं लोग सीलो नाउँ क ठउर पइ बटुर गएन। उ ठउरे पइ उ पचे मिलापवाला तम्बू खड़ा किहन। इस्राएल क लोग उ प्रदेस क सबहिं दुस्मन क हराए रहेन अउर उ प्रदेस ओनके अधिकार में रहेन। 2मुला उ समइ भी इस्राएल क सात परिवार समूह अइसेन रहेन, जेनका परमेस्सर क जरिये वचन दीन्ह जाइ पइ भी ओनका दीन्ह गइ भुइँया नाहीं मिली रही।

3एँह बरे यहोसू इस्राएल क लोगन स कहेस, “तू लोग आपन प्रदेस लेइ मैं ऐतनी देर काहे जोहत अहा? यहोवा, तू पचन्क परमेस्सर इ प्रदेस तू पचन्क दिहे अहइ। 4एँह बरे तोहरे सबन्क हर एक परिवार समूह क तीन मनई चुनइ चाही? मइँ ओन मनइयान क ओन प्रदेसन क जाँच बरे पठउब। उ सबइ उ पूरे प्रदेस स होइ क जाब अउर उ प्रदेस क विवरन तइयार करिहीं तब उ सबइ मोरे लगे लउटिहीं। 5उ पचे देस क सात ठु हींसा मैं बाँटि देइहीं। यहूदा क लोग आपन प्रदेस दक्खिन मैं रखिहीं। यूसुफ क लोग आपन प्रदेस उत्तर मैं रखिहीं। 6मुला तू लोगन क भुइँया क उल्लेख करत भवा विवरण तइयार करइ चाही अउ प्रदेस क सात ठु हींसन मैं बाँटि देइ चाही। विवरण मोरे लगे लिआवा। अउर मइँ हिआँ यहोवा हमार परमेस्सर क मौजूदगी मैं तोहार बरे पाँसा (लोटेरी) डालब। 7मुला लेवी परिवार समूह एँ प्रदेसन क कउनो हींसा नाहीं पइहीं। उ सबइ याजक अहइ अउर ओनकर कारज यहोवा क सेवा करब अहइ। गाद अउर रूबेन क परिवार समूह अउ मनस्से क आधा क परिवार समूहन क लोग पहले वचन क अनुसार दीन्ह गवा आपन प्रदेस पाइ चुका अहइ। इ सबइ प्रदेस यरदन नदी क पूरब मैं अहइ। यहोवा क सेवक मूसा उ प्रदेस क पहिले ही दइ दिहे रहा।”

8एँह बरे चुने भए मनई उ भुइँया क लखइ अउ ओकर नक्सा बनावइ बरे चला गएन। यहोसू ओनसे कहेस, “जा, अउर उ प्रदेस क जाँच करा अउर ओकर नक्सा तइयार करा। तब मोरे लगे लउटि आवा। उ समइ मइँ यहोवा स

कहबउँ कि जउन देस तू पचन्क मिली ओका चुनइ मैं उ पचे मोर मदद करइँ।”

9एँह बरे ओन मनसेधुअन उ जगह तजेन अउर उ देस मैं उ पचे चला गएन। उ पचे देस क जाँच किहेन अउर यहोसू बरे नक्सा तइयार किहेन। उ पचे हर सहर क जाँच किहेन अउर पाएन कि प्रदेस क सात ठु हींसा अहइ। उ पचे आपन नकसा क तइयार किहेन अउर यहोसू क लगे गएन। यहोसू तबहुँ सीलो क डेरा मैं रहा। 10उ समइ यहोसू यहोवा स मदद माँगेस। यहोसू हर एक परिवार समूह क देइ बरे एक ठु प्रदेस चुनेस। यहोसू प्रदेस क बाँटेस अउर हर एक परिवार समूह क ओकरे हींसा क प्रदेस दिहस।

### बिन्यामीन बरे प्रदेस

11तब बिन्यामीन क परिवार समूह अउर ओनकइ कबीलन बरे पाँसा डावा गवा रहा अउर पाँसा यहोदा अउर यूसुफ क परिवार समूहन क भुइँया क बीच पड़ेन। 12एँकर उत्तरी चउहद्दी यरदन नदी स सुरु भइ। इ चउहद्दी यरीहो क उत्तरी छेरे स गइ रही। तब इ चउहद्दी पच्छिम क पहाड़ी प्रदेस मैं गइ रही। इ चउहद्दी लगातार बेतावेन क ठीक पूरबी ढलान तलक रही। 13तब इ चउहद्दी लूज़ (यानी बेतेल) क दक्खिनी ढलान तलक गइ। फिन इ चउहद्दी अत्रोटद्वार तलक खाले गइ। अत्रोटद्वार खाले बेथोरोन क दक्खिनी पहाड़ी क ढलान पइ अहइ। 14चउहद्दी दक्खिन कइँती मड़ी अउर बैथ-हेरोन क लगे उ पहाड़ी क पच्छिमी कइँती क निचके स गइ। इ चउहद्दी आगे किर्यत बाल जउन किर्यत-यारीम भी कहलावत ह तलक गएन। इ एक सहर रही जहाँ यहूदा क लोग रहत रहेन। इ पच्छिमी चउहद्दी रही।

15दक्खिन क चउहद्दी किर्यतयारीम स सुरु भइ अउर नेप्तोह क पानी क चसमा तलक गइ। 16तब चउहद्दी हिन्नोम क घाटी क निचके पहाड़ी क तलहटी मैं गइ। इ रपाईम घाटी क उत्तरी छोर रहा। इ चउहद्दी यबूसी सहर क ठीक दक्खिन हिन्नोम घाटी मैं चलत भइ चली गइ। तब चउहद्दी एनरोगेल तलक चली गइ। 17हुआँ, चउहद्दी उत्तर कइँती मुड़ी अउर एन सेमेस क गइ। इ चउहद्दी लगातार गलीलोट तलक जात ह। (गलीलोट, पहाड़न मैं अदुम्मीम दर्रे क निअरे अहइ।) इ चउहद्दी उ बड़की चट्टान तलक गइ जेकर नाउँ रूबेन क पूत, बोहन बरे धरा गवा रहा। 18इ चउहद्दी बेतअरबा क उत्तरी भाग तलक लगातार चली गइ। 19तब इ बेथोगला क उत्तरी भाग क जाइके, लवण सागर क उत्तरी तट पइ खतम भइ। इ उहइ जगह अहइ जहाँ यरदन नदी समुद्र मैं गिरत ह। इ दक्खिनी चउहद्दी रही।

20पूरब कइँती यरदन नदी क चउहद्दी रही। इ तरह इ भुइँया रही जउन बिन्यामीन क परिवार समूह क दीन्ह गइ। इ सबइ चारिहुँ कइँती क चउहद्दी रहीन। 21बिन्यामीन क हर एक परिवार समूह क, इ तरह, इ भुइँया मिली। ओनके कब्जा मैं इ सबइ सहर रहेन। यरीहो, बेथोगला, एमेक्कसीस, 22बेतशाबा, समारैम, बेतेल, 23अव्वीम, पारा, ओप्रा, 24कपरम्मोनी,

ओपनी अउ गोबा। इ सबइ बारहु सहर, उस छोटके छेत्र में, ओनके आसपास खेतन क साथे रहेन।

25बिन्ध्यामीन क परिवार समूह क लगे गिबोन, रामाबेरोत, 26मिस्पा, कपीरा, मोसा, 27रेकेम, थिर्पेल, तरला, 28सेला, एलेप, यबूस सहर (यरुसलेम), गिबत अउ किर्यत-यरीम सहर भी रहेन। इ सबइ चउदह सहर, उ छोटके छेत्र में ओनके आसपास क खेतन क साथे रहेन। इ सबइ पहाँटा बिन्ध्यामीन क परिवार समूह पाए रहा।

### सिमोन बरे प्रदेस

19 सिमोन क परिवार बरे दूसर पाँसा डावा गवा रहा। जउन ओनका मिली, यहूदा क अधिकार-छेत्र क भीतर रही। 2इ उ भुइँया क विवरण रही जउन ओनका मिली: बेसेबा जउन सेबा भी कहलावत ह। मोलादा, 3हसर्सूआल, बाला, एसेम, 4एलन्तोल्द, बतूल, होर्मा, 5सिकलग, बेत्मर्काबोत, हसर्सूसा, 6बेतलबाओत अउ सारुहने, इ सबइ तेरह सहर अउर ओनकर सारा खेत सिमोन क रहेन। 7ओनका ऐन, रिम्मोन, एतेर अउ आसान सहर भी एकर खेतन क साथ पाए रहेन। 8उ पचे उ सबइ सारा खेत सहसन क साथे पाएन जउन बालत्वेर तलक फइला रहेन। (इ नेगव छेत्र में रामा ही अहइ।) इ तरह इ उ प्रदेस रहा, जउन सिमोनी लोगन क परिवार समूह क दीन्ह गवा। हर एक इ भुइँया क पाएस। 9सिमोनी लोगन क भुइँया यहूदा क प्रदेस क भाग स लीन्ह गइ रही। यहूदा क लगे ओन लोगन क जरुरत स जियादा भुइँया रही। एह बरे सिमोनी लोगन क ओनकी भुइँया क हीसा मिला।

### जबूलून बरे प्रदेस

10जबूलून क परिवार समूह अउर ओकरे कबीलन बरे तीसर पाँसा डावा गवा रहा। जबूलून क प्रदेस सारीद तलक जात रही। 11फिन उ पच्छिम में दब्बेसेत स होत भइ मरला क छेत्र क निचके तलक पहोंचत रहा। तब इ चउहद्दी संकरी घाटी स होत भए योकनाम क छेत्र तलक जात रही। 12तब इ चउहद्दी पूरब कइँती मुड़ी रही। इ सारीद स किसलोलताबोर क छेत्र तलक पहोंचत रही। तब इ चउहद्दी दाबरत अउ यापी तलक चलत गइ रही। 13तब चउहद्दी पूरब में गथेपेर अउर इत्कासीन तलक लगातार रही। इ चउहद्दी रिम्मोन पइ खतम भइ। तब चउहद्दी मुड़ी अउर नेआ तलक गइ। 14नेआ पइ फिन चउहद्दी मुड़ी अउ उत्तर कइँती गइ। इ चउहद्दी हन्नातोन तलक पहोंची अउर लगातार यिप्तहेल क घाटी तलक गइ। 15इ चउहद्दी क भीतर कतात, नहलाल, सिप्रोन यिदला अउर बेतलेहेम सहर रहेन। सब मिलाइके इ सबइ बारह सहर आपन खेतन क साथे रहेन।

16एह बरे इ सबइ सहर अउ छेत्र अहइँ जउन जबूलून क कबीलन क दीन्ह गएन।

### इस्साकार बरे प्रदेस

17चउथा पाँसा इस्साकार क परिवार समूह क कबिलन बरे डावा गवा रहा। 18उ परिवार समूह क जउन भुइँया दीन्ह

गइ रही उ इ अहइ: यिज्रेल, कसुल्लोत, सूनेम 19हपारैम, सीओन, अनाहरत, 20रब्बीत, किस्योन, एबेस, 21रेमेत, एनगन्नीम, एन हददा अउर बेतपस्सेस।

22ओनकर प्रदेस क चउहद्दी ताबोरसहसूसूसा अउर बेतसेमेस क छुअत रही। इ चउहद्दी यरदन छेत्र पइ खतम होत रही। सब मिलाइके सोहाह सहर अउर ओनकर खेत रहेन। 23इ सबइ सहर अउर कस्बा इस्साकार परिवार समूह अउर ओनकइ कबीलन क दीन्ह गएन प्रदेस क हीस रहेन।

### आसेर बरे प्रदेस

24पाँचवाँ पाँसा आसेर क परिवार समूह अउर ओनकइ कबीलन बरे डावा गवा रहेन। 25उ परिवार समूह क जउन भुइँया दीन्ह गइ उ इ अहइ: हेल्कत, हली, बेतेन, अच्छाप, 26अलाम्मेल्लेक, अमाद अउ मिसाल।

पच्छिमी चउहद्दी लगातार कर्मेल पहाड़ अउ सीहोलिब्नात तलक रही। 27तब चउहद्दी पूरब कइँती मुड़ी। इ चउहद्दी बेतदागोन तलक गइ। इ चउहद्दी जबूलून अउ यिप्तहेल क घाटी क छुअत रही। तब इ चउहद्दी बेतेमेक अउ नीएल क उत्तर क गइ। इ चउहद्दी काबुल क उत्तर स गइ रही। 28तब इ चउहद्दी एग्रोन, रहोब अउर हम्मोन होत भइ काना तलक गइ रही। इ प्रदेस लगातार एक सक्तीसाली सहर सिदोन तलक गइ रही। 29इ चउहद्दी रामा कइँती मुड़ी अउर फुन किलाबन्द सहर सूर तलक गइ। तब फुन मुड़ी अउर होसा तलक गइ। इ चउहद्दी अकज़ीब, 30उम्मा, अपेक अउर रहोब क छेत्र में समुदर पइ खतम होत रही।

सब मिलाइके हुआँ बाईस सहर अउ ओनकर खेत रहेन। 31इ सबइ सहर अउ ओनके खेत आसेर परिवार समूह क दीन्ह गए भुइँया क हीसा रहेन। उ परिवार समूह क हर एक कबिला इ भुइँया क कछू हीसा पाएस।

### नप्ताली बरे प्रदेस

32छठा पाँसा नप्ताली क परिवार समूह अउर ओनकर कबीलन बरे डावा गवा रहेन। 33ओनकर प्रदेस क चउहद्दी सानन्नीम क छेत्र में बिसाल वृच्छ स सुरू भइ। इ हेलेप क निअरे रहा। तब इ चउहद्दी अदानीमेकेब अउ यबनेल स होइके गइ। इ चउहद्दी लक्कूम पइ खतम भइ। 34तब इ चउहद्दी पच्छिम क अजनोत्ताबोर होइके गइ। इ चउहद्दी हुक्कोक पइ खतम भइ। इ चउहद्दी दक्खिन क जबूलून छेत्र तलक गइ। इ चउहद्दी पच्छिम में आसेर क छेत्र तलक पहोंचत रही। इ चउहद्दी पूरब में यरदन नदी पइ यहूदा क जात रही। 35इ चउहद्दी क भीतर कछू बहोत सक्तीसाली सहर रहेन। इ सबइ सहर सिद्दीम, सेर, हम्मत, रक्कत, किन्नेरेत, 36अदामा, रामा, हासोर, 37केदेस, एदेइ, अन्हासेर, 38यिरोन, मिगदलेल, होरेम, बेतनात अउ बेतसेमेस रहेन, सब मिलाइके हुआँ उन्नीस सहर अउर ओनकर खेत रहेन।

39इ सबइ सहर अउर ओनकर चारिहुँ कइँती क कस्बन उ प्रदेस क हीसा रहेन, जउन नप्ताली क परिवार समूह क ओनकइ कबीलन क अनुसार दीन्ह ग रहेन।

### दान बरे प्रदेस

40तब सताएँ पाँसा दान क परिवार समूह अउर ओनकर कबीलन बरे डावा गवा रहेन। 41ओनका जउन कछू प्रदेस दीन्ह गवा उ इ अहइ: सोरा, एस्ताओल, ईरसेमेस, 42सालब्बीन, अय्यालोन, यितला, 43एलोन, तिम्ना, एक्रोन, 44एलतके, गिब्बतोन, बालात, 45यहूद, बेनेबराक, गत्रिम्मोन, 46मेयर्कोन, रक्कोन अउ यापो क निचके क छेत्र। 47मुला दान क लोगन क आपन प्रदेस लेइ मँ परेसानी उठावइ क पड़ी। हुआँ सक्तीवाला दुस्मन रहेन अउर दान क लोग ओनका आसानी स हराइ नाहीं सकत रहेन। एँह बरे दान क लोग गएन अउर लेसेम क खिलाफ लड़ेन। उ पचे लेसेम क हराएन अउ जउन लोग हुआँ रहत रहेन, ओनका मार डाएन। एँह बरे दान क लोग लेसेम सहर मँ रहेन। उ पचे ओकर नाउँ बदलिके दान कइ दिहन काहेकि इ नाउँ ओनके परिवार समूह क पुरखा क रहा। 48इ सबइ सबहिँ सहरन अउर खेत उ भुइँया मँ रहेन जउन दान क परिवार समूह क ओनकर कबीलन क अनुसार दीन्ह ग रहेन।

### यहोसू बरे प्रदेस

49इ तरह प्रदेसन क बाँटवारा करब अउर अलग अलग परिवार समूहन क ओनका देब पूरा किहन। तब इस्राएल क सब लोग नून क पूत यहोसू क भी कछू प्रदेस देइ क निहचय किहन। 50यहोवा हुकुम दिहस कि ओका उ भुइँया मिलइ। एँह बरे उ पचे एप्रैम क पहाड़ी प्रदेस मँ यहोसू क विमन्त्सेरह सहर दिहन। इहइ उ सहर रहा, जेकरे बरे यहोसू कहे रहा कि मईँ ओका चाहत हउँ। यहोसू उ सहर क फुन: बनाएस अउर उ ओहमाँ रहइ लाग।

51इ तरह इ सबइ प्रदेस इस्राएल क अलग अलग परिवार समूहन क दीन्ह गएन। याजक एलीआजार, नून क पूत यहोसू अउ हर एक परिवार समूह क नेता लोग सिलोह मँ मिलापवाला तम्बू क दुआर पइ यहोवा क मौजूदगी मँ बटुरा रहेन। इ तरह उ पचे प्रदेस क बाँटवारा पूरा कइ लिहन।

### सुरच्छा क सहर

20 तब यहोवा यहोसू स कहेस: 2“मईँ मूसा क उपयोग तू लोगन क हुकुम देइ बरे कियेउँ ह। मूसा तू लोगन स सुरच्छा क विसेस सहर बनवइ बरे कहे रहा। तउ सुरच्छा बरे ओन सहरन क चुनाव करा। 3अगर कउनो मनई कउनो मनई क मार डावत ह, मुला अइसा संजोग क कारण होत ह अउर ओकर इरादा ओका मार डावइ क नाहीं होत तउ उ मरे मनई क ओन रिस्तेदारन स जउन बदला लेइ बरे ओका मारि डावइ चाहत हीँ, आत्मरच्छा बरे सुरच्छा नगर मँ सरण लइ सकत ह।

4“उ मरा मनई क इ करइ चाही। जब उ पराइ अउर ओन सहरन मँ कउनो एक मँ पहुँचइ तउ ओकर सहर दुआर पइ रुकइ चाही। ओका सहर दुआरे पइ खड़ा रहइ चाही अउर नगर प्रमुखन क बतावइ चाही कि का घटा अहइ। तब नगर प्रमुख ओका सहर मँ प्रवेस करइ दइ सकत हीँ। उ सबइ ओका आपन बीच मँ रहइ क जगहिया

देइहीँ। 5मुला उ मनई जउन ओकर पाछा करत अहइ उ सहर तलक ओकर पाछा कइ सकत ह। अगर अइसा होत ह तउ नगर प्रमुखन क ओका यो ही नाहीं तजि देइ चाही, बल्कि ओनका उ मनई क रच्छा करइ चाही जउन ओनके लगे सुरच्छा बरे आवा अहइ। उ सबइ उ मनई क रच्छा एँह बरे करिहीं कि उ जेका मार डाएस ह, ओका मारि डावइ क ओकर इरादा नाहीं रहा। इ संजोग क कारण होइ गवा। उ कोहान नाहीं रहा अउर उ मनई क मारइ क निहचय नाहीं किये रहा। इ कछू अइसा रहा, जउन होइ ही गवा। 6उ मनई क तब तलक सहर मँ रहइ चाही जब तलक उ सहर क निआव क कचहरी क जरिये ओकरे मोकदमा क निर्णय नाहीं होइ जात अउर ओका तब तलक उहइ सहर मँ रहइ चाही जब तलक महा याजक नाहीं मर जात। तब उ आपन घर मँ उ सहर मँ लउटि सकत ह, जहाँ स उ भागत भवा आवा रहा।”

7एँह बरे इस्राएल क लोग “सुरच्छा सहर” नाउँ क सहरन क चुनेन। उ सबइ सहर इ सबइ सहर रहेन:

नप्ताली क पहाड़ी प्रदेस मँ गलील क केदेस; एप्रैम क पहाड़ी प्रदेस मँ सकेम; किर्यतर्बा जउन यहूदा क पहाड़ी प्रदेस मँ रहा।

8रूबेन क प्रदेस क रेगिस्तान मँ, यरीहो क निअरे यरदन नदी क पूरब मँ बेसेर; गाद क प्रदेस मँ गिलाद मँ रमोत; मनस्से क प्रदेस मँ बासान मँ गोलान।

9कउनो इस्राएली मनई या ओनके बीच रहइवाला कउनो भी विदेसी, अगर कउनो क मार डावत ह, मुला इ संजोग क कारण होइ जात ह, तउ उ ओन सुरच्छा नगरन मँ स कउनो एक मँ सुरच्छा बरे पराइके जाइ सकत रहा। तब उ मनई हुआँ सुरच्छित होइ सकत रहा अउर पाछा करइवाला कउनो क जरिये मारा नाहीं जाइ सकत रहा। उ सहर मँ उ मनई क मोकदमा क निबटारा उ सहर क निआव क कचहरी क जरिये होइ।

### याजकन अउ लेवी बंसियन क सहर

21 लेवी परिवार समूह क सासक लोग याजक एलीआजार, नून क पूत यहोसू अउ इस्राएल क दूसर परिवार समूहन क सासक लोगन स बात कियेस। 2इ कनान देसा मँ सीलो सहर मँ भवा। लेवी परिवार समूह क सासक लोग ओनसे कहेन, “यहोवा मूसा क आदेस दिहे रहा कि तू हम लोगन क रहइ बरे सहर देब्या अउर तू हम लोगन क मइदान देब्या जेहमाँ हमार जनावर चरि सकिहीं।” 3एँह बरे उ पचे यहोवा क आदेस क माना। उ पचे लेवी परिवार समूह क इ सबइ सहर अउर ओनके गोरुअन बरे खेत दिहेन:

4पहिला पाँसा कोहात कबीला बरे जउन लेवी परिवार समूह स रहा। कछू कोहात कबिलन क एक हीँसा स तेरह सहर दीन्ह ग रहेन। इ सबइ सहर उ प्रदेस मँ रहेन जउन यहूदा, सिमोन अउ बिन्यामीन क होत रहा। इ सबइ सहर ओन कोहातियन क दीन्ह ग रहेन जउन महा याजक हारून क संतान रहिन।

5कोहात कबीला क दूसर सारे सदस्य क दस सहर दीन्ह ग रहेन। इ सबइ दस सहर एप्रैम, दान अउर मनस्से क आधा परिवार क समूहन क प्रदेसा में स रहेन।

6गोर्सीन कबीला क तेरह सहर दीन्ह ग रहेन। इ सबइ सहर उ प्रदेस में रहेन जउन इस्साकार, आसेर, नप्ताली अउर बासान में मनस्से क आधा परिवार समूह क भुईया में रहेन। 7मरारी कबीला क बारह सहर दीन्ह ग रहेन। इ सबइ सहर ओन प्रदेसन में रहेन जउन रूबेन, गाद अउर जबूलून क रहेन।

8इ तरह इस्त्राएल क लोग लेवी परिवार समूह क इ सबइ सहर अउर ओनके चारिहुँ ओर क खेत दिहन। उ पचे इ मूसा क आदेस क अनुसार यहोवा क हुकुम क मानइ बरे किहन।

9यहूदा अउर सिमोन परिवार समूहन क प्रदेस क सहरन जेका कि लेवी परिवार समूह क दीन्ह ग रहेन इ सबइ रहेन। 10इ सहरन कोहात कबीला क सदस्य क रहेन जउन कि लेवी परिवार समूह स हारून क संतानन रहेन। 11उ पचे ओनका किर्यत-अर्बा जेका नाउँ अनाक क पिता अरबा क नाउँ पाइ धरा गवा रहेन, एकर चारिहुँ कइँती क खेतन क संग दिहस। इ कसबा क यहूदा क पहाड़ी देस में हेब्रोन स भी जाना जात ह। 12मुला खेत अउर किर्यत-अर्बा सहर क चारिहुँ कइँती क छोटकन सहर यपुन्ने क पूत कालेब क रहेन।

13इ तरह उ पचे हेब्रोन सहर क हारून क संतानन क सुरच्छा क सहर क रूप में अउर लिब्ना अउर ऐंकर चारिहुँ कइँती क घास क मइदान दइ दिहस। 14उ पचे यत्तीर, एसतमो अउर ओनकर घास क मइदान, 15होलोन, दबीर, 16ऐन, युत्ता अउर बेतसेमेस भी ओनकइ चारिहुँ कइँती क घास क मइदान समेत पाएन। ऐंन दुइनउँ समूहन क यहूदा अउर सिमोन क जरिये नौ सहर दीन्ह गएन।

17उ पचे हारून क संतानन क उ सबइ सहर भी दिहन जउन बिन्यामीन परिवार समूह क रहेन। इ सबइ सहर गिबोन, गोबा अउर ओनकर घास क मइदान, 18अनातोत अउर अल्मोन रहेन। उ पचे इ सबइ चार सहर अउर ऐंनकइ चारिहुँ कइँती क सब खेत दिहन। 19इ तरह इ सबइ सहर याजकन क दीन्ह गएन। (इ सबइ याजक, याजक लोग हारून क संतान रहेन।) सब मिलाइके तेरह सहर अउर ओनकइ सब खेत ओनके जनावरन क दीन्ह गएन।

20कोहाती कबीला क दूसर लोगन क इ सहर दीन्ह गएन, जउन कि एप्रैम परिवार समूह क रहेन: 21उ पचे ओनका एप्रैम क पहाड़ी मुल्क में सेकेम सहर जउन कि सुरच्छा क सहर रहा एकर चारिहुँ कइँती क घास क मइदान क संग दिहन। उ पचे गोजरे, 22किबसैम अउर, बेथोहरोन भी ओनका दिहन। सब मिलाइके उ पचे चार सहर अउर ओनकर चारिहुँ कइँती क सारा खेत ओनका दिहन।

23दान क परिवार समूह ओनका एलतके, गिब्वतोन, 24अय्यालोन अउर गत्रिमोन दिहन। सब मिलाइके इ सबइ चार सहर अउर ओनकर सारा खेत ओनके जनावरन क बरे रहेन।

25मनस्से क आधा परिवार समूह ओनका तानाक अउर

गत्रिमोन दिहन। ओनका उ सबइ सारा खेत भी दीन्ह गएन जउन ऐंन दुइनउँ सहरन क चारिहुँ ओर रहेन।

26इ तरह इ सबइ दस जियावा सहर अउर ऐंन सहरन क चारिहुँ कइँती क भुईया ओनकर जनावरन बरे कोहाती समूह क दिन्ह गइ रही।

27लेवी परिवार समूह क गोर्सीनी कबीला क इ सबइ सहर दीन्ह ग रहेन।

मनस्से परिवार समूह क आधा परिवार ओनका बासान में गोलान दिहस। (गोलान एक सुरच्छा सहर रहा।) मनस्से ओनका बे-एसतरा भी दिहस। उ पचे इ दुइनउँ सहरन क चारिहुँ ओर क घास क मइदान भी पाएन।

28इस्साकार क परिवार समूह ओनका किस्सोन, दाबरत, 29यरमूत अउर एनगन्नीम अउर ओनकर घास क मइदान दिहस। कुल मिलाइके चार सहर।

30आसेर क परिवार समूह ओनका मिसाल, अब्दोन, 31हेल्कात अउर र्होब दिहस। एन चारिहुँ सहरन क चारिहुँ कइँती क भुईया भी ओनका ओनकर जनावरन बरे दीन्ह गइ।

32नप्ताली क परिवार समूह ओनका गलील में केदेस क सुरच्छा क सहर क रूप में दिहस। नप्ताली क परिवार समूह ओनका हम्मोतदोर अउर कर्तान भी दिहस। ओनकर घास क मइदान क संग तीन सहर।

33सब मिलाइके गोर्सीनी कबीला तेरह सहर अउर ओनकर चारिहुँ ओर क खेतन पाएस।

34दूसर लेवी कबीला मरारी कबीला रहा। मरारी लोगन क इ सहर दीन्ह ग रहेन: जबूलून क परिवार समूह ओनका योक्नाम, कर्ताह, अउर ओनकर घास क मइदान, 35दिम्ना अउर नहलाल अउर ओनकर घास क मइदान - चार सहर दिहेन।

36रूबेन क परिवार समूह ओनका यरदन क पूरब में बेसेर, यहसा, 37केदमोत अउर मेपात सहर दिहन। सारी भुईया, जउन ऐंन चारिहुँ सहरन क चारिहुँ कइँती रही, मरारी लोगन क ओनकर जनावरन बरे दीन्ह गइ।

38गाद क परिवार समूह ओनका गिलाद में सुरच्छा क सहर रामोत अउर एकर घास क मइदान दिहस। उ पचे ओनका महनैम अउर एकर घास क मइदान, 39हेस्वोन अउर याजेर भी दिहन। गाद ऐंन चारिहुँ सहरन क चारिहुँ कइँती क सारी भुईया भी ओनकर जनावरन बरे दिहन।

40सब मिलाइके मरारी कबीला जउन कि आखिरी लेवी कबीला रहा क बारह सहर दीन्ह गएन।

41सब मिलाइके लेवी परिवार समूह अइतालीस सहर अउर ओकर संग ऐंन सहरन क चारिहुँ कइँती क खेत पाएन। इ सबइ सहर उ प्रदेसन में रहेन, जउन इस्त्राएल क दूसर परिवार समूह क लोगन क कबजा में रहेन। 42हर एक सहर क साथ ओनकइ चारिहुँ कइँती क अइसी भुईया अउर खेत रहेन। जेन पइ जनावरन जिन्नगी बिताइ सकत रहेन। इहइ बात हर सहर क साथे रही।

43इ तरह यहोवा इस्त्राएल क लोगन क जउन वचन दिहे रहा, ओका पूरा किहस। उ ओनका सारा प्रदेसन दइ दिहस जेका देइ क उ ओनकर पुरखन क वचन दिहे रहा। लोग उ

प्रदेसन क लिहन अउर ओहमौं रहइ लागेन। 44अउर यहोवा ओनकर प्रदेस क चारिहुँ कइँती सान्ति स्थापित होइ दिहस काहेकि उ ओनकइ सतानन स वचन दइ रहा। ओनकर कउनो दुस्मन ओनका नाहीं हराएन। यहोवा इस्त्राएल क लोगन क हर एक दुस्मन क हरावइ दिहस। 45यहोवा इस्त्राएलियन क दीन्ह गए आपन सबहीं वचनन क पूरा किहस। कउनो अइसा वचन नाहीं रहा, जउन पूरा न भवा होइ। हर एक वचन पूरा भवा।

### तीन परिवार समूह घरे लउटत हीं

**22** तब यहोसू रूबेन, गाद क परिवार समूह अउ मनस्से क आधा परिवार समूह क सबहिं लोगन क एक सभा किहस। 2यहोसू ओनसे कहेस, “तू पचे यहोवा क सेवक मूसा क दीन्ह गए सबहिं हुकुमन क मान्या ह। अउर तू पचे मोरे सबहिं हुकुमन क भी मन्या ह। 3अउर इ पूरा समइ मैं तू लोग इस्त्राएल क दूसर लोगन क मदद किह्या ह। तू लोग यहोवा क ओन सबहिं हुकुमन क बहोत ही होसियार स मानइ रह्या, जेनका तोहार परमेस्सर यहोवा तू पचन्क दिहे रहा। 4तोहार परमेस्सर यहोवा इस्त्राएल क लोगन क सान्ति देइ क वचन दिहे रहा। ऐह बरे अब यहोवा आपन वचन पूरा कइ लिहस ह। इ समइ तू लोग आपन घरे लउटि सकत ह। तू लोग, आपन उ प्रदेस मैं जाइ सकत ह जउन तू पचन्क दीन्ह ग अहइ। इ प्रदेस यरदन नदी क पूरब मैं अहइ। इ उहइ प्रदेस अहइ जेका यहोवा क सेवक मूसा तू पचन्क दिहे रहा। 5मुला याद राखा कि जउन व्यवस्था मूसा तू पचन्क दिहे अहइ, ओनका माना जात रहइ। तू पचन्क आपन परमेस्सर यहोवा स पिरिम करब अउ ओकरे हुकुमन क मानइ क अहइ। तू पचन्क ओनके पाछे चलइ चाही, अउर पूरी आस्था क साथ ओनकर सेवा करा।”

6तब यहोसू ओनका आसीर्बाद दिहस अउर उ पचे बिदाइ लिहन। उ पचे आपन घरे लउटि गएन। 7मूसा आधा मनस्से परिवार समूह क बासान प्रदेस दिहे रहा। यहोसू दूसर आधा मनस्से परिवार समूह क यरदन नदी क पच्छिम मैं प्रदेस दिहस। यहोसू ओनका आपन घरे पठाएसा यहोसू ओनका आसीर्बाद दिहस। 8उ कहेस, “तू पचे बहोत सम्पन्न अहा। तोहरे पचन्क लगे चाँदी, सोना अउर दूसर बहुमूल्य जेवरन क संग बहोत स जनावर अहइँ। तू लोगन क लगे अनेक सुन्नर वस्त्र अहइँ। तू पचे आपन दुस्मनन स बहोत स चिजियन लिह्या ह। ऐन चिजियन क तू पचन्क आपुस मैं बाँट लेइ चाही। अब आपन आपन घरे जा।”

9ऐह बरे रूबेन अउ गाद क परिवार समूह अउर मनस्से क आधा परिवार समूह इस्त्राएल क दूसर लोगन स बिदाइ लिहेन। उ पचे कनान मैं सीलो मैं रहेन। उ पचे उ जगह क तजेन अउर उ पचे गिलाद क लउटेन। इ ओनकर आपन प्रदेस रहा। मूसा ओनका इ प्रदेस दिहे रहा, काहेकि यहोवा ओका अइसा करइ क आदेस दिहे रहा।

10रूबेन, गाद अउ मनस्से क अधा परिवार समूह क लोग गेलिलोथ नाउँ क जगह क जात्रा किहन। इ यरदन नदी क किनारे कनान देस मैं रहा। उ जगह पइ उ पचे एक ठु सुन्नर वेदी बनाएन। 11मुला इस्त्राएल क लोगन क दूसर

समूहन, जउन तब तलक सीलो मैं रहेन, उ वेदी क बारे मैं सुनेन जउन ऐन तीनहुँ परिवार समूह बनाए रहेन। उ पचे इ सुनेन कि इ वेदी कनान क सीमा पइ गोत्र नाउँ क जगह पइ रही। इ यरदन नदी क किनारे इस्त्राएल कइँती रही। 12इस्त्राएल क सबहिं परिवार समूह ऐन तीनउँ परिवार समूहन पइ बहोत कोहाइ गएन। उ पचे बटुर गएन अउर उ पचे ओनकइ खिलाफ जुद्ध करइ क निहचय किहन।

13ऐह बरे इस्त्राएल क मनइयन कछू लोगन क रूबेन अउर गाद क परिवार समूह अउ मनस्से क आधा परिवार समूह क लोगन स बातन करइ बरे पठाएन। इस्त्राएल क लोग प्रमुख याजक जउन कि एलीआज़र क पूत पीनहास रहा क बात पइ चर्चा करइ बरे पठाएस। 14उ पचे हुआँ क परिवार समूहन क दस नेतान क पठाएन। उ पचे सीलो मैं ठहरेन। इस्त्राएल क परिवार समूहन मैं हर एक परिवार समूह स एक मनई रहा।

15इ तरह इ सबइ गियारह मनई गिलाद गएन। उ पचे रूबेन, गाद अउ मनस्से क लोगन स बातन करइ गएन। गियारह मनइयन ओनसे कहेन: 16“इस्त्राएल क सबहिं लोग तू पचन्स पूछत हीं: तू पचे इस्त्राएल क परमेस्सर क खिलाफ इ काहे किह्या ह? तू पचे यहोवा क खिलाफ कइसे होइ गया? तू लोग आपन बरे वेदी काहे बनाया? तू पचे जानत अहा कि इ परमेस्सर क सिच्छा क खिलाफ अहइ। 17पोर नाउँ क जगह क याद करा।\* हम लोग पाप क कारण अबहुँ कस्ट सहित ह। इ बड़के पाप बरे परमेस्सर इस्त्राएल क बहोत स लोगन क बुरी तरह बीमार कइ दिहे रहा अउर हम लोग अबहुँ उ बेरामी क कारण कस्ट सहत अही। 18अउर अब तू पचे उहइ करत अहा। तउ पचे यहोवा क विरुद्ध जात बाट्या। का तू पचे यहोवा क हुकुम क मानइ स मना करब्या? अगर तू पचे जउन करत अहा, बन्द नाहीं करत्या तउ यहोवा इस्त्राएल क हर मनई प कोहाइ जाइ।

19“अगर तोहार पचन्क प्रदेस उपासना बरे ठीक नाहीं अहइ तउ हमरे प्रदेस मैं आवा। यहोवा क तम्बू हमरे प्रदेसन मैं अहइ। तू पचे हमार कछू पहुँटा लइ सकत ह अउर ओहमौं बसि सकत ह। मुला यहोवा क खिलाफ जिन हवा। दूसर वेदी जिन बनावा। हम लोगन क संग पहिले स ही आपन परमेस्सर यहोवा क वेदी यहोवा क संग मलइ बरे खास तम्बू मैं अहइ।

20“जेरह क पूत आकान क सुमिरा। आकान आपन पाप क कारण मरा। उ ओन चीजन क बारे मैं हुकुम क मानइ स इन्कार किहस, जेनका नस्ट कीन्ह जाब रहा। उ एक मनई परमेस्सर क नेम क तोड़ेस, मुला इस्त्राएल क सबहिं लोगन क दण्ड मिला। आकान आपन पाप क कारण मरा। मुला बहोत स दूसर लोग भी मरेन।”

21रूबेन अउ गाद क परिवार समूह क लोग अउर मनस्से क आधा परिवार समूह क लोग इस्त्राएल क कबीला क प्रमुखन क जवाब दिहन। उ पचे इ कहेन, 22“हमार परमेस्सर यहोवा अहइ। हम लोग फुन दोहरावत अही कि

हमार परमेस्सर यहोवा अहइ\* अउर परमेस्सर जानत ह कि तू लोग भी इ जाना। तू लोग ओकर फइसला कइ सकत अहा जउन हम लोग किहे अही। अगर तू लोगन क इ बिस्सास अहइ कि हम लोगा पाप किहे अही तउ तू लोग हम पचन्क अबहिं मार सकत ह। 23अगर हम पचे परमेस्सर क नेम तोड़े अही तु हम कहब कि यहोवा खुद हमका सजा देइ। का तू लोग इ सोचत अहा कि हम लोग इ वेदी क होमबलि चढ़ावइ अउर अन्नबलि अउर मेलबलि चटावइ बरे बनावा ह? 24नाहीं। हम लोग ऐंका इ उछेस्य स नाहीं बनावा ह। हम लोग इ वेदी काहे बनावा ह? हम पचन्क डर रहा कि भक्त्सि में तोहार सबन्क लोग हम पचन्क आपन रास्ट्र क एक ठु हींसा नाहीं समुझिहीं। तब तोहरे लोग इ कहिहीं, तू लोग इस्राएल क परमेस्सर यहोवा क उपासना नाहीं कइ सकत्या। 25परमेस्सर हम लोगनक यरदन नदी क दूसर कईंती प्रदेस दिहे अहइ। एकर अरथ इ भवा कि यरदन नदी क सीमा बनावा ह। हमका डर अहइ कि जब तोहरे पचन्क गदेलन बड़ा होइके इ प्रदेस पइ सासन करिहीं तब उ पचे हमका बिसरि जइहीं, कि हम भी तोहार लोग अही। उ पचे हमसे कहिहीं, 'हे रूबेन अउर गाद क परिवार समूह, तू पचे इस्राएल क हींसा नाहीं अहा!' तब तोहार संतानन हमरे संतानन क यहोवा क उपासना करइ स रोकिहीं।

26“ऐंहे बरे हम लोग इ वेदी क बनावा। मुला हम लोग इ योजना नाहीं बनावत अही कि यह पइ होमबलि चढ़ाव अउर बलियन क देब। 27हम पचे जउने सच्चे उद्धेस्य बरे वेदी बनाए रहे, उ आपन लोगन क सिरिफ देखाव रहा कि हम पचे उ परमेस्सर क उपासना करित ह जेकर तू लोग उपासना करत अहा। इ वेदी तोहरे पचन बरे, हम लोगन बरे अउर भपिस्स में हम लोगन क गदेलन बरे इ बात क प्रमाण होइ कि हम लोग परमेस्सर क उपासना करित ह। हम लोग यहोवा क बलियन, अन्नबलि अउ मेलबलि चढ़ावत ह। हम पचे चाहत रहे कि तोहार गदेलन बड़ईं अउर जान लेईं कि हम लोग भी तोहरी तरह इस्राएल क मनईं अही। 28भक्त्सि में अगर अइसा होत ह कि तोहार गदेलन कइईं, 'हम लोग इस्राएल स सम्बंध नाहीं रखित तउ हमार गदेलन तब कहि सकिहीं कि होसियारी स धियान देईं कि हमार पुरखन, जउन हम पचन स पहिले रहेन, एक ठु वेदी बनाइ रहेन। इ वेदी ठीक वइसे ही अहइ जइसी पवितर तम्बू क समन्वा यहोवा क वेदी अहइ। हम लोग इ वेदी क उपयोग बलि देइ बरे नाहीं करत। मुला इ बाने क संकेत करत ह कि हम लोग इस्राएल क एक हींसा अही।”

29“फुरे तउ इ अहइ कि हम लोग यहोवा क खिलाफ नाहीं होइ चाहित। हम लोग अब ओकर अनुसरण करब तजि देइ नाहीं चाहित। हम लोग जानत अही कि एक मात्र सच्ची वेदी उहइ अहइ जउन पवितर तम्बू क समन्वा अहइ। उ वेदी, हमरे परमेस्सर यहोवा क अहइ।”

30याजक पीनहास अउर दस नेतन रूबेन अउर गाद क परिवार समूह अउ मनस्से क आधा परिवार समूह क लोगन

क कही गइ बात सुनेन। उ पचे ओनकइ बात स संतुट्ट रहेन। 31ऐंहे बरे एलीआजार क पूत याजक पीनहास कहेस, “अब हम लोग समुझत अही कि यहोवा हमरे संग अहइ अउर हम लोग जानत अही कि तू पचन में स कउनो भी ओकरे खिलाफ नाहीं गवा अहा। हम लोग खुस अही कि इस्राएल क लोगन क यहोवा स सजा नाहीं मिली।”

32तब पीनहास अउ नेतन उ जगह क तजेन अउर उ पचे आपन घरे चला गएन। उ पचे रूबेन अउर गाद क लोगन क गिलाद प्रदेस में तजेन अउर कनान क लउटि गएन। उ पचे लउटिके इस्राएल क लोगन क लगे गएन अउर जउन कछू भवा रहा, ओनसे कहेस। 33इस्राएल क लोग भी सन्तुट्ट होइ गएन। उ पचे खुस रहेन अउर उ पचे परमेस्सर क धन्यवाद दिहन। उ पचे निर्णय लिहन कि उ पचे रूबेन, गाद अउ मनस्से क आधा परिवार समूह क लोगन क खिलाफ जाइके नाहीं लइहीं। उ पचे ओन प्रदेसन क नस्ट न करइ क निर्णय किहन।

34अउर रूबेन अउर गाद क लोग कहेन, “इ वेदी सबहिं मनइयन क इ बतावत ह कि हम पचन्क इ बिस्सास बाटइ कि यहोवा परमेस्सर अहइ अउर ऐंहे बरे उ पचे वेदी क नाँउ 'प्रमाण' धरेन।”

### यहोसू लोगन क उत्साह बढ़ावत ह

23 यहोवा इस्राएल क ओकरे चारिहुँ कईंती क ओनके दुस्मन स सान्ति प्रदान किहस। यहोवा इस्राएल क सुरच्छित बनाएस। बरिस बीत गएन अउर यहोसू बहोत बूढ़ा होइ गवा। 2इ समइ यहोसू इस्राएलियन अउर ओनका बुजुर्गन, नेतन, निआवधीसन अउर फउज क अफसरन क बइठक बोलाएस। यहोसू ओन लोगन स कहेस, “मईं बहोत बूढ़ा होइ गवा अहउँ। 3तू पचे उ लख्या जउन यहोवा हमरे दुस्मनन क संग किहस। उ इ हमरी मदद बरे किहस। तोहार पचन्क परमेस्सर यहोवा तोहरे सबन बरे जुद्ध किहस। 4लखा, मईं ओन रास्ट्रन क सबहीं भुईंया क बाँट दिहस ह जेका इस्राएल क परिवार समूह स निकाला नाहीं गएस। इ भुईंया यरदन नदी अउ पच्छिम क भुमध्य समुदर क बीच अहइ, अउर ओन रास्ट्रन क सामिल कइ लिहस जेका मईं हरइ रहा। 5उ तोहार पचन्क परमेस्सर यहोवा लोगन क उ जगह क तजि देइ बरे मजबूर करी। जइस ही पचे उ प्रदेस में घुसब्या यहोवा ओन लोगन क उ प्रदेस तजइ बरे मजबूर करी। तोहार परमेस्सर यहोवा तू पचन्क इ वचन दिहस ह।

6“तू पचन्क ओन सबइ हुकुमन क मानइ में सावधान रहइ चाही जउन यहोवा हमका दिहे अहइ। उ हर नियमन अउर विधियन क पालन करा जउन मूसा क व्यवस्था क किताबे में लिखा अहइ। उ व्यवस्था क खिलाफ जिन जा। 7इ करा ताकि गैर इस्राएली लोग जउन कि तोहका आपन दोस्त बनाइ बरे नाही ललचाइ। ओनकइ देवतन क पूजा नाही करा अउर ना ही ओकर देवतन क नाउँ ल्या। किरिया खाइ बरे ओन देवतन क नाउँ क प्रयोग जिन करा। अउर ओन देवतन क पूजा अउ सेवा जिन करा। 8तू पचन्क सदा आपन परमेस्सर यहोवा क अनुसरण करइ चाही। तू पचे इ

**हमार ... परमेस्सर यहोवा अहइ** या “यहोवा फुरइ परमेस्सर अहइ! यहोवा फुरइ परमेस्सर अहइ!” सब्द क अरथ “अल इलाहिम यहोवा, अल इलाहिम यहोवा।”

बीते जमाने में किह्या ह अउर तू पचन्क इ करत रहइ चाही।

9“यहोवा अनेक सक्तीवाला रास्ट्रन क हरावइ में तोहार मदद किहेस ह। यहोवा ओन लोगन क आपन देस तजइ बरे मजबूर किहस ह। कउनो भी रास्ट्र तू पचन्क हरावइ में समरथ नहीं होइ सका। 10यहोवा क मदद स इस्राएल क एक मनई एक हजार मनइयन क हराइ सकत ह। ऐंकर कारण इ अहइ कि तोहार परमेस्सर यहोवा तोहरे बरे जुद्ध करत ह। यहोवा इ करइ क वचन दिहेस ह। 11ऐह बरे तू पचन्क आपन परमेस्सर यहोवा क भक्ति करत रहइ चाही। आपन पूरी आत्मा स ओहसे पिरेम करा।

12“यहोवा क रस्ता स कबहुँ दूर जिन जा। ओन दूसर लोगन स दोस्ती न करा जउन अबहिँ तलक तोहरे पचन्क बीच तउ अहइँ मुला जउन इस्राएल क अंग नहीं अहइँ। ओनमाँ स कउनो क संग बियाह जिन करा। मुला अगर तू पचे ऐंन लोगन क मीत बनब्या, 13तब तोहार परमेस्सर यहोवा तोहरे दुस्मनन क हरावइ में तोहार मदद नहीं करी। इ तरह इ सबइ लोग तोहरे बरे एक जाल बन जइहीं। मुला उ पचे तोहरे पचन्क पिठिआ बरे कोइन अउ तोहरी सबन्क आँखिन बरे काँटा बन जइहीं। उ पचे पलट जइहीं अउर नफरत करिहीं जब तलक कि तू पचे इ नीक भुईया स बिदा न होइ जाब्या जेका तोहार परमेस्सर यहोवा तू पचन्क दिहे बाटइ। मुला अगर तू पचे इ हुकुम क नहीं मनब्या तउ तू पचे नीक भुईया क खोइ देब्या। 14इ करीब-करीब मोरे मरइ क समइ बा। तू पचे जानत अहा अउर फुरइ बिस्सास करत अहा कि यहोवा तोहरे पचन्क बरे बहोतइ बड़के काम किहेस ह। तू सबइ जानत अहा कि उ आपन दीन्ह भए वचनन में स कउनो क पूरा करइ में असफल नहीं रहा अहइ। यहोवा ओन सबहिँ वचनन क पूरा किहेस ह, जउन उ हमका दिहस ह। 15जे तरह उ सबहिँ आसीर्बाद जउन तोहार परमेस्सर यहोवा दिहस ह, पूरी तरह सच भएन, उहइ तरह सबहिँ विपत्तियन क घटइ क यहोवा कारण होब्या, जब तलक कि उ तोहका इ नीक भुईया क स जउन यहोवा तोहार परमेस्सर तोहका दिहस ह नास नहीं कइ देइ। 16इ घटि जाइ, अगर तू पचे आपन परमेस्सर यहोवा क संग कीन्ह गइ समझौता क मानइ स इंकार करब्या। अगर तू पचे दूसर देवतन क लगे जाब्या अउर ओकर आराधना करब्या तउ तू पचे इ भुईया क खोइ देब्या। अगर तू पचे अइसा करब्या तउ यहोवा तू पचन पइ बहोत गुस्साइ जाइ। तब तू पचे इ धरती स हाली गायब होइ जाब्या जेका उ तू पचन्क दिहस ह।”

### यहोसू अलविब कहत ह

**24** तब इस्राएल क सबहिँ परिवार समूह सकेम में बटुर गएन। यहोसू ओन सबहिँ क हुआँ एक संग बोलाएस। तब यहोसू इस्राएल क बुजुर्गन, ओनकइ नेतन, ओनकइ निआवधीसन अउर ओनकइ फउज क अफसरन क बोलाएस। इ सबइ मनई परमेस्सर क समन्वा खड़ा भएन।

2तब यहोसू सबहिँ लोगन स बात किहस। उ कहेस, “मई उ कहत हउँ जउन यहोवा, इस्राएल क परमेस्सर तू पचन्स कहत अहइ:

बहोत समइ पहिले तोहरे पचन्क पुरखन परात नदी क दुसरी कईती रहत रहेन। मई ओन मनइयन क बारे में बात करत अहउँ, जउन इब्राहीम अउर नाहोर क पिता तेरह क तरह रहेन। ओन दिनन तोहार पचन्क पुरखन दूसर देवतन क पूजा करत रहेन। 3मुला मई, यहोवा तोहरे पचन्क पुरखन इब्राहीम क नदी क दूसर कईती क भुईया स बाहेर लिआएउँ। मई ओका कनान क भुईया स होइके लइ गएउँ अउर ओका अनेक सन्तानन दीन्ह। मई इब्राहीम क इसहाक नाउँ क पूत दिहेउँ। 4मई इसहाक क याकूब अउर एसाव नाउँ क दुइ पूत दिहेउँ। मई सार्इर पहाड़े क चारिहुँ कईती क प्रदेश एसाव क दिहेउँ। मुला याकूब अउर ओकर सन्तानन हुआँ नहीं रहिन। मिस्त्र चले गएन।

5तब मई मूसा अउ हारून क मिस्त्र पठएउँ। मई मिस्त्र क लोगन पइ भयंकर विपत्तियन पइइ दिहेउँ। तब मई तू सबइ पचन्क मिस्त्र स बाहेर लिआएउँ। 6इ तरह मई तोहरे पचन्क पुरखन क मिस्त्र स बाहेर लिआएउँ। उ पचे लाल सागर तलक आएन अउर मिस्त्र क लोग ओनकर पाछा करत रहेन। ओनके संग रथ अउ घुड़सवार रहेन। 7ऐह बरे मनइयन मोसे यानी यहोवा स मदद माँगेन अउर मई मिस्त्र क लोगन पइ बहोत बड़की विपत्ति आवइ दीन्ह। मई यानी यहोवा समुदर में ओनका बोर दिहेउँ। तू लोग खुद ही लख्या कि मई मिस्त्र क फउज क संग का किहेउँ। ओकरे पाछे तू पचे रेगिस्तान में लम्बे समइ तलक रह्या। 8तबइ मई तू पचन्क एमोरी लोगन क धरती में लिआएउँ। इ यरदन नदी क पूरब में रहा। उ सबइ लोग तोहरे पचन्क खिलाफ लड़ेन, मुला मई तू पचन्क ओनका हरावइ दिहेउँ। मई तू पचन्क ओन लोगन्क नस्ट करइ बरे सकती दिहेउँ। तब तू पचे उ धरती पइ अधिकार किह्या।

9तब सिप्पोर क पूत मोआब क राजा बालाक इस्राएल क लोगन क खिलाफ लड़इ क तइयारी किहस। राजा बोर क पूत बिलाम क बोलाएस। उ बिलाम स तू पचन क सराप देइ क कहेस। 10मुला मई यहोवा बिलाम क एक न सुनेउँ। ऐह बरे बिलाम आपन चाहत क खिलाफ तू लोगन बरे नीक चीज होइ क याचना किहस। उ तू पचन्क खुले मन स आसीर्बाद दिहस। इ तरह मई तू पचन्क बिलाम स बचाएउँ।

11तब तू पचे यरदन नदी क पार तलक जात्रा किह्या। तू लोग यरीहो प्रदेश में आया। यरीहो सहर में बसइयन तोहर पचन्क खिलाफ लड़ेन। एमोरी, परिज्जी, कनानी, हिल्ली, गिर्गसी, हिंवी अउर यबूसी लोग भी तोहरे पचन्क खिलाफ लड़ेन। मुला मई तू पचन्क ओन सबका हरावइ दिहेउँ। 12जब तोहार पचन्क फउज अगवा बड़ी तउ तोहार दुस्मन पराइ गएन जइसे मई ओनका अउर अमोरी राजा क खिलाफ भोंड़ा पठाइ रहा। ऐह बरे तू लोग आपन धनुस या तरवार क प्रयोग किए बिना ही ओन पइ कब्जा कइ लिहा।



13इ मई, ही रहेउँ, जउन तू पचन्क उ धरती दिहेउँ। मई तू पचन्क उ धरती दिहेउँ जहाँ तू पचन्क कउनो काम नहीं करइ क पड़ा। मई तू पचन्क सहर दिहेउँ जेनका तू पचन्क बनाउब नहीं भवा। अब तू पचे उ धरती अउर ओन सहरन मँ रहत अहा। तोहरे सबन्क लगे अंगूरे क लता अउ जइतून क बाग अहई, मुला ओन बागन क तू पचे नहीं लगाया।”

14तब यहोसू लोगन स कहेस, “अब तू लोग यहोवा क कहब सुनि लिह्या ह। एँह बरे तू पचन्क यहोवा क सम्मान करइ चाही अउ ओकर सच्ची सेवा करइ चाही। ओन लबार देवतन क बहाइ द्या जेनका तोहार पचन क पुरखन पूजत रहेन। इ सब कछू बहोत समइ क पहिले फरात नदी क दूसर कईती, मिस्त्र मँ भी भवा रहा। अब तू पचन्क यहोवा क सेवा करइ चाही।

15“मुला होइ सकत ह कि तू पचे यहोवा क उपासना नहीं करइ चहत्या। तू पचन्क खुद आज ही इ चुन लेइ चाही। तू पचन्क आजु तय कइ लेइ चाही कि तू पचे केकर उपासना करब्या। तू पचे ओन देवतन क उपासना करब्या जेनकर उपासना तोहरे पचन्क पुरखन उ समइ करत रहेन जब उ पचे नदी क दूसर कईती रहत रहेन? या तू पचे ओन एमोरी लोगन क देवतन क उपासना करइ चाहत अहा जउन हिआँ रहत रहेन? जहाँ तलक मोरी अउ मोरे परिवार क बात अहइ, हम यहोवा क उपासना करब।”

16तब मनइयन जवाब दिहन, “नाहीं, हम यहोवा क अनुसरण करब कबहुँ न तजब। नाहीं, हम लोग कबहुँ दूसर देवतन क सेवा नहीं करब। 17हम जानित ह कि उ परमेस्सर यहोवा रहा जउन हमरे लोगन क मिस्त्र स लिआवा। हम लोग उ देस मँ दास रहे। मुला यहोवा हम लोगन बरे हुआँ बड़कन-बड़कन काम किहस। उ उ देस स हम लोगन क बाहेर लिआवा अउर उ समइ तलक हमार रच्छा करत रहा जब तलक हम लोग दूसर देसन स होइके जात्रा कीन्ह। 18तब यहोवा ओन एमोरी लोगन क हरावइ मँ हमार मदद किहस जउन उ प्रदेस मँ रहत रहेन जेहमँ अज हम पचे रहित ह। एँह बरे हम लोग यहोवा क सेवा करतइ रहब। काहेकि उ हमार परमेस्सर अहइ।”

19तब यहोसू कहेस, “तू पचे यहोवा क काफी सेवा अच्छी तरह स नहीं कइ सकब्या। यहोवा, पवितर परमेस्सर अहइ अउर परमेस्सर आपन लोगन क जरिये दूसर देवतन क पूजा स घिना करत ह। अगर तू पचे उ तरह परमेस्सर क खिलाफ जाब्या तउ परमेस्सर तू पचन्क छिमा नहीं करी। 20तू पचे यहोवा क तजि देब्या अउर दूसर देवतन क सेवा करब्या तब यहोवा तू पचन पइ भयंकर विपत्तियन क लिआइ। यहोवा तू पचन्क बरबाद करी। यहोवा तोहरे पचन्क बरे अच्छा रहा ह, मुला अगर तू पचे ओकरे विरुद्ध चलत अहा तउ उ तू पचन्क नास कइ देइ।”

21मुला मनइयन यहोसू स कहेन, “नाहीं। हम पचे यहोवा क सेवा करब।”

22तब यहोसू कहेस, “खुद आपन अउर आपन संग क लोगन क चारिहुँ कईती निहारा। का तू पचे जानत अहा

अउर अंगीकार करत अहा कि तू पचे यहोवा क सेवा करब चुन्या ह? का तू सब एकर गवाह अहा?”

मनइयन जवाब दिहन, “हाँ, इ फुरइ अहइ। हम लोग धियान रखब कि हम लोग यहोवा क सेवा करब चुना ह।”

23तब यहोसू कहेस, “एँह बरे आपन बीच मँ जउन बीच मँ जउन लबार देवतन रखत अहा ओनक जरइ द्या। आपन पूरा हिरदइ स इस्राएल क परमेस्सर यहोवा स पिरेम करा।”

24तब मनइयन यहोसू स कहेन, “हम लोग यहोवा, आपन परमेस्सर क सेवा करब। हम लोग ओकर आग्या क पालन करब।”

25एँह बरे यहोसू लोगन बरे उ दिन एक वाचा किहस। यहोसू इ वाचा क ओन लोगन क जरिये मानइ बरे एक ठु नेम बनाइ दिहस। इ सकेम नाउँ क सहर मँ भवा। 26यहोसू इ सबइ बातन क परमेस्सर क व्यवस्था क किताबे मँ लिखेस। तब यहोसू एक ठु बड़की सिला लिआवा। इ सिला इ करारा क प्रमाग रही। उ इ सिला क यहोवा क पवितर तम्बू क निअरे बलूत बृच्छ क खाले धरेस।

27तब यहोसू सबहिँ लोगन स कहेस, “इ सिला तू पचन्क ओका याद दिआवइ मँ सहायक होइ जउन कछू हम पचे आजु कहे अही। इ सिला तब हिआँ रही जब परमेस्सर हम लोगन स बतियात रहा। एँह बरे इ सिला कछू अइसी रही जउन तू पचन्क याद दिआवइ मँ मदद करी कि आजु क दिन का भवा रहा। इ सिला तोहरे बरे एक गवाह बनी रही। इ तू पचन्क तोहर परमेस्सर यहोवा क खिलाफ जाइ स रोकी।”

28तब यहोसू लोगन स आपन घरे लउटि जाइ क कहेस तउ तउ हर एक मनई आपन प्रदेस क लउटि गवा।

### यहोसू क मउत

29ओकरे पाछे नून क पूत यहोसू मर गवा। उ एक सौ दस बरिस क रहा। 30यहोसू आपन भुइँया तिम्नत्सेरह मँ दफनावा गवा इ रास पहाड़ क उत्तर मँ एप्रैम क पहाड़ी प्रदेस मँ रहा। 31इस्राएल क लोगन यहोसू क जिन्नगी क समइ मँ यहोवा क उपासना किहन अउर यहोसू क मरइ क पाछे भी, लोग यहोवा क उपासना करत रहेन। इस्राएल क लोग तब भी यहोवा क उपासना करत रहेन जब तलक सबहिँ बुजुर्गन जउन कि यहोसू क पाछे जिअत रहेन। इ सबइ उ सब नेता रहेन, जउन उ पचे उ सब कछू लखे रहेन जउन यहोवा इस्राएल बरे किहे रहा।

### यूसुफ दफनावा गवा

32जब इस्राएल क लोगन मिस्त्र तजि दिहेन तब उ पचे यूसुफ क तने क हाइ आपन संग लइ आपन रहेन। एँह बरे लोग यूसुफ क हाइ सकेम मँ दफनाएन। उ पचे हाइन क उ भुइँया मँ दफनाएन जेका याकूब सकेम क बाप हमोर क पूतन स बेसहे रहा। याकूब उ भुइँया क चाँदी क सौ सिक्कन स बेसहे रहा। इ प्रदेस यूसुफ क सन्तानन क रहा।

33हारून क पूत एलीआजार मर गवा। उ गिबा मँ दफनावा गवा। गिबा एप्रैम क पहाड़ी प्रदेस मँ एक ठु सहर रहा। उ सहर एलीआजार क पूत पीनहास क दीन्ह गवा रहा।

# व्यवस्था विवरण

## मूसा इस्त्राएल क मनइयन स बतियात ह

1 मूसा क जरिये इस्त्राएल क मनइयन क दीन्ह गवा सँदेसा इ अहइ। उ ओनका इ सँदेसा तबहिं दिहे रहा जब उ पचे यरदन नदि क पूरब क रेगिस्तान में रहेन। इ सूफ क निकट रहा जउन कि पारान रेगिस्तान अउ तोपेल, लाबान, हसेरोत अउ दीजाहाब सहरन क बीच में रहा।

2होरेब अरथात सिनाई पहाड़े स सेईर पहाड़ स होइके कादेसबर्ने क जात्रा सिरिफ गियारा दिना क रही। 3मुला जब मूसा इस्त्राएल क मनइयन क इ ठउरे प सँदेसा दिहस तब इस्त्राएल क मनइयन क मिस्त्र तजे भए चालीस बरिस होइ गवा रहेन। इ चालिस बरिस क गियारहवें महीना क पहिला दिन रहा, जब मूसा इस्त्राएल क मनइयन स बातन किहेस। उ ओनसे उहइ सबहिं बातन कहेस जउन यहोवा ओका कहइ क हुकुम दिहे रहा। 4इ तब भवा जब मूसा एमोरियन क राजा सीहोन जउन हिब्रोन में रहत रहेन अउर बासान क राजा ओग क जउन एद्रेई क असतारोत में रहत रहेन। 5उहइ समइ उ पचे यरदन नदी क पूरब कइँती मोआब क पहुँटा में रहेन अउर मूसा परमेस्सर क हुकुमन क अरथ बनावत रहा। मूसा कहेस:

6“यहोवा, हमार परमेस्सर होरब पहाड़े पइ हम स कहेस। उ कहेस, ‘तू पचे बहोत समइ स इ पहाड़े प ठहर चुका बाट्या। 7एमोरी लोगन क पहाड़ी देस अउर चारिहूँ कइँती क पहुँटा में जा। यरदन घाटी, पहाड़ी प्रदेस, पच्छिमी नीची भुइँया, दक्खिन क रेगिस्तान में अउ समुद्र तट में जा। कनानी लोगन क देस में अउर लबानोन में बड़की नदी परात तलक जा। 8लखा, मई इ समूचइ देस तोहका दिए अहउँ। भितरे जा अउ ओह पइ कब्जा करा। इ उहइ देस बाटइ जेका देइ क बचन मई तोहरे पुरखन इब्राहीम, इसहाक अउ याकूब क दिहे रहेउँ। मई इ प्रदेस ओन लोगन क अउ ओन लोगन क सन्ताने क देइ बरे बचन दिहे रहेउँ।”

## मूसा प्रमुखन क नियुक्ति करत ह

9मूसा कहेस, “ओह समइ जब मई तू पचन स बात किहे रहेउँ तबहिं कहे रहेउँ, मई अकेल्ले तू लोगनक अगुअइ करइ अउ देखरेख करइ मैं समरथ नाहीं अहउँ। 10यहोवा तू पचनक परमेस्सर क्रम स मनइयन क ऐतना बढ़ाएस ह कि तू पचे अब ओतना होइ ग अहा जेतना अकासे मैं तारा बाटेन! 11होइ सकत ह यहोवा, तोहरे पुरखन क परमेस्सर, आज तू पचे जेतना अहा, ओहसे हजार गुना जियादा करइ। होइ सकत ह उ तू पचन क आसीर्वाद देइ जउन उ तोहका सबनक देइ क बचन दिहेस ह। 12का मई अकेल्ले तोहार देखरेख अउर तोहरी सबइ समस्या अउ वाद-विवाद क हल

कइसे कइ सकत हउँ? नाहीं! 13एह बरे: ‘हर एक परिवार समूह स कछू सम्मानित मनइयन क चुना। मई ओनका तोहार नेता बनाउवा। ओन बुद्धिमान मनइयन क चुना जउन समझदार अउ तजरबेकार अहउँ।

14“अउर तू पचे कह्या, ‘अइसा करब नीक अहइ।’

15“एह बरे, मई बुद्धिमान अउर सम्मानित मनइयन क लीन्ह जउन तोहार जरिया चुना भवा अहइ अउ ओनका तोहार प्रमुखन बनाएउँ। मई ओनमाँ स कछू क हजार क, कछू क सौ क, कछू क पचास क अउ कछू क दस क प्रमुख बनाएउँ ह। मई तोहरे परिवार समूहे बरे अधिकारियन क भी नियुक्त किहेउँ ह।

16“ओह समइ, मई तोहरे इ सबइ प्रमुखन क तोहार निआवाधीस बनाए रहेउँ। मई ओनसे कहे रहेउँ, ‘आपन मनइयन क बीचउ बीच वाद-प्रतिवाद क सुना। हर एक मोकदमा क फैसला सही सही करा। एकर कउनो महत्व नाहीं कि मोकदमा दुइ तु इस्त्राएली मनइयन क बीच बाटइ या इस्त्राएली अउर बिदेसी क बीच। तू पचनक हर एक मोकदमा क फैसला सही करइ चाही। 17जब तू फैसला करा तब इ जिन सोचा कि कउनो मनई दूसर क बराबरी में जियादा महत्व क बाटइ। तोहका पचनक हर एक मनई क फैसला एक तरह समुझिके करइ चाही। कउनो स जिन डेराअ काहेकि तोहार फैसला परमेस्सर स आवा अहइ। मुला अगर कउनो मोकदमा ऐतना जटिल होइ चुका होइ कि तू पचे फैसला न कइ सका तउ ओका मोरे लगे लिआवा। मई एकर मोकदमा क फैसला करवा। 18उहइ समइ, मइ उ सबइ बातन क बताए रहेउँ जेका तू पचनक करइ चाही।

## जासूस कनान देस में जात अहउँ

19“तब हम पचे उहइ कीन्ह जेका यहोवा हमार परमेस्सर हम पचनक हुकुम दिहे रहा। हम पचे होरेब पहाड़े क तजा अउर एमोरी लोगनक पहाड़े क जात्रा कीन्ह। हम पचे ओन बड़की अउ सबइ भयंकर भुइँया स होइके गएन जेका तू पचे भी लखे रह्या। हम पचे कादेसबर्ने पहुँच गएन। 20तब मई तू पचनस कहे रहेउँ, ‘तू पचे एमोरी लोगनक पहाड़ी प्रदेस में आइ चुका अहा। यहोवा हमार परमेस्सर इ देस हमका देई। 21लखा, यहोवा तोहार परमेस्सर उ देस क तोहार समन्वा कइ दिहेस। अगवा बढ़ा अउ भुइँयाँ क आपन बनाइ ल्या। तोहरे पुरखन क यहोवा परमेस्सर तू पचनक अइसा करइ क आदेस दिहे अहइ। एह बरे जिन डेराअ, कउनो तरह क चिन्ता जिन करा!’

22“तब तू सबहिं मोरे लगे आया अउ बोल्या, ‘पहिले उ देस क लखइ क बरे कछू मनइयन क पठवा। उ सबइ क

हुआँ क देस क धियान स लखि द्या। उ सबइ तब वापस आइ सकत हीं अउ हम लोगन्क उ रस्ता बताइ सकत हीं जेनसे हम सबन्क जाइ क बाटइ अउर ओन सहरन क बताइ सकत हीं जेनके ताई हम पचन्क पहुँचइ क अहइ।

23“मई सोचेउँ कि इ नीक बिचार अहइ। एह बरे मई तू मनइयन में स हर परिवार समूह बरे एक ठु मनई क हिसाब स बारह मनइयन क चुनेस। 24तबहिं उ सबई मनइयन हम पचन्क पीछे तजिके पहाड़ी पहुँटा में गएन। उ पचे एसकोल क घाटी में गएन। उ पचे भुईया क विभिन्न जगह क छान-बीन कियेन। 25उ पचे उहइ पहुँटा क कछू फल लिहन अउ ओनका हमरे लगे लिआएन। उ पचे हम लोगन्क विवरण दिहन अउ कहेन, ‘इ नीक देस अहइ जेका यहोवा हमार परमेस्सर हमका दइ देत अहइ।’

26“मुला तू पचे ओहमाँ जाइसे इन्कार कइ दिहा। तू पचे यहोवा आपन परमेस्सर क हुकुम क मानइ स इन्कार कइ दिहा। 27तू पचे आपन सिबिर में सिकाइत किहा। तू पचे कह्या, ‘यहोवा हमसे घिना करत अहइ। उ हम पचन्क मिस्र स बाहेर एमोरी मनइयन क देइ बरे लइ आवा जेहसे उ पचे हमका नस्ट कइ सकइँ। 28अब हम पचे कहाँ जाई? हमार भाई हम पचन्क डेरान। उ पचे कहेन, ‘हुआँ क लोग हम पचन्स बड़वार अउ लम्बा अहइँ, उ सहर बड़ा अहइँ अउ ओनकइ देवार आसमान क छुअत हीं। अउ हम पचे देत्य\* क सन्तानन क हुआँ लखा।’

29“तब मई तू पचन्स कहेउँ, ‘घबराअ जिन! ओन लोगन्स डेरान नाहीं! 30यहोवा तोहार परमेस्सर तोहरे समन्वा जाइ अउ तोहरे बरे लड़ी। उ उहइ करी जे तू ओका मिस्र में देखावत रहा। 31तू पचे हुआँ आपन समन्वा ओका रेगिस्तान में जात भवा लख्या ह। तू पचे लख्या कि यहोवा तोहार परमेस्सर तोहका पचन्क वइसेन ही लइ आवा जइसे कउनो मनई आपन पूत क लिआवत ह। यहोवा पूरा रस्ता भइ तू पचन्क रच्छा करत भवा तोहका सबन्क हिआँ पहुँचाएस ह।’

32“मुला तबहुँ तू पचे आपन परमेस्सर पई नाहीं पतियाना। 33जब तू पचे जात्रा करत रह्या तब उ तोहरे आगे तोहार डेर डवइ बरे जगहिया हेरइ गवा। तोहका सबन्क इ बतावइ बरे कि तू पचन्क कउने राहे प जाइ क अहइ उ राति क आगी में अउ दिन में बदरी में चला।

### मनइयन क कनान जाइ प मनाही

34“यहोवा तोहार कहब सुनेस, उ कोहाइ गवा। उ प्रण कियेस। उ कहेस, 35तू सबइ लोगन जउन अबहुँ जितत रहेन सबहिं पापी अहइँ। उ लोगन स कउनो भी मनई नीक देसे में न जाई, जेका देइ क बचन मई तोहरे पुरखन क दिहे अहइँ। 36यपुने क पूत कालेब ही सिरिफ उ देस क लखी। मई कालेब क उ देस देब जेह पइ उ चला ह अउर मई उ देस क कालेब क सन्तानन क देब। काहेकि कालेब उ सबइ कियेस जउन मोर हुकुम रहा।’

**देत्य** अरथात् अनाकी लोग, अनाक लोगन क सन्तानन, अइसा परिवार जउन कि आपन लम्बाई अउर सक्तीसाली लड़ाइ बरे प्रसिद्ध रहेन।

37“यहोवा तू लोगन क कारण मोसे भी नाखुस रहा। उ मोसे कहेस, ‘तू भी उ देस में नाहीं जाइ सकत्या। 38मुला तोहार सहायक, नून क बेटवा यहोसू उ देस में जाइ। यहोसू क हौसला बढ़ावा, काहेकि उहइ इस्त्राएल क लोगन्क भुईया पइ आपन कब्जा जमावइ बरे लइ जाई। 39“यहोवा हम पचन्स कहेस, ‘तू पचे कह्या, कि तोहरे नान्ह-नान्ह गदेलन दुस्मन क जरिये लइ लीन्ह जइहीं। मुला उ सबइ उ देस में जाई। मई तोहरी गलितियन बरे तोहरे गदेलन क देखी नाहीं मानत हउँ। काहेकि उ पचे अबहिं ऐतना नान्ह-नान्ह बाटेन कि उ पचे इ जान नाहीं सकतेन कि का सही बाटइ अउ का गलत। उ पचे हुवाँ जाब अउर मई उ पचन्क उ धरती ओकर देस क रूप में देब। 40मुला तू पचन क लाल सागर जाइवाला मार्ग स रेगिस्तान क सफर करइ चाही।’

41“तबहिं तू पचे कह्या, ‘मूसा, हम पचे यहोवा क खिलाफ किहे अही। मुला अब हम पचे आगे बढ़ब अउ जइसे पहिले यहोवा हमार परमेस्सर हुकुम दिहे रहा वइसेन ही लड़ब।’

“तब तू पचन में स हर एक जुद्ध बरे औजार धारण कियेस। तू पचे पहाड़ी-देस तलक जाई क तैयारी कियेस। 42“मुला यहोवा मोसे कहेस, ‘मनइयन स कहा कि उ पचे हुआँ न जाई अउर न लड़इँ। काहेकि मई ओनकर संग न देब अउ ओनकर दुस्मन ओनका हराइ देइहीं।’

43“एह बरे, मई तू लोगन स बात कियेउँ, मुला तू पचे मोर एक न सुन्या। तू पचे यहोवा क हुकुम मानइ स इन्कार कइ दिहा। तू पचे घमण्ड स बेउहार कियेस अउर तू पचे पहाड़ी-देस तलक चलि गवा। 44तबहिं एमोरी लोग जउन उहइ पहाड़ी पहुँटा में रहत ही तोहरे खिलाफ होइ गएन। उ पचे तोहार पीछा उहइ तरह कियेन जइसे मधुमक्खी तोहार पीछा करत ह। उ पचे तोहार सेईर स लइके होर्मा तलक पूरा रस्ता में बुरी तरह हराएन। 45तू पचे लउट्या अउ यहोवा क समन्वा रोया-चिचियाया। मुला यहोवा तोहार बात कछू नाहीं सनेस। उ तोहार बात सुनइ स इन्कार कइ दिहस। 46एह बरे तू सबइ कादेस में बहोत समइ तलक रुका रह्या।

### इस्त्राएल क लोग रेगिस्तान में भटकत हीं

2“तब हम पचे घूमि गए अउ लाल सागर क सड़क होइके रेगिस्तान क जात्रा कियेस इ उहइ अहइ जइसा यहोवा मोका आदेस दिहे रहेन। हम पचे सेईर क पहाड़ी पहुँटा क चारिहुँ कइँती अनेक दिना तलक चलत रहेन। 2तब यहोवा मोसे कहेस, 3‘तू पचे इ पहाड़ी क चारिहुँ कइँती बहोत जियादा भटक चुका बाट्या। अब उत्तर कइँती घूमा। 4उ मोसे तोसे इ कहेस क कहेस, तू पचे सेईर प्रदेस स होइके जाब्या। इ प्रदेस तू लोगन्क रिस्तेदारन एसाव क सन्तानन क अहइ। उ पचे तोहसे डेराइ जइहीं। बहोत सावधान रहा। 5ओनसे जुद्ध जिन करा। मई ओकर एक फुट भुईया तलक तोहका नाहीं देबउँ। काहेकि मई एसाव क सेईर क पहाड़ी प्रदेस ओनके कब्जे में दइ दीन्हेउँ। 6तू पचन्क एसाव क लोगन्क हुआँ पइ भोजन करइ या पानी पिअइ क मूल्य चुकावइ चाही। 7इ याद राखा कि यहोवा तोहार परमेस्सर, तोहका तू सबइ जउन कछू भी कियेस ओन

सबहिं बरे आसीर्बाद दिहस। उ इ लम्बे चौड़े रेगिस्ताने स तोहार जात्रा जानत ह। यहोवा तोहार परमेस्सर इ सबइ चालीस बरिसन में तोहरे संग रहा ह। तू पचन्क कउनो भी चीजन क कमी नहीं रही।

8“एह बरे, हम लोग सेईर में रहइवालन आपन रिस्तेदारन क लगे स अगवा बड़ गए। हम पचे यरदन घाटी स एलत अउ एस्थोनगेबेर सहरन क जाइवालिन सड़क क पाछे तजि दिहेन। तब हम पचे उ सड़क पइ घूमि गए जउन मोआब क रेगिस्तान कइँती जात अहइ।

### आर प्रदेश में इस्त्राएल

9“यहोवा मोसे कहेस, ‘मोआब क लोगन्क परेसान जिन करा। ओनके खिलाफ जंग जिन छेड़ा। मईँ ओनकइ कउनो भी भुईँया तू पचन्क नहीं देब। उ पचे लूत क सन्तानन\* अहईँ, अउर मईँ ओनका आर प्रदेश दिहे अहईँ।”

10(पहिले, आर में एमी लोग रहत रहेन। उ पचे सक्तीसाली मनई रहेन अउर हुआँ ओनमाँ बहोत स रहेन। उ पचे अनाकी लोगन क तरह बहोत लम्बा रहेन। 11अनाकी लोगन क तरह, एमी रपाई लोगन क एक तु हीसा समुझा जात रहेन। मुला मोआबी लोग ओनका एमी कहत रहेन। 12पहिले होरी लोग भी सेईर में रहत रहेन। मुला एसाव क सन्तानन ओनकर भुईँया लइ लिहन। एसाव क सन्तानन होरी लोगन क नास कइ दिहन। तब एसाव क सन्तानन हुआँ रहइ लागेन। इ वइसा ही किहेन जइसा इस्त्राएल उ भुईँया क कब्जा करइ में किहेन जउन यहोवा ओनका दिहे रहेन।)

13“यहोवा मोसे कहेस, ‘अब तइयार होइ जा अउर जेरेद घाटी क पार जा।’ एह बरे हम जेरेद घाटी क पार किहेन। 14कादेसबर्ने क तजइ अउ जेरेद घाटी क पार करइ में अइतीस बरिस क समइ बीता रहा। उ पीढ़ी क सबहिं जोधा मरि चुका रहेन। यहोवा सपथ लिहेस कि अइसा ही होई। 15यहोवा ओन लोगन क खिलाफ तब तलक करत रहेन जब तलक उ सबइ सिबिर स न नस्ट होइ गएन।

16“जब सबहिं जोधन मरि गए रहेन अउर चला गए रहेन। 17तब यहोवा मोसे कहेस, 18“आजु तू पचन्क आर सहर क सीमा क पार कइके मोआब क इलाका में लइ जाबइ। 19जब तू लोग ओकर भुईँया स होइके गुजरब्या तउ ओनका तंग जिन कर्या। ओनसे जिन लइया काहेकि मईँ तू पचन्क ओनकर भुईँया न देब। काहेकि मईँ उ भुईँया लूत क संतानन क नियन्त्रण करइ बरे दिहेउँ ह।”

20(उ प्रदेश रपाइ लोगन्क देस भी कहा जात ह। उ सबइ ही मनइयन पहिले हुआँ रहत रहेन। अम्मोनी क लोग ओनका “जमजुम्मी लोग” कहत रहेन। 21जमजुम्मी लोग बहोत सक्तीसाली रहेन अउर ओनमाँ स बहोत स हुआँ रहेन। उ पचे अनाकी लोगन क नाई लम्बा रहेन। मुला यहोवा जमजुम्मी लोगन क अम्मोनी लोगन बरे नास कइ दिहस। अम्मोनी लोग जमजुम्मी लोगन्क प्रदेश छीन लिहन अउ अब उ पचे हुआँ रहत रहेन। 22परमेस्सर इहइ काम एसाव क सन्तानन बरे किहस जउन सेईर में रहत रहेन। उ पचे हुआँ रहइवालन होरी लोगन्क नास कइ दिहन। अब एसाव

क सन्तानन हुआँ रहत अहईँ जहाँ पहिले होरी लोग रहत रहेन। 23अव्वियन गाँवन में गाजा तलक रहत रहेन। मुला कछू लोगन कप्तोरी स आएन अउर ओका नस्ट कइ दिहेन। अबहिं कप्तोरियन ओकर जगह में रहत अहईँ।)

### एमोरी लोगन क खिलाफ जुद्ध करइ क हुकुम

24“यहोवा मोसे कहेस, ‘जात्रा बरे तइयार होइ जा। अर्नोन नदी क घाटी से होइके जा। मईँ तू पचन्क हेसबोन क राजा सीहोन पइ विजय पावइ क सक्ती देत हउँ। मईँ तोहका सबन्क उ देस जीतइ क सक्ती देत हउँ। एह बरे ओकरे खिलाफ लड़ा अउ ओकरे देस पइ कब्जा करब सुरु करा। 25आजु मईँ तू पचन्क समूचइ संसार क लोगन क डेरावइवाला बनाउब सुरु करत अहउँ। उ पचे तोहरे बारे में खबर पइहीं अउ उ पचे भय स काँप उठीहीं। जब उ पचे तोहरे बारे में सोचिहीं तब उ पचे घबराइ जइहीं।’

26“कदेमोत क रेगिस्तान स मईँ हेसबोन क राजा सीहोन क लगे दून क पठएउँ। दून सीहोन क समन्वा सान्ति-सन्धि राखेस। उ पचे कहेन, 27“आपन देस स होइके हम पचन्क जाइ द्या। हम लोग सड़क पइ ठहरब। हम पचे सड़किया क दाहिन या बाएँ कइँती न मुड़ि जाब। 28हम पचे जउन खइया क खाब या जउन पानी पिअब ओकर बरे पैसा चुकाउब। हम पचे सिरिफ तोहरे देस स पइदल जात्रा करइ क अनुमति चाहित ह। 29आपन देस स होइके तू पचे हम पचन्क यरदन नदी क पार कइके ओह देस में पहुँच तलक जाई जेका यहोवा हमार परमेस्सर हमका दइ देत बाटइ। एसाव क सन्तानन अउर आर में बसइया मोआबी लोग आपन देस स हमका जाइ अनुमति दइ दिहन ह।’

30“मुला हेसबोन क राजा सीहोन, आपन देस स हमका जाइ नहीं दिहस। यहोवा, तोहार परमेस्सर, ओका बहोत जिददी बनाइ दिहस। यहोवा इ एह बरे किहस कि उ सीहोन क तोहरे कब्जा में दइ सकइ अउ उ अब इ कइ दिहेस ह।

31“यहोवा मोसे कहेस, ‘मईँ राजा सीहोन अउ ओकरे देस क तोहका सबन्क देत अहउँ। भुईँया लेब सुरु करा। इ तब तोहार होई।’

32“तब राजा सिहोन अउ ओकर सब लोग हम पचन्स यहस में जुद्ध करइ बाहेर निकरेन। 33मुला यहोवा हमार परमेस्सर ओका हमका दइ दिहस। हम पचे ओका, ओकरे बेटवन क, अउ ओकरे सब लोगन क हराएन। 34हम पचे ओन सबइ सहरन पइ कब्जा कइ लीन्ह। तउ हम पचे सहर क सबइ मनइयन, मेहरारु अउ गदेलन क पूरी तरह नास कइ दीन्ह। हम पचे कउनो क जिअत नहीं तजा। 35हम पचे जउन सहरन क जीत लीन्ह ओनमाँ स सिरिफ जनावरन अउ कीमती चीजनक लइ लीन्ह। 36हम पचे अरोएर सहर क जउन अर्नोन क घाटी में बाटइ अउ उ घाटी क बीच दूसर सहर क भी हरावा। यहोवा हमार परमेस्सर हमका अर्नोन घाटी अउ गिलाद क बीच क सबहिं सहरन क हार जाइ दीन्ह। कउनो सहर हम लोग बरे एतनों जियादा मज़बूत नहीं रहेन। 37मुला उ प्रदेश क निचके नहीं गए, जउन अम्मोनी लोगन्क रहा। तू पचे यब्बोक नदी क किनारे या पहाड़ी प्रदेशन क सहरन क निअरे नहीं गया। तू पचे अइसे

कउनो ठउरे क निअरे नाहीं गया जेका यहोवा हमार परमेस्सर तोहका आदेस दिहस रहा।

### बासान क लोगन क संग जुद्ध

3 “हम पचे घूमि गए अउ बासान क जाइवाली सड़क पड़ चलतइ रहेन। बासान क राजा ओग अउ ओकर सबहि लोग एदेइ में हम लोगन स लड़इ बरे आएन। यहोवा मोसे कहेस, ‘ओग स जिन डेराअ, जेका मई तोहरे हाथे में देइ दिहस ह। मई एकरे सबहि लोगन अउ भुईया क तोहका सबन्क दइ देब। तू पचे एँका वइसे ही हरउब्या जइसे तू पचे हेसबोन क सासक एमोरी राजा सीहोन क हरया।’

3“इ तरह यहोवा हमार परमेस्सर बासान क राजा ओग अउ ओकर सबहि लोगन्क हमरे हाथे में दिह्या। हम पचे ओका लोगन पड़ तब तलक हमला किहेस जब तलक हर कछू खतम नाहीं होइ गएन। 4तब हम पचे उ समइ उ सबइ सहरन पड़ कब्जा कीन्ह रहेन। एक भी अइसा सहर नाहीं बचा जेका हम पचे नाहीं लिहेन। हम पचे ओन लोगन स बासान में ओग क राज्ज अगोब प्रदेस क सबइ साठ सहरन क लीन्ह। 5इ सबहि सहरन ऊँची देवारन अउ दुआरन में मजबूत छड़न क संग बहोत मजबूत रहेन। अनेक दूसर सहरन बे देवारे क रहेन। 6हम पचे ओनका वइसे बरबाद कीन्ह जइसे हेसबोन क राजा सीहोन क नगरन क बरबाद किहे रहे। हम पचे हर एक सहर क ओनके मनइयन क संग, मेहररुअन अउ गदेलन क भी बरबाद कीन्ह। 7मुला हम पचे सबहि गइयन अउ कीमती चीजन्क अपने लगे राखा।

8“उहइ समइ में हम पचे एमोरी लोगन्क दुइ ठु राजा स भुईया लीन्ह। इ भुईया यरदन नदी क दूसरी कइँती पूरब तरफ अहइ। इ भुईया अर्नोन घाटी स लइके हर्मोन पहाड़े तलक अहइ। 9(सिदोनी हेर्मोन पहाड़े क “सिर्योन” कहत हीं, मुला एमोरी एँका “सनीर” कहत हीं।) 10हम पचे समूचइ समथर मइदान क सहर, समूचइ गिलाद, अउ समूचइ बासान में सल्का अउ एदेई तलक अधिपत्य कायम कीन्ह। उ सबइ सहर बासान में ओग क समराज्ज क सहरन रहेन।”

11(बासान क राजा ओग एक रपाई मनई रहा जउन अबहिं तलक ज़िअत रहा। ओग क पलंग लोहे क बनी रही। इ करीब नौ हाथ लम्बी अउ चार हाथ चौड़ी रही। रब्बा सहर में इ अबहिं तलक अम्मोनी लोगन क संग बाटइ।)

### यरदन नदी क पूरब क भुईया

12“उ समइ उ भुईया क हम पचे जीत लिहे रहे अउर मई एका रूबेन परिवार समूह क अउ गादी परिवार समूह क अर्नोन घाटी क अरोएर स लइके गिलाद क आधा पहाड़ी भाग तलक ओकरे सहरन क संग दिहेउँ ह। 13मनस्से क आधा परिवार समूह क मई गिलाद क दूसर आधा हीसा अउ समूचइ बासान दिहेउँ यानी अर्गोब क पूरा छेत्र बासान ओग क राज्ज रहा।”

(बासान क छेत्र रपाइयन क प्रदेस कहा जात रहा। 14याईर, मनस्से क सन्तानन में स एक, अर्गोब क समूचा छेत्र जेका बासान कहा जात रहा, कब्जा कइ लिहेन। उ प्रदेस गसूरी अउर माका लोगन क इलाका तलक फइल गएन। याईर पाछे इ प्रदेस क नाउँ आपन नाउँ पड़ राखेस। इहइ स आजु भी याईर प्रदेस क नाउँ स सुमिरइ जात ह।)

15“मई गिलाद माकीर क दिहेउँ। 16अउर रूबेन परिवार समूह क अउ गाद परिवार समूह क मई उ प्रदेस दिहेउँ जउन अर्नोन घाटी स यब्बोक नदी तलक जात ह। घाटी क बीच एक चउहद्दी बाटइ। यब्बोक नदी अम्मोनी लोगन क चउहद्दी अहइ। 17यरदन घाटी में यरदन नदी पच्छिम चउहद्दी बनावत ह। इ छेत्र क उत्तर में किन्नेरेत झील अउर दक्खिन में अराबा समुदर बाटइ अरथात जेका लवण सागर कहत हीं। इ पूरब में पिसगा क चोटी क तलहटी में बना अहइ।

18“ओह समइया, मई तोहका आदेस दिहे रहेउँ: ‘यहोवा, तोहार परमेस्सर तू पचन्क रहइ बरे यरदन नदी क इ कइँती क प्रदेस दिहेउँ ह। मुला अब तोहरे पचन्क जोधन बरे आपन औजार उठावइ चाही। तोहका दूसर इस्त्राएली परिवार समूहन क भी नदी क पार होइ क अगुवाइ करइ चाही। 19तोहार मेहररुअन, गदेलन अउर तोहार गोरुअन हिओँ ओन सहरन में रइहीं जेनका मई तू पचन्क दिहेउँ ह। मई जानत हउँ कि तोहरे लगे बहोत स गोरुअन अहइँ। 20मुला तोहे पचन्क आपन इस्त्राएली रिस्तेदारन क मदद यरदन नदी क दूसर किनारे उ प्रदेस क पाइ लेतेन तलक करइ चाही जउन यहोवा तोहार परमेस्सर दिहेस ह। ओनकइ मदद तब तलक करा जब तलक यहोवा ओनकइ जीवन में सान्ति न देइ जइसा तू पचे हिओँ पाइ लिहा ह। तब तू पचे हिओँ आपन देस में लउटि सकत ह जेका मई तू पचन्क दिहेउँ ह।’

21“तब मई यहोसू स कहेउँ, ‘तू पचे उ सबइ लख्या ह जउन यहोवा तोहार परमेस्सर इ दुइ राजा लोगन क संग किहेस ह। यहोवा अइसा ही ओन सबहिं राज्जन क संग करब जउन जगह तू जात रहा। 22इ सबइ देसन क राजा लोगन स जिन डेराअ, काहेकि यहोवा तोहार परमेस्सर, तोहरे बरे लड़ी।’

### मूसा क कनान में प्रवेस करइ स मनाही

23“मई उ समइ यहोवा स विसेख कृपा क पराथना किहेउँ। 24‘यहोवा मोर सुआमी, ‘मई तोहार सेवक अहउँ। तू मोका आपन महानत सक्ती देखाइ सुरू किहस ह। सरग या भुईया पड़ कउनो अइसा दूसर परमेस्सर नाहीं अहइ, जउन तू किह्या ह तोहरे तरह महान अउ सक्तीसाली काम कइ सकइ। 25मई तोहसे विनती करत हउँ कि तू मोका उ पार जाइ द्या अउ यरदन नदी क दूसर कइँती क नीक प्रदेस, सुन्नर पहाड़ी पहेँटा अउर लबानोन क लखइ द्या।’

26“मुला यहोवा तोहरे कारण मोह पड़ नाखुस रहा। उ मोर बात सुनइ स इन्कार कइ दिहा। उ मोसे कहेस, ‘बस करा! एकरे बारे में मोका दूसर सब्द जिन कहा। 27पिसगा पहाड़े क चोटी पड़ जा। पच्छिउँ कइँती, उत्तर कइँती, दक्खिन कइँती, पूरब कइँती लखा। ओनका तू आपन आँखिन स

लखा काहेकि तू पचे यरदन नदी क पार नाहीं कइ पडब्या। 28तू पचन क यहोसू क निर्देस देइ चाही। ओका मजबूत अउ हिम्मती बनावा। काहेकि यहोसू लोगन क यरदन नदी क पार लइ जाइ। यहोसू ओन भुइँया क जउन तू लखत रहा ओका कब्जा करइ मँ तोहार मदद करी ओहमाँ तोहका रहइ क देइ।

29“एँह बरे हम पचे बेत-पोर क दूसर कइँती घाटी मँ रुकि गए।”

### मुसा लोगन क परमेस्सर क नेमन पइ धियान देइ बरे चिताउनी देत ह

4 “इस्त्राएल, अब ओन नेमन अउ सबइ आदेस क सुना जेनकइ उपदेस मइँ देत अहउँ। ओनका माना। तब तू पचे जिअत रहब्या। तू जाइ सकब्या अउर उ प्रदेस क लइ लेइ सकब्या जेका यहोवा तोहरे पचन्क क पुरखन क परमेस्सर तोहका दइ देत अहइ। 2जउन मइँ हुकुम देत अहउँ ओहमाँ अउर कछू जोरब नाहीं अहइ। तू पचन्क ओहमाँ स कछू घटावइ नाहीं चाही। तू पचन्क आपन यहोवा परमेस्सर क ओन सबइ आदेस क मानइ चाही जेनका मइँ तू पचन्क दिहेउँ ह।

3“तू पचे लख्या ह कि बाल पोर मँ यहोवा का किहेस। यहोवा तोहार परमेस्सर तोहरे ओन सबहिँ मनइयन क नास कइ दिहेस जउन बाल पोर क मानत रहेन। 4मुला तू लोग सबइ जउन यहोवा आपन परमेस्सर क संग रहेन, आजु जिअत अहा।

5“धियान द्या, यहोवा मोर परमेस्सर जउन मोका हुकुम दिहेस ह, ओनहीं नेमन अउ हुकुमत क मइँ तू पचन्क सिच्छा देत अहउँ। तोहका उ नेमन क उ भुइँया मँ जरूर मानइ चाही जहाँ तू पचे रहइ बरे जात रहा। 6एँन नेमन क होसियारी स पालन करा। इ दूसर रास्ट्रन क सूचित करी कि तू पचे बुद्धि अउ समझ राखत अहा। जब ओन देसन क लोग इ नेमन क बारे मँ सुनिहीं तउ उ सबइ सच्चाइ क साथ स्वीकार करिही कि ‘फुरइ, इस्त्राएल रास्ट्र क लोग बुद्धिमान अउ समुझवार अहइँ।’

7“कउनो रास्ट्र क कउनो देवता ओनके संग ओतना निचके नाहीं रहत जउने तरह यहोवा हमार परमेस्सर जउन हम लोगन क लगे रहत ह, जब हम ओका पुकारित ह, 8कउनो दूसर रास्ट्र एँतना महान नाहीं कि ओकरे लगे उ पचे न्यायसंगत नेमन अउ हुकुमन होइँ जेनकर उपदेस मइँ आजु करत अहउँ। 9मुला तू पचन्क होसियार रहइ। निहचय कइ ल्या कि जब तलक तू पचे जिअत रहब्या, तब तलक तू पचे देखी भइ चिजियन क न बिसरब्या या एकाँ आपन हिरदइ स जाइ न देब्या। तू पचन्क इ सबइ सिच्छा क आपन पूत अउ पोतन क देइ चाही। 10उ दिन क याद राखा जब तू पचे होरेब पहाड़े पइ आपन यहोवा परमेस्सर क समन्वा ठाढ़ रह्या। यहोवा मोसे कहेस, ‘मइँ जउन कहत हउँ, ओका सुनइ बरे लोगन क बटोरा। तब उ पचे मोर स भयभीत होइही जब तलक उ पचे उ भुइँया पइ रइहीं अउर उ पचे इ सब उपदेस आपन गदेलन क भी देइहीं।’ 11तू पचे निचके आया अउ पहाड़े क तरखाले खड़ा होइ गया। पहाड़े

मँ आग लग गइ अउ उ अकास क छुअइ लाग। घना करिआ बादर अउ अँधियारा गमका। 12तबहिँ यहोवा आगी क बीच मँ स तू पचन्स बतियान। तू पचे अवाज सुनया मुला तू पचे ओका कउनो सकल नाहीं निहार सक्या। सिरिफ अवाज सुनाई पडत रही। 13उ तू पचन क आपन करार क बताएस। उ दस आदेसन क दिहस अउ तोहका ओका मानइ क आदेस दिहस। उ ओनका दुइ ठू पाथर क सिला पइ लिखेस। 14ओह समइ यहोवा मोका हुकुम दिहस कि मइँ तू पचन्क इ सबइ विधि अउ नेमन क उपदेस देउँ। इ सबइ उहइ सब नेमन अउ विधि अहइँ जेनका मानब तू पचन्क उ देस मँ करइ चाही जेका तू पचे लेइ अउ बसइ बरे तू पचे जात अहा।

15“उ दिना यहोवा होरेब पहाड़े क आगी स तोहे सबन्स बात किहस। तू पचे ओका तने क रुप मँ नाहीं लख्या। एँह बरे होसियार रहा। 16आपन जिन्नगी क जिन बरबाद करा। आपन बरे कउनो मूरति क रूप जिन बनावा। अइसी मूर्ति जिन बनावा जउन कउनो मनसेधू अउ मेहरारु क नाई होइ। 17अइसी मूरत जिन बनावा जउन भुइँया क कउनो जनावर या अकासे क पंछी क नाई देखौँइ देत होइ। 18अउर अइसी मूरत जिन बनावा जउन भुइँया पइ रेंगइवाला या समुदर क मछरी क नाई देखौँइ देत ह। 19जब तू पचे अकासे कइँती निगाह करा अउर सूरज, चँदा, तारन अउ बहोत कछू चिजियन तू अकासे मँ लखा, ओनका प्रति सेवा अउ पूजा बरे आकसित जिन भवा। यहोवा तू पचन्क परमेस्सर एँन सबइ चिजियन क संसारे क दूसर मनइयन क दिहस ह। 20मुला यहोवा तोहका पचन्क मिस्त्र स बाहेर लिआवा ह जउन तोहरे पचन बरे लोहा क भटठी रही। उ तू सबन्क एह बरे लिआएस ह कि तू पचे ओकर आपन लोग बन सका जइसे तू पचे अबहुँ अहा।

21“यहोवा तोहरे पचन्क कारण मोसे कोहाइ ग रहा। उ किरया खाएस कि मइँ यरदन नदी क ओह पार नाहीं जाइ सकत हउँ। उ कहेस कि मइँ उ सुन्नर प्रदेस मँ घुस नाहीं सकत हउँ जेका यहोवा तोहार परमेस्सर तोहका मिरास क रूप मँ देत अहइँ। 22एँह बरे मोका इहइ प्रदेस मँ मरइ चाही। मइँ यरदन नदी क पार नाहीं जाइ सकत हउँ। मुला तू पचे ओकरे पार होइ जाब्या अउ अच्छा भुइँया पाउब्या। 23तोहका सबन्क होसियार रहइ चाही कि तू पचे उ करार क जिन बिसरि जा, जेका यहोवा तोहरे पचन्क परमेस्सर तोहे सबन्स किहे अहइ। तू पचन्क कउने किसिम क मूरति नाहीं बनवइ चाही काहेकि यहोवा तोहरे पचन्क परमेस्सर तोहे सबन्क न बनावइ क आग्या दिहे अहइ। 24काहेकि तोहार परमेस्सर, ईस्राएल परमेस्सर अहइ। उ भस्म करइ बरे आगी क नाई अहइ।

25“जब तू पचे उ भुइँया मँ बहोत समइ तलक अच्छी तरह स रहि लेब्या अउ तोहार सबन्क पूतन अउ पोतवन होइहीं, अगर तू भ्रस्ट होइ जाब्या अउ तू सबइ प्रकार क मूर्ति बनाउब्या, तउ यहोवा तोहार पचन्क परमेस्सर इ क बुरा चीज मँ सामिल करिही। एहसे उ कोहाइ जाइ। 26अगर तू पचे उ बुराई क करब्या, तउ अकास अउ धरती तू पचन्क खिलाफ गवाह होई। मइँ तोहका कहत हउँ इ होई। तू पचे

हाली ही बरबाद होइ जाब्या। तू पचे यरदन नदी क उ देस क लेइ बरे पार करत बाट्या, मुला तू पचे हुवाँ बहोत समइ तलक नाहीं रहब्या। तू सबहिं पूर्णरूप स नस्ट होइ जाब्या। 27यहोवा तोहे पचन्क दूसर रास्ट्रन में तितराइ बितराइ देइ अउ तू पचन में स उ देस में कछू ही जिअत रइहीं जेनमों यहोवा तू पचन्क पठइ। 28तू पचे हुवाँ मनइयन क बनवा देवतन क पूजब्या, ओन जिजियन क जउन काठे अउ पाथर क होइहीं जउन न लखि, न सुनि, न खाइ या न सूँघ सकत ही। 29मुला एँन दूसर देसन में तू पचे यहोवा आपन परमेस्सर क हेरब्या। अगर तू पचे आपन पूरी तन अउ मन स ओका हेरब्या तउ ओका पउब्या। 30जब तू पचे विपत्ति में पड़ि जाब्या अउर उ सबइ बातन तू पचन पइ घटिहीं तउ तू पचे उ दिनन में यहोवा आपन परमेस्सर क लगे लउटब्या अउ ओकरी आग्या क मनब्या। 31यहोवा तोहार परमेससर कृपालु अहइ उ तू पचन्क न तजी। उ तू पचन्क नस्ट नाहीं करी। उ उ वाचा क न बिसरी जउन उ तोहरे पुरखन क बचन क रुप में दिहस।

### ओन महान करमन क बारे में सोचा जउन यहोवा तोहरे पचन्क बारे में किहस

32“का ऐतनी महान बात पाछे कबहुँ भइ रही? पाछे के उ दिनन क बारे में सोचा जब परमेस्सर धरती पइ मनई क बनाएस। ओन सबहिं बातन क बारे में सोचा जउन संसार में कहुँ भी घटि भइ अहइँ। का इ महान घटना जइसी कउनो कबहुँ पहिले सुनेस ह? नाहीं। 33तू पचे परमेस्सर क तू पचन्स आगी में स बोलत सुन्या ह अउर तू पचे अबहुँ भी जिअत अहा। का अइसी घटना कउनो क संग घटी भइ अहइ? नाहीं। 34का कउनो दूसर देवता कबहुँ आपन लोगन क दूसरे रास्ट्रन क भीतर खुद हुआँ स बाहेर लिआवइ क जतन किहस ह? नाहीं। मुला तू पचे खुद लख्या ह कि परमेस्सर इ सबइ काम तोहार बरे करत ह। उ तोहका मिस्त्र स परीच्छा, चमत्कार, अचरज, जुद्ध, महान सक्ती, ताकत अउ भयानक कामन क जरिया बाहर लिआएस। 35उ तू पचन्क इ सब देखाएस ह जेका तू पचे जान ल्या कि यहोवा ही परमेस्सर अहइ। ओकरे अतिरिक्त कउनो दूसर परमेस्सर नाहीं अहइ। 36यहोवा सरग स आपन बातन क, तोहका सिच्छा देइ बरे सुनइ देत रहा। उ धरती पइ आपन महान आगी देखाएस अउ उ ओहमों स बोलेस।

37“यहोवा तोहरे पुरखन स पिआर करत रहा। इहइ कारण रहा कि उ ओनके पुरखन यानी तू पचन्क चुनेस अउ इहइ कारण अहइ कि यहोवा तोहका मिस्त्र बाहेर लिआएस। उ तोहरे संग रहा अउ आपन बड़की सक्ती स तू पचन्क बाहेर लिआएस। 38जबहिं तू पचे आगवा बड़्या तउ यहोवा तोहरे समन्वा स रास्ट्रन क बाहेर जाइ बरे मजबूर किहस। इ सबइ रास्ट्र तू पचन्स बड़का अउ जियादा बरिआर रहेन। मुला यहोवा तू पचन्क ओनके देस में लइ आवा। उ ओनकइ देस तू पचन्क बसइ बरे दिहस अउ इ देस आजु भी तोहार अहइ।

39“एह बरे आजु तू पचन्क जानइ अउ सुमिरइ चाही कि यहोवा परमेस्सर अहइ। उ आकासे क ऊपर अउ धरती क

नीचे तलक क परमेस्सर अहइ। कउनो दूसर परमेस्सर नाहीं अहइ। 40तू पचन्क ओकरे ओन नेमन अउ हुकुमन क जरूर मानइ चाही जेनका मई आजु तू पचन्क देत अहउँ। अगर तू करब तब हर एक बात तोहरे पचन्क अउ तोहरे ओन गदेलन बरे नीक रही जउन तोहरे सबन्क बाद होइहीं। तू पचे लम्बे समइ तलक उ देस में रहब्या जेका यहोवा तोहार परमेस्सर तू पचन्क हमेसा बरे दइ देत अहइ।”

### मूसा सुरच्छा क नागन क चुनत ह

41तब मूसा तीनउ सहरन क यरदन नदी क पूरब कइँती चुनेस। 42जदि कउनो मनई कउनो क संजोग स मारि डवइ तउ उ इ सहरन में स कउनो में पराइके जाइ सकत ह अउ बचा रहि सकत ह। अगर उ मारा भए मनई स घिना नाहीं करत रहा अउर ओका मार डवइ क इरादा नाहीं रखत रहत तउ उ ओन सहरन में स कउनो एक में जाइ सकत ह। 43मूसा जउने सहरन क चुनेस, उ सबइ इ सब रहेन: रूबेनी लोगन बरे रेगिस्तान क मैदानी भुइँया में बेसेर; गादी लोगन बरे गिलाद में रामोत अउ मनस्से लोगन बरे बासान में गोलान।

### मूसा क नेमन क परिचय

44इस्त्राएली मनइयन बरे जउन नेम मूसा दिहस उ इ बाटइ। 45मूसा इ सबइ उपदेसन, नेमन अउ हुकुमन इस्त्राएल क लोगन बरे तब दिहस जब उ सबइ मिस्त्र स बाहेर आएन। 46मूसा इ सबइ नेमन क तब दिहस जब लोग यरदन नदी क पूरबी किनारे पइ बेत-पोर क पार घाटी में रहेन। उ पचे एमोरी राजा सीहोन क देस में रहेन, जउन हेसबोन में रहत रहा। मूसा अउ इस्त्राएल क लोग सीहोन क तब हराएन जब उ पचे आए रहेन। 47उ पचे सीहोन क भुइँया अउ बासन राजा क ओग क भुइँया क अपने लगे रखइ बरे कब्जा कइ लिहे रहेन। दुइनउँ एमोरी राजा यरदन नदी क पूरब में रहत रहेन। 48इ पहँटा अर्नोन घाटी क सिरे पइ टिका भवा अरोएर स लइके सिओन अरथात हेर्मोन पहाड़े तलक फइला रहा। 49यरदन नदी क पूरब क पूरा पहँटा उस प्रदेस में मिला रहा। इ पूरब में पिसगा पहाड़े क चरण तलक अराबा समुद्दर तलक फइलत भवा रहा।

### दस आग्यन

5 मूसा इस्त्राएल क सब मनइयन क एक संग बोलोँएस अउ ओनसे कहेस, “इस्त्राएल क मनइयो! आजु जउने नेमन अउ कानूनन क मई बतावत अहउँ, ओनका सुना। इ सबइ नेमन क सीखा अउ सक्ती स ओनका माना। 2यहोवा, हम पचन्क परमेस्सर होरब पहाड़े पइ हम पचन्क संग वाचा किहे रहा। 3यहोवा इ वाचा हम पचन्क पुरखन क संग नाहीं किहे रहा, मुला हम पचन्क हमार संग जउन कउनो आजु जिअत अहइँ। 4यहोवा पहाड़े पइ तू पचन्स आमने सामने बात किहस। उ तू पचन्स आगी में स बतियान। 5ओह समइ तू पचन्क इ बतावइ बरे कि यहोवा का किहस ह, मई तू लोगन अउ यहोवा क बीच खड़ा रहेउँ। काहेकि तू पचे

आगी से डेराइ गया अउर तू पचे पहाड़े पइ जाइ स इन्कार किहया। यहोवा कहेस:

6“मई यहोवा तोहार उ परमेस्सर हउँ जउन तू पचन्क मिस्त्र स बाहेर लइ आएउँ ह जहाँ तू पचे दास क नाई रहत रहया।

7“मोरे अलावा कउनो दूसर देवता क पूजा जिन करा।

8“कउनो भी मूरतियन या कउनो क तस्बीर जउन आकास क ऊपर में, भुइँया पइ या समुद्र क नीचे में होइ, जिन बनावा। 9ओका निहुरिके दण्डवत या पूजा जिन करा। काहेकि मई यहोवा तोहार परमेस्सर ईस्यालु अहउँ। मई आपन लोगन क जरिये कउनो दूसर देवता क पूजा स घिना करत हउँ। अइसे लोग जउन मोरे खिलाफ पाप करत हीं, मोर दुस्मन होइ जात हीं। मई ओन लोगन्क सजा देब अउर मई ओनके पूतन, पोतन अउ परपोतन क सजा देब। 10मुला मई ओन लोगन पइ बहोत दयालु रहब जउन मोसे पिरेम करत हीं अउर मोरे आदेसन क मानत हीं। मई ओनकइ हजार पीढ़ियन तलक दयालु रहब।

11“यहोवा, आपन परमेस्सर क नाउँ क उपयोग गलत तरिके स जिन करा। अगर कउनो मनई ओकरे नाउँ क उपयोग गलत तरीके स करत होइ तउ उ दोखी अहइ अउर यहोवा ओका निर्दोष न बनाई।

12“सबित क दिना क खास महत्व देइ बरे सबित खास दिन क रूप में माना। यहोवा तोहार परमेस्सर हुकुम दिहस ह कि तू पचे सबित क दिन क हफ्ता क दूसर दिनन स अलगगइ द्या। 13पिछले छः दिन तोहरे पचन्क काम करइ बरे अहइँ। 14मुला सतवाँ दिन यहोवा तोहरे परमेस्सर क सम्मान में आराम करइ क दिन अहइ। एह बरे सबित क दिन कउनो मनई काम न करइ चाही। यानी तू पचे, तोहार पूतन, बितियन, मनइयन अउ मेहरारु नउकरन, गइयन, बर्धन, गदहन, अउर तोहरे पचन्क सहसन में रहइवाला बिदेसी, कउनो भी काम न करइ चाही। तोहरे पचन्क दास क भी तोहार जइसा आराम मिलइ चाही। 15तोहका इ जरूर याद रखइ चाही कि तू मिस्त्र में दास रहा। यहोवा, तोहार परमेस्सर महान सक्ती स तू पचन्क मिस्त्र स बाहेर लिआवा। उ तू पचन्क अजाद किहस। इहइ कारण अहइ कि यहोवा तोहार परमेस्सर हुकुम देत ह कि तू पचे सबित क दिन माना।

16“आपन महतारी अउर बाप क सम्मान करा। यहोवा तोहार परमेस्सर तोहका इ करइ क हुकुम दिहस ह। अगर तू पचे इ हुकुम क मानत ह तउ तोहार उमिर लम्बी होइ अउर उ देस में जेका यहोवा तोहार परमेस्सर तू पचन्क दइ देत अहइ इ तोहार बरे अच्छा होइ।

17“कउनो क हत्या जिन करा।

18“बिभिचार क पाप जिन करा।

19“कउनो चीज जिन चोरावा।

20“दूसर जउन कछू किहे अहइँ ओकरे बारे में झूठ जिन बोला।

21“तू पचे दूसर लोगन क धन-सम्पति या दूसर कउनो चिजियन जे दूसर क अहइ क आपन बनावइ क इच्छा जिन करा। दूसर मनई क पात्नी, घर, खेत, मनसेधू या मेहरारु नौकर, गइयन अउ गदहन लइ लेइ क इच्छा तू पचन में न होइ चाही।”

### मनइयन क परमेस्सर स डर

22मूसा कहेस, “यहोवा इ सबइ हुकुम तू सबहिं क दिहस जब तू पचे एक संग पहाड़े प रहया। यहोवा साफ साफ सबदन में बानत किहस अउर ओकर तेज आवाज आगी, बादर अउ घना आँधियास स सुनाई देत रहा। जब उ इ आदेस दइ दिहस तब अउर कछू नाहीं कहेस। उ आपन सबदन क दुइ तु पाथरे क सिला पइ लिखेस अउ ओनका मोका दइ दिहस।

23“तू पचे आवाज क तब सुन्या जब पहाड़ आगी स बरत रहा। तब तू पचे मोरे लगे आया, तोहरे परिवार समूह क सबहिं नेता लोग अउ तोहार सबहिं पुरनियन। 24उ पचे कहेन, ‘यहोवा हमार परमेस्सर आपन गौरव अउ बड़कइ देखौँएस ह। हम पचे ओका आगी में स बोलत सुना ह। आजु हम पचे लिख लीन्ह ह कि कउनो मनई क परमेस्सर स बात करइ क बाद भी जिअत रहि सकब, होइ सकत ह। 25मुला अगर हम पचे यहोवा आपन परमेस्सर क दुसरी दाई बात करत सुना तउ हम पचे जरूर मरि जाब। उ खउफनाक आगी हमार नास कइ देइ। मुला हम पचे मरब नाहीं चाहित। 26कउनो अइसा मनई नाहीं जउन हम लोगन क नाई कबहुँ जिअत परमेस्सर क आगी में स बतियात सुने होइ अउ जिअत होइ। 27मूसा, तू निअरे जा अउ यहोवा हम लोगन्क परमेस्सर, जउन कहत बाटइ सुना। तब उ सब बातन हमका बतावा जउन यहोवा तू पचन्स कहत ह, अउर हम लोग तोहार सुनब अउर ओकर पालन करब।’

### यहोवा मूसा स बतियात ह

28“यहोवा उ सबइ बातन सुनेस जउन तू मोसे कहया। तब यहोवा मोसे कहेस, ‘मई उ सबइ बातन सुनेउँ ह जउन हम पचे कहेन ह। जउन उ पचे कहेन बढिया अहइ। 29मई इच्छा करत हउँ कि उ पचे हिरदय स मोर सम्मान करइ अउर मोरे आदेसन क हमेसा मानइ सिखिहीं। तब इ ओनके अउ ओनके सन्तानन बरे सदा ही नीक रही।

30“जा अउ मनइयन स कहा कि आपन आपन तम्बूअन में लउटि जाइँ। 31मुला मूसा, तू मोरे निअरे ठाड़ रहा। मई तोहका सारा हुकुम, कानून अउ नेम हेरब जेकर सिच्छा तू ओनका देब्या। ओनका इ सबइ उ देस में करइ चाही जेका मई ओनका रहइ बरे दइ देत हउँ।’

32“एह बरे, तू सब मनइयन क उ सब कछू करइ बरे होसियार रहइ चाही जेकरे बरे यहोवा तोहका हुकुम दिहस बाटइ। तोहका न दाहिन हाथे कइँती घूमइ चाही अउर न ही बाएँ हाथे कइँती। 33तोहका उहइ तरह रहइ चाही, जउने तरह रहइ क हुकुम यहोवा तोहार परमेस्सर तोहका दिहे अहइ। तब तू सदा जिअत रहि सकत ह अउर हर चीज



तोहरे बरे नीक होइ। उ देस में, जउन तोहार होइ, तोहार उमिर लम्बी होइ जाइ।

### सदा परमेस्सर स पिरम करा अउर आग्या माना

6 “जउन आदेसन, नेमन अउ हुकुमन क यहोवा, तोहार परमेस्सर तोहका सिखावइ क मोका आदेस दिहस ह, उ सबइ इ सब अहई। ऐनका उ देस में मानया जेहमों रहइ बरे तू प्रवेश करत अहा। 2 तू अउर तोहार गदेलन अउ पतोहून जब तलक जिअत रहा यहोवा आपन परमेस्सर क सम्मान करइ चाही। तोहका ओनके ओन सबइ नेमन अउ हुकुमन क पालन करइ चाही जेनका मई तोहका दइ देत हई। अगर तू अइसा करब्या तउ लम्बी उमिर पउब्या। 3 इस्त्राएल क मनइयो, एका धियान स सुना अउ इ सबइ नेमन क माना। तब इ तोहारे बरे नीक होइ अउर तू पचे तेजी स बढ़ब्या। यहोवा तोहारे पुरखन क परमेस्सर, इ सबन बरे बचन दिहे अहइ कि तू पचे दूध अउर सहद स बहत भवा धरती पाउब्या।

4 “इस्त्राएल क मनइयो, धियान स सुना। यहोवा हमार परमेस्सर अहइ, यहोवा एक अहइ। 5 अउर तू पचन्क यहोवा आपन परमेस्सर स आपन क पूरा हिरदय, आतिमा अउ सक्ती स पिरम करइ चाही। 6 इ सबइ हुकुमन क सदा आपन दिल में रखा जेनका मई आजु तू पचन्क दइ देत हई। 7 एनकइ सिच्छा आपन लरिकन क देइ बरे होसियार रहा। इ सबइ हुकुमन क बारे में तू पचे जब तू आपन घन में बइठे भए, सड़किया पइ टहरत भए, जब तू ओलरा अउ जब जागा तब एकरे बारे में बात करा। 8 एका स्मरण पत्र नाई आपन हाथे पइ बाँधा अउ ललाट पइ धारण करा। 9 एका आपन घन क दरवाजन पइ, अउ सहर फाटक पइ लिख ल्या।

10 “यहोवा तोहार परमेस्सर तू पचन्क देस में लइ जाइ जेकरे बरे उ तोहारे पुरखन-इब्राहीम, इसहाक अउ याकूब क देइ क बचन दिहे रहा। तब उ तू पचन्क बढ़के अउ अमीर सहर देइ जेनका तू नहीं बनाया। 11 यहोवा तू पचन्क अच्छी चीजन्स भरा भवा घर देइ जेनका तू पचे हुवाँ नहीं राख्या ह। यहोवा तू पचन्क कुआँ देइ जेनका तू पचे नहीं खन्या ह। यहोवा तू पचन्क अंगूरन अउ जइतून क बाग देइ जेनका तू पचे नहीं लगाया ह। तू पचन्क ओका खाब्या अउ संतुट्ट होब्या।

12 “मुला होसियार रहा। यहोवा क जिन बिसरा जउन तू पचन्क मिस्त्र स लिआएस, जहाँ तू पचे दास रह्या। 13 यहोवा आपन परमेस्सर क सम्मान करा अउर सिरिफ उहइ क सेवा करा। बचन देइ बरे तू पचे सिरिफ उहइ क नाउँ क उपयोग करा। 14 तू पचन्क दूसर देवतन क अनुसरण नहीं करइ चाही। तू पचन्क आपन चारिहुँ कइँती रहइवाला लोगन क देवतन क अनुसरण नहीं करइ चाही। 15 काहेकि यहोवा तोहार परमेस्सर जउन तोहार बीच अहइ ईस्यारु परमेस्सर अहइ। अगर तू पचे दूसर देवतन क पाछे रहब्या, तउ उ तू पचन पइ कोहाइ जाइ अउ उ धरती पइ स तू पचन क खतमइ कइ देइ।

16 “तू पचन्क यहोवा आपन परमेस्सर क जाँच उहइ तरह नहीं करइ चाही जउने तरह तू पचे मस्सा में जाँचत किह्या ह। 17 तू पचन्क यहोवा आपन परमेस्सर क हुकुमन क मानइ बरे पक्का निहचय रखइ चाही। तू पचन्क ओकर सबहिँ ओन उपदेसन अउ नेमन क मानइ चाही जेनका उ तू पचन्क दिहे अहइ। 18 तू पचन्क उ सबइ उचित अउ नीक काम करइ चाही जउन यहोवा क खुस करइ तब तोहारे बरे इ ठीक होइ अउर तू पचे उ देस में जाइ सकत ह जेकरे बरे यहोवा तोहारे पचन्क पुरखन क बचन दिहे अहइ। 19 अउर तू पचे आपन सबहिँ दुस्मनन क सक्ती स निकार सकब्या, जइसा यहोवा कहेस ह।

### आपन गदेलन क परमेस्सर क कारज क सिच्छा द्या

20 “भविस्स में, तोहार पचन्क पूत तोहसे सबन्स इ पूछ सकत ह कि ‘यहोवा हमार परमेस्सर हमका जउन उपदेस, कानून अउ नेम दिहस ह, ओकर अरथ का अहइ?’ 21 तब तू पचे आपन पूतन स कहब्या, ‘हम पचे मिस्त्र में फिरौन क गुलाम रहेन, मुला यहोवा हम पचन्क बढ़की सक्ती स बाहेर लिआवा ह। 22 यहोवा हमका माहन, खउफनाक चीन्हा अउ चमत्कार देखौएस। हम पचे ओनके जरिये इ सबइ घटना क मिस्त्र क मनइयन, फिरौन अउ फिरौन क महल क संग होत भए लखा ह। 23 अउर यहोवा हम लोगन क मिस्त्र स एह बरे लिआवा कि उ-उ देस हमका दइ सकइ जेकरे बरे उ हमारे पुरखन क बचन दिहे रहा। 24 यहोवा हमका इ सबहिँ उपदेसन क मानइ क हुकुम दिहस। इ तरह हम लोग यहोवा आपन परमेस्सर क सम्मान करत अही। तब यहोवा सदा हम लोगन क जिअत राखी अउ हम पचे बढ़िया जिन्नगी बिताउब जइसा इ समइ अहइ। 25 अगर हम इ सबइ आदेसन क मानब जेका यहोवा हमार परमेस्सर हमका आदेस देत ह तउ हम पचे नीक होब्या।

### इस्त्राएल, परमेस्सर क खास लोग

7 “यहोवा तोहार परमेस्सर तू पचन्क उ देस में लइ जाब, जेका कब्जा करइ बरे तू पचे ओहमाँ जात अहा। परमेस्सर तोहारे बरे हिती, गिर्गासी, एमोरी, कनानी, परिज्जी, हिब्बी अउ यबूसी क बाहेर हौकि देइ। उ सात रास्ट्र तोहसे जियाद बरियार अउ जियादा तादद में अहइ। 2 यहोवा तोहार परमेस्सर इ रास्ट्रन क तू पचन्क अधीन करी अउर तू पचे ओनका हरउब्या। तू पचन्क ओनका पूरी तरह नस्ट कइ देइ चाही। ओनके संग कउनो सन्धि जिन करा। ओन पइ दया जिन करा। 3 ओन लोगन में स कउनो क संग बियाह जिन करा, अउर उ रास्ट्रन क कउनो मनई क संग आपन पूत अउ बिटियन क बियाह न करा। 4 काहेकि उ पचे तोहारे गदेलन क परमेस्सर क दूर लइ जइहीं। एह बरे तोहारे गदेलन दूसर देवतन क सेवा करिहीं। तब यहोवा तोहे सबन पइ कोहाइ जाइ। उ हाली ही तोहार नास कइ देइ।

### बनावटी देवतन क नास करइ क हुकुम

5 “तू पचन्क इ सबइ रास्ट्र क संग इ करइ चाही। तू पचन्क ओनकर वेदियन क बरबाद कइ देइ चाही। स्मृति

पाथरन क टूकन मैं तोड़ि डवइ चाही। ओनकर असेरा खम्भन क काटि डवा अउ ओनकइ मूरतिन क बार डवा। 6काहेकि तू पचे यहोवा आपन परमेस्सर क अलग कीन्ह भवा मनई अहा। तू पचे यहोवा क आपन सम्पत्ति अहा। संसार क सबहिं मनइयन मैं स यहोवा तोहार परमेस्सर तू पचन्क विसेख अइसे लोग जउन ओकर आपन अहई, चुना। 7यहोवा तू पचन्स काहे पिरेम करत ह अउ तू पचन्क उ काहे चुनेस? एह बरे नाहीं कि दूसर लोगन क बराबरी मैं तोहार गिनती बहोतइ जियादा अहइ। तू पचे सबहिं लोगन मैं स सबसे कम रह्या। 8मुला यहोवा तू पचन्क आपन बड़की सक्ती क जरिये मिस्त्र क बाहेर लिआवा, काहेकि उ तोसे पिरेम करत ह। उ मिस्त्र क सम्राट फिरौन क गुलामी स तू पचन क तोहरे पुरखन क दीन्ह भए बचन क पूरा करइ बरे, अजाद कराएस।

9“एह बरे याद राखा कि यहोवा तोहार परमेस्सर ही सिरिफ परमेस्सर अहइ। उ बिसासी परमेस्सर अहइ। उ आपन वाचा क पूरा करत ह। उ ओन सबहिं लोगन स पिरेम करत अउ ओन पइ दाया करत ह जउन ओकरे हुकुमन क मानत हीं। उ हजारन पीढ़ियन तलक पिरेम करत रहत ह। 10जउन ओहसे घिना करत ह उ खुद ओसे ही सजा पाइहीं। उ ओनका बरबाद कइ देइ। जउन ओसे घिना करत ह उ बिना देरी भए खुद ओसे ही सजा पाइहीं। 11एह बरे तू पचे इ आदेसन, नेमन अउ हुकुमन क मानइ मैं जरूर होसियार रहा, जेनका मई आजु तू पचन्क दइ देत हउँ।

12“अगर तू पचे मोरे इ सबइ नेमन पइ धियान देब्या अउ ओनका मानइ मैं होसियार रहब्या तउ यहोवा तोहार परमेस्सर तू पचन्स पिरेम क वाचा क पूरा करी। उ इ बचन तोहरे पुरखन क दिहे रहा। 13उ तू पचन्स पिरेम करी अउ तू पचन क आसीबाद देइ। तोहरे रास्ट्रे मैं लोग लगातार बढ़त जइहीं। उ तोहे पचन्क गदिलन क आसीबाद देइ। उ तोहरे पचन्क खेतन मैं अच्छी फसल क आसीबाद देइ। उ तू पचन्क अन्न, दाखरस अउ तेल क आसीबाद देइ। उ तोहारी गइयन क बछवन अउ तोहरी भेड़िन क बच्चा पइदा करइ क आसीबाद देइ। तू पचे उ सबइ आसीबाद उ देसे मैं पउब्या जेका तू पचे देइ क बचन यहोवा तोहरे पुरखन क दिहे रहा।

14“तू पचे दूसर लोगन्स जियादा आसीबाद पउब्या। हर एक पति-पत्नी बच्चे पइदा करइ क काबिल होइहीं। तोहार गोरु बछवा पइदा करइ काबिल होइहीं। 15अउर यहोवा तू पचन्स सबहिं बेरमियन क दूर करी। यहोवा तू पचन्क उ खउफनाक बेरमियन स बचाइ जउन तू मिस्त्र मैं जानत रहेन अउ ओन खउफनाक बेरमियन क ओन सबहिं लोगन क देइ जउन तू पचन्स घिना करत हीं। 16तू पचन्क ओन सबहिं लोगन्क नास जरूर करइ चाही जेनका हरावइ मैं यहोवा तोहार मदद करत ह। ओन पइ दाया न करा। ओनके देवतन क सेवा न करा। उ तोहार बरे फंदा अहइ।

### यहोवा आपन लोगन क सहायता क बचन देत ह

17“आपन मन मैं इ न सोचा, ‘इ सबइ रास्ट्र हम लोगन्स जियादा बरिआर अहई। हम पचे ओनका दबाव डाइके कइसे भगाइ सकित ह?’ 18तू पचन्क ओनसे डेराइ नाहीं चाही। तू

पचन्क सुमिरइ चाही जउन यहोवा तोहार परमेस्सर फिरौन अउर मिस्त्र क लोगन्क संग किहस। 19जउन बड़की बिपदन उ दिहस तू पचे ओनका लख्या। तू पचे ओकरे किए भए चमत्कार अउ अचरजन क लख्या। तू पचे यहोवा क बड़की सक्ती अउ मजबूती क, तू पचन्क बाहेर लिआवइ मैं उपयोग करत देख्या। यहोवा, तोहार परमेस्सर उहइ सक्ती क उपयोग ओन लोगन्क खिलाफ करी जेनसे तू पचे डेरात अहा। 20“यहोवा तोहार परमेस्सर, ओकर खिलाफ बरौ\* क भेजब जउन बचा भवा अहइ अउ आपन क तोहस छुपाए अहइ। यहोवा ओन सबहिं मनइयन क नास करी। 21तू पचे ओनसे जिन डेराअ, काहेकि यहोवा तोहार परमेस्सर तोहरे संग अहइ। उ महान अउ आस्चर्यजनक परमेस्सर अहइ। 22यहोवा तोहार परमेस्सर ओन रास्ट्रन क तोहार देस थोड़ा-थोड़ा कइके तज देइ क मजबूर करी। तू पचे ओनका हाली मैं सबहिं क नास नाहीं कइ पउब्या। अगर तू पचे अइसा करब्या तउ जगली जनावरन क तादाद तोहर बरे बहोत जियादा होइ जाइ। 23मुला यहोवा तोहार परमेस्सर ओन रास्ट्रन क तू पचन्क दइ देइ। उ ओनका बरबाद होइ तलक बड़ा उलझन मैं डाइ के परेसान करब्या। 24यहोवा तू पचन्क ओनके राजा लोगन क हरावइ मैं मदद करी। तू पचे ओनका मारि डाउब्या अउर उ बिसारि जाब। कउनो भी तू पचन्क रोक नाहीं सकी। तू पचे ओन सबहिं क बरबाद करब्या।

25“तू पचन्क ओनके देवतन क मूरतियन क बारि डवइ चाही। तू पचन्क ओन मूरतियन पइ मढ़ा भवा सोना या चाँदी क लेइ क इच्छा नाहीं करइ चाही। तू पचन्क उ सोना क अउ चाँदी क अपने खातिर नाहीं लेइ चाही। इ तोहका फंसा लेइहीं काहेकि उ सबइ मूरती यहोवा तोहार परमेस्सर बरे नफरत-अंगोज अहइ। 26इ सबइ मूरतियन क बर्बाद कीन्ह जाब्या। तू पचन्क ओन प्रकार क मूरतियन क आपन घरे मैं नाहीं लावइ चाही। एह बरे तू पचन्क ओनकर संग बर्बाद नाहीं कीन्ह जाब्या। तू पचन ओका अस्वीकार करइ चाही अउर ओन से घिना करइ चाही।

### यहोवा क सुमिर

8 “तू पचन्क आजु मई जउन सबइ कानून क देत ह ओका मानइ मैं होसियार रहइ चाही। काहेकि तब तू पचे जिअत रहब्या। तोहार गनती जियादा स जियादा होत जाइ। तू पचे उ देस मैं जाब्या अउर ओहमैं रहब्या जेका यहोवा तोहरे पुरखन क देइ क बचन दिहे अहइ। 2अउर तू पचन्क उ लम्बी जात्रा क याद रखइ चाही जेका यहोवा तोहार परमेस्सर रेगिस्ताने मैं चालीस बरिस तलक कराएस ह। यहोवा तोहार परमेस्सर तोहका परिपूर्ण बनाएस ह। उ तू पचन्क बिनम्र बनवइ चाहत रहा। अउर तोहार परीच्छा लइ चाहत रहा। उ पचे तोहार हिरदय क बारे मैं जानइ क चाहत रहा कि तू पचे ओकरे हुकुमन क पालन करब्या या नाहीं। 3यहोवा तू पचन्क बिनम्र बनाएस अउ तू पचन्क भूखा रहइ दिहस। तब उ तू पचन्क मन्ना खियाएस जेका तू पचे पहिले

बरी इ एक प्रकार क डंक मारइ क कीड़ा अहइ। इ बड़का भिड़ या मधुमक्खि क नाई अहइ। हीअँ एकाँ अरथ अहइ परमेस्सर क सरगदूत या ओकरे महानसक्ती।

स नहीं जानत रह्या, यहाँ तक कि ओका तोहार पुरखन भी कबहुँ नहीं लखे रहेन। यहोवा इ काहे किहस? काहेकि उ चाहत रहा कि तू पचे जान ल्या कि मनइयन सिरिफ रोटी प ही जिअत नहीं रहत ह किन्तु यहोवा क मुहँ स निकरा भवा हर एक बातन पइ टिका रहत ह। 4इ सबइ पिछले चालीस बरिसन मँ तोहार ओढ़ना नहीं निकलेन। तोहरे गोड़वन मँ चोट नहीं लागेन काहेकि यहोवा तोहार रच्छा किहेन। 5एह बरे तोहका पचन्क जानइ चाही कि यहोवा तोहार परमेस्सर तू पचन्क सिच्छा देइ अउ सुधारइ बरे उ सब वइसेन ही किहस जइसे कउनो पिता अपने बेटा क सिच्छा बरे करत ह।

6“तू पचन्क यहोवा आपन परमेस्सर क आदेसन क मानइ चाही। ओकरे बताए भए राहे पइ जीवन बितावा अउ ओकर मान करा। 7यहोवा तोहार परमेस्सर तू पचन्क एक ठु नीक देसे मँ लइ जात अहइ, अइसे देस मँ जेहमँ नदियन, फव्वासन अउ झरणा घाटियन अउ पहाड़ियन मँ बहत ह। 8इ अइसा देस अहइ जेहमँ गोहूँ, जउ, अंगूरे क सबइ बेल, अंजीरे क बृच्छ अउ अनार होत हीं। इ अइसा देस अहइ जेहमँ जइतून क तेल अउ मधु होत ह। 9हुआँ तू पचन्क बहोत जियादा भोजन मिली। तू पचन्क हुआँ कउनो चीज क कमी नहीं होइ। इ अइसा देस अहइ जहाँ लोहा क चट्टान अहइँ। तू पचे पहाड़ियन स ताँबा खन सकत ह। 10तोहरे पचन्क खाइ बरे खूब जियादा होइ अउर तू पचे संतुटठ होब्या। तब तू पचे आपन परमेस्सर क तारीफ करब्या कि उ तू पचन्क अइसा बढ़िया देस दिहस।

### यहोवा क कारजन क जिन बिसरा

11“होसियार रहा, यहोवा आपन परमेस्सर क जिन बिसरा। होसियार रहा कि आज मई जउने हुकुमन क, कानूनन अउ नेमन क दइ देत हउँ ओनका माना। 12तू पचे खाब्या अउ संतटठ रहब्या। तू पचे बढ़िया मकान बनउब्या अउर ओनमँ रहब्या। 13तोहार लगे गोरुअन अउर भेड़िन क बहोत बड़का झुण्ड होइहीं, तू पचे जियादा स जियादा सोना अउ चाँदी पउब्या। तोहरे लगे बहोत स चिजियन होइहीं। 14जब अइसा होइ तउ तू पचन्क होसियार रहइ चाही कि तू पचन्क घमण्ड न होइ। तू पचन्क यहोवा आपन परमेस्सर क नहीं बिसरइ चाही। उ तू पचन्क मित्र स बाहर लाएस ह, जहाँ तू पचे गुलाम रह्या। 15यहोवा तू पचन्क बहोतइ बड़का अउ खउफनाक रेगिस्ताने स लिआवा। हुवाँ जहरिला साँप अउ बीछू उ रेगिस्ताने मँ रहेन। जमीन झुरान रही अउ कतहूँ पानी नहीं रहा। मुला यहोवा तोहका कठोर चट्टान स पानी बाहेर निकारि के दिहस। 16रेगिस्ताने मँ यहोवा तू पचन्क मन्ना खिआएस, अइसी चीज जेका तोहार पुरखन कबहुँ नहीं जान पाएन। यहोवा तोहार परीच्छा लिहस। काहेकि यहोवा तू पचन्क बिनम्र बनवइ चाहत रहा। उ चाहत रहा कि आखीर मँ तोहार सबन्क भला होइ। 17आपन मने मँ कबहुँ अइसा जिन सोचा कि, ‘मई इ सारी सम्पति आपन सक्ती अउ जोगगता स पाएँ ह।’ 18यहोवा आपन परमेस्सर क सुमिरा। उहइ एक बाटइ जउन तू पचन्क सम्पति प्राप्त करइ क सक्ती देत ह। यहोवा अइसा काहे करत ह? काहेकि उ तोहरे

पुरखन क संग कीन्ह गइ वाचा क पूरा करइ क चाहत ह। उ आजु उहइ करत ह जउन उ वाचा किहे रहा।

19“यहोवा आपन परमेस्सर क जिन बिसरा। कउनो दूसर देवता क पाछा जिन करा। ओकर पूजा या सेवा जिन करा। अगर तू पचे अइसा करब्या तउ मई तू पचन्क आज चितउनी देत हउँ कि तू पचे निस्चय ही नस्ट कइ दीन्ह जाब्या। 20यहोवा तोहरे बरे दूसर रास्ट्रन क नास करत अहइ। तू पचे भी ओनहीं रास्ट्रन क नाई बरबाद होइ जाब्या जेनका यहोवा तोहरे समन्वा नास करत अहइ। इ होइ काहेकि तू पचे यहोवा आपन परमेस्सर क आग्या क मान्या नहीं।

### यहोवा इस्त्राएल क मनइयन क साथ देइ

9“धियान द्या, इस्त्राएल क मनइयो! आजु तू पचे यरदन नदी क पार करब्या। तू पचे उ देस मँ अपने स बड़का अउ सक्तीवाला क दबाव डाइके हटावइ बरे जाब्या। ओनकइ सहर बड़वार अउ अकासे क छुअत ऊँची दीवार स किलेबन्द अहइ। 2उ देस क मनई लम्बा अउ बरिआर अहइँ। उ पचे अनाकी लोग अहइँ। तू सबइ इ सबइ लोगन क बाबत जानत अहा। इ कहत भवा सुनेस, ‘कउनो मनई अनाकी लोगन क मुकाबिला नहीं कइ सकत ह।’ 3मुला तू पचे जान सकत ह कि यहोवा तोहार परमेस्सर भसम करइवाली आगी क नाई तोहरे आगे नदी क पार जात अहइ। यहोवा ओन रास्ट्रन क बरबाद कइ देइ। उ ओनका तोहरे समन्वा हराइ देइ। तू सबइ ओनँ क बाहर खदेर देब्या अउ हाली ही ओका बारबाद कइ देब्या जइसन ही यहोवा तोहका कहिहीं।

4“यहोवा तोहार परमेस्सर जब ओन रास्ट्रन क दबाव डाइके तू पचन्स दूर हटाइ देइ। तउ अपने मने मँ इ न सोच्या कि, ‘यहोवा हम लोगन्क इ देस मँ रहइ बरे, एह बरे लिआएस कि हम लोगन्क रहइ क तरीका ठीक अहइ।’ यहोवा ओन रास्ट्रन क तू लोगन्स दूर दबाव डाइके काहे हटाएस? काहेकि उ पचे दुस्टपूर्ण तरीका स रहत रह्या। 5तू सबइ ओनकइ देस कब्जा बरे जात अहा, मुला एह बरे नहीं कि तू पचे नीक अहा अउ उचित तरीका स रहत अहा। यहोवा तोहार परमेस्सर उ रास्ट्रन क ओकर आपन दुस्टता क कारण तोहका हुवाँ जाई स पहिले ओका उ रास्ट्र स खदेर देब अउर तू ओकर देस पइ कब्जा कइ लेब्या काहेकि उ चाहत रहा कि जउन बचन उ तोहरे पुरखन इब्राहीम, इसहाक अउ याकूब क दिहस उ पूरा होइ। 6यहोवा तोहार परमेस्सर उ बढ़िया देस क तू सबन्क रहइ बरे देत अहइ, मुला तू सबन्क इ जानइ चाही कि अइसा तोहरी जिन्गगी क ठीक तरीका क होइ क कारण नहीं होत अहइ। सच्चाइ इहइ अहइ कि तू सबइ अड़ियल लोग अहा।

### यहोवा क किरोध याद रखा

7“याद रखा अउ इ जिन बिसरा कि तू पचे यहोवा आपन परमेस्सर क रेगिस्ताने मँ कोहाइ दिहा। तू सबइ उहइ दिना स जउने दिन स मित्र स बाहेर निकइया अउर इ जगह पइ आवइ क दिन तलक यहोवा क हुकुम क मानइ स इन्कार कइ दिह्या ह। 8तू पचे यहोवा क होरेब पहाड़े पइ भी

कोहाइ दिह्या। यहोवा तू पचन्क बरबाद कइ देइ क हद तलक कोहाइ ग रहा। 9मई पाथरे क सिलन क लेइ बरे पहाड़े क ऊपर गएँ। जउन वाचा यहोवा तोहरे संग किहेस, ओन सिलन पइ तरासा भवा रहेन। मई हुआँ पहाड़े पइ चालीस दिन अउ चालीस रात ठहरेउँ। न तउ मई रोटी खाएँ, अउर न ही पानी पिएँ। 10तब यहोवा मोका दुई पाथर क सिलन दिहस। यहोवा ओन सिलन पइ खुद आपन अगुंरियन स लिखेस ह, उ हर उ एक बात क लिखेस ह जेनका उ आगी मँ स कहे रहा, जब तू पचे पहाड़ी क चारिहुँ कइँती बटुरा रह्या।

11“एह बरे, चालीस दिन अउ चालीस रात क आखीर मँ यहोवा मोका वाचा क दुइ ठु पाथर क सिलन दिहस। 12तब यहोवा मोसे कहेस, ‘उठा अउ जल्दी स हिआँ स खाले जा। जउन मनइयन क तू पचे मिस्त्र स बाहेर लिआया ह उ मनइयन खुद क पाछे ही बरबाद कइ लिहेस ह। उ पचे ओन बातन स पराइ ग अहई, जेनके बरे मई हुकुम दिहे अहई। उ पचे एक ठु धातू क मूर्ति बनाइ लिहे अहई।’

13“यहोवा मोसे इ भी कहेस, ‘मई इ लोगन पइ आपन निगाह रखेँ ह। उ पचे बहोतइ अड़ियल अहई। 14मोका अकेला रहइ द्या। मई इ मनइयन क पूरी तरह बरबाद करइ क चाहत अहई। ताकि कउनो मनई ओनकइ नाउँ कबहुँ याद नाहीं करी। तब मई तू पचन्स रास्ट्र बनाउबउँ जउन ओनके रास्ट्र स बड़का अउ जियादा सक्तीवाला होइ।’

### सोने क बछवा

15“तब मई मुड़ेउँ अउ पहाड़े स खाले आएँ। पहाड़ आगी स बरत रहा। वाचा क दुइनउँ पाथर मोर दुइनउँ हाथे मँ रही। 16जब मई नजर डालेउँ, तउ लखेउँ कि तू पचे यहोवा आपन परमेस्सर क खिलाफ पाप किहे रहा। तू पचे अपने बरे धातू एक ठु बछवा बनाया ह। यहोवा जउन हुकुम दिहे अहइ ओसे तू पचे दूर पराइ ग अहा। 17एह बरे मई दुइनउँ सिलन क लिहेउँ अउ ओनका नीचे फैंकि दहेउँ। हुआँ तोहरी आँखियन क समन्वा सिलन क टूका होइ गएन। 18तब मई यहोवा क समन्वा निहुरेउँ अउ आपन चेहरा क जमीन पइ कइके चालीस दिन अउ चालीस रात वइसे ही बिताउँ। मई न तउ रोटी खाएँ, अउ न ही पानी पिएँ। मई इ एह बरे किहेउँ, कि तू पचे ऐतना बुरा पाप किह्या ह। तू पचे यहोवा बरे बुरा किहा अउर ओका कोहाइ दिह्या। 19मई यहोवा क खउफनाक किरोध स डेराइ ग रहेउँ। उ तोहरे पचन्क खिलाफ ऐतना कोहाइ ग रहा कि तू पचन्क नास कइ देत। मुला यहोवा मोर बात फुन सुनेस। 20यहोवा हारून पइ बहोत कोहान रहा। उ काफी किरोधित रहा अउ ओका बरबाद करइ चाहत रहा। एह बरे उ समइ मई हारून बरे भी पराथना किहे रहा। 21मई उ पापे स भरा भए तोहार बनवा सोना क बछवा क लिहेउँ अउ ओका आगी मँ बारि दिहेउँ। मई ओका नान्ह नान्ह टूकन मँ तोड़ेउँ अउ मई बछवा क टूकन क तब तलक कुचर दिहेउँ जब तलक उ सबइ धूरि नाहीं बन गएन अउर तब मई उ धूरि क पहाड़े स खाले बहइवाली नदी मँ फेकेउँ।

### मूसा परमेस्सर स छिमा मँगत ह

22“मस्सा, तबेरा अउ किब्रोत-हतावा पइ तू पचे फिन यहोवा क किरोधी कइ दिहा। 23अउर जब यहोवा तू पचन्स कादेसबर्ने तजइ क कहेस तब तू पचे ओकरी आग्या क नाहीं मान्या। उ कहेस, ‘अगवा बढ़ा अउ उ देस मँ रहा जेका मई तोहका पचन्क दिहेउँ ह।’ मुला तू पचे ओह पइ बिस्सास नाहीं किह्या। तू पचे ओकरे आदेस क अनसुनी किह्या। 24पूरा समइ जबहिँ स मई तू पचन्क जानत हउँ तू लोगो यहोवा क आग्या क मानइ स इन्कार किहा ह।

25“एह बरे मई चालीस दिन अउ चालीस रात यहोवा क समन्वा निहुरा रहा। काहेकि यहोवा कहेस कि उ तू पचन्क नास करी देब्या। 26मई यहोवा स पराथना किहेउँ। मई कहेउँ: यहोवा, मोर सुआमी, आपन लोग, आपन मीरास क बरबाद जिन करा। तू आपन बड़की ताकत अउ सक्ती स ओनका अजाद किहा अउ मिस्त्र स लिआया। 27तू आपन सेवकन इब्राहीम, इसहाक अउ याकूब क याद करा। कृपा कइके तू इ लोगन क हठीलापन क भूल जा। 28अगर तू आपन लोगन क सजा देब्या तउ मिस्त्री कहि सकत ही, ‘यहोवा आपन लोगन क लइ जाइ मँ समर्थ नाहीं रहा, जेहमँ लइ जाइ क बचन दिहे रहा। उ ओनसे घिना किहेस। एह बरे उ ओनका मारइ बरे रेगिस्तान मँ लइ गवा।’ 29मुला उ सबइ तोहार लोगन अहई। यहोवा उ तोहार सम्बंधित अहई। तू आपन बड़की ताकत अउ मजबूती स ओनका मिस्त्र स बाहेर लिआया।

### नवा पाथर क सिलन

10 “ओह समइ, यहोवा मोसे कहेस, ‘तू पहिली सिलन क नाई पाथर फारिके दुइ सिला बनावा। तब तू पचे मोरे लगे पहाड़े पइ आवा। अपने बरे एक काठे क संदूख भी बनावा। 2मई पाथरे क सिलन पइ उ सबइ सब्द लिखब जउन पहिली सिलन पइ लिखे रहेन। तू पहिली सिलन क तोड़ी दिहेन। तब तू पचन्क इ नवी सिलन क सन्दूखे मँ रखइ चाही।’

3“एह बरे मई बबूल क एक ठु सन्दूख बनाएँ। मई पहिली सिलन क तरह पाथर फारिके दुइ सिलन बनाएँ। तब मई पहाड़े पइ गएँ। मोरे हथवा मँ दुइ सिलन रहिन 4अउर यहोवा ओनही सबदन क लिखेस जेनका उ तब लिखे रहा जब दस हकुमन क उ आगी मँ स तू पचन्क दिहे रहा अउर तू पचे पहाड़े क चारिहुँ कइँती बटुरा रह्या। तब यहोवा पाथर क सिलन मोका दिहस। 5मई घूमेउँ अउर पहाड़े क खाले आएँ। मई आपन बनाए भए सन्दूखे मँ सिलन क रखेउँ। यहोवा मोका एन सिलन क ओहमँ धरइ क आदेस दिहस।”

6(इस्त्राएल क लोग याकान क लोगन क कुआँ स मोसेरा क जात्रा किहेन। हुआँ हारून मरा अउ दफनाव गवा। हारून क पूत एलीआज़ार हारून क जगह पइ याजक क रुप मँ सेवा सुरु किहस। 7तब इस्त्राएल क लोग मोसेरा स गुदगोदा गएन अउर उ पचे गुदगोदा स नदियन क पहेँटा योतबाता गएन। 8ओह समइ यहोवा लेवी क परिवार समूह क आपन खास काम बरे दूसर परिवार समूहन स अलगाइ दिहस।

ओनका यहोवा क करार क सन्दूखे क लइ जाइ क काम, यहोवा क समन्वा खड़ा होइके अउर ओकर सेवा करइ क काम रहा। उ यहोवा क नाउँ पइ उ पचे लोगन क आसीबाँद देइ क काम भी करत रहेन। उ पचे अब भी इ खास काम करत हीं। 9इहइ कारण अहइ कि लेवी बंस क मनइयन क भुइँया क कउनो हींसा दूसर परिवार समूहन क नाई नाहीं मिल पावा। लेवी बंसियन क हींसे मैं यहोवा पड़ा। यहोवा तोहार परमेस्सर ओकर संग इ वाचा किहेस।)

10“मईं पहाड़े पइ पहिली दाई क तरह चालीस दिन अउ चालीस रात रुका रह। यहोवा ओह समइ भी मोर बातन क सुनेस। यहोवा तू पचन्क नास न करइ क निहचय किहेस। 11यहोवा मोसे कहेस, ‘जा अउर मनइयन क जात्रा पइ लइ जा। उ पचे उ देस मैं जइहीं अउ ओहमों रइहीं जेका मईं ओनके पुरखन क देइ क बचन दिहे अहउँ।’

### यहोवा असलियत मैं का चाहत ह

12“इस्त्राएल क लोगो, अब सुना! यहोवा, तोहार परमेस्सर जउन चाहत ह उ इ बाटइ: उ चाहत ह कि तू ओकर सम्मान करा अउ ओकर रास्ता प रहा। उ चाहत ह परमेस्सर स पिरिम अउर ओकर अराधना आपन पूरा हिरदइ अउर पूरा आतिमा स करा। 13यहोवा क नेमन अउ आदेसन क पालन करा। मईं इ सबइ आदेसन तोहका आपन भलाई बरे देत अहउँ।

14“हर एक चीज, यहोवा तोहरे परमेस्सर क अहइ। सरग, सबन त ऊँचा उहइ क अहइ। भुइँयाँ अउ ओह पइ क सारी चिजियन यहोवा तोहरे परमेस्सर क अहउँ। 15यहोवा तोहरे पुरखन स बहोत पिरिम करत रहा। उ ओनसे एतना पिरिम करत रहा कि ओनके सन्तान, तू पचन्क, उ आपन लोग बनाएस। उ कउनो दूसर रास्ट्र क जगह पइ तू पचन्क चुनेस अउ आजु भी तू पचे ओकर चुना भवा लोग अहा।

### इस्त्राएलियन क यहोवा क याद रखइ चाही

16“तू पचन क आपन हिरदय क खतना करइ चाही।\* तू पचन्क अड़ियल होब तजि देइ चाही। 17काहेकि यहोवा तोहार परमेस्सर अहइ। उ देवतन क परमेस्सर, अउ देवतन क यहोवा अहइ। उ महान परमेस्सर अहइ। उ अरज करइवाला अउ सक्तीवाला जोदधा अहइ। यहोवा क निगाहे मैं सबहिं मनई बराबर अहउँ। यहोवा आपन इरादा बदलइ बरे धन नाहीं लेत। 18उ अनाथ क अउ रँड क निआउ करत ह। उ हमरे देस मैं रहइवाला प्रवासी स पिरिम करत ह। उ ओनका खइया क अउ ओढ़ना देत ह। 19एह बरे तू पचन्क भी इ अजनबियन स पिरिम करइ चाही। काहेकि तू पचे खुद भी मिस्त्र मैं अजनबी रह्या। 20“तोहका यहोवा आपन परमेस्सर क मान करइ चाही अउ सिरिफ उहइ क उपासना करइ चाही। ओका कबहुँ न तजा। जब तू पचे बचन द्या तउ सिरिफ ओकरे नाउँ क उपयोग करा। 21तू पचन्क ओका बड़कई करइ चाही। उ तोहार परमेस्सर अहइ। उ तोहरे बरे महान अउ अचरजे स भरा भवा काम किहेस ह। इ सबइ

कारजन क तू पचे आपन आँखिन स लख्या ह। 23जब तोहार पुरखन मिस्त्र ग रहेन तउ सिरिफ सत्तर रहेन। अब यहोवा तोहार परमेस्सर तू पचन्क बहोतइ जियादा मनइयन क रुप मैं बड़ाइ दिहे अहइ जेतना अकासे मैं तारा बाटेन।

### यहोवा क सुमिया

11“एह बरे तू पचन्क आपन परमेस्सर यहोवा स पियार करइ चाही। तू पचन्क उहइ करइ चाही जउन उ करइ बरे तू सबन्स कहत ह। तू पचन्क ओकरे नेमन, हुकुमन अउ आदेसन क हमेसा ही मानइ चाही। 2याद रखा सिरिफ तोहार गदेलन उ एक नाहीं अहइ जेका उ लख्या ह अउर जउन यहोवा तोहार परमेस्सर बरे महान काम करइ मैं तजुरबा राखत अहइ। उ सबइ तू लोग रह्या तोहरे सबन्क जउन उ लखेन अउर तू पचे लख्या ह कि यहोवा केतना महान, मज़बूत अउ केतना सक्तीसाली अहइ। 3तू पचे ओकरे चमत्कारन क लख्या ह। तू पचे उ सबइ लख्या ह जउन उ मिस्त्र क राजा फिरौन अउ ओकरे पूरे देस क संग किहस। 4तू पचे मिस्त्र क फउज, ओनकइ घोड़न अउ रथन क संग यहोवा जउन किहस, लख्या ह। उ सबइ तू सबन्क पाछा करत रहेन, मुला तू पचे लख्या ह, यहोवा ओनका लालसागरे क जले मैं बोर दिहस। तू पचे लख्या ह कि यहोवा ओनका पूरी तरह बरबाद कइ दिहस। 5तू पचे उ सबइ चिजियन क लख्या ह जउन यहोवा तोहार परमेस्सर उ रेगिस्तान मैं तू पचन्क इ जगह मैं आवइ तलक किहेस ह। 6तू पचे लख्या ह कि यहोवा रूबेन क परिवार क एलिआब क दूइ पूतन दातान अउ अबीराम क संग का किहेस। इस्त्राएल क सबहिं मनइयन लख्या ह कि भुइँयाँ मुँहे क नाई खुलत भवा ह अउ ओन मनइयन, ओनके परिवारे, खेमन, सबहिं नउकरन अउ ओनकर सबहिं जनावरन क निगल लिहस। 7तू पचे यहोवा क जरिये कीन्ह गएन महान कारनामा क लख्या ह।

8“एह बरे आजु जउन आदेस मईं देत अहउँ, तू पचन क ओन सबन क जरूर मानइ चाही। तबहिं तू पचे सक्तीसाली बनब्या। अउर तू पचे नदी क पार करइ लायक बनब्या अउर उ देस पइ कब्जा करब्या जेहमों प्रवेस करइ बरे तू पचे तइयार अहा। 9उ देस मैं तोहार उमिर लम्बी होई। इ उहइ देस अहइ जेका यहोवा तोहरे पुरखन स ओनके अउ ओनके सन्तानन क देइ क बचन दिहे रहा। इ देस मैं दूध अउर सहद बहत ह। 10जउने देस क तू पचे पउब्या उ मिस्त्र क नाई नाहीं अहइ जहाँ से तू पचे आया ह। मिस्त्र मैं तू पचे बिआ बोअत रह्या अउर पौधन क गोड़न क जरिये नहर स पानी निकाल कइ सबजियन क बगियन क नाई सीचत रहा। 11मुला जउन पहेँटा तू पचे हाली ही पउब्या उ मैं पहाड़न अउ घाटियन अहउँ। इ भुइँयाँ बरखा स पानी अकासे स पावत ह। 12यहोवा तोहार परमेस्सर उ देस क देख-भला करत ह। यहोवा तोहार परमेस्सर बरिस क सुरू स आखिर तलक ओकर देख-भाल लगातार करत रहत ह।

13“तू पचन्क जउन आदेसन मईं आजु देत अहउँ, ओका तोहका होसियारी स जरूर सुनइ चाही। तू पचन क यहोवा तोहार परमेस्सर स पिरिम अउ ओकर सेवा पूरा हिरदय अउ

**तू पचन ... चाही** इ प्रमाण अहइ कि तू परमेस्सर क अहइ। हम पचन्क आकर आदेसन क पालन करत ह।

आतिमा स जरूर करइ चाही। अगर तू पचे अइसेन करब्या, 14तउ मई ठीक समइ पइ तोहरी भुइँया बरे बरखा पठउब। मई पतझर अउ बसन्त क समइ क भी बरखा दुआरा तोहका आसीर्बाद देब। तू पचे आपन अन्न, नवा दाखरस अउ तेल बटोरब्या। 15अउर मई तोहरे खेतन मँ तोहरे पचन्क गोरुअन बरे घास जमाउब। तोहरे पचन्क भोजन बरे बहोत जिआव होइ।

16“मुला होसियार रहा कि ललचाया नाहीं जा। दूसर देवतन क पूजा अउ सेवा करइ बरे जिन घूमा। 17अगर तू पचे अइसा करब्या तउ यहोवा तू पचन पइ बहोतइ कोहाइ जाइ। उ अकासे क बन्द कइ देइ अउ बरखा नाहीं होइ। भुइँया स फसल नाहीं जमी अउर तू पचे उ नीक देस मँ हाली ही मरि जाब्या जेका यहोवा तू पचन्क देत अहइ।

18“इ सब्दन क आपन दिमाग अउर हिरदइ मँ रखा। ऐंका आपन कमर अउ कपाल पइ यादगार क रूप मँ रखा। 19ऐं नेमन क सिच्छा आपन गदेलन क द्या। ऐंके बारे मँ जउन तू आपन घरे मँ बइठा, जउन तू सड़किया पइ टहरत रहा, जउन तू लोटत रहा अउ जउन जागत भए रहा, बतावा करा। 20ऐं आदेसन क आपन घरे क दुआरे क चौखट अउ फाटकन पइ लिखा। 21तबहिं तू पचे अउ तोहार गदेलन उ देस मँ लम्बे समइ तलक रइहीं। इ उहइ भुइँया अहइ जेका यहोवा तोहरे पुरखन क देइ क बचन दिहे रहा। तू पचे तब तलक रहब्या जब तलक धरती क ऊपर अकास रही।

22“होसियार रहा कि तू पचे उ हर एक आदेस क मानत रहा जेका मानइ बरे मई तू पचन्स कहेउँ ह। आपन परमेस्सर यहोवा स पिरेम करा। ओकर बताए भए सबहिं राहे प चला। ओहसे लगा रहा। 23यहोवा ओन सबहिं रास्ट्रन क ताकत लगाइके बाहर करब। तू पचे ओन रास्ट्रन स भुइँया लेब्या जउन तोहसे पचन्स लम्बा अउ मजबूत अहइँ। 24उ सारा प्रदेस जेह पइ तू पचे चलब्या, उ तोहार होइ। तोहार देस दक्खिन मँ रेगिस्ताने स लइके लगातार उत्तर मँ लबानोन तलक होइ। इ पूरब मँ फरात नदी स लइके पस्चिमी सागर तलक होइ। 25कउनो मनई तोहरे पचन्क खिलाफ ठाड़ न होइ। यहोवा तोहार परमेस्सर ओन लोगन्क तू पचन्स डेरवाइ देइ जहाँ कहुँ तू पचे उ देस मँ जाब्या। इ उहइ जेकरे बरे यहोवा पहिले तोहका पचन्क बचन दिहे रहा।

### इस्त्राएलियन बरे चुनाव: आसीर्बाद या अभिसाप

26“आजु मई तू पचन्क आसीर्बाद या अभिसाप मँ स एक क चुनइ क बचन देत अहउँ। 27तू सबइ बरदान पठब्या, अगर तू पचे यहोवा आपन परमेस्सर क आदेसन क पालन करब्या। मई आजु इ आदेसन क तोहका देत अहउँ। 28मुला तू पचे ओह समइ अभिसाप पठब्या जब तू पचे यहोवा आपन परमेस्सर क आदेसन क मानइ स इन्कार करब्या। ऐंहे बरे जउने राहे पइ चलइ क आदेस मई आजु तू पचन्क दइ देत अहउँ, ओहसे घूमब्या अउ ओन दूसर देवतन क पाछा करब्या जेनका तू पचे जानत्या नाहीं।

29“जब यहोवा तोहार परमेस्सर तू पचन्क उ देस मँ लावत ह जहाँ तू पचे रहब्या, तब तू पचन्क गरीज्जीम पहाड़े

क चोटी पइ जाइ चाही अउ हुओं स आसीर्बादन क लोगन क सुनावइ चाही। तब तू पचन्क एबाल पहाड़े क चोटी पइ भी जाइ चाही अउ हुओं स अभिसापन क लोगन क सुनावइ चाही। 30इ सबइ यरदन नदी क दूसर कईँती कनानी लोगन्क प्रदेस मँ अहइँ जउन यरदन घाटी मँ रहत हीं। इ सबइ पहाड़ गिलगाल सहर क निचके मोरे क बांज क बृच्छन क निअरे पच्छिम कईँती अहइँ। 31तू पचे यरदन नदी क पार कइके जाब्या। तू पचे उ पहुँटा क लेब्या जेका यहोवा तोहार परमेस्सर तू पचन्क दइ देत अहइ। इ देस तोहार होइ। जब तू पचे इ देस मँ रहइ लगब्या तउ 32तोहका ओन सबहिं हुकुमन अउ नेमन क मानब होसियारी स करी चाही जेनका आजु मई तू पचन्क दइ देत अहउँ।

### परमेस्सर क उपासना क ठउर

12 “इ सबइ नेम अउर हुकुम अहइ जेका तोहका आपन नवा भुइँया मँ होसियारी क साथ जरूर पालन करइ चाही। यहोवा तोहार पुरखन क परमेस्सर तोहका इ भुइँया दइ दिहा ह जब तलक तू पचन्क इ धरती पइ रही तोहका आपन अधिकार मँ रखइ बरे दिहेस ह। 2तू पचे उ पहुँटा क ओन रास्ट्रन स लेब्या जउन अब हुओं रहत अहइँ। तू पचन्क ओन सबहिं ठउरन क पूरी तरह नास कइ देइ चाही जहाँ इ सबइ रास्ट्र आपन देवतन क पूजत हीं। इ सबइ ठउर ऊँचे पहाड़न, पहाड़ियन अउ सबइ हरिअर बृच्छन क खाले अहइँ। 3तू पचन्क ओनकर वेदियन क बरबाद करइ चाही अउ ओनके स्मृति पाथरन क टूका-टूका कइ देइ चाही। तू पचन्क ओनके पवितर खम्भन क बार देइ चाही। ओनके देवतन क मूरतियन क काट डवइ चाही अउ ओनकर नाउँ हुओं स मेट देइ चाही।

4“मुला तू पचन्क यहोवा आपन परमेस्सर क उपासना उ तरह नाहीं करइ चाही जउने तरह उ सबइ लोग आपन देवतन क पूजन हीं। 5यहोवा तोहार परमेस्सर तोहरे परिवार समूहे स खास ठउर चुनवा। उ हुओं आपन नाउँ क थापना करी। अउ हुओं निवास करी तू पचन्क ओकर उपासना करइ बरे उ ठउर प जाइ चाही। 6हुओं तू पचन्क आपन होमबलि, आपन सबइ बली, दसवाँ हीसा, आपन खास भेंट, यहोवा क बचन दीन्ह गइ भेंट, आपन क इच्छा स भेंट अउर झुण्ड अउ रेवइ क पहिला पइदा भवा बचन क लियावइ चाही। 7तू अउर तोहार परिवार हुओं यहोवा तोहार परमेस्सर क मौजूदगी मँ भोजन करिहीं। जउने अच्छी चिजियन बरे तू पचे काम किहया ह आपन परमेस्सर क कासन स तू आनन्द पाउब्या। काहेकि यहोवा तोहार परमेस्सर तोहका आसीर्बाद दिहेस ह।

8“उ उहइ तरह उपासना करत नाहीं रहइ चाही जउने तरह हम उपासना करत आवत अही। अबहिं तलक हम मँ स हर एक जइसा चाहे परमेस्सर क उपासना करत रहा। 9काहे अबहिं तलक हम उ सान्त देस मँ नाहीं पहुँचे रहेन जेका यहोवा तोहार परमेस्सर तू पचन्क देत अहइ। 10मुला तू पचे यरदन नदी क पार करब्या अउ उ देस मँ रहब्या जेका यहोवा तोहार परमेस्सर तू पचन्क देत अहइ। हुओं यहोवा तू पचन्क सबहिं दुस्मनन स चैन स रहइ देइ अउ तू सुरच्छित

रहब्या। 11तब यहोवा आपन बरे खास ठउर चुनी उ हुआँ आपन नाउँ क थापना करी अउर तू पचे ओन सबहिं चीजन्क हुआँ लइ अउब्या जेनके बरे मई आदेस देत हउँ। हुआँ तू पचे आपन क सबइ होम बलियन, आपन बलियन, दसवाँ हीसा\*, आपन इच्छा क भेंट, आपन खास भेंट, अउ आपन क स्वतंत्र इच्छा क भेंट, जउन तू यहोवा क देइ क बचन दिहस ह। 12उ ठउरे पइ तू पचे आपन सबहिं लोग, आपन बेटवन अउ बेटियन, मरद अउ मेहरारु नउकरन, अउर आपन सहर मँ बसइया सबहिं लेवीबंसियन क संग बटुर जा। (इ सबइ लेवीबंसी आपन बरे भुइँया क कउनो हीसा न पइहीं।) यहोवा आपन परमेस्सर क मौजूदगी मँ हुआँ आनंद मनाव। 13होसियारी बरता कि तू पचे आपन होम बलियन क जहाँ लखा हुआँ जिन चढ़ावा। 14तोहरे परिवार समूहे मँ स कउनो एक क इलाका मँ यहोवा आपन खास ठउर चुनी। हुआँ आपन होमबलि चढ़ावा अउ तू पचन्क बतावा गवा सबहिं आदेसन क हुआँ करा।

15“जउने कउने जगह तू पचे रहा तू कउनो जनावर क मारिके खाइ सकत ह। तू हरिण या नील गाय क साथ ठीक वइसा ही करा। तू पचे ओतना माँस खाइ सकत ह जेतना तू चाह, जेतना यहोवा तोहार परमेस्सर तू पचन्क देइ। कउनो भी मनई इ गोस क खाइ सकत ह, चाहे उ पवितर होइ या अपवितर होइ। 16मुला तू पचन्क रकत नाहीं खाइ चाही। तू पचन्क खून क पानी क तरह जमीन प बहाइ देइ चाही।

17“कछू अइसी चिजियन अहई जेनका तू पचन्क ओन ठउरन पइ नाहीं खाइ चाही जहाँ तू पचे रहत अहा। इ सबइ अहई: आपन अनाज क, दाखरस क, अउ तेल क दसवाँ हीसा। तोहार भेइ अउ गोरुअन क पहिला पइदा भवा बच्चा, परमेस्सर क वचन दीन्ह गइ भेंट, कउनो आपन इच्छा भेंट या कउनो भी परमेस्सर क दूसर भेंट। 18तू पचन्क ओन भेंटन क सिरिफ यहोवा तोहार परमेस्सर क मौजूदगी मँ खाइ चाही यानी यहोवा तोहार परमेस्सर जउने ठउरे क चुनइ। तू पचन्क हुआँ जाइ चाही अउर आपन पूतन, बिटियन, सबहिं मरद अउ मेहरारु नउकरन अउर तोहरे सहरन मँ बसइयन लेवी बंसियन क संग मिलिके खाइ चाही। यहोवा आपन परमेस्सर क मौजूदगी मँ आनन्द मनाव। जउने चिजियन बरे काम किहा ह ओनकर आनन्द ल्या। 19धियान रखा कि इ भोजनन क लेवी बंसियन क संग बाँटिके खा। इ तब तलक करा जब तलक आपन देस मँ रहा।

20-21“यहोवा तोहार परमेस्सर इ बचन दिहे अहइ कि उ तोहरे देस क सीमा क अउर बढ़ाई। जब यहोवा अइसा करी तउ उ ओकरे चुने भए खास निवास स दूर रहि सकत ह अउर तोहे पचन्क गोस क भूख अहइ तउ तू पचे कउनो भी तरह क गोस क, जउन तोहरे लगे अहइ खाइ सकत ह। तू पचे यहोवा क दीन्ह झुण्ड अउ समूह मँ स कउनो

भी जनावर क मारि सकत ह। इ वइसे ही करा जइसा करइ क हुकुम मई दिहे अहउँ। इ गोस, तू पचे जबहिं चाहा जहाँ भी रह्या, खाइ सकत ह। 22तू पचे इ गोस क वइसे ही खाइ सकत ह जइसे नीलगाय अउर हिरन क गोस खात ह। कउनो भी मनई इ कइ सकत ह चाहे उ सबइ पवित्तर होई या अपवितर। 23मुला निहचय ही खून जिन खा। काहेकि खून मँ जिन्गी अहइ अउर तू पचन्क उ गोस नाहीं खाइ चाही जेहमँ अबहिं जिन्गी होइ। 24खून जिन खा। तू पचन्क खून क पानी क नाई भुइँया पइ डइ देइ चाही। 25तू पचन्क उ सब कछू करइ चाही जेका परमेस्सर उचित समझत ह। एह बरे खून जिन खा। तब तोहार अउ तोहरे सन्तानन क भला होइ।

26“कउनो भी तरह तोहका आपन पवितर बलिदान क अउर वचन क उपहारन क उ जगह पइ लावइ चाही जेका यहोवा चुनी। 27तू पचन्क आपन होमबलि हुआँ चढ़ावइ चाही। आपन होमबलि क गोस अउ रकत यहोवा आपन परमेस्सर क वेदी पइ चढ़ावा। रकत क बाहर निकाल। तब तू पचे गोस खाइ सकत ह। 28जउन आदेस मई देत अहउँ ओनका मानइ मँ होसियार रहा। जब तू पचे उ सब कछू करत अहा जउन यहोवा तोहार परमेस्सर बाटइ अउ ठीक अउ अच्छा अहइ, तब हर चीज तोहरे बरे अउ तोहरे सन्ताने बरे भविस्य मँ सब भला रही।

29“जब यहोवा तोहार परमेस्सर उ रास्ट्रन क बरबाद करब्या अउ तो ओकर भुइँया पइ कब्जा करब्या। तू पचे हुआँ जाब्या अउ ओनसे भुइँया लेब्या। तू पचे ओनकइ भुइँया पइ रहब्या। 30किन्तु ओकर पाछे होसियार रहा काहेकि उ तोहार समन्वा बरबाद भवा। ओकरे कैद मँ जिन फँसा जेहसा उ देवतन क पूजा करत अहइ। इ सीखइ क कोसिस न करा कि उ सबइ आपन देवतन क पूजा कइसे करत हीं। ‘उ सबइ जइसे पूजा करत ही वइसेन पूजा करइ क बारे मँ जिन सोचा।’ 31तू पचे यहोवा आपन परमेस्सर क वइसेन उपासना नाहीं करब्या जइसे उ पचे आपन देवतन क करत हीं। काहेकि उ पचे आपन पूजा मँ सब किसिम क बुरी चीजन करत हीं जेनसे यहोवा घिना करत ह। उ पचे आपन देवतन क बलि बरे आपन गदेलन क भी बार देत हीं।

32“तू पचन्क ओन सबहिं काम क करइ बरे होसियार रहइ चाही जेनके बरे मई आदेस देत हउँ। जउन मई तू पचन्स कहत हउँ ओहमँ न तउ कछू जोरा, न ही ओहमँ स कछू कमती करा।

### झूठे नबियन

**13** “कउनो नबी या सपन क फले क जानइवाला तोहरे लगे आइ सकत ह। उ इ कहि सकत ह कि उ कछू दैवी चीन्हा या अचरजवाला काम देखाइ। 2उ दैवी चीन्हा या अचरजवाला काम, जेकरे बारे मँ उ तू पचन्क बताएस ह, उ सही होइ सकत ह। तब उ तू पचन्स कहि सकत ह कि तू पचे दूसर देवतन क माना (जेनका तू पचे नाहीं जानत अहा।) उ तू पचन्स कहि सकत ह, ‘आवा हम ओन देवतन क सेवा करी।’ 3उ नबी या सपन काल क

**दसवाँ हीसा** मनई क लाभ क दसवाँ हीसा परमेस्सर क उपहार क रूप मँ दइ जात रहा। कबहुँ इ सबइ दोस्तन अउर पड़ोसियन क बीच मेल बाले क रूप मँ बाँट लइ जात रहा, कबहुँ इ विधावा अउ अनाथ क जात रहा, अउर कबहुँ इ मन्दिर क जात रहा।

बातन क जिन सुना। काहेकि यहोवा तोहार परमेस्सर तोहार परीच्छा लेत अहइ। उ इ जानइ चाहत ह कि तू पचे पूरे हिरदय अउ आतिमा स पिरेम करत अहा कि नहीं। 4तू पचन्क यहोवा आपन परमेस्सर क अनुसरण करइ चाही। तू पचन्क ओकर सम्मान करइ चाही। यहोवा क आदेसन क माना अउर उ करा जउन उ कहत ह। यहोवा क सेवा करा अउ ओका कबहुँ जिन तजा। 5उ नबी या सपन फले क जानइवाला मार दीन्ह जाइ चाही। काहेकि उ ही न तू पचन्स यहोवा तोहरे परमेस्सर क रास्तन स भटकत ह। यहोवा तू पचन्क मिस्र स बाहरे लिआवा। यहोवा तू पचन्क हुआँ क दासता क जिन्नगी स अजाद किहेस। उ ही अहइ जउन तोहका रोकइ क कोसिस करत अहइ कि तू पचे यहोवा आपन आदेस क मुताबिक जिन्नगी जिन बितावा। एह बरे आपन लोगन स बुरा मानुस क जरूर बरबाद करइ चाही।

6“तोहार आपन भाइ, बेटवा, बिटिया, तोहार पियारी मेहरारु या तोहार पियारा दोस्त छुपाइ के कहि सकत है, ‘आवा चली, दूसर देवतन क सेवा करी।’ (इ सबई वइसेन देवतन अहई जेनका तू पचे अउ तोहार पुरखन कबहुँ नहीं जानेन। 7उ सबइ ओन लोगन क देवता अहई जउन तोहरे चारिहुँ कइँती दूसर देसन में रहत हीं, कछू निचके अउ कछू दूर।) 8तू पचन्क उ मनई क संग राजी नहीं होइ चाही। ओकर बात जिन सुना। ओह पइ दया न देखावा। ओका आजादी स जिन जाइ द्या। ओकर रच्छा जिन करा। 9-10तू पचन्क ओका मारि डावइ चाही। पाथर उठावइ वालन में स तू पचन्क पहिला होइ चाही अउर ओका मारइ चाही। तब सबहिं मनइयन क ओका मारि देइ क बरे ओह पइ पाथर लोकावइ चाही। काहेकि उ मनई तू पचन्क यहोवा तोहरे परमेस्सर स दूर हटावइ क कोसिस किहस। यहोवा सिरिफ एक अहइ जउन तोहे सबन्क मिस्र स लिआवा, जहाँ तू पचे दास रह्या। 11तब इस्राएल क सबहिं लोग सुनिहीं अउ डेरइ जइहीं अउर उ सबइ तोहरे पचन्क बीच अउर जियादा इ तरह क बुरा काम फुरइ स करिहीं।

### नगर जेनका बार दीन्ह जाइ चाही

12“यहोवा तोहार परमेस्सर तू पचन्क रहइ बरे सहरन विहे अहइ। कबहुँ-कबहुँ तू पचे सहरन में स कउनो क बारे में बुरी खबर सुन सकत ह। तू सबइ सुनि सकत ह कि 13तोहारे पचन्क आपन रास्ट्र में ही कछू बुरे लोग आपन सहर क लोगन्क बुरी बातन बरे तइयार करत अहइ। उ पचे आपन सहर क लोगन स कहि सकत हीं, ‘आवा चली, दूसर देवतन क सेवा करी।’ (इ सबइ अइसे देवता होइहीं जेनका तू पचे पहिले नहीं जान्या ह।) 14तब तोहका सबइ चिजियन क पूरी तरह निरिच्छन करइ चाही। अगर तू पावत ह कि इ सही अहइ, तउ तू साबित कइ सकत ह कि सचमुच अइसा भयंकर बात भइ, 15तब तू पचन्क उ सहर क लोगन्क निहचय ही स जरूर मारिइ चाही। उ सहर अउ ओकर सबइ चिजियन क, गिरुअन सहित बरबाद करइ चाही। 16तब तू पचन्क सबहिं कीमती चीजन्क बटोरइ चाही अउर ओका सहर क बीच लइ जाइ चाही अउर सब चिजियन क सहर क संग बारि देइ चाही। इ तोहरे परमेस्स यहोवा बरे होमबलि

होइ। सहर क सदा बरे राख क ढेर होइ जाइ चाही। इ कबहुँ दोबारा नहीं बनावा जाइ चाही। 17एह बरे तू पचन्क कउनो चीज आपन बरे नहीं राखइ चाही। अगर तू पचे इ हुकुम क मानत अहा तउ यहोवा तू पचन्पइ कोहाइ स रोकि देइ। यहोवा तोहे पचन्पइ दया करी अउ तरस खाइ। उ तोहरे पचन्क रास्ट्र क वइसा बड़का बनाइ जइसा उ तोहरे पुरखन क बचन दिहे रहा। 18इ तब होइ जब तू पचे यहोवा आपन परमेस्सर क बात सुनब्या यानी अगर तू पचे ओन हुकुमन क मनब्या जेनका मई तू पचन्क आजु दइ देत अहउँ। अउर तू पचन्क उहइ करइ चाही जेका यहोवा तोहार परमेस्सर उचित बतावत ह।

### इस्राएली, यहोवा क खास लोग

14 “तू पचे यहोवा आपन परमेस्सर क गदेलन अहा। अगर कउनो मरइ तउ तू पचन्क आपन दुखे में पड़ा भवा देखावइ बरे खुद क नहीं काटइ चाही। तु पचन्क आपन मूँडे क अगवा क हींसा क बार नहीं कटवावइ चाही।\* 2काहेकि तू पचे यहोवा आपन परमेस्सर क खास लोग अहा। उ संसार क सब मनइयन में स, तू पचन्क आपन खास लोगन्क रुप में चुना ह।

### इस्राएलियन क भोजन जेका खाइ क अनुमति रही

3“अइसी कउनो चीज जिन खा, यहोवा जेहसे घिना करत ह। 4तू पचे एँन जनावरन क खाइ सकत ह: गाय, भेड़, बोकरी, 5हिंस, नीलगाय, मृग, जंगली भेड़, जंगली बोकरी, चीतल अउ पहाड़ी भेड़। 6तू पचे अइसे कउनो भी जनावरे क खाइ सकत ह जेकर खुर दुइ हींसा में बँटा होई अउर जउन जुगाली करत होई। 7उ सबइ जनावर जउन जुगाली करत हीं या जेकर खुर दुई भाग में फाट भवा नहीं होतेन तू पचन क सिरिफ एका नहीं खाई चाही। जँट चट्टानी बिच्छु अउर खरहा क जिन खावा। इ सबइ जनावर जुगाली करत हीं किन्तु एकर खुर फटा भवा नहीं होतेन। एह बरे इ तू पचन्क बरे असुद्ध अहई। 8तू पचन्क सुअर नहीं खाइ चाही। ओनकइ खुर फाट होत हीं, मुला उ सबइ जुगाली नहीं करतेन। एह बरे सुअर तोहरे बरे असुद्ध अहइ। सुअर क कउनो गोस जिन खा अउर न ही मरे भए सुअर क छुआ।

9“तू पचे अइसी मछरी खाइ सकत ह जेकरे पर अउ सेहरा होई। 10मुला अइसी मछरी क न खा जेकरे पर अउ सेहरा दुइनाउँ न होई। इ सबइ तोहरे बरे असुद्ध भोजन अहई। 11तू पचे कउनो सुद्ध चिरई क खाइ सकत ह। 12मुला इ चिरइयन में स कउनो क जिन खा गरुड़, गीद्ध, बुर्जद, 13लाल चील, बाइ, कउनो तरह क चील, 14कउनो तरह क काला कौआ 15सुतुरमुर्गा, उल्लू, घुग्घू, कउनो तरह क बहोर, 16नान्ह उल्लू बड़वार उल्लू, उज्जर उल्लू, 17रेगिस्तानी उल्लू, मच्छरी क सिकार करइवाला बड़ा पंछी, जल कौआ, 18चमरघेंच, कउनो तरह क बगुला, नौवा या चमगादड़।

बार नहीं कटवाइ चाही जइसा मूसा क समइ में कउनो क मरे पइ दुःख परगट करइ बरे आपन बार क कटवाइ लेत रहेन या आपन मूँडे क बार छोलवाइ लेत रहेन।



19“पंखवाला किरउनन तोहरे बरे असुद्ध भोजन अहई। तू पचन्क ओनका नाहीं खाइ चाही। 20मुला तू पचे कउनो सुद्ध चिरइया क खाइ सकत ह।

21“खुद मरे भएन जनावरन क जिन खा। तू पचे मरे भए जनावरन क तोहार बीच रहइवाला कउनो प्रावासी क दइ सकत ह या ओका कउनो बिदेसी क हाथे बेंच सकत ह। मुला तू यहोवा तोहार परमेस्सर क खास लोग अहा।

“बोकरी क बच्चा क ओकरी महतारी क दूधे में जिन पकावा।

### मंदिर क दीन्ह जाइवाला दसवों हीसा

22“तू पचन्क हर बरिस आपन खेतन में उगी भइ फसिल क दसवों हीसा निहचय ही बचावइ चाही। 23तब तू पचन्क उ ठउर पइ जाइ चाही जेका यहोवा आपन नाउँ बरे चुनत ह। हुआँ यहोवा आपन परमेस्सर क मौजूदगी में आपन फसिल क दसवों हीसा, अनाजे क तोहरे नवा दाखरस, तोहार तेल क दसवों हीसा, झुण्ड अउ समूह में पइदा पहिला बच्चा, खाइ चाही। तब तू पचे यहोवा आपन परमेस्सर क जीवन भर डर करब सिखब्या। 24मुला उ ठउर ऐतना दूर होइ सकत ह कि तू पचे हुआँ तलक क जात्रा नाहीं कइ सकत ह। इ होइ सकत ह कि यहोवा जउन फसिल क बरदान दिहे अहइ ओकर दसवों हीसा तू पचे हुआँ न पहोंचाइ सका। अगर अइसा होत ह तउ इ करा: 25आपन फसिल क उ हीसा बेचं द्या। तब उ धने क लइके यहोवा तोहार परमेस्सर क जरिये चुने भएन खास ठउरे पइ जा। 26उ धने क उपयोग जउन कछू तू पचे चहा ओकरे बेसहइ में करा। गाय, भेड़ी, दाखरस या दूसर उबला भवा पेय या कउनो दूसर चीज जउन तू पचे चाहत अहा। तब तू पचन्क तोहरे परिवार क संग खइया खाइ चाही अउर यहोवा आपन परमेस्सर क मौजूदगी में हुआँ उ ठउरे पइ आनन्द मनावइ चाही। 27मुला आपन सहर में बसइया लेवी बंसी लोगन क जिन बिसरा काहेकि ओनके लगे तोहरी तरह भुईया क हीसा नाहीं अहइ।

28“हर तीन बरिस क आखीर में आपन उ बरिस क पइदा भवा फसिल क दसवों हीसा बटोरब्या। इ भोजन क आपन सहर में रखा। 29इ भोजन लेवी बंसी लोगन क बरे अहइ, काहेकि ओनके लगे आपन कउनो भुईया नाहीं अहइ। इ भोजन तोहरे सहर में ओन लोगन बरे अहइ जेनका एकर जरुरत अहइ जइसे तोहार बीच रहइवाला प्रवासी, अनाथ अउर राँइ मेहररुअन उ पचे खाब्या अउ संतुट्ट होब्या। अगर तू पचे इ करत अहा तउ यहोवा तोहार परमेस्सर सबहिं काम तू पचे जउन कछू करब्या ओकरे बरे आसीबादि देइ।

### कर्ज क खत्म करइ क खास लौहार

15 “हर सात बरिस क आखीर में, तू पचन्क कर्ज खतम कइ देइ चाही। 2कर्ज क तू पचन्क इ तरह खत्म करइ चाही: हर एक मनई जउन कउनो इस्त्राएलियन क कर्ज दिहे अहइ आपन कर्ज खत्म कइ दे। ओका आपन भाई (इस्त्राएली) स कर्ज अदा करइ क नाहीं कहइ चाही।

काहेकि यहोवा कहेस ह कि उ बरिस कर्ज खत्म कइ दीन्ह जात हैं। 3तू पचे बिदेसी स आपन कर्ज वापस लइ सकत ह। मुला उ कर्ज क खत्म कइ देब्या जउन कउनो दूसर इस्त्राएली पइ अहइ। 4मुला तोहरे पचन्क बीच कउनो गरीब मनई नाहीं रहइ चाही। काहेकि यहोवा तोहार पचन्क परमेस्सर तू पचन्क उ भुईया क बरदान देइ। जेका तू कब्जा करिही। 5इहइ होइ, अगर तू पचे यहोवा आपन परमेस्सर क बातन क पूरी तरह मानब्या। तू पचन्क उ हर एक कानूनन क मानइ में सावधान रहइ चाही जेका मई तू पचन्क दिहे हउँ। 6यहोवा तोहार परमेस्सर तू पचन्क आसीबादि देइ, जइसा कि उ बचन दिहे अहइ अउर तोहरे पचे बहोत स रास्ट्रन क कर्ज देइ बरे काफी धन होइ। मुला तू पचन्क कउनो स कर्ज लेइ क जरुरत नाहीं होइ। तू पचे बहोत स रास्ट्रन पइ सासन करब्या। मुला ओन रास्ट्रन में स कउनो रास्ट्र तोह पइ सासन नाहीं करब्या।

7“जब तू पचे ओह देसे में रहब्या जेका यहोवा तोहार पचन्क परमेस्सर तू पचन्क देत अहइ तब तोहरे लोगन में स एक गरीब होइ सकत ह। तू पचन्क स्वार्थी नाहीं होइ चाही। तू पचन्क उ गरीब मनई क मदद देइ स इन्कार नाहीं करइ चाही। 8तू पचन्क ओका हाथ बटावइ क इच्छा रखइ चाही। तू पचन्क उ मनई क जेतने कर्ज क जरुरत होइ, तोहका प्रचूरता स देइ चाही।

9“कउनो क मदद देइ स एह बरे इन्कार जिन करा, काहेकि कर्ज क सतवों बरिस निजके अहइ। इ तरह क बुरा विचार अपने मन में जिन आवइ द्या। तू पचन्क उ मनई क बरे बुरा विचार नाहीं रखइ चाही जेका मदद क जरुरत बाटइ। तू पचन्क ओकर मदद करइ स इन्कार नाहीं करइ चाही। अगर तू पचे उ गरीब मनई क कछू नाहीं देत्या तउ उ यहोवा स तोहरे खिलाफ सिकाइत करी अउर यहोवा तू पचन्क पाप क उत्तरदायी पाइ।

10“गरीब क तू पचे प्रचूरता स द्या अउर ओका देइ क बुरा न माना। काहेकि यहोवा तोहार परमेस्सर इ नीक काम बरे तू पचन्क आसीस देइ। उ तोहरे पचन्क सबहिं काम अउर जउन कछू तू पचे करब्या ओहमाँ तोहार मदद करी। 11देस में सदा गरीब लोग भी होइहीं। इहइ कारण अहइ कि मई तू पचन्क आदेस देत अहउँ कि तू पचे आपन लोगन, जउन लोग तोहरे देस में गरीब अउर सहायता चाहत हीं, ओनका सहायता देइ बरे तइयार रहा।

### सतएँ बरिस में दसन क अजाद करइ क नेम

12“अगर तोहरे लोगन में स कउनो, हिब्रू मेहरारू या मनसेधू, तोहरे हाथे बेचा जाइ तउ उ मनई क तोहार सेवा छ: बरिस करइ चाही। तब सतएँ बरिस तू पचन्क ओका आपन स अजाद कइ देइ चाही। 13मुला जब तू पचे आपन दास क अजाद करा तउ ओसे बगैर कछू लिए भए जिन जाइ द्या। 14तू पचन्क दास क आपन झुण्ड स, अनाज स, अउ आपन दाखरस स, प्रचूरता स देइ चाही। यहोवा तोहार परमेस्सर तू पचन्क बहोतइ नीक चीजन क पाए पइ आसीबादि दिहेस ह। उहइ तरह तू पचन्क भी आपन दास क बहोत सारी चीजन क देइ चाही। 15तू पचन्क याद रखइ

चाही कि तू पचे मिस्त्र में दास रह्या। यहोवा तोहार परमेस्सर तोहका पचन्क अजाद किहेस ह। इहइ कारण अहइ कि मई तू पचन्स आजु इ करइ क कहत हउँ।

16“मुला तोहरे दासन में स कउनो कहि सकत ह, ‘मई आप क नहीं तजब।’ उ अइसा एह बरे कहि सकत ह कि उ तू पचन्स, तोहरे परिवारे स पिरेम करत ह अउर उ तोहरे संग बढ़िया जिन्नगी बिताएस ह। 17इ सेवक क आपन दुआरे स कान लगावइ द्या अउर एक तु सूए क उपयोग ओकरे काने में छेद करइ बरे करा। तब उ सदा बरे तोहार दास होइ जाइ। तू पचे दासियन बरे भी इहइ करा जउन तोहरे हिआँ रहइ चाहत ह।

18“तू सबइ आपन दास क अजाद करत समइ दुःखे क अनुभव जिन करा। याद रखा, उ छः बरिस तलक तोहार सेवा, सामान्य मजदूर क दुई गुणा सेवा करइ कइ किहेस ह। यहोवा तोहार परमेस्सर तू पचे जउन करब्या ओकरे बरे असीस देइ।

### पहिला पइदा भवा जनावर क बाबत नेम

19“तू पचे आपन झुण्ड अउ समूह में सबइ पहिला पइदा भवा जनावरन क यहोवा तोहार परमेस्सर क खास जनावर बनाइ द्या। ओनमें स कउनो बर्धन क उपयोग आपन काम बरे जिन करा। इ भेड़न में स कउनो क ऊन जिन काटा। 20हर साल तोहका गोरुअन क झुण्ड में पहिला पइदा भवा जनावर क बच्चा क उ ठउरे पइ लइ आवइ चाही जेका यहोवा चुनइ। हुआँ तू पचे अउ तोहरे परिवारे क लोगन क यहोवा तोहार परमेस्सर क मौजूदगी में ओन जनावरन क खइहीं।

21“मुला अगर जनावरन में कउनो दोख होइ, या लंगड़ा, आँधर होइ या एहमें कउनो दोख होइ, तउ तू पचन्क ओका यहोवा आपन परमेस्सर क भेंट नहीं चढ़ावइ चाही। 22मुला तू पचे ओकर गोस आपन सहरन में खाइ सकत ह। एँका कउनो मनई खाइ सकत ह, चाहे उ सुद्ध होइ चाहे असुद्ध। नीलगाय या हिरन क गोस खाइ पइ इहइ नेम लागू करा जउन इ गोस पइ लागू होत ह। 23मुला तू पचन्क जनावरन क रक्त नहीं खाइ चाही। तू पचन्क खून क पानी क तरह भुईँया पइ बहाइ देइ चाही।

### फसह क त्यौहार

16 “यहोवा आपन परमेस्सर क फसह क त्यौहार आबीब क महीना में मनाव। काहेकि आबीब क महीना में तोहार परमेस्सर तू पचन्क रात में मिस्त्र स बाहेर लिआवा रहा। 2तू पचन्क उ ठउरे पइ जाइ चाही जेका यहोवा आपन नाउँ क हुआँ रखइ बरे चुनब्या। हुआँ तू पचन्क यहोवा क सम्मान में फसह भेंट में भेड़ अउर गोरु चढ़ावइ चाही। 3इ भेंट क संग खमीर वाली रोटी जिन खा। तू पचन्क सात दिना तलक बेखमीरे क रोटी खाइ चाही। इ रोटी क ‘विपत्तियन क रोटी’ कहत हीं। सुमिर ल्या कि केतनी हाली हाली तू पचन्क मिस्त्र तजि देइ क पड़ा। तू पचन्क उ देस स आपन प्रस्थान क तब तलक सुमिरइ चाही जब तलक तू पचे जिअत रहा। 4सात दिना तलक देस में

कउनो क घरे में कहुँ खमीर नहीं होइ चाही। फसह भेंट जउन गोस क पहिले दिन क साँझ क भेंट में चढ़ावा ओका भिन्सार होइ क पहिले खाइ लेइ चाही।

5“तू पचन्क फसह क जनावरन क बलि ओन सहरन में स कउनो में नहीं चढ़ावइ चाही जेनका यहोवा तोहार परमेस्सर तू पचन्क दिहे अहइ। 6तू पचन्क फसह क त्यौहार क जनावर क बलि सिरिफ उ ठउरे पइ चढ़ावइ चाही जेका यहोवा तोहार परमेस्सर आपन बरे खास निवास क रुप में चुनइ। हुआँ तू पचे फसह क त्यौहार क जनावर क जब सूरज बूडइ तब साँझ क बलि चढ़ावइ चाही। तू पचे एका बरिस क उहइ समइ में करब्या जउने समइ तू पचे मिस्त्र स बाहेर निकरा रह्या। 7अउर तू पचन्क फसह क त्यौहार क गोस यहोवा तोहार परमेस्सर जउने ठउर क चुनी हुआँइ पकउब्या अउर खाब्या। तब भिन्सारे तू पचन्क आपन खेमन में चला जाइ चाही। 8तू पचन्क बेखमीरी क रोटी छः दिना तलक खाइ चाही। सतएँ दिन तू पचन्क कउनो भी काम नहीं करइ चाही। उ दिन यहोवा आपन परमेस्सर बरे खास सभा में भी सबहिं एकट्ठा होइहीं।

### हफ्तन क त्यौहार (पिन्तेकुस्त)

9“जब तू पचे दोबारा फसल काटब सुरु करा तबहिं स तू पचन्क सात हफता गनइ चाही। 10तब यहोवा आपन परमेस्सर बरे हफतन क त्यौहार करा। एँका एक स्वच्छ बलि ओका लिआइके करा। तू पचन्क केर्तेना देब अहइ, एकर निहचय इ बिचारिके करा कि यहोवा तोहार परमेस्सर केर्तेना तू पचन्क आसीबाद दिहे अहइ। 11उ ठउरे पइ जा जेका यहोवा आपन नाउँ स हुवाँ बसइ बरे चुनी। हुआँ तू पचे अउर तोहार लोग, यहोवा आपन परमेस्सर क मौजूदगी में आनन्द क समइ बितइहीं। आपन सबहिं लोगन, आपन पूतन, आपन बितियन अउर आपन सबहिं मनसेधू अउ मेहरारु दासन क हुआँ लइ जा अउर आपन सहर में बसइयन लेवी लेवीबसियन, प्रवासियन, अनाथन अउर रॉइ मेहररुअन क भी संग लइ जा। 12सुमिरा कि तू पचे मिस्त्र में दास रह्या। तू पचन्क निहचय करइ चाही कि तू पचे इ नेमन क मनब्या।

### खेमन क त्यौहार

13“जब तू पचे आपन खरिहान स फसिल अउ दाखरसाला स दाखरस बटोर लेब्या तब कुटीर क त्यौहार सात दिना तलक मनवा। 14तू पचे, तोहार पूतन, तोहार बितियन, तोहार सबहिं मरद अउ मेहरारु दासन, तोहरे सहर में बसइयन लेवीबसियन, प्रावासियन, अनाथ अउ रॉइ मेहररुअन सबइ इ दावत में आनन्द मानवइँ। 15तू पचन्क इ दावत क सात दिना तलक उ खास ठउरे पइ मनावइ चाही जेका यहोवा चुनी। इ तू पचे यहोवा आपन परमेस्सर क सम्मान में करा। आनन्द मनाव! काहेकि यहोवा तोहार परमेस्सर तू पचन्क तोहरी फसिल बरे अउर तू पचे जउन कछू भी किहा ह ओकरे बरे आसीस दिहेस ह।

16“तोहार पचन्क सबहिं मनइयन बरिस में तीन दाईँ यहोवा आपन परमेस्सर स मिलइ बरे उ खास ठउरे पइ अइहीं जेका उ चुनी। इ बे खमीरे क रोटी क त्यौहार क समइ, हफतन

क ल्यौहार क समइ अउ कटीर क ल्यौहार क समइ होइ। कउनो मनई क बिना भेंट लइ यहोवा स नाही मिलइ जाइ चाही। 17हर एक मनई ओतना देइ जेतना उ दइ सकी। केतना देब अहइ, ओकर निहचय उ इ सोचिके करी कि ओका यहोवा केतना दिहे अहइ।

### लोगन बरे निआवधीस अउ अफसर

18“यहोवा तोहार परमेस्सर जउन सहरन क तू पचन्क दइ देत अहइ ओनमाँ स हर एक सहर मँ तू पचन्क आपन परिवार समूह बरे निआव क निआवाधीस अउ अफसर बनवइ चाही। इ निआव क निआवाधीसन अउ अफसरन क जनता क संग सही अउ ठीक निआव करइ चाही। 19तू पचन्क ठीक निआव क बदलइ नाही चाही। तू पचन्क पच्छपाती नाही हाई चाही। तू पचन्क कउनो क सम्बन्ध मँ आपन इरादा क बदल देइ बरे धन नाही लेइ चाही। धन बुद्धिमान मनइयन क आँधर करत ह। इ सच्चा मनई क सबदन क बदल देतह। 20तू पचन्क हर समइ बिना पच्छ लिए अउ निआवा स ठीक होइ क पूरी कोसिस करइ चाही। तब तू पचे जिअत रहब्या अउर तू पचे उ देस क पउब्या जेका यहोवा तोहार परमेस्सर तू पचन्क दइ देत अहइ अउर तू पचे ओहमाँ रहब्या।

### परमेस्सर मूरतियन स घिना करत ह

21“आसेर देवी क सम्मान बरे उ वेदी बगल मँ काठ क खम्भन जिन लगावा जेका तू पचे यहोवा आपन परमेस्सर बरे बनाउब्या। 22अउर तू पचन्क खास पाथर लबार देवतन क पूजा बरे नाही खड़ा करइ चाही। यहोवा तोहार परमेस्सर एनसे घिना करत ह।

### बलियन बरे गोरु निर्देख होइ चाही

17 “तू पचन्क यहोवा आपन परमेस्सर क कउनो एक अइसी गाय या भेड़, बलि मँ नाही चढ़ावइ चाही जेहमाँ कउनो दोख या कमी होइ। काहेकि यहोवा तोहार पचन्क परमेस्सर एहसे घिना करत ह।

### मूरति क पुजवइया क सजा

2“तू पचे ओन सहरन मँ स कउनो बुरी बात होइ क सूचना पाइ सकत ह जेनका यहोवा परमेस्सर तू पचन्क देत अहइ। तू पचे इ सुनि सकत ह 3कि तू पचन मँ स कउनो मेहरारु या मनसेधू यहोवा क खिलाफ पाप किहस ह। तू पचे इ सुनि सकत ह कि उ पचे यहोवा स करार तोड़ैत ह यानी उ पचे दूसर देवतन क पूजा किहेन ह। या इ होइ सकत ह कि उ पचे सूरज, चन्द्रमा या तारन क पूजा किहे होई। इ यहोवा क आदेस क खिलाफ अहइ जेका मई तोहे सबन्क दिहे अहउँ। 4अगर तू पचे अइसी बुरी खबर सुनत ह तउ तू सबन्क ओकर जाँच होसियारी स करइ चाही। तू पचन्क इ जान लेइ चाही कि का इ फुरइ अहइ कि इ खौफनाक काम इस्त्राएल मँ होइ चुका अहइ। अगर तू पचे ऐंका साबित कइ सकत ह कि इ फुरइ अहइ, 5तब तू पचन्क उ मनसेधू या मेहरारु क जरूर सजा देइ चाही जउन इ बुरा काम किहे

अहइ। तू पचन्क उ मनसेधू या मेहरारु क सहर क दुआरे क लगे लइ जाइ चाही अउर ओका पाथरन स मारि डवइ चाही। 6मुला अगर एक ही गवाह इ कहत ह कि उ बुरा काम किहस ह तउ ओका मउत क सजा नाही दीन्ह जाइ। अगर दुइ या तीन गवाह इ कहत ही कि इ फुरइ अहइ तउ उ मनई क फाँसी पइ चढ़ाइ देइ चाही। 7गवाह क पहिला पाथर उ मनई क मारि डवइ बरे लोकावइ चाही। तबहिँ दूसर लोगन क ओकर मउत पूरी करइ बरे पाथरन क लोकावइ चाही। इ तरह तू पचन्क उ बुराई क आपन बीच स दूर करइ चाही।

### जटिल मुकदमा

8“कबहुँ अइसी समस्या आइ सकत ह कि जउन तोहरे अदालत बरे फइसला देइ मँ एतना कठिन होइ कि फइसला ही न देइ सकई। इ दूसर तरह खून-खराबा क मुकदमा, कउनो प्रकार क आक्रमण, कउनो दावा क पूरा होवइ सकत ह। जब इ मुकदमन पइ तोहरे सहरन मँ बहस होत ह तउ तोहार निआव क जज होइ सकत ह, फइसला न कइ सकई कि ठीक का अहइ? तब तू पचन्क उ खास ठउरे पइ जाइ चाही जेका यहोवा तोहार परमेस्सर क जरिये चुना ग होइ। 9तू पचन्क लेवी परिवार समूह क याजकन अउ उ समइ क निआव क जज क लगे जाइ चाही। तउ मुकदमा क ओनका देइ चाही। अउर उ मुकदमन क फइसला प्रस्तुत करब्या। 10यहोवा क खास ठउरे पइ उ पचे आपन फइसला तू पचन्क सुनईहीं। जउन भी उ पचे कहई ओका तू पचन्क करइ चाही। तू पचन्क ओनकर फइसला स्वीकारइ चाही अउर ओनकर निर्देस क ठीक ठीक मानइ चाही। 11तोहका ओकर निर्देसन अउ फइसलन क सही-सही मानइ चाही। तू पचन्क ओनसे अलग कछू भी नाही करइ चाही जउन उ सबइ तू पचन्क करइ क कहत हीं।

12“तू पचन्क यहोवा आपन परमेस्सर क सेवा क करइया उ समइ क याजक अउ निआव क निआधीसन क आया मानइ स इन्कार करइवाला क जउन अभिमान पूर्वक कार्य करइ, सजा देइ चाही। उ मनई क मरइ चाही। इही प्रकार तू इस्त्राएल स बुराई क हटाउब्या। 13सबहिँ लोग इ सजा क बारे मँ सुनिहीं अउर अहंकारी कार्य करइ बरे डेरइहीं।

### राजा कइसे चुनई

14“तू पचे उ प्रदेस मँ जाब्या जेका यहोवा तोहार परमेस्सर तू पचन्क दइ देत अहइ। तू पचे उ देस पइ कब्जा करब्या अउर ओहमाँ रहब्या। तब तू पचे कहब्या, ‘हम लोग अपने ऊपर एक तु राजा वइसेन ही रखब जइसेन हमरे चारिहुँ कइँती क रास्ट्रन मँ अहइ।’ 15जब अइसा होइ तब तू पचन्क इ पक्का निहचय होइ चाही कि तू पचे ओका ही राजा चुन्या ह जेका यहोवा तोहार परमेस्सर चुनत ह। तोहार राजा तू पचन्क आपन लोगन मँ स होइ चाही। तू पचन्क बिदेसियन क आपन राजा नाही बनावइ चाही। 16राजा क बहोत जियादा घोड़न क अपने बरे नाही राखइ चाही अउर ओका लोगन क जियादा घोड़न क लियावइ बरे मिस्त्र नाही पठवइ चाही। काहेकि तू पचन्स यहोवा कहेस ह, ‘तू पचन्क

उ रहे पड़ कबहुँ नाहीं लउटब अहइ।' 17राजा क बहोत पत्नियन क भी नाहीं राखइ चाही। काहेकि इ काम ओका यहोवा स दूर हटाइ अउर राजा क सोना, चाँदी स आपन क मालामाल नाहीं बनावइ चाही।

18"जब राजा हुकुमत सुरु करइ लागइ, तउ ओका एक किताबे में आपन बरे नेमन क नकल कइ लेइ चाही। ओका याजकन अउ लेवी बंसियन क समन्वा नकल कइ चाही 19राजा क उ किताबे क आपन संग रखइ चाही। ओका उ किताबे क जिन्गी भइ पढ़इ चाही। काहेकि तब राजा यहोवा आपन परमेस्सर क सम्मान करब सीखी अउर उ नेम क हुकुमन क पूरा पालन करइ सीखी। 20तब राजा इ न सोची कि उ आपन लोगन में कउनो स भी जियाद नीक बाटइ। उ नेम क खिलाफ न जाइ बल्कि ठीक तरह स मानी। तब उ राजा अउर ओकर संतानन इस्राएल क राज्ज पइ लम्बा समइ तलक हुकुमत करी।

### याजकन अउ लेवी बंसियन क मन्द

18 "लेवी परिवार समूह क याजकन क इस्राएल में कउनो भुइँया क हीसा नाहीं पाइ। उ पचे आपन जीवन यापन उ भेंट क खाइके करिहीं जउन आगी पइ पाकी अउ यहोवा क चढ़ाई जाइ। उ ओकरे मीरास क हीसा अहइ। 2उ सबइ याजक लोग भुइँया क कउनो हीसा दूसर परिवार समूहन क तरह नाहीं पइहीं। लेवी बंसियन क हीसा में खुद यहोवा अहइ। यहोवा एँकरे बरे ओनका बचन दिहे अहइ।

3"जब तू पचे कउनो बर्धा, या भेड़ी बलि बरे मारा तउ तू पचन्क इ सबइ हिस्सन दइ देइ चाही: कंधा, दुइनउ गाल अउर पेट। 4तू पचन्क याजकन क आपन पहली फसल क अनाज, नई दाखरस अउर आपन नई फसल क तेल देइ चाही। तू पचन्क याजकन क अपनी भेड़ी क पहिला काटा उन देइ चाही। 5काहेकि यहोवा तोहार परमेस्सर तोहरे सबहि परिवारे समूहन स ओनका सदा यहोवा बरे खड़ा होइ अउर सेवा करइ बरे चुनेस ह।

6"लेवी बंसी जउन समूचइ इस्राएल में तोहरे सहरन में स कउनो में रहत ह, कउनो समइ में आपन घर तजि सकत ह अउर यहोवा क खास ठउर पइ जाइ सकत ह। 7तब इ लेवी बंसी यहोवा आपन परमेस्सर क नाउँ पइ सेवा कइ सकत ह। ओका परमेस्सर क खास ठउर में वइसेन ही सेवा करइ चाही जइसे ओकर भाई दूसर लेवी बंसी करत हीं। 8उ लेवी बंसी, आपन अधिकार क मिलइवाला हीसा क अलावा दूसर लेवी बंसियन क संग बराबर क हीसादार होइ।

### इस्राएलियन क दूसर रास्ट्रन क नकल नाहीं करइ चाही

9"जब तू पचे उ भुइँया में घुसब्या, जउन यहोवा तोहार पचन्क परमेस्सर तू पचन्क दइ देत अहइ, तब उ रास्ट्रे क लोग जउन खउफनाक काम हुआँ करत होइँ ओनका जिन सीखा। 10आपन बेटवन अउ बिटियन क बलि आपन वेदी पइ आगी में जिन द्या। कउनो जोतिसी स बात कइके या कउनो जादूगर, डाइन या बाजीगर क लगे जाइके इ जिन

सीखा कि भविस्स में का होइ? 11कउनो भी मनई क जादू-टोना चलावइ क कोसिस न करइ द्या अउर तू पचन में स कउनो मनई ओझा या भूतसिद्धक नाहीं बनी। अउर कउनो मनई कउनो अइसे मनई स बात करइ क कोसिस न करी जउन मर चुका होइ। 12यहोवा तोहार परमेस्सर ओन लोगन स घिना करत ह जउन अइसा करत हीं। इहइ कारण अहइ कि उ तोहरे समन्वा इ लोगन्क देस तजि देइ क मजबूर करी। 13तोहे सबन्क यहोवा तोहार परमेस्सर पइ पूरा निस्थावान जरूर होइ चाही।

### यहोवा क खास नबी

14"तू पचन्क उ रास्ट्रन क लोगन्क बल क जरिये आपन देस स हटाइ देइ चाहीं। उ रास्ट्रन क लोग जोतिसियन अउर जादूगरन क बात मानत हीं। मुला यहोवा तोहार परमेस्सर तू पचन्क वइसा नाहीं करइ देइ। 15यहोवा तोहार परमेस्सर तोहारे लगे आपन नबी पठई। इ नबी तोहरे आपन लोगन में स आइ। उ मोरी नाई होइ। तू पचन्क इ नबी क बात मानइ चाही। 16यहोवा तोहरे लगे इ नबी क पठइ काहेकि तू पचे अइसा करइ क बरे ओहसे कहया ह। उ समइ जब तू पचे होरेब पहाड़े क चारिहूँ कइँती बटुरा रहया, तू पचे यहोवा क अवाज अउ पहाड़े पइ खउफनाक आगी क लिखके डेरान रहया। एह बरे तू पचे कहे रहया, 'हम लोग यहोवा आपन परमेस्सर क अवाज फुनि न सुनी। हम लोग उ खउफनाक आगी क फुनि न लखी। हम मरि जाब।'

17"यहोवा मोसे कहेस, 'उ पचे जउन चाहत हीं, उ ठीक बाटइ। 18मई तोहरी नाई क एक ठु नबी ओनके बरे पठइ देब। इ नबी ओन लोगन में स कउनो एक होइ। मई ओकर मुख में आपन बात डालब। उ लोगन स उहइ कही जउन मोर हुकुम मानी। 19इ नबी मोरे नाउँ पइ बोली अउर जब उ कछू कही तब अगर कउनो मनई मोरे हुकुमन क सुनइ स इन्कार करी, तउ मई खुद उ मनई क जिम्मेदार होब।'

### लबार नबियन क कइसे पहिचाना जाइ?

20"मुला कउनो नबी कछू अइसा कहि सकत ह जेका करइ क बरे मई ओसे नाहीं कहेउँ ह अउर उ लोगन स कहि सकत ह कि उ मोरे जगह पइ बोलत अहइ। अगर अइसा होत ह तउ उ नबी क मारि डवइ चाही या कउनो अइसा नबी होइ सकत ह जउन दूसर देवतन क नाउँ पइ बोलत ह। उ नबी क भी मारि डवइ चाही। 21तू पचे सोच सकत ह, 'हम कइसे पहिचान सकित ह कि नबी क कहब, यहोवा क नाहीं अहइ?' 22अगर कउनो नबी कहत ह कि उ यहोवा कइँती स कछू कहत बाटइ, मुला ओकर कहब फुर साबित नाहीं होत, तउ तू पचन्क पहिचान लेइ चाही कि यहोवा वइसा नाहीं कहेस। तू पचे समुझ जाब्या कि इ नबी अभिमान पूर्वक बात करत रहा। तू पचन्क ओसे डेराइ क जरुरत नाहीं।

### सुरच्छा बरे तीन ठु सहर

19 "यहोवा तोहार परमेस्सर तू पचन्क उ देस देत अहइ जउन दूसर रास्ट्रन क अहइ। यहोवा ओन रास्ट्रन

क बरबाद करी। तू पचे हुआँ रहब्या जहाँ उ सबइ लोग रहत हीं। तू पचे ओनकइ सहरन अउर घसन क लइ लेब्या। जब अइसा होइ, 2-3तब तू पचन्क भुइँया क तीन हींसा में बाँटइ चाही। तब तू पचन्क हर एक हींसा में सबहिं लोगन्क निअरे परइवाला सहर उ छेत्र में चुनइ चाही अउर तू पचन्क उ सहरन तलक सड़कन बनावइ चाही तब कउनो भी मनई जउन कउनो दूसर मनई क मारत ह हुआँ पराइके जाइ सकत ह।

4“जउन मनई कउनो क मारत ह उ सुरच्छा बरे इ तीन सहरन में स कउनो में भी पराइके पहोंच सकत ह। उ सुरच्छा पा सकत ह। जदि उ बिना इरादा क साथ कउनो मनई क मारि डवइ अउर उ ओसे पहिले स घिना नाहीं करत रहेन। 5एक ठु उदाहरण बा: कउनो मनई कउनो मनई क संग जंगल में लकड़ी काटइ जात ह। ओनमाँ स एक मनई लकड़ी काटइ बरे कुल्हरी क एक ठु बृच्छ पइ चलावत ह, मुला कुल्हरी हाथे स छूट जात ह। कुल्हरी क धार दूसर मनई पइ लग जात ह अउर ओका मार डवत ह। उ मनई जउन कुल्हरी चलाएस, ओन नगरन में पराइ सकत ह अउर आपन क सुरच्छित कइ सकत ह। 6मुला अगर सहर बहोत दूर होइ, तउ उ आवस्यकतानुसार तेज नाहीं पराइ सकी। मारा भवा मनई क कउनो नजदीक क रिस्तेदार\* ओकर पाछा कइ सकत ह अउर सहर में ओकरे पहोंचइ स पहिले ही ओका धरि सकत ह। रिस्तेदार आपन किरोध में उ मनई क कतल कइ सकत ह। मुला उ मनई क मउत क सजा उचित नाहीं अहइ। उ उ मनई स पहिले घिना नाहीं करत रहा जेका उ मारेस ह। 7एह बरे मई आदेस देत हउँ कि तीन खास सहरन क चुना।

8“यहोवा तोहार परमेस्सर तोहरे पुरखन क इ बचन दिहस कि मई तू पचन्क चउहद्दी क विस्तार करब। उ तू लोगन क सारा देस देइ जेका देइ क बचन उ तोहरे पुरखन क दिहस। 9उ इ करी, अगर तू ओन नेमन क पालन पूरी तरह करब्या जेनका मई तू पचन्क आजु दइ देत हउँ यानी अगर तू पचे यहोवा आपन परमेस्सर स पिरम करब्या अउर ओकरे रहे पइ चलत रहब्या। अगर यहोवा तोहरे देस क बड़ावत ह तउ तू पचन्क तीन दूसर नगर सुरच्छा बरे चुनइ चाही। उ सबइ सुरच्छा बरे पहिले तीन सहरन क इलावा होइ चाही। 10तबहिं निर्दोख लोग उ देस में नाहीं मारा जइहीं जेका यहोवा तोहार परमेस्सर तू पचन्क आपन बनावइ बरे देत बाटइ अउर तू पचे कउनो भी मउत बरे अपराधी नाहीं होब्या।

11“किन्तु एक मनई कउनो मनई स घिना कइ सकत ह। उ मनई क मारइ बरे इन्तजार में लुका रहि सकत ह जेहसे उ घिना करत ह। उ उ मनई प हमला कइ सकत ह अउ ओका पीटइ अउर मारि सकत ह। ओकर पाछे सुरच्छा बरे चुने इ सहरन में पहोंच सकत ह। 12अगर अइसा होत ह, तउ उ मनई क सहर क मुखिया क, कउनो क ओका धरइ क अउर सुरच्छत क सहर स ओका बाहेर लिआवइ बरे

पठइ चाही। सहर क मुखिया ओका मरे भए क नजिक क रिस्तेदारे क दइ चाही। हत्तियारा जरुर मारा जाइ चाही। 13ओकरे बरे तू पचन्क दुःखी नाहीं होइ चाही। तू पचन्क निर्दोख मनई क मारइ क अपराध क इस्त्राएल स हटावइ चाही। तब इ तोहरे बरे नीक रही।

### जायदाद क चीन्हा

14“तू पचन्क पड़ोसी क जायदाद क चीन्हा क नाहीं हटावइ चाही। उ चउहद्दी उ समइ में स्थापित कीन्ह जात रहा जउन तू उ भुइँया में कब्जा कीन्ह रहा। यहोवा तोहार परमेस्सर तू पचन्क रहइ बरे देइ अउर जउन तोहार होई।

### गवाह

15“अगर कउनो मनई कछु अन्याय या पाप क दोखी ठहरावइ जात ह जेका अपराध उ किहेस ह, तउ एक गवाह एक साबित करइ बरे काफी नाहीं होइ कि उ दोखी अहइ। उ सिद्ध करइ बरे दुइ या तीन गवाह जरुर होइ चाही।

16“कउनो झुठी गवाह कउनो मनई प झुठी मत क अपराध ठहरइ सकत ह। 17अगर अइसा होत ह तउ तहतुक करइवाले दुइनउँ मनई क यहोवा क मौजूदगी में खड़ा होइ चाही अउर ओनके मोकददमन क फइसला याजकन अउ उ समइ क मुख्य निआवाधीसन क जरिये होइ चाही। 18निआवाधीसन क होसियारी स पूछ-ताछ करइ चाही। उ पचे पता लगाइ सकत हीं कि गवाह दूसर मनई क खिलाफ झूठ बोलेस ह। अगर गवाह झूठ बोलेस ह तउ, 19तू पचन्क ओका सजा देइ चाही। तू पचन्क ओका उहइ हानि पहोंचावइ चाही जउन उ दूसर मनई क पहोंचावइ चाहत रहा। इ तरह तू पचे आपन बीच स कउनो भी बुरी बात निकारिके बाहेर कइ सकत ह। 20दूसर सबहिं लोग एँका सुनिहीं अउर डेराइ जइहीं, अउर तोहमाँ स कउनो भी फुन वइसी बुरी बात नाहीं करी।

21“तू पचे ओह पइ दया-दृष्टि जिन कर्या जेका बुराई बरे तू पचे ओका सजा देत अहा। जिन्गगी बरे जिन्गगी, आँखी बरे आँखी, दाँत बरे दाँत, हाथ बरे हाथ अउर गोइवा बरे गोइ लीन्ह जाइ चाही।

### जुद्ध बरे नेम

20“जब तू पचे आपन दुस्मनन क खिलाफ जुद्ध में जा, अउर आपन फउज स जियादा घोड़न, रथ, मनइयन क लखा, तउ तू पचन्क डेराइ नाहीं चाही। काहेकि यहोवा तोहार परमेस्सर तोहरे संग अहइ अउर उहइ एक अहइ जउन तू पचन्क मिस्त्र स बाहेर निकारि लिआवा।

2“जब तू पचे जुद्ध क निचके आवा, तब याजक क लोगन क लगे जाइ चाही अउर ओनसे बात करइ चाही। 3याजक कही, ‘इस्त्राएल क लोगो, मोरी बात सुना। आजु तू लोग आपन दुस्मनन क खिलाफ जुद्ध में जात अहा। आपन हिम्मत जिन तजा। जिन डरा। आतंकित जिन हवा। दुस्मनन स जिन डेराअ! 4काहेकि यहोवा तोहार परमेस्सर दुस्मनन क खिलाफ लड़इ बरे तोहरे संग जात अहइ। यहोवा तोहार परमेस्सर तोहार रच्छा करी।’

**मारा भवा ... रिस्तेदार** सब्द क अरथ “खून क बदला लेइवाला”। जब कउनो मनई मारा जात रहा तब ओकरे निचके क रिस्तेदारन क इ कर्तव्य होत रहा कि उ मारइवाला मनई क उ पचे सजा देई।

5“उ पचे अफसरन फउजियन स इ कइहीं, ‘का हिआँ कउनो अइसा मनई अहइ जउन नवा घर बनाइ लिहे अहइ, मुला अब तलक ओका अर्पण नाहीं किहे अहइ? उ मनई क आपन घरे लउट जाइ चाही। उ जुद्ध में मारा जाइ सकत ह अउर तब दूसर मनई ओकरे घरे क अर्पित करी। 6का कउनो मनई हिआँ अइसा अहइ जउन अंगूरे क बगिया लगाए अहइ, मुला अबहिं तलक ओसे कउनो अंगूर नाहीं पाएस ह? उ मनई क घर लउटि जाइ चाही। अगर उ मनई जुद्ध में मारा जात ह तउ दूसर मनई ओकरे बगिया क फले क भोग करी। 7का हिआँ कउनो अइसा मनई अहइ जेकरे बियाहे क क बात पक्की होइ चुकी अहइ। मुला उ लइकी क नाहीं बियाहेस ह? उ मनई क घरे लउटि जाइ चाही। अगर उ जुद्ध में मारा जात ह तउ दूसर मनई उ मेहरारु स बियाह करी जेकरे संग ओकरे बियाहे क बात पक्की होइ चुकी बाटइ।’

8“अफसरन क लोगन स इ पूछइ चाही, ‘का हिआँ कउनो अइसा मनई अहइ जउन हिम्मत हरि चुका अहइ अउर डेरान अहइ। ओका घर लउटि जाइ चाही। तब उ दूसर फउजियन क हिम्मत हार जाइ मैं सहायक न होइ।’ 9जब अफसर फउजियन स बात करब खतम कइ लेइ तब उ पचे लोगन क अगवाइ बरे सैनिक क सेनापतियन चुनईं।

10“जब तू पचे सहर पइ हमला करइ जा तउ हुआँ क लोगन क समन्वा सान्ति क प्रस्ताव रखा। 11अगर उ पचे तोहार प्रस्ताव अंगिकार कइ लेत हीं अउर आपन फाटक खोलि देत हीं तब उ सहर में बसइयन सब लोग तोहार दास होइ जइहीं अउर तोहार काम करइ बरे मजबूर कीन्ह जइहीं। 12मुला अगर सहर सान्ति प्रस्ताव अंगीकार करइ स इन्कार करत ह अउर तू सबन्स लइत ह तउ तू सबन्क सहर घेरि लेइ चाही। 13अउर जब यहोवा तोहार परमेस्सर सहर पइ तोहार कब्जा करावत ह तब तू पचन्क सबहिं मनसेधुअन क मारि डवइ चाही। 14तू पचे आपन बरे मेहररुअन, गदेलन, गोरुअन अउर सहर क कउनो भी चीज लइ सकत ह। तू पचे इ सबइ चीजन्क बइपर सकत ह। यहोवा तोहार परमेस्सर इ सबइ चीजन तू पचन्क दिहे अहइ। 15जउन सहर तोहरे प्रदेश में नाहीं अहइ अउर बहोत दूर अहइँ, ओन सबन्क संग तू पचे अइस बेउहार करब्या।

16“मुला जब तू पचे उ सहर उ प्रदेश में लेत ह जेका यहोवा तोहार परमेस्सर तू पचन्क दइ देत अहइ तब तू पचन्क हर एक क मारि डवइ चाही। 17तू पचन्क हिती, एमोरी कनानी, परिज्जी, हिब्बी अउर यबूसी सबहिं लोगन्क पूरी तरह बरबाद कइ देइ चाही। यहोवा तोहार परमेस्सर, इ करइ क तू पचन्क आदेस दिहे अहइ। 18एह बरे तब उ पचे तू सबन्क यहोवा तोहारे परमेस्सर क खिलाफ घृणित कार्य क सिच्छा तू पचन्क नाहीं दइ सकत जउन उ पचे आपन देवतन क पूजा क समइ करत हीं।

19“जब तू पचे कउनो सहर क खिलाफ जुद्ध करत रहब्या तउ तू पचे लम्बा समइ तलक ओकर घेरा डए रहि सकत ह। तू पचन्क सहर क चारिहुँ कइँती क फलदार बृच्छन क नाहीं काटइ चाही। तू पचन्क एनसे फल खाइ चाही मुला काटिके भहरावइ नाहीं चाही। इ सबइ बृच्छ

दुस्मन नाहीं अहइँ। एह बरे ओनके खिलाफ जुद्ध जिन लइ। 20मुला ओन बृच्छन क काटि सकत ह जेनका तू पचे जानत अहा कि इ सबइ फलदार नाहीं अहइँ। तू पचे एनकइ उपयोग उ सहर क खिलाफ घेराबंदी में कइ सकत ह, जब तलक ओकर पतन न होइ जाइ।”

### अगर कउनो मनई मरा भवा पावा जाइ

21 “उ देस में जेका यहोवा तोहार परमेस्सर तू पचन्क रहइ बरे देत अहइ, कउनो मनई मइदान में हतिया कीन्ह भवा लास पाइ जाइ सकत ह। मुला कउनो क इ पता नाहीं चल सकत कि ओका कउन मारेस। 2तब तोहार पचन्क मुखियन अउर निआवाधीसन मारे भए मनई क चारिहुँ कइँती स सहरन क दूरी क नाप-जोख करइ चाही। 3जब तू पचे इ जानि जाब कि मारे भए मनई क सबन त निचके क कउन सा सहर अहइ। तब उ सहर क मुखियन आपन झुण्डन में स एक गइया लेइहीं। जेकर उपयोग कबहुँ भी कउनो कामे में न कीन्ह गवा होइ। या उ प कबहुँ जुआ न रखा गवा ह। 4उ सहर क मुखियन उ गइया क बहता भवा पानीवाली घाटी में लइहीं। इ अइसी घाटी होइ चाही जेका कबहुँ जोता न गवा होइ अउर न ओहमाँ पेड़-पौधा रोपा गवा होई। तब मुखियन क उ घाटी में हुअँइ उ गइया क गर्दन तोड़ देइ चाही। 5लेवी बंसी याजकन क हुआँ जाइ चाही। (यहोवा तोहार परमेस्सर इ याजकन क आपन सेवा बरे अउर आपन नाउँ पइ आसीबदि देइ बरे चुनेस ह। याजक सबहिं वाद-विवाद अउ नोस्कान क मुकद्दमा क निहचय करिहीं।) 6मारे भए मनई क सबन त निचके क सहर क सबई मुखियन आपन हाथन क उ गइया क ऊपर धरिहीं जेकर गर्दन घाटी में तोड़ दीन्ह गवा रहा। 7इ सबइ मुखिया स जरूर कइहीं, ‘हम इ मनई क नाहीं मारा अउर हम पचे एकर मारा जाब नाहीं देखा। 8यहोवा, इस्राएल क लोगन क छिमा कर, जेनकइ तू उद्धार किहा ह। आपन लोगन में स कउनो निर्दोख मनई क दोखी न ठहरावइ द्या।’ तब उ पचे कतल बरे दोखी नाहीं ठहरावा जइहीं। 9इ सबइ मामलन में उ करब ही तोहरे पचन्क बरे नीक अहइ। अइसा कइके तू पचे कउनो निर्दोख क हत्या कइके दोखी नाहीं रहब्या।

### जुद्ध में मिली मेहररुअन

10“तू पचे आपन दुस्मनन स जुद्ध करउब्या अउर यहोवा तोहार पचन्क परमेस्सर ओनका तू पचन्स हरवाइ देइ। तब तू पचे दुस्मनन क बन्दी क रुप में लिअउब्या। 11अउर तू पचे जुद्ध में बन्दी कउनो सुन्नर मेहरारु क लख सकत ह। तू पचे ओका पाउब चाह सकत ह अउर आपन मेहरारु क रुप में रखइ क इच्छा कइ सकत ह। 12तू पचन्क ओका आपन परिवार में आपन घरे लिआवइ चाही। ओका आपन बार छोलवावइ चाही अउर आपन नह कटवावइ चाही। 13ओका आपन बन्दी भए ओढनन क उतारइ चाही। ओका तोहरे घरे में रहइ चाही अउर एक महीना तलक आपन महतारी अउर बाप बरे रोवइ चाही। ओकरे बाद तू ओकरे संग यौन सम्बन्ध कायम कइ सकत ह अउर ओकर भतार होइ सकत ह्या। अउर उ तोहार पत्नी बन जाइ। 14मुला अगर तू पचे

ओसे खुस नहीं होत्या तउ तू पचे ओका जहाँ उ जाइ चाही जाइ देइ। मुला तू ओका वास्तविक रूप में बेच नहीं सकत्या। तू ओकरे बरे दासी क तरह बेउहार नहीं कइ सकत्या। काहेकि तोहार ओकरे संग यौन सम्बन्ध रहा।

### एक ठु मनई क दुइ पत्नियन क गदेलन

15“एक ठु मनई क दुइ पत्नियन होइ सकत हीं अउर उ एक पत्नी स दूसर पत्नी क अपेच्छा जियादा पिरेम कइ सकत ह। दुइनउँ पत्नियन स ओकरे गदेलन होइ सकत हीं अउर पहिला गदेलन उ पत्नी क होइ सकत ह जेहसे उ जियादा पिरेम न करत होइ। 16जब उ आपन सम्पत्ति आपन गदेलन में बाँटी तउ उ इ घोसणा नहीं करइ सकत ह कि जे पत्नी क उ जियादा पिरेम करत ह ओका गदेलन पहिलौटी अहइ अउर जेका उ पिरेम नहीं करत ही ओका गदेलन नहीं। 17उ मनई क दुतकारी पत्नी क गदेलन क ही पहिलौटी क गदेलन अंगीकार करइ चाही। उ मनई क आपन चीजन क दुइ हींसा पहिलौटी पूत क देइ चाही। काहेकि उ बड़का गदेलन अहइ। अउ पहिलौटी क अधिकार रखत अहइ।

### आग्या न मानइवाला पूत

18“कउनो मनई क अइसा पूत होइ सकत ह जउन जिद्दी अउर आग्या क न मानइवाला होइ। इ पूत आपन महतारी अउर बाप क आग्या न मानी। महतारी अउर बाप ओका दण्ड देत हीं मुला पूत फुन भी ओनकइ कछू नहीं सुनत। 19ओकरे महतारी अउर बाप क ओका सहर क फाटक पइ सहर क मुखियन क लगे लइ जाइ चाही। 20ओनका सहर क मुखियन स कहइ चाही: ‘हमार पूत जिद्दी अहइ अउर आग्या नहीं मानत। उ कउनो काम नहीं करत जेका हम करइ बरे कहित ह। उ जरुरत स जियादा खात अउ मद पिअत ह।’ 21तब सहर क लोगन क उ पूत क पाथरन स मारि डवइ चाही। अइसा कइके तू पचे आपन में स बुराई क हटाइ देइहीं। इस्त्राएल क सबहिं लोग ऐंका सुनिहीं अउ डेरइ जइहीं।

### अपराधियन मारा जात अउ लटकावा जात हीं

22“कउनो मनई अइसा पाप करइ क अपराधी होइ सकत ह जेका मउत क सजा दीन्ह जाइ। जब उ मारि डवा जाइ तब ओकर देह पेड़े पइ लटकावा जाइ सकत ह। 23जब अइसा होत ह तउ ओकरे देह क रत भइ पेड़े पइ नहीं रहइ चाही। तू पचन्क ओका उहइ दिन निहचय ही दफनाइ देइ चाही। काहेकि जउन मनई पेड़े पइ लटकावा जात ह उ परमेस्सर स अभिसाप पावा होत ह। तू पचन्क उ देस क बे पवित्तर नहीं करइ चाही जेका यहोवा तोहार परमेस्सर तू पचन्क रहइ बरे देत ह।

### दूसर नेम

22 “अगर तू पचे लखा कि तोहरे पड़ोसी क गइया या भेड़ी खुली बाटइ, तउ तू पचन्क एहसे लापरवाह नहीं होइ चाही। तू पचन्क निहचय ही ऐंका मालिक क लगे पहोंचाइ देइ चाही। 2अगर ऐंकर मालिक तोहरे लगे न रहत

होइ या तू ओका नहीं जानत हवा कि उ कउन अहइ तउ तू उ गइया या भेड़ी क आपन घरे लइ जाइ चाही अउर तू ऐंका तब तलक रखा जब तलक मालिक ऐंका हेरत भवा तोहार लगे न आवइ। तब तू पचन्क ओका ओकरे बरे लउटाइ देइ चाही। 3तू पचन्क इहइ तब भी जरूर करइ चाही जब तू पचन्क पड़ोसी क गदहा मिलइ, ओकर ओढ़न मिलई या कउनो चीज पड़ोसी खोइ देत ह। अगर तू पावत ह, तउ तोहका नज़रअन्दाज नहीं रहइ चाही।

4“अगर तोहरे पड़ोसी क गदहा या ओकर गइया सड़क पइ पड़ी होइ तउ ओहसे आँखी नहीं फेरि लेइ चाही। तू पचन्क ओका फुनि उठावइ मैं ओकर मदद करइ चाही।

5“कउनो मेहरारु क कउनो मनई क ओढ़ना नहीं पहिरइ चाही अउर कउनो मनसेधू क कउनो मेहरारु क ओढ़ना नहीं पहिरइ चाही। यहोवा तोहार परमेस्सर ओहसे धिना करत ह जउन अइसा करत ह।

6“कउनो राहे स टहरत समइ तु पचे बृच्छ पइ या भुइँया पइ चिरइयन क घोसला पाइ सकत ह। अगर मादा चिरई आपन बच्चन क संग बइठी होइ या आपन अण्डन पइ बइठी होइ तउ तू पचन्क मादा चिरई क बच्चन क संग नहीं पकड़इ चाही। 7तू पचे बच्चन क आपन बरे लइ सकत ह। मुला तू पचन्क महतारी क तजि देइ चाही। अगर तू पचे इ नेमन क मानत ह तउ तोहरे बरे सब कछू नीक होइ अउर तू लम्बे समइ तलक जिअत रहब्या।

8“जब तू पचे कउनो नवा घर बनावा तउ तू पचन्क आपन छते क चारिहुँ कइँती देवार खड़ी करइ चाही। तब तू पचे कउनो मनई क अपराधी नहीं होब्या अगर उ छते पइ स भहरात ह।

### कछू चीजन जेका एक संग नहीं रखइ चाही

9“तू पचन्क आपन अंगूरे क बगिया में अनाजे क बिअन क नहीं बोवइ चाही। काहेकि अनाज या अंगूर जउन बोवइ भवा बिअन स उगिहीं ओनका अलग रखइ क होइ।

10“तू पचन्क बर्धी अउ गदहा क एक संगे हर जोतइ मैं नहीं लगावइ चाही।

11“तू पचन्क उ ओढ़नन क नहीं पहिरइ चाही जेका अन अउ सूते स एक संग बुना भवा होइ। 12“तू पचन्क आपन पहिरा जाइवाला चोगा क चारिहुँ कोनन पइ फुंदनन जरूर लगावइ चाही।

### बियाह क नेम

13“अगर एक मनई कउनो लइकी स बियाह करइ अउर ओसे तने स सम्बन्ध करइ। तब होइ सकत ह। उ फइसला करत ह कि उ ओका पसन्द नहीं अहइ। 14उ झूठ बोलि सकत ह अउर कह सकत ह, ‘मई उ मेहरारु स बियाहेउँ, मुला जब हम पचे तने स सम्बन्ध कियेउँ तब मालूम भवा कि उ कुआँरी नहीं अहइ।’ ओकरे खिलाफ अइसा सरमनाक बात कहइ पइ लोग उ मेहरारु क सम्बन्ध मैं बुरा विचार रख सकत हीं। 15अगर अइसा होत ह तउ बिटिया क महतारी अउर बाप क इ बात क सबूत सहर क फाटक जगह पइ नगर-प्रमुखन क लगे लिआवइ चाही कि बिटिया कुआँरी

रही। 16 लड़की क बाप क नगर-प्रमुखन स कहइ चाही, 'मई आपन बिटिया क उ मनई क पत्नी होइ बरे दिहेउँ, मुला अब उ ओका नहीं चाहत।' 17 इ मनई मोरी बिटिया क खिलाफ झूठ बोलेस ह। उ कहेस, "मई तोहार बिटिया क कुआँरी नाही पावइ ह। मुला इ मोर बिटियन क कुआँरिपन क सबूत अहइ। तब उ पचे उ ओढ़ना\* क नगर-प्रमुखन क देखइहीं।" 18 तब नगर-प्रमुख उ मनई क लेइहीं अउर ओका सजा देइहीं। 19 उ पचे ओह पइ सौ चाँदी क सेकेल क जुर्माना करिहीं। उ पचे उ रुपिया क लड़की क पिता क देइहीं काहेकि ओकर भतार एक इस्त्राएली बिटिया पइ कलंक लगाएस ह अउर बिटिया उ मनई क पत्नी बनी रही। उ आपन पूरी जिन्नगी ओका तलाक नहीं दइ सकत।

20 "मुला जउन बातन भतार आपन पत्नी क बारे में कहेस उ सबइ फुर होइ सकत हीं। पत्नी क महतारी-बाप क लगे इ सबूत नहीं होइ सकत कि बिटिया कुआँरी रही। 21 अगर अइसा होत ह तउ नगर-प्रमुख उ बिटिया क ओकरे बाप क दुआरे पइ लइ अइहीं तब नगर क मनई ओका पाथर स मार डइहीं। काहेकि उ इस्त्राएल में लज्जावाली बात किहस। उ आपन बाप क घरे में रंडी जइस बेउहार किहस ह। तू पचन्क आप लोगन में स हर बुराई क दूर करइ चाही।

### जिनाखोरी क पाप

22 "अगर कउनो मनई कउने दूसरे क पत्नी क संग तने क सम्बन्ध करत भवा पावा जात ह तउ दुइनउँ मारा जाब्या, उ मेहरारू अउ उ मनसेधु जउन ओकर संग तने क सम्बन्ध किहस ह। तू पचन्क इस्त्राएल स इ बुराई दूर करइ चाही। 23 "कउनो मनई कउनो उ कुआँरी बिटिया स मिल सकत ह जेकर दूसरे स पक्का होइ चुका अहइ। उ ओकरे संग तने क सम्बन्ध भी कइ सकत ह। अगर सहर में अइसा होत ह तउ 24 तू पचन्क ओन दुइनउँ क उ सहर क बाहेर फाटक पइ लावइ चाही अउर तू पचन्क ओन दुइनउँ क पाथरन स मारि डवइ चाही। तू पचन्क मनई क एह बरे मारि डवइ चाही कि उ दूसर क पत्नी क संग तने क सम्बन्ध किहस अउर तू पचन्क बिटिया क एह बरे मारि डवइ चाही कि उ सहर में रही अउर उ मदद बरे पुकार नहीं किहस। तू पचन्क आपन लोगन में स इ बुराई भी दूर करइ चाही।

25 "मुला कउनो मनई मैदानन में, बियाह क सगाई पक्की भइ बिटिया क पकड़ लेत ह अउर ओसे बल लगाइके तने क सम्बन्ध करत ह तउ अकेला उ जरूर मनई क मारि डवइ चाही। 26 तू पचन्क बिटिया क संग कछू भी नहीं करइ चाही काहेकि उ अइसा कछू भी अपराध नहीं किहस जउन ओका मउत क सजा क काबिल बनावत ह। इ मामला वइसा ही अहइ जइसा कउनो मनई क निर्दोख मनई पइ आक्रमण अउ ओकर कतल करतह। 27 उ मनई बियाह क सगाई पक्की कीन्ह भइ बिटिया क मैदान में धरेस। बिटिया

**ओढ़ना** अक्सर मेहरारू क संग पहिले तने क सम्बन्ध क समइ में भितरे क झिझी फटि जाइसे तनिक रक्त आवत ह। दुलहिन अपने बियाहे क रात क बिछउना क ओढ़ना क इ सिद्ध करइ बरे राखत रही कि उ बियाहे क समइ कुआँरी रही।

मदद बरे गोहार लगाएस, मुला कउनो ओकर मदद करइवाला नहीं रहा।

28 "कउनो मनई कउनो कुआँरी बिटिया जेकर बरिच्छा नहीं भइ अहइ, क धइ लेत ह अउर ओका आपन संग बल स तने क सम्बन्ध करइ क मजबूर कइ सकत ह। अगर उ परगट होइ जात ह, 29 तउ ओका बिटिया क बाप क पचास सेकेल चाँदी देइ चाही अउर बिटिया ओकर पत्नी होइ जाइ। काहेकि उ ओकरे संग तने क सम्बन्ध किहस। उ ओका पूरी जिन्नगी तलाक नहीं दइ सकत।

30 "कउनो मनई क आपन सौतेली महतारी क संग सादी कइके आपन बाप पइ कलंक नहीं लगावइ चाही।"

### उ सबइ लोग उपासना में सामिल होइ सकत हीं

**23** "इ सबइ लोग इस्त्राएल क लोगन क संग यहोवा क उपासना करइ बरे नहीं आइ सकतेन: उ मनई जउन आपन क बधिया कराइ लिहस ह, उ मनई जउन आपन जनन अंग कटवाइ लिहस ह 2या उ मनई जउन बिना बियाहे भए महतारी-बाप क सन्तान होइ। इ मनई क परिवार क कउनो मनई दसई पीढ़ी तलक भी यहोवा क लोगन में यहोवा क उपासना करइ बरे नहीं गना जाइ सकत।

3 "कउनो अम्मोनी या मोआबी यहोवा क लोगन स सम्बन्ध रखत भवा नहीं होइ सकत अउर दस पीढ़ियन तलक ओनकर कउनो सन्तान भी यहोवा क लोगन क हींसा यहोवा क उपासना करइ बरे नहीं बन सकत। 4 काहेकि अम्मोनी अउर मोआबी लोग मिस्त्र स बाहेर आवइ क जात्रा क समइ तू लोगन क रोटी अउ पानी देइ स इन्कार किहे रहेन। उ सबइ यहोवा क लोगन क हींसा एह बरे भी नहीं होइ सकतेन काहेकि उ पचे बिलाम क तू पचन्क अभिसाप देइ बरे मुकरर किहे रहेन। (बिलाम अरम्महरैम में पतोर सहर क बोर क पूत रह।) 5 मुला यहोवा परमेस्सर बिलाम क एक नहीं सुनेस। यहोवा अभिसाप क तोहरे बरे बरदान में बदल दिहस। काहेकि यहोवा तोहार परमेस्सर तू पचन्स पिरेम करत ह। 6 तू पचन्क अम्मोनी अउ मोआबी लोगन क संग सान्ति रखइ क कोसिस कबहुँ नहीं रखइ चाही। जब तलक तू लोग रहा, ओनसे मिताइं जिन राखा।

### इ सबइ जेका इस्त्राएलियन क अपने में मिलावइ चाही

7 "तू पचन्क एदोमी स घिना नहीं करइ चाही। काहेकि उ तोहार सभ्बंधी अहइ। तू पचन्क कउनो मिस्त्री स घिना नहीं करइ चाही। काहेकि ओनके देस में तू पचे अजनबी रह्या। 8 एदोमी अउर मिस्त्री लोगन स पइदा तीसरी पीढ़ी क गदेलन यहोवा क लोगन क हींसा बन सकत हीं।

### फउज क छाउनी क स्वच्छ रखब

9 "जब तोहार फउज दूस्मन क खिलाफ जाइ, तब तू पचे ओन सबहिं चीजन स दूर रहा जउन तू पचन्क बे पवित्तर बनावत हीं। 10 अगर कउनो अइसा मनई अहइ जउन इ कारण पवित्तर नहीं अहइ कि रात में सपनदोस होइ गवा बाटइ तउ ओका छाउनी क बाहेर चला जाइ चाही। ओका



छाउनी स दूर रहइ चाही। 11मुला जब साँझ होइ तब उ मनई क पानी स नहाइ चाही अउर जब सूरज बूडइ तब ओका छाउनी में आवइ चाही।

12“तू पचन्क छाउनी क बाहेर दिसा फरागत बरे जगह बनवइ चाही। 13अउर तू पचन्क आपन हथियार क संग खनइ बरे एक ठु खन्ती रखइ चाही। एह बरे जब तू पचे फरागत करब्या तब तू एक ठु गड़हा खना अउर ओका ढाँकि द्या चाही। 14काहेकि यहोवा तोहार परमेस्सर तोहरे डेरन में दुस्मनन क हरावइ मैं तोहार मदद करइ बरे तोहरे संग अहइ। एह बरे डेरा पवित्तर रहइ चाही। तब यहोवा तू पचन में कछू भी अनुचित न लखी अउर तोहे सबन्स आँखी न फेरी।

### दूसर नेम

15“अगर कउनो दास आपन मालिक क हिआँ स पराइके तोहरे लगे आवत ह तउ तू पचन्क उ दास क ओकरे मालिक क नहीं लउटावइ चाही। 16इ दास तोहरे संग जहाँ चाहे हुआँ रहि सकत ह। उ जउने भी सहर क चुन लेइ ओहमाँ रहि सकत ह। तू पचन्क ओका परेसान नहीं करइ चाही।

17“कउनो इस्त्राएली मेहरारु या मनसेधू क कबहुँ देवदासी या देवदास नहीं बनइ चाही। 18देवदास या देवदासी क कामावा भवा धन तोहरे परमेस्सर क मन्दिर में नहीं लिआवा जाइ चाही। कउनो मनई दीन्ह भाए बचन क कारण यहोवा क दीन्ह जाइवाली चीज क बरे इ धने क उपयोग नहीं कइ सकत। यहोवा तोहार परमेस्सर सबहिँ मन्दिरन क देवदास-देवदासियन स घिना करत ह।

19“अउर तू पचे कउनो इस्त्राएली क उधार द्या तउ तू पचे ओह पइ बियाज जिन ल्या। तू पचे उधार में लीन्ह गवा सिक्कन, भोजन या कउनो अइसी चीज पइ बियाज में न ल्या। 20तू पचे बिदेसियन स बियाज लइ सकत ह। मुला तू पचन्क दूसर इस्त्राएली स बियाज नहीं लेइ चाही। अगर तू पचे इ नेमन क मनब्या तउ यहोवा तोहार परमेस्सर उ देस में, जहाँ तू पचे रहइ जात अहा, जउन कछू तू पचे करब्या ओहमाँ आसीस देइ।

21“जब तू पचे यहोवा आपन परमेस्सर क बचन द्या, तउ जउन तू पचे देइ क कहा ओन सब क देइ मैं ढीला जिन हवा। अगर तू बचन दीन्ह गइ चीजन क नहीं देब्या तउ पाप क अपराध करब्या। यहोवा तोहार परमेस्सर चाहत ह कि तू निहचय ही आपन वचन क जरूर पूरा करा। 22अगर तू बचन नहीं देब्या तउ तू पचे पाप नहीं करत अहा। 23मुला तू पचन्क उ चीजन क करइ चाही जेका करइ बरे तू पचे कह्या ह कि तू करब्या। जब तू पचे अजादी स यहोवा आपन परमेस्सर क बचन द्या तउ, तू पचन्क बचन दीन्ह गइ बात क पूरी करइ चाही।

24“अगर तू दूसर मनई स अंगूर क बगिया स होइके जात अहा, तउ तू जेतना चाहा ओतना अंगूर खाइ सकत ह। मुला तू कउनो अंगूर आपन टोकरी में नहीं रख सकब्या। 25जब तू दूसर क पका भवा अनाज क फसल क खेते स होइके जात अहा तउ तू आपन हाथे स जेतना उजारा, खाइ

सकत ह। मुला तू हँसिया क उपयोग दूसर क अनाज क काटइ अउर लेइ बरे नहीं कइ सकत्या।

24 “जदि कउनो मनई कउनो मेहरारु स बियाह करत ह, अउर उ मेहरारु ओका खूस नहीं करत ह, काहेकि उ मनई उ मेहरारु में कछू असलीलता पावत ह, तउ उ ओक तलाक पत्र दइ सकत ह अउर ओका आपन घरे स पठइ देइ सकत ह। 2जब उ ओकर घर तज दिहेस ह तउ उ दूसर मनई क लगे जाइके ओकर पत्नी होइ सकत ह। 3-4मुला मान ल्या कि नवा भतार भी ओका पसन्द नहीं करत अउर ओका बिदा कइ देत ह। अगर उ मनई ओका तलाक देत ह तउ भी पहला भतार ओका फुन स पत्नी क रूप में नहीं राखि सकत या अगर नवा भतार मरि जात ह तउ भी पहिला भतार ओका फुन पत्नी क रूप में नहीं रख सकत ह। उ दूसित होइ चुकी बाटइ। अगर उ ओसे बियाह करत ह तउ उ अइसा काम करी जेहसे यहोवा घिना करत ह। तू पचन्क उ देस में अइसा पाप नहीं लावइ चाही जेका यहोवा तोहार परमेस्सर तू पचन्क रहइ बरे दइ देत अहइ।

5“नवा बियाहा क फउज में नहीं पठवइ चाही अउर ओका कउनो दूसर खास काम भी नहीं देइ चाही। काहेकि एक बरिस तलक ओका घरे पइ रहइ क अजाद होइ चाही अउर आपन नई पत्नी क सुखी बनावइ चाही।

6“अगर कउनो मनई क तू कर्ज द्या तउ गिरवी क रूप में ओकर आटा पीसइ क जाँत क कउनो पाट न रखा। काहेकि अइसा करब ओका खइया करइ के तू ओकर जिन्गी क जरिया लइ लेब्या।

7“अगर कउनो इस्त्राएली मनई दूसर इस्त्राएली मनई क अपहरण करत ह जउन ओकरे देस क अहइ अउर ओकरे संग दूरव्यवहार करत ह या ओका बेच लेत ह तउ अपहरण करइवाला जरूर मारा जाइ चाही। इ तरह तू आपन बीच स इ बुराई क दूर करब्या।

8“अगर तू पचन्क कोढ़ होइ जाइ तउ तू पचन्क लेवी बंसी याजकन क दीन्ह गइ सारी सिच्छा अंगीकार करइ मैं होसियार रहइ चाही। तू पचन्क होसियारी स ओन सबइ आदेसन क मानइ चाही जेनका देइ बरे मईँ याजकन स कहेउँ ह। 9इ याद राखा कि यहोवा तोहार परमेस्सर मिरियम क संग का किहेस जब तू पचे मिस्र स बाहेर निकरइ क जात्रा पइ रह्या।

10“जब तू पचे कउनो मनई क कउनो तरह क कर्ज द्या तउ ओकरे घरे मैं ओकर घरेलू सामान क, गिरवी रखी चीज लेइ बरे जिन जा। 11तू पचन्क बाहेर ही खड़ा रहइ चाही। तब उ मनई, जेका तू पचे कर्ज दिहा ह, तोहारे लगे गिरवी रखी गइ चीज लिआइ। 12अगर उ गरीब अहइ तउ उ आपन वस्त्रन क दइ देइ, जेहसे उ आपन क गरम रख सकत ह। तू पचन्क ओकर गिरवी रखी चीज रात क नहीं रखइ चाही। 13तू पचन्क हर एक साँझ क ओकर गिरवी धरी चीज क लउटाइ देइ चाही। तब उ आपन ओढ़नन मैं स सोइ सकी। उ तोहार एहसानमंद रही अउर यहोवा तोहार परमेस्सर इ लखी कि तू इ अच्छा काम किह्या ह।

14“तू पचन्क कउनो गरीब अउ जरूरतवाला मजूर पइ अत्याचार नाही करइ चाही। एकर कउनो महत्व नहीं कि उ

तोहार साथी इस्त्राएली बाटइ या उ कउनो बिदेसी अहइ जउन तोहरे सहरन में स कउनो एक में उ रहत बाटइ। 15सूरज बूड़इ स पहिले हर रोज ओकर मजूरी दइ द्या। काहेकि उ गरीब अहइ अउर उहइ धने पइ ओका सहारा अहइ। अगर तू ओकर भुगतान नहीं करत्या तउ उ यहोवा स तोहरे खिलाफ सिकाइत करी अउर तू पचे पाप करइ क अपराधी होब्या। 16“गदेलन क जरिये कीन्ह गए कउनो अपराध बरे बाप क मउत क सजा नहीं दीन्ह जाइ सकत। अउर गदेलन क बाप क जरिये कीन्ह गए अपराध बरे मउत क सजा नहीं दीन्ह जाइ सकत। कउनो मनई क ओकरे खुद क अपराध बरे ही मउत क सजा दीन्ह जाइ सकत ह।

17“तू पचन्क प्रवासी अउ अनाथन क संग गलत फइसला नाही करइ चाही। तू पचन्क रँडि मेहररु स ओकर ओढ़ना कबहुँ भी गिरवी रखइ क बरे नहीं लेइ चाही। 18तू पचन्क सदा सुमिरइ चाही कि तू पचे मिस्र में दास रह्या। इ जिन बिसस कि यहोवा तोहार परमेस्सर तू पचन्क हुआँ स बाहेर लिआवा। इहइ कारण अहइ कि मई तू पचन्क इहइ करइ क आदेस देत अहउँ।

19“तू पचे आपन खेत क फसल बटोरत रहि सकत ह अउर तू पचे तनिक भूलचूक स हुआँ छोड़ि सकत ह। तू पचन्क ओका लेइ नहीं चाही। इ प्रवासियन, अनाथन अउर रँडि मेहररुअन बरे होइ। अगर तू पचे ओनके बरे कछू अन्न छोड़त ह तउ यहोवा तोहार परमेस्सर तू पचन्क ओन सबहि कामन में असीसी जउन तू पचे करब्या। 20जब तू पचे आपन जइतून क बृच्छन स फली झरब्या तउ तू पचन्क डारन क फुन जाँच करइ नहीं जाइ चाही। जउन जइतून तू पचे ओहमाँ तज देब्या उ बिदेसियन, अनाथन अउर रँडि मेहररुअन बरे होइ। 21जब तू पचे आपन अंगूरे क बगियन स अंगूर बटोरब्या तब तू पचन्क ओन अंगूर क लेइ नहीं जाइ चाही जेनका तू पचे तजि दिहे अहा। उ सबइ अंगूर बिदेसियन, अनाथन अउर रँडि मेहररुअन बरे होइहीं। 22याद राखा कि तू पचे मिस्र में दास रह्या। इहइ कारण अहइ कि तू पचन्क इ करइ क आदेस देत अहउँ।

**25** “अगर दुइ मनइयन में झगड़ा होइ तउ ओनका अदालत में जाइ चाही। निआवाधीस ओनके मोकदमा क फइसला करिही। ओनका निर्दोष क रिहा अउ दोसी क सजा देइ चाही। 2अगर अपराधी मनई पीटा जाइ जोगग अहइ तउ निआवाधीस ओका मुँहे क बल ओलारी। ओका निआवाधीस क समन्वा ओकरे अपराध क अनुसार ओतनी दाई पीटा जाइ चाही जेतना दाई उचित होइ। 3कउनो मनई क चालीस दाई तलक पीटा जाइ सकत ह, मुला ओसे जियादा नहीं। अगर उ ओहसे जियादा बार पीटा जात ह तउ एहसे पता चली कि उ मनई क जिन्नगी तोहरे बरे महत्वपूर्ण नहीं।

4“जब तू पचे अन्न क अलगावइ बरे गोरुअन क उपयोग करा तब ओनका खाइ स रोकइ बरे ओनके थूथन क जिन बाँधा।

5“अगर दुइ भाई एक संग रहत होइँ अउर ओनमाँ स एक ठुलाओलाद मरि जाइ तउ मरे भए भाई क पत्नी क बियाह परिवार क बाहेर कउनो अजनबी स नहीं होइ चाही।

ओकरे भतारे क भाई क ओका पत्नी क रूप में लइ चाही अउर ओकर लगे जाइ चाही अउर ओकरे बरे भतार क भाई क कर्तव्य पूरा करइ चाही। 6तब जउन पहिलौटी पूत ओसे पइदा होइ उ मनई क मरे भाई क जगह लेइ। तब मरे भाई क नाउँ इस्त्राएल स बाहेर नहीं कीन्ह जाइ। 7अगर उ मनई आपन भाई क पत्नी क अंगीकार करइ नहीं चाहत, तब भाई क पत्नी क बइठकवाली जगह पइ नगर-प्रमुखन क लगे जाइ चाही। ओकरे भाई क पत्नी क नगर प्रमुखन स कहइ चाही, ‘मोरे भतार क भाई इस्त्राएल में आपन भाई क नाउँ बनाए रखइ स इन्कार करत ह। उ मोरे बरे आपन भाई क कर्तव्य क पूरा नहीं करी।’ 8तब नगर-प्रमुखन क उ मनई क बोलावइ चाही अउ ओसे बात करइ चाही। अगर उ मनई जिद्दी अहइ अउर कहत बाटइ, ‘मई ओका अंगीकार करइ नहीं चाहत हउँ।’ 9तब ओकरे भाई क पत्नी नगर प्रमुखन क समन्वा ओकरे लगे आवइ। उ ओकरे गोड़ स पनही उतारि लेइ अउर ओकरे मुँहे पइ थूकइ। ओका कहइ चाही, ‘इ उ मनई क कीन्ह जात इ कारज अहइ कि उ आपन भाई क परिवार न बसाइ।’ 10तब उ भाई क परिवार, बुलावा जाब्या, ‘उ मनई क परिवार जउन आपन जूता पनही, उतार दिहस।’

11“दुइ मनई आपुस में झगड़ सकत हीं। ओनमाँ एक क पत्नी आपन भतारे क मदद करइ आइ सकत ह। मुला ओका दूसर मनई क गुप्त अंगन क नहीं धरइ चाही। 12अगर उ अइसा करत ह तउ ओकर हाथ काट डवा, ओकरे बरे दुःखी जिन हवा।

13“लोगन क धोखा देइ बरे जाली बटरखरा जिन रखा। ओन बटरखरन क उपयोग जिन करा जउन असली वजन स कमती या जियादा होइँ। 14आपन घरे में ओन नाप जोख क न रखा जउन सही नाप जोख स बहोत बड़ा या बहोत नान्ह न होइँ। 15तू पचन्क ओन बटरखरन अउ नाप-जोख क बइपरइ चाही जउन सही अउर ईमानदारी क परिचायक अहइ। तू पचे उ देस में लम्बी उमिरवाला होब्या जेका यहोवा, तोहार परमेस्सर तू पचन्क देत अहइ। 16यहोवा तोहार परमेस्सर ओनसे घिना करत ह जउन जाली बटरखरा अउर नाप जोख बइपरिके धोखा देत बाटेन। हाँ, उ सबइ ओन सबहि लोगन स घिना करत ह जउन बेईमानी करत हीं।

### अमालेक क लोगन्क नस्ट कइ देइ चाही

17“तू पचन क याद करइ चाही कि जब तू पचे मिस्र छोड़ेस तब अमालेक क लोग तोहरे संग का किहेन। 18अमालेक क लोग परमेस्सर क सम्मान नहीं किहन। उ पचे तू पचन्क पइ पाछे स तब हमला किहन जब तू पचे थका भवा अउर कमजोर रह्या। उ पचे तोहरे ओन सब लोगन्क मार डापन जउन सुस्त होइके पीछे चलत रहेन। 19एह बरे तू लोगन्क अमालेक क लोगन्क याद क संसारे स मेट देइ चाही। इ तू लोग तब करब्या जब उ देस में जाब्या जेका यहोवा तोहार परमेस्सर तू पचन्क देत अहइ। हुआँ उ पचे तू सबन्क चारिहुँ कइँती क दुस्मनन स छुटकारा दिअइहीं। मुला अमालेकियन क नास करब जिन बिसरा।

### पहिली फसिल क बारे में नेम

**26** “तू पचे हाली ही उ देस में घुसब्या जेका यहोवा तोहार परमेस्सर तू पचन्क रहइ बरे देत अहइ। जब तू पचे हुआँ क भुईया पइ कब्जा कइ ल्या अउ ओह पइ रहइ लाग्या, 2तब तू पचन्क आपन क तनिक फसिल लेइ चाही अउर ओका एक टोकरी में धरइ चाही। उ पहिली फसिल होइ जेका तू पचे उ देस स पउब्या जेका यहोवा तोहार परमेस्सर तू पचन्क दइ देत अहइ। तनिक पहिली फसिल वाला टोकरी क ल्या अउर उ ठउर पइ जा जेका यहोवा तोहार परमेस्सर चुनी। 3उ समइ सेवा करइवाला याजक क लगे तू पचन्क जाई चाही अउर ओहसे कहइ चाही, ‘आजु मई यहोवा आपन परमेस्सर क लगे इ एलान करत हई कि हम पचे उ देस में आवा अही जेका यहोवा हम लोगन क देइ बरे हमरे पुरखन क बचन दिहे रहा।’

4“तब याजक टोकरी क तोहरे हाथे स लेइ। उ एका यहोवा तोहरे परमेस्सर क वेदी क समन्वा रखी। 5तब तू पचे यहोवा आपन परमेस्सर क समन्वा इ कहब्या: ‘मोर पुरखा घुमक्कड़ अरामी रहा।\* उ मिस्र पहोंचा अउर हुआँ रहा। जब उ हुआँ गवा तब ओकरे परिवार में बहोत कम लोग रहेन। मुला मिस्र में उ एक सक्तीवाला बहोत स मनइयन वाला महान रास्ट्र बन गवा। 6मिस्रियन हम लोगन क संग बहोतइ बुरा बेउहार किहन। उ हम लोगन क मुसीबत में डाइ दिहेन अउ कठिन कारज करइ बरे निश्चित किहेन। 7तब हम पचे यहोवा आपन पुरखन क परमेस्सर स पराथना कीन्ह अउर ओनका गोहार लगाएन यहोवा हमरउ सुनेस अउर उ हम लोगन्क परेसानियन, हमरे कठोर काम अउ अत्याचार क लखेस। 8तब यहोवा हम लोगन्क आपन प्रबल सक्ती अउ मजबूती स मिस्र स बाहेर लइ गवा। उ डरावना बातन, महान चमत्कारन अउ अचरजन कर्म किहस। 9इ तरह हम लोगन्क इ ठउरे पइ लिआवा। उ दूध अउर सहद बहत भवा देस हम पचन्क दिहस। 10यहोवा, अब मई उ देस क पहिली फसिल तोहरे लगे लिआएँ ह जेका तू मोका दिह्या ह।’

“तब तू पचन्क यहोवा आपन परमेस्सर क समन्वा रखइ चाही अउर तू पचन्क ओका निहुर करइ चाही। 11तब तू पचे ओन सब नीक चीजन्क क आनन्द स भोग कइ सकत ह जेका यहोवा तोहार परमेस्सर तू पचन्क अउर तोहरे परिवार क दिहस ह। लेवी बंसी अउर उ सबइ प्रवासी जउन तोहरे बीच रहत ही तोहरे संग इ चीजन्क आनन्द लइ सकत हीं।

12“जब तू पचे दसवाँ हींसा जउन तीसरे बरिस (दसवाँ हींसा क बरिस) तोहरी फसिल क दीन्ह जाइ क अहइ, दइ चुका तब तू पचन्क लेवी बंसियन, बिदेसियन, अनाथन अउर रॉइ मेहररुअन क एका दइ देइ चाही। तब हर एक सहर में उ पचे खाइ सकत हीं अउर सन्तुदठ कीन्ह जाइ सकत हीं। 13तू पचे यहोवा आपन परमेस्सर स कहब्या, ‘मई आपन घरे स आपन फसिल क पवित्तर हींसा दसवाँ हींसा बाहेर निकारि दिहेँ ह। मई एका ओन सबहिं लेवी बंसियन, बिदेसियन, अनाथन अउर रॉइ मेहररुअन क दइ दिहेँ ह। जइसा तू

मोका आदेस दिहेस रहा मई एका ओन सबहिं अदेसन क मानइ स इन्कार नाहीं किहेँ ह। मई ओनका बिसरेँ नाहीं। 14मई इ भोजन तब नाहीं किहेँ जब मई सोक मनावत रहेँ। मई इ अनाज क तब अलग नाहीं किहेँ जब मई असुद्ध रहेँ। मई इ अनाजे में स कउनो हींसा मरे मनई बरे नाहीं दिहेँ ह। मई यहोवा हमार परमेस्सर क आग्या क मानेँ ह। मई उ सब कछू किहेँ ह जेकरे बरे तू आग्या दिह्या ह। 15तू आपन पवित्तर आवास सरग स खाले निगाह डवा अउर आपन लोगन, इस्राएलियन क आसीबाद द्या जेका तू हम लोगन्क वइसा ही दिह्या ह जइसा तू हमरे पुरखन क बढिया चीजन्स भरा-पूरा देस देइ ल बचन दिह्या रह्या।

### यहोवा क हुकुमन पइ चला

16“आजु यहोवा तोहार परमेस्सर तू पचन्क आदेस देत अहइ कि तू पचे इ सबइ बिधियन अउ नेमन क माना। आपन पूरा हिरदय अउर आपन पूरी आतिमा स एनका मानइ बरे होसियार रहा। 17आजु तू पचे इ कह्या ह कि यहोवा तोहार परमेस्सर अहइ। तू लोग बचन दिहा ह कि तू पचे ओकरे रहे पइ चलब्या, ओकरे हुकुमन, आदेसन अउर नेमन क मनब्या। तू पचे कह्या ह कि तू पचे उ सब कछू करब्या जेका करइ बरे उ कहत ह। 18आजु यहोवा तू पचन्क आपन लोग क रूप स्वीकार किहेस। अउर तोहका आपन मूल्यवान सम्पत्ति बनाइ बरे बचन दिहस ह। अउर तू पचन्क ओकरे सब आदेसन क मानइ चाही। 19यहोवा तू पचन्क ओन सबहिं रास्ट्रन स महान बनाई जेनका उ बनाएस ह। उ तू पचन्क तारीफ, जस अउर गौरव देइ अउर तू पचे ओकर खास लोग होब्या, जइसा उ बचन दिहेस ह।”

### नेमन पाथरन पइ लिखा जाइ चाही

**27** मूसा अउर इस्राएल क प्रमुखन मनइयन क आदेस दिहस। उ कहेस, “ओन सबहिं आदेसन क माना जेनका मई आजु देत हई। 2जउने दिन तू यरदन नदी पार कइके उ देस में घुसा जेका जेका यहोवा तोहार परमेस्सर तू पचन्क देत अहइ उ दिन, आपन बरे बहोत बड़की सिलन क तइयार करा। इ सबइ सिला क पलसतर स ढाँकि द्या। 3तब इ उपदेस क सब बातन इ पाथरन पइ लिखी द्या। तू पचन्क इ तब करइ चाही जब तू पचे यरदन नदी क पार पहोंच जा। तब उ देस में जाइ सकब्या जउन में दूध अउर सहद बहत अहइ जेका यहोवा तोहार परमेस्सर तू पचन्क देत अहई। यहोवा तोहरे पुरखन क परमेस्सर एँका दइके आपन बचन क पूरा किहस ह।

4“यरदन नदी क पार जाइके पाछे तू पचन्क इ सिलन क एबाल पहाड़े पइ आजु क मोरे आदेस क मुताबिक स्थापना करइ चाही। तू पचन्क इ पाथरन क चूना क लेप स ढाँकि देइ चाही। 5हुआँ पइ यहोवा आपन परमेस्सर क वेदी बनावइ बरे भी कछू सिला क उपयोग करा। पाथरन क काटइ बरे लोहा क अउजारन क उपयोग जिन करा। 6तू पचन्क यहोवा आपन परमेस्सर क वेदी पूरा पाथरन स बनाववा अउर तब यहोवा आपन परमेस्सर बरे एह पइ होमबलि चढ़ावा।

**मोर ... अरामी रहा** हिआँ इ सबइ इब्राहीम, इसहाक या साइद याकूब होइ सकत ह।

7तोहका मेलबलि चढ़ावइ चाही अउर ओनका खाइ चाही। खा अउर यहोवा आपन परमेस्सर क मौजूदगी में खुसी क समइ बितावा। 8तू पचन्क इ सबइ उपदेसन क पाथर क सिलन पइ साफ साफ लिखि देइ चाही।”

### नेम क अभिसाप

9मूसा अउर लेवी बंसी याजकन इस्राएल क सबहि लोगन स बात किहस। उ कहेस, “इस्त्राएलियो, सान्त रहा अउ सुना! आजु तू लोग, यहोवा आपन परमेस्सर क लोग होइ गवा। 10एह बरे तू पचन्क उ सब कछू जरूर करइ चाही जउन यहोवा तोहार परमेस्सर कहत ह। तू पचन्क ओकरे ओन आदेसन अउ नेमन क जरूर मानइ चाही जेनका मई आजु तू पचन्क दइ देत हउँ।”

11उहइ दिन, मूसा लोगन क आदेस दिहेस, 12“जब तू पचे यरदन नदी क पार जाब्या ओकरे पाछे इ सबइ परिवार समूह गिरिज्जीम पहाड़े पइ खड़ा होइ के लोगन्क आसीबादि देइहीं: सिमोन, लेवी, यहूदा, इस्साकार, यूसुफ अउ बिन्यामीन। 13अउर इ सबइ परिवार समूह एबाल पहाड़े पइ अभिसाप बाँचिहीं: रूबेन, गाद, आसेर, जबूलून, दान अउर नप्ताली।

14“अउर लेवी बंसी इस्राएल क सबहि लोगन स ऊँची अवाजे में कइँहीं: 15‘उ मनई अभिसाप स दबा बा जउन लबार देवता बनावत ह अउर ओका गुप्त ठउरे में धरत ह। लबार देवतन सिरिफ उ सबइ मूर्तियन अहइँ जेका कउनो कारीगर काठ, पाथर या धातु क बनावत ह। यहोवा ओन चीजन स घिना करत ह!’

“तब सबहि लोग जवाब देइहीं, ‘आमीन!’

16“लेवी बंसी कइँहीं, ‘उ व्यक्ति अभिसापित अहइ जउन आपन महतारी अउर बाप क बेज्जत करत ह।’

“सबहि लोग जवाब देइहीं, ‘आमीन!’

17“लेवी बंसी कइँहीं: ‘उ व्यक्ति अभिसापित अहइ जउन आपन पड़ोसी क चउहदूदी-चीन्हा क खिसकावत ह।’

“तब सबहि लोग कइँहीं, ‘आमीन!’

18“लेवी बंसी कइँहीं: ‘उ व्यक्ति अभिसापित अहइ जउन आँधर क कुमार्ग पर चलावत ह।’

“तब सबहि लोग कइँहीं, ‘आमीन!’

19“लेवी बंसी कइँहीं: ‘उ व्यक्ति अभिसापित अहइ जउन बिदेसियन, अनाथन अउर रौँड मेहररुअन क संग निआव नहीं करत।’

“तब सब लोग कइँहीं, ‘आमीन!’

20“लेवी बंसी कइँहीं: ‘उ व्यक्ति अभिसापित अहइ जउन आपन बाप क पत्नी क संग तने क सम्बंध रखत ह काहेकि उ आपन बाप क नंगा क तरह करत ह।’

“तब सबहि लोग कइँहीं, ‘आमीन!’

21“लेवी बंसी कइँहीं: ‘उ व्यक्ति अभिसापित अहइ जउन कउनो तरह क जनावर क संग तने क सम्बंध रखत ह।’

“तब सबहि लोग कइँहीं, ‘आमीन!’

22“लेवी बंसी कइँहीं: ‘उ व्यक्ति अभिसापित अहइ जउन आपन महतारी क बिटिया या आपन बाप क बिटिया, आपन बहिन क संग तने क सम्बंध रखत ह।’

“तब सबहि लोग कइँहीं, ‘आमीन!’

23“लेवी बंसी कइँहीं: ‘उ व्यक्ति अभिसापित बाटइ जउन आपन सास क संग तने क सम्बंध रखत ह।’

“तब सबहि लोग कइँहीं, ‘आमीन!’

24“लेवी बंसी कइँहीं: ‘उ व्यक्ति अभिसापित अहइ जउन दूसर मनई क लुकाई क कतल करत ह।’

“तब सबहि लोग कइँहीं, ‘आमीन!’

25“लेवी बंसी कइँहीं: ‘उ व्यक्ति अभिसापित अहइ जउन निर्दोख क कतल बरे धन वसूलत ह।’

“तब सबहि लोग कइँहीं, ‘आमीन!’

26“लेवी बंसी कइँहीं: ‘उ व्यक्ति अभिसापित अहइ जउन इ उपदेसन क समर्थन नहीं करत अउर ओका पालन नहीं करत।’

“तब सबहि लोग कइँहीं, ‘आमीन!’”

### आसीबादि

28 “अगर तू पचे यहोवा आपन परमेस्सर क इ सबइ कानून क मानइ मैं होसियार रहब्या अउर ओका सावधानी स पालन करब्या जेनका मई आजु बतावत हउँ तउ यहोवा तोहार परमेस्सर तू पचन्क धरती क सब रास्ट्रन क ऊपर स्नेष्ठ करी। 2अगर तू यहोवा आपन परमेस्सर क आदेसन क मनब्या तउ इ सबइ वरदान तोहरे लगे अइहीं अउर तोहार होइहीं:

3“तोहरे सहरन अउ खेतन क असीसी कीन्ह जाब्या।

4तोहरे गदेलन क आसीबादि दीन्ह जाई। उ तोहरी भुइँया क बढ़िया फसिल क वरदान देइ अउर तोहरे गोरुअन क बच्चन देइ क वरदान देइ। तोहरे लगे बहोत स मवेसी अउर भेड़ होइहीं।

5यहोवा तू पचन्क बढ़िया अनाज क फसिल अउर बहोत जियादा भोजन पावइ क असीसी।

6तू पचन्क आसीबादि दीन्ह जाई जब तू पचन्क आवई अउर जावई।

7“यहोवा तू पचन्क ओन दुस्मनन पइ विजयी बनाई जउन तोहरे खिलाफ होइहीं। तोहार दुस्मन तोहरे खिलाफ एक रस्ता स अइहीं मुला उ पचे तोहरे समन्वा सात ठु राहे मैं पराइ जइहीं।

8“यहोवा तू पचन्क खरिहान क आसीबादि देइ। तू पचे जउन कछू तू करब्या उ ओकरे बरे आसीबादि देइ। उ पचे तोहका उ भुइँया पइ आसीबादि देइ जेका यहोवा तोहार परमेस्सर तोहाका दिहेस ह। 9यहोवा तू पचन्क आपन खास लोग बनाई। यहोवा तू पचन्क इ वचन दिहे अहइ मुला सर्त इ बाटइ कि तू पचे यहोवा आपन परमेस्सर क हुकुमन क माना अउ ओनकइ राहे पइ चला। 10तब धरती क सबहि लोग इ लिखिहीं कि तू पचे यहोवा क नाउँ स जाना जात अहा अउर उ पचे तोहसे सबन्स डेराइ जइहीं।

11“अउर यहोवा तू पचन्क बहोत स बढ़िया चीज देइ। उ तू पचन्क बहोत स गदेलन देइ। उ तू पचन्क बहोत स गोरु अउ बछवन क देइ। उ उ देस मैं बहोत-स बढ़िया फसिल देइ जेका उ पचे तोहरे पुरखन क देइ क वचन दिहे रहन। 12यहोवा सरग मैं आपन भण्डार खोलि देइ। उ आपन वरदान स तोहरी भुइँया बरे ठीक समइ पइ बर्खा देइ। यहोवा

जउन कछू तू पचे करब्या ओकरे बरे आसीबाद देइ अउर बहोत स रास्ट्रन क कर्ज देइ बरे तोहरे पचन्क लगे धन होइ। मुला तू पचन्क ओन से कछू उधार लेइ क जरुरत नाहीं होइ। 13यहोवा तू पचन्क मूँड बनाई, पूँछ नाहीं। तू पचे चोटी पड़ होब्या, तलहटी पड़ नाहीं। इ तब होइ जब तू पचे यहोवा आपन परमेस्सर क ओन आदेसन पड़ धियान देब्या जेनका मईँ आजु तू पचन्क देत अहउँ। 14तू पचन्क ओन सिच्छन मँ स कउनो क उपेच्छा नाहीं करइ चाही जेनका मईँ आजु तू पचन्क देत हउँ। तू पचन्क एँसे दाईँ या बाईँ कइँती नाहीं जाइ चाही। तू पचन्क उपासना बरे दूसर देवतन क पाछे नाहीं चलइ चाही।

### अभिसाप

15“अगर तू यहोवा आपन परमेस्सर क जरिये कही गइ बातन पड़ धियान नाहीं देत्या अउर आजु मईँ जउने आदेसन अउ नेमन क बतावत अहउँ, होसियारी स पालन नाहीं करत्या तउ इ सबइ अभिसाप तू पचन्प अइहीं।

16“तोहका तोहरे सहरन अउर मइदानन मँ अभिसापित कीन्ह जाइ।

17यहोवा तोहरी टोकरियन अउ बर्तनन क अभिसापित करी। अउ तू पचन्क काफ़ी भोजन नाहीं मिली।

18तू पचन्क गदेलन अभिसाप पइहीं। तोहरी धरती क फसलन तोहरे गोरुअन क बछवन अउ तोहरे झुण्डे क बचवन अभिसाप पइहीं।

19तू आपन आवइ अउर जावइ पड़ अभिसापित कीन्ह जाब्या।

20“अगर तू पचे बुरा काम करब्या अउर आपन यहोवा स मुँह फेर लेब्या, तउ तू पचे अभिसाप पउब्या। तू पचे जउन कछू करब्या ओहमँ तू पचन्क क अव्यवस्था अउ फटकार क सामना करइ क होइ। उ इ तब तलक करी जब तलक तू पचे हाली स अउ पूरी तरह स बरबाद नाहीं होइ जात्या। 21अगर तू पचे यहोवा क हुकुम नाहीं मनत्या तउ उ तू पचन्क तब तलक महामारी स दुखी करत रही जब तलक तू उ देस मँ पूरी तरह बरबाद नाहीं होइ जात्या जेहमँ तू पचे रहइ बरे प्रवेस करत अहा। 22यहोवा तू पचन्क रोग स दुखी अउ दुर्बल होइ क दण्ड देइ। तू पचन्क बोखार अउ सूजन होइ। यहोवा तोहरे लगे भयंकर गर्मी पठइ अउर तोहरे हिउँ बर्खा नाहीं होइ। तोहार फसलन गर्मी अउ रोग\* स बरबाद होइ जइहीं। तू पचन्प इ सबइ मुसीबतन तब तलक अइहीं जब तलक तू पचे मर नाहीं जात्या। 23अकासे मँ कउनो बादल नाहीं रही अउर आकास काँसा सरीखा होइ जाइ। अउर तोहरे पचन्क खाले धरती लोहा क सरीखा होइ। 24बर्खा क बदले यहोवा तोहरे पास अकासे स रेत अउ धूरि पठइ। इ तोहे सबन पड़ तब तलक आइ जब तलक तू पचे बरबाद नाहीं होइ जात्या।

### दुस्मन स हार जाइ क अभिसाप

25“यहोवा तोहरे पचन्क दुस्मनन क जरिये तू पचन्क

हराइ। तू पचे आपन दुस्मनन क खिलाफ एक रहे स जाब्या अउर ओनके समन्वा स सात तु रहे स पराइ जाब्या। तोहरे सबन क ऊपर जउन मुसीबतन अइहीं उ सबइ सारी धरती क लोगन क डेरवाइ देइहीं। 26तोहार पचन्क क लहासियन क सबइ जंगली जनावर अउ पछियन क चारा बनिहीं। कउनो मनईँ ओनका डेराइके तोहरी लहासियन स पराइवाला न होइ।

### दूसर रोगन क अभिसाप

27“अगर तू यहोवा क हुकुम क नाहीं मनत्या तउ उ तू पचन्क वइसेन फोड़ा होइ क सजा देइ जइसे फोड़न क उ मिस्री लोगन पड़ पठए रहा। उ तू पचन्क ला-इलाज सूजन, पीड़ा युक्त फोड़न अउ खजुरी स दुःखी करी। 28यहोवा तू पचन्क पागल बनाइके सजा देइ। उ तू पचन्क अँधर बनाइ अउ उलझन मँ डाइ देइ। 29तू पचन्क दिन क प्रकास मँ अँधर क नाईँ आपन राह टटोलइ क होइ। तू पचे जउन कछू करब्या ओहमँ तू पचे असफल रहब्या। लोग तू पचन्प बार बार प्रहार करिहीं अउर तोहार चिजियन क चोरइहीं। तू पचन्क बचावइवाला हुआँ कउनो भी न होइ।

### चीज हेराइ क अभिसाप

30“तोहार बियाह कउनो मेहरारु क संग पक्का होइ सकत ह, मुला कउनो दूसर मनईँ ओकरे संग बलत्कार करी। तू पचे कउनो घर बनाइ सकत ह, मुला तू पचे ओहमँ रहब्या नाहीं। तू पचे अंगूरे क बगिया लगाइ सकत ह, मुला एहसे कछू भी बटोर नाहीं सकत्या। 31तोहार बर्धा तोहरी आँखिन क समन्वा मारा जाइ मुला ओकर कछू भी गोस नाहीं खाइ सकत्या। तोहार पचन्क गदहा तू पचन्स जबरदस्ती हरिके लइ जावा जाइ इ तू पचन्क लउटा नाहीं जाइ। तोहार पचन्क भेड़ तोहरे दुस्मनन क दइ दीन्ह जइहीं। तोहार पचन्क क रच्छक कउनो भी मनईँ न होइ।

32“तोहार पचन्क पूतन अउ बिटियन दूसर जाति क मनइयन क दइ दीन्ह जइहीं। तोहार अखियन गदेलन क निहारइ बरे सारे दिन टकटकी लगाए रइहीं काहेकि तू पचे गदेलन क लखइ चहब्या। मुला तू पचे जोहत जोहत कमजोर होइ जाब्या, तू पचे असहाय होइ जाब्या।

### दूसर अभिसाप

33“उ रास्ट्र जेका तू पचे नाहीं जनत्या, तोहरे पसीना क कमाई क फसिल खाब्या अउ आनन्दित होब्या। तोहार संग सदा दुरव्यवहार अउ दुरुपयोग कीन्ह जाब्या। 34जउन चिजियन क तू लखब तोहका दीवाना बनाइ देब। 35यहोवा तू पचन्क दर्दवाला फोड़न क सजा देइ। इ सबइ फोड़न तोहरे घुटनन अउ गोड़न पड़ होइहीं। उ सबइ तोहरे पचन्क क तलवा स लइके मूँडे क ऊपर तलक फइल जइहीं अउर तोहार पचन्क इ फोड़न भरिहीं जाहीं।

36“यहोवा तू पचन्क अउ तोहरे राजा जेका तू आपन बरे चुनेस ह, क उ रास्ट्र म पठइ जेका तू पचे नाहीं जानत होब्या। तू पचे अउ तोहार पुरखन उ रास्ट्र क कबहुँ नाहीं लखे होइहीं। हुआँ तू पचे काठ अउ पाथर क बने भए दूसर

**रोग** इ हरब रोग होइ सकत ह जेहसे फसलन क बाल पिअर पड़ जात ही अउर ओनमँ दाना आउब रुकि जात ह।

देवतन क पूजब्या। 37जउने देसन में यहोवा तू पचन्क पठइ ओन देसन क लोग तू लोगन पइ आइ भइ मुसीबतन क सुनिके हक्का बक्का रहि जइहीं। उ पचे तोहार हंसी उइइहीं अउर तोहार निन्द करिहीं।

### विफल होइ क अभिसाप

38“तू पचे आपन खेतन में बोवइ बरे जरुरत स जियादा बहोत जियादा बिआ लइ जाब्या। मुला तोहार उपज कमती होइ। काहेकि टिड्डियन तोहार फसिल चाट जइहीं। 39तू पचे अंगूरे क बगिआ लगउब्या अउ ओहमाँ कठिन मेहनत करब्या। मुला तू पचे ओहमाँ स अंगूर बटोरब्या नाहीं अउ न ही ओनसे दाखरस पीब्या। काहेकि ओनका किरवन खाइ लेइहीं। 40तोहरी सारी भुईँआ में जइतून क बृच्छ होइहीं। मुला तू पचे ओकरे कछू भी तेले क उपयोग नाहीं कइ सकब्या। काहेकि तोहरे जइतून क बृच्छ आपन फलन क बरबाद होइ बरे गिराइ देइहीं। 41तोहरे पचन्क पूतन अउ बिटियन होइहीं, मुला तू पचे ओनका आपन लगे नाहीं रख सकब्या। काहेकि उ पचे धरिके दूर लइ जावा जइहीं। 42टिड्डियन तोहरे सबहिँ खेतन अउ फलन क नास कइ देइहीं। 43तोहरे बीच रहइवाले विदेसी जियादा स जियादा सकती बढ़ावत जइहीं अउर तू पचन में जउन भी सकती बाटइ ओका खोवत जाब्या। 44उ पचे तोहका उधार देइ, मुला तू पचन्क ओका उधार देइ क जोगग धन नाहीं होइ। उ पचे मूँडे क नाई होइ। तू पचे पूँछे क नाई बन जाब्या।

### अभिसाप इन्नाएलियन क बरबाद करिहीं

45“इ सबइ अभिसाप तू पचन्प पड़िहीं। उ पचे तोहार पाछा तब तलक करत रइहीं अउर तू पचन्क गहियाइके धरे रइहीं जब तलक तू पचे बरबाद नाहीं होइ जात्या। काहेकि तू पचे यहोवा आपन परमेस्सर क कही भइ बातन क परवाह नाहीं किह्या। तू पचे ओकरे ओन आदेसन अउ नेमन क नाहीं मान्या जेका उ तू पचन्क दिहस। 46इ सबइ अभिसाप मनइयन क बतइहीं कि परमेस्सर तू अउर तोहरे पचन्क संतानन क संग सदा ही निआव किहस ह।

47“यहोवा तोहार परमेस्सर तू पचन्क बहोत स बरदान दिहस मुला तू पचे ओकर सेवा खुसी स अउ उल्लास स भरे भए हिरदय स नाहीं किह्या। 48एह बरे तू पचे आपन ओन दुस्मनन क सेवा करब्या जेनका यहोवा, तोहरे पचन्क खिलाफ पठइ। तू पचे भूखा, पिआसा अउर नंगा रहब्या। तोहरे लगे कछू भी न होइ। यहोवा तोहरी गर्दन पइ एक ठु लोहे क जुवा तब तलक धरी जब तलक तू पचन्क बरबाद नाहीं होइ जाइ।

### दुस्मन रास्ट्र क अभिसाप

49“यहोवा तोहरे खिलाफ बहोत दूर स एक रास्ट्र क लिआइ। इ रास्ट्र पृथ्वी क दूसर कइँती स आइ। इ रास्ट्र तोहरे ऊपर अकासे स उतरत उकाब पंछी क नाई हाली स हमला करी। तू पचे इ रास्ट्र क भाखा नाहीं समुझ पउब्या। 50इ रास्ट्र क मनइयन क चेहरा कठोर होइहीं। उ पचे बुढ़वा लोगन क परवाह न करिहीं। उ पचे नान्ह नान्ह गदेलन पइ

भी दयालु नाहीं होइहीं। 51उ पचे तोहरे गोरुअन क बछवन अउ तोहरी धरती क फसिल तू पचे बरबाद होइ तलक खाइ। उ पचे तोहरे बरे अनाज, नई दाखरस, तेल, तोहरे गोरुअन क बछवन या तोहरे झुण्ड क भेड़ी क बच्चन क नाहीं छोड़िहीं। उ पचे इ तब तलक करत रइहीं जब तलक तू पचे नस्ट नाहीं होइ जात्या।

52“इ रास्ट्र तोहरे सबहिँ सहरन क घेरि लेइ। तू पचे आपन सहरन क चारिहुँ कइँती ऊँची अउ मजबूत देवारे पइ भरोसा रखत अहा। मुला तोहरे देस में इ सबइ देवारन हर जगह भरगइ जइहीं। हौँ, उ रास्ट्र तोहरे उ देस क सबहिँ सहरन पइ हमला करी जेका यहोवा तोहार परमेस्सर तू पचन्क देत अहइ। 53जब तलक तोहार दुस्मन तोहरे सहर क घेरा डए रही तब तलक तोहार बड़का नोस्कान होत रही। तू पचे ऐतना भूखा रहब्या कि आपन गदेलन क भी खाइ जाब्या। तू पचे आपन पूतन अउ बिटियन क गोस खाब्या जेनका यहोवा तोहार परमेस्सर तू पचन्क दिहे बाटइ।

54“तोहार बहोत विनम्र सज्जन मनई भी आपन गदेलन, भाइयन, आपन पियारि पत्नी अउ बचे भए गदेलन क संग निर्दयी होइके बेउहार करी। 55ओकरे लगे आपन सहरन पइ दुस्मन क हमला अउ घेराबन्दी क कारण कछू भी खाइ क नाहीं होइ। एह बरे उ आपन गदेलन क खाइ। मुला उ आपन परिवार क बचे भए सदस्सन क कछू नाहीं देइ।

56“तोहरे पचन्क बीच सब त जियादा विनम्र अउ सुकुमार मेहरारु भी उहइ करी। अइसी धन्नासेठ अउ सुकुमार मेहरारु भी जउन कहुँ जाइ बरे भुईँया पइ गोइ भी न रखे होइ। उ आपन पियारा भतार या गदेलन क संग हाँसा बँटावइ क विरोध करी। 57उ जनम क बाद आपन ही गरभ क खेड़ी क खाइ अउ उ गदेलन क भी जेका उ जन्मी। उ ओका छिपा रुप स खाइ। काहेकि हुआँ कछू भी खइया क नाहीं बचा बाटइ। इ तब होइ जब तोहार दुस्मन तोहरे सहरन क खिलाफ घेरा डाली अउर बहोत जियादा कस्ट पहुँचाइ।

58“इ किताबे में जेतना सबदन अउ नेम लिखा बाटेन ओन सबन्क तू पचन्क मानइ चाही। तू पचन्क यहोवा आपन परमेस्सर क सम्मानित अउर महिमामय नाउँ क सम्मान करइ चाही। अगर तू पचे ऐनका नाहीं मनत्या 59तउ यहोवा तू पचन्क खउफनाक मुसीबत में डाइ देइ अउर तोहार सन्तानन खउफनाक मुसीबत उठइहीं अउर ओनका भयंकर रोग होइ जइहीं जउन लम्बे समइ तलक रइहीं 60यहोवा मिस्त्र स सबहिँ बेरमियन क लिआइ जेनसे तू पचे डेरात अहा। इ सबइ बेरमियन तू लोगन में रइहीं। 61यहोवा ओन बेरमियन अउ अउ परेसानियन क तोहरे बीच लिआइ जउन इ व्यवस्था क किताब में नाहीं लिखी गइ अहइँ। उ इ तब तलक करत रही जब तलक तू पचे नस्ट नाहीं होइ जात्या।

62तू पचे ऐतना जियादा होइ सकत ह जेतना अकासे में तारा अहइँ। मुला तू पचन में कछू ही बचा रइहीं। तू पचन्क संग इ काहे होइ? काहेकि तू पचे यहोवा आपन परमेस्सर क बात नाहीं मान्या।

63“पहिले यहोवा तोहार भलाइ करइ अउ तोहरे रास्ट्र क बढ़ावइ में खुस रहा। उहइ तरह यहोवा तू पचन्क नस्ट अउ बरबाद करइ में खुस होइ। तू पचे उ देस स बाहेर लइ जावा

जाब्या जेका तू पचे आपन बनावइ बरे ओहमाँ प्रवेस करत अहा। 64यहोवा तू पचन्क पृथ्वी क एक छोरे स दूसर छोरे तलक संसार क सबहिं लोगन मँ बिखेर देइ। हुआँ तू पचे दूसर काठ अउ पाथर क देवतन क पूजब्या जेनका तू पचे अउ तोहार पुरखन कबहुँ नाहीं पूजेन।

65“तू पचन्क एँन रास्ट्रन क बीच तनिकउ भी सान्ति नाहीं मिली। तू पचन्क आराम क कउनो जगह नाहीं मिली। यहोवा तू पचन्क दिमागन्क सबइ चिन्ता स भरि देइ। तोहार सबन्क आँखिन पथराइ जइहीं। तू पचे आपन क उखड़ा भवा महसूस करब्या। 66तू पचे संकट मँ रहब्या। तू पचे दिन-रात डेरान रहब्या। सदा ह सन्देह मँ घिरा रहब्या। तू पचे आपन जिन्नगी मँ कबहुँ सुरच्छित नाहीं रहब्या। 67भिन्सारे तू पचे कहब्या, ‘अच्छा होत, इ सौँझ होत।’ सौँझ क तू पचे कहब्या, ‘अच्छा होत, इ भिन्सार होत!’ काहेकि उ भय क कारण अउर ओकरे कारण जउन तू पचे लखब्या। 68यहोवा तू पचन्क जहाजन मँ मिस्र वापस पठइ। मई इ कहेउँ कि तू पचे उ जगह पइ दुबारा कबहुँ नाहीं जाब्या। मुला यहोवा तू पचन्क हुआँ पठइ। अउर हुआँ तू पचे आपन क आपन दुस्मनन क हाथे मनसेधु अउ मेहरारू दास क रुप मँ बेचइ क कोसिस करब्या, मुला कउनो मनई तू पचन्क बेसही नाहीं।”

### मोआब मँ वाचा

**29** इ सबइ बातन उ वाचा क अंग अहइ जउन वाचा क यहोवा मोआब प्रदेश मँ इस्राएल क लोगन क संग मूसा स करइ क कहेस। यहोवा इ वाचा क उ बचन स अलवा किहस जेका उ इस्राएल क लोगन क संग होरेब पहाड़े पइ किये रहा।

2मूसा सबहिं इस्राएली मनइयन क बटोरिके बोलाएस। उ ओमसे कहेस, “तू पचे उ सब कछू लख्या ह जउन यहोवा मिस्र देस मँ किहस। तू पचे उ सब भी लख्या जउन फिरौन, फिरौन क प्रमुखन अउ ओकरे पूरे देस क संग किहस। 3तू पचे ओन बड़की मुसीबतन क लख्या ह जउन उ ओनका दिहस। तू पचे ओकरे ओन चमत्कारन अउ बड़के अचरजन क लख्या ह जउन उ किहस।

4“मुला आजु भी तू पचे नाहीं समझत्या कि का भवा। यहोवा सचमुच तू पचन्क नाहीं समझाएस जउन तू पचे लख्या अउ सुन्या ह। 5मई तू पचन्क चालीस बरिस तलक रेगिस्ताने स होइके लइ जात रहा अउर उ लम्बे समइ क बीच तोहार पचन्क ओढ़ना अउ पनही फाटिके खतम नाहीं भएन। 6तोहरे लगे कछू भी भोजन नाहीं रहा। तोहरे पचन्क लगे कछू भी दाखरस या कउनो उत्तेजित करइवाला पिअइ क चीज नाहीं रही। किन्तु यहोवा तोहार देख-रेख किहस। उ इ एह बरे किहस कि तू पचे समुझ पउब्या कि उ यहोवा तोहार सबन्क परमेस्सर अहइ।

7“जब तू पचे इ ठउरे पइ आया तबहिं हेसबोन क राजा सीहोन अउ बासान क राजा ओग हम लोगन क खिलाफ लइइ आएन। मुला हम पचे ओनका हरावा। 8तब हम लोग इ सबइ पहँटा रूबेनियन, गादियन अउ मनस्से क आधे लोगन क ओनकइ कब्जा मँ दइ दीन्ह। 9एह बरे, इ वाचा

क आदेसन क पूरी तरह माना। तब जउन कछू तू पचे करब्या ओहमाँ सफल होब्या।

10“आजु तू पचे सबहिं यहोवा आपन परमेस्सर क समन्वा ठाइ अहा। तोहरे पचन्क प्रमुखन, तोहार परिवार समूहन, तोहार पचन्क अफसरन, तोहार पचन्क बुजुर्गन (प्रमुखन) अउर सबहिं दूसर लोग हिआँ अहई। 11तोहार पचन्क पत्नियन अउ गदेलन हिआँ अहई अउर उ सबइ विदेसी भी हिआँ अहई जउन तोहरे बीच रहत हीं अउ तोहार लकड़िन क काटत अउर पानी भरत हीं। 12तू पचे सबहिं हिआँ यहोवा आपन परमेस्सर क संग एक ठु वाचा करइवाला अहा। यहोवा तू लोगन क संग इ वाचा आजु करत अहइ। 13इ वाचा क जरिये यहोवा तू पचन्क आपन खास लोग बनावत अहइ अउर उ खुद तोहार परमेस्सर होइ। उ तोहरे पुरखन इब्राहीम, इसहाक अउ याकूब क इ वचन दिहे रहा। 14यहोवा आपन वचन दइके सिरिफ तू लोगन क संग ही वाचा नाहीं करत अहइ। 15उ इ वाचा हम सबहिं क संग करत अहइ जउन हिआँ यहोवा आपन परमेस्सर क समन्वा ठाइ अहई। मुला इ वाचा हमरे ओन संतानन क बरे भी अहइ जउन हिआँ आजु हम लोगन क संग नाहीं अहई। 16तू पचन्क याद अहइ कि हम मिस्र मँ कइसे रहत रहेन अउ कइसे सारा रास्ट्रन क जात्रा कीन्ह ह जउन हिआँ तलक हमरे राहे पइ रहेन। 17तू पचे ओनकइ घिनौनी चिजियन यानी काठ, पाथर, चाँदी अउ सोना क बनी देवमूरतियन लखेन। 18ठान ल्या कि आजु हिआँ हम लोगन मँ कउनो अइसा मनसेधु, मेहरारू, परिवार या परिवार समूह नाहीं अहइ जउन यहोवा, आपन परमेस्सर क खिलाफ जात होइ। कउनो भी मनई ओन रास्ट्रन क देवतन क सेवा करइ नाहीं जाइ चाही। जउन लोग अइसा करत हीं उ पचे उ पौधन क नाई अहई जउन करुआ, जहरीला फल पइदा करत होइ।

19“कउनो मनई इ अभिसापन क सुन सकत ह अउर आपन क संतोख देत भवा कहि सकत ह, ‘मई जउन चाहत हउँ करत रहब। मोर कछू भी बुरा भी नाहीं होइ।’ उ मनई आपन ऊपर ही मुसीबत नाहीं बोलाइ मुला उ सबन क ऊपर, अच्छे लोगन प भी बोलाइ।\* 20-21यहोवा उ मनई क छिमा नाहीं करी। नाहीं, यहोवा उ मनई पइ कोहाइ जाइ अउर ओका सजा देइ। इ किताबे मँ लिखे भए सबहिं अभिसापन ओह पइ पड़िहीं। यहोवा ओका इस्राएल क सबहिं परिवार समूहन स निकारिके बाहेर करी। यहोवा ओका पूरी तरह बरबाद करी। सबहिं आपत्तियन जउन इ किताबे मँ लिखी गइ अहई, ओह पइ अइहीं। उ सबइ सबहिं बातन उ वाचा क हींसा अहई जउन व्यवस्था क किताब मँ लिखी गइ अहई।

22“भविस्स मँ, तोहार सन्तानन अउ बहोत दूर क देसन स आवइवाले विदेसी लोग लखिहीं कि देस कइसे बरबाद होइ गवा अहइ। उ पचे ओन बेमारियन क लखिहीं जेनका यहोवा ओन लोगन मँ लिआइ। 23सारा देस बरत भए गन्धक अउ जोन स ढका भवा बेकार होइ जाइ। भुईया मँ कछू भी बोवा भवा नाहीं रही। कछू भी, हिआँ तलक खर-पतवार भी हिआँ

उ मनई ... बोलाइ सब्द क अरथ “ओकरे जरिये तृप्त अउर पिआसा दुइनउँ बरबाद कीन्ह जइहीं।

नाहीं उगिहीं। इ देस ओन नगरन-सदोम, अमोर, अदमा अउर सबोयीम क तरह बरबाद कइ दीन्ह जाइ। जेनका यहोवा, तब बरबाद किहे रहा, जब उ बहोत कोहान रहा।

24“सबहिँ दूसर रास्ट्र पूछिहीं, ‘यहोवा इ देस क संग अइसा काहे किहस? उ ऐतना कोहान काहे रहा?’ 25उ इ जबाब देइ, ‘इस्त्राएली लोग उ करार क सम्मान नाही किहस जेका यहोवा ओकर बापन स किहस अहइ। उ पचे उ वाचा क मानब बन्द कइ दिहेन जेका यहोवा ओनके संग तब किहे रहा जब उ ओनका मिस्र देस स बाहेर लिआए रहा। 26इस्त्राएल क लोग अइसे दूसर देवतन क पूजा, सेवा अउ मानवइ सुरु किहेन जेनकर पूजा क गियान ओनका पहिले कबहुँ नाही रहा। यहोवा आपन लोगन स ओन देवतन क पूजा करब मना किहे रहा। 27इहइ कारण अहइ कि यहोवा इ लोगन क खिलाफ बहोत कोहाइ ग रहा। एह बरे उ इ किताब मँ लिखे भए सबहिँ अभिसापन क एँन पइ लागू किहस। 28यहोवा ओन पइ बहोत कोहाइ गवा अउर ओन पइ बउखलाइ उठा। एह बरे ओनके देस स ओनका बाहेर किहस। उ ओनका दूसर देस मँ पठएस जहाँ उ पचे आजु अहई।’

29“कछू अइसी बातन अहई जेनका यहोवा हमार परमेस्सर छुपाए रखेस ह। ओन बातन क सिरिफ उ ही जानत ह। मुला यहोवा हमका आपन नेमन क जानकारी दइ दिहस ह! इ व्यवस्था हमरे बरे अउ हमरे संताने बरे अहइ। हम पचन्क एँका सवा मानइ चाही।

### इस्त्राएलियन क वापसी क बचन

30“जउन मई कहेउँ ह तू पचन पइ होइके रही। तू पचे आसीबाद स बढिया चीजन पउब्या अउ अभिसाप स बुरी चीजन पउब्या। यहोवा तोहार परमेस्सर तू पचन्क दूसर रास्ट्रन मँ पठई। तब तू पचे एकरे बारे मँ सोचब्या। 2उ समइ तू पचे अउर तोहार संतानन यहोवा, आपन परमेस्सर क लगे लौटिहीं। तू पचे पूरा तन-मन स ओन आदेसन क मनब्या जउन आजु हम पचे दीन्ह ह। अतबहिँ यहोवा तोहार पचन्क परमेस्सर तू पचन्पइ दयालु होइ। यहोवा तू पचन्क फुन अजाद करी। उ ओन रास्ट्रन स तू पचन्क लउटाई जहाँ उ तू पचन्क पठए रहा। 4चाहे तू पचे पृथ्वी क सब त दूर जगह पइ पठइ दीन्ह गवा होइ, यहोवा तोहार परमेस्स तू पचन्क बटोरी अउर तू पचन्क हुआँ स वापस लिआइ। 5यहोवा तू पचन्क उ देस मँ लिआइ जउन तोहरे पुरखन क रहा अउर उ देस तोहार होइ। यहोवा तोहार भला करी अउर तोहरे लगे ओसे जियादा होइ, जेतना तोहरे पुरखन क लगे रहा अउर तोहरे रास्ट्र मँ ओसे जियादा लोग जेतना ओनके लगे कबहुँ रहेन। 6यहोवा तोहार परमेस्सर, तू पचन्क अउ तोहरे संतानन क हिरदय क खतना करी\* कि उ सबइ ओकरी अगया मानइ चइहीं। ‘तब तू पचे यहोवा क आपन सम्पूर्ण हिरदय अउ आतिमा स पिरेम करब्या अउर तू पचे जिअत रहब्या!

7“अउर यहोवा तोहार परमेस्सर इ सबइ अभिसापन क तोहरे ओन दुस्मनन पइ उतारी जउन तोहसे घिना करत हीं

अउर तू पचन्क परेसान करत हीं 8अउर तू फुन यहोवा क आगया क मनब्या। तू पचे ओन सबहिँ आदेसन क मनब्या जेनका मई आजु तू पचन्क दिहेउँ ह। यहोवा तोहार परमेस्सर तू पचन्क ओन सब मँ सफल बनाई जउन तू पचे करब्या। उ तू पचन्क बहोत स गदेलन बरे, तोहरे गोरुअन क बहोत बछवन अउर तोहरे खेतन क नीक फसल होइ क वरदान देइ। यहोवा तोहरे बरे भला होइ। यहोवा तोहार भला करइ मँ वइसेन ही खुस होइ जइसेन खुस उ तोहरे पुरखन क भला करइ मँ होत रहा। 10मुला तू पचन्क उ सब कछू जरूर करइ चाही जउन यहोवा तोहार परमेस्सर तू पचन्स करइ बरे कहत ह। तू पचन्क ओकरे अउ हुकुमन जउन व्यवस्था क इ किताबे मँ लिखे भए क जरूर मानइ चाही। तू पचन्क यहोवा आपन परमेस्सर कइँती आपन पूरा हिरदय अउर आतिमा स अर्पित होइ जाइ चाही।

### जिअब या मरब

11“आजु जउन आदेसन क मई तू पचन्क देत हउँ, उ तोहरे बरे बहोत कठिन नाही बा। इ तोहरी पहोंच क बाहेर नाही अहइ। 12इ आदेस सरग मँ नाही अहइ जेहसे तू पचन्क कहइ क पइइ ‘हम लोगन बरे सरगे मँ कउन जाइ अउ ओका हम लोगन क लगे लिआइ जेहसे हम पचे ओका सुनि सकी अउर ओकर पालन करइ सकी?’ 13इ आदेस समुद्दर क दूसरे पार नाही अहइ जेहसे तू पचे इ कहा कि ‘हमरे बरे समुद्दर कउन पार करी अउर एँका लिआइ जेहसे हम पचे एँका सुनि सकी अउर कइ सकी?’ 14नाहीं, यहोवा क बचन तोहरे लगे अहइ। इ तोहरे मुँह अउर तोहरे हिरदय मँ अहइ जेहसे तू पचे एँका कइ सका।

15“मई आजु तोहरे पचन्क समन्वा जिन्नगी अउ मउत, समृद्धि अउ विनास धइ दिहेउँ ह। 16मई आजु तू पचन्क आदेस देत अहउँ कि यहोवा आपन परमेसर स पिरेम करा, ओकरे राहे पइ चला अउ ओकरे आदेसन, नेमन अउ हुकुमन क माना। तब तू पचे जिअत रहब्या अउ तोहार रास्ट्र जियादा तादाद मँ होइ। अउर यहोवा तोहार परमेस्सर तू पचन्क उ देस मँ आसीबाद देइ जेका आपन बनावइ बरे तू पचे हुआँ जात अहा। 17मुला अगर तू पचे यहोवा स मुँह फेरत अहा अउ ओकर नाफरमानी करत अहा अउर दूसर देवतन क सेवा अउ पूजा मँ बहकावा जात अहा। 18तब तू पचे पूरी तरह बरबाद कइ दीन्ह जाब्या। मई चिताउनी देत अहउँ, तू पचे यरदन नदी क पार क उ देस मँ लम्बे समइ तलक नाही रहब्या जेहमाँ आवइ बरे तू पचे तइयार अहा अउर जेका तू पचे आपन बनउब्या।

19“आजु मई तू पचन्क दुइ राहन क चुनइ क छूट देत हउँ। मई धरती अउ अकास क तोहरे साच्छी बरे बुलाए हउँ। तू पचे जिन्नगी क चुन सकत ह, या तू पचे मउत क चुन सकत ह। जिन्नगी क चुनब वरदान लिआइ अउर मउत क चुनब अभिशाप। एह बरे जिन्नगी क चुना। तबहिँ सिरिफ तू पचे अउर तोहार गदेलन जिअत रइहीं। 20तू पचन्क यहोवा आपन परमेस्सर स पिरेम करइ चाही अउ ओकर आगया मानइ चाही। ओसे अउर ओसे चिपक जा। काहेकि यहोवा तोहार जिन्नगी अहइ, अउर यहोवा तू पचन्क उ देस



में लम्बा जीवन देइ जेका उ तोहरे पुरखन इब्राहीम, इसहाक अउ याकूब क देइ क बचन दिहे रहा।”

### यहोसू नवा नेता होइ

**31** तब मूसा अगवा बढ़ा अउ इस्राएलियन स इ सबइ बातन कहेस। 2मूसा ओनसे कहेस, “अब मई एक सौ बीस बरिस क अहउँ। मई अब आगे तोहार नेता क अगुवाइ नार्हीं कइ सकत हउँ। यहोवा मोसे कहेस ह: ‘तू पचे यरदन नदी क पार नार्हीं जाब्या।’ 3यहोवा तोहार परमेस्सर तोहरे आगे चली। उ इ सबइ रास्ट्रन क तोहरे पचन्क बरे बरबाद करी। तू पचे ओनकर देस ओसे हर लेब्या। यहोसू ओह पार तू लोगन क अगवा चली। यहोवा इ कहेस ह।

4“यहोवा इ रास्ट्रन क लोगन क संग उहइ करी जउन उ एमोरियन क राजा लोगन सीहोन अउ ओग क संग किहस। ओन राजा लोगन क देस क संग उ जउन किहस उहइ हिआँ करी। यहोवा ओनकर प्रदेसन क बरबाद किहस। 5अउर यहोवा तू पचन्क ओन रास्ट्रन क हरवइ देइ अउर तू पचे ओनके संग उ सब करब्या जेका करइ बरे मई कहेउँ ह। 6मजबूत अउ हिम्मती बना। इ सबइ रास्ट्रन स डेराअ जिन। काहेकि यहोवा तोहार परमेस्सर तोहरे संग जात अहइ। उ तू पचन्क न छोड़ी अउ तजी।”

7तब मूसा यहोसू क बोलाएस। जउने समइ मूसा यहोसू स बातन करत रहा ओह समइ इस्राएल क सबहि लोग लखत रहेन। जब मूसा यहोसू स कहेस, “मजबूत अउ हिम्मती बना। तू इ सबइ लोगन क उ देस में लइ जाब्या जेका यहोवा ऐनकइ पुरखन क देइ क बचन दिहे रहा। तू इस्राएल क लोगन क मदद उ देस क लेइ अउ आपन बनावइ में करब्या। 8यहोवा आगे चली। उ खुद तोहरे संग अहइ। उ तू पचन्क न मदद देब बन्द करी, न ही तू पचन्क छोड़ी। तू न ही डेरान अउ फिकिर में रहब्या।”

### मूसा व्यवस्था लिखत ह

9तब मूसा इ कानून क लिखेस अउ लेवी क सन्तान याजक क अउर इस्राएल क सबइ बुजुर्गन क दइ दिहस। ओनकर काम यहोवा क करार क सन्दूखे क लइ चलब रहा। 10मूसा ओनका आदेस दिहस, “हर सात बरिस पाछे, कुटीर क त्यौहार में इ सबइ नेमन क बाँचा। 11उ समइ इस्राएल क सबहि लोग यहोवा, आपन परमेस्सर स मिलइ बरे उ खास ठउरे पइ अइहीं जेका उ पचे चुनिहीं। तब तू लोगन में इ सबइ कानून क अइसे बाँचब जेहसे उ पचे सुनि सकइ। 12सबहि लोगन, मनसेधुअन, मेहररुअन, नान्ह गदेलन अउ आपन नगरन में रहइवाले सबहि प्रवासियन क बटोरा। उ पचे नेमन क सुनिहीं, अउर उ पचे यहोवा तोहरे परमेस्सर क आदर करब सिखिहीं अउर उ पचे इ नेमन क सब्दन क मानइ में होसियार रहई। 13अउर तब ओनकी संतानन जउन नेमन नार्हीं जानत ह, एँका सुनिहीं अउर उ पचे यहोवा तोहरे परमेस्सर क सम्मान करब सिखिहीं। उ पचे तब तलक सम्मान करिहीं जब तलक तू पचे उ देस में रहब्या जेका तू पचे यरदन नदी क ओह पार लेइ बरे तइयार अहा।”

### यहोवा मूसा अउ यहोसू क बोलावत ह

14यहोवा मूसा स कहेस, “अब तोहरे मरइ क समइ निचके आइ ग अहइ। यहोसू क ल्या अउ मिलापवाला तम्बू में जा। मई यहोसू क बताउब कि उ का करइ।” एह बरे मूसा अउ यहोसू मिलापवाला तम्बू में गएन अउर आपन क उपस्थित किहस।

15यहोवा बदरन क एक ठु खम्भा क रूप में परगट भवा। बदरे क खम्भा तम्बू क दुआरे पइ ठाड़ रहा। 16यहोवा मूसा स कहेस, “तू हाली ही मरब्या अउर जब तू आपन पुरखन क संग चला जाब्या तउ इ सबइ लोग मोह पइ बिस्सास नाही करब्या। उ पचे उ वाचा क तोड़ देइहीं जउन मई ऐनकइ संग किहे अहउँ। उ पचे मोका छोड़ देइहीं। अउर दूसर देवतन क पूजा करब सुरु करिहीं, ओन प्रदेसन क बनावटी देवतन क जेनमों उ पचे जइहीं। 17उ समइ, मई ऐन पइ बहोत कोहाइ जाब अउर ऐनका छोड़ देब। मई ओनकी मदद करब बन्द करब अउर उ पचे बरबाद होइ जइहीं। ओनके संग भयंकर सबइ घटना होइहीं अउर उ पचे विपत्ति में पड़िहीं। तब उ पचे कइहीं, ‘इ सबइ बुरी सबइ घटना हम पचन्क संग एह बरे होति अहई कि हमार परमेस्सर हमरे संग नार्हीं अहइ।’ 18तब मई आपन चेहरा ओन लोगन स छुपाइहीं काहेकि उ पचे बुरा कार्य करिहीं अउर दूसर देवतन क पूजा करिहीं।

19“एह बरे इ गीत क लिखा अउर इस्राएली लोगन क सिखावा। ओनका इ गाइ द्या। इ इस्राएल क लोगन क खिलाफ मोरे बरे साच्छी रही। 20मई ओनका उ देस में जउन में दूध अउर सहद बहत ह अउ जेका देइ क वचन मई ओनके पुरखन क दिहेउँ ह लइ जाब अउर उ पचे संतुटठ होइ तलक खाब्या। उ पचे अमीरी स भरी जिन्नगी बितइहीं। मुला ऐँकर बाद उ पचे दूसर देवतन क पूजा अउर ओनकर सेवा करिहीं। उ पचे मोसे मुँहना फेरि लेइहीं अउर मोर वाचा क तोड़िहीं, 21तब ओन पइ भयंकर आपदा अइहीं अउर उ पचे बड़ी मुसीबत में होइहीं। उ समइ ओनके लोग इ गीत क तब भी जनिहीं अउर इ ओनका बताइ कि उ पचे केलैनी भूल पइ अहई। मई अभी तलक ओनका उ देस में नार्हीं पहोंचाएउ हउँ जेका ओनका देइ क बचन मई दिहेउँ ह। मुला मई पहिले स ही जानत हउँ कि उ पचे हुआँ का करइवाला अहई, काहेकि मई ओनकी आदत स परिचित अहउँ।”

22एह बरे मूसा उहइ दिन गीत लिखेस अउ उ गीत क इस्राएल क लोगन क सिखाएउँ।

23तब यहोवा नून क पूत यहोसू स बातन किहस। यहोवा कहेस, “मजबूत अउ हिम्मती बना। तू इस्राएल क लोगन क उ देस में लइ चलब्या जेका ओनका देइ क वचन मई दिहेउँ ह अउर मई तोहरे संग रहब।”

### मूसा इस्राएल क लोगन क चिताउनी देत ह

24मूसा इ सारे नेमन क सब्दन क एक ठु किताबे में लिखेस। जब उ एँका पूरा कइ लिहस तब 25उ लेवीबंसियन क आदेस दिहस (सबइ लोग यहोवा क करार क सन्दूखे क देख-रेख करत रहेन।) मूसा कहेस, 26“इ व्यवस्था क

किताबे क ल्या अउर यहोवा, आपन परमेस्सर क करार क सन्दूखे क बगल मँ धरा। तब इ हुआँ तोहरे खिलाफ साच्छी होइ। 27मई जानत हउँ कि तू बहोतइ अड़ियल अहा। मई जानत हउँ तू मनमानी करइ चाहत अहा। धियान द्या, आजु जब मई तोहरे संग हउँ तब भी तू यहोवा क आग्या मानइ स मना किह्या ह। मोरे मरइ क पाछे तू यहोवा क आग्या मानइ स अउर जियादा इन्कार करब्या। 28आपन सबहि परिवार समूहन क प्रमुखन अउ अफसरन क एक संग बोलावा। मई ओनका इ सब कछू बताउब अउर मई पृथ्वी अउ अकास क ओनके खिलाफ साच्छी होइ बरे बोलाउब। 29मई जानत हउँ कि मोर मउत क पाछे तू सबइ लोग पूरी तरह भ्रस्ट होइ जाब्या। तू पचे उ राहे स बगद जाब्या जेह पइ चलइ क आदेस मई दिहेउँ ह। तब भविस्स मँ तोहे सबन पइ आपद अइहीं। काहेकि तू पचे उ करइ चाहत अहा जेका यहोवा बुरा बतावत ह। तोहार बुरा काम करइ क कारण उ पचे तोहस कोहाइ जाब्या।”

### मूसा क गीत

30तब मूसा इस्त्राएल क सबहि लोगन क गीत सुनाएस। उ तब तलक नाहीं रुका जब तलक उ ऐँका पूरा नाहीं कइ लिहस।

**32** “हे गगन, सुन ल्या मई बोलिहउँ, पृथ्वी मोरे मुँहना स बात सुनी।

2मोरे उपदेस बरसिहइँ बर्खा क नाई, ओस समान बही पृथ्वी पइ मोरी वाणी, नरम घासन पइ बर्खा क मन्द झरी सी, हरिअर पौधन पइ बर्खा सी।

3मोर वाणी परमेस्सर क नाउँ सुनाई महँ कहब, स्तुति कर, परमेस्सर महान अहइ।

4“उ (यहोवा) हमार चट्टान अहइ ओकर सबहि काम पूर्ण अहइँ! काहेकि ओकर सबहि राह उचित अहइँ! उ विस्सास अउ निस्पाप परमेस्सर अहइ करत जउन उचित अउ सही अहइ।

5तू लोगन ओकर संग दुर्वेउहार किह्या तू ओकर संग भ्रस्ट तौर पइ बरताव किहेस। तोहार दोस एह बरे नाहीं कि तू पचे ओकर गदेलन अहइ। तू एक दुट्ठ अउ पतित पीढ़ी अहा।

6का इही बेउहार अहइ जेका तू यहोवा स करइ चाही? नाहीं! तू मूर्ख अउ जड़बुद्धि जन अहा। यहोवा परम पिता तोहार अहइ, उ तू पचन्क बनाएस, उ आपन जन क मजबूत बनाएस तू पचन्क।

7“याद करा बीता भवा दिन क सोचा बीती भइ पीढ़ियन क बरिसन क, बुढ़वा पिता स पूछा, उहइ कइहीं आपन प्रमुखन स पूछा; उहइ कइहीं।

8सर्वोच्च परमेस्सर आपन रास्ट्रन क आपन देसन क दिहस, उ मानव जाति उ विभाजित किहेस उ रास्ट्रन मँ इस्त्राएली क सम्बंध क बीच सरहद बनाएस।

9यहोवा क विरासत अहइ ओकर लोग; याकूब यहोवा क आपन अहइ।

10“यहोवा याकूब क रेगिस्तान मँ पाएस, सुनसान अउ साँय साँय करइवाली मरु भुइँया मँ। यहोवा याकूब क रच्छा

बरे ओका चारिहुँ कइँती घेर लिहस उ ओका आँखिन क पुतरी क नाई रच्छा किहेस।

11यहोवा उकाब क नाई इस्त्राएल क रच्छा किहस, जइसे उकाब घोसला स उठावत ह बच्चन क ओनका उड़इ बरे सिखावत ह। उ बच्चन क लइके रच्छा करत उड़ति ह उ आपन पखना फइलावत ह जब उ पचे ओका पकड़त ही। उ ओनका पखना पइ लइके उड़ति ह अउ सुरच्छित जहग पइ। परमेस्सर वइसेन अहइ।

12“अकेल्ले यहोवा याकूब क मारग दरसन किहस, कउनो देवता विदेसी ओकरे लगे न रहेन।

13यहोवा याकूब क पृथ्वी क ऊँच जगहन पइ चढ़ाएस, याकूब खेतन क फसल खाएस, यहोवा याकूब क पुट्ट चट्टानन क सहद स किहस; जइतून-तेल ओका वज्र-चट्टाने स दिहस,

14माखन खरका स दिहस, दूध झुण्ड स दिहस, गोस भेड़ी अउ बोकसन क, भेड़ा अउ बासान जाति क बोकसन स दिहस- बड़िया स बड़िया गोहूँ, लाल अंगूरे क दाखरस दिहस।

15“मुला यसूरून मोटा भवा, साँड़े क नाई लात मारत, उ बाढ़ा अउ उ भारी भी रहा। उ ऊँच जाति अउ खूब पाला पोसा गवा उ आपन कर्ती क नकारेस अउर चट्टान बरे ओका अपमान किहेस, जउन उद्धारकर्ता रहा।

16जलोटा यहोवा क, दूसर देवन क पूजिके बनाएस! ओकर जन; कोहाइ दिहन परमेस्सर क आपन मुरतियन स जउन धिनौनी परमेस्सर क रहिन,

17उ पचे दानवन क बलि दिहन जउन फुरइ देवतन नाहीं रहेन ओन देवतन क बलि दिहन जेकर ओनका गियान नाहीं रहा। देवतन उ सबइ जेनका न पूजेन कबहुँ तोहार पुरखन नए रहेन।

18तू पचे चट्टान क तजि दिहा, तू पचे आपन परमेस्सर क बिसराया जउन जिन्नगी दिहस।

19“यहोवा लखेस इ जन क आपन कहइ स इन्कार किहस, ओका ओकर बेटवन अउ बिटियन कोहाइ दिहन।

20तब यहोवा कहेस, ‘मई ऐंसे मुँह मोड़बउँ! मई लखि सकउँ - ओनका अन्त होइ। काहेकि भ्रस्ट सबहि ओनकी पीढ़ियन अहइँ। उ सबइ अहइँ अइसा सन्तान जेनका विस्सास नाहीं अहइ!'

21उ पचे मोका मूरतियन स ईस्यलु बनाएन जउन परमेस्सर नाहीं अहइ। उ पचे मोका आपन निरर्थक मूरतियन स नाराज किहेन। एह बरे मई ओन लोगन स जउन इस्त्राएलियन नाहीं अहइ ईस्यलु बनाइ देब। मई ओन लोगन क मूर्ख रास्ट्र स नाराज करइ देब।

22मोर किरोध आगी क नाई सुलगत अहइ। मोर किरोध मोत क ठउर क नाई गहिर तलक, मोरे किरोध भुइँया नस्ट करत ह। अउ फसल क, अउ पहाड़े क नेंव मँ आगी लगावत ह।

23“मई इस्त्राएलियन प विपत्ति ढाउब, मई आपन बाण ओन पइ चलाउब।

24उ पचे भूखन क मारे दूबर स दूबर होइहीं। भयंकर महारोग ओनकर विनास करिहीं। मई जंगली जनावर क

ओनके खिलाफ पठउब जहरीला सॉपन अउ रेगंड वाला जहरीला जंतुअन क ओनका डसइ पठउब।

25बाहेर सड़कन पइ तरवारे स मारा जइहीं, अउ घरे क भीतर भय अउ डर स। सिपाही मारि डइहीं जवान मनसेधू अउ मेहररुअन। उ पचे मारि डइहीं नान्ह गदेलन अउ बुढवन क।

26मइँ कहत हउँ, मइँ ओका तितर-बितर कइ देब। इस्त्राएलियन क लोगन स बिसरि जाइ द्या।

27मुला मइँ दुस्मन क कोहाइ क आसंका दूर करब, जउन होइ सकत ह दुस्मन गलत समुझत ही। उ पचे सेखी बघरिहीं अउर कइहीं, “हम पचे जीत लीन्ह ह आपन ताकत स, यहोवा नाहीं किहस इ काम क।”

28“उ मूरख रास्ट्र अहइँ उ पचे कछू भी समुझ नाहीं पातन अहइँ।

29अगर उ समझदार होतेन तउ एँका समुझ पउतेन अउर लख लेतेन आपन भविस्स।

30कइसे एक तु हजारन क पीछा करत? कइसे दस हजार क दुइ तु भगाइ देतेन? इ तबइ होत जब सैल यहोवा देत ओनका, अउर ओनका गुलाम बनाइ देत।

31तोहार ‘चट्टान’ हमार चट्टान क नाइँ नाहीं। हमार दुस्मन इ सच्चाई क खुद लखि सकत हीं।

32ओनकर अंगूरे क लता सदोम क लता स अउ अमोर क खेत स अहइ। ओनकर अंगूर बिखौला होत हीं ओनकर अंगूरन क गुच्छन करुआन।

33ओनकर दाखरस सॉपन क बिख जइसी अहइँ अउ नागिन क जहर क नाइँ।

34“पर्भू कहत बा ‘मइँ उ सजा क सुरच्छित रखेउँ ह। मइँ एँका आपन बस्तू-भण्डारे में बन्द किहेउँ ह।

35सिरिफ मइँ ही देइवाला दण्ड अहउँ मइँ ही लोगन क अपराधन क बदला देत हउँ, जब अपराधन में ओनकइ गोड़वा फिसल जाइ, काहेकि विपत्तिकाल ओनके निअरे अहइ अउर दण्ड समइ ओनका दौड़ि आइ।’

36“यहोवा आपन जन क निआव करि। उ पचे ओकर सेवक अहइँ, उ दयालु होइ। उ ओकरे बल क मिटाइ लखिही तउ उ ओन सबहिं अजाद अउ दासन क होत लखी असहाय।

37उ तब पूछी, ‘लोगन क लबार देवतन कहाँ अहइँ? उ ‘चट्टान’ कहाँ अहइ, उ पचे जेकर सरण गएन?

38मनइयन क इ सबइ देव, बलि क चर्बी खात रहेन, अउर दारु, दारु क भेंट की पिअत रहेन। एह बरे उठइँ इ सबइ देव, मदद तोहार करइँ तोहरी इ सबइ रच्छा करइँ!

39“लखा अब मइँ तोहार परमेस्सर अहउँ! नाहीं दूसर कउनो भी परमेस्सर मइँ ही निहचय करब लोगन क जिअत राखेउँ या मारुँ। मइँ लोगन क दइ सकत हउ चोट अउर ठीक भी रख सकत हउँ। अउर न बचाइ सकत केउ कउनो क मोरी सक्ति क बाहेर।

40आकास कइँती हाथ उठाइके मइँ वचन देत हउँ। अगर इ फुरइ अहइ कि मइँ सास्वत हउँ।

41मइँ आपन बिजरी क तरवार क उपयोग करब। मइँ निआव पइ रहब। मइँ एका आपन दुस्मन पइ प्रयोग करब। मइँ ओका जवाब देब जउन मोहस घिना करत ह।

42मोर दुस्मनन मारा जइहीं अउर बन्दी होइहीं। हमार बाण ओनके रक्त स रंग जइहीं। मोर तरवार दुस्मन क मूँड क काटि देइ।’

43“सब संसार परमेस्सर क मनइयन स खुस होइ। काहेकि उ ओनकी मदद करत ह आपन सेवकन क हत्तियारन क उ सजा देत रहत ह। उ आपन दुस्मनन स बदला लेत ह अउर आपन देस अउर आपन लोगन बरे प्रायश्चित करत ह।”

### मूसा लोगन क आपन गीत सिखावत ह

44मूसा आवा अउ इस्त्राएल क सबहिं लोगन क सुनइ बरे उ गीत पूरा सुनाएस। नून क पूत यहोसू मूसा क संग रहा। 45जब मूसा लोगन क इ उपदेस देब खतम किहस 46तब उ ओनसे कहेस, “तू पचन्क निहचय करइ चाही कि तू ओन सबहिं आदेसन क सुमिरिब्या जेका मइँ आजु तू पचन्क बतावत जरूर हउँ अउर तू पचन्क आपन गदेलन क इ जरूर बतावइ चाही कि एँन व्यवस्था क सबइ नेमन क होसियारी स उ पचे पूरी तरह मानइँ। 47इ जिन समुझा कि इ सबइ उपदेस महत्व क नाहीं अहइँ। इ सबइ तोहार जिन्गी अहइँ। एँन उपदेसन क जरिया तू पचे उ यरदन नदी क पार क देस में लम्बे समइ तक रहब्या जेका लेइ बरे तू पचे तइयार अहा।”

### मूसा नबो पहाड़े पइ

48यहोवा उहइ दिन मूसा स बतियान। यहोवा कहेस, 49“अबारीम पहाड़े पइ जा। यरीहो सहर स पार होइके मोआब पहाँटा में नबो पहाड़े पइ जा। तब तू उ कनान प्रदेस क लखि सकत ह जेका मइँ इस्त्राएल क लोगन क रहइ बरे दइ देत हउँ। 50तू उ पवते पइ मरब्या। तू वइसेन ही ओन लोगन स मिलब्या जउन मरि गए अहइँ जइसे तोहार भाई हारुन होर पहाड़े पइ मरा अउ आपन लोगन स मिला। 51काहेकि जब तू सीन क रेगिस्तान में कादेस क निअरे मरीबा क जलासयन क लगे रहया तब मोरे खिलाफ पाप किहे रहया अउ इस्त्राएल क लोग ओका हुआँ लखे रहेन। तू मोर सम्मान नाहीं किहया अउर तू इ लोगन क नाहीं देखाया कि मइँ पवित्तर अहउँ। 52एह बरे अब तू आपन समन्वा उ देस क लखि सकत ह किन्तु तू उ देस में जाइ नाहीं सकत्या जेका मइँ इस्त्राएल क लोगन क देत अहँउ।”

### मूसा इस्त्राएल क लोगन क आसीर्बाद देत ह

33 मरइ क पहिले परमेस्सर क मनई मूसा इस्त्राएल क लोगन क इ वरदान दिहस:

2मूसा कहेस, ‘यहोवा सिनाइ स आवा। यहोवा सेईर क भिन्सारे क रोसनी क नाई चमका। उ पारान पहाड़े स फूटइ वाला प्रकास क नाई रहा। यहोवा दस हजार पवित्तर लोगन क संग आवा। ओकरी दाहिन कइँती बलवान सिपाही रहेन।

3हँ, यहोवा पिरेम करत ह मनइयन स सबहिं पवित्तर मनइयन ओकरे हथवन में अहइँ अउर चलत हीं उ ओकरे पद चीन्हन पइ हर एक मनई अंगीकार करता ओकर उपदेस।

4मूसा दिहस नेमन हम पचन्क उ सबइ-जउन अहईं याकूब क सबहिं लोगन क। 5उहइ समइया, इस्त्राएल क लोग अउ नेता लोग मिलेन अउ यहोवा भवा यसूरुन क राजा।

### रूबेन क आसीबाद

6“रूबेन जिअत रहइ, उ न मरइ होइ सकत ह रूबेन जिअत रहा उ न मरइ, मुला ओकर बंस में मनइयन अधिक न होब।”

### यहूदा क आसीबाद

7मूसा यहूदा क परिवार समूह बरे इ सबइ बातन कहेस: “यहोवा, सुन लेइ यहूदा क प्रमुख क जब उ माँगइ मदद लिआवइ ओका आपन लोगन में सक्तीसाली बनावइ ओका, करइ मदद ओकर दुस्मन क हरावइ में।”

### लेवी क आसीबाद

8मूसा लेवी क बारे में कहेस: “तोहार मनवइयन सच्चा लेवी धारण करत ऊरीम-तुम्मीम, मस्सा पइ तू लेवी क परीच्छा लिहा, तोहार विसेख मनई राखत रहा ओनका। लड़ा तू रहया ओकरे बरे मरीबा क जलासन पइ।

9लेवी बताएस आपन महतारी-बाप क बारे में: मई न करब ओनकइ परवाइ, मानेस नाहीं उ आपन भाई, क या जानेस आपन गदेलन क; लेवीबंसियन पालेन आदेस तोहार, अउर निभाएन वाचा तोहसे जउन।

10उ पचे सिखइहीं याकूब क नेम तोहार अउर इस्त्राएल क व्यवस्था जउन तोहार। उ पचे सुलगइहीं सुगन्धि तोहार आगे अउ तोहार सारी होमबलि वेदी क जगह पइ।

11यहोवा, ओकर धन क आसीबाद द्या अउर ओकर काम क अंगीकार किहेस। उ ओका नास कइ द्या जउन उ पइ हमला किहेस अउ ओका हराइ द्या जउन ओहस घृना किहेस इस प्रकार उ फुन हमला नाहीं कइ सकत।”

### बिन्यामीन क आसीबाद

12बिन्यामीन क बारे में मूसा कहेस: “यहोवा क पिआरा ओकरे संग सुरच्छित होइ। यहोवा आपन पिआरा क रच्छा करत सारा दिन, अउर बिन्यामीन क भुईया पइ रहत यहोवा।”

### यूसुफ क आसीबाद

13मूसा युसुफ क बारे में कहेस: “यहोवा द्या आसीबाद ओकरे देस क सरग क उन्तिम बर्खा जहाँ होई; अउ धरती क तले स पानी अउ ओस मिलइ।

14सूरज क दीन्ह उन्तिम फल होई ओकर अउर हर महीना में सब स बढ़िया फल होई। 15पहाड़ियन अउ पुरान पहाड़न सब स बढ़िया फल उपजावई।

16धरती देइ सब स बढ़िया फल यूसुफ बरे उ जउन भाइयन स अलगाइ दीन्ह ग रहा। तउ परमेस्सर जउन बरत भइ झाड़ी में रहत ह स सब स बढ़िया बरदान देइ यूसुफ क।

17यूसुफ आपन गोरु क पहिला पइदा भवा क गौरव पाइ। ओकर दुइनउँ बेटवन बर्धा क सींगे क तरह अहईं। उ पचे रास्ट्रन क धरती क आखिरी छोर तलक छेद देब। ओन में स हजारन क हजार मनस्सप स अहइ अउर ओन में स दसन हजार एप्रैम स ह।”

### जबूलून क आसीबाद

18जबूलून क बारे में मूसा कहेस: “जबूलून, खुस रहा जा जब बाहेर अउर इस्साकार, खुस रहइ आपन सिबिर पइ।

19उ पचे लोगन क न्यौतिहीं आपन पहाड़े पइ हुआँ करिहीं भेंट सबहिं सच्ची बलि काहेकि उ पचे लोग सागर स निकारत हीं धन अउर पइहीं बालू में छिपा भवा जउन धन अहइ।”

### गाद क आसीबाद

20मूसा गाद क बारे में कहेस: “स्तुति करा परमेस्सर क जउन गाद क बढ़ावत ह। गाद ओलरा रहत अउ जोहत सिंह क नाई, उ फड़ि देत ह बाजु अउ मूँडे क टूकन में।

21आपन खातिर चुनत ह उ, सब स खास हींसा राजा बरे सुरच्छित रहब। मनइयन क नेतन आवत हीं ओकरे लगे। उ करत ह उहइ जउन परमेस्सर क इच्छा बा। अउर यहोवा बरे इस्त्राएलियन क संग निआव करत ह।”

### दान क आसीबाद

22दान क बारे में मूसा कहेस: “दान सेरे क बच्चा अहइ जउन बासान स उछरा करत ह।”

### नप्ताली क आसीबाद

23नप्ताली क बारे में मूसा कहेस: “नप्ताली, तू बहोतइ बढ़िया चीजन क रखब्या। यहोवा क आसीबाद तोहरे बारे भरपूर अहइ, लइ ल्या पच्छिम अउ दक्खिन क प्रदेस।”

### आसेर क आसीबाद

24मूसा आसेर क बारे में कहेस: “आसेर क पूतन में सब स जियाद अहइ आसीबाद, ओका आपन भाई लोगन में सब स पियारा होइ द्या अउ ओका आपन गोड़ तेल स धोवइ द्या।

25तोहरे फाटकन क ताला होइहीं लोहा अउ काँसा क तू जिन्नगी भइ सक्ती स भरपूर रहब्या।”

### मूसा परमेस्सर क स्तुति करत ह

26“यसूरून, परमेस्सर क नाई नाहीं अहइ अउर कउनो परमेस्सर आपन महिमा में चलत ह चढ़िके बदरा पइ, अकासे स होइके आवत ह मदद करइ तू पचन्क।

27परमेस्सर सास्वत अहइ तोहार सरण सुरच्छित अहइ। परमेस्सर क सक्ती सास्वत अहइ उ तोहार सुरच्छा करत ह अउर बल स हटावत ह दुस्मनन क, कहत ह उ ‘नास करा दुस्मनन क।’

28तउ इस्राएल सुरच्छित रही सदा याकूब क जलस्रोत सुरच्छित अहइ धरती में। अन्न अउ नइ दाखरस क पइहीं सुन्नर धरती में अउ उ भुइँया सूबइ पाइ।

29इस्राएलियो, तू पचे आसीस पाए अहा तोहार जइसा कउनो रास्ट्र नाही। तू यहोवा क दुआरा सुरच्छा पाउब्या। उ तोहार सुरच्छा ढाल अहइ। यहोवा अहइ विजय तरवार तोहार करइ वाली। तोहार दुस्मनन तोहसे डेरइहीं, अउर तू रउँद देब्या ओनकइ लबार देवतन क ठउसन क।”

### मूसा क मउत

**34** मूसा मोआब क समतल पहुँटा स नबो पहाड़े पइ गवा जउन यरीहो क पार पिसगा क चोटी पइ रहा। यहोवा ओका गिलाद स दान तलक सारा प्रदेस देखाएस। 2यहोवा ओका सारा नप्टाली, जउन एप्रैम अउ मनस्से क रहा, देखाएस। उ पस्चिमी सागर तलक यहूदा क प्रदेस देखाएस। 3यहोवा मूसा क खजूरे क बृच्छन क सहर सोअर स यरीहो तलक फइली घाटी अउर नेगेव देखाएस। 4यहोवा मूसा स कहेस, “इ उ देस अहइ जेका मई इब्राहीम, इसहाक, अउर याकूब क बचन दिहे रहेउँ कि, ‘मई इ देस क तोहरे सन्तानन क देब।’ मई तू पचन्क इ देस देखाउब। मुला तू पचे हुआँ जाइ नाही सकत्या।” 5तब यहोवा क सेवक मूसा मोआब देस में उहइँ मरा। यहोवा मूसा स कहे

रहा कि अइसा होइ। 6यहोवा बेतपोर क पार मोआब प्रदेस क घाटी में मूसा क दफनाएस। मुला आजु भी कउनो नाही जानत कि मूसा क कब्र कहाँ बाटइ। 7मूसा जब मरा उ एक सौ बीस बरिस क रहा। ओकर आँखिन कमजोर नाही रहिन। उ तब भी बलवान रहा। 8इस्राएल क लोग मूसा बरे मोआब क खाले प्रदेस में तीस दिना तलक रोवत पीटत रहेन। इ सोक मनावइ क पूरा समइ रहा।

### यहोसू मूसा क जगह लेत ह

9तब नून क पूत यहोसू बुद्धिमत्ता क आलिमा स भरपूर रहा काहेकि मूसा ओह पइ आपन हाथ धइ दिहे रहा। इस्राएल क मनइयन यहोसू क बातन मानेन। उ पचे वइसा ही किहन जइसा यहोवा मूसा आदेस दिहे रहा। 10मुला उ समइ क पाछे, मूसा क नाई कउनो नबी नाही भवा। यहोवा परमेस्सर मूसा क प्रत्यक्ष जानत रहा। 11कउनो दूसर नबी उ सारे चमत्कार अउ अचरज भरा काम नाही देखाएन जेनका करइ बरे यहोवा मूसा क मिस्त्र क भुइँया में पठए रहा। उ पचे चमत्कार अउ अचरज, फिरौन, ओकर सबइ सेवकन अउ मिस्त्र क सबहिं वस्तुअन बरे करइ ग रहेन। 12कउनो दूसर नबी कबहुँ ओतना सक्तीसाली अउ अचरज भरा चमत्कार नाही किहस जउन मूसा किहस अउर जेनका इस्राएल क सबहिं लोग लखेन।

# गनती

## मूसा इस्त्राएल क मनइयन क गनत ह

**1** यहोवा मूसा क संग मिलापवाला तम्बू में बात किहस। इ बात सीनै रेगिस्तान में भइ। इस्त्राएल क मनइयन जब मिस्र तजि दिहन ओकरे पाछे इ बात दूसर बरिस क दूसर महीना क पहिले दिन क रही। यहोवा मूसा स कहेस, 2“इस्त्राएल क सब मनइयन क गना। हर मनई क सूची ओकर परिवार अउ ओकर परिवार-समूह क संग बनावे। 3तू अउ हारून इस्त्राएल क सबहिं मनइयन क गनब्या। ओन मनसेधुअन क गना जउन बीस बरिस या ओसे जिआदा उमर क अहई। इ सबइ उ पचे अहई जउन इस्त्राएल क फउज में सेवा करत हीं। एनकइ सूची एँके समूह प बनी तइयार करा। 4हर परिवार दल स एक मनई तोहार मदद करी। उ मनई आपन परिवार दल क अगुआ होइ। 5तोहरे साथे रहइ अउ तोहार मदद करइ वाला मनइयन क नाउँ इ अहई:

- रूबेन क परिवार समूह में स सदेऊर क पूत एलीसूर;
- 6सिमोन परिवार समूह स सूरीसद्दे क पूत सलूमिआल;
- 7यहूदा क परिवार समूह स अम्मिनादाब क पूत नहसोन;
- 8इस्साकार क समूह में स सूआर क पूत नतनेल;
- 9जबूलून क परिवार समूह स हेलोन क पूत एलीआब;
- 10यूसुफ क सन्तानन स, एप्रैम क परिवार समूह स अम्मिहूद क पूत एलीसामा अउ मनस्से क परिवार समूह स पदासूर क पूत गमलिले;
- 11बिन्यामीन क परिवार समूह स गिदोनी क पूत अबीदान;
- 12दान क समूह में स अम्मिसद्दे क पूत अहीएजेर;
- 13आसेर क परिवार समूह स आक्रोन क पूत पगीएल;
- 14गाद क परिवार समूह स दूएल क पूत एल्यासाप;
- 15नप्ताली क परिवार समूह स एनाम क पूत अहीरा दल क।”

16इ सब मनइयन आपन लोगन क जरिए आपन परिवार समूह क अगुआ चुना गएन। इ पचे आपन मनइयन क जरिए परिवार समूह क नेता चुना गएन। इ सबइ आपन परिवार समूह क नेता अहई। 17-18इसलिए मूसा अउ हारून उ मनइयन क लिहस जे नाउँ दुआरा चुना गएस अउ एह बरे दूसर महीना क पहिले दिन रहा। मूसा अउ हारून इ मनइयन अउ इस्त्राएल क लोगन क एक संग बोलाएस। तब मनइयन क सूची ओन कई परिवार अउ परिवार समूह क मुताबिक बनी। बीस बरिस या ओसे जिआदा उमर क सबहिं

मनइयन क सूची बनी। 19मूसा ठीक वइसा ही किहेस जइसा यहोवा क हुकुम रहा। मूसा मनइयन क तब गनेस जब उ पचे सीनै क रेगिस्तान में रहेन।

20रूबेन क परिवार समूह क गना गवा। रूबेन इस्त्राएल क पहिलौटी पूत रहा। ओन सबहिं मनइयन क जउन फउज में सेवा करइ क जोगग अहइ सूची बनी जेकर उमिर बीस बरिस या ओसे जिआदा रहेन। ओनकइ सूची ओनके परिवार अउ ओनकइ परिवार समूह क संग बनी। 21रूबेन क परिवार समूह स गना भए मनसेधुअन क गनती 46,500 रही।

22सिमोन क परिवार समूह क गना गवा। बीस बरिस या ओसे जिआदा उमर अउर फउज में सेवा करइ क जोगग सबहिं मनसेधुअन क सूची बनी। ओनकइ सूची ओनके परिवार अउ ओनकइ परिवार समूहन क संग बनी। 23सिमोन क परिवार समूह क गने प सारे मनसेधुअन क गनती 59,300 रही।

24उ पचे गाद क परिवार समूह क गनेन। बीस बरिस या ओसे जिआदा उमर क सबइ मनइयन जउन कि फउज में सेवा करइ जोगग सबहिं मनसेधुअन क नाउँ क सूची बनी। ओनकइ सूची ओनके परिवार समूहन क संग बनी। 25गाद क परिवार समूह क गने प मनसेधुअन क सब गिनती 45,650 रही।

26यहूदा क परिवार समूह क गना गवा। बीस बरिस या ओसे जिआदा उमर अउ फउज में सेवा करइ क जोगग मनसेधुअन क नाउँ क सूची बनी। ओनकइ सूची ओनकइ परिवार अउ ओनके परिवार समूहन क संग बनी। 27यहूदा क परिवार समूह क गने प सब क गनती 74,600 रही।

28इस्साकार क परिवार समूह क गना गवा। बीस बरिस या ओसे जिआदा उमर अउ फउज में सेवा करइ क जोगग सबहिं मनसेधुअन क नाउँ क सूची बनी। ओनकइ सूची ओनके परिवार अउ ओनकइ परिवार समूहन क संग बनी। 29इस्साकार क परिवार समूह क गने प मनसेधुअन क गनती 54,400 रही।

30जबूलून क परिवार समूह क गना गवा। बीस बरिस या ओसे जिआदा उमर अउ फउज में सेवा करइ जोगग सबहिं मनसेधुअन क नाउँ क सूची बनी। ओनकइ सूची ओनके परिवार अउ ओनके परिवार समूहन क संग बनी। 31जबूलून क परिवार समूह क गने प मनसेधुअन क सब गनती 57,400 रही।

32यूसुफ क पूतन स एप्रैम क परिवार समूह क गना गवा। बीस बरिस या ओसे जिआदा उमर अउ फउज में सेवा करइ जोगग सबहिं मनसेधुअन क नाउँ क सूची बनी।

ओनकइ सूची ओनके परिवार अउर परिवार समूहन क संग बनी। 33एप्रैम क परिवार समूह क गने प सब गन्ती 40,500 रही।

34मनस्से क परिवार समूह क गना गवा। बीस बरिस या ओसे जिआदा उमर अउ फउज में सेवा करइ जोगग सबहिं मनसेधुअन क नाउँ क सूची बनी। ओनकइ सूची ओनके परिवार समूहन क संग बनी। 35मनस्से क परिवार समूह क गने प मनसेधुअन क सब गन्ती 32,200 रही।

36बिन्यामीन क परिवार समूह क गना गवा। बीस बरिस या ओसे जिआदा उमर अउ फउज में सेवा करइ जोगग सबहिं मनसेधुअन क नाउँ क सूची बनी। ओनकी सूची ओनके परिवार अउ ओनके परिवार समूहन क संग बनी। 37बिन्यामीन क परिवार समूह क गने प मनसेधुअन क सब गन्ती 35,400 रही।

38दान क परिवार समूह क गना गवा। बीस बरिस या ओसे जिआदा उमर अउ फउज में सेवा करइ जोगग सबहिं मनसेधुअन क नाउँ क सूची बनी। ओनकी सूची ओनके परिवार अउ परिवार समूहन क संग बनी। 39दान क परिवार अउ ओनका परिवार समूहन क गने प सब गन्ती 62,700 रही।

40आसेर क परिवार समूह क गना गवा। बीस बरिस या ओसे जिआदा उमर अउ फउज में सेवा करइ जोगग सबहिं मनसेधुअन क नाउँ क सूची बनी। ओनकी सूची ओनके परिवार अउ परिवार समूहन क संग बनी। 41आसेर क परिवार समूह क गने प मनसेधुअन क सब गन्ती 41,500 रही। 42नप्ताली क परिवार समूह क गना गवा। बीस बरिस या ओसे जिआदा उमर अउ फउज में सेवा करइ जोगग सबहिं मनसेधुअन क नाउँ क सूची बनी। ओनकी सूची ओनके परिवार अउ ओनके परिवार समूहन क संग बनी। 43नप्ताली क परिवार समूह क गने प मनसेधुअन क सब गन्ती 53,400 रही।

44मूसा, हारून अउ इस्राएल क बारह नेता लोग इ सब मनसेधुअन क गनेन। हर परिवार समूह स एक तु नेता रहा। 45इस्राएल क हर एक मनसेधू जउन बीस बरिस या ओसे जिआदा उमर अउ फउज में सेवा करइ जोगग रहा, गना गवा। इ मनसेधुअन क सूची ओनके परिवार क संग बनी। 46मनसेधुअन क सब गन्ती 6,03,550 रही।

47लेवी क परिवार समूह स परिवारे क सूची इस्राएल क दूसर मनसेधुअन क संग नहीं बनी। 48यहोवा मूसा स कहे रहा: 49“लेवी क परिवार समूह क मनइयन क जिन गना। उ क गन्ती इस्राएल क बचा भवा लोगन क संग जिन करा। 50लेवी क मनइयन स कहा कि उ पचे करार क पवितर तम्बू क जिम्मेदार अहई। उ पचे ओकर अउर ओहमाँ स जउन चीजन अहई, ओनका देखा-भाला। उ पचे पवितर तम्बू में अउ ओकर सबहिं चीजन लइके चलिहीं। उ पचे आपन सिबिर ओकरे चारिहुँ कइँती डइहीं अउ ओकर देख भाल करिहीं। 51जब कबहुँ भी पवितर तम्बू क जात्रा पइ लइ जावइ जाइ तउ लेवी क मनइयन क ही तम्बू क निचे उतारइ चाही। जब कबहुँ पवितर तम्बू कउनो ठउरे प लगाइ जाइ तउ लेवी क मनसेधुअन क ही तम्बू क लगाइ चाही।

उ पचे अइसा ही लोगन अहई जउन पवितर तम्बू क देख-रेख करत हीं। जदि कउनो अइसा दूसर मनई जउन कि लेवी नहीं अहइ, पवितर तम्बू क निअरे ओका देख-रेख करइ बरे आवत ह तउ उ मारि डवा जाइ चाही। 52इस्राएल क मनइयन आपन तम्बू आपन समूहन क अनुसार लगइहीं। हर एक मनई क अनुसार आपन सिबिर आपन परिवार समूह क झण्डा क लगे लगावइ चाही। 53मुला लेवी क मनइयन क आपन सिबिर पवितर तम्बू क चारिहुँ कइँती डवइ चाही। लेवी क मनई करार क पवितर तम्बू क रच्छा करिहीं। उ पचे पवितर तम्बू क रच्छा करिहीं उ पचे पवितर तम्बू क रच्छा करिहीं जैसे इस्राएल क मनइयन क कछू बुरा न होइ।”

54एह बरे इस्राएल क मनइयन ओन सबहिं बातन क किहेन जेकर हुकुम यहोवा मूसा क दिहन।

### सिबिर क संजाम

2 यहोवा मूसा अउ हारून स कहेस, 2“इस्राएल क मनइयन क मिलापवाला तम्बू क चारिहुँ कइँती आपन तम्बू लगावइ चाही। हरेक दल क आपन झण्डा होइ अउ हरेक मनई क आपन समूह क झण्डा क लगे आपन तम्बू लगावइ चाही।

3“यहूदा क सिबिर झण्डा क पूरब में होइ जेहर सूरज निकरत ह। यहूदा क मनई हुवँइ सिबिर लगइहीं। यहूदा क मनइयन क अगुआ अम्मीनादाब क पूत नहसोन अहइ। 4इ दल में 74,600 मनसेधू रहेन।

5“इस्साकार क परिवार समूह यहूदा क मनइयन क ठीक पाछे होइ। इस्साकार क मनइयन क नेता सूआर क पूत नतनेल अहइ। 6इ दल में 54,400 मनसेधू रहेन।

7“जबूलून क परिवार समूह भी यहूदा क परिवार समूह स ठीक आगे आपन सिबिर लगाइ। जबूलून क मनइयन क नेता हेलोन क पूत एलीआब अहइ। 8इ दल में 57,400 मनसेधू रहेन।

9“यहूदा क सिबिर में 1,86,400 मनसेधू रहेन। इ सबइ आपन अलग-अलग परिवार समूहन में बँटा भवा रहेन। यहूदा पहिला समूह होइ जउन उ टेमें अगवा चली। जब लोग एक ठउर स दूसर ठउर क जात्रा करिहीं।

10“रूबेन क झण्डा पवितर तम्बू क दक्खिन में होइ। हरेके समूह आपन झण्डा क लगे आपन सिबिर लगाइ। रूबेन क लोगन क प्रधान संदेऊर क पूत एलीसूर बाटइ। 11इ दले में 46,500 मनसेधू रहेन।

12“सिमोन क परिवार समूह क रूबेन क परिवार समूह क ठीक पाछे आपन सिबिर लगाइ। साइमन क मनइयन क अगुआ सूरीसद्दल क पूत सल्लमीएल अहइ। 13इ दले में 59,300 मनसेधू रहेन।

14“गद क परिवार समूह भी रूबेन क मनइयन क ठीक पाछे आपन सिबिर लगाइ। गद क लोगन क प्रधान रूपल क पूत एल्यासाप अहइ। 15इ दले में 45,650 लोगन रहेन।

16“रूबेन क सिबिर में सब दलन क 1,51,450 मनसेधू रहेन। रूबेन क सिबिर दूसर समूह होइ जउन उ समइ चली। जब मनई एक ठउर स दूसर ठउर क जात्रा करिहीं।

17“जब मनई जात्रा करिहीं तउ लेवी क सिबिर ठीक ओकरे, पाछे चली। मिलापवाला तम्बू दूसर सिबिरन क बीचउ बीच ओनके संग रही। मनइयन आपन सिबिर उहइ सिलसिला में लगइहीं जउने क्रम में उ पचे चलिहीं। हरेक मनई आपन परिवार क झण्डा क संग रही।

18“एप्रैम क झण्डा पच्छिम कइँती रही। एप्रैम क परिवार-दलन हुवँइ सिबिर लगइहीं। एप्रैम क लोगन क प्रधान अम्मीहूद क पूत एलीसामा अहइ। 19इ दल में 40,500 लोगन रहेन।

20“मनस्से क परिवार समूह एप्रैम क परिवार क ठीक पाछे आपन सिबिर लगाइ। मनस्से क मनइयन क नेता पदासूर क पूत गम्लीएल अहइ। 21इ दल में 32,200 मनसेधू रहेन।

22“बिन्यामीन क परिवार समूह भी एप्रैम क परिवार क ठीक आगे आपन सिबिर लगाइ। बिन्यामीन क लोगन क नेता गिदोनी क पूत अबीदान अहइ। 23इ दले में 35,400 मनसेधू रहेन।

24“एप्रैम क सिबिर में 1,08,100 मनसेधू रहेन। इ तीसर परिवार होइ जउन तब चली जब मनई एक ठउर स दूसर ठउर क जात्रा करिहीं।

25“दान क सिबिर क निसान उत्तर कइँती होइ। दान क परिवार दलन हुवँइ सिबिर जमाई। दान क मनइयन क प्रधान अम्मीसद्दै क पूत अहीएजेर अहइ। 26इ दले में 62,700 मनसेधू रहेन।

27“आसेर क परिवार समूह दान क परिवार समूह क ठीक पाछे आपन सिबिर डाइ। आसेर क मनइयन क नेता ओक्रान क पूत पगीएल बाटइ। 28इ दले में 41,500 मनसेधू रहेन।

29“नप्ताली क परिवार समूह दान क परिवार समूह क ठीक पाछे आपन सिबिर लगाइ। नप्ताली क मनइयन क प्रधान एनान क पूत अहीरा अहइ। 30इ दले में 53,400 मनसेधू रहेन।

31“दान क सिबिर में 1,57,600 मनसेधू रहेन। जब मनइयन एक ठउर स दूसर ठउर क जात्रा करिहीं तउ इ काफिला आखिरी परिवार समूह होइ। हर एक मनई आपन झण्डा क अनुसार आपन परिवार क संग होइ।”

32सबहिं डेरन में अलग अलग दलन क सब परिवारन क मनसेधुअन क समूचइ गिनती रही 6,03,550 । 33मूसा इस्त्राएल क दूसर मनइयन में लेवी क मनइयन क नहीं गनेस। इ यहोवा क हुकुम रहा। 34यहोवा मूसा क जउन कछू करइ क कहेस उ सब क इस्त्राएलियन मान लिहेन। इस्सर क कहेइ क मुताबिक इस्त्राएल क मनइयन आपन झण्डा तरे आपन सिबिर लगाएन। यहोवा क कहे क मुताबिक इस्त्राएल क मनइयन जात्रा किहेन। हरेक मनई आपन परिवार अउ आपन परिवार समूह क संग रहा।

### हारून क याजकन परिवार

3 जउन समइ यहोवा सीनै पहाड़े प मूसा स बात किहेस उहइ समइ क हारून अउ मूसा क परिवार क इतिहास इहइ अहइ।

2हारून क चार पूत रहेन। नादाब पहिलौटा पूत रहा। ओकरे पाछे अबिहू, एलीआज़ार अउ ईतामार रहेन। 3इ सबइ अभिसेक करा भवा याजकन रहेन।

एनका याजकन क रूप में यहोवा क सेवा क खास काम सउँपा गवा रहा। 4मुला नादाब अउ अबीहू यहोवा क सेवा करत टेमें प पाप करइ क कारण मर गएन। उ पचे यहोवा क भेंट चढ़ाएन, मुला उ पचे उ आगी क बइपरेन जेकरे बरे यहोवा हुकुम नहीं दिहे रहेन। इ सीनै क रेगिस्तान में भवा। इ तरह नादाब अउ अबिहू हुवाँ मरि गएन। ओनके पूत नहीं रहेन। एह बरे एलीआज़ार अउ ईतामार याजक बनेन अउर यहोवा क सेवा करइ लागेन। उ पचे उ टेमें करत रहेन जब ओनकइ बाप जिअत रहा।

### लेवी बंस क याजकन क सहायक

5यहोवा मूसा स कहेस, 6“लेवी क परिवार समूह क सबहिं मनइयन क याजक हारून क अगवा लिआवा। उ पचे ओनका सेवा करइ हीं। 7लेवी बंस क हारून क उ समइ मदद करिहीं जब उ मिलापवाला तम्बू में सेवा करी अउर लेवी बंसे क इस्त्राएल क सब मनइयन क उ टेमें मदद करिहीं जउने टेमें उ पचे पवितर तम्बू में आराधना करइ अइहीं। 8इस्त्राएल क मनइयन मिलापवाला पवितर तम्बू क हर एक चीज क रच्छा करिहीं, इ ओनकइ कर्तव्य अहइ। मुला इ चीजन क देख-भाल कइके ही लेवी बंस क लोग इस्त्राएल क मनइयन क सेवा करिहीं। पवितर तम्बू में आराधना करइ क ओनका इहइ तरीका होइ।

9“इस्त्राएल क सब मनइयन में स लेवी बंसे क मनई चुना गएन। इ पचे लेवी बंस क हारून अउ ओकरे पूतन क मदद बरे चुना ग रहेन।

10“तू हारून अउ ओकरे पूतन क याजकन तइनात करब्या। उ पचे आपन फरज पूरा करिहीं अउ याजकन क रूप में सेवा करिहीं। कउनो दूसर मनई जउन निअरे आवइ क कोसिस करत ह मारि दीन्ह जाइ चाही।\*”

11यहोवा मूसा स इहइ कहेस, 12“मई तोसे कहेउँ कि इस्त्राएल क हरेक परिवार आपन पहिलौटी क जन्मा पूत मोका देइ-मुला अब मई लेवी बंस क आपन सेवा बरे चुनत हउँ। उ पचे मोर होइहीं। एह बरे इस्त्राएल क सब मनइयन क दूसर सबहिं लोगन क आपन पहिलौटी क पूत मोका नहीं देइ क होइ।

13“जब तू मिस्त्र में रहया, मई मिस्त्र क पहिलौटी क पइदा भवा लरिकन क मार डाए रहा। उ समइ मई इस्त्राएल क सबहिं पहिलौटी क गदेलन क अपने बरे लीन्ह। सबहिं पहिलौटी क पइदा भवा गदेलन अउ सबहिं पहिलौटी क जन्मा गोरु मोर अहइ। मुला अब मई तोहरे पहिलौटी क जन्मा गदेलन क तोहका वापस करत अहउँ अउर लेवी बंसे क आपन बनावत हउँ। मई यहोवा अहउँ।”

14यहोवा फुन सीनै क रेगिस्तान में मूसा स बात किहेस। यहोवा कहेस, 15“लेवी बंस क सबहिं परिवार समूहन अउ परिवार समूह क गना। हरेक मनसेधू या गदेलन जउन एक महीना या ओसे जिआद क होई ओनका गना।”

कउनो ... चाही याजक क रूप में सेवा करइ चाहत ह।



16एह बरे मूसा यहोवा क आग्या मानसे। उ ओन सबहि क गनेस।

17लेवी क तीन पूत रहेन। ओनकइ नाउँ रहेन: गोर्सीन, कहात अउ मरारी। 18हरेक पूत परिवार समूहन क प्रधान रहा।

गोर्सीन क परिवार समूहन रहेन लिब्नी अउ सिमी।

19कहात क परिवार समूहन रहेन: अम्राम, यिसहार, हेब्रोन, उज्जीएल।

20मरारी क परिवार समूहन रहेन: महली अउ मूसी।

उ सबइ उ कुल परिवार रहेन जउन लेवी क परिवार समूहन स जुड़ा रहेन।

21लिब्नी अउ सिमियन क परिवार गोर्सीन क परिवार स जुड़ा रहेन। उ सबइ गोर्सीन बंस क परिवार समूहन क रहेन। 22इ दुइनउँ परिवार समूहन में स एक महीना स जिआदा उमर क लरिकन या मनसेधू 7,500 रहेन। 23गोर्सीन बंस क परिवार समूहन क पच्छिउँ में सिबिर डवइ क कहा गवा। उ पचे पवितर तम्बू\* क पाछे आपन सिबिर लगाएन। 24गोर्सीन बंस क परिवार समूहन क प्रधान लाएल क पूत एल्यासाप रहा। 25मिलापवाला तम्बू में गोर्सीन बंस क लोग पवितर तम्बू, बाहरी तम्बू अउ पर्दन क देख-रेख क जिम्मेदार रहेन। उ पचे मिलापवाला तम्बू क प्रवेश दुआर क पर्दा क देख-भाल करत रहेन। 26उ पचे आँगन क पर्दा क देख-रेख करत रहेन। इ पर्दा जउन पवितर तम्बू अउ वेदी क चारिहूँ कइँती फइला रहा। उ पचे रस्सी अउ पर्दा बरे काम में बइपरइ वाली हर एक चिजियन क देख-रेख करत रहेन।

27अम्रामियन, यिसहारियन, हेब्रोनियन अउ उज्जीएल क परिवार कोहात क परिवार स जुड़ा रहेन। उ पचे कोहात बंसी परिवार समूहन क रहेन। 28इ परिवार समूह में एक महीना या ओसे जिआदा उमर क गदेलन अउ मनसेधू 8,600 रहेन। कोहात बंस क मनइयन क पवितर ठउर क देख-रेख क काम सउँपा गवा। 29कोहात बंस क परिवार समूहन क “पवितर तम्बू” क दक्खिन पहँटा दीन्ह गवा। इ उ पहँटा रहा जहाँ उ पचे सिबिर लगाएन। 30कोहात बंस क परिवार समूहन क प्रधान उज्जीएल क पूत एलीसापान रहा। 31ओनकइ काम पवितर सन्दूख, मेज, डीबट, वेदी अउ पवितर ठउर क कामे में आवइवाला सामान क देख-रेख करब रहा। उ पचे पर्दा अउ ओनके संग प्रयोग में आवइवाली सबहि चीजन क देख-रेख करत रहेन।

32लेवी बंस क नेता लोगन क मुखिया एलीआज़ार रहा। उ याजक हारून क पूत रहा। एलीआज़ार पवितर चीजन क देख-रेख करइवालन सबहि मनइयन क कोतवाल रहा।

33-34महली अउ मुसी परिवार समूहन मरारी परिवारे स जुड़ा रहा। एक महीना या ओसे जिआदा उमर क लरिकन अउ मनसेधू परिवार समूह में 6,200 रहेन। 35मरारी समूह क नेता अबीहैल क पूत सूरीएल रहा। इ परिवार समूह क पवितर तम्बू क उत्तर क पहँटा दीन्ह ग रहा। इ उहइ पहँटा अहइ जहाँ उ पचे सिबिर लगाए रहेन। 36मरारी लोगन क पवितर तम्बू क ढाँचा क देखभाल क काम सौंप दीन्ह गवा।

**पवितर तम्बू** या “टाबरनाकेल” तम्बू परमेस्सर आपन मनइयन क बीच रहइ आवा रहा।

उ पचे सबहि छड़न, खंभन अउ आधार अउ पवितर तम्बू क ढाँचा में जउन कछू लगा रहा उ सब कछू क देख-भाल करत रहेन। 37पवितर तम्बू क चारिहूँ कइँती आंगन क सबहि खंभन क देखरेख करत रहेन। एहमें सबइ आधार, तम्बू क खँटी अउ रस्सियन जुड़ी रहिन।

38मूसा, हारून अउ ओकर लरिकन मिलापवाला तम्बू क समन्वा पवितर तम्बू क पूरब कइँती सिबिर लगाएन। उ पचन क पवितर ठउर क देख-भाल क काम दीन्ह गवा। उ पचे इस्राएल क सबहि मनइयन बरे इ किहन। कउनो दूसर मनई जउन पवितर ठउर क निचके आवत, मार दीन्ह जाइ क रहा। 39यहोवा लेवी परिवार समूह क एक महीना या ओसे जिआदा उमर क गदेलन अउ मनसेधुअन क गनइ क हुकुम दिहस। सब गिनती 22,000 रही।

### लेवी बंसी पहिलौटी क लरिकन क जगह लेत हीं

40यहोवा मूसा स कहेस, “इस्राएल में सब एक महीना या ओसे जिआदा उमर क पहिला पइदा भवा लरिकन अउ मनसेधुअन क गना। ओनके नाउँ क एक अनुसार सूची बनावा। 41अब मई इस्राएल क सबहि पहिलौटी क पइदा भवा लरिकन अउ मनसेधुअन क नाहीं लेबा अब मई यानी यहोवा लेवी बंसियन क ही लेब। इस्राएल क दूसर सबहि मनइयन क पहिलौटी क पइदा भवा जनावरन क लेइ क ठउर प अब मई लेवी बंस क मनइयन क पहिलौटी क जनावरन क ही लेब।”

42इ तरह मूसा उ किहस जउन यहोवा हुकुम दिहस। मूसा इस्राएल क पहिलौटी क सतान क गनेस। 43मूसा सबहि पहिलौटी क पइदा भवा एक महीना या ओसे जिआदा उमर क लरिकन अउ मनसेधुअन क सूची बनाएस। उ सूची में 22,273 नाउँ रहेन।

44यहोवा मूसा स इ भी कहेस, 45“मई यानी यहोवा इ हुकुम देत हउँ: ‘इस्राएल क दूसर परिवारन क पहिलौटी क पइदा भवा मनसेधुअन क जगह प लेवी बंस क मनइयन क ल्या। अउर मई दूसर मनइयन क जनावरन क ठउर प लेवी-बंस क जनावरन क लेब। लेवी बंसी मोरउ अहइ। 46लेवी-बंस क मनई 22,000 अहइ अउर दूसर परिवारन क 22,273 पहिलौटी क पइदा भवा पूत अहइ। इ तरह सिरिफ 273 पहिलौटी क पइदा पूत लेवी बंस क मनइयन स जिआदा बाटेन। 47दूइ सौ तेहतर पहिलौटी मनइयन में स हर एक बरे पाँच सेकेल चाँदी जमा करा। (पवितर स्थान क सेकेल क अनुसार एक सेकेल बीस गोरा होत ह) 48उ चाँदी हारून अउ ओकरे पूतन क द्या। इ इस्राएल क 273 मनइयन बरे भुगतान अहइ।”

49मूसा 273 जिआदा मनइयन बरे रूपिया बटोरेस। इ सबइ उ पचे 273 मनई अहइ जेनकइ जगह लेवी बंस परिवार समूह नाहीं लइ सका। 50मूसा इस्राएल क पहिलौटी क पइदा भवा मनइयन स चाँदी बटोरेस। उ 1,365 सेकेल चाँदी पवितर स्थान क सेकेल क अनुसार बटोरेस। 51मूसा यहोवा क आग्या मानेस। मूसा यहोवा क आग्या क मुताबिक उ चाँदी हारून अउ ओकरे पूतन क दिहस।

### कोहात परिवार क सेवा करब

4 यहोवा मूसा अउ हारून स कहेस: 2“कोहात परिवार समूह क मनसेधुअन क गना। (कोहात परिवार समूह लेवी परिवार समूह क एक हींसा अहइ।) 3तीस स पचास बरिस क उमर वाले मनइयन क गना जउन फउज मँ सेवा करइ सकत ह। इ मनइयन मिलापवाला तम्बू मँ कामकाज करिहीं।

4“ओनकइ कामकाज सबन त जियादा पवितर ठउर क देखभाल करब अहइ।

5“जब सिबिर नवा ठउर क जात्रा करई। हारून अउ ओनके पूतन क चाही कि उ पचे मिलापवाला तम्बू मँ जरूर जाई अउ पर्दा उतारई अउ करार क पवितर सन्दूखे क ढौपई। 6तब उ पचे इ सबन्क बढ़िया चाम स बना भवा ढकना स ढौपि देई। तब उ पचे पवितर सन्दूखे प बिछा भवा खाल प एक ठु नीला ओढ़ना फइलइहीं अउ पवितर सन्दूखे प लगा भवा कइ मँ डंडा डइहीं।

7“तब उ पचे एक ठु नीला ओढ़ना पवितर मेजी प फइलइहीं। तब उ सबइ ओह पइ थाली, चम्मच, खोरा अउ पयेबलि बरे गगरी धरिहीं। उ पचे खास रोटी ओकर ऊपर धरइ सकत ह। 8तब तू पचे इ सबहिं चीजन प एक ठु लाल ओढ़ना डउब्या। तब हर एक चीज क बढ़िया चाम स ढौपि द्या। तब मेज क छल्ला मँ डंडा डवा।

9“तब डीबट अउ दिया क नीला ओढ़ना स ढकि द्या अउ साथ ही साथ दिया क गुल काटइवाला कैची, गुल रखइवाला थाली अउर दिया बरे प्रयोग मँ आवइवाला तेल क मेटिया क ढकि द्या। 10तब सबहिं चीजन क नीक चाम मँ लपटावा अउ ऐंका ढोवइ बरे प्रयोग मँ आवइवाला डंडन प ऐंका धरा।

11“सुनहरी वेदी प एक नीला कपड़ा फइलावा। ओका नीक चाम स ढका। तब वेदी क ढोवइ बरे ओहमँ लगा भवा छल्लन मँ डंडा डवा।

12“पवितर ठउर मँ आराधना क प्रयोग मँ आवइवाली खास चीजन क एक साथे बटोरा। ऐंका एक संग बटोस अउ ऐंका नीला ओढ़ना मँ बटोरा। तब ऐंका बढ़िया चाम स ढका। इ चीजन क लइ जाइ बरे ऐंका एक ढौंचा प धरा जिस प इ लइ जाइ।

13“काँसावाली वेदी स राख क झार द्या अउ ऐंकरे ऊपर एक बैगनी रंग क ओढ़ना फइलावा। 14तब वेदी प आराधना बरे प्रयोग मँ आवइवाली आगी क गोस्सी, काँटा, बेल्ला अउ खोरा आदी सब चीजन क बटोरा। इ चीजनक काँसा क वेदी प धरा। तब वेदी क ऊपर नीक चाम क ओढ़ना फइलावा। वेदी मँ लगा कइन मँ ऐंका लइ जाइवाला डंडा डवा।

15“जब हारून अउ ओकर पूत पवितर ठउर क सबहिं पवितर चीजनक ढकना पूरा करि लेई तब कोहात परिवार क मनई अन्दर आइ सकत हीं अउर उ चीजनक लइ जाब सुरु कइ सकत हीं। इ तरह उ पचे पवितर चीजनक छुइहीं नाहीं। तउ उ पचे मरिहीं नाहीं।

16“याजक हारून क पूत एलीआज़ार पवितर तम्बू बरे जिम्मेदार होइ। उ पवितर ठउर अउ ऐंकर हर चीज बरे

जिम्मेदार होइ। उ डीबट क तेल, महकउआ सुगन्धिवाली\* अगारबत्ती अउ हमेसा दीन्ह जाइवाली भेंट।\*”

17यहोवा मूसा अउ हारून स कहेस, 18“होसियार रहा, इ कोहात बंसी मनइयन क लेवी मनसेधुअन क बीच स बरबाद जिन होइ द्या। 19तोहका इ एह बरे करइ चाही कि कोहात बंसी महा पवितर ठउर ताई जाई अउ मरई नाहीं। हारून अउ ओकरे पूतन क अन्दर जाइ चाही अउ हरेक कोहात बंसी क बतावइ चाही कि उ का करइ। ओन पचन क हर एक मनई क चीज देइ चाही जउन ओका लइ जाइ क अहइ। 20जदि तू अइसा नाहीं करत्या तउ कोहात बंसी अन्दर जाइ सकत हीं अउ पवितर चीजन क लखि सकत हीं। जदि उ पचे एक छिन बरे भी ओन पवितर चीजन कइती निहारत हीं तउ ओनका मरइ क होइ।”

### गोर्सोनी परिवार क सेवा

21यहोवा मूसा स कहेस, 22“गोर्सोनी परिवार क सबहिं मनइयन क गना। ओनकइ सूची परिवार अउ परिवार समूह क मुताबिक बनावा। 23आपन सेवा क कर्तव्य कइ चुकइवालन तीस बरिस स पचास बरिस तक क मनसेधुअन जउन सबइ सेवा करइ बरे जाइ सकत ह क गना। इ सबइ लोग मिलापवाला तम्बू क देख-भाल करिहीं।

24“गोर्सोनी परिवार क इहइ करइ चाही अउ इ चीजन क लइ चलइ चाही। 25ऐंका पवितर तम्बू क पर्दा, मिलापवाला तम्बू, एकर ओढ़ावन अउ नीक चाम स बना ओढ़ावन लइ चलइ चाही। ओनका मिलापवाला तम्बू क दुआर क पर्दा भी लइ चलइ चाही। 26ओनका अंगने क ओन पर्दन क भी जउन पवितर तम्बू अउ वेदी क चारिहुँ ओर लगा बाटेन, लइ चलइ चाही। ओनका आंगन क प्रवेश दुआर क पर्दा भी लइ चलइ चाही। ओनका सब लसुरी अउ पर्दा क संग प्रयोग मँ आवइवाली सबहिं चीजन क लइ चलइ चाही। गरसान बंस क मनई उ कउनो भी चीज बरे जिम्मेदार होइहीं जउन इ चीजन स कीन्ह जात हीं। 27हारून अउ ओकर पूत इ सबहिं कामन क निगरानी करिहीं। गोर्सोनी बंस क मनई जउन कछू लइ जइहीं अउ जउन दूसर काम करिहीं ओकर पइ हारून अउ ओकर पूत नज़र राखिहीं। तोहका ओन लोगन क उ सबइ चीज सौंप देइ चाही जेनका ढोवइ बरे उ पचे जिम्मेदार होइहीं। 28इहइ काम अहइ जेका गोर्सोनी बंस क परिवार समूह क लोगन क मिलापवाला तम्बू बरे करइ क अहइ। हारून क पूत ईतामार याजक ओनके काम बरे जिम्मेदार होइ।”

### मरारी परिवार क सेवा

29“मरारी परिवार समूह क परिवार अउ परिवार समूहन क मनसेधुअन क गना। 30तीस स पचास बरिस क सबहिं

**महकउआ सुगन्धिवाली** यहोवा क भेंट क रूप मँ पवितर ठउर मँ हर दिन दीन्ह जाइवाली भेंट अउ अभिसेक बरे तेल क जिम्मेदार होई।

**हमेसा दीन्ह जाइवाली भेंट** जइतून क तेल जउन याजक, देवपुरूस या राजा क मूँडे प डवा जात रहा। इ बतावत रहा कि यहोवा क जरिये आपन खास काम बरे चुना ग रहेन।

मनसेधुअन क जउन सेवा करइ बरे जाइ सकत ह क गना। उ पचे मनइयन मिलापवाला तम्बू बरे खास काम करिहीं। 31जब तू जात्रा करब्या तब ओनकइ इ काम अहइ कि मिलापवाला तम्बू क फरेम (ढाँचा) लइ चला। ओनका पट्टी, खम्भा अउ आधार क लइ चलइ चाही। ओनका ओन तम्बू क खुँटियन क लइ चाही 32अउर ओका आँगन क चारिहुँ कइँती क खम्भा, ओका खुँटियन क साथ, आधार अउ रस्सी क लइ चाही। सब नाउँ क सूची बनावा अउ हरेक मनई क बतावा कि ओका का का चीज लइ जाइ क अहइ। 33इहइ बात अहइँ जेका मरारी बंस क लोग मिलापवाला तम्बू क कामे मँ सेवा बरे करिहीं। हारून क पूत ईतामार याजक ऐंके बरे जिम्मेदार होइ।”

### लेवी बंस परिवार

34मूसा, हारून अउ इस्त्राएल क मनइयन क अगुआ लोग कोहती-बंस क मनइयन क गनेन। उ पचे ऐंनका परिवार अउ परिवार समूहन क मुताबिक गनेन। 35उ पचे तीस स पचास बरिस क उमर क मनइयन क जउन सेवा करइ बरे जाइ सकत ह गनेन। इ पचन क मिलापवाला तम्बू बरे खास काम करइ बरे दीन्ह गएन।

36कहात परिवार समूह मँ जउन इ काम करइ क जोगगता रखत रहेन, 2,750 मनसेधू रहेन। 37इ तरह कोहात परिवार क इ मनइयन क मिलापवाला तम्बू क खास काम करइ बरे जिम्मेदारी दीन्ह गएन। मूसा अउ हारून ऐंका वइसा ही किहेन जइसा यहोवा मूसा स करइ क कहे रहा।

38गेर्सोनी परिवार समूह क भी ओकर परिवारन अउ ओकर परिवार समूहन क अनुसार गना गवा। 39तीस स पचास बरिस क उमर क सबहिं मनइयन क जउन सेवा करइ बरे जाइ सकतेन क गना गएन। इ मनइयन क मिलापवाला तम्बू मँ खास काम करइ क सेवा-काम दीन्ह गवा। 40गेर्सोनी परिवार समूह क परिवारन मँ जउन जोगग रहेन उ पचे 2,630 मनसेधू रहेन। 41इ तरह इ मनसेधुअन क जउन गेर्सोनी परिवार समूह क रहेन, मिलापवाला तम्बू मँ खास काम करइ क सेवा-काम सौंपा गवा। मूसा अउ हारून ऐंका वइसा ही किहेन जइसा यहोवा मूसा क करइ क कहे रहा।

42मरारी परिवार क परिवार अउ परिवार समूहन क भी गना गवा। 43तीस स पचास बरिस क उमर क सबहिं मनसेधू जउन सेवा करइ बरे जाइ सकतेन क गना गएन। इ मनइयन क मिलापवाला तम्बू बरे खास काम करइ क सेवा-काम दीन्ह गवा। 44मरारी परिवार समूह क परिवारन मँ जउन लोग जोगग रहेन, उ पचे 3,200 मनई रहेन। 45इ तरह मरारी परिवार समूह क इ मनइयन क खास काम दीन्ह गवा। मूसा अउ हारून ऐंका वइसा ही किहेन जइसा यहोवा मूसा स करइ क कहे रहा।

46मूसा, हारून अउ इस्त्राएल क मनइयन क नेता लोग लेवी-बंस क सबहिं निअम्बर क गनेन। उ पचे हर एक परिवार अउ हर एक परिवार समूह क गनेन। 47सब मनइयन जउन आपन सेवा कर्तव्य क निभाइ चुका रहेन अउर जउन तीस बरिस स पचास बरिस उमर क रहेन, गना गएन। इ

मनइयन क मिलापवाला तम्बू बरे खास काम करइ क सेवा-काम दीन्ह गवा। उ पचे मिलापवाला तम्बू क चलइ क काम तब किहेन जब उ पचे जात्रा किहेन। 48मनसेधुअन क सारी संख्या 8,580 रही।

49यहोवा इ आदेस मूसा क दिहेन। हर एक मनई क आपन काम दीन्ह ग रहा। अउ हरेक मनसेधू स कहा गवा रहा कि ओका का का लइ चलइ चाही। एह बरे यहोवा जउन हुकुम दिहे रहा उ चीजन क पूरा कीन्ह गवा। सबहिं मनइयन क गना गवा।

### सफाई क बारे मँ नेम

5 यहोवा मूसा स कहेस, 2“इस्त्राएल क मनइयन क हुकुम द्या कि उ हर एक व्यक्ति क चाहे उ मनसेधु या मेहरारू जउन चाम रोग स पीड़ित ह या जेकर सरीर स पीप बहत ह या जउन कि कउनो लहासे क छुअइ क करण असुद्ध होइ गवा अहइ छाउनी स दूर भेज द्या। 3उ पचन्क छाउनी स बाहेर भेज दीन्ह जाइ चाही ताकि उ छाउनी क जउन कि मोरे निवास अहइ क उ पचन्क असुद्ध नाहीं कइ देईं। मई तोहरे छाउनी मँ तू लोगन क बीच रहत हउँ।”

4एह बरे इस्त्राएल क मनइयन परमेस्सर क हुकुम मानेन। उ पचे ओन मनइयन क सिबिर क बाहेर पठइ दिहेन। उ पचे अइसा एह बरे किहेन काहे की यहोवा मूसा क हुकुम दिहस।

### अपराध बरे जुर्माना

5यहोवा मूसा स कहेस, 6“इस्त्राएल क लोगन क इ बतावा, अगर कउनो मनई अउ मेहरारू कउनो अइसा पाप करत ह जेका लोग करत, (कउनो पाप जेका दूसर क खिलाफ कीन्ह गवा ह तउ उ असल मँ परमेस्सर क खिलाफ पाप अहइ) तउ उ तरह क मनसेधू या मेहरारू अपराधी अहइ। 7एह बरे उ मनई लोगन क खिलाफ आपन कीन्ह पाप क कबूलइ। तब उ मनई ओका जरूर सुधार करइ चाही जेका उ किहस ह उ भुगतान मँ पाँचवाँ हींसा जोरइ अउ ओकर भुगतान ओका करइ जेकर बुरा उ किहस ह। 8मुला जउन मनई क उ बुरा किहा ह जदि उ मनई मरि जात ह अउर ओकर कउनो निचके क नातेवार भुगतान लेइ बरे न होइ तउ इ हाल मँ, बुरा करइ वाला मनई यहोवा क भुगतान करी। उ मनई पूरा भुगतान याजक क करी। भुगतान क बरे ओका एक ठू भेंड़ा क बलि अभिसेक क रूप मँ जरूर देइ चाही। याजक ओका बलि ओका अभिसेक करइ बरे देब्या। मुला याजक बचा भुगतान क आपन लगे रख सकत ह।

9“जदि इस्त्राएल क कउनो मनई परमेस्सर क खास भेंट चढ़ावत ह तउ उ याजक जउन ओका अंगीकार कइ सकत ह ओका अपने लगे रख सकत ह। इ ओकर बाटइ। 10एक मनइ क पवितर चीज ओका अपना अहइ (उ ओका दइ सकत ह या ओका आपन बरे रखइ सकत ह)। मुला जदि उ ओनका देत ह तउ उ याजक क होइ जाइ।”

## सक्की भतार लोग

11तब यहोवा मूसा स कहेस, 12“इस्त्राएल क लोगन स इ कहा कउनो मनई क मेहरारु पतिव्रता नाहीं भी होइ सकत। 13उ दूसर मनइयन क संग सोइ सकत ह अउ ऐका आपन भतारे स छुपाइ सकत ह। ओकर भतार ओका कबहुँ जान भी नाहीं सकत जउन बुराई उ किहेस ह होइ सकत ह कि कउनो गवाह भी नाहीं अहइ अगर उ आपन हरकत स नाहीं पकड़ा जाइ। अउ उ मेहरारु भी आपन भतार स आपन पाप क बारे में नाहीं कही। 14मुला भतार संका करब सुरु कइ सकत ह कि ओकर मेहरारु ओकरे विरुद्ध पाप किहेस ह। उ ओकरे बरे जलन रख सकत ह, चाहे उ कउनो बुरा काम नाहीं किहेस ह जेकर कारण उ अविस्वासी होइ जाइ। 15जदि अइसा होत ह तउ उ आपन मेहरारु क याजक क लगे लइ जाइ। भतार एक भेंट भी लइ जाइ। इ भेंट एपा क दसवाँ भाग जौ क आटा होइ। ओका जौ क आटे प तेल या सुगन्धि नाहीं डवइ चाही। इ जौ क आटा यहोवा क अन्न भेंट अहइ। इ एह बरे दीन्ह जात कि भतार ईर्ष्यालु अहइ। इ भेंट इ संकेत करी कि ओका बिस्वास अहइ कि ओकर मेहरारु पतिव्रता नाहीं अहइ।

16“याजक मेहरारु क यहोवा क समन्वा लइ जाइ अउ मेहरारु यहोवा क समन्वा खड़ी होइ। 17तब याजक कछू खास पानी लेइ अउ ओका माटी क कूँड़ा में डई। याजक पवित्र तम्बू क फर्स स कछू माटी पानी में नाई। 18याजक मेहरारु क यहोवा क समन्वा खड़ी रहइ बरे मजबूर करी। तब उ ओकर बार उधारी अउ ओकरे हाथे में अन्नबलि देइ। इ जौ क आटा होइ जउन जेका भतार जलन क कारण ओका दिहे रहा। उहइ टेमें याजक उ खास करुआ पानीवाला माटी क कूँड़ा धरे रही। इ जल ही अहइ जउन मेहरारु क परेसानी पइदा करत ह (सिरिफ अगर उ पाप किहेस ह।)

19“तब याजक मेहरारु क हिदायत देइ कि ओका झूठ नाहीं बोलइ चाही। ओका फुरइ बोलइ क बचन देइ चाही। याजक ओसे कही: ‘जदि तू दूसर मनई क संग नाहीं सोई अहा अउ तू आपन भतार क खिलाफ पाप नाहीं किहे अहा, जबकि तोहार बियाह ओकरे संग हुआ अहइ, तउ इ सराप जल तोहका नोस्कान न पहुँचाइ। 20मुला जदि तू आपन भतार क खिलाफ पाप किहा ह, जदि तू कउनो दूसर मनई क संग सोई अहा तउ तू सुद्ध नाहीं अहा। काहे? काहेकि जउन तोहरे संग सोवा इ बरे अहइ तोहार भतार नाहीं अहइ अउ उ तोहका असुद्ध बनाएन ह। 21एह बरे जब तू इ खास जल क पिउबू तउ तोहका बहोत परेसानी होइ। तोहार पेट फूलि\* आइ अउ तू कउनो लरिका पइदा नाहीं कइ सकबिउ। जदि तू गोइवा स भारी होबिउ तउ तोहार लरिका मरि जाइ। तब तोहार लोग तोहका तजि देइहीं अउ उ पचे तोहरे बारे में बुरी बात करिहीं।’

“तब याजक क मेहरारु स यहोवा क विसेस बचन देइ बरे कहइ चाही। मेहरारु क अंगीकार करइ चाही कि इ सबइ बुरी बातन ओका होइहीं, जदि उ झूठ बोली। 22याजक क कहइ चाही, ‘तू इ जले क लेबिउ जउन तोहरे तन में परेसानी पइदा करी। जदि तू पाप किहा ह तउ तू लरिका क

जनम नाहीं दइ सकबिउ अउर जदि तोहार कउनो लरिका गरभ में अहइ तउ उ जन्मइ स पहिले मरि जाइ।’ तब मेहरारु क कहइ चाही: ‘मई उ अंगीकार करत हई जउन आप कहत हीं।’

23“याजक क इ चिताउनियन क चाम-पत्र प लिखइ चाही। फुन ओका इ लिखावट क पानी में धोवइ चाही। 24तब मेहरारु उ पानी क पिई जउन परेसानी पइदा करत ह। उ पानी ओहमा जाइ अउर जदि उ अपराधी अहइ तउ ओका बहोत परेसानी पइदा करी।

25“तब याजक उ अन्नबलि जउन जलन बरे भेंट अहइ क ओहसे लेइ। उ ओका यहोवा क समन्वा उठाई अउर ओका वेदी तलक लइ जाइ। 26तब याजक आपन अंजुरी में अन्न भरी अउ ओका वेदी प धरी। तब उ ओका बारी। ओकरे पाछे उ मेहरारु स पानी पिअइ क कही। 27जदि मेहरारु भतार क खिलाफ पाप किहे होई तउ पानी ओका परेसान करी। पानी ओकरे सरिर में जाई अउर ओका बहोत कस्ट होइ। अउर कउनो बच्चा जउन ओकरे गरभ में होइ, पइदा होइ स पहिले मरि जाई अउर उ कबहुँ बच्चा क जन्म नाहीं दइ सकी। उ आपन लोगन क बीच अभिसाप होइ जाब्या। 28मुला जदि मेहरारु पति क खिलाफ पाप नाहीं किहे अहइ तउ उ पवित्र अहइ। फुन याजक घोसणा करी कि उ अपराधी नाहीं अहइ। अउर लरिकन क जन्म देइ बरे जोगग होइ जाई।

29“इ तरह इ ईसा क बारे में कानून अहइ। तोहका इहइ करइ चाही जदि कउनो बीही मेहरारु आपन पति क खिलाफ पाप करत ह। 30या जदि कउनो मनई जलन करत ह अउ आपन मेहरारु क बारे में संका करत ह कि उ ओकरे खिलाफ पाप किहे अहइ तउ मनई क इहइ करइ चाही। याजक क कहइ चाही कि उ मेहरारु यहोवा क समन्वा खड़ी होइ। तब याजक इ सबहिं काम क करी। इहइ कनून बा। 31भतार कउनो बुरा करइ क अपराधी नाहीं होइ। मुला मेहरारु कस्ट उठाइ, जदि उ पाप किहे अहइ।”

## नाज़ीरी बंस

6 यहोवा मूसा स कहेस, 2“इ बातन इस्त्राएल क मनइयन स कहा: कउनो मनसेधू या मेहरारु कछू निश्चित समइ बरे आपन आप क परमेस्सर क अपर्ण कइ क कसम खाइ सकत ह। उ मनई नाज़ीरी कहा जाई। 3उ टेम में मनई क कउनो दाखरस या कउनो जियादा नसीली चीज नाहीं पिअइ चाही। मनई क सिरका जउन दाखरस स बना होइ या कउनो जियादा नसीला पिअनी नाहीं पिअइ चाही। उ मनई क अंगूरे क रस नाहीं पिअइ चाही अउर न ही अंगूर या किसमिस खाइ चाही। 4उ पवित्रीकरण क काल में उ मनई क अंगूर स बना कउनो चीज नाहीं खाइ चाही। उ मनई क अंगूरे क बिया या बोबला भी नाहीं खाइ चाही।

5“पवित्रीकरण क काल में उ मनई क आपन बार नाहीं काटइ चाही। उ मनइ क उ टेमें तलक सुद्ध रहइ चाही जब तलक पवित्रीकरण क काल खतम न होइ। ओका आपन बार क लम्बा होइ देइ चाही। उ मनई क बार परमेस्सर क दीन्ह गवा पवित्रीकरण क बचन क एक खास

पेट फूलि तोहार गरभ गिरि जाइ अउ पेट फूलि आई।

हींसा अहइ। उ ओन बारन क परमेस्सर क भेंट क रूप में देई। एह बरे उ मनई आपन बारन क तब तलक लम्बा होइ देइ जब तलक अलग होइ क टेमें खतम होई।

6“इ पवित्रीकरण क काल में इ कउनो नाज़ीर क कउनो ल्हासे क लगे नहीं जाइ चाही। काहेकि उ मनई आपन क पूरी तरह स यहोवा क अर्पित कइ दिहे अहइ। 7जदि ओकर आपन बाप, आपन महतारी, आपन भाई या आपन बहिन भी मरि जाई तउ भी ओका ओनका छुवइ न चाही। इ ओका अपवित्तर करी। ओका इ देखावइ चाही कि ओका अलग कीन्ह ग अहइ अउर आपन क पूरी तरह परमेस्सर क अर्पित कइ चुका अहइ। 8जउन पूरा टेमें में उ अलग कीन्ह गवा उ पूरी तरह आपने यहोवा क अर्पित किहे रहा अहइ।

9“इ होइ सकत ह कि नाज़ीर कउनो दूसर मनई क संग होइ अउ दूसर मनई एकाएक मरि जाइ। जदि नाज़ीरी मरे भए मनई क छुई तउ उ अपवित्तर होइ जाइ। जदि अइसा होत ह तउ नाज़ीरी क मूँड स बार कटवावइ चाही। इ सबइ बार ओकरे खास दीन्ह गए बचन क हींसा रहने। ओका आपन बारन क सतएँ दिन काटइ चाही काहे की उ दिन उ पवित्तर कीन्ह जात ह। 10तब अठवें दिन ओका दुइ फाखता या कबूतरी क दुइ बच्चा याजक क लगे लइ आवइ चाही। ओका याजक बरे ओनका मिलापवाला तम्बू क दुआरे देइ चाही। 11तब याजक एक क कबूतरी पापबलि क रूप में भेंट करी। उ दूसरे कबूतरी क होमबलि क रूप में भेंट करी। अउर याजक उ मनई क ओकरे पाप बरे प्रायश्चित करब्या। (उ पाप किहेस काहे की उ ल्हास क लगे रहा।) उ समइ उ मनई फुन बचन देइ कि मूँडे क बारन क यहोवा बरे भेंट करी। 12एँकर इ अरथ भवा कि उ मनई क फुन पवित्रीकरण क काल में दूसर समइ बरे आपन आप क यहोवा क अर्पित कइ देइ चाही। उ मनई क एक बरिस क नर मेमना लावइ चाही। उ एँका दोखबलि क रूप में देइ। ओकरे पवित्रीकरण क सब दिन बिसराइ दीन्ह जात अहइ। उ मनई क नवा अलग होइके टेमें सुरु करइ क होइ। इ जरुर कीन्ह जाइ काहे की उ पवित्रीकरण पहिले काल में एक ल्हास क छुए रहा।

13“जब मनई क अलग होइ क टेमें पूरा होइ जाइ तउ ओका इ जरुर करइ चाही। ओका मिलापवाला तम्बू क दुआर प जाइ चाही। 14हुवाँ उ आपन भेंट यहोवा क देइ। ओकर भेंट होइ चाही:

होमबलि बरे बिन दोखे क एक बरिस क नर मेमना पापबलि क भेंट खातिर बिन दोखे क एक बरिस क मादा मेमना। मेलबलि बरे बिन दोखे क एक नर भेड़ा।

15बे खमीरे क बनी भइ रोटिन-नीक आटा में साना भवा तेले स बना केक-एँके ऊपर लावइ चाही। अउर दूसर अन्नबलि अउ पयेबलि जउन इ भेंटन क एक हींसा अहइ।

16“तब याजक इ चीजन क यहोवा क देइ। याजक पापबलि अउ होमबलि चढ़ाई। 17याजक बे खमीरे क रोटी क टोकरी यहोवा क देइ। तब उ यहोवा क मेलबलि क रूप में भेड़ा क मारी। उ यहोवा क अन्नबलि अउ पयेबलि क संग एँका देइ।

18“नाज़ीर क मिलापवाला तम्बू क दुआर प जाइ चाही। हुवाँ ओका आपन बार कटवावइ चाही जेका उ यहोवा बरे बढाए रहा। ओन बारन क मेलबलि क नीचे आगी क ऊपर रखई चाही।

19“जब नाज़ीर आपन बारन क काटि चुकी तउ याजक ओका भेड़ा क एक तु उसना भवा काँध अउ टोकरी स एक तु बड़वार अउ एक तु नान्ह क केक देइ। इ दुइनउँ केक बे खमीरे क बना होइहीं। 20तब याजक इ चीजन क यहोवा क अगवा हलाई। इ एक तु उत्तोलनबलि अहइ। इ चीजन पवित्तर अहइँ अउ याजक क अहइँ। भेड़ा क छाती अउ जाँघ भी यहोवा क समन्वा हलावा जइहीं। इ चीजन भी याजक क बाटिन। एँकरे पाछे नाज़ीरी दाखरस पी सकत ह।

21“जदि कउनो मनई नाज़ीर होइ चाहत ह तउ ओका यहोवा क इ सबहिं भेंट देइ चाही। इ नेमें ओन मनइयन बरे अहइँ जउन नाज़ीर होइ क बचन लेत हीं। जदि कउनो मनई जियादा देइ क बचन देत ह तउ ओका आपन बचन क निभावइ बरे नाज़ीर क नेमें क मुताबिक करइ चाही।”

### याजक क आसीबाँद

22यहोवा मूसा स कहेस, 23“हारून अउ ओकरे पूतन स कहा। इस्राएल क लोगन क आसीबाँद देइ क तरीका इहइ अहइ, ओनसे कहा:

24यहोवा तोहका आसीस देइ अउ तोहार रच्छा करई।

25यहोवा क कृपा-दृस्टि तोहे प उजागर होइ। उ तोहसे पिरेम करइ।

26यहोवा क दृस्टि तोह प होइ। उ तोह पइ दाया करी उ तोहका सान्ति क साथ आसीबाँद देइ।”

27तब यहोवा कहेस, “इ तरह हारून अउ ओकर पूत इस्राएल क मनइयन क समन्वा मोर नाउँ लेइहीं अउ मईँ ओनका आसीबाँद देब।”

### पवित्तर तम्बू क समर्पण

7 जउने दिन मूसा पवित्तर तम्बू क लगाउब समापन किहेस, उ एँका यहोवा क अर्पण किहेस। मूसा तम्बू अउ एहमाँ प्रयोग में आवइवाली चीजन, अउर वेदी अउ एहमाँ प्रयोग आवइवाली चीजन अउर वेदी अउ एहमाँ प्रयोग आवइवाली चिजिन प खास तेल डाएस इ ओन सबइ चीजन क पवित्तर किहेस।

2तब इस्राएल क नेता लोग भेंट चढ़ाएन। इ पचे आपन आपन परिवारे क मुखिया रहे रहने जउन आपन परिवार समूहन क नेता रहने। इ नेता लोग मनइयन क गनेन। 3इ सबइ नेता यहोवा बरे भेंट लइ आएन। उ पचे चारिहुँ ओर स ढँकी छः तु गाड़ी अउ बारह तु बर्धा क लइ आएन। (हर एक नेता क जरिये एक तु बर्धा दीन्ह गइ रही। अउर दुइ नेता क जरिये एक ठू गाड़ी दीन्ह गइ रही) नेता लोग पवित्तर तम्बू में यहोवा क इ चीजन क दिहेन।

4यहोवा मूसा स कहेस, 5“नेता लोग क इ चीजन क अंगीकार करा। इ चीजन क लेवि-बंस क मनइयन क द्या। इ ओनका मिलापवाला तम्बू प काम करइ मैं सहायक होइ।”

6एह बरे मूसा चारिहूँ कइँती स ढकी भइ गाड़ियन अउ गइयन क लिहस। उ इ चीजन क लेवी-बंस क लोगन क दिहस। 7उ दुइ गाड़ी अउ चार तु गाइ गोर्सीन बंसी लोगन क दिहस। ओनका आपन काम बरे ओन गाड़ियन अउ गइयन क जरूरत रही। 8तब मूसा चार तु गाड़ी अउ आठ तु गइया मरारी बंस क मनइयन क दिहस। ओनका आपन काम बरे गाड़ी अउ गइयन क जरूरत रही। याजक हारून क पूत ईतामार इ सबहिं मनइयन क काम बरे जिम्मेदार रहा। 9मूसा कोहात बंसी मनइयन क कउनो गाइ या कउनो गाड़ी नाहीं दिहस। इ मनइयन क पवितर चीजन आपन कौंधे प ढोउब रहा इहइ कारज ओनका करइ बरे सौंपा ग रहा।

10जउन दिन मूसा वेदी प तेल डाएस, उहइ दिन नेता लोग वेदी क अर्पण बरे आपन भेंट चढ़ावइ बरे लइ आएन। उ पचे आपन भेंट वेदी क समन्वा यहोवा क भेंट किहना। 11यहोवा पहिले स ही मूसा स कहे रहा, “हर दिन एक एक नेता वेदी प भेंट चढ़ावइ लइ जाइ।”

12-83\*बारहु-नेतन में स हर एक नेता आपन आपन भेंट लइ आवा।

उ सबइ भेंट इ अहइँ: हर एक नेता चाँदी क एक तु थाली लइ आवा जेकर वजन एक सौ तीस सेकेल अउर एक चाँदी क खोरा जेकर वजन सत्तर सेकेल रहा। इ दुइनउँ उपहार क पवितर स्थान क सेकेल क अनुसार भवा बटखरा स तउला गवा रहा। हर खोरा अउ हर थाली में तेल महीन आटा भरा रहा। इ अन्नबलि क रूप में प्रयोग में लइ जात रहा। हर नेता सोना क एक बड़का कलछुला भी लइ आवा जेकर वजन दस सेकेल रहा। इ कलछुला में धूप भरी रही।

हर नेता एक तु बछवा, एक भेड़ा अउ एक बरिस क नर मेमना भी लइ आवा। इ गोरुअन होमबलि बरे रहेन। हर नेता पापबलि क रूप में बइपरइ बरे एक बोकरा भी लावा। हर नेता दुइ गाइ, पाँच भेड़ा, पाँच बोकरा अउ एक एक बरिस क पाँच मेमना लिआवा। इ सबन क एक मलेबलि बरे बलि दीन्ह गइ।

पहिले दिन अम्मीनादाब क पूत नहसोन, जउन यहूदा क परिवार समूह स रहा, आपन भेंट लिआवा।

दूसर दिन सूआर क बेटवा नतनेल जउन इस्साकार क नेता रहा, आपन भेंट लिआवा।

तीसरे दिन हेलोन क बेटवा एलीआब जउन जबूलून क नेता रहा, आपन भेंट लिआवा।

चउथे दिन सदेऊर क पूत एलीसूर जउन रूबेनियन क नेता रहा, आपन भेंट लिआवा।

पाँचए दिन सूरीसदुदई क पूत सलुनीएल जउन सिमोनियन क नेता रहा, आपन भेंट लिआवा।

छठएँ दिन दूएल क बेटा एल्यासाप जउन गादियन क नेता रहा, आपन भेंट लिआवा।

सतएँ दिन अम्मीहूद क बेटवा एलीसामा जउन एप्रैम क नेता रहा, आपन भेंट लिआवा।

अठएँ दिन पदासूर क पूत गम्लीएल जउन मनस्से क मनइयन क नेता रहा, आपन भेंट लिआवा।

नवें दिन गिदोनी क पूत अबीदान जउन बिन्यामीन क मनइयन क नेता रहा, आपन भेंट लिआवा।

दसएँ दिन अम्मीसदुदई क बेटवा अहीयाजर जउन दान क लोगन क नेता रहा, आपन भेंट लिआवा।

ग्यारहवें दिन ओक्रान क बेटवा पजीएल जउन आसेर क लोगन क नेता रहा, आपन भेंट लिआवा।

अउर फिन बारहवें दिन एनान क बेटवा अहीरा जउन नप्ताली मनइयन क नेता रहा, आपन भेंट लइके आवा।

84इ तरह इ सबहिं चीजन इस्त्राएली मनइयन क नेता लोगन क भेंट रही। इ चीजन तब लाइ गइन जब मूसा खास तेल वेदी प एका अर्पण बरे डाएस। उ पचे बारह चाँदी क तस्तरी, बारह चाँदी क खोरा अउ बारह सोना क चम्मच लाएन। 85चाँदी क हर तस्तरी क वजन लग भग एक सौ सेकेल रहा। अउर हरेक खोरा क चाँदी क वजन लगभग सत्तर सेकेल रहा। चाँदी क तस्तरियन अउ चाँदी क खोरन क कुल माना गवा वजन\* दुइ हजार चार सौ सेकेल रहा। 86धूप स लबालब सोना क चम्मच में स हर एक क माना गवा वजन चार औंस रहा। बारह सोने क चम्मचन क कुल वजन करीब करीब उ पौंड रहा।

87होमबलि बरे गोरुअन क कुल गनती बारह बर्धी, बारह भेड़ा अउ बारह एक बरिस क भेड़ी क नर बच्चा रहेन। हुवाँ अन्नबलि भी रहा। यहोवा क पापबलि क रूप में प्रयोग में आवइ वाला कुल बारह बोकरा भी रहेन। 88नेता लोग मेलबलि क रूप में प्रयोग अउ मारा जाइ बरे गोरुअन क दिहना। इ सबइ गोरुअन क एक साथ गनती चौबीस बर्धी, साठ भेड़ा, साठ बोकरा अउ साठ एक बरिस क भेड़ी क नर बच्चा भी रहेन। इ तरह उ पचे वेदी क इ चीजन अर्पण कई बरे भेंट किहेन। इ मूसा वेदी प खास तेल डाइ क पाछे भवा।

89मूसा मिलापवाला तम्बू में यहोवा स बात करइ गवा। उ टेमें उ आपन स बात करत भइ यहोवा क वाणी सुनेस। उ वाणी करार क सन्दूखे क ऊपर क बिसेख ढकना क दुइनउँ करूब सरगदूतन क बगल स आवत रही। इ तरह परमेस्सर मूसा स बात किहस।

### डीबट

8 यहोवा मूसा स कहेस, 2“हारून स बात करा अउ ओसे कहा, “उ ठउरन प सात दिया धरा जेका मईँ तोहका देखीएँ ह। उ सबइ दियन डीबट क समन्वा क डेबरा क रोसन करिहीं।”

3हारून इ किहेस। हारून ओनेँ दियन क ठीक ठउर प धरेस अउ ओनकइ मुँह अइसा कइ दिहस कि ओसे डीबट क समन्वा क पहुँटा उजियर होइ सकइ। उ मूसा क दीन्ह गवा यहोवा क हुकुम क मानेस। 4डीबट सोने क पाटी स बना रहा। सोना क उपयोग पावा स लइ क उपर डीबट क

**पद 12-83** मूल पाठ में हर एक नेता क सूची अलग-अलग दीन्ह गइ अहइ। मुला हर एक भेंट क लिखा भवा पाठ एक समान अहइ। यह बरे सुविधा क धियान देत भए पद-गनती 12 से 83 ताई हिआँ एक साथेन दिआइके अनुसार कीन्ह ग रहा।

**माना गवा वजान** “पवितर सेकेल।” एक तु पौंडे में चालीस सेकेल होत रहेन। पवितर तम्बू अउ मन्दिर में तउल क काम में आवइ वाला माना भवा बटखरा।

सोना क फूल तलक कीन्ह गवा रहा। इ सब उहइ तरह बना रहा जइसा यहोवा मूसा क देखौए रहा।

### लेवी बंस क मनइयन क समर्पण

5 यहोवा मूसा स कहेस, 6 "लेवी बंस क मनइयन क इस्त्राएल क दूसर मनइयन स अलग लइ जा। ओने लेवी बंसी मनइयन क सुद्ध करा। 7 इ तोहका सुद्ध बनावइ बरे करइ क होइ। पापबलि स खास पानी\* ओन प छिरका। इ पानी ओनका सुद्ध करी। तब उ पचे पूरा सरिर स बार उस्तरा स कटवइहीं अउ आपन ओढ़ना क धोइहीं। इ ओनके सरिर क सुद्ध करी।

8 "तब उ पचे एक नवा बर्धा अउ ओकरे संग प्रयोग में आवइवाली अन्नबलि लेइहीं। इ अन्नबलि तेले स साना भवा आटा होइ। तब दूसर बर्धा क पाप बरे भेंट क रूप में ल्या। 9 लेवी बंस क मनइयन क मिलापवाला तम्बू क समन्वा पहँटा में लिआवा। तब इस्त्राएल क सबहि मनइयन क चारिहूँ कइँती स बटोरा। 10 तब तोहका लेवी बंस क मनइयन क यहोवा क समन्वा लइ आवा। अउ इस्त्राएल क लोग आपन हाथ ओन प धरीहीं। 11 तब हारून लेवी बंस क लोगन क यहोवा क समन्वा लाइ। उ पचे यहोवा बरे उत्तोलनबलि क रूप में होइहीं। इ ढंग स लेवी बंस क लोग यहोवा क विसेस काम करइ बरे तइयार होइहीं।

12 "लेवी बंस क लोगन स कहा कि उ पचे आपन हाथ बर्धा क मूँटे प धरिहीं। एक बर्धा यहोवा क पापबलि क रूप में होइ। दूसर बर्धा यहोवा क होमबलि क रूप में काम आइ। इ भेंट लेवी-बंस क मनइयन क पाप बरे प्रायश्चित करी। 13 लवि बंस क मनइयन स कहा कि उ पचे हारून अउ ओकरे पूतन क अगावा खड़ा होइ। तब यहोवा क समन्वा लेवी बंस क मनइयन क उत्तोलनबलि क रूप में अर्पण करा। 14 इ तरीका स लेवी बंस क लोग खास होइहीं। उ पचे इस्त्राएल क दूसर मनइयन स अलग होइहीं। अउ लेवी बंस क लोग हमार होइहीं।

15 "एह बरे लेवी बंस क मनइयन क सुद्ध करा। अउ ओनका यहोवा क समन्वा उत्तोलन बलि क रूप में हाजिर करा। जब इ पूरा हो जाइ तब उ पचे आइ सकत हीं अउर मिलापवाला तम्बू में आपन काम कइ सकत हीं। 16 इ सबइ लेवी बंसी इस्त्राएल क लोग अहीं जउन मोका दीन्ह ग अहइँ। मई ओनका आपन लोग क रूप में अंगीकार किएँ ह। बीते भए जमाना में हर एक इस्त्राएली परिवार में पहिलौटी क पइदा लरिका मोका दीन्ह जात रहा मुला मई लेवी बंस क मनइयन क इस्त्राएल क दूसर परिवारन क पहिलौटी क बेटवन क जगह प अंगीकार कियेउँ ह। 17 इस्त्राएल क हर मनई जउन हर एक परिवार में पहिले पइदा भवा ह, मोर अहइ। जदि उ मनई या गोरु अहइ तउ भी मोर अहइ। मई मिस्त्र में सबहि पहिला पइदा गदेलन अउ जनावर क मारि डिएँ रहा। एह बरे मई पहिला पइदा पूतन क अलग कियेउँ जेहँसे उ पचे मोर होइ सकइँ। 18 अब मई लेवी बंस क मनइयन क लइ लिहैउँ ह। मई

इस्त्राएल क दूसर लोगन क परिवारन में पहिला पइदा भएन गदेलन क ठउर प ऐनका अंगीकार कियेउँ ह। 19 मई इस्त्राएल क सबहि लोगन स लेवी बंस क मनइयन क चुनेउँ ह। मई ओनका हारून अउ ओकरे पूतन क ऐनका उपहार क रूप में दिहैउँ ह। मई चाहत हउँ कि उ पचे मिलापवाला तम्बू में काम करइँ। उ पचे इस्त्राएल क सबहि मनइयन बरे सेवा करिहीं। अउर उ पचे ओन बलिदानन क देइ में मदद करिहीं जउन इस्त्राएल क लोगन क पापन क प्रायश्चित करिहीं। तब कउनो बड़ा रोग या कष्ट इस्त्राएल क लोगन क नाहीं होइ जब उ पचे पवितर ठउर क लगे अइहीं।"

20 एह बरे मूसा, हारून अउ इस्त्राएल क सबहि लोगन यहोवा क हुकुम मानेन। उ पचे लेवी बंस क खातिर वइसा ही कियेन, जइसा यहोवा ओनके बरे मूसा क हुकुम दिहे रहा। 21 लेवी लोग आपन क फर्छा कियेन अउ आपन ओढ़ना क धोएन। तब हारून ओनका यहोवा क समन्वा उत्तोलन बलि क रूप में हाजिर कियेस। हारून उ भेंटन क भी चढ़ाएस जेका ओनकर पापन क प्रायश्चित करइ बरे चढ़ावा गवा रहा जउन ओनका पवितर कइ दिहे रहा। 22 ओकरे पाछे लेवी बंस क लोग आपन काम करइ बरे मिलापवाला तम्बू क आएन। हारून अउ ओकर पूतन ओनकइ देखरेख कियेन। उ पचे लेवी बंस क मनइयन क काम बरे जिम्मेदार रहेन। हारून अउ ओकर पूतन ओन आदेसन क मानेन जेका यहोवा मूसा क दिहे रहेन।

23 यहोवा मूसा स कहेस, 24 "लेवी बंस क मनइयन बरे इ विसेस आदेस अहइ: हर एक लेवी बंस क मनसेधू क, जउन पचीस बरिस या ओसे जिआदा उमर क अहइ, जरूर आवइ चाही अउ मिलापवाला तम्बू में क काम में हाथ बटावइ चाही। 25 जब कउनो मनई पचास साल क होइ जाइ तउ ओका रोजाना क कामे स छुट्टी लेइ चाही। ओका फुन काम करइ क जरूरत नाहीं अहइ। 26 पचास साल या ओसे जियादा उमर क लोग मिलापवाला तम्बू में आपन भाइयन क ओनके काम में मदद दइ सकत हीं। मुला उ पचे खुद काम नाहीं करिहीं। तोहका इ सब करइ चाही जब तू लेवि मनइयन क ओनका काम करइ क द्या।"

### फसह त्यौहार

9 यहोवा मूसा स सीने रेगिस्तान में कहेस। उ टेमें दूसर बरिस क पहिला महीना रहा। जब इस्त्राएल क मनइयन मिस्त्र स निकरा रहेन। यहोवा मूसा स कहेस, 2 "लोगन क तय कीन्ह गवा टेमें पइ फसह क दवत जरूर मनावइ चाही। 3 उ तय कीन्ह गवा समइ इ महीना क चउदहवाँ दिन अहइ। ओनका गोधूरि क टेमें फसह क भोजन खाइ चाही। ओका इ सबइ कानून अउ नेम क पालन करइ चाही जेका त्यौहार में कीन्ह जात ह।"

4 एह बरे मोसा इस्त्राएल क लोगन क फसह क त्यौहार मनावई बरे कहेस। 5 अउर लोग पहिला महीन क चउदहवाँ दिन वइसा ही कियेन। इस्त्राएल क मनइयन हर एक काम वइसन कियेन जइसा यहोवा मूसा क हुकुम दिहे रहेन।

6 मुला कछू लोग फसह त्यौहार क भोज उ दिन नाहीं खाइ सकेन। उ पचे एक ल्हास क कारण सुद्ध नाहीं रहेन।

**पापबलि स खास पानी** इ पानी में लाल गइयन क राख रही जेका पाप बरे भेंट क रूप में वेदी प जरावा ग रहा।

एह बरे उ दिन उ पचे मूसा अउ हारून क लगे गएन। 7उ पचे मूसा स कहेन, “हम पचे एक लहासे क छुअइ क कारण असुद्ध भवा अहेन। याजकन लोग तय कीन्ह ग टेमें प हमेका यहोवा क चढ़ावा देइ स रोक दिहस। तउ हम पचे इस्त्राएल क दूसर मनइयन क संग फसह त्योंहार नाहीं मनाइ सकित। हमका का करइ चाही?”

8मूसा ओनसे कहेस, “मई यहोवा स पूछब कि उ एकरे बारे में का कहत ह।”

9तब यहोवा मूसा स कहेस, 10“इस्त्राएल क लोगन स इ बातन कहा: इ विधि तोहार अउर तोहारे सन्तानन बरे होब्या। इ होइ सकत ह कि तू ठीक टेमें प फसह त्योंहार न मनाइ सका काहे की तू या तोहारे सन्तानन क कउनो मनई लहास क छुइ जाइ क कारण असुद्ध होइ या होइ सकत ह कि उ कउनो लम्बी जात्रा प गवा भवा अहा।” 11उ फसह त्योंहार दूसर महीना क चउदहवाँ दिन गोधूरि क समइ मनावइ। उ मेमना, बे खमीरे क रोटी अउ करुआ सागापात खाइ। 12दूसर दिन क भिन्सारे तलक ओका ओहमाँ स कउनो भी भोजन नाहीं तजइ चाही। ओका भेड़ी क कउनो हाइ क भी नाहीं तोइइ चाही। उ मनई क फसह क नेमें क मानइ चाही। 13कउनो भी व्यक्ति जउन पवितर अहइ अउर लम्बी जात्रा पइ नाहीं अहइ तउ फसह त्योंहार ठीक समइ पइ ही मनावइ चाही। जदि उ मनई फसह त्योंहार ठीक समइ पइ नाहीं मनावत ह तउ ओका आपन मनइयन स अलगइ पठइ दीन्ह जाइ। उ अपराधी बा काहे की उ यहोवा क ठीक टेमें प भेंट नाहीं चढ़ाएस। तउ ओका जरुर सजा दीन्ह जाइ चाही।

14“तू सबइ क बीच बसइया गेर इस्त्राएली फसह त्योंहार में आवइ चाहइ तउ तोहारे संग हीसा लइ सकत ह। इ कनून में अहइ मुला उ मनई क फसह क सब नेमें मानइ चाही। उहइ नेमें सब बरे अहई।”

### बादर अउ आगी

15जउने दिन पवितर तम्बू अउ करार क तम्बू लगावा गवा। यहोवा क बादर ऐंका घेरि लिहस। रात में, उ बादर आगी क नाई देखाइ देत रहा। 16बादर पवितर तम्बू प बराबर थमा रहा। अउर राति में बादर आगी क तरह देखीत रहा। 17जब बादर पवितर तम्बू प आपन ठउर स तम्बू प ठहरत रहा, इस्त्राएलियन ऐंकर पाछा करत रहेन। जब बादर थमि जात्रा रहा तब इस्त्राएल क लोग हुवैइ सिबिर डवत रहेन। 18इहइ ढरी रहा कि यहोवा मनइयन क देखाएस कि कब जात्रा करई, कब रुकि जाई अउ कब सिबिर डवई। अउ जबहि तबहि बादर पवितर तम्बू क ऊपर ठहरि जात, लोग उहइ ठउर प सिबिर दसाए रहतेन। 19कबहुँ कबहुँ बादर बहोत दिन तलक पवितर तम्बू प जमा रहत। इस्त्राएलियन यहोवा क हुकुम मनतेन अउ जात्रा नाहीं करत रहेन। 20कबहुँ कबहुँ बादर पवितर तम्बू प कछू दिन बरे ठहरत रहत रहा यहोवा क हुकुम क अनुसार उ ठहरत अउ यहोवा क हुकुम क अनुसार उ चलत। 21कबहुँ कबहुँ बादर रात में ठहरि जात अउ दूसर दिन भिन्सारे चलि पड़त। तउ मनइयन आपन चीजन क बटोरतेन अउ एकर पाछा करतेन। या अगर बादर एक दिन अउ एक रात ठहरत अउर तब इ चलि सुरू

करत तउ मनइयन ओकर साथ चलि रहत। 22जदि बादर तम्बू क ऊपर दुइ दिन, या एक महीना या एक बरिस ठउरत तउ लोग यहोवा क हुकुम मनतेन। उ पचे उहइ सिबिर में ठउरतेन अउ तब ताई न चलतेन जब तलक बादर न चलत। जब बादर आपन ठउर स उठत अउ चलत रहत तबहि लोग चलतेन। 23इ तरह लोग यहोवा क हुकुम क मनतेन। उ पचे हुवैइ सिबिर जमउतेन जहाँ यहोवा बतावत। उ पचे तब चलतेन जब यहोवा ओनका अइसा बतावत। लोग धियान स निहरतेन अउ यहोवा क हुकुम मूसा क जरिए मनतेन।

### चाँदी क तुरहियन

10 यहोवा मूसा स कहेस, 2“तुरहियन बनवइ बरे चाँदी क प्रयोग करा। चाँदी क पतरी बनाइके ओसे दुइ तुरहियन बनावा। इ सबइ तुरहियन क उपयोग मनइयन क एक संग बोलावइ अउ इ बतावइ बरे कि सिबिर क लइक कब चलइ चाही। 3जब तू इ तुरहियन क बजउब्या, तउ सबहि मनइयन क मिलापवाला तम्बू क प्रवेश दुआर प बटुर जाइ चाही। 4अगर तू एक ही तुरही दर तलक बजउब्या तब सिरिफ नेता लोग अइहीं। (इस्त्राएल क बारहु परिवारे क मुखिया तोहारे समन्वा बटुर जइहीं।)

5“जब तू तुरहियन क चेताउनी क रूप में बजाउब इ मनइयन क सिबिर क लेकइ चलइ चाही। जब तू पहिली दाई तू तुरहियन क चेताउनी क रूप में बजउब्या, तउ मिलापवाला तम्बू क पूरब कइँती क परिवार दलन क चलब सुरू करइ चाही। 6दूसरी दाई जब तू तुरहियन क चेताउनी क रूप में बजउब्या, मिलापवाला तम्बू क ढक्खिन कइँती क परिवार दलन क सिबिर जमाए भए मनइयन क आगे चलब सुरू करइ क होइ। 7जब तू कउनो खास सभा बरे मनइयन क बटोरइ चाहा, तउ तुरहियन क दूसरे ढंग स लम्बी थिरान अवाजे में बजावा। 8सिरिफ हारून क याजक बेटवन ही तुरहियन बजाइ सकत हीं। इ तू सब पचन बरे नेमें अहइ जउन हमेसा अगवा क पीढ़ी दर पीढ़ी चलत रही।

9“जदि तू आपन देस में दुस्मन स लड़त रहा हवा तउ ओनसे लड़इ स पहिले तुरहियन क चेताउनी क रूप म बजावा। तब यहोवा तोहार परमेस्सर तोहार बात सुनी अउ तू सबन क दुस्मनन स बचाइ। 10तू सबन क आपन खास बइठक, नवा चन्द्रमा क दिना पइ अउ खुसी क टेमें प तुरहियन बजावइ चाही। जब तू पचे होमबलि अउ मेलबलि द्या, तउ तुरहियन बजावा। इ यहोवा तोहार परमेस्सर बरे तोहका याद रखइ बरे खास तरीका होइ।”

### इस्त्राएल क लोग सिबिर लइ जात हीं

11जब इस्त्राएल क मनइयन मिस्र छोड़ी दिहेन ओकरे पाछे दूसर बरिस क दूसर महीना क बीसवाँ दिन करार क तम्बू क ऊपर स बादर उठा। 12एह बरे इस्त्राएल क मनइयन आपन जात्रा सुरू किहेन। उ सबइ सीनै क रेगिस्तान तजि दिहेन अउ तब तलक जात्रा करत रहेन जब ताई बादर पारान क रेगिस्तान में नाहीं थमा। 13इ पहिली दाई रही जब मनइयन सिबिर लइ गएन। जइसा यहोवा मूसा क हुकुम दिहेस वइसा सिबिर क चलाएन।



14सबसे पहिले यहूदा क सिबिर स तीन दल गएन। उ पचे झण्डा लइके जात्रा किहेन। पहिला समूह यहूदा क परिवार समूह क रहा। अम्मीनादाब क पूत नहसोन उ दल क नेता रहा। 15ओकरे पाछे इस्साकार क परिवार समूह आवा। सूआर क पूत नतनेल उ समूह क नेता रहा। 16अउर तब जबूलून क परिवार समूह आवा। हेलोन क पूत एलीआब उ समूह क नेता रहा।

17तब पवित्तर तम्बू उतारा गवा। गेसोन अउ मरारी परिवार क मनइयन पवित्तर तम्बू क लइके चलेन। एह बरे इ परिवारे क लोग कतार में ठीक पाछे रहेन।

18तब रूबेन क सिबिर स तीन दल आएन। उ पचे आपन निसान लइके जात्रा किहेन। पहिला समूह रूबेन परिवार क रहा। सदेऊर क पूत एलीआज़ार इ समूह क नेता रहा। 19ओकरे पाछे सिमोन क परिवार समूह आवा। सूरीसद्वै क पूत सल्लमीएल उ समूह क नेता रहा। 20अउर तब गाद क परिवार समूह आवा। दूएल क पूत एलिअसफ इ समूह क नेता रहा। 21तब कोहात परिवार क लोग आएन। उ पचे ओन परित्र चीजन क ढोएन जउन पवित्तर ठउर में धरी रहिन। अब पवित्तर तम्बू क इ समूहन क नवा सिबिर में पहुँचइ क पहिले लगाइ द्या।

22एकरे पाछे एप्रैम क सिबिर क तीन समूह आएन। उ पचे आपन झण्डा लइके जात्रा किहेन। पहिला समूह एप्रैम क परिवार समूह रहा। अम्मीहूद क पूत एलीसामा उ समूह क नेता रहा। 23ओकरे पाछे मनस्से क परिवार समूह आवा। पदासूर क पूत गम्लीएल उ दले क नेता रहा। 24तब बिन्यामीन क परिवार समूह आवा। गिदौनी क पूत अबीदान उ दले क नेता रहा।

25कतार में आखिरी तीन तु परिवार समूह दूसर सबहि परिवार समूह बरे पीछ रच्छक रहेन। इ सब समूह दान क सिबिर स रहेन। उ पचे आपन निसान क संग जात्रा किहेन। पहिला समूह दान क परिवार समूह क रहा। अम्मीसद्वै क पूत अहीएजेर उ समूह क नेता रहा।

26ओकरे ठीक पाछे आसेर क परिवार समूह आवा। ओक्रान क पूत पजीएल उ समूह क नेता रहा। 27तब नप्ताली क परिवार समूह आवा। एनान क पूत अहीरा उ समूह क नेता रहा। 28इहइ तरह इस्त्राएल एक जगह स दूसर जगह पइ आपन समूहन क साथ, जब कबहुँ भी उ सिबिर लइ जाइ जात्रा करत रहेन।

29रुएल क पूत होबाब मिद्यानी रहा। (रुएल मूसा क ससुर रहा।) मूसा होबाब स कहेस, “हम पचे उ देस क जात्रा करत अही जेका यहोवा हम पचन क देइ क बचन दिहे अहइ। एह बरे हम लोगन क संग आवा। हम पचे तोहरे संग नीक बेउहार करब। यहोवा इस्त्राएल बरे नीक चीज देइ क बचन दिहे अहइ।”

30मुला होबाब जवाब दिहेस, “नाही; मई तोहरे संग न जाब। मई आपन देस अउ मनइयन क लगे जाब।”

31तब मूसा कहेस, “मेहरबानी कइके हमका जिन तजा। तू जानत अहा कि रेगिस्तान में हम पचन्क कइसा सिबिर लगाइ क होइ। तू हमार रह क देखइया होब्या। 32अगर तू हमरे संग आवत हया तउ यहोवा जउन कछू नीक चीज

देइहीं, हम तोहर संग हींसा बाँटबा।” 33उ सबइ यहोवा क पहाड़े स जात्रा सुरू किहेन। याजक लोग करार क सन्दूख लिहन अउ मनइयन क अगवा चलेन। उ पचे सिबिर डावइ बरे उचित ठउर क निहारत निहारत तीन दिना तलक लोगन क आगे-आगे सन्दूख लइ चलत रहेन। 34यहोवा क बदरा ओनके ऊपर मँडरात रहा। अउर हर एक भिन्सारे जब उ पचे आपन सिबिर क तजि देत रहेन तउ ओनका रह देखौवइ बरे बदरा हुवाँ रहत रहा।

35जब पवित्तर सन्दूख सिबिर स बाहर कइ जात रहा। मूसा हमेसा कहत रहा:

“परमेस्सर! उठा तोहार दुस्मन छितराइ जाई तोहार दुस्मन तोहरे समन्वा स पराइ जाई।”

36अउर जब पवित्तर सन्दूख आपन ठउर प धरा जात रहा, तब मूसा सब कहत रहा,

“हे परमेस्सर इस्त्राएल क दसिहुँ हजार बंस क लगे लउटि आवा।”

### लोग फुन सिकाइत करत हीं

**11** मनइयन आपन कस्ट क सिकाइत करब सुरू किहेन। यहोवा ओनकइ सिकाइत सुनेस। जब यहोवा इ बातन सुनेस तउ कोहाइ गवा। यहोवा क तरफ स आगी लोगन क बीच लग गइ। आगी सिबिर क कोना क कछू बाहरी भाग क भस्म कइ दिहस। 2एह बरे लोग मूसा क मदद बरे पुकारेन। मूसा यहोवा स बिनती किहेस अउ आगी क बरब बन्द होइग। 3एह बरे उ ठउर क नाउँ तबेरा पड़ि गवा। मनइयन उ ठउर क इहइ नाम दिहन काहे की यहोवा ओनके बीच आगी बारे रहा।

### सत्तर पुरनिया नेतन

4गरीब लोगन क भीड़ अउर इस्त्राएलियन क बीच आम जन-समूह दूसर खाइ बरे इच्छा जाहिर किहेन। हाली ही इस्त्राएल क मनइयन फुन सिकाइत करब सुरू किहेन। मनइयन कहेन, “हम पचे गोस खाइ चाहित ह। 5हम पचे मछरी क याद करित ह जउन हम मिस्र में खावा ह। उ मछरियन क कउनो दाम नाहीं देइ क पड़त रहा। हम पचन क लगे ढेर क भाजी रहिन जइसे ककरियन, खरबूजा, चीव (एक किसिम क पियाज), पियाज अउ लहसुन। 6मुला अब हम ताकत खोइ चुका अही। इ मन्ना क छोड़िके खाइ बरे हम कछू नाहीं लखइ सकत ह।” 7(मन्ना धन्ना बिया क नाई रहा अउ पेड़ क गोदं क नाई देखात रहा। 8लोग ऐंका बटोरत रहेन अउ तब एक पीसिके आटा बनवत रहेन। या उ पचे ऐंका खूँदइ बरे चक्की बइपरतेन, ऐंका बासन में पकउतेन या ऐंकर केक बनावत रहेन। “केक” क स्वाद जैतून क तेल स पकी भइ रोटी क तरह रहा। 9हर रात क भुईया ओस स गीली होइ जात तउ मन्ना जमीने प टपकत रहा।

10मूसा हर एक परिवार क मनइयन क आपन आपन तम्बू क दुआरे प खड़ा भएन सिकाइत करत सुनेस। यहोवा बहोत कोहाइ गवा। एँहसे मूसा बहोत हलाकान भवा। 11मूसा यहोवा स पूछेस, “यहोवा! आप आपन सेवक लोगन प इ मुसीबत

काहे डया ह। मई का गलती किहेउँ ह? मई तोहका नाखुस करइ का किहे उँ ह? तू मोहे प इ सबहिं मनइयन क जिम्मेदारी काहे ओढ़ाया ह? 12तू जानत ह कि मई इ सबहिं मनइयन क बाप नाहीं अहउँ। तू जानत ह कि मई ऐंका नाहीं पइदा किहेउँ ह। मुला मोका ऐंकाइ फिकिर करइ चाही जइसे धाई गदेली क कोरा मँ लइ चलत ह। तू हमका अइसा करइ क काहे मजबूर करत ह? तू मोका काहे जबरियावत ह कि मई ऐंका उ देस क लइ चलउँ जेका देइ क बचन ओनके पुरखन क तू दिहा ह। 13मोरे लगे इ मनइयन बरे जियादा गोस नाहीं अहइ। मुला उ पचे लगातार मोसे सिकाइत करत अहइ। उ सबइ कहत हीं, 'हमका खाइके गोस द्या।' 14मई अकेल्ला इ सब मनइयन क देख-भाल नाहीं कइ सक्ति। इ मोरे बरे भारी बोझा अहइ। 15जदि आप ओनके कस्ट क मोका देइ क काम चलावत रहइ चाहत हीं तउ आप मोका अबहिं मारि डवइ। जदि आप मोका सेवक मानत हीं तउ अबहिं मोका मरि जाइ देई। तब मोर सबहिं कस्ट खतम होइ जइहीं।"

16यहोवा मूसा स कहेस, "मोरे लगे इस्राएल क सत्तर बुजुर्गन लइ आवा जउन मनइयन क अफसर अउ पुरनिया होई। ऐंका मिलापवाला तम्बू मँ लिआवा। हुवाँ ओनाका आपन संग खड़ा करा। 17तब मई आउब अउ तोहसे बात करब। अब तोह प आतिमा आइ बा। मुला मई ओनका भी उ आतिमा देब। तब उ पचे मनइयन क देख भाल करइ मँ मदद करिहीं। इ तरह तोहका इ मनइयन बरे अकेले बोझा नाहीं उठाइ क होइ।"

18"मनइयन स कहा, "भियान खातिर आपन क तइयार करा। भियान तू पचे गोस खाब्या। यहोवा सुनेस ह जबहिं तू सबइ रोया अउ चीख्या ह। यहोवा तू पचन क बातन सुनेस ह जब तू मनइयन स कह्या, 'हमका खाइ बरे गोस द्या। हम पचन क इ मिस्त्र मँ नीक रहा।' तउ यहोवा अब तू पचन क गोस देइ। अउर तू पचे ओका खाब्या। 19तू पचे सिरिफ ओका एक दिन नाहीं, दुइ, पाँच, दस या बीस दिन भी खाइ सकब्या। 20तू पचे उ माँस महीना भर खाब्या। तू पचे उ गोस तब तलक खाब्या जब तलक ओसे ऊब न जाब्या। इ होइ, काहे की तू पचे यहोवा क खिलाफ सिकाइत किहा ह। यहोवा तू मनइयन मँ घूमत ह अउ तोहार जरुरत क समझत ह। मुला तू पचे ओकरे अगवा रोया, चिचियाया अउ ओराहना दिहा। तू मनइयन स कहा, 'हम पचे आखिर मिस्त्र काहे छोड़ि दीन्ह?'"

21मूसा कहेस, "यहोवा! हिआँ 6,00,000 मनसेधू साथ चलत अहइ। अउर तू कहत ह, मई ओनका पूरा महीना भइ खाइके गोस देब।" 22जदि हमका सबहिं भेड़ी अउ गोरु मारइ क होइ तउ भी ऐंते बड़े तावद मँ मनइयन क महीना भर खाइके भरपूर न होइ। अउर जदि हम समुदर क सारी मछरियन क धइ लेइ तउ भी ओनके बरे पूर्ति न होइ।" 23मुला यहोवा मूसा स कहेस, "यहोवा क सक्ती क जिन समेटा। तू देखब्या कि जदि मई कहत हउँ कि मई कछू करब तउ मई ओका कइ सकत हउँ।"

24एह बरे मूसा मनइयन स बतियाइ बाहेर गवा। मूसा ओनका उहइ बताएस जउन यहोवा कहे रहा। तब मूसा

सत्तर बुजुर्ग क बटोरेस। मूसा ओनसे पक्तर तम्बू क चारिहूँ कइती खड़ा होइके कहेस। 25तब यहोवा एक बादर मँ उतरा अउ उ मूसा स बात कहेस। आतिमा मूसा प सवार रही। यहोवा उहइ आतिमा क सत्तर बुजुर्गन लोगन प डाल दिहस। जब ओन सबन मँ आतिमा आइ तउ उ पचे भविस्सबाणी करइ लागेन। मुला ओकर बाद उ पचे अइसा अउर कभी नाहीं किहस।

26सत्तर बुजुर्गन मँ स दुइ ठु, एल्दाद अउ मेदाद तम्बू मँ स बाहेर नाहीं गएन। ओनकइ नाउँ बुजुर्गन क सूची मँ रहा मुला उ पचे सिबिर मँ रहेन। मुला परम आतिमा ओन पइ भी आइ अउ उ पचे सिबिर मँ भविस्सबानी करइ लागेन। 27एक ठु जवान दउड़ा अउ मूसा क सूचना दिहस। उ मनई कहेस, "एल्दाद अउ मेदाद सिबिर मँ भविस्सबाणी करत अहइ।"

28नून क पूत यहोसू मूसा स कहेस, "मूसा, तोहका ओनका रोकइ चाही।" (यहोसू मूसा क सहायक तब स रहा जब उ किसोर रहा।)

29मुला मूसा जवाब दिहस, "का तू मोह बरे जलन करत अहइ? मई चाहत हउँ कि यहोवा क सब लोग भविस्सबाणी करइ क जोगग होइ जाई। मई चाहत हउँ कि यहोवा आपन आतिमा ओन सबहिं प पठवइ।" 30तब मूसा अउ इस्राएल क नेता सिबिर मँ लउटि गएन।

### बटेन् आइन

31तबहिं यहोवा समुदर कइती स आँधी चलाएस। आँधी उ पहँटा मँ बटेरन क पठाएस। बटेरन सिबिर क चारिहूँ कइती उड़इ लागिन। हुआँ ऐंता बटेरन रहिन कि भुइँया ढँकि गइ। भुइँया प बटेरन क तीन फुट गहरी परत जमा होइ गइ। कउनो मनई एक दिन मँ ओतनी दूर जाइ सकत रहा जेतती दूर तलक चारिहूँ कइती बटेर रहिन। 32मनई अहदंकेन अउ बाहेर आएन। उ पचे सारा दिन अउ सारी रात बटेरन क बटोरेन। अउर फिन अगला दिन भी उ सबइ बटेरन क बटोरेन। हर मिला कम स कम साठ बुसल या ओसे जियादा बटेरन बटोरेस। तब मनइयन बटेरन क आपन सिबिर क चारिहूँ कइती धूप मँ फइलाएन।

33मनइयन गोस खाब सुरु किहन, मुला यहोवा कोहाइ गवा। जब गोस ओनके मुँहना मँ रहा अउ ऐंकरे पहिले कि मनइयन लील लेई यहोवा ओनका बहोत बेराम कइ दिहस। ढेर लोगन हुवई मरि बिलाइ गएन अउर ओनका माटी दइ दीन्ह गइ। 34एह बरे मनइयन उ ठउरे क नाउँ किब्रोथ-हतावा राखेन। उ पचे उ ठउर क उहइ नाउँ दिहेन। इ उहइ जगह बाटइ जहाँ उ पचे मनइयन क माटी दिहेन जउ स्वाद क भोजन क गहरी इच्छा धरत रहेन।

35मनइयन किब्रोथ-हतावा स हंसेरोत क जात्रा किहेनन अउ हुवई ठहरि गएन।

### मिरियम अउ हारून मूसा क सिकाइत करत हीं

12 मिरियम अउ हारून मूसा क खिलाफ बकइ लागीं। उ पचे ओकर अंगुस्तनुमाइ किहेन काहे की ओकर मेहरारु इथियोपिया क रही। उ पचे बिचारेन कि मूसा क इ

नीक नाहीं कि इथियोपिया क मेहरारु स बियाह करइ। 2उ पचे आपुस में कहेन, “यहोवा मनइयन स बात करइ मूसा क बीच में डाए बा। मुला सिरिफ मूसा ही नाहीं। यहोवा हम पचन क जरिये भी कहेस ह।” यहोवा एका अनकेस। 3(मूसा एक बहोतइ विनम्र मनई रहा। उ न तु डींग हँकत रहा अउर न सेखी बघारत रहा। उ धरती पइ के कउनो मनइयन स जियादा विनम्र रहा। 4एह बरे यहोवा एकाएक आवा अउ मूसा, हारून अउ मिरियम स बोला। यहोवा कहेस, “तू तीनहुँ अब मिलापवाला तम्बू में आवा!”

एह बरे मूसा, हारून अउ मिरियम तम्बू में गएन। 5यहोवा तम्बू क दुआर प खड़ा भवा। यहोवा हारून अउ मरियन क आपन लगे आवइ क कहेस। जब दुइनउँ ओनके निअरे आएन तउ 6परमेस्सर कहेस, “मोरउ सुना! अगर तोहरे बीच एक नबी अहइ, तउ मई, परमेस्सर खुद ओह पइ परगट होब या ओकर संग सपना में बात करब्या। 7मुला मूसा दूसर तरह क अहइ। मूसा मोर बिस्सासी दास अहइ। ओका मोरे पूरा घराना क जिम्मेदारी सोंपा गवा ह। 8जब मई ओसे बात करत हउँ तउ मई ओकरे अमन्वा समन्वा बतियात हउँ। मई छिपा भवा अरथ क कहतूत क ओकरे संग नाहीं बइपरत। मई ओका सफ साफ बातन क बतावत हउँ जउन मई ओसे जानइ चाहत हउँ। अउ मूसा यहोवा क सरूप क साफ साफ निहारि सकत ह। तउ काहे तू पचे मोर दास मूसा क खिलाफ बोलइ क हिम्मत किहा ह?”

9यहोवा ओन पइ कोहाइ गवा। यहोवा ओनका तजि दिहस। 10बादर तम्बू स उठा। हारून पाछे घूमा अउ मिरियम क लखेस। ओकर बदन क चाम कोढ़, सफेद बरफ क नाई होइ गइ। ओका भयानक चर्म रोग होइ गवा।

11तबहिं हारून मूसा स कहेस, “महोदय! कृपा कइके छिमा करा जउन मूरखपना क पाप हम पचे किहे अही।” 12ओकरी चमड़ी क रंग उ तरह न उड़ि जाइ देई जइसे मरा भवा लरिका क होत ह। (कबहुँ कबहुँ इ तरह क गदेली अधगला चमड़ी क साथ पइदा होइ जात ह।)

13एह बरे मूसा यहोवा स परार्थना किहेस, “परमेस्सर मेहरबानी कइके इ बीमारी स ओका नीक करा।” 14यहोवा मूसा क उत्तर दिहेस, “जदि ओकर बाप ओकरे चेहरा प थूक देइ तउ उ सात दिना तलक लजाई रही। एह बरे ओका सात दिना तलक सिबिर स बाहेर राखा। उ टेमें क पाछे इ वापस लउट सकत ह।”

15एह बरे उ पचे मिरियम क सात दिना तलक बरे बाहेर लइ गएन। तब तलक लोगन हुवाँ स नाहीं चलन जब तलक उ फुन वापस नाहीं लाइ गइ। 16ओकरे पाछे मनइयन हसेरथ क तजेन अउ उ सबइ पारान रेगिस्तान क जात्रा किहन। मनइयन उ रेगिस्तान में सिबिर डाएन।

### खुफिया कनान क गएन

**13** यहोवा मूसा स कहेस, 2“कछू मनइयन क कनान देस क बारे में गहराइ स जानइ बरे पठवा। इ उहइ देस अहइ जेका मई इस्राएल क मनइयन क देब। हर एक बारहु परिवार समूहन स एक नेता पठवा।”

3एह बरे मूसा यहोवा क हुकुम मानेस। उ पारान क रेगिस्तान स नेता लोगन क पठाएस। 4इ सबइ ओनकइ नाउँ अहई:

जककूर क पूत सम्मू-रूबेन परिवार समूह स।

5होरी क पूत सापात - सिमोन क परिवार समूह स।

6योपुन्ने क पूत कालेब - यहूदा क परिवार समूह स।

7योसेप क पूत यिगास - इस्साकार क परिवार समूह स।

8नून क पूत होसे - एप्रैम क परिवार समूह स।

9रापू क पूत पलती - बिन्यामीन क परिवार समूह स।

10सोदी क पूत गद्दीएल - जबलून क परिवार समूह स।

11सूसी क पूत गद्दी - यूसुफ क (जउन मनस्से स) परिवार समूह स।

12गमल्ली क पूत अम्मीएल - दान क परिवार समूह स।

13मीकाएल क पूत सतूर - आसेर क परिवार समूह स।

14वोप्सी क पूत नहूबी - नप्ताली परिवार समूह स।

15माकी क पूत गूएल - गाद क परिवार समूह स।

16उ नाउँ ओन मनइयन क अहई जेनका मूसा पहँटा क लखइ अउ जाँच करइ बरे पठाएस। (मूसा नून क पूत होसे क दूसर नाउँ स पुकारेस। मूसा ओका यहोसू कहेस।)

17मूसा जब ओनका कनान क खोज-बीन बरे पठावत रहा, तब उ कहेस, “नेगेव स होइके जा तब पहाड़ी देस में जाब्या 18इ लखा कि भूइयाँ कइसा अहइ अउर तब तू उ मनइ क बारे जानकारी ल्या जउन हुमाँ रहत हीं। उ पचे सक्तीवाला अहई या कमजोर बाटेन। उ पचे तनिक अहई या जियादा तदाद में बाटेन? 19उ पहँटा क बारे में जानकारी ल्या जेहमाँ उ पचे रहत हीं। का उ नीक प्रदेस अहइ या बुरा? कउने तरह क सहर में उ पचे रहत हीं? का उ नगरन क चहरदेवार बाटेन? क एन गाँव क देवारन नाहीं अहइ? 20प्रदेस क बारे में अउर जानकारी ल्या। का भुइयाँ उपज बरे नीक बाटइ या बंजर जमीन अहइ? का धरती प बृच्छ उगा बाटेन? साहसी बना अउ उ धरती स कछू फल लइ आवा।” (इ अंगूर क पहली फसल क टेम होइ।)

21तब उ पचे पहँटा क छान-बीन किहेन। उ पचे जिन नाउँ क रेगिस्तान स रहोब अउ लेबो हमात तलक गएन। 22उ पचे नेगव स होइके तब तलक जात्रा करत रहेन जब तलक उ पचे हेब्रोन नगर पहुँच गएन। (हेब्रोन मिस्र में सोअन नगर क बसइ क सात बरिस पहिले बना रहा।) अहीमन, सेसै अउ तल्मै हुवाँ रहत रहेन। इ सबइ अनाक क सन्तान रहेन। 23तब उ पचे एस्कोल क घाटी में गएन। उ सबइ हुवाँ अंगूरे क बेल काटेन। उ साखा में अंगूर क

गुच्छ रहा। मनइयन में स दुइ मनई आपन बीच एक डंडा प धइके ओका लइ आएन। उ पचे कछू अनार अउ अंजीर भी लइ आएन। 24उ ठउरे क नाउँ एस्कोल क घाटी रहा। काहेकी इ उहइ ठउर अहइ जहाँ इस्त्राएल क मनइयन अंगूरे क गुच्छ काटेन।

25उ मनइयन उ पहुँटा क छानबीन चालीस दिन तलक किहेन। तब उ पचे सिबिर क लउटेन। 26उ पचे मूसा, हारून अउ दूसर इस्त्राएल क लोगन क लगे कादेस में लउटि गएन। इ पारान रेगिस्तान में रहा। तब उ पचे मूसा, हारून अउ सबहिँ मनइयन क, जउन कछू लखेन, सब कछू सुनाएन। अउर उ पचे ओनका उ प्रदेस क फल क देखाएन। 27उ पचे मूसा स इ कहेन, “हम पचे उ पहुँटा में गए जहाँ आप हमका पठएन। उ प्रदेस बहोत नीक बाटइहिँ दूध अउ मधु क नदी बहत हीं। इ सबइ उ कछू फल अहइँ जेका हम पचे हुआँ पावा ह। 28मुला हुआँ जउन मनइयन रहत हीं उ पचे बहोतइ सक्तीवाला अउ मजबूत बाटेन। ओनकइ सहर क मजबूती स रच्छा कीन्ह ग अहइ। हम पचे हुआँ अनाक बंसी मनइयन क लखा। 29अमालेकी लोग नेगेव में रहत हीं। हिन्ती, यबूसी अउ एमोरी पहाड़ी प्रदेस में रहत हीं। कनानी लोग समुदर क किनारे अउ यरदन नदिया क तीरे रहत हीं।”

30तब कालेब मूसा क नचिके मनइयन क सान्त होइके कहेस। कालेब कहेस, “हम पचन क हुआँ जाइ चाही अउ उ प्रदेस क आपन बरे लेइ चाही। हम पचे उ प्रदेस क आसानी स लइ सकित हीं।”

31मुला जउन मनई ओकरे संग गवा उ बोला, “हम पचे उ मनइयन क खिलाफ नाहीं लइ सकित। उ पचे हम लोगन स जियादा सक्तीसाली अहइँ।” 32अउर उ मनइयन सबहिँ इस्त्राएली लोगन स कहेन कि उ पहुँटा क लोगन क हरावइ बरे उ पचे जियादा ताकतवर नाहीं रहेन। उ पचे कहेन, “जउने पहुँटा क हम पचे लखा उ ताकतवर मनइयन स भरा बाटइ। उ पचे ऐतना जियादा सक्तीवाला अहइँ कि जउन कउनो मनई हुआँ जाइ ओका आसनी स हराइ सकत हीं। 33हम सबइ हुआँ देत्य नेपीलियन लोगन क लखा। (अनाक सन्तानन नपीली लोगन में स अहइ।) उ पचे हम पचन क लखेन जइसे हम पचे टिड्डा रहेन। हाँ हम पचे झींगुर क नाई ओनकइ बरे रहे।”

### लोग फुन सिकाइत करत हीं

**14** उ रात सिबिर क सब मनइयन जोर स रोउब सुरु किहन। 2इस्त्राएल क सबहिँ लोग हारून अउ मूसा क खिलाफ फुन सिकाइत किहन। सब मनइयन एक संग आएन अउ मूसा अउ हारून स कहेन, “हम पचन क मिस्त्र या रेगिस्तान में मरि जाइ चाही रहा। आपन इ नवा देस में तरिवारि स मरि जाइ क बजाय इ बहोतइ नीक भवा होत। 3का यहोवा हम पचन क इ नवा प्रदेस में मरइ बरे लइ आएन? हमरी मेहररुअन अउ हमरे गदेलन क हम पचन स छीन लइ लीन्ह जाइ अउ हम तरिवारे स मारि डवा जाब। इ हम पचन बरे नीक होइ कि हम पचे मिस्त्र क लउटि जाइ।”

4तब मनइयन एक दूसर स कहेन, “हम पचन क दूसर नेता चुनइ चाही अउ मिस्त्र लउटि चलइ चाही।”

5मूसा अउ हारून हुआँ बटुरा भवा सारे इस्त्राएली मनइयन क समन्वा भुइयोँ प गिरि गएन। 6अउर उ दुइनउँ मनई जउन नवा पहुँटा का छानबीन करइ बरे गए रहेन आपन ओढ़ना क सोक परगट करइ बरे फाइ दिहस। (उ पचे दुइनउँ नून क पूत यहोसू अउ यपुन्ने क पूत कालेब रहेन।) 7इ दुइनउँ हुआँ बटुरा भाए इस्त्राएलियन स कहेन, “जउने पहुँटा क हम पचे लखे अही, उ बहोतइ नीक बाटइ। 8अउर यदि यहोवा हम पचन स खुस अहइ तउ उ हम पचन क उ पहुँटा में लइ चली। उ पहुँटा नीक अउ उपजाउ अहइ, अइसा बाटइ जइसन हुआँ दूध अउ मधु क नदी बहत होइँ। अउर यहोवा उ पहुँटा क हम पचन क देइ बरे आपन सक्ती क बइपरी। 9मुला हम पचन क यहोवा क खिलाफ नाहीं जाइ चाही। हम पचन क उ पहुँटा क लोगन स नाहीं सिबिरइ चाही। हम पचे ओनका आसानी स हराइ देब। ओनके लगे कछू सुरच्छा नाहीं अहइ, ओनका सुरच्छित राखइ बरे ओनके लगे कछू नाहीं अहइ। मुला हम पचन क संग यहोवा अहइ। एह बरे इ मनइयन स जिन सिबिरअ।”

10तब इस्त्राएल क सबहिँ लोग यहोसू अउ कालेब क पाथर मारि देइ क बात करइ लागेन। मुला यहोवा क तेज मिलापवाला तम्बू प आवा। इस्त्राएल क सबहिँ लोग ऐंका लखि सकत रहेन। 11यहोवा मूसा स कहेस, “इ पचे इ तरह मोका घिना स लखत रइहीं? उ पचे परगट करत रहेन कि उ पचे मोह पइ बिस्सास नाहीं करतेन। उ सबइ परगट करत हीं कि ओनकइ मोहे प बिस्सास नाहीं अहइ अउर उ पचे देखोवत हीं कि उ पचे मोरी सक्ती प बिस्सास नाहीं करतेन। उ सबइ मोहे प बिस्सास करइ स तब भी मना कइ देत हीं जबहि मई ओनका बहोत स सक्तीसाली संकेत दिहेउँ ह। मई ओनके बीच कइ बइकी चीजन किहेउँ ह। 12मई ओनका नास एक महामारी स करब अउ मई ओका बेदखल कइ देब, अउ तोहार प्रयोग दूसर रास्ट्र बनवइ बरे करब। अउर तोहार रास्ट्र इ सब लोग स बड़ा अउ जियादा ताकतवर होइ।”

13तब मूसा यहोवा स कहेस, “जदि आप अइसा करत हीं तउ मिस्त्र में लोग इ सुनिहीं कि आपन सबहिँ मनइयन क मारि डएन। आप आपन बइकी सक्ती स प्रयोग ओन मनइयन क मिस्त्र स बाहेर लइ आवइ में किहन। 14अउर मिस्त्र क लोग इ भूइँया (कनान) में रहइवालन स तोहार महान सक्ती क बारे में कइहीं। हे यहोवा! उ पचे पहिले स सुनि लिहेन कि। तू ऐंन लोगन (इस्त्राएलियन) क परमेस्सर अहइ। उ पचे सबइ जानत ह कि तू प्रत्येच्छ रूप स आपन लोगन क समन्वा परगट भवा। उ पचे तोहरे बादर क बारे में जानत ह जउन उ पचनक ऊपर ठहरत ह। तू उ बादर क प्रयोग दिन में ओन लोगन क राह दिखावइ बरे किहा अउर राति में उ बादर लोगन क राह दिखावइ बरे आगी में बदल जात रहा। 15एह बरे आप क अब मनइयन क मारइ नाहीं चाही। जदि आप ओनका मारत हीं तउ सबहिँ रास्ट्र, जउन आपक सक्ती क बारे में सुनि चुका अहइँ, कइहीं, 16यहोवा इ मनइयन क उ पहुँटा में लइ जाइ में समर्थ नाहीं रहेन

जउने पहुँटा क उ पचे ओनका देइ क बचन दिहे रहने। एह बरे यहोवा ओनका मरु भूमि में मारि दिहने।

17“एह बरे सुआमी आपन सामर्थ देखावा! देखावा वइसा ही जइसा देखेवइ क कहे रह्या! 18तू कहे रहा, ‘यहोवा कोहाइ में धीरा करत हीं। यहोवा पिरेम स भरपूर अहई। यहोवा पाप क छिमा करत हीं अउर ओन मनइयन क छिमा करत हीं जउन ओनके खिलाफ भी होइ जात हीं। मुला यहोवा ओन मनइयन क जरुर सजा देइहीं जउन अपराधी अहई। यहोवा पूत, पूतन अउ ओकर पूतहू क भी सजा देत हीं।’ 19एह बरे इ मनइयन क आपन बड़का पिरेम देखावा। ओनके पाप क छिमा करा। ओनका उहइ तरह छिमा करा जइसा तू मिस्र छोड़इ क टेमें स अब तलक छिमा करत आवत ह।”

20यहोवा उत्तर दिहस, “मई मनइयन क तोहरे कहे क मुताबिक छिमा कइ दीन्ह ह। 21मुला मई तोहसे फुरइ कहत हउँ काहे की मई जब तलक रहबूँ अउ मोर महिमा इ धरती प फइली अहइ। एह बरे मई तोहका इ बचन देत हउँ। 22उ मनइयन में स कउनो भी मनई जेका मई मिस्र स बाहेर लइ आएँ, उ पचे कनान क भूइया क कबहुँ नाहीं क लखिहीं। उ मनइयन मिस्र में मोर तेज अउ मोर संकेत क लखेन ह। अउर उ मनइयन उ महान कारज क निहारेन ह जउन मई रेगिस्तान में कीन्ह ह। मुला उ पचे मोर आग्या क नाहीं मानेन अउर दसहु बार मोर परीच्छा किहेन ह। 23मई ओनके पुरखन क बचन दिहेउँ ह। मई प्रण किहेउँ रहा कि ओनका एक बड़का देस देब। मुला ओहमा स कउनो मनई जउन मोरे खिलाफ होइ चुका ह उ देस में घुस न पाइ। 24मुला मोर सेवक कालेब एने स अलग रहा। उ पूरी तरह मोर बात मानत रहा। एह बरे मई ओका उ देस में लइ जब जेका उ पहिले लखेस ह। अउ ओकर सत्तानन भी उ पहुँटा क उत्तराधिकार होइ जाब। 25अमालेकियन अउ कनानी लोग घाटी में रहत अहई। भियान इ जगहिया क तज़ा अउ रेगिस्तान कइँती लउटि जा। लाल सागर स होइके जा।”

### यहोवा मनइयन क सजा देत हीं

26यहोवा मूसा अउ हारून स कहेस, 27“इ पचे कब तलक मोरे खिलाफ सिकाइत करत रहई? मई इ मनइयन क ओराहना अउ पीरा क सुन चुकेउँ ह। 28एह बरे एनसे कहा, ‘यहोवा कहत ह उ फुरइ ही सबहि काम करी जेकरे बारे में तू पचे सिकाइत किहा ह। 29तू मनइयन क इ सब होइ। तू मनइयन क देह इ रेगिस्तान में मरा भवा गिरिहीं। हर एक मनई जउन बीस बरिस या जियादा उमर क रहा। हमार मनइयन क निअंबर क रूप में गना गवा। अउर तू पचन में स हर कउनो मोरे यानी परमेस्सर क खिलाफ सिकाइत किहस। एह बरे तू मनइयन में स हर एक रेगिस्तान में मरी। 30तू पचन में स कउनो भी कबहुँ उ देस में नाहीं घुसी जेका मई तोहका देइ क बचन दिहेउँ ह। सिरिफ युपुन्ने क पूत कालेब अउ नून क पूत यहोसू उ देस में प्रवेस करिहीं। 31तू पचे सिबिरइ गए रह्या अउ तू पचे ओराहना दिहा कि उ नवा देस में तोहार दुस्मनन तोहरे गदेलन क तोहसे छिनि लेइहीं। मुला मई तोहसे कहत हउँ कि मई ओन

गदेलन क देस में लइ जाब। उ पचे उ चीजन क भोग करिहीं जेनकइ भोग तू अंगीकार नाहीं किहा। 32जहाँ तलक तू पचन क बात बा, तू पचे इ रेगिस्ताने में मरि बिलाइ जाब्या।

33“तोहार बेटवन हिआँ रेगिस्तान में चालीस बरिस तलक गड़ेरिया क रूप में आपन जिन्नगी बिताइ। उ पचे तोहार अबिस्सासी क कारण कस्ट झेलब। उ पचे इ रेगिस्तान में तब तलक कस्ट झेलिहीं जब तलक तू सबहि मरि नाहीं जाब्या। 34तू पचे आपन पाप बरे चालीस बरिस तलक कस्ट झेलब्या। (तू पचे इ देस क छानबीन में चालीस दिन लगाया। ओकरे हर दिन बरे एक बरिस होइ।) तू पचे जनब्या कि हमार तू पचन क खिलाफ होब केतँना खतरनाक अहइ।

35“मई यहोवा अहउँ अउर मई इ घोसना करत हउँ। अउर मई बचन देत हउँ कि मई इ सबहि बुरे मनइयन बरे इ करब। इ पचे मोरे खिलाफ एक संग आएन। एह बरे उ सबइ इ रेगिस्तान में मरिहीं।”

36जउन मनइयन क मूसा नवा प्रदेस क छान-बीन करइ पठाएस ह उ पचे अइसा रहेन जउन लउटि आएन अउर सबहि इस्त्राएलियन में सिकाइत करत भए सँचर गएन। उ मनइयन कहेन कि मनई उ प्रदेस में प्रवेस करइ खातिर जियादा बरिआर नाहीं रहेन। 37उ मनइयन उ भूइयाँ क बारे में बुरी खबर लइहीं। एह बरे यहोवा एक बेरामी पइदा कइके ओन सबहि क मरि बिलाइ जाइ दिहस। 38मुला नून क पूत यहोसू अउ युपुन्ने क पूत कालेब ओन मनइयन में रहेन जेनका देस क छानबीन करइ पठवा गवा रहा। अउर यहोवा ओन दुइनउँ मनइयन क बचाएस। ओनका उ बेरामी नाहीं भइ जउन दूसर मनइयन क मारि डाएस।

### मनइयन कनान में जाइके जतन करत हीं।

39मूसा इ सबइ बातन इस्त्राएल क मनइयन स कहेस। लोग बहोत जियादा दुखी भएन। 40दूसर दिन बहोतइ तइके मनइयन ऊँचा पहाड़ी पहुँटा कइँती बढब सुरु किहेन। मनइयन कहेन, “हम पचे पाप किहे अहेन। हम पचन क दुःख अहइ कि हम पचे यहोवा प बिस्सास नाहीं किहेन ह। हम पचे उ ठउरे प जाब जेका यहोवा देइ क बचन दिहे अहइ।”

41मुला मूसा कहेस, “तू पचे यहोवा क हुकुम क काहे नाहीं मानत अहा? तू पचे कामयाब न होइ सकब्या। 42उ देस में जिन जा। यहोवा तू पचन क संग नाहीं अहइ। तू पचे आसनी स आपन दुस्मनन स हारि जाब्या। 43अमालेकी अउ कनानी लोग हुवाँ तोहरे खिलाफ लड़ीहीं। तू पचे यहोवा स खिलाफत किहा ह। एह बरे उ तोहरे संग न होइ जब तू पचे ओनसे लइब्या। अउर तू सबहि लइइ में मारा जाब्या।”

44मुला मनइयन मूसा प बिस्सास नाहीं किहेन। उ पचे ऊँची पहाड़ी कइँती गएन। मुला मूसा अउ यहोवा क करार क सन्दूख मनइयन क संग नाहीं गएन। 45तब अमालेकी अउ कनानी लोग जउन पहाड़ी देस में रहत रहेन, आएन अउ उ पचे इस्त्राएलियन प हमला बोलि दिहने। अमालेकी अउ कनानी लोग ओनका आसनी स हराइ दिहने अउ होर्मा तलक ओनका खदेरेन।

## बलि क नेम

**15** यहोवा मूसा स कहेस, **2**“इस्त्राएल क मनइयन स बात करा अउ ओनसे कहा: मई तू पचन क इ धरती घर क रूप में देत अहई। जब तू उ देस में घुसब्या, **3**जब तू परमेस्सर क होमबलि चाहे उ गइयन, भेड़िन अउ बोकरियन होइ क होमबलि क रूप में बलि क रूप में, मनौती भेंट क रूप में, बचनबलि क रूप में, मेलबलि क रूप में या खास पवितर क रूप में चढ़ाउब्या तउ इ परमेस्सर बरे एक सुहावना सुगन्धित अहइ।

**4**“अउर उ टेमें जउन आपन भेंट लइ आइ ओका यहोवा क अन्नबलि देइ क होइ। इ अन्नबलि एक चौथाई हीन जइतून क तेले में सनी भइ एपा क दसवाँ हीसा बढ़िया आटा क होइ। **5**हर दाई जब तू एक तु मेमना होमबलि क रूप में या बलिदान क रूप में द्या तउ तोहका एक चौथाई हीन दाखरस पयेबलि क रूप में तइयार करइ चाही।

**6**“हर समइ जब तू भेड़ा क भेंट करइहीं तउ तोहका अन्नबलि क रूप में एक तिहाई हीन जइतून क तेले में सनी भइ एपा क दुइ दसवाँ हीसा बढ़िया आटा क जरूर भेंट करइ चाही। **7**अउर तोहका एक तिहाई हीन पेयबलि जरूर चढ़ावइ चाही। एनका परमेस्सर क भेंट करा। इ परमेस्सर बरे सुहावना सुगन्ध अहइ।

**8**“होमबलि, मेलबलि या कउनो मन्त बरे यहोवा क एक भेंट क रूप में एक बछवा तइयार कइ सकत ह। **9**एह बरे तोहका बर्धा क संग अन्नबलि भी लइ आवइ चाही। अन्नबलि आधा हीन जइतून क तेले स सनी भइ एपा क तीन दसवाँ हीसा बढ़िया आटा क होइ चाही। **10**आधा हीन दाखरस भी पयेबलि क रूप में लइ आवा। आगी में बारी गइ इ भेंट परमेस्सर बरे महकउआ सुगन्ध अहइ। **11**हर एक बछवा या भेड़ा या मेमना या बोकरी क बच्चा, जेका तू यहोवा क भेंट करा, उहइ तरह तइयार करइ चाही। **12**जनावरन क गन्ती क अनुसार तू परमेस्सर क भेंट करा, हर एक एकही तरीका स तइयार करा।

**13**“एह बरे इ तरीका स हर एक इस्त्राएली क होमबलि देइ चाही जेकर गंध परमेस्सर क प्रसन्न करी। **14**तोहरे बीच बिदेसी रहब। अगर उ पचे होमबलि देइ चाहत हीं तउ ओनका वइसे ही देइ चाही जइसे तू करत ह। ताकि इ परमेस्सर बरे सुहावना सुगन्ध होइ। **15**उहइ नेमें हर एक इस्त्राएली बरे होइ चाही अउ तोहरे बीच बसइया बिदेसी बरे भी होइ। इ नेमें हमेसा लागू रही। तू अउ तोहरे बीच बसइया मनइयन यहोवा क समन्वा बराबर होइहीं। **16**एकर अरथ अहइ कि तू सबन क एक ही कनून अउ नेमें क मानइ चाही। उ सबइ कनून अउ नेमें इस्त्राएल क परिवार में पइदा भए तोहरे अउ जउन तोहरे बीच रहत ही, ओनके बरे अहइ।”

**17**यहोवा मूसा स कहेस, **18**“इस्त्राएल क लोगन स इ कहा: मई तोहका दूसर देस में लइ जात हउं। **19**जब तू उ भोजन करब्या जउन उ पहेँटा में पइदा होइ तउ भोजन क कछू हीसा यहोवा क भेंट क रूप में द्या। **20**तू अनाजे क बटोरब्या अउ एँका आटा क रूप में पिसब्या। तू आटा क रोटी बनवइ बरे गुँधब्या। तू पहिला गुँधा भाव आटा स बना

रोटी परमेस्सर क अर्पित करब्या। उ अइसा अन्नबलि होइ जउन खरिहान स आवत ह। **21**इ नेमें सदा बरे बा। एकर अरथ अहइ कि जउन अन्न क तू आटा क रूप में गुँधत ह ओकर पहिली रोटी यहोवा क देइ चाही।

**22**“अगर तू यहोवा क जरिये मूसा की दीन्ह गवा आदेस में स कउनो क मानव भूलि जा तउ तू का करब्या? मूसा क जरिये दीन्ह गए यहोवा क इ हुकुम अहई। **23**इ आदेस उहइ दिन स सुरु होइ ग रहेन जउने दिन यहोवा एँका तोहका दिहेस ह। अउर इ आदेस भविस्स में भी लागू रइहीं। **24**जदि समुदाय अनजाने में कि उ पचे पाप करत हीं तउ सब जने मिलिके एक होमबलि बर्धा क परमेस्सर क चढ़ावइं। इ परमेस्सर बरे सुहावना सुगन्ध अहइ। बर्धा क बलि क संग परमेस्सर क हिदायत क अनुसार अन्नबलि अउर पयेबलि चढ़ा। तोहका एक तु बोकरा भी पापबलि क रूप में देइ चाही।

**25**“याजक क लोगन क पाप स सुद्धि बरे ओकर प्रायश्चित करइ चाही। उ इस्त्राएल क सब लोगन बरे अइसा करी। लोगन इ नाहीं जाने रहेन कि उ सबइ पाप करत बाटेन। मुला जब उ पचे इ जानेन तब उ पचे होमबलि अउ पापबलि लेइ बरे आएन। इ तरह मनइयन ओकर गलती बरे छिमा पाइ हीं। **26**इस्त्राएल क सब मनइयन अउ ओनके बीच रहइवाला सब लोग छिमा कइ दीन्ह जइहीं। उ पचे एह बरे छिमा कइ दीन्ह जइहीं कि उ सबइ नाहीं जानतेन कि उ पचे बुरा करत बाटेन।

**27**“मुला एक ठू मनई बिना इरादे स पाप करत ह तउ ओका एक बरिस एक तु मादा बोकरी पापबलि क रूप में आपन पाप बरे लावइ चाही। **28**याजक यहोवा क समन्वा पाप बरे जउन उ मनइ गलती स किहेस ह प्रायश्चित करी अउ उ मनई छिमा पाइं। **29**इ हर मनई बरे कनून अहइ जउन पाप करत ह, मुला जानत नाहीं कि बुरा किहेस ह। इहइ कनून इस्त्राएल क परिवार में पइदा भए मनइयन बरे अहइ या दूसर मनइयन बरे जउन तोहरे बीच रहत हीं।

**30**“मुला कउनो मनई जउन पाप करत ह अउ जानत ह कि उ बुरा करत ह। उ मनई क आपन लोगन स अलग पठइ देइ चाही। इ इस्त्राएल क परिवार में जन्मा मनई अउ कउनो भी दूसर मनई बरे, जउन तोहरे बीच रहत ह, एक समान बाटइ। **31**उ मनई यहोवा क हुकुम क खिलाफ गवा अहइ। उ यहोवा क हुकुम क तिस्सकार करइ। उ मनई क तोहरे दले स अलगाइ दीन्ह जाइ चाही। उ मनई अपराधी ही रही अउ सजा भोगी।”

## एक तु मनई अराम क दिन काम करत ह।

**32**इ टेमें इस्त्राएल क मनई अबहिं रेगिस्तान में रहेन। अइसा भवा कि एक मनई क बारइ बरे कछू काठ मिला। एह बरे उ मनई लकड़ी बटोरत रहा मुला उ सबित क दिन रहा। कछू दूसर मनई ओका इ करत लखेन। **33**जउन मनई ओका लकड़ी बटोरत करत देखेन। उ पचे ओका मूसा अउ हारून क लगे लइ आएन। अउर सबहिं लोग चारिहुँ कइँती बठुर गएन। **34**उ पचे उ मनई क हुवाँ रखेन काहे की उ पचे नाहीं जानत रहेन कि ओकर संग का करइ चाहीं।

35तब यहोवा मूसा स कहेस, “इ मनई क मरि जाइ चाही। पूरा धार्मिक सभा क ओका सिबिर स बाहेर लइ जाइ चाही अउर ओका पाथर स मार डवइ चाही।” 36एह बरे सबइ लोगन ओका सिबिर स बाहेर लइ गएन। उ ओका तब तलक पाथर मारेन जब तलक उ मरि नाहीं गवा। उ पचे इ वइसा ही किहेन जइसा मूसा क यहोवा हुकुम दिहे रहा।

### परमेस्सर नेमें क सुमिरइ में मनइयन क मदद करत ह

37यहोवा मूसा स कहेस, 38“इस्त्राएल क लोगन स बतियाअ अउ ओनसे इ कहा, “मई तू सबन क आपन हुकुम क सुमिरइ क देब। धागा क कइउ खण्ड क एक साथ बाँधा अउ ओनका आपन बस्तर क कोना प धइ दया। एक ठु नीला रंग क डोरा हर एक अइसे गुच्छा में नावा। अब एँका तू पहिरब्या अउ भविस्स क सबहिं दिनन में पहिरब्या। 39तू पचे इ गुच्छन क लखत रहब्या अउ यहोवा जउन हुकुम तोहका दिहे अहइ ओका सुमरत रहब्या। तब तू हुकुम क मनब्या। तू पचे हुकुम क न बिसरब्या। अउर आपन आँखिन अउ जरुरत स बस मैं आइके कउनो पाप न करब्या। 40तू हमरे सब हुकुम मानइ क सुमिरब्या। अउर तोहका तोहार परमेस्सर क अपर्ण कीन्ह जाइहीं। 41मई तोहार परमेस्सर यहोवा अहउँ। उ मई अहउँ जउन तोहका मिस्त्र स बाहेर लइ आएउँ ह। मई इ किहेउँ ह। एह बरे मई तोहार परमेस्सर रहब। मई तोहार परमेस्सर यहोवा अहउँ।”

### कोरह, दातान अउ अबीराम मूसा क खिलाफ होइ जात हीं

**16** कोरह, दातान, अबीराम अउ ओनें मूसा क खिलाफ होइ गएन। (कोरह यिसहार क पूत रहा। यिसहार कहात क पूत रहा। कहात लेवी क पूत रहा। एलीआब क पूत दातान अउ अबीराम भाई रहेन। अउर ओनें पेलेत क पूत रहा। दातान, अबीराम अउ ओन रूबेन क सन्तान रहेन।) 2इ चार मनइयन इस्त्राएल क 250 मनइयन क एक संग बटोरिन अउर इ पचे मूसा क खिलाफ आएन। इ पचे नेता रहेन अउ जउन इस्त्राएलियन क जरिये चुना ग रहेन। सब मनइयन ओनका जानत रहेन। 3उ पचे एक ठु गुट क रूप में मूसा अउ हारून क खिलाफ बात करइ बरे आएन। इ मनइयन मूसा अउ हारून स कहेन, “हम लोगन क काबू करइ बन्द करा। इस्त्राएल क सब मनई पवितर अहईं। यहोवा ओनके संग अहइ। तू सबइ अपने आप क काहे परमेस्सर क (दूसर) मनइयन स जियादा महत्वपूर्ण मानत बाट्या?”

4जइसेन मूसा इ बात सुनेस तउ उ मुँहे क बले गिर गवा। 5तब मूसा कोरह अउ ओकरे मनवइयन स कहेस, “काल्ह भिन्सारे यहोवा देखईहीं कि कउन मनई फुरइ ओकर बाटइ। यहोवा देखईहीं कि कउन मनई फुरइ पवितर अहइ। अउर यहोवा ओका आपन निअरे लइ जइहीं। यहोवा उ मनई क चुनी अउ ओका आपन निचके लइ जाइ। 6एह बरे कोरह, तोहका अउ तोहरे सबहिं मनवइयन क इ करइ चाही। 7भियान कउनो खास अगियारी क गोरसी में आगी अउ धूप धरा अउ उ गोरसी क यहोवा क अगवा लिआंवा।

यहोवा उहइ मनई क चुनिहीं जउन फुरइ पवितर होइ। लेवी क पूतन रूका! तू का करइ क कोसिस करत अहा।”

8मूसा कोरह स इ भी कहेस, “लेवी बंसी लोगो! मोरहु सुना। 9तू पचन क खुस होइ चाही कि इस्त्राएल क परमेस्सर तोहका चुनेस ह अउ खास बनएस ह। तू पचे बाकी इस्त्राएलियन स अलग अहा। यहोवा तोहका आपन लगे बोलाएस ह कि तू यहोवा क आराधना में इस्त्राएल क मनइयन क खास मदद बरे यहोवा क पवितर तम्बू में खास काम कइ सका। का इ तोहका बरे काफी नाहीं बा? 10यहोवा तोहका अउ लेवी बंस क मनइयन क आपन निचके लइ आवा ह। मुला अब तू याजकन बनइ चाहत बाट्या। 11तू अउ तोहार मनवइयन एक अउट ग अहा अउ यहोवा क खिलाफ आवा अहा! का हारून कउनो बुरा किहे अहइ? नाही! तउ ओकरे खिलाफ काहे ओराहना देत अहा?”

12तब मूसा एलीआब क पूत दातान अउ अबीराम क बोलाएस। मुला दुइनउँ मनइयन कहेन, “हम पचे न आउब। 13तू हमका उ देस स निकारि लिआया ह जउन धनवाद रहा। जहाँ दूध अउ सहद क धारा बहत रहिन। तू हम पचन क हिआँ रेगिस्तान में मारइ बरे लिआया ह। का अब तू अपने आप क हम पइ राजकुमार बनबू चाहत अहइ? 14हम पचे तोहार पाछा काहे करी? तू हम पचन क नवा देस में नाहीं लइ आया ह- जउन भरपूर अहइ- जहाँ दूध अउ सहद की नदी बहत रहत हीं। तू हम पचन क उ देस नहीं दिए रहा जेका देइ क परमेस्सर बचन दिहे रहा। तू हम पचन क खेत या अंगूर क बगिया नाहीं दिहे रहा। का तू इ लोगन क आँखन क अंधा करब्या? नाहीं, हम पचे तोहार लगे न आउब।”

15एह बरे मूसा बहोतइ कोहाइ गवा। उ यहोवा स कहेस, “एँकइ भेंट जिन ल्या। मई एँसे कछू नाहीं लीन्ह-एक गदहा तलक नाहीं। मई इ मनइयन में स कउनो क बुरा नाहीं कीन्ह।”

16तब मूसा कोरह स कहेस, “तोहका अउ तोहरे मनवइयन क भियान यहोवा क समन्वा खड़ा होइ चाही। अउर हारून तोहरे संग यहोवा क समन्वा खड़ा होइ। 17तू सबन में स हर कउनो क एक ठु आग-दान रखइ चाही अउर ओहमा आगी अउ धूप होइ चाही अउर एका यहोवा क समन्वा चढ़ावइ चाही। इ सारी आगी क गोरसी 250 नेता लोगन क होइ चाही। तोहका अउर हारून क आपन गोरसी क संग हुवाँ रहइ चाही।”

18तउ हर एक मनई एक एक ठु आगी क गोरसी लिहेस अउ ओहमाँ सुलगन धूप धरेस। तब उ पचे मिलापवाला तम्बू क दुआरे खड़ा भएन। मूसा अउ हारून भी हुवाँ खड़ा भएन। 19कोरह आपन सबहिं लोगन क एक संग मिलापवाला तम्बू क दुआरे बटोरिस। तब यहोवा मौजूदगी सबइ जमा लोगन क दुआरा लखइ जाइ।

20यहोवा मूसा अउ हारून स कहेस, 21“इ मनइयन स दूर हटा। मई अब ओनकर नास करइ चाहत हउँ।”

22मुला मूसा अउ हारून भुइयँ प निहुरेन अउ चिचियानेन, “परमेस्सर! तू जानत ह कि मनइयन क सोचत हीं। तू सब प्राणी क आत्मा क परमेस्सर। का एक मनई क पाप क

कारण सारा किरोध मण्डली प होइ। एक मनई फुरइ पाप किहे अहइ।”

23तब यहोवा मूसा स कहेस, 24“मनइयन स कहा कि उ पचे कोरह, दातान अउ अबीराम क सिबिर स दूर हटि जाई।”

25मूसा खड़ा भवा अउ दातान अउ अबीराम क लगे गवा। इस्त्राएल क सबहि बुजुर्गन ओकरे पाछे चलेन। 26मूसा धार्मिक सभा स कहेस, “इ बुरा लोगन तम्बू स दूरि हटि जा। ऐनकइ चीज क जिन छुआ। यदि तू पचे छूब्या तउ ऐनके पापन क कारण बिलाइ जाब्या।”

27एह बरे मनइयन कोरह, दातान अउ अबीराम क तम्बू स दूर परानेन। दातान अउ अबीराम आपन तम्बू क बाहरे आपन मेहरारु, लरिकन अउ गदेलन क संग खड़ा रहेन।

28तब मूसा कहेस, “मई तोहका परमान देब कि यहोवा मोका ओन चीजन क करइ क पठए बाटइ जउन मई तोहका केहउँ ह। मई देखाउब कि उ सबइ मोर बिचार नाहीं रहेन। 29इ मनइयन हिआँ मरिहीं। मुला इ पचे साधारन रीति स मरत ह जउने तरह आदमी हमेसा मरत ह तउ इ परगट होइ कि यहोवा फुरे मोका नाहीं पठाएस। 30मुला यदि यहोवा ऐनका दूसर रीति स मरइ देत ह तउ तू पचे जनब्या कि इ मनइयन सचमुच यहोवा क खिलाफ पाप किहे अहइ। इहइ प्रमाण बाटइ: भुइयाँ फाटि जाइ अउ इ मनइयन क डकार जाइ। उ सबइ आपन कब्रन मँ जिअत जइहीं। अउर ऐनकइ हर चीज ऐनके संग जाइ।”

31तब मूसा इ बातन क कहब खतम किहेस। मनइयन क गोड़े क तरे जमीन फाटि गइ। 32इ अइसा रहा कि मान ल्या धरती आपन मुँह बाएस अउ ऐनका खाइ लिहस अउ ओनके सारा परिवार अउ कोरह क सबहि मनइयन अउ ओनकइ सब चीजन धरती मँ चली गइन। 33उ पचे जिअत भ कब्र मँ चला गएन। ओनकइ हर एक चीज ओनके संग गइ। तब धरती ओनके ऊपर बन्द होइ गइ। उ पचे मर बिलाइ गएन अउ उ सबइ सभा स लोप हो गएन।

34इस्त्राएल क मनइयन नास कीन्ह जात मनइयन क रोउब चिचियाब सुनेन। एह बरे उ सबइ चारिहुँ कइती दौड़ेन अउ कहइ लागेन, “धरती हम लोगन क लील जाइ।”

35तबइ यहोवा स आगी आइ अउ 250 मनइयन क, जउन धूप भेंट करत रहेन, माटी मँ मिलाइ दिहस।

36यहोवा मूसा स कहेस, 37-38“याजक हारून क पूत एलीआज़ार स कहा कि उ आगी क गोरसी क बटोरइ। सिबिर स दूर क पहँटा मँ ओस कोइला अउ राखी क छितरावइ क कहा। इ मनइयन मोरे खिलाफ पाप किहेन ह अउर ओनकइ पाप क दाम जिन्नगी खतम होइ गइ। मुला धूप क गोरसी अबहुँ पवितर बाटइ। इ गोरसियन पवितर अहइँ काहे की उ पचे यहोवा क दिहन ह। धूप गोरसी क पीटि पीटि के पत्तर मँ बदलि द्या। तब इ धातु क पत्तर क उपयोग वेदी क ढाँपि बरे करा। इ पत्तरन इस्त्राएल क लोगन बरे चिताउनी क रूप मँ रहइ द्या।”

39तब याजक एलीआज़ार काँसा क उ सबइ तसला बटोरस जेनका उ पचे लइ आए रहेन। उ सबइ मनई जरि गएन, मुला बासन तब भी हुवाँ रहेन। तब एलीआज़ार कछू

मनइयन क बासन क धातु क चपटी पीटइ क कहेस। तब उ धातु क चपटी चादर क वेदी प धरेस। 40उ ऐका वइसेन ही किहेस जइसा यहोवा मूसा क जरिये हुकुम दीन्ह ग रहा। इ चीन्हा रहा कि जेकाँ इस्त्राएल क लोग सुमिर सकई कि सिरिफ हारून क परिवार क मनई क यहोवा क समन्वा सुगन्धि देइ क अधिकार बाटइ। यदि कउनो दूसर मनई परमेस्सर क समन्वा सुगन्धि बारत ह तउ उ मनई कोरह अउ ओकर मनवइयन क तरह होइ जाइ।

### हारून मनइयन क रच्छ करत ह

41अगले दिन इस्त्राएल क मनइयन मूसा अउ हारून क खिलाफ ओराहना दिहेन। उ पचे कहेन, “तू सबइ यहोवा क मनइयन क मारि डया ह।”

42मूसा अउ हारून मिलापवाला तम्बू क दुआर प ठाड़ रहेन। मनई उ ठउर प मूसा अउ हारून क खिलाफ सिकाइत बरे बटुर गएन। मुला जब उ पचे मिलापवाला तम्बू क लखेन कि बदरा ओका ढाँकि लिहेस, अउर यहोवा हुआँ परगट भवा। 43तब मूसा अउ हारून मिलापवाला तम्बू क समन्वा गएन।

44तब यहोवा मूसा स कहेस, 45“उ मनइयन स दूरि हटि जा जेका अब मई नास करब।” मूसा अउ हारून भुइँया प भहराइ पड़ेन।

46तब मूसा हारून स कहेस, “वेदी क आगी आपन काँसा क बासन मँ ल्या। तब एहमँ सुगन्धि नावा। लोगन क भीड़ मँ ओनके पापन क प्रायश्चित करइ बरे हाली जा। यहोवा ओन पइ कोहान बा। महामारी ओन लोगन क बीच मँ फैलइ सुरू होइ गवा अहइ।”

47-48तउ हारून वइसे किहस जइसेन मूसा कहे रहा। धूप अउ आगी लइ लिहे क पाछे उ मनइयन क बीच दौड़के पहोँचा। मुला मनइयन मँ बेरामी पहिले ही सुरू होइ चुकी रही। तब हारून मुर्दा मनइयन क बीच अउ जउन जिअत रहेन खड़ा भवा। हारून लोगन क प्रायश्चित बरे सुगन्धि सुलगाइ दिहस। अउर तब बेरामी रुकि गइ। 49मुला हारून क पापे स प्रायश्चित स पहिले 14,700 लोग उ महामारी स मरि गए रहेन। उ कोरह क कारण मरे भवा लोगन क अतिरिक्त अहइ। 50तब हारून मिलापवाला तम्बू क दुआर प मूसा क लगे लउटा। मनइयन मँ भयंकर महामरगी रोक थाम दीन्ह गइ।

### यहोवा परमान देत हीं कि हारून

#### महा याजक अहइ

17 यहोवा मूसा स कहेस, 2“इस्त्राएल क मनइयन स कहा। आपन लोगन स बारह लकड़ी क कुबरी लइ लेईं। बारहु परिवार समूहन मँ स हर एक नेता स एक कुबरी ल्या। हर एक मनई क कुबरी प नाउँ लिखि द्या। 3अउ लेवी क कुबरी प हारून क नाउँ लिखि द्या। बारह परिवार समूहन क हर एक मुखिया क कुबरी होइ चाही। 4इ टहरइ वाली कुबरियन क मिलापवाला तम्बू मँ करार क सन्दूख क अगवा धइ द्या। इ उहइ ठउर अहइ जहाँ मइ तोहसे भेंटत अहउँ। 5मई एक मनई क सच्चा होइवाला याजक चुनब। तू



जानि लेब्या कि कउने मनई क मई चुनेउँ ह। काहे की उ कुबरी में नई पाती निकरब सुरु होइ। इ तरह मई मनइयन क आपन अउ तोहरे खिलाफ सदा ओराहना देइ स रोकबा।”

6तउ मूसा इस्त्राएली मनइयन स बात किहस। प्रधान में स हर एक ओका एक तु कुबरी दिहस। सब कुबरियन क गनती बारह रही। हर ए परिवार दल क नेता क एक कुबरी ओहमों रही। हारून क कुबरी ओहमों रही। 7मूसा करार क मिलापवाला तम्बू में यहोवा क समन्वा कुबरियन क धइ दिहस।

8अगला दिन मूसा तम्बू में घुसा। उ लखेस कि हारून क उ कुबरी, जउन लेवी बंस क रही, सिरिफ एक अइसी रही कि जेहसे नई पाती निकरब सुरु भई रहिन। उ कुबरी में डारि फूटि आइन अउ ओहमा बदाम लग गए रहेन। 9एह बरे मूसा यहोवा क ठउर स सबहिं कुबरियन क लइ आवा। मूसा इस्त्राएल क मनइयन क कुबरियन देखौएस अउ हर एक मनई आपन कुबरी वापिस लइ लिहस।

10तब यहोवा मूसा स कहेस, “हारून क कुबरी क करार वाला सन्दूखे क समन्वा रख द्या। इ ओनें मनइयन क चिताउनी होइ जउन हमेसा मोरे खिलाफ जात हीं। इ ओनकइ मोरे खिलाफ सिकाइत क रोककी। इ तरह उ पचे मरिहीं नहीं।” 11तउ मूसा ओन हुकुमन क मानेस जउन यहोवा दिहे रहा।

12इस्त्राएल क मनइयन मूसा स कहेस, “हम पचे जानित ह कि हम सबइ मरि जाब। हम विनास होइ गए। हम सबहिं विनास होइ गवा। 13कउनो मनई जउन यहोवा क पवितर ठउर क निअरे आवत ह मरि जाइ। का इ फुरइ बा कि हम सबइ मरि गएन?”

### याजकन अउ लेवी बंसी लोगन क कारज

**18** यहोवा हारून स कहेस, “तू तोहार पूतन, अउ तोहरे पिता क परिवारे क सब मनई कउनो पाप जउन पवितर ठउरे क सम्बंधित कीन्ह ग अहइ क जिम्मेदार अहइँ। तू अउ तोहार पूत याजकिये स सम्बन्धि कउनो भी बरे जिम्मेदार होइहीं।\* 2दूसर लेवी मनइयन क आपन साथ देइ बरे आपन परिवार समूह स लइ आवा। उ सबइ तोहार अउ तोहरे पूतन क मदद साच्छी क तम्बू क काम करइ में करिहीं। 3लेवी परिवार क उ सबइ मनई तोहरे मातहत अहइँ। उ पचे उ सबहिं कामे क करिहीं जेनका तम्बू में किया जाब अहइ। मुला उ पचेन क वेदी या पवितर ठउर क बर्तनन क लगे न जाइ चाही। जदि उ पचे अइसा करिहीं तउ उ सबइ मरि जइहीं अउ तू भी मरि जाब्या। 4उ पचे तोहरे संग होइहीं अउ तोहरे संग काम करिहीं। उ पचे मिलापवाला तम्बू क देखइ रेखइ क जिम्मेदार होइहीं। सब कारज, जेका तम्बू में कीन्ह जाइ चाही, उ पचे करिहीं। दूसर कउनो भी उ ठउर क नगिचे न आइ जहाँ तू अहा।

5“पवितर ठउर अउ वेदी क देख-रेख करइ क जिम्मेदार तू अहा। मई इस्त्राएल क मनइयन प फुन कोहाइ नहीं चाहत हउँ। 6मई खुद तोहरे मनइयन यानी लेवी बंस क लोगन क

खुद इस्त्राएल क सबहिं मनइयन में स चुनेउँ ह। उ पचे यहोवा क दीन्ह गवा उपहार अहइ अउर उ पचन्क परमेस्सर क सेवा करइ अउर मिलापवाला तम्बू क काम करइ बरे आर्पित कीन्ह गवा अहइ। 7मुला सिरिफ तू अउ तोहार पूत याजकन क रूप में सेवा कइ सकत हीं। अकेले तू ही वेदी क लगे जाइ सकत ह। तू अकेले महापवितर ठउर क पर्दा क भितरे जाइ सकत ह। याजक क रूप में तोहार सेवा एक तु उपहार जेका मई तोहका देत हउँ। कउनो भी दूसर, जउन पवितर ठउर क लगे आइ, मरि डवा जाइ।”

8तब यहोवा हारून स कहेस, “मई खुद तोहका मनइयन जउन खास भेंट चढ़ाएन ह जिम्मेदारी दिहेउँ ह। इस्त्राएल क लोग जउन सारी भेंट मोका देइहीं उ मई तोहका देत अहउँ। तू अउ तोहार पूत इ पवितर भेंटन क आपुस में बाटि सकत ह। इ हमेसा तोहार होइ। 9इ ओन सबहिं पवितर भेंटन में इ तोहार आपन हींसा होइ जेका जलावा नहीं गवा ह। हरेक भेंटन, हरेक अन्नबलि, हरेक पापबलि अउ हरेक दोखबलि जउन उ मोरे लगे लइ आवत हीं, इ सबइ तोहर अउ तोहरे पूतन बरे बहोत पवितर भेंटन होइ हीं। 10उ सबन चीजन क महापवितर ठउरे में खा। तोहरे परिवार क हर मरद मनसेधू एँका खाइ सकत ह मुला तोहका सुमिरइ चाही कि उ सबइ भेंट पवितर अहइँ।

11“अउर उ सबहिं चीजिन जेका इस्त्राएली उत्तोलन बलि क रूप में देइहीं, तोहरइ होइहीं। मई एँका तोहका, तोहार पूतन अउ तोहार बिटियन क देत हउँ। इ तोहार हींसा अहइ। तोहरे परिवार क हर एक मनई जउन सुद्ध होई, एँका खाइ सकी।

12“अउर मई सारा बढ़िया जइतून क तेल अउ सबन त बढ़िया नीक नई दाखरस अउ अनाज तोहका देत अहउँ। इ सबइ उहइ चीजन बाटिन जेका इस्त्राएल क लोग मोका यानी आपन यहोवा क देत हीं। इ सबइ उ चीजियन बाटिन जेका उ पचे आपन फसिल पाक जाए प बटोरत हीं। 13सबइ चीज जउन तोहार भूँया स आवत ही क पहिला फल परमेस्सर क अहइ। एह बरे इ चीजन क मई तोहका देब। अउर हर एक मनई जउन परिवार में सुद्ध होई एँका खाइ सकी।

14“अउर हर एक इस्त्राएल में जउन यहोवा क दीन्ह जात हीं, तोहार बा।

15“कउनो भी परिवारे में पहिलौटी क पूत या गोरु परमेस्सर क भेंट होइ। उ तोहार होइ। मुला तोहका हर एक पहिलौटी लरिका अउ पहिला पइदा भवा असुद्ध गोरु क फुन स वापिस लइ लेइ चाही। तब पहिला पइदा बच्चा फुन उ परिवार क होइ जाइ। 16जब लरिका बच्चा एक महीना क होइ जाई तबइ तोहका ओकर बरे दाम लइ लेइ चाही। ओका मुक्त करावइ क मूल्य पाँच सेकेल चाँदी पवितर स्थान क अधिकारिक माप अनुसार होइ चाही। एक सेकेल बीस गेरा क बराबर होत ह।

17“मुला तोहका पहिलौटी क गइया या भेड़ी या बोकरा क दाम नहीं लेइ चाही। उ सबइ गोरु तउ पवितर बाटेन। ओनकइ रक्त वेदी प छिछकारा अउर ओनकइ चर्बा बारा। इ भेंट आगी क जरिए दीन्ह जात ह। इ भेंट क महकब मोरे बरे यानी यहोवा बरे सोहइवाली गंध होइ। 18मुला इ

**तू ... होइहीं** जदि अचानक कउनो अनफिट याजक पवितर स्थान, में दाखिल होत ह या बलि चढ़ावत ह।

गोरुअन क गोस तोहार होइ जइसे कि उत्तोलन बलि क छाती तोहार होइ अउर भेंटन क दहिनी जाँघन तोहार होइ। 19कउनो भी चीज, जेका लोग पवित्र भेंट क रूप में मोका चढ़ावत ही, मई यहोवा ओका तोहका देत हउँ। इ तोहार हीसा अहइ। मई एँका तोहका, तोहार बेटहनन अउ तोहार बिटिहिनियन क देत अहउँ। इ यहोवा क संग किया गवा करार अहइ जउन हमेसा बना रही। मई इ बचन तोहका अउ तोहरे सन्तानन क देत अहउँ।”

20यहोवा हारून स इ भी कहेस, “तू कउनो भी भुइयों न पउब्या। अउर अइसी कउनो भी चीज नहीं रखब्या जइसी दूसर लोग रखत हीं। मई तोहार अंस अउ मई इस्राएल क लोगन क बीच तोहार उत्तरधिकार अहइ।

21“इस्राएल क लोग जउन कछू ओनके लगे होइ ओकर दसवाँ हीसा देइहीं। इ तरह मई लेवी बंस क सन्तानन क दसवाँ हीसा देत अहउँ। इ ओनके उ काम क मजूरी अहइ जउन उ पचे मिलापवाला तम्बू में सेवा करत भए करत रहत हीं। 22मूला इस्राएल क दूसर लोगन क मिलापवाला तम्बू क निअरे कबहुँ नहीं जाइ चाही। यदि उ पचे अइसा करत हीं तउ ओनका अपने आप मरइ क होइ। 23जउन लेवी बंसी मिलापवाला तम्बू में काम करत अहइँ उ पचे एँकरे खिलाफ पाप क जिम्मेदार होइहीं। इ कनून हमेसा बरे होइ। लेवीबंसी उ भुइँया क न लेइहीं जेका मई इस्राएल क दूसर लोगन क बचन दिहेउँ ह। 24मूला इस्राएल क लोगन क लगे जउन कछू होइ ओकर दसवाँ हीसा मोका देइहीं। इ तरह मई लेवी बंसी मनइयन क दसवाँ हीसा देब। इहइ कारण अहइ कि मई लेवीबंसी मनइयन बरे कहेउँ ह: “उ पचे उ भुइँया क न पइहीं जेका मई इस्राएल क मनइयन क देइ क वचन दिहेउँ ह।”

25यहोवा मूसा स कहेस, 26“लेवी बंसी मनइयन स बात करा अउ ओमसे कहा, “इस्राएल क लोग हर एक चीज क दसवाँ हीसा यहोवा क देइहीं। उ दसवाँ हीसा लेवी बंसी मनइयन क होइ। मुला ओकर दसवाँ हीसा यहोवा क ओनकी भेंट क रूप में देइ चाही। 27अउर उ दसवाँ हीसा क इ समुझा जाब कि तू खरिहान स अनाज या दाखरस क कोलहू स दाखरस भेंट किहे रहा। 28इ तरह तू यहोवा क वइसेन ही भेंट देब्या जइसे इस्राएल क दूसर लोग देत हीं। तू इस्राएल क मनइयन क दीन्ह गवा दसवाँ हीसा पउब्या। अउर तू ओकर दसवाँ हीसा याजक हारून क देब्या। 29जब इस्राएल क लोग आपन हर एक चीज क दसवाँ हीसा देइँ तउ तोहका ओहमों स सबन त जियाब पवित्र हीसा चुनइ चाही। उहइ दसवाँ हीसा अहइ जेका तोहका यहोवा क देइ चाही।

30“मूसा, लेवी लोगन स इ कहा, “लोग जउन कछू तोहका देत ह ओका सबन त अच्छा हीसा जब तू भेंट करब। तउ इ अइसा होइ जइसा तू एका खरिहान स अनाज या दाखरस क कोलहू स दाखरस भेंट किहे रहा। 31जउन बाकी बची ओका तू अउ तोहार परिवार एँका कउनो जगह खाइ सकत ह। इ तू मनइयन क उ काम बरे मजूरी अहइ जउन तू पचे मिलापवाला तम्बू में करत बाट्या। 32अउर अगर तू एँकर सब स बढ़िया हीसा यहोवा क देत रहब्या तउ

तू कबहुँ दोखी न होब्या। तू इस्राएल क मनइयन क पवित्र भेंट क बरे दूसित न करब्या अउर तू मरब्या नाहीं।”

### लाल गइया क राखी

19 यहोवा मूसा अउ हारून स बात किहेस अउ कहेस, 2“इ सबइ कनून अउर नेमें अहइँ जेका यहोवा इस्राएल क मनइयन क दिहे अहइ। ओनका बिना दोखे क एक लाल गइया तोहार लगे लिआवइ। उ गइया क कउनो खोचा भी नाही लागी रहइ चाही। अउर न ही कबहुँ ओका काँधे पइ कउनो जुआ धर दीन्ह गवा ह। 3इ गइया क याजक एलीआज़ार क द्या। एलीआज़ार गइया क सिबिर स बाहेर लइ जाइ अउ हुवाँ गइया क मारी। 4तब याजक एलीआज़ार एँकर कछू रकत आपन अँगुरी प लगाइ। तब ओका कछू रकत पवित्र तम्बू क ओर छिछकारइ चाही। ओका इ सात दाई करइ चाही। 5तब पूरी गइया क उ समइ जलाइ चाही जब उ लखत ह। चाम गोस, रकत अउ गोबर सबन क फूँकि देइ चाही। 6तब याजक एक ठु देवदारु क लकड़ी, हिस्सप क डार अउ एक लाल तौत लेइ चाही। याजक क इ चीजन क उ आगी में नावइ चाही जेहमों गइया बरत होइ। 7तब याजक क अपने क अउ अपने ओढ़ना क धोवइ चाही। तब ओका सिबिर में लउटइ चाही। याजक सौँझ तलक असुद्ध रही। 8जउन मनई गइया क फूँकि ओका आपन क आपन ओढ़ना क पानी स धोवइ चाही। उ सौँझ तलक असुद्ध रही।

9“तब एक मनई जउन सुद्ध होइ, गइया क राखी बटोरी। उ इ राखी क सिबिर क बाहेर एक सुद्ध ठउरे प राखी। इ राख ओनका असुद्धता क सुद्धीकरण क उपयोग क लइ इस्राएलियन दुआरा रखइ जाब्या।

10“उ मनई जउन गइया क राखी बटोरेस, आपन ओढ़ना धोइ। उ सौँझ तलक असुद्ध रही।

“इ नेमें सदा चलतइ रही। इ नेमें इस्राएल क नागरिक लोगन बरे अहइ अउर ओन बिदेसी मनइयन बरे भी बाटइ जउन तोहरे बीच रहत हीं। 11जदि एक मनई कउनो मरे मनई क छुअत ह तउ उ सात दिन बरे असुद्ध होइ जाइ। 12ओका आपन क तीसरे दिन अउ फुन सतएँ दिन पानी स धोवइ चाही। जदि उ अइसा नहीं करत तउ उ सुद्ध नहीं होइ। 13जदि कउनो मनई लहास क छुअत ह तउ उ मनई जउन असुद्ध अहइ। जदि उ मनई जउन असुद्ध अहइ पवित्र तम्बू क जात ह तउ पवित्र तम्बू अपवित्र होइ जात ह। एह बरे उ मनई क इस्राएलियन स निकारइ दीन्ह जाइ। जदि सुद्धीकरण क जल उ असुद्ध मनई प नहीं छिरकइ जात ह, उ असुद्ध ही रहब्या।

14“इ नेमें ओन लोगन स जुड़ा बाटइ जउन तम्बू में मरि जात हीं। जदि कउनो व्यक्ति तम्बू में मरि जात ह तउ तम्बू क हर एक मनई अउर हर एक चीज असुद्ध होइ जाइ। उ सबइ सात दिना तलक असुद्ध रहईं। 15अउर हर बे ढकना क कूँड़ा या बासन असुद्ध होइ जात ह। 16जदि कउनो लहास क छुअत ह तउ उ मनई सात दिना तलक असुद्ध रही। इ तब भी लागू होइ जब लहास खुला मैदान में या जुद्ध क

मइदान में मरा होइ। यदि कउनो मनई मरा भवा मनई क हाइ या कबर क छुअत ह तउ उ मनई सात दिना तलक असुद्ध रहब्या।

17“एह बरे तोहका बारी भइ गइया क राखी क प्रयोग उ मनई क फुन सदुध करइ बरे करइ चाही। बहता भवा जल गगरी में धरी राखी प डावा। 18सुद्ध मनई क एक हिस्सप डार लेइ चाही अउ एँका पानी में बोरइ चाही। तब ओका तम्बू, घारी अउ तम्बू में जउन मनइयन होई ओन पइ इ पानी छिरकइ चाही। तोहका ओन मनइयन क संग इहइ करइ चाही जउन ल्हासे क छुअई। तोहका इ ओकरे संग भी करइ चाही जउन लराइ में मारे मनइयन क ल्हासे क छुअत ह। या उ कउनो क संग भी जउन कउनो मरे मनई क हाइ क या कबर क छुअत ह।

19“तउ कउनो सुद्ध मनई इ जल क असुद्ध मनई प तीसरे दिन अउ फुन सतएँ दिन छिरकइ। सतएँ दिन उ मनई सुद्ध होइ जात ह। ओका आपन ओढ़ना क पानी में धोवइ चाही। उ साँझ तलक पवितर होइ जात ह।”

20“जदि कउनो मनई असुद्ध होइ जात ह अउ सुद्ध नाहीं होत तउ ओका इस्त्राएल क मनइयन स निकारइ दीन्ह जाइ। उ मनई प सुद्धीकरण क जल नाहीं छिरका गावा। उ सुद्ध नाहीं भवा। एह बरे उ पवितर तम्बू क असुद्ध कइ सकत ह। 21इ नेमें तोहरे बरे सदा होइ। जउन मनई इ सुद्धीकरण क जल क छिरकत ह ओका भी आपन ओढ़ना जरूर धोइ लेइ चाही। जउन मनई इ सुद्धीकरण क जल क छुइ उ साँझ तलक असुद्ध रही। 22जदि कउनो असुद्ध मनई कउनो दूसर क छुअइ तउ भी असुद्ध होइ जाइ। उ मनई साँझ तलक असुद्ध रही।”

### मिरियन मरत ह

**20** इस्त्राएल क मनई ‘सीन’ रेगिस्तान में पहिले महीना में पहुँचेन। लोग कादेस में रुकि गएन। मिरियन क मउत भइ अउ उ हुवाँ दफनाई गइ।

### मूसा क गलती

2उ जगह प मनइयन बरे पानी जियादा नाहीं रहा। एह बरे लोग मूसा अउ हारून क खिलाफ सिकाइत करइ बटुर गएन। अमनइयन मूसा स बहस कियेन। उ सबइ केहन, “इ नीक होत कि हम आपन भइयन क तरह यहोवा क समन्वा मर गए होतेन। 4तू यहोवा क मनइयन क इ रेगिस्तान में काहे लियाया? का तू चाहत ह कि हम अउ हमार गोरु हिअँ मरि जाई? 5तू हम पचन क मिस्त्र स काहे लिआया? तू हम पचन क बुरे ठउर प काहे लिआया ह? हिअँ कउनो अनाज नाहीं अहइ, कउनो अंजीर, अंगूर या अनार नाहीं अहइ। अउर हिअँ पिअइ बरे पानी नाहीं अहइ।”

6एह बरे मूसा अउ हारून उ मनइयन क तजि दिहन अउ उ पचे मिलापवाला तम्बू क दुआरे पहुँचेन। उ पचे हुअँ पैलगी कियेन। यहोवा क मौजूदगी क तेज ओन पइ परगट भवा।

7यहोवा मूसा स बात कियेस। उ कहेस, 8“आपन भाई हारून अउ मनइयन क भीड़ क संग ल्या अउ उ चट्टान

तलक जा। आपन टहरइ वाली कुबरी क ल्या। मनइयन क समन्वा चट्टान स बात करा। तबहिँ चट्टान स पानी बही। अउर तू उ पानी आपन मनइयन अउ जानवरन क दइ सकत ह।”

9टहरइ वाली कुबरी यहोवा क समन्वा पवितर तम्बू में रही। जइसा यहोवा कहे रहा, मूसा टहरइवाली कुबरी लिहस। 10मूसा अउ हारून मनइयन स चट्टाने क समन्वा मिलइ क कहेन। तब मूसा कहेस, “तू लोग सदा बिद्रोह करत ह। अब मोरउ सुना। का हम इ चट्टाने स पानी बहाउब?” 11मूसा आपन भुजा उठाएस अउ दुइ दाई चट्टानें प चोट कियेस। चट्टान स पानी बहइ लाग। मनइयन अउ गोरुअन पानी पिएन।

12मुला यहोवा मूसा अउ हारून स कहेस, “इस्त्राएल क सबहिँ मनइयन चारिहुँ कइँती बटुरा रहेन। मुला तू पचे मोका उ लोगन क समन्वा पवितर नाहीं ठहराया। तू पचे मनइयन क नाहीं बताएस कि मई चट्टान स पानी कइसा बहाएस ह। तू सबइ मनइयन क नाहीं बताया कि तू सबइ मोहे प पतियाना ह। मई ओन मनइयन क उ देस देब जेका देइ क मई बचन दिहेउँ ह। मुला तू सबइ उ देस में ओनका पहुँचावइ वाला न रहब्या।”

13इ ठउर क नाउँ मरीबा क पानी कहा जात रहा। इ उहइ ठउर अहइ जहाँ इस्त्राएल क मनइयन यहोवा स वाद-विवाद कियेन। अउर इ उहइ ठउर रहा जहाँ यहोवा इ देखीएँ रहा कि उ पवितर रहा।

### एदोम इस्त्राएल क पार नाहीं होइ दिहस

14जब मूसा कादेस में रहा, उ कउनो मनइयन क एदोम क राजा क लगे एक संदेसा क संग पठाएस। संदेसा इ रहा: “तोहरे भाई लोग तोहसे इ कहत हीं: तू जानत ह कि हम पचे केतनी तकलीफ उठावा ह। 15बहोत बहोतइ बरिस पहिले हमार पुरखन मिस्त्र चला ग रहेन। अउर हम पचे हुवाँ देर बरिस रहेन। मिस्त्र क मनई हम सबन बरे निर्दयी रहेन। 16मुला हम पचे यहोवा क मदद क बिनती कीन्ह। “अउर उ हम सबन क मदद बरे एक सरगदूत पठाएस। यहोवा हम पचन क मिस्त्र स बाहेर लइ आएन ह।

“अब हम पचे कादेस में अही जहाँ स तोहार पहुँटा सुरु होत ह। 17कृपा कइके आपन देस स हम पचन क जात्रा करइ देई। हम पचे कउनो खेत या अंगूर क बाग स जात्रा नाहीं करब। हम पचे तोहरे कउनो इनारा स पानी नाहीं पिअब। हम पचे सिरिफ राजपथ स जात्रा करब। हम पचे राजपथ क तनिके दाहिन बाएँ नाहीं बढ़ब। हम पचे तब तलक राजपथ प ठहरब जब तलक तोहरे धरती क पार नाहीं कइ जाइत।”

18मुला एदोम क राजा उत्तर दिहस, “तू हमरे देस स होइके जात्रा नाहीं कइ सकत्या। जदि तू हमरे देस स जात्रा करइ क कोसिस करत ह तउ हम पचे आउब अउ तोहसे तरवारे स लइब।”

19इस्त्राएल क मनइयन जवाब दिहन, “हम पचे बड़की सड़क स जात्रा करब। जदि हम या हमार गोरु तोहार कछू

पानी पीहीं तउ हम पचे ओकरे दाम क भुगतान करब। हम सबइ तोहरे देस स सिरिफ चलिके पार जाइ चाहित ह। हम सबइ एँका आपन बरे लेइ नहीं चाहित।”

20मुला एदोम फिन जवाब दिहस, “हम पचे आपन देस स होइके तोहका जाइ नहीं देब।”

तब एदोम क राजा एक ठु बहोत बड़वार अउ ताकतवर फउज बटोरिस अउ इस्त्राएल क मनइयन स लड़इ बरे निकर पड़ा। 21एदोम क राजा इस्त्राएल क मनइयन क अपने देस स जात्रा करइ बरे मना कइ दिहस। अउर इस्त्राएल क लोग मुड़ गए अउर दूसरे राहे स चल पड़ेन।

### हारून मरि जात ह

22इस्त्राएल क सब मनइयन कादेस स होर पहाड़े तलक जात्रा किहन। 23होर पहाड़ एदोम क चौहद्दी प रहा। यहोवा मूसा अउ हारून स कहेस, 24“अब हारून क मरि क समइ अउर आपन पुरखन क लगे जा मिलइ क समइ आ गवा ह। इ उ पहुँटा मैं न जाइ जेका देइ क मई इस्त्राएल क मनइयन क बचन दिहेउँ ह। मूसा, मई इ तोहसे कहत हउँ काहेकि मरीबा क पानी क बारे मैं तू अउ हारून मोरे दीन्ह ग हुकुम क खिलाफ बिद्रोह किहस।

25“हारून अउ ओकरे पूत एलीआज़ार क हॉर पहाड़े प लिआवा। 26हारून क खास ओढ़ना क ओसे ल्या अउ ओन ओढ़नन क ओकर पूत एलीआज़ार क पहिरावा। हारून हुवाँ पहाड़े प मरी। अउर उ आपन पुरखन क संग होइ जाइ।”

27मूसा यहोवा क हुकुम क मानेस। मूसा, हारून अउ एलीआज़ार हॉर पहाड़े प गएन। इस्त्राएल क सब मनइयन ओका जात लखेन। 28मूसा हारून क ओढ़ना उतार लिहस अउ ओन ओढ़ना क हारून क पूत एलीआज़ार क पहिराएस। तब हारून पहाड़े क चोटी प मरि गवा। मूसा अउ एलीआज़ार पहाड़े स उतरि आएन। 29तबहिं इस्त्राएल क सब मनइयन जान लिहन कि हारून गुजर गवा। एह बरे इस्त्राएल क हर मनई तीस दिना तलक हारून बरे गमी मनाएस।

### कनानीयन स जुद्ध

21 एक कनानी अराद क राजा रहा। उ नेगेव रेगिस्तान में रहत रहा। अराद क राजा सुनेस कि इस्त्राएल क मनइयन अथारीम कईंती जाइवाली सड़क स आवत अहई। एह बरे राजा बाहेर निकरा अउ इस्त्राएल क मनइयन प हमला किहस। उ ओहमाँ स कछू क धइ लिहस अउ ओनका बंदी बनाएस। 2तब इस्त्राएल क मनइयन यहोवा क इ बचन दिहन, “हे यहोवा! इ मनइयन क हरावइ मैं हमार मदद करा। एँका हमरे मातहत कइ द्या। जदि तू अइसा करब्या तउ हम पचे ओनके सहरन क पूरी तरह बरबाद कइ देब।”

3यहोवा इस्त्राएल क मनइयन क बिनती सुनेस। अउर यहोवा इस्त्राएल क लोगन स कनानी मनइयन क हरवाइ दिहस। इस्त्राएल क मनइयन कनानी लोगन अउ ओनके सहरन क पूरी तरह नास कइ दिहन। एह बरे उ ठउरे क नाउँ होरगा पड़ा।

### काँसा क साँप

4इस्त्राएल क मनइयन होर पहाड़े क तजेन अउ लाल सागर क जाइवाली सड़क स जात्रा प गएन। उ पचे अइसा एदोम क देस क चारिहुँ कईंती जाइ बरे किहेन। मुला मनइयन क धीरा नहीं रहा। 5उ सबइ परमेस्सर अउ मूसा क खिलाफ ओराहना सुरु किहन। मनइयन कहेन, “तू हम सबन क मिस्त्र स बाहेर काहे लिआया ह? हम पचे हिऑ रेगिस्तान में मरि जाब! हिऑ रोटी नहीं मिलत! हिऑ पानी नहीं! अउर हम पचे इ सड़ाइंध खइया स घिना करित ह।”

6एह बरे यहोवा मनइयन क बीच बिखैला साँपन पठाएस। साँपन ओन मनइयन क डस लिहस अउ बहोत स लोग मरि गएन। 7लोग मूसा क लगे आएन अउ ओसे कहेन, “हम पचे जानित ह कि जब हम पचे यहोवा अउ तोहरे खिलाफ बोलइ क पाप किहे अहउँ। यहोवा स पराथना करा अउ ओसे कहा कि इ साँपन क दूर करइ।” एह बरे मूसा लोगन बरे पराथना किहस।

8यहोवा मूसा स कहेस, “एक ठु काँसा क साँप बनावा अउ ओका एक ठु खम्बा प धरा। अगर कउनो मनई क साँप डसइ तउ उ मनई क खम्बा क ऊपर काँसा क साँप लखइ चाही। तब इ तरह उ मनई मरी नहीं।” 9एह बरे मूसा यहोवा क हुकुम मानेस अउ एक काँसा क साँप बनाएस अउ ओका एक खम्बा प धरेस। तब जब कबहुँ कउनो मनई क साँप डसत रहा तउ ओका खम्बा पइ काँसा क साँप क लखइ क होइ रहा। अउ जिअत रहत रहा।

### होर पहाड़े स मोआब क घाटी तलक क जात्रा

10इस्त्राएल क लोग उ जगह क तजि दिहेन अउ ओबोत नाउँ क जहग प सिबिर डाएन। 11तब मनइयन ओबोत स इये अबारीम तलक क जात्रा किहन। अउर हुऑ सिबिर डाएन। इ मोआब क पूरब रेगिस्तान में रहा। 12तब मनइयन उ ठउर क छोड़ दिहेन अउर जेरेद घाटी क जात्रा किहन। उ पचे हुवाँ सिबिर डाएन। 13तब उ पचे चलेन अउ रेगिस्तान क अर्नोन नदी क ओह पार सिबिर डाएन। इ नदी एमोरियन क चउहद्दी स सुरु होत रही। घाटी मोआब क चउहद्दी अउ एमोरी क बीचउ बीच रही। 14इहइ कारन अहइ कि “यहोवा क जुद्ध” किताबे मैं नीचे लिखा भवा हाल मिलत ह।”

“...अउर सूपा मैं बाहेब, अर्नोन क घाटी। 15अउर अर क बस्ती तलक पहोंचावइ वाली घाटी क किनारे क पहाड़ी। इ ठउर मोआब क चउहद्दी प अहई।”

16इस्त्राएल क मनइयन उ ठउर क तजेन अउर उ पचे बीर क जात्रा किहन। इ ठउर प एक ठु इनार रहा। यहोवा मूसा स कहेस, “हिऑ सबहिं मनइयन क बटोरा अउर मई ओनका पानी देब।” 17तब इस्त्राएल क मनइयन गीत गाएन:

“ए इनारा! उमड़िके पानी बहाउ। एकर गीत गावा।

18महा पुरखन इ इनारा क खोदेन। सज्जन लोग इ इनारा क खोदेन। उ पचे आपन राज-दण्डियन अउर लाठियन स एँका खोदेन। इ रेगिस्तान में एक ठु भेंट अहइ।”

तउ मनइयन ऐंका "मत्ताना" नाउँ क इनारा कहेन। 19तब मनइयन मत्ताना स नहलीएल क जात्रा किहेन। फुन उ पचे नहलीएल स बामोत क जात्रा किहेन। 20मनइयन बामोत स मोआब मँ घाटी तलक क जात्रा किहेन। इ ठउरे प पिसगा पहड़ क चोटी रेगिस्तान क ऊपर देखेई पड़त ह।

### सिहोन अउ ओगें

21इस्त्राएल क मनइयन कछू मनइयन क एमोरी लोगन क राजा सीहोन क लगे पठाएस। इ मनइयन राजा स कहेन, 22"आपन देस स होइ के हमका जात्रा करइ द्या। हम पचे कउनो खेत या अंगूरे क बगिया स होइके न जाब। हम पचे तोहरे कउनो इनारा क पानी न पिअब। हम सबइ सिरिफ राज-पथ स होइके जात्रा करब। हम सबइ तब तलक उ सड़क प ठहरब जब तलक हम पचे तोहरे देसे स होइके जात्रा पूरी नाहीं कइ लेइत।"

23मुला राजा सीहोन इस्त्राएल क लोगन क आपन देस स होइके जात्रा करइ क रजामन्दी नाहीं दिहस। राजा आपन फउज बटोरेस अउ रेगिस्ताने कईती चल पड़ा। उ इस्त्राएल क खिलाफ हमला करत रहा। यहज नाउँ क एक ठउरे प राजा क फउज इस्त्राएल क लोगन क संग लड़ाई लड़ेस।

24मुला इस्त्राएल क लोगन राजा क मारि डाएन। तब उ पचे अर्नोन घाटी स लड़ेके यब्बाक इलाका तलक ओकरे पहुँटा प कब्जा कइ लिहेन। इस्त्राएल क मनइयन अम्मोनी लोगन क हद तक क पहुँटा प कब्जा किहेन। उ पचे अउर जियादा इलाका प कब्जा नाहीं किहेन काहे की उ हद अम्मोनी लोगन क जरिए सुरच्छित रही। 25मुला इस्त्राएल अम्मोनी लोगन क सबहिँ सहरन प कब्जा कइ लिहेन। उ पचे हेसबोन नगर तलक अउ ओकरे चारिहुँ कईती क छोटके सहरन क भी हराइ दिहेन। 26हेसबोन उ सहर रहा जेहमा राजा सीहोन रहत रहा। ऐंकरे पहिले सीहोन मोआब क राजा क हराए रहा अउ सीहोन अर्नोन घाटी ताई सब पहुँटन प कब्जा कइ लिहे रहा। 27इहइ कारण अहइ कि गवइया इ गीत गावत हीं:

आवा हेसबोन क ऐंका फुन स बसावइ क बाटइ। सीहोन क सहरन क फुन स बनइ द्या।

28काहेकि आगी हेसबोन सहर स बाहेर चले गएस अउर सोला सीहोन सहर स बाहेर चला गवा। आगी मोआब मँ आर क नस्ट कइ दिहस। इ अर्नोन नदी क ऊपरी पहाड़ियन क सासकन क बार दिहस।

29हे मोआब! इ तोहरे बरे बुरा बाटइ, कामोस क मनई बरबाद कइ दीन्ह ग बाटेन। ओकर पूतन भाग पराइ गएन। ओकर बिटियन बन्दी बनाइ गइन। अमानीत लोगन क राजा सीहोन क जरिये।

30मुला हम पचे ओनेँ एमोरियन क हरावा, हम सबइ ओनका हेसबोन स दिबान तलक सहरन क, नसिम स नोपह तलक जउन मेदाब क निचके अहइ मिटाइ द्या।"

31एह बरे इस्त्राएल क मनइयन एमोरियन लोगन क देस मँ रहेन।

32मूसा कछू खुफिया लोगन क याजेर प नजर धरइ बरे पठाएस। मूसा क अइसा करइ क पाछे इस्त्राएल क मनइयन

उ सहर प कब्जा कइ लिहेन। उ पचे ओकरे चारिहुँ कईती क छोटके सहरन प भी कब्जा कइ लिहेन। इस्त्राएल क मनइयन उ ठउरे प बसइया एमोरी लोगन क उ ठउर तजि देइ क मजबूर किहेन।

33तब इस्त्राएल क लोग बासान कईती जाइवाली सड़क प जात्रा किहेन। बासान क राजा ओग आपन फउज लिहस अउ इस्त्राएल क लोगन क मुकाबला करइ निकरा। उ एद्रेइ नाउँ क पहुँटा मँ ओनके खिलाफ लड़ा।

34मुला यहोवा मूसा स कहेस, "उ राजा स जिन सिबिरअ। मईँ तोहका ओका हरावइ देब। तू ओकर पूरी फउज अउ पहुँटा क पउब्या। तू ओकरे संग उहइ करा जउन तू एमोरी लोगन क राजा सिहोन क संग किहा ह।"

35एह बरे इस्त्राएल क लोगन ओग अउ ओकर फउज क हाराया। उ सबइ ओका, ओकर बेटवन अउ ओकर सारी फउज क हराएन। तब इस्त्राएल क मनइयन ओकरे पूरे देस क कउनो क बिना जिउत छोड़इ क कब्जा कइ लिहेन।"

### बिलाम अउ मोआब क राजा

22 तब इस्त्राएल क मनइयन मोआब क समतल स होइ के यरदन नदी क पार यरीहो तलक जात्रा किहेन। 2-3सिप्पोर क पूत बालाक उ सब लखेस जेका इस्त्राएल क मनइयन एमोरी मनइयन क संग किहे रहेन। मोआब बहोतइ जियादा डेराइ ग रहा काहे की हुवाँ इस्त्राएल क बहोत मनई रहेन। मोआब इस्त्राएल क लोगन स बहोत ससान रहा।

4मोआब क राजा मिद्यान क नेता लोगन स कहेस, "मनइयन क इ बड़का झुण्ड हमरे चारिहुँ कईती क सब चीज क वइसे ही बरबाद कइ देइ जइसे कउनो गइया खेते क घास चरि जात ह।"

इ टेमें सिप्पार क पूत बालाक मोआब क राजा रहा। 5उ कछू मनइयन क बोर क पूत बिलाम क बोलावइ बरे पठाएस। बिलाम फरात नदी क निअरे पतोर नाउँ क पहुँटा मँ रहा। बालाक कहेस, "मनइयन क एक नवा रास्ट्र मिस्त्र स आवा ह। उ पचे एतना जियादा अहईँ कि समूचइ प्रदेस मँ संचर सकत हीं। उ पचे ठीक हमरे निअरे सिबिर डाए अहईँ।

6आवा अउ इ मनइयन क संग भिड़इ मँ मोर मदद करा। उ पचे मोर ताकत स जियादा बरिआर ताकत वाला अहईँ। इ होइ सकत ह कि तब मईँ ऐंका हराइ सकउँ। तब मईँ ओनका आपन देस छोड़इ क मजबूर कइ सकउँ। मईँ जानत अहउँ कि तू बड़की ताकत धरत ह। अगर तू कउनो मनई क आसीबादि देइ तउ उ आसीसित होइ, अगर तू कउनो मनई क सराप देइ तउ उ मनई सापित होइ।\* एह बरे आवा अउ इ मनइयन क सराप देइ।"

7मोआब अउ मिद्यान क नेतन बालाम स मिलइ बरे गएन अउर आपन संग जादूइ सेवा क फीस भी लइ गएन। तब उ पचे, बालाक जउन कछू कहे रहा, ओसे कहेन।

अगर तू ... होइ इ उ वाचा क कईती इसारा करत ह जउन परमेस्सर इब्राहीम क संग उत्पत्ति 12:3 मँ किहेस ह "मईँ ओका आसिस देब जउन तोहका आसिस देत ह, मईँ ओका सराप देब जउन तोहका सराप देत ह।"

8बिलाम ओनसे कहेस, “हिआँ रात भइ ठहरा। मईँ यहोवा स बात करब अउर जउन जवाब, उ पचे मोका देइहीं, उ तोहसे कहबा।” एह बरे उ रात मोआवियन क नेता ओनके संग ठहरेन।

9परमेस्सर बिलाम क लगे आवा अउ उ पूछेस, “तोहरे संग इ सबइ कउन लोग अहईँ?”

10बिलाम परमेस्सर स कहेस, “मोआब क राजा सिप्पोर क पूत बालाक एक संदेसा मोका देइ बरे ओनका पठाए अहइ।” 11सँदेसा इ अहइ: मनइयन क एक ठु नवा रास्ट्र मिस्त्र स आवा अहइ। उ पचे ऐतना जियादा अहईँ कि समूचइ देस मँ फइलि सकत हीं। एह बरे आवा अउ इ मनइयन क खिलाफ कछू कहा। इ होइ सकत ह ओनसे लइइ मँ मईँ समर्थ होइ सकउँ अउ आपन देस तजि देइ क ओनका मजबूर कइ सकउँ।”

12मुला परमेस्सर बिलाम स कहेस, “ओनके संग जिन जा। तू ओनका सराप नहीं देइ चाही, काहेकि उ आसीबादि पाएस ह।”

13दूसर दिन बिलाम उठा अउ बालाक क नेता स कहेस, “अपने देस क लउटि जा। यहोवा मोका तोहरे संग नहीं जाइ देइहीं।”

14एह बरे मोआबी नेता बालाक क लगे लउटि गएन अउ ओसे इ बात कियेन। उ पचे कहेन, “बिलाम हम सबन क संग आवइ स मना कइ दिहे अहइ।”

15एह बरे बालाक दूसर नेता लोगन क बिलाम क लगे पठाएस। इ दाईँ उ पहिली दाईँ क अपेच्छा बहोत ढेर क मनई पठाएस। अउर इ नेता लोग पहिली दाईँ क अपेच्छा जियादा सम्मान रहेन। 16उ सबइ बिलाम क निअरे गएन अउ कहेन: “जिप्पार क पूत बालाक तोहसे कहत ह: कृपा कइके आपन क हिआँ आवइ स कउनो क रोकइ जिन द्या। 17जउन मईँ तोहसे मँगत अहउँ जदि तू उ करब्या तउ मईँ तोहका बहोत जियादा भुगतान करब। आवा अउ इ मनइयन क खिलाफ मोरे बरे कछू कहा।”

18मुला बिलाम उ मनइयन क जवाब दिहस। उ कहेस, “मोका यहोवा मोरे परमेस्सर क आग्या मानइ चाही। मईँ ओकरे हुकुम क खिलाफ कछू नहीं कइ सकत हउँ। मईँ बड़का-छोटका कछू भी तब तलक नहीं कइ सकत जब तलक परमेस्सर नहीं कहत कि मईँ ओका कइ सकत हउँ। अगर राजा बालाक आपन सोना चाँदी भी सुन्दर घर क भी दइ देइ तउ भी मईँ आपन परमेस्सर यहोवा क हुकुम क खिलाफ कछू नहीं करब। 19मुला तू भी ओन दूसर लोगन क तरह आज क रात हिआँ ठहर सकत ह। अउ रात मँ मईँ जान जाब कि यहोवा मोहसे क कहवावइ चाहत ह।”

20उ रात परमेस्सर बिलाम क लगे आवा। परमेस्सर कहेस, “इ लोग अपने संग लइ जाइ बरे कहइ खातिर फुन आवा अहईँ। एह बरे तू ओनके संग जाइ सकत ह मुला सिरिफ उहइ करा जउन मईँ तोहसे करइ क कहउँ।”

### बिलाम अउ ओकर गदहा

21दूसरे भिन्सारे बिलाम उठा अउ अपने गदहा प काठी धरेस। तब उ भी मोआबी नेता लोगन क संग गवा।

22बिलाम आपन गदहा प सवार रहा। ओकरे नउकरन मँ स दुइ ठु ओकर संग रहेन। जब बिलाम जात्रा करत रहा तउ परमेस्सर ओन प कोहाइ गवा। एह बरे यहोवा क सरगदूत बिलाम क समन्वा सड़के प खड़ा होइ गवा। सरगदूत बिलाम क रोकइ जात रहा।”

23बिलाम क गदहा यहोवा क सरगदूत क सड़क प खड़ा देखेस। सरगदूत क हाथ मँ एक तरवार रही। एह बरे सड़क स मुड़ा अउ खेत मँ चला गवा। बिलाम सरगदूत क नहीं लख सकत रहा। एह बरे उ गदहा प बहोत कोहान। उ गदहा क पीटेस अउ ओका सड़क प लउटइ क मजबूर किहस।

24पाछे यहोवा क सरगदूत अइसी जगह प खड़ा भवा जहाँ सड़क संकरी होइ गइ रही। इ दुइ अंगूर क बगियन क बीच क ठउर रहा। हुवाँ सड़क क दुइनउँ ओर देवार रहिन। 25गदहा यहोवा क सरगदूत क फुन निहारेस। एह बरे गदहा एक देवारे स चिपकिके निकरा। एहसे बिलाम क गोड़ देवारे स पिचक गवा। एह बरे आपन गदहा क फुन स पीटेस। 26एकरे पाछे यहोवा क सरगदूत दूसर ठउर प खड़ा भवा। इ दूसर जगह रही जहाँ सड़क संकराइ ग रही। हुवाँ कउनो अइसी जगह नहीं रही जहाँ गदहा मुड़ सकइ। 27गदहा यहोवा क सरगदूत क लखेस। एह बरे गदहा बिलाम क आपन पीठ प लइके जमिन प बइठि गवा। बिलाम गदहा पर बहोतइ कोहान रहा। एह बरे उ ओका लाठी स पीटि डाएस।

28तब यहोवा गदहा क बोलइवाला बनाएस। गदहा बिलाम स कहेस, “तू मोहे प काहे कोहान अहा। मईँ तोहरे संग का किहउँ ह? तू मोका तीन दाईँ मार्या ह।”

29बिलाम गदहा क उत्तर दिहस, “तू मोर मज़ाक उड़ाएस ह, तू मोका गलत ठहराएस ह। जदि मोरे हाथे मँ अबहिँ सिरिफ एक तरवार होत तउ मईँ अबहिँ तोहका मारि डाइत।”

30मुला गदहा बिलाम स कहेस, “मईँ तोहार आपन गदहा अहउँ, जेह प तू आपन सारा जिन्नगी सवार भवा ह। अउर तू जानत ह कि मईँ अइसा एकरे पहिले कबहुँ नहीं किहेउँ ह।”

“इ सही अहइ।” बिलाम कहेस।

31तब यहोवा बिलाम क सड़क प खड़ा सरगदूत क लखइ दिहस। बिलाम सरगदूत अउ ओकर तरवारि निहारेस। तब बिलाम निहुरिके पैलगी किहस।

32तब यहोवा क सरगदूत बिलाम स पूछेस, “तू आपन गदहा क तीन दाईँ काहे मार्या ह? मईँ तोहका रोकइ बरे हिआँ आवा अहउँ। काहेकि तोहार जात्रा मोर आदेस क खिलाफ अहइ। 33गधा मोका लखेस। अगर गदहा न मुड़ा होत तउ मईँ तोहका मारि डाए होतेउँ। मुला मोका तोहरे गदहा क नहीं मारइ क रहा।”

34तब बिलाम यहोवा क सरगदूते स कहेस, “मईँ पाप किहेउँ ह। मईँ इ नहीं जानत रहेउँ कि तू सड़क प खड़ा अहा। अगर मईँ बुरा करत अहउँ तउ मईँ घर लउटि जाब।”

35यहोवा क सरगदूत बिलाम स कहेस, “नहीं, तू इ मनइयन क संग जाइ सकत ह। मुला होसियार रहा। सिरिफ उ बातन क कहा जउन मईँ तोहसे कहइ बरे कहबा।” एह

बरे बिलाम बालाक क जरिये पठए गए नेता लोगन क संग गवा।

36 बालाक सुनेस कि बिलाम आवत अहइ। एह बरे बालाक ओसे मिलइ बरे अर्नोन नदी क निअरे मोआबी सहर गवा। इ ओकरे देस क उत्तरी छोरे प रहा। 37 जब बालाक बिलाम क लखेस तउ उ बिलाम स कहेस, “मई एकरे पहिले आप स आवइ क कहेउँ रहा अउर इ भी बताएउँ रहा कि इ बहोत जियादा महत्व स भरा बाटइ। आप हमरे लगे काहे नाहीं आपन? का मई तोहका धन देइ क जोग्य नाहीं अहइ?”

38 मुला बिलाम उत्तर दिहस, “मई अब तोहरे लगे आवा अहउँ।” मुला मई, जउन तू करइ क कहे रहा ओहमों स, साइद, कछू भी न कइ सकउँ। मई सिरिफ उहइ बातन तोहसे कइ सकत हउँ जउन यहोवा परमेस्सर मोसे कहइ क बताएस हा।”

39 तब बिलाम बालाक क किर्यथूपोत गवा। 40 बालाक कछू गोरु अउ कछू भेड़िन ओकरे भेंट क रूप में मारेस। उ कछू गोस बिलाम अउ कछू ओकरे संग क नेता लोगन क दिहस।

41 दूसरे भिन्सारे बालाक बिलाम क बमोत बाल नगर लइ गवा। उ सहर स उ पचे इस्राएली मनइयन क कछू सिबिर क लखि सकत रहेन।

### बिलाम क पहिली भविस्सबाणी

**23** बिलाम कहेस, “हिआँ सात तु वेदी बनावा। अउ मोरे बरे सात तु बर्धा अउ सात भेड़ा तइयार करा।” 2 बालाक उ सब किहस जउन बिलाम कहेस। तब बिलाम अउ बालाक हर एक वेदी प एक तु बर्धा अउ एक भेड़ा मारेस।

3 तब बिलाम बालाक स कहेस, “इ वेदी क लगे ठहरा। मई दूसर जगह जाब। तब साइद यहोवा मोरे लगे अहहीं अउर बतइहीं कि मई का कहेउँ।” तब बिलाम एक ऊँचा जगह प गवा।

4 परमेस्सर उ ठउर प बिलाम क लगे आवा। अउर बिलाम कहेस, “मई सात तु वेदी तइयार किहेउँ ह। अउर मई हर एक वेदी प एक तु बर्धा अउ एक भेड़ा मारेउँ ह।”

5 तब यहोवा बिलाम क इ बताएस जउन ओका कहइ चाही। तब यहोवा कहेस, “बालाक क लगे जा अउ इ बातन क कहा जउन मई कहइ बरे बताएउँ ह।”

6 एह बरे बिलाम बालाक क लगे लउटा। बालाक तब तलक वेदी क निचके खड़ा रहा। अउर मोआब क सबहिं नेता लोग ओकरे संग खड़ा रहेन। 7 तब बिलाम इ सब बातन क कहेस:

मोआब क राजा बालाक मोका अरम स बोलाएस पूरबिया पहाड़न स। बालाक मोसे कहेस: “आवा अउ मोरे बरे याकूब क खिलाफ कहा, आवा अउ इस्राएलक क लोगन क खिलाफ कहा।”

8 परमेस्सर ओन मनइयन क खिलाफ नाहीं अहइ, एह बरे मई भी ओनके खिलाफ नाहीं कहि सकत हउँ। यहोवा

ओनका बुरा होइ बरे नाहीं कहेस ह। एह बरे मई भी वइसा नाहीं कइ सकत हउँ।

9 मई ओन सबन क पहाड़े स लखत हउँ। मई अइसे मनइयन क लखत हउँ जउन अकेले रहत हीं। इ मनइयन कउनो दूसरे रास्ट्र क अंग नाहीं अहइ।

10 कउन याकूब क मनइयन क गन सकत ह? उ सबइ बालू क कणे क तरह ढेर क बाटेन। इस्राएल क मनइयन क एक चउथाई क भी कउनो गन नाहीं सकत। मोका एक तु नीक मनई क तरह मरइ द्या, मोका ओन मनइयन क तरह मरइ द्या।

11 बालाक बिलाम स कहेस, “तू हमरे बरे का किहा ह? मई तोहका आपन दुस्मनन प सारप देइ बरे बोलाएउँ रहा। तू आपन सबन क आसीर्बादि दिहा ह।”

12 मुला बिलाम जवाब दिहस, “यहोवा मोहसे जउन कहइ क चाहत ह ओका मोका जरुर कहइ चाही।”

13 तब बालाक ओसे कहेस, “तउ मोरे संग कउनो दूसर ठउर प आवा। जहाँ तू ओन लोगन क लखि सकत ह। मुला तू ओनके एक हिंसा क लखि सकत ह, सबहिं क नाहीं लखि सकत ह। अउर उ ठउर स मोरे बरे ओनका सराप दइ सकत ह।” 14 एह बरे बालाक बिलाम क जोफिम क मइदान\* में लइ गवा। इ पिसगा पहाड़े क चोटी प रहा। बालाक उ ठउर प सात वेदी बनाएस। तब बालाक हर एक वेदी प बलि क रूप में एक तु बर्धा अउ एक भेड़ा मारेस।

15 एह बरे बिलाम बालाक स कहेस, “इ वेदी प खड़ा रहा। मई उ ठउरे प परमेस्सर स भेंटइ जाब।”

16 तउ यहोवा बिलाम क लगे आवा अउ उ बिलाम क बताएस कि उ का कहइ। तब यहोवा बिलाम क बालाक क लगे लउटि आवइ अउ ओन बातन क कहइ बरे कहेस। 17 एह बरे बिलाम बालाक क लगे गवा। बालाक तब वेदी क लगे खड़ा रहा। मोअब क नेता ओकरे संग रहेन। बालाक बिलाम क आवत भवा लखेस अउ ओसे पूछेस, “यहोवा का कहेस ह?”

### बिलाम क दूसर भविस्सबाणी

18 तब बिलाम इ बातन क कहेस: “खड़ा हवा अउ मोर बात सुना। सिप्पार क पूत बालाक! मोरउ सुना।

19 परमेस्सर मनई नाहीं; उ लबार न बोली। परमेस्सर मनई स पइदा पूत नाहीं, ओकर फइसला बदली नाहीं। अगर यहोवा कहत ह कि उ कछू करी तउ उ ओका जरूर करी। जदि यहोवा बचन देत ह तउ आपन बचन क जरूर पूरा करी।

20 यहोवा मोका ओनका आसीर्बादि देइ क हुकुम दिहेस ह। यहोवा ओनका आसीर्बादि दिहेस ह, एह बरे मई ओका नाहीं बदल सकित।

21 परमेस्सर याकूब क मनइयन में कउनो दोख नाहीं पाएस। इस्राएल क लोगन में कउनो पाप नाहीं रहा। यहोवा ओनकइ परमेस्सर अहइ अउ ओनके संग बाटइ। महाराजा क पुकार ओनके संग अहइ।

जोफिम क मइदान पहाड़ा पइ उ जगह जहाँ स चोकीदार दूर क चिजियन क लख सकत ह।

22परमेस्सर ओनका मिस्त्र स बाहेर लिआवा। इस्त्राएल क उ सबइ लोग जंगली सौंड़े क तरह बलवान अहई।

23कउनो ताकत नाहीं जउन याकूब क लोगन क हराइ सकइ। कउनो जादू इस्त्राएल क लोगन क नाहीं रोकइ सकत ह। याकूब क बारे में अउ इस्त्राएल क लोगन क बारे में भी मनइयन इ बात कहब्या, 'परमेस्सर जउन महान काम किहे अहइ ओन पइ धियान द्या।'

24मनई सेर क नाई सक्तीवाला होइहीं। उ सबइ सेर जइसे लड़िहीं। अउर इ सेर कबहुँ नाहीं आराम करी, जब तलक उ सिकार क खाइ नाहीं लेअत। जब तलक उ ओनकइ खून नाहीं पिअत जउन जुद्ध मई मारा गवा ह।"

25तब बालाक बिलाम स कहेस, "तू नाहीं ओका सराप द्या अउर नाहीं ओका आसीबादि।"

26बिलाम जवाब दिहस, "मई पहिले तोहसे कहि दिहेउँ ह कि मई सिरिफ उहइ करब जउन यहोवा मोका करइ बरे कहत ह।"

27तब बालाक बिलाम स कहेस, "एह बरे तू मोर संग दूसर ठउर प चला। साइद कि ओनका उ जगह स सराप देइ स परमेस्सर खुस होइ।" 28एह बरे बालाक बिलाम क पेऑर पहाड़े प लइ गवा। इ पहाड़ रेगिस्तान में दिखौंइ देत रहा।

29बिलाम कहेस, "हिआँ सात वेदी बनावा। तब सात तु सौंड़ अउ सात भेड़ा क वेदी प बलि बरे तइयार करा।" 30बालाक उहइ किहस जउन बिलाम कहेस। बालाक बलि क रूप में हरेक वेदी प एक तु सौंड़ अउ एक भेड़ा भोरेस।

### बिलाम क तीसरी भविस्सबाणी

**24** बिलाम क मालूम भवा कि यहोवा इस्त्राएल क आसीबादि देइ चाहत हीं। एह बरे बिलाम कउनो किस्म क जादू टोना क प्रयोग कइके ओका बदलइ नाहीं चाहेस। मुला बिलाम मुड़ा अउ उ रेगिस्तान कइँती लखेस। 2बिलाम रेगिस्तान क पार तलक लखेस अउ इस्त्राएल क सबहिं लोगन क लखेस। उ पचे आपन अलग-अलग परिवार समूहन क पहँटा में सिबिर डाए भए रहेन। तब परमेस्सर क आतिमा बिलाम प उतरी। 3अउर बिलाम इ शब्दन क बोला:

"बोर क पूत बिलाम क सँदेसा अहइ जउन मई साफ-साफ निहारत हउँ उहइ क बारे में बोलत हउँ

4"मई इ सँदेसा क परमेस्सर स सुनेउँ ह। मई लखेउ हँ जउन सर्वसक्तीमान परमेस्सर मोका देखौँएस ह। मई मूँड़ि निहुराइके बतावत हउँ जउन मई साफ-साफ देखँत हउँ।

5"याकूब क मनइयो! तोहार तम्बू बहोतइ सुन्नर अहई! इस्त्राएल क मनइयो! तोहार घर बहोतइ सुन्नर अहई!

6"तोहार तम्बू बगिया क नाई अहई जउन नदी क आगे लगावा गवा ह। तोहार घर उ बगिया क नाई बाटेन जउन नदी क किनारे बाढ़त रहत ह। तोहार घर मीठी महकउआ झाड़ी क नाई अहई जेका यहोवा उगाए बाटइ। तोहार घर सुन्नर बिरवा क नाई अहई जउन पानी स बाढ़त रहत हीं।

7"तोहका पिअइ क पानी हमेसा मिलत रही। तोहका खूब इफरत पानी बिआ क बाढ़इ बरे मिली। तोहार सबन क राजा अगग स बड़ा होइ। तोहरे राज्ज क बड़की महिमा होइ।

8"परमेस्सर ओन लोगन क मिस्त्र स बाहेर लिआवा। उ एँतना बरिआर सक्तीवाला अहइ जेतँना एक तु अनेर सौंड़। उ पचे आपन सबहिं दुस्मनन क नास कइ देब। उ ओकर हड्डियन क तोड़ देब अउ आपन तीरन स ओनका भेद देब।

9"उ सबइ सेर क नाई अहई जउन गुटुर-मुटुर बड़ठा अहइ अउर सोअत अहइ। कउनो मनई ओका जगावइ नाहीं चाहत। कउनो मनई जउन तोहका आसीबादि देइ, असीस पाइ। अउर कउनो मनई जउन तोहका सराप देइ उ पचे सराप पाइ।"

10तब बिलाम प बालाक बहोत कोहान। बालाक बिलाम स कहेस, "मई तोहका आपन दुस्मनन पइ सराप देइ बरे हिआँ बोलाएउँ रहा। मुला तू ओनका आसीबादि दिहे अहा। तू ओनका तीन दाई आसीबादि दिहे अहा। 11अब बिदा ह्वा अउ घरे जा। मई कहेउँ रहा कि मई तोहका बहोत जियादा अमीर बनाउब। मुला यहोवा तोहका इनाम पावइ स रोक रखे बाटइ।"

12बिलाम बालाक स कहेस, "का मई ओन संदेसवाहकन क जेनका तू मोरे लगे पठाएस रहा नाहीं कहेस रहा: 13'बालाक आपन सोना चाँदी स भरा आपन घर मोका दइ सकत ह। मुला मई तब भी सिरिफ उहइ बात कहि सकत हउँ जेका कहइ बरे यहोवा हुकुम दिहे अहइ। मई नीक या बुरा खुद कछू नाहीं कइ सकत हउँ। मोका उहइ करइ चाही जउन यहोवा क हुकुम होइ।' का तोहका याद नाहीं कि मई इ बातन तोहरे मनइयन स कहेउँ। 14अब मई आपने लोगन क बीच जात अहउँ; मुला मई तोहका एक चिताउनी देब। मई तोहसे कहब कि भविस्स मँ इस्त्राएल क इ लोग तोहरे संग अउ तोहरे लोगन क संग का करिहीं।"

### बिलाम क आखिरी भविस्सबाणी

15तब बिलाम इ बातन क कहेस:

"बोर क पूत बिलाम क इ सब्द अहई: इ सबइ सब्द उ मनई क अहई जउन चीजन क साफ साफ लिखि सकत ह।

16मई परमेस्सर स इ सँदेसा सुनेउँ ह। मई गियान पाएउँ ह जउन सर्वोच्च परमेस्सर दिहेस ह जेका सर्वसक्तीमान परमेस्सर दिहेस ह। मई उ निहारेउँ ह। मई दण्डवत कइके कहत हउँ जउन मई निहारेउँ ह।

17"मई लखत अहउँ कि यहोवा आवत बा, मुला अबहिं नाहीं। मई ओकर अवाई लखत हउँ, मुला हाली नाहीं। याकूब क परिवार स एक तारा आई। इस्त्राएल क मनइयन मँ स एक नवा राजा आई। उ राजा मोआबी मनइयन क मूँड़ खूँद देइ। उ सेथ क सबहिं पूतन क मूँड़न क चकना-चूर कइ देइ।

18इस्त्राएल ताकतवर होइ! उ एदोम क राज्ज पाई। उ आपन दुस्मन सेइर क राज्ज पाई।

19"उ याकूब क परिवार स सासन करब। सहर मँ उ सबन लोगन क नास करी जउन जिअत बचा भवा बाटेन।"



20तब बिलाम आपन अमालेकी मनइयन क लखेस अउ इ बातन क कहेस:

“सब रास्ट्रन में स अमालेकी सबन त जियादा बरिआर रहा। मुला अमालेकी भी बरबाद कइ दीन्ह जाइ!”

21तब बिलाम केनित मनइयन क लखेस अउ ओसे इ सब बात कियेस:

“तू सबइ पतियात ह कि तोहार देस उहइ तरह सुरच्छित बा, जइसे कउनो ऊँचे पहाड़े प एक चिरइया क झोंझ।

22“मुला तू कनित लोगो नस्ट होइ जाब्या जइसे यहोवा केन क नास कियेस ह। अससूर तोहका बन्दी बनाइ लेइ।”

23तब बिलाम इ बतिया कहेस:

“कउनो मनई नहीं जी सकत जब परमेस्सर अइसा करत ह।

24कितियन क घाट स जहाज अइहीं। उ सबइ अससूर अउ एबर क हरइहीं। मुला तब सब जहाज नस्ट कइ दीन्ह जइहीं।”

25तब बिलाम उठा अउ आपन घर लउटि गवा अउ बालाक भी आपन रहे चला गवा।”

### पेऑर में इस्त्राएल

**25** इस्त्राएल क लोग अबहिं सितीमी क इलाका में सिबिर डाए रहेन। उ समई इस्त्राएली मनसेधूअन मोआबी मेहररुअन क संग वेस्यावृत्ति करइ लागेन। 2-3मोआबी मेहररुअन मनसेधूअन क आवइ अउ आपन मिथ्य देवतन क भेंट चढ़ावइ में मदद करइ क न्यौतेन। इस्त्राएली लोगन हुवाँ भोजन किहन अउ देवतन क पूजन। उ ठउरे प इस्त्राएल क लोग इ तरह लबार देवता-पोर क बाल क पूजा सुरु किहन। यहोवा इ लोगन प किरोध कियेस।

4यहोवा मूसा स कहेस, “इ मनइयन क नेता लोगन क लिआवा। ओनका धूप में यहोवा क समन्वा लट्काइ द्या। तब यहोवा इस्त्राएल क मनइयन प न कोहाइ।”

5तउ मूसा इस्त्राएल क जजन स कहेस, “तू पचन में स हर एक क आपन परिवार समूह में ओन लोगन क हेरिके निकारब अहइ जउन मनइयन क पेऑर क लबार देवता बाँल क आराधना खातिर अगुअइ किहन ह। तब तोहका उ मनइयन क जरुर मारि डवइ चाही।”

6उ समई मूसा अउ सबहिं इस्त्राएल क नेतन मिलापवाला तम्बू क दुआरे प एक संग बटुरा रहेन। एक इस्त्राएली मनई एक मिद्यानी मेहरारु क आपन परिवारे में आपन घरे लिआवा। उ इ हुवाँ कियेस जहाँ ओका मूसा अउ सारे देवता लखि सकत रहेन। मूसा अउ नेतन मिलापवाला तम्बू क समन्वा रोवत रहेन। 7याजक हारून क पोता अउ एलीआज़ार क पूत पीनहास एँका लखेन। एह बरे बइठक क तजि दिहस अउ आपन भाला उठाएस। 8उ इस्त्राएली मनई क पाछे पाछे ओकरे तम्बू में गवा। तब उ इस्त्राएली मनसेधू अउ मिद्यानी मेहरारु क आपन भाला स मारि डाएस। उ तम्बू में आपन भाला क दुइनउँ क बदन स भोंकि के पार कइ दिहस। उ टेमें इस्त्राएल क लोगन में एक बड़की बेरामी सँचरी रही। मुला जब पीनाहास इ दुइनउँ मनइयन क मारि डाएस तउ

बेरामी रुकि गइ। 9५ बेरामी स 24,000 मनई मरि गवा रहेन।

10यहोवा मूसा स कहेस, 11“याजक हारून क पोता अउ एलीआज़ार क पूत फिनहस इस्त्राएल क लोगन क मोरे किरोध स बचाइ लिहस। उ लोगन क बीच में मोर बरे व्यग्रसील रहा। एह बरे मई लोगन क आपन व्यग्रता में नाहीं मारब्या। 12एह बरे फिनहम स कहा कि मई ओकरे संग एक सान्ति क करार करइ चाहत हउँ। 13उ अउ ओकरे पाछे बंसे में जन्मा मोरे संग एक करार करिहीं। उ पचे सदा याजकन रइहीं। काहे की उ आपन परमेस्सर क सम्मान बरे व्यग्रसील रहा उ इस्त्राएल क लोगन क पाप बरे प्रायश्चित कियेस।”

14जउन इस्त्राएली मनई मिद्यानी मेहरारु क संग मारा गवा रहा ओकर नाउँ ज़िम्निरा रहा। उ साल क पूत रहा। उ सिमोन क परिवार समूह क नेता रहा। 15अउर मिद्यानी मेहरारु क मारी गइ रही ओकर नाउँ कोजबी रहा। उ जूर क बिटिया रही। उ अपने परिवार क मुखिया रहा। अउर उ मिद्यानी परिवार समूह क नेता रहा।

16यहोवा मूसा स कहेस, 17“मिद्यानी लोग तोहार दुस्मन अहइँ। तोहका ओनका मारि डवइ चाही। 18उ पचे पहिले ही तोहका आपन दुस्मन बनाइ लिहे अहइँ। उ पचे तोहका ललचाएस अउ तू आपन लबार देवतन क पोर में पूजवाया। उ पचे तोहमाँ स एक मनई क कोजबी क संग वेस्यावृत्ति क अपराध करइ बरे बहकाएस। उ मिद्यानी नेता क बिटिया रही। मुला इहइ मेहरारु तब मारी गइ जब इस्त्राएली लोगन में महामारी फइली। इ महामारी एह बरे सँचर गइ काहेकि लोगन क संग लबार देवता बाल-पेऑर क आराधना करइ बरे छल कीन्ह ग रहा।”

### दूसर जन-गणना

**26** बड़की बेरामी क पाछे, यहोवा मूसा अउ हारून क पूत याजक एलीआज़ार स बात कियेस। 2उ कहेस, “सबहिं इस्त्राएली लोगन क गनती करा। हर एक परिवार क लखा अउ बीस बरिस या ओसे जियादा उमर क हर एक मनसेधू क गना जउन इस्त्राएल क फउज में सेवा करइ जोगग अहइँ।”

3इ टेमें लोग मोआब क मइदानन में सिबिर डाए रहेन। इ जारिको स लइके यरदन नदी क उस पार तलक बसा भवा रहा। एह बरे मूसा अउ याजक एलीआज़ार मनइयन स बात कियेस। उ पचे कहेन, 4“तोहका बीस बरिस या ओसे जियादा उमर क हर एक मनसेधू क गनइ चाही। इहइ उ हुकुम रहा जउन यहोवा मूसा क मानइ बरे दिए रहा।” हिओँ ओन इस्त्राएल क लोगन क सूची बाटइ जउन मिस्त्र स आए रहेन:

5इ सबइ रूबेन परिवार क लोग रहेन। (रूबेन इस्त्राएल क पहिलौटी क पूत रहा) इ सबइ परिवार रहेन:

हनोक - हनोकी परिवार

पल्लू - पल्लियत परिवार

६हेस्त्रोन - हेस्त्रोनी परिवार।

कर्मी - कर्मी परिवार।

7रूबेन क परिवार समूह में उ सबइ परिवार रहेन। जोड़ में सब 43,730 मनसेधु रहेन।

8पल्लू क पूत एलीआब रहा। 9एलीआब क तीन पुत्र रहेन-नमूएल, दातान अउ अबीराम। इ याद राखा कि दातान अउ अबीराम दुइ नेता रहेन जउन मूसा अउ हारून क खिलाफ होइ गएन। उ पचे कोरह क मनवइया रहेन अउ कोरा यहोवा क बिरोधी होइ गवा। 10उहइ टेमें रहा जब धरती फाटि गइ अउ कोरह अउर ओकरे सबहिं मनवइयन क धरती लील लिहस। सब 250 मनसेधु मरि गएन। इ इस्त्राएल क सब मनइयन बरे एक संकेत अउ चिताउनी रही। 11मुला कोरह क परिवार क दूसर लोग नाहीं मरेन।

12सिमोन क परिवार समूह क इ परिवार रहेन।

नमूएल - नमूएल परिवार  
यामीन - यामीन परिवार  
याकीन - याकीन परिवार  
13जेरह - जेराही परिवार  
साऊल - साऊल परिवार।

14सिमोन क परिवार समूहन में उ सबइ परिवार रहेन। एहमें कुल 22,200 मनसेधु रहेन।

15गाद क परिवार दलन में इ सबइ परिवार रहेन:

सपोन - सपोन परिवार  
हाग्गी - हाग्गी परिवार  
सुनी - सुनी परिवार  
16ओजनी - ओजनी परिवार  
एरी - एरी परिवार  
17अरोद - अरोद परिवार  
अरेली - अरेली परिवार

18गाद परिवार समूह क उ सबइ परिवार रहेन। एहमें कुल 40,500 मनसेधु रहेन।

19-20यहूदा परिवार समूह क इ सबइ परिवार रहेन:

सेला - सेलनी परिवार  
पेरेस - पेरेस परिवार  
जेरह - जेरह परिवार यहूदा क दुइ पूत एर अउ ओनान-कनान में मर गए रहेन।

21पेरेस क इ सबइ परिवार रहेन:

हेस्त्रोन - हेस्त्रोनी परिवार  
हामूल - हामूल परिवार

22यहूदा क परिवार समूह क उ सबइ परिवार रहेन। एँके कुल मनसेधुअन क गनती 76,500 रही।

23इस्साकर क परिवार समूह क इ सबइ परिवार रहेन:

तोला - तोला परिवार  
पुव्वा - पुव्वा परिवार  
24यासूब - यासूब परिवार  
सिम्रोन - सिम्रोन परिवार

25इस्साकर परिवार समूह क इ सबइ परिवार रहेन। एहमें कुल मनसेधुअन क गनती 64,300 रही।

26जबूलून क परिवार समूह क इ सबइ परिवार रहेन:

सेरेद - सेरेद परिवार  
एलोन - एलोन परिवार  
यहलेल - यहलेल परिवार

27जबूलून क परिवार समूह क उ सबइ परिवार रहेन। एहमें कुल मनसेधुअन क गनती 60,500 रही।

28यूसुफ क दुइ पूत मनसे अउ एप्रैम रहेन। हर एक पूत आपन परिवार क संग परिवार समूह बन गवा। 29मनसे क परिवार में इ सबइ रहेन:

माकीर - माकीर परिवार। (माकीर गिलाद क बाप रहा।)

गिलाद - गिलाद परिवार

30गिलाद क परिवार क इ सबइ रहेन:

ईएजेर - ईएजेर परिवार  
हेलेक - हेलेकी परिवार

31अस्त्रीएल - अस्त्रीएली परिवार

सेकेम - सेकेमी परिवार

32समीदा - समीदा परिवार

हेपेर - हेपेरी परिवार

33हेपेर क पूत सलोफाद रहा। मुला ओकर कउनो पूत नाहीं रहा। सिरिफ बिटिया रही। ओकरी बिटियन क नाउँ महला, नोआ, होग्ला, मिल्का अउ तिसा रहेन।

34मनसे परिवार समूह क इ सबइ परिवार रहेन। एहमें कुल मनसेधुअन 52,700 रहेन।

35एप्रैम क परिवार समूह क इ सबइ परिवार रहेन:

सूतेलह - सूतेलही परिवार

बेकरे - बेकरी परिवार

तहन - तहनी परिवार

36एरान सुतेलह परिवार क रहा। ओकर परिवार एरनी रहा।

37एप्रैम क परिवार समूह में उ सबइ परिवार रहेन। कुल मनसेधुअन क गनती 32,500 रही। उ पचे अइसे सब लोग रहेन जउन जौसेफ क परिवार समूह क रहेन। 38बिन्यामीन क परिवार समूह क परिवार इ सबइ रहेन:

बेला - बेला परिवार

असबेल - असबेली परिवार

अहीरम - अहीरमी परिवार

39सपूपाम - सपूपाम परिवार

हूपाम - हूपामी परिवार

40बेला क परिवार में इ सबइ रहेन:

अर्द - अर्दा परिवार

नामान - नामानी परिवार

41बिन्यामीन क परिवार समूह क इ सबइ परिवार रहेन। एहमौं मनइयन क कुल गनती 45,600 रही। 42दान क परिवार समूह मँ इ सबइ परिवार रहेन:

सूहाम - सूहामी परिवार समूह।

दान क परिवार समूह स उ परिवार समूह रहा। 43सुहमीत परिवार-दल मँ बहोत स परिवार रहेन। एहमौं मनसेधुअन क गनती 64,400 रही। 44आसेर क परिवार समूह क इ सबइ परिवार रहेन:

यिम्ना - यिम्नी परिवार

यिस्त्र - यस्त्री परिवार बरीआ-बरीआ परिवार।

45बरीआ क इ सबइ परिवार अहईं:

हेबेर - हेबेरी परिवार

मल्कीएल - मल्कीएली परिवार।

46(आसेर क एक बिटिया सेरा नाउँ क रही।) 47आसेर क परिवार समूह मँ उ सबइ परिवार रहेन। एहमौं मनसेधुअन क गनती 53,400 रही।

48नेपाली क परिवार समूह क इ सबइ परिवार रहेन:

यहसेल - यहसेली परिवार

गूनी - गुनी परिवार

49येसेर - येसेरी परिवार

सिल्लेमे - सिल्लेमी परिवार

50नेपाली क परिवार समूह क उ सबइ परिवार रहेन। एहमौं मनसेधुअन क कुल गनती 45,400 रही। 51इ तरह इस्त्राएल क कुल मनसेधुअन क गनती 6,01,730 रही।

52यहोवा मूसा स कहेस, 53“हर एक परिवार क धरती दीन्ह जाइ। इ उहइ प्रदेस अहइ जेकरे बरे मई बचन दिहेउँ ह। हर एक परिवार समूह ओन मनइयन बरे ढेर क धरती पाइ जइहीं जेनका गना गवा। 54बड़कवा परिवार समूह जियादा भुइयौं पाई अउ छोटा परिवार समूह कमती भुइयौं पाई। मुला हर एक परिवार समूह क भुइयौं मिली, जेकरे बरे मई बचन दिहेउँ ह। अउर जउन भुइयौं क उ पचे पइहीं। उ ओनके गनी भइ गनती क बराबर होइ। 55हर एक परिवार समूह क पाँसा डाइ के आधार प तय कइके धरती दीन्ह जाइ। अउर उ पहँटा क उहइ नाउँ होइ जउन उ परिवार समूह क होइ। 56उ पहँटा जेका मई लोगन क देइ क बचन दिहेउँ ह, ओकरे बपोती मँ होइ। इ बड़के अउ छोटके परिवार समूह क दीन्ह जाइ। तय करइ बरे तोहका पाँसा फेंकइ क होइ।”

57लेवी क परिवार समूह भी गना गवा। लेवी क परिवार समूह क इ परिवार अहईं:

गोर्सोन - गोर्सोन परिवार

कहात - कहात परिवार

मरारी - मरारी परिवार

58लेवी क परिवार समूह स इ भी परिवार रहेन:

लिब्नी परिवार

हेब्रानी परिवार

महली परिवार

मुसी परिवार कहात परिवार

अग्राम कहात क परिवार समूह क रहा। 59अग्राम क मेहरारु क नाउँ योकेबेद रहा। उ भी लेवी क परिवार समूह क रही। ओकर जन्म मिस्त्र मँ भवा रहा। अग्राम अउ याकेबेद क पूत हारून अउ मूसा रहेन। ओनकइ एक बिटिया मिरियम भी रही।

60हारून नादाब, अबीहू, एलीआज़ार अउ इतामार क बाप रहा। 61मुला नादाब अउ अबीहू मर गएन। काहे की उ पचे यहोवा क उ आगी स भेंट चढ़ाएन जउन ओनके बरे ओनकइ अधिकार नाहीं रहा।

62लेवी परिवार समूह क सबहिं मनइयन क गनती 23,000 रही। मुला इ सबइ इस्त्राएल क दूसर लोगन क संग नाहीं गना गएन उ धरती नाहीं पाइ सकेन जेका दूसर लोगन क देइ क बचन यहोवा दिहे रहा।

63मूसा अउ याजक एलीआज़ार इ सबहिं मनइयन क गनेन। उ पचे इस्त्राएल क लोगन क मोआब क मइदान मँ गनेन। इ यरीहो स यर्दन नदी क पार रहा। 64बहोत टेमें पहिले मूसा अउ याजक हारून इस्त्राएल क मनइयन क रेगिस्तान, मँ गने रहेन। मुला उ सबइ लोग मरि गवा रहेन। मोआब क मइदान मँ मूसा जउन लोगन क गनेन। उ पचे पहिले गना गए भए मनइयन स अलग रहेन। 65इ एह बरे भवा कि यहोवा इस्त्राएल क लोगन स इ कहे रहा कि उ सबइ रेगिस्तान मँ मरिहीं। ओकर मारइ क पाछे जउन सिरिफ दुइ बचा रहेन उ यपुने क पूत कालेब अउ नून क पूत यहोसू रहेन।

### सलोफाद क बिटियन

27 सलोफाद हेपेर क पूत रहा। हेपेर गिलाद क पूत रहा। गिलाद माकीर क पूत रहा। माकीर मनस्से यूसुफ क पूत रहा। सलोफाद क पाँच बिटियन रहिन। ओनकइ नाउँ महला, नोवा, होगला, मिल्का अउ तिसा रहा। 2इ पाँचउ मेहररुअन मिलापवाला तम्बू मँ गइन अउ मूसा याजक एलीआज़ार, नेता लोग अउ एक संग बटुरे मनइयन ओनका लखेन।

पाँचउ बिटियन कहेन, 3“हमार बाप उ सबइ मरि गएन जब हम पचे रेगिस्तान मँ जात्रा करत रहिन। ओकर मउत ओकर पाप बरे भइ। उ ओन मनइयन मँ नाहीं रहा जउन कोरह क दल मँ मिलि गवा। (कोरह उहइ रहा जउन यहोवा क खिलाफ होइ गवा रहा।) हमरे बाप क कउनो बेटवा नाहीं रहा। 4एकर इ अरथ भवा कि हमरे बाप क नाउँ न चली। इ ठीक नाहीं कि हमरे पिता क नाउँ नाहीं चलइ। ओकर नाउँ मेट जाइ काहे की ओकरे कउनो पूत नाहीं अहइ। एह बरे हम पचे माँग करित ह कि हमका कछू भुइयौं उ भूइँया क अलवा दीन्ह जाइ जेका हमरे पिता क भाई लोग उत्तराधिकार क रूप मँ पइहीं।”

5एह बरे मूसा यहोवा स पूछेस कि उ का करइ। 6यहोवा ओसे कहेस, 7“सलोफाद क बिटियन फुरे कहत हीं। तोहका ओनके चाचा क संग संग ओनका भी धरती क हींसा देइ चाही, जउन तू ओनके बाप क देत्या।

8“एह बरे इस्राएल क मनइयन बरे ऐंका कनून बनइ द्या। ‘जदि कउनो मनई क पूत न होइ अउर उ मरि जात ह तउ हर एक चीज ओकर बाटइ ओकरे बिटिया क होइ। 9जदि ओका कउनो बिटिया न होइ तउ जउन कछू भी होइ ओकरे भइयन क दीन्ह जाइ। 10जदि ओकर कउनो भाई न होइ तउ जउन कछू ओकर होइ ओकरे पिता क भाइयन क दीन्ह जाइ। 11अगर ओकरे बाप क कउनो भाई न होइ तउ जउन कछू ओकर होइ ओकरे परिवार क सबन न निचेक क नातेदाद क दीन्ह जाइ। इस्राएल क लोगन में इ कनून होइ चाही। यहोवा मूसा क इ हुकुम देत ह।”

### यहोसू नवा नेता अहइ

12तब यहोवा मूसा स कहेस, “उ पहाड़न क कतारन में एक क ऊपर चढ़ा जउन यरदन नदी क पूरब रेगिस्ताने में बा। तु उ धरती क निहरब्या जेका मई इस्राएल क मनइयन क देत अही। 13जब तू इ पहुँटा क लखि लेब्या तब तू आपन भाई हारून क तरह मरि जाब्या। 14उ बात क सुमिरा जब लोग सीन क रेगिस्तान में पानी बरे कोहान रहेन। तू अउ हारून दुइनउँ मोर हुकुमबदूली किहा ह। तू पचे मोर मान नाहीं किहा अउ मनइयन क अगवा पक्वितर नाहीं बनाया रहा।” (इ पानी जिन क रेगिस्तान में कादेस क भीतर मरीबा में रहा।)

15मूसा यहोवा स कहेस, 16“यहोवा परमेस्सर अहइ। उहइ जानत ह कि लोग का सोचत अहइँ। यहोवा मोर बिनती अहइ कि तू इ मनइयन बरे एक नेता चुना। 17मई बिनती करत हउँ कि यहोवा एक अइसा नेता चुनी जउन ओनका इ प्रदेस स बाहेर लइ जाइ अउर ओनका नवा पहुँटा में पहुँचाई। तब यहोवा क लोग बे गइरिया क भेड़ी क नाई न होइहीं।”

18एह बरे यहोवा मूसा स कहेस, “नून क पूत यहोसू नेता होइ। यहोसू बहोत बुद्धिमान अहइ। ओवा नवा नेता बनावा। 19ओसे याजक एलीआज़ार अउ पूरा धार्मिक मण्डली क समन्वा खड़ा होइ क कहा। तब ओका सबहिँ लोगन क समन्वा नवा नेता बनावा।

20“मनइयन क इ देखौंवा कि तू ओका नेता बनावत अहा, तब सबहिँ ओकर हुकुम मनिहीं। 21जदि यहोसू कउनो खास निर्णम लेइ चाही तउ ओका याजक एलीआज़ार क लगे जाइ क होइ। एलीआज़ार उरिम क प्रयोग यहोवा क जवाब जानइ बरे करी। तब यहोसू अउ इस्राएल क सब लोग उ करिहीं जउन परमेस्सर कइहीं। जदि परमेस्सर कहत ह ‘बाहर जा।’ तब उ पचे ओनका बाहर लइ जाइ, अउर अगर उ कहत ह, ‘घरे प अराम करा।’ तउ उ पचे घर में आराम करिहीं।”

22मूसा यहोवा क आग्या मानेस। मूसा यहोसू याजक एलीआज़ार अउ इस्राएल क सब लोगन क समन्वा खड़ा होइके कहेस। 23तब मूसा आपन हाथे क ओकरे मूँडे प

देखौंवाइ बरे धरेस कि उ नवा नेता अहइ। उ वइसे ही किहेस जइसा यहोवा कहे रहा।

### रोज क भेंट

28 तब यहोवा मूसा स बात किहेस। उ कहेस, 2“इस्राएल क मनइयन क इ हुकुम द्या। ओनसे कहा कि उ पचे मोर बलिदानन अउर अन्नबलि क भोजन जेकर सुगन्ध मोका प्रसन्न करत हीं क भेंट बारी गइ भेंट दुआरा चढ़ावई। इ निहचित करा कि ओका उचित समइ में भेंट करइ चाही। 3इ होमबलि क ओनका यहोवा बरे चढ़ावइ चाही। ओनका दोख क बिना एक बरिस का दुइ तु मेमना रोज भेंट क रूप में चढ़ावइ चाही। 4मेमनन में स एक क भिन्सारे चढ़ावा अउ दूसर मेमना क सर्यास्त क टेमें। 5ऐंकरे अलावा एपा क दसवाँ हींसा अन्नबलि हीन क चौथाई जइतून क तेल क संग मिला भवा आटा क द्या।” 6इ रोज क होम बलि अहइ जउन सीनै पहाड़ प प्रथम दाई सरू किहे गवा रहेन। इ बारी गइ भेंट रही जउन यहोवा बरे सुहावना सुगन्ध अहइ। 7मनइयन क बारी गइ भेंट क संग पयेबलि करइ चाही। ओनका हर एक भेड़ क संग हीन क एक चौथाई दाखरस देइ चाही। उ पयेबलि क पक्वितर ठउरे में वेदी प डवा। इ यहोवा क भेंट अहइ। 8दूसरे भेड़ क भेंट गोधूरि क टेमें चढ़ावा। ऐंका भिन्सारे क भेंट क तरह चढ़ावा। अन्नबलि अउ दाखरस क एक ही तरीका स भेंट करिहीं। इ बारी गइ भेंट रही जउन यहोवा बरे सुहावना सुगन्ध अहइ।”

### सबित भेंट

9“सबित क दिन एक बरिस क बेदोखे क दुइ मेमना जइतून क तेल क संग मिला एपा क दुइ दसवाँ हींसा बढ़िया आटा क अन्नबलि अउ पयेबलि अउ दाखरस भी चढ़ावा। 10इ हरेक सबित क दिन क खास भेंट अहइ। इ भेंट रोजाना राजे क भेंट अउ दाखरस क भेंट क अलावा अहइ।”

### नवा चन्द्रिमा क भेंट

11“हर एक महीना क पहिले दिन तू यहोवा क होमबलि चढ़उब्या। इ भेंट बेदोखे क दुइ बर्धा, एक भेड़ अउ एक बरिस क सात मेमना होइ। 12हर एक बर्धा क संग जइतून क तेल क संग जेहमा एपा क तीन दसवाँ हींसा बढ़िया आटा क भेंट भी चढ़ावा। हर एक भेड़ क संग जइतून क तेल क संग मिला एपा क दुइ दसवाँ हींसा बढ़िया आटा क भेंट भी चढ़ावा। 13हर एक भेड़ क बच्चा क संग जइतून क तेल क संग मिला भवा एपा क दसवाँ हींसा बढ़िया आटा क भेंट भी चढ़ावा। इ होमबलि अहइ जे आगी में तइयार भवा अहइ इ यहोवा बरे सुहावना सुगन्ध अहइ। 14पयेबलि में आधा हीन दाखरस हर एक बर्धा क संग, तिहाई हीन दाखरस हर एक भेड़ क संग अउ चौथाई हीन दाखरस हर एक मेमना क संग होइ चाही। इ होमबलि अहइ जउन बरिस क हर एक महीना चढ़ावइ जाइ चाही। 15हेमेसा रोजाना क होमबलि अउ पयेबलि क अलावा तोहका यहोवा क एक बोकरा देइ चाही। उ बोकरा पापबलि होइ।

**फसह त्यौहार**

16“पहले महीना नीसान क चउदहवौं दिन यहोवा क सम्मान में फसह पर्व होइ। 17उ महीना क पन्द्रहवौं दिन बे खमीरे क रोटी क दवत सुरु होत ह। इ पवित्र जलसा सात दिनों तलक रहत ह। तू सिरिफ उहइ रोटी खाइ जउन बे खमीरे क होइ। 18इ पवित्र जलसा क पहिले दिन तोहका खास बइठक बोलावइ चाही। उ दिन तोहका कउनो काम नाहीं करइ चाही। 19तू यहोवा क होमबलि देब्या। इ होमबलि दोख क बिना दुइ बर्धा, एक ठु भेड़ा अउ एक बरिस क सात ठु मेमना होइ। 20-21हर एक बर्धा क साथ जइतून क तेल क साथ साना भवा एपा क तीन दसवौं हींसा बढ़िया आटा, भेड़ा क संग जइतून क तेल क संग साना भवा एपा क दुइ दसवौं हींसा बढ़िया आटा अउर हर एक मेमना क संग एपा क दसवौं हींसा जइतून क तेल क संग साना भवा बढ़िया आटा क अन्नबलि भी होइ। 22तोहका एक बोकरा भी देइ चाही। उ बोकरा तोहरे बरे पापबलि होइ। इ तोहरे पाप क ढोंपि देइ। 23तू पचन क ओन भेंटन क अलावा देइ चाही जउन तू हर एक भिन्सारे होमबलि क रूप में देत रहत ह।

24“उहइ तरह तोहका सात दिनों तलक बलि भेंट देइ चाही। इ आगी क दुआरा होमबलि क रूप में अन्न भेंटन होइ। इ यहोवा बरे सुहावना सुगन्ध अहइ। तू नेमें स होमबलि अउ एकर दाखरस भेंट चढ़उब्या। एकरे अलावा तू भोजन चढ़उब्या। होमबलि क अलावा इ भेंट क तोहका देइ चाही जउन तू रोज देत ह।

25“तब फसह क सतएँ दिन तू एक पवित्र सभा बुलाउब्या, अउर उ दिन तू कउनो काम नाहीं करब्या।

**हप्ता क त्यौहार (पिन्तेकुरस्त)**

26“पहिले फल क उत्सव क अवसर पइ तोहका यहोवा क एक नवा अनाज क भेंट जरूर देइ चाहीं। उ टेमें प तोहका एक खास बइठक बोलावइ चाही। तू उ दिन कउनो काम नाहीं करब्या। 27तू पचे होमबलि चढ़उब्या। उ बलि यहोवा बरे सुहावनी सुगन्ध होइ। तू सबइ बे दोखे क दुइ साँड़, एक-एक बरिस क भेड़ा अउ सात मेमना क भेंट चढ़उब्या। 28तू हर एक साँड़ क संग जइतून क तेल क संग साना भवा एपा क तीन दसवौं हींसा बढ़िया आटा, हर एक भेड़ा क संग एपा क दुइ दसवौं हींसा 29अउ हर एक मेमना क संग एपा क दसवौं हींसा आटा क भेंट चढ़उब्या। 30तोहका आपन पापे क ढोंपइ बरे एक ठु बोकरा क बलि चढ़ावइ चाही। 31तोहका इ भेंट रोजाना क दग्ध-भेंट अउ एकर अन्नबलि क अलावा चढ़ावइ चाही। ठान ल्या कि गोरुअन में कउनो दोख नाहीं हो। अउर इ निहचय करि ल्या कि पयेबलि ठीक बाटइ।

**तुरहियन क त्यौहार**

29 “सातवौं महीना क पहिले दिन एक खास बइठक होइ। तू सबइ उ दिन कउनो काम नाहीं करब्या। उ तुरही बजावइ क दिन अहइ। 2तू पचे होमबलि चढ़उब्या। इ भेंटन यहोवा बरे सुहावनी सुगन्ध होइ। तू बेदोखे क एक साँड़ एक भेड़ा अउ एक-एक बरिस क सात मेमना चढ़उब्या।

3तू पचे एपा क तीन दसवौं हींसा तेल स सना भवा नीक आटा हरेक बर्धा क संग, अउ एपा क दुइ दसवौं हींसा भेड़ा क संग चढ़ाउब्या। 4सात मेमना में स हरेक क संग एपा क दसवौं हींसा आटा क भेंट चढ़उब्या। 5एकरे अलावा पापबलि बरे एक बोकरा भी चढ़उब्या। इ तोहरे पापे क ढोंपी। 6इ भेंटन नवा चन्द्रिमा भेंट अउ ओकरे अन्नबलि क अलावा होइ। अउर इ रोज क भेंट, एकर अन्नबलि अउ पयेबलि क अलावा होइहीं। इ नेम क मुताबिक कीन्ह जाइ चाही। एनका आगी बारइ चाही। इ यहोवा क बरे सुहावनी सुगन्ध होइ।

**प्रायश्चित क दिन**

7“सतएँ महीना क दसवौं दिन एक खास बइठक होइ। उ दिन तू उपवास रखब्या अउर तू कउनो काम नाहीं करब्या। 8तू होमबलि भेंट करब्या। इ यहोवा बरे सुहावनी गन्ध होइ। तू बे दोखे क एक ठू साँड़ एक ठु भेड़ा अउ एक बरिस क सात मेमना भेंट चढ़उब्या। 9हर एक बर्धा क संग जइतून क तेल स साना भवा एपा क तीन दसवौं हींसा आटा, भेड़न क संग एपा क दुइ दसवौं हींसा आटा। 10अउ हर एक सातहु मेमना क संग एपा क दसवौं हींसा आटा क भेंट चढ़उब्या। 11तू एक बोकरा भी पापबलि क अलावा भेंट करब्या। इ पाप बरे प्रायश्चित क अतिरिक्त होइ। इ रोजाना क बलि, अन्नबलि अउ पयेबलि क अलावा भी होइ।

**कुटीर क त्यौहार**

12“सतएँ महीना क पन्द्रहवौं दिन एक खास बइठक होइ। इ कुटीर क त्यौहार होइ। तू उ दिना कउनो काम नाहीं करब्या। तू यहोवा बरे खास छुट्टी सात दिना तलक मनउब्या। 13तू होमबलि चढ़उब्या। इ यहोवा बरे सुहावनी सुगन्ध होइ। तू तेरह बर्धा, दुइ भेड़ा अउ एक बरिस क चउदह मेमना चढ़उब्या। 14तू तेरह बर्धा में स हर एक बरे जइतून क तेल क संग साना भवा एपा क तीन दसवौं हींसा आटा, दुइनउँ भेड़न में स हर एक बरे एपा क दुइ दसवौं हींसा 15अउ चउदह भेड़न में स हर एक बरे एपा क दसवौं हींसा आटा क भेंट चढ़उब्या। 16तोहका एक ठु बोकरा भी पाप भेंट क रूप में अर्पित करइ चाही। इ रोजाना क भेंट अउ एकर अनाज अउ दाखरस भेंट क अलावा होइ।

17“इ पवित्र दिन क दूसरे दिन तोहका बारह बर्धा, दुइ भेड़ा अउ चउदह एँक बरिस क मेमना चढ़ावइ चाही। इ सबइ बिना दोख क होइ चाही। 18तोहका साँड़, भेड़ा अउ मेमना क संग गनती क मुताबिक तउले में अन्नबलि अउ पयेबलि भी चढ़ावइ चाही। 19तोहका पापबलि क रूप में एक ठु बोकरा क भी भेंट चढ़ावइ चाही। इ रोजाना क भेंट अउ अन्न अउ पयेबलि क अलावा भेंट होइ।

20“इ पवित्र दिन क तीसर दिन तोहका बे दोखे क गियारह साँड़, दुइ भेड़ा अउ एक एक बरिस क मेमना क भेंट चढ़ावइ चाही। 21तोहका बर्धा, भेड़ा अउ मेमना क ठीक गनती क मुताबिक अन्न अउ पयेबलि चढ़ावइ चाही। 22तोहका पापबलि क रूप में एक बोकरा क भी देइ चाही। इ रोजाना क भेंट अउ अन्नबलि अउ पयेबलि क अलावा भेंट होइ।

23“इ पवित्र दिन क चउथा दिन तोहका बे दोखि क दस साँड़, दुइ भेड़ा अउ एक-एक बरिस क चउदह मेमना भेंट चढ़ावइ चाही। इ सबइ बेदोख होइ चाही। 24तोहका बर्धा, भेड़ा अउ मेमना क ठीक सख्योँ क मुताबिक अन्न अउ पयेबलि चढ़ावइ चाही। 25तोहका पापबलि क रूप में एक बोकरा क भी चढ़ावइ चाही। इ रोजाना क भेंट अउ अन्नबलि अउ पेयबलि क अलावा होइ चाही।

26“इ पवित्र दिन क पँचए दिन तोहका बेदोख क नौ साँड़, दुइ भेड़ा अउ एक-एक बरिस क चउदह मेमना भेंट चढ़ावइ चाही। इ सबइ बेदोख होइ चाही। 27तोहका बर्धा, भेड़ा अउ मेमना क ठीक सख्योँ क मुताबिक अन्न अउ पयेबलि चढ़ावइ चाही। 28तोहका पापबलि क रूप में एक बोकरा क भी भेंट चढ़ावइ चाही। इ रोजाना क भेंट अउ अन्नबलि अउ पेयबलि क अलावा होइ चाही।

29“इ पवित्र दिन क छठएँ दिन तोहका बे दोखे क चउदह साँड़, दुइ भेड़ा अउ एक-एक बरिस क चउदह मेमना क भेंट चढ़ावइ चाही। 30तोहका बर्धा, भेड़ा अउ मेमना क संग जेतैना होइ चाही उ मात्रा में अन्न अउ पयेबलि चढ़ावइ चाही। 31तोहका पापबलि क रूप में एक बोकराँ क भी भेंट देइ चाही। इ रोजाना क भेंट अउ अन्नबलि अउ पयेबलि क अलावा भेंट होइ।

32“इ पवित्र दिन क सतएँ दिन तोहका बेदोख क सात साँड़, दुइ भेड़ा, अउ एक एक बरिस क चउदह मेमना क भेंट चढ़ावइ चाही। 33तोहका बर्धा, भेड़ा अउ मेमना क संग गनी भइ गन्ती में अन्न अउ पयेबलि चढ़ावइ चाही। 34तोहका पापबलि क रूप में एक बोकरा क भी भेंट देइ चाही। इ रोजाना क भेंट अउ अन्नबलि तथा पयेबलि क अलावा भेंट होइ।

35“इ पवित्र दिन क अठवाँ दिन तोहका एक समापन बइठक करइ चाहीं। तोहका उ दिन कउनो काम नाहीं करइ चाही। 36तू होमबलि अउ आगी क भेंट चढ़ावा। इ यहोवा बरे सुहावनी सुगंध होइ। तोहका बेदोखे क एक साँड़, एक भेड़ा अउ एक एक बरिस क सात मेमना भेंट में चढ़ावइ चाही। 37तोहका साँड़, भेड़ा अउ भेड़ी क बच्चा बरे गनी भइ मात्रा में अन्न अउ पयेबलि देइ चाही। 38तोहका पापबलि क रूप में एक बोकरा क भी भेंट देइ चाही। इ रोजाना क भेंट अउ अन्नबलि अउ पयेबलि क अलावा भेंट होइ चाही।

39“उ सबइ तोहार खास दिन यहोवा क सम्मान बरे अहइ। तोहकाएपा क दसवाँ हीसाओन बचन भेंट, आपन स्वेच्छा भेंट, होमबलि, अन्नबलि, पयेबलि अउ मेलबलि क अलावा इ पतिर दिनन म मानइ चाहीं।”

40मूसा इस्त्राएल क लोगन स ओन सबहिं बातन क कहेस जउन यहोवा ओका हुकुम दिहे रहा।

### दीन्ह गवा खास बचन

**30** मूसा सबहिं इस्त्राएली परिवार समूहन क नेता लोगन स बात किहेस। मूसा यहोवा क इ आदेस क बारे में ओनसे कहेस।

2“अगर कउनो मनई परमेस्सर क खास बचन देइ चाहत ह या जदि उ मनई परमेस्सर क कछू खास न्यौछावर करइ क बचन देत ह तउ ओका वइसे ही करइ द्या। मुला ओन मनई क ठीक वइसेन ही करइ चाही जइसा उ बचन दिहे अहइ।

3“होइ सकत ही कि कउनो जवान मेहरारु आपन पिता क घर रहत होइ जउन जवान अहइ। अउर उ मेहरारु यहोवा क कछू चढ़ावइ क बचन देत होइ। 4अउर ओकर बाप इ बचन क बारे में सुनत ह अउर ओकर बरे (बचन क रद्द करइ बरे) कछू नाहीं कहत ह तउ उ जवान मेहरारु क बचन तउ जरुर पूरा कइ देइ चाही जेका करइ क उ बचन दिहे अहइ। 5मुला अगर ओकर बाप ओकर दीन्ह गवा बचन क बारे में सुनिके ओका पूरा करइ स मना करत ह तउ उ मेहरारु क उ बचन पूरा नाहीं करइ चाही जेका उ बचन लिहेस ह। काहेकि ओकर बाप ओका रोकेस। एह बरे यहोवा ओका छिमा करिहीं।

6“होइ सकत ह कि कउनो मेहरारु बात ही बातन में बे सोचे बिचारे कउनो किरिया खाइ लेत ह अउ पाछे ओकर बियाह होइ जात ह। 7अउर भतार दीन्ह गवा बचन क बारे में सुनत ह अउ अउर ओकर (बचन क रद्द करइ) बरे कछू नाहीं कहत ह। तउ उ मेहरारु क आपन दीन्ह गवा बचन क मुताबिक काम क पूरा कइ लेइ चाही। 8मुला जदि भतार दीन्ह गवा बचन क बारे में सुनत ह अउ ओका अंगीकार नाहीं करत ह तउ मेहरारु क दीन्ह गवा बचन क पूरा नाहीं करइ क पड़ी। ओकर भतार ओकर बचन रोकि दिहन-उ ओका कही गइ बात क पूरा नाहीं करइ दिहस। एह बरे यहोवा ओका छिमा करिहीं।

9“कउनो रँड़ या तलाक दीन्ह गइ मेहरारु खास बचन दइ सकत ह। अगर उ अइसा करत ह तउ ओका आपन ठीक बचन क मुताबिक करइ चाही। 10एक बियाही मेहरारु यहोवा क कछू चढ़ावइ क बचन, या कछू स अपने आप क बचाइ क बचन दइ सकत ह। 11अदि ओकर भतार दीन्ह गए बचन क बारे में सुनत ह अउ ओका आपन बचन क पूरा करइ देत ह तउ ओका ठीक आपन दीन्ह गए बचन क मुताबिक ही उ काम करइ चाही। 12मुला अगर ओकर भतार ओकर दीन्ह गए बचन क सुनत ह अउर ओका बचन पूरा करइ स मना कइ देत ह तउ ओका आपन दीन्ह गए बचन क मुताबिक उ काम पूरा नाहीं करइ क होइ। एँकर कउनो महत्व न होइ काहे की उ का बचन दिहे रहा, ओकर भतार उ बचन क भगं कइ सकत ह। अगर ओकर भतार उ बचन क तोड़ देत ह तउ यहोवा ओका छिमा करिहीं।

13“एक बियाही मेहरारु यहोवा या परमेस्सर क कउनो खास बचन दइ सकत ह। भतार ओकरे बचन में स कउनो क रोक सकत ह या भतार उ बचन में स कउनो क पूरा करइ देइ सकत ह। 14भतार आपन मेहरारु क कइसे बचन पूरा करइ देइ? अगर उ दीन्ह ग बचन क बारे में सुनत ह अउ ओनका रोकत नाहीं तउ मेहरारु क आपन दीन्ह ग बचन क मुताबिक काम क पूरा करइ चाही। 15अगर भतार दीन्ह ग बचन क बारे में सुनत ह अउ ओकर पाछे ओका

बचन पूरा करइ स रोकत ह तउ ओकर बचन तोड़इ क जिम्मेदारी भतार प होइ।”

16इ सबइ हुकुम अहइ जेनका परमेस्सर मूसा क दिहेस। इ सब आदेस एक मनई अउ ओकरे मेहरारू क बारे में अहई अउ बाप अउ ओकरे बिटिया क बारे में अहइ जउन उ जवान मेहरारू रहइ अउ अपने बाप क घरे में रहत होइ।

### इस्त्राएल मिदियन क खिलाफ फुन हमला किहेस

**31** यहोवा मूसा स बात किहेस। उ कहेस, “मई इस्त्राएल क लोगन क संग मिद्यानी लोग जउन किहे बाटई, ओकरे बरे मई सजा देब। ओकरे पाछे मूसा तू मरि जाब्या।”

3इ बरे मूसा मनइयन स बात किहेस। उ कहेस, “आपन कछू मनइयन क जुद्ध बरे तइयार करा। यहोवा ओन मनइयन क प्रयोग मिदियानी लोगन क सजा देइ में करिहीं। 4अइसे 1,000 मनइयन क इस्त्राएल क परिवार समूहन स चुना। 5इस्त्राएल क सबहि परिवार समूहन स 12,000 सिपाही होइहीं।”

6मूसा ओन 12,000 मनइयन क जुद्ध बरे पठाएस। उ याजक एलीआज़ार क पूत पनीहास क ओनके संग पठाएस। पनीहास आपन संग पवित्तर चीजन, सींग अउ तुरहियन लइ लिहेस। 7इस्त्राएल क लोग मिदियानी लोगन क नरसिंग वइसेन ही लड़ेन जइसा यहोवा मूसा क हुकुम दिहे रहा। उ पचे सबहि मिद्यानी मनइयन क मारि डापन। 8जउन मनइयन क उ पचे मारि डापन ओहमों एवी, रकैम, सूर, हूर अउ रेबा इ सबइ पाँच मिद्यानी राजा रहेन। उ पचे बेओर क पूत बिलाम क भी तरवारे स मारि डापन।

9इस्त्राएल क लोग मिद्यानी मेहररुअन अउ गदेलन, ओनकइ सब भेड़ी, गइयन अउ सब चीजन क बन्दी बनाइ लिहन। 10तब उ पचे ओनके सब डेरन में अउ सहरन में आगी लगाइ दिहन जहाँ उ पचे रहत रहेन। 11उ पचे सब मनइयन अउ गोरुअन क लइ लिहन, 12अउर ओनका मूसा, याजक एलीआज़ार अउ इस्त्राएल क सब लोगन क लगे लइ गएन। उ पचे ओन सबहि इस्त्राएल क सिबिर में लाएन जेनका उ पचे हुवों पाइ लिहन। इस्त्राएल क लोग मोआब क समतल में बसा यरदन घाटी में सिबिर डाप रहेन। इ यरीहो क निचके यरदन नदी क पूरब कईती रहा। 13तब मूसा, याजक एलीआज़ार अउ मनइयन क नेता, सिपाहियन स मिलइ बरे डेरन स बाहेर गएन।

14मूसा सेनापति लोगन प बहोत कोहान रहा। उ ओन 1,000 क फउज क संचालक लोगन अउ एक सौ क फउज क संचालक लोगन प कोहान रहा जउन जुद्ध स लौटिके आए रहेन। 15मूसा ओनसे कहेस, “तू आदमी लोग मेहररुअन क काहे जिअत रहइ दिहा? 16लखा इ अउरत ही रही जेकरे वजह स बिलाम क घरना में इस्त्राएलियन बरे समस्या पइदा भइन अउ पेओर में यहोवा क खिलाफ होइ गएन जेहसे इस्त्राएल क मनइयन क महामारी भोगइ क पड़ी। 17तउ अब मिद्यानी नर गदेलन क मारि डवा। अउर ओन सबहि मिद्यानी मेहररुअन क मारि डवा जउन कउनो मनई क संग रही होई। ओन सब मेहररुअन क मारि डवा

जेकर कउनो मनई क संग सारीरिक सम्बंध होइ। 18तू सिरिफ ओन सबहि बिटियन क जिअइ द्या जेकर कउनो मनई क संग सारीरिक सम्बंध नहीं भइ। 19तब एकर बाद तू सबइ सिपाहियन क जउन लोगन क मारेस या लहास क छुएस सात दिना तलक सिबिर क बाहर रहइ क पड़ी। तीसरे अउ सताएँ दिनन तू अउर तोहार बन्दी सुद्ध होब्या। 20तोहका उहइ काम सातवें दिन फिर करइ क होइ। तोहका आपन सबहि ओढ़ना धोवइ चाही। तोहका चाम क बनी हर चीज ऊनी अउ काठे क बनी चीजन क भी धोवइ चाही। तोहका सुद्ध होइ जाइ चाही।”

21तब याजक एलीआज़ार सिपाहियन स कहेस कउन जुद्ध क लउटेस ह। उ कहेस, “इ उहइ नेम बाटेन जेका यहोवा मूसा क दिहे रहा। 22-23मुला जउन चीजन आगी में डइ जाइ सकत हीं ओकरे बारे में अलग अलग नेमें अहई। तोहका सोना, चाँदी, काँसा, लोहा, टिन या सीसा क आगी में डवइ चाही। जब तू ओनका सुद्धीकरण बरे लाल गाय क राख मिला भवा पानी स धोवा उ सबइ सुद्ध होइ जइहीं। जदि चीजन आगी में न नाई जाइ सकई तउ तोहका ओनका पानी स धोवइ चाही। 24सतएँ दिन तोहका आपन सारा ओढ़ना धोवइ चाही। जब तू सुद्ध होइ जाब्या। ओकरे बाद तू पचे सिबिर में आइ सकत ह।”

25तब यहोवा मूसा स कहेस, 26“मूसा तोहका याजक एलीआज़ार अउ सबहि नेता लोगन क चाही कि तू पचे ओन बन्दियन, गोरुअन अउ सबहि चीजन क गना जेनका फउजी लोग जुद्ध स लाए होई। 27तब ओन सबहि विजियन क जुद्ध में भाग लेइ वालन आधा फउजी लोगन अउ बाकी आधा इस्त्राएल क मनइयन में बाँटे देइ चाही। 28जउन सिपाही जुद्ध में भाग लेइ ग रहेन ओनसे ओन चीजन क कर ल्या। उ हींसा यहोवा क होइ। हर एक पाँच सौ चीजन में स एक यहोवा क हींसा होइ। एहमों मनई, गाय, गदहन अउ भेड़ी सामिल अहई। 29जउन फउजी जुद्ध में जउन चीजन क पाएन ह, ओनका आधी हींसा कर क रूप में ल्या। तब ओन चीजन क (प्रति एक पाँच सौ में स एक) याजक एलीआज़ार क द्या। तब हींसा यहोवा क होइ। 30अउर तब बाकी लोगन क आधा में स हर एक पचास चीजन में स एक चीज ल्या। एहमों मनई, गाय, गदहन, भेड़ी या दूसर जनावर सामिल बाटेन। इ हींसा लेवी बंसी मनइयन क द्या। काहे? काहेकी लेवी बंसी यहोवा क पवित्तर तम्बू क देखत रेखत हीं।”

31इ तरह मूसा अउ एलीआज़ार उहइ किहन जउन मूसा क यहोवा क हुकुम रहा। 32फउजी सिपाही 6,75,000 भेड़िन, 33बहतर हजार गोरु, 34इक्सठ हजार गदहन, 35बतीस हजार मेहररुअन छूटे रहेन। इ सबइ अइसी मेहररुअन रहिन जेनकइ कउनो मनई क संग सारीरिक सम्बंध नहीं रहा। 36जउन सिपाही जुद्ध में गए रहेन उ सबइ आपन हींसा क 3,37,500 भेड़िन क पाइ लिहन। 37फउजियन स लीन्ह ग यहोवा क कर 675 भेड़ रहा। 38फउजियन क 36,000 गाइयन मिलि गएन। उ पचे बहतर यहोवा क दिहेन। 39फउजी 30,500 गदहा पाइ गएन। उ पचे यहोवा क इक्सठ दिहेन। 40फउजियन क 16,000

मेहरारू मिलिन। उ सबइ यहोवा क बतीस दिहेन। 41यहोवा क हुकुम क मुताबिक मूसा यहोवा बरे दीन्ह गइ ओन सारी भेंटन क याजक एलीआज़ार क दिहस।

42तब मूसा मनइयन स मिला भवा आधा हींसा क गनेस। इ उ हींसा रहा जेका मूसा जुद्ध में जाइवालन फउजियन स लिहे रहा। 43मनइयन 3,37,500 भेड़ी, 44छत्तीस हजार गाइयन, 45तीस हजार पाँच सौ गदहा 46अउ 16,000 मेहरारू पाएन। 47मूसा हर एक पचास चीजन प एक चीज यहोवा बरे लिहस। एहमा गोरु अउ मनई दुइनऊ सामिल रहेन। तब ओन चीजन क उ लेवी बंसी लोगन क दिहस। काहेकि उ यहोवा क पवित्र तम्बू क देखत रेखत रहेन। मूसा इ यहोवा क हुकुम क मुताबिक किहस।

48तब सेना क संचालक 1,000 सिपाहियन क सेनापति अउ एक सौ सिपाहियन क सेनापति मूसा क निअरे गएन। 49उ पचे मूसा स कहेन, “हम पचे आपन फउजियन क गना ह। हम पचन में स कउनो भी कम नहीं अहइ। 50एह बरे हम लोग हर एक तु सिपाही स यहोवा क भेंट लइ आवत अही। हम पचे सोना क चीज बाजूबन्द, कड़ा, मुँदरी, बाली अउ हबेल लइ आवत अही। इ सब भेंट यहोवा क समन्वा हमार पाप बरे प्रायश्चित्त बरे होइ।”

51एह बरे मूसा उ सबइ सोना क चीज लिहस अउ याजक एलीआज़ार क ओन चीजनक दिहस। 52एक हजार फउजियन क सेनापतियन अउ एक सौ मनइ क सेनापतियन जउन सोना बटोरन ओकर वजन 16,750 सेकेल रहा। 53हर एक फउजी लड़ाई में मिली भइ बाकी चीजन क हींसा अपने लगे रख लिहस। 54मूसा अउ याजक एलीआज़ार एक हजार फउजियन क सेनापतियन अउर एक सौ मनइयन क सेनापतियन स सोना अंगीकार किहस। तब उ पचे सोना क मिलापवाला तम्बू में धरेस। इ भेंट एक यादगार क रूप में इस्त्राएल क लोगन बरे यहोवा क समन्वा रहिन।

### यरदन नदी क पूब क परिवार समूहन

32 रूबेन अउ गाद परिवार समूहन क लगे ढेर तदाद में मवेशियन रहेन। ओर्ने मनइयन याजेर अउ गिलाद क निचके क धरती लखेन। उ पचे बिचारेन कि उ धरती ओनके गोरु बरे ठीक अहइ। 2एह बरे रूबेन अउ गाद परिवार समूहन क लोग मूसा क निअरे आएन। उ पचे मूसा, याजक एलीआज़ार अउ मनइयन क नेता लोगन स बात किहेन। 3-4उ पचे कहेन, “आपक सेवक हम सबन क लगे भारी तदाद में गोरु अहइँ। अउर उ भुइयों जेका परमेस्सर हम लोगन क जीतइ अउर कब्जा करइ क दिहस, गोरुअन बरे एक ठू बाढ़ियों चरागाह अहइ। इ पहुँटा में अतारोत, दीबोन, याजेर, हेसबोन, एलाले सबाम, नबो, बोन सामिल अहइँ। 5अगर आप लोगन क रजामन्दी होइ तउ हम पचे चाहब कि इ पहुँटा हम पचन क दीन्ह जाइ। हम लोगन क यरदन नदी क दूसर कईती न लइ जाइँ।”

6मूसा रूबेन अउ गाद क परिवार समूहन स पूछेस, “का तू पचे हिओँ बसब्या अउ आपन भाइयन क हिओँ स जाइ अउ जुद्ध करइ देब्या? 7तू पचे इस्त्राएल क लोगन क

उत्साह काहे भंग करइ चाहत बाट्या? होइ सकत ह उ पचे यरदन नदी क पार जउन पहुँटा यहोवा ओनका दिसह ह नहीं लेइ चाहीं। 8तोहार बाप अउ दादा मोरे संग अइसा ही किहन। जब मई कादेसबर्ने स जासूसन क प्रदेस क छान-बीन करइ पठाएँ रहेउँ। 9उ पचे एँस्कोल घाटी तलक गएन। उ सबइ प्रदेस क लखेन। अउर उ सबइ इस्त्राएल क लोगन क उ धरती प जाइ क उत्साह भंग कइ दिहस। उ पचे इस्त्राएल क लोगन क उ पहुँटा में जाइ क इच्छा नहीं करइ दिहन जेहसे यहोवा ओनका दइ दिहे रहा। 10यहोवा मनइयन प बहोतइ कोहान। यहोवा इ कठोर निसेध अग्या क बनाएस: 11‘मिस्र स आवइ वालन लोगन अउ बीस बरिस या जियादा उमर क कउनो भी मनई क उ भूँइया क जेकरे बरे मई इब्राहीम, इसहाक अउ याकूब क बचन दिहेउँ रहा। लखइ क आगिया नहीं होब्या। मई इ भूँइया क लोगन क देइ क बचन दिहेउँ रहा। मुला उ पचे मोर ठीक तरह नहीं मानेन। एह बरे उ पचे इ भूँइया क न पइहीं। 12सिरिफ कनजी यपुन्ने क पूत कालेब अउर नून क पूत यहोसू यहोवा क पूरी तरह मानेस।’

13“यहोवा इस्त्राएल क लोगन क खिलाफ बहोतइ कोहान रहा। एह बरे यहोवा मनइयन क 40बरिस तलक रेगिस्तान में रोके रहा। यहोवा ओनका तब तलक रोके रहा, जब ताई उ पचे यहोवा क खिलाफ पाप किहे रहेन, मर नहीं गएन। 14अउर अब तू पचे उहइ करत अहा जउन तोहार पुरखन किहन ह। अरे पापियो! का तू चाहत ह कि यहोवा इस्त्राएल क लोग क खिलाफ अउ जियादा कोहाइ जाइ? 15अगर तू पचे ओकर पाछा करइ स मुड़ि जाब्या तउ यहोवा इस्त्राएल क अउर जियादा समइ तलक रेगिस्ताने में ठहराइ देइ। तब तू इ सब मनइयन क नास कइ देब्या।”

16मुला रूबेन अउ गाद परिवार समूहन क लोग मूसा क लोगे गएन। उ सबइ कहेन, “हिओँ हम पचे आपन गदेलन बरे सहर अउ आपन गोरुअन बरे बाड़ा बनउबइ। 17तब हमार गदेलन दूसर लोगन स सुरच्छित रइहीं जउन इ प्रदेस में रहत हीं। मुला ह पचे खुसी स अगवा बढिके इस्त्राएल क लोगन क मदद करब। हम लोग ओनका ओनके देस में लइ जाब। 18हम पचे तब तलक घर नहीं लउटब जब तलक हर एक मनई इस्त्राएल में आपन धरती क हींसा पाइ जात। 19हम लोग यरदन नदी क पच्छिम में कउनो धरती नहीं लेब, हम सबन क धरती क हींसा यरदन नदी क पूब ही बाटइ।”

20तउ मूसा ओनसे कहेस, “जदि तू पचे इ सब करब्या तउ इ रेगिस्तान तू पचन क होइ। मुला तोहरे फउजियन क यहोवा क समन्वा जुद्ध में जाइ चाही। 21तोहरे सिपाहियन क यरदन नदिया पार करइ चाही अउ दुस्मनन क उ देस तजि देइ बरे मजबूर करइ चाही। 22जब हम सबन क धरती पावइ में यहोवा मदद कइ चुकई तब तू सबइ घर जाइ सकत ह। तब यहोवा अउ इस्त्राएल तोहका अपराधी नहीं मनिहीं। तब यहोवा तू पचन क इ पहुँटा लइ लेइ देइहीं। 23मुला अगर तू सबइ इ बातन पूरी नहीं करत्या तउ तू लोग यहोवा क खिलाफ पाप करब्या। अउर उ गाँठ बाँधा कि तू आपन पाप खातिर सजा पउब्या। 24आपन गदेलन बरे सहर अउ गोरुअन



बरे बाड़ा बनावा। मुला ओकरे पाछे ओका पूरा करा जेका करइ क तू पचे बचन दिहे अहा।”

25तब गाद अउ रूबेन परिवार समूहन क लोग मूसा स कहेन, “हम पचे आप क सेवक अही। आप हमार सुआमी अहइ। एह बरे हम लोग उहइ करब जउन आप कहत हीं। 26हमार मेहरारु, गदेलन अउ हमार गोरुअन गिलाद नगर में रहहीं। 27मुला आपक सेवक हम यरदन नदी क पार करब। मुला हम पचे यहोवा क समन्वा आपन सुआमी क कहे क मुताबिक जुद्ध में कूदि पड़ब।”

28मूसा याजक एलीआज़ार, नून क पूत यहोसू अउ इस्त्राएल क परिवार समूहन क सबहिं नेतागणन क ओकरे बारे में हुकुम दिहस। 29मूसा ओनसे कहेस, “गाद अउ रूबेन क मनई यरदन नदी क पार करिहीं। उ पचे यहोवा क अगवा जुद्ध में धावा बोलिहीं। उ सबइ देस जीतइ में तोहार मदद करिहीं। अउर तू पचे गिलाद क प्रदेस ओनके हींसा क रूप में ओनका दोब्या। 30मुला जदि उ पचे आपन सिपाहियन क तोहार संग पार नाहीं भेजइ तउ होइ सकत ह कि उ कनान प्रदेस में तोहार लोगन क बीच सिरिफ पैतृक सम्पत्ति ही पाइ।”

31गाद अउ रूबेन क लोग जवाब दिहन, “हम पचे उहइ करइ क बचन देत अही जउन यहोवा क हुकुम अहइ। 32हम पचे यरदन नदी पार करब अउ कनान देस प यहोवा क समन्वा धावा बोलब। अउ हमरे देस क हींसा यरदन नदी क पूरब क धरती होइ।”

33इ तरह मूसा उ प्रदेस क कछू भाग गाद क लोगन, रूबेन क लोगन अउ मनस्से परिवार समूहन क आधे लोगन क दिहस। (मनस्से यूसुफ क पूत रहा।) उ प्रदेस में एमोरियन क राजा सिहोन क राज्ज अउ बसान क राजा ओग क राज्ज मिला रहा। उ प्रदेस में उ इलाका क चारहों कइंती क सहर भी मिला रहेन।

34गाद क मनइयन दीबोन, अतारोत, अरोएर, 35अत्रौत, सोपान, याजेर, योगबहा, 36बेतनिम्रा अउ बेथारान सहरन क बनाएन। उ पचे मजबूत चहर-देवार क संग सहरन क बनाएस अउ आपन गोरुअन क बाड़ा बनाएन।

37रूबेन क मनइयन हसबोन, एलाले, कियतैन, 38नबो, बालमोन अउर तित्पा सहर। उ दूसर सहरन क नाउँ दिहस जेका उ बनाए। मुला नेबो अउ बाल मिआँन क नवा नाम स पुकारेस। 39मनस्से परिवार समूह क सन्तान माकीर स जन्मा लोग गिलाद क गएन। उ पचे सहर क हराएन। उ पचे ओन एमोरी क हराएन जउन हुवाँ रहत रहेन। 40एह बरे मनस्से क परिवार समूह क माकीर बरे मूसा गिलाद दिहस। एह बरे ओकर परिवार हुवाँ बस गवा। 41मनस्से क परिवार समूह क यैर नान्ह-नान्ह सहरन जेका हेवोल यार्ईर कहा जात ह क जीत लिहस ह। 42तउ नोबह कनात अउ ओकरे लगे क नान्ह-नान्ह सहरन क हराएस। तब उ उ ठउर क नाउँ आपन नाउँ प नोबह धरेस।

### मिस्र स इस्त्राएलियन क जात्रा

33 इ सबइ इस्त्राएली लोगन क जात्रा अहइ जउन उ मूसा अउ हारून क अगवाइ में आपन परिवार

समूहन क संग मिस्र स बाहर आएन। 2मूसा ओनेँ जात्रन क बारे में लिखे अहइ जेनका यहोवा हुकुम दिहेस रहा। उ सबइ जात्रा हिआँ दर्ज अहइ।

3पहिले महीना क पन्द्रहवाँ दिन उ पचे रामसेस तजेन। फसह क पाछे भिन्सारे इस्त्राएल क मनइयन बिजयी क संग मिस्र स बाहेर गएन। मिस्र क सब मनइयन लखेन। 4मिस्र क लोग आपन पहिलौठा पूतन क दफनावत रहेन जेका परमेस्सर मार जाए रहेन। परमेस्सर मिस्र क देवता लोगन क खिलाफ आपन निर्णय देखाए रहा।

5इस्त्राएल क लोग रामसेस क तजि दिहेन अउ सुक्कोत में सिबिर डाएन। 6सुक्कोत स उ पचे एताम क जात्रा किहेन। हुवाँ प लोगन रेगिस्तान क छोर प सिबिर डाएन। 7उ सबइ एताम क तजेन अउ पीहहीरोत क गएन। इ बालसपोन क लगे रहा। उ सबइ मिंगदोल क लगे सिबिर डाएन।

8लोगन पीहीरोत तजि दिहेन अउ समुद्दर क बीच स चलेन। तब उ पचे तीन दिन तलक एथम रेगिस्तान स होइके चलेन। लोगन मरा में सिबिर डाएन।

9लोगन मरा क तजि दिहेन अउ एलीम में सिबिर डाएन। हुवाँ प बारह पानी क झरना रहेन अउ 70 खजूर क बृच्छ रहेन।

10लोग एलीम तजेन अउ लाल-सागर क लगे सिबिर डाएन।

11लोग लाल-सागर तजेन अउ सीन रेगिस्तान में सिबिर डाएन।

12लोग सीन रेगिस्तान क तजेन अउ दोपका में सिबिर डाएन।

13लोग दोपका तजेन अउ आलूस में सिबिर डाएन।

14लोग आलूस तजेन अउ रपीदीम में सिबिर डाएन। हुवाँ लोग क पानी पिअइ बरे नाहीं रहा।

15लोग रपीदीम तजेन अउ सिनाइ रेगिस्तान में सिबिर डाएन।

16लोग सिनाइ रेगिस्तान तजेन अउ किब्रोथताबा में सिबिर डाएन।

17लोग किब्रोथताबा तजेन अउ हसेरोत में सिबिर डाएन।

18लोग हसेरोत क तजेन अउ रिम्मा में सिबिर डाएन।

19लोग रिम्मा क तजेन अउ रिम्मोनपेरेस में सिबिर डाएन।

20लोग रिम्मोनपेरेस क तजेन अउ लिब्ना में सिबिर डाएन।

21लोग लिब्ना तजेन अउ रिस्सा में सिबिर डाएन।

22लोग रिस्सा तजेन अउ कहेलाता में सिबिर डाएन।

23लोग कहेलाता तजेन अउ सेपेर पहाड़े प सिबिर डाएन।

24लोग सेपेर पहाड़ तजेन अउ हरादा में सिबिर डाएन।

25लोग हरादा तजेन अउ मखेलोट में सिबिर डाएन।

26लोग मखेलोट तजेन अउ तहत में सिबिर डाएन।

27लोग तहत तजेन अउ तेरह में सिबिर डाएन।

28लोग तेरह तजेन अउ मिक्का में सिबिर डाएन।

29लोग मिक्का तजेन अउ हसमोना में सिबिर डाएन।

30लोग हसमोना तजेन अउ मोसेरोत में सिबिर डाएन।

31लोग मोसेरोत तजेन अउ बने-याकन में सिबिर डाएन।

32लोग बने-याकन तजेन अउ हॉर होर्हिंग्गदगाद मँ सिबिर डाएन।

33लोग होर्हिंग्गदगाद तजेन अउ योताबात मँ सिबिर डाएन।

34लोग योतबात तजेन अउ अब्रोना मँ सिबिर डाएन।

35लोग अब्रोना तजेन अउ एस्योनगेबेर मँ सिबिर डाएन।

36लोग एस्योनगेबेर तजेन अउ सीने रेगिस्तान मँ कादेस मँ सिबिर डाएन।

37लोग कादेस तजेन अउ होर मँ सिबिर डाएन। इ एदोम देस क सिवाने प एक पहाड़ रहा। 38याजक हारून यहोवा क आग्या मानेस अउ उ हॉर पहाड़े प चढ़ा। हारून पाँचवाँ महीना क पहिले दिन मरा। उ मिस्र क इस्राएल क लोगन क जरिया तजि देइ क चालिसवाँ बरिस रहा। 39हारून जब होर पहाड़े प मरा तब उ 123 बरिस क रहा।

40अरत कनान क नेगेव प्रदेस मँ रहा। कनानी राजा हुवाँ सुनेस कि इस्राएली लोगन आवत अहई। 41लोग हॉर पहाड़े क तजेन अउ सलमोना मँ सिबिर डाएन।

42लोग सलमोना क तजेन अउ पूनोन मँ सिबिर डाएन।

43लोग पूनोन तजेन अउ ओबोस मँ सिबिर डाएन।

44लोग ओबोस तजेन अउ इये अबारीम मँ सिबिर डाएन। इ मोआब देस क चउहद्दी प रहा।

45लोग इयीन (इये अबारीम) क तजेन अउ दिबोन-गाद मँ सिबिर डाएन।

46लोग दिबोन-गाद तजेन अउ अल्मोनदिबलतैम मँ सिबिर डाएन।

47लोग अल्मोनदिबलतैम तजेन अउ नबो क लगे अबीराम पहाड़न प सिबिर डाएन।

48लोग अबीराम पहाड़न क तजेन अउ यरदन नदी क लगे मोआब क प्रदेस मँ सिबिर डाएन। इ जेरिको क निअरे रहा। 49उ पचे मोआब मँ यरदन घाटी मँ यरदन नदी क निअरे सिबिर डाएन। ओनकइ डेरन वेत्यसीमोत स अबेलसितीम चरागाह तलक फइला रहेन।

50उ ठउरे प यहोवा मूसा स बात किहेस, 51“इस्राएल क लोगन स कहा। ओनसे इ बातन क बतावा: तू सबइ यरदन नदी पार करब्या। तू पचे कनान देस मँ जाब्या। 52तू पचे ओनें लोगन स भुइयाँ लइ लेब्या जउन हुवाँ रहत ह तू पचन क ओनकइ खोदी भइ मूरत अउ प्रतिमा क नस्ट कइ देइ चाही। तोहका ओनके सबहिँ ऊँच ठउरे क नास कइ देइ चाही। 53तू पचे उ देस लेब्या अउ हुवाँ बसि जाब्या। काहे? काहे की इ देस मई तू सबन क देत अहउँ। इ तोहरे परिवारे क होइ। 54तोहार हर एक परिवार भुइयाँ क हींसा पाई। तू पचे इ बात बरे गोटी दुउब्या कि देस क कउन सा हींसा कउन परिवारे क मिलत ह। बड़का परिवार भुइयाँ क बड़का हींसा पाइ। नन्ह परिवार देस क नन्ह नन्ह हींसा पाइ। भुइयाँ ओनें लोगन क दीन्ह जाइ जेकर नाउँ गोटी तय करी। हर एक परिवार समूह आपन भुइयाँ पाइ।

55“तू पचन क दूसर लोगन स देस खाली कराइ लेइ चाही। अगर तू पचे ओनें लोगन क आपन देस मँ ठहरइ देब्या तउ उ पचे तोहरे बरे बहोतइ परेसानी पइदा करिहीं। उ पचे तोहरी आँखी क पिन या तोहरी कखरी क काँटा क

तरह होइहीं। उ पचे तोहका परेसानी देइहीं जहाँ तू रहब्या। 56अगर अइसा ह तउ इ होइ सकत ह मुझे तू लोगन क संग भी उहइ करइ क होइ जउन जोजना मई ओन लोगन संग करइ बरे किहउँ।”

### कनान क चउहद्दी

34 यहोवा मूसा स बात किहस। उ कहेस, 2“इस्राएल क लोगन क इ हुकुम द्या: तू पचे कनान देस मँ आवत अहा। तू लोग इ देस क हरउब्या। तू पचे पूरा कनान देस लइ लेब्या। 3दक्खिनी अउ तू लोग एदोम क निअरे सीन रेगिस्तान क हींसा पाइ लेब्या। दक्खिनी सिवान मृत-सागर क दक्खिनी छोर स सुरु होइ। 4इ बिच्छूदर क दक्खिन कइँती स गुजरी। इ सीन रेगिस्तान स होइके कादेसबर्ने तलक जाइ, अउर तब हसरद्दार तथा तब इ अस्मोन स होइके चली। 5अस्मोन स सिवान मिस्र नदी तलक जाइ अउ एकर आखिर भूमध्य सागर प होइ। 6तोहार पच्छिउ क सिवान भूमध्य सागर होइ। 7तोहार उत्तरी सीमा भूमध्य सागर प सुरु होइ अउ होर पहाड़े तलक जाइ। लबानोन मँ 8इ लबानोन मँ हॉर पहाड़े स लबोहामात तलक जाइ क प्रवेस दुआर अहइ। एकर बाद इ सदद तक जाइ। 9तब इ चउहद्दी जिप्रोन क जाइ अउर इ हसेरनान प खतम होइ। इ तरह इ तोहार उत्तरी चउहद्दी होइ। 10तोहार पुर्बिहा चउहद्दी एनान प सुरु होइ अउर इ सपान तक जाइ। 11सपान स चउहद्दी ऐन क पूरब रिबला तलक जाइ। किन्नेरत समुद्दर गलील क सागर क संग क पहाड़ियन क संग सिवान चलत रही। 12तब सिवान यरदन नदी क संग संग चली। एकर अन्त मृत-सागर प होइ। तोहरे देस क चारिहुँ कइँती क चउहद्दी हिअँइ बा।”

13मूसा इस्राइल क लोगन क हुकुम दिहस, “इहइ उ देस अहइ जेका तू पउब्या। तू लोग नौ परिवार समूहन अउ मनस्से परिवार समूह क आधा मनइयन बरे धरती बाँटइ खातिर ओनके नाउँ क गोटी डउब्या। 14रूबेन, गाद अउ क परिवार समूहन मनस्से क आधा परिवार समूह क मनइयन पहिलेन ही आपन प्रदेस लइ लिहे अहई। 15उ अढ़ाई परिवार समूहन यरीहो क निचके यरदन नदी क पूरब आपन पहँटा लइ लिहे अहइ।”

16तब यहोवा मूसा स बात किहेस। उ कहेस, 17“इ सबइ उहइ लोग अहई जउन भुइँया बाँटइ मँ तोहार मदद करिहीं: याजक एलीआज़ार, नून क पूत यहोसू, 18अउ हर एक परिवार समूहन स तू पचे एक ठु नेता चुनब्या। इ लोग भुइँया क बाँटवारा करिहीं। 19नेता लोगन क नाउँ इ अहई:

यहूदा क परिवार समूह स युपुने क पूत कालेब।

20सिमोन क परिवार समूह स, अम्मीहूद क पूत समूएल।

21बिन्यामीन क परिवार समूह स, किसलेस क पूत एलीहदद।

22दान क परिवार समूह स, योगिल क पूत बुक्की।

23मनस्से (यूसुफ क पूते) क परिवार समूह स, एपोद क पूत हन्नीएल।

24एप्रैम (यूसुफ क पूते) क परिवार समूह स, सिप्तानी क पूत कमूल।

25जबूलन क परिवार समूह स, पर्नाक क पूत एलीसापान।

26इस्साकार क परिवार समूह स, अज्जान क पूत पलतीएल।

27आसर क परिवार समूह स, सलोमी क पूत अहीदूद।

28नपताली क परिवार समूह स, अम्मीहूद क पूत पदहेल।”

29यहोवा इ मनइयन क इस्त्राएल क लोगन में कनान क भुइँया बॉटइ बरे चुनेस।

### लेवी बंस क सहर

**35** यहोवा मूसा स बात किहस। इ यरीहो क पार मोआब में यरदन घाटी में यरदन नदी क निचके रहा। यहोवा कहेस, 2“इस्त्राएल क लोगन स कहा कि ओनका आपन हीसा क देस में कछू सहर लेवी-बंस क लोगन क देइ चाही। इस्त्राएल क लोगन क सहर अउ ओकरे चारिहुँ कइँती क चरागाह लेवी-बंस क देइ चाही। 3लेवी बंसी लोग ओन सहरन म रइहीं। अउ सब गोरुअन, अउ दूसर जनावर, जउन लेवी बंसी मनइयन क होइहीं, सहर क चारिहुँ कइँती क चरागाह में चरि सकिहीं। 4तू पचे केतनी भुइँयाँ लेवी बंसी मनइयन क देब्या? सहर क देवों स 1,500 फुट बाहेर सहर क पूरब में नापत जा 5अउ सहर क दक्खिन में 3,000 फुट अउर सहर क पच्छिउँ में 3,000 फुट, पूर्व 3,000 फुट अउ उत्तर में 3,000 फुट- उ सारी भुइँयाँ लेवी बंसियन क होइ। उ भुइँयाँ क बीच सहर होइ। 6ओन सहरन में छः सहर सरण क सहर होइहीं। जदि कउनो मनई कउनो क कतल कइ डवत ह तउ उ सुरच्छा बरे ओन सहरन में पराइ सकत ह। ओन छः सहरन क अलावा तू लेवी बंसियन क बियालीस दूसर सहर देब्या। 7इ तरह तू पचे कुल अरचालीस सहर लेवी बंसी लोगन क देब्या। तू पचे ओन सहरन क चारिहुँ कइँती भुइँया भी देब्या। 8इस्त्राएल क बड़का परिवारन क भुइँया क बड़का भाग देइहीं। इस्त्राएल क नान्ह परिवारन क भुइँया क छोटा भाग देइहीं। सबहिँ परिवार समूहन लेवी बंसी मनइयन क आपन सहरन में स कछू सहर देइहीं।”

9तब यहोवा मूसा स बात किहस। उ कहेस, 10“मनइयन स इ कहा: तू पचे यरदन नदी क पार करब्या अउ कनान देस में जाब्या। 11तोहका “सरण-सहर” बनावइ बरे सहरन क चुनइ चाही। जदि कउनो मनई संजोग स कउनो क मारि डवत ह तउ इ सुरच्छा बरे इ सहरन में स कउनो में पराइके जाइ सकत ह। 12उ ओ कउनो मनई स बचा रही जउन मरे परिवार क होइ अउ ओका धरइ चाहत होइ। उ तब तलक सुरच्छित रही जब तलक अदालन में ओकरे बारे में फइसला नाहीं होइ जात। 13अउ छः सहर जेका तू चुनिहीं उ तोहार “सरण-नगर” होइहीं। 14ओन सहर में स तीन सहर यरदन नदी क पूरब में होइहीं। अउर तीन दूसर सहर कनान

प्रदेस में यरदन नदी क पच्छिउँ में होइहीं। 15उ सबइ सहर नागरिक लोगन, स्थाई निवासियन अउ अस्थाई निवासियन बरे सरण-ठउर होइहीं। कउनो भी मनई संजोग स कउनो क मारि डवत ह, इ कउनो एक सहर में पराइके जाइ सकत ह।

16“जदि कउनो मनई कउनो क मारइ बरे लोहा क हथियार बइपरत ह तउ मनई क मरि जाइ चाही। 17अउर जदि कउनो मनई एक पाथर उठावत ह अउ कउनो क मारि डवत ह तउ ओका भी मरइ चाही। पाथर उ आकार क होइ चाही जेका मनइयन क मारइ बरे अक्सर बइपरा जात ह। 18अगर कउनो मनई कउनो लकड़ी का प्रयोग करत ह अउ कउनो क मारि डवत ह तउ ओका मरइ चाही। लकड़ी एक हथियार क सेकेल में होइ चाही जेकर प्रयोग अक्सर लोग मनइयन क मारि डवइ बरे करत हीं। 19मरे भए मनई क परिवार क निअम्बर उ हत्यारा क पाछा कइ सकत ह अउ ओका मार सकत ह।

20-21“कउनो मनई कउनो प हाथ स हमला कइ सकत ह अउ ओका मारि डइ सकत ह। या कउनो मनई कउनो क धकियाइ सकत ह अउ ओका मारि डइ सकत ह। या कउनो मनई कउनो प कछू बहाइ सकत ह अउ ओका मारि सकत ह। अगर उ मरवइया घिना स अइसा किहस तउ उ हत्यारा अहइ। उ मनई क मारि डवइ चाही। मरे भए परिवार क कउनो मनई उ हत्यारा क पाछा कइ सकत ह अउ ओका मार सकत ह।

22“मुला जदि कउनो मनई संजोग स कउनो क मारि सकत ह। उ मनई उ मनई स घिना नाहीं करत रहा, उ होनी संजोग स होइ गइ। या कउनो मनई कछू लोकाइ सकत ह अउ संजोग स कउनो क मार सकत ह, उ मारइ क इरादा नाहीं किहे रहा। 23या कउनो मनई कउनो बड़वार पाथर बहाइ सकत ह। अउ उ पाथर कउनो अइसे मनई प भहराइ पड़इ जउन ओका न लखत होइ अउ उ ओका मारि डवइ। उ मनई कउनो क मारि डवइ क इरादा नाहीं किहे रहा। उ मृतक मनई बरे घिना नाहीं राखत रहा। इ सिरिफ संजोग स भवा रहा। 24जदि अइसा होइ तउ बिरादरी फइसला करी कि का कीन्ह जाइ। जाति बिरादर क अदालत इ फइसला देइ कि मृतक मनई क परिवार क निअम्बर ओका मारि डइ सकत ह। 25अगर अदालत क इ फइसला देइ क होइ कि उ जिअत रहइ तउ ओका आपन “सरण-सहर” मई जाइ चाही। ओका हुवों तब तलक रहइ चाही जब तलक महा याजक मरि जाइ। इ महा याजक उहइ होइ चाही जेकर अभिसेक पवितर तेल स भवा होइ।

26-27“उ मनई क आपन “सरण-सहर” क चउहदूदी स कबहुँ बाहेर नाहीं जाइ चाही। अगर उ सिमान पार करत ह अउ मृतक मनई क परिवार क निअम्बर ओका धरत ह अउ ओका मारि डवत ह तउ उ मनई हत्या क अपराधी नाहीं होत। 28उ मनई क जेका, जउन संजोग स कउनो क मारि डएस ह, “सरण-सहर” में महा याजक क मरि तलक रहइ सकत ह। महा याजक क मरइ क पाछे उ मनई आपन भुइँया क लउटि सकत ह। 29तू जउन कहुँ भी रहा इ नेमें तोहार आवइ वाले नसलन बरे कानून क तरह होइ जाब।

30“हत्तियारा क तबहिं मउत-सजा दीन्ह जाइ सकत ह। जब ओकरे बिरोध में एक स जियादा गवाही होइहीं। जदि एक ठु ही गवाह होइ तउ कउनो मनई क मउत क सजा नाहीं दीन्ह जाइ।

31“जदि कउनो मनई हत्तियारा अहइ तउ ओका मारि डावइ चाही। धन क बदले ओका नाहीं छोड़ दीन्ह जाइ चाही। उ हत्तियारे क मार दीन्ह जाइ चाही।

32“अगर कउनो मनई कउनो क मारेस अउ उ पराइके कउनो “सरण-सहर” में गवा तउ घर लउटइ बरे ओसे धन जिन ल्या। उ मनई क उ नगर में तब तलक रहइ क पड़ी जब तलक महायाजक न मरइ।

33“भोले मनइयन क खून स आपन देस क जिन दुसित करा। जदि कउनो मनई कउनो क मारि डावत ह तउ इ अपराध क बदला इहइ अहइ कि उ मनई क मार दीन्ह जाइ। दूसर कउनो अइसा बदला उ जुर्म बरे नाहीं बा कि हत्तियारा क जान स मारि डावा जाइ। दूसर कउनो चारा नाहीं कि उ देस क अजाद कइ सकइ। 34मई यहोवा हउं! मई इस्त्राएल क लोग क बीच तोहरे देस में सदा रहत रहबइ। मई उ देस में रहत रहब। एह बरे बे अपराधी मनइयन क खून स उ देस क दुसित जिन करा।”

### सलोफाद क बिटियन क देस

**36** मनस्से यूसुफ क पूत रहा। माकीर मनस्से क पूत रहा। गिलाद माकीर क पूत रहा। गिलाद परिवार क नेता मूसा अउ इस्त्राएल क परिवार समूहन क नेता लोगन स बात करइ गएन। 2उ पचे कहेन, “महोदय, यहोवा हमलोगन क लौटरी क आधार पइ भुइँया बाटइँ क हुकम दिहस ह। अउर महोदय, यहोवा हुकुम दिहस कि सलोफाद क भुइँयाँ ओकरी बिटियन क मिलइ। सलोफाद हम लोगन क भाई रहा। 3इ होइ सकत ह कि कउनो दूसर परिवार समूह क मनई सलोफाद क कउनो बिटिया स बियाह करइ। का उ भुइँया हमरे परिवारे स निकरि जाइ? का उ दूसरे

परिवार समूह क मनई उ भुइँया क पाइ लेइहीं? का हम लोग उ भुइँया क खोइ देब जेका हम लोग लौटरी क आधार प पावा ह। 4लोग आपन भुइँया बेचं-बिकिन सकत हीं। मुला जुबली क बरिस में सारी धरती उ परिवार समूह क लउटी जात ह जउन एकर असली मालिक होत ह। उ टेमें सलोफाद क बिटियन क भुइँयाँ कउन पाई? अगर वइसा होत ह तउ हमार परिवार उ भुइँयाँ क सदा न पाइ सकी।”

5मूसा इस्त्राएल क लोगन क इ हुकुम दिहस। इ हुकुम यहोवा क रहन “यूसुफ क परिवार समूह क इ सबइ मनई ठीक कहत हीं। 6सलोफाद क बिटियन बरे इ हुकुम अहइ: जदि तू कउनो स बियाह करइ चाहति हउ तउ तोहका आपन परिवार समूह क कउनो मनई क संग बियाह करइ चाही। 7इ तरह इस्त्राएल क लोगन में भुइँयाँ एक परिवार समूह स दूसर परिवार समूह में नाहीं जाइ। हर एक इस्त्राएली आपन पुरखन क भुइँया क ही आपन लगे रखी। 8अउर जदि कउनो बिटिया बाप क भुइँया पाइ जात ह तउ ओका आपन परिवार समूह में स ही कउनो क संग बियाह करइ चाही। इ तरह हर एक मनई उहइ भुइँयाँ अपने लगे रखी जउन ओकरे पुरखन क रही। 9इ तरह इस्त्राएल क लोगन में एक परिवार समूह स दूसर परिवार समूह में न जाइ। हर एक इस्त्राएली उ भुइँया रखी जउन ओकरे आपन पुरखन क रही।”

10सलोफाद क बिटियन, मूसा दुआरा प्राप्त भवा यहोवा क हुकुम क पालन किहेस। 11एह बरे सलोफाद क बिटियन महला, तिसा, होगला, मिल्का अउ नोआ आपन चचेरा भाइयन क संग बियाह किहन। 12ओनकइ भतार मनस्से क परिवार समूह क रहेन। एह बरे ओनकइ भुइँया ओनके बाप क परिवार अउ परिवार समूह क बनी रही।

13इ तरह उ सब कनून अउ हुकुम यरीहो क पार स यरदन नदी क किनारे मोआब इलाका में यहोवा मूसा क दिहे रहा। मूसा यहोवा क ओन कनूनन क अउ हुकुमन क इस्त्राएल क लोगन क दिहस।

# लैव्यवस्था

## होमबलि क नेम

1 यहोवा परमेस्सर मूसा क मिलापवाला तम्बू स बोलाएस अउ ओसे कहेस। यहोवा कहेस, 2“इस्त्राएल क मनइयन क निर्देस द्या कि जब तू लोगन में स कउनो मनई यहोवा बरे भेंट लइ आवइ तउ उ ओकर झुण्ड या खरका स होइ चाही।

3“अगर कउनो मनई आपन झुण्ड में स कउनो क होमबलि देइ तउ उ नर होइ चाही अउ गोरु में कउनो दोख नाही होइ चाही। उ मनई क चाही कि गोरु क मिलापवाला तम्बू क दुआरे प लइ जाइ। तब यहोवा भेंट क अंगीकार करी। 4इ मनई क आपन हाथ क गोरु क मूँड़े प धरइ चाही। जब एको बलि दीन्ह जाइ क होइ। यहोवा होमबलि क ओकर पाप बरे प्रायस्चित क खातिर अंगीकार करी।

5“मनई क चाही कि बछवा क यहोवा क समन्वा मारइ। तब हारून क याजक बेटवन क बछवा क रक्त मिलापवाला तम्बू क दुआरे प वेदी क चारिहुँ कइँती बहावइ चाही। 6याजक उ गोरु क चाम हटाइ देइ अउ ओका टूका में काटी। 7हारून क याजक बेटहनन क वेदी प काठ अउ आगी धरइ चाही। 8हारून क याजक बेटहनन क उ सबइ टूकन, (मूँड़े अउ चर्बी) क काठे प धरइ चाही। उ काठ वेदी प आगी क ऊपर होत ह।

9“याजक क गोरु क भितरे क हींसा अउ गोड़ी क पानी स धोवइ चाही। तब याजक क गोरु क इ सबइ हींसा क वेदी प बारइ चाही। इहइ होमबलि अहइ यानी एक तु उपहार, यहोवा क खुस करइ बरे एक तु सुगन्ध।

10“अगर कउनो मनई भेड़ी या बोकरी क होमबलि चढ़ावइ तउ उ एक अइसा नर गोरु क भेंट देइ जेहमों कउनो दोख न होइ। 11उ मनई क वेदी क उत्तर कइँती यहोवा क समन्वा गोरु क मारइ चाही। हारून क याजक बेटवन वेदी क चारिहुँ कइँती रक्त छिड़कइ चाही। 12तब याजक क चाही कि उ गोरु क टूकन में काटइ। गोरु क मूँड़ी अउ चर्बी काठे क ऊपर सिलसिला स धरइ चाही। काठ वेदी प आगी क ऊपर रहत ह। 13याजक क गोरु क भीतर क हींसन क अउ ओकरे गोड़े क पानी स धोवइ चाही। तब याजक क चाही कि उ गोरु क इ सबहिं हींसन क वेदी प बारइ। इ होमबलि अहइ यानी एक तु उपहार यहोवा क खुस करइ बरे एक तु सुगन्ध।

14“अगर कउनो व्यक्ति यहोवा क एक तु पंछी होमबलि क रूप चढ़ावत ह तउ इ पंछी फाख्ता या नान्ह कबूतर होइ चाही। 15याजक भेंट क वेदी प लिआइ। याजक पंछी क मूँड़े क काट देइ। तब उ पंछी क वेदी प बारी। पंछी क

खून वेदी कइँती बहइ चाही। 16याजक क पंछी क गटइ क थइली अउ ओकरे पखना क वेदी क पूरब कइँती लोकइ देइ चाही। इ उहइ जगह अहइ जहाँ उ पचे वेदी स निकारिके रखी रखई जात हीं।

17“तब याजक क पखना क लगे पंछी क जरूर काटइ चाही, मुला पंछी क दुइ हींसा में नाही बाँटइ चाही। याजक क वेदी क ऊपर आगी प धरी काठे क ऊपर पंछी क जरूर बारइ चाही। इ होमबलि अहइ यानी एक तु उपहार, यहोवा क खुस करइ बरे एक तु सुगन्ध।

## अन्नबलि क नेम

2 “जब कउनो मनई यहोवा क अन्न बलि चढ़ावइ तउ ओकर भेंट पातर आटा क होइ चाही। उ मनई उ आटे प तेल नावइ अउ ओह प लोहबान धरइ। 2तब उ एँका हारून क याजक बेटवन क लगे जरूर लिआवइ चाही। तब याजक तेल अउ लोहबान स मिला भवा एक मूठी आटा लेइ अउर एको वेदी प स्मृति भेंट क रूप में बारइ देइ। इ यहोवा बरे एक भेंट एक सुहावना सुगन्ध होइ। 3बची भई अन्नबलि हारून अउ ओकरे पूतन बरे होइ। इ भेंट यहोवा क दीन्ह जाइवाली भेंटन में स सब त परमपवितर होइ।

## चूल्हा में पकी अन्नबलि क नेम

4“जबहिं तू चूल्हा में पकी भइ अन्नबलि क भेंट लिआवा तउ इ बे खमीरे तेल मिला भवा बढ़िया आटा क फुलका या ऊपर स तेल डवा भवा बिना खमीरा क पतला केक होइ चाही। 5अगर तू भूँजइ वाली कड़ाही स अन्नबलि लिआवत ह तउ इ तेल स मिला भवा बे खमीरे क गोहूँ क बढ़ियाँ आटा क केक होइ चाही। 6तोहका एँका टूका कइँके कइउ हींसा में तोड़इ चाही अउ एँन प तेल चुपरइ चाही। इ अन्नबलि अहइ। 7अगर तू अन्नबलि क भूँजइ वाली कड़ाही स लिआवत ह तउ इ तेल स मिला भवा गोहूँ क बढ़ियाँ आटा क होइ चाही।

8“तू इ चीजन स बनी अन्नबलि यहोवा खातिर लइ अउब्या। तू इ चीजन क याजक क लगे लइ अउब्या अउ उ ओनका वेदी प धरी। 9फिन याजक उ अन्नबलि में स एँकर कछू हींसा लइके ओका स्मृति भेंट क रूप में वेदी प बारि देइ। अउर इ एक तु उपहार, यहोवा क खुस करइ बरे एक तु सुगन्ध होइ। 10बची भइ अन्नबलि हारून अउ ओकरे बेटवन बरे होइ। इ भेंट यहोवा बरे चढ़ाई जाइवाली भेंटन में स परमपवितर होइ।

11“तोहका यहोवा क खमीर स या मधु स बना भवा अन्नबलि क भेंट क रूप में नाहीं चढ़ावइ चाही। 12तू पहिली फसल क खमीर स बना भवा अन्न भेंट यहोवा बरे भेंट क रूप में लाइ सकत ह, मुला एका खुस करइ बरे सुगन्ध क रूप में वेदी प बारइ नाहीं चाही। 13तोहका आपन लिआइ भइ हर एक अन्नबलि प नोन भी जरूर धरइ चाही। यहोवा स तोहरे करार क मुताबिक नोन क जरूरत क अनुसार अन्नबलि में धरइ स तोहका नाहीं रोकइ चाही। तोहका आपन सबहिं भेंटन प नोन धरइ चाही।

### पहली पकी फसल स अन्नबलि क नेम

14“अगर तू पहिली पकी फसल स अन्नबलि लिआवत ह तउ तोहका भूजी भइ ताजा अनाज लिआवइ चाही। इ अनाजे क दरिके नान्ह नान्ह टूकन में तोरा जाइ चाही। इ भेंट तोहार पहिली पकी फसल क जइसा अन्नबलि होइ। 15तोहका ऐह प तेल नावइ अउ लोहबान जरूर धरइ चाही। इ अन्नबलि अहइ। 16अउर याजक क चाही कि उ स्मृति भेंट क रूप में दरा भवा अनाजे क कछू हीसा, तेल अउ ऐह पइ धरा पूरा लोहबान क बारइ। इ यहोवा बरे उपहार होइ।

### मेलबलि क नेम

3 “अगर कउनो मनई आपन झुण्ड में स एक तु नर या मादा जनावर यहोवा क समन्वा मेलबलि क रूप में भेंट चढ़ावत ह तउ ओहमाँ कउनो दोख नाही होइ चाही। 2इ मनई क आपन हाथ गोरु क मूँड़े प जरूर धरइ चाही। मिलापवाला तम्बू क दुआरे प उ मनई क जरिये उ गोरु क जरूर मारि डवइ चाही। तब हारून क याजक पूतन क वेदी क चारिहुँ कइँती रक्त बहावइ चाही। 3मेल बलि में स यहोवा क उपहार क रूप में भीतरी हीसन क ढौंपइ वाली अउ भितरे क हीसा में रहइवाली चर्बी क भेंट जरूर चढ़ावइ चाही। 4ओका दुइनउँ गुर्दन अउर ओका ढौँकइ वाला चर्बी क अउर पुट्टा के चर्बी क भी भेंट चढ़ावइ चाही। तउ उ झिल्ली जउन करेजा स चिपका भवा ह ओका भी गुर्दन क संग निकाारि लेइ चाही। 5तब हारून क बेटवन चर्बी क वेदी प बरिहीं। उ पचे चर्बी क आगी प धरी भइ लकड़ी प राखी। इ एक उपहार अहइ। एकर सुगन्धि यहोवा क खुस रखत ह।

6“अगर एक मनई यहोवा बरे आपन झुण्ड में स मेलबलि क रूप में नर अउर मादा गोरु लिआवत ह तब ओका सिरिफ उ गोरु क भेंट देइ चाही जेहमाँ कउनो दोख न होइ। 7अगर उ आपन बलि क रूप में एक तु मेमना लिआवत ह तउ ओका यहोवा क समन्वा बलि देइ चाही। 8ओका आपन हाथ गोरु क मूँड़े प धरइ चाही अउ मिलापवाला तम्बू क समन्वा ओका मारइ चाही। तब हारून क बेटवन वेदी प चारिहुँ कइँती गोरु क रक्त बहावइ चाही। 9इ मनई क चर्बी स भरी पूरी पूँछ गोरु क पिछली हड्डी क आखरी हीसा स कटा भवा चर्बी, अउ उ चर्बी जउन भीतरी हीसा क ढौँपि रहत ह अउ उ सबइ चर्बी जउन भितरे में अहइ क यहोवा क उपहार क रूप में भेंट चढ़ावइ

चाही। 10ओका दुइनउँ गुर्दन अउर ओनका ढौँपइ वाला चर्बी क अउर पुट्टा क चर्बी क भी भेंट चढ़ावइ चाही। उ झिल्ली जउन करेजा स चिपका भवा ह ओका भी निकाारि लेइ चाही अउर गुर्दन क संग चढ़ावइ चाही। 11तब याजक वेदी प ऐका जरूर बारी। इ खइया अहइ, इ यहोवा बरे एक तु उपहार होइ।

### मेलबलि क रूप में बोकरा क बलि क नेम

12“अगर ओकर बली एक तु बोकरा अहइ तउ उ ओका यहोवा क समन्वा जरूर भेंट देइ। 13उ व्यक्ति क बोकरा क मूँड़ी प हाथ धरइ चाही। ओका मिलापवाला तम्बू क समन्वा एको मारइ चाही। तबइ हारून क बेटवन बोकरा क रक्त वेदी प चारिहुँ कइँती बहाइहीं। 14तब उ व्यक्ति क बोकरा क एक हीसा यहोवा बरे उपहार क रूप में चढ़ावइ बरे लिआवइ चाही। इ मनई क भीतरी हीसा क अउ ओकरे चारिहुँ कइँती क चर्बी क भेंट जरूर चढ़ावइ चाही। 15ओका दुइनउँ गुर्दन अउर ओनका ढौँपइ वाला चर्बी क अउर पुट्टा के चर्बी क भी भेंट चढ़ावइ चाही। उ झिल्ली जउन करेजा स चिपका भवा ह ओका भी निकाारि लेइ चाही अउर गुर्दन क संग चढ़ावी चाही। 16याजक क वेदी प बोकरा क हीसा क जरूर बारइ चाही। इ खइया अहइ, यहोवा बरे एक तु उपहार। सबहिं चर्बी यहोवा क अहइ। 17इ नेम तोहार सबहिं अगुवा पीढ़ियन में हमेसा चलत रही। तू जहाँ कहुँ भी रहा, तोहका खून या चर्बी नाहीं जरूर खाइ चाही।”

### संजोग स भवा पाप बरे पापबलि क नेम

4 यहोवा मूसा स कहेस, 2“इस्त्राएल क मनइयन स कहा: अगर कउनो व्यक्ति स संजोग क कारण कउनो अइसा पाप होइ जाइ जेका यहोवा न करइ क हुकुम दिहे अहइ तउ उ व्यक्ति क नीचे लिखी भई बात करइ चाही:

3“अगर अभिसिक्त याजक स कउनो पाप भवा होइ अउ इ लोगन क बुरा बनावत हीं तउ ओका आपन कीन्ह गए पाप बरे यहोवा क बलि चढ़ावइ चाही। ओका एक बछवा यहोवा क भेंट में जरूर देइ चाही जेहमाँ कउनो दोख न होइ। ओका यहोवा क बछवा पापबलि क रूप में जरूर चढ़ावइ चाही। 4अभिसिक्त याजक क उ बछवा क यहोवा क समन्वा मिलापवाला तम्बू क दुआरे प जरूर लावइ चाही। ओका आपन हाथ उ बछवा क मूँड़े प जरूर धरइ चाही अउ यहोवा क समन्वा ओका मारि देइ चाही। 5तब अभिसिक्त याजक क बछवा क कछू रक्त जरूर लेइ चाही अउ मिलापवाला तम्बू क अन्दर लइ जाइ चाही। 6याजक क आप अँगुरी खून में डवइ चाही अउ महा पवितर ठउर क पर्दा क समन्वा खून क सात दाई परमेस्सर क समन्वा छिछकारइ चाही। 7याजक क कछू खून महकउआ धूप क वेदी क सींगन प जरूर लगावइ चाही। इ वेदी यहोवा क समन्वा मिलापवाला तम्बू क अन्दर अहइ। याजक क बछवा क सारा खून होमबलि क वेदी क आधार प जरूर उडेरइ चाही। इ वेदी मिलापवाला तम्बू क दुआर प अहइ। 8अउर ओका पापबलि कीन्ह गइ बछवा क सारी चर्बी जरूर

निकारि लेइ चाही। ओका भितरे क हीसा क ढौंपि भइ चर्बी अउ ओकरे चारिहुँ कइँती क चर्बी क निकारि लेइ चाही। 9ओका दुइनँ गुर्दन अउर ओनका ढौंपइ वाला चर्बी अउ पुट्टा प क चर्बी क भी भेंट चढ़ाई चाही। ओका उ झिल्ली जउन करेजा स चिपका भवा ह ओका भी निकारि लेइ चाही अउर गुर्दन क संग चढ़ावइ चाही। 10याजक क इ सबइ चीजन ठीक उहइ तरह लेइ चाही जउने तरह उ इ सबइ चीजन मेलबलि क बछवा स लिहे रहा। याजक क होमबलि क वेदी प गोरु क भितरे क हीसन क जरूर बारि देइ चाही। 11मुला याजक क बछवा क चाम, मूँड़, गोड़, भीतर क हीसन अउ तने क बेकार हीसा जरूर निकारि देइ चाही। 12याजक क डेरा क बाहेर खास ठउरे इ हीसन जउन बछवा क सरीर क बचा भवा हीसा अहइ क हुँआ लइ जाइ चाही जहाँ राखी डारी जात ह। याजक क हुआँ काठ क आगी पइ जहाँ राखी क डारी दीन्ह गवा ह इन हीसन क जरूर बारइ चाही।

13“अइसा होइ सकत ह कि समूचइ इस्त्राएल रस्ट्र स बे जाने भए कउनो अइसा पाप होइ जाइ जेका न करइ बरे परमेस्सर हुकुम दिहे होइ। मुला अइसा होइ जात ह तउ उ सबइ दोखी होइहीं। 14जदि ओनका इ पापे क पता लागि जात ह तउ समूचइ रस्ट्र बरे एक ठु बछवा पापबलि खातिर चढ़ावा जाइ चाही। ओनका बछवा क मिलापवाला तम्बू क समन्वा लइ आवइ चाही। 15बुर्जुगन क बछवा क मूँड़े प आपन हाथ धरइ चाही। बछवा क यहोवा क अगवा मारइ चाही। 16तबहिँ अभिसिक्त याजक क बछवा क तनिक खून मिलापवाला तम्बू में लइ आवइ चाही। 17याजक क आपन अँगुरियन रक्त में जरूर बोरइ चाही अउ पर्दा क समन्वा सात दाई रक्त क छिछकारइ चाही। इ यहोवा क अहइ। 18तब याजक क कछू रक्त वेदी क सिंगियन प डवइ चाही। उ वेदी मिलापवाला तम्बू में यहोवा क समन्वा बा। याजक क सारा रक्त होमबलि क वेदी क नीव प डवइ चाही। उ वेदी मिलापवाला तम्बू क दुआरे प बा। 19तब याजक क गोरु क सारी चर्बी निकारि लेइ चाही अउ ओका वेदी प बारइ चाही। 20उ बछवा क संग जरूर वइसा ही करी जइसा उ पापबलि क रूप में चढ़ावा भवा बछवा क संग किहे रहा। इ तरह याजक मनइयन क पाप क पछतावा करत ह एहसे लोग छिमा पाइहीं। 21याजक डेरा क बाहेर बछवा क लइ जाइ अउर ओका हुआँ बारि देइ। इ पहिले क तरह होइ। इ पूरे समाज बरे पापबलि होइ।

22“जब कउनो सासक यहोवा आपन परमेस्सर क हुकुम तोड़इ क पाप अनजाने में करत ह, तउ उ दोखी समुझा जाई। 23अगर सासक क इ पाप क पता लागत ह तब ओका एक अइसा बोकरा जरूर लावइ चाही जेहमाँ कउनो दोख न होइ। इहइ ओकर भेंट होइ। 24सासक क बोकरा क मूँड़ि प हाथ जरूर धरइ चाही अउ ओका उ ठउरे प मारइ चाही जहाँ उ पचे होमबलि क यहोवा क समन्वा मारत हीं। इ एक पापबलि अहइ। 25याजक क पापबलि क कछू रक्त आपन अँगुरियन प जरूर लेइ चाही। याजक क होमबलि क वेदी क सिंगियन प रक्त जरूर छिछकारइ चाही। याजक क बचा भवा रक्त होमबलि क वेदी क

आधार प जरूर डवइ चाही। 26अउ याजक क बोकरा क सारी चर्बी वेदी प जरूर बारइ चाही। ओका एका उहइ तरह बारइ चाही जउने तरह उ मेलबलि क चर्बी बारत ह। इ तरह याजक सासक क पाप क पछतावा करत ह अउ सासक छिमा पाइहीं।

27“अइसा होइ सकत ह कि साधारण जनता में स कउनो मनई स संजोग स कउनो अइसा पाप होइ जाइ जेका यहोवा न करइ क हुकुम दिहेस ह। 28अगर उ व्यक्ति क आपन पाप क पता लागि जाइ तउ उ एक ठु मादा बोकरी जरूर लियावइ जेहमाँ कउनो दोख न होइ। इ उ व्यक्ति क पापबलि होइ। उ इ बोकरी क उ पाप खातिर लियावइ जउन उ किहस ह। 29ओका आपन हाथ गोरु क मूँड़ी प धरइ चाही अउ होमबलि क ठउरे प ओका बाँधइ चाही। 30याजक क उ बोकरी क कछू रक्त आपन अँगुरियन प जरूर लेइ चाही अउ याजक क होमबलि क वेदी क सिंगियन प रक्त जरूर छिड़कइ चाही। याजक क बचा भवा रक्त होमबलि क आधार प जरूर डवइ चाही। 31तब याजक क बोकरी क सारी चर्बी उहइ तरह निकारइ चाही जउने तरह मेलबलि स चर्बी निकारी जात रहा। याजक क एँका यहोवा बरे सुहावना सुगंध क रूप में धूप क वेदी प बारइ चाही। इ तरह याजक उ मनई क पापे क पछतावा कइ देइ अउ व्यक्ति छिमा पाइहीं।

32“अगर उ मनई पापबलि क रूप में एक ठु भेड़ी क बच्चा लिआवत ह तउ ओका एक मादा भेड़ी क बच्चा लइ आवइ चाही जेहमाँ कउनो दोख न होइ। 33मनई क ओकरे मूँड़ी प हाथ धरइ चाही अउ ओका उ ठउरे प पापबलि क रूप में मारइ चाही जहाँ उ पचे होमबलि क गोरु क मारत हीं। 34याजक क उ बोकरी क कछू रक्त आपन अँगुरियन प जरूर लेइ चाही अउ याजक क होमबलि क वेदी क सिंगियन प रक्त जरूर छिड़कइ चाही। याजक क बचा भवा रक्त होमबलि क आधार प जरूर डवइ चाही। 35याजक क मेमना क सारी चर्बी उहइ तरह लेइ चाही जउने तरह मेलबलि क चर्बी लीन्ह जात ह। याजक क मेमना क सारी चर्बी क यहोवा क उपहार क रूप में जरूर बारइ चाही। इ तरह याजक उ व्यक्ति क पापे क पछतावा करी अउ उ व्यक्ति छिमा पाइहीं।

### एक मनई दुआरा अनजाने में कीन्ह गवा पाप

5 “जदि कउनो मनई अदालत में गवाही देइ बरे बोलावा जात ह अउ जउन कछू उ लखेस ह या अनकेस ह, ओका नाहीं बतावत तउ उ पाप करत ह। ओका ओकरे अपराध बरे जरूर ही सजा भोगइ क होइ। 2जदि कउनो व्यक्ति कउनो असुद्ध चिजियन क जइसे जंगली जनावर या घरेलू जनावर या रेंगइवाला कउनो जनावर क लहास क अनजाने में छुवत ह तउ उ व्यक्ति, जदि ओका एँकर पता नाहीं भी लागत तउ भी उ दोखी होइ। 3एक व्यक्ति अलग अलग चिजियन स असुद्ध होइ सकत ह। अगर कउनो प्रकार क मानव अनजाने में किसी असुद्ध मनई क छुअत ह, तउ जे टेम में ओका इ पता चली उ दोखी होइ। 4अगर एक व्यक्ति कउनो व्यक्ति स कछू नीक या खोट करइ

क बचन करत ह अउ ओका बिसरि जात ह, जब उ आपन बचन क सुमिरइ तब उ दोखी होइ। 5<sup>एह</sup> बरे, अगर उ एनमौ स कउनो चिजियन क दोखी बाटइ तउ ओका आपन बुराई जेका उ किहेस ह क कबूल लेइ चाही। 6<sup>ओका</sup> आपन झुण्ड मैं स एक तु मादा मेमना या एक तु बोकरी पापबलि बरे लावइ चाही। इ उ यहोवा बरे आपन दोख बरे किहेस ह। तब याजक उ व्यक्ति क पापे क पछतावा करी।

7<sup>अगर</sup> कउनो मनई भेड़ी क बच्चा भेंट करइ मैं समरथ नाहीं अहइ तउ ओका दुइ फावता या कबूतरे क दुइ बच्चा यहोवा क भेंटे मैं देइ चाही। इ ओकरे पाप बरे दोखबलि होइ। एक तु पंछी दोखबलि बरे होइ चाही अउ दूसर होमबलि बरे होइ चाही। 8<sup>उ</sup> मनई क चाही कि उ ओन पंछियन क याजक क लगे लइ जाइ। पहिले याजक क दोखबलि क रुप मैं एक पंछी चढ़ावइ चाही। याजक पंछी क गटई क मरोइ देइ। मुला याजक पंछी क दुइ हीसा मैं न बाँटी। 9<sup>तब</sup> याजक क पापबलि क कछू रकत क वेदी क सिरस कईती प जरूर ड़ावइ चाही। तब याजक क बचा भवा रकत क वेदी क आधार प जरूर ड़ावइ चाही। इ एक दोखबलि अहइ। 10<sup>तब</sup> याजक क नेम क मुताबिक होमबलि क रुप मैं यहोवा क दूसर पंछी क भेंट चढ़ावइ चाही। इ तरह याजक उ व्यक्ति क पापे क पछतावा करी अउ उ व्यक्ति छिमा पाइहीं।

11<sup>अगर</sup> कउनो व्यक्ति दुइ फावता या दुइ कबूतर क भेंट चढ़ावइ मैं समरथ न होइ तउ ओका एपा\* क दसवाँ हीसा महीन आटा जरूर भेंट चाही। इ ओकर पापबलि होइ। उ मनई क आटा प तेल नाहीं ड़ावइ चाही। ओका एह प लोहबान नाहीं ड़ावइ चाही काहेकि इ पापबलि बाटइ। 12<sup>मनई</sup> क आटा याजक क लगे जरूर लावइ चाही। याजक एहमौ स मुट्ठी भइ आटा निकारी। इ स्मृति भेंट होइ। याजक यहोवा क उपहार क रूप मैं वेदी क ऊपर आटा क बारी। इ पापबलि अहइ। 13<sup>इ</sup> तरह याजक उ व्यक्ति क पाप क अपराध बरे पछतावा करी अउ उ छिमा पाइहीं। बची भइ आटा याजक बरे अन्नबलि क जइसा ही होइ।”

14<sup>यहोवा</sup> मूसा स कहेस, 15<sup>एक</sup> व्यक्ति गलती स यहोवा क पवितर चीजन मैं स एक तु चीज लइ सकत ह। अइसा हालत मैं उ व्यक्ति क एक तु बिना दोख क भेड़ा लइ आवइ चाही। इ भेड़ा यहोवा बरे ओकर दोखबलि होइ। तोहका उ भेड़ा क कीमत तय करइ बरे पवितर स्थान क सेकेल क अनुसार बइपरइ चाही। 16<sup>उ</sup> व्यक्ति क पवितर चीजन बरे भुगतान जरूर करइ चाही अउर जउने चीजन क उ लिहस ह। ओका कीमत मैं पाँचवाँ हीसा जोरि देइ चाही अउर ओका इ धन याजक क देइ चाही। इ तरह याजक दोखबलि क भेड़ा क जरिये उ मनई क पाप क पछतावा करी अउ उ व्यक्ति छिमा पाइहीं।

17<sup>अगर</sup> कउनो व्यक्ति पाप करत ह अउ जउन चीजन क न करइ क हुकुम यहोवा दिहे अहइ, ओनका करत ह तउ इ बात क कउनो महत्व नाहीं कि उ एको नाहीं जानत। उ मनई अपराधी अहइ अउर आपन पाप क जिम्मेदार होइ।

एपा लगभग दुइ लीटर क बराबर या दुइ क्वार्ट।

18<sup>उ</sup> व्यक्ति क एक तु उचित कीमत क निर्दोख भेड़ा आपन झुण्ड स याजक क लगे लइ आवइ चाही। भेड़ा दोखबलि होइ। इ तरह याजक उ व्यक्ति क उ पाप बरे पछतावा करी जेका उ अनजाने मैं किहेस ह अउ उ छिमा पाइहीं। 19<sup>मनई</sup> अपराधी अहइ चाहे उ इ न जानत होइ कि उ पाप करत बा। एह बरे ओका यहोवा क दोखबलि देइ क होइ।”

### दूसर पाप बरे दोखबलि

6 यहोवा मूसा स कहेस, 2<sup>एक</sup> मनई यहोवा क समन्वा दोखी समुझा जाइ अगर उ एनमौ स कउनो कार्य करत ह: उ एक पड़ोसी क उ सामान जउन ओका देखरेख करइ बरे दीन्ह ग अहइ क बरे छल कइ सकत ह, या उ वस्तु क आपन खुद क लइ ले सकत ह, या उ कछू चोरइ सकत ह, या आपन पड़ोसी क ठग सकत ह, 3<sup>या</sup> ओका कउनो क हेरान चीज मिलइ अउर तब उ ओकरे बारे मैं लबार बोल सकत ह या कउनो मनई कछू करइ क झूठा बचन दइ सकत ह या उ कउनो अइसा अपराध कइ सकत ह जउन दूसर लोग करत ह। 4<sup>अगर</sup> कउनो मनई अइसा पाप ओनमौ स करत ह अउ उ दोखी होत ह, ओका उ जरूर वापिस करइ चाही जउन उ चुराएस ह, या उ लाभ जउन उ ठगी स प्राप्त किहेस ह, या उ सामान जउन देखरेख बरे लिहस ह, या उ खोया भवा सामान जउन उ पाएस ह, क जरूर वापिस करइ चाही। 5<sup>या</sup> जउन कउनो क बारे मैं झूठ बचन दीन्ह ग होइ, उ ओका ओन वस्तुअन क पूरा दाम चुकावइ चाही अउर तब ओका चीज क दाम क पाँचवाँ हीसा अलावा देइ चाही। ओका असली मालिक क धन जरूर देइ चाही। ओका इ उहइ दिन करइ चाही जउने दिन उ दोखबलि लिआवइ।

6<sup>उ</sup> व्यक्ति क दोखबलि याजक क लगे जरूर लिआवइ चाही। इ जरूर झुण्ड स एक भेड़ा होइ चाही। भेड़ा मैं कउनो दोख नाहीं होइ चाही। इ जरूर उहइ दाम क होइ चाही जउन याजक कहइ। इ यहोवा बरे दोखबलि होइ। 7<sup>तब</sup> याजक यहोवा क समन्वा उ मनई क ओन पापन क पछतावा करी अउ उ व्यक्ति सभी चीजन बरे छिमा पाइ जेनका उ किहेस अउ उ दोखी होइ गवा।”

### होमबलि

8<sup>यहोवा</sup> मूसा स कहेस, 9<sup>हारून</sup> अउ ओकरे पूतन क इ हुकुम द्या: होमबलि क वेदी क अगी कुण्ड मैं पूरी रात भिन्सार होइ तलक जरूर राखइ चाही। वेदी क आगी क वेदी प जरूर बरत रहइ चाही। 10<sup>याजक</sup> क सन क उत्तिम रेसा क बना भवा चोगा जरूर पहिरइ चाही। ओका आपन तन स चिपका जाँधिया पहिरइ चाही। तब याजक क होमबलि प पूरी तरह स जरि जाइ क पाछे वेदी स बची भइ राखी क उठावइ चाही। याजक क वेदी क बगल मैं राखी जरूर राखइ चाही। 11<sup>तब</sup> याजक क आप ओढ़ना क उतारइ चाही अउ दूसर ओढ़ना पहिरइ चाही। तब ओका डेरा स बाहेर साफ ठउर प राखी लइ जाइ चाही। 12<sup>मुला</sup> वेदी प आगी क जरूर बरत रहइ चाही। एका बुझइ नाहीं देइ चाही। याजक क रोज भिन्सारे वेदी प काठ जरूर बारइ चाही।



ओका वेदी प होमबलि जरूर रखइ चाही। ओका मेलबलि क चर्बी जरूर बारइ चाही। 13वेदी प आगी लगातर बरत रहइ चाही। एका बुझइ नाहीं चाही।

### अन्नबलि

14“अन्नबलि क इ नेम अहइ कि हारून क पूतन क वेदी क समन्वा यहोवा बरे अन्नबलि जरूर लावइ चाही। 15याजक क अन्नबलि में स मूठी भइ उत्तिम ँँकर आटा, ँँकर तेल अउ ँँकर लोहबान लेइ चाही अउ ँँका वेदी पइ बारइ चाही। इ यहोवा बरे एक खुसबूदार अउर स्मृति भेंट होइ।

16“हारून अउ ओकरे बेटहनन क बची भइ अन्नबलि क खाइ चाही। अन्नबलि एक तरह क अखमीरी रोटी क भेंट अहइ। याजक लोगन क इ रोटी पवित्र ठउर में खाइ चाही। ओनका मिलापवाला तम्बू क आँगन में अन्नबलि खाइ चाही। 17अन्नबलि खमीर क मिलइके जरूर नाहीं पकावइ चाही। मई इ ओनका आपन उपहार में स ओकर हींसा दिहेस ह। इ पापबलि अउ दोखबलि क नाई बहोतइ पवित्र बाटइ। 18हारून क पूतन में स हर एक यहोवा क चढ़ाइ भइ भेंट स खाइ सकत ह। इ तोहरी पीढियन बरे सदा नेम बाटइ। जउन कउनो ँँका छुअब उ जरूर पवित्र होइ चाही।” \*

### याजक लोगन क अन्नबलि

19यहोवा मूसा स कहेस, 20“हारून अउ ओकरे बेटवन क जउन अन्नबलि लइ आवइ चाही उ इ अहइ। ओनका इ उ दिना ही करइ चाही जउने दिन हारून क अभिसेक भवा रहा। ओनका हमेसा एपा क दसवाँ हींसा महीन आटा अन्नबलि बरे जरूर लेइ चाही। ओनका ँँकर आधा भिन्सारे अउ आधा सौँझ में लइ आवइ चाही। 21उत्तिम महीन आटे में तेल जरूर डावइ चाही अउ ओका कड़ाही में जरूर भूँजइ चाही। जब इ भूँज जाइ तब ँँका जरूर भीतर लिआवइ चाही। भेंट पूर्ण रूप स जरूर टूकन में तोड़वइ चाही। तू पचन क यहोवा क चूरमा क भेंट जरूर चढ़ावइ चाही ँँकर सुगन्धि यहोवा क खुस करी।

22“हारून क सन्तानन में स, जउन हारून क जगह पइ अभिषिक्त अहइ, क इ अन्नबलि यहोवा बरे चढ़ावइ चाही। इ नेम हमेसा बरे अहइ। अन्नबलि यहोवा बरे पूर्ण रूप स जरूर जरावइ चाही। 23याजक क हर एक अन्नबलि पूरी तरह जरावइ चाही। एका खाई नाहीं चाही।”

### पापबलि क नेम

24यहोवा मूसा स कहेस, 25“हारून अउ ओकरे पूतन स कहा: पापबलि बरे इ नेम अहइ कि पापबलि क हुवैइ मारा जाइ चाही जहाँ यहोवा क समन्वा होमबलि क मारा जात ह। इ बहोतइ पवित्र बाटइ। 26उ याजक क ँँका खाइ चाही, जउन पापबलि चढ़ावत ह। ओका पवित्र ठउरे प मिलापवाला

**जउन ... चाही** एकर अनुवाद इ तरह कीन्ह जाइ सकत ह: ँँका जउन कउनो छुअइ ओका पहिले पवित्र (सुद्ध) होइ लेइ चाही।

तम्बू क आँगन में एका खाइ चाही। 27कउनो मनई जउन पापबलि क गोस क छुअत ह ओका पवित्र होइ चाही। अगर छिछकारा भवा रक्त कउनो मनई क ओढ़ना प पड़त ह तउ ओन ओढ़नन क जरूर धोइ चाही। तू पचन क ओन ओढ़नन क सिरिफ एक पवित्र ठउरे में ही धोवइ चाही। 28अगर पापबलि कउनो माटी क बासन में उबाली जाइ, तउ उ बासन क जरूर फोड़ देइ चाही। अगर पापबलि क काँसा क बासन में उबाला जाइ, तउ बासन क जरूर माँजा जाइ अउ पानी स धोवा जाइ।

29“याजक परिवारे क कउनो मनई पापबलि क खाइ सकत ह। इ सबन्त पवित्र बाटइ। 30मुला अगर पापबलि क रक्त पवित्र ठउर प पछतावा करइ बरे मिलापवाला तम्बू में लइ जाइ। तउ पापबलि क आगी में बारि देइ चाही। याजकन क उ पापबलि जरूर नाहीं खाइ चाही।

### दोखबलि

7 “दोखबलि खातिर इ नेम बाटइ। इ सबइ स पवित्र अहइ। 2याजक क दोखबलि क उहइ ठउरे पइ मारइ चाही जउने प उ सबइ होमबलि क मारत ह अउ ओका ँँकर रक्त क वेदी क चारिहुँ कइँती जरूर डावइ चाही।

3“याजक क दोखबलि क सारी चर्बी चढ़ावइ चाही। ओका चर्बी भरी पूँछ, भीतरी भाग क ढकइवाली चर्बी, 4दुइनउँ गुर्दन अउ ओकरे ऊपर क चर्बी, पुट्ठन क चर्बी जरूर भेंट करइ चाही। अउ करेजा क संग क झिल्ली जउन ओकर संग चिपकी भइ चर्बी अहइ गुर्दन क संग जरूर हटावइ चाही। 5याजक क वेदी प ओन सबहि चीजन क जरूर बारइ चाही। इ यहोवा बरे उपहार भेंट होइ। इ दोखबलि अहइ।

6“याजक परिवार स हर एक मरद दोखबलि खाइ सकत ह। एका बहोतइ पवित्र ठउर पइ खाइ चाही इ बहोतइ पवित्र बाटइ। 7दोखबलि क सबइ नेम पापबलि क नेम क जइसा अहइ। इ भेंट उ याजक क होइ जउन ऐसे ओकर बरे पछतावा करी। 8उ याजक, जउन बलि चढ़ावत ह, चमड़ा भी होमबलि स लइ सकत ह। 9हर एक अन्नबलि चढ़ावइवाला याजक क होत ह। याजक ओन सबइ अन्नबलि क लइ लेइ जउन चूल्हा में पकाई गइ होई, या कड़ाही में पकाइ गइ होई या तावा प पकी होई। 10अन्नबलि हारून क बेटवन क होइ। ओसे कउनो फर्क नाहीं पड़ी कि उ सबइ झुरान या तेल स सनी भइ अहइ। हारून क बेटवन याजक क नाई भागीदार होईहीं।

### मेलबलि

11“इ सबइ मेलबलि क नेम अहइ, जेका कउनो मनई यहोवा क चढ़ावत ह: 12कउनो व्यक्ति मेलबलि आपन एहसान परगट करइ बरे लई आइ सकत ह। अगर एक व्यक्ति एहसान परगट करइ बरे बलि लिआवत ह तउ ओका तेल स सना भवा अखमीरी फुलका, अखमीरी केक अउ तेल स सना भवा उत्तिम आटा क फुलका भी लिआवइ चाही। 13उ व्यक्ति क आपन मेलबलि बरे खमीरी रोटियन क साथ आपन बलि जरूर लइ आवइ चाही। इ मेलबलि

अहइ जेका एक व्यक्ति यहोवा बरे एहसान देखावइ बरे लिआवत ह। 14ओन रोटियन में स एक तु उ याजक क दुआरा लइ जाइ जउन मेलबलि क रक्त क छिछकारत ह। 15इ मेलबलि क गोस उहइ दिन खावा जाइ चाही जउने दिन उ चढ़ावा जाइ। एक व्यक्ति परमेस्सर बरे एहसान परगट करइ बरे इ भेंट चढ़ावत ह। मुला तनिकउ भी गोस दुसर भिन्सारे बरे जरूर नाहीं बचइ चाही।

16“एक व्यक्ति मेलबलि यहोवा क उपहार देइ क इरादे स लइ आइ सकत ह या उ वादा क पूरा करइ बरे जेका उ पिहले परमेस्सर स किहस ह। अगर इ सच अहइ तउ बलि उहइ दिन खाई जाइ चाही जउने दिन उ ऐंका चढ़ावइ। जदि कछू बच जाइ तउ अगले दिना जरूर खाइ लेइ चाही। 17मुला अगर इ बलि क कछू गोस फिन भी तीसरे दिन बरे बचि जाइ तउ ओका आगी में बारि देइ चाही। 18अगर कउनो मनई मेलबलि क गोस तीसरे दिन भी खात ह, तउ यहोवा उ मनई स खुस नाहीं होइ। यहोवा उ बलि बरे कउनो सम्मान नाहीं देई। इ बलि एक असुद्ध वस्तु बन जाई। अगर कउनो उ बलि क खात ह तउ उ आपन पाप बरे उत्तरदायी होइ।

19“लोगन क अइसा गोस भी नाहीं खाइ चाही जेका कउनो असुद्ध वस्तु छुइ लेइ। ओनका इ गोस क आगी में बारि देइ चाही। उ पचे सबहिं मनइयन जउन सुद्ध होई इ मेलबलि क गोस खाइ सकत हीं। 20मुला अगर एक व्यक्ति अपवितर अहइ अउ यहोवा क मेलबलि में स कछू गोस खाइ लेइ, तउ उ व्यक्ति क ओकरे लोगन स निकाल दीन्ह जाहीं।

21“अगर एक व्यक्ति मानव जाति क असुद्ध चीज क या एक असुद्ध जनावरन क या कउनो असुद्ध घृणित वस्तु क छुअत ह अउ अगर उ यहोवा बरे मेलबलि क कछू गोस खाइ लेत ह तउ उ व्यक्ति क ओकरे लोगन में स जरूर निकाल कइ दीन्ह जाइ।”

22यहोवा मूसा स कहेस, 23“इस्त्राएल क मनइयन क सलाह देइ कि तू लोगन क गाइ, भेड़ी अउ बोकरी क चर्बी नाहीं खाइ चाही। 24तू पचे उ पसु क चर्बी क प्रयोग कइ सकत ह जउन खुद ही मरा होइ या दूसर जनावरन क जरिये मार दीन्ह ग होइ। मुला तू उ पसु क चर्बी कबहुँ नाहीं खाया। 25जदि कउनो मनई अइसा पसु क चर्बी खात ह जउन यहोवा क उपहार क रूप चढ़ावा ग होइ, तउ उ लोग क ओकरे मनइयन स निकाल दीन्ह जाइ।

26“तू पचे चाहे जहाँ कहुँ भी रहा, तू पचन क कउनो पंछी या पसु क रक्त कबहुँ नाहीं खाइ चाही। 27अगर कउनो व्यक्ति कछू रक्त खात ह, तउ उ व्यक्ति क ओकरे लोगन स निकाल दीन्ह जाइ।”

### उत्तोलन बलि क नेम

28यहोवा मूसा स कहेस, 29“इस्त्राएल क लोगन स कहा: अगर कउनो व्यक्ति यहोवा बरे मेलबलि लइ आवइ, तउ उ मनई क उ भेंट क एक हींसा यहोवा क जरूर देइ चाही। 30ओका उ भेंट क उ हींसा आपन हाथे में यहोवा बरे लइके चलइ चाही। ओका पसु क चर्बी अउ छाती याजक

बरे लइके चलइ चाही। छाती क यहोवा क समन्वा ऊपर हिलावा जाइ चाही। इ उत्तोलन बलि होइ। 31तब याजक क वेदी पइ चर्बी बारइ चाही। मुला पसु क छाती हारून अउ ओकर पूतन क होइ। 32मेलबलि स दाहिन जाँघ हारून क पूतन में स याजक क जरूर देइ चाही। 33मेलबलि में स दाहिन जाँघ उ याजक क होइ जउन मेलबलि क चर्बी अउ रक्त मेलबलि बरे चढ़ावत ह। 34मई (यहोवा) उत्तोलन बलि क छाती अउ मेलबलि क दाहिन जाँघ इस्त्राएल क मनइयन स अंगीकार किहे हउँ अउ मई ओन चीजन क हारून अउ ओकरे बेटवन क देत अहउँ। इस्त्राएल क लोगन क जरिये इ नेम क सदा-सदा पालन कीन्ह जाइ चाही।”

35यहोवा बरे दीन्ह गइ उपहार हारून अउ ओकरे पूतन क अहइ, जब कबहुँ हारून अउ ओकरे पूतन यहोवा क याजक क रूप में सेवा करत हीं तब उ पचे बलि क उ हींसा पावत हीं। 36जउने समइ यहोवा याजकन क अभिसेक किहेस उहइ समइ उ पचे इस्त्राएल क लोगन क उ सबइ हींसा याजकन क देइ क हुकुम दिहेस। उ सबइ हींसा हमेसा याजकन क ओकर भाग क रूप में दीन्ह जाइ क अहइ।

37इ सबइ होमबलि, अन्नबलि, पापबलि, दोखबलि, याजकन क नियुक्ति, अउ मेलबलि क नेम अहइ। 38यहोवा सिनाई पहाड़े पइ इ सबइ नेम मूसा क दिहस। यहोवा इ सबइ नेम ओह दिन दिहस जउने दिन उ इस्त्राएल क मनइयन क सिनाई रेगिस्तान में यहोवा बरे आपन भेंट लिआवइ क हुकुम दिहे रहा।

### मूसा हारून अउ ओकरे पूतन क सेवा करइ बरे अभिसेक करत ह

8 यहोवा मूसा स कहेस, 2“हारून अउ ओकर पूतन ओकरे वस्त्रन, अभिसेक क तेल, पापबलि बरे बर्धा, दुइ भेड़ी अउ अखमीरी रोटी क डलिया क संग लइ आवा 3अउर सबहिं लोगन क मिलापवाला तम्बू क दुआरे प जमा करा।”

4मूसा उहइ किहस जउन यहोवा ओका हुकुम दिहस। मनइयन मिलापवाला तम्बू क दुआरे प एक संग मिलेन। 5तब मूसा लोगन स कहेस, “इ उहइ बाटइ जेका करइ क यहोवा हुकुम दिहे अहइ।”

6तब मूसा हारून अउ ओकरे पूतन क लइ आवा। उ ओनका पानी स धोएस। 7तब मूसा हारून क कमीज पहिराएस। मूसा हारून क चारिहुँ कइँती एक तु पेटी बाँधिस। तब मूसा हारून क चोगा पहिराएस। तब ओह पइ एपोद\* पहिराएस। उ ओह पइ सुन्दर बुना भवा पेटी बाँधिस। 8तब मूसा हारून क निआव क थइला पहिराएस। तब मूसा निआव क थइला मैं ऊरीम अउ तुम्मीम धरेस। 9मूसा हारून क मूँडे पइ पगड़ी भी बाँधिस। मूसा पगड़ी क अगले भाग पइ सोना क पवितर पतर क मुकुट बाँधिस। मूसा इ यहोवा क आदेस क मुताबिक किहस।

10तब मूसा अभिसेक क तेल लिहस अउ पवितर तम्बू अउ एहमाँ क सबहिं चीजन प छिछकारेस। इ तरह मूसा ओनका पवितर किहस। 11मूसा अभिसेक क कछू तेल वेदी

एपोद एक खास अंगरख जेका महा याजक पहिरत रहा।

पड़ सात दाईं छिछकारेस। मूसा वेदी, ओकरे उपकरण अउ तस्तरियन क अभिसेक किहस। मूसा खोरा अउ ओकरे आधार पड़ भी तेल छिछकारेस। इ तरह मूसा ओनका पवित्र किहस। 12तब मूसा अभिसेक क कछू तेल क हारून क मूँड़े प डाएस। इ तरह उ हारून क पवित्र किहस। 13तब मूसा हारून क बेटवन क लिआएस अउ ओनका कमीज पहिराएस। उ ओन पड़ पेटियन क बाँधेस। तब उ ओनके मूँड़े पड़ पगड़ियन क बाँधेस। मूसा इ सबइ सब वइसेन ही किहस जइसे यहोवा हुकुम दिहे रहा।

14तब मूसा पापबलि क बर्धा लिआएस। हारून अउ ओकर पूतन आपन हाथे क पापबलि क बर्धा क मूँड़े प धरेन। 15तब मूसा बर्धा क मारेस अउ रक्त जमा किहस। मूसा आपन अँगुरियन स तनिक रक्त लिहस अउ वेदी क सबहिं सिंगियन पड़ छिछकारेस। इ तरह मूसा वेदी क बलि बरे सुद्ध किहस। तब मूसा वेदी क आधार पड़ रक्त क उड़ेस। इ तरह मूसा वेदी क सुद्ध किहस अउ एको पापन क प्रायश्चित करइ बरे तइयार किहस। 16मूसा बर्धा क भितरी भाग स सबइ चर्बी लिहस। मूसा दुइनउँ गुर्दा अउ ओनकइ ऊपर क चर्बी क संग करेजा स चिपकइ वाली चर्बी लिहस। तब उ ओनका वेदी प बारेस। 17मुला मूसा बर्धा क चाम, ओकर गोस अउ बदन क बेकार भितरी भाग क डेरा क बाहेर लइ गवा। मूसा डेरा क बाहेर आगी में ओन चीजन क जराएस। मूसा इ सबइ वइसा ही किहस जइसा यहोवा हुकुम दिहे रहा।

18मूसा होमबलि क भेड़ा क लइ आवा। हारून अउ ओकर बेटवन आपन हाथ भेड़ा क मूँड़े प धरेन। 19तब मूसा भेड़ा क मारेस। उ वेदी क चारिहुँ कइँती रक्त छिछकारेस। 20मूसा एको टूका में काटेस। तब मूसा ओकर मूँड़े, टूका अउ चर्बी क जराएस। 21मूसा भितरी भागन अउ गोड़े क पानी स धोएस। तब मूसा समूचइ भेड़ा क वेदी पड़ जराएस। इ होमबलि रही। इ यहोवा क बरे एक ठु सुगन्धि उपहार रही। मूसा यहोवा क हुकुम क मुताबिक उ सबइ काम किहस।

22तब मूसा दूसर भेड़ा क लइ आवा। इ भेड़ा क उपयोग हारून अउ ओकरे बेटवन क याजक नियुक्त करइ बरे कीन्ह गवा। हारून अउ ओकर बेटवन आपन आपन हाथन क भेड़ा मूँड़े प धरेन। 23तब मूसा भेड़ा क मारेस। उ भेड़ा क तनिक रक्त हारून क काने क निचले सिरे, दाहिन हाथे क अंगूठा अउ ओकर दाहिन गोड़े क अंगूठा पड़ लगाएस। 24तब मूसा हारून क बेटवन क वेदी क निचके लिआवा। मूसा तनिक रक्त ओनके दाहिन कान क निचले सिरे, दाहिन हाथ क अंगूठा, अउ ओनके दाहिन गोड़े क बड़का अंगुरि पड़ लगाएस। तब मूसा वेदी क चारिहुँ कइँती रक्त उड़ेस। 25मूसा चर्बी, चर्बी भरी पूँछ, भितरी भाग क सारी चर्बी, करेजा स चिपकइवाली चर्बी, दुइनउँ गुर्दन अउ ओनकइ चर्बी अउ दाहिन जाँघ क लिहस। 26अखमीरी रोटी क एक ठु टोकरी हर रोज यहोवा क अगवा धरा जात रहेन। मूसा टोकरी में स एक ठु तेल स सनी रोटी, अउर एक अखमीरी फुल्का लिहस। मूसा ओन टूकन क चर्बी अउ भेड़ा क दाहिन जाँघे प धरेस। 27तब मूसा ओन सबहिं क हारून अउ

ओकरे बेटवन क हाथे में धरेस। मूसा ओन टूकन क यहोवा क आगे उत्तोलन बलि क रूप में हाथन क ऊपर उठावाएस। 28तब मूसा ओन चीजन क हारून अउ ओकरे बेटवन क हाथन स लिहस। मूसा ओनका वेदी प होमबलि क ऊपर जराएस। इ तरह उ बलि हारून अउ ओकरे पूतन क याजकन नियुक्त करइ बरे रही। इ यहोवा क खुस करइ बरे एक ठु सुगन्धि उपहार रही। 29तब मूसा उ भेड़ा क छाती लिहस अउ यहोवा क समन्वा उत्तोलनबलि बरे हिलाएस। याजकन क नियुक्त करइ बरे भेड़ा में स मूसा क हीसा रहा। इ ठीक वइसा ही रहा जइसा यहोवा मूसा क हुकुम दिहे रहा।

30मूसा अभिसेक क कछू तेल अउ वेदी पड़ क कछू रक्त लिहस। मूसा ओहमा स कछू हारून अउ ओकरे ओढ़नन पड़ छिछकारेस अउ कछू हारून क ओन पूतन प जउन ओकरे संग रहेन अउ कछू ओनकइ ओढ़नन प छिछकारेस। इ तरह मूसा हारून, ओकरे वस्त्रन, ओकरे पूतन अउ ओनकइ ओढ़नन क पवित्र बनाएस।

31तब मूसा हारून अउ ओकरे बेटवन स कहेस, “का तू पचन क मोर आदेस\* याद अहइ? मई कहे रहेउँ, ‘हारून अउ ओकर पूत इ सबइ चीजन क खइहीं।’ एह बरे याजकन नियुक्ति संस्कार क याजक स रोटी अउ गोस ल्या। मिलापवाला तम्बू क दुआरे पड़ उ गोस क पकावा। तू पचे उ गोस अउ उ रोटी क उहइ ठउर प खाब्या। 32अगर कछू गोस या रोटी बचि जाइ तउ ओका जराइ द्या। 33याजक नियुक्ति संस्कार सात दिना तलक चली। तू पचे मिलापवाला तम्बू स तब तक नाहीं जाब्या जब तक तोहार याजक नियुक्ति संस्कार क समइ पूरा नाहीं होइ जात। 34यहोवा ओन काम क करइ क आदेस दिहे रहा जउन आज कीन्ह गए। उ तू पचन क आपन क प्रायश्चित करइ बरे इ आदेस दिहे रहा। 35तू पचन क मिलापवाले तम्बू क दुआर प सात दिना तलक लगातार दिन अउ रात जरूर रहइ चाहीं। अउर तू पचे यहोवा क आदेस क पालन करब्या एँह बरे तू नाहीं मरिब्या। यहोवा मोका इ आदेस दिहे रहा।”

36एँह बरे हारून अउ ओकरे पूतन उ सब कछू किहन जेका करइ क आदेस यहोवा मूसा क दिहे रहा।

### परमेस्सर क जरिये याजकन क स्वीकृति

9 अठवें दिन, मूसा हारून अउ ओकरे पूतन क बोलाएस। उ इस्त्राएल क बुजुर्गन (नेता लोगन) क भी बोलाएस। 2मूसा हारून स कहेस, “आपन झुण्ड में स एक ठु बछवा अउ एक ठु भेड़ा ल्या। ओन में कउनो दोख नाहीं होइ चाहीं। बछवा पापबलि बरे होइ अउ भेड़ा होमबलि बरे होइ। इ सबइ गोरुअन क यहोवा क समन्वा बलि द्या। 3इस्त्राएल क लोगन स कहा, ‘पापबलि बरे एक ठु बकरा ल्या। एक बछवा अउ एक मेमना होमबलि बरे ल्या दुइनउँ एक बरिस क होइ चाहीं। इ सबइ जनावरन में कउनो दोख

**मोर आदेस** हिआँ मोर आदेस स मतलब अहइ मोरे जरिये दीन्ह गवा यहोवा क आदेस मूसा क बचन, यहोवा क बचन अहइ काहेकि उ यहोवा क प्रवक्ता अहइ। एह बरे हिआँ मूसा यहोवा क आदेस क मोर आदेस कहेस ह।

नाहीं होइ चाही। 4एक साँड़ अउ एक भेड़ा मेलबलि बरे ल्या। ओन जनावरन क अउर तेल स मिली भइ अन्नबलि ल्या अउ ओनका यहोवा क भेंट चढ़ावा। काहेकि आजु यहोवा क महिमा तोहरे समन्वा परगट होइ।”

5एह बरे सबहिं लोग मिलापवाला तम्बू में आएन अउर उ पचे ओन सबहिं चीजन क लियाएन जेनके बरे मूसा आदेस दिहे रहा। सबहिं लोग यहोवा क आगे ठाड़ भएन। 6मूसा कहेस, “तू पचे उहइ किहया ह जेका यहोवा हुकुम दिहस। तू लोग यहोवा क महिमा देखब्या।”

7तब मूसा हारून स कहेस, “जा अउर उ करा जेकरे बरे यहोवा हुकुम दिहे रहा। वेदी क निअरे जा अउर पापबलि अउ होमबलि चढ़ावा। इ सबइ आपन अउर लोगन क पापन क प्रायश्चित्त बरे करा। तू लोगन क लाई भइ बलि ल्या अउर ओका यहोवा क अर्पित करा। इ ओनके पापन बरे प्रायश्चित्त होइ।”

8एह बरे हारून वेदी क लगे गवा। उ बछवा क पापबलि बरे मारेस। इ पापबलि खुद ओकरे अपने बरे रही। 9तब हारून क पूतन हारून क लगे रक्त लिआएन। हारून आपन अंगुरियन क रक्त में डाएस अउ वेदी क सींगन पइ ऐंका लगाएस। तब हारून वेदी क आधार पइ रक्त उड़ेरेस। 10हारून पापबलि स चर्बी, गुर्दन अउ करेजा क संग चिपका भवा झिल्ली जमा किहेस। उ ओन सब क वेदी प जराएस। उ उहइ प्रकार किहस जउने तरह यहोवा मूसा क आदेस दिहे रहा। 11तब हारून डेरा क बाहर गोस अउ चाम क बारेस।

12एकरे पाछे, हारून होमबलि बरे जनावरन क मारेस। हारून क पूत रक्त क हारून क लगे लिआएन अउ हारून वेदी क चारिहुँ कइँती रक्त डाएस। 13हारून क बेटवन ओन टूकन अउ होमबलि क मूँड़ हारून क दिहस। तब हारून ओन सबन क वेदी पइ बारेस। 14हारून होमबलि क भितरी भागन क अउ गोड़े क धोएस अउ उ ओनका वेदी प बारेस।

15तब हारून लोगन क बलि लावा। उ लोगन क बरे पापबलि वाला बोकॅरा क मारेस। उ बोकरा क पहिले क नाई पापबलि बरे चढ़ाएस। 16हारून होमबलि लावा अउ उ उ बलि चढ़ाएस। वइसेन ही जइसे यहोवा आदेस दिहेस। 17हारून अन्नबलि क वेदी क लगे लिआवा। उ मूठी भइ अनाज लिहस। अउ भिन्सारे क नित्य बलि क संग उ वेदी प धरेस।

18हारून लोगन बरे मेलबलि क साँड़ अउ भेड़ा क मारेस। हारून क बेटवन रक्त क हारून क लगे लिआएन। हारून इ रक्त क वेदी क चारिहुँ कइँती उड़ेरेस। 19हारून क बेटवन साँड़ अउ भेड़ा क चर्बी भी लाएन। उ पचे साथ ही साथ चर्बी भरी पूँछ, भितरी भाग क ढकड़वाली चर्बी, गुर्दन अउ करेजन स चिपका भवा झिल्ली भी लिआएन। 20हारून क बेटवन चर्बी क इ सबइ भागन क साँड़ अउ भेड़ा क छाती प धरेस। हारून चर्बी क भागन क लइके ओका वेदी पइ बारेस। 21मूसा क आदेस क मुताबिक हारून छातियन अउ दाई जाँघ क उतोलन भेंट बरे यहोवा क समन्वा हाथन में ऊपर उठाएस।

22तब हारून आपन हाथ लोगन कइँती उठाएस अउ ओनका आसीबीद दिहस। हारून पापबलि, होमबलि अउ मेलबलि क चढ़ावइ क पाछे वेदी स तरखाके उतरि आवा।

23मूसा अउ हारून मिलापवाला तम्बू में गएन। ओकर पाछे हुआँ स बाहेर आइके उ पचे लोगन क आसीबीद दिहन। अउर यहोवा क तेज सबहिं लोगन क समन्वा परगट भवा। 24यहोवा स आगी परगट भइ अउ उ वेदी पइ होमबलि अउ चर्बी क जराएस। सबहिं लोगन जब इ लखेन तउ उ पचे चिल्लानेन अउ उ पचे धरती पइ भराइके प्रणाम किहेन।

### परमेस्सर क ज्वाला क जरिये बिनास

**10** फिन तब हारून क बेटवन नादाब अउ अबीहू धूप जरावइ बरे तस्तरियन क लिहन, ओह में आग लगाएन अउ धूप क आगी पइ धरेन। तउ उ पचे एक तु अनोखी आगी\* क उपयोग यहोवा क समन्वा किहन जेकरे प्रयोग क हुकुम उ ओनका नाही दिहे रहा। 2एह बरे यहोवा स ज्वाला परगट भइ अउ उ नादाब अउ अबीहू क बरबाद कइ दिहस।

3तब मूसा हारून स कहेस, “यहोवा कहत ह, ‘जउन मोरे लगे आवइ ओनका मोर संग जरूर पवितरता क बर्ताव करइ चाही। अउ सबहिं लोगन क मोका सम्मान देइ चाही।’” हारून खामोस रहा।

4हारून क चाचा उज्जीएल क दुइ पूत रहेन। उ पचे मीसाएल अउ एलसाफान रहेन। मूसा ओन बेटवन स कहेस, “पवितर ठउर क समन्वा जा। आपन चचेरा भाइयन क ल्हासे क उठावा अउ ओनका डेरा क बाहेर लइ जा।”

5एह बरे मीसाएल अउ एलसाफान मूसा क आदेस मानेन। उ पचे नादाब अउ अबीहू क ल्हासन क बाहेर लइ आएन। नादाब अउ अबीहू तब तलक आपन खास अंगरखा पहिरे रहेन।

6तब मूसा हारून अउ ओकरे दूसर पूतन एलीआजार अउ ईतामार स बात किहस। मूसा ओनसे कहेस, “कउनो सोक परगट जिन करा। आपन ओढ़ना जिन फाड़ा या आपन बासन क जिन बिखरावा। तू मरब्या नाहीं अउ यहोवा क गुस्सा तोहार समूचइ धर्मिक सभा क भंग नाही करी। इस्राएल क समूचा राष्ट्र तोहार सम्बंधी अहइ। उ पचे यहोवा क जरिये नादाब अउ अबीहू क बारइ क बारे में रोइ सकत हीं। 7मुला तू लोगन क मिलापवाला तम्बू नाहीं तजइ चाही। अगर तू पचे बाहेर जाब्या तउ मर जाब्या। काहेकि यहोवा क अभिसेक क तेल तू पचन पइ अहइ।” तउ हारून, एलीआजार अउ ईतामार मूसा क आग्या मानेन।

8तब यहोवा हारून स कहेस, 9“तोहका अउ तोहरे पूतन दाखरस या सराब\* उ समइ नाहीं पिअइ चाही जब तू पचे मिलापवाला तम्बू में आवा। अगर तू पचे अइसा करब्या तउ

**अनोखी आगी** सम्भवतः एकर अरथ इ होइ सकत ह कि उ पचे उ आगी मन्दिर क बाहेर लाएस रहा वेदी क आगी क उपयोग करइ क बजाए। बलि क नेम क अनुसार।

**सराब** एक ठू पेय जेका अनाज क खमीर स बनावा जात ह। इ प्राचीन मिस्र आम रहा।

मर जाब्या। इ नेम तोहरी सारी पीढ़ियन में हमेसा चलत रही। 10तू पचन क, पवितर अउ अपवितर तथा सुद्ध अउ असुद्ध चिजियन में फरक करइ चाही। 11यहोवा मूसा क आपन नेम दिहस अउ मूसा ओन नेमन क लोगन बरे दिहस। हारून, तोहका ओन सबहिं नेमन क सिच्छा लोगन क देइ चाही।”

12मूसा हारून अउ ओकरे बचा भवा दुई पूतन एलीआज़ार अउर ईतामार स बात किहस। मूसा कहेस, “कछू अन्नबलि यहोवा क उपहार में अबहुँ तलक बची भइ अहइ। तू लोग अन्नबलि क उ हीसा खाइ सकत ह। मुला तू लोगन क एको बिना खमीर मिलाए खाइ चाही। एको वेदी क लगे खा। काहेकि उ भेंट बहोतइ पवितर बाटइ। 13उ उ भेंटन क हीसा अहइ, जउन यहोवा बरे उपहार क रूप में भेंट चढ़ाइ ग रहेन। जउन नेम मई तोहका बताएउँ ह, उ सिखावत ह कि उ हीसा तू अउर तोहार पूतन क बाटइ। मुला तोहका एको पवितर ठउरे प खाइ चाही।

14“तू, तोहार बेटवन अउ बिटियन भी उत्तोलन बलि स छाती क अउ मेलबलि स जाँघि क खाइ सकिहीं। इ सबइ क तोहका जरूर पवितर ठउरे पइ खाइ चाही। मुला तोहका इ सबइ क सुद्ध जगह पइ खाइ चाही। काहेकि इ सबइ मेलबलि में स मिली अहइ। इस्राएल क लोग इ बलि यहोवा क देत हीं। ओन जनावरन क कछू भाग क लोग खात हीं मुला छाती अउ जाँघ तोहार हीसा अहइ। 15लोगन क आपन चर्बी क भेंट जरूर लिआवइ चाही। ओनका मेलबलि क जाँघ अउ उत्तोलन बलि क छाती जरूर लिआवइ चाही। ओका यहोवा क समन्वा जरूर उत्तोलन करइ चाही। इ बलि तोहार हीसा होइ। इ तोहार अउ तोहार गदेलन क होइ। यहोवा क आदेस क मुताबिक बलि क उ भाग हमेसा तोहार होइ।”

16मूसा पापबलि क बोकरा क बारे में पूछेस। मुला ओका पहिले ही बारि दीन्ह गवा रहा। मूसा हारून क बाकी बेटवन अलावा एलीआज़ार अउ ईतामार पइ बहोतइ कोहाइ गवा। मूसा कहेस, 17“तू लोगन क इ बोकरा पवितर ठउरे पइ खाइ क रहा। इ बहोतइ पवितर बाटइ। तू लोगन एँका यहोवा क समन्वा काहे नाहीं खाया? यहोवा इ तोहका धार्मिक सभा क पापन क छिमा बरे ओकर प्रायश्चित करइ बरे दिहस। 18देखा! तू उ बोकरे क रक्त पवितर जगह क भीतर नाहीं लिआया। तू पचन क इ बोकरा पवितर ठउरे प खाइ क रहा जइसा कि मई आदेस दिहेउँ ह।”

19मुला हारून मूसा स कहेस, “लखा आज उ पचे आपन पापबलि अउ होमबलि यहोवा क समन्वा लाएन। मुला तू जानत अहा कि आजु मोरे संग का भवा ह! का तू इ समझत अहा कि अगर मई पापबलि क आज खाब तउ खुस होइ नाहीं।” \* 20जब मूसा इ सुनेस तउ सहमत होइ गवा।

### माँस भोजन क नेम

**11** यहोवा मूसा अउ हारून स कहेस, 2“इस्राएल क लोगन स कहा: इ सबइ पसु अहई जेनका तू खाइ

का तू ... नाहीं हारून आपन दुइ पूतन क मउत स एँतना जियाद परेसान रहा कि पापबलि क नाहीं खाइ सका रहा।

सकत ह: 3अगर पसु क खुर दुइ हिस्सा में बँटा होइ अउ उ पसु जुगाली करत होइ तउ तू उ पसु क गोस खाइ सकत ह।

### अइसे पसु जेनकइ गोस नाहीं खाइ चाही

4-6“कछू पसु जुगाली\* करत हीं, मुला ओनकइ खुर नाहीं फाट होतेन। तउ अइसे पसु क जिन खा। ऊँट, सापान अउ खरहा वइसेन दर्जा क अहई। एह बरे उ सबइ तोहरे बरे असुद्ध अहई। 7दुसर पसु दुइ हिस्सा में बँटा भवा खुरवाला अहई, मुला उ पचे जुगाली नाहीं करतेन। ओन पसुअन क जिन खा। सुअर वाइसेन ही अहई, एह बरे उ सबइ असुद्ध अहई। 8ओन पुसुअन क गोस जिन खा। ओनके लहासे क जिन छुआ। उ सबइ तोहरे बरे असुद्ध अहई।

### समुद्री भोजन क नेम

9“अगर कउनो जनावर समुदर या नदी में बसत ह अउ ओकरे पखना अउ परत होत हीं तउ तू उ जनावर क खाइ सकत ह। 10-11मुला जदि जनावर समुदर या नदी में बसत ह अउ ओकरे पखना अउ परत नाहीं होतिन तउ उ जनावर क तोहका नाहीं खाइ चाही। तोहका उ तरह जनावरन क घिनौना समुझइ चाही। उ तरह क पसु क गोस जिन खा। इहाँ तक कि ओकर लहासे क जिन छुआ। 12तोहका पानी क हर एक पसु क जेकरे पखना अउ परत नाहीं होतिन असुद्ध जनावर में समझइ चाही। तोहका उ तरह क समुदर क जनावरन क घिनौना चिजियन में स समुझइ चाही।

### अभोज्य पंछिन

13“तोहका नीचे लिखे भए पंछिन क भी घिनौना पंछी समझइ चाही। इन पंछिन में स कउनो क जिन खा: उकाब, गीध, सिकारी पंछी, 14चील, सबहिं तरह क बाज नाउँ क पंछी, 15सब तरह क काला पंछी, 16सुतुर्मुर्ग, सींगवाला कुचकुचवा, समुद्री जलमुर्गा, सबहिं प्रकार क बाज, 17कुचकुचवा, समुद्री कौआ, बड़का कुचकुचवा, 18जलमुर्गा, मछरी खाइवाला पेलिकन नाउँ क खेत जल पंछी, समुद्री गीध, 19हंस, सब तरह क सारस, कठफोड़वा अउ चमगादड़।

### कीड़ा पतंगा खाइ क नेम

20“अउ सबहिं अइसे उड़इवाला कीड़ा पतंगा जउन चार गोड़े प चलत इ सबइ तोहार लइ घिनौना अहइ। 21मुला अगर उड़इवाला कीड़ा पतंगा क पखना होत हीं अउ चार गोड़े प चलत ह अगर ओकरे गोड़े क ऊपर टांगन में अइसे जोड़ अहई कि उ जमीन प उछरि सकइ तउ तू ओन पतंगन क खाइ सकत ह। 22इ सबइ बाटेन जेनका तू खाइ सकत ह: हर किसिम क टिडियन, हर किसिम क उड़इवाला

**जुगाली** कछू पसु गाइ क तरह एक स जियाद पेट वाला होत हीं। पहिले पेट में चार लील लीन्ह जात ह अउ ओकर कछू हिस्सा बचि जात ह। पाछे उ हिस्सा पसु आपन मुँह में लिआवत ह अउ फुन चबात ह। इ चार क चबाब जुगाली कहा जात ह।

टिड्डियन, हर तरह क झींगुर, हर तरह क घास चट कइ देइवाला टिड्डन।

23“मुला दूसर उ सबहिं उड़इवाला कीड़ा पतंगन जउन चार गोड़े प चलि सकत हीं, तोहरे बरे घिनौना प्राणी अहइ। 24उ सबइ कीड़ा पतंगन तोहका सबन क असुद्ध करिहीं। कउनो मनई जउन मरे भए कीड़ा पतंगन क छुई, साँझ तलक असुद्ध रही। 25अगर कउनो मनई ओन मरे भए किरवन में स कउनो क उठावत ह तउ उ मनई क आपन ओढ़ना धोइ लेइ चाही। उ मनई साँझ तलक असुद्ध रही।

### घिनौना पसुअन क विसय में अन्य नेम

26-27“कछू जनावरन क खुर होत ह मुला उ खुर दुइ भाग में फटि नाही होतेन। कछू जनावर जुगाली नाही करतेन। कछू जनावरन क खुर नाही होतेन, उ आपन पंजे पइ चलतहीं। इ सबइ प्रकार क जनावरन असुद्ध अहइँ। अगर एक व्यक्ति ओकर लहासे क छुअत ह तउ उ व्यक्ति साँझ तलक असुद्ध रहीं। 28अगर एक व्यक्ति ओकर लहासे क उठावत ह तउ उ व्यक्ति क आपन ओढ़ना क जरूर धोवइ चाही। उ व्यक्ति साँझ तलक असुद्ध रहीं। उ सबइ जनावरन तू पचनक बरे असुद्ध अहइ।

### रेगंडवालन पसुअन क बारे में नेम

29“इ सबइ रेगंडवालन पसु तू पचन बरे असुद्ध अहइँ: छछून्दर, चूहा, सबहिं तरह क गिरगिट, 30छिपकली, मगरमच्छ, गिरगिट, रेगिस्तानी गोहेर, अउ रंग बदलत गिरगिट। 31इ सबइ रेगंडवाला पसु तोहरे बरे असुद्ध अहइँ। कउनो मनई जउन ओन मरे भएन क छुई साँझ तलक असुद्ध रही।

### घिनौना पसुअन क बारे में नेम

32“अगर कउनो असुद्ध पसुअन में स एक मरा भवा पसु कउनो चीज प गिर पड़इ तउ उ चीज असुद्ध होइ जाइ। इ काठ, चाम, कपड़ा, सोक ओढ़ना या कउनो भी औजार होइ सकत ह। जउन कछू भी उ होइ ओका पानी स धोवइ चाही। इ साँझ तलक असुद्ध रही। तबहिं इ फुन सुद्ध होइ जाइ। 33अगर कउनो असुद्ध पसुअन में स एक मरा भवा माटी क कटोरा में गिर जाइ तउ कटोरा क कउनो भी चीज असुद्ध होइ जाइ। तू पचन क कटोरा जरूर तोड़ देइ चाही। 34अगर असुद्ध माटी क कटोरा क पानी कउनो खइया या पेय खोरा पइ पड़इ तउ उ असुद्ध होइ जाइ। 35अगर कउनो मरे भए घिनौने पसु क कउनो हिस्सा कउनो चीजे पइ आइ पड़इ तउ उ चीज सुद्ध नाही रही। एका टूका टूका कइ देइ चाही। चाहे उ चूल्हा होइ या कइही। उ सबइ तू पचन क बरे हमेसा असुद्ध रहीं।

36“कउनो सोता या कुआँ, जेहमाँ पानी रहत ह, सद्ध बना रही। मुला कउनो व्यक्ति जउन कउनो मरे भए असुद्ध जनवार क छुइ उ असुद्ध होइ जाइ। 37अगर ओन घिनौने मरे पसुअन क कउनो हिस्सा बोवा जाइवाला बिआ पइ आइ पड़इ तउ भी उ सुद्ध ही रही। 38मुला बोवइ बरे तू पचे कउनो बिआ प पानी डावत ह अउ तब अगर मरे असुद्ध

पसु क कउनो हिस्सा ओन बिअन पइ आइ पड़इ तउ उ सबइ बिआ तोहरे बरे असुद्ध अहइँ।

39“अउर भी, अगर भोजन बरे कउनो पसु जेका तू बइपरत ह अपने आप मरि जाइ तउ जउन मनई उसके मरे सरीर क छुअइ, साँझ तलक असुद्ध रही। 40जउन व्यक्ति मरे भए पसु क गोस खाइ, ओका आपन ओढ़ना जरूर धोवइ चाही। उ मनई साँझ तलक असुद्ध रही। जउन व्यक्ति मरे पसु क सरीर उठावइ ओका भी आपन ओढ़ना जरूर धोवइ चाही। इ व्यक्ति साँझ तलक असुद्ध रही।

41“हर एक अइसा पसु जउन धरती प रगत ह, उ ओन पसुअन में स एक बाटइ, जेका यहेवा खाइ क मना किहे अहइ। 42तू पचन क अइसे कउनो रेगंडवाले पसुअन क जरूर खाइ नाही चाही जउन पेटे क बल रगत ह या चारउँ गोड़न प चलत ह, या जेकरे बहोत स गोड़ अहइँ। उ पचे तोहरे बरे असुद्ध पसु अहइँ। 43ओन पसुअन स आपन क गन्दा जिन बनावा अउ ओनके बरे आपन क असुद्ध जिन बनावा। 44काहेकि मई यहेवा तोहार परमेस्सर अहउँ। मई पवितर अहउँ। एह बरे तू पचन क आपन क पवितर रखइ चाही। ओन घिनौने रेगंडवाला पसुअन स आपन क घिनौना जिन बनावा। 45मई तू लोगन क मिस्र स लइ आवा अहउँ। मई इ एह बरे किहेउँ कि तू लोग मोर खास जन बना रहि सका। मई इ एह बरे किहेउँ कि मई तोहार परमेस्सर बन सकउँ। मई पवितर अहउँ, एह बरे तोहे सबन क पवितर रहब अहइ।”

46उ सबइ नेम सबहिं गोरुअन, पंछियन अउ भुइँया क दूसर पसुअन बरे अहइ। उ सबइ नेम समुद्धर में रहइवालन सबहिं पसुअन अउ भुइँया पइ रेगंडवालन सब पसुअन बरे अहइँ। 47उ सबइ उपदेस एह बरे अहइँ कि लोग सुद्ध अउ असुद्ध पसुअन में अन्तर कइ सकइँ। इ तरह लोग जनिहीं कि उ पचे कउन सा पसु खाइ सकत हीं अउर कउन सा नाही खाइ सकत हीं।”

### नई महतारिन बरे नेम

12 यहेवा मूसा स कहेस, 2“इस्त्राएल क लोगन स इ नेमन क कहा: अगर कउनो स्त्री एक ठु लरिका क जन्मत ह तउ उ स्त्री सात दिना तलक असुद्ध रही। इ ओकरे मासिक धर्म क समइ असुद्ध होइ क तरह होइ। 3अठएँ दिन लरिका क खतना होइ चाही। 4उ आपन सुद्धीकरण क टेमें क लइके तैंतीस दिना पाछे तलक असुद्ध रहीं। उ स्त्री क उ समइ में कछू नाही छुअइ चाही जउन पवितर अहइ। ओका पवितर ठउरे में तब तलक नाही जाइ चाही जब तलक ओकरे सुद्धीकरण क समइ पूरा न होइ जाइ। 5मुला अगर स्त्री लरिकी क जन्मत ह तउ महतारी क मासिक धर्म क समइ क तरह उ दुइ हफ्ता तलक असुद्ध रही। उ आपन सुद्धीकरण क टेमें स लइके छहसठ दिना पाछे असुद्ध रही।

6“नई महतारी जउन अबहिं बच्चा जनम दिहे अहइ, चाहे उ बच्चा लरिका होय या लरिकी तउ अइसी महतारी क सुद्धीकरण क समइ पूरा होइ क पाछे ओका मिलापवाला तम्बू में खास भेंटन लइ आवइ चाही। ओका ओन भेंटन क

मिलापवाला तम्बू क दुआर पइ याजक क जरूर देइ चाही। ओका एक बरिस क मेमना होमबलि बरे अउ एक तु फारखा या कबूतर क बच्चा पापबलि बरे लइ आवइ चाही। 7-8अगर स्त्री मेमन देइ में असमर्थ होइ तउ उ दुइ फारखा या दुइ कबूतरे क बच्चा लिआइ सकत ह। एक तु पंछी होमबलि बरे अउ एक तु पापबलि बरे होइ। याजक यहोवा क सामने ओनका भेंट करी। इ तरह उ ओकरे पाप बरे प्रायश्चित करी। तब उ आपन रक्त क हानि स सुद्ध होइ। इ सबइ नेम ओन स्त्रियन बरे अहई जउन एक तु लरिकी या लरिकी क जन्मत ह।”

### गंभीर चर्मरोग क बारे में नेम

**13** यहोवा मूसा अउ हारून स कहेस, <sup>2</sup>“कउनो व्यक्ति क चाम पइ भयंकर सूजन या खजुरी या सफेद दाग होइ सकत हीं। अगर घाव चर्मरोग क नाई देखाइ पड़ई तउ उ मनई क याजक हारून या ओकरे कउनो याजक पूतन क लगे लिआवा जाइ चाही। <sup>3</sup>याजक लोगन क मनई क चर्म क घाव क देखइ चाही। अगर घाव क बार सफेद होइ गवा होई अउर घाव मनई क चाम स जियादा गहिर मालूम होइ तउ इ भयंकर चर्मरोग बाटइ। जब याजक मनई क जाँच खतम करइ तउ ओका एलान करइ चाही कि मनई असुद्ध अहइ।

<sup>4</sup>“कबहुँ कबहुँ कउनो मनई क चाम पइ कउनो सफेद दाग होइ जात ह मुला दाग चाम स गहिर नाहीं मालूम होत। अगर उ सच होइ तउ याजक उ मनई क सात दिना बरे दूसर लोगन स अलग करी। <sup>5</sup>सतएँ दिन याजक क उ मनई क फुन स जरूर जाँच करइ चाही। अगर घाव में कउनो बदलाव नाहीं आएस ह। अउर चाम पइ नाहीं फइलेस ह। तउ याजक क दूसर सात दिना बरे उ व्यक्ति क दूसर लोगन स जरूर अलगाइ देइ चाही। <sup>6</sup>तब याजक क उ व्यक्ति क सात दिना पाछे जरूर जाँच करइ चाही। जदि दाग गहिर होइ गवा ह अउ चाम पइ न फइला होइ तब याजक क जरूर एलान करइ चाही कि उ व्यक्ति सुद्ध अहइ। इ सिरिफ खुरंड अहइ। तब उ व्यक्ति क आपन ओढ़ना धोवइ चाही अउ उ फुन स सुद्ध होइ चाही।

<sup>7</sup>“मुला अगर मनई याजक क फिन अपने आप क सुद्ध बनावइ बरे देखाइ लिहे होइ अउ ओकरे पाछे चर्मरोग चमड़ी पइ फइलइ लागइ तउ उ मनई क फुन याजक क लगे आवइ चाही। <sup>8</sup>याजक क जाँच कइके देखइ चाही। अगर घाव चाम पइ फइला होइ तउ याजक क एलान करइ चाही कि उ मनई असुद्ध अहइ अर्थात् ओका कउनो भयानक रोग अहइ।

<sup>9</sup>“अगर मनई क भयानक चर्मरोग भवा होइ तउ ओका याजक क लगे लइ आवा जाइ चाही। <sup>10</sup>याजक क उ मनई क जाँच कइके देखइ चाही। अगर चाम पइ सफेद दाग होइ अउ ओहमाँ सूजन होइ, उ जगह क बार सफेद होइ ग होई अउर अगर हुअँ घाव कच्चा होइ। <sup>11</sup>तउ इ कउनो भयानक चर्मरोग अहइ जउन उ मनई क बहोत समइ स अहइ। ऐह बरे याजक क उ मनई क असुद्ध घोसित कइ देइ चाही। याजक उ मनई क सिरिफ तनिक समइ क बरे ही दूसर

मनइयन स न अलगाई। काहेकि उ जानत ह कि उ मनई असुद्ध अहइ।

<sup>12</sup>“अगर कबहुँ चर्मरोग मनई क समूचइ सरीर में फइल जाइ, उ चर्मरोग उ मनई क मूँडे स गोड़े तलक ढक लेइ, <sup>13</sup>अउर याजक लखइ कि चर्मरोग समूचइ सरीर पइ इ तरह ढके अहइ कि उ मनई क पूरा सरीर ही सफेद होइ ग अहइ तउ याजक क ओका सुद्ध घोसित कइ देइ चाही। <sup>14</sup>मुला अगर मनई क चर्म घाव जइसा कच्चा होइ तउ उ सुद्ध नाहीं अहइ। <sup>15</sup>जब याजक कच्चा चाम लखइ, तब ओका घोसित कइ देइ चाही कि मनई असुद्ध अहइ। कच्चा चाम सुद्ध नाहीं अहइ। इ भयानक चर्मरोग अहइ।

<sup>16</sup>“अगर कच्चा चाम फुन सफेद होइ तउ उ मनई क याजक क लगे आवइ चाही। <sup>17</sup>याजक क उ मनई क जरूर जाँच करइ चाही। अगर व्याधि सफेद होइ गवा अहइ तउ याजक क घोसित करइ चाही कि रोग ग्रस्त व्यक्ति सुद्ध अहइ। तउ उ मनई सुद्ध अहइ।

<sup>18</sup>“होइ सकत ह कि कउनो व्यक्ति क सरीर क चाम पइ कउनो फोड़ा होइ जउन कि ठीक होइ ग रहा।<sup>19</sup>अउर उ जगह पइ सफेद सूजन, या लाली लिए भए सफेद दाग जाहिर हो जात ह अउ तब एका याजक क जरूर देखावइ चाही। <sup>20</sup>याजक क ओका निहारइ चाही। अगर सूजन चमड़ी स गहिर बाटइ अउ एह पइ क बार सफेद होइ ग अहई तउ याजक क एलान करइ चाही कि उ मनई असुद्ध बाटइ। उ दाग भयानक चर्मरोग अहइ। इ फोड़ा क भितरे स फूट पड़ा बाटइ। <sup>21</sup>मुला अगर याजक उ जगह क लखत ह अउ ओह पइ सफेद बार नाहीं अहई अउर दाग चमड़ी स गहिर नाहीं अहइ, मुला धुँधला बाटइ तउ याजक क उ मनई क सात दिन बरे अलग कइ देइ चाही। <sup>22</sup>अगर दाग क जियादा हिस्सा चमड़ी पइ फइलत ह तब याजक क एलान करइ चाही कि मनई असुद्ध अहइ। इ छूत रोग अहइ। <sup>23</sup>मुला अगर सफेद दाग अपनी जगह बना रहत ह, फइलत नाहीं तउ उ पुराना फोड़ा क सिरिफ घान अहइ। याजक क एलान करइ चाही कि मनई सुद्ध अहइ।

<sup>24-25</sup>“कउनो व्यक्ति क चाम जरि सकत ह। अगर कच्चा चाम सफेद या लाली लिए भए सफेद दाग में बदल जाइ, तउ याजक क ऐका जाँच करइ चाही। अगर उ दाग चमड़ी स गहिर मालूम होइ अउ उ जगह क बार सफेद होइ जाई तउ इ अत्यधिक व्याधिक चर्मरोग अहइ। जउन जरा भवा में स फूट पड़ा अहइ। तउ याजक क उ व्यक्ति क असुद्ध घोसित करइ चाही। इ भयंकर चर्म रोग अहइ। <sup>26</sup>मुला याजक इ जगह क लखत ह अउर सफेद दाग में सफेद बार नाहीं अहई अउ दाग चमड़ी स गहिर नाहीं अहइ, मुला हल्का बा तउ याजक क ओका सात दिना बरे अलग करइ चाही। <sup>27</sup>सतएँ दिन याजक क उ मनई क फुन देखइ चाही। अगर दाग चमड़ी पइ फइलइ तउ याजक क एलान करइ चाही कि मनई असुद्ध अहइ। इ भयंकर चर्मरोग अहइ। <sup>28</sup>मुला अलग सफेद दाग चमड़ी पइ न फइलइ, मुला धुँधला होइ तउ इ जरइ स पइदा भइ सूजन अहइ। याजक क उ मनई क सुद्ध घोसित करइ चाही। इ सिरिफ बर जाइ क चीन्हा अहइ।

29“कउनो मनई या मेहरारू क मूँड़े या दाढ़ी क चाम पइ कउनो छूत रोग होइ सकत ह। 30याजक क उ छूत क रोग (व्याधि) क जरूर लखइ चाही। अगर छूत क रोग चमड़ी स गहिर मालूम होइ अउ एकरे चारिहूँ कइँती क बार पियार अउर पतला अहा तउ याजक क एलान करइ चाही कि उ व्यक्ति असुद्ध अहइ। इ मूँड़े या दाढ़ी क बुरा चर्मरोग अहइ। 31अगर रोग चमड़ी स गहिर न मालूम होइ, अउर एहमौँ कउनो करिया बार न होइ तउ याजक क ओका सात दिन बरे अलग कइ देइ चाही।

32“सतएँ दिन याजक क छूत क रोगी क फुन जाँच करइ चाही। अगर रोग फइला नाहीं बाटइ अउर बार पियार नाहीं होइ अउ जदि रोग चमड़ी स गहिर नाहीं अहइ, 33तउ उ मनई क बार जरूर काट देइ चाही। मुला ओका रोगवाले जगह क बार नाहीं कतवइ चाही। याजक क रोग लखइ बरे उ व्यक्ति क अउर सात दिन बरे अलगाइ देइ चाही। 34सतएँ दिन याजक क रोगी क निहारइ चाही। अगर रोग चमड़ी में फइला नाहीं अहइ अउर इ चमड़ी स गहिर नाहीं मालूम होत ह तउ याजक क एलान करइ चाही कि मनई सुद्ध अहइ। मनई क आपन ओढ़ना धोवइ चाही अउ सुद्ध होइ जाइ चाही।

35“मुला अगर मनई क सुद्ध होइके जाइके पाछे चमड़ी में रोग फइलत ह। 36तउ याजक क फिन मनई क लखइ चाही। अगर रोग चमड़ी में फइलत ह तउ याजक क पियार बाल लखइ क जरूरत नाहीं मनई असुद्ध अहइ। 37मुला अगर याजक इ समुझत ह कि रोग क बढ़व रुकि गवा बाटइ अउ एहमौँ करिया बार जमत अहइँ तउ रोग नीक होइ गवा अहइ। मनई सुद्ध अहइ। याजक क एलान करइ चाही कि मनई सुद्ध अहइ।

38“जदि कउनो मनई या मेहरारू क चाम पइ सफेद दाग होइँ, 39तउ याजक क ओन दागन क लखइ चाही। अगर मनई क चमड़ी क दाग धुँधला होइँ, तउ रोग सिरिफ हानि न पहुँचावइवाली फोड़िया अहइ। उ मनई सुद्ध अहइ।

40“कउनो मनई आपन मूँड़े क बार क झरते हुए लख सकत हीं। उ सुद्ध अहइ। इ सिरिफ गंजापन बाटइ। 41कउनो मनई क मूँड़े क बार झरि सकत हीं। उ सुद्ध अहइ। इ दूसर तरह क गंजापन अहइ। 42मुला ओकरे मूँड़े क चमड़ी पइ लाल सफेद फोड़िया बाटिन तउ इ भयानक चर्मरोग अहइ। 43याजक क अइसे व्यक्ति क जाँच करइ चाही। अगर चमड़ी क व्याधि सरीर पइ उ चाम रोग की नाई ललछौँइ सफेद अहइ। 44तउ उ मनई क मूँड़े क चमड़ी पइ भयानक चर्मरोग अहइ। मनई असुद्ध अहइ, याजक क एलान करइ चाही।

45“अगर कउनो मनई क भयानक चर्मरोग होइ तउ उ मनई क दूसर लोगन क होसियार करइ चाही। उ मनई क जोर से “असुद्ध! असुद्ध!” कहइ चाही, उ मनई क ओढ़नन क, सिलाइ स फाड़ देइ चाही। उ मनई क आपन बारन क सँवारइ नाहीं चाही अउ उ मनई क आपन मुँह ढँकइ चाही। 46जउन मनई असुद्ध होइ ओहमौँ छूत क रोग हमेसा रही। उ मनई असुद्ध अहइ। ओका अकेल्ले रहइ चाही। ओकरे निवास डेरा स बाहेर होइ चाही।

47-48“कछू ओढ़नन पइ फफूँदी\* लागि सकत ह। ओढ़ना सन या ऊनी होइ सकत ह। ओढ़ना बुना भवा या कढ़ा भवा होइ सकत ह। फफूँदी कउनो चमड़ा या चमड़ा स बना भवा कउनो चीज पइ होइ सकत ह। 49अगर फफूँदी हरिरअर या लाल होइ तउ ओका याजक क देखँवइ चाही। 50याजक क फफूँदी लखइ चाही। ओका उ चीज क सात दिन तलक अलग जगह पइ धरइ चाही। 51-52सतएँ दिन, याजक क फफूँदी लखइ चाही। इ महत्वपूर्ण नाहीं बा कि ओढ़ना क ताना बाना में फफूँदी अहइ या नाहीं इ महत्वपूर्ण नाहीं बा कि चमड़ा क प्रयोग काहे बरे कीन्ह गवा रहा। अगर फफूँदी फइलत ह तउ उ कपड़ा या चाम असुद्ध बाटइ। उ फफूँदी असुद्ध अहइ। याजक क उ कपड़ा या चमड़ा क बारि देइ चाही।

53“अगर याजक देखइ कि फफूँदी फइली नाहीं तउ उ कपड़ा या चाम धोवा जाइ चाही। इ महत्वपूर्ण नाहीं कि इ चाम अहइ या कपड़ा या कपड़ा क ताना बाना में फफूँदी अहइ या नाहीं। ऐका धोवइ चाही। 54याजक क मनइयन क इ हुकुम देइ चाही कि उ पचे चाम या कपड़ा क टूका क धोवइँ, तबहि याजक ओढ़नन क अउर सात दिन बरे अलग करइ। 55उ समइ क पाछे याजक क फुन देखइ चाही। अगर फफूँदी ठीक वइसेन ही देखाइ देत ह तउ उ ओढ़ना असुद्ध अहइ। इ महत्वपूर्ण नाहीं अहइ कि छूत फइली नाहीं अहइ। तू पचन क उ कपड़ा या चमड़ा बारि देइ चाही।

56“मुला अगर याजक उ चाम या कपड़ा क लखत ह कि फफूँदी मुरझान बा तउ याजक क चमड़ा या कपड़ा क फफूँदी स लाग दाग क चमड़ा या कपड़ा स फाड़ि देइ चाही। इ महत्वपूर्ण नाहीं कि कपड़ा क ताना बाना में फफूँदी अहइ या नाहीं। 57मुला फफूँदी उ चमड़ा या कपड़ा पइ लौटि सकत ह। अगर अइसा होत ह तउ फफूँदी बढ़ति अहइ। उ चमड़ा या कपड़ा क बारि देइ चाही। 58मुला अगर धोवइ क पाछे फफूँदी न लउटइ, तउ उ चाम या कपड़ा सुद्ध अहइ। एकर कउनो महत्व नाहीं कि कपड़ा क ताना बाना में फफूँदी अहइ या नाहीं। उ कपड़ा फुन धोवइ चाही अउर उ सुद्ध होइ।”

59चाम या कपड़ा पइ फफूँदी क बारे में फइसला करइ बरे इ सबइ नेम अहइ कि उ सुद्ध अहइ या असुद्ध। ऐकर कउनो महत्व नाहीं कि कपड़ा क ताना बाना में फफूँदी अहइ या नाहीं।

### भयानक चर्मरोगी क सुद्ध करइ क नेम

**14** यहोवा मूसा स कहेस, 2“इ सबइ ओन लोगन बरे नेम अहइँ जेनका भयानक चर्मरोग रहा अउर जउन नीक होइ गएन। इ सबइ नेम उ मनई क सुद्ध बनावइ बरे अहइँ।

“याजक क उ मनई क लखइ चाही जेका भयानक चर्मरोग अहइ। 3याजक क उ मनई क लगे डेरा क बाहेर जाइ चाही। याजक क इ लखइ क कोसिस करइ चाही कि

**फफूँदी** एक तरह क काई जउन गर्मी अउ नमीवाली जगह पइ ओढ़नन, चमड़न या काठ में लग जात ह। हिब्रू सब्ब क अरथ “कोढ़” या “भयानक चर्मरोग” भी बाटइ।



उ चर्म रोग नीक होइ ग अहइ। 4अगर व्यक्ति स्वस्थ अहइ तउ याजक ओका इ करइ क कही। ओका दुइ जिअत सुद्ध पंछी, एक देवदारु क लकड़ी, लाल कपड़ा क एक ठु टूका अउर एक ठु जूफा\* क पौधा जरूर लइ आवइ चाही। 5याजक क बहत भए पानी क ऊपर माटी क एक ठु खोरा में एक ठु पंछी क मारइ क हुकुम देइ चाही। 6तब याजक दूसर जिअत पंछी, देवदारु क लकड़ी, लाल कपड़ा क टूकन अउ जूफा क पउथा स्वीकार करी। याजक क जिअत पंछी अउ दूसर चीजन क बहत भए पानी क ऊपर मारा गवा पंछी क रक्त में बोरइ चाही। 7याजक उ व्यक्ति प भयानक चर्मरोग स उपचार करइ बरे सात दाई रक्त छिरकी। तब याजक क जरूर घोसित करइ चाही कि उ मनई सुद्ध अहइ। तब याजक क खुला मैदान में जाइ चाही अउ जिअत पंछी क अजाद करइ देइ चाही।

8“एकरे पाछे उ व्यक्ति क आपन ओढ़ना जरूर धोवइ चाही। ओका आपन सब बार क मूंडन करावइ चाही अउ पानी स नहाइ चाही। उ पवित्र होइ जाइ। तब उ व्यक्ति सिबर में जाइ सकी। मुला ओका आपन खेमा क बाहेर सात दिन तलक रहइ चाही। 9सातएँ दिन ओका आपन सारा बार काट डवइ चाही। ओका आपन मूँड, डाढ़ी, भौहन क सबहिं बार कटवाइ लेइ चाही। तब ओका आपन कपड़ा धोवइ चाही अउ पानी स नहाइ चाही। तब उ मनई सुद्ध होइ।

10“अठएँ दिन उ व्यक्ति क दुइ भेड़ी क नर बच्चन लेइ चाही जेहमों कउनो दोख न होइ। ओका एक बरिस क एक ठु मादा मेमना भी लेइ चाही जेहमों कउनो दोख न होइ। ओका एपा क तीन दसवाँ हींसा तेल मिला भवा उत्तिम आटा लेइ चाही। इ आटा अन्नबलि बरे अहइ। उ व्यक्ति क दुइ तिहाइ पिण्ट\* जैतून क तेल भी लेइ चाही। 11याजक क एलान करइ चाही कि उ मनई सुद्ध अहइ। याजक क उ मनई अउ ओकरी बलि क मिलापवाला तम्बू क दुआरे पइ यहोवा क समन्वा लइ आवइ चाही। 12याजक मेमनन में स एक क दोखबलि क रुप में चढ़ाई। उ मेमना क अउर उ तेल क यहोवा क समन्वा उत्तोलन बलि क रुप में चढ़ाई। 13तब याजक नर मेमना क उहइ पवित्र ठउर पइ मारी जहाँ उ पचे पापबलि अउ होमबलि क मारत हीं। दोखबलि, पापबलि क समान अहइ। इ याजक क बाटइ। इ बहोतइ पवित्र अहइ।

14“याजक दोखबलि क कछू रक्त सुद्ध कीन्ह जाइवाला व्यक्ति क दाहिने काने क लौ में कछू रक्त दाहिने हाथ क अंगूठा अउ दाहिन गोड़े क अंगूठा पइ लगाइ। 15याजक कछू तेल भी लेइ अउ आपन बाई हथेली पइ डार्इ। 16तब याजक आपन दाहिन हाथे क अँगुरियन अपन बाएँ हाथे क हथेली में धरे भए तेल में बोरी। उ आपन अँगुरी क प्रयोग कछू तेल यहोवा क समन्वा सात दाई छिरकइ बरे करी। 17याजक आपन हथेली स कछू तेल सुद्ध कीन्ह जाइवाला मनई क दाहिन काने क लौ पइ लगाई। याजक कछू तेल उ

मनई क दाहिन हाथे क अंगूठे अउ दाहिन गोड़ क अंगूठे पइ लगाइ। याजक कछू तेल दोखबलि क रक्त पइ लगाई। 18याजक आपन हथेली में बचा भवा तेल सुद्ध कीन्ह जाइवाला मनई क मूँडे प लगाइ। इ तरह याजक उ मनई क पाप क यहोवा क समन्वा प्रायश्चित करी।

19“ओकरे पाछे याजक पापबलि चढ़ाई अउ मनई क पापक प्रायश्चित करी। जेहसे उ सुद्ध होइ जाई। एकरे पाछे याजक होमबलि बरे पसु क मारी। 20एँह बरे याजक होमबलि अउ अन्नबलि क वेदी पइ चढ़ाई। इ तरह याजक उ मनई क पापक प्रायश्चित करी अउ उ मनई सुद्ध होइ जाई।

21“अगर व्यक्ति गरीब अहइ अउ ओन बलियन क देइ में असमर्थ बाटइ तउ ओका एक ठु नर मेमना दोखबलि क रुप में लेइ चाही। इ उत्तोलन बलि उ व्यक्ति क पापन क प्रायश्चित्य करइ बरे होइ। ओका एपा क दसवाँ हींसा तेल स मिला भवा उत्तिम महीन आटा लेइ चाही। इ आटा अन्नबलि क रुप में उपयोग में आई। मनई क दुइ तिहाई पिण्ट जैतून क तेल। 22अउर दुइ फाखता या दुइ ठु कबूतरे क बच्चा लेइ चाही। इ सबइ चिजियन क देइ में गरीब लोग समर्थ होइहीं। एक पंछी पापबलि बरे होई अउ दूसर होमबलि बरे होई।

23“अठएँ दिन, उ मनई ओन चिजियन क याजक क लगे मिलापवाला तम्बू क दुआर पइ लिआई। उ सबई चिजियन यहोवा क समन्वा बलि चढ़ाई जइहीं जेहसे मनई सुद्ध होइ जाई। 24याजक, दोखबलि क मेमना अउर तेल भी लेई अउर ओनका यहोवा क समन्वा उत्तोलन बलि क रुप में चढ़ाई। 25तब याजक दोखबलि क मेमना मारी। याजक दोखबलि क कछू रक्त लेई। याजक एहमों स कछू रक्त सुद्ध कीन्ह जाइवाला व्यक्ति क दाहिन कान क लौ पइ कछू रक्त इ व्यक्ति क दाहिन हाथे क अंगूठा पइ अउर कछू रक्त दाएँ गोड़ क अंगूठा पइ लगाई। 26याजक इ तेल में स कछू आपन बाई हथेली में भी डार्इ। 27याजक आपन दाहिन हाथे क अँगुरी क उपयोग आपन हथेली क तेल क यहोवा क समन्वा सात दाई छिरकइ बरे करी। 28तब याजक आपन हथेली स कछू तेल उहइ जगह पइ लगाइ जहाँ उ पहिले लगाए रहा। उ आपन हथेली स कछू तेल सुद्ध कीन्ह जाइवाला व्यक्ति क दाहिन काने क लौ पइ लगाई। याजक इ तेल में स कछू तेल मनई क दाहिन हाथे क अंगूठा अउ ओकरे दाहिन गोड़े क अंगूठा पइ लगाई। याजक दोखबलि क रक्त लगा ठउरे पइ एहमों स कछू तेल लगाई। 29याजक क आपन हथेली क बचा भवा तेल क सुद्ध कीन्ह जाइवाला मनई क मूँडे पइ डवइ चाही। इ तरह याजक यहोवा क समन्वा उ मनई क पापन क प्रायश्चित करी।

30“तब मनई फखतन या कबूतरे क बच्चन में स एक क बलि चढ़ाई। ओका उहइ चढ़ाई चाही जेका गरीब व्यक्ति देइ में समर्थ होइ। 31ओका दुइनउँ पंछियन में स एक क पापबलि क रुप में चढ़ावइ चाही अउ दूसर पंछी क होमबलि क रुप में ओका ओनकइ अन्नबलि क संग भेंट चढ़ावइ चाही। इ तरह याजक यहोवा क समन्वा उ मनई क पाप क प्रायश्चित करी। उ मनई सुद्ध होइ जाई।”

**जूफा** कटिजर क पौधा एँकर नरम पाती अउ साखन क प्रयोग सुद्ध करइ क प्रक्रिया में खून या पानी छिछकारइ में कीन्ह जात रहा।

**दुइ तिहाइ पिण्ट** “एक लोजा।”

32इ सबइ भयानक चर्मरोग क नीक होइ क पाछे कउनो एक मनई क सुद्ध करइ क नेम अहई। इ सबइ नेम ओन मनइयन बरे अहई जउन सुद्ध होइ बरे साधारिन बलियन क खर्चा नहीं उठाइ सकतेन।

### घरे में लग फफूँदी क नेम

33यहोवा मूसा अउ हारून स इ भी कहेस, 34“मई तोहरे लोगन क कनान देस देत अहउँ। तोहरे लोग इ भुईया पइ जइहीं। उ समइ में होइ सकत ह, कछू लोगन क घसन में फफूँदी लगी होइ। 35तउ उ घर क मालिक क याजक क लगे आइके कहइ चाही, ‘मई आपन घरे में फफूँदी जइसी कउनो चीज देखेउँ ह।’

36“तब याजक क आदेस जरूर देइ चाही कि घर क खाली कइ दीन्ह जाइ। लोगन क याजक क फफूँदी लखइ जाइके पहिले ही इ जरूर करी। इ तरह घरे क सबहिं चिजियन क याजक क असुद्ध नहीं कहइ पड़ी। लोगन क घर क खाली कइ दीन्ह जाइ क पाछे याजक घरे क अन्दर जाइ अउर देखइ। 37याजक फफूँदी क लखी। अगर फफूँदी घरे क दीवारे पइ हरिअर या लाल रंग क चकत्ता बनाइ दिहे अहई अउर इ दीवारन क सतह स गहिरा मालूम पड़त अहइ, 38तउ याजक क घरे स बाहेर निकरि आवइ चाही। अउ सात दिना तलक घर जरूर बन्द कइ देइ चाही।

39“सतएँ दिन, याजक क हुआँ लौटइ चाही अउर घरे क जाँच करइ चाही। अगर घरे क दीवार पइ फफूँदी फइलि गइ होइ 40तउ याजक क लोगन क हुकुम देइ चाही कि उ पचे फफूँदी क सात पाथरन क उखाड़ि देई अउर ओनका दूर बहाइ देई। ओनका ओन पाथरन क सहर स बाहेर विसेस असुद्ध जगह पइ लोकावइ चाही। 41तब याजक क पूरे घर क भितरे से खुरचवावइ चाही। लोगन क उ लेप क जेका उ पचे खुरचेन ह, लोकाइ देइ चाही। ओनका उ लेप सहर क बाहेर खास असुद्ध जगह पइ डावइ चाही। 42तबहिं उ मनई क नवा पाथर दीवारे में लगावइ चाही अउ ओका ओन दीवारन क नवा लेप स ढाँकि देइ चाही।

43“होइ सकत ह कउनो मनई पुरान पाथरन अउ लेप क निकारिके नवा पाथरन अउ लेप क लगावइ अउ होइ सकत ह उ फफूँदी उ घरे में फिन परगट होइ। 44तब याजक क आइके उ घरे क जाँच जरूर करइ चाही। अगर फफूँदी घरे क अन्दर में फइलि गइ अहइ, तउ इ रोग अहइ जउन दूसरी जगहन में जल्दी स फइलत ह। एह बरे घर असुद्ध अहइ। 45उ मनई क उ घर गिराइ देइ चाही। ओनका सारा पाथर, लेप अउ दूसर लकड़ी क टूकन क सहर स बाहेर असुद्ध जगह पइ लइ जाइ चाही। 46कउनो मनई जउन ओहमों जात ह, साँझ तलक असुद्ध रही। 47अगर कउनो मनई ओहमों खाना खात ह या ओहमों सोवत ह तउ उ मनई क आपन ओढ़ना धोवइ चाही।

48“घरे में नवा पाथर अउ लेप लगाए क पाछे याजक क घरे क जाँच करइ चाही। अगर फफूँदी घरे में नहीं फइली अहइ तउ याजक एलान करी कि घर सुद्ध अहइ। काहेकि फफूँदी खतम होइ ग अहइ।

49“तब घरे क सुद्ध करइ बरे याजक क दुइ तु पंछी, एक देवदारु क लकड़ी, एक लाल कपड़ा क टूका अउ जूफा क पउथा लेइ चाही। 50याजक बहत भए पानी क ऊपर माटी क एक तु खोरा में एक पंछी मारी। 51तब याजक देवदारु क लकड़ी, जूफा क पउथा, लाल कपड़ा क टूका अउ जिअत पंछी क लेई। याजक बहत पानी क ऊपर मारा भए पंछी क रक्त में ओन चीजन क बोरी। तब याजक उ रक्त क उ घरे पइ सात दाई छिरकी। 52इ तरह याजक ओन चीजन क उपयोग घर क सुद्ध करइ बरे करी। 53याजक खुला मैदान में सहर क बाहेर जाई अउर पंछी क उड़ाई देई। इ तरह याजक घरे बरे प्रायश्चित करी। घर सुद्ध होइ जाइ।”

54उ सबइ नेम भयानक चर्मरोग क, 55घर या कपड़ा क टूकन पइ क फफूँदी क बारे में अहई। 56उ सबइ नेम सूजन, फुंसियन या चर्मरोग पइ सफेद दाग सम्बंध रखत हीं। 57उ सबइ नेम सिखावत हीं कि चीजन कब असुद्ध अहई अउ कब सुद्ध अहई। उ सबइ नेम उ तरह क बेरामी स सम्बंध रखत हीं।

### सरीर स बहइवाला स्त्राव क नेम

15 यहोवा मूसा अउ हारून स कहेस, 2“इस्त्राएल क लोगन स कहा: जब कउनो मनई क सरीर स धात क स्त्राव होत ह तब उ व्यक्ति असुद्ध होत ह। 3उ धात सरीर स खुला बहत ह या सरीर ओका बहइ स रोक देत ह एँकर कउनो महत्व नहीं।

4“अगर धात तजइवाला बिछउना पइ सोवत रहत ह तउ उ बिस्तर असुद्ध होइ जाइ। जउने जगह प उ बइठत ह उ असुद्ध होइ जाइ। 5अगर कउनो मनई ओकरे बिछउना क छुअत ह तउ ओका आपन ओढ़नन क धोवइ चाही अउ पानी स नहाइ चाही। उ साँझ तलक असुद्ध रही। 6अगर कउनो मनई उ चीज प बइठत ह जउने पइ धात तजइवाला मनई बइठा होइ तउ ओका आपन ओढ़ना धोवइ चाही अउर बहत पानी में नहाइ चाही। उ साँझ तलक असुद्ध रही। 7अगर कउनो मनई उ मनई क छुअत ह जउन धात क तजे बाटइ तउ ओका आपन ओढ़नन क धोवइ चाही अउ बहत पानी में नहाइ चाही। उ साँझ तलक असुद्ध रही।

8“अगर धात तजइवाला मनई कउनो सुद्ध मनई पइ छूवत ह तउ सुद्ध मनई क आपन ओढ़ना धोवइ चाही अउ नहाइ चाही। उ मनई साँझ तलक असुद्ध रही। 9पसु पइ बइठइ क काठी जउने प धात तजइवाला मनई बइठा होइ तउ उ असुद्ध होइ जाइ। 10एह बरे कउनो मनई जउन धात तजइवाला मनई क नीचे रहइवाली कउनो चीजे क छुअत ह तउ उ साँझ तलक असुद्ध रही। जउन मनई धात तजइवाला मनई रहइवाली कउनो नीचे क चीजन क लइ जात ह तउ ओका आपन ओढ़नन क धोवइ चाही अउ पानी में नहाइ चाही। उ साँझ तलक असुद्ध रही।

11“सम्भव अहइ कि धात तजइवाला मनई पानी में बिना हाथ धोइके कउनो दूसर मनई क छुअइ। तब दूसर मनई आपन ओढ़नन क धोवइ चाही अउ पानी में नहाइ। उ साँझ तलक असुद्ध रही।

12“धात तजइवाला मनई अगर माटी क खोरा छुअइ तउ उ खोरा जरूर फोड़ देइ चाही। अगर धात तजइवाला मनई कउनो काठे क खोरा छुअइ तउ उ खोरा क बहत पानी में अच्छी तरह धोवइ चाही।

13“जब धात तजइवाला कउनो मनई आपन धात तजे स सुद्ध कीन्ह जात ह तउ ओका आपन सुद्धि बरे उ दिना स सात दिन गनइ चाही। तब ओका आपन ओढ़ना धोवइ चाही अउ बहत पानी में नहाइ चाही। उ सुद्ध होइ जाइ। 14अठएँ दिन उ मनई क दुइ फ़ाखता या दुइ कबूतरे क बच्चा लेइ चाही। ओका मिलापवाला तम्बू क दुआरे पइ यहोवा क समन्वा आवइ चाही। उ मनई दुइ पंछी याजक क देइ। 15याजक पंछियन क बलि चढ़ाई। एक क पापबलि बरे अउ दूसर क होमबलि बरे। इ तरह याजक इ मनई क यहोवा क समन्वा ओकरे धात तजइ बरे प्रायश्चित्त करी।

### मनसेधुअन बरे नेम

16“अगर मनसेधू क वीर्य निकरि जात ह तउ ओका बहत पानी में नहाइ चाही। उ साँझ तलक असुद्ध रही। 17अगर वीर्य कउनो ओढ़ना या चाम पइ गिरइ तउ उ ओढ़ना या चाम पानी में धोवइ चाही। इ साँझ तलक असुद्ध रही। 18अगर कउनो मनसेधू कउनो स्त्री क संग सोवत ह अउ वीर्य निकरत ह तउ स्त्री अउ मनसेधू दुइनउँ क बहत पानी में नहाइ चाही। उ पचे साँझ तलक असुद्ध रहहीं।

### स्त्रियन बरे नेम

19“अगर कउनो स्त्री मासिक रक्त स्राव क समइ मासिक धर्म स बाटइ तउ उ सात दिना तलक असुद्ध रही। अगर कउनो मनई ओका छुअत ह तउ उ मनई साँझ तलक असुद्ध रही। 20आपन मासिक धर्म क समइ स्त्री जउन कउनो चीज पइ ओलरी, उ भी असुद्ध रही अउ उ समइ में जउने चीजे प उ बइठी, उ भी असुद्ध होइ। 21अगर कउनो मनई उ स्त्री क बिछउना क छुअत ह तउ ओका आपन ओढ़नन क बहत पानी में धोवइ अउ नहाइ चाही। उ साँझ तलक असुद्ध रही। 22अगर कउनो मनई उ चीज क छुअत ह जेह पइ उ स्त्री बइठी होइ तउ उ मनई क आपन ओढ़ना बहत पानी में धोवइ चाही अउ नहाइ चाही। उ साँझ तलक असुद्ध रही। 23उ मनई स्त्री क बिछउना क छुअत ह या उ चीज क छुअत ह जेह पइ उ बइठी होइ, तउ उ मनई साँझ तलक असुद्ध रही।

24“अगर कउनो मनई कउनो स्त्री क संग मासिक धर्म क समइ में यौन सम्बंध रखत ह तउ उ मनई सात दिना तलक असुद्ध रही। हर उ बिछउना जउने प उ सोवत ह असुद्ध होइ।

25“अगर कउनो स्त्री क कइउ दिना तलक रक्त स्राव रहत ह जउन ओकरे मासिक धर्म क समइ नहीं होत, या निश्चित समइ क पाछे मासिक धर्म होत ह तउ उ उहइ तरह असुद्ध होइ जेह तरह मासिक धर्म क समइ अउ तब तलक असुद्ध रही जब तलक रही। 26पूरा रक्त स्राव क समइ उ स्त्री जेह बिछउना पइ ओलरी, उ वइसा ही होइ जइसा

मासिक धर्म क समइ। जउन कउनो चीजे पइ उ स्त्री बइठी, उ वइसे ही असुद्ध होइ जइसेन उ मासिक धर्म स असुद्ध होत ह। 27अगर कउनो मनई ओन चिजियन क छुअत ह तउ उ असुद्ध होइ। इ मनई क बहत पानी स आपन (कपड़ा) धोवइ चाही अउ नहाइ चाही। उ साँझ तलक असुद्ध रही। 28ओकरे पाछे जब उ स्त्री मासिक धर्म स असुद्ध होइ जात ह तब स ओका सात दिन जरूर गनइ चाही एकरे पाछे उ सुद्ध होइ। 29फिन अठएँ दिन ओका दुइ फ़ाखता अउ दुइ कबूतरे क बच्चा लेइ चाही। ओका ओनका मिलापवाला तम्बू क दुआरे पइ याजक क लगे जरूर लावइ चाही। 30तब याजक क एक पंछी पापबलि क रूप में अउ दूसर क होमबलि क रूप में चढ़ावइ चाही। इ तरह उ याजक ओका यहोवा क समन्वा ओकरे स्राव बरे प्रायश्चित्त करी।

31“एह बरे तू इस्त्राएल क लोगन क उपदेस द्या कि उ पचन्क अपने आप क अलग करइ चाही जउन उ असुद्ध अहइ। इ तरह उ मोर पवितर तम्बू क दूसित नाहीं करब्या जउन ओकर बीच बाटइ। अगर उ पचे एँका दूसित करत ही तउ आपन असुद्धी क कारण जरूर मरइ क होइ।”

32इ सबइ नेम तजइवाले लोगन क बरे अहईं। इ सबइ नेम ओन मनइयन बरे अहईं जउन वीर्य क सरीर स बाहेर निकरइ स असुद्ध होत हीं। 33अउर इ सबइ नेम ओन स्त्रियन बरे अहईं जउन आपन मासिक धर्म क रक्त स्राव क समइ असुद्ध होह हीं अउर उ सबइ नेम ओन मनसेधुअन बरे अहईं जउन असुद्ध स्त्रियन क संग सोवइ स असुद्ध होत हीं।

### प्रायश्चित्त क दिन

16 हारून क दुइ पूत यहोवा क सुगन्ध भेंट चढ़ावइ क जतन करइ क समइ मर ग रहेन।\* 2एकर पाछे यहोवा मूसा स कहेस, “आपन भाई हारून स कहा कि उ महा पवितर ठउर में पर्दा क पाछे कउनो टेम जाइ चाहत ह तउ नाहीं जाइ सकत ह। उ पर्दा क पाछे जउन कमरा बाटइ ओहमाँ पवितर सन्दूख रखा भवा अहइ। पवितर सन्दूख क ऊपर ओकर बिसेस ढकना\* लाग अहइ। बिसेस ढकना क ऊपर एक ठु बदरे में मई परगट होब। अगर हारून उ कमरा में जात ह तउ उ मरि जाइ।

3“प्रायश्चित्त क दिन पवितर ठउर में जाइके पहिले हारून क पापबलि क बरे एक ठु बछवा अउ होमबलि बरे एक ठु भेड़ा क महा पवितर ठउर क दुआरे क अगवा जरूर भेंट करइ चाही। 4हारून आपन पूरा सरीर क पानी डइके धोइ। तब हारून इ सबइ ओढ़नन क पहिरी। सन क नीचे क ओढ़ना सरीर स सटा होइहीं। उ सन स बना भवा कमर बन्द बान्ध लेइहीं। तउ हारून सन क पगड़ी बाँधी। इ सबइ पवितर ओढ़ना अहईं।

हारून क दुइ पूत ... रहेन लखईं लैव्यव्यवस्था 10:1-2

बिसेस ढकना इ “दया क सीट” भी कहलावत ह। इब्रानी सब्द क अरथ “ढकना” ढाकइ क ओढ़ना” या “उ ठउर जहाँ पाप क छिमा कीन्ह जात ह।”

5“हारून क इस्त्राएल क लोगन स दुइ ठु बोकरा पापबलि क रूप में अउ एक ठु भेड़ा होमबलि क रूप में जरूर लेइ चाही। 6तब हारून बछवा क पापबलि क रूप में चढ़ाइ। इ बलि ओकरे अपने बरे अहइ। तब हारून उ अउ ओकर परिवार बरे प्रायश्चित करी।

7“एकरे पाछे हारून दुइ बोकरा लेइ अउ मिलापवाला तम्बू क दुआरे पइ यहोवा क समन्वा लिआइ। 8हारून दुइनउँ बोकसन बरे चिट्ठी डइ। एक चिट्ठी यहोवा बरे होइ। दूसरी चिट्ठी अजाजेल बरे होइ।

9“तब हारून चिट्ठी डइके यहोवा खातिर चुना गवा बोकरा क भेंट चढ़ाइ। हारून क इ बोकरा क पापबलि बरे चढ़ावइ चाही। 10मुला चिट्ठी डइके अजाजेल बरे चुना गवा बोकरा यहोवा क समन्वा जरूर जिअत लइ आवा जाइ चाही। याजक ऐसे ओकर पाप बरे प्रायश्चित करी। तब इ बोकरा मरूभूमि में अजाजेल क लगे पठवा जाइ।

11“तब हारून आपन बरे बछवा क पापबलि रूप में चढ़ाइ। हारून अपने अउ आपन परिवार बरे प्रायश्चित करी। हारून बछवा क अपने बरे पापबलि क रूप में मारी। 12तब ओका वेदी स आगी क एक ठु तसला अंगारा स भरा भवा यहोवा क समन्वा लइ आवइ चाही। हारून दुई मुट्ठी भइ उ महकइवाली सुगन्धित धूप लेइ जउन महीन पीसी गइ अहइ। हारून क पर्दा क पाछे कमरा में उ सुगन्धि क लिआवइ चाही। 13हारून क यहोवा क समन्वा सुगन्धि क आगी में जरूर डवइ चाही। तबहिं सुगन्धि स भरी धूप क धुआँ क बदर साच्छीपत्र क ऊपर क बिसेस ढकना क ढँकि लेइ। इ तरह हारून नाहीं मरी। 14साथ ही साथ हारून क बछवा क कछू रक्त अपनी अँगुरियन पइ लइ चाही अउ ओका बिसेस ढकना क पूरब कइँती छिछकारइ चाही। एकरे समन्वा उ सात दाईं जरूर अँगुरी स रक्त छिछकारी।

15“एकरे पाछे हारून क लोगन बरे पापबलि क रूप में बोकरा क मारइ चाही। हारून क बोकरा क रक्त पर्दा क पाछे कमरा में जरूर लावइ चाही। हारून क बोकरा क रक्त क प्रयोग वइसा ही करइ चाही जइसा बछवा क रक्त क किहस। हारून क उ ढकना पइ अउर ढकना क समन्वा बोकरा क खून जरूर छिछकारइ चाही। 16अउर ओका इस्त्राएल क लोगन क असुद्धता स, अउ ओकर अपराधन अउर पापन स महा पवित्तर ठउर क सुद्ध करइ बरे प्रायश्चित करी चाही। हारून क इ इहइ मिलापवाला तम्बू बरे करइ चाही जउन असुद्ध लोगन क बीच में बाटइ। 17जउने समइ हारून महा पवित्तर ठउर सुद्ध करइ, उ समइ कउनो मनई मिलापवाला तम्बू में नाहीं होइ चाही। कउनो मनई क ओकरे भीतर तब तलक नाहीं जाइ चाही जब तलक हारून बाहेर न आइ जाइ। इ तरह, हारून आपन क, आपन परिवार क अउर इस्त्राएल क सबहिं लोगन बरे प्रायश्चित करी। 18तब हारून उ वेदी पइ जाइ जउन यहोवा क समन्वा बाटइ। हारून वेदी बरे प्रायश्चित करी। हारून बछवा अउ बोकरा क कछू रक्त लइके वेदी क चारिहुँ कइँती अउ कोना पइ लगाइ। 19तब हारून कछू रक्त आपन अँगुरियन स वेदी पइ सात दाईं छिरकी। इ तरह

हारून इस्त्राएल क लोगन क सबहिं पापन स वेदी क सुद्ध अउ पवित्तर करी।

20“हारून महा पवित्तर स्थान, मिलापवाला तम्बू अउ वेदी बरे प्रायश्चित करी। इ सबइ काम क पाछे हारून यहोवा क लगे जिअत बोकरा क लिआई। 21हारून आपन दुइनउँ हाथन क जिअत बोकरा क मूँड़े पइ धरी। तब हारून बोकरा क ऊपर इस्त्राएल क लोगन क अपराध अउ पाप क कबूली। इ तरह हारून लोगन क पापन क बोकरा क मूँड़े पइ डइ। तब उ बोकरा क दूर रेगिस्तान में पठइ। एक मनई बगल में बोकरा क लइ जाइके बरे खड़ा होइ। 22इ तरह बोकरा सबहिं लोगन क पाप अपने ऊपर सूना रेगिस्तान में लइ जाइ। जउन मनई बोकरा क लइ जाइ उ रेगिस्तान में ओका खुला छोड़ि देइ।

23“तब हारून मिलापवाला तम्बू में जाई। उ सन क ओन उत्तम ओढ़नन क पहिरिही जेनका उ महा पवित्तर स्थान में जात समइ पहिरे रहा। ओका ओन ओढ़नन क हुअँइ तजइ चाही। 24उ आपन पूरा सरीर क एक पवित्तर जगह में पानी स धोई। तब उ आपन दूसर खास ओढ़नन क पहिरी। उ बाहेर आइ अउर आपन होमबलि अउर लोगन क होमबलि चढ़ाइ। उ आपन क अउ लोगन क पाप बरे प्रायश्चित करी। 25तब उ वेदी पइ पापबलि क चर्बी क चढ़ाइ।

26“जउन मनई बोकरा क अजाजेल क लगे लइ जाइ, उ आपन ओढ़ना अउ आपन पूरा सरीर क पानी स धोवइ चाही। ओकरे पाछे उ मनई सिबिर में वापिस आइ सकत ह।

27“पापबलि क बछवा अउर बोकरा क सिबिर स जरूर बाहेर लइ जाइ चाही। (उ पसुअन क रक्त पवित्तर ठउरे में पवित्तर चीजन बरे प्रायश्चित करइ बरे लिआवा ग रहा।) याजक ओन पसुअन क चाम, सरीर अउ सरीरे क मल आगी में बारी। 28तब ओन चीजन क बारइवाला मनई क आपन ओढ़ना अउ पूरा सरीर क पानी डइके धोवइ चाही। ओकरे पाछे उ मनई डेरा में आइ सकत ह।

29“इ नेम तोहरे बरे सदा रही। सतएँ महीना क दसवें दिन तू पचन क जरूर उपवास करइ चाही। तू पचन क कउनो काम नाहीं करइ चाही। तोहरे संग रहइवाला नागरिक या विदेसी भी कउनो काम नाहीं कइ सकिहीं। 30काहेकि उ दिन याजक तोहका सुद्ध किहिस ह अउ तोहरे पापनक बरे प्रायश्चित किहिस ह। तब तू पचे यहोवा बरे सुद्ध होब्या। 31इ दिन तोहरे बरे आराम करइ क बिसेस दिन अहइ। तोहका सबन क इ दिन उपवास करइ चाही। इ नेम सदा बरे होइ। 32तउ उ मनई जउन महा याजक बनइ बरे अभिसेक किहिस ह इ चीजन सुद्ध करइ बरे प्रायश्चित करी। इ उहइ मनई अहइ जेका ओकरे पिता क मउत क पाछे महा याजक क रूप में सेवा बरे तय कीन्ह ग अहइ। उ याजक क सन क पवित्तर ओढ़ना धारण करइ चाही। 33ओका पवित्तर स्थान, मिलापवाला तम्बू अउ वेदी क सुद्ध करइ चाही अउ ओका याजक अउ इस्त्राएल क सबहिं लोगन क सुद्ध करइ चाही। 34इस्त्राएल क लोगन क प्रायश्चित करइ क इ नेम सदा ही रही। तोहका इ सबइ बरिस में एक दाईं जरूर करइ चाही।”

एह बरे उ पचे उहइ किहेन जउन करइ क यहोवा मूसा क आदेस दिहे रहा।

जनावरन क मारइ अउ खाइ क नेम

**17** यहोवा मूसा स कहेस, <sup>2</sup>“हारून, ओकरे पूतन अउ इस्राएल क सबहिं मनइयन स कहा। ओनका कहा कि यहोवा इ हुकुम दिहे अहइ: <sup>3</sup>कउनो इस्राएली मनई कउनो बर्धा या भेड़ी क बच्चा या बोकरा क डेरा में या डेरा क बाहेर मारि सकत ह। <sup>4</sup>उ व्यक्ति उ जनावरे क मिलापवाले तम्बू क दुआरे पइ लिआइ। ओका उ जनावर क एक हीसा यहोवा क भेंट क रुप में देइ चाही। उ व्यक्ति रकत बहाएस ह। उ मारे बाटइ एह बरे ओका यहोवा क पवित्तर तम्बू में भेंट लइ जाइ चाही। अगर उ जनावर क हीसा यहोवा क लगे नहीं लइ जात तउ ओका आपन लोगन स अलग कइ देइ चाही। <sup>5</sup>इ नेम एह बरे अहइ कि लोग मेलबलि यहोवा क अर्पण करईं। इस्राएल क लोगन क ओन जनावरन क जरूर लावइ चाही जेनका उ पचे मैदान में मारत ह। ओनका ओन जनावरन क मिलापवाला तम्बू क दुआर पइ लावइ चाही। ओनका ओन जनावरन क याजक क लगे लिआवइ चाही। <sup>6</sup>तब याजक ओन जनावरन क रकत मिलापवाला तम्बू क दुआरे क लगे यहोवा क वेदी तलक फेंकइ। याजक ओन जनावरन क चर्बी क वेदी पइ बारी। इ यहोवा बरे महकउआ सुगन्ध होइ। <sup>7</sup>ओनका कउनो भेंट ‘बोकरन क मूर्तियन’ क अगवा नहीं चढ़ावइ चाही, जउन उ पचन क वेस्थावृति क नाई बदलत हीं। इ सबइ नेम हमेसा रहईं।

<sup>8</sup>“लोगन स कहा: इस्राएल क कउनो नागरिक या कउनो बिदेसी जउन तू पचन क बीच बसत ह मैं स कउनो जउन मेलबलि अउ होमबलि चढ़ावत ह <sup>9</sup>ओका आपन बलि क मिलापवाला तम्बू क दुआर पइ लइ चाही अउ ओका यहोवा क चढ़ावइ चाही। अगर उ मनई अइसा नहीं करत तउ ओका आपन लोगन स अलग कइ देइ चाही।

<sup>10</sup>“मई हर अइसे मनई क खिलाफ होब जउन रकत खात ह। चाहे उ इस्राएल क नागरिक होइ या उ तोहरे बीच रहइवाला कउनो बिदेसी होइ। मई ओका ओकरे लोगन स अलग कइ देब। <sup>11</sup>काहेकि प्राणी क जीवन रकत में बाटइ। मई तू पचन क उ रकत वेदी पइ डवइ क नेम दिहेउँ ह। इ तोहार आपन प्रायश्चित करइ बरे अहइ। कहेकि रकत में जान बाटइ, इ तोहार प्रायश्चित करी। <sup>12</sup>एह बरे मई इस्राएल क लोगन स कहत हउँ: तू पचन में स कउनो अउर न ही तू पचन क बीच रहइवाला कउनो बिदेसी रकत खाइ सकत ह। <sup>13</sup>अगर कउनो मनई कउनो जंगली जनावर या पंछी क धरत ह जेका खावा जाइ सकइ तउ उ मनई क रकत भुईया पइ जरूर बहाइ देइ चाही अउ माटी स ओका मूँद देइ चाही। चाहे उ मनई इस्राएल क नागरिक होइ या तू पचन क बीच रहइवाला बिदेसी ओका इ जरूर करइ चाही। <sup>14</sup>तू पचन क इ काहे करइ चाही? काहेकि अगर रकत गोसे में बाटइ तउ उ जनावर क प्राण भी गोसे में बाटइ। एह बरे मई इस्राएल क लोगन क हुकुम देत अहउँ: उ गोस क जिन खा जेहमों रकत होइ। कउनो भी मनई जउन रकत खात ह आपन लोगन स अलगाइ दीन्ह जाइ।

<sup>15</sup>“अगर कउनो मनई खुद स मरा भवा जनावर या कउनो दूसर जनावर क जरिये मरा भवा जनावर क खात ह।

उ साँझ तलक असुद्ध रही। तउ उ मनई क आपन ओढ़ना अउ आपन पूरा सरीर पानी स धोवइ चाही। चाहे उ मनई इस्राएल क नागरिक हो या तू पचन क बीच रहइवाल बिदेसी। ओका इ जरूर करइ चाही। <sup>16</sup>अगर उ मनई आपन ओढ़नन क नाहीं धोवत अउ न ही नहात ह तउ उ पाप करइ क अपराधी होइ।”

यौन सम्बंध क बारे में नेम

**18** यहोवा मूसा स कहेस, <sup>2</sup>“इस्राएल क लोगन स कहा: मई यहोवा तू पचन क परमेस्सर अहउँ। <sup>3</sup>हिआँ आवइ क पहिले तू लोग मिस्त्र में रह्या। तू पचन क उ नहीं करइ चाही जउन हुआँ होत भवा रहा। मई तू लोगन क कनान लइ जात अहउँ। तू लोगन क उ नहीं करब अहइ जउन उ देस में कीन्ह जात ह। <sup>4</sup>तू पचन क मोरे नेमन क जरूर पालन करइ चाही। इ नेमन क पालन में होसियार रहा। काहेकि मई यहोवा तू पचन क परमेस्सर अहउँ। <sup>5</sup>एह बरे तू पचन क मोरे सबइ नेमन अउ कानून क पालन जरूर करइ चाही। अगर कउनो मनई मोर सबइ नेमन अउ हुकुमन क पालन करत ह तउ उ जिअत रही। मई यहोवा अहउँ।

<sup>6</sup>“तोहका सबन्क निचके क रिस्तेदारन स कबहुँ यौन सम्बंध नहीं करइ चाही। मई यहोवा अहउँ!

<sup>7</sup>“तू पचन्क आपन पिता क अपमान नहीं करइ चाही अरथ अहइ तू पचन्क आपन महतारी क संग यौन सम्बंध नहीं करइ चाही। <sup>8</sup>तू पचन्क आपन बाप क मेहरारु स भी यौन सम्बंध नहीं करइ चाही चाहे उ तोहार महतारी भले ही न होइ। पिता क स्त्री स यौन सम्बंध सिरिफ तोहरे पिता बरे अहइ।

<sup>9</sup>“तू पचन्क आपन पिता या महतारी क बिटिया अर्थात आपन बहिन स यौन सम्बंध नहीं करइ चाही। एहसे फरक नहीं पड़त कि तोहरी उ बहिन क पालन पोसण तोहरे घरे में भवा या कउनो दूसर जगह।

<sup>10</sup>“तोहका सबन्क आपन नाती पोतन स यौन सम्बंध नहीं करइ चाही। उ पचे तोहार अंग\* अहईं।

<sup>11</sup>“अगर तोहरे पिता अउ ओकर पत्नी\* क कउनो बिटिया अहइ तउ तोहरा बहिन अहइ। तू सबन्क ओनकइ संग यौन सम्बंध नहीं करइ चाही।

<sup>12</sup>“आपन पिता क बहिन क संग तोहार यौन सम्बंध नहीं होइ चाही। उ तोहरे पिता क गोत क अहइ। <sup>13</sup>तू पचन्क आपन महतारी क बहिन क संग यौन सम्बंध नहीं करइ चाही। उ तोहरे महतारी क गोत क अहइ। <sup>14</sup>तू पचन्क आपन पिता क भाई क पत्नी क संग यौन सम्बंध नहीं करइ चाही। तू पचन्क आपन चाचा क पत्नी क निअरे तलक नहीं जाइ चाही। उ तोहार काकी अहइ।

<sup>15</sup>“तोहका पचन्क आपन पतोहू क संग यौन सम्बंध नहीं करइ चाही। उ तोहरे बेटवा क पत्नी अहइ। तोहका ओकरे संग यौन सम्बंध नहीं करइ चाही।

**तोहार अंग** ओनकर नंगा होब तोहार नंगा होब अहइ।

**ओकर पत्नी** साइद एकर अरथ “तोहार सौतेली महतारी।”

16“तू पचन्क आपन भाई क पत्नी क संग यौन सम्बंध नहीं करइ चाही। इ आपन भाई क संग यौन सम्बंध रखब जइसा होइ। सिरिफ तोहार भाई आपन पत्नी क संग यौन सम्बंध रख सकत ह।\*  
 17“तोहका सबन्क कउनो महतारी अउ ओकरी बिटिया स यौन सम्बंध नहीं रखइ चाही अउ तोहका इ स्त्री क नातिन स यौन सम्बंध नहीं रखइ चाही। एहसे इ फरक नहीं पड़त कि उ नातिन उ स्त्री क पूत या बिटिया क बिटिया बाटइ। ओकर पोतिन ओकरे नजदिकी गोत क बाटिन। ओनकइ संग यौन सम्बंध करब गलत अहइ।  
 18“जब ताई तोहार स्त्री जिअत बाटइ, तू सबन्क ओकरी बहिन क दूसर स्त्री नहीं बनावइ चाही। इ बहिनियन क आपसी दुस्मन बनाइ देइ। तोहका सबन्क आपन स्त्री क बहिन स यौन सम्बंध नहीं करइ चाही।  
 19“तोहका सबन्क कउनो स्त्री क लगे ओकरे मासिक धर्म क समइ यौन सम्बंध बरे नहीं जाइ चाही। उ इ समइ असुद्ध अहइ।  
 20“तोहे सबन्क आपन पड़ोसी क स्त्री स यौन सम्बंध नहीं करइ चाही। इ तू सबन्क असुद्ध बनाइ।  
 21“तू सबन्क आपन कउनो गदेली क आगी क जरिये मोलेक क भेंट नहीं चढ़ावइ चाही। अगर तू पचे अइसा करत अहा तउ तू पचे आपन यहोवा क नाउँ क अपमान किहस ह। मई यहोवा अहउँ।  
 22“तू सबन्क कउनो मनसेधू क संग यौन सम्बंध नहीं करइ चाही जइसा कउनो स्त्री क साथ कीन्ह जात ह। इ भयंकर पाप अहइ।  
 23“कउनो जनावर क संग तोहार यौन सम्बंध नहीं होइ चाही। इ सिरिफ तोहका घिनौना बनाइ देइ। स्त्री क भी कउनो जनावर क संग यौन सम्बंध नहीं करइ चाही। इ प्रकृति क खिलाफ अहइ।  
 24“इ सबइ अनुचित कामन स आपन क असुद्ध जिन करा। मई ओन रास्ट्रन क ओकर देस स बाहेर करत हउँ अउर मई ओनकी धरती तू सबन्क देत अहउँ। काहेकि उ पचे लोग वइसेन भयंकर पाप करत हीं। 25एह बरे उ देस असुद्ध होइ ग बाटइ। एह बरे मई ओन लोगन स ओनकइ पापन बरे भरपाई कराउब। उ देस आपन निवासियन बाहेर अलगइ देत ह।  
 26“एह बरे तू पचे मोरे सबइ नेमन अउ कानूनन क पालन जरूर करब्या। तू पचन्क ओनमाँ स कउनो भयंकर पाप नहीं करइ चाही। इ सबइ नेमन इस्त्राएल क सबहिं नागरिक अउर तोहरे बीच रहइवाला सबहिं बिदेसियन बरे बाटइ। 27जउन लोग तू सबन्स पहिले हुआँ रहेन उ पचे उ सबइ भयंकर पापन किहेन। जेहसे उ धरती असुद्ध होइ गवा। 28अगर तू पचे भी उहइ काम करब्या तउ तू पचे इ धरती क गन्दा बनउब्या। इ तू लोगन्क वइसेन ही बाहेर निकारि देइ, जइसेन तू पचेन स पहिले बसइवाली जातियन क संग कीन्ह गवा रहा। 29अगर कउनो मनई ओन भयंकर पापन मँ कउनो पाप करत ह, तउ उ आपन लोगन स अलग कइ दीन्ह जाइ। 30दूसर लोग उ ओन भयंकर पापन

क किहेन ह। मुला मोरे नेमन क पालन करइ चाही। तोहका पचन्क ओन भयंकर पापन मँ स कउनो भी नहीं करइ चाही। ओन भयंकर पापन स आपन क असुद्ध जिन बनाव। मई तोहार सबन्क परमेस्सर यहोवा अहउँ।”

### इस्त्राएल परमेस्सर क अहइ

19 यहोवा मूसा स कहेस, 2“इस्त्राएल क सबहिं लोगन स कहा: कि मई तोहार परमेस्सर अहउँ मई पवितर हउँ! एह बरे तू सबन्क पवितर होइ चाही!

3“तू पचन मँ स हर एक मनई क आपन महतारी बाप क सम्मान करइ चाही अउ मोर बिस्त्राम क खास दिनन क मनावइ चाही। मई तोहार पवितर परमेस्सर अहउँ!

4“मूर्तिर्यन क उपासना जिन करा। आपन बरे देवतन क मूर्तिर्यन क धातु गलाइके जिन बनाव। मई तू लोगन क परमेस्सर यहोवा अहउँ।

5“जबहिं तू यहोवा क मेलबलि चढ़ावा तउ तू पचे ओका अइसे ठीक तरीका स चढ़ावा कि यहोवा तोहार बलि क स्वीकार कइ लेइ। 6जउने दिन चढ़उब्या तू एँका खाइ सकब्या अउ दूसरे दिन भी। मुला अगर बलि क कछू हींसा तीसर दिन भी बचि जाइ तउ ओका तू पचन क आगी मँ बारि देइ चाही। 7कउनो भी बलि क तीसर दिन नहीं खाइ चाही। इ असुद्ध बाटइ। इ अंगीकार नहीं होइ। 8अगर कउनो मनई अइसा कामन करत ह तउ उ दोखी होइ। काहेकि उ यहोवा क पवितर चीजन क दूसित किहेस। उ मनई क ओकर लोगन स अलग कइ दीन्ह जाइ।

9“जबहिं तू कटनी क समइ आपन फसल काट्या तउ तू पचे सब कइँती स खेत क कोनन ताई जिन काट्या अउर अगर अन्न जमीन पइ गिरि जात ह तउ तू पचन्क ओका बटोरइ नहीं चाही। 10आपन अंगूरे क बगिया क सारा अंगूर जिन तोइया। जउन अंगूर भुइँया पइ गिरि जाइँ ओनका जिन उठावा। काहेकि तू पचन्क उ सबइ चीजन गरीब लोगन अउर जउन तोहार बीच रहइवाला बिदेसियन बाटइ ओनके बरे छोड़इ चाही। मई यहोवा तोहार परमेस्सर अहउँ!

11“तू पचन्क चोरी नहीं करइ चाही। तू पचन्क लोगन्क ठगी नहीं करइ चाही। तू पचन्क आपुस मँ झूठ नहीं बोलइ चाही। 12तू पचन्क मोरे नाउँ पइ झूठा बचन नहीं देइ चाही। अगर तू पचे अइसा करत ह्या तउ तू पचे आपन परमेस्सर क नाउँ क अपमान करत ह। मई यहोवा तोहार परमेस्सर अहउँ!

13“तू पचन्क आपन पड़ोसी क धोखा नहीं देइ चाही। तू पचन्क ओकर चोरी नहीं करइ चाही। तू पचन्क मजदूर क मजदूरी पूरी रात, भिन्सारे तलक नहीं रोकइ चाही।\*  
 14“तू पचन्क कउनो बहिरे मनई क सरापइ नहीं चाही। तू पचन्क कउनो आँधर क भहरावइ बरे ओकरे अगवा कउनो चीज नहीं रखइ चाही। मुला तू पचन्क आपन परमेस्सर यहोवा क सम्मान करइ चाही। मई यहोवा अहउँ!

तू पचन्क ... रोकइ चाही एहसे इ पता लागत ह कि मजदूरी पइ धरा गए मजदूर क उहइ दिन कीन्ह गए कामे क मजदूरी उहइ दिन दीन्ह जात रही। लखई मत्ती 20:1-16

15“तू पचन्क क निआव करइ में ईमानदार होइ चाही। न तउ तू पचन्क गरीबन क संग खास पच्छपात करइ चाही अउ न ही बड़कन अउ धनी मनइयन बरे कउनो आदर देखावइ चाही। तू पचन्क आपन पड़ोसी क संग निआव करत समइ ईमानदार होइ चाही। 16तू पचन्क दूसर लोगन्क खिलाफ चारिहूँ कईती अफवाह सँचरावत भए नार्ही चलइ चाही। अइसा कछू जिन करा जउन तू पचन्क पड़ोसी क खतरा में डइ देइ। मईँ यहोवा अहउँ!

17“तू पचन्क आपन हिरदइ में आपन भाइयन स घिना नार्ही करइ चाही। अगर तोहार पड़ोसी कछू बुरा करत ह तउ एकरे बारे में ओका समझावा। मुला ओका छिमा करा! 18लोग, जउन तोहार बुरा कईँ, ओका बिसरि जा। ओसे बदला लेइ क कोसिस जिन करा। आपन पड़ोसी स वइसेन ही पिरेम करा जइसे अपने आप स करत ह्या। मईँ यहोवा अहउँ!

19“तू पचन्क मोरे नेमन क पालन जरूर करा। दुइ जाति क जनावनन क प्रजनन बरे आपुस में जिन मिलावा। तू पचन क खेते में दुइ तरह क बिआ नार्ही मिलावइ चाही। तू पचन्क दुइ तरह क मिलावट स बना ओढ़ना क नार्ही पहिरइ चाही।

20“इ होइ सकत ह कि कउनो दूसर मनई क दासी स कउनो मनई क यौन संबंध होइ। अगर इ दासी न तउ खरीदी गइ अहइ अउर न ही अजाद कराई गइ अहइ तउ ओनका जरूर दण्ड दीन्ह जाइ चाही। मुला उ पचे मउत न पइहीं। काहेकि स्त्री अजाद नार्ही रही। 21उ मनई क आपन अपराध बरे मिलापवाला तम्बू क दुआरे पइ यहोवा बरे जरूर दोखबलि चढ़ावइ चाही। मनई क एक ठु भेड़ा दोखबलि क रूप में लावइ चाही।

22“याजक उ मनई बरे जउन पाप किहेस ह क प्रायश्चित करी। याजक यहोवा क दोखबलि क रुप में भेड़ा क चढ़ाइ। इ मनई क कीन्ह गए पापन बरे भेंट होइ। तब मनई आपन कीन्ह गए पापन बरे छिमा पाइहीं।

23“भविस्स में तू पचे आपन प्रदेस में प्रवेस करब्या। उ समइ भोजन बरे तू पचे किसिम किसिम क बृच्छ लगाउब्या। पौधा लगावइ क पाछे बृच्छ क कउनो फले क प्रयोग करइ बरे तोहका तीन बरिस तलक जोहइ चाही। तू पचन क ओसे पहिले क फल क प्रयोग नार्ही करइ चाही।

24“चउथे बरिस उ बृच्छ क फले यहोवा क होइहीं। इ यहोवा क स्तुति बरे पवितर भेंट होइ। 25तब, पँचवें बरिस तू सब उ बृच्छ क फल चखि सकत ह अउ बृच्छ तोहरे बरे जियादा स जियादा फल पइदा करी। मईँ तोहार परमेस्सर यहोवा अहउँ।

26“तू सबन्क क कउनो गोस जेहमा रकत बाटइ नार्ही खाइ चाही। तू पचन्क भविस्सबाणी करइ बरे जादू या कउनो दूसर चीजियन क प्रयोग नार्ही करइ चाही।

27“तू पचन्क आपन मूँडे क बगल क बाढ़ भवा बार कटवावइ नार्ही चाही या तोहका आपन दाढ़ी क छटवावइ नार्ही चाही। 28कउनो मरे मनई क सुमिरन बनाए रहइ बरे आपन तन क काटइ नार्ही चाही। तू पचन्क आपन सरीर प गोदना गोदवावइ नार्ही चाही। मईँ यहोवा अहउँ!

29“तू पचे आपन बिटिया क बेस्या जिन बनइ द्या। एहसे सिरिफ इ पता लागत ह कि तू ओकर इज्जत नार्ही करत ह्या। तू पचे आपन देस में स्त्रियन क बेस्या जिन बनइ द्या। तू पचे आपन देस क इ तरह क पापन स जिन भर जाइ द्या।

30“तू पचन्क मोरे बिस्त्राम क बिसेस दिनन में काम नार्ही करइ चाही। तू पचन्क मोरे पवितर ठउर क सम्मान जरूर करइ चाही। मईँ यहोवा अहउँ!

31“ओझा लोगन अउ भूत सिद्ध लोगन लगे सलाह बरे जिन जा। उ पचे सिरिफ तोहका असुद्ध बनइहीं। मईँ तोहार परमेस्सर यहोवा अहउँ।

32“बुढ़वा मनइयन क सम्मान करा। जब उ पचे कमरा में आवईँ तउ खड़ा होइ जा। आपन परमेस्सर क सम्मान करा। मईँ यहोवा अहउँ।

33“आपन देस में बिदेसी लोगन क संग बुरा बेउहार जिन करा! 34तू पचन्क बिदेसी लोगन क संग वइसा ही बेउहार ही करइ चाही जइसा तू पचे आपन नागरिकन क संग करत ह्या। तू बिदेसियन स वइसेन पियार करा जइसा आपन स करत ह्या। काहेकि तू पचे भी एक समइ मिस्त्र में बिदेसी रह्या। मईँ तोहार परमेस्सर यहोवा अहउँ!

35“तू पचन्क निआव करत समइ लोगन बरे ईमानदार होइ चाही। तू पचन्क चीजन क जोखइ अउ तउलइ में ईमानदार होइ चाही। 36तोहार झउअन ठीक नाप क होइ चाही। तोहरे नाप करइ क बासन में द्रव क ठीक मात्रा आवइ चाही। तोहरे तराजू अउ बटखरा चीजन्क ठीक तउलइवाला होइ चाही। मईँ तोहार परमेस्सर यहोवा अहउँ। मईँ तू पचन्क मिस्त्र देस स बाहेर लिआएँ!

37“तोहका पचन्क सबहि नेम अउ निर्णयन क सुमिरिके रखइ चाही अउ तू सबन्क ओनका पालन करइ चाही। मईँ यहोवा अहउँ!”

### मूर्ति पूजा क खिलाफ चिताउनी

20 यहोवा मूसा स कहेस, 2“तोहका इस्राएल क लोगन स इ भी कहइ चाही: तोहरे देस में कउनो मनई आपन गदेलन में स कउनो क लबार देवता मोलेक क दइ सकत ह। उ मनई क जरूर मार डावइ चाही। एहसे फरक नार्ही पड़त कि उ इस्राएल क नागरिक अहइ या इस्राएल में बसइया कउनो बिदेसी। तू पचन क ओका पाथर लोकाइ लोकाइके मारि डावइ चाही। 3मईँ उ मनई क खिलाफ होब। मईँ ओका ओकरे लोगन स अलग कइ देब। काहेकि उ आपन गदेलन क मोलेक क दिहस। उ मोरे पवितर नाउँ क अपमान किहेस। उ मोरे पवितर ठउरे क असुद्ध किहस। 4होइ सकत ह कि साधारिन लोग उ मनई क उपेच्छा करइ। होइ सकत ह कि उ मनई क न मारइ जउन गदेलन क मोलेक क दिहस ह। 5मुला मईँ उ व्यक्ति अउ ओकरे परिवार क खिलाफ होब। मईँ ओका ओकरे लोगन स अलग करब। मईँ कउनो भी अइसे व्यक्ति क ओकरे लोगन स अलग करब, जउन मोलेक क पाछे वेस्या क तरह करत ह।

6“मई उ मनई क खिलाफ होब जउन कउनो ओझा या भूतसिद्ध क लगे सलाह लेइ बरे जात ह। अइसा करइके उ मोहे स अबिस्सासी होइ जात ह। एह बरे मई उ मनई क ओकरे लोगन स अलग करब।

7“बिसेस बना। आपन क पवितर बनावा। काहेकि मई यहोवा तोहार परमेस्सर अहउँ। 8मोर सबइ आग्या क पालन करा अउ ओनका सुमिरा। मई यहोवा अहउँ अउर मई तू लोगन क आपन बिसेस लोग बनाएउँ ह।

9“अगर कउनो मनई आपन महतारी-बाप क सराप देत ह तउ उ मनई क मारि डवइ चाही। उ आपन पिता या महतारी क सराप देत ह, एह बरे उ आपन मउत क खुद जिम्मेदार होइ।

### यौन पापक दण्ड

10“अगर कउनो मनई आपन पड़ोसी क पत्नी क संग यौन सम्बंध रखत ह तउ स्त्री अउ मनसेधू दुइनउँ व्यभिचारी क अपराधी अहइँ। एह बरे दुइनउँ क जरूर मारि डवइ चाही। 11अगर कउनो मनई आपन सौतेली महतारी स यौन सम्बंध करत ह तउ उ मनई क मारि डवइ चाही। उ मनई क अउ ओकर सौतेली महतारी दुइनउँ क मार डवइ चाही।\* उ मनई आपन पिता क खिलाफ खुद पाप किहेस ह।

12“अगर कउनो मनई आपन पतोहू क संग यौन सम्बंध करत ह तउ दुइनउँ क मारि डवइ चाही। उ पचे बहोत बुरा यौन पाप किहेन ह। ओनका दण्ड जरूर मिलइ चाही।

13“अगर कउनो मनई कउनो मनई क संग मेहरारु जइसा यौन सम्बंध करत ह तउ दुइनउँ क मारि डवइ चाही। उ पचे बहोत बुरा पाप किहेन ह। ओनका दण्ड जरूर मिलइ चाही।

14“अगर कउनो मनई कउनो मेहरारु अउ ओकरी महतारी क संग यौन सम्बंध करत ह तउ इ यौन पाप अहइ। लोगनक उ मनई अउ दुइनउँ मेहररुअन क आगी में बारि देइ चाही। इ यौन पाप क आपन लोगन में जिन होइ द्या।

15“अगर कउनो मनई कउनो गोरु स यौन सम्बंध करइ तउ उ मनई क मारि डवइ चाही अउ तोहका उ गोरु क मारि डवइ चाही। 16अगर कउनो मेहरारु कउनो गोरु स यौन सम्बंध करत ह तउ तू पचन क उ मेहरारु अउ उ गोरु क मारि डवइ चाही। ओनका जरूर मारि डवइ चाही।

17“इ एक भाई अउ ओकरी बहिन या सोतेली बहिन बरे लज्जा क बात अहइ कि उ पचे आपुस में यौन सम्बंध करइँ। ओनका समाज कइँती स दण्ड मिलइ चाही। उ पचन क आपन लोगन स अलगाइ देइ चाही। उ मनई जउन आपन बहिन क संग यौन सम्बंध किहेस ह, आपन पाप बरे जरूर दण्ड पाई।

18“अगर कउनो मनई कउनो मेहरारु क संग मासिक धर्म क रक्त बहइ क समइ यौन सम्बंध करी, तउ दुइनउँ क आपन लोगन स अलगाइ देइ जाई। उ पचे पाप किहेन क काहेकि उ पचे रक्त क स्रोत क उघारेन ह।

19“तू सबन्क आपन महतारी क बहिन या पिता क बहिन क संग यौन सम्बंध नाहीं करइ चाही। इ आपन नगीचे क

उ मनई ... डवइ चाही सब्द क अरथ “आपन मउत उ पचे खुद बोलाएन ह।”

रिस्तेदार क नंगापन क उघारेन ह। ऐह बरे दुइनउँ क ओनके पाप बरे जरूर दण्ड मिली चाही।

20“कउनो मनई क आपन चाचा-मामा क पत्नी क संग नाहीं सोवइ चाही। इ मनई अउ ओकर चाची अउ मामी क ओनके पापन बरे दण्ड मिली। उ पचे बगैर कउनो सन्तान क मरिहीं। 21कउनो मनई क बरे इ बुरा अहइ कि उ आपन भाई क स्त्री क संग यौन सम्बंध करइ। उ मनई आपन भाई क खिलाफ पाप किहे बाटइ। ओकर कउनो सन्तान नाहीं होइ।

22“तू पचन क मोर सारे नेम अउ निर्णय क सुमिरइ चाही अउ तोहका ओनकर पालन जरूर करइ चाही। मई तू पचन क तोहरे प्रदेस लइ जात अहउँ। तू लोग उ प्रदेस में रहब्या। अगर तू लोग मोर नेमन अउ सबइ निर्णय क मानत रहब्या तउ उ प्रदेस तू लोगन क निकारिके बाहेर न करी। 23मई दूसर लोगन क उ प्रदेस क तजइ क मजबूर करत हउँ। काहेकि ओन लोगन उ सबइ पाप किहेन। मई ओन पापन स घिना करत हउँ। एह बरे तू पचन्क ओकरे जीवन-सैली क नकल नाहीं करइ चाही।

24“मई कहेउँ ह कि तू पचे ओनकर प्रदेस पउब्या। मई ओनकर प्रदेस तू पचन क देबउँ। उ तोहार प्रदेस होइ। उ प्रदेस दूध अउ सहद क नदियन बहत हीं। मई तोहार परमेस्सर यहोवा अहउँ।

“मई तू पचन्क खास बनाएउँ ह। मई तोहरे संग दूसर रास्ट्रन स अलग बेउहार किहेउँ ह। 25एह बरे तू पचन क सुद्ध जनावरन क संग असुद्ध जनावरन स जरूर अलग बेउहार करइ चाही। तू पचन क सुद्ध पंछियन क संग असुद्ध पंछियन स जरूर अलग बेउहार करइ चाही। ओनमाँ स कउनो भी असुद्ध पंछी, जनावरन अउ कीड़ा-पतंगा क जिन खा जउन भुइयाँ प रेंगत हीं। मई ओन चीजन क असुद्ध बनाएउँ ह। 26तू पचन क मोरे बरे पवितर होइ चाही। काहेकि मई यहोवा अहउँ अउ मई पवितर हउँ। मई तोहका दूसर रास्ट्रन स अलग कइ दिहे हउँ तोहका बिसेस लोग बनावई बरे जउन कि मोर अहइ।

27“अगर कउनो मनसेधू या मेहरारु ओझा होइ या कउनो जादूगर होइ, ओनका निहचय ही मार दीन्ह जाइ। लोगन क चाही कि उ पचे पाथर मारि मारिके मार देईं। उ आपन मउत क खुद ही कसूरवार होइ।”

### याजकन बरे नेम

21 यहोवा मूसा स कहेस, “इ सबइ बातन हारून क याजक पूतन स कहा: कउनो मरे भए मनई क छुइके याजक आपन क असुद्ध न करइ। 2मुला अगर मरा भवा मनई ओकरे निजके रिस्तेदारन में स कउनो अहइ तउ उ मरे भए क लहास क छुइ सकत ह। याजक आपन क असुद्ध कइ सकत ह अगर मरा मनई ओकर महतारी, बाप, ओकर पूत, या बितिया, ओकर भाई, 3ओकर बिन बियाही बहिन अहइ। (इ बहन ओकर निचके क रिस्तेदार अहइ काहेकि ओकर भतार नाहीं अहइ।) एह बरे याजक आपन क असुद्ध कइ सकत ह, अगर उ मरत ह। 4मुला याजक



आपन क असुद्ध नहीं करइ चाही, अगर मरा भवा व्यक्ति बियाहे क कारण ओकर रिस्तेदार होइ।\*

5“याजकन क आपन मूँडे क मूडन नहीं करावइ चाही। याजकन क आपन दाढ़ी क सिरा नहीं कटवावइ चाही। याजकन क आपन चाम पइ कहूँ भी काटइ नहीं चाही। 6याजकन क आपन परमेस्सर बरे पवितर होइ चाही। उ पचे आपन परमेस्सर क नाउँ क दूसित नहीं करइ चाही। काहेकि उ पचे आपन भोजन अउ भेंट यहोवा क चढ़ावत ह एह बरे ओनका पवितर होइ चाही।

7“याजक परमेस्सर बरे पवितर अहइ। एह बरे याजक क अइसी मेहरारु स बियाह नहीं करइ चाही जउन कउनो क संग यौन सम्बंध किहे होइ। याजक क कउनो पतुरिया, या तलाक दीन्ह गइ मेहरारु स बियाह नहीं करइ चाही। 8याजक परमेस्सर बरे पवितर अहइ। एह बरे तू पचन क ओकरे साथे खास तरह स बेउहार करइ चाही। काहेकि उ पवितर चीजन क लइ चलत बाटइ। उ पवितर रोटी परमेस्सर क चढ़ावत ह अउर मई पवितर अहउँ। मई यहोवा अहउँ, अउर मई तू पचन क पवितर बनावत अहँउ।

9“अगर याजक क बिटिया पतुरिया बन जात ह तउ उ आपन इज्जत बरबाद करत ह अउ अपने भतारे पइ कलंक लगावत ह। एह बरे ओका बारि देइ चाही।

10“महा याजक आपन भाइयन मँ स चुना जात रहा। अभिसेक क तेल ओकरे मूँडे पइ नावा जात रहा। इ तरह उ महा याजक क बिसेस कर्तव्य बरे तैनात कीन्ह जात रहा। ओका महा याजक क खास ओढ़ना पहिरइ बरे चुना जात रहा। ओका आपन बार जंगली ढंग स नहीं बिखेरइ चाही। ओका आपन ओढ़ना बढ़ाइ देइ नहीं चाही। 11ओका मुर्दा क छुइके आपन क असुद्ध नहीं बनावइ चाही। ओका कउनो मुर्दा क लगे नहीं जाइ चाही। चाहे उ ओकर महतारी-बाप का ही काहे न होइ। 12महा याजक क परमेस्सर क पवितर ठउर क बाहरे नहीं जाइ चाही। अगर उ अइसा किहस तउ उ असुद्ध होइ जाइ अउ उ परमेस्सर क पवितर ठउर क भी अपमान कइ देइ। अभिसेक क तेल महा याजक क मूँडे पइ नावइ चाही। मई यहोवा अहउँ।

13“महा याजक क सिरिफ ओकर संग बियाह करइ चाही जउन कुवौरी होइ। 14महा याजक क अइसी मेहरारु स बियाह नहीं करइ चाही जउन कउनो दूसर मनई क संग यौन सम्बंध रख चुकी होइ। महा याजक क कउनो रण्डी, तलाक दीन्ह गइ मेहरारु या रौँड मेहरारु स बियाह नहीं करइ चाही। महा याजक क आपन लोगन मँ स एक कुवौरी स बियाह करइ चाही। 15ओका आपन गदेलन क अपवितर नहीं करइ चाही। मई, यहोवा, याजक क ओकरे खास कामे बरे पवितर बनाएँ ह।”

16यहोवा मूसा स कहेस, 17“हारून स कहा: अगर तोहरे बंस मँ जन्मइवालन क सन्तानन मँ स कउनो आपन मँ कउनो दोख पावइ तउ ओनका खास रोटी परमेस्सर तलक नहीं लइ जाइ चाही। 18कउनो मनई, जेहमँ कउनो दोख होइ, याजकन क काम न कइ सकत ह। उ मोरे लगे भेंट

नहीं लिआइ सकत ह। इ सबइ लोग याजक क रुप मँ सेवा नहीं कइ सकतेन।

ऑंधर मनई, लँगड़ा मनई, भयंकर चेहरा वाला मनई, बहोत जियादा लम्बी बाँह अउर टोंगवाला मनई।

19टूटा गोड़ या हाथवाला मनई,

20कुबड़ा मनई, बौना, ऑँखी मँ दोखवाला मनई, खजुरी अउ चरम रोग क मनई, बधिया कीन्ह गवा मनई।

21अगर हारून क कउनो बंसे मँ कछु दोख अहइ। अहइ तउ उ यहोवा क होमबलि नहीं चढ़ाइ सकत अउर उ खास रोटी परमेस्सर क लगे नहीं लइ जाइ सकत ह। 22बहरहाल उ पवितर रोटी खाइ सकत ह। उ सबन त पवितर रोटी भी खाइ सकत ह। 23मुला उ सबन त जियादा पवितर ठउरे मँ पर्दा स होइके नहीं जाइ सकत अउर न ही उ वेदी क लगे जाइ सकत ह। काहेकि ओहमँ कछु दोख अहइ। ओका मोरे पवितर ठउर क अपवितर नहीं बनावइ चाही। मई यहोवा ओन ठउरन क पवितर बनावत हउँ।”

24एह बरे मूसा इ सबइ बातन हारून स, हारून क पूतन अउ इस्राएल क सबहि लोगन स कहेस।

**22** यहोवा परमेस्सर मूसा स कहेस, 2“हारून अउ ओकरे पूतन स कहा: इस्राएल क लोग जउन चिजियन मोका देइहीं, उ सबइ पवितर होइ जइहीं। उ सबइ मोर अहइँ। एह बरे तू सबइ याजकन क उ सबइ चीजन नहीं लेइ चाही। तोहका उ सबइ पवितर चिजियन क नहीं लेइ चाही। एँह बरे तू मोर नाउँ क अपमान नहीं करब्या। मई यहोवा अहउँ। 3अगर तोहरे बंसे मँ जन्मइवालन मँ स कउनो व्यक्ति जउन असुद्ध अहइ। ओन चीजन क छुई। तउ उ व्यक्ति क मोसे अलग कइ दीन्ह जाइ। इस्राएल क लोग उ सबइ चीजन क मोका दिहन। मई यहोवा अहउँ।

4“अगर हारून क कउनो बंसे जन्मइ वालन मँ क बुरा चरम रोगन मँ स कउनो रोग होइ या ओका धात स्राव होइ तउ ओका तबहि तलक कउनो पवितर खाना नहीं खाइ चाही जब तलक उ सुद्ध न होइ जाइ। इ नेम उ सबइ याजक क बरे अहइ जउन असुद्ध होइ। उ याजक कउनो लहासे क छुइके या आपन वीर्य क गिरइ स असुद्ध होइ सकत ह। 5उ तब असुद्ध होइ सकत ह। जब उ कउनो रंगइवाला जनावर क छुअइ। उ तब असुद्ध होइ सकत ह जब उ कउनो असुद्ध मनई क छुअइ। एकर कउनो महत्व नहीं कि उ मनई क कउन चीज असुद्ध किहे अहइ। 6अगर कउनो मनई ओन चीजन क छुई तउ उ सँझ तलक असुद्ध रही। उ मनई क पवितर भोजन मँ स कछु भी नहीं खाइ चाही! पानी डाइके बगैर नहाए भए उ पवितर भोजन नहीं कइ सकत ह। 7उ सूरज क बूड़इ प इ सुद्ध होइ। तबहुँ उ पवितर भोजन कइ सकत ह। काहेकि भोजन ओकर अहइ।

8“अगर याजक क कउनो अइसा जनावर मिलत ह जउन खुद मरि गवा होइ या कउनो जनावर क जरिये मारि दीन्ह ग होइ तउ ओका मरे भए जनावर क नहीं खाइ चाही। अगर उ मनई जनावर क खाइ लेत ह तउ उ असुद्ध होइ। मई यहोवा अहउँ।

**मुला याजक ... रिस्तेदार होइ** सब्द क अरथ “मुला सुआमी क आपन लोगन बरे असुद्ध नहीं होइ चाही।”

9"याजक लोगन क उ काम करइ बरे सावधान होइ चाही जउन मई ओका दिहेस ह। ओनका सावधान रहइ क होइ कि उ पचे पवित्र चिजियन क अपवित्र न बनावइ। अगर उ पचे सावधान रहई तउ मरिहीं नाहीं। मई यहोवा ओनका इ खास काम बरे दूसर लोगन स अलगाएउँ ह। 10सिरिफ याजक लोगन क परिवार क मनई ही पवित्र भोजन खाइ सकत हीं। याजक क संग ठहरइवाला अतिथि या मजदूर पवित्र भोजन में स कछू भी नाहीं खाइ। 11मुला अगर याजक आपन धन स कउनो दास क बेसहत ह तउ उ पवित्र चीजन में स कछू क खाइ सकत ह अउ याजक क घरे में पइदा भवा दास भी उ पवित्र भोजन में स कछू खाइ सकत ह। 12कउनो याजक क बिटिया अइसे मनई स बियाह कइ सकत ह जउन याजक न होइ। अगर उ अइसा करत ह तउ पवित्र भेंट में स कछू नाहीं खाइ सकत। 13कउनो याजक क बिटिया विधवा होइ सकत ह, या ओका तलाक दीन्ह जाइ सकत ह। अगर ओकरे भरण पोसण बरे ओकरे लरिकन नाहीं बाटेन अउर उ आपन पिता क हिआँ लउटत ह, जहाँ उ बचपन में रही ह तउ उ पिता क भोजन में स कछू खाइ सकत ह। मुला सिरिफ याजक क परिवार क मनइयन ही इ भोजन क खाइ सकत हीं।

14"कउनो मनई भूलिके कछू पवित्र भोजन खाइ सकत ह। उ मनई क उ पवित्र भोजन याजक क देइ चाही अउ ओकरे अलावा उ भोजन क दाम क पाँचवाँ हीसा ओका अउर देइ क होइ। 15इस्त्राएल क लोग यहोवा क भेंट चढ़इहीं। उ सबइ भेंटन पवित्र होइ जात हीं। एह बरे याजक क ओन पवित्र चीजन क अपवित्र नाहीं बनावइ चाही। 16अगर याजक ओन चीजन क अपवित्र समझत हीं तउ उ पचे तबहिं आपन पाप क बढ़इहीं जब पवित्र भोजन क खइहीं। मई, यहोवा, ओनका पवित्र बनावत हउँ।"

17यहोवा परमेस्सर मूसा स कहेस, 18"हारून अउ ओकरे पूतन, अउर इस्त्राएल क सबहिं लोगन स कहा: होइ सकत ह कि इस्त्राएल क कउनो नागरिक या कउनो बिदेसी कउनो भेंट लावइ चाहइ। होइ सकत ह उ कउनो बिसेस बचन दिहे होइ, अउ इ ओकरे बरे होइ। या होइ सकत ह इ उ बिसेस भेंट होइ जेका उ व्यक्ति अर्पित करइ चाहइ। 19-20इ सबइ अइसी भेंटन अहई जेनका लोग एह बरे लिआवत हीं कि उ पचे यहोवा क भेंट चढ़ावइ चाहत हीं। तोहका सबन्क अइसी भेंट नाहीं कबूल करइ चाही जेहमें कउनो दोख होइ। मई उ भेंट स खुस नाहीं होब। अगर भेंट एक ठु साँइ अहइ, या एक ठु भेड़ी अहइ, या एक बोकरा अहइ तउ उ नर होइ चाही अउ एहमें कउनो दोख नाहीं होइ चाही।

21"कउनो मनई यहोवा क मेलबलि चढ़ाइ सकत ह। उ मेलबलि उ व्यक्ति क जरिये दीन्ह गए बचन बरे होइ सकत ह या इ कउनो खुद प्रेरित भेंट होइ सकत ह। इ बर्धा या भेड़ी होइ सकत ह। मुला ओका तन्दुरुस्त अउ दोख रहित होइ चाही। 22तोहका यहोवा क अइसा कउनो गोरु भेंट नाहीं करइ चाही जउन आँधर होइ या जेकर हाइ टूटा होइ, या जउन लंगड़ा होइ, या जेकर घाव बहत होइ, या चरम रोग वाला होइ। तोहका यहोवा बरे वेदी प कउनो बीमार गोरु क भेंट नाहीं चढ़ावइ चाही।

23"कबहुँ कबहुँ कउनो बर्धा या मेमना क गोइ बहोत जियावा लम्बा होइ सकत हीं या अइसेन गोइ होइ सकत हीं जेनकर विकास ठीक स न भवा होइ। अगर कउनो मनई अइसे गोरु क यहोवा क खास भेंट क रुप में चढ़ावत ह तउ उ स्वीकार कीन्ह जाइ। मुला एका कउनो व्यक्ति क जरिये दीन्ह गए बचन बरे स्वीकार नाहीं कीन्ह जाइ।

24"अगर कउनो गोरु क अण्ड कोस जख्मी, घाउवाला, फाड़ा भवा या कटा भवा होई तउ तोहका उ गोरु क भेंट यहोवा क नाहीं चढ़ावइ चाही। तोहका अइसा गोरुअन आपन भुईया पइ बलि नाहीं देइ चाही।

25"तोहका बिदेसियन स बलि बरे अइसे गोरुअन क नाहीं लेइ चाही। काहेकि इ सबइ गोरु कउनो तरह चोट खाए अहई। ओनमें कछू दोख अहइ। इ सबइ स्वीकार नाहीं कीन्ह जइहीं।"

26यहोवा मूसा स कहेस, 27"जब कउनो बछवा, या भेड़ी, या बोकरी जउन नवा पइदा होइ तउ आपन महतारी क संग ओका सात दिन रहइ देइ चाही। तब अठएँ दिन अउ ओकरे पाछे इ यहोवा क दीन्ह जाइवाली बलि क रुप में स्वीकार कीन्ह जइहीं। 28मुला तोहका सबन्क उही दिन उ गोरु अउ ओकरी बच्चन क नाहीं मारइ चाही। इहइ नेम गइया अउ भेड़न बरे अहइ।

29"अगर तू पचन्क यहोवा बरे कउनो खास कृतग्यता बलि चढ़ावइ क होइ तउ तू पचे उ भेंट क चढ़ावइ में अजाद अहा। मुला इ इ तरह करा कि परमेस्सर क खुस करा। 30तू पचन्क पूरा गोरु उहइ दिन खाइ लेइ चाही। तू पचन्क अगले भिन्सारे बरे कछू भी गोस नाहीं छोड़इ चाही। मई यहोवा अहउँ।

31"मोरे आदेसन क याद राखा अउ ओनकइ पालन करा। मई यहोवा अहउँ। 32मोरे पवित्र नाउँ क अपमान जिन करा। मोका इस्त्राएल क लोगन बरे बहोत खास होइ चाही। मई, यहोवा तू पचन्क आपन बिसेस लोग बनाएउँ ह। 33मई तू पचन्क मिस्र स लाएउँ। मई तोहार परमेस्सर बनेउँ। मई यहोवा अहउँ।"

### खास पवित्र दिन

23 यहोवा मूसा स कहेस, 2"इस्त्राएल क लोगन स कहा: तू पचे यहोवा क निहचित पर्वन क पवित्र एलन करा। इ सबइ मोर पवित्र दिन अहई:

### सबित

3"छः दिन काम करा। मुला सतवाँ दिन, आराम क एक खास दिन या पवित्र मिलन क दिन होइ। उ दिन तू पचन क कउनो काम नाहीं करइ चाही। इ तोहरे सबहिं घरन में यहोवा क सबित अहइ।

### फसह त्यौहार

4"इ सबइ यहोवा क चुने भए पवित्र दिन अहई। ओनके बरे निहचित समइ पइ तू पचे पवित्र सभा क घोसणा करब्या। 5यहोवा क फसह त्यौहार पहिले महीना क चउदह तारीख क साँइ बेला में अहइ।

### अखमीरी रोटी क त्यौहार

6“उहइ महीना क पन्द्रह तारीख क बे खमीरी मैदा क फुलकन क त्यौहार होइ। तू पचे सात दिना तलक बे खमीरी मैदा क फुलकन खाब्या। 7इ त्यौहार क पहिले दिन तू पचे एक पवितर सभा करब्या। उ दिन तोहका कउनो काम नहीं करइ चाही। 8सात दिन तलक तू पचे यहोवा बरे भेंट चढ़उब्या। सतएँ दिन एक पवितर सभा होइ। उ दिन तू पचन क कउनो काम नहीं करइ चाही।”

### पहिली फसल क त्यौहार

9यहोवा मूसा स कहेस, 10“इस्त्राएल क लोगन स कहा: तू पचे उ धरती पड़ जाब्या जेका मई तोहका देव। तू पचे उ समइ ओकर फसल कटब्या। उ समइ तू पचन क आपन फसल क पहिली पूली याजक क लगे लइ आवइ चाही। 11याजक पूली क यहोवा क समन्वा लहराइ। तब उ तोहरे पचन्क बरे स्वीकार कइ लीन्ह जाइ। याजक पूली क रविवार क भिन्सारे लहराइ।

12“जउने दिन तू पचे पूली क लहरउब्या, उ दिन तू पचे एक बरिस क एक ठु नर भेड़ी क बच्चा बलि चढ़उब्या। उ भेड़ी क बच्चा मँ कउनो दोख नहीं होइ चाही। इ भेड़ी क बच्चा यहोवा क होमबलि होइ। 13तू पचन क एपा क दुइ दसवाँ हीसा जइतून क तेल स सना आटा क अन्नबलि देइ चाही। तू पचन क हीन क चौथाई हीसा दाखरस भी देइ चाही। इ भेंट यहोवा क खुस करइवाली सुगन्धि होइ। 14जब तलक तू पचे आपन परमेस्सर क भेंट नहीं चढ़उत्या, तब तलक तू पचे कउनो नवा अनाज, या फल या नवा अनाज स बनी भइ रोटी नहीं खाइ चाही। इ नेम तू पचे जहाँ भी रहब्या, तोहरी पीढ़ी दर पीढ़ी चलत रही।

### हप्तन क त्यौहार

15“उ रविवार क भिन्सोर स ही उ दिन जब तू पचे पूली उत्तोलन बलि बरे लिआवत ह, सात हप्ता गिना। 16सतएँ हप्ता क पाछे रविवार क (अर्थात पचास दिन क पाछे) तू पचे यहोवा बरे नवा अन्नबलि लउब्या। 17उ दिन तू पचे आपन निवास स्थान स दुइ-दुइ रोटी लिआवा। इ सबइ उत्तोलन भेंट होइ। खमीर क प्रयोग करा अउ चार क्वार्ट आटा क रोटी बनावा। उ तोहरी पहली फसल स यहोवा क भेंट होइ।

18“लोगन स अन्नबलि क साथ मँ एक ठु बछवा, दुइ भेड़ा अउर एक-एक बरिस क सात नर मेमना भेंट कीन्ह जइहीं। इ गोरुअन मँ कउनो दोख नहीं होइ चाही। इ सबइ भेंट क रूप मँ यहोवा क खुस करइ बरे सुगन्धित होमबलि होइहीं। 19तू पचे भी पापबलि क रूप मँ एक ठु नर बोकरा अउ एक बरिस क दुइ भेड़ी क बच्चन मेलबलि क रूप मँ चढ़उब्या।

20“याजक यहोवा क समन्वा उत्तोलन बलि क रूप मँ दुइ भेड़ी क बच्चन क पहिली फसल क रोटी क संग लहरउब्या। उ सबइ यहोवा बरे पवितर अहई। इ सबइ याजक क होइहीं। 21उहइ दिन, तू पचे एक ठु पवितर सभा

बोलउब्या। तू पचे कउनो काम नहीं करब्या। इ नेम तोहरे सबहिँ घरन मँ हमेसा ही चली।

22“जब तू पचे आपन खेतन क फसल कटब्या तउ खेतन क कोनन सारी फसल जिन काट्या। जउन अन्न भुईया पड़ गिरइ, ओका जिन उठावा। ओका तू पचे गरीब लोगन क अउ तोहरे सबन्क देस मँ जात्रा करइवाले बिदेसियन बरे छोड़ द्या। मई यहोवा तोहार परमेस्सर अहई।”

### तुरहियन क त्यौहार

23यहोवा मूसा स फिन कहेस, 24“इस्त्राएल क लोगन स कहा: सतएँ महीना क पहिले दिन तोहका पचन्क आराम क खास दिन मानइ चाही। उ दिन एक पवितर सभा होइ। इ दिना (यहोवा क) याद रखइ अउर तुरही क बजावइ बरे अहइ। 25तोहका कउनो काम नहीं करइ चाही। तू पचे यहोवा क भेंट चढ़ावइ बरे बलि ले अउब्या।”

### प्रायश्चित क दिन

26यहोवा मूसा स कहेस, 27“सतएँ महीना क दसवें दिन प्रायश्चित क दिन\* होइ। उ दिन क पवितर सभा होइ। तू पचे भोजन नहीं करब्या। अउर तू पचे यहोवा क भेंट चढ़उब्या। 28तू पचे ओह दिन कउनो काम नहीं करब्या। काहेकि इ प्रायश्चित क दिन अहइ। उ दिन याजकन यहोवा क समन्वा जाइ अउ उ तोहार बरे प्रायश्चित करइहीं।

29“अगर कउनो मनई उपवास करइ स मना करत ह तउ ओका आपन लोगन स अलगाइ दीन्ह जाइ। 30अगर कउनो मनई उ दिन काम करी तउ मई ओका ओकरे लोगन मँ स बारबाद करइ देव। 31तोहका कउनो भी काम नहीं करइ चाही। इ नेम तू पचे जहाँ कहीं भी रहब्या, सदा ही रही। 32इ तोहरे सबन्क आराम क खास दिन होइ। तू पचन क भोजन नहीं करइ चाही। तू पचे आराम क इ खास दिन क महीना क नवाँ दिन साँझ\* स सुरु करब्या। इ आराम क खास दिन उ साँझ स सुरु कइके अगली साँझ तलक रहत ह।”

### कटीर क त्यौहार

33यहोवा मूसा स फुन कहेस, 34“इस्त्राएल क लोगन स कहा: सतएँ महीना क पन्द्रहवें दिन कटीर क त्यौहार होइ। यहोवा बरे इ पवितर त्यौहार सात दिन तक चली। 35पहिले दिन एक धरम सभा होइ। तू पचन्क तब कउनो काम नहीं करइ चाही। 36तू पचे सात दिना तलक यहोवा बरे भेंट चढ़उब्या। अठएँ दिन तू पचे दूसर धरम सभा करब्या। तू पचे यहोवा क भेंट चढ़उब्या। इ एक भेंट सभा होइ। तू पचन्क तब कउनो काम नहीं करइ चाही।

**प्रायश्चित क दिन** एँका “युम कुप्पुर” भी कहा गवा बाटइ। इ यहूदियन क एक बहोत महत्व क पवितर दिन अहइ। इ दिन महा याजक परमपवितर ठउर मँ जात रहा अउ ओन कामे क करत रहा जेहसे लोगन क पापन क प्रायश्चित होत रहा।

**नवाँ दिन साँझ** यहूदी लोगन क दिन क आरम्भ साँझ स होत रहा।

37“इ सबइ यहोवा क खास पवित्र दिन अहई। ओन दिन पवित्र सभा होइ। तू पचे यहोवा क होम बलि, अन्नबलि, जनावरन क बलि पेयबलि भेंट क रूप में चढ़उब्या। तू पचे उ सबइ भेंटन क ठीक समइ पइ लइ अउब्या। 38तू पचे यहोवा क सबित दिनन क सुमिरइ क अलावा ओन पवित्र दिनन क त्यौहार मनउब्या। तू पचे ओन बलियन क यहोवा क आपन अन्नबलि क अलावा देब्या। तू पचे बिसेस दीन्ह गए बचन क पूरा करइ क रूप में दीन्ह गइ कउनो भेंट क अलावा ओन चिजियन क देब्या। उ सबइ ओन बिसेस भेंटन क अलावा होइहीं जेनका तू पचे यहोवा क देइ चाहत अहा।

39“सतएँ महीना क पन्द्रहवें दिन, जब तू पचे आपन खेतन स फसल लिआइ चुकब्या, सात दिन तलक यहोवा क त्यौहार मनउब्या। पहिले अउ अठएँ दिन भी आराम क खास दिन होइ चाही। 40पहिले दिन तू पचे फलदार पेड़न स नीक फल लिअउब्या अउ तू पचे खजूर क बृच्छ क डारी, चीड़ अउ बेंते क बृच्छन स डारि लिअउब्या। तू पचे आपन परमेस्सर यहोवा क समन्वा सात दिना तलक त्यौहार मनउब्या। 41तू पचे इ पवित्र दिन क हर साल यहोवा बरे सात दिना तलक मनउब्या। इ नेम सदा ही रही। तू पचे इ पवित्र दिन क सतएँ महीना में मनउब्या। 42तू पचे सात दिना तलक अस्थायी आस्त्रयन में रहब्या। इस्राएल में पइदा भए सबहि लोग ओन आस्त्रयन में रइहीं। 43काहे? एहसे तोहरे सब बंसज इ जनिहीं कि मई इस्राएल क लोगन क अस्थायी आस्त्रयन में रहइवाला ओह समइ बनाएँ जउने समइ मई ओनका मित्र स लिआएँ। मई तोहार परमेस्सर यहोवा अहउँ।”

44इ तरह मूसा इस्राएल क लोगन क यहोवा क खास पवित्र दिनन क बारे में बताएस।

### डीबट अउ पवित्र रोटी

24 यहोवा मूसा स कहेस, 2“इस्राएल क लोगन क कुचला भवा जइतून स जइतून क तेल अपने लगे लिआवइ क आदेस द्या। उ तेल दीपकन बरे अहई। इ सबइ दीपक बेबुझे भए लगातार बरत रहइ चाही। 3हारून यहोवा क मिलापवाला तम्बू में करार क सन्दूख क पर्दा क आगे सँझ बेला स भिन्सारे तलक दीपकन क बारे राखी। इ नेम सदा बरे अहइ।

4“हारून क सोना क डीबट पइ यहोवा क समन्वा दीपकन क सदा बरत भवा रखइ चाही।

5“नीक महीन आटा ल्या अउ ओकर बारह रोटी बनावा। हर एक रोटी बरे एपा क दुइ दसवों हींसा आटा क प्रयोग करा। 6ओनका दुइ लाइन में सुनहरी मेजे पइ यहोवा क समन्वा धरा। हर एक लाइन में छः रोटी होइहीं। 7हर एक लाइन पइ सुदुध लोहबान धरा। इ यहोवा बरे भेंट, भोजन क स्मृति हींसा होइ। 8हर एक सबित दिवस क उ रोटियन क यहोवा क समन्वा एक करार क रूप में क्रम में इस्राएल क लोगन क संग हमेसा बरे राखि। 9उ रोटी हारून अउ ओकरे पूतन क होइ। उ पचे रोटियन क पवित्र ठउर में खइहीं। काहेकि उ रोटी यहोवा क चढ़ई गइ भेंटन में स एक अहइ। उ रोटी सदा हारून का हींसा होइ।”

### उ मनई जउन यहोवा क सराप दिहस

10एक इस्राएली स्त्री क पूत रहा। ओकर बाप मित्री रहा। इस्राएली स्त्री क इ पूत इस्राएली रहा। उ इस्राएली लोगन क बीच में घूमत रहा अउ उ डेरा में लइब सुरु किहस। 11इस्राएली मेहरारु क लरिका यहोवा क नाउँ क सरापेस ह। एह बरे लोग उ लरिका क मूसा क समन्वा लिआएन। (लरिका क महतारी क नाउँ सलोमीत रहा जउन दान क परिवार समूह स दिब्री क बितिया रही।) 12लोग लरिका क कैदी क तरह धरे रहेन अउ तब तलक जोहत रहेन, जब तलक यहोवा क हुकुम ओनका साफ तरीका स मालूम नाहीं होइ गवा।

13तब यहोवा मूसा स कहेस, 14“उ मनई क डेरा स बाहेर एक ठउरे पइ लिआवा, जउन सराप दिहस ह। तब ओन सबहि लोगन क एक संग बोलावा जउन ओका सराप देत सुनेन ह। उ पचे लोग आपन हाथ ओकरे मूँडे प धरिहीं।\* अउर तब सब लोग ओह पइ पाथर स मरिहीं अउ ओका मार डइहीं। 15तोहका पचन्क इस्राएल क लोगन स कहइ चाही: अगर कउनो मनई आपन परमेस्सर क सरापत ह तउ उ मनई क सजा मिलइ चाही। 16कउनो मनई, जउन यहोवा क नाउँ क सरापत ह, जरुर मार दीन्ह जाइ चाही। सब लोगन क ओका पाथर स मारइ चाही। बिदेसी क वइसे भी ही सजा मिलइ चाही जइसे इस्राएल में जन्म लेइवाला मनई क मिलत ह। अगर कउनो मनई यहोवा क नाउँ क सरापत ह तउ ओका जरुर मार देइ चाही।

17“अउर अगर कउनो मनई कउनो दूसर क मार डवत ह तउ ओका जरुर मार डवइ चाही। 18अगर कउनो मनई कउनो मनई क गोरु क मार डवत ह तउ ओकरे बदले में ओका दूसर गोरु देइ चाही।\*

19“अगर कउनो मनई अपने पड़ोस में कउनो क चोट पहुँचावत ह तउ उ मनई क उहइ तरह क चोट उ मनई क पहुँचावइ चाही।\* 20एक टूटी हड्डी बरे एक टूटी हड्डी, एक आँखी बरे एक ठु आँखी, अउर एक दाँत बरे एक ठु दाँत। उहइ तरह क चोट उ मनई क पहुँचावइ चाही, जइसा उ दूसर क पहुँचाएस ह। 21एह बरे जउन मनई कउनो दूसर मनई क गोरु क मारइ तउ एकरे बदले में ओका दूसर गोरु देइ चाही। मुला जउन मनई कउनो दूसर मनई क मार डवत ह उ जरुर मार डवा जाइ चाही।

22“इहइ नेम तू सबइ लोगन बरे लागू होइ: इ तोहार बीच में रहइवालन बिदेसी अउ तोहरे आपन देसबासियन बरे समान होइ। काहेकि मई तोहर परमेस्सर अहउँ।”

23तब मूसा इस्राएल क लोगन स बात किहस अउर उ पचे उ मनई क डेरा क बाहेर एक ठउर पर लिआएन, जउन सराप दिहे रहा। तब उ पचे ओका पाथर स मार डएन। इ

हाथ ओकरे मूँडे प धरिहीं एहसे पता चलत ह कि उ पचे सब लोग लरिका क सजा देइ में हाथ बटावत रहेन।

दूसर गोरु देइ चाही सव्व क अरथ एकरे बरे भुगतान करा “जीवन बरे जीवन।”

अगर ... चाही इ नेम समाज बरे अपराधन क निहचित करइ बरे एक दिसा निर्दोस अहइ। निजी तरीका स बदला लेइ क बजाय अपराध क मुताबिक सजा समाज क निहचित करब अहइ।

तरह इस्त्राएल क लोग उहइ किहन जउन यहोवा मूसा क हुकुम दिहे रहा।

### भुइँयाँ बरे आराम क समइ

**25** यहोवा मूसा स सिनाई पहाड़े प कहेस। यहोवा कहेस, 2<sup>॥</sup> इस्त्राएल क लोगन स कहा: तू लोग उ भुइँयाँ प जाब्या जेका मई तू पचन्क देत अहउँ। उ समइ तू पचन्क भुइँयाँ क आराम क समइ जरूर देइ चाही। इ यहोवा क सम्मान देइ बरे भुइँयाँ क आराम क खास समइ होइ। 3<sup>॥</sup> तू पचे छ: बरिस तलक आपने खेतन मँ बिआ बोउब्या। तू पचे आपन अंगूर क बागन मँ छ: बरिस तलक कटनी करब्या अउ ओकर फल स खूब आनन्द लेउब्या। 4<sup>॥</sup> मुला सतएँ बरिस तू पचे उ भुइँयाँ क आराम करइ देब्या। इ यहोवा क सम्मान देइ बरे आराम क खास समइ होइ। तोहका पचन्क आपन खेतन मँ बिआ नाहीं बोवइ चाही अउ अंगूर क बागन मँ बेलन क कटनी नाहीं करइ चाही। 5<sup>॥</sup> तू पचन्क ओन फसलन क कटनी नाहीं करइ चाही जउन फसल कटइ क पाछे अपने आप उगत ह। तू पचन्क आपन ओन अंगूर क बेलन स अंगूर नाहीं उतारइ चाही जेनकइ तू पचे कटनी नाहीं किहे अहा। इ भुइँयाँ क आराम क खास समइ होइ।

6<sup>॥</sup> इ (जउन चीज सतएँ बरिस मँ अपने आप उगत ह) तोहरे बरे भोजन होइ। तोहार मनसेधू अउ मेहरारू दास लोगन बरे मजदूरी प रखा गएन तोहरे मजदूर अउ तोहरे देस मँ रहइवाले बिदेसियन बरे प्रयाप्त भोजन होइ। भोजन रही। 7<sup>॥</sup> तोहरे गोरुअन अउ दूसर जनावरन क खाइ बरे ढेर चारा होइ।

### जुबली मुक्ति बरिस

8<sup>॥</sup> तू पचे सात बरिस तलक सात समूहन क गनब्या। इ सबइ उन्नचास बरिस होइहीं। इ समइ क भितरे भुइँयाँ बरे सात बरिस आराम क होइहीं। 9<sup>॥</sup> प्रायश्चित्त क दिन तू सबन्क भेड़ा क सींग बजावइ चाही। उ सतएँ महीना क दसवाँ दिन होइ। तू सबन्क पूरा देस मँ भेड़ा क सींग बजावइ चाही। 10<sup>॥</sup> तू पचे पचासवँ बरिस क बिसेस ल्यौहार मनउब्या। तू पचे आपन देस मँ रहइवाले सबहिँ लोगन क स्वतंत्र घोषित करब्या। इ समइ क “जुबली” कहा जाइ। तू पचन मँ स हर एक आपन भुइँयाँ मँ लउटि जाइ। अउर तू पचन मँ स हर एक आपन परिवार मँ लउटि जाइ। 11<sup>॥</sup> पचासवँ बरिस तोहरे पचन्क बरे खास उत्सव क बरिस होइ। उ बरिस तू पचे बिआ जिन बोआ। अपने आप उगी भइ फसल क जिन काटा। अंगूरे क ओन बेलन स अंगूर जिन ल्या। 12<sup>॥</sup> उ जुबली बरिस अहइ। इ तोहरे पचन बरे पवितर बरिस होइ। तू पचे उ पैदावार क खाब्या जउन तोहरे खेतन स आवति अहइ। 13<sup>॥</sup> जुबली बरिस मँ हर एक मनई क ओकर धरती वापस होइ जाइ।

14<sup>॥</sup> दूसर मनई क आपन भुइँयाँ बेंचइ या खरीदइ मँ जिन ठगा। 15<sup>॥</sup> अगर तू पचे कउनो क भुइँयाँ बेसहइ चाहया तउ पिछले जुबली स काल क गिना करा अउ उ गणना क प्रयोग धरती क ठीक दाम तय करइ बरे करा। अगर तू पचे भुइँयाँ क बेंचत ह, तउ फसलन क कटनी क सबइ बरिस

क गना अउ बरिसन क गणना क उपयोग ठीक दाम तय करे बरे करा। 16<sup>॥</sup> अगर जियादा बरिस अहइँ तउ दाम ऊँच होइ। अगर थोड़ा बरिस अहइँ तउ दाम कमती करा। काहेकि उ मनई तू पचन्क सचमुच कुछ बरिस क फसल बेंचत अहइ। अगली जुबली पइ भुइँयाँ ओकरे परिवार क होइ जाइ। 17<sup>॥</sup> तू सबन्क एक दूसर क ठगाइ नाहीं चाही। तू सबन्क आपन परमेस्सर क सम्मान करइ चाही। मई यहोवा तोहार परमेस्सर अहउँ।

18<sup>॥</sup> मोरे नेमन अउ निर्णयन क सुमिरा। ओनकइ पालन करा। तबहिँ तू पचे अपने देस मँ सुरच्छित रहब्या। 19<sup>॥</sup> भुइँयाँ तोहरे बरे उत्तम फसल पइदा करी। तब तोहरे लगे बहोत जियादा भोजन होइ अउर तू पचे आपन देस मँ सुरच्छित रहब्या।

20<sup>॥</sup> मुला साइद तू पचे इ कहा, ‘अगर हम बिआ न बोई या आपन फसल न बटोरी तउ सतएँ बरिस हम लोगन बरे कछु खाइ क तनिकउ भी न रही।’ 21<sup>॥</sup> चिन्ता जिन करा। मई छठवँ बरिस मँ आपन आसीस क तोहरे सबन्क लगे आवइ क हुकुम देब। भुइँयाँ तीन बरिस तलक फसल पइदा करत रही। 22<sup>॥</sup> जब अठएँ बरिस तू पचे बोउब्या तब तलक फसल पइदा करत रही। तू पचे पुरान पैदावार क नवएँ बरिस तलक खात रहब्या जब अठएँ बरिस मँ बोइ भइ फसल घरन मँ आइ जाइ।

### सम्पत्ति क नेम

23<sup>॥</sup> असल मँ भुइँयाँ मोरि अहइ। एह बरे तू पचे ऐंका स्थायी रुप मँ नाहीं बेंच सकत्या। तू पचे मोरे संग मोर भुइँयाँ पइ सिरिफ बिदेसी अउ निवासी क रुप मँ रहत बाट्या। 24<sup>॥</sup> कउनो मनई आपन भुइँयाँ बेंच सकत ह, मुला ओकर परिवार हमेसा ही आपन भुइँयाँ वापस पाइ। 25<sup>॥</sup> कउनो मनई तोहरे देस मँ बहोत गरीब होइ सकत ह। उ ऐंतना गरीब होइ सकत ह कि ओका आपन सम्पत्ति बेंचइ क पइइ। अइसी हालत मँ ओकरे निचके क रिस्तेदारन क आगे आवइ चाही अउ आपन रिस्तेदार बरे उ उ सम्पत्ति वापस बेसहइ चाही। 26<sup>॥</sup> कउनो मनई क कउनो अइसा नजदीकी रिस्तेदार नाहीं। भी होइ सकत ह जउन ओकरे बरे सम्पत्ति वापस खरीदइ। मुला होइ सकत ह उ खुद भुइँयाँ क वापस बेसहइ बरे ढेर क धन पाइ लेइ। 27<sup>॥</sup> तउ ओका जब स भुइँयाँ बिकी रही तब स बरिसन क गनइ चाही। ओका उ गणना क उपयोग, भुइँयाँ क दाम निहचित करइ बरे करइ चाही। तब ओका भुइँयाँ क वापस बेसहइ चाही। तब भुइँयाँ फुन ओकर होइ जाइ। 28<sup>॥</sup> मुला अगर उ मनई आपन बरे भुइँयाँ क वापस बेसहइ बरे ढेर क धन नाहीं जुटाइ पावत तउ जउन कछू उ बेंचेस ह उ उ मनई क हाथे मँ जउन ओका बेसहेस ह, जुबली क ल्यौहार क आवइ तलक रही। तब उ खास उत्सव क समइ भुइँयाँ पहिले भू स्वामी क परिवार क होइ जाइ। इ तरह सम्पत्ति फुन मूल आधिकारी परिवार क ही होइ जाइ।

29<sup>॥</sup> अगर कउनो मनई नगर परकोटा क भीतर आपन बेंचत ह तउ घरे क बेंचा जाइ क पाछे एक बरिस तलक ओका वापस लेइ क अधिकार होइ। घर क वापस लेइ क

ओकर अधिकार एक बरिस तलक रही। 30 मुला अगर घरे क मालिक एक पूरा बरिस बीत जाइ क पहिले आपन घर वापस नहीं बेसहत तउ नगर परकोटा क भीतर क घर जउन मनई बेसहत ह ओकर अउ ओकरे बसजन क होइ जात ह। जुबली क समइ पहिल गृह स्वामी क वापस नहीं होइ। 31 बगैर परकोटा वाला नगर खुला मैदान माना जइहीं। एह बरे ओन छोटे नगरन में बने भए घर जुबली क त्यौहार क समइ पहिले गृह स्वामी क वापस होइहीं।

32 "मुला लेवियन क नगर क बारे में: जउर सहरन लेवियन क आपन अहई, ओनमें उ सबइ आपन घरन क कउनो भी समइ वापस खरीद सकत हैं। 33 अगर कउनो मनई लेवी स कउनो घर खरीदइ तउ लेवियन क उ घर फुन जुबली क अवसर में लउटइ जाइ। काहेकि उ घर उ लेवियन क अउ ओकरे परिवारे क अहइ जउन इस्राएली लोगन क बीच रहत ह। 34 लेवी नगरन क चारिहूँ कइँती क खेत अउर चरागाह बेचा नहीं जाइ सकतेन। उ सबइ खेत सदा लेवियन क अहई।

### दासन क सुआमियन क नेम

35 "साइद तोहरे देस क मनई ऐतना गरीब होइ जाइ कि आपन भरण पोषण न कइ सकइ। तू पचे ओका कउनो दूसर नागरिक या बिदेसी निवासी क तरह तोहारे संग जरूर रहइ देइ चाही। 36 ओका दीन्ह गए आपन कर्जा पइ कउनो सूद जिन ल्या। आपन परमेस्सर क सम्मान करा अउ आपन भाई क अपने साथे रहइ द्या। 37 ओका सूद पइ पइसा उधार जिन द्या। जउन भोजन उ करइ, ओह पइ कउनो फायदा लेइ क कोसिस जिन करा। 38 मई तोहार परमेस्सर यहोवा अहउँ। मई तू पचन्क मिस्त्र देस स कनान प्रदेस देइ अउ तोहार परमेस्सर बनइ बरे बाहेर लाएँ।

39 "इ होइ सकत ह कि तोहार कउनो भाई ऐतना गरीब होइ जाइ कि उ दास क रूप में तू पचन्क अपने क बेंच देइ। तोहका ओसे दास क तरह काम नाही लेइ चाही। 40 उ जुबली बरिस तलक मजदूर अउ एक अतिथि क तरह तोहरे संग रही। 41 तब उ तू सबन्क छोड़ सकत ह। उ आपन बच्चन क अपने संग लइ जाइ सकत ह अउ आपन परिवार में लउट सकत ह। उ आपन पुरखन क सम्पत्ति क लउटाइ सकत ह। 42 काहेकि उ पचे मोर सेवक अहई। मई ओनका मिस्त्र क गुलामी स अजाद किहेउँ ह। ओनका फुन स दास नहीं होइ चाही। 43 तोहका सबन्क अइसे लोगन पइ क्रूर होइके सासन नहीं करइ चाही। तोहका पचन्क अपने परमेस्सर क सम्मान जरूर करइ चाही।

44 "तोहरे दास दासियन क बारे में: तू पचे आपन चारिहूँ कइँती क रास्ट्रन स दास अउ दासियन क लइ सकत ह। 45 अगर तोहरे देस में रहइवाले बिदेसियन क परिवारन क बच्चन तोहरे लगे आवत हीं तउ तू पचे ओनका भी दास रख सकत ह। उ सबइ बच्चन तोहार दास होइहीं। 46 तू सबइ इ बिदेसी दासन क आपन बच्चन क भी दइ सकत ह जउन तोहरे मरइ क पाछे तोहरे बच्चन क होइहीं। उ पचे सदा तोहार दास रहहीं। तू पचे इ बिदेसियन क गुलाम बनाइ

सकत ह। मुला तू पचन्क आपन भाइयन, इस्राएल क लोगन पइ क्रूर होइके सासन नहीं करइ चाही।

47 "होइ सकत ह कि कउनो बिदेसी या अस्थायी निवासी तोहरे बीच धनी होइ जाइ। सम्भव अहइ कि तोहरे देस क कउनो मनई ऐतना गरीब होइ जाइ कि उ आपन क तोहरे बीच रहइवाले धनी बिदेसी क हाथ या बिदेसी परिवार क कउनो सदस्य क हाथ दास क रूप में बेंचइ। 48 उ मनई वापस खरीदा जाइ अउ अजाद होइ क अधिकारी होइ। ओकरे भाइयन में स कउनो भी ओका वापस बेसहि सकत ह 49 या ओकर चाचा, मामा व चचेरा, ममेरा भाई ओका वापस बेसहि सकत हीं या ओकरे निचके क रिस्तेदारन में स ओका कउनो खरीद सकत ह या अगर मनई ढेर क धन पावत ह तउ खुद धन दइके उ फुन अजाद होइ सकत ह।

50 "तू पचे ओकर दाम कइसे निहचित करब्या? तू पचे बिदेसी क लगे जब स उ अपने क बेंचेस ह तब स अगली जुबली तलक क बरिसन क गनब्या, उ आपन क जुबली क बरिस तलक बेचेस ह। उ गणना क उपयोग दाम तय करइ में प्रयोग करा। काहेकि असल में उ मनई कछू बरिसन बरे ओका मजदूरी पइ राखेस। 51 अगर जुबली क बरिस क पहिले कइउ बरिस होइ जाइँ तउ मनई क दाम क बड़का हींसा लउटावइ चाही। इ ओन बरिसन क गनती पइ टिका बाटइ। 52 अगर जुबली क बरिस तलक कछू ही बरिस बाकी होइँ तउ मनई मूल कीमत क थोड़ा सा हींसा लउटावइ चाही। 53 मुला उ मनई हर बरिस बिदेसी क हिआँ मजदूर क तरह रही, बिदेसी क उ मनई पइ क्रूर होइके सासन न करइ द्या।

54 "उ मनई कउनो क जरिये वापस न बेसहा जाइ पइ भी अजाद होइ। जुबली क बरिस उ अउ ओकरे बच्चन अजाद होइ जइहीं। 55 काहेकि इस्राएल क लोग मोर सेवक अहई। उ पचे मोर सेवक अहई जउन क मई मिस्त्र क गुलमी स अजाद किहेउँ। मई तोहार परमेस्सर यहोवा अहउँ।

### परमेस्सर क आग्या मानइ क पुरस्कार

26 "अपने बरे मूर्तियन जिन बनावा। मूर्तियन या यादगार क पाथर क स्थापना जिन करा। आपन देस में उपासना करइ बरे पाथर क मूर्तियन क स्थापना जिन करा। काहेकि मई यहोवा तोहार परमेस्सर अहउँ।

2 "मोरे आराम क खास दिनन क याद रखा अउ मोरे पवितर स्थान क सम्मान करा। मई यहोवा अहउँ।

3 "मोर नेमन अउ आदेसन क याद रखा अउ ओनकर पालन करा। 4 अगर तू पचे अइसा करब्या तउ मई जउने समइ बर्खा आवइ चाही, उहइ समइया में बर्खा कराउब। भुईँया फसलन क पइदा करिहीं अउर बृच्छ आपन फल देइहीं। 5 तोहार अनाज निकारइ क काम तब तलक चली जब तलक अंगूर एकट्ठा करइ क समइ आइ अउ अंगूरे क बटोरब तब तलक चली जब तलक बोवाइ क समइ आइ जाइ। तब तोहरे लगे खाइ क बहोत होइ, अउर तू पचे आपन पहेँटा में सुरच्छित रहब्या। 6 मई तोहरे देस क सान्ति देब। तू पचे सान्ति स सोइ सकब्या। कउनो मनई डरवावइ

नाहीं आइ। मई बिनास करइवाले जनावरन क तोहरे देस स बाहेर रखब। अउर फउज भी तोहरे देस स न गुजरिहीं।

7“तू पचे आपन दुस्मनन क पाछा कइके भगउब्या अउर ओनका हरउब्या। तू पचे ओनका आपन तरवार स मारि डउब्या। 8तोहरे पाँच मनई सौ मनईयन क पाछा कइके भगाइ देइहीं अउर सौ मनई दस हजार मनईयन क पाछा कइके भगाइ देइहीं। तू पचे आपन दुस्मनन क हरउब्या अउ ओनका तरवारे स मार डउब्या।

9“तब मई तोहरी कइँती मुडबउँ। मई तू पचन्क बहोत स बच्चावाला बनउबउँ। मई तोहरे संग आपन वाचा क पालन करबउँ। 10तोहरे लगे एक बरिस स जियादा चलइवाली ढेर क पइदावार होइ। तू पचे नई फसल कटब्या। मुला तब तोहका पुरान पइदावार नई पइदावार बरे जगह बनवइ खातिर फेंक देइ क पड़ी। 11तू पचन क बीच मँ मई आपन पवित्तर तम्बू लगाउब। मई तू लोगन क नाहीं तजिबय। 12मई तोहरे संग चलब अउर तोहार परमेस्सर रहब। तू पचे मोर आपन लोग रहब्या। 13मई तोहार परमेस्सर यहोवा अहउँ। तू पचे मिस्र मँ दास रह्या। मुला मई तू पचन्क बाहेर लिआएउँ। तू लोग दास क रुप मँ भारी बोझा ढोवइ स निहुरा भए रह्या मुला मई तोहरे कधि क जुए क तोड़ फेंकेउँ। मई तू पचन्क फुन गरब स चलइवाला बनाएँ।

### यहोवा क आग्या पालन न करइ बरे सजा

14“मुला अगर तू मोर आग्या क पालन नाहीं करब्या अउर मोर इ सबइ आदेस क नाहीं मनब्या तउ इ सबइ बुरी बात होइहीं। 15अगर तू मोर नेम अउ आदेसन क रद्द करब्या अउर ओनका पालन करइ मँ फेल होब्या। तउ तू पचे मोर करार क भंग कइ देब। 16अगर तू पचे अइसा करत अहा तउ मई अइसा करबउँ कि तोहार सबन्क भयंकर अनिस्ट होइ। मई तू पचन्क लाइलाज रोग अउ तेज बोखार लगाउब। उ सबइ तोहरी अँखियन क नस्ट करिहीं अउ तोहार जिन्गी लइ लेइहीं। जब तू पचे आपन बिआ बोउब्या तउ तू पचन्क कामयाबी न मिली। तोहार पइदावार क तोहार दुस्मन लोग खइहीं। 17मई तोहरे खिलाफ होब, तोहार दुस्मन तोहका हरइहीं। उ सबइ दुस्मन तोहसे घिना करिहीं अउ तोहरे ऊपर सासन करिहीं। तू पचे तब भी पराइ जाब्या, जब तोहार पाछा कउनो न करत रहा होइ।

18“अगर ऐँकरे पाछे भी तू पचे मोर आग्या क नाहीं मानत अहा तउ मई तोहरे पापन बरे सात गुना जियादा सजा देब। 19मई ओन बड़के सहरन क भी नस्ट करब जउन तोहका घमण्डी बनावत हीं। आकास बर्खा न देइ अउ धरती पइदावार नाहीं उपजाइ।\* 20तू पचे कठिन परिस्त्रम करब्या, मुला एहसे कछू भी न होइ। तोहरी भुइँया मँ कउनो पइदावार न होइ अउर तोहरे बृच्छन प फल नाहीं अइहीं।

21“अगर तब भी तू पचे मोरे खिलाफ जात ह्या अउर मोरी आग्या क मानब स्वीकार नाहीं करत ह्या तउ मई सात गुना कठोर होइके मारब। जेतना जियादा पाप करब्या ओतना

जियादा सजा पउब्या। 22मई तोहरे सबन्क खिलाफ जंगली जनावर पठउब। उ सबइ तोहरे गदेलन क तोहसे छोर लइ जइहीं। उ पचे तोहरे गोरुअन क नास कइ देइहीं। उ पचे तोहार मनइयन क गनती बहोत कम कइ देइहीं। लोग जात्रा करइ स डेराइ जइहीं, सड़क खाली होइ जइहीं।

23“अगर ओन चीजन क होइ प तू पचन्क सिच्छा नाहीं मिलत अउर तू पचे मोरे बिरुद्ध होइ जात ह्या, 24तउ मई तोहरे बिरुद्ध होब। मई, हॉ, मई (यहोवा) तोहरे पापन बरे सात गुना सजा देब। 25तू पचे मोर वाचा तोड़्या ह, एह बरे मई तू सबन क दण्ड देब। मई तोहरे खिलाफ फउज क पठउब। तू पचे सुरच्छा बरे आपन सहरन मँ जाब्या। मुला मई अइसा करब कि तू लोगन मँ बेगामी सँचरइँ। तब तोहार दुस्मन तोहका हराइ देइहीं। 26मई उ सहर मँ छोड़े गए अन्न क एक हींसा तोहका देब। मुला खाइ बरे बहोत कम अनाज रही। दस मेहररुअन आपन सबहिँ रोटियन एक चूल्हा मँ सेकं सकिहीं। उ पचे रोटी क हर एक टूका क नपिहीं। तू पचे खाब्या, मुला फुन भी भूखा रहब्या।

27“अगर तू पचे खतना पइ भी मोर बातन क सुनब अंगीकार नाहीं करत ह्या, अउर मोरे बिरुद्ध रहत ह, 28तउ मई असलियत मँ आपन किरोध परगट करब। मई, हॉ, मई (यहोवा), तू पचन्क तोहरे पापन बरे सात गुना दण्ड देब। 29तू पचे आपन पूत, बितियन क तने क खाब्या। 30मई तोहरे ऊँचे ठउरन\* क नस्ट करब। मई तोहार सुगन्धि वाली वेदियन क काट डाउब। मई तोहरे लहासन क तोहरे निर्जीव मूर्तियन क लहासन पइ डाउब। तू पचे मोका बहोत जियादा घिनौना लगब्या। 31मई तोहरे सहरन क नस्ट करब। मई तोहार पवित्तर ठउर क खाली कइ देब। मई तोहार महकउआ सुगन्धित भेंटन क अंगीकार नाही करब। 32मई तोहरे देस क एतना खाली कइ देब कि तोहरे दुस्मन तलक जउन एहमँ रहइ अइहीं, उ पचे ऐँह पइ चकित होइ जइहीं। 33अउर मई तू पचन क अलग अलग पहुँटन मँ बिखराउब। मई आपन तरवार हींचब अउ तू सबन्क नास करब। तोहार भुइँया खाली होइ जाइ अउ तोहार नगर उजाइ होइ जइहीं।

34“तू पचे आपन सत्रु क देसन मँ लइ जावा जाब्या। जब तोहार धरती क खाली कइ देइ जाइ उ समइ इ आपन सबित क बिस्त्राम मनाइ। 35जेका तू पचे ओका तब नाहीं दिहे रह्या जब तू पचे ओह पइ रहत रह्या। 36उत्तरजीवी आपन दुस्मनन क देस मँ हिम्मत खोइ देइहीं। उ हर चीज स डेरात होइहीं। उ पचे हवा क जरिये हिलइवाला पाती क आवाज़ स भी डेराइ जाइ अउर ओकरे कारण उ सबइ अइसेन परइहीं मान ल्या कउनो तरवार लिए भए ओनकर पाछा करत होइ। बिना केहू क पाछा कइ भए भी उ पचन्क गिरि जाब। 37उ पचे एक दूसरे पइ तब भी गिरिहीं, जब कउनो भी ओनकर पाछा नाहीं करत रहा होइ।

“तू पचे ऐँतना सक्तीसाली नाहीं रहब्या कि आपन दुस्मनन क मुकाबला मँ खड़ा होइ सका। 38तू दूसर लोगन मँ बिलाइ जाब्या। तू पचे आपन दुस्मनन क देस मँ लुप्त होइ जाब्या। 39इ तरह तोहार सन्तानन तोहरे दुस्मनन क देस मँ आपन

आकास ... उपजाइ सब्द क अरथ, “तोहरे बरे आकास लोहा स होइ अउर भुइँया काँसे जइसी।”

ऊँचे ठउरन परमेस्सर या झूठे देवतन क उपासना क ठउर। इ सबइ ठउर अक्सर पहाड़ी अउ पर्वत प बनाव जात रहेन।

पापन में सड़िहीं। उ पचे आपन पापन में वइसे ही सड़िहीं जइसे ओनके पुरखन सड़ा रहेन।

### आसा हमेसा रहत ह

40“इ होइ सकत ह कि लोग आपन पापनक कबूल लेई अउर उ पचे आपन पुरखन क पापनक स्वीकार करिहीं। होइ सकत ह कि उ पचे कबूलई कि उ पचे मोरे खिलाफ भएन ह। इ होइ सकत ह उ पचे इ कबूल लेई कि उ पचे मोरे खिलाफ पाप किहे अहई। 41इ होइ सकत ह कि उ पचे स्वीकार करई कि मई ओनके खिलाफ भाएई अउ ओनका ओनके दुस्मनन क देस में लाएई। अगर उ पचे विनम्र होइ जाई अउ आपन पापन बरे सजा क कबूल लेई। 42तउ मई याकूब क संग क आपन वाचा क सुमिरब। इसहाक क संग क आपन वाचा क सुमिरब। इब्राहीम क संग कीन्ह गए वाचा क सुमिरब अउर मई उ भुईया क सुमिरब।

43“भुईया खाली रही। भुईया आराम क समइ क आनन्द लेइ। तब तोहरे बचे भए लोग आपन पाप बरे सजा क कबूल लेइहीं। उ पचे सिखिहीं कि ओनका एह बरे सजा मिली कि उ पचे मोर व्यवस्था स घिना किहेन अउ नेमन क पालन करब स्वीकार नहीं किहेन। 44उ पचे फुरे पाप किहेन। मुला अगर उ पचे मोरे लगे मदद बरे आवत हीं तउ मई ओनसे दूर नहीं रहब। मई ओनकइ बातन तब भी सुनब जब उ पचे आपन दुस्मनन क देस में भी होइहीं। मई ओनका पूरी तरह नस्ट नहीं करब। मई ओनके संग आपन वाचा क भंग न करब। काहेकि मई यहोवा ओनकर परमेस्सर अहई। 45मई ओनके पुरखन क संग कीन्ह गइ वाचा क याद रखब। मई ओनके पुरखन क मिस्त्र स बाहेर लिआएई कि मई ओनकर परमेस्सर होइ सकई। दूसर सबइ रास्ट्रन ओन बातन क लखेन। मई यहोवा अहई।”

46इ सबइ उ सबइ नेमन, कानून अउर उपदेस अहई जेनका यहोवा इस्त्राएल क लोगन क दिहस। उ सबइ कानून इस्त्राएल क लोगन अउ यहोवा क बीच करार अहइ। यहोवा ओन कानून क सिनाई पहाड़े प दिहे रहा। उ मूसा क नेम दिहस अउ मूसा ओनका लोगन क दिहस।

### बचन क महत्व बाटइ

27 यहोवा मूसा स कहेस, 2“इस्त्राएल क लोगन स कहा: कउनो मनई यहोवा क खास बचन दइ सकत ह। उ मनई यहोवा क कउनो मनई क अर्पित करइ क बचन दइ सकत ह। उ मनई यहोवा क सेवा खास तरीका स करी। याजक उ मनई बरे बिसेस दाम निहचित करी। अगर लोग ओका यहोवा स वापस बेसहइ चाहत हीं तउ उ पचे दाम देइहीं। 3बीस स साठ बरिस उमिर तलक क मनसेधू क दाम पचास सेकेल चाँदी होइ। तू पचन क चाँदी क तौलइ बरे पवितर ठउर क सेकेल क अनुसार उपयोग करइ चाही। 4बीस स साठ बरिस उमिर तलक क मेहरारु क दाम तीस सेकेल होइ। 5पाँच स बीस बरिस उमिर तलक क मनसेधू क दाम बीस सेकेल होइ। पाँच स बीस बरिस उमिर तलक क मेहरारु क दाम दस सेकेल होइ। 6एक महीना स पाँच बरिस क उमिर तलक क बालक क दाम

पाँच सेकेल होइ। एक लरिकी क दाम तीन सेकेल होइ। 7साठ या साठ स जियाद अवस्था क मनसेधू क दाम पन्द्रह सेकेल होइ। एक मेहरारु क दाम दस सेकेल होइ।

8“अगर मनई ऐतना गरीब अहइ कि दाम देइ में समर्थ नहीं अहइ तउ उ मनई क याजक समन्वा लिआवा। याजक इ निहचित करी कि उ मनई केतना दाम भुगतान में दइ सकत ह।

### यहोवा क भेंट

9“कछू गोरुअन क उपयोग यहोवा क बलि क रुप में कीन्ह जाइ सकत ह। अगर कउनो मनई ओन गोरुअन में स कउनो क लिआवत ह तउ उ गोरु पवितर होइ जाइ। 10उ मनई यहोवा क उ गोरु क देइ क बचन देत ह। एह बरे उ मनई क उ गोरु क जगह पइ दूसर गोरु रखइ क कोसिस नहीं करइ चाही। ओका नीक गोरु क बुरे गोरु स नहीं बदलइ चाही। ओका बुरे गोरु क नीक गोरु स नहीं बदलइ चाही। अगर उ मनई दुइनई गोरुअन क बदलइ चाहत ह तउ दुइनई, उ गोरु अउ बदलइ भइ गोरु पवितर होइ जइहीं।

11“कछू गोरुअन यहोवा क बलि क रुप में नहीं भेंट कीन्ह जाइ सकतेन। अगर कउनो मनई ओन असुद्ध गोरुअन में स कउनो क यहोवा बरे लिआवत ह तउ उ गोरु याजक क समन्वा लिआवा जाइ चाही। 12याजक उ गोरु क दाम उ नीक या बुरे अहइ क अनुसार निहचित करी। जउन दाम याजक निहचित करत ह उहइ मकान क दाम अहइ। 13अगर मनई गोरु क वापस बेसहइ चाहत ह\* तउ ओका दाम में पाँचवाँ हीसा अउर जोड़इ चाही।

### यहोवा क भेंट कीन्ह गए मकान क दाम

14“अगर कउनो मनई आपन मकान क पवितर मकान क रुप में यहोवा क अर्पित करत ह, तउ याजक क एकर दाम नीक या बुरा अहइ क अनुसार निहचित करी। जउन दाम याजक निहचित करत ह उहइ मकान क दाम अहइ। 15मुला उ मनई जउन मकान अर्पित करत ह अगर ओका वापस खरीदइ चाहत ह तउ ओका दाम में पाँचवाँ हीसा जोड़इ चाही। तब घर उ मनई क होइ जाइ।

### सम्पत्ति क दाम

16“अगर कउनो मनई अपने खेते क कउनो हीसा यहोवा क अर्पित करत ह तउ ओन खेतन क दाम ओनका बोवइ बरे जरुरी बिआ पइ टिका होइ। एक होमेर\* जौ क बिआ क कीमत चाँदी क पचास सेकेल होइ। 17अगर मनई जुबली क बरिस खेत क दान करत ह तब दाम उ होइ जउन

वापस बेसहइ चाहत ह पहिलौठा बच्चा या गोरु यहोवा क दीन्ह जात रहेन। मुला गधन क तरह बच्चन क बलि नहीं दीन्ह जात रही। इ तरह मनई पहिला पइव भए क याजक क देत रहा। याजक दाम निहचित करत रहा, अउर मनई पहिले पइव भए क धन या बलि चढ़ावइ जोगग गोरु स वापस बेसहत रहा।

एक होमेर माप वाली झुरान बिअन क तउल। इ लगभग छः बुसल।



याजक निहचित करी। 18 मुला मनई अगर जुबली क पाछे खेत क दान करत ह तउ याजक क असली दाम तय करइ चाही। ओका अगले जुबली बरिस तलक क बरिसन क गनइ चाही। तब उ गणना उपयोग दाम निहचित करइ बरे करी। 19 अगर खेत क दानी मनई खेत क वापस बेसहा चाहउ तउ ओकरे दाम मँ पाँचवाँ हीसा अउर जोड़ा जाइ। 20 अगर उ मनई खेत क वापस नाहीं बेसहत ह तउ खेत सदा याजकन क होइ। अगर खेत कउनो दूसर क बेचा जात ह तउ पहिला मनई ओका वापस नाहीं बेसहि सकत। 21 अगर उ मनई खेत क वापस नाहीं बेसहत ह तउ जुबली क बरिस खेत सिरिफ यहोवा बरे पवितर रही। इ सदा ही याजकन क रही। इ उ भूँइ क तरह होइ जउन पूरी तरह यहोवा क दइ दीन्ह गइ होइ।

22 “अगर कउनो आपन खेते क यहोवा क अर्पित करत ह जउन ओकरी निजी सम्पत्ति क हीसा नाहीं अहइ। 23 तब याजक क जुबली क बरिस तलक बरिसन क जरूर गनइ चाही। अउ ओका खेत क दाम भी जरूर निहचित करइ चाही। तब उ खेत यहोवा क होइ। 24 जुबली क बरिस उ खेत मूल भू सुआमी क पास चला जाइ। उ ओह परिवार क जाइ जउन ओकर सुआमी अहइ।

25 “तोहका पवितर स्थान क सेकेल क अनुसार उपयोग ओन दाम क अदा करइ बरे करइ चाही। पवितर ठउर क प्रमाण क सेकेल क तउल बीस गेरा\* अहइ।

### गोरुअन क दाम

26 “लोग गोरुअन अउ भेड़न क यहोवा क दान दइ सकत हीं, मुला अगर गोरु पहिला पइदा भवा अहइ तउ उ गोरु जन्म स ही यहोवा क अहइ। एह बरे लोग पहिला पइदा भवा गोरु क दान नाहीं दइ सकतेन। 27 लोगन क पहिला पइदा भवा गोरु यहोवा क जरूर देइ चाही। मुला

अगर पहिला पइदा भवा गोरु असुद्ध अहइ, तउ मनई क उ गोरु क वापस जरूर बेसहइ चाही। याजक उ गोरु क दाम निहचित करी अउर मनई क उ दाम क पाँचवाँ हीसा ओहमँ जोरि देइ। अगर मनई गोरु क वापस नाहीं खरीदत तउ याजक क आपन निहचित कीन्ह गए दाम पइ ओका जरूर बेंच देइ चाही।

### बिसेस भेंट

28 “एक ठु बिसेस तरह क भेंट\* अहइ जेका लोग यहोवा क चढ़ावत हीं। उ भेंट न वापस खरीदी जाइ सकत ह न तउ बेची जाइ सकत ह। उ भेंट यहोवा क अहइ। इ बहोत पवितर अहइ। उ तरह क भेंटन अइसे लोग, गोरु अउर खेत अहईं, जउन परिवारे क सम्पत्ति अहइ।

29 “अगर उ बिसेस प्रकार क यहोवा क भेंट कउनो मनई अहइ तउ ओका वापस बेसहा नाहीं जाइ सकत। ओका जरूर मार दीन्ह जाइ चाही।

30 “सबहिं पइदावारन क दसवाँ हीसा यहोवा क अहइ। एहमँ खेतन, फसलन अउ बृच्छन क फल सामिल अहईं। उ दसवाँ हीसा यहोवा क अहइ। 31 एह बरे कउनो मनई आपन दसवाँ हीसा वापस लेइ चाहत ह तउ ओकरे दाम क पाँचवाँ हीसा ओहमँ जोड़इ चाही अउ वापस खरीदइ चाही।

32 “याजक मनइयन क गोरुअन अउ भेड़िन मँ स हर दसवाँ जनावर लेइ। हर दसवाँ जनावर यहोवा क होइ। 33 मालिक क इ चिन्ता नाहीं करइ चाही कि उ जनावर नीक अहइ या बुरा। ओका जनावर क दूसर जनावर स नाहीं बदलइ चाही। अगर उ बदलइ क निहचय करत ह तउ दुइनउँ जनावर यहोवा क होइहीं। उ जनावर वापस नाहीं बेसहा जाइ सकत।” 34 इ सबइ उ आदेसन अहईं जेनका यहोवा सिनाइ पहाड़ पइ मूसा क दिहस। इ सबइ आदेस इस्त्राएल क लोगन बरे अहईं।

# निर्गमन

1 याकूब आपन बेटवन क संग मिस्त्र क जात्रा प गवा। अउर हर एक पूत आपन परिवार क संग लिहेस। इस्त्राएल क बेटवन क नाउँ अहईँ: 2रूबेन, सिमोन, लेवी, यहूदा, 3इस्साकर, जबूलुन, बिन्यामीन 4दान, नप्ताली, गाद, आसेर 5याकूब क आपन सन्तानन में सत्तर लोग रहेन। (ओकरे बारह बेटवन में स यूसुफ पहिलेन स मिस्त्र में रहा।)

6पाछे यूसुफ, ओकर भइयन अउ ओकरे पीढ़ी क सबइ परानी मर बिलाइ गएन। 7मुला इस्त्राएल क मनइयन क ढेर गदेलन रहेन, अउर ओनकइ संख्या बाढ़त गइ। उ पचे बरिआर होइ गएन अउ ओन लोगन स भुईया भरि गई रही रहेन।

## इस्त्राएल क मनइयन क कस्ट

8तबइ एक नवा राजा मिस्त्र प हुकूमत करइ लाग। उ राजा यूसुफ क नाहीं जानत रहा। 9र राजा लोगन स कहेस, “इस्त्राएल क मनइयन क लखा। एनकइ तादद जिआदा बा। अउ उ पचे हमसे जिआदा बरिआर अहईँ। 10हम पचन क अइसी चाल चलइ क चाही कि इस्त्राएलियन क बरिआर होइसे रोकइ चाही। जदि जुद्ध होत ह, तउ इस्त्राएलियन हमरे दुस्मनन क साथ देइहीं। तबहिं उ सबइ हम पचन क हराइ सकित ह अउ हमरे हाथे स निकारि सकित ह।”

11मिस्त्र क लोगन इस्त्राएलियन क जिन्नगी क दूभर बनवइ निस्चय किहे रहेन। एह बरे उ पचे इस्त्राएल क काम करइ वालन प दास सुआमी तइनात कइ दिहन। उ सुआमी लोगन फिरौन बरे भण्डार सहरन पितोम अउर रामसेस क बनावइ बरे इस्त्राएलियन क मजबूर कइ दिहन।

12मिस्त्र क मनइयन इस्त्राएलियन क कठोर स कठोर काम करइ क मजबूर किहेन। मुला जेतना जिआदा इस्त्राएलियन क काम करइ बरे मजबूर कीन्ह गवा ओनकइ तादद बाढ़त गइ। अउर मिस्त्र क मनइयन इस्त्राएलियन स जिआदा स जिआदा डेराइ लागेन। 13एह बरे मिस्त्र क मनइयन इस्त्राएलियन क अउर भी जिआदा कठोर काम करइ क मजबूर किहेन।

14मिस्त्र क मनइयन इस्त्राएलियन क जिन्नगी दूभर कइ दिहन। उ पचे इस्त्राएलियन क ईट अउ गारा बनावइ क बहोत करी काम करइ बरे मजबूर किहेन। उ पचे ओनका खेत में बहोत करी काम करवावइ क मजबूर किहेन। उ पचे ओनका गुलाम क नाई दूसर सबहिं कार्य करइ बरे मजबूर किहेन।

## यहोवा क पाछे चलइवाली दाइयन

15हुवाँ सिप्रा अउ पूआ नाउँ क दुइ हिब्रू दाइयन रहिन। मिस्त्र क राजा इ दाइयन स बतियान। 16राजा कहेस, “जब तू

हिब्रू मेहररूअन क लरिका पइदा करइ में मदद करा। जदि लरिकी पइदा होइ तउ ओका तू जिअइ दिहा। मुला अगर लरिका पइदा होइ तउ तू पचे ओका मारि डया।”

17मुला दाइयन परमेस्सर स डेरात रहिन। एह बरे उ पचे मिस्त्र के राजा क आदेस क पालन न किहेन। उ पचे सारे लरिका क जीवित रहइ दिहिन।

18मिस्त्र क राजा दाइयन क बोलाएस अउ कहेस, “तू पचे अइसा काहे किहा? तू पचे बेटहनन क काहे जिअइ दिहा?”

19दाइयन फिरौन स कहेन, “हिब्रू\* मेहररूअन मिस्त्री मेहररूअन स जिआदा ताकतवर बाटिन। हमरे पहुँचइ स मदद बरे उ पचे पहिलेन बेटहनन क जन्मत हीं।” 20-21परमेस्सर उ दाइयन प कृपालु रहा। काहेकि उ पचे परमेस्सर स डेरात रहिन। एह बरे परमेस्सर ओनका नीक रहा अउ ओनका आपन परिवार चलावइ दिहेस। अउर हिब्रू लोग जिआदा लरिका पइदा करत रहेन। अउ उ पचे जिआदा ताकतवर होइ गएन।

22एह बरे फिरौन आपन सबहिं लोगन क हुकूम दिहेस, “जब कबहुँ लरिका पइदा होइ तब तू सबइ जरूर ओका नील नदी में नाइ द्या मुला सबहिं लरिकियन क जिअइ द्या।”

## बचवा मूसा

2 लेवी क परिवार क एक मनई हुवाँ रहा। उ लेवी क परिवार क एक तु अउरत स आपन बियाह किहेस। 2उ मेहरारू गोड़े स भारी भइ अउ उ एक बेटवा क जन्म दिहेस। महतारी निहारेस कि बेटवा बहोत सुन्नर बा अउर उ ओका तीन महीना ताई छुपाएस। 3मुला तीन महीना क पाछे महतारी डेराइ गइ कि बचवा हेरि लीन्ह जाई तब उ मारि डवा जाई, काहेकि उ बेटवा अहइ। एह बरे उ एक तु डलिया बनाएस अउ ओह प तारकोल लेपि दिहेस जेसे उ तैर पावइ। उ बचवा क डलिया में धइ दिहस। तब उ नदी क बीच लंबी घासे में धइ दिहस। 4बचवा क बहिन हुवाँ रूकी रही अउ ओकर रखवारी करत रही। उ देखइ चाहत रही कि बचवा क संग का घटी।

5उहइ समइया फिरौन क बिटिया नदी में नहावन बरे गइ। उ ऊँच की घासे में एक तु डलिया लखेस। ओकर नउकरन नदी क किनारे टहरत रहेन। तउ उ मेहरारू नउकरन में स एक क ओकर टोकरी लावइ बरे हुकुम दिहेस। 6राजा क बिटिया डलिया क खोलेस अउ बेटवा क लखेस। बचवा

हिब्रू या “इस्त्राएलियन” इ नाउँ क आरथ अहइ, “एबर चला बंस” या “फगत नदी क पच्छिम क मनई।”

रोवत रहा अउ ओका ओह प दया आइ गइ। उ कहेस, “इ हिब्रू बचवन में एक अहइ।”

7बचवा क बहिन लुकी छिपी रही। तब उ ठाड़ भइ अउ फिरौन क बिटिया स बोली, “का आप चाहत बाटिन कि मई बचवा क देख-रेख करइ बरे एक ठू हिब्रू दाइयन क हेरि लिआवउँ?”

8फिरौन क बिटिया कहेस, “हाँ, जरूर।”

तउ बिटिया गइ अउ बचवा क महतारी क हेरिके लइ आइ।

9फिरौन क बिटिया कहेस, “इ बचवा क लइ जा अउ मोरे खातिर एका पाला। इ बचवा क आपन दूध पिआवा। मई तोहका पगार देब।”

तब उ मेहरारू आपन बचवा क लइ लिहस अउ ओका पालेस पोसेस। 10जब बचवा बाढ़ गवा तउ कछू टेम पाछे अउरत राजा क बचवा दइ दिहस। राजा क बिटिया उ बचवा क आपन पूत क रूप में स्वीकार किहेस। उ ओकर नाउँ मूसा धरेस काहेकि उ ओका पानी स उबारेस।

### मूसा आपन मनइयन क मदद करत ह

11मूसा बाढ़ि गवा अउ जवान होइ गवा। उ परखेस कि उ ओकर आपन लोग अहइ हिब्रू मनई ओनका जियादा कठोर काम करइ बरे मजबूर करत हीं। एक दिना मूसा लखेस कि एक मिस्त्री हिब्रू मनई क पीटत रहा। 12मूसा चारिहु कइँती निहारेस अउ देखेस कि कउनो नाहीं ताड़त बा। तबहिँ मूसा मिस्त्री मनई क मारि डाएस अउ ओहका रेत में दाब दिहेस।

13पाछे क दिन में मूसा दुइ हिब्रू मनइयन क लइत भिड़त लखेस। मूसा निहारेस कि एक मनई क गलती रही। मूसा उ मनई स कहेस, “तू आपन पड़ोसी क काहे मारत बाट्या?”

14उ मनई जवाब दिहेस, “का कउनो मनई तोहका हमार हाकिम अउ निआवधीस, नियुक्त किहेस ह? नाहीं! मोका बतावा कि का तू मोका भी उहइ तरह मारि डउब्या जउने तरह तू बीता भवा काल्ह मिस्त्री क मारि डया। तब मूसा डेरइ गवा।”

मूसा मन में बिचारेस, “अब हरेक मनई जानत ह कि मई का किहेउँ ह।”

15फिरौन सुनेस कि मूसा का किहेस, तउ उ मूसा क मारि डावइ क पक्का बिचार बनाएस। मुला मूसा फिरौन क कुचाल स भाग गवा। फिन मूसा मिदियन देस में चला गवा।

### मूसा मिदियन देस में

मूसा मिदियन देस में कुआँ क लगे रूकि गवा। 16हुवाँ एक ठु याजक मिदियन में रहा जेकरे सात बिटिया रहिन। उ पचे आपन बाप क भेड़िन बरे कुआँ स पानी निकालइ बरे गएन। उ पचे पानी स कठौते क भरइ क कोसिस करत रहिन। 17मुला कछू गइरियन उ बिटियन क भगाइ दिहन अउ पानी नाहीं भरइ दिहन। तब मूसा बिटियन क मदद किहेस अउ ओनके जनावर क पानी दिहस।

18तब उ पचे आपन बाप रूएल क लगे गइन। ओनकइ

बाप ओनसे पूछेस, “आज तू पचे काहे हाली घरे आइ गइउ?”

19बिटियन जवाब दिहेन, “हाँ, पिता जी। गइरिया लोग हमका खदेरइ क कोसिस किहेन, मुला एक मिस्त्री मनई हमार मदद करेस। उ हमका बरे इनारा स पानी निकारेस अउ हमरे जनावर क पानी दिहेस।”

20एँह बरे रूएल आपन बिटियन स कहेस, “इ मनई कहाँ बाटइ? तू पचे ओका काहे छँड़ि दिहा? ओका हिआँ बोलावा इ तरह हम पचन क संग खाइ सकत ह।”

21मूसा उ मनई क संग टिक जाइ स खुस भवा। याजक रूएल आपन बिटिया सिप्पोरा क मूसा क बसही क तरह दिहेस। 22सिप्पोरा एक बेटवा क जन्मेस। मूसा आपन बेटवा क नाउँ गोसोम राखेस। मूसा आपन बेटवा क इ नाउँ इ कहत भए दिहस: “मई एक अजनबी देस में अजनबी होई गवा।”

### यहोवा इस्त्राएल क मदद बरे मन में ठनेस

23बहोत समइ बीते प मिस्त्र क राजा मरि गवा। काहेकि इस्त्राएलियन क कठिन काम करइ बरे मजबूर कीन्ह जात रहेन। एँह बरे उ पचे मदद बरे परमेस्सर क गोहराएन अउर यहोवा ओनका पराथना सुनि लिहेस। 24यहोवा ओनकइ पराथना सुनेस अउ उ करार क याद किहेस जउन उ इब्राहीम, इसहाक अउ याकूब क संग किहेस। 25यहोवा इस्त्राएलियन क कस्ट निहारेस अउ उ सोचेस कि उ ओनकइ मदद तुरंतहि करी।

### जरत भइ झाड़ी

3 मूसा क ससुर क नाउँ यित्रो रहा। यित्रो मिदियन क याजक रहा। मूसा यित्रो क भेड़ क देख-रेख करत रहा। मूसा एक दिना भेड़न क रेगिस्तान क पच्छिम कइँती लइ गवा। मूसा यहोवा क पहाड़ प जउन होरेब अर्थात् सीनै पहाड़ कहलावत ह प गवा। 2यहोवा क सरगदूत मूसा क समन्वा बरत भइ झाड़ी में उ पहाड़ प परगट भवा। उ इ तरह भवा। मूसा झाड़ी क बे भसम भवा बरत देखेस। 3एँह बरे मूसा झाड़ी क निचके इ चमत्कार क देखइ बरे गवा कि झाड़ी बे भसम भए कइसे लगातार बरति अहइ।

4यहोवा लखेस कि मूसा झाड़ी क लखइ आवत बा। एँह बरे परमेस्सर झाड़ी स मूसा क पुकारेस अउ कहेस, “मूसा, मूसा।”

अउ मूसा कहेस, “मई हिआँ हउँ!”

5तब्बइ यहोवा कहेस, “अउर निचके जिन आवा। आपन पनही उतारि द्या। तू पवित्तर भुइयाँ प ठाड़ बाट्या। 6मई तोहरे पुरखन क परमेस्सर हउँ। मई इब्राहीम क परमेस्सर, इसहाक क परमेस्सर अउ याकूब क परमेस्सर हउँ।”

मूसा आपन मुँहना क ढाँकि लिहेस काहेकि उ परमेस्सर क लखइ स डेरत रहा।

7तब यहोवा कहेस, “मई उ सबन दुःखन क लखेउँ ह जउन हमार लोगन मिस्त्र में सहेन ह। मइ ओनकइ चीखब सुनेउँ ह जब मिस्त्र क क्रूर मनइयन ओनका चोट पहुँचाएन ह। मई ओनकइ दुःखन क जानत हउँ।”

8मई अब जाब अउ मिस्त्री मनइयन स आपन लोगन क बचाउब। मई ओनका मिस्त्र स बाहेर निकारब अउ ओनका एक नीक अउ विसाल भुँइया में लइ जाब। उ भुँइया जहाँ दूध अउर सहद क नदी बहत रहत ह।\* हुवाँ कइउ जाति क लोग जइसे कनानी, हित्ती, एमोरी, परिज्जी, हिब्बी, अउ यबूसी रहत ही। 9मई इस्राएल क मनइयन क गोहार सुनेउँ ह। मई मिस्त्री मनइयन क अत्याचार क लखेउ जउन ओन लोगन प किहेन। 10एँह बरे अब मई तोहका फिरौन क लगे पठवत हउँ। जा अउर मोर लोगन, इस्राएलियन क मिस्त्र स बाहर लइ आवा।”

11मुला मूसा परमेस्सर स कहेस, “मई कउनो बड़का मनई नाहीं। मई कइसे उ मनई होइ सकत हउँ जउन फिरौन क लगे जाउँ अउ इस्राएलियन क मिस्त्र स बाहेर निकारि के लइ चलउँ।”

12परमेस्सर कहेस, “तू कइ सकत ह्या काहेकि मई तोहरे संग हउँ। इ सबूत रही कि मई तोहका पठवत हउँ। जब तू लोगन क मिस्त्र स बाहेर निकारि लइ अउब्या, तब तू इ पहाड़े प हमार आराधना करब्या।”

13तबहिँ मूसा परमेस्सर स कहेस, “किंतु यदि मई इस्राएलियन क नगिचे जात हउँ, अउ कहत हउँ, ‘तोहरे पुरखन क यहोवा मोका तोहरे लगे पठएस ह,’ तब मनई पुछिहीं, ‘ओकर नाउँ का अहइ?’ मई ओनसे का कहब?”

14तब यहोवा मूसा स कहेस, “मई हउँ जउन मई हउँ।\* जबहिँ तू इस्राएलियन क लगे जाब्या, तब ओनका बताइ दिहा, ‘मई हउँ, जउन मोका तोहरे लगे पठएस ह।’

15परमेस्सर मूसा स इ भी कहेस, “इस्राएली मनइयन स जउन तू कहब्या, उ इ अहइ: ‘यहोवा तोहरे पुरखन क परमेस्सर, इब्राहीम, इसहाक अउर याकूब क परमेस्सर अहइ। होइ सकत ह इहइ नाम में अगवा पीढ़ी दर पीढ़ी मोका जनिहीं।’ लोगन क बतावा, ‘यहोवा मोका तोहरे लगे पठएस ह।’”

16यहोवा इ भी कहेस, ‘जा अउ इस्राएल क बुजर्गन क बटोरा अउ ओनसे कहा, ‘यहोवा, तोहरे पुरखन क परमेस्सर मोरे समन्वा परगट भवा रहा। इब्राहीम, इसहाक अउ याकूब क परमेस्सर मोसे बात किहेस। उ कहेस, ‘मई तोहरे बारे में अउ ओन सब क बाबत मैं जउन तू पचन क संग मिस्त्र में भवा अहइ खियाल रखे अहइ। 17मई मने मैं ठान लिहे हउँ कि मिस्त्र में जउन दुःख अउ मुसीबत सहत बाट्या ओहसे मई तोहका बाहेर निकारि लेबइ। मई तू पचन क उ देसे मैं लइ जाब जउन ढेर लोगन जइसे कनानी, हित्ती, एमोरी, परिज्जी, हिब्बी, अउ यबूसी क बाटइ। मई तू पचन क एक नीक देसे मैं लइ जाब जहाँ दूध अउर सहद क नदी बहत अहइ।’

18बुजर्गन तोहार बातन्क मनिहीं। अउर तब तू अउर बुजर्गन मिस्त्र क राजा क लगे जाब्या। तू पचे ओसे कहब्या, ‘यहोवा हिब्रू मनइयन क परमेस्सर हम पचन्क लगे आएन अउ उ पचे हम पचन्स तीन दिन ताई रैगिस्तान में जात्रा

जहाँ दूध अउर सहद क नदी बहत रहत ह इ का अरथ इ भुँइया अच्छी चिजियन स भरा पड़ा अहइ।

मई हउँ जउन मई हउँ हिब्रू सब्द याहवे या “परमेस्सर”।

करइ क कहने ह। हुवाँ हम पचे आपन परमेस्सर, यहोवा क बलि चढ़ाउब।’

19“मुला मई जानत हउँ कि मिस्त्र क राजा तू पचन्क जाइ नाहीं देई। सिरिफ एक ठु बड़वार सकती ही तू पचन्क जाइ देइ बरे मजबूर करी। 20एँह बरे मई आपन बड़की सकती क प्रयोग मिस्त्र क खिलाफ करबइ। मई मिस्त्र क आपन चमत्कार स तबाह कइ देब। जबहिँ मई अइसा करिहउँ तउ उ तू पचन्क जाइ देइ। 21अउर मई मिस्त्री मनइयन क इस्राएलियन बरे कृपालु बनवाउब। तब उ पचे इस्राएलियन क जब उ सबइ मिस्त्र छोड़िहीं तब ओन लोगन क बहोत सारा उपहार देइहीं

22“हर एक हिब्रू अउरत आपन मिस्त्री पड़ोसिन स अउर मिस्त्री अउरत स आपन घरे में रहइ बरे अनुरोध किहेस अउर उ पचे ओका उपहार देइहीं। तोहार लोग उपहार में चाँदी, सोना अउ सुन्नर ओढ़ना पइहीं। जबहिँ तू पचे मिस्त्र क छोड़ि देब्या, तू पचे उ उपहार क आपन गदेलन क पहिरउब्या। इ तरह तू पचे मिस्त्री मनइयन क धन लइ अउब्या।”

### मूसा बरे प्रमाण

4 तब मूसा क जवाब दिहेस, “मुला इस्राएलियन मोहे पइ बिस्सास न करिहीं। उ पचे कइहीं, ‘यहोवा तोह पइ परगट नाहीं भवा।’”

2मुला यहोवा मूसा स कहेस, “तू आपन हथवा मैं का धइके रखे बाट्या?”

मूसा जवाब दिहेस, “इ मोर टहरइ क लाठी अहइ।”

अयहोवा कहेस, “आपन टहरइवाली लाठी जमीन प फेंकि द्या।”

तउ मूसा आपन टहरइ क लाठी क जमीन प फेंक दिहेस। अउ लाठी साँप बन गवा। मूसा डेरान अउ एँसे परान। 4मुला यहोवा मूसा स कहेस, “अगवा बढ़ा अउ पूँछ धइके साँप क पकड़ि ल्या।”

एँह बरे मूसा अगवा कइँती बढ़ा अउ साँप क पूँछ धइ लिहस। जइसेन मूसा अइसा किहेस, साँप फुनि लाठी होइ गवा। 5तब यहोवा कहेस “आपन छड़ी क इ तरह बइपरा अउ मनई बिस्सास करइँ, कि यहोवा ओकर पुरखन क परमेस्सर, इब्राहीम क परमेस्सर, इसहाक क परमेस्सर अउ याकूब क परमेस्सर तोहार समन्वा परगट भवा रहा।”

6तब यहोवा मूसा स कहेस, “मई तोहका दूसर परमान देब। आपन हाथ क लबादा क नीचे धरा।”

तउ मूसा आपन हाथ क आपन लबादा क भीतर किहेस। तब मूसा आपन हाथ क लबादा स बाहेर निकारेस अउ उ बदरि गवा। ओकर हाथ बर्फ क नाई उज्जर दागे स भरि गवा रहा।

7तब यहोवा कहेस, “अब तू आपन हाथ लबादा क भीतर धरा।” एँह बरे आपन हाथ फुन आपन लबादा क भितरे धइ द्या। तब मूसा आपन हाथ बाहेर निकारेस अउ टैम भी ओकर हाथ बदरि गएन। अब ओकर हाथ पहिले क नाई होइ गवा रहा।

8तब यहोवा कहेस, “जदि मनई तोहार बिस्सास छड़ी बड़परे प न करई तउ उ पचे तोह प बिस्सास तबहिं करिहिं जबहिं तू इ दूसर चीन्हा क देखउब्ब्या। 9जदि तोहरे दुइनउँ चीन्हा देखाएँ क पाछे तोहार बिस्सास न करिहिं तउ तू नील नदी स कछू पानी लइ लिहा। पानी क जमीन प गिराउब सुरू कइ दिहा अउ जइसे ही इ जमीन क छुई, रक्त बनि जाई।”

10मुला मूसा यहोवा स कहेस, “हे यहोवा, मई फुरे कहत हउँ, मई कुसल बोलवइया नाहीं हउँ। मई कबहूँ मनइयन स नीक तौर स बतियाइ काबिल नाहीं भएउँ। अउ आपसे बतियाए क पाछे भी नीक बोलवइया नाहीं हउँ। आप जानत हीं कि मई धीमे धीमे बोलत हउँ अउ उत्तिम सब्दन क बड़परत नाहीं हउँ।”

11तब यहोवा ओसे कहेस, “कउन मनई क मुँहना क बनाएस? अउर कउन मनई क गूँगा या न बोलइ क लाइक बनइ सकत ह? कउन मनई क आँधर बनइ सकत ह? कउन मनई क लखइ क लाइक बनइ सकत ह? मई ही हउँ जउन इ सब कइ सकत हउँ, मई अहउँ यहोवा। 12एँह बरे अब जा। जबहिं तू बोलवइया, मई तोहरे साथे रहब। मई बोलइ बरे तोहका सब्दन देब।”

13मुला मूसा कहेस, “मोर यहोवा। मई तोहसे बिनती करत हउँ कि दुसरे मनई क पठवा, मोका नाहीं।”

14तबबइ यहोवा मूसा प कोहान। यहोवा कहेस, “नीक अहइ। मई तोहका अउर कउनो क मदद बरे देब। मई तोहरे भइया हारून जउन लेवी परिवार स अहइ, क बड़परब। उ एक कुसल बोलवइया अहइ। हारून तोह स मिलइ बरे तोहरे लगे आवत आहइ। उ तोहका निहारिके खुस होइ। 15उ तोहरे संग फिरौन क लगे जाइ। तोहका का कहइ का बा, मई बताउब। तब तू हारून क बतउब्ब्या। जउन हारून फिरौन स बात करइ बरे नीक सब्दन बड़परी। 16हारून तोहरे बरे मनइयन स बात करी। तू ओकरे बरे एक बड़का राजा क रूप में रहवइया अउर उ तोहरे कइँती स बोलवइया होइ। 17अब जा। आपन छड़ी साथे लइ जा। आपन छड़ी क चमत्कार अउ दूसर चमत्कार मनइयन क समन्वा प्रदर्सित कर्या।”

### मूसा मिस्त्र लउटत ह

18तब मूसा आपन ससुर यित्रो क लगे लौटि आवा। मूसा यित्रो स कहेस, “मेहरबानी कइ क मोका मिस्त्र जाइ द्या। मई मिस्त्र में आपन लोगन क लखइ चाहत हउँ कि मोर लोगन अबहूँ जिअत अहइ।”

यित्रो मूसा स कहेस, “तू सान्ति स जा। इ ठीक अहइ।”

19उ समइया जब मूसा मिदियन में ही रहा, यहोवा ओसे कहेस, “अब मिस्त्र वापिस जाइ क तोहारे बरे सुरच्छित टेम अहइ। जउन मनइयन तोहका मारइ चाहत रहेन, उ पचे मरि गएन।”

20एँह बरे मूसा आपन मेहरारू अउ आपन बेटवन क लइके गदहा प बड़ठाएस। अउ मिस्त्र क वापसी प लौटि गवा। मूसा उ टहरइवाली छड़ी क संग लिहेस जेहमाँ यहोवा क सक्ती रही।

21जउन टेमें मूसा मिस्त्र क लउटत रहा, परमेस्सर ओसे कहेस। “जबहिं तू फिरौन स बतियाबा तउ उ सबहिं चमत्कारे क देखावा जेका देखावइ क सक्ती मई तोहका दिहेउँ ह। मुला मई फिरौन क बहोत जिद्दी बनाउब। उ लोगन क जाइ न देइ। 22तब तू फिरौन स कह्या: 23यहोवा कहत ह, ‘इस्त्राएल मोर पहिलौटी क बेटवा अहइ। मोरे बेटवा क जाइ द्या अउर मोर आराधना करइ द्या। जदि तू इस्त्राएल क जाइ स मना करत बाट्या तउ मई तोहार पहिलौटी क पूत मारि डाउब।”

### मूसा क पूत क खतना

24जउन टेम मूसा मिस्त्र क जात्रा प जात भवा रहा रात काटइ बरे सराय में रूका। यहोवा इ जगह प मूसा स भेटा अउ ओका मारि डावइ क जतन किहेस। 25मुला जिप्पोरा चकमक पाथर क तेज छूरी लिहेस अउ आपन बेटवा क खतना किहेस। उ आपन बेटवा क बाहरी चाम लिहेस अउ ओकर गोड़वा छुएस। तब उ मूसा स कहेस, “तू मोरे लहू क भतार अहा। 26जिप्पोरा इ किहेस काहेकि ओका आपन बेटवा क खतना करइ पड़ा रहा। एँह बरे यहोवा मूसा क माफ़ कइ दिहेस अउ ओका नाहीं मारेस।\* ”

### यहोवा क समन्वा मूसा अउ हारून

27यहोवा हारून स कहेस। यहोवा ओनका बताएस, “रेगिस्तान में जा अउ मूसा स मिला।” तउ हारून गवा अउ यहोवा क पहाड़े प मूसा स मिला। जब हारून मूसा क लखेस, उ ओका चूमेस। 28मूसा हारून क सब कछू बताएस जउन यहोवा कहे रहा। मूसा हारून क यहोवा क जरिए पठवइ क कारण बताएस। मूसा हारून क उ चमत्कारन अउ उ चीन्हा क समझाएस बुझाएस जेका परमान क वास्ते देखवइ क रहा।

29इ तरह मूसा अउ हारून गएन अउ उ पचे इस्त्राएल क मनइयन में स सबहिं बुजुर्गन क बटोरेन। 30तबहिं हारून मनइयन स कहेस। उ मनइयन क सारी बातन क बताएस जउन यहोवा मूसा स कहेस। तबहिं मूसा सब मनइयन क देखइ बरे सब परमानन क सामने कइके देखौएस। 31एँह बरे लोग मूसा पइ बिस्सासेन कि परमेस्सर ओका पठएस ह। इस्त्राएलियन समझेन कि यहोवा लोगन का मुसिबतन क लखइ क पाछे ओनके मदद बरे आवा रहेन अहइ। तउ उ पचे निहुरि गएन अउ आराधना किहेस।

### मूसा अउ हारून अहइँ फिरौन क समन्वा

5 लोगन स बात किहे क पाछे मूसा अउ हारून फिरौन क लगे गएन। उ पचे कहेन, “यहोवा इस्त्राएल क परमेस्सर कहत हीं, “मोरे लोगन क रेगिस्तान में जाइ द्या, जेसे उ पचे मोरे सम्मान बरे जलसा करइ।”

2मुला फिरौन कहेस, “यहोवा कउन अहइ? मई ओकर हुकुम काहे मानी? मई यहोवा क नाहीं जानित। एँह बरे मई इस्त्राएल क लोगन क जाइ देइ स मना करत हउँ।”

पद 26 या “उ चिकित्सा किहेस। उ कहेस, ‘इ खतना क वजह से तू पचे रक्त क भतार अहा।”

3तब हारून अउ मूसा कहेन, “हिब्रू मनइयन क परमेस्सर हम पचन क दरसन दिहेस ह। एँह बरे हम आपसे पराथना करत अही कि आप हम पचन्क रेगिस्तान में तीन दिना तलक जात्रा करइ देईं। हुवाँ हम पचे आपन परमेस्सर यहोवा क बलि चढ़ाउब। जदि हम अइसा नाहीं करित, उ हमसे कोहाइ जाइ अउ हमका बरबाद कइ देइ। उ हम पचन्क बेमारी स या तरवारि स मारि डाइ।”

4मुला मिस्त्र क राजा ओनसे कहेस, “मूसा अउ हारून, तू पचे लोगन क काम करइ स बगदावद अहा। ओन मजदूरन क आपन काम करइ द्या। जहाँ तलक तू दुइनउँ क बात ब जा अउर आपन काम करा। 5हिआँ बहोत स मजदूर अहई, तू पचे ओनका काम स रोकत बाट्या।”

### फिरौन मनइयन क सजा दिहेस

6ठीक उहइ दिना फिरौन इस्राएलियन क काम करइ क अउर जिआदा करी हुकुम पालन करइ बरे कहेस। फिरौन गुलामन क मालिक अउ हिब्रू सरदारन स कहेस, 7“तू मनइयन क हमेसा पुआल दिहा ह जेका उ ईटा बनवइ में बइपरत हीं। मुला अब ओनसे कहा कि उ पचे ईटा बनवइ खातिर पुआल खुद बटोरईं। 8मुला अब उ पचे ओतनी तदाद में ओतनी ईट बनइहीं जेतना उ पचे पहिले बनवत रहेन। उ पचे अहदी होइ ग अहई। इहइ कारण अहइ कि उ पचे मोसे बाहेर जाइ बरे कहत बाटेन। ओनके लगे करइ खातिर काम नाहीं बा। एँह बरे उ पचे मोसे माँगत बाटेन ताकि उ पचे आपन परमेस्सर क बलि अउ चढ़ावा देइ। 9एँह बरे इ दास स जिआदा करी काम करावा। एँनका कामे में लगाइ राखा। तबहिँ ओनके लगे एँतना टेम नाहीं रही कि उ पचे मूसा क झूठी बातन क सुनईं।”

10एँह बरे मिस्त्री गुलामन क मालिक अउ हिब्रू काम क इस्राएलियन क लगे गएन अउ उ पचे कहेन, “फिरौन फइसला किहे अहइ कि उ तू पचन्क तोहरे ईटा बरे तोहका पुआल न देइ। 11तू पचन्क खुद जाइ क होइ अउ आपन बरे पुआल खुद बटोरइ क होइ। एँह बरे जा अउ पुआल बटोरा। मुला तू ओतना ईटा बनवा जेतना तू पचे पहिले बनवत रह्या।”

12तउ इ तरह हर मनई मिस्त्र में पुआल हेरइ बरे चारिहं कइँती गवा। 13गुलामन क मालिक जिआदा करी काम करइ बरे मजबूर करत रहेन। उ पचे मनइयन क ओतना ही ईटा गढ़इ बरे मजबूर करत रहेन जेतना उ पचे पहिले बनावत रहेन। 14मिस्त्र क गुलामन क मालिक हिब्रू काम क मेठ चुनि लिहे रहेन। उ पचे लोगन क कामे क जिम्मेदार रहेन। मिस्त्री गुलाम क मालिक उन हिब्रू काम क मेठन क पीटत रहेन अउ ओनसे कहत रहेन, “तू पचे ओतनी ईटन क काहे नाहीं बनउत्या जउन पहिले बनावत रह्या।”

15तब हिब्रू काम क मेठ फिरौन क लगे गवा। उ पचे सिकाइत किहेन अउ कहेन, “हम पचे आप क सेवक अही आप हम पचन्क संग अइसा बर्ताव काहे करत अहई? 16आप हम पचन्क पुआल नाहीं दिहेन। मुला हम पचन्क हुकुम दिहेन कि ओतना ही ईटा बनावई जेतना पहिले बनत

रहिन। अउर अब हम पचन्क मालिक हमका पीटत हीं। अइसा करइ स आप लोगन क गलती अहइ।”

17फिरौन उत्तर दिहेस, “तू पचे अहदी अहा। तू पचे काम नाहीं करइ चहत्या। इहइ कारण अहइ कि तू पचे माँगत बाट्या कि मई तू सबन क निकरइ देउँ। अउर इहइ कारण अहइ कि तू पचे इ ठउर क तजि देइ चाहत बाट्या अउर यहोवा क बलि चढ़ावा चाहत अहा। 18अब कामे प लउट जा, हम तू पचन क कछू पुआल न देब। मुला तू पचे ओतना ही ईटा बनवा जेतना पहिले बनवत रह्या ह।

19हिब्रू काम क मेठ बूझ गएन कि उ पचे मुस्किल में पड़ि गएन। तब उ पचे कहेन, “तू पचन्क हर दिना क तय किया भवा ईट स कम ईट नाहीं बनाइ चाही।”

20जब उ पचे फिरौन क संग बइठे क पाछे जात रहेन, उ पचे मूसा अउ हारून क लगे स निकरेन। मूसा अउ हारून ओनकइ इंतजार करत रहेन। 21एँह बरे उ सबइ मूसा अउ हारून स कहेन, “तू पचे सचमुच फिरौन स इ आग्रह करइ क कि हम पचन्क जाइ देइ क गलती किहा। यहोवा तोहका सजा देइ काहेकि तू पचे फिरौन अउ ओकरे अफसरन में हमरे बरे घिन पइदा कर्या ह। तू पचे ओनका एक बहाना हमका मारि डवइ क-दिहा ह।”

### मूसा क परमेस्सर स सिकाइत

22तबहिँ मूसा यहोवा स पराथना किहेस अउ कहेस, “हे यहोवा! आप आपन लोगन बरे इ भयानक काम काहे किहा ह? आप हमका हिआँ काहे पठया ह? 23मई फिरौन क लगे गएँ अउ जउन आप कहइ क बोल्या ह ओका मई ओसे कहेउँ ह। मुला उ समइया स उ मनइयन बरे जिआदा अत्याचार होइ गवा अहइ। मुला आप ओनके बचावइ बरे काहे कछू नाहीं किहा ह।”

6 तबहिँ यहोवा मूसा स कहेस, “अब तू लखब्या कि मई फिरौन बरे का करत हउँ। उ ओनका छोइइ बरे एँतना हलबुली करी कि उ खुद ओनका जाइ बरे मजबूर करी।”

2तब परमेस्सर मूसा स कहेस, 3“मई यहोवा हउँ। मई इब्राहीम, इसहाक अउ याकूब क समन्वा परगट भएँ ह। उ पचे मोका “एल सददइ”(सर्व-सक्तीमान परमेस्सर) कहेन। मई ओनका इ नाहीं जाहिर करिउँ कि मोर नाउँ यहोवा अहइ। 4मई ओनके संग एक करार बनयो हउँ। मई उ पचन्क कनान क भुईया देइ क बचन दिहउँ ह। उ सबइ उ देस में रहत रहेन, मुला उ सबइ हुवाँ अजनबी क जैसे रहत रहेन। 5अब मई इस्राएलियन क चीख-पुकार जउन मिस्त्री लोगन क अत्याचार अउर कठिन काम करइ बरे मजबूर कीन्ह जाइ क कारण रहेन क सुना। अउर मई आपन करार क याद किया। 6एँह बरे इस्राएलियन स कहा कि मई ओन लोगन स कहत हउँ, “मई यहोवा हउँ। मई तू पचन्क मिस्त्र क बधवा मजदूरी स दूर लइ जाउब अउर मई तू पचन्क का ओन लोगन क गुलामी से बचाउब। अउर मई आपन महान सक्ती क प्रयोग कइ क अउर निअउ क महान काम अंजाम दइ क तू पचन्क अजाद करब। 7तू पचे हमार मनई होब्या अउ मई तू पचन्क परमेस्सर। तू पचे जान जइब्या कि मई परमेस्सर, यहोवा हउँ अउर कि मई तू सबन्क मिस्त्र क

गुलामी स अजाद किहउँ ह। 8मई इब्राहीम, इसहाक अउ याकूब स बड़ा वाचा किहेउँ रहा। मई ओनका एक खास पहँटा देइ क वाचा किहेउँ रहा। एँह बरे मई तू सबन क उ पहँटा ताई लइ जाब। मई उ पहँटा तू पचन्क देब। इ तू पचन्क होइ। मई यहोवा हउँ।”

9एँह बरे मूसा इ बात इस्राएलियन क बताएस। मुला मनइयन आपन करी मेहनत अउर निरासा क कारण मूसा क बात नाहीं सुनेन।

10तब यहोवा मूसा स कहेस, 11“जा अउ मिस्र क राजा फिरौन स कहा कि उ इस्राएल क लोगन क इ देसे स जाइ देइ।” 12मुला मूसा जवाब दिहेस, “इस्राएल क मनइयन मोर बात सुनइ नाहीं चाहतेन। एँह बरे सचमुच फिरौन भी सुनइ न चाही। अउर मई माहिर बोलवइया नाहीं हउँ।”\*

13मुला यहोवा मूसा अउ हारून स बतियान। यहोवा ओनका जाइ अउ इस्राएलियन स बतियाइके हुकुम दिहेस अउ इ भी हुकुम दिहेस कि उ पचे जाई अउर फिरौन स बतियाई। यहोवा हुकुम दिहेस कि उ पचे इस्राएलियन क मिस्र क बाहेर लइ जाई।

### इस्राएल क कछू परिवार

14इस्राएल क घराने क नेता क नाउँ अहई: इस्राएल क पहिलौटी क बेटवा रूबेन क चार बेटवन रहेन। उ पचे रहेन: हनोक, पल्लू हेस्रोन अउ कम्मर्मी। 15सिमोन क बेटहनन रहेन: यमूएल, यामीन, ओहद, याकीन, सोहर, अउर साउल। (साउल एक कनानी अउरत क पूत रहा।) 16लेवी एक सौ सैतीस बरिस जिन्दा रहा। लेवी क बेटहनन रहेन: गोर्सीन, कहात अउ मरारी। 17गोर्सीन क दुइ पूत रहेन-लिबनी अउ सिमी। 18कहात एक सौ तैतीस बरिस जिआ। कहात क बेटहनन रहेन: अग्राम, यिसहार, हेब्रोन अउ उज्जीएल। 19मरारी क पूत रहेन: महली अउ मूसी। इ सबहिँ परिवार इस्राएल क पूत लेवी क रहेन।

20अग्राम एक सौ सैतीस बरिस जिआ। अग्राम आपन बाप क बहिन योकेबेद स बियाह करेस। अग्राम अउ योकेबेद स हारून अउर मूसा पइदा भएन। 21यिसहार क बेटवन रहेन: कोरह, नेपग, अउ जिक्की। 22उज्जीएल क बेटहनन रहेन: मीसाएल एलसापान, अउ सित्री।

23हारून ऐलीसेबा स बियाह किहेस। (ऐलीसेबा बिटिया रही अम्मीनादाब क, अउ नहसोन क बहिन रही।) हारून अउ ऐलीसेबा स नादाब, अबीहू, ऐलाजार अउ ईतामार क जन्मेन। 24कोरह क पूत, अर्थात कोरही रहेन: अस्सीर, एलकाना अउ अबीआसाप रहेन। 25हारून क बेटवा ऐलाजार पूतीएल क बिटिया स बियाह किहेस। अउ उ पचे पीनहास क जन्मेन। इ सबहिँ इस्राएल क बेटवा लेवी स रहेन।

26इ तरह हारून अउ मूसा उहइ परिवार समूह स रहेन। अउर उ पचे उहई मनइयन रहेन जउन स यहोवा बतियान अउ कहेस, “मोर लोग इस्राएलिन क दल\* में मिस्र स निकारा। 27हारून अउ मूसा-मनई अहई जउन मिस्र क राजा

फिरौन स बतियानेन। उ पचे फिरौन स कहेन कि उ इस्राएल क मनइयन क मिस्र स निकरइ देइ।

### यहोवा मूसा क फुन बोलावत ह

28यहोवा मिस्र देस में मूसा स कहेस। 29उ कहेस, “मई यहोवा हउँ। मिस्र क राजा स उ सारी बातन्क कहि द्या जउन मई तोहसे कहत अही।”

30मुला मूसा जवाब दिहेस, “मई नीक बोलवइया नाहीं अहउँ। राजा मोर बतिया सुनी नाहीं।”

7 यहोवा मूसा स कहेस, “मई तोहरे संग रहब। फिरौन बरे तू एक बड़वार राजा\* क तरह रहब्या। अउर हारून तोहार हकदार बोलवइया\* होइ। 2जउन हुकुम मई देत हउँ उ सब हारून स कहा। तबहिँ उ उ बतियन क जउन मई कहत हउँ, फिरौन स कही। अउर फिरौन इस्राएल क मनइयन इ देसे स जाइ देइ। 3मुला मई फिरौन क जिद्दी बनउब। उ तोहार मांग क न मानी। तबहिँ मई मिस्र में बहोत स चमत्कारन, चिन्ह अउर आश्चर्य जनक काम करिबेउँ। 4मुला उ तउ भी तोहार नाहीं सुनी। एँह बरे मई मिस्र क बुरी तरह स सजा देब। अउ मई आपन लोगन, इस्राएलियन क मिस्र देस स बाहेर लइ जाब। 5तब मिस्र क मनइयन जनिहीं कि मई यहोवा अहउँ। जब मई ओन पचन्क खिलाफ होब अउर आपन लोग इस्राएलियन क ओनके देस स बाहेर लइ जाब।”

6मूसा अउ हारून उन बातन क मान लिहेन जेका यहोवा कहे रहा। 7तउ मूसा अस्सी बरिस क रहा अउ हारून तिरासी बरिस क।

### मूसा क टहरइ क छड़ी साँप होइ जात ह

8यहोवा मूसा अउ हारून स कहेस, 9“फिरौन तोहसे तोहार सक्ती क सिद्ध करइ बरे कही। उ तोहसे चमत्कार करइ बरे कही। उ समइया तू हारून स कह्या कि भुईँया प टहरइ क छड़ी बहाइ द्या। जउन समइया फिरौन देखत रहत होइ, छड़ी साँप बन जाई।”

10तउ मूसा अउ हारून फिरौन क लगे गएन अउ यहोवा क हुकुम क मानेन। हारून आपन छड़ी खाले बहाइ दिहस। फिरौन अउ ओनके अफसरन क लखत लखत तबहीं छड़ी साँप बनि गइ।

11एँह बरे फिरौन आपन बुद्धिमान अउ जादूगरन क बोलाएस। इ पचे जन्तर मन्तर किहेन अउ हारून की नाई चमत्कार किहेन। 12उ पचे आपन टहरइवाली छड़ी क भुईँया प बहाएन अउ उ सबन साँप बनि गइन। मुला तबहिँ हारून क छड़ी उ छड़िन क खाइ लिहस। 13फिरौन तउ भी इस्राएली दास क जाइ स मना किहस। इ वइसा ही भवा जइसा यहोवा कहेस। फिरौन मूसा अउ हारून क बात सुनइ स मना कइ दिहस।

अउर ... हउँ “मोर ओढन क खतना नाहीं भवा ह।”

दल फौज क टुकड़ी इ सबद फौज क अहइ अउ एहसे पता लागत ह कि मनइयन “यहोवा क सेना” की तरह एकउटा रहेन।

बड़वार राजा अरथात “परमेस्सर।”

हकदार बोलवइया अरथात “नबी।”

### पानी क रक्त बन जाब

14तब यहोवा मूसा अउ हारून स कहेस, “फिरौन हठ धरे बा। फिरौन मनइयन क जाइ स मना करत ह। 15भिन्सारे फिरौन नदी क किनारे जाइ। ओकरे संग भेंट करइ बरे नील नदी क किनारे जा। तू अपने साथे उ छड़ी क लइ जाया जउन सॉप होइ ग रही। 16ओका इ कह्या: ‘परमेस्सर, हिब्रू लोगन क यहोवा, मोका तोहरे लगे पठएस ह। यहोवा मोसे इस कहइ क बोलेस ह, “मोरे लोगन क मोर आराधना करइ बरे रेगिस्तान में जाइ द्या। अबहूँ तलक तू यहोवा क कहब नाही मान्या। 17एँह बरे यहोवा कहत ह कि उ तोहका लखावइ बरे कछू करी कि उ यहोवा अहइ। मई आपन हाथे में छड़ी लइके पानी प मारब अउ नील नदी रक्त में बदल जाइ। 18तब नील नदी क मछरियन मरि जइहीं अउ नदी बसाइ लागी। तब मिस्त्री मनइयन नदी क पानी न पी पइहीं।”

19यहोवा मूसा क इ हुकुम दिहेस, “हारून स कहा कि उ नदियन, नहरन, झीलियन अउ उ सबहि ठउरन प जहाँ मिस्त्र क मनइयन पानी भरत हीं-हुवों आपन छड़ी क पसारइ। जबहि उ अइसा करी तउ सारा पानी रक्त में बदलि जाइ। सारा क सारा पानी हिआँ तलक कि काठे अउ पाथर क बासन में धरा पानी रक्त में बदलि जाई।”

20एँह बरे मूसा अउ हारून वइसा किहेन जइसा यहोवा कहेस। हारून छड़ी क उठाएस अउ नील नदी क पनिया प पटकेस। उ इ फिरौन अउ ओकरे अफसरन क समन्वा किहेस। फिन नदी क सारा पानी रक्त में बदलि गवा। 21मछरियन नील नदी में मरि गइन अउ नदी बसाइ लागी। एँह बरे मिस्त्री मनइयन नदी क पानी नाही पिउ सकत रहेन। मिस्त्र में सब कइँती रक्त रहा।

22फिरौन क जादूगारन आपन जन्तर मन्तर देखाएन अउ उ पचे वइसा ही किहेन। एँह बरे फिरौन मूसा अउ हारून क सुनइ स इन्कार कइ दिहेस। इ ठीक वइसे भवा जइसे यहोवा कहे रहा। 23जउन मूसा अउ हारून किहे रहेन ओका फिरौन नाही मानेस। उ घूमा अउ घरे चला गवा।

24मिस्त्री मनइयन नदी स पानी नाही पिउ सकत रहेन। एँह बरे पानी पिअइ बरे नदी क चारिहुँ कइँती कुअँन क खोदेन।

### मेघा

25यहोवा क जरिए नील नदी क पानी क रक्त में बदलइ क पाछे सात दिन बीति गएन।

8 तब यहोवा मूसा स कहेस, “फिरौन क लगे जा अउ ओसे कहा कि यहोवा इ कहत ह, ‘मोरे मनइयन क मोरी आराधना करइ बरे जाइ द्या। 2मुला जदि फिरौन ओनका जाइ स रोकत ह तउ मई, यहोवा सारे मिस्त्र क मेघन स भरि देब। 3नील नदी मेघन स भरि जाइ। उ पचे नदी स निकरिहीं अउ तोहरे घरे में घुसिहीं। उ सबइ तोहरे सोवइ क खोलि में अउ तोहरे बिछउना में होइहीं। मेघन तोहरे अफसरन क घरे में होइहीं अउ तोहरे तन्दूरे में अउ पानी क घइली में होइहीं। 4मेघन पूरि तरह तोहरे ऊपर, तोहरे मनइयन क ऊपर अउ तोहरे अफसरन क ऊपर होइहीं।”

5तबहि यहोवा मूसा स कहेस, “हारून स कहा कि उ आपन छड़ी क नहरन, नदियन अउ झीलियन क ऊपर पसारइ। अउर मेघन बाहेर निकरिके सारे मिस्त्र देस में भरि जइहीं।”

6तब हारून परमेस्सर क हुकम स मिस्त्र देस में जहाँ कहुँ पानी रहा ओकर ऊपर हथवा उठाएस अउ मेघा पानी स बाहेर आउब सुरू कइ दिहन अउ पूरे मिस्त्र प छाइ गएन।

7जादूगर भी वइसा किहेन। उ पचे भी मिस्त्र देस में मेघा लइ आएन।

8फिरौन मूसा अउ हारून क बोलाएस। फिरौन कहेस, “यहोवा स आराधना करइ कि उ हम लोगन क मेघन स आजाद करइ देइ। तबहि मई मनइयन क यहोवा बरे बलि भेंट चढ़ावइ बरे जाइ देइहउँ।”

9मूसा फिरौन स कहेस, “मोका इ बतावा कि आप कब चाहत हीं कि मेघन निकरि जाईं। मई आप बरे, आप क मनइयन बरे अउ आप क अफसर बरे पराथना करिहउँ। तबहि मेघन आप क अउ आप क घरन्क, अउ आप क अफसरन्क अउ आप क मनइयन क तजि देइहीं। मेघन सिरिफ नदिया में रहि जइहीं। तू कब चाहत बाट्या कि मेघन तोहका तजि देई?”

10फिरौन कहेस, “भियान।”

मूसा कहेस, “जइसा आप कहत हीं वइसा ही होइ। इ तरह आप जानि जइहीं कि यहोवा हमार परमेस्सर क नाई अउर कउनो देवता नाही बा। 11मेघन आप क, आप क घरे क, आप क अफसरन्क अउ आप क लोगन क तजि देइहीं। मेघन सिरिफ नदी में रहि जइहीं।”

12मूसा अउ हारून फिरौन स बिदा भएन। मूसा ओन मेघन खातिर यहोवा क पराथना किहेस, जउने मेघन क यहोवा फिरौन क खिलाफ पठए रहा। 13अउ यहोवा उहइ किहेस जउन मूसा कहेस। सब मेघा घरन में, घरन क अंगने में अउ खेतन में मरि गएन। 14मिस्त्री मुरदा मेघन क ढेर में जमा कहेस तउ समूचा देस में भयंकर बदबू होइ लाग। 15जब फिरौन निहारेस कि उ पचे मेघन स बरी होइ गएन उ फुन जिदियाइ गवा। फिरौन वइसा नाही किहेस जइसा मूसा अउ हारून ओसे करइ बरे कहे रहेन। इ ठीक वइसा ही भवा जइसा यहोवा कहेस।

### जुआँ

16तब यहोवा मूसा स कहेस, “हारून स कहा कि उ आपन छड़ी उठावइ अउ भुइयों क धूरि प पटकइ। मिस्त्र में सब कइँती धूरि जुअँन होइ जाइ।”

17उ पचे इ किहेन। हारून छड़ी क उठाएस अउ भुइयों क धूरि प दइ मारेस। मिस्त्र में सब कइँती धूरि जुअँन में बदल गइ। जुअँन जानवरन अउ लोगन प छाइ गइन।

18जादूगरन आपन जादू मारेन अउ वइसे करइ चाहेन। मुला जादूगरन धूरि स जुअँन नाही बनाइ सकेन। जुअँन जानवरन अउ मनइयन प छाइ गएन। 19तउ जादूगरन फिरौन स कहेन, ‘इ परमेस्सर क सक्ती अहइ?’ मुला फिरौन ओनपइ बिसवास करइ स इन्कार कइ दिहेस। उ जिदी होइ गवा। इ ठीक अइसा ही भवा जइसा यहोवा कहे रहा।



### माखिन

20यहोवा मूसा स कहेस, “भिन्सारे उठा अउ फिरौन क लगे जा। फिरौन नदी क लगे जाइ। ओन से कहा, ‘मोरे लोगन क मोर आराधना बरे जाइ द्या। 21जदि तू मोर लोगन क नाहीं जाइ देब्या तउ तोहरे घरन में माखी अइहीं। माखी तोहरे अउ तोहरे अफसरन प छाड़ जइहीं। मिस्त्र क घरन माखिन स भरि जइहीं। माखिन पूरी भुइयों प छाड़ जइहीं। 22मुला मई इस्त्राएल क लोगन क संग वइसा बर्ताव न करब जइसा मिस्त्री लोगन क संग करिब। जहाँ गोसेन में मोर लोगन रहत हीं हुवों कउनो माखी नाहीं होइ। इ तरह तू जनब्या कि मई यहोवा, इ देसे में हउँ। 23एँह बरे मई काल्ह भियान स तोहरे लोगन क संग आपन लोगन स अलग बर्ताव करिहउँ।”

24एँह बरे यहोवा उहइ किहेस, “जउन उ कहेस। माखिन झुण्ड क झुण्ड में आइ गइन। माखिन फिरौन क घर अउ ओकर सबहिं अफसरन क घरे में भरी रहिन। माखिन पूरे मिस्त्र देस में भरि गइन। माखी देस क नासत रहिन। 25एँह बरे फिरौन मूसा अउ हारून क बोलाएस। फिरौन कहेस, “तू पचे यहोवा तोहार परमेस्सर क इहइ देस में बलि भेंट कइ द्या।”

26मुला मूसा कहेस, “वइसा करब नीक नाहीं होइ। मिस्त्री मनइयन सोचत हीं कि परमेस्सर बरे हम लोगन क बलि देब एक खउफनाक बात अहइ। एँह बरे जदि हम पचे अइसा करित तउ उ पचे हमका देखिहीं अउ हम पइ पाथर बहइहीं अउर हमका मारि डइहीं। 27हम पचन्क तीन दिना तलक रेगिस्तान में जाइ द्या अउर हमका आपन यहोवा परमेस्सर क ओकर हुकम क अनुसार बलि चढ़ावइ द्या।”

28एँह बरे फिरौन कहेस, “मई तोह सबन क मरूभूमि में जाइ क देब अउ तोह सबन क यहोवा तोहार परमेस्सर क भेंट चढ़ाई क देब। मुला तोहका बहोत दूर नाहीं जाई क चाही। अब जा अउर मोरे बरे पराथना कर।”

29मूसा कहेस, “लखा, मई जाब अउ यहोवा स पराथना करब कि काल्ह भियान आप स, आपक लोगन स अउ आपक अफसरन्स माखिन क हइइ देई। मुला आप लोगन क यहोवा क बलि चढ़ावइ स जिन रोका।”

30एँह बरे मूसा फिरौन क लगे स गवा अउ यहोवा स पराथना किहेस। 31अउर यहोवा इ किहेस जउन बरे मूसा पराथना किहेस। यहोवा माखिन क फिरौन स, ओकरे अफसरन्स ओकरे लोगन स हइइ लिहेस। कउनो माखी नाहीं टिक पाइ। 32मुला फिरौन फुन जिद्दी होइ गवा अउर उ लोगन क जाइ नाहीं दिहेस।

### खेते क गोरूअन क बेरामी

9 तब परमेस्सर मूसा स कहेस, फिरौन क लगे जा अउर ओका कहा, “हिब्रू मनइयन क यहोवा परमेस्सर कहत बा, ‘मोरे लोगन क मोरे आराधना बरे जाइ द्या। 2जदि आप ओनकइ लगातार रोकत रहब्या अउ ओनकइ जाइ स लगातार मना करत रहब्या, 3तउ यहोवा आपन सक्ती क प्रयोग तोहरे खेतन क गोरूअन क खिलाफ करी। परमेस्सर

तोहरे सबहिं घोड़न, गदहन, ऊँट, गइया बोकरी अउ भेड़िन क भयानक बेरामी दइ देइ। 4यहोवा इस्त्राएल क गोरूअन क संग मिस्त्र क गोरूअन स अलग बर्ताव करी। इस्त्राएलियन क मनइयन क कउनो गोरू न मरी। 5यहोवा एका घटित होइ जाइ क टेम तइ कइ दिहे अहइ। भियान यहोवा इहइ देस में घटइ देइ।”

6अगली भियान मिस्त्र क खेत क सबहीं जनावर मर गएन। मुला इस्त्राएल क कउनो भी जनावर नाहीं मरा। 7फिरौन मनयइन क यह देखे इस्त्राएल भेजा कि का इस्त्राएल क कउनो जनावर मरा। अउ इस्त्राएल क कउनो जनावर नाहीं मरा। फिरौन हठी रहा उ कउनो मनयइन क नाहीं जाई द्या।

### फोड़ा फुंसी

8यहोवा मूसा अउ हारून स कहेस, “मुट्ठी भर भट्ठी क राखी ल्या। मूसा तू फिरौन क समन्वा राखी क हवा में उछारा। 9इ धूरि होइ जाइ अउ समूचइ मिस्त्र देस में संचरि जाइ। जबहुँ इ धूरि मनई क छुइ या गोरू प गिरी, खाली प फोड़ा (गलका) फुंसी फुटिहीं।”

10एँह बरे मूसा अउ हारून भट्ठी स राखी लिहेस। तबहिं उ पचे गएन अउ फिरौन क समन्वा ठाड़ भएन। मूसा राखी क हवा में उछारेन अउर मनइयन अउ गोरूअन क बदन में फोड़ा फुंसी होइ लागेन। 11जादूगर मूसा क अइसा करइ स थाम नाहीं पाएन, काहे कि जादूगरन क फोड़ा होइ गएन। इ समूचइ मिस्त्र में अइसा ही भवा। 12मुला यहोवा फिरौन क जिद्दी बनइ दिहे रहा। एँह बरे फिरौन मूसा अउ हारून क सुनइ स मना कइ दिहेस। इ वइसा ही भवा जइसा यहोवा कहे रहा।

### ओला

13तब यहोवा मूसा स कहेस, “भिन्सारे उठा अउ फिरौन क समन्वा आपन आप क पेस करा। अउर ओसे कहा कि परमेस्सर, हिब्रू मनइयन क यहोवा तोहसे कहत ह, ‘मोरे लोगन क मोर आराधना बरे जाइ द्या। 14जदि तू इ नाहीं करब्या तउ मई तोहारे अफसरन अउ तोहरे मनइयन क खिलाफ आपन पूरी ताकत क प्रयोग करब। तब तू जनब्या कि मोरे तरह दुनिया में दूसर कउनो देवता नाहीं अहइ। 15मई आपन सक्ती क प्रयोग कइ सकत हउँ अउ अइसी बीमारी फइलाइ सकत हउँ जउन तोहका अउ तोहरे मनइयन क भुइयों प नास कइ डइ। 16मुला मई तू सबन्क कउनो खास कारण स हिओँ धरे अहउँ। मई तू पचन्क हियाँ एँह बरे धरे अहउँ कि मई तू पचन्क आपन सक्ती देखाउब। तब सारी दुनिया क मनइयन मोरे बारे में बात करिहीं। 17तू पचे अबहुँ मोरे लोगन क खिलाफ अहा। तू ओनका जाइ नाहीं देत अहा। 18एँह बरे भियान मई इहइ टेम काफी जोरदार ओला बरसाउब। जब ते मिस्त्र देस बना ह आजु तक कबहुँ अइसे ओला नाहीं बरसा ह। 19तू आपन गोरूअन क सुरच्छित ठउरे में राख्या। जउन कछू तोहार खेते में होइ ओका ओंटे में छिपाइ जरूर लिहा। काहेकी कउनो भी लोग या गोरू जउन खेते में होइ उ मरि जाइ। हर एक चीजन अउ हर

एक मनइयन प जउन घरे क बाहेर होइ ओन सब प ओला बरसिहीं।”

20फिरौन क कछू अफसरन यहोवा क संदेसे प धियान दिहेस। उ पचे हाली हाली आपन गोरूअन अउ गुलामन क घरे मँ हाँक लिहेन। 21मुला दूसर मनइयन यहोवा क संदेसा प धियान नाहीं दिहेन। ओ पचन्क गुलाम अउ गोरू जउन बाहेर खेतन मँ रहेन सब तबाह हो गएन।

22यहोवा मूसा स कहेस, “आपन हाथ हवा मँ उठावा अउ मिस्त्र प ओला गिरब सुरू होइ जइहीं। इ ओला मिस्त्र क सबहुँ खेतन प, लोगन प, गोरूअन प अउर बृच्छ अउ पौधा प गिरिहीं।”

23एँह बरे आपन छड़ी क हवा मँ उठाएस अउ यहोवा बिजुरी अउ ओला क भुइँया प गिराएन। ओला समूचइ मिस्त्र प गिरेन। 24ओला पड़त रहेन अउ बिजुरी चमकत रही। जबहिँ ते मिस्त्र एक ठु रास्ट्र बना तबहिँ स अब तलक इ सबते जिआदा नेसकान करइवाली ओला बरसत रही। 25मिस्त्र क खेत मँ जउन कछू रहा आँधी ओका नसाइ दिहेस। ओला मिस्त्र मँ मनइयन, गोरूअन अउ बृच्छ पउधन क नास कइ डाएस। ओला खेतन मँ सबन बृच्छन क ओखाइ अउ तोड़ि दिहस। 26गोसेन पहुँटा मँ जहाँ इस्त्राएल क मनइ रहत रहेन हुवाँ ओला नाहीं गिरेन।

27फिरौन मूसा अउ हारून क बोलाएस। फिरौन ओनसे कहेस, “इ समइ मँ मई पाप किहउँ ह। यहोवा सही अहइ। अउर मई अउ मोर लोग गलत अहइँ। 28परमेस्सर क ओर स ओला क आवाज अउ गर्जत अवाज बहोत जिआदा बा। यहोवा स आँधी थामइ क परार्थना करा। मई तू सबइ पचन्क जाइ देब। तू सबइ पचन्क हिआँ नाहीं रहइ क पड़ी।”

29मूसा फिरौन स कहेस, “जब मई सहर क तजि देब, तबहिँ मई परार्थना मँ आपन बाँही क यहोवा क समन्वा पसराउब। गर्जब अउ ओला क गिरब थमि जाइ। तबहिँ आप सबन जनिहीं कि इ भुँइया यहोवा क अहइ। 30मुला मई जानत हउँ कि आप अउ आपक अफसरन अबहुँ नाहीं यहोवा स डेरतेन अउर नाही यहोवा क इज्जत देत हीं।”

31सनई मँ दाना पड़ि गवा रहा अउ बारली मँ फूल निकरि आवा रहा। मुला इ सब पउधन नसाइ गएन। 32गोहूँ अउ कठियान गोहूँ जउन दूसर अनाजे क पाछे पाकत हीं, एँह बरे एनकइ फसल नसान नाहीं।

33मूसा फिरौन क तजि दिहेस अउ सहर क बाहेर आवा। उ यहोवा क समन्वा आपन बाँह पसारेस अउ गर्जब अउ ओला क गिरब पटान। बर्खउ धरती प गिरब पटाइ गइ।

34जब फिरौन लखेस, कि बर्खी, ओला अउ गर्जब पटाइ गएन। उ फुन स पाप किहेस। उ अउ ओकर अफसरन फुन जिद धरे रहेन। 35फिरौन फुन जिदी होइ गएन। उ इस्त्राएल क मनइयन क अजादी स जाइके मना कइ दिहस। इ ठीक उहइ तरह भवा जइसे यहोवा मूसा स कहे रहा।

### टिड्डियन

10 यहोवा मूसा स कहेस, “फिरौन क हिआँ जा। मई ओका अउ ओकरे अफसरन्क जिद्दी बनइ दिहेउँ ह। मई यह आपन बरियारे क चमत्कार ओनका अउर

ओकर लोगन क समन्वा देखाइ बरे किहेउँ ह। 2मई एँका एँह बरे किहेउँ ह कि तू आपन पूत-बिटिया तथा नाती-नतिनी क ओन अजूबा काम क अउ दूसर चीन्ह क बताइ सका जउन मई मिस्त्री लोगन क खिलाफ मँ किहेउँ ह। तबहिँ तू पचे जान लेब्या कि मई यहोवा हउँ।”

3एँह बरे मूसा अउ हारून फिरौन क लगे गएन। उ पचे ओसे कहेन, “हिब्रू लोगन क यहोवा परमेस्सर कहत हीं, ‘तू मोरे हुकुम क मानइ स कब ताई इन्कार करब्या? मोरे लोगन क मोर आराधना करइ बरे जाइ द्या। 4जदि तू मोर लोगन क जाइ स मना करत ह तउ मई भियान तोहरे देस मँ टिड्डियन क लइ आउब। 5टिड्डियन पूरी भुइँया क ढाँपि लेइहीं। ओ एँतना ढेरि क होइहीं कि तू भुइँयाँ नाहीं लखइ पउब्या। सबहिँ पउधन अउ जउन कछू चीज ओला भरी आँधी स बचि गइ बाटिन ओका टिड्डियन चट कइ जइहीं। टिड्डियन मइदान क सब पातिन्क चट कइ डइहीं। 6टिड्डियन सबहिँ घरन, तोहरे अफसरन्क सबहुँ घरन अउ मिस्त्र क सबहुँ घरन मँ भरि जइहीं। जेतना टिड्डियन तोहार बाप दादा कबहुँ न देखे होइहीं ओसे भी जिआदा टिड्डियन हिआँ होइहीं। जब ते मनइयन मिस्त्र मँ रहइ लागेन, तब ते जब कबहुँ टिड्डियन भइ होइहीं ओसे भी जिआदा टिड्डियन होइहीं।” तबहिँ मूसा घूमि गवा अउ फिरौन क तजि दिहस।

7फिरौन क अफसरन ओसे पूछेन, “हम पचे कब तलक इ लोगन क जालि मँ फँसा रहब। मनइयन क यहोवा आपन परमेस्सर क आराधना करइ जाइ द्या। जदि आप ओनका नाहीं जाइ देब्या तउ आपक जानइ स पहिले मिस्त्र बरबाद होइ जाइ।”

8एँह बरे फिरौन आपन अफसरन्स कहेस कि मूसा अउ हारून क ओकरे लगे लिआवा। उ ओनसे कहेस, “जा अउ यहोवा आपन परमेस्सर क आराधना करा। मुला मोका बतावा फुरे कि कउन कउन जात अहइँ?”

9मूसा जवाब दिहेस, “हमार मनई जवान अउ बुढ़वा मनई जइहीं। अउ हम पचे आपन बेटहनन अउ बिटिनियन, आपन भेड़िन अउ गोरूअन क आपन संग लइ जाब। हम सब एक अउट जाब काहे कि परमेस्सर क भोज हम सबइ बरे अहइ।”

10फिरौन ओनसे कहेस, “जदि मई कभी तू पचन्क अउ तोहरे बचवन क जाइ देइ तउ परमेस्सर क सचमुच तोहरे साथे होइ चाही। लखा, तू पचे कछू बुरा योजना करत बाट्या? 11सिरिफ मनइयन ही जाइ सकत हीं अउ यहोवा क आराधना कइ सकत हीं। तू पचे इहइ सुरू से ही माँग्या ह। मुला तोहार सारे लोगन क साथे जाइ क आग्या नाही बा।” तब फिरौन मूसा अउ हारून क पठाएस।

12यहोवा मूसा स कहेस, “मिस्त्र क धरती प बाँहिया उठावा अउ टिड्डियन आइ जइहीं। टिड्डियन मिस्त्र क सारी भुइँयाँ प संचर जइहीं। टिड्डियन ओला स बचा भवा पेड़ पउधा क चट कइ जइहीं।”

13मूसा आपन छड़ी क मिस्त्र कइँती उठाएस अउ यहोवा पूरब स जोर क आँधी चलाइ दिहेस। आँधी उ सारे दिन भइ अउ रात मँ चलत रही। जब भिन्सार भवा, आँधी मिस्त्र देस मँ टिड्डियन क लइ आइ दिहस। 14टिड्डियन मिस्त्र देस स

उड़िके आइन अउ भुइयाँ प बैठि गइन। मिस्त्र मँ एँतनी जिआदा टिड्डियन कबहुँ नाहीं भइन जेतनी इ दई रहिन। 15टिड्डियन पूरी भुइयाँ क ढँपि लेइहीं। एँह बरे पूरे देस मँ जमीन प अँधियारा छाड़ गवा। टिड्डिन ओन सबहिँ पउधन क अउ बृच्छ क हरिअर फल क, जउन ओला गिरे स नसान नाहीं रहेन, चट कइ डाइन। मिस्त्र मँ कतहुँ कउनो पेड़ या पउधन प कउनो पाती नाहीं रहि पाइ।

16फिरौन मूसा अउ हारून क हाली बोलावाएस। फिरौन कहेस, “मई तोहरे अउ यहोवा तोहरे परमेस्सर क खिलाफ पाप किहेउँ ह। 17इ टेम प मोरे पाप क अब छिमा कइ द्या। यहोवा आपन स पराथना करा कि इ ‘मउत’ (टिड्डियन) क मोसे दूर करा।”

18मूसा फिरौन स अलग भवा अउ उ यहोवा स पराथना किहेस। 19एँह बरे यहोवा हवा क बहब बदलि दिहस। यहोवा पच्छिउँ स तेज आँधी उठाएस अउ उ टिड्डियन क लाल सागरे\* मँ हटाइ दिहस। एक तु भी टिड्डी मिस्त्र मँ नाहीं बचि पाएस। 20मुला यहोवा फिरौन क जिददी बनाएस। अउर फिरौन इस्त्राएल क मनइयन क जाइ नाहीं दिहस।

### अँधियारा

21तब यहोवा मूसा स कहेस, “आपन बाँही क हवा मँ ऊपर उठावा अउ अँधियारा मिस्त्र क ओढ़ि लेइ। इ अँधियारा एतना गहिर अउ मोट होइ कि तू एँका महसूस कइ सकित ह।”

22तउ मूसा आपन हथवा हवा मँ उठाएस अउ मिस्त्र मँ टोवइवाला अँधियार छाड़ गवा। इ अँधियारा तीन दिना तलक मिस्त्र मँ रहा। 23मनइयन मँ स कउनो क चोंधरात नाहीं रहा अउ तीन दिन कउनो कतहुँ नाहीं जाइ पावा। मुला हुवाँ उजिआरा उ ठउरन प रहा जहाँ कतहुँ इस्त्राएल क मनई रहेन।

24फिरौन मूसा क फुन बोलाएस। फिरौन कहेस, “जा अउ यहोवा क आराधना करा। तू पचे आपन संग बचवन क लइ जाइ सकत ह। सिरिफ आपन भेड़िन अउ गोरून क हिआँ तजि द्या।”

25मूसा कहेस, “न सिरिफ हम पचे आपन भेड़ अउ गोरू क लइ जाब मुला जब हम पचे जाब, आप हम सबन्क भेंट अउ बलि भी देब्या। हम पचे इ सब बलिन क आपन परमेस्सर यहोवा क आराधना बरे बइपरब। 26हम पचे आपन पसु क संग संग परमेस्सर क आराधना बरे लइ जाब। हमरे पाछे एक तु खुर भी न छूटि पाइ। हम पचे ठीक तरह अबहिँ नाहीं जानित अही कि परमेस्सर क आराधना बरे हम क का चाही। हम पचे तब ओका जानि पाउब जब हम सबइ उ ठउरे क पहुँचि जाब जहाँ हम पचे जात अही।”

27यहोवा फुन फिरौन क जिददी बनाएस। एँह बरे फिरौन ओन सब क जाइ स मना कइ दिहस। 28तब फिरौन मूसा स कहेस, “मोसे दूर होइ जा। मई नाहीं चाहित कि तू हिआँ फुन आवा। एकरे पाछे जदि तू हम से भेंटइ अउब्या तउ मारि डावा जाब्या।”

29तबहिँ मूसा फिरौन स कहेस, “आप जउन कहत हीं, ठीक बा। मई फुन आप स भेंटइ कबहुँ न आउब।”

### पहिलौटी क मउत

11 तब यहोवा मूसा स कहेस, “मई फिरौन अउ मिस्त्र क खिलाफ एक तु अउर बिपत लइ आउब। एकरे पाछे उ तू सबन्क मिस्त्र स पठइ देइ। असिल मँ उ तू पचन्क इ देस तजि देइ क मजबूर करी। 2तू इस्त्राएलियन क इ संदेसा जरूर दिहा: ‘तू आपन पड़ोसियन मनसेधू अउ मेहरारूअन स सोना अउ चाँदी क बनी चीज मांग्या। 3परमेस्सर मिस्त्र क मनइयन क तू सबन प कृपालु बनइहीं। मिस्त्री मनइयन, हिआँ तलक फिरौन क अफसरन भी पहिलेन स मूसा क बड़का मनइ मानत हीं।”

4मूसा लोगन स कहेस, “यहोवा कहत हीं: ‘आज आधी रात क मई मिस्त्र स होइके जाब, 5अउ मिस्त्र क सबइ पहिलौटी पूतन अउ मिस्त्र क राजा फिरौन क पहिलौटी बेटवा स लइके जाँत चलावइवाली नौकरानी तलक क पहिलौटी पूत मरि जाइ। पहिलौटी क पइदा भवा नर गोरू भी मरिहीं। 6मिस्त्र क समूचइ धरती पइ रोउब पीटब होइहीं। उ रोउब पीटब मिस्त्र मँ पुराने जमाने मँ कबहुँ भए रहेन कउनो भी रोउब पीटब स या आवइ वाल समइ मँ कबहुँ होइवाला रोउब पीटब से जियादा बुरा होइहीं। 7मुला इस्त्राएल क कउनो भी मनइ क चोट न पहुँच पाइ। हिआँ तलक कि ओन लोगन प कउनो कुत्ता भी नाहीं भूँकी। न कउनो इस्त्राएली मनइ क अउ न ही कउनो गोरूअन क चोट लागी। इ तरह स तू जनब्या कि मई इस्त्राएल क मिस्त्र स अलगउज क बियूहार कीन्ह ह। 8तबहिँ तोहार सब मिस्त्री अधिकारियन मोर समन्वा निहुरिहीं अउ मोर पूजा करइही। उ पचे कइहीं, ‘जा, अउ आपन सबहिँ लोगन क आपन संग लइ आवा।’ तबहिँ मई फिरौन क कोहाइ क देब।”

9तबहिँ यहोवा मूसा स कहेस, “फिरौन तोहार बात सुनेस नाहीं। काहे? एँह बरे कि मई आपन बड़की सकती क मिस्त्र मँ देखाइ सकउँ।” 10इहइ कारण रहा कि मूसा अउ हारून फिरौन क समन्वा बड़का बड़का चमत्कार देखाएन। अउर इहइ कारण अहइ कि यहोवा फिरौन क एँतना हट्टी बनाएस कि उ इस्त्राएल क मनइयन क आपन देस तजइ नाहीं दिहस।

### फसह

12 मूसा अउ हारून जब मिस्त्र मँ रहेन, यहोवा ओनसे कहेस। यहोवा कहेस, 2“इ महीना तोहार बरे बरिस क पहिल महीना होइ। 3इ हुकुम इस्त्राएल क पूरी जाति बरे अहइ: इ महीना क दसवाँ दिन हर मनइ आपन परिवारे बरे एक तु मेनना जरूर राखी। 4जदि हुवाँ जिआदा मनइयन अेकरे घरे मँ मेमना क खाइ बरे न होइँ, तउ ओका आपन पड़ोसियन क भोज खाइ बरे बोलावइ चाही। हर मनइ क खाइ बरे मेमना क पर्याप्त गोस होइ चाही।

5एक बरिस क नर मेमना बे दोखे तगड़ा होइ क चाही। इ पसु या तउ भेड़ क बच्चा या बोकरी क बच्चा होइ सकत ह। 6तोहका इ मेमना क महीना क चौदहवाँ तारीख ताई रखइ चाही। उ दिन इस्त्राएल बिरादरी क सबहिँ लोग

गोधरी क समइ में इ मेमनन क जरूर मारिहीं। 7इ जानवरन क खून तोहका बटोरइ क चाही। कछू खून घरे क दरवाजे क चौखट क ऊपर सिरा अउ दुइनउँ पाटी प लगावइ चाही, जउन घरन में मनइयन खइया क खाईं।

8इ रात क तू मेमना क भूँजि ल्या अउ ओकर सबइ गोस खाइ ल्या। तू जरूर कइवान जरी-बूटी अउ बे खमीरे क रोटी भी खाइ लिहा। 9तोहका मेमना क बच्चा नाहीं खाइ चाही तोहका मेमना क पानी में बोलकावइ नाहीं चाहीं तोहका समूचइ मेमना क आगी प भूँजइ चाही। इ हालत में भी मेमना क मूँड़, जोड़ अउ ओकरे भीतर क हींसा ठीक ठाक होइ क चाही। 10उहइ राति क तोहका सब गोस खाइ लेइ चाही। जदि तनिक गोस भिन्सारे ताई बचि खुचि जाइ तउ ओका आगी में जराइ देइ चाही।

11“जब तू खइया क खाया तउ अइसे ओढ़ना क पहिरया जइसे तू पचे जात्रा प जात ह्वा। तू पचन्क लबादा तोहरे पेटी में कसा होइ चाही। तू पचे आपन पनही पहिरे रहया अउ आपन जात्रा करइ क लाठी आपन हाथे में थामे रहया। तू पचन्क हालि खइया क खाइ लिहा। काहेकि इ यहोवा क फसह अहइ- उ टेम जब यहोवा ओकरे मनइयन क बचाएस अउ मिस्त्र स ओनका हाली बाहेर किहेस।”

12“आजु राति में मई मिस्त्र स होइक जाब अउ मिस्त्र में सबइ पहिलौटी पूत क मारि डाउब। मई सबहि पहिलौटी का पइदा भवा मनइ क बेटवा, अउ जानवर क बच्चा क मारि डाउब। इ तरह मइ मिस्त्र क सबहि देवतन क परखब अउ देखाउब कि मई यहोवा हउँ। 13मुला तू मनइयन\* क घरेन प लाग खून क चीन्हा एक खास चीन्हा होइ। जब मई खून क चीन्हा क लखब, तउ मई तू पचन क घरेन क सुरच्छित तजइ भवा चला जाब। मई मिस्त्र क मनइयन क मारब, मुला ओन जानलेवा माहमारी स तू पचन्क कउनो भी नसकान न पहुचाउब।

14“तउ तू पचे आजु इ रात क हमेसा याद करब्या। तू पचन बरे एक खास पवित्तर क दिन होइ। तोहार सन्तानन हमेसा इ पवित्तर दिन क मनाइ क जरिया यहोवा क सम्मान देइही 15इ पवित्तर दिन प तू पचे बेखमीर क आटा क रोटी सात दिन ताई खउब्या। इ पवित्तर दिन क अवाई स पहिले तू पचे आपन घरे स खमीर क निकारिके बाहेर बहाइ द्या। इ पवित्तर दिन क सात दिन ताई तू पचे में स कउनो क भी खमीर नाहीं खाइ चाही। जदि तू पचे में स कउनो भी मनइ खमीर खाई तउ ओका इस्त्राएल क दूसर मनइयन स निकारइ दइ जाब्या। 16इ पवित्तर दिन क पहिले दिन अउ सातवाँ दिन में तोहका पवित्तर बइठक करइ चाही। इ दिनन तोहका कउनो काम नाहीं करइ क होइ। इ दिनन सिरिफ एक काम जेका करइ क अगिगया अहइ आपन भोज क तइयार करब। 17तू लोगन क बेखमीरे क पवित्तर त्यौहार क जरूर याद राखे चाही। काहेकि इहइ दिन ही मई तोहरे लोगन क समूहन में मिस्त्र स बाहेर लइ आवा। एँह बरे तू लोगन क

अउर तोहार सबहि सन्तानन क इ दिन याद राखइ क होइ। इ नेम अहइ अउ इ सदा रही। 18एँह बरे पहिले महीना निसन क चौदहवाँ दिन क साँझ स तू पचे बेखमीरे क रोटी खाब सुरू करब्या। उहइ महीना क इक्कीसवाँ दिन क साँझ तलक तू अइसी रोटी खाब्या। 19सात दिना ताई तू सबन्क घरन में कउनो खमीर क रोटी नाहीं होइ चाही। कउनो भी मनइ चाहे उ आपन देस में पैदा भवा ह या विदेसी होइ जउन इ खमीर क खाई दूसर इस्त्राएलियन स अलगाइ दीन्ह जाइ। 20इ पवित्तर दिन क तू पचन्क खमीर नाहीं खाई चाही। तू जहाँ कतहुँ रहा बेखमीरे क रोटी खाया।”

21एँह बरे मूसा सबहि बुजुर्गन क एक ठउरे प बोलाएस। मूसा ओन पचन्सा कहेस, “आपन परिवारे बरे मेमनन लइ ल्या। फसह त्यौहारे बरे मेमनन क मारि द्या। 22हिसाप\* क गुच्छा क लइ ल्या। खोरा में ओनका डुबावा अउर दुइनउँ चौखटन क दुइनउँ कइँती अउ सिरन प खून क लगावा। तू पचन में स कउनो भी भियान तई आपन घर नाहीं छोड़इ चाही। 23जब यहोवा पहिलौटी क मारइ बरे मिस्त्र स होइके जाइ तउ यहोवा उ घरे क रच्छा करिहीं जउने घर क चौखटन क दुइनउँ कइँती अउ सिरन प खून लखिहीं। यहोवा नास करइवालन क तोहरे घरे क भीतर ना भेजही। उ तू पचन्क चोट न पहुँचइहीं। 24तू पचन क इ हुकुम जरूर याद राखइ चाही। इ नेम तू पचन अउ तू पचन क सन्तानन बरे हमेसा अहइ। 25तू सबन्क इ जसन क तबहुँ याद राखइ क होइ जब तू पचे उ देस में पहुँचब्या जउन यहोवा तू सबन्क आपन वाचा क अनुसार देइहीं। 26जब तोहार गदेलन तोहसे पूछिहीं, ‘इ त्यौहार क का मतलब अहइ?’ 27तउ तू पचे कहब्या, ‘इ फसह त्यौहार यहोवा क सम्मान बरे अहइ। काहेकि जब हम पचे मिस्त्र में रहेन तब यहोवा इस्त्राएल क घरवा स होइके गएन। यहोवा मिस्त्र क मनइयन क मारि डाएन मुला हम सबन्क हमार घरे में बचाइ लिहन। तबहि लोग यहोवा क निहुरेन अउ आराधना किहेन।”

28यहोवा इ हुकुम मूसा अउ हारून क दिहे रहा। एँह बरे इस्त्राएल क मनइयन उहइ किहेन जउन यहोवा क हुकुम रहा।

29आधी रात क यहोवा मिस्त्र क सबहि पइदा भए पूतन, फिरौन क पहिलौटी क पूत जउन मिस्त्र क राजा रहा-स लइके जेल में बइठेन कैदी क पूत तलक सबहि क मारि डाएन। पहिलौटी क पइदा जानवर भी मरि गएन। 30मिस्त्र में उ राति क कउनो न कउनो मरि गवा। फिरौन, ओकर अफसरन अउ मिस्त्र क सबहि मनइयन ज़ोर स रोवइ चिचिआइ लागेन।

### इस्त्राएलियन मिस्त्र क तजि देत हीं

31एँह बरे उ रात फिरौन मूसा अउ हारून क बोलाएस। फिरौन ओसे कहेस, “तइयार होइ जा अउ हमरे लोगन क तजिके चला जा। तू अउ तोहार लोगन वइसा हीं करि सकत हीं जइसा तू कहया ह। जा अउ आपन यहोवा क आराधना करा। 32अउ तू पचे जइसा तू कहया ह कि तू चाहत बाद्या,

हिसाप तीन फुट ऊँच तने क पौधा। एँकर पाती अउ डार बारे क नाई होत हीं। ओका कूँची क तरह बइपरत हीं।

**मनइयन** मनइ काम करइ या लम्बा रस्ता प जाइ बरे आपन टॉग क बीचोबीच हींच लेत रहेन अउ पेटी स दबाइ लेत रहेन “कूदब”, “रच्छा करब” अहइ। यहोवा आपन मनइयन क रच्छा किहेस अउ ओनका बाहेर लइ गवा।

आपन भेड़िन अउ गोरूअन क आपन संग लइ जाइ सकत ह, जा अउ मोका भी आसीबदि द्या।” 33मिस्र क मनइयन भी ओनका हालि जाइके कहेन। काहेकि उ पचे कहेन, “जदि तू पचे हालि नहीं जात बाट्या हम सबहिं मरि जाब।”

34इस्त्राएलियन क लगे ऐतना टेमें न रहा कि उ पचे आपन रोटी में खमीर नावई। उ पचे गूँधा भवा आटा क परातन क कपड़ा में लपेटिके अउ ओका आपन कौंधे प धइके ढोएन। 35तबहिं इस्त्राएलियन उहइ किहेन जउन मूसा करइ क कहेस।” उ पचे आपन मिस्री पड़ोसियन क लगे गएन अउ ओनसे ओढ़ना अउर चाँदी सोना स बनी चीजनक मॉगस। 36यहोवा मिस्री लोगन क इस्त्राएल क लोगन बरे दयालु बनइ दिहेन। ऐह बरे मिस्र क लोग आपन धन दौलत इस्त्राएलियन क दइ दिहेन।

37इस्त्राएल क मनइयन रमसिज स सुक्काथ गएन। उ सबइ छः लाख मनइ\* रहेन। ऐहमा गदेलन मिलाइ क नहीं अहई। 38ओनके संग ढेर भेड़न, गइयन, बोकरियन अउ दूसर गोरूअन रहा। ओनके संग दूसर मनइ भी जात्रा करत रहेन। जउन इस्त्राएलियन नहीं रहेन, मुला उ पचे ओनके संग गएन। 39मुला मनइयन क गूँधा भवा आँटा क फुलइ दइ क टेमें नहीं मिला। अउ उ पचे आपन जात्रा बरे कउनो खास खइया के नहीं बनाएन। ऐह बरे ओनका बेखमीर क रोटी बनवइ क पड़ी।

40इस्त्राएल क लोग मिस्र\* में चार सौ तीस बरिस ताई जिअत रहेन। 41चार सौ तीस बरिस पाछे, ठीक उहइ दिन, यहोवा क सबइ मनइयन मिस्र क तजि दिहेन। 42उ खास रात अहइ जब लोग याद करत हीं कि यहोवा ओनका मिस्र स बाहेर लइ आएन। इस्त्राएल क सबहिं मनइयन उ रात क हमेसा याद रखिहीं।

43यहोवा मूसा अउ हारून स कहेस, “इ सबइ फसह त्यौहार क नेम अहई: कउनो बिदेसी फसह त्यौहार क पवित्तर भोजन नहीं खाइ। 44मुला जदि कउनो मनइ गुलाम क खरीदी अउ जदि ओकर खतना करी तउ उ गुलाम उ प्रसाद क खाइ सकत ह। 45मुला जदि कउनो मनइ सिरिफ तू पचन्क देस में रहत ह या कउनो मनइ तोहरे बरे मजूरी प रखा गवा अहइ तउ उ मनइ क प्रसाद खाइ क न चाही। उ प्रसाद सिरिफ इस्त्राएल क मनइयन बरे अहइ।

46हर परिवारे क घरवा क भीतर ही खइया क खाइ चाही। कउनो क भी खइया क घरे क बाहर नहीं लइ जाइ चाही। भेड़ क बच्चा क कउनो हाइ जिन तोड़ा। 47समूचइ इस्त्राएलियन जाति इ त्यौहार क जरूर मनावइ। 48जदि कउनो प्रवासी जउन तोहरे संग रहत ह अउर उ यहोवा क फसह में हिस्सा लेइ चाहत ह, तउ ओकर खतना जरूर होइ चाही। तउ उ इस्त्राएल क नागरिक क तरह होइ, अउर उ खइया में हिस्सा लइ सकी। मुला जदि उ मनइ क खतना नहीं भवा होइ तउ उ इ पसह क त्यौहार क खइया क नहीं खाइ

**छः लाख मनई** परिवार ज झुण्ड-हिब्रू सब्द “हजार” उ हिब्रू सब्द क तरइ अहइ जेकर अरथ परिवार क समूह होत ह।

**मिस्र** पुरान ग्रीक अउ समरीती अनुवाद में “मिस्र अउ कनान” अहइ। एहसे पता लागत ह कि उ पचे इब्राहीम क टेंम स बरिस क गनत रहत रहेन, यूसुफ क टेमें स नाही।

सकत। 49इ सबहिं नेम हर एक प लागू होइहीं। नेम लागू भए में इ बात क कउनो फर्क नहीं परिहीं चाहे उ आपन देस में पइदा भवा रहा या कउनो तोहरे बीच में रहइवाला बिदेसी अहइ।”

50ऐह बरे इस्त्राएल क सबहिं मनइयन ओन हुकुमन क तामील किहेन जेनका यहोवा मूसा अउ हारून क दिहेन। 51उहइ दिन यहोवा इस्त्राएल क सबहिं लोगन क मिस्र स बाहेर लइ गएन। लोग झुण्डे में गएन।

### पहिले पइदा भए अउलाद क अर्पण

**13** तब यहोवा मूसा स कहेस, 2“हर पहिला पइदा भवा इस्त्राएली लरिका मोका अर्पण कइ दिहा। हर अउरत क पहिला पइदा बचवा मोर ही होइ। तू पचे पहिला पइदा हर एक नर पसु क मोका अर्पण कइ दिहा।”

3मूसा मनइयन स कहेस, “इ दिन क याद राखा। तू पचे मिस्र में गुलाम रहया। मुला इ दिन यहोवा आपन बड़की सक्ती क बइपरेस अउ तू पचन्क अजाद कराएस। तू पचे खमीरे क संग जिन खाया। 4आजु आबीब क महीना में, तू पचे मिस्र स जात रहया। 5यहोवा तू पचन्क पुरखन स खास वाचा किहे रहेन। यहोवा तू पचन्क कनानी, हित्ती, एमोरी, परिज्जी, हिब्वी, अउ यबूसी मनइयन क धरती देइ क वाचा किहेस। जब यहोवा तू पचन्क उ बढिया देस में ले जाइ जहाँ दूध अउर सहद क नदी बहत रहत ह तब तू इ दिन क जरूर याद राख्या। तू पचे हर बार बरिस क पहिले महीना में इ दिन क खास आराधना क दिन क रूप में मनाव।

6“सात दिन तलक तू पचे उहइ रोटी खाया जेहँमा खमीर न होइ। सातवें दिन एक ठु बड़की दावत होइ। इ दावत यहोवा क मान करइ क निसानी होइ। 7ऐह बरे सात दिना ताई खमीर स बनई रोटी नहीं खाइ चाही। तोहरे पहँटा में कउनो जगह खमीर क रोटी नहीं होइ चाही। 8इ दिन तू सबन्क आपन गदेलन स कहेइ चाही, ‘हम पचे इ दावत ऐह बरे करत अही कि यहोवा हमका मिस्र स बाहेर निकारेस।’

9“इ छुट्टी क दिन तू पचन्क याद करइ में मदद करी यानी इ तू पचन्क कलाई प बाँधा धागा\* क नाई होइ। इ दिन तोहार आँख क आगवा एक चीन्ह क नाई होइ। इ छुट्टी क दिन तोहका यहोवा क उपदेस क याद राखइ में मदद करी। इ छुट्टी क दिन तू पचन्क ई याद राखइ में मदद करी कि यहोवा तू पचन्क क आपन महान सक्ती क प्रयोग कइके तोहका मिस्र स बाहेर निकारेस ह। 10ऐह बरे हर बरिस इ छुट्टी क दिन क ठीक टेम प मनावइ क याद राखा।

11“यहोवा तू मनइयन क उ देस में लइ चलिहीं जेका तू पचन्क देइ बरे वाचा किहेस रहा। इ समइया हुवाँ कनानी मनइ रहत हीं। मुला यहोवा तोहार पुरखन स इ वाचा किहे रहा कि इ धरती तू पचन्क दइ देइ। यहोवा इ भुईँया तोहका देइहीं। 12ओकरे पाछे तू सबइ आपन हर एक पहिलौटी लरिका क ओका अर्पण करइके याद राखा अउ हर एक

**बाँधा धागा** तोहरे हथवा प चीन्हा अउ माथे प निसानी। इ उ खास चीज क इस्सारा करत ह जेका यहूदी आपन बाँह प अउ माथे प यहोवा क नेम क याद दियावइ बरे बाँधत हीं।

पहिला पइदा भवा नर पसु क जरूर यहोवा बरे अर्पण कइ दिहा। 13हर एक पहिला पइदा भवा गदहा यहोवा स वापस बेसहि लिहा। तू पचे ओकरे बदले में भेड़ क बच्चा क दइ दिहा अउ गदहा क वापस लइ सकत ह। जदि तू यहोवा स गदहा नाहीं बेसहा चहत्या तउ एका मारि डावा। इ एक बलि होइ। तू ओकर गरदन जरूर तोड़ि द्या। हर एक पहिलौटी लरिका यहोवा स फुन जरूर बेसहि लीन्ह जाइ।

14“अगावा तोहार गदेलन पूछिहीं तू इ काहे करत ह। उ पचे कइहीं, ‘इ सब का का मतलब अहइ?’ अउर तू जवाब देब्या, ‘यहोवा हम सबन्क मिस्त्र स बचावइ बरे बड़की सकती बइपरेस ह। हम पचे हुवाँ गुलाम रहेन। मुला यहोवा हम पचन्क बाहेर निकारेस अउ उ पचे हिआँ लइ आएन। 15मिस्त्र में फिरौन हठी होइ गवा। उ हम पचन क जाइ नाहीं दिहस। ऐह बरे यहोवा उ देस क सबहिं पहिलौटी नर अउलादे क मारि डाएस। (यहोवा पहिलौटी नर पसु अउ पहिलौटी बेटवन क मारि डाएस।) ऐह बरे हम पचे पहिले पइदा भए हर एक नर पसु क यहोवा बरे अर्पण करत अही। अउर इहइ कारण अहइ कि हम पचे पहिलौटी भए बेटवन क यहोवा स बेसहित ह।’ 16इ तोहरे कलाई प बाँधा भवा धगा क नाई अहइ। अउ इ तोहरे आँखिन क समन्वा बाँधा भवा चीन्हा क तरह अइइ। इ एका याद दियावइ में मदद करी कि यहोवा आपन बड़की ताकत स हम पचन्क मिस्त्र स बाहेर लइ आएन।”

### मिस्त्र स बाहेर जात्रा

17फिरौन लोगन क मिस्त्र तजि देइ क मजबूर किहेस। यहोवा लोगन क उ सड़क प नाहीं जाइ दिहस जउन फिलीस्तीन कइँती जात रही। उ सड़क समुद्र स होइ क सबते छोटी राह रही मुला यहोवा कहेस, “जदि लोगन उ राहे स जात हीं, उ पचन्क जुद्ध करइ क होइ। तउ उ पचे आपन इरादा बदलि सकत हीं अउ मिस्त्र क लौटि सकत हीं।” 18ऐह बरे यहोवा ओनका दूसर राहे स लइ गवा। उ ओन पचेन्क लाल समुद्र क रेगिस्ताने स लइ गवा। इस्राएल क मनइयन जुद्ध क कपड़ा पहिरे रहेन जब उ पचे मिस्त्र क तजि दिहन।

### यूसुफ घर जात ह

19मूसा यूसुफ क हाड़े क आपन संग लइ गवा। मरइ क पहिले यूसुफ इस्राएल क अउलादे स वाचा किहेस कि उ पचे इ करिहीं। मरइ स पहिले यूसुफ कहेस, “परमेस्सर तू पचन्क बचावइ, तू आपन संग मोर हाड़े क मिस्त्र स बाहेर लइ जाइ क याद राखा।”

### यहोवा आपन लोगन क अगुवाई करत ह

20इस्राएल क मनइयन सुक्कोत नगर तजेन अउ एताम में डेरा डाएन। एताम रेगिस्ताने क छोरे प रहा। 21यहोवा रस्ता देखौएन। दिन में यहोवा एक लम्बा बदरे क प्रयोग मनइयन क लइ जाइ बरे किहस अउ राति में यहोवा ओनका रस्ता देखावइ बरे एक लम्बा आगी क खम्भा क बइपरेस। इ आगी ओनका उजिआरा देत रही। इ कारण उ पचे राति में

जात्रा कइ सकत रहेन। 22एक ऊँच खम्भा क रूप में बादर हमेसा ओनके संग दिन में रहा अउ राति क आगी क खम्भा सदा ओनके संग रहा।

14 यहोवा मूसा स कहेस, 2“लोगन स कहा कि पीहाहीरोत क पाछे होइ के जात्रा करइँ। मिगदोल अउ लाल समुद्र क बीच राति में ओनसे ठहरइ बरे कहा। इ बाल सपोन क निगचे बा। 3फिरौन सोची कि इस्राएल क मनइयन रेगिस्तान में भटक गएन अहँइ अउर उ नाहीं जानत कि कउन दिसा जाइ। 4मइँ फिरौन क हिम्मती बनउब जेसे उ तू पचन्क पाछा करइ। मुला मइँ फिरौन अउ ओकर फउज क हराइ देब। एहसे हमार महिमा बाढ़ी। तब मिस्त्र क मनइयन जनिहीं कि मइँ यहोवा हउँ।” इस्राएल क मनइयन यहोवा क हुकुम मानेन यानी उ पचे उहइ किहेन जउन उ कहे रहा।

### फिरौन इस्राएलियन क खदेरत ह

5जब फिरौन क इ खबर मिली कि इस्राएलियन परात अहँइ तउ उ अउ ओकर अफसरन ओनका हुवाँ स चला जाइ क जउन बचन दिहे रहेन, ओकरे बरे आपन इरादा बदल दिहेन। फिरौन कहेस, “हम इस्राएल क मनइयन क काहे जाइ दीन्ह? हम ओनका काहे पराइ दीन्ह? अब हमार गुलाम हमरे हाथे स निकारि चुका अहँइ।”

6ऐह बरे फिरौन आपन जुद्ध क रथे क तइयार किहेस अउ आपन फउज क संग लइ लिहस। 7फिरौन आपन मनइयन में स छः सौ सवन ते बढिया मनइयन अउ आपन सबहीं रथे क संग लिहस। हर एक रथ में एक एक अधिकारी रहेन। 8इस्राएल क मनइयन जीत क खुसी में आपन औजारन क ऊपर कइँती उठावत जात रहेन मुला यहोवा मिस्त्र क राजा फिरौन क हिम्मती बनाएस। अउर फिरौन इस्राएल क मनइयन क खदेरइ लाग।

9मिस्त्र क फउजे क लगे घोड़सवार सिपाहीयन अउ रथन रहेन। उ पचे इस्राएल क मनइयन क पीछा किहेस अउ उ टेमें प जब उ पचे लाल समुद्र क निकट बाल सपोन क पूरब पीहाहीरोत में डेरा डाए रहेन, ओनका धइ लिहन।

10इस्राएल क मनइयन फिरौन अउ ओकरी फउज क अपनी कइँती आवत लखेन तउ उ पचे बुरी तरह डेराइ गएन। उ पचे मदद बरे यहोवा क गोहार लगाएन। 11उ पचे मूसा स कहेन, “का मिस्त्र में पर्याप्त कबर नाहीं रहिन? तू हम पचन्क मिस्त्र स बाहेर काहे लिआया? तू हम पचन्क मरइ बरे इ रेगिस्ताने में काहे लिआया? 12हम पचे तोहसे कहे रहेन कि अइसा ही होइ। मिस्त्र में हम पचे कहे रहेन, ‘कृपा कइके हम पचन्क कस्ट जिन द्या। हम पचन्क मूसा हिँयँइ ठहरइ बरे अउ मिस्त्री मनइयन क सेवा करइ द्या’ हिआँ आइके रेगिस्तान में मरइ स नीक इ होत कि हम पचे हुवाँइ मिस्त्री मनइयन क गुलाम बनिके रहित।”

13मुला मूसा जवाब दिहेस, “डेराअ जिन। पराअ जिन, अबहिं रूकि जा अउ लखा कि आज तू पचन्क यहोवा कइसे बचावत हीं। आज क पाछे तू पचे इन मिस्त्री मनइयन क कबहुँ नाहीं निहरब्या। 14तू पचन्क सान्त रहइ के अलावा

अउर कछू नार्ही करइ क अहइ। यहोवा तोहरे बरे लइतइ रइहीं।”

15तबहिं यहोवा मूसा स कहेस, “तू पचे अब भी मोरे लगे काहे चीखत ह! इस्त्राएल क मनइयन क अगवा बड़इ क हुकुम द्या। 16आपन छड़ी क लाल सागरे क ऊपर उठावा अउ लाल सागर फाटि जाइ। तब इस्त्राएली मनइयन झुरान भुइयौं स समुदर क पार कइ सकिहीं। 17मई मिस्त्री मनइयन क जिद्दी बनायउँ ह। इ बरे उ सबइ तोहार पीछा करहीं। मुला मई देखाउब कि मई फिरौन, ओकर सबहिं घोड़ सवार अउ रथन स जिआदा बरिआर हउँ। 18तबबइ मिस्त्री बूझि जइहीं कि मई यहोवा हउँ। जब मई फिरौन, ओकर घोड़सवार अउ रथे क हराउब तउ मोर महिमा क परगट कीन्ह जाब्या।”

### यहोवा मिस्त्री फउज क हरावत ह

19उहइ समइया यहोवा क सरगदूत इस्त्राएली मनइयन क पाछे गवा। यहोवा क सरगदूत अक्सर लोगन क अगवा रहा अउ ओनका अगुआइ करत रहा। एँह बरे लम्बा बदरे क खंभा लोगन क अगवा स टरि गवा अउ पाछे आइ गवा। 20इ तरह बादर मिस्त्री मनइयन अउ इस्त्राएलियन क बीच आइ क खड़ा होइ गवा। इस्त्राएलियन बरे इ उँजिर रहा मुला मिस्त्री मनइयन बरे अँधियार। एँह बरे मिस्त्र क मनइयन उ राति में इस्त्राएलियन क नगिचे नार्ही आइ सकेन।

21मूसा आपन बाँह लाल सागर प उठाएस। अउ यहोवा पूरब स बहोत तेज हवा चलाइ दिहस। हवा राति भइ चलत रही। समुदर फाटि पड़ा अउ हवा समुदर क झुरान भुँइया में बदल दिहस। 22इस्त्राएल क मनइयन सूखी धरती प चलिके समुदर पार किहेन। ओनके दौँई अउ बाई कइँती पानी दिवारे क नाई ठाइ रहा। 23तबहिं फिरौन क सब रथन अउ घोड़सवार समुदर में ओनका पीछा किहेस। 24बहोतइ भिन्सारे यहोवा लम्बा बादर अउ आगी क खम्भा में स मिस्त्र क फउज क लखेस। अउर यहोवा ओन प हमला कइ दिहस अउ ओन पचन्क हराइ दिहस।

25रथे क पहिया भुइयौं में घुसुर गएन। रथ क सम्भारब मुस्किल होइ गवा। मिस्त्री मनइयन चिचियानेन, “हम पचे हिउँ स निकरि चली। यहोवा हम पचन्क खिलाफ जूझत अहइँ। यहोवा इस्त्राएलियन बरे लइत बाटेन।”

26तबहिं यहोवा मूसा स कहेस, “आपन हाथ क समुदर प उठावा। फिन समुदर क पानी मिस्त्री रथन अउ घोड़सवारन प गिरी अउर उ पचन्क बोरि देइ।”

27एँह बरे दिन निकरइ स ठीक पहिले मूसा आपन हाथ समुदर प उठाएस अउ पानी आपन ठीक तह प वापिस चला गवा। मिस्त्री मनइयन पराइ क जतन करत रहेन। मुला यहोवा मिस्त्री मनइयन क समुदर में बहाइके बोर दिहस। 28पानी आपन ठीक तह ताई लौटि आवा अउ रथन अउ घोड़सवारन क ओढ़ लिहस। फिरौन क समूचइ फउज जउन इस्त्राएलियन मनइयन क पाछा करत रहिन, बूड़िके नसाय गइन। ओनमाँ स कउनो नार्ही जिअत रहा।

29मुला इस्त्राएल क मनइयन झुरान भुइयौं प चलिके समुदर पार किहेन। ओनके दाहिन अउ बाएँ कइँती पानी

दिवारे क नाई ठाइ रहा। 30एँह बरे उ दिन यहोवा इस्त्राएल क मनइयन क मिस्त्री मनइयन स बचाइ लिहस। बाद में इस्त्राएलियन मिस्त्री मनइयन क लहासे क लाल सागर क किनारे निहारेन 31इस्त्राएलियन यहोवा क बड़की सक्ती क लखेन जब उ मिस्त्री मनइयन क हराइ दिहस। एँह बरे लोगन यहोवा क मान किहेन। अउर उ पचे यहोवा अउ ओनके सेवक मूसा प पतियानेन।

### मूसा क गीत

15 तब मूसा अउ इस्त्राएल क मनइयन यहोवा बरे इ गीत गावइ लागेन:

“मई यहोवा बरे गीत गाउब काहेकि उ बड़का कारनामा किहेस ह। उ घोड़ा अउ सवारन क सगरे में बहाइ दिहेस ह। 2यहोवा ही मोर सक्ती अहइ। उ मोका बचावत ह अउर मई गावत हउँ गीत ओनकी बड़कई क।\* मोर परमेस्सर यहोवा अहइ अउ मई ओनकइ बड़कई करत हउँ। यहोवा मोरे पुरखन क परमेस्सर अहइ अउर मई ओनकइ मान करत हउँ।

3यहोवा बड़का जोधा अहइ ओकर नाउँ यहोवा अहइ।

4यहोवा फिरौन क रथ अउ फउजिन क सगरे में बहाइ दिहस। फिरौन क उत्तम अफसरन लाल सगरे में बूड़ि गएन।

5गहिर पानी ओनका ढाँकि लिहस। उ पचे चट्टाने क नाई गहिर पानी में डूबेन।

6आप क दाहिन बाँह गजब क सक्ती स भरी अहइ। यहोवा आप क दाहिन बाँह दुस्मन क छिटकाइ बिटकाइ दिहस।

7आप आपन सक्ती अउ बड़की परताप म नसाइ दिहा ओन पचेन क जउन खिलाफ खड़ा होइ गएन। आपक किरोध ओनका उ तरह नास कइ दिहस जइसे आगी तिनका क बारि डवत ह।

8आप आपन किरोध में जउन तेज हवा क चलाया उ जले क उँचेके उछारि दिहेस। उ जोर स बहत पानी पोढ़ दिवार बनि गवा। समुदर आपन गहिर स गहिर तले तक ठोस होइ गवा।

9“दुस्मन कहेस, ‘मई ओनका खदेरब अउ धइ लेब। मई ओनकइ धन दौलत लइ लेब। मई आपन तरवारि क भांजब अउ ओनकइ हर एक चीज छीन लेब। मई आपन खातिर सब कछू लइ लेब।’

10मुला आप ओनपइ फूँकि दिहस अउ सगरे स ओन पचन्क ढाँकि दिहा उ पचे गहिर सागर में सीसा क नाई बूड़ि गएन।

11“का कउनो देवता यहोवा क समान अहइ? नार्ही, आप क बराबरी क कउनो देवता नार्ही, तू आपन पवित्तर होइ मैं अजूबा अहा तोहरे में अचरजवाली सक्ती बाटइ आप अजूबा चमत्कार करत हीं।

12आप आपन दाहिन हाथ क पसारेस अउर धरती ओनका निगल लिहेस।

यहोवा ... बड़कई क सब्द क अरथ अहइ: “इ मोर सक्ती अउ अस्तुति अउर उ मोर मुक्ति बनत हीं।”

13 आप मेहरबानी कइके लोगन क लइ चलई जेका आप बचाइन ह। आप आपन सकती स इन लोगन क आपन पवित्तर अउ सुहावना भुईया मँ लइ जाई।

14 दूसर देस जब इ कथा क सुनिहीं अउर उ सबइ डेराइ जइहीं। पलिस्तीन क मनई डर स कँपिहीं।

15 तबहिँ एदोम क नेतन डर स कँपिहीं मोआब क नेतन डर स कँपिहीं, कनान क मनई आपन हिम्मत छोड़ि देइहीं।

16 ओनमों डर समाइ जाइ जबहिँ उ पचे तोहार सकती देखिहीं। इ सबइ चट्टाने क नाई सान्त रइहीं जब तलक यहोवा क लोग निकरि न जाई, जब तलक उ लोग निकरि न जाई जेका आप बनाइन ह।

17 यहोवा तू आपन पहाड़े ताई आपन लोगन क लइ जा। ओनका उ जगहिया मँ रहइ द्या जेका तू आपन सिंहासन बरे बनाएस ह, तोहार आपन यहोवा क मन्दिर क बगलमँ, जेका तू आपन हथवा स बनाएस ह।

18 यहोवा हमेसा हमेसा राज्ज करत रइहीं।”

19 हँ इ फुरे अइसा भवा। फिरौन क घोड़ा, सवार अउ रथ समुदर मँ चला गएन। यहोवा ओनके ऊपर समुदर क पानी लइ आइ दिहस। मुला इस्त्राएल क मनइयन झुरान धरती प चलिके समुदर पार कइ लिहन।

20 तबइ हारून क बहिन नबिया मिरियम एक ठु ढपली लिहस। मिरियम अउ दूसर मेहररूअन नाचइ गावइ लागीं। मिरियम क गवनिया क बोल रहा:

21 “यहोवा बरे गावा। काहेकी उ बड़वार काम किहेस ह। उठाइके बहाइ दिहस घोड़ा अउ सवारे क सगरे क बीच मँ...”

22 मूसा इस्त्राएल क मनइयन क लाल सागर स सूर रेगिस्तान लइ जात रहा। लोग तीन दिना तलक रेगिस्तान मँ जात्रा करत रहेन। उ पचे तनिकउ पानी नाहीं पाइ सकेन। 23 तीन दिना क पाछे मनइयन मारा आएन। मारा मँ पानी रहा। पानी ऐतना करूआ रहा कि लोग पिउ नाहीं सकत रहेन। (इहइ कारण रहा कि ठउरे क नाउँ मारा पड़ि गवा।)

24 मनइयन मूसा क ओराहना दिहन। मनइयन कहि बइठेन, “अब हम पचे का पिई?”

25 मूसा यहोवा क दोहाई दिहस। ऐह बरे यहोवा ओका एक बृच्छ देखाएस। मूसा बृच्छे क पानी मँ नाएस। जब उ अइसा किहस, पानी बढ़िया पिअइ क जोगग होइ गवा।

उ ठउरे प यहोवा लोगन क परखेन अउ ओनका एक नेमँ दिहन। यहोवा लोगन क बिस्सास क भी जाँच किहस।

26 यहोवा कहेस, “तू पचन्क आपन परमेस्सर यहोवा क हुकुम जरूर मानइ चाही। तू सबन्क उहइ करइ चाही जेको उ नीक कहत हीं। जदि तू पचे यहोवा क हुकुम अउ नेमँ क मनब्या तउ तू पचे मिस्त्री मनइयन क नाई बेमार जिन होब्या। मई तोहार यहोवा तू पचन्क कउनो अइसी बेरामी नाहीं देब जइसे मई मिस्त्री मनइयन क दीन्ह ह। मई यहोवा हउँ, मई उहइ हउँ जउन तोहका बेमारी स नीक बनवत हउँ।”

27 तबहिँ लोगन एलिम तलक क जात्रा किहेन। एलीम मँ पानी क बारह झरना रहेन अउ हुवाँ सत्तर खजूरे क पेड़ रहेन। ऐह बरे लोगन हुवाँ पानी क नगिचे डेरा डइ लिहेन।

### इस्त्राएली परमेस्सर स मन्ना अउ गोस पावत ह

16 तबहिँ लोगन एलीम स चलेन अउ सीनै रेगिस्तान मँ पहुँचि गएन। इ ठउर एलीम अउ सीनै क बीच रहा। उ पचे इ ठउर प दुसरे महीना क पद्रहवाँ दिन मिस्त्र छोड़ दिहे क पाछे पहुँचेन। 2 तब इस्त्राएल क मनइयन फिन ओरहना देब सुरू किहेन। उ सबइ मूसा अउ हारून स रेगिस्तान मँ ओराहना दिहेन। 3 मनइयन मूसा अउ हारून स कहेन, “इ हमरे बरे नीक होतेन कि यहोवा हम पचन्क मिस्त्र मँ मारि डाए होत। मिस्त्र मँ हम पचन्क लगे खइया क बहोत रहा। हम पचन क लगे उ सब खइया क रहा जेकर हमका जरूरत रही। मुला अब तू हम सबन्क रेगिस्तान मँ लइ आया ह। हम सब हिआँ भुखिया स मरि जाब।”

4 तब यहोवा मूसा स कहेस, “मई अकासे स खइया क गिराउब। इ भोजन तोहरे बरे खाइ क होइ। हर एक दिन लोग बाहेर जाई अउ उ दिन खाइ क जरूरत बरे भोजन बटोरि लेई। मई ऐह बरे करब कि मई लखिहउँ कि का लोग उहइ करिहीं जउन मई करइ क कहब। 5 हर एक दिन लोग बरे ढेर क खइया क बटोरि लेई। मुला सुकुरवार क जब खइया तइयार करइ लागई तउ लखई कि उ पचे दुइ दिन क भोजन रखि लेई। 6 ऐह बरे मूसा अउ हारून इस्त्राएल क मनइयन स कहेन, “आज ही रात तू पचे यहोवा क सकती लखब्या। तू पचे जानब्या कि इ उहइ यहोवा अहइ जउन तू पचन्क मिस्त्र देस स बचाइके बाहेर निकारेस। 7 भिन्सारे तू पचे यहोवा क महिमा निहरब्या। तू पचे यहोवा स सिकाइत किहा ह। उ तोहार बात सुनेस ह। तू पचे हम सबन्क ओराहना देत अहा। इ होइ सकत ह कि हम पचे अब कछू अराम कइ सकित ह।”

8 अउर मूसा कहेस, “तू पचे सिकाइत किहा ह अउर यहोवा तू पचन्क सिकाइत सुनि लिहेन ह। ऐह बरे रात क यहोवा तू पचन्क गोस देईहीं। अउ हर भिन्सारे तू पचे उ सारा रोटी पउब्या, जेका तोहका जरूरत बा। तू पचे मोसे अउ हारून स ओराहना करत रहत बाट्या। मुला अब हम पचे तनिक अराम करब। याद राखा तू पचे मोरे अउ हारून क खिलाफ सिकाइत नाहीं करत बाट्या। तू पचे यहोवा क खिलाफ सिकायत करत बाट्या।”

9 तबहिँ मूसा हारून स कहेस, “इस्त्राएल क मनइयन क बोलावा अउ ओनसे कहा, ‘यहोवा क समन्वा जमा होइ जा काहेकि उ तोहार ओराहना सुनेस ह।’”

10 हारून इस्त्राएल क सबहीं मनइयन स बात किहेस। उ पचे एक ठउरे प जमा भइ रहेन। जबहिँ हारून बतियात रहा तबहिँ लोग घूमि गएन अउ रेगिस्ताने कइँती लखेन। अउर उ पचे यहोवा क महिमा क मँ बदरे मँ परगट होत निहारेन।

11 यहोवा मूसा स कहेस, 12 “मई इस्त्राएल क मनइयन क ओराहना सुनेउँ ह। ऐह बरे ओनसे मोर बतियन क कहि द्या, ‘आजु गउ धूरि मँ तू पचे गोस खाब्या। अउ भियान भोर होत ही तू पचे पेटवा भरिके रोटी खाब्या। तबहिँ तू पचे जनब्या कि मई यहोवा तोहार परमेस्सर हउँ।”

13 उ रात बटेर चिरइया डेरा क चारिहुँ कइँती आइ गइन। बटेरन डेरा क ठाँक लिहस। भोर मँ डेरा क नगिचे ओस गिरी रही। 14 सूरज क निकरि आए प ओस टेघरत रही।



मुला पाला क तहे क नाई भुइयों प कछू रहि जात रहा। 15इस्त्राएल क मनइयन एका लखेन अउ आपुस में करइ लागेन, “इ का बा?” \* उ पचे इ सवाल एँह बरे पूछेन कि उ पचे इ नाहीं जानत रहेन इ कउन चीजि अहइ। एँह बरे मूसा ओनसे कहेस, “इ खइया क अहइ जेका यहोवा तोहका खाइके देत अहइ। 16यहोवा कहत अहइ, ‘हर व्यक्ति ओतैना बटोरइ जेतना ओका जरूरत होइ। तू लोगन में स आपन परिवारे क हर एक सदस्य क खातिर एक ओमेर बटोरि लेइ।”

17तउ इस्त्राएल क मनइयन अइसा ही किहेन। हर मनई खइया क बटोरेस। कछू मिला दूसर मनइयन स जिआदा बटोरि लिहिन। 18उ मनइयन आपन आपन परिवारे क खइया क दिहिन। जब खइया क नाप जोख भवा तउ हर मनई बरे हमेसा ढेर क रहा, मुला कबहूँ भी जरूरत स जिआदा नाहीं भवा। हम मनई ठीक अपने खातिर अउ आपन परिवारे बरे ढेर क बटोरेस।

19मूसा ओन पचेन स कहेस, “अगवा दिन बरे खइया क जिन बचावा।” 20मुला कछू लोग मूसा क बतिया नाहीं मानेन। कछू लोग आपन खइया क बचाइ लिहिन जेका उ सबे अगवा दिन खाइ सकेन। मुला जउन खइया क बचाइ लिहिन ओहमों किरवा पड़ि गएन अउर उ बसाइ होइ गएन। मूसा उ लोगन प कोहाइ गएन जउन इ किहे रहेन।

21हर भिन्सारे लोगन खइया क बटोरत रहेन। हर मनई ओतैना ही बटोरत रहा जेतैना उ खाइ सकत रहा। किन्तु जब धुपिया तेज होत रही तउ खइया गलि जात रहा।

22सुकुरवारे क मनइयन दुगुना खइया क बटेरेन। उ पचे दुई ओमेर हर मनई बरे बटोरेन। एँह बरे लोगन क मुखिया आएन अउर उ सबइ इ बात मूसा स कहेन।

23मूसा ओनसे कहेस, “इ वइसेन भवा जइसा यहोवा कहे रहेन। काहेकि भियान यहोवा क परम अराम क पवित्तर दिन परमेस्सर क मान देइ बरे अहइ। तू पचे आजु बरे जेतैना खइया क तोहका चाही तू बनइ सकत ह। मुला बाकी खइया क काल्ह भियान बरे भी बचावा।”

24एँह बरे लोगन अगवा दिन बरे बाकी खइया क बचाइ लिहिन। अउर कउनो खइया किरवा पड़ि क खराब नाहीं भवा। अउर ओहमों स बसाइ भी नाहीं आवत रहा।

25सनीचरे क मूसा मनइयन स कहेस, “जउन कछू तू बिते क दिन में बटोरा रहेन तोहका उहइ आजु खाइ चाही। आजु अराम का दिन सबत यहोवा क सम्मान दइ बरे अहइ। आजु खेत में खइया पाइ नाहीं चाही। 26तू पचन क हफ्ता क छः दिना में ही खइया बटोर इ चाही। मुला सतवों दिन अराम क दिन अहइ एँह बरे भुइयों प कउनो खास खइया नाही होइ।”

27सनीचरे क कछू मिला तनिक खइया बटोरइ बरे गएन, मुला उ पचे हुवाँ रचिकउ खइया क नाहीं पाइ सकेन। 28तबहिँ यहोवा मूसा स कहेस, “तोहार लोग मोर आदेसन अउर उपदेसन क मानइ स कबहुँ तलक इनकार करत रहब। 29लखा यहोवा सबत क दिन तोहरे अराम खातिर

बनएस ह। एँह बरे सुकुरवार क यहोवा दुइ दिना बरे ढेर क खइया के तोहका देइहीं। एँह बरे सबत क दिना क हर कउनो क अराम करइ चाही। तू आपन जगह प रूकि रहा कउनो जगह बाहर नाहीं जा।” 30एँह बरे लोग सबत क दिन अराम किहेन।

31इस्त्राएली लोग इ खास खइया क “मन्ना” कहब सुरू दिहेन। मन्ना नान्हक उज्जर धनिया क बिआ क नाई रहा अउ एकर स्वाद सहद स बनवा पपड़े क तरह रहा। 32तबहिँ मूसा कहेस, “यहोवा हुकुम दिहेस हः ‘इ खइया क एक ओमेर अपने सन्तानन बरे बचावा। तबबइ उ पचे खइया क लखि सकिहीं जेका मई तू पचन क रेगिस्ताने में तबहिँ दिहे रहेउँ जबहिँ मई तू पचन क मिस्त्र स निकारे रहेउँ।”

33एँह बरे मूसा हारून स कहेस, “एक घँड़ा लइ आवा अउ एका एक ओमेर मन्ना स भरि द्या। अउ इ मन्ना क भरि के यहोवा क अगवा धइ द्या अउ आपन सन्तानन बरे बचावा।” 34(यहोवा क हुकुम क अनुसार हारून मन्ना क कूँड़ा क सुरच्छा बरे करार क समन्वा धरेस।) 35इस्त्राएल क लोगन चालीस बरिस तलक मन्ना खाएन। उ पचे मन्ना तब तलक मन्ना खात रहेन जब तलक उ पचे उ भुइयाँ में नाहीं आइ गएन जहाँ ओनका बसइ क रहा। उ पचे ओका तब तलक खात रहेन जब ताई उ पचे कनान देस क चौहद्दी तक नाहीं पहुँचेन। 36(उ पचे मन्ना क नापइ बरे जउन तउल क बइपरत रहेन, उ आँमर रहा जउन लगभग एक ओमेर क बराबर रहा।)

### चट्टन में पनी

17 इस्त्राएल क सबहिँ मनइयन मिस्त्र क सीन रेगिस्तान स साथ-साथ जात्रा किहेन। उ पचे जइसा यहोवा हुकुम देत रहेन वइसा एक ठउर स दूसर ठउरे ताई जात्रा करत रहेन। मनइयन रपीदीम क जात्रा किहेन अउ हुँई डेर डाएन। हुवाँ ओनका पिअइ बरे पानी न रहा। 2एँह बरे उ पचे मूसा क खिलाफ होइ गएन अउ ओसे तहतुकु करइ लागेन। उ पचे माँगैन, “हमका पिअइ क पानी द्या।”

मुला मूसा ओनसे कहेस, “तू पचे मोरे खिलाफ काहे होत बाट्या? तू पचे यहोवा क परीच्छा काहे लेत बाट्या?”

3मुला लोग पिआसा रहेन अउ पानी चाहत रहेन। एँह बरे उ पचे मूसा स ओराहना बार बार करत रहेन। लोग कहेन, “हम पचन क मिस्त्र स बाहेर काहे लइ आया? का तू हमका एँह बरे लइ आया ह कि हम हमार गदेलन अउ गोरूनन बे पानी क मरि जाइँ?”

4एँह बरे मूसा यहोवा क गोहार लगाएस, “मई इन लोगन बरे का करउँ? इ पचे मोका मार डवइ क तइयार अहइँ?”

5यहोवा मूसा स कहेस, “लोगन क लगे जा। अउ इस्त्राएल क कछू नेतन क आपन संग में लइ ल्या। आपन छड़ी क आपन साथे लइ जा। इ उहइ लाठी अहइ जेका तू तबहिँ बइपरे रह्या जबहिँ नील नदी प एका पटके रह्या। 6मई तोहरे अगवा होरेब अर्थात् सीने पर्वत प एक चट्टाने प ठाइ रहब। लाठी क चट्टाने प पटका अउ एहसे पानी बाहेर आइ जाइ। तबहिँ लोग पी सकत हीं।”

**इ का बा?** हिब्रू भाखा में इ सवाल “मन्ना” क तरह बोला जात ह।

मूसा उहड़ किहेस अउ इस्त्राएल क नेतेन लखेन। 7मूसा इ ठउरे क नाउँ मरीवा अउ मस्सा रखेस काहेकि इ उहड़ जगहिया अहड़ जहाँ इस्त्राएल क मनइयन ओनके खिलाफ होइ गएन अउ यहोवा क परीच्छा लिहेन इ कहत भवा, “का यहोवा हम लोगन का संग अहड़ या नाहीं?”

8अमालेकी लोगन रपीदीम आपन अउ इस्त्राएल क लोगन क खिलाफ लड़ेन। 9एँह बरे मूसा यहोसू स कहेस, “कछू मनइयन क चुना अउ भियान अमालेकियन स जाइ के लड़ा। मई पर्वते क चोटी प ठाड़ होइके तू पचन क निहारब। मई परमेस्सर क छड़ी क धरे रहब जउन उ मोका दिहन ह।”

10यहोसू मूसा क हुकुम मानेस अउ भियान भए प अमालेकियन स लड़इ गवा। उ टेमें प मूसा, हारून अउ हुर पहाड़े क चोटी प गएन। 11जब कबहूँ मूसा आपन हथवा क हवा में उठावत तउ इस्त्राएल क मनइयन जुद्ध जीत जातेन। मुला जबहिँ मूसा आपन हथवा क नीचे कईती करेस तउ इस्त्राएल क मनइयन हारइ लागेन।

12कछू समइया क पाछे मूसा क बाँह थक गइन। उ पचे मूसा क जतन क आसान करइ बरे एक ठू रास्ता निकारेन जब उ आपन बाँह ऊपर उठाइके राखे रहा। एँह बरे उ पचे एक बड़की चट्टाने मूसा क तरखाले बड़ठइ बरे धरेन। हारून अउ हुर मूसा क बाँही क हवा में धरे राखेन। हारून मूसा क एक कईती रहा अउर हूर दुसरी कईती। उ पचे ओकरे हथवा क ऊपर सूरज डूबई तलक धरे रहेन। 13एँह बरे यहोसू अउ ओकर फउजी सिपाही अमालेकियन क जुद्ध में हराइ दिहन।

14तब यहोवा मूसा स कहेस, “इ जुद्ध क बारे में लिखा। इ जुद्ध क घटना क एक तु किताबे में लिखा। ताकि लोग याद करई कि हिआँ का भवा ह। अउर यहोसू क यकीन दिला कि मई अमालेकियन क संसार स समूचइ नास कइ देब।”

15तबहिँ मूसा एक तु वेदी बनएस। मूसा वेदी क नाउँ, “यहोवा मोर झण्डा बा” धरेस। 16मूसा कहेस, “मई यहोवा क सिंहासने कईती आपन हाथ फइलावा ह। एँह बरे यहोवा अमालेकि मनइयन स लड़ा ह, जइसा उ हमेसा किहेस ह।”

### यित्रो मूसा क नगिचे आवत ह।

**18** मूसा क ससुर यित्रो मिदियन में याजक रहा। यहोवा मूसा अउ इस्त्राएल क मनइयन क अनेक तरह स जउन मदद किहे रहा ओकरे बारे में यित्रो सुनेस। यित्रो इस्त्राएल क मनइयन क यहोवा क जरिए बाहेर लइ जाइ क बारे में सुने रहा। 2एँह बरे यित्रो मूसा क लगे उ समइ गवा, जब उ परमेस्सर क पर्वत क नगिचे डेर डार रहा। उ मूसा क पत्नी बसही सिप्पोरा क आपन संग लइ आवा। सिप्पोरा मूसा क संग नाहीं रही काहेकी मूसा ओका आपन बाप क घरे में पठाए रहा। 3यित्रो मूसा क दुइनउँ बेटवन क भी आपन संग लइ आवा। पहिलौटी बेटहना क नाउँ गोर्सोन राखे रहा, काहेकि जब उ पड़व भवा, मूसा कहेस, “मई बिदेस में अजनबी हउँ।” 4दुसरे बेटहना क नाउँ एलिअजर राखेस काहेकि जब उ पड़व भवा तउ मूसा कहेस, “मोरे बाप क

परमेस्सर मोर मदद किहेस ह अउ मिस्त्र क राजा क तरवार स मोका बचाएस ह।” 5एँह बरे यित्रो मूसा क लगे तब गवा जब उ परमेस्सर क पर्वत सीनै पर्वत क निअरे रेगिस्ताने में डेर डार रहा। मूसा क मेहरारू अउ ओकर दुइ बेटवा यित्रो क लगे रहेन।

6यित्रो मूसा क सँदिसा पठाएस। यित्रो कहेस, “मई तोहार ससुर यित्रो अहउँ। अउर मई तोहार मेहरारू अउ ओकरे दुइनउँ बेटवन क तोहरे लगे लइ आवत हउँ।”

7एँह बरे अपने ससुर स मिलइ गवा। मूसा ओकरे समन्वा निहुग अउ ओका चूमेस। दुइनउँ मनइयन एक दुसरे स हाल चाल पूछेन। तब उ पचे खेमा में गएन। 8मूसा आपन ससुर यित्रो क हर बात बताएस जउन यहोवा इस्त्राएल क मनइयन बरे किहे रहा। मूसा ओन सारी चीजन क बारे में बताएस जउन यहोवा फिरौन अउर मिस्त्र क लोगन क खिलाफ किहे रहा। अउर मूसा आपन ससुर क बताइ दिहस कि कउने तरह यहोवा इस्त्राएलियन क बचाएस जब उ पचे कस्ट में रहेन।

9यित्रो उ समइया बहोत खुस भवा जब उ यहोवा क जरिए इस्त्राएल क मनइयन बरे सबहिँ नीक बातन क सुनेस। यित्रो एँह बरे खुस रहा कि यहोवा इस्त्राएल क मनइयन क मिस्त्री मनइयन स अजाद कइ दिहेस। 10यित्रो कहेस:

“यहोवा क गुन गावा! उ तोहका मिस्त्र क मनइयन क अजाद कराएस। यहोवा तू पचन क फिरौन स बचाएस ह।

11अब मई जानत हउँ कि यहोवा सबहिँ देवतन स बड़वार अहड़। उ पचे बिचारेन उ सबइ नियन्तरण में अहड़ मुला निहार यहोवा का किहेस ह।”

12तबहिँ यित्रो होम बलि अउर दूसर बलि परमेस्सर क मान दइ बरे भेंट किहस। तबहिँ हारून अउ इस्त्राएल क सबहिँ नेतन परमेस्सर क समन्वा मूसा क ससुर यित्रो क संग खइया क खाएस।

13दुसरे दिना मूसा लोगन क परखइ बरे बड़ठा। हुँवा लोगन क गिनती जियादा रही। इ कारण लोगन मूसा क समन्वा दिन भइ ठाड़ रहेन।

14यित्रो मूसा क लोगन क परखते भए लखेस। उ पूछेस, “तू इ काहे करत बाट्या? का सिरिफ तू ही एक कानून क निआवधीस अहा? अउर मनइयन सिरिफ तोहरे लगे ही सारे दिन भइ काहे आवत हीं?”

15तबहिँ मूसा आपन ससुर स कहेस, “मनइयन मोरे लगे आवत हीं अउर आपन समस्या क बारे में मोसे यहोवा क निर्णय क बारे में पूछत हीं। 16जदि ओन पचन में कउनो वाद-विवाद होत ह तउ उ पचे मोरे लगे आवत हीं। मई निर्णय देत हउँ कि कउन निआव प अहड़। इ तरह मई यहोवा क नेमन अउ ओकरे उपदेसन क बारे में मनइयन क बतावत हउँ।”

17मुला मूसा क ससुर ओसे कहेस, “इ नीक तरीका काम करइ क नाहीं अहड़। 18तोहरे अकेल्ले बरे इ काम बहोत जिआव अहड़। एहसे तू थक जात ह अउर इ सबइ लोग भी थक जात ही। तू इ काम क खुद नाहीं कइ सकत्या। 19अब मोरउ सुना। मई तोहका कछू सुझाव देत हउँ। मई तोहका बताव कि तोहका का करइ चाही।

मोर पराथना बा कि परमेस्सर तोहार साथ देइ हीं। तोहका लोगन क वाद-विवाद सुनब जारी रखइ चाही। तोहका इ तहतुकन अउ समस्या क परमेस्सर क समन्वा रखइ चाही। 20तोहका परमेस्सर क नेमन अउ विधि का उपदेसन लोगन क देइ चाही। लोगन क चिताउनी द्या कि उ पचे परमेस्सर क नेम न तोड़ई। लोगन क जानकार बना उ पचन्क कइसे जिअइ चाही। ओनका बतावा कि उ पचे का करई। 21मुला तोहका लोगन में स कछू क जज अउ नेता क चुनइ चाही।

“उ नीक मनइयन क चुना जेहें प तू पतिआत ह। उ मनइयन जउन यहोवा क मान करत हीं। उ मनइयन क चुना जउन धने खातिर आपन फइसला न बदल देई। इन चुने मनइयन क लोगन क प्रधान बनवा। एक हजार मनइयन, एक सौ मनइयन, पचास मनइयन, अउर दस मनइयन प भी एक प्रधान होइ क चाही। 22इन ही सासक लोगन्क क मनइयन क निआव करइ द्या। अगर जिआवा कउनो गंभीर मामला होइ तउ प्रधान लोग तोहरे लगे आइ सकत हीं। अउ उ पचे दूसर मुकदमा क फैसला खुद कइ सकत हीं। इ तरह उ पचे तोहरे काम में मदद करिहीं अउ इ तोहरे बरे जिआवा सहल होइ जाइ। 23जदि तू परमेस्सर क इच्छा स अइसा करत ह तबहिं तू आपन काम करइ बरे जोगग रहब्या। अउ ऐंकरे संग संग सब मनइयन आपन समस्या क पूरी होइ जाए स सांत होइके घरवा जाइ सकिहीं।”

24एँह बरे मूसा उहइ किहेस जइसा यित्री कहे रहा। 25मूसा इस्त्राएल क मनइयन में स नीक मनइयन क चुनेस। मूसा ओन मिला क मनइयन क अगुवा बनएस। हुवाँ एक हजार मनइयन, एक सौ मनइयन, पचास मनइयन, अउर दस मनइयन भी प्रधान रहेन। 26इ प्रधान मनइयन क जज रहेन। मनइयन आपन आपन समस्या क एनके लगे हमेसा लइ आवत रहेन। अउर मूसा क सिरिफ गंभीर मामला निपटावइ क पड़त रहा। 27तनिक समइया पाछे मूसा आपन ससुर यित्री क बिदा किहेस अउ यित्री अपने घरे लौटि गवा।

### इस्त्राएल क संग परमेस्सर क करार

**19** मिस्र स आपन जात्रा करइ क तीसरे महीना में इस्त्राएल क मनइयन सीनै रेगिस्तान में पहुँचेन। 2उ पचे रपीदीन स चलिके सीनै रेगिस्तान में आएन। इस्त्राएल क मनइयन रेगिस्ताने में पर्वत क नगिचे डेरा डएन। 3तबहिं मूसा पहाड़े प परमेस्सर क लगे गवा। यहोवा ओसे पर्वत प कहेस, “इ बातन क इस्त्राएल क मनइयन यानी याकूब क बड़का परिवार स कहा। 4तू पचे निहारया ह कि मई आपन दुस्मनन क का कइ सकत हउँ। तू पचे लख्या ह कि मई मिस्र क मनइयन क संग का किहेउँ ह अउ इस्त्राएल क लोगन क संग का किहेउँ ह। तू सबइ देख्या ह कि मई तू सबन्क मिस्र स बाहेर एक उकाब क नाई निकारा ह अउर हिआँ आपन निचके लइ आवा ह। 5एँह बरे जदि तू मोरे कथन का माना अउर मोरे आदेसन क पालन करा तउ तू पचे मोरे खास लोग होब्या। समूचइ धरती मोर अहइ। मुला मई तोहका आपन खास लोग चुनत अहउँ। 6तू पचे मोरे एक खास रास्ट्र-याजक क समराज होब्या।’ मूसा, जउन

बतियन क मई तोहका बताएउँ ह ओनका इस्त्राएल क मनइयन क जरूर कहि दिहा।”

7एँह बरे मूसा पहाड़े स तरखाले उतरा अउ लोगन क सासकन क बोलाएस। मूसा लोगन क सासकन स इ कहेस जउन कहइ क यहोवा ओका हुकुम दिहे रहेन। 8फुन सबहिं लोग उहइ समइ एक साथ बोलेन, “हम पचे यहोवा क हर आदेसन क मानब जउन यहोवा कहत ह।”

तबहिं मूसा यहोवा क लगे पहाड़े प लौटि आवा। मूसा परमेस्सर स कहेस कि मनइयन ओनके हुकुम क पालन करिहीं। 9अउर यहोवा मूसा स कहेस, “मई घनघोर घटा में तोहरे लगे आउब। मई तोहसे बात करब। सबइ लोग मोका तोहसे बात करत सुनिहीं। मई इ एँह बरे करब जेहसे लोग ओन बातन में सदा पतियइहीं जउन तू ओनसे कहत अहा।”

तब मूसा यहोवा क उ सब बातन क बताएस जउन लोगन ओसे कहेन।

10यहोवा मूसा स कहेस, “आज अउ भियान तू लोगन क खास सभा बरे जरूर तइयार करा। लोगन क आपन ओढ़ना धोइ लेइ चाही। 11अउ तीसरे दिन मोरे बरे तइयार रहइ चाही। तीसरे दिना यहोवा सीनै पहाड़े प आइ, अउर सबहीं लोग यहोवा क निहिरिहीं। 12-13मुला लोगन स तू जरूर कहि दिहा कि उ पचे पहाड़े स दूर ठहरई। एक ठु रेखा खईच द्या अउ ओनका उ रेखा क पार न होइ द्या। जदि कउनो मनई या गोरू पहाड़े क छुइ तउ ओका जरूर मारि दीन्ह चाही। ओका पथरे या तीर स जरूर मारि डवा जाइ। मुला कउनो क ओका छुअइ नाहीं दीन्ह जाइ। लोगन क बिगुल स लम्बी आवाज निकलइ तलक जोहइ क पड़ी। उहइ समइया ओनका पहाड़े प जाइ दीन्ह जाइ।”

14तउ मूसा पहाड़े स खाले उतरि आवा। उ लोगन क नगिचे गवा अउर ओनका खास बइठक बरे तइयार किहेस। मनइयन आपन ओढ़ना धोएन।

15तब मूसा लोगन स कहेस, “परमेस्सर स मिलइ खातिर तीन दिना में तइयार होइ जा। उ टेम तलक कउनो मनई अउरत क संग सोवइ न चाही।”

16तीसरे दिना क भिन्सारे घनघोर घटा पर्वत प आइ। बिजुरी क कड़कब अउ बदरे क गरजब भवा। इ समइया बिगुल क बाजब ऊँची अवाज में भवा। डेरा क सबहिं लोग ससाइ गएन। 17तब मूसा लोगन क डेरा स बाहेर पहाड़े क तलहटी प परमेस्सर स भेंटइ बरे गवा। 18सीनै पहाड़ धुआँ स ढँकि गवा। पहाड़े स धुआँ अइसा निकरा जइसे भट्टी स निकरत होइ। इ एँह बरे भवा कि यहोवा आगी में पहाड़े प उतरेन। अउर साथ ही समूचा पहाड़ थरथर काँपइ लाग। 19बिगुल क अवाज जोर स जिआवा जोरदार होत गइ। जबहुँ मूसा परमेस्सर स बात किहेस, परमेस्सर बदरे क गरज क नाई ऊँची अवाज में ओका जवाब दिहस।

20इ तरह यहोवा सीनै पहाड़े प उतरा। तबहिं यहोवा मूसा क आपन लगे पहाड़े क चोटी प आवइ बरे कहेस। एँह बरे मूसा पहाड़े प चढ़ि गवा।

21यहोवा मूसा स कहेस, “जा अउर लोगन क चेताउनी दइ द्या कि उ पचे मोका निहारइ बरे मोरे लगे न आवई। जदि उ पचे अइसा करिहीं तउ उ पचे मरि जइहीं। अउर इ

तरह ढेर लोगन क मउत होइ जाइ। 22ओन याजकन स भी कहा जउन मोरे लगे आवा चाहत हीं कि उ पचे इ खास मिलन बरे खुद क तइयार करइँ। जदि उ पचे अइसा नाहीं करतेन तउ मईँ ओनका सजा देब।”

23मूसा यहोवा स कहेस, “मुला लोग पर्वते प नाहीं आइ सकत हीं। आप खुद ही हम का एक रेखा खईँचके पहाड़े क पवित्तर समुझइ अउ ओका पार न करइ बरे मोसे कहे रह्या।”

24यहोवा ओसे कहेस, “लोगन क लगे जा अउ हारून क लइ आवा। ओका आपन संग वापस लइ आवा। मुला याजकन अउ लोगन क मोरे लगे जिन आवइ द्या। जदि उ पचे भी मोरे जिआदा नगिचे अइहीं तउ मईँ ओनका सजा देब।”

25एँह बरे मूसा लोगन क लगे गवा अउ ओनका इ सब बातन बताएस।

### दस आग्यन

20 तबहिँ परमेस्सर कहेस, 2“मईँ तोहार परमेस्सर यहोवा हउँ। मईँ तोहका मिस्र देस स बाहेर लइ आएँ। मईँ तोहका गुलामी स अजाद करावा। एँह बरे तोहका सचमुच इन अदेसन क मानइ चाही।

3“तोहार लगे मोर अलावा अउर कउनो देवतन नाहीं होइ चाही।”

4“तोहका कउनो भी मूर्ति या कउनो भी चीज क कउनो तस्वीर जिन बनवा जउन ऊपर अकासे मँ या खाले भुइयँ प या धरती क तरखाले पानी मँ होइ। 5 कउनो भी तरह क मूर्ति क आराधना जिन करा, अउर न ही ओकर सेवा करा। काहेकी मईँ तोहार यहोवा परमेस्सर हउँ। मईँ ईस्यालु परमेस्सर हउँ। जउन मनईँ मोरे खिलाफ पाप करत ह तउ उ हमार दुस्मन होइ जात ह। मईँ उ मनइयन क सजा देब। अउर मईँ ओनके गदेलन, ओनके नातिन पोतन अउ ओनके पर-नातिन पोतन क भी सजा देब। 6मुला मईँ ओन लोगन प कृपा करब जउन मोसे पिरेम करिहीं अउ मोरे हुकुमन क मनिहीं। मईँ ओनके परिवारे बरे हजारन पीढ़ी तलक कृपा करब।

7“तोहरे परमेस्सर यहोवा क नाउँ क बइपरब तोहका गलत ढंग स नाहीं करइ चाही। जदि कउनो मनईँ यहोवा क नाउँ क प्रयोग गलत ढंग स करत ह तउ उ अपराध करत ह अउ यहोवा ओका बे अपराधे क न मनिहीं। 8“तोहका सबित क दिन क एक खास दिन क रूप मँ मनावइ क याद रखइ चाही। 9हफ्ता मँ तू छ दिन तलक काम कइ सकत ह। 10मुला सातवाँ दिन, सबित क दिन यहोवा तोहरे परमेस्सर क मान देइ बरे अराम क दिन अहइ। एँह बरे उ दिन कउनो व्यक्ति-तू, तोहार बेटवा अउ बिटिया तोहरे नउकर अउ नउकरानी, गोरू अउर तोहरे सहर मँ रहइवाला विदेसी क काम न करिहीं चाही। 11काहेकी यहोवा छः दिना तलक काम किहेस अउ अकास, धरती, सागर अउ ओनके बरे हर

चीज बनएस। अउ सातवाँ दिन यहोवा अराम किहेस। इ तरह यहोवा सबित क दिन क बरदान दिहेस कि ओका अराम क पवित्तर दिन क रूप मँ मनाव जाइ। यहोवा ओका बहोत ही खास दिन बनएस।

12“आपन बाप अउ महतारी क इज्जत करा। इ करा ताकि तू उ धरती प जउन धरती क परमेस्सर तोहका देत अहइ, लम्बी जिन्नगी बिताइ सका। 13“तोहका कउनो व्यक्ति क कतल नाहीं करइ चाही।

14“तोहका जिनाखोरी क पाप न करइ चाही।

15“तोहका चोरी न करइ चाही।

16“तोहका आपन पड़ोसी क खिलाफ झूठी गवाही न देइ चाही।

17“तोहका पड़ोसी क घर हथियावइ क इच्छा न करइ चाही। तू आपन पड़ोसी क मेहरारू, ओकर नउकर अउ नउकरानी, ओकर गोरू अउ ओकरे गदहा क हथियावइ क इच्छा नाहीं करइ क चाही। तोहका दूसर व्यक्ति क चीजक लेइ क इच्छा न करइ चाही।”

### लोगन यहोवा स डेरनेन

18घाटी मँ लोग बदरे क गर्जब अउ पहाड़े प बिजुरी क चमकब निहारेन। उ पचे बिगुल क अवाज सुनेन अउ पहाड़े स धुआँ उठब लखेन। मनइयन डेरनेन अउ भय स काँपि गएन। उ पचे पर्वते स दूर ठाड़ रहेन अउ निहारत रहेन। 19तब लोगन मूसा स कहेन, “जदि तू हम पचन स कछू कहइ चहब्या तउ हम पचे सुनब। मुला परमेस्सर क हम पचन स बात जिन करइ द्या। जदि इ होइ तउ हम पचे मरि जाब।”

20तब मूसा लोगन स कहेस, “जिन डेरअ। यहोवा तोहार परिच्छा लइ बरे आएस ह। उ चाहत ह कि तू पचे ओका मान द्या जेहसे तू पचे पाप जिन कइ सका।”

21लोग उ समइ उठिके पर्वते स दूर चला गएन जबहिँ मूसा उ घना बदरे मँ गवा जहाँ यहोवा रहेन। 22तबहिँ यहोवा मूसा स इस्त्राएलियन क कहइ बरे इ बातन क कहेस: “तू पचे निहारया ह कि मईँ तोहसे अकास स बात कीन्ह ह। 23एँह बरे तू पचे मोरी बराबरी करइ बरे सोना अउ चाँदी क मूर्ति जिन बनवा। तोहका झूठे देवतन क मूर्तियन न बनवइ चाही।

24“मोरे बरे एक खास वेदी बनवा। इ वेदी बनवइ बरे मिट्टी बइपरा। इ वेदी प मोका बलि क रूप मँ होम बलि अउ सान्ति भेंट चढ़ाइ द्या। इ काम बरे आपन भेड़ अउ गोरू क इस्तेमाल करा। एँका उ सबहिँ ठउरे प करा जहाँ मईँ आपन क याद करइ बरे कहउँ। तबहिँ मईँ आउब अउ तोहका आसीबाद देब। 25जदि तू लोग वेदि क बनवइ बरे चट्टान क बइपरत ह तउ उ पाथर क न बइपरइँ जउने पाथर क लोह क औजार स काटा गवा ह। जदि तू अइसा करत ह तउ मईँ उ वेदी क अर्गीकार न करब। 26तू पचे वेदी प पहुँचइ बरे सीढ़ी जिन बनया। जदि सीढ़ी होइ तउ लोग ऊपर वेदी क लखिहीं तउ उ पचे तोहरे ओढ़ना क नीचे स तोहका निहरीहीं।”

## दूसर कानून अउ हुकुम

**21** तब परमेस्सर मूसा स कहेस, “इ सबइ नेम अहइ जेको तू लोगन क देब्या:

2“जदि तू एक हिब्रू गुलाम खरीदत ह तउ उ तोहार सेवा सिरिफ छ बरिस करी। छ बरिस बाद उ अजाद होइ अउर ओका आजाद होइ बरे कछू नाहीं देइ क होइ। 3जदि उ मनई क बियाह तोहरे गुलामी स पहिले नाहीं भवा अहइ, तब जब उ अजाद होइ क टेमें में अकेले ही चला जाइ। मुला जदि उ तोहार गुलाम होइ स पहिले बियाहा होइ तउ उ आपन पत्नी क आपन संग लइ जाइ। 4जदि गुलाम बियाहा नाहीं होत तउ ओकर मालिक ओका मेहरारू दियॉइ सकत ह। जदि उ पत्नी, बेटवा अउर बिटिया क जन्मी, तउ उ पत्नी अउर ओकर बेटवा अउ बिटिया ओकर मालिक क होइहीं। आपन सेवा क समइ काटे क पाछे उ गुलाम अजाद कीन्ह जाइ।

5“मुला इ होइ सकत ह कि गुलाम इ निहचय करइ कि उ आपन मालिक क संग रहइ चाहत ह। तब ओका इ कहइ क पड़ी, ‘मई आपन सुआमी स पिरेम करत हउँ। मई आपन पत्नी अउर आपन बचवन स पिरेम करत हउँ। मई अजाद नाहीं होब। मई हिअँइ रहब।’ 6जदि अइसा होइ तउ गुलाम क सुआमी ओका निआवाधीसन\* क लगे लिआइ। उ ओका दरवाजा तलक लइ जाइ अउर उ कउनो तेज अउजार स गुलाम क कान छेदी। तब उ दास जिन्नगी भइ मालिक क सेवा करी।

7“कउनो भी मनई आपन बिटिया क दासी क तरह बेचइ बरे ठान लेत ह। जदि अइसा होत ह तउ ओका अजाद करइ क कानून उ गुलाम मनई क आजाद करइ क कानून स अलग होइ। 8जदि गुलाम क मालिक उ मेहरारू स संतुट्ट न होइ तउ उ ओकरे बाप क बेच सकत ह। मुला जदि दासी क मालिक उ मेहरारू स बीहइ क बचन देइ तउ उ दूसर मनई क बेचइ क हक ओका नाहीं।” 9जदि दासी क सुआमी उ दासी स आपन बेटवा बीहइ क बचन देइ तउ ओसे दासी जइसा बेवहार नाहीं कीन्ह जाइ। ओकरे साथ बिटिया जइसा बेवहार करइ चाही।

10“जदि दासी क सुआमी कउनो दूसर मेहरारू स अपने क बियाहत ह तउ ओका चाही कि उ पहली मेहरारू क कमती खइया के अउ ओढ़ना न देइ अउर न ही ओकर बियाहे क हक में कमती करइ। अउर ओका चाही कि उ सब चीजन्क बराबर देत रहइ चाही जेका पावइ क हक ओका बियाहे में मिला रहा। 11उ मनई क ई तीन ठु चीज ओकरे बरे करइ चाही। जदि उ करत नाहीं तउ उ मेहरारू अजाद कीन्ह जाइ अउ एकरे बरे ओका कछू भी नाहीं देइ क पड़ी। ओका उ मनई बरे कउनो धने क देनदार न होइ क पड़ी।

12“अगर कउनो मनई दूसर क मारत ह अउर ओका मारि डावत ह तउ मरवइया भी मारि डावा जाइ। 13मुला कउनो संजोग होइ जात ह कि कउनो बे पहिले क जोजना बनाए कउनो क मारि डावत ह, तउ अइसा परमेस्सर क

मर्जी स ही भवा होइ। मई कछू खास ठउरे क चुनब जहाँ मनई सुरच्छा बरे भागिके जाइ सकत हीं। इ तरह उ हत्तियारा भागिके एहमों स कउने भी ठउरे प जाइ सकत ह। 14मुला जदि कउनो मनई कउनो मनई बरे किरोध या घिन धरे क कारण ओका जान बूझ क मारि डावइ क चाल चलत ह तउ उ हत्तियारा क जरूर सजा मिलइ चाही। उ मनई क मोरी वेदी स भी दूर लइ जाइ चाही अउर ओका मारि डावा चाही।

15“कउनो मनई जउन महतारी बाप क मारइ तउ ओका जरूर मारि डावा जाइ।

16“अगर कउनो मनई कउनो क गुलाम क तरह बिक्री करइ या आपन गुलाम बनवइ बरे अपहरण करइ तउ ओका जरूर मारि देइ चाही।

17“कउनो मनई जउन अपने बाप या आपन महतारी क सरापत ह ओका जरूर मारि देइ चाही।

18“दुइ मनई तहतुक करई अउ एक दुसरे क पथरे स या मूका स मारि सकत ह। उ मनई क तोहका कइसे सजा देइ चाही। जदि मार खावा मनई मरत नाहीं तउ मरवइया क न मारि डावइ चाही। 19मुला जदि मार खावा मनई कछू समइ तलक खटिया प पड़ा रहइ तउ मरवइया क ओका हर्जीना देइ चाही। मरवइया ओकरे टेम क बर्बादी क धन स पूरा करइ। उ मनई तबहिं ताई ओका हर्जीना देइ जब तलक उ पूरी तरह स चंगा न होइ जाइ।

20“कबहुँ-कबहुँ मनई आपन दास अउ दासी क पीट देत हीं। जदि पीटे-पाटे क पाछे उ दास मरि जात ह तउ हत्तियारा क जरूर सजा देइ चाही। 21मुला दास अगर मरत नाहीं अउ कछू दिनों पाछे उ नीक होइ जात ह तउ उ मनई क सजा न दीन्ह जाइ। काहेकि दास क मालिक दास बरे धन दिहे रहा अउ उ दास ओकर अहइ।

22“दुइ मनइ आपस में लड़इ-भिड़इ अउ कउनो गर्भवली अउरत क धक्का दइ देत हीं। जदि उ मेहरारू अपने लरिका क जन्मत ह, अउर महतारी बुरी तरह घायल नाहीं बा तउ धक्का देवइया क जरूर धन देइ चाही। उ मेहरारू क भतार इ तय करी कि उ मनई केतना धन देइ। जज उ मनई क इ तय करइ में मदद देइहीं कि उ धन केतना होइ। 23जदि अउरत बुरी तरह घायल होइ तउ उ मनई क जउन ओका चोट पहुँचाएस ह जरूर सजा देइ चाही। जदि एक मनइ मारि डावा जात ह तउ हत्तियारा जरूर मारि डावा जाइ। तू एक जिउ क बदले दूसर जिउ लइ चाही। 24तू आँखी क सन्ती आँखी, दँत क सन्ती दँत, हाथे क सन्ती हाथ, गोड़ क सन्ती गोड़। 25जरइ क सन्ती जरावा, खोंचे क सन्ती खोंचा अउ घाउ क सन्ती घाउ होइ।

26“अगर कउनो मनई गुलाम क आँखी क खोंचइ अउर अगर गुलाम उ आँखी स आँधर होइ जाइ तउ उ गुलाम अजाद कइ दीन्ह जाइ। ओकर आँखी ओकरी अजादी क कीमत अहइ। इ नेम मरद अउ मादा बरे दुइनउँ गुलाम एक ही तरह अहइ। 27अगर दास क मालिक दास क मुँहना प मारइ अउ दास क कउनो दँत टूटि जाइ तउ दास अजाद कइ दीन्ह जाइ। दँस क दँतवा ओकरे अजादी क कीमत अहइ। इ दास अउ दासी दुइनउँ बरे एक तरह अहइ।

**निआवाधीसन** कबहुँ परमेस्सर क अरथ निआवाधीस भी होत ह।

28“अगर कउनो मनई क सौँड कउनो मेहरारू या मनई क मार देत ह तउ तू पाथर क बइपरा अउ सौँड क मारि डावा। तू उ सौँडे क खाइ नार्ही चाही। मुला सौँडे क मालिक अपराधी नार्ही बा। 29मुला जदि सौँड पहिले स मरकहा अहइ अउ सौँडे क सुआमी क ओराहना दइ दीन्ह गइ अहइ तउ उ सुआमी दोखी अहइ। काहेकि इ सौँडे क बाँधा या बाझ मँ बंद कइके नार्ही रखा गवा। तउ जदि सौँड अमेरे छोरि दीन्ह ग होइ अउ कउनो क जान स मार देत ह। तउ सुआमी दोखी अहइ। तू पचन्क सौँडे क पाथरे स मारि देइ चाही अउ सुआमी क भी हत्तिया कइ देइ चाही। 30मुला अगर मउत पावइवाला परिवार क मनई कसूरवार मनई स छुड़ैती क धन स्वीकार करत ही, तउ छुड़ैती क धन निआवधीस क तय करइ चाही अउर सौँडे क मालिक क मारइ न चाही।

31“इहइ नेम लागू करइ चाही जदि सौँड कउनो मनई क बेटवा या विटिया क मारि डावत ह। 32मुला सौँड जदि गुलाम क जान स मार देइ तउ सौँड क मालिक दास क सुआमी क चाँदी क तीस सिक्का\* देइ। अउ सौँड भी पथरे स मारि डावा जाइ। इ नेम दास अउ दासी बरे एक तरह लागू होइ।

33“जदि कउनो मनई एक खुला गइहा या कुइयौं खनइ अउ ओका मूँदइ नार्ही अउर कउनो मनई क जनावर आवइ अउ ओहमा गिरि पड़इ तउ गइहा क मालिक दोखी बा। 34गइहा क मालिक जनावर बरे हर्जाना देइ मुला जनावर क हर्जाना दिए जाए प ओका उ जनावर क लहास लेइ दीन्ह जाइ।

35“जदि कउनो क सौँड कउनो दूसर मनई क सौँडे क मारि डावइ तउ उ सौँड क जउन जिअत अहइ ओका बेंचइ दइ चाही। अउ एहसे मिले भए धन क आधा आधा हींसा दुइनउँ मनइयन क मिली। अउ मेरे सौँडे का अधियाइ क दुइनउँ क जरूर बाँटि दीन्ह जाइ। 36मुला उ मनई क सौँड पहिले कउनो जनावरे क मारे अहइ तउ सौँडे क मालिक आपन सौँड बरे जिम्मेदार अहइ। जदि ओकर सौँड दूसर सौँड क मारि डावत ह तउ उ अपराधी बा काहेकि उ सौँडे क अजाद छोड़ेस। उ मनई सौँड क बदले सौँड देइ। उ मेरे भए सौँड हरजाने मँ आपन सौँड जरूर देइ।

**22** “तू उ मनई क सजा कइसे देब्या जउन एक बर्धा या भेड़ी क चुरावत ह? जदि उ मनई जनावर क मारि डावइ या बेंच डावइ तउ उ ओका लउटाइ तउ सकत नार्ही। एँह बरे उ चोराए बर्धा क बदले मँ पाँच बर्धा देइ। या एक ठु चोराइ भई भेड़ी क बदले चार भेड़ी देइ। एँह बरे उ आपन चोरी क अपराध बरे हरजाना भी देइ। 2-4जदि उ कंगाल बा, तउ ओका गुलाम क रूप मँ बेचा जाइ। अगर ओकरे लगे चोराइ क भवा जनावर अहइ तू ओका खोजा जात ह तउ उ मालिक क एक ठु जनावर चोरी खातिर दुइ ठु जनावर देइ। एहसे कउनो दरकार नार्ही कि कि उ जनावर गदहा, बर्धा या भेड़ी रही।

“अगर कउनो चोर राति सेंध लगावत धइ जात ह अउ ओका कउनो मनई मारि डाएस तउ जउन ओका मारी डाएस उ मरइ क कउनो दोखी न होइ। मुला अगर इ दिन मँ घटि जात ह तउ जउन हत्तिया क हत्तिया क दोख लागी।

**चाँदी क तीस सिक्का** एक नवा गुलाम क कीमत।

5“अगर कउनो मनई आपन खेत या अंगूरे क बगिया मँ आपन जनावरन क धरइ देइ अउर उ जनावर पड़ोसी क खेत या अंगूरे क बगिया मँ चलि जाइ अउ ओकर अनाज क बरबाद करइ देत ह तउ उ आपन सबत बढ़िया फसिल क आपन पड़ोसी क नोकसान बरे भरइ।

6“अगर कउनो मनई आपन खेतवा क कँटहरी झाड़ी मँ आगी लगावइ अउ आगी बढ़त बढ़त पड़ोसी क फसिल या पड़ोसी क खेते क दना क बारि देइ, तउ मनई जउन आगी बारेस ह ओका ओकरे बरे हर्जाना देइ क होइ जउन बारेस ह।

7“कउनो मनई आपन पड़ोसी स ओकर घरे मँ कछू धन या कछू दूसर चीज धरइ बरे कहइ अउर जदि उ धन या उ सबइ चीजन पड़ोसी क घरे स चोरी चली जाइँ तउ तू का करब्या? तोहका चोरे क पता लगावइ क जतन करइ चाही। जदि तू चोरे क धइ लिहा ह तउ उ चीजे क दाम दुइ गुना देइ। 8मुला जदि तू चोर क पता न लगाइ सका तब निआवाधीसन तय करिहीं कि उ अपराधी अहइ कि नार्ही। घरे क मालिक क निआवाधीसन क समन्वा जाइ चाही तउ निआवाधीसन तय करइहीं अगर उ आपन पड़ोसी क चिजियन क चुराएस ह।

9“जदि दुइ मनई कउनो हेरान बर्धा, गदहा, भेड़ी, ओढ़ना या कउनो दूसर चीज क बारे मँ तकरार करइँ तउ तू का करब्या? एक मनइ कहत ह, ‘इ मोर अहइ।’ अउर दूसर कहत ह, ‘नार्ही इ मोर अहइ।’ दुइनउँ मनई परमेस्सर क लगे जाइँ। परमेस्सर तय करिहीं कि अपराधी कउन अहइ। जउन मनई गलती क दोखी होइ उ उ चीजे क दुइ गुना दाम भरी।

10“कउनो आपन पड़ोसी स कछू टेम बरे आपन जनावर क देखइ भालइ क कहइ। उ जनावर एक गदहा, बर्धा या भेड़ी होइ सकत ह। तबहिँ तू का करब्या जदि उ जनावर मरि जाइ या चोट खाइ जाइ या कउनो मनई उ जनावरे क चोराइके लइ जाइ जब कउनो मनई ओका लखत न होइ। 11उ पड़ोसी सफाई देइ कि उ जनावर क चोराएस नार्ही ह। अगर इ सच होइ तब पड़ोसी यहोवा क किरिया खाइ कि उ ओका नार्ही चोराएस ह। जनावर क मालिक इ किरिया क जरूर मानइ। पड़ोसी क हेरान जनावर क मालिक क हर्जाना नार्ही देइ क होइ।

12“मुला जदि पड़ोसी क चोराएस ह तउ उ मालिक क जनावर बरे भुगतान जरूर करइ। 13जदि जंगली जनावर जनावर क मारि डाए होइ तउ सबूत बरे ओकरे सरिर क पड़ोसी लइ आवइ। पड़ोसी मारा भवा जनावर क मालिक क हर्जाना न देइ।

14“अगर कउनो मनई आपन पड़ोसी स कउनो चीजन उधार प लेइ तउ ओकरे बरे उ मनई क जिम्मेदार होइ चाही। जदि उ आपन पड़ोसी स कउनो जानवर उधार प लइ जाइ जदि उ जनावरे क चोट लागि जाइ या उ मरि जाइ तउ पड़ोसी मालिक क हर्जाना देइ। पड़ोसी एँह बरे जिम्मेदार अहइ काहेकि ओकर मालिक हुवाँ खुद नार्ही रहा। 15मुला जदि मालिक जनावर क संग हुवाँ होइ तब पड़ोसी क भुगतान नार्ही करइ क होइ। या जदि पड़ोसी काम लेइ बरे

भाड़ा क भुगतान करत होइ तउ जनावर क मरइ या चोट खाइ प ओका कछू भी नाहीं देइ क होइ। जनावर क बइपरइ बरे दीन्ह गवा भाड़ा ही खूब होइ।

16“अगर कउनो मनई कउनो बिन बियाही कुवैरी कन्या क गुमराह करत ह अउ ओकर संग सारीरिक सम्बंध बनावत ह तउ ओका ओसे बियाह करइ चाही। ओकरे बाप क पूरा पूरा दहेज देइ। 17अगर बाप उ बिटिया क ओसे बीहइ क मना करत ह तउ भी उ मनई क धन देइ क होइ। उ ओका दहेज क भरपूर धन देइ।

18“तू कउनो अउरत क जादू टोना जिन करइ द्या। जदि उ अइसा करइ तउ तू ओका जिअइ जिन द्या।

19“तू कउनो मनई क कउनो जनावर क संग जिनाखोरी जिन करइ द्या। जदि अइसा होइ तउ उ मनई जरूर मारि डावा जाइ।

20“जदि कउनो मनई झूठे देवता क बलि चढ़ावत ह तउ उ मनई जरूर बर्बाद कइ द्या। सिरिफ यहोवा ही अइसा अहई जेहका तू पचन्क बलि चढ़ावइ चाही।

21“याद राखा पहिले तू पचे मिस्त्र देस में बिदेसी रह्या। एँह बरे तू पचे उ मनई क जिन ठगा न ओका चोट पहुँचावा जउन तोहरे देस में बिदेसी होइ।

22“तू पचे अइसी अउरत क कबहुँ नोस्कान नाहीं करइ चाही जेकर भतार मरि गवा होइ या कउनो अनाथ बचवन होइ। 23जदि तू पचे ओन रँड़ या अनाथ बचवन क कछू बुरा करिब्या तउ उ पचे मोरे अगवा रोइहीं अउर मई ओनके गोहार क सुनब।

24“अउर मोका जिआवा किरोध आइ। मई तोहका तरवारि स मारि डाउब। तबहिं तोहार पत्नी रँड़ होइहीं। अउर तोहार गदेलन अनाथ होइ जइहीं।

25“जदि मोरे लोगन में स कउनो गरीब होइ अउर तू ओका कर्ज द्या तउ उ धन पइ तोहका बिआज नाहीं लेइ चाही। 26कउनो मनई उधारे पर लीन्ह धन बरे आपन कोट क रेहन धरत ह तउ सूरज बूड़इ स पहिले ओका कोट लउटाइ द्या। 27जदि उ आपन कोट नाहीं पावत तउ ओकरे लगे तन ढाकइ क कछू भी नाहीं होइ। जब उ सोइ तउ ओका सर्दी लागी। जदि उ मोका रोइ क पुकारी तउ मई ओकर सुनब। मई ओकर बात सुनब काहेकि मई कृपालु हउँ।

28“तू परमेस्सर या आपन लोगन क नेतन क सरापइ नाहीं चाही।

29“फसिल काटइ क टेमें प तोहका आपन पहिला अनाज अउर पहिला फले क रस मोका देइ क चाही। बरिस क आखिर तलक प्रतिच्छा जिन करा।

“आपन पहिलौटी पइवा भवा बेटवन क मोका दइ द्या। 30आपन पहिला गोरू अउ भेड़ी क बच्चा मोका द्या। पहिलौटी बच्चा क सात दिना तक जनावरे क महतारी क संग रहइ द्या। आठवें दिन मोका इ सब द्या।

31“तू पचे क मोर बरे पवित्तर लोग होइ चाही। एँह बरे कउनो अइसे जनावरे क गोस जिन खा जेका कउनो जंगली जनावर मारि डाए होइ। उ मरे भए जनावरन क कुकुरन क खाइ द्या।

## निआव अउर कृपा क नेम

23 “दूसर मनइयन क खिलाफ लबार जिन बोला। जदि तू अदालत में गवाह हवा तउ बुरा मनई बरे लबार जिन बोला।

2“कुछ अइसा जिन करा सिरिफ एह बरे हर मनई वइसा करत बा। अगर मनई क समूह गलत करत बा तउ ओनकइ साथ जिन द्या। तू ओन मनइयन क अपने क गलत काम बरे बहकावइ जिन द्या। तू उहइ करा जउन ठीक अउ निआव क बात होइ।

3“अगर एक ठु गरीब मनई क अदालत में जाँच होत भइ, तउ कबहुँ कबहुँ लोग ओकर साथ देत हीं काहेकि उ पचे अफसोस महसूस करत ह। त उ जिन करा। जदि उ निआउ प होइ तउ ओकर साथ द्या।

4“जदि तू कउनो हेरान बर्धा या गदहा पावा तउ तोहका ओका मालिक क लौटाए देइ चाही। चाहे उ तोहार दुस्मन काहे न होइ।

5“जदि उ लखा कि जनावर एँह बरे नाहीं चल पावत अहइ कि ओको ऊपर ढेर क बोझ लदा अहइ तउ तोहका ओका रोकइ चाही अउ उ जनावर क मदद करइ चाही। तोहका उ जनावर क मदद तबहुँ भी करइ चाही जब उ जनावर तोहरे दुस्मनन में स कउनो क होइ।

6“तोहका गरीबन क संग अदालत में अनिआव न होइ देइ चाही। ओनके संग दूसर लोगन क तरह निआव होइ चाही।

7“बहोत होसियार रहा कि तू कउनो बात बरे कउनो क अपराधी कहा। कउनो बेकसूर मनई क खिलाफ अपराध जिन लगावा। कउनो निर्दोषी मनई क अपराध क सजा क जरिए जान स जिन मारा जाइ द्या काहेकि उ अपराध नाहीं किहेस। अगर कउनो मनई निर्दोषी क हतिया करइ तउ उ दुट्ट अहइ। अउर मई उ दुट्ट मनई क दोख मुक्त न करब।

8“अगर कउनो मनई गलत होए प आपन बात अंगीकार करावइ बरे तोहका घूस देइ तउ जिन ल्या। अइसा घूस जज क भी आँधर कइ देइ जेसे उ फुर बात क न लखि सकिहीं। इ तरह क घूस नीक मनइयन क लबार होइ क सिखाइ।

9“तू कउनो बिदेसी क संग जउन तोहार भुइँया में रहत ह जुलम जिन करा। याद राखा जब तू मिस्त्र देस में बसत रह्या तबहिं तू बिदेसी रह्या।

## खास छुट्टियन

10“छः बरिस ताई बिआ बोवा। आपन फसिल काटा अउ खेत क तइयार करा। 11मुला सातवें बरिस आपन खेत क जिन जोता। सातवाँ बरिस खेते क खास अराम करइ क होइ। आपन खेते में कछू जिन बोआ। अगर कउनो फसिल सातवें बरिस में आपन आप होइ जात ह तउ ओका गरीबन क खाइ द्या। जउन खइया क दाना बच खुच जाइ ओका बनैला पसु क भकोसइ द्या। इहइ बात तोहका अंगूर अउ जइतून क बृच्छ क बारे में करइ चाही।

12“छः दिना तलक काम करा। तब सातवाँ दिन अराम करा। एहसे तोहरे गुलामन, मजूरन अउ विदेसियन क जउन

कि तोहार बरे काम करत हीं तनिक समइ बरे अराम अउर सुस्ताइ क टेम मिली। अउर तोहार बर्धा अउ गदहा भी अराम करइ क टेम पइहीं।

13“इ नेमन क मनाइ बरे होसयारी बरता। झूठ देवतन क पूजा जिन करा। तू सबन्क ओनकइ नाउँ भी नाहीं लेइ चाही।

14“हर बरिस तोहार तीन खास छुट्टी क दिन होइहीं। इ दिन तू पचे मोर आराधना बरे मोर खास जगह प आया। 15पहिल छुट्टी क दौरान बेखमीरे क रोटी क दावत होइ। इ वइसा ही होइ, जइसा मई हुकुम दिहे हउँ। इ दिन तू अइसी रोटी खाब्या जेहमा खमीर न होइ। इ सात दिन ताई चली। तू पचे ऐंका आबीब क महीना मँ करब्या। काहेकि इ उहइ टेम अहइ जब तू पचे मिस्र स आए रहया। इ दिन कउनो भी मनई मोरे समन्वा खाली हाथ जिन आया।

16“दूसर छुट्टी का दिन फसल काटइ क, तोहार मिहनत क पहिला फल क परब होइ।”

“तीसर छुट्टी क दिन फसल जमा करइ क परब होइ। इ पतझड़ मँ तब मनावा जाइ जब तू खेत मँ आपन सारी फसल क काटब्या।

17“इ तरह हर बरिस तीन दाई सबहिं मनई यहोवा आपन सुआमी क समन्वा हाजिर होइहीं।

18“जब तू कउनो जनावर क मारा अउ एकरे खूने क बलि क रूप मँ जब चढ़ावा तउ अइसी रोटी भेंट मँ जिन चढ़ावा जेहमा खमीर होइ। अउर जब तू इ बलि क खा तउ एकहि दिन मँ सब गोस खाइ जा। दूसर दिन बरे गोस जिन बचावा।

19“जबहिं तू फसिल काटइ क टेम आपन फसिल बटोरा तबहिं आपन काटइ भइ फसिल क पहिली उपज आपन यहोवा क मन्दिर मँ लावा।

“तोहका नान्ह बोकरी क मांस नाहीं खाइ क चाही जउन आपन महतारी क दूधे मँ पका भवा होइ।

### परमेस्सर इस्त्राएल क ओकर मँ भूमि लेइ क मदद करी

20परमेस्सर कहेस, “मई तोहरे समन्वा तोहार अगुआयी बरे एक ठु सरगदूत पठवत हउँ। इ सरगदूत तोहका उ ठउरे प लइ जाइ जेका मई तोहरे बरे तइयार किहेउँ ह। इ सरगदूत तोहार रच्छा करी। 21सरगदूत क हुकुम माना अउ ओकरे पाछे चला। ओकरे खिलाफ कउनो बुरा काम जिन करा। उ सरगदूत तोहरे जर्म क छिमा न करी जउन तू ओकरे बरे करब्या। ओहमाँ मोर सक्ती अहइ। 22तोहका उ बात मानइ चाही जउन उ कहत ह। तोहका हर एक काम करइ चाही जउन मई तोहका कहत हउँ। यदि तू इ करब्या तउ मई तोहरे संग रहब। मई तोहरे सबहिं दुस्मनन क खिलाफ होइ जाब। अउर मई उ हर लोग क दुस्मन होब जउन तोहरे खिलाफ होइ।”

23यहोवा कहेस, “मोर सरगदूत तोहका इ देस स होइके जाइ मँ तोहार अगुवायी करिहीं। उ तोहका कइउ अलग अलग लोगन एमोरी, हित्ती, परिज्जी, कनानी, हिब्वी अउ यबूसी क खिलाफ तोहार अगुवायी करिहीं। मुला मई ओन सबहिं क नास कइ देब।”

24“ओनकइ देवदत क जिन पूजा करा। ओन देवतन क निहुरिके पइलगी जिन करा। तू उ तरीका स जिन रहा जउने तरीका स उ पचे रहत हीं तोहका ओनकइ मूरत क नास कइ देइ चाही। तोहका ओनकइ स्मृति क पाथर क तोड़ देइ चाही जउन ओनकइ देवतन क सुमिरइ मँ उ पचन्क मदद करत ह। 25तोहका यहोवा आपन परमेस्सर क सेवा करइ चाही। यदि तू इ करब्या, तउ मई तोहका भरपूर रोटी अउ पानी क बरदान देब। मई तोहार सारी बेरामी क दूर कइ देब। 26तोहार सब पचन्क मेहररूअन बच्चन क जन्मिहीं। जन्म क टेम प ओनकइ कउनो बच्चा नाहीं मरी। अउर मई तू पचन्क भरपूर लम्बी जिन्नगी देब।

27“जब तू आपन दुस्मनन स लड़ब्या, मई आपन प्रबल सक्ती तोहसे पहिले हुवाँ पठइ देब। मई तोहरे सबहिं दुस्मनन क हरावइ मँ तोहार मदद करब। उ पचे जउन तोहरे खिलाफ होइहीं, उ पचे जुद्ध मँ घबराइ क पराइ जइहीं। 28मई तोहरे अगवा अगवा बरँ पठउब। उ तोहरे दुस्मनन क भगाइ देइ मँ मजबूर करी। हिब्वी, कनानी अउ हित्ती लोग तोहार देस तजिके पराइ जइहीं। 29मुला मई ओन लोगन क तोहरे देस स बाहेर हाली हाली जाइके मजबूर न करब। मई इ सिरिफ एक बरिस मँ न करब। यदि मई लोगन क बहोत हाली जाइके मजबूर करब तउ देस ही निर्जन होइ जाइ। तब सबहिं तरह क जंगली जानवर बढ़िही अउर धरती प कब्जा कइ लइहीं। अउ उ पचे तोहरे बरे बहोत कस्ट देइवाला होइहीं। 30मई ओनका धीमे धीमे तोहरी भुइयाँ स उ टेमँ तलक बाहेर खदेरत रहब जब तलक तू उ भुइयाँ प न छाइ जा। अउ जहाँ कहुँ तू जाब्या मई दूसर लोगन क उ भुइयाँ तजि देइ बरे मजबूर करब।

31“मई तू पचन्क लाल सागर स फरात नदी तलक सारा भुइयाँ देब। पच्छिउँ चौहद्दी पलिस्ती सागर (भूमध्य सागर) होइ अउ पूर्बी चौहद्दी अरब क रेगिस्तान होइ। मई तू पचन्क हुवाँ बसइ सबहि लोगन क हराइ क देब। अउर तू पचे इ सबहिं मनइयन क हुवाँ स पराइ बरे मजबूर करब्या।

32“तू पचे हुवाँ क लोगन मँ स कउनो क संग या ओनकइ देवतन क संग कउनो समझौता जरूर न करइ चाही। 33ओन पचन्क आपन देस मँ जिन रहइ द्या। यदि तू ओनका रहइ देब्या तउ ओनकइ चाल-चपेट मँ फँसि जाब्या। उ पचे तोहसे मोरे खिलाफ पाप करवइहीं। अउर तू पचे ओनकइ देवतन क सेवकइ सुरू कइ देब्या।”

### यहोवा अउ इस्त्राएल क बीच करार

24 परमेस्सर मूसा स कहेस, “तू हारून, नादाब, अबीहू अउ इस्त्राएल क सत्तर पुरनिया नेता पहाड़े प आवा अउ कछू दूर होइ के मोर आराधना करा। 2तबहिं तू अकेले ही मोर निअरे आवइँ। दूसर कउनो लोग यहोवा क निचके न आवइँ अउ बाकी बचा भवा लोग पहाड़े क निअरे न आवइँ।”

3इ तरह मूसा यहोवा क सबहिं नेम अउ आग्या क लोगन क बताएस। तब सबहिं मनइयन कहेन, “यहोवा जउन सबहिं आग्या क दिहेस ओका हम सब मानब।”



4<sup>एँह</sup> बरे मूसा यहोवा क सबहिं आग्या क चाम पत्तर प लिखेस। भियान भिन्सारे मूसा उठा अउ पहाड़े क तलहटी क निचके एक वेदी बनाएस। अउर उ बारह पाथर इस्त्राएल क बारहु परिवार समूह बरे खड़ा किहेस। 5<sup>तब</sup> मूसा इस्त्राएल क जवानन क बलिदान दइ बरे पठएस। उ पचे यहोवा बरे होमबलि अउ सान्ति क भेंट बरे बर्धा क बलि दिहेन।

6<sup>मूसा</sup> ओन जनावरन क खून बटोरेस। मूसा आधा खून खोरा मँ धरेस। अउर दूसर आधा खून वेदी प उडैरेस।\*

7<sup>मूसा</sup> चाम पत्तर प लिखा भवा करार क पड़ेस। मूसा करार क एँह बरे पढ़ेस कि सब लोग ओका सुन सकइँ। अउ लोग कहेन, “हम लोग ओन नेम क सुन लिहेन ह जेका यहोवा हम पचन्क दिहेस ह। अउर हम सब मनइयन ओनका मानइ क बचन देत अही।”

8<sup>तब</sup> मूसा खून स भरा खोरा बलि स लिहेस अउ ओका लोगन प छिछकेस। उ कहेस, “इ खून बतावत ह कि यहोवा तोहरे संग अउ ओन सबइ बातन क लगइ क जउन हम पचन्क कहेन।”

9<sup>तबहिं</sup> मूसा, हारून, नदब, अबिहु अउ इस्त्राएल क सत्तर पुरनियन नेता लोग पहाड़े प चढ़ेन।

10<sup>इ</sup> मनइयन इस्त्राएल क यहोवा क पहाड़े प ठाड़ भवा लखेन। यहोवा कउनो अइसे अधार प ठाड़ रहेन जउन नीलमणि जइसा देखात रहा। अइसा निर्मल जइसा अकास। 11<sup>इस्त्राएल</sup> क सबहिं नेता लोग यहोवा क लखेन, मुला यहोवा ओनका बर्बाद नाहीं किहेन।\* उ पचे साथ खाएन अउ पिएन।

### मूसा परमेस्सर क नेम पावइ जात ह

12<sup>यहोवा</sup> मूसा स कहेस, “मोरे लगे पहाड़े प आवा। मई आपन उपदेसन अउ आदेसन क दुइ ठु समथर पाथरे क पाटी प लिखे अही। इ आदेसन मनई बरे अहईँ। मई इ पाथर क समथर पाटी क तोहका देइहउँ।”

13<sup>एँह</sup> बरे मूसा अउ ओकर मददगार यहोसू यहोवा क पहाड़े ताई गएन। 14<sup>मूसा</sup> चुने भए नेतन स कहेस, “हम दुइनउँ क हिअँई जोहा। हम तोहरे लगे लउटब। जब तलक मई गैर हाजिर रहब, हारून अउ हूर तोहार सासकन रइहीं। ओनके लगे जा जदि कउनो क समस्या होइ।”

### मूसा क यहोवा स मिलन

15<sup>तब</sup> मूसा पहाड़े प चढ़ा। अउर बादर पहाड़ क ढाँपि लिहेस। 16<sup>परमेस्सर</sup> क महिमा सीनै पहाड़े प उतरी। बादर छः दिना तलक पहाड़े क मूँदै रहा। सतएँ दिन यहोवा, बादर मँ, स मूसा स बोला। 17<sup>इस्त्राएल</sup> क लोग यहोवा क महिमा

**मूसा ... उडैरेस** खून यहोवा अउ मनइयन क बीच करार क पक्का करइ बरे बइपरत रहेन। खून वेदी पर इ देखावइ बरे उडैरा जात रहा कि यहोवा करार मँ साथे बा।

**यहोवा क ... किहेन** बाइबिल कहत ह कि मनई परमेस्सर क नाहीं लख सकलेन। उ निराकार अहइ। मुला यहोवा चाहत रहा कि इ नेता ओका कउनो खास तरह स लखि सकइँ। तउ यहोवा ओनका आपन दरसन करइ दिहस।

क लख सकत रहेन। इ पहाड़े क चोटी प भरभराइ क बरत आगी क नाई रहा।

18<sup>तबहिं</sup> मूसा बदरे मँ थोड़ा ऊपर पहाड़े प चढ़ा। मूसा पहाड़े पर चालीस दिन अउ चालीस रात रहा।

### पवित्तर वस्तु बरे भेंट

**25** यहोवा मूसा स कहेस, 2<sup>“इस्त्राएल</sup> क लोगन स मोरे बरे भेंट लइ आवइ क कहा। हर मनई अपने मनवा मँ इ ठान लेइ चाही जउन उ मोका देइ चाहत ह। इ भेंटन क मोरे बरे मंजूर कइ ल्या। 3<sup>इ</sup> चीजन्क पत्री इ अहइ जेनेँका तू मनइयन स अंगीकार करब्या: सोना, चाँदी, काँसा 4<sup>नीला</sup> बैगनी अउ लाल धागा, सुन्नर रेसमी कपड़ा, बोकरी क बार, 5<sup>भेड़ी</sup> क लाल रंगे क खाल, नरम खाल, बबुरे क काठ, 6<sup>दिया</sup> मँ बारइ क तेल: अभिसेक क तेल, धूपे बरे महकउआ मसाला, भीनी सुगन्धे बरे मसाला। 7<sup>सुलेमानी</sup> पाथर अउ दूसर कीमती रतन जउन याजक क एपोद मँ जड़ दीन्ह जाईँ अउ निआव क थइला।”

### पवित्तर तम्बू

8<sup>यहोवा</sup> इहउ कहेस, “मनई मोरे बरे एक पवित्तर स्थल बनइहीं। तबहिं मई ओनके संग रहि सकब। 9<sup>मइ</sup> तोहका देखाउब कि पवित्तर तम्बू कइसा देखाइ देइ चाही। जइसा मई देखाएउँ ह हर एक चीज ठीक वइसा ही होइ चाही।

### करार क संदूख

10<sup>“बबुरे</sup> क काठ बइपरा अउ एक खास संदूख बनावा। इ पवित्तर संदूख क ढाई हाथ लम्बा डेढ़ हाथ चौड़ा अउ डेढ़ हाथ ऊँचा होइ चाही। 11<sup>संदूखे</sup> क भीतर अउ बाहर पत्तर चढ़ावइ बरे सुद्ध सोना लगावा। संदूखे क कोना क सोना स मढ़ा। 12<sup>संदूखे</sup> क उठावइ बरे सोना क चार कड़ा बनवा। सोने क कड़ा क चारिहुँ कोना प लगावा। दुइनउँ कइँती दुइ दुइ कड़ा होईँ। 13<sup>तब</sup> संदूखे क ढोवइ बरे खम्भा बनावा। इ खम्भन बबुरे क काठे क होइ अउ सोना स जरूर जड़ी होईँ चाही। 14<sup>संदूखे</sup> क बगल क कोन प लगा भवा कड़ा मँ इ खम्भन क घुसेइ द्या। इ खम्भन क बइपरब संदूखे क ढोवइ बरे करा। 15<sup>इ</sup> खम्भा संदूखे क कड़न मँ सदा छुई रहइ चाही। खम्भन क बाहेर जिन खईँचा।

16<sup>यहोवा</sup> कहेस, “मई तोहका करार देत अही।” एँका करार क संदूखे मँ धरा। 17<sup>तब</sup> एक ढकना\* बनावा। एका सुद्ध सोने क बनावा। एका ढाई हाथ लम्बा अउ डेढ़ हाथ चौड़ा बनावा। 18<sup>“तब</sup> दुइ करूब सरगदूतन क बनावा अउ ओनका ढकना क दुइनउँ सिरा प लगावा। इ सरगदूत क बनवइ बरे सोना क पत्तर बइपरा। 19<sup>एक</sup> करूब क ढकना क सिरे प लगावा अउ दूसर क दुसरे सिरे प। एक टूकड़ा बनावइ बरे करूब सरगदूत क ढकना क संग जोइ द्या। 20<sup>करूब</sup> क पाखा ढकना प उपर की ओर पसरा होइ होइ चाही। करूब क मुँहना ढकना कइँती लखत होइ करूब एक दूसरे क आमना सामना होइ चाही।

**एक ढकना** एका “छिमा क पीढ़ा” कहा जात ह। हिवू सब्द क अरथ होइ सकत ह। “उ ठउर जहाँ पाप माफ कीन्ह जात हीं।”

21“मई तोहका करार देब। उ करार क संदूखे में धरा अउ खास ढकना स संदूखे क बंद करा। 22जब मई तू पचन स भेंटब तबहिं मई करूब सरगदूतन क बीच स बात करब, जउन करार क संदूख खास ढकना प अहइ। मई आपन सबहिं आदेसन क इस्त्राएल क मनइयन क उहइ ठउरे स देब।

### खास रोटी क मेज

23“बबुरे क काठे क एक ठु मेज बनावा। मेज दुइ हाथ लम्बा, एक हाथ चौड़ा अउ डेढ़ हाथ ऊँचा होइ चाही। 24मेज क निखालिस सोना स मढ़ द्या अउ ओकरे चारिहुँ कइँती सोना क झालर लगावा। 25तब चार अँगली चौड़ी सोना क पट्टी मेज क चारिहुँ कइँती ठोक द्या। अउ पट्टी क चारिहुँ कइँती सोना क झालर लगावा। 26तब सोना क चार कड़ा बनावा अउ मेज क चारिहुँ कोने प ओकर पावा प लगावा। 27कड़ा पट्टा क लगे होइ चाही। इ कड़न में मेज क ढोवइ बरे खम्भन फँसाइ दीन्ह जइहीं। 28खम्भन बनवइ बरे बबुरे क काठ बइपरा अउ ओका सोना स मढ़ि द्या। खम्भन मेज क ढोवइ बरे अहइँ। 29हर परात, चम्मच, सुराही अउ खोराइ सब चीज निखालिस सोना क बनावा। सुराही अउ खोरा पिअइ क भेंट उडेलइ बरे बइपरा जइहीं। 30खास रोटी मोरे समन्वा मेज प धरा। इ सदा मोरे समन्वा हुवाँ रहइ चाही।

### डीबट

31तब तोहका एक डीबट बनवावइ चाही। सुद्ध सोना बइपरा। एकर पेंदी अउ चपटी नोक बनावइ बरे निखालिस सोना क पत्तर बइपरा। एकर फूल, कली अउर पंखड़ी निखालिस सोना क बनी होइ चाही। अउ इ सबहिं चीज डीबट में एक ठुकड़ा में होइ चाही।

32“डीबट क छः ठु डार होइ चाही। तीन डार एक कइँती अउ तीन डार दूसर कइँती होइ चाही। 33हर डारे प तीन ठु फूल होइ चाही। इ फूलन क बदाम क फूल क नाई कली अउ पंखड़ी जोरिंके बनावा। 34डीबट बरे चार ठु फूल बनवा। इ फूलन क बदामे क कली अउ पंखुड़ी क नाई बनावइ चाही। 35डीबटे प छः ठु डार होइ चाही-दुइ हींसा में दुइनउँ कइँती तीन तीन डार होइ चाही। तीनउँ जगहिया क नीचे जहाँ डार मिलत ह कली अउ पंखुड़ी क संग एक ठू फूल बनवा।

36“फूल अउ पंखुड़ी क संग समूचा डीबट निखालिस सोना स बनवई चाही। इ सबहिं डार अउ कली एक एकाई में निखालिस सोना क होइ चाही। 37तबहिं 7दिया डीबट प धरइ बरे बनावा। इ दिया डीबट क समन्वा क ठउरे प रोसनी देइहीं। 38दिया क झालर अउ थाली सबहिं निखालिस सोना क होइ चाही। 39पचहतर पौंड\* सुद्ध सोना क प्रयोग डीबट अउ एकरे साथे क सब चीज बनवइ में करा। 40धियान दइ क हर चीज ठीक-ठीक उहइ तरह स बनइ जाइ जइसा मई पहाड़े प तोहका देखावा ह।”

पचहतर पौण्ड लगभग 34 किलोग्राम या एक किवकार।

### पवित्तर तम्बू

26 परमेस्सर मूसा स कहेस, “पवित्तर तम्बू क दस पर्दा स बनावा। इ परदन क बढ़िया सनीवाला अउ नीला, लाल अउर बैगनी कपरा स बनावा। कउनो कुसल कारीगर क चाही कि उ करूब सरगदूत क पखना क संग परदन प कढ़ाई करइ। 2हर एक पर्दा अट्ठाइस हाथ लम्बा अउ चार हाथ चौड़ा होइ चाही। अउर हर कनात क नाप बराबर होइ चाही। 3सब परदन क दुइ समूह में सिआ। पहिले हींसा में पाँच परदन क एक संग अउ दूसर हींसा में पाँच परदन क एक संग सी द्या। 4आखिरी क पर्दा क सिरे क नीचे फन्दा बनावा। इ फन्दन क बनवइ बरे नीला कपरा लगावा। दुसरे समूह क परदन क आखरी पर्दा में भी उहइ काम करा। 5पहिले अउ दुसरे समूह क परदन क आखिरी पर्दा में पचास फन्दा बनवा। फन्दा एक दुसरे फन्दा क आमने सामने होइ चाही। 6तब पचास सोना क हुक परदन क एक संग मिलवइ बरे बनावा। इ परदन क एक दुसरे क संग हुक स इ तरह जोरिहीं कि पुरा पवित्तर तम्बू एक ही होइ जाइ।

7“तब तू दूसर तम्बू बनउव्या जउन पवित्तर तम्बू क ढाकि लेइ। इ तम्बू बरे ग्यारह परदन बइपरा। इ परदन क बोकरी क बारे स बनावा। 8इ सबहिं पर्दा नाप में एक बराबर होइ चाही। उ सबहिं तीस हाथ लंबा चार हाथ चौड़ा होइ चाही। 9पाँच ठु पर्दे क एक समूह में जुड़वावा अउ फुन दुसर छः पर्दे क एक दुसर समूह में जुड़वावा। छठे पर्दे क आधे हींसा क तम्बू क समन्वा ऊपर मोड़ि द्या। 10एक समूह क आखिरी पर्दा क छोर प पचास फन्दा बनवा अइसा ही दूसरे समूह क आखिरी पर्दा क छोरा प भी पचास फन्दा बनावा। 11तब काँसे क पचास फन्दा बनवा। इ काँसे क फन्दा क प्रयोग तम्बू क परदन क एक साथे जोरइ बरे करा। इ सबइ तम्बू क एक संग जोरइ क एक एकाई क रूप में बनिहीं। 12तम्बू क आखरी पर्दे क आधा हींसा तम्बू क पीछे क किनारे लटका रही। 13तम्बू क किनारन में इ तम्बू क पर्दा पवित्तर तम्बू क पेंदी स एक हाथ नीचे लटकत रही। तउ इ तम्बू पवित्तर तम्बू क पूरी तरह ढाँकि लेइ। 14बाहेर क तम्बू क ढाकइ बरे दुइ पर्दा बनवा। एक पर्दा लाल रंग स रंगी भइ भेड़ा क खाल स बनइ चाही अउ दूसर पर्दा उतम खाल सुइसों क बनी होइ चाही।

15“पवित्तर तम्बू क सहारा देइ बरे बबुरे क काठ क तखता क प्रयोग करा। 16तखता दस हाथ ऊँचा अउ डेढ़ हाथ चौड़ा होइ चाही। 17हर तखता क तले में ओनका जोड़इ बरे एक दूसरे प धरइ बरे दुइ खूँटी होइ चाही। पवित्तर तम्बू क हर एक तखता बरे इहइ करा। 18पवित्तर तम्बू क दक्खिन कइँती बीस तखता क प्रयोग करा। 19बीस तखता बरे चाँदी क चालीस आधार बनावा। हर एक ढाँचा नीचे चाँदी क दुइ आधार एका दुइ खम्भा बरे होइ चाही। 20पवित्तर तम्बू क उत्तरी हींसा बरे बीस तखता अउर ल्या। 21इ तखता बरे चालीस कुर्सियन क बनवावा हर एक तखता क नीचे बरे दुइ आधार होई चाही। 22तोहका पवित्तर तम्बू क पच्छिउँ छे बरे छः अउर तखता लइ चाही। 23पवित्तर तम्बू क पाछे कोना बरे दुइ तखता ल्या। 24कोने क दुइनउँ तखता क नीचे एक साथ जोरि द्या। ऊपरी छल्ला दुइनउँ

तखतन क एक कइके जोड़ी। दुइनउ कोन बरे उहइ करा। 25इ तरह सब मिलिके आठ तु तखता पवित्तर तम्बू के पच्छिउँ छोर बरे होइहीं। हर तखता क नीचे दुइ कुर्सी होइस चाँदी क सोलह कुर्सी होइहीं।

26“बबुरे क काठ बड़परा अउ पवित्तर तम्बू क तखता बरे बेंड़ा बनवा। पवित्तर तम्बू क एक कइँती क हींसा क तखता बरे पाँच बेड़ा बनवा। 27अउ पवित्तर तम्बू क दूसर हींसा क तखता बरे पाँच अउर बेड़ा होइहीं। अउर पवित्तर तम्बू क पाछे क तखता बरे पाँच बेड़ा होइहीं 28बीच क बेंड़ा फरेम एक सिरा स दूसर सिरा तलक पहोंचइ चाही।

29“तखतन क सोने स मढ़ा। अउ तखतन क बेड़न क फँसावइ बरे छल्ला बनवा। इ छल्ला भी सोने क होइ चाही। बेड़े क सोने स मढ़ा। 30पवित्तर तम्बू क तू अहइ तरह क बनवा जइसा मई तोहका पहाड़े प देखाए रहेउँ।

### पवित्तर तम्बू क भीतर

31“बढ़िया सनी क बड़परा अउ पवित्तर तम्बू क भीतर भाग बरे एक खास पर्दा बनावा। इ पर्दा क नीला, बैंगनी अउ लाल ओढ़ना स बनवा। करूब सरगदूत क तस्बीर कपरा में काढ़ा। 32बबुरे क लकड़ी क चार खंभा बनावा। खम्भन क सोने स मढ़ द्या। चारिहुँ खम्भन प सोने स बना हुकन लगावा। खम्भन की नीचे चाँदी क चार आधार लगावा। तउ सोने क हुक में पर्दा टाँगा। 33पर्दा क सोने क हुक क नीचे टाँगा, अउ करार क संदूखे क पर्दा क पाछे धरा। इ पर्दा पवित्तर ठउर क सब ते जिआदा पवित्तर ठउर क अलगाइ देइ। 34सबते जिआदा पवित्तर ठउर में करार क संदूखे प ढकना राखा।

35“पवित्तर ठउर में पर्दा क दुरसे कइँती खास मेज क धरा। मेज पवित्तर तम्बू क उत्तर में होइ चाही। तब डीबट क पवित्तर तम्बू क दखिन में राखा। डीबट मेज क ठीक समन्वा होइ।

### पवितर तम्बू क बड़का दुआर

36“तब पवित्तर तम्बू क दुआर बरे एक पर्दा बनावा। इ पर्दा क बनवइ बरे नीला, बैंगनी, लाल उत्तिम सन क कपरा क बड़परा। अउर कपरा में तस्बीर क बुन द्या। 37दुआरे क पर्दा बरे सोना क हुक बनवा। सोना स मढ़ा बबुरे क काठे क पाँच खम्भा बनावा। अउ पाँचउ खम्भा बरे काँसे क पाँच कुर्सी ढलवाइ ल्या।”

### होम बलि बरे वेदी

27 यहोवा मूसा स कहेस, “बबुरे क काठ बड़परा अउ एक वेदी बनावा। इ वेदी चउकोर होइ चाही। इ पाँच हाथ लम्बी अउ पाँच हाथ चउड़ी अउर तीन हाथ ऊँच होइ चाही। 2वेदी क चारिहुँ कोने प सींग बनावा। हर एक सींग क एकरे कोने स अइसा जोड़ा कि सबहिं कुछू एक होइ जाई। तबहिं वेदी क काँसे स मढ़ि द्या।

3“वेदी प काम आवइवाला सबहिं औजार अउ डेकची क काँसा स बनावा। काँसे क बासन, फरूही, खोरा, काँटा अउ तसला बनावा। इ में स कुछू वेदी स राखी बहावइ में बड़परी

जइहीं। 4“वेदी बरे एक झंझरी बनावा। इ काँसा झंझरी जाल क नाई बनई जाइ। झंझरी क चारिहुँ कोने प काँसे क छल्ला बनावा। 5झंझरी क वेदी क तले कंगनी क नीचे धरा। झंझरी नीचे से वेदी क आधा हींसा में बीच तलक होइ चाही।

6“वेदी बरे बबुरे क काठ क बल्ला बनावा अउ ओनका काँसा स मढ़ा। 7वेदी क दुइनउँ ओर लगा भवा छल्ला में इ खम्भन क नाइ द्या। इ खम्भन क वेदी ढोवइ बरे बड़परा। 8वेदी क भितरे स फोफ्फल संदूख क नाई बनवा अउ एकर अगली बगली लकड़ी क पट्टा स बनावा। वेदी वइसइ ही बनावा जइसा मई तोहका पहाड़े प देखाएउँ ह।

### पवित्तर तम्बू क चारिहुँ कइँती आँगन

9“पवित्तर तम्बू बरे एक आँगन बनावा। परदन क दक्खिन कइँती एक सौ हाथ लम्बी होइ चाही। इ परदन क उत्तिम सनी क रेसा क होइ चाही। 10बीस खम्भा अउ बीस काँसे क कुर्सी क बनावा। खम्भन क हुक अउ पर्दा क छड़ चाँदी क बनइ चाही। 11उत्तर कइँती परदन क दीवार एक सौ हाथ लम्बी होइ चाही। एहमें बीस तु खम्भा अउर बीस काँसे क आधार होइ चाही। खम्भा क फन्दा अउ परदन क छड़ चाँदी क बनवइ चाही।

12“आँगन क पच्छिउँ कइँती परदन क दीवार होइ चाही जउन पचास हाथ लम्बी होइ चाही। हुवाँ उ दीवारे क दस खम्भा अउ दस आधार चाँदी क बना होइ चाहिए। 13आँगन क पूरब कइँती पचास हाथ लम्बाई होइ चाही। 14-15इ पूरब क सिरा अंगने में घुसइ क दुआर होइ। प्रवेस दुआर क एक सिरा क पर्दा पन्द्रह हाथ लम्बी होइ चाही। उ कइँती तीन खम्भा अउर तीन तु आधार होइ चाही।

16“एक पर्दा बीस हाथ लम्बे आँगन क प्रवेस दुआर ढाकइ बरे बनावा। इ पर्दा क सनी क उत्तिम रेस अउ नीला, लाल अउ बैंगनी कपरा स बनावा। इ पर्दे प नकसा क काढ़ि द्या। उ पर्दा बरे चार खम्भा अउ चार आधार होइ चाही। 17अंगने क चारिहुँ कइँती क सबहिं खम्भन चाँदी क छड़े स जोरी जाइ चाही। खम्भन क हुक चाँदी क चाँदी स बनवइ चाही अउ खम्भा क आधार काँसा क होइ चाही। 18आँगन एक सौ हाथ लम्बा अउ पचास हाथ चौड़ा होइ चाही। अंगने क चारिहुँ कइँती क परदन क दीवार पाँच हाथ ऊँच होइ चाही। पर्दा सनी क उत्तिम रेसा क बनवा होइ चाही। सबहिं खम्भन क तले आधार काँसा क होइ चाही। 19सबहिं औजार पवित्तर तम्बू क खूँटिन, अउ पवित्तर तम्बू में लाग भइ हर एक चीज काँसा क ही बनइ चाही। अउर अंगने क चारिहुँ कइँती क पर्दा बरे खूँटिन काँसा क ही बनई होइ चाही।

### दिया बरे तेल

20“इस्त्राएल क मनइयन क सब ते बढ़िया तेल लइ आवइ क हुकुम द्या। इ तेले क बड़परब हर साँझि क जरइवाला दिया बरे करा। 21हारून अउ ओकर बेटवा दिया क रोसन करइ क काम संभरिहीं अउर एकर धियान रखिहीं कि इ ठउरे प यहोवा क समन्वा दिया साँझि स भिन्सारे

तलक बराबर जरत रइहीं। उ पचे बइठका वाली तम्बू क पहिले कमरा में जइहीं। इ कमरा करार क संदूखे बाला कमरा क बाहेर अहइ जउन उ पर्दा क पीछे अहइ जउन दुइनउँ कमरन क अलगावत ह। इस्त्राएल क मनइयन अउ ओनकइ औलाद इ नेम क हमेसा मानत रइहीं।”

### याजकन क वस्त्र

**28** यहोवा मूसा स कहेस, “आपन भाई हारून अउ ओकर बेटवन नादाब, अबीहू, एलिआजार अउ ईतामार क इस्त्राएल क मनइयन में स अपने लगे आवइ क कहा। इ मनइयन मोर सेवा याजकन क रूप में करिहीं।

2“आपन भाई हारून बरे खास वस्त्र बनावा। इ वस्त्र ओका मान अउ सम्मान अउर सान बरे अहइ। उलोगन में अइसे कुसल कारीगर अहई जउन इ वस्त्र बनइ सकत हीं। मई इन मनइयन क खास बुद्धि दीन्ह ह। ओन मनइयन स हारून बरे वस्त्र बनवइ क कहा। इ वस्त्र बतइहीं कि उ मोर सेवा खास रूप स करत अहई। उ मोर सेवा याजक क रूप में करत अहइ। 4इ उहइ वस्त्र अहई जेका कारीगरन क बनवइ: “निआव क थइला”, एपोद, एक नीला रंग क लबादा एक सफेद बुना भवा चोगा, एक पगड़ी अउ एक कमर बंद “कुसल मनइयन क इ खास वस्त्र तोहार भाई हारून अउ ओकरे बेटवन बरे जरूर बनवइ चाही। तबहि हारून अउ ओकर बेटवा मोर सेवा याजकन क रूप में कइ सकत हीं। 5मनइयन स कहा कि उ पचे सनी क उत्तिम रेसा अउ नीला, लाल अउ बैगनी कपरा क बइपरई।

### एपोद अउ कमरबंद

6“एपोद बनवइ बरे सुनहरी धागा, सनी क उत्तिम रेसा अउ नीला, लाल अउ बैगनी कपरा पहिरा। इ खास एपोद क माहिर कारीगर बनइहीं। 7एपोद क हर एक काँधे प पट्टी लाग होइ। काँधे क इ पट्टियन एपोद क दुइनउँ कोने प बंधी होइहीं।

8“कारीगर बड़ी, हुसियारी स एपोद बरे एक कमरबंद बुनिहीं। इ उहइ रूप स बनवाइ चाही जउन रूप में एपोद। सुनहरा, नीला, बैगनी अउ लाल धागा अउर उत्तम सनी बइपरा।

9“तोहका दुइ गोमेद लेइ चाही। इन नगन प इस्त्राएल क बारहु बेटवन क नाउँ खोवा। 10छः नाउँ एक नग प अउ छः नाउँ दूसर नग प खोवइ चाही। नाउँ क सब ते बइका अउ सब ते छोटका बेटवा क हिंसाब स लिखा। 11इस्त्राएल क बेटवन क नाउँ इ नगन प खोवावा। इ उहइ तरह करा जउने तरह उ कुसल दस्तकार मनई जउन मोहर बनावत ह, 12तब एपोद क दुइ काँधे क पट्टी प इ दुइ नगन क लगावा। हारून यहोवा क समन्वा जब ठाड़ होइ, उ इ खास एपोद क जउन पइ इस्त्राएल क बेटवन क नाउँवाला दुइनउँ नग यादगारी क तौर पइ पहिरी। 13बढ़िया सोना ही नगन क एपोद प लागइ बरे बइपरा। 14गुँथा भवा धागा क तरह निखालिस सोना क जंजीर बटि द्या। सोना क अइसी दुइ जंजीर बनावा अउर सोना क जड़न क संग एनका बाँधि द्या।

### निआव क थइला

15“बइका याजक बरे निआव क थइला बनावा। कुसल कारीगर इ निआव क थइला क वइसा इ बनावई जइसा एपोद बनए रहेन। उ पचे सोने क तार, सनी क उत्तिम रेसा अउ नीला, लाल अउ बैगनी कपड़ा क बइपरा। 16एका चौकोर बनवइ बरे दोहर देइ चाही। निआव क थैला एक बीत्ता लम्बा अउ एक बीत्ता चौड़ा होइ चाही। 17निआव क थइला प सुन्नर रतन क चार पाँति जड़ा। रतन क पहली पाँति में रूबी, पुखराज अउ मरकत मणि होइ चाही। 18दूसर पाँति में फीरोज, नीलम अउ हीरा होइ चाही। 19तीसर पाँति में सूर्यकान्त, अकीक अउ याकूत लगइ चाही। 20चउथी पाँति में लहसुनिया, गोमेदक अउ कपिस मणि लगावइ चाही। निआव क थैला प एनका लगावइ बरे सोना में जड़ द्या। 21निआव क थइला प बारह रतन होइहीं। इस्त्राएल क बारहु बेटवन क नाउँ उ प नुमाइंदी होइ चाही। एक एक नगे प इस्त्राएल क बेटवन में स एक एक नाउँ लिखा। हर एक नगे प एनकइ नाउँ उहइ तरह लिखा जइसे माहिर कारीगर एक मुहर बनावत ह।

22“निआवा क थइला बरे निखालिस सोना क जंजीर बनावा। इ जंजीरियन बरी भइ लसुरी क नाई होइहीं। 23दुइ सोना क छल्ला बनावा अउ एनका निआव क थइला प दुइनउँ कोने प लगावा। 24दुइनउँ सोना क जंजीरियन क निआव क थइला में दुइनउँ कोने में लगावा। 25सोने क जंजीर क दुइ सिरा क दुइनउँ खाना में जड़वाइ द्या इ एपोद क काँधे क दुइनउँ टुकरन क समन्वा में कसा रहई। 26दुइ ठु अउर सोना क छल्ला बनावा अउ ओनका निआव क थइला क दुइनउँ कोने प लगावा। इ निआव क थइला क भीतर क हींसा एपोद क नगिचे होइ। 27दुइ अउर सोना क छल्ला बनावा अउ ओका काँधे क पाटी क तले एपोद क समन्वा लगावा। सोना क छल्ला क एपोद क बुना भवा पाटी क ऊपर लगावा। 28निआव क थइला क छल्ला क एपोद क छल्लन स जोड़ा बरे नीला फीता बाँधा। इ तरह निआव क थइला बुना भवा पाटी क लगे लगा होइ अउर एपोद स अलग न होइ।

29“हारून जब पवित्तर ठउर में घुसरत ह, ओका निआव क थइला पहिरे रहइ चाही। इ तरह इस्त्राएल क बारहु बेटवन क नाउँ ओकरे हिरदय प रइहीं अउर इ हमेसा यहोवा क ओन लोशन क याद दियाई जात रही। 30ऊरीम अउ तुम्मीम क निआव क थइले में रखा। जब हारून यहोवा क समन्वा जाइ तब उ सबइ ओका याद होइहीं। एह बरे हारून जब यहोवा क समन्वा होइ तउ उ इस्त्राएल क मनइयन क निआव करइ क साधन हमेसा अपने साथ रखी।

### याजकन क दूसर वस्त्र

31“एपोद क नीचे पहिरइ क एक नीला एपोद बनावा। 32मूँड डवइ बरे इ चोगा क बीचोबीच एक छेद बनावा। इ छेदे क चारिहुँ कइँती गोटा लगावा। इ गोटा काँलर क नाई होइ अउ फाटइ स रोकी। 33नीला, लाल अउ बैगनी कपरा क अनार बनावा। इ अनार क चोगा क नीचे क सिरा क चारिहुँ कइँती लटकावा। अउ अनार क बीचोबीच सोना क

घंटी लगवावा। 34इ तरह चोगा क नीचे सिरन में चारिहूँ कइँती सोना क घंटी अउ अनार होइहीं जउन इहइ तरह होइ कि दुइ अनार क बीचोबीच एक सोना क घंटी होइ। 35हारून इ चोगा क पहिरी जब उ याजक क रूप में यहोवा क सेवा करी अउ यहोवा क समन्वा पवित्तर ठउर में जाइ, तब इ घंटिन बाजै लगिहीं। जब उ पवित्तर ठउर तजि देइ तब इ घंटिन बाजै लगिहीं। इ तरह हारून न मरी।

36“निखालिस सोना क धारी बनावा। सोना प उहइ तरह सब्द खोदा जइसे मनइयन मुहर बनावत हीं। इ सब्दन क लिखा, “यहोवा बरे पवित्तर”। 37सोना क इ धारी क नीला फीता स कस द्या। पगड़ी क चारिहूँ कइँती नीला फीता बाँधा। सोना क धारी क पगड़ी क समन्वा होइ चाही। 38हारून आपन कपार प इ का बाँधी। हारून जब जब यहोवा क समन्वा जाइ हमेसा इ पहिरे रही जेहसे यहोवा मनइयन क भेंटे क कबूल कइ लेइ। इ तरह स हारून इस्त्राएल क लोगन क अपराध क सहन करिहीं जदि उ पचे परमेस्सर क गलत रूप में भेंट दिहे अहइँ या ओकर भेंट में कउनो खराबी रही अहइ।

39“सफेद लबादा बुना बरे उत्तिम सनी क बइपरा अउ पगड़ी बरे उत्तिम सनी क बइपरा। बुना भवा पाटी पइँ मँ नकसा काढ़ा भवा होइ चाही। 40हारून क बेटवन बरे कोट, कमरबंद अउ पगड़ी बनावा। इ ओनका मान सम्मान देइहीं। 41इ पोसाक आपन भाई हारून अउ ओकर बेटवन क पहिरावा। ओकरे पाछे जइतून क तेल ओनके मूँडे प इ देखौवइ बरे नावा कि उ पचे याजकन अहइँ। इ ओनका पवित्तर बनई। तबहिँ उ पचे मोर सेवा याजकन क रूप में करिहीं।

42“सनी क उत्तिम रेसा क जौंधिया वगैरह बनवावा। इ नीचे क पहिरइ क कपरा करिहाउँ स जौँध तलक ढाँकिही। 43हारून अउ ओकर बेटवन क इ कपसन क पहिरइ चाही जब कबहुँ उ पचे बइठका क तम्बू में जाईं। ओनका इहइँ कपसन क पहिरइ चाही जब कबहुँ उ पचे पवित्तर ठउर में याजक क तरह सेवा खातिर वेदी क नगिचे आवईं। उ पचे इ कपसन क जरूर पहिर चाही ताकि उ पचे अपराधी नाहीं होइ अउर नाहीं मरइ। इ अइसा नेम होइ चाही जउन हारून अउ ओकरे पाछे ओकरे बंस क मनइयन बरे हमेसा बना रही।”

### याजकन क तइनात करइ क संस्कार

**29** तब यहोवा मूसा स कहैस, “अब मईँ तोहका बताउब कि इ देखावइ बरे तोहका का करइ चाही कि हारून अउ ओकर बेटवा पवित्तर याजकन क नाईँ खास तरह स मोर सेवा करत हीं। एक बे दोखे क बछवा अउ दुइ बे दोख क बच्चा भेड़ा लइ आवा। 2जेहमाँ खमीर न होइ उ बारीक गोहूँ क आटा ल्या अउ रोटी बनवा। अउर इस तेले से सनी केकन अउ तेले स लगा हुवा छोटा पातर केकन भी बनावा। 3इ रोटिन्क अउ केकन क एक डलिया में धरा अउ फिन इ डलिया क हारून अउ ओकरे बेटवन क द्या। ओनका बैल अउ दुइनउँ भेड़ा भी द्या।

4“तब हारून अउ ओकर बेटवन क बइठकावालातम्बू क दुआर क समन्वा लइ आवा। तब ओनका पानी स नहवावा। 5हारून क खास पोसाक: जैसे कि सफेद चोगा, नीला चोगा जउन कि एपोद क संग पहिरावा जात ह पहिरावा। फिन ओह प निआव क थइला अउ एपोद बाँधा। एपोद क सजा भवा अउ बुना भवा पाटी क संग बाँध द्या। 6सर प साफा बाँधा अउ साफा क चारिहूँ कइँती मुकुट क धइ द्या। 7अउर जइतून क तेल ल्या अउ हारून क मूँडे प नाइ के अभिसेक करा। इ बताई कि हारून इ काम बरे चुना ग अहइ।

8“तब हारून क बेटवा क उ ठउरे प लइ आवा। अउर ओका सफेद बुना भवा लबादा पहिरावा। 9तब ओनके करिहाउँ क चारिहूँ कइँती कमरबंद बाँधा। ओनका मूँडे प धरइ क खास टोपी द्या। उ समइ उ पचे याजकन क रूप में बहाल होइहीं। उ पचे उ नेम क माफिक याजक होइहीं जउन हमेसा होइहीं। इहइँ ढंग अहइ कि जेहसे तू पचे हारून अउ ओकरे बेटवन क याजक बनउब्या।

10“तब बइठकावाली तम्बू क समन्वा ठउरे प बछवा क लावा। हारून अउ ओकरे बेटवन क चाही कि उ पचे बछवा क मूँडे प हथवा धरईं। 11तब उ बछवा क बइठकावाली तम्बू क दुआरे प यहोवा क समन्वा एका मारि डवा। यहोवा एका लखी। 12तब बछवा क कछू खून ल्या अउ वेदी ताईँ जा। आपन अंगुरी स वेदी क सींगे प कछू खून लगावा। बचा भवा सारा खून नीचे वेदी क पैदी प डवा। 13तब बछवा क करेजा क चर्बी, दुइनउँ गुर्दे क चर्बी अउ ओकरे चारिहूँ कइँती चर्बी निकार ल्या। इ चर्बी क वेदी प जरावा। 14तब बछवा क गोस, ओकर खाल अउ ओकर दूसर अंगे क लइके आपन डेरा स बाहेर जा। इ सब चीजन्क डेरा क बाहेर जरावा। इ भेंट अहइ जउन याजकन क पाप दूर करइ बरे चढ़ाई जात ह।

15“तब हारून अउ ओकरे बेटवन स भेड़ा क मूँडे प हाथ धरइ क कहा। 16तब उ भेड़ा क मारि डवा अउ ओकर खून ल्या। खूने क वेदी क चारिहूँ कइँती छिरका। 17ओकर पाछे भेड़ा क कइउ हींसा में काटि डवा। भेड़ा क भितरे क सब अंगे क अउ गोड़ धोवा। इ चीजन्क क दूसर टूका क संग अउ भेड़ा क मूँडे क संग राखा। 18तब वेदी प इ सबन्क बारा। इ यहोवा बरे होम बलि अहइ अउर इ यहोवा बरे सोहाइ गंध, एक भेंट अहइ।

19“हारून अउ ओकरे बेटवन क दूसर भेड़ा प हाथ धरइ क कहा। 20उ भेड़ा क मारि डवा अउ ओकर खून ल्या। उ खून क हारून अउ ओकरे बेटवन क दाहिन काने क सिरा में लगवा। ओनकइ दाहिन हाथे क अगूठा पर भी कछू खून लगावा। अउ कछू खून ओनके दाहिन गोड़वा क बड़का अंगूठा प लगावा। तब वेदी क चारिहूँ कइँती खून बहाइ द्या।

21“तब वेदी प स कछू खून ल्या। इ खून क अभिसेक क तेले में मिलइ द्या अउर हारून अउ ओकरे ओढ़ना प, अउर ओकरे पूतन अउ ओनके ओढ़ना प छिरक्या। इ इ बताई कि हारून अउ ओकर पूत मोर सेवा खास तरह स करइ बरे पवित्तर किए गएन ह। अउर इ भी बताई कि

ओनकइ वस्त्र खास समझ्या प बइपरइ जात बरे पवित्तर कीन्ह गवा ह।

22“तब उ भेड़ा स चर्बी ल्या। (इ उहइ भेड़ा बा जेका हारून क महा याजक बनवइ बरे में पवित्तर करइ क समारोह में होइ।) पूँछे क चारिहुँ कइँती क चर्बी अउर उ चर्बी क ल्या जउन बदन क भीतरी हींसा क ढँकत ह। करेजा क ढकइवाली चर्बी क ल्या। दुइनउँ गुर्दे अउ ओह पइ क चर्बी अउर दाहिन जाँघ क ल्या। 23तब उ रोटी क डलिया ल्या जेहमाँ तू बे खमीरे क बनई रोटी धरे रह्या। इहइ डलिया बा जेका तोहका यहोवा क समन्वा राखइ क अहइ। एक रोटी सादी, एक तले स बनी केक अउर तले लगा भवा एक छोटा पातर केक क बाहेर निकारा। 24तब एनका हारून अउ ओकरे बेटवन क द्या: फुन ओनसे कहा कि यहोवा क समन्वा एनका उठावई। इ यहोवा क खास भेंट होइ।

25“तब इ चीजन क हारून अउ ओकरे बेटवन स ल्या अउ ओनका वेदी प भेड़ा क साथे धरा। तब हर चीजे क वेदि प जरावा। इ होमबलि बा। इ भेंट यहोवा बरे भेंट अहइ। अउर इ यहोवा बरे सोहाइ क गंध अहइ।

26“तब भेड़ा स छाती क निकारा। (इहइ भेड़ा अहइ जेका हारून क खास महा याजक बनवइ बरे पवित्तर कर क समारोह में बइपरा जाइ।) भेड़ा क छाती क लहराइ क भेंट क रूप में यहोवा क समन्वा लहराया। जनावरे क इ हींसा तोहार होइ। 27तब भेड़ा क छाती अउ जाँघ ल्या जउन हारून क महा याजक बनवइ बरे काम म आइ रहन। इ हींसा पवित्तर बनावे अउ एका हारून अउर ओकरे बेटवन क द्या। इ भेंट क खास हींसा होइ। 28इस्त्राएल क मनइयन इ अंगन क हारून अउ ओकरे बेटवन क सदा देइहीं। जब कबहुँ इस्त्राएल क मनइयन यहोवा बरे भेंट चढ़इहीं तउ इ हींसा हमेसा याजक लोगन क होइहीं। ओन लोगन क मेलबलि जउन कि यहोवा बरे अहइ, में स इ हींसा याजक लोगन क होई।

29“ओन खास वस्त्रन क बचाइके राखा जउन हारून बरे सिया रहेन। इ वस्त्रन ओकरे बेटा, पोता बरे होइहीं। उ पचे उ वस्त्रन क तन पहिरहीं जब याजकन चुना जइहीं। 30हारून क बेटवा ओकरे पाँछे अगवा महा याजक होइ। उ सात दिनों ताई उ वस्त्रन क पहिरे रही जबहिँ उ बइठकावाली तम्बू क पवित्तर ठउरे में सेवा करइ आइ।

31“उ भेड़ा क गोस पकावा जउन हारून क महा याजक बहाल करइ बरे प्रयोग में आवा रहा। उ गोस क पवित्तर ठउरे में पकावा। 32तब हारून अउ ओकर बेटवा बइठकावाली तम्बू क दुआरे प गोस खइहीं। अउर उ पचे डलिया क रोटी भी खइहीं। 33इ भेंट प्रायश्चित्तिकरण बरे तब भवा रहा जब उ पचन्क याजकन क रूप में सेवा करइ बरे पवित्रीकरण कइ जात रहेन। इ भेंट क ओनहीं क खाइ चाही। कउनो बिदेसी क इ पवित्तर भेंट क नाहीं खाइ चाही। 34अगर उ भेड़ा क गोस या रोटी भियान ताई काफी मात्रा में बचि जाइ तउ ओका जरइ देइ चाही। तोहका उ बचि भवा रोटी या गोस नाहीं खाइ चाही काहेकि इ पवित्तर अहइ।

35“वइसा ही करा जइसा मई तोहका हारून अउ ओकरे बेटवन बरे करइ क हुकुम दिहउँ ह। ओनका याजकन बहाल करइ बरे इ त्यौहार सात दिना तलक चली। 36सात दिनों तलक हर रोज एक साँड़ मारा। इ हारून अउ ओकरे बेटवन बरे पाप भेंट होइ। इ बलिदान क प्रयोग वेदी क सुद्ध करइ बरे किहा। अउर वेदी क पवित्तर बनावइ बरे जइतूने क तेल स एकर अभिसेक करा। 37तू सात दिना तलक वेदी क सुद्ध अउर पवित्तर रख्या। उ समझ्या वेदी सब ते जिआदा पवित्तर होइ। जउन चीज वेदी क छुइ उ पवित्तर होइ जाइ।

38“हर रोज वेदी प तोहका एक भेंट चढ़ावइ चाही। तोहका एक एक बरिस क दुइ भेड़ी क बचवन क भेंट चढ़ावइ चाही। 39एक भेड़ी क बच्चा भिंसारे अउ दूसर साँड़ क चढ़ावा। 40-41पहिला भेड़ी क साथ हीन क चउथाई दाखरस क पिअइ क भेंट क संग एपा क दसवाँ हींसा गँहू क महीन आटा जउन कि हीन क चउथाई तेल स मिला भवा अहइ चढ़ावा। 41अउर गोधरी क समइ में दूसर भेड़ी क बिहान क चढ़ावा क नाई एकर पिअइ क भेंट क संग चढ़ावा। इ यहोवा बरे एक भेंट एक सुहावना सुगंध अहइ।

42“तोहका इ चीजनक यहोवा क भंटे में रोज जरावइ चाही। इ यहोवा क समन्वा, बइठकावाली तम्बू क दुआरे करा। इ हमेसा करतइ रह्या। जब तू भेंट चढ़उब्या तब मई यहोवा, हुवाँ तोहसे मिलब अउ तोहसे बात करब। 43मई इस्त्राएल क मनइयन स उ ठउरे प मिलब। उ ठउर मोर महिमा स पवित्तर बन जाइ।

44“इ तरह मई बइठकावाली तम्बू क पवित्तर बनउव। अउर मई वेदी क पवित्तर बनउव। अउर मई हारून अउ ओकरे बेटवन क पवित्तर बनउव, जेहसे उ पचे मोर सेवा याजकन क तरह करि सकई। 45मई इस्त्राएल क मनइयन क संग रहब। मई ओनकइ परमेस्सर होब। 46मनइयन इ जनिहीं कि मई ओनकइ परमेस्सर यहोवा हउँ। उ पचे जनिहीं कि मई उहइ परमेस्सर अहउँ जउन ओनका मित्र स बाहेर लाएउँ ह तउ कि मई ओनके संग रहि सकत हउँ। मई ओनकइ परमेस्सर, यहोवा अहउँ।”

### धूप जरावइ क वेदी

**30** यहोवा मूसा स कहेस, “बबुरे क लकड़ी क एक वेदी बनावे। तू इ वेदी धूप बारइ बरे करब्या। 2तोहका वेदी क चौकोर एक हाथ लम्बा अउ एक हाथ चौड़ा बनवइ चाही। एकर ऊँचाइ दुइ हाथ होइ चाही। चारिहुँ कोने प सींग होइ चाही। इ सींगन क वेदी क साथ एक टुकड़ा बनइ देइ चाही। गेवेदी क ऊपर क सिरा अउ ओकर सबहिँ कइँती निखालिस सोना मढ़ा। वेदी क चारिहुँ कइँती सोना क पाटी लगावा। 4 पाटी क तले सोना क दुइ छल्ला होइ चाही। वेदी क दूसर कइँती सोना क दुइ छल्ला भी होइ चाही। इ छल्ला वेदी क ढोवइ में खम्भन फँसावइ खातिर होइहीं। छल्लन क वेदी क विपरीत कइँती लगावा। 5खम्भन क भी बबुरे क काठे क बनावे। खम्भन क सोना स मढ़ा। 6वेदी क खास पर्दा क समन्वा धरा। करार क संदूख उ पर्दा

क दूसर कईती अहइ। उ संदूखा क ढकइवाला ढकना क समन्वा वेदी होइ। इ उठइ ठउर अहइ जहाँ मई तोहसे मिलब।

7“हारून हर भिंसारे महकउआ धूप बत्ती वेदी प बारी। इ उ तब करी जब दियन क देखइ भालइ आइ। 8ओका संझा क देखइ भालइ आइ तब फुन धूप बत्ती बारइ चाही। जेहसे यहोवा क समन्वा हर रोज भिंसारे अउ सौंझ क धूप बत्ती बरत रहइ। 9इ वेदी क प्रयोग कउनो दूसर तरह क धूप या जरी भइ बलि बरे जिन किहा। इ वेदी क प्रयोग अन्न भेंट या पेय भेंट बरे जिन किहा।

10“बरिस मँ एक दाई हारून यहोवा क खास भेंट चढ़ाइ। हारून पाप भेंट क खून क प्रयोग मनइयन क पापन्क प्रायश्चित करइ बरे करी। हारून इ वेदी क सींगन प करी। इ दिन प्रायश्चित क दिन कहा जाइ। इ तोहार पीढ़ी दर पीढ़ी लागू होइ। इ यहोवा बरे बहोत ही खास दिन होइ।”

### मंदिर क कर

11यहोवा मूसा स कहेस, 12“इस्त्राएल क मनइयन क गना करा जेहसे तू जनब्या कि हुवाँ केतवा लोग अहई। जब कबहूँ इ कीन्ह जाइ हर एक मनई आपन जिन्गी बरे यहोवा क धन देइ। जदि हर मनई उ करी तउ मनइयन क संग कउनो भी डराउन घटना न होइ। 13हर मनई जेका गना जाए उ आधा सेकेल चाँदी जरूर देइ। (पवित्र ठउर क सेकेल क अनुसार आधा सेकेल अहइ।) एक सेकेल क वजन बीस गेरा होत ह। इ आधा सेकेल यहोवा बरे भेंट होइ। 14बीस बरिस या ओसे जिआदा जउन मनई होइ ओका गना जाइ। हर मनई जउन गना जाइ, यहोवा क भेंट देइ। 15धनी मनई आधा सेकेल स जिआदा न देइहीं। अउ गरीब मनई आधा सेकेल स कमती नाहीं देइहीं। सबहिं मनइयन यहोवा क बराबर बराबर भेंट देइहीं। इ तोहरे जिन्गी क कीमत होइ। 16इस्त्राएल क लोगन स इ धन बटोरा। बइठकावाले तम्बू मँ सेवकाइ करइ बरे इ धन क बइपरा। इ यहोवा क समन्वा आपन मनइयन क याद करइ, तोहार रूहन क प्रायश्चित करइ बरे एक यादगार होइ।”

### हाथ गोड़ धोवइ क हउद

17यहोवा मूसा स कहेस, 18“एक टु काँसा क सिलफची ल्या अउ एका काँसे क गोड़े प धरा। तू पचे एका धोवइ बरे बइपरा। सिलफची क बइठकावाली तम्बू अउ वेदी क बीच धरा। सिलफची मँ पानी भरा। 19हारून अउ ओकर बेटवन इ हउद क पानी स आपन गोड़ हाथ धोवई। 20हर दाई जब उ पचे बइठकावाले तम्बू मँ आवई तउ पानी स गोड़ हाथ जरूर धोवई। जब उ पचे वेदी क निअरे वेदी क नगिचे यहोवा क सेवा करइ अउ धूप बारइ आवई। 21उ पचे आपन गोड़ हाथ जरूर धोवइ ताकि उ पचे मरिहीं नाहीं। इ अइसा कनून होइ जउन हारून अउ ओकरे लोगन बरे हमेसा बना रही। इ कनून हारून अउ ओन सबहिं लोगन बरे बना रही जउन भविस्स मँ होइ।”

### अभिसेक क तेल

22तब यहोवा मूसा स कहेस, 23“बहोत बढिया मसाला लिआवा। बारह पौंड गीला लोहबान लिआवा अउ इ तउल क आधा (छः पौण्ड) महकउआ दालचीनी अउर बारह पौंड अगर, 24अउ बारह पौण्ड तेजपत्ता ल्या। एनका नापइ जोखइ बरे दफ्तर क नाप क प्रयोग करा। एक गौलन जइतून क तेल भी लिआवा।

25“गमकइवाला अभिसेक क तेल बनवइ बरे इ सबहिं चीजन्क जरूर मिलावइ चाही। 26बइठकावाले तम्बू अउ करार क संदूखे प इ तेल क छिरका। 27मेज अउ मेजे प धरी सबहिं तस्तरिन प तेल छिरका। इ तेल क सबहिं दिया अउर सब औजार प छिरका। इ तेल क धूप वेदी प डारि द्या। 28जरि क भेंट क वेदी अउ दूसर सबही बरतन प यहोवा बरे तेल नावा। खोरा अउ ओका आधार प तेल नावा अउ वेदी क पावा प तेल नावा। 29तू इ सब चीजन्क पवित्र बनउब्या। उ सबइ चिजियन यहोवा बरे खास होइहीं। कउनो भी चीज जउन एनका छुइ उ भी पवित्र होइ जइ।

30“हारून अउ ओनके पूतन प तेल छिरका। मोर खास तरह स सेवा करइ बरे इ ओनकइ पवित्र करिहीं। तबहिं इ सबइ मोरे सेवा याजकन क तरह करत हीं। 31“इस्त्राएल क मनइयन स कहा कि अभिसेक क तेल मोरे बरे हमेसा बहोत पवित्र अउ खास होइ। इ हमेसा तोहार सबही पीढ़ियन बरे सिरफ मोर सेवा बरे होइ चाही। 32मामूली सुगन्धि क तरह कउनो भी मनई इ तेल क न बइपरी। उ तरह कउनो सुगन्धि बनावा जउन तरह इ खास तेल बनाएस ह। इ खास अभिसेक क तेल पवित्र अहइ अउर इ तोहरे बरे बहोत खास अउ पवित्र होइ चाही। 33जदि कउनो इ पवित्र तेल क नाई सुगन्धि बनवइ अउर ओका कउनो विदेसी क देइ जउन कि याजक नाही ह तउ उ मनई क आपन लोगन स जरूर अलगाइ देइ चाही।”

### धूप

34तब यहोवा मूसा स कहेस, “इ महकउआ हवन सामग्री क ल्या: रसगंधा, कस्तूरी गंधिका, बिरोजा अउ निखालिस लोहबान। धियान राखा कि तोहरे लगे सामग्री क वजन बराबर होइ। 35सामग्री क महकउआ धूप बनावइ बरे आपुस मँ मिलावा। एका उहइ तरह करा जइसा सुगन्धि बनवइया करत ह। इ धूप मँ नोन भी मिलावा। इ एका सुद्ध अउ पवित्र बनइ। 36कछू धूप क तब तलक पीसा जब ताई ओकर बुकनी न होइ जाइ। बइठकावाले तम्बू मँ करार क संदूखे क समन्वा इ बुकनी क धरा। इ उहइ ठउर अहइ जहाँ मई तोहसे मिलब। 37तू पचन्क इ धूपे क चूरन क सिरिफ खास अवसर मँ ही बइपरइ चाही। तू पचन्क इ धूपे क चूरन क बइपरइ बरे सिरिफ खास तरह स यहोवा खातिर जराइ चाही। इ खास तरह स धूप बनावइ बरे दूसर धूपे बरे जिन करया। 38कउनो मनई आपन खातिर कछू अइसा धूप बनावा चाहत ह जेहसे उ इ सुगन्धि क मजा लइ सकइ। मुला अगर उ अइसा करत ह तउ ओका अपने मनइयन स अलग कइ दीन्ह जाइ।”

## बसलेल अउ ओहोलीआब

31 तबहिं यहोवा मूसा स कहेस, 2“मईं यहूदा क परिवार समूह स ऊर क बेटवा बसलेल क चुनेउँ ह। उरि हुर क बेटवा रहा। 3मईं बसलेल क परमेस्सर क आतिमा स भरि दिहस ह। मईं ओका हर दस्तकारी क काम मँ माहिर बनावत हउँ अउ गियान देत हउँ। 4बसलेल एक बहोत बड़िया सिल्पकार बा अउ उ सोना, चाँदी अउ काँसा क चीज बनइ सकत ह। 5बसलेल सुन्नर रतन क काटि अउर जड़ सकत ह। उ लकड़ी क भी काम कइ सकत ह। बसलेल हर किसिम क काम कइ सकत ह। 6मईं ओहोलीआब क भी ओकरे संग काम करइ क चुनेउँ ह। ओहोलीआब दन कबीले क आहोसामाक क बेटवा अहइ। मईं दूसर मजूरन क माहिर बनाएउँ ह ताकि उ पचे उ सबहिं चीजन्क बनइ सकिहीं जेका मईं तोहका करइ क हुकुम दिहेउँ ह।

7बइठकावाला तम्बू, करार क संदूख, संदूखे क ढकना।

8मेज अउर ओह पड़ सारी चीजन निखालिस सोना क डीबट अउर एकर सबहिं बर्तन, धूप बारइ क वेदी।

9भेंटे क जरावइ बरे वेदी अउ वेदी प बइपरइ क चीज, कटोरा अउ एकर नीचे क चीज।

10याजक हारून क खास वस्तर अउ ओकरे बेटवन बरे खास वस्तर, जबहिं उ पचे याजक क नाई सेवा करत पहिरहीं।

11अभिसेक क महकउआ तेल, अउर पवित्रर ठउर बरे महकत धूप।

इ कारीगरन्क इ सब चीजन्क वइसी बनवइ चाही जइसा मईं तोहका हुकुम-दिहेउँ ह।”

## सबित

12तबहिं यहोवा मूसा स कहेस, 13“इस्त्राएल क लोगन स इ कहा: ‘तू पचे मोरे खास अरामे क दिन बरे नेम क मानाई चाही। तू पचन्क इ जरूर करइ क चाही, काहेकि इ सब मोरे अउ तोहरे बीच सबहिं पीढ़ी बरे चीन्हा क रूप मँ रइहीं। एहसे तोहका पता लागी कि मईं, यहोवा तोहका आपन खास मनई बनए अही।

14“सबित क दिन क खास दिन बनाव। यदि कउनो एका दुसित करत ह तउ उ व्यक्ति क जरूर मार डावइ चाही। अगर कउनो सबित क दिन काम करत ह, तउ उ व्यक्ति क आपन लोगन मँ स जरूर अलग कइ दीन्ह जाइ। 15हफ्ता मँ दूसर छः दिन काम करइ बरे अहइँ। एकर मतलब खास दिन अराम करइ बरे अउर यहोवा क मान देइ बरे अहइ। अगर कउनो सबित क दिन काम करी उ जरूर ही मार दीन्ह जाइ। 16इस्त्राएल क लोगन सबित क दिना क खास दिन क रूप मँ जरूर याद रखइ चाही। उ एका हमेसा हमेसा मनावत रइहीं। इ मोरे अउ ओनके बीच करार अहइ जउन सदा बना रही। 17सबित क दिन मोरे अउ इस्त्राएल क बीच सदा चीन्हा क रूप मँ बना रही। यहोवा छः दिन काम किहेस अउ अकास अउ धरती क बनएस अउ सतएँ दिन उ आपन क अराम दिहेस अउ सुस्तान।”

18जउने समइ परमेस्सर मूसा स सीनै पहाड़े प बात करब बंद किहस, उ ओका करार लिखित भवा दुइ समथर पाथर दिहस। परमेस्सर आपन अंगुरियन क काम मँ लगाएस अउ पथरे प लिखेस।

## सोने क बछवा

32 लोगन निहारेन कि टेमें बीति गवा अहइ जब तलक मूसा पहाड़े प नाहीं गवा अउर हुआँ स वापिस नाहीं भवा। एँह बरे लोगन हारून क चारिहुँ कइँती एकठा भएन। उ पचे ओसे कहेन, “लखा। मूसा हम पचन्क मिस्त्र देस बाहेर निकारेस। मुला हम पचे इ नाहीं जानित कि ओकरे साथ का होइ गवा अहइ। एँह बरे कछू देवतन क हमरे अगवा चलइ अउ हमका अगवा लइ चलइवाला बनाव।”

2हारून मनइयन स कहेस, “आपन आपन मेहररूनन, बेटवन अउ बिटियन्के सोना क बाली मोरे लगे लइ आवा।”

3एँह बरे सब मनइयन कनवा क बालिन्क बटोरेन अउ उ सबइ ओनका हारून क लगे लइ आएन। 4हारून मनइयन स सोना लिहेस अउ बछवा क एक मूर्ति बनवइ बरे बइपरेस। हारून मूर्ति क तरासइ बरे एक छोनी क बइपरेस। तबहिं इ मूर्ति क सोना स ढाँक दिहेस।

तब लोगन स कहेस, “इस्त्राएल, तू पचन्क हिआँ उहइ देवता अहइँ जउन तू सबन्क मिस्त्र स बाहेर लइ आएन ह।”

5हारून इ चीजन्क लखेस। एँह बरे उ बछवा क समन्वा एक वेदी बनएस। तब हारून एलान किहेस, “भियान यहोवा क मान देइ बरे एक खास भोज होइ।”

6भियान भिन्सारे मनइयन हाली उठि गएन। उ पचे पसु क मारि डाएन अउ ओकर होमबलि अउ मेलबलि चढ़ाएन। मनइयन खाइ अउ पिअइ बरे बइठेन। तब उ पचे ठाड़ भएन अउ असभ्य भोज किहेन।

7उहइ समइया यहोवा मूसा स कहेस, “इ पहाड़े स पाले उतरा। तोहार लोगन यानी उ पचे, जेका तू मिस्त्र स लइ आया ह, भयंकर पाप किहे बाटेन। 8उ पचे जल्दी ही उ चीजन क करइ स मुकर गएन जेनका करइ क हुकुम मईं ओनका दिहेउँ ह। उ पचे टेघरा भवा सोना स आपन बरे एक बछवा बनएन। उ सबइ उ बछवा क निहुरत अहइँ अउ ओका बलि चढ़ावत अहइँ। लोगन कहेन ह, ‘इस्त्राएल, इ सबइ तोहार देवता अहइँ, जउन तोहका मिस्त्र स बाहेर लइ आएन ह।”

9यहोवा मूसा स कहेस, “मईं इ लोगन क लखेउँ ह, “मईं जानत अहउँ कि इ पचे बहोत हठी अहइँ। 10एँह बरे अब मोका ओन लोगन क बरबाद करइ द्या। तब मईं तोहरे बरे एक बड़का रास्ट बनउबा।”

11मुला मूसा यहोवा आपन परमेस्सर स पराथना किहेस अउ ओसे भीख माँगेस। मूसा कहेस, “हे यहोवा, तोहका आपन लोग पड़ काहे किरोध करइ चाही। आप आपन अपार सक्ती अउ आपन बल स इ पचन्क मिस्त्र स बाहेर लइ आया ह। 12मुला अगर आप आपन लोगन क नस्ट करब्या तब मिस्त्र क मनइ कहि सकत हीं ‘यहोवा आपन लोगन क संग बुरा करइ क चाल चलेन ह। इहइ कारण



अहइ कि एनका मिस्त्र स बाहेर निकारया ह। उ ओनका पहाड़े प मारि डावा चाहत रहा। उ आपन लोगन क धरती स मेटाई देइ चाहत ह। एह बरे आपन लोगन किरोध करइ बन्द करा। ओन लोगन क बर्बाद करइ क योजना छोड़ दिया। 13 आप आपन सेवा करइवालन इब्राहीम, इसहाक अउ याकूब क याद राखा। आप आपन नाउँ क उ पचन्क प्रतिग्या करइ बरे बइपरया तू कहया: 'मई तोहार लोगन क ओतना अनगिनत बनउब जेतना अकासे में तारा अहईं। मई तोहरे लोगन क इ समूची भुईया देब जेका मई ओनका बचन दिहउँ ह। इ भुईया हमेसा ओनकइ होइ।"

14 एह बरे यहोवा अफसोस किहेन। यहोवा उ नाहीं किहेन जउन उ कहे रहेन। उ लोगन क बरिबाद नाहीं किहेन।

15 तब मूसा पहाड़े स खाले उतरा। मूसा क लगे अगवा अउ पाछे लिखा भवा करार वाला दुइ समथर पाथर रहेन। 16 परमेस्सर खुद ओनें पाथरन क बनएस। परमेस्सर खुद उ आग्यन क पाथरे प खोदेस ह।

17 पहाड़े स तरखाले उतरत यहोसू मनइयन क हल्लागुल्ला सुनेस। यहोसू मूसा स कहेस, "खाले पड़ाव में लड़ाई क अवाज सुनाइ पड़त अहइ।"

18 मूसा जवाब दिहेस, "इ फउजे क जीत क सोर न बाटइ अउर न ही हार जाए प चिचिआइ क सोर। मई जउन अवाज अनकत अहउँ उ गाने का अवाज अहइ।"

19 जब मूसा डेरा क निअरे आवा तउ उ सोना क बछवा अउ लोगन क गावत अउ नाचत भवा निहारेस। मूसा बहोत कोहाइ गवा अउ उ समथर पथरन क भुईया प गिराइ दिहस अउ ओनका तोड़ दिहस। पहाड़े क तलहटी में उ ओनका रेजा रेजा कइ दिहस। 20 तबहिं मूसा लोगन क बनवा भवा बछवा क तोड़ फोड़ डाएस। उ सोना क आगी में टेघराएस। उ सोना क ऐतना पीसेस कि उ चूरन होइ गवा। उ सोना क चूरन क पानी में बहाइ दिहस। तबहिं उ इस्त्राएल क मनइयन क पानी पिअइ बरे मजबूर किहस।

21 मूसा हारून स कहेस, "इ मनइयन तोहरे संग का किहेन? कि तू ओनका अइसे बुरा पाप करइ क लिआया?"

22 हारून जवाब दिहस, "महासया। जिन कोहाअ। आप जानत बाटेन कि लोगन हमेसा गलत काम करइ क तइयार रहत हीं। 23 लोग मोसे कहेस, 'मूसा हम पचन्क मिस्त्र स बाहेर लइ आया। मुला हम पचे नाहीं जानित कि ओकरे संग का भवा बाटइ। एह बरे हम सब मनइयन क राह देखावइ वाला कउनो देवतन क बनावा।'

24 एह बरे मई मनइयन स कहेस, 'जदि तोहरे लगे सोना क अंगूठियन होइ तउ ओनका मोका दइ दिया।' मनइयन मोका आपन सोना दिहेन ह। मइ इ सोना क आगी में झोंका अउ इ बछवा आगी स बाहेर आएस।"

25 मूसा लखेस कि लोग नियंत्रण स बाहेर होइ गएन, काहेकि हारून ओह पइ नरम होइ गएन ह। मनई मूरख क नाई इ तरह क ब्योहार करत बाटेन। ओनकइ सब दुस्मन लखि सकईं। 26 एह बरे मूसा डेरा क दरवाजे प ठाड़ भवा। मूसा कहेस, "कउने मनई जउन यहोवा क पाछा करइ चाहत ह मोरे लगे आवइ।" तब लेवी क परिवारे क सबइ मनइयन परात परात मूसा क लगे आएन।

27 तबहिं मूसा ओनसे कहेस, "इ तरह इस्त्राएल क परमेस्सर यहोवा क कहात ह: 'हर मनई आपन तरवार उठाइ लेइ अउ डेरा क एक निकास स दूसर निकास ताई जाइ। तू पचे उ लोगन क जरूर मारइ चाही चाहे उ तोहार आपन भाई, दोस्त अउ पड़ोसी ही क्यों न हो।"

28 लेवी क परिवारे क मनई मूसा क हुकुम मानेन। उ दिना इस्त्राएल क करिब तीन हजार मनई मर गएन। 29 तब मूसा कहेस, "आज यहोवा क सेवा करइ बरे अपने आपक तइयार कर ल्या। काहेकि यहोवा आज तोहका आसीर्बाद देइही! अगर चाहे कि कउनो आदमी आपन पूत या रिस्तेदार क खोइ देत ह।"

30 दूसर दिन भिन्सारे मूसा मनइयन स कहेस, "तू पचे खउफनाक पाप किहा ह। मुला अब मई यहोवा क लगे ऊपर जाब। सायद कि मई तोहार पाप बरे प्रायश्चित कइ सकत हउँ।" 31 तउ मूसा लौटिके यहोवा क लगे गवा अउ कहेस, "कृपा कइके सुना। इ लोग बहोत बुरा पाप किहेन ह अउ सोना क एक देवता बनएन ह। 32 अबहिं ओनका पाप खातिर छिमा कइ दिया। जदि आप छिमा न करब्या तउ मोर नाउँ "जिन्नगी क किताबे\* स मेट दिया जेका आप लिखे अहा।"

33 मुला यहोवा मूसा स कहेस, "जउन मोरे खिलाफ पाप करत हीं, सिरिफ अइसा ही मनई बाटेन जेकर नाउँ मई आपन किताबे स मेटत हउँ। 34 एह बरे जा अउ मनइयन क हुवाँ लइ जा, जहाँ मई कहत हउँ। मोर सरगदूत तोहरे अगवा अगवा चली अउ तोहका राह देखाइ। जब उ मनइयन क सजा देइ क टेमें आइ, तउ जउन पाप किहे बाटेन तब ओनका सजा दीन्ह जाइ।" 35 एह बरे यहोवा मनइयन में एक भयंकर बेरामी पड़वा किहेन ह। उ एह बरे अइसा किहेन ह कि उ पचे हारून स सोना क बछवा बनवइ क कहे रहेन।

### "मई तोहरे संग न जाब"

**33** तब यहोवा मूसा स कहेस, "तू अउ तोहार उ लोग जेनका तू मिस्त्र स हिआँ लइ आया ह इ ठउर क जरूर तजि दिया। अउर उ भुईया में जा जेका मई इब्राहीम, इसहाक अउ याकूब क देइ क बचन दिहउँ ह। मई ओनका बचन दिहउँ ह। मई वाचा किहेउँ, "मई उ भुईया क तोहरे सन्तानन क देब। 2 मई एक सरगदूत तोहरे अगवा अगवा पठउब। अउर मई कनानी, हिल्ली, एमोरी, परिज्जी, हिब्बी, अउ यबूसी मनइयन क बाहर हाँक देब। मई उ लोगन क तोहार पहँटा तजि देइ क मजबूर करब। 3 एह बरे उ भुईया पइ जा जउन दूध अउर सहद स भरपूर होइ। मुला मई तोहरे संग न जाब। तू पचे बहोत जिद्दी अहा। जदि मई तोहरे संग जाब तउ तोहार नास करब।"

4 मनइयन इ बुरी खबर सुनेन अउ बहोत दुःखी भएन। एह बरे लोग आपन गहना उतार लिहेन। 5 उ काहेकि यहोवा मूसा स कहेन, "इस्त्राएल क मनइयन स कहा, 'तू पचे हठी लोग अहा। जदि मई तोहरे संग सिरिफ थोड़ी बरे होबउँ, होइ सकत ह मई तू पचन्क नास कइ देब। एह बरे सबइ

"जिन्नगी क किताब" कइती इसारा करत ह कि यहोवा किताब रखत ह, जेहमाँ सब मनइयन क नाउं लिखा रहत ह।

आपन गहना उतारि देई। तब मई इ निहचय करब कि तोहरे संग का करी।” 6एँह बरे इस्त्राएल क लोग होरेब अर्थात् सीनै पहाड़े स अगवा आपन गहना उतारे रहेन।

### बड़ठकावाला तत्कालिक तम्बू

7मूसा बड़ठकावाला तम्बू क डेरा स कछू दूर लइ गवा। हुवाँ उ ओका लगाएस अउ ओकर नाउँ “बड़ठकावाला तम्बू” राखेस। कउनो व्यक्ति जउन यहोवा स कछू जानइ चाहत रहा, ओका डेरा क बाहरे बड़ठकावाला तम्बू ताई जाइ क पड़त रहा। 8जब कबहुँ मूसा बाहरे बड़ठकावाला तम्बू में जात तउ मनइयन ओका निहारत रहतेन। लोगन आपन तम्बू क दुआरे ठाड़ रहतेन अउ मूसा क तबहिँ ताई लखत रहतेन जबहिँ ताई मूसा बड़ठका वाला तम्बू में न चला जात। 9जब मूसा बड़ठकावाला तम्बू में घुसरत एक लम्बा बादर क खम्भा खाले उतर जात अउ उ बादर बड़ठकावाला तम्बू क दुआरे ठहरत। इ तरह यहोवा मूसा स बात करत रहत। 10जब लोगन बड़ठकावाला तम्बू क दुआर बादर क लखतेन उ निहुरेस अउ परमेस्सर क आराधना किहेस। हर मनई आपन तम्बू क दुआरे ओकर आराधना करत रहा।

11इ तरह यहोवा मूसा स आमने-सामने बात करत रहा। यहोवा मूसा स इ तरह बात करत रहा जइसे कउनो मनई आपन मीत स बतियात होइ। यहोवा स बात करइ क पाछे मूसा हमेसा डेरा में वापस लौटत रहा। नून क पूत यहोसू मूसा क सहायक रहा। यहोसू हमेसा तम्बू में रहत रहा। जब मूसा ओका छोड़त रहा।

### मूसा यहोवा क महिमा लखत ह

12मूसा यहोवा स कहेस, “आप मोका इ पचन्क क अगुवाइ करइ क कहया ह। मुला आप इ नाहीं बताएन कि आप मोरे संग केका पठइहीं। आप मोसे कहेन, ‘मई तोहका अच्छी तरह जानत हउँ अउ मई तोहसे खुस अहउँ।’ 13जदि मई तोहका फुरे फुरे खुस किहेउँ ह, मोका तोहार निर्णय क बारे में जानइ दया अउर तू मोका आपन तरह सिखावा। तब मई आपक लगातार खुस राखि सकत हउँ। याद राखा कि इ आप क लोग अहउँ।”

14यहोवा कहेस, “मई खुद तोहरे संग चलब। मई तोहका राह देखाउब।”

15तबहिँ मूसा यहोवा स कहेस, “जदि तू हम पचन्क संग न चलब्या तउ तू इ ठउर स हम पचन्क जिन दूर पठवा। 16हम पचे इ भी कइसे जान लेब कि तू मोसे अउर इ लोगन स खुस अहा? जदि तू संग चलब्या तउ हम पचे निहचय इ जानब। तोहका हमरे संग होइ क पाछे इ देखाउब कि मई अउर तोहार लोगन इ धरती क दूसर लोगन स कइसे अलग होइ जाब।”

17तब यहोवा मूसा स कहेस, “मई उहइ करब जउन तू कहत बादया। मई इ करब काहेकि मई तोहसे खुस अहउँ। मई तोहका अच्छी तरह स जानत हउँ।”

18तब मूसा कहेस, “अब किरपा कइके मोका महिमा देखावा।”

19परमेस्सर कहेस, “मई आपन उचित भलाई क तोहार आगे स गुजारउब। मई यहोवा अहउँ अउर मई आपन नाउँ क घोषणा करब जेसे तू ओका सुनि सका। मई कउनो भी व्यक्ति प कृपा अउ पिरेम देखाउब जेनका मई चाहउब। 20मुला तू मोर मुँह नाहीं निहार सकत्या। कउनो भी मनई मोका लख नाहीं सकत अउर जदि लखि लेत ह तउ उ जिन्य नाहीं रहि सकत।

21“मोरे लगे नगिचे एक तु चट्टान बाटइ। तू उ चट्टाने प ठाड़ होइ सकत ह। 22मोर महिमा उ ठउर स होइके जाइ। मई तोहका उ चट्टाने क बड़की दरार में राखब अउ तोहका आपन हथवा स ढाँकब जे समइ मई गुजरब। 23तबहिँ मई आपन हाथ हटाइ लेब अउर तू मोर पीठ भइ देखब्या। मुला तू मोर मुँह नाहीं देख पउब्या।”

### पाथर क नई पाटी

34 तब यहोवा मूसा स कहेस, “दुइ अउर समथर पाथरन ठीक वइसे ही बनावा जइसे पहिले दुइ रहीं जेका तू तोग दिहे रहा। मई एह प ओनही सब्दन क लिखब जउन पहिले दुइनउँ पाथर क पाटी प लिखा रहेन। 2भियान भिन्सारे तइयार रहया अउ सीनै पहाड़े प आवा। हुवाँ मोरे समन्वा पहाड़े क चोटी प ठाड़ रहया। 3कउनो मनई क तोहरे संग नाहीं आवइ दीन्ह जाइ। हिआँ तलक कि तोहरे गोरू अउ भेड़ी क झुण्ड क भी पहाड़े क उ पार घास नाहीं चरइ चाही।”

4एँह बरे मूसा पहिले पाथर क तरह पाथर क दुइ समथर पाटी बनएस। तब दूसर दिन भिन्सारे उ सीनै पहाड़े प गवा। मूसा उहइ किहेस जइसा यहोवा ओका हुकुम दिहे रहेन। मूसा आपन संग पाथर क दुइ पाटी लइ गवा। 5मूसा क पहाड़े प पहुँच जाइ क पाछे यहोवा ओकरे लगे बादर में खाले पहाड़े प आवा। यहोवा हुवाँ मूसा क लगे ठाड़ रहा। उ यहोवा क नाउँ लिहेस।

6यहोवा मूसा क समन्वा स गवा अउ उ कहेस, “यहोवा, दयालु यहोवा, अउ कृपालु परमेस्सर अहइ। यहोवा कोहाइ मैं धीरे करत ह। यहोवा महान पिरेम स सराबोर बा। यहोवा बिस्सास क जोगग बा। 7यहोवा हजारन पीढ़िन प कृपा करत ह। यहोवा लोगन क जउन उ पचे पापन्क करत हीं, छिमा करत ह। मुला यहोवा अपराधी क सजा देइ मैं चूकत नाहीं। यहोवा सिरिफ अपराधी क सजा नाहीं देइ मुला ओनके बेटवन, नाती, पंती अउ संती क भी बुरी बात क सजा देइ जउन उ पचे किहे रहेन।

8तब तुरन्तइ मूसा धरती प निहुरा अउ यहोवा क पूजेस। मूसा कहेस, 9“सुआमी। जदि आप मोसे खुस अहउँ तउ हमार साथे चलइँ। मई जानत हउँ कि उ पचे हठी लोग अहइँ। मुला हम पचन्क ओन पापन्क अउ अपराधन्क छिमा कइ दया, जउन हम पचे किहेन ह।”

10तब यहोवा कहेस, “मई तोहरे सबहिँ लोगन क संग इ करार करत हउँ। मई अइसा अचरज कार्य करब जइसे इ धरती प कउनो भी दूसर रास्ट्र क खातिर पहिले कबहुँ नाहीं कीन्ह गवा रहा। तोहरे संग सबहिँ लोगन उ अचभ्वा क निहिरिहीं जउन मई तोहरे बरे करब।” 11आज मई जउन

हुकुम देत हउँ ओका माना। मई कनानी, हित्ती, एमोरी, परिज्जी, हिब्बी, अउ यबूसी क बाहेर निकरि जाइ क मजबूर करब। 12होसियार रहा। उ लोगन क संग कउनो समझौता जिन करा जउन उ पहुँटा में रहत अहई जहाँ तू जात अहा। जदि तू ओनकइ संग समझौता करब्या तउ तू ओहमों फँस जाब्या। 13ओनके वेदी क नास कइ डावा उ पाथरन क तोड़ि डावा जेका उ पचे पूजत बाटेन। ओनकइ मूरत\* क काटिके बहाइ द्या। 14कउनो दूसर देवता क आराधना जिन करा। मई “यहोवा कना - ईस्र्यालु यहोवा” अहउँ। इ मोर नाउँ अहइ। मई “एलकना ईस्र्यालु परमेस्सर हउँ।”

15“जउन लोग उ पहुँटा में रहत हीं ओनसे कउनो समझौता जिन करा। जदि तू इ करब्या तउ जब उ सबइ आपन देवतन क पूजिहीं तब तू ओनके साथे होइ सकब्या। उ पचे तोहका सामिल होइ बरे न्यौतिहीं अउर तू ओनकइ भेंट क खाब्या। 16तू आपन बेटवन क पत्नी बनवइ बरे ओनकइ कछू बिटियन क चुन सकत ह। उ पचे बिटियन झूठ देवतन क पूजा करत रहत हीं। उ पचे तोहरे बेटवन स उहइ करवाइ सकत हीं।

17“मूरत जिन बनाया।

18“बे खमीरे क रोटी क दावत क त्यौहार मनावा। मोरे हुकुम बरे सात दिना तलक बेखमीरे क रोटी खाया। एका उहइ महीना में करा जेका मइ चुनेउँ ह जउन कि अबीब क महीना अहइ। काहेकि उहइ महीना अहइ जब तू मिस्त्र स बाहेर आए रहया।

19“कउनो भी मेहरारू क पहिलौटी बेटवा मोर बा। पहिला जनावर भी जउन तोहार गाय-बोकरी अउ भेड़ी स पइदा होइ, मोर अहइ। 20जदि तू पहिले पइदा भए गदहा क आपन बरे रखइ चाहत बाट्या तउ तू एका भेड़ी क बच्चा स बेसहि सकत ह। मुला अगर तू उ गदहा क भेड़ी क बच्चा स नाहीं वेसहत्या तउ तोहका उ गदहा क गरदन जरूर तोड़ दइ चाही। तोहका आपन पहिलौटी सब पूतन बरे मोसे बेसहइ क होइ। कउनो व्यक्ति बे भेंटे क मोरे समन्वा न आइ।

21“तू छः दिन काम करा। मुला सातवाँ दिन अराम करा।। पौध रोपइ अउ फसिल काटइ क समझ्या भी तोहका सबित क दिन क धियान रखइ चाही।

22“हपतन क त्यौहार मनावा। फसल कटाइ क त्यौहार क मनावा। आखीर में फसल काटइ क दावत करा।

23“हर साल तोहार सब मनई तीन दाई आपन सुआमी, यहोवा इस्त्राएल क परमेस्सर क लगे जइहीं।

24“जबहि तू आपन भुईया में पहुँचब्या मई तोहरे दुस्मनन क उ भुईया स बाहेर जाइके मजबूर करब। मई तोहरे चौहदी क बड़ाउब अउर तू जिआदा स जिआदा धरती पउब्या। तोहका आपन परमेस्सर यहोवा क समन्वा बरिस में तीन दाई जाइ चाही। अउर तोहसे उ टेमें तोहर देस लेइ क कउनो जतन न करी।

25“जब तू बलि स खून भेंट करा तउ उहइ समझ्या खमीर जिन भेंट करा।

“अउर फसह त्यौहार क कछू भी गोस दूसर भिन्सारे तलक नाहीं रखइ चाही।

26“यहोवा क आपन पहली काटी भइ फसल द्या। उ चीजन्क यहोवा आपन परमेस्सर क घरे लइ आवा।

“बोकरी क बच्चा क ओकर महतारी क दूध में जिन पकावा।”

27तब यहोवा मूसा स कहेस, “जउन बातन क मई बतायउँ ह ओनका लिखि ल्या। इ आदेस क अनुसार मई तोहार अउर आपन बीच करार किहउँ ह।”

28मूसा हुवाँ यहोवा क संग चालीस दिना अउ चालीस रात रहा। उ पूरे टेम तलक न खइया क खाएस अउर न पानी पिएस। अउर मूसा क करार क सब्दन क दस-आग्यन क दुइ समथर पाथरन प लिखेस।

### मूसा क चमकत मुँह

29तब मूसा सीनै पहाड़े स तरखाले उतरा। इ यहोवा क दुइनउँ पाथरे क समथर पाटी क संग लइ आवा। मूसा क मुँह चमकत रहा। काहेकि उ यहोवा स बात किहेस। मुला मूसा इ बरे नाहीं जानत रहा। 30हारून अउ इस्त्राएल क सब लोगन लखेन कि मूसा क मुँह चमकत रहा। ऐँह बरे उ पचे ओकरे पास जाइ स डेरनेन।

31मुला मूसा ओनका बोलाएस। ऐँह बरे हारून अउ सबहि अगुवा लोग मूसा क लगे गएन। मूसा ओनसे बतियान। 32ओनके पाछे इस्त्राएल क सबहि लोग मूसा क लगे आएन। अउर मूसा ओनका उ आदेस दिहेस जउन यहोवा सीनै पहाड़े प दिहे रहा।

33जब मूसा बात करब खतम किहेस तउ उ आपन मुँह क एक ओढ़ना स ढँकि लिहस। 34जब कबहुँ मूसा यहोवा क समन्वा बात करइ जात तउ ओढ़ना क हटाइ लेत। तब मूसा बाहेर आवत अउ इस्त्राएल क लोगन क इ बतावत जउन यहोवा क हुकुम होत रहा। 35इस्त्राएल क मनइयन देखत रहेन कि मूसा क मुँह तेज स चमकत रहा। ऐँह बरे मूसा आपन मुँह फुन ढँकि लेत। मूसा आपन मुँहना क तब तलक ढँके रखत रहा जब तलक उ यहोवा क संग बात करइ अगली दाई नाहीं जात रहा।

### सबित क नेम

**35** मूसा इस्त्राएल क सबहि मनइयन क बटोरेस। मूसा ओनसे कहेस, “मई उ सब आदेसन क बताउब जउन यहोवा तू पचन्क करइ क आदेस दिहस ह।

2“काम करइ क छः दिन अहई। मुला सातवाँ दिन तू पचन्क अराम क दिन खास दिन होइ। उ खास दिन अराम कइके तू पचे यहोवा क स्रद्धा देब्या। जदि कउनो सातवाँ दिन काम करी तउ ओका जरूर मारि डावा जाइ। 3सबित क दिना तू सबन्क कउने ठउर प आगी तलक नाहीं बारइ चाही जहाँ कहुँ तू पचे रहत बाट्या।”

**उ पाथरन ... मूरत** “स्मारक क असेरा स्तम्भ” इ पाथर क प्रतीक अउ लकड़ी क खम्भा रहेन जेका मनई झूठ देवता बरे याद रखइ अउ स्रद्धा बरे खइ करत रहेन।

### पवित्तर तम्बू क सामान

4मूसा इस्त्राएल क सबहिं मनइयन स कहेस, “इहइ बा जउन यहोवा हुकुम दिहे अहइ। 5यहोवा बरे खास भेंट बटोरा। तोहका आपन मन में ठान लेइ चाही कि तू पचे का भेंट में देब्या। अउर तब तू उ भेंट यहोवा क लगे लइ आवा। सोना, चाँदी, काँसा, 6नीला बैगनी अउ लाल कपड़ा, उत्तिम सन अउ बोकरी क बार, 7भेड़ी क लाल रंगी खाल, उत्तिम चाम, बबुरे क लकड़ी, 8दिया बरे जइतूने क तेल, अभिसेक क तेल बरे मसाले सुगन्धि धूप बरे मसाला, 9गोमेद रतन अउ दूसर रतन एपोद अउर निआव क थइला प लगावा जइहीं।

10आप सबहिं कुसल कारीगर क चाही कि यहोवा जउन चीजन्क हुकुम दिहे अहइँ ओनका बनावा। इ सबइ उ चीज अहइँ जेनके बरे यहोवा हुकुम दिहे अहइँ। 11पवित्तर तम्बू, ँँकरे बाहेर क तम्बू, अउ एकर ढकना, हुक, तखता, पाटी, खम्भा अउ आधार। 12पवित्तर संदूख, अउ एकर खम्भन अउ संदूखे क ढकना, अउ दरवाजे क रास्ता क ढाँपइ बरे पर्दा। 13मेज अउ एकर खम्भन, मेजे प धरी जाइवाली सब चीज, अउ मेजे प धरी जाइवाली खास रोटी, 14रोसनी क बइपरइ बरे डीबट, अउर ँँकर सबइ बासन, ँँकर दिया, अउ रोसनी बरे तेल, 15धूप बारइ बरे वेदी अउ ँँकर खम्भन, अभिसेक क तेल अउ महकउआ धूप, बइठकावाला तम्बू क प्रवेस दुआर क ढकइ वाली कनात, 16होमबलि क बारइ बरे वेदी, एकर काँसा क झंझरी, खम्भन अउ वेदी प बइपरइ बरे सबहिं चिजियन, काँसा क खोरा अउ आधार, 17आँगन क चारिहूँ कइँती पर्दा, अउर खम्भा अउ एकर आधार, अउर आँगन क प्रवेस दुआर क ढकइवाला कनात, 18तम्बू क थामइ बरे बइपरइ खातिर खूँटी अउर आँगन क घेरइवाला पर्दा क दिवार, खूँटी स बाँधइवाली लसुरी। 19अउ खास बुना भवा ओढ़ना जेका याजक पवित्तर ठउरे प पहिरहीं। इ खास ओढ़ना हारून अउ ओकरे बेटवन क पहिरइ बरे अहइँ। उ पचे इ ओढ़ना क तब पहिरहीं जब उ पचे याजक क रूप में सेवा करिहीं।”

### लोगन क बइका भेंट

20तब इस्त्राएल क सबहिं मनई मूसा क लगे स चलेन। 21सबहिं मनइयन जउन भेंट चढ़ावइ चाहत रहेन आएन अउर यहोवा बरे भेंट लिआएन। इ भेंट बइठकावाला तम्बू क बनावइ, तम्बू क सब चीजन अउ खास ओढ़ना बनावइ क काम में लाइ गइन। 22सबहिं मेहरारू-मनसेधू, जउन चढ़ावा देइ चाहत रहेन, किसिम किसिम क आपन आपन सोना क गहना लइ आएन। उ सबइ पिन, कान क बाली, मुंदरी, दूसर गहना लइ आएन। उ पचे आपन सबहिं गहना क चढ़ाएन। इ यहोवा क खास भेंट रही।

23हर मनई जेकरे लगे नीला, बैगनी अउ लाल कपड़ा अउर सन क उत्तिम रेसा रहा, उ इ सबन्क यहोवा क लगे लइ आवा। उ मनई जेकरे लगे बोकरी क बार, लाल रंग क भेड़ी क खाल, उत्तिम चमड़ा रहा, ओका उ यहोवा क लगे लइ आवा। 24हर मनई जउन चाँदी, काँसा चढ़ावइ चाहत रहा यहोवा क भेंट क रूप में ओका लियाएस। हर

मनई जेकरे लगे बबुरे क लकड़ी रही, आवा अउ ओका यहोवा क चढ़ाएस। 25हर माहिर मेहरारू सन क उत्तिम रेसावाला नीला, बैगनी अउ लाल ओढ़ना बनाएस। 26उ सबहिं मेहरारू जउन माहिर रहीं अउ इ काम बरे ओकर मदद करइ सकत हीं उ पचे बोकरी क बारे स ओढ़ना बनाएन।

27नेतन सुलेमानी पाथर तथा दूसर रतन लइ आएन। इ सब नग अउ रतन याजक क एपोद अउ निआउ क थइली में लगाए रहेन। 28लोग मसाला अउ जइतून क तेल भी लइ आएन। इ चीजन महकउआ धूप, अभिसेक क तेल अउ दिया क तेल बरे बइपरी गइन।

29इस्त्राएल क सबहिं मनइयन जउन मदद करइ चाहत रहेन यहोवा बरे भेंट लइ आएन। मनइयन इ सबही भेंट दिल खोलिके जेतन उ पचे चाहेस दिहेन। इ भेंट उ सबइ चीजन्क बनवइ बरे काम में आइन जेका यहोवा मूसा अउ लोगन क बनाइ क हुकुम दिहे रहेन।

### बसलेल अउ ओहोलीआब

30तब मूसा इस्त्राएल क मनइयन स कहेस, “लखा यहोवा बसलेल, उरि क बेटवा (उरि हूर क बेटवा रहा) जउन यहूदा क परिवार गोत्र स रहा क चुनेस। 31अउर उ बसलेल क परमेस्सर क आतिमा स भरि दिहस। इसलिए उ बुद्धि स परिपूर्ण अहइ अउर उ हर प्रकार क सिल्पकारी कार्य क करइ में होसियार अउ माहिर अहइ। 32उ सोना, चाँदी अउ काँसा क चीजन्क नमूना बनाइ सकत ह। 33उ नग अउर रतन क काट अउ जइ सकत ह। बसलेल लकड़ी क काम कइ सकत ह अउर सबहिं तरह की चीजन क बनइ सकत ह। 34यहोवा बसलेल अउ ओहोलीआब क दूसर लोगन क सिखवइ क जोग्यता दइ दिहस ह। ओहोलीआब दन क परिवार गोत्र स अहीसामाक क पूत रहा। 35यहोवा इ दुइनुँ मनइयन क सब तरह क काम कइ क कुसलता दइ दिहस। ह। उ पचे बढई अउ लोहार क काम करइ क जोग्यता रखत हीं। उ सबइ नीला, बैगनी अउ लाल ओढ़ना अउ सन क उत्तिम रेसा वाला कपड़ा स तस्बीर क काढ़िके ओनका बुन सकत हीं। अउर उ पचे ऊन स भी चीजन्क बुन सकत हीं। उ सबइ प्रकार क काम करइ सकत ह अउर सबइ प्रकार क डिजाइन बनाइ सकत ह।

**36** “ँह बरे बसलेल, ओहोलीआब अउ सब चतुर मनई उ काम करिहीं जेनका यहोवा हुकुम दिहे अहइ। यहोवा इ मनइयन क ओन सबहिं काम करइ क बुद्धि अउ समझ दइ दिहे अहइ जेकर जरूरत इ पवित्तर ठउर क सेवा करइ बरे अहइ।”

2तब मूसा बसलेल, ओहोलीआब अउ सबहिं दूसर मनइयन क बोलाएस जेनका यहोवा खास चतुराई दिहे रहा। अउर इ पचे आएन काहेकि इ काम में मदद करइ चाहत रहेन। 3मूसा इस्त्राएल क उ कुसल मनइयन क उ सबहिं चीजन्क दिहेन जेनका इस्त्राएल क लोग उपहार क रूप में लइ आए रहेन। अउर उ पचे पवित्तर ठउर क बनवइ में उ चीजन्क बइपरेन। मनइयन रोज भिन्सारे भेंट लइ आवत रहेन। 4तब सबहिं कुसल मनइयन पवित्तर ठउर क काम क

अनजाम देइ बरे क जगह जमा भएन। अउर उ पचे मूसा स बात करइ गएन। उ पचे कहने, 5“लोग बहोत सारे चिजन जाए अहई, अउर हम पचन्क लगे ओसे बहोत जिआदा सामान अहइ जेतना कि उ काम क पूरा करइ बरे चाही जेका करइ क हुकुम यहोवा दिहस ह।”

6तबहिं मूसा सिबिर में खबर क प्रचार कराएस: ‘कउनो मनसेधू या मेहरारू क अब कउनो भेंट पवितर तम्बू में न चढ़ाई चाही।’ 7इ तरह लोगन जेतना चाही ओसे जियादा देइ क बन्द कइ दिहेन।”

### पवितर तम्बू

8तब कुसल कारीगरन तम्बू बनउब सुरू किहेन। उ पचे नीला, बैगनी अउ लाल ओढ़ना अउ सन क उत्तिम रेसा स दस पर्दा बनाएन। अउर उ पचे करूब सरगदूतन क तस्वीरन क पर्दन प काढ़ेन। 9हर एक पर्दा बराकर नाप क रही। इ अट्ठाइस हाथ लम्बी अउर चार हाथ चौड़ी रही। 10कारीगरन पर्दन क दुइ भाग में बाँटि दिहेन। उ पचे पाँच ठु पर्दन क एक हीसा में जोड़ के पहिला समूह बनाएन। दूसर समूह क भी उ पचे पाँच ठू पर्दन क एक हीसा में जोड़के बनाएन। 11पहली समूह क आखरी पर्दा क सिरा क संग फंदा बनइ बरे नीला कपड़ा प्रयोग भवा रहा। उ पचे दूसर समूह क आखरी पर्दा क संग भी उहइ काम करइ रहेन। 12पहिले समूह क आखरी पर्दा क सिरा में पचास फंदा रहेन अउ दूसरे समूह क आखरी पर्दा क सिरा में भी पचास फंदा रहेन। फंदा एक दूसर क आमने सामने रहेन। 13तब उ पचे पचास सोने क छल्ला बनाएन। उ पचे इ फलियन क दुइनउँ कनात क जोड़इ बरे लगाएन। इ तरह पवितर तम्बू क जोड़के एक हीसा बनाइ गएन।

14तब कारीगरन दूसर तम्बू पवितर तम्बू क ढाँकइ बरे बनाएन। उ ग्यारह पर्देन बनावइ बरे बोकरी क बारन क प्रयोग किहेन। 15सबहिं ग्यारह पर्देन एक ही नाप जोख क रहिन। उ सबइ तीस हाथ लम्बी अउ चार हाथ चौड़ी रहिन। 16कारीगरन पाँच पर्देन क एक में सिएस अउ छ पर्देनन क दूसर में सिएस। 17उ पचे पहिली समूह क आखरी पर्दा क सिरा स जोड़इ बरे पचास फंदा बनाएन। अउ दूसर कनाते क समूह क आखरी कनाते क सिरा में भी पचास फली बनाएन। 18कारीगरन पर्देन क दुई समूह क जोड़इ बरे पचास काँसा क छल्ला बनाएन अउर एक तम्बू बनाएस। 19तबहिं उ पचे पवितर तम्बू क दुइ अउर ढकना बनाएन। एक ढकना भेड़ा क लाल रंग क खाल स बनाएन। दूसर ढकना उत्तिम खाले क बनाएन।

20तब उ बबुर क लकड़ी क तखता पवितर तम्बू क सहारा देइ बरे लिहेस। 21हर एक तखता दस हाथ लम्बा अउ डेढ़ हाथ चौड़ा बनाएन। 22हर एक तखता क बगल में दुइ खूँटी एक दुसर स जुड़ रहिन। पवितर तम्बू क सबहिं तखता एक ही तरह क बना रहेन। 23बेसलेल पवितर तम्बू क दक्खिनी हीसा बरे बीस ढाँचा बनाएस। 24तब उ ढाँचा बरे चालीस चाँदी क आधार बनाएस। हर ढाँचा बरे दुइ आधार रहिन। एक आधार एक बगल क खम्भा बरे रहेन। 25उ बीस तखता पवितर तम्बू क उत्तर कइँती भी बनाएस।

उ चालीस चाँदी क आधार बनाएस अउ हर तखतन बरे दुइ ठु बनाएस। 26उ हर ढाँचा क तले दुइ लगइवाला चाँदी क चालीस कुर्सी बनाएस। 27उ पवितर तम्बू क पिछला हीसा (तम्बू क पस्चिमी भाग) कइँती छ: ठु तखता ल्या। 28उ पवितर तम्बू क पिछला भाग क कोना बरे दुइ तखता ल्या। 29इ सबइ तखता तरखाले एक दूसर स जोड़ गवा रहेन। ऊपर में छल्ला तखता क कोना को साथ में जोड़त रहेन। दुइनउँ कोना बरे भी अइसा ही कीन्ह ग रहेन। 30इ तरह हुवाँ पवितर तम्बू क पस्चिम भाग क बरे आठ तखता रहेन। हर एक ढाँचा क बरे दुइ आधार क हिसाब स सोलह चाँदी क आधार रहेन।

31तब कारीगरन बबुरे क लकड़ी स ढाँचा क छड़ बनाएन। पवितर तम्बू क पहली कइँती बरे पाँच छड़ बनाएन। 32अउर पाँच छड़ दूसर कइँती, पाँच छड़ पिछली भाग (पस्चिमी कइँती) बरे बनाएन। 33उ पचे ओहमाँ बीच क छड़ अइसी तरह स बनाएन जउन ढाँचा में स एक छोर स दूसर छोर तलक गुजरत रहिन। 34उ पचे इ तखतन क सोना स मढ़ेन। उ पचे छड़ क धरइ बरे सोना क छल्ला बनाएन उ पचे कड़ियन क भी सोना स मढ़ेन।

35उ सबइ सब ते जिआदा पवितर ठउर क दुआर बरे पर्दा बनाएन। उ पचे सन क उत्तिम रेस अउ नीला लाल अउ बैगनी कपड़ा बइपरेन। उ पर्दा में करूब सरगदूत क तस्वीर काढ़ेन। 36उ पचे बबुरे क लकड़ी क चार खम्भा बनाएन अउ ओनका सोना स मढ़ेन। उ पचे खम्भा बरे सोना क हुक बनाएन अउर खम्भा बरे चार चाँदी क आधार बनाएन। 37तब उ पवितर तम्बू क दुआर बरे पर्दा बनाएन। उ पचे नीला, बैगनी अउ लाल कपड़ा अउर सन क उत्तिम रेसा बइपरेन। पर्दा कढ़ाइ क सामग्री स बनाए गए रहेन। 38तब उ सबइ इ पर्दा बरे पाँच खम्भा अउ ओकर बरे हुक बनाएन। उ सबइ खम्भन क चोटी अउ पर्देन क छड़न क सोना स मढ़ेन। अउर उ पचे काँसा क पाँच आधार खम्भा बरे बनाएन।

### करार क सन्दूख

37 बसलेल बबुरे क लकड़ी स पवितर सन्दूख बनाएस। सन्दूख ढाई हाथ लम्बा, डेढ़ हाथ चौड़ा अउ डेढ़ हाथ ऊँचा रहा। 2उ सन्दूखे क भितरे अउ बाहेर दिवार क निखालिस सोना स मढ़ि दिहस। तब उ सोना क झालर सन्दूखे क चारिहुँ कइँती लगाएस। 3फुन उ सोना क चार छल्ला बनाएस अउ ओनका चारिहुँ कोने प लगाएस। इ छल्लन क संदूख ढोवइ बरे बइपरा जात रहा। दुइनउँ कइँती दुइ दुइ छल्ला रहेन। 4तब उ सन्दूखे क ढोवइ बरे लकरी क खम्भन क लगाएस। खम्भा बरे उ बबुरे क लकड़ी लगाएस, अउ खम्भन क सोना स मढ़ि दिहस। 5उ संदूखे क हर सिरन प बना भवा छल्लन में खम्भन क डाइ दिहस। 6तब उ निखालिस सोना स ढकना बनाएस इ ढाई हाथ लम्बा अउ डेढ़ हाथ चौड़ा रहा। 7तब बसलेल सोना क पीट पीटके दुइ करूब बनाएस। उ ढकना क दुइनउँ छोर प करूब लगाएस। 8उ एक करूब क एक अउ दूसर क दूसर कइँती लगाएस। करूब सरगदूतन क ढकना स एक बनावइ

बरे जोड़ दीन्ह गवा। 9सरगदूतन क पखना अकासे कईंती ऊपर उठाइ दीन्ह गएन। सरगदूतन आपन पखना स सन्दूखे क ढँकि लिहने। सरगदूतन एक दूसर क समन्वा ढकना क लखत रहेन।

### खास मेज

10तब बसलेल बबुर क लकड़ी क मेज बनाएस। मेज दुइ हाथ लम्बी, एक हाथ चौड़ी अउ डेढ़ हाथ ऊँची रही। 11उ मेज क निखालिस सोना स मढ़ेस। उ सोना क झालर मेज क चारिहुँ कईंती किहस। 12तब उ मेज क चारिहुँ कईंती एक पट्टी बनाएस। इ पट्टी करीब चार अंगुल चौड़ा रहा। उ पट्टी प सोना क झालर बनाएस। 13तब उ मेज बरे चार सोना क छल्ला बनाएस। उ मेज क चारिहुँ कोना प सोना क छल्ला लगाएस जहाँ चार ठु पाया रहेन। 14छल्ला पट्टी क नगिचे लगा रहेन। छल्ला खम्भा में लगा रहेन जउन मेज क लड़ जाइ में काम करत रहीं। 15तब उ मेजे क ढोवइ बरे खम्भा बनाएस। इ खम्भा बबुरे क लकड़ी क रहिन। अउर ओन प निखालिस सोना मेढ़ भवा रहेन। 16तब उ ओन चीजन्क बनाएस जउन मेज प काम आवत रहीं। उ थारी, चम्मच, परात, अउ घड़ा बनाएस। इ सब निखालिस सोना स बनवा भवा रहेन। खोरा अउ घड़ा क पेयबलि क देइ बरे बड़परा जात रहेन।

### डीबट

17तब उ डीबट बनाएस। एकरे बरे उ सुद्ध सोना बड़परेस उ सोना क पीट पीट के आधार अउ डण्डा बनाएस। तब उ फूल, कली अउ पंखड़ी बनाएस। उ इ सब चीजन्क एक टुकड़ा में जोरि दिहस। 18डीबट में छः डारन रहिन। एक कईंती तीन डार अउ दूसर कईंती तीन डार रहेन। 19हर डारे प तीन फूल रहेन। इ फूल बदाम क फूल क सकल क बना रहेन। अउर ओहमाँ कली अउ पंखुड़ी रहिन। 20डीबट क डंडा प चार फूल रहेन। इ सबइ कली अउ पंखुड़ी क संग बदाम फूल क सकल क बनवा रहेन। 21हुवाँ छः डार रहेन-डण्डा क दुइनउँ किनारा स तीन-तीन डार निकलत रहेन। हुआँ एक फूल कली अउ पंखड़ी क संग उ तीनउँ जगह क नीचे जहाँ डार जुड़त रहा, रहेन। 22इ सबहिँ कली अउ डार अउ डीबट निखालिस सोना क बनी रहिन। इ समूचइ सोना क पटिके एक ही में जोड़ दीन्ह ग रहा। 23उ इ डीबट क बरे सात दिया बनाएस तब उ तस्तरी अउ चिमटा बनाएस। हर चीजन्क क निखालिस सोना स बनाएस। 24उ लगभग पचहत्तर पौण्ड निखालिस सोना डीबट अउ ओकर संग प्रयोग में आवइवाली चीजन क बनावइ बरे प्रयोग किहस।

### धूप बारइ क वेदी

25तब उ धूप क जलाइ बरे वेदी बनाएस। उ एका बबुरे क काठे क बनाएस। इ वेदी चउकोर रही। इ एक हाथ लम्बी, एक हाथ चौड़ी अउर दुइ हाथ ऊँची रही। वेदी प चार सीगं रहेन। हर एक कोना प एक ठु सीगं लगा भवा रहेन। इ सीगन्क वेदी क संग एक इकाई बनवइ बरे जोड़

दीन्ह ग रहा। 26चोटी, सबहिँ बगल अउ सीगन्क निखालिस सोना स मढ़ेस। तब उ वेदी क चारिहुँ कईंती सोना क झालर बनाएस। 27उ सोना क दुइ छल्ला वेदी बरे बनाएस। उ सोना क छल्लन वेदी क हर कईंती झालर क तरे राखेस। इ छल्लन में वेदी ढोवइ बरे डण्डा डाई जात रहीं। 28तब उ बबुरे क काठे क खम्भन बनाएस अउ ओनकइ सोना स मढ़ेस।

29तब उ अभिसेक क पवित्तर तेल बनाएस। उ निखालिस महकउआ धूप भी बनाएस। इ चीजन्क उहइ तरह बनावा गवा जउने तरह कउनो कुसल महकउआ बनवइया बनावत ह।

### भेंट बारइ क वेदी

38 तब बसलेल बबुरे क काठ वेदी बनवई बरे बड़परेस। इ वेदी भेंट क बारइ बरे काम में आवत रही। इ चउकोर रही। इ पाँच हाथ लम्बी, पाँच हाथ चौड़ी अउ तीन हाथ ऊँच रही। 2उ हर एक कोना प एक सीग बनाएस। उ सीगन क वेदी क संग जोड़ दिहस। तब उ हर चीज क काँसा स ढँकि दिहस। 3तब उ वेदी प बड़परइ वाला सबहिँ अउजार बनाएस। उ बर्तनन, बेलचन, खोरन, माँस खाइ बरे काँटन अउ कड़ाहियन बनाएस। उ इ चीजन्क क काँसा स बनाएस। 4तब उ वेदी बरे एक ठू काँसा क जाली बनएस। इ जाली जाल क तरह रही। इ ओका वेदी क पायदाने क नीचे लगाएस। इ वेदी क पेंदी स वेदी क आधा ऊँचाइ तक रहा। 5तब उ काँसे क छल्ला बनाएस अउर एँका जाली क चारिहुँ कोना में लगाइ दिहस। इ छल्ला वेदी क ढोवइ बरे खम्भन क फँसावइ क काम आवत रहेन। 6तब उ बबुरे क काठे क खम्भन बनाएस अउ ओनका काँसा स मढ़ेस। 7खम्भन वेदी क बगल में लगा भवा छल्लन में स लगाइके वेदी क ढोवइ क काम बरे लगाएस। उ वेदी क किनारा बनावइ बरे तखता बड़परेस। वेदी भीतर स खोखल खाली सन्दूखे क तरह रही।

8जउन मेहररूअन पवित्तर बड़ठकावाला तम्बू क प्रवेस दुआर प जमा भवा रहिन आपन काँसा क दरपन दइ दिहने। बसलेल इ दरपन क काँसा स हाथ धावइ क पात्र अउ एकर आधार बनाएस।

### पवित्तर तम्बू क चारिहुँ ओर क आँगन

9तब उ आँगन क चारिहुँ कईंती पर्दा क दीवार बनाएस। दक्खिन कईंती पर्दा क दीवार एक सौ हाथ लम्बी रही। इ पर्दा सन क उत्तिम रेसा क बना रहा। 10दक्खिनी कईंती क पर्दाने बीस खम्भन क सहारे प टिका रहेन। इ खम्भन काँसा क बीस आधारन प टिका रहेन। खम्भन अउ पर्दा क छड़ा बरे हुक चाँदी क बनी रहेन। 11आँगन क उत्तर कईंती पर्दा क दीवार एक सौ हाथ लम्बी रही। बीस खम्भन अउ काँसा क बीस आधारन भी बनई गइन। खम्भन अउ पर्दा क छड़ा बरे हुक चाँदी क रहिन।

12आँगन क पश्चिमी कईंती पर्दा क दीवार पचास हाथ लम्बी रही। हुवाँ दस खम्भन अउ दस आधारन रहिन। खम्भन बरे हुक अउ पर्दा क छड़ा चाँदी क बनाव ग रहेन।

13अँगने क पूर्वी किनारा पचास हाथ चौड़ी रही। अँगने क प्रवेस दुआर इहइ तरफ रहा। 14प्रवेस दुआर क एक कइँती पर्दा क दीवार पन्द्रह हाथ लम्बी रही। इस तरफ तीन खम्भन अउ तीन आधार रहीं। 15प्रवेस दुआर क दूसर कइँती क पर्दा पन्द्रह हाथ लम्बी रहेन। उस तरफ भी तीन खम्भन अउ तीन आधारन रहेन। 16अँगन क चारिहुँ कइँती क पर्दा सन क उत्तिम रेसा क बनी रहीं। 17खम्भन क आधार काँसा क बनी रही। हुक अउ कनात क छड़ा चाँदी क बना रहा। खम्भन क चोटी भी चाँदी स मढ़ा रहा। अँगन क सबहिँ खम्भन चाँदी स बना भवा छड़ा क संग रहेन।

18अँगन क प्रवेस दुआर क पर्दा सन क उत्तिम रेसा अउ नीला लाल अउ बैगनी कपड़ा क बना रहा। एह प कढ़ाई कीन्ह गइ रही। कनात बीस हाथ लम्बा अउ पाँच हाथ ऊँच रही। इ उहइ उँचाई क रही जउने उँचाई क अँगन क चारिहुँ कइँती क कनात रहीं। 19कनात चार खम्भन अउ चार काँसा क आधारन प खड़ी रही। खम्भा क हुक चाँदी क बनी रही। खम्भा क सिरा चाँदी स मढ़ा रहा अउ पर्दा क छड़ भी चाँदी स मढ़ा रहा। 20पवित्रर तम्बू अउ अँगन क चारिहुँ कइँती क खूँटी काँसा क बनी रहीं।

21मूसा सबहिँ लेवी मनइयन क हुकुम दिहेस कि उ पचे पवित्रर तम्बू करार क तम्बू क बनवइ में काम आवइ वाली चीजन्क क लिखि ल्या। हारून क पूत ईतामार इ सूची रखइ क अधिकारी रहा।

22यहूदा क परिवार समूह स हर क बेटवा उरी क बेटवा बसलेल सबहिँ चीजन्क बनाएस जेनके बरे यहोवा मूसा क हुकुम दिहे रहेन। 23दान क परिवार समूह स अहीसामाक क पूत ओहोलीआब भी ओकर सहायता किहेस। ओहोलीआब एक कुसल सिल्पकार अउ डिजाइनर रहेन। उ सन क उत्तिम रेसा अउ नीला, बैगंती अउ लाल कपड़ा बुनइ में बहोत कुसल रहा।

24दुइ टन स जिआदा सोना पवित्रर ठउर बनवइ बरे यहोवा क भेंट कीन्ह ग रहा। (इ मंदिर क मान्ता स तौला ग रहा।)

25कुल मनई जउन गना ग रहेन, पौने चार टन स जिआदा चाँदी दिहन। (इ मन्दिर क मान्ता स तौला ग रहा) 26सबइ मनइयन जउन बीस बरिस या ओसे जिआदा उमिर क रहेन, उ पचे गना गएन। एकइ संख्या 6,03,550 रहेन। अउ हर एक मनई क एक बेका चाँदी कर क रूप देइ क भवा। (पवित्रर क अनुसार एक बेका आधा सेकेल क बराबर रहा।) 27उ सबइ पौने चार टन चाँदी क प्रयोग पवित्रर तम्बू क एक सौ आधार बनवइ बरे अउ कनात बनवइ बरे किहन। उ पचे पचहत्तर पौण्ड चाँदी हर एक आधार में लगाएन। 28दूसर पचास पौण्ड चाँदी क प्रयोग हुक कनाते क छड़ा अउ खम्भन क सिरा क ढाँकइ बनवइ बरे किहेन।

29साढ़े छब्बीस टन स जिआदा काँसा यहोवा क भेंट चढ़ावइ बरे भवा। 30उ काँसा क प्रयोग बड़ठकावाला तम्बू क प्रवेस दुआर क आधार बनवइ में भवा। उ पचे काँसा क प्रयोग वेदी अउ काँसा क जाली बनवइ में भी किहेन। अउ उ काँसा सब अउजार अउ वेदी क बतर्नन क बनवइ क

काम में आवा। 31एकर प्रयोग चारिहुँ कइँती कनाते क आधार अउ अँगन क चारिहुँ कइँती प्रवेस दुआर क आधारन क पर्दन बनवइ बरे भवा। अउर बचा भवा काँसा क प्रयोग पवित्रर तम्बू क खूँटियन अउ अँगन क चारिहुँ कइँती क पर्दन क बनवइ बरे भवा।

### याजक क खास ओढ़ना

**39** कारीगरन नीला, लाल अउ बैगनी ओढ़ना क खास बस्त्र याजक बरे बनाएन जेनका उ पचे पवित्रर ठउर में सेवा क समइ पहिरहीं। उ पचे हारून बरे वइसा ही खास बस्त्र बनाएन जइसा यहोवा मूसा क हुकुम दिहेन।

### एपोद

2उ पचे याजक क एपोद सोना क तार, सन क उत्तिम रेसा अउ नीला, लाल अउर बैगनी कपड़ा स बनाएस। 3(उ पचे सोना क पातर पत्तर क तरह पीटेन अउर तब उ पचे ओका लम्बा धागा क रूप में काटेन। उ पचे सोना क नीला, बैगनी, लाल कपड़ा अउ सन क उत्तिम रेसा में बुनेन। इ काम क कुसल कारीगरन क तरह किहेन।) 4उ पचे एपोद बरे काँधि क पट्टी बनएन। उ पचे एपोद क काँधि क कपड़ा क दुइनउँ कोना स मिलाइके सिएन। 5उ पचे कमर क पेटी बुनेन अउ एकोँ एपोद स जोड़ें। एकोँ एपोद क बनावट क तरह बनाएन। उ सोनहरा धागा, बढिया सन क रेसा अउ नीला, बैगंती अउर लाल धागा जइसा यहोवा मूसा क हुकुम दिहे रहेन वइसा ही कपड़ा बनाएन। कारीगरन सोने क पत्तर में गोमेद मणि एपोद बरे जोड़ें। उ पचे इ रत्न प इस्त्राएल क बेटवन क नाउँ लिखेन। 7तब उ पचे रत्नन क एपोद क काँधि प लगाएन। इ रत्न इस्त्राएल क लोगन बरे यादगारी क रत्न रहेन। इ उहइ कीन्ह ग रहेन जइसा यहोवा मूसा क हुकुम दिहे रहेन।

### निआव क थइला

8तब उ पचे निआव क थइला उहइ कुसल कारीगर क दुआर बनाव ग रहा जउन एपोद बनाएस रहा। इ सोना क तार, सन क उत्तिम रेसा अउ नीला, लाल अउ बैगनी कपड़ा क बनाव ग रहा। 9निआव क थइला चउकोर दोहराइके तह कीन्ह भवा रहा। एक बित्ता लम्बा अउ एक बित्ता चौड़ा रहा। 10कारीगरन एह प सुन्नर रत्नन क चार लाइन जड़ें। पहली लाइन में एक लाल, एक पुखराज अउ एक मर्कतमणि रही। 11दूसर लाइन में एक फिरोज, एक नीलम अउ एक पन्ना रहा। 12तीसरी लाइन में एक गोमेद, एक अकीक अउ एक आकूत रहा। 13चौथी लाइन में एक लहसुनिया, एक सेसमणि अउ एक कपिस मणि रही। इ सबहिँ रत्न सोना में जड़ा रहेन। 14निआव क थइला में बारह रत्न रहेन। इ बारह रत्न प इस्त्राएल क बेटवन क नाउँ उहइ तरह लिखा ग रहेन जइसा एक कारीगर मोहर प खोदत ह। हर एक रत्न प इस्त्राएल क बारहु बेटवन में स एक क नाउँ रहेन। 15निआव क थइला बरे निखालिस सोना क जंजीर बनावइ गएन। इ लसुरी क नाई बटी गइ रहिन। 16कारीगरन

सोना क दुइ छल्ला बनाएस अउ उ पचे दुइनउँ छल्ला क निआउ क थइला क दुइनउँ कोना प लगाएन। उ पचे काँधा क पट्टा बरे दुइ दू सोना क सेट भी बनाएस। 17तब उ पचे दुइ सोना क जंजीरन क निआव क थइला क कोना क दुइनउँ छल्लन मँ बाँधिस। 18उ पचे सोना क जंजीरन क दूसर सिरन क काँधा क दुइनउँ पट्टियन स बाँधेने। तब उ पचे एँका एपोद क समन्वा जोड़ेस। 19तब उ पचे दुइ अउर सोना क छल्ला बनाएन अउर निआउ क थइला क दूसर कोने प ओनका लगाएस। इ एपोद क निअरे निआव क थइला क अन्दरोनी किनारा मँ रहेन। 20उ पचे एपोद क समन्वा कइँती काँधि क पट्टी क तले दुइ छल्ला लगाएन। इ छल्लन क जोड़न क नगिचे ठीक कमर पेटी क ऊपर रहेन। 21तब उ पचे एक तु नीली पट्टी बइपरेन अउ निआउ क थइला स छल्लन क एपोद क छल्लन स बाँधेन। इ तरह निआव क थइला पेटी क नगिचे लाग रहा अउ इ गिर नहीं सकत। उ पचे इ सब चीजन्क यहोवा क हुकुम क मुताबिक किहेन।

### याजकन क दूसर बस्त्रन

22तब उ पचे एपोद बरे नीला कपड़ा स चोगा बनाएन। इ एक कुसल व्यक्ति दुआरा बुना गाएन। 23चोगा क बीचउ बीच एक छेद रहा। इ छेद क चारिहुँ कइँती कपड़ा क टुकड़ा लाग रही। इ कपड़ा छेद क फाटइ स बचावत रही।

24तब उ पचे सन क उत्तिम रेसा, नीला, लाल अउ बैगनी कपड़ा स अनार बनाएन। उ पचे ओनका क चोगा क खाले कोना प चारिहुँ कइँती लटकाएन। 25तब उ पचे निखालिस सोना क घण्टी बनाएन। उ पचे अनारन क बीच मँ चोगा क खाले सिरा क चारिहुँ कइँती घण्टी क बाँधेन। 26चोगा क सिरा क चारिहुँ कइँती घण्टी अउ अनार रहेन। हर दुइ अनारे क बीच एक घण्टी रही। याजक उ चोगा क तब पहिरत रहा जब उ यहोवा क सेवा करत रहा, जइसा यहोवा मूसा क हुकुम दिहे रहेन।

27कुसल कारीगर हारून अउ ओकरे बेटवन बरे कमीज बनाएन। इ कमीज सन क उत्तिम रेसा स बना रहेन। 28कारीगर लोग उत्तिम सन क रेसन स पगड़ी बनएन। उ पचे सिर क पगड़ी अउ भीतर पहिरइवाला कपड़ा भी सन क उत्तिम रेसा स बनाएस। 29तब उ पचे कमरबन्द क सन क उत्तिम रेसा, नीला, बैगनी अउ लाल कपड़ा स बनाएन। कपड़ा मँ कढ़ाई कीन्ह ग रहेन। इ चीजन क वइसे ही बनाइ गइन जइसे यहोवा मूसा क हुकुम दिहे रहेन।

30तब उ पचे पवित्रर मुकुट बरे सोना क पत्तर बनाएन। उ पचे सोना प इ सब्द लिखेन: “यहोवा बरे पवित्रर”। 31तब उ पचे पतरा स एक नीली पट्टी बाँधेन अउ पट्टी क पगड़ी चारिहुँ कइँती इ तरह बाँधेन जइसा यहोवा मूसा हुकुम दिहे रहेन।

### मूसा पवित्रर तम्बू क निरिच्छन किहेस

32इ तरह “बइठकावाला पवित्रर तम्बू” क सारा काम पूरा होइ गवा। इस्राएल क मनइयन हर चीज ठीक वइसे ही बनाएन जइसा यहोवा मूसा क हुकुम दिहे रहेन। 33तब उ पचे “बइठकावाला तम्बू” मूसा क देखाएन। उ पचे ओका

तम्बू अउर ओहमँ क सब चीजन्क देखाएन। उ पचे ओका तखता, ढाँचन, छड़न, खम्भन अउर आधानन क देखाएन। 34उ पचे ओका बइठकावाला तम्बू क ढकना देखाएन जउन लाल रंगी भइ भेड़ा क खाल क बना रहा। अउर उ पचे उ ढकना देखौएन जउन नरम खाल क बना रहा। अउर उ पचे उ कनात देखौएन जउन सब स जिआदा पवित्रर ठउर क प्रवेस दुआर क ढकत रही।

35उ पचे मूसा क करार क सन्दूख देखाएन। उ पचे सन्दूखे क ढोवइवाली खम्भन अउ सन्दूखे क ढकइवाला ढकना क देखाएन। 36उ पचे खास रोटी क अउ मेज प रखइवाली सबहिं चीजन्क देखाएन। 37उ सबइ निखालिस सोना क डीबट अउ ओहँ प धरा भवा सब दिया क देखाएन। उ पचे तेल अउ दूसर सब चीजन्क देखाएँ, अउ दूसर सबहिं चीजन्क जउन दिया क संग बइपरी जात रहीं। 38उ पचे मूसा क सोना क वेदी, अभिसेक क तेल महकउआ धूप, अउ बइठकावाला तम्बू क प्रवेस दुआर क ढकइवाली कनात क देखाएँ। 39उ पचे काँसा क वेदी अउर काँसा क जाली क देखाएन। उ पचे वेदी क ढोवइ बरे बनी भइ खम्भन क मूसा क देखाएन। अउर उ सबइ ओका उ सबहिं चीजन्क देखाएन जउन वेदी प काम मँ आवत रहीं। उ पचे ओका हाथ धोवइवाला पात्र अउ एकर आधार क देखाएन।

40उ पचे मूसा क आँगने क चारिहुँ कइँती क कनाते क खम्भा अउर आधार क देखाएन। उ पचे ओका उ कनात क देखाएन जउन आँगन क प्रवेस दुआर क ढाँके रही। उ पचे ओका लसुरी अउ बइठकावाला तम्बू क खूँटी देखाएन। उ पचे पवित्रर तम्बू मँ ओका सबहिं चीजन्क देखाएन।

41तबहिं उ पचे मूसा क पवित्रर ठउर मँ सेवा करइवालन याजकन बरे बना ओढ़ना क देखाएन। उ पचे ओका हारून अउ ओकर पूतन बरे बना भवा खास बस्त्र देखाएन। उ पचे उ वस्त्र क तब पहिरत रहेन जब उ पचे याजकन क रूप मँ सेवा करत रहेन।

42यहोवा मूसा क जइसा हुकुम दिहेस, इस्राएल क मनइयन ठीक सब काम उहइ तरह किहेन। 43मूसा सब कामे क धियान स लेखस। मूसा लखेस कि सब काम ठीक उहइ तरह भवा जइसा यहोवा हुकुम दिहे रहेन। एँह बरे मूसा ओनका आसीर्बादि दिहेस।

### मूसा पवित्रर तम्बू क नीव धरत ह

**40** तब यहोवा मूसा स कहेस, 2“पहिले महीना क पहिला दिन बइठकावाला पवित्रर तम्बू क खड़ा करा। 3करार क सन्दूख क पवित्रर तम्बू मँ धरा। सन्दूख क समन्वा पर्दा क रखा 4तब खास मेज क भीतर लइ आवा। जउन सामान मेज प होइ चाही ओनकइ ओह प धरा। तब डीबट क बइठकावाला तम्बू मँ धरा। दिया क डीबट मँ रख एका कइ उचित जगहन पइ धरा। 5सोना क वेदी क धूप क भेंट बरे बइठकावाला तम्बू मँ धरा। वेदी क करार क सन्दूखे क समन्वा धरा। तब कनात क पवित्रर बइठकावाला तम्बू क प्रवेस दुआर प लगावा।



6“बरी भई भेंट क वेदी क पवितर तम्बू क प्रवेस दुआर प धरा। 7कौसा क हउदा क बइठकावाला तम्बू अउ वेदी क बीच धरा। हउदा क पानी स भरि द्या। 8अंगना क चारिहुँ कइँती कनात लगावा। तबहि आंगन क प्रवेस दुआर प कनात लगावा।

9“अभिसेक क तेल स पवितर तम्बू अउ ँकर हर एक चीज क अभिसेक करा। जबहिँ तू इ चीजन प तेल नउब्या इ पवितर होइ जाब। 10होमबलि बरे वेदी क अभिसेक करा। वेदी क हर एक चीज क अभिसेक करा। तू वेदी क पवितर करब्या। इ सबन त जियादा पवितर होइ जाब। 11तब खोरा अउ ँकर आधार क अभिसेक करा। अइसा उ चीजक पवितर करइ बरे करा।

12“हारून अउ ओकरे पूतन क बइठकावाला तम्बू क प्रवेस दुआर प लावा। ओनका पानी स नहवावा। 13तब हारून क खास पोसाक पहिरावा। तेल स ओकर अभिसेक करा अउर ओका पवितर करा। तबहिँ उ याजक क रूप में मोर सेवा कइ सकत ह।

14तउ ओकर पूतन क पोसाक पहिरावा। 15पूतन क अभिसेक वइसा ही करा जइसे ओकरे बाप क अभिसेक किहा ह। तबहिँ उ पचे याजकन क रूप में मोर सेवा कइ सकत हीं। जब तू ओनका अभिसेक करिब्या, उ पचे याजकन होइ जइहीं। उ परिवार भविस्स में हमेसा याजकन रहइ ही।” 16मूसा यहोवा क हुकुम मानेस। उ इ सब किहस जेका यहोवा हुकुम दिहे रहेन।

17इ तरह पवितर तम्बू दूसर बरिस क पहिले महीना क पहिले दिन बनइ दीन्ह गवा जउन टेमें उ पचे मिस्र क तजि दिहे रहेन। 18मूसा पवितर तम्बू क यहोवा क हुकुम क मुताबिक खड़ा किहेस। पहिले उ आधारन क नीचे धरेस। तउ उ तखता क आधारन प धरेस। उ छड़न क लगाएस अउर खम्भन क खड़ा किहेस। 19ओकरे पाछे मोसा बाहरी तम्बू क पवितर तम्बू क ऊपर फइलाएस। एकरे पाछे उ बाहरी तम्बू प दूसर ढकना धरेस। उ इ यहोवा क हुकुम क मुताबिक किहेस।

20मूसा करार लिखा भवा उ दुइ पाथरन क पाटी क लिहेस अउ ओनका सन्दूखे में धरेस। मूसा खम्भन क सन्दूखे में लगाएस। तबहिँ उ सन्दूखे प ढकना धरेस। 21तबबइ मूसा सन्दूखे क पवितर तम्बू में धरेस। उ पर्दा क नीक ठउरे प आइ करइ बरे लगाएस। इसी प्रकार यहोवा क हुकुम क मुताबिक उ करार क सन्दूख क पर्दा क पीछे कइके आइ में कइ दिहेस। 22तब मूसा खास रोटी क मेज क बइठकावाला तम्बू में धरेस। उ ँका पवितर तम्बू क उत्तर कइँती रखेस। उ इ पर्दा क समन्वा रखेस। 23तबहिँ उ यहोवा क समन्वा रोटी मेज प धरेस। इ उ वइसा

ही किहेस जइसा यहोवा हुकुम दिहे रहेन। 24तब मूसा डीबट क बइठकावाला तम्बू में धरेस। उ डीबट क तम्बू क दक्खिन में मेज क पार धरेस। 25तब मूसा यहोवा क समन्वा डीबटे प दिया रखेस। उ इ यहोवा क हुकुम क मुताबिक किहेस।

26तबहिँ मूसा सोना क वेदी क बइठकावाला तम्बू में धरेस। उ सोना क वेदी क पर्दा क समन्वा धरेस। 27तब उ सोना क वेदी प महकउआ धूप बारेस। उ वइसा ही किहेस जइसा यहोवा ओका हुकुम दिए रहेन। 28तब मूसा पवितर तम्बू क दुआरे कनात लगाएस।

29मूसा बची भइ भेंट क वेदी क पवितर तम्बू क प्रवेस दुआर प धरेस। तबहिँ मूसा एक होमबलि भेंट उ वेदी प चढ़ाएस। उ अन्नबलि भी यहोवा क चढ़ाएस। उ इ सब चीजक यहोवा क हुकुम क मुताबिक किहेस।

30तब मूसा बइठकावाला तम्बू अउ वेदी क बीच कौसा क खोरा धरेस। उ खोरा में पानी धोवइ बरे धरेस। 31मूसा, हारून अउ हारून क बेटवन आपन हाथ पैर धोवइ बरे इ खोरा क बइपरेन।

32उ पचे हर दई जब बइठकावाला तम्बू में प्रवेस करतेन तउ आपन हाथ पैर धोवतेन। जब उ पचे वेदी क नगिचे जातेन तब भी हाथ पैर धोवतेन। उ पचे ँका वइसा ही करतेन जइसा यहोवा मूसा क हुकुम दिहे रहेन। 33तब मूसा पवितर बइठकावाला तम्बू क आँगन क चारिहुँ कइँती कनात खड़ी किहेस। मूसा वेदी क आँगन में धरेस। तब उ आँगने क प्रवेस दुआर प कनात लगाएस। इ तरह मूसा उ सबहिँ काम क पूरा किहेस जेका करइ क यहोवा हुकुम दिहे रहेन।

### यहोवा क महिमा

34तब बादर बइठकावाला तम्बू क ढोंकि लिहस। अउर यहोवा क महिमा पवितर तम्बू क भरि द्या। 35मूसा बइठकावाला तम्बू में ँह बरे नाहीं घुसि सका काहेकि बादर ँह पइ उतरि आए रहेन अउ यहोवा क महिमा स पवितर तम्बू भरि ग रहेस।

36इ उहइ बादर रहा जउन मनइयन क इसारा किहेस कि कब चलइ क अहइ। जब बादर पवितर तम्बू स उठत तब इस्त्राएल क मनइयन चलब सुरू कइ देतेन। 37मुला जब बादर पवितर तम्बू प ठहर जात तउ मनइयन चलइ क कोसिस नाहीं करत रहेन। लोगन उहइ जगह पइ तब तलक रहतेन जब तलक बादर तम्बू में रहतेन। 38ँह बरे दिन भइ बादर पवितर तम्बू में रहतेन। अउर राति में बादर आगी क नाई परगट होतेन। ँह बरे इस्त्राएल क सबहिँ मनइयन आपन पूरा जात्रा में बादर क लिखि सकतेन।

# License Agreement for Bible Texts

World Bible Translation Center

Last Updated: September 21, 2006

Copyright © 2006 by World Bible Translation Center

All rights reserved.

## These Scriptures:

- Are copyrighted by World Bible Translation Center.
- Are not public domain.
- May not be altered or modified in any form.
- May not be sold or offered for sale in any form.
- May not be used for commercial purposes (including, but not limited to, use in advertising or Web banners used for the purpose of selling online ad space).
- May be distributed without modification in electronic form for non-commercial use. However, they may not be hosted on any kind of server (including a Web or ftp server) without written permission. A copy of this license (without modification) must also be included.
- May be quoted for any purpose, up to 1,000 verses, without written permission. However, the extent of quotation must not comprise a complete book nor should it amount to more than 50% of the work in which it is quoted. A copyright notice must appear on the title or copyright page using this pattern: "Taken from the HOLY BIBLE: EASY-TO-READ VERSION™ © 2006 by World Bible Translation Center, Inc. and used by permission." If the text quoted is from one of WBTC's non-English versions, the printed title of the actual text quoted will be substituted for "HOLY BIBLE: EASY-TO-READ VERSION™." The copyright notice must appear in English or be translated into another language. When quotations from WBTC's text are used in non-saleable media, such as church bulletins, orders of service, posters, transparencies or similar media, a complete copyright notice is not required, but the initials of the version (such as "ERV" for the Easy-to-Read Version™ in English) must appear at the end of each quotation.

Any use of these Scriptures other than those listed above is prohibited. For additional rights and permission for usage, such as the use of WBTC's text on a Web site, or for clarification of any of the above, please contact World Bible Translation Center in writing or by email at [distribution@wbtc.com](mailto:distribution@wbtc.com).

World Bible Translation Center

P.O. Box 820648

Fort Worth, Texas 76182, USA

Telephone: 1-817-595-1664

Toll-Free in US: 1-888-54-BIBLE

E-mail: [info@wbtc.com](mailto:info@wbtc.com)

**WBTC's web site** – World Bible Translation Center's web site: <http://www.wbtc.org>

**Order online** – To order a copy of our texts online, go to: <http://www.wbtc.org>

**Current license agreement** – This license is subject to change without notice. The current license can be found at: <http://www.wbtc.org/downloads/biblelicense.htm>

**Trouble viewing this file** – If the text in this document does not display correctly, use Adobe Acrobat Reader 5.0 or higher. Download Adobe Acrobat Reader from: <http://www.adobe.com/products/acrobat/readstep2.html>

**Viewing Chinese or Korean PDFs** – To view the Chinese or Korean PDFs, it may be necessary to download the Chinese Simplified or Korean font pack from Adobe. Download the font packs from: <http://www.adobe.com/products/acrobat/acrrasianfontpack.html>